


Kupia



Kupia: Kupia New Testament (New Testament)

Kupia
Kupia: Kupia New Testament (New Testament)

copyright © 2018 Wycliffe Bible Translators, Inc.

Language: Kupia

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files dated 6 May 2025
7ccb2690-4432-5e86-88c1-f8ee976f30f4

Contents

మత్తయి	1
మార్కు	48
లూకా	79
యోహాను	138
భారికుల్ కమె	178
రోమా	226
1 కొరింది	250
2 కొరింది	270
గలతీ	284
ఎఫెసీ	293
పిలిప్పీ	301
కొలోస్సీ	306
1 దెస్సలొనీ	312
2 దెస్సలొనీ	318
1 తిమోతి	321
2 తిమోతి	328
తీతు	333
పిలేమోన్	336
ఎబ్రియుల్	338
యాకోబు	355
1 పేతురు	361
2 పేతురు	368
1 యోహాను	372
2 యోహాను	378
3 యోహాను	379
యూదా	380
ప్రకటన	383

మత్తయి సుబుమ్ కబుర్ మత్తయి రెగిడ్లి సుబుమ్ కబుర్

యేసుక్రీస్తుచి వంసుమ్ వర్స తెన్ రెగిడ్లిసి
(లూకా 3:23-38)

1 అబ్రాహామ్ చి సెకుమ్ తె జెర్మిలో దావీదు రానొచి వంసుమ్ తె యేసుక్రీస్తు జా జెర్మిలన్. జోచి వంసుమ్ ఇసి జలి.

2 అబ్రాహామ్ ఇస్సాకుక పాయిలన్. ఇస్సాకు యాకోబుక పాయిలన్. యాకోబు యూదాక చి జోచ అన్నసీంక బావుడ్లివొక పాయిలన్.

3 యూదా తామారు మెలి తేర్చి తెన్ పెరెసుక చి జెరహుక పాయిలన్.

4 పెరెసు ఎస్రోముక పాయిలన్. ఎస్రోము అరాముక పాయిలన్. అరాము అమ్మినాదాబుక పాయిలన్.

5 అమ్మినాదాబు నయస్సోనుక పాయిలన్. నయస్సోను సల్మానుక పాయిలన్. సల్మాను రాహాబు మెలి తేర్చి తెన్ బోయజుక పాయిలన్. బోయజు రూతు మెలి తేర్చి తెన్ ఓబేదుక పాయిలన్. ఓబేదు యెస్సయింక పాయిలన్.

6 యెస్సయి దావీదు రానొక పాయిలన్. ఈంజో దావీదు రానొ ఊరియా మెలి ఎక్కిలోచి తేర్చి తెన్ సాలోమోనుక పాయిలన్.

7 సాలోమోను రెహాబాముక పాయిలన్. రెహాబాము అబీయాక పాయిలన్. అబీయా ఆసాక పాయిలన్.

8 ఆసా యెహోసాపాతుక పాయిలన్. యెహోసాపాతు యెహోరాముక పాయిలన్. యెహోరాము ఉజ్జియాక పాయిలన్.

9 ఉజ్జియా యోతాముక పాయిలన్. యోతాము ఆహాజుక పాయిలన్. ఆహాజు హిజ్కీయాక పాయిలన్.

10 హిజ్కీయా మనస్సేక పాయిలన్. మనస్సే ఆమోసుక పాయిలన్. ఆమోసు యోసీయాక పాయిలన్.

11 పడ్డె యూదుల్ క బబులోను దేసిమి విరోదుమ్ సుదల్ దెర గెలి కాలుమ్, యోసీయా యెకోన్యాక చి జోచ బావుడ్లివొక పాయిలన్.

12 యూదుల్ క బబులోను దేసిమ్ చి విరోదుమ్ సుదల్ దెర గెలి పడ్డె, యెకోన్యా సయల్తీయెలుక పాయిలన్. సయల్తీయెలు జెరుబ్బాబెలుక పాయిలన్.

13 జెరుబ్బాబెలు అబీహూదుక పాయిలన్. అబీహూదు ఎల్యాకీముక పాయిలన్. ఎల్యాకీము అజోరుక పాయిలన్.

14 అజోరు సాదోకుక పాయిలన్. సాదోకు ఆకీముక పాయిలన్. ఆకీము ఎలీహూదుక పాయిలన్.

15 ఎలీహూదు ఎలీయాజరుక పాయిలన్. ఎలీయెజెరు మత్తానుక పాయిలన్. మత్తాను యాకోబుక పాయిలన్.

16 యాకోబు మరియచో మున్నుసి జలో యోసేపుక పాయిలన్. మరియచి పెట్టి క్రీస్తు మెంతో యేసు జెర్మిలన్.

17 ఇసి, అబ్రాహామ్ తెంతో మొదోల్ కెర, దావీదు రానొ ఎదక, వర్స తెన్ మొత్తుమ్ చొప్త తరుమ్లు జల. అన్నె, దావీదు రానొ తెంతో మొదోల్ కెర, యూదుల్ క బబులోను దేసిమి విరోదుమ్ సుదల్ కడ నిలి ఎద చొప్త తరుమ్లు జల. బబులోను తె గెలి తెంతో అన్నె మొదోల్ కెర, క్రీస్తు ఎద కి చొప్త తరుమ్లు జల.

యేసుక్రీస్తు జెర్మిలిసి
(లూకా 2:1-7)

18 *యేసుక్రీస్తు జెర్మిలిసి కిసి జలి మెలె, మరియచ అయ్యసిని, “అమ్ చి బోదక తుక దెమ్ దె” మెన యోసేపుక సంగిలి పడ్డె, జేవ్ దొగుల నే బెదితె అగ్గె, దేముడుచి† నుద్ది తిలి ఆత్మ తెన్ మరియ అంగి జలి.

19 మరియచో మున్నుసి జంక తిలో యోసేపు, జా దస్సి జా అస్సి మెన సూన కెర, జో పున్నిమ్ జలోసా మాన్సుచి రిసా, పడ్డె మాన్సుల్ చి మొక్కె జాక లాజ్ కెరుక నెస కెర, గగ్గోల్ నే జతె లుంకవ జాక ముల దెంక మెల ఉచర్లన్.

20 జో ఇసి కెరుక మెన ఉచర్లె తతికయ్, ప్రబుచో దూత ఎక్కిలో సివు తెన్ జోక డీస కెర, “దావీదు రానొచి సెకుమ్ చో ఓ యోసేపు, తుచి తెర్చి జతి మరియక ఆననుక తుయి బి నాయ్. దేముడుచి నుద్ది తిలి ఆత్మసెక్తిక జా అంగి జా అస్సి.

21 జాచి పెట్టి ఏక్ పుత్తుసి జెర్మెదె. జోయ్యి జోచ ప్రెజల్ క జోవయిం చ పాపల్ తెంతో రచ్చించువ కెరెదె. జాచి రిసా, జోక ‘యేసు’ మెన నావ్ తీ” మెన జో దూత సంగిలన్.

22 ఈంజ ఎత్తి కిచ్చొక జర్గు జలి మెలె, దేముడు జోచ† కబుర్లు సంగిలోసాచి అత్తి సంగిలి కోడు నెరవెర్చువ జంకయ్ ఇసి జలి.

23 “ఈందె, విడ్డి బోద అంగి జయెదె,

చి జాచి పెట్టి ఏక్ పుత్తుసి జెర్మెదె. జోక

‘ఇమ్మానుయేలు’ మెన నావ్ తిస్సె,”

జా నావ్ చి అర్దుమ్ కిచ్చొ మెలె, ‘దేముడు అమ్క తోడ్ తయెదె’.

24 జలె, యోసేపు నిజ తా ఉట్ట కెర, ప్రబుచో దూత జోక సంగిలి రితి, జోచి తేర్చిక ఆనన్.

* **1:18 1:18** ‘ప్రబు’ మెన రెగిడ్లి, ‘ఎత్తిక ఏలువ కెర్సా’ మెలి అర్దుమ్ తయెదె. యెహోవ అబ్బొన్ కి యేసు పూత్తుక కి ‘ప్రబు’ మెనుల. † **1:18 1:18** అన్నె తెంతో జోవయింక ‘దేముడు’ మెన రెగుడుమ్ దె. ఒగ్గర్ పూర్ణమ్ తెంతో జోక ‘యెహోవ’ మెన నావ్ తయెదె, గని యేసుచి జీవితముచి రిసా రెగిడ్లి ఈంజ పుస్తకుమ్ చ సాచులు బులె తిల పొదులె, ‘యూదుల్’ మెన జో పూర్ణమ్ నిసాన ప్రెజల్ జోచి నావ్ దెర్చి నాయ్. ‘యెహోవ’ మెలి నావ్ చి అర్దుమ్ కిచ్చొ మెలె, ‘ఎత్తి జెర్మిలోసా, ఎత్తిక జీవ్ దెతోసా, కెయెడ తెయెడ తతోసా’. ‡ **1:22 1:22** ‘జోచ కబుర్లు సంగిలన్’ మెలె, పూర్ణమ్ తెంతో కక్క ప్రబు నిసాన, జోచ కబుర్లు మాన్సుల్ క జేవ్ సంగితి రిసా, జోచి ఆత్మసెక్తి జోవయింక దెయెదె.

25 దస్సి, జాచి పుత్తుసి నే జెర్మితె ఎదక, జాచి తెన్ బెద నిజె నాయ్, జో జెర్మితికయ్, యోసేపు జోక 'యేసు' మెన నావ్ తిలన్.

2

తూర్పు దేసిమ్చ పండితుల్ యేసుక చజ బక్తి కెర్లిసి

1 హేరోదు రానో జా యూదయ ప్రదేసిమి ఏలుప కెర్తె తిలి పొది, జా ప్రదేసిమ్చి బేత్తెహేమ్ పట్టుమ్తె యేసు జెర్మిలి పిమ్మట్, ఈందె, తూర్పు దేసిమ్చ పండితుల్ నగుమ్జిన్ యెరూసలేమ్ మెలి వెల్లి పట్టుమ్తె జా కెర,

2 "యూదుల్చో* రానో జంక జెర్మిలోసా కేనె అస్సె? తూర్పు పక్క జోచి సుక్కొక దెకిలమ్, చి జోక బక్తి కెరుక జా అస్సుమ్" మెన ప్రెజల్క సంగితె తిల.

3 హేరోదు రానో ఈంజ కోడు నూన కెర, జో కి, జో తెన్ యెరూసలేమ్ పట్టుమ్చ ఎత్తిజిన్ కి 'అన్నెక్టో రానో జంక ఉచరెదె' మెన బియె కెర, పంబ్ర జా.

4 దేముడు నిసాన యూదుల్చ వెల్లెల పూజర్లుక చి మోసే తెన్ దేముడు దిలి ఆగ్నల్ సికడ్డన ఎత్తిజిన్క, బుకారా కెర, "క్రీస్తు కేనె జెర్మిక్ అస్సె?" మెన పుసిలన్.

5 జేవ్, "ఈంజ యూదయ ప్రదేసిమ్చి బేత్తెహేమ్ పట్టుమ్తె జెర్మెదె.

6 'ఓ యూదయ ప్రదేసిమ్చి బేత్తెహేమ్ పట్టుమ్, తుయి యూదయ ప్రదేసిమ్తె తిలి దాక్ పట్టుమ్ నెంజిన్. కిచ్చొక మెలె, ఇస్రాయేలులు మెల అంచ ప్రెజల్క ఏలుప కెర్తెసా తుచితె జెర్మెదె' దేముడుచ కబుర్లు సంగిలో పూర్ణమ్చో ఎక్కిలోచి అత్తి రెగ్గ అస్సె" మెన బజాబ్ దిల.

7 తెదొడి హేరోదు రానో తూర్పు దేసిమి తెంతో అయ్ల పండితుల్క గుట్టు తెన్ బుకారా కెర, జేవ్ దెకిలి సుక్కొ కెయ్ డీసిలి గే నూన కెర,

8 "తుమ్ గెచ్చ, జో బోద కేనె అస్సె గే సరిగా చజ దెక జా, అన్నె జా కెర, అంక సంగ. ఆవ్ కి గెచ్చ, జోక బక్తి కెరిందె" మెన మోసిమ్ తెన్ సంగ, జేక బేత్తెహేమ్ పట్టుమ్తె తెద్రయ్లన్.

9 జేవ్ పండితుల్ జో రానొచ కొడొ నూన కెర, బార్ జా గెతె తతికయ్, ఈందె, తూర్పు దేసిమి జేవ్ దెకిలి సుక్కొ జేవ్చి కంట అగ్గె ఇండ గెతె తా, జో బోద తిలో గేరచి ఉప్పిరి టీవో జలి.

10 జా సుక్కొ టీవో జలిసి దెక కెర, ఒగ్గర్ సర్లంతోసుమ్ జా,

11 జా గెరి పెన, మరియ అయ్యున్ తెన్ తిలో జో బోదక దెక, సెర్ను సేడ జోక జోకర, జోవయించ పెట్టెల్

ఉగ్గ కెర, బజార్, దూపుమ్, చెంగిలి వాసిన తేలు, దనచ, బవుమానుమ్క దిల.

12 బక్తి కెర్లి పిమ్మట్, "హేరోదు రానొతె అన్నె గెచ్చ నాయ్" మెన, సివ్వుతె దేముడు జేవ్క జాగర్ల సంగితికయ్, జేవ్ వేర వాటు జోవయించి దేసిమి బుల, ఉట్ట గెల.

యోసేపుక బగుప్పు వెయిలు దేసిమి తెద్రయ్లిసి

13 జేవ్ తూర్పు దేసిమ్చ ఉట్ట గెలి పిమ్మట్, ప్రబుచో దూత ఎక్కిలో సివ్వు తెన్ యోసేపుక డీస కెర, "హేరోదు ఈంజో బోదక మార గెలుక ఉచర్తయ్. జాచి రిసా, తుయి ఉట్ట, ఈంజో బోదక చి అయ్యున్క కడ దెరన, బగుప్పు దేసిమి ఉట్ట గో. ఆవ్ తుక అన్నె సంగితె ఎద ఒత్త తా" మెన యోసేపుక జో దూత సంగితికయ్,

14 జో ఉట్ట కెర, అందరె బోదక చి అయ్యున్క కడ దెరన, బగుప్పు దేసిమి ఉట్ట గెచ్చ,

15 హేరోదు రానో మొర గెతి ఎదక ఒత్త తా గెల. దేముడుచ కబుర్లు సంగిలో పూర్ణమ్చోచి అత్తి సంగిలి కొడొ నెరవెర్నువ జంకయ్ ఇసి జర్లు జలి.

"బగుప్పు దేసిమి తెంతో అంచొ పుత్తుక బుకార్లయ్.", మెన సంగిలిసి.

16 తెదొడి, 'జా దీసి జా తిల పండితుల్ అంక మోసిమ్ కెర్ల' మెన హేరోదు రానో జాన కెర, ఒగ్గర్ కోపుమ్ ఆనన, యేసుక మారుక మెన, కెయ్ జెర్మ తయెదె గే జేవ్ పండితుల్ అగ్గె సంగిల కొడొక ఉచర, బేత్తెహేమ్తె, పడ్డొ జా పట్టుమ్చి సుట్టునంతచ గావ్వొ ఎత్తితె, దొన్ని వెర్నుల్ తెంతో మొదొల్ కెర, తొక్కి వయసుచ మున్నుబోదల్ ఎత్తిక మొరవ గెలన్.

17 ఇన్నెతెన్ కి యిర్మీయా మెలో పూర్ణమ్చోచి అత్తి దేముడు సంగిలి కోడు నెరవెర్నువ జలి.

18 "రామా మెలి పట్టుమ్చి ఎది దూరి తెంతో, ఒగ్గర్ ఏడుకుడు జతిసి, దుకుమ్ జతిసి, నూన్ల. జేవ్చ బోదల్ మొర గెలి రిసా, రాహేలు ఏడ ఏడ సింతుమ్ జయ్యె నాయ్."

యోసేపు సొంత దేసిమి అన్నె ఉట్ట అయ్లిసి

19 హేరోదు రానో మొర గెలి పడ్డొ, ఈందె, ప్రబుచో దూత బగుప్పు దేసిమి యోసేపుక సివ్వు తెన్ అన్నె డీస కెర,

20 "తుయి ఉట్ట, బోదకచి అయ్యున్క కడ దెరన, తుమ్చి ఇస్రాయేలు దేసిమి అన్నె ఉట్ట గెచ్చ. బోదక మార గెలుక ఉచర్లొసా మొర గెలన్" మెన సంగితికయ్,

21 జో ఉట్ట కెర, బోదకచి అయ్యున్క కడ దెరన, ఇస్రాయేలు దేసిమి అన్నె ఉట్ట అయ్ల.

* 2:2 2:2 'యూదుల్' మెలె, 'అంచయ్ మాన్సుల్ జతు, ఎక్కి అంకయ్ జోకర్లు' మెన ప్రబు పూర్ణమ్ నిసాన ప్రెజల్. ముక్కిమ్క ఇస్రాయేలు దేసిమి జవుల. యూదుల్తె, జా ఇస్రాయేలు దేసిమి, యేసు మాన్సు జా జెర్మన్, జా బుల్తె తిలన్. † 2:4 2:4 'క్రీస్తు' మెలె, దేముడు టీవడ్డొ దొర్కు జలో రచ్చించువ కెర్తెసా.

22 జలె, హీరోదు రానొ మొర గెలి రిసా, అప్పె జా యూదయ ప్రదేసిమి జోచొ పుత్తుసి అర్కెలాయు ఏలుప కెర్తయ్ మెన సూన కెర, యోసేపు ఒత్త గెచ్చుక బియఁ కెర, అన్నెక్ సిన్న తెన్ ప్రబుచి అన్నెక్ కబుర్ సూన కెర,

23 గలిలయ ప్రాంతుమ్తె ఉట్ట గెచ్చు. నజరేతు గవ్వె జా కెర, ఒత్త జితె తిల. ఒత్త జిలిన్ తెన్, “యేసుక ‘నజరేయుడు’ మెనుక జయెదె” మెన పూర్ణుమ్ దేముడుచ కబుర్లు సంగిలసచి అత్తి జో సంగిలిసి కోడు నెరవెర్చువ జంకయ్ ఇసి జర్లు జలి.

3

యోహాను బాప్తిసుమ్ మెంతి ఉపదెసిమ్ దెతె తిలిసి (మార్కు 1:1-8; లూకా 3:1-9,15-17; యోహా 1:19-28)

1 జా దీసల్తె, బాప్తిసుమ్ దెతో యోహాను మెలోసా బార్ జా,

2 “దేముడుచి రాజిమ్ పాసి జా అస్సె. జాకయ్ తుమ్చి పాపల్చి రిసా దుకుమ్ జా ఒప్పున, పాపుమ్బుద్ది ముల దాస” మెన యూదయ ప్రదేసిమ్చి బయిలె బుల బుల సాట్టు కెర్తె తిలన్.

3 జోచొ కబుర్లు సంగిలో యెనయా పూర్ణుమ్చొచి అత్తి ఈంజొ యోహానుచి రిసాయి దేముడు సంగిలి కోడు ఇన్నెతెన్ నెరవెర్చువ జలి.

“ఎక్కిలో అంచొ బారికి రితో జా, అంచొ అవాడ్ రితో జా.

ప్రబు జెతికయ్ వాటు తిన్నగ కెర్లి రితి,

తుమ్ ఎత్కిజిన్ బుద్ది జా మెన,

బయిలె ప్రదేసిమి తా కేక్ గల సాట్టు కెరెదె.”

4 ఈంజొ యోహాను ఒంటెచ రోమల్క పాలల్ గలన, చామ్క కెర్లి పట్క నెడిమి బందన తయెదె. చిట్కల్చి ఒండడ తేల్ జో కయెదె.

5 జా దీసల్తె, యెరూసలేమ్ పట్టుమ్తెచ మాన్సుల్ కి, జా ఒంటి యూదయ ప్రదేసిమ్చ మాన్సుల్ కి, ఒంటి యోర్దాను మెంతి గాడు పాసిచ మాన్సుల్ కి, యోహానుతె జా కెర,

6 జేవ్ కెర్ల పాపల్ దుకుమ్ తెన్ ఒప్పున ఎదార్దుమ్ సంగ, యోర్దాను గడ్డె జోచి అత్తి బాప్తిసుమ్ నజన్తె తిల.

పరిసయ్యుల్క యోహాను గోల కెర్లిసి

7* పరిసయ్యుల్క కి, †సద్దాకయ్యులుక కి, ఒగ్గరజిన్ జా బాప్తిసుమ్ నజనుక జెతిసి యోహాను దెక కెర, “అయివొచి రితి విన్నుమ్ పెట్టి తిలన, తుమ్! దేముడు కెర్లి సిచ్చు పిట్టవనుక ఉచరుక మెన తుమ్క సికణ్ణొసా కొన్సొ?”

* 3:7 3:7 పరిసయ్యుల్ చి సద్దాకయ్యులు యూదుల్క ముక్కిమ్చ వెల్లెల మాన్సుల్ జవుల. ఎత్కిక వెల్లెల పూజర్లు తెన్ యూదుల్చి వెల్లి నబతె వెసుల. జేవ్ దీసల్తె ముక్కిమ్క జెవ్వె, మోసి తెన్ దేముడు దిలి అగ్గల్ సికణ్ణు తెన్, దేముడుచి నిదానుమ్ ప్రజల్క సికణ్ణుక. † 3:7 3:7 సద్దాకయ్యులు మెలె జేవ్ దూతల్ అస్తి మెన నంపజతి నాయ్. మొర గెలన ఉటుల మెన నంపజతి నాయ్. జేవ్ కి యూదుల్ ముక్కిమ్చ ఎక్కి జటు. జేవ్ పరిసయ్యుల్ తెన్ బెద ఎదివాల్ నుటు యేసుప్రబుక పరిచ్చు కెర్ల. ‡ 3:11 3:11 ‘దేముడుచి సుద్ది తిలి అత్త’ మెలె, యెహోవ దేముడు అబ్బొన్చి కి యేసు దేముడు పుత్తున్చి కి జయెదె.

8 తుమ్ కెర్ల పాపల్ ముల దా, చెంగిల్ బుద్దితె ఇండ, ఆత్మచి పంటొ దెర.

9 పిమ్మట్, ‘అబ్రాహామ్ అమ్క అబ్బొ జయెదె, చి రిసా దేముడు తెన్ బెద అస్సుమ్’ మెన తుమ్క తూమ్ ఉచరన, సాంత గవురుమ్ సంగనుక నాయ్. కిచ్చొక మెలె, ఇన్నెచ పత్రల్ తెన్ కి దేముడు అబ్రాహామ్చి రిసా బోదల్క జెర్మవుక తెరె, మెన తుమ్క ఆవ్ సంగితసి.

10 ఈందె, అప్పె కి ప్రబు కురాడు వాండి కెర, రూకుక బుంది కండితి రితి, కురాడు దెర టీచొ జా అస్సె. జలె, చెంగిల్ పంటొ నే దెర్లొ, ఎత్కి రూకుక కండ కెర ఆగితె గలుల” మెన, జేవ్క యోహాను సంగిలన్.

11 తెదొడి, ప్రజల్క యోహాను “తుమ్ కెర్ల పాపల్చి రిసా తుమ్ దుకుమ్ జా ముల దెతి గుర్తుకయ్ ఆవ్ తుమ్క ఇసి పానితె బాప్తిసుమ్ దెతసి. గని, అంచి పడ్డొ అన్నెక్లో అప్పె జెతయ్. జో అంచి కంట వెల్లొ, జోక అదికారుమ్ ఒగ్గరి. జోచ జోడ్లు వయుక జలెకు, ఆవ్ విలువ నాయ్. జో, †దేముడుచి సుద్ది తిలి అత్త తెన్ చి ఆగి తెన్ తుమ్క బాప్తిసుమ్ దెయెదె.

12 జోచి పూన్తి సూపు జోచి అత్తి అస్సె, చి జోచి కెల్లి సుబ్రుమ్ కెర, జోక కామ్క జెతికయ్ గోదుమ్ పంటొ గుడ్డ కెర కొట్టుతె కుడవనెదె, చి కో విజవుక నెతిర్లి ఆగితె పోటు గల, డయ గెలెదె” మెన సంగిలన్.

యేసు బాప్తిసుమ్ నజన్సిసి

(మార్కు 1:9-11; లూకా 3:21-22)

13 జా సమయుమి, ఈంజ బాప్తిసుమ్ నజనుక మెన యేసు గలిలయ ప్రాంతుమ్ తెంతో ఉట్ట జా కెర, యోర్దాను గడ్డె యోహానుతె అయ్లన్.

14 యోహాను జోక దెక కెర, “ఆవ్ తుచి అత్తి బాప్తిసుమ్ నజనుక అస్సె. తుయి కిచ్చొక అంచితె బాప్తిసుమ్ నజనుక జెతసి? బెదె నాయ్” మెన యేసుక సంగితికయ్,

15 యేసు “అల్లె, అప్పెచి మట్టుక ఇసి జర్లు జవున్. దేముడుచి నీతి ఎత్కి ఇసి నెరవెర్చువ కెరుక అమ్క చెంగిలి” మెన యేసు జబాబ్ దెతికయ్, యోహాను జోక బాప్తిసుమ్ దిలొ.

16 యేసు ఈంజ బాప్తిసుమ్ నజన్సి బేగి, గడ్డె తెంతో బార్ జతికయ్, ఆదె, పరలోకుమ్ ఉగ్గి జలి, చి దేముడుచి సుద్ది తిలి అత్త పార్వ పిట్టచి రితి జా ఉత్త్ర జా కెర, యేసుచి ఉప్పిరి వెసిలిన్ జో దెకిలొ.

17 “ఈందె, ఈంజొయి అంచొ ప్రేమ తిలొ పూత్తు. ఇనాచి రిసా అంక సర్లసంతోసుమ్” మెన, ఇసి పరలోకుమ్ తెంతో సంగిలిన్చి అవాడ్ అయ్లి.

4

యేసుక సయ్తాన్చి అత్తి పరిచ్చ జలిసి
(మార్కు 1:12-13; లూకా 4:1-13)

1 తెదొడి సయ్తాన్చి అత్తి జోచి పరిచ్చ కెరవనుక దేముడుచి సుద్ది తిలి ఆత్మ, జోక కో నెంజిలి డొంగై కడ నిలన్.

2 జలె, దొన్ని విస్సా పొదులు, దొన్ని విస్సా అందర్లు యేసు చువ్వె తతికయ్, జోక చూ కెర్తికయ్,

3 పాపుమ్ కెరవుక ఉచర సయ్తాన్ జోతె జా కెర, “తుయి దేముడుచొ పుత్తుసి జలె, ఈంజేవ్ పత్తల్ పొడియొ జతి రితి సంగు” మెలన్.

4 తెదొడి యేసు,

“ ‘ఎక్కి పొడియొ తెన్ నాయ్, గని దేముడుచి చొడి తెంతో జెతి ఎత్తి కోడు తెన్ మాన్సుల్ జింక అస్సె’ మెన దేముడుచి కోడుతె రెగ్ల అస్సె” మెలన్.

5 తెదొడి సయ్తాన్ యేసుక దేముడుచి గుడి తిలి యెరూసలేమ్ పట్టుమ్తె కడ నా కెర, జా దేముడుచి గుడితెచి వెగ్గొపుచి ఉప్పిరి జోక టీవొ కెర,

6 “తుయి దేముడుచొ పుత్తుసి జలె, ఎట్టొతొ డేవు.

‘తుక ప్రమాదుమ్ నే జతి రితి, జోచ దూతల్ క దేముడు ఆడ్ర దా తెద్రయెదె’,

‘తుచ చట్టొ పత్తె నే లయితి రితి, జేవ్ దూతల్ జోవయించ అత్తో చంపొ కెర, తుక ఉక్కులనుల,’

మెన దేముడుచి కోడుతె రెగ్ల అస్సె” మెన యేసుక సంగిలన్.

7 సయ్తాన్ దస్సి సంగితికయ్, యేసు జోక

“ ‘ప్రబు జలొ తుమ్చొ దేముడుక

పరిచ్చ కెరుక నాయ్’

మెన అన్నెక్ టాన్తె రెగ్ల అస్సె” మెన సయ్తాన్ క సంగిలన్.

8 పడ్డొ అన్నె, ఒగ్గర్ డొంక్ తిలి ఏక్ డొంగుర్ ఉప్పిరి సయ్తాన్ యేసుక కడ నా కెర, ఈంజ లోకుమ్చ రాజిమ్లు ఎత్తి, జేవ్చి విలువ ఎత్తి జోక దెకవ కెర,

9 “తుయి సెర్ను సేడ అంక జొకరెగ్లిన, ఈంజ ఎత్తి తుక దెయిందె” మెన యేసుక సంగిలన్.

10 యేసు జోక, “సయ్తాన్, తుయి ఉట్ట గో. కిచ్చొక మెలె,

‘ప్రబు జలొ తుమ్చొ దేముడుకయ్ జొకర,

జో ఎక్కిలొచి సేవ తుమ్ కెరుక అస్సె’

మెన రెగ్ల అస్సె.” మెన సంగిలన్.

11 తెదొడి సయ్తాన్ జోక ముల దా ఉట్ట గెలన్, చి ఈందె దేముడుచ దూతల్ జా కెర, యేసుక సావైచన కెర, సుక్కుమ్ కెర్ల.

యేసు గలిలయ ప్రాంతుమ్తె బస జలిసి
(మార్కు 1:14-15; లూకా 4:14-15)

12 ఒత్త తెంతో ‘బాప్తిసుమ్ దెతో యోహానుక జేలి కెర జేల్తె గల అస్తి’ మెన యేసు సూన కెర, ఉత్తర పక్క గలిలయ ప్రాంతుమ్తె బుల ఉట్ట గెచ్చ కెర,

13 ఒత్తచి నజరేతు మెలి జో వడ్డిలి గావ్ తెంతో ముల దా కెర, జెబులూను చి నష్టాలి మెల పూర్లుచ నవ్వొ దిలి ప్రాంతుమ్తెచి సముద్దుమ్చి పాసిచి కపెర్నహూమ్ మెంతి పట్టుమ్తె ఉట్ట జా జితె తిలన్.

14 దేముడుచ కబుర్లు సంగిలొ యెసయా పూర్లుమ్చొచి అత్తి జో సంగిలి కోడు ఇసి నెరవెర్చువ జలి.

15 “జెబులూను ప్రదేసిమి, నష్టాలి ప్రదేసిమి, యోర్దాను గాడు ఒత్తల్తో తిలి వెల్లి సముద్దుమ్చి పక్క, పూర్లుమ్ యూదుల్ నెంజిలన జితె తిలి గలిలయ ప్రాంతుమ్తె తిల ప్రెజల్

16 అగ్గె అందర్బుద్ది తెన్ తిలె కి, అప్పె వెల్లి ఉజిడి దెక అస్తి. జేవ్ పాపుమ్ తెన్ మొర గెల రిత జా తిలె కి, జోవయింక రాత్ పాయిలి రితి జా, పరలోకుమ్చి ఉజిడి జోవయింక డీస అస్సె” మెన సంగిలి కోడు.

17 జా దీసి తెంతో, జా ప్రాంతుమ్చ ప్రెజల్ క యేసు బోదన కెర్లెసి కిచ్చొ మెలె, “పరలోకుమ్చి రాజిమ్ ఇన్నె పావ జా అస్సె. జాచి రిసా, తుమ్చ పాపల్చి రిసా దుకుమ్ జా, పాపుమ్బుద్ది ముల దాస” మెన బోదన కెర్లె తిలొ.

యేసు తొలితొచ సిస్సుల్ క బుకార్లిసి
(మార్కు 1:16-20; లూకా 5:1-11)

18 యేసు జా గలిలయ సముద్దుమ్చి గట్టుతె ఇండితె తా, ‘పేతురు’ మెన ఆసిమ్ నావ్ తిలొ సీమోను, చి జోచొ అంద్రెయ మెలొ బావొసి దొగులక దెకిలన్. జేవ్ దొగుల సముద్దుమ్తె వల గల్తె తిల. జేవ్ జాలర్లు.

19 జలె, జోవయింక దెక కెర, “జలె, తుమ్ అంచి పట్టి జా, చి మాన్సుల్ అంక నంపజతి రిసా తుమ్ జోవయింక అంచితె కడ ఆన్త జాలర్లు జతి రితి, తుమ్క ఆవ్ కెరిందె” మెన సంగిలన్.

20 ఇసి సంగ బుకార్లి బేగి, జేవ్ జోవయించ వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

21 ఒత్త తెంతో ఇదిల్ దూరి గెచ్చ, యాకోబుచి యోహాను మెల అన్నె దొగుల అన్నొబావొక యేసు దెక జేవ్ క బుకార్లన్. జేవ్ దొగుల జెబెదయి మెలొ అబ్బొసి తెన్ జోవయించి దొనితె వెన తా, జోవయించ వలల్ చెంగిల్ కెర్లె తిల.

22 యేసు బుకార్లి బేగి, జోవయించొ అబ్బొన్ క చి దొనిక ముల దా కెర, జోచ సిస్సుల్ జతి రితి జోచి పట్టి గెల.

యేసు మాన్సుల్ క చెంగిల్ కెర్లిసి

23 యేసు జా ఒండి గలిలయ ప్రాంతముతె బుల బుల, యూదుల్చ ఒత్తచ నబ గెరలె గెచ్చ గెచ్చ, “పరలోకుమచి రాజిమ్ ఇత్తల్ పావ జా అస్సె” మెన నుబుమ్ కబుర్ సంగ, ప్రజల్క, కిచ్చొ జబ్బు తిలె కి, జబ్బులు బాదల్ ఎత్తి గెచ్చయలన్.

24 ఒండి సిరియ దేసిమ్చ ఎత్తిజిన్ జోచి రిసా సూన్ల, చి రగరగాల్చ జబ్బుల్ తిలనక, జొర్జొల్ నొప్పుల్ తిలనక, బూతల్ దెర్లనక, మోర్చల్క, చి అత్తో చట్టొ కదుల్ కెరుక నెత్తిర్లనక, ఇనచ ఎత్తిక యేసుతె కడ ఆన్తికయ, జోవయింక చెంగిల్ కెర్లన్.

25 ఈంజ ఎత్తిచి రిసా, గలిలయ ప్రాంతము తెంతొ, దెకపొలి ప్రాంతము తెంతొ, యెరూసలేమ్ పట్టుమ్ తెంతొ, యూదుయ ప్రదేసిమ్ తెంతొ, పణ్ణొక యోర్దాను గాడు ఒత్తల్తో తెంతొ, ఒగ్గరిజిన్ మాన్సుల్ జట్లు తెన్ జోచి పట్టి గెల.

5

యేసు మెట్టయ్ ఉపిర్ కెర్లి బోదన

(లూకా 6:20-23)

1 యేసు జేవ్ ఒగ్గరిజిన్ పట్టి అయలనక దెక కెర, ఏక్ మెట్టయ్ వెగ వెసితికయ, జోచ సిస్సుల్ జోతె జెతికయ

2 జో చోడి పుటవ జేవ్ ఎత్తిజిన్క బోదన కెరుక దెర్లన్.

3 “అమ్ అత్తతె ఎద్దరె తొక్కిచ నుదల్ మెన కో చిననుల గే, జోవయింక చెంగిలి. కిచ్చొక మెలె, దన మాన్సుల్కయ పరలోకుమచి రాజిమ్తె వాట తయెదె.

4 “దుకుమ్ సెడ్డనక చెంగిలి, కిచ్చొక మెలె, దేముడు జోవయింక బురియవెదె.

5 “సొంత గవురుమ్ నే ఉచరంతనక చెంగిలి. కిచ్చొక మెలె, *జేవ్ ఈంజ బూలోకుమతె ఏలువ కెరుల.

6 “చూ తాన్ గెతె ఎదక మాన్సుల్ కిసి అన్నిమ్క పితిన్క ఆన జవుల గే, దస్సి, పున్నిమ్ ఇండుక కో ఎక్కి ఆన జవుల గే, జోవయింక చెంగిలి. కిచ్చొక మెలె, దేముడు జోవయింక పున్నిమ్ దా సర్లసంతోసుమ్ కెరెదె.

7 “మాన్సుల్క కన్కారుమ్ దెకితనక చెంగిలి. కిచ్చొక మెలె, దేముడు జోవయింక కన్కారుమ్ దెకెదె.

8 “పెట్టి నుద్ది తతనక చెంగిలి. కిచ్చొక మెలె, జేవ్ దేముడుక దెకుల.

9 “కోపుమ్ జలనక కో సేతుమ్ కెర్లన జవుల గే, జోవయింక చెంగిలి. కిచ్చొక మెలె, దేముడుచ పుత్తర్లు, మెన జోవయింక సంగుక జయెదె.”

10 “సత్తిమ్ ఇండితి రిసా కో అన్నె మాన్సుల్చి అత్తి అల్లరలు సిచ్చలు సేడుల గే, జోవయింక చెంగిలి. కిచ్చొక

మెలె, దన మాన్సుల్కయ పరలోకుమచి రాజిమ్తె వాట తయెదె.”

11 “తుమ్ అంచ మాన్సుల్ జలి రిసా తుమ్క మాన్సుల్ ఆరిక దూసుప కెర్లెగిన, అల్లర్ కెర్లెగిన, ఎత్తి రగల్ అబద్దుమ్ సంగిలెగిన, తుమ్క చెంగిలి.

12 జేవ్ దస్సి కెర్లె కి, సర్లసంతోసుమ్ తెన్ తా. కిచ్చొక మెలె, పరలోకుమతె తుమ్క వెల్లి బవుమానుమ్ దొర్కు జయెదె. పూర్గుమ్ కి, దేముడుచ కబుర్లు సంగిల మాన్సుల్ కి జేవ్ దన అల్లర్ కెర్లె.”

లోన్క చి ఉజిడిక టాలి

(మార్కు 9:50; 4:21; లూకా 14:34-35; 8:16)

13 “తుమ్ ఈంజ లోకుమ్క లోన్చి రితి జన్తె. గని జాగర్ల తెన్ తా, లోన్చి కారు గెలెగిన, జా లోన్ కిసి అన్నె కారు జయెదె? అన్నె కిచ్చొక కి కామ్క నే జయె. ఎత్తి వెంట గెలుక జయెదె. దస్సి వెంట గెలెగిన, మాన్సుల్ నుడుక జయెదె.”

14 “తుమ్ ఈంజ లోకుమ్క ఉజిడి జా అస్సున్. ఏక్ పట్టుమ్ మెట్టచి ఉప్పిరి తిలెగిన, జా పట్టుమ్క లుంకడుక నెంజె.

15 దస్సి, మాన్సుల్ దీవు లంబడ తిలెగిన, జా దీవుక నాడి గట్ట డంకితి నాయ్, గని దీవు కంబుమ్తె టీవుల, చి జా గెరి తిలస ఎత్తిక జా ఉజిడి కామ్క జెయెదె.

16 తుమ్చి తెన్ కి దస్సి తంక అస్సె. తుమ్ చెంగిల్ బుద్ది ఇండితిసి మాన్సుల్ దెక, పరలోకుమ్ తిలొ అబ్బొది జలొ దేముడుక గవురుమ్ దెతు మెన, తుమ్చి పెట్టి తిలి ఉజిడి మాన్సుల్చి ముక్కె లగితి రితి తుమ్ ఇండ.”

పూర్గుమ్ దిల ఆగ్గుల్చి రిసా యేసు సంగిలి బోదన

17 “మోసే పూర్గుమ్చొచి అత్తి దేముడు రెగ్గయల ఆగ్గుల్ జలెకు, పూర్గుల్చి అత్తి సంగిల దేముడుచ కబుర్లు జలెకు, పెట గెలుక ఆవ్ అయలయ్ మెన తుమ్ ఉచర నాయ్. జా ఎత్తి నెరవెర్లుప కెరుకయ్ ఆవ్ అయలయ్, గని పెట గెలుక మెన తుమ్ ఉచర నాయ్.

18 కిచ్చొక మెలె, తుమ్క ఆవ్ కిచ్చొ కచితుమ్ సంగితసి మెలె, ఆగాసుమ్ బుయి పాడ్ జా గెతె ఎదక, మోసే పూర్గుమ్చొచి అత్తి రెగిడ్డిసి దేముడుచ †ఆగ్గుల్చి కొడొ పూర్తి నెరవెర్లుప జతె ఎదక, జేవ్తె ఎక్కి కోడు కి ఎక్కి కామ కి పిట్టె నాయ్.

19 జాచి రిసా, ఈంజ ఆగ్గుల్ రితి కెర్లెన్క కో విలువ దెకితి నాయ్ గే, చి విలువ నే దెకితి రితి అన్నె మాన్సుల్క సికడుల గే, పరలోకుమచి రాజిమ్తె జో దాకు జవుల. గని కో జేవ్ కొడొ రితి నిదానుమ్ కెర, దస్సి నిదానుమ్ కెరుక అన్నె మాన్సుల్క సికడుల గే, జెవ్వి పరలోకుమచి రాజిమ్తె గవురుమ్ జవుల.

* 5:5 5:5 ‘ఆకర్క’ మెలె, ఈంజ లోకుమ్ నొవర్ జతి రితి ప్రబు మార్కుప కెర్లి పొదిక. † 5:18 5:18 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయలి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచే పున్చుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె.

20 తుమ్క ఆవ్ కిచ్చొ మెంతసి మెలె, మోసే తెన్ దేముడు దిలి అగ్గుల్ సికడ్డన చి పరిసయ్యుల్, కెర్తి కంట తుమ్ పున్నిమ్ ఇండిలెకయ్ నెంజిలె, తుమ్ కచితుమ్ పరలోకుమచి రాజిమతె బెదున్ నాయ్.”

నీతిచి రిసా యేసు సంగిలి బోదన

21 ‘నరు అత్య కెర నాయ్. నరు అత్య కో కెర్లె, సిచ్చ జంక అస్సె’ మెన పూర్ణుమచక సంగిలిసి తుమ్ సూన్తను.

22 ఆవ్, జలె, తుమ్క అన్నె కిచ్చొ సంగితసి మెలె, కక్క జలెకు కో జలెకు కోపుమ్ జలె, జో కోపుమ్ జలె సిచ్చ జతి తప్పు కెర అస్సె, కో జలెకు అన్నెక్లొక నిస్కారుమ్ సంగిలె, వెల్లి సబచి అత్తిచి సిచ్చ జతి తప్పు కెర అస్సె. కో జలెకు అన్నెక్లొక ‘తుయి గడ్డు’ మెలి ఎదిలి కోడు సంగిలె, వెల్లి ఆగిచి గొయిచి సిచ్చ జతి తప్పు కెర అస్సె.

23 జలె, తుమ్చితె కో గే కిచ్చొగె అర్పితుమ్ దెంక మొదొల్ కెర తిలె జవున్, ఈంజొ మాన్సు కిచ్చొగె కెర్లెన్చి రిసా అన్నెక్లొ ఇనాచి ఉప్పిరి కోపుమ్ తెన్ అస్సె మెన ఈంజొ ఏదన్ల కెర్లెగిన,

24 ఈంజొ అర్పితుమ్ దెతిసి బలి దెతి టాన్తె నే దెతె, పాసి ముల దా కెర, తొలితొ గెచ్చ, జో అన్నెక్లొ తెన్ సేంతుమ్ కెరన, అన్నె జా కెర, ఇన్నెచి అర్పితుమ్ ఈంజొ దెవును.

25 “తుమ్చితె ఎక్కిలోక కో గే నేరిమ్ వయడ తిలెగిన, తుమ్ బెద గెతె తా తీర్పు కెర్తి గెరి నే పావితె అగ్గె, జో నేరిమ్ వయడ్తొ మాన్సు తెన్, నేరిమ్ జలొసా బేగి సేంతుమ్ జంక అస్సె. నెంజిలె నేరిమ్ వయడ్తొసా తుమ్క తీర్పు కెర్తొసాతె సార్ప కెర్లె, జో తీర్పు కెర్తొసా తుమ్క జమాన్లుచి అత్తి సార్ప కెర్లె, జో జమాన్లు తుమ్క జేతె గల దెయెదె.

26 దస్సి, తుమ్క ఆవ్ కిచ్చొ కచితుమ్ సంగితసి మెలె, తుమ్చితె కో సిచ్చ జవుల గే, ఆకర్చి కాసు ఎద కి పూర్తి తీర్పుప కెర్లె ఎదక, తుమ్క ములుక నెంజె.”

లంజెచి రిసాచి తీర్పు

27 “పడ్తొ ‘తుమ్ లంజెకమొ కెర నాయ్’ మెన సంగిలి కోడు తుమ్ అగ్గె తెంతొ సూన అస్సున్.

28 గని ఆవ్ తుమ్క సంగితిసి కిచ్చొ మెలె, ఏక్ తేర్బోదక దస్సి దెకుక కి కో దెకెదె గే, ఎక్కి దెకిలి రిసా, జోచి మెన్సుతె జా తెన్ లంజె కెర అస్సె.”

29 “జలె, తుమ్చితె కచి గే ఉజిల్ అంకి జవున్ జోక పాపుమ్ కెరవ తిలెగిన, పాపుమ్ నే కెర్తి రిసా, జో జా అంకి కడ వెంట గెలి రితి జవున్. జోవయించ ఆగ్గెతె తత్తన ఎత్తి తెన్ ఒండొయి మాన్సు వెల్లి ఆగి గొయ్తె గలి జతి కంట,

జోచి ఆగ్గెతె తత్తనతె ఎక్కి జవున్ పిట్ట గెలి రితి జలె, జోక చెంగిలి.

30 దస్సి, తుమ్చితె ఎక్కిలోచొ ఉజిల్ ఆతు జవున్ జోక పాపుమ్ కెరవ తిలెగిన, జా దీసి తెంతొ అన్నె దస్సి పాపుమ్ నే కెర్తి రిసా, జో ఆతు కండ గెలి రితి జా, జోచి తెంతొ వెంట గెలి రితి జవున్. కిచ్చొక మెలె, జోచ ఆగ్గెతె తిల వాటల్ ఎత్తి తెన్ ఒండొయి మాన్సు వెల్లి ఆగి గొయ్తె గలి జతి కంట, జోచ ఆగ్గెతె తత్తన ఎక్కి ఆతు పిట్ట గెలి రితి జలె, జోక చెంగిలి.”

పెండ్లి జా ములవులి జలనచి రిసాచి తీర్పు

31 ‘కో జలెకు జోచి తేర్చిక ముల దెయెదె గే, జో జాక ముల దెంక మెన ఏక్ కాగ్తుమ్ రెగ్ల దెంక అస్సె’ మెన పూర్ణుమ్ తెంతొ సంగిలి కోడు అస్సె.

32 గని ఆవ్ తుమ్క కిచ్చొ మెన సంగితిసి మెలె, జా తేర్చి లంజె జలిన్క పిట్టవ, కో జలెకు తేర్చిక ముల దెయెదె గే, జోయ్యి జాక లంజె కెర్తయ్. అన్నె, మున్సున్ ముల దిలి తేర్బోదక పెండ్లి జతొసా కో జలెకు, లంజె జతయ్.

అప్పిడ్డిన్చి రిసాచి తీర్పు

(మత్త 19:9; మార్కు 10:11-12; లూకా 16:18)

33 “అన్నె, ‘ఆరిక అప్పుడుక నాయ్, గని కిచ్చొ జవున్ కెర్తి రిసా కో గే ప్రమానుమ్ తిలెగిన, ప్రబుక సత్తిమ్ కెర్తి రిసా జో మాన్సు జో సంగిలిసి జర్లు కెరుక అస్సె’ మెన పూర్ణుల్క సంగిలి కోడు తుమ్ సూన అస్సున్.

34 గని ఆవ్ తుమ్క సంగితిసి కిచ్చొ మెలె, ఎద్దె ఒట్టు గలన్క నాయ్. ‘పరలోకుమ్ సాచి’ మెన జవున్ ఒట్టు గల నాయ్. కిచ్చొక మెలె, జా కిఎత్తి అదికారుమ్ తిలొ దేముడుచి స్తిజాసనుమ్.

35 ‘బుయెచి సాచి’ మెన జవున్, ఒట్టు గలన్క నాయ్. కిచ్చొక మెలె, జా దేముడు సుదితి పొదొ. అన్నె, ‘యెరూసలేమ్ పట్టుమ్ సాచి’ మెన జవున్, ఒట్టు గలన్క నాయ్. కిచ్చొక మెలె, *జా పరలోకుమ్చొ రానొ జలొ దేముడుచి గుడిక నిసాన్ల పట్టుమ్.

36 అన్నె, ‘బోడిచి ఒటు జవున్’ మెననుక నాయ్. కిచ్చొక మెలె, ఎక్కి నెండి వాడొ కి నీడి జతి రితి జలెకు, చొక్కిల్ జతి రితి జలెకు మార్పుప కెరుక తూమ్ నెతుర్పు.

37 జలె, తుమ్ ‘ఎఁ ఎఁ’ మెనుక అస్సె మెలెగిన, ‘ఎఁ ఎఁ’ మెన. తుమ్ ‘నాయ్’ మెనుక అస్సె మెలెగిన, ఎక్కి ‘నాయ్’ మెన. ఇన్నెక జీన్తిన్ సయ్తాన్ తెంతొయ్ జతయ్.”

అల్లర్ కెర్లెన్చి రిసాచి తీర్పు

(లూకా 6:29-30)

‡ 5:33 5:33 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలొ ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె.

§ 5:34 5:34 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలొ ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె.

* 5:35 5:35 ‘ప్రబు’ మెలె కి, ‘ఎత్తి అదికారుమ్ తిలొ దేముడు’ మెలె కి, ‘పరలోకుమ్చొ రానొ జలొ ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె.

38 'ఏక్ మాన్సుచి అంకి జవున్ అన్నెక్కో కోపుమ్క కడ్డెగిన, జో కడ్డెసాచి అంకి కి జో అంకి గెలో మాన్సు గెచ్చు కడుక అస్సె. అన్నె, ఏక్ మాన్సుచో దాంతు అన్నెక్కో పెట బగయ్లెగిన, ఈంజో కి జోచి దాంతు పెట బగవ గెలుక అస్సె' మెన పూర్లుమ్ సంగిలి కోడు తుమ్ సూన అస్సున్.

39 జలె, ఆవ్ తుమ్క కిచ్చో సంగితిసి మెలె, తుమ్క అల్లర్ కెర్లొసాక తుమ్ అల్లర్ కెర్క నాయ్. మూర్కుడు జవున్ తుమ్చితె ఎక్కిలోక ఉజిల్ గలి జవున్ పెట్టెగిన, దెబ్బ కయ్లోసా తుక్లె తా, జోచి డెబ్బి గలి కి జో అన్నెక్కో అన్నె పెటితి రితి, జోచి పక్క పస్లవుక అస్సె.

40 "అన్నె దస్సి, తుమ్చితె ఎక్కిలోక కో జలెకు తీర్పు కెర్తి గేరెతె కడన, ఇనెతె సొక్క నజిలె, ఈంజో ఇనాచి కోటు కి దా గెల్పు.

41 కో జలెకు తుమ్చితె ఎక్కిలోక 'ఏక్ మయిలు దూరి బెద జె' మెన బలవంతుమ్ కెర్లెగిన, జో తెన్ ఈంజో దొన్ని మయిలు దూరి బెద గెస్సు.

42 కో జలెకు తుమ్చితె ఎక్కిలోకె కిచ్చో జవున్ నజిలె, దెంక. అన్నె, కో జలెకు తుమ్చితె ఎక్కిలోకె బదుల్ నజిలె, తుక నే దెయింద్ మెనుక నాయ్, దెంకయి."

విరోదుమ్ సుదల్క ప్రేమ కెర్తెసచి రిసాచి తీర్పు
(లూకా 6:27-28,32-36)

43 "అన్నె, 'తుమ్చి తెన్ బెదితసక ప్రేమ కెర' మెన, 'తుమ్క విరోదుమ్ జలసచి ఉప్పిరి విరోదుమ్ తెన్ తా' మెన సంగిలిసి సూన అస్సున్.

44 గని ఆవ్ తుమ్క సంగితిసి కిచ్చో మెలె, తుమ్క విరోదుమ్ జలసక ప్రేమ కెర. తుమ్క అల్లర్ కెర్తెసచి రిసా 'చెంగిల్ జతు' మెన ప్రార్దన కెర్తె తా.

45 తుమ్ ఇసి కెర్లెగిన, తుమ్చో పరలోకుమ్తె తిలో దేముడు జలో అబ్బొన్చ పుత్తర్లు జలదు మెన డీసెదె. కిచ్చొక మెలె, గార్ సుదల్క కి చెంగిల్ సుదల్క కి రోజుక జో పొద్దు బార్ కెర్తయ్. సత్తిమ్ ఇండితసచి రిసా కి, పాపుమ్ ఇండితసచి రిసా కి పాని పెటయ్తయ్.

46 ఎక్కి తుమ్క ప్రేమ కెర్తెసకయ్ తుమ్ ప్రేమ కెర్లెగిన, తుమ్క కిచ్చో పున్నిమ్ జా? †సిస్తు నజితస కి దస్సి కెరుల.

47 ఎక్కి తుమ్చ సాంత మాన్సుల్క ముద్దు కెర్లె, గని వేర మాన్సుల్క నాయ్ మెలె, మాములుమ్ మాన్సుల్ కెర్తెసచి కంట జా కిచ్చో జిన్నిసి! దేముడుక నేన్ల మాన్సులి దస్సి కెరుల.

48 తుమ్, జలె, సూన. పరలోకుమ్ తిలో అబ్బొసి జలో దేముడు కిసి ప్రేమక పూర్తి అస్సె గే, తుమ్ కి దస్సి ప్రేమక పూర్తి జా తంక అస్సె."

† 5:46 5:46 'సిస్తు' మెలె, జా దేసిమ్క ఆక్రమించువ కెర్లి రోమ్ దేసిమ్చి ప్రబుతుమ్చి వాట డబ్బుల్. జా ప్రబుతుమ్చి నావ్ తెన్ పన్ను నజితసక యూదుల్ నిస్కారుమ్ దెకుల.

6

దర్ముమ్ కిచ్చో బుద్ది తెన్ దెంక గే సికడ్డిసి
(లూకా 11:2-4)

1 "మాన్సుల్చి మొక్కె గవురుమ్ ఆనన్తి రితి తుమ్చ నీతికమొ కెర నాయ్. మాన్సుల్చి గవురుమ్ ఆనన్తి రిసా కెర తిలెగిన, తుమ్చో పరలోకుమ్ తిలో దేముడు జలో అబ్బొద్తె బవుమానుమ్ తుమ్క దొర్కు జయె నాయ్.

2 జాచి రిసా, తుమ్ దర్ముమ్ దెంక జలె, నప్పిర్ బజయ్లి రితి జా మాన్సుల్చి మొక్కె గవురుమ్ జతి రిసా దాస నాయ్. కిచ్చొక మెలె, మాన్సుల్ గవురుమ్ దెతి రిసా ఉప్రమెస్సుచో మాన్సుల్ సబ గెరలె జవున్, వీదులె జవున్, దస్సి, ఎత్తిజిన్ దెకితి రితి, నప్పిర్ బజవ కెర దెతతి. దస్సి గవురుమ్ ఆనన్తసచి రిసా ఆవ్ తుమ్క కిచ్చో కచితుమ్ సంగితసి మెలె, జేవ్ ఈంజయి లోకుమ్తె జోవయించి బవుమానుమ్ నజన గెల అస్సి."

3 "తుమ్, జలె, దర్ముమ్ దెతె పొది, తుమ్చి దర్ముమ్ గుట్టు తెన్ తతి రితి, తుమ్చో ఉజిల్ ఆతు తెన్ దర్ముమ్ దిలె, తుమ్చో డెబ్బొ ఆతుక నేన్తె నే జాన్తి రితి దాస.

4 దస్సి తుమ్ దిలదు మెలె, అన్నె కోయి నేన్లె కి, తుమ్చో దేముడు అబ్బొసి దెక, తుమ్క బవుమానుమ్ దెయెదె."

ప్రార్దన కెరుక సికడ్డిసి
(లూకా 11:1-4)

5 "పడ్డె, తుమ్ ప్రార్దన కెర్తి పొది, ఉప్రమెస్సుచో మాన్సుల్చ రిత జా నాయ్. దస మాన్సుల్ సాంత గవురుమ్ ఆనన్తి రితి, మాన్సుల్ దెకుత్ మెన, సబ గెరలె, వీదులె టీవో జా ప్రార్దన కెరుక ఓజ జా అస్సి. తుమ్క కచితుమ్ కిచ్చో సంగితసి మెలె, జేవ్ జోవయించి బవుమానుమ్ నజన గెల అస్సి.

6 దస్సి తుమ్ ప్రార్దన కెరుక జలె, మాన్సుల్ నే దెకితి రితి, గని తుమ్చి గదితె పెన, కెప్పి డంకన, నే డీసయ్ జతో తుమ్చో దేముడు అబ్బొన్క ప్రార్దన కెర. మాన్సుల్ నే దెకితిసి కి జో అబ్బొసి జలో దేముడు దెకితయ్, తుమ్ ప్రార్దన కెర్తెసి జో జానన, తుమ్క బవుమానుమ్ దెయెదె.

7 పడ్డె, తుమ్ ప్రార్దన కెర్తె పొది, దేముడుక నేన్ల మాన్సుల్ కెర్తి రితి పొన. మెలె, కామ్క నెంజిత కొడెచి ఉప్పిరి కొడె లట్టబా నాయ్. కిచ్చొక మెలె, దేముడుక నేన్ల మాన్సుల్ కిచ్చో ఉచర్తతి మెలె, 'ఒగ్గర్ ఒగ్గర్ కొడె సంగిలె దేముడు అమ్చ ప్రార్దనల్ మెన్సెదె' మెన ఆరిక ఉచర్తతి.

8 తూమ్ జోవయించి రితి జా నాయ్. తుమ్ దేముడు అబ్బొన్తె నే నజితె అగ్గె, తుమ్క కిచ్చో కామ్క జెయెదె గే జో జానె."

9 "జాకయ్, తుమ్ ఇసి ప్రార్దన కెర.

ఓ పరలోకుమ్ తిలో అమ్చో దేముడు జలో అబ్బొ,
తుచి నావ్ గవురుమ్ జవున్.

10 తుచి రాజిమ్ అమ్చి తెన్ జెవును.

తుచి ఇస్టుమ్ రితి పరలోకుమ్తె కిసి కెర్తతి గే,
ఈంజ లోకుమ్తె కి ఆమ్ కెరుక మెన, అమ్క దయ కెర
సికడు.

11 అమ్క సరిపుచుప జతి అన్నిమ్ అమ్క రోజుక దె.

12 పడ్డె, అమ్క తప్పు కెర్ల మాన్సుల్క
ఆమ్ కెద్ది చెమించుప కెర అస్సుమ్ గే,
ఆమ్ కెర్ల తప్పుల్ తుయి అమ్క చెమించుప కెరు.

13 పడ్డె, అమ్ పాపుమ్ నే కెర్తి రితి, సయ్తాన్ కెరయ్తినీ
తెంతో అమ్క పిట్టవు, అన్నె, సయ్తాన్ కెర్త అల్లర్ తెంతో కి
అమ్క పిట్టవు.”

14 “కిచ్చొక మెలె, కోకో తుమ్క తప్పు కెర తిలెగిన, తుమ్
జోవయింక చెమించుప కెర్లెగిన, తుమ్చో పరలోకుమ్ తిలో
దేముడు జలో అబ్బొ తుమ్క చెమించుప కెరెదె.

15 గని మాన్సుల్ తుమ్క కెర్త తప్పుల్ తుమ్ నే
చెమించుప కెర్లెగిన, తుమ్చో అబ్బొ జలో దేముడు తుమ్క
చెమించుప కెరె నాయ్.”

చువ్వె తతిన్చి రిసా సంగిలినీ

16 “పడ్డొక, తుమ్ చువ్వె తంక జలె, ఏడ్డి రితి మొకోమ్
తెన్ తా నాయ్. ఉప్తమెన్సుచో మాన్సుల్, జలె, ‘చువ్వె
అస్సుమ్’ మెన, ‘అమ్క నీతి మెన మాన్సుల్ గవురుమ్
సంగుతు’ మెన, మొకోమ్ వెట్కారుమ్ తెయార్ కెరన
తవుల. తుమ్క ఆవ్ కిచ్చొ కచితుమ్ సంగితసి మెలె, దస్సి
కెర్త మాన్సుల్ జోవయింక బవుమానుమ్ నజన గెల అస్సి.

17 తుమ్, జలె, తుమ్ చువ్వె తతె పొది, మాన్సుల్ నేన్లి
రితి, తుమ్చి బోడి తేలు గాంసన, ఓడన, తుమ్చి మొకోమ్
దోవన, సర్ద తెన్ తా.

18 మాన్సుల్ నే దెకిలెకి, తుమ్చో అబ్బొసి జలో దేముడు
దెక కెర, తుమ్క బవుమానుమ్ దెయెదె.

19 “బూలోకుమ్తెచి దనుమ్ తుమ్క తూమ్ కుడవన్క
నాయ్. ఈంజ లోకుమ్చి దనుమ్ కుడవన్లెగిన, రుస్సి కా
గెలెదె, నెంజిలె కిచ్చొ కా గెలెదె, నెంజిలె చోర్లు గెరి బొరొ కెర
చోర నెవుల.

20 తుమ్, జలె, రుస్సి కిచ్చొ నే కతి లోకుమ్తె, చోర్లు
నే పెసితి లోకుమ్తె, మెలె పరలోకుమ్తె, ఒత్తచి దనుమ్
కుడవన కెరన.

21 తుమ్ కేన్ లోకుమ్తె దనుమ్ కుడవన తస్తె గే, ఒత్త
తిలినచి రిసా తుమ్చి వెట్టి ఉచర్తె తస్తె.

22 “ఆగుక దీవు అంకివొ. జాచి రిసా, తుమ్చ అంకివొ
టోంట తిలెగిన, తుమ్చి ఒండి ఆగ్ ఉజిడ్ తెన్ తయెదె.

23 తుమ్చ అంకివొ మయ్ల జా తిలెగిన, తుమ్చి ఆగ్
ఎత్తి ఆమన్ రితి అందర్ జా తయెదె. దస్సి, తుమ్చి వెట్టి
తిలి బుద్ది అందర్చి తిలెగిన, కెద్ది అందర్ జయెదె!

24 “ఎక్కిలో గొత్తి నుదొ కో జలెకు దొగుల ఎజొమాన్లుచి
సేవ ఎక్కి దడి కెరుక నెత్తె. ఎక్కిలోక విరోదుమ్ కెర, అన్నెక్కోక
ప్రేమ కెరెదె. నెంజిలె ఎక్కిలోక నిదానుమ్ దెక, అన్నెక్కోక
నిస్కారుమ్ దెకెదె. జలె, దేముడుక చి ఈంజ లోకుమ్చి
దనుమ్క ఎక్కి దడి సేవ కెరుక నెతుర్పు.

25 జాకయ్, ఆవ్ తుమ్క కిచ్చొ మెంతసి మెలె, ‘కిచ్చొ
కమ్దె గే కిచ్చొ పిమ్దె గే కిచ్చొ గలనుమ్దె గే కిసి జా జిమ్దె’
మెన, తుమ్చి మెన్సుతె చింత గలన నాయ్. అన్నిమ్చి
కంట ఆత్మ విలువ, గెద. పాలల్చి కంట ఆగ్ విలువ, గెద.

26 “ఆగానుమ్చ పిట్టల్చి రిసా ఉచర. జేవ్ పిట్టల్
ఉంపితి నాయ్. ఉంప లాయితి నాయ్. లాయ కొట్టుతె
ఆన కుడవంతి నాయ్. జలెకి, తుమ్చో పరలోకుమ్ తిలో
అబ్బొ జలో దేముడు జోవయింక పొస్తయ్. తుమ్, జలె,
జోవయింక కంట విలువ నెంజును గే?

27 పడ్డె, తుమ్చితె కో కెద్ది చింత గలన్లెకి, జోచి బత్తుక
కొల్లక ఏక్ అత్తెక్ జవున్ ఒగ్గర్ కెరనుక తెరె గే? నెత్తె.

28 “పాలల్చి రిసాచి చింత గలనుక కిచ్చొక? డొంగ్రెచ
పుల్లో కిసి వడ్డితతి గే ఉచరన. జేవ్ కామ్ కెర్తి నాయ్,
పాలల్ వీంతి నాయ్.

29 జలెకి, ఎదివాట్ సామ్నారుమ్ కలుగు జలో
సాలోమోను మెలొ పూర్గుమ్చో రానొ కి ఈంజేవ్ పుల్లొచి
రితి నూటి కెరనుక నేన్లొ.

30 తుమ్ తొక్కి నముకుమ్ తిలన, ఏక్ కోడు ఉచరన.
ఆజి తా కెర కలిక డయ దెతి చివ్వర్క దేముడు ఎదిలి నూటి
కెర్తయ్ జలె, తుమ్క అన్నె ఒగ్గర్ చెంగిల్ గలంతిసి దొర్కు కెరె
నాయ్ గె? దొర్కు కెరెదె.

31 “జాకయ్, ‘కిచ్చొ కమ్దె గే, కిచ్చొ పిమ్దె గే, కిచ్చొ
గలనుమ్దె’ మెన చింత గలన ఉచర నాయ్.

32 దేముడుక నేన్ల మాన్సుల్ కి ఇసిచి ఎత్తిక ఉచరంతె
తవుల, అన్నె, ఇన సామన్లు తుమ్క కి దొర్కు జతతి మెన;
తుమ్చో పరలోకుమ్ తిలో అబ్బొసి జలో దేముడు జానె.

33 తుమ్, కిచ్చొ కెరుక అస్సె మెలె, తొలితొ దేముడుచి
రాజిమ్ జోచి పున్నిమ్ చజ, జో సికడ్డి బుద్ది ఇండుక ఆన జా
తా. తుమ్ ఇసి జలదు మెలె, తెదొడి ఎత్తి తుమ్క దొర్కు
జవుల.

34 జాకయ్, ‘కలిక కిసి జా జిమ్దె?’ మెన తుమ్ చింత
గలన ఉచర నాయ్. కలికచి రిసా సమ్మందుమ్ జతిసి కలిక
దొర్కు జయెదె. కేన్ దీసిచి బాద జయి దీసిక సాలు.”

7

తీర్పు కెర్తి బుద్దిచి రిసా సంగిలినీ

(లూకా 6:37-38,41-42)

1 “తుమ్ ఎక్కిలోక ఎక్కిలో కుస్సిదుమ్ తెన్ తీర్పు ఉచర
నాయ్, చి ఎత్తి అదికారుమ్ తిలో దేముడు తుమ్క తీర్పు
కెర సిచ్చ కెరుక నాయ్.

2 కిచ్చొక మెలె, తుమ్ అన్నె మాన్సుల్క కిసి తీర్పు దెకితె గే, దేముడు తుమ్కయ్ కి దస్సి దెకెదె. తుమ్ అన్నె మాన్సుల్చి రిసా *కట్టడ్డి కొల్త రితి దేముడు తుమ్క కి జయ్యి కొల్త తెన్ కట్టడెదె.

3 “తుమ్చితె ఎక్కిలోచి అంకితె ఏక్ దూలుమ్ బెర తిలెగిన, బావోచి అంకితె ఇదిలిదిల్ తొక్కు సేడ తిలెగిన, అంకితె దూలుమ్ తిలోసా కిచ్చొక జోచి బావోచి అంకితె తిలి ఇదిలిదిల్ తొక్కు దెకితసి, గని సొంత అంకితెచి దూలుమ్ దెకిన్ నాయ్?

4 నెంజిలె, తుచి అంకితెచి తొక్కు కడిందె” మెన చిల్పి అంకితె తిలోసా కిసి తుచో బావోక సంగుక జయెదె!

5 తుయి ఉప్రమెన్సుచో, తొలితో తుచి సొంత అంకితెచి చిల్పి కడను, చి తుచో బావోచి అంకితెచి తొక్కు కడితి రితి బేంట దెకితె.

6 “సుద్ది తిలిసి సూనర్లుక దాస నాయ్. అండ్రుల్చి చట్టె ముత్యల్ గల దాస నాయ్. అండ్రుల్క దిలె, విలువ నే దెకితె సుద కెర, పస్ల కెర, తుమ్క చిర గెలుల.

7 “నజ తుమ్క దెయెదె. ఎక్కి మెన్సు తెన్ చజిలె, దొర్కు జయెదె. కెప్పితె పెట్టె, తుమ్క కెప్పి ఉగిడిందె.

8 కో సంగిలె, జోక దొర్కు జయెదె, చి చజిలె, దొర్కు జయెదె, చి జోచి కెప్పితె పెట్టె, జోచి రిసా ఉగ్గి జయెదె.

9 “తుమ్చి తెన్ కేన్ మాన్సు జలెకు జోచో పుత్తుసి పొడి నజిలె, జోక పత్తురు దెయెదె గే? నాయ్.

10 జో పుత్తుసి మొస్సా నజిలె అయి దెయెదె గే? నాయ్.

11 జలె, తుమ్ మాన్సుల్ పాపుమ్ సుదల్ జలెకి, తుమ్చ బోదల్క చెంగిల్ వస్తువల్ దెంక జాన్సు. జలె, పరలోకుమ్ తిలో అబ్బోన్ జలో దేముడుతె కో చెంగిల వరల్ నజిలె, మాన్సుల్ దెతి కంట జో అన్నె ఒగ్గర్ చెంగిల్ వరల్ దెయెదె!

12 “మాన్సుల్ తుమ్క కిసి కెరుక మెన తుమ్ ఇస్టుమ్ జస్తె గే, తూమ్ కి జోవయింక దస్సి కెర. కిచ్చొక మెలె, మోసే పూర్గుమ్చోచి అత్తి దేముడు రెగ్గయ్ల ఆగ్గుల్, అన్నె పూర్గుల్చి అత్తి సంగిల దేముడుచ కబుర్లు ఎత్కితె ఈంజ కోడు బెదితయ్.

పరలోకుమ్ పెసితి గుమ్ముమ్చి రిసా సంగిలి బోదన
(లూకా 13:24)

13 “వెల్లో నాసెనుమ్తె గెతి వాట్ సుల్లు, జా వాట్ పెసితి గుమ్ముమ్ రూండు. జా వాట్ ఒగ్గర్జిన్ గెతతి. తూమ్, మాత్తుమ్, ఇర్కు వాట్చి గుమ్ముమ్ పెన.

14 కిచ్చొక మెలె, పరలోకుమ్తె బెదితి వాట్చి గుమ్ముమ్ ఇర్కు అస్సె, జా వాట్ సుల్లు నాయ్, చి ఒత్త పావితన ఒగ్గర్ తొక్కిజిన్ జవుల.

15 “దేముడు తెంతో కబుర్ ఆన్తోసా ఆవ్” మెన అబద్దుమ్క సంగితన సగుమ్జిన్ జెవుల, ఉప్రమెన్సుచ

జేవ్. దస మాన్సుల్చి రిసా తుమ్ జాగర్త తెన్ తా. చెంగిల్ మాన్సుల్ రితి, జేవ్ మెండల్చ రోమల్ గలన డిసయ్ జవుల, గని జోవయించి పెట్టి తెడి డుర్కొవ రితి కుస్సిదుమ్ తిలస.

16 జోవయించ కమెచి పలితుమ్ దెకిలె, జోవయించి బుద్ది తుమ్ చినితె. కంట చెట్టె ద్రాచ పండ్లు కోడుక జయెదె గే? అస్సెన్ రూకి తెన్ †అంజూరుమ్ పండ్లు కోడుక జయెదె గే? నెంజె.

17 ఎత్కి చెంగిలో రూక్తె చెంగిలి పండ్లు దెరుల, గని కామ్క నెంజితె రూక్తె కామ్క నెంజిత పండ్లు దెరుల.

18 చెంగిల్ రూక్తె కామ్క నెంజితి రగుమ్ పండ్లు దెర్తి నాయ్. కామ్క నెంజితె రూక్తె చెంగిల్ పండ్లు దెర్తి నాయ్,

19 అన్నె, చెంగిల పండ్లు నే దెర్తో ఎత్కి రూకుక కండ కెర, ఆగితె గలుల.

20 తుమ్చితె జెతసచి పలితుమ్ దెకిలె, జోవయించి రగుమ్ చినితె.

21 “ప్రబు, ప్రబు!” మెన, అంక సంగితన ఎత్కిజిన్ పరలోకుమ్చి రాజిమ్తె పెసితి నాయ్. గని పరలోకుమ్ తిలో అంచో అబ్బో జలో దేముడు సికడ్డి కోడు రితి కెర్తనయ్ ఒత్త గెచ్చుల.

22 ఈంజ లోకుమ్చ ఎత్కిక వెల్లి తీర్పు కెర్తి దీసిక, అంక ఒగ్గర్జిన్ మాన్సుల్, ‘ప్రబు, ప్రబు’, తుచి నావ్ తెన్ తూయి సంగిల కబుర్లు సంగిలమ్, నాయ్ గే? తుచి నావ్ తెన్ బూతల్ గట్ట ఉదడ్డమ్, నాయ్ గే? తుచి నావ్ దెర ఒగ్గర్ ఒగ్గర్ అద్బుతుమ్ కమె కెర్తమ్, నాయ్ గే?” మెన సంగుల.

23 జలె “ఆవ్, తుమ్క అగ్గె తెంతో నేని. తుమ్ గార్ కమె కెర్తతన, అంచి తెంతో దూరి ఉట్ట గెచ్చు” మెన జోవయింక సంగెదె.

సాప్రయ్ బందిలో గేరుచి ఇన్కుతె బందిలో గేరుచి రిసాచి టాలి

(లూకా 6:47-49)

24 “అంచ కొడొ సూన అంచి కోడు రితి ఇండుల గే కిస జవుల, జో బుద్ది తిలోసా కిచ్చొ కెర్లొ మెలె, జోచో గేరు రెంగ్విచి ఉప్పిరి బందిలో.

25 బందితికయ్, పాని పెట్టి, వర్లల్ జలి, చి గట్టిజ వాదు జో గేరుచి సుట్టునంత కెర్లె కి, జా గేర్చి పునాది రెంగ్విచి ఉప్పిరి తిలి రిసా, కెద్ది వాదు పాని కెర్లె కి, సేడె నాయ్.

26 “జలె, కో అంచ కొడొ సూన కి నే కెరుల గే, జేవ్ కిసి జవుల మెలె, బుద్ది నెంజిలో ఎక్కిలోచి రితి జవుల. జో బుద్ది నెంజిలోసా కిచ్చొ కెర్లొ మెలె, జోచో గేరు ఇన్కుచి ఉప్పిరి బందిలో.

27 జో గేరు ఇన్కుచి ఉప్పిరి బంద తతికయ్, పాని పెట్టి, వర్లల్ అయ్లి చి గట్టిజ వాదు జో గేరుచి సుట్టునంత కెర్లె, చి జా గేరు సేడ గెల్. జా గేరు ఎద్గర సేడయ్ గెల్!” మెన యేసు సంగిలన్.

* 7:2 7:2 మీన్సి † 7:16 7:16 ‘అంజూరుమ్ పండ్లు’ మెలె, బొడ్డ పండ్లు రిత జవుల.

28 యేసు ఈంజేవ్ కొడొ సంగ కేడయ్లి పడ్డొ, జనాబ్ ఎత్తి జో కెర్లి బోదనచి రిసా ఆచారిమ్ జల.

29 కిచ్చొక మెలె, జేవ్చ మోసే తెన్ దేముడు దిలి ఆగ్గుల్ సికడ్డస కెర్లి రితి నాయ్, గని దేముడు దిలి అదికారుమ్ తెన్ జో సొస్టుమ్ బోదన కెర్లె తిలన్.

8

వెల్లి రోగిక యేసు చెంగిల్ కెర్లిసి

(మార్కు 1:40-45; లూకా 5:12-16)

1 జేవ్ జా మెట్ట తెంతో ఉత్త జెతె తిలె, ఒగ్గర్ ఒగ్గర్జిన్ జనాబ్ జోచి పట్టి అయ్ల.

2 జేవ్ ఎత్తిజిన్ దస్సి ఉత్తిరై తతికయ్, వెల్లి రోగి ఎక్కిలో యేసుక దస్సుల్ జా, సెర్ను సేడ జొకర, “ప్రబు తుక ఇస్టుమ్ జలె, తుయి అంక చెంగిల్ కెర సుద్ది కెరుక తెర్చి” మెన సంగిలన్.

3 యేసు ఆతు చంప కెర జోక చడ, “అంక ఇస్టుమి. చెంగిల్ జా సుద్ది జా” మెన సంగిలి బేగి, జోచి వెల్లి జబ్బు గెతికయ్, చెంగిల్ జా సుద్ది జలన్.

4 యేసు జోక “వట్టె కక్క కిచ్చొ సంగు నాయ్. గని, దేముడుచి గుడితె గెచ్చు, తుచి ఆగ్గే సుద్ది జలి మెన, ఒత్త పూజరిక దెకవు, చి తుయి సుద్ది జలిసి ఒత్త తిల మాన్సుల్క రుజ్జు జతి రితి, మోసే పూర్లుమ్ సంగిలి కాసుక దేసు” మెన సంగ, అన్నె ఉట్ట గెలన్.

పుంజెక్జిన్ జమాన్లుక వెల్లొచొ గొత్తి సుదొక యేసు చెంగిల్ కెర్లిసి

(లూకా 7:1-10; యోహా 4:43-54)

5 యేసు కపెర్నహూమ్ పట్టుమ్తె అన్నె పాఁవితికయ్, రోమ్ దేసిమ్చొ పుంజెక్జిన్ జమాన్లుక వెల్లొ ఎక్కిలో జా కెర,

6 యేసుక “బాబు, అంచొ గొత్తి నాడు కదుల్ జంక నెత్త కెర ఒగ్గర్ బాద జా గెరి ఎంగ్ల తత్తయ్” మెన బతిమాల్పా జా సంగిలన్

7 యేసు జోక “ఆవ్ జెయిందె, చి జోక చెంగిల్ కెరిందె” మెన సంగిలన్.

8 గని జో పుంజెక్జిన్ జమాన్లుక వెల్లొ మాన్సు జోక, “ప్రబు, తుయి అంచి గెరి జెంక మెలె, ఆవ్ విలువ నాయ్. తుయి ఇన్నె తెంతో ఎక్కి నెలవ్ కోడు దిలది మెలె, అంచొ గొత్తి నాడు చెంగిల్ జయెదె.

9 ఆవ్ కి అదికారుమ్క బితొసా. అంచి తెడి జమాన్లు అస్తి. ఆవ్ ఎక్కిలోక ‘గో’ మెలె, గెచ్చెదె. అన్నెక్లొక ‘జె’ మెలె, జెయెదె. అంచొ గొతిమాన్సుక ‘ఈంజ కామ్, జా కామ్ కెరు’ మెలె కెరెదె” మెన సంగిలన్.

* 8:20 8:20 ‘మాన్సు జా జెర్నున్ అయ్లోసా’ మెన బయ్బిల్తె రెగ్ల తిలె, జాచి అర్దుమ్ కిచ్చొ మెలె, ‘ఎత్తి అదికారుమ్ తిలో దేముడు తెద్రయ్లో క్రిస్తు రచ్చుచుప కెర్లొసా’. యేసు ఈంజ లోకుమ్తె బుల్లె తిలి పొది, బయ్బిల్చి పొర్చి ప్రమాసుమ్ ఒగ్గర్ నదు కెర్లె పండితుల్ జా అర్దుమ్ కెరనుల, గని మాములుమ్ మాన్సుల్ నేన్తి.

10 యేసు ఈంజొ సంగిలిసి నూన సర్ల జా, పట్టి జెతె తిలసక దెక, జోవయింక, “తుమ్క ఆవ్ కిచ్చొ కచితుమ్ సంగితసి మెలె, అమ్చ ఇస్రాయేలుల్తె ఆవ్ కక్క కి ఎదిలి నముకుమ్ తిలసక అప్పె ఎదక కి దెకుక నాయ్.

11 తుమ్క కిచ్చొ మెంతసి మెలె, తూర్పు దేసిమ్లు తెంతో, పడమర దేసిమ్లు తెంతో కి యూదుల్ నెంజిల ఒగ్గర్జిన్ మాన్సుల్ జాఁ కెర, అమ్చ యూదుల్చ పూర్లుమ్చ అబ్రాహామ్, ఇస్సాకు చి యాకోబు తెన్ పరలోకుమ్తె ఎక్కితె అన్నిమ్ కవుల.

12 గని, అమ్చి రాజిమ్చి రిసా తుమ్క నిసాన అస్సి మెన, అమ్చ యూదుల్క దేముడు సంగ తిలె కి, ఈంజేవ్ అమ్చ యూదుల్తె ఒగ్గర్జిన్ అందర్చి ఉప్పిరి అందర్తె బయిలె గలి జవుల. ఒత్త మాన్సుల్ ఏడ్తె తవుల, దంతో చప్పిల్లె తవుల.” మెన సంగ కెర,

13 యేసు జో పుంజెక్జిన్ జమాన్లుక వెల్లొక “సరె, గో. తుయి నంపజలి రితి తుక జర్గు జవున్” మెన సంగిలన్. సంగిలి బేగి, జో మాన్సుచొ గొత్తి నాడు చెంగిల్ జలన్.

పేతురుచి అత్తన్క యేసు చెంగిల్ కెర్లిసి

(మార్కు 1:29-34; లూకా 4:38-41)

14 పడ్డొ, యేసు పేతురు మెలో జోచొ సిస్సుడుచి గెరి గెచ్చు కెర, పేతురుచి అత్తన్ జొర్లొ సేడ ఎంగ్ల అస్సి మెన దెక కెర,

15 జాచి ఆతు దెర్తికయ్, జా జొర్లొ గెలి, చి జా ఉట్ట కెర, యేసుక మరియాద ఎత్తి కెరుక దెర్లి.

16 సాంజ్ జతికయ్, ఒగ్గర్జిన్ బూతుమ్ దెర్లసక ఒత్త తిల పైజల్ యేసుతె కడ ఆన్తికయ్, జేవ్ బూతల్ ఎక్కిక్క “ఉట్ట గో” మెన ఎక్కి కోడు తెన్ యేసు ఉదడ గెలన్. కిచ్చొ కిచ్చొ జబ్బుల్ తిలసక కి చెంగిల్ కెర్లన్.

17 “జొయ్యి అమ్చ బాదల్ జబ్బుల్ దెర గెచ్చయ్లో” మెన దేముడుచ కబుర్లు సంగిలో యెనయా పూర్లుమ్చొచి అత్తి జో సంగిలి కోడు నెరవెర్చుప జంకయ్ మెన ఇసి జలి.

యేసు తెన్ బుల్లన ఎక్కి మెన్సు నిదాసుమ్ తంక మెన సంగిలిసి

(లూకా 9:57-62)

18 సుట్టునంత ఒగ్గర్ ఒగ్గర్జిన్ బెర తిలిసి యేసు దెక, కెర, “సముద్రుమ్ ఒత్తల్తో గెచ్చుమ” మెన సిస్సుల్క సంగిలన్.

19 జలె, మోసే తెన్ దేముడు దిలి ఆగ్గుల్ సికడ్డొసా ఎక్కిలో యేసుతె జా కెర, “గురుబాబు, తుయి కేనె గెలె కి, ఆవ్ కి తుచి తెన్ బెద జెయిందె” మెన సంగిలన్.

20 యేసు జోక “నక్కల్ క పార్లు, ఆగాసుమ్ చ పిట్టల్ క గూడలు, గని ఆవ్ *మాన్సు జా జెర్మున్ అయ్ లొసాక బోడి వంపొ కెర్తి టాన్ నాయ్” మెన సంగితికయ్,

21 సిస్సుల్ తె అన్నెక్లో యేసుక “ప్రబు, ఆవ్ తుచి తెన్ నే జెతె అగ్గె, గెచ్చు కెర, అంచొ అబ్బొ మొర గెతె ఎదక జోక పొస కెర, జో మొర్రె జోక రోవ గెలుక మెన, అంక సెలవ్ దె” మెన సంగిలన్. చి యేసు జోక దెక,

22 “మొర్రన జోవయించ సొంత మొర్రనక రోవ గెల్లు, గని తూయి బేగి అంచి పట్టి బులుక జె.” మెన జో సిస్సుడుక సంగిలన్.

యేసు దోనితె గెతె వాదుపానిక సేంతుమ్ కెర్తిసి
(మార్కు 4:35-41; లూకా 8:22-25)

23 తెదొడి యేసు దోనితె వెగితికయ్, జోచ సిస్సుల్ జోచి పట్టి వెగిల.

24 జేవ్ సగుమ్ దూరి ఇండయ్ తికయ్, సముద్రుమ్ తె వాదు కెర్తికయ్, వెల్లెల కెర్తల్ జా దోనితె డేవితె తిల, గని యేసు నిజ తిలన్.

25 జేవ్ సిస్సుల్ జోతె గెచ్చు, ఉట్టవ కెర, “ప్రబు మొర గెతనుమ్. అమ్క రచ్చించువ కెరు!” మెన సంగితికయ్,

26 యేసు ఉట్ట కెర, జోవయింక “ఇదిల్ నముకుమ్ చ, తుమ్, కిచ్చొక బితను?” మెన జోవయింక సంగ కెర, వాదుక సముద్రుమ్ క గట్టిజ ఆడ్ర దిలన్. వాదు కెర్తలు ముల దిలి, చి ఎత్కి అన్నె సేంతుమ్ జలి రిసా,

27 సిస్సుల్, “ఈంజొ కిసా మాన్సు, చి వాదు కి సముద్రుమ్ కి ఇన్నెచి కోడెక వంపొ జత్తయ్!” మెన ఆచారిమ్ జల.

బూతల్ దెర్ల దొగులక యేసు చెంగిల్ కెర్తిసి
(మార్కు 5:1-20; లూకా 8:26-39)

28 జో సముద్రుమ్ జిన కెర, †గదరేనులుచి ప్రాంతుమ్ తె పావితికయ్, బూతల్ దెర్లన దొగుల మెన్నె తెంతో బార్ జా కెర, యేసుక దస్సుల్ జల. జేవ్ దొగులచి ఎదివాట్ కోపుమ్ చి రిసా, కో కి జా వాట్ గెచ్చుక దయిరిమ్ నాయ్.

29 యేసు జా వాట్ జెతికయ్, “ఈందె, దేముడుచొ పుత్తుసి, అమ్చి తెన్ తుక కిచ్చొ? అమ్ సిచ్చు జతి పొది నే జెతె అగ్గె అమ్క అల్లర్ కెరుక ఇన్నె అయ్ లది గే?” మెన కేక్తల్ గలిల.

30 జలె, జోవయించి ఇదిల్ ఒత్తల్ క ఒగ్గర్ అండ్రల్ తిలి మంద కతె తతికయ్,

31 జేవ్ బూతల్ యేసుక “తుయి అమ్క ఇన్నె తెంతో ఉదడెగిన, అండ్రల్ తిలి జా మందతె అమ్క తెద్రవ్” మెన, యేసుక బతిమాల్పా జా సంగిల.

32 జో జోవయింక “గెచ్చు!” మెన సంగితికయ్, జేవ్ బూతల్ బార్ జా, జేవ్ మాన్సుల్ క ముల దా, అండ్రల్ చి

పెట్టి పెస గెల, చి జా మందచ అండ్రలు ఎత్కి వెర్రి జా, జా వెల్లి గాటిక నిగ ఉత్త, సముద్రుమ్ తె సేడ మొర గెల.

33 దస్సి జర్గు జతికయ్, మంద రకితన బమ్మ జా, జా పట్టుమ్ తె నిగ గెచ్చు, బూతల్ దెర్లనక జర్గు జలిసి ఎత్కి, కిచ్చొ నే పిట్టె, పట్టుమ్ చక సంగిల.

34 జాచి రిసా, పట్టుమ్ చ ఎత్కిజిన్ యేసు తెన్ దస్సుల్ జంక మెన బార్ జా, దెక కెర, “అమ్చి దేసిమ్ తెంతో ముల దా ఉట్ట గో!” మెన బతిమాల్పా జా, జోక బమ్మ తెన్ సంగిల.

9

ఉట్టుక నెత్తిర్లొ మాన్సుక యేసు చెంగిల్ కెర్తిసి
(మార్కు 2:1-12; లూకా 5:17-26)

1 ఒత్త తెంతో, యేసు దోనితె వెగ కెర, జా సముద్రుమ్ జిన కెర, జోచి సొంత పట్టుమ్ తె పావితికయ్,

2 ఒత్త తిల మాన్సుల్ వాతుమ్ జొర్లొ తెన్ తిలొసా, ఉట్టుక నెత్తిర్లొ అంతుర్లొ తె ఎంగ్ల తిలొసా ఎక్కిలొక జోతె కడ ఆన్. యేసు జేవ్ కడ ఆన్లనచి నముకుమ్ దెక కెర, జో ఉట్టుక నెత్తిర్లొసాక దెక, “ఓ పూత్తు, తుయి దయిరిమ్ జా. తుచి పావల్ చెమించువ జా అస్తి” మెన జోక సంగిలన్.

3 జలె, ఒత్త తిల మోసే తెన్ దేముడు దిలి ఆగ్గల్ సికడ్డన సగుమ్ జిన్ ‘యేసు దేముడు తెన్ సమ్మందుమ్ సంగితయ్. జా వెల్లి పాపుమ్’ మెన బమ్మ జా, లట్టబన్.

4 యేసు జోవయించి మెన్నుతె తిలిసి చిన కెర, “తుమ్చి పెట్టి కిచ్చొక కుస్సిదుమ్ ఉచర్తను?

5 ‘తుచి పావల్ చెమించువ జా అస్తి’ మెనుక సుల్లు గే, ‘ఉట్ట ఇండు’ మెనుక సుల్లు గే?

6 జలె, ‘మాన్సు జా జెర్మున్ అయ్ లయ్ అంక అప్పె ఈంజ లోకుమ్ తె తిలె కి, మాన్సుల్ చి పావల్ చెమించువ కెర్తి అదికారుమ్ అస్సి’ మెన తుమ్క రుజ్జు దెకయిందె” మెన, జో ఉట్టుక నెత్తిర్లొ మాన్సుక అన్నె దెక, యేసు జోక, “తుయి ఉట్ట కెర, తుచి అంతుర్లొ వయన గెరి గో” మెన సంగితికయ్,

7 జో మాన్సు ఉట్ట కెర, గెరి గెలన్.

8 ఇసి జర్గు జతికయ్, ప్రెజల్ దెక కెర, బియఁ గెచ్చు, మాన్సుచి అత్తి జో ఇసి అదికారుమ్ దిలిన్ చి రిసా, దేముడుక గవ్వరుమ్ కెల.

యేసు మత్తయిక బుకార్లన్
(మార్కు 2:13-17; లూకా 5:27-32)

9 యేసు ఒత్త తెంతో ఇదిల్ దూరి ఇండ గెచ్చు, జా పట్టుమ్ చి సిస్టు కడన్ తి గెరిచి వాట్ గెచ్చు కెర, ఒత్త పెస తిలొ మత్తయి మెలొ సిస్టు నజెతోసాక దెక, “అంచి పట్టి జా

అంచో సిస్సుడు జా” మెన జోక సంగిలన్, చి జో ఉట్ట కెర, యేసుచి పట్టి గెలన్.

10 జో మత్తయి మెలోసాచి గెరి అన్నిమ్ కంక మెన యేసు గెచ్చు వెస తతికయ్, జా దేసిమ్చ నిస్కారుమ్ దెకిల సిస్తు నజీతన కి, చి నీతి నే కెరంత ‘పాపుమ్ కెర్లస’ మెన ఒత్తచ యూదుల్ నిస్కారుమ్ దెకిలన ఒగ్గర్జిన్ జోతె జా కెర, జో తెన్ సిస్సుల్ తెన్ వెసిల.

11 జేవ్ ఇన్నె బెద వెసిలిసి దెక కెర, పరిసయ్యుల్ మెంత పండితుల్ యేసుచ సిస్సుల్తె జా కెర, జోవయింక “తుమ్చో గురు సిస్తు నజీతన తెన్ పాపుమ్ కెర్లస తెన్ కిచ్చొక వెస అన్నిమ్ కతయ్?” మెన పుసిల.

12 జేవ్ దస్సి సంగిలిసి యేసు నూన కెర, “జబ్బు తెన్ అస్సుమ్ మెన చినన్లస డాక్టర్ అవ్సురుమ్, గని జబ్బు నెంజిలనక డాక్టర్ అవ్సురుమ్ నాయ్.”

13 జలె, “తుమ్ కిచ్చొ కెర్లిసి అంచి ఆస మెలె, బలి దెతిసి నాయ్, గని మాన్సుల్క కన్కారుమ్ దెకితిసి

మెలి కోడుచి అర్దుమ్ కిచ్చొ జయెదె గే, తుమ్ గెచ్చు సిక్క. ‘ఆమ్ పాపుమ్ కెర్లస’ మెన చినంతనకయ్ బుకార్క ఆవ్ అయ్లయ్, గని ఆమ్ పున్నిమ్ తిలస మెన ఉచరంతనక బుకార్క నాయ్.” మెన యేసు సంగిలన్.

14 తెదొడి బాప్తిసుమ్ దెతె తిలో యోహానుచ సిస్సుల్ యేసుతె జా కెర “పరిసయ్యుల్ కి ఆమ్ కి చువ్వె తంక అలవాట్, గని తుచ సిస్సుల్ చువ్వె తతి నాయ్. కిచ్చొక?” మెన, యేసుక పుసిల.

15 ఇసి పుసితికయ్, యేసు జోవయింక, “కేన్ పెండ్లితె, జోవయించి నెడిమి పెండ్లిఉబేడో తిలె పొది, పెండ్లి విందుతె బుకార్లన ముసుర్లు తవుల గె? నాయ్. బెదె నాయ్. జలె, పెండ్లిఉబేడోచి పచ్చెన జలసచి నెడ్మె తెంతో జోక దెర వేరతె కడ నిలె, జేవ్ పొదుల్క జోచ మాన్సుల్ ఏడ ఏడ చువ్వె తవుల.

16 “జలెకు, పొర్ని పాలుమ్ చిరి జా తిలెగిన, మాసికచి రిసా నే కేడయ్లి నే కేడ్డె నొవి బట్ట గండ కో జాన్ల మాన్సుల్ గల్తి నాయ్. దస్సిచి పొర్నిచితె గల తిలెగిన, జో పాలుమ్ కేడ్డె, జా మాసిక కడెదె. మాన్సు జా పాలుమ్ గలనై, అప్పు జలి పొర్ని బట్ట నొవి బట్టచి మాసిక బెదయ్లి కుటు సాడి చిరి జయెదె, చి అగ్గెచి కంట వెల్లి బొరొ జయెదె.

17 పడ్డె, జలె, ఒత్త నొవి ద్రాచ రస్సుమ్ పొర్నిచి కాయ తెన్ కో సువితి నాయ్. జా కాయ పొర్ని జలి రిసా, దస్సితె నొవి రస్సుమ్ సువిలెగిన, జా కాయ పులుక నెతిరి రిసా, జా రస్సుమ్ పొంగుప జలె, జా కాయ పుట్టెదె. పుట్టిలె, జా రస్సుమ్ నూయి జయెదె, చి కాయ కి పాడ్ జా గెచ్చెదె. జాచి రిసా, నొవి ద్రాచ రస్సుమ్ నొవి కాయల్తె సువుల. దస్సి, జా రస్సుమ్ కి జా కాయ కి పాడ్ నే జస్తె,

చెంగిల్ తయెదె” మెన, జోక పరిచ్చ కెర్ల మాన్సుల్క యేసు సంగిలన్.

బార వెర్పుల్ బాద తెన్ తిలి తేర్బోదక యేసు చెంగిల్ కెర్లిసి

(మార్కు 5:21-43; లూకా 8:40-56)

18 ఒత్త జా తిల మాన్సుల్క యేసు ఈంజేవ్ కొడో సంగితె తతికయ్, ఒత్తచి సబ గెర్చో అదికారి ఎక్కిలో జా కెర, యేసుక దస్సుల్ జా, సెర్ను సేడ జోకర, “అంచి దూ అప్పె మొర గెచ్చు అస్సె. తుయి, జలె, అమతె జా కెర జాక చడిలెగిన, అన్నె జయెదె” మెలన్.

19 జో దస్సి మెంతికయ్, యేసు ఉట్ట కెర జోచి పట్టి గెలన్. జోచ సిస్సుల్ కి బెద గెల.

20-21 జేవ్ వట్టె గెతె తతికయ్, బార వెర్పుల్ తెంతో లోయి గెతి బాద తెన్ తిలి ఏక్ తేర్బోద యేసుచి పట్టి జా, పాచ కెర, “ఆవ్ ఎక్కి జోచో పాలుమ్ జవున్ చడిలెగిన, చెంగిల్ జయిందె” మెన, జాక జయ్యి ఉచరన, జోచో పాలుమ్చి కొంగు చుడిలి.

22 జా చడితికయ్, యేసు పడ్డె పన్ల జాక దెక, “ఓ దూ, దయిరిమ్ తెన్ తా. అంచి ఉప్పిరిచి తుచి నముకుమ్ తుక చెంగిల్ కెర్లి.” మెన సంగిలన్. జా బేగి చెంగిల్ జలి.

23 తెదొడి యేసు జో అదికారిచో గెరి పాచ కెర, నాడి మొర్లి రిసా మూరి పుజీతన, చి బెర తిల ఏడుకుడు జతన ఒగ్గర్ గొడబ జతిసి దెక కెర,

24 “తుమ్ గెచ్చు. ఈంజ నాడి మొర గెచ్చె నాయ్. నిజ అస్సె” మెన జోవయింక సంగితికయ్, జోక ఆసిల.

25 జలె, జనాబ్ ఎత్కిక బార్ కెరవడ కెర, యేసు తెడి గెచ్చు, జా నాడిచో ఆతు దెర్లి బేగి, జీవ్ జా ఉట్టి.

26 ఈంజ కామ్చి రిసా జా ప్రాంతుమ్ ఎత్కితె పాచిలి.

దొగుల గుడ్డి మాన్సుల్క యేసు చెంగిల్ కెర్లిసి

27 యేసు బార్ జా కెర, ఒత్త తెంతో గెరి గెతె తతికయ్, దొగుల గుడ్డి మాన్సుల్ జోచి పట్టి జా, “దావీదు రానొచి సెకుమ్తె జెర్మిలో రచ్చించుప కెర్లొసా, అమ్చి ఉప్పిరి కన్కారుమ్ తియ, అమ్క చెంగిల్ కెరు!” మెన కేకుల్ గల్తె తిల.

28 యేసు గెరి గెచ్చు పెసిలి పడ్డె, జేవ్ గుడ్డి మాన్సుల్ ఒత్త జోతె అయ్ల. జెతికయ్, యేసు జోవయింక “తుమ్ ఉచర్లిసి అంక ‘కెరుక తెరె’ మెన తుమ్ నంపజతసు గే?” మెన జోవయింక పుసితికయ్, జేవ్, “ప్రబు, అమ్ నంపజతసుమ్” మెన జోక సంగిల.

29 యేసు జోవయింక అంకివొతె చడ కెర, “ఆవ్ తుక ‘చెంగిల్ కెరుక తెరె’ మెన తుమ్ నంపజలిసి రిసాయి తుమ్క జర్గు జవున్!” మెన, సంగిలన్.

30 సంగిలి బేగి, జోవయింక అంకివొ డీసిల. పిమ్మట్, యేసు జోవయింక “ఈంజ కామ్ కో కి నేన్తె రితి దెకన, తుమ్ దొగుల తుక్లె తా” మెన గట్టిజ సంగిలన్.

31 గని, జేవ్ ఉట్ట గెచ్చు, జా ఒండి గలిలయ ప్రాంతుమ్తె జోచి గవురుమ్ సంగితె తిల.

గుల్లో కెర్తొ బూతుమ్క యేసు ఉదడ గెలిసి

32 యేసు సిస్సుల్ తెన్ బార్ జా కెర, అన్నె బులుక గెతె తతికయ్, బూతుమ్ దెర్లొ గుల్లో సుదొ ఎక్కిలోక జోతె కో గే కడ ఆన్ల.

33 యేసు జో బూతుమ్క ఉదడ గెలి బేగి, జో గుల్లో సుదొ లట్టబన్లొ. ఒత్త బెర తిల జనాబ్ ఆచారిమ్ జా, “అమ్చ ఇస్రాయేలుల్తె ఇసిచి జర్గు జలిసి కెయ్య దెకుమ్ నాయ్. ఆజి జర్గు జలి!” మెన లట్టబన్ల.

34 గని పరిసయ్యుల్ కిచ్చొ మెల మెలె, *“బూతల్క రానొ జలోసాచి నావ్ తెన్ ఈంజొ బూతల్క ఉదడయ్” మెన అరుగురు జా, గోసక సంగిల.

35 యేసు జా గలిలయ ప్రాంతుమ్ ఒండిచ పట్టులె గెచ్చిలె బుల బుల, జోవయిం చ నబ గెరలె గెచ్చు, పరలోకుమ్చి రాజిమ్ పాసి జా అయ్లినచి రిసాచి సుబుమ్ కబుర్ సంగ, ఎత్కి రగల్చ జబ్బులు నొప్పులు గెచ్చవ, మాన్సుల్క చెంగిల్ కెర్తె తిలన్.

36 దస్సి బుల్తె పొది, ఒగ్గర్ జనాబ్ జోతె అయ్ల జేవ్ మాన్సుల్క దెక దెక, జేవ్ గొవుడు నెంజిల మెండల్ రిత మాలజ్ జా సైమల్ తెన్ తిలిసి దెక, జోవయించి ఉప్పిరి కన్కారుమ్ జా,

37 “గట్టిజ పంటొ పిక లాయితి సమయుమ్ జా అన్నె.

38 జాచి రిసా, ‘ఈంజ పంటొ లాయితి రితి, ఈంజ పంటొక ఎజొమాని జలో ప్రబు లాయిత మాన్సుల్క తెద్రవుసు’ మెన, తుమ్ జోక ప్రార్దన కెర” మెన యేసు సిస్సుల్క సంగిలన్.

10

బారజిన్ సిస్సుల్క యేసు అదికారుమ్ దిలిసి

(మార్కు 3:13-19; 6:7-13; లూకా 6:12-16; 9:1-

6)

1 తెదొడి యేసు జోచ బారజిన్ సిస్సుల్క పాసి బుకారా కెర, బూతల్ గట్టక ఉదడ గెలుక మెన, రగరగాల్చ జబ్బులు బాదల్ జల మాన్సుల్క చెంగిల్ కెరుక మెన, జోవయింక అదికారుమ్ దిలన్.

2 జేవ్ బారజిన్ యేసుచ, బారికుల్చ నవ్వొ కిచ్చొ కిచ్చొ మెలె, తొలితొ పేతురు మెన అన్నెక్ నావ్ తిలొ సీమోను, చి జోచొ బావొని అంద్రెయ్. ఒత్త తెంతొ, జెబెదయిచొ పుత్తుని యాకోబు, చి యాకోబుచొ బావొని యోహాను.

3 ఒత్త తెంతొ, పిలిప్ చి బర్థొలోమయి, తోమా చి మత్తయి మెలొ సీస్తు నజితొసా. ఒత్త తెంతొ, అల్పయిచొ పుత్తుని యాకోబు, చి తద్దయి మెలొసా.

4 ఒత్త తెంతొ, కనానుచొ సీమోను మెలొ అన్నెక్లొ, చి పడ్డొ యేసుక దెర తిలొ ఇస్కరియోతు మెలి గెచ్చిచొ యూదా.

5 యేసు జేవ్ బారజిన్క అదికారుమ్ దా కెర బులుక తెద్రయ్లి పొది, కిచ్చొ సెలవ్ దిలన్ మెలె, “యూదుల్ నెంజిలనతె అప్పె గెచ్చుక పొన, చి సమరయ ప్రదేసిమ్చ పట్టులె పెన నాయ్.

6 జలె, పిట్ట గెల గొవుడు నెంజిలి మంద రితి జా తిల ఇస్రాయేలుల్తె తుమ్చ సొంత మాన్సుల్తె తుమ్ గెచ్చు.

7 తుమ్ గెచ్చు, చి ‘పరలోకుమ్చి రాజిమ్ పాసి జా అన్నె’ మెన బోదన కెర.

8 జబ్బు మాన్సుల్క చెంగిల్ కెర. మొర గెలసక జీవ్ కెర. వెల్లి జబ్బుల్ తిలసక చెంగిల్ కెర సుద్ది కెర, చి బూతల్క ఉదడ గెల. ఆవ్ దెతిసి ఆరి తుమ్క దొర్కు జలి. మాన్సుల్క ఆరి తుమ్ దాన.

9 “తుమ్ బుల్తె పొది, బజార్ గే వెండి గే రాగిచ కాసుల్ గే, కిచ్చొ రగుమ్ డబ్బుల్ జలెకు దెరన బార్ జా నాయ్.

10 దస్సి, నెంచె జలెకు, దొన్ని సొక్కల్ జలెకు, జోడ్డు జలెకు, టొక్కొ డండొ జలెకు దెరన బార్ జా నాయ్. తుమ్ కచి రిసా కామ్ కెర్తె గే, తుమ్ కెర్తి కామ్చి రిసా జో దెతి అన్నిమ్ తుమ్ నజనుక నాయిమ్.

11 “అన్నె, తుమ్ కేన్ పట్టుమ్తె జలెకు గెచ్చి జలెకు పెసితె పొది, ఒత్త తగుప జలోసా కో గె జానన, చి తుమ్ ఒత్త తెంతొ ఉట్ట గెతె ఎదక జోచితె తా.

12 జోచి గెరి తుమ్ పెసితె పొది, జా గేర్చక, తుమ్క సేంతుమ్ తవుసు మెన చెంగిల్ సంగ.

13 జా గేర్ సేంతుమ్క తగుప జతిన్ జలె, తుమ్ ఆన్లి సేంతుమ్ జోవయింక జర్గు జా, తవుసు. జా గేర్చ సేంతుమ్క నే తగుప జతిన్ జలె, తుమ్ ఆన్లి సేంతుమ్ జోవయింక నే తతె తుమ్క అన్నె బుల జెయెదె.

14 కో జలెకు తుమ్క మరియాద నే కెర్తెగిన, తుమ్ ఆన్తి కబుర్ నే నూన్లెగిన, జో గేరు జలెకు, జా గావ్ జలెకు ముల దా, తుమ్ ఉట్ట గెతె పొది, జా గుర్తుక, తుమ్చ చట్టొ జా టాన్తెచి లంబిలి దూడి పంప్త గెల, చి ఉట్ట గెచ్చు.

15 ఈంజ లోకుమ్చక వెల్లి తీర్పు కెర్తి దీసి అయ్లె, సాదొమ చి గొమొరా మెల పూర్గుమ్ కుడ్డె నాసెనుమ్ జల పట్టుల్చి గత్తిచి కంట, తుమ్క మరియాద నే కెర్తి కేన్ గెచ్చిచచి గత్తి ఒగ్గర్ సిచ్చుచి జయెదె, మెన నిజామి తుమ్క ఆవ్ సంగితసి.

16 “ఈందె, డొర్కొవచి నెడమె మెండల్క తెద్రయ్లి రితి, దస్సి, తుమ్క మాన్సుల్తె ఆవ్ తెద్రయ్తసి. జాచి రిసా, అయివొ కెద్ది తెలివి అస్తి గే, తుమ్ కి తెద్ది తెలివి జా తా. గని, దస్సి తెలివి జలెకి, పార్వ పిట్టల్చి రితి, తేట మెన్సు తిల సుదల్ జా తా.

* 9:34 9:34 ‘బూతల్క రానొ జలోసా’ మెలె, నయ్తాన్.

17 కోపుమ్ జత మాన్సుల్చి రిసా జాగర్త తెన్ తా. జేవ్ తుమ్క తీర్పు కెర్త సబల్తె సార్పు కెర, జోవయించ సబ గెరలె తుమ్క కొర్డల్ తెన్ పెటుల.

18 తెదొడక అంచి రిసా జేవ్ మాన్సుల్ తుమ్క దెర అదికారుల్తె, రానల్తె ఒగ్గొడ నెవుల. చి జోవయించి మొక్కె కి, వేర దేసిమ్లు తెంతో అయల అమ్చ యూదుల్ నెంజిలసచి మొక్కె కి తుమ్ అంచి రిసా సాచి సంగితె.

19 మాన్సుల్ తుమ్క దస్సి సార్పు కెర్తె పొదిక, కీసి లట్టబుక గే, కిచ్చొ సంగుక గే, ఉచర చింత గలన నాయ్. కిచ్చొక మెలె, తుమ్ జోవయింక కిచ్చొ సంగుక గే, తెదొడకయ్ దేముడుచి సుద్ది తిలి ఆత్మ తుమ్క దెయెదె.

20 మెలె, తుమ్చొ అబ్బొసి జలో దేముడుచి సుద్ది తిలి ఆత్మ తుమ్చి పెట్టి తా కెర, జొయ్యి లట్టబెదె. తుమ్ ఉచర లట్టబ్బు నాయ్.

21 “జా పొదిక, అన్నొన్క బావొసి జలెకు, పుత్తున్క అబ్బొసి జలెకు, మొర్తి సిచ్చతె సార్పు దెవుల. అన్నె, పుత్తర్పుల్ అయ్యస్ అబ్బొన్చి ఉప్పిరి విరోదుమ్ జా, జోవయింక మొరవుల.

22 అంచి నావ్చి రిసా ఒగ్గర్ ఒగ్గర్జిన్ తుమ్క విరోదుమ్ జవుల. ఈంజేవ్ అల్లర్ పూర్తి జతె ఎదక కో అంక నిదానుమ్ తా ఓర్పువ జవుల గే, రచ్చించువ జవుల.

23 మాన్సుల్ ఏక్ పట్టుమ్తె తుమ్క అల్లర్ కెర్తె, అన్నెక్ పట్టుమ్తె ఉట్ట నిగ. కిచ్చొక మెలె, తుమ్క ఆవ్ కిచ్చొ సంగితసి మెలె, ఆవ్ మాన్సు జా జెర్మున్ అయ్లోసా అన్నె జెతె ఎదక, అమ్చ ఇస్రాయేలుల్చ పట్నల్ ఎత్కితె తుమ్ బుల కేడవుక నెతుర్పు.

24 “జోచొ గురుచి కంట సిస్సుడు వెల్లో నెంజె. దస్సి కి, జోచొ ఎజొమానిచి కంట గొత్తి మాన్సు వెల్లో నెంజె.

25 సిస్సుడు జోచొ గురుచొ రితొ, గొత్తి మాన్సు జోచొ ఎజొమానిచొ రితొ జలె, సరి జతయ్. దస్సి, ఆవ్ గెర్చొ ఎజొమానిక *‘బయెల్జెబూల్’ మెన కోపుమ్ జల మాన్సుల్ సంగ అస్తి జలె, తుమ్ అంచి గెర్చ ఎత్కిక కి కచితుమ్ దస్సి దూసుప కెరుల.

కక్క బింక గే నే బింక గే యేసు సంగిలిసి
(లూకా 12:2-7)

26 “జలె, జేవ్ అల్లర్ కెర్తెనక తుమ్ బియఁ నాయ్. డంక తిలిసి కిచ్చొ జలెకి కెయఁక తెయఁక నే డీస్తె తయె నాయ్, లుంకణ్ణిసి కిచ్చొ జలెకి కెయఁక తెయఁక ఎత్కిక నే జాన్తి రితి తయె నాయ్. ఆకర్క డీసెదె, ఆకర్క జానన్క జయెదె.

27 ఆవ్ గుట్టు తెన్ తుమ్క సంగితిసి తూమ్ ఎదార్దుమ్ సంగ. కంగ్గయి తుమ్క ఆవ్ సంగితిసి తూమ్ మేడల్చ ఒర్వెలె తెంతో సాట్పు కెర.

28 తుమ్చి ఆఁగుక మారుక తెర్లనక తుమ్ బియఁ నాయ్. కిచ్చొక మెలె, తుమ్క మార్తె కి, తుమ్చి ఆత్మక మారుక నెతిర్తి. గని ఆత్మక కి ఆఁగుక కి మార వెల్లి ఆగి గొయ్తె గల దా, నాసెనుమ్ కెరుక తెర్లొసాకయ్ తుమ్ బియఁ.

29 “ఈంజ దేసిమ్చ మాన్సుల్ దొన్ని గెర్పిట్టల్ ఎక్కి కాసుక వికుల. జలెకి, తుమ్చొ అబ్బొసి జలో దేముడుచి సెలవ్ నెంజిలె, దస పిట్టల్తె ఎక్కి కి బుయ్యె సేడె నాయ్.

30 తుమ్చి బోడిచ సెండి వాడల్ ఎత్కి మొత్తుమ్ కెత్తి అస్తి గే జొయ్యి జానె.

31 జాచి రిసా, తుమ్ బియఁ నాయ్. తుమ్ పిట్టల్చి కంట ఒగ్గర్ విలువ అస్సున్.

32 “కో అంక నంపజా, మాన్సుల్చి మొక్కె ఒప్పునుల గే, జోక అమ్చ మాన్సుల్ ఈంజేవ్ మెన, పరలోకుమ్ తిలొ అబ్బొసి జలో దేముడుచి మొక్కె ఆవ్వి సాచి సంగిందె.

33 గని, మాన్సుల్చి మొక్కె కో అంచి రిసా ‘జోచొ నెంజ’ మెనుల గే, దస్సి పరలోకుమ్ తిలొ అబ్బొసి జలో దేముడుచి మొక్కె జోక ‘అమ్చ నెంజితి’ మెన సంగిందె.

34 “ ‘జో బూలోకుమ్తె అయ్లిసి మాన్సుల్తె ఎక్కి సేంతుమ్ కెరెదె’ మెన తుమ్ అంక ఉచర నాయ్. సేంతుమ్ నాయ్, గని జట్టి కెరయ్తి రితి అయ్లయ్.

35 కిసి మెలె, ఆవ్ అయ్లి రిసా, జోచొ అబ్బొన్క పుత్తుసి, జాచి అయ్యన్క దువిసి, జాచి అత్తన్క నూనుసి విరోదుమ్ జవుల.

36 దస్సి, ఏక్ మాన్సుచి కుటుంబుమ్చయ్ జోక విరోదుమ్ సుదల్ జవుల.

37 “అబ్బొన్క జలెకు, అయ్యన్క జలెకు అంచి కంట కో ఒగ్గర్ ప్రేమ కెరుల గే, దస్సి మెననుక అంక తగువ జలన నెంజితి. పుత్తున్క జలెకు, దువిన్క జలెకు అంచి కంట కో ప్రేమ కెరుల గే, దస్సి మెననుక అంక తగువ జలన నెంజితి.

38 అంచి రితి జోవయించి సొంత సిలువ వయన్లి రితి జా, కో అంచి పట్టి జెతి నాయ్, దస్సి మెననుక అంక విలువ జలన నెంజితి.

39 కో జోచి సొంత ప్రానుమ్ రచ్చించువ కెరనుక చజాల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి నిదానుమ్ ఇండుల గే, జోచి ప్రానుమ్ రచ్చించువ జా జోక దొర్కు జయెదె.

40 “తుమ్క కో మరియాద కెరుల గే, జేవ్ తుమ్క మరియాద కెర్లిసి, అంకయి మరియాద కెర్లిసి జతయ్. అన్నె, అంకయి కో మరియాద కెరుల గే, జేవ్ దస్సి కెర్లిసి అంక తెద్దయ్లోసాక కి మరియాద కెర్లిసి జతయ్.

41 జలె, ‘దేముడు సంగిలి కబుర్ ఆన్తోసా, ఈంజొ’ మెన కో దస మాన్సుల్క మరియాద దెకుల గే, జోవయింక కి ప్రబుచి కబుర్ సంగితొసాక దెతి రితి బవుమానుమ్ దొర్కు.

* 10:25 10:25 ‘బయెల్జెబూల్’ మెలె, నయ్తాన్, బూతల్క రానొ జలోసా.

జయెదె. పడ్డొ, 'ప్రబుచి నీతి తెన్ తిలోసా, ఈంజొ' మెన చిన, కో దసా మాన్సుక మరియాద కెరుల గే, జోక కి నీతి తిలోసాక దెతి రితి బవుమానుమ్ దొర్కు జయెదె.

42 పడ్డొ, 'యేసుచ సిస్సుల్' మెన కో ఈంజేవ్ గవురుమ్ నెంజిల నంపజలసతె ఎక్కిలోక కి ఎక్కి బుక్కెక్ పాని కి పియడుల గే, జోవయింక కి బవుమానుమ్ దొర్కు జయెదె, మెన నిజుమి సంగితసి" మెన సిస్సుల్క యేసు సంగిలన్.

11

1 యేసు జోచ బారజన్ సిస్సుల్క బోదన కెర్లిసి కేడ్లి పడ్డొ, జా గలిలయ ప్రాంతుమ్చ పట్నల్తె బోదన కెరుక మెన బార్ జలన్.

జేల్తె తిలో యోహాను యేసుక తెద్రయేలి కబుర్
(లూకా 7:18-35)

2 బాప్తిసుమ్ దెతో యోహానుక హేరోదు రానొ జేల్తె గల తిలో. జలె, క్రిస్తు కెర్ల కమొచి రిసా యోహాను జేల్తె నూన కెర, జోచ సిస్సుల్ తెన్ యేసుక కిచ్చొ కబుర్ తెద్రయేలన్ మెలె, "దేముడు తెద్రయిందె మెలో రచ్చింఛుప కెర్తోసా నిజుమి తుయి గే, అమ్ అన్నెక్కోక రకుక గే?

3 మెన పున" మెన సంగ తెద్రయేలో.

4 యేసు యోహానుచ సిస్సుల్క, దెక కెర నూన కెర, "తుమ్ గెచ్చ, చి దెకిలిసి నూన్లిసి ఎత్తి యోహానుక సంగ.

5 గుడ్డి జా తిల మాన్సుల్ దెకితతి, సొట్ట జా తిల మాన్సుల్ ఇండితతి, వెల్లి రోగుమ్ సేడ తిలన చెంగిల్ జా నుద్ది జతతి, బోయ్ రొ జా తిల మాన్సుల్ నూన్తతి, మొర గెలన జివ్ జతతి, నుబుమ్ కబుర్ బీద మాన్సుల్క నూనయేతసి.

6 జలె, 'కో జలెకు అంచి రిసా అన్మానుమ్ నెంతె తవుల గే, జోక చెంగిలి" మెన యేసు సంగ తెద్రయేలన్.

యోహానుచి రిసా యేసు సంగిలిసి

7 యోహానుచ సిస్సుల్ ఉట్ట గెతె తతికయ్, ఒత్త తిల ప్రెజల్క యోహానుచి రిసా యేసు ఇసి మెన సంగుక దెర్లన్. "తుమ్ కిచ్చొ దెకుక జా బయిలె గెచ్చ తిలదు? వాదుతె చివ్వర్ వెల్లి జతిసి దెకుక గెచ్చ తిలదు గే?

8 నాయ్ మెలె, కిచ్చొ వేరచి దెకుక గెలదు? సొమ్మార్లు గలంత పాలల్ గలన్లో మాన్సుక దెకుక గెలదు గే? ఈందె, దస్స పాలల్ గలంతన రానల్చి గెరలె తవుల.

9 జలె, కిచ్చొ దెకుక గెలదు? దేముడు తెద్రయేలి కబుర్ సంగితోసా ఎక్కిలోక దెకుక గెలదు గే? నిజుమి. గని, జో ప్రబుచ మాములుమ్ కబుర్లు సంగితనచి కంట యోహాను ముక్కిమ్చొ జయెదె," మెన తుమ్క ఆవ్ సంగితసి.

10 "ఈందె, అంచి కబుర్ సంగితోసా జతి రితి ఎక్కిలోక తుచి పురె తెద్రయేతసి. తుచి కంట అగ్గె గెచ్చ, తుయి జెతిసి సొట్టు కెరెదె"

మెన రెగిడ్లి కోడ్ అస్సె. జా కోడు యోహానుచి రిసాయి 'అంచి కబుర్ సంగితోసా' మెన కచి రిసా సంగితయ్.

11 జాచి రిసా, తెర్నిమున్ను లట్టల్లి రిసా జెర్మిలసతె బాప్తిసుమ్ దిలో యోహానుచి కంట వెల్లొచొ కోయి నాయ్ మెన ఆవ్ కచితుమ్ తుమ్క సంగితసి. జలెకి, పరలోకుమ్చి రాజిమతె బెదితసతె, కో ఎత్తిచి కంట దాక్ జవుల గే, జో యోహానుచి కంట వెల్లెల జవుల.

12 "బాప్తిసుమ్ దిలో యోహానుచ దీసల్ తెంతో మొదొల్ కెర, పరలోకుమ్చి రాజిమ్ పెలయ్లి రితి జెతె అస్సె, చి మాన్సుల్ బమ్మ తెన్ జేవేతె బెదితతి.

13 యోహాను ఎదక దేముడుచ కబుర్లు సంగిలన, మోసి పూర్ణమ్చొచి అత్తి దేముడు రెగ్గయ్ల *అగ్గల్చి కొడొ ఎత్తి పరలోకుమ్చి రాజిమ్ జెతిన్చి రిసా సంగితయ్. జేవ్ ఎత్తిజిన్చి ఆకర్తె యోహాను అయ్లో.

14 అంచి కబుర్ పూర్ణమ్ సంగిలో ఏలీయా రితోసా ఎక్కిలోక తెద్రయిందె" మెన ప్రబు అగ్గె సంగ తిలో. జలె, తుమ్ నంప కెర్లె గే నాయ్ గే, గని జో తెద్రయి జలోసా యోహాను.

15 నూన్త కంగ్గొ తిలన నూన.

అన్మానుమ్ జతనచి రిసా యేసు గోల కెర్లిసి

16 "జలె, ఈంజ ఉగుమ్చ మాన్సుల్చి బుద్దిక కిచ్చొ టాలి జయెదె? వీదులె వెన కెల్ల బోదల్చ రిత జతతి, జేవ్ బోదల్ జోవయింతెన్ బెద కెల్ల బోదల్ బుకార కెర,

17 తుమ్క 'నచ్చుతు' మెన బచ్చి పుంగిలెకి నచ్చును నాయ్. అమ్ ఏడ్లెకి, తుమ్ బెద ఏడ్పు నాయ్, మెన దన బోదల్ కిసి సంగుల గే, దస్సి ఆవ్ చి యోహాను కిచ్చొ కెర్లె కి, తుమ్ మెన్సున్ నాయ్.

18 కిచ్చొక ఆవ్ ఇసి టాలి కెర్లెసి మెలె, యోహాను చువ్వె తన్నె తతోసాచి రిసా, 'జోక బూతుమ్ దెర అస్సె' మెన సంగితె తిల.

19 ఆవ్, జలె, మాన్సు జా జెర్మన్ అయ్లోసా, మాములుమ్ కతె పితె తతిన్చి రిసా కిచ్చొ మెంతతి మెలె, 'ఆదె, కయ్ రొ మత్వాలొ ఈంజొ. సిస్టు నజితన తెన్ పాపుమ్ కెర్లెన తెన్ బెదితోసా' మెన అంక నిస్కారుమ్ సంగితతి. గని ఎక్కిలోచి పెట్టి చెంగిల్ తెంతో చి బుద్ది తిలె, జోచ కమొచి పలితుమ్తె రుజ్జు జయెదె" మెన యేసు సంగిలన్.

పట్నల్క యేసు గట్టిజ గోల కెర్లిసి
(లూకా 10:13-15)

* 11:13 11:13 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లి అగ్గల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుసియ బాసతె నొయ ప్రమానుమ్తె మోసి పూర్ణమ్చొచి అత్తి రెగిడ్లి దేముడుచ అగ్గల్ మెన రగ్గవ అస్సె.

20 యేసు జా గలలయ ప్రాంతుమతచ సగుమ్ పట్నల్తె ఒగ్గర్ ఒగ్గర్ అద్బుతుమ్ కమొ కెర్లన్. ఈంజేవ్ కమొ జోచి అదికారుమ్క రుజ్జు దెకయ్లెకి, ఒత్త తిల మాన్సుల్ జేవ్ కెర్ల పాపల్చి రిసా దుకుమ్ జతి నాయ్, ములితి నాయ్. జాచి రిసా, యేసు ఇసి మెన జోవయింక గోల కెరుక దెర్లన్:

21 “అయ్యో! కొరాజినా పట్నుమతచ చి బేత్నయిదా పట్నుమతచ, తుమ్చి సిచ్చ పిట్టె నాయ్! తుమ్చి నెడిమి కెర్ల కమొ అమ్చ యూదుల్ నెంజిల తూరు చి సిదోను మెల పట్నల్తె ఆవ్ కెర్లయ్ జలె, జేవ్ పట్నల్చ మాన్సుల్ అగ్గెయి జేవ్ కెర్ల పాపల్చ దుకుమ్ జా, ములిత. జేవ్ కెర్ల పాపల్చి దుకుమ్చి రుజ్జుక బస్తల్ బందన సార్ గాంసంత.

22 పూర్ణమ్ జేవ్ తూరు పట్నుమచ కి సిదోను పట్నుమచ కి ఒగ్గర్ పాపుమ్ కెర్లె తిలె కి, ఈంజ లోకుమ్చ ఎత్తిజిన్క వెల్లి తీర్పు కెర్లె జా దీసిక, తూమ్ జతి సిచ్చ జేవ్ పట్నల్ జతి సిచ్చచి కంట ఒగ్గరి జయెదె, మెన తుమ్క ఆవ్ కచితుమ్ సంగితసి.

23 “పడ్డె, తుమ్ కెర్రహూమ్ పట్నుమతచ, తుమ్ పరలోకుమ్తె ఉక్కిల్ జస్సె గే? నాయ్. తుమ్ మొర్లన రకితి టాన్తె ఉత్త గెతె. కిచ్చొక మెలె, తుమ్చితె ఇన వెల్లో కమొ అమ్చ యూదుల్ నెంజిలి సాదోమ పట్నుమతె పూర్ణమ్ కెర తత్తయ్ జలె, ఒత్త తిలన నంపజత, చి జా పట్నుమ్ నాసెనుమ్ నే జతె, ఆజి ఎద తత్తి.

24 సాదోమ పట్నుమచ మాన్సుల్ ఒగ్గర్ పాపుమ్ కెర్లె తిలె కి, ఈంజ లోకుమ్చ మాన్సుల్క వెల్లి తీర్పు కెర్లె దీసిక, తూమ్ జతి సిచ్చ జా పట్నుమచ జతి సిచ్చచి కంట ఒగ్గరి జయెదె, మెన ఆవ్ తుమ్క సంగితసి.” మెన యేసు సంగిలన్.

25 తెదొడి యేసు కిచ్చొ సంగిలన్ మెలె, “పరలోకుమ్క కి బూలోకుమ్క కి అదికారుమ్ తిలొ ఓ అబ్బొ, ‘జానుమ్’ మెన జేవ్క జెచ్చి గవురుమ్ ఉచరంతనక చి ఒగ్గర్ సదు కెర్లనక ఈంజ జర్గు జతినె ఎత్తిచి అర్దుమ్ లుంకడ, బాలబోదల్ జల రిత గవురుమ్ నెంజిలనక అర్దుమ్ దెకవ అస్సిసి మెన తుక జోబర, మెన అంచి సర్ల జతసి.

26 తుచి దయ తెన్ ఇసి కెర్లది” మెన ప్రార్లన కెర్లన్. దస్సి ప్రార్లన కెర, అన్నె ఇసి మెన సంగిలొ.

27 “అంచొ అబ్బొ ఎత్తి అంచి అత్తి సార్ప కెర దా అస్సె. అన్నె, అబ్బొ ఎక్కిలొయి ఆవ్ పుత్తున్క సరిగా జానె అన్నె కో కి నేన్తి. పడ్డె, ఆవ్ పుత్తుసి అంక పిట్టవ కో కి అబ్బొక

నేన్తి చి అన్నె కక్క. ఆవ్ అబ్బొక దెకవుక మెన నిసాన్దె గే, జో కి జానెదె.

28 “నైమల్ బాదల్చ జాడ్లు వయ టక్క తిలన ఎత్తిజిన్ అంచితె జా, చి తుమ్చి జాడు ఆవ్ వయిలి రితి జా, తుమ్క వుండయిందె.

29 అంచి తెన్ లంకె జా, చి అంచితె బుద్ధి సిక్క. కిచ్చొక మెలె, ఆవ్ గవురుమ్ నే ఉచరంతె, పెట్టి అమ్మయికుమ్ తెన్ అస్సి, చి తుమ్చ ఆత్మల్తె వుండితె.

30 కిచ్చొక మెలె, ఆవ్ గల్లి పూండు సుల్లు అస్సె, ఆవ్ వయడ్డి జాడు సుల్కన అస్సె” మెన యేసు సంగిలన్.

12

బక్తి కెర్లె దీసి రిసా యేసు సంగిలిసి
(మార్కు 2:23-28; లూకా 6:1-5)

1 జా పొదులె, *సెలవ్ కడన్లె దీన్తె, యేసుచి సిస్సుల్, పంటొ పికిలి బుయి వాట్ గెతె తిల. జలె, యేసుచ సిస్సుల్క చూ కెర్లెకయ్. జా వాట్ సాడిచి పికిలి పంటొచ ఎన్నులు దొన్ని కోడ కంక దెర్ల.

2 జలె, పరినయ్యుల్ సగుమ్జిన్, జేవ్ సిస్సుల్ కెర్లెసి దెక కెర, “ఆదె, †బక్తి కెర్లె సెలవ్ కడన్లె దీసి కెరుక నాయిమ్ నెంజిలిసి తుచ సిస్సుల్ కెర్లెతి” మెన యేసుక గోల కెర్లెకయ్,

3 జో జోవయింక ఇసి మెలన్: “పూర్ణమ్ తిలొ దావీదు రానొ, జోక చి జో తెన్ తిలనక చూ కెర్లెకయ్, జో కెర్లెన్చి రిసా తుమ్ సదు కెర్లు నాయ్ గే?

4 కిచ్చొ కెర్లెసి మెలె, దేముడుచి గుడితె జో పెసిలన్, చి ఒత్త తిల పూజర్లు అర్పితుమ్ దిల పొడియొ కయ్ల. జేవ్ పొడియొ పూజర్లు కంక జయెదె, గని అన్నె కో కంక జయె నాయ్. జో కి, జో తెన్ తిలన కి జా కంక నాయిమ్ నెంజిలె కి జేవ్ కయ్ల.

5 పడ్డె, ఎత్తి బక్తి కెర్లె సెలవ్ కడన్లె దీసి, దేముడుచ పూజర్లు దేముడుచి గుడితె సేవ కెర్లెతి. జా సేవక ‘కామ్. సుద్ది దీసి పిట్టవ గార్ కెర్లెతి మెన ఉచరుక జయెదె జలెకి, పాపుమ్ నెంజె’ మెన మోసి పూర్ణమ్చొచి అత్తి రెగిడ్డి దేముడుచ ‡ఆగ్గుల్తె తిలిసి సదు కెర్లు నాయ్ గే?

6 జలె, ఆవ్ తుమ్క సంగితిసి కిచ్చొ మెలె, దేముడుచి గుడిచి కంట వెల్లో సుదొ ఇన్నె అస్సె.

7 ‘తుమ్ కిచ్చొ కెర్లెసి అంక ఆన మెలె, బలి దెతిసి నాయ్, గని మాన్సుల్క కన్యారుమ్ దెకితిసి’

* 12:1 12:1 ఎత్తి సెన్సర్ల యూదుల్క బక్తి కెర్లె సెలవ్ కడ దీసి జయెదె. జా దీసి జోవయింక నబ గెరలె గెచ్చ, దేముడుచ కొడొ సూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్డి రితి కెర కామ్ నే కెర్లెన్చి రిసా ఒగ్గర్ ఆగ్గుల్ అచ్చి ఉచర అస్సి. ఇన్నె, దొన్ని ఎన్నులు కోడ్లెన్క ‘కామ్’ మెన నింద కెర్లెతి.

† 12:2 12:2 ఎత్తి అదికారుమ్ తిలొ దేముడు ఒగ్గర్ పూర్ణమ్ పొది సంగిలి రితి, యూదుల్ ముక్కిమ్క సెన్సర్ల దీసి సబతె గెచ్చ బోదన సూన బక్తి కెరుల, చి కిచ్చొ కామ్ కెర్లె నాయ్. కామ్ నే కెర్లె ఆగ్గు ప్రజల్ నే పిట్టయ్తి రితి, జోవయింక వెల్లెల మాన్సుల్, కన్యారుమ్ పచ్చ, ప్రబు సంగిలి కంట అన్నె ఒగ్గర్ ముద్దొ కెర్లెతి. ‡ 12:5 12:5 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచే పుస్తకమతె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమతె మోసి పూర్ణమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె.

మెన తెదొడి సంగిలి కోడు తుమ్ అర్దుమ్ కెరంతదు జలె, పాపుమ్ నే కెర్ల ఈంజేవ్ సిస్సుల్క 'పాపుమ్ కెర్ల' మెన, నింద కెర్లదు నాయ్.

8 సెలవ్ కడన్లి దీసిచి ఉప్పిరి ఆవ్ మాన్సు జా జెర్మున్ అయ్లోసాక అదికారుమ్ అస్సె." మెన, జేవ్ పరిసయుల్క యేసు సంగిలన్.

ఆతు లంబిలోసాక యేసు చెంగిల్ కెర్లిసి
(మార్కు 3:1-6; లూకా 6:6-11)

9 యేసు ఒత్త తెంతో గెచ్చ, జా కపెర్నహూమ్ పట్టుమ్తెచి సబ గెరి పెసిలో.

10 ఒదె, ఆతు లంబ గెలోసా ఎక్కిలో ఒత్త తిలన్. జేవ్ పండితుల్, కి, జో బాద తిలో మాన్సు అస్సె మెన దెక కెర, యేసుక నేరిమ్ వయడుక ఉచర, "సెలవ్ కడన్లి దీసి ఏక్ బాద తిలో మాన్సుక చెంగిల్ కెరుక నాయిమ్ గే, నాయ్?" మెన జోక వుసిల.

11 జో జోవయింక, "తుమ్చితె కేన్ మాన్సుక జలెకు ఎక్కి మెండ జవున్ తిలెగిన, జా మెండ బక్తి కెర్లి సెలవ్ కడన్లి దీసి ఏక్ గొయితె సేడ తిలెగిన, జో ఎజోమాని జాక జా గొయి తెంతో కడె నాయ్ గే?"

12 జలె, మెండచి కంట మాన్సు ఒగ్గర్ విలువ. జాకయ్, సెలవ్ కడన్లి దీసి కి మాన్సుక చెంగిల్ కెరుక నాయిమి" మెన జబాబ్ దా,

13 యేసు జో ఆతు లంబిలోసాక దెక, "తుచి ఆతు చంపొ కెరు" మెలన్. జో మాన్సు ఆతు చంపొ కెర్లన్, చి ఈంజో ఆతు బేగి అన్నెక్ చెంగిల్ తిలి ఆతుచి రితి చెంగిల్ జలి.

14 గని యేసు దస్సి కెర్లికయ్, పరిసయుల్ కిచ్చొ కెర్ల మెలె, బార్ జా కెర, యేసుక కిసి మారుక గే కుట్ర ఉచరన లట్టబన్ల.

15 జేవ్ పరిసయుల్ ఉచర్లిసి యేసు జానెచి రిసా, ఒత్త తెంతో ఉట్ట గెలన్. ఒగ్గర్ ఒగ్గర్జిన్ జనాబ్ జోచి వట్టి గెల, చి జోవయింతె జొర్జొ తిలన ఎత్తిజిన్క జో చెంగిల్ కెర,

16 "అంచి రిసా తుమ్ కేనె తెర్లె ఒత్త సంగ నాయ్" మెన, జేవ్ ప్రెజల్క ఆడ్ర దిలన్.

17 ఈంజ ఎత్తి కిచ్చొక జర్గు జలి మెలె, దేముడుచ కబుర్లు సంగిలో యెసయా పూర్గుమ్చొచి అత్తి సంగిలి కోడ్ నెరవెర్చుప జతి రిసాయి.

18 "ఈంజో, ఆవ్ నిసాన్ల అంచొ సేవ కెర్టొసా, ఈంజో ఆవ్ ప్రేమ కెర్టొసా, చి రిసా అంక పూర్తి సర్లసంతోసుమ్. ఇనాచి పెట్టి అంచి ఆత్మ తియిదె, చి 'యూదుల్ నెంజిల మాన్సుల్ కి రచ్చించుప జంక జయెదె' మెన నూనవెదె.

19 ఈంజో పోటి జయె నాయ్. గగ్గోల్ జయె నాయ్, అన్యె, గవురుమ్ ఆనన్తి రితి వీదులె గట్టిజ లట్టబ జోచి అవాడ్ నూనయె నాయ్.

20 జలె, ఆకర్ దీసిక సత్తిమ్ తెన్ ఎత్తిక పరిచ్చు కెర తీర్పు కెర, సిచ్చల్ గే బవుమానల్ గే దెతి ఎద, కామ్క నెంజిలి పీరి గండక జో మోడ కెర వెంట గెల్లి నాయ్. సరిపుచుప జతి ఉజిడి నే దెతి వత్తి జో నే విజవ దెవుల.

21 వడ్డో, ఇనాచి నావ్చి తెడి యూదుల్ నెంజిలన దయిరిమ్ జా ఆస జవుల"

మెన, దేముడు సంగిలి కోడు నెరవెర్చుప జలి.

యేసుక పండితుల్ దూసుప కెర్లిసి
(మార్కు 3:20-30; లూకా 11:14-23; 12:10)

22 తెదొడి బూతుమ్ దెర్లి రిసా గుడ్డి జా గుల్లో జా తిలో మాన్సుక ఒత్త తిల మాన్సుల్ యేసుతె కడ ఆన్తికయ్, యేసు జోక చెంగిల్ కెర్లన్. జో మాన్సు లట్టబుక దెర్లో చి అంకివో డీసిల.

23 ఇస్సె జలి రిసా, ప్రెజల్ ఎత్తి ఆచారిమ్ జా, "ఈంజో యేసు కొన్సో? దావీదు రానొచి సెకుమ్తె జెర్ముక తిలో రచ్చించుప కెర్టొసా ఈంజో ఏక్ వేల జయెదె గే?" మెన లట్టబ్క దెర్ల.

24 పరిసయుల్, జా కోడు సూన కోపుమ్ జా. "బూతల్క రానో జలో బయెల్జెబూల్చి నావ్ తెన్ ఈంజో బూతల్క ఉదడ్డయ్" మెన గోసక సంగిల.

25 గని జేవ్ ఉచర్లిసి యేసుక జానెచి రిసా, ఇసి మెలన్. "కేన్ జవున్ రాజిమ్తెచ మాన్సుల్, జోవయింక జెవ్వె విరోదుమ్ జా వర్న వర్న జా యుద్దుమ్ కెరన్లె, జా రాజిమ్ పాడ్ జా గెచ్చెదె. కేన్ పట్టుమ్ జవున్ కేన్ గేరు జవున్ మాన్సుల్ వర్న వర్న జా జోవయింక జెవ్వె విరోదుమ్ కెరన్లె, జా పట్టుమ్ జవున్, గేరు జవున్ టీవో జయె నాయ్.

26 దస్సి, సయ్తాన్చక సయ్తాన్ ఏక్ వేల ఉదడ గెలెగిన, జోవయింక జొయ్యి యుద్దుమ్ కెర్లయ్, జోవయింక జొయ్యి యుద్దుమ్ కెర్లె, జోచి రాజిమ్ కిసి జా టీవో జయెదె?

27 ఆవ్ ఏక్ వేల బయెల్జెబూల్చి నావ్ తెన్ బూతల్క ఉదడ్డెగిన, తుమ్చ సిస్సుల్ కచి నావ్ తెన్ ఉదడ్డతి? బూతల్క ఉదడ్డ తుమ్చయ్ సిస్సుల్ అంచి రిసా తుమ్క తీర్పు సంగుతు!

28 దేముడుచి సుద్ది తిలి ఆత్మసెక్తిక ఆవ్ బూతల్క ఉదడ గెల్లిసి జలె కచితుమ్ దేముడుచి రాజిమ్ తుమ్తె అప్పె పావ జా అస్సె.

29 "అన్నెక్ టాలి ఉచర, కిచ్చొ మెలె, కేన్ జవున్ బలుమ్ సుదొచి గెరి పెన జోచి ఆస్తి దెర గెచ్చుక చోరు ఉచర్లెగిన, తొలితో జో చోరు జో బలుమ్ సుదొక నే బంద తిలెగిన, చోరుక నెత్తె. జో బలుమ్ సుదొక తొలితో బందెలెగిన, గెరిచి సామన్ జో చోర గెలుక జయెదె" మెన సంగిలన్.

30 దస్సి సంగ, యేసు అన్యె, "కో అంచి పచ్చెన జయె నాయ్ గే, అంక విరోదుమ్ జా అస్సె, చి అంచి రాజిమ్తె

జేవ్ బెదిత్ రితి కో అంచి తెన్ మాన్సుల్క ఆనె నాయ్ గే అంచి మందక చెదుర్పు కెర్తయ్.

31 “జలె, ఆవ్ తుమ్క సంగితిసి కిచ్చొ మెలె, ఎక్కిక పిట్టవ మాన్సుల్ కెర్త పాపల్ దూసెనల్ ఎత్తి జోవయింక చెమించుప కెరుక జయెదె. గని, దేముడుచి సుద్ది తిలి ఆత్మక దూసుప కెర్తిసి చెమించుప జయె నాయ్.

32 కో గడియ బమ్మ జా ఆవ్ మాన్సు జా జెర్మున్ అయ్లోసాచి రిసా అన్మానుమ్ కోడ్ లట్టబెదె గే, జోవయింక చెమించుప కెరుక జయెదె. గని దేముడుచి సుద్ది తిలి ఆత్మక కో దూసుప కెరుల గే, ఈంజ ఉగుమ్తె కి జా ఉగుమ్క కి చెమించుప జతి నాయ్.

33 “రూక్చి వండ్లు చెంగిల్చి జలె, జా రూకుక చెంగిల్ మెన ఒప్పున. రూక్చి వండ్లు గర్చి జలె, జా రూకుక గర్చొ మెన ఒప్పున. రూక్చి వండ్లు దెకిలెగిన, జా రూకుక చెంగిల్ గే, గర్చొ గే చినుక జయెదె.

34 పెట్టి అయివొచి రితి విస్సుమ్ తిల మాన్సుల్, తుమ్. తుమ్చి పెట్టి విస్సుమ్ తిలి రిసా తుమ్ కిసి చెంగిల్చి లట్టబుక జయెదె! పెట్టితె తిలి బుద్దిచి కొల్లి చోడి లట్టబెదె.

35 చెంగిల్ మాన్సు జోచి చెంగిల్ బుద్ది బెర్తుచి కొల్లి చెంగిల్చి బార్ కెరెదె. గర్చొ మాన్సు జోచి పెట్టిచి విస్సుమ్చి బెర్తుచి కొల్లి విస్సుమ్ బార్ కెరెదె.

36 ఆవ్ తుమ్క సంగితిసి కిచ్చొ మెలె, ఈంజ లోకుమ్చ ఎత్తిక వెల్లి తీర్పు కెర్తి దీసిక మాన్సుల్ లట్టబ్లి ఎత్తి కామ్క నెంజిలి కోడుచి రిసా నేరిమ్ వయుల.

37 తుమ్చ కొడొ తుమ్చి పెట్టి తిలిన్క సాచి జలి రిసా నీతి సుదొ గే, నెంజిలె పాపుమ్ సుదొ గే బార్ కెరెదె.” మెలన్.

జేవ్ యూదుల్ అన్మానుమ్ జలిన్చి రిసాచి తీర్పు
(మార్కు 8:11-12; లూకా 11:29-32)

38 తెదొడి పరిసయ్యుల్ చి మోసి తెన్ దేముడు దిలి ఆగ్గుల్ సికడ్డన సగుమ్జిన్ యేసుక, “గురుబాబు, దేముడుచి అదికారుమ్ తుక అస్సె మెన రుజ్జు దెకయ్తి వెల్లి కామ్ ఏక్ అప్పె కెరు. దెకుమ్దె” మెన యేసుక సంగిల.

39 గని, జో జోవయింక కిచ్చొ జబాబ్ దిలన్ మెలె, “ప్రబుక నిదానుమ్ నెంజ లంజెబుద్ది పాపుమ్బుద్ది జల తుమ్ ఈంజ కాలుమ్చ మాన్సుల్, రుజ్జు దెకయ్త కమొక కోర్ప జతను. అంచి అదికారుమ్ దెకయ్తి రిసా ఎక్కి పిట్టవ, కేన్ వేర కామ్ కెర దెంక నెంజె. జా రుజ్జుచి కామ్ కిసిచి జయెదె మెలె, దేముడుచ కబుర్లు పూర్గుమ్ సంగిలో యోనాక జర్గు జలిన్చి రితి జయెదె.

40 మెలె, యోనా కిసి తిర్తి అందరె మెద్దెనె సముద్రుమ్చి వెల్లి మొస్సాచి పెట్టి తిలన్ గె, దస్సి, మాన్సు జా జెర్మున్

అయ్లయ్ ఆవ్ తిన్ని అందర్లు తిన్ని మెద్దెనె బుయి తెడి తయిందె.

41 అన్నె, ఈంజ లోకుమ్ ఎత్తిక వెల్లి పరిచ్చ కెర్తి దీసిక, తుమ్ ఈంజ కాలుమ్చ అన్మానుమ్ జల యూదుల్ కి, యోనా బోదన కెర్త నీనెవె పట్టుమ్చ పైజల్ కి, బెద టీవొ జా, జేవ్ తుమ్క ‘గర్చ’ మెన రుజ్జు దెకవుల. కిచ్చొక మెలె, జా పట్టుమ్చ మాన్సుల్ యోనా కెర్తి బోదన సూన కెర, జేవ్ కెర్త పాపల్చి రిసా దుకుమ్ జా, నంపజా, బుద్ది జల. ఈందె, యోనాచి కంట వెల్లి తుమ్చి నెడిమి అస్సె.

42 వడ్డొ, వెల్లి తీర్పు కెర్తి జా దీసిక, దచ్చెన దేసిమ్చి పూర్గుమ్ తిలి రాని ఎక్కి ఈంజ కాలుమ్చ మాన్సుల్ తెన్ టీవొ జా, తుమ్క ‘గర్చ’ మెన రుజ్జు దెకయెదె. కిచ్చొక మెలె, పూర్గుమ్ జా రాని ‘సాలోమోను రానొ సంగితి బుద్దిచి కోడు సూనిందె’ మెన, ఒగ్గర్ ఒగ్గర్ దూరి తెంతో అయ్లి. గని, ఈందె, సాలోమోనుచి కంట వెల్లి సుదొ తుమ్చి నెడిమి అస్సె.

43 “ఏక్ మాన్సుక బూతుమ్ దెర తిలెగిన, జా బూతుమ్ జో మాన్సుచి తెంతో ముల దా తత్తిచి రిసా టాన్ చజన, బయిలె గెచ్చు బుల్తె తయెదె, గని, టాన్ నే దొర్కు జలి రిసా,

44 జో ఉచరన, ఆవ్ ముల దిలో గెరి అన్నె గెచ్చొందె మెన, జా గేర్ విడి అస్సె మెన, జా గేర్చొ మాన్సు వడ్డవ కెర సుబ్బుమ్ కెర అస్సె మెన దెక కెర,

45 అన్నె గెచ్చు, జాచి కంట గర్చ సత్తు బూతల్క పట్టి కడ ఆనెదె, చి జేవ్ ఎత్తి జో మాన్సుచి తెడి పెన కెర, ఒత్తయ్ బన జవుల. జాచి రిసా, జో మాన్సుక అగ్గెచి కంట, ఆకర్క ఒగ్గర్ అల్లర్ తయెదె. గర్చి బుద్దిచి ఈంజ కాలుమ్చ మాన్సుల్ తెన్ దస్సి జయెదె.” మెన, యేసు బోదన కెర్తన్.

46 యేసు పైజల్క అన్నె బోదన కెర్తె తతికయ్, ఈందె, జోచి అయ్యసి బావుడ్డివొ జా కెర, ‘జో తెన్ లట్టబుమ్దె’ మెన వీదె టీవొ జా తిల.

47 కితెదొడి ఎక్కిలో “ఈందె, తుచి అయ్యది తుచ బావుడ్డివొ తుచి తెన్ లట్టబుక మెన వీదె టీవొ అస్తి” మెన యేసుక సంగిలన్.

48 జోక సంగిలో మాన్సుక యేసు “కొన్ని అంక అయ్య, కొన్న అంక బావుడ్లు జవుల గే జాన్సు గే?” మెన సంగ,

49 జోచి సిస్సుల్ తిలి పక్క ఆతు చంప కెర, “ఈందె, అంచి అయ్య, అంచ బావుడ్లు.

50 కిచ్చొక మెలె, పరలోకుమ్ తిలో అంచొ దేముడు అబ్బొ సంగిలి రితి కో కెరుల గే, జెవ్వి అంచ బావుడ్లు, అంచ బేనివొ, అంచి అయ్య” మెన సంగిలన్.

బీ ఊంపిలిన్క టాలి
(మార్కు 4:1-9; లూకా 8:4-8)

1 జా దీసి, యేసు గెరి తెంతో బార్ జా, సముద్రుమ్చి ఒడ్డుతె గెచ్చు, వెసిలన్.

2 ఒగ్గర్ ఒగ్గర్జిన్ జనాబ్ జోతె జా కెర, సుట్టునంత బెర *పెలపెలి జలి రిసా, జో ఏక్ దోనితె వెగ వెసిలన్. అన్నె బెర తిల మాన్సుల్ ఎత్కిజిన్ సముద్రుమ్చి ఒడ్డుతె టీవో జా తతికయ్,

3 యేసు జోవయింక దెక దెక, బోదన కెర్తి రిసా ఒగ్గర్ టాలివో సంగుక దెర్లన్. “ఈందె, ఊంపిలిన్క ఎక్కిలో బీ ఉంపుక బార్ జలన్.

4 జో ఉంపితె తతికయ్, సగుమ్ బీ బయిలె వాల్ వక్క సేడ్డికయ్, పిట్టల్ ఉత్త్ర జా, జా బీ కా గెల.

5 అన్నె సగుమ్ బీ ఒగ్గర్ మత్తి నెంజిలి పత్తురు బుయ్యె సేడ్లన్. ఉప్పిరి ఇదిలిదిల్ మత్తి తిలి రిసా, ఒత్త సేడ్లి బీ బేగి గజ్జల్ జలి

6 ఒప్పణ్ లయితికయ్, మొక్కల్ డడ్డ గెల. చి చెర్రో బుయి తెడి పెన వడ్డుక నెత్తిర్లి రిసా, జేవ్ మొక్కల్ సుకా గెచ్చు, మొర గెల.

7 అన్నె సగుమ్ బీ కంట మొక్కల్ తిలిన్తె సేడ గజ్జల్ జా మొక్కల్ జల. గని ఒత్త తిల కంట మొక్కల్ వడ్డ కెర, ఒత్త సేడ్లి బీచ మొక్కల్కపెల గెల్లికయ్, జేవ్ మొక్కల్ పలితుమ్ దెర్తి నాయ్.

8 గని అన్నె సగుమ్ బీ చెంగిల్ బుయ్యె సేడ కెర, కేన్ మొక్క పుంజెక్ వంతుల్, †అరవయ్ వంతుల్, ముప్పుయ్ వంతుల్, పలితుమ్ దిల.

9 సూన్త కండ్లి తిలస, సూన” మెన సంగిలన్.

10 పడ్డో యేసుచ సిస్సుల్ జోతె జా కెర, “తుయి కిచ్చొక టాలివో సంగయ్ పైజల్క బోదన కెర్తసి?” మెన జోక పుసిల.

11 యేసు జోవయింక, “పరలోకుమ్చి రాజిమ్చి రిసాచి గుట్టుల్ జానన్క తుమ్క సెలవ్ దా అన్నె. గని జోవయింక జా సెలవ్ నాయ్. ‡

12 కిచ్చొక మెలె, తిలొసాక అన్నె దెంక జయెదె, చి జోక ఒగ్గర్ కలుగు జయెదె. గని, నెంజిలొసా జలె, జోక తిలిసి కి జోతె తెంతో కడ నెంక జయెదె.

13 జేవ్ పైజల్ దెక నే దెకిలి రితి, సూన నే సూన్లి రితి, అర్దుమ్ కెరంతి నాయ్. ఇసిచి రిసా ఆవ్ టాలివో కెరయ్ జోవయింక బోదన కెర్తసి.

14 జేవ్ నంప నే జతిన్చి రిసా యెసయాచి అత్తి పూర్గుమ్ దేముడు సంగిల్ కోడ్ కచితుమ్ నెరవెర్చువ జతయ్.

తుమ్ నిజుమ్ సొంత సూన్లె కి, కచితుమ్ కెయ్క అర్దుమ్ కెరన్ను నాయ్, నిజుమ్ సొంత దెకిలెకి, కచితుమ్ అర్దుమ్ చినున్ నాయ్.

15 కిచ్చొక మెలె, ఈంజ పైజల్చి పెట్టి బేడు బంద అన్నె, ఇనాచి కండ్లల్ దిమ్మల్ డంకి జలి రితి జా అన్నె. ఇనయింక అంకివో డంకన్లి రితి జా అన్నె. నెంజిలె, ఇనయింక అంకివో దెక చినిత, ఇనయింక కండ్లల్ సూన సూనిత, చి ఇనాచి పెట్టి అర్దుమ్ కెరంత, చి ఆవ్ ఇన్నెక చెంగిల్ కెర్తి రితి పసుల కెర అంచితె జెత”.

మెన జేవ్చి రిసా సంగిలి కోడు.

16 “జలె, తుమ్ నంపజలసచ అంకివో డీస్తతిచి రిసా తుమ్క చెంగిలి. తుమ్క అర్దుమ్ సూన్త కండ్లి అస్తిచి రిసా తుమ్క చెంగిలి.

17 పూర్గుమ్చక చి కంట తుమ్క ఒగ్గర్ చెంగిలి మెన కచితుమ్ తుమ్క ఆవ్ సంగితసి. కిచ్చొక మెలె, పూర్గుమ్ దేముడుచ కబుర్లు సంగిలస ఒగ్గర్జిన్, సత్తిమ్ ఇండిలస ఒగ్గర్జిన్, తూమ్ దెకితిసి దెకుక జేవ్ కోర్ప జలెకి, దెకుక నెత్తిర్ల. తూమ్ సూన్తిసి సూనుక జేవ్ కోర్ప జలెకి, సూనుక నెత్తిర్ల. జా అవ్కాసుమ్ జోవయింక దొర్కు జయె నాయ్.

ఉంపిలి బీచి టాలిచి అర్దుమ్ యేసు సంగిలిన్
(మార్కు 4:13-20; లూకా 8:11-15)

18 “ఉంపిలిన్క రిసా సంగిలి టాలి తుమ్ అర్దుమ్ కెరన.

19 కో జలెకు పరలోకుమ్చి రాజిమ్చి రిసాచి బోదన సూన అర్దుమ్ నే కెరన్లె, సయ్తాన్ జా కెర, జో మాన్సుచి పెట్టి ఉంపిలి జా బోదన ఉర్ల కెర దెర గెచ్చెదె. వట్టెచి ఉంపిలి బీ ఈంజ జయెదె.

20 పత్తల్ బుయ్యె ఉంపిలిసి, కో జలెకు చి బోదన సూన్లి బేగి, సర్ల జా నంపజతసి మెనెదె,

21 గని జోచి సొంత పెట్టి సుబుమ్ కబుర్చ చెర్రో నెంజిలి రిసా, జో జలి రితి జా గడయ్ టీవో జా తిలె కి, సుబుమ్ కబుర్ జో నంపజలిన్చి రిసా కిచ్చొ జవున్ బాద సేడ్లె జలెకు, నెంజిలె విరోదుమ్ జలస జోక అల్లర్ కెర్లె జలెకు, జో మాన్సు బమ్మ జా, బే బేగి నముకుమ్ ముల దెయెదె.

22 కంట దుబ్బుల్ తిలి బుయ్యె ఉంపిలి బీ, కో జలెకు, చి బోదన సూన్లె కి, ఈంజయ్ లోకుమ్తె తిలిసి ఎత్కిక ఉచర్లె తా, కిసి జా జయిందె? మెన చింత గలనెదె జలెకు, సొమ్మారుమ్ జంక ఆన జయెదె జలెకు, దస్సి, జా ఆన జవున్, జా చింత జవున్, జా బోదనక పెలగెలి రితి జతయ్చి రిసా జా బోదన జోతె పలితుమ్ దెరె నాయ్.

23 గని, చెంగిలి బుయ్యె ఉంపిలి బీ, చి బోదన సూన కో అర్దుమ్ కెరనెదె గే, జో మెలె, చెంగిలి బుయ్యె ఉంపిలి బీతె

* 13:2 13:2 పెలపులి † 13:8 13:8 తిని విస్సా ‡ 13:11 13:11 12 ఇన్నెచి అర్దుమ్ కిచ్చొ మెలె, ‘నంపజా అర్దుమ్ తిలసకయ్ అన్నె అర్దుమ్ సికడుక జయెదె...గని నంప నెంజి అర్దుమ్ నెంజిలసక తిలి అర్దుమ్ కి జోవయింతె తెంతో కడ నెంక జయెదె’.

కేన్ గిడ్డ పుంజెక్ వంతుల్, అరవయ్ వంతుల్, ముప్పయ్ వంతుల్ కిసి పలితుమ్ దెరుల గే, దస్సి, సూన అర్దుమ్ కెరంతో మాన్సు తమ్మన కీపలితుమ్ దెరెదె” మెన యేసు బోదన కెర్లన్.

చెంగిల మొక్కల్ క చి వెర్రి మొక్కల్ టాలి

24 యేసు ప్రజల్ క సంగిలి అన్నెక్ టాలి ఇసి జలి. “పరలోకుమ్ చి రాజిమ్ తెన్ కిసి మెలె, జోచి వెడయ్ చెంగిల్ గోదుమ్ చి బీ ఉంపిలినచి ఏక్ మాన్సు రితి జతయ్.

25 మాన్సుల్ నిజ గెల తతికయ్, జో ఉంపిలొసాచొ విరోదుమ్ చొ జా కెర, జా చెంగిల్ బీ ఉంప తిలిన్ తె వెర్రి గిడ్డల్ ఉంప దా, ఉట్ట గెలన్.

26 చెంగిల్ బీచ మొక్కల్ ఉట్ట వడ్డ ఎన్నులు దెర్లి పొది, జేవ్ వెర్రి మొక్కల్ కి డీసిల.

27 జో ఉంపిలొ ఎజొమానితె జోచ గొత్తి సుదల్ జా కెర, ‘బాబు, తుయి తుచి వెడయ్ తె చెంగిలి బీ ఉంపిలది. జలె కిసి ఒత్త వెర్రి మొక్కల్ కి ఉట్ట అస్తి?’ మెన పుసితికయ్,

28 జో జేవ్ క, ‘ఈంజ కో గే విరోదుమ్ చొ కెర్లి కామ్ జయెదె’ మెన సంగిలన్. జోచ గొత్తి సుదల్ జోక, ‘దస్సి జలె, అమ్ వెడయ్ గెచ్చు జేవ్ వెర్రి మొక్కల్ కడ గెలుక తుక ఇస్టుమ్ గే?’ మెన పుసిల.

29 దస్సి జో, ‘పొన. జేవ్ వెర్రి మొక్కల్ అప్పె కడ్డెగిన, ఏక్ వేల జోవయింతెన్ ఎక్కె దడి గోదుమ్ చ మొక్కల్ కి బెదవ కడితె. అప్పె పొన.

30 లాయితి కాలుమ్ ఎద దొన్ని కి బెద వడ్డుతు. లాయితె పొదిక, వెర్రి మొక్కల్ తొలితొ కడ కెర, డయ గెల్లి రిసా కట్టల్ బందిలి వడ్డొక, గోదుమ్ లాయ కెర అంచి కొట్టుతె ఆన’ మెన లాయితనక సంగిందె. మెన జో ఎజొమాని సంగిలన్” మెన యేసు సంగిలన్.

సార్సు గిడ్డక టాలి

(మార్కు 4:30-34; లూకా 13:18-21)

31 యేసు జోవయింక అన్నెక్ టాలి సంగిలన్. “పరలోకుమ్ చి రాజిమ్ ఏక్ మాన్సు జోచి పట్టయ్ ఉంపిలి సార్సుగిడ్డచి రితి జతయ్.

32 గిడ్డల్ ఎత్కిచి కంట జా గిడ్డ ఇదిలిసి డీసిలెకి, జా మొక్క వడ్డలి మెలె, రోన్ తె గల్తి మొక్కల్ ఎత్కిచి కంట వల్లో జా, రూకు జయెదె, చి ఆగాసుమ్ చ పిట్టల్ జా కెర, జో చెట్టెచ కొమ్మల్ తె గూడల్ బందుల” మెన సంగిలన్.

33 యేసు జోవయింక అన్నెక్ టాలి సంగిలన్. “పరలోకుమ్ చి రాజిమ్ తెన్ కిసి మెలె, అన్నిమ్ కెర్లి పిట్ ఎత్కి పొంగువ జా పులితి రిసా, ఏక్ తేర్ బోద ఏక్ తీనడి పిట్ తె గలిలి పులయ్ తి పిట్ చి రితి జతయ్. ఇదిలిదిల్

గలిలెకి, జా కలొయ్ లి సామన్ ఎదివాట్ పుల కెర ఒగ్గర్ జయెదె”, మెన, యేసు సంగిలన్.

34 ప్రజల్ క సంగితి బోదన ఎత్కి టాలివొ తెన్ యేసు సంగితి తిలన్. టాలివొ నెంతె జేవ్ ప్రజల్ క జో కిచ్చొ సంగి నాయ్.

35 ఇసి, దేముడు జోచ కబుర్లు సంగిలొ ఎత్కిలొచి అత్తి రెగిడ్డి కోడ్ నెరవెర్సుప జలి.

“టాలివొ సంగ ఆవ్ అంచి చోండి పుట్టయిందె, చి బూలోకుమ్ జెర్మున్ జలి మొదొల్ తెంతొ లుంకడ్డిసి సంగిమ్ దె” మెన రెగిడ్డి కోడు.

బట్టి ఉంపిల వెర్రి గిడ్డల్ చి టాలిక అర్దుమ్ సంగిలిసి

36 తెదొడ్ యేసు ప్రజల్ చి జనాబ్ క ముల దా, గెరి గెలన్. జోచ సిస్సుల్ జోతె జా కెర, “బట్టిచ వెర్రి మొక్కల్ చి రిసా సంగిలి టాలి అమ్ క అర్దుమ్ సంగు” మెన పుసితికయ్,

37 జో జోవయింక ఇసి మెలన్. “చెంగిల్ బీ ఉంపిలొసా కొన్సొ మెలె, ఆవ్ మాన్సు జా జెర్మున్ అయ్ లొసా.

38 బాటి కిచ్చొ మెలె, ఈంజ లోకుమ్. చెంగిల్ బీ కిచ్చొ మెలె, పరలోకుమ్ చి రాజిమ్ చ బోదల్ జల మాన్సుల్. వెర్రి మొక్కల్ కిచ్చొ మెలె, సయ్ తాన్ చ బోదల్ జల మాన్సుల్.

39 జా వెర్రి బీ ఉంపిలొసా కొన్సొ మెలె, సయ్ తాన్. పంటొ లాయితి పొది కెయ్ క మెలె, ఈంజ ఉగుమ్ పూర్తి జతి ఆకర్ దీసి. లాయితన కొన్సొ మెలె, దేముడు చి దూతల్.

40 “వెర్రి మొక్కల్ క కిసి కుడవ ఆగితె గలుక జయెదె గే, దస, ఈంజ ఉగుమ్ పూర్తి జతి పొదిక, దస్సి సిచ్చ తయెదె.

41 జా పొదిక, ఆవ్ మాన్సు జా జెర్మున్ అయ్ లొసా అంచ దేముడు చి దూతల్ తెద్రయిందె, చి పాపుమ్ కెరయ్ తి వెట్కారుమ్ చి ఎత్కిక కి, పాపుమ్ ఇండితన ఎత్కిక కి, ఈంజ లోకుమ్ తెంతొ కడ కెర, ఎత్కితె కుడవ కెర,

42 జేవ్ దేముడు చి దూతల్ జోవయింక వెల్లి ఆగి గొయ్ తె గల దెవుల. ఒత్త గలి జలన ఏడుల, దంతొ చప్పిల్తె తవుల.

43 తెదొడ్ క, పొద్దుచి ఉజిడి కెద్ది జతయ్ గే, దస్సి, అంక నంపజా పున్నిమ్ జలన జోవయించొ దేముడు అబ్బొస్ చి రాజిమ్ తె ఉజిడి జవుల. సూన్ త కంగ్గొ తిలన సూన.

లుంకడ్డి దనుమ్ చి టాలి

44 “పడ్డొ, పరలోకుమ్ చి రాజిమ్ క కిచ్చొ టాలి కెరుక జయెదె మెలె, ఏక్ వెడయ్ తె లుంకడ తిలి దనుమ్ చి రితి జయెదె. ఎత్కిలొ జా దనుమ్ చ జ కెర, అన్నె లుంకడ కెర, జా దొర్కు జలి మెన, నంతొనుమ్ తెన్ గెచ్చ, జోక కలుగు జలిసి ఎత్కి విక గెల కెర, జా దనుమ్ రోవిలి వెడ గెనెదె.

చెంగిలి ముత్తల్ క చజ గెన్లొసాచి టాలి

§ 13:23 13:23 ‘ఆత్మపలితుమ్ దెరెదె’ మెలె, దసా మాన్సు ప్రబుచి బుద్ధి ఇండెదె, చి అన్నె మాన్సుల్ దెక, జేవ్ కి ప్రబుచి రాజిమ్ తె బెదుక ఇస్టుమ్ జా, సుబుమ్ కబుర్ సూన నంపజా బెదుల.

45 “అన్నె, పరలోకుమచి రాజిమ్తె బెదితిసి చెంగిలి ముత్యల్ గెన్తో సావుకరి కెర్తినచి రితి జతయ్.

46 జో ఒగ్గర్ విలువచి ముత్యల్ ఏక్ చజ కెర, గెచ్చ, జోక కలుగు జలిసి ఎత్తి విక గెల కెర, జా ముత్యల్ గెనెదె.

సముద్రుమ్తె గల్లి వలచి టాలి

47 “అన్నె, పరలోకుమ్ రాజిమ్తె బెదయ్తెసి కిసి మెలె, సముద్రుమ్తె గలిలి రగరగాల్చ మొస్స దెర్తి వలచి రితి జతయ్.

48 జా బెరిలె పొది మాన్సుల్ జేడ ఒడ్డుతె కడ కెర, వెన కెర, చెంగిలచ తిర్తితె బెరవ కెర, గర్బ బయిలె వెంట గెలుల.

49 దస్సి, ఈంజ ఉగుమ్ పూర్తి జతి ఆకర్ దీసిక అమ్చ దేముడుచి దూతల్ జా కెర, సంపజా పున్నిమ్ జలసక ఏక్తె, సంపనెంజిల్ రిసా గార్ జలసక వేరతె కుడవ తా,

50 జేవ్ సంపనెంజిలసక వెల్లి ఆగి గొయ్తె గల దెవుల. ఒత్త గలి జలన ఏడుల, దంతో చప్పిల్తె తవుల.

51 “ఈంజ ఎత్తిచి అర్దుమ్ కెరన్లదు గే నాయ్?” మెన యేసు జేవ్ సిస్సుల్క పుసిలన్, చి “అమ్క అర్దుమ్” మెల.

52 జేవ్ దస్సి సంగితికయ్, యేసు జోవయింక “జలె, కేన్ జలెకు మోసే తెన్ దేముడు దిలి ఆగ్నల్ సికడ్తెసా, పరలోకుమచి రాజిమ్చి స్సుబుమ్ కబుర్ కామ్తె బెదితి రిసా కో సిస్సుల్ జా జవుల గే, జో ఏక్ గెర్చో ఎజోమాని కిసి జోచి దనదాన్యుమ్ తెంతో నొవ పోర్న సామన్లు వెంట వాడిక కెరెదె గే, దస్సి అస్సె.”

యేసు సొంత మాన్సుల్ జోచి అదికారుమ్ నే చినిలిసి

(మార్కు 6:1-6; లూకా 4:16-30)

53 యేసు ఈంజేవ్ టాలివొ సంగ కేడయ్లి పడ్డె, ఒత్త తెంతో బార్ జా ఉట్ట గెచ్చ,

54 జోచి సొంత గవ్వె పావ కెర, జోవయించ సబ గెరలె బోదన కెరుక దెర్లె. జో కెర్లి బోదన సూన ఆచారిమ్ జా, “ఈంజ గ్యానుమ్చి, ఈంజొ కెర్త కమెచి కెర్తి సెక్తి ఇన్నెక కేనె తెంతో అయ్లి?”

55 ఈంజొ మాములుమ్, ఈంజ గవ్వెచో దార్చ కామ్ కెర్తెసాచో పుత్తుసి గెద? ఇన్నెచి అయ్యెన్చి నావ్ మరియు గెద? అన్నె, యాకోబు, సీమోను అన్నె యూదా జోచ బావుడ్డివొ జవుల గెద?

56 ఇన్నెచ బేన్సివొ ఎత్తిజిన్ అమ్చి తెన్ అస్తి గెద? దస్సి జలె, ఇన్నెక ఈంజ గ్యానుమ్ ఎత్తి కేనె తెంతో అయ్లి?” మెన లట్టబన్ల,

57 యేసుచి రిసా అన్మానుమ్ జా గెల. జేవ్ దస్సి జతికయ్, యేసు జోవయింక, “కేన్ జవున్ మాన్సు దేముడుచి కబుర్ ఆన్తోసా జలె, జోచి సొంత దేసిమ్చ మాన్సుల్ సొంత గెర్చ మాన్సుల్ జోక గవురుమ్ దెకిత్ నాయ్” మెన జోవయించి అన్మానుమ్చి రిసా సంగిలన్.

58 జలె, జా గవ్వెచ మాన్సుల్చి అన్మానుమ్చి రిసా, యేసు ఒత్త వెల్లి కమె ఒగ్గర్ కెరె నాయ్.

14

హేరోదు రానొ యేసుచి రిసా బిలిసి
(మార్కు 6:14-29; లూకా 9:7-9)

1 జా సమయుమ్తె, హేరోదు మెలో జా గలిలయ ప్రాంతుమ్చో అదికారి, యేసు కెర్త కమెచి రిసా సూన తా,

2 బియఁ కెర, జోచి గొత్తి సుదల్క బుకారా కెర, జోవయింక, “ఈంజొ యేసు, జో బాప్తిసుమ్ దెతె తిలో యోహాను మొర గెచ్చ అన్నె జియ అస్సె. జాచి రిసా, ఇస వెల్లి కమె కెరుక జోక సెక్తి అస్సె” మెన ఉచర సంగిలన్.

3-4 కిచ్చొక జో అదికారి దస్సి బియఁ కెర ఉచర్లన్ మెలె, జోచో పిలిప్ మెలో అన్నెన్చి హేరోదియ మెలి తేర్నిక హేరోదు నెతికయ్, యోహాను జోక “తుయి జాక తియనుక నాయిమ్ నాయ్” మెన సంగితె తిలి రిసా, జో అదికారి యోహానుక దెర, బందవడ, జేల్తె గల తిలన్.

5 జోక మారుక ఉచర్లె కి, దేముడుచి కబుర్ సంగిలోసా, మెన పైజల్ యోహానుక ఉచర్లి రిసా, జోవయింక బియఁ కెర, మారుక వాయిద కెర తిలన్.

6 జలె, హేరోదుచి జెర్మున్ పండుగు దీసి అయ్లె, జోచి హేరోదియ మెలి తేర్నిచి దువిసి విందుతె బుకారా తిలసచి నెడిమి నచితికయ్, హేరోదు రానొ మెన్సిలన్, చి

7 జో ఒట్టు గలన, “తుయి కిచ్చొ నజీలె కి దెయిందె.” మెన జాక సంగిలన్.

8 జా నాడిచి అయ్యెసి సంగితికయ్, బెర్ల మాన్సుల్చి మొక్కె జా దువిసి, “బాప్తిసుమ్ దెతో యోహానుచి బోడి, గండ కెరవ పలెరుమ్తె గల, అంక ఇత్తల్ ఆన దె” మెన రానొక సంగిలి.

9 ఈంజ కొడు సూన దుకుమ్ జలెకి, హేరోదు జేవ్ బుకార్ల మాన్సుల్చి మొక్కె ఒట్టు గల తిలి రిసా, జా సంగిలిసి దెంక మెన ఒప్పన తిలో, చి

10 జమాన్సుక తెద్రవ కెర, “జేల్తె యోహానుచి బోడి కండ కెర దా” మెలో.

11 జో జమాను, దస్సి కెర, యోహానుచి బోడి పలెరుమ్తె గల ఆన నాడిక దెతికయ్, జా నాడి అయ్యెన్క నా దిలి.

12 యోహానుచ సిస్సుల్ జో మొర్లిన్చి సూన కెర, జా కెర, పీనుమ్ ఉక్కుల దెర గెచ్చ రోవ గెల, అన్నె యేసుతె జా కెర, జోక సంగిల.

పాచ్ వెయిల్జిన్ మాన్సుల్క యేసు అన్నిమ్ దిలిసి
(మార్కు 6:30-44; లూకా 9:10-17; యోహా 6:1-

14)

13 యోహానుక జర్గు జలిసి యేసు సూన కెర, దోనితె వెగ కెర, మాన్సుల్ నెంజిలి టాన్తె గెచ్చుక మెన సముద్రుమ్ జిస, ఉట్ట గెలన్. యేసు ములిలి ఏక్ తిల జనాబ్ ‘జో

ఒత్తల్తో గెతయ్' మెన సూన కెర, పట్నల్తె గవ్వెలె తెంతో బార్ జా, ఇండ కెర, జోచి పట్టి గెల.

14 యేసు జా ఒడ్డుతె పాచ కెర, ఒత్త బెర తిల పట్టి అయ్ల ప్రెజల్ ఎత్కిక దెక కెర, జోవయించి ఉప్పిరి కన్నారుమ్ జా, జోవయింతె జబ్బుల్ తిల మాన్సుల్ ఎత్కిక చెంగిల్ కెర్లన్.

15 సాంజ్ జతికయ్, యేసుచ సిస్సుల్ జోతె జా కెర, "ఈంజ డొంగుర్ దేసిమ్ గెద, పొద్దు గెలి రిసా, అన్నిమ్ సామన్ గెనన్తి రిసా, ఈంజేవ్ ప్రెజల్క గవ్వెలె తెద్రవ" మెన సంగిల.

16 యేసు జోవయింక, "జేవ్ గెచ్చుక నాయ్. తుమి జోవయింక కిచ్చో జవున్ అన్నిమ్ దాస" మెన సంగిలన్.

17 జేవ్ సిస్సుల్ జోక, "అమ్చితె పాచ పోడియె, చి దొన్ని మొస్సు పిట్టవ, అన్నె కిచ్చో నాయ్" మెన, యేసుక సంగిల.

18 యేసు, "దస్సి జలె, జా తిలి సామన్ అంచితె ఆన దా" మెన, సిస్సుల్క సంగ కెర,

19 ప్రెజల్క దెక, "తుమ్ ఎత్కిజిన్ వెస" మెన సంగ, జా చివ్వర్చి బుయ్యె వెసడ కెర, జేవ్ పాచ పోడియె చి దొన్ని మొస్సు దెరన, ఆగాసుమ్ పక్క దెక, "ఈంజ అన్నిమ్ తుయి దిలది" మెన దేముడు అబ్బొన్క జొకర కెర, జేవ్ పోడియె మోడ కెర, జోచ సిస్సుల్క దెతికయ్, జేవ్ సిస్సుల్ ప్రెజల్క వంట దిల.

20 జేవ్ బెర తిల ప్రెజల్ ఎత్కిజిన్ పేట్ బెర్తు కయ్ల. కయ్లి పడ్డో, సేసిల గండల్ బార గంపల్తె బెర్తు సిస్సుల్ గుడ్డిల.

21 తేర్బోదల్ బాలబోదల్క ముల్తె, అన్నిమ్ కత్తన పాసి పాసి పాచ వెయిల్జిన్ మున్సుబోదల్ జల.

యేసు సముద్దుమ్చి ఉప్పిరి ఇండిలిసి
(మార్కు 6:45-52; యోహా 6:16-21)

22 జా ఎత్కి జర్గు జలి పడ్డో, "ప్రెజల్క అవ్వె తెద్రయిందె. తూమ్ దోనితె వెగ, అంచి కంట అగ్గె ఒత్తల్తోచి గట్టుతె గెచ్చ" మెన, సిస్సుల్క యేసు బలవంతుమ్ కెర్లొ.

23 పడ్డో, జో జేవ్ ప్రెజల్క తెద్రవ దా కెర, ప్రార్లన కెర్తి రిసా, మెట్టయ్ ఎక్కిలొయి వెగ గెలన్.

సాంజ్ జతికయ్, యేసు ఎక్కిలొయి ఒత్త తిలన్.

24 సిస్సుల్ తిలి జా దోని మాత్తుమ్, ఒడ్డు తెంతో దూరి గెతికయ్, వాదు కెర పెలయ్తె తతికయ్, కెర్లల్ జా దోనితె పెట్టి జస్తె తిల.

25 అందరె, పాసి పాసి కుకుడో వాంసెనె, యేసు జా సముద్దుమ్చి ఉప్పిరి ఇండ జా, జేవ్ సిస్సుల్ తిలిన్తె జెతె తిలన్.

26 జో సముద్దుమ్చి ఉప్పిరి ఇండిలిసి జోచ సిస్సుల్ దెక కెర, బమ్మ జా బియఁ గెచ్చ, "డుంబో!" మెన బియఁ కెర కేకుల్ గల్తికయ్,

27 యేసు బేగి, "దయిరిమ్ ఆనన. బియఁ నాయ్. అవ్వె జెతసి" మెన సంగిలన్.

28 యేసు "అవ్వె జెతసి" మెన సంగితికయ్, పేతురు జోక కేక్ గల, "ప్రబూ, తుయి జలె, ఆవ్ కి పానిచి ఉప్పిరి ఇండ తుచితె జెతి రితి అంక సెలవ్ దే" మెన సంగిలన్.

29 యేసు జోక "జే!" మెంతికయ్, పేతురు దోని తెంతో ఉత్త కెర, యేసుతె గెతి రిసా పానిచి ఉప్పిరి ఇండ కెర, సగుమ్ దూరి గెలన్.

30 గని, వాదుక దెక కెర, బియఁ కెర, డుంబ గెచ్చె తా, "ప్రబూ, ప్రబూ, అంక రచ్చింఛువ కెరు!" మెన, కేక్ గలన్.

31 యేసు బేగి ఆతు చంప కెర, పేతురుచి ఆతు దెరన, "తొక్కి నముకుమ్చో, తుయి కిచ్చోక అన్మానుమ్ జలది?" మెన పేతురుక సంగిలన్.

32 తెదొడి, జేవ్ దొగుల దోనితె వెగిల, చి వాదు ముల దిలి.

33 దస్సి జర్గు జలి రిసా, దోనితె తిలన యేసుక జొకర, "తుయి నిజుమి దేముడుచో పుత్తుసి" నేన, జోచి గవురుమ్ చిన సంగిల.

గెన్నేనరెతు మెలి టాన్తె మాన్సుల్క యేసు చెంగిల్ కెర్లిసి

(మార్కు 6:53-56)

34 జేవ్ యేసు ఒత్తల్తోచి గట్టుతె పాచ కెర, గెన్నేనరెతు మెలి టాన్తె ఉత్తిర్ల.

35 ఒత్తచ ప్రెజల్ యేసుక చిన కెర, సుట్టుపట్టు గవ్వెలె కబుర్లు తెద్రవ, జబ్బుల్ తిలన ఎత్కిజిన్క జోతె కడ ఆనయ్తికయ్,

36 యేసుచో పాలుమ్చి అంచు జలెకు జేవ్ చడుక మెన బతిమాల్పా జా సెలవ్ నజన్తె తిల, చి జోచో పాలుమ్చి అంచు చడిలన ఎత్కిజిన్ చెంగిల్ జల.

15

అత్తో నే దొవన్తె కయ్లిన్చి రిసా పరినయ్యుల్ యేసుక సంగిల

(మార్కు 7:1-23)

1 జా పొది, యెరూసలేమ్ పట్టుమ్ తెంతో పరినయ్యుల్ చి మోసే తెన్ దేముడు దిలి ఆగ్గుల్ సికడ్డన యేసుతె బెద జా కెర,

2 "తుచ సిస్సుల్ అత్తో నే దొవన్తె అన్నిమ్ కతతి. జేవ్ కిచ్చోక ఇసి పాపుమ్ కెర పూర్గుమ్చ వెల్లెల మాన్సుల్ సికయ్లి రితి కెర్తి నాయ్?" మెన సంగిల.

3 యేసు జోవయింక, "తూమ్ తుమ్చ పూర్గుమ్చ అవ్వె ఉచర్లిసి కెర్తి ఆసక, కిచ్చోక పాపుమ్ కెర దేముడుచి ఆగ్గు రితి కెర్ను నాయ్?"

4 కిచ్చో ఆగ్గుచి రిసా ఆవ్ సంగితసి మెలె, అయ్యద్అబ్బొద్క చెంగిల్ దెక గవురుమ్ కెర"

మెన సంగిలి కోడు. అన్నెక్ కిచ్చొ మెలె, “అబ్బొన్క జలెకు అయ్యన్క జలెకు కో దూసుప కెరుల గే, నే పిట్టె మొర్నుచి సిచ్చ దెంకయ్” మెన సంగిలి కోడు.

5 తూమ్, మాత్రమ్, కిచ్చొ మెంతసు మెలె, తుమ్ అవ్వి ఉచర్లి కోడు. కిచ్చొ కోడు మెలె, ‘అంచితె తుమ్క కిచ్చొ కలుగు జతి గే, జయ్యి అమ్చొ దేముడుక దెంక సంగ అస్సి మెన కో అయ్యన్క అబ్బొన్క సంగుల గే, జేవ్ దస్సి సంగిలన అయ్యన్క జలెకు, అబ్బొన్క జలెకు, అన్నె తోడు దెంక నాయ్’, మెన, తుమ్ సంగితసు.

6 జలె, తుమ్ దస్సి మెన తుమ్చ పూర్లుమ్చక అవ్వి ఉచర్లిసి కెరుక ముక్కిమ్ మెలి రితి, ‘దేముడుక అదికారుమ్ నాయ్’ మెలి రితి జా, జో సంగిలి ఆగ్గు మార్పుప కెర అస్సున్.

7 “తుమ్ ఉప్రమెన్నుచొ! యెసయా పూర్లుమ్చొచి అత్తి దేముడు సంగిలి కోడు తుమ్చితె నిజుమి నెరవెర్పువ జతయ్.

8 ఈంజ పైజల్ అంక జేవ్చి ఒటొ తెన్ గవురుమ్ కెర్త రిత కొడొ సంగిలి కి, జోవయించి పేట్ అంక దూరి అస్సి.

9 మాన్సుల్ అవ్వి ఉచర్ల కొడొక ‘దేముడు సంగిలన’ మెన, పైజల్క సికడ, అంక ఆరిక జొకర్తతి.

మెన తుమ్చి రిసాచి కోడు” మెన, యేసు జేవ్ వెల్లెల మాన్సుల్క సంగిలన్.

మాన్సుక గార్ కెర్లిసి కిచ్చొ జయెదె గే యేసు సంగిలిసి

10 యేసు జేవ్క దస్సి సంగ కెర, పాసి తిల పైజల్క బుకారా కెర, జోవయింక ఇసి మెన బోదన కెర్లన్. “తుమ్ సూన అర్దుమ్ కెరన.

11 మాన్సుక గార్ కెర్లిసి కిచ్చొ మెలె, చోడి తెడి తెంతో గెతిసి నెంజె, గని చోడి తెంతో బార్ జతిసి. జయ్యి మాన్సుక గార్ కెర్లిసి” మెన సంగిలన్.

12 యేసు దస్సి సంగిలి పిమ్మట్, జోచ సిన్సుల్ జోతె జా కెర, “పరినయ్యల్ జా కోడు సూన కోపుమ్ జల మెన జాన్ని గె?” మెన, యేసుక పునిల.

13 జలె జో, “వెర్లి రూకుక కిసి ఉట్కువుల గే, దస్సి, పరలోకుమ్ తిలొ అంచొ దేముడు అబ్బొ జోక కామ్క నెంజితో ఎత్తి మాన్సుక ఉట్కుయ్లి రితి గెచ్చవ కెర గెలెదె.

14 జాకయ్, జేవ్ సంగితిసిచి రిసా తుమ్ చింత గలన నాయ్. జేవ్ నంప నెంజ ఆత్మ గుడ్డి జా, మాన్సుల్క వాట్ దెకడుక ఉచర్లిసి. గని గుడ్డి సుదొ గుడ్డి సుదల్క వాట్ దెకయ్లెగిన, జో కి ఈంజొ కి గొయితె సేడుల.” మెలన్.

15 జలె, పేతురు యేసుక, “జా టాలిచి అర్దుమ్ అమ్క సంగు” మెన సంగిలన్, చి

16 యేసు జోవయింక, “అప్పె ఎద తూమ్ కి అర్దుమ్ నెంతె అస్సున్ గే?

17 ఈందె, చోడి గలంతిసి కిచ్చొ జలెకి పెట్టి గెచ్చ కెర, కామ్క నెంజిలెగిన, బార్ జా గెచ్చెదె, మెన తుమ్క అర్దుమ్ నాయ్ గే?

18 మాన్సుచి చోడి తెంతో బార్ జతి ఎత్తి కోడు, మాత్రమ్, జోవయించి పెట్టితె జెర్మ కెర బార్ జతయ్. జా కోడు లట్టబ్బొ మాన్సుక జయ్యి గార్ కెరెదె,

19 కిచ్చొక మెలె, గర్చ ఉద్దెసుమ్లు, నరు అత్యల్, లంజెకమొ, చోరు కమొ, అబద్దుమ్ సాచి, మాన్సుల్క దూసుప కెర్లిసి, దసచ ఎత్తి, మాన్సుచి పెట్టి తెంతో జెయెదె.

20 దసచయ్ మాన్సుక గార్ కెరుల, గని అత్తో నే దొవన్తె కతిసి మాన్సుక గార్ కెరె నాయ్” మెన యేసు బోదన కెర్లన్.

వేర దేసిమ్చి తేర్బోదచి దువిన్క యేసు చెంగిల్ కెర్లిసి

21 యేసు ఒత్త తెంతో బార్ జా ఉట్ట గెచ్చ, తూరు పట్టుమ్ చి సిదోసు పట్టుమ్చి ప్రాంతుమ్తె గెతికయ్,

22 ఈందె, జా ప్రాంతుమ్చ కనానుచి సెకుమ్చి తేర్బోద ఎక్కి బార్ జా, జోక దస్సుల్ జా కెర, “ప్రబువ, దేముడు తెద్రయ్లో, దావీదు రానొచి సెకుమ్తె జెర్మిలో, క్రీస్తు జలొ రచ్చించుప కెర్లొసా తుయి. అంచి ఉప్పిరి దయ తీ. అంచి దూక బూతుమ్ దెర అస్సె, చి ఒగ్గర్ సైమ జతయ్” మెన యేసుక కేకుల్ గలిలి.

23 గని యేసు తుక్లె తా, జాక ఎక్కి కోడు కి జబాబ్ సంగె నాయ్. తెదొడి, జోచ సిన్సుల్ జోతె జా కెర, “ఈంజ అమ్చి పట్టి జా జా, కేకుల్ గలితయ్, ఇన్నెక తెద్రవ దేను” మెన, యేసుక బతిమాల్పా జా సంగిల.

24 యేసు, “గొవుడు నెంజిల మెండల్ రిత జా అమ్చి ఇస్రాయేలుచ పైజల్తెయి అంక అబ్బొ తెద్రయ్లన్, గని వేర మాన్సుల్తె నాయ్” మెలన్.

25 యేసు దస్సి మెలె కి, జా తేర్బోద అన్నె పాసి జా కెర, నెర్ను సేడ జొకర, “ప్రబు, అంక తోడు కెరు” మెన సంగిలి.

26 యేసు జాక దెక, “*బోదల్చి అన్నిమ్ గుడ్ల కెర, సూనకూనర్లుక గల దెంక చెంగిల్ నాయ్” మెన సంగిలన్.

27 జా కిచ్చొ మెలి మెలె, “నిజుమి, ప్రబు, గని సూనకూనర్లు కి జోవయించొ ఎజొమానిచి బల్ల తెంతో సేడ్లి ఉస్ట్రా వెంట కవుల” మెన, సంగిలి.

28 జా తేర్బోద దస్సి జబాబ్ దెతికయ్, యేసు జాక, “అమ్మ, తుయి గట్టిజ నంపజతసి. తుయి కోర్ప జలిసి తుక జర్గు జవున్” మెన, జాక వరుమ్ దిలన్. చి బేగి జాచి దువిసి చెంగిల్ జలి.

29 యేసు ఒత్త తెంతో ఉట్ట గెచ్చ, గలిలయచి నముద్రుమ్తెచి ఒడ్డుతెచి వట్టి గెచ్చ, ఏక్ మెట్టయ్ వెగ వెసితికయ్,

30 ఒగ్గర్ ఒగ్గర్జిన్ జనాబ్ మాన్సుల్ జోతె సొట్ట జలసక, అత్తో చట్టొ నెంజిలసక, గుడ్డి జలసక, గుల్ల జలసక,

* 15:26 15:26 ఎత్తి అదికారుమ్ తిలొ దేముడుచ ‘బోదల్’ రిత జల యూదుల్చి రిసా సంగితయ్.

అన్నె వేర బాదల్ తిలస ఎత్తిక, కడ ఆన, జోచి పాసి వెసయ్తకయ్, యేసు జేక చెంగిల్ కెర్లన్.

31 గుల్ల మాన్సుల్ లట్టబ్లిసి, అత్తో చట్టో నెంజిలస చెంగిల్ జలిసి, సొట్ట మాన్సుల్ ఇండిలిసి, గుడ్డి మాన్సుల్ దెకిలిసి ఒత్త తిల మాన్సుల్ దెక కెర, ఆచారిమ్ జా, ఇస్రాయేల్ ప్రెజల్చో దేముడుక గవురుమ్ కెర్ల.

చెత్తర్ వెయిల్ జిన్క యేసు అన్నిమ్ దిలిసి

32 జేవ్ జనాబ్ ఎత్తిజిన్ యేసు తెన్ జా మెట్టయ్ తిర్రతి తతికయ్, జోచి సిస్సుల్క యేసు పాసి బుకారా కెర, “ఈంజేవ్ ప్రెజల్ తిర్రతి అంచితె అస్తి. జోవయింక అన్నిమ్ కిచ్చో కి నాయ్, చి జోవయించి ఉప్పిర్ ఆవ్ కన్యారుమ్ జతసి. జేవ్ నే కతె ఉట్ట గెలిగిన, వట్టె మొకొమ్ గుంజ్ర సేడుక జయెదె, చి రిసా జోవయింక చువ్వె తెద్రవుక అంక ఇస్టుమ్ నాయ్” మెన సంగిలన్.

33 సిస్సుల్ ఆచారిమ్ జా, జోవయింక “ఎతివాట్జిన్ మాన్సుల్క అన్నిమ్ దెంక మెలె, జోవయింక సరిపుచుప జతి అన్నిమ్ ఈంజ బయిలె అమ్క కేనె దొర్కు జవుల?” మెన సంగిల, చి

34 యేసు జోవయింక, “జలె, తుమ్చితె కెత్తి పోడియె అస్తి?” మెన పుసిలన్, చి జేవ్ సిస్సుల్ చజన కెర, “అమ్చితె సత్తు పోడియె, చి ఇదుద్ల మొస్స దొన్ని అస్తి” మెన సంగితికయ్,

35 యేసు ప్రెజల్ ఎత్తిక “వెన” మెన సంగ కెర,

36 జేవ్ సత్తు పోడియెచి జేవ్ మొస్స నజన, అత్తి దెరన, ‘తుయి దా దయ కెర్లది’ మెలి రితి దేముడు అబ్బొన్క ఉచర, పోడియె మోడ కెర, జోచ సిస్సుల్క వంట దెతికయ్, జేవ్ సిస్సుల్ ప్రెజల్క జా ఎత్తి వంట దిల.

37 జేవ్ ప్రెజల్ ఎత్తిజిన్ పేట్ బెర్దు కయ్లి పడ్డో, సింసిల గండల్ సత్తు గంపల్తె సిస్సుల్ గుడ్డ బెరయ్ల.

38 తేరబోదల్ బాలబోదల్క ముల్తె, చెత్తర్ వెయిల్జిన్ మున్సుబోదల్ కయ్ల.

39 పడ్డో, జేవ్ బెర తిల జనాబ్క తెద్రవ దా కెర, దోనితె వెగ, యేసుచి సిస్సుల్ మగదాన్ మెంతి ప్రాంతుమ్తె ఉట్ట గెల.

16

యూదుల్చి వెల్లి సబతె యేసుక పరిచ్చ కెర్లిసి (మార్కు 8:11-13; లూకా 12:54-56)

1 తెదొడి, పరిసయ్యుల్ చి సద్దూకయ్యులు యేసుతె జా కెర, జోక పరిచ్చ కెర్లి రిసా, “అన్లె, తుక పరలోకుమ్చి అదికారుమ్ అస్సె మెన అమ్ చినితి రిసా, అమ్చి మొక్కె వెల్లి కామ్ ఏక్ కెరు” మెన, మోసిమ్క జోక సంగిల.

2 యేసు జోవయింక ఏక్ టాలి సంగిలన్. “సాంజ్ జతి పొది ఆగాసుమ్తె మబ్బు నెంజ పొద్దు బగుక ఎరన

లగితయ్ మెన దెకిలెగిన, ‘కలిక చెంగిల్ కెరెదె’ మెన తుమ్ చినితను.

3 పడ్డో, పెందలె ఒగ్గర్ మబ్బు కెర్లెగిన, ‘వెల్లో పాని పెటెదె’ మెన చినితను గెద? జలె ఆగాసుమ్ కీసి తిల కీసి కెరెదె గే తుమ్ చినితను, గని అప్పె జర్గు జత కమొచి అర్దుమ్ చినుక నెతుర్పు.

4 ప్రబుక నిదానుమ్ నెంజ లంజెబుద్ది పాపుమ్బుద్ది జల తుమ్ ఈంజ కాలుమ్చ మాన్సుల్, రుజ్జా దెకయ్త కమొక కోరప జతను. అంచి అదికారుమ్ దెకయ్తి రిసా, ఎక్కి ముల కేన్ వేర కామ్ కెర దెంక నెంజె. దేముడుచ కబుర్లు పూర్గుమ్ సంగిలో యోనాక జర్గు జలిన్చి రితి జయెదె.”

పండితుల్చి రిసా యేసు సిస్సుల్క జాగర్ల సంగిలిసి (మార్కు 8:14-21)

5 పడ్డో యేసు సిస్సుల్ తెన్ గాడు ఒత్తల్తో జిన ఒడ్డుతె పాచ కెర, “పోడియె గట్ట ఆనుక పచ్చ గెలమ్” మెన సిస్సుల్ ఏద కెర్లికయ్,

6 యేసు జోవయింక టాలి సంగిత్ రితి ఇసి మెలన్. “తుమ్ దెకన. పరిసయ్యుల్చి సద్దూకయ్యుల్చి పులయ్తి పీట్చి రిసా తుమ్ జాగర్ల తెన్ తా” మెన, జోవయింక సంగిలన్.

7 జేవ్ ఎక్కిలో తెన్ ఎక్కిలో “కిచ్చో పోడియె రిసా సంగితయ్? అమ్ పోడియె నే ఆన్లి రిసాయి ఇస్సె మెలన్.” మెన బమ్మ జా లట్టబన్ల.

8 యేసు, మాత్రుమ్, జేవ్ ఉచర్లిసి జాన కెర, “తోక్కి నముకుమ్చ, తుమ్. తుమ్చితె పోడియె నెంజిలిన్చి రిసా కిచ్చొక ఉచరన లట్టబంతను?

9 తుమ్ అప్పెక అర్దుమ్ కెరన్ను నాయ్ గె? పాచ్ పోడియె పాచ్ వెయిల్ జిన్క వంటితికయ్, కెత్తి గంపల్తె సింసిలిసి బెరయ్లదు గే?

10 సత్తు పోడియె చెత్తర్ వెయిల్ జిన్క వంటిత్కయ్, కెత్తి గంపల్తె సింసిలిసి బెరయ్లదు గే? తుమ్ ఏద కెర్పు నాయ్ గె?

11 జలె, అవ్ మాములుమ్ అన్నిమ్చి రిసా తుమ్క సంగుక నాయ్, మెన కిచ్చొక అర్దుమ్ కెరన్ను నాయ్? పరిసయ్యుల్చి, సద్దూకయ్యుల్చి పులయ్తి పీట్చి రితి బోదనచి రిసా జాగర్ల తెన్ తా” మెన యేసు అన్నె సంగిలన్.

12 తెదొడి ‘మాములుమ్ పులయ్తి పీట్చి రిసా నాయ్, గని సద్దూకయ్యులు చి పరిసయ్యుల్ సికడ్డిసిచి రిసా అమ్క జాగర్ల సంగితయ్’ మెన సిస్సుల్ అర్దుమ్ కెరన్ల.

మాన్సుల్ అంక కో మెన ఉచర్తి గే?

(మార్కు 8:27-30; లూకా 9:18-21)

13 యేసు సిస్సుల్ తెన్ ఇండ గెచ్చు కైసరియ పిలిప్పిచి ప్రాంతుమ్తె పాచ అయ్లె పొది, “మాన్సు జా జెర్పున్ అయ్లయ్ అంక, కో మెన ప్రెజల్ సంగితతి?” మెన పుసిల. జేవ్ సిస్సుల్ జోక,

14 “సగుమ్జిన్ తుక ‘బాప్తిసుమ్ దెతె తిలో యోహాను’ మెంతతి. సగుమ్జిన్ తుక ‘దేముడుచ కబుర్లు సంగిలో ఏలీయా జయెదె’ మెంతతి. అన్నె సగుమ్జిన్, యిర్మీయా, నెంజిలె ప్రబుచ కబుర్లు సంగిలో అన్నెక్లో జయెదె.” మెన, సిస్సుల్ సంగిల.

15 యేసు జోవయింక, “జలె, తూమ్ అంక కో మెన ఉచర్లసు?” మెన పుసితికయ్,

16 “తుయి ఎక్కిలో జీవ్ తిలో దేముడుచొ పుత్తుసి. జో తెద్రయ్లో క్రీస్తు మెలె రచ్చించుప కెర్తొసా తుయి” మెన, సీమోను పేతురు ఒప్పన సంగిలన్.

17 యేసు జోక, “ఓ సీమోను, యోహాను మెలోసాచొ పుత్తుసి, తుక చెంగిలి. కిచ్చొక మెలె, ఈంజ కోడు తుక కో మాన్సు సికయ్లిసి నెంజె, గని పరలోకుమ్ తిలో అంచొ అబ్బొయి జలో దేముడు తుచి ఆత్మతె ఇసి మెన సికడ అస్సె.

18 అన్నె, తుక ఆవ్ కిచ్చొ మెంతసి మెలె, తుక ‘పేతురు’ మెన నావ్ తియ అస్సి. ‘వెల్లో పత్తుర్’ మెలి అర్దుమ్ తెన్. ఈంజ రంగ్గి పత్తుర్తె అంచి నంగుమ్ బందిందె, చి మొర్రు ఆన్తె సెక్తివొ కి జేవ్చి ఉప్పిరి జీనుక నెతిర్తి.

19 పరలోకుమ్చి తాలుమ్లు వాడిక కెరుక మెలి రితి, తుక అదికారుమ్ దెతసి. మెలె, బూలోకుమ్తె కిచ్చొచి రిసా ‘పోని’ మెనిస్తె గే, పరలోకుమ్తె ‘పోని’ మెనుమ్దె. అన్నె, కిచ్చొచి రిసా సెలవ్ దెస్తె గే, పరలోకుమ్చి సెలవ్ దెమ్దె” మెన, యేసు పేతురుక అదికారుమ్ దిలన్.

20 తెదొడి, “ఆవ్, ‘ఎత్తి అదికారుమ్ తిలో దేముడు తెద్రయ్లో క్రీస్తు రచ్చించుప కెర్తొసా జెయెదె’ మెన కక్క సంగ నాయ్” మెన, యేసు సిస్సుల్క గట్టిజ సంగిలన్.

యేసు సైమల్ సేడ మొర గెచ్చ అన్నె జీవ్ జా ఉట్టిందె
(మార్కు 8:31-9:1; లూకా 9:22-27)

21 జా దీసి తెంతొ, “ఆవ్ యెరూసలేమ్ పట్టుమ్తె గెచ్చ కెర, వెల్లి సబ కెర్తె వెల్లెల మాన్సుల్, పూజర్లు చి మోసే తెన్ దేముడు దిలి ఆగ్గుల్ సికడ్తనతె, చి అత్తి ఒగ్గర్ సైమల్ సేడ మొరుక అస్సె. గని, తిర్తతక అన్నె జీవ్ జా ఉట్టిందె” మెన యేసు జోచ సిస్సుల్క సంగుక దెర్లన్.

22 తెదొడి, పేతురు జోక పక్కయ్ కడ నా కెర, “ప్రబు, దేముడుచి దయక తుక జా పిట్టవుసు! దస్సిచి తుక కెయ్యొక కి జర్లు జవున్ నాయ్” మెన, యేసుక గోల కెర్లన్.

23 పేతురు దస్సి సంగితికయ్, యేసు పస్ల కెర, జోక దెక, “సయ్తాన్, అంచి పడ్డొ గో! అంచి తిలి కామ్క తుయి అడ్డు అస్సిన్. దేముడుచి వచ్చెనచి బుద్ది ఉచర్లది నాయ్, గని మాన్సుల్ ఉచర్తి రగుమ్ ఉచర్లది” మెన, పేతురుక సంగిలన్.

నంపజలన నిదానుమ్ తెన్ అంచి పట్టి బులుక అస్సె

24 యేసు పేతురుక దస్సి సంగ కెర, సిస్సుల్ ఎత్తిక, “కో నంపజా, అంచి పట్టి బులుక ఉచరుల గే, జోచి సొంత ఇన్సుమ్ ఎత్తి ముల దా, జోచి సొంత సిలువ వయన్లి రితి జా, అంచి పట్టి బులుక అస్సె.

25 కిచ్చొక మెలె, జోచి సొంత ప్రానుమ్ రచ్చించుప కెరన తంక, కో కోర్ప జవుల గే, జోచి ప్రానుమ్ పాడ్ జా గెచ్చెదె. గని, అంచి రిసా కో జోచి ప్రానుమ్ దెతి రితి ఎక్కి మెన్సు నిదానుమ్ ఇండుల గే, జోచి ప్రానుమ్ రచ్చించుప జా జోక దొర్కు జయెదె.

26 ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన, జోచి సొంత ప్రానుమ్ పాడ్ కెరన్లెగిన, జోక కిచ్చొ లాబుమ్? కిచ్చొ లాబుమ్ నాయ్. అన్నె, కేన్ మాన్సుచి ఆత్మ పాడ్ జలెగిన, జోచి ప్రానుమ్ దేముడు తెన్ అన్నె బెదవంతి రితి కిచ్చొ దిలె సరిపుచుప జయెదె గే?

27 “కిచ్చొక ఈంజ ఎత్తి ఆవ్ సంగితసి మెలె, పడ్డొక ఆవ్ మాన్సు జా జెర్మున్ అయ్లోసా, అంచ దూతల్ తెన్, కచితుమ్ అంచొ అబ్బొసి జలో దేముడుచి పరలోకుమ్చి ఉజిడి తెన్, అన్నె జెంక అస్సె. ఎత్తి మాన్సు ఇండిలి కొల్లి జోక సిచ్చ గే బవుమానుమ్ గే దెయిందె.

28 అన్నె, తుమ్క ఆవ్ కిచ్చొ కచితుమ్ సంగితసి మెలె, ఇన్నె టీవొ జా తిలనతె సగుమ్జిన్ నే మొర్తె అగ్గె, ఆవ్ మాన్సు జా జెర్మున్ అయ్లోసా అంచి రాజిమ్చి అదికారుమ్ తెన్ డీస్తిసి దెకుల” మెన యేసు సంగిలన్.

17

సిస్సుల్చి మొక్కె యేసు పరలోకుమ్చి ఉజిడి జా మార్పువ జలిసి

(మార్కు 9:2-13; లూకా 9:28-36)

1 అన్నె సొవ్వు దీసల్ గెలి పడ్డొ, యేసు పేతురుక, యాకోబుక చి యాకోబుచొ బావొన్ జలో యోహానుక పట్టి కడ దెరన, డోంక్ తిలి ఏక్ మెట్టయ్ వెగ కెర,

2 జోవయించి మొక్కె జోచి రూపుమ్ మార్పువ జా, జోచి మొకొమ్ పొద్దు రితి తల్కున ఉజిడ్ జలి, చి జోచ పాలల్ ఉజిడ్ రితి చోక్ డీసిల.

3 పడ్డొ, ఈందె, పూర్గుమ్చ దేముడుచి కబుర్లు సంగిత మోసే చి ఏలీయా దొగుల యేసు తెన్ లట్టబై తా. జేవ్ తీగ్గ సిస్సుల్క డీసన్ సేడ్డ.

4 జేవ్ దొగుల పూర్గుమ్చ యేసు తెన్ లట్టబై తతికయ్, పేతురు యేసుక, “ప్రబు, అమ్ ఇన్నె తంక చెంగిలి. తుక ఇన్సుమ్ తిలె, ఏక్ తుక, ఏక్ మోసేక, ఏక్ ఏలీయాక, మొత్తుమ్ తిన్ని కుడియల్ బందిందె” మెన సంగిలన్.

5 పేతురు దస్సి సంగితె తతికయ్, ఈందె, ఉజిడ్ తిలి ఏక్ మబ్బు జోవయింక డంకి జలన్, చి “ఈందె, ఈంజొ అంచొ ప్రేమ తిలో సొంత పుత్తు. ఇన్నెచి రిసా అంక ఒగ్గర్

సర్దనంతోనుమ్. ఇన్నెచి కోడు తుమ్ సూన” మెన, జా మబ్బు తెంతో అవాడ్ సంగిలిసి సూన్.

6 సిస్సుల్ ఈంజ కోడు సూన పుణ్ణో సేడ ఒగ్గర్ బియఁ గెల.

7 గని యేసు జోవయించి పాసి జా కెర, జోవయింక చడ, “ఉట్ట. బియఁ నాయ్” మెన సంగిలన్.

8 జేవ్ సిస్సుల్ అంకివో ఉగుడ దెకిలె, యేసు ఎక్కిలోయి డీసిలన్, అన్నె కక్క దెకిత్ నాయ్.

మొర గెలె అన్నె జీవ్ జతిన్చి రిసా యేసు అన్నె సంగిలిసి

9 యేసుచి సిస్సుల్ జా మెట్టయ్ తెంతో ఉత్త జెతె తతికయ్, “ఆవ్ మాన్సు జా జెర్మున్ అయ్లోసా మొర గెచ్చు అన్నె జీవ్ జతె ఎద, ఈంజ తుమ్క డీసిలిన్చి రిసా తుమ్ కక్క సంగ నాయ్” మెన యేసు జోవయింక సంగిలన్.

10 తెదొడి జోచ సిస్సుల్, “క్రిస్తు మెలో రచ్చించువ కెర్టొసా నే జెతె అగ్గె ఏలీయా పూర్ముచో జెంక అస్సె, మెన మోసే తెన్ దేముడు దిలి అగ్గుల్ సికడ్డన కిచ్చొక సంగితతి?” మెన, యేసుక పుసిల.

11 జో జోవయింక, “ ఏలీయా పూర్ముచో జా కెర ఎత్తి తెయార్ కెరుక అస్సె’ మెన పూర్ము దేముడు సంగిలి కోడు నిజుమి,

12 గని తుమ్క ఆవ్ కిచ్చొ మెంతసి మెలె, ఈంజో ఏలీయా అగ్గెయి అయ్లన్. అయ్లె కి, జేవ్ జోక చినితి నాయ్, చి జోవయింక ఇస్టుమ్ అయ్లి రితి జేవ్ జోక కెర్ల. ఆవ్ మాన్సు జా జెర్మున్ అయ్లోసా కి జోవయింతె దన సైమల్ సేడిందె” మెన యేసు సంగిలన్.

13 జో బాప్తిసుమ్ దెతె తిలో యోహానుచి రిసాయి ఏలీయా పూర్ముచో రిత్సా మెన యేసు సంగిలన్, మెన సిస్సుల్ అర్దుమ్ కెరన్ల.

మొర్పు సేడ్డె తిలో బూతుమ్ దెర్లొ నాడుక యేసు చెంగిల్ కెర్లిసి

(మార్కు 9:14-29; లూకా 9:37-43)

14 యేసుచి సిస్సుల్ జా మెట్టయ్ తెంతో ఉత్త జా కెర, ఒత్త బెర్లి జనాబ్తె పావితికయ్, ఎక్కిలో యేసుతె జా కెర, సెర్పు సేడ జొకర,

15 “బాబు, అంచొ పుత్తుచి ఉప్పిరి కన్కారుమ్ తీ. జో మొర్పు జబ్బు తెన్ ఒగ్గర్ బాద సేడ్డె తత్తయ్. జో కెయఁక తెయఁక ఆగితె నెంజిలె గడ్డె సేడుక అస్సె.

16 తుచ సిస్సుల్తె జోక కడ ఆన్లయ్, గని జోక చెంగిల్ కెరుక జేవ్ నెత్తిర్ల” మెన సంగిలన్.

17 యేసు, “నముకుమ్ నెంజిలి వెర్రి బుద్దిచి కాలుమ్చ, తుమ్. తుమ్చి తెన్ ఆవ్ కెత్తి దీసల్ తంక? కెత్తి దీసల్

తుమ్క ఆవ్ ఒర్పుప జంక? అల్లె, జో నాడుక అంచితె కడ ఆన” మెన, సంగిలన్.

18 జో నాడుక కడ ఆన్తికయ్, యేసు జోక దెర్లి బూతుమ్క గోల కెర్తికయ్, జా బూతుమ్ జోక ముల దా, ఉట్ట గెలన్. గెలి వెంటనె, జో నాడు చెంగిల్ జలన్.

19 పణ్ణో, అన్నె కో నెంతె, యేసుచ సిస్సుల్ జోతె జా కెర, “ఆవ్ కిచ్చొక జా బూతుమ్క ఉదడుక నెత్తిర్లమ్?” మెన పుసిల,

20 చి యేసు జోవయింక, “తుమ్ తొక్కి నంపతిలి రిసా, తుమ్క సార్పుగిడ్డచి ఎదిలి నముకుమ్ తిలెగిన, ఈంజ మెట్టక జవున్ దెక ‘ఇన్నె తెంతో ముల దా, ఒత్తల్తో గో’ మెలె బేగి గెచ్చెదె. తుమ్ కిచ్చొ నంపజలెకి, జయ్యె జెయిమ్ జయెదె, మెన తుమ్క ఆవ్ కచితుమ్ సంగితసి

21 * గని ఎక్కి చువ్వెతా ప్రార్దన కెర్లకయ్ ఇసిచిక ఉదడుక జయెదె.”, మెన యేసు సంగిలన్.

22 పణ్ణో, జేవ్ గలిలయ ప్రాంతుమ్తె బెద బుత్తె తతికయ్. యేసు సిస్సుల్క దెక, “ఆవ్ మాన్సు జా జెర్మున్ అయ్లోసాక మాన్సుల్చి అత్తి విరోదుమ్ సుదల్ దెర దెవుల,

23 చి అంక జేవ్ మారుల. మార్లె కి, తిర్తెత్ అన్నె జీవ్ జా ఉట్టిందె” మెన, యేసు అన్నె సంగిలి రిసా, సిస్సుల్ ఒగ్గర్ దుకుమ్ జల.

దెంక తిలి పన్నుచి రిసా యేసు సంగిలిసి

(మార్కు 9:30-32; లూకా 9:43-45)

24 యేసు కపెర్నహూమ్ పట్టుమ్తె పావిలి పొది, దేముడుచి గుడితె దెతి చెత్తర్ వెండ్లుచి † పన్ను నజీతన పేతురుతె జా కెర, “తుమ్క బోదన కెర్టొసా ఈంజ చెత్తర్ వెండ్లుచి పన్ను దెయెదె గే నాయ్?” మెన పుసిల, చి “దెయెదె” మెలన్.

25 జో పేతురు గెరి జా కెర, నే లట్టబై అగ్గె, యేసు జా సంగతి జాన్లి రిసా, “ఓ సీమోను, తుయి కిచ్చొ ఉచర్తసి? ఈంజ లోకుమ్చ రానలు కచితె పన్ను నజుల? సొంత పుత్తర్పుల్తె గే, వేర మాన్సుల్తె గె?” మెన పుసిలన్,

26 చి పేతురు “వేర మాన్సుల్తె” మెంతికయ్, యేసు, “దస్సి జలె, పుత్తర్పుల్తె సంగుక నాయ్.

27 గని, దేముడుచి గుడిక ఈంజ పన్ను నజీతనక అన్కానుమ్ నే కెర్లి రిసా, తుయి సముద్రుమ్తె గెచ్చు, గాలుమ్ గలు. తొలితో దెర్పు సేడ్డె మొస్సాక దెర, జో మొస్సాచి చోడి చిర దెకిలె, ఒత్త ఏక్ అట్టు వెండ్లుచి విలువచి కాసు డీసెదె. జా దెర జా కెర, తుచి రిసా కి అంచి రిసా కి జోవయింక దేసు” మెన, యేసు పేతురుక సంగిలన్.

* 17:21 17:21 గ్రీకు బాస తెన్ ఈంజ మత్తెలి తొలితో రెగిడ్ల పున్తకల్తె 21 కోడు తయె నాయ్. † 17:24 17:24 ‘పన్ను’ మెలె, సిస్టుచి రితి జయెదె. ఈంజ పన్ను జలె, విస్కెక్ వెర్పుల్చి జలి తెంతో ఎత్తి యూదుడు వెర్సెక్ వెర్సెక్ దేముడుచి గుడిచి రిసా చెత్తర్ వెండ్లు దెంక తిలిసి.

18

పరలోకుమతె కో వెల్లో జయెదె గే
(మార్కు 9:33-37; లూకా 9:46-48)

1 జా పొదుల్తె, యేసుచ సిస్సుల్ జోతె జా కెర, “పరలోకుమచి రాజిమతె కో వెల్లో జయెదె?” మెన పుసితికయ్,

2 జో ఏక్ బాలబోదక జోచి పాసి బుకారా కెర, జోవయించి నెడిమి టీణో కెర,

3 ఇసి మెలన్. “తుమ్క ఆవ్ కిచ్చొ కచితుమ్ సంగితసి మెలె, తుమ్ బుద్ది మార్పుప కెరన బాలబోదల్ రిత గవురుమ్ నే ఉచరంతి రితి జలెకయ్, పరలోకుమచి రాజిమతె బెదుక తెరితె, జయె నాయ్.

4 జాకయ్, ఈంజో బోదచి రితి కో దాక్ కెరన తయెదె గే, జొయ్యి పరలోకుమచి రాజిమతె వెల్లో జయెదె.

5 అన్నె * ఇన బాలబోదల్తె ఎక్కిలోక జలెకు, కో † అంచి నావ్ తెన్ మరియాద కెరుల గే, అంకయి మరియాద కెర్లి రితి జవుల.

6 గని అంక సంపజల ఇన బాలబోదల్ జల రితసతె ఎక్కిలోక కి, కో ‡ పాపుమ్ కెరవుల గే, జోవయించి టొట్రయ్ తిర్రేలి రితో వెల్లో పత్తురు ఒడోవ దా, జోక నముద్రుమ్తె బుడ్డవ గెలుక చెంగిలి.

7 “అయ్యో! కిపాపుమ్ కెరయ్తినచి రిసా ఈంజ లోకుమ్క కస్తుమ్! * పాపుమ్ కెరయ్తిన కచితుమ్ జెయెదె, గని కచి అత్తి దన అల్లర్ జవుల గే,

8 అయ్యో! జాచి రిసా, తుమ్చితె ఎక్కిలోచొ ఆతు జలెకు, చాటు జలెకు, జోక † పాపుమ్ కెరవ తిలెగిన, జోచి ఆతు జవున్, జోచి చాటు జవున్, కండ గెల వెంట గెలి రితి జవున్. కిచ్చొక మెలె, దొన్ని అత్తో దొన్ని చట్టో తెన్ కెయెఱ నే విజితి ఆగితె గలి జతి కంట, ఆతు జలెకు, చాటు జలెకు నెంజ పరలోకుమచి రాజిమతె బెదుక తుమ్క చెంగిలి.

9 అన్నె, తుమ్చితె ఎక్కిలోచి అంకి జవున్ తుమ్క ‡ పాపుమ్ కెరవ తిలెగిన, అన్నె జా అంకి జోతె తెంతో కడ వెంట గెలి రితి జవున్. కిచ్చొక మెలె, దొన్ని అంకివో తెన్ వెల్లి ఆగి గోయ్తె గలి జతి కంట, ఎక్కి అంకి తెన్ పరలోకుమచి రాజిమతె బెదుక తుమ్క చెంగిలి.

సంపజతనక దేముడు విలువ దెకితిసి

10 “ఈంజేవ్ బాలబోదల్ రితసతె ఎక్కిలోక కి నిస్కారుమ్ నే దెకితి రితి దెకన. కిచ్చొక మెలె, ఇన్నెక రకిత దూతల్ కెయెఱ తెయెఱ పరలోకుమ్ తిలొ అబ్బొచి

* 18:5 18:5 ఇన బాలబోదల్తె మెలె, బాలబోదల్తయ్ ఇసి మెనుక జయెదె, నెంజిలె సంపజా బాలబోదల్ రిత జా దాక్ కెరస్సనక కి ఇసి మెనుక జయెదె. దొన్ని అర్థల్ కి కెరనుక జయెదె. † 18:5 18:5 నెంజిలె 5. మొత్తమ్: అన్నె జో అంక సంపజలి రిసా, ఇన బాలబోదల్తె ఎక్కిలోక జలెకు కో మరియాద కెరెదె గే, అంకయ్ మరియాద కెర్లి రితి జయెదె. ‡ 18:6 18:6 నెంజిలె జోవయించి నముకుమ్ పిట్టవుల గే, § 18:7 18:7 నెంజిలె, ‘నముకుమ్ పిట్టయ్తినచి రిసా’. * 18:7 18:7 నెంజిలె ‘నముకుమ్ పిట్టయ్తినచి’. † 18:8 18:8 పాపుమ్...రిసా, నెంజిలె ‘నముకుమ్ పిట్టయ్తె రితి జలెగిన, జా దీసి తెంతో అన్నె దస్సి నే జతి రిసా’ చి అర్థమ్ కి గ్రీకు బాస తెన్ ఈంజ తొలితొ రెగిడ్లిన్ తెన్ బెదెదె. ‡ 18:9 18:9 పాపుమ్...రిసా, నెంజిలె ‘నముకుమ్ పిట్టయ్తె రితి జలెగిన, జో దీసి తెంతో అన్నె దస్సి నే జతి రిసా’ చి అర్థమ్ కి గ్రీకు బాస తెన్ ఈంజ తొలితొ రెగిడ్లిన్ తెన్ బెదెదె. § 18:11 18:11 గ్రీకు బాస తెన్ ఈంజ ఎత్తి తొలితొ రెగిడ్లిన్ నగుమ్ పుస్తకల్తె 11 నంబర్చి కోడు తయె నాయ్. * 18:13 18:13 పిట గెలి

మొకొమ్ దెకితె తవుల మెన ఆవ్ తుమ్క కచితుమ్ సంగితసి.

11 కిచ్చొక మెలె, ఆవ్ మాన్సు జా జెర్మున్ అయ్లొసా కిచ్చొక అయ్లయ్, మెలె, జోవయించి ఆత్మక నెస గెల మాన్సుల్క రచ్చించుప కెరుక అయ్లయ్.

నెస గెలి మెండపిల్లచి రిసాచి టాలి

12 “అల్లె, తుమ్ కిచ్చొ ఉచర్తసు? ఏక్ మాన్సుక పుంజెక్ మెండల్ తిలె, జోవయంతె ఎక్కి పిట్ట తిలెగిన, ఏక్ తకు పుంజెక్ మెండల్క ఒత్త డొంగై ముల దా కెర, జా పిట్ట గెచ్చు తిలి మెండక చజుక గెచ్చె నాయ్ గే?

13 అన్నె జేవ్ కెయ్ నే నాసీల ఏక్ తకు పుంజెక్ మెండల్చి రిసా సంతోసుమ్ జతి కంట, ఈంజ * నాస గెలి మెండక చజలె, డీసీలె, జో గొవుడు ఒగ్గర్ సర్లసంతోసుమ్ జయెదె మెన, తుమ్క కచితుమ్ ఆవ్ సంగితసి.

14 దస్సి కి, ఈంజేవ్ బోదల్ ఎక్కిలో కి నాసెనుమ్తె గెచ్చుక పరలోకుమ్ తిలొ అబ్బొన్క ఇన్సుమ్ నాయ్.

15 “తుమ్చితె బావొ ఎక్కిలోక అన్నెక్లో పాపుమ్ కెర తిలెగిన, జో జా పాపుమ్ నే కెర్లొసా పాపుమ్ కెర్లొసాతె గెచ్చు కెర, అన్నె కో నెంతె, జో కెర్లి పాపుమ్ జోకయ్ సంగుక అస్సె. జో పాపుమ్ కెర్లొసా జా కోడు సూన్లెగిన, నిజుచి, పాపుమ్ కెర్లయ్ మెన, ఒప్పున సంగిలెగిన, జోక అన్నె బెదవన తస్తె.

16 గని, జో నే సూన్లెగిన, జా తగుచి రిసా తుమ్ లట్టబ్బినచి రిసా దొగుల తీగ్ల సాచి జతి రితి, అన్నెక్లోక గే అన్నె దొగులక గే కడన, జో పాపుమ్ కెర్లొసాతె గెచ్చు, సంగ.

17 జో తీగ్లచి కోడు నే సూన్లెగిన, అంక సంపజలన మొత్తమ్ బెద సబ కెర్లిన్తె జా తగు సూనవ. జో జా సంగుమ్ సబ కెర్లిన్చి కోడు కి నే సూన్లెగిన, జోక తుమ్చితె నే బెదవంతె, బార్ కెర, దస్సి, యూదుల్ నెంజిలనక కి సిస్తు నజితనక కి యూదుల్ కిసి బెదవంతి నాయ్ గే, దస్సి దెక సిచ్చు కెర.

18 తుమ్ సంపజలన బెద ఈంజ లోకుమ్తె సబ కెర కిచ్చొ రుజ్జు సంగితె గే, జాకయ్ పరలోకుమ్ తిలి అమ్చి అదికారుమ్ దెతసుమ్, మెన నిజుచి తుమ్క ఆవ్ సంగితసి.

19 “పడ్డొ, తుమ్క అన్నె కిచ్చొ మెంతసి మెలె, ఈంజ లోకుమ్తె తుమ్చితె కో కో, ఎక్కి దొగులయి జలెకి, మెన్సుతె ఎక్కి రితి ఉచర, కిచ్చొచి రిసా ప్రార్దన కెర్తె గే,

పరలోకుమ్ తిలో అంచో అబ్బొ తుమ్చి రిసా జాక జర్గు కెరెదె.

20 కిచ్చొక మెలె, దొగుల తీగ్ల అంచి నావ్ తెన్ కేనే ఎక్కితె తవుల గే, ఒత్త జోవయించి నెడిమి ఆవ్ తయిందె” మెన, యేసు సంగిలన్.

మాన్యుల్క కెత్తి సుట్టు చెమించుప కెరుక గే

21 తెదొడి పేతురు పురె జా కెర, యేసుక, “ప్రబు, కేన్ జవున్ బావో అంక కెత్తి సుట్టు పాపుమ్ కెర్తిసి, ఆవ్ జోక చెమించుప కెరుక? సత్తు సుట్టు ఎద గే?” మెన, పుసిలన్.

22 యేసు జోక, “సత్తు సుట్టు నాయ్. తిని విసా సత్త సుట్టు ఎదక.” మెలన్.

ఎక్కిలోక ఎక్కిలో చెమించుప కెర

23 “పరలోకుమ్చి రాజిమ్తె బెదితన ఎక్కిలోక ఎక్కిలో చెమించుప కెర్తిసి రిసా కిచ్చొ టాలి సంగుక జయెదె మెలె, జోచ గొత్తి సుదల్ దెంక తిలి డబ్బుల్ ఏక్ రానొ నజనుక దెర్లొ.

24 నజనుక దెర్లి పొది, ఈందె, జోక దెస్సు వెయి వెండ్లు దెంక తిలో ఎక్కిలోక బుకార్తికయ్, జమాన్లు జోక జో రానొతె కడ ఆన్ల.

25 జా రునుమ్ తీర్పుప కెరుక మెన జో మాన్యుతె కిచ్చొ నెంజిలి రిసా, జోచొ ఎజొమాని, ‘జోక కి జోచి తేర్నిక కి, జోచ బోదల్క కి, జోక కలుగు జలిసి ఎత్కి కి విక గెల కెర, రునుమ్ తీర్పుప కెరవడ’ మెన, జమాన్లుక సంగిలన్.

26 జలె, రునుమ్ జలొ జో గొత్తి సుదొ సెర్ను సేడ, జొకర, బాబు, అంచి ఉప్పిరి దయ తియ, దొరత్ రక్క. జా రునుమ్ ఎత్కి ఆవ్ తీర్పుప కెరిందె” మెన, బతిమాల్పా జా సంగితికయ్,

27 జో రానొ జోచి ఉప్పిరి కన్కారుమ్ జా, జోక ముల కెర, జోచి రునుమ్ చెమించుప కెర్లన్.

28 “గని, జో దస్సి బార్ జా కెర, జోచి జతచ గొతి మాన్యుల్తె ఎక్కిలో జోక దొన్ పుంజొ †వెండ్లు దెంక తిలోసాక దస్సుల్ జా, జోచి పికతె దెర, ‘తుయి అంక దెంక తిలిసి అంక దే’ మెన సంగిలన్.

29 జోచి జతచొ జో గొత్తి సుదొ సెర్ను సేడ, జొకర జొకర, ‘అంచి ఉప్పిరి దయ తియ దొరత్ రక్క. తుక దా గెలిందె’ మెన, బతిమాల్పా జా సంగిలే కి,

30 జో నే ఒప్పన్తె, జో అన్నెక్లొ దెంక తిలిసి దా గెల్తె ఎద జోక జేల్తె గలయ్లన్.

31 “తెదొడి, ఈంజొ కన్కారుమ్ నే దెకిలో గొత్తి సుదొచి ఒత్తచ గొత్తి సుదల్ జా జర్గు జలిసి దెక కెర, ఒగ్గర్ బాద సేడ, జర్గు జలిసి ఎత్కి జోచొ ఎజొమానిక సంగిల.

32 తెదొడి, జో ఎజొమాని, జో కన్కారుమ్ నెంజిలో గొత్తి సుదొక బుకారా కెర, జోక, ‘తుయి, గర్చొ గొత్తి సుదొ, తుయి

అంక బతిమాల్పా జా జొకర్లది, చి తుచి ఎదివాట్ తిలి రునుమ్ పెట గెలయ్.

33 ఆవ్ తుక చెమించుప కెర్లి రితి, తుయి తుచొ జతచొ గొత్తి సుదొక చెమించుప కెరుక తిలి నాయ్ గే? మెన, జోక సంగ కెర,

34 జో గొత్తి సుదొ రునుమ్ జలిసి ఎత్కి దెతె ఎద, సిచ్చల్ కెర్తనతె జో జేలి తంక మెన జోచొ ఎజొమాని సొర్ప కెర దిలన్.

35 “జలె, తుమ్తె కో తుమ్చొ బావొ జలొ అన్నెక్లొక పెట్టి ఎత్కి చెమించుప నే కెర్లె, పరలోకుమ్ తిలో అంచొ అబ్బొ కచితుమ్ జో మాన్యుక సిచ్చ దెయెదె” మెన యేసు బుద్ది సంగిలన్.

19

1 యేసు ఈంజేవ్ కొడొ సంగ కేడయ్లి పడ్డె, గలిలయ ప్రాంతుమ్ తెంతొ ముల దా, యూదయ ప్రదేసిమ్తెచి యొర్దాను గాడు ఒత్తల్తో పక్క ఉట్టు అయ్లన్.

2 ఒగ్గర్జిన్ జనాబ్ జోచి పట్టి జెతికయ్, జోవయించ జబ్బులు ఒత్త చెంగిల్ కెర్లన్.

పెండ్లి జలన ముల ములి జతిన్చి రిసా యేసు సంగిలిసి

3 పరిసయ్యుల్ సగుమ్జిన్ యేసుక పరిచ్చ కెర, తెర్లె నింద కెరుక మెన, జోతె అయ్ల, అన్నె, “కేన్చి రిసా జలెకు మున్సుబొద జోచి తేర్నిక ములుక నాయిమ్ గే?” మెన, పుసిల, చి యేసు జోవయింక,

4 “ఈంజ లోకుమ్ జెర్మయ్లి పొది తెంతొ, మున్సుబొద తేర్బొద మెన, జెర్మిలోసా జేక జెర్మయ్లో.

5 ఇసికయి మున్సుబొద అయ్యున్అబ్బొన్క ముల దా, జోచి తేర్ని తెన్ బెద తంక అస్సి, అన్నె జేవ్ దొగుల ఎక్కి ఆగ్ జా తవుల మెన జెర్మయ్లోసా సంగిలన్

మెన సదు కెర్పు నాయ్ గే?

6 జలె, జేవ్ దొగుల ఎక్కి జివ్ జా అస్తి. జాచి రిసా, దేముడు పెండ్లితె కక్క జత కెరవ తయెదె గే, కేన్ మాన్యు ములవుక జయె నాయ్.” మెన్ యేసు సంగిలన్.

7 జేవ్ పరిసయ్యుల్ యేసుక “జలె, ‘ముల దెతి పుస్తకుమ్ రెగ్ల దిలెగిన ముల దెంక జయెదె’ మెన మోసే పూర్గుమ్చొ కిచ్చొక ఆడ దిలన్?” మెన, సంగిల.

8 యేసు జోవయింక, “తుమ్ రాడ్ జివ్చ మాన్యుల్చి రిసా ‘తుమ్చ తేర్నివొక ముల దెంక జయెదె’ మెన మోసే సెలవ్ దిలన్, గని మాన్యుల్క జెర్మయ్లి కెర్లి మొదొల్ తెంతొ దస్సి తయె నాయ్.

9 ఆవ్ కిచ్చొ మెన తుమ్క సంగితసి మెలె, జా లంజె జలి రిసా పిట్టవ, కో జలెకు జోచి తేర్నిక ముల దా అన్నెక్లిక పెండ్లి జయెదె గే, లంజె వంసుమ్చొ జతయ్, మెన గట్టిజ సంగితసి” మెన, జోవయింక సంగిలన్.

పెండ్లి నే జతిన్చి రిసా సిస్సుల్ ఉచర పుసిలిసి

10 ఈంజ కోడు నూన కెర, యేసుచ సిస్సుల్ జోక “తెర్నిమున్ను చి నెడిమి ఇసి తిలెగిన, పెండ్లి నే జలెగిన చెంగిల్.” మెన యేసుక సంగిల,

11 చి యేసు జోవయింక, “దేముడు జా సెక్తి దిలెకయ్, నెంజిలె కో కి జా కోడు ఓర్పుప జంక నెత్తిర్తి.

12 ఈందె, జెర్మున్ తెంతో గొడ్డు జలస తవుల, మాన్సుల్ సగుమ్జిన్క గొడ్డు జతి రితి కెర్ల, పడ్డో పరలోకుమ్చి రాజిమ్చి సేవ ఎక్కి మెన్ను తెన్ కెర్తి రిసా, సగుమ్జిన్ కి గొడ్డు రిత జా తవుల. జలె, తుమ్ ఉచర్లి రితి తంక కో తెరుల గే, దస్సి తత్తు.” మెన సంగిలన్.

యేసు బాలబోదల్క చడ వరుమ్ దిలిసి

13 పడ్డో, యేసు జోవయింక చడ ప్రార్దన కెరుక మెన, సగుమ్జిన్ జోవయించ బాలబోదల్క జోతె కడ ఆన్ల.

14 జలె, జేవ్ బోదల్క కడ ఆన్ల మాన్సుల్క యేసుచ సిస్సుల్ “పోన” మెన గోల కెర్ల. గని, యేసు, “జోవయింక అడ్డు కెర నాయ్. బోదల్ అంచితె జెతు. కిచ్చొక మెలె, పరలోకుమ్చి రాజిమ్ ఇన సుదల్చియి” మెన, సిస్సుల్క సంగిలన్.

15 జేవ్ బోదల్క బోడి చడ కెర ఒత్త తెంతో ఉట్ట గెలన్.

పరలోకుమ్చి రాజిమ్తె కిసి బెదుక గే యేసు సంగిలిసి
(మార్కు 10:17-31; లూకా 18:18-30)

16 పడ్డో, ఈందె, ఉబెడో ఎక్కిలో యేసుతె జా కెర, “గురుబాబు, జోబర. ఆవ్ పరలోకుమ్చి రాజిమ్తె కెయెక తెయెక జితి వాట అంక దొర్కు జంక మెలె, ఆవ్ కిచ్చొ చెంగిల్ కామ్ కెర్లె జయెదె?” మెన పుసిలన్.

17 యేసు జోక, “కేన్ చెంగిల్చి మెన కిచ్చొక అంక తుయి పుసితసి? చెంగిల్ తిలొసా ఎక్కిలోయి. అన్నె కోయి నాయ్. పరలోకుమ్తె జితి వాట కావలె మెలె, దేముడుచ ఆగ్గుల్ రితి కెర్లె తా” మెన సంగిలన్.

18 జో ఉబెడో, “కేన్ కేన్ ఆగ్గుల్ రితి కెరుక?” మెన యేసుక పుసిలన్, చి యేసు,

“నరు అత్య కెరు నాయ్,

లంజెకమొ కెరు నాయ్,

కిచ్చొ చోరు నాయ్,

అబద్దుమ్ సాచి సంగు నాయ్,

19 అయ్యద్అబ్బొద్క గవురుమ్ దెకితె తా,

అన్నె, తుక్క తుయి కిసి ప్రేమ కెరంతసి గే దస్సి, వేర సుదల్క కి ప్రేమ కెర్లె తా”

మెన సంగిలన్.

20 జో మాన్సు యేసుక, “ఇనచ ఎత్తి ఆవ్ నిదానుమ్ కెర దెకన్తసి. గని కిచ్చొగె పిట్ట అస్సె మెన అంక అజ్జ. అన్నె

కిచ్చొ పిట్ట అస్సె?” మెన పుసిలన్, చి యేసు జోక, “తుయి పూర్తి జంక ఆన తిలెగిన, గో, చి

21 తుచి ఆస్తి ఎత్తి విక కెర, బీద సుదల్క దేసు, చి పరలోకుమ్తె తుక ఆస్తి కలుగు జెయెదె. అన్నె, అంచి తెన్ బెద, అంచి పట్టి జే!” మెలన్.

22 గని, జో ఉబెడో ఒగ్గర్ సొమ్సారుమ్చి రిసా, యేసు దస్సి సంగితికయ్, దుకుమ్ జా మొకోమ్ ఇదిలిసి కెర ఉట్ట గెలన్.

సొమ్సార్లు పరలోకుమ్చి రాజిమ్తె బెదుక కస్టుమ్

23 తెదొడి యేసు జోచి సిస్సుల్క, “ఆవ్ తుమ్క కిచ్చొ కచితుమ్ సంగితసి మెలె, సొమ్సార్లు పరలోకుమ్చి రాజిమ్తె బెదుక కస్టుమ్.

24 అన్నె, దన సొమ్సార్లు దేముడుచి జా రాజిమ్తె బెదితి కంట, సూజిబొరొ వాట్ ఒంటె గెచ్చుక సుల్లు, మెన తుమ్క ఆవ్ సంగితసి” మెన సంగిలన్.

25 సిస్సుల్ ఈంజ కోడు నూన కెర, ఆచారిమ్ జా, “దస్సి జలె, కో రచ్చొంచుప జంక జయెదె?” మెన, సంగితికయ్,

26 యేసు జోవయింక దెక, “మాన్సుల్ కెర్క నెత్తిర్లిసి, గని ఎత్తి జర్గు కెరుక కి దేముడుక సెక్తి అస్సె.” మెన సంగిలన్.

27 పేతురు, “ఈందె, ఆమ్ ఎత్తి ముల దా తుచి పట్టి బులితసుమ్, చి రిసా అమ్కయి కిచ్చొ దొర్కు జయెదె?” మెన పుసిలన్.

28 యేసు జోవయింక ఇసి మెలన్, “తుమ్క ఆవ్ కిచ్చొ కచితుమ్ సంగితసి మెలె, ఈంజ లోకుమ్క నొవర్ చెంగిల్ కెర్లె పొదిక, ఆవ్ మాన్సు జా జెర్మున్ అయ్లోసా ఎత్తిక ఏలుప కెర్తి రిసా, అంచి పరలోకుమ్చి ఉజిడ్చి సింగాసనుమ్తె వెసితె పొదిక, అంక నంపజా తుమ్ బారజిన్, బార సిజాసనల్తె వెన, ఇస్రాయేలుల్చ బార సెకుమ్లుచక అంచి తెడి తుమ్ తీర్పు కెర్లె.

29 అన్నె, అంచి నావ్చి రిసా గెరల్ జలెకు, అన్నొబావొక జలెకు, బయిబేనిక జలెకు, అబ్బొన్క జలెకు, అయ్యన్క జలెకు, బోదల్క జలెకు, బుయి జలెకు, జో ముల తయెదె గే, జోక దనచ పుంజెక్ వంతుల్ దొర్కు జయెదె, అన్నె, పరలోకుమ్తె గెచ్చు కెయెక తెయెక చెంగిల్ తా జివుల.

30 ఈంజ అగ్గె జల మాన్సుల్ ఒగ్గర్జిన్ పడ్డో జవుల, పడ్డో జలస అగ్గె జవుల.”

20

ద్రాచ తోటచొ ఎజొమానిచి దయచి రిసా టాలి

1 “పరలోకుమ్చి రాజిమ్తె మాన్సుల్క బెదయ్తోసాచి దయ కిసి మెలె, ఎజొమాని ఎక్కిలోచి దయచి రితి జయెదె.

జో జోచి ద్రాచ తోటతె కామ్ కెరవుక మెన, కూలి మాన్సుల్క బుకార్తి రిసా, పెందలె బార్ జా కెర,

* 20:2 20:2 ఏక్ దిసిచి కామ్క కూలి ఏక్ దేనారము ఇస్రాయేలు దేసిమ్చ దా అస్సి

2 ఏక్ దీసిచి కామ్క ఏక్ ఒండి మెద్దెన్చి కూలి *డబ్బుల్ దెయిందె” మెన, జేవ్ కూలి మాన్సుల్చి మొక్కి ఒప్పున సంగ తా, ద్రాచ తోటతె జేవ్ కామ్ కెర్తి రిసా జోవయింక తెద్రయ్లో.

3 “పిమ్మట్, పాసి పాసి నొవ్వు గంటల్క, జో ఎజొమాని, సంతవీది గెచ్చ కెర, కామ్ నెంజ ఆరి టీవో జా తిలన్క సగుమ్జిన్ ఒత్త తిలిసి దెక కెర,

4 తూమ్ కి అంచి ద్రాచ తోటతె గెచ్చ, కామ్ కెర, చి సరిపుచువ జతి కూలి డబ్బుల్ తుమ్క దెయిందె” మెన, జోవయింక సంగితికయ్, జేవ్ జోచి కామ్తె గెల.

5 అన్నె, పాసి పాసి బార గంటల్ మెద్దెనె కి, తిన్ని గంటల్క కి, జా వీదె జో ఎజొమాని గెచ్చ కెర, అన్నె దస్సి కెర్లన్.

6 “ఒత్త తెంతో, పాచ్ గంటల్ సంజె, జా వీదె అన్నె గెచ్చ కెర, అన్నె సగుమ్జిన్ దస్సి ఒత్త టీవో జా తతికయ్, తుమ్ ఒండి మెద్దెనె కిచ్చొక దస్సి, కామ్ నే కెర్తి కిచ్చొక టీవో జా అస్సున్?” మెన పుసీతికయ్,

7 జేవ్, “కో అమ్క కూలి కెరయ్తి నాయ్” మెన సంగిల. సంగితికయ్, జో ఎజొమాని, “జలె, తూమ్ కి అంచి ద్రాచ తోటతె గెచ్చ కామ్ కెర” మెన, జోవయింక కి తెద్రయ్లన్.

8 “సాంజ్ జతికయ్, జో ద్రాచ తోటచొ ఎజొమాని జోచొ గెర్చి డబ్బుల్ దెకితో మాన్సుక, ‘జేవ్ కూలి కెర్లనక బుకారా కెర, పడ్డె అయ్లనక తెంతో తొలితో అయ్లనక ఎద, ఎత్కిక ఆచ్ సంగిలి కూలి డబ్బుల్ దేసు’ మెన, జోక సంగిలన్.

9 జాచి రిసా, పాచ్ గంటల్ సంజె జా కెర గడియయ్ కామ్ కెర్లనక కి, ఒండి మెద్దెన్చి ఎదిలి కూలి డబ్బుల్ దిలన్.

10 జేవ్ ఆల్నిమ్ అయ్లనక తెద్దిలి దిలి రిసా, జేవ్ అగ్గె అయ్లన, ‘అమ్క ఒగ్గర్ దెయెదె’ మెన ఉచర్ల. ఎత్కిజిన్క ఎక్కి రితి ఒండి మెద్దెన్చి కూలి డబ్బుల్ దొర్కు జలి.

11 జాచి రిసా, జేవ్ అగ్గె అయ్లన జా కూలి డబ్బుల్ నజన, ‘పెందలె తెంతో సాంజ్ ఎద ఒప్పడక కెద్ది నైమ జా, అమ్ కామ్ కెర్లమ్.

12 జేవ్ ఎక్కి గంట కెర్లనక అమ్చి తెన్ సమానుమ్ దిలది’ మెన గోన లట్టబ, ఎజొమానిక సంగిల.

13 ఈంజొ ఎజొమాని జోవయింతె ఎక్కిలోక, ‘నేస్సమ్†, ఆచ్ తుమ్క అన్యాయమ్ కెరుక నాయ్. తుయి ఏక్ ఒండి మెద్దెన్చి కూలి డబ్బుల్ నజనుక ఒప్పున్లది.

14 అల్లె, తుయి ఒప్పుస్లిసి నజన గో” మెన సంగ కెర, పడ్డె అయ్లో ఎక్కిలోక దెకవ, జో తొలితో అయ్లోసాక అన్నె, ‘తుక దిలి రితి, ఈంజొ పడ్డె అయ్లోసాక కి దెంక అంక ఇస్టుమ్ జలి.

15 అంచి సొంత ఆస్తి అంచి ఇస్టుమ్ అయ్లి రితి వంట దెంక నెంజె గే? అంచి సర్క జోవయింక దర్ముమ్ తెన్ దిలి

రిసా తుమ్క గోస గే? మెన, జో ఎజొమాని సంగిలో మెన యేసు సంగ కెర,

16 అన్నె, జలె, తొలితో బెదిలన పడ్డె బెదిలన జవుల. పడ్డె బెదిలన తొలితో బెదిలన జవుల”, మెన సంగిలన్.

యేసు మొర అన్నె జింక తిలిన్చి రిసా అన్నెక్ సుట్టు సంగిలిసి

(మార్కు 10:32-34; లూకా 18:31-34)

17 యేసు యెరూసలేమ్ పట్టుమ్తె గెచ్చుక మెన బార్ జా, ఇండ గెతె తిలి పొది, వట్టె గెతనతె తెంతో జోచ బారజిన్ సిస్సుల్క పాసి బుకారాన, ఇసి మెలన్.

18 “ఈందె, యెరూసలేమ్తె గెతనుమ్. ఒత్త కిచ్చొ జయెదె మెలె, ఆచ్ మాన్సు జా జెర్మున్ అయ్లోసాక, మాన్సు దెర్లె, వెల్లెల మాన్సుల్ పూజర్లుతె చి మోసే తెన్ దేముడు దిలి ఆగ్గుల్ సికడ్డనతె దెర్సు నీడిందె, చి జేవ్ అంక మొర్తి సిచ్చ వయడ కెర,

19 అంక కొంకడ్డి రిసా, అంక కొర్డల్ తెన్ పెటితి రిసా, అంక సిలువతె టీవో కెర మార్తి రిసా, అమ్చ యూదుల్ నెంజిల అదికారుల్చి అత్తి అంక సార్ప కెర దెవుల. గని తిర్తత్క అన్నె జీవ్ జా ఉట్టిందె” మెన సంగిలన్.

అయ్యసి జాచి దొగుల పుత్తర్లుచి రిసా కోర్ప జలి

20 తెదొడి యేసుచ సిస్సుల్ జల జెబెదయచ దొగుల పుత్తర్లుచి అయ్యసి, జేవ్ పుత్తర్లు తెన్ యేసుతె జా కెర, సెర్ను సెడ జోకర, “ఏక్ వరుమ్ దే” మెన, సంగితికయ్,

21 యేసు జాక, “తుయి కిచ్చొ కోర్ప జతసి?” మెన పుసీలన్, చి ఈంజ, “తుచి రాజిమ్తె అంచ పుత్తర్లు దొగుల, తుచి ఉజెతో పక్క ఎక్కిలో, డెబ్రి పక్క ఎక్కిలో వెస తతి రితి ఆడ్ర దేసు” మెన సంగిలి.

22 చి యేసు, “తుమ్ కిచ్చొ పుసీతను గే, తుమ్ నేన్సు. అంచి గిన్నతె బెద పితి రితి, ఆచ్ సేడుక తిలి దుకుమ్తె బెదుక ఓర్పుప జంక తెర్పు గే?” మెన సంగితికయ్, జేవ్ “అమ్ తెరుమ్దే” మెలె.

23 దస్సి జబాబ్ దెతికయ్, యేసు, “ఆచ్ పితి గిన్నచి తుమ్ పిస్తె, గని అంచి ఉజెతో పక్క ఎక్కిలో, అంచి డెబ్రి పక్క అన్నెక్తో తుమ్ వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచొ దేముడు అబ్బొ కక్క కక్క సెలవ్ దా తయెదె గే, జెచ్చి ఒత్త వెసుల.” మెలన్.

24 తెదొడి, జేవ్ దొగుల బావుడ్లు ఎత్కిచి కంట వెల్లెల మాన్సుల్ జంక ఉచర్లినచి రిసా సేంసెల దెస్సుజిన్ సిస్సుల్ జా ఎత్కి నూన కెర, జోవయించి ఉప్పిరి ఒగ్గర్ కోపుమ్ జల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

25 తెదొడి యేసు జేవ్ బారజిన్ సిస్సుల్క జోతె బుకారా కెర, “యూదుల్ నెంజిల అదికారుల్ జోవయించి తెడి తిల వెల్లెల మాన్సుల్, సొంత గవురుమ్ ఉచరన, ప్రెజల్క జాడ్లు

† 20:13 20:13 మింత

వయస్థి రితి, జోవయింక పోటి తెన్ ఏలుప కెర్తతి మెన తుమ్ జాన్సు.

26 గని తుమ్చితె దస్సి తంక జయె నాయ్. తుమ్చితె కో వెల్లో జంక ఉచరెదె గే, జొయ్యి తుమ్చొ సేవ కెర్తొసా రితొ జా తంక.

27 తుమ్చితె కో ముక్కిమ్ జంక ఉచరెదె గే, జొ తుమ్చొ గొతిమాన్సు రితొ జా తంక.

28 దస్సి, ఆవ్ మాన్సు జా జెర్మున్ అయ్లోసా కి మాన్సుల్చి అత్తి సేవ కెరవడనుక నాయ్, గని మాన్సుల్క ఆవ్ సేవ కెరుకయ్ అయ్లయ్. మెలె, ఒగ్గర్జిన్ మాన్సుల్క సయ్తాన్చి రాజిమ్ తెంతొ నెతోవ గెల్తి రిసాయి మొర అంచి ప్రానుమ్ దెంక అస్సెచి రిసా ఈంజ లోకుమ్తె అయ్లయ్” మెన సిస్సుల్క యేసు సంగిలన్.

దొగుల గుడ్డి జలసక యేసు చెంగిల్ కెర్లిసి
(మార్కు 10:46-52; లూకా 18:35-43)

29 పడ్డొ, యేసుచి సిస్సుల్ యెరికో పట్టుమ్ తెంతొ బార్ జా, యెరూసలేమ్ పట్టుమ్తె గెతె తిలి పొది, ఒగ్గర్జిన్ ప్రెజల్ జోచి పట్టి గెతె తిల.

30 జలె, ఈందె, వాట్ సొడి దొగుల గుడ్డి మాన్సుల్ వెన తిల. యేసు జా వాట్ జెతయ్ మెన నూన తా, “ఓ యేసుప్రబు, దావీదు రానొచి సెకుమ్తె జెర్మిలో రచ్చించుప కెర్తొసా, అమ్చి ఉప్పిరి కన్కారుమ్ తియ, చెంగిల్ కెరు!” మెన, బతిమాల్పా జా కేక్ గల.

31 తిల జనాబ్, జలె, “తుక్కె తా” మెన గోల కెర్లె కి, జేవ్ గుడ్డి మాన్సుల్ అన్నె, “ప్రబు, దావీదు రానొచి సెకుమ్తె జెర్మిలో రచ్చించుప కెర్తొసా, అమ్చి ఉప్పిరి కన్కారుమ్ తియ చెంగిల్ కెరు!” మెన, అగ్గెచి కంట గట్టిజ కేకుల్ గల్లికయ్,

32 యేసు టీవొ కెర, జోవయింక బుకారా కెర, “ఆవ్ తుమ్క కిచ్చొ కెరుక మెన తుమ్ ఉచర్తను?” మెన పుసిలన్.

33 జేవ్ జోక, “అమ్చ అంకివొ దెకితి రితి కెరు” మెన సంగిల.

34 జేవ్చి ఉప్పిర్ యేసు కన్కారుమ్ జా, జోవయింక అంకివొ చడిలన్. చడిలి బేగి, జోవయింక అంకివొ టేంట డీసిల, చి జేవ్ జోచి పట్టి గెల.

21

యేసు యెరూసలేమ్ పట్టుమ్తె గెచ్చు పాచిలిసి
(మార్కు 11:1-11; లూకా 19:28-38; యోహా

12:12-19)

1 పడ్డొ, యేసు ఇసి ఇండ జా యెరూసలేమ్ పట్టుమ్చి పాసి జా కెర, * ఒలీవ మెలి మెట్టచి పాసి తిలి బేత్సగే మెలి గవ్వి అయ్లి పొది, జోచ సిస్సుల్తె దొగులక,

2 “తుమ్చి మొక్కె తిలి గవ్వి గెచ్చు పెన, చి బేగి, ఒత్త బంద తిలి ఏక్ గాడ్చి, జాచి తెన్ తిలి ఏక్ గాడ్డె పిల్ల తుమ్క డీసుల. జోవయింక యిప కెర, అంచితె ఉదడ ఆన.

3 కో జలెకు తుమ్క కిచ్చొ జలెకు సంగిలెగిన, ‘ఇన్నెతెన్ ప్రబుక కామ్ అస్సె’ మెన సంగ. సంగిలె, బేగి జో మాన్సు జేవ్ గాడ్డెల్క తెద్రయెదె” మెన సంగిలన్.

4 పూర్గుమ్ దేముడు జోచి కబుర్ సంగిలో అత్తి సంగిలి కోడు నెరవెర్చుప జంక మెన, ఈంజ జర్గు జలి.

5 “తుమ్చొ సేతుమ్ తిలొ రానొ గాడ్డె పిల్లతె వెగ జెతయ్, మెన దేముడు నిసాన † సీయోసు పట్టుమ్తెచ ప్రెజల్క సాట్ట కెర”

మెన, రెగిడ్డి కోడు.

6 జలె, జేవ్ దొగుల సిస్సుల్ గెచ్చు, యేసు జోవయింక సంగిలి రితి కెర,

7 జా గాడ్డెక చి, జాచొ పిల్లక ఉదడ ఆన, జోచి సిస్సుల్ జోవయింక దుప్పట్లు జా పిల్లచి ఉప్పిర్ గల్లికయ్, యేసు వెగ వెసిలన్.

8 అన్నె, ఒత్త బెర్ల జనాబ్తె ఒగ్గర్జిన్ జోవయింక దుప్పట్లు వట్టె అంతిర్ల. అన్నె సగుమ్జిన్ రూక్చ మట్టల్ రొడ్డల్ కండ కెర వట్టె అంతిర్ల.

9 అంత్ర కెర, జోవయించి పురెతో గెతె తిలన కి పడ్డొ గెతె తిలన కి, “దావీదు రానొచి సెకుమ్తె జెర్మిలో అమ్చొ ‡ రచ్చించుప కెర్తొసాక కీజోబర, జోబర! దేముడు ప్రబుచి నావ్ తెన్ జెతోసాక ఓనన్న, ఓనన్న! ఎత్కిచి కంట ఉప్పిర్చి టాన్తె తిలొసాక ఓనన్న!” మెన, కేకుల్ గల్తె తిల.

10 జలె, యేసు యెరూసలేమ్తె పాచితికయ్, పట్టుమ్చ ఎత్కిజిన్ “ఈంజొ కో?” మెన, బమ్మ జతికయ్.

11 ఒత్త జో తెన్ అయ్ల ప్రెజల్ కిచ్చొ మెల మెలె, “దేముడుచి కబుర్ ఆన్తో, గలిలయ ప్రాంతుమ్చి నజరేతు గవ్విచొ, యేసు ఈంజొ” మెన సంగిల.

దేముడుచి గుడితె సామన్లు వికితన గట్లక యేసు ఉదడ్డిసి

(మార్కు 11:15-19; లూకా 19:45-48; యోహా 2:13-22)

* 21:1 21:1 ఒత్త ఒలీవ వండ్లు రూకుల్ తవుల చి ఇసి నావ్ తయెదె. † 21:5 21:5 ‘సీయోసు’ మెలె, యెరూసలేమ్ పట్టుమ్క అన్నెక్ నావ్ జయెదె.

‡ 21:9 21:9 ‘రచ్చించుప కెర్తొసా’ మెన జేవ్ సంగిలె, ఈంజ లోకుమ్చి రగుమ్చి రాజిమ్క ఏలుప కెర జోవయింక ఆక్రమించుప కెర్లన తెంతొ జోవయింక ఈంజ లోకుమ్చ బాదల్ తెంతొ రచ్చించుప కెరెదె మెన జేవ్ ప్రెజల్ ఒగ్గర్జిన్ ఉచర్ల. జోచి రాజిమ్ ముక్కిమ్క అత్తు రగుమ్చి జయెదె మెన అర్దుమ్ కెరంతి నాయ్. § 21:9 21:9 జోవయించి బాన తెన్ ‘జోబర, జోబర!’ మెలి అర్దుమ్ తెన్ ‘ఓనన్న!’ మెన కేక్ గల్తె తిల. * 21:12 21:12 అర్పితుమ్ దెత పిట్టల్ గల్తె గెనుక జలె, జోవయింక ఆక్రమించుప కెర్లె రోమ్ దేసిమ్చి ప్రబుతుమ్చి డబ్బుల్ దిల నెంజె. జేక, జోవయించి డబ్బుల్ పల్లవన, దేముడుచి గుడితె కామ్క జెతికయ్ రగుమ్ డబ్బుల్కయ్ పిట్టల్ గల్తె గెనుక, నెంజెల డబ్బుల్ కి దేముడుచి గుడిక దెంక జయెదె.

12 తెదొడి యేసు *దేముడుచి గుడితె పెన కెర, ఒత్త, సామన్లు వికితన, గెంతన ఎత్తిజిన్క ఉదడ కెర, డబ్బుల్ పల్లయ్తనచ, బల్లల్ చి పార్వ పిట్టల్ వికితనచ, బల్లల్ సేడవ దా.

13 “అంచి గేరు ప్రార్దన కెర్తె గేరు జా అస్సె. దస్సి తవున్ మెన రెగ్గ అస్సె, గని తుమ్ కీసి కెర అస్సున్ మెలె, ఈంజ దేముడుచి గేరుక, చోర్లు జితో రితో గేరు జతి రితి తుమ్ మార్పుప కెర అస్సున్” మెన సంగిలన్.

14 తెదొడి, గుడ్డి మాన్సుల్, సొట్ట మాన్సుల్ దేముడుచి గుడితె యేసుతె అయ్ల, చి జోవయింక చెంగిల్ కెర్తెన్.

15 గని, వెల్లెల పూజర్లు, మోసి తెన్ దేముడు దిలి ఆగ్గుల్ సికడ్డన కి, యేసు కెర్తె కమొ దెక, పడ్డె, “దావీదు రానొచి నెకుమ్తె జెర్లిలో అమ్చో రచ్చించువ కెర్తొసా, తుక జెయ్యి, జెయ్యి!” మెన, దేముడుచి గుడితె బోదల్ యేసుక కేకుల్ గల్తె తిలిసి దెక, కోపుమ్ జల.

16 కోపుమ్ జా, యేసుక, “ఈంజేవ్ సంగిలిసి తుయి సూన్తసి గే?” మెన పుసిల, చి యేసు జోవయింక, “సూన్తసి. ఈందె, బాలబోదల్చి కొవ్న బోదల్చి చోండివాట్ గవురుమ్ ఆనన్లది”

మెన దేముడుచి కొడొతె రెగిడ్డి కోడు తుమ్ కెయ్య సదు కెర్పు నాయ్ గే? మెన, జేవ్ వెల్లెల మాన్సుల్క సంగ కెర,

17 జోవయింక ముల దా కెర, జా పట్టుమ్తె తెంతో బార్ జా, బేతనియ గెవ్వి గెచ్చ, ఒత్త నిద్ర తిలన్.

పండ్లు నే దెర్లొ రూకుక జర్లు జలిసి

(మార్కు 11:12-14,20-24)

18 అన్నెక్ దీసి పెందలె, యేసు యెరూసలేమ్ పట్టుమ్తె అన్నె జెతె తతికయ్, జోక చూ కెర్తెన్.

19 తెదొడి వాట్ సొడి తిలో ఏక్ †అంజూరుమ్ రూకుక దెక కెర, రూకీచి పాసి గెలె, జా రూకీతె‡ అక్కుడ్లు పిట్టవ అన్నె కిచ్చొ కి నాయ్. జాకయ్, జో రూకుక దెక, “అప్పె తెంతో తుచితె కెయ్యక కి కాయల్ దెర్తు నాయ్” మెన సంగిలన్, చి జా రూకు బేగి సుక్క గెలి.

ప్రార్దన కెర్తెన్చి రిసా యేసు బోదన కెర్తెసి

20 యేసుచ సిస్సుల్ జా జర్లు జలిసి దెక బమ్మ జా, “ఈంజ రూకు కీసి జా బేగి సుక్క గెలి గే?” మెన లట్టబంతికయ్,

21 యేసు, “తుమ్క ఆవ్ కిచ్చొ కచితుమ్ సంగితసి మెలె, తుమ్ నంపజా ఎదిలి అన్మానుమ్ కి నే జతె నంపజలెగిన, ఈంజొ చెట్టొక జర్లు జలి రితి తూమ్ కి వెల్లొ కమొ కెర్తె. గని అన్నె, ఈంజ మెట్టక జలెకు దెక, ఉట్టి జా,

సముద్రుమ్తె గలి జా మెన సంగిలెగిన, దస్సి జర్లు జయెదె మెన తుమ్క నిజామి ఆవ్ సంగితసి.

22 మెలె, తుమ్ ప్రార్దన కెర్తె పొది కిచ్చొ నజితె గే, జా దొర్కు జలి మెన నంపజలెగిన, తుమ్ నజిలిసి నే పిట్టె తుమ్క దొర్కు జయెదె.” మెన, యేసు సంగిలన్.

వెల్లెల మాన్సుల్ యేసుక అన్నె పరిచ్చొ కెర్తె
(మార్కు 11:27-33; లూకా 20:1-8)

23 యేసు దేముడుచి గుడితె పావ కెర బోదన కెర్తె తతికయ్, వెల్లెల పూజర్లు చి అన్నె వెల్లెల మాన్సుల్ జోతె జా కెర, “తుయి కెర్తె కమొ కెరుక, తుయి ఇన్నె బోదన కెరుక తుక కిచ్చొ అదికారుమ్ అస్సె? కొన్నొ తుక అదికారుమ్ దిలన్?” మెన జోక పుసిల.

24 యేసు జోవయింక, “ఆవ్ కి తుమ్కయ్ ఏక కోడు పుసిందె. ఈంజ కోడుక తుమ్ జబాబ్ సంగిలెగిన, ఆవ్ కిచ్చొ అదికారుమ్క ఇసి కెర్తెసి గే, తుమ్క సంగిందె.

25 యోహాను బాప్తిసుమ్ దెతె తిలిన్చి అదికారుమ్ కేసె తెంతో చి? పరలోకుమ్ తెంతో చి గే, మాన్సు తెంతో చి గే?” మెన పుసిలన్. జలె, జేవ్ వెల్లెల మాన్సుల్ ఎక్కిలో తెన్ ఎక్కిలో బమ్మ తెన్ లట్టబన, ‘పరలోకుమ్ తెంతో చి’ మెన అమ్ సంగిలెగిన, ఈంజొ ‘దస్సి జలె, తుమ్ కిచ్చొ జోక నంప కెర్పు నాయ్?’ మెన అమ్క సంగెదె.

26 గని, ‘మాన్సు తెంతో చి’ మెన అమ్ సంగిలెగిన, జనాబ్ కిచ్చొ మెనుల గే బితనుమ్. కిచ్చొక మెలె, యోహానుక ‘దేముడుచి కబుర్ సంగిలోసా జయెదె’ మెన ఎత్తిజిన్ నంపజతతి మెన వెల్లెల మాన్సుల్ జోవయింక జెవ్వి ఉచరన, “అమ్ నేనుమ్” మెన జబాబ్ సంగిల.

27 జేవ్ వెల్లెల మాన్సుల్ దస్సి సంగితికయ్, యేసు “జలె, కిచ్చొ అదికారుమ్తె ఆవ్ ఈంజేవ్ కమొ ఆవ్ కెర్తెసి గే, తుమ్క సంగి నాయ్” మెన సంగిలన్.

దొగుల పుత్తర్లుచి రిసా సంగిలి టాలి

28 ఒత్త తెంతో వెల్లెల మాన్సుల్క యేసు అన్నె ఇసి మెలన్. “ఏక్ టాలి ఉచర. ఏక్ మాన్సుక దొగుల పుత్తర్లు తిల. అబ్బొసి జో వెల్లొ పుత్తున్క ‘ఓ పూత్తు, తుయి ఆజి గెచ్చ, అమ్చి ద్రాచ తోటతె కామ్ కెరు మెన’ మెలన్.

29 జో పుత్తుసి ‘నెసి’ మెన జబాబ్ సంగిలో, గని పడ్డె తప్పు ఒప్పున దుకుమ్ జా బుద్ది ఆననా, జా కామ్తె గెలన్.

30 పడ్డె జో అబ్బొసి అన్నెక్లొ పుత్తున్తె జా కెర, తొలితొచొక సంగిలి రితి, ఇన్నెక కి సంగిలన్, చి ‘గెచ్చిందె, బ’ మెలన్. గని గెచ్చె నాయ్.

31 “జలె, ఈంజేవ్ దొగులతె కో అబ్బొన్చి కోడు రితి కెర్తొసా జయెదె?” మెన, యేసు జేవ్ వెల్లెల మాన్సుల్క పుసితికయ్, జేవ్ “తొలితొచొ” మెన సంగితికయ్, యేసు

† 21:19 21:19 అంజూరుమ్ రూకవ కాయల్ బొడ్డ పండ్లు రిత జవుల.

‡ 21:19 21:19 రూకు చెంగిలొచొ జలె, అక్కల్ దెర్లె పొది పండ్లు కి దెర తంక.

జోవయింక, “తుమ్క ఆవ్ కిచ్చొ కచితుమ్ సంగితసి మెలె, ఈంజ దేసిమ్చ తుమ్ నిస్కారుమ్ దెకిత సిస్టు నజితస కి లంజె కమొచ తేర్బోదల్ కి తుమ్చి కంట సుల్లు తెన్ దేముడుచి రాజిమ్తె బెదుల.

32 కిచ్చొక మెలె, యోహాను సత్తిమ్ వాట్ ఇండ, సత్తిమ్ వాట్ దెకయ్తి రిసా తుమ్చితె అయ్లె కి, తుమ్ జోక నంపజసు నాయ్. గని, సిస్టు నజితస కి లంజె కమొచ కి జోక నంపజల. జలె, జేవ్ నంపజా చెంగిల్ జలిసి తుమ్ దెకిలెకి, తుమ్ కెర్త పావల్క విసారుమ్ జసు నాయ్, చి యోహానుచి కోడు నంపజసు నాయ్.” మెన రుజ్జు సంగిలన్.

ద్రాచ తోటచొ గుత్త మాన్సుల్చి టాలి
(మార్కు 12:1-12; లూకా 20:9-19)

33 పిమ్మట్ యేసు, “అన్నెక్ టాలి సంగిందె. నూన, ఏక్ ఎజొమాని తిలన్. జో ద్రాచ తోట రోవడ కెర, జా తోట సుట్టునంత కోట గలవ కెర, ఒత్త ద్రాచ రస్సుమ్ కడవనుక వెల్లో పత్తుర్ కూనవ కెర, తోట రకితి గోపురుమ్ బందవ కెర, రకితసక నిసాన, జోవయింక జా తోట గుత్త దా కెర, వేర దేసిమ్ ఉట్ట గెలన్.

34 “పండ్లుచి పంటో లాయితి సమయుమ్ జెతికయ్, జోచి వాట నజన్తి రిసా, తోట రకితసతె జోచ గొత్తి సుదల్క, జో ఎజొమాని తెద్రయ్లొ.

35 గుత్త నజిలస, ఒత్త రక తిలస జో ఎజొమానిచ గొతి మాన్సుల్తె ఎక్కిలోక దెర పెట్ల, అన్నెక్కోక మార గెల, అన్నెక్కోక పత్తల్ గల పెట్ల.

36 జేవ్ రకితస దస్సి కెర్తికయ్, జో ఎజొమాని అగ్గెచి కంట ఒగ్గర్జన్ వేర గొత్తి సుదల్క తెద్రయ్లన్, గని జేవ్ తోట రకితస ఇన్నెయింక కి దస్సి అల్లర్ కెర్ల.

37 “పడ్డొ, జో ఎజొమాని కిచ్చొ కెర్లన్ మెలె, ‘అంచొ పూత్తుక తెద్రయ్లెగిన, జోక మరియాద దెకుల, కిచ్చొగె’ మెన, పుత్తున్క జేవ్ గర్చ రకితసతె తెద్రయ్లన్.

38 జేవ్ జో ఎజొమానిచొ పుత్తున్క దెక కెర, ‘ఇన్నెకయి అబ్బొన్చి దనుమ్ కలుగు జయెదె, అల్లె, ఇన్నెక మార కెర, ఇన్నెక జెతి దనుమ్ అమ్క కడనుమ.’ మెన ఉచర,

39 జోక దెర కెర, ద్రాచ తోట తెంతో బార్ కెర మార్ల.

40 జలె, జా తోటచొ ఎజొమాని అయ్లె, గుత్త నజిలస, జేవ్ రకితసక కిచ్చొ కెరెదె?” మెన యేసు పుసిలన్.

41 జో ఎజొమాని, “జేవ్ గార్చ సుదల్క మార, పంటో లాయితె పొదిక జోచి వాట జోక నిదానుమ్ తెన్ దెతు మెన, వేర మాన్సుల్క నిసాన, జోవయింకయి జా తోట రకుక గుత్త దెయెదె” మెన జబాబ్ దిల.

42 జలె, యేసు జోవయింక, “దేముడుచి కొడొతె రెగిడ్డిసి కెయ సదు కెర్చు నాయ్ గే?

‘గేర్ బందిత సుదల్ కామ్క నే జయె మెన పక్కయ్ పెలవ దిలి పత్తుర్ మెన ఉచర్లె కి, జొయ్యి పత్తురు బోడిపత్తురు జయెదె. ప్రబుయి సొంతయ్ ఇసి జర్గు కెర్లొ. జో ఇసి కెర్లి రిసా, అమ్ దెకిలె ఆచారిమ్ జతయి!’

మెన రెగిడ్డి కోడు.

43 దేముడుచి రాజిమ్క దెకితి కామ్ తుమ్చితె తెంతో కడ కెర, జోచి రాజిమ్ తెన్ బెదితి పలితుమ్ దెర్త ప్రెజల్చి అత్తి దెయెదె మెన తుమ్క కచితుమ్ సంగితసి.

44 § “పడ్డొ, ఈంజొ ముక్కిమ్ జలొ పత్తుర్చి ఉప్పిరి కో సేడుల, బద్దల్ జా గెచ్చుల, గని కచి ఉప్పిరి పత్తురు సేడెదె గే, జోక బీడవ గెలెదె” మెన యేసు సంగిలన్.

వెల్లెల మాన్సుల్ యేసుక దెరుక కోర్ప జలిసి

45 వెల్లెల పూజర్లు చి పరిసయ్యుల్ జో సంగిల టాలిచొ నూన కెర, “అమ్చి రిసాయి సంగితయ్” మెన అర్దుమ్ కెరన,

46 యేసుక దెరుక మెన ఉచర్ల. గని జనాబ్ జోక దేముడు తెద్రయ్లొ కబుర్ సంగితొసా మెన ఉచర్లి రిసా, జోవయింక బియ్యం కెర, జా పొది జోక దెరుక ముల దిల.

22

పెండ్లి విందు దిలొ ఎక్కిలొ రానొచి టాలి

(లూకా 14:15-24)

1 అన్నెక్ టాలి కెర, యేసు జేవ్ కోపుమ్ జల వెల్లెల మాన్సుల్క ఇసి సంగిలన్

2 “పరలోకుమ్చి రాజిమ్తె బెదుక బుకార్లిసి కిసి మెలె, జోచొ పుత్తున్చి రిసా పెండ్లి విందు దిలొ ఎక్కిలొ రానొ కెర్లిన్చి రితి జయెదె.

3 జా పెండ్లి విందుతె బుకార్లసక కడ ఆన్తి రిసా, జో రానొ జోచ గొత్తి సుదల్క తెద్రయ్లన్. గని, జేవ్ బుకార్లస జెంక నెసిల.

4 జాకయ్, జో రానొ, ‘ఈందె, అంచి విందు తెయార్ కెర అస్సి. బెయిలల్క, బేడు జల సొమ్ముల్క కండ అస్సి. ఎత్తి తెయార్ కెర అస్సి. విందు కంక జా’ మెన బుకార్లసక అన్నె సంగ” మెన, వేర గొత్తి సుదల్క జో రానొ అన్నె సంగ తెద్రయ్లన్.

5 జేవ్ బుకార్లస జో మాన్సు బుకార్లిన్క మరియాద నే దెకితె, జోవయింతె ఎక్కిలొ జోచి బుయింతె గెలొ, అన్నెక్కో జోచి బియ్యార్తె ఉట్ట గెలొ.

6 అన్నె, సేన్ల సుదల్, జో రానొచ కబుర్ గెల గొత్తి సుదల్క దెర కెర, జోక నిస్కారుమ్ కెర, మార గెల.

7 జాచి రిసా, జో రానొ కోపుమ్ జా, జోచ జమాన్సుక తెద్రవ దా, జేవ్ అత్య కెర్లసక మొర్తి సిచ్చ దిలొ, చి జోవయింక పట్టుమ్క ఆగి లంబడ డయవడ్డొ.

§ 21:44 21:44 గ్రీకు బాస తెన్ ఈంజ మత్తెలి తొలితొ రెగిడ్డ సగుమ్ పుస్తకల్తె 44 నంబర్చి కోడు తయె నాయ్.

8 “తెదొడి జో రానొ గొత్తి సుదల్ ఇసి మెన సంగిలన్. ‘పెండ్లి విందు తెయార్ కెర అస్సి, గని బుకార్లన ఈంజ విందుతె జెంక తగుప జలన్ నెంజి.

9 జాచి రిసా, వీదుల్తె గెచ్చు కెర, తుమ్క డిస్తన ఎత్తిక పెండ్లి విందుతె జా మెన, తుమ్ బుకారా.’ మెన, జోచ గొత్తి సుదల్క జో రానొ తెద్రయలన్.

10 జేవ్ గొత్తి సుదల్ వీదుల్తె గెచ్చు కెర, ఒత్త డిసిల మాన్సుల్ ఎత్తిక విందుతె బుకారా ఆన్ల, చి జా పెండ్లి బడ్డితె బెర్ల.

11 “పడ్డొ జో రానొ, ‘పెండ్లి బడ్డితె వెసిలనక దెకిందె’ మెన, జా పెండ్లి బడ్డిచి తెడి జా కెర, ఒత్త పెండ్లి పాలల్ నే గలన్లొ ఎక్కిలోక దెక కెర,

12 ‘ఓ *నేస్తమ్, తుయి పెండ్లి పాలల్ నెంజితె ఇన్నె కీసి అయ్లది?’ మెన, జో రానొ సంగితికయ్, జో మాన్సు బియఁ గెచ్చు, తుక్కె తిలన్.

13 తెదొడి రానొ, ‘ఇన్నెక చట్టొ అత్తో బంద కెర, ఇన్నెక బయిలె అందర్చి కంట అందర్తె గల దాన. ఒత్త గెతన ఏడ ఏడ, దంతొ చప్పిలై తవుల’ మెన, జోచ గొత్తి సుదల్క రానొ సంగిలన్.

14 పరలోకుమ్చి రాజిమ్తె బెదుక బుకార్లన ఒగ్గర్జిన్ గని నిసాన జలన తొక్కిజిన్ జవుల.” మెన సంగిలన్.

యేసుక కొడొతె అడ్డవుక మెన మాన్సుల్క జోతె తెద్రయలీసి

(మార్కు 12:13-17; లూకా 20:20-26)

15 తెదొడి పరిసయ్యుల్, కొడొతె యేసుక అడ్డవుక మెన,

16 హేరోదు పచ్చాన జతన తెన్ పరిసయ్యుల్ జోచ సొంత సిస్సుల్క కి యేసుతె తెద్రయతికయ్, జేవ్ యేసుక, “గురుబాబు, తుయి సత్తిమ్చొ మెన జానుమ్. మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల గే నే బితె, దేముడు దెకయ్లి వాట్చి రిసా సత్తిమ్ తెన్ బోదన కెర్తసి మెన జానుమ్” మెన, పులయ్తి రితి నంగ, అన్నె,

17 “జలె, రోమ్ దేసిమ్చొ కైసర్ రానొక అమ్ †సిస్టు దెంక నాయిమ్ గే నాయ్ గే? తూయి కిసి ఉచర్తసి? తుయి అమ్క సంగు” మెన, పరిసయ్యుల్ తెద్రయలన యేసుక పుసిల.

18 గని యేసు జోవయించి వెట్టిచి విస్సుమ్ జాన, “ఉప్రమెన్సుచొ మాన్సుల్, తుమ్. అంక కిచ్చొక పరిచ్చు కెర్తసు?”

19 అల్లె, జా సిస్టు దెతి డబ్బుల్చి కాసు ఏక్ అంక దెకవ” మెన, జోవయంక సంగితికయ్, జేవ్ జోక ఏక్ వెండి కాసు దెకయ్ల.

20 యేసు “ఈందె, ఇన్నెకచి పోలిక, కచి నావ్ డిస్తయ్?” మెన జోవయంక పుసిలన్,

21 చి జేవ్, “కైసర్ రానొచి” మెంతికయ్, యేసు జోవయంక, “కైసర్క దెతిసి కైసర్క, దేముడుక దెతిసి దేముడుకయ్ దెంక అస్సె” మెన, జోవయంక సంగిలన్.

22 జోచి కోడు సూన ఆచారిమ్ జా, జేవ్ వెల్లెల మాన్సుల్ తెద్రయల మాన్సుల్ యేసుక ముల దా, ఉట్ట గెల.

సద్దూకయ్యులు యేసుక పరిచ్చు కెరుక అయ్లిసి
(మార్కు 12:18-27; లూకా 20:27-40)

23 ‘మొర గెలెగిన అన్నె జివ్ జంక నెంజె, అన్నెక్ లోకుమ్తె గెచ్చుక నెంజె’ మెన ప్రజల్క సికయ్త సద్దూకయ్యులు జా దీసి యేసుతె జా కెర,

24 “ఓ గురుబాబు, ఎక్కిలో బోదల్ నెంజితె మొర గెలెగిన, జోచొ బావొసి జో అన్నొన్చి తేర్చిక పెండ్లి జా, జోచొ అన్నొన్చి నావ్ తెన్ బోదల్ పాయ దెంక అస్సి,

మెన, మోసే పూర్ణమ్చ సంగిలన్.

25 జలె, అమ్చి తెన్ సత్తుజిన్ బావుడ్లు తిల. వెల్లొ పెండ్లి జా మొర గెలన్. ఇన్నెక బోదల్ నెంజిలి రిసా, ఇన్నెచి పట్టి జెర్మిలో బావొన్క ఈంజ తేర్చి పెండ్లి కెరన్లె.

26 తొల్పుర్ తెంతొ కర్వడ్చొ ఎద, వర్స తెన్ వెల్లొచి తేర్చిక దస్సి పెండ్లి జర్గు కెరన మొర గెల.

27 ఎత్తి మొర గెలి పడ్డొ, ఈంజ తేర్బోద కి మొర గెలి.

28 జలె, మొర గెలన అన్నె జివ్ జతె పొదిక, ఈంజేవ్ సత్తుజిన్తె కక్క ఈంజ తేర్చి జా తయెదె? ఈంజేవ్ సత్తుజిన్ వర్స తెన్ ఇన్నెక పెండ్లి జా తిల గెద?” మెన యేసుక పుసిల.

29 గని, యేసు జేవ్క, “తుమ్ దేముడుచి కొడొ నేన అస్సున్. కిచ్చొక మెలె, దేముడుచి కొడొతె రెగ్డయ్లి తుమ్ నదు కెర్లె కి, ఒత్త తిలిసి అర్థమ్ కెరన్సు నాయ్, చి జో దేముడు కెరయ్త కమె దెకిలెకి, జోచి అదికారుమ్, సెక్కి, కెర్లె గే చినున్ నాయ్.

30 మెలె, మొర గెచ్చు అన్నె జివ్ జతిన్తె, పెండ్లిచొ నే జతె, మాన్సుల్ దూతల్చి రితి దస్సి తవుల.

31 పడ్డొ, ‘మొర గెలన అన్నె జితి నాయ్’ మెన ఉచర, తుమ్ అన్మానుమ్ తెన్ అస్సున్. జలె, దేముడు తుమ్క సొంత సంగిలిసి నదు కెర్సు నాయ్ గె? మొర జివు జా ఉట్టితి రిసా,

‘అవ్ అబ్రాహామ్క, ఇస్సాకుక చి యాకోబుక దేముడుయి’, మెన, దేముడు సంగిలి కోడు.

32 జలె, జేవ్ పూర్ణుల్ మొర తిలె కి, జోవయంక జో దేముడు జా తా కామ్క జెతయ్ జలె, అన్నెక్ లోకుమ్తె గెచ్చు జివ్వి అస్తి మెన రుజ్జు జతయ్. రితి మొర గెలనక నాయ్, గని జివ్ తిలనకయ్ జో దేముడు.” మెన, యేసు జేవ్ సద్దూకయ్యుల్క సంగిలన్.

* 22:12 22:12 మింత † 22:17 22:17 జా సిస్టు మెలె, రోమ్ దేసిమ్చి ప్రబుతుమ్చి సిస్టు.

33 ప్రజల్, జలె, జో బోదన కెర్లిన్చి రిసా సూన కెర, ఆచారిమ్ జల.

పరిసయుల్ యేసుక అన్నె పరిచ్చ కెర్లిసి
(మార్కు 12:28-34; లూకా 10:25-28)

34 'యేసు సద్దూకయులు చి చోడి ముద్దో కెర దిలో' మెన పరిసయుల్ సూన కెర, యేసుతె బెద అయ్ల,

35 చి జోవయింతె మోసే తెన్ దేముడు దిలి ఆగ్గుల్ సికడ్డసా ఎక్కిలో యేసుక పరిచ్చ కెరుక మెన, ఏక్ కోడు పుసిలన్.

36 "గురుబాబు, ఒండి మోసే పూర్ణుమ్చోచి అత్తి దేముడు దిలి ఆగ్గుల్ తెన్ కేన్ ఆగ్గు తొలితోచి ముక్కిమ్చి?"

37 యేసు జోక,
"తుమ్చో ప్రబు జలో దేముడుక తుమ్చి ఒండి కేపెట్టి తెన్, తుమ్చి ఒండి ఆత్మ తెన్, ఒండి మెన్ను తెన్ ఎక్కి ప్రేమ కెరె తంక.

38 ఎత్తి ఆగ్గుల్తె ఈంజ తొలితో చి, ముక్కిమ్చి.

39 అన్నె, 'తుమ్క తుమ్ కెర్లి ప్రేమ కెరంతను గే, తుచి పక్క సుదొక కి తెర్లి ప్రేమ కెరె తంక' మెన, అన్నెక్ ఆగ్గు ముక్కిమ్.

40 మోసే పూర్ణుమ్చోచి అత్తి దేముడు రెగ్గయ్ల ఆగ్గుల్ ఎత్తిక కి, దేముడుచ కబుర్లు సంగిలన సంగుల ఎత్తి కోడు కి, ఈంజేవ్ దొన్ని ఆగ్గుల్ ఆదారుమ్ జా అస్తి" మెన, యేసు సంగిలన్.

41 పరిసయుల్ ఎత్తి యేసుచి సుట్టునంత బెర తతికయ్, యేసు జోవయింక ఏక్ కోడ్ పుసిలన్.

42 "రచ్చింఛువ కెర్లిసా జతో క్రీస్తుచి రిసా తుమ్ కిచ్చో మెన ఉచర్లను? జో కచ్చో పుత్తుసి జయెదె?" మెన పుసితికయ్, జేవ్ జోక, "దావీదు రానోచో పుత్తుసి, జోవయించి సెకుమ్చో" మెల్లన్.

43 జేవ్ దస్సి సంగితికయ్, యేసు జోవయింక, "దస్సి జలె, క్రీస్తు దావీదుక పుత్తుసి జలెగిన, దేముడుచి సుద్ది తిలి ఆత్మ సికయ్తికయ్, దావీదు రానో కిచ్చోక క్రీస్తుక 'ప్రబు' మెన సంగిలన్. కిచ్చో కోడుతె దస్సి సంగిలన్ మెలె;

44 'తుచ విరోదుమ్ సుదల్క తుయి సుదితి రితి ఆవ్ కెరె ఎద, అంచి ఉజెతో పక్కయ్ తుయి పెన తా' మెన, ప్రబు అంచో ప్రబుక సంగిలన్."

45 దస్సి దావీదు రానో క్రీస్తుక 'ప్రబు' మెన సంగితయ్ జలె, జో క్రీస్తు కిసి జా జోక పుత్తుసి జయెదె? ఉచర మెన యేసు జేవ్ వెల్లెల మాన్సుల్క సంగితికయ్,

46 కో కి అన్నెక్ కోడ్ సంగుక నెతిర్ల. అన్నె, జా దీసి తెంతో, జోవయింతె కో కి యేసుక ఎక్కి కోడు కి పుసుక దయిరిమ్ తిలె నాయ్.

‡ 22:36 22:36 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచ్ పుస్తకుమతె రెగ్గయ్ జా అన్నె. ఈంజ దెకపుక మెన కుపియి బాసతె నొయి ప్రమానుమతె మోసే పూర్ణుమ్చోచి అత్తి రెగిడ్లి దేముడుచ ఆగ్గుల్ మెన రగ్గవ అన్నె.

§ 22:37 22:37 పేట్ తెన్

23

ప్రజల్క సిస్సుల్క యేసు జాగర్ల సంగిలిసి
(మార్కు 12:38-40; లూకా 11:37-52; 20:45-47)

1 తెదొడి యేసు జా దేముడుచి గుడితె బెర్ల ప్రజల్క కి జోచ సిస్సుల్క కి ఇసి మెలన్.

2 "మోసే తెన్ దేముడు దిలి ఆగ్గుల్ సికడ్డన చి పరిసయుల్ మోసే పూర్ణుమ్చోచి పీటతె వెసిలి రితి జా ప్రజల్క మోసే తెన్ దేముడు దిలి ఆగ్గుల్ సికడుక అదికారుమ్ అన్నె.

3 జాకయ్, జేవ్ తుమ్క సికయ్తిసి ఎత్తి కెర, గని, జోవయించ కమె రితి తుమ్ కెర నాయ్. జేవ్, ఇసి కెర, దస్సి కెర, మెన సంగితిసి జేవ్ సొంత కెర్లి నాయ్.

4 పిమ్మట్, కూలి మాన్సుల్క సావుకర్లు కిసి కంది వయితి జాడు వయడుల గే, దస్సి ఈంజేవ్ వెల్లెల మాన్సుల్, ఒగ్గర్ ఆగ్గుల్ రితి కెరుక అన్నె మెన, ప్రజల్క జాడు వయడ్లి రితి కెర్లి. గని, జేవ్ వయడ్ల జాడ్లు రిత కమె సుల్కన కెర్లి రిసా జేవ్చి కిడి ఈంటి కి నే తెన్ జవున్ కదుల్వ కెర్లి నాయ్, ప్రజల్క కన్నారుమ్ జతి నాయ్.

5 జోవయించ కమె కిచ్చో బుద్ది తెన్ కెర్లి మెలె, అమ్ కెరంతి పున్నిమ్ మాన్సుల్ మెన్నుతు మెన, దేముడుచ ఆగ్గుల్ రెగ్గ రచ్చల్ రిత బంద, రూందు వెల్లో కెర, నిర్లె బందంతతి, చి జోవయించ పాలల్చ జుల్పల్ దీగు కెర్లి.

6 పడ్డె, విందుల్తె ముక్కిమ్ టాన్లుక కోర్ప జతతి. అన్నె, జోవయించ నబ గెరలె కి ముక్కిమ్చ వెసిత పీటల్ కడన్తతి.

7 పడ్డె సంతవీదులె, మాన్సుల్ ఎత్తి అమ్క జోకర్లు మెన కోర్ప జతతి. పడ్డె, మాన్సుల్ జోక 'గురుబాబు' మెన జోకరుక కి కోర్ప జతతి" మెన యేసు సంగిలన్.

యేసు సంగిలి బోదన

8 "తుమ్, జలె, తుమ్తె కక్క 'గురుబాబు' మెన నాయ్. తుమ్క ఎక్కిలోయి తుమ్చో గురుబాబు రితో జా అన్నె, చి తుమ్ ఎత్తిజిన్ ఎక్కి జతి రిత బావుడ్లు జా అన్నెన్.

9 అన్నె, ఈంజ లోకుమ్తెచ కక్క కి 'దేముడు జలో అబ్బో' మెలి రితి నావ్ తియ నాయ్. కిచ్చోక మెలె, ఎక్కిలోయి తుమ్చో అబ్బోసి జలో దేముడు, పరలోకుమ్తె తిలోసా.

10 అన్నె, తుమ్తె కక్క 'గురు' మెనుక పొన. కిచ్చోక మెలె, తుమ్క క్రీస్తు ఎక్కిలోయి గురు జా అన్నె.

11 అన్నె, తుమ్చితె కో వెల్లో జయెదె గే, జో తుమ్క గొత్తి సుదో జా సేవ కెర్లు.

12 కో జోవయింక జెవ్వొ గవురుమ్ కెరంతి రితి జవుల గే, జేవ్ దాక్ జవుల, చి కో జోవయింక జెవ్వొ దాక్ కెరనుల గే, వెల్లెల్ జవుల” మెన యేసు సంగిలన్.

పరిసయ్యుల్క యేసు సంగిలి తీర్పు

13 పడ్డొ వెల్లెల మాన్సుల్క యేసు ఇసి మెన తీర్పు సంగిలన్. “అయ్యో! ఉప్రమెన్నుచొ పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన, నాసెనుమ్ జస్తె! కిచ్చొక మెలె, మాన్సుల్చి మొక్కె తుమ్ పరలోకుమ్చి కెట్టివొ డంకితను. కిచ్చొక మెలె, తుమ్ జా రాజిమ్తె సొంత బెదున్ నాయ్, చి బెదుక ఇస్టుమ్ జలన బెదుక తుమ్ ఒప్పున్ నాయ్.

14 *అయ్యో! తుమ్ మోసే తెన్ దేముడు దిలి ఆగ్గుల్ సికడ్డన, పరిసయ్యుల్, నాసెనుమ్ జస్తె! తుమ్ రండెల్ మాన్సుల్చ గెరల్ విక కయ్లెకి, ‘మాన్సుల్ అమ్చి బుద్ధి చినుతు నాయ్’ మెన మాన్సుల్చి మొక్కె దిగిల ప్రార్దనల్ కెర్తను. జాకయ్ తుమ్చి పాపుమ్ ఒగ్గర్, చి వెల్లి సిచ్చ జస్తె.

15 “అయ్యో! ఉప్రమెన్నుచొ పరిసయ్యుల్, మోసే తెన్ దేముడు దిలి ఆగ్గుల్ సికడ్డన, నాసెనుమ్ జస్తె! తుమ్ కక్క జలెకు తుమ్చి మొత్తుమ్తె బెదవంతి రిసొ, సముద్దుమ్ బుయి దెకజెతను, చి జో తుమ్చితె బెదిలో మెలె, జోవయించి బుద్ధి తుమ్చి బుద్ధిచి కంట దొన్ని వాటల్ గార్ జతి రితి కెర్తను, చి వెల్లి ఆగి గొయ్తె తుమ్ గెతె జలె, జో అన్నె దస్సి సిచ్చ జంక విలువ జయెదె.

16 “అయ్యో! తుమ్ గుడ్డి రిత జా, ‘మాన్సుల్క చెంగిల్ వాట్ దెకడుమ్దె’ మెన తుమ్క తూమ్ ఉచర్లె కి, చెంగిల్ వాట్ పిట్టయ్తన, తుమ్ నాసెనుమ్ జస్తె. తుమ్ సికడ్డిసి ఏక్ కిచ్చొ మెలె, ఎక్కిలో ‘దేముడుచి గుడి తోడు’ మెన ఒట్టు గలనై కిచ్చొ నెంజె, గని ‘దేముడుచి గుడితె తిలి బజరి తోడు’ మెన ఒట్టు గలనై, జో గలిలి ఒట్టు నెరవెర్చువ కెరనుక అస్సె మెన తుమ్ సంగితను.

17 తుమ్ బుద్ధి నెంజిల గుడ్డి జల మాన్సుల్. దొన్నితె కేన్ ముక్కిమ్? బజరి గే, బజర్క చెంగిల్ కెర్తి దేముడుచి గుడి గే?

18 “అన్నె, ‘బలి దెతి టాన్ సాచి’ మెన ఎక్కిలో ఒట్టు గలనై కిచ్చొ నెంజె, గని ‘జాచి ఉప్పిరి తిలి అర్పితుమ్ సాచి’ మెన ఒట్టు గలనై, జో మాన్సు గలిలి జా ఒట్టు నెరవెర్చువ కెరనుక అస్సె” తుమ్ మెంతను.

19 తుమ్ గుడ్డి జల రిత మాన్సుల్, దొన్నితె కేన్ ముక్కిమ్? అర్పితుమ్ గే, అర్పితుమ్క సుద్ది కెర్తి బలి దెతి టాన్ గే?

20 జలె, బలి దెతి టాన్ తోడు మెన కో ఒట్టు గలన తవుల గే, ‘జేవ్చి ఉప్పిరి తిలిసి ఎత్తి సాచి’ మెన ఒట్టు గలనై రితి జతయ్.

21 పడ్డొ, ‘ఈంజ దేముడుచి గుడి సాచి’ మెన కో ఒట్టు గలన తవుల గే, దేముడు సాచి మెన ఒట్టు గలనై రితి జతయ్. జో ఒత్త జితయ్చి రిసొ.

22 అన్నె, ‘పరలోకుమ్ తోడు’ మెన కో ఒట్టు గలన తవుల గే, ‘దేముడుచి సిజాసనుమ్ తోడు’ మెలి రితి జా, ‘ఒత్త వెసితోసొ తోడు’ మెలి రితి ఒట్టు గలనై రితి జతయ్.

23 “అయ్యో! ఉప్రమెన్నుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, తుమ్ నాసెనుమ్ జస్తె! తుమ్ పొచెర్డొ రొడ్డెతె, చెరమల్లితె, జిల్లకరతె, దస్సచతె దెస్సు వంతుల్ కెర, ఏక్ వంతు దేముడుక దెతను, గని మోసే తెన్ దేముడు దిలి ఆగ్గుల్ తెచ ముక్కిమ్ జల సెలవ్ కొడొ పచ్చ అస్సును. కిచ్చొ కిచ్చొ సెలవ్ కొడొ రితి కెరుక ముల అస్సున్ మెలె, సత్తిమ్ తెన్ రుజ్జు కెర తీర్పు కెర్తిసి, కన్కారుమ్ జతిసి, చి దేముడుచి ఉప్పిరి నిదానుమ్ నముకుమ్ తితిసి. జోవయించి వంతు దస్స వస్తువల్క దెంక తప్పు నాయ్, గని అన్నె ముక్కిమ్ జల సెలవ్ కొడొ రితి తుమ్ కెర్తదు జలె, తుమ్క చెంగిల్ తత్తి

24 గుడ్డి జల రిత వాట్ దెకయ్తన, తూమ్. పితిన్తె డోమ తిలె జాక వెంట గెల, ఒంట తిలె కి నాయ్ మెన జాక గిడ్డి రితి జతను.

25 “అయ్యో! ఉప్రమెన్నుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, నాసెనుమ్ జస్తె! గలన్లు గిన్నలు ఉప్పిరి పక్క మంజితి రితి, చెంగిల్ వేసిమ్ గలంతి రితి జతను, గని తుమ్చి పేట్ తెడి పక్క చోరు బుద్ధిచి ఆన బెర అస్సె.

26 తుమ్ గుడ్డి రిత పరిసయ్యుల్, గలన్ చి గిన్న తెడి సుబుమ్ కెరుక కిసి ముక్కిమ్ తయెదె గే, దస్సి, తుమ్చి బుద్ధి చెంగిల్ జలెగిన, నిజమి పున్నిమ్ రితి చెంగిల్ జంక జయెదె.

27 “అయ్యో! ఉప్రమెన్నుచొ, మోసే తెన్ దేముడు దిలి ఆగ్గుల్ సికడ్డన, పరిసయ్యుల్, తుమ్ నాసెనుమ్ జస్తె! తుమ్ చున్నుమ్ సరొయ్లి మెన్నున్చి రితి అస్సున్. ఉప్పిరి చొక్కెల్ సూటి డిస్తయ్, గని తెడి మొర గెల మాన్సుల్చ అడ్డొ, కువ గెలి ముక్కల్ తయెదె.

28 దస్సి, తుమ్క దెకిత మాన్సుల్క నీతిసుదల్చ రిత డిస్తను, గని తుమ్చి ఆత్మ తెడి ఉప్రమెన్ను, మూర్కుమ్ బుద్ధి బెర అస్సె.

29 “అయ్యో! ఉప్రమెన్నుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, తుమ్ నాసెనుమ్ జస్తె! దేముడుచ కబుర్లు సంగిలనక తుమ్చ పూర్గుమ్చ మార్లి

* 23:14 23:14 గ్రీకు జాన్ తెన్ ఈంజ మత్తెలి రెగిడ్డ సగుమ్ పుస్తకల్తె 14 నంబర్చి కోడు తయె నాయ్.

రిసా తుమ్క లాజుచి రిసా, జేవ్ నీతిసుదల్చి రిసా తుమ్ మెస్సున్లు బందవ, నూటి కెరవ,

30 ఆమ్ అమ్చ పూర్ణుమ్చ తిల దీసలె జితమ్ జలె, దేముడుచి కబుర్ ఆన్లసక మార్లిన్తె ఆమ్ బెదితమ్ నాయ్” మెనన, నీతి సంగితను, తుమ్.

31 దస్సి మెనన, దేముడుచి కబుర్ ఆన్లసక మార్లసచ పుత్తర్లులు జా అస్సుమ్ మెన, తుమ్చి ఉప్పిరి తుమ్ సాచి లట్టబంతను.

32 తుమ్చ పూర్ణుమ్చ మొదొల్ తెంతో కెర్లిసి తుమ్ పూర్తి నెరవెర్చుప కెర, జలె.

33 “పెట్టి అయిచి విస్సుమ్చ, తుమ్. విస్సుమ్చ అయిచొచి జట్టుచ, వెల్లి ఆగి గొయ్తెచి సిచ్చ తుమ్ కీసి పిట్టవన్తె? పిట్టవనుక నెతుర్చు.

34 జాచి రిసా, దేముడుచి కబుర్ ఆన్తనక కి, బుద్ది సుదల్క కి, అంచి సుబుమ్ కబుర్ సికడ్డనక కి తుమ్చితె తెద్రయిందె. గని జోవయింతె సగుమ్జినక మార్తె, సిలువల్తె గలుల. అన్నె సగుమ్జినక తుమ్చ సబ గెరలె కొర్లల్ తెన్ పెట కెర, అల్లర్ కెర, ఏక్ పట్టుమ్ తెంతో అన్నెక్ పట్టుమ్ ఎద, ఉదడ గెల్తె తస్సె.

35 తుమ్ దస్సి కెర్లసుచి రిసా, మాన్సుల్చి అత్తి మొర గెల నీతిసుదల్ ఎత్కిజినచి లోయిచి పాపుమ్ తుమ్క లయెదె. నీతి జలో హేబెలుక మార్లి తెంతో మొదొల్ కెర, దేముడుచి గుడిచి నెడిమి బలి దెతి టాన్ సాడి తుమ్చ అబ్బుదింసి మార్లొ బరకీయచొ పుత్తున్ మెలో జెకర్యాచి లోయి ఎద,

36 జా పాపుమ్ ఎత్కి, ఈంజ కాలుమ్చ మాన్సుల్క లయెదె మెన, తుమ్క ఆవ్ కచితుమ్ సంగితసి.

37 “ఓ యెరూసలేమ్చ, అమ్చి యెరూసలేమ్చ మాన్సుల్! అమ్ తెద్రయల కబుర్ ఆన్లసక, బోదన కెర్లసక పత్తల్ గల మార్లను. కిచ్చొ ప్రమాదుమ్ నే లయితి రితి కుకిడి జాచి పిల్లల్క జాచి రెప్పల్ తెడి కీసి ముద్దొ కెరన తయెదె గే, ఆవ్ తుమ్క కెత్తిగే సుట్లు ముద్దొ కెరంతి రితి తుమ్క చెంగిల్ కెర్లయ్, గని తుమ్ నెసెలదు.

38 ఈందె, తుమ్చి గేర్ కో నెంజితె రితి తుమ్క తూమి ముల దెస్సె.

39 అప్పె తెంతో మొదొల్ కెర, ప్రబుచి నావ్ తెన్ జెతోసాక ‘జెయ్యి, జెయ్యి!’ మెన తుమ్ సంగుక దెర్తె ఎదక తుమ్ అంక దెకుక నెతుర్చు మెన, కచితుమ్ సంగితసి” మెన, యేసు సంగిలన్.

24

దేవులుమ్ పాడ్ జంక తిలిన్చి రిసా యేసు సంగిలిసి
(మార్కు 13:1-31; లూకా 21:5-33)

* 24:5 24:5 కెయక మెలె, యేసు పరలోకుమ్తె వెగ గెచ్చు అన్నె నే జెతె అగ్గె.

1 తెదొడి యేసు దేముడుచి గుడి తెంతో బార్ జా ఉట్ట గెతె తతికయ్, జోచ సిస్సుల్, ‘ఈంజ దేముడుచి గుడి కెద్ది నూటి కెర అస్తి!’ మెన జోక దెకవుక అయల.

2 జాచి రిసా యేసు జోవయింక, “ఈంజ ఎత్కి తుమ్ దెకితను, గని, తుమ్క ఆవ్ కిచ్చొ కచితుమ్ సంగితసి మెలె, పత్తుర్చి ఉప్పిర్ పత్తుర్ దొత్తల్ అప్పె తిలె కి, ఎక్కి జలెకు నే టీవొ నే జతి దీసి జెయెదె” మెన, సంగిలన్.

3 పిమ్మట్, యేసు దేముడుచి గుడిచి మొక్కె తిలి ఒలీవ మెట్టయ్ గెచ్చు వెసితకయ్, అన్నె కో నెంతె సిస్సుల్ జోతె జా కెర, “తుయి సంగిలిసి కెయక జర్లు జయెదె? పిమ్మట్, తుయి ఈంజ లోకుమ్తె అన్నె జెతిసి కి, ఈంజ ఉగుమ్ మార్చుప జతిసి కి పాసి జెతయ్ మెన, అమ్ కీసి చినుక జయెదె?” మెన పుసిల.

4 జలె యేసు జోవయింక ఇసి మెలన్. “కో జలెకు తుమ్క మోసిమ్ నే కెర్లి రితి, తుమ్ జాగర్ల దెకన.

5 కిచ్చొక మెలె, ఒగ్గర్జిన మాన్సుల్, ‘అంచి నావ్ తెన్ జా కెర అవ్వి క్రిస్తు’ మెన సంగుక జలెకు, ఒగ్గర్జినక మోసిమ్ కెర, వేర బుద్ది సికడుల.*

6 పిమ్మట్, ‘యుద్దుమ్ జతయ్’ మెన జలెకు, ‘యుద్దుమ్ జెయెదె’ మెన జలెకు, తుమ్ నూన్తె. గని, బమ్మ నెంతె తా. ఇనచ ఎత్కి జర్లు జంక అస్సె, గని ఈంజ ఉగుమ్ తెద్ది బేగి పూర్తి జయె నాయ్.

7 పిమ్మట్, దేసిమ్చి ఉప్పిర్ దేసిమ్, రాజిమ్చి ఉప్పిర్ రాజిమ్ యుద్దుమ్క టీవొ జవుల. అన్నె, వేర వేర దేసిమ్లుతె కరులు కి బూకంపల్ కి జర్లు జవుల.

8 అంచి రాజిమ్ ఏలుప కెర్లి ఉగుమ్క జెర్మయ్తి అగ్గె జెతి సల్వ నొప్పుల్ రితి జా, ఇనచ మొదొల్ జవుల.

9 “దస్సి జర్లు జతి పొదిక, పైజల్ తుమ్క సైమల్ కెర్లి రిసా అదికారుల్తె సార్చ కెర మొరవుల. అంచి నావ్చి రిసా, దేసిమ్లు ఎత్కితె తుమ్క విరోదుమ్ కెరుల.

10 దస్సి జర్లు జతిన్చి రిసా, ఒగ్గర్జిన బమ్మ జా అంక ముల దా, ఎక్కిలోక ఎక్కిలో మోసిమ్ కెర అదికారుల్చి అత్తి దెరవ దెవుల, చి ఎక్కిలోక ఎక్కిలో విరోదుమ్ జవుల.

11 “జేవ్ దీసల్క, ఒగ్గర్జిన మాన్సుల్ ‘దేముడుచి కబుర్ సంగితోసా ఆవ్’ మెనన, తుమ్చితె జా కెర, వేర బుద్ది సికడ, ఒగ్గర్జినక అంక ములవ దెవుల.

12 అన్నె, ‘పాపుమ్ కెర్లిసి ఒగ్గర్ జా గెతయ్’ మెన, ఒగ్గర్జినతె ఎక్కిలోక ఎక్కిలో ప్రేమ కెర్లిసి పిట్ట గెచ్చెదె.

13 దస్సి జలెకి, ఆకర్ ఎద నముకుమ్ తెన్ తా, కో ఓర్చుప జవుల గే, జెవ్వి రచ్చించుప జవుల.

14 “ ‘ఒండి లోకుమ్చ పైజల్ ఈంజ సాచి నూన తత్తు’ మెన, ఈంజ లోకుమ్ ఎత్కిక పరలోకుమ్చి రాజిమ్చి

రిసాచి ఈంజ అంచి సుబుమ్ కబుర్ నూనయిందె. ఎత్తితె నూనయ్లకయ్ ఆకర్ దీసి జెయెదె” మెన యేసు సంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి

15 “జాకయ్, †పిమ్మట్క, ‘జర్గు జయెదె’ మెన దానియేలు పూర్ణుమ్చొచి అత్తి రెగ్గయ్లి కోడు తిలిసి, మెలె, దేముడుక విరోదుమ్ జా జోక బలే దూసుప కెర నాసెనుమ్ కెర్తిక దేముడుచి గుడితె టీవో జంక, తుమ్ దెకితె, ఇన్నెచి అర్దుమ్ కిచ్చొ మెలె, ఈంజ సదు కెర్తస తుమ్ చెంగిల్ ఉచరన, జలె, జా గుర్తు తుమ్ దెకిలె,

16 యూదయ ప్రదేసిమ్తెచ మాన్సుల్ చట్టున డొంగ్రలె ఉట్ట నిగుతు.

17 జా జర్గు జతిసి తుమ్ దెకిలె, కేన్ మిద్దెచి ఉప్పిర్ తిలొ సుదొ, ఉత్త కెర, జోచి గెరి తెంతొ కిచ్చొ జలెకు వెంట నెంక ఉత్త జెంక నాయ్.

18 వెడయ్ తిలొ సుదొ, కామ్చి రిసా కడ్ల జోచ సొక్కల్ జవున్ వెంట నెంక పన్ల జెంక నాయ్.

19 “అయ్యో! జేవ్ దీనల్క వయ తిల తేర్బోదల్, బోదల్ వడ్డివో ఉట్ట నిగుక నెత్త బగ్గర్ సైమల్ జవుల.

20 ‘చల్లి పొది జవున్, ‡సెలవ్ కడన్లి దీసి జవున్ అమ్క ఈంజ ఉట్ట నిగితి సైమ జెవున్ నాయ్’ మెన, తుమ్ ప్రార్దన కెర.

21 కిచ్చొక మెలె, లోకుమ్ జెర్మున్ జలి తెంతొ అప్పె ఎదక, దస్సి సైమ కెయ్యక కి కలుగు జయె నాయ్, చి తెద్ది సైమ కెయ్యక కి అన్నె జయె నాయ్.

22 జాచి రిసా, తొక్కి దీనల్క దస సైమల్ జతి రితి ప్రబు సెలవ్ దెతో నాయ్ జలె, కో కి రచ్చించుప జంక నెత్త. గని, నంపజతి రిసా రచ్చనక నిసాన జలన పాడ్ నే జతి రిసాయి, జేవ్ సైమల్ తొక్కి దీనల్ తతి సెలవ్ అస్సె.

యేసు అన్నె జెతిసి కీసి తయెదె గే జొయ్యి సంగిలిసి

23 “జా కాలుమ్క, ‘ఈందె, క్రీస్తు!’, ‘ఓదె క్రీస్తు’ మెన కో జలెకు తుమ్క సంగిలెగిన, తుమ్ నంప కెర నాయ్.

24 కిచ్చొక మెలె, అబద్దుమ్చ జా కెర, ‘ఆవ్ క్రీస్తు’ మెనన జలెకు ‘ఆవ్ దేముడుచి కబుర్ ఆన్తొసా’ మెనన జలెకు, రచ్చనక నిసాన్లనక మోసిమ్ కెర జోవయించి నముకుమ్ పిట్టపుక మెన ఉచర, వెల్లెల మాయకమొ కెరుల.

25 ఈందె, ఈంజ నే జతె అగ్గ తుమ్క ఆవ్ సంగితసి.

26 జాకయ్, కో జలెకు, ‘ఈందె, క్రీస్తు జా బయిలె అస్సె’ మెన సంగిలె జవున్, తుమ్ ఒత్త గెచ్చ నాయ్. నెంజిలె,

‘ఈందె, గేర్ తెడి మూలయి పెన అస్సె’ మెన సంగిలె జవున్, నంప కెర నాయ్.

27 కిచ్చొక మెలె, బిజిలి తూర్పు పక్క మొల్క, పడమర పక్క గెతె ఎదక కీసి ఉజిడ్ జతయ్ గే, దస్సి కి ఆవ్ మాన్సు జా జెర్మున్ అయ్లోసా అన్నె జెతె పొదిక, దస్సి, కేన్ పక్క కి డీసిందె.

28 పీనుమ్ కేనె తయెదె గే, ఒత్త గిద్దుల్ బెరుల.

29 “ఆవ్ సంగిలి జా వెల్లి సైమచి దీనల్ కేడ్లె, బేగి పొద్దు అందర్ జయెదె. జోను కి ఉజిడి దెయె నాయ్. ఆగాసుమ్ తెంతొ సుక్కల్ గెసురుల, ఆగాసుమ్తె ఎత్తి అద్దుర్ జయెదె.

30 తెదొడ్క ఆవ్ మాన్సు జా జెర్మున్ అయ్లోసా జెతిన్క గుర్తు ఆగాసుమ్తె డీసెదె. సొస్టుమ్ డీసెదె, చి ఆవ్ మాన్సు జా జెర్మున్ అయ్లోసా ఆగాసుమ్చ మబ్బుల్తె ఉత్త, అంచి అదికారుమ్ అంచి పరలోకుమ్చి ఉజిడి తెన్ జెతిసి బూలోకుమ్ తిలి ఎత్తి ప్రెజల్చ మాన్సుల్ ఎత్తిజిన్ దెక, జేవ్ కెర్ల పాపల్చి రిసా దుకుమ్ కెరనుల.

31 తెదొడ్క నప్పిర్ గట్టిజ బజవ, అంచ దూతల్క తెద్రయిందె, చి చెత్తర్ పక్కల్ తెంతొ ఆవ్ నిసాన అంక నంపజల మాన్సుల్క జేవ్ ఎక్కితె కుడవుల.

32 “అంజూరుమ్ రూకుక టాలి కెర అర్దుమ్ కెరన. మెలె, దసా రూక్చ కొమ్మల్ కొవ్ని జా పలోయలె, ‘వేసెగు అప్పె పాచ జెయెదె’ మెన, తుమ్ చినితె.

33 దస్సి, ఆవ్ సంగిల గుర్తుల్ తుమ్ దెకిలె, జా గుమ్ముమె పాచిల్ రితి జా అన్నె జెతికయ్ సమయ్యమ్ పాసి జా అస్సె మెన తుమ్ జాన్తె.

34 ఆవ్ సంగిల సైమల్, గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్క ఆవ్ కచితుమ్ సంగితసి.

35 జలె, ఆగాసుమ్ బుయి నాసెనుమ్ జా గెచ్చుల, గని అంచ కొడె ఎద్దరె పిట్టితి నాయ్.

కో నేన్లి పొదిక అన్నె జెయిందె మెన యేసు సంగిలిసి

36 “జలె, కేన్ దీసిక ఈంజ లోకుమ్తె అన్నె జెయిందె గే, జా దీన్, జా గడియ కెయెక జెయెదె గే, మెన దేముడు అబ్బొక పిట్టవ కేన్ మాన్సు జలెకు, పరలోకుమ్చ దూతల్ జలెకు, దేముడు అబ్బొచొ పుత్తుసి జలెకు, కోయి నేనుమ్.

37 నోవహు పూర్ణుమ్చొ తిలి పొది ఎత్తి కీసి తిలి గే, దస్సి ఆవ్ మాన్సు జా జెర్మున్ అయ్లోసా అన్నె జెతె పొదిక దస్సి తయెదె.

38 మెలె, నోవహు తిలి పొది, దేముడు సంగిలే కి, జా దీనల్తె తిల మాన్సుల్ నంప కెర్ల నాయ్, చి జా వర్లల్చి

† 24:15 24:15 యేసు జెర్ము డబ్బయ్-70-వెర్సుల్ గెలి పడ్డొ ఈంజ నస్టుమ్ జర్గు జలి. మెలె, యేసు పరలోకుమ్తె గెచ్చ అన్నె విస్సిక్ సత్తు-27-వెర్సుల్ గెతికయ్.

‡ 24:20 24:20 ఎత్తి సెన్సర్ యూదుల్క బక్తి కెర్రి సెలవ్ కడ దీసి జయెదె. జా దీసి జోవయించ నబ గెరలె గెచ్చ, దేముడుచి కొడె నూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలిన్క యూదుల్చ వెల్లెల మాన్సుల్ ప్రెజల్చ జాడు వయడ్లి రితి కెర కామ్ నే కెర్నిచి రిసా బగ్గర్ అగ్గల్ అవ్వి ఉచర అస్సి. ఇన్నె, దొన్ని ఎన్నులు కోట్టిన్క ‘కామ్’ మెన నింద కెర్తితి.

పాని పెటుక దెర్లి పొది కి, నోవహుచి కుటుంబుమ్ వెల్లి ఓడతె పెన కెప్పి డంకిలి ఎద, అన్నె కో కి కతె తా, పితె తా, పెండ్లివొ కెర్తె తా, కిచ్చో నే జతి రితి బుల్తె తిల.

39 జా వర్లల్ పాని గెడ్సుప జతిసి నిజుమి జర్గు జంక తిలి మెన నంప నే కెరంతికయ్, జా జర్గు జతికయ్, జేవ్ ఎత్తిజిన్క బూరుమ్ గుడ్డ నిలి, చి డుజ గెల. దస్సి, ఆవ్ మాన్సు జా జెర్మున్ అయ్లోసా అన్నె ఉత్త జెతిసి తెన్ కి, ఒగ్గర్జిన్ మాన్సుల్ అంక నే సూన్తె, జోవయింక ఇన్సుమ్ అయ్లి రితి కెర్తె తవుల, చి తెదొడక నాసెనుమ్ జాఁ గెచ్చుల.

40 “జా కాలుమ్క, దొగుల బట్టి తిలె, ఎక్కిలోక ముల దా, అన్నెక్కిక కడ నెవుల.

41 దొగుల తేర్బోదల్ తిర్వేల్ తెన్ రోడ్తె తిలె, ఎక్కిక ముల దా, అన్నెక్కిక కడ నెవుల.

42 “జలె, కేన్ సమయుమ్క తుమ్చో ప్రబు ఆవ్ అన్నె జెయిందె గే, తుమ్ నేన్సు. జాచి రిసా, తుమ్ తెలివి తా, అంక రకితె తా.

43 గని ఏక్ టాలి అర్దుమ్ కెరన. ‘కేన్ సమయుమ్క చోరు జెయిందె గే, గెర్చో ఎజొమాని కో జలెకు జాన్తో జలె, జో జా సమయుమ్క చెద్దొయి తా, రకితె తా, జోచో గెరి చోరు నే పెసితి రితి దెకన్తో’ మెలి కోడుక తుమ్ అర్దుమ్ కెరన.

44 మెలె, తుమ్ నే ఉచర్లి సమయుమ్క ఆవ్ మాన్సు జా జెర్మున్ అయ్లోసా అన్నె జెయిందె. జాచి రిసా, తుమ్ తెయార్ జా, తెలివి తెన్ రకితె తా.

45 “జలె, ప్రయానుమ్ గెచ్చుక మెన ఎజొమాని బార్ జంక జలె, జోచ గేర్చక దెక సమయుమ్క అన్నిమ్ దెంక మెన జో నిసాన్లొ బుద్ది తిలొ నిదానుమ్చో గొత్తి సుదొ కో జవుల?

46 జో ఎజొమాని అన్నె ఉట్ట అయ్లె, జో గొత్తి సుదొ జో ఎజొమాని తియార్లి కామ్ కెర్తె తిలె, జోక చెంగిలి.

47 దస్సి నిదానుమ్ కెర్తె తిలొ మెలె, జో ఎజొమాని అయ్లె, జోచి ఆస్తి ఎత్తిచి ఉప్పిరి జో గొత్తి సుదొక అదికారుమ్ దెయెదె, తుమ్క ఆవ్ కిచ్చో కచితుమ్ సంగితసి.

48 “జో గొత్తి సుదొ గార్ సుదొ జలె, ‘ఎజొమాని ఆల్నిమ్ కెర్తయ్’ మెన ఉచర,

49 జోచి తెన్ తిల గొత్తి సుదల్క పెటుక మొదొల్ కెర, సూర్ పిత మాన్సుల్ తెన్ బెద, జేవ్ కతిసి పితిన్తె బెద దస్సు అలవాట్లు సికెదె.

50 ‘ఎజొమాని ఆజి జెయె నాయ్’ మెన గొత్తి సుదొ ఉచర, నే రకితె దీసిక గడియక జో ఎజొమాని ఉట్ట అయ్లె,

51 జోక మొర్తి సిచ్చ తియడ కెర, ఉప్రమెన్సుచ మాన్సుల్ సిచ్చ జిత్తె గలెదె. ఒత్త గెతన సిచ్చక ఏడ్తె తవుల, దంతొ చప్పిల్తె తవుల.

25

తెలివి తా ఆవ్ అన్నె జెతిన్క రకితె తా

1 “పరలోకుమ్చి రాజిమ్చి ఉజిడి తెన్ ఆవ్ అన్నె జెతిన్క రకితిసి కిసి జయెదె మెలె, పెండ్లి ఉబేడొక దస్సుల్ జంక మెన, దెస్సుజిన్ ఉబెడివొ దివ్వొ దెరన బార్ జలిన్చి రితి జయెదె.

2 జోవయింతె బుద్ది నెంజిలన పాచ్జిన్, చి బుద్ది తిలన పాచ్జిన్ తిల.

3 బుద్ది నెంజిలన జోవయించ దివ్వొ దెరన, తేల్ నే దెర్తె గెల.

4 గని బుద్ది తిలన, మాత్రుమ్, జోవయించ దివ్వొకి, అన్నె సువితి తేల్ కి దెరన గెల.

5 “పెండ్లిఉబేడొ ఆల్నిమ్ కెర్తికయ్, జేవ్ దెస్సుజిన్ గూన్క జుమ్ నిజిల.

6 సొక్కుక, ఈందె, పెండ్లిఉబేడొ జెతయ్. జోక దస్సుల్ జంక బార్ జా” మెన, బారికి కేకుల్ గల్తికయ్,

7 జేవ్ దెస్సుజిన్ ఉబెడివొ ఎత్తిజిన్ సూన కెర, ఉట్ట, జోవయించ దివ్వొచ వాటివొ చెంగిల్ కెరన,

8 జోవయింతె జేవ్ పాచ్జిన్ బుద్ది నెంజిలన, అమ్చ దివ్వొ విజ గెతతి. తుమ్చి తేల్ సగుమ్ అమ్క దా మెన, బుద్ది తిల తెయార్ జలనక సంగిలి

9 జేవ్ తెలివి జా తిలన అమ్తె తిలిసి అమ్క తుమ్క పావె నాయ్. సావుకర్లుతె తుమ్ గెచ్చు, తుమ్చి రిసా గెనన మెన సంగిలి.

10 “జలె, సమయుమ్క బుద్ది నెంజిలన తేల్ గెనుక గెతె తతికయ్, పెండ్లిఉబేడొ పావె అయ్లన్, చి తెయార్ జా తిలన జోవయింతెన్ బెద పెండ్లి గెరి పెన, విందుతె వెసిల. తెదొడి, విందు దెతోసా కెప్పి డంక దిలొ.

11 డంక దిలి పిమ్మట్, బుద్ది నెంజిల ఉబెడివొ ఒత్త జా కెర, ‘బాబు, బాబు, అమ్క కెప్పి ఉగుడ దే’ మెన సంగిల.

12 జో ఎజొమాని జోవయింక, ‘ఆవ్ తుమ్క నేని మెన తుమ్క నిజుమి ఆవ్ సంగితసి’ మెన సంగెదె.

13 జలె, ఆవ్ ఉట్ట గెలె, కేన్ దీసిక కేన్ గంటక అన్నె జెయిందె గే, తుమ్ నేన్సు, చి రిసా తెలివి తా రకితె తా.

తలంతుల్ దొర్కు కెరన్ల తిగ్గచి టాలి

(లూకా 19:11-27)

14 “ఏక్ మాన్సు ప్రయానుమ్ గెచ్చుక తిలి రిసా, జోచ గొత్తి సుదల్క బుకారా కెర, ‘చెంగిల్ రకుతు’ మెన జోచి ఆస్తి ఎత్తి జోవయించి అత్తి సార్ప కెర దిలన్.

15 ఎక్కిలోక పాంచ్ తాలంతుల్, ఎక్కిలోక దొన్ని తాలంతుల్, ఎక్కిలోక ఎక్కి *తాలంతు, దస్సి. కక్క జేవ్ వాడిక కెర్తె సెక్తిచి ఎదిలి వంట దా కెర, బార్ జా, ఉట్ట గెలన్.

* 25:15 25:15 తాలంతు మెలె బజర కాసు. దేనార కాసు మెలె ఎక్కి దీసిక కూలి. ఎక్కి తాలంతు, 6000 దేనార.

16 జలె, జేవ్ గొత్తిమాన్సుల్తె పాంచ్ తాలంతుల్ కడన్లొసా గెచ్చు, జేవ్ తెన్ బియ్యార్ కెర, అన్నె పాంచ్ తాలంతుల్ లాబుమ్ కెరన బెదయ్లన్.

17 దస్సి, దొన్ని తాలంతుల్ కడన్లొసా అన్నె దొన్ని తాలంతుల్ లాబుమ్ కెరన బెదయ్లన్.

18 జలె, ఏక్ తాలంతు కడన్లొసా గెచ్చు, బుయి కూన కెర, జోచొ ఎజొమాని దిలి దనుమ్ లుంకడ దిలన్.

19 “ఒగ్గర్ దీనల్ గెలి పిమ్మట్, జేవ్ గొత్తి సుదల్చొ ఎజొమాని అన్నె జా కెర, జోవయింక దిలి జోచి డబ్బుల్ లెక్క కెర నజనుక మెన, జోవయింక బుక్కార్లొ.

20 తెదొడి, పాంచ్ తాలంతుల్ కడన్లొసా పురె జా కెర, బాబు తుయి పాంచ్ తాలంతుల్ అంక దిలది, చి ఈందె, ఆవ్ అన్నె పాంచ్ తాలంతుల్ బెదయ్లయ్” మెన, జా డబ్బుల్ ఎత్తి ఆన దెకయ్లన్.

21 జలె, జా ఎజొమాని జోక, “తుయి నిదానుమ్ తిలొ చెంగిలొ గొత్తి సుదొ, ఈంజ ఇదిల్ తుక దిలయ్, గని తుచొ ఎజొమానిచి రిసా నిదానుమ్ తెన్ లాబుమ్ కెర్లది చి రిసా, ఇన్నెచి కంట ఒగ్గర్ ఆస్తిచి ఉప్పిరి తుక అదికారుమ్ దెయిందె. తుచొ ఎజొమానిచి సంతోసుమ్తె తుయి బెదు” మెన జోక సంగిలన్.

22 “దస్సి, దొన్ని తాలంతుల్ కడన్లొసా కి పురె జా కెర, ‘బాబు, తుయి అంక దొన్ని తాలంతుల్ దిలది, చి ఈందె ఆవ్ దొన్ని తాలంతుల్ లాబుమ్ బెదయ్లయ్’ మెన సంగితికయ్,

23 జోచొ ఎజొమాని, ‘నిదానుమ్ తిలొ చెంగిలొ గొత్తి సుదొ, తుయి. ఈంజ ఇదిల్ తెన్ అంచి కామ్ నిదానుమ్ కెర్లది. అప్పె ఒగ్గర్చి ఉప్పిరి కి తుక అదికారుమ్ దెయిందె. తుచొ ఎజొమానిచి సంతోసుమ్తె తుయి బెదు’ మెన జోక సంగిలన్.

24 “పిమ్మట్, ఎక్కి తాలంతు కడన్లొసా జా కెర, బాబు, తుయ్ ‘కన్కారుమ్ నెంజిలొసా’ మెన, ‘తుయి నే ఉంపిలి పంటొ, లాయితోసా’ మెన, ‘తుయి నే పూన్లిన్తె కుడవంతొసా’ మెన, ఆవ్ జాని.

25 జాచి రిసా, ఆవ్ తుక బియ్ కెర, తుయి దిలి తాలంతు జాగర్ల తెన్ బుయ్యె రొవ దిలయ్, చి జెతికయ్, ఉట్కువ ఆన్లయ్. ఈందె, కడను” మెన సంగిలన్.

26 గని, జోచొ ఎజొమాని జోక, “గర్చొచొ బద్దుకుమ్చొ గొత్తి సుదొ తుయి. ఆవ్ నే ఉంపిలిన్తె లాయితోసా మెన, నే పూన్లిసి కుడవంతొసా మెన తుయి జాన్లది?

27 జలె అంచి డబ్బుల్ కేన్ జవున్ సావుకారితె తుయి దా తత్తది జలె, ఆవ్ అయ్లె అంచి డబ్బుల్ వడ్డి తెన్ నజన్తయ్” మెన, జో గొత్తి సుదొక గొల కెర,

28 జా తాలంతు జో గొత్తి సుదొ తెంతొ నజన, దెస్సు తాలంతుల్ తిలొసాక దేసు.

29 ఇదిల్ జవున్ తిలొసాక అన్నె దెంక జయెదె, గని నెంజిలొసాతె తెంతొ జోక తిలిసి కి కడ గెలుక జయెదె.

30 జో కామ్క నెంజిలొ గొత్తి సుదొక అందర్చి కంట రితి అందర్తె బయలె గల దాన. ఒత్త గెలన జా సిచ్చుక ఏడ ఏడ, దంతొ చప్పిలై తవుల మెన, ఎజొమాని ఆడ్ర దిలన్.

మెండల్ అన్నె గొర్రెల్

31 “ఆవ్ మాన్సు జా జెర్మున్ అయ్లొసా, అంచ దేముడుచి దూతల్ తెన్ పరలోకుమ్చి ఉజడి తెన్ అన్నె జెతె పొదిక, అంచి ఒత్తచి ఉజడిచి సింగాసనుమ్తె వెసిందె.

32 మంద రకితోసా, మంద ఎత్తి ఎక్కితె కుడవన, కిసి మెండల్ తెంతొ గొర్రెల్క వేర కెరెదె గే, తెదొడక ఆవ్ అన్నె జెతె పొదిక దేసిమ్లు ఎత్తితెచ ప్రజల్ ఎత్తిజిన్క అంచి మొక్కె కుడవన కెర, నంపజలన తెంతొ నంపనెంజిలనక వేర కెరిందె.

33 అంచి ఉజెతో పక్క మెండల్ రిత నంపజలనక, డెబ్బి పక్క గొర్రెల్ రిత నంపనెంజిలనక టీవొ కెరెదె.

34 “ఒత్త తెంతొ, ఆవ్ పరలోకుమ్చొ రానొ, అంచి ఉజెతో పక్క తిలనక కిచ్చొ మెనిందె మెలె, అంచొ అబ్బొ రచ్చున వరుమ్ దిలన, తూమ్. బూలోకుమ్ జెర్ములి పొది తెంతొ తుమ్చి రిసా తెయార్ కెర్లి రాజిమ్తె తుమ్చి వాట తూమ్ నజన.

35 కిచ్చొక మెలె, అంక చూ కెర్లికయ్, తుమ్ అంక అన్నిమ్ దిలదు, అంక తాన్ కెర్లికయ్, తుమ్ పాని దిలదు. వేర దేసిమ్చొ జా తిలయ్, గని అంక తుమ్చితె బెదవన్లదు.

36 అంక సరిపుచుప జత పాలల్ నెంజితికయ్, అంక పాలల్ దిలదు. జొర్లొ తెన్ తతికయ్, అంక దెకుక అయ్లదు. జేల్తె తతికయ్, ఒత్త అంక దయిరిమ్ కెరుక అయ్లదు” మెన, సంగిందె.

37 “జా కోడు సూన్లె, పున్నిమ్ మెన జో తీర్పు సంగిలన కిచ్చొ మెనుల మెలె, ప్రబు, తుయి కెయ్య చూ జలిసి దెకిలమ్ చి అన్నిమ్ దిలమ్? తుక కెయ్య తాన్ కెర్లిసి దెకిలమ్ చి పాని దిలమ్?

38 తుయి కెయ్య వేర దేసిమ్ తెంతొ అయ్లిసి దెకిలమ్ చి అమ్చి తెన్ బెదవన్లమ్? కెయ్య తుక పాలల్ నెంజిలిసి దెకిలమ్ చి పాలల్ దిలమ్?

39 తుక జొర్లొ తిలిసి, తుయి జేల్తె తిలిసి కెయ్య దెకిలమ్, చి దయిరిమ్ కెరుక గెలమ్? కెయ్య నాయ్, కిచ్చొగె” మెన సంగుల, జేవ్, పున్నిమ్ జలన.

40 జేవ్ దస్సి సంగిలె, రానొ జోవయింక కిచ్చొ మెనిందె మెలె, తుమ్క ఆవ్ కిచ్చొ కచితుమ్ సంగితసి మెలె, అంచ బావుడ్లు జల ఈంజేవ్ అంచ మాన్సుల్క తుమ్ మరియాద కెర్లిసి, అంక కి మరియాద కెర్లి రితి జలి మెనిందె.

41 “పడ్డొ, జా దీసిక అంచి డెబ్బి పక్క తిలనక కిచ్చొ మెనిందె మెలె, గర్చు, తూమ్, గెచ్చు! నయ్తానుక చి జోచ దూతల్క గల్లి రిసా తెయార్ కెర్లి నే విజెతి ఆగితె తుమ్ సేడ!

42 కిచ్చొక మెలె, అంక చూ కెర్లి పొది తుమ్ అంక అన్నిమ్ దిలదు నాయ్. అంక తాన్ కెర్లికయ్, పాని దిలదు నాయ్.

43 వేర దేసిమ్చొ ఆవ్ అయ్లె కి, అంక తుమ్ బెదవన్ను నాయ్. సరిపుచుప జత పాలల్ నెంజిలి పొది, అంక తుమ్ పాలల్ దిలదు నాయ్. జబ్బు తెన్ తిలె కి, జేతె తెలె కి, తుమ్ అంక దెకుక అయ్లదు నాయ్, మెన అంచి డెబ్లి పక్క తిలసక సంగిందె.

44 తెదొడెక జేవ్ కి ఇసి మెన జబాబ్ దెవుల. ప్రబు, తుక చూ కెర్తికయ్, తాన్ కెర్తికయ్, తుయి వేర దేసిమ్చొ జెతికయ్, పాలల్ నెంతె తతికయ్, జొర్ణొ తెన్ తతికయ్, జేతె తెతికయ్, అమ్ తుక తోడు కెరుక నాయ్ గె? మెన సంగుల.

45 జోవయింక ఆవ్ కిచ్చొ జబాబ్ దెయిందె మెలె, తుమ్క ఆవ్ కిచ్చొ కచితుమ్ సంగితసి మెలె, అంచ మాన్సుల్తె కక్క కి తుమ్ ఇసి నే కెర్లిసి, అంక కి నే కెర్లి రితి జలి, మెన జోవయింక సంగుమదె,

46 చి కెయక తెయక సిచ్చు జతిన్తె గెచ్చుల, గని పున్నిమ్ జలస కెయక తెయక పరలోకుమ్తె జింక గెచ్చుల." మెన సిన్సుల్క యేసు సంగిలన్.

26

అంక విరోదుమ్ సుదల్ దెర్తి సమయుమ్ పాసి జా అన్సె (మార్కు 14:1-2; లూకా 22:1-2; యోహా 11:45-53)

1 యేసు సిన్సుల్క ఈంజేవ్ కొడొ ఎత్తి సంగ కేడయ్లి పిమ్మట్ జర్గు జలిసి కిచ్చొ మెలె, జో జోచ సిన్సుల్క,

2 "దొరతి గెలె, *పస్కా పండుగు జెయెదె మెన తుమ్ జాన్సు. జా పొదిక, ఆవ్ మాన్సు జా జెర్మున్ అయ్లోసాక సిలువతె టీవొ కెర మార్తి రిసా, అంక దెర దెయెదె" మెన యేసు సంగిలన్.

3 జా సమయుమి, వెల్లెల పూజర్లు కి వెల్లెల మాన్సుల్తె అన్సె సగుమ్జిన్ కి, కయప మెంతొ ఎత్తిక వెల్లొ పూజరిచి గేర్తె బెద జా కెర,

4 కిసిగె లుంకచొరు యేసుక దెర, మారుక మెన, బెద ఉచర్ల, గని,

5 "పండుగు పొది పొని, నెంజిలె పండుగక బెర అయ్ల ప్రెజల్ కుమ్మత్ తెన్ గగ్గొల్ జా అమ్క బలే అల్లర్ కెరుల" మెన సంగితె తిల.

తేర్బోద వాసిన తేల్ యేసుచి బోడి సువిలిసి (మార్కు 14:3-9; యోహా 12:1-8)

6 జలె, యేసు బేతనియ గవ్వి గెచ్చు కెర, సీమోను మెలొ వెల్లి రోగి జా తిలొ ఎక్కిలొచొ గెరి తిలి పొది,

* 26:2 26:2 పూర్ణమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతొ ప్రబు రచ్చించుప కెర్లిసి ఏద కెర్లి పండుగు, ఈంజ. ముక్కిమ్క కిచ్చొ ఏద కెరుల మెలె, 'అమచ యూదుల్క విడ్డల్ కెర్లు' మెన ఐగుప్తు దేసిమ్చ కుటుంబల్ ఎత్తిచ తొల్పుర్ జల మున్సుబోదల్క దూత మార్లిన్తె యూదుల్చ తొల్పుర్ బోడల్ నే మొర్తి రితి ప్రబు జోవయింక పిట్టయ్లిసి ఏద కెరుక. తెదొడి, పూర్ణమచి జా రాతి కేన్ గెరి యూదుల్ తిల గే, జా గెరచ దార్బంద్రల్తె అర్చితుమ్ జలొ ఏక మెండపిల్లిచి లొయి దెరవుల, చి దూత దెకిలె, జా గెరచొ తొల్పుర్ బోడక మారొ నాయ్. నిర్ణమకాండుమ్ 12:21-30. † 26:17 26:17 'పస్కా పండుగు' మెలె, యూదుల్ ఒగ్గర్ పూర్ణమ్ ఐగుప్తు దేసిమి గెచ్చు గొతిమాన్సుల్ జా ఒగ్గర్ సైమల్ సిడ్డె తతికయ్ మోసా పూర్ణమచొచి అత్తి ప్రబు జోవయింక విడ్డల్ కెర బార్ కెర్లన్. జా రచ్చన నే పచ్చిత్ రితి ఎత్తి వెర్ని పస్కా పండుగు కెర్తె.

7 ఏక్ తేర్బోద, ఒగ్గర్ చెంగిలి విలువచి వాసిన తేల్చి బుడ్డి దెరన, జోతె అయ్లి. అన్సె, జో అన్నిమ్ కంక వెన తతికయ్, జోచి బోడి ఉప్పిరి సువెలి.

8 సిన్సుల్ దెక కెర, కోపుమ్ జా, "ఈంజ నస్టుమ్ కిచ్చొక?

9 ఈంజ తేల్ ఒగ్గర్ కరీద్క వికిలెగిన, బీద మాన్సుల్క దర్ముమ్ దెంక జతి" మెన సంగిల.

10 యేసు జా కోడు జాన్లి రిసా, "ఈంజ తేర్బోద అంక కెర్లిసి చెంగిల్ వెల్లొ కామ్. తుమ్ కిచ్చొక ఇన్నెక ఉన్సుర్ కెరుక?

11 బీద మాన్సుల్ కెయక కి తుమ్చి తెన్ తవుల, గని ఆవ్ కెయక తెయక తుమ్చి తెన్ ఈంజ లోకుమ్తె ఇసి తయె నాయ్.

12 ఈంజ తేర్బోద ఈంజ వాసిన తేల్ అంచి ఆగ్తె సువ కిచ్చొ గుర్తు కెర్తయ్ మెలె, ఆవ్ నే మొర్తె అగ్గె, అంక నే రోవితె అగ్గె, అంచి ఆగ్ తెయార్ కెర్తి గుర్తు కెర్తయ్.

13 తుమ్క ఆవ్ కిచ్చొ నిజమి సంగితసి మెలె, ఒండి లోకుమ్తె కేనె ఈంజ అంచి సుబుమ్ కబుర్ బోదన కెరుల గే, ఒత్తయ్ ఈంజ అప్పె కెర్లిసి సంగ, ఇన్నెచి రిసా ఉచరవడుల" మెన యేసు సంగిలన్.

యూదా యేసుక దెర దెంక ఉచర వెల్లెల పూజర్లుతె గెచ్చు సంగిలిసి

(మార్కు 14:10-11; లూకా 22:3-6)

14 తెదొడి, బారజిన్ సిన్సుల్తె తిలొ ఇన్సురియోతు గవ్విచొ యూదా, వెల్లెల పూజర్లుతె గెచ్చు కెర,

15 "ఆవ్ యేసుక తుమ్క దెర దెలెగిన, తుమ్ అంక కిచ్చొ దెస్సె?" మెన పుసిలన్. జేవ్ జోక ముప్పయ్ వెండి బిల్లల్ దిల.

16 జా గడియ తెంతొ యూదా యేసుక దెర దెంక మెన సమయుమ్ చజితె తిలన్.

యేసు సిన్సుల్ తెన్ పస్కా పండుగు కెర్తె

(మార్కు 14:12-21; లూకా 22:7-14,21-23; యోహా 13:21-30)

17 నే పులయ్ల పొడియె కతి పండుగక తొలితొ చి దీసి, సిన్సుల్ యేసుతె జా కెర, "తుయి పస్కా అన్నిమ్ కెర్తి రిసా, అమ్ కేన్ టాన్ తెయార్ కెరుక?" మెన, జోక పుసిల.

18 చి యేసు జేవ్క, "యెరూసలేమ్తె తిలొ పలాన్ సుదొతె తుమ్ గెచ్చు కెర, 'అంచి సమయుమ్ పాచ జా అస్సె. అంచ సిన్సుల్ తెన్ తుచి గెరి పండుగు కెరిందె' మెన, ప్రబు తుక సంగ మెన అమ్క తెద్రయ్లొ" మెలన్.

19 యేసు జోవయింక, సంగిలి రితి జేవ్ సిన్సుల్ కెర, పస్కా అన్నిమ్క దొర్కు జలిసి తెయార్ కెర్ల.

20 సాంజ్ జతికయ్, యేసు జేవ్ బారజిన్ సిస్సుల్ తెన్ అన్నిమ్ కంక వెసిల.

21 జేవ్ అన్నిమ్ కత్తె తతికయ్, యేసు జేవ్ క, “తుమ్ క ఆవ్ కిచ్చొ కచితుమ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్ప కెర దెయెదె” మెలన్.

22 దస్సి మెంతికయ్, జేవ్ ఒగ్గర్ దుకుమ్ తెన్ ఎత్తి మాన్సు, “ప్రబు, ఆవ్ గే?” మెన పుసిల,

23 చి యేసు కిచ్చొ జబాబ్ దిలన్ మెలె, “అంచి తెన్ పలెరుమ్తె కో ఆతు గల పోడి గండ బుడ్డవ తయెదె గే, జ్యియి అంక దెర, సార్ప కెర దెయెదె.

24 “ఆవ్ మాన్సు జా జెర్మున్ అయ్లోసాచి రిసా రెగిడ్డి రితి ఆవ్ ఉట్ట గెచ్చిందె. గని, అయ్యె! ఆవ్ మాన్సు జా జెర్మున్ అయ్లోసాక, కేన్ మాన్సు దెర విరోదుమ్ సుదల్చి అత్తి సార్ప కెర దెయెదె గే, జో మాన్సు జతి సిచ్చచి రిసా, జో నే జెర్ము తిలె జోక చెంగిల్ తత్తి” మెన, యేసు సంగిలన్.

25 జోక దెర దెతో యూదా “గురుబాబు, ఆవ్ గే?” మెన సంగితికయ్, యేసు జోక, “తుయి జా సంగిలి” మెన సంగిలన్.

26 యేసు, సిస్సుల్, జా పస్కా అన్నిమ్ కెర్తె తా, యేసు పోడియె దెరన, “దయ కెర్లది” మెలి రితి †దేముడు అబ్బొన్ క జోకర కెర, జా పోడియె మోడ, సిస్సుల్ క వంట దా, జోవయింక, “తుమ్ ఈంజ కడన కా. అంచి ఆగుక ఈంజ గుర్తు జయెదె” మెన కెర,

27 ఏక్ గిన్నచి ద్రాచ రస్సుమ్ దెర, దేముడు అబ్బొన్ క అన్నె ఉచర, సిస్సుల్ క దా కెర, “ఇన్నెచి రస్సుమ్ పియ.

28 కిచ్చొక మెలె, ఈంజ రస్సుమ్ కిచ్చొ గుర్తుచి మెలె, ఒగ్గర్ జిన్ మాన్సులచి పాపుమ్ గెచ్చయ్ తి రిసా అంచి లోయి నూయి జంక అస్సె మెన నోవి ప్రమానుమ్.

29 అంచో అబ్బొచి రాజిమ్ తె తుమ్చి తెన్ ఇసి ఆవ్ ద్రాచ రస్సుమ్ నోవర్ పితి ఎద, ఇసిచి అన్నె పియ నాయ్ మెన తుమ్ క సంగితసి” మెన, సంగిలన్.

30 తెదొడి, జేవ్ దేముడుక గనుమ్ గాయ కెర, బార్ జా కెర, ఒలీవ మెట్టయ్ ఉట్ట గెల.

31 తెదొడి యేసు జోవయింక, “ఆజి రాతిక, తుమ్ ఎత్తిజిన్ అంచి రిసా బమ్మ జా అంక ములితె. కిచ్చొక మెలె, మెండల్ రకితోసాక మొరయిందె, చి జోచ మెండల్ ఎత్తిజిన్ చెదుర్చు జా గెచ్చుల

మెన దేముడు రెగ్గయ్ లి కోడు నెరవెర్చుప జంక అస్సె.

32 గని, ఆవ్ అన్నె జివ్ జా ఉట్టి పిమ్మట్, తుమ్చి కంట అగ్గె గలిలయ ప్రాంతుమ్ తె గెచ్చిందె” మెన, ప్రమానుమ్ కెర్లన్.

33 జాకయ్ పేతురు, “తుచి రిసా ఎత్తిజిన్ బమ్మ జా తుక ములిలెకి, ఆవ్ తుక కెయంక ములి నాయ్” మెన సంగిలన్.

34 యేసు జోక, “తుక ఆవ్ కిచ్చొ నిజమి కచితుమ్ సంగితసి మెలె, ఆజి రాతిక, కుకుడొ నే వాశితె అగ్గె, ‘జోక నేని’ మెన అంచి రిసా తివ్వెరి తుయి సంగితె” మెన, సంగిలన్.

35 పేతురు జోక అన్నె, “ఆవ్ తుచి తెన్ మొరుక అస్సె మెలె కి, ఆవ్ తుక ‘నేని’ మెన, కెయ్యక కి సంగి నాయ్” మెన సంగిలన్, చి సిస్సుల్ ఎత్తిజిన్ కి దస్సి మెల.

గెత్తేమనే మెంతి తోటతె యేసు దుకుమ్ సేడ వడ్డిసి

36 తెదొడి యేసు సిస్సుల్ తెన్ గెత్తేమనే మెంతి తోటతె గెచ్చ కెర, జో “ఆవ్ ఒత్తల్తో గెచ్చ ప్రార్దన కెర జెతి ఎద, తుమ్ ఇన్నె వెస తా” మెన సంగ కెర,

37 ఎక్కి పేతురుక చి జెబెదయిచ దొగుల పుత్తర్పుల్ జత యాకోబుక చి యోహానుక పట్టి కడన, ఇదిల్ దూరి గెచ్చ కెర, దుకుమ్ దా, మెన్సుత ఒగ్గర్ బాద సేడుక దెర్లొ.

38 తెదొడి, “అంచి పెట్టి తిలి దుకుమ్ రిసా మొర గెచ్చుక జయెదె. తుమ్ ఇన్నె తా, అంచి తెన్ చెదొయి తా” మెన, సంగ కెర,

39 సగుమ్ దూరి గెచ్చ కెర, సెర్ను సేడ, దేముడు అబ్బొన్ క ఇసి మెన ప్రార్దన కెర్లన్. “ఓ బ, జతి లెక జలె, ఈంజ గిన్నచి ఆవ్ నే పితి రితి అంక పిట్టవు, గని అంచి ఇస్టుమ్ పోని. తుచి ఇస్టుమ్ జర్గు జవున్” మెన, ప్రార్దన కెర, ఉట్ట కెర,

40 జేవ్ సిస్సుల్ తె అన్నె ఉట్ట జా, జేవ్ నిజ అస్తి మెన దెక కెర, పేతురుక, “జలె, ఎక్కి గడియ జలెకు అంచి తెన్ తుయి రకితె తంక నెతిర్లది గే?

41 జత అల్లర్తె తుయి పాపుమ్ నే కెర్తె రితి జాగర్త తా ప్రార్దన కెర్తె తా. ‘ఆత్మ నిదానుమ్ అస్సె’ మెన ఉచరన్లెకి, ఆగేక సెక్తి నాయ్” మెన యేసు సంగ కెర,

42 అన్నెక్ సుట్టు ఇదిల్ దూరి ఉట్ట గెచ్చ కెర, “ఓ బ, ఈంజ సైమచి గిన్న ఆవ్ పిలెకయి గెచ్చెదె జలె, తుచి ఇస్టుమ్ జర్గు జవున్” మెన ప్రార్దన కెర,

43 అన్నె ఉట్ట అయ్లె, జేవ్ సిస్సుల్ గూన్ క నెత్త కెర అన్నె నిజ అస్తి మెన దెక కెర,

44 జోక అన్నె ముల దా, ఉట్ట గెచ్చ, అన్నెక్ సుట్టు తెదొడచ కొడొ ప్రార్దన కెర్లన్.

45 తెదొడి యేసు జోచ సిస్సుల్ తె అన్నె ఉట్ట జా, జోవయింక, “అప్పెకయ్ సెలవ్ కడన, నే రకితె నిజ అస్సున్ గే? ఈందె, సమయుమ్ జయి గెలి. ఆవ్ మాన్సు జా జెర్మున్ అయ్లోసా పాపుమ్ కెర్లచి అత్తి దెర్ను సేడిందె.

46 జొమ్మ, గెచ్చుమ! ఈందె, అంక దెర దెతోసా పాసి జా అస్సె” మెన, సిస్సుల్ క సంగిలన్.

† 26:26 26:26 ‘దేముడు అబ్బొసి’ మెన కేన్ సుట్టు రెగ్గ తిలె, దేముడుచి రిసా సంగితయ్.

యూదా చి జనాబ్ యేసుక దెరుక అయ్లినీ
(మార్కు 14:43-50; లూకా 22:47-53; యోహా
18:3-12)

47 యేసు లట్టబై తతికయ్, బారజిన్ సిస్సుల్తె జో అగ్గె
తిలో యూదా పాచ అయ్లన. జో తెన్ కి ఒగ్గర్జిన్ జనాబ్
కత్తుల్ డండల్ దెరన యూదుల్చ వెల్లెల పూజర్లు చి అన్నె
వెల్లెల మాన్సుల్తె యూదా తెన్ అయ్ల.

48 జలె, ఈంజ నే జతె అగ్గె, “ఆచ్ కక్క చుంబిందె గే,
జొయ్యి యేసు. జోకయి దెరన” మెన యేసుక దెర దెతో
యూదా జేవ్ జనాబ్ గుర్తు సంగ తిలన్.

49 జాచి రిసా, జో యేసుతె బేగి జా కెర, “గురుబాబు,
జోబర!” మెన సంగ, జోక చుంబిలన్.

50 యేసు జోక దెక, “ఓ నేస్తము, తుయి కిచ్చొ కెరుక
అయ్లది గే, జయి కెరు” మెన, జోక సంగిలన్. జేవ్
అయ్లన పాసిక జా, యేసుక దెర్ల.

51 జలె, యేసు తెన్ తిలోసా ఎక్కిలో, ఆతు చంపా కెర,
కత్తి కడన, ఎత్తిక వెల్లో పూజరిచొ గొత్తి సుదొక పెట, జోచొ
కంగ్గొ సింద గెలన్.

52 యేసు జోక, “తుచి కత్తి తియ దేసు. కత్తివొ తెన్
యుద్దుమ్ కెర్తన కత్తి తెన్ మొరుల.

53 అలై, ఈంజ సమయుమ్ ఆచ్ అంచొ అబ్బొక ప్రార్దన
కెరుక నెతిరి మెన ఉచర్తసి గె? నెంజిలె, ప్రార్దన కెర్తెగిన, జో
డబ్బుయ్ వెయిలు దూతల్క బేగి తోడ్ తెద్రవుక నెత్తె మెన
తుయి ఉచర్తసి గే?

54 గని, దస్సి కెర్తెగిన, అంక ఈంజ ఎత్తి జర్లు జంక అస్సి
మెన దేముడుచి కొడతె రెగిడ్డిసి కిసి నెరవెర్పువ జయెదె!”
మెన జో సిస్సుడుక సంగిలన్.

55 తెదొడి, జయి గడియయ్, యేసు జనాబ్క, “ఆచ్
కిచ్చొ చొర్లయ్ చి కత్తులు డండల్ దెరన అంక దెరుక తుమ్
అయ్లదు గే? ఆచ్ రోజుక దేముడుచి గుడితె పెన బోదన
కెర్తె కి, అంక జా పొది దెర్పు నాయ్.

56 జలె, దేముడుచి కబుర్లు రెగిడ్డనచి అత్తి రెగిడ్డ కొడొ
నెరవెర్పువ జతి రిసాయి ఈంజ ఎత్తి జర్లు జలి” మెన,
యేసు సంగితికయ్, సిస్సుల్ ఎత్తి బియఁ కెర, జోక ముల
దా, ఉట్ట నిగిల.

ఎత్తిక వెల్లో పూజరిచి మొక్కె యేసుక టీవడ్డ
(మార్కు 14:53-65; లూకా 22:54-55,63-71;
యోహా 18:13-14,19-24)

57 ఒత్త తెంతొ, యేసుక జేవ్ విరోదుమ్ సుదల్ దెర కెర,
కయప మెలో ఎత్తిక వెల్లో పూజరితె జోక కడ నెతికయ్,
ఒత్త దేముడు మోసె తెన్ దిలి ఆగ్గుల్ సికడ్డన చి అన్నె వెల్లెల
మాన్సుల్ బెర తిల.

58 పేతురు, మాత్రుమ్, దూరి దూరి యేసుచి పట్టి జా జా,
జో ఎత్తిక వెల్లో పూజరిచి వీదె పాచ కెర, వీదె పెన కెర,

ఆకర్క కిచ్చొ జర్లు జయెదె గే దెకుక మెన, జమాన్లు తెన్
వెసిలన్.

59 వెల్లెల పూజర్లు చి అన్నె వెల్లి సబ కెర్తన ఎత్తిజిన్
యేసుక మారుక కోర్ప జా, జోక నేరిమ్ వయడ్డి సాచి చజితె
తిల.

60 గని అబద్దుమ్ సాచి సంగితన ఒగ్గర్జిన్ పురె జలెకి,
సరి జతి సాచి దొర్కు జయె నాయ్. గని, ఆకర్క, దొగుల
పురె జా కెర,

61 “ఈంజొ మాన్సు ‘దేముడుచి గుడి ఆచ్ సేడవ గెల
కెర, తిర్తత్క అన్నె బందిందె’ మెన సంగిలో” మెన సంగిల.

62 జేవ్ దస్సి సంగితికయ్, ఎత్తిక వెల్లో పూజరి టీవొ
జా, యేసుక దెక, “ఈంజేవ్ సంగిలిన్క కిచ్చొ జబాబ్ దెంక
నెతిర్చి గే? ఈంజేవ్ తుక కిచ్చొ నేరిమ్ వయడ్డతి?” మెన,
పుసితికయ్ కి

63 యేసు తుక్కె తిలన్. జాకయ్, ఎత్తిక వెల్లో పూజరి జోక
అన్నె, “తుయి దేముడుచొ క్రిస్తు జలో పుత్తుసి జస్తె జలె,
‘జీవ్ తిలో దేముడు తోడు’ మెన, జోచి నావ్ తెన్ అమ్చి
మొక్కె ఒప్పున సంగు” మెల,

64 యేసు జోక, “తుయి సంగిలి రితి. గని తుమ్క
ఆచ్ కిచ్చొ మెంతసి మెలె, ఆకర్క ఎత్తి సెక్కి అదికారుమ్
తిలోసాచి ఉజెతో పక్క ఆచ్ మాన్సు జా జెర్మున్ అయ్లోసా
వెన తతిసి కి, ఆగాసుమ్చి మబ్బుతె, ఆచ్ పరలోకుమ్
తెంతొ అన్నె ఉత్త జెతిసి కి తుమ్ దెకితె” మెన, సంగిలన్.

65 జో ఎత్తిక వెల్లో పూజరి, కోపుమ్క జో గలన్లి దిగిల్
చొక్క చిరన గెల కెర, “అయ్యె! ‘దేముడుక సమానుమ్
జతసి’ ఈంజొ సంగుక ప్రబుచి విలువ కడ వెల్లి పాపుమ్
కెర్తయ్. అమ్క అన్నె సాచుల్ అక్కర్ నాయ్. ఈందె,
దేముడుక ఈంజొ సమ్మందుమ్ సంగన్లిసి. తుమ్ అప్పె
సాంత సూన్లదు ఈంజయి సరి జతయ్.

66 తుమ్ కిచ్చొ రుజ్జు సంగితె?” మెన సబ కెర్తనక
పుసితికయ్, జేవ్, “ఈంజొ మొర్తి సిచ్చుచి ఎదిలి తప్పు కెర
అస్సె” మెన సంగ,

67 యేసుచి మొక్కె తుంక దా, జోక కుందిల. అన్నె,
సగుమ్జిన్ జోక పెట కెర,

68 “క్రిస్తు, తుక కో పెట్ల గే తుయ్ క్రిస్తు గద, అమ్క
సంగు!” మెన కొంకడ్ల.

పేతురు యేసుక “జోక నేని” మెన సంగిలిసి
(మార్కు 14:66-72; లూకా 22:56-62; యోహా
18:15-18,25-27)

69 ఈంజ మదెనె, పేతురు వీదె వెన తతికయ్, ఒత్తచి
తేర్బోద గొత్తి సుది ఎక్కి జోతె జా కెర, “తుయి కి గలిలయ
ప్రాంతుమ్చొ యేసు తెన్ తిలది” మెన, జోక సంగిలి.

70 జా దస్సి మెన సంగితికయ్, పేతురు, “తుయి
సంగిలిసి అంక అర్దుమ్ జయె నాయ్” మెన, ఎత్తిజిన్చి
మొక్కె, యేసుక నేన్లి రితి సంగిలన్.

71 పేతురు అన్నె వీదిచి గుమ్ముమ్ పక్క గెతికయ్, అన్నెక్కి తేర్బోద్ గొత్తి సుది జోక దెక కెర, “ఈంజొ కి నజరేతు గచ్చివో యేసు తెన్ తిలొ” మెన, ఒత్త టీవ తిలసక సంగిలి.

72 జలె పేతురు ఒట్టు గలన, “జో మాన్సుక ఆవ్ నేని” మెన సంగిలన్.

73 గడియ గెలి పిమ్మట్, ఒత్త టీవో జా తిలస పేతురుతె జా కెర, “నిజమి, తుయి జోచ సిస్సుల్తె ఎక్కిలో. తుయి లట్టబ్బె చినుక ఒత్తయ్” మెన, సంగిల.

74 జేవ్ దస్సి సంగితికయ్, పేతురు, “జో మాన్సుక ఆవ్ నేని” మెన సపెన గల కెరన ఒట్టు గలనుక దెర్లో, చి బేగి కుకుడొ వాసిలన్.

75 జాచి రిసా, “కుకుడొ నే వాన్సె అగ్గె, ‘జోక నేని’ మెన, తుయి తివ్వెరి అంచి రిసా సంగితె” మెన యేసు అగ్గె సంగిలిసి ఏదస్ట కెర, పేతురు బార్ జా ఎదివాట్ దుకుమ్ జా ఏడ గెలన్.

27

యేసుక అదికారి జలో పొంతి పిలాతుతె నజీలిసి (మార్కు 15:1; లూకా 23:1-2; యోహా 18:28-32; బారి కమ్మొ 1:18-19)

1 రాత్ పాయితికయ్, వెల్లెల పూజర్లు చి యూదుల్చ అన్నె వెల్లెల మాన్సుల్ ఎత్రిజిన్ సబ కెర, యేసుక మారుక మెన తిర్పు కెర,

2 జోక బంద కడన, * అదికారి జలో పిలాతుతె సార్ప దిల.

3 తెదొడి, యేసుక దెర దిలొ యూదా, “యేసుక నేరిమ్ వయడ అస్తి, చి మారుల” మెన దెక కెర, “పాపుమ్ కెర్లయ్” మెన దుకుమ్ జా బమ్మ జా, జేవ్ ముప్పయ్ వెండి బిల్లల్ జేవ్ వెల్లెల పూజర్లుతె చి అన్నె వెల్లెల మాన్సుల్తె అన్నె ఆన కెర,

4 “కేన్ తప్పు నే కెర్లో నీతి తిలొసాక ఆవ్ దెర దా ఆవ్ పాపుమ్ కెర్లయ్” మెన సంగిలన్. గని జేవ్ వెల్లెల మాన్సుల్ కిచ్చొ మెల మెలె, “జాకయ్ అమ్క కిచ్చొ? అమ్చి పూచి నెంజె. తుయి దెకన్” మెన, సంగితికయ్,

5 జో యూదా జేవ్ వెండి బిల్లల్ దేముడుచి గుడితె గల దా, గెచ్చ, ఉరి గలన, మొర గెలొ.

6 యూదా దస్సి కెర్తికయ్, వెల్లెల పూజర్లు జా డబ్బుల్ వెంట కెర, కిచ్చొ మెలె, “ఈంజ ఎక్కిలోచి లోయి సువిలి పాపుమ్ డబ్బుల్. జాచి రిసా, దేముడుచి గుడిచి డబ్బుల్ పెటెతె ఈంజ డబ్బుల్ గలుక జయె నాయ్” మెన

7 లట్టబన, ఉచరన, ‘యూదుల్ నెంజిల వేర దేసిమ్చ మాన్సుల్క ఒత్త రోప గెలుక జయెదె’ మెన, కుమ్మరొ ఎక్కిలోచి బాటి జా డబ్బుల్క గెనిల.

8 జాచి రిసా, ఆజి ఎద, జా బాటిక † ‘ఎక్కిలోచి లోయి సువిలి పాపుమ్చి డబ్బుల్క గెన్సి బాటి’ మెంతతి.

9 ఇసి జర్లు జలిసి తెన్, దేముడుచి కబుర్ సంగిలొ యిర్మియాచి అత్తి రెగిడ్లి కోడు నెరవెర్చువ జలి.

“ప్రబు సంగిలి రితి, ఇస్రాయేలులు సగుమ్జిన్, ఎక్కిలోక గెనుక మెన ఒప్పన్సి సొమ్ముక, మెలె ముప్పయ్ వెండి బిల్లల్క,

10 కుమ్మరొచి వెడ ఏక్ గెనిల,” మెన రెగిడ్లి కోడు.

అదికారి యేసుక పరిచ్చ కెర్లిసి

11 యూదుల్చ వెల్లెల మాన్సుల్ యేసుక జో పిలాతు మెలొ అదికారిచి మొక్క టీవో జలొ, చి జో అదికారి యేసుక “యూదుల్చో రానొ తుయి గె?” మెన పుసితికయ్, యేసు “తుయి సంగిలి రితి,” మెన జబాబ్ మెలన్.

12 గని వెల్లెల పూజర్లు చి అన్నె వెల్లెల మాన్సుల్ జోచి ఉప్పిరి నేరిమ్ వయడ్తికయ్, జో జబాబ్ కిచ్చొ కి సంగె నాయ్.

13 జాకయ్, పిలాతు యేసుక అన్నె, “తుచి ఉప్పిరి ఈంజేవ్ కెత్తి నేరిమ్లు వయడ్తి గే, తుయి సూన్సి నాయ్ గే?” మెన జోక సంగిలే కి,

14 జేవ్ మాన్సుల్ సంగిల నేరిమ్లుతె ఎక్కిక కి యేసు జబాబ్ సంగె నాయ్, చి అదికారి ఎదివాట్ ఆచారిమ్ జలన్.

15 జలె, జా పండుగు పొది, ప్రెజల్ కోర్ప జలొ కేన్ జలెకు జేలి జలొసాక ముల దెంక జో అదికారిక అలవాట్ జా అస్సె.

16 జా కాలుమ్, జలె, బరబ్బు మెలొ ఎత్రిజిన్ జాన్లో ఒగ్గర్ మూర్కుమ్ తిలొ జేలి జలొ ఎక్కిలో అదికారిచి జేల్తె తిలన్.

17 జలె, ప్రెజల్ బెర తతికయ్, పిలాతు జోవయింక “ఆవ్ కక్క ముల దెంక మెన తుమ్ కోర్ప జతను? బరబ్బుక గే, క్రిస్తు మెంతొ యేసుక గే?” మెన జోవయింక పుసిలన్.

18 జో అదికారి కిచ్చొక ఇసి జేవ్ ప్రెజల్ నిసానుక సెలవ్ దిలొ మెలె, యూదుల్చ వెల్లెల మాన్సుల్ ఎక్కి గోసచి రిసా యేసుక తిర్పు కెర్తి టాన్తె ఆన అస్తి మెన జానె.

19 పిమ్మట్, రుజ్జు కెర్తి పొది వెసితి పీటతె, జో అదికారి తెదొడి వెసితికయ్, జోచి తేర్పి ఏక్ గొత్తి సుదిచి అత్తి, జో తెన్ కబుర్ తెద్రయ్లి. “జో నీతి తిల మాన్సుక జేవ్ యూదుల్ కెర్తిన్తె తుయి జోలిక గో నాయ్. ఆజి ఆవ్ జోచి రిసా సిప్ప దెక అల్లర్ జలయ్” మెన, అదికారి జలొ మున్సున్తె కబుర్ తెద్రయ్లి.

20 గని, వెల్లెల పూజర్లు చి అన్నె వెల్లెల మాన్సుల్ కిచ్చొ కెర్ల మెలె, “ ‘బరబ్బుక ముల దేను!’ మెన సంగ” మెన ప్రెజల్క సికడ్తె తిల.

* 27:2 27:2 రోమ్ దేసిమ్చి ప్రబుతుమ్ జా దేసిమ్ ఆక్రమించువ కెర ఏలువ కెర్తె తతికయ్, జా రోమ్ దేసిమ్చి ప్రబుతుమ్చి నావ్ తెన్ పిలాతు అదికారి జా అస్సె. † 27:8 27:8 నెంజెల ‘లోయిచి బాటి’.

21 జలె, అదికారి జనాబ్ క అన్నె కిచ్చొ పుసిలన్ మెలె, “దొగులతె ఆవ్ కక్క ముల దెంక?” మెన పుసిలన్, చి జేవ్ “బరబ్బుకయ్” మెన కేక్ గల్లికయ్,

22 పిలాతు “దస్సి జలె, క్రీస్తు మెంతో యేసుక ఆవ్ కిచ్చొ కెరుక?” మెన పుసిలన్. జేవ్ జనాబ్ ఎత్తిజని, “సిలువతె గల, మొర్తి సిచ్చ కెరు!” మెన సంగిల.

23 జేవ్ జనాబ్ దస్సి జతికయ్, జో అదికారి “కిచ్చొక? ఈంజొ కిచ్చొ నేరిమ్ కెర అస్సె?” మెన పుసిలన్, గని, “సిలువతె గల, మొర్తి సిచ్చ కెరు!” మెన గట్టిజ కేకుల్ గలిల.

24 జలె, ‘కెద్ది సంగిలే కి కామ్క నెంజె, గని పైజల్ అన్నె గగ్గోల్ జతతి, చి ఒగ్గర్ అల్లర్ కెరుల. యేసుచి రిసా పూచి సేడుక అంక కిచ్చొ లాబుమ్ నాయ్’ మెన పిలాతు దెక కెర, పాని నజన, పైజల్చి మొక్కె అత్తో దోవన, “ఈంజొ నీతి మాన్సుక మార్తిన్చి రిసా తుమి దెకన్. జోచి లోయి అంచి పూచి నాయ్” మెన పైజల్చి మొక్కె సంగిలన్.

25 జో అదికారి దస్సి సంగితికయ్, పైజల్ ఎత్తి, “జోచి లోయిచి పూచి, అమ్చి ఉప్పిర్ చి అమ్చ బోదల్చి ఉప్పిర్ తవున్.” మెన ఒప్పున, కేకుల్ గలిల.

26 తెదొడి, జేవ్ కోర్వ జలి రితి, పిలాతు బరబ్బుక ముల కెర, యేసుక కొర్థల్ తెన్ పెటవడ, ‘జోక సిలువతె గల్లు, జలె’ మెన జోవయింక జమాన్లుతె సార్ప దిలన్.

జమాన్లు యేసుక కొంకడ్లిసి

(మార్కు 15:16-20; యోహా 19:2-3)

27 తెదొడి, అదికారి తెచ జేవ్ జమాన్లు యేసుక అదికారి గేర్చి తెడిచి గదితె కడ నా కెర, జమాన్లు ఎత్తిక ఒత్త ఆనవ కెర,

28 యేసుచ సొంత పాలల్ కడ గెల కెర, ఏక్ ఎరన రగుమ్చి పాలుమ్ యేసుక గల దా,

29 కంటక ఏక్ కిరిటుమ్ గంచ కెర, యేసుచి బోడితె గల దా కెర, ఏక్ డండొ జోచి ఉజిల్ అత్తి దెరవ కెర, జొకర జోచి పుర్రెతో నెర్ను సేడ, “యూదుల్చొ రానొ, తుక జెయ్యి!” మెన జోక కొంకడ్ల.

30 పిమ్మట్, జోచి ఉప్పిరి తుంక, జా డండొ కడ కెర జా తెన్ జోక బోడితె పెట పెట,

31 జోక దస్సి దూసుప కెర్లి పడ్డొ, జోక గల తిలి ఎరన పాలుమ్ కడ కెర, జోచ సొంత పాలల్ జోక అన్నె గల దా కెర, సిలువతె గల్లి రిసా జోక కడ నిల.

యేసుక సిలువతె టీవడ్లిసి

(మార్కు 15:21-32; లూకా 23:26-39; యోహా 19:17-19)

‡ 27:32 27:32 సిలువ కీసి తయెది మెలె, ఏక్ టీవ్ తిలి ఏక్ అడ్డుమ్ జతి దొన్ని డండల్ బెదవుల. జా సిచ్చ జతొ మాన్సుక జా సిలువతె ఎంగ్లవ కెర, జోచ అత్తో చట్టొ చంపొ కెరవ, అత్తోచట్టొతె మేకుల్ పెట సిలువ బుయ్యె టీవ రోవ కెర దస్సి ములుల. జో సిచ్చ జతొసొ దస్సి ఒడొయ్ జా మొరెదె. రోమ్ దేసిమ్చి అలవాట్ తెన్ చి సిచ్చ జా. § 27:37 27:37 యూదుల్క కొంకడ్లి రిసా పిలాతు అదికారి జా దార్ గండ రెగ్గ తిలన్. యోహాను 19:19.

32 యేసుక †సిలువతె గల్లి రిసా, జేవ్ ఎత్తిజన్ గెతె తతికయ్, కురేనియు దేసిమ్చొ సీమోను మెలొ ఎక్కిలోక డిస్తికయ్, యేసుక గల్లి సిలువ వయితి రిసా జోక బలవంతుమ్ కెర్ల.

33 గొల్గొతా మెంతి టాన్తె, మెలె గిడ్లి పోలికచి ఏక్ మొట్టయ్, పాచ కెర,

34 నొప్పి తొక్కి కెర్లి ఓస్తు బెదయ్లి ద్రాచ రస్సుమ్ యేసుక జమాన్లు దా కెర, “పి” మెన సంగితికయ్, జో జా చక దెక, పియె నాయ్.

35 పిమ్మట్, సిలువతె గల టీవడ కెర, “జోచ పాలల్ వంటనుమ” మెన చీట్లు గల, వంటన్ల.

36 తెదొడి జోక రకుక మెన ఒత్త వెసిల.

37 అన్నె, “ఈంజొ యేసు, యూదుల్చొ రానొ” మెన, జోచి ఉప్పిరి నేరిమ్ రెగిడ్లి కీదారుగండ ఏక్ జోచి బోడిచి ఉప్పిరి ఒడొవ దిల.

38 యేసుచి ఉజెతో పక్క ఎక్కిలోక, డెబ్లి పక్క ఎక్కిలోక, దొగుల చోర్లుక కి ఎక్కెక్ సిలువల్తె గల టీవడ్ల.

39 జా వాటు గెతె తిల మాన్సుల్ యేసుక ఆన, ఆన బోడి దున్నొవ,

40 “దేముడుచి గుడి సేడవ తిర్రత్క అన్నె బందితొసొ తుయి జలె, తుక తూయి రచ్చించుప కెరను. తుయి దేముడుచొ పుత్తుసి జలె, జా సిలువ తెంతొ ఉత్తు” మెన జోక దూసుప కెర్ల.

41 వెల్లెల పూజర్లు, మోసె తెన్ దేముడు దిలి ఆగ్గుల్ సికడ్లన, చి అన్నె వెల్లెల మాన్సుల్ కి, జోక దూసుప కెర్లి రితి,

42 కిచ్చొ మెన కొంకడ్ల మెలె, “ఈంజొ వేర సుదల్క రచ్చించుప కెర్లె కి, జోక జొయ్యి రచ్చించుప కెరనుక నెత్తె. ఈంజొ ఇస్రాయేలు పైజల్చొ రానొ జలె, అప్పె సిలువతె తెంతొ ఉత్తుసు, చి జోక నంపజమ్దె.

43 జో దేముడుచి ఉప్పిరి నంపజా అస్సె బెర్లె. ఆవ్ ఎత్తి అదికారుమ్ తిలొ దేముడుచొ పుత్తుసి, మెలన్ గెద? జలె, దేముడుక ఇస్టుమ్ తిలె, ఈంజొ నే మొర్తి రితి ఇన్నెక రచ్చించుప కెర్లు!” మెన, ఆన ఆన, దూసుప కెర్ల.

44 యేసు తెన్ బెదవ సిలువల్తె టీవడ్ల దొగు చోర్లు కి, జోక దస్సి దూసుప కెర్ల.

యేసు మొర్తిసి

(మార్కు 15:33-41; లూకా 23:44-49; యోహా 19:28-30)

45 జలె, బార గంటల్ మెద్దెనె తెంతొ మొదొల్ కెర, తిన్ని గంటల్ ఎద, జా ఒండి దేసిమి అందర్ డంక తిలి.

46 జలె, పాసి పాసి తిన్ని గంటల్క, యేసు, “ఏలీ, ఏలీ, లామా సబ్బానీ” మెన సంగ, గట్టిజ ఒర్ప దిలన్. జా కోడుక కిచ్చొ అర్దుమ్ మెలె, ‘అంచొ దేముడు ప్రబు, అంచొ దేముడు ప్రబు, అంక కిచ్చొక ఆతు ముల దిలది?’

47 “జలె, ఒత్త టీవొ జా తిలసతె సగుమ్జిన్ జా కోడు నూన కెర, ‘ఈంజొ ఏలీయా పూర్లుమ్చొక బుకార్తయ్, కిచ్చొగె’ ” మెల.

48 బేగి జోవయింతె ఎక్కిలో నిగ గెచ్చు, బూంజు రితిసి వెంట, అమ్డి ద్రాచ రస్సుమ్తె బుడ్డవ కెర, ఏక్ రివ్వతె బంద, చంప కెర, యేసుక ‘పి’ మెన దిలన్.

49 గని పాసి తిలస, “పోని. ఏలీయా జోక రచ్చించువ కెరుక ఉత్తెదె గే, నాయ్ గే, దెకుమ” మెన కొంకడ్ల.

50 తెదొడి, యేసు అన్నె గట్టిజ కేక్ గల కెర, ప్రానుమ్ ముల దిలన్.

51 యేసు మొర గెలి గడియయ్ దేముడుచి గుడితె ఒడొవ తిలి తెర, *ఉప్పిరె తెంతొ ఎట్టొ ఎదక చిరి జా దొన్ని గండల్ జలి. బుయి అద్దుర్ జలి. రంగ్వివత్తల్ పుట్ట గెల.

52 అన్నె, మెస్సున్లు ఉగ్గి జతికయ్, ఒగ్గర్జిన్ నిజ తిల దేముడుచొ సుదల్ మొర్లస మెస్సున్తె జీవ్ జా, ఉట్ట.

53 యేసు జీవ్ జా ఉట్టి పడ్డొ, మెస్సున్లు తెంతొ బార్ జా, దేముడుచి గుడి తిలి యెరూసలేమ్ పట్టుమ్తె గెచ్చు కెర, ఒగ్గర్జిన్క డీసిల.

54 జలె, యేసుక రక తిల జమాన్లు, జోవయించొ పుంజెకజిన్ జమాన్లుక వెల్లొ తెన్, బూకంపుమ్ కెర్లి పొది జర్లు జలిసి ఎత్తి దెక కెర, బలే బియఁ కెర, “నిజుమి, ఈంజొ దేముడుక పుత్తుసి జా తిలొ” మెన సంగిల.

55 యేసుక సవైచన కెర్లి రిసా, గలిలయ ప్రాంతుమ్ తెంతొ జోచి పట్టి జా తిల తేర్బోదల్ ఒగ్గర్జిన్ కి జో మొర్లి పొది ఒత్త తిల.

56 జోవయింతె కో కో తిల మెలె, మగ్గలేనే పట్టుమ్చి మరియు మెలిసి, పడ్డొ యాకోబుక చి యోసేపుక అయ్యసి జలి †మరియ, పడ్డొ జెబెదయిచ పుత్తర్పుల్చి అయ్యసి.

యేసుచి పీనుమ్ వెంట గెలిసి
(మార్కు 15:42-47; లూకా 23:50-56; యోహా 19:38-42)

57 సాంజ్ జతికయ్, యేసుక నంపజా సిస్సుడు రితొ జలొ యోసేపు మెలొ అరిమతయ్ గవ్విచొ సొమ్సారి ఎక్కిలో జా కెర,

* 27:51 27:51 ఎక్కి ఎత్తిక వెల్లొ పూజరి వెర్సెక్క ఎక్కి సుట్టు వెన అర్చితుమ్ దెతి గదిక అడ్డు కెర్లి తెర, ఈంజ. † 27:56 27:56 ఈంజ మరియు యేసుచి అయ్యసి జయెదె; మత్తయి 13:55. ‡ 27:61 27:61 యేసుచి అయ్యసి జయెదె. * 28:1 28:1 ఎత్తి సెన్సర్ యూదుల్క బక్తి కెర్లి సెలవ్ కడ దీసి జయెదె. జా దీసి జోవయింప సబ గెరలె గెచ్చు, దేముడుచి కొడొ నూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యోహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలినక యూదుల్చ వెల్లెల మాస్సుల్ ప్రజల్క జాడు వయడ్లి రితి కెర కామ్ నే కెర్లినిచి రిసా ఒగ్గర్ ఆగ్గల్ అచ్చె ఉచర అస్తి. ఇస్సె, దొన్ని ఎన్నులు కోడ్లిన్క ‘కామ్’ మెన నింద కెర్తెతి.

58 పిలాతు అదికారితె గెచ్చు కెర, “యేసుచి పీనుమ్ అంక దే” మెన సంగితికయ్, జో అదికారి జోక దాస మెన ఆడ్ర దిలన్.

59 జలె, యోసేపు జా పీనుమ్ ఉత్తవ జాక నొవి విలువచి బట్ట పంగ్రవ కెర,

60 జోచి రిసా నొవర్ కెరవ తిలి రంగ్వి పత్తుర్చి డొల్లి కెర్లి మెస్సున్తె నా కెర, తెడి రోవ దిలన్, చి గుమ్ముమె వెల్లొ పత్తురు వెలవ దా డంక గెల కెర, ఉట్ట గెలన్.

61 తెదొడి మగ్గలేనే పట్టుమ్చి మరియు చి జా అన్నెక్ †మరియ ఒత్త మెస్సున్చి మొక్కె వెన తిల.

మెస్సున్క డిట్టుమ్ బంద కెర తిలిసి

62 అన్నెక్ దీసి, మెలె పండుగ్చి బోగి దీసిక అన్నెక్ దీసి, వెల్లెల పూజర్లు చి పరిసయ్యుల్ పిలాతు అదికారితె బెద జా కెర,

63 జోక, “బాబు, జో మోసిమ్ కెర్లొసా జీవ్ తిలి పొది, మొర్లె తిర్తక ఆవ్ అన్నె జీవ్ జా ఉట్టిందె మెలిసి ఏదస్త్ కెర్లొనుమ్.

64 జాకయ్, తిర్తక ఎద మెస్సున్క చెంగిల్ బందు కెరవడు, నెంజిలె జోచ సిస్సుల్ జా కెర, జోక ఉక్కుల నా కెర, యేసు జీవ్ జా మెస్సె తెంతొ బార్ జలొ మెన, ప్రెజల్క సికడుల, చి అగ్గెచి మోసిమ్చి కంట ఆకర్చి మోసిమ్ ఒగ్గర్ జయెదె” మెన, యూదుల్చ జేవ్ వెల్లెల మాస్సుల్ అదికారిక సంగిల.

65 పిలాతు “జమాన్లుక కడన రకవడ, చి తుమ్ గెచ్చు కెర, తుమ్ తెర్లి ఎదిలి డిట్టుమ్ బందు కెరవడ” మెన, జేవ్క సంగిలన్.

66 జేవ్ గెచ్చు కెర, రకితసక టీవడ కెర, జోక అడ్డు కెర్లొ పత్తురు డిట్టుమ్ రెచ కెర, ముద్ద గల దా, మెస్సున్క కో లుంకచోరు నే ఉగిడ్లి రితి కెర్ల.

28

యేసు జీవ్ జా ఉట్ట అస్సె

(మార్కు 16:1-8; లూకా 24:1-12; యోహా 20:1-10)

1 *సెలవ్ కడన్లి దీసి జిన గెలి పడ్డొ, సెలవ్ కడన్లి దీసి రాత్ పాయితె తతికయ్, మగ్గలేనే పట్టుమ్చి మరియు కి, జా అన్నెక్ మరియు కి, జా మెస్సున్ దెకుక గెల.

2 ఒత్త పాచిలె, ఈందె, దేముడుచి దూత ఎక్కిలో పరలోకుమ్ తెంతొ ఉత్తిర్తికయ్, ఒగ్గర్ బూకంపుమ్ జర్లు

జలి, చి జో దూత జో అడ్డు తిలొ పత్తురు ఒస్సుల్ కెర, పత్తుర్చి ఉప్పిరి వెసిలన్.

3 జోక దెకిలె, ఉజిడ్ తిలి రితి డీసిలొ, జోచ పాలల్ మంచుచి ఎదిలి చొక్కిల డీసిల.

4 జోక బియఁ కెర, ఒత్త రక తిల జమాన్లు మొర గెల రిత జల.

5 గని, జో దేముడుచి దూత జేవ్ దొగుల తేర్బోదల్క దెక, జేవ్ క, “తుమ్ బియఁ నాయ్. సిలువతె జేవ్ టీవడ్డొ యేసుక తుమ్ చజితను మెన ఆవ్ జాని.

6 జో ఇన్నె నాయ్. జో సంగిలి రితి, జివ్ జా ఉట్ట అస్సె. ఈందె, తుమ్ జా కెర, జో తిలి టాన్ దెక కెర,

7 బే బేగి గెచ్చ, చి జోచ సిస్సుల్క ఇసి మెన సంగ. యేసుప్రబు మొర గెచ్చ తా, జివ్ జా ఉట్ట అస్సె, చి ఈందె, జో తుమ్చి కంట అగ్గె గలిలయతె గెతయ్. తుమ్ ఒత్త జోక దెకితె, మెన జోవయింక సంగ దాస.” మెన జేవ్ తేర్బోదల్క జో దూత సంగిలన్.

8 జాచి రిసా, జేవ్ దొగుల బి తెన్, సర్ల తెన్, మెస్సె తెంతొ బార్ జా, యేసుచ సిస్సుల్తె గెచ్చ జా కబుర్ బేగి సంగుక మెన, ఉట్ట నిగిల.

9 జేవ్ దొగుల తేర్బోదల్ యేసుచ సిస్సుల్తె గెచ్చుక నిగితె తతికయ్, యేసు జోవయింక వట్టె దస్సుల్ జా, “చెంగిల్ అస్సున్ గే?” మెన సంగిలన్, చి జేవ్ జోచి పాసి జా కెర, జోచ చట్టొ దెరన జోకర్తికయ్,

10 యేసు జోవయింక, “బియఁ నాయ్. అంచ సిస్సుల్తె గెచ్చ జోవయింక కిచ్చొ మెన సంగ దాస మెలె, గలిలయతె గెచ్చ. ఒత్త అంక దెకితె మెన యేసు తుమ్క సంగ తెద్రయ్లన్, మెన సంగ దాస” మెన యేసు సంగిలన్.

11 జేవ్ దొగుల తేర్బోదల్ యేసుచ సిస్సుల్తె గెతె తతికయ్, జా మెస్సె రక తిల జమాన్లు సగుమ్జిన్ యెరూసలేమ్తె గెచ్చ కెర, మెస్సె జర్గు జలిసి ఎత్తి వెల్లెల పూజర్లుక సంగిల.

12 జాకయ్ జేవ్ పూజర్లు, అన్నె వెల్లెల మాన్సుల్ తెన్ సబ కెర, లట్టబన, జేవ్ జమాన్లుక లంచుమ్ దా కెర,

13 జోవయింక ఇసి మెన సికడ్ల. “ప్రెజల్క తుమ్ ఇసి మెన: ‘జోవయించ సిస్సుల్ అందరె జా కెర, అమ్ నిజ తతికయ్, జోక ఉక్కుల నిల’ మెన సంగ.

14 ఈంజ ఎత్తి అదికారిక నేన్తె జలెగిన, తుమ్ కిచ్చొ సిచ్చ నే జతి రితి అమ్ జోక సేంతుమ్ కెరుమ్దే” మెన, యూదుల్చ వెల్లెల మాన్సుల్ పూచి సేడ్ల.

15 జేవ్ వెల్లెల మాన్సుల్ దస్సి సంగితికయ్, జేవ్ జమాన్లు జా లంచుమ్ కడ నా కెర, జోవయింక సంగిలి రితి కెర్ల. ఆజి ఎద కి జా అబర్దుమ్ యూదుల్ నూన నంప కెర్లతి.

16 ఎగరజిన్ సిస్సుల్ గలిలయతెచి యేసు సంగిలి మెట్టతె ఉట్ట గెల.

17 గెచ్చ, జోక దెక కెర, సెర్ను సేడ జోక జోకర్ల. గని సగుమ్జిన్ అన్యానుమ్ జల.

18 తెదొడి, యేసు జోవయించి పాసి జా కెర, “పరలోకుమ్తె, బూలోకుమ్తె ఎత్తి అదికారుమ్ అంక దొర్కు జా అస్సె.

19 జాచి రిసా తుమ్ దేసిమ్లు ఎత్తితె గెచ్చ కెర, మాన్సుల్ ఎత్తితెచ ప్రెజల్తె అంక నంపజా సిస్సుల్ జతి రితి కెర, అబ్బొసి జలొ దేముడుచి, దేముడు పుత్తున్చి, దేముడుచి నుద్ది తిలి ఆత్మచి నావ్ తెన్, జోవయింక బాప్తిసుమ్ దాస.

20 అన్నె, ఆవ్ తుమ్క కిచ్చొ కిచ్చొ సంగ బోదన కెర అస్సి గే, జా ఎత్తి జేవ్ నంపజతసక కి సంగ బోదన కెర. ఈందె, ఉగుమ్ పూర్తి జతె ఎదక కి, కెయఁక తెయఁక తుమ్చి తెన్ ఆవ్ తోడ్ అస్సి” మెన యేసు సిస్సుల్క సంగిలన్.

యేసు సిస్సుల్ తెన్ అన్నె దస్సుల్ జలిసి కామ్ తియార్లిసి

మార్కు సుబుమ్ కబుర్ మార్కు రెగిడ్లి సుబుమ్ కబుర్

క్రీస్తు రచ్చించువ కెర్తొసా జెతిన్చి రిసా యోహాను సాట్టు కెర్తొసి
(మత్త 3:1-12; లూకా 3:1-9,15-17; యోహా 1:19-28)

1 *దేముడుచొ పుత్తుసి జలో యేసుక్రీస్తుచి† సుబుమ్ కబుర్ ఇసి మొదొల్ జతయ్.

2 †దేముడుచ కబుర్ సంగిలో యెసయా పూర్ణుమచొచి అత్తి దేముడు రెగిడ్లి రితి జర్గు జలి.

“ఈందె, తుక వాట్ తెయార్ కెరయ్తి రితి, అంచొ బారికి జతో ఎక్కిలోక తుచి కంట అగ్గె తెద్రయిందె”

మెన,
3 అన్నె,

“ఎక్కిలో అంచొ బారికి రితొ జా, అంచి అవాడ్ రితొ జా, ‘ప్రబుకయ్ వాట్ చెంగిల్ కెరు. జోక వాట్ తిన్నగ కెర్లి రితి తుమ్ ఎత్తిజిన్ బుద్ది ఆననా’ మెన, బయిలె ప్రదేసిమి తా కేక్ గల సాట్టు కెరెదె”

మెన, రెగిడ్లి కోడు.

4 ఈంజెవ్ కొడొ కిసి నెరవెర్చువ జల మెలె, బాప్తిసుమ్ దెతో యోహాను మెలోసా బయిలె బార్ జా బులుక దెర కెర, “తుమ్చి పాపల్చి రిసా తుమ్ పెట్టి దుకుమ్ జా, పాపుమ్ ముల్లి బుద్ది జా, దేముడు తుమ్చి పాపుమ్ చెమించువ కెర్లి గుర్తుక, తుమ్ బాప్తిసుమ్ నజన్.” మెన సాట్టు కెర్తొ తిలన్.

5 యోహాను ఇసి కెర్తొ తతికయ్, యూదయ మెలి జా ప్రదేసిమ్చ ప్రెజల్ ఒగ్గర్ ఒగ్గర్జిన్ జా ప్రదేసిమ్చి కియెరూసలేమ్ మెలి వెల్లి పట్టుమ్చ ప్రెజల్ ఒగ్గర్ ఒగ్గర్జిన్, జోతె జా బయిలె జా కెర, జేవ్ కెర్ల పాపల్చి రిసా పెట్టి దుకుమ్ జా, ఎదార్దుమ్ తెన్ ఒప్పున సంగ కెర, యోర్దాను మెంతి ఒత్తచి గడ్డె, జోచి అత్తి బాప్తిసుమ్ నజన్తె తిల.

6 యోహాను కిసా తిలో మెలె, ఒంటెచ రోమల్చ పాలల్ గలన, చామ్ తెన్ కెర్లి పట్టు కెరంటి బందన, డొంగ్రెచి ఒండార్ తేల్, చిట్కల్ కతోసా.

7 కిచ్చొ మెన యోహాను బోదన కెర్తొ తిలన్ మెలె, “అంచి పట్టి అన్నెక్లొ జెతయ్, అంచి కంట జోక అదికారుమ్ ఒగ్గరి.

* 1:1 1:1 అప్పె తెంతొ జోక ‘దేముడు’ మెన రెగుడుమదె. † 1:1 1:1 ‘సుబుమ్ కబుర్’ మెలె ఎత్తి అదికారుమ్ తిలో దేముడు దొర్కు కెర్లి రచ్చనచి కోడు. అమచ పాపల్ జో చెమించువ కెర్తొనచి రిసాచి కబుర్. యేసుయ దొర్కు జలో రచ్చించువ కెర్తొసా జలిన్చి కబుర్. జో అర్చితుమ్ జా పాపల్ గెచ్చయ్లి రిసా నంపజల మాన్యుల్ వరలోకుమ్చి రాజిమ్తె బెదితి అవ్కాసుమ్ దొర్కు జలిన్చి కబుర్. ‡ 1:2 1:2 ‘జోచ కబుర్లు సంగిలన్’ మెలె, పూర్ణుమ్ తెంతొ కక్క ఎత్తి అదికారుమ్ తిలో దేముడు ప్రబు నిసాన, జోచ కబుర్లు మాన్యుల్ జేవ్ సంగితి రిసా, జోచి అత్తెక్కి జోవయింక దెయెదె. § 1:5 1:5 యెరూసలేమ్ పట్టుమ్ యూదుల్ ఒగ్గర్ ముక్కిమ్ జయెదె. కిచ్చొక మెలె, ఒత్త దేముడుచి గుడి తయెదె. ఒండి బూలోకుమ్చి ఎక్కి ఒత్తయ్ జోవయింక దేముడుచి గుడి తయెదె.

* 1:15 1:15 మత్తయి మెలో యేసుచ సిస్సుడు రెగిడ్లి రితి, వరలోకుమ్చి రాజిమ్ యేసు తెన్ పాసి జా అయ్లోన్చి కబుర్, ఈంజ. మత్తయి 3:2,3.

ఆవ్ వంపొ జా జోచ చట్టొతెచ జోడ్లుతెచ వాలివొ యిప్పక జలెకు అంక విలువ నాయ్.

8 ఆవ్ జలె, పానితె తుమ్క బాప్తిసుమ్ దెతసి, గని అప్పె జెతోసా జలె, దేముడుచి సుద్ది తిలి అత్తె తుమ్క బాప్తిసుమ్ దెయెదె” మెన సాట్టు కెర్తొ తిలన్.

యేసు బాప్తిసుమ్ నజన్చిసి

9 తెదొడి ఏక్ దీసి, యేసు గలిలయ ప్రాంతుమ్తెచి నజరేతు గద్వి తెంతొ ఉట్ట జా కెర, ఒత్త యోర్దాను గడ్డె యోహానుచి అత్తి బాప్తిసుమ్ నజన్చొ.

10 యేసు పాని తెంతొ బార్ జలి బేగి యోహాను కిచ్చొ దెకిలన్ మెలె, వరలోకుమ్ ఉగ్గి జలి, చి దేముడుచి సుద్ది తిలి అత్తె, పార్వ పిట్టచి రితి జా, ఉత్త జా యేసుచి ఉప్పిరి టీవొ జలి.

11 అన్నె, “తుయి అంచొ ప్రేమ తిలో పూత్తు. తుచి రిసా అంక సర్దసంతొసుమ్” మెన వరలోకుమ్ తెంతొ సంగిలిన్చి అవాడ్ అయ్లి.

సయ్తాన్చి అత్తి యేసు పరిచ్చు జా జిన్చిసి
(మత్త 4:1-17; లూకా 4:1-15)

12 దస్సి జలి బేగి, కో నెంజిలి బయిలె యేసు గెతి రితి, దేముడుచి సుద్ది తిలి అత్తె జోక పెలవ నిలన్.

13 యేసు ఒత్త దొన్ని విసా దీసల్ తతికయ్, సయ్తాన్ జోక పాపుమ్ కెరవుక ఉచర్లన్. ఒత్త రితయ్ జంతువుల్ తిల. దేముడుచి దూతల్ జా కెర, యేసుక సావైచన కెర, సుక్కుమ్ కెర్ల.

14 జా పొది, బాప్తిసుమ్ దెతె తిలో యోహాను జేలి జలో. జో యోహాను జేలి జలి పిమ్మట్, యేసు, దేముడు జలో అబ్బొన్చి సుబుమ్ కబుర్ బోదన కెర కెర, బుల బుల, గలిలయ ప్రాంతుమ్తె అన్నె ఉట్ట అయ్లన్.

15 “*దేముడుచి రాజిమ్ ఈంజ లోకుమ్తె జెతిన్క రకితి కాలుమ్ పూర్తి జా అస్సి. దేముడుచి రాజిమ్ పాసి జా అస్సి. జాచి రిసా, తుమ్ కెర్ల పాపల్చి రిసా పెట్టి దుకుమ్ జా. పాపుమ్ ముల్లి బుద్ది జా, సుబుమ్ కబుర్ సూన నంపజా” మెన బోదన కెర్తొ తిలన్.

చెత్తర్జిన్ సిస్సుల్క యేసు నిసాన బుక్కార్చిసి

16 యేసు జా గలిలయ ప్రాంతుమ్చి సముద్దుమ్చి గట్టుతె ఇండితె తా, సీమోనుక చి అంద్రెయ మెలో సీమోనుచొ బావొన్క దెకిలన్. జేవ్ దొగుల గడ్డె వల గల్తె తిల. జేవ్ మొస్స దెర్తన.

17 జలె, యేసు జోవయింక దెక, “తుమ్ అంచి పట్టి జా, చి మాన్సుల్ అంక సంపజతి రిసా, జోవయింక తుమ్ అంచితె కడ ఆన్తి రితి తుమ్క సికడిందె” మెన సంగిలన్.

18 ఇసి సంగ బుకార్లి బేగి, జేవ్, జోవయించ వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

19 ఒత్త తెంతో అన్నె ఇదిల్ దూరి గెచ్చ కెర, జెబెదయి మెలో ఎక్కిలోచ దొగుల పుత్తర్పుల్క యేసు దెకిలన్. వెల్లొచి నావ్ యాకోబు, బావొచి నావ్ యోహాను. జేవ్ దొగుల జోవయించి దొనితె వెన తా, చిరి జల వలల్ చెంగిల్ కెర్తె తిల.

20 జోవయింక దెకిల్ బేగి, యేసు జోవయింక బుకార్లన్. జెబెదయి మెలో జోవయించో అబ్బొన్క, జోవయింతె కూలి కెర్తసక కి దొనితె ముల దా, జేవ్ దొగుల బావుడ్లు జోచ సిన్సుల్ జతి రితి యేసుచి పట్టి గెల.

బూతుమ్ దెర్లి మాన్సుక యేసు చెంగిల్ కెర్లిసి (లూకా 4:31-37)

21 జలె, యేసు, జేవ్ సిన్సుల్ తెన్ కపెర్నహూమ్ పట్టుమతె బెద గెల. అన్నెక్ సెలవ్ కడన్లి దీసి, దేముడుక బక్తి కెర్తి యూదుల్చి ఒత్తచి సబ గెరి గెచ్చ, తెడి పెన కెర, యేసు బోదన కెరుక దెర్లన్.

22 మోసె తెన్ దేముడు దిలి ఆగ్గుల్ సికడ్డస కెర్తి రితి నాయ్, గని దేముడు దిలి అదికారుమ్ తెన్ యేసు సొస్తుమ్ బోదన కెర్లన్, చి ఒత్త తిల మాన్సుల్ బలే ఆచారిమ్ జల.

23 తెదొడి జేవ్ తిలి సబగెరి బూతుమ్ దెర్లి ఎక్కిలో డీసిలో.

24 జో జలె “ఓ నజరేతు గవ్వెచో యేసుప్రబు, అమ్చి తెన్ తుక కిచ్చో కామ్? అమ్క పాడ్ కెరుక జా అస్సిన్ గే? తుయి కొన్సో గే జాని. దేముడుచి నుద్ది తిలోసా, తుయి.” మెన కేక్ గలో.

25 యేసు, జలె, “తుక్లె తా ఇన్నెక ముల దా గో!” మెన జో మాన్సుక దెర్లి బూతుమ్క గోల కెర్లన్.

26 బూతుమ్ జో మాన్సుక అద్దుర్ కెర దా, గట్టిజ ఒర్నవడ కెర, జోక ముల దిలో.

27 జర్గు జలిసి ఎత్కిజిన్ దెక ఆచారిమ్ జా, “అబ్బురేయ్య! ఈంజ కెద్ది అదికారుమ్ తిలి బోదన. నొవి రగుమ్. బూతల్క కి అదికారుమ్ తెన్ ఈంజో ‘గో!’ మెన సంగిలె, జా సూన, ఈంజో సంగిల్ రితి ఉట్ట గెతతి!” మెన బమ్మ తెన్ ఎక్కిలోక ఎక్కిలో సంగన్.

28 జా దీసి తెంతో, జా ఒండి గలిలయ ప్రాంతుమ్తె, కేనె ఒత్త, యేసుచి రిసా ఎత్కిజిన్ సూన్.

29 బూతుమ్ దెర్లిసాక చెంగిల్ కెర్లి బేగి, సబ గెరి తెంతో బార్ జా ముల కెర, యాకోబు చి యోహాను తెన్ యేసు బెద గెచ్చ, సీమోను చి అంద్రెయ చి గెరి గెల.

30 జలె, గెరి పెసిలె, సీమోనుచి అత్తన్ జోర్జో సేడ నిజ అస్సి. దస్సి అస్సి మెన దెక కెర, సిన్సుల్ యేసుక సంగిల.

31 యేసు జాచి పాసి జా కెర, ఆతు దెర ఉట్టయ్తికయ్, జోర్జో జాక ముల దిలి, చి చెంగిల్ జలి, జా మంతిరి గెరి తిలసక సవైచన ఎత్కి కెర్లి.

ఒగ్గర్జిన్ బాద తిలసక యేసు చెంగిల్ కెర్లిసి

32 జా దీసి సాంజ్ జతికయ్, ఒగ్గర్ ఒగ్గర్జిన్ జబ్బుల్ తిలసక కి, బూతుమ్ దెర్లసక కి యేసుతె ప్రెజల్ కడ అన్.

33 జా పట్టుమ్చ ప్రెజల్ ఎత్కిజిన్ జా గెర్చి వీదె బెర జా, గుమ్ముమె టీవో జా తిల.

34 జోవయింతె రగరగాల్చ జబ్బుల్ తిల మాన్సుల్క యేసు చెంగిల్ కెర్లన్, ఒగ్గర్ బూతల్క ఉదడ గెలన్. గని జో కొన్సో గే బూతల్ చినిలి రిసా, జా గుట్టు బార్ కెర్తు నాయ్ మెన, జేవ్ బూతల్ లట్టబుక సెలవ్ నే దిలో.

35 అన్నెక్ దీసి, రాతి నే పాయితె ఒగ్గర్ అందర్ తత్తయి, యేసు ఉట్ట కెర బార్ జా, కో నెంజిలి టాన్తె గెచ్చ, ప్రార్దన కెరుక దెర్లన్.

36 ప్రార్దన కెర్తె తతికయ్, సీమోను, జో తెన్ తిలస కి, యేసుచి పట్టి జా చజన,

37 జోతె పాచ కెర, “ఇన్నెచ మాన్సుల్ ఎత్కిజిన్ తుక చజితతి” మెన యేసుక సంగితికయ్,

38 జో, “జోమ్మ, ఈంజ ప్రాంతుమ్తెచ అన్నె గవ్వెలె గెచ్చుమ, ఆవ్ ఒత్త కి బోదన కెర్తి రిసా. జాకయ్ బార్ జలయ్!” మెన యేసు సంగిలన్.

39 జలె, జా గలిలయ ప్రాంతుమ్ ఎత్కితె బుల బుల, ఒత్తచ యూదుల్చ సబ గెరలె బోదన కెర్తె తిలన్, చి మాన్సుల్క దెర్ల బూతల్క ఉదడ గెల్తె తిలన్.

వెల్లి రోగిక యేసు చెంగిల్ కెర్లిసి

(మత్త 8:1-4; లూకా 5:12-16)

40 జా పొది, వెల్లి రోగి ఎక్కిలో యేసుతె జా కెర, సెర్ను సేడ, “తుక ఇస్టుమ్ తిలె, తుయి అంక చెంగిల్ కెర సుద్ది కెరుక తెర్చి.” మెన బతిమాల్పా జా జోకర్తికయ్,

41 యేసు కన్కారుమ్ జా, ఆతు చంప కెర, జోక చడ, “అంక ఇస్టుమి. తుయి చెంగిల్ జా సుద్ది జా” మెన సంగిలన్.

42 వెల్లి రోగుమ్ బేగి జో మాన్సుక ముల దిలి, చి చెంగిల్ జా సుద్ది జలన్.

† 1:21 1:21 ఎత్కి సెన్వర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ సబ గెరలె గెచ్చ, దేముడుచి కొడె సూన కెర, ఎత్కి అదికారుమ్ తిలో దేముడుక బక్తి కెరుల. జోక ‘యోహోవ’ మెన నావ్ తయెదె. జా దీసి ‘కిచ్చో కామ్ కెర నాయ్’ మెన జో ఎత్కి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్చెన్చి రిసా ఒగ్గర్ ఆగ్గుల్ అవ్వె ఉచర అస్సి. ఇన్నె, దొన్ని ఎన్నులు కోట్టిన్క ‘కామ్’ మెన నింద కెర్తెతి.
‡ 1:24 1:24 దేముడు తెద్రయలో క్రీస్తు, రచ్చించువ కెర్లసా

43-44 తెదొడి యేసు జోక, “జర్గు జలిన్చి రిసా కక్క, సంగు నాయ్, గని దేముడుచి గుడితె గెచ్చు, ఒత్త సేవ కెర్తొ పూజరితె గెచ్చు, తుయి చెంగిల్ జలిసి జోక దెకవ, తుయి చెంగిల్ జాకీ సుద్ది జలిసి ఎత్తిజిన్క రుజ్జు దెకయ్తి రితి, మోసే పూర్గుమ్చో సంగిలి కానుక దేసు” మెన యేసు ఆడ్ర దా జోక సంగిలన్.

45 గని, “కేనె ఒత్త సంగు నాయ్” మెన యేసు సంగ తిలె కి, జో మాన్సు బార్ జా ఉట్టు గెచ్చు కేనె ఒత్త సంగుక దెర్లన్. జర్గు జలిసి జో దస్సి ఎత్తిజిన్క సూనయ్తికయ్, ‘కేనె పట్టుమ్తె ఇష్టుమ్ అయ్లి రితి ఎదార్దుమ్ పెసుక నెంజె’ మెన, యేసు జా బయిలె తాఁ గెలో. ఒత్త జా బయిలె తతికయ్, చెత్తర్ దిక్కుల్ తెంతో కి, ప్రెజల్ జోతె బెర గెతె తిల.

2

ఉట్టుక నెత్తిర్లొ రోగిక యేసు చెంగిల్ కెర్లన్
(మత్త 9:1-8; లూకా 5:17-26)

1 సగుమ్ దీసల్ గెలి వడ్డొ, యేసు కపెర్నహూమ్ పట్టుమ్తె అన్నె బుల జెతికయ్, జో ‘గెరి అస్సె’ మెన సూన కెర,

2 ఒగ్గర్ ఒగ్గర్జిన్ జనాబ్ జోతె బెర అయ్ల. బెర అయ్లి రిసా, జోచి గడితె కి, గుమ్ముమె కి, అన్నె కక్క టాన్ నాయ్.

జలె, యేసు జనాబ్ క దేముడుచి* బోదన కెర్తె తతికయ్,

3 వాతుమ్ జోర్లొ తెన్ తిలోసా ఉట్టుక నెత్తిర్లొ మాన్సు ఎక్కిలోక, చెత్తర్జిన్ యేసు తిలిన్తె కడ ఆన్ల. జో మాన్సుక కడ ఆన్లనతె తిల చెత్తర్జిన్ జోక జోచి అంతుర్నొ తెన్ వయ ఆన తిల.

4 జలె, జో రోగిక యేసుతె పాసి కడ ఆనుక చజెలె కి, బెర్ల జనాబ్చి రిసా నెత్తిర్ల. జోచి పాసి జెంక నెత్తిర్లి రిసా, జో తిలి గదిచి ఉప్పిర్ ఒర్నెచి వెల్లి బొరొ కెర, జో ఎంగ్గ తిలి అంతుర్నొ తెన్ జో రోగిక జా బొరొ వాట్ ఉత్తవ దా, యేసుచి పాసిక పావడ్ల.

5 జలె, ‘కడ ఆన ఉత్తవ తిల జేవ్ మాన్సుల్ నంప తెన్ అస్తి’ మెన యేసు రుజ్జు దెక కెర, ఉట్టుక నెత్తిర్లొ జో రోగిక దెక, “ఓ పూత్తు, తుచి పాపల్ చెమించుప జా అస్తి” మెన సంగిలన్.

6 జలె, మోసే తెన్ దేముడు దిలి ఆగ్గుల్ సికడ్డన సగుమ్జిన్ ఒత్త వెన అస్తి. యేసు సంగిలిసి జేవ్ సూన కెర బమ్మ జా,

7 “ఈంజొ మాన్సు కిసా జా లట్టబ్తయ్! ఇసి లట్టబ దేముడుచి విలువ కడ పాపుమ్ కెర్తయ్! దేముడు ఎక్కిలోక పిట్టవ, కో కి పాపల్ చెమించుప కెరుక నెత్తిర్లి!” మెన, జోవయించి పెట్టి ఉచరన్ల.

8 జోవయించి పెట్టి తిలి అన్మానుమ్ యేసు జోచి ఆత్మతె బేగి చిన కెర, “తుమ్చి పెట్టి కిచ్చొక దస్సి అన్మానుమ్ తియంతసు?

9 ఉట్టుక నెత్తిర్లొ ఈంజొ మాన్సుక ‘తుచి పాపల్ చెమించుప జా అస్తి’ మెన సంగుక సుల్లు గే, ‘ఉట్టు, తుచి అంతుర్నొ వయన ఇండు’ మెనుక సుల్లు గే?

10 జలె, †మాన్సు జా జెర్మున్ అయ్లయ్ అంక, ఈంజయ్ లోకుమ్తె కి పాపల్ చెమించుప కెర్లి అదికారుమ్ అస్సి మెన రుజ్జు దెకయిందె, మెన జేవ్క సంగ కెర, ఉట్టుక నెత్తిర్లొ జో మాన్సుక అన్నె దెక కెర,

11 ‘అల్లె, తుయి ఉట్టు, తుచి అంతుర్నొ వయన ఇండ గెరి గో, మెన తుక ఆవ్ సంగితసి!’ ” మెన యేసు సంగిలన్.

12 బేగి, జో మాన్సు ఉట్టు కెర, జోచి అంతుర్నొ ఉక్కుల వయన, జేవ్ ఎత్తిజిన్చి మొక్కె ఇండుక దెర, బార్ జా కెర, ఉట్టు గెలన్. ఇసి జర్గు జలి రిసా, ఒత్త బెర తిలన ఎత్తిజిన్ ఆచారిమ్ జా, “ఇస కమొ అమ్ కెయ్య దెకుక నాయ్. ఆజి దెకిలమ్” మెన, దేముడుక గవురుమ్ సంగిల.

లేవీ మెలో సిస్టు నజీతోసాక యేసు బుకార్లిసి
(మత్త 9:9-13; లూకా 5:27-32)

13 యేసు అన్నె బార్ జా, ‡సముద్రుమ్చి జా గాడుచి ఒడ్డుతెచి వాట్ గెలన్. ఒత్త ఒగ్గర్జిన్ జనాబ్ జోతె బెర జెతికయ్, జోవయింక బోదన కెరుక దెర్లన్. బోదన కెర కెర,

14 అన్నె ఇదిల్ దూరి గెలె, § సిస్టు నజీతి గెరి ఒత్త వట్టె అస్సె. జా గెరితె అల్పయి మెలో ఎక్కిలోచొ లేవీ మెలో పుత్తుసి ఎక్కిలో వెన అస్సె. యేసు జోక దెక కెర, “అంచి పట్టి జా, అంచొ సిస్సుడు జా” మెన జోక బుకార్లన్. బుకార్లి బేగి, జో ఉట్టు, యేసుచి పట్టి గెలన్.

15 జలె, లేవీయింతె యేసు అన్నిమ్ కంక గెలన్. జోతె అన్నిమ్ కంక మెన యేసు సిస్సుల్ తెన్ వెన తతికయ్, జో తెన్ జా దేసిమ్చ నిస్కారుమ్ కెర్ల ఒగ్గర్జిన్ బెద వెన తిల. కొన్స మెలె, సిస్టు నజీతన కి, నీతి రితి నే కెర్లన కి సగుమ్జిన్, దన మాన్సుల్ ఒగ్గర్జిన్ యేసుచి పట్టి గెచ్చు ఒత్త తిల.

§ 1:43-44 1:43-44 వెల్లి రోగిచి వెల్లి రోగుమ్ గెలె, ‘సుద్ది జలన్’ మెన తెదొడచ యూదుల్ సంగితె తిల. కిచ్చొక మెలె, ఏక మాన్సుక వెల్లి రోగుమ్ తిల, ‘జో గవ్వి తంక గార్’ మెలి రితి, ‘జోచి జబ్బు డేవ అమ్కయ్ దెరెదె’ మెలి రితి బియఁ కెర గవ్వి తెంతో ఉడడుల. దేముడుచి దయచి రిసా వెల్లి రోగుమ్ పూర్తి గెలె, ‘సుద్ది జలొ’ మెన గవ్వి అన్నె పెనడుల. * 2:2 2:2 ఇన్నెక ‘సుబుమ్ కబుర్’ కి మెనుక జయెదె. † 2:10 2:10 ‘మాన్సు జా జెర్మున్ అయ్లొసా’ మెన పొర్ని ప్రమానుమ్తె రెగ్గి తెంతో జా కోడు కచి రిసా నావ్ తయెదె మెలి ఎత్తి అదికారుమ్ తిలో దేముడు ‘తెర్లయిందె’ మెన సంగ తిలో ‘క్రీస్తు’ మెలో దొర్కు జలొ రచ్చించుప కెర్లొసాక ఈంజ అన్నెక్ నావ్ తయెదె; జా నావ్చి అర్దుమ్ వండితుల్ కెర్లెకి, యేసుక ‘జొయ్య’ మెన ఒప్పునుక నెన ఒగ్గర్ అల్లర్ కెరుల. ‡ 2:13 2:13 ఇత్తల్ జా గాడు సముద్రుమ్చి రితి రూండు తయెదె. § 2:14 2:14 ‘సిస్టు’ మెలె, జా దేసిమ్క ఆక్రమించుప కెర్లి రోమ్ దేసిమ్చి వాట డబ్బుల్. జా ప్రబుతుమ్చి నావ్ తెన్ సిస్టు నజీతనక యూదుల్ నిస్కారుమ్ దెకుల; వేర ప్రబుతుమ్చి నావ్ తెన్ జా డబ్బుల్ నజీతతిచి రిసా కి, జేవ్ కెర్ల మోసిమ్లుచి రిసా కి.

16 జలె, *పరిసయ్యుల్ తెన్ బెదిత మోసె తెన్ దేముడు దిలి ఆగ్గుల్ సికడ్డన సగుమ్జిన్ తిల. 'సిన్సు నజితన తెన్, నీతి నెంజిలన తెన్ యేసు వెస కతయ్' మెన జేవ్ మోసె తెన్ దేముడు దిలి ఆగ్గుల్ సికడ్డన దెక కెర, "సిన్సు నజితన తెన్, పాపుమ్ సుదల్ తెన్ ఈంజొ కిచ్చొక కతయ్?" మెన యేసుచ సిన్సుల్క పుసిల.

17 జేవ్ వెల్లెల మాన్సుల్ పుసిలిసి సూన కెర, యేసు జోవయింక దెక, "జబ్బు తెన్ అన్సుమ్ మెన చినన్లసక డాక్టర్ అవ్సురుమ్, గని జబ్బు నెంజిలసక డాక్టర్ అవ్సురుమ్ నాయ్. జలె, పాపుమ్ సుదల్ ఆమ్ మెన చినంతసకయ్ బుకార్క ఆవ్ అయ్లయ్, గని ఆమ్ పున్నిమ్ సుదల్ మెన ఉచరంతసక బుకార్క నాయ్" మెన యేసు సంగిలన్.

చువ్వె తతిన్చి రిసా ప్రెజల్ యేసుక పుసిలిసి (మత్త 9:14-17; లూకా 5:33-39)

18 బాప్తిసుమ్ దెతె తిలో యోహానుచ సిన్సుల్ కి, పరిసయ్యుల్ కి చువ్వె తతికయ్, ప్రెజల్ సగుమ్జిన్ యేసుతె జా కెర, "యోహానుచ సిన్సుల్, పరిసయ్యుల్చ సిన్సుల్, చువ్వె తంక అలవాట్, గని తుచ సిన్సుల్ చువ్వె తత్తి నాయ్. కిచ్చొక?" మెన జోక పుసిల.

19 ఇసి పుసితికయ్, యేసు జోవయింక, "కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి విందుతె బుకార్లన చువ్వె తవుల గే? నాయ్! జలె, పెండ్లిఉబేడో జోవయించి నెడిమి తతి విదిలి సేంపుక జేవ్ చువ్వె తంక బెదె నాయ్. సర్ల తెన్ తవుల.

20 జలె, పెండ్లిఉబేడోచి పచ్చెన జలసచి నెడిమి తెంతో జోక దెర వేరతె కడ నిలె, జేవ్ మాన్సుల్ ఏడ ఏడ చువ్వె తవుల.

21 "అన్నె, పొర్ని పాలుమ్ చిరి జా తిలెగిన, మాసికచి రిసా నే కేడయ్లి నే కేడ్డె నొవి గండ కో జాన్ల మాన్సుల్ గల్తి నాయ్. ఏక్ వేల, దస్సి, తొలితో నే కేడ్డె నే కేడయ్తె గల తిలెగిన, జా ఒండి పాలుమ్ కేడ్డె, జా మాసిక కడెదే. మాన్సు జా పాలుమ్ గలన్లె, అమ్మ జలి పొర్ని బట్ట నొవి బట్టచి మాసిక బెదయ్లి కుటు సొడి చిరి జయెదె, చి అగ్గెచి కంట వెల్లి బోరో జయెదె.

22 "పిమ్మట్, పొర్నిచి కాయ తెన్ ఒత్త నొవి ద్రాచ రస్సుమ్ సువితి నాయ్. కిచ్చొక మెలె, జా కాయ పొర్ని జలి రిసా, జాచితె నొవి ద్రాచ రస్సుమ్ సువితిగిన, జా పులుక నెతిరి రిసా, జా రస్సుమ్ పొంగుప జలె పొది జా కాయ పుట్టెదె,

జా రస్సుమ్ సూయి జయెదె. దస్సి, కాయ, రస్సుమ్, దొన్ని కి పాడ్ జా గెచ్చుల. జాకయ్, నొవి ద్రాచ రస్సుమ్క నొవి కయల్ అవ్సురుమ్." మెన జోక పుసితి మాన్సుల్క యేసు సంగిలన్.

పండితుల్ యేసుక గోల కెర్లిసి (మత్త 12:1-8; లూకా 6:1-5)

23 జా పొదులె, † ఏక్ సెలవ్ కడన్లి దీసి, యేసుచి సిన్సుల్ పంటొ పికిలి బుయి వాట్ గెతె తిల. వాట్ సొడి పికిలి పంటొచ ఎన్నులు దొన్ని జోచ సిన్సుల్ కోడ కయ్ల.

24 జేవ్ సిన్సుల్ ఎన్నులు కోడ్డిసి, జలె, పరిసయ్యుల్ సగుమ్జిన్ దెక కెర, 'జేవ్ దస్సి కెర్లిసి కామ్ కెర్లి రితి జతయ్' మెన, "ఈందె, సెలవ్ కడన్లి దీసి కెరుక నాయిమ్ నెంజిలిసి కిచ్చొక తుచ సిన్సుల్ కెర్తితి?" మెన యేసుక గోల కెర్ల.

25 యేసు జోవయింక, "‡ దావీదు పూర్ణుమ్చొ జో తెన్ తిలస, చూ కెర్తికయ్ కిచ్చొ కెర్ల గే తుమ్ కెయ సదు కెర్పు నాయ్ గే?

26 మెలె, అబ్యాతారు మెలోసా ఎత్కిక వెల్లో పూజరి జా తిలి కాలమ్, దేముడుచి గుడి తెడి దావీదు పెస కెర, దేముడుచి గుడిచ పూజర్లు దేముడుక అర్చితుమ్ దిల పోడియె వెంటన, పూజర్లు కంక జయెదె గని అన్నెకో కి కంక నెంజె మెన జాన్లె కి, జో తెన్ తిలసక వంట దా, జోవయింతెన్ కయ్ల!" మెన జేవ్ పరిసయ్యుల్క యేసు సంగిలన్. జోవయింక అన్నె,

27 "సెలవ్ కడన్లి దీసి మాన్సుల్క ఒగ్గర్ ఏలుప కెర్తు మెన నాయ్, గని మాన్సుల్క 'చెంగిల్ తత్తు' మెనయ్ దేముడు సెలవ్ కడన్లి దీసి దిలన్.

28 జలె, సెలవ్ కడన్లి దీసిచి ఉప్పిరి ఆవ్ మాన్సు జా జెర్మున్ అయ్లోసొక అదికారుమ్ అస్సె" మెన పరిసయ్యుల్క యేసు జబాబ్ దిలన్.

3

ఆతు లంబ గెలో మాన్సుక యేసు చెంగిల్ కెర్లిసి (మత్త 12:9-14; లూకా 6:6-11)

1 తెదొడి జా కపెర్నహూమ్ పట్నుమ్తె యూదుల్చి సబ గెరి యేసు అన్నె గెచ్చు, పెస, కిచ్చొ దెకిలన్ మెలె, ఆతు లంబ గెలోసా ఎక్కిలో ఒత్త అస్సె.

2 జలె, 'బక్తి కెర్తి సెలవ్ కడన్లి దీసి యేసు జో మాన్సుక చెంగిల్ కెరెదె గే నాయ్ గే' మెన దెకుక మెన, వెల్లెల మాన్సుల్

* **2:16 2:16** పరిసయ్యుల్, మోసె తెన్ దేముడు దిలి ఆగ్గుల్ సికడ్డన, సద్భూకయ్యులు యూదుల్క ముక్కిమ్చ వెల్లెల మాన్సుల్ జవుల. ఎత్కిక వెల్లెల పూజర్లు తెన్ యూదుల్చి వెల్లి సబతె వెసుల. జేవ్ పొదులె ముక్కిమ్క జెవ్వి ఎత్కి అదికారుమ్ తిలో దేముడుచి నిదానుమ్ ప్రెజల్క సికడుక. † **2:23 2:23** ఎత్కి సెన్సర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ సబ గెరలె గెచ్చు, దేముడుచి కొడె సూన కెర, ఎత్కి అదికారుమ్ తిలో దేముడుక బక్తి కెరుల. జోక 'యెహోవ' మెన నావ్ తయెదె. జా దీసి 'కిచ్చొ కామ్ కెర నాయ్' మెన జో ఎత్కి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్లిన్చి రిసా ఒగ్గర్ ఆగ్గుల్ అచ్చి ఉచర అస్సి. ఇన్నె, దొన్ని ఎన్నులు కోడ్డిన్క 'కామ్' మెన నింద కెర్తితి. ‡ **2:25 2:25** దావీదు ఒగ్గర్ పూర్ణుమ్ యూదుల్క రాసి జా తిలన్. యేసు జోచి నెకుమ్తె జెర్లిలన్. అబ్రాహామ్ తెన్, అన్నె దొగుల త్రిగ్ తెన్, దావీదుక 'ముక్కిమ్చొ పూర్ణుమ్చొ' మెనుల.

రకితె అస్తి. 'జోక చెంగిల్ కెర్లగిన, సెలవ్ కడన్లి దీసి కామ్ కెర్లి రితి జయెదె, చి యేసుక నేరిమ్ వయడుక జయెదె' మెన ఉచర అస్తి.

3 జేవ్ వెల్లెల మాన్సుల్ దస్సి రకితె తతికయ్, యేసు జో ఆతు లంబిలోసాక దెక, "ఇత్తల్ జే!" మెన సంగ కెర,

4 జేవ్ వెల్లెల మాన్సుల్ దెక, "*సెలవ్ కడన్లి దీసి ఎక్కిలోక చెంగిల్ కెరుక నాయిమ్ గే, గార్ కెరుక నాయిమ్ గె? జోచి ప్రానుమ్ రచ్చించుప కెరుక గే, జోక మార గెలుక చెంగిల్ కి?" మెన జోవయింక పుసిలన్. గని జేవ్ తుక్కె తిల.

5 జోవయించి మెన్సుతె ఇదిల్ కన్కారుమ్ కి జతి నాయ్, చి రిసా యేసు దుకుమ్ జా, కోపుమ్ తెన్ ఒత్త తిలసక దెక కెర, జో మాన్సుక అన్నె దెక, "తుచో ఆతు చంపొ కెరు" మెన జోక సంగితికయ్, జో ఆతు చంపొ కెర్లన్, చి జా ఆతు చెంగిల్ జలి.

6 యేసు కెర్లిసి దెక కెర, పరిసయ్యుల్ బార్ జా, హేరోదు పచ్చెన జతస తెన్ సబ కెర, "జోక కీసి మారుమ?" మెన కుట్ర ఉచర్ల.

ఒగ్గర్జిన్ మాన్సుల్ యేసుతె జా కెర బెర తిలిసి

7 యేసు బార్ జా కెర, జోచ సిన్సుల్ తెన్ జా గలిలయ ప్రాంతుమ్చి సముద్రుమ్ గాడుచి ఒడ్డుతె గెలన్. ఒత్తచ ప్రెజల్ ఒగ్గర్జిన్ జనాబ్ జోచి పట్టి గెల. పిమ్మట్, జో కెర్ల కమొచి రిసా సూన తా, యూదయ ప్రదేసిమ్ తెంతో,

8 యెరూసలేమ్ పట్టుమ్ తెంతో, ఇదుమయ ప్రాంతుమ్ తెంతో, యోర్దాను గాడు ఒత్తల్తో తెంతో, పడ్డో సీదోసుచి తూరు మెల పట్టుల్చి ప్రాంతుమ్ తెంతో, దూర్దూరిచ మాన్సుల్ ఒగ్గర్ ఒగ్గర్జిన్ జనాబ్ జా కెర, ఒత్త యేసుతె జా బెర్ల.

9 జలె, "ఈందె, ప్రెజల్ పెలపెలి జతతి. ఇసి జలె, దస్సి ప్రమాదుమ్ నే జతి రిసా, దోని ఏకక సంగ తా" మెన, సిన్సుల్క సంగిలన్.

10 కిచ్చొక మెలె ప్రెజల్తె ఒగ్గర్ ఒగ్గర్జిన్చ జొర్జొల్ గట్టక యేసు గెచ్చయ్తికయ్, "జోక చడిలె జలెకు చెంగిల్ జమ్దె" మెన, అన్నె జబ్బు తిలస ఎత్తిజిన్, జోక చడుక మెన పెలపెలి జతె తిల.

11 పిమ్మట్ జా పొది అన్నె కిచ్చొ జర్గు జతె తిలి మెలె, బూతల్ యేసుక దెకిలె, జేవ్ దెర్లసక సెర్ను సేడవ దా, "దేముడుచొ పుత్తుసి, తుయి" మెన జేవ్ దెర్లసచి చోండివాట్ బూతల్ యేసుచి రిసా కేకుల్ గల్తె తిల.

* **3:4 3:4** ఎత్తి సెన్సర్ యూదుల్క బక్తి కెర్లి సెలవ్ కడ దీసి జయెదె. జా దీసి జోవయించ సబ గెరలె గెచ్చ, దేముడుచి కొడె సూన కెర, ఎత్తి అదికారుమ్ తిలో దేముడుక బక్తి కెరుల. జోక 'యెహోవ' మెన నావ్ తయెదె. జా దీసి 'కిచ్చొ కామ్ కెర నాయ్' మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్లిచి రిసా ఒగ్గర్ ఆగ్గల్ అవ్వి ఉచర అస్తి. ఇన్నె, దొన్ని ఎన్నులు కోడ్లిన్క 'కామ్' మెన నింద కెర్తె. † **3:18 3:18** 'కనానుడు జలో సీమోను' మెన రెర్ల అస్సి. సొంత దేసిమ్ ఏలుప కెరంతి ఆస తిల ఒత్తచ మాన్సుల్క 'కనానులు' మెన ఆసిమ్ నావ్ తయెదె, బెర్ల. ‡ **3:21 3:21** జోచి నజరేతు గవ్వి తెంతో బార్ జల. యేసు కపెర్నహూమ్ పట్టుమ్తె తిలన్. § **3:22 3:22** 'బూతల్క రానో జలిసా' మెలె, నయ్తాన్.

12 గని, "ఆవ్ కొన్సొ గే తుమ్ కక్క. కి సంగుక నాయ్" మెన బూతల్క యేసు ఆడ్డ దిలన్.

బారజిన్ సిన్సుల్క యేసు అదికారుమ్ దిలిసి

13 తెదొడి యేసు ఏక్ మెట్టయ్ వెగ గెచ్చ, జో ఇష్టుమ్ జల మాన్సుల్క బుకార్లన్, చి జోతె అయ్ల.

14-15 యేసు బారజిన్ బారికుల్క నిసాన, "తుమ్ అంచి తెన్ తత్తి రిసా తుమ్క ఆవ్ నిసాన అస్సి. పడ్డో, అంచి నావ్ తెన్ తుమ్ బోదన కెర్లి రిసా, అంచి నావ్ తెన్ బూతల్క తుమ్ ఉదడ్డి రిసా తుమ్క ఆవ్ తెద్రయ్తసి" మెన, జోవయింక అదికారుమ్ దిలన్.

16 జో నిసాన అదికారుమ్ దిల బారజిన్ కొన్సొ మెలె, ఎక్కిలో సీమోను మెలోసా, జోక 'పేతురు' మెన యేసు పడ్డో ఆసిమ్ నావ్ తిలన్.

17 జెబెదయ మెలో ఎక్కిలోచ దొగుల పుత్తర్పులు, మెలె, యాకోబు చి యోహాను మెలో బావోసి. 'ఉర్ముల్ జల మాన్సుల్' మెలి అర్దుమ్ తెన్ 'బోయనేర్లెస్' మెన జేవ్ దొగులక యేసు ఆసిమ్ నావ్ దిలన్.

18 పిమ్మట్, అన్నె కొన్సొ మెలె, అంద్రెయ, పిలిప్, బర్తోలోమయి, మత్తయి, తోమా. పడ్డో అల్పుయి మెలో ఎక్కిలోచొ యాకోబు మెలో పుత్తుసి, పడ్డో తద్దయి, † కనానుచొ జలో సీమోను మెలో అన్నెక్కో.

19 అన్నె కొన్సొ మెలె, ఇన్కరియోతు మెలి గవ్విచొ యూదా మెలోసా. జో పడ్డో విరోదుమ్ సుదల్చి అత్తి యేసుక దెర దిలోసా. తెదొడి యేసు కపెర్నహూమ్ గెరి గెలన్.

20 యేసు గెరి గెతికయ్, ఒగ్గర్జిన్ జనాబ్ జోతె అన్నె బెర్ల. జేవ్ ఒత్త బెర్లి రిసా, అన్నిమ్ కంక కి యేసుక సెలవ్ నాయ్.

21 దస్సి యేసు జోచి బోదన జోచ కమొ కెరుక ఆస జా ఎద్గెర పుండె నాయ్ చి రిసా "వెర్లి జా తయెదె" మెన మాన్సుల్ సంగిత్ తిలిసి సూన కెర, జోక దెర, గెరి కడ నెంక మెన, జోచి కుటుంబుమ్చః బార్ జల.

పండితుల్ యేసుక నింద కెర దూసుప కెర్లిసి

22 జా మదెనె, యెరూసలేమ్ పట్టుమ్ తెంతో జా తిల, మోసే తెన్ దేముడు దిలి ఆగ్గల్ సికడ్డన, యేసు ఉత్తిర్లిన్తె అయ్ల. జా కెర, యేసుచి రిసా " 'బయెల్జెబూల్' మెలో జో వెల్లొ బూతుమ్ జోక దెర అస్సి", "బూతల్క కిరానో జలోచి నావ్ తెన్ ఈంజొ బూతల్క ఉదడ్డయ్" మెన సంగితె తిల.

23 జలె, యేసు జోవయింక పాసి బుకారా కెర టాలివో కెర ఇసి మెలన్. “సయ్తాన్ కీసి జా జోక జోయ్యి ఉదడెదె! బెదె నాయ్!

24 మెలె, కేన్ జవున్ రాజిమ్చ పైజల్ జలెకు విరోదుమ్ కెరస వర్స వర్స జా జోవయింక జెవ్వి యుద్దుమ్ కెరనై, జా రాజిమ్ టీవో జంక నెత్ర నాసెనుమ్ జా గెచ్చెదె.

25 పడ్డొ, కేన్ గెర్చ జలెకు జోవయింక జెవ్వి విరోదుమ్ కెరనై, వర్స వర్స జా గెచ్చుల, చి కట్టు పిట్టవన పాడ్ జా గెచ్చుల.

26 జలె, దస్సి, సయ్తాన్ జోక జోయ్యి విరోదుమ్ జలి రితి జా జోచ సొంత సేవ కెర్తనక ఉదడుక బెదె నాయ్. జో దస్సి జోక జోయ్యి విరోదుమ్ జలెగిన, జోచి రాజిమ్ టీవో జయె నాయ్, నాసెనుమ్ జా గెచ్చెదె.

27 “గని, కేన్ గెర్చొ ఎజొమాని బలుమ్ సుదొ జలె, జోకయ్ తొలితో బందిలకయ్, జోచి గెరి పెస జోచి సామన్ చోరుక జయెదె. గని జోక తొలితో బంద తిలె, జోచి గెర్చి ఎత్తి చోర గెలుక జయెదె.

28 “ముక్కిమ్క తుమ్క ఆవ్ గట్టిజ సంగితసి. కిచ్చొ మెలె, ఎక్కిక పిట్టవ, మాన్సుల్ కెర్త పాపల్ దూసెనల్ ఎత్తి జోవయింక చెమించుప కెరుక జయెదె.

29 గని, దేముడుచి సుద్ది తిలి ఆత్మక కో దూసుప కెరుల గే, జెవ్వి కెయ్యక కి చెమించుప జతి నాయ్. జోవయించి పాపుమ్ కెయ్యక తెయ్యక తయెదె, చి నాసెనుమ్తె గెచ్చుల” మెన జేవ్క యేసు సంగిలన్.

30 కిచ్చొక మెలె, యేసుచి సుద్ది తిలి ఆత్మ జలెకి, ‘జోక సయ్తాన్చి ఆత్మ అస్సె’ మెలి రితి, “జోక బూతుమ్ దెర అస్సె” మెన జేవ్ దూసుప కెర తిల.

కొన్న యేసుక కుటుంబుమ్ జవుల గే జోయ్యి సంగిలిసి (మత్త 12:46-50; లూకా 8:19-21)

31 తెదొడి, యేసుచి అయ్యసి, బావుడ్సులు, జో తిలిన్తె పావ కెర, వీదె టీవో జా కెర, “అమ్ జా అస్సుమ్. బార్ జవున్” మెన సంగ తెర్తయ్ల.

32 జలె, యేసుచి సుట్టునంత ఒగ్గర్జిన్ జనాబ్ వెస తిల. జేవ్ జలె, జోక “ఈందె, అయ్యది చి తుచ బావుడ్సు జా కెర, వీదె టీవో జా కెర తుక బూకర్తతి” మెన సంగ దిల.

33 యేసు జోక కిచ్చొ జబాబ్ దిలన్ మెలె, “కొన్న అంక అయ్య బావుడ్సు జవుల గే జాన్సు గె?” మెన సంగ,

34 జోచి సుట్టునంత వెస తిల ప్రెజల్క దెక, జోవయింక దెకవ, “ఈందె, అంచి అయ్య, అంచ బావుడ్సు!

35 దేముడుచి ఇస్తుమ్ రితి కో కెరుల గే, జెవ్వి అంక బావొ, బేని, అయ్య జవుల” మెన సికడ్లన్.

4

టాలివో సంగ యేసు బోదన కెర్లన్ (మత్త 13:1-9; లూకా 8:4-8)

1 యేసు సముద్దుమ్ గాడుచి ఒడ్డుతె అన్నె గెచ్చు కెర, అన్నె బోదన కెరుక దెర్లన్, గని ఒగ్గర్జిన్ జనాబ్ జోచి సుట్టునంత బెర పెలపెలి జతె తిలి రిసా, యేసు ఏక్ దోనితె వెగ వెస, ఒడ్డు తెంతో ఇదిల్ దూరి గెలన్. బెర తిల మాన్సుల్ ఎత్తిజిన్ జా ఒడ్డుతె టీవో జా తిల.

2 యేసు జోవయింక కిచ్చొ కిచ్చొ సికడ్డి రిసా, ఒగ్గర్ టాలివో సంగ బోదన కెరుక దెర్లన్.

బుయ్యె ఉంపిలి బీక టాలి

జో జోవయింక బోదన కెరుక,

3 “ఈందె, తుమ్ సూన! ఉంపితోసా ఎక్కిలో, బీ ఉంపుక బార్ జలన్.

4 జో ఉంపితె తతికయ్, సగుమ్ బీ బయిలె వాట్ పక్కయ్ సేడ్డికయ్, పిట్టల్ ఉత్త జా కాఁ గెల.

5 అన్నె సగుమ్ బీ ఒగ్గర్ మత్తి నెంజిలి పత్తురు బుయ్యె సేడ్లన్. ఉప్పిరి ఇదిలిదిల్ మత్తి తిలి రిసా, ఒత్త సేడ్లి బీ బేగి గజ్జల్ జలి.

6 బేగి గజ్జల్ జలె కి, ఒప్పడ లయతికయ్, పత్తలె మొక్కల్ డడ్డ గెల, చి చెర్రో బుయ్యె తెడి పెస వడ్డుక నెతిర్లి రిసా, జేవ్ మొక్కల్ సుకా గెచ్చు మొర గెల.

7 అన్నె సగుమ్ బీ కంట దుబ్బుల్ తిలిన్తె సేడ గజ్జల్ జా మొక్కల్ జలన్. గని ఒత్త తిల కంట మొక్కల్ వడ్డ కెర ఒత్త సేడ్లి బీచ మొక్కల్క పెల గెల్లికయ్, జా బీచ మొక్కల్ ఎన్నులు నే దెర్లె కిచ్చొ పలితుమ్ దెయె నాయ్.

8 గని, అన్నె సగుమ్ బీ చెంగిలి బుయ్యె సేడ కెర, చెంగిల్ వడ్డ చెంగిల్ వంటొ పిక, విస్సెక్ దెస్సు వంతుల్, తిని విస్సా వంతుల్, పుంజెక్ వంతుల్, పలితుమ్ దిలి.”

9 అన్నె, “సూన్త కండ్లొ తిలస సూన!” మెన యేసు సంగిలన్.

10 బెర తిల మాన్సుల్ ఉట్ట గెతికయ్, యేసు తెన్ బెదిల మాన్సుల్ సగుమ్జిన్ జోచ బారజిన్ సిస్సుల్ తెన్ బీచి రిసాచి టాలిచి అర్దుమ్చి రిసా పుసిల.

11 చి, జో జోవయింక, “దేముడుచి రాజిమ్చి రిసాచి గుట్టు జలిసి జానన్తు మెన తుమ్క సెలవ్ దా అస్సె, గని అమ్చి తెన్ నే బెదిలసక ఎత్తి టాలివో తెన్ని సంగుక అస్సె.

12 కిచ్చొక మెలె, పూర్గుమ్ రెగిడ్డి రితి,

*ఆవ్ కెర్త కమొ కచితుమ్ దెకత్ గని అర్దుమ్ చినుత్ నాయ్. ఆవ్ సంగితి బోదన కచితుమ్ సూనుల, గని అర్దుమ్ కెరంతు నాయ్. నెంజిలె అర్దుమ్

* 4:12 4:12 నెంజిలె “జోవయించి పాపుమ్ చెమించుప జతి రితి పనుల అంచితె జెతు నాయ్ మెన, తుమ్ కచితుమ్ దెకితను గని అర్దుమ్ చినుతు నాయ్, ఆవ్ సంగితి బోదన కచితుమ్ సూన్తు, గని అర్దుమ్ కెరంతు నాయ్”.

కెరనెగిన బుద్ధి మార్పుప జా అంచి తెన్ పన్న చెమించుప జత, మెన రెగ్డ అస్సె.” మెన సంగిలన్.

ఉంపిలి బీచి టాలిచి అర్దుమ్ యేసు సంగిలిసి

13 తెదొడి యేసు జోవయింక అన్నె, “ఈంజ టాలిచి అర్దుమ్ కెరన్ను నాయ్ గే? దస్సి జలె, అన్నె టాలివొచి అర్దుమ్ కిసి కెరంతె!

14 ఈందె, ఉంపితోసా బీ ఉంపిలి రితి, ఆవ్ బోదన నూనయ్తసి.

15 వట్టె ఉంపిలి బీక జర్గు జలిసి, జలె, ఈంజ బోదన సగుమ్జిన్ సూన్లినచి రితి జతయ్. వట్టె ఉంపిలి బీక పిట్టల్ కిసి జా కెర కా గెల గే, దస్సి, సగుమ్జిన్ మాన్సుల్ ఈంజ బోదన సూన్లి బేగి, సయ్తాన్ జా కెర, జోవయించి పెట్టి తెంతో ఉర్లిలి రితి కెర పచ్చ వడ్డయ్.

16 “పత్తురు బుయ్యె ఉంపిలి బీక జర్గు జలిసి, జలె, అన్నె సగుమ్జిన్ మాన్సుల్చి బోదన నూన జతిన్చి రితి జతయ్. మెలె, జా బీ బేగి గజ్జల్ జలి రితి జా, జేవ్ మాన్సుల్ సుబుమ్ కబుర్ సూన్లి బేగి, సర్ల జా, ‘నంపజతసుమ్’ మెనుల.

17 గని జోవయించి సొంత పెట్టి సుబుమ్ కబుర్చ చెర్రో నెంజిలి రిసా, గడియ జలి రితి డిసిలెకి, చి రిసా కిచ్చొ జవున్ బాద సేడ్లె జలెకు, నెంజిలె వేర మాన్సుల్ జాచి రిసా జోవయింక అల్లర్ కెర్లె జలెకు, జేవ్ మాన్సుల్ బమ్మ జా, బే బేగి నమకుమ్ ముల దెవుల.

18 “అన్నె సగుమ్జిన్ మాన్సుల్, చి బోదన నూన, కంట దుబ్బుల్ తిలిన్తె ఉంపిలి బీ రితి జతయ్. మెలె, చి బోదన జేవ్ సూన్లె కి,

19 ఈంజయ్ లోకుమ్తె తిలిసి ఎత్కిక ఉచర్తె తా, ‘కిసి జా జిమ్దె’ మెన చింత గలనుల, సొమ్సారుమ్ జంక ఆస జవుల, దస్సి, జా ఆస జవున్, జా చింత జవున్, జోవయించి పెట్టి పెన తా, జా బోదనక పెలగెలి రితి జయెదె, చి రిసా, జా బోదన జోవయింతె పలితుమ్ దెయె నాయ్.

20 “అన్నె సగుమ్జిన్ మాన్సుల్ బోదన నూన, చెంగిల్ బుయ్యె ఉంపిలి బీ రితి జతయ్. మెలె, చెంగిలి బుయ్యె ఉంపిలి బీతె విస్సెక్ దెన్ను వంతుల్, తిన్ విసా వంతుల్, పుంజెక్ వంతుల్ కిసి పలితుమ్ దెవుల గే, దస్సి, జేవ్ మాన్సుల్ కి బోదన నూన, నంపజా గెచ్చు, †పలితుమ్ దెవుల” మెన బోదన కెర్లన్.

దీవు లగితిన్క టాలి (లూకా 8:16-18)

† 4:20 4:20 ‘ఆత్మపలితుమ్ దెరుల’ మెలె, దన మాన్సుల్ ప్రబుచి బుద్ధి ఇండుల, చి అన్నె మాన్సుల్ దెక, జేవ్ కి ప్రబుచి రాజిమ్తె బెదుక ఇస్టుమ్ జా, సుబుమ్ కబుర్ నూన నంపజా బెదుల. ‡ 4:24 4:24 ఇన్నెచి అర్దుమ్ కిచ్చొ మెలె, ‘తుమ్ అర్దుమ్ కెరంతి కొల్లి తుమ్క అన్నె సికడుక జయెదె. అన్నెయ్ సికడిందె 25 అర్దుమ్ తిలోసాక అన్నె సికడుక జయెదె, గని అర్దుమ్ నెంజలసక తిలి అర్దుమ్ జోవయింతె తెంతో కడ నెంక జయెదె’.

21 సిస్సుల్క యేసు అన్నె సంగిలిసి కిచ్చొ మెలె, “దీవు దీవుకంబుమ్చి ఉప్పిరి తివుల గని ఆరి నాడిచి తెడి జవున్, మంచుమ్చి తెడి జవున్ తింకయ్ మెన కేన్ గెర్చ మాన్సుల్ దీవు ఆనుల గే? నాయ్. ‘కామ్క జెవున్’ మెన దీవుకంబుమ్చి ఉప్పిరి తివుల.

22 జలె, డీసున్ మెనయ్ కిచ్చొ జవున్ లుంకడ తవుల. ఆకర్క బార్ కెర్తి రిసాయి కిచ్చొ జవున్ గుట్టు లుంకడ తవుల.

23 నూన్తన కంగ్గొ కక్క తిలె, సరిగా నూన్సు!”

24 అన్నె జోవయింక, “తుమ్ కిచ్చొ నూన్తె గే, సరిగా అర్దుమ్ కెరన దెకన. †తుమ్ కేన్ కొల్త తెన్ కట్టడతె గె, జయి కొల్త తెన్ అన్నె తుమ్కయ్ కి కట్టడ దెవుల. తుమ్క అన్నెయ్ మీన దెయిందె.

25 తిలోసాక అన్నె దెంక జయెదె, గని నెంజిలోసాక జలె, జోవయింక తిలిసి కి జోతె తెంతో కడ నెంక జయెదె” మెన యేసు సంగిలన్.

బీ గజ్జల్ జా వడ్డితిచి టాలి

26 యేసు సిస్సుల్క అన్నెక్ టాలి సంగిలన్. “ఎక్కిలో బుయ్యె బీ గల్లి రితి అస్సె. జా బీ కిసి జయెదె గే, దేముడుచి రాజిమ్ పూర్తి జతిన్ తెన్ కి దస్సి.

27 జలె, జో మాన్సు జోచి బట్టి బీ గల తా, జో అలవాట్ జలి రితి, రోజుక అందరె నిజ, పెందలె ఉట్ట, మాములుమ్ జితె తయెదె. మదెనె, జా బీ గజ్జల్ జా వడ్డుక దెరెదె. కిసి వడ్డితయ్ గే జో మాన్సు నేనె.

28 గని జా బీ బుయ్యె తా, దస్సి జేవ్చి ఇస్టుమ్క మెలి రితి జియ గజ్జల్ జా వడ్డ, తొలితొ మొక్క, పడ్డె ఎన్నులు, పడ్డె పికిలి పంటొ దెయెదె.

29 జలె, పంటొ పికిలి పొది, ‘లాయితి సమయుమ్ జా అస్సె’ మెన చీన, జో మాన్సు బార్ జా లాయెదె” మెన సిస్సుల్క యేసు సంగిలన్.

సొర్పు గిడ్డ రూకు జా గెతిన్చి టాలి

(మత్త 13:31-32,34-35; లూకా 13:18-19)

30 జో అన్నె ఇసి మెలన్, “దేముడుచి రాజిమ్ కిసి జతయ్ గే తుమ్ అర్దుమ్ కెరంతి రిసా కిచ్చొ టాలి ఉచరుమ?

31 ఇసి జయెదె, బుయ్యె ఉంపిలి సొర్పు గిడ్డక జర్గు జతిన్చి రితి జయెదె. మెలె, జా గిడ్డ ఈంజ లోకుమ్చ గిడ్డల్ ఎత్కిచి కంట ఇదిలిసి తిలె కి, ఉంపిలె, గజ్జల్ జా వడ్డిలి మెలె,

32 రోన్తె గల్లి మొక్కల్ ఎత్కిచి కంట వెల్లో జా, జా మొక్కచ కొమ్మల్ వడ్డిలె, జా రూక్చ కొమ్మల్చి నీడతె

ఆగాసుమచ పిట్టల్ జోవయించ గూడల్ బంద చెంగిల్ తంక జయెదె” మెన యేసు బోదన కెర్లన్.

33 ఒగ్గర్ టాలివొ సంగయ్ యేసు ప్రజల్ కనుబుమ్ కబుర్ బోదన కెర్లన్, జేవ్ సూనుక అర్దుమ్ కెరనుక తెరితి రితి.

34 టాలివొ నెంతె జోవయింక సికడ్డె నాయ్. గని ప్రజల్ నెంజిలి పొది, జోచ సొంత సిస్సుల్ కయ్ అర్దుమ్ ఎత్కి సికడ్డె తిలన్.

35 జా దీసి సాంజ్ జతికయ్, “సముద్రుమ్ జిన ఒత్తల్ తొ గెచ్చుమ,” మెన సిస్సుల్ కయ్ యేసు సంగిలన్.

36 బెర తిల జనాబ్ క సిస్సుల్ ముల దా కెర, యేసు అగ్గె తెంతో వెన తిలి దోనితె వెగ కెర, జోవయింతెన్ గాడు ఒత్తల్ తొ గెచ్చుక మెన దోని జినవుక దెర్ల. అన్నె సగుమ్ దోనివొ కి జో తిలి దోని తెన్ తిల.

37 జలె, యేసు దోనితె గెతె తతికయ్, వాదు ఒగ్గర్ కెర్తికయ్, కెర్లల్ దోనితె పెట్టి జా డేవిత్ తిలి రిసా, దోనితె పాని బెరితె తిలి.

38 ఇసి జతె తిలె కి, యేసు దోనితెచి వడ్డెచి బల్లయ్ నిజ తిలన్. నిజ తతికయ్, సిస్సుల్ బమ్మజా, గురుబాబు, అమ్ మొర్లె తుక బాద నాయ్ గె? మెన కేక్ గల, జోక ఉట్టయ్ల.

39 జో ఉట్ట, వాదుక గోల కెర, “సేంతుమ్ జా తుక్లె తా” మెన సముద్రుమ్ క సంగితికయ్, వాదు ముల దిలి, చి ఎత్కి అన్నె సేంతుమ్ జా గెలి.

ఇసి సేంతుమ్ జతికయ్,

40 జేవ్ సిస్సుల్ కయ్ యేసు, “కిచ్చొక బితను? అంచి రిసా తుమ్ క ఇదిల్ కి నముకుమ్ నాయ్ గె?” మెన సంగితికయ్,

41 జేవ్ ఎత్కిజిన్ బియఁ గెచ్చ, ఎక్కిలోక ఎక్కిలో “ఈంజొ కొన్సొ జయెదె? వాదు సముద్రుమ్ కి ఇన్నెచి కోడ్ రితి కెర్తతి!” మెన ఆచారిమ్ జా లట్టబనుక దెర్ల.

5

బూతల్ దెర్లొసాక యేసు చెంగిల్ కెర్లిసి (మత్త 8:28-34; లూకా 8:26-39)

1 యేసు జోచ సిస్సుల్ తెన్ సముద్రుమ్ జిన కెర, ఒత్త తిలి *గెరాసేనుల్ చి ప్రాంతుమ్ తె పావిల.

2 యేసు దోని తెంతో ఉత్తిర్లి బేగి, బూతుమ్ దెర్లొ మాన్సు ఎక్కిలో మెన్నెల తెంతో బార్ జా, జోక దస్సుల్ జలో.

3 జో మాన్సు మెన్నెలె జితె తిలొ. జోక బూతల్ దెర్లి రిసా, గొల్పుల్ తెన్ కి జోక కో అన్నె బందుక నెత్తిర్ల.

4 ఒగ్గర్ దప్పలు జోచ అత్తో చట్టొక గొల్పుల్ తెన్ మాన్సుల్ అగ్గె బంద తిల, గని కెత్తి నుట్టు జవున్, కెడ్డి డిట్టుమ్ బంద తిలె కి, అత్తోచ గొల్పుల్ కుట్టవుక, చట్టొచ గొల్పుల్ గండల్ కెరుక, దస్సి జతె తిలొ. జోక అన్నె ముద్దొ కెరుక కో కి నెత్తిర్ల.

5 జో రాతి మెద్దెనె మెన్నెలె డొంగ్రలె బుల బుల, కెడ్డొడి తెదొడి ఒర్న, జోక జొయ్యి పత్తల్ తెన్ పెటన, బాద కెరంతె తిలన్.

6 జలె, జో దూరి తెంతో యేసుక దెక, నిగ జా, నెర్ను సేడ యేసుక జొకర,

7 “ఓ యేసుప్రబు, ఎత్కిచి ఉప్పిరి తిలొ దేముడుచొ పుత్తుసి, తుయి. అంచి తెన్ తుక కిచ్చొ కామ్? అంక అల్లర్ నే కెర్తి రితి దేముడుచి నావ్ తెన్ ఒట్టు గలను.” మెన గట్టిజ కేకుల్ గలుక దెర్లొ.

8 కిచ్చొక దస్సి జలొ మెలె, “ఓ బూతుమ్, ఈంజొ మాన్సు తెంతో బార్ జా ముల దేను!” మెన యేసు సంగ తిలొ.

9 జలె, యేసు జో బూతుమ్ క అన్నె, “తుచి నావ్ కిచ్చొ?” మెన పుసిలన్, చి జో యేసుక “అంచి నావ్ ‘నయన్యమ్’. ఎత్తివాల్ జిన్ బూతల్ అస్సుమ్” మెన సంగ,

10 “అమ్ క ఈంజ దేసిమ్ తెంతో ఉదడ గెలు న్నాయ్.” మెన జో బూతుమ్ యేసుక బతిమాల్పా జా సంగిలన్.

11 జలె, జా మెట్టయ్ వెల్లి మంద అండ్రులు కతె తిల.

12 చి “ఆదె, జేవ్ అండ్రుల్ క అమ్ దెర్లి రితి సెలవ్ దా, అమ్ క జోవయింతె తెద్రవు” మెన యేసుక జేవ్ బూతల్ బతిమాల్పా జా సంగిల.

13 దస్సి జతికయ్, యేసు సెలవ్ దిలన్. సెలవ్ దెతికయ్, జేవ్ బూతల్ బార్ జా జో మాన్సుక ముల దా, జేవ్ అండ్రుల్ చి పెట్టి పెసిల, చి జేవ్ పాసి పాసి దొన్ని వెయిలు బోడియొ అండ్రులు బమ్మజా, ఒత్తచి గాటిక నిగ ఉత్త గెచ్చ, గడ్డె సేడ డుజ మొర గెల.

14 జేవ్ అండ్రుల్ దస్సి జతికయి, మంద రకితన బమ్మ జా ఉట్ట నిగ, పట్టుమ్ తె, ఒండి ప్రాంతుమ్ తె సూనయ్ల, చి జర్గు జలిసి దెకుక మెన, ప్రజల్ ఎత్కి బార్ జల.

15 జేవ్ ప్రజల్ ఎత్కి యేసుతె జా, ఒగ్గర్ బూతల్ దెర తిలొ జో వెర్లి జా తిలొసా అప్పె చెంగిల్ బుద్ది జా పాలల్ గలన ఒత్త వెన తిలిసి దెక, బియఁ గెల.

16 జో చెంగిల్ జలిసి జర్గు జలి పొది సొంత దెక తిల మాన్సుల్, జలె, జో బూతల్ దెర వెర్లి జా తిలొసాక చి జేవ్ అండ్రుల్ క జర్గు జలిసి ఎత్కి పిమ్మట్ అయ్లసక జేవ్ సాచి సంగిల.

17 ఒత్తచ మాన్సుల్ ఎత్కిజిన్ “అమ్ చి ప్రాంతుమ్ ముల దా ఉట్ట గొ” మెన యేసుక బతిమాల్పా జా సంగిల.

18 పడ్డె యేసు, సిస్సుల్, ఉట్ట గెచ్చుక మెన దోనితె తతికయ్, బూతల్ అగ్గె దెర తిలొ జో మాన్సు పట్టి జా, “ఆవ్ కి తుమ్ చి తెన్ బెద జెంక అంక సెలవ్ దే.” మెన బతిమాల్పా జా సంగిలన్.

19 గని యేసు దస్సి సెలవ్ నే దెతె, జోక, “పోని, తుయి గెరి గెచ్చ తుచ సొంత మాన్సుల్ క, † ప్రబు తుక

* 5:1 5:1 గెరాసేనులుక ‘గదరేసులు’ కి సగుమ్ తె రెగ్ల తవుల. మత్తయి 8:28 తె ‘గదరేసులు’ మెన రెగ్ల అస్తి. † 5:19 5:19 ‘ప్రబు’ మెలె కిచ్చొ అర్దుమ్ మెలె, ‘ఎత్కిక ఏలుచ కెర్లొసా, ఎత్కిక వెల్లి జలిసా’. జా నావ్ యెహోవ దేముడు అబ్బొన్ కి సంగుల, యేసు దేముడు పుత్తున్ కి సంగుల.

కన్యారుమ్ దెక చెంగిల్ కెర ఎదివాట్ దయ కెర్లెసి నంగు” మెన సంగిలన్.

20 జో మాన్సు యేసుక ముల దా ఉట్ట గెచ్చు, యేసు జోక ఎదివాటు దయ కెర్లెన్చి రిసా దెకపొలి మెలి జా ప్రాంతుమ్తెచ పట్టల్ ఎత్తితె సూనపుక దెర్లొ. జా సూనయ్తికయ్, ఎత్తిజిన్ ఆచారిమ్ జల.

యాయారు మెలో అదికారి యేసుచి తోడు నజిలిసి (మత్త 9:18-26; లూకా 8:40-56)

21 యేసు అన్నె దోనితె వెగ గాడు అన్నె జిన్తికయ్, జోచి సుట్టునంత ఎదివాట్జిన్ జనాబ్ బెర అయ్ల. జో జా బడ్డుతె ఉత్త తతికయ్,

22 యూదుల్చి ఒత్తచి సబ గెర్చి అదికారి జలో యాయారు మెలోసా జా కెర, యేసుక దెక కెర, జోచి చట్టె సెర్ను సేడ,

23 “అంచి నాడి జోర్లొ సేడ, జియెదె గే, నాయ్ గే, దస్సి జా అస్సె. తుయి, అమ్తె జా కెర జాక చడిలెగిన, జా చెంగిల్ జా అన్నె జియెదె.” మెన బతిమాల్పా జా జో సంగితికయ్,

24 యేసు జో తెన్ బెద గెలన్. జేవ్ వట్టె గెతె తతికయ్, ఒగ్గర్ ఒగ్గర్జిన్ జనాబ్ యేసుచి పట్టి జా జోచి సుట్టునంత తా వెలపులి జతె తిల.

25 జలె, బార వెర్కుల్ తెంతో లోయి గెతి బాద తిలి తేర్బోద ఎక్కి జా జనాబ్తె అస్సె.

26 జా సైమచి రిసా చెంగిల్ కెరంతి రిసా, ఎక్కిలోచి పిమ్మట్ అన్నెక్లొ గురుతె వర్న తెన్ గెచ్చు గెచ్చు, జాక తిలి దనుమ్ ఎత్తి విక కెరవన తిలి. దస్సి కెర కెర జలెకి, జా బాద తెన్ నే చెంగిల్ జతె, ఒగ్గర్ జతె తిలి.

27 జలె, యేసుచి రిసా సూన తా, “ఆవ్ జోచ పాలుమ్ జవున్ చడితె చెంగిల్ జయిందె” మెన ఉచర,

28 యేసుచి సుట్టునంత తిలి జనాబ్చి తెడి పెన, యేసుచి పడ్డొ పాసి పాచ కెర, జోచొ పాలుమ్క చడిలి.

29 చడిలి బేగి లోయి గెతిసి బందు జలి, చి బాద గెచ్చు జివ్ చెంగిల్ జలి మెన చినన్చి.

30 యేసు మాత్తుమ్, జోచి సెక్తిక కో గే, చెంగిల్ జా అస్సి మెన చినిలి బేగి, జా జనాబ్చి నెడిమి టీవొ జా పడ్డొ పన్ల, “అంచి పాలుమ్ చడిలోసా కో?” మెన సంగిలన్.

31 జోచ సిస్సుల్ జోక, “తుచి ఉప్పిరి మాన్సుల్ వెలపెలి జలెకి, ‘అంక చడిలోసా కో?’ మెన కిచ్చొక పుసితసి?” మెన సంగిల.

32 జలె, కో చడిలన్ గే జానన్క మెన, యేసు అన్నె పన్ల దెకితికయ్,

33 జా తేర్బోద జాక జర్గు జలిసి జాన, బియఁకెర, అద్దుర్ జా, యేసుచి పురైతో సెర్ను సేడ, జర్గు జలిసి ఎత్తి సత్తిమ్ తెన్ జోక సంగిలి.

34 యేసు జాక, “ఓ పుత్తరి, అంచి ఉప్పిరి తుయి నముకుమ్ తిలి రిసా తుయి చెంగిల్ జా అస్సిసి. సేంతుమ్ తెన్ గెచ్చు, చెంగిల్ జా, చెంగిల్ తా” మెన సంగిలన్.

35 జా తేర్బోదక యేసు దస్సి సంగితె తిలి పొది, దువిన్చి రిసా యేసుతె జా తిలో అదికారిచి గెర్చ సగుమ్జిన్ జా కెర, జో అదికారిక “తుచి నాడి మొర గెచ్చు అస్సె. ఈంజొ గురుబాబుక బుకార్లె లాబుమ్ నాయ్. గురుబాబుక జా బాద పొని” మెన జోక సంగిల.

36 జలె, జేవ్ సంగిలిసి సూన నే సూన్లి రితి జా, యేసు సబగేర్చొ జో అదికారిక దెక, “జేవ్ సంగిలిన్క కాతర్ నే కెర్లె, బి నాయ్. నంపజా దయిరిమ్ తెన్ తా” మెన జోక సంగిలన్.

37 ఒత్త తెంతో పేతురు, యాకోబు, యాకోబుచొ బావొసి యోహానుక పిట్టవ, జోచి పట్టి అన్నె కో జెంక సెలవ్ నే దా కెర,

38 యేసు, జేవ్ తెన్ జో అదికారిచి గెరి పాచ కెర, ఒత్త తిలన ఏడుకుడు జా గోల జతిసి దెకిలన్.

39 జో గెరి పెన, ఒత్త తిలనక దెక, “తుమ్ గోల జా ఏడ్డును కిచ్చొక? ఈంజ బోద మొర గెచ్చె నాయ్ నిజ అస్సె.” మెన యేసు సంగిలన్.

40 దస్సి సంగితికయ్, జేవ్, జోక ఆసిల. గని యేసు జేవ్ ఎత్తిజిన్క బార్ కెర దా, నాడిచ అయ్యన్అబ్బొన్క కి, జో తెన్ అయ్ల సిస్సుల్క కి కడ ఆన, జా నాడి తిలిన్తె గెచ్చు,

41 జా నాడిచి ఆతు దెర, జాక “ఆవ్ సంగిలయ్, నాడి, ఉట్టు!” మెలి అర్దుమ్ తెన్ †“తలీతా కుమి” మెన సంగిలన్.

42 సంగిల్ బేగి, జా నాడి ఉట్ట కెర, ఇండుక దెర్లి. ఒత్త తిలన ఎత్తిజిన్ ఆచారిమ్ జా బలే ఉచర్ల.

43 పడ్డొ, జర్గు జలిన్చి రిసా కక్క సంగుక జయె నాయ్ మెన జాగర్త సంగ, “నాడిక కిచ్చొ జవున్ అన్నిమ్ దాస” మెన, జా గేర్చక యేసు సంగిలన్.

6

నజరేతు గవ్వొచ మాన్సుల్ యేసుక నే నంపజలిసి (మత్త 13:53-58; లూకా 4:16-30)

1 యేసు ఒత్త తెంతో ముల దా కెర, నజరేతు మెలి జోచి సొంత గవ్వొ ఉట్ట జెతికయ్, జోచ సిస్సుల్ జోచి పట్టి అయ్ల.

† 5:41 5:41 మాములుమ్ ప్రజల్ లట్టల్లి అరమయ్ బాస తెన్ చి కోడు, ఈంజ. దీసి జోవయింప నబ గెరలె గెచ్చు, దేముడుచి కొణొ సూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్డి రితి కెర కామ్ నే కెర్లెన్చి రిసా ఒగ్గర్ ఆగ్గల్ అవ్వొ ఉచర అస్సి. ఇన్నె, దొన్ని ఎన్నులు కోడ్డిన్క ‘కామ్’ మెన నింద కెర్తతి.

* 6:2 6:2 ఎత్తి సెన్వర్ యూదుల్క బక్తి కెర్లి సెలవ్ కడ దీసి జయెదె. జా

2 బక్తి కెర్తి సెలవ్ కడన్లి * దీసి, ఒత్తచి నబ గెరి గెచ్చు, యేసు బోదన కెరుక దెర్లన్. జో సంగిలి బోదన సూన, ఒగ్గర్జిన్ మాన్సుల్ ఆచారిమ్ జా, “ఇసి బోదన ఇన్నెక కేనె తెంతో అయ్లి? ఇన్నెక దిలి గ్యానుమ్ కీసిచి? కెర్తి అందుమ్చ వెల్లెల కమె ఇన్నెచి అత్తి జర్గు జతతి!

3 గని ఈంజో దార్చ కామ్ కెర్టోసా జయెదె, మరియచో పుత్తుసి గెద? యాకోబుక, యోసేక, యూదాక, సీమోనుక అన్నోసి జయెదె గెద? ఇన్నెచ బేన్సివో ఇన్నె అమ్చి తెన్ అస్తి గెద?” మెన యేసుచి రిసా అన్మానుమ్ జా సంప కెర్తి నాయ్.

4 జేవ్ దస్సి అన్మానుమ్ జతికయ్, “కేన్ జవున్ మాన్సు దేముడుచి కబుర్ ఆన్తోసా జలె, జోచి సొంత దేసిమ్చ మాన్సుల్, సొంత గెర్చ మాన్సుల్ జోక గవురుమ్ దెకిత్ నాయ్” మెన యేసు, జోవయించి అన్మానుమ్చి రిసా సంగిలన్.

5 ఒత్తచ మాన్సుల్చి అన్మానుమ్చి రిసా, జలె, ఒత్త యేసు కేన్ వెల్లో కమె కెరుక బెదిలన్ నాయ్. ఎక్కి సగుమ్జిన్ జబ్బు తిల మాన్సుల్క బోడి చడ చెంగిల్ కెర్లన్.

6 జా పలాన్చ మాన్సుల్చి అన్మానుమ్చి రిసా ఆచారిమ్ జా, విసారుమ్ జలన్. గని, జా ప్రాంతుమ్చ గవ్విలె బుల బుల బోదన కెర్తి తిలన్.

సిస్సుల్క దొగుల దొగులక తెద్రయ్లిసి
(మత్త 10:1,5-15; లూకా 9:1-6)

7 ఒత్త తెంతో, జేవ్ బారజిన్ సిస్సుల్క యేసు పాసి బుకారా కెర, జేవ్ దొగుల దొగులక గవ్విలె బులుక మెన తెద్రవుక దెర్లన్. తెద్రయిలి పొది, బూతల్క జేవ్ ఉడడ్డి రితి జోవయింక అదికారుమ్ దిలన్.

8 తెదోడి కిచ్చో ఆడ దిలన్ మెలె, “ప్రయానుమ్చి రిసా టెక్నొ డండో పిట్టవ, పోడి జలెకు, సెంచె జలెకు, కెరంటెచి బెల్లుచి జేబితె డబ్బుల్ జలెకు దెరన నాయ్.

9 జోడ్లు గలన, గని దొన్ని సొక్కల్ పోన. ఎక్కి సరి జతయ్” మెన సంగ.

10 అన్నె, “తుమ్ కేనె జలెకు పావెలె పొది, కేన్ గెర్చ తుమ్క టాన్ దెవుల గే, జా గావ్ తెంతో ఉట్ట గెతె ఎదక జయ్యి గెరి బన జా తా.

11 గని, కేన్ టాన్తె జలెకు తుమ్క మరియాద కెర్తి నాయ్ గే, తుమ్చి కబుర్ సూనుక ఎద్దె ఇస్టుమ్ జతి నాయ్ గే, తుమ్ ఒత్త తెంతో ఉట్ట గెచ్చు. ఉట్ట గెతె పొది, ‘జేవ్ దస్సి జలి రిసా, జేవ్ దేముడుచ నెంజితి’ మెలి రితి గుర్తుక తుమ్చ చట్టోచి దూడి పంప్త గెలన” మెన యేసు సంగిలన్.

12 యేసు దస్సి అదికారుమ్ దా బులుక తెద్రయ్తికయ్, జేవ్ సిస్సుల్ దొగుల, దొగుల బార్ జా, “తుమ్ కెర్ల పాపల్చి రిసా పెట్టి దుకుమ్ జా పాపుమ్ ముల్లి బుద్ది జా” మెన బోదన కెర బుల్లె తిల.

13 పడ్డో, మాన్సుల్క దెర్ల ఒగ్గర్ బూతల్క ఉడడ గెల, చి ఒగ్గర్జిన్ జబ్బుల్ తిలనక బోడి తేల్ సువ దా యేసుచి నావ్ తెన్ జోవయింక చెంగిల్ కెర్ల.

హేరోదు రానో యేసుచి రిసా ఉచర్లిసి
(మత్త 14:1-12; లూకా 9:7-9)

14 యేసుచ కమెచి రిసా హేరోదు మెలో జా గలిలయ ప్రాంతుమ్క ఏలుప కెర్టో రానో కి నూన్లొ. జా ఒండి దేసిమి యేసుచి రిసా ఎత్కిజిన్ సూన తిల. సగుమ్జిన్ జోక “బాప్తిసుమ్ దెతో యోహాను అన్నె జీవ్ జా అన్నె, కిచ్చొగె, చి ఇన వెల్లో కమె కెర్తి సెక్తి జోచి పెట్టి అన్నె” మెంతె తిల.

15 అన్నె సగుమ్జిన్, “ఏలీయా పూర్గుమ్చో జా తయెదె” మెంతె తిల. అన్నె సగుమ్జిన్, “దేముడుచ కబుర్లు పూర్గుమ్ సంగిలో ఎక్కిలో రితి జయెదె. దసాచో జా తయెదె” మెంతె తిల.

16 హేరోదు, మాత్రుమ్, సూన, కిచ్చొ ఉచర్లన్ మెలె, “ఆవ్ బోడి గండ కెరవ తిలో యోహాను జా తయెదె. అన్నె జీవ్ జా అన్నె, కిచ్చొగె” మెన బియఁ గెలో.

బాప్తిసుమ్ దెతె తిలో యోహానుక హేరోదు మార తిలిసి

17 హేరోదు రానో కిచ్చొక దస్సి బిలన్ మెలె, జోచో పిలివ్ మెలో బావొచి హేరోదియ మెలి తేర్తిక ఆనన హేరోదు జాక పెండ్లి జా తిలో.

18 దస్సి, అన్నెక్లొచి తేర్తిక పెండ్లి జతికయ్, యోహాను హేరోదుక “తుచో బావొదిసి తేర్తిక తుయి తియనుక నాయిమ్ నాయ్” మెన సంగితె తిలన్. జాక, హేరోదు యోహానుక జేలి కెరవ, జేల్తె గల బందవడ తిలన్.

19 జేల్తె గల తతికయ్, యోహానుచి ఉప్పిరి హేరోదియ కుస్సిదుమ్ తా, జోక మారుక ఆన జా అన్నె. గని నెత్తె. కిచ్చొక మెలె,

20 యోహాను, దేముడుచో సత్తిమ్ సుదొ, నీతి సుదొ, మెన హేరోదు జాన కెర, జోక కిచ్చొ ప్రమాదుమ్ నే జతి రితి రకవ అన్నె. అన్నె, యోహాను సంగితి తీర్పుక హేరోదు బాద సిడ్లె కి, రోజుక సంతోసుమ్ తెన్ జోచి బోదన సూన్తె తిలన్.

21 జలె, జా మదెనె జా తేర్బోద యోహానుక కిచ్చొ కెరుక నెత్తిరె కి, ఆకర్క జోక మొరవుక అవ్కాసుమ్ అయ్లి. హేరోదుచి జెర్మున్ పండుగు దీసి జెతికయ్, జోచ మంత్రివొక, వెల్లెల మాన్సుల్క, చి గలిలయ ప్రాంతుమ్చ వెల్లెల మాన్సుల్ ఎత్కిజిన్క వెల్లి విందుతె రానో బుకార్లొ.

22 జా విందు కెర్లి పొది, హేరోదియ మెలి జా తేర్బోదచి దువిసి విందుతె బుకార్లనచి నెడిమి జా నచిలి. హేరోదు, బుకార్లన, ఎత్కిజిన్ జా నచిలిసి మెన్ గెల, చి హేరోదు జా నాడిక, “కిచ్చొ ఇస్టుమ్ జస్తె గే అంక సంగు చి జయ్యి దెయిందె” మెన అన్నె,

23 “తుయి కిచ్చొ నజీలె కి, అంచి రాజిమ్తె ఏక్ అర వాట నజీలె కి, జయ్యి దెయిందె” మెన ఒట్టు గలన్లన్.

24 జలె, జా నాడి బార్ జా, అయ్యన్తె గెచ్చు, “అవ్ కిచ్చో నజుక?” మెన పుసితికయ్, అయ్యసి, “బాప్తిసుమ్ దెతో యోహానుచి బోడి అంక దే మెన సంగు” మెన దువిన్క సంగిలి.

25 సంగిలి బేగి, జా నాడి హోదుతె నిగ జా, “బాప్తిసుమ్ దెతో యోహానుచి బోడి ఏక్ పలెరుమ్తె అంక దే” మెన సంగిలి.

26 నాడి ఇసి సంగితికయ్, జో రానో బలె దుకుమ్ జలెకి, జో గలన తిలి ఒట్టుచి రిసా, విందుతె బుకార్లసచి మొక్కె జాక సంగిలిసి పిట్టపుక నెన కెర,

27 బేగి, “జోచి బోడి ఆను” మెన జమాను ఎక్కిలోక తెద్రయ్లన్. జో జమాను గెచ్చు, జేల్తె యోహానుచి బోడి గండ కెర,

28 పల్లెరుమ్తె ఆన, జా నాడిక దెతికయ్, జా నాడి అయ్యన్క నా దిలి.

29 జలె, యోహానుచ సిస్సుల్ నూన కెర, జా కెర, పీనుమ్ నజన ఉక్కుల నా, మెన్నె రోవిల.

బారజిన్ సిస్సుల్ యేసుతె అన్నె ఉట్ట అయ్లిసి (మత్త 14:13-21; లూకా 9:10-17; యోహా 6:1-14)

30 యేసు తెద్రయ్ల జోచ బారజిన్ సిస్సుల్ బోదన కెర కెర మాన్సుల్క చెంగిల్ కెర కెర, జోతె అన్నె బుల జా, జేవ్ కెర తిలిసి, బోదన కెర తిలిసి ఎత్తి జోక సంగిల.

31 జలె, ఒగ్గర్ ఒగ్గర్జిన్ మాన్సుల్ జోవయింతె జెంక గెచ్చుక జతె తిలి రిసా, అన్నిమ్ కంక కి పుండితి సమయుమ్ దొర్కు నెంజితికయ్, యేసు సిస్సుల్క “జోమ్మ, తుమ్ గడియ పుండితి రిసా, కేనెగె, మాన్సుల్ నెంజిలి టాన్తె బెద గెచ్చుమ” మెన సంగిలన్.

32 జేవ్ బార్ జా దోనితె వెగ, అన్నె కోయి నెంజిలి టాన్తె గెచ్చుక బార్ జల.

33 గని, జేవ్ బార్ జా ఉట్ట గెలిసి ఒగ్గర్జిన్ దెక, జోవయింక చిన, వేర వేర పట్టులె గవ్విలె తెంతో బార్ జా నిగ, నిగ జోవయించి తొల్లితో జేవ్ గెతె తిలిన్తె పాచిల.

పాచ్ వెయిల్జిన్ మాన్సుల్క యేసు అన్నిమ్ దిలిసి

34 యేసు జా ఒడ్డుతె పాచ, దోనితె తెంతో ఉత్త, ఒగ్గర్ ఒగ్గర్జిన్ జనాబ్ బెర అయ్లిసి దెక, ‘గొప్పడు నెంజిల మెండల్ కిసి జా కేనె తెల్లె ఒత్తలి ఉట్ట గెతె తవుల గే దస్సి, ఈంజేవ్ ప్రెజల్ అస్తి’ మెన యేసు కన్యారుమ్ జా, ఈంజ ఎత్తి బోదన జోవయింక సికడుక దెర్లన్.

35 సాంజ్ జంక దెర్లికయ్, యేసుచ సిస్సుల్ జోతె జా కెర, “ఈంజ డొంగుర్ దేసిమ్. పొద్దు ఒగ్గర్ జలి, తొక్కి అస్సె.

† 6:37 6:37 నెంజిలె, డొన్ పుంజొజిన్ మాన్సుల్క ఏక్ దీనిచి కూలి డబ్బుల్ దెతి ఎదిలి డబ్బుల్. ‡ 6:44 6:44 తేర్బోదల్ బాలబోదల్క కి తిల, గని మత్తయి 14:21తె రెగిడ్లి రితి, తేర్బోదల్ బాలబోదల్క ఒత్త లెక్క కెర్తి నాయ్.

36 ఈంజేవ్ ప్రెజల్ ఎత్తి. ఈంజ పల్లల్చ గవ్విలె గెచ్చు, కిచ్చో జవున్ అన్నిమ్ గెనన్తి రిసా ఇన్నెక తెద్రవు.” మెన సంగిల.

37 ఇసి సంగితికయ్, యేసు సిస్సుల్క కిచ్చో జబాబ్ దిలన్ మెలె, “తుమ్ జోవయింక కిచ్చో జవున్ అన్నిమ్ దాస”. ఇసి యేసు సంగితికయ్, జేవ్ జోక, “జోవయింక అన్నిమ్ దెంక మెన † దొన్ పుంజొ వెండ్లుచ పోడియె గెనుక ఆమ్ గెచ్చుక గే?” మెంతికయ్,

38 యేసు జోవయింక, “తుమ్తె కెత్తి పోడియె అస్తి గే, గెచ్చు దెక” మెలన్, చి జేవ్ గెచ్చు దెక జా కెర, “పాచ్ పోడియె చి దొన్ని మొన్న అస్తి” మెన జోక సంగిల.

39 జో, జేవ్ జనాబ్ దెక, జోవయింక “తుమ్ ఎత్తిజిన్ వర్చువర్చల్ తెన్ బుయ్యె వెన” మెన జా చివ్వర్ బుయ్యె వెనడ్లన్.

40 జాకయ్ జేవ్ ఎక్కెక్ వర్చల్తె పుంజెక్ జిన్, యాబయ్జిన్ వెసితికయ్,

41 యేసు జేవ్ పాచ్ పోడియె దొన్ని మొన్న దెర, ఆగాసుమ్ పక్క దెక, ‘ఈంజ తూయి దిలది’ మెన దేముడు జలో అబ్బొన్క జోకర కెర, జేవ్ పోడియె మోడ కెర, “ఎత్తిజిన్క వంట దాస” మెన సిస్సుల్చి అత్తి సార్ప కెర దా, జేవ్ దొన్ని మొన్నక కి ఎత్తిజిన్క వంట దిలన్.

42 జేవ్ జనాబ్ ఎత్తిజిన్ పేట్ బెర్తు కతికయ్,

43 సేంసిల పోడి గండలు, మొన్న గండలు బార గంపల్తె సిస్సుల్ గుడ్డ బెరయ్ల.

44 జా దీసి పోడియె కయ్లన, పాచ్ వెయిల్జిన్ † మున్నబోదల్ జల.

యేసు పానిచి ఉప్పిరి ఇండిలిసి వాదుక సేంతుమ్ కెర్లిసి (మత్త 14:22-33; యోహా 6:16-21)

45 తెదొడి బేగి, యేసు ప్రెజల్క నే తెద్రయ్తె తొలితో, “తుమ్ దోని వెగ అంచి కంట తొలితో గాడు జిన, బేత్పుయిదా గవ్వి గెచ్చు” మెన సిస్సుల్క తెద్రవ దా,

46 జేవ్ ప్రెజల్తె సెలవ్ నజన తెద్రవ దా, ప్రార్దన కెర్తి రిసా యేసు డొంగై వెగిలన్.

47 ఒగ్గర్ సాంజ్ జతికయ్, సిస్సుల్ తిలి జా దోని సముద్దుమ్ రితి జా గాడుచి మదెనె పాచ తతికయ్, యేసు ఎక్కిలో గట్టుతె తా,

48 కిచ్చో దెకిలో మెలె, దోనిక వాదు పెలయ్తె తిలి రిసా, దోని ఇండవుక సిస్సుల్ కస్టుమ్ జతె అస్తి.

జలె, అందరె, పాసి పాసి కుకుడో వాసెనె, యేసు జా సముద్దుమ్చి ఉప్పిరి ఇండ జా, సిస్సుల్చి పాసి పాచ అయ్లో. జోవయింక జిన్తె ఉట్ట గెచ్చుక మెనన్లె.

49 గని, పానిచి ఉప్పిరి జో ఇండ గెతిసి సిస్సుల్ దెక, “డుంబో, కిచ్చొగె” మెన ఉచర బమ్మ జా ఒర్చిల.

50 జేవ్ ఎత్కిజిన్ జోక దెక దస్సి పంబ్ర జలి బేగి, జో, “దయరిమ్ జా. ఆవ్వి, తుమ్ బియఁ నాయ్” మెన జోవయింక సంగ

51 దోనితె జోవయించి నెడిమి వెగితికయ్, వాదు ముల దిలి. జాచి రిసా జేవ్క జెవ్వి ఆచారిమ్ జా ఒగ్గర్ బమ్మ జల.

52 గని పోడియొక యేసు జర్గు కెర్లిసి అర్దుమ్ నే కెరన తిలి రిసా, జో కొన్సొగె, జోచి పెట్టి బేడు బందెలి జోచి సెక్తి అదికారుమ్ కేనెచి గే అర్దుమ్ నే కెరంతె, బలే ఆచారిమ్ తెన్ తిల.

అన్నె ఒగ్గర్జిన్క యేసు చెంగిల్ కెర్లిసి (మత్త 14:34-36)

53 జేవ్ దోనితె గాడు జిన గెన్నేసరెతు ప్రాంతుమ్తె పాచ దోని ఒడ్డుతె బంద కెర

54 దోని తెంతో ఉత్తిర్లి బేగి, ఒత్త తిల మాన్సుల్ జోక చిన కెర,

55 జబ్బు తిల మాన్సుల్ జా ఒండి పలాన్తె కేనె తిలె ఒత్త గెచ్చు, జేవ్ నిజ తిలి అంతుర్నొ తెన్ ఉక్కుల కెర యేసు కేనె అస్సి గే నూన్లె, ఒత్తయ్ వయ్ ఆన్తె తిల.

56 జా ప్రాంతుమ్చ పట్టలె గెవ్విలె బయిలె, కేన్ జలెకు టాన్తె జో అయ్లో గే, బాద తిలసక కడ ఆన, సంతవీదులె జలెకు ఎంగ్డవ దా, యేసుచో పాలుమ్చి అంచు జలెకు జేవ్ చడుక మెన బతిమాల్పా జా సెలవ్ నజన్తె తిల. కో జలెకు చడిల గే, జేవ్ చెంగిల్ జల.

7

అలవాట్లు చి రిసా వెల్లెల మాన్సుల్క యేసు సంగిలి తీర్పు (మత్త 15:1-20)

1 *యెరూసలేమ్ పట్టుమ్ తెంతో సగుమ్జిన్, మోసే తెన్ దేముడు దిలి ఆగ్గుల్ సికడ్డన కి పరిసయ్యుల్ సగుమ్జిన్చి ఒత్త జా తా, యేసుతె బెద జా కెర,

2 జోచ సిస్సుల్తె సగుమ్జిన్ గర్చ అత్తో తెన్, మెలె నే దొవన్తె, అన్నిమ్ కెర్లిసి దెక కెర, బమ్మ జల.

3 కిచ్చొక మెలె, పరిసయ్యుల్ కి †యూదుల్ ఎత్కిజిన్ కి ‘పూర్గుమ్చ వెల్లెల మాన్సుల్ సికయ్లిసి కెరుకయ్’ మెన, గుర్తు అత్తో దొవన్లెకయ్ కవుల, నెంజిలె నాయ్.

4 అన్నె, సంతయ్ తెంతో గెరి అయ్లె, ‘నే దొవన్లె గారు’ మెన, ‡పాని చించన్లెకయి కవుల, నెంజిలె నాయ్. దస్సి, గిన్నలు, గేడివో, కంచు సామన్, ఈంజ జా ఎత్కి కెయఁక దొవుక గే, కిసి దొవుక గే, కిచ్చొ కిచ్చొ అలవాట్లు రితి కెరుక పూర్గుమ్చ జోవయించ వెల్లెల మాన్సుల్ సికడ అస్తి.

* 7:17:1 ఎత్కి అదికారుమ్ తిలో దేముడుచి గుడి తిలి పట్టుమ్, జా. † 7:3 7:3 ‘అంచయ్ ప్రెజల్ జతు’ మెన ఎత్కి అదికారుమ్ తిలో దేముడు పూర్గుమ్ నిసాన్లె ప్రెజల్. ‡ 7:4 7:4 నెంజిలె, సంతయ్ తెంతో ఆన్లి సామన్ దొవలెకయ్ కవుల.

5 జాచి రిసా, జేవ్ పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన యేసుక, “తుచ సిస్సుల్ కిచ్చొక వెల్లెల మాన్సుల్ సంగిలి రితి ఇండుక ముల దా, గర్చ అత్తో తెన్ అన్నిమ్ కతతి?” మెన పుసిల.

6 జలె, యేసు జోవయింక, “తుమ్ ఉప్రమెన్సుచొచి రిసా యెనయా పూర్గుమ్చొచి అత్తి దేముడు సంగిలి కోడు సత్తిమ్.

ఈంజ ప్రెజల్ అంక గవురుమ్ కెర్త రిత కొడొ సంగిలే కి, జోవయించి పెట్టి అంక దూరి అస్తి.

7 మాన్సుల్ అవ్వి ఉచర్ల కొడొక ‘దేముడు సంగిలస’ మెన ప్రెజల్క సికడ, అంక ఆరిక జొకర్తతి”

మెన తుమ్చి రిసాచి కోడు.

8 “తూమ్, దేముడు దిలి ఆగ్గు ముల దా, మాన్సు అవ్వి ఉచర్లిసి ఎక్కి మెన్సు నిదానుమ్ కెర్తసు” మెన జేవ్ వెల్లెల మాన్సుల్క యేసు సంగ,

9 జోవయింక అన్నె, “తుమ్చ పూర్గుమ్చ అవ్వి సికయ్ల అలవాట్లు నిదానుమ్ కెర్తి రిసా దేముడుచి ఆగ్గు రితి ఇండుక ముల అస్సున్. కిస మాన్సుల్, తూమ్!

10 తుమ్ ములిలి కేన్ ఆగ్గుచి రిసా ఆవ్ అప్పె సంగితసి మెలె,

తుమ్చ అయ్యుద్అబ్బొద్క చెంగిల్ దెక, గవురుమ్ కెర” మెన, పిమ్మట్,

“అయ్యున్క జలెకు, అబ్బొన్క జలెకు, కో దూసుప కెరుల గే, కచితుమ్ జోక మొర్నుచి సిచ్చ దెంక”

మెన మోసేచి అత్తి రెగిడ్డి కోడు అస్సి.

11 “గని, తుమ్ జలె ఇన్నె మెంతసు, అంచితె తుమ్క కిచ్చొ కలుగు జతి గే, జయ్యి ‘కొర్బాను’ మెలె ‘ప్రబుక దెంక ఒప్పన అస్సి’, మెన కో పుత్తుసి అయ్యున్అబ్బొన్క సంగిలెగిన,

12 ‘జా దీసి తెంతో, జో మాన్సుచి పూచి నాయ్’ తుమ్ సంగిల్ రితి జా, జో అయ్యున్అబ్బొన్క దెంక తిలి సాయిమ్ జో మాన్సు దెంక తుమ్ ఒప్పున్ నాయ్.

13 తుమ్ దస్సి జా, తుమ్చ పూర్గుమ్చ అవ్వి ఉచర్ల అలవాట్లు ప్రెజల్ కెర్తు మెన, ‘దేముడు సంగిలి కోడుక అదికారుమ్ నాయ్’ మెన సికడ్డి రితి జా, తుమ్ దేముడుచి కోడు మార్పుప కెర్తి రితి కెర్తసు. అన్నె దస్సు మాయల్ ఒగ్గర్ కెర్తసు.” మెన, జేవ్ వెల్లెల మాన్సుల్క యేసు గోల కెర్లన్.

మాన్సుక గార్ కెర్లిసి కిచ్చొ జయెదె గే యేసు సంగిలిసి

14 తెదొడి యేసు ప్రెజల్క అన్నె పాసి బుకారా కెర, జోవయింక ఇస్సె మెలన్. ఆవ్ సంగితి కోడు తుమ్ ఎత్కిజిన్ ఏక్ కోడు నూన అర్దుమ్ కెరన.

15 బయిలె తెంతో మాన్సుచి పేట్ తెడి కిచ్చొ వస్తువ పెసిలె, జయ్యి జో మాన్సుక గార్ కెరుక నెత్తె. గని, మాన్సుచి పెట్టి తిలి బుద్ది గార్ జలె, జయ్యి జో మాన్సుక గార్ కెరెదె.

16 కీసూన్త కంగ్గొ కక్క తిలె, సరిగా సూన్సు!

17 జేవ్ ప్రెజల్క ముల దా గెరి గెచ్చు తెడి పెసిలి పొది, జోచ సిస్సుల్ ఈంజ టాలిచి రిసొ పుసిల.

18 యేసు జోవయింక, “తూమ్ కి అర్దుమ్ నెంతె అస్సున్ గే? మాన్సు కయ్లె, బయిలె తెంతో జో మాన్సుచి పెట్టి కిచ్చొ పెస తయెదె గే, జో మాన్సుక గార్ కెరుక నెత్తె మెన అర్దుమ్ కెరన్సు నాయ్?”

19 ఈందె, జోచి పేట్ వాట్ గెచ్చు, అన్నె బార్ జయెదె. జోచి పెట్టితె పెసె నాయ్! జాకయ్, జోక గార్ కెరె నాయ్” మెన సంగిలన్. ఇసి మెన యేసు సంగిలినచి అర్దుమ్ కిచ్చొ మెలె, “కిచ్చొ కి కంక గారు మెనుక నెంజె. కిచ్చొ కి కంక జయెదె” మెన సెలవ్ సంగిల్ రితి జతయ్.

20 తెదొడి యేసు సిస్సుల్క “మాన్సుచి పెట్టితె మొదొల్ జా, కిచ్చొ కిచ్చొ బార్ జయెదె, జయ్యి జోక గార్ కెరెదె.

21 మెలె, గర్చ ఉద్దెసుమ్లు, లంజెబుద్ది, చోరు బుద్ది, అత్య కెర్తి బుద్ది, లంజెకమొ,

22 అన్నె మాన్సుల్చి ఆస్తిక ఆస జతిసి, పాపుమ్ ఇండితి ఆస, మోసిమ్బుద్ది, గోసలు, మాన్సుల్క దూసుప కెర్తిసి, గవురుమ్ ఉచరంతిసి, కామ్క నెంజిత కొడె, దసచ ఎత్తి, మాన్సుచి తెడి జోచి పెట్టితె మొదొల్ జతతి.

23 గర్చ బుద్దుల్ ఎత్తి మాన్సుచి పేట్ తెడి మొదొల్ జా బార్ జతతి. దసచయ్ మాన్సుక గార్ కెర్తి” మెన అన్నె సంగిలన్.

తేర్బోదచి దువినక యేసు చెంగిల్ కెర్తిసి (మత్త 15:21-28)

24 యేసు ఒత్త తెంతో బార్ జా, తూరు చి సీదోసు మెల పట్నల్చి ప్రాంతుమ్తె ఉట్ట గెచ్చు, ఏక్ గెరి గెలన్. జో ఒత్త తిలి రితి కో కి సూనుక జో నెసిలె కి, జో తిలిసి లుంకడుక నెత్తిర్ల,

25 చి బేగి, బూతుమ్ దెర్లి ఇదిలిన్ దువిసి తిలి ఏక్ తేర్బోద, యేసుచి రిసొ సూన కెర, జోతె జా కెర, జోచి చట్టె సెర్ను సేడ్డి.

26 జా తేర్బోద కేనెచి మెలె, జా *సిరియ దేసిమ్చి జా పెనికయ ప్రాంతుమ్తె జెర్మిలి, గ్రికు మెలి వేర దేసిమ్చి మాన్సు. జలె, జా తేర్బోద యేసుతె జా కెర, “అంచి దూక దెర్లి బూతుమ్క ఉదడ గెల్తె గె?” మెన యేసుక బతిమాల్పా జా సంగితికయ్,

27 జో జాక,† “సొంత బోదల్ తొలితో కతు. బోదల్చి వంతు అన్నిమ్ గుడ్డ కెర, సూనకూనర్లు కతి రితి గల దెంక చెంగిల్ నాయ్” మెన సంగిలన్.

28 జా జోక, “నిజామి, ప్రబు, గని సూనకూనర్లు కి అన్నిమ్ కెర్తి బల్లచి ఎట్టొ రక తా, బోదల్ సేడయ్లి ఉస్టా కవుల” మెన సంగిలి.

29 ఇసి సంగితికయ్, తెదొడి యేసు జాక, “ఈంజ తుయి సంగిలి తుచి నముకుమ్చి రిసొ, సేతుమ్ తెన్ గో. బూతుమ్ తుచి దువిద్క ముల దా గెచ్చు అస్సె” మెన సంగిలన్.

30 ఇసి సంగితికయ్, జా తేర్బోద గెరి గెచ్చు కిచ్చొ దెకిలి మెలె, బూతుమ్ ముల దా గెలి రిసొ, జా నాడి మంచుమ్తె నిజ తిలిసి.

తోత్తో జలొ బోయ్ రొక యేసు చెంగిల్ కెర్తిసి

31 ఒత్త తెంతో యేసు తూరు ప్రాంతుమ్ ముల దా సీదోసు ప్రాంతుమ్ వాట్ గెచ్చు, దెకపొలి ప్రాంతుమ్ వాట్ కి గెచ్చు. గలిలయ ప్రాంతుమ్చి సముద్రుమ్ రితి గాడు పక్క అన్నె ఉట్ట అయ్లన్.

32 ఉట్ట జెతికయ్, బోయ్ రొ తిలొ తోత్తో మాన్సు ఎక్కిలొక మాన్సుల్ యేసుతె కడ ఆన, “ఇన్నెక చడ చెంగిల్ కెర్తి గే?” మెన యేసుక బతిమాల్పా జా పుసిల.

33 జలె, ప్రెజల్తె తెంతో యేసు జోక ఎక్కిలొక పక్క కడన, జో మాన్సుచ కంగ్గొతె ఏక్ ఏక్ ఈంటివొ గల దా తుంక్ర, జో తోత్తోచి జిబు చడ జోచి సొంత లాడు దెరవ దా,

34 ఆగాసుమ్ పక్క దెక, కన్యారుమ్ తెన్ పెట్టి ఏడ్డి రితి జా, ‘ఉర్ది జా’ మెలి అర్దుమ్ తెన్, ఒత్తచి బాస తెన్ “ఎప్పాతా” మెన సంగ యేసు సంగిలన్.

35 యేసు దస్సి సంగితికయ్, జో బోయ్ రొచ కంగ్గొ ఉర్ది జలి చి చెంగిల్ జలన్, చి జిబు బులుక దెర్తికయ్, సొస్టుమ్ లట్టబుక దెర్లన్.

36 తెదొడి, “కక్క సంగ నాయ్” మెన ఒత్త తిల మాన్సుల్క యేసు సంగిలన్. గని “సంగుక పొన” మెన జో కెత్తి సుట్టు సంగిలే కి, జేవ్ అన్నె ఒగ్గర్ జా కేన్ తెన్ సంగితె తిల.

37 జర్చు జలిన్చి రిసొ ఎదివాట్ ఆచారిమ్ జా, యేసుచి రిసొ “ఈంజొ కిచ్చొ కెర్లె కి జెయిమ్ జతయ్. బోయ్ రొ మాన్సుల్ సూన్తి రితి కెరుక జానె, తోత్త మాన్సుల్ సొస్టుమ్ లట్టబ్బి రితి కెరుక జానె. ఎత్తి చెంగిల్ కెర అస్సె” మెన ఎత్తిజిన్ సంగితె తిల.

8

చెత్తర్ వెయిల్ జిన్క యేసు అన్నిమ్ దిలిసి (మత్త 15:32-39)

§ 7:16 7:16 గ్రికు బాస తెన్ ఈంజ మత్తెలి తొలితో రెగిడ్ల సగుమ్ పుస్తకల్తె 16 నంబర్చి కోడు తయె నాయ్. † 7:27 7:27 దేముడు దెతి వరుమ్క ‘అన్నిమ్’ మెన టాలి కెర

* 7:26 7:26 నెంజిలె ‘సురోపెనికయ

1 జేవ్ దీనలె అన్నెక్ సుట్టు ఒగ్గర్జిన్ జనాబ్ యేసుతె బెర తతికయ్, జోవయింక కతిసి కిచ్చొ నెంజిలి రిసా, యేసు జోచ సిస్సుల్క పాసి బుకారా, జోవయింక

2 “ప్రెజల్ అప్పెక తిర్తతి ఎద అంచి తెన్ అస్తి. జోవయింక కతిసి కిచ్చొ కి నాయ్ చి రిసా జోవయించి ఉప్పిరి ఆవ్ కన్యారుమ్ జా అస్సి.

3 జోవయింక చువ్వెచి పెట్టి గెరి తెద్రయ్లెగిన, వట్టె ఏక్ వేల మొకొమ్ గుంజు సేడుల. జోవయింతె సగుమ్జిన్ దూర్ తెంతో జా అస్తి.” మెన సంగిలన్.

4 జేవ్ సిస్సుల్ ఆచారిమ్ జా, “ఈంజ బయిలు దేసిమి ఎతివాట్జిన్ మాన్సుల్క అన్నిమ్ దొర్కు కెరుక కిసి?” మెన అన్యారుమ్ జా సంగిల.

5 ఇసి సంగితికయ్, యేసు జోవయింక “తుమ్తె కెత్తి పోడియె అస్తి?” మెన పుసిలన్, చి “సత్తు” మెన జబాబ్ దిల.

6 జలె, యేసు జా జనాబ్క “బుయ్యె వెన” మెన ఆడ్ర దా, జేవ్ సత్తు పోడియె దెర, “తుయి దా దయ కెర్లది” మెన దేముడు అబ్బొన్క ఉచర, జేవ్ పోడియె మోడ కెర, “ప్రెజల్క వంట దాస” మెన సిస్సుల్క దెతికయ్, ప్రెజల్క వంట దిల.

7 దొన్ని ఇదుద్ల మొస్సు కి తతికయ్, యేసు దేముడు అబ్బొన్క అన్నె దస్సి జోకర, “ఈంజేవ్ మొస్సు కి వంట దాస” మెన ఆడ్ర దెతికయ్, సిస్సుల్ ప్రెజల్క వంట దిల.

8 ఎత్తిజిన్ పేట్ బెర్తు కతికయ్, సేంసిల గండలు సిస్సుల్ గుడ్డిల, చి సత్తు గంపల్తె బెర్ల.

9 అన్నిమ్ కత్తన కెత్తిజిన్ జల మెలె, పాసి పాసి చెత్తర్ వెయిల్జిన్ జల.

10 జలె, యేసు ప్రెజల్క గెరి తెద్రవ దా, సిస్సుల్ తెన్ బేగి దోనితె వెగ, దల్కునూతా ప్రాంతుమ్తె ఉట్ట గెల.

పరిసయ్యుల్ యేసుక అన్నె పరిచ్చ కెర్లిసి

11 యేసు ఇసి ఒత్త తిలి పొది, పరిసయ్యుల్ సగుమ్జిన్ జా కెర, యేసు తెన్ జట్టి జతి రితి జా, జోక “తుచి అదికారుమ్ పరలోకుమ్ తెంతో చి జలె, అమ్క రుజ్జు దెకయ్తి రిసా కిచ్చొ జవున్ వెల్లి కామ్ కెరు.” చెంగిల రితి జోక పరిచ్చ కెర్ల.

12 యేసు, జలె, జోచి మెన్సుతె ఒగ్గర్ దుకుమ్ జా ఏడ్డి రితి జా, “తుమ్ ఈంజ కాలుమ్చ మాన్సుల్ కిచ్చొక అంచి రిసా రుజ్జు దెకయ్త కమొక ఆన జతను? ఆవ్ తుమ్క కిచ్చొ కచితుమ్ సంగితసి మెలె, తుమ్ అన్యారుమ్ జల ఈంజ కాలుమ్చ మాన్సుల్క తుమ్ ఉచర్లి సాచి కామ్ ఎక్కి కి కెర దెంక నెంజె.” మెన జేవ్ వెల్లెల మాన్సుల్క సంగ కెర,

13 జోవయింక ముల దా, సిస్సుల్ తెన్ దోని అన్నె వెగ, గాడు జిన్ ఒత్తల్తో గెచ్చుక మెన బార్ జల.

పండితుల్ సికయ్తి బుద్ధిచి రిసా యేసు జాగర్త సంగిలిసి
(మత్త 16:5-12)

14 దోనితె ఎక్కి పోడి తిలి, గని అన్నె పోడియె ఆనుక సిస్సుల్ పచ్చు తిల.

15 జలె, యేసు జోవయింక కిచ్చొ సంగిలన్ మెలె, “తుమ్ దెకన. పరిసయ్యుల్ చి రానొ జలో హేరోదుచి పులయ్తి పీట్చి రగుమ్చి రిసా తుమ్ జాగర్త తెన్ తా” మెన సంగిలన్.

16 ఇసి సంగితికయ్, జేవ్ ఎక్కిలోక ఎక్కిలో “అమ్క పోడి నాయ్. కిచ్చొక ఇసి మెన అమ్క సంగితయ్?” మెన లట్టబంతె తిల.

17 యేసు జేవ్ ఉచర్లిసి జానెచి రిసా, జో “ ‘అమ్క పోడియె నాయ్’ మెన కిచ్చొక లట్టబంతను? తుమ్ అప్పెక అర్దుమ్ కెరన్ను నాయ్ గే? తుమ్క పెట్టి బేడు బంద అస్సి గే, చి అర్దుమ్ కెరనుక ఇస్టుమ్ జసు నాయ్ గే?

18 తుమ్క అంకివొ తిలె కి దెకున్ నాయ్ గే? తుమ్క కంగ్గల్ తిలె కి సూన్సు నాయ్ గే? అప్పె రితి జర్గు జలిసి కి ఏదస్ట కెర్ను నాయ్ గే?

19 జేవ్ పాచ్ వెయిల్జిన్ మాన్సుల్క ఆవ్ పాచ్ పోడియె మోడ వంట్టి దీసి, కెత్తి గంపల్తె సేంసిల గండల్ గుడ్డ బెరయ్లదు?” మెన సంగితికయ్, జేవ్ “బార గంపల్తె” మెన జబాబ్ దిల.

20 “అన్నె, జేవ్ చెత్తర్ వెయిల్జిన్ మాన్సుల్ తిలిన్తె జేవ్ సత్తు పోడియె మోడ వంట్టి దీసి, కెత్తి గంపల్తె సేంసిల గండల్ గుడ్డ బెరయ్లదు?” మెన సంగితికయ్, జేవ్ “సత్తు గంపల్తె” మెన జబాబ్ దిల.

21 జాకయ్ జో జోవయింక “జలె, అప్పెక కి తుమ్ అర్దుమ్ కెరన్ను నాయ్ గే?” మెన యేసు సంగిలన్.

గుడ్డి మాన్సుక యేసు చెంగిల్ కెర్లిసి

22 తెదొడి యేసు, సిస్సుల్, బేత్తుయిదా గవ్వెచి ఒడ్డుతె దోనితె పాచ ఉత్తిర్ల. గుడ్డి మాన్సు ఎక్కిలోక ఒత్తచ మాన్సుల్ సగుమ్జిన్ యేసుతె కడ ఆన, “దయ కెర, ఇన్నెక చడ చెంగిల్ కెరు” మెన బతిమాల్పా జా సంగిల.

23 జలె, యేసు జో గుడ్డి మాన్సుచి ఆతు దెర, జా గవ్వె తెంతో ఇదిల్ దూరి కడ నా కెర, జోచ అంకివొతె తుంక, చడ, “తుక కిచ్చొ జలెకు డీస్తయ్ గే?” మెన పుసిలన్, చి

24 జో మాన్సు, “మాన్సుల్క దెకితసి, గని జేవ్ రూకుల్ ఇండితి రితి డీస్తతి” మెన సంగిలన్.

25 జలె, జో మాన్సుచ అంకివొతె యేసు అన్నె చడితికయ్, జో చెంగిల్ దెక, ఎత్తి సొస్టుమ్ దెకిలో.

26 ఇసి చెంగిల్ జతికయ్, యేసు జోక, “తుయి గవ్వె అన్నె నే పెసితె కి తుచి సొంత గెరి ఉట్ట గో” మెన తెద్రవ దిలన్.

ఈంజాయి 'క్రీస్తు' మెలో జెంక తిలో రచ్చించుప కెర్తొసా (మత్త 16:13-20; లూకా 9:18-21)

27 ఒత్త తెంతో యేసు, జోచ సిస్సుల్ తెన్ కైసరియ పిలిప్పి మెలి ప్రాంతుమ్చ గవ్విలె ఇండ గెతె తత్తికయ్, "కొన్సొ మెన ప్రెజల్ అంక సంగితతి?" మెన సిస్సుల్క పుసిలన్.

28 జేవ్ జోక "బాప్తిసుమ్ దెతో యోహాను జా తయెదె మెన సగుమ్జిన్ తుక సంగితతి. అన్నె సగుమ్జిన్ తుక 'ఏలీయా పూర్ణుమ్చో జా తయెదె' మెంతతి. అన్నె సగుమ్జిన్, 'దేముడుచి కబుర్ పూర్ణుమ్ సంగిలో అన్నెక్కో జా తయెదె' మెన తుక సంగితతి" మెన సిస్సుల్ సంగిల.

29 ఇసి సంగితికయ్, జో జేవ్క, "తుమ్, జలె, కొన్సొ మెన అంక సంగితను?" మెన పుసిలన్. జలె, పేతురు, "తెద్రయిందె మెన దేముడు సంగ తిలో *క్రీస్తు' మెలో రచ్చించుప కెర్తొసా, తుయి" మెన ఒప్పన సంగిలన్.

30 పేతురు ఇసి మెన ఒప్పనతికయ్, యేసు జోక, "అంచి రిసా తుమ్ చినిలిసి కక్క సంగ నాయ్" మెన జాగర్త సంగిలన్.

జో మొర అన్నె జీవ్ జంక తిలిన్చి రిసా యేసు సంగిలిసి (మత్త 16:21-28; లూకా 9:22-27)

31 † "ఆవ్ మాన్సు జా జెర్మన్ అయ్లోసా ఒగ్గర్ సైమల్ సేడ, వెల్లెల మాన్సుల్చి అత్తి, వెల్లెల పూజర్లుచి అత్తి, మోసే తెన్ దేముడు దిలి ఆగ్గుల్ సికడ్డసచి అత్తి, మొరుక అస్సె. గని తిర్తతి గెలె, అన్నె జీవ్ జా ఉట్టుక అస్సె" మెన యేసు జోచ సిస్సుల్క బోదన కెరుక దెర్లన్.

32 జో ఈంజ కోడ్ ఒండిజినక సొస్టుమ్ సంగిలన్. దస్సి సంగితికయ్, పేతురు జోక ఏక్ పక్కయ్ కడ నా కెర, "దస్సి సంగు నాయ్. తుక దస్సిచి పోని!" మెన పేతురు జోక గోల కెరుక దెర్లన్.

33 పేతురు ఇసి సంగితికయ్, యేసు పన్ల, సిస్సుల్క దెక, పేతురుక, "సయ్తాన్, అంచి పడ్డో గో! తుయి దేముడుచి పచ్చెనచి బుద్ది ఉచర్లద్ నాయ్, గని మాన్సుల్ ఉచర్తి రితి ఉచర్లది" మెన యేసు గోల కెర్లన్.

34 తెదొడి జోచ సిస్సుల్క, ప్రెజల్చి జనాబ్క, జోచి పాసి బుకారా కెర, యేసు జోవయింక, "కో నంపజా అంచి పట్టి బులుక ఉచరుల గే, జోచి సొంత ఇస్టుమ్ కెరుక ముల దా, జోచి సొంత ‡సిలువ వయన అంచి పట్టి బులుక అస్సె.

* 8:29 8:29 ఒగ్గర్ పూర్ణుమ్ తెంతో "పావుమ్ గెచ్చయ్తో దొర్కు జలో రచ్చించుప కెర్తొసాక తెద్రయిందె" మెన ఎత్తి అదికారుమ్ తిలో దేముడు సంగ రెగ్గవ తిలన్. క్రీస్తు మెలె ఈంజ అర్లుమ్ తయెదె. † 8:31 8:31 'మాన్సు జా జెర్మన్ అయ్లోసా' మెన బయబిల్తె రెగ్గ తిలె, జేవ్చి అర్లుమ్ కిచ్చొ మెలె, 'తెద్రయిందె' మెన ఎత్తి అదికారుమ్ తిలో దేముడు దెద్రయ్లో క్రీస్తు రచ్చించుప కెర్తొసా. యేసు 'ఆవ్ మాన్సు జా జెర్మన్ అయ్లోసా' మెన సంగిలె, బయబిల్చి పొర్చి ప్రమానుమ్ సదు కెర్ల పండితుల్ జా అర్లుమ్ కెరసుల, గని యేసుక 'జొయ్య' మెన ఒప్పనుక నెన కెర, జోవయింక ఒగ్గర్ అల్లర్ కెరుల. ఒగ్గర్ సదు నే కెర్ల ప్రెజల్, సిస్సుల్, జా అర్లుమ్ ఇదిల్ ఆల్సిమ్ కెరసుల. ‡ 8:34 8:34 'సిలువ' మెన కిచ్చొక సంగితయ్ మెలె, యేసుక విరోదుమ్ సుదల్ కిసి మారుల మెలె, జోక 'సిలువ' మెలిన్తె అత్తిలె చట్టలె మేకుల్ పెట టీవడ మొర్తి రితి ములుల. జోక జా సిలువతే నే టీవడ అగ్గె, యేసుచి సొంత సిలువ జోక మార్చిన్తె జో గడియ సొంత వయక నెత్తిర్; యోహాను 19:17. పడ్డో సిమాసు మెలో ఎక్కిలో వయతి రితి తియార్ల; మార్కు 15:21. సిలువ మెలె, ఏక్ డేడిక అన్నెక్ డేడి రితి డంజొ అడ్డుమ్ కెర బుయ్యో రోవ టీవడుల.

35 కిచ్చొక మెలె, జోచి సొంత ప్రానుమ్ రచ్చించుప కెరనుక కో కోర్ప జవుల గే, జోచి ప్రానుమ్ గెచ్చవనెదె. గని అంచి రిసా, అంచి సుబుమ్ కబుర్ సూనయ్తి రిసా, కో జోచి ప్రానుమ్ దెతి రితి ఎక్కి మెన్సు నిదానుమ్ ఇండుల గే, జోచి ప్రానుమ్ రచ్చించుప జెయెదె.

36 మెలె, ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన జోచి ప్రానుమ్ గెచ్చవనెగిన, జోక కిచ్చొ లాబుమ్? కిచ్చొ లాబుమ్ నాయ్.

37 మెలె, జో మాన్సుచి ఆత్మ గెచ్చవనెగిన, జోచి ప్రానుమ్ దేముడు తెన్ అన్నె బెదయ్తి రితి కేన్ మాన్సు కిచ్చొ దిలె సరిప్పచుప జయెదె గే?

38 మెలె, గర్బ కమొ కెర్తి ఈంజ పాపుమ్చి లంజెచి ఉగుమ్తెచి బుద్ది కెరన, అంచి సత్తిమ్ జవున్, అంచ కొడెచి సత్తిమ్ జవున్, కో లాజ్ జా నే ఒప్పన్తె తవుల గే, ఆవ్ మాన్సు జా జెర్మన్ అయ్లోసా పరలోకుమ్తె గెచ్చ అబ్బొసి జలో దేముడుచి పరలోకుమ్చి ఉజిడెచి గవురుమ్ తెన్ సుద్ది తిల దూతల్ తెన్ బెద ఈంజ లోకుమ్తె అన్నె జెతి దీసిక, జేవ్ మాన్సుల్క 'అంచ' మెన ఒప్పన్తి రితి అమ్చి తెన్ బెదవనుక అంక లాజు తయెదె." మెన సిస్సుల్క ప్రెజల్క యేసు సంగిలన్.

9

1 జో ఇసి సంగ, "దేముడుచి రాజిమ్ అదికారుమ్ తెన్ జా అస్సె మెన, ఇన్నె టీవో జా తిల సుదల్తె సగుమ్జిన్ నే మొర్తె అగ్గె దెకుల మెన తుమ్క ఆవ్ కచితుమ్ సంగితసి" మెన సిస్సుల్క ప్రెజల్క యేసు సంగిలన్.

యేసు గడియ పరలోకుమ్చి ఉజిడి జలిసి (మత్త 17:1-13; లూకా 9:28-36)

2 సొప్పు దీసల్ గెలి పిమ్మట్, యేసు పేతురుక యాకోబుక, యోహానుక, అన్నె కో నెంజలి డోంక్ తిలి మెట్టయ్ కడ నిలన్. మెట్టయ్ వెగితికయ్, జేవ్చి మొక్కె యేసుచి రూపుమ్ మార్పువ జలి.

3 జోచి పాలల్ కిసి జల మెలె, ఈంజ లోకుమ్తె కేన్ సార్ కేన్ సబ్బు తెద్ది చోక్ కెరుక నెత్తిర్ రితి, ఉజిడె జా చోక్ జల.

4 తెదొడి, పూర్ణుమ్చ దేముడుచి కబుర్లు సంగిత మోసి చి ఏలీయా దొగుల యేసు తెన్ లట్టబై తా, జేవ్ సిస్సుల్క డీసన్ సేడ్.

5-6 ఇసి జతికయ్, జేవ్ సిస్సుల్ బలే బియఁ గెతికయ్, తెదొడి పేతురు, కిచ్చొ మెనుక గే నేన గెచ్చు, యేసుక “గురుబాబు, అమ్ ఇన్నె తంక చెంగిలి. తుక ఏక్, మోసేక ఏక్, ఏలీయాక ఏక్, మొత్తుమ్ తిన్ని కుడియల్ ఇన్నె బండుక అమ్క సెలవ్ దే” మెన సంగిలన్.

7 సంగితె తతికయ్, తెదొడి మబ్బు ఏక్ ఉత్ర జా, జోవయింక డంకిలన్, అన్నె, “ఈంజొయి అంచొ పుత్తు, అంచొ ప్రేమ తిలో పుత్తు. ఇన్నెచి కోడు తుమ్ నూన” మెన, మబ్బు తెంతో అవాడ్ సంగిలిసి నూన్ల. ఇసి జలి బేగి,

8 సిస్సుల్ సుట్టునంత అంకి గలెకి, యేసుక పిట్టవ జో తెన్ అన్నె కో కి డీస్తి నాయ్.

9 జేవ్ జా మెట్టయ్ తెంతో ఉత్ర జెతె తతికయ్, “ఆవ్ మాన్సు జా జెర్మున్ అయ్లోసా మొర గెచ్చు అన్నె జివ్ జా ఉట్టితి ఎద, తుమ్ అప్పె ఇన్నె దెకిలిసి కక్క కి సంగ నాయ్” మెన సిస్సుల్క యేసు సంగిలన్.

10 ఇసి సంగితికయ్, జర్గు జలిన్చి రిసా తుక్లె తా గెల, గని “మొర గెచ్చు అన్నె జితిన్చి రిసా సంగిల్ కోడుక కిచ్చొ అర్దుమ్?” మెన ఉచరంతె తిల.

11 తెదొడి జోక కిచ్చొ పుసిల మెలె, “రచ్చించుప కెర్తొసా జతో క్రిస్తచి అగ్గె ఏలీయా పూర్ముచొ జెంక అస్సె, మెన మోసే తెన్ దేముడు దిలి ఆగ్గుల్ సికడ్డన కిచ్చొక సంగితతి?” మెన పుసిల.

12 యేసు జోవయింక, “ఎత్కి తెయార్ కెర్తి రిసా *ఏలీయా తొలితో జెంక అస్సె మెలి కోడు సత్తిమ్. జా ఏక్, రచ్చించుప కెర్తొసా, ఆవ్ మాన్సు జా జెర్మిలె ఒగ్గర్ స్రెమల్ సేడుక అస్సె

మెన, మాన్సుల్ జోక నిస్కారుమ్ దెకుల”

మెన రెగిడ్లిసి కిచ్చొచి రిసా గే తుమ్ ఉచర.

13 అన్నె, జలె ఆవ్ తుమ్చి తెన్ సంగితిన్ కిచ్చొ మెలె, జో ఏలీయా తొలితో జా తిలన్ మెన ఆవ్ తుమ్క కచితుమ్ సంగితసి. జో జా తిలో, అన్నె జోచి రిసా రెగిడ్లి కోడు కి నెరవెర్చుప జలి.

“జేవ్చి ఇస్టుమ్ అయ్లి రితి మాన్సుల్ జోక కెల మెన రెగిడ్లి కోడు” మెన యేసు సంగిలన్.

సిస్సుల్ ఏక్ బూతుమ్క ఉదడుక నెత్తిరిసి (మత్త 17:14-20; లూకా 9:37-43)

14 యేసు, జేవ్ సిస్సుల్, మెట్టక ఎట్టొ తా గెల సిస్సుల్తె పావ కెర, జోవయించొ సుట్టునంత ఒగ్గర్జిన్ జనాబ్ బెర అస్తి, చి మోసే తెన్ దేముడు దిలి ఆగ్గుల్ సికడ్డన జోవయింతెన్ గగ్గల్ జతె అస్తి మెన యేసు ఇసి దెకిలో.

15 జలె, జేవ్ జనాబ్ యేసుక దెకిల్ బేగి, ఒగ్గర్ ఆచారిమ్ జా, జోతె నిగ జా జోకర్త.

16 యేసు, జలె, “జోవయింతెన్ కిచ్చొచి రిసా లట్టబ్బను?” మెన పుసిలన్.

17 జనాబ్తె తిలో ఎక్కిలో, “గురుబాబు, గుల్లో కెర్తి బూతుమ్ దెర్లొ అంచొ పుత్తుక తుచితె కడ అన్లయ్.

18 జా బూతుమ్ జోక కేనె దెరెదె గే, ఒత్త సేడవ దెయెదె. సేడయ్లె, ఈంజొ పొగుర్లు బార్ కెరవన, దంతో చప్ల, మోర్పు సేడుక. ‘జా బూతుమ్క ఉదడ దాన’ మెన తుచ సిస్సుల్క బతిమాల్పా జా సంగిలే కి, జేవ్ నెత్తిర్ల.” మెన జో నాడుచొ అబ్బొసి సంగిలన్.

19 తెదొడి యేసు కిచ్చొ జబాబ్ దిలన్ మెలె, “నముకుమ్ నెంజిలి కాలుమ్చ, తుమ్! తుమ్చి తెన్ ఆవ్ కెత్తి దీనల్ తంక? కెత్తి దీనల్ తుమ్చి బుద్ది ఆవ్ ఓర్పువ జంక? జో నాడుక అంచితె కడ ఆన” మెన సంగితికయ్,

20 నాడుక యేసుతె అన్ల. ఆన్తికయ్, జా బూతుమ్ యేసుక దెకిలి బేగి, జో నాడుక పొర్లు కెరవ గెల్తికయ్, నాడు బుయ్యె సేడ ఎంగ్ల ఎంగ్ల జా పొగుర్లు కెరవన, పొర్లువ జతె తిలన్.

21 దస్సి జతె తతికయ్, “ఇన్నెక కెత్తి దీనల్ తెంతో ఈంజ బాద అస్సె?” మెన యేసు నాడుచొ అబ్బొన్క పుసిలన్, చి జో “బాల తతె తెంతో. బాల తతె తెంతో దస్సి జా జా,

22 ఇన్నెక నాసెనుమ్ కెర్తి రిసా ఒగ్గర్ ఒగ్గర్ సుట్టు ఆగితె పానితె సేడయ్లి. తుయి కిచ్చొ జలెకు కెరుక తెర్లెగిన, అమ్చి ఉప్పిరి కన్కారుమ్ తియ అమ్క తోడ్ కెరు!” మెన సంగ జోకర్తికయ్,

23 తెదొడి యేసు జోక, “‘తుయి తెర్లెగిన’ మెంతసి అంక, కిచ్చొక? కో అంక నంపజలోసాక, జోక ఎత్కి జెయిమ్ జయెదె!” మెన సంగిలన్.

24 బేగి నాడుచొ అబ్బొసి, “ఆవ్ నంపజతసి. అంచి నముకుమ్ తొక్కి చి జలె, ఒగ్గర్ జతి రితి అంక తోడు తా!” మెన ఏడ కేక్ గలన్.

25 తెదొడి ఒగ్గర్జిన్ జనాబ్ ఎక్కితె బెద పాసి నిగ జెతతి మెన యేసు దెక కెర, “ఓ గుల్లో కెర్తి బొయ్రో కెర్తి బూతుమ్. తుయి ఇన్నెక ముల దా, కెయ్యెక కి ఇన్నెక అన్నె దెరు నాయ్ మెన ఆవ్ తుక ఆడ్ర దెతసి,” మెన జా బూతుమ్క యేసు గోల కెర్తికయ్,

26 బూతుమ్ గట్టిజ కేక్ గల, నాడుక గట్టిజ పొర్లు కెరవ బార్ జా ముల దిలన్, చి నాడు మొర గెలి రితి జలి. “మొర గెలో” మెన ఒగ్గర్జిన్ సంగిల,

27 గని యేసు నాడుక ఆతు దెర ఉట్టయ్తికయ్, జో చెంగిల్ జా టీవో జలన్.

* 9:12 9:12 మత్తయి 17:13 తె దెకిలె, ‘ఏలీయా రితొసా’ మెన బాప్తిస్ముమ్ దెతె తిలో యోహానుచి రిసా సంగిలన్ మెన రుజ్జు జతయ్.

28 జలె, యేసు గెరి గెచ్చు తెడి పెసితికయ్, జోచ సిస్సుల్, “అమ్ కిచ్చొక జా బూతుమ్క ఉదడుక నెతిర్లమ్?” మెన కో వేర మాన్సుల్ నే నూన్తి రితి యేసుక పుసిల.

29 పుసితికయ్, జో † “ప్రార్దన కెర్లెకయ్ ఇసిచి ఉదడుక జయెదె, నెంజిలె నాయ్” మెన సంగిలన్.

మొర గెచ్చు అన్నె జీవ్ జా ఉట్టిందె మెన యేసు సంగిలిసి (మత్త 17:22-23; లూకా 9:43-45)

30 యేసు, సిస్సుల్, ఒత్త తెంతో బార్ జా గలిలయ ప్రాంతుమ్ వాట్ గెల. ‘అమ్ ఇన్నె తిలిసి పైజల్ నేన్తు’ మెన గుట్టు తెన్ గెతె తిల.

31 కిచ్చొక మెలె, యేసు జోచ సిస్సుల్క బోదన కెర్లె తిలొ. “అవ్ మాన్సు జా జెర్నున్ అయ్లోసొక మాన్సుల్చి అత్తి దెర దెవుల, చి అంక మార గెలుల. జేవ్ అంక మార గెలె కి, తిర్తత్క అన్నె జీవ్ జా ఉట్టిందె” మెలన్.

32 గని జో సంగిలిసి అర్దుమ్ నే కెరన్లెకి, పుసుక బియెకెర, తుక్లె తిల.

33 తెదొడి యేసు, సిస్సుల్, కపెర్నహూమ్ పట్టుమ్తె పాచ గెరి గెచ్చు తెడి పెసిలి పొది, యేసు జోవయింక “వట్టె ఎక్కిలొ తెన్ ఎక్కిలొ కిచ్చొచి రిసా వాదెన జతె తిలదు?” మెన పుసిలన్.

34 జేవ్ తుక్లె తిల. కిచ్చొక మెలె, “అమ్చితె కొన్సొ వెల్లొ జయెదె?” మెన జేవ్ వట్టె లట్టబన తిల.

35 తెదొడి యేసు వెన, జేవ్ బారజిన్క పాసి బుకారా కెర, జోవయింక, “కొన్సొ జలెకు వెల్లొ జంక ఉచరెదె గే, జో గవురుమ్ నే ఉచరంతె తా, ఎత్తిచి కంట దాక్ కెరన, ఎత్తిజిన్క సేవ కెర్లొసా జంక అస్సె” మెన సంగ,

36 ఏక్ బాలబోదక దెర, జోవయింక నెడమె టీవొ కెర, ఉక్కుల, జోవయింక అన్నె,

37 † “ఇన బాలబోదల్తె ఎక్కిలొక జలెకు కో అంచి నావ్ తెన్ మరియాద కెరుల గే అంకయ్ మరియాద కెర్లి రితి జవుల. అన్నె, అంకయ్ కో మరియాద కెర తవుల గే, ఎక్కి అంకయ్ నాయ్, గని అంక తెద్రయ్లోసొకయ్ మరియాద కెర్లి రితి జవుల” మెన యేసు బోదన కెర్లన్.

38 తెదొడి యోహాను మెలొ సిస్సుడు యేసుక కిచ్చొ మెన సంగిలన్ మెలె, “గురుబాబు, ఎక్కిలొ తుచి నావ్ తెన్ బూతల్క ఉదడ్డిసి దెకిలమ్. జో అమ్చి పట్టి జెతోసా నెంజెచి రిసా జోక అడ్డు కెర్లమ్” మెన సంగిలన్.

39 జలె యేసు, “జోక అడ్డు కెర నాయ్. కిచ్చొక మెలె, కో జలెకు అంచి నావ్ తెన్ ఏక్ వెల్లి కామ్ కెరెదె గే, జా జర్గు జలి తెంతో అంచి రిసా విరోదుమ్ లట్టబుక నెత్తె.

40 అమ్చి కామ్చి ఉప్పిరి విరోదుమ్ నెంజిలొసా అమ్చి పచ్చెన జెతోసా జయెదె.

41 “అవ్ క్రీస్తు జలొసా తెన్ తుమ్ బెదిలి రిసా, కో జలెకు తుమ్క బుక్కెక్ పాని జలెకు దెయెదె గే, జో దస్సి కెర్లి రిసా కచితుమ్ జోక బవుమానుమ్ పిట్టె నాయ్, మెన తుమ్క అవ్ కచితుమ్ సంగితసి.

42 “గని అంక నంపజల ఇన బాలబోదల్ రిత జలనతె ఎక్కిలొక కి, కో కిపాపుమ్ కెరవుల గే, జోక జెతికయ్ సిచ్చుచి కంట, జోక టొట్రయ్ తిర్వేలి రితొ వెల్లొ పత్తురు ఒడొవ దా, నముద్రుమ్తె బుడ్డవన్కయ్ జోక చెంగిలి.

43 తుమ్చితె ఎక్కిలొచొ ఆతు జలెకు జోక * పాపుమ్ కెరవ తిలెగిన, జో ఆతు జో కండన గెలి రితి జవున్. కిచ్చొక మెలె, దొన్ని అత్తో తెన్ తా వెల్లి ఆగి గొయ్తె, కెయెక నే విజయ్తి ఆగితె, గలి జతి కంట, పాపుమ్ కెరయ్తో ఆతు జలెకు నెంజిలి రితి జా పరలోకుమ్తె బెదుక చెంగిలి.

44-45 † దస్సి, తుమ్చితె ఎక్కిలొచొ చాటు జలెకు జోక † పాపుమ్ కెరవ తిలెగిన, జో చాటు కండన గెలి రితి జవున్. కిచ్చొక మెలె, దొన్ని చట్టొ తెన్ తిలి రితి తా వెల్లి ఆగి గొయ్తె గలి జతి కంట, పాపుమ్ కెరయ్తి చాటు జలెకు నెంజిలి రితి జా పరలోకుమ్తె బెదుక చెంగిలి.

46-47 కితుమ్తె ఎక్కిలొచి అంకి జలెకు జోక * పాపుమ్ కెరవ తిలెగిన, జా అంకి కడ వెంట గెలి రితి జవున్. కిచ్చొక మెలె, దొన్ని అంకివొ తెన్ తిలి రితి తా వెల్లి ఆగి గొయ్తె గలి జతి కంట, ఎక్కి అంకి తెన్ జలి రితి జా దేముడుచి రాజిమ్తె బెదుక చెంగిలి.

48 వెల్లి ఆగి గొయ్తె కిచ్చొ మొర్తి నాయ్, చి జా ఆగి విజె నాయ్.

49 “సుద్ది జవున్” మెన బలి దెతి ఎత్తితె లోన్ దెరవుక అస్సె. దస్సి, లోన్క, ఆగిక మెలి రితి, ఎత్తి మాన్సుక సుద్ది నిదానుమ్ కెరుక అస్సె.

50 “లోన్ చెంగిలిచి. గని జా లోన్చి కారు గెచ్చు చప్పుయ్ జలెగిన, జా అన్నెక్ సుట్టు కిసి కెర కారు కెరుక జయెదె! నెంజె. తూమ్, జలె, తుమ్చి పెట్టి లోన్ దెర్లి రితి జా, చి ఎక్కిలొ తెన్ ఎక్కిలొ సేంతుమ్ తెన్ తా” మెన సిస్సుల్క యేసు బోదన కెర్లన్.

† 9:29 9:29 ఈంజ మత్తెలి గ్రీకు బాస తెన్ తొలితొ రెగిడ్ల పుస్తకల్తె “చువ్వె తా ప్రార్దన కెర్లెకయ్...” మెన రెగ్ల అస్సె. † 9:37 9:37 నెంజిలె “జో అంక నంపజలి రిసా ఇన బాలబోదల్తె ఎక్కిలొక జలెకు కో మరియాద కెరెదె గే, అంకయ్ మరియాద కెర్లి రితి జయెదె.” § 9:42 9:42 నెంజిలె ‘జోవయింక నముకుమ్ పిట్టవుల గే...’ * 9:43 9:43 పాపుమ్...రిసా నెంజిలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాస తెన్ ఈంజ తొలితొ రెగిడ్లన్ తెన్ బెదెదె. † 9:44-45 9:44-45 గ్రీకు బాస తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 44 నంబర్లువ కొడొ తతి నాయ్. గని తిలె, 44 చి 46చి కోడు 48 నంబర్చి కోడుచి రితి జవుల. † 9:44-45 9:44-45 పాపుమ్...రిసా నెంజిలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాస తెన్ ఈంజ తొలితొ రెగిడ్లన్ తెన్ బెదెదె. § 9:46-47 9:46-47 గ్రీకు బాస తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 44 నంబర్లువ కొడొ తతి నాయ్. గని తిలె, 44 చి 46చి కోడు 48 నంబర్చి కోడుచి రితి జవుల. * 9:46-47 9:46-47 పాపుమ్...రిసా నెంజిలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాస తెన్ ఈంజ తొలితొ రెగిడ్లన్ తెన్ బెదెదె.

10

యేసు తిరిమ్ తిరిమ్ యెరూసలేమ్ గెచ్చుక మొదొల్ కెర్లిసి

(మత్త 19:1-12)

1 యేసు కపెర్నహూమ్ పట్టుమ్ తెంతో ముల దా యూదయ ప్రదేసిమ్ వాట్ గెచ్చు, యోర్దాను గాడు ఒత్తల్తో ఉట్ట గెలన్. ఒత్త తతికయ్, ఒగ్గర్జిన్ జనాబ్ అన్నె జోతె బెర జెతికయ్, జో అలవాట్ జలి రితి జోవయింక బోదన కెరుక దెర్లన్.

పెండ్లి జలన ముల ములి జతినచి రిసా యేసు సంగిలి (మత్త 19:1-12)

2 జా పొది, పరిసయ్యుల్ నగుమ్జిన్ జోక పరిచ్చు కెర తెర్లె నింద కెరుక మెన, జోతె జా కెర, “మున్నుబోద జోచి తేర్చిక ములుక నాయిమ్ గె?” మెన పుసిల.

3 యేసు “మోసే పూర్ముచొ తుమ్క కిచ్చొ ఆడ్ర దిలన్?” మెన పుసిలన్.

4 ఈంజొ ఇసి సంగితికయ్, జేవ్ “ముల దెతి కాగుమ్ రెగ్ల దిలెగిన ముల దెంక జయెదె మెన మోసే పూర్ముచొ సెలవ్ దిలన్” మెన జబాబ్ దిల.

5 జలె, యేసు జోవయింక, “తుమ్ రాడ్ జివచ మాన్సుల్చి రిసా మోసే జా ఆగ్గు రెగిడ్లన్.

6 గని లోకుమ్ జెర్మయ్లి మొదొల్ పొది తెంతో ‘మున్నుబోద తేర్బోద’ మెన దేముడు దొన్ని రగల్ జర్లు కెర్లొ” మెన, అన్నె

7 “జాకయ్ మున్నుబోద అయ్యున్అబ్బొన్క ముల దా జోచి తేర్చి తెన్ బెద తంక అస్సె.

8 అన్నె జేవ్ దొగుల ఎక్కి ఆగ్ జా తవుల మెన దేముడు రెగ్లయ్లి కోడు అస్సె. జాచి రిసా, పెండ్లి జలి తెంతో జేవ్ దొగుల నెంజితి. ఎక్కి ఆగ్ జా అస్తి.

9 జాకయ్, దేముడు పెండ్లితె కక్క జట్టు కెరవ తయెదె గే, కేన్ మాన్సు ములవుక జయె నాయ్” మెన జేవ్క సంగిలన్.

10 యేసు, సిస్సుల్, జేవ్ బన జతి గెరి గెచ్చు తెడి పెసిలి పడ్డొ, ఈంజ కోడుచి రిసా సిస్సుల్ అన్నె పుసిల.

11 యేసు సిస్సుల్క, “కో జలెకు జోచి తేర్చిక ముల దా అన్నెక్కిక పెండ్లి కెరనెదె గే, జో లంజె వంసుమ్చొ జా తేర్చిక లంజె కెర్లయ్,

12 అన్నె, మున్నున్క తేర్చి ముల దా అన్నెక్కిక పెండ్లి కెరనెగిన, జయ్యి లంజె జతయ్” మెన సంగిలన్.

బాలబోదల్క యేసు చడ చెంగిల్ కెర్లిసి (మత్త 19:13-15; లూకా 18:15-17)

13 ఒత్త తిలి పొది, ‘అమ్చ బోదల్క చడ చెంగిల్ జవున్’ మెన, సగుమ్జిన్ జోవయింక యేసుచి పాసి కడ ఆన్తికయ్, సిస్సుల్, “పోస” మెన కడ ఆన్తసక గోల కెర్ల.

14 గని జేవ్ గోల కెర్లిసి యేసు దెక, బాద సేడ, “బోదల్ అంచితె జెతు. జోవయింక అడ్డు కెర నాయ్. దేముడుచి రాజిమ్ ఇస బాలబోదల్ జల సుదల్చియి.

15 తుమ్క ఆవ్ కిచ్చొ కచితుమ్ సంగితసి మెలె, గవురుమ్ నే ఉచరంతె బాలబోదల్చి రితిచి నముకుమ్ తెన్ దేముడుచి రాజిమ్తె బెదితి రితి నజ్లెకయ్, పరలోకుమ్తె గెచ్చుక జయెదె. ఇసి నే జలెగిన, కో కి ఒత్త బెదుక జయె నాయ్” మెన సంగ

16 జేవ్ బోదల్క ఉక్కుల దెర, జోవయింక ఎక్కిక్ల బోడి చడ, ‘చెంగిల్ తత్తు’ మెన యేసు సంగిలన్.

పరలోకుమ్చి రాజిమ్తె కిసి బెదుక గే (మత్త 19:16-30; లూకా 18:18-30)

17 యేసు అన్నె బార్ జా వట్టె గెతె తతికయ్, ఉబెడొ ఎక్కిలో నిగ జా, యేసుచి పురైతొ సెర్ను సేడ జొకర, “చెంగిల్ తిలో గురుబాబు, పరలోకుమ్చి రాజిమ్తె కెయ్క తెయ్క జితి వాట, అంక దొర్కు జంక మెలె, ఆవ్ కిచ్చొ కెర్లె జయెదె?” మెన పుసిలన్.

18 పుసితికయ్, యేసు, “చెంగిల్ తిలోసా మెన అంక కిచ్చొక సంగిలది? దేముడు ఎక్కిలోయి చెంగిలోసా, గని అన్నె కో కి చెంగిలన నెంజితి.

19 జో దిల ఆగ్గుల్ మెలె, తుయి జాన్చి.

‘నరు అత్య కెరుక జయె నాయ్,

లంజెకమొ కెరుక జయె నాయ్,

చోరుక జయె నాయ్,

అబద్దుమ్ సాచి సంగుక జయె నాయ్,

మోసిమ్ కెరుక జయె నాయ్,

అయ్యుద్అబ్బొద్క గవురుమ్ దెకితె తంక అస్సె’

ధనచయ్” మెన జోక యేసు సంగిలన్.

20 జో మాన్సు, “గురుబాబు, బాల తెంతో ఈంజేవ్ ఆగ్గుల్ రితి నిదానుమ్ కెర దెకన్తసి” మెన జబాబ్ దిలన్.

21 యేసు జోక దెక కన్కారుమ్ జా, “తుక ఎక్కి పిట్ట గెచ్చు అస్సె. తుయి గెచ్చు, తుచి ఆస్తి ఎత్తి విక గెల కెర, బీద సుదల్క దేసు. దస్సి కెర్లెగిన, పరలోకుమ్తె తుక ఆస్తి కలుగు జయెదె. అన్నె, అంచి తెన్ బెద, అంచి పట్టి జే!” మెన యేసు సంగిలన్.

22 జలె, జో ఉబెడొక ఒగ్గర్ సొమ్నూరుమ్చి రిసా, దుకుమ్ జా మొకొమ్ ఇదిలిసి కెర ఉట్ట గెలన్.

సొమ్నూర్లు పరలోకుమ్తె బెదుక కష్టమ్

23 జో సొమ్నూరుమ్చొ ఉట్ట గెతికయ్, యేసు పస్ల సిస్సుల్క దెక జోవయింక, “సొమ్నూర్లు దేముడుచి

* 10:24 10:24 గ్రికు జాన్ తెన్ ఈంజ మత్తెలి తొలితో రెగిడ్ల సగుమ్ పున్తకల్తె ఈంజ...సుదల్చి కొడొ తతి నాయ్.

రాజిమతె బెదుక జలె, కన్వనె జలెకయ్ జయెదె” మెన సంగిలన్.

24 జోచ ఈంజేవ్ కొణొక సిస్సుల్ ఎదివాట్ ఆచారిమ్ జతికయ్, జోవయింక అన్నె, “ఓ పుత్తర్లు, *ఈంజ లోకుమతెచి ఆస్తిక నముకుమ్ తిల సుదల్ దేముడుచి రాజిమతె బెదుక కెడ్డి కన్వమ్!

25 ఇసా సామ్సారి దేముడుచి రాజిమతె బెదితి కంట, సూజిబొరొ వాట్ ఒంటె గెచ్చుక సుల్లు!” మెన సంగిలన్.

26 జేవ్ ఎదివాట్ ఆచారిమ్ జా, “దస్సి జలె, కో రచ్చించుప జంక జయెదె?” మెన జోక పుసిల.

27 యేసు జోవయింక దెక, “మాన్సు ఈంజ కెర్క నెత్తిర్లిసి, గని దేముడు జా ఎత్తి జర్గు కెరుక తెరె.” మెన సంగిలన్.

28 జలె, పేతురు జోక, “ఈందె, ఆమ్ ఎత్తి ముల దా తుచి పట్టి బులితనుమ్” మెన సంగుక దెర్లన్.

29 జలె యేసు జోవయింక, “తుమ్క ఆవ్ కిచ్చొ కచితుమ్ సంగితసి మెలె, అంచి రిసా, అంచి సుబుమ్ కబుర్చి రిసా, గేరు జలెకు, అన్నొబావొక జలెకు, †బయిబేనిక జలెకు, అయ్యస్అబ్బొస్క జలెకు, బోదల్క జలెకు, బుఁయి జలెకు, కో ముల తవుల గే,

30 అప్పె ఈంజ లోకుమతె కి, జోవయింక గెరలు, అన్నొబావొ, బయిబేని, అయ్యసిసి, బోదల్, బుఁయి, దసచ ఎత్తి జోవయింక దొర్కు జయెదె. అన్నె, జెతి కాలుమతె, కెయఁక తెయఁక పరలోకుమతె జితి వాట జోవయింక దొర్కు జయెదె.

31 గని తుమ్ జాగర్త ఉచరన. అప్పె అగ్గె జలన ఒగ్గర్జిన్ పడ్డె జవుల. అప్పె పడ్డె జలన ఒగ్గర్జిన్ అగ్గె జవుల” మెన యేసు సంగిలన్.

మొర గెచ్చు అన్నె జీవ్ జా ఉట్టిందె మెన యేసు సంగిలిసి (మత్త 17:22-23; లూకా 9:43-45)

32 యేసు, సిస్సుల్, యెరూసలేమ్ పట్టుమతె గెతి రిసా వట్టె గెతె తతికయ్, యేసు దయిరిమ్ తెన్ జోవయించి అగ్గెతో ఇండిలిసి సిస్సుల్ దెక, బలే బమ్మ జల. జోచి పడ్డె గెతె తిలసక కి బలే బిడ్డి దెర గెలి. జలె, యేసు సిస్సుల్క అన్నె పాసి కెరన, జోక జర్గు జంక తిలన్చి రిసా జోవయింక అన్నె సంగుక దెర,

33 “ఈందె సూన, అమ్ యెరూసలేమ్తె గెతనుమ్. ఒత్త గెలమ్ మెలె, ఆవ్ మాన్సు జా జెర్మున్ అయ్లోసాక వెల్లెల పూజర్లుతె, మోసే తెన్ దేముడు దిలి ఆగ్గుల్ సికడ్డనతె దెర దెవుల, చి జేవ్ వెల్లెల మాన్సుల్ అంక మొర్తి సిచ్చు వయడ దా, యూదుల్ నెంజిల అదికారుల్తె అంక సొర్ప కెర దెవుల.

34 దస్సి కెర్లె, జేవ్ అంక కొంకడ, తుంక దా, కొర్డల్ తెన్ పెట కెర, అంక మారుల. మార్లె కి, తిర్తత్క అన్నె జివ్ జా ఉట్టిందె” మెన యేసు సిస్సుల్క అన్నె సంగిలన్.

† 10:29 10:29 అప్పజేనిక

దొగుల సిస్సుల్ వెల్లొ జంక కోర్ప జలిసి (మత్త 20:20-28)

35 తెదొడి యాకోబు, యోహాను మెల జెబెదయి మెలోసాచ దొగుల పుత్తర్లుల్ పురైతో జా, యేసుక “గురుబాబు, కిచ్చొ అమ్ నజుమమ్దె గె అమ్క దెంక.” మెన సంగిల.

36 ఇసి సంగితికయ్ యేసు “ఆవ్ తుమ్క కిచ్చొ జర్గు కెరుక మెన తుమ్ కోర్ప జతను?” మెన పుసితికయ్,

37 జేవ్ జోక, “తుచి పరలోకుమచి ఉజడచి రాజిమతె తుయి ఏలువ కెర్తి పొదిక అమ్ దొగుల, తుచి ఉజెతో పక్క ఎక్కిలో, తుచి డెబ్లి పక్క ఎక్కిలో వెసితి రితి అమ్క సెలవ్ దే” మెన సంగిల.

38 యేసు జలె, జోవయింక, “తుమ్ కిచ్చొ పుసితను గే తుమ్ నేన్సు. అల్లె, అంచి గిన్నతె బెదపిలి రితి, ఆవ్ సేడుక తిలి దుకుమతె బెదుక ఓర్పువ జంక జలెకు, అంచి తెన్ అంచి బాప్తిసుమ్ నజన్లి రితి జా, ఆవ్ సేడుక తిలి సైమతె బెదుక జలెకు తెరితె గే?” మెన జేవ్ దొగులక సంగితికయ్,

39 జేవ్ ‘తెరుమ్’ మెన సంగిల. దస్సి సంగితికయ్, యేసు జోవయింక, “ఆవ్ పితి గిన్న దుకుమ్ తుమ్ పిస్తె. ఆవ్ సైమల్ సేడ్డి బాప్తిసుమ్ తూమ్ కి నజన్తె,

40 గని అంచి ఉజెతో పక్క ఎక్కిలో, అంచి డెబ్లి పక్క ఎక్కిలో వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచొ దేముడు అబ్బొ కక్క కక్క సెలవ్ దా తయెదె గే, జెవ్వి ఒత్త వెనుల.” మెన జబాబ్ దిలన్.

41 జలె, యాకోబు యోహాను ఎత్తిచి కంట వెల్లొ జంక ఉచర్లిసిచి రిసా సేసిల దెస్సుజిన్ సిస్సుల్ సూన కెర, జోవయించి ఉప్పిరి కోపుమ్ జంక దెర్ల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

42 తెదొడి యేసు జేవ్ బారజిన్ సిస్సుల్క జోతె బుకారా కెర, “యూదుల్ నెంజిల వేర అదికారుల్ అన్నె జోవయించి తెడి తిల వెల్లెల మాన్సుల్ సొంత గవురుమ్ ఉచరన, ప్రైజల్క జాడ్లు వయడ్లి రితి జోవయింక పోటి తెన్ ఏలువ కెర్తతి మెన తుమ్ జాన్సు.

43 గని తుమ్చి తెన్ దస్సి తంక జయె నాయ్. తుమ్చితె కో వెల్లొ జంక ఉచరెదె గే, జొయ్యి తుమ్చొ సేవ కెర్తొసా జా తంక.

44 తుమ్చితె కో ముక్కిమ్ జంక ఉచరెదె గే, జో ఎత్తిజిన్క గొతిమాన్సు జా తంక.

45 కిచ్చొక మెలె, ఆవ్ మాన్సు జా జెర్మున్ అయ్లోసా కి మాన్సుల్చి అత్తి సేవ కెరవన్కు జెయ్యి నాయ్, గని మాన్సుల్క ఆవ్ సేవ కెరుకయ్ అయ్లయ్. మెలె, ఒగ్గర్జిన్ మాన్సుల్క సయ్తాన్చి రాజిమ్ తెంతొ అన్నె గెనన్తి రిసాయి మొర అంచి ప్రానుమ్ దెంక అస్సిచి

రిసా ఈంజ లోకుమ్తె అయ్లయ్” మెన సిస్సుల్క యేసు సంగిలన్.

గుడ్డి జలో బర్తిమయిక యేసు చెంగిల్ కెర్లిసి
(మత్త 20:29-34; లూకా 18:35-43)

46 ఒత్త తెంతో యేసు సిస్సుల్ వట్టె గెచ్చు గెచ్చు యెరికో పట్టుమ్తె జా కెర, సిస్సుల్ తెన్ కి, ఒగ్గర్ ఒగ్గర్జిన్ జనాబ్ తెన్ కి ఒత్త తెంతో బార్ జతె తతికయ్, తీమయిచో పుత్తుసి, బర్తిమయి బిచ్చిమ్ నజీతో గుడ్డి జలోసా, వాట్ సాడి పెన అస్సె.

47 ఒత్త వెన తా, “జెతోసా నజరేతు గవ్వెచో యేసు” మెన జో సూన కెర, “ఓ యేసుప్రబు, దావీదు రానోచి సెకుమ్తె జెర్మిలో రచ్చించుప కెర్తొసా, అంచి ఉప్పిరి కన్కారుమ్ తియ, అంక చెంగిల్ కెరు!” మెన కేక్ గలన్.

48 జలె, పాసి తిలస ఒగ్గర్జిన్ “తుక్లె తా” మెన గోల కెర్లె కి, జో గుడ్డి మాన్సు అస్సె, “దావీదుచి సెకుమ్తె జెర్మిలో రచ్చించుప కెర్తొసా, అంచి ఉప్పిరి కన్కారుమ్ తియ, అంక చెంగిల్ కెరు!” మెన అగ్గెచి కంట గట్టిజ కేకుల్ గలో.

49 ఇసి జతికయ్, యేసు టీవో జా కెర, “జోక ఇత్తల్తో బుకారా” మెన సిస్సుల్క సంగిలన్. జేవ్, జలె, “అల్లె, దయిరిమ్ జా ఉట్టు! యేసు తుక బుకార్తయ్” మెన జో గుడ్డి మాన్సుక బుకార్తయ్,

50 జో చట్టున ఉట్ట జోచి దుప్పటి పక్కయ్ వెంట గల, యేసుతె అయ్లో.

51 యేసుతె జెతికయ్, “ఆవ్ తుక కిచ్చొ కెరుక మెన తుయి కోర్ప జతసి?” మెన పుసితికయ్, జో గుడ్డి మాన్సు, “గురుబాబు. ఆవ్ దెకిత్ రితి కెరు.” మెన సంగిలో.

52 జలె, యేసు జోక “గో, అంచి ఉప్పిరిచి తుచి నముకుమ్ తుక చెంగిల్ కెర అస్సె.” మెన సంగిలన్. బేగి, జో మాన్సుచ అంకివో డిసిల, చి జో యేసుచి పట్టి వట్టె గలో.

11

యేసు యెరూసలేమ్ పట్టుమ్క ఉట్ట అయ్లిసి
(మత్త 21:1-11; లూకా 19:28-40; యోహా 12:12-19)

1 యేసు సిస్సుల్ తెన్ వట్టె గెచ్చు గెచ్చు, యెరూసలేమ్ పట్టుమ్క పాసి అయ్లి పొది, బేత్సగే బేతనియ మెంత గావిలెచి పాసిచి *ఒలివ మెట్టయ్ పావిలి పొది, యేసు జోచ సిస్సుల్తె దొగులక బుకారా,

* 11:11:11 ‘ఒలివ చెట్టె’ మెలె, జా దేసిమ్క ముక్కిమ్ జలి ఏక్ రగుమ్ పండ్లు. దస్సి కంక జయెదె, నెంజలె తేల్ పేడుక జయెదె. జేవ్ రూకుల్క ఈంజ మెట్టక నావ్ తియ అస్సి. † 11:10 11:10 యేసుచి రాజిమ్క ‘ఈంజ లోకుమ్చి రగుమ్చి’ మెన ప్రెజల్ ఉచర్త తిల. ఈంజ లోకుమ్చ జోవయించ బాదల్ తెంతో, జోవయింక ఆక్రమించుప కెర్లన తెంతో రచ్చించుప కెరెదె మెన ఉచర్త తిల, గని జోవయించి రాజిమ్ జోవయించి రచ్చన ముక్కిమ్క ఆత్మ రగుమ్చి మెన నేనెతి. ‡ 11:13 11:13 బొడ్డ పండ్లు రిత పండ్లు దసా రూకతె దెరుల. రూకు మాములుమ్ చెంగిల్చి జలె, అక్టల్ దెర్లి పొది పండ్లు కి దెర తంక.

2 “తుమ్చి మొక్కె తిలి గవ్వె గెచ్చు పెన, చి బేగి బంద తిలి గాడ్డె పిల్ల ఏక్ డీసెదె. జాచి ఉప్పిరి కేన్ మాన్సు కెయెం కి వెసుక నేతయ్. జాక యిప కెర ఉదడ ఆన.

3 కొనొ జలెకు తుమ్ కిచ్చొక దస్సి కెర్తసు?” మెన సంగిలెగిన, “ఇన్నెతెన్ ప్రబుక కామ్ అస్సె. కామ్ జలి బేగి ఇత్తల్తో అన్నె బే బేగి తెద్రయెదె, మెన సంగ” మెన సిస్సుల్క యేసు సంగ, తెద్రయెలన్.

4 జలె, జో సంగిలిన్తె జేవ్ గెతికయ్, ఏక్ వీదె ఏక్ గుమ్ముమె బంద తిలి ఏక్ గాడ్డె పిల్ల జోవయింక డిసిలి.

5 జేవ్ జాక యిపితె తతికయ్, జా వీదె టీవో జా తిల మాన్సుల్, “తుమ్ కిచ్చొక జా గాడ్డె పిల్లక యిపితసు?” మెన జోవయింక పుసిల.

6 జేవ్ పుసితికయ్, యేసు సంగిలి రితి సిస్సుల్ సంగిల. జేవ్ మాన్సుల్, “దస్సి జలె, దెర గెచ్చు!” మెన సెలవ్ దిల.

7 సిస్సుల్ జా గాడ్డె పిల్లక యేసుతె ఉదడ ఆన, జోవయించ దుప్పట్లు గట్ట గాడ్డెచి ఉప్పిరి గలిల, చి యేసు వెగ వెసిలన్.

8 పిమ్మట్ ఒగ్గర్జిన్ మాన్సుల్ జోవయించ దుప్పట్లు గట్ట వటె వటె అంతిర్ల. అన్నె సగుమ్జిన్ వాట్ సాడిచ బట్టిలె తిల చెట్లె కండిల రొడ్డల్ మట్టల్ ఆన, వట్టె అంతిర్ల.

9 దస్సి అంత్ర అంత్ర, పురైతో గెతన పడ్డో గెతన “జోబర, జోబర!” మెలి అర్దుమ్ తెన్ “ఓసన్న, ఓసన్న!” మెన, “దేముడు ప్రబుచి నావ్ తెన్ జెతోసొక ఓసన్న!

10 అమ్చో దావీదు పూర్గుమ్చో తెన్ మొదొల్ జలి †రాజిమ్ ముక్కిమ్ జా అన్నె బార్ జతిన్క జోబర! ఎత్కిచి కంట ఉప్పిరిచి టాన్తె తిలొసొక ఓసన్న!” మెన కేకుల్ గల్తె తిల.

11 జలె, యేసు యెరూసలేమ్తె పావ, దేముడుచి గుడితె గెచ్చు, పెన, సుట్టునంత అంకి గల, ఎత్కి దెక, సాంజ్ జలి రిసా అన్నె బార్ జా, బారజిన్ సిస్సుల్ తెన్ బేతనియ గవ్వె అన్నె ఉట్ట గెల.

అంజూరుమ్ రూకుక యేసు సావెన గల కెర్లిసి
(మత్త 21:18-19)

12 అన్నెక్ దీసి, జేవ్ బేతనియ గవ్వె తెంతో యెరూసలేమ్తె అన్నె గెతె తత్తికయ్, యేసుక చూ కెర్లి.

13 జలె అక్టల్ తిలి ఏక్ ‡అంజూరుమ్ రూకుక దెకిలన్. జలె, జో రూకతె పండ్లు దెర అస్సి గే నాయ్ గే మెన దెకుక గెలో. అక్కుడలీ గని అన్నె కిచ్చొయ్ నాయ్. కిచ్చొక మెలె, జా రూకతె జా కాలుమ్ పండ్లు దెర్లి నాయ్.

14 యేసు జలె, జో రూకుక, “అప్పె తెంతో తుచి తెంతో కో కి పండ్లు కతు నాయ్” మెన రూకుక సంగిలన్. జో సంగిలిసి జోచ సిస్సుల్ సూన్ల.

దేముడుచి గుడితె గెచ్చు వికితనక గోల కెర్లిసి

(మత్త 21:12-17; లూకా 19:45-48; యోహా 2:13-22)

15 తెదొడి జేవ్ యెరూసలేమ్తె పాచ కెర, యేసు దేముడుచి గుడితె పెన, దేముడుచి గుడిచి తెడి కిచ్చొ కిచ్చొ వికితనక గెంతనక దెక, జోవయింక ఉదడుక దెర, వీడబ్బుల్ పల్లయ్తనచ బల్లల్, అర్పితుమ్ దెత పార్షు పిట్టల్ వికితనచ బల్లల్ సేడవ దా,

16 కో కి, కిచ్చొ కి దేవులుమ్ వాటు వయ నెంక కి ఒప్పె నాయ్.

17 దస్సి కెర తా,

“ ‘దేసిమ్లు ఎత్కిచ మాన్సుల్ అంచితె జెతి రితి, అంచి గేరు ప్రార్దన కెర్లి గేరు జా, దస్సి తవున్.’

మెన దేముడుచి కొడెతె రెగ్లవ అస్సె. తూమ్ జలె, జాక చోర్లు జితో గేరు జతి రితి ఈంజో దేముడుచి గుడిక మార్పువ కెర అస్సున్” మెన సంగిలన్.

18 వెల్లెల పూజర్లు, మోసె తెన్ దేముడు దిలి ఆగ్గుల్ సికడ్డన సూన కెర, పిమ్మట్ జోయ్యి కెర్లి బోదనక సర్ల తెన్ సూన ప్రెజల్ ఎత్కిజిన్ ఆచారిమ్ జతతి మెన దెక, జో యేసు వెల్లో జయెదె మెన బియఁ కెర, “జోక కిసి మారుమ” మెన కుట్ల ఉచరన్ల.

19 సాంజ్ జతికయ్, యేసు పట్టుమ్ తెంతో అన్నె బార్ జలొ.

20 పెందలె, యేసు సిస్సుల్ అన్నె యెరూసలేమ్తె గెతె తతికయ్, వట్టి జో అంజూరుమ్ పండ్లు రూకుక దెకిలె, చెర్రో తెంతో మొదోల్ జా ఒండి సుకా గెచ్చు అస్సె.

21 సుకాగెలిన్ దెక, జో రూకుక యేసు సంగిలి కోడు ఏదస్ట కెర, పేతురు, “గురుబాబు, ఆదె! తుయి సాపెన దిలొ రూకు సుకా గెచ్చు అస్సె” మెన సంగిలన్.

22 యేసు సిస్సుల్ దెక కిచ్చొ సంగిలన్ మెలె, “దేముడుచి ఉప్పిరి తుమ్ నముకుమ్ తియన.

23 తుమ్క ఆవ్ కిచ్చొ కచితుమ్ సంగితసి మెలె, ఈంజ మెట్టక జవున్ దెక, ‘ఓ మెట్ట, ఉట్టి జా సముద్రుమ్తె గలి జా’, మెన పెట్టితె కిచ్చొ అన్మానుమ్ నెంతె తా, పూర్తి నంపజా నెరవెర్పువ జయెదె మెన, కొన్సో జలెకు సంగెదె గే, జయ్యి జోచి రిసా ప్రబు జర్గు కెరెదె మెన తుమ్క ఆవ్ కచితుమ్ సంగితసి.

24 జాకయ్ తుమ్క ఆవ్ కిచ్చొ మెంతసి మెలె, ప్రార్దన కెర్లె పొది తుమ్ కిచ్చొ సంగిలే కి, ‘జా అమ్క దొర్కు జలి’ మెన తుమ్ నంపజా, చి కచితుమ్ తుమ్క దొర్కు జయెదె.

25 గని ప్రార్దన కెర్లె పొది తుమ్క కిచ్చొ బుద్ది తంక మెలె, తుమ్తె ఎక్కిలో అన్నెక్కోక కిచ్చొ జవున్ అల్లర్ కెర తిలెగిన, అల్లర్ కెర్లెసాక, జో అల్లర్ సేడ్లెసా చెమించుప కెరుక అస్సె. తుమ్ దస్సి ఎక్కిలోక ఎక్కిలో చెమించుప కెర్లె, పరలోకుమ్ తిలొ తుమ్చొ అబ్బొ జలొ దేముడు తుమ్క చెమించుప కెరెదె.

26 *తుమ్ అన్నెక్కో మాన్సుల్క చెమించుప నే కెర్లెగిన, దస్సి పరలోకుమ్ తిలొ అబ్బొ జలొ దేముడు తుమ్క చెమించుప కెరె నాయ్” మెన యేసు సికడ్డన్.

యేసుక అన్నె పరిచ్చు కెర్లిసి

(మత్త 21:23-27; లూకా 20:1-8)

27 జలె, యెరూసలేమ్తె అన్నె పాచిలి. యేసు దేముడుచి గుడితె అన్నె గెచ్చు ఒత్త బుల్తె తతికయ్, వెల్లెల పూజర్లు, మోసె తెన్ దేముడు దిలి ఆగ్గుల్ సికడ్డన, అన్నె సగుమ్జిన్ వెల్లెల మాన్సుల్ కి, జోతె జా కెర,

28 “తుయి కెర్లె కమె కెరుక, తుయి బోదన కెరుక తుక కిచ్చొ అదికారుమ్ అస్సె? కొన్సో తుక అదికారుమ్ దిలన్?” మెన జోక పుసిల.

29 జాకయ్ యేసు జోవయింక, “ఆవ్ కి తుమ్క ఏక్ కోడ్ పుసిందె. తుమ్ చెంగిల్ జబాబ్ సంగిలె, ఆవ్ కిచ్చొ అదికారుమ్క ఇసి కెర్తసి గే, ఆవ్ కి తుమ్క సంగిందె.

30 జలె, యోహాను బాప్తిసుమ్ దెతె తిలిన్చి అదికారుమ్ కేనె తెంతో చి? పరలోకుమ్ తెంతో చి గే, మాన్సు తెంతో చి గే, తుమ్ సంగ” మెన వెల్లెల మాన్సుల్క యేసు పుసిలన్.

31 దస్సి పుసితికయ్, జేవ్ వెల్లెల మాన్సుల్ కిసి జల మెలె, ఎక్కిలో తెన్ ఎక్కిలో బమ్మ తెన్ లట్టబన, ఇసి మెంతె తిల, “ ‘పరలోకుమ్ తెంతో చి’ మెన అమ్ సంగిలెగిన, దస్సి జలె, తుమ్ కిచ్చొక జోక నంప కెర్పు నాయ్?” మెన అమ్క సంగిందె.

32 “ ‘మాన్సు తెంతో చి’ మెన సంగుక నెంజె” మెన ఉచర్లన. కిచ్చొక మెలె, ‘యోహాను నిజుమి దేముడుచి కబుర్ ఆన్లొసా’ మెన ప్రెజల్ ఎత్కిజిన్ నంపజా అస్తి మెన జేవ్ వెల్లెల మాన్సుల్ ప్రెజల్క బితె తిల.

33 జాచి రిసా “నేనుమ్” మెన జబాబ్ సంగిల. జేవ్ దస్సి సంగితికయ్, యేసు జోవయింక “దస్సి జలె, కేన్ అదికారుమ్క ఆవ్ అంచ కమె కెర్తసి గే, ఆవ్ తుమ్క సంగి నాయ్” మెన సంగ ముడ్లొ కెర్లన్.

§ 11:15 11:15 అర్పితుమ్ దెత పిట్టల్ గల్ల గెనుక జలె, జోవయింక ఆక్రమించుప కెర్లి రోమ్ దేసిమ్చి ప్రబుతుమ్చి డబ్బుల్ దిలె నెంజె. జేక, జోవయించి డబ్బుల్ పల్లవన, దేముడుచి గుడితె కామ్క జెతికయ్ రగుమ్ డబ్బుల్కయ్ పిట్టల్ గల్ల గెనుక, నెంజెలె దేముడుచి గుడిక డబ్బుల్ దెంక. డబ్బుల్ పల్లయ్తన నాయిమ్ నెంజెల్చి ఎదిలి లాబుమ్ కి కెరనుల. * 11:26 11:26 గ్రీకు బాస తెన్ ఈంజ మత్తలి రెగిడ్ల సగుమ్ పుస్తకల్తె 26 నంబర్ కోడు తయి నాయ్.

12

ద్రాచతోటచి రిసా యేసు సంగిలి టాలి
(మత్త 21:33-46; లూకా 20:9-19)

1 తెదొడి యేసు వెల్లెల మాన్సుల్క దస్సి సంగ, జోవయింక టాలివొ సంగ అన్నె బోదన కెరుక దెర్లన్. తెదొడి కిచ్చొ టాలి ఏక్ సంగిలన్ మెలె, ఇసి జతయ్; “ఏక్ మాన్సు ద్రాచ తోట రోవడ కెర, జాచి నుట్టునంత కోట గలవడ కెర, ద్రాచ రస్సుమ్ కడ గన్న వెల్లొ పత్తుర్ కూనవ కెర, తోట రకితి మాటు రితిసి బందవ కెర, రకితసక నిసాన, జోవయింక జా తోట గుత్త దా, వేరతె ఉట్ట గెలన్.

2 “పంటొ పికిలి పొది, జేవ్ గుత్త నజీలనతె జా తోటచి పంటొ ఏక్ వాట నజ ఆన్తి రిసా, గొత్తి సుదొ ఎక్కిలోక ఎజొమాని తెద్రయ్లన్. జో ఒత్త పావితికయ్,

3 గుత్త నజీల జేవ్ రకిత మాన్సుల్ జో గొత్తి సుదొక దెర, పెట, కిచ్చొ నే దెతె ఉదడ్డ.

4 ఒత్త తెంతొ, అన్నెక్లో గొత్తి సుదొక జో ఎజొమాని తెద్రయ్లన్, గని జేవ్ రకితన జోచి బోడి పెట కెర దా, మరియాద నెంతె జోక ఉదడ గెల.

5 పిమ్మట్ అన్నెక్లోక ఎజొమాని తెద్రయ్తికయ్, జేవ్ రకితన జోక మార గెల. అన్నె ఒగ్గర్జిన్క తెద్రయ్తికయ్, జోవయింతె సగుమ్జిన్క పెట గెల, సగుమ్జిన్క మార గెల.

6 “జలె, జో ఎజొమానిక అన్నెక్లో తిలన్, కొన్నొ మెలె, సొంత ప్రేమ తిలొ పుత్తుసి. ‘అంచొ పుత్తుక మరియాద దెకుల, కిచ్చొగె’ మెన, ఆకర్క జోకయ్ తెద్రయ్లన్.

7 గని జేవ్ గుత్త నజీలన ‘ఇన్నెకయ్ అబ్బొన్చి దనుమ్ కలుగు జయెదె. అల్లె, ఇన్నెక మారుమ, చి ఇన్నెక కలుగు జతి వాట అమ్కయ్ దొర్కు జయెదె’ మెన జోవయింక జెవ్వి లట్టబన్.

8 జేవ్ ఎజొమానిచొ పుత్తున్క దెర కెర, మార కెర, పినుమ్ జా ద్రాచ తోట తెంతొ బార్ కెర వెంట గెల.

9 జలె, దస్సి కెర్లి రిసా, జా తోటచొ ఎజొమాని కిచ్చొ కెరెదె మెలె, జో జా కెర, జేవ్ గుత్త నజీలసక నాసెనుమ్ కెర, జా తోట వేర మాన్సుల్క గుత్త దెయెదె.

10 “అల్లె, ఆవ్ అప్పె తుమ్క సంగితిన్చి రిసా, దేముడుచి కొడతె రెగిడ్లిసి తుమ్ కెయ్య సదు కెర్పు నాయ్ గె? ‘కామ్క నెంజె’ మెన ఉచర, గేర్ బందిలన పిటయ్ల పత్తురు, బోడిపత్తురు జలన్.

11 ప్రబు సొంతయ్ ఇసి జర్గు కెర్లొ. జో ఇసి కెర్లి రిసా, అమ్ దెకిలె ఆచారిమ్ జతయి!” మెన జేవ్ కోపుమ్ జల వెల్లెల మాన్సుల్క యేసు సంగిలన్.

12 “అమ్చి రిసాయి యేసు సంగితయ్” మెన వెల్లెల మాన్సుల్ చినన కోపుమ్ జా, జోక దెరుక ఉచర్ల, గని ప్రెజల్

కోపుమ్ జా అల్లర్ కెరుల మెన, జోవయింక బియకెర, జోక ముల దా ఉట్ట గెల.

వెల్లెల మాన్సుల్ యేసుక పరిచ్చ కెరయ్లిసి
(మత్త 22:15-22; లూకా 20:20-26)

13 ‘యేసుక కొడతె అడ్డవ నేరిమ్ వయడుమ’ మెన, సగుమ్జిన్ పరిసయ్యుల్క కి హేరోదు పచ్చెన జతన సగుమ్జిన్క కి, జేవ్ కోపుమ్ జల వెల్లెల మాన్సుల్ తెద్రయ్తికయ్,

14 జేవ్ యేసుతె జా కెర, “గురుబాబు, తుయి నత్తిమ్చొ మెన జానుమ్. తుయి మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల మెన నే బితె, దేముడు దెకయ్లి వాట్చి రిసా సత్తిమ్ తెన్ బోదన కెర్లసి మెన అమ్ జానుమ్” మెన పులయ్తి రితి సంగ, అన్నె, “రోమ్ దేసిమ్చి ప్రబుతుమ్చొ కైసర్ రానొక అమ్ *సిస్తు దెంక నాయిమ్ గే, నాయ్ గె? అమ్ జా సిస్తు దెంక గే పోని గే? సంగు” మెన యేసుక సంగిల.

15 ఇసి సంగితికయ్, యేసు జోవయించి ఉప్రమెన్సు జాన, “అంక కిచ్చొక పరిచ్చ కెర్లసు? డబ్బుల్ కాసు ఏక్ అంచితె ఆన దెకవ” మెన సంగితికయ్, ఆన్.

16 జేవ్ జో తెన్ జా కాసు ఆన్లి పొది, జా కాసు దెకవ, “ఇన్నె కచి పోలిక, కచి నావ్ డిస్తయ్?” మెన జోవయింక పుసిలన్, చి జేవ్ జోక, “కైసర్ రానొచి” మెన సంగిల.

17 యేసు జోవయింక, “కైసర్క దెతిసి కైసర్క, దేముడుక దెతిసి దేముడుకయ్ దెంక అస్సె” మెన, జోవయింక జబాబ్ దిలన్. దస్సి జబాబ్ దెతికయ్, వెల్లెల మాన్సుల్ తెద్రయ్ల మాన్సుల్ ఆచారిమ్ జల.

సద్దూకయ్యుల్ యేసుక పరిచ్చ కెర్లిసి
(మత్త 22:23-33; లూకా 20:27-40)

18 తెదొడి, ‘మొర గెలిగిన అన్నె జివ్ జంక నెంజె, అన్నెక్ లోకుమ్తె గెచ్చుక నెంజె’ మెన ప్రెజల్క సికయ్త సద్దూకయ్యులు సగుమ్జిన్ యేసుతె జా కెర,

19 “గురుబాబు, ఈందె, ‘ఎక్కిలోచొ అన్నొసి బోదల్ నెంతె మొర గెలె, తేర్నిక ఎక్కిల్క ముల దా గెలిగిన, జోచొ బావొసి అన్నొన్చి తేర్నిక ఆనన, అన్నొన్చి నావ్ తెన్ బోదల్ పాయిక అస్సె’ మెన మోసే పూర్లుమ్చొ అమ్ యూదుల్చి రిసా రెగిడ్లొ గెద?

20 జలె సత్తుజిన్ బావుడ్డు తిల. జోవయింతె తొల్పుర్ తెర్ని ఆనన, బోదల్ నెంతె మొర గెలన్.

21 ఒత్త తెంతొ, జో మాన్సుచి పట్టి జెర్మిలోసా జా తేర్బోదక ఆనన, జో కి బోదల్ నెంతె మొర గెలన్. జోచి పట్టి జెర్మిలోసా కి దస్సి కెరన దస్సి జలన్.

22 జేవ్ సత్తుజిన్ బావుడ్లు ఎత్తిజిన్ వర్స తెన్ దస్సి కెరన మొర గెల. జేవ్ ఎత్తిజిన్ మొర గెతికయ్, జా తేర్బోద కి మొర గెలి.

23 జలె, మొర గెలన అన్నె జివ్ జతి పొదిక, జోవయింతె కక్క తేర్పి జా తయెదె? జేవ్ సత్తుజిన్ వర్స తెన్ జా తెన్ పెండ్లి జల గెద?” మెన యేసుక పుసిల.

24 ఇసి జతికయ్, యేసు జోవయింక, “తుమ్ పొరపాట్ జా గతసు. కిచ్చొక గే తుమ్ ఉచర. మెలె, దేముడు పూర్ణమ్ రెగ్డయ్లిసి సదు కెర్లె కి, ఒత్త తిలిసి అర్దుమ్ కెరన్ను నాయ్, చి జో కెరయ్త కమె దెకిలెకి, జోచి సెక్తి అదికారుమ్ చినున్ నాయ్.

25 మెలె, మొర గెచ్చు అన్నె జివ్ జతిన్తె పెండ్లివొ నే జతె, పరలోకుమ్తె మాన్సుల్ దూతల్చి రితి దస్సి తవుల.

26 పడ్డె, ‘మొర గెలన అన్నె జతి నాయ్’ మెన ఉచర, తుమ్ అన్మానుమ్ తెన్ అన్నున్. గని జా సుట్టు, పూర్ణమ్, రూకు తెడి జా ఆగి లగితె తిలిన్చి రిసా రెగిడ్లిన్తె

ఆవ్ అబ్రాహామ్క, ఇస్సాకుక చి యాకోబుక దేముడుయి, మెన దేముడుచి కోడు మోసే రెగిడ్లి పుస్తకుమ్తె సదు కెర్పు నాయ్ గె?

27 జలె, జేవ్ మొర్ల పూర్ణుల్క మోసేచి కాలుమ్ ఎద కి జోవయింక జో దేముడు తా కామ్క అయ్లిన్ తెన్ జేవ్ అన్నెక్ లోకుమ్తె గెచ్చు జిప్పి అస్తి మెన రుజ్జు జతయ్, రితి మొర గెలనక నాయ్, గని జివ్ తిలనకయ్ జో దేముడు. తుమ్ ఎదివాట్ పొరపాట్ జా అన్నున్” మెన జేవ్ సద్దూకయ్యుల్క యేసు సంగిలన్.

వెల్లి ఆగ్గుచి రిసా యేసుక పుసిలిసి
(మత్త 22:34-40; లూకా 10:25-28)

28 ఈంజ కోడుచి రిసా జేవ్ సద్దూకయ్యుల్ తెన్ పరిసయ్యుల్ గగ్గోల్ జంక దెర్ల. ఇసి జతికయ్, మోసే తెన్ దేముడు దిలి ఆగ్గుల్ సికడ్డెసా ఎక్కిలో నూన, జోవయించి నెడిమి జా కెర, జేవ్ వెల్లెల మాన్సుల్చ పరిచ్చుల్క యేసు చెంగిల్ జబాబుల్ దెతయ్ మెన దెక, జోక, “ఆగ్గుల్ ఎత్తితె ముక్కిమ్చి కేన్?” మెన పుసిలన్.

29 యేసు జోక, “ముక్కిమ్చి ఇసి జతయ్;

‘ఓ అమ్చ ఇస్సాయేలులు, నూన, ప్రబు జలో అమ్చో దేముడు ఎక్కిలో. జో ఎక్కిలోయి అదికారుమ్ తిలో దేముడు. అన్నెకోయి నాయ్’

మెన, అన్నె;

30 ‘తుచొ ప్రబు జలో దేముడుక తుమ్చి ఒండి పెట్టి తెన్, తుమ్చి ఒండి ఆత్మ తెన్, తుమ్చి ఒండి మెన్ను తెన్, తుమ్చి ఒండి బుద్ధి తెన్, తుమ్చి సెక్తి ఎత్తి తెన్ ప్రేమ కెర్లె తంక.’

మెన మోసేచి అత్తి రెగిడ్లి దేముడుచ ఆగ్గుల్తె ముక్కిమ్.

31 పడ్డె,

‘తుమ్క తుమి కెద్ది ప్రేమ కెరంతసు గే, పక్కయ్చక కి తెద్ది ప్రేమ కెర్లె తంక’

మెన అన్నెక్ ఆగ్గు కి ముక్కిమ్ అన్నె. ఈంజేవ్ దొన్ని ఆగ్గుల్చి కంట కేన్ ఆగ్గు కి జినె నాయ్” మెన జోక యేసు సంగిలన్.

32 జలె, జో మోసే తెన్ దేముడు దిలి ఆగ్గుల్ సికడ్డెసా యేసుక “నిజామి, గురుబాబు. ‘జో ఎక్కిలోయి’ మెన, ‘అదికారుమ్ తిలో దేముడు అన్నె కోయి నాయ్’ మెన తుయి సత్తిమ్ సంగిలది.

33 అన్నె, ‘ఒండి పెట్టి తెన్, తుమ్చి ఒండి బుద్ధి తెన్, తుమ్చి ఎత్తి సెక్తి తెన్ జోక ప్రేమ కెరుక’ మెన, అన్నె ‘తుమ్క తుమి కెద్ది ప్రేమ కెరంతసుమ్ గే, పక్కయ్చక తెద్ది ప్రేమ కెర్లె తంక ముక్కిమ్’ మెన తుయి అన్నె మాన్సుల్క సంగిలిసి సత్తిమ్. బలి గట్ట ఎత్తిచి కంట ఈంజేవ్ దొన్ని ఆగ్గుల్ రితి కెరుక విలువ” మెన మోసే తెన్ దేముడు దిలి ఆగ్గుల్ సికడ్డెసా ఒప్పున యేసుక జబాబ్ దిలన్.

34 ‘ఇసి సంగ బుద్ధి తెన్ జబాబ్ దిలో” మెన యేసు దెక, జోక “దేముడుచి రాజిమ్క తుయి దూరి నాయ్” మెన సంగిలన్. జలె, యేసు బలే బుద్ధి తెన్ ప్రన్నల్ ఎత్తిక బులవ సంగితికయ్, మోసే తెన్ దేముడు దిలి ఆగ్గుల్ సికడ్డెసాక, జో జా కోడు సంగిలి తెంతో, కో కి కేన్ కోడుక కి యేసుక పుసుక దయిరిమ్ కెర్లె నాయ్.

క్రీస్తు దావీదు పూర్ణుమ్చొక ప్రబు కి పుత్తున్ కి
(మత్త 22:41-46; లూకా 20:41-44)

35 యేసు దేముడుచి గుడితె అన్నె బోదన కెర్లె తత్తికయ్, “రచ్చించుప కెర్లొసా జలో క్రీస్తు దావీదు రానొచి సెకుమ్తె జెర్మ జోక పుత్తుసి జయెదె మెన మోసే తెన్ దేముడు దిలి ఆగ్గుల్ సికడ్డెన కిసి సంగుక జతయ్?

36 మెలె, దేముడుచి సుద్ది తిలి ఆత్మ దావీదుచి పెట్టి సికయ్తికయ్

తుచ విరోదుమ్ సుదల్క తుయి సుదితి రితి ఆవ్ కెర్లి ఎద, అంచి ఉజెతో పక్కయ్ తుయి వెస తా, మెన ప్రబు అంచొ ప్రబుక సంగిలన్.

మెన దావీదు రానొ సొంత సంగిలన్.

37 దస్సి దావీదు రానొ క్రీస్తుక ‘ప్రబు’ మెన సంగితయ్ జలె, జో క్రీస్తు కిసి జా జోక పుత్తుసి జయెదె? ఉచర” మెన ఒత్త తిలనక యేసు సంగిలన్. జలె, ప్రెజల్చి ఒగ్గర్జిన్ జనాబ్ సర్ల తెన్ జోచ కొణొ సూన్తె తిల.

38 యేసు అన్నె బోదన కెర్లె తిలి పొది ఇసి మెలన్. “దిగిల సూటిచ పాలల్ గలంత గవురుమ్ ఉచరంత మోసే తెన్ దేముడు దిలి ఆగ్గుల్ సికడ్డెనచి రిసా తుమ్ జాగర్ల తెన్ తా. జేవ్ సంతవీదులె టీచ, మాన్సుల్ ఎత్తి అమ్క జొకర్తు మెన కోర్ప జతతి.

39 సబ గెరలె ముక్కిమ్చ టాన్లుతె, విందుల్తె ముక్కిమ్చ టాన్లుతె వెసుక కోర్ప జతతి.

40 జేవ్ మోసిమ్లు కెర రండెల్ మాన్సుల్చ గెరల్ విక కతతి, అన్నె ఉప్రమెన్సుక దిగిల ప్రార్దనల్ కెర్తతి. దస్సి, జోవయించి పాపుమ్ ఒగ్గరి, చి వెల్లి సిచ్చ సేడుల” మెన జేవ్చి రిసా యేసు సంగిలన్.

బీద సుద్ది జాక కలుగు జలిసి ఎత్తి దేముడుక దిలిసి (లూకా 21:1-4)

41 తెదొడి యేసు దేముడుచి గుడితె తతి, దేముడుచి కామ్క కానుక దెతి డబ్బుల్ పెట్టెల్చి మొక్కె వెసిలన్. ఒత్త వెన, బెర అయ్ల మాన్సుల్ ఒత్త డబ్బుల్ గల దెతిసి దెకితె తిల్.

జలె, ఒగ్గర్జిన్ సొమ్నార్లు ఒగ్గర్ డబ్బుల్ జేవ్ పెట్టెల్తె గల్తె తతికయ్,

42 ఎద్దెరె నెంజిలి రండెల్ మాన్సు ఎక్లి జా కెర, దొన్ని ఇదుల రాగి కాసుల్ పెటెతె గలిలి.

43 గల్తికయ్, యేసు జోచ సిన్సుల్క పాసి బుకారాన, “ఈందె, జేవ్ సొమ్నార్లు ఎత్తిజిన్ మొత్తుమ్ దిలిన్చి కంట ఈంజ ఎద్దెరె నెంజిలి రండెల్ మాన్సు ఒగ్గర్ దా అస్సె” మెన కచితుమ్ సంగితసి.

44 కిచ్చొక మెలె, జోవయించి ఎదివాట్ సొమ్నారుమ్ తెంతో సేసిలిసి జా దా అస్తి. ఇన్నెక, కిచ్చొ నెంజిలికి, కలుగు జలిసి ఎత్తి దా గెల అస్సె” మెన సిన్సుల్క బుద్ది దెకయ్లో.

13

దేముడుచి గుడి నాసెనుమ్ జయెదె మెన యేసు సంగిలిసి

(మత్త 24:1-44; లూకా 21:5-33)

1 ఒత్త తెంతో, యేసు దేముడుచి గుడి తెంతో బార్ జతె తతికయ్, జోచ సిన్సుల్తె ఎక్కిలో, “ఈందె, గురుబాబు, ఈంజ దేముడుచి గుడి బందిల పత్రల్, కెద్ది బమ్మ జతి రితి అస్సె!” మెన దెకయ్లన్.

2 దస్సి మెన దెకయ్తికయ్, యేసు జోవయింక “ఈంజేవ్ ఎత్తి దెకితసు, గని అప్పె పత్తుర్చి ఉప్పిర్ పత్తురు దొత్తల్ తిలె కి, ఎక్కి జలెకు నే టీవో నే జతె, గలి జతి దీసి జెయెదె” మెన జబాబ్ దిలన్.

3 తెదొడి దేముడుచి గుడిచి మొక్కె తిలి ఒలీవ మెట్టయ్ యేసు గెచ్చ వెసిలన్, చి పేతురు యాకోబు యోహానుచి అంద్రెయ మెల సిన్సుల్ జోతె జా కెర, అన్నె కో నెంతె,

4 “గురుబాబు, తుయి సంగిలిసి కెయ్చ ఒగ్గు జయెదె గే అమ్క సంగు. ఈంజ నెరవెర్చుప జతి పొది అయ్లి మెలె, అమ్ చినితి రిసా కిచ్చొ గుర్తు తయెదె?” మెన యేసుక పుసిల.

5 జో జోవయింక “కొన్సొ జలెకు తుమ్క అంచి రిసా మోసిమ్ నే కెర్తె రితి తుమ్ జాగర్త దెకన.

* 13:14 13:14 యేసు జెర్లు డబ్బయ్; 70; వెర్పుల్ గలి పట్టి ఈంజ నస్టుమ్ ఒగ్గు జలి. మెల యేసు పరలోకుమతె గెచ్చ అన్నె విస్సెక్ సత్తు; 27; వెర్పుల్ గెతికయ్.

6 కిచ్చొక మెలె, ఒగ్గర్జిన్ మాన్సుల్ క్రిస్తుచి నావ్ తెన్ జా అస్సి, మెన సంగుక జలెకు, ‘ఆవ్ క్రిస్తు’ మెన సంగుక జలెకు, ఒగ్గర్జిన్క మోసిమ్ కెర, వేర బుద్ది సికడుల.

7 అన్నె, ‘యుద్దుమ్ జతయ్’ మెన జలెకు, ‘యుద్దుమ్ జయెదె’ మెన జలెకు తుమ్ సూన్తె. గని బమ్మ నెంతె తా. ఇనచ ఎత్తి ఒగ్గు జంక అస్సి. గని ఈంజ ఉగుమ్ ఒగ్గర్ బే బేగి పూర్తి జయె నాయ్.

8 అన్నె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క టీవో జవుల. వేర వేరతె బూకంపల్, కరువుల్ ఒగ్గు జవుల. గని ఈంజ ఎత్తి అంచి రాజిమ్ ఏలుప కెర్తె ఉగుమ్ జెర్మయ్త నొప్పుల్ రితె జా, ఇనచ ఎక్కి మొదొల్ జవుల.

9 “తుమ్ మాత్తుమ్, జాగర్త దెకన. కిచ్చొక మెలె, జా పొదిక మాన్సుల్ తుమ్క తీర్పు కెర్త సబల్తె సొర్పు దెవుల. అమ్చ యూదుల్చ సబ గెరల్తె తుమ్క పెట గెలుల. జేవ్ దస్సి విరోదుమ్ కెర్తె, అంచి నావ్చి రిసా, అంచి రిసా సాచి సంగితి రిసా, అదికార్లుచి మొక్కె రానల్చి మొక్కె తుమ్ టీవో జస్తె.

10 గని తొలితొ, ఉగుమ్ నే మార్పుప జతె, అగ్గె, ఒండి లోకుమ్చ కేన్ దేసిమ్చ పైజల్క కి సుబుమ్ కబుర్ నూనవుక అస్సి. నూనయ్లెకయ్, ఈంజ ఉగుమ్చి ఆకర్ దీసి జెయెదె.

11 “జలె, తుమ్క మాన్సుల్ నేరిమ్ వయడ అదికారుల్తె సొర్పు దెతి పొదిక, ‘కిచ్చొ సంగుక గే?’ మెన తుమ్ చింత గలన నాయ్. తుమ్ సంగుక మెన జయ్యి గడియయ్ దేముడుచి సుద్ది తిలి ఆత్మ కిచ్చొ దెయెదె గే, జయ్యి సంగ. కిచ్చొక మెలె, తుమి లట్టబ్బు నాయ్. దేముడుచి సుద్ది తిలి ఆత్మయి లట్టబెదె. తుమ్క తుమి సంగున్ నాయ్.

12 “జా పొదిక అన్నె కిచ్చొ బాద తయెదె మెలె, అన్సొన్క బావొసి జలెకు, పుత్తున్క అబ్బొసి జలెకు, మొర్తి సిచ్చతె సొర్పు దెవుల. అన్నె, అయ్యన్క అబ్బొన్క పుత్తుర్లు సగుమ్జిన్ విరోదుమ్ జా, జోవయింక మొరవుల.

13 అన్నె, తుమ్ అంచి నావ్ తెన్ బులితె తత్తెచి రిసా ఎతివాట్జిన్ తుమ్క విరోదుమ్ జవుల. గని ఇన అల్లర్ జలెకి, ఆకర్ ఎద కో నముకుమ్ తెన్ తా ఓర్పుప జవుల గే జెద్వి రచ్చించుప జవుల” మెన యేసు సంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి

14 “జలె, *పిమ్మట్, దేముడుక విరోదుమ్ జా జోక బలే దూసుప కెర నాసెనుమ్ కెర్తెక్ ఏక్, దేముడుచి గుడితె టీవో నే జతి టాన్తె టీవో జంక తుమ్ దెకిలె, ఇన్నెచి అర్దుమ్ కిచ్చొ మెలె, ఈంజ సదు కెర్తెన తుమ్ చెంగిల్ ఉచరన.

జా గుర్తు తుమ్ దెకిలె, ఈంజ యూదయ ప్రదేసిమ్తెచ మాన్సుల్ చట్టున డొంగ్రెల ఉట్ట నిగుతు!

15 జా పొదిక కేన్ మిద్దెచి ఉప్పిరి కో తవుల గే, ఉత్త కెర, జోచి గెరి తెంతో కిచ్చొ జలెకు వస్తువ వెంట నెంక జవున్ గెరి పెసుక జయె నాయ్.

16 వెడయ్ గట్ట కో తవుల గే, కామ్చి రిసా కడ్ల జోచ పాలల్ జవున్ వెంట నెంక పస్ల జెంక నాయ్.

17 అయ్యో! జేవ్ దీనల్క వయ తిల తేర్బోదల్, బోదల్ వడ్డివో, ఉట్ట నిగుక నెత్త ఒగ్గర్ సైమల్ జవుల!

18 “ ‘ఈంజ ఎత్కి చల్లి పొది జర్లు జవున్ నాయ్’ మెన తుమ్ ప్రార్దన కెర.

19 కిచ్చొక మెలె, లోకుమ్ జెర్మయ్లి తెంతో అప్పె ఎద కలుగు జల సైమల్చి ఒగ్గర్ సైమల్ జేవ్ దీనల్క ఎత్తివాట్ తయెదె. జలి మెలె, ఒత్త తెంతో అన్నె కెయఁక కి తెద్ది సైమ తయె నాయ్.

20 జాచి రిసా, జేవ్ అల్లర్ జత దీసల్ తొక్కి జతి రితి ప్రబు సెలవ్ దెతో నాయ్ జలె, కో కి మాన్సుల్ రచ్చించుప జంక నెత్తిర్ తా. గని సంపజతి రిసా రచ్చనక నిసాన జల మాన్సుల్ పాడ్ నే జతి రిసాయి, ‘జేవ్ సైమల్ తొక్కి దీసల్ తత్తు’ మెన ప్రబు సెలవ్ దా అస్సె.

21 అన్నె తెదొడ్క, ‘ఈందె క్రిస్తు!’, ‘ఓదె క్రిస్తు!’ మెన కో జలెకు తుమ్క సంగిలె, జా సంప కెర నాయ్.

22 కిచ్చొక మెలె, అబద్దుమ్చ జా కెర, ‘ఆవ్ క్రిస్తు’ మెనన జలెకు, ‘ఆవ్ దేముడుచి కబుర్ ఆన్తోసా’ మెనన జలెకు, రచ్చనక నిసాన జలనక మోసిమ్ కెర జోవయించి నముకుమ్ పిట్టవుక మెన ఉచరన, వెల్లో మాయకమొ కెరుల.

23 అల్లె, చెంగిల్ దెకన. ఈంజ ఎత్కి నే జతె అగ్గెయ్ తుమ్క ఆవ్ సంగితసి.

24 “జేవ్ దీనల్క, ఆవ్ సంగిల జేవ్ సైమల్ పూర్తి జలె పిమ్మట్క, పొద్దు అందర్ జయెదె, జోసు కి ఉజిడి దెయె నాయ్.

25 ఆగాసుమ్ తెంతో సుక్కల్ గెసురుల, చి ఆగాసుమ్తె ఎత్కి అద్దుర్ జయెదె.

26 తెదొడ్క ఎదివాట్ అదికారుమ్ తెన్, పరలోకుమ్చి ఉజిడి తెన్, ఆవ్ మాన్సు జా జెర్మన్ అయ్లోసా మబ్బుల్తె పరలోకుమ్ తెంతో ఉత్త జెయిందె. ఆవ్ దస్సి ఉత్త జెతిసి లోకుమ్ ఎత్కి దెకుల.

27 తెదొడ్క అంచ దూతల్క తెద్రయిందె, చి జేవ్, చెత్తర్ దిక్కుల్ తెంతో, లోకుమ్చి ఏక్ పక్క తెంతో, అన్నెక్ పక్క ఎద, కేన్ దేసిమ్చక నే పిట్టె, రచ్చనక ఆవ్ నిసాన్ల మాన్సుల్క ఆనవ, ఎక్కితె కుడవనిందె.

* 14:1 14:1 పూర్ణుమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతో ప్రబు రచ్చించుప కెర్లిసి ఏద కెర్లి వండుగు, ఈంజ. ముక్కిమ్క కిచ్చొ ఏద కెరుల మెలె, ‘అమ్చ యూదుల్క విడ్డల్ కెర్లు’ మెన ఐగుప్తు దేసిమ్చ కుటుంబల్ ఎత్కిచ తొల్పూర్ జల మున్సుబోదల్క దూత మార్లిన్తె యూదుల్చ తొల్పూర్ బోదల్ నే మొర్లి రితి ప్రబు జోవయింక పిట్టయ్లిసి ఏద కెరుక. తెదొడి, పూర్ణుమ్చి జా రాతి కేన్ గెరి యూదుల్ తిల గే, జా గెర్చ దార్బంద్రల్తె అర్పితుమ్ జలో ఏక్ మెండపిల్లచి లోయ దెరవుల, చి దూత దెకిలె, జా గెర్చ తొల్పూర్ బోదక మారె నాయ్.

అంజూరుమ్ రూకుక టాలి

28 “అంజూరుమ్ రూకుక టాలి కెర అర్దుమ్ కెరన. మెలె, దసా రూక్చ కొమ్మల్ కొవ్ని జా పలోయ్లె ‘వేసెక్ అప్పె పావ జెయెదె’ మెన తుమ్ చినితె.

29 దస్సి, ఆవ్ సంగిల గుర్తుల్ జర్లు జతిసి తుమ్ దెకిలె, జా గుమ్ముమె పావిల్ రితి జా, అన్నె జెతికయ్ సమయుమ్ పాసి జా అస్సె మెన తుమ్ జాన్తె.

30 ఆవ్ సంగిల సైమల్ గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్క ఆవ్ కచితుమ్ సంగితసి.

31 జలె, ఆగాసుమ్ బుయి నాసెనుమ్ జా గెచ్చుల, గని అంచ కొడె ఎద్దె పిట్టితి నాయ్.

32 “జలె, కేన్ దీసిక ఈంజ లోకుమ్తె అన్నె జెయిందె గే, జా దీసిక కేన్ గడియక జెయిందె గే, దేముడు జలో అబ్బొక పిట్టవ కేన్ మాన్సు జలెకు, పరలోకుమ్చ దూతల్ జలెకు, దేముడు అబ్బొచొ పుత్తుసి జలెకు, కోయి నేనుమ్.

33 జాకయ్, జాగర్త తెన్ తా, తెలివి తా, ప్రార్దన కెర్తె తా. జా కాలుమ్ కెయఁక జెయెదె గే నేన్సు.

34 ఆవ్ అప్పె దేముడు జలో అబ్బొతె గెతిసి, ఈంజ లోకుమ్తె అన్నె జెతిసి కీసి మెలె, ప్రయానుమ్ గెతో మాన్సు కెర్లిన్చి రితి జయెదె. జో మాన్సు గెచ్చుక బార్ జతి పొది, జోక కలుగు జతిసి జోచ గొత్తి సుదల్క రకితి రితి జోవయింక అదికారుమ్ దా, జోవయింక ఎక్కిలోక కమొ దా, గుమ్ముమ్ రకితోసా ఎక్కిలోక రకవ, ఉట్ట గెచ్చెదె. అంచి తెన్ కి దస్సి.

35 “జలె, తుమ్ జాగర్త తెన్ రకితె తా. కిచ్చొక మెలె, గేర్చొ ఎజొమాని కెర్లి రితి ఆవ్ ఉట్ట గెలె, సంజెక జెయిందె గే, సొక్కుక జెయిందె గే, కుకుడె వాంసెనె జెయిందె గే, పెందలె జెయిందె గే, కెద్దొడ్క జెయిందె గే, తుమ్ నేన్సు.

36 తెలివి తా రకితె తా. నెంజిలె, తుమ్ నే రకితె నిజిల్ రితి బదుకుమ్ జా తిలె పొది ఆవ్ అయ్లె, దెకిలె, తుమ్ కీసి జస్తె!

37 తుమ్కయ్ మెన నాయ్, ఎత్కిజిన్ మాన్సుల్క ఆవ్ కిచ్చొ జాగర్త సంగితసి మెలె, ఈంజ లోకుమ్తె ఆవ్ అన్నె జెతిన్క తెలివి తెన్ రకితె తా” మెన సిస్సుల్క యేసు ఈంజ బోదన ఎత్కి సంగిలన్.

14

యేసుక మారుక మెన వెల్లెల మాన్సుల్ కుట్ట కెర్లిసి (మత్త 26:1-5; లూకా 22:1-2; యోహా 11:45-53)

1 దొరతి గెలి పిమ్మట్ *పస్కా వండుగు, జలె నే పులయ్ల పొడియె కతి వండుగు, నే జెతె అగ్గె, వెల్లెల పూజర్లు చి

మోసే తెన్ దేముడు దిలి ఆగ్గుల్ సికడ్డన కుట్ర ఉచర ఉచర, “కిసి కెర జలెకు గుట్టు తెన్ యేసుక అప్పెయి దెర మారుమ” మెన ఆన తెన్ తిల.

2 గని, “పండుగు పొది పోని, కిచ్చొక మెలె పండుగక బెర అయ్ల ప్రజల్ కుమ్మత్ తెన్ గగ్గోల్ జా అమ్క బలే అల్లర్ కెరుల.”

3 యేసు బేతనియ గవ్వొ గెచ్చు, సీమోను మెలో వెల్లి రోగుమ్ జా తిలో ఎక్కిలోచి గెరి తా, అన్నిమ్ కంక వెన తతికయ్, ఏక్ తేరబోద ఒగ్గర్ విలువచి వాసన తేలుచి బుడ్డి దెరన జా, జా బుడ్డి పుట్టవ కెర యేసుచి బోడి ఉప్పిరి సువీలి.

4 ఒత్త తిలన సగుమ్జిన్ కోపుమ్ జా “ఈంజ తేల్ ఇసి పాడ్ కెరుక కిచ్చొక?

5 ఈంజ తేల్ సొవ్వు పుంజొ వెండ్లుచి కంట అన్నె డబ్బుల్క వికుక జతి, చి బీద సుదల్క దర్ముమ్ దెంక జతి” మెన లట్టబన, జా తేరబోదక గోల కెర్ల.

6 జలె యేసు, “ఇన్నెక గోల కెర నాయ్. కిచ్చొక ఇన్నెక ఉన్నుర్ కెర్లను? అంచి రిసా ఈంజ కెర్లిసి వెల్లి కామ్.

7 బీద సుదల్ కెయ్క కి తుమ్చి తెన్ తవుల చి రిసా తుమ్క కెయ్క ఇస్టుమ్ అయ్లె, జోవయింక దర్ముమ్ దెంక జయెదె. గని ఆవ్ కెయ్క తెయ్క తుమ్చి తెన్ ఈంజ లోకుమ్తె ఇసి తయె నాయ్.

8 ఇన్నెచి అత్తి తిలిసి సర్లక ఈంజ కెర అస్సె. ఆవ్ నే మొర్తె అగ్గె, అంక నే రోవితె అగ్గె, అంచి ఆగ్గె తెయార్ కెర్లి గుర్తు రితి కెర అంక ఈంజ తేల్ బోడి సువ దా అస్సె.

9 అన్నె ఆవ్ తుమ్క కిచ్చొ నిజుమి సంగితసి మెలె, ఒండి లోకుమ్తె కేసె అంచి రిసా సుబుమ్ కబుర్ బోదన కెరుల గే ఒత్తయ్ ఈంజ అప్పె కెర్లిసి సంగ, ఇన్నెచి రిసా ఉచరవడుల” మెన యేసు సంగిలన్.

యూదా మెలో సిన్సుడు యేసుక దెర దెంక ఒప్పన్నిసి (మత్త 26:14-16; లూకా 22:3-6)

10 యేసుచ బారజిన్ సిన్సుల్తె ఎక్కిలో ఇన్కరియోతు గవ్వొచో యూదా మెలోసా, తెదొడి జో, యేసుక దెర వెల్లెల పూజర్లుచి అత్తి దెంక ఉచర, జోవయింతె గెచ్చు, సంగిలన్.

11 జేవ్ నూన సర్ల జా, “తుక డబ్బుల్ దెమ్దె” మెన ఒప్పన్తికయ్, యేసుక కిసి కెర కెయ్క దెర దెంక గే, యూదా వాట్ చజితె తిలో.

12 నే పులయ్ల పోడియె కతి పండుగచి మొదోల్ కెర్లి దీసి, మెలె, ‘పస్కా’ మెన మెండపిల్లక అర్చితుమ్ దా †జోచి లోయి సువెతి దీసి, సిన్సుల్ యేసుక “తుయి పస్కా అన్నిమ్ కెర్లి రిసా అమ్ కేన్ టాన్ తెయార్ కెరుక?” మెన జోక పుసిల.

13 జో సిన్సుల్తె దొగులక పాసి బుకారా, “తుమ్ †పట్టుమ్తె గెచ్చు, చి పట్టుమ్ తెడి పెసిలదు మెలె, పాని వయితోసా ఎక్కిలో తుమ్క దస్సుల్ జయెదె. జోచి పట్టి గెచ్చు,

14 చి కేన్ గెరి జో పెనెదె గే, జా గేర్చొ ఎజొమానిక తుమ్ కిచ్చొ మెన మెలె, ‘అంచ సిన్సుల్ తెన్ ఆవ్ పస్కా అన్నిమ్ కతి గది కేన్?’ మెన అమ్చొ గురుబాబు పుసితయ్ మెన సంగ, చి

15 తెయార్ కెర్లి వెల్లి అంతస్తు గది ఏక్ తుమ్క దెకయెదె. ఒత్తయ్ అమ్చి రిసా పస్కా అన్నిమ్ తెయార్ కెర తా” మెన యేసు సంగిలన్.

16 జేవ్ సిన్సుల్ బార్ జా పట్టుమ్తె గెచ్చు, జో సంగిలి రితి ఎత్తి జర్లు జా అస్సె మెన దెక, జా పస్కా అన్నిమ్క దొర్కు జలిసి తెయార్ కెర్ల.

17 సాంజ్ జతికయ్, యేసు జేవ్ బారజిన్ సిన్సుల్ తెన్ జా గదితె జా కెర,

18 జేవ్ వెన అన్నిమ్ కెర్లె తతికయ్, యేసు “తుమ్క ఆవ్ కిచ్చొ కచితుమ్ సంగితసి మెలె, తుమ్ అంచి తెన్ కతనతె ఎక్కిలో అంక దెర విరోదుమ్ సుదల్చి అత్తి సార్పు కెర దెయెదె” మెన సంగిలన్.

19 ఇసి సంగితికయ్, జేవ్ దుకుమ్ జా, “ఆవ్ గె?” మెన ఎక్కిలోచి పడ్డె ఎక్కిలో ఎత్తిజిన్ సంగుక దెర్ల.

20 జలె, జో జోవయింక, “తుమ్ బారజిన్తె ఎక్కిలో దస్సి కెరెదె. అంచి తెన్ ఆతు తప్పెలయ్ పోడి బెద బుడ్డయ్తో ఎక్కిలో.

21 ఆవ్ మాన్సు జా జెర్మిలోసాచి రిసా రెగిడ్లి లెక్క ఉట్ట గెచ్చుందె. గని, అయ్యొ! ఆవ్ మాన్సు జా జెర్మిలోసాక కేన్ మాన్సు దెర విరోదుమ్ సుదల్చి అత్తి సార్పు కెర దెయెదె గే, జో మాన్సు జతి సిచ్చుచి రిసా జో నే జెర్మ తిలె జోక చెంగిల్ తత్తి!” మెన సంగిలన్.

22 యేసు, సిన్సుల్ జా పస్కా అన్నిమ్ కెర్లె తా, యేసు పోడియె దెరన “దయ కెర్లది” మెలి రితి కీదేముడు అబ్బొన్క జోబర సంగ కెర, జా పోడియె మోడ, సిన్సుల్క వంట దా, జోవయింక “తుమ్ ఈంజ కడన కా. అంచి ఆగ్గెక ఈంజ గుర్తు జయెదె” మెన కెర,

23 ఏక్ గిన్నుచి ద్రాచ రస్సుమ్ దెర, దేముడు అబ్బొన్క అన్నె ఉచర, సిన్సుల్క దెతికయ్, జేవ్ ఎత్తిజిన్ జా గలన్చి ద్రాచ రస్సుమ్ వర్ష తెన్ పిల.

24 తెదొడి యేసు “ఈంజ రస్సుమ్ కిచ్చొచి గుర్తు మెలె, ఒగ్గర్జిన్ మాన్సుల్చి పాపుమ్ గెచ్చయ్తి రిసా అంచి లోయి సూయె జంక అస్సె మెన అంచి నోవి ప్రమానుమ్.

25 తుమ్క ఆవ్ కిచ్చొ నిజుమి సంగితసి మెలె, అబ్బొసి జలో దేముడుచి రాజిమ్తె ఆవ్ నోవర్ పితె ఎద, ఇసి ద్రాచ

† 14:12 14:12 యేసు కి ఈంజ పస్కా పండుగు పొది మాన్సుల్చి పాపుమ్ గెచ్చయ్త అర్చితుమ్ జా జోవయింక లోయి సుచ దెయెదె. ‡ 14:13 14:13 మెలె యెరూసలేమ్ పట్టుమ్. § 14:22 14:22 ‘దేముడు అబ్బొసి’ మెన కేన్ సుట్టు రెగ్ల తిలె, ఎత్తి అదికారుమ్ తిలో దేముడుచి రిసా సంగితయ్.

రస్సుమ్ పియి నాయ్” మెన సిస్సుల్క సంగిలన్.

బమ్మ జా అంక ములితె మెన సంగిలిసి

26 తెదొడి జేవ్ దేముడుక గనుమ్ గాయ కెర బార్ జా, ఒలీవ మెట్టయ్ ఉట్ట గెల.

27 యేసు జోవయింక, “తుమ్ ఎత్కిజిన్ బమ్మ జా అంక ములితె. కిచ్చొక మెలె, మెండల్ రకితోసాక ఆవ్ మొరయిందె, చి జోచ మెండల్ ఎత్కిజిన్ చెదుర్పు జా గెచ్చుల, మెన దేముడు కోడుతె రెగ్గయ్లిసి నెరవెర్పుప జంక అస్సె.

28 గని ఆవ్ అన్నె జివ్ జా ఉట్టి పిమ్మట్క, తుమ్చి కంటు అగ్గె గలిలయ ప్రాంతుమ్తె గెచ్చిందె” మెన ప్రమానుమ్ కెర్లన్.

29 యేసు ఇసి సంగితికయ్, పేతురు జోక “ఎత్కిజిన్ తుక ములితెకి, ఆవ్ తుక ములి నాయ్” మెన సంగిలన్.

30 జలె యేసు జోక, “తుక ఆవ్ కిచ్చొ నిజుమి కచితుమ్ సంగితసి మెలె, అజి రాతిక, కుకుడొ తివ్వెరి నే వాసితె అగ్గె, ‘జోక నేని’ మెన అంచి రిసా తుయి తివ్వెరి సంగితె” మెన సంగిలన్.

31 దస్సి సంగిలే కి, పేతురు బమ్మ తెన్ “ఆవ్ తుచి తెన్ మొరుక అస్సె మెలె కి, ఆవ్ తుక ‘నేని’ మెన కెయ్యక కి సంగి నాయ్” మెన పేతురు గట్టిజ సంగిలన్. జేవ్ సిస్సుల్ ఎత్కిజిన్ దస్సి సంగిల.

గెత్సేమనే తోటతె

(మత్త 26:36-46; లూకా 22:39-46)

32 ఒత్త తెంతో యేసు సిస్సుల్ గెత్సేమనే మెంతి తోటతె గెచ్చ, జో “ఆవ్ ఒత్తల్తో గెచ్చ ప్రార్దన కెర జెతి ఎది ఎద తుమ్ ఇన్నె వెస తా” మెన జేవ్ సిస్సుల్క సంగ,

33 ఎక్కి పేతురుక, యాకోబుక చి యోహానుక పట్టి కడన ఇదిల్ దూరి గెచ్చ తా, దుకుమ్ జా మెన్నుతె ఒగ్గర్ బాద సేడుక దెర్లొ. దస్సి బాద సేడ,

34 “అంచి పెట్టి తిలి దుకుమ్క మొర గెచ్చుక జయెదె. తుమ్ ఇన్నె తెలివి తెన్ రకితె తా” మెన సంగ,

35 సగుమ్ దూరి గెచ్చ కెర, సెర్ను సేడ, దేముడు అబ్బొన్క ఇసి మెన ప్రార్దన కెర్లన్. “ఓ బ, తుక జంక తిలెగిన, ఈంజ దుకుమ్ జతి గడియ నెంజిలె, జతి లెక జలె అంక పిట్టవు” మెన అన్నె,

36 “ఓ బ, ఎత్కి తుచి అత్తి అస్సె. ఈంజ గిన్నుచి ఆవ్ నే పితి రితి అంక పిట్టవు. గని అంచి ఇస్టుమ్ పొని. తుచి ఇస్టుమ్ జర్గు జవున్” మెన ప్రార్దన కెర,

37 జేవ్ సిస్సుల్తె ఉట్ట జా, జేవ్ నిజ అస్తి మెన దెక కెర, పేతురుక, “ఓ సీమోను, తుయి నిజ అస్సిన్ గే? ఎక్కి గడియ జవున్ రకితె తంక నెతిర్లది గే?

38 జెత అల్లర్తె తుయి పాపుమ్ నే కెర్తి రితి జాగర్త తెన్ తా, ప్రార్దన కెర్తె తా. ‘అత్తు నిదానుమ్ అస్సి’ మెన ఉచరన్లెకి, ఆగ్క సెక్తి నాయ్,” మెన పేతురుక యేసు సంగిలన్.

39 అన్నెక్ సుట్టు ఇదిల్ దూరి ఉట్ట గెచ్చ కెర, తొలితో ప్రార్దన కెర్ల కొడొ, అన్నెక్ సుట్టు ప్రార్దన కెర్లొ.

40 దస్సి ప్రార్దన కెర, అన్నె బుల జా, జేవ్ సిస్సుల్ గూన్క నెత్త కెర నిజ అస్తి మెన దెకిలన్. దెకితికయ్, జేవ్ లాజ్ జా, జోక కిచ్చొ సంగుక గే నేన గెల.

41 అన్నెక్ సుట్టు కి యేసు దస్సి గెచ్చ అన్నె జా, మొత్తుమ్ తివ్వెరి జేవ్ నిజిలిసి దెక, “అప్పెకయ్ సెలవ్ కడన నే రకితె నిజ అస్సున్ గే? సాలు. ఈందె నమయ్యుమ్ జా గెలి గే. ఆవ్ మాన్సు జా జెర్మున్ అయ్లోసా పాపుమ్ కెర్తనచి అత్తి దెర్ను సేడిందె.

42 జొమ్మ, గెచ్చుమ! ఓదె, అంక దెర దెతోసా పాసి జా అస్సె” మెన జోవయింక సంగిలన్.

యూదా చి జనాబ్ యేసుక దెరుక అయ్లిసి

43 యేసు దస్సి లట్టబై తతికయ్, జోచ బారజిన్ సిస్సుల్తె అగ్గె బెద తిలో యూదా పావ అయ్లో. వెల్లెల పూజర్లు, మోసే తెన్ దేముడు దిలి ఆగ్గల్ సికడ్డనచి అన్నె వెల్లెల మాన్సుల్ తెద్రయ్ల జనాబ్ కి, కత్తులు డండల్ దెరన, యూదా తెన్ అయ్ల.

44 జలె ఈంజ నే జతె అగ్గె, “కక్క ఆవ్ చుంబిందె గే, జొయ్యి యేసు. జోకయ్ దెరన కో నే పిట్టయ్తి రితి చెంగిల్ రక కడన” మెన యేసుక దెర దెతో యూదా జేవ్ జనాబ్క గుర్తు సంగ తిలన్.

45 జో అయ్లి బేగి, యేసుతె జా కెర, “గురుబాబు” మెన సంగ చుంబితికయ్,

46 జేవ్ బెద అయ్లన యేసుక దెర్ల.

47 జలె, ఒత్త టీవొ జా తిలో ఎక్కిలో కత్తి కడన, ఎత్కిక వెల్లొ పూజరిచొ గొత్తి సుదొక పెట జోచొ కంగ్గొ కండ గెలన్.

48 తెదొడి జోక దెర్లనక యేసు, “ఆవ్ కిచ్చొగె చొర్లయ్ గే, చి తుమ్ కత్తులు డండల్ దెరన అంక దెరుక తుమ్ అయ్లదు గే?

49 ఆవ్ రోజుక తుమ్చి తెన్ దేముడుచి గుడితె తా బోదన కెర్లె కి, జా పొది అంక దెర్ను నాయ్. జలె, దేముడుచి కొడొతె రెగిడ్డిసి ఎత్కి జర్గు జవున్!” మెన సంగిలన్.

50 జలె, సిస్సుల్ ఎత్కిజిన్ బమ్మ జా, జోక ముల దా ఉట్ట నిగిల.

51 జలె, పట్టి బందన తిలో ఏక్ ఉబెడొ యేసుచి పట్టి గెతె తిలన్ యేసుక కడ నెత మాన్సుల్తె సగుమ్జిన్ జో ఉబెడొక దెర్ల.

52 గని, జో జా పట్టి సేడవ దా డుమ్డొయ్ ఉట్ట నిగిలన్.

ఎత్కిక వెల్లొ పూజరిచి మొక్కె యేసుక పరిచ్చ కెర్లసి

53 *యేసుక ఎత్కిక వెల్లో పూజరితె కడ నిల. ఒత్త కడ నెతికయ్, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన, వెల్లెల మాన్సుల్ ఎత్కిజిన్ ఒత్త బెర తిల.

54 పేతురు, జలె, దూరి దూరి తా యేసుచి పట్టి జా జా, జో ఎత్కిక వెల్లో పూజరిచి వీదె పెస, ఆగితె తపితి రిసా జమాన్సు తెన్ వెస తిలో.

55 వెల్లెల పూజర్లు చి అన్నె వెల్లెలో సబ కెర్తన ఎత్కిజిన్ యేసుక మార గెలుక మెన జోక నేరిమ్ వయడ్డి సాచిక చజెతి తిల, గని సరి జతి సాచి దొర్కు జయె నాయ్.

56 మెలె, ఒగ్గర్జిన్ జోచి ఉప్పిరి అబద్దుమ్ సాచి సంగిలే కి కచి, కచి సాచి ఎక్కి రితి జయె నాయ్.

57-58 తెదొడి, సగుమ్జిన్ టీవో జా, “మాన్సు బందిలి ఈంజ దేముడుచి గుడి సేడవ కెర తిర్తకయ్ మాన్సు నే బందిలి ఏక్ దేముడుచి గుడి బందిందె, మెన ఈంజో సంగిలిసి సూన్లమ్” మెన అబద్దుమ్ సంగిల.

59 గని జేవ్ సంగిలి సాచి కి సరిగా బెదె నాయ్.

60 తెదొడి, ఒత్త తిల మాన్సుల్చి నెడమె ఎత్కిక వెల్లో పూజరి టీవో జా కెర, యేసుక “ఈంజేవ్ సంగితిన్క కిచ్చొ జబాబ్ దెంక నెతిర్ని గే? ఈంజేవ్ తుక కిచ్చొ నేరిమ్ వయడ్డతి?” మెన పుసిలన్.

61 గని యేసు తుక్లె తా, కిచ్చొ జబాబ్ కి సంగె నాయ్. యేసు తుక్లె తతికయ్, ఎత్కిక వెల్లో పూజరి జోక అన్నె “పరలోకుమ్ తిలో అమ్చో దేముడు ప్రబుచో పుత్తున్ జలో క్రిస్తు తూయి గే?” మెన యేసుక పుసితికయ్,

62 జో “అచ్చి. అన్నె, ఆకర్క, ఎత్కి నెక్తి అదికారుమ్ తిలోసాచి ఉజెతో పక్కయ్ ఆవ్ మాన్సు జా జెర్నున్ అయ్లోసా వెస తతిసి కి, ఆగాసుమ్చ మబ్బుల్ తెన్ ఆవ్ పరలోకుమ్ తెంతో అన్నె ఉత్త జెతిసి కి తుమ్ దెకితె” మెన సంగిలన్.

63 ఇసి సంగితికయ్, జో ఎత్కిక వెల్లో పూజరి కోపుమ్ జా, జో గలన్లి దిగిల్ సొక్క చిరన గెల కెర, “అన్నె సాచి సంగితన అమ్క అక్కర్ నాయ్.

64 దేముడుక ఆవ్ సమ్మందుమ్ జతసి మెన ఈంజో సంగ ప్రబుచి విలువ కడ వెల్లి పాపుమ్ కెర్తిసి తుమ్ ఎత్కిజిన్ సొంత సూన్లదు, తుమ్ కిచ్చొ తీర్పు సంగితె?” మెన సబ కెర్తనక పుసితికయ్, “మొర్తి సిచ్చుచి తప్పు కెర అస్సె” మెన జేవ్ ఎత్కిజిన్ తీర్పు సంగిల.

65 తెదొడి జోవయింతె సగుమ్జిన్ యేసుక తుంకుర్క దెర, నిస్కారుమ్ కెర్ల. అన్నె, జోచి మొక్కె పాలుమ్ డంక దా జోక పెట, “తుక కో పెట్ల గే, తుయ్ క్రిస్తు గే సంగు!” మెన కొంకడ్ల. అన్నె, జమాన్సు జోక ఎత్తివాట్ దెబ్బల్ పెట గెల.

* 14:53 14:53 ‘ఎత్కిక వెల్లో పూజరి’ మెలె, వెల్లెల పూజర్లు మొత్తమతె ఎక్కిలో ముక్కిమ్చో పూజరి జయెదె. తెదొడి కయప మెలోసా ఎత్కిక వెల్లో పూజరి జా తిలో. * 15:1 15:1 రోమ్ దేసిమ్చి ప్రబుతుమ్ జా దేసిమ్ ఆక్రమించుప కెర విలువ కెర్ల తతికయ్, జా రోమ్ దేసిమ్చి ప్రబుతుమ్చి నావ్ తెన్ని పిలాతు అదికారి జా అస్సె.

“జోక నేని” మెన యేసుచి రిసా పేతురు సంగిలిసి (మత్త 26:69-75; లూకా 22:56-62; యోహా 18:15-18,25-27)

66 పేతురు ఎట్టొతో వీదె తతికయ్, జో ఎత్కిక వెల్లో పూజరితెచి తేర్బోద గొత్తి సుది ఎక్కిల్ జా కెర,

67 పేతురు ఆగితె తపిత్ తిలిసి దెక కెర, “తుయి కి నజరేతు గచ్చిచో యేసు తెన్ తిలది, గెద” మెలి.

68 ఇసి మెన సంగితికయ్, “నాయ్, గెద. తుయి సంగితిసి కిచ్చొ గే, ఆవ్ నేని. అంక అర్దుమ్ జయె నాయ్” మెన సంగ, జా వీదెచి ఒత్తల్తోచి గుమ్ముమె ఉట్ట గెలన్.

69 గని జా గొతిమాన్సు జోక ఒత్త అన్నె దెక, “ఈంజో కి జోచ సిస్సుల్తె ఎక్కిలో” మెన ఒత్త టీవో జల సుదల్క సంగితికయ్,

70 పేతురు అన్నె, “ఆవ్ నెంజి” మెన సంగిలన్. అన్నె గడియ గెతికయ్, ఒత్త తిలస పేతురుక దెక, “తుయి, నిజుమి జోతె తిలోసా. తుయి కి గలిలయ ప్రాంతుమ్తెచో మాన్సు గెద?” మెన సంగిల.

71 జాకయ్ పేతురు, “తుమ్ సంగిలో మాన్సుక ఆవ్ నేని” మెన సాపెన గల కెరన ఒట్టు గలనుక దెర్తికయ్,

72 బేగి కుకుడో వాసిలన్. జలె ఇన్నెతెన్ దొవ్వెర్ జలి, చి “కుకుడో తివ్వెరి నే వాసితె అగ్గె, తుయి అంక ‘నేని’ మెన తివ్వెరి సంగితె” మెన యేసు అగ్గె సంగిలిసి ఏదస్ట కెర, పేతురు ఎదివాట్ దుకుమ్ జా ఏడ గెలన్.

15

పిలాతు యేసుక పరిచ్చ కెర్తిసి

(మత్త 27:1-2,11-14; లూకా 23:1-5; యోహా 18:28-38)

1 రాత్ వయితికయ్, వెల్లెల పూజర్లు, వెల్లెల మాన్సుల్, మోసే తెన్ దేముడు దిలి ఆగ్గుల్ సికడ్డన, వెల్లి సబ కెర్ల సుదల్ ఎత్కిజిన్ బెద వెస, యేసుక కిచ్చొ కెరుక గే ఉచర, జోక బంద కడన, *అదికారి జలో పిలాతు మెలోసాతె సార్పు దిల.

2 పిలాతు యేసుక దెక, “తుయి గే యూదుల్చో రానో?” మెన పుసిలన్, చి యేసు “తుయి సంగిలి రితి” మెన జబాబ్ దిలన్.

3 తెదొడి వెల్లెల పూజర్లు యేసుక ఒగ్గర్ నేరిమ్లు వయడ్డికయ్,

4 పిలాతు మెలో జో అదికారి జోక అన్నె, “తుయి జోవయింక కిచ్చొ జబాబ్ దెసి నాయ్ గే? ఈందె, తుక కెత్తి నేరిమ్లు వయడ్డతి గే సూను”, మెన సంగిలన్.

5 గని యేసు అన్నె కిచ్చొ జబాబ్ దిలో నాయ్, చి రిసా పిలాతు ఒగ్గర్ ఆచారిమ్ జలో.

6 జలె, జా వండుగు పొది, ప్రెజల్ కోర్ప జలో కేన్ జలెకు జేలి జలోసాక ముల దెంక పిలాతుక అలవాట్ జా అస్సె.

7 జలె, ప్రబుతుమ్క విరోదుమ్ జా అదికారుల్క విత్తేకుమ్ కెర అత్య కెర్ల మాన్సుల్ సగుమ్జిన్ జా పొది జేల్తె తిల. జోవయింతె బరబ్బు మెలో ఎక్కిలో తిలో.

8 జలె, ఒత్త తిల జనాబ్ పిలాతుచి పాసి బెర జా కెర, “తుయి ఈంజ వండుగ్క అలవాట్ జలి రితి అమ్క కెరు!” మెన బలవంతుమ్ కెర్ల.

9 జాకయ్ జో పిలాతు జోవయింక “తుమ్ యూదుల్క †రానో జలోసాక తుమ్క ఆవ్ ముల దెంక తుమ్చి ఆస గే?” మెన పుసిలన్.

10 కిచ్చొక మెలె, ఎక్కి గోసకయ్ వెల్లెల పూజర్లు యేసుక జో తెన్ ఆన అస్తి మెన జో జానె.

11 గని, “ యేసుక పోని. బరబ్బుక ములు!” మెన సంగ” మెన వెల్లెల పూజర్లు జేవ్ బెర తిల జనాబ్క సికయ్తె తిల.

12 తెదొడి పిలాతు జేవ్క అన్సె, “దస్సి జలె, తుమ్ యూదుల్చో రానో మెలోసాక ఆవ్ కిచ్చొ కెరుక?” మెన పుసిలన్,

13 చి జేవ్ జనాబ్ “జోక సిలువతె గల మొర్తి సిచ్చ కెరు!” మెన ఒర్పిల.

14 జేవ్ ఇసి జతికయ్, పిలాతు అన్సె, “కిచ్చొక? కిచ్చొ నేరిమ్ కెర అస్సె?” మెన పుసిలన్. గని జేవ్, అగ్గెచి కంట ఒగ్గర్ విస్సుమ్ తెన్ “సిలువతె గల మొర్తి సిచ్చ కెరు!” మెన గట్టిజ కేకుల్ గలిల.

15 జాకయ్ పిలాతు, ప్రెజల్క ముద్దొ కెరుక మెన, జేవ్ సంగిలో బరబ్బుక ముల కెర, యేసుక కొర్డల్ తెన్ పెటవడ, ‘జోక సిలువతె గల్తు, జలె’ మెన సార్ప దిలన్.

జమాన్లు యేసుక కొంకడ్డిసి

16 తెదొడి అదికారితెచ జమాన్లు సుదల్ యేసుక ‘ప్రేతోరియమ్’ మెంతి అదికారి గేర్చి తెడిచి గదితె కడ నా కెర, సయ్న్యమ్ ఎత్కిజిన్క ఒత్త బుకారా కెర,

17 ‡ఊద రంగుచొ ఏక్ పాలుమ్ జోక గల దా, కంటక ఏక్ కిరీటుమ్ గంచ కెర, జోచి బోడితె గల దా కెర,

18 యూదుల్చొ రానో, తుక జెయ్యి, జెయ్యి! మెన కొంకడ కొంకడ జోకర,

19 ఏక్ డండొ తెన్ జోక బోడి పెట, జోక తుంక కెర, సెర్పు సేడ జోకర కొంకడ.

20 దస్సి దూసుప కెర్ల పిమ్మట్, జోక గల తిలి ఊద రంగుచొ పాలుమ్ కడ గెల కెర, జోచొ సొంత పాలుమ్ జోక అన్సె గల కెర, జోక సిలువతె గలుక మెన కడ నిల.

† 15:9 15:9 యేసుక ‘యూదుల్చొ రానో’ మెన సంగిల, వెల్లెల పూజర్లు కొవుమ్ జవుల మెన జోవయింక కొంకడ్డి రిసా దస్సి మెలన్. ‡ 15:17 15:17 ఎరస చి నీలిమ్ రంగుల్ బెదయ్లె, ఊద రంగు జయెదె. § 15:24 15:24 ‘సిలువ’ కిసి తయెదె మెలె, ఏక్ టీవ్తి చి ఏక్ అడ్డుమ్ జతి దొన్ని డండల్ బెదవుల. సిచ్చ జతి మాన్సుక జా సిలువతె ఎంగ్గవ కెర, జోచ అత్తొ చ్చట్టొ చంపొ కెరవ, అత్తొచ్చట్టొతె మేకుల్ పెట సిలువ బుయ్యె టీవ రోవ కెర దస్సి ములుల. జో సిచ్చ జతొనా దస్సి ఒడ్యె జా మొరెదె. రోమ్ దేసిమ్చి అలవాట్ తెన్ చి సిచ్చ, జా. * 15:26 15:26 రోమ్ దేసిమ్చి నావ్ తెన్ ఏలుప కెర్ల పిలాతు ఈంజ దార్ గండ రెగ్గ తిలన్; యూదుల్క కొకడ్డి రితి. యోహాను 19:19. † 15:28 15:28 గ్రీకు బాస తెన్ ఈంజ మత్తెలి రెగిడ్ల సగుమ్ పున్కల్తె 28 నంబర్చి కొడు తయె నాయ్.

యేసుక సిలువతె టీచడ మార్గిసి

(మత్త 27:32-44; లూకా 23:26-39; యోహా 19:17-19)

21 వట్టె గెతె తతికయ్, కురేనియు దేసిమ్చొ సీమోను మెలో ఎక్కిలో పాసిచి బయిలె తెంతొ జా, ఒత్త పావిలన్. జో, అలెక్సంద్రు రూపు మెల దొగులక అబ్బొసి జయెదె. జలె, జోకయ్ “యేసుచి సిలువ తుయి వయు” మెన జమాన్లు సుదల్ బలవంతుమ్ కెర్ల.

22 జలె, యేసుక గొల్లొతా మెలి మెట్టయ్ కడ నిల. ‘గొల్లొతా’ మెలె, ‘గిడ్డి పోలికచి టాన్’. జలె, జోక ఒత్త కడ నా కెర,

23 నొప్పి తొక్కి కెర్ల ఒస్తు బెదయ్లె ద్రాచ రస్సుమ్ యేసుక సయ్న్యమ్ సుదల్ “పి” మెన దిలెకి, పియె నాయ్.

24 తెదొడ్ జోక ఏక్ కీసిలువతె గల టీచడ సిలువక బుయ్యె రోవ కెర, “జోచ పాలల్ వంటనుమ” మెన చీటి గల వంటన్.

25 జోక సిలువతె గలిలి సమయమ్ కెద్ది జలి మెలె, పెందలె నొవ్వు గంటల్ జలి.

26 “*యూదుల్చొ రానో, ఈంజొ” మెన జోచి నేరిమ్ రెగిడ్లి దార్చిగండ యేసుచి బోడిచి ఉప్పిరి సిలువతె ఒడవ దిల.

27 అన్సె, ఉజెతో పక్క ఎక్కిలోక, డెబ్లి పక్క ఎక్కిలోక, దొగుల చొర్లుక ఎక్కెక్ సిలువల్తె గలిల.

28 †జేవ్ తెన్ దేముడు పూర్లుమ్ రెగ్గయ్లి ఏక్ కోడు నెరవెర్చువ జలి.

“జో పాపుమ్ నెంజిలోసా జలెకి, నేరిమ్ వయడ, జోక ‘పాపుమ్ కెర్లొసా’ మెన పాపుమ్ కెర్లన తెన్ బెదవ సిచ్చ కెర్ల.”

సిలువతె తతికయ్ జోక మాన్సుల్ కొంకడ్డిసి

29 జా వాట్ గెతె తిల మాన్సుల్ యేసుక ఆస, ఆస బోడి దున్నొవ, “దేవులుమ్ సేడవ తిర్రత్క అన్సె బందితోసా, తుయి.

30 జలె, తుక తూయి రచ్చించుప కెరన, జా సిలువ తెంతొ ఉత్తు!” మెన జోక కొంకడ దూసుప కెర్ల.

31 దస్సి, వెల్లెల పూజర్లు, మోసె తెన్ దేముడు దిలి ఆగ్నల్ సికడ్డన తెన్ బెద జా, ఎక్కిలో తెన్ ఎక్కిలో ఆస, ఆస “ఈంజొ వేర సుదల్క రచ్చించుప కెర్లన్, గని జోక జొయ్యి రచ్చించుప కెరనుక నెత్తె.

32 ఆమ్ దెక నంప కెర్తి రిసా, ఈంజొ క్రీస్తు, ఇస్రాయేలు ప్రెజర్చొ రానొ జలె, సిలువ తెంతో ఉత్త్ర జెవును!” మెన యేసుక దూసుప కెర్ల.

జో తెన్ బెదవ సిలువల్తె గలిల దొగుల చొర్ల కి జోక దూసుప కెర్ల.

యేసు మొర గెలిసి
(మత్త 27:45-56; లూకా 23:44-49; యోహా 19:28-30)

33 బార గంటల్ మెద్దెన్ జలి తెంతో, మొదొల్ కెర తిన్ని గంటల్ ఎద జా ఒండి దేసిమి అందర్ డంక తిలి.

34 జలె, తిన్ని గంటల్క యేసు, “ఏలీ, ఏలీ, లామా సబక్తానీ” మెన అరమయ్ బాస తెన్ “అచొ దేముడు ప్రబు, అచొ దేముడు ప్రబు, అంక కిచ్చొక ఆతు ముల దా అస్సిసి?” మెన గట్టిజ ఒర్న దిలన్.

35 జలె, ఒత్త టీచొ జా తిలసతె సగుమ్జిన్ జా కోడు నూన కెర, “ఆదె, ఏలీయా పూర్గుమ్చొక బుకార్తయ్, కిచ్చొగె” మెల.

36 జోవయింతె ఎక్కిలో నిగ గెచ్చు, బూంజు రితి తిలి ఏక్ వస్తువ వెంట, అమ్డి ద్రాచ రస్సుమ్తె బుడ్డవ కెర, ఏక్ రివ్వతె బంద, చాంప కెర, జోక “పి” మెన దా, “అల్లె, ఇన్నెక సిలువ తెంతో ఉత్త్రవుక మెన ఏలీయా తోడ్ జా ఉత్త్ర జెయెదె గే, నాయ్ గే దెకుమ!” మెన కొంకడ్లన్.

37 జలె, యేసు గట్టిజ కేక్ గల దా, ప్రానుమ్ ముల దిలన్.

38 మొర గెలి గడియయ్, దేముడుచి గుడితె ఒడొవ తిలి ‡తెర, ఉప్పిర్ తెంతో ఎట్టొ ఎద చిరి జా దొన్నిగండల్ జా గెలి.

39 తెదొడి, యేసుక మొక్కె రక తిలో పుంజెక్జిన్ జమాన్లుక వెల్లొ యేసుక మొర గెలో మెన దెక కెర, “నిజమి, ఈంజొ మాన్సు దేముడుచొ పుత్తుసి జా తిలో” మెన సంగిలన్.

40 యేసు మొర్లి పొది, సగుమ్జిన్ తేర్బోదల్ దూరి తెంతో దెకితె తిల. జోవయింతె సగుమ్జిన్ కొన్న మెలె, మగ్గలేనే పట్టుమ్చి మరియు మెలి ఎక్లి, దకిలో జలొ యాకోబు అన్నె యోసే మెల ఉబెడల్చి కిమరియ మెలి అయ్యసి, పడ్డె సలోమే మెలి ఎక్లి తిల.

41 యేసు తిలి ప్రాంతుమ్తె బుల్తె తిలి పొది, ఈంజేవ్ తీగ్ల జోవయించి పట్టి గెచ్చు సవైచన కెర్తె తిల. యేసు యెరూసలేమ్తె ఉట్ట అయ్లి పొది అన్నె ఒగ్గర్జిన్ తేర్బోదల్ కి జా తిల. జో మొర్లి పొది, జేవ్ కి సిలువ తిలిన్తె రకితె తిల.

యేసుచి పీనుమ్ వెంట గెలిసి
(మత్త 27:57-61; లూకా 23:50-56; యోహా 19:38-42)

42 యూదుల్క బక్తి కెర్తి సెలవ్ కడన్లి దీసి జయెదె, జలె జా దీసి సెలవ్ కడన్లి దీన్క అగ్గెచి దీసి.

43 జలె సాంజ్ జలి పొది, యూదుల్చి వెల్లి సబతె బెదితో ‘చెంగిలో మాన్సు’ మెన ఎత్తిజిన్ జాన్తో, అరిమతయ్ గచ్చిచొ యోసేపు, దయిరిమ్ కెరన, పిలాతుతె గెచ్చు, “యేసుచి పీనుమ్ జోక దా” మెన వెంట గెలి రిసా నజిలో. జో యోసేపు, ‘దేముడుచి రాజిమ్ ఈంజ లోక్తుమ్తె ఏలుప కెర్తి కాలుమ్ కెయెడ జెయెదె.’ మెన, నిదానుమ్ తెన్ రకితె తిలో.

44 జలె, పిలాతు “జో తెద్ది బేగి మొర గెలన్ గె?” మెన అన్మానుమ్ జా, పుంజెక్జిన్ జమాన్లుక వెల్లొక బుకారా, “నిజమి జో తెద్ది బేగి మొర గెచ్చు అస్సి గె?” మెన పుసిలన్.

45 “నిజమి మొర గెచ్చు అస్సి” మెన జో పుంజెక్జిన్ జమాన్లుక వెల్లొచి అత్తి నూన, యోసేపు పీనుమ్ వెంట గెలుక మెన పిలాతు సెలవ్ దిలన్.

46 జాకయ్, జో విలువచి బట్ట ఆన, యేసుచి పీనుమ్ సిలువ తెంతో ఉత్త్రవ దా, జో పాలుమ్ పంగ్రవ దా, రంగ్ని పత్తుర్ డొల్లి కెరయ్లి బొరొచి మెస్సున్తె ఎంగ్డవ దా, జా బొరొచి గుమ్ముమె వెల్లొ పత్తురు ఒన్కువ కెర డంకిలన్.

47 కేనే ఎంగ్డవ దా వెంట గల గే, మగ్గలేనే పట్టుమ్చి మరియు మెలిసి కి, యోసే మెలొసాచి *మరియ మెలి అయ్యసి కి దెకిల.

16

యేసు జివ్ జా ఉట్ట అస్సి

(మత్త 28:1-8; లూకా 24:1-12; యోహా 20:1-10)

1 సెలవ్ కడన్లి దీసి కేడ గెలి రాతి, మగ్గలేనే పట్టుమ్చి మరియు, యాకోబుచి అయ్యసి మరియు, సలోమే తెన్, యేసుక గాంసుక మెన, చెంగిల్ వాసెన తేల్ గెనన్ల, చి

2 జా *అయ్తర్ దీసి ఒగ్గర్ పెందలె ఉట్ట, బార్ జా, పొద్దు బార్ జలి సమయుమి జా మెస్సు పాచ,

3 “మెస్సు డంపిలో పత్తుర్ అమ్చి రిసా కో ఒన్కువ దెవుల గె?” మెన ఎక్లి తెన్ ఎక్లి †లట్టబై తిల.

4 ఇసి లట్టబ లట్టబ, ఉప్పిరి దెక, పత్తురు ఒన్కు జా అస్సి మెన దెకిల. జో పత్తుర్ ఒగ్గర్ వెల్లొచొ.

5 తెదొడి, మెస్సు గెచ్చు పెన, కిచ్చొ దెకిల మెలె, జా మెస్సు తెడిచి ఉజెతో పక్క, చొక్కిల పాలల్ గలన తిలో ఉబెడొ రితొ దేముడుచి దూత వెన అస్సి. జోక దెక, ఆచారిమ్ జా పంబ్ర జల.

6 జేవ్ ఇసి జతికయ్, జో దేముడుచి దూత జోవయింక “పంబ్ర జా నాయ్. సిలువతె గల మొర తిలో నజరేతు

‡ 15:38 15:38 ఎక్కి వెల్లొ పూజరి వెర్సెక్క ఎక్కి సుట్టు వెన అర్పితుమ్ దెతి గదిక అడ్డు కెర్తె తెర, ఈంజ.

§ 15:40 15:40 ఈంజ మరియు యేసుచి

అయ్యసి జయెదె; మార్కు 6:3. * 15:47 15:47 ఈంజ మరియు యేసుచి అయ్యసి జయెదె; మార్కు 6:3.

* 16:2 16:2 సత్తు పొదుల్తె అగ్గెచి దీసి

† 16:3 16:3 ఎక్కిల్ తెన్ ఎక్కిల్

గద్విచో యేసుక తుమ్ చజితను. జో జీవ్ జా ఉట్ట అస్సె. జో ఇన్నె నాయ్. ఈందె జోక ఎంగ్లవ తిలి టాన్క అంకి గల.”

7 అన్నె, సిస్సుల్క, పేతురుక “తుమ్చి కంట అగ్గెతో, యేసు గలిలయతె ఉట్ట గెతయ్. తుమ్క జో అగ్గె సంగిలి రితి, జోక ఒత్త దెకితె మెన తుమ్ గెచ్చ సంగ” మెన దూత సంగిలన్.

8 జేవ్ తేర్బోదల్ బమ్మ తెన్ మెన్నె తెంతో బార్ జా, సిస్సుల్క జా కబుర్ సంగుక ఉట్ట నిగ గెల. గట్టిజ ఆచారిమ్ జా, అద్దుర్ జా గెచ్చ తిల, చి బియఁ కెర, సిస్సుల్క పిట్టవ, కక్క కి కిచ్చో సంగితి నాయ్.

మగ్గల పట్టుమ్చి మరియక యేసు డీసిలిసి

9 యేసు ‡అయ్తర్ దీసి జీవ్ జా ఉట్ట, జా దీసి పెందల్ మగ్గల పట్టుమ్చి మరియక తొలితో డీసిలన్. ఒగ్గర్ అగ్గె, జాచిక దెర్ల బూతల్క యేసు ఉడడ గెల తిలన్. జా తేర్బోద ఈంజయి.

10 జలె, యేసు జాక డీస్తికయ్, జా జో తెన్ బుల్తె తిల సిస్సుల్ జివ్వి అస్సె మెన నేన కెర దుకుమ్ జా ఏడ్తె అస్సి, మెన జా జాన కెర, జా మాన్సు జోవయింతె గెచ్చ కెర, “జీవ్ జా అస్సె. ఆవ్ సొంత దెక అస్సి” మెన సాచి సంగిలి.

11 గని జో జీవ్ జలిసి జా దెకిలిసి సూన్లె కి, తెదొడి నంప కెర్తి నాయ్.

12 ఒత్త తెంతో, బయిలుచి వట్టె దొగుల సిస్సుల్ ఇండ గెతె తతికయ్, యేసు, జోచి పోలిక ఇదిల్ వేర మార్పువ జా తా, జోవయింక డీసిలన్.

13 తెదొడి జేవ్ దొగుల అన్నె బుల గెచ్చ, అన్నె సిస్సుల్క సంగిల. గని జేవ్ అన్నె సిస్సుల్ తెదొడి నంప కెర్తి నాయ్.

ఎగరజిన్ సిస్సుల్క యేసు డీసిలిసి

(మత్త 28:16-20; లూకా 24:36-49; యోహా 20:19-23; బారి కమ్మె 1:6-8)

14 జాచి పిమ్మట్, ఎగరజిన్ సిస్సుల్ అన్నిమ్ కంక వెస తిలి పొది, యేసు జోవయింక డీసిలన్, చి గోల కెర్లన్. జో జీవ్ జలి పిమ్మట్ జోక దెక తిలస, జోక సాచి సంగ తిలె కి, జేవ్ రాడ్ జీవ్ తెన్ తిలి రితి అన్మానుమ్ జా నంప నే కెర్లి రిసా గోల కెర్లన్.

15 తెదొడి యేసు సిస్సుల్క, “తుమ్ దేసిమ్లు ఎత్తితె గెచ్చ, లోకుమ్చ ఎత్తిక అంచి రిసా సుబుమ్ కబుర్ బోదన కెర.

16 కో నంపజయి గెచ్చులచి బాప్తిసుమ్ నజనుల గే, జేవ్ రచ్చించుప జవుల. గని కో నంప నే జవుల గే, మొర గెలె, సిచ్చతె గెచ్చుల.

17 “అంక నంపజతన తెన్ అంచి అదికారుమ్ అస్సె మెన కీస గుర్తులు తయెదె మెలె, అంచి నావ్ తెన్ బూతల్క ఉడడ గెలుల, జేవ్ అగ్గె నే సికిల బాసల్ తెన్ లట్టబుల,

18 అయివొక ఉక్ల దెర్లె జవున్, మొర్రిసి పిల్లె జవున్, జోవయింక ప్రమాదుమ్ జయె నాయ్. అన్నె, జోర్జొ జబ్బుల్ తెన్ తిల మాన్సుల్క అంచి నావ్ తెన్ బోడి చడిలె, చెంగిల్ జవుల.”

19 ప్రబు జలో యేసు, జలె, సిస్సుల్ తెన్ లట్టబ బోదన కెర కేడయ్లి ఇదిల్ పడ్డో, జోవయించి మొక్కె ఆగాసుమ్తె వెగ, పరలోకుమ్తె దేముడు అబ్బోన్చి ఉజెతో పక్కయ్ వెసిలన్.

20 అన్నె, జో సంగిలి రితి, సిస్సుల్ కేనె ఒత్త గెచ్చ బోదన కెర్తె తతికయ్, ప్రబు జోవయింక తోడ్ తా జేవ్ సిస్సుల్చి అత్తి వెల్లో కమె కెరవ కెరవ, జేవ్ సంగిలి చి సత్తిమ్క రుజ్జు దెకయ్లన్కి.

‡ 16:9 16:9 సత్తు పొదుల్తె అగేచి దీసి § 16:20 16:20 మార్కుచి అత్తి రెగిడ్లి ఈంజ పున్తకుమ్తె, ఈంజ అద్యయిమ్చి నొవ్వు నంబర్ తెంతోచ కొణొ ముల, ఆకర్చి కోడు కొట్టు జవున్ మెలి రితి ఇదిలిసి కోడు కెయఁగె గలిల. గని దూతల్చి అత్తి సంగిలి కబుర్ ఎత్తి పేతురుక చి జోవయింతెన్ తిల సిస్సుల్క జేవ్ తేర్బోదల్ సంగిల. ఒత్త తెంతో, సుబుమ్ కబుర్ సూనయ్తి రిసా యేసు జేవ్ సిస్సుల్క చెత్తర్ దిక్కుల్తె తెద్రవ దిలన్. యేసు తెన్ రచ్చన వాట్ దొర్కు జలి, చి పరలోకుమ్చి రాజిమ్తె బెద కెయఁక తెయఁక ఒత్త చెంగిల్ తంక జయెదె చి సుబుమ్ కబుర్, గెద. జా సుబుమ్ కబుర్ పరలోకుమ్చి సత్తిమ్ తెన్ అస్సె. కో పాడ్ కెరుక నెత్తి. తెద్దిలి.

లూకా సుబుమ్ కబుర్ లూకా రెగిడ్లి సుబుమ్ కబుర్

1 యేసుక్రీస్తు ఈంజ లోకుమ్తె అయ్లీసి, జో ఇన్నె తిలి పొది అమ్చితె ఎత్తి జర్గు కెర్ల కమె ఎత్తి మొదోల్ తెంతో *సగుమ్జిన్, సొంత దెక సాచుల్ జా, జా ఎత్తిచి రిసాచి సుబుమ్ కబుర్ సూనయ్త సేవ కెర్తన జల.

2 జలె, జో యేసుక్రీస్తు అయ్లీసి తెన్ †నెరవెర్చువ జలిసి ఎత్తిచి రిసా జేవ్ సాచుల్ అమ్క జాన కెర అస్తి, అమ్చి అత్తి జా సుబుమ్ కబుర్ దా అస్తి, చి యేసు తెన్ జర్గు జలిన్ ఎత్తిచి మత్తెలితెచ బెదవ ఒగ్గర్జిన్ రెగ్ల అస్తి.

3-4 జలె, ఓ వెల్లో దెయొపిలా, ఈంజ ఎత్తి సూన ఆవ్ సరిగా పరిచ్చ కెర అస్తి, చి తుక 'జో సూస్లిన్చి రిసా సత్తిమ్ చినున్' మెనయ్, తుచి రిసా ఈంజ ఎత్తి వర్చ తెన్ ఆవ్ రెగుడుక అంక చెంగిల్ డీస్తయ్, చి ఇన్నె రెగ్లితసి.

క్రీస్తు రిసా సాట్టు కెర్లొ యోహాను జెర్లొదె

5 హేరోదు రానో ‡ యూదుల్చి ఒండి దేసిమి ఏలువ కెర్లె తిలి పొది, కీదేముడుచి గుడితె జోచి సేవ కెర్లొ పూజరి జలో జెకర్యా మెలో ఎక్కిలో తిలన్. పూజర్లుతెచో అబీయా పూర్ణుమ్చోచి *తెగచో జో. జోచి తేర్చి, †అహరోను పూర్ణుమ్చో జలో యూదుల్చో తొలితొచో ఎత్తిక వెల్లో పూజరిచి సెకుమ్తెచి తేర్బోద జా తిలి. జాచి నావ్ ఎలీనబెతు.

6 జేవ్ దొగుతెర దేముడుచి కోడు తెన్ సత్తిమ్ ఇండితె తిల. నే పిట్టయ్తె నెంతె దేముడు దిల ఆగ్నల్ ఎత్తి తెన్ నాయిమ్ ఇండితె తిల.

7 గని ఎలీనబెతు గొడ్డు జా తిలి రిసా జోవయింక బోదల్ నాయ్. జేవ్ ఒగ్గర్ వెర్చుల్ వయసుచ మంత్రో మంతిరి జా తిల.

8 జెకర్యా తిలి తెగచ పూజర్లు దేముడుచి గుడితె సేవ కెర్లె కాలుమ్ జా తిలి, చి జెకర్యా దేముడుచి జా సేవ కెర్లె తిలి పొది,

9 దేముడుచ పూజర్లుతె కీసి కెర్తతి గే, దస్సి జొయ్యి జో ప్రబు జలో దేముడుచి గుడితెచి దూపుమ్ డయ్యుక మెన చీట్లు గల్క జోచి నావ్ ‡సేడ్లి.

* **1:1 1:1** జోచ బారజన్ బారికుల్ చి అన్నె ఒగ్గర్జిన్. † **1:2 1:2** 'నెరవెర్చువ జలిసి' మెలి కోడు కిచ్చొక ఒత్త అన్నె మెలె, పూర్ణుమ్ తెంతో 'దొర్చు జలో రచ్చింపువ కెర్లొసా జతో క్రీస్తుక తుమ్తె తెర్లయిందె, ఇసి దస్సి కెరెదె' మెన ఎత్తి అదికారుమ్ తిలో దేముడు సంగ తిలన్, చి దేముడుచి కొణెతె రెగ్లవ తిలన్, చి యేసు అయ్లీసి, బులిలిసి, మొర్లిసి, అన్నె జలిసి చి పరలోకుమ్తె అన్నె వెగ గెలిసి తెన్ జా ఎత్తి నెరవెర్చువ జలి. ‡ **1:5 1:5** నెంజెలె 'ఒండి యూదయ దేసిమి' మెనుక జయెదె, రోమ్ దేసిమిచి ప్రబుతుమ్చి నావ్ తెన్ జో హేరోదు ఏలువ కెర్లె తిలన్. 4:44చి ఎట్టొచి కోడు దెక. § **1:5 1:5** ఎత్తి అదికారుమ్ తిలో దేముడుక ఈంజ లోకుమ్తె ఎక్కి దేముడుచి గుడి తయెదె. కేన మెలె; యెరూసలేమ్తె, యూదుల్చి వెల్లి పట్టుమ్తె. యెరూసలేమ్ యూదయ ప్రదేసిమి తిలి.

* **1:5 1:5** పూర్ణుమ్ జా అలనాబ్ దిలి తెంతో, యూదుల్చ పూజర్లుతె విస్సెక్ చెత్తర్జిన్ తిల. జోవయింతె ఏక్ జట్టుచో వెల్లో మాన్చు అబీయా. † **1:5 1:5** అహరోను మోసి పూర్ణుమ్చో అన్నెసి. ‡ **1:9 1:9** కేన్ పూజరిచి జివెతుమ్తె ఎక్కి సుట్టుచి సేవతె జో జా దూపుమ్ డయ్యుక జయెదె. జేక జా సమయ్యుమ్ జెకర్యాక ఒగ్గర్ ముక్కిమ్చి.

10 దూపుమ్ డయిలి పొది ప్రెజల్ ఒండిజిన్ దేముడుచి గుడిచి కోటచి తెడి బయిలె ప్రార్దన కెర్లె తిల.

11 తెదొడి దేముడు ప్రబుచో దూత ఎక్కిలో జా దూపుమ్ డయితి టాన్చి ఉజెతో పక్క టీవ డీసిలన్.

12 జెకర్యా జో దూతక దెక కెర బేగి బమ్మ జా బియె గెలన్,

13 గని దూత జోక, "జెకర్యా, తుయి బి నాయ్. తుయి కెర్లి ప్రార్దన దేముడు సూన అస్సె. చి తేర్లి ఎలీనబెతు తుక పుత్తు పాయ దెయెదె. జోక 'యోహాను' మెన నావ్ తిస్తి.

14 జో బోద జెర్లిలె తుయి సర్దనంతోసుమ్ జస్తి. అన్నె ఒగ్గర్జిన్ కి జా సర్ద జవుల.

15 పడ్డొ, ప్రబుచి కామ్ కెర్తనతె జోక 'వెల్లో' మెన ప్రబు దెకెదె. అంబడ్లి ద్రాచ రస్సుమ్ కి, కిచ్చొ మచ్చితి సూరు కి జో పియె నాయ్. చి జో దేముడుచి సుద్ది తిలి ఆత్తు జోచి పెట్టి బెర తయెదె; అయ్యున్చి పెట్టి జో తిలి మొదోల్ తెంతో కి.

16 ప్రబు జలో జో జోక దేముడుక జేవ్ అన్నె సత్తిమ్ కెరుక దెర్లి రితి జో యోహాను ఒగ్గర్జిన్ ఇస్రాయేలుల్క దేముడుచి పక్క పస్లయెదె,

17 చి ఏలీయా పూర్ణుమ్చొక తిలి ఆత్తునెక్కి, ప్రబుచ కబుర్లు సంగితి ఆత్తునెక్కి, యోహానుచి పెట్టి తయెదె చి, ప్రబుచి పురె జో గెచ్చెదె.

పురె గెచ్చు అబ్బదింసి జోవయింక బోదల్క అన్నె చెంగిల్ దెకిత్ రితి జోవయింక పసులవెదె, అన్నె బుద్ది సుదల్చి గ్యానుమ్ జేవ్ సూన్తి రితి దేముడుచి నీతి కోడు తెన్ అగ్గె నెసిలనక పసులవ దెయెదె.

కిచ్చొక మెలె, ప్రబుచి సేవ జేవ్ కెర్లి రితి మాన్సుల్క తెయారొ కెర్లి రిసాయి" మెన దూత జెకర్యాక సంగిలన్.

18 గని, "ఈంజ కోడుచి సత్తిమ్క అంక కిచ్చొ రుజ్జు? ఆవ్ మంత్రో మాన్చు, చి అంచి తెర్చి ఒగ్గర్ వెర్చుల్చి మంతిరి" మెన జెకర్యా అన్మానుమ్ సంగిలన్.

19 దూత జోక కిచ్చొ జబాబ్ దిలన్ మెలె, "ఎత్తి అదికారుమ్ తిలో దేముడుచి పురెతో టీవ్తో జోచి సేవ కెర్లొసా ఆవ్. అంచి నావ్ గల్చియెలు. తుక ఈంజ కోడు

ఆవ్ సంగుక మెన, తుక ఈంజ సర్దచి కబుర్ ఆనుక మెన, దేముడు అంక తెద్రయ్లో.

20 ఈందె, నూను, ఆవ్ సంగిల కొణొ తుయి సంప కెర్లది నాయ్ చి రిసొ, జొ ఎత్తి జర్గు జతి ఎద తుయి గుల్లో జొ తస్తె. జేవ్ కొణొ కచితుమ్ దేముడు దిలి కాలుమ్కయ్ ఎత్తి జర్గు జయెదె” మెన దూత జబాబ్ దిలన్.

21 జలె, మదెనె, జెకర్యా అన్నె బార్ జతిన్క పైజల్ రకితె తిల. దేవులుమ్తె జో ఆల్సమ్ తా గెలి రిసొ ఆచారిమ్ జల.

22 జలె, జో బార్ జలె, జోవయింతెన్ లట్టుబుక నెత్తిర్లి రిసొ, ‘దేముడుచి గుడితె కిచ్చొ జవున్ డీసన్ సేడ్లిన్ దెకిలన్’ మెన చినిల, అన్నె, గుల్లో జొ తా అత్తో తెన్ జోవయింక సయ్నల్ కెర్లన్.

23 అన్నె, జోచి సేవచ దీసల్ బెర జోచి సేవ కెర కిడెడవ కెర, గెరి ఉట్ట గెలన్.

24 సగుమ్ దీసల్ గెలి పడ్డె, జోచి తేర్ని ఎలీసబెతు అంగి జలి, అన్నె పాచే జొన్నొ ఎద లుంకిల్ రితి జొ గెరి తాఁ గెలి.

25 “ఆవ్ మంతిర్ జొ అయ్లి పొది ప్రబు అంక చెంగిల్ దెక చెంగిల్ వరుమ్ దా అస్సె. అంక ‘గొడ్డు జొ అస్సె’ మెన మాన్సుల్ అగ్గె ఆన్తె తిల, గని అప్పె అంగి జొ అస్సిచి మరియాద అయ్లి. దేముడుచి దయక అంక మరియాద దిల్లో. అంచె అవమానుమ్ కడ గెల్లో.” మెన ఎలీసబెతు సర్ద తెన్ తిలి.

యేసుచి జెర్చున్ రిసొ దూత మరియక సంగిలిసి

26 ఎలీసబెతు అంగి జొ సొవ్వు జొన్నొ జతికయ్, దేముడు జో గబ్రియేలు మెలో దూతక గలిలయ ప్రాంతుమ్చి నజరేతు మెలి గెవ్వి కబుర్ తెద్రయ్లన్.

27 యూదుల్చొ *దావీదు పూర్గుమ్చొచి సెకుమ్చొ యోసేపు మెలో ఎక్కిలోక పెండ్లి కెరుక మెన అయ్యసిసే సంగ తిలి విడ్డి బోదతె తెద్రయ్లన్. జొ విడ్డి బోదచి నావ్ మరియ.

28 జలె, జో దూత జొతె జొ కెర, “ఓ మరియ, తుక జోబర, తుయి సంతోసుమ్ జొ. ఎత్తి అదికారుమ్ తిలో దేముడు తుక చెంగిల్ దెక అస్సె. తుక చెంగిల్ వరుమ్ దెతయ్. జో తుక తోడు అస్సె” మెన సంగిలన్.

29 గని జొ నాడి ఈంజ కోడు నూన బలే ఆచారిమ్ జొ ఇదిల్ బాద సేడ కిచ్చొ కెరుక గే నేన కెర, “ఈంజ కోడుచి అర్దుమ్ కిచ్చొ?” మెన ఉచరన బియఁ గెలి.

§ 1:23 1:23 సత్తరెక్ చి సేవ, బెర్, కెర తయెదె. * 1:27 1:27 పూర్గుమ్ పొది జేవ్ యూదుల్క దావీదు ముక్కిమ్చొ రాన్ జొ తిలన్. † 1:32 1:32 యూదుల్క బగ్గర్ పూర్గుమ్ సొంత రానల్ తిల, చి జేవ్ రానల్తె దావీదు ముక్కిమ్చొ జల్లో. “తుచి సెకుమ్తె దొర్కు జల్లో రచ్చించుప కెర్లొసొక జెర్చయిందె” మెన జో దావీదుక దేముడు సంగ తిలన్. దావీదుచి సెకుమ్తె జో జెర్చె ఏలుప కెరుక తిలిన్చి రిసొ ‘మాములుమ్ ఈంజయ్ లోకుమ్చి అప్పెచి రగుమ్చి రాజిమ్తె ఏలుప కెరెదె’ మెన యూదుల్ ఉచరై తిల, గని ఆత్మయి రగుమ్చి రాజిమ్చి అర్దుమ్ ఇన్నె ముక్కిమ్ తయెదె. ఆకర్కయ్, దేముడు ఈంజ లోకుమ్క మార్పుప కెర్లి పడ్డెకయ్, జోచి రాజిమ్ డీసెదె. ‡ 1:33 1:33 యాకోబు పూర్గుమ్చొ కి యేసు జెర్చిలి వంసుమ్చొ జయెదె జోక ‘ఇస్రాయేలు’ మెన అన్నెక్ నావ్ తయెదె, చి జోచి సెకుమ్చక ‘ఇస్రాయేలులు’ మెన కి యూదుల్ సంగుల. § 1:36 1:36 అప్పసి జయెదె గే, అత్తన్ జయెదె గే, పాపన్ జయెదె గే, కిచ్చొ జయెదె గే నేన్తి. * 1:37 1:37 నెంజలె, జో సంగిలి కోడుక ‘జో జర్గు కెరుక నెత్తె’

30 “మరియ, తుయి బి నాయ్. కిచ్చొక మెలె, ఎత్తి అదికారుమ్ తిలో దేముడు తుక దయ దెక అస్సె.

31 ఈందె, నూను, తుయి అంగి జస్సె. పుత్తు పాయితె, చి జో బోదక ‘యేసు’ మెన నావ్ తిస్సె.

32 జో ముక్కిమ్ జయెదె, చి ‘ఎత్తిచి ఉప్పిరి తిలోసొచొ పుత్తుసి’ మెన జోచి రిసొ సంగుల. అన్నె,

దావీదు రానొచి సెకుమ్తె జెర్చెదె, చి జో ఒగ్గర్ పూర్గుమ్ తిలో ముచ్చొతాతోన్ జల్లో రిసొ

†దావీదుచి సింగాసనుమ్తె జో వెసయెదె జోచి రాజిమ్క జో ఏలుప కెర్లి రితి ప్రబు జల్లో దేముడు దెయెదె.

33 ‡యాకోబు పూర్గుమ్చొచి సెకుమ్చచి ఉప్పిరి జో కెయఁక తెయఁక ఏలుప కెరెదె. జోచి రాజిమ్ కెయఁక కి అంతుమ్ జయె నాయ్” మెన మరియక జో దూత సంగిలన్.

34 దూత దస్సి సంగితికయ్, మరియ జోక, “ఈంజ కిసి అంక జర్గు జయెదె? ఆవ్ మున్సుక నే గెలి మాన్సు, గెద” మెన సంగిలన్.

35 దూత జొక, దేముడుచి సుద్ది తిలి ఆత్మసెక్తి తుచి పెట్టి జెయెదె.

జో ఎత్తిచి ఉప్పిరి తిలోసొచి ఆత్మసెక్తి తుచి సుట్టునంత జోచి నీడ సెక్తి డంక తయెదె.

జొచి రిసొ, తుచి పెట్టి జెర్చుక తిలో బోదక “పూర్తి దేముడుచి సుద్ది తిలోసొ,

జోచొ సొంత పుత్తుసి” మెనుల.

36 అన్నె, “ఈందె, అన్నెక్ కోడు కి నూను. తుమ్చి కిమాన్సు జతి ఎలీసబెతు కి మంతిరి జలి పొది అంగి జొ అస్సె, చి పుత్తు పాయెదె. జొ అగ్గె గొడ్డు జొ తిలిసి అంగి జొ అప్పె సొవ్వు జొన్నొ జొ అస్సె.

37 జలె, *కిచ్చొచి రిసొ కి ‘జో జర్గు కెరుక నెత్తె’ మెన అమ్చొ దేముడుచి రిసొ సంగుక నెంజె, గెద. జో ఎత్తి తెరె” మెన దూత సంగిలన్. సంగితికయ్,

38 మరియ, “ఆవ్, ప్రబుచి సేవ కెర్లొ సుది, తుయి సంగిలిసి అంక జర్గు జవున్” మెన సంగిలి చి దూత జొచి తెంతో బార్ జొ ఉట్ట గెలన్.

మరియ ఎలీసబెతుతె గోత్ గెలిసి

39 జలె, ఒగ్గర్ దీసల్ నే గెతె అగ్గె ఏక్ దీసి, మరియు బార్ జా, బే బేగి గెచ్చు యూదయ ప్రదేసిమ్చి డొంగుర్ దేసిమ్ పక్కచి ఏక్ గణ్వి పావిలన్.

40 జెకర్యాచి గెరి గెచ్చు ఎలీసబెతుక దస్సుల్ జా జొకర్లన్.

41 మరియు జొకర్ల కోడు ఎలీసబెతు నూన్లి బేగి, జాచి పెట్టి తిలో బోద డేవిలన్. తెదొడి జాచి పెట్టి దేముడుచి సుద్ది తిలి ఆత్మ బెర్తికయ్,

42 జా ఆత్మసెక్తిక కిచ్చొ మెన గట్టిజ అవాడ్ తెన్ ఎలీసబెతు కేక్ గలిలన్ మెలె, “తేర్బోదల్ ఎత్కిచి కంట

దేముడు తుకయ్ దీవెన దిలన్ అస్సె, చి

తుచి పెట్టి జెర్మితో బోద చెంగిల్చో!

43 అంచొ ప్రబుక పాయితి అయ్యసి అంచితె జెంక

దేముడు కిచ్చొక వరుమ్ దా అస్సె?

44 ఈందె,

తుయి జొకర్ల కోడు అంచి కంగ్లల్ సూన్లి బేగి

అంచి పెట్టి తిలో బోద సర్లక

అంచి పేట్ తెడి డేవిలన్.

45 ఒహో, దేముడు

జాక సంగ తెద్రయ్లి కోడుక

‘నిజామి జర్లు జయెదె’ మెన

నంప కెర్లి తేర్బోదక చెంగిలి!”

మెన ఎలీసబెతు కేక్ గల్లికయ్,

46 మరియు జా ఇసి మెలి.

దేముడుచి గవురుమ్ మరియు గాయిలిసి

అంచి జీవు ప్రబు జలో దేముడుచి గవురుమ్ కెర్లసి.

47 అంచొ రచ్చించుప కెర్లొసా జలో దేముడు జర్లు కెర్లిన్చి రిసా

అంచి ఆత్మతె సర్ల జతసి.

48 అవ్ జోచి నేవ కెర్లొ సుది ఒగ్గర్ దాకు జలెకి,

అంక జో చెంగిల్ దెక అస్సె.

మెలె, ఈందె, “జాక చెంగిలి” మెన

అప్పె తెంతో యుగల్చి ఉప్పిరి యుగల్చ మాన్సుల్

అంచి రిసా దీవెన పాయిలిసి మెన సంగుల.

49 ఒండె సెక్తి తిలో దేముడు జోచి దయక

అంక గొప్ప కామ్ కెర అస్సె,

జోచి నావ్ పరలోకుమ్చి సుద్ది తిలిసి.

జో సుద్ది తిలిన్క జోచి నావ్ కెద్ది గవురుమ్ కెరుక జయెదె!

50 యుగుమ్చి ఉప్పిరి యుగుమ్చ జోక బిత మాన్సుల్క

జో కన్కారుమ్ దెకితె తయెదె.

51 †జో అప్పె జర్లు కెర్లొన్ తెన్ కచితుమ్

జోచి ఆతుచి ఒగ్గర్ సెక్తి కమొ కెర కెర,

జోచి సెక్తి దెకప అస్సె.

వెల్లొ మెనన్లసచి పెట్టిచ ఆలోసుమ్లు పాడ్ కెర,

జోవయింక చెదుర్ప కెర అస్సె,

52 ఏలుప కెర్లసక జోవయింక సిజాసనల్ తెంతో

నేడవ గెల కెర,

విలువ నెంజిల రిత మాన్సుల్క

జో విలువ దా అస్సె.

53 చూ జలసక చెంగిల్ అన్నిమ్ దొర్కు కెర అస్సె, చి

సామ్సార్లుక కిచ్చొ నే దెతె

రితి తెద్రవ దా అస్సె.

54-55 అమ్చ పూర్లుల్క, ముక్కిమ్క అబ్రాహామ్

పూర్లుమ్చొక,

“తుక, చి యుగుమ్చి ఉప్పిరి యుగుమ్చ తుచి

సంతానుమ్ జతసక

తోడు తయిందె” మెన

జో ప్రమానుమ్ సంగిలన్, గెద,

జలె, జా రచ్చనచి రిసాచి ప్రమానుమ్చి

జోవయించి కన్కారుమ్ నే పచ్చితె.

56 మరియు ఎలీసబెతు తెన్ తిన్ని జొన్నొ తా కెర గెరి అన్నె

ఉట్ట గెలి.

57 జలె, ఎలీసబెతుచి కంట్లు పాచ అయ్లి, చి

మున్సుబోద జెర్మిలన్.

58 జెర్మితికయ్, దేముడు జాచి ఉప్పిరి కన్కారుమ్ జా

అస్సె మెన, జేవ్చి గేర్ పాసిచ గెరల్చ మాన్సుల్చి జేవ్చ

అన్నొబాచొ చి బందుగులు ఎత్కిజిన్ సూన కెర, జేవ్ తెన్

ఒగ్గర్ సర్లసంతోసుమ్ జల.

59 జలె, బోద జెర్మ అట్టు పొదుల్ జతికయ్, యూదుడు

కెర్లి సున్నతి జో బోదక కెరుక చి, జోక నావ్ తింక మెన

ఎత్కిజిన్ బెద అయ్ల. ‘జెకర్యా’ మెన అబ్బొన్చి నావ్ జో

బోదక తిల.

60 గని అయ్యసి కిచ్చొ మెలి మెలె, “పొన. జోక †

‘యోహాను’ మెన నావ్ తింక అస్సె” మెలన్.

61 దన్సి మెంతికయ్, “జేవ్ తుమ్చ మాన్సుల్తె కక్కయ్

జా నావ్ నాయ్. జా నావ్ కిసి తితె!” మెన ఒత్త బెర్లస సంగ

కెర.

62 “బోదక కిచ్చొ నావ్ తింక?” మెలి రితి అబ్బొన్క

సయ్న కెర్ల.

63 రెగిడ్డి ఏక్ బల్ల జో నజన, “జోచి నావ్ యోహాను”

మెన జా బల్లయ్ రెగ్ల దెతికయ్, జేవ్ ఎత్కిజిన్ ఆచారిమ్

జల్.

64 జా నావ్ జెకర్యా రెగ్ల దెకయ్లి బేగి, జోక చొడి పుట్టి

చి జీబు బులిలి, లట్టబుక దెర తొలితో దేముడుచి గవురుమ్

సంగిలన్.

† 1:51 1:51 51-53 ఈంజేవ్ కొడొ ముక్కిమ్క జర్లు జంక తిలిన్చి రిసాచ కొడొ జవుల, గని జా ఎత్కిక ‘కచితుమ్ జర్లు జయెదె’ మెలి ఎత్కి అదికారుమ్ తిలో దేముడు జోచి సెక్తిక దిలి దయిరిమ్కయ్ జా ఎత్కిక అప్పె కి జర్లు జలి రితి సంగితయ్. † 1:60 1:60 యోహాను మెలి నావ్చి అర్దుమ్ కిచ్చొ మెలె, ‘ఎత్కి అదికారుమ్ తిలో దేముడు ప్రబు దయ కెర్లొసా జయెదె’ మెలి అర్దుమ్ తయెదె.

65 జలె, జా జర్గు జలిసి ఎత్కిచి రిసా జా పల్లెల్చ మాన్సుల్ ఎత్కిజిన్ బియిఁ గెల, చి జర్గు జలిన్ ఎత్కిచి రిసా, జా యూదయ ప్రదేసిమ్చి డొంగుర్ దేసిమ్చ మాన్సుల్ గావ్వొ ఎత్కితె లట్టబై తిల.

66 అన్నె, జర్గు జలిన్చి రిసాచ కొడొ నూన్లన ఎత్కిజిన్ మెన్సు చెంగిల్ ఉచర, 'జో నాడు దేముడుచి అత్తి అస్సె. జోయ్యి జోక తోడు' మెన చిన కెర, "ఈంజో బోద వడ్డిలె కిచ్చొ కామ్ కెరెదె, కీసాచొ జయెదె?" మెన ఉచరై తిల.

67 జలె, యోహానుక నావ్ తిలి గడియ దేముడుచి నుద్ది తిలి ఆత్మ జెకర్యాచి పెట్టి బెర, దేముడు దెతి రచ్చన తెదొడి తెంతో ఎత్కి జర్గు జంక దెరుక తిలిన్చి రిసా చొండి పుట్టవ జెకర్యా ఇసి మెలన్;

68 "ప్రబు జలో అమ్చ ఇస్రాయేలుల్చొ దేముడుక జోబర! కిచ్చొక మెలె, జోచయ్ ప్రెజల్ జల అమ్చ ఇస్రాయేలుల్క అన్నె కీగెనన రచ్చించుప కెర్తి రిసా జో ఉత్త్ర జా అస్సె.

69 జోచొ సేవ కెర్తొసా జలో దావీదు పూర్గుమ్చొచి సెకుమ్తె సెక్తి తిలొ రచ్చించుప కెర్తొసాక జో జెర్మవ అస్సె; అమ్క రచ్చించుప కెర్చు మెన.

70 దస్సి కెరిందె, మెన దేముడుచ కబుర్లు సంగిల పూర్గుల్చి చొండి పుట్టవ సంగిలన్, గెద.

71 అమ్క విరోదుమ్ జల మాన్సుల్ తెంతో అమ్క విరోదుమ్ కెర్లన ఎత్కిజిన్చి అత్తి తెంతో అమ్క రచ్చించుప కెరుక మెన జో సంగ అస్సె.

72-73 ఒగ్గర్ అగ్గెచ అమ్చ పూర్గుల్క ప్రమానుమ్ సంగిలి కోడు జర్గు కెరుకయ్ మెన, జేవ్ పూర్గుల్తె అమ్చొ అబ్రాహామ్ పూర్గుమ్చొక ఒట్టు గలన

దేముడు సంగిలి నిజుమ్ కోడు నే పచ్చితె జర్గు కెరుకయ్ మెన జో ఒప్పన అస్సె, జర్గు కెరెదె!

74-75 ప్రమానుమ్ జర్గు కెర్తినతె అమ్క జో కిచ్చొ గుర్తు దెతయ్ మెలె.

అమ్క విరోదుమ్ సుదల్ జలనచి అత్తి తెంతో అమ్ ములవుక జలె, బయిమ్ నెంతె పూర్తి జోచయ్ జా జో దెతి నుద్ది సత్తిమ్ ఇండ అమ్చి జివితమ్ పూర్తి జోచి సేవ అమ్ కెర్తె తంక వాటు జెయెదె.

76 తుయి, పుత్త, తుయి వడ్డిలె తుకయ్ కిచ్చొ మెనుల మెలె, ఎత్కిచి కంట వెల్లొ తిలొసాచి కబుర్ సంగితొసా జో మెన సంగుల. కిచ్చొక మెలె, ప్రబు జెతికయ్ జోక వాటు తెయార్ కెరవుక తుయి జోచి పురైతొ బులై తస్సె;

77 జోచ ప్రెజల్క జో ప్రబు రచ్చన దెతిన్చి కోడు జాన కెర, కేన్ రచ్చన మెలె, జోచ పాపల్ చెమించుప కెర్తిసి.

78 దేముడుచి పెట్టిచి కన్కారుమ్చి జోచి దయచి రిసాచి రచ్చన. ఈంజ రచ్చనచి రిసా, పరలోకుమ్ తెంతో ఉజిడి అమ్చి ఉప్పిరి లగిలి, నొవి దీసి అయ్లి రితి అమ్క ఉజిడి దెయెదె.

79 అందర్తె వెసిల, మొర్చుచి నీడతె వెసిల రిత మాన్సుల్క దొర్కు జలి ఉజిడి దెతి రిసాయి. జో దెతి రచ్చనచి సేంతుమ్ వాటు అమ్ ఇండితి రితి అమ్క వాటు దెకయ్తి రిసాయి అమ్చొ దేముడు ఈంజ ఉజిడి అమ్చి ఉప్పిరి దెకయెదె." మెన జెకర్యా దేముడుచి నుద్ది తిలి ఆత్మ తెన్ చొండి పుట్టవ సంగిలన్.

80 జలె, జో బోద యోహాను వడ్డ ఆత్మక డిట్టుమ్ జలన్ అన్నె, జోచ ఇస్రాయేలుల్తె జో బార్ జా, జోక దిలి కామ్ మొదొల్ కెరుక మెన దేముడు సంగిలి కాలుమ్ ఎద జో బయిలు దేసిమి తాఁ గెలన్.

2

యేసు జెర్మిలిసి (మత్త 1:18-25)

1 జేవ్ పొదులె, బెగుస్తు మెలొ *కైసర్ రానొ రోమ్ దేసిమ్ తెంతో ఒగ్గర్ దేసిమ్లు ఏలుప కెర్తె తిలి పొది, "ఒండి లోకుమ్తె కెత్తిజిన్ ప్రెజల్ జవుల గే తుమ్ లెక్క కెర రెగుడ" మెన మాన్సుల్క ఆడ్ర దిలన్.

§ 1:68 1:68 ఎత్కి అదికారుమ్ తిలొ దేముడు కక్క డబ్బుల్ గట్ట దెంక నాయ్, గని కేన్ జవున్ మాన్సు గొతిమాన్సు జా తిలె, కో జవున్ డబ్బుల్ దా, జో గొతిమాన్సుక విడ్డల్ కెరవుక జయెదె. దస్సి, 'ఎత్కి అదికారుమ్ తిలొ దేముడు రచ్చించుప కెర్తొసాక తెద్రవ అమ్క అమ్చ బాదల్ తెంతో, అమ్క ఆక్రమించుప కెర్లన తెంతో విడ్డల్ కెరెదె' మెన యూదుల్ ఆన జా నంప తెన్ అస్సి. 'క్రీస్తు జలో రచ్చించుప కెర్తొసాక తెద్రయిందె' మెన ఎత్కి అదికారుమ్ తిలొ దేముడు నిజుమి పూర్గుమ్ తెంతో ప్రమానుమ్ సంగ తిలొ, గని 'జా రచ్చన ముక్కిమ్క అమ్ కెర్ల పాపల్చి సిచ్చ తెంతో చి రచ్చన' మెన అర్దుమ్ కెరంతి నాయ్. ఆకర్కయ్, ఉగుమ్ జో మార్చుప కెర్తి పొదికయ్, గర్చి ఎత్కి బాదల్ ఎత్కి పూర్తి గెచ్చవ గెల కెర, నొవి ఆగాసుమ్ నొవి బూలోకుమ్ జతి రితి ఎత్కి అదికారుమ్ తిలొ దేముడు మార్చుప కెరెదె. జలె, పాపుమ్ గెచ్చయ్తి రిసా, ఆకర్క గర్చి ఎత్కి బాదల్ ఎత్కి గెచ్చయ్తి రిసా, ఎత్కి అదికారుమ్ తిలొ దేముడు దిలిసి కిచ్చొ మెలె, యేసు అర్చితుమ్ జలిన్ తెన్ చి జో సువడ్డి లొయి. జో అన్నె గెనంతిసి, జలె, ఈంజ ఎత్కిక టాలి జయెదె. * 2:1 2:1 'కైసర్' మెలె, గ్రీకు బాన తెన్ బెదితయ్. నెంజలె 'సీజరు' కి మెనుల. 'సీజరు' మెలె, ఇంగ్లీస్ తెన్ బెదితయ్. తెలుగు తెన్ 'వెల్లొ రానొ' మెన అస్సి.

2 జేవ్ పొదులె కురేనియు మెలోసా సిరియ దేసిమి అదికారి జా తిలి పొది జా ప్రెజల్ లెక్క కెర్ల. ఇన ప్రెజల్ లెక్కల్ రెగుడుక ఈంజ తొలితో చి.

3 జలె, ప్రెజల్ ఎత్తి కేనేచ మాన్సుల్ ఒత్త జేవ్చ సొంత టాన్లుతె జేవ్చ నవ్వో రెగ్గవనుక గెల.

4 దస్సి, యోసేపు దావీదు పూర్ణుమచొచి వంసుమచొ జోచి తెగచొ మాన్సుచి రిసా, గలిలయ ప్రాంతుమచి జో జితె తిలి నజరేతు గవ్వో తెంతో బార్ జా, యూదయ ప్రదేసిమచి బేత్లెహేమ్ మెంతి గవ్వో ఉట్ట గెలన్.

5 తేర్చి జతి మరియ తెన్ ప్రెజల్ లెక్కతె ఒత్త జోవయించ నవ్వో రెగ్గవనుక మెన గెల. జా జలె, అంగి జా తిలి.

6 జలె, జేవ్ ఒత్త తిలి పొది జాచి కంట్లు పాచ అయ్లి, చి

7 తొల్పుర్ మున్సుబోద లడెన్ జలన్. జోక పాలల్ గుడియవ, జేవ్ తిలి సొమ్ముల్ సాడె తిలి సొమ్ముల్ దొవ్నో పితి దోనెతె పెటెతె నిజవ తిల. ఒత్తయ్ కిచ్చొక మెలె, జా గవ్వో జేవ్ తంక, కేనె టాన్ విడి నాయ్.

గొప్పడుక దూతల్ డీన యేసు జెర్మిలిన్చి రిసా సంగిలిసి

8 జలె, జా రాతి జా గావ్క పాసి, మెండల్ రకిత గొప్పడు సగుమ్జిన్ బయిలె మెండల్ రకితె తిల.

9 రకితె తిలె, దేముడుచొ, దూత ఎక్కిలో జోవయింక డీసిలన్, చి జో ప్రబుచి పరలోకుమచి ఉజిడి జోవయించి సుట్టునంత లగిలి, చి ఒగ్గర్ బియఁ గెల.

10 తెదొడి దూత జోవయింక, “తుమ్ బియఁ నాయ్. తుమ్క చెంగిల్ కబుర్ ఆన్తసి. ప్రెజల్ ఎత్తిక ఒగ్గర్ సర్దనంతోసుమ్ ఆన్తి కబుర్, ఈంజ.

11 ఆజి దావీదు పూర్ణుమచొచి గవ్వో తుమ్చొ రచ్చించుప కెర్తొసా జెర్మ అస్సి. కొన్సో మెలె, †క్రీస్తు జలొ ప్రబుయి.

12 జోక తుమ్ చినితి రిసా తుమ్క కిచ్చొ గుర్తు దెతసి మెలె, జో బోదక పాలల్ గుడియవ తా జోక ఏక్ సొమ్ముల్ సాడె తిలి సొమ్ముల్ దొవ్నో పితి దోనెతె నిజవ తవుల” మెన దూత కబుర్ సంగిలన్.

13 సంగిలి బేగి, పరలోకుమ్ తెంతో ఒగ్గర్జిన్ దూతల్ ఉత్త జా కిచ్చొ మెన దేముడుచి గవురుమ్ గాయిల మెలె,

14 “పరలోకుమ్తె దేముడుక జోబర! చి బూలోకుమ్తె జో దయ దెకిత మాన్సుల్తె జో దెతి సేంతుమ్ ఏలువ కెర్చు!” మెన గనుమ్ గాయిల.

† **2:11 2:11** ‘క్రీస్తు’ మెలె ‘తెద్రయందె’ మెన ఎత్తి అదికారుమ్ తిలొ దేముడు ప్రమానుమ్ నంగ తిలొ రచ్చించుప కెర్తొసా. † **2:21 2:21** జా నావ్చి అర్దుమ్ కిచ్చొ మెలె. యెహోవ రచ్చించుప కెర్తొసా జా అస్సి. ‘యెహోవ’ మెలె, ఎత్తి అదికారుమ్ తిలొ దేముడుచి నావ్. § **2:22 2:22** బోద జెర్మ దొన్ని విసా పొదుల్ జలె జా సుద్ది కామ్క దేముడుచి గుడితె గెచ్చుల. * **2:23 2:23** తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్నల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సి. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్ణుమచొచి అత్తి రెగ్గి దేముడుచ ఆగ్నల్ మెన రగ్గవ అస్సి. † **2:23 2:23** తొల్పుర్ పుత్తుక ‘దేముడుక దిలొసా. అమ్ అన్నె గెనసుక’ మెనయ్, బోదచ అయ్యసిసి దేముడుచి గుడితె ఇదెల్ డబ్బుల్ దెవుల.

15 జలె, దూతల్ జా గనుమ్ గాయ ఉట్ట గెల. చి మెండల్ రకిత జేవ్ గొప్పడు “బేత్లెహేమ్తె గెచ్చుమ, చి ‘జర్లు జలి’ మెన దేముడు అమ్క జానయ్లిసి దెకుమ. జోమ్మ!” మెన ఎక్కిలోక ఎక్కిలో సంగన్.

16 గవ్వో బే బేగి నిగ గెచ్చు, మరియక, యోసేపుక, చి సాడెచి సొమ్ముల్ దొవ్నో పితి దోనెతె నిజ తిలొ బోదక చజ దెకిల.

17 జా రుజ్జు దెకిల్ రిసా, జో బోదచి రిసా దూత జేవ్క జానయ్లి కొడు ఎత్తి కక్క కక్క,

18 జేవ్ గొప్పడు సంగిలిసి నూన్ల ఎత్తిజిన్ ఆచారిమ్ జా గెల.

19 మరియ మాత్రుమ్ ఈంజేవ్ కొడె ఎత్తి జాచి పెట్టితె తియఁ జోచి అర్దుమ్ కిచ్చొ జయెదె గే ఉచర్తె తిలి.

20 జలె, మెండల్ రకితసక దూత సూనయ్లిసి చి జేవ్ సాడె దెకిలిసి ఎక్కి రితి బెదిలి రిసా దేముడుక జోకర, గవురుమ్ గాయ గాయ, జేవ్ రకిత మెండల్తె అన్నె ఉట్ట గెల.

యేసుక నావ్ తిలిసి

21 బోద జెర్మ అట్టు పొదుల్ జతికయ్, జోక యూదుడు కెర్తి సున్తుతి కెర దిల, చి జోక †‘యేసు’ మెన నావ్ తిల. అయ్యసి అంగి నే జతె అగ్గె ‘యేసు’ మెన నావ్ తిత్తు మెన దూతచి అత్తి దేముడు ఈంజ నావ్ దా తిలన్.

యేసుక దేముడుచి గుడితె కడ నిలిసి

22 మోసే పూర్ణుమచొచి అత్తి రెగ్గి దేముడుచి ఆగ్నల్ రితి మరియక అన్నె సుద్ది కెర్తి కామ్చి కీదీసి అయ్లి పొది, జా కామ్క మెన అన్నె యేసుక దేముడుచి టాన్తె జోవయించి పురై టీచడుక మెన యోసేపు జోక యెరూసలేమ్తె దేముడుచి గుడితె కడ నిలన్.

23 కిచ్చొక మెలె, మోసే పూర్ణుమచొచి అత్తి దేముడు రెగ్గయ్ల *ఆగ్నల్చి రిసా, “తొల్పుర్ బోద పుత్తు జలె, జోక ‘ప్రబుకయ్ †అర్దితుమ్ దిలొసా’ మెనుక అస్సి” మెన రెగ్గి కొడు.

24 జలె, మోసే పూర్ణుమచొచి అత్తి దేముడు రెగ్గయ్ల ఆగ్నల్తె రెగ్గయ్లి రితి, “పూజరిచి అత్తి దొన్ని వన్యో పిట్టల్ జలెకు, దొన్ని పార్వ పిట్ట పిట్టల్ జలెకు దెంక” మెన రెగ్గిసి జర్లు కెరుక మెన, అయ్యస్క సుద్ది కెర్తి రుజ్జుక దనచ దెంక జేవ్ దేముడుచి గుడితె గెల.

25 జలె, జా కాలమ్ యెరూసలేమ్తె ఏక్ మాన్సు తిలన్. జోచి నావ్ సుమెయోను. జో మాన్సు సత్తిమ్ ఇండితోసా. దేముడుక నిదానుమ్ బక్తి కెర్తొసా. 'అమ్చ ఇస్రాయేలుల్చో రచ్చించుప కెర్తొసా కెయక జెయెదె గె,' మెన జో దెకితె తిలన్. దేముడుచి సుద్ది తిలి ఆత్మ జో తెన్ తిలి.

26 "దేముడుచో క్రీస్తుక తుయి దెకిలెకయ్ మొర గెతె" మెన జో దేముడుచి సుద్ది తిలి ఆత్మ జో సుమెయోనుక నూనవ తిలన్.

27 జలె, 'క్రీస్తు రచ్చించుప కెర్తొసా జాఁ అస్సె' మెన జో జాన్లి రితి, జయ్యి దీసి జో సుమెయోను దేముడుచి గుడితె గెతి రితి దేముడుచి సుద్ది తిలి ఆత్మ జోక పెలవ నెతికయ్, ఒత్త గెలన్. 'తోల్పూర్ బోద' మెన మోసే పూర్ణమ్చోచి అత్తి దేముడు రెగ్గయ్ల ఆగ్గుల్తె రెగిడ్లి రితి యేసుచి రిసా కెరుక మెనయ్, జోక అయ్యసిసి దేముడుచి గుడి తెడి పాయ ఆన్తికయ్,

28 జో సుమెయోను జోక దెర పాయ దేముడుచి గవురుమ్ సంగ ఇసి మెన జోబర కెర్లన్:

29 "ఓ ప్రబువ, ఆవ్ తుచో గొత్తి సుదో, అప్పె సేంతుమ్ తెన్ మొర గెతి

సెలవ్ తుయి దెతసి, తుయి అంక సంగిలిసి ఎత్తి జర్గు కెర అస్సిన్,

30 తుయి తెర్లయ్లో రచ్చించుప కెర్తొసాక దెక అస్సి.

31 ఈంజ లోకుమ్ ఎత్తిచ ప్రెజల్ దెకిత్ రితి ఈంజ రచ్చన తుయి తెయోర్ కెర్లది.

32 యూదుల్ నెంజిలన సత్తిమ్ ఇండితి రితి ఈంజో రచ్చించుప కెర్తొసాచి ఉజిడి వాట్ దెకయెదె, చి తుచయ్ ప్రెజల్ జల అమ్చ ఇస్రాయేలుల్క జోవయించి ఉజిడి
‡అన్నె గవురుమ్ ఆనెదె."

మెన, సుమెయోను దేముడుచి సుద్ది తిలి ఆత్మసెక్తిక చోండి పుట్టవ సంగిలన్.

33 జలె, యేసుచి రిసా సంగిలిన్చి రిసా అయ్యన్ కిఅబ్బొన్ ఆచారిమ్ జా గెల.

34 తెదొడి "దేముడుచి దయ తుమ్చి ఉప్పిరి తవున్" మెన సుమెయోను జేవ్క దీవెన సంగిలన్, చి దేముడుచి సుద్ది తిలి ఆత్మ తెన్ యేసుచి అయ్యన్ మరియక జో సుమెయోను అన్నె ఇసి మెలన్.
"ఈందె, ఈంజో బోదచి రిసా అమ్చ ఇస్రాయేలుల్తె ఒగ్గర్జిన్ నంపజా రచ్చించుప జవుల.

‡ 2:32 2:32 నెంజలె, 'తుచి ఉజిడి అన్నె సాస్టుమ్ దెకయెదె'. § 2:33 2:33 యోసేపు నిజమి అబ్బొసి నెంజ. ఎత్తి అదికారుమ్ తిలో దేముడు సొంత

అబ్బొసి జయెదె, గని మరియ యోసేపుక పెండ్లి జా అస్సె చి దస్సి మెన్తయ్. * 2:38 2:38 యూదుల్ మాములుమ్ ఈంజ లోకుమ్చ బాదల్ తెంతో చి రచ్చనక రకితె తిలి, చి ఆకర్క జయి ఎత్తి కి మార్పువ జయెదె, గని అప్పెచి మట్టుకచి రచ్చనక 'ఆత్మయి రగుమ్' మెన నేన కెర, యేసుక 'ఈంజ లోకుమ్తె ఎదార్దుమ్ విలువ కెర నాయ్' మెన, జోవయింక 'జొయ్యి దొర్పు జలొ రచ్చించుప కెర్తొసా' మెన జోవయింతె ఒగ్గర్జిన్ చినితి నాయ్. 'యెరూసలేమ్' మెలె, ఇన్నె యూదుల్ ఎత్తిచి రిసాచి టాలి జయెదె. జా మదెనె, రోమ్ దేసిమచి ప్రబుతుమ్ జోవయింక విలువ కెర్తె తిల, చి 'జా బాద తెంతో కి రచ్చించుప కెర్తొసా అమ్క విడ్డల్ కెరెదె' మెలి రితి ఉచర్తె తిల. † 2:41 2:41 'పస్కా పండుగు' మెలె, పూర్ణమ్ యూదుల్ ఐగుప్తు (ఐగుప్తు) దేసిమి గొతిమాస్సుల్ జా విడ్డల్ జా జా దేసిమ్ తెంతో బార్ జా సొంత దేసిమి అయ్లిసి ఏద కెర్తి పండుగు.

గని ఒగ్గర్జిన్ అన్నానుమ్ జా పాడ్ జవుల, దేముడుచి గుర్తుక ఈంజో టీవ్దె, చి ఇన్నెచి ఉప్పిరి ఒగ్గర్జిన్ విరోదుమ్ లట్టబుల, 35 ఒగ్గర్జిన్చి పెట్టిచి బుద్ధిక 'కీసిచి గే' చినుక జయెదె. ఈంజ ఎత్తిచి రిసాయి జో ఈంజ లోకుమ్తె జా అస్సె, తుచి పెట్టి ఏక్ కండా బూసి జయెదె తుక దుకుమ్ జెయెదె," మెన సుమెయోను మరియక సంగిలన్.

అన్నా మెలి మంతిరి కి యేసుచి రిసా ఒత్త సర్ల లట్టబ్బిసి

36 జలె, దేముడుచ కబుర్లు సంగితి 'అన్నా' మెలి మంతిరి దేముడుచి గుడితె తిలి. జా ఆసేరు పూర్ణమ్చోచి తెగచి మాన్సు. పనూయేలు మెలొసాచి దువిసి జయెదె. జా ఒగ్గర్ వెర్సుల్ వయసుచి మంతిరి. జా బాల తతె పెండ్లి జా సత్తు వెర్సుల్ మున్సున్ తెన్ తిలన్,

37 చి రండెలి జా అప్పె చెత్తర్ విస్సా చెత్తర్ వెర్సుల్ జా తా, దేవులుమ్ నే ముల్తె, చువ్వె తా, రాతి మెద్దెనె ప్రార్దన కెర్తె తా బక్తి కెర్తె తయెదె.

38 తెదొడి జయ్యి గడియయ్ మరియయింసితె జా కెర, యేసుచి రిసా దేముడుక "ఇన్నెక తెర్లవ తుయి దయ కెర్లది" మెన ప్రార్దన కెర్లన్. అన్నె తెదొడి * "రచ్చించుప కెర్తొసా కెయక జా కెర యెరూసలేమ్క విడ్డల్ కెరెదె" మెన రకిత మాన్సుల్ ఎత్తిజిన్క "ఈంజొయి జో" మెన యేసుచి రిసా సంగిలి.

39 మోసే పూర్ణమ్చోచి అత్తి దేముడు రెగ్గయ్ల ఆగ్గుల్తె రెగ్గయ్లిన్తెచ జేవ్ కెరుక తిల కమె ఎత్తి కెర కేడవ కెర, గలిలయ ప్రాంతుమ్చి జోవయించి సొంత గావ్ జలి నజరేతు గవ్వి మరియయింసి అన్నె ఉట్ట గెల.

40 జో బోద వడ్డ డిట్టుమ్ జలొ, ఒగ్గర్ బుద్ది సుదో జలొ, దేముడుచి దయ జోచి ఉప్పిర్ తిలి.

యేసు యెరూసలేమ్తె పండుగ్క గెలిసి

41 యేసుచ అయ్యసిసి వెర్సు వెర్సు † పస్కా పండుగ్క యెరూసలేమ్ పట్టుమ్తె దేముడుచి గుడితె గెచ్చుక అలవాట్.

42 జలె, యేసుక బార వెర్సుల్ జా తిలి పొది జోవయించి అలవాట్క పండుగ్క ఒత్త గెల.

43 జలె, పండుగు కేడ జేవ్ గెరి గెచ్చుక బార్ జలె, యేసు యెరూసలేమ్తె తాఁ గెలన్, గని అయ్యసిసి నేన్తి.

* 2:38 2:38 యూదుల్ మాములుమ్ ఈంజ లోకుమ్చ బాదల్ తెంతో చి రచ్చనక రకితె తిలి, చి ఆకర్క జయి ఎత్తి కి మార్పువ జయెదె, గని అప్పెచి మట్టుకచి రచ్చనక 'ఆత్మయి రగుమ్' మెన నేన కెర, యేసుక 'ఈంజ లోకుమ్తె ఎదార్దుమ్ విలువ కెర నాయ్' మెన, జోవయింక 'జొయ్యి దొర్పు జలొ రచ్చించుప కెర్తొసా' మెన జోవయింతె ఒగ్గర్జిన్ చినితి నాయ్. 'యెరూసలేమ్' మెలె, ఇన్నె యూదుల్ ఎత్తిచి రిసాచి టాలి జయెదె. జా మదెనె, రోమ్ దేసిమచి ప్రబుతుమ్ జోవయింక విలువ కెర్తె తిల, చి 'జా బాద తెంతో కి రచ్చించుప కెర్తొసా అమ్క విడ్డల్ కెరెదె' మెలి రితి ఉచర్తె తిల. † 2:41 2:41 'పస్కా పండుగు' మెలె, పూర్ణమ్ యూదుల్ ఐగుప్తు (ఐగుప్తు) దేసిమి గొతిమాస్సుల్ జా విడ్డల్ జా జా దేసిమ్ తెంతో బార్ జా సొంత దేసిమి అయ్లిసి ఏద కెర్తి పండుగు.

44 'యేసు అమ్చి తెన్ జెతన తెన్ అస్సె' మెన ఉచర తా, ఏక్ ఒండి మెద్దెన్చి ఎదిలి ప్రయానుమ్ గెలి పడ్డె, జోవయించ మాన్సుల్తె చి గోతుసుదల్తె చజల.

45 గని డీసె నాయ్, చి జోక చజన చజన యెరూసలేమ్తె అన్నె గెల.

46 ‡ ఒత్త పావెలె, అన్నెక్ దీసి యేసు దేముడుచి గుడితె ఒత్త పండితుల్చి నెడిమి పెన తిలొ డీసిలన్. జో జేవ్చ కొడొ సూన, జేవ్చ ప్రస్నల్ కి పునితె తిలన్.

47 ఒత్త తిలస ఎత్తిజిన్ యేసుచ కొడొ, చి జోచ ప్రస్నల్ సూన, జోచి బుద్ది గ్యానుమ్చి రిసా పండితుల్క జో దెత జబాబుల్చి రిసా బలే ఆచారిమ్ జతె తిల.

48 జలె, దస్సి జతె తతికయ్, అయ్యసిని జోక దెక, జేవ్ కి బలే ఆచారిమ్ జల, చి అయ్యసి జోక కిచ్చొ పుసిలి మెలె "కిచ్చొక, పుత్త, అమ్క ఇసి అల్లర్ కెర్లది? ఈందె, అబ్బొది ఆవ్ గొప్ప దుకుమ్ నేడ ఒండి చజితె తిలమ్" మెన సంగిలన్.

49 యేసు జేవ్చ కిచ్చొ సంగిలన్ మెలె, "అంచి రిసా కిచ్చొక చజుక? ఆవ్ అంచొ అబ్బొచి గెరి తంక మెన తుమ్ నేన్సు గె?" మెలన్.

50 జలె, జో సంగిలి కోడు జేవ్చ అర్దుమ్ జయె నాయ్.

51 జలె, జోవయింతెన్ యేసు నజరేతు గచ్చి అన్నె ఉట్ట గెలన్. చి జోవయింతెన్ జియ జేవ్ సంగిల్ కోడు రితి ఇండితె తిలొ. అయ్యసి, జలె, దేముడుచి గుడితె జో సంగిలిసి పెట్టి తియన, ఒత్త జర్గు జలిసి ఎత్కిచి రిసా జాచి పెట్టి ఉచరె తిలి.

52 జలె, యేసు ఆగ్క కి బుద్దిక కి వడ్డిలన్, చి మాన్సుల్ జోక మెన్సితె తిల, చి దేముడుచి దయ జోచి ఉప్పిర్ తిలి.

3

దేముడు దెతి రచ్చనక యోహాను సాట్టు కెర్లిసి
(మత్త 3:1-12; మార్కు 1:1-8; యోహా 1:19-28)

1 తిబెరియ మెలొ క్షెసర్ రానొ పనర వెర్సుల్ రోమ్ పట్టుమ్ తెంతొ ఒగ్గర్ దేసిమ్లు ఏలుప కెర్తె తిలి పొది, జోవయించి తెడి పొంతి పిలాతు యూదయ ప్రదేసిమి అదికారి జా తా, హేరోదు మెలొసా గలిలయ ప్రాంతుమ్తె అదికారి జా తా, జోచొ బావొసి పిలివ్ ఇతారయ అన్నె త్రకొనీతి మెల ప్రాంతుమ్లుతె అదికారి జా తా, లుసానియ అబిలేనే ప్రాంతుమ్తె అదికారి జా తా,

2 అన్నా మెలొసా ఎత్కిక వెల్లొ పూజరి జా తా, దూజాంవొన్ జలొ కయప తెదొడి ఎత్కిక వెల్లొ పూజరి జా తిలి పొది, జెకర్వాచొ పుత్తసి యోహాను బయిలు దేసిమి

* బుల్తె తిలి పొది, దేముడుచి జో సంగుక తిలి కబుర్ జోక అయ్లి.

3 జలె, జోచి కబుర్ జో సంగుక దేముడు తియార్తికయ్, "తుమ్చి పాపల్చి రిసా తుమ్ దుకుమ్ జా, అమ్చొ దేముడు తుమ్చి పాపుమ్ చెమించుప కెర్తి గుర్తుక తుమ్ బాప్తిసుమ్ నజన" మెన యోర్దాను గాడు పాసి ఒండి బుల బుల సాట్టు కెర్తె తిలన్.

4 దేముడుచ కబుర్లు సంగిలొ యెసయాచ కోడు రెగిడ్లి పుస్తకుమ్తె రెగిడ్లి రితి;

"ఎక్కిలొ అంచొ బారికి జా, అంచి అవాడ్ రితొ జా, ప్రబు జెతికయ్ వాటు తిన్నగ కెర్లి రితి తుమ్ ఎత్కిజిన్ బుద్ది జా మెన, బయిలె ప్రదేసిమి తా కేక గల సాట్టు కెరెదె.

5 ఎత్కి డొంగుర్, ఎత్కి మెట్ట, ఎత్కి లోయ సదూనుమ్ జవుల, వంకుడ వట్టొ తిన్నగ జవుల, చి గర్కు తిల వట్టొ మిన్న జవుల,

6 దేముడు మాన్సుల్క కిసి రచ్చించుప కెరెదె గే ఎత్కిజిన్ దెకుల." మెన రెగిడ్లి కోడు.

బాప్తిసుమ్క అయ్లనక యోహాను గోల కెర బుద్ది సంగిలిసి

7 జలె, జోచి అత్తి బాప్తిసుమ్ నజనుక మెన బార్ జల ఒగ్గర్జిన్ జనాబ్క దెక కెర, యోహాను జోవయింక ఇసి మెలన్: "అయివొచి రితి విస్సుమ్ పెట్టి తిలస, తుమ్! దేముడు కెర్తి సిచ్చ పిట్టవనుక ఉచరుక మెన తుమ్క సికడ్లొసా కొస్సొ?

8 తుమ్ కెర్తె పాపల్ ముల దా, చెంగిల్ బుద్ది ఇండ, ఆత్మపలితుమ్ దెర. పడ్డె, 'అబ్రాహామ్ అమ్క అబ్బొ జయెదె చి రిసా, దేముడు తెన్ బెద అస్సుమ్' మెన తుమ్క తూమ్ ఉచరన సొంత గవురుమ్ సంగుక నాయ్. కిచ్చొక మెలె, దేముడుక ఇన్నెచ పత్రల్ తెన్ అబ్రాహామ్చి రిసా బోదల్క జెర్మవుక తెరె, మెన తుమ్క ఆవ్ సంగితసి.

9 ఈందె, అప్పె ప్రబు కురాడు వాండి కెర, రూకుక బుంది కండుక, కుర్తడి దెర టీచ అస్సె, జలె, చెంగిల్ పలితుమ్ నే దెర్తొ ఎత్కి రూకుక కండ కెర ఆగితె గలుల," మెన యోహాను జాగర్ల బుద్ది సంగిలన్.

10 జో ఇసి సంగితికయ్, "దస్సి జలె, అమ్ కిచ్చొ కెరుక గే అమ్క సంగు" మెన జనాబ్ పుసిల,

11 జో జోవయింక కిచ్చొ జబాబ్ దిలన్ మెలె, "కక్క దొన్ని సాక్కల్ తవుల గే, ఎద్దెరె సాక్క నెంజిలొసాక ఏక్ దెంక. కక్క అన్నిమ్ తిలె, జో అన్నిమ్ నెంజిలొసాక అన్నిమ్ దెంక." మెలన్.

‡ 2:46 2:46 నెంజిలె, 'తిర్రతి గెతికయ్, డీసిలన్'. ఇసి మెన ఒగ్గర్జిన్ ఉచర్తతి: జేవ్ అయ్యసిని దేముడుచి గుడి తెంతొ బార్ జా ప్రయానుమ్ గెలిసి ఏక్ దీసి దెర్లి, దేముడుచి గుడితె జేవ్ అన్నె గెచ్చుక చి అన్నెక్ దీసిచి ప్రయానుమ్ తెన్ దొరతి జలె, చి అన్నెక్ దీసి డీసిలన్. * 3:2 3:2 1:80 దెక.

12 జలె, బాప్తిసుమ్ నజనుక మెన సిస్తు నజిత నుంకర్లు కి యోహానుతె అయ్ల, చి “గురుబాబు, ఆమ్ కిచ్చొ కెరుక?” మెన పుసీల.

13 జో జోవయింక, “తుమ్ కెద్ది సిస్తు నజుక నాయిమ్ తయెదె గే, తెద్దిలి నజ. అన్నె ఒగ్గర్ నజ నాయ్” మెలన్.

14 “ఆమ్, జలె, కిచ్చొ కెరుక?” మెన నయ్న్యుమ్ సుదల్ పుసీలె, యోహాను జోవయింక, “బియడ జవున్, ఆరిచ నిందల్ కెర జవున్, కచి అస్తి దొర్కు కెరన నాయ్. దస్సి కెర్లె చొర్లి రితి జయెదె. జా పోన, గని తుమ్చి నాయిమ్ తెన్ చి జీతుమ్ నజన, ‘సాలు’ మెన సర్ల తెన్ జియ,” మెన యోహాను సంగిలన్.

క్రీస్తుచి రిసా యోహాను బోదన కెర్లసి

15 ‘జెతో క్రీస్తు జా తయెదె’ మెన ప్రెజల్ ఎత్తి అజ్జ కెరన, యోహానుచి రిసా “ఈంజొ ఏక్ వేల క్రీస్తు జా తయెదె” మెన పెట్టి ఉచరంతె తతికయ్,

16 జో ఇసి మెన జబాబ్ దిలన్. “ఆవ్ పానితె తుమ్క బాప్తిసుమ్ దెతసి, గని అంచి కంట అదికారుమ్ తిలోసా జెతయ్. జోచ చట్టోతెచ జోడ్లుచ వాలివొ యిపుక జలెకు అంక విలువ నాయ్. జో, జలె, దేముడుచి సుద్ది తిలి ఆత్మ తెన్, †ఆగి తెన్ తుమ్క బాప్తిసుమ్ దెయెదె.

17 జోచి పూనితి సూపు జోచి అత్తి అస్సె. జోచి కెల్లి సుబ్రుమ్ కెర జోక కామ్క జెతి పంటొ గుడ్ల కెర కొట్టుతె కుడవ, కో విజవుక నెత్తిగ్లి ఆగితె పోటు గల డయ గెలెదె,” మెన యోహాను సంగిలన్.

18 ఒగ్గర్ దన దయిరిమ్ కొడొ సంగిత జాగర్ల సంగిత కొడొ తెన్ ప్రెజల్క దేముడు దెతి రచ్చనచి రిసా యోహాను సుబుమ్ కబుర్ బోదన కెర్లన్.

19 గలిలయ ప్రాంతుమ్చొ అదికారి జలొ హేరోదు, జలె, బావోన్చి తేర్చి హేరోదియక ఆనన తిలన్, చి అన్నె కిచ్చొ కిచ్చొ గర్చ కమె ఒగ్గర్ కెర్లె తిలన్. జాచి రిసా యోహాను జోవయింక గోల కెర్లె తిలన్, చి రిసా

20 అన్నెక్ పాపుమ్ కి కెర్లన్. కిచ్చొ మెలె, యోహానుక జేలి కెర జేల్తె గలిలన్.

యేసు బాప్తిసుమ్ నజన్లసి

21 జా నే జతె అగ్గె, జలె, ప్రెజల్ ఎత్తిజిన్ బాప్తిసుమ్ నజన్తికయ్, యేసు కి బాప్తిసుమ్ నజన ప్రార్దన కెర్లె తతికయ్, పరలోకుమ్ ఉగ్గి జలి.

22 దేముడుచి సుద్ది తిలి ఆత్మ పార్వ పిట్టచి రితి ఉత్తజా, జోచి ఉప్పిరి టీచిలి, చి “తుయి అంచొ ప్రేమ తిలో పుత్తు. తుచి రిసా అంక సర్దనంతోనుమ్” మెన, పరలోకుమ్ తెంతో అవాడ్ అయ్లి.

యేసుచి వంసుమ్ వర్చ తెన్ రెగిడ్లసి

23 యేసు సేవ మొదొల్ కెర్లి పొది, జోచి వయసు పాసి పాసి ముప్పయ్ వెర్సుల్ జా తిలి. †యేసుక యోసేపుచొ పుత్తుసి మెంతె తిల.

యోసేపు హేలీచొ పుత్తుసి,

24 హేలీ మత్తతుచొ పుత్తుసి,

మత్తతీయ లేవీచొ పుత్తుసి, లేవీ మెల్కీచొ పుత్తుసి, మెల్కీ యన్నుచొ పుత్తుసి, యన్ను యోసేపుచొ పుత్తుసి,

25 యోసేపు మత్తతీయచొ పుత్తుసి, మత్తతీయ ఆమోసుచొ పుత్తుసి, ఆమోను నాహాముచొ పుత్తుసి, నాహాము ఎస్లిచొ పుత్తుసి, ఎస్లి నగ్గయిచొ పుత్తుసి,

26 నగ్గయి మయతుచొ పుత్తుసి, మయతు మత్తతీయచొ పుత్తుసి,

మత్తతీయ సిమియచొ పుత్తుసి, సిమియ యోశేకుచొ పుత్తుసి,

యోశేకు యోదాచొ పుత్తుసి,

27 యోదా యోహాన్నుచొ పుత్తుసి,

యోహాన్ను రేసాచొ పుత్తుసి, రేసా జెరుబ్బాబెలుచొ పుత్తుసి, జెరుబ్బాబెలు సయల్తీయెలుచొ పుత్తుసి, సయల్తీయెలు

నేరిచొ

పుత్తుసి,

28 నేరి మెల్కీచొ పుత్తుసి, మెల్కీ అద్దిచొ పుత్తుసి,

అద్ది కోసాముచొ పుత్తుసి, కోసాము ఎల్మదాముచొ పుత్తుసి, ఎల్మదాము ఏరుచొ పుత్తుసి,

29 ఏరు యెహోసువచొ పుత్తుసి,

యెహోసువ ఎలీయెజెరుచొ పుత్తుసి, ఎలీయెజెరు

యోరీముచొ

పుత్తుసి, యోరీము మత్తతుచొ పుత్తుసి, మత్తతు లేవీచొ పుత్తుసి,

30 లేవీ సిమోయానుచొ పుత్తుసి, సిమోయాను యూదాచొ పుత్తుసి,

యూదా యోసేపుచొ పుత్తుసి, యోసేపు యోనాముచొ పుత్తుసి,

యోనాము ఎల్యాకీముచొ పుత్తుసి,

31 ఎల్యాకీము మెలెయాచొ

పుత్తుసి, మెలెయా మెన్నుచొ పుత్తుసి, మెన్ను మత్తతాచొ పుత్తుసి,

మత్తతా నాతానుచొ పుత్తుసి, నాతాను దావీదుచొ పుత్తుసి,

32 దావీదు యెస్సయిచొ పుత్తుసి, యెస్సయి ఓబేదుచొ పుత్తుసి, ఓబేదు బోయజుచొ పుత్తుసి, బోయజు సల్మానుచొ పుత్తుసి, సల్మాను నయస్సోనుచొ పుత్తుసి,

† 3:16 3:16 బారికుల్ 2:3-4 దెక. అన్నె అన్నె కిచ్చొ అర్దుమ్ తయెదె మెలె, ఆగిక బజార్ గర్ల సుబ్రుమ్ కెరుక జయెదె, నెంజలె, ఆగితె అర్పితుమ్ దెతిసి సుబ్రుమ్ జయెదె. దస్సి, ఆగిచి బాప్తిసుమ్ మాస్సుచి ఆత్మక ఎత్తి అదికారుమ్ తిలో దేముడు సుబ్రుమ్ కెర్లన్క టాలి గుర్తు జయెదె. † 3:23 3:23 గని ఎత్తి అదికారుమ్ తిలో దేముడుచి పరలోకుమ్చి సుద్ది ఆత్మకయ్ మరియ యేసుక అంగి జా తిలి, గెద.; 1:26-38.

33 నయస్సోను
 అమ్మినాదాబుచో పుత్తుసి, అమ్మినాదాబు అరాముచో
 పుత్తుసి,
 †అరాము ఎస్రోనుచో పుత్తుసి,
 ఎస్రోము పెరెనుచో పుత్తుసి, పెరెను యూదాచో పుత్తుసి,
 34 యూదా యాకోబుచో పుత్తుసి, యాకోబు ఇస్సాకుచో
 పుత్తుసి,
 ఇస్సాకు అబ్రాహామ్చో పుత్తుసి, అబ్రాహామ్ తెరహుచో
 పుత్తుసి,
 తెరహు నాహోరుచో పుత్తుసి,
 35 నాహోరు సెరూగుచో పుత్తుసి,
 సెరూగు రయూచో పుత్తుసి, రయూ పెలెగుచో పుత్తుసి,
 పెలెగు హెబెరు పుత్తుసి, హెబెరు షేలహు పుత్తుసి,
 36 షేలహు
 కేయినానుచో పుత్తుసి, కేయినాను అర్పక్షదుచో పుత్తుసి,
 అర్పక్షదు సేముచో పుత్తుసి, సేము నోవహుచో పుత్తుసి,
 నోవహు లెమెకుచో పుత్తుసి,
 37 లెమెకు మెతూసెలచో పుత్తుసి,
 మెతూసెల హనోకుచో పుత్తుసి, హనోకు యెరెదుచో పుత్తుసి,
 యెరెదు మహాలలేలుచో పుత్తుసి, మహాలలేలు
 కేయినానుచో
 పుత్తుసి,
 38 కేయినాను ఎనోషుచో పుత్తుసి,
 ఎనోషు సేతుచో పుత్తుసి, సేతు ఆదాముచో పుత్తుసి,
 ఆదాము దేముడుచో *పుత్తుసి.

4

సయ్తాన్ యేసుక పరిచ్చ కెర్లిసి
 (మత్త 4:1-11; మార్కు 1:12-13)

1 దేముడుచి నుద్ది తిలి ఆత్మ యేసుచి పెట్టి బెర తా,
 జో యోర్దాను గాడు పక్క ముల దా, జా ఆత్మ జోక వెలవ
 నెతికయ్, ఒత్తల్తోచి బయిలు దేసిమి గెచ్చు, ఒత్త బుల్లె
 తిలన్.
 2 జా డొంగుర్ దేసిమి దొన్ని విస్సా దీసల్ తిలన్క
 సయ్తాన్ జోక పాపుమ్ కెరవుక మెన ఉచర, జా దొన్ని విసా
 దీసల్ అల్లర్ కెర్తె తిలన్. జేవ్ దొన్ని విసా పొదుల్ గెతికయ్,
 యేసుక చూ కెర్లి.
 3 తెదొడి సయ్తాన్ యేసుతె జా కెర జోక, “తుయి
 దేముడుచో పుత్తుసి జలె, ఈంజొ పత్తురు పొడియొ జతి
 రితి సంగు” మెలన్.
 4 యేసు జోక ఇసి సంగిలన్,
 “*మాములుమ్ పొడిచి సెక్తి తెన్ మాన్సుల్ జితి నాయ్.
 †‡దేముడుచి కొడతె రెగ్గ అస్సె.”

మెలన్.
 5 తెదొడి సయ్తాన్ యేసుక ఒగ్గర్ డొకుతె కడ నా కెర,
 ఎక్కి నిమ్ముమ్కయ్ జోక ఒండి లోకుమ్చ రాజిమ్లు దెకవ
 కెర,
 6 “ఈంజ ఎత్కిచి ఉప్పిరి ఏలుప కెర్తి అదికారుమ్,
 ఈంజేవ్ రాజిమ్లు ఎత్కితె తిలిన్చి గవురుమ్ తుక
 దెయిందె. ఈంజ ఎత్కి అంచి అత్తి అస్సె, కక్క దెయిందె గే
 అంచి ఇస్టుమ్.
 7 జాక, తుయి అంక జొకర్లెగిన, తుకయ్ దెయిందె” మెన
 సయ్తాన్ సంగిలన్.
 8 దస్సి సంగితికయ్, యేసు ఇసి మెన జబాబ్ దిలన్,
 “ప్రబు జలొ తుమ్చో దేముడుకయ్ తుమ్ జొకర. జో
 ఎక్కిలోచి సేవ తుమ్ కెరుక అస్సె.
 మెన †దేముడుచి కొడతె రెగ్గ అస్సె.”
 9 తెదొడి సయ్తాన్ యేసుక యెరూసలేమ్ పట్టుమ్తె
 కడ నా కెర, దేముడుచి గుడిచి వెస్సొపుచి ఉప్పిరి జోక టీవడ
 కెర, ఇసి మెలన్,
 “తుయి దేముడుచో పుత్తుసి జలె, ఎట్టొతో డేవు.
 10 కిచ్చొక మెలె,
 తుయి ప్రమాదుమ్ నే జతి రితి
 జోచ దూతల్క దేముడు ఆడ్ర దా తెద్రయెదె
 11 తుచ చట్టొ పత్రె నే లయితి రితి జేవ్ దూతల్
 జోవయించ అత్తో చంపొ కెర తుక ఉక్కులనుల,
 మెన *దేముడుచి కొడతె రెగ్గ అస్సె” మెన సయ్తాన్
 సంగిలన్.
 12 యేసు జోక,
 “ప్రబు జలొ తుమ్చో దేముడుక పరిచ్చ కెరుక నాయ్
 మెన †దేముడుచి కొడతె సంగ అస్సె” మెన యేసు జబాబ్
 దిలన్.
 13 జలె, సయ్తాన్ జేవ్ అల్లర్ కెర్త, పరిచ్చ కెర్త కొడ సంగ
 కేడవ కెర, ‘అన్నె కెయెడ గే అవ్కాసుమ్ అయ్లె, అన్నె
 దస్సి అల్లర్ కెరిందె’ మెనయ్ ఉచర, ఉట్ట గెలన్.
 యేసు తొల్లితో గలిలయతె బోదన కెర్లిసి
 (మత్త 4:12-17; మార్కు 1:14-15)
 14 జలె, అబ్బొన్చి జోచి దేముడుచి నుద్ది తిలి ఆత్మ
 వెలవ నెతికయ్ యేసు జో వడ్డిలి గలిలయ ప్రాంతుమ్తె
 అన్నె గెలన్, చి జా ప్రాంతుమ్ ఎత్కితెచ సుట్టునంతచ
 గవ్విలె జోచి రిసా ఎత్కిజిన్ నూన్.
 15 అన్నె, జా ప్రాంతుమ్చ యూదుల్చ సబ గెరల్ ఎత్కితె
 బోదన కెర్తె తిలన్, చి ఎత్కిజిన్ జోచి గవురుమ్ సంగితె తిల.

§ 3:33 3:33 నెంజిలె, అరాముచి కోడు సగుమ్ పుస్తకల్తె తయె నాయ్. * 3:38 3:38 మెలె, మాన్సుల్ ఎత్కితె జోకయ్ దేముడు తొలితో జెర్వయ్లన్.
 * 4:4 4:4 మత్తయి 4:4 దెక. † 4:4 4:4 ఎత్కి అదికారుమ్ తిలొ దేముడుచి కోడు రితి ఇండితిసి. ‡ 4:4 4:4 ద్విత్వియాపదేశ కాండుమ్ 8:3. § 4:8
 4:8 ద్విత్వియాపదేశ కాండుమ్ 6:13. * 4:11 4:11 కిర్తనలు 91:11, 12. † 4:12 4:12 ద్విత్వియాపదేశ కాండుమ్ 6:16.

16 జో బాల తతె తెంతో వడ్డిలి ఒత్తచి నజరేతు గవ్వి యేసు అయ్లన్, అన్నె, †సెలవ్ కడన్లి దీసి యూదుల్చి సబ గెరలె గెలన్. రోజుక సెలవ్ కడ దీసి దస్సి సబగేరి గెచ్చుక జోక అలవాట్. జలె, జయ్యి దీసి ఒత్తచి సబగేరి గెచ్చు కెర, దేముడుచి కొడొ సదు కెరుక మెన టీవెలన్.

17 జలె, దేముడుచ కబుర్లు సంగిలో యెసయా పుస్తకుమ్తెచి కొడొ సదు కెర్పు మెన జోచి అత్తి దిల, చి జా ఉగ్గ కెర, సదు కెర సూనయ్లన్.

18 “దేముడుచి సుద్ది తిలి ఆత్మ అంచి పెట్టి అస్సె. బీద సుదల్క సుబుమ్ కబుర్ ఆవ్ సూనయ్తి రిసా జో జోవయించి ఆత్మసెక్తి అంచి బోడి సువ దా

అదికారుమ్ దా అస్సె.
జేలి జలన విడ్డల్ జతిసి
ఆవ్ సాట్పు కెర్తి రితి, పడ్డొ
గుడ్డి జలన అన్నె దెకితినచి రిసా
ఆవ్ సాట్పు కెర్తి రితి,
అన్నె మాన్పుల్ నిస్కారుమ్ కెర్త మాన్పుల్చ బాదల్
ఆవ్ పిట్టవ దన బాదల్ తెంతో విడ్డల్ కెర్తి రిసా,

19 ‘ఎత్తి అదికారుమ్ తిలో దేముడు ప్రబు జోచి దయ మాన్పుల్క దెకయెదె’ మెన ఆవ్ సాట్పు కెర్తి రిసాయి జో అంక తెద్రవ అస్సె” మెన దేముడుచ కబుర్లు సంగిలో యెసయాచి అత్తి రెగిడ్డి కొడు యేసు సదు కెర సూనవ కెర,

20 జా పుస్తకుమ్ డంప కెర, జా సబగేర్చో సేవ కెర్తొన్క అన్నె దా కెర, అన్నె వెసిలన్. జా సబగేరి తిలన ఎత్కిజిన్ జోక చెంగిల్ దెకితె తిల.

21 తెదొడి జోవయింక, “దేముడుచి కొడొతెచ ఆవ్ అప్పె తుమ్క సూనయ్ల కొడొ ఆజి ఎత్కి జర్గు జంక దెర అస్తి” మెన సంగిలన్.

22 తెదొడి, “చెంగిలో మాన్పు, ఈంజొ సంగిల కొడొ నిజుమి సత్తిమ్చ” మెన జేవ్ ఆచారిమ్ సంగ తా, “గని ఈంజొ యోసేపుచొ పుత్తుసి, నెంజె గె?” మెన అన్నె ఇదిల్ అన్మానుమ్ జా సంగిల.

23 జలె, యేసు జోవయించి బుద్ది జాన కెర, జోవయింక అన్నె, “డాక్టర్, తుకయ్ తూయి చెంగిల్ కెరను” మెంతె అంక, అన్నె § “కపెర్నహూమ్ పట్టుమ్తె ఇన దన వెల్లెల

కమె కెర్లన్ మెన తుచి రిసా సూన అస్సుమ్. ఇన్నె కి తుచి సొంత దేసిమి దన కమె కెరు మెన అంక సంగితె, కిచ్చొగె?”

24 అన్నె, “తుమ్క ఆవ్ కిచ్చొ కచితుమ్ సంగితసి మెలె, దేముడుచ కబుర్లు సంగితో కేన్ మాన్పుక కి జోచి సొంత దేసిమ్చ మాన్పుల్ ఇస్టుమ్ జతి నాయ్” మెలన్.

25 గని తుమ్క ఆవ్ కిచ్చొ మెంతసి మెలె, ఏలీయా పూర్గుమ్చొ తిలి పొది, తిన్ని వెర్పుల్ నర పూర్తి కిచ్చొ పాని పెటె నాయ్. చి ఒండి దేసిమి ఒగ్గర్ కరు జా గెలి. జలె, అమ్చ ఇస్రాయేలుల్ అమ్ యూదుల్ మొత్తుమ్తె జా పొది ఒగ్గర్జిన్ రండెలివొ తిల.

26 గని జేవ్ మొత్తుమ్జిన్తె ఎక్లితె కి దేముడు ఏలీయాక తోడు తెద్రయె నాయ్. సీదోసు ప్రాంతుమ్చి సారెపతు గవ్విచి *రండెలి ఎక్లితె జోక తోడు తెద్రయ్లో.

27 పడ్డొ, దేముడుచ కబుర్లు సంగిలో ఎలీషాచి కాలుమ్ అమ్చ †ఇస్రాయేలుల్తె వెల్లి రోగుమ్ దెర్ల మాన్పుల్ ఒగ్గర్జిన్ తిల. జలె, జోవయింతె కో కి చెంగిల్ జతి నాయ్. గని సిరియ దేసిమ్చొ అమ్చొ యూదుడు నెంజిలో ‡నయమానుయి చెంగిల్ జలో; యేసు సంగిలన్.

28 జలె, యూదుల్క నాయ్, గని వేర దేసిమ్చక దేముడు చెంగిల్ కెరయ్లిన్చి రిసా యేసు సంగిలిసి సూన కెర, జా సబ గెరితె తిల యూదుల్ ఎత్కిజిన్క ఒగ్గర్ కోపుమ్ అయ్లి.

29 జేవ్ ఉట్ట జా, యేసుక పట్టుమ్ తెంతో ఉదడ కెర, జోవయించి పట్టుమ్ టీవెలి మెట్టచి కొసా ఎద ఉదడ్డ; ‘ఒత్త తెంతో గలి జవున్’ మెన సేడయ్తి రిసా,

30 గని యేసు ప్రమాదుమ్ నే జతె జోవయించి నెడిమి తెంతో బార్ జా జో గెచ్చుక ఉచర్లి వాట్క గెలన్.

కపెర్నహూమ్ పట్టుమ్చి సబగేరిత యేసు (మార్కు 1:21-28)

31 తెదొడి జా గలిలయ ప్రాంతుమ్చి కపెర్నహూమ్ పట్టుమ్తె యేసు ఉట్ట గెచ్చు, సెలవ్ కడన్లి దీసి మెన, సబగేరి గెచ్చు జా పట్టుమ్చ యూదుల్క బోదన కెర్లన్.

32 దేముడు దిలి అదికారుమ్ కొల్లి బోదన కెర్తె తతికయ్, జనాబ్ ఆచారిమ్ జల.

33 జలె, జేవ్ తిలి సబ గెరి బూతుమ్ దెర్లొ ఎక్కిలో తిలో. జో జలె, గట్టిజ అవాడ్ కెరన కిచ్చొ మెన కేక్ గలన్ మెలె,

34 “ఓ సబరేతు గవ్విచొ యేసుప్రబు, అమ్చి తెన్ తుక కిచ్చొ? అమ్క పాడ్ కెరుక జా అస్సిన్ గె? తుయి కొన్సొ

‡ 4:16 4:16 యూదుల్చి అలవాట్ తెన్, సత్తరెక్క సత్తు దీసల్ కిచ్చొ కామ్ నే కెర్తె దేముడుక జోకర్తి దీన్. సెలవ్ కడన్లి దీసి-తెలుగు. ఎత్కి సెస్వర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ సబ గెరలె గెచ్చు, దేముడుచి కొడొ సూన కెర, ఎత్కి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్కి అదికారుమ్ తిలో దేముడు సంగిలిన్క యూదుల్చ వెల్లెల మాన్పుల్ ప్రజల్క జాడు వయడ్డి రితి కెర కామ్ నే కెర్తెన్చి రిసా ఒగ్గర్ ఆగ్గల్ అచ్చి ఉచర అస్తి. ఇన్నె, దొన్ని ఎన్నులు కోడ్డిన్క ‘కామ్’ మెన నింద కెర్తెతి. § 4:23 4:23 కపెర్నహూమ్ పట్టుమ్ కి జోవయించి దేసిమ్చి పట్టుమ్, దస్సి లట్టబ్తతి. * 4:26 4:26 జా రండెల్ మాన్పుక కతిసి నెంజితికయ్, ఏలీయా ప్రార్దన కెర్తె, చి సరిపుచువ జతిసి ఒత్త తెంతో జేక దొర్పు జతె తిలి, చి పుత్తుసి మొర్తికయ్, ఏలీయా ప్రార్దన కెర్తికయ్, జలన్. 1 రాసల్ పుస్తకుమ్ 17 అద్యయిమ్. † 4:27 4:27 మెలె ‘యూదుల్తె’.

‡ 4:27 4:27 రాసల్ దొన్నిచి పుస్తకుమ్ 5 అద్యయిమ్. § 4:34 4:34 దేముడు తెద్రయ్లో క్రిస్తు, రచ్చించువ కెర్తెసా

గే ఆవ్ జాని. తుయి దేముడుచి కీసుద్ది తిలోసా తుయి, అమ్క ములు” మెన కేక్ గల సంగిలో.

35 యేసు, జలె, “తుళ్లె తా ఇన్నెక ముల దా గో!” మెన జో మాన్సుక దెర్లి బూతుమ్క గోల కెర్లన్. గోల కెర్లికయ్, ఎత్కిజినచి నెడిమి బూతుమ్ జో మాన్సుక సేడవ దా, జోక ప్రమాదుమ్ నే కెర్తె జోతె తెంతో బార్ జలన్.

36 జర్లు జలిసి ఎత్కిజిన్ దెక ఎక్కిలోక ఎక్కిలో, “ఇన్నెచి కోడు కిచ్చో అదికారుమ్చి? బూతల్క గో! మెన ఆడ్ర దెతయ్, చి జేవ్ బార్ జా గెతతి” మెన ఆచారిమ్ జా సంగిల.

37 జా దీసి తెంతో ఒండి ప్రాంతుమ్తె జో కెర్ల కమొచి రిసా జాన్ల.

పేతురుచి అత్తన్క యేసు చెంగిల్ కెర్లిసి (మత్త 8:14-17; మార్కు 1:29-34)

38 జలె, యేసు ఉట్ట సబ గెరి తెంతో బార్ జా సీమోనుచి గెరి గెలన్. జలె, సీమోనుచి అత్తన్క జొర్లొ తా ఆగ్ ఒగ్గర్ తాత్ తతికయ్, జాక “చెంగిల్ కెరు” మెన జేవ్ బతిమాల్ప జా సంగిల, చి

39 యేసు జాచి పాసి టీవ జొర్లొక గోల కెర్లికయ్, జొర్లొ చట్టున గెలి, చి బేగి జా ఉట్ట కెర, జేవ్క సవైచన కెర్లి.

40 జా సజె పొద్దు గెతె తతికయ్, కచ మాన్సుల్క కిచ్చో కిచ్చో జొర్లొల్ తిల గే, యేసుతె జోవయింక కడ ఆన్ల, చి జోవయింతె ఎత్కి మాన్సుక చడ, చెంగిల్ కెర్లన్.

41 అన్నె, ఒగ్గర్జిన్ మాన్సుల్ తెంతో బూతల్ బార్ జా, “తుయి, దేముడుచొ పుత్తుసి.” మెన కేక్ గల. గని జేవ్ బూతల్క యేసు గోల కెర్లన్, అన్నె జేవ్ లట్టబుక సెలవ్ దెయె నాయ్. కిచ్చొక మెలె, జోక *‘క్రీస్తుయి’ మెన జేవ్ జాన్సి రిసా.

యేసు కపెర్నహూమ్ పట్టుమ్ ములిలిసి (మార్కు 1:35-39)

42 రాత్ పాయితికయ్, యేసు బార్ జా కోయి నెంజిలి టాన్తె గెలన్, గని వైజల్ జోక చజన జోతె అయ్ల, చి “అమ్క ముల దా గో నాయ్” మెన జో ఉట్ట గెచ్చుక అడ్డు కెర్క దెకిల.

43 జో జోవయింక, “దేముడుచి †రాజిమ్చి రిసాచి ‡నుబుమ్ కబుర్ ఆవ్ అన్నె తిల పట్నాల్తె కి నూనపుక

అన్నె. ఈంజయ్ కామ్కయ్ దేముడు అంక తెద్రవ అన్నె.” మెన జబాబ్ దిలన్.

44 జలె, కీయాదయ దేసిమ్చ సబ గెరలె బుల బుల యేసు బోదన కెర్తె తిలన్.

5

యేసు ప్రైజల్క బోదన కెర్లిసి (మత్త 4:18-22; మార్కు 1:16-20)

1 జలె ఏక్ దీసి కిచ్చో జలి మెలె, యేసు *గెన్నెసరెతు మెంతి గాడు పాసి టీవ తతికయ్, దేముడు దిలి †కోడు నూనుక జోవయింక ఇష్టుమ్ అయ్లి రిసా, ప్రైజల్ బెర జా జోచి ఉప్పిరి డంకి జల.

2 జలె, గాడు సాడి దొన్ని దోనివొ తిలిసి యేసు దెకిలన్. జలల్లు జోవయించ జేవ్ దోనివొ తెంతో ఉత్తజాతె జోవయించ వలల్ దోవితె తిల.

3 జేవ్ దోనివొతె ఏక్ సీమోను మెలోసాచి, జో సీమోనుచి దోనితె యేసు వెగ కెర, జోక “ఒడ్డు తెంతో దోని ఇదిల్ పెలవ దేను” మెన సంగిలన్, చి పెలవ దెతికయ్, యేసు వెన కెర, దోని తెంతో ప్రైజల్క బోదన కెరుక మొదొల్ కెర్లన్.

సీమోనీని ఒగ్గర్ మొన్న దెర్లి రితి యేసు కెర్లి వెల్లి కామ్

4 యేసు బోదన కెర కేడయ్లి పడ్డొ, “దీగు తిలిన్తె తుమ్చ వలల్ గల చి మొన్న దెర్తె” మెన సీమోనుక సంగిలన్.

5 దన్నీ సంగితికయ్, “గురుబాబు, ఒండి సరారాతి వలల్ గల తిలమ్, గని కిచ్చో దెరుమ్ నాయ్. గని తుయి సంగిలె, అమ్చ వలల్ గలుమ్దె” మెన సంగ

6 గలిల, చి ఒగ్గర్ మొన్న వలతె సెడ్డికయ్, వలల్ కుట్టితె రితి జల.

7 అన్నెక్ దోనితె తిల జోవయించ గోతుసుదల్క “తుమ్ తోడు జా” మెన నయన కెర్ల. జేవ్ తోడు అయ్ల, చి జేవ్ దొన్ని దోనివొ బెర్తు బెరయ్ల, చి దోనివొ బుడ్డుక దెర్ల.

8 జర్లు జలిసి జో సీమోను పేతురు దెక కెర, యేసుచి చట్టె సెర్లు సేడ, “ప్రబువ, అంక ముల దా ఉట్ట గో, ఆవ్ పాపుమ్ సుదొ” మెన సంగిలన్.

9 కిచ్చొక మెలె, జేవ్ దెర్ల మొన్నచి కొట్టె ఎదివాట్ మెన దెక కెర, జో కి, జో తెన్ తిలస ఎత్కిజిన్ కి ఒగ్గర్ ఆచారిమ్ జల.

* 4:41 4:41 ‘క్రీస్తు’ మెలె, ‘దొర్లు జలొ రచ్చించుప కెర్లొసాక తెద్రయిందె’ మెన ఎత్కి అదికారుమ్ తిలో దేముడు పూర్ణమ్ తెంతో సంగ తిలోసా. † 4:43 4:43 ‘ఎత్కి అదికారుమ్ తిలో దేముడుచి రాజిమ్’ మెలె, ‘పరలోకుమ్’ ఏక్ అర్దుమ్, గని అన్నె కిచ్చొ మెలె, జో పరలోకుమ్ తెంతో ఏలుప కెర్లిసి. జో ఏలుప కెర్లిసి మెలె, ఉగుమ్ మార్పుప జలెకయ్ ఎదార్దుమ్ ఈంజ లోకుమ్తె ఏలుప కెరెదె, గని మదెనె కి 1. జోక నంపజల మాన్సుల్చి పెట్టి ఏలుప కెర్లయ్, చి 2. జోచి నెక్తి ఈంజ లోకుమ్తె కామ్ కెర్లయ్. ‡ 4:43 4:43 ఎత్కి అదికారుమ్ తిలో దేముడుచి రాజిమ్చి రిసాచి మెలె, జోచి రాజిమ్ పావ జా అయ్లిన్చి కబుర్, మత్తయి 12:28, మార్కు 1:15, వడ్డొ జో పావల్ చెమించుప కెర్లిన్చి కబుర్, యేసుయి దొర్లు జలొ రచ్చించుప కెర్లొసా జలిన్చి కబుర్, వడ్డొ పరలోకుమ్తె గెతి అవ్కానుమ్ జో దొర్లు కెర్లొ రచ్చనచి రిసాచి కబుర్. § 4:44 4:44 ఇన్నె ‘యాదయ దేసిమ్’ మెలె, యూదుల్చి ఒండి దేసిమ్. మెలె యూదయ ప్రదేసిమ్ కి, సమరయ ప్రదేసిమ్ కి, గలిలయ ప్రాంతుమ్ కి మొత్తుమ్ బెదయ్లిసి. జా మొత్తుమ్ బెదయ్లిన్కయ్ ‘యాదయ దేసిమ్’ మెన ఇన్నె సంగితయ్ మెన సగుమ్జిన్ ఉచర్తతి. మత్తయి 4:23-25 దెక, చి మార్కు 1:39, 3:7-10 * 5:1 5:1 ఈంజ గాడుక మత్తయి చి మార్కు రెగిడ్డిన్తె ‘గలిలయ ప్రాంతుమ్చి గాడు’ మెంతతి. † 5:1 5:1 నెంజిలె ‘నుబుమ్ కబుర్’; మార్కు 1:14. నెంజిలె ‘యేసుచి బోదన’; మత్తయి 4:7.

10 దస్సి సీమోను మొస్సు దెర్ల జట్టుచ జెబెదయిచ పుత్తర్లు యాకోబు చి యోహాను కి, జో తేన్ ఆచారిమ్ జల. యేసు, జలె, “తుమ్ బియఁ నాయ్. అప్పె తెంతో, మాన్సుల్ అంక సంపజతి రితి జోవయింక కడ ఆన్త జాలర్లు తుమ్ జస్తె” మెన సీమోనుక సంగిలన్,

11 జలె, దోనివొ ఒడ్డుతె ఒగ్గొడ ఆన కెర, ఎత్తి ముల దా, యేసుచ సిస్సుల్ జంక జోచి పట్టి గెచ్చు, జో తేన్ బులుక దెర్ల.

వెల్లి రోగుమ్ తిలోసాక యేసు చెంగిల్ కెర్లిసి (మత్త 8:1-4; మార్కు 1:40-45)

12 యేసు ఏక్ గవ్వి తిలి పొది, వెల్లి రోగుమ్ బెర్తు తిలో ఎక్కిలో ఒత్త అయ్లో, అన్నె, యేసుక దెక సెర్ను సేడ, “ప్రబు, తుక ఇస్టుమ్ తిలె, †తుయి అంక చెంగిల్ కెర సుద్ది కెరుక తెర్ని” మెన బతిమాల్పా జా సంగిలన్.

13 దస్సి సంగితికయ్, యేసు ఆతు చంపా కెర జోక చడ, “తుయి చెంగిల్ జంక, అంక ఇస్టుమి. తుచి వెల్లి రోగుమ్ గెచ్చు సుద్ది జా” మెన సంగిలన్, చి బేగి జోచి వెల్లి రోగుమ్ గెల్లి.

14 యేసు జోక కిచ్చొ ఆడ్ర దిలన్ మెలె, “కక్క సంగు నాయ్, గని దేముడుచి గుడితె గెచ్చు, ఒత్త సేవ కెర్తొ పూజరితె గెచ్చు, తుచి ఆగ్ చెంగిల్ జలిసి జోక దెకవ, మోసే పూర్లుమ్ సంగిలి రితి, తుయి చెంగిల్ సుద్ది జలిసి ఎత్తిజిన్క రుజ్జు దెకయ్తి రితి, ఒత్త కానుక దేసు.”

15 “కక్క సంగు నాయ్” మెన జో మాన్సుక యేసు సంగ తిలె కి, అగ్గెచి కంట అప్పె అన్నె ఒగ్గొజిన్ యేసుచి రిసా కీసూన్ల, చి ఒగ్గొజిన్ “యేసుచి బోదన సూనుమ్దె” మెన, “అమ్చ జొర్జొల్ గెచ్చువెదె” మెన బెర జెతె తిల.

16 గని ఎక్కెక్ సుట్లు యేసు కో నెంజిలి టాన్తె గెచ్చు *ప్రార్దన కెరెదె.

ఉట్టుక నెత్తిర్లొ రోగిక చెంగిల్ కెర్లిసి (మత్త 9:1-8; మార్కు 2:1-12)

17 ఏక్ దీసి యేసు బోదన కెర్తె తతికయ్, పరిసయ్యుల్ చి మోసే తేన్ దేముడు దిలి ఆగ్గుల్ సికడ్తన పాసి వెన తిల. ఈంజేవ్ గలిలయ ప్రాంతుమ్చ చి యూదయ ప్రదేసిమ్చి గావ్వొ ఎత్తి తెంతో చి యెరూసలేమ్ పట్టుమ్ తెంతో జా తిల. అన్నె, మాన్సుల్చ జొర్జొల్ బాదల్ జో గెచ్చవుక మెన యేసు దేముడుచి సెక్తి తేన్ తిలో.

‡ 5:12 5:12 జా దేసిమి వెల్లి రోగిచి వెల్లి రోగుమ్ గెలె, సుద్ది జలన్ మెన తెదొడచ యూదుల్ సంగితె తిల. కిచ్చొక మెలె, ఏక్ మాన్సుక వెల్లి రోగుమ్ తిల, ‘జో గవ్వి తంక గారు’ మెలి రితి ‘జోచి జబ్బు డేచ అమ్కయ్ దెరెదె’ మెలి రితి బియ కెర, గవ్వి తెంతో ఉడడుల. దేముడుచి దయచి రిసా వెల్లి రోగుమ్ పూర్తి గెలె, ‘అన్నె సుద్ది జలొ’ మెన గవ్వి అన్నె పెనడుల. 17:14చి ఎట్టొచి కోడు కి దెక. § 5:15 5:15 జొయ్యి మాన్సు సూనయ్తె తిలో. మార్కు 1:45. * 5:16 5:16 దేముడు అబ్బొచి ఇస్టుమ్ సూనుక మెన, జోచి సెక్తిక అన్నె సెక్తి జంక మెన. † 5:24 5:24 ‘మాన్సు జా జెర్మున్ అయ్లోసా’ మెన బయ్బిల్తె రెగ్గ తిలె, జేవ్చి అర్దుమ్ కిచ్చొ మెలె, ఎత్తి అదికారుమ్ తిలో దేముడు తెద్రయ్లో క్రీస్తు రచ్చించువ కెర్తొసా. పూర్లుమ్ పొది క్రీస్తు రచ్చించువ కెర్తొసాక తెద్రవుక జో సంగ తిలో, చి నగుమ్తె జయి టాలిక జోవయింక ‘మాన్సు జా జెర్మున్ అయ్లోసా’ మెన పూర్లుమ్ తెంతో రెగ్గ అస్తి. దానియేలు 7:13 దెక. ‡ 5:27 5:27 మార్కుతె కి జోక ‘లేవీ’ మెన రెగ్గ అస్సి. జోచి అన్నెక్ నావ్ ‘మత్తయి’; మత్తయి 10:3.

18 జలె, కిచ్చొ జర్లు జలి మెలె, ఓదె, వాతుమ్ జొర్జొ తేన్ తిలోసా ఉట్టుక నెత్తిర్లొ మాన్సు ఎక్కిలోక అన్నె మాన్సుల్ అంతుర్నొ తేన్ వయ ఆన, యేసుతె ఆన కెర జోచి చట్టి తియ దెంక మెన వాట్ చజిల.

19 గని జనాబ్ ఒగ్గొజిన్ బెర తిలి రిసా యేసు తిలి గెరి పెసుక వాట్ నాయ్ మెన, ఒర్నె వెగ కెర, జో తిలి గదిచి ఉప్పిర్ ఒర్నెచి వెల్లి బొరో కెర, జా బొరో వాట్ ప్రెజల్చి నెడిమి యేసుచి పుర్తొక జో మాన్సుక అంతుర్నొ తేన్ ఉత్తవ దిల.

20 జలె, జేవ్ కడ ఆన్ల మాన్సుల్చి జో ఉట్టుక నెత్తిర్లొ మాన్సుచి నముకుమ్ యేసు దెక కెర, “నేస్తము, తుచి పాపల్ చెమించువ జా అస్తి” మెన జో ఉట్టుక నెత్తిర్లొ మాన్సుక సంగిలన్.

21 జో దస్సి సంగితికయ్, మోసే తేన్ దేముడు దిలి ఆగ్గుల్ సికడ్తన చి పరిసయ్యుల్ బమ్మ జా, “ఈంజొ మాన్సు కొన్సొ? ఇసి లట్టబ దేముడుచి విలువ కడ పాపుమ్ కెర్తయ్. దేముడుక పిట్టవ కో కి పాపల్ చెమించువ కెరుక నెత్తిర్లి!” మెన ఎక్కిలో తేన్ ఎక్కిలో లట్టబన్ల.

22 జలె, జేవ్ అన్మానుమ్ జా లట్టబంతె తిలిసి యేసు పూర్తి జాన కెర, జోవయింక కిచ్చొ జబాబ్ దిలన్ మెలె, “తుమ్చి పెట్టి కిచ్చొక దస్సి అన్మానుమ్ తియంతను?”

23 ‘తుచి పాపల్ చెమించువ జా అస్తి’ మెనుక సుల్లు గే, ‘ఉట్ట ఇండు’ మెనుక సుల్లు గే తుమ్ ఉచర.

24 జలె, †మాన్సు జా జెర్మున్ అయ్లయ్ అంక, ఈంజయి లోకుమ్తె కి పాపల్ చెమించువ కెర్తి అదికారుమ్ అస్సి మెన రుజ్జు దెకయిందె, మెన జేవ్క సంగ కెర, ఉట్టుక నెత్తిర్లొ జో మాన్సుక అన్నె దెక కెర, అల్లె, తుయి ఉట్ట, తుచి అంతుర్నొ వయన ఇండ గెరి గో మెన తుక ఆవ్ సంగితసి!” మెన యేసు సంగిలన్.

25 బేగి జో మాన్సు, జో ఎంగ్ల తిలిసి ఉక్కుల వయన, దేముడుచి గవురుమ్ సంగ, సంగ గెరి ఉట్ట గెలన్.

26 దస్సి జర్లు జతికయ్, ఒగ్గొ ఆచారిమ్ జేవ్ ఎత్తిజిన్క దెర్లి, చి “ఆజి బలే ఆచారిమ్చి కామ్ దెకిలమ్” మెన దేముడుక గవురుమ్ కెర్ల, చి జోచి నెక్తిచి ఉప్పిర్చి బయిమ్ జోవయించి పెట్టి బెర్లి.

లేవీ మెలోసాక యేసు బుకార్లిసి (మత్త 9:9-13; మార్కు 2:13-17)

§ 5:15 5:15 జొయ్యి మాన్సు సూనయ్తె తిలో. మార్కు 1:45. * 5:16 5:16 దేముడు అబ్బొచి ఇస్టుమ్ సూనుక మెన, జోచి సెక్తిక అన్నె సెక్తి జంక మెన. † 5:24 5:24 ‘మాన్సు జా జెర్మున్ అయ్లోసా’ మెన బయ్బిల్తె రెగ్గ తిలె, జేవ్చి అర్దుమ్ కిచ్చొ మెలె, ఎత్తి అదికారుమ్ తిలో దేముడు తెద్రయ్లో క్రీస్తు రచ్చించువ కెర్తొసా. పూర్లుమ్ పొది క్రీస్తు రచ్చించువ కెర్తొసాక తెద్రవుక జో సంగ తిలో, చి నగుమ్తె జయి టాలిక జోవయింక ‘మాన్సు జా జెర్మున్ అయ్లోసా’ మెన పూర్లుమ్ తెంతో రెగ్గ అస్తి. దానియేలు 7:13 దెక. ‡ 5:27 5:27 మార్కుతె కి జోక ‘లేవీ’ మెన రెగ్గ అస్సి. జోచి అన్నెక్ నావ్ ‘మత్తయి’; మత్తయి 10:3.

27 ఇన్నెచి పడ్డో, యేసు బార్ జా ఒత్త తెంతో గెచ్చు, సిస్తు నజీతి సుంకరో ఎక్కిలోక దెకిలో. జోచి నావ్ †లేవీ. జో సిస్తు నజీతి టాన్తె వెన తిలన్, చి “అంచి పట్టి జా అంచో సిస్తుడు తుయి జా” మెన యేసు జోక బుకార్లన్.

28 బుకార్లయ్, సుంకరో జలో జో లేవీ, ఉట్ట జోచి కామ్ ఎత్తి ముల దా, యేసుచి పట్టి ఉట్ట గెలన్.

29 లేవీ యేసుక గెరి కడ ఆన కెర, జోక వెల్లి విందు దిలన్. సిస్తు నజీతన చి వేర మాన్సుల్ ఒగ్గర్జిన్ జోవయింతెన్ అన్నిమ్ కంక వెసిల.

30 జలె, పరిసయ్యుల్ చి జోవయింతెన్ బెదిత మోసే తెన్ దేముడు దిలి ఆగ్గుల్ సికడ్తన జా దెక కెర, “కిసిస్తు నజీతన తెన్ *పాపుమ్ కెర్ల సుదల్ తెన్ తుమ్ కిచ్చొక వెన అన్నిమ్ కత్తసు?” మెన యేసుచ సిస్సుల్క గోల కెర్ల.

31 దస్సి జతికయ్, యేసు జేవేక కిచ్చొ సంగిలన్ మెలె, “జబ్బు తెన్ అస్సుమ్ మెన చినన్లన డాక్టర్ అవ్సురుమ్, గని జబ్బు నెంజిలనక డాక్టర్ అవ్సురుమ్ నాయ్.

32 జలె, ‘పాపుమ్ కెర్లొసా అమ్’ మెన చినంతనక ‘జోవయించి పాపుమ్చి రిసా దుకుమ్ జా ముల దెతు’, మెన జోవయింకయ్ బుకారుక మెన అయ్లయ్ గని ‘పాపుమ్ కెర్లొసా నెంజుమ్, అమ్క పున్నిమ్’ మెన ఉచరంతనక బుకారుక నాయ్” మెన జోవయింక యేసు సంగిలన్.

చువ్వె తతిన్చి రిసా యేసుక పుసిలిసి (మత్త 9:14-17; మార్కు 2:18-22)

33 జలె, సగుమ్జిన్ మాన్సుల్ యేసుక, “యోహానుచ సిస్సుల్ చువ్వె తా ప్రార్లన కెరుక అలవాట్. పరిసయ్యుల్చ సిస్సుల్ కి దస్సి కెరుల, గని తుచయ్ సిస్సుల్ కంక పింక జతతి” మెన అన్మానుమ్ తెన్ పుసిల.

34 యేసు జోవయింక ఇని సంగిలన్. “కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి విందుక బుకార్లన చువ్వె తతి రితి కెరుక జయెదె గె?

35 జలె, పెండ్లిఉబేడోచి పచ్చెన జలసచి నెడిమి తెంతో జోక †దెర వేరతె కడ నిలె, జేవ్ దీనల్క జోచ మాన్సుల్ ఏడ ఏడ చువ్వె తవుల” మెలన్.

36 యేసు జోవయింక అన్నెక్ టాలి కి సంగిలన్. కిచ్చొ మెలె, “నోవి పాలుమ్ తెంతో గండ చిర పొర్ని పాలుమ్తె

మాసిక గల్లి నాయ్. దస్సి కెర్లె, జా నోవి పాలుమ్ చిరి జా తయెదె, చి జా గండ పొర్ని పాలుమ్ తెన్ బెదె నాయ్.

37 పడ్డో జలె, ఒత్త నోవి ద్రాచ రస్సుమ్ పొర్నిచి కాయ తెన్ కో సువితీ నాయ్. కిచ్చొక మెలె, జా కాయ పొర్ని జలి రిసా దస్సితె నోవి ద్రాచ రస్సుమ్ సువితెగిన, జా కాయ పులుక నెత్తెచి రిసా జా రస్సుమ్ పొంగుప జలె పొది జా కాయ పుట్టెదె. పుట్టిలె, జా రస్సుమ్ నూయి జయెదె, చి కాయ కి పాడ్ జా గెచ్చెదె.

38 నోవి ద్రాచ రస్సుమ్ నోవి కాయల్తె సువుక అస్సి.

39 అన్నె, తొలితొ పొర్ని ద్రాచ రస్సుమ్ పియ తిలె, నోవి ద్రాచ రస్సుమ్క కోరప జతి నాయ్. కిచ్చొక మెలె, ‘నోవిచి కంట పొర్నిచి చెంగిలి’ మెనుల” మెన యేసు టాలి సంగ బోదన కెర్లన్.

6

విస్తాంతి దీసి సిస్సుల్ కెర్లొచి రిసా పండితుల్ గోల కెర్లొసి (మత్త 12:1-8; మార్కు 2:23-28)

1 ఏక్ సెలవ్ కడన్లి దీసి, *యేసు జోచ సిస్సుల్ తెన్ పంటో పికిలి బుయి వాట్ గెతె తా, వాట్ సొడి తిల ఎన్నులు దొన్ని జోవయించ సిస్సుల్ కోడ అత్తో తెన్ రెగ్గ చొప్ప జేడవ కతె తిల.

2 జలె, పరిసయ్యుల్ సగుమ్జిన్ పాసి తా యేసుచ సిస్సుల్ కెర్లొసి దెక కెర, “జేవ్ దస్సి కెర్లొసి ‘కామ్ కెర్లి రితి జతయ్’ మెన, ఈందె, సెలవ్ కడన్లి దీసి కెరుక నాయిమ్ నెంజిలిసి తుమ్ కిచ్చొక కెర్లొసు?” మెన జోవయింక గోల కెర్ల.

3 జలె యేసు జేవేక కిచ్చొ జబాబ్ దిలన్ మెలె, “పూర్లుమ్ తిలొ దావీదు రానొ, జోక, చి జో తెన్ తిలనక కి చూ కెర్లికయ్, జాచి రిసా కిచ్చొ కెర్ల గే, కెయ తుమ్ సదు కెర్పు నాయ్ గే?

4 కిచ్చొ కెర్లొసి మెలె, దావీదు దేముడుచి గుడితె పెన కెర, ఒత్త తిల పూజర్లు దేముడుక అర్పితుమ్ దిల పోడియె వెంటన, జేవ్ పోడియె పూజర్లుయి కంక జయెదె గని అన్నె కో కంక జయె నాయ్ మెన జాన్లె కి, జేవ్ పోడియె వంట దా, దావీదు కి జో తెన్ తిలన కి నాయిమ్ నెంతె కి కయ్ల.” మెలన్.

§ 5:30 5:30 సిస్తు నజీతనక, అన్నె యూదుల్ నిస్కారుమ్ దెకితె తిల. కిచ్చొక మెలె, జోవయింక ఆకమించుప కెర్లి రోమ్ దేసిమ్చి ప్రబుతుమ్చి సేవ కెర్లె తిల, పడ్డో సిస్తుచి డబ్బుల్ నజీతి పొది, నాయిమ్చి కంట అన్నె నజీతి తిల. తెదోడెచ యూదుల్ ‘అమ్క నీతి, చి వేర జాతివొక నాయ్’ మెనుల. రోమ్ దేసిమ్చ మాన్సుల్ యూదుల్ నెంజితి, చి సిస్తు నజీత సుంకర్లు యూదుల్ నెంజిలనచి సేవ కెర్లె తిల. జాకయ్ యూదుల్ జోవయింక నిస్కారుమ్ దెకితె తిల. * 5:30 5:30 ‘పాపుమ్ సుదల్’ మెన కిచ్చొక సంగిల మెలె, జేవ్ పండితుల్ సికడ్డి నీతి నే కెరంతనక దస్సి నిస్కారుమ్ దెకుల. జోవయింతె సగుమ్జిన్ నిజమి ఎత్తి అదికారుమ్ తిలొ దేముడు ‘పాపుమ్’ మెంత కమొక అలవాట్ జా తవుల, గని సగుమ్జిన్ ఎక్కి పండితుల్చి కోడు పిట్టయ్తతి. † 5:35 5:35 ‘పెండ్లిఉబేడో’ మెన జోవయించి రిసా జొయ్యి టాలి సంగితయ్. జోవయింక పడ్డొక విరోదుమ్ సుదల్ దెర మారుల, గెద. * 6:1 6:1 యూదుల్చి అలవాట్ తెన్, సత్తెకెక్క సత్తు దీనల్ కిచ్చొ కామ్ నే కెర్లె దేముడుక జొకెర్లి దీన్. విస్తాంతి దీసి-తెలుగు. ఎత్తి సెన్యర్ యూదుల్క బక్తి కెర్లి సెలవ్ కడ దీసి జయెదె. జా దీసి జోవయించ సబ గెరతె గెచ్చ, దేముడుచి కొడో నూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలిన్క యూదుల్చ వెల్లెల మాన్సుల్ ప్రజెల్క జాడు వయడ్లి రితి కెర కామ్ నే కెర్లొచి రిసా ఒగ్గర్ ఆగ్గుల్ అచ్చి ఉచర అస్సి. ఇన్నె, దొన్ని ఎన్నులు కోడ్లిన్క ‘కామ్’ మెన నింద కెర్లతి.

5 తెదొడి జోవయింక అన్నె, “సెలవ్ కడన్లి దీసిచి ఉప్పిరి †ఆవ్ మాన్సు జా జెర్మున్ అయ్లోసాక అదికారుమ్ అన్నె” మెన జేవ్ పరిసయ్యుల్క సంగిలన్.

ఆతు లంబ గెలో మాన్సుక యేసు చెంగిల్ కెర్లిసి (మత్త 12:9-14; మార్కు 3:1-6)

6 అన్నెక్ సెలవ్ కడన్లి దీసి యేసు జా పట్టుమ్తెచి యూదుల్చి నబ గెరి గెచ్చు పెన బోదన కెర్తె తతికయ్, ఒత్త ఉజిల్ ఆతు లంబ గెలో మాన్సు ఎక్కిలో తిలో.

7 జలె, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్ యేసుక చెంగిల్ దెకితె తిల. కిచ్చొక మెలె, “సెలవ్ కడన్లి దీసి యేసు జో మాన్సుక చెంగిల్ కెరెదె గే నాయ్ గె” మెన దెకుక మెన, రకితె అన్తి. “జోక చెంగిల్ కెర్లిగిన, సెలవ్ కడన్లి దీసి కామ్ కెర్లి రితి జయెదె, చి యేసుక నేరిమ్ వయడుక జయెదె” మెన ఉచర అన్తి.

8 గని జేవ్చి మెన్సుతె ఉచర్లిసి యేసుక ఎర్కె, చి ఆతు లంబ గెలో జో మాన్సుక కిచ్చొ మెలో మెలె, “ఇత్తల్ జా ఎత్కిజిన్ దెకిత్ రితి నెడిమి టీచ.” మెలన్, చి జో ఉట్ట ఒత్త టీచిలన్.

9 తెదొడి యేసు జేవ్క, “సెలవ్ కడన్లి దీసి ఎక్కిలోక చెంగిల్ కెరుక గే కస్టుమ్ కెరుక నాయిమ్? జోవయించి ప్రానుమ్ రచ్చించుప కెరుక గే పాడ్ కెరుక నాయిమ్?” మెన సంగిలన్.

10 సుట్టునంత అంకి గల జోవయింతె ఎత్కి మాన్సుక చెంగిల్ దెక కెర, ఆతు లంబ గెలో మాన్సుక దెక, “తుచొ ఆతు చంపొ కెరు” మెన సంగిలన్, చి యేసు సంగిల్ రితి జో మాన్సు కెర్లికయ్, జోచొ ఆతు చెంగిల్ జలి.

11 పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన జర్గు జలిసి దెకిలె, జోవయింక ఒగ్గర్ కోపుమ్ అయ్లి, చి “యేసుక కిసి †కెరుమ?” మెన ఎక్కిలో తెన్ ఎక్కిలో లట్టబన్.

యేసు బారజిన్ సిన్సుల్క నిసాన్లిసి (మత్త 10:1-4; మార్కు 3:13-19)

12 జలె, కిచ్చొ జలి మెలె, జేవ్ పొదులె ఏక్ దీసి, ప్రార్దన కెరుక మెన యేసు బార్ జా డొంగె గెలన్. జో ఒండి నరారాతి ఒత్త ప్రార్దన కెర్తె తిలో.

13 జలె, రాత్ పాయితికయ్, యేసు జోవయించి సిన్సుల్క బుకారా కెర, జోవయింతె బారజిన్క నిసాన, ఈంజేవ్ బారజిన్క ‘కీబారికుల్’ మెన నావ్ తిలన్.

14 జేవ్ కో కో మెలె, ఎక్కిలో సీమోను మెలోసా. జోక ‘పేతురు’ మెన యేసు అన్నెక్ నావ్ తిలన్. పడ్డె పేతురుచొ బావొసి అంద్రెయ. ఒత్త తెంతో యాకోబు చి యోహాను. ఒత్త తెంతో పిలిప్ చి బర్తోలోమయి.

15 పడ్డె *మత్తయి చి తోమా. ఒత్త తెంతో అల్పయిచొ పుత్తుసి యాకోబు, పడ్డె †సాంత దేసిమ్ ఏలుప కెరంతి ఆస తిలో సీమోను మెలో అన్నెక్కో,

16 యాకోబుచొ పుత్తుసి యూదా, పడ్డె ఇన్సురియోతు మెలి గవ్విచొ యూదా మెలోసా. ఈంజే యూదా పడ్డె యేసుక దెర విరోదుమ్ సుదల్చి అత్తి దిలో.

యేసు బోదన కెర కక్క చెంగిల్ కెర్లిసి (మత్త 4:23-25; 5:1-12)

17 జలె, యేసు జో నిసాన్ల బారజిన్ తెన్ డొంగె తెంతో ఉత్త జా, నదూనుమ్ తిలి ఏక్ టాన్తె టీచిల. చి జోచ అన్నె సిన్సుల్ జో తెన్ తిల, చి †ఒండి యూదయ దేసిమ్చ మాన్సుల్, యెరూసలేమ్ పట్టుమ్చ మాన్సుల్, వెల్లి నముద్రుమ్చి పాసి తిల తూరు చి సీదోను పట్టల్చ మాన్సుల్ ఒగ్గర్జిన్ ఒత్త తిల. ఈంజేవ్ జోచి బోద నూనుక చి “అమ్చ జొణ్ణొల్ గెచ్చవెదె” మెన జా తిల.

18 యేసు బూతల్ ఉదడ, బూతల్ దెర్ల మాన్సుల్క చెంగిల్ కెర్లొ.

19 పైజల్ ఎత్కి యేసుక చడుక మెన అత్తో చంపొ కెర్తె తిల. కిచ్చొక మెలె, జోక చడిలె, జోతె తెంతో సెక్తి జయెదె, చి జా సెక్తిచి రిసా చెంగిల్ జవుల. జోక చడ్డన ఎత్కిజిన్ దస్సి చెంగిల్ జల.

కిన బుద్దుల్చ మాన్సుల్క చెంగిల్ తయెదె

20 యేసు జోచ సిన్సుల్ జల మాన్సుల్క చెంగిల్ దెక ఇసి మెన సంగిలన్.

“బీద సుదల్ తుమ్క చెంగిలి. కిచ్చొక మెలె, దేముడుచి రాజిమ్తె తుమ్క కీవాట తయెదె.

21 తుమ్ అప్పె చూ జలనక చెంగిలి. కిచ్చొక మెలె, పడ్డొక తుమ్క సరిపుచుప జతిసి దొర్కు జయెదె.

తుమ్ అప్పె ఏడ్డనక చెంగిలి. కిచ్చొక మెలె, పడ్డొక సర్దక ఆన్తె.

22 “పడ్డె, *ఆవ్ మాన్సు జా జెర్మున్ అయ్లోసాక తుమ్ నంప కెర్లి రిసా మాన్సుల్ తుమ్క విరోదుమ్ దెకిలె, తుమ్క అమ్చి తెన్ బెదుత్ నాయ్ మెన సంగిలె, తుమ్క దూసుప కెర్లె, పడ్డె జోవయింక నంపజా గార్ జల, చి జోవయించి

† 6:5 6:5 5:24చి ఎట్టొచి కోడు దెక. ‡ 6:11 6:11 నెంజిలె ‘మారుమ’. మార్కు 3:6, చి మత్తయి 12:14 దెక. § 6:13 6:13 నెంజిలె ‘ఆవ్ తెద్రయ్లన’. గ్రీకు మెలి ఈంజి ఎత్కి తొలితొ రెగిడ్లి బాస తెన్ ‘తెద్రయ్లన’ మెలి అర్దుమ్ తయెదె. * 6:15 6:15 జోవయించి అన్నెక్ నావ్ ‘పేవి’ గెద. 5:27 దెక. † 6:15 6:15 రోమ్ దేసిమ్చి ప్రబుతుమ్ తెదొడి జోవయింక ఏలుప కెర్తె తిలన్, గెద. ‡ 6:17 6:17 ఇన్నె ‘ఒండి యూదయ దేసిమ్’ మెలె, ఏక్ వేల యూదుల్చి ఒండి దేసిమ్క సంగితయ్. మెలె, గలిలయ ప్రాతుమ్, సమరయ ప్రదేసిమ్, చి యూదయ ప్రదేసిమ్ మొత్తుమ్ బెదయ్లిసి. § 6:20 6:20 లూకా 22:29, 30 దెక. * 6:22 6:22 5:24చి ఎట్టొచి కోడు దెక.

నావ్ కి సంగుక నెంజె, మెన తుమ్ చి రిసా మాన్సుల్ సంగిలె, తుమ్ క చెంగిలి.

23 దస్సి జర్గు జతి దీసిక సర్ల సంతోసుమ్ క తుమ్ నచ్చు. కిచ్చొక మెలె, ఈందె, పరలోకుమ్ తె తుమ్ క వెల్లి బవుమానుమ్ దొర్కు జయెదె. తుమ్ కయ్ మాన్సుల్ కీస అల్లర్ కెరుల గే అగ్గెయ్ దేముడుచ కబుర్లు సంగిలనక కి, జేవ్ క అబ్బదింసి దసయ్ అల్లర్ కెర్ల.” మెన యేసు సంగిలన్.

ఆకర్ క కక్క నస్టుమ్ తయెదె గే యేసు సంగిలిసి

తెదొడి యేసు అన్నె,

24 “అబ్బవోమ్మ! తుమ్ అప్పె సొమ్సారుమ్ తిలసక కెద్ది నస్టుమ్ జెయెదె!

కిచ్చొక మెలె, ఈంజయ్ లోకుమ్ చి రగుమ్ చి సుక్కుమ్

పూర్తి దొర్కు కెరన అస్సున్

ఈంజయ్ లోకుమ్ తె.

25 అబ్బవోమ్మ, తుమ్ అప్పె ఈంజ లోకుమ్ తె పెట్టి బెరవన్లన,

తుమ్ కెద్ది నస్టుమ్ జస్తె!

తెదొడక చూ జస్తె.

అబ్బవోమ్మ, తుమ్ అప్పె ఈంజ లోకుమ్ తె ఆన్లన,

తుమ్ కెద్ది నస్టుమ్ జస్తె!

తెదొడక ఏడ్తె, ఏడుకుడు జస్తె.

26 అబ్బవోమ్మ,

ఈంజేవ్ చెంగిల మాన్సుల్ మెన తుమ్ చి రిసా ఎత్కిజిన్ సంగిలె,

తుమ్ క కెద్ది సంతోసుమ్ జెయెదె! కిచ్చొక మెలె,

తుమ్ క ఈంజేవ్ కీసి అప్పె దస్సి సంగితతి గే,

దేముడుచ కబుర్లు సంగితసుమ్

మెన అబద్దుమ్ క సంగిల పూర్లుక

ఇనయించ అబ్బదింసి దస్సి కెర,”

మెన సంగిలన్.

విరోదుమ్ సుదల్ క ప్రేమ కెర్తిన్ చి రిసా చి తీర్పు

(మత్త 5:38-48; 7:12)

27 ఒత్త తెంతో యేసు అన్నె, “తుమ్ సూన్ తనక ఆవ్ కిచ్చొ మెంతసి మెలె, తుమ్ చ విరోదుమ్ సుదల్ క తుమ్ ప్రేమ కెర్తె తా, చి తుమ్ క విరోదుమ్ కెర్తనక చెంగిల్ దెకితె

28 తుమ్ క సాపెనల్ దెతనక, దేముడు జోవయింక చెంగిల్ దెకున్.” మెన తుమ్ ఇస్టుమ్ జా, చి తుమ్ క దూసుప కెర్తనచి రిసా ‘చెంగిల్ తత్తు’ మెన తుమ్ ప్రార్థన కెర.

29 తుమ్ చితె ఎక్కిలోక జవున్ కో జలెకు అన్నెక్లో గలి పెట్టిగన, దెబ్బ కయ్ లొసా తుక్లె తా, జోచి అన్నెక్ గలి కి జో అన్నెక్లో పెటతి రితి, జోచి పక్క పసులవున్. అన్నె, తుమ్ చితె ఎక్కిలోచి కోటు జవున్ కో జలెకు అన్నెక్లో దెరన

గెలె, జోచి సొక్క కి ఈంజో అన్నెక్లో దెర గెతి రితి జో అడ్డు కెర్పు నాయ్.

30 తుమ్ చితె కో జలెకి కిచ్చొ జవున్ నజిలె, దెంక. అన్నె, తుచితెచొ కేన్ జవున్ మాన్సుచి సామన్ అన్నెక్లో దెర గెలె, జో సంతోసుమ్ జలొసా “అంచి వస్తువ అంక దె” మెన జోచి సామన్ అన్నె నజన్పు నాయ్.

31 మాన్సుల్ తుమ్ క కీసి కెరుక మెన తుమ్ ఇస్టుమ్ జస్తె గే, తూమ్ కి జోవయింక దస్సి చెంగిల్ కెర.

32 “ఎక్కి తుమ్ క ప్రేమ కెర్తనకయ్ తుమ్ ప్రేమ కెర్లెగన, అన్నె మాన్సుల్ క నాయ్ మెలె, తుమ్ క కిచ్చొ పున్నిమ్ జా? పాపుమ్ సుదల్ కి జోవయింక ప్రేమ కెర్తనక ప్రేమ కెరుల.

33 తుమ్ కయ్ చెంగిల్ దెకితనకయ్ చెంగిల్ కెర్తనక, అన్నె వేర మాన్సుల్ క నాయ్ మెలె, జయి తుమ్ క కిచ్చొ పున్నిమ్? పాపుమ్ సుదల్ కి దస్సి కెరుల, గెద.

34 తుమ్ క పూర్తి అన్నె దెంక సెక్తి తిలసకయ్ తుమ్ కిచ్చొ జవున్ తోడు దిలె, అన్నె మాన్సుల్ క నాయ్ మెలె, జయి తుమ్ క కిచ్చొ పున్నిమ్? తెద్దిలి అన్నె నజితి రితి పాపుమ్ సుదల్ కి ఒప్పన పాపుమ్ సుదల్ క తోడు దెవుల.

35 “తూమ్, జలె, తుమ్ చ విరోదుమ్ సుదల్ క ప్రేమ కెర, చి ఎత్కిజిన్ క చెంగిల్ దెక, చి కిచ్చొ అన్నె దొర్కు కెరనుక ఆస నే జతె, మాన్సుల్ క తోడు దాస. తుమ్ ఇసి బుద్ది ఇండిలె, తుమ్ క వెల్లి బవుమానుమ్ దొర్కు జయెదె, చి ‘ఎత్కిచి ఉప్పిరి తిలో దేముడుచ పుత్తర్లు ఈంజేవ్’ మెన తుమ్ చి రిసా రుజ్జు జెయెదె. కిచ్చొక మెలె, ఎక్కి జోచి దయ ఒప్పన్ తనకయ్ మెన నాయ్, గని అన్నె జో కెర్తి దయ నే ఒప్పన్లనక కి, ఏక్ జోవయింకయ్ జెవ్వి దెకన్ తనక కి, జో ఎత్కి అదికారుమ్ తిలో దేముడు సొంత దయ దెకితయ్.

36 జో పరలోకుమ్ తిలో అబ్బొసి జలొ దేముడు మాన్సుల్ క కీసి కెద్ది కన్కారుమ్ దెకితయ్ గే, తుమ్ కి అన్నె మాన్సుల్ క కన్కారుమ్ దెక.

మాన్సుల్ క తీర్పు కెర్తిచి రిసా సంగిలిసి

(మత్త 7:1-5)

37 “అన్నె మాన్సుల్ క కుస్సిదుమ్ చ తీర్పుల్ తుమ్ ఉచర నాయ్, చి దేముడు తుమ్ కయ్ తీర్పు కెర సిచ్చ కెరుక నాయ్. అన్నె మాన్సుల్ క నేరిమ్ లు వయడ నాయ్ చి, దేముడు తుమ్ కయ్ నేరిమ్ వయడుక నాయ్. అన్నె మాన్సుల్ క చెమించుప కెర చి, దేముడు తుమ్ కయ్ చెమించుప కెరెదె.

38 అన్నె మాన్సుల్ క తోడు దాస చి, దేముడు తుమ్ కయ్ తోడు దెయెదె. కీసి దెయెదె మెలె, చెంగిల్ మీన, గట్టిజ పెల, దున్నొవ, పూర్తి బెరవయ్, తుమ్ చి ఒట్టి సువ దెయెదె. తూమ్ అన్నె మాన్సుల్ క కీసి మీన తస్తె గే, ఎత్కి అదికారుమ్

తిలో దేముడు తుమ్కయ్ దస్సి మీన దెయెదె.” మెన యేసు ఒత్త బెర తిలసక సంగిలన్.

39 తెదొడి యేసు ఈంజ టాలి సంగిలో. కిచ్చొ మెలె, “కేన్ జవున్ గుడ్డి సుదొ అన్నెక్టొ గుడ్డి సుదొక వాట్ దెకవుక నెత్తె, గెద! వాట్ దెకవుక దెర్లె, జేవ్ దొగుల కి కేన్ జవున్ గొయితె సేడుల.

40 సిస్సుడు జోచొ గురుచి కంట వెల్లో నెంజె, గని జో గురుచి లెక పూర్తి సికిలో సిస్సుడు, జోచొ గురుచొ రితొ జా తయెదె.

41 “తుమ్చితె ఎక్కిలోచి అంకితె ఏక్ చిల్ప బెర తిలెగిన, బావొచి అంకితె ఇదిలిదిల్ తొక్కు సేడ తిలెగిన, అంకితె చిల్ప తిలోసా కిచ్చొక జోచి బావొచి అంకితె తిలి ఇదిలిదిల్ తొక్కు దెకితసి, గని సొంత అంకితెచి చిల్పక ‘అస్సె’ మెన దెకిన్ నాయ్?

42 నెంజెలి, అంకితె చిల్ప తిలోసా కో జలెకు, జోచి సొంత అంకితెచి చిల్ప నే దెకిలె, బావొ, తుచి అంకితెచి తొక్కు కడిందె మెన తుచొ బావొక తుయి కీసి సంగుక జయెదె! తుయి ఉప్తమెన్నుచొ, తొలితొ తుచి సొంత అంకితెచి చిల్ప కడను, చి తెదొడెకయ్ తుచొ బావొచి అంకితెచి తొక్కు కడితి రితి టేంట దెకితె.

చెంగిలో రూకు మెన చి గర్చొ రూకు మెన టాలి

43 “కేన్ చెంగిలో రూకు జలెకు గర్చొ పండ్లు దెరె నాయ్, చి గర్చొ రూకు చెంగిల్ పండ్లు దెరె నాయ్.

44 రూకుక చెంగిలోచొ గే గర్చొ గే చినుక జలె, జో దెర్ల పండ్లుక దెకిలె డీసెదె. కంట రూక్తె† అంజూరుమ్ పండ్లు కోడుక నెంజె, దుబ్బల్తె ద్రాచ పండ్లు కోడుక నెంజె, గెద!

45 చెంగిలో మాన్సు జోవయించి పెట్టిచి చెంగిల్ బుద్ది బెర్తుచి కెద్ది చెంగిల్ బుద్దిచ కొడొ లట్టబెదె. గర్చొ మాన్సు, జలె, జోచి పెట్టిచి విస్సుమ్చి బెర్తుచి గర్చొ కొడొ లట్టబెదె. జోచి పెట్టి కేన్ రగుమ్చి బెర్తు జా తిలె, జయ్యి జోవయించి చొండి లట్టబెదె.

చెంగిల్ పునాదితె బందిలో గేరుక టాలి (మత్త 7:24-27)

46 “ ‘ప్రబు, ప్రబు’ మెన అంక కిచ్చొక సంగితను? అంక దస్సి సంగితను, గని అంచి కోడు రితి ఇండున్ నాయ్.

47 కో అంచితె ‡జా కెరె అంచ కొడొ సూన అంచి కోడు రితి ఇండుల గే కీన్ జవుల గే ఏక్ టాలితె సంగిందె.

48 దసా మాన్సు కీసా జయెదె మెలె, గేరు బందిలో ఏక్ మాన్సు దీగుక గొయి కూన కెరె, రెంగ్చిచి ఉప్పిరి పునాది గల కెరె జా పునాదిచి ఉప్పిరి గేరు బందిలో. జలె, పాని గట్టిజ పెట, బూరుమ్ జా జో గేరుచ కుడ్డిలె జా బూరుమ్ కెర్లె జా గట్టిజ లయితె తిలె కి, జా గేరు చెంగిల్ డిట్టుమ్చి పునాదితె తిలి రిసా, ఎదిలి కి కదుల్ జయె నాయ్.

49 గని అంచి కోడు సూన్లె కి కో కెర్తె నాయ్ గే కీసి జవుల మెలె, జో మాన్సు పునాది నే కెర్తె, రితి మత్తిచి ఉప్పిరి గేరు బందిలో, చి పాని పెట బూరుమ్ జా అయ్లె, గేరుచి కుడ్డి బూరుమ్ కెర్లె జా అయ్లి బేగి జా గేరు సేడ్డి, చి జా గేరు పూర్తి నాసెనుమ్ జా గెలి” మెన యేసు బోదన కెర్లెన్.

7

***పుంజెక్జీన్ జమాన్లుక వెల్లొచొ గొత్తి సుదొక యేసు చెంగిల్ కెర్లిసి**

(మత్త 8:5-13; యోహా 4:43-54)

1 ఈంజేవ్ కొడొ ఎత్కి పైజల్ సూన్తి రితి సంగ కేడయ్లి పడ్డొ, యేసు కపెర్నహూమ్ పట్టుమ్తె అన్నె గెచ్చె పెసిలన్.

2 జలె, ఒత్త రోమ్ దేసిమ్చి పుంజెక్జీన్ జమాన్లుక వెల్లొ ఎక్కిలో తిలో. జోక ఒగ్గర్ ప్రేమ తిలో గొత్తి సుదొ ఎక్కిలో తిలన్. జో గొత్తి సుదొ గట్టిజ జొర్లొ సేడ మొర్తి రితి జా తిలన్.

3 జలె, జో పుంజెక్జీన్ జమాన్లుక వెల్లొ యేసుచి రిసా సూన కెరె, యూదుల్చ వెల్లెల మాన్సుల్తె సగుమ్జిన్క యేసుతె తెద్రయ్లన్; యేసుక “జెవున్ చి అంచొ గొత్తి సుదొక చెంగిల్ కెర్చు” మెనయ్ జోవయించి అత్తి కబుర్ తెద్రయ్లన్.

4-5 జలె, జేవ్ వెల్లెల మాన్సుల్ యేసుతె జాఁ కెరె, “జో పుంజెక్జీన్ జమాన్లుక వెల్లొచొ గొత్తి సుదొక తుయి చెంగిల్ కెరుక జో తగుప జలోసా. కిచ్చొక మెలె, అమ్ యూదుల్చ పైజల్క జో ప్రేమయ్ అస్సె, చి అమ్చి సబగేర్ జొయ్యి బందిలో” మెన, యేసుక బతిమాల్పా జా సంగిల.

6 జలె, యేసు జోవయింతెన్ బార్ జా గెలాఁచి. జో గెరి నే పాఁచితె అగ్గె ఇదిల్ దూరి తిలి పొది, జో పుంజెక్జీన్ జమాన్లుక వెల్లొ మాన్సు, జోచ మితర్చుల్ సగుమ్జిన్క యేసుతె కబుర్ తెద్రయ్లన్. కిచ్చొ మెలె, “ప్రబు, అమ్చి రిసా తుయి అన్నె అల్లర్ సేడు నాయ్. తుయి అంచి గెరి జెంక మెలె, ఆవ్ తగుప జలోసా నెంజె.

7 అంక విలువ నాయ్ చి రిసా తుచితె సొంత జా దస్సుల్ జంక నిసాని నాయ్. గని ఒత్త తెంతొ కి తుయి సెలవ్ కోడు సంగిలె, అంచొ గొత్తి సుదొ చెంగిల్ జయెదె.

8 ఆవ్ కీసి జాని మెలె, అవ్ కి అదికారుమ్క బితొసా, అంచి తెడి జమాన్లు అస్తి. ఆవ్ ఎక్కిలోక ‘గో’ మెలె, గెచ్చెదె. అన్నెక్టొక ‘జె’ మెలె, జెయెదె. అంచొ గొతిమాన్సుక ‘ఈంజ కామ్, జా కామ్ కెరు’ మెలె, కెరెదె” మెన. జో పుంజెక్జీన్ జమాన్లుక వెల్లొ జేవ్ వెల్లెల మాన్సుల్చి అత్తి సంగ తెద్రయ్లన్.

9 జలె, ఈంజ కోడు సూన కెరె, జో పుంజెక్జీన్ జమాన్లుక వెల్లొచి నముకుమ్చి రిసా యేసు ఆచారిమ్ జలన్. అన్నె జోచి పట్టి జెత పైజల్చి పక్క పసుల జోవయింక, “తుమ్క

† 6:44 6:44 అంజూరుమ్ పండ్లు బొడ్డ పండ్లు రిత జవుల ‡ 6:47 6:47 మెలె, ‘కో అంక నంప కెరె...’ * 7: 7:1 పుంజెక్జీన్ చి ఉప్పిర్ అదికారి జా తిలోసా

ఆవ్ కిచ్చొ మెంతసి మెలె, అమ్చ ఇస్రాయేలుల్తె ఎదిలి నముకుమ్ తిలసక అప్పె ఎద కి ఆవ్ దెకుక నాయ్” మెన సంగిలన్.

10 తెదొడి, కబుర్ అయ్లస జో పుంజెకజీన్ జమాన్లుక వెల్లొచొ గెరి అన్నె కిచ్చొ దెకిల మెలె, జో గొత్తి సుదొ చెంగిల్ జా చెంగిల్ తిలిసి.

రండెల్ మాన్సు ఎక్కిలోచొ మొర గెలో పుత్తున్క యేసు చెంగిల్ కెర్లిసి

11 ఒత్త తెంతో అన్నె కిచ్చొ జర్గు జలి మెలె, యేసు నాయీను మెలి పట్టుమ్తె గెచ్చుక మెన బార్ జలన్, చి జోవయించ సిస్సుల్ చి ఒగ్గర్జిన్ పైజల్ జోవయింతెన్ గెల.

12 జా పట్టుమ్చి కోటచి గుమ్ముమ్ పాసి పావెలె, ఈందె, ఒత్త మాన్సుల్ ఏక్ పీనుమ్ జా గుమ్ముమ్ వాట్ బయిలె వయ నెతె తిల. జా పీనుమ్ కచి మెలె, రండెల్ మాన్సు ఎక్కిలోచి ఎక్కిలో పుత్తుసి. జా పట్టుమ్చ ఒగ్గర్జిన్ మాన్సుల్ జా రండెలి తెన్ ఒత్త తిల.

13 జలె, ప్రబు జా రండెలిక దెక జాచి ఉప్పిరి కన్కారుమ్ జలో, చి “ఏడు నాయ్, అమ్మ” మెన సంగ కెర,

14 పీనుమ్క పాసి జా, పీనుమ్ వయిలి కట్టి చడిలన్, చి ఒత్త జేవ్ వయ నెతె తిలస టీవెల. తెదొడి “నాడు, ఉట్టు మెన తుక ఆవ్ సంగితసి” మెన సంగిలన్.

15 జలె, జో మొర్లొ †ఉబెడొ జివ్ జా వెన కెర లట్టబుక మొదొల్ కెర్లన్, చి యేసు అయ్యున్క బుకారా కెర, “ఈందె, తుచొ పుత్తుది” మెన జోక జాచి అత్తి అన్నె దిలో.

16 ఇసి జర్గు జతికయ్, ఒత్త తిల జనాబ్ ఎత్తిజిన్ బియ, యేసుచి రిసా “అమ్చి నెడిమి దేముడుచ కబుర్లు సంగితో గొప్ప కమొ కెర్లొసా బార్ జా అస్సె. వెల్లొచొ, ఈంజొ” మెన, అన్నె “ఎత్తి అదికారుమ్ తిలో దేముడు అమ్తె ఉత్త జా అస్సె” మెన, దేముడుచి గవురుమ్ సంగితె తిల.

17 ఒత్త తెంతో, జా దీసి యేసు జర్గు కెర్లిసిచి రిసా ‡యూదుల్ జితి ఒండి దేసిమి, చి సుట్టునంతచ ఎత్తి గవ్విలె ఎత్తిజిన్ సూన్ల.

బాప్తిసుమ్ దెతె తిలో యోహాను యేసుతె కబుర్ తెద్రయ్లిసి

(మత్త 11:2-19)

18 జలె, బాప్తిసుమ్ దెతె తిలో యోహానుచ సిస్సుల్ జోతె గెచ్చ, యేసు జర్గు కెర్ల కమొ జోక సంగిల.

19 యోహాను, జోచ సిస్సుల్తె దొగులక బుకారా కెర, “దేముడు తెద్రవుక సంగ తిలో రచ్చించుప కెర్లొసా నిజమి తుయి గే, అమ్ అన్నెక్లొక రకుక గె? తుమ్ పున” మెన కబుర్ తెద్రయ్లన్.

20 జలె, జేవ్ మాన్సుల్ యేసుతె జాఁ కెర, “దేముడు తెద్రవుక సంగ తిలో రచ్చించుప కెర్లొసా నిజమి తుయి గే, అమ్ అన్నెక్లొక రకుక గె?” మెన సంగ మెన “బాప్తిసుమ్ కిదెతో యోహాను అమ్క తుచితె తెద్రవ అస్సె.” మెన జా కబుర్ సంగిల.

21 జలె, జయ్యి గడియయ్ ఒగ్గర్జిన్ జబ్బుల్ బాదల్ తిలసక చి బూతల్ దెర్లసక యేసు చెంగిల్ కెర్లన్, చి ఒగ్గర్జిన్ గుడ్డి జలసక చెంగిల్ కెర్లన్.

22 తెదొడి యేసు జేవ్ కబుర్ అయ్లసక కిచ్చొ జబాబ్ దిలన్ మెలె, “తుమ్ యోహానుతె గెచ్చ కెర, తుమ్ దెకిలిసి, సూన్లిసి ఎత్తి జోక సంగ. గుడ్డి జా తిల మాన్సుల్ దెకితతి, సొట్ట జా తిల మాన్సుల్ ఇండితతి, వెల్లి రోగుమ్ నేడ తిలస చెంగిల్ జతతి, బొయ్రల్ జా తిల మాన్సుల్ సూన్తతి, మొర గెలస జివ్ జతతి, చి సుబుమ్ కబుర్ బీద మాన్సుల్క ఆవ్ సూనయ్తసి.

23 జలె, కో జలెకు అంచి రిసా అన్మానుమ్ నెంతె తవుల గే, జోవయింక చెంగిలి.” మెన యేసు యోహానుచ సిస్సుల్క సంగిలన్.

యోహానుచి రిసా పైజల్క యేసు సంగిలిసి

24 యోహాను కబుర్ తెద్రవ తిలస ఉట్ట గెలి బేగి, జో యోహానుచి రిసా ఒత్త తిల పైజల్క యేసు ఇసి మెన సంగుక దెర్లన్. “జేవ్ పొదులె తుమ్ కిచ్చొ దెకుక జా బయిలె గెచ్చ తిలదు? వాదుతె చివ్వర్ పెల్లి జితిసి దెకుక గెచ్చ తిలదు గె?

25 నాయ్ మెలె, కిచ్చొ వేరచి దెకుక గెలదు? సొమ్మార్లు గలంత పాలల్ గలన్లొ మాన్సుక దెకుక గెలదు గె? ఈందె, చెంగిల పాలల్ గలంత సుక్కుమ్ తెన్ జితస రానల్చ మేడల్తె తవుల.

26 జలె, కిచ్చొ దెకుక గెలదు? దేముడు తెద్రయ్లి కబుర్ సంగితో ఎక్కిలోక దెకుక గెలదు గె? నిజమి, గని జో ప్రబుచ మాములుమ్ కబుర్లు సంగితసచి కంట యోహాను అన్నె ముక్కిమ్చొ జయెదె మెన, తుమ్క ఆవ్ సంగితసి.

27 కిచ్చొక మెలె,

ఈందె, అంచి కబుర్ సంగితో బారికి జతి రితి ఎక్కిలోక తుచి పురె తెద్రయ్తసి.

తుచి కంట అగ్గె గెచ్చ,

తుయి జెతిసి సొట్ట కెరెదె

మెన రెగిడ్డి కోడు అస్సె. జా కోడుతె ‘అంచి కబుర్ సంగితొసా’ మెన ఈంజ యోహానుచి రిసాయి రెగ్గి జా అస్సె.

28 తుమ్క ఆవ్ కిచ్చొ మెంతసి మెలె, తేర్బోదల్క జెర్లిలసతె, యోహానుచి కంట వెల్లొచొ కోయి నాయ్. జలెకి, దేముడుచి రాజిమ్తె కో ఎత్తిచి కంట దాక్ జవుల గే,

† 7:15 7:15 జోవయించి వయసు విస్సెక్ చెత్తర్ వెర్చుల్క తకు నాయ్, టొన్ని విసా వెర్చుల్క ఒగ్గర్ నాయ్ జెరె. ‡ 7:17 7:17 నెంజిలె ‘ఒండి యూదయ దేసిమి’. § 7:20 7:20 గని జా మదెనె యోహాను జేల్తె తిలన్. మత్తయి 11:2 దెక.

జో యోహానుచి కంట వెల్లో జవుల” మెన యేసు ప్రజల్ క సంగిలన్.

29 జలె, ఈంజ కోడు మాములుమ్ ప్రజల్ ఎత్తిచి సిస్టు నజిత సుంకర్లు నూన కెర, “ఎత్తి అదికారుమ్ తిలో దేముడుచ తీర్పుల్ సత్తిమ్చ” మెన ఒప్పున్ల. జేవ్, అగ్గె యోహానుచి అత్తి బాప్తిసుమ్ నజన తిల.

30 గని పరిసయ్యుల్ చి మోసి తెన్ దేముడు దిలి ఆగ్గుల్ సికడ్టా సొ సికడ్టన జోచి అత్తి బాప్తిసుమ్ నజిత నాయ్. యోహానుచి అత్తి బాప్తిసుమ్ జేవ్ నజుక నెసిలిన్ తెన్ జోవయించి రిసాచి దేముడుచి * ఇస్టుమ్ జేవ్ నెసిలిన్ చి రుజ్జు దెకవ తిల. అప్పె కి యేసుచి కోడు నెసిల.

అన్మానుమ్ జతనచి రిసా యేసు గోల కెర్లిసి

31 యేసు అన్నె, “ఈంజ ఉగుమ్చ మాన్సుల్చి బుద్దికి చిచ్చో టాలి సంగుక జయెదె? జేవ్ కీసి జతతి?

32 వీదులె వెన కెల్ల బోదల్చ రిత జతతి. జేవ్ బోదల్ ఎక్కిలోచి ఉప్పిరి ఎక్కిలో అన్మానుమ్ జా, తుమ్క ‘నచ్చుత్’ మెన బచ్చి పుంగిలెకి నచ్చున్ నాయ్.

అమ్ ఏడ్లెకి, తుమ్ బెద ఏడ్చు నాయ్” మెన దస బోదల్ కీసి సంగుల గే, దస్సి ఆవ్ చి యోహాను కిచ్చో కెర్లె కి, తుమ్ మెన్సున్ నాయ్.

33 కిచ్చోక ఆవ్ ఇసి టాలి కెర్లెసి మెలె, బాప్తిసుమ్ దెతె తిలో యోహాను కిచ్చో అన్నిమ్ నే కతె చువ్వె తతోసా, కిచ్చో ద్రాచ రస్సుమ్ గట్ట నే పితె తన్నె తతోసా తుమ్తె అయ్లో, చి జోచి రిసా “జోక బూతుమ్ దెర అస్సె.” మెంతసు.

34 ఆవ్ జలె, †మాన్సు జా జెర్మున్ అయ్లోసా, మాములుమ్ కతె పితె తతిన్చి రిసా తుమ్ కిచ్చో మెంతసు మెలె, “ ఆదె, కయ్ రొ మత్తాల్లో ఈంజో. సిస్టు నజిత సుంకర్లు తెన్ పాపుమ్ సుదల్ తెన్ బెదితోసా’ మెన, అంచి రిసా సంగితసు.

35 ‡గని కచి కచి పెట్టి దేముడుచి బుద్ది తిలె, జేవ్ ఎత్తిజిన్చ కమొచి పలితుమ్తె రుజ్జు జయెదె” మెన యేసు సంగిలన్.

పరిసయ్యుడుచి గెరి యేసు అన్నిమ్ కంక గెతికయ్

36 పరిసయ్యుడు జలొ ఎక్కిలో యేసుక అన్నిమ్క బుకార్లన్, చి జో పరిసయ్యుడుచి గెరి గెచ్చ. జా దేసిమ్చ సామాన్లుచ గెరలె అన్నిమ్క కీసి ఒర్లు జా బల్లయ్ కవుల గే, దస్సి, అన్నిమ్ కతన ఎత్తిజిన్ తెన్ యేసు కి ఒర్లు జలన్.

* **7:30 7:30** మెలె, “క్రీస్తు రచ్చించువ కెర్లెసా జెతయ్చి రిసా తుమ్ కెర్లె పాపల్ క దుకుమ్ జా ఒప్పున ముల దా బుద్ది జా, చి జా గుర్తుక బాప్తిసుమ్ నజన” మెనయ్ యోహాను బోదన కెర కెర బాప్తిసుమ్ దెతె తిలన్. పరిసయ్యుల్ గట్ట దస్సి దాక్ కెరన బుద్ది జంక నెసిల. ఎత్తి అదికారుమ్ తిలో దేముడు తెద్రయ్లో రచ్చించువ కెర్లెసాక నంప కెరుక నెసిల. † **7:34 7:34** దేముడుచి కొడతె అన్నె పూర్లుమ్ రెగిడ్డిన్తె ‘మాన్సు జా జెర్మున్ అయ్లోసా’ మెన సంగిలె, ‘తెద్రయ్చె’ మెన ఎత్తి అదికారుమ్ తిలో దేముడు సంగిలో రచ్చించువ కెర్లెసా మెలి అర్లుమ్ తయెదె. దానియేలు 7:13 దెక. ‡ **7:35 7:35** నెంజలె, ఎత్తి అదికారుమ్ తిలో దేముడుచి బుద్ది కచి కచి పెట్టి తిలె, జా బుద్ది అన్నె మాన్సుల్తె దెకిలె, జాక జో దిలి బుద్ది మెన ఒప్పునుల. మత్తయి 11:19చి కోడు దెక. § **7:37 7:37**

* **7:41 7:41** ఎక్కి దేనారము ఎక్కి పొదుల్చి కూలి

37 జలె, ఈందె, లంజె జితె తిలి జా పట్టుమ్చి తేర్బోద ఎక్కి యేసుక ‘జో పరిసయ్యుడుచి గెరి అన్నిమ్ కంక గెచ్చ అస్సె’ మెన నూన కెర, ఏక్ బుడ్డితె కీఅత్తర్ తేల్ దెరన అయ్లి.

38 యేసుచి వడ్డో జోచ చట్టొక పాసి టీచ వంపొ జా ఏడుక దెర్లి, చి జాచి ఆనునొ సువి జతికయ్ యేసుచ చట్టొ తిమిలచి, జాచి నెండి తెన్ జా తేర్బోద జోచ చట్టొ పుంచ, జోక చుంబ కెర, జా అత్తర్ తేలు గాసిలి.

39 జలె, యేసుక బుకారా తిలో పరిసయ్యుడు జా ఎత్తి దెక కిచ్చో ఉచర్లన్ మెలె, “ఈంజో నిజమి ఎత్తి అదికారుమ్ తిలో దేముడుచ కబుర్లు సంగితొసా జలె, జోక చడితి తేర్బోద కొన్ని జయెదె, కీసిచి జయెదె గే జాన్తో. ఇన్నెక ‘పాపుమ్ సుది’ మెన జాన్తో.”

40 జలె, జో ఉచర్లిసి జాన కెర, యేసు జోక కిచ్చో జబాబ్ దిలన్ మెలె, “ఓ సీమోను, తుక ఏక్ కోడు సంగిందె” మెన సంగిలన్, చి “కిచ్చో, గురుబాబు? సంగు” మెన సీమోను సంగిలన్.

41 సంగితికయ్, యేసు ఏక్ టాలి సంగిలన్. “ఏక్ సావుకారితె దొగుల రునుమ్ జా తిల. జేవ్ దొగులతె ఎక్కిలో పాచ్ పుంజో * పొదుల్చి కూలిచి ఎదిలి డబ్బుల్ క బాకి జా అస్సె, అన్నెక్లో యాబయ్ పొదుల్చి కూలిచి ఎదిలిక బాకి జా అస్సె.

42 జేవ్ జోవయించి రునుమ్ కుట్టవుక నెతిర్లి రిసా, సావుకరి దొగులచి రునుమ్కి ముల దా చెమించువ కెర్లెన్. జలె, తుయి సంగు, ఈంజేవ్ దొగులతె కేన్ మాన్సు జో సావుకరిక ఒగ్గర్ ప్రేమ జయెదె?” మెన యేసు జో సీమోనుక పరిచ్చ కెర్లెన్, చి

43 జో కిచ్చో జబాబ్ దిలన్ మెలె, “ఒగ్గర్ బాకి జా తిలోసా, కిచ్చోగె” మెలన్, చి “తుయి సరిగా ఉచర్లది” మెన యేసు జోక సంగ కెర,

44 జా తేర్బోదచి పక్క పసుల సీమోనుక అన్నె ఇసి మెలన్: “ఈంజ తేర్బోదక దెకితసి గె? జలె, ఆవ్ తుచి గెరి అయ్లయ్, గని ఆవ్ చట్టొ దొవన్తి రిసా తూయి పాని దెసి నాయ్. ఈంజ, జలె, ఇన్నెచి ఆనునొ తెన్ అంచ చట్టొ దోవ అస్సె, చి ఇన్నెచి నెండి తెన్ పుంచ అస్సె.

45 తూయి అంక చుంబిన్ నాయ్, గని ఆవ్ ఈంజ గెరి అయ్లి తెంతో ఈంజ అంచ చట్టొ చుంబుక దెర ములె నాయ్.

46 అంచి బోడి తూయి తేల్ కి సువిన్ నాయ్. గని ఈంజ అంచ చట్టెలె అత్తర్ తేలు గాన దా అస్సె.

47 జాచి రిసా తుక ఆవ్ కిచ్చొ మెంతసి మెలె, ఇన్నెచ పాపల్ ఒగ్గర్ జా తిలె కి, చెమించుప జా అస్తి. ఈంజ చెమించుప జలిన్ కిచ్చొ రుజ్జు మెలె, ఇన్నెచి ఒగ్గర్ ప్రేమయ్ జా రుజ్జు దెకయ్తయ్. గని కక్క తొక్కి పాపుమ్ చెమించుప జా తయెదె గే, జోచి పెట్టి తొక్కి ప్రేమ తయెదె” మెన యేసు జో పరిసయ్యుడుక సంగ కెర,

48 జా తేర్బోదక, “తుచ పాపల్ చెమించుప జా అస్తి” మెలన్.

49 జో దస్సి మెంతికయ్, జోవయింతెన్ అన్నిమ్ కెర్తె తిలస జోవయించి పేట్ తెడి కిచ్చొ మెల మెలె, “ఈంజో పాపల్ చెమించుప కెర్తయ్ జలె, ఈంజో కొన్సొ?” మెన పేట్ తెడి ఉచరన్.

50 జలె, “తుయి అంచి ఉప్పిరి తుచి నముకుమ్ తిలి రిసా రచ్చించుప జా అస్సిసి. సేంతుమ్ తెన్ గో.” మెన యేసు జా తేర్బోదక సంగిలన్.

8

యేసు తెన్ బుల సగుమ్జిన్ కెర్తె సావైచన

1 ఈంజ ఎత్తి జర్గు జా ఒగ్గర్ దీనల్ నే గెతె అగ్గె, యేసు బార్ జా పట్టలె గెవ్విలె బుల బుల, దేముడుచి *రాజిమ్చి రిసాచి †సుబుమ్ కబుర్ బోదన కెర్తె తిలొ. జో తెన్ జోచ బారజిన్ సిస్సుల్ బుల్తె తిల.

2 అన్నె కొన్స మెలె, యేసు అగ్గె సగుమ్జిన్ జబ్బుల్ తిల తెర్బోదల్చ జబ్బుల్ గెచ్చవ చెంగిల్ కెర తిలన్, సగుమ్జిన్ తెర్బోదల్చ బూతల్ దెర్తికయ్ ఉదడ జోవయింక కి చెంగిల్ కెర తిలన్. జేవ్ తెర్బోదల్తె సగుమ్జిన్, జలె, యేసు తెన్ సిస్సుల్ తెన్ బుల్తె తిల. జోవయింతె ఎక్కి కొన్సి మెలె, మగ్గల పట్టుమ్చి మరియ, జాక దెర్ల సత్తు బూతల్చ యేసు ఉదడ తిలన్.

3 అన్నె కొన్స మెలె, హేరోదు రానాచి గేర్క దెకితో కూజా మెలోసాచి తేర్ని యోహాన్న, పడ్డొ సూసన్న చి అన్నె ఒగ్గర్జిన్, జోవయింక తిలి సాంత డబ్బుల్చ యేసుక చి సిస్సుల్చ సావైచన కెర్తె తిల.

ఉంపిలి బీక టాలి

4 ఒగ్గర్జిన్ జనాబ్ కుప్పల్ కుప్పల్ బెర జా, పట్టల్ ఎత్తి గావ్వొ ఎత్తి తెంతొ యేసుతె అయ్లి. జో ఏక్ టాలి జోవయింక సంగిలన్.

* **8:1 8:1** ‘ఎత్తి అదికారుమ్ తిలొ దేముడుచి రాజిమ్’ మెలె, ‘పరలోకుమ్’ ఏక్ అర్దుమ్, గని అన్నె కిచ్చొ మెలె, జో పరలోకుమ్ తెంతొ ఏలువ కెర్తెసి. జో ఏలువ కెర్తెసి మెలె, ఉగుమ్ మార్పుప జలెకయ్ ఎదార్దుమ్ ఈంజ లోకుమ్తె ఏలువ కెరెదె, గని మదెనె కి 1. జోవయింక నంపజల మాన్సుల్చి పెట్టి జో ఏలువ కెర్తయ్, చి 2. జోవయించి అత్తసెక్కి ఈంజ లోకుమ్తె కామ్ కెర్తయ్. † **8:1 8:1** ‘ఎత్తి అదికారుమ్ తిలొ దేముడుచి రాజిమ్చి రిసాచి సుబుమ్ కబుర్’ మెలె, జోవయించి రాజిమ్ పావ జా అయ్లిన్చి కబుర్, మత్తయి 12:28, మార్కు 1:15, పడ్డొ జో పాపల్ చెమించుప కెర్తెసిచి కబుర్, యేసుయి దొర్కు జలొ

రచ్చించుప కెర్తెసా జలిన్చి కబుర్, పడ్డొ పరలోకుమ్తె గెతి అవ్కాసుమ్ జో దొర్కు కెర్తె రచ్చనచి రిసాచి కబుర్. ‡ **8:10 8:10** యెసయా 6:9. § **8:10 8:10** మత్తయి 13:13, 15 దెక. జేవ్ మాన్సుల్ దెకిలెకి సూనె కి జోవయింక ఇస్సుమ్ నాయ్; జోవయించి పెట్టి బేడు బందిల్ రితి, చి “జోవయింక ఇస్సుమ్ నెంజిలె, కిచ్చొక జోవయింక రితి సంగుక?” మెలి రితి సంగితయ్. *

8:11 8:11 నెంజిలె ‘సుబుమ్ కబుర్’; మార్కు 1:14. నెంజిలె ‘యేసుచి బోదన’; మత్తయి 4:17. † **8:12 8:12** మెలె, నయ్తాన్ తెంతొ, పాపుమ్ తెంతొ.

5 “ఎక్కిలొ జోచి బీ ఉంపుక బార్ జలన్. ఉంపితె తతికయ్, సగుమ్ బీ బయిలె వట్టె సేడ్లన్, చి వట్టె జెతన గెతన జా బీ సుదిల, చి పిట్టల్ జేవ్ దాన్ వెంట కా గెల.

6 అన్నె సగుమ్ బీ పత్తురు బుయ్యె సేడ్లన్ చి, తెడి సాల్వ నాయ్ చి రిసా గజ్జల్ జలెకి, డడ్డ మొర గెల.

7 అన్నె సగుమ్ బీ కంట దుబ్బుల్తె సేడ్ల చి, కంట దుబ్బుల్ తెన్ వడ్డితికయ్, కంట మొక్కల్ ఈంజేవ్ మొక్కల్చ పెల గెల్తికయ్, ఈంజేవ్ మొక్కల్ పలితుమ్ దెర్తి నాయ్.

8 అన్నె సగుమ్ బీ చెంగిల్ బుయ్యె సేడ్లన్ చి, వడ్డ పంటొ పికిలె, పుంజెక్ వంతుల్ పలితుమ్ దిలి” మెన సంగ యేసు అన్నె, “సూన్త కండ్డొ తిలస సూన!” మెన కేక్ గలన్.

9 జలె, వేర మాన్సుల్ ఉట్ట గెతికయ్, “ఈంజ టాలిచి అర్దుమ్ కిచ్చొ?” మెన యేసుక సిస్సుల్ పుసిల చి,

10 జోవయింక, “దేముడుచి రాజిమ్చి రిసాచ గుట్టుల్ జాన్సుప మెన, అంచ సిస్సుల్ జతి తుమ్క సెలవ్ దా అస్సి, గని వేర మాన్సుల్చి రిసాయి టాలివొ తెన్ సంగితసి. కిచ్చొక మెలె, పూర్గుమ్ దేముడుచి కొడొతె †రెగిడ్డి రితి.

తుమ్ దెకుతను, గని అర్దుమ్ చినుతు నాయ్, ఆవ్ సంగితి బోదన సూన్తు, గని అర్దుమ్ కెరంతు నాయ్.” §

ఉంపిలి బీచి టాలిచి అర్దుమ్ యేసు సంగిలిసి

11 “జలె, జా టాలిచి అర్దుమ్ సంగిందె. తుమ్ సూన, బీ మెలె, దేముడు దిలి *కోడు.

12 వట్టె సేడ్ల గిడ్డల్చి అర్దుమ్ కిచ్చొ మెలె, సగుమ్జిన్చి బోదన సూన అస్తి, గని నయ్తాన్ జా కెర, జోవయించి పెట్టి తెంతొ జా బోదన ఉర్ల కెర, పచ్చడ్డయ్; ‘నంపజా †రచ్చించుప జతు నాయ్’ మెన.

13 పత్తురు బుయ్యె సేడ్లి బీ జలె, సగుమ్జిన్ సుబుమ్ కబుర్ సూన్సి పొది సర్లసంతోసుమ్ తెన్ సూన్తతి గని, జోవయించి పెట్టి సుబుమ్ కబుర్చ చెర్రో నెంజిలి రిసా గడియ నంపజలి రితి జలెకి, జోవయించి నముకుమ్ పిట్టయ్తి రితి కిచ్చొ జవున్ అల్లర్ అయ్లె, నముకుమ్ ముల దెతతి.

14 జలె, కంట దుబ్బుల్తె సేడ్లి బీ కిచ్చొ మెలె, సగుమ్జిన్ సూన్తతి గని, జేవ్ జోవయించి వట్టె గెతె తా, ఈంజ

లోకుమచి జీవితముచ బాదల్, సొమ్మారుమ్, సుక్కుమ్ జోవయింక పెల్లితయ్ చి, జోవయించి పంటో పికె నాయ్.

15 జలె, చెంగిల్ బుయ్యె ఉంపిలిన్ కిచ్చొ మెలె, సగుమ్జిన్ సుబుమ్మ కబుర్ చెంగిల్ నిదానుమ్ ఫేట్ తెన్ సూన, దెరన, జా కోడ్ రితి నిదానుమ్ ఇండ బాదల్ ఓర్పువ జా ఆత్మపలితుమ్ దెరుల.

దీవు లగితిన్క టాలి కెర యేసు సంగిలి బోదన (మార్కు 4:21-25)

16 “ఏక్ దీవు లంబడ తిలె, జా దీవుక ఆరి లంబడ్లి రితి నాడిచి తెడి జవున్ కో డంకితి నాయ్, మంచుమచి తెడి జవున్ కో లుంకడ్లి నాయ్. జా దీవుకంబుమచి ఉప్పిరి తివుల; ‘ఒత్త తిలె, గెరి జెత ఎత్తిజిన్క, జా ఉజడి కామ్క జెవున్’ మెనయ్.

17 లుంకాడ తిలిసి ఎత్తి పడ్డొక డీసెదె, అప్పె గుట్టు తిలిసి ఎత్తి జాన్తి రితి జా బార్ జయెదె.

18 “జలె, తుమ్ కిసి సూన్తె గే జాగర్ల దెకన. కిచ్చొక మెలె, తిలోసొకః అన్నె దెంక జయెదె, గని నెంజిలోసొ జలె, ‘అంక అన్నె’ మెన జో ఉచరంతిసి కి జోతె తెంతో కడ నెంక జయెదె” మెన యేసు సంగిలన్.

“దేముడు దిలి కోడు నంపజా కో ఇండుల గే జెవ్వి అంచి కుటుంబుమ్” (మత్త 12:46-50; మార్కు 3:31-35)

19 ఏక్ దీసి యేసుచి అయ్యసి జోవయించ కిబావుడ్లివో జోతె అయ్ల, గని యేసు తిలి గదితె ఒగ్గర్జిన్ జనాబ్ బెర తిలి రిసొ, జోతె పాచుక నెత్తిర్ల.

20 జలె, “తుచి అయ్యది, తుచ బావుడ్లివో తుక దెకుక మెన జా కెర, వీదె టీవ అస్తి” మెన కో గే యేసుక సంగిలన్.

21 గని జో జోవయింక, “అంచి అయ్య, అంచ బావుడ్లు కో జవుల మెలె, దేముడుచి కోడు సూన జయ్యి రితి కెర్లసయ్” మెన సంగిలన్.

దోనితె గెతికయ్ ఒగ్గర్ వాదు కెర్లల్ కెర్లిన్క యేసు సేంతుమ్ కెర్లిసి (మత్త 8:23-27; మార్కు 4:35-41)

22 ఏక్ దీసి యేసు జోచ బారజిన్ సిస్సుల్ తెన్ దోనితె వెగ కెర, “గాడు ఒత్తల్తో గెచ్చుమ, జొమ్మ” మెన సంగిలన్, చి జినుక దెర్ల.

23 జలె, నెడిమి గడ్డె పాచిలె యేసు నిజ గెలన్. తెదొడి వాదు పాని గట్టిజ కెర, జేవ్ తిలి పక్క ఉడ్డ అయ్లి చి, కెర్లల్క దోనితె ఒగ్గర్ పాని బెర్లికయ్, ప్రమాదుమ్ జతి.

‡ 8:18 8:18 ఈజ టాలిచి అర్దుమ్ కిచ్చొ మెలె, అంచితె సిక కో బుద్ది దెరనుల గే, జోవయింక అన్నె ఒగ్గరి సికడిందె. గని సూన్లె కి కో బుద్ది ఆనన్ నాయ్ గే, చి అర్దుమ్ కెరన అస్సి మెన జో ఉచర్లె కి, జోవయింక కామ్క నెంజె మెన, జా కి జోతె తెంతో కడ నెంక జయెదె. § 8:19 8:19 మెలె ఎత్తి అదికారుమ్ తిలో దేముడుచి సుద్ది తిలి ఆత్మనెక్తిక మరియ యేసుక అంగి జా పాయిలెకె, పడ్డొ మాములుమ్ మున్నున్ జలో యోసేపు తెన్ అన్నె బోదల్ పాయ తిలి. * 8:24 8:24 నెంజిలె ‘బాబు, బాబు’. † 8:30 8:30 నెంజిలె, ‘జమాన్లుచ ఎత్తయజిన్’. ‡ 8:31 8:31 డీనయ్లిసి 9:1, 20:3 దెక. ఆగి గొయి తెన్ బెదితి మాటు నెంజిలి గొయి, జా.

24 జేవ్, యేసుక పాసి జా “*ప్రబు, ప్రబు, అమ్ మొర గెచ్చుమ్దే!” మెన సిస్సుల్ కేక్ గల ఉట్టయ్తికయ్, జో ఉట్ట వాదుక చి కెర్లల్క గోల కెర్లన్, చి వాదు ముల దిల, చి ఎత్తి అన్నె సేంతుమ్ జా గెలి.

25 తెదొడి యేసు జోవయింక, “తుమ్చి నముకుమ్ కేతె?” మెలన్, చి బియె గెచ్చ, ఆచారిమ్ జా, ఎక్కిలోక ఎక్కిలో కిచ్చొ మెల మెలె, “ఈంజొ కొన్సొ జయెదె, చి వాదుక పానిక ఆడ్లల్ దిలె ఇన్నెచి కోడుక లొంగువ జా కెర్తతి?” మెన జేవ్ ఆచారిమ్ జల.

బూతల్ దెర్లొ మాన్సుక యేసు చెంగిల్ కెర్లిసి (మత్త 8:28-34; మార్కు 5:1-20)

26 జలె, యేసు సిస్సుల్ తెన్ గాడు జిన గలిలయచి మొక్కెచి గాడు ఒత్తల్తోచి గెరాసీనుల్చి ప్రాంతుమ్తె పాచిలె.

27 యేసు దోని తెంతో ఉత్త కెర ఒడ్డుతె టీవితికయ్, జా గవ్విచొ ఎక్కిలో జోవయింక దస్సుల్ జలన్. జో మాన్సుక బూతల్ దెర తిల. ఒగ్గర్ దీసల్ జలి జో కిచ్చొ పాలల్ గలనె నాయ్, చి కేనె జతె తిలన్ మెలె, గెరి నాయ్, గని మెస్సున్తె.

28-29 జో బూతుమ్ జో మాన్సుక ఒగ్గర్ సుట్టు దెర తిలన్, చి అగ్గె గవ్విచ జోక చట్టెలె అత్తిలె గొల్పుల్ బంద రకితె తిల, గని జేవ్ గొల్పుల్ కుట్టవనెదె, చి జో బూతుమ్ జోక బయిలు టాన్తె వెలవ నెయెదె. జలె, బూతుమ్ దెర్లొ జో మాన్సు అప్పె యేసుక దెక కెర, కేక్ గల జోచి చట్టె సెర్ను సేడ్లన్, చి “ఓ బూతుమ్, ఈంజొ మాన్సుచి తెంతో బార్ జా తుయి ఉట్ట గో!” మెన యేసు ఆడ్ల దిలన్. జో మాన్సు గట్టిజ అవాడ్ కెరన, “ఓ యేసుప్రబు, ఎత్తిచి ఉప్పిరి తిలో దేముడుచొ పుత్తుసి తుయి, అంచి తెన్ తుక కిచ్చొ కామ్? అంచి ఉప్పిరి దయ తియ అంక అల్లర్ కెరు నాయ్!” మెన కేక్ గలన్.

30 తెదొడి, “తుచి నావ్ కిచ్చొ?” మెన యేసు బూతుమ్క పుసిలన్, చి † “ఎతివాట్జిన్” మెలన్. కిచ్చొక మెలె, ఒగ్గర్జిన్ బూతల్ జోక దెర తిల.

31 “జా వెల్లి గొయ్యితె అమ్క తెద్రవు నాయ్” మెన యేసుక బతిమాల్పా జా సంగిల.

32 జలె, జా మెట్టయ్ వెల్లి మంద అండ్రుల్ కతె తిల, చి “అండ్రుల్చి తెన్ అమ్ పెసిత్ రితి అమ్క సెలవ్ దె.” మెన యేసుక జేవ్ బూతల్ బతిమాల్పా జా సంగితికయ్, జో సెలవ్ దిలన్.

33 తెదొడి జో మాన్సుచి తెంతో బూతల్ బార్ జా ముల దా, అండ్రుల్ తెన్ పెసిల, చి జా అండ్రుల్ మంద మొత్తుమ్ ఒత్తచి గాటిక నిగ ఉత్త గెచ్చ, గడ్డె సేడ డుజ మొర గెల.

34 జా అండ్రుల్ మంద రకితన జర్గు జలిసి దెక కెర, బమ్మ జా నిగ గెచ్చు, ఒండి పట్టుమ్తెచి సుట్టునంతచ గెచ్చొ ఎత్తితె సూనయ్ల.

35 తెదొడి జర్గు జలిన్చి రుజ్జు సొంత దెకుక మెన ప్రెజల్ ఎత్తి బార్ జల, చి యేసుతె జా కెర కిచ్చొ దెకిల మెలె, బూతల్ ముల దిలో మాన్సు యేసుచి చట్టె వెస అస్సె. పాలల్ గలన తా అప్పె వెర్రి నెంతె మాములుమ్ చెంగిల్ బుద్ది తెన్ అస్సె, మెన దెక కెర, బియఁ గెల.

36 అస్సె, జర్గు జలి పొది దెక తిల మాన్సుల్, జలె, బూతల్ దెర తిలో మాన్సుక యేసు కిసి చెంగిల్ కెర్లొ గే జేవ్ పడ్డె అయ్లసక సంగిల.

37 తెదొడి జేవ్ గెరాసీనుల్చి ప్రాంతుమ్ ఎత్తిచ మాన్సుల్ ఎత్తిజిన్ “అమ్చి దేసిమ్ తుయి ముల దా ఉట్ట గో” మెన యేసుక బతిమాల్పా జా సంగిల. కిచ్చొక మెలె, జోవయింక ఒగ్గర్ బయిమ్ దెర తిలి. జాకయ్ యేసు దోనితె వెగ ఉట్ట గెలన్.

38 బూతల్ ముల దిలో మాన్సు, జో నే గెతె “ఆవ్ కి తుచి తెన్ బెద జెంక అంక సెలవ్ దె” మెన బతిమాల్పా జా సంగిలన్. గని యేసు జోక,

39 “తుచి గెరి గో చి, దేముడు తుక చెంగిల్ కెర ఎదివాట్ దయ కెర్లిసి ఒత్త సంగు” మెన యేసు తెద్రవ దిలన్ చి, జో ఉట్ట గెచ్చు, యేసు జోక ఎదివాట్ దయ కెర్లిన్చి రిసా జా ఒండి పట్టుమ్తె సూనయ్లన్.

యాయీరు మెలో అదికారి యేసుచి తోడు నజీలిసి

40 యేసు గాడు అన్నె జిన్ గట్టుతె పావితికయ్, జో అన్నె జెతిన్క రక తిల చి రిసా ప్రెజల్ ఒగ్గర్జిన్ జోక దస్సుల్ జల.

41 జలె, యాయీరు మెలో ఎక్కిలో ఒత్త అయ్లో. జో యూదుల్చి సబగెర్చొ అదికారి జయెదె. జో యేసుచి చట్టె సెర్ను సేడ్లన్, అన్నె “అమ్చి గెరి జె” మెన యేసుక బతిమాల్పా జా సంగిలన్.

42 కిచ్చొక మెలె, జాక బార వెర్సుల్ వయసుచి ఎక్కి దువిసి, మొరెదె గే జియెదె గే, దస్సి జాఁ తిలి.

జలె, యేసు జో అదికారి తెన్ గెల, చి వట్టె ఒగ్గర్జిన్ ప్రెజల్ జోచి సుట్టునంత తా పెలపులి జతె తిల.

43 జలె, బార వెర్సుల్ తెంతో లోయి గెతి బాద తిలి తేర్బోద ఎక్కి ఒత్త తిలి. కో కి జాచి బాద గెచ్చువుక నెత్త గెచ్చు తిల.

44 జా, జలె, యేసుచి పడ్డె జా పాసి జా, జోచి పాలుమ్చి కొంగు చడిలి చి, బేగి జా లోయి గెతిసి బండు జా గెలి.

45 దస్సి జతికయ్, “కో అంక చడిలన్?” మెన యేసు పుసిలన్ చి, పేతురు యేసుక “గురుబాబు, జనాబ్ ఎత్తి,

తుచి సుట్టునంత బెర పెలపులి జతెచి లయడ్ జతతి, గెద” మెలన్,

46 “గని అంక చడుక మెన, కో గే అంక చడిలన్. అంచి తెంతో ఆత్మసెక్కి బార్ జా గెచ్చు అస్సె.” మెన యేసు సంగిలన్.

47 జలె, జా కెర్లిసి గుట్టు తయె నాయ్, మెన జా తేర్బోద చిన కెర, అద్దుర్ జా యేసుచి చట్టె సెర్ను సేడ్లన్, అన్నె “ ‘అంచి బాద గెస్సు’ మెన తుక చడిలయ్ చి, చడిల్ బేగి చెంగిల్ జలయ్” మెన ఎత్తిజిన్ ప్రెజల్చి మొక్కె ఒప్పన్లన్.

48 ఒప్పన్తికయ్, యేసు జాక, “పుత్త, అంచి ఉప్పిరి తుయి నముకుమ్ తిలి రిసా, తుయి కీచెంగిల్ జా అస్సిసి. సేంతుమ్ తెన్ గో” మెలన్.

49 జా తేర్బోదక యేసు దస్సి సంగితె తిలి పొది, ధువిన్చి రిసా యేసుతె జా తిలో అదికారిచి గెర్చ సగుమ్జిన్ జా కెర, జో అదికారిక “తుచి నాడి మొర గెచ్చు అస్సె. ఈంజొ గురుబాబుక బుకార్లె లాబుమ్ నాయ్. జోక జా బాద పొని” మెన సంగిల.

50 యేసు ఈంజ కొడు సూన, “జేవ్ సంగిలిన్క కాతర్ నే కెర్లె, తుయి బి నాయ్. నంపజా దయిరిమ్ తెన్ తా చి, తుచి నాడి చెంగిల్ జయెదె.” మెలన్.

51 జలె, యాయీరుచి గెరి పావితి, పేతురుక యోహానుక చి యాకోబుక, చి నాడిచి అయ్యున్అబ్బొన్క పిట్టవ, అన్నె కోయి జో తెన్ జా నాడి తిలిన్తె గెచ్చుక యేసు ఒప్పె నాయ్.

52 నాడి మొర గెలి రిసా ఎత్తిజిన్ ఏడుకుడు జతె తిల, గని “తుమ్ ఏడ నాయ్. ఈంజ మొర గెచ్చె నాయ్. జా నిజ అస్సె.” మెన సంగిలన్.

53 జాకయ్ జా నాడి ‘నిజుమి మొర గెచ్చు అస్సె’ మెన జాన కెర, జోక జేవ్ ఆఁస గెల.

54 గని జో, జా నాడి తిలిన్తె గెచ్చు కెర, జాచి ఆతు దెర, “నాడి, ఉట్టు!” మెలన్.

55 జాచి జివ్, జాచి పెట్టి అన్నె అయ్లిచి, బేగి ఉట్టి. తెదొడి “ఇన్నెక తుమ్ కిచ్చొ జలెకు కవడ” మెన యేసు సంగిలన్.

56 జా నాడిచ అయ్యుసిసి బలే ఆచారిమ్ జల, గని “జర్గు జలిసి కక్క సంగ నాయ్” మెన యేసు ఆడ్ర దిలన్.

9

బారజిన్ సిస్సుల్క యేసు అదికారుమ్ దా బులుక తెద్రయ్లిసి

(మత్త 10:5-15; మార్కు 6:7-13)

1 పడ్డె, యేసు జోచ బారజిన్ సిస్సుల్క ఎక్కితె బుకారా కెర, ఎత్తి రగల్ బూతల్క జేవ్ ఉదడ్డి రిసా, జబ్బుల్ జేవ్ గెచ్చయ్తి రిసా జోవయింక సెక్కి అన్నె అదికారుమ్ దిలన్.

§ 8:48 8:48 నెంజెల ‘రచ్చించువ జా అస్సిసి’. * 9:2 9:2 మత్తయి 10:7. యేసు అయ్లిన్ తెన్ జా రాజిమ్ పావ జా అస్సె మెనుక జయెదె. ఈంజ మదెనె డిసి నాయ్, గని జోవయింక నంపజల మాన్సుల్చి పెట్టి జో ఏలువ కెర్తయ్, చి అప్పె కి ఈంజ లోకుమ్తె జోవయించి ఆత్మసెక్కి కామ్ కెర్తయ్. ఉగుమ్ మార్పువ జలె, జోవయించి రాజిమ్ పూర్తి డిసెదె.

2 అన్నె, “దేముడుచి *రాజిమ్ పాచ జా అయ్లినచి రిసా తుమ్ బోదన కెర చి, మాన్సుల్చ జబ్బుల్ గెచ్చవ” మెన తెద్రయ్లన్.

3 తెద్రయ్తె పొది ఇసి మెలన్: “ప్రయాసుమ్చి రిసా కిచ్చొ దెరన గెచ్చ నాయ్. టెక్కి డండో జలెకు, సెంచె జలెకు, అన్నిమ్ జలెకు, డబ్బుల్ జలెకు, దొన్ని సొక్కల్ జలెకు దెరన గెచ్చ నాయ్.

4 పడ్డొ కేన్ గెర్చ తుమ్క టాన్ దెవుల గే, తుమ్ జా గావ్ జవున్ ముల్తె ఎదక, జయ్యి గెరి బస జా తా.

5 అన్నె, కేన్ పట్టుమ్తె జవున్ తుమ్క †మరియాద కెర్తి నాయ్ గే, జా పట్టుమ్ తెంతో బార్ జతె పొది ‘జేవ్ దస్సి జలి రిసా దేముడుచ ‡నెంజితి’ మెన గుర్తుక తుమ్చ చట్టొచి దూడి వండ్లన గెల” మెన యేసు సంగిలన్.

6 తెదొడి జేవ్ బారజిన్ సిస్సుల్ బార్ జా గావ్వొ ఎత్తితె బుల బుల, చి రిసా బోదన కెర్తె తా, మాన్సుల్చ జబ్బుల్ గెచ్చయ్తె తిల.

హేరోదు అదికారి చి ప్రెజల్ సగుమ్జిన్ యేసుచి రిసా ఉచర్తిసి

(మత్త 14:1-12; మార్కు 6:14-29)

7 జా పొది, గలిలయ ప్రాంతమ్తె ఏలుప కెర్తొ అదికారి హేరోదు, యేసు జర్గు కెర్ల కమె ఎత్తిచి రిసా నూన్లి రిసా, కిచ్చొ ఉచరుక నేన కెర బాద సేడ్డొ. కిచ్చొక మెల, యేసుక “యోహాను మొర తా అన్నె జివ్ జా అస్సె” మెన సగుమ్జిన్ సంగితె తిల,

8 గని అన్నె సగుమ్జిన్ “పూర్ణమ్ దేముడుచ కబుర్లు సంగిలో కీవలీయా అన్నె జా అస్సె” మెల, చి అన్నె సగుమ్జిన్ “పూర్ణమ్ దేముడుచి కబుర్లు సంగిలో అన్నెక్లొ మొర, అన్నె జివ్ జా అన్నె జా అస్సె” మెన ఉచర్తె తిల.

9 జా ఎత్తి నూన కెర, హేరోదు, “యోహానుక *బోడి గండల్ కెర గెలయ్, గని ఈంజేవ్ కమె కెర్తొసాచి రిసా ఆవ్ ఒగ్గర్ నూన్తసి. ఈంజొ కొన్సొ జయెదె?” మెన, యేసు తెన్ దస్సుల్ జంక మెన వాటు చజితె తిలొ.

యేసుచ బారజిన్ బారికుల్ అన్నె ఉట్ట అయ్లిన

(మత్త 14:13-21; మార్కు 6:30-44; యోహా 6:1-14)

10 యేసుచ బారజిన్ †బారికుల్, జలె, జేవ్ బులుక మెన జో తెద్రయ్లిన తెంతో అన్నె ఉట్ట జా, జేవ్ జర్గు కెర్తిసి ఎత్తి జోక సంగిల చి, జో వేరతె జోవయింతెన్ గడియ తతి రితి, బేత్తయిదా మెంతి గెవ్వొ జోవయింక కడ నిలన్.

పాచ్ వెయిల్జిన్ మాన్సుల్క యేసు అన్నిమ్ దిలిసి

† 9:5 9:5 నెంజిలె ‘బెదవంతి నాయ్’. ‡ 9:5 9:5 నెంజిలె, ‘జోవయించి కొప్పుమ్ జోవయించి ఉప్పిరి అస్సె’ § 9:8 9:8 ఏలీయా పూర్ణమ్చొ మొరె నాయ్, గని ఎత్తి అదికారుమ్ తిలొ దేముడు జోవయింక దస్సి పరలోకుమ్తె కడ నిలన్. రాసల్ దొన్నిచి పుస్తకుమ్ 2:11. * 9:9 9:9 మత్తయి 14:10, మార్కు 6:27, 28. † 9:10 9:10 లూకా 6:13-16 దెక. సగుమ్తె ‘బారజిన్ సిస్సుల్’ మెన అస్సె. జేవ్ ఈంజేవ్ ఎక్కి. తెలుగు-అపోస్తలు ‡ 9:11 9:11 4:43చి ఎట్టొచి కోడు, చి 9:2 దెక. § 9:12 9:12 నెంజిలె ‘బారికుల్’.

11 జలె, జోవయింక ‘ఒత్త బేత్తయిదాతె గెతయ్’ మెన యేసుచి రిసా ప్రెజల్ జనాబ్ నూన కెర, జోచి పట్టి గెల. జోతె పాచితికయ్, జో జోవయింక పాసి కెరన్లన్ చి, దేముడుచి ‡రాజిమ్చి రిసా జోవయింక బోదన కెర, జోవయింతె జోర్జొల్, బాదల్ తిలసక చెంగిల్ కెర్లన్.

12 జలె, పొద్దు గెచ్చుక దెర్లి చి, యేసుచ బారజిన్ కిసిస్సుల్ జోతె జా కెర, “ఈంజేవ్ జనాబ్ అన్నిమ్ దొర్కు కెరంతి రితి, నిద్ర తతి రిసా ఇన్నెక సుట్టునంతచ గెవ్వొలె తెద్రవు బయిలు దేసిమి అస్సుమ్, గెద. ఇన్నె కిచ్చొయ్ దొర్కు జయె నాయ్” మెల,

13 గని జో జోవయింక, “తుమి జోవయింక కిచ్చొ జవున్ అన్నిమ్ దాస” మెలన్. దస్సి మెంతికయ్, జేవ్ “అమ్చితె ఎక్కి పాచ్ పోడియె చి దొన్ని మొస్స అస్తి. నెంజిలె, అమ్ గెచ్చు ఈంజేవ్ ఎత్తిజిన్క అన్నిమ్ గెన అనుక గె?” మెల.

14 జా జనాబ్తెచ మున్సుబోదల్ కెత్తిజిన్ జవుల మెలె, పాచ్ వెయిల్జిన్. గని యేసు సిస్సుల్క “యాబయ్ జిన్క ఏక్ దవుని, యాబయ్ జిన్క అన్నెక్ దవుని, దస్సి దవుని దవునివొ తెన్ జేవ్ ఎత్తిజిన్క వెనడ” మెన సంగిలన్.

15 జేవ్ దస్సి కెర ప్రెజల్ ఎత్తిజిన్క వెనడ్ల.

16 తెదొడి యేసు జేవ్ పాచ్ పోడియె చి దొన్ని మొస్స దెర, ఆగాసుమ్ పక్క దెక, ‘ఈంజ తూయి దిలది’ మెన దేముడు అబ్బొన్క జోబర సంగ కెర, జేవ్ పోడియె మోడ కెర, “ఎత్తిజిన్క వంట దాస” మెన సిస్సుల్చి అత్తి సొర్పు కెర దిలన్.

17 జేవ్ ఎత్తిజిన్ పేట్ బెర్తు కయ్ల చి, సేంసిల పోడియె గండల్ మొస్స గండల్ బార గంవల్తె బెర్తు జల.

యేసుక ‘క్రీస్తు’ మెలొ జెంక తిలొ రచ్చించుప కెర్తొసా

(మత్త 16:13-19; మార్కు 8:27-29)

18 ఏక్ సుట్టు, యేసు ఎక్కిలొయి ప్రార్దన కెర్తె తిలన్, గని జోచ బారజిన్ సిస్సుల్క ఒత్తయ్ తిల, చి “కొన్సొ మెన ప్రెజల్ అంక సంగితతి?” మెన యేసు సిస్సుల్క పుసిలన్.

19 పుసితికయ్, “బాప్తిసుమ్ దెతె తిలొ యోహాను” మెన సగుమ్జిన్ తుక సంగితతి. అన్నె సగుమ్జిన్ తుక “దేముడుచి కబుర్లు సంగిలో ఏలీయా జా తయెదె” మెంతతి చి, అన్నె సగుమ్జిన్ “దేముడుచి కబుర్లు సంగిలో అన్నెక్లొ పూర్ణమ్చొ జివ్ జా అమ్చితె జా అస్సె.” మెంతతి మెల.

20 జేవ్ దస్సి మెంతికయ్, యేసు “తుమ్, జలె, కొన్సొ మెన అంక సంగితను?” మెన జోవయింక పుసిలన్ చి, “‘తెద్రయిందె’ మెన దేముడు సంగ తిలొ క్రీస్తు మెలొ రచ్చించుప కెర్తొసా తుయి” మెన పేతురు జబాబ్ దిలన్.

21 గని “జా కోడు అన్నె కక్క కి సంగ నాయ్” మెన జోవయింక యేసు కచితుమ్ తెన్ ఆడ్ర దిలన్.

22 అన్నె జో, “అవ్ *మాన్సు జా జెర్మున్ అయ్లోసా ఒగ్గర్ సైమల్ సేడుక అస్సె. †వెల్లెల సుదల్, వెల్లెల పూజర్లు చి, మోసే తెన్ దేముడు దిలి ఆగ్గుల్ సికడ్డన అంక ‘జివున్ నాయ్’ మెనుక అస్సె చి, అవ్ మొరుక అస్సె. గని తిర్రత్త ఆవ్ అన్నె జివ్ జా ఉట్టుక అస్సె” మెన యేసు సంగిలన్.

**దేముడుచి రాజిమ్
(మత్త 16:21-28; మార్కు 8:30-9:1)**

23 తెదొడి ఎత్తిజిన్క యేసు, “కో అంక నంపజా అంచి పట్టి బులుక ఉచరుల గే, జోచి సొంత ఇస్టుమ్ కెరుక ముల దా, రోజుక జోచి సొంత †నిలువ వయన అంచి పట్టి బులుక అస్సె.

24 కిచ్చొక మెలె, జోచి సొంత ప్రానుమ్ రచ్చించుప కెరనుక కోకోర్ప జవుల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి మెన్ను నిదానుమ్ ఇండుల గే, జోచి ప్రానుమ్ రచ్చించుప జయెదె.

25 మెలె, ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన జోచి ప్రానుమ్ పాడ్ కెరన్లెగిన, జేవ్ కిచ్చు జలెగిన, జోక కిచ్చొ లాబుమ్? కిచ్చొ లాబుమ్ నాయ్.

26 కో జలెకు అంచి రిసాచి అంచ కొడొచి రిసా లాజ్ జా సత్తిమ్ నే ఒప్పునుల గే, అవ్ మాన్సు జా జెర్మున్ అయ్లోసా పరలోకుమ్ గెచ్చు అంచి అన్నె అబ్బొసి జలో దేముడుచి దూతల్చి పరలోకుమ్చి ఉజిడిచి గవురుమ్ తెన్ ఈంజ లోకుమ్తె అన్నె ఉత్త జెతి దీసిక, జేవ్ మాన్సుల్క ‘అంచ’ మెన ఒప్పునతి రితి అంచి తెన్ బెదవనుక అంక లాజ్ తయెదె.

27 గని తుమ్క ఆవ్ కిచ్చొ కచితుమ్ సంగితసి మెలె, ఇన్నె టీవ తిలన సగుమ్జిన్ నే మొరై అగై దేముడుచి కిరాజిమ్ దెకుల” మెన యేసు సంగిలన్.

**తీగ్ల సిస్సుల్చి మొక్కె యేసు గడియ పరలోకుమ్చి ఉజిడి జలిసి
(మత్త 17:1-8; మార్కు 9:2-8)**

28 జలె, యేసు ఈంజేవ్ కొడొ సంగ పాసి పాసి అట్టు దీనల్ గెతికయ్, ప్రార్దన కెరుక మెన, పేతురుక యోహానుక చి యాకోబుక వట్టి కడ దెరన, యేసు డొంక తిలి మెట్టుయ్ గెచ్చు వెగిల.

* 9:22 9:22 5:24చి ఎట్టెచి కోడు దెక. † 9:22 9:22 వెల్లెల మాన్సుల్, వెల్లెల పూజర్లు చి మోసే తెన్ దేముడు దిలి ఆగ్గుల్ సికడ్డన మొత్తుము యూదుల్చి వెల్లి సబ వెసితన జవుల. వెల్లెల మాన్సుల్తె పరినయ్యుల్ చి సద్దూకయ్యులు కి తవుల. ‡ 9:23 9:23 ‘నిలువ’ మెన కిచ్చొక సంగితయ్ మెలె, యేసుక విరోదుమ్ సుదల్ కీసి మారుల మెలె, జోవయింక ‘నిలువ’ మెలిన్తె అత్తిలె చట్టెలె మేకుల్ పెట టీవడ మొర్తి రితి ములుల. జోవయింక జా నిలువతె నే టీవడై అగై, వట్టి గెతె తిలి పొది, జోవయింక సొంత నిలువ జోవయింక మార్చిన్తె యేసు గడియ సొంత వయక తియార్ల; యోహాను 19:17. పడ్డె సీమోసు మెలో ఎక్కిలో వయతి రితి తియార్ల; మార్కు 15:21. నిలువ మెలె, డేడిక అన్నెక డేడి రిత్ డండొ అడ్డుమ్ కెర బుయ్యె రోవ టీవడుల. § 9:27 9:27 మత్తయ 16:28, చి మార్కు 9:21 దెక. * 9:29 9:29 మత్తయ 17:2. † 9:31 9:31 ఈంజ లోకుమ్చ మన్సుల్చ పాపల్ వయన గెచ్చుయి రిసా. ‡ 9:31 9:31 మొరై, అన్నె జివ్ జా, పరలోకుమ్తె కి ఉట్టు గెచ్చెదె. § 9:35 9:35 నెంజెలి, ఈంజ మత్తెలి రెగిడ్ల తొలితోచ సగుమ్ పున్కల్తె ‘అవ్ ప్రేమ తిలోసా’ మెన రెగ్గ అస్సె.

29 యేసు ప్రార్దన కెరై తతికయ్, జోచి *మొకొమ్ మార్పుప జలన్ చి, జోచ పాలల్ చొక్కిల జా దగదగాల్పు మెర్పుప జల.

30 అన్నె, ఈందె, దొగుల మున్నుబోదల్ డీస యేసు తెన్ లట్టబ్బ. కొన్న మెలె, పూర్ణమ్చ దేముడుచి కబుర్లు సంగిత మోసే అన్నె ఏలీయా తిల.

31 జేవ్ పరలోకుమ్చి ఉజిడి తెన్ డీసిల చి, కిచ్చొచి రిసా లట్టబ్బై తిల మెలె, దేముడుచి కోడు తెన్ రెగిడ్లి రితి యేసు †మొరుక తిలిన్చి రిసా, జో మొర్తిసి ‡ఉట్టు గెతిసి యెరూసలేమ్తె జర్లు జంక తిలిన్చి రిసా.

32 పేతురు చి జోవయింతెన్ తిల దొగుల గూన్క నిజ తిల గని, అన్నె చెద్దొయి జలె. యేసు పరలోకుమ్చి ఉజిడి జలిసి చి, జో తెన్ జేవ్ దొగుల పూర్ణమ్చ టీవెలిసి దెకిల.

33 జలె, జేవ్ పూర్ణమ్చ యేసుక ములుక దెర్లి పొది పేతురు యేసుక “గురుబాబు, అమ్ ఇన్నె తతిసి చెంగిలి. తుక ఏక్, మోసేక ఏక్, ఏలీయాక ఏక్ మొత్తుమ్ తిన్ని కుడియల్ బందుమ్దె” మెలన్, గని జో కిచ్చొ సంగితయ్ గే నేనె.

34 జలె, జో ఇసి సంగితె తతికయ్, మబ్బు ఏక్ ఉత్త జా జోవయింక డంకిలన్ చి, డంకి జతికయ్, సిస్సుల్ బియఁ గెల.

35 మబ్బు తెంతో “ఈంజొ అంచొ పుత్తు, అవ్ కినిసాన్లసా. ఇన్నెచి కోడు తుమ్ నూన” మెన జా మబ్బు తెంతో అవాడ్ సంగిలిసి నూన్ల.

36 జలె, జా కోడు సంగ కేడయ్లి బేగి, యేసు ఎక్కిలోయి జేవ్ తీగ్ల సిస్సుల్ తెన్ తిలో. జలె, జర్లు జలిన్చి రిసా సిస్సుల్ తుక్లె తా, జేవ్ పొదులె కక్క కి జేవ్ దెకిలిన్చి రిసా ఎక్కి కోడు కి సంగితి నాయ్.

**మోర్చ సేడ్తె తిలో బూతుమ్ దెర్లి నాడుక యేసు చెంగిల్ కెర్లిసి
(మత్త 17:14-18; మార్కు 9:14-27)**

37 అన్నెక దీసి, జేవ్ మెట్టుయ్ తెంతో ఉత్త జెతికయ్. ఒగ్గర్జిన్ జనాబ్ యేసుక దస్సుల్ జల.

38 ఈందె, జేవ్ జనాబ్తెచొ మాన్సు కేక్ గలో. “గురుబాబు, అంక ఎక్కిలో పుత్తు. జోక దెకు, మెన తుక ఆవ్ బతిమాల్ప జతసి!

39 ఈందె, ఏక్ బూతుమ్ జోక దెరుక అలవాట్ అస్సె చి, కెయ దెర్లె, ఈంజొ కేక్ గలన ఒర్చెదె చి, బూతుమ్

జోక పొర్లువ కెరెదె చి, చోడివాట్ ఈంజొ పొగుర్లు బార్ కెరవంతయ్ చి, ఇన్నెక ఒగ్గర్ అల్లర్ కెర పూర్తి అల్పు కెర కస్సనె ముల ఉట్ట గెతయ్.

40 అన్నె బూతుమ్క ఉదడ దాస మెన తుచ సిస్సుల్క బతిమాల్పా జా సంగితె తిలయ్, గని జేవ్ నెతిర్ల” మెన జో మాన్సు యేసుక సంగిలన్.

41 సంగితికయ్, యేసు కిచ్చొ జబాబ్ దిలన్ మెలె, “నముకుమ్ నెంజిలి వెర్రి బుద్దిచి కాలుమ్చ, తుమ్. తుమ్చి తెన్ ఆవ్ కెత్తి దీసల్ తంక? కెత్తి దీసల్ తుమ్క ఆవ్ ఓర్పువ జంక? అల్లె, జో నాడుక అంచితె కడ ఆను!” మెన సంగిలన్.

42 జలె, జో నాడు పాసి జెతె తతికయ్, బూతుమ్ జోక పొర్లు కెరవ గిజ్జిగిజ్జిల్ కెరయ్లన్. గని యేసు జో బూతుమ్క గోల కెర్లన్ చి, జో నాడుక చెంగిల్ కెర, అబ్బొన్చి అత్తి జోక అన్నె సార్లు కెర్లన్,

43 “దేముడు అమ్చొ కెద్ది నెక్తి అదికారుమ్చొ!” మెన ఎత్తిజిన్ జోచి ఆచారిమ్ సంగితె తిల చి, యేసు జర్లు కెర్లన్చి రిసా ఎత్తిజిన్ జోచి ఆచారిమ్ సంగితె తతికయ్, యేసు జోచ బారజిన్ సిస్సుల్క,

44 “ఆవ్ అప్పె సంగితిసి తుమ్ చెంగిల్ సూన. మెలె, ఆవ్ మాన్సు జా జెర్మన్ అయ్లోసాక విరోదుమ్ సుదల్ అన్నె మాన్సుల్చి అత్తి సార్లు కెర దెంక అస్సె” మెన సంగిలన్.

45 గని జా కోడుచి అర్దుమ్ జోవయింక జయె నాయ్. జేవ్ జా అర్దుమ్ నే కెరంతి రితి ఎత్తి అదికారుమ్ తిలొ దేముడు లుంకడ్లన్ చి, యేసుక పుసుక బియ్యం తుక్లె తిల.

“అమ్చితె కో వెల్లో జయెదె?”
(మత్త 18:1-5; మార్కు 9:33-37)

46 జలె, “అమ్చితె కో వెల్లో ముక్కిమ్ జయెదె?” మెన సిస్సుల్ లట్టబన ఇదిల్ గగ్గోల్ జల.

47 గని జోవయించి పెట్టి ఉచర్లిసి యేసు చిన కెర, ఏక్ బాలబోదక దెర, జోచి పక్క టీవడ,

48 జోవయింక ఇసి మెలన్. “* ఈంజొ బాలబోదక జవున్ అంచి నావ్ తెన్ కో జలెకు మరియాద కెరెదె గే, అంకయ్ మరియాద కెర్లి రితి జయెదె. అన్నె, కో జలెకు అంకయ్ మరియాద కెరుల గే, అంక తెద్రయ్లో దేముడు అబ్బొక కి మరియాద కెర్లి రితి జయెదె. తుమ్ ఎత్తిజిన్తె కో దాకు కెరనెదె గే, జొయ్యి వెల్లో జయెదె” మెన జోవయింక సంగిలన్.

* 9:48 9:48 మార్కు 9:37 దెక. † 9:53 9:53 యెరూసలేమ్తె యేసు గెలె కిచ్చొక జేవ్ సమరయ సుదల్ కోపుమ్ జతతి మెలె, “ఎత్తి అదికారుమ్ తిలొ దేముడుక బక్తి కెరుక మెలె, ఎక్కి అమ్చి యెరూసలేమ్చి దేముడుచి గుడితె సత్తిమ్ బక్తి కెరుక జయెదె” మెన యూదుల్ సంగితతి, అన్నె సమరయ సుదల్క నిస్కారుమ్ ఉచర్తతి, చి రిసా జా కోపుమ్క యెరూసలేమ్తె గెతనక మరియాద దెతి నాయ్. ‡ 9:55 9:55 ఈంజ మత్తెలి తొలితె రెగిడ్ల నగుమ్ పుస్తకల్తె ఇసి అస్సె: గోల కెర, తుమ్చి బుద్ది కేనె తెంతొ చి గే నేస్సు. కిచ్చొక మెలె, ఆవ్ మాన్సు జా జెర్మన్ అయ్లోసా కిచ్చొక అయ్లయ్ మెలె, మాన్సుల్చ జీవితముక పాడ కెరుక నాయ్, గని జోవయింక రచ్చించువ కెరుకయ్ అయ్లయ్ మెలన్.

బూతల్క ఉదడ్లొ ఎక్కిలోచి రిసా సిస్సుల్ ఆచారిమ్ జలిసి
(మార్కు 9:38-40)

49 తెదొడి యోహాను మెలొ సిస్సుడు యేసుక కిచ్చొ మెన సంగిలన్ మెలె, “గురుబాబు, ఎక్కిలో తుచి నావ్ తెన్ బూతల్క ఉదడ్లిసి దెకిలమ్. జో అమ్చి తెన్ తుచి పట్టి గెతోసా నెంజెచి రిసా జోక ఆటంకుమ్ కెర్లమ్” మెన సంగిలన్.

50 గని యేసు జోవయింక, “జోక ఆటంకుమ్ కెర నాయ్. కిచ్చొక మెలె, కో తుమ్చి కామ్చి ఉప్పిరి విరోదుమ్ కెరె నాయ్ గే, తుమ్చి పచ్చెన జతోసా జయెదె” మెన యేసు సంగిలన్.

సమరయ ప్రదేసిమ్చి ఏక్ గవ్వొచ మాన్సుల్ యేసుక టాన్ నే దిలిసి

51 ఒత్త తెంతొ కిచ్చొ జర్లు జలి మెలె, యేసు మొర్తి పరలోకుమ్తె అన్నె గెతి సమయమ్ పాసి జా అయ్లి పొది, ‘యెరూసలేమ్తె అప్పె ఉట్ట గెచ్చుక అస్సె’ మెన జాన కెర బార్ జలన్, అన్నె వట్టె గెతె తా,

52 ‘అంక టాన్ తెయార్ కెర్లు’ మెన, సగుమ్జిన్క యేసు పురె కబుర్ తెద్రయ్లన్. దస్సి మెన జేవ్ గెచ్చు, సమరయ సుదల్చి ఏక్ గవ్వొ గెల.

53 గని జా గవ్వొచ ప్రెజల్ యేసుక టాన్ దెంక నెసిల. కిచ్చొక మెలె, † యెరూసలేమ్తె గెచ్చుక జోచి ఉద్దెనుమ్.

54 ‘జా గవ్వొచ దస్సి బుద్ది తెన్ అస్తి’ మెన యేసుచ సిస్సుల్ యాకోబు చి యోహాను దెక కెర, కిచ్చొ మెల మెలె, “ప్రబువ, ఇన్నెక డయ గెలి రితి ఆగాసుమ్ తెంతొ ఆగి అనవుమ గె?” మెన పుసిల.

55 గని యేసు పసుల జోవయింక ‡ గోల కెర్లన్.

56 జోచ సిస్సుల్ తెన్ తోడ్ అయ్ల తెర్బోదల్ తెన్ వట్టె గెచ్చు, అన్నెక్ గవ్వొ గెల.

యేసు తెన్ బుల్తన ఎక్కి మెన్సు తెన్ తంక మెన సంగిలిసి
(మత్త 8:19-22)

57 యేసు సిస్సులీసి తెన్ వట్టె గెతె తతికయ్, ఏక్ మాన్సు యేసుతె జాఁ కెర, “తుయి కేనె గెలె కి, అవ్ కి తుచి తెన్ బెద జెయిందె” మెన యేసుక సంగిలన్ చి,

58 యేసు జోక, “నక్కల్క పార్లు, ఆగాసుమ్చ పిట్టల్క గూడలు, గని ఆవ్ మాన్సు జా జెర్మన్ అయ్లోసాక బోడి వంపొ కెర్లి టాన్ నాయ్” మెన జబాబ్ దిలన్.

59 అన్నెళ్లొక, “అంచి పట్టి జె” మెలన్, గని “ప్రబు, ఆవ్ తుచి తెన్ నే జెతె అగ్గె గెచ్చు కెర, అంచో అబ్బొ మొర గెతె ఎదక జోక పోన కెర, జో మొర్లె జోక రోవ గెలుక మెన, అంక సెలవ్ దె” మెన సంగిలన్.

60 యేసు జోక కిచ్చొ సంగిలన్ మెలె కి, “మొర్లస జోవయించ సొంత మొర్లసక రోవ గెల్లు, గని తుయి కిచ్చొ కెరుక అస్సె మెలె, ‘దేముడుచి రాజిమ్ పాచ జా అస్సె’ మెన, తుయి గెచ్చు, జా రాజిమ్చి రిసాచి సుబుమ్ కబుర్ బోదన కెరు” మెన ఆడ్ర దిలన్.

61 ఒత్త తెంతో అన్నెళ్లొ “తుచి పట్టి జెయిందె, ప్రబు. గని తొలితో ఆవ్ గెరి గెచ్చు, గెర్చ మాన్సుల్క ఆవ్ సంగ జెతి రితి సెలవ్ దె” మెన యేసుక సంగిలన్.

62 జోక యేసు, “కో జలెకు నాజెల్ దెర కేనుక మొదొల్ కెర పడ్డె దెకితె తిలె, జో మాన్సు దేముడుచి రాజిమ్చి కామ్క నెంజె” మెన జబాబ్ దిలన్.

10

డబ్బుయ్జిన్ మాన్సుల్ దొగుల దొగులక యేసు తెద్రయ్లీసి

1 ఇన్నెచి పడ్డె యేసు అన్నె *డబ్బుయ్జిన్ మాన్సుల్క నిసాన, జేవ్ దొగుల దొగుల బార్ జా, జో గెచ్చుక తిలి ఎత్కి పట్టుమ్, ఎత్కి టాన్తె జేవ్ పురె గెచ్చుక మెన జోవయింక తెద్రయ్లీన్.

2 తెద్రయ్లీ పొది జోవయింక, “గట్టిజ పంటో పిక †లాయితి కాలుమ్ జా అస్సె‡. పంటో బలేగ ఒగ్గర్ అస్సె, గని పికిల్ పంటో లాయ ఆన్తి రిసా దస్సి ఆన్త మాన్సుల్ తొక్కిజిన్ అస్తి. జాకయ్, ఈంజ పంటో లాయితనక బార్ కెర తెద్రవు” మెన ఈంజ పంటో పికడ్డె ఎజొమానిక తుమ్ ప్రార్దన కెర.

3 అల్లె, బార్ జా గెచ్చు. ఈందె, నక్కల్చి నెడిమి మెండ పిల్లల్క తెద్రయ్లీ రితి తుమ్క ఆవ్ తెద్రయ్తసి.

4 డబ్బుల్ సెంచె జవున్, జోడ్లు జవున్ దెరన గెచ్చు నాయ్, అన్నె వట్టె సమయుమ్ పాడె కెర్తి రితి కచి తెన్ లట్టబా నాయ్.

5 అన్నె, కేన్ గెరి తుమ్ గెతె గె బేగి, “ఈంజ గేరుచి ఉప్పిరి దేముడుచి సేంతుమ్ తవున్!” మెన తుమ్ సంగ.

6 జా గెరితె సేంతుమ్చొ మాన్సు తిలె, తుమ్ సంగిలి సేంతుమ్ జోవయించి ఉప్పిరి తయెదె. గని దసా మాన్సు నెంజిలె, తుమ్ ఆన్లి సేంతుమ్ ఒత్త నే తయెదె, పసుల తుమ్చితె అన్నె బుల జెయెదె.

* 10:1 10:1 నగుమ్తె ‘డబ్బుయ్దొన్నిజిన్’ మెన రెగ్గ అస్సె. † 10:2 10:2 యోహాను 4:35-38 దెక. ‡ 10:2 10:2 మాన్సుల్ సుబుమ్ కబుర్ సూన అంక నంపజా దేముడుచి రాజిమ్తె బెదితి కాలుమ్ జా అస్సె. § 10:12 10:12 సాదొమ పట్టుమ్ పూర్లుమ్ కిసి నానెనుమ్ జలి మెలె, ఎత్కి అదికారుమ్ తిలొ దేముడు జా పట్టుమ్చి ఉప్పిరి ఆగి సువ దిలన్. ఆదికాండుమ్ 13:12, చి 18:20-19:29. * 10:15 10:15 నెంజెలె ‘ఉప్పిర్ గెచ్చు గవురుమ్ జస్సె గె? నాయ్, గెద, ఎట్టొ గెచ్చు నిస్కారుమ్-జస్సె’ మెలి అర్దుమ్ కి ఉచరుక జయెదె. కపెర్నహూమ్ పట్టుమ్చ మాన్సుల్ ‘ఆమ్ యూదుల్ జమ్దెచి రిసా ఆమ్ చెంగిల్ జమ్దె. తూరు చి సిదోనుచ మాన్సుల్ యూదుల్ నెంజెతిచి రిసా గార్ జవుల’ మెన ఉచరుల. † 10:15 10:15 నెంజెలె ‘వెల్లి ఆగి గొయ్తె’.

7 జలె, కేన్ సేంతుమ్ గెర్చ తుమ్క టాన్ దిలె జయ్యి గెరి తా, వేరచితె ఉట్ట గెచ్చు నాయ్. అన్నె, తుమ్ ఒత్త తిలె పొది, జేవ్ దెతిసి కతె పితె తా జా గెరి తా, కిచ్చొక మెలె కామ్ కెర్తొసా జోచి జితుమ్ నజనుక నాయిమ్. గేర్ గేర్ బుల నాయ్.

8 తుమ్ కేన్ పట్టుమ్ గెలె కి, జేవ్ తుమ్క మరియాద కెర, జేవ్ తుమ్క కిచ్చొ దిలెకి జా కా.

9 అన్నె, జా పట్టుమ్చ జొర్డొల్ జబ్బుల్ తిల మాన్సుల్క చెంగిల్ కెర చి, “దేముడుచి రాజిమ్ తుమ్క పాసి జా అస్సె.” మెన జోవయింక బోదన కెర.

10 గని కేన్ పట్టుమ్ తుమ్క కిచ్చొ మరియాద కెర్తి నాయ్ గే, జా పట్టుమ్చ వీదులె తుమ్ గెచ్చు, ఇసి మెన సంగ.

11 “అమ్చ చట్టెలె లంబిలి తుమ్చి పట్టుమ్చి దూడి కి తుమ్చి బుద్దిచి ఉప్పిరి సాచి తతి రితి పంష్ట దా ఉట్ట గెతసుమ్. గని కిచ్చొ కోడు తుమ్ ఉచరన మెలె, దేముడుచి రాజిమ్ పాసి జా అస్సె మెన తుమ్ సాచి సంగ.

12 తుమ్క ఆవ్ కిచ్చొ మెంతసి మెలె, ఈంజ లోకుమ్చ మాన్సుల్క వెల్లి తీర్పు కెర్తి దీసి అయ్లె, సాదొమ మెలి పూర్లుమ్ కుడ్డె కీనానెనుమ్ జలి పట్టుమ్చి గత్తిచి కంట, తుమ్క మరియాద నే కెర్తి కేన్ పట్టుమ్చచి ఉప్పిర్ ఒగ్గర్ సిచ్చ జయెదె” మెన యేసు సంగిలన్.

తిన్ని పట్టుల్క యేసు గట్టిజ గోల కెర్తిసి (మత్త 11:20-24)

13 “అయ్యో! కొరాజినా పట్టుమ్చ చి బేత్పుయిదా పట్టుమ్చ, తుమ్చి సిచ్చ కెర్తి! తుమ్చి నెడిమి ఆవ్ కెర్ల కమె అమ్చ యూదుల్ నెంజిలె తూరు చి సిదోను మెలె పట్టులె ఆవ్ కెర్తయ్ జలె, జేవ్ పట్టుల్చ మాన్సుల్, జేవ్ కెర్ల పాపల్క రిసా అగ్గెయి దుకుమ్ జా ములిత, జేవ్ కెర్ల పాపల్చి రిసాచి దుకుమ్క బస్తల్ బందన, సార్ గాంసన వెన తా జేవ్ జోవయించి పాపుమ్క దుకుమ్ జలిన్చి రుజ్జుల్ దెకయ్త.

14 గని పూర్లుమ్ జేవ్ తూరు పట్టుమ్చ కి సిదోను పట్టుమ్చ కి ఒగ్గర్ పాపుమ్ కెర్తి తిలె కి, ఈంజ లోకుమ్చ ఎత్కిజిన్క వెల్లి తీర్పు కెర్తి జా దీసి తుమ్క జతి సిచ్చ జేవ్ పట్టుల్ జతి సిచ్చచి కంట ఒగ్గర్ జయెదె.

15 పడ్డె తూమ్, కపెర్నహూమ్ పట్టుమ్చ మాన్సుల్, తుమ్ *పరలోకుమ్తె ఉక్కిల్ జస్సె గె? నాయ్, గెద, తుమ్ †వెల్లి ఆగి గొయ్తె ఉత్త గెతె” మెన యేసు సంగిలన్.

16 తెదొడి యేసు జోచ సిస్సుల్క, “తుమ్చి కోడు కో నూనుల గే, అమ్చి కోడు నూన్లి రితి జయెదె. తుమ్కయ్ కో మరియాద కెర్లి నాయ్ గే, అంకయ్ కి మరియాద నే కెర్లి రితి జయెదె. కో అంకయ్ మరియాద కెర్లి నాయ్ గే, అంక తెద్రయ్లో దేముడు అబ్బొక కి మరియాద నే కెర్లి రితి జతయ్” మెన సంగిలన్.

యేసు గవ్వొలె అగ్గె తెద్రయ్ల డబ్బయ్జిన్ ఉట్ట అయ్లిసి

17 యేసు అగ్గె గవ్వొలె తెద్రయ్ల డబ్బయ్జిన్ జోవయించి కామ్ కెర కేడవన, సర్దనంతోనుమ్ తెన్ యేసుతె అన్నె ఉట్ట జా కెర, “ప్రబు, గెచ్చు మెన బూతల్క తుచి నావ్ తెన్ ఉదల్లె, అమ్చి కోడు జేవ్ కి నూన ఉట్ట గెతతి” మెన జోవయించి సర్ద సంగిల.

18 యేసు జోవయింక, “సయ్తాన్ పరలోకుమ్ తెంతొ, జోచి టాన్ తెంతొ బిజలి మొల్కొలి రితి. డీన సేడ గెలిసి ఆవ్ దెకిలయ్.

19 ఈందె, తుమ్క కెర్లి అదికారుమ్ దా అస్సి మెలె, తుమ్ అయివొక, పొట్టెల్క నుదిలె జవున్ తుమ్ కిచ్చొ ప్రమాదుమ్ జను నాయ్, సయ్తాన్చి సెక్తి తిలస ఎత్కిచి ఉప్పిరి తుమ్ ప్రమాదుమ్ నెంతె జీన్తె. తెద్ది సెక్తి అదికారుమ్ తుమ్క దా అస్సి.

20 గని ముక్కిమ్క తుమ్ కిచ్చొచి రిసా సర్దనంతోనుమ్ తంక మెలె, బూతల్ గట్ట తుమ్క బియఁ ఉట్ట గెతిన్చి రిసా నాయ్, గని ‘ఇన్నె జెవుల’ మెన తుమ్చ నవ్వొ పరలోకుమ్తె రెగిడ్లిన్చి రిసాయి తుమ్ సర్దనంతోనుమ్ జా” మెన యేసు జోవయింక సంగిలన్.

దేముడు అబ్బొన్చి రిసా సిస్సుల్క సంగిలిసి (మత్త 11:25-27; 13:16-17)

21 జయ్యొ గడియయ్ దేముడుచి సుద్ది తిలి ఆత్మసెక్తిక యేసు ఒగ్గర్ సర్దనంతోనుమ్ జా దేముడు అబ్బొన్క కిచ్చొ మెన ప్రార్దన కెర్లన్ మెలె, “పరలోకుమ్క కి బూలోకుమ్క కి అదికారుమ్ తిలో ఓ బ, ‘జానుమ్’ మెన జోవయింక జెవ్వొ గవురుమ్ ఉచరంతసక చి ఒగ్గర్ సదు కెర్లసక ఈంజ జర్గు జతిసి ఎత్కిచి అర్దుమ్ లుంకడ, బాలబోదల్ జల రిత గవురుమ్ నెంజిలసక అర్దుమ్ దెకవ అస్సిసి మెన తుక జోబర, మెన అంచి సర్ద ఆవ్ సంగితసి. తుచి దయతె ఇసి కెర్లది, గెద” మెన ప్రార్దన కెర్లన్.

22 “అంచొ అబ్బొ ఎత్కి అంచి అత్తి సార్పు కెర దా అస్సె. అన్నె, ఆవ్ పుత్తుసి కొన్సొ జయిందె గే అబ్బొ ఎక్కిలోయి జానె, చి అబ్బొ కొన్సొ జయెదె గే, ఎక్కి ఆవ్ పుత్తుసి జాని,

‡ 10:17 10:17 నెంజెల ‘డబ్బయ్దొన్సిజిన్’. జానుమ్. ఈంజ కొడొ ఎత్కి బైబిల్త అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసి పూర్ణుమ్చొచి అత్తి రెగిడ్లి దేముడుచ ఆగ్గల్ మెన రర్దవ అస్సె.

§ 10:26 10:26 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రర్దయ్లి ఆగ్గల్ మెన అమ్ మెన; “అమ్చొ యూదుడు ఎక్కిలో యెరూసలేమ్ తెంతొ యెరికో పట్టుమ్తె గెచ్చుక మెన వట్టె గెతె తిలన్, చి చొర్లచి అత్తి దెర్ను సేడ్లన్క, జేవ్ జోచ పాలల్ కడ కెర జోక

చి అన్నె కక్క జోవయింక దెకయిందె గే, జెవ్వొ జాన్తి” మెన సంగిలన్.

23 తెదొడి యేసు జోచ బారజిన్ సిస్సుల్ తిలి పక్క పనుల ఎక్కి జోవయింకయ్, “తుమ్ దెకితిసి దెకిత మాన్సుల్క చెంగిలి!

24 తుమ్క ఆవ్ కిచ్చొ మెంతసి మెలె, పూర్ణుమ్చక చి కంట తుమ్క ఒగ్గర్ చెంగిలి. కిచ్చొక మెలె, పూర్ణుమ్ దేముడుచ కబుర్లు సంగిలస ఒగ్గర్జిన్, రానల్ ఒగ్గర్జిన్ తుమ్ దెకితిసి దెకుక జేవ్ కోర్ప జలెకి, దెకుక నెత్తిర్ల. తుమ్ నూన్తిసి నూనుక జేవ్ కోర్ప జలెకి, నూనుక నెత్తిర్ల. జా అవ్కానుమ్ జోవయింక దొర్కు జయె నాయ్” మెన యేసు సిస్సుల్క సంగిలన్.

ప్రేమబుద్ధి తిలో సమరయ నుదొచి రిసా సంగిలి టాలి

25 ఏక్ సుట్టు యూదుల్చి మోసి తెన్ దేముడు దిలి ఆగ్గల్ సికడ్డొసా ఎక్కిలో టీఁవ కెర, యేసుక పరిచ్చు కెరుక ఉచర ఇసి పుసిలన్. “గురుబాబు, పరలోకుమ్చి రాజిమ్తె ఆవ్ బెద కెయఁక తెయఁక జితి వాట్ అంక దొర్కు జంక మెలె, ఆవ్ కిచ్చొ కెర్లె జయెదె?” మెన పుసిలన్.

26 జో దస్సి పుసితికయ్, యేసు జోక, “మోసి పూర్ణుమ్చొచి అత్తి దేముడు రెగ్డయ్ల కి ఆగ్గల్తె కిచ్చొ మెన రెగ్ల అస్సె? ఒత్త కిచ్చొ సంగితయ్?” మెన పుసిలన్.

27 జో యేసుక కిచ్చొ జబాబ్ దిలన్ మెలె, *“తుమ్చొ ప్రబు జలొ దేముడుక తుచి ఎత్కి పెట్టి తెన్, తుచి ఎత్కి మెన్సు తెన్, తుచి ఎత్కి సెక్తి ఎత్కి తెన్, తుచి ఎత్కి బుద్ది తెన్ నిదానుమ్ ఎక్కి ప్రేమ కెర్లె తంక. అన్నె,

తుమ్క తుమి కెర్లి ప్రేమ కెరంతను గే, తుచి పక్కయ్చక కి తెద్ది ప్రేమ కెర్లె తంక” నేన దేముడు మోసిచి అత్తి దిలి ఆగ్గల్చి కోడు సంగిలన్.

28 జో దస్సి జబాబ్ దెతికయ్, యేసు జోక “తుయి సరిగా జబాబ్ దిలది. తుయి సంగిల్ రితి కెర్లె తిలె, పరలోకుమ్తె తుయి బెద కెయఁక తెయఁక జితి వాట తుక దొర్కు జయెదె” మెలన్.

29 జో మాన్సు, జలె, జో అన్నె సగుమ్జిన్క చెంగిల్ నే దెకితిన్క, ‘తప్పు నెంజె’ మెన రుజ్జు దెకుక ఉచర, “జలె, అన్నె మాన్సుల్క మెలె, కక్క?” మెన పుసిలన్.

30 పుసితికయ్, యేసు ఏక్ టాలి సంగ జబాబ్ దిలన్. ఇసి మెన; “అమ్చొ యూదుడు ఎక్కిలో యెరూసలేమ్ తెంతొ యెరికో పట్టుమ్తె గెచ్చుక మెన వట్టె గెతె తిలన్, చి చొర్లచి అత్తి దెర్ను సేడ్లన్క, జేవ్ జోచ పాలల్ కడ కెర జోక

పెట గెల కెర, జోక ఇదిలిదిల్ జీవ్ తతె, జో మొర్తి రితి ముల దా ఉట్ట గెల.

31 “జలె, కీసి గే పూజరి ఎక్కిలో జయి వాట్ అయ్లన్, అన్నె, జో మాన్సుక దెక పాసి నే గెతె వాట్చి ఒత్తల్తో పక్క ఉట్ట గెలన్.

32 దస్సి, దేముడుచి గుడితెచి సేవ కెర్తొ †లేవీయుడు ఎక్కిలో కి జా టాన్తె అయ్లె, జో కి దెక కెర, వాట్చి ఒత్తల్తోచి పక్క ఉట్ట గెలన్.

33 “గని ‡సమరయ సుదొ ఎక్కిలో జా వట్టె ప్రయానుమ్ గెతె తా, జో మాన్సు సేడ తిలిన్తె అయ్లన్, అన్నె జోక దెక కెర, యూదుల్ నిస్కారుమ్ దెకితో ఈంజొ సమరయ సుదొ, జో సేడ తిలో యూదుడుచి ఉప్పిరి కన్కారుమ్ జా,

34 పాసి గెచ్చ దెబ్బల్ లయ్లిన్తె తేలు చి ద్రాచ రస్సుమ్ ‘ఓస్తు’ మెన సువ దా, కట్లు బందిలన్ చి, ఇన్నెచి సొంత గాడ్చె చి ఉప్పిరి వెగడ దా, ఏక్ అద్దె గెరితె న కెర, జోవయింక దొర్కు జలి సావైచన కెర్లన్.

35 అన్నెక్ దీసి, దొరత్ చి కూలిచి ఎదిలి డబ్బుల్ జేబితె తెంతో వెంట కెర, జా అద్దె గెరిచొ సావుకరిక దా, ఈంజొ మాన్సుక చెంగిల్ దెకితె తా, ఇన్నెచి రిసా అన్నె కిచ్చొ కర్పు సేడ్తె గే, ఆవ్ అన్నె అయ్లి పొది తుక దెందె మెన ఈంజొ సమరయ సుదొ ఒప్పున్.

36 “జలె, చొర్లతె దెర్ను సేడ్తె జో అన్నెక్లొక ఈంజేవ్ త్రిగ్లతె కేన్ మాన్సు ప్రేమ కెర్లొసా జలొ? కిచ్చొ ఉచర్లసి? సంగు” మెన జోక యేసు పరిచ్చ కెర్లన్.

37 “జోక కన్కారుమ్ దెకిలోసా” మెన జబాబ్ దిలన్చి, రిసా యేసు జోవయింక, “తుయి గో, చి అన్నె మాన్సుల్క దస్సి ప్రేమ కన్కారుమ్ దెకితె తా” మెన సంగిలన్.

మార్త మరియుచి గెరి యేసు గోత్ గెలిసి

38 జలె, యేసు అన్నె సిస్సుల్ వట్టె గెతె తతికయ్, ఏక్ గవ్వి పాచ అయ్లక, మార్త మెలి తేర్బోద జోవయింక మరియుద కెరుక మెన గెరి బుకార్లన్.

39 జాక మరియు మెలి బేన్సి తిలి. జా, జలె, ప్రబుచి చట్టె వెన జో సంగితె తిలి బోదన సూన్తె తిలి.

40 మార్త, కీగెర్చి కామ్ కెరుక మెన బమ్మ జతె తిలి, అన్నె, యేసుతె గెచ్చ కెర, “ప్రబు, ఆవ్ ఎక్కిలి ఈంజ కామ్ కెర్తి రితి అంచి బేని బద్దుకుమ్ జా ములితయ్ మెన దెకిన్ నాయ్ గె? జా అంక తోడు కెర్పు. సంగు” మెలన్.

41 గని ప్రబు జేవేక కిచ్చొ జబాబ్ దిలన్ మెలె, “మార్త, మార్త, తుయి ఒగ్గర్ కమొ తియన బమ్మ జా పంబ్ర జతసి.

† 10:32 10:32 మెలె, లేవీ పూర్ణుమ్చొచి సెకుమ్చొ. ‡ 10:33 10:33 సమరయ సుదలక యూదుల్ నిస్కారుమ్ దెకితతి. § 10:40 10:40 నెంజలె, ‘అన్నిమ్ తెయార్ కెరుక మెన’. * 11:2 11:2 నెంజలె ‘ఓ పరలోకుమ్ తిలో అమ్చొ దేముడు అబ్బొ’. † 11:4 11:4 మెలె, జేవ్ అమ్క పాపుమ్ నే కెర్తి రితి అమ్ దెకితసుమ్.

42 ఎత్కి కమొతె ఎక్కి ముక్కిమ్చి సుబుమ్ కబుర్ సూన్తి జయ్యి వాట మరియు నజన అస్సె, జా జాచి తెంతో కడుక జెయె నాయ్.” మెన జాక సంగిలన్.

11

ప్రార్థన కెర్తిన్చి రిసా యేసు బోదన కెర్లిసి (మత్త 6:9-15)

1 ఏక్ దీసి కిచ్చొ జర్గు జలి మెలె, యేసు ఏక్ టాన్తె ప్రార్థన కెర్తె తిలన్, అన్నె, ప్రార్థన కెర కేడయ్లె, జోచ సిస్సుల్తె ఎక్కిలో జోక “ప్రబు, బాప్తిసుమ్ దెతె తిలో యోహాను జోచ సిస్సుల్క ప్రార్థన కెరుక సికడ్లి రితి, అమ్క కి ప్రార్థన కెరుక తుయి సికడ.” మెన సంగిలన్.

2 దస్సి సంగితికయ్, యేసు జోవయింక ఇసి మెలన్. “తుమ్ ప్రార్థన కెర్తె పొది ఇసి మెన;

*ఓ బ, తుచి నావ్ గవురుమ్ జవున్.

తుచి రాజిమ్ అమ్చితె జెవున్.

3 సరిపుచుప జతి అన్నిమ్ అమ్క రోజుక దొర్కు కెర దె.

4 పడ్డె, అమ్క పాపుమ్ కెర్తె మాన్సుల్క ఆమ్ †చెమించుప కెర్తసుమ్,

చి ఆమ్ కెర్తె పాపల్ తుయి అమ్క చెమించుప కెరు.

అమ్ పాపుమ్ నే కెర్తి రితి,

సయ్తాన్ పాపుమ్ కెరయ్తిన్ తెంతో

దయ కెర అమ్క పిట్టవు,

మెన తూమ్ ప్రార్థన కెర” మెన యేసు సిస్సుల్క సికడ్లన్.

లాజ్ నెంతె పుసితో మింతు (మత్త 7:7-11)

5 తెదొడి జోవయింక అన్నె, “తుమ్తె కో జలెకు ఎక్కిలో మితుసి జలె, అందరె సొక్కుక మింతున్చి గెరి గెచ్చ, ఓ నేస్తము, అంక తిన్ని పొడియె బదుల్ దె.

6 అంచొ అన్నెక్లొ మిత దూరి ప్రయానుమ్ జా అస్సె చి, జోక అన్నిమ్ దెతిసి అమ్తె కిచ్చొ కి నాయ్”.

7 పొడియె సంగుక గెలి గెర్చొ ఎజొమాని, జలె, గేర్ తెడి తెంతో “అంక ఇసి అల్లర్ కెరుక పొని. కెబ్బె డంక అస్సి చి, ఆవ్ అంచ బోదల్ నిజ అస్సుమ్. అప్పె ఉట్ట దెంక నెతిరి” మెనెదె,

8 జలె, తుమ్క ఆవ్ కిచ్చొ మెంతసి మెలె, జో జోక మింతున్ జయెదె చి రిసా నాయ్; మింతున్ జలెకి నెసి, గెద; గని జో లాజ్ నెంతె పుసితె తత్తయ్చి రిసా, జో ఉట్ట కెర జోక దొర్కు జలిసి ఎత్కి దెయెదె.

9 జాకయ్ తుమ్క ఆవ్ కిచ్చొ మెంతసి మెలె, దొర్కు జలిసి ఎత్కి, దేముడుతె తుమ్ సంగితె తా, తుమ్క

దెయెదె. ఎక్కి మెన్సు తెన్ చజిలె దొర్కు జయెదె. కెప్పితె ఉంక్రయ్తె తిలె, తుమ్క కెప్పి ఉగ్గ దెయెదె.

10 కో నజిలె, జోక దొర్కు జయెదె, చజిలోసాక, దొర్కు జయెదె. కెప్పితె కో ఉంక్రయ్తె, జోచి రిసా ఉగ్గ దెయెదె.

11 తుమ్తె సగుమ్జిన్క బోదల్, తుమ్తె కేన్ జవున్ మాన్సుచొ పుత్తుసి †“మొస్సా రోన్ దె” మెలె, అబ్బొసి అయి దెయెదె గె? నాయ్, గెద.

12 నెంజిలె “అండొ దె” మెలె, పొట్టె దెయెదె గె? నాయ్, గెద.

13 జలె, తుమ్ మాన్సుల్ పాపుమ్ సుదల్ తిలె కి తుమ్చ బోదల్క చెంగిల్చి దెంక జాన్సు జలె, పరలోకుమ్ తిలో దేముడు అబ్బొతె కో జోచి సుద్ది తిలి ఆత్మక నజిలె దెయె నాయ్ గె? కచితుమ్ దెయెదె.

14 ఏక్ సుట్టు యేసు గుల్లో కెర్తొ ఏక్ బూతుమ్క ఉదడ్తె తిలో. జో బూతుమ్ జో మాన్సుక ముల దిలె, జో మాన్సు లట్టబుక మొదొల్ కెర్తొ, చి దెకిలె ప్రెజల్ ఒగ్గర్ ఆచారిమ్ జల.

15 గని జోవయింతె సగుమ్జిన్ కిపండితుల్ సూన కెర కిచ్చొ మెల మెలె, “బూతల్క రాన్ జలో *బయెల్లెబూల్చి నావ్ తెన్ ఈంజొ బూతల్క ఉదడ్తయ్” మెన సంగిల.

16 అన్నె సగుమ్జిన్, జోక పరిచ్చ కెరుమ మెన ఉచర, “తుచి సెక్తి పరలోకుమ్చి అదికారుమ్చి తిలె, జా రుజ్జు దెకయ్తె కిచ్చొ జవున్ వెల్లి కామ్ అమ్చి మొక్కె కెరు” మెన సంగిల.

17 గని యేసు జోవయించి మెన్సుతె తిలిసి జానె చి, జోవయింక, “కేన్ జవున్ రాజిమ్తెచ మాన్సుల్ జోవయింక జెవ్వి విరోదుమ్ జా వర్స వర్స జా యుద్దుమ్ కెరన్లె, జా రాజిమ్ పాడ్ జా గెచ్చెదె, అన్నె, †కేన్ గేరు జవున్ మాన్సుల్ వర్స వర్స జా జోవయింక జెవ్వి విరోదుమ్ కెరన్లె, జా గేరు జవున్ సేడెదె.

18 దస్సి, సయ్తాన్ సయ్తాన్చి ఉప్పిరి జొయ్యి యుద్దుమ్ కెర్లె, జోచి రాజిమ్ కిసి టీవెదె, టీవుక నెత్తె మెలె, అంక బయెల్లెబూల్ జోవయింక సాయిమ్ తతికయ్ బూతల్క ఉదడ్తయ్” మెన తుమ్ సంగితసు.

19 జలె, ఏక్ కోడు తుమ్ ఉచర. ఆవ్ ఏక్ వేల బయెల్లెబూల్చి నావ్ తెన్ బూతల్క ఉదడ్తెగిన, తుమ్చయ్ సిన్సుల్ కచి నావ్ తెన్ ఉదడ్తె? బూతల్క ఉదడ్తె తుమ్చయ్ సిన్సుల్ అంచి రిసా తుమ్క తీర్పు సంగుతు!

20 గని దేముడుచి ఆతుక మెలి కోడు జోచి సెక్తికయ్ ఆవ్ బూతల్క ఉదడ గెల్లసి జలె, కచితుమ్ దేముడుచి రాజిమ్ తుమ్తె అప్పె పాచ జా అన్నె.

21 కేన్ జవున్ †బలుమ్ సుదొ, జోచ అయ్దల్ ఎత్తి దెరన జోచి సాంత గేరు రకితె తిలె, కో నే దెర గెతి రితి జోచ

ఆస్తుల్ చెంగిల్ తవుల.

22 గని జోచి కంట ఒగ్గర్ కిసెక్తి తిలోసా అయ్లె, జోక పెట జిన్లె, జో మాన్సు నంప కెర్లె అయ్దల్ ఈంజొ అన్నె సెక్తి తిలోసా వెంట గెల కెర, జోచ ఆస్తుల్ దెర గెచ్చ జోచ మితర్పుల్ తెన్ వాటల్ కెరన వంటనుల.

23 “జలె, కో అంచి పచ్చెన జయె నాయ్ గే, అంక విరోదుమ్ జా అన్నె, చి అంచి రాజిమ్తె జేవ్ బెదితి రితి కో అంచి తెన్ మాన్సుల్క అంచితె ఆనె నాయ్ గే, అంచి మందక చెదుర్పు కెర్తయ్.” మెన యేసు సంగిలన్.

బూతుమ్ ముల దిలి గెరి అన్నె ఒగ్గర్ బూతల్ ఉట్ట జా బన జతిన్చి టాలి (మత్త 12:43-45)

24 తెదొడి యేసు అన్నెక్ కోడు సంగిలో, “ఏక్ మాన్సుక బూతుమ్ దెర తిలెగిన, జో బూతుమ్ జో మాన్సుచి తెంతొ ముల దా తత్తిచి రిసా టాన్ చజన బయిలె గెచ్చ బుల్తె తయెదె, గని టాన్ నే దొర్కు జలి రిసా, ఉచరన, ఆవ్ ముల దిలో గెరి అన్నె గెచ్చిందె మెన

25 జో గెరి అయ్లె, జో గెర్చొ మాన్సు వడ్డవ కెర సుబ్రుమ్ కెర అన్నె మెన దెక కెర

26 గెచ్చ, అన్నె జాచి కంట గర్పు నత్తు బూతల్క పట్టి కడ ఆనెదె చి, జేవ్ ఎత్తి జో మాన్సుతె పెన కెర, ఒత్తయ్ బన జవుల. జాచి రిసా, పట్టొ జో మాన్సుక అగ్గెచి కంట ఒగ్గర్ అల్లర్ జయెదె” మెన యేసు సంగిలన్.

కక్క ఒగ్గర్ చెంగిల్ గే యేసు సంగిలిసి

27 యేసు ఈంజ కొడు సంగితికయ్, కిచ్చొ జర్గు జలి మెలె, ఒత్త బెర తిల జనాబ్తె ఏక్ తేర్బోద “తుక పాయిలి దూదు పియడ్లి అయాద్క ఒగ్గర్ చెంగిలి!” మెన కేక్ గలిలి.

28 జలె, యేసు కిచ్చొ జబాబ్ దిలన్ మెలె, “నాయ్, గెద. కక్క ఒగ్గర్ చెంగిల్ మెలె, దేముడుచి కోడు సూన, జయ్యి కోడ్ రితి ఇండితనకయ్” మెలన్.

జేవ్ యూదుల్చి అన్మానుమ్ బుద్దిచి రిసా సంగిలిసి (మత్త 12:38-42; మార్కు 8:12)

29 అన్నె ఒగ్గర్జిన్ ప్రెజల్ బెర జెతె తతికయ్, యేసు ఇసి మెన బోదన కెరుక దెర్లన్. “ఈంజ కాలుమ్చ మాన్సుల్ ఒగ్గర్ పాపుమ్చ. అంచి అదికారుమ్క రుజ్జు దెకయ్త వెల్లెల కమొక కోర్ప జతసు, గని అంచి అదికారుమ్ దెకయ్తి రిసా ఎక్కిక పిట్టవ, కేన్ వేర కామ్ కెర దెంక నెంజె. కేన్ మెలె, దేముడుచ కబుర్లు సంగిలో యోనా పూర్ణుమ్చొక జర్గు జలిసి జా వెల్లి కామ్ టాలి జయెదె.

‡ 11:11 11:11 నెంజిలె ఈంజ తొలితో రెగిడ్ల సగుమ్ పుస్తకల్తె అన్నె కిచ్చొ బెద తిలి మెలె, “పోడియొ దె” మెలె, అబ్బొసి పత్తురు దెయెదె గె? నెంజిలె “మొస్సా రోన్...”... § 11:15 11:15 మత్తయి 12:24, మార్కు 3:22. * 11:15 11:15 మెలె, సయ్తాన్. † 11:17 11:17 మత్తయి 12:25, మార్కు 3:25. ‡ 11:21 11:21 సయ్తానుక టాలి జయెదె. § 11:22 11:22 యేసుక్రీస్తుక టాలి జయెదె. * 11:30 11:30 యోనా 1-4 అధ్యాయ్.

30 *యోనా పూర్ణమచో తిర్రతి వెల్లో మొస్సాచి పెట్టి తా బార్ జలిసి నీనెవె పట్టుమ్చ మాన్సుల్క ఏక్ రుజ్జు జలి, గెద. దస్సి, మాన్సు జా జెర్మున్ అయలయ్ అంక †జర్గు జలిసి దొర్కు జలి రుజ్జు జయెదె.

31 “జలె, ఈంజ లోకుమ్చ మాన్సుల్క వెల్లి తీర్పు కెర్తి దీసిక, తుమ్ ఈంజ కాలుమ్చ అన్మానుమ్ జల యూదుల్ కి, యోనా బోదన కెర్ల నీనెవె పట్టుమ్చ ప్రెజల్ కి, బెద టీచితె. జేవ్ తుమ్క ‘గర్బ’ మెన రుజ్జు దెకవుల. కిచ్చొక మెలె, జా దేసిమ్చ మాన్సుల్ యోనా కెర్లి బోదన నూన కెర, జేవ్ కెర్ల పాపల్చి రిసా దుకుమ్ జా, మెన్సు మార్పుప, సంపజా బుద్ది జల గని తూమ్ నాయ్. ఈందె, యోహానుచి కంట వెల్లో తుమ్చి నెడిమి ‡అస్సె.

32 పడ్డె, వెల్లి తీర్పు కెర్తి జా దీసిక, కోసేబా మెలి దచ్చెన దేసిమ్చి పూర్ణమ తిలి రాని ఎక్లి, ఈంజ కాలుమ్చ మాన్సుల్ తెన్ టీచ, తుమ్క ‘గర్బ’ మెన రుజ్జు దెకయెదె. కిచ్చొక మెలె, పూర్ణమ జా రాని ‘సొలొమోను రానొ సంగితి బుద్ది సూనిందె’ మెన, ఒగ్గర్ ఒగ్గర్ దూరి తెంతో అయలి. గని, ఈందె, సొలొమోనుచి కంట వెల్లో తుమ్చి నెడిమి *అస్సె.

మాన్సుచి పేట్ తెడి చెంగిల్ ఉజిడి కావలె మెలిసి

33 “కేన్ జవున్ మాన్సు ఏక్ దీవు లంబడ తిలె, జా దీవుక ఆరి లంబడ్లి రితి గెరిచి మజ్గెర్తె కూన్లొ గొయితె జవున్ తితి నాయ్, నాడిచి తెడి జవున్ డంకితి నాయ్, గని గెరి జెత ఎత్కిజిన్క జా ఉజిడి దెతి రిసా దీవుకంబుమ్చి ఉప్పిరి తివుల.

34 “తుమ్చి ఆగ్రుక తుమ్చ అంకివో దీవు జలె, తుమ్చ అంకివో †టేంట తిలె, తుమ్చి ఒండి ఆగ్గ ఉజిడ్ తెన్ తయెదె. గని తుమ్చ అంకివో మయల జా తిలె, తుమ్చి ఆగ్గ ఎత్కి ఆమన్ రితి అందర్ తెన్ తయెదె.

35 జాకయ్, తుమ్చి పెట్టి తిలి ఉజిడి అందర్ నే జతి రితి జాగర్ల తెన్ తా.

36 జలె, తుమ్చి ఒండి అగి కేన్ పక్క కి అందర్ నెంజితె రితి ఉజిడి బెర తిలె, దీవుచి ఉజిడి కీసి తుమ్క ఉజిడి దెకయెదె గే, దస్సి, తుమ్చి పెట్టిచి ఉజిడి సొస్టుమ్ డీసెదె” మెన యేసు సంగిలన్.

పరిసయ్యుల్క చి దేముడుచి కొడొ సికడ్డసక యేసు తీర్పు సంగిలిసి

(మత్త 23:1-36; మార్కు 12:38-40; లూకా 20:45-47)

37 యేసు జా బోదన సంగ కేడయ్తికయ్, పరిసయ్యుడు ఎక్కిలో యేసుక జోచి గెరి అన్నిమ్ కా జె మెన బుకార్లన్, చి యేసు జో తెన్ గెరి గెచ్చ అన్నిమ్ కంక వెసిలన్.

38 జలె, యేసు అత్తో నే దొవన్తె అన్నిమ్ కతయ్ మెన దెక కెర జో ఆచారిమ్ జలొ.

39 యేసుప్రబు జోక, “తుమ్ పరిసయ్యుల్ గలస్సు గిన్నలు ఉప్పిర్ పక్క దోవ, తుమ్చి ఆగ్రుచి ఉప్పిరి దొవన్తను, గని గలసు గిన్న తెడి ముర్కి తా గెలి రితి, తుమ్చి పేట్ తెడి కిచ్చొ అస్సి మెలె, ఆస బుద్ది పాపుమ్బుద్ది బెర అస్సి.

40 తుమ్ బుద్ది నెంజిలన, ఉప్పిరి తిలిసి జెర్మయ్లో దేముడు, తెడి తిలిసి కి జెర్మయ్లోసా నెంజె గె? కెర్లొ, గెద!

41 జలె, తెడి తిలిసి దర్ముమ్క దాస, చి ఈందె, తుమ్క ఎత్కి సుద్ది జయెదె.

42 “అయ్యె తుమ్ పరిసయ్యుల్, తుమ్క సిచ్చ పిట్టె నాయ్! కిచ్చొక మెలె, తుమ్ పొచ్చెన్ రొడ్డతె చెరమల్లితె దసచ ఎత్కితె దెస్సు వంతుల్ కెర, ఏక్ వంతు ఎత్కి అదికారుమ్ తిలొ దేముడుక దెతను. గని మాన్సుల్చి ఉప్పిరి సత్తిమ్ తీర్పు కెరుక చి, దేముడుక ప్రేమ కెరుక తుమ్ పచ్చితను. జలె, కిచ్చొ కిచ్చొ వస్తవల్తె దెస్సు వాటల్ కెర ఏక్ వాట జోవయింక దెంక తప్పు నెంజె, గని ముక్కిమ్క సత్తిమ్ తీర్పు కెర్తె తత్తదు జలె, దేముడుక ప్రేమ కెర్తె తత్తదు జలె, తుమ్క చెంగిల్ తత్తి!

43 “అయ్యె, తుమ్ పరిసయ్యుల్, తుమ్క సిచ్చ పిట్టె నాయ్! కిచ్చొక మెలె, నబ గెరిచ ముక్కిమ్ టాన్లుతె వెసుక కోర్ప జతను, సంతవీదులె ఎత్కిజిన్ అమ్క జొకర్తు మెన కోర్ప జతను.

44 అయ్యె, తుమ్క సిచ్చ పిట్టె నాయ్! తుమ్ కిసి జతను మెలె, బయలె తతా నే డీస్స మెస్సల్ రిత అస్సున్. ‘మెస్సల్’ మెన నేన కెర, మాన్సుల్ ఒత్త సుదితతి” మెన యేసు టాలి కెర సంగిలన్.

45 తెదొడి, మోసే తెన్ దేముడు దిలి ఆగ్రుల్ సికడ్డొసా ఎక్కిలో యేసుక, “గురుబాబు, తుయి ఇసి సంగిలె, ‡అమ్క కి మరియాద కడ్డసి” మెలన్.

46 యేసు జోక కిచ్చొ జబాబ్ దిలన్ మెలె, “తుమ్ మోసే తెన్ దేముడు దిలి ఆగ్రుల్ సికడ్డస, అయ్యె! తుమ్క కి సిచ్చ పిట్టె నాయ్! కిచ్చొక మెలె, కూలి మాన్సుల్క సావుకర్లు కిసి కంది వయితి జాడు వయడుల గే, దస్సి తూమ్, ఒగ్గర్ ఆడ్ర రితి కెరుక అస్సి మెన, ప్రెజల్క జాడు వయడ్లి రితి కెర్తను. గని తుమ్ వయడ్ల జాడ్లు రిత ఆడ్ర సుల్కన కెర్తి

† 11:30 11:30 మెలె, యేసు మొర తిర్రతక అస్సె జివ్ జా ఉట్టితసి. లూకా 23, 24 అద్యయల్. ‡ 11:31 11:31 సొంతచి రిసా సంగితయ్. § 11:32 11:32 సొంతచి రిసా సంగితయ్. * 11:32 11:32 రానల్ మొదొల్ పుస్తకుమ్ 10 అద్యయమ్. † 11:34 11:34 ‘టేంట అంకివో’ మెలె, ఎత్కి అదికారుమ్ తిలొ దేముడు తెన్ యేసు తెన్ బెద జోవయించి బుద్ది దెరన జయ్యి బుద్దిక సత్తిమ్ ఇండితసి. ‡ ‘మయల అంకివో’ మెలె, నయతాన్ తెన్ బెదిలిసి; జోవయించి పొరపాట్ బుద్ది, పాపుమ్బుద్ది దెరన పాపుమ్ ఇండితె తా గార్ జతిసి. † 11:45 11:45 కిచ్చొక మెలె, మోసే తెన్ దేముడు దిలి ఆగ్రుల్ సికడ్డస పరిసయ్యుల్ తెన్ బెదితన జవుల.

రిసా తుమ్చి కిడి ఊంటి కి నే చంపా కెర్తి రితి, జేవ్ ప్రజల్క కన్కారుమ్ జను నాయ్.

47 అయ్యో, తుమ్చి సిచ్చ పిట్టె నాయ్! కిచ్చొక మెలె, తుమ్చ పూర్ణుమ్చ దేముడుచ కబుర్లు సంగిలసక మార్ల, చి జా టాన్క జోవయించి రిసా కీచెంగిల మెస్సున్లు తుమ్ బందయ్తను.

48 దస్సి, జోవయించి పాపుమ్తె తుమ్ బెదిలిన్చి రిసా తుమ్చి ఉప్పిరి జోవయించి ఉప్పిరి సాచుల్ జతసు. కిచ్చొక మెలె, జేవ్ జోవయింక మార్ల, చి తూమ్ జోవయింక మెస్సున్లు బందయ్తను.

49 జాకయ్ దేముడుచి గ్యానుమ్ సంగిలిసి కిచ్చొ మెలె, అంచ కబుర్లు సంగితస సగుమ్జిన్క, అంచ బారికుల్ జతస సగుమ్జిన్క, జా కాలుమ్క అమ్చ యూదుల్తె తెద్రయిందె, చి జా కాలుమ్క అమ్చ యూదుల్ జోవయింతె సగుమ్జిన్క మారుల, సగుమ్జిన్క వేర సిచ్చల్ అల్లర్ కెరుల” మెన అస్సి.

50 దస్సి, బూలోకుమ్ జెర్మయ్లి తెంతో అప్పె ఎద అబ్బదింసి తూమ్ దేముడుచ కబుర్లు సంగిలసచి లోయి సువిలి పాపుమ్ తుమ్ ఈంజయ్ కాలుమ్చ వయితె. కెయ్ తెంతో సూయి జలిసి మెలె,

51 *హేబెలు అస్సొసి అత్య కెర్లి తెంతో మొదొల్ కెర, †దేముడుచి గుడిచి నెడిమి బలి దెతి స్తంబుమ్ సాడి మాన్సుల్ మార్లొ జెకర్యాచి లోయి సువిలి ఎదచి లోయి. నిజుమి తుమ్క ఆవ్ కచితుమ్ సంగితసి, జేవ్ ఎత్కిజిన్చి లోయి సువిలి పాపుమ్చి సిచ్చ ఈంజయ్ కాలుమ్చక లయెదె.

52 “అయ్యో, తుమ్ మోసే తెన్ దేముడు దిలి ఆగ్గుల్ సికడ్తన, తుమ్క సిచ్చ పిట్టె నాయ్! కిచ్చొక మెలె, దేముడు రెగిడ్డిన్తెచి బుద్ది గ్యానుమ్చి ‡గేరుచి తాలల్ కడి తుమ్ దెర గెచ్చు లుంకాడ అస్సున్. తూమ్ కి ఒత్త పచ్చ నాయ్, చి ఒత్త పెనుక గెల అన్నె మాన్సుల్క కి అడ్డు కెర, ఒత్త పెసడ్సు నాయ్” మెన యేసు సంగిలన్.

53 యేసు ఒత్త తెంతో ఉట్ట గెతికయ్, మోసే తెన్ దేముడు దిలి ఆగ్గుల్ సికడ్తన చి పరిసయ్యుల్ జోచి ఉప్పిరి ఒగ్గర్ కుస్సిదుమ్ జా, కిచ్చొ కిచ్చొచి రిసా జోవయింక పుస లట్టబడ పరిచ్చ కెర్లి రితి జతె తిల.

54 ‘ఏక్ వేల జో కిచ్చొ జవున్ తప్పు సంగిలె జోక దెరుక జయెదె’ మెన, రకితె తిల.

12

మాయబుద్దిచి రిసా యేసు సంగిలిసి

§ 11:47 11:47 మత్తయి 23:29-30. * 11:51 11:51 అదికాండుమ్ 4:8. † 11:51 11:51 2 దిన: పుస్తకుమ్ 24:20-22. యేసు నే జెతె అగ్గె ఎత్కి అదికారుమ్ తిలో దేముడుచ కబుర్లు సంగిలో అకర్బొ మాన్సు ఈంజొ జెకర్యా మెలొనా. ‡ 11:52 11:52 మత్తయి రెగిడ్డిన్తె, మత్తయి 23:13తె కిచ్చొ అస్సె మెలె, “మాన్సుల్చి మొక్కె తుమ్ పరలోకుమ్చి కెచ్చివొ డంకితను....”. * 12:1 12:1 నెంజెలె, జా అర్దుమ్క ‘లచ్చజన్ మాన్సుల్’ మెన రెర్ల అస్సె.

1 తెదొడి * ఒగ్గర్ ఒగ్గర్జిన్ మాన్సుల్ యేసుతె బెర జా ఎక్కిలోక ఎక్కిలో సుద సుది జతె తతికయ్, యేసు తొలితొ జోచ సిస్సుల్ తెన్ లట్టబుక దెర, “పరిసయ్యుల్ జేవ్ సొంత సికడ్డి బుద్ది ఇండితి నాయ్. పొడియొ కెర్లి పీట్తె కిసి జా పొడియొ కెర్లిసి ఎత్కిక పులయెదె గే, దస్సి పరిసయ్యుల్ చి జా మాయబుద్ది దెకిలె, అన్నె మాన్సుల్ కి దస్సి మాయబుద్ది సికుక జయెదె. జాకయ్ తుమ్ జాగర్త దెకన.

2 డంకి జలిసి కిచ్చొ జలెకి కెయ్క తెయ్క నే డిస్టె తయె నాయ్. లుంకడ్డిసి కిచ్చొ జలెకి కెయ్క తెయ్క ఎత్కిక నే జాన్తి రితి జెయె నాయ్. ఆకర్క డిసిదె, ఆకర్క జానుప జయెదె.

3 అందర్తె తుమ్ కిచ్చొ సంగ తస్సె గే, ఉజిడ్తె సూనయ్ జయెదె, చి అన్నె కోయి నెంతె కెచ్చివొ డంకన కిచ్చొ కచి కండయి సంగ తస్సె గే, మేడల్చ ఒర్నెల్ తెంతో సాట్టు జయెదె.

కక్క బింక గే నే బింక గే యేసు సంగిలిసి (మత్త 10:28-31)

4 “జాకయ్, గోతుసుదల్, తుమ్క ఆవ్ కిచ్చొ మెంతసి మెలె, తుమ్చి ఆగుక మారుక తెరితసక తుమ్ బియ్ నాయ్. జేవ్చి పడ్డె తుమ్క అన్నె కిచ్చొ అల్లర్ కెరుక నెత్తిర్తి

5 నాయ్, గని తుమ్ కక్క బింక గే తుమ్క సంగితసి. కక్క మెలె, మాన్సుచి ఆగుక మార్లి పడ్డె జోవయింక వెల్లి ఆగి గొయ్తె గల దెతి అదికారుమ్ తిలో దేముడుకయ్ తుమ్ బియ్. తుమ్ జోకయ్ బియ్ మెన తుమ్క ఆవ్ సంగితసి.

6 “ఈంజ దేసిమ్చ మాన్సుల్ పాచ్ గెర్పిట్టల్ దొన్ని కాసుక వికుల, గెద. జలె, దసచక ‘విలువ’ మెన మాన్సుల్ నే దెకిలెకి, దేముడు జోవయింతె ఎక్కిక కి పచ్చె నాయ్.

7 దేముడు తుమ్చి ఉప్పిర్ కెర్లి ప్రేమ అస్సె మెలె, తుమ్చి బోడిచ నెండి వాడల్ ఎత్కి మొత్తుమ్ కెత్తి అస్తి గే, జొయ్యి జానె. జాచి రిసా తుమ్ బియ్ నాయ్. తుమ్ పిట్టల్చి కంట ఒగ్గర్ విలువ అస్సున్.

యేసుక నంపజలెగిన, మాన్సుల్చి మొక్కె ఒప్పున సంగుక అస్సె (మత్త 10:32-33; 12:32; 10:19-20)

8 “జలె, తుమ్క ఆవ్ కిచ్చొ మెంతసి మెలె, కో అంక నంపజా యేసుక్రీస్తుకయ్ ఆవ్ నంపజా అస్సి, మెన మాన్సుల్చి మొక్కె ఒప్పునుల గే, అంచయ్ మాన్సుల్, మెన, పరలోకుమ్తె దేముడుచ దూతల్చి మొక్కె ఆవ్ మాన్సు జా జెర్మన్ అయ్లోసా ఒప్పునిందె.

9 గని, మాన్సుచి మొక్కె కో అంచి రిసా జోచో నెంజి మెనుల గే, దస్సి, ఒత్త దూతల్చి మొక్కె జోవయించి రిసా 'అంచ నెంజితి' మెన ఆవ్ సంగిందె.

10 "అన్నె, కో గడియ బమ్మ జా కెర ఆవ్ మాన్సు జా జెర్మున్ అయ్లోసాచి రిసా అన్మానుమ్ కోడు లట్టబుల గే, జోవయింతె ఎత్తి మాన్సుచి జా పాపుమ్ చెమించుప కెరుక జయెదె. గని, దేముడుచి సుద్ది తిలి ఆత్మక కో దూసుప కెరుల గే, జోవయింతె కచి పాపుమ్ చెమించుప జయె నాయ్.

11 "అన్నె కిచ్చొ మెలె, తుమ్చి ఉప్పిరి కోపుమ్ జల యూదుల్ తుమ్క నిందల్ కెర జోవయించ సబ గెరల్ నెంజితి అదికార్లుచి మొక్కె, నెంజితి రానల్చి మొక్కె పరిచ్చు కెరుల, గని తుమ్ కిసి రుజ్జు నజనుక గే, కిచ్చొ జబాబ్ దెంక గే, తుమ్ కిచ్చొ సంగుక గే, తుమ్ బియఁ నాయ్.

12 కిచ్చొక మెలె, తుమ్ కిచ్చొ సంగుక గే తెదొడక, జయి గడియయ్ పరలోకుమ్చో దేముడుచి సుద్ది తిలి ఆత్మ తుమ్క సికడెదె" మెన యేసు సంగిలన్.

సామ్సారుమ్ జతి ఆసక జితిన్చి రిసా యేసు సంగిలిసి

13 తెదొడి పైజల్తె ఎక్కిలో యేసుక ఇసి మెలన్: "ప్రబు, అమ్చి అస్తితెచి అంచి వాట దెవున్ మెన అంచో అన్నొక సంగు" మెలన్.

14 యేసు, జలె, జోక, "ఓ మాన్సు, జోక చి తుక నెడిమి తిర్పు దెతోసా ఆవ్ జతి రితి, జోచి తుచి అస్తి వంటితి రితి, దస్సి కెరిందె మెన కో అంక టీచ అస్తి?"

15 జనాబ్క అన్నె, "తుమ్ నూన. సామ్సారుమ్ దొర్కు కెరంతి ఆస నే జతి రితి తుమ్ జాగర్త తెన్ తా. మాన్సుక కెద్ది సామ్సారుమ్ తిలె కి, †జోవయించి ఆత్మక జియడ్డిసి నెంజె, జా" మెలన్.

బుద్ది నెంజిలో సామ్సారిచి టాలి

16 తెదొడి జనాబ్క యేసు ఏక్ టాలి సంగిలన్. కిచ్చొ మెలె, "సామ్సారి ఎక్కిలో తిలన్. జోచి బుయింతె చెంగిల్ పంట్లో పికడ్లన్.

17 గట్టిజ పంట్లో పికిత్కయ్ కిచ్చొ ఉచర్లన్ మెలె, 'అంచి దాను సువుక టాన్ దెరె నాయ్. కిన్ కెరుక?' మెన ఉచర, అన్నె,

18 బహో, జాని. దాన్ కొట్టు తియంత గెరల్ సేడవ కెర, అన్నె వెల్లెల్చ బందయిందె, చి ఒత్తయ్ అంచ దాన్ చి అంచి సామన్ ఎత్తి తియనిందె.

19 అన్నె, కిచ్చొ మెననిందె మెలె, తుయి అద్రుస్తుమ్చో! కెత్తిగే వెర్పుల్ తుక కామ్క జెతిసి తుక సామ్సారుమ్ అస్సె. సుక్కుమ్ తెన్ తా, చి ఇస్టుమ్ అయ్లి రితి కా పియ సర్ద కెరంతె తా జి మెననిందె మెలన్.

20 గని దేముడు జో మాన్సుక, 'తుయి బుద్ది నెంజిలో వెరి సుదో, తుచి. జివు ఆజి రాతికయ్ కడ నెంక జెవుల. జయి అంచి ఆడ్ర. తుకయ్ తుయి కుడవన్నిసి తెదొడక కచి జయెదె?' మెలన్.

21 జలె, కో ఈంజ లోకుమ్చి అస్తి కుడవన సామ్సారుమ్ కెరనుల చి దేముడుక పచ్చు జో దెతి ఆత్మ సామ్సారుమ్ జోక తయె నాయ్ గే, జోచి గత్తి ఈంజ టాలిచో మాన్సుచి గత్తి ఎక్కి" మెన యేసు సంగిలన్.

'కిసి జా జిమ్దె?'

(మత్త 6:25-34; 6:19-21)

22 "జాకయ్, ఆవ్ తుమ్క కిచ్చొ మెంతసి మెలె, 'కిచ్చొ కమ్దె గే, కిచ్చొ గలనుమ్దె గే, కిసి జా జిమ్దె' మెన తుమ్చి మెన్సుతె చింత గలన నాయ్.

23 కిచ్చొక మెలె, అన్నిమ్చి కంట మాన్సుచి †ఆత్మ ముక్కిమ్ గెద, పాలల్చి కంట ఆగ్ విలువ గెద?.

24 కాడల్చి రిసా తుమ్ ఉచర. జేవ్ ఉంపితి నాయ్, పంట్లో లాయితి నాయ్, చి జోవయింక కొట్టు నాయ్ కొట్టు గెరల్ నాయ్ జలెకి, దేముడు జోవయింక అన్నిమ్ దెతయ్. జలె, పిట్టల్చి కంట తుమ్ ఒగ్గర్ విలువ అస్సున్ గెద? కచితుమ్ తుమ్క దొర్కు జలిసి జో దొర్కు కెరెదె.

25 పడ్డె, తుమ్చితె కో కెద్ది చింత గలన్లెకి, కిజోచి బత్తుక కొల్తక అత్తెక్ జవున్ ఒగ్గర్ కెరనుక తెరె గే? నెత్తె.

26 దస్సు ఇన ఇదుర్ల కమె జర్లు కెరుక నెతుర్లు జలె, అన్నె తిల కమె జర్లు కెరుక కిచ్చొక బమ్మ జతను?

27 "డొగ్గెచ పుల్లో కిసి వడ్డితతి గే, తుమ్ ఉచర. జేవ్ కామ్ కెర్తి నాయ్, పాలల్ వీంతి నాయ్. జలెకి, ఎదివాట్ సామ్సారుమ్ కలుగు జలో పూర్లుమ్చో రానో సాలొమోను కి ఈంజేవ్ పుల్లోచి రితి నూటి కెరనుక నేన్లొ.

28 తుమ్ తొక్కి నముకుమ్ తిలన, ఏక్ కోడు ఉచర. ఆజి బట్టి వడ్డితి, గని కలిక డయ దెతి వెరి చివ్వర్క దేముడు ఎదిలి నూటి కెర్తయ్, జలె, కచితుమ్ తుమ్ మాన్సుల్క అన్నె చెంగిల్ గలంతిసి దొర్కు కెరెదె.

29 అన్నె, 'అన్నిమ్ కిసి దొర్కు జయెదె, పితిసి కిసి దొర్కు జయెదె?' మెన తుమ్ బమ్మబుద్ది తెన్ తా నాయ్.

30 కిచ్చొక మెలె, ఈంజ లోకుమ్చ ఎత్తి మాన్సుల్ ఇన వస్తువల్ దొర్కు కెరనుక ఆస జతతి. ఇన సామన్లు తుమ్క కి దొర్కు జతతి మెన తుమ్క అబ్బొది జతో దేముడు జానె.

31 తూమ్, కిచ్చొ కెరుక అస్సె మెలె, *జోచి రాజిమ్తె బెద, జోక గవురుమ్ కెర్తి బుద్ది ఇండుక ఆస జా, చి దొర్కు జల ఈంజేవ్ అన్నె వస్తువల్ కి తుమ్క జో దొర్కు కెరెదె.

† 12:15 12:15 నెంజితి, 'జో ఒగ్గర్ దీసల్ జతి రితి నెలవ్ దెతిసి నెంజె'. నెంజితి 'జోవయింక జియడ్డిసి నెంజె, జోవయించి జివితుమ్క నిజమ్ ముక్కిమ్ తిలిసి నెంజె'. ‡ 12:23 12:23 నెంజితి 'జివు'. § 12:25 12:25 నెంజితి, 'జోవయింక దిల దీసల్చి కంట జోవయించి ఇస్టుమ్క అన్నె దీసల్ జింక జయెదె గే?' * 12:31 12:31 నెంజితి 'జోచి రాజిమ్ ఈంజ లోకుమ్తె ఎదార్లుమ్ బార్ జతిన్క ఆస జాచి జోక గవురుమ్ కెర్తి బుద్ది ఇండ'.

పరలోకుమతెచి అత్త సామ్యారుమక ఆన జతిన్చి కోడు

32 “అంచి ఇదిలిసి మంద జల అంక నంపజలన, తుమ్ బియఁ నాయ్. కిచ్చొక మెలె, †జోచి రాజిమతె తుమ్ బెద జో తెన్ ఏలుప కెర్తి రితి అంచో అబ్బొసి జలో దేముడుచి ఉద్దెసుమ్.

33 తుమ్చ ఆస్తుల్ విక గెల కెర, బీద సుదల్క జా డబ్బుల్క తుమ్ దర్ముమ్ దాస. పరలోకుమతెచి పొర్ను నే జతి రగుమ్ పాడ నే జతి రగుమ్ సెంచెల్ కోడు దొర్కు కెరన తా. జేవ్ సెంచెల్తె కిచ్చొ తంక మెలె, పాడ నే జతి, కేన్ చోరు జా దనుమక పాసి గెచ్చుక నెతిర్తి, చి కేన్ కీవు జాక కంక నెతిర్తి.

34 తుమ్ కేన్ లోకుమతె దనుమ్ సంపాదన కెరన తస్తె గే, ఒత్త తిలిన్చి రిసా తుమ్చి పెట్టి ఉచర్తె తస్తె.

యేసు అన్నె ఉత్త జెతిన్క తెయార్ జా (మత్త 24:42-51)

35-36 “పెండ్లి విందు తెంతో బుల జెతో కేన్ ఎజొమాని గెరి అన్నె జెతిన్క జోచ సేవ కెర్తన జోచ పాలల్ చెంగిల్ కుంచన దీవు లంబడ తా, జో అయ్లె కెప్పితె ఉంక్రయ్లె కెప్పి ఉగ్గ దెంక మెన, రకితె తవుల, గెద. తుమ్, జలె, దస్సి తెయార్ జా తా.

37 ఆవ్ ఎజొమాని అన్నె ఉట్ట అయ్లె, అంచ సేవ కెర్తన రితనతె కో చెదొయ్ తా రకితె తిలె, జోవయింకయ్ చెంగిలి. తుమ్క కిచ్చొ కచితుమ్ మెంతసి మెలె, ఆవ్ అంచి పాలుమ్ కుంచన జోవయింక అన్నిమక వెనడ దా, జోవయించి రిసా జొగుడ దెయిందె.

38 అన్నె ఆల్నిమ్ అయ్లి రితి సాక్కుక నెంజిలె కుకుడొ వాంసెనె అయ్లె, తెద్ది గడియ గెలె కి కో దస్సి చెద్దొయ్ తా రకితె తవుల గే, జోవయింక చెంగిలి!

39 “గని ఏక్ టాలి తుమ్ చెంగిల్ అర్దుమ్ కెరన. కిచ్చొ మెలె, కేన్ సమయుమ్క చోరు జెయెదె మెన గెర్చొ ఎజొమాని కో జలెకు జాన్తో జలె, †జో చెదొయి తత్తో, అన్నె చోర్ను జోచి గెరి పెసితి అవ్కాసుమ్ తతి రితి గేర్ ములితో నాయ్.

40 జలె, తుమ్ తెయార్ జా తా రకితె తంక అస్సె. కిచ్చొక మెలె, తుమ్ నే ఉచర్లి సమయుమ్క ఆవ్ మాన్సు జా జెర్కున్ అయ్లొసా అన్నె జెయిందె” మెన యేసు సంగిలన్.

41 తెదొడి పేతురు “ప్రబు, ఈంజ టాలి కీఅమ్కయ్ సంగితసి, గే ఎత్తిజిన్చి రిసా గె?” మెన యేసుక పుసిలన్.

42 యేసుప్రబు జోక, “ప్రయానుమ్ గెచ్చుక మెన ఎజొమాని బార్ జంక జలె, జోచ గేర్చక దెక సమయుమ్క అన్నిమ్ దెంక మెన జో నిసాన నిదానుమ్చొ గొత్తి సుదొ కో జవుల?

43 జో ఎజొమాని అన్నె ఉట్ట అయ్లె, జో గొత్తి సుదొ జో ఎజొమాని తియార్లి కామ్ కెర్తె తిలె, గొత్తి సుదొక చెంగిలి.

44 దస్సి నిదానుమ్ కెర తయెదె మెలె, తుమ్క ఆవ్ కిచ్చొ కచితుమ్ మెంతసి మెలె, జో ఎజొమాని అయ్లె, జోచి అస్తి ఎత్తిచి ఉప్పిరి జో చెంగిల్ రకిలొ గొత్తి సుదొక అదికారుమ్ దెయెదె.

45 గని జో గొత్తి సుదొ ఏక్ వేల ఎజొమాని ఆల్నిమ్ కెర్తయ్ మెన ఉచర, జోచి జత జల అన్నె మున్సుబొద గొత్తి సుదల్క జలెకి, తేర్బొద గొత్తి సుదల్క జలెకి, పెటుక చి కంక పింక సూరు పియ మచ్చుక దెర్లె,

46 ‘ఎజొమాని ఆజి జెయె నాయ్’ మెన గొత్తి సుదొ ఉచర నే రకితె దీన్క, గడియక జో ఎజొమాని ఉట్ట జెయెదె చి, జోక *మొర్తి సిచ్చ తియడ కెర, జోక †నంప నెంజిలన సిచ్చ జతిన్తె జో గలెదె.

47 “జో కిచ్చొ కామ్ కెరుక మెన జోచొ ఎజొమాని తియార్ అస్సె గే కేన్ గొత్తి సుదొ జానె గని జోచొ ఎజొమానిచి ఇస్టుమ్ జర్గు కెరె నాయ్ అన్నె జా జర్గు కెరుక తెయార్ కి జయె నాయ్ గే, జోవయింక ఎజొమాని గట్టిజ పెటయెదె.

48 జోచొ ఎజొమానిచి ఇస్టుమ్ కిచ్చొ జయెదె గే నేన కెర, పెట్టి సిచ్చుచి ఎదిలి తప్పు కేన్ గొత్తి సుదొ కెరెదె గే, జోక ఎజొమాని తొక్కి పెటయెదె. కక్క దేముడు ఒగ్గర్ బుద్ది గే, సెక్కి గే, అస్తి గే, కిచ్చొ గే దా తయెదె గే, జో మాన్సు నిదానుమ్ తెన్ జా వాడిక కెర ప్రబుచి సేవ కెరుక అస్సె, చి అమ్క ‘దస్సి నిదానుమ్ కెర్ల గే, నాయ్ గె’ జో ప్రబు దెకెదె. దస్సి, కచి అత్తి జో ఒగ్గర్ సార్పు కెర తయెదె గే, జో మాన్సు అన్నె లాబుమ్ తెన్ అన్నె దెంక అస్సె.

యేసు అయ్లిసి ఎక్కి సేంతుమ్ కెరయ్తిసి నెంజె (మత్త 10:34-36)

49 “బూలోకుమచి ఉప్పిరి ఆగి సువుక అయ్లయ్, చి జా ఆగి అప్పె లంబ తత్తి జలె ఆవ్ ‘చెంగిల్’ మెన్తయ్.

50 ఏక్ మాన్సు మాములుమ్ పానిచి బాప్తిసుమ్ నజనుక జలె, కీసి పానితె డుజుక తయెదె గే, దస్సి ఆవ్ సైమల్తె డుజ మొరుక అస్సె, చి జా పూర్తి జర్గు జతె ఎదక అంచి పెట్టి కెద్ది బాద సేడ్దసి!

51 “జలె, అంక ‘జో బూలోకుమతె అయ్లిసి మాన్సుల్తె ఎక్కి సేంతుమ్ కెరెదె’ మెన తుమ్ ఉచర్తసు గె? ఆవ్ అయ్లిసి సేంతుమ్ దెయె నాయ్, గని ఆవ్ అయ్లి రిసా మాన్సుల్ జట్లు జవుల.

52 మెలె, అప్పె తెంతో ఎక్కి గెరి పావ్జిన్ తిలె, జట్లు జవుల. దొగుల ఏక్ జట్టు జా, తీగ్ల ఏక్ జట్టు జా, దొగులచి

† 12:32 12:32 లూకా 22:29-30, డీసయ్లిసి 5:10, 20:4, 6 చి తివోతిక రెగిడ్లి దొన్ని నంబర్ ఉత్తమ్ 2:12 దెక. ‡ 12:39 12:39 ఈంజ మత్తెలి తొలితో రెగిడ్ల సగుమ్ పున్కల్తె ‘జో చెద్దొయి తత్తో, అన్నె’ చి కోడు తయె నాయ్. § 12:41 12:41 ఏక్ వేల సిన్సుల్కయ్ పేతురు ఉచర్తయ్. * 12:46 12:46 నెంజిలె టాలిక ‘కండ గెలెదె’. † 12:46 12:46 నెంజిలె ‘నిదానుమ్ నెంజిలనక’.

ఉప్పిరి తీగ్గ విరోదుమ్ జవుల. నెంజిలె, తీగ్గచి ఉప్పిరి దొగుల విరోదుమ్ జవుల.

53 దస్సి, పుత్తున్చి ఉప్పిరి అబ్బొసి విరోదుమ్ జయెదె, అబ్బొన్చి ఉప్పిరి పుత్తుసి విరోదుమ్ జయెదె, దువినచి ఉప్పిరి అయ్యసి చి, అయ్యన్చి ఉప్పిరి దువిసి విరోదుమ్ జవుల, చి నూనున్చి ఉప్పిరి అత్తన్, చి అత్తన్చి ఉప్పిరి నూనుసి విరోదుమ్ జవుల” మెన యేసు సంగిలన్.

కాలుమ్ కీసిచి గే చినితినచి రిసాచి కోడు (మత్త 16:2-3)

54 యేసు ప్రెజల్క, “పడమర పక్క పాని దెతి మబ్బు అయ్లె, ‘పాని పెటదె’, మెన తుమ్ బేగి సంగితను గెద, కచితుమ్ జర్గు జతయ్.

55 పడ్డె దచ్చెన పక్క తెంతో వాదు వీరె, ‘అజి గట్టిజి వేడి కెరెదె’ మెన చినితె చి, దస్సి జర్గు జయెదె గెద?

56 తుమ్ ఉప్రమెన్సుచో మాన్సుల్! తుమ్ చినితినక ‘నేనుమ్’ మెంతను. బుయిక్ చి ఆగాసుమ్క దెకిలె కీసి కెరెదె గే చినితను జలె, ఈంజి కాలుమ్తె జర్గు జతిసి దెకిలె ఈంజి కాలుమ్క కీసిచి గే చినుక నెతుర్పు గె? చినుక తెరితను, గెద” మెన సంగిలన్.

నేరిమ్ వయడ్తెసా తెన్ నేరిమ్ జలోసా సేంతుమ్ కెరెంతినచి టాలి (మత్త 5:25-26)

57 యేసు అన్నె కిచ్చొ బుద్ది జోవయింక ఉచరయ్లన్ మెలె, “తుమ్ కిచ్చొ కెరె చెంగిల్ తయెదె గే, కిచ్చొక చినున్ నాయ్?

58 తుచి తగు నూనితో తీర్పు కెరెంతె గెచ్చుక మెన తుక నేరిమ్ వయడ్తెసాచి తుయి నేరిమ్ జలోసా వట్టి గెతె తిలె పొది, జోవయింతెన్ తుయి సేంతుమ్ జంక దెకను. నెంజిలె, తీర్పు కెరెంతె తుక ఒర్గొడె తిలె, తుచి తగు నూన్లె, తీర్పు కెరెంతె తుక జమాన్లుచి అత్తి సార్ప కెరె దెయెదె, చి జమాన్లు తుక జేల్తె గల దెయెదె.

59 †అవ్ తుమ్క కిచ్చొ మెంతసి మెలె, తుయి తుచి సిచ్చుచి ఆకర్ కాసు ఎద కి తుయి పూర్తి తీర్పుప కెరె ఎదక, తుక ములుక నెంజె.”

13

సగుమ్జిన్ ప్రమాదుమ్ జా మొర్లిన్చి రిసా సంగిలిసి

‡ 12:59 12:59 ఈంజి కోడుచి అర్దుమ్ కిచ్చొ మెలె, 59. తుమ్క అవ్ కిచ్చొ మెంతసి మెలె, తుమ్చి పాపుమ్చి రిసా తుమ్క నేరిమ్ వయడ్తె ఎత్తి అదికారుమ్ తిలో దేముడు తెన్ తుమ్చితె కో మదెనె సేంతుమ్ జను నాయ్ గే, ఈంజి లోకుమ్చ పమాన్సుల్క పరిచ్చు కెరె తీర్పు కెరె పొదిక, సిచ్చు జన్లె, చి జా సిచ్చుచి రునుమ్చి ఆకర్చి కాసు ఎద కి పూర్తి తీర్పుప కెరె ఎదక మెలి కోడు, తుక ములుక నెంజె. జా తీర్పుప కెరెక నెతుర్పుచి రిసా జా సిచ్చు కుట్టె నాయ్. కీసి సేంతుమ్ జంక మెలె, అమ్చి పాపుమ్ ఒప్పన యేసుక నంపజా పాపుమ్బుద్ది ముల జోచి ఇస్టుమ్ కెరక దెరక. * 13:1 13:1 గలిలయుల్ మెలె, గలిలయ ప్రాంతుమ్చ యూదుల్. † 13:1 13:1 గలిలయుల్తె సగుమ్జిన్, బెరె, జోవయింక ఆక్రమించుప కెరె రోమ్ దేసిమ్చి ప్రబుతుమ్క ఉడడుక ఉచర కిచ్చొ కిచ్చొ అల్లర్ కెరె తిల. ఏక్ వేల ఈంజివ్ మాన్సుల్క ‘అమ్చి ప్రబుతుమ్క అల్లర్ దెతతి’ మెన ఉచరయ్ పిలాతు కండయ్లన్. ‡ 13:7 13:7 యేసు తిన్ని వెర్పుల్ బుల బుల బోదన కెరె తిలన్, జోర్జో బాదల్ తిల మాన్సుల్క చెంగిల్ కెరె తిలన్, గని ఒగ్గర్ బుద్ది పలితుమ్ జేవ్ ప్రెజల్తె నే దెర్లి రితి తిలి, చి “తుమ్చి బుద్ది నే మార్పుప జలె, తుమ్చి పాపుమ్ నే ములిలె, చెంగిల్ బుద్దిపంటా నే దెర్లి, తుమ్చి సిచ్చు వయతె” మెన ఈంజి టాలి తెన్ జాగర్ల సంగితయ్.

1 యేసు జేవ్ కొడొ సంగిలి సమయుమ్ తిలన సగుమ్జిన్ జోక, సగుమ్జిన్ గలిలయుల్ మొర్లిన్చి రిసా సంగిల. “జేవ్ *గలిలయుల్ యెరూసలేమ్తె దేముడుక బలి దెతె తతికయ్, పిలాతు అదికారి జోవయింక †కండయ్లన్, చి జేవ్ అర్పితుమ్ దిలిన్తె జోవయించి లోయి కల్యో జలి” మెన సంగిల.

2 యేసు జోవయింక కిచ్చొ జబాబ్ దిలన్ మెలె, “ఈంజివ్ గలిలయుల్ ఇసి మొర గెలి రిసా, తిల గలిలయుల్చి కంట ఒగ్గర్ పాపుమ్చ జవుల మెన ఉచర్తను గె?

3 నాయ్, దస్సి నాయ్, మెన తుమ్క అవ్ సంగితసి. గని తుమ్క కిచ్చొ అవ్ సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె.

4 “నెంజిలె, అమ్చి యెరూసలేమ్తె సిలోయము పక్కచి గోపురుమ్ సేడ గెలి పొది జాచి తెడి తిల అట్టర జిన్ మాన్సుల్ తెడి తా మొర్లిన్క ఉచర్లె, అన్నె యెరూసలేమ్తె తిల మాన్సుల్చి కంట, జేవ్ అన్నె పాపుమ్చ జా తిల మెన తుమ్ ఉచర్తను గె?

5 దస్సి నాయ్ మెన అవ్ సంగితసి గని, తుమ్క ముక్కిమ్క అవ్ కిచ్చొ సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె” మెన యేసు సంగిలన్.

పలితుమ్ నే దిలి అంజూరుమ్ రూక్చి టాలి

6 తెదొడి యేసు ఈంజి టాలి సంగిలన్: “ఎక్కిలోక ఏక్ అంజూరుమ్ రూకు అస్సె. తిన్ని వెర్పుల్ జలి జో రూకు జోచి ద్రాచ తోటతె రోవ అస్సె. జలె, జో ఎజోమాని ‘జా రూక్తె పండ్లు అస్తి కిచ్చొగె. దొన్ని కోడిందె’ మెన రూక్తె అయ్లె, ఎక్కి పండు కి నాయ్.

7 తెదొడి జా తోటక దెకితో గొత్తి నుదొక ఎజోమాని, ఈందె, పండ్లు చజి కోడుక మెన †తిన్ని వెర్పుల్ జలి అవ్ జెతసి, గని కేన్ పండు కి దెరె నాయ్. ఈంజో రూకు కండ గెలు. ఆరి ఈంజి టాన్క పాడ్ కెర్తయ్” మెలన్.

8 జో ఎజోమాని దస్సి సంగితికయ్, జా తోట రకితోసా, “బాబు, ఏనుమ్ జవున్ దెకుమ. రూకుక మత్తి వెగవ కెరె, సాపును నువ దెకిన్దె,

9 పోరుమ్క పండ్లు దెర్లి రూకు తవున్, నే దెర్లి, కండ గెలుమ” మెలన్.

సాగ టీవ్క నెత్తి తేర్బోదక విస్తాంతి దీసి యేసు చెంగిల్ కెర్లిసి

10 జలె, ఏక్ సెలవ్ కడన్లి దీసి, యేసు సబగేరి బోదన కెర్తె తతికయ్,

11 బూతుమ్ చి రిసాచి జబ్బు తిలి తేర్బోద ఒత్త తిలన్. జా తేర్బోదక జా జబ్బు జా అట్టర వెర్చుల్ జా తిలి. జా కుబ్బి జా, వంపొ జా ఎద్దరె టీచేక నెత్తె.

12 జలె, యేసు జాక దెక కెర, “పాసి జె” మెన జాక బుకారా కెర, “అమ్మ, తుచి జబ్బు తెంతో చెంగిల్ జా అస్సిన్” మెన సంగ,

13 జేవేక చడిల్ బేగి సొగ జా టీచిలన్, అన్నె దేముడుచి గవురుమ్ సంగిలన్.

14 గని సెలవ్ కడన్లి దీసి జా తేర్బోదక చెంగిల్ కెర్తి రిసా జేవ్ యూదుల్చి జో సబగేర్చొ అదికారి కోపుమ్ జా, ప్రెజల్క, “సత్తరెక్క మాన్సుల్ కామ్ కెర్తి రిసా సొప్పు పొదుల్ అస్తి. తుమ్క జొర్టెల్ గట్ట తిలె, సెలవ్ కడన్లి దీన్ నాయ్, గని తిల సొప్పు పొదుల్తె జా” మెన సంగిలన్.

15 దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “తుమ్ ఉప్రమెన్సుచ, సెలవ్ దీన్ కామ్ కెరుక నెంజె మెంతను, గని సెలవ్ కడన్లి దీసి కి తుమ్చ బెయిలల్ కి గాడ్డెల్ కి కిచ్చొ సొమ్ముల్ జలెకి యివ జేవ్ పాని పింక మెన గడ్డె ఉదడ నెసు నాయ్ గె? దస్సి కెర్తను, గెద.

16 జలె, ఈంజ తేర్బోద, అమ్ యూదుల్చి అబ్రాహామ్చి సెకుమ్చి తేర్బోదక సయ్తాన్ బంద, అట్టర వెర్చుల్ జా అస్సె. జలె, తుమ్చ సొమ్ముల్క సెలవ్ కడన్లి దీసి యిపుక జతయ్ జలె, సెలవ్ కడన్లి దీసి జలెకి ఈంజ తేర్బోదక బందిలిన్ తెంతో ఇన్నెక యివ, విడ్డల్ కెరుక అన్నె ముక్కిమ్ నాయ్ గె?” మెన యేసు సంగితికయ్,

17 జోక ‘తప్పు కెర్తయ్’ మెన ఉచర్లన్ ఎత్కిజిన్ ‘అమ్చి తప్పు’ మెన లాజ్ జల చి, జోచి అత్తి జర్గు జల వెల్లెల కమొ ఎత్కిచి రిసా ప్రెజల్ ఎత్కి సర్లసంతోనుమ్ జా గెల.

దేముడుచి రాజిమ్క చి సొర్పు గిడ్డక సంగిలి టాలి (మత్త 13:31-33; మార్కు 4:30-32)

18 జో జర్గు కెర్లిన్క ప్రెజల్ దస్సి సర్లసంతోనుమ్ జతికయ్, యేసు, “దేముడుచి రాజిమ్ కిసి జతయ్ గే ఉచరుమ. జాక కిచ్చొ టాలి ఉచరుమ?

19 ఈందె, సొర్పు గిడ్డక జలిన్చి రితి జతయ్. ఏక్ మాన్సు సొర్పు గిడ్డ ఆన, జోచి పట్టయ్ రోవిలన్, చి మొక్క వడ్డ రూకు జా గెలన్, చి జేవేచ కొమ్ముల్తె పిట్టల్ గూడల్ బంద జిల” మెన టీటాలి బెదవ సంగిలన్.

§ 13:19 13:19 ఈంజ టాలిచి అర్దుమ్ కిచ్చొ మెలె, ఎత్కి అదికారుమ్ తిలో దేముడుచి రాజిమి మొదొల్క తొక్కిజిన్ మాన్సుల్ తిలెక, జా రాజిమ్ వడ్డె, చి ఆకరిక ఒగ్గర్జిన్ జేవేతె బెద తవుల, చి పిట్టల్ రూకతె గూడల్ బందిలిన్ అమ్ ఉచర్తి, జా రాజిమ్తె బెదిల మాన్సుల్క జా రాజిమ్ నీడ, చెంగిల్ తతి టాన్, దిలి రితి జయెదె. * 13:20 13:20 ఈంజ టాలితె దొస్సి ఉచరుక జయెదె. తొలితో తొక్కిజిన్ జా రాజిమ్తె తిలె కి, పడ్డొ తిరిమ్ తిరిమ్ ఒగ్గర్జిన్ జా రాజిమ్తె బెదితిసి ఉచరుక జయెదె. పడ్డొ జా ఒస్తు కిసి జా కలొయ్లి పిట్టుచి రూపుమ్ జేవేచి వాసిన గట్టక మార్పుప కెరెదె గే, దస్సి ఎత్కి అదికారుమ్ తిలో దేముడుచి రాజిమ్ ఒగ్గర్జిన్క మార్పుప కెరెదె, చి జోవయించి బుద్ధిక మార్పుప కెర చెంగిల్ కెరెదె. † 13:22 13:22 9:51, 53 దెక. ‡ 13:24 13:24 బారికుల్ 4:12, 16:31, యోహాను 3:15, 16 చి లూకా 10:25-28. § 13:25 13:25 జానె. జేవ్ యూదుల్ జవుల చి “అమ్కయ్ రచ్చన దొర్కు జయెదె. అమి పరలోకుమ్తె గెచ్చుమదే” మెన జేవ్ ఉచర్తి కి జేవ్ నంపనెంజలి రిసా దస్సి సంగితయ్.

పులయ్తి పీట్చి రిసాచి టాలి (మత్త 7:13-14,21-23)

20 ఒత్త తెంతో యేసు అన్నెక్ కోడు పున *కిచ్చొ టాలి సంగిలన్ మెలె, “దేముడుచి రాజిమ్క కిచ్చొ అన్నెక్ టాలి ఉచరుమ?

21 ‘పోడియొ కెర్తి పీట్ ఎత్కి పొంగుప జా పులున్’ మెన, ఏక్ తేర్బోద తీనడి పీట్తె పులయ్తి పీట్ గలిలి. గల జా పాకుమ్ పులితి రితి తియ దిలి, చి జా పులయ్తి పీట్ ఇదిలిదిల్ జలెకి. జా కలొయ్లి పాకుమ్ తిరిమ్ తిరిమ్ పుల, ఒగ్గర్ జా గెలి” మెన సంగిలన్.

పరలోకుమ్తె పెసితి గుమ్ముమ్చి రిసాచి బోదన

22 జేవ్ పొదులె యేసు †యెరూసలేమ్తె గెచ్చుక మెన ప్రయానుమ్ గెతె తిలన్. జలె, వట్టె అన్నె ఒగ్గర్ పట్టలె గవ్విలె గెలన్.

23 జేవ్ పొదులె కో గే జోక కిచ్చొ మెన పుసిలన్ మెలె, “ప్రబు, పాపుమ్ తెంతో రచ్చించుప జా పరలోకుమ్తె గెతన తొక్కిజిన్ జవుల గె?” మెన పుసిలన్, చి యేసు ఒత్త తిలసక,

24 “పరలోకుమ్చి గుమ్ముమ్ ఇర్కు జయెదె. జా ఇర్కు గుమ్ముమె తుమ్ పెసితి రితి ‡దొర్కు జలిసి కెరనుక దెకన. కిచ్చొ మెలె, జా గుమ్ముమె పెసుక మెన ఒగ్గర్జిన్ ఉచర్తి కి, జోవయింతె ఒగ్గర్జిన్ నెత్తిర్తి.”

25 “పరలోకుమ్క ‘గేరు’ మెనుమ. జో గేర్చొ ఎజొమాని ఉట్ట తెదొడ్క కెర్తి డంక దెయెదె, చి తెదొడ్క తుమ్ జా కెర్తి ఇత్తల్తో బయిలె టీచ ఉంక్కుక దెర, ‘ప్రబువ, అమ్క కెర్తి ఉగ్గ దె’ మెంతె, చి జో తుమ్క కిచ్చొ జబాబ్ దెయెదె మెలె, ‘తుమ్ కేనె తెంతొచ గే నేని’ మెనెదె. §

26 తెదొడ్క తూమ్ కిచ్చొ మెంతె మెలె, ‘తుచి తెన్ బెద అన్నిమ్ కయ్లమ్ పిలమ్, చి అమ్చి వీదులె తుయి బోదన కెర్తిదె’ మెంతె,

27 గని జో తుమ్క కిచ్చొ మెనెదె మెలె, ‘నాయ్, తుమ్ కేనె తెంతొ జెతను గే నేని. తుమ్క కచితుమ్ నేని. తుమ్ గార్ కమొ కెర్తసొ అంచి తెంతొ దూరి ఉట్ట గెచ్చొ’ మెనెదె.

28 జలె, అమ్చ పూర్గుల్ అబ్రాహామ్, ఇస్సాకు, యాకోబు తెన్ దేముడుచ కబుర్లు సంగిల పూర్గుమ్చ జోచి రాజిమ్తె పరలోకుమ్తె తిలిసి తుమ్ తెదొడ్క దెకితె, గని తుమి ఒత్త పెసుక సెలవ్ తయె నాయ్ చి రిసా ఏడుకుడు జస్తె, దంతొ చప్లన్తె తస్తె.

29 తుమ్ నంప నెంజిలస ఒత్త పెసున్ నాయ్, గని తూర్పు పక్క తెంతో, పడమర పక్క తెంతో, ఉత్తర పక్క తెంతో చి దచ్చెన పక్క తెంతో యూదుల్ నెంజిల ఒగ్గర్జిన్ మాన్సుల్ జా కెర, దేముడుచి పరలోకుమ్చి రాజిమతె వెస, జో తెన్ అన్నిమ్ కవుల.

30 అన్నె, అప్పె పడ్డో జలస జా అగ్గె జవుల, చి అగ్గె జలస *పడ్డో జవుల” మెన యేసు సంగిలన్.

యేసుక పరిసయ్యుల్ బియడ ఉదడుక ఉచర్రిసి (మత్త 23:37-39)

31 జయి గడియయ్ పరిసయ్యుల్ సగుమ్జిన్ యేసుతె జా కెర జోక కిచ్చో మెల మెలె, “తుయి కేనెగె వేరతె గే. హేరోదు అదికారి తుక మారుక ఉచర్తయ్” మెల.

32 జేవ్ దస్సి మెంతికయ్, యేసు జోవయింక, “తుమ్ గెచ్చు, జో †నక్కొ రితో మాన్సుక కిచ్చో మెన మెలె, ‘ఈందె, ఆజి చి కలిక ఆవ్ బూతల్క ఉదడ్డసి చి, జబ్బుల్ తిల మాన్సుల్క చెంగిల్ కెర్తసి చి, పేర్క అంచి కామ్ పూర్తి జయెదె.

33 జలెకి, ఆజి కలికచి పేర్క ఆవ్ అంచి ప్రయానుమ్ గెచ్చు గెచ్చు యెరూసలేమ్తె పావుక అస్సి. మెలె, దేముడుచ కబుర్లు సంగితో మాన్సు యెరూసలేమ్క వేర టాన్తె మొరుక బెదె నాయ్’ మెన జోక తుమ్ సంగ” మెన పరిసయ్యుల్క యేసు సంగిలన్.

34 తెదొడి యేసు కిసి జలన్ మెలె, “ఓ యెరూసలేమ్చ, అమ్చి యెరూసలేమ్చ మాన్సుల్! అమ్ తెద్రయ్ల కబుర్ ఆన్లసక చి బోదన కెర్లసక పత్రల్ గల మార్తసు! కిచ్చో ప్రమాదుమ్ తుమ్క నే లయితి రితి కుకిడి జాచ పిల్లల్క రెప్పల్ తెడి కిసి ముద్దో కెరన తయెదె గే, దస్సి, ఆవ్ తుమ్క కెత్తిగే నుట్లు ముద్దో కెరంతి రితి తుమ్క చెంగిల్ కెర్తయ్, గని తుమ్ నెసెలదు.

35 ఈందె, తుమ్చి గేర్ కో నెంజితె రితి తుమ్క తూమి ముల దెస్సె. అన్నె అప్పె తెంతో మొదొల్ కెర †‘ప్రబుచి నావ్ తెన్ జెతోసాక జెయ్యి! జెయ్యి!’ మెన తుమ్ కేక్ గల్లి దిసి ఎద అంక అన్నె దెకున్ నాయ్ మెన తుమ్క ఆవ్ కచితుమ్ సంగితసి.” మెన యేసు సంగిలన్.

14

విస్రాంతి దిసి అత్తో చట్టో పుల తిలో మాన్సుక యేసు చెంగిల్ కెర్రిసి

* **13:30 13:30** జా కాలుమ్క అగ్గెచ బూలోకుమ్ గెచ్చవ గెల కెర, ఎత్తి అదికారుమ్ తిలో దేముడు నొవి బూలోకుమ్ జర్లు కెరెదె, చి రచ్చించుప జల పరలోకుమ్చి రాజిమతె బెదిల జోచయ్ జల మాన్సుల్ తెన్ జయెదె, డీనయ్లిసి 21:1-8, చి జోవయింతెన్ బెద విలువ కెరుల, లూకా 22:29-30. † **13:32 13:32** ‘నక్కొ రితో మాన్సు’ మెలె, జోక తెల్విచ మోసిమ్ కెర్ల ఉద్దెసుమ్లు తవుల. పడ్డో యూదుల్ తెన్ ఇదిల్ దకిలో రితో నిస్కారుమ్ జలో మాన్సుక దస్సి మెనుల. జెతె. జో హేరోదు అదికారి జయెదె, గని జోచి బుద్ధికయ్ యేసు దస్సి సంగితయ్. ‡ **13:35 13:35** ఈంజ కోడు ఎత్తి అదికారుమ్ తిలో దేముడు తెద్రయ్తో

రచ్చించుప కెర్రిసాక సంగితి కోడు. * **14:1-2 14:1-2** యూదుల్చి అలవాట్ తెన్, సత్తరెక్క, సత్త దీసల్ కిచ్చో కామ్ నే కెర్తె దేముడుక జోకర్తి దీన్. విస్రాంతి దిసి-తెలుగు. ఎత్తి సెన్వర్ యూదుల్క బక్తి కెర్తి సెలవ్ కడ దిసి జయెదె. జా దిసి జోవయింక నబ గెరలె గెచ్చు, దేముడుచి కొడో నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దిసి ‘కిచ్చో కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్రిన్చి రిసా ఒగ్గర్ అగ్గల్ అయ్యె ఉచర అస్తి. ఇన్నె దొన్ని ఎన్నులు కోడ్లిన్క ‘కామ్’ మెన నింద కెర్తెతి.

1-2 అన్నె కిచ్చో జర్లు జలి మెలె, సెలవ్ *కడ దిసి, అన్నిమ్క మెన యేసు పరిసయ్యుల్చో అదికారి ఎక్కిలోచి గెరి గెచ్చు తతికయ్, అత్తో చట్టో పుల తిలో మాన్సు ఎక్కిలో యేసుచి మొక్కె తిలన్, చి “యేసు కిచ్చో కెరెదె గే దెకుమ” మెన ఒత్త తిల మోసే తెన్ దేముడు దిలి ఆగ్గుల్ సికడ్డన చి పరిసయ్యుల్ చెంగిల్ దెకితె తిల.

3 జలె, జేవ్ పరిసయ్యుల్చి మోసే తెన్ దేముడు దిలి ఆగ్గుల్ సికడ్డనచి మెన్సుతె తిలి జోవయింక ఉప్పిర్చి కుస్సిదుమ్ యేసు జాన కెర, జోవయింక, “సెలవ్ కడన్ల దిసి జబ్బు తిలనక చెంగిల్ కెరుక అమ్చి మోసేచి అత్తి దేముడు దిలి ఆగ్గుల్ తెన్ బెదితయ్ గే నాయ్? గే? తుమ్ సంగ” మెన పుసిలో.

4 గని జేవ్ ఎత్తిజిన్ తుక్లె తిల. తెదొడి జో అత్తో చట్టో పుల తిలో మాన్సుక యేసు పాసి బుకారా కెర జోక చెంగిల్ కెర “గో” మెలన్.

5 తెదొడి యేసు జేవ్ పండితుల్క అన్నె కిచ్చో పుసిలన్ మెలె, “తుమ్చి తెన్ ఎక్కిలోక పుత్తున్ జలెకు, బెయిలు జలెకు తిలె, జో పుత్తున్ జలెకు బెయిలు జలెకు సెలవ్ కడన్ల దిసి కుండితె నేడ తిలె, జయ్యి దిసి, సెలవ్ కడన్ల దిసి జలెకి, బేగి జోక జా కుండితె తెంతో కడె నాయ్ గే? కడెదె, గెద” మెలన్.

6 ‘జో సంగిలిసి సత్తిమ్’ మెన జేవ్ కిచ్చో జబాబ్ దెంక నెత్తిర్.

గవురుమ్ నే ఉచరంతిన్చి రిసాచి కోడు

7 జలె, జా అన్నిమ్క జో పరిసయ్యుడు బుకార్లసతె సగుమ్జిన్ వెసుక మెన గవురుమ్చ టాన్లు నిసాన, యేసు జోవయింక ఇసి మెన ఏక్ టాలి సంగిలన్.

8 “కో జలెకు తుమ్చితె కక్క జలెకు పెండ్లి విందుతె బుకార్లెగిన, విందుతె అయ్లోసా తుయి గవురుమ్చి టాన్తె వెసు నాయ్, నెంజిలె తుచి కంట వెల్లో మాన్సుక జో బుకారా తిలె,

9 జో వెల్లో మాన్సు అయ్లె, తుక చి జోక బుకార్లోసా తుచితె జా కెర ‘ఈంజో మాన్సుక జా టాన్ దేసు’, మెన సంగిలె, తుయి లాజ్ జా ఎత్తిచి కంట తొక్కి గవురుమ్చి టాన్తె తుయి తిరీమ్ గెచ్చు వెసిస్సె.

10 తుక కో జలెకు బుకార్లె, ఎత్తిచి కంట తొక్కి గవురుమ్చి సొడిచి టాన్తె గెచ్చు వెసు, చి తుక బుకార్లోసా

అయ్యలె తుక 'మిత, అన్నె చెంగిల్తె వెను', మెన సంగిలెగిన, జా విందుక తుచి తెన్ వెన తిల ఎత్తిజిన్చి మొక్కె తుయి గవురుమ్ జస్తె.

11 కిచ్చొక మెలె, కో జోవయింక జొయ్యి గవురుమ్ కెరనెదె గే, దేముడు జోవయింక దాక్ కెరెదె, గని కో జోవయింక జొయ్యి దాక్ కెరనెదె గే, దేముడు జోవయింక వెల్లో కెరెదె" మెన యేసు సంగిలన్.

విందుల్తె ముక్కిమ్క కక్క బుకారుక గే యేసు సంగిలసి

12 తెదొడి జా అన్నిమ్క బుకార్లో పరిసయ్యుడుక యేసు, "తుయి మెద్దెన్చి జవున్ సంజెచి జవున్ అన్నిమ్క మాన్సుల్క బుకారుక ఉచర్లె, ముక్కిమ్క మితర్దుల్క జవున్, బావొదింసిక జవున్, తుమ్చ బందుగుల్క జవున్, నెంజిలె అన్నె సొమ్సార్దుక జవున్ బుకారా నాయ్. కిచ్చొక మెలె, †జేవ్ జోవయించ అన్నిమ్తె తుమ్క అన్నె బుకారుక జోవయింక సెక్తి అస్సె, చి తుమ్క జేవ్ బుకార్లె, ఈంజయ్ లోకుమ్తె తుమ్చి బవుమానుమ్ సంగుక తస్తె.

13 తుమ్ ‡అన్నిమ్క మాన్సుల్క బుకారుక మెలె, కక్క బుకారా మెలె, బీద సుదల్క, మొండివొ మాన్సుల్క, సొట్ట మాన్సుల్క, గుడ్డి మాన్సుల్క, చి

14 జేవ్ తుమ్క అన్నె బుకారుక నెతిర్తన్చి రిసా తుమ్క చెంగిల్ జయెదె. కిచ్చొక మెలె, సత్తిమ్ ఇండిలస అన్నె జివ్ జా ఉట్టితి పొదిక తుమ్క ఎత్తి అదికారుమ్ తిలో దేముడు బవుమానుమ్ దెయెదె" మెన యేసు సంగిలన్.

వెల్లి విందుచి టాలి (మత్త 22:1-10)

15 జా అన్నిమ్క యేసు తెన్ వెన తిలో మాన్సు ఎక్కిలో జోచి జా కోడు సూన కెర, "దేముడుచి రాజిమ్తె, కో జో తెన్ బెద అన్నిమ్ కవుల గే, జోక ఒగ్గర్ చెంగిలి!" మెలన్.

16 యేసు టాలిక కిచ్చొ మెలన్ మెలె, "ఏక్ మాన్సు వెల్లి విందు తెయార్ కెర, ఒగ్గర్జిన్క బుకార్లన్.

17 జలె, విందు వంటితి సమయమ్ జా అయ్యలి పొది, 'తుమ్ జా, విందు తెయార్ జా అస్సె' మెన బుకార్ల సుదల్క సంగు మెన ఎజొమాని జోచొ గొత్తి సుదొక తెద్రయ్లన్.

18 గని జేవ్ బుకార్లన్ ఎత్తిజిన్ ఎక్కి బుద్ది జా, జోవయింతె ఎత్తి మాన్సు జెంక నెతిరి మెల. జోవయింతె తొలితొచొ జో ఎజొమాని తెద్రయ్లో గొత్తి సుదొక, 'ఆవ్ బుయి గెన అస్సి, చి జా దెకుక మెన గెచ్చుక అస్సి. దయ కెర, ఆవ్ నే జెతిసి చెమించుప కెరు' మెలన్.

† 14:12 14:12 అన్నెక్ అద్దుమ్ కి ఇన్నె ఉచరుక జయెదె. కిచ్చొ మెలె, తుమ్క అన్నె బుకారుక సెక్తి తిలసక బుకార్లె గని నెంజిల మాన్సుల్క నాయ్ మెలెగిన, జా కిచ్చొ ఒగ్గర్ ప్రేమ? మత్తయి 5:46, 6:2-4, 16-18 దెక. ‡ 14:13 14:13 నెంజిలె 'విందుతె'. § 14:23 14:23 నెంజిలె బెరుక. 24. తుక ఆవ్ కిచ్చొ మెంతసి మెలె, జేవ్ ఆవ్ తొలితొ బుకార్ల మాన్సుల్తె కో కి అంచి విందు కంక ఆవ్ సెలవ్ దెయి నాయ్ మెన జో ఎజొమాని సంగిలో మెన యేసు టాలి సంగిలన్.

* 14:24 14:24 యేసు దెతి విందు కిచ్చొ మెలె, పరలోకుమ్తెచి విందు మెలి రితి మెలె, పరలోకుమ్తె గెచ్చ కెయ్క తెయ్క ఎత్తి అదికారుమ్ తిలో దేముడు తెన్ యేసు తెన్ జితిసి. † 14:27 14:27 లూకా 9:23 దెక, అన్నె జా 9:23 కోడుచి ఎట్టెచి కోడు దెక.

19 పడ్డొ అన్నెక్లో, 'ఆవ్ పావ్ జతల్ బెయిలల్ గెన అస్సి చి, జేవ్ చెంగిల్ కామ్ కెరుల గె నాయ్ మెన దెకుక గెతసి. దయ కెర, ఆవ్ నే జెతిసి చెమించుప కెరు' మెలన్.

20 పడ్డొ అన్నెక్లో, 'ఆవ్ అప్పె పెండ్లి జలయ్ చి, జాకయ్ ఆవ్ జెంక నెతిరి' మెలన్.

21 "జాకయ్ జో గొత్తి సుదొ ఎజొమానితె అన్నె ఉట్ట జా కెర, జేవ్ మాన్సుల్ సంగిలసి ఎత్తి జో ఎజొమానిక సంగిలన్, చి జో ఎజొమాని ఒగ్గర్ కోపుమ్ జా, జోచొ గొత్తి సుదొక, 'తుయి బేగి గో, చి పట్టుమ్చ వీదులె వట్టెలె కో బీద సుదల్, మొండివొ మాన్సుల్, గుడ్డి మాన్సుల్చి సొట్ట మాన్సుల్ తవుల గే, జోవయింక అంచి విందుతె కడ ఆను' మెన సంగిలన్.

22 సంగితికయ్, జో దస్సి గెచ్చ దస్సి కెర, అన్నె జా కెర ఎజొమానిక బాబు, తుయి సంగిల్ రితి కెర అస్సి, గని విందుతె అన్నె టాన్ అస్సి, మెలన్,

23 జో గొత్తి సుదొక ఎజొమాని అన్నె, జలె, పట్టుమ్ ఒత్తల్తెచి బయిలె తుయి గెచ్చ ఒత్తచ వట్టెలె కో తిలె, ఏడెల్చి తెడి కో బిచ్చిమ్ నజితస జవున్ వెన తిలె, జేవ్ ఎత్తిజిన్క బలవంతుమ్ కెర కడ ఆను. అంచొ గేరు కిబెరుకయ్ మెలన్.

24 జలె, తుమ్క ఆవ్ కిచ్చొ మెంతసి మెలె, జేవ్ తొలితొ బుకార్లసచ రిత జల మాన్సుల్తె కో కి *అంచి విందు కంక ఆవ్ సెలవ్ దెయి నాయ్." మెన యేసు సంగిలన్.

యేసు సిస్సుడు జంక కో ఉచర్లె, చెంగిల్ ఉచరుక (మత్త 10:37-38)

25 జలె, యేసు యెరూసలేమ్తె గెతి రిసా వట్టె గెతె తతికయ్, ఒగ్గర్జిన్ జనాబ్ జో తెన్ బెద గెతె తిల. తతికయ్, యేసు వసుల జోవయింక,

26 "అంచొ సిస్సుడు జంక మెన కో అంచితె జెయెదె గే, అంక ప్రేమ కెర్తి కంట అబ్బొస్క, అయ్యస్క, తేర్నిక, జోవయించ బోదల్క, అన్నసీంసిక, అప్పసీంసిక చి జోకయ్ తొక్కి ప్రేమ నే కెర్లె, నెంజె.

27 జోచి సొంత †సిలువ వయన, కో అంచి పట్టి జెయె నాయ్ గే, జో, అంచొ సిస్సుడు జంక నెత్రె.

28 "తుమ్చితె కో జలెకు ఉప్పిర్ గేర్ బందుక ఉచర తిలె, జా పూర్తి బందితి రిసా డబ్బుల్ సరిపుచువ జయెదె గే నాయ్ గే దెకుక మెన, లెక్క కెరుక మెన వెనెదె.

29 జో తొల్లితొ జా లెక్క నే కెర్లె జా ఉప్పిర్ గేర్చి పునాది గలిలె పడ్డొ డబ్బుల్ సరిపుచువ నే జతిన్చి రుజ్జు పడ్డొ

దెక పూర్తి బంధుక నెత్త ముల దిలె, దెకితస ఎత్కిజన్ జోక ఆఁసుల.

30 'ఈంజొ మాన్సు ఉప్పిర్ గేర్ బంధుక మొదొల్ కెర్లొ, గని పూర్తి బంధుక నెత్' మెన ఆఁసుల. ‡

31 "అన్నె, ఏక్ రానొ అన్నెక్లొ రానొచి ఉప్పిరి యుద్దుమ్ కెరుక ఉచర్తయ్. ఈంజొ రానొక దెన్ను వెయిల్జిన్ సయ్న్యమ్ సుదల్ తిలె, గని జో అన్నెక్లొ రానొక విస్సెక్ వెయిల్జిన్ సయ్న్యమ్ సుదల్ తిలె, ఈంజొ తొక్కి సయ్న్యమ్ తిలొసొ తొలితొ వెన, 'జో అన్నెక్లొచి ఉప్పిరి జీనుక సెక్తి అస్సె గే, నాయ్ గే' మెన ఉచరెదె.

32 'జీనుక సెక్తి నాయ్' మెన డీసిలె, ఈంజేవ్ జోక దూరి తా పాసి నే జతె అగ్గె, 'అమ్ కట్టు జమ. తుమ్క అమ్ కిచ్చొ దెంక గే తుమ్ సంగ' మెన ఈంజొ రానొ జో అన్నెక్లొ రానొక కబుర్ తెద్రయెదె. §

33 "దస్సి, తుమ్చితె కో జోక తిలిసి ఎత్కి ములె నాయ్ గే, అంచొ సిస్సుడు జంక నెత్తె" మెన యేసు సంగిలన్.

కామ్క నెంజిలి లోన్చి కోడు
(మత్త 5:13; మార్కు 9:50)

34 "లోన్ చెంగిల్ అస్సె, గని లోన్చి కారు గెలెగిన, జా లోన్ కిసి అన్నె కారు జయెదె? జయె నాయ్. అన్నె

35 జా కారు గెలి లోన్క 'ఎరు' మెన బుయ్యె సువుక కి కామ్క నెంజె. ఆరి వెంట గెలుక జయెదె. నూన్త కంఘొ కక్క తిలె, నూన్తు!"

15

నెన గెలి వెండపిల్లచి టాలి
(మత్త 18:12-14)

1 ఏక్ సుట్టు *సిస్తు నజిత సుంకర్లు చి 'పాపుమ్ సుదల్' మెన యూదుల్ నిస్సారుమ్ దెకిత అన్నె ఒగ్గర్జిన్ యేసుచి బోదన నూనుక మెన పాసి జెతె తిల, చి

2 పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన దెక కెర, "ఈంజొ మాన్సు పాపుమ్ సుదల్ బెదవన జోవయింతెన్ అన్నిమ్ కతయ్" మెల.

3 జాకయ్ జోవయింక ఈంజ టాలి యేసు సంగిలన్. ఇసి జతయ్:

4 "తుమ్తె, మెనుమ, ఎక్కిలోక పుంజెక్ మెండల్ తిలె, చి జోవయింతె ఏక్ నెన తిలె, జేవ్ తిలి బయిలె తిల ఏక్ తకు పుంజెక్ మెండల్క ముల దా కెర, జో నెన తిలొ మెండపిల్ల చజనుక గెచ్చెదె.

5 గెచ్చు చజ, డీసిల్ బేగి సర్దసంతోసుమ్ జా కందిగోడొ కెరన

‡ 14:30 14:30 ఈంజ టాలిచి అర్దుమ్ కిచ్చొ మెలె, 'అంచొ సిస్సుడు జంక ఉచర్లె, ఆకర్ ఎద అంచి కామ్ కెర కేడవుక తుమ్క సెక్తి అస్సె గే నాయ్ గే తుమ్ వెంగిల్ ఉచర' మెన యేసు సంగితయ్. § 14:32 14:32 ఈంజ టాలిచి అర్దుమ్ కిచ్చొ మెలె, 'అంక దొర్కు జలి సేవ నే కెర్లె ఒడువ జస్సె గే నాయ్ గే తుమ్ వెంగిల్ ఉచర' మెన యేసు సంగిల్ రితి జతయ్. * 15:1 15:1 'సిస్తు సంగిత సుంకర్లు' చి 'పాపుమ్ సుదల్' మెలిన్చి అర్దుమ్క 5:30చి ఎట్టెచ జాచి కచ కొడొ దెక. † 15:8 15:8 జా దేసిమి ఏక్ వెండి కాసు కెర్లె విలువ జయెదె మెలె, ఏక్ దీసిచి కూలిచి ఎదిలి డబ్బుల్. ‡ 15:13 15:13 నెంజిలి 'ఏక కెర, డబ్బుల్ దెరన,....'

6 గెరి దెరన జెయెదె, అన్నె, గోతుసుదల్క చి పాసి గెరల్చ మాన్సుల్క బుకారా కెర, 'అంచి సంతోసుమ్తె తుమ్ బెద. కిచ్చొక మెలె, నెన తిలి అంచి మెండపిల్ల అన్నె దొర్కు జా అస్సె' మెనెదె.

7 దస్సి తుమ్క ఆవ్ కిచ్చొ మెంతసి మెలె, తుమ్చి తెన్ పుంజెక్ మెండల్తె ఏక్ నెన తిలె, జా ఏక్ అన్నె దొర్కు జలె కిసి సర్దసంతోసుమ్ జస్సె గే, దస్సి, పుంజెక్ జిన్ మాన్సుల్తె ఏక్ తకు పుంజెక్జిన్ 'పాపుమ్ సుదల్ నెంజుమ్' మెన ఉచరన్లన తిలె, గని అన్నెక్లొ జో కెర్లె పావల్ చినన దుకుమ్ జా పాపుమ్ ముల దిలె, జేవ్ ఏక్ తకు పుంజెక్జిన్చి రిసొచి కంట జోవయించి పాపుమ్ ముల మార్పువ జలొసొచి రిసొ పరలోకుమ్తె ఒగ్గర్ సర్దసంతోసుమ్ జవుల.

నెన గెలి వెండి కాసుచి టాలి

8 "అన్నెక్ టాలి ఉచరుమ. ఏక్ తేర్బోదక దెన్ను †వెండి కాసుల్ తిలె, జోవయింతె ఏక్ సేడ గెలె, జా కిచ్చొ కెరెదె? దీవు లంబడ, గేరు వడ్డవ, జా డీస్తె ఎదక సరిగా చజెదె, గెద!

9 జలె, జా డీసిలె, బేగి జేవ్చ గోతుసుదల్క చి జేవ్చి గేర్క పాసి తిల గెరల్చ మాన్సుల్క బుకారా కెర, 'అంచి సంతోసుమ్తె తుమ్ బెద. కిచ్చొక మెలె, నెన తిలి అంచి వెండి కాసు అన్నె డీస అస్సె' మెనెదె.

10 దస్సి, తుమ్క ఆవ్ కిచ్చొ మెంతసి మెలె, కో జలెకు ఎక్కిలొ కి జో కెర్లె పావల్ చినన దుకుమ్ జా పాపుమ్బుద్ది ముల దిలె, పరలోకుమ్తె దేముడుచ దూతల్ సర్దసంతోసుమ్ జవుల" మెన యేసు సంగిలన్.

నెన గెలి పుత్తున్చి రిసొచి టాలి

11 తెదొడి యేసు అన్నె, "ఏక్ మాన్సుక దొగుల పుత్తర్లు తిల.

12 జేవ్ పుత్తర్లుల్తె దకిలొ పుత్తుసి అబ్బొన్క ఇసి మెన సంగిలొ. 'ఓ బ, తుచి ఆస్తితె అంక జెతి వాట అప్పె దె' మెలన్. జలె, జో అబ్బొసి జోచి ఆస్తిక దొన్ని వాటల్ కెర, జేవ్ దొగుల ఎక్కెక్క జెత వాటల్ జోవయింక వంట దిలన్.

13 "జలె, ఒగ్గర్ దీసల్ నే గెతె అగ్గె, జో దకిలొ పుత్తుసి జోచి వాట సామన్లు ఎత్కి కి ‡బెదవన కెర, ఏక్ దూరి దేసిమి గెచ్చుక మెన బార్ జలన్. జా దూరి దేసిమి గెచ్చు తా, ఈంజొ కిచ్చొ కెర్లెన్? బుద్ది నెంజిల కమొతె జోక దిలిసి ఎత్కి పాడ్ కెర గెలన్.

14 జా పూర్తి కెడ్డికయ్, జా దేసిమి వెల్లి గార్ జా గెలి, చి జింక అల్లర్ జలన్.

15 జింక అల్లర్ జా, జా దేసిమ్చొ మాన్సు ఎక్కిలోతె కామ్ నజనుక గెలో, చి 'అంచ అండ్రుల్ కతిన్తె గెచ్చు జేవ్క రక్కు' మెన కామ్ దిలన్, చి యూదుల్ తెన్ జా కామ్ నిస్కారుమ్చి జలెకి, కెర్లన్. §

16 జలె చూ బమ్మక జో ఉబెడొ కిసి జలొ మెలె, జేవ్ అండ్రుల్ *కతిసి జో కి సర్ల తెన్ కతో, గని జోక కో దెతి నాయ్.

17 "దస్సి, జోక కొవ్ని నాయ్, తోడు నాయ్ చి రిసొ సగుమ్ దీసల్ గెతికయ్, జోక బుద్ది అయ్లి, చి కిచ్చొ మెన ఉచరన్లన్ మెలె, 'అబ్బొచ గొతిమాన్సుల్క సరిపుచుప జతి అన్నిమ్ అస్సె, గని ఆవ్ పుత్తుసి ఇన్నె చుక మొర గెతసి. ఈంజ అల్లర్ ఆవ్ కిచ్చొక సేడుక?

18 అబ్బొతె గెచ్చొందె, చి ఓ బ, దేముడుక అన్నె తుక విరోదుమ్ జలి రితి, ఆవ్ పాపుమ్ కెర అస్సి.'

19 'అంచొ పుత్తు' మెన తుయి అంక సంగుక జలె, అంక విలువ నాయ్, గని అంక 'అంచొ గొతిమాన్సు' మెన తుయి అంక తియన కామ్ దె" మెన సంగిందె మెన జో ఉబెడొ ఉచరన,

20 ఉట్ట, అబ్బొన్తె అన్నె గెచ్చుక బార్ జలొ. జలె, అబ్బొన్చొ గేరుక అన్నె దూరి తిలి పొది, అబ్బొసి జోవయింక దెక కెర, జో బుద్ది నెంజ తిలొ గని అప్పె ఇదిల్ బుద్ది జలొ పుత్తున్చి ఉప్పిరి కన్కారుమ్ జా నిగ జా కెర, జోక అమ్డ చుంబిలన్.

21 "తెదొడి జో పుత్తుసి జోక 'ఓ బ, దేముడుచి ఉప్పిరి, అన్నె తుచి ఉప్పిరి విరోదుమ్ జలి రితి, ఆవ్ పాపుమ్ కెర అస్సి. అంచొ పుత్తు మెన తుయి అంక సంగుక అంక విలువ నాయ్,' మెలన్.

22 గని అబ్బొసి జోవయించ గొత్తి సుదల్క బుకారా కెర, 'అమ్చ పాలల్ ఎత్కితె చెంగిల్చి బే బేగి ఆన ఇన్నెక గల దాస, చి ఇన్నెచి ఉంటితె ఉంగారుమ్ చి చట్టెలె జోడ్లు గల దాస.

23 దస్సి కెర్లదు మెలె, అమ్ బల్సుప జలొ పొతుపిల్ల తుమ్ ఆన కండ, చి ఈంజొ గెరి ఉట్ట అయ్లి సర్లక విందు కెరుమ.

24 కిచ్చొక మెలె, ఈంజొ అంచొ పుత్తు మొర గెచ్చు అన్నె జియ అస్సె. నెన తిలొ, చి అన్నె దొర్కు జలొ' మెన అబ్బొసి సంగిలొ, అన్నె, ఎత్కి తెయార్ జతికయ్, సర్ల కెరనుక దెర్ల.

25 "జలె, ఈంజొ గెరి ఉట్ట అయ్లొ ఉబెడొచొ అన్నొసి జోవయించి బుయియె కామ్ కెర్లె తిలొ, చి గెరి అన్నె ఉట్ట జెతె తిలి పొది పాసి అయ్లె, బాజె నచితి అవాడ్ సూన్లన్.

26 సూన కెర, గొత్తి సుదొ ఎక్కిలోక బుకారా కెర, 'కిచ్చొక బజయితతి, సర్ల కెరంతతి?' మెన పుసిలన్,

27 చి గొత్తి సుదొ జోక, 'బావొది గెరి అయ్లన్ చి జో జీవ్ తా గెరి ఉట్ట జా అస్సెచి రిసొ అబ్బొది బేడు తిలొ పొతుపిల్ల

కండయ్లన్.'

28 "జలె, జో మాన్సుచొ ఈంజొ వెల్లొ పుత్తున్క కోపుమ్ అయ్లి, చి గెరి పెసుక కి జోక ఇన్సుమ్ నాయ్. జాకయ్ అబ్బొసి బార్ జా, తెడి జె మెన బతిమాల్ప జా సంగిలన్, గని

29 అబ్బొన్క జో, 'ఈందె, ఎత్తి వెర్సుల్ తుచి సేవ కెర్లయ్, తుయి సంగిలిసి నిదానుమ్ కెర, కెయ్య కి పిట్టవి నాయ్. జలెకి, అంచ గోతుసుదల్ తెన్ ఆవ్ సర్ల తెన్ విందు కెరంతి రితి కెయ్య కి ఏక్ ఇదిలిసి గొర్లె కి దెస్సి నాయ్.

30 గని సానివొ తెన్ బెద తుచి †ఆస్తి పాడ్ కెర్లొ ఈంజొ పుత్తుది గెరి జెతికయ్, తుయి బేడు తిలొ పొతు కండయ్లది! కిచ్చొ సత్తిమ్, జా!' మెన జో వెల్లొ పుత్తుసి సంగిలన్, చి

31 అబ్బొసి జోక, 'ఓ పుత్త, తుయి కెయ్క కి అంచి తెన్ అస్సిసి, చి అంచి ఆస్తి ఎత్కి తుచి.

32 జలెకి, ఈంజొ తుచొ బావొది మొర గెచ్చు అన్నె జీవ్ జలన్. నెన తిలన్, గని అన్నె దొర్కు జలొచి రిసొ ఇసి విందు దా సర్ల కెరనుక చెంగిలి' మెన సంగిలన్, మెన సిస్తు సంగిత సుంకర్లుక చి 'పాపుమ్ సుదల్' మెన అన్నె మాన్సుల్ నిస్కారుమ్ సంగిలన్ జోవయింక నంప కెర్లెన్చి రిసొ యేసు పండితుల్క టాలి సంగ జేవ్ పండితుల్చి తప్పుచి రిసొ ఉచరయ్లన్."

16

తెల్వి తిల గొత్తి సుదొచి టాలి

1 తెదొడి యేసు జోచ సిస్సుల్క, "సొమ్మారి ఎక్కిలో తిలన్. జోచి గెర్చి కామ్ ఎత్కి దెకుక చి జోచి ఆస్తి ఎత్కి దెకుక జోతె ఏక్ మాన్సు తిలొ. జలె, 'తుచి ఆస్తి దెకితోసొ జా ఆస్తి పాడ్ కెర్లయ్' మెన జో ఎజొమానిక కబుర్ అయ్లి.

2 జో జోచి ఆస్తి దెకితోసొక బుకారా కెర, 'తుచి రిసొ ఆవ్ సూన్సిసి కిచ్చొక? అప్పె తెంతొ తుక ఇన్నె కామ్ నాయ్. తుచి అత్తి ఆవ్ సొర్ప కెర్లెన్క కిచ్చొ కెర అస్సిన్ గే కక్క కెద్ది దా అస్సిన్ గే లెక్కల్ కెర రెగుడ అంక దెకవు' మెన ఎజొమాని సంగిలొ.

3 "జలె, ఎజొమానిచి ఆస్తి దెకితో ఈంజొ మాన్సు కిచ్చొ తెలివి ఉచరన్లన్ మెలె, అంచొ ఎజొమాని అంక కడ గెలెదె జలె, ఆవ్ కిచ్చొ కెర్లె జయెదె? కూలి కామ్ కెరుక అంక నత్తు నాయ్, అవ్ నెతిరి. బిచ్చిమ్ నజుక లాజు, మెన ఉచర అస్సి.

4 ఎజొమాని అంక కడ గెలె పొది మాన్సుల్ అంక సినేతుమ్ జా తా జోవయించ గెరలె బుకార్లె బాద తయె నాయ్ మెన ఉచరన కెర,

5 ఎక్కిలోకచి పడ్డొ అన్నెక్కిలోక వర్స తెన్ జోచొ ఎజొమానితె రునుమ్ జల ఎత్కిజిన్క బుకారా కెర,

§ 15:15 15:15 యూదుల్ అండ్రు ముక్కల్ కతి నాయ్. * 15:16 15:16 ఏక్ రగుమ్ రూక్చ కాయల్, బెర్లె, అండ్రుల్క ఒత్తచ కవడుల. † 15:30 15:30 నెంజెలె 'డబ్బుల్'.

తొలితొచొక అంచొ ఎజొమానిక తుయి కెద్ది బాకి జా అస్సిసి? మెన పుసిలన్.

6 జొ రునుమ్ జలొసా చెత్తర్ వెయిల్ కాయల్ తేలు మెలన్, చి ఈజొ జలె తుచి బాకి నజ తిలి పుస్తకుమ్ బేగి చజన వెన 'దొన్ని వెయిలు' మెన రెగుడు మెలన్.

7 "తెదొడి ఎజొమానిచొ గేర్ దెకితోసా అన్నెక్లొక బుకారా కెర, 'తుయి కెద్ది బాకి జా అస్సిస్', మెన పుసిలన్, చి జొ 'వెయి నాడివొ గొదుమ్' మెంతికయ్, 'దస్సి జలె, తుచి బాకి కార్దుమ్ వెంట అట్టు పుంజొ' మెన రెగ్గును మెలన్.

8 "జలె, జొచి ఆస్తిక దెకితో జొ అబద్దుమ్ కెర్లొ మాన్సుచి తెలివి దెక, తెలివి కామ్ కెర్లది మెన జొ ఎజొమాని సంగిలొ. ఈందె, దేముడుచి ఉజిడ్ బుద్ది జలనచి కంట ఈంజ లొకుమ్చి బుద్ది తిలన జొవయించి ఈంజ కాలుమ్చ మాన్సుల్ తెన్ బలే తెలివి దెకన్తతి.

9 "జలె, తుమ్క ఆచ్ కిచ్చొ మెంతసి? *ఈంజ లొకుమ్చి దనుమ్ తెన్ తుమ్క నేస్తమ్ కెరన, చి జా డబ్బుల్ కేడ్లె పరలొకుమ్తె ఎల్లకాలుమ్ జియతస్తితె తుమ్క †బెదవనుల.‡

10 ఈందె, కో జలెకు ఇదిలిన్ కామ్తె నిదానుమ్ కెరెదె గే, వెల్లి కామ్తె కి నిదానుమ్ కెరెదె. గని కో జలెకు ఇదిలిన్ కామ్తె అబద్దుమ్ కెరెదె గే, వెల్లి కామ్తె కి అబద్దుమ్మి కెరెదె.

11 జాకయ్, మాములుమ్ ఈంజ లొకుమ్చి డబ్బుల్ వాడిక కెర్లెన్తె తుమ్ నిదానుమ్ నే కెర తిలెగిన, పరలొకుమ్చి దనుమ్ తెన్ తుమ్ కామ్ కెర్లి రితి దేముడు కిసి తుమ్చి అత్తి జా సార్ప కెర దెయెదె! తుమ్క జొ కిసి నంప కెరుక జయెదె!

12 అన్నె, జొవయించి ఆస్తిక తుమ్ దెకుక మెన అన్నెక్లొ తుమ్చి అత్తి సార్ప కెర తిలె, గని తుమ్ జా ఆస్తిక నిదానుమ్ నే కెర్లె, తుమ్క జెతికయ్ తుమ్చి సొంత అస్తి కో తుమ్క దెవుల! దిలె, పాడ్ కెరుల మెనుల.

13 కేన్ గొతిమాన్సు ఎక్కె దడి దొగుల ఎజొమాన్సుచి సేవ కెరుక నెత్తె. కిచ్చొక మెలె, ఎక్కిలొక విరోదుమ్ కెర, అన్నెక్లొక ప్రేమ కెరెదె, నెంజిలె జొ అన్నెక్లొక నిదానుమ్ కెర, తొలితొచొక నిస్కారుమ్ దెకెదె. జలె, దేముడుక చి ఈంజ లొకుమ్చి దనుమ్క ఎక్కె దడి సేవ కెరుక నెతుర్పు" మెన యేసు జొచ సిస్సుల్క సంగిలన్.

యేసు సంగిల దొన్ని కొడొ (మత్త 11:12-13)

* 16:9 16:9 ఎజొమాని మెలె, ఎత్తి అదికారుమ్ తిలొ దేముడుక టాలొ జతయ్. † 16:9 16:9 నెంజిలె, ఎజొమాని, మెలె ఎత్తి అదికారుమ్ తిలొ దేముడు బెదవనెదె. ‡ 16:9 16:9 నెంజిలె గ్రీకు తెన్ చి ఈంజ 9 నంబర్ కోడు తొలితొ రెగిడ్లెన్చి అర్దుమ్ కిచ్చొ మెన అన్నె సగుమ్జన్ ఉచర్తతి మెలె, 9. జలె, తుమ్క ఆచ్ కిచ్చొ మెంతసి మెలె, ఈంజ లొకుమ్చి డబ్బుల్ పాపుమ్చి జలెకి, తుమ్ బుద్ది తెన్ ఎత్తి అదికారుమ్ తిలొ దేముడుచి సేవ కెర్లి రితి జా డబ్బుల్ వాడిక కెరన నేస్తమ్ కెరన, చి జా కేడ్లె తుమ్ మొర గెలె, పరలొకుమ్తె తుమ్క బెదవనుల నెంజిలె ఎత్తి అదికారుమ్ తిలొ దేముడు బెదవనెదె. గ్రీకు జాన తెన్ తిలిసి కిసి జతయ్ మెలె, 'పాపుమ్చి డబ్బుల్క నేస్తమ్ కెరన, చి జా డబ్బుల్ కేడ్లె, పరలొకుమ్తె తుమ్క బెదవనుల. గని ఉప్పిరి జా మత్తలి రెగిడ్లెన్తె రెగిడ్లి రితి అర్దుమ్ అన్నె సంగితయ్' మెన ఉచర్తనుమ్.

14 ఈంజ లొకుమ్చి దనుమ్చి రిసా యేసు తెదొడి సిస్సుల్క సంగిలిసి పరిసయ్యుల్ నూన కెర జొక కొంకడ్లె. కిచ్చొక మెలె దేముడుచి సేవ కెర్తనుమ్ మెననె కి, డబ్బుల్క జొవయింక ఒగ్గర్ ప్రేమ.

15 యేసు జొవయింక, "మాన్సుల్చి మొక్కె పున్నిమ్ తిలి రితి డేసుక ఆన జతన తుమి. గని తుమ్చి పెట్టి కిచ్చొ బుద్ది అస్సి గే దేముడు జానె. జలె, ఈంజ లొకుమ్చ మాన్సుల్ కిచ్చొచి రిసా 'ముక్కిమ్చి' మెనుల గే, దస్సిచి దేముడు వెట్కారుమ్చి మెనెదె.

16 "బాప్తిసుమ్ దెతె తిలొ యోహాను బార్ జలి ఎదక మోసే పూర్గుమ్చొచి అత్తి దేముడు రెగ్గయల ఆగ్గుల్, అన్నె పూర్గుల్చి అత్తి సంగిల దేముడుచ కబుర్లు రెగిడ్లెసి ముక్కిమ్ జా తిల. గని యోహాను అయ్లి తెంతొ, దేముడుచి రాజిమ్ పాచ జా అయ్లిన్చి రిసాచి, సుబుమ్ కబుర్ నూనయి జతయ్, జొ నూనయ్లొ, ఆచ్ నూనయ్తసి, చి పాచ జా అయ్లి ఈంజ రాజిమ్తె బెదితన ఎత్తిజిన్ బెదుక మెన బమ్మ జతతి.

17 మోసే పూర్గుమ్చొచి అత్తి దేముడు రెగ్గయల ఆగ్గుల్చి ఎక్కి అచ్చుమ్చి విలువ గెచ్చె నాయ్, జెతె కేన్ అచ్చుమ్ కామ్క నెంజితి రితి జతి కంట, పరలొకుమ్ బూలొకుమ్ కేడ గెచ్చుక నుల్లు.

18 "కో జలెకు జొ జొచి తేర్లిక ముల దా అన్నెక్లిక పెండ్లి కెరనె, లంజె వంసుమ్చొ జతయ్, చి జాకయ్ పెండ్లి ముల దిలి కేన్ తేర్బొదక కో పెండ్లి జయెదె గే, జొ కి లంజె వంసుమ్చొ జతయ్.

లాజర్ మెలొ బీద సుదొ చి సొమ్నారుమ్ తిలొన్చి రిసా టాలొ

19 "సొమ్నారి ఎక్కిలొ తిలన్. జొ రొజుక చెంగిల చెంగిల సొమ్నార్లు గలంతి ఊద రంగుచ ఒగ్గర్ కరిదీచ పాలల్ గలనెదె, చి రొజుక ఇస్టుమ్ అయ్లి సర్ల కెరన సుక్కుమ్ తెన్ జితె తిలొ.

20 జలె, జొ సొమ్నారొచి మేడచి గుమ్ముమె లాజర్ మెలొ బీద సుదొ ఎంగ్గ తయెదె. జొచి ఆగ్ బెర్లు గావ్వొ తిల.

21 జొ సొమ్నారొ అన్నిమ్ కెర్లి బల్లయ్ తెంతొ సేడ్లె చింబొ గిడ్లల్ జొ బీద సుదొక దొర్కు జలె, సర్ల తెన్ కతో, తెద్ది మాలజ్ జా తెద్ది చూ జా తిలొ, అన్నె నూనర్లు జొచ గావ్వొ లేంవితె తిల.

22 "జలె, ఏక్ దీసి జొ బీద మాన్సు మొర గెలొ, చి పరలొకుమ్తె అబ్రాహామ్ పూర్గుడు తెన్ తతి రితి దూతల్

జో బీద జలో లాజర్ క వయ కడ నిల. జలె, జో సొమ్నారొ కి మొర గెలన్, చి జోక మాన్సుల్ రోప గెల.

23 అన్నె జో వెల్లి ఆగ్ లగితి గొయితె ఒగ్గర్ సిచ్చల్ జతె తా, ఉప్పిరి దెకిలె, దూరిక అబ్రాహామ్ క చి జోచి పాసి వెస తిలో లాజర్ క దెకిలన్.

24 దెక కెర, 'ఓ అమ్చో అబ్రాహామ్ తాతో, అంచి ఉప్పిరి కన్యారుమ్ తీ, చి జోచి ఊంటి పానితె బుడ్డవ అంచి జీబుతె ఇదిల్ లయడ తిమడ్డి రిసా జో లాజర్ క అంచితె తెద్రవు. ఈంజ ఆగి అంక ఒగ్గర్ నొప్పి దెతయ్ చి రిసా' మెన సొమ్నారొ బతిమాల్పా జా సంగిలన్.

25 గని అబ్రాహామ్ జోక, 'పుత్త, తుయి బూలోకుమ్తె జితె తిలి పొది సీతుక ఇస్టుమ్ అయ్ లిసి దొర్కు కెరన సుక్కుమ్ తెన్ జితె తిలది. గని లాజర్ కన్తల్ సేడ్తె తిలన్. గని అప్పె జో ఇన్నె సుక్కుమ్ జా అస్సె, చి తుయి ఒత్త సిచ్చల్ సేడ్తె తత్తసి.

26 అన్నె కిచ్చో మెలె, తుమ్క అమ్క మదెనె వెల్లి గొయి అడ్డు అస్సె. ఏక్ వేల ఇన్నె తెంతో సగుమ్ జిన్ ఒత్త గెచ్చుక ఉచర్లె అడ్డు తవుసు. నెతుర్పు' చి 'ఒత్త తిలన కో కి ఇన్నె డేవ జెతు నాయ్ మెన జా గొయి అడ్డు అస్సె' మెన

27 అబ్రాహామ్ సంగితికయ్, సొమ్నారొ అన్నె, దస్సి జలె, తాతో, అంచి ఏక్ మనవి సంగిమ్దె. దయ కెర, అంచో అబ్బొచ్చి గెరి జో లాజర్ క తెద్రవు.

28 అంక పాచ్ జిన్ బావుడ్లు అస్తి, చి జేవ్ కి ఈంజ సిచ్చ జతి లోకుమ్తె నే ఉత్త, సేడ్తి రితి జోవయింక బుద్ది సికడ్డు మెలన్.

29 గని అబ్రాహామ్ జోక అన్నె, 'మోసేచి అత్తి రెగిడ్డి దేముడుచి ఆగ్గుల్, అన్నె దేముడుచ కబుర్లు సంగిల పూర్గుల్ రెగిడ్ల పుస్తకల్ ఎత్తి జోవయింక అస్సె. ఒత్త తిలిసి సరిగా సూన్తు, చి జేవ్ బుద్ది జంక జయెదె' మెన అబ్రాహామ్ సంగిలన్.

30 గని జో అన్నె అబ్రాహామ్ తెన్, 'నాయ్, ఒత్త తిలిసి సూన్లె కి కెర్తి నాయ్, గని మొర గెలొసా కో జలెకు జేవ్తె గెచ్చ బుద్ది సంగిలె, జేవ్ కెర్ల పాపల్ చినన దుకుమ్ జా పాపుమ్ బుద్ది ముల మార్పుప జవుల' మెలన్.

31 చి ఆకర్క అబ్రాహామ్ జోక కిచ్చో జబాబ్ దిలన్ మెలె, 'మోసేచి అత్తి దేముడుచి ఆగ్గుల్ రెగిడ్డి కొడొ కి, దేముడుచ కబుర్లు సంగిల పూర్గుల్ రెగిడ్డి కొడొ సూన నంప నే కెర్లె, కో జవున్ మొర్లొ మాన్సు అన్నె జీవ్ జా ఉట్లెకి నంప కెర్తి నాయ్.' ", మెన పరిసయ్యుల్క యేసు సంగిలన్.

17

పాపుమ్ కెరయ్ తిన్ చి రిసాచి కోడు (మత్త 18:6-7, 21-22; మార్కు 9:42)

1 తెదొడి యేసు జోవయింప సిస్సుల్క, " * పాపుమ్ కెరయ్ త అల్లర్ కచితుమ్ జెయెదె, గని కచి అత్తి దస అల్లర్ జెవుల మెలె, అయ్యె, జోవయింక సిచ్చ పిట్టె నాయ్!

2 అంక నంపజల ఇన బాలబోదల్ జలసతె ఎక్కిలోక కి, కో † పాపుమ్ కెరయెదె గే, జోచి టొట్రయ్ తిర్వేలి పత్తురు. ఒడొవ దా జోవయింక సముద్రుమ్తె బుడ్డవ గెలుక చెంగిలి.

3 తూమ్ జాగర్ల తా. తుమ్చితె కో గే మెనుమ. తుచొ కేన్ జవున్ బావొ పాపుమ్ కెర్లెగిన, జోవయింక బుద్ది సంగు, చి జోవయింప తప్పుక దుకుమ్ జా బుద్ది జలెగిన, జోవయింక చెమించుప కెరు.

4 అన్నె, రోజుక సత్తు సుట్లు కి తుక పాపుమ్ కెర జేవ్ సత్తు సుట్లు తుచి పక్క పసుల 'అంచి తప్పు. చెమించుప కెరు' మెన జో సంగిలెగిన, తుయి జోక చెమించుప కెరుక అస్సె" మెన యేసు జోచ సిస్సుల్క బుద్ది సంగిలన్.

నముకుమ్ చి రిసాచి కోడు

5 తెదొడి యేసుచ జేవ్ బారజిన్ † బారికుల్ యేసుప్రబుక కిచ్చో మెలన్ మెలె, "అమ్క అన్నె ఒగ్గర్ నముకుమ్ దె" మెల చి,

6 యేసు జోవయింక, "సొర్పుగిడ్లచి ఎదిలి నముకుమ్ తుమ్క తిలె, ఈంజొ సీమారోడు రూకుక 'ఉట్టి జా సముద్రుమ్తె గెచ్చ రోవి జా' మెలె, తుమ్ సంగిలె, జా కోడు సూన్లె జా దస్సి జయెదె."

సేవ నిదానుమ్ కెరుక తిలిన్ చి కోడు

7 "తుమ్చితె ఎక్కిలోక గొత్తి సుదొ తయెదె మెనుమ, చి జో గొత్తి సుదొ కేస్సాతో జవున్, మెండల్ రక తా జవున్ గెరి అన్నె అయ్లె, 'తుయి బేగి గెచ్చ అన్నిమ్ కెరు' మెన ఎజొమాని సంగెదె గె?

8 నాయ్, గెద. 'తోలితో అంచి రిసా అన్నిమ్ తెయార్ కెర తుచొ పాలుమ్ కుంచన అంక జోగుడ దె, చి ఆవ్ అన్నిమ్ కెర పాని పిలి పడ్డొ తుయి కా, పి' మెన ఎజొమాని సంగెదె.

9 అన్నె, జో గొత్తి సుదొ జోక దిలి కామ్ కెర జోచి పూచి తిలిసి కెర్లి రిసా జో ఎజొమాని జోక 'తుయి దయ కెర్లది' మెనెదె గె? నాయ్, గెద.

10 జలె, తుమ్చి పూచి తెన్ కి దస్సి, దేముడు తుమ్క సంగిలిసి ఎత్తి కెర తుమ్చి పూచి కెర తిలె, తుమ్ కిచ్చో మెన మెలె, 'అమ్ రితయ్ గొత్తి సుదల్. అమ్ గవురుమ్క విలువ నాయ్. అమ్క పూచి తిలిసి కెర అస్సుమ్. తెద్దిలి' మెన తుమ్" మెన యేసు సిస్సుల్క సంగిలన్.

వెల్లి రోగుమ్ దెర్ల దెస్సుజిన్ క యేసు చెంగిల్ కెర్లిసి

§ 16:25 16:25 నెంజిలె 'తుచి వాట పూర్తి'. * 17:1 17:1 నెంజిలె, 'నముకుమ్ పిట్టయ్ త...' † 17:2 17:2 నెంజిలె, 'జోవయింప నముకుమ్ పిట్టయెదె గె,....' ‡ 17:5 17:5 6:13 దెక. జోవయింప బారజిన్ సిస్సుల్ బారజిన్ బారికుల్ ఎక్కి. § 17:6 17:6 ఏక్ రగుమ్ పండ్లు దెదెదె.

11 ఒత్త తెంతో అన్నె కిచ్చొ జర్గు జలి మెలె, యేసు యెరూసలేమ్ పట్టుమతె గెచ్చుక మెన సమరయ ప్రదేసిమ్క చి గలిలయ ప్రాంతుమ్క మదెనె గెతి వట్టె గెతె తా,

12 ఏక్ గావ్క పాసి అయలె, వెల్లి రోగుమ్ దెర్ల దెస్సుజిన్ మాన్సుల్ జోక దస్సుల్ జంక మెన అయల, అన్నె, ఇదిల్ దూరి తా

13 కేక్ గల. కిచ్చొ మెన కేక్ గల మెలె, “యేసుప్రబు, బాబు, అమ్చి ఉప్పిరి కన్నారుమ్ తీ” మెన కేక్ గల.

14 జలె, యేసు జోవయింక దెక కెర “దేముడుచి గుడితె తుమ్ గెచ్చు, ఒత్తచ *పూజర్లుతె దెకవన” మెన సంగిలన్, చి ఒత్త యెరూసలేమ్తె గెచ్చుక మెన వట్టె గెలె కిచ్చొ జర్గు జలి మెలె, జోవయించి ఆగ్ చెంగిల్ జా సుద్ది జల.

15 జలె, జోవయింతె ఎక్కిలో జో చెంగిల్ జలిసి దెకన, గట్టిజి అవాడ్ కెరన దేముడుచి గవురుమ్ సంగ సంగ, యేసు తిలిన్తె ఉట్ట అయలన్.

16 ఉట్ట జా, “అంక రచ్చించుప కెర దయ కెర్లది” మెన యేసుక జోచి సర్ల సంగ యేసుచి చట్టె సెర్ను సేణ్ణె. జో మాన్సు †సమరయ సుదొ.

17 జలె, యేసు తెదొడి, “దెస్సుజిన్క చెంగిల్ కెర్లయ్, గెద. జేవ్ అన్నెక్ నొవ్వుజిన్ కేతె?

18 ఈంజొ యూదుడు నెంజిలోసొక పిట్టవ, జేవ్ అమ్చ యూదుల్తె అన్నె కో జోవయించి సర్ల సంగుక జెతి నాయ్ గె?” మెన వుస కెర,

19 జో చెంగిల్ జలోసొక అన్నె, “తుయి ఉట్ట, గెరి గో. అంచి ఉప్పిరి తుయి నముకుమ్ తిలి రిసొ †చెంగిల్ జా అస్సిసి” మెన యేసు జో మాన్సుక సంగిలన్.

దేముడుచి రాజిమ్చి రిసొచ కొడొ (మత్త 24:23-28,37-41)

20 జలె, “దేముడుచి రాజిమ్ కెయడక జెయెదె?” మెన సగుమ్జిన్ పరిసయ్యుల్ యేసుక వుసిల చి, జో, “దేముడుచి రాజిమ్ డిస్తిసి నెంజె. కెయడక గే డిన్ జెయెదె మెన నాయ్.

21 ‘ఈందె, ఇన్నె అస్సె’ జలెకు, ‘ఓదె, ఒత్త అస్సె’ జలెకు మెనుక బెదె నాయ్. కిచ్చొ మెలె, దేముడుచి రాజిమ్ అప్పెయి కి కీతుమ్చి నెడిమి అస్సె” మెన సంగిలన్.

యేసు ఎదార్దుమ్ ఏలుప కెరుక మెన అన్నె జెతిన్చి రిసొచి కొడు

* **17:14 17:14** యూదుల్ తెన్ వెల్లి రోగుమ్ ఏక్ మాన్సుక ముల తిలె, జో మాన్సుక ‘చెంగిల్, సుద్ది జలొ’ మెన రుజ్జు సంగుక ఎక్కి పూజర్లుకయ్ అదికారుమ్, 5:12చి ఎట్టెచి కొడు దెక. † **17:16 17:16** సమరయ సుదల్క యూదుల్ నిస్కారుమ్ దెకుల, గని జేవ్ యూదుల్ ఇన్నె బుద్ది ఉచర్తి నాయ్. ఎక్కి సమరయ సుదొ బుద్ది ఉచర్తి. ‡ **17:19 17:19** నెంజిలె ‘రచ్చించుప జా అస్సిసి’. § **17:21 17:21** కిచ్చొక దస్సి మెన్తయ్ మెలె, జో యేసు అయలిన్ తెన్ జా రాజిమ్ అయలి, చి ఎత్తి అదికారుమ్ తిలో దేముడుచి సుద్ది తిలి అత్త జోవయించి అత్తి, అన్నె జోవయించ సిస్సుల్చి అత్తి జా రాజిమ్చి రచ్చించుప కెర్తి కామ్ జో కెర్తయ్. ‘తుమ్చి నెడిమి అస్సె’ మెలి కొడుక సగుమ్జిన్ ‘తుమ్చి పెట్టి అస్సె’ మెన రెర్ల అస్సి, గని నంపతిలనచి పెట్టి జా రాజిమ్ తయదె, గని నంపనెంజలనచి పెట్టి నాయ్. జేవ్ పరిసయ్యుల్తె ఒగ్గరజిన్ యేసుక నంప కెర్తి నాయ్. * **17:24 17:24** లూకా 1:32-33, డిసయలిసి 5:10, చి 20:4-6 దెక. † **17:25 17:25** లూకా 9:22 దెక. ‡ **17:27 17:27** ఆదికాండుమ్ 7 అద్యయమ్. § **17:29 17:29** ఆదికాండుమ్ 18:16-19:29. * **17:30 17:30** లూకా 21:34-36 దెక.

22 జోచ సొంత సిస్సుల్క యేసు, ఆవ్ మాన్సు జా జెర్మున్ అయ్లోసొక “ఏక్ దిసి గడియ జవున్ డిసున్” మెన తుమ్ ఒగ్గర్ ఆస జత దీనల్ జెవుల, గని జా మదెనె అంక దెకుక నెతుర్పు.

23 అన్నె, “ఓదె, ఒత్త అస్సె. ఓదె, ఒత్తయ్ అస్సె” మెన సగుమ్జిన్ తుమ్క సంగుల, గని జోవయించి పట్టి తుమ్ గెచ్చు నాయ్.

24 కిచ్చొక మెలె, బిజిలి మొల్కిలె, కిసి ఆగాసుమ్ పూర్తి ఏక్ పక్క తెంతో అన్నెక్ పక్క ఎద ఉజిడి దెయెదె, దస్సి, ఆవ్ మాన్సు జా జెర్మున్ అయ్లోసొ *ఏలుప కెరుక మెన ఉత్త జెతి దీసిక కేన్ పక్క కి డిసిందె.

25 గని జా నే జతె అగ్గె తొలితో ఆవ్ ఒగ్గర్ బాదల్ సైమల్ సేడుక అస్సె, ఈంజ కాలుమ్చ †మాన్సుల్ అంక “అమ్క నాయ్. మొర్పు!” మెనుక అస్సె.

26 నోవహు పూర్లుమ్చొచి కాలుమ్ మాన్సుల్ కిన్ జతె తిల గే, దస్సి, ఆవ్ మాన్సు జా జెర్మున్ అయ్లోసొ అన్నె నే జెతె అగ్గెచి మదెనె ఆవ్ జెతె ఎదక మాన్సుల్ దస్సి జతె తవుల.

27 మెలె, ‘జోవయించి పాపుమ్చి రిసొచి సిచ్చుక’ మెన ఎత్తి అదికారుమ్ తిలో దేముడు వెల్లి వర్లల్చి పాని గెడ్డుప కెరయ్లి గడియ ఎద, నోవహు జోచి కుటుంబుమ్ తెన్ జా వెల్లి ఓడతె పెన కెర్తి డంకిల్ ఎద, నే నంప కెర్తి మాన్సుల్ కతె తా, పితె తా, పెండ్లివొ కెర్తి తా, పెండ్లివొ జతె తా జితె తిల, చి ‡జేవ్ ఎత్తి జిన్క వర్లల్చి పాని గిడ గెలి.

28 పడ్డొ లోతు పూర్లుమ్చొచి కాలుమ్ కి జో జితె తిలి సొదొమ పట్టుమ్చ దస్సి జతె తిల. ప్రెజల్ కతె తా, పితె తా, బియ్యారి కెర్తి తా, పంటొ పిక్యతె తా, గెరల్ బందితె తిల.

29 గని కిలోతు జా సొదొమ పట్టుమ్ తెంతో బార్ జా ముల దిలి దిసి, ఎత్తి అదికారుమ్ తిలో దేముడు పరలోకుమ్ తెంతో జా పట్టుమ్చి ఉప్పిరి ఆగిచి ఎడ్డి రితి ఇంగుడు సువ దిలన్, చి జా పట్టుమ్చ ఎత్తి జిన్ మొర గెల.

30 అన్నె, ఆవ్ మాన్సు జా జెర్మున్ అయ్లోసొ ఏలుప కెరుక మెన అన్నె ఉత్త జా డిస్తి దిసి జెతి ఎద దస్సి మాన్సుల్ అంక నే ఉచర్తి, బుద్ది నే ఉచర్తి ఇస్టుమ్ అయ్లి రితి జితె తవుల, చి తెదొడక *తీర్పు జా సిచ్చ జవుల.

31 “జా దిసిక జోచి గేరుచి ఒర్పె కో తవుల గే, జోచి

సామన్ గెరి తిలె కి, జా వెంట నెంక మెన ఉత్తుతు నాయ్, అన్నె కో జోచి బట్టి జవున్ తిలె, కిచ్చొ వెంటుక పసుల్తు నాయ్, †గని బే బేగి ఉట్ట గెతు.

32 లోతుచి తేర్చి జా సాదోమ పట్టుమ్క ఇదిల్ ఇష్టుమ్ జా జాక దెకుక మెన పసుల లోన్చి †పత్తురు మర్లు జా గెలి, గెద. జలె, జాక దస్సి జర్గు జలిసి తుమ్ పచ్చు నాయ్.

33 కిచ్చొక మెలె, సొంత ప్రానుమ్ రచ్చించుప కెరనుక కో ఉచరుల గే, జోవయింక ప్రానుమ్ పాడ్ జా గెచ్చెదె, గని దేముడు దిలి వాటు ఎక్కి సత్తిమ్ ఇండుక మెన జోవయింక ప్రానుమ్ కో దెవుల గే, జోవయింక ప్రానుమ్ రచ్చించుప జయెదె.

34 “జా రాతిక దోగుల ఎక్కితె నిజ తిలె, ఎక్కిలోక ముల దా, అన్నెక్కోక కడ నెవుల.

35 దస్సి, దోగుల తేర్బోదల్ రోడ్డె తిలె ఎక్కిక ముల దా, అన్నెక్కిక కడ నెవుల,

36 కిఅన్నె, దోగుల మున్నుబోదల్ బట్టి తిలె, ఎక్కిలోక ముల దా, అన్నెక్కోక కడ నెవుల” మెన యేసు సంగిలన్.

37 దస్సి సంగితికయ్, “కేనె కడ నెవుల, ప్రబు?” మెన సిస్సుల్ పుసిల, చి జోవయింక, “పినుమ్ కేనె తయెదె గే, ఒత్త గిద్దుల్ బెరుల.” మెన సంగిలన్.

18

తిర్పు కెర్తి టాన్తె తోడు సంగితో ఎక్కిలోచి టాలి

1 తెదొడి యేసు జేవ్ సిస్సుల్క ఈంజ టాలి సంగిలన్. కిచ్చొక మెలె, *జో తిర్పు కెర ఏలుప కెరుక మెన అన్నె జెతె ఎదకచి మదెనె జేవ్ బద్దుకుమ్ గే అన్మానుమ్ గే నే జతె ప్రార్దన కెర్తి తంక మెన జోవయింక సికడ్డి రిసా సంగిలన్.

2 ఇసి జతయ్ “ఏక్ పట్టుమ్తె తిర్పు కెర్తి టాన్తె తిర్పు దెతోసా ఎక్కిలో తిలొ. జో అన్నె మాన్సుల్క బియె నాయ్, దేముడుక బియె నాయ్.

3 పడ్డె, జయి పట్టుమ్తె రండెల్ మాన్సు ఎక్కి తిలి. ఈంజ జలె, రోజుక జో తిర్పు దెతోసాతె గెచ్చు కెర, ‘విరోదుమ్ సుదొ ఎక్కిలో అంచి ఉప్పిరి దావ దా అస్సె. అంచి సంగిలీస్ నూనె జో మాన్సు సంగిలి నిందక ఆరిచి మెన రుజ్జు దెకయ్ తిన్తె అంక తోడు తా’ మెన పుసితె తిలన్.

4 ఒగ్గర్ దీనల్ జో ఒప్పనె నాయ్, గని పడ్డె కిచ్చొ బుద్ది జోక అయ్లి మెలె, ఆవ్ దేముడుక బితోసా, మాన్సుక బితోసా నెంజి, గని

5 ఈంజ రండెలి అంక అల్లర్ దా పుసుక ములె నాయ్ చి రిసా, జాచి సంగిలీస్ నూన్ తిస్సె తోడు సంగిమదె. నెంజిలె, జా రోజుక జెతె తతిన్క అంక పూర్తి అల్పు కెరెదె మెలన్” మెన యేసు ప్రబు టాలి సంగిలన్.

6 కిచ్చొ అర్దుమ్ సంగిలన్ మెలె, “అదె, జో బుద్ది నెంజిలొ తిర్పు దెతోసా కీన్ సంగిలొ!

7 జలె, రాతి మెద్దెనె జాక జాచి బాదల్ కస్టల్ సంగిత జో నిసాన్ల జోచయ్ జల మాన్సుల్చ ప్రార్దనల్ దేముడు సూనె నాయ్ గె? జోవయింక తోడు జెయె నాయ్ గె? కచ్చితుమ్ సూనెదె, తోడు జెయెదె. అన్నె జా తోడు జెంక ఆల్సిమ్ కెరెదె గె? నాయ్ గెద.

8 బే బేగి తోడు జెయెదె. గని, జాగర్త, ఆవ్ మాన్సు జా జెర్మున్ అయ్లొసా ఈంజ లోకుమ్తె అన్నె ఉత్త జెతి పొదిక మాన్సుల్ †నిదానుమ్ నముకుమ్ తవుల గే నాయ్ గె?” మెన యేసు సంగిలన్.

పరిసయ్యుడుచి సుంకరోచి రిసా సంగిలి టాలి

9 పడ్డె ‘అమ్క పున్నిమ్’ మెనన అన్నె మాన్సుల్క నిస్కారుమ్ ఉచర్ల మాన్సుల్క ‘నూన్తు’ మెన యేసు అన్నెక్ టాలి సంగిలన్.

10 “ప్రార్దన కెరుక మెన దోగు మాన్సుల్ అమ్చి దేముడుచి గుడితె గెల. జోవయింతె ఎక్కిలో పరిసయ్యుడు, ఎక్కిలో సిస్టు నజితో సుంకరో.

11 జలె, పరిసయ్యుడు పురైతో టీచ, జోచి పెట్టి ఉచరన ఇసి ప్రార్దన కెరన్లన్, ‘ఓ అమ్చొ దేముడు, ఆవ్ జేవ్ అన్నె మాన్సుల్చి రితి నెంజిలి రిసా తుక అంచి సర్ల ఆవ్ సంగితసి. జేవ్, జలె, మాన్సుల్క బియడ, జోవయింక ఆస్తి దొర్కు కెరంతతి, కిచ్చొ కిచ్చొ నాయిమ్ నెంజిల కమొ కెర్తతి, లంజెకమొ కెర్తతి, చి సగుమ్జిన్ కి జో ఒత్తల్తోచొ సిస్టు నజితోసాచి రితి జతతి.

12 గని అవ్ సత్తరెక్క తివ్వెరి చువ్వె తత్తసి, చి అంక దొర్కు జతిన్ ఎత్తితె దెస్సు వాటల్తె ఏక్ వాట తుక దెతసి’ మెన దేముడుక ప్రార్దన కెర్లన్.

13 “గని, జో సిస్టు నజితోసా, ఇదిల్ దూరి టీచ తా, మాములుమ్ జేవ్ యూదుల్ కెర్తి రితి నే కెర్తి, ఉప్పిరి నే దెకితె, లాజుక మొకొమ్ లుంకడ గుండెతె పెటన ‘ఓ దేముడు, ఆవ్ పాపుమ్చొ మాన్సు. అంచి ఉప్పిరి కన్కారుమ్ జా అంచ పాపల్ చెమించుప కెరు!’ మెన ప్రార్దన కెర్లన్.

14 జలె, జేవ్ దోగులతె కక్క ‘సత్తిమ్ జలొ’ మెన దేముడు దెకిలన్? జో గవురుమ్ ఉచరన్లొసాక, నాయ్, గని పాపుమ్ ఒప్పన్లొ ఈంజొ సుంకరోకయ్, మెన తుమ్క ఆవ్ సంగితసి. జోచి పాపుమ్ చెమించుప జా గెరి ఉట్ట గెలన్. కిచ్చొక మెలె, కో జోక జొయ్యి గవురుమ్ కెరనెదె గే, జోక దేముడు దాక్ కెరెదె, గని కో జోక జొయ్యి దాక్ కెరనెదె గే జోక దేముడు వెల్లొ కెరెదె” మెన సంగిలన్.

† 17:31 17:31 మత్తయి 24:15-18. ‡ 17:32 17:32 అదికాండుమ్ 19:26. § 17:36 17:36 ఈంజ మత్తెలి తొలితో రెగిడ్ల నగుమ్ పుస్తకల్తె 36 నంబర్చి కోడు తయె నాయ్. * 18:1 18:1 లూకా 21:5-36. † 18:8 18:8 నెంజిలె, ‘నిదానుమ్ ప్రార్దన కెర్తి నముకుమ్ తన్ తవుల గే నాయ్ గె?’

బాలబోదల్ క యేసు చడ వరుమ్ దిలిసి
(మత్త 19:13-15; మార్కు 10:13-16)

15 జలె, జా దీసి 'యేసు జోవయింక చడ చెంగిల్ వరుమ్ దెవును' మెన, సగుమ్జిన్ ప్రజల్ జోవయించ బాలబోదల్ క జోతె కడ ఆన్తె తిల. గని జేవ్ జెతె తిలిసి యేసుచ సిస్సుల్ దెక కెర, జేవ్ బోదల్ క కడ ఆన్ల మాన్సుల్ క "పోస" మెన గోల కెర్ల.

16 గని యేసు జా దెక కెర, జోవయింక పాసి బుకారా కెర, "బోదల్ అంచితె జెతు. జోవయింక ఆటంకుమ్ కెర నాయ్. కిచ్చొక మెలె, దేముడుచి రాజిమ్ ఇస బాలబోదల్ జల సుదల్చియి.

17 తుమ్క ఆవ్ కిచ్చొ కచితుమ్ సంగితసి మెలె, మాన్సు గవురుమ్ నే ఉచరంతె బాలబోదల్ చి రితిచి నముకుమ్ తెన్ దేముడుచి రాజిమ్తె బెదితి వరుమ్ నజ్జెకయ్, పరలోకుమ్తె గెచ్చుక జయెదె" మెన యేసు సంగిలన్.

సామ్సారుమ్ తిలొ ఉబెడొ ఎక్కిలొ దేముడుచి
రాజిమ్చి రిసా యేసుక పుసితికయ్
(మత్త 19:16-30; మార్కు 10:17-31)

18 యూదుల్చొ అదికారి ఎక్కిలొ యేసుతె జా కెర, "చెంగిల్ తిలొ గురుబాబు, పరలోకుమ్చి రాజిమ్తె ఆవ్ కెయెక తెయెక జితి వాట అంక దొర్కు జంక మెలె, ఆవ్ కిచ్చొ కామ్ కెర్లె జయెదె?" మెన పుసిలన్.

19 పుసితికయ్ యేసు, " 'చెంగిల్ తిలొసా' మెన అంక కిచ్చొక సంగిలది? చెంగిలొసా దేముడు ఎక్కిలొయి, గని అన్నె కో కి చెంగిలొస నెంజితి.

20 జో దిల ఆగ్గుల్ మెలె తుయి జాన్సి.
లంజెకమొ కెరుక జయె నాయ్,
నరు అత్య కెరుక జయె నాయ్,
చోరుక జయె నాయ్,
అబద్దుమ్ సాచి సంగుక జయె నాయ్,
అయ్యద్ అబ్బొద్ క గవురుమ్ దెకితె తంక అస్సె.
దసచయ్" మెన జోక యేసు సంగిలన్.

21 సంగితికయ్ జో మాన్సు, "బాల తతె తెంతొ ఈంజేవ్ ఆగ్గుల్ రితి ఆవ్ నిదానుమ్ కెర దెకన్తసి" మెన జబాబ్ దిలన్.

22 జా కోడు సూన కెర యేసు, జోక, "అప్పెక తుక ఎక్కి పిట్ట అస్సె. తుచి ఆస్తి ఎత్తి. తుయి విక కెర, జా వికిలి డబ్బుల్ బీద సుదల్ క దేసు, దస్సి కెర్లెగిన పరలోకుమ్తె తుక ఆస్తి కలుగు జెయెదె. అన్నె అంచి తెన్ బెద అంచి పట్టి జె!" మెన సంగిలన్.

23 గని ఈంజ కోడు సూన కెర, జోక ఒగ్గర్ సామ్సారుమ్ తిలిచి రిసా జో మాన్సు ఒగ్గర్ విసారుమ్ జలొ.

24 తెదొడి, జో మాన్సు దస్సి విసారుమ్ జలిసి దెక కెర యేసు, "సామ్సార్లు దేముడుచి రాజిమ్తె గెచ్చుక జలె, కెద్ది గే కస్టుమ్ జలెకయ్ జయెదె.

25 కిచ్చొక మెలె, ఇస సామ్సార్లు దేముడుచి రాజిమ్తె బెదితి కంట, సూజిబొరొ వాట్ ఒంటి గెచ్చుక సుల్లు!" మెన సంగిలన్.

26 జలె, జా కోడు సూన్లస "దస్సి జలె, కో రచ్చించుప జంక జయెదె?" మెన బమ్మ జల.

27 గని యేసు, "మాన్సు కెర్క నెత్తిర్లిసి కి, దేముడు జర్లు కెరుక తెరె" మెలన్.

28 తెదొడి యేసుచ బారజిన్ బారికుల్తె తిలొ పేతురు మెలొ సిస్సుడు "ఈందె, అమ్చ గెరల్ ఎత్తి. ముల దా ఆమ్ తుచి పట్టి బులితసుమ్" మెలన్.

29 యేసు జేవ్ బారికుల్ క, నిజుమి, అన్నె తుమ్క ఆవ్ కిచ్చొ కచితుమ్ మెంతసి మెలె, దేముడుచి రాజిమ్చి కామ్ కెర్లి రిసా గేరు జలెకు, తేర్లిక జలెకు, అన్నొబావొక జలెకు, అయ్యన్ అబ్బొన్ క జలెకు, బోదల్ క జలెకు కో ముల తవుల గే,

30 అప్పె ఈంజ లోకుమ్తె ఈంజ కాలుమ్తె కి జోక దసచ అన్నె ఒగ్గర్ వంతుల్ రితి దొర్కు జయెదె, అన్నె, జెతి కాలుమ్తె, కెయెక తెయెక పరలోకుమ్తె జితి వాట జోక దొర్కు జయెదె.

జో మొరుక తిలిన్చి రిసా యేసు అన్నెక్ సుట్టు
సంగిలిసి

31 తెదొడి జేవ్ యెరూసలేమ్తె గెతె తిలి వట్టె యేసు జోచ బారజిన్ సిస్సుల్ క పక్క కడన ఇసి మెలన్. "ఈందె, అమ్ యెరూసలేమ్తె గెతసుమ్, చి ఆవ్ మాన్సు జా జెర్మున్ అయ్లొసాచి రిసా దేముడుచ కబుర్లు సంగిలన రెగిడ్డిసి ఎత్తి కచితుమ్ పూర్తి జర్లు జయెదె.

32 కిచ్చొక మెలె, యూదుల్ నెంజిలనచి అత్తి అంక సార్లు కెర దెవుల, చి అంక కొంకడుల, అంచి మరియాద కడుల, చి అంక తుంక దెవుల.

33 అంక కొర్డల్ తెన్ పెటుల, చి అంక మారుల, తిర్త్రతక అన్నె జీవ్ జా ఉట్టిందె" మెలన్.

34 గని ఇన్నెచి కిచ్చొ అర్దుమ్ కి కెరంతి నాయ్. జా అర్దుమ్ లుంకిల్ రితి తిలి, చి జో కిచ్చొచి రిసా సంగిలొ గే నేన్ల.

గుడ్డి జలొ మాన్సుక యేసు చెంగిల్ కెర్లిసి
(మత్త 20:29-34; మార్కు 10:46-52)

35 యెరూసలేమ్తె గెచ్చుక మెన యేసు వట్టె గెతె తా యెరికో పట్టుమ్క పాసి అయ్లి పొది, గుడ్డి జలొ మాన్సు ఎక్కిలొ వాట్ సాడి వెస తా, బిచ్చిమ్ నజెతె తిలొ.

36 ఒగ్గర్జిన్ మాన్సుల్ జా వాట్ గెతె తిలిన్చి అవాడ్ సూన కెర, "కిచ్చొక ఒగ్గర్ జనాబ్ ఈంజ వాట్ గెతతి?" మెన పుసిలన్.

‡ 18:26 18:26 మెలె, పాపుమ్ తెంతొ రచ్చించుప జంక, చి ఎత్తి అదికారుమ్ తిలొ దేముడుచి రాజిమ్తె బెదుక.

37 పుసిలె, జేవ్ “నజరేతు గవ్వొచో యేసు ఈంజ వాట్ గెతయ్” మెన జోక సంగిల,

38 చి నూన, జో “ఓ యేసుప్రబు, దావీదు రానొచి సెకుమ్తె జెర్మిలో రచ్చించుప కెర్తొసా, అంచి ఉప్పిరి కన్కారుమ్ తియ, అంచ చెంగిల్ కెరు!” మెన కేక్ గలన్.

39 తెదొడి పురెతో ఇండితె తిలస నగుమ్జిన్ జో గుడ్డి మాన్సుక “తుక్లె తా” మెన గోల కెర్ల, గని జో అన్నె, “దావీదు రానొచి సెకుమ్తె జెర్మిలో రచ్చించుప కెర్తొసా, అంచి ఉప్పిరి కన్కారుమ్ తియ చెంగిల్ కెరు!” మెన అగ్గెచి కంట గట్టిజ కేకుల్ గలొ.

40 ఇసి జతికయ్, యేసు టీవ కెర, “జోక ఇత్తల్ కడ ఆన” మెన ఆడ్ర దిలన్, చి జోక జోచితె కడ ఆన్లస పాసి జెతికయ్,

41 “ఆవ్ తుక కిచ్చొ కెరుక మెన తుయి కోర్ప జతసి?” మెన పుసితికయ్, జో గుడ్డి మాన్సు, “ప్రబు, ఆవ్ దెకిత్ రితి కెరు” మెలన్.

42 యేసు జోక, “ఈందె తుచ అంకివొ డీస్తు. అంచి ఉప్పిరి తుయి నముకుమ్ తిలి రిసా తుయి కేచెంగిల్ జా అస్సిసి” మెన సంగితికయ్,

43 బేగి జో మాన్సుచ అంకివొ డీసిల చి, దేముడుచి గవురుమ్ సంగ యేసుచి పట్టి గెలన్. అన్నె, పైజల్ ఈంజ ఎత్తి దెక తా, జేవ్ కి దేముడుచి గవురుమ్ సంగిల.

19

జక్కయ్య మెలో సిస్తు నజితో నుంకరో

1 జలె, యేసు యెరికో పట్టుమ్ పెన జా పట్టుమ్ వాట్ గెచ్చు ముల్తి పొది,

2 ఒత్త జక్కయ్య మెలో మాన్సు తిలన్. జో సిస్తు నజిత నుంకర్లుచో అదికారి, చి జో ఒగ్గర్ సొమ్నారుమ్ తిలో.

3 జలె, ‘యేసు కీసాచొగె దెకిన్దె’ మెన ఇస్తుమ్ జలన్, గని జో పాట్టి మాన్సు, చి యేసుచి నుట్టునంత బెర్ల జనాబ్ అడ్డు జా అస్తి.

4 జాకయ్ జో కిచ్చొ కెర్లన్ మెలె, యేసు జా వాట్ గెచ్చెదె, చి జో పురెతో నిగ గెచ్చ, ఏక్ బొడ్డ రూక్తె వెగిలన్.

5 జలె, యేసు ఒత్త పాచ కెర, ఉప్పిరి రూక్తె దెక, “జక్కయ్య, బే బేగి ఉత్తు. ఆజి ఆవ్ తుచి గెరి తంక అస్సె” మెలన్.

6 దస్సి మెంతికయ్, జక్కయ్య బమ్మ తెన్ జా రూక్తె తెంతో ఉత్త జా, సర్ల తెన్ యేసుక గెరి కడన, మరియాద ఎత్తి కెర్లన్.

7 ఇసి జర్గు జలిసి దెక కెర పైజల్ ఎత్తి కునుమ్కసుమ్ లట్టబ్బ. “పాపుమ్ నుదొచి గెరి జో గోత్ గెచ్చుక కిచ్చొక?” మెల.

8 జలె, యేసు ఒత్త తిలి పొది, జక్కయ్య పురె జా టీవ ప్రబుక కిచ్చొ కోడు సంగిలన్ మెలె, “ఈందె, ప్రబు, అంచి ఆస్తితెచి ఏక్ వంతు బీద సుదల్క దా గెలిందె. అన్నె, డబ్బుల్క ఆవ్ కక్క మోసిమ్ కెర తిలె, జోవయింక ఆవ్ మోసిమ్ కెర నజిలి కంట అన్నె అన్నె చెత్తర్ వాటల్ జోవయింక అన్నె దెయిందె” మెన ఒప్పల్లన్.

9 దస్సి జతికయ్, యేసు జోక, “దేముడు పాపల్ చెమించుప కెర్తి రచ్చన ఆజి ఈంజ గెరి పాచ అస్సె. పాపుమ్ ఇండితె తిలె కి ఈంజొ కి * అబ్రాహామ్చి సెకుమ్చో, గెద.

10 మెలె, ఆత్మక నెన గెలసకయ్ చజన జోవయించ పాపల్ తెంతో రచ్చించుప కెరుక మెనయ్ ఆవ్ మాన్సు జా జెర్మున్ అయ్లోసా ఈంజ లోకుమ్తె అయ్లయ్”.

బజర్చ కాసుల్చి టాలి (మత్త 25:14-30)

11 యేసు సంగిలి కోడు పైజల్ నూన్తె తిలి పొది, యెరూసలేమ్క పాసి జెతె తిల, చి పైజల్ జేవ్చి పెట్టి కిచ్చొ మెన ఉచరె తిల మెలె, “యేసు అమ్చి యెరూసలేమ్ పట్టుమ్తె పాచిలె, దేముడుచి రాజిమ్ ఎదార్దుమ్ ఏలుప కెరుక మొదొల్ జయెదె.” మెన ఉచరె తిల.

12 జాకయ్ యేసు జోవయింక ఏక్ టాలి సంగిలన్. “వెల్లొ మాన్సు ఎక్కిలో తిలో. ఈంజ దేసిమ్క రానొ జంక మెన, రానల్క టీవణ్ణొసా తిలి దూరి దేసిమి ఉట్ట గెచ్చ జెంక మెన, ఈంజొ బార్ జలొ.

13 గని, నే గెతె అగ్గె, జోచ దెస్సుజిన్ గొత్తి సుదల్క బుకారా కెర, జోవయింక ఎక్కెక్కోక ఎక్కెక్ † బజర్చ కాసుల్ దా కెర, ‘ఆవ్ జెతె ఎదక ఇన్నెతెన్ బియ్యారి కెర్తె తా’ మెలన్.

14 గని జోవయించ పైజల్ జోక ఒగ్గర్ విరోదుమ్ జా అస్తి, చి ‘ఈంజొ మాన్సు అమ్చి ఉప్పిరి ఏలుప కెరుక మెలె, అమ్క ఎగ్గె ఇస్తుమ్ నాయ్’, మెన జో మాన్సుచి పట్టి కబుర్ తెద్రయ్లన్.

15 “గని, జో మాన్సు రానొ జా బుల అయ్లన్, చి జో డబ్బుల్ దా తిల గొత్తి సుదల్ బియ్యారి కెర కెద్ది లాబుమ్ కెర అస్తి నూనుక మెన జేవ్క బుకార్లన్.

16 తొలితొచొ జా కెర, రానొచి పురెతో టీచిలన్ అన్నె, ‘బాబు, తుయి దిలి బజార్ కాసుక అన్నె దెస్సు బజార్ కాసుల్ లాబుమ్ దొర్కు జా అస్సె’ మెలన్, చి

§ 18:42 18:42 నెంజలె ‘రచ్చించుప జా అస్సిసి’. * 19:9 19:9 యూదుల్క అబ్రాహామ్ ముక్కిమ్చొ పూర్గుమ్చొ జా తిలో. † 19:13 19:13 ఏక్ బజార్ కాసుచి విలువ కెద్ది మెలె, పుంజెక్ పొదుల్చి కూలి డబ్బుల్చి ఎదిలి. ‡ 19:17 19:17 లూకా 16:10 దెక.

17 'బొల్లాయ్ కెర్లది, తుయి చెంగిలో గొత్తి సుదో. †ఇదిలిసి కామ్ దెతికయ్ తుయి నిదానుమ్ కెర్లది, చి తుయి దెస్సు పట్టల్చి ఉప్పిరి ఏలుప కెరుక మెన తుక ఆవ్ అదికారుమ్ దెతసి' మెన రానొ సంగిలన్.

18 తెదొడి అన్నెక్లో గొత్తి సుదో అయ్లో, అన్నె, 'బాబు, తుయి దిలి బజార్ కాసుక అన్నె పాచ్ బజార్ కాసుల్ లాబుమ్ దొర్కు జా అస్సె' మెలన్, చి

19 'బొల్లాయ్ కెర్లది, తుయి చెంగిలో గొత్తి సుదో, పాచ్ పట్టల్చి ఉప్పిరి ఏలుప కెరుక మెన తుక ఆవ్ అదికారుమ్ దెతసి' మెన రానొ సంగిలన్.

20 "తెదొడి అన్నెక్లో గొత్తి సుదో అయ్లో అన్నె, 'బాబు, ఉంద, తుచి బజార్ కాసు. ఇన్నెక మూటో బంద తియ దిలయ్'.

21 కిచ్చొక మెలె, తుయ్ 'కన్కారుమ్ నెంజిలోసా' మెన బిలయ్. తుయి కామ్ నే కెర్రిసి నజన్తసి, తుయి నే ఉంపిలిసి లాయితసి మెలన్.

22 జలె, జోక జో రానొ కిచ్చొ జబాబ్ దిలన్ మెలె, 'తుయి గర్చొ గొత్తి సుదో! తుయి సొంత సంగిలిసి తుకయ్ నేరిమ్ వయడ్డయ్. అంక కన్కారుమ్ నెంజిలోసా, సొంత కామ్ నే కెర్రిసి నజిలోసా, సొంత నే ఉంపిలిసి లాయితోసా' మెన తుయి జాన్సి.

23 జలె, 'అంచి డబ్బుల్ కిచ్చొక సావుకర్తె జవున్ తిసి నాయ్? సావుకర్తె జవున్ తితది జలె, ఆవ్ బుల అయ్లి పొది సర్ల తెన్ వడ్డె నజన్తయ్' మెన జో గర్చొ గొత్తి సుదొక సంగ కెర,

24 పాసి టీవ తిల మాన్సుల్క, జా బజార్ కాసు జోతె నజన, దెస్సు బజార్ కాసుల్ తిలో జో అన్నెక్లో గొత్తి సుదొక దాస, మెలన్.

25 జో దస్సి మెంతికయ్, జేవ్ తిల గొత్తి సుదల్ గోస జా, గని బాబు, జోక దెస్సు బజార్ కాసుల్ అస్సి! జోక అన్నె కాసుల్ కిచ్చొక దెంక! మెల.

26 గని జో రానొ కిచ్చొ సంగిలన్ మెలె, 'తుమ్క కిచ్చొ మెంతసి మెలె, కిక్క తిలె, జోక అన్నె దెంక జయెదె. కక్క నెంజిలె, జోక తిలిసి కి జోతె తెంతో అన్నె కడ గెలుక జయెదె.

27 జలె, అంక అమ్చి ఉప్పిరి జో ఏలుప కెరుక మెలె, అమ్క ఎద్గరె ఇస్టుమ్ నాయ్' మెల అంచ విరోదుమ్ సుదల్క కిచ్చొ కెరుక? జోక ఇన్నె కడ ఆన, చి అంచి మొక్కా కండ గెల మెన రానొ సంగిలన్" మెన యేసు *టాలి సంగిలన్.

అయ్లిసి
(మత్త 21:1-11; మార్కు 11:1-11; యోహా 12:12-19)

28 యేసు ఈంజ టాలి సంగ కేడవ కెర, యెరూసలేమ్తె గెచ్చుక మెన జోచ సిస్సుల్చి పురె గెలన్.

29 జలె, బేత్తుగే చి బేతనియ మెల గవ్వొక పాసిచి †బలీవ మెంతి మెట్టయ్ పావిలి పొది, యేసు జోచ సిస్సుల్తె దొగులక పాసి బుకారా కెర,

30 "తుమ్చి మొక్కా తిలి గవ్వొ తుమ్ పెస, చి గవ్వొ పెసిలదు మెలె, బంద తిలి ఏక్ గాడ్డె పిల్ల బేగి తుమ్క డీసెదె. జాచి ఉప్పిరి అప్పె ఎద కో కి వెగుక నేతయ్. జాక యిప కెర ఉదడ ఆన.

31 అన్నె, 'కిచ్చొక యిపితను?' మెన తుమ్క కో జవున్ పుసిలె, తుమ్ కిచ్చొ మెన మెలె, 'ఇన్నెతెన్ ప్రబుక కామ్ అస్సె' " మెన సంగ, మెన యేసు జేవ్ దొగుల సిస్సుల్క సంగ జా గవ్వొ తెద్రయ్లన్.

32 జలె, జో తెద్రయ్ల దొగుల గెచ్చు కెర, యేసు సంగిల్ రితి జలి మెన దెకిల.

33 జేవ్ జా గాడ్డె పిల్లక యిపుక దెర్రికయ్, "గాడ్డె పిల్లక కిచ్చొక యిపితను?" మెన జేవ్చ సావుకర్లు పుసిల.

34 పుసితికయ్, "ఇన్నెతెన్ ప్రబుక కామ్ అస్సె" మెల.

35 జలె, జేవ్ సిస్సుల్ జా గాడ్డె పిల్లక యేసుతె ఉదడ ఆన కెర, జోవయించ దుప్పట్లు గాడ్డెచి ఉప్పిరి గల దా, యేసుక వెగడ్డ,

36 అన్నె, యెరూసలేమ్తె జో గెతె తతికయ్, జో గెతి వట్టె †జనాబ్ జోవయించ పాలల్ అంతిర్ల.

37 అన్నె, యేసు జా బలీవ మెట్టచి కొన్న జిన యెరూసలేమ్ పట్టుమ్ పక్క ఉత్త పాసి పావిలి పొది, జోక నంపజల వైజల్ ఎత్తిజిన్ సర్లనంతోనుమ్ జా గట్టిజ అవాడ్ కెరన,

38 "దేముడుచి నావ్ తెన్ జెతో రానొక జోబర, జోబర! పరలోకుమ్తె సేంతుమ్, చి ఎత్తిచి ఉప్పిర్ టాన్తె తిలోసాక జోబర!" మెన కేకుల్ గల, యేసుచి అత్తి కెర్ల జేవ్ దెకిల కమొచి రిసా దేముడుచి గవురుమ్ సంగిలె తిల.

39 తెదొడి జేవ్ జనాబ్తె బెద తిల సగుమ్జిన్ పరిసయ్యుల్ యేసుక "గురుబాబు, తుచ సిస్సుల్ తుక్లె తతి రితి సంగు" మెలె,

40 గని యేసు జేవ్క కిచ్చొ సంగిలన్ మెలె, "తుమ్క ఆవ్ కిచ్చొ మెంతసి మెలె, ఈంజేవ్ తుక్లె తత్త జలె, ఈంజేవ్ పత్తల్ కేక్ గలుల" మెలన్.

యెరూసలేమ్ పట్టుమ్క జెంక తిల అల్లర్చి రిసా

యేసు గాడ్డె పిల్లతె వెగ యెరూసలేమ్ పట్టుమ్క యేసు ఏడ్డిసి

§ 19:26 19:26 మత్తయి 25:29 దెక. ఇన్నెచి అర్దుమ్ కిచ్చొ మెలె 'ఇదిల్ జవున్ బుద్ది తిలోసాక అన్నె బుద్ది సికడుక జయెదె, గని బుద్ది నెంజిలోసాతె తెంతో జో సిక తిలిన్ కి కడ గెలుక జయెదె'. * 19:27 19:27 ఈంజ టాలితె రానొ కో మెలె, యేసు. జోవయించ విరోదుమ్ సుదల్ కో మెలె, యూదుల్చ వెల్లెల మాన్సుల్. గొత్తి సుదల్ మెలె, జోక నంపజలన. డబ్బుల్ వాడిక కెర్రిన్ మెలె, జో దిలి కామ్. డబ్బుల్ మెలె, జో దిల నెక్కివో. † 19:29 19:29 'బలీవ మెట్ట' మెన కిచ్చొక నావ్ తియ అస్సి మెలె, ఒత్త బలీవ పండ్లు రూకుల్ తిల. ‡ 19:36 19:36 మత్తయి 21:8, చి మార్కు 11:8 దెక.

41 యేసు యెరూసలేమ్ పట్టుమక అన్నె పాసి జా జాక దెక కెర, జాచి రిసా ఏడ్లన్.

42 కిచ్చొ మెన ఏడ్లన్ మెలె, “ఓ యెరూసలేమ్, దేముడు తెన్ కిసి సేంతుమ్ జంక తుయి ఆజి జాన్తతి జలె, చెంగిల్ తత్తి! గని నాయ్, అప్పె జా అర్దుమ్ ఎత్తి తుమ్క లుంకిల్ రితి అస్సె.

43 ఓ యెరూసలేమ్ పట్టుమ్, తుయి ఒగ్గర్ సైమల్ సేడ్డి ఏక్ కాలుమ్ జెతయ్. జేవ్ దీసల్క తుక కిచ్చొ జయెదె మెలె, తుచ విరోదుమ్ సుదల్ తుచి సుట్టునంత మత్తి డిబ్బల్ వెగడ, తుచి సుట్టునంత బెర జా, ఎత్తి పక్కల్ తెంతో వెల జెవుల.

44 తుచ కోటల్, తుచ గెరల్ పూర్తి సేడవ గెల కెర, తుచి తెడి తిల మాన్సుల్ ఎత్తిజిన్క జేవ్ మారుల, చి తుచితె పత్తుర్చి ఉప్పిరి పత్తురు తతి రితి ములితి నాయ్. కిచ్చొక మెలె, దేముడు తుక రచ్చించుప కెర్తి వాటు ఆవ్ దెకయ్లయ్, గని చినున్ నాయ్” మెన యేసు కియెరూసలేమ్చి రిసా ఏడ గెలన్.

వెల్లెల మాన్సుల్ యేసుక మారుక మెన రకితె తిలిసి (మత్త 21:12-17; మార్కు 11:15-19; యోహా 2:13-22)

45 యేసు పట్టుమ్తె పావ కెర, దేముడుచి గుడితె పెన కెర, ఒత్త * సామన్ వికితనక ఉదడ గెలుక దెర,

46 జోవయింక, “ ‘అంచి గేరు ప్రార్దన కెర్తి గేరు, జా దస్సె తవున్’ మెన దేముడుచి కొడెతె రెగ్గవ అస్సె, గని తూమ్ చోర్లు జితో రితో గేరు జతి రితి జాక మార్పుప కెర అస్సెన్.” మెన సంగిలన్.

47 జలె, జా దొరతి యేసు రోజుక దేముడుచి గుడితె బోదన కెర్తె తిలన్, అన్నె వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన చి, యూదుల్చ వెల్లెల మాన్సుల్ జోక మారుక వాట్ చజితె తిల, గని

48 ప్రెజల్ ఎత్తి రోజుక జెతె తా జోవయించ కొడె ఒగ్గర్ సర్ల తెన్ సూన్తె తిల, చి నెతిర్ల.

20

వెల్లెల సుదల్ యేసుక పరిచ్చ కెర్తిసి (మత్త 21:23-27; మార్కు 11:27-33)

1 తెదొడి ఏక్ దీసి, యేసు దేముడుచి గుడితె ప్రెజల్క బోదన కెర్తె తా సుబుమ్ కబుర్ సంగితె తతికయ్, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన చి అన్నె సగుమ్జిన్ వెల్లెల మాన్సుల్ జోతె జాఁ కెర,

§ 19:44 19:44 యేసు జెర్మ ముప్పుయ్ తిన్ని వెర్పుల్క మొర అన్నె జిలన్, చి యేసు జెర్మ డబ్బయ్ వెర్పుల్క రోమ్ దేసిమ్చ నయ్స్యమ్ సుదల్ యెరూసలేమ్ పట్టుమక, దేముడుచి గుడిక పాడ్ కెర్ల. జా పట్టుమ్ దస్సి జా జా పట్టుమ్చ మాన్సుల్ జా సిచ్చ జవుల మెంతి గుర్తుక యేసు ఇసి సంగిలన్. * 19:45

19:45 మత్తయి 21:12-13, చి మార్కు 11:15-17 చి యోహాను 12:12-19 దెక. * 20:9 20:9 ఈంజ టాలెతె, ‘గుత్త నజ తోట రకితన’ కొన్న మెలె, ముక్కిమ్క యూదుల్క ఎత్తి అదికారుమ్ తిలో దేముడు దెకయ్లి వాట్ సికడ్డ వెల్లెల మాన్సుల్, మోసే తెన్ దేముడు దిలి ఆగ్గుల్ సికడ్డన, పరినయ్యల్, పూజర్లు. ‘ఎజోమాని’ మెలె, ఎత్తి అదికారుమ్ తిలో దేముడు. ‘ఎజోమాని తెద్రయ్ల గొత్తి సుదల్’ మెలె, జోవయించ కబుర్లు సంగిలన్. ‘ఎజోమానిచొ పుత్తున్’ మెలె, యేసు. ‘ద్రాచ తోట’ మెలె, యూదుల్, చి ఎత్తి అదికారుమ్ తిలో దేముడుచి బక్తి కెర్తె అన్నె మాన్సుల్.

2 “తుయి కెర్ల కమొ కెరుక, తుయి బోదన కెరుక, తుక కిచ్చొ అదికారుమ్ అస్సె? కొన్నో తుక అదికారుమ్ దిలన్?” మెన జోక గోల కెర్ల.

3 యేసు జోవయింక కిచ్చొ జబాబ్ దిలన్ మెలె, “ఆవ్ కి తుమ్కయ్ ఏక్ కోడు పుసిందె. జలె, అంక తుమ్ సంగ.

4 యోహాను బాప్తిసుమ్ దెతె తిలిన్చి అదికారుమ్ కేనె తెంతో చి? పరలోకుమ్ తెంతో చి గే, మాన్సు తెంతో చి గే, తుమ్ సంగ” మెన వెల్లెల మాన్సుల్క యేసు పుసిలన్.

5 దస్సి పుసితికయ్, జేవ్ వెల్లెల మాన్సుల్ కిసి జల మెలె, ఎక్కిలో తెన్ ఎక్కిలో బమ్మ తెన్ లట్టబన, ఇసి మెంతె తిల, “పరలోకుమ్ తెంతో చి మెన అమ్ సంగిలెగిన, ‘దస్సి జలె, తుమ్ కిచ్చొక జోక నంప కెర్పు నాయ్?’ మెన ఈంజో అమ్క సంగిదె.

6 గని, ‘మాన్సు తెంతో చి’ మెన సంగిలె, జనాబ్ అమ్క పత్తల్ తెన్ పెట మారుల. యోహానుక ‘అమ్చొ దేముడుచ కబుర్లు సంగితోసా కచితుమ్ తిలో’ మెన జేవ్ జనాబ్క నమ్ముకుమ్.”

7 జాకయ్ జేవ్ యేసుక కిచ్చొ జబాబ్ దిలి మెలె, “జా అదికారుమ్ కేనె తెంతో గే నేనుమ్” మెలె.

8 జేవ్ దస్సి సంగితికయ్, యేసు జోవయింక, “దస్సి జలె, కేన్ అదికారుమ్క ఆవ్ అంచ కమొ కెర్తెసి గే, ఆవ్ తుమ్క సంగి నాయ్” మెన సంగ జేవ్క ముద్దొ కెర్లన్.

ద్రాచ తోటచొ ఎజోమానిచొ పుత్తున్క మార్గిన్చి టాలి యేసు సంగిలిసి (మత్త 21:33-46; మార్కు 12:1-12)

9 తెదొడి యేసు ప్రెజల్క ఈంజ ఏక్ * టాలి సంగుక దెర్లన్. “ఏక్ మాన్సు ద్రాచ తోట రోవడ కెర, రకితనక నిసాన, జేవ్క జా తోట గుత్త దా, ఇదిల్ ఒగ్గర్ దీసల్ వేర దేసిమి గెచ్చ తంక మెన, ఉట్ట గెలన్.

10 జలె, వంటొ పికిలి పొది, ‘సమయుమ్ జా అయ్లి’ మెన, జేవ్ గుత్త నజిలనతె జా తోటచి వంటొ ఏక్ వాట నజ ఆన్తి రిసా, గొత్తి సుదొ ఎక్కిలోక ఎజోమాని తెద్రయ్లన్. గని జో గొత్తి సుదొ ఒత్త పావెతికయ్, గుత్త నజిల జేవ్ రకిత మాన్సుల్ జోక పెట గెల కెర, కిచ్చొ నే దెతె ఉదడ్డొ.

11 “ఒత్త తెంతో, అన్నెక్లొ గొత్తి సుదొక జో ఎజోమాని తెద్రయ్లన్, గని జేవ్ రకితన జోక కి పెట కెర జోచి మరియాద కడ, జోక కి కిచ్చొ నే దెతె ఉదడ గెల.

12 ఒత్త తెంతో అన్నెక్లొ గొత్తి సుదొక ఎజోమాని తెద్రయ్లన్ చి, ఇన్నొక కి బలే అల్లర్ కెర గంటివొ గాయిమ్లు కెర దా ఉదడ గెల.

13 “తెదోడి జా ద్రాచ తోటచో ఎజోమాని, ‘అవ్ కిచ్చొ కెర్లె జయెదె? నాయ్, గెద, ఇసి కెరిందె. అంచొ ప్రేమ తిలో పుత్తుక తెద్రయిందె. జోకయ్ మరియాద దెకుల, కిచ్చొగె’ మెన ఆకర్క జోకయ్ తెద్రయలన్.

14 జేవ్ తోట గుత్త నజీలన జోక దెక కెర, ‘ఇన్నెకయ్ అబ్బొన్చి దనుమ్ కలుగు జయెదె. అల్లె, ఇన్నెక మారుమ, చి ఇన్నెక కలుగు జతి వాట అమ్కయ్ దొర్కు జయెదె’ మెన జోవయింక జెవ్వి లట్టబన,

15 జో ఎజోమానిచొ పుత్తున్క దెర కెర, జోక తోట తెంతో వెలవ న కెర, †బయిలె మార గెల. జలె, జేవ్ ఎజోమానిచొ పుత్తున్క దస్సి కెర్లి రిసా, జా తోటచో ఎజోమాని జోవయింక కిచ్చొ కెరెదె?

16 కిచ్చొ కెరెదె మెలె, జాఁ కెర, జేవ్ గుత్త నజీలనక మొరవ కెర, జా తోట వేర మాన్సుల్క గుత్త దెయెదె” మెన యేసు సంగిలన్. ప్రెజల్ జాక నూన కెర, దస్సి కెయఁక జర్గు జంక జయె నాయ్! మెల.

17 గని యేసు జోవయింక పక్క పసుల దెక, “జలె, దేముడు దేముడుచ కొడెతె రెగ్గయలి ఏక్ కోడు సంగిందె, జాచి అర్దుమ్ కిచ్చొ గే తుమ్ ఉచర.

‘కామ్క నెంజె’ మెన గేరు బందిలన జా ఏక్ పత్తురు పిట్టవుక మెన ఉచర్లె కి, జయ్యి పత్తురు గేరుక బోడిపత్తుర్ జలన్. మెన రెగిడ్ల కోడు.

18 ఈంజొ పత్తుర్చి ఉప్పిరి కో సేడుల గే, జేవ్ బద్దల్ జా గెచ్చుల, గని కచి ఉప్పిరి ఈంజొ పత్తుర్ సేడెదె గే, జోక బీడవ గెలెదె.” మెన యేసు‡ సంగిలన్.

19 పంటొ నజుక గెలనక మార్ల సంగిలన మెన అమ్చి రిసా యేసు సంగితయ్ మెన మోసే తెన్ దేముడు దిలి ఆగ్గుల్ సికడ్డన చి వెల్లెల పూజర్లు చినన కోపుమ్ జా, జోక జయ్యి గడియయ్ దెరుక ఉచర్ల, గని ‘ప్రెజల్ కోపుమ్ జా అల్లర్ కెరుల’ మెన, జోవయింక బియ్ కెర, తుక్లె తిల.

సిస్టు డబ్బుల్ దెతిన్చి రిసా యేసుక పరిచ్చ కెరయలిసి (మత్త 22:15-22; మార్కు 12:13-17)

20 జలె, ‘వాల్ అయ్లె యేసుక దెరుమ్దె’ మెన మోసే తెన్ దేముడు దిలి ఆగ్గుల్ సికడ్డన చి వెల్లెల పూజర్లు దెకితె తిల చి, సగుమ్జినక లంచుమ్ దా కెర, “తుమ్ సత్తిమ్క పుసిల్ రితి డీస” మెన, జేవ్ మాన్సుల్ యేసుక ఏక్ కోడు పుసితి రితి తెద్రయల. జోవయింక ఉద్దెనుమ్ కిచ్చొ

మెలె, ‘యేసు కిచ్చొ జవున్ తప్పు సంగిలె, జోక దెర, రోమ్ దేసిమ్చొ అదికారితె సార్ప కెర దెంక జయెదె చి, యేసుచి రిసా నూన, సిచ్చ దెయెదె’ మెన కోర్ప జతతి.

21 జలె, జేవ్ మాన్సుల్ యేసుతె జా కెర, “గురుబాబు, తుయి సత్తిమ్ లట్టబ, సత్తిమ్ బోదన కెర్తసి మెన. తుయి మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల గే నే బితె, దేముడు దెకయలి వాట్చి రిసా సత్తిమ్ తెన్ బోదన కెర్తసి మెన జానుమ్” మెన పులయతి రితి సంగ,

22 అన్నె, “రోమ్ దేసిమ్చి ప్రబుతుమ్చొ కైసర్ రానొక అమ్ సిస్టు దెంక నాయిమ్ గే నాయ్ గె?” మెన పుసిల.

23 గని యేసు జోవయింక కిఉచరన్ల, జోవయింక ఉప్రమెన్ను చిన కెర,

24 “ఏక్ వెండి *కాసు అంక దెకవ” మెలన్, చి జేవ్ ఆన దెకయతికయ్, “ఇన్నెతె కచి బొమ్మ కడ అస్సి? కచి నావ్ డీస్తయ్?” మెన పుసిలన్ చి, “కైసర్ రానొచి” మెన జనాబ్ సంగిల.

25 యేసు జోవయింక, “దస్సి జలె, కైసర్క దెతిసి కైసర్క, దేముడుక దెతిసి దేముడుకయ్ తుమ్ దాస.” మెన, జోవయింక జబాబ్ దిలన్.

26 దస్సి, జో సంగిలిన్తె తప్పు నాయ్ చి, ప్రెజల్చి మొక్కె జో కిచ్చొ తప్పు సంగితిన్చి రుజ్జు దెకవుక నెతిర్ల, చి దెరుక నెతిర్ల. గని జో దిలి జబాబ్చి తెల్విక ఆచారిమ్ జా, తుక్లె జల.

సద్దూకయ్యులు మెల పండితుల్ యేసుచి తెలివి పరిచ్చ కెరుక

(మత్త 22:23-33; మార్కు 12:18-27)

27 పడ్డొ, ‘మొర గెలెగిన అన్నె జీవ్ జంక నెంజె, అన్నెక్ లోకుమ్తె గెచ్చుక నెంజె’ మెన ప్రెజల్క సికయత సద్దూకయ్యులు సగుమ్జిన్ యేసుతె జాఁ కెర,

28 “గురుబాబు, ఈందె, ‘ఎక్కిలోచొ అన్నొసి పెండ్లి జా బోదల్ నెంతె మొర గెలెగిన, జో బావొసి అన్నొన్చి తేర్చిక ఆనన, అన్నొన్చి నావ్ తెన్ బోదల్ పాయిక అస్సి’ మెన, మోసే పూర్గుమ్చొ అమ్ యూదుల్చి రిసా రెగ్ల అస్సి.

29 జలె, సత్తుజిన్ బావుడ్లు తిల. జోవయింతె తొల్పుర్ తెర్చి ఆనన, బోదల్ నెంతె మొర గెలన్.

30 జో మాన్సుచి పట్టి జెర్మిలోసా కి జాక ఆనన, బోదల్ నెంతె మొర గెలన్.

31 జోచి పట్టిచొ, జోచి పట్టిచొ, దస్సి వర్స తెన్ సత్తుజిన్ మొత్తుమ్ జా తెన్ పెండ్లి జా సంతానుమ్ నెంతె మొర గెల.

† 20:15 20:15 యేసుక కి పడ్డొ యెరూసలేమ్ పట్టుమ్ తెంతో బయిలె కడన మార్ల; సిలువతె. లూకా 23:26-33. ‡ 20:18 20:18 ఈంజు టాలితె ‘దేముడుచి గుడి’ మెలె, ఎత్తి అదికారుమ్ తిలో దేముడుచి రాజిమ్, యేసుక సంపజా జోవయింక నిదానుమ్ జలన మొత్తుమ్ జిన్. బోడిపత్తుర్ మెలె, యేసు. ‘బోడిపత్తుర్ నెసిలన’ మెలె, ముక్కిమ్క యూదుల్చవ వెల్లెల మాన్సుల్. ‘పత్తురు జోవయింక ఉప్పిరి సేడ బీడయతిసి’ మెలె, జేవ్ పూర్తి సంపనెంజిలిన్ నెసిలిసిచి సిచ్చ. § 20:23 20:23 జోవయింక కిచ్చొ ఉచర్ల మెలె, ‘అమ్క ఆక్రమించుప కెర్లి రోమ్ దేసిమ్చి ప్రబుతుమ్క సిస్టు దెంక నెంజె’ మెన ఏక్ వేల జో సంగిలె, జా ప్రబుతుమ్చి మొక్కె జోవయింక నేరిమ్ వయడ సిచ్చ కెరవుక జయెదె. గని ‘జా సిస్టు దెంక చెంగిల్’ మెన జో సంగిలె మాములుమ్ ప్రెజల్ కోపుమ్ జవుల. మెలె, జా వేర దేసిమ్చి ప్రబుతుమ్క సిస్టు దెంక ఆగ్గు తిలె కి, జేవ్ యూదుల్ నెసితి. * 20:24 20:24 యెరూసలేమ్తె దొన్ని రగల్ కాసుల్ తవుల. ఏక్ రగుమ్ దేముడుచి గుడితె దెతిసి, ఏక్ రగుమ్ ప్రబుతుమ్క దెతిసి, మాములుమ్ బియ్యార్కు వాడిక కెర్తిసి.

32 ఆకర్షక జా తేర్బోద కి మొర గెలి.

33 జాకయ్, మొర గెలన అన్నె జీవ్ జతి పొదిక, జా తేర్బోద జోవయింతె కక్క తేర్చి జా తయెదె? జేవ్ నత్తుజిన్ వర్ష తెన్ జా తెన్ పెండ్లి జల, గెద” మెన యేసుక పుసీల.

34 ఇసి జతికయ్, యేసు జేవ్ సద్దుకయ్యుల్క, “ఈంజయ్ కాలుమ్చ మాన్సుల్ పెండ్లి జా పుత్తర్పుల్క పెండ్లివొ కెర్తతి,

35 గని ‘అన్నె జీవ్ జా పరలోకుమ్తె జా కాలుమ్క జితు’ మెన కక్క దేముడు విలువ దెకెదె గే, ఒత్త పెండ్లివొ నెంతె దస్సే తవుల.

36 కిచ్చొక మెలె, ఒత్త గెలె దూతల్ కిసి మొర్తి నాయ్ గే, దస్సి, ఈంజేవ్ కి కెయ్క కి అన్నె మొర్తి నాయ్. అన్నె, జేవ్ మొర గెచ్చు అన్నె జీవ్ జలి రిసా, జేవ్ దేముడుచ పుత్తర్లు జా అస్తి.

37 “జలె, ‘మొర గెలన అన్నె జీవ్ జవుల’ మెన †రూకు తెడి జా ఆగి లగితె తిలిన్చి రిసా జో రెగిడ్డిన్తె అమ్చో మోసే పూర్గుమ్చో కి దెకయ్తయ్. కేన్ కోడుతె మెలె, దేముడుచి రిసా ‘అబ్రాహామ్చో దేముడు, ఇస్సాకుచో దేముడు, చి యాకోబుచో దేముడు’ మెన ఏకతె సంగితయ్, గెద.

38 జలె జేవ్ మొర్ల పూర్గుల్క మోసేచి కాలుమ్ ఎద కి జో దేముడు తా కామ్క అయ్లిన్ తెన్ జేవ్ అన్నెక్ లోకుమ్తె గెచ్చు జివ్వి అస్తి మెన రుజ్జు జతయ్. రితి మొర గెలనక నాయ్, గని జీవ్ తిలనకయ్ జో దేముడు తయెదె. కో దేముడుచి రిసా జియ మొర అస్తి గే, జోవయించి రిసా జితతి” మెన యేసు సంగిలన్.

39 జలె, మోసే తెన్ దేముడు దిలి ఆగ్గుల్ సికడ్డన కి ఒత్త తిల. జేవ్, జలె, పరిసయ్యుల్ తెన్ బెదితన జవుల చి, మొర్లె జీవ్ జంక జయెదె, అన్నెక్ లోకుమ్తె గెచ్చుక జయెదె మెన నంప కెర్తతిచి రిసా “గురుబాబు, తుయి చెంగిల్ జబాబ్ దిలది!” మెన సంగిల.

40 ఒత్త తెంతో జోవయింతె అన్నె కో కి యేసుక కిచ్చొ పుసుక కి దయిరిమ్ జతి నాయ్.

దేముడు తెద్రయ్లో క్రీస్తు
(మత్త 22:41-46; మార్కు 12:35-37)

41 తెదోడి యేసు జోవయింక ఇసి మెలన్. “‘దేముడు తెద్రయ్లో రచ్చించుప కెర్తొసా జతో క్రీస్తు అమ్చో దావీదు రానొచి సెకుమ్తె జెర్మ జోక పుత్తుసి జయెదె’ మెన కిసి సంగుక జతయ్?” మెన, అన్నె,

42-43 క్రీస్తనల్తె దావీదు,

‡“తుచ విరోదుమ్ సుదల్ తయె సుదితి పొద్రొ జతి రితి ఆవ్ కెర్తి ఎది ఎద

తుయి అంచి ఉజెతో పక్కయ్ వెస తా

అంచి తెన్ ఏలుప కెరు, మెన ప్రబు అంచొ ప్రబుక సంగిలన్ మెన రెగిడ్లన్.

44 దస్సి, దావీదు రానొ క్రీస్తుక ‘ప్రబు’ మెన సంగితయ్ జలె, జో క్రీస్తు కిసి జోక కిపుత్తుసి జయెదె? తుమ్ ఉచర” మెన ఒత్త తిలనక యేసు సంగిలన్.

దేముడుచి కొడొ సికడ్డనచి రిసా ప్రెజల్క యేసు జాగర్త సంగిలిసి
(మత్త 23:1-36; మార్కు 12:38-40; లూకా 11:37-54)

45 ప్రెజల్ ఎత్తి నూన్తె తతికయ్, యేసు జోచ సిస్సుల్క ఇసి మెలన్.

46 “దిగిల నూటిచ పాలల్ గలన బులిత గవురుమ్ ఉచరంత అమ్చ మోసే తెన్ దేముడు దిలి ఆగ్గుల్ సికడ్డనచి రిసా తుమ్ జాగర్త తెన్ తా. జేవ్ సంతవీదులె టీచ మాన్సుల్ ఎత్తి అమ్క జొకర్తు మెన కోర్ప జతతి. సబ గెరలె ముక్కిమ్చ టాన్లుతె, విందుల్తె ముక్కిమ్చ టాన్లుతె వెనుక కోర్ప జతతి.

47 జేవ్ మోసిమ్లు కెర రండెల్ మాన్సుల్చ గెరల్ విక కతతి, అన్నె ఉప్రమెన్సుక దిగిల ప్రార్దనల్ కెర్తతి. దస్సి, జోవయించి పాపుమ్ ఒగ్గరి, చి వెల్లి సిచ్చ సేడుల” మెన యేసు సంగిలన్.

21

బీద జలి రండెల్ మాన్సు ఎక్కి జాక కలుగు జలిసి ఎత్తి దేముడుక దిలిసి
(మార్కు 12:41-44)

1 దేముడుచి గుడితె డబ్బుల్ దెతి కానుక పెటె ఏక తయెదె. దేముడుచి కామ్క మెన మాన్సుల్ ఒత్త డబ్బుల్ గలుల. జలె, యేసు జా పక్క అంకి గల, సామ్సార్లు జోవయించి డబ్బుల్ జా పెట్టెతె గల్తె తిలిసి దెకిలన్.

2 తెదోడి ఎద్దరె నెంజిలి రండెల్ మాన్సు జా డబ్బుల్ దెతి కానుక పెట్టెతె దొన్ని ఇదుల రాగి కాసుల్ గలిలిసి యేసు దెకిలన్.

3 జా దెక కెర, యేసు, “నిజమి తుమ్క ఆవ్ కిచ్చొ మెంతసి మెలె, జేవ్ సామ్సార్లు ఎత్తిజిన్ మొత్తుమ్ దిలిన్చి కంట ఈంజ ఎద్దరె నెంజిలి రండెల్ మాన్సు ఒగ్గర్ దా అస్సె.

4 జోవయించి ఎదివాట్ సామ్సారుమ్ తెంతో సేంసిలిసి జేవ్ దా అస్తి. ఇన్నెక, మాత్తుమ్, కిచ్చొ నెంజిలి కి, కలుగు జలిసి ఎత్తి దాయి గెల అస్సె” మెన యేసు సంగిలొ.

† 20:37 20:37 నిర్గమకాండుమ్ 3:1-6. ‡ 20:42-43 20:42-43 క్రీస్తన 110:1. § 20:44 20:44 కిసి మెలె, యేసు ఎత్తి అదికారుమ్ తిలొ దేముడుచొ పుత్తుసి జయె దేముడి జతయ్, గని మాన్సు జా దావీదు రానొచి సెకుమ్తె జెర్మ జోవయింక పుత్తుసి రితో జతయ్. సగుమ్జిన్ ప్రెజల్ జా కోడు ఒప్పణ్; మత్తయి 9:27, 21:9. ‘మాన్సు జా జెర్మన్ అయ్లోసా’ మెలి జో యేసు సంగిన్ల నావ్తె కి జా అర్దుమ్ ఇదిల్ లుంకిల్ రితి అస్సె.

దేముడుచి గుడి పాడ జంక తిలినచి రిసా సంగిలిసి
 5 దేముడుచి గుడి “చెంగిల్ పత్తల్ తెన్ కెడ్డి సూటి తెయార్ కెర అస్తి, *కెడ్డి తమ్మన వస్తువల్క సూటి కెర అస్తి!” మెన †సిస్సుల్ యేసుక దెకయ్ల.

6 యేసు, “తుమ్ దెకితిసి ఎత్తి జలె, సగుమ్ దీసల్ గెలె కిసి జయెదె మెలె, అప్పె పత్తుర్చి ఉప్పిరి పత్తురు దొత్తల్ తిలె కి, ఎక్కి జలెకు నే టీవెతె గలి జతి †దీసి జెయెదె” మెన సంగిలన్.

ఉగుమ్ మార్పుప జతిన్చి రిసా యేసు సంగిలిసి

7 తెదొడి యేసుక, జోచ బారజన్ సిస్సుల్ “గురుబాబు, తుయి సంగిలిసి కెయెక జర్గు జయెదె? ఈంజ జర్గు జతి పొది అయ్లి మెలె, అమ్ చినితి రిసా కిచ్చొ గుర్తు తయెదె?” మెన వుసీల.

8 జో జోవయింక, “కొన్సొ జలెకు తుమ్క అంచి రిసా మోసిమ్ నే కెర్తి రితి తుమ్ జాగర్త దెకన. కిచ్చొక మెలె, ‘ఆవ్వి క్రీస్తు’ మెనన జలెకు. క్రీస్తు జెతి సమయుమ్ జా అయ్లి మెన జలెకు, కో కో మాన్సుల్ బార్ జవుల. జోవయించి పట్టి తుమ్ గెచ్చు నాయ్.

9 అన్నె, దేసిమ్చి ఉప్పిరి దేసిమ్ యుద్దుమ్ కెర్తినచి రిసా జలెకు, ఏక దేసిమ్చ జోవయించి ఉప్పిరి జెవ్వి యుద్దుమ్ కెర్తినచి రిసా జలెకు తుమ్ సూన్లె, తుమ్ బమ్మ జా నాయ్. దనచ ఎత్తి జర్గు జంక అస్సి, గని ఈంజ ఉగుమ్ తెద్ది బేగి పూర్తి జయె నాయ్” మెన సంగ కెర

10 జోవయింక అన్నె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క టీవెల.

11 వేర వేరతె బూకంపల్ కరువుల్ చి, కిచ్చొ కిచ్చొ కన్జల్ నన్జల్ జర్గు జవుల చి, ఆగాసుమ్ తెంతో జెత ఒగ్గర్ బయిమ్ దెత వెల్లో గుర్తులు జెవుల.

12 “గని ఈంజ ఎత్తి జర్గు నే జతె అగ్గె, మాన్సుల్ తుమ్క దెర, జోవయించి కోపుమ్క తుమ్క కిచ్చొ కిచ్చొ అల్లర్ కెర, ‘అదికారుల్ జోవయింక సిచ్చు కెర్తొ’ మెన అమ్క యూదుల్చ నబ గెరలె జోవయించి అత్తి సార్పు కెర దెవుల, చి తుమ్క జేల్తె గల దెవుల. అంచి సేవ తుమ్ కెర్తసుచి రిసా, రానల్చి మొక్కె అదికారుచి మొక్కె తుమ్ తీర్పు జతి రిసా సిచ్చల్ జతి రిసా తుమ్క టీవెడుల.

13 జేవ్ దస్సి కెర్తి పొదిక, అంచి రిసా తుమ్ సాచి సంగితె.

14 తుమ్ అప్పె మెన్సుతె కిచ్చొ బుద్ది దెరన మెలె, మాన్సుల్చి మొక్కె తుమ్ పరిచ్చు జంక జలె, జా నే జతె అగ్గె, జేవ్ పరిచ్చు కెర్తొ కిచ్చొ జబాబుల్ దెమ్దె?, మెన తుమ్ ఉచరంతె తా నాయ్.

15 కిచ్చొక మెలె, తుమ్క చోడి దెయిందె, తుమ్క దొర్కు జలి బుద్ది గ్యానుమ్ దెయిందె. తుమ్చ జబాబుల్చి తెల్విచి ఉప్పిరి జేవ్ అల్లర్ కెర్తసతె వెల్లెల మాన్సుల్తె కో జినుక నెత్తిరి, తుమ్క కిచ్చొ జబాబ్ సంగుక నెత్తిరి.

16 “అదికారుల్చి అత్తి తుమ్క సార్పు కెర దెతసతె సగుమ్జిన్ కొన్సొ జవుల మెలె, తుమ్చ అయ్యెదింసి, అన్సొబావొదింసి, తుమ్చ బందుగులు, తుమ్చ సినేతులు. అన్నె, తుమ్తె సగుమ్జిన్క మాన్సుల్ మారుల.

17 అన్నె, తుమ్ అంచి నావ్ తెన్ బులితె తత్తెచి రిసా, ఎతివాట్జిన్ తుమ్క విరోదుమ్ జవుల.

18 గని, కిపరలోకుమ్తె తుమ్ జెతిన్క ఉచర్లె, తుమ్చ నెండివాడల్తె ఎక్కి కి నాసెనుమ్ జా గెచ్చె నాయ్, ఈంజ లోకుమ్తె ఈంజ ఆగ్గక మార్లె కి, తుమ్ పరలోకుమ్తె గెతిసి అడ్డు కెరుక నెత్తిరి.

19 తుమ్ ఎక్కి నిదానుమ్ ఓర్పుప జా, చి పరలోకుమ్తె గెతి రితి తుమ్చి జివు దొర్కు కెరన తా.

యెరూసలేమ్ పట్టుమ్ పాడ జంక తిలినచి రిసా యేసు సంగిలిసి (మత్త 24:15-21; మార్కు 13:14-19)

20 “గని యెరూసలేమ్ పట్టుమ్క సయ్యెన్యుమ్ ఒండి సుట్టునంత బెర తతిసి తుమ్ కెయెక దెకితె గే, ‘పట్టుమ్ పాడ జంక తిలి సమయుమ్ పాచ జా అస్సె’ మెన చినితె.

21 జా గుర్తు దెకిలె, తుమ్చితె కో ఈంజ యూదయ ప్రదేసిమి తవుల గే, చట్టున డొగ్రలె ఉట్ట నిగుతు చి, పట్టుమ్చి తెడి తిలన బార్ జా ఉట్ట గెత్తు, చి పట్టుమ్ ఒత్తల్తోచి బయిలె గవ్విలె జవున్ కో తవుల గే, పట్టుమ్తె అన్నె పెసుత్ నాయ్.

22 కిచ్చొక మెలె, జోవయింక పచ్చిల్ రితి ఇండిల జోవయించ అమ్చ యూదుల్క దేముడు సిచ్చు దెత దీసల్ జవుల, జేవ్. జో అగ్గె రెగిడ్డిసి దస్సి జర్గు జా పూర్తి జంక అస్సి.

23 “అయ్యె! జేవ్ దీసల్క వయ తిల తేర్బోదల్, బోదల్ వడ్డివొ ఉట్ట నిగుక నెత్త ఒగ్గర్ సైమల్ జవుల! ఈంజ దేసిమి ఒగ్గర్ కన్జల్ సిచ్చల్ జవుల!

24 అమ్చ యూదుల్తె సగుమ్జిన్క కండ గెలుల, సగుమ్జిన్క దెర వేర దేసిమ్లుతె కడ నెవుల. అన్నె యూదుల్ నెంజిలన ఈంజ యెరూసలేమ్ పట్టుమ్చి ఉప్పిరి, ఈంజ దేముడుచి గుడిచి ఉప్పిరి ఏలుప కెర్తి కాలుమ్ కేడ్డె ఎదక జేవ్ ఈంజ ఎత్తి సుంద గెలుల.

* 21:5 21:5 ఇస్టుమ్ తిల సామ్నార్లు బజార్ వస్తువల్ ఎత్తి అదికారుమ్ తిలో దేముడుక దెకికయ్, దసచక దేముడుచి గుడి సూటి కెర తిల. † 21:5 21:5 మార్కు 13:1, మత్తయి 24:1 దెక. ‡ 21:6 21:6 యేసు జెర్కు డబ్బయ్ వెర్చల్ గెతికయ్, రోమ్ దేసిమ్చ సయ్యెన్యుమ్ పాడ కెర్ల. § 21:18 21:18 నెంజెలి, ‘ఎత్తి అదికారుమ్ తిలో దేముడుచి సెలవ్ నెంతె తుమ్చ నెండివాడల్తె ఎక్కి కి నాసెనుమ్ జా గెచ్చె నాయ్’.

దేముడుచి రాజిమ్ ఎదార్దుమ్ ఏలుప కెరుక దెర్రిసి చి రిసా యేసు సంగిలసి
(మత్త 24:29-35; మార్కు 13:24-31)

25 “పడ్డొక, పొద్దుతె, జోనుతె, చి సుక్కల్తె కిచ్చొ కిచ్చొ గుర్తుల్ డీనుల చి, తుపాన్ కెర్తె సముద్దుమ్చ కెర్తల్ ఎదిలి డోంకక జా, బుయ్యో ఉట్ట జా గెరల్ గుడ్డ దెర గెలె, జా అల్లర్ జా అవాడ్ కీన్ తయెదె గే, దస్సి జయెదె చి, దసచచి రిసా ఒండి లోకుమ్తె వేర వేర దేసిమ్లుచ మాన్సుల్ సైమల్ సేడుల చి, కిచ్చొ ఉచరుక గే నేన గెచ్చుల.

26 ఈంజ లోకుమ్తె జెంక తిల అల్లర్చి రిసాచి జోవయించి బయిమ్క మాన్సుల్చి మొకొమ్ గుంజు సేడుల. కిచ్చొక మెలె, ఆగాసుమ్తె సెక్తి తిలిసి ఎత్తి అద్దుర్ జా గెచ్చెదె.

27 తెదొడక, ఎదివాట్ అదికారుమ్ తెన్, పరలోకుమ్చి ఉజిడి తెన్ ఆవ్ మాన్సు జా జెర్మున్ అయ్లోసా మబ్బుతె పరలోకుమ్ తెంతో ఉత్త జెతిసి *ఎత్తిజిన్ దెకుల.

28 “జలె, ఈంజ ఎత్తి జర్గు జంక దెర్తె పొది, అమ్చి రచ్చన పాసి జా జెతయ్ మెనన, తుమ్ సొగ టీచ దయిరిమ్క ఉప్పిరి దెక, సర్దనంతోసుమ్ జా” మెన యేసు సంగిలన్.

29 తెదొడి యేసు జోవయింక అన్నె కిచ్చొ టాలి సంగిలన్ మెలె, “అంజూరుమ్ రూకుక చి అన్నె రగల్ రూకుల్క ఉచరుమ్.

30 జేవ్ పలోయిలె బేగి, ‘వేసెగు అప్పె పావ జెయెదె’ మెన తుమ్ చినితసు, జాన్సు.

31 దస్సి, ఆవ్ సంగిల గుర్తుల్ జర్గు జతిసి తుమ్ దెకిలె, †‘దేముడుచి రాజిమ్ పావ జా అస్సి చి జెయెదె’ మెన జాన్తె.

32 “తుమ్క ఆవ్ కిచ్చొ కచితుమ్ సంగితసి మెలె, ఆవ్ సంగిల సైమల్ గుర్తుల్ పూర్తి జర్గు జతి ఎద ఈంజ ఉగుమ్ అంతుమ్ జయె నాయ్.

33 ఆగాసుమ్ బుయి నాసెనుమ్ జా గెచ్చుల, గని అంచ కొడొ †ఎద్దరె పిట్టితి నాయ్.

‘తెలివి తా పాపుమ్తె దెర్ను నే సేడ్డి రిసా ప్రార్దన కెర్తె తా’

34 “తుమ్ మెన్సుతె కిచ్చొ బుద్ది ఇండితె గే తుమ్ జాగర్త దెకన! నెంజిలె, తుమ్ ఓడుప జతి రితి ఒగ్గర్ సూరు పియ మచ్చితిన్ గట్ట, దస్సి మచ్చితిన్క వెర్రి రితి ఇండితిన్ గట్ట చి, ఈంజ లోకుమ్చ రోజుకచ బాదల్ చి రిసా ఉచర్రిసి తుమ్క పెల గెలెదె. తుమ్ దసచతె అలవాట్ జా తిలె, ఈంజ ఉగుమ్చి జా ఆకర్ దీసి అయ్లె, బోనుక ‘అస్సె’ మెన జంతు నేన్లె కిసి చట్టున దెర్ను నేడుక జయెదె గే, దస్సి తుమ్ చట్టున లాజ్ బెట్టుక జయెదె.

35 కిచ్చొక మెలె, బూలోకుమ్ తిలన ఎత్తిజిన్క జా దీసి లయెదె.

36 ఈంజేవ్ సైమల్తె జా దీసి జెతికయ్ గుర్తుచ అల్లర్ ఎత్తితె తుమ్ ఓర్పుప జా జీన్తి రితిచి, జిన ఆవ్ మాన్సు జా జెర్మున్ అయ్లోసా ఏలుప కెరుక మెన అన్నె జెతి పొదిక అంచి మొక్కె తుమ్ టీచ్ రితి, తుమ్ జాగర్త దెకన, జా ఎత్తిక దొర్కు జలి సెక్తి తుమ్క తవున్ మెన తుమ్ ప్రార్దన కెర్తె తా” మెన యేసు సిస్సుల్క సంగిలన్.

37 జలె, జా దొరతి యేసు రోజుక మెద్దెన్ పొది దేముడుచి గుడితె గెచ్చ బోదన కెర్తె తయెదె చి, రోజుక సంజె పట్టుమ్ తెంతో బార్ జా †ఒలీవ మెట్టయ్ నిద్ర తయెదె.

38 రోజుక పెందల్ పొది ప్రెజల్ ఎత్తి బే బేగి బార్ జా జోచి బోదన సూనుక మెన దేముడుచి గుడితె గెచ్చుల.

22

జా దేసిమ్చ వెల్లెల మాన్సుల్ యేసుక దెర మారుక మెన కుట్ట కెర్రిసి

(మత్త 26:1-5,14-16; మార్కు 14:1-2,10-11; యోహా 11:45-53)

1 *పస్కా పండుగు, జలె నే పులయ్ల పొడియె కతి పండుగు పాసి జా అయ్లి.

2 తెదొడి “కెయ్క కిసి ప్రెజల్క బమ్మ నే కెర్తె యేసుక మారుమ?” మెన వెల్లెల పూజర్లు చి మోసి తెన్ దేముడు దిలి ఆగ్గుల్ సికడ్డన కుట్ట ఉచర్తె తిల. కిచ్చొక మెలె, ప్రెజల్క †బితె తిల.

యూదా యేసుక దెర దెంక ఒప్పన్లిసి

* 21:27 21:27 మత్తయి 24:30. † 21:31 21:31 మత్తయి 24:33 అన్నె మార్కు 13:29తె యేసు అన్నె ఉత్త జెతిన్చి రిసాచి కోడు అన్నె. మెలె, జో అన్నె ఉత్త జెతిసి తెన్సి ఎత్తి అదికారుమ్ తిలో దేముడుచి రాజిమ్ ఎదార్దుమ్ ఏలుప కెరుక దెరెదె. జా రాజిమ్ ఏలుప కెర్రిన్తె యేసుయి రానొ జయెదె, చి ఎత్తిచి ఉప్పిరి జిన్లె మెలె, దేముడు అబ్బొన్చి అత్తి జో ఎత్తి సార్పు కెర దెయెదె, చి అబ్బొసి కెయ్క తెయ్క ఎత్తిచి ఉప్పిరి పూర్తి ఏలుప కెరెదె. ఇన్నెక కొరిందియిల్క పవులు రెగ్గి ఏక్ నంబర్ ఉత్తుమ్ 15:24-28 నదు కెర. యేసు ఏలుప కెర్తె పొదిక, జోవయించి తెడి జోవయింక నంపజా జోవయించయ్ జల మాన్సుల్ కి ఏలుప కెరుల. ఇన్నెక డీనయ్లిసి 5:10 నదు కెర. † 21:33 21:33 నెంజిలె ‘నెరవెర్పుప జంక ఎద్దరె పిట్టితి నాయ్’. § 21:37 21:37 మార్కు 11:11-12, చి 19-20తె దెకిలె, ‘ఒలీవ మెట్టయ్’ మెనె నాయ్, గని ‘బేతనియ గెవ్వి’. బేతనియ గావ్ ఒలీవ మెట్టకయ్ పాసి తయెదె. * 22:1 22:1 ‘ఇని దస్సి పండుగు కెర’ మెన ఎత్తి అదికారుమ్ తిలో దేముడు సంగిలసి కేనె నదు కెరుక జయెదె మెలె, నిర్దమకాండుమ్ 12 అధ్యయిమ్తె. † 22:2 22:2 ‘ప్రెజల్క బితె తిల’ మెలె, దొన్చి రిసా ఉచరుక జయెదె. యోహాను 11:48తె దెకిలె, ‘యేసుక కిచ్చొ నే కెర్తె దస్సి బోదన కెర్తె తయెదె, చి ప్రెజల్ పూర్తి జోవయింక నంపజా గెచ్చుల, చి రోమ్ దేసిమ్చ నయ్స్యమ్ అమ్చి దేముడుచి గుడి పాడ్ కెరుల, అమ్చి అదికారుమ్ కుడ్డె గెచ్చుల’, మెన బితె తిల. జా ఏక్, గని అన్నె కిచ్చొ మెలె, మత్తయి 26:5 చి మార్కు 14:2తె దెకిలె, పండుగు పొది జోవయింక మారుక పొని, నెంజిలె పండుగక బెర అయ్ల ప్రెజల్ అల్లర్ దెవుల మెన జేవ్ వెల్లెల మాన్సుల్ బితె తా అల్లర్ జలిన్చి రిసా సంగితయ్. † 22:3 22:3 జోవయింక ‘ఇస్కరియోతు’ మెన కిచ్చొక జోవయింక నావ్ తిలి మెలె, జో ఇస్కరియోతు గెవ్విచొ మాన్సు జయెదె.

3 తెదొడి, యేసుచ బారజిన్ సిస్సుల్తె తిలో †ఇస్కరియోతు మెలో యూదాక నయ్తాన్ దెర్లన్.

4 యూదా వెల్లెల పూజర్లుతె చి దేముడుచి గుడిచ జమాన్లు సుదల్చ అదికారుల్తె గెచ్చ కెర, “యేసుక తుమ్చి అత్తి ఆవ్ దెర దెయిందె. కీన్ కెరుమ?” మెన జోవయింతెన్ లట్టబ్బ,

5 జేవ్ నర్ల జా “తుక డబ్బుల్ దెమ్దె” మెన ఒప్పున్ల.

6 జో కి ఒప్పున్లొచి, జనాబ్ నెంజిలిన్తె యేసుక దెర దెంక మెన వాట్ చజితె తిలో.

పస్కా పండుగ్చి అన్నిమ్ యేసుచ సిస్సుల్ తెయార్ కెర్లిసి

(మత్త 26:17-25; మార్కు 14:12-21; యోహా 13:21-30)

7 తెదొడి నే పులయ్ల పొడియె కతి దీసి అయ్లి. జా దీసి పస్కా పండుగ్చి రిసొచి కీమెండపిల్ల కండ అర్పితుమ్ దెవుల.

8 జాకయ్ యేసు పేతురుక చి యోహానుక “తుమ్ గెచ్చ, చి పస్కా పండుగు అన్నిమ్ అమ్ కతి రిసొ దొర్కు జలిసి తెయార్ కెర” మెలన్.

9 “అమ్ కేనె తెయార్ కెరుక తుచి ఆన?” మెన జేవ్ పుసిల.

10 జోవయింక, “ఈందె, పట్టుమ్చి తెడి పెసిలదు మెలె, పాని వయితొసొ ఎక్కిలో తుమ్క దస్సుల్ జయెదె. జోచి పట్టి తుమ్ గెచ్చ చి, కేన్ గెరి జో పెసెదె గే,

11 జో గెర్చొ ఎజొమానిక తుమ్ కిచ్చొ మెన మెలె, ‘అంచ సిస్సుల్ తెన్ ఆవ్ పస్కా అన్నిమ్ కతి గది కేన్ మెన అమ్చొ గురుబాబు సంగితయ్’ మెన తుమ్ సంగ,

12 సామన్ తెయార్ కెర్లి వెల్లి అంతస్తు గది ఏక తుమ్క జా దెకయెదె. ఒత్తయ్ అమ్చి రిసొ పస్కా అన్నిమ్ తుమ్ తెయార్ కెర తా” మెన యేసు సంగిలన్.

13 జేవ్ గెచ్చ కెర, ‘జో సంగిల్ రితి ఎత్తి జర్లు జా అస్సె’ మెన దెక కెర, జా పస్కా అన్నిమ్క దొర్కు జలిసి ఎత్తి తెయార్ కెర్ల.

యేసు సిస్సుల్ తెన్ పండుగ్ అన్నిమ్ కంక

(మత్త 26:16-30; మార్కు 14:22-26; 1 కొరి 11:23-25)

14 పండుగ్ అన్నిమ్ కెర్లి సమయుమ్ పాచ జెతికయ్, యేసు సిస్సుల్ తెన్ జా అన్నిమ్ కంక మెన వెసిల.

15 తెదొడి యేసు జోపయింక, ఆవ్ సేడుక తిల సైమల్ నే జతె అగ్గె తుమ్చి తెన్ ఈంజ పస్కా అన్నిమ్ కంక మెన ఆవ్ ఒగ్గర్ ఆన జలయ్.

16 కిచ్చొక మెలె, దేముడు ఎదార్లుమ్ ఏలుప కెరుక అయ్లె పొదిక, జోచి రాజిమ్తె ఈంజ పస్కా పండుగు *గుర్లు జతి రచ్చనచి ముక్కిమ్చి అర్దుమ్చి కామ్ పూర్తి జర్లు కెర్లె ఎదక ఈంజ మదెనె, ఈంజ పండుగ్ అన్నిమ్ ఆవ్ అన్నె కయి నాయ్ మెన తుమ్క ఆవ్ సంగితసి.

17 జా పండుగ్ అన్నిమ్ పితి డొమ్మ ద్రాచ రస్సుమ్ యేసు తెదొడి దెర కెర, ‘ఈంజ తుయి దా దయ కెర్లది’ మెన దేముడు అబ్బొన్క సంగ కెర, సిస్సుల్క “ఉంద, ఇన్నె తిలిసి తుమ్ వర్ల తెన్ పియ వంటన.

18 కిచ్చొక మెలె, దేముడుచి రాజిమ్ ఎదార్లుమ్ ఏలుప కెర్లి రితి జెతె ఎదక ఈంజ మదెనె ఆవ్ ద్రాచ రస్సుమ్ పియి నాయ్ మెన తుమ్క ఆవ్ సంగితసి” మెన యేసు సంగ కెర,

19 పొడి వెంట ‘తుయి ఈంజ దయ కెర్లది’ మెన దేముడు అబ్బొన్క సంగ కెర, జా పొడి మోడ కెర, సిస్సుల్క దా “ఉంద, ఈంజ అంచి ఆగ్. †అంక తుమ్ ఏద కెర్లి గుర్లుక తుమ్ ఇసి కంక అలవాట్ జా. ఉంద కా,” మెన దిలన్.

20 దస్సి, జా అన్నిమ్ కా కేడయ్లి పొది †గలన్ అన్నె దెర, “ఈంజ గలన్ ద్రాచ రస్సుమ్, ఆవ్ దెతి నొచి ప్రమానుమ్. తుమ్చి పాపుమ్ గెచ్చయ్తి రిసొ సువ దెతి అంక లొయి. జా లొయిచి గుర్లు ఈంజ ద్రాచ రస్సుమ్.

21 “ఈందె, అంక దెర, సొర్లు కెర దెతోసొ ఈంజ బల్లతె వెన అంచి తెన్ అన్నిమ్ కెర్లయ్. జోచి ఆతు అంచి ఆతు తెన్ ఈంజ బల్లచి ఉప్పిరి అస్సి.

22 కిచ్చొక మెలె, ‘జర్లు జంక అస్సె’ మెన దేముడు అగ్గె తెంతొ రెగిడ్లి రితి ఆవ్ మాన్లు జా జెర్మున్ అయ్లొసొ కిగెచ్చుక అస్సి, గని అయ్యె! కేన్ మాన్లు అంక దెర విరోదుమ్ సుదల్చి అత్తి సొర్లు కెర దెయెదె గే, జో మాన్లు జతి సిచ్చ కెర్లి!” మెన సంగిలన్.

23 జో దస్సి సంగితికయ్, ‘ఆవ్ గె? ఆవ్ గె?’ మెన ఎక్కిలో తెన్ ఎక్కిలో లట్టబుక దెర్ల.*

ఎక్కిలోక ఎక్కిలో సేవ కెర్లి బుద్ది తెన్ తతిసి చి కోడు

24 జలె, జోవయింతె కొన్సొ వెల్లి జయెదె గే సిస్సుల్ లట్టబనుక దెర్ల.

§ 22:7 22:7 యేసు కి జయి పండుగు కెర్లి పొది అర్పితుమ్ జలన్. జో, జలె, కెయెక తెయెక సరిపుచువ జలి అర్పితుమ్ జలన్. జొయ్యి అర్పితుమ్ జలిసి తెంతొ అన్నె అర్పితల్ నాయ్. ఎబ్రీయుల్ 9:28, 10:10. * 22:16 22:16 జా పస్కా పండుగు మెన మాములుమ్ యూదుల్ కిచ్చొక కెరుల మెలె, పూర్లుమ్ పొది జేవ్ ఐగుప్తు దేసిమి తా గొతిమాన్లుల్ జలిసి తెంతొ ఎత్తి అదికారుమ్ తిలో దేముడు జోవయింక రచ్చించుప కెర్లిసి ఏద కెరుక. నిర్లమకాండుమ్ 3 అద్యయిమ్ తెంతొ యోహోసువ ఏద ఈంజ మత్తెలి పూర్తి తయెదె. ముక్కిమ్క అస్సె నిర్లమకాండుమ్ 12, 13 అద్యయల్ దెకిలె సగుమ్ అర్దుమ్ జెయెదె. గని ‘పస్కా పండుగ్చి గుర్లు జతి ముక్కిమ్చి రచ్చన’ మెలె, పాపుమ్ తెంతొ, పాపుమ్చి ఉగుమ్ తెంతొ, పాపుమ్చి లోకుమ్ తెంతొ మాన్లుల్ రచ్చించువ జా పరలోకుమ్చి రాజిమ్తె బెదితిసి, పరలోకుమ్తె గెతిసి. † 22:19 22:19 ఈంజ ఎత్తి తొలితొ రెగిడ్లి సగుమ్ పున్కల్తె ‘తుమ్చి’ తెంతొ 20 నంబర్చి కోడు పూర్తి తెన్ చ కొడె తయె నాయ్. ‡ 22:20 22:20 దన పండుగ్ అన్నిమ్తె బెర్లె, చెత్తర్ సుట్టు ద్రాచ రస్సుమ్ పివుల. § 22:22 22:22 మెలె, ‘మొరుక అస్సె’. * 22:23 22:23 ఒత్త తెంతొ యేసుక దెర దెతో యూదా బార్ జా అదికారుల్తె గెలో. యోహాను 13:30.

25 జేవ్ దస్సి జతికయ్, యేసు జోవయింక, “యూదుల్ నెంజిల వేర రానల్ సొంత గవురుమ్ ఉచరన ప్రజల్క జాడ్లు వయడ్తె తిలి రిత జోవయింక పోటి తెన్ ఏలుప కెర్తతి, అన్నె ప్రజల్చి ఉప్పిర్చ అదికారుల్ ‘దర్ముమ్ కెర్తన’ మెనంతతి.

26 గని తుమ్చి తెన్ దస్సి తంక జయె నాయ్. తుమ్చి తెన్ వెల్లో జతోసా ఎత్కిచి కంట దకిలో రితో జవున్ చి, తుమ్క ఏలుప కెర్తోసా సేవ కెర్తోసా రితో జవున్.

27 మాములుమ్ ఈంజ లోకుమ్చి రగుమ్ ఉచర్లె, కొన్నొ వెల్లో జయెదె? అన్నిమ్క బల్లతె వెసితోసా గే జోవయించి అన్నిమ్ వంట దెతో గొత్తి సుదో గె? బల్లతె వెసితోసా వెల్లో జయెదె, గెద. జలె, ఆవ్ తుమ్చి నెడిమి తా వంట దెతో †గొత్తి సుదోచొ రితో జతసి. ఈంజ అర్దుమ్ కిచ్చొ జయెదె గే తుమ్ ఉచర.

28 †తుమ్ అంచ సిస్సుల్ ఆవ్ సేడ్ల బాదల్ ఎత్కితె బెద నిదానుమ్ తా అస్సున్,

29 అన్నె, జోచి రాజిమ్చి ఉప్పిరి ఆవ్ ఏలుప కెర్తి రిసా కీసి అంచొ దేముడు అబ్బొ అంక అదికారుమ్ దా అస్సె గే, దస్సి

30 తుమ్ అంచి రాజిమ్తె అంచి బల్లతె వెస కంక పింక చి, కీతుమ్ బారజిన్ బార సిజాననల్తె వెస, ఇస్రాయేలుల్చ బార సెకుమ్లుచక అంచి తెడి ఏలుప కెరుక మెన తుమ్క ఆవ్ నిసాన అస్సి” మెన యేసు జోచ సిస్సుల్క సంగిలన్.

పేతురుక “ ‘జోక నేని’ మెన అంచి రిసా తుయి తివ్వెరి సంగితె”

(మత్త 26:31-35; మార్కు 14:27-31; యోహా 13:36-38)

31 పడ్డె, పేతురుచి అగ్గెచి నావ్ దెర, “సీమోను, సీమోను, ఈందె, తేర్బోద కీసి తందుడు పూన నిసెదె గే, దస్సి తుమ్క నిసితి రితి అల్లర్చి పరిచ్చ కెరుక మెన సయ్తాన్ సెలవ్ నజన అస్సె.

32 గని తుచి నముకుమ్ పాడ్ జా గెస్సు నాయ్ మెన ఆవ్ ప్రార్దన కెర అస్సి. అన్నె, తుమ్ అన్నె బుద్ది జా అంచి పచ్చెన అన్నె జెతి రితి తుమ్ మార్పుప జలదు మెలె, తుమ్చ బావుడ్లు జల అంక నంపజల అన్నె మాస్సుల్చి నముకుమ్ తుమ్ డిట్టుమ్ కెర” మెన యేసు పేతురుక చి, అన్నె సిస్సుల్క సంగిలన్.

† 22:27 22:27 యోహాను 13:2-16. † 22:28 22:28 యూదా జోవయింతె నాయ్. 23నంబర్ కోడుచి ఎట్టొచి కోడు దెక. § 22:30 22:30 ‘తుమ్ బారజిన్’ మెలె, జో యూదా పిట్టె, గెద-యేసుక విరోదుమ్ సుదల్చి అత్తి సార్పు కెర దిలోచి రిసా. గని యేసు జీవ్ జా పరలోకుమ్తె వెగ గెలి పడ్డె, తిల సిస్సుల్ ప్రార్దన కెర అన్నెకోక, మెలె మత్తియ మెలోసాక నిసాన బెదవన్ల, చి అన్నె బారజిన్ జా గెల. బారికుల్ 1:15-26. * 22:35 22:35 లూకా 10:4, 9:3. † 22:36 22:36 ఈంజ 36నంబర్చి కోడు కిచ్చొక సంగితయ్, బెరె, ‘అల్లర్ జెవుల చి తుమ్ డిట్టుమ్ తతి రిసా తెయార్ జా’ మెలి అర్దుమ్కయ్. గని ‘మాములుమ్ అయ్దల్క యుద్దుమ్ కెరుక తెయార్ జా’ మెలి అర్దుమ్క యేసు సంగె నాయ్. పడ్డె పేతురు జో మాస్సుచి కంట్టొ కండా తెన్ సిందితికయ్ యేసు గెల కెర్తన్. మత్తయ 26:52, యోహాను 18:11, లూకా 22:51. † 22:37 22:37 యెసయా 53:12. § 22:38 22:38 నెంజిల కడ్లుమ్లుచి రిసాచి టాలి సిస్సుల్ అర్దుమ్ నే కెరన్ల రిసా “ఈందె ప్రబు, అమ్చితె దొన్ని కడ్లుమ్లు అస్సి” మెల, చి “సాలు, అన్నె దస్సి లట్టబా నాయ్” మెలన్.

33 తెదొడి పేతురు “ప్రబు, తుయి జేల్తె జేలి తంక జలెకి, మొరుక జలెకి, తుచి తెన్ బెద జేలి జయిందె జవున్, మొరిందె జవున్, అంక బి నాయ్” మెలన్.

34 జలె, పేతురు దస్సి సంగితికయ్, యేసు జోక, “ఓ పేతురు, తుక ఆవ్ కిచ్చొ మెంతసి మెలె, జోక ఆవ్ నేని మెన, తుయి తివ్వెరి అంచి రిసా సంగితె ఎదక కుకుడొ వాసె నాయ్”.

డబ్బుల్, సామన్చి కడ్లుమ్చి రిసా యేసు సంగిలిసి

35 తెదొడి యేసు సిస్సుల్క అన్నె, “జా సుట్టు దేముడుచి రాజిమ్ పాసి జా అయ్లినచి రిసాచి సుబుమ్ కబుర్ సంగ సంగ మాస్సుల్క చెంగిల్ కెర కెర తుమ్ బుల” మెన తుమ్క ఆవ్ తెద్రయ్లి పొది “సెంచె నెంతె, డబ్బుల్ సెంచె నెంతె, చి జోడ్లు నెంతె గెచ్చ మెన *సంగిలయ్ గెద. జలె, దసచ నెంతె గెతికయ్, తుమ్క కిచ్చొ జలెకు కొత్తు తిలి గె?” మెన పుసిలన్, చి “కిచ్చొయ్ కొత్తు నాయ్” మెల.

36 †దస్సి జబాబ్ దెతికయ్, జోవయింక అన్నె, “అప్పె జలె, కక్క సెంచె గే డబ్బుల్ సెంచె గే అస్సె గే, దెర తంక, చి కక్క కండా తయె నాయ్ గే, జోవయించి కోటు విక కండా గెననుక.

37 కిచ్చొక మెలె, తుమ్క ఆవ్ కిచ్చొ సంగితసి మెలె,

‡క కి ‘నేరిమ్ కెర్తోసా’ మెన తీర్పు కెరు మెన దేముడుచి కొడెతె రెగ్గయ్లి కోడు అంచితె పూర్తి జర్లు జంక అస్సె. కిచ్చొక మెలె, అంచి రిసా రెగిడ్డిసి ఎత్కి కచితమ్ జర్లు జయెదె” మెలన్.

38 కీతెదొడి సిస్సుల్, “ఈందె, ప్రబు, అమ్చితె దొన్ని కడ్లుమ్లు అస్సి” మెల, చి “సాలు” మెలన్.

యేసు మొరుక తిలిన్చి రిసా జో ప్రార్దన కెర్తిసి

(మత్త 26:36-46; మార్కు 14:32-42)

39 యేసు ఒలీవ మెట్టయ్ గెచ్చుక అలవాట్ తిలి చి, తెదొడి బార్ జా ఒత్తయ్ గెలన్. జోచ సిస్సుల్ కి జో తెన్ బెద గెల.

40 జలె, ‘గెత్తేమనే’ మెంతి జో గెతి ఒత్తచి తోటతె పాచ కెర, సిస్సుల్క యేసు, “అప్పె జెత అల్లర్ తుమ్క ఏక్ పరిచ్చ రితి జయెదె. ఈంజ ఎత్కితె తుమ్ పాపుమ్ నే కెర్తి రిసా ప్రార్దన కెర్తె తా” మెన యేసు సంగ కెర,

41 పత్తురు గల్తి ఎదిలి దూరి గెచ్చ కెర, మొగ్రల్ టెక,

42 “ఓ బ, తుక ఇస్తుమ్ తిలె, ఈంజ గిన్నచి ఆవ్ నే పితి రితి అంక పిట్టవు, గని అంచి ఇస్తుమ్ పోని. తుచి ఇస్తుమ్ జర్లు జవున్” మెన దేముడు అబ్బొన్క ప్రార్థన కెర్లన్.

43 *పరలోకుమ్ తెంతో దూత ఎక్కిలో డీస జోక డిట్టుమ్ కెర్లన్.

44 †తెదొడి జోచి పెట్టి ఒగ్గర్ బాద దుకుమ్ సేడ, అన్నె ఒగ్గర్ ఆస తెన్ ప్రార్థన కెర్లన్ చి, జోచి గాము కిసి పుట్టిలి మెలె, సుక్కల్ లోయి జా బుయ్యో సేడ గెలన్.

45 జలె, యేసు ప్రార్థన కెరుక ముల ఉట్టు కెర సిస్సుల్ తిలిన్తె అయ్లె, జేవ్ ఒగ్గర్ దుకుమ్క అల్పు జా నిజ గెల అస్తి.

46 అన్నె, జోవయింక “తుమ్ కిచ్చొక నిజుక? ఉట్టు, చి ఈంజ జెతి అల్లర్చి పరిచ్చుతె తుమ్ పాపుమ్ నే కెర్తె రితి ప్రార్థన కెర్తె తా” మెలన్.

యేసుక దెరుక మెన యూదా చి జనాబ్ జట్టు తెన్ అయ్లిసి
(మత్త 26:47-56; మార్కు 14:43-50; యోహా 18:3-11)

47 యేసు జా కోడు సంగితె తతికయ్, ఒగ్గర్జిన్ జనాబ్ మాన్సుల్ జట్టు తెన్ అయ్లె, చి కో జోక పురై గెచ్చు వాట్ దెకయ్తె తిలన్ మెలె, యేసుచ బారజిన్ సిస్సుల్తె తిలో ఇన్నరియోతు యూదా. జో యూదా, జలె, యేసుక చుంబుక మెన జోచి పాసి అయ్లన్,

48 గని యేసు జోక, “ఓ యూదా, ఆవ్ మాన్సు జా జెర్మున్ అయ్లోసాక దెర దెతి పొది ఉప్రమెన్నుక చుంబ దెతె గె?” మెన జోక పుసిలన్.

49 జలె, ‘జోక దెరుల’ మెన యేసు తెన్ తిల జోచి సిస్సుల్ దెక కెర, “ప్రబు, అమ్చ కథ్టుమ్లు తెన్ జోవయింక కండుమ గె?” మెన పుసిల.

50 జోవయింతె ‡ఎక్కిలో కిచ్చొ కెర్లె మెలె, †ఎత్తిక వెల్లో పూజరిచొ గొత్తి సుదొక కండుక గెచ్చు, జోచొ ఉజిలో కండ్లొ సింద గెలన్.

51 జలె యేసు “అన్నె దస కమె పోస” మెన సంగ కెర, జో గొత్తి సుదొచొ కండ్లొ చెంగిల్ కెర్లన్.

52 తెదొడి జోక దెరుక మెన బార్ జా అయ్ల వెల్లెల పూజర్లుక, దేముడుచి గుడిచ నయ్న్యుమ్ సుదల్చ అదికారుల్క చి వెల్లెల సుదల్చ యేసు, “ఆవ్ కిచ్చొ చొర్లయ్ గే, చి కత్తులు *డండల్ దెరన తుమ్ అయ్లదు?

53 ఆవ్ రోజుక దేముడుచి గుడితె గెతె తిలె కి, తెదొడి తుమ్ అంక దెర్లద నాయ్. గని తుమ్చి కామ్ తుమ్ జర్లు

కెర్తె గడియ ఈంజ, అందర్ లోకుమ్చి సెక్తి ఏలుప కెర్తె గడియ ఈంజ” మెన సంగిలన్.

యేసుచి రిసా ‘జోక నేని’ మెన పేతురు తివ్వెరి సంగిలిసి
(మత్త 26:57-58,69-75; మార్కు 14:53-54,66-72; యోహా 18:12-18,25-27)

54 తెదొడి యేసుక దెర ఎత్తిక వెల్లో పూజరిచి మేడతె కడ నిల. కడ నెతె తిలి పొది పేతురు, జలె, దూరి దూరి యేసుచి పట్టి గెతె తిలన్, అన్నె,

55 ఎత్తిక వెల్లో పూజరిచి మేడచి వీదిచి నెడిమి సగుమ్జిన్ చల్లిక ఆగి లావ తవుక మెన వెస తతికయ్, పేతురు జోవయింతెన్ వెసిలన్.

56 పేతురు దస్సి ఆగిచి ఉజిడతె వెస తతికయ్, తేరబోద గొత్తి సుదొ ఎక్కి జోక దెక కెర, చెంగిల్ దెక కెర, “ఈంజొ మాన్సు యేసు తెన్ బుల్తె తిలో” మెలి.

57 గని పేతురు “అమ్మ, జోక ఆవ్ నేని” మెన సంగిలన్.

58 పడ్డొ అన్నె గడియ గెతికయ్, అన్నెక్లొ పేతురుక దెక కెర, “తుయి కి జో తెన్ తిలోసా” మెలన్, గని “బాబు, ఆవ్ నెంజి” మెన పేతురు సంగిలన్.

59 అన్నెక్ గంట గెతికయ్, అన్నె అన్నెక్లొ పేతురుచి రిసా “నిజుమి, ఈంజొ మాన్సు కచితుమ్ జో యేసు తెన్ తిలన్. ఈంజొ కి †గలిలయు సుదొ గెద!” మెలన్.

60 పేతురు “బాబు, తుయి సంగితిన్చి అర్దుమ్ ఆవ్ నేని” మెలన్, జో అన్నె లట్టబై తతికయ్, బేగి కుకుడొ వాసిలన్.

61 తెదొడి యేసుప్రబు పసుల పేతురుక చెంగిల్ దెకిలన్ చి, “కుకుడొ ఆజి నే వాసితె అగ్గె తుయి తివ్వెరి అంచి రిసా ‘జోక నేని’ మెంతె” మెన యేసుప్రబు సంగిలిసి పేతురు ఏదస్ట కెర్లను, చి

62 జా వీదె తెంతో బార్ జా బయిలె గెచ్చు కొక్క కొక్క ఏడ్లన్.

యేసుక రకితె తిలస జోక కొంకడ పెట్టిసి
(మత్త 26:59-68; మార్కు 14:55-65; యోహా 18:19-24)

63 తెదొడి యేసుక రకితె తిల మాన్సుల్ యేసుక కొంకడ కెర దెబ్బుల్ పెట్ల చి,

64 జోచి అంకివొతె కచ్చెల్ బంద కెర, “తుక కో పెట్ల గే ‡తుయ్ క్రీస్తు గద, అమ్క సంగు!” మెల, అన్నె

65 జోక దూసుప కెర్తె అన్నె ఒగ్గర్ కొణొ సంగిల.

66 రాత్ పాయితికయ్, యూదుల్చ వెల్లెల సుదల్, జోవయింక వెల్లెల పూజర్లు చి, మోసె తెన్ దేముడు దిలి

* 22:43 22:43 ఈంజ ఎత్తి రెగిడ్ల సగుమ్ పుస్తకల్తె 43 చి 44నంబర్లుచ కొణొ తయె నాయ్. † 22:44 22:44 ఈంజ ఎత్తి రెగిడ్ల సగుమ్ పుస్తకల్తె 43 చి 44నంబర్లుచ కొణొ తయె నాయ్. ‡ 22:50 22:50 కొణ్ణొ మెలె, పేతురు. యోహాను 18:10 దెక. § 22:50 22:50 ‘ఎత్తిక వెల్లో పూజరి’ మెలె, మొత్తుమ్ వెల్లెల పూజర్లుతె ఎక్కిలో ‘ఎత్తిక వెల్లో పూజరి’ జయెదె. దేముడుచి గుడిచ సగుమ్ కమె జో ఎక్కిలోయి కెరెదె. జేవ్ ఎత్తిక జో వెల్లో జయెదె.
* 22:52 22:52 నెంజిలె ‘బెడ్డివ’. † 22:59 22:59 యేసు యూదయ ప్రదేసిమచి యెరూసలేమ్ పట్టుమ్తె జెర్మిలికి గలిలయ ప్రాంతమ్తె వడ్డిలన్.
‡ 22:64 22:64 మత్తయి 26:68 దెక.

ఆగ్నుల్ సికడ్డన తగు కెరుక మెన వెసిల చి, జా తగు కెర్తిన్తె యేసుక కడ ఆన్.

67 “‘తెద్రయిందె’ మెన దేముడు సంగిలో క్రిస్తు రచ్చించుప కెర్తొసా తుయి గే?” మెన అగ్గెతె వెసిలన పుసిల. యేసు కిచ్చొ సంగిలన్ మెలె, “ఆవ్ తుమ్క సంగిలె, అంక నంప కెర్పు నాయ్,

68 అన్నె, తుమ్క ఆవ్ ఏక్ కోడు పుసిలె, అంక జబాబ్ దేసు నాయ్,

69 గని ఇన్నెచి పడ్డొ ఆవ్ మాన్సు జా జెర్మున్ అయ్లోసా ఎత్తి సెక్తి అదికారుమ్ తిలో అమ్చొ దేముడుచి ఉజెత్తో పక్క వెన తతిసి దెకితె” మెలన్.

70 “దస్సి జలె, అమ్చొ దేముడుచొ పుత్తుసి తుయి గే?” మెన పుసిల, చి జో జోవయింక “తుమ్ సొంత సంగిల్ రితి జొయ్యి ఆవ్” మెలన్.

71 యేసు దస్సి సంగితికయ్, ‘దేముడుచొ పుత్తుసి ఆవ్’ మెన యేసు ఒప్పన్లిసి జో దేముడు తెన్ సమ్మందుమ్ సంగన్లి రితి జతయ్. జా తప్పు మెన ఉచర, “అమ్క అన్నె సాచి అవ్సురుమ్ నాయ్. జో సొంత సంగితికయ్ సూన్లమ్.”

23

పిలాతు అదికారిచి మొక్కె యేసుక నింద సంగిలిసి

(మత్త 27:1-2,11-14; మార్కు 15:1-5; యోహా 18:28-38)

1 తెదొడి తగుతె వెసిల వెల్లెల సుదల్ ఎత్తి ఉట్ట యేసుక పిలాతు *అదికారితె కడ నిల చి,

2 జోచి మొక్కె జోక టీచడ కెర, కిచ్చొ నేరిమ్ సంగిల మెలె, “†కైసర్ రానొచి అమ్క ఏలుప కెర్తొ ప్రబుతుమ్క సిస్తు దాస నాయ్” మెన. “ఆవ్ క్రిస్తు, ఆవ్ రానొ మెనన, ఈంజొ మాన్సు అమ్చ పైజెల్క వెర్తి సికడ్డయ్”.

3 పిలాతు అదికారి యేసుక కిచ్చొ పుసిలన్ మెలె, “తుయి యూదుల్చొ రానొ గే?”. “తుయి సంగిల్ రితి మెన”, యేసు జబాబ్ దిలన్.

4 తెదొడి వెల్లెల పూజర్లుక చి జనాబ్క “ఈంజొ మాన్సు కిచ్చొ నేరిమ్ నే కెర్లి రితి అంక డీస్తయ్” మెన పిలాతు అదికారి తీర్పు సంగిలన్.

5 జేవ్ కిచ్చొ మెల మెలె, గలిలయతె మొదొల్ కెర ఈంజ యెరూసలేమ్ ఎద కి “అమ్చ యూదుల్ జితిన్ ఎత్తితె, ఈంజొ కిచ్చొ కిచ్చొ సికడ, ప్రబుతుమ్చి ఉప్పిరి పైజెల్చి సేంతుమ్ పిట్టయ్తయ్” మెన యేసుచి రిసా పిలాతుక బియఁడుక ఉచర అబద్దుమ్ సంగిల.

హేరోదుతె పిలాతు యేసుక తెద్రయ్లిసి

* 23:1 23:1 పిలాతు అదికారి రోమ్ దేసిమ్చి నావ్ తెన్ యూదయ ప్రదేసిమ్చి ఉప్పిరి చి నమరయ ప్రదేసిమ్చి ఉప్పిరి ఏలుప కెర్తె తిలన్. † 23:2 23:2 కైసర్ రానొ రోమ్ దేసిమ్చి ఉప్పిరి జేవ్ ఆక్రమించుప కెర్ల దేసిమ్చి ఉప్పిరి వెల్లి రానొ జా తిలో. ‡ 23:17 23:17 ఈంజ ఎత్తి రెగిడ్ల తొలితొవ సగుమ్ పుస్తకల్తె 17నంబర్చి కోడు తయె నాయ్.

6 గలిలయచి కోడు పిలాతు అదికారి సూన కెర, యేసుచి రిసా “దస్సి జలె, ఈంజొ మాన్సు గలిలయుడు గే?” మెన పుసిలన్

7 హేరోదు ఏలుప కెర్లి గలిలయతె తెంతొ యేసు బార్ జలొ మెన సూన కెర, జోక జో హేరోదు రానొతె తెద్రయ్లన్. జా పొది హేరోదు యెరూసలేమ్తె జా తిలన్.

8 జలె, హేరోదు యేసుక దెక కెర, సర్దనంతొనుమ్ జలొ. కిచ్చొ మెలె, జోచి రిసా అగ్గెయ్ తెంతొ సూన తిలో చి, ‘జో కెర్తి కిచ్చొ జవున్ వెల్లి కామ్ దెకిన్దె’ మెన హేరోదు జోక దెకుక ఒగ్గర్ ఆస జా తిలో.

9 జాకయ్, యేసుక జేవ్ మాన్సుల్ ఒత్త కడ నెతికయ్, హేరోదు ఒగ్గర్ కొడొల్ జోక పుసిలన్, గని యేసు ఎక్కి కోడు కి జబాబ్ దెయె నాయ్.

10 తెదొడి వెల్లెల పూజర్లు చి మోసే తెన్ దేముడు దిలి ఆగ్నుల్ సికడ్డన పురె టీచ కెర, ఒగ్గర్ విస్సుమ్ తెన్ యేసుచి ఉప్పిరి నేరిమ్లు వయడుక దెర్ల.

11 అన్నె హేరోదు అదికారి జోచి సయ్న్యమ్ తెన్ జోక నిస్కారుమ్ దెకిత్ రితి మార్పుప జా, కొంకడ్ల చి, చెంగిల పాలల్ జోక గల దా, పిలాతుతె అన్నె తెద్రయ్లన్.

12 చి హేరోదు చి పిలాతు అగ్గె తెంతొ ఎక్కిలోక ఎక్కిలో విరోదుమ్ జా తిలె కి, జయ్యి దీసి తెంతొ సినేతుమ్ బందెల.

పిలాతు యేసుక జోవయించి అత్తి సొర్పు కెర్లిసి

(మత్త 27:15-26; మార్కు 15:6-15; యోహా 18:39-19:16)

13 తెదొడి పిలాతు వెల్లెల పూజర్లుక చి యూదుల్చ అదికారుల్ ఎత్తిక బుకారా కెర,

14 జోవయింక, “ ‘పైజెల్ ప్రబుతుమ్చి తెడి సేంతుమ్ నే తతి రితి ఈంజొ సికడ్డయ్’ మెన సంగ తుమ్ ఈంజొ మాన్సుక అంచితె కడ ఆన్లదు, అన్నె, తుమ్చి మొక్కె ఆవ్ పరిచ్చ కెర్లె, ఈందె, ఇన్నెక ఉప్పిరి తుమ్ సంగిల నేరిమ్లుతె కేన్ కి ‘కెర్లొ’ మెన రుజ్జు డీసె నాయ్.

15 హేరోదు కి పరిచ్చ కెర్లొ చి, జోక అమ్తె అన్నె తెద్రయ్లో, గెద. ఈందె, మొర్తి సిచ్చ జతి కిచ్చొ నేరిమ్ కి కెరె నాయ్.

16 జాకయ్, ఇన్నెక ఇదిల్ బుద్ది సికడ్డి రితి అంచ సయ్న్యమ్లు కొర్లల్ తెన్ పెటుతు చి, ఇన్నెక విడ్డల్ కెరిందె” మెలన్.

17 †కిచ్చొక మెలె, యూదుల్క సర్ల కెర్లి రితి వెర్ని వెర్ని జా పండుగు పొది జేలి జలొ కేన్ జవున్ మాన్సుక విడ్డల్ కెరుక జో అదికారిక అలవాట్.

18 గని “జో మాన్సుక పోని. జోక మారు చి, బరబ్బుక ములు. జోకయ్ అమ్క కావలె” మెన ఎక్కి జట్టు జా కేక్ గల.

19 బరబ్బు, జలె, కొన్సొ మెలె, యెరూసలేమ్ పట్టుమ్తె ప్రబుతుమ్చి ఉప్పిరి ప్రెజల్ విరోదుమ్ కెర్తి రితి జో అల్లర్ కెర తిలి రిసాచి, నరు అత్య జో కెర తిలి రిసా జోక జేలి కెర జేల్తె గల తిల.

20 తెదొడి కిచ్చొ జలి మెలె, యేసుక విడ్డల్ కెరుక మెన తెదొడి ఎద పిలాతుక ఇస్టుమ్ తిలి రిసా, దస్సి మెన కేక్ గల బెర తిలసక అన్నెక్ సుట్టు సంగుక దెర్తికయ్,

21 జేవ్ ఎత్రిజిన్ “జోక కిసిలువతె గల టీవడ మొర్తి సిచ్చ కెరు! మొర్తి సిచ్చ కెర!” మెన కేక్ గల.

22 తెదొడి అన్నెక్ సుట్టు, ఇన్నెతెన్ మొత్తుమ్ తివ్వెర్ జలి, పిలాతు “కిచ్చొక? ఈంజొ కిచ్చొ నేరిమ్ కెర అస్సె? మొర్తి సిచ్చ జతి ఎదిలి కేన్ నేరిమ్ ఈంజొ కెర్తినచి రుజ్జు అంక డీసె నాయ్. జాకయ్ ఇన్నెక్ కొర్డల్ తెన్ పెట బుద్ది సికడ్డు చి, విడ్డల్ కెరిందె” మెలన్.

23 గని బెర తిల జనాబ్ “జోక సిలువ గలు! మొర్పు!” మెన కేకుల్ గల గల, బలవంతుమ్ కెర జిన్ల.

24 జాకయ్ “జేవ్ బలవంతుమ్ కెర సంగిలి రితి జర్గు జవున్” మెన పిలాతు తీర్పు దిలన్,

25 అన్నె, ప్రబుతుమ్చి ఉప్పిరి ప్రెజల్క విరోదుమ్ సికడ్డొ నరు అత్య కెర తిలొ బరబ్బుకయ్ ముల దిలన్; బెర తిల జనాబ్ బలవంతుమ్ కెర తిలి రిసా-చి “యేసుక కిచ్చొ కెర్తి గే కెర తుమ్చి ఇస్టుమ్ తుమ్చి పూచి” మెన, జోవయించి అత్తి జోక సార్పు కెర దిలన్.

యేసుక సిలువతె టీవడుక మెన కడ నిలిసి (మత్త 27:32-44; మార్కు 15:21-32; యోహా 19:17-19)

26 జలె, యేసుక పట్టుమ్ ఒత్తల్తోచి బయిలె కడ నెతె తా, ‘యేసుక టీవడ్డి సిలువ వయన జోవయించి పట్టి ఇండున్’ మెన, కేనె గే బయిలు దేసిమ్ తెంతొ జా వాట్ జెతె తిలొ సీమోను మెలొ కురేనియు ప్రాంతుమ్చొ మాన్సుక దెర కెర, జోక జా సిలువ వయడ్డ.

27 అన్నె, యేసుచి పట్టి ఒగ్గర్జిన్ జనాబ్ జెతె తిల, అన్నె జోవయింతెన్ ఒగ్గర్జిన్ తేర్బోదల్ గుండెతె పెటన ఏడుకుడు జుతె తిల.

28 గని యేసు పసుల జోవయింక, “ఓ యెరూసలేమ్చ తేర్బోదలు, అంక జెతి బాద చి రిసా తుమ్ ఏడ నాయ్,

గని తుమ్ కిచ్చొచి రిసా ఏడుక మెలె, తుమ్క చి తుమ్చ బోదల్క రిసాయ్ ఏడ.

29 మెలె, ఈందె, ‘గొడ్డు జలసక, బోదల్ నే పాయిలసక, దూద్ నే పియడ్లసక చెంగిలి!’ మెన తుమ్ సంగిత దీసల్ జెవుల.

30 కిచ్చొక మెలె, జేవ్ దీసల్కచ సిచ్చల్ దెక కెర, ‘అమ్చి ఉప్పిరి నేడ అమ్క డంక గెల’ మెన డొంగ్రల్క చి మెట్టల్క సంగుల.

31 *అవ్వి తిలి మట్టుక మాన్సుల్ ఇసి కెర్తి, సుకా గెలి మట్టుక కిచ్చొ కెరులగే?” మెన జేవ్క సంగిలన్.

32 యేసు తెన్ మొర్తి సిచ్చ జతి రిసా అన్నె దొగులక కి ఒత్త కడ నిల. జేవ్ నిజుమి నేరిమ్లు కెర్లన.

యేసుక సిలువతె టీవడ్డిసి

33 జలె, ‘గిడ్డి రితి పొలికచి మెట్టు’ మెలిన్తె జేవ్ ఎత్రిజిన్ గెచ్చు పావ కెర, యేసుక జోచి సిలువతె టీవడ్డ చి, జో డెబ్బి పక్క ఎక్కిలొక చి ఉజెతొ పక్క ఎక్కిలొక జేవ్ దొగుల నేరిమ్ కెర్లసక కి ఎక్కి సిలువల్తె టీవడ్డ.

34 †అన్నె, జోక దస్సి కెర్లసచి రిసా యేసు “ఓ బ, ఇన్నెక్ చెమించువ కెరు. కిచ్చొ కెర్తి గే నేన్తి” మెన దేముడు అబ్బొన్క ప్రార్థన కెర్లన్.

జోక సిలువతె టీవడ్డ ‡జమాన్లు సుదల్ జోచ పాలల్ వంటునుక మెన చీటి గలిల.

35 ప్రెజల్ పాసి టీవ తా దెకితె తిల, “జో అన్నెమాన్సుల్క రచ్చించువ కెర్తి, గెద. దేముడు ‘తెద్రయిందె’ మెన సంగ తిలొ రచ్చించువ కెర్తిసా క్రీస్తు జయెదె జలె, జొయ్యి నిసాన్లొసా జయెదె జలె, జోక జొయ్యి రచ్చించువ కెరన్పు!” మెన యూదుల్చ అదికారుల్ జోక ఆసిల.

36 జమాన్లు సుదల్ కి జోక కొంకడ్డ. జోచి పాసి జా కెర, కిఅమ్డి తిలి ద్రాచ రస్సుమ్ చంపొ కెర దా,

37 “తుయి యూదుల్చొ రానొ జలె, తుకయ్ తుయి రచ్చించువ కెరను!” మెన కొంకడ్డె తిల.

38 పడ్డొ అన్నె కిచ్చొ కెర్ల మెలె, * “యూదుల్చొ రానొ ఈంజొ” మెన రెగిడ్డి దార్చిగండ యేసుచి బోడిచి ఉప్పిరి ఒడయ్ల.

యేసు తెన్ సిలువల్తె ఒడయ్ జా తిల దొగుల చొర్లు

39 ఒత్త అన్నె సిలువల్తె ఒడయ్ జా తిల నేరిమ్ కెర్ల దొగులతె ఎక్కిలొ, జలె, “ ‘తెద్రయిందె’ మెన దేముడు సంగిలొ క్రీస్తు రచ్చించువ కెర్తిసా నెంజిన్ గె? జలె, తుకయ్

§ 23:21 23:21 ‘సిలువ’ మెలె, ఏక్ టీవ్తి చి ఏక్ అడ్డుమ్ జతి దొన్ని డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోవయించ అత్తి చట్టొ చంపొ కెరవ, అత్తిచట్టొతె మేకుల్ పెట, సిలువ బుయ్యె టీవ రొవ కెర, దస్సి ములుల. జో సిచ్చ జతో మాన్సు దస్సి ఒడయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా. * 23:31 23:31 నెంజిలె, ‘ఆవ్ తిలొ దారు జలొసొక మాన్సుల్ ఇసి కెర్తి, తుమ్ సుకా గెలి దారు జతసక కిచ్చొ కెరుల?’ † 23:34 23:34 ఈంజు ఎత్రి తొతొ రెగిడ్డి గ్రీకు బాసచ నగుమ్ పుస్తకల్తె ఈంజు ‘అన్నె’ తెంతొ ‘ప్రార్థన కెర్లన్’ ఎదచి కోడు తయె నాయ్. ‡ 23:34 23:34 యోహాను 19:23. § 23:36 23:36 రానల్, సామాన్లు నెంజిలె మాములుమ్ మాన్సుల్ పితి రగుమ్ అమ్డి తిలి ద్రాచ రస్సుమ్ * 23:38 23:38 యోహాను 19:20తె దెకితె, పిలాతు అదికారి జా దార్ గండ సొంత రెడ్డె తిలన్. తిన్ని బాసల్ తెన్ రెడ్డె తిల; గ్రీకు బాస తెన్, రోమ్ దేసిమ్చి లాటిన్ బాస తెన్, చి జేవ్ యూదుల్చి సొంత ఎట్టి బాస తెన్.

తుయి రచ్చించువ కెరను చి అమ్క కి రచ్చించువ కెరు!”
మెన యేసుక దూసుప కెర సంగిలన్.

40 జలె, జో ఎక్కిలో దస్సి లట్టబ్బికయ్, అన్నెక్లో జోక
“ఇన్నెతెన్ తుయి ఎక్కి రితి సిచ్చ జలెకి, దేముడుక బిస్సి
నాయ్ గె?

41 ఆమ్ జలె, అమ్ నేరిమ్లు కెర్లి రిసాయి నాయిమ్ తెన్
అమ్క సిచ్చ కెర అస్తి, అమ్ కెర్ల కమొక జెతి సిచ్చతె అమ్క
గల అస్తి. గని ఈంజో మాన్సు కిచ్చొ ఇదిలిన్ తప్పు కి కెరె
నాయ్” మెన ఈంజో అన్నెక్లో †చోరు తొల్లితొచొక గోల కెర.

42 జో యేసుక, “ఓ యేసుప్రబు, తుయి రానో జా ఏలుప
కెర్లి తుచి అదికారుమ్ తెన్ అన్నె జెతి పొదిక అంక ఉచర
దయ దెకు” మెన సంగిలన్.

43 యేసు జోక, “తుక ఆవ్ కచితుమ్ సంగితసి మెలె,
అజి కి చెంగిల్ తోట రితి †పరదైసుతె అంచి తెన్ తస్తై” మెన
సంగిలన్.

యేసు మొర గెలిసి

(మత్త 27:45-56; మార్కు 15:33-41; యోహా
19:28-30)

44 మెద్దెనె, బార గంటల్ జలి పొది తెంతో, జలె, తిన్ని
గంటల్ ఎద, పొద్దు అందర్ జా గెలి చి, †జా దేసిమి ఒండి
అందర్ జా గెలి.

45 అన్నె కిచ్చొ జర్గు జలి మెలె, దేముడుచి గుడితె ఒడొవ
తిలి *తెర ఉప్పిర్ తెంతో ఎట్టో ఎద చిరి జా దొన్ని గండల్ జా
గెలి.

46 తెదొడి యేసు గట్టిజ అవాడ కెరన “ఓ బ, తుచి అత్తి
అంచి జీవు ఆవ్ సార్ప కెర దెతసి” మెన సంగ ప్రానుమ్
ముల దిలన్.

47 జలె, యేసుక దెకితె తిలో †పుంజెక్జిన్ జమాన్లుక
వెల్లో, జర్గు జలిసి ఎత్తి దెక కెర, దేముడుక గవురుమ్
కెర్లొ చి, “ఈంజో మాన్సు కచితుమ్ పున్నిమ్చొ!” మెన
సంగిలన్.

48 అన్నె, కిచ్చొ జర్గు జయెదె గే దెకుమ మెన ఒత్త గెచ్చ
తిల మాన్సుల్ ఎత్తిజిని, జర్గు జలిసి దెక కెర, గుండెతె
పెటన గెరి ఉట్ట గెల.

49 అన్నె యేసుచ గోతుసుదల్, చి గలిలయ ప్రాంతుమ్
తెంతో జోచి పట్టి జా †సవైచన కెర తిల తేర్బోదల్ కి
సిలువల్క ఇదిల్ దూరి టీచ తా జర్గు జలిసి ఎత్తి దెకితె
తిల.

† 23:41 23:41 మత్తయి 27:44. ‡ 23:43 23:43 నెంజెలె ‘పరలోకుమ్తె’. § 23:44 23:44 నెంజెలె ‘ఒండి బూలోకుమ్తె’. * 23:45
23:45 ఎక్కి ఎత్తిక వెల్లొ పూజరి వెర్సెక్ ఎక్కి సుట్టు పెన అర్పితుమ్ దెతి గదిక అడ్డు కెర్లి తెర, జా. జా చిరి జా దొన్ని గండల్ జలిసిచి అర్దుమ్ కిచ్చొ మెలె,
యేసు మొర్లిన్ తెన్ ఎత్తి అదికారుమ్ తిలో దేముడుక చి మాన్సుల్క అడ్డు తిల పాపుమ్ జో యేసు గెచ్చయిలిన్చి అర్దుమ్. ఏత్రియులుక రెగిడ్డి ఉత్తమ్ 10:19,
20. † 23:47 23:47 జో రోమియుడు జయెదె జలెకి. ‡ 23:49 23:49 లూకా 8:1-3 దెక. § 23:53 23:53 యూదుల్ తెన్ బట్టక దిగిల గండల్
కెర గుడియవుల, పీనుమ్క. * 23:54 23:54 ‘సాంజ్ జలె అన్నెక్ దీసి మొదొల్ జా తయెదె-సెలవ్ దీసి; చి రిసా, తెదొడ్క వెంట గెలుక నెంజె’ మెన జేవ్
యూదుల్చి రితి ఉచర, సాంజ్ సరిగా నే జతె అగ్గె వెంట గెల. † 23:55 23:55 లూకా 8:1-3 దెక. ‡ 23:55 23:55 యోసేపు తెన్ నీకోదేము మెలొ
బెద వెంట గెల. యోహాను 19:39-40.

యేసుచి పీనుమ్ ఎంగ్గవ దిలిసి

(మత్త 27:57-61; మార్కు 15:42-47; యోహా
19:38-42)

50 అరిమతయ్ మెంతి ఏక్ గెవ్విచొ యోసేపు మెలొ
ఎక్కిలో తిలొ. యూదుల్చి వెల్లి తగుతె వెసితోసా జయెదె,
జో, చెంగిలో సత్తిమ్చొ మాన్సు జయెదె.

51 జేవ్ అన్నె వెల్లెల సుదల్ యేసుచి ఉప్పిరి కుట్ర
కెర్లిన్తె జో బెదె నాయ్, జోక ఇస్టుమ్ నాయ్ చి, ‘ఎత్తి
అదికారుమ్ తిలో దేముడుచి రాజిమ్ కెయ్క ఎదార్దుమ్
డిసెదె, జా రాజిమ్చొ క్రిస్తు రానో ఏలుప కెరెదె?’ మెన జో
రకితె తిలన్.

52 ఈంజో మాన్సు, జలె, పిలాతు అదికారితె గెచ్చ కెర,
“యేసుచి పీనుమ్ అంక దె” మెన జా ఉత్తవ వెంట గెల్లి రిసా
సెలవ్ నజిలన్,

53 అన్నె, ఉత్తవ కెర, జోచి ఉప్పిరి చెంగిల్ విలువ †బట్ట
గండ వంగ్రవ కెర, కక్క అగ్గె నే రోవ తిలి సాప్రయ్ డొల్లి కెర్లి
మెస్సున్తె రోవ దిలన్.

54 *కేన్ దీసి దస్సి కెర్లన్ మెలె, యూదుల్చి సెలవ్ కడన్లి
దీసిక బోగి జయెదె.

55 యేసుక †సవైచన కెరుక మెన అగ్గె గలిలయ
ప్రాంతుమ్ తెంతో జో తెన్ బెద జా తిల తేర్బోదల్ జలె,
†యోసేపుచి పట్టి జా తిల, మెస్సున్ దెక, యేసుచి పీనుమ్
కీసి ఎంగ్గవ దిల గే దెకిల.

56 దెక కెర, జేవ్ తతా గెరలె గెచ్చ కెర, జోక పడ్డొ గానుక
మెన చెంగిల వాసిన తేల్లు తెయార్ కెర్ల. అన్నె దేముడు
మోసే తెన్ దిలి ఆగ్గుల్తె రెగిడ్డి రితి సెలవ్ కడన్లి దీసి తుక్లె
తిల.

24

యేసుక ‘జీవ్ జా అస్సె’ మెన రుజ్జు అయ్లిసి

(మత్త 28:1-10; మార్కు 16:1-8; యోహా 20:1-
10)

1 సెలవ్ కడన్లి దీసి రాత్ పాయితె తతికయ్, జేవ్
తేర్బోదల్ జేవ్ తెయార్ కెర్ల వాసిన తేల్లు దెరన మెస్సి గెల.

2 జలె, ఒత్త పావెలె, కిచ్చొ దెకిల మెలె, జా సాప్రయ్ డొల్లి
కెర్లి మెస్సున్ పెసితి వాల్క డంక తిలో వెల్లొ పత్తురు ఒస్సుల్
జా అస్సె మెన దెకిల,

3 పెసిలె, యేసుచి పీనుమ్ జేవ్క డీసి నాయ్.

4 జలె, యేసుచి పీనుమ్ అప్పె నెంజిలిన్చి రిసా కిచ్చొ ఉచరుక గే జేవ్ నేన తతికయ్, ఈందె, దగదగాల్పు మెర్చుప జల పాలల్ గలన్ల దొగుల ఉబెడల్ రిత దూతల్ జోవయించి పాసి టీవెల.

5 ఈంజేవ్ తేర్బోదల్ బియఁ గెచ్చు బుయి పక్క దెకితె తతికయ్, జేవ్ దూతల్ జోవయింక కిచ్చొ మెల మెలె, “జీవు తిలోసాక కిచ్చొ మెన్నె చజితసు? జో ఇన్నె నాయ్. జో జీవ్ జా ఉట్ట అస్సె.

6 ఈందె, జో తెదొడి గలిలయతె తా ఒత్త తెంతో నే బారీ జతె అగ్గె తుమ్క సంగిలిసి తుమ్ ఏద కెర.”

7 కిచ్చొ మెలె, “*ఆవ్ మాన్సు జా జెర్మన్ అయ్లోసాక విరోదుమ్ సుదల్ అన్నె పాపుమ్ సుదల్చి అత్తి సార్పు కెర దెంక అస్సె చి, జేవ్ అంక సిలువతె టీవడ మారుక అస్సె, చి తిర్రతక ఆవ్ అన్నె జీవ్ జా ఉట్టుక అస్సె, మెన సంగిలన్, గెద” మెన దూతల్ సంగిల.

8 జేవ్ తేర్బోదల్ యేసుచ తెదొడచ కొడో ఏదన్లు కెర్ల,

9 అన్నె, మెన్నె తెంతో పసుల ఉట్ట గెచ్చు, †ఎగరజిన్ యేసుచ సిస్సుల్క చి జోవయింక నంపజల అన్నె ఎత్తిజిన్క జా కబుర్ సంగిల.

10 జేవ్ ఎగరజిన్ యేసుచ ‡బారికుల్క జో జీవ్ జా ఉట్టిన్చి రుజ్జు సంగిల జేవ్ తేర్బోదల్ కొన్న మెలె, మగ్ల గెవ్విచి మరియు, యోహాన్సు, సీయాకోబుచి అయ్యసి మరియు, చి జోవయింతెన్ తిల *అన్నె తేర్బోదల్.

11 జేవ్ సంగిలిన్క ‘వెర్రి కోడు’ మెన ఈంజేవ్ ఎగరజిన్ ఉచర నంప కెర్తి నాయ్.

12 †గని పేతురు ఉట్ట కెర, మెస్సున్తె నిగ గెలో, అన్నె ఒత్త పావ వంపొ జా తెడి దెకిలె, యేసుచి పీనుమ్క అగ్గె పంగ్రవ తిలి బట్టయ్, గని పీనుమ్ నాయ్, కిచ్చొ నాయ్. జలె, జర్పు జలిన్క ఆచారిమ్ జా ఉచరన ఉచరన, గెరి ఉట్ట గెలన్.

ఎమ్మాయు గెవ్వి దొగుల సిస్సుల్క యేసు దన్సుల్ జా బెద గెలిసి

(మార్కు 16:12-13)

13 జయ్యి దీసి, యేసుచ సిస్సుల్ జల దొగుల ఎమ్మాయు మెంతి గెవ్వి గెతె తిల. జా గావ్ యెరూసలేమ్ పట్టుమ్క ఎగర కిలోమిటర్లు దూరి తయెదె.

14 జర్పు జలిన్ ఎత్తిచి రిసా జేవ్ దొగుల లట్టబై తిల,

* 24:7 24:7 లూకా 9:22, 24. † 24:9 24:9 యేసుక విరోదుమ్ సుదల్చి అత్తి దెర దిలో యూదా మదెనె అత్త్య కెరన తిలో. మత్తయి 27:5, బారికుల్ 1:18. ‡ 24:10 24:10 ఒగ్గరతె ‘సిస్సుల్’ మెన అస్సె. ‘బారికుల్’ మెలి పుస్తకుమతె పూర్తి ‘బారికుల్’ మెంతె తయెదె. § 24:10 24:10 ఈంజ మెరియ యేసుచి అయ్యసి జయెదె; మార్కు 6:3. * 24:10 24:10 జోవయింతె ఎక్కి ‘సలోమే’ మెలిసి; మార్కు 15:40. † 24:12 24:12 ఈంజ ఎత్తి తొలితె రెగ్గె సగుమ్ పుస్తకల్తె 12 నంబర్చి కోడు తయె నాయ్. ‡ 24:16 24:16 ఎత్తి అదికారుమ్ తిలో దేముడుచి నెలవ్కయ్ జా అడ్డు తయెదె.

మార్కు 16:12తె దెకిలె, యేసుచి పోలిక ఇదిల్ మార్కుప జా తిలి. § 24:21 24:21 నెంజిలె ‘అన్నె గెనన విడ్డల్ కెరుక తిలోసా’. మాములుమ్ యూదుల్ జోవయింక ఈంజ లోకుమ్చ బాదల్ తెంతో పడ్డె జోవయింక ఆక్రమించుప కెర్తి రోమ్ దేసిమ్చి ప్రబుతుమ్ తెంతో చి రచ్చనక ఉచర్తె తిల. బారికుల్ 1:6-8 కి దెక. ఈంజేవ్ సిస్సుల్ కి జా రగుమ్ రచ్చనచి రిసా ఉచర్తె తిల, కిచ్చొగె. అప్పెచి మట్టుక ముక్కిమ్క పాపుమ్ తెంతో చి రచ్చన దొర్పు కెరుక యేసు అయ్లో, చి జాచి రిసా దొర్పు జలి అర్చితుమ్ జలో. లూకా 5:24 యోహాను 3:16-18 దెక. ఎత్తి అదికారుమ్ తిలో దేముడు అకర్కయ్ ఆగానుమ్ బూలోకుమ్ మార్కుప కెరెదె, చి తెదొడకయ్ యేసు ఎదార్డుమ్ ఏలుప కెరెదె, చి ఈంజ లోకుమ్చ బాదల్ పూర్తి గెచ్చుల. డీనయ్లిన్ 21:3-5, కొరింథిల్క రెగ్గె ఏక నంబర్ ఉట్టుమ్ 15:24-28.

15 జలె, జేవ్ దన్సి లట్టబై తతికయ్, యేసు సొంత జా వాల్ జా జోవయింతె పావ కెర, జోవయింతెన్ బెద ఇండుక దెర్లన్.

16 జలె, జోక దెకిలెకి, జోక జేవ్ చినుక ‡అడ్డు కెర్తె తిలన్, చి చినితి నాయ్.

17 తెదొడి యేసు జోవయింక “తుమ్ ఇండ ఇండ, కిచ్చొచి రిసా ఎక్కిలో తెన్ ఎక్కిలో లట్టబై అస్సున్?” మెన పుసిలన్ చి, జేవ్ ముసుర్లు జా ఇదిలిన్ మొకొమ్ కెరన అస్తి.

18 జోవయింతె ఎక్కిలో క్లెయిపా మెలోసా. జో, జలె, “ఈంజ మదెనె యెరూసలేమ్తె జర్పు జలిసి ఒత్త అయ్లన ఎత్తిజిన్ జాన్తి. ఎక్కి తుయి నేన్సి గె?” మెన జోచి ఆచారిమ్ సంగిలో.

19 యేసు జోవయింక “కిచ్చొ జర్పు జలిసి?” మెలన్, చి జేవ్ జోక నజరేతు గెవ్విచొ యేసుచి రిసా జర్పు జలిసి. జో దేముడుచ కబుర్లు సంగితోసా జా తిలో. జో కెర్తి బోదన, జో కెర్ల వెల్లెల కమె, దేముడు దిలన చి, జోచి బోదన జోచ కమెక ఎత్తిజిన్ ప్రజల్ నంప కెర తిల.

20 గని అమ్చ వెల్లెల పూజర్లు చి అమ్చ అదికారుల్ ‘జో మొర్తి సిచ్చు జవున్ తుమ్ మొర్తి సిచ్చు తియ’ రోమ్ దేసిమ్చ అదికారుల్చి అత్తి సార్పు కెర దిల చి, సిలువతె టీవడ మార్ల.

21 ఆమ్, జలె, జోక “‘అమ్చ ఇస్రాయేలుల్క సీరచ్చించుప కెరుక తిలోసా జోయ్యి’ మెన ఆన జా తిలమ్. అన్నె, అమ్ సంగిలిసి జర్పు జలి తెంతో, జో మొర్తి తెంతో, అప్పె తిర్రతి జా అస్సె.

22 అన్నె కిచ్చొ మెలె, అమ్చి తెన్ బెదిత సగుమ్జిన్ తేర్బోదల్ ఆజి అమ్క ఆచారిమ్చి కోడు సంగిల. రాత్ పాయితె తతికయ్. జేవ్ మెన్నె గెల చి,

23 ఒత్త యేసుచి పీనుమ్ డీసె నాయ్, చి అమ్తె జా కెర అన్నె కిచ్చొ మెల మెలె, దూతల్ అమ్క డీసెన్ సేడ్ల చి, యేసుక ‘జీవ్ జా ఉట్ట అస్సె’ మెన అమ్క సంగిల మెల.

24 అమ్చితె తిలన సగుమ్జిన్ మెన్నె గెచ్చు దెకిల చి, జేవ్ తేర్బోదల్ సంగిల్ రితి తిలి. గని యేసుక, దెకితి నాయ్” మెన జేవ్ దొగుల సంగిల.

25 యేసు జోవయింక, “కిచ్చొ గ్యానుమ్ నెంజిలన, తుమ్! దేముడుచ కబుర్లు సంగిల పూర్తుల్చ కొడో అర్దుమ్ కెరనుక నంప కెరుక ఆల్నిమ్ కెర్తసు, కిచ్చొక?

26 క్రీస్తు రచ్చించుచు ప కెర్తొసా దస బాదల్ సేడ జో గవురుమ్ జతిన్తె గెచ్చుక దొర్కు జలి, గెద” మెన,

27 మోసే చి అత్తి రెగిడ్లి దేముడుచ ఆగ్గుల్, అన్నె దేముడుచ కబుర్లు సంగిల పూర్లుచి అత్తి రెగిడ్లి, జోచి రిసొచ దేముడుచ కొడొతె రెగిడ్లి ఎత్కిచి అర్దుమ్ యేసు సంగిలన్.

28 జలె, జేవ్ గెతి గావ్ పాసి జా జెతికయ్, యేసు అన్నె దూరి గెచ్చుక మెలి రితి జలె,

29 గని, “సాంజ్ జలి. పొద్దు గెతయ్. అమ్చి తెన్ ఇన్నె తుయి నిద్ద తా” మెన జోక బతిమాల్పా జా సంగిల, చి జేవ్ తతిన్తె బెద గెలన్.

30 జలె, జోవయింతెన్ అన్నిమ్ కంక మెన వెసిలో, అన్నె, ఏక్ పోడి అత్తి దెరన ‘ఈంజ తుయి దా దయ కెర్లది’ మెన దేముడు అబ్బొన్క జోబర సంగ కెర, జా పోడి మోడ కెర, జోవయింక వంట దిలన్.

31 దస్సి కెర్తికయ్, జోవయించ అంకివో టేంట జల చి, అర్దుమ్ అయ్లి చి జోక చినిల. చినిలి బేగి, యేసు మాయ జా ఉట్ట గెలో.

32 దస్సి జర్గు జతికయ్. “నిజామి, అమ్ వట్టె జో తెన్ జెతె తిలి పొది, దేముడుచ కొడొచి అర్దుమ్ అమ్క జో దెకయ్తె తిలి పొది అమ్చి పెట్టి డడ్డిల్ రితి సర్ల తిలి, గెద” మెన లట్టబన్.

33 జోవయించి ఒగ్గర్ సర్లక బేగి ఉట్ట జయ్యి గడియయ్ బార్ జా యెరూసలేమ్ పట్టుమ్తె అన్నె గెల. ఒత్త పాచె కెర, ఎగరజిన యేసుచ సిస్సుల్క చి జోవయింతెన్ తిలసక చజిల చి,

34 జేవ్ ఈంజేవ్ దొగులక కిచ్చొ మెల మెలె, “ప్రబు నిజామి జీవ్ జా ఉట్ట అస్సె. *సీమోనుక డీసిలన్!” మెన జేవ్ సంగితికయ్,

35 యేసు ఎమ్మాయున్తె గెతి వట్టె దస్సుల్ జలిసి అన్నె పోడి మోడ్డికయ్ ఈంజేవ్ జోక చినిలిసి ఈంజేవ్ జోవయింక సంగిల.

జోచ ఎగరజిన సిస్సుల్క యేసు డీసిలిసి

(మత్త 28:16-20; మార్కు 16:14-18; యోహా 20:19-23; బారి కమ్మొ 1:6-8)

* 24:34 24:34 ‘సీమోను’ మెలె, పేతురు. † 24:36 24:36 “తుమ్క” తెంతొ 36నంబర్ కోడుచి ఆకర్ కోడు ‘మెలన్’ ఎదచి కోడు ఈంజ ఎత్కి తొలితొ రెగిడ్లి సగుమ్ పుస్తకల్తె తయ నాయ్. ‡ 24:40 24:40 ఈంజ ఎత్కి తొలితొ రెగిడ్లి సగుమ్ పుస్తకల్తె 40నంబర్చి కోడు తయ నాయ్. § 24:44 24:44 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగేచి పావ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్లి దేముడుచ ఆగ్గుల్ మెన రగ్గవ అస్సె. * 24:44 24:44 జేవ్ కిర్తనల్తె దావీదు రాసె జలె పూర్లుమ్చొ ఒగ్గర్ రెగిడ్లిన్. † 24:44 24:44 లూకా 18:31, 22:37, కిర్తనలు 20:42. ‡ 24:45 24:45 నెంజెలి ‘సెక్సి తిలన్’. § 24:46 24:46 యెసయా 53:1-9 ఎద జో బాదల్ సేడ మొర్తినచి రిసొచి టాలి అస్సె, చి దెస్సు నంబర్ తెంతొ బార నంబర్ ఎద జో అన్నె గవురుమ్ జతిన్చి రిసొచి కోడు అస్సె. జో తిర్తకయ్ అన్నె జీవ్ జా ఉట్టిన్చి రిసొ జా నే జతె అగ్గె అన్నె పూర్లుమ్చి వాల్ దేముడుచి కొడొతె, ‘జా జర్గు జయెదె’ మెన కేనె టాలి డీస్తయ్ మెలె, యోనా పుస్తకుమ్తె. యోనాక వెల్లొ మొస్సొ గిడ తిర్తక జోవయింక ఒక్క విడ్డల్ కెర్లిసి. యేసు మొర తిర్తక అన్నె జీవ్ జంక తిలిన్చి రిసొచి టాలి జా.

36 జేవ్ దస్సి లట్టబంతె తతికయ్, యేసు డీస జోవయించి నెడిమి టీవెలన్, అన్నె, † “తుమ్క సేంతుమ్ తవున్. తుమ్ బమ్మ జా నాయ్. ఆవ్వి, గెద” మెలన్.

37 గని జేవ్ బియఁ గెచ్చు బమ్మ జల. జోక ‘డుంబొ’ మెన ఉచర్ల.

38 జో, జలె, జోవయింక “తుమ్ కిచ్చొక బమ్మ జతను? తుమ్చి పెట్టి కిచ్చొక అన్నానుమ్ జతను?

39 అంక సిలువతె గలిలి పొది జేవ్ అంచ అత్తిలె చట్టెలె పెట్ల మేకుల్చ మచ్చల్ దెక అంక తుమ్ చిన. ఆవ్వి గెద. అంక చడ దెక. డుంబొక ఆగ్గె తయె నాయ్ అడ్డె తయె నాయ్, గెద, గని అంక అస్సె.”

40 ‡ మెన జోచ అత్తో చట్టొ జోవయింక దెకయ్లన్.

41 జలె, జోవయించి సర్లసంతొసుమ్, జోవయించి ఆచారిమ్క జేవ్ తెదొడి ఎద నంప కెరుక ఇదిల్ అల్లర్ జలి రిసొ, “ఇన్నె కిచ్చొ జలెకు కతిసి అస్సె గె?” మెన పుసిలన్.

42 మొస్సొ గండ దిల,

43 జో డుంబొ నెంజెలిన్చి రుజ్జుక జో నజన జోవయించి మొక్కె కయ్లన్.

44 తెదొడి జోవయింక, “ఆవ్ తుమ్చి తెన్ తిలి పొది, ‘మోసే పూర్లుమ్చొచి అత్తి దేముడు రెగ్గయ్ల సీఆగ్గుల్తె అంచి రిసొ మోసే పూర్లుమ్చొచి అత్తి రెగిడ్లి దేముడుచ ఆగ్గుల్, దేముడుచ కబుర్లు సంగిల పూర్లుమ్చచి కోడు, చి *కిర్తనల్తె †రెగిడ్లిసి ఎత్కి కచితుమ్ పూర్తి జర్గు జంక అస్సె’ మెన సంగిలయ్, గెద” మెన సంగ కెర,

45 దేముడుచ కొడొతె తిలిసి జేవ్ అర్దుమ్ కెరంతి రితి ‡ అర్దుమ్ దెకయ్లన్.

46 జోవయింక కిచ్చొ మెలన్ మెలె, “దేముడుచి కోడుతె రెగ్గయ్లిసి కిచ్చొ మెలె, ‘దొర్కు జలె క్రీస్తు రచ్చించుచు ప కెర్తొసా ఒగ్గర్ బాదల్ సేడ మొర తిర్తక అన్నె జీవ్ జా ఉట్టుక అస్సె’ మెన సీఅస్సె. అన్నె, ‘కచితుమ్ జర్గు జయెదె’ మెన దేముడుచి అప్పెచి సెలవ్ కిచ్చొ మెలె,

47 మాన్సుల్ జేవ్ కెర్ల పాపల్ చినన జేవ్ పాపల్క దుకుమ్ జా ఒప్పున ములిలె, క్రీస్తు దొర్కు జలి అర్పితుమ్ జలిన్చి రిసొ అప్పె జేవ్ కెర్ల పాపల్ చెమించుచ జతి వాటు దొర్కు జా అస్సె మెన ఆవ్ క్రీస్తుచి నావ్ తెన్ తొలితొ యెరూసలేమ్తె పడ్డె ఒండి లోకుమ్చ పైజల్ ఎత్కిచ

మాన్యుల్తె తుమ్ బోదన కెరుక అస్సె.

48 ఈంజ ఎత్కిచి రిసా సాచుల్ జా అస్సున్, చి తుమ్ బుల సాచి నంగుక అస్సె.

49 ఈందె, అంచొ దేముడు అబ్బొ 'జోవయించి పెట్టి *తెద్రయిందె' మెన సంగ తిలి జోచి పరలోకుమ్చి దేముడుచి సుద్ది తిలి ఆత్మ తుమ్చి పెట్టి తెద్రయిందె, గని పరలోకుమ్ తెంతో చి జా ఆత్మనెక్తి తుమ్చి పెట్టి జా తుమ్క తెయార్ కెర్తె ఎదక, ఈంజ మదెనె ఈంజ యెరూసలేమ్ పట్టుమ్తె తుమ్ రకితె తా" మెన యేసు జేవ్ ఎగరజిన్క చి ఒత్త తిల జోక నంపజల అన్నె మాన్యుల్క సంగిలన్.

యేసు పరలోకుమ్తె వెగ గెలిసి
(మార్కు 16:19-20; బారి కమ్మొ 1:9-11)

50 తెదొడి యేసు జోవయించ సిస్సుల్క కడన, †బేతనియ గావ్ పక్క గెల చి, అత్తో ఉక్కుల జోవయింక దీవెన దిలన్.

51 జో దస్సి జా దీవెన దెతె తా, జోవయించి నెడిమి తెంతో ముల ఉక్కిల్ జా పరలోకుమ్తె ఉట్ట గెలన్.

52 తెదొడి జేవ్ సెర్ను సేడ జోక బక్తి కెర తా ఒగ్గర్ సర్దసంతోసుమ్ తెన్ యెరూసలేమ్తె అన్నె గెల.

53 రోజుక దేముడుచి గుడితె గెచ్చ, యేసుచి రిసా జో దేముడుచి గవరుమ్ సంగితె తిల.

* 24:49 24:49 యావేలు 2:28, 29 దెక. † 24:50 24:50 బేతనియ గావ్ ఒలీవ మెట్టయ్ అస్సె; ఎట్టొ పక్కయ్. బారికుల్ 1:6-12చి దెకిలె, జో పరలోకుమ్తె వెగ గెలిన్చి రిసా ఒత్తయ్ కి అస్సె.

యోహాను సుబుమ్ కబుర్ యోహాను రెగిడ్డి సుబుమ్ కబుర్

యేసుక్రీస్తు కొన్సొ

1 * మొదోల్ తెంతో కి దేముడుచి †కోడు తిలో. కిచ్చొ జెర్మన్ నెంజిలి పొది తెంతో కి జా కోడు దేముడు తెన్ తిలో.

జా కోడుయి దేముడు జా తిలో. ‡

2 జోయ్యి కిచ్చొ నెంజిలి జా పొది దేముడు తెన్ తిలో. ఎత్తి జోచి అత్తి కల్లుప జలి.

3 తిలిసి ఎత్తి జో నెంజితె జెర్మన్ జయె నాయ్.

4 జోచితె జివు తిలి, జా జివు మాన్సుల్క ఉజిడి జా అస్సె.

5 జా ఉజిడి అందరతె ఉజిడి దెతె అస్సె గని అందర్ జా ఉజిడిక చినన్క నెతిరయ్.

6 దేముడు తెద్రయ్తికయ్, ఏక్ మాన్సు బార్ జలన్. జోవయించి నావ్ యోహాన్సు.

7 జో సాచి సంగుక అయ్లన్. ఎత్తి జిన్ క్రీస్తుక నంపజా పాపుమ్ తెంతో రచ్చించుప జతు మెన, 'దొర్కు జలి * ఉజిడి యేసుక్రీస్తుయి' మెన సాచి సంగుక అయ్లన్.

8 యోహాను, జలె, జా ఉజిడి నెంజె, గని 'క్రీస్తుయి దొర్కు జలి జా ఉజిడి' మెన సాచి సంగుక అయ్లన్.

9 ఈంజ లోకుమ్తె జెర్మిత ఎత్తి మాన్సుక ఉజిడి దెతి నిజుమ్ జలి ఉజిడి ఈంజ లోకుమ్తె జెతె అస్సె.

10 జలె, ఈంజ లోకుమ్తె జో తిలో. ఈంజ లోకుమ్ జోచి అత్తి జెర్మన్ జలి, గని ఈంజ లోకుమ్చ మాన్సుల్ జోక చినితి నాయ్.

11 జోచి సాంత గేర్చి మాన్సుల్తె జో అయ్లన్, గని జోచి సాంత మాన్సుల్ జోక ఒప్పన్తి నాయ్, నంపజతి నాయ్.

12 దస్సి జలి పొది సగుమ్జిన్ జోక ఒప్పన బెదవన నంపజా గెల. జోవయింకయి, జలె, 'తెదొడి తెంతో దేముడుచ బోదల్ తుమ్ జలదు' మెన సెలవ్ దిలన్.

13 జోచ బోదల్ జతి జెర్మన్, జలె, కేన్ నెకుమ్తె జెర్మిలి రిసా జర్గు జలిసి నెంజె, కేన్ తేర్ని మున్సుసి ఆగేక ఆసచి రిసా జెర్మన్ జలిసి నెంజె. ఈంజ దేముడుచి దయచి రిసా జోచి ఆత్మనెక్తి దిలి రిసాచి జెర్మిలన్.

14 జలె, దేముడుచి కోడు ఈంజ లోకుమ్తె మాన్సు జా జెర్మన్ జా అమ్ మాన్సుల్ తెన్ బెద జలన్. పూర్తి దయ, పూర్తి సత్తిమ్ తా అమ్చి తెన్ జలన్, చి జోచి పరలోకుమ్చి

* **1:1 1:1** నమూనా బుయి లోకుముల్ కిచ్చొయ్ నెంజిలి పొది † **1:1 1:1** మెలె, ఎక్కిలోచి వెట్టి తిలిసి జోవయించి కోడుతె కిసి చినుక జయెదె గే, దస్సి, ఎత్తి అదికారుమ్ తిలో దేముడు కిసా అస్సె గే చినుక జలె, యేసుక్రీస్తుక దెకుక. వడ్డె, ఎత్తి అదికారుమ్ తిలో దేముడుచి వెట్టి తిలిసి యేసుక్రీస్తుచి అత్తి జర్గు జయెదె. ‡ **1:1 1:1** 'ప్రబు' మెలె కిచ్చొ అర్దుమ్ తయెదె మెలె, ఎత్తిక ఏలుప కెర్తె దేముడు, ఎత్తి అదికారుమ్ తిలో దేముడు. దేముడు అబ్బొన్క కి దేముడు పుత్తున్క కి 'ప్రబు' మెనుల. బయ్బిల్చి ఈంజ వాటతె ముక్కిమ్క క్రీస్తుకయ్ 'ప్రబు' మెనుల. § **1:5 1:5** ఈంజ లోకుమ్చి పాపుమ్ అమన్ అందర్ రితి జలెకి, ఉజిడిక అందర్ కిసి విజవుక నెత్తె గే, క్రీస్తుచి సత్తిమ్చి ఉప్పిరి పాపుమ్ జినుక నెత్తె. * **1:7 1:7** సత్తిమ్, నెక్తి. † **1:19 1:19** యెరూసలేమ్ పట్టుమ్తె ఎత్తి అదికారుమ్ తిలో దేముడుచి ఎక్కి దేముడుచి గుడి తయెదె. యూదుల్క జయి పట్టుమ్ ముక్కిమ్ జయెదె. ‡ **1:19 1:19** 'యూదుల్' మెలె, 'అంచయ్ మాన్సుల్ జా అంకయ్ జోకర్డు' మెన పూర్గుమ్ తెంతో ఎత్తి అదికారుమ్ తిలో దేముడు నిసాన్ల వ్రెజల్.

ఉజిడి దెకిల్ రితి జలమ్, చి 'దేముడు తెంతో అయ్లో దేముడుచొ ఎక్కి పుత్తుసి ఈంజొయి' మెన అమ్క నిజుమి రుజ్జు అయ్లి.

15 జోచి రిసా " 'అంచి కంట పడ్డె జెతోసా అంచి కంట వెల్లో. కిచ్చొక మెలె, అంచి కంట జో అగ్గెయ్ తిలోసా' మెన ఇన్నెచి రిసాయి సంగిలయ్" మెన యోహాను సాచి జా కేక్ గల సాట్టు కెర్తె తిలో.

16 జోచి ఎదివాట్ బెర్తుతె తిలి దయ తెంతో అమ్ ఎత్తి జిన్ దయ పడ్డె దయ పాయ అస్సుమ్.

17 మోసే పూర్గుమ్చొచి అత్తి దేముడుచ ఆగ్గుల్ అగ్గె తెంతో అమ్క దా అస్సె, గని దేముడుచి దయ, నిజుమ్ యేసుక్రీస్తుచి అత్తి దొర్కు జలి.

18 కేన్ మాన్సుకి కెయ్యు కి దేముడుక దెకిత్ నాయ్. మాన్సు జోక దస్సి దెకుక నెంజితయ్. జాకయ్, జోచి పక్కయ్ తిలో దేముడుచొ ఎక్కి పుత్తుసి, ఈంజ లోకుమ్తె జెర్మ అమ్చి తెన్ జియ, అబ్బొసి కిసాచొ గే అమ్క దెకవ అస్సె, చి అబ్బొన్క దెకిల్ రితి జా అస్సుమ్.

బాప్తిసుమ్ దెతె తిలో యోహానుక పరిచ్చొ కెర్లిసి

(మత్త 3:1-12; మార్కు 1:1-8; లూకా 3:1-9,15-17)

19 † యెరూసలేమ్ పట్టుమ్చ ‡ యూదుల్చ వెల్లెల మాన్సుల్ 'తుయి కో?' మెన పుసితి రిసా, జోవయించ పూజర్తుక చి దేముడుచి గుడిచి సేవ కెర్తి లేవీ పూర్గుమ్చొచి సెకుమ్చ మాన్సుల్ సగుమ్జిన్క బాప్తిసుమ్ దెతె తిలో యోహానుతె తెద్రయ్ల.

20 జేవ్ జోక 'తుయి కో' మెన పుసితికయ్, జో అబద్దుమ్ జయె నాయ్. జో కిసి సాచి జలె, "ఆవ్ క్రీస్తు నెంజి" మెన సత్తిమ్ ఒప్పన్లన్.

21 దస్సి ఒప్పన్తికయ్, "దస్సి జలె, దేముడుచ కబుర్లు సంగిలో ఏలీయా పూర్గుమ్చొ ఏక్ వేల జస్తె గే?" మెన పుసిల. పుసిలె, "నెంజి" మెన సంగిలన్, చి "దస్సి జలె, దేముడుచ కబుర్లు సంగుక జెంక తిలో జో అన్నెక్లొ జస్తె గే?" మెన పుసిల, గని అన్నె "నెంజి" మెన యోహాను సంగిలన్.

22 జోక జేవ్ అన్నె, "దస్సి జలె, తుయి కొన్సొ? అమ్క తెద్రయ్ల వెల్లెల మాన్సుల్క అమ్ సంగుక అస్సె. కొన్సొ మెన తుయి సంగితసి?" మెన జో తెన్ పుసిల.

23 జో జోవయింక, "యెసయా పూర్గుమ్చొచి అత్తి దేముడు రెగ్డయ్లి

‘ప్రబు జెంక వాట్ సోగ కెర!’ మెన బయిలె ప్రదేసిమి కేక్ గల ప్రబుచి అవాడ్ ఆవ్.

మెన రెగ్గ అస్సి, గెద. ఆవ్ ఎక్కి జో” మెన యోహాను సంగిలన్.

24 పిమ్మట్ యోహానుక జేవ్ పరిచ్చ కెర్లన, జలె, కిపరిసయ్యుల్ తెంతో జా అస్సి,

25 “తుయి క్రీస్తు నెంజిలె, ఏలీయా నెంజిలె, దేముడుచ కబుర్లు సంగిలో అన్నెక్టో కి నెంజిలె, తుక కిచ్చో అదికారుమ్ తయెదె, చి *బాప్తిసుమ్ దెతసి?” మెన జేవ్ పుసిల.

26 యోహాను, జలె, “ఆవ్ జలె, మాన్సుల్క పానితె బాప్తిసుమ్ దెతసి, గని తుమ్చి నెడిమి తుమ్ నేన్లొ ఎక్కిలో టీచ అస్సి.

27 జో అంచి కంట పడ్డొ జెంక తిలొసా. జో అంచి పడ్డొ అయ్లె కి, జో కెడ్డి ముక్కిమ్చొ మెలె, జోచ జోడ్లుచ వాలివొ యివుక అంక ఏలువ నాయ్!” మెన జేవ్క ఇసి సంగిలన్.

28 ఈంజ ఎత్తి యోహాను గాడుక తూర్పు పక్కచి ఒడ్డుతెచి బేతనియ మెలి వక్ టాన్తె జర్లు జలి.

ప్రజల్చి మొక్కె క్రీస్తుచి రిసా యోహాను సంగిలిసి

29 అన్నెక్ దీసి, యేసు పాసి తతికయ్, యోహాను జోక దెక, “ఈంజ లోకుమ్చ చి పాపుమ్ వయ గెచ్చయ్తో అమ్చొ దేముడు దిలో మెండపిల్ల జలొసా ఓదె!” మెన సంగిలో. అన్నె,

30 “ఇన్నెచి రిసాయి ఆవ్ సంగిలి, ‘జో అంచి పడ్డొ జెర్లిలెకి, అంచి కంట అగ్గెయ్ తెంతో తిలొసా, చి రిసా అంచి కంట వెల్లో జయెదె’ మెలయ్.

31 ఈంజొ కొన్సొ గే ఆవ్ కి అగ్గె నేన్లయ్, గని ఆవ్ అయ్లిసి జోచి రిసాయి. †ఇస్రాయేలులు ఇన్నెక ‘అమ్చొ రచ్చించుప కెర్టొసా’ మెన చినుతు మెన, పాపుమ్ జో గెచ్చయ్తి రిసా పానితె మాన్సుల్క బాప్తిసుమ్ దెతసి.”

32 తెదొడి యోహాను అన్నె కిచ్చొ సాచి సంగిలన్ మెలె, †“దేముడుచి సుద్ది తిలి ఆత్మ పార్వ పిట్టచి రితి జా, ఆగాసుమ్ తెంతో ఉత్ర జా, జోచి ఉపిర్ టీవిలిసి ఆవ్ దెకిలయ్.

33 ఆవ్ జోక ‘జొయ్యి’ మెన నేన్లయ్. నేన్తయ్, గని పానితెచి బాప్తిసుమ్ ఆవ్ దెంక మెన అంక తెద్రయ్లో జో అమ్చొ దేముడు కిచ్చొ గుర్తు సంగ తిలొ మెలె, ‘అంచి ఆత్మ ఉత్ర జా ఎక్కిలోచి ఉప్పిర్ టీవెదె, కచి ఉప్పిరి ఉత్ర

జా టీవెదె గే, అంచి పరలోకుమ్చి సుద్ది తిలి ఆత్మక జోక నంపజలసక జొయ్యి బాప్తిసుమ్ దా కెరెదె.’

34 జలె, జోక ‘దేముడుచొ పుత్తుసి ఈంజొయ్’ మెన ఆవ్ రుజ్జు దెక అస్సి, సాచి జా అస్సి” మెన ఒత్త తిలసక యోహాను సాచి సంగిలన్.

యోహానుచ సిన్సుల్తె దొగుల యేసుచి పట్టి గెలిసి

35 అన్నెక్ దీసి, యోహాను జోచి దొగుల సిన్సుల్ తెన్ టీచ తతికయ్,

36 యేసు జా వాట్ ఇండ గెతె తతికయ్, యోహాను జోక దెక, “పాపుమ్ గెచ్చయ్తో దొర్కు జలి దేముడుచి మెండపిల్ల, ఓదె!” మెన సంగిలన్.

37 యోహానుచ జేవ్ దొగుల సిన్సుల్, జలె, నూన కెర, యేసుచి పట్టి గెచ్చుక దెర్ల.

38 జలె, యేసు పన్ల, జేవ్ పట్టి జెతె తిలిసి దెక కెర, జోవయింక “కిచ్చొ చజితను?” మెన పుసిలన్, చి జేవ్ ‘గురుబాబు’ మెలి అర్దుమ్ తెన్ జోవయించి అరమయ్ బాస తెన్ “రబ్బీ” మెన సంగ, “కేనె బన జా అస్సిసి?” మెన జోక పుసిల.

39 జో “జొమ్మ. జా, దెక” మెన సంగిలన్, చి జేవ్ జో తెన్ గెచ్చ, జో బన జలి టాన్ దెకిల. జలె, పాసి పాసి చెత్తర్ గంటల్ నంజె జలి రిసా, జా దీసి జేవ్ దొగుల యేసుతె తా గెల.

అంద్రెయ పేతురు మెలొ అన్నొన్క యేసుతె బుకారా ఆల్లిసి

40 యోహానుచి జా కోడు నూన యేసుచి పట్టి గెల జేవ్ దొగులతె ఎక్కిలో అంద్రెయ మెలొసా జయెదె. జో కొన్సొ మెలె, సీమోను పేతురుచొ బావొసి.

41 జో జలె, అన్నెక్ దీసి పెందలె కిచ్చొ తొలితొ కెర్లన్ మెలె, సీమోను మెలొ జోచొ అన్నొన్క చజ కెర, “మెస్సయక జలె క్రీస్తుక చజ దెక అస్సుమ్!” మెన సంగిలన్. కి‘మెస్సయ’ మెన జా బాస తెన్ సంగిలె, గ్రీకు బాస తెన్ ‘క్రీస్తు’ మెలి అర్దుమ్ తయెదె.

42 దస్సి సంగ, సీమోనుక అంద్రెయ యేసుతె కడ ఆల్సొ. కడ ఆన్తికయ్, యేసు సీమోనుక చెంగిల్ దెక, “యోహాను మెలొ ఎక్కిలోచొ సీమోను మెలొ పుత్తుసి, తుయి. జలె, అప్పె తెంతో తుక ‘కేపా’ మెన నావ్ తితసి” మెన సంగిలన్. *‘కేపా’ మెన అరమయ్ బాస తెన్ సంగిలె, గ్రీకు బాస తెన్ ‘పేతురు’ జయెదె.

§ 1:24 1:24 పరిసయ్యుల్ మెల పండితుల్, నడ్డాకయ్యులు మెల పండితుల్, మోసి తెన్ దేముడు దిలి ఆగ్గల్ సికడ్డన చి వెల్లెల పూజర్లు యూదుల్చి వెల్లి నబతె వెసుల. * 1:25 1:25 ‘బాప్తిసుమ్’ మెలె, ఎత్తి అదికారుమ్ తిలొ దేముడు మాన్సుచి పాపుమ్ చెమించుప కెర్రి గుర్తుక కెర్రిసి. కిసి ఎక్కిలో బాప్తిసుమ్ నజనుక మెలె, “ఆవ్ పాపుమ్ సుదొ” మెన జో మాన్సు ఒప్పన, పాపుమ్ దొయి జా గెతి గుర్తుక పానితె డుజ తా, అన్నె బార్ జంక. ఉపదెసిమ్ దెతొసా బాప్తిసుమ్ దెంక. † 1:31 1:31 ‘ఇస్రాయేలులు’ మెలె, యూదుల్క అన్నెక్ నావ్ జయెదె. ‡ 1:32 1:32 ఎత్తి అదికారుమ్ తిలొ దేముడుచి సుద్ది తిలి ఆత్మక

తెలుగు తెన్ సగమ్తె ‘పరిశుద్ధాత్మ’ మెంతతి నెంజిలె ‘చెంగిల్ ఆత్మ’ మెంతతి. § 1:41 1:41 ‘క్రీస్తు’ మెలె, మెస్సయ మెలె, ‘దొర్కు జలి రచ్చించుప కెర్టొసాక తెద్రయిందె’ మెన ఎత్తి అదికారుమ్ తిలొ దేముడు పూర్ణమ్ తెంతో సంగ తిలొసా. అన్నె కిచ్చొ అర్దుమ్ తయెదె మెలె, ‘రాసొ’, ‘ఎత్తి అదికారుమ్ తిలొ

దేముడు ఏలువ కెరయ్లొసా’ మెలి అర్దుమ్. * 1:42 1:42 ‘కేపా’ మెలె, ‘పేతురు’ మెలె, ‘పత్తుర్’ మెలి అర్దుమ్ తయెదె.

అన్నె దొగులక యేసు సిస్సుల్ కెరన్లసి

43 అన్నెక్ దీసి, గలిలయ ప్రాంతుమ్తె ఉట్ట గెచ్చిందె మెన యేసు ఉట్ట గెలన్. ఒత్త పాచ కెర, పిలిప్ మెలో ఎక్కిలోక చజ కెర, “అంచి పట్టి జా అంచో సిస్సుడు జా” మెన, యేసు జోక బుకార్లన్.

44 పిలిప్ బేత్నయిదా పట్టుమ్చో. అంద్రెయ పేతురు కి జయ్యి పట్టుమ్చ.

45 జలె, నతనియేలు మెలో ఎక్కిలోక పిలిప్ చజ కెర, “అమ్చో, మోసే పూర్గుమ్చోచి అత్తి దేముడు రెగ్గయలి †ఆగ్గుల్తె, క్రీస్తుచి రిసా రెగిడ్డో, గెద. ‡అమ్చో దేముడుచ కబుర్లు సంగిల పూర్గుమ్చ కి జోవయించి రిసా రెగిడ్డ, గెద. జలె, జో క్రీస్తుక అమ్ చజ అస్సుమ్. జో కొన్సో మెలె, నజరేతు గవ్వెచో యోసేపుచో యేసు మెలో పుత్తుసి. జోయ్యి” మెన నతనియేలుక సంగిలన్.

46 సంగిలె నతనియేలు అన్మానుమ్ జా “నజరేతు గవ్వె తెంతో కిచ్చో జలెకు చెంగిల్ తిలిసి బార్ జయెదె గే?” మెన పుసిలన్, గని పిలిప్ జోక “తుయి జా కెర, సొంత దెకు!” మెన జోక యేసుతె కడ ఆన్సో.

47 జలె, నతనియేలు పాసి జెతె తతికయ్, యేసు జోక దెక జోచి రిసా “ఈందె, సత్తిమ్ తిలో ఇస్రాయేలుడు, ఈంజో. ఇనాచితె కిచ్చో ఉప్రమెన్ను నాయ్!” మెన సంగిలన్.

48 దస్సి సంగితికయ్, నతనియేలు ఆచారిమ్ జా “తుయి కీసా మాన్సుచి అంచి బుద్ది చినిలది?” మెన యేసుక పుసిలన్, చి యేసు జోక “పిలిప్ తుక నే బుకార్తె అగ్గె, తుయి జో రూక్ మొదొలె వెన తిలి పొది తుక ఇన్నె తెంతో దెకిలయ్” మెన జబాబ్ దిలన్, చి

49 నతనియేలు జోక “గురుబాబు, దేముడుచి పెట్టిచో దేముడు పుత్తుసి, తుయి! అమ్చ ఇస్రాయేలులుచో రానో, తుయి!” మెన సంగిలన్.

50 యేసు జోక “‘ఆవ్ తుక రూక్ మొదొలె దెకిలయ్’ మెన సంగిలి రిసా తుయి అంక నంప కెర్లది, గెద. ఇన్నెచి కంట అన్నె వెల్లెల కమె దెకితె” మెన సంగ యేసు అన్నె,

51 “జలె, ఆవ్ తుక కిచ్చో నిజుమి కచితుమ్ సంగితసి మెలె, పరలోకుమ్ ఉగ్డి జతిసి, చి ఆవ్ సీమాన్సు జా జెర్మున్ అయ్లోసాచి ఉప్పిరి దేముడుచి దూతల్ పరలోకుమ్తె వెగితిసి చి పరలోకుమ్ తెంతో ఉత్త జెతిసి దెకితె” మెన యేసు సంగిలన్.

2

పానిక యేసు ద్రాచ రస్సుమ్ కెర్లసి

1 దొరతి గెతికయ్, గలిలయ ప్రాంతుమ్తెచి కానా మెంతి గవ్వె ఏక్ పెండ్లి జలి. యేసుచి అయ్యసి ఒత్త జా పెండ్లితె అస్సె.

2 యేసుక, జోచ సిస్సుల్క కి పెండ్లితె బుకారా అస్తి.

3 జలె, పెండ్లి విందుతె అయ్లస పితి *ద్రాచ రస్సుమ్ ఎత్తి కేడ గెలి. యేసుచి అయ్యసి జోతె జా కెర, “విందుక అన్నె ద్రాచ రస్సుమ్ నాయ్” మెన సంగిలి.

4 యేసు జాక “అంచి తెన్ తుక కిచ్చో కామ్, అయ? అంచి సమయమ్ అప్పెక కి జెంక నేతయ్” మెన అయ్యసిక సంగిలన్.

5 తెదొడి అయ్యసి, జా గెరచ గొత్తి సుదల్క “తుమ్ కెరుక మెన ఈంజో కిచ్చో సంగెదె గే, జయ్యి కెర” మెన సంగిలి.

6 జలె, ఒత్త పాని దెర్ల పత్తుర్ బానల్ సొవ్వు అస్తి. ఏక్ బానో, జలె, పుంజెక్ నెంజలె పుంజెక్ యాబయ్ కాయల్ పాని దెరెదె. ఇన బానల్తె పాని కిచ్చోక ఒత్త తయెదె మెలె, యూదుల్ నుద్ది కెరంత అలవాట్లు చి రిసా.

7 యేసు, జలె, కిచ్చో కెర్లన్ మెలె, “తుమ్ ఈంజేవ్ బానల్తె బెర్తు పాని నుచ” మెన, కామ్ కెర్లనక సంగిలన్. సంగితికయ్, జేవ్ బానల్తె పాని బెరయ్ల.

8 తెదొడి జో “అప్పె, బానల్తె తిలిసి తుమ్ డుంబ కెర, విందు వంటితో మాన్సుతె నా దాస” మెన సంగిలన్, చి జోక నా దిల.

9 జలె, జా పాని ద్రాచ రస్సుమ్ మార్పుప జా అస్సె. ద్రాచ రస్సుమ్ మార్పుప జలి జా పానిచి రుసి జో విందు వంటితో మాన్సు చక దెకిలన్. జా ద్రాచ రస్సుమ్ కేనె తెంతో అయ్లి గే పాని డుంబిలనక ఎర్కె, గని విందు వంటితో మాన్సుక ఎర్కె నాయ్. తెదొడి జో, ఆచారిమ్ జా, †పెండ్లిబూలోక బుకారా కెర, జోక

10 “అమ్చి తెన్ ఇన విందుల్తె కో కి చెంగిలి రస్సుమ్ తొలితో వంట దెవుల. మాన్సుల్ ఒగ్గర్ పిలి పడ్డో, గర్చి రస్సుమ్ బార్ కెరుల. గని చెంగిల్చి ఆకర్క పితి రితి తుమ్ తియ తిలదు. కీసి?” మెన పుసిలన్.

11 గలిలయ ప్రాంతుమ్తెచి కానా మెంతి గవ్వె, యేసు ఈంజ వెల్లి కామ్ జర్గు కెర్లొ. జోవయించి అదికారుమ్ దెకయ్త వెల్లెల కమె ఎత్తితె ఈంజయి తొలితో చి. జోచ సిస్సుల్ జోచి ఉప్పిరి నముకుమ్ తిల.

† 1:45 1:45 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయలి ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచ్ పుస్తకమ్తె రెగ్గయ జా అస్సె. ఈంజ దెకపుక మెన కుపియ బాసతె నొయి ప్రమానుమ్తె మోసే పూర్గుమ్చోచి అత్తి రెగిడ్డ దేముడుచ ఆగ్గుల్ మెన రెగ్గవ అస్సె.

‡ 1:45 1:45 ‘ఎత్తి అదికారుమ్ తిలో దేముడుచ కబుర్లు సంగిల పూర్గుమ్చ’ మెలె, ఎత్తి అదికారుమ్ తిలో దేముడు నగుమ్జిన్చి పెట్టి జోచి అత్తి దా జోచ కబుర్లు సంగయ్లో, చి రెగ్గయ్లో. మెలె, జోచి అత్తి జోవయించి చోడి పుట్టవ జోచ కబుర్లు లట్టబడ్డో, చి జోవయించి మెన్సుతె సికయ్తికయ్ రెగిడ్డ.

§ 1:51 1:51 ‘మాన్సు జా జెర్మున్ అయ్లోసా’ మెన బయ్బిల్తె రెగ్గ తిలె, జేవ్చి అర్దుమ్ కిచ్చో మెలె, ‘ఎత్తి అదికారుమ్ తిలో దేముడు తెద్రయ్లో క్రీస్తు రచ్చించుప కెర్లొసా.’ పూర్గుమ్ తెంతో దస్సి మెన జోవయించి రిసా ప్రబుచ కబుర్లు సంగిలన రెగిడ్డిన్తె ‘మాన్సు జా జెర్మున్ జెంక తిలోసా’ మెన రెగ్గ తిలిన్చి అర్దుమ్ ఒగ్గర్ నదు కెర్ల యూదుల్ అర్దుమ్ కెరనుల, ఇస్టుమ్ తిలె. * 2:3 2:3 మాములుమ్ ద్రాచ రస్సుమ్ మెలె, ఓస్తు నే గలిలి ద్రాచ రస్సుమ్ జిర్గ సూరుచి రితి తియన తయెదె. ఒగ్గర్ పిలెకయ్ మచ్చుక జయెదె. పెండ్లివొతె యూదుల్ దస్సిచి పివుల. † 2:9 2:9 పెండ్లి ఉబెడె

12 ఒత్త తెంతో యేసు, జోచి అయ్యసి, జోచ బావుడ్లులు, సిస్సుల్, ఇదిల్ ఉత్తర పక్కచి కపెర్నహూమ్ పట్టుమ్తె ఉట్ట గెచ్చు, ఒత్త సగుమ్ దీసల్ తా గెల.

దేముడుచి గుడితె సామన్ వికితసక యేసు ఉదడ్డిసి (మత్త 21:12-13; మార్కు 11:15-17; లూకా 19:45-46)

13 యూదుల్చి †పస్కా పండుగు పాసి అయ్లి. ఈంజ పండుగ్చి రిసా యెరూసలేమ్ పట్టుమ్తె యేసు ఉట్ట గెలన్.

14 జలె, దేముడుచి గుడితె పెన కిచ్చొ దెకిలన్ మెలె, 'అర్పితల్క' మెన, బెయిలల్, గొరెలు, పార్వ పిట్టల్, దనచ వికుక బెర తిల మాన్సుల్క దెకిలన్. కిడబ్బుల్ పల్లయ్తనచి కామ్ కి దెకిలన్.

15 తెదొడి, వాలివొ తెన్ కొర్డ తెయార్ కెర, జేవ్ ఎత్కిజిన్క, సామ్ముల్క, గొరెల్క, ఎత్కి, దేముడుచి గుడి తెంతో ఉదడ గెలన్, అన్నె డబ్బుల్ పల్లయ్తనచి డబ్బుల్ ఎత్కి విచ గెల కెర, జోవయింక బల్లల్ సేడవ దిలన్.

16 దస్సి కెర, పార్వ పిట్టల్ వికితసక ఇసి మెన సంగిలన్: "ఈంజేవ్ ఎత్కి బయిలె దెర గెచ్చు! అంచొ దేముడు అబ్బొచ్చొ గేర్క బియ్యార్ కెర్తి సంత రితి కెరుక జయె నాయ్!" మెన గోల కెర్లన్.

17 జో దస్సి కెర్తికయ్, దేముడు పూర్గుమ్ రెగ్గయ్లి ఏక్ కోడు యేసుచ సిస్సుల్ ఏదస్ట కెర్ల.

"తుచొ గేరు జతి దేముడుచి గుడి సుద్ది తా తుకయ్ తవుసు మెన అంచి జివ్ డడ్డెదె" మెన దేముడు రెగిడ్డి కోడు.

18 తెదొడి, దేముడుచి గుడిచ అదికారుల్ జల యూదుల్చ వెల్లెల మాన్సుల్ యేసుతె జా కెర, "తుయి అప్పె కెర్లి రితి కెరుక తుక కిచ్చొ అదికారుమ్? తుక అదికారుమ్ తిలె, అమ్క రుజ్జు దెకయ్తి రిసా కిచ్చొ వెల్లి కామ్ కెర్తె?" మెన కోవుమ్ తెన్ సంగిల.

19 యేసు, జలె, జోవయింక కిచ్చొ జబాబ్ దిలన్ మెలె, "ఈంజ దేముడుచి గుడి తుమ్ సేడవ గెల, చి తిర్తతి తెడి ఆవ్ అన్నె బందిందె" మెన సంగిలన్.

20 యూదుల్చ జేవ్ వెల్లెల మాన్సుల్ "అప్పెక ఈంజ దేముడుచి గుడి బందుక దొన్ని విసా సొవ్వు వెర్వుల్ దెర

అస్సె. సేడయ్లెగిన, తుయి తిర్తక బందుక కిసి? నెతిర్తి!" మెన ఆసెల.

21 గని, 'దేముడుచి గుడి' మెన జో కిచ్చొ అర్దుమ్ తెన్ సంగిలన్ గే, జేవ్ వెల్లెల మాన్సుల్ నేన్ల. జోచి సొంత ఆగుచి రిసా సంగ తిల్.

22 జలె, పడ్డొ, మెలె జో మొర గెచ్చు తిర్తతి తెడి అన్నె జివ్ జలి పడ్డొ, జో ఇసి సంగ తిల్ మెన జోచ సిస్సుల్ ఉచార కెరుల. ఉచార కెర్తె, క్రీస్తు "మొర అన్నె జివ్ జా ఉట్టెదె" మెన దేముడు పూర్గుమ్ రెగ్గయ్లి కోడు, చి క్రీస్తు అప్పె సంగిలి కోడు నంప కెరుల.

23 జా పస్కా పండుగు పొది, యేసు యెరూసలేమ్తె తా, కిచ్చొ కిచ్చొ వెల్లెల కమె కెర్తె తిలన్, చి జేవ్ కమె దెకితె తా, జోవయింక 'క్రీస్తు జా తయెదె' మెన ఒగ్గర్జిన్ మాన్సుల్ నంప కెర్ల.

24-25 గని మాన్సుచి పెట్టి తిలి ఉప్రమెన్నుక యేసు జానె. మాన్సుచి బుద్ది కిసి గే కో జోక సాచి సంగుక నాయ్, జానెచి రిసా, జోవయింక నంప కెరె నాయ్.

3

నీకొదేమొ యేసుతె అందరె అయ్లిసి

1 యూదుల్చొ అదికారి ఎక్కిల్, జో పరిసయ్యుల్ మెంత పండితుల్తె ఎక్కిల్, జోచి నావ్ నీకొదేమొ.

2 జో ఏక్ దీసి అందరె యేసుతె అయ్లన్, అన్నె, "గురుబాబు తుయి బోదన కెర్తి రిసా అమ్చొ దేముడు తుక తెద్రవ అస్సె మెన జానుమ్. కిచ్చొక మెలె, దేముడు తోడు నెంజిలె, తుయి కెర్తె వెల్లెల కమె కెరుక కో కి నెతిర్తి" మెన యేసుక సంగిలన్.

3 యేసు, జలె, జోక, "తుక ఆవ్ కిచ్చొ నిజుమి కచితుమ్ సంగితసి మెలె, *నొవర్ నే జెర్మిలె దేముడుచి రాజిమ్ దెకుక నెతిర్తి." మెన సంగిలన్.

4 ఇసి సంగితికయ్, నీకొదేమొ జోక "మంత్రొ జలో మాన్సు అన్నెక్ దప్ప జెర్ముక కిసి? అన్నెక్ సుట్టు అయ్యసిచి పెట్టి పెన గెచ్చు జెర్ముక జయెదె గె? నెంజె!" మెన సంగిలన్.

5 యేసు జోక, "దేముడుచి రాజిమ్తె మాన్సు బెదుక జలె, †పానిక చి దేముడుచి సుద్ది తిలి ఆత్మకచి జెర్మున్ జంకయ్. ఈంజ ఆత్మతె జెర్మున్ కో జతి నాయ్ గే, దేముడుచి రాజిమ్తె జో బెదుక నెంజె.

‡ 2:13 2:13 పూర్గుమ్ పొది యూదుల్ ఐగుప్తు దేసిమి తా గొతిమాన్సు జలిన్ తెంతో ఎత్కి అదికారుమ్ తిల్ దేముడు రచ్చించుప కెర్లిసి ఏద కెర్తి పండుగు, ఈంజ. § 2:14 2:14 జోవయింక ఆక్రమించుప కెర్లి రోమ్ దేసిమిచి ప్రబుతుమ్చి డబ్బుల్ దేముడుచి గుడితె దెంక నెంజె. జేక, జోవయింక డబ్బుల్ దేముడుచి గుడితె కామ్క జెతికయ్ రగుమ్ డబ్బుల్తె పల్లవన, వేర వేర తెంతో అయ్ల బక్తల్ అర్పితుమ్ దెత గొరెల్ పిట్టల్ గట్ట గెననుల, నెంజెలె దేముడుచి గుడిక డబ్బుల్ దెవుల. జేవ్ డబ్బుల్ పల్లయ్తన నాయిమ్ నెంజిలి ఎదిలి లాబుమ్ కి కెరనుల. * 3:3 3:3 నెంజెలె, 'ఉప్పిర్ తెంతో చి జెర్మున్ జలెకయ్'. † 3:5 3:5 1. 'పానిక' మెలె, బాప్తిసుమచి కోడు మెన సగుమ్జిన్ ఉచర్తతి. పరిసయ్యుల్ యోహాను దెత తిలి, కెర్ల పాపల్ ఒప్పున చెమించుప జతి గుర్తుచి బాప్తిసుమ్ నజనుక ఎధరె నెసిల. పానికచి బాప్తిసుమ్ జలె, సుద్ది జతిన్చి గుర్తుం జయెదె. ఆత్మచి కామ్ జలె, సుద్ది జతిన్ జయెదె. 2. 'పానిక' మెలె అన్నె సగుమ్జిన్ కిచ్చొ అర్దుమ్ ఉచర్తతి మెలె, మాన్సు మాములుమ్ అయ్యసిచి పెట్టి జెర్మున్ జతిన్చి రిసా సంగితయ్ మెన ఉచర్తతి. ఈంజ అర్దుమ్ ఉచర్తె, దొన్ని రగల్ జెర్మున్ కావల్సపచి కోడు జయెదె; మెలె, ఆగుకచి కి ఆత్మకచి కి.

6 ఈంజ లోకుమతె ఆగ్గతె జెర్మన్ జలె, ఆగ్గచి జెర్మన్ జయెదె. †దేముడుచి రాజిమతె బెదుక జలె, దేముడుచి సుద్ది తిలి ఆత్మతె జెర్మన్ జెంక అస్సె.

7 ‘ఇసి కీనోవర్ జెర్మక అస్సె’ మెన తుక ఆవ్ సంగిలి రిసా తుయి బమ్మ జా నాయ్.

8 ఇసిచి రిసా వాదుక చి దేముడుచి సుద్ది తిలి ఆత్మక టాలి కెరుమ. వాదు, జలె, ఇస్టుమ్ అయ్లి పక్క వీర్తి రితి జతయ్. వీరితి సప్పుడు మాన్సు సూన్లె కి, కేనె తెంతో జెతయ్ గే, కేనె గెతయ్ గే, మాన్సుల్ నేన్తి. జలె, కేన్ మాన్సు దేముడుచి సుద్ది తిలి ఆత్మచి జెర్మన్ జలె, దస్సి. జా కీసి జర్గు జతయ్ గే కో నేన్తి, గని జర్గు జా అస్సె మెన జో మాన్సుచ కొడొతె కమొతె రుజ్జు జతయ్.”

9 నీకోదేమొ, జలె, యేసుక అన్నె “తుయి సంగిలి జెర్మన్ కీసి జర్గు జంక జయెదె?” మెన పుసిలన్.

10 యేసు జోక కిచ్చొ జబాబ్ దిలన్ మెలె, “ఇస్రాయేలులుక తుయి సికడ్తొసా జలెకి, ఇన్నెచి అర్దుమ్ కెరన్సి నాయ్ గె?

11 తుక ఆవ్ కిచ్చొ నిజుమి కచితుమ్ సంగితసి మెలె, అమ్ జాన్తిసి తుమ్క సంగితసుమ్, అమ్ దెకిలిసి తుమ్క సాచి సంగితసుమ్, గని అమ్చి సాచి తుమ్ వెల్లెల మాన్సుల్ నంప కెర్పు నాయ్.

12 మాములుమ్ ఈంజ లోకుమతె జర్గు జతిన్క తుమ్క సంగిలే కి తుమ్ నంప నే కెర్లె జలె, దస్సి, పరలోకుమచి రిసాచి తుమ్క సంగిలే కి, కీసి నంప కెర్లె!

13 కో మాన్సుయి పరలోకుమతె వెగ గెతి నాయ్, చి తుమ్క సికడుక నెతిర్తి, గని ఆవ్ మాన్సు జా జెర్మన్ అయ్లోసా ఒత్త తెంతో ఉత్త జా అస్సి, చి ఒత్తయ్ అన్నె వెగ గెచ్చిందె.

14 నూను, పూర్గుమ్ ‘అయివొ చడితిన్ తెంతో ప్రెజల్ రచ్చించుప జా జితు’ మెన జా బయిలు దేసిమి మోసా కంచుక తెయార్ కెర్లె *అయిచి బొమ్మక కీసి ఉక్కుల టీచడ్లన్ గే, దస్సి ఆవ్ మాన్సు జా జెర్మన్ అయ్లోసాక ఉక్కుల †టీచడ్డుక అస్సె.

15 కిచ్చొక మెలె, అంచి ఉప్పిరి కో, జోచి నముకుమ్ తివుల గే, †పరలోకుమచి రాజిమతె బెద, మొర్లె పరలోకుమతె గెచ్చ కెయ్క తెయ్క జివుల” మెన జోక యేసు సంగిలన్.

16 జలె, దేముడు ఈంజ లోకుమచక ఎదివాట్ ప్రేమ

కెర్లి రిసా, జోచొ సొంత ఎక్కి పుత్తుసి ఈంజ లోకుమచ చి పాపుమ్ వయితి రితి జోవయింక తెద్రవ దిలన్. కిచ్చొక మెలె, కోయి జోక నంపజా గెచ్చుల గే, ఎత్కిక నాసెనుమ్ నే జతె, సిచ్చతె నే గెతె పరలోకుమతె గెచ్చ కెయ్క తెయ్క చెంగిల్ తా జివుల.

17 దేముడు జోచొ సొంత పుత్తున్క ఈంజ లోకుమతె తెద్రయ్లిసి కిచ్చొక మెలె, లోకుమచక పాపుమ్ వయడ సిచ్చతె తెద్రయె నాయ్, గని జోచి ఎత్కి పాపుమ్ తెంతో జోవయింక రచ్చించుప కెర్లి రిసా తెద్రయిలో.

18 కో జోక నంపజా గెచ్చుల గే, జోవయించి పాపుమ్ జేవ్ వయుక నాయ్. గని కో జోవయింక నంపజతి నాయ్ గే, జోవయించి పాపుమ్ అప్పె కి వయ అస్సి, చి దేముడుచొ సొంత ఎక్కి దేముడు పుత్తున్క నంపజతి నాయ్ చి రిసాయి సిచ్చ జతి మొర్పుతె గెచ్చుల.

19 జేవ్ కిచ్చొక జోవయించి పాపుమ్ వయ సిచ్చతె గెచ్చుక మెలె, ఉజిడి ఈంజ లోకుమతె అయ్లె కి, గర్పు కమొ కెరుక ఒగ్గర్జిన్ అలవాట్ జా అస్సిచి రిసా, అందర్ రితి పాపుమతె ఇండుక ఆస జా, జా ఉజిడి నెసితి.

20 పాపుమ్ కెరుక ఓజ జల మాన్సుల్, జలె, జా ఉజిడి ఎద్దెర నెస కెర, జోవయించ కమొ బయిలె దెకవనుక నెస కెర బియ్, జా ఉజిడతె జెతి నాయ్.

21 గని కో సత్తిమ్ ఇండుల గే, జా ఉజిడక బింక నాయ్, చి జేవ్ కెర్ల కమొక ‘దేముడుచ కమొ, జోచి ఆత్మనిక్కిక సత్తిమ్క కెర్ల కమొ’ మెన రుజ్జు జతి రితి, దయిరిమ్ తెన్ జోచి జా ఉజిడతె జెవుల.

క్రీస్తు వెల్లో జతిసి యోహాను దాక్ జతిన్చి కోడు

22 ఒత్త తెంతో, యేసు జోచ సిస్సుల్ తెన్ బార్ జా, యూదయ ప్రదేసిమ్చి బయిలె ఉట్ట గెల. జా పొది యేసు జోచ సిస్సుల్ తెన్ తా, జోవయించి అత్తి మాన్సుల్క బాప్తిసుమ్ దెతె తిలో,

23 అన్నె, ఒత్త తెంతో ఇదిల్ దూరిక, సలీము మెలి గవ్విచి పాసి తిలి అయ్నోను మెలి టాన్తె ఒగ్గర్ పాని తతికయ్, యోహాను కి బాప్తిసుమ్ దెతె తతికయ్, మాన్సుల్ జోతె జా కెర బాప్తిసుమ్ నజన్తె తిల.

24 జా పొది యోహానుక హేరోదు రానొ జేలి కెరుక నేతయ్.

25 జలె, యోహానుచ సిస్సుల్ సగుమ్జిన్, సుద్ది కెరంత అలవాట్లు చి రిసా యూదుల్చొ వెల్లో మాన్సు ఎక్కిలో తెన్ లట్టబుక దెర్ల.

† 3:6 3:6 మత్తయ మెలొ సిస్సుడు రెగిడ్లి సుబుమ్ కబుర్తె ఎత్కి అదికారుమ్ తిలో దేముడుచి రాజిమక ‘పరలోకుమచి రాజిమ్’ మెనెదె, మత్తయ 3:2, 13:24. ఎక్కిలో పరలోకుమచి రాజిమతె నెదితిసి కెయ్క మెలె, జో మాన్సు నంపజా ప్రబుచి ఆత్మక నోవర్ జెర్మన్ జలి గడియ తెంతో. S 3:7 3:7 నెంజెలి, ‘ఉప్పిర్ తెంతో చి జెర్మన్ జంక అస్సె’. * 3:14 3:14 ప్రెజల్ ఒగ్గర్ పాపుమ్ కెర్లి రిసా, ఏక సిచ్చక ప్రబు ఒగ్గర్ అయివొ తెద్రయ్లన్. చడిలె, మొరుక జయెదె, గని ‘అంచి కోడు నంప కెర్లెన రచ్చించుప జతు’ మెన “మోసా తెయార్ కెర్లె కంచుచి అయిక కో దెకుల గే రచ్చించుప జా జివుల” మెన ప్రబు సంగిలన్, చి జాక దెకిలన చెంగిల్ జా జల. † 3:14 3:14 యేసుక కీసి టీచడ్డుక మెలె, జోవయింక సిలువతె గల టీచడ్డుక. కో జోవయింక నంపజలె, జోవయించి పాపుమ్ గెచ్చయ్తి రిసా. † 3:15 3:15 ఎక్కిలో ఎత్కి అదికారుమ్ తిలో దేముడుచి రాజిమతె బెదితిసి కెయ్క మెలె, జో మాన్సు నంపజా ప్రబుచి ఆత్మక నోవర్ జెర్మన్ జలి గడియ తెంతో.

26 తెదొడి జేవ్ యోహానుతె జా కెర, జోవయింక “గురుబాబు, ఈంజ యోర్దాను గాడు ఒత్తల్తో జా పొది తుచి తెన్ తిలోసా, తుయి సాచి సంగిలోసా, జో కి ఇన్నె తుచి రితి బాప్తిసుమ్ దెతయ్, చి ఎత్కిజిన్ జోతె గెతతి” మెన సంగిల.

27 యోహాను జోవయింక కిచ్చొ జబాబ్ దిలన్ మెలె, “పరలోకుమ్చొ దేముడు జా దిలెకయ్ మాన్సుక జా అదికారుమ్ తయెదె. జో కెర్తిసి తప్పు నెంజె.

28 తుమ్క అగ్గె సంగిలయ్, గెద. ‘క్రీస్తు నెంజె, గని ఆవ్ జోచొ బారికి జా జో జెతిసి సాట్టు కెరుక మెన దేముడు అంక జోచి పురెతో తెద్రవ అస్సె’ మెన తుమ్క ఆవ్ తెదొడి సంగిలయ్. ఆవ్ దస్సి సంగిలిన్క తుమి సాచి జా అస్సెన్.

29 జలె, కేన్ జలెకు పెండ్లితె, పెండ్లిబూలి పెండ్లిబూలోకయ్ గెచ్చెదె, గెద. బూలోచొ మింతుసి జోచి పచ్చెన జా అయ్లె కి, జో ఒత్త టీవ, బూలోక దెక, జోచి అవాడ్ నూన, సర్దనంతోనుమ్ జయెదె. జలె, పెండ్లితె బూలోయి కిసి ముక్కిమ్ జయెదె గే, దస్సి, క్రీస్తు ముక్కిమ్ జా అస్సె, చి అంక సర్దనంతోనుమ్.

30 జో వెల్లో జంక, ఆవ్ దాక్ జంక” మెన యోహాను సంగిలన్.

క్రీస్తుచి అదికారుమ్చి రిసా సంగిలిసి

31 పరలోకుమ్ తెంతో అయ్లోసా ఎత్కిచి కంట వెల్లో. మాములుమ్ ఈంజ లోకుమ్చ మాన్సుల్, జలె, మాములుమ్ ఈంజ లోకుమ్చి రగుమ్ తా, మాములుమ్ ఈంజ లోకుమ్తె తిలిన్చి రిసా లట్టబుల. గని యేసుక్రీస్తు పరలోకుమ్ తెంతో అయ్లోచి రిసా, జో ఎత్కిచి కంట వెల్లో.

32 ఒత్త దేముడు అబ్బొన్తె సొంత దెకిలిసి సొంత సూన్లిన్చి రిసా జో సాచి సంగిలె కి, మాములుమ్ ఈంజ లోకుమ్చి బుద్ది తిల మాన్సుల్ కోయి జోచి సాచి నంప కెర్తి నాయ్.

33 గని, జోచి సాచి కో నూన నంప కెర్తతి గే, ‘దేముడు సత్తిమ్చొ’ మెన పూర్తి దయిరిమ్ జా జోచి సాచి దెతతి.

34 దేముడు తెద్రయ్లోసా జా, జో దేముడుచ కబుర్లు నిదానుమ్ తెన్ సంగితయ్, అన్నె జోచి పెట్టి దేముడుచి సుద్ది తిలి ఆత్మ ఎదివాట్ దెతయ్.

35 జలె, దేముడు అబ్బొసి దేముడు పుత్తున్క పూర్తి ప్రేమ అస్సె, చి అదికారుమ్ ఎత్కి జోచి అత్తి సార్ప కెర దాయి గెల అస్సె.

36 దేముడు పుత్తున్క కో నంపజా గెచ్చుల గే, పరలోకుమ్చి రాజిమ్తె కచితుమ్ బెద, మొర్లె ఒత్త గెచ్చు కెయ్క తెయ్క జివుల. గని, దేముడు పుత్తున్చి కొడె రితి కో కెర్తి నాయ్ గే, జోచి జా పాపుమ్ వయ అస్సి, చి దేముడు దిలి సిచ్చొ జోవయింక కెయ్క కి పిట్టె నాయ్.

4

సమరయ ప్రదేసిమ్చి తేర్బోదక యేసు బోదన కెర్తిసి

1 యోహానుచి కంట యేసు అప్పె ఒగ్గర్ సిస్సుల్ కెరన బాప్తిసుమ్ దెతయ్ మెన పరిసయ్యుల్ నూన్.

2 యేసు మాత్తుమ్ సొంత బాప్తిసుమ్ దెయె నాయ్, గని జోచ సిస్సుల్చి అత్తి దెతె తిలన్,

3 జలె, “బాప్తిసుమ్క ఎత్కిజిన్ అంచితె జెతిన్చి రిసా పరిసయ్యుల్ నూన అస్సి” మెన యేసు చిన కెర, “జోవయింక కోపుమ్చి రిసా అప్పెచి మట్టుక ఇన్నె తంక బెదె నాయ్” మెన, యూదయ ప్రదేసిమ్ ముల దా, జో వడ్డిలి గలిలయ ప్రాంతుమ్తె గెచ్చుక మెన అన్నె బార్ జలన్.

4 అప్పె యేసుక సమరయ ప్రదేసిమ్చి వాట్ గెచ్చుక జంకయ్.

5 జలె, సిస్సుల్ తెన్ బార్ జా సమరయ ప్రదేసిమ్చి సుకారు మెంతి ఏక్ గావ్ సొడి అయ్ల. జా గావ్ కేనె మెలె, యాకోబు మెలో పూర్తుమ్చొ జోచొ యోసేపు మెలో పుత్తున్క దిలి బుయి పాసి అస్సె.

6 ఊంటక యాకోబు కూనయ్లి కుండి ఒత్త అస్సె. జలె, యేసు ప్రయానుమ్చి రిసా అల్పు జా, జా కుండి సొడి వెసిలన్. పాసి పాసి మెద్దెన్ జా అస్సె.

7 తెదొడి, అన్నిమ్ గెన ఆన్తి రిసా యేసుచ సిస్సుల్ జా గెచ్చె పెన గెల. యేసు ఎక్కిలో ఒత్త వెన అస్సె

8 జా సమరయ ప్రదేసిమ్చి తేర్బోద ఎక్కి పాని కడన్తి రిసా అయ్లి. యేసు జాక “పాని దె, పియిందె” మెన సంగిలన్.

9 జలె, యూదుల్ సమరయ సుదల్ తెన్ బెదితి నాయ్ చి రిసా, జా తేర్బోద ఆచారిమ్ జా, “ఆవ్ ఈంజ సమరయతెచి తేర్బోద, తుయి యూదుడు. జలె, ‘పాని దే’ మెన కిచ్చొక అంచి అత్తి తుయి సంగితసి?” మెన యేసుక సంగిలి.

10 యేసు జాక, “మాన్సుల్క దేముడు దిలి వరుమ్ తుయి చినితది జలె, అన్నె, ‘పాని దే, పియిందె’ మెన తుక సంగితోసా కొన్నొ జయిందె గే తుయి చినితది జలె, ‘జీవ్ దెతో పాని అంక దే’ మెన తుయి అంకయ్ సంగితది,” మెన యేసు జాక జబాబ్ దిలన్.

11 జలె, జా తేర్బోద అర్దుమ్ కెరనె నాయ్ చి రిసా, “బాబు, ఈంజ కుండి దీగ్ అస్సె. పాని కడన్తి సామన్ కిచ్చొ నాయ్, తుక. జీవ్ దెతో జో పాని కేనె తెంతో తుక దొర్కు జయెదె?”

12 అమ్చొ యాకోబు పూర్తుమ్చొ, జోచ పుత్తుర్లు, జోచ సామ్ముల్ ఎత్కి ఈంజయ్ ఊంటచి పాని పితె తిల. జోయ్యి అమ్క ఈంజ కుండి దిలన్. తుయి అమ్చొ యాకోబు పూర్తుమ్చొచి కంట వెల్లో గే?” మెన సంగిలి.

13 జా తేర్బోద దస్సి సంగితికయ్, యేసు జాక, “ఈందె, ఈంజ పాని కేన్ మాన్సు పిలెకి, జోక అన్నె తాన్ కెరెదె.

14 గని ఆవ్ దెతిసి *‘పాని’ కో పివుల గే, జోక కెయెడ కి అన్నె తాన్ కెరె నాయ్. ఆవ్ దెతో పాని జోచి పెట్టి ఊంట పుట్టి రితి జతె తయెదె, చి †కెయెడ తెయెడ చెంగిల్ తతి జివుమ్ జోక దొర్కు జయెదె.”

15 జలె, జా తేర్బోద అర్దుమ్ కెరెనుక నేతయ్చి రిసా, “అప్పె తెంతో అంక తాన్ నే కెర్తి రితి, పానిక ఆవ్ అన్నె ఇన్నె నే జెతె తతి రిసా, తుయి సంగిలో పాని అంక దె” మెలి.

16 యేసు జాక, “తుయి గెచ్చ, తుచో మున్నుద్క కడ ఆను” మెన సంగిలన్.

17 జా తేర్బోద జోక “అంక మున్ను నాయ్” మెన సంగిలి, చి యేసు జాక “‘అంక మున్ను నాయ్’ మెన తుయి సంగిలి కోడు సత్తిమ్.

18 తుక అప్పె ఎద పాచ్జిన్ మున్నుర్లు అస్తి, చి అప్పె తిలోసా తుచో మున్నుది నెంజె. సత్తిమ్ సంగిలది” మెన యేసు సంగిలన్.

19 యేసు ఇసి సంగితికయ్, జా తేర్బోద, “బాబు, ‡దేముడు తుక కిచ్చో కిచ్చో దెకయ్తయ్ మెన అప్పె ఆవ్ చినితసి. జొయ్యి తెద్రయ్లో మాన్సు, తుయి.

20 అమ్చ పూర్ణుమ్చ తెంతో అమ్ సమరయ సుదల్ ఈంజ అమ్చి మొక్కె తిలి డొంగుర్తె దేముడుక బక్తి కెర్తనుమ్, గని ‘యెరూసలేమ్తె దేముడుచి గుడితె జోక బక్తి కెరుక అస్సె’ మెన తుమ్ యూదుల్ సంగితసు” మెన జా సంగిలి.

21 యేసు జాక, “అమ్మ, ఇదిల్ పడ్డొక, ‘దేముడు అబ్బొక బక్తి కెర్తి రిసా ఈంజ డొంగుర్ జవున్, యెరూసలేమ్ పట్టుమ్ జవున్ ముక్కిమ్ మెనుక నాయ్’ మెన మాన్సుల్క అర్దుమ్ జయెదె.

22 తుమ్ సమరయ సుదల్, దేముడుక బక్తి కెర్తె కి, జోవయింక అప్పెక కీదూరి అస్సున్. అమ్ యూదుల్క మాత్రుమ్, జో నిసాన అస్సె. మాన్సుల్క దొర్కు జలో రచ్చించుప కెర్తొసా అమ్ యూదుల్తె జెర్కుక జోచి సెలవ్.

23 జలె, ఇదిల్ పడ్డొక, అప్పె రితి కి, జో దేముడు అబ్బొక నిజుమి నంపజల మాన్సుల్ కో జవుల గే, జోవయించి ఆత్తుతె నిదానుమ్ జా జోవయింక సత్తిమ్ తిలి బక్తి కెరుల. దేముడు అబ్బొన్ దస్స మాన్సుచి రిసా రకితయ్.

24 దేముడు డీస్తొసా నెంజె, గెద. ఆత్తుయి, జో. జాకయ్, కో జోక బక్తి కెరుక ఉచరుల గే, జోవయించి ఆత్తుయి నిదానుమ్ తెన్ జోక సత్తిమ్ తిలి బక్తి కెరుక అస్సె” మెన యేసు జా తేర్బోదక సంగిలన్.

25 జో ఇసి సంగితికయ్, జా తేర్బోద, “‘దేముడు తెద్రయిందె’ మెన సంగ తిలో *‘మెస్సయ మెలో రచ్చించుప

కెర్తొసా జెయెదె’ మెన జాని. జో అయ్లి పొది, జొయ్యి అమ్క ఎత్తి దెకయెదె” మెన సంగిలి†.

26 జలె, జా దస్సి సంగితికయ్, యేసు జాక “ఆవ్ తుచి తెన్ లట్టబ్బొసా జొయ్యి” మెన సంగిలన్.

27 యేసు ఇసి సంగిలి బేగి, జోచ సిస్సుల్ జా గవ్వె తెంతో బుల అయ్ల. తేర్బోద తెన్ యేసు లట్టబ్తయ్ మెన దెక ఆచారిమ్ జల, గని ‘తుక కిచ్చొ కావలె?’ జలెకు, ‘జాచి తెన్ కిచ్చొక లట్టబ్బసి?’ జలెకు మెన కో పుసితి నాయ్.

28 తెదొడి జా తేర్బోద, జాచి గేడి ముల దా నిగ గెచ్చ, జా గావ్ తెడి పెన,

29 “తుమ్ బేగి జా ఎక్కిలోక దెక! ఈంజొ మాన్సు కక్క నే పుసితె, ఆవ్ అగ్గె కెర్తిసి ఎత్తి అంక సంగ దిలో. ఈంజొయి క్రిస్తు జయెదె, కిచ్చొగె” మెన ప్రెజల్క బుకార్లి,

30 చి జా తెన్ ఒగ్గర్జిన్ యేసుతె జెంక బార్ జల.

31 జా తేర్బోద గవ్వె పెన ప్రెజల్క బుకార్లి మెద్దెనె, యేసుచ సిస్సుల్ జోక “గురుబాబు, అన్నిమ్ కెరు!” మెన బలవంతుమ్ కెర్ల.

32 గని జో “తుమ్ నేన్లి ఏక్ రగుమ్ అన్నిమ్ అంక అస్సె” మెన జబాబ్ దిలన్.

33 జో ఇసి సంగిలి రిసా, జోచ సిస్సుల్ “ఇన్నెక కో జలెకు కిచ్చొ జవున్ అన్నిమ్ ఆన దా అస్తి గే?” మెన ఎక్కిలో తెన్ ఎక్కిలో లట్టబుక దెర్ల.

34 జేవ్ దస్సి జతికయ్, యేసు జోవయింక, “అంచి అన్నిమ్ కిచ్చొ మెలె, అంక తెద్రయ్లోసాచి ఇస్టుమ్ రితి కెరుకయ్. జోచి కామ్ పూర్తి జర్గు కెరుకయ్.

35 “ఈందె, ‘అన్నె చెత్తర్ జొన్నొ గెలెకయ్ పంటొ లాయ ఆనుక జయెదె’ మెన మొక్కల్ రోచితి పొది సంగితసు. జలె, ఆవ్ తుమ్క కిచ్చొ మెంతసి మెలె, ఆదె! అంకివొ ఉగుడ దెక! బట్టిలె పంటొ అప్పె పిక తెయార్ జా రితి, అంక నంపజంక ఎతివాట్జిన్ మాన్సుల్ తెయార్ జలి రితి సమయుమ్ జా అస్సె.

36 ప్రెజల్క దేముడుచి రాజిమ్తె బెదయ్తి ఈంజ ఆత్తుపంటొ లాయితితె కో లాయ ఆన్తన జవుల గే, జోవయింక ఆత్తుజితుమ్ దొర్కు జయెదె. జాచి రిసా, అంచి సుబుమ్ కబుర్ తిలి బి గలిలన కి, జా ఆత్తుపంటొ లాయ ఆన్తన కి, సర్దసంతోసుమ్ జవుల.

37 అంచి ఆత్తుపంటొచి కామ్తె, జలె, ‘ఎక్కిలో బి గలెదె, అన్నెక్కో పంటొ లాయ ఆనెదె’ మెలి కోడు సత్తిమ్ జయెదె.

* 4:14 4:14 ఇన్నె ‘పాని’ మెలె, జా టాలిచి అర్దుమ్ కిచ్చొ మెలె, పరలోకుమచి రాజిమ్తె బెదితి ఆత్తుతె జెర్కున్ దెతి జోవయించి సుద్ది తిలి ఆత్తు. † 4:14 4:14 ‘కెయెడ తెయెడ చెంగిల్ తతి జివుమ్’ మెలె, పరలోకుమచి రాజిమ్తె బెదితి, మొర్లె ఒత్త గెచ్చ జతి, సెక్తి. ‡ 4:19 4:19 నెంజెలె, “తుక ‘ఎత్తి అదికారుమ్ తిలో దేముడుచ కబుర్లు సంగితొసా ఎక్కిలో’ మెన ఆవ్ అప్పె చినితసి”. § 4:22 4:22 నెంజెలె, “నేన్ను. అమ్ యూదుల్ మాత్రుమ్, జోవయింక జానుమ్.” * 4:25 4:25 ‘మెస్సయ’ మెలె, ‘క్రిస్తు’ మెలె, అన్నె కిచ్చొ అర్దుమ్ తయెదె మెలె, ‘రానొ’, ‘ఎత్తి అదికారుమ్ తిలో దేముడు విలువ కెరయ్లోసా’ మెలి అర్దుమ్. † 4:25 4:25 అరమయ్ బాస తెన్ ‘మెస్సయ’ మెలె, గ్రీకు బాస తెన్ ‘క్రిస్తు’ జయెదె.

38 అల్లె, తుమ్ మొదొల్ నే కెర్లి ఈంజ కామ్తె బెదుక తుమ్క ఆవ్ తెద్రవ అస్సి. కో కో క్లమ్ జా అగ్గె తెంతో ఈంజ కామ్ కెర తతికయ్, తూమ్ కి అప్పె ఈంజ కామ్తె బెద అస్సున్” మెన యేసు జోచ సిస్సుల్క సికయ్లన్.

సమరయచ మాన్సుల్ ఒగ్గర్జిన్ యేసుక నంపజలిసి

39 జలె, ‘ఆవ్ కెర్లిసి ఎత్తి అంక సంగ దిలో’ మెన యేసుచి రిసా జా తేర్బోద సంగిలి సాచి సూన కెర, జా గవ్వొచ సమరయ సుదల్ ఒగ్గర్జిన్ యేసుక నంపజల.

40 జాకయ్, యేసుతె జా కెర, “అమ్చి గవ్వొ జా తా” మెన జేవ్ సమరయ సుదల్ బతిమాల్పా జా సంగిల, చి దొరతి తా గెలన్.

41 జో సొంత బోదన కెర్లికయ్, అన్నె ఒగ్గర్జిన్ జోక నంపజల,

42 చి జా తేర్బోదతె జా కెర, “తుక ‘జయ్యి సంగిలి రిసా నంపజలమ్’ మెన అప్పె తెంతో సంగుమ్ నాయ్. కిచ్చొక మెలె, అమ్ అప్పె జోచి కొడొ సొంత సూన్లి రిసా, ‘ఈంజ లోకుమ్చ ఎత్తిక దొర్కు జలో రచ్చించుప కెర్లిసా ఈంజొయి’ మెన పూర్తి దయిరిమ్ జా అస్సుమ్” మెన సంగిల.

గలిలయచ మాన్సుల్ యేసుక మరియాద దెకిలిసి

(మత్త 8:5-13; లూకా 7:1-10)

43 జా దొరతి గెలి పడ్డొ, యేసు జోచ సిస్సుల్ తెన్ ఒత్త బార్ జా గెచ్చ, గలిలయ ప్రాంతుమ్తె పావెల.

44 ‘దేముడుచ కబుర్లు సంగితోసా కో జలెకు సొంత టాన్తె తిలె, సొంత టాన్చ మాన్సుల్ జోక గవురుమ్ దెకితి నాయ్’ మెన జాన కెర, యేసు సొంత సంగితె తిలన్. జాకయ్ యూదయ ప్రదేసిమ్ ముల తిలో.

45 గలిలయ ప్రాంతుమ్చ ప్రెజల్ ఒగ్గర్జిన్, జలె, యెరూసలేమ్ పట్టుమ్తె పండుగ్క జేవ్ కి గెచ్చ తా అన్నె ఉట్ట జా అస్తి. జేవ్ యెరూసలేమ్తె తిలి పొది, యేసు కెర్ల కమొ ఎత్తి దెక తిల. జేవ్, జలె, జేవ్ గలిలయులు, సర్ల తెన్ జోక మరియాద కెర్ల.

46 జలె, జా గలిలయ ప్రాంతుమ్తెచి కానా మెంతి గవ్వొ యేసు అన్నె ఉట్ట అయ్లన్. జా సుట్టు, ఒత్తయ్ పానిక ద్రాచ రస్సుమ్ మార్పుప కెర తిలో. జలె, యేసు అప్పె కానాతె తతికయ్, ఇదిల్ దూరి తిలి కపెర్నహూమ్ మెంతి గవ్వొపేరోదు రానొచొ వెల్లో అదికారి ఎక్కిలోచొ పుత్తుసి జొర్లొ సేడ అస్సి.

47 యేసు యూదయ ప్రదేసిమ్ ముల దా గలిలయ ప్రాంతుమ్తె జా అస్సి మెన జో వెల్లో మాన్సు సూన్లి బేగి, బార్ జా, యేసుతె అయ్లన్. జోచొ పుత్తుసి మొర గెచ్చెదె గే జియెదె గే, దస్సి జా అస్సిచి రిసా, “బేగి జా అమ్చొ పుత్తుక చెంగిల్ కెరు” మెన యేసుక బతిమాల్పా జా సంగిలన్.

48 జలె, యేసు జోక, “దేముడు దిలి అదికారుమ్క రుజ్జు దెకయ్త కమొ నే దెకిలె, తుమ్ నంప కెర్లు నాయ్” మెన సంగిలన్.

49 యేసు ఇసి సంగితికయ్, జో “బాబు, అమ్చొ బోబొ నే మొర్లి రితి బే బేగి జె” మెన జో అన్నె బతిమాల్పా జా సంగిలన్.

50 తెదొడి యేసు జోక, “గో, తుచొ పుత్తుది జియెదె!” మెన సంగిలన్. యేసు సంగిలి కోడు జో మాన్సు నంప కెర, గెరి గెచ్చుక బార్ జలన్.

51 జో వట్టె గెతె తతికయ్, జోచ గొత్తి సుదల్ జో తెన్ దస్సుల్ జల. “తుచొ పుత్తుది జిలో!” మెన జోక సంగిల.

52 “కెత్తి గంటల్క చెంగిల్ జలో?” మెన జో పుసిలన్, చి జేవ్ జోక “కాలి ఒంటి గంటక జొర్లొ గెలి!” మెన సంగిల.

53 జలె, “తుచొ పుత్తుది జియెదె” మెన యేసు సంగిలి గడియ జయ్యి మెన జొర్లొ సేడ్లొ నాడుచొ అబ్బొసి చినన్లో. జాకయ్, జోచి గెర్చ మాన్సుల్ ఎత్తిజిన్ యేసుక నంపజా గెల.

54 యూదయ ప్రదేసిమ్ ముల గలిలయ ప్రాంతుమ్తె తొలితో ఉట్ట అయ్లి జా సుట్టు తెంతో, ఈంజొ నాడుక చెంగిల్ కెర్లిసి తెన్ జోచి అదికారుమ్క రుజ్జు దెకయ్త కమొ దొన్ని జల.

5

యేసు యెరూసలేమ్ పట్టుమ్తె ఉట్ట గెలిసి

1 ఈంజ జర్లు జలి పడ్డొ, యూదుల్చి పండుగు అన్నెక్ అయ్లిచి రిసా దేముడుచి దేవులుమ్ తిలి యెరూసలేమ్ పట్టుమ్తె యేసు ఉట్ట గెలన్.

2 జలె, జా పట్టుమ్తె ‘మెండల్ వీది’ మెన ఏక్ టాన్ అస్సి. ఒత్త ఏక్ వెల్లో కుండి అస్సి. ఎబ్లి బాస తెన్ జా కుండిచి నావ్ ‘బేతెస్స’. జా కుండిచి సుట్టునంత, పావ్ గుమ్మల్ తిలి టాన్ ఏక్ అస్సి.

3 ఒత్త రగరగాల్ రోగల్చ బెర అస్తి, గుడ్డి మాన్సుల్, సొట్ట మాన్సుల్, అత్తో చట్టొ లంబ గెల మాన్సుల్, దసచ అస్తి.

4 *కిచ్చొక ఒత్త అస్తి మెలె, గడియ గడియక ఏక్ దూత జా గడ్డె ఉత్త జా కెర, పాని కదుల్ కెరెదె, చి జో పాని కదుల్ జలి బేగి కో జలెకు రోగి తొలితో పానితె ఉత్తెదె గే, జోవయించి జబ్బు గెచ్చ, చెంగిల్ జియెదె.

5 జలె, ముప్పుయ్ అట్టు వెర్సుల్చి జబ్బు తిలో ఏక్ మాన్సు ఒత్త అస్సి.

6 యేసు జా వెల్లి కుండి తిలిన్తె గెచ్చ, జో రోగిక దెక, ‘ఒత్త ఎత్తివాట్ దీసల్ తెంతో జోచి అంతుర్వొతె నిజ తా మాలజ్ జా అస్సి’ మెన చిన కెర, “తుక నిజమి చెంగిల్ జంక ఇస్టుమ్ అస్సి గే?” మెన జోక పుసిలన్.

* 5:4 5:4 గ్రీకు బాస తెన్ ఈంజ తొలితో రెగిడ్ల సగుమ్ పుస్తకల్తె 4 నంబర్చి కోడు తయె నాయ్.

7 జో రోగి “బాబు, పాని కదుల్ జలి బేగి అంక పానితె ఉత్తయ్తోసా కో నాయ్, చి ఆవ్ ఉత్తిరై ఎద అన్నై కో గే అంచి కంట అగై ఉత్తై” మెన సంగిలన్.

8 యేసు జోక “తుయి ఉట్ట, తుచి అంతుర్నొ వయన ఇండు!” మెన సంగిలన్.

9 సంగిలి బేగి, జో మాన్సు చెంగిల్ జా జోచి అంతుర్నొ వయన ఇండిలన్.

10 జా దీసి, యూదుల్చి ఒక్తి కెర్తి సెలవ్ కడన్లి దీసి. జలె, యూదుల్చ వల్లెల మాన్సుల్ సగుమ్జిన్ చెంగిల్ జలో జో మాన్సుక దెకిల. దెక, “ఈంజ సెలవ్ కడన్లి దీసి. తుచి అంతుర్నొ వయక గారు!” మెన సంగిల.

11 దస్సి సంగితికయ్, చెంగిల్ జలో జో మాన్సు “ ‘తుచి అంతుర్నొ వయన ఇండు’ మెన, అంక చెంగిల్ కెర్తొసా సంగిలన్, చి వయన ఇండిలయ్” మెన జోవయింక జబాబ్ దిలన్.

12 “ ‘తుచి అంతుర్నొ వయన ఇండు’ మెలోసా కో?” మెన జేవ్ వెల్లెల మాన్సుల్ పుసిల.

13 జో కొన్సొ జయెదె గే చెంగిల్ జలో జో మాన్సు నేనె. కిచ్చొక మెలె, ఒత్త ఒగ్గర్జిన్ జనాబ్ తతికయ్, యేసు, కో నే దెకితె, ఉట్ట గెచ్చు తిలో.

యేసు జో మాన్సు తెన్ అన్నై దస్సుల్ జా జాగర్త సంగిలిసి

14 పడ్డొ, చెంగిల్ జలోసాక యేసు దేముడుచి గుడితె చజ కెర, జోక “ఈందె, అప్పె తుయి చెంగిల్ అస్సిసి. అన్నై కిచ్చొ జవున్ వెల్లి బాద నే సేడ్డి రిసా అన్నై పాపుమ్ కెరు నాయ్” మెన జాగర్త సంగిలన్.

15 జో మాన్సు ఒత్త తెంతొ గెచ్చు, “అంక చెంగిల్ కెర్తొసా యేసుయి” మెన యూదుల్చ వల్లెల మాన్సుల్క సంగిలన్.

16 జలె, సెలవ్ కడన్లి దీసి యేసు ఈంజ కామ్ కెర్లి రిసా, యూదుల్చ వల్లెల మాన్సుల్ జోక అల్లర్ కెరుక దెర్ల.

17 దస్సి జతికయ్, యేసు జోవయింక, “అగై తెంతొ ఎద కి అంచొ దేముడు అబ్బొ కామ్ కెర్తై తత్తయ్. ఆవ్ కి జోచి కామ్ కెర్తై అస్సి” మెన సంగిలన్.

18 జలె, ‘సెలవ్ కడన్లి దీసి పిట్టవన కామ్ కెర్తయ్’ మెన, అన్నై, దేముడు తెన్ సమ్మందుమ్ మెనన్లొ జోక ‘అబ్బొ’ మెన యేసు సంగిలిన్చి రిసా, యేసుక మారుక మెన అన్నై ఒగ్గర్ ఉచర జల.

యేసుచి అదికారుమ్ కేనె తెంతొ జెతయ్

19 జలె, కోపుమ్ జల జేవ్ వెల్లెల మాన్సుల్క యేసు ఇని మెన సంగిలన్. “ఆవ్ తుమ్క కిచ్చొ నిజుమి కచితుమ్ సంగితసి మెలె, దేముడు అబ్బొ కెర్తిసి కేన్ జలెకి ఆవ్ పుత్తుసి దెకిలె, జయ్యి దస్సి కెర్తై తయిందె, వేరచి కిచ్చొ కెరుక నెంజె. అబ్బొ కిచ్చొ కెర్తై, ఆవ్ పుత్తుసి జయ్యి కెర్తయ్.

20 ఆవ్ పుత్తున్క దేముడు అబ్బొ ప్రేమ కెర్తయ్. దేముడు అబ్బొ కెర్తిసి ఎత్కి ఆవ్ జోచొ పుత్తున్క దెకయ్తె

తత్తయ్. తుమ్ దెకిల ఈంజేవ్ కమొచి కంట అన్నై జిన్ల కమొ ఆవ్ పుత్తున్క దేముడు అబ్బొ దెకయెదె. తుమ్ ఆచారిమ్ జస్తె.

21 కీస కమొ మెలె, మొర గెలసక ఉట్టవ దేముడు అబ్బొ జోవయింక కీసి అన్నై జియడ్డయ్ గే, దస్సి, కక్క జియడుక సర్ల జయిందె గే, జోవయింక జియడ చెంగిల్ కెరిందె.

22 పడ్డొ, దేముడు అబ్బొ కక్క సొంత తీర్పు కెరె నాయ్. తీర్పు కెర్తి అదికారుమ్ ఆవ్ జోచొ పుత్తున్క సార్పు కెర దా అస్సె.

23 దేముడు అబ్బొక మాన్సుల్ కీసి గవురుమ్ కెర్తతి గే, దస్సి ఎత్కిజిన్ ఆవ్ జోచొ పుత్తున్క కి గవురుమ్ కెర్తు మెన, జో సెలవ్ దా అస్సె. ఆవ్ పుత్తున్క కో గవురుమ్ కెర్తి నాయ్ గే, అంక తెద్రయ్లో దేముడు అబ్బొక కి గవురుమ్ కెర్తి నాయ్.

24 “తుమ్క కిచ్చొ నిజుమి కచితుమ్ ఆవ్ సంగితసి మెలె, అంక తెద్రయ్లోసాక నంప కెర కో అంచి కోడు సూన కెరుల గే, పరలోకుమ్చి రాజిమ్తె బెదితి వరుమ్ జోవయింక దొర్కు జా అస్సె. పాపుమ్చి రిసా జేవ్ మొర గెల రిత జా తిలె కి, జేవ్ కెర్ల పాపల్ చెమించుప జా సిచ్చుతె గెతి నాయ్, గని జివ్వి జా అస్సి.

25 “తుమ్క నిజుమి కచితుమ్ ఆవ్ కిచ్చొ సంగితసి మెలె, మొర గెలస ఆవ్ దేముడు పుత్తున్చి అవాడ్ సూన్తి సమయుమ్ జెతయ్, అప్పె కి జా అస్సె, కో సూన నంపజవుల గే, నొవర్ జలి రితి జా, దేముడుచి రాజిమ్తె బెదుల.

26 జీవ్ కెర్తి సెక్తి జో అబ్బొసి జలో దేముడుచి అత్తి అస్సె, జలె, దొర్కు జలి జయ్యి సెక్తి ఆవ్ జోచొ అబ్బొ జలో దేముడు పుత్తున్క దా అస్సె.

27 అన్నై, ఆవ్ మాన్సు జా జెర్మున్ అస్సిచి రిసా అంక మాన్సుల్క తీర్పు కెర సిచ్చు కెరుక, చెమించుప కెరుక, అదికారుమ్ దా అస్సె.

28 ఇన్నెచి రిసా తుమ్ కిచ్చొ ఆచారిమ్ సేడ నాయ్, కిచ్చొక మెలె, మొర గెల మాన్సుల్, మెన్సున్లెతె తిలస ఎత్కి, అంచి అవాడ్ సూన బార్ జతి సమయుమ్ జెయెదె.

29 తెదొడ్క జేవ్ బార్ జా, సత్తిమ్ కెర్లస అన్నై జీవ్ జా ఉట్ట పరలోకుమ్తె గెచ్చు చెంగిల్ జితె తవుల, సత్తిమ్ నే కెర్లస ఉట్ట, సిచ్చుతె గెచ్చుల.

30 “జలె, కిచ్చొ అవ్వి కెరుక అంక అదికారుమ్ నాయ్, దేముడు అబ్బొతె ఆవ్ సూన్లి రితి ఆవ్ తీర్పు కెర్తసి ఆవ్ కెర్తి తీర్పుతె కిచ్చొ తప్పు నాయ్. కిచ్చొక మెలె, ఆవ్ కిచ్చొ వేర ఉచరి నాయ్, గని అంక ఎక్కి ఆస. కిచ్చొ మెలె, అంక తెద్రయ్లోసాచి ఇస్టుమ్ తిలిసి పూర్తి జర్గు కెరుక.

యేసుచి రిసా సాచి

31 “అంచి రిసా ఆవ్ ఎక్కిలో సాచి సంగనై, అంచి సాచి సత్తిమచి గే అబద్దుమచి గే రుజ్జు నాయ్.

32 అంచి రిసా సాచి సంగితోసా అన్నెక్కో అస్సె. జో అంచి రిసా సాచి సంగిలిసి సత్తిమ మెన జాని.

33 మెలె, యోహానుక ‘కిచ్చో సాచి సంగెదె?’ మెన సూన్తి రిసా తుమి జా సుట్టు సగుమ్జిన్చి అత్తి కబుర్ తెద్రయలదు, చి ఆవ్ కొన్సో గే జో సాచి సంగిలన్.

34 అంచి రిసాచి ముక్కిమ్ జలి సాచి మాన్సు సంగిలిసి నెంజె, గని తుమ్క ‘నంపజా రచ్చించుప జతు’ మెన, యోహానుచి సాచిచి రిసా తుమ్క ఆవ్ ఉచరయతసి.

35 దొర్కు జలిసి మాన్సు చినితి రిసా దీవు లగితె తిలె కిసి తమ్మస ఉజిడ్ దెతయ్ గే, దస్సి, ఉజిడ్ రితో జా, అంచి రిసా యోహాను సాచి సంగితె తిలో. జో సంగిలి సాచి సూన, తూమ్ కి గడియయ్ సర్ద తెన్ తిలదు.

36 “గని, యోహానుచి సాచిచి కంట అంక జిన్లి సాచి అస్సె. ఆవ్ కెరుక మెన దేముడు అబ్బో దిల కమె, ఈంజేవ్ ఆవ్ కెర్త కమెయి దెకిలె, జొయ్యి అంక తెద్రయలో మెన ఈంజేవ్ కమెయి అంచి రిసా సాచి సంగితతి.

37 “పడ్డె, అంక తెద్రయలో అబ్బొయి అంచి రిసా సాంత సాచి సంగిలన్. తూమ్ కెయ జోచి అవాడ్ సూన్సు నాయ్, జోచి రూపుమ్ తుమ్ కెయ దెకున్ నాయ్.

38 జోచి కోడు తుమ్చి పెట్టి నాయ్ మెన కిచ్చో రుజ్జు తత్తయ్ మెలె, జో తెద్రయలోసాక తుమ్ నంప కెర్చు నాయ్.

39 దేముడుచి రాజిమ్తె బెద పరలోకుమ్తె గెతి రిసా దొర్కు జలి గ్యానుమ్ పున్సిమి దెతిసి దేముడుచ కొడొతె తయెదె మెన దేముడుచ కొడొ తుమ్ రోజుక దెకితను. జలె, జెవ్వి అంచి రిసా సాచి సంగితతి.

40 జేవ్ కొడొ అంచి రిసా సాచి సంగిలే కి, అంచితె దొర్కు జతి పరలోకుమచి జివ్ సంగితి రిసా తుమ్ అంచితె జెంక ఎద్దె నెనును. అంక నంపజలె, తుమ్క దొర్కు జతి.

41 “మాన్సు దెతి గవురుమ్ అంక నాయ్.

42 గని దేముడుచి ప్రేమబుద్ధి తుమ్చి పెట్టి నాయ్ మెన జాని.

43 అంచో అబ్బొసి జలో దేముడుచి నావ్ తెన్ ఈంజ లోకుమ్తె ఆవ్ జా అస్సి, గని తుమ్ అంక నంప కెర్చు నాయ్. గని, కో జలెకు వేర మాన్సు అవ్వి కెర అయ్లె, జోకయ్ నంప కెర్తె.

44 మాన్సు సంగితి గవురుమ్ ఎక్కిలోతె ఎక్కిలో తుమ్ సంగితను, గని ఎక్కిలో దేముడు దెతి గవురుమ్క తుమ్ కోర్ప జను నాయ్. జాకయ్ తుమ్ కిసి నంప జస్సె, నెతుర్చు.

45 “జలె, అబ్బొసి జలో దేముడుచి మొక్కె తుమ్క నేరిమ్ వయడ్తోసా ఆవ్ మెన తుమ్ ఉచర నాయ్. ‘మోసేచి అత్తి ప్రబు రెగిడ్లి ఆగ్గుల్ నంపజలమ్, చి జాకయ్ రచ్చించుప

జమ్దె.’ మెన, తుమ్క తుమి ఉచర్తను. గని జయి బోదన తుమ్క నేరిమ్ వయడ్తో అస్సె.

46 మోసే పూర్గుమ్చోచి అత్తి దేముడు రెగిడ్లిసి కోడు తుమ్ నంప కెర్తదు జలె, అంకయ్ నంప కెర్తదు! కిచ్చొక మెలె, అంచి రిసాయి జో రెగిడ్లి.

47 గని మోసే రెగిడ్లిసి తుమ్ నంప నే కెర్తె, ఆవ్ సంగిత కొడొ కిసి నంప కెర్తె!” మెన జేవ్ వెల్లెల మాన్సుల్క యేసు సంగిలన్.

6

పావ్ వెయిల్ జిన్క యేసు అన్నిమ్ దిలిసి

(మత్త 14:13-21; మార్కు 6:30-44; లూకా 9:10-17)

1 ఇన్నెచి పడ్డె యేసు గలిలయ ప్రాంతుమ్తె అన్నె గెచ్చు, జా గలిలయచి సముద్రుమ్ గాడు జిన ఒత్తల్తో గెలన్. జా గాడుక ‘తిబెరియ గాడు’ కి మెనుల.

2 జలె, జబ్బుల్క జో యేసు చెంగిల్ కెర్త దేముడు అబ్బొసి దిలి అదికారుమ్క రుజ్జు దెకయ్త కమె జేవ్ దెక తిలి రిసా, ఒగ్గర్జిన్ జనాబ్ గాడుచి ఒడ్డువాట్ ఇండ యేసుచి పట్టి గెచ్చుక బార్ జల.

3 జలె, యేసు జోచ సిస్సుల్ తెన్ ఏక మెట్టయ్ వెగ, వెన అస్తి.

4 యూదుల్చి *పస్కా మెంతి పండుగు అన్నెక్ సుట్టు పాసి జెతయ్.

5 యేసు దెకిల్ పొది, ప్రెజల్ జట్లు జట్లు తెన్ జోతె జెతిసి దెక, పిలిప్ మెలో సిస్సుడుక “ఈంజేవ్ ప్రెజల్ కతి రిసా అమ్ కిసి అన్నిమ్ గెనుక?” మెన పుసిలన్.

6 కిచ్చొ కెరుక గే యేసు జానె, గని, జోచి రిసా పిలిప్ కెర్తె దయిరిమ్ తెన్ నంపజతయ్ గే దెకితి రిసా దస్సి మెన యేసు పుసిలన్.

7 జలె, పిలిప్ జోక, “ఈంజేవ్ మాన్సుల్ ఎత్తిజిన్క ఇదిల్ ఇదిల్ జవున్ దెంక జలె, †వెయి వెండ్లుచ పోడియె జలెకు నే బెరె” మెన సంగిలన్.

8 గని సీమోసు పేతురు మెలో సిస్సుడుచో అంద్రెయ మెలో బావోసి జేవ్ సిస్సుల్తె అస్సె.

9 ఈంజో, జలె యేసుక “ఓదె, ఇన్నె తిలో ఇదిలోసా నాడు ఎక్కిలోక పావ్ పోడియె చి దొన్ని ఇదుర్ల మొస్సు అస్సి, గని ఎత్తిజిన్క తెద్దిలి కిసి వంట దెంక జయెదె!” మెన సంగిలన్.

10 యేసు “ఎత్తిజిన్క వెసవ దాస” మెన సిస్సుల్క సంగిలన్. జలె, ఒత్త చెంగిలి వెసితి రితి గర్చి చివ్వర్ తిలి టాన్ ఒగ్గర్ అస్సి, చి ఎత్తిజిన్ ప్రెజల్ వెసిల. ఎక్కి

* 6:4 6:4 పూర్గుమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతో ప్రబు రచ్చించుప కెర్లిసి ఏద కెర్తె పండుగు, ఈంజ. జా పండుగక నే పులయ్ల పోడియె రిత పోడియె కవుల. † 6:7 6:7 నెంజలె, దొన్ పుంజోజిన్ మాన్సుల్క ఏక దీన్చి కూలి డబ్బుల్ దెతి ఎదిలి డబ్బుల్.

మున్నుబోదల్క లెక్క కెర్లె, జేవ్ మొత్తుమ్ పాసి పాసి పాచే వెయిల్జిన్ జల.

11 జలె, యేసు జేవ్ పోడియె నజన, “తూయి ఈంజ అన్నిమ్ దా దయ కెర్లది” మెన దేముడు అబ్బొన్క ఉచర, వెన తిలన ఎత్తిజిన్క పాచితి రితి వంట దిలన్. మొస్సుతెన్ కి దస్సి కెర, జేవ్ పేట్ బెర్తు కతి రితి వంట దిలన్.

12 ఎత్తిజిన్ పేట్ బెర్తు కయలి పడ్డొ, “ఆరి పాడ్ జవున్ నాయ్ మెన, సేంసిల గండల్ గుడ్డ ఆన” మెన సిస్సుల్క యేసు సంగిలన్.

13 జలె, ఎత్తిజిన్ కయల జేవ్ పాచే పోడియెచ సేంసిల గండల్ సిస్సుల్ గుడ్డెల. గుడ్డెలె, బార గంపల్ బెర్తు జల.

14 జలె, దేముడు అబ్బొసి దిలి అదికారుమ్క రుజ్జు దెకయలి ఈంజ కామ్ పైజల్ దెక కెర, “ఒహా, ‘అంచి కబుర్ సూనయ్తోసొక బూలోకుమ్తె బార్ కెరిందె’ మెన దేముడు సంగిలోసొ ఈంజొయి” మెన సంగితె తిల.

15 తెదొడి, జోక రానొ కెర్తి రిసొ దెరుక మెన పైజల్ కోర్ప జల, గని జోవయించి ఉద్దెసుమ్ చిన కెర, యేసు జోవయింక ముల దా, ఎక్కిలో గెచ్చు, మెట్టయ్ అన్నె గెలన్.

**యేసు పానిచి ఉప్పిరి ఇండితయ్
(మత్త 14:22-27; మార్కు 6:45-52)**

16 సాంజ్ జతికయ్, అందర్ జంక దెర తిలి, చి యేసు జోవయింతె అన్నె ఉత్త జెంక నేతయ్చి రిసొ సిస్సుల్ “గెరి గెచ్చుమ!” మెన గడ్డె గెచ్చు,

17 జోవయించి దోనితె వెగ, గాడు ఒత్తల్తో తిలి కపెర్నహూమ్ పట్టుమ్తె గెచ్చుక మెన, దోని జీనవుక దెర్ల.

18 ఇదిల్ దూరి జీనయలి పొది, వాదు ఒగ్గర్ కెర్లి, చి వెల్లెల కెర్లల్ కెరుక దెర్లి.

19 దస వెల్లెల కెర్లల్ కెర్లిన్తె జేవ్ పాసి పాసి దొన్ని కోసుల్ దూరిక దోని ఇండయ్తికయ్, యేసు పానిచి ఉప్పిరి ఇండ జా, దోనిక పాసి పాచిలన్. జో దస్సి పాసి ఇండ జెతె తతికయ్, సిస్సుల్ దెక, “డుంబొ, కిచ్చొ గే!” మెన, బియఁ గెల.

20 యేసు జోవయింక “తుమ్ బియఁ నాయ్. ఆవ్వి జెతసి” మెన దయిరిమ్ సంగిలన్.

21 తెదొడి నర్ల తెన్ జోకయి దోనితె వెగయల, చి బేగి జేవ్ గెతి ఒడ్డుతె దోని పాచ గెలి.

పైజల్ యేసుక చజిలిసి

22 జలె, జా గెలి దీసి పోడియె మొస్సు కయల పైజల్ సగుమ్జిన్, అన్నెక్ దీసి ఎద గాడు ఒత్తల్తో రకితె అస్తి. ‘గెలి దీసి ఎక్కి దోని తిలి’ మెన, ‘యేసు జోచ సిస్సుల్ తెన్ దోనితె వెగె నాయ్, చి జో నెంతె సిస్సుల్ ఉట్ట గెచ్చు తిల’ మెన, జేవ్ పైజల్ ఉచార కెర అస్తి. జాకయ్, యేసుచి రిసొ

‘మెట్టయ్ తెంతొ ఉత్త జెంక నేతయ్. కిచ్చొగ’ మెన రకితె అస్తి.

23 రకితె తిలె, తిబెరియ పట్టుమ్ తెంతొ, వేర దోనివొ అయల. గెలి దీసి యేసు దేముడు అబ్బొన్క ఉచర వంట దిల పోడియె కయల జేవ్ పైజల్ తిలిన్తె, జలె, జేవ్ దోనివొ అయల.

24 జెతికయ్, జోచ సిస్సుల్ కి యేసు కి ఇన్నె నాయ్ మెన పైజల్ దెక, జేవ్ అప్పె అయల దోనివొతె వెగ, యేసుక చజుక మెన, కపెర్నహూమ్ పట్టుమ్తె గెచ్చు పాచిల.

పరలోకుమ్తె బెదితి సెక్తి దెతి పోడియె

25 పైజల్ గాడు జీన, యేసుక చజ, జో తిలిసి జానన “గురుబాబు, కెయ ఉట్ట అయలది?” మెన పుసిల.

26 యేసు జోవయింక, “తుమ్ ఆవ్ నిజామి కచితుమ్ కిచ్చొ మెంతసి మెలె, తుమ్ ఒత్త పేట్ బెర్తు పోడియె కా కెర సుకుమ్ జలి రిసొ అంక చజుక అయలదు, గని అంచి అదికారుమ్క రుజ్జు దెకయలి జా కామ్చి గుర్తు అర్దుమ్ కెర్లన్ రిసొ నాయ్.

27 ఆగ్ సుకుమ్ కెర్తి అన్నిమ్ గట్రచి రిసొ తుమ్ ఉచర్లె తా నాయ్. జా ఎత్తి పాడ్ జతిసి. అన్నిమ్, మెన పరలోకుమ్తె బెదితి సెక్తి దెతిన్క టాలి కెర్లె, జయ్యి అన్నిమ్క కోర్ప జా. జయ్యి అన్నిమ్, జలె, కెయఁక తెయఁక తా గెతిసి. జయ్యి అన్నిమ్. జలె, ఆవ్ మాన్సు జా జెర్మన్ అయ్లోసొ తుమ్క దెయిందె. జయ్యి తుమ్క ముక్కిమ్. జా దెంక అంక అదికారుమ్ కిసి తంక మెలె, దేముడు అబ్బొ, దేముడు, అంచి అదికారుమ్చి రిసొ సాచి సంగ జోచి ముద్ద దా అస్సె,” మెన పైజల్క యేసు సంగిలన్.

28 తెదొడి జేవ్ పైజల్ జోక “దేముడుచ కమె అమ్ కెరుక మెలె, అమ్ కిచ్చొ కెర్లె జయెదె?” మెన పుసిల.

29 యేసు జోవయింక “దేముడు తుమ్క కిచ్చొ పూచి తియార్తయ్ మెలె, ఆవ్ జో తెద్దయ్లోసొక తుమ్ పూర్తి నంపజంకయ్” మెన సంగిలన్.

30 సంగితికయ్, జేవ్ జోక “జలె, ‘జో తెద్దయ్లో రచ్చించువ కెర్తొసొ తుయి’ మెన అమ్ దయిరిమ్ తెన్ నంపజతి రిసొ తుచి అదికారుమ్క కిచ్చొ గుర్తు అమ్క దెకయ్తె? కిచ్చొ వెల్లి కామ్ కెర అమ్క రుజ్జు దెకయ్తె?

31 అమ్చ పూర్ణుమ్చ వెల్లి బయిలె బుల్లె తిలి పొది, †‘మన్నా’ మెలి పోడియె రితిసి కతె తిల. జాకయ్, పరలోకుమ్తె తెంతొ చి పోడియె రితిసి జోవయింక జో దిల్లో మెన దేముడుచ కొడొతె రెగ్గ అస్సె, గెద” మెన సంగిల.

32 పైజల్ యేసుక దస్సి సంగితికయ్, జో జోవయింక, “తుమ్క కిచ్చొ నిజామి కచితుమ్ ఆవ్ సంగితసి మెలె, తుమ్చ పూర్ణుల్క పరలోకుమ్ తెంతొ చి పోడియె మోసి

† 6:31 6:31 జా బయిలు దేనిమి బుల్లె తిలి పొది కిచ్చొ కతిసి యూదుల్క నాయ్, చి ఎత్తి అదికారుమ్ తిలొ దేముడు రోజుక ఆగాసుమ్ తెంతొ జా ‘మన్నా’ మెలిసి సువెతె తిలన్. ఏక రగుమ్ పిట్టల్ కి సేడయ్తె తిలన్; ‘పోడ కతు’ మెన. నిర్ణమాండుమ్ 16:1-36.

దిలిసి నెంజె. దేముడు అబ్బొయి దిలిసి. జలె, తుమ్క నిజుమ్ జలి పోడి రితి, నిజుమ్ జలి పోడి దేముడు అబ్బొ అప్పె పరలోకుమ్ తెంతో తెద్రవ దా తుమ్క దెతయ్.

33 దేముడు అబ్బొ దిలి జయ్యి పోడియె, కిచ్చొ జయెదె మెలె, పరలోకుమ్ తెంతో అప్పె రితి ఉత్ర అయ్లీసి. జయ్యి పోడి ఒండి లోకుమ్చక సరి జతి జీవ్ దెతిసి” మెన యేసు సంగిలన్.

34 యేసు దస్సి సంగితికయ్, “బాబు, జయ్యి పోడి అమ్క దెతె తా” మెన ప్రెజల్ సంగిల.

35 జలె, యేసు జోవయింక, “సరి జతి జీవ్ దెతి జా పోడి ఆవ్వి. కో అంక పూర్తి నంపజా కీఅంచితె జెవుల గే, జోవయింక చూ, తాన్ కెయ్క అన్నె కెరె నాయ్.

36 గని, ‘అంక దెకిలెకి తుమ్ నంప కెర్పు నాయ్’ మెన తుమ్క అగ్గె తెంతో సంగితసి.

37 “ ‘నంపజా రచ్చించుప జతు’ మెన కక్క దేముడు అబ్బొ అంచితె తెద్రయెదె గే, జెవుల, చి కో అంక నంపజా జెవుల గే, జోవయింక కెయ్క కి ‘తుమ్క నెసి’ మెన ఉదడి నాయ్.

38 ఆవ్ పరలోకుమ్ తెంతో అయ్లీసి కిచ్చొక మెలె, అంచి సొంత ఇస్టుమ్ అయ్లి రితి కెరుక నాయ్, గని, అంక తెద్రయ్లోసా సంగిలిసి నెరవెర్పుప కెరుకయ్.

39 అంక నంపజతి రిసా కక్క జో అంచితె తెద్రయెదె గే, జోవయింతె కక్క నే పిట్టయ్తె, వెల్లి తీర్పు కెర్తి జా ఆకర్ దీసిక, జోవయింక జయడ పరలోకుమ్తె బెదవుక అన్నె.

40 మెలె, అంచొ అబ్బొసి జలొ దేముడుచి ఇస్టుమ్ కిచ్చొ మెలె, ‘దేముడు ప్రబుచొ ఎక్కి పుత్తుసి ఈంజొయి’, మెన ‘ఈంజొయి అమ్క దొర్కు. జలొ రచ్చించుప కెర్తొసా’ మెన, కో అంక చిన పూర్తి నంపజవుల గే, పరలోకుమ్తె బెదితి జీవ్ జోవయింక దొర్కు. జయెదె, చి వెల్లి తీర్పు కెర్తి జా ఆకర్ దీసిక జోవయింక జయడ పరలోకుమ్తె బెదయిందె. ఈంజయ్ అబ్బొసి జలొ దేముడుచి ఇస్టుమ్” మెన యేసు సంగిలన్.

యేసుచి రిసా యూదుల్ అన్మానుమ్ జలిసి

41 ‘పరలోకుమ్ తెంతో ఉత్ర అయ్లి పోడి ఆవ్వి’ మెన యేసు సంగిలి రిసా, ఒత్త తిల జేవ్ యూదుల్చ వెల్లెల మాన్సుల్ జోచి రిసా కోపుమ్ జా,

42 ఇసి మెన లట్టబన్. “ఈంజొ యేసు యోసిపుచొ పుత్తుసి, గెద. జోచ అయ్యన్అబ్బొన్క జానుమ్, గెద. దస్సి జలె, ‘పరలోకుమ్ తెంతో ఉత్ర అయ్లయ్’ మెన కిచ్చొక సంగితయ్?” మెన ఆసిల.

43 జేవ్ దస్సి జతికయ్, యేసు జోవయింక కిచ్చొ జబాబ్ దిలన్ మెలె, “ఆవ్ సంగిలిన్చి రిసా అన్మానుమ్ జా లట్టబన నాయ్.

44 అంక తెద్రయ్లో దేముడు అబ్బొ మాన్సుచి పెట్టి జోవయింక సికడ బుకార్కయ్ జేవ్ అంక నంపజా జెవుల. అయ్లె, వెల్లి తీర్పు కెర్తి జా ఆకర్ దీసిక జోవయింక జయడ పరలోకుమ్తె బెదయిందె.

45 పూర్తుల్చి అత్తి సంగిల దేముడుచ కబుర్లుచ కొడతె రెగ్గ అన్నె.

దేముడు జేవ్ ఎత్కిజిన్క సొంత సికడెదె” మెన రెగిడ్లి కోడు. దేముడు అబ్బొ జోవయింక సంగిలిసి కో సూన సికుల గే, అంక నంపజా జెవుల.

46 “జోతె తెంతో అయ్లోసాక పిట్టవ, కోయి దేముడు అబ్బొక కెయ్ దెకితి నాయ్. ఎక్కిలోయి జోక దెక అన్నె.

47 జలె, ఆవ్ తుమ్క కిచ్చొ నిజుమి కచితుమ్ సంగితసి మెలె, అంక కో సత్తిమ్ తెన్ నంపజవుల గే, జేవ్ నంపజలి తెంతో, పరలోకుమ్చి రాజిమ్తె బెదయ్ అన్తి.

48 సరి జతి జీవ్ దెతి పోడి, ఆవ్వి.

49 “తుమ్చ పూర్తుమ్చ జా వెల్లి బయిలె బుల్తె తిలి పొది ‘మన్నా’ మెలి జా పోడి కయ్లెకి, మాములుమ్ మొర్తి సమయుమ్ జా అయ్లె పొది, మొర గెల.

50 ఆవ్ అప్పె సంగితిసి, జలె, పరలోకుమ్ తెంతో దొర్కు, జతి ఈంజయ్ పోడి, జలె, కిచ్చొక ఉత్ర జా అన్నె మెలె, ఈంజయి పోడి, కో కవుల గే, మొర్లె పొది సిచ్చ తిలి మొర్తుతె గెతి నాయ్.

51 పరలోకుమ్ తెంతో ఉత్ర అయ్లి జీవ్ దెతి పోడి ఆవ్వి. ఈంజయ్ పోడి కో కవుల గే, పరలోకుమ్తె గెచ్చు కెయ్క తెయ్క చెంగిల్ జివుల. జలె, ‘జోవయించి పాపుమ్చి సిచ్చ జతి మొర్తుతె గెతు నాయ్, గని అంచి వరుమ్ నజ రచ్చించుప జతు’ మెన ఆవ్ కిచ్చొ పోడి దెయిందె మెలె, అంచి *ఆగ్” మెన సంగిలన్.

52 యేసు జా సంగితికయ్, యూదుల్చ వెల్లెల మాన్సుల్ బమ్మజా, “అమ్ కతి రిసా ఈంజొ మాన్సు జోచి ఆగ్ అమ్క కిసి దెంక జయెదె?” మెన ఎక్కిలో తెన్ ఎక్కిలో లట్టబై తిల.

53 జాకయ్ యేసు జోవయింక, “తుమ్క ఆవ్ నిజుమి కచితుమ్ కిచ్చొ సంగితసి మెలె, ఆవ్ మాన్సు జా జెర్మన్ అయ్లోసాచి ఆగ్ తుమ్ నే కయ్లె, అంచి లోయి తుమ్ నే పిల్లె, తుమ్చి పెట్టి కిచ్చొ జీవ్ తయె నాయ్.

54 అంచి ఆగ్ కో కవుల గే, అంచి లోయి కో పివుల గే, దేముడుచి రాజిమ్తె బెదితి జీవ్ జోవయింక దొర్కు జా అన్నె, చి వెల్లి తీర్పు కెర్తి జా ఆకర్ దీసిక, జోవయింక జయడ, పరలోకుమ్తె బెదయిందె.

55 జాకయ్, అంచి ఆగ్ ముక్కిమ్ జలి అన్నిమ్, అంచి లోయి ముక్కిమ్ జలి పితిసి జయెదె.

56 కో అంచి ఆగ్ కతి రితి అంచి లోయి పితి రితి జతతి గే, జో అంచి పెట్టి తత్తతి, చి ఆవ్ జోచి పెట్టి తయిందె.

§ 6:35 6:35 మెలె ‘అంచి తెన్ బెదుల, అంచి రాజిమ్తె బెదుల’.

* 6:51 6:51 ఈంజ లోకుమ్చి పాపుమ్ గెచ్చయ్తి రిసా జో అర్పితుమ్ జంక తిలిన్చి రిసా ‘అంచి ఆగ్ దెయిందె’ మెన యేసు టాలి సంగితయ్.

57 “జీవ్ తిలో దేముడు అబ్బొ అంక ఈంజ లోకుమ్తె తెద్రయ్లో. జోచి జీవ్ అంచి పెట్టి అస్సె, చి జోచి జీవ్కయ్ ఆవ్ జితసి. దస్సి అంకయ్ కో కయ్లి రితి జా అంక జోచి పెట్టి తియనుల గే, అంచి జీవ్చి రిసా జేవ్ కి జివుల.

58 పరలోకుమ్ తెంతో ఉత్త్ర అయ్లి పోడి ఈంజయి. తుమ్చ పూర్ణుమ్చ కయ్లి రగుమ్ నెంజె. గని, ఈంజయ్ పోడియె కో కవుల గే, పరలోకుమ్తె గెచ్చ కెయ్చ తెయ్చ జివుల” మెన యేసు సికడ్లన్.

59 యేసు కపెర్నహూమ్ పట్టుమ్చి జేవ్ యూదుల్చి సబ గెరి ఇసి మెన సికడ్లన్.

యేసు సంగిలి బోదనచి రిసా జో తెన్ బులుక ములిలిసి

60 యేసుక ఇదిల్ నంపజా సిస్సుల్ జంక దెర్ల మాన్సు, జలె, జో సంగిలిసి నూన కెర, జోవయింతె సగుమ్జిన్ బమ్మ జా, “జా కోడు అల్లర్చి! జా కోడు కో నూనుల!” మెన సంగిల.

61 జో నిసాన్ల సిస్సుల్ కి అన్మానుమ్ లట్టబ్తతి మెన యేసు పెట్టి జానిలన్, చి “ఆవ్ అప్పె సంగిలిచి రిసా తుమ్ అన్మానుమ్ జతను గే?

62 జలె, ఆవ్ మాన్సు జా జెర్మున్ అయ్లోసా ఆవ్ అగ్గె తిలిన్తె అన్నె వెగ గెతిసి తుమ్ దెకిలె, కిన్ జన్నె!

63 జీవ్ తిలెకయ్ మాన్సు జియెదె. జీవ్ నెంజిలె, ఆగ్ కామ్క నెంజె. ముక్కిమ్ జలి ఆవ్ సంగిలి జీవ్ కిచ్చొతె మెలె, ఆవ్ తుమ్క సంగిల కొడొతెయ్ అస్సె.

64 గని తుమ్చితె సగుమ్జిన్ నంపజతి నాయ్” మెన జోవయింక సంగిలన్. జోవయింతె కో నంపజతి నాయ్ గే, అన్నె పడ్డొక జోక మార్తసచి అత్తి కో దెర దెయెదె గే, యేసు అగ్గె తెంతో జానె.

65 తెదొడి అస్సె, “జాకయ్ ‘దేముడు అబ్బొ జా సెక్తి దిలెకయ్, నెంజిలె కో కి అంక నంపజంక, అంచితె జెంక నెత్తి’ మెన తెదొడి సంగిలయ్” మెన సంగిలన్.

66 జలె, జా దీసి జో సంగిలిసి ఓర్పువ జంక నెత్త కెర, జోవయించి పట్టి గెతె తిలసతె ఒగ్గర్జిన్ సిస్సుల్ అన్మానుమ్ జా, ఒత్త తెంతో జో తెన్ బుల్లి నాయ్.

67 జేవ్ దస్సి జతికయ్, జో నిసాన్ల బారజిన్ సిస్సుల్క యేసు, “తుమ్ కి అంక ముల దా ఉట్ట గెతె గే?” మెన పుసిలన్.

68 “ప్రబు, అమ్ అన్నె కత్తెయ్ గెచ్చుమ్దే? దేముడుచి రాజిమ్తె బెదుక కీసి గే తుచయ్ కొడొతె సూనుక జతయ్, గని అన్నె కత్తెయ్ నాయ్.

69 జాకయ్ ‘దేముడుచి సుద్ది తిలోసా† క్రీస్తు తుయి’ మెన తుకయ్ అమ్ నంపజా అస్సుమ్, కచితుమ్ జానుమ్” మెన సీమోను పేతురు దయిరిమ్ తెన్ సంగిలన్.

70 తెదొడి యేసు జేవ్ బారజిన్క కిచ్చొ జాగర్త సంగిలన్ మెలె, “తుమ్ బారజిన్ ఎత్కిక ఆవ్ నిసాన్లయ్, గెద. గని, తుమ్చితె కి సయ్తాన్చొ సేవ కెర్తొసా ఎక్కిలో అస్సె” మెన సంగిలన్.

71 కచి రిసా దస్సి సంగిలో మెలె, సీమోను ఇస్కరియోతు మెలో ఎక్కిలోచొ యూదా మెలో పుత్తున్చి రిసా. కిచ్చొక మెలె, పడ్డొ, జేవ్ జోక మార్తి రిసా, విరోదుమ్ నుదల్చి అత్తి యూదా యేసుక దెర దెయెదె మెన తెదొడి కి యేసు జానె.

7

1 జా మదెనె, యూదుల్చ వెల్లెల మాన్సుల్ జోక మారుక కోర్ప జా అస్తి మెన యేసు జానెచి రిసా జోవయింక ముక్కిమ్ తిలి యూదయ ప్రదేసిమ్తె గెచ్చె నాయ్, గని గలిలయ ప్రాంతుమ్తె బుల్తె తిలో.

2 జలె, యూదుల్చి అన్నెక్ పండుగు పాసి జా అయ్లి. జాక ‘కుడియల్ పండుగు’ మెనుల.

3 జలె, యేసుచ బావుడ్చివో జోక కిచ్చొ మెల మెలె, “ఒత్త తిల తుచ సిస్సుల్ జల మాన్సుల్ దెకితి రిసా, ఈంజ డొంగుర్ దేసిమ్ ముల దా, *యూదయ ప్రదేసిమ్తె గెచ్చె, తుచ వెల్లెల కమొ ఒత్తయ్ కెరు.

4 మెలె, ‘అంచి అదికారుమ్ మాన్సుల్ చినుతు’ మెన ఎక్కిలోచి ఆస జలె, జోచ కమొ కో నెంజిల్తె కెరె నాయ్. ఒగ్గర్జిన్ తిలిన్తె కెరెదె. తుయి వెల్లెల కమొ కెర్తసి జలె, ఎత్కిజిన్ దెకితి రితి ఒత్త కెరు” మెన సికడుక దెర్ల.

5 జోచి అయ్యున్చి పెట్టి జెర్మిల ఈంజేవ్ బావుడ్చివో కి జోక ‘దేముడు తెద్రయ్లో క్రీస్తు రచ్చించుప కెర్తొసా’ మెన నంప కెర్తి నాయ్.

యేసు దిలి జబాబ్

6 జేవ్ దస్సి సంగితికయ్, యేసు జోవయింక, “ఆవ్ గవురుమ్ జతి సమయుమ్ జెంక నేతయ్. తూమ్, మాత్తుమ్, కెర్డొడె తెదొడె గవురుమ్ జంక జతయ్.

7 జేవ్ కెర్తి రితి తూమ్ కి కెర్తనుచి రిసా, ఈంజ లోకుమ్చ మాన్సుల్ తుమ్క విరోదుమ్ దెకుక నెత్తి, గని జోవయించ కమొక ‘గర్బ’ మెన ఆవ్ తీర్పు సంగితసిచి రిసా అంక విరోదుమ్ దెకితతి.

8 తుమి ఒత్త గెచ్చ పండుగు కెర. ఆవ్ అప్పెచి మట్టుక ఈంజ పండుగ్క గెచ్చి నాయ్. ఆవ్ గెతి సమయుమ్ పూర్తి జెంక నేతయ్” మెన సంగ,

9 యేసు గలిలయతె తా గెలో.

కుడియల్ పండుగు కెర్తినతె యేసు గెలిసి

10 జలె, జోవయించ బావుడ్చివో పండుగ్తె ఉట్ట గెలి ఇదిల్ పడ్డొ, యేసు కి గెలన్. ఎత్కిజిన్ దెకిత్ రితి నాయ్, గని కో నేన్లి రితి గెలన్.

† 6:69 6:69 దేముడు తెద్రయ్లో రచ్చించుప కెర్తొసా జలోసా, * 7:3 7:3 ‘యూదయ ప్రదేసిమ్తె గో’ మెన కిచ్చొక సికడ్లతి మెలె, యెరూసలేమ్ పట్టుమ్ చి దేముడుచి గుడి జయి ప్రదేసిమి తవుల, చి పండుగ్క మాన్సుల్ ఒత్తయ్ బెర తవుల.

11 జా మదెనె, పండుగతె గెల యూదుల్చ వెల్లెల మాన్సుల్ 'యేసు కేతె?' మెన జోక చజితె తిల.

12 ప్రెజల్ కి జోచి రిసా జోవయింతెన్ ఇనయింతెన్ లట్టబై తిల. "జో చెంగిలో మాన్సు" మెన సగుమ్జిన్ సంగితె తిల, "నాయ్, ప్రెజల్ క మోసిమ్ కెర్తయ్" మెన అన్నె సగుమ్జిన్ సంగితె తిల.

13 గని వెల్లెల మాన్సుల్ క బియఁ కెర, జోచి రిసా కో ఎదార్దుమ్ లట్టబై నాయ్.

దేముడుచి గుడితె యేసు బోదన కెర్లిసి

14 జలె, సగుమ్ పండుగ కేడ్డి పొది, యేసు దేముడుచి గుడితె గెచ్చ, తెడి పెన, బోదన కెరుక దెర్లన్.

15 జోచి బోదన నూన కెర, యూదుల్చ వెల్లెల మాన్సుల్ "అమ్చి తెన్ ఈంజో మాన్సు కెయ నే నదు కెర్లె కి, బలే తెలివి తెన్ బోదన కెర్తయ్, కిసి?" మెన ఆచారిమ్ తెన్ లట్టబన్.

16 జాచి రిసా యేసు జోవయింక కిచ్చో జబాబ్ దిలన్ మెలె, "ఆవ్ కెర్లి బోదన ఆవ్ ఉచర్లిసి నెంజె. ఈంజ అంక తెద్రయ్లోసాచి బోదన.

17 అంక తెద్రయ్లోసాచి ఇస్టుమ్ రితి కెరుక కో కోర్ప జవుల గే, జెచ్చి అంచి బోదన నూనె, జేవ్ 'దేముడు సికడ్లిసి జయెదె గే, నాయ్ మెలె, ఆవ్ ఉచర్లిసి జయెదె గే' జోవయింక పెట్టి చినుల.

18 గవురుమ్ ఆననుక ఆస జలన, జలె, జేవ్ జేవ్చి ఉచర్లిసి సికడుల. గని, జోక తెద్రయ్లోసాచి గవురుమ్ దెకవుక ఆస జలోసా జలె, సత్తిమ్చో జయెదె, జోతె కిచ్చో అబద్దుమ్ తయె నాయ్.

19 "మోసె పూర్గుమ్చో దేముడుచ ఆగ్గుల్ తుమ్చి రిసా దేముడుచ ఆగ్గుల్ రెగ్ల దిలన్. గని ఒత్త తిల ఆగ్గుల్ రితి తుమ్చితె కో కి నిదానుమ్ కెర్పు నాయ్. నెంజెలె, కిచ్చొక అంక మారుక కోర్ప జతను?" మెన సంగిలన్.

20 యేసు దస్సి సంగితికయ్, ప్రెజల్ తుక "బూతుమ్ దెర అస్సె, కిచ్చొగె, చి దస్సి సంగితసి! కో తుక మారుక కోర్ప జతతి?" మెన సంగిల.

21 జలె, యేసు జోవయింక, "ఆవ్ జా సెలవ్ కడన్లి దీసి జో రోగిక చెంగిల్ కెర్లి కామ్ కెర్లయ్, చి 'కామ్ కెర సెలవ్ కడన్లి దీసిచి ఆగ్గు పిట్టయ్లో' మెన తుమ్ ఎత్కిజిన్ అంచి రిసా బమ్మ జతను.

22 తుమ్ ఉచర. 'తుమ్ యూదుల్క మున్సుబోద జెర్మిలె, జోవయింక దేముడుచో మాన్సు జవున్' మెన సున్నతి కెరనుక, జో బోదక ఇదిలిన్ సుద్ది కెర+ మెన మోసె పూర్గుమ్చో రెగిడ్లె, గెద. జా కారిమ్, జలె, మోసె తెన్ మొదోల్ జలిసి నెంజె. జోచి కంట అగ్గెచ పూర్గుల్ కి దస్సి

కెర్లె తిల. గని సున్నతి కెర మెన ఆగ్గుల్తె రెగిడ్లన్. జాకయ్, ఏక్ నాడు జెర్మ అట్టు పొదుల్ జలిసి సెలవ్ కడన్లి దీసి సేడ్లె, జా ఆగ్గు పిట్టయ్ నాయ్ మెన, జయ్యి దీసి, సెలవ్ కడన్లి దీసి జలెకి, జా కామ్ కెర్లను.

23 జలె, 'మోసె రెగిడ్లె దేముడుచి ఆగ్గుల్ తెన్, ఈంజ ఏక్ ఆగ్గు పిట్టయ్ నాయ్' మెన సెలవ్ కడన్లి దీసి కి ఏక్ మాన్సుకి సున్నతి కెరుక జయెదె జలె, సెలవ్ కడన్లి దీసి కి ఏక్ ఒండోయి మాన్సుచి అగ్గె చెంగిల్ కెరుక నెంజె గె?

24 జలె, కిచ్చో జవున్ జర్లు జా తిలె, ఇసి గే దస్సి గే డీసిలి రిసా 'ఆగ్గు పిట్టి' జవున్, నాయ్ మెలె, 'ఆగ్గు పిట్టె నాయ్' రిత ఆగ్గుల్క నంపజా అస్సున్. దస్సి, అర్దుమ్ నెంతె, కన్కారుమ్ నెంతె తీర్పు కెరుక పొన. ఆగ్గుచి అర్దుమ్, జర్లు జలిన్చి అర్దుమ్, సరిగా ఉచర తీర్పు కెర" మెన జేవ్ వెల్లెల మాన్సుల్క యేసు సంగిలన్.

యేసుచి రిసా ఈంజోయి క్రిస్తు గే

25 యేసు దస్సి బోదన కెర్లికయ్, యెరూసలేమ్ పట్టుమ్చ మాన్సుల్ సగుమ్జిన్ " 'జోక మారుమ్' మెన వెల్లెల మాన్సుల్ కోర్ప జలోసా ఈంజోయి, కిచ్చొగె.

26 గని, ఈందె, జోవయింక మొక్కె దయిరిమ్ తెన్ బోదన కెర్తయ్, గని జోక 'పోసి' కి మెంతి నాయ్. జలె, జోక 'తెద్రయిందె' మెన దేముడు సంగిలో 'దొర్కు జలో రచ్చించుప కెర్లొసా జతో క్రిస్తు ఈంజోయి' మెన ఏక్ వేల అదికారుల్క రుజ్జు జా అస్సె గె?

27 నాయ్, కిచ్చొగె. మెలె, ఈంజో మాన్సు కేనె తెంతో అయ్లో గే జానుమ్. గని క్రిస్తు అయ్లెగిన, కేనె తెంతో జెతయ్ గే కక్క నేన్తె జయె నాయ్" మెన ఉచర లట్టబన్.

28 జేవ్ ఉచర్లిసి యేసు జాన్లి రిసా, దేముడుచి గుడితె బోదన కెర్లె తిలి పొది, ఇసి మెన కేక్ గలన్. " 'జోక జానుమ్! జో కేనె తెంతో అయ్లో గే అమ్ జానుమ్!' మెన, అంచి రిసా తుమ్ ఉచర్లను జలె. గని నేన్పు. ఆవ్ అవ్వె జెంక నాయ్. అంక తెద్రయ్లోసా సత్తిమ్ తిలోసా. జోక తుమ్ నేన్పు.

29 ఆవ్ మాత్రుమ్, జోక జాని. కిసి మెలె, ఆవ్ జోతె తెంతో ఉత్త అయ్లయ్. జోయ్యి అంక తెద్రయ్లన్" మెన సంగిలన్.

30 యేసు దస్సి సంగితికయ్, జేవ్ వెల్లెల మాన్సుల్ "జోక జేలి కెరుమ!" మెన ఉచర్ల, గని జోక కో దెర్లి నాయ్. కిచ్చొక మెలె, అబ్బొన్తె జో గెతి సమయుమ్ తెదోడి జెంక నేతయ్.

31 యేసుక వెల్లెల మాన్సుల్ దస్సి విరోదుమ్ జలెకి, మాములుమ్ ప్రెజల్, జలె, ఒగ్గర్జిన్ జోక నంపజల. "ఈంజో మాన్సు ఒగ్గర్ ఒగ్గర్ వెల్లెల కమొ కెర్తయ్. క్రిస్తు మెలో అమ్చో రచ్చించుప కెర్లొసా అయ్లె ఇసి తయెదె.

† 7:22 7:22 సున్నతి ‡ 7:27 7:27 'నజరేతు గవ్వె తెంతో అయ్లో' మెన ఉచర్లతి. నేన కెర 'జానుమ్' మెంతి గని పరలోకుమ్ తెంతో అయ్లో గెద.

అన్నె వెల్లెల కమె కెరుక కో తెరితి గే? ఈంజో జొయ్యి, కిచ్చొగే” మెన నంపజల.

32 ప్రెజల్ యేసుక నంపజలి రితి జా ఎక్కిలో తెన్ ఎక్కిలో ఇసి తిరిమ్ లట్టబంతిసి పరిసయ్యుల్ సూన్లచి రిసా “జోక జేలి కెరుక దెర జా!” మెన దేముడుచి గుడితెచ జమాన్లుక వెల్లెల పూజర్లు చి పరిసయ్యుల్ తెద్రయ్ల.

33 జలె, జా మదెనె యేసు అన్నె బోదన కెరై తా, “అన్నె సగుమ్ దీసల్ తుమ్చి తెన్ తయిందె, చి తెదొడిక అంక తెద్రయ్లోసాతె అన్నె ఉట్ట గెచ్చొందె.

34 ఆవ్ ఉట్ట గెలి వడ్డో తుమ్ అంక చజితె, గని అంచితె పాచ్చుక నెతుర్పు. ఆవ్ కేనె తయిందె గే, తుమ్ ఒత్త జెంక నెతుర్పు” మెన సంగిలన్.

35 జాకయ్ యూదుల్చ వెల్లెల మాన్సుల్ ఎక్కిలోక ఎక్కిలో “అమ్ నే పావితీ రితి ఈంజో కేనె గెచ్చొందె? గ్రీకు దేసిమి తిల చెదుర్పు జల అమ్చ యూదుల్తె గెచ్చొ, గ్రీసు దేసుమ్చ సుదల్క బోదన కెరైదె గే?

36 నాయ్ మెలె, ‘తుమ్ అంక చజితె కి అంచితె పాచ్చుక నెతుర్పు’ మెన ‘కేనె తయిందె గే, తుమ్ ఒత్త జెంక నెతుర్పు’ మెన కిచ్చొక సంగిలన్?” మెన లట్టబనుక దెర్ల.

37 జా పండుగ్చి ఆకర్ దీసి అయ్లి. జాక ‘వెల్లో దీసి’ మెనుల. జా దీసి, ఎత్తిజిన్ బెర తిలిన్తె యేసు టీచ జా, ఇసి మెన కేక్ గలన్. “కక్క జలెకు తాన్ కెరై, అంచితె జా పివుసు.

38 కో అంక పూర్తి నంపజవుల గే, దేముడుచి కొడొతె రెగ్గయ్లి రితి,

జోచి పెట్టి తెడి ఊంట పుట్టి రితి జా, జివ్ దెతో పాని జోచి ఆత్మ చెంగిల్ కెరై తయెదె”

మెన, ఎత్తిజిన్ సూన్తి రితి యేసు సంగిలన్.

39 ‘జివ్ దెతో పాని’ మెన కిచ్చొచి గుర్తుక సంగిలన్ మెలె, దేముడుచి సుద్ది తిలి ఆత్మచి గుర్తుకయ్. యేసు మొర దేముడు అబ్బొన్తె అన్నె గెలె, జోక కో నంపజా తవుల గే, జోచి జా ఆత్మజోవయింపి పెట్టి జెయెదె. జలె, యేసు తెదొడి అబ్బొన్తె అన్నె గెచ్చుక, గవురుమ్ జంక, నేతయ్చి రిసా, జో సంగిలి జా ఆత్మ తిలిన్ తెదొడి జర్లు జంక నేతయ్.

40 యేసు దస్సి బోదన కెర్తికయ్, సూన కెర జోచి రిసా ప్రెజల్ సగుమ్జిన్ కిచ్చొ మెల మెలె, “ ‘తెద్రయిందె’ మెన దేముడు సంగిలో జోచ కబుర్లు సంగుక జెంక తిలోసా ఈంజో నిజుమ్ జా తయెదె” మెన సంగిల.

41 గని అన్నె సగుమ్జిన్ “తెద్రయిందె మెన దేముడు సంగిలో క్రీస్తు రచ్చొంచుప కెర్తొసా జా తయెదె” మెల, గని

“నెంజె. ఈంజో గలిలయ ప్రాంతుమ్చొ మాన్సు. క్రీస్తు, జలె, గలిలయతె జెర్తుక నెంజె.

42 ఈందె, దేముడుచి కొడొతె రెగిడ్లి రితి, అమ్చొ రానొ జలో దావీదు పూర్లుమ్చొచి సెకుమ్తె క్రీస్తు జెర్తొదె. దావీదుచి గావ్ బేత్లెహేమ్. ఒత్తయ్ జో జెర్తుక అన్నె. దస్సి జలె ఈంజో క్రీస్తు జయె కీనాయ్” మెన సంగిల.

43 దస్సి జతికయ్, జోచి రిసా ప్రెజల్ దొన్ని మెన్ను జలె.

44 జోవయింతెన్ సగుమ్జిన్ “జోక జేలి కెర్తు!” మెన కోరవ జలె. గని జోక దెరుక మెన కో చడితి కి *నాయ్.

దేముడుచి గుడిచ అదికారుల్ కోపుమ్ జలిసి

45 తెదొడి, జోక దెర్తి రిసా గెచ్చొ తిల జమాన్లు వెల్లెల పూజర్లు చి పరిసయ్యుల్ తిలిన్తె అన్నె అయ్ల. జెతికయ్, జేవ్ పరిసయ్యుల్, పూజర్లు, “కిచ్చొక జోక దెర ఆన్సు నాయ్?” మెన గోల కెర్ల.

46 గోల కెర్తికయ్, జేవ్ జమాన్లు, “కేన్ మాన్సు కెయ్ తెద్ది చెంగిల్చి బోదన సంగె నాయ్” మెన సాచి సంగిల.

47 పరిసయ్యుల్ కోపుమ్ జా జోవయింక కిచ్చొ జబాబ్ దిల మెలె, “తూమ్ కి జోచ కొడొక మోసిమ్ జలదు గే?

48 అమ్ పరిసయ్యుల్తె జవున్, అమ్చ అదికారుల్తె జవున్ కో జలెకు జోక నంపజా అస్సుమ్ గే? నాయ్, గెద. దస్సి జలె, తూమ్ కిచ్చొక జోక నంప కెరుక?

49 మాములుమ్ ఈంజేవ్ ప్రెజల్ నంప కెర అస్సి, గని మోసి తెన్ దేముడు దిలి ఆగ్గుల్ నేన్తి జేవ్క కిచ్చొ పున్నిమ్ నాయ్, దేముడుక నేన్తి” మెన ప్రెజల్ నంపజలిన్క వెల్లెల మాన్సుల్ నిస్కారుమ్ సంగిల.

50 యేసుతె అగ్గె రాతి లుంకచోరు కిచ్చొగె పుసుక గెచ్చొ తిలో నీకొదేమె మెలో పరిసయ్యుడు, జలె, జో వెల్లెల మాన్సుల్తె అన్నె.

51 అన్నె తిల జేవ్ వెల్లెల మాన్సుల్క జో, జలె, “కేన్ జలెకు మాన్సుక నేరిమ్ వయడ తిలె, దేముడు మోసి తెన్ దిలి ఆగ్గుల్తె రెగ్గయ్లి రితి జో మాన్సు సంగన్తి సాచి నే సూన్తె అగ్గె, జో కిచ్చొ కెర్లొ గే నాయ్ గే, రుజ్జు నే దెకయ్తె అగ్గె జోక తీర్పు కెర సిచ్చొ కెరుక అమ్చి తెన్ నాయిమ్ గే? నాయ్, గెద” మెన జాగర్త సంగిలన్.

52 జేవ్ అన్నె పండితుల్ నీకొదేమొక కిచ్చొ జబాబ్ దిల మెలె, “తూయి కి గలిలయచొ గే, చి జోచి వచ్చెనచి కోడు తుయి సంగితసి? దేముడుచి కొడొ సరిగా సదు కెరు, చి దేముడుచ కబుర్లు సంగితస కో కి † గలిలయతె జెర్తితి నాయ్ మెన దెకితె” మెన సంగిల.

53 తెదొడి ఎత్తిజిన్ జోవయింప గెరలె ఉట్ట గెల.

§ 7:42 7:42 నిజుమి బేత్లెహేమ్తె, దావీదు రానొచి సెకుమ్తె జెర్తిలన్; మత్తయి 1:1, 2:1; గని నేన కెర దస్సి మెల. * 7:44 7:44 జో అబ్బొన్తె అన్నె గెతి సమయ్యుమ్ జంక నేతయ్చి రిసా దెరుక నెతిర్ల. అన్నె సగుమ్ సుట్టు కి వెల్లెల మాన్సుల్ అల్లర్ కెరుక ఉచ్చర్లె కి, నెతిర్ల; లూకా 4:29-30, యోహాను 7:30, 8:20. జోవయింప సమయ్యుమ్ జా అయ్లి పొది జేవ్ దెరుక జో ఒప్పుణ్ణొ; మత్తయి 26:53-54, మార్కు 14:41, యోహాను 18:4, 6. † 7:52 7:52 గని గలిలయతె జెర్తి నాయ్, యూదయ ప్రదేసిమ్చి బేత్లెహేమ్ పట్టుమ్తె జెర్తిలన్, గెద.

8

వెల్లెల మాన్సుల్ తేర్బోదక దెర యేసుతె కడ ఆన్లసి

1 *యేసు, దేముడుచి గుడి తెంతో బార్ జా, జేవ్చి మొక్కె తిలి †బలీవ మెట్టయ్ ఎక్కిలో గెలన్.

2 చి రాత్ పాయితికయ్, దేముడుచి గుడితె అన్నె ఉట్ట అయ్లో. అయ్లె, ఒగ్గర్జన్ జనాబ్ అయ్ల, చి జో వెన కెర, జోవయింక బోదన కెరుక దెర్లన్.

3 యేసు బోదన కెరె తతికయ్, మోసే తెన్ దేముడు దిలి ఆగ్నల్ సికడ్డన, పరిసయ్యుల్, బెద జా, ఏక్ తేర్బోదక కడ ఆన్ల. జా తేర్బోద లంజె జతె తతికయ్, దెర తిల. జలె, బెర తిల మాన్సుల్చి నెడిమి జాక టీచడ్ల.

4 యేసుక కిచ్చొ మెల మెలె, “గురుబాబు ఈంజ తేర్బోద లంజె జతె తతికయ్, దెర్ల.

5 ‘ఇన లంజె జలనక పత్రల్ తెన్ పెట మారుక అస్సె’ మెన అమ్చొ మోసే పూర్ణమచొచి అత్తి రెగిడ్లి దేముడుచి ఆగ్నల్తె అమ్క ఆగ్న దిలన్. జలె, ఈంజ తేర్బోదచి రిసా తూయి కిచ్చొ తీర్పు సంగితె?” మెన యేసుక పుసిల.

6 కిచ్చొక దస్సి పుసిల మెలె, జో కిచ్చొ జవున్ తప్పు సంగిలె, నేరిమ్ వయడుమ! మెన దస్సి కెర్ల. యేసు మాత్రుమ్, వంపొ జా, బుయ్యె ఈంటి తెన్ కిచ్చొగె రెగిడ్లన్.

7 జేవ్ జోక పుసుక ములితి నాయ్ చి రిసా యేసు టీచ, జోవయింక, “తుమ్చితె కో కిచ్చొ పాపుమ్ నే కెర తయెదె గే, జోయ్యి తొలితొ చి పత్తురు జాక గలుక జయెదె” మెన సంగిలన్.

8 చి అన్నె వంపొ జా, బుయ్యె అన్నె కిచ్చొగె రెగిడ్లన్.

9 జలె, జో సంగిలిసి ఎత్కిజిన్ నూన అర్దుమ్ కెరన, తొలితొ వెల్లెల మాన్సుల్, పడ్డె ఎత్కిజిన్ ఎక్కిలోచి పట్టి ఎక్కిలో వర్ల తెన్ బార్ జా, ఉట్ట గెల, చి టీచ తిలి జా తేర్బోదక పిట్టవ, యేసు ఎక్కిలో ఒత్త తిలొ.

10 జలె, యేసు అన్నె ఉప్పిరి దెక, జా తేర్బోదక, “అమ్మ, కెతె జేవ్ ఎత్కిజిన్? కో తుక నేరిమ్ వయడ్డి నాయ్?” మెన సంగితికయ్,

11 జా తేర్బోద యేసుక, “బాబు, కోయి నాయ్!” మెన సంగిలి. తెదొడి యేసు జాక, “ఆవ్ కి తుక నేరిమ్ వయడి నాయ్. తుయి గో, చి అప్పె తెంతొ పాపుమ్ నే కెరె జి!” మెన సంగ తెద్రవ దిలన్.

“ఈంజ లోకుమ్చక దొర్కు జలి ఉజిడి ఆవ్వి”

12 అన్నెక్ సుట్టు యేసు బోదన కెరె తత్తికయ్ కిచ్చొ మెన సంగిలన్ మెలె, “ఈంజ లోకుమ్చక దొర్కు జలి ఉజిడి ఆవ్వి. కో అంచి పట్టి ఇండుల గే, అందర్తె తిలి

రితి అందర్బుద్ది ఇండితి నాయ్, గని జీవ్ దెతి ఉజిడి జోవయింక దొర్కు జా జోవయించి పెట్టి తయెదె” మెన సంగిలన్.

13 జో దస్సి సంగితికయ్, పరిసయ్యుల్ జోక, “తుచి రిసా తుయి సాచి సంగితసి; తుచి సాచి సత్తిమచి నెంజె” మెన సంగిల.

14 జలె, యేసు జోవయింక, “ఆవ్ సొంత సాచి సంగన్లె కి, అంచి సాచి సత్తిమి. కిచ్చొక మెలె, ఆవ్ కేనె తెంతొ అయ్లయ్ గే, కేనె అన్నె గెతసి గే, ఆవ్ జాని గని కేనె తెంతొ ఆవ్ అయ్లయ్ గే, కేనె గెతసి గే, తూమ్ నేన్సు.

15 తూమ్ అవ్వి కెర మాన్సు ఉచర్తి రగుమ్ తీర్పు కెర్లను, గని ఆవ్ అప్పెచి మట్టుక కక్క తీర్పు కెరె నాయ్.

16 గని ఆవ్ తీర్పు కెరుక జలె, అంచి తీర్పు సత్తిమ్ జయెదె. కిచ్చొక మెలె, ఆవ్ అవ్వి కెర కి ఎక్కిలో కి తీర్పు కెరె నాయ్. ఆవ్, అంక తెద్రయ్లోసా తెన్ని తీర్పు కెరుమ్దె.

17 “ ‘కో దొగుల ఎత్కి రితి సాచి సంగుల గే, జా సాచి సత్తిమ్చి జయెదె’ మెన తుమ్చి మోసే పూర్ణమచొచి అత్తి దేముడు రెగ్డయ్ల †ఆగ్నల్తె రెగ్డ అస్సె.

18 జలె, ఆవ్ సొంత సాచి సంగితసి, చి అంక తెద్రయ్లో అబ్బొకి అంచి రితి ఎక్కి రితి సాచి సంగితయ్” మెన వెల్లెల మాన్సుల్క యేసు జబాబ్ దిలన్.

19 జేవ్ జోక, “అబ్బొది కేతె?” మెన పుసిల. పుసితికయ్, యేసు జోవయింక, “తుమ్ అంక నేన్సు. అంచొ అబ్బొక కి నేన్సు. అంకయ్ జాన్తదు జలె, అబ్బొక కి జాన్తదు” మెన సంగిలన్.

20 బోదన కెర కెర ఇసి సంగిలి పొది యేసు కేనె తిలన్ మెలె, దేముడుచి గుడితెచి డబ్బుల్ పెట్టల్ తిలి గదితె తిలన్. గని జోక జేలి కెర్తి నాయ్. కిచ్చొక మెలె, జో దేముడు అబ్బొన్తె గెతి సమయ్యుమ్ జంక నేతయ్.

21 జేవ్ వెల్లెల మాన్సుల్క యేసు అన్నె, “ఆవ్ ఉట్ట గెచ్చొంది. ఉట్ట గెలె, తుమ్ అంక చజిలె కి, తుమ్చ పాపల్ తెన్ని మొర గెతె. మొర గెలె, ఆవ్ గెతినెతె తుమ్ జెంక నెతుర్పు” మెన సంగిలన్.

22 యూదుల్చ జేవ్ వెల్లెల మాన్సుల్ ఎక్కిలో తెన్ ఎక్కిలో కిచ్చొ మెల మెలె, “ ‘ఆవ్ గెతినెతె తుమ్ జెంక నెతుర్పు’ మెన జో సంగిలిసి కిచ్చొక? జో అత్య కెరన ఎట్టొ తొ గెచ్చెదె గే?” మెన లట్టబన్ల,

23 జలె, యేసు జోవయింక, “తుమి ఎట్టొచ మాన్సుల్, ఆవ్ ఉప్పిర్ తెంతొచొ మాన్సు. తూమ్ ఈంజ లోకుమ్చ కమె కెర్లన, ఆవ్ ఈంజ లోకుమ్చొ మాన్సు నెంజి.

* 8:1 8:1 యోహానుచి సాచి రెగిడ్ల గ్రీకు జాన తెన్ తొలితొ రెగిడ్ల సగుమ్ పుస్తకల్తె ఈంజ మత్తెలి తయె నాయ్. నెంజెలి, వేరతె తయెదె. సగుమ్తె యోహాను 2:25చి పడ్డె తయెదె. † 8:1 8:1 ఒత్త బలీవ పండ్లు రూకుల్ తవుల, చి ఇసి నావ్ తయెదె. ‡ 8:17 8:17 తెలుగు బైబిల్తె ధర్మశాస్త్రమ్ మెలె, మోసీచి అత్తి దేముడు రెగ్డయ్ల ఆగ్నల్ మెన అమ్ జానుమ్. ఈంజ కొడె ఎత్కి బైబిల్తె అగేచి పావ్ పుస్తకమతె రెగ్డయ్ జా అస్సె. ఈంజ దెకవుక మెన కుపియ్ జానతె నొయి ప్రమానుమతె మోసే పూర్ణమచొచి అత్తి రెగిడ్లి దేముడుచి ఆగ్నల్ మెన రెగ్డవ అస్సె.

24 ‘తుమ్చ పాపల్ తెన్ని మొర గెతె’ మెలయ్. కిచ్చొక మెలె ‘దేముడు తెద్రయ్లో క్రిస్తు, రచ్చించుప కెర్తొసా, ఈంజొయి’ మెన అంక తుమ్ నే నంపజలె, నిజుమి తుమ్చ పాపల్ తెన్ మొర గెతె, పాపుమ్తె గెతె” మెన సంగిలన్.

25 జోక, జేవ్ వెల్లెల మాన్సుల్ యేసుక “తుయి కొన్సో?” మెన పుసిల. యేసు జోవయింక, “ఆవ్ కొన్సో జయిందె గే ఆవ్ తుమ్క అగ్గె తెంతో సంగితసి గెద, జొయ్యి ఆవ్.

26 తుమ్చి రిసా, తుమ్ కెర్త కమొచి రిసా ఆవ్ ఒగ్గర్ ఒగ్గర్ తీర్పు సంగుక జయెదె. గని అంక తెద్రయ్లోసా సత్తిమ్చొ, చి లోకుమ్చక ఆవ్ నూనయ్తిసి కిచ్చొ మెలె, అంక తెద్రయ్లోసాతెయి ఆవ్ నూన్లిసి” మెన సంగిలన్.

27 గని, ‘తెద్రయ్లోసా’ మెన దేముడు అబ్బొన్చి రిసా సంగితయ్ మెన వెల్లెల మాన్సుల్ అర్దుమ్ కెరంతి నాయ్, చి రిసా

28 యేసు అన్నె, “ఆవ్ మాన్సు జా జెర్మున్ అయ్లోసాక తుమ్ టీచెడ్డె. టీచెడ్డె, అంక ‘జొయ్యి’ మెన పడ్డొక చినితె. తెద్రొడక అంక ‘జో’ అవ్వి కెర్లిసి కిచ్చొయ్ నాయ్, గని దేముడు అబ్బొసి సికడ్లి రితి కెర్తె తత్తయ్” మెన అంచి రిసా అర్దుమ్ కెరంతె.

29 అంక తెద్రయ్లోసా అంక తోడు అస్సె, అంచి తెన్ అస్సె. జో కెయ్ అంక ములె నాయ్. కిచ్చొక మెలె, ఆవ్ కెయ్క తెయ్క జోచి ఇన్సుమ్ రితి కెర్తసి” మెన సంగిలన్.

30 జో దస్సి సంగితె తతికయ్, ఒత్త తిలసతె ఒగ్గర్జన్ జోవయింక నంపజా గెల.

జోక నంప కెరుక దెర్లసక యేసు బోదన కెర్లిసి

31 జోక నంపజంక దెర్ల వెల్లెల మాన్సుల్క యేసు తెద్రొడి, “ఆవ్ సంగిలి రితి ఇండితె తస్తె జలె, నిజుమి అంచ సిస్సుల్ జస్తె.

32 చి సత్తిమ్ జాన్తె, చి జా సత్తిమ్ తుమ్క విడ్డల్ కెరెదె” మెన సంగిలన్.

33 గని, విడ్డల్ జతిసిక మాములుమ్ ఈంజ లోకుమ్తె జతిన్చి అర్దుమ్ జేవ్ కెరన, జోక “అమ్ అబ్రాహామ్ పూర్లుమ్చొచి సేకుమ్తెచ మాన్సుల్చి రిసా, కక్క కి కెయ్ కి గొతిమాన్సుల్ జము నాయ్. జాకయ్ ‘విడ్డల్ జస్తె’ మెన తుయి కిచ్చొక అమ్క సంగిలది?” మెన బమ్మ జా పుసిల.

34 యేసు జోవయింక, “తుమ్క ఆవ్ నిజుమి కచితుమ్ కిచ్చొ సంగితసి మెలె, కో కిచ్చొ పాపుమ్ కెరుల గే, పాపుమ్క గొతిమాన్సుల్ జా అస్తి.

35 గొతిమాన్సుల్, జలె, సావుకరిచొ గేరు కెయ్క తెయ్క తంక జోవయింక సెలవ్ నాయ్. గని, సావుకరిచొ సొంత పుత్తుసి జలె, కెయ్క తెయ్క అబ్బొన్చి గెరి తయెదె.

36 తుమ్ కెర్త పాపల్క తుమ్ దెర్ను సేడ్లిసి తెంతో దేముడుచొ పుత్తుసి తుమ్క విడ్డల్ కెర్లిగిన, నిజుమి విడ్డల్ జస్తె.

37 “అబ్రాహామ్ పూర్లుమ్చొచి సేకుమ్తె తుమ్ జెర్మ అస్సున్ మెన జాని, గని జోచి సేకుమ్తె తుమ్ జెర్మిలెకి, అంచి కొడొ తుమ్చి పెట్టి తియనుక నెనున్చి రిసా, అంక మారుక కోర్ప జా అస్సున్.

38 అంచొ అబ్బొతె ఆవ్ దెకిలిన్క ఆవ్ సాచి సంగితసి. తూమ్ మాత్తుమ్, తుమ్చొయ్ అబ్బొది సంగిలిసి కెర్తసు” మెన వెల్లెల మాన్సుల్క యేసు సంగిలన్.

39 యేసు ఇసి సంగితకయ్, జేవ్ వెల్లెల మాన్సుల్ జోక, “అబ్రాహామ్ అమ్చొ అబ్బొ!” మెన సంగిలచి రిసా యేసు జోవయింక అన్నె, “తుమ్ అబ్రాహామ్చ బోదల్ జతదు జలె, అబ్రాహామ్ కెర్ల కమొ తూమ్ కి కెర్తదు.

40 దేముడుతె ఆవ్ నూన్లి సత్తిమ్ తుమ్క ఆవ్ సంగ అస్సి, గని అప్పె అంక మారుక తుమ్ కోర్ప జా అస్సున్. అబ్రాహామ్ దస్సి కెరె నాయ్.

41 గని తుమ్చొ సొంత అబ్బొది కెర్ల కమొ తుమ్ కెర్తసు” మెన సంగిలన్. జేవ్ జోక “ఆమ్ లంజెపెట్టి జెర్మిలన నెంజుమ్. అమ్క ఎక్కిలో అబ్బొ జయెదె, మెలె, దేముడు” మెన సంగిల.

42 యేసు జోవయింక, “దేముడు తుమ్చొ అబ్బొది జతొ జలె, తుమ్ అంకయ్ ప్రేమ కెర్తదు. కిచ్చొక మెలె, ఆవ్ జోచి పెట్టి తా జోతె తెంతో బార్ జా ఉట్ట అయ్లయ్. ఆవ్ అవ్వి జెంక నాయ్, జొయ్యి అంక తెద్రయ్లో.

43 ఆవ్ సంగితిసి తుమ్ కిచ్చొక అర్దుమ్ కెరన్ను నాయ్? కిచ్చొక మెలె, అంచ కొడొతెచి సత్తిమ్ తుమ్క అల్లర్ కెర్తయ్, చి నూనుక ఓర్పుప జంక నెతుర్పు.

44 తుమ్చొ అబ్బొది సయ్తాన్. తుమ్ జోచ మాన్సుల్ జా, జో కీసాచొ గే, తూమ్ కి దస్సచ. తుమ్చొ అబ్బొద్చ ఆసల్ తీర్పుప కెరుక తుమ్ కోర్ప జా అస్సున్. మొదొల్ తెంతో జో కూని కెర్తొసా. సత్తిమ్, జోతె, ఎదిలి కి బెదితి నాయ్. జోతె కిచ్చొ సత్తిమ్ కి నాయ్. జో అబద్దుమ్ సంగుక, జోచి సొంత అబద్దుమ్ జొయ్యి లట్టబెదె. జో పూర్తి అబద్దుమ్చొ. జో అబ్బొదల్క అబ్బొసి.

45 జాకయ్, ఆవ్ సత్తిమ్ సంగితసిచి రిసా, ఆవ్ సంగితిసి తుమ్ నంప కెర్పు నాయ్.

46 ఆవ్ కెయ్యు కేన్ పాపుమ్ కెర్లయ్ గే, చి తుమ్తె కో అంక ‘అబద్దుమ్చొ’ మెన సాచి సంగుక జయెదె? కెయ్ కేన్ పాపుమ్ కెరి నాయ్, చి కో కి దస్సి సాచి సంగుక నెతుర్పు. జలె, ఆవ్ సత్తిమ్ సంగితసి జలె, తుమ్ అంక కిచ్చొక నంప కెర్పు నాయ్? తుమ్ ఉచర.

47 దేముడుచ మాన్సుల్కో జవుల గే, జో దేముడుచ కొడొ నూనుల. తూమ్ కిచ్చొక జోవయించ కొడొ నూన్సు నాయ్ మెలె. తుమ్ జోవయించ మాన్సుల్ నెంజుసు” మెన వెల్లెల మాన్సుల్క యేసు సంగిలన్.

వెల్లెల మాన్యుల్ యేసుక పత్రల్ గల మారుక ఉచర్లసి

48 యూదుల్చ జేవ్ వెల్లెల మాన్యుల్, జలె, జోక “సీసమరయ సుదొ జస్తె, చి తుక బూతుమ్ దెరె అస్సె మెన అమ్ ఉచర్లసి సత్తిమ్, కిచ్చొగె” మెన సంగిల.

49 జేవ్ దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “అంక బూతుమ్ దెరె నాయ్. ఆవ్, మాత్రుమ్, దేముడు అబ్బొక గవురుమ్ కెర్తసి, గని తూమ్ అంకయ్ గవురుమ్ కెర్చు నాయ్.

50 అంచి రిసా అంక గవురుమ్ నాయ్. గని అంక గవురుమ్ కెర్తొ ఎక్కిలొ అస్సె. జొయ్యి అంచి రిసా తుమ్చి రిసా తీర్చు కెర సత్తిమ్క రుజ్జు దెకయెదె.

51 “జలె, తుమ్క ఆవ్ నిజుమి కచితుమ్ కిచ్చొ సంగితసి మెలె, అంచ కొణొ కో నిదానుమ్ కెరుల గే, కెయక కి * మొర్తి నాయ్” మెన సంగిలన్.

52 దస్సి సంగితికయ్, జేవ్ వెల్లెల మాన్యుల్ జోక కిచ్చొ మెల మెలె, “అప్పె రుజ్జు అయ్లి. నిజుమి తుక బూతుమ్ దెరె అస్సె. అబ్రాహామ్ మొర గెలన్. దేముడుచ కబుర్లు సంగిల పూర్ణుమ్చ కి మొర గెల, గని ‘అంచ కొణొ కో నిదానుమ్ కెరుల గే, కెయక † మొర్తి నాయ్’ మెన తుయి సంగితసి!

53 అమ్చొ పూర్ణుమ్చొ అబ్రాహామ్చి కంట తుయి వెల్లొ గే? జో మొర గెలొ. దేముడుచ కబుర్లు సంగిలన కి మొర గెల. తుయి కొన్సొ మెన సంగితసి? సంగు!” మెన యేసుక పుసిల.

54 జలె, యేసు జోవయింక, “ఆవ్ సొంత గవురుమ్ సంగన్లెగిన, అంచి గవురుమ్ ఆరిచి. జలె, ‘అమ్చొ దేముడు’ మెన అంచొ అబ్బొచి రిసా తుమ్ సంగితను. జొయ్యి అంక గవురుమ్ కెర్తయ్.

55 గని జోక తుమ్ అగ్గె తెంతొ నేన్సు. ఆవ్, మాత్రుమ్, జోక జాని. ‘జోక నేని’ మెన ఆవ్ ఏక్ వేల సంగితయ్ జలె, తుమ్చి రితి అబద్దుమ్చొ జతయ్. గని, నిజుమి జోక జాని, చి జోచి కోడు నిదానుమ్ కెర్తసి.

56 ఆవ్ ఈంజ లోకుమ్తె జెర్మ తతి దీసి దెకుక మెన తుమ్చొ పూర్ణుమ్చొ అబ్రాహామ్, జలె, ఆస తెన్ తిలన్. జలె, అబ్బొసి జలొ దేముడుచి సెలవ్ తెన్ ‡ దెకిలన్, చి సర్దనంతొసుమ్ జలన్” మెన యేసు సంగిలన్.

57 యూదుల్చ జేవ్ వెల్లెల మాన్యుల్ జోక, “తుక యాబయ్ వెర్చుల్ జంక నేతయ్. దస్సి జలె, తుయి పూర్ణుమ్చొ అబ్రాహామ్క కిసి దెక తస్తె! సీనెంజలె జో తుక దెక తయెదె గే? బెదె నాయ్!” మెన సంగిల,

58 చి యేసు, “తుమ్క ఆవ్ కిచ్చొ నిజుమి కచితుమ్ సంగితసి మెలె, అబ్రాహామ్ నే జెర్మితె అగ్గె తెంతొ ఆవ్వి తిలయ్, అస్సి” మెన సంగిలన్.

59 జో దస్సి సంగితికయ్, ‘దేముడు తెన్ సమ్మందుమ్ సంగితయ్, జా వెల్లె పాపుమ్’ మెన ఉచర, యేసుక పత్రల్ తెన్ పెట మారుక మెన, వెల్లెల మాన్యుల్ పత్రల్ వెంట్ల, గని యేసు నే దెకయ్ జతె, దేముడుచి గుడి తెంతొ బార్ జా, ఉట్ట గెలన్.

9

గుడ్డి జా జెర్మిలోసాక యేసు చెంగిల్ కెర్లసి

1 పడ్డొ యేసు జోచ సిస్సుల్ తెన్ వట్టె గెతె తిలి పొది, జెర్మన్ తెన్ గుడ్డి మాన్సు ఎక్కిలొక దెకిల.

2 జోక దెక కెర, యేసుచ సిస్సుల్ కిచ్చొ పుసిల మెలె, “గురుబాబు, ఈంజొ మాన్సు గుడ్డి జెర్మిలిసి జోచి పాపుమ్చి రిసా గే, అయ్యన్ అబ్బొచి పాపుమ్చి రిసా గే?” మెన పుసిల.

3 యేసు జోవయింక, “ఈంజొ పాపుమ్ కెర్లసి నెంజె, అయ్యన్ అబ్బొచి పాపుమ్ కెర్లసి కి నెంజె. జలె, ఇన్నెక చెంగిల్ కెర్లన్ తెన్ దేముడుచి గవురుమ్ జోచితె దెకయ్ జతి రిసాయి దస్సి జెర్మిలన్.

4 మెద్దెన్ తిలి రితి మదెనె, అంక తెద్రయ్లోసాచ కమొ ఆమ్ కెర్తె తంకయ్. కిచ్చొక ‘మెద్దెన్’ మెలయ్ మెలె, అందర్ అయ్లె, కో కి కామ్ కెరుక నెంజె.

5 ఆవ్ ఈంజ లోకుమ్తె ఇసి బుల్తె తిలి మదెనె ఈంజ లోకుమ్చక దొర్చు. జలి ఉజిడి ఆవ్వి జతసి” మెన యేసు బోదన కెర్లన్.

6 యేసు దస్సి సంగితె తా కిచ్చొ గుర్తు కెర్లన్ మెలె, బుయ్యె తుంక బుర్ల కెర, జా బుర్ల జో మాన్సుచ అంకివొతె గాఁన దా,

7 జోక “తుయి గెచ్చు సిలోయమ్ మెంతి వెల్లొ కుండితె దోవన్సు” మెన సంగిలన్. జా సిలోయమ్ మెంతి నావ్చి అర్దుమ్ కిచ్చొ మెలె, ‘తెద్రయ్లిసి’. జలె, యేసు సంగిలి రితి జో మాన్సు ఒత్త గెచ్చు, దోవన కెర, అంకివొ దెకయ్ జా, ఉట్ట అయ్లన్.

8 జో దస్సి చెంగిల్ జా ఉట్ట జెతికయ్, జోచి గవ్విచ మాన్యుల్, జో అగ్గె బిచ్చిమ్ నజితె తిలిసి దెక తిల అస్సె సగుమ్జిన్ కిచ్చొ మెన లట్టబన్ల మెలె, “ఈంజొయి అగ్గె బిచ్చిమ్ నజ నజ రోజుక వట్టె వెన తిలొసా, కిచ్చొగె” మెన లట్టబంతె తిల.

§ 8:48 8:48 యూదుల్ తెన్ ఎక్కిలొక ‘సమరయ సుదొ’ మెలె, ‘సూనొ’ మెలి రితి నిస్కారుమ్ కోడు జయెదె. సమరయ సుదొ మెలె సమరయ ప్రదేసిమ్చొ మాన్సు. * 8:51 8:51 నెంజెల ‘మొర్చు దెకితి నాయ్’. † 8:52 8:52 నెంజెల ‘మొర్చు చకితి నాయ్’. ‡ 8:56 8:56 ఎత్తి అదికారుమ్ తిలొ దేముడు దెకయ్లి సివ్తె దెకిలన్, కిచ్చొగె. § 8:57 8:57 ఈంజ మత్తెలి గ్రీకు బాస తెన్ తొలితొ రెగిడ్ల సగుమ్ పున్కల్తె ‘నెంజెలె’ తెంతొ ‘తయెదె గే?’ ఎదచి కోడు తయె నాయ్.

9 సగుమ్జిన్ “జొయ్యి” మెన సంగిల. అన్నె సగుమ్జిన్ “నెంజె, గని జోచి పొలికచొ మాన్సు” మెన సంగిల. గని జో “ఆవ్ జొయ్యి!” మెన సంగిలన్.

10 జేవ్ ప్రెజల్, జలె, జో మాన్సుక, “జలె, కిసి జా అప్పె దెకితసి?” మెన ఆచారిమ్ జా పుసిల.

11 జో మాన్సు జోవయింక, “యేసు మెంతో జో మాన్సు బుర్ల కెర అంచ అంకివొతె గాఁన దా, తుయి గెచ్చ సిలోయమ్ వెల్లో కుండితె దోవను! మెన అంక సంగిలన్. ఆవ్ గెచ్చ దోవన్లయ్, చి అంకివొ డిసిల!” మెన సాచి సంగిలో.

12 “జో అప్పె కేతె?” మెన జేవ్ జోక పుసిల, చి “ఆవ్ నేని” మెన జో సంగిలన్.

పండితుల్ గుడ్డి మాన్సుక పరిచ్చ కెర్లిసి

13 జో గుడ్డి జా జెర్మిలోసాక ప్రెజల్ పరిసయ్యుల్తె కడ నిల.

14 జలె, యేసు బుర్ల కెర జోచ అంకివొతె గాఁన చెంగిల్ కెర్లి దీసి కేన్ దీసి మెలె, జోవయించి బక్తి కెర్లి సెలవ్ కడన్లి దీసి.

15 జాకయ్, పరిసయ్యుల్ కి “తుక అంకివొ డీసయ్లిసి కిసి జర్గు జలి?” మెన పరిచ్చ కెర్ల. చి జో మాన్సు జోవయింక, “జో బుర్ల అంచ అంకివొతె గాఁసిలన్, చి ఆవ్ దోవన్లయ్, చి అప్పె దెకితసి” మెన సంగిలన్.

16 పరిసయ్యుల్తె సగుమ్జిన్ “జో మాన్సు దేముడుతె తెంతో అయ్లోసా నెంజె. కిచ్చొక మెలె, సెలవ్ కడన్లి దీసి పిట్టవన్తయ్” మెన యేసుచి రిసా తీర్పు సంగిల. గని అన్నె సగుమ్జిన్ “పాపుమ్ కెర్లొ మాన్సు, జలె, దేముడుచి అదికారుమ్ దెకయ్త గుర్తుల్ కెరుక నెత్తిర్లొ” మెల, చి దొన్ని జటుల్ జలె.

17 జాకయ్, జో గుడ్డి మాన్సుక కిచ్చొ మెన అన్నె పరిచ్చ కెర్ల మెలె, “జో తుక అంకివొ డీసయ్లి రిసా, తుయి జోచి రిసా కిచ్చొ ఉచర్లసి?” మెన పుసిల. జో జోవయింక “దేముడుచ కబుర్లు సంగితో ఎక్కిలో జయెదె” మెన జబాబ్ దిలన్.

18 జో ‘నిజుమ్ అగ్గె గుడ్డి తిలో, చి చెంగిల్ జలె’ మెన, యూదుల్చ జేవ్ వెల్లెల మాన్సుల్ మొదొల్క నంప కెర్లి నాయ్ చి రిసా జోచ అయ్యున్అబ్బొన్క బుకార్ల.

19 బుకారా కెర, జోవయింక “ఈంజొ తుమ్చొ పుత్తుది గే? జెర్మిల్ తెంతో గుడ్డి తిలో గే? దస్సి జలె, కిసి జా అప్పె దెకితయ్?” మెన పుసిల.

20 అయ్యున్ అబ్బొసి కిచ్చొ జబాబ్ దిల మెలె, “ ‘ఈంజొ అమ్చొ పుత్తు’ మెన, ‘ఈంజొ గుడ్డి జా జెర్మిలన్’ మెన జానుమ్.

21 గని అంకివొ అప్పె డిసిలిసి కిసి జర్గు జలి గే, కో జోచ అంకివొ చెంగిల్ కెర్లన్ గే, నేనుమ్. జోక తుమ్ పున దెక. జో ఉబెడొబ్ద గెద? జొయ్యి సంగెదె” మెన జబాబ్ దిల.

22 అయ్యుసి అబ్బొసి కిచ్చొక దస్సి మెల మెలె, వెల్లో మాన్సుక బితె తిల. కిచ్చొక మెలె, యేసుక ‘దేముడు తెర్తయ్లో క్రీస్తు రచ్చించుప కెర్లొసా’ మెన కో జలెకు ఒప్పన్లె, జోవయింక సబగేర్ తెంతో ఉదడ గెలుక అస్సె, చి అన్నె కెయ్క కి పెసడుక జయె నాయ్ మెన వెల్లెల మాన్సుల్ అగ్గె తెంతో ఉచర అస్తి.

23 జాకయ్, “జో ఉబెడొబ్ద. జోకయ్ పున!” మెన అయ్యున్ అబ్బొసి సంగ తిల.

24 జాకయ్ తెదొడి, గుడ్డి జా జెర్మ తిలో జో మాన్సుక జేవ్ వెల్లెల మాన్సుల్ అన్నెక్ సుట్టు బుకారా కెర జోక కిచ్చొ మెల మెలె, “జో యేసు పాపుమ్ కెర్లొసా మెన ఆమ్ జానుమ్. జాకయ్, తుయి చెంగిల్ జలిన్చి రిసా దేముడుక గవురుమ్ కెరు, గని జో యేసుక పొని” మెన ఆటంకుమ్ కెర్ల.

25 గని జేవ్ దస్సి సంగిలే కి, జో జోవయింక, “జో పాపుమ్ కెర్లొసా గే నెంజె గే ఆవ్ నేని, గని కిచ్చొ కచితుమ్ జాని మెలె, ఆవ్ అగ్గె గుడ్డి జా తిలె కి, అప్పె దెకితసి” మెన సాచి సంగిలన్.

26 దస్సి సంగితికయ్, జేవ్ జోక “తుక జో కెర్లిసి కిచ్చొ? తుచ అంకివొ కిసి చెంగిల్ కెర్లన్?” మెన అన్నెక్ సుట్టు పుసిల.

27 చి జో అన్నె జోవయింక, “ఆవ్ తెదొడి సంగిలయ్, గని తుమ్ సూన్సు నాయ్. కిచ్చొక అన్నెక్ సుట్టు సూనుక కోర్ప జతసు? తూమ్ కి ఏక్ వేల జోచ సిస్సుల్ జంక కోర్ప జతసు గే?” మెన పుసిలన్.

28 జో దస్సి పుసితికయ్, జేవ్ “తూయి జోచొ సిస్సుడు. తుచి ఇస్టుమ్! ఆమ్, మాత్రుమ్, మోసే పూర్గుమ్చొచ సిస్సుల్!”

29 మోసేచి అత్తి ఎత్తి అదికారుమ్ తిలో దేముడు జోచ కబుర్లు సంగ అస్సి మెన జానుమ్. జో యేసు జలె, కేనె తెంతో అయ్లో గే, నేనుమ్” మెన సంగిల.

30 జాకయ్, చెంగిల్ జలె జో మాన్సు జోవయింక అన్నె కిచ్చొ జబాబ్ దిలన్ మెలె, “అబ్బువొమ్మ! అంచ అంకివొ జో అన్నె డిసయ్లెకి, కేనె తెంతో అయ్లో గే తుమ్ నేన్సు గే?”

31 ‘కో పాపుమ్ కెర్లొసా జవుల గే, దేముడు జోక దెకె నాయ్ గని, కో జలెకు జోవయింక సత్తిమ్ కెరెదె గే, జోకయ్ జో ప్రబు దెకెదె’ మెన ఎత్తిజిన్ జానుమ్.

32 లోకుమ్ జెర్మయ్లి తెంతో, కేన్ జెర్మన్ గుడ్డి జా తిలో మాన్సుక కో చెంగిల్ కెర్లిసి కో సూనుక నాయ్.

33 దేముడు తెంతో ఈంజొ మాన్సు జెతో నాయ్ జలె, అంచి బాద గెచ్చువుక ఎద్దరె నెత్తిర్లొ” మెన వెల్లెల మాన్సుల్క బుద్ది సంగిలన్.

34 జో దస్సి సంగితికయ్, జేవ్ వెల్లెల మాన్సుల్ జోక కిచ్చొ జబాబ్ దిలన్ మెలె, “నిజుమి రితి పాపుమ్ తెన్

జెర్మిలోసా, తుయి అమ్మక సికడుక జయె నాయ్” మెన, జో కెయెడక కి అన్నె నే జెతి రితి సబగేర్ తెంతో జోక ఉదడ గెల.

చెంగిల్ జలో మాన్సుక యేసు దయిరిమ్ కెర్లిసి

35 జో మాన్సుక వెల్లెల మాన్సుల్ ఉదడ్డి సిచ్చ కెర్లిన్చి రిసా యేసు సూన కెర, జోక చజ దెక, “మాన్సు జా జెర్మున్ అయ్లోసాక తుయి నంపజా అస్సిసి గే?” మెన పుసిలన్.

36 జో మాన్సు యేసుక “బాబు, ఆవ్ జోక నంపజంక ఇస్టుమ్ జా అస్సి. జో కేతె?” మెన పుసిలన్, చి

37 యేసు జోక, “తుయి జోక దెక అస్సిసి. తుచి తెన్ అప్పె లట్టబ్బోసా జోయ్యి.” మెలన్.

38 జో మాన్సు “ప్రబు, ఆవ్ నంపజతసి” మెన జొకర బక్తి కెర్లొ.

39 తెదొడి యేసు ఒత్త తిల మాన్సుల్క, “ఆవ్ ఈంజ లోకుమ్తె అయ్లసి లోకుమ్చక తీర్పు కెర్లి రితి జతయ్. కిచ్చొక మెలె, ఆవ్ జెతికయ్, గుడ్డి జల మాన్సుల్ దెకితతి, చి గుడ్డి నెంజిల మాన్సుల్ గుడ్డి రితి జతతి” మెన సంగిలన్.

40 జలె, జోచి పాసి తిల పరినయ్యుల్ సగుమ్జిన్ ఈంజ కోడు సూన కెర “అమ్మక కి ‘గుడ్డి మాన్సుల్’ మెన తుయి సంగితసి గే?” మెన యేసుక పుసిల.

41 యేసు జోవయింక, “తుమ్ నిజుమి గుడ్డి జా తత్తదు జలె, తుమ్మక కిచ్చొ పాపుమ్ తత్తి నాయ్. గని ‘అమ్ దెకితసుమ్’ మెన తుమ్ సంగితసుచి రిసా తుమ్చి పాపుమ్ గెచ్చె నాయ్.

10

మెండల్సాడు అన్నె గొవుడు రకితిసి

1 “తుమ్మక కచితుమ్ నిజుమి ఆవ్ కిచ్చొ సంగితసి మెలె, మెండల్సాడు ఏక తిలె, ఎక్కిలో జా కెర గుమ్ముమ్ వాట్ నే గెతె, కూడ్ డేవ పెసిలె, జో చోరు జయెదె.

2 గని గుమ్ముమ్ వాట్ కో పెసెదె దే, జోయ్యి గొవుడు జయెదె.

3 జా సాడుక గుమ్ముమ్ రకితోసా ఎక్కిలో తిలె, గొవుడుక వాట్ తయెదె. జో గొవుడుచి అవాడ్ జో రకిత మెండల్ కి చినుల, చి జో రకిత మెండల్క జో నవ్వొ తియ తయెదె, చి జోవయింక జో రోజుక బార్ కెరెదె.

4 జోయ్యి సొంత రకిత మెండల్క బార్ కెర్లె, జో కేనె ఉదడెదె గే, జేవ్ గెచ్చుల. కిచ్చొక మెలె, జేవ్ నంపజలో గొవుడుచి అవాడ్ జేవ్ చినితతి.

5 వేర మాన్సు అయ్లె, జోవయింక అవాడ్ నేన్తి, చి నంపజతి నాయ్, చి ఉట్ట నిగుల” మెన యేసు సంగిలన్.

6 * జలె, యేసు జా సంగిలే కి, జేవ్ వెల్లెల మాన్సుల్ అర్దుమ్ కెరంతి నాయ్.

* 10:6 10:6 జేవ్ వెల్లె మాన్సుల్కయ్ ‘చోర్లు’ ‘వేర మాన్సుల్’ మెన్తయ్. పరలోకుమ్తె బెదితి జివు. యోహాను 3:15.

పరలోకుమ్చి రాజిమ్క దొర్కు జలి గుమ్ముమ్ ఆవ్

7 జాకయ్ యేసు జేవ్క అన్నె, “ఆవ్ తుమ్మక నిజుమి కచితుమ్ కిచ్చొ సంగితసి మెలె, ఆవ్ సంగిలి మెండల్సాడె పెసితి గుమ్ముమ్ ఆవ్వి.

8 అంచి కంట అగ్గె అయ్ల గొవుడ్లు ఎత్తిజిన్ చోర్లు, చోర్లన జల. మెండల్ జోవయింక అవాడ్ సూన్తి నాయ్.

9 దొర్కు జలి గుమ్ముమ్ ఆవ్వి. ఆవ్ తిలి గుమ్ముమ్ వాట్ కో పెనుల గే, రచ్చించుప జవుల, చి జా సాడు జోవయింక సొంత టాన్ జయెదె, చి పెనుక బార్ జంక జతె తవుల, చి చెంగిల్ అన్నిమ్ జోవయింక దొర్కు జతె తయెదె.

10 చోరు, జలె, ఆరి మెండల్క చోరుక, కండ గెలుక, పాడ్ కెరుక జయెదె. ఆవ్, మాత్తుమ్, కిచ్చొక అయ్లయ్ మెలె, అంచ మెండల్ జల మాన్సుల్క ‘జితు, ఎదిలి చెంగిల్ †జివ్ జోవయింక దొర్కు జవున్’ మెనయ్ అయ్లయ్.

11 “ఆవ్వి చెంగిలో గొవుడు జయిందె. గొవుడు చెంగిలోచొ జలె, మెండల్ కిచ్చొ ప్రమాదుమ్ జతి రితి జలె, జోవయింక ‘మొర్తు నాయ్. జితు’ మెన జోయ్యి అడ్డు జా, జోవయింక రచ్చించుప కెర్లి రిసా జోచి జివ్ దా మొరెదె. ఆవ్ కి దస్సి జయిందె.

12 ఎక్కిలో జవున్ నిజుమ్ తిలో గొవుడు నెంజితె, ఆరి డబ్బుల్క జవున్ మంద రకిలె, జేవ్ మెండల్ జోచ సొంత మెండల్ నెంజిలి రిసా, మెండల్క మారితో కిచ్చొ జవున్ జంతు అయ్లె, కూలిక రకితో జో మాన్సు ఉట్ట నిగ, మెండల్ నస్టుమ్ జతి రితి ముల దెయెదెచి. ఉట్ట నిగిలె, జో జంతు కేన్ మెండక దెర, తిల మెండల్క చెదుర్పు కెరెదె.

13 జో వేర మాన్సు కిచ్చొక దస్సి ఉట్ట నిగ మెండల్క మాలజ్ కెర ములెదె మెలె, ఆరి డబ్బుల్కయ్ రకితయ్చి రిసా. జోచ సొంత మెండల్ నెంజితి, చి మొర్లె కి జలె కి, జోక బాద నాయ్.

14 “ఆవ్ జలె, చెంగిలో గొవుడు.

15 అంచొ అబ్బొ అంక జానె, ప్రేమ కెర్తయ్. ఆవ్ కి అబ్బొక జాని ప్రేమ కెర్తసి. దస్సి, అంచ మెండల్క ఆవ్ జాని, ప్రేమ కెర్తసి. జేవ్ కి అంక జాన్తి, ప్రేమ కెర్తతి. అన్నె, జేవ్ అంచ మెండల్ జల మాన్సుల్క ‘మొర్తు నాయ్, గని జితు’ మెన ఆవ్ మొర గెచ్చిందె.

16 “అన్నె, వేర దేసిమ్లుచ వేర ప్రెజల్చ మాన్సుల్ అంక నంపజా అంచ మెండల్ జవుల. జోవయింక కి అంచి మందయ్ బెదవనుక అస్సి. జేవ్ కి అమ్చి అవాడ్ సూన జెవుల. అయ్లె, జేవ్ కి ఈంజేవ్ కి ఎక్కి మంద జవుల, చి జేవ్ ఎత్తిక ఆవ్ ఎక్కిలో గొవుడు జయిందె.

17 జలె, అంచ మెండల్ జలనక రచ్చించుప కెర్లి రిసా మొర గెచ్చిందె చి రిసా అబ్బొ అంక ఒగ్గర్ ప్రేమ దెకితయ్, చి మొర గెలె కి, అన్నె జివ్ జా ఉట్టిందె.

జోయ్ ‘గొవుడు’ మెనంతయ్. † 10:10 10:10 ‘చెంగిల్ జివ్’ మెలె,

18 మాన్యుల్ అంక మార గెలె కి, ఆవ్ నే ఒప్పిలె నెత్తిర్తి. గని, అంచి ఇస్టుమ్కయ్ మొరిందె. అంచి ఇస్టుమ్క మొరుక అదికారుమ్ అస్సె, అన్నె, అన్నె జీవ్ జా ఉట్టుక కి అంక అదికారుమ్ అస్సె. జా ఎత్తి ఆవ్ నెరవెర్పుప కెరుక మెన అంచొ అబ్బొ తియార్లి కామ్” మెన యేసు బోదన కెర్తన్.

యేసుచి రిసా వెల్లెల మాన్యుల్ అన్నె దొన్ని జట్టు జలిసి

19 యేసుచ ఈంజేవ్ కొణొచి రిసా యూదుల్చ ఒత్తచ వెల్లెల మాన్యుల్ అన్నె దొన్ని జట్టు జల.

20 జోవయింతె ఒగ్గర్జిన్, “జోక బూతుమ్ దెర్లి రిసా వెర్లి జా అస్సె. జోవ కొణొ అమ్ కిచ్చొక నూనుక?” మెన సంగిల.

21 అన్నె నగుమ్జిన్ “ఇన కొణొ బూతుమ్ దెర్లి కొణొ నెంజితి. అన్నె, గుడ్డి జల మాన్యుల్క చెంగిల్ కెరుక బూతల్ దెర్లసక సెక్తి తయెదె గే? నాయ్, గెద?” మెన సంగిల.

22 ఇదిల్ పడ్డొ, అన్నెక్ పండుగు అయ్లి. ‘ఎక్కి దేముడుకయ్ తవున్’ మెన పూర్గుమ్ పొది దేముడుచి గుడి సుద్ది కెర్లి ఏక్ కామ్చి గుర్తుచి పండుగు, జా.

23 చల్లి పొది జా, జలె, దేముడుచి గుడితెచి రానొ జలొ సొలొమోను పూర్గుమ్చొచి నావ్ తిలి వెల్లి పేడితె యేసు బుల్లె తతికయ్,

24 యూదుల్చ వెల్లెల మాన్యుల్ జోచి నుట్టునంత బెర జా, జోక అన్నె పరిచ్చు కెరుక దెర్ల. కిచ్చొ మెన పుసిల మెలె, “అన్నె కెత్తి దీసల్ అమ్ నేన తతి రితి కెర్తె? తుయి రచ్చించుప కెర్తొసా జతో క్రిస్తు జలె, అమ్క సొష్టుమ్ సంగు!” మెన సంగిల.

25 జలె, యేసు జోవయింక, “తుమ్క అగ్గె సంగిలయ్, గని తుమ్ నంప కెర్పు నాయ్. అబ్బొసి జలొ దేముడుచి నావ్ తెన్ ఆవ్ కెర్త కమొ కి అంచి రిసా ‘జొయ్యి’ మెన సాచి సంగితతి.

26 గని, అంచి మెండల్ మందతెచ తుమ్ నెంజున్చి రిసా తుమ్ నంపజంక నెతుర్పు.

27 అంచ మెండల్ జలె, అంచి అవాడ్ సూన్తతి. ఆవ్ జోవయింక జాని, స్రెమ కెర్తసి, చి అంచి పట్టి జెతతి.

28 దేముడుచి రాజిమ్తె బెదితి, మొర్లె పరలోకుమ్తె గెచ్చు కెయెక తెయెక జితి వరుమ్ జోవయింక ఆవ్ దెతసిచి రిసా, జేవ్ కెయెక కి సిచ్చు జితి మొర్నుతె గెతి నాయ్, అన్నె, కో కి జోవయింక అంచి అత్తి తెంతొ ఉర్లుక నెత్తిర్తి.

29 అంచొ దేముడు అబ్బొ జోవయింక అంచి అత్తి సొర్పు కెర దిలన్. జొయ్యి ఎత్తిచి కంట వెల్లొచి రిసా, జో అంచొ అబ్బొసి జలొ దేముడుచి అత్తి తెంతొ జోవయింక కో కి ఉర్లుక నెత్తిర్తి.

30 ఆవ్ అంచొ అబ్బొ ఎక్కి” మెన యేసు వెల్లెల మాన్యుల్క సంగిలన్.

31 యేసు ఇసి సంగితికయ్, ‘జోక పత్తల్ తెన్ పెట మార గెలుమ్’ మెన, జా దీన్చి రితి వెల్లెల మాన్యుల్ పత్తల్ వెంట్ల.

32 యేసు జోవయింక, “దేముడు అబ్బొ కెరయ్ల చెంగిల్ కమొ ఒగ్గరి తుమ్క దెకవ అస్సి. జేవ్ కమొతె కేన్ కామ్క ‘గర్చి’ మెన తుమ్ అంక పత్తల్ గల మారుక ఉచర్తను?” మెన పుసిలన్, చి

33 వెల్లెల మాన్యుల్ జోక, “కిచ్చొ చెంగిల్ కామ్ కెర్లి రిసా పత్తల్ గల మారుమ్ నాయ్, గని తుయి రితొయి మాన్యు దేముడు తెన్ సమ్మందుమ్ సంగుక, జోచి విలువ కడ్డి రిసాయి, జా వెల్లి తప్పుకయ్” మెన సంగిల.

34-35 జాకయ్ యేసు జోవయింక ఇసి మెన జబాబ్ సంగిలన్,

“తుమ్క ‘దేముడ్లు జస్తె’ మెన సంగిలయ్ మెన జోవయించ కబుర్లు నూన సికడ్ల మాన్యుల్చి రిసా తుమ్చి †మోసే పూర్గుమ్చొచి అత్తి దేముడు రెగ్గయ్ల ఆగ్గుల్తె రెగ్గయ్లొ, గెద? జో దేముడు రెగ్గయ్లిసి కో మాన్యు పిట్టవుక నెత్తిర్తి, గెద.

36 జలె, జో దేముడు అబ్బొ అంక జోవయించి కామ్కయ్ నిసాన అదికారుమ్ దా అంక ఈంజ లోకుమ్తె తెద్రయ్లొ. తెద్రయ్లొ జలె, ‘ఆవ్ దేముడుచొ పుత్తుసి’ మెన ఆవ్ సంగిలి రిసా ‘జోచి విలువ కడ్డయ్’ మెన తుమ్ కిసి సంగుక జయెదె!

37 ఆవ్ దేముడు అబ్బొచ కమొ కెర్తసి నాయ్ జలె, అంక నంపజంక పొన.

38 గని దేముడు అబ్బొచ కమొ ఆవ్ కెర్తసి జలె, అంకయ్ తుమ్ నే నంప కెర్లె కి, జేవ్ కమొ దెక జేవ్ కమొకయ్ నంపజా. జేవ్ కమొక నంపజలె, దేముడు అబ్బొ అంచి పెట్టి తిలిసి, ఆవ్ జో అబ్బొచి పెట్టి తిలిసి చినితె, చి తుమ్క అర్లుమ్ జెయెదె” మెన యేసు సంగిలన్.

39 యేసు దస్సి సంగితికయ్, జేవ్ వెల్లెల మాన్యుల్ జోక దెరుక దెకిల, గని జోవయించి అత్తి దెర్ను నే సేడ్డె బార్ జా ఉట్ట గెలన్.

40 యేసు ఉట్ట గెచ్చు, యొర్దాను గాడు ఒత్తల్తో గెచ్చు, అగ్గె యోహాను బాప్తిసుమ్ దెతె తిలిన్తె టాన్తె సగుమ్ దీసల్ ఒత్త తిలన్.

41 ఒత్త తతికయ్, మాన్యుల్ ఒగ్గర్జిన్ జోతె జా కెర, కిచ్చొ మెన సంగితె తిల మెలె, “దేముడుచి అదికారుమ్క గుర్తు దెకయ్త కమొ కేన్ కి యోహాను కెరె నాయ్, గని ఈంజొ యేసుచి రిసా జో సంగిలిసి ఎత్తి సత్తిమ్!”

42 ఒత్త తిలన బలేగ జీన యేసుక ఒత్త తెన్ నంపజల.

† 10:34-35 10:34-35 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొణొ ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగిడ్లి దేముడుచ ఆగ్గుల్ మెన రెగ్గవ అస్సె.

11

లాజర్ మెలో మాన్యు మొర గెలిసి

1 లాజర్ మెలో ఎక్కిలో జొర్జో సేడ్లన్. జో కేన్ గవ్వొచొ మెలె, మరియు మార్త మెల దొగుల బేన్సివొ చి బేతనియ గవ్వొచొ.

2 పడ్డో తేర్బోద ఎక్కి యేసుక తేల్ గాన, జాచి సెండి తెన్ జోచ చట్టొ పుంచెదె. జయ్యి ఈంజ మరియు జయెదె. జొర్జో సేడ్లొసా జేవ్చొ అన్నొసి జయెదె.

3 జలె, లాజర్చ బేన్సివొ “ప్రబువ, తుయి ప్రేమ కెర్తొసా జబ్బు సేడ అస్సె” మెన యేసుతె కబుర్ తెద్రయల.

4 గని యేసు ఈంజ కబుర్ సూన, “ఈంజ జబ్బు సేడ్లిసి జో మొర్తి రిసాయి నాయ్, గని దేముడుచి నావ్ గవురుమ్ జతి రిసాయి, ఆవ్ జోచొ పుత్తున్చి అదికారుమ్ దెకయ్తి రిసాయి” మెన, సిస్సుల్క సంగిలన్.

5 మార్తక, జాచి బేన్సిక, లాజర్క, యేసు బలె ప్రేమ తిలొ,

6 గని లాజర్ ‘జబ్బు తెన్ అస్సె’ మెన సూన్లె కి, జో తిలి టాన్తె యేసు అన్నె దొరతి తాఁ గెలొ.

7 జా దొరతి గెతికయ్, జోచ సిస్సుల్క, “యూదయ ప్రదేసిమి అన్నె గెచ్చుమ!” మెన యేసు సంగిలన్.

8 జేవ్ సిస్సుల్ జోవయింక “గురుబాబు, ఈంజ మదెనె యూదుల్చ వెల్లెల మాన్సుల్ తుక పత్తల్ గల మారుక ఉచర్తె తిలె కి, తుయి అన్నె ‘ఒత్త గెచ్చిందె’ మెన ఉచర్తెసి గే?” మెన బియఁ గెచ్చ జోక సంగిల.

9 యేసు జోవయింక, “ఒండి మెద్దెనె పాసి పాసి బార గంటల్చి ఉజిడి తయెదె, గెద? దస్సి జలె, జా బార గంటల్చి ఉజిడి తిలె పొది మాన్సు ఇండిలె, ఈంజ లోకుమ్చి ఉజిడ్చి రిసా జోక వాట్ డీస్యయ్, చి సేడె నాయ్.

10 గని, జేవ్ అందరె ఇండిలె, ఉజిడి నెంజిలి రిసా జేవ్ సేడుల” మెన సంగిలన్.

11 యేసు జోవయింక దస్సి సంగ అన్నె, “ఆవ్ ప్రేమ కెర్తొ లాజర్ నిజ అస్సె, గని జోవయింక ఉట్టవుక గెతసి” మెలన్, చి

12 సిస్సుల్ “దస్సి జలె, ప్రబు, జో నిజ తిలెగిన, చెంగిల్ జయెదె. కిచ్చొ బాద నాయ్” మెలె.

13 జలె, ‘నిజ అస్సె’ మెన జో మొర్లిన్చి రిసా యేసు సంగ తిలన్. గని, ‘మాములుమ్ నిజ తతిన్చి రిసా సంగితయ్’ మెన సిస్సుల్ ఉచర్తెతి.

14 తెదొడి “లాజర్ మొర గెచ్చ అస్సె” మెన యేసు జోవయింక సొష్టుమ్ సంగ,

15 అన్నె, “జో మొర గెలి పొది ఆవ్ ఒత్త నెంజిలిసి చెంగిలి. కిచ్చొక మెలె, తుమ్చి రిసాయి. మెలె, అంచి రిసా తుమ్ దయిరిమ్ తెన్ నంపజతి రిసా ఈంజ ఎత్తి జర్లు జతయ్. అల్లె, జోతె గెచ్చుమ!” మెన సంగిలన్.

16 ‘కల్వల్ జెర్మిలొసా’ మెలి ఆసిమ్ నావ్ తిలొ తోమా మెలొ సిస్సుడు, జలె, తిల సిస్సుల్క, “జొమ్మ, ఆమ్ ఇన్నెతెన్ మొర గెచ్చుక గెచ్చుమ!” మెన సంగిలన్, చి జేవ్ బార్ జల.

యేసు లాజర్చ బేన్సివొ తెన్ సంగిలిసి

17 జేవ్ బేతనియ గవ్వొ పాసి అయ్లె, యేసు కిచ్చొ కబుర్ సూన్లొ మెలె, ‘లాజర్క మెన్నె రోప చెత్తర్ పొదుల్ జా అస్సె’ మెన సూన్లన్.

18 జలె, జా గావ్ యెరూసలేమ్ పట్టుమ్ తెంతొ పాసి పాసి ఎక్కి దొన్ని మయిలు దూరి అస్సె. ఒగ్గర్ దూరి నాయ్,

19 చి జేవ్చి అన్నొసి మొర్తి రిసా మార్తక చి మరియుక బురియవుక మెన, యెరూసలేమ్చ యూదుల్ ఒగ్గర్జిన్ జా అస్సి.

20 జలె, యేసు జెతయ్ మెన మార్త సూన కెర, జోక దస్సుల్ జంక మెన వాట్ ఎదక అయ్లి, గని మరియు గెరి తా గెలి.

21 మార్త జోక దస్సుల్ జా జోకర, యేసుక, “ప్రబు, తుయి ఇన్నె తత్తది జలె, అంచొ అన్నొ మొర్తొ నాయ్.

22 గని అప్పె కి తుయి దేముడుతె కిచ్చొ సంగిలే కి తుక దెయెదె మెన జాని” మెన సంగిలి.

23 యేసు జాక, “తుచొ అన్నొది అన్నె జీవ్ జా ఉట్టెదె” మెలన్.

24 మార్త జలె, జోక “ఈంజ లోకుమ్ ఇసి తతిన్చి ఆకర్ దీసిక, ఈంజ లోకుమ్చ మాన్సుల్ ఎత్తిజిన్ అన్నె జీవ్ జా ఉట్టితి దీసిక, అన్నొ అన్నె ఉట్టెదె మెన జాని” మెన సంగిలి.

25 చి యేసు జాక, “మొర గెలనక ఉట్టయ్లొసా, దొర్కు జలి జీవ్ దెతోసా ఆవ్వొ. అంక కో నంపజా గెచ్చుల గే జోవయించి ఆగ్ మొర గెలి కి, జివుల.

26 చి, కో అంక నంప తెన్ జితతి గే, సిచ్చు జతి మొర్తుతె కెయఁక కి గెతి నాయ్. అమ్మ, ఈంజ కోడు తుయి నంపజతసి గే?” మెన పుసిలన్.

27 మార్త యేసుక “నంపజా అస్సి ప్రబు. ఈంజ లోకుమ్తె జెంక తిలొ రచ్చించుప కెర్తొసా జతో క్రిస్తు తుయి మెన, దేముడుచొ పుత్తుసి తుయి మెన నంప తెన్ అస్సి” మెన ఒప్పున సంగిలి.

28 జలె, మార్త ఇసి సంగిలి బేగి, యేసుక ఒత్త ముల దా గెరి గెచ్చ, “గురుబాబు జా అస్సె. తుక బుకార్తయ్” మెన బేన్సి జలి మరియుక తిరిమ్ సంగిలన్.

29 మరియు ఈంజ కోడు సూన, చట్టున ఉట్ట, యేసుతె గెచ్చుక బార్ జలి.

30 ఈంజ మదెనె, యేసు కేనె అస్సె మెలె, మార్త జోక దస్సుల్ జా ముల దిలి టాన్తె రక అస్సె. గవ్వొ జెంక నేతయ్.

31 మరియు చట్కున బార్ జతికయ్, జాతె జా తా జాక బురియయ్తె తిల యూదుల్ దెక, “మెస్సె ఏడుక గెతయ్, కిచ్చొగె” మెన ఉచర, జాచి పట్టి గెల.

32 జలె, యేసు తిలినతె మరియు పాచ కెర, జోక దెక జోచి చట్టె నెర్ను సేడ, “ప్రబు, తుయి ఇన్నె తత్తది జలె, అంచొ అన్నొ మొర గెతో నాయ్” మెన సంగిలి.

33 జా ఏడ్డిసి, జేవ్ తెన్ అయ్ల యూదుల్ ఏడ్డిసి దెక, యేసు కన్కారుమ్ జా జోచి ఆత్మతె బాద సేడ,

34 “జోక కేనె రోవెలదు?” మెన పుసిలన్, చి జేవ్ జోక “జా దెకు, ప్రబు!” మెన సంగిల.

35 యేసు ఆనుమ్ గేడవ ఏడ్లన్.

36 జో ఏడ్డిసి దెక, ఒత్త తిల యూదుల్ సగుమ్జిన్ “ఆదె, జోవయింక కెద్ది ప్రేమ తిలో, ఈంజొ!” మెన దెకయ్ల.

37 జోవయింతె అన్నె సగుమ్జిన్, మాత్తమ్, “జో గుడ్డి మాన్సుచ అంకివొ డీసయ్లో, గెద. జలె, లాజర్ నే మొర్తి రితి కెర్తొ జలె”, మెన సంగిల.

యేసు లాజర్ క జియడ్డిసి

38 తెదొడి యేసు జోచి ఆత్మతె అన్నె ఒగ్గర్ ఒగ్గర్ కన్కారుమ్ జా, మెస్సె పావెలన్. ఈంజ మెన్సున్ కిసిచి మెలె, మెట్టయ్ తిలి సాప్రయ్ డొల్మి కెర్లి గది. జా డొల్మి కెర్లిన్ క డంక తిలిసి వెల్లొ పత్తురు.

39 యేసు, “పత్తురు కడ గెల!” మెలన్. దస్సి మెంతికయ్, మొర గెలోసాచి మార్త మెలి బేస్సి జోక “ప్రబు, జో మొర గెచ్చు చెత్తర్ పొదుల్ జలి! పీనుమ్ వాసెన పెట్టె తయెదె!” మెన సంగిలి.

40 యేసు జాక “ఆవ్ తుక కిచ్చొ సంగిలయ్ గే, తుయి నంప తెన్ తిలెగిన, దేముడుచి గవురుమ్ సెక్తిచి రుజ్జు దెకితె.” మెన ఇదిల్ గోల కెర్లన్.

41 జలె, పత్తురు కడ గెల, చి యేసు ఆగాసుమ్ పక్క దెక “ఓ బ, తుయి అంచి ఆస సూన్లది మెన అంక సర్ద.

42 తుచి తెన్ ఆవ్ లట్టబ్లిసి తుయి కెయ్క తెయ్క సూనతసి మెన ఆవ్ పూర్తి జాని, గని తుయి అంక తెద్రయ్లిన్ చి రుజ్జు దెక నంపజతు మెన, ఇన్నె టీచ తిల ప్రెజల్ చి రిసా ఇసి చొండి పుట్టవ సంగితసి” మెన సంగ, గట్టిజ ఒర్న,

43 “లాజర్, బార్ జా!” మెన బుకార్లన్.

44 చి జో మొర గెలోసా, జోచ అత్తో చట్టొ బందున్ తెన్ తతె, జోచి మొక్కె తువ్వల్ గుడియవ తతె, బార్ జా అయ్లో, చి తిల మాన్సుల్ క యేసు “కట్టు యివ, జోక విడ్డల్ కెర!” మెన సంగిలన్.

యేసుక మారుక మెన యూదుల్ అన్నె కుట్ర కెర్లిసి (మత్త 26:1-5; మార్కు 14:1-2; లూకా 22:1-2)

* 11:55 11:55 పస్కా పండుగ్ చి రిసా 2:13చి ఎట్టొచి కోడు దెక.

45 మరియు తెన్ జా తిల యూదుల్తె ఒగ్గర్జిన్ జలె, యేసు కెర్లిసి దెక, జోక నంపజల.

46 గని జోవయింతె అన్నె సగుమ్జిన్, పరిసయ్యుల్తె గెచ్చు, యేసు కెర్లిసి జోవయింక సంగిల.

47 వెల్లెల పూజర్లు పరిసయ్యుల్ నబ కెర్తసక వెనవ దా, “అమ్ కిచ్చొ కెర్లె జయెదె? ఈంజొ మాన్సు ఒగ్గర్ ఒగ్గర్ వెల్లెల కమొ కెర్తయ్, చి

48 అమ్ జోక నే ములయ్లె, ప్రెజల్ ఎత్కిజిన్ జోక నంపజా గెచ్చుల. చి రోమ్ దేసిమ్చ సయ్న్యమ్ జా కెర, అమ్చి దేముడుచి గుడి కి అమ్చి ఒండి దేసిమ్ కి పాడ్ కెరుల” మెన సంగిల.

49 జలె, జేవ్ వెల్లెల మాన్సుల్తె కయప మెలో ఎక్కిలో తిలో. జా వెర్ని జొయ్యి ఎత్కిక వెల్లొ పూజరి జా తిలో. నబతె తిలసక జో కిచ్చొ మెన సంగిలన్ మెలె, “తుమ్ కిచ్చొయ్ నేన్సు.

50 ఏక్ కోడు తుమ్ ఉచర. అమ్చ యూదుల్ అమ్చి దేసిమ్ పాడ్ నే జతి రితి ఎక్కిలో మొర్లె తుమ్క చెంగిలి” మెన సంగిలో.

51 జలె, జోక జొయ్యి ఈంజ కోడు సంగె నాయ్. గని జా వెర్ని జో ఎత్కిక వెల్లొ పూజరి జా తిలి రిసా, దేముడు జోచి చొండి పుట్టవ సంగయ్లో. జా కబుర్చి అర్దుమ్ కిచ్చొ మెలె, యూదుల్తెచ మాన్సుల్క పాపుమ్ తెంతొ రచ్చించుప కెర్తి రిసా యేసు మొరుక తిలి.

52 ఎక్కి యూదుల్తెచ మాన్సుల్క నాయ్. గని జోవయింక బోదల్ జల జోక నంపజల మాన్సుల్ ఎత్కిక, జేవ్ కేన్ దేసిమ్చ జలెకి, జేవ్క ఎక్కితె జోవయించి బెదవంతి రిసాయి మొరుక తిలి.

53 జలె జా దీసి తెంతొ, ‘యేసుక కిసి మారుమ’ మెన, వెల్లెల మాన్సుల్ కుట్ర ఉచర్లె తిల.

54 జలె, జో మొర్తి సమయమ్ జెంక నేతయ్చి రిసా యేసు, యూదుల్చ వెల్లెల మాన్సుల్ తిలిన్తె నే బుల్తె, ఒత్త తెంతొ వెల్లి బయిలు పక్క, ఎప్రాయిమ్ మెంతి గవ్వి ఉట్ట గెచ్చు, జా మదెనె జోవయించ సిస్సుల్ తెన్ ఒత్త తా గెల.

55 యూదుల్చి జా వెర్నిచి *పస్కా పండుగు పాసి జా అయ్లి. జా పండుగు నే జెతె అగ్గె, సుద్ది కెరనుక మెన, యూదుల్ ఎత్కిజిన్ జోవయించ జోవయించ గవ్విలె తెంతొ యెరూసలేమ్తె జా అస్తి.

56 దేముడుచి గుడితె గెలన యేసుక రకితె అస్తి. ఒత్త రకితె తా కిచ్చొ మెన లట్టబంతె అస్తి మెలె, “తుమ్ కిచ్చొ ఉచర్లను? ఏక్ వేల పండుగ్క జెయె నాయ్ గే?” మెన లట్టబంతె అస్తి.

57 కిచ్చొక మెలె, జా మదెనె వెల్లెల పూజర్లు చి పరిసయ్యుల్ జోక జేలి కెరుక మెన ఉచర “జో కేనె తయెదె గే కో జాన్లె, అమ్క సంగ!” మెన ప్రెజల్క ఆడ్ర దా అస్తి.

12

యేసుక వాసిన తేల్ గాన దిలిసి
(మత్త 26:6-13; మార్కు 14:3-9)

1 *పస్కా పండుగక సొవ్వు పొదుల్ అగ్గె, యేసు బేతనియ గవ్వి అన్నె ఉట్ట అయ్లన్. జా గవ్వి యేసు జియడ్లో లాజర్ అస్సె.

2 జలె, యేసు ఒత్త తతికయ్, జోచి రిసా విందు దిల. మార్త జోగిడ్లి, చి యేసు తెన్ అన్నిమ్ కయ్లనతె లాజర్ తిలన్.

3 జేవ్ ఎత్కిజిన్ వెన తిలిన్తె, జలె, మరియు ఒగ్గర్ విలువ తిలి ఏక్ ఎదిలి చెంగిల్ వాసిన తేల్ ఆన్లి. ఆన, యేసుచ చట్టతె గాన, జాచి సెండి తెన్ వుంచిలి, చి ఒండి గెరి జా తేల్చి వాసిన బెర్లి.

4 జలె, ఇన్కరియోతు యూదా మెలో యేసుచ సిస్సుల్తె తా, జో కి ఒత్త అస్సె. కొన్సొ మెలె, జో పడ్డో విరోదుమ్ సుదల్తె యేసుక దెర దెయెదె. జలె, యేసుక మరియు జా తేల్ గాన్తికయ్, జో యూదా జాక,

5 “ఈంజ తేల్ సొవ్వు వుంజో వెండ్లుక విక గెల్ది జలె, బీద సుదల్తక జా డబ్బుల్ దర్ముమ్ దెంక జతి!” మెన గోల కెర్లన్.

6 గని ఆరిక సంగిలో, బీద సుదల్చి ఉప్పిర్చి కన్కారుమ్క నాయ్. కిచ్చొక మెలె, జో చోరు. సిస్సుల్చి డబ్బుల్ పెట్టె జోచి అత్తి తిలి, చి జా డబ్బుల్ జో చోర కంక అలవాట్ జా తిలో.

7 జలె, యూదా జా కోడు సంగితికయ్, యేసు జోక, “జాక గోల కెరు నాయ్. అంక †రోవితి దీసికచి కామ్క ఈంజ గుర్తు తతి రితి జా, జా తేల్ తియ దా తిలి. తవుసు.

8 బీద సుదల్ కెయ్క తెయ్క తుమ్చి తెన్ తవుల చి రిసా ఇస్సుమ్ అయ్లి పొది జోవయింక దర్ముమ్ దెంక జయెదె. ఆవ్, మాత్రుమ్, కెయ్క తెయ్క తుమ్చి తెన్ ఇసి తయె నాయ్” మెన సంగిలన్.

9 యెరూసలేమ్తె †పండుగక బెర తిల యూదుల్, జలె, యేసుచి రిసా, జో ‘బేతనితె లాజర్తె అస్సె’ మెన సూన కెర, యేసుక దెకుక మెన, చి జో జియడ్లో లాజర్క దెకుక మెన ఒత్త ఉట్ట అయ్ల.

10-11 జాకయ్, ‘లాజర్క జియడ్లిసిచి రుజ్జు దెక ఒగ్గర్జిన్ అమ్చి ఆచారిమ్ ముల దా యేసుక నంపజతతి’ మెన వెల్లెల పూజర్లు బియ్ కెర, లాజర్క కి మారుక ఉచర్ల.

యేసు యెరూసలేమ్తె ఉట్ట అయ్లో

(మత్త 21:1-11; మార్కు 11:1-11; లూకా 19:28-40)

12 ‘యేసు యెరూసలేమ్తె జెతయ్’ మెన పండుగక బెర తిల మాన్సుల్ అన్నెక్ దీసి సూన కెర,

13 ‘జో తెన్ దస్సుల్ జమ్దె’ మెన, పట్టుమ్ తెంతో బార్ జా కజారుమ్ రూకుల్చ ముట్టల్ మోడ దెరన వట్టె జా తా, యేసు పాసి అయ్లి పొది “అమ్చొ ప్రబుచి నావ్ తెన్ జెతో రచ్చించుప కెర్టొసొక జోబర, జోబర! అమ్చి ఇస్రాయేల్చ ప్రెజల్చొ రానొక ఓసన్న, ఓసన్న!” మెన జోచి రిసా కేకుల్ గల్తె తిల.

14-15 జలె, ‘జర్గు జయెదె’ మెన దేముడుచి కొడొతె పూర్గుమ్ దేముడు రెగ్గయ్లి తిలిసి జర్గు జలి. కీసి మెలె, యేసు ఏక్ గాడ్డె పిల్ల దొర్కు కెరన, వెగ, పట్టుమ్తె అయ్లో.

“ఓ కీసీమోసుచి దువిసి, తుయి అన్నె బి నాయ్!

గాడ్డె పిల్లతె వెగ, తుమ్చొ రానొ జెతయ్!”

మెన రెగిడ్లి కోడు.

16 ఈంజ ఎత్కి జర్గు జతె తిలి పొది యేసుచ సిస్సుల్ కి అర్దుమ్ కెరంతి నాయ్. గని యేసు దేముడు అబ్బొన్తె అన్నె వెగ గెలి పడ్డో, యేసుక ఇసి జలి, చి జోచి రిసా దేముడు అబ్బొసి జా కోడు రెగ్గవ తిలన్ మెన ఉచార కెర్ల.

17 జలె, యేసు జో లాజర్క మెస్సున్ తెంతో బుకారా జియడ తిలిన్తె బెర తిల మాన్సుల్ జేవ్ జా ఇసి సొంత దెకిలిన్క అప్పె సాచి సంగితె తిల.

18 యెరూసలేమ్తెచ ప్రెజల్ కిచ్చొక యేసు తెన్ దస్సుల్ జంక బార్ జా తిల మెలె, లాజర్క యేసు జియడ జోచి అదికారుమ్క రుజ్జు దెకయ్లిన్చి రిసా సూన తిల.

19 ప్రెజల్ యేసుక నంపజతతి మెన పరిసయ్యుల్ దెక, “అయ్యె, జోవయింక పిట్టయ్తీసి అమ్ అన్నె కిచ్చొ కెరుక కామ్క నెంజె. ఆదె, లోకుమ్ ఎత్కిచ మాన్సుల్ జోచి పట్టి గెచ్చు అస్తి” మెన ఎక్కిలో తెన్ ఎక్కిలో లట్టబన్ల.

20 పండుగు పొది బక్తి కెరుక అయ్లనతె సగుమ్జిన్ గ్రీసు దేసిమ్చ మాన్సుల్ ఒత్త అయ్ల.

21 జేవ్ జలె, గలిలయతె తిలి బేత్సయిదా గవ్విచొ పిలిప్ మెంతో యేసుచొ సిస్సుడు ఎక్కిలోక చజ కెర జోక “బాబు, యేసు తెన్ లట్టబుక మెన అయ్లమ్” మెన సంగిల.

22 చి పిలిప్ అంద్రెయ మెలో సిస్సుడుక సంగ, జేవ్ దొగుల యేసుతె జా, జోక సంగిల.

యేసు మొర గెచ్చుక తిలిన్చి రిసా సంగిలిసి

23 యేసుక జేవ్ దొగుల సిస్సుల్ జా కబుర్ సంగితికయ్, జో జోవయింక, “ఆవ్ మాన్సు జా జెర్మున్ అయ్లోసా గవురుమ్ జతి సమయుమ్ జా అస్సె.

24 తుమ్క ఆవ్ కిచ్చొ నిజుమి కచితుమ్ సంగితసి మెలె, గోదుమ్ గిడ్డ జవున్ పంటో దెరుక జలె, బుయ్యె సేడ చొప్పొ కుసుడ గెలెకయ్ జయెదె. దస్సి తొలితో మొర్లి రితి నే

* 12:1 12:1 పస్కా పండుగచి రిసా 2:13చి ఎట్టొచి కోడు దెక. † 12:7 12:7 పస్కా పండుగక కీసి మెండపిల్లక అర్పితుమ్ దెవుల గే, దస్సి, ఈంజ జెతె తిలి పస్కా పండుగక యేసుయి పాపల్ గెచ్చయ్తి అర్పితుమ్ జయెదె. ‡ 12:9 12:9 2:13చి ఎట్టొచి కోడుక దెక. § 12:14-15 12:14-15 ‘సీయోసుచి దువిసి’ మెలె, యూదుల్ మొత్తుమ్క టాలి జయెదె.

జలెగిన, ఎక్కి గిడ్డయ్ తాఁ గెచ్చెదె. గని దస్సి మొర్లి రితి జలె, ఒగ్గర్ పంటొ దెరెదె.

25 “జోచి జీవుక జో కో ప్రేమ కెర రచ్చించుప కెరనుక ఉచరుల గే, జోచి ప్రానుమ్ పాడ్ జా గెచ్చెదె, గని ఈంజ లోకుమ్తె కో జోచి సొంత జీవుక విలువ నే దెకితె దేముడుక నిదానుమ్ కెరుల గే, జోచి జీవు జోక దొర్కు జా, పరలోకుమ్తె గెచ్చు కెయఁక తెయఁక ఒత్త జివుల.

26 అంచి సేవ కో కెరుల గే, అంచి పట్టి అయ్లి రితి ఆవ్ కెర్తి రితి కెరుక, చి ఆవ్ కేనె తయిందె గే, అంచొ సేవ కెర్తొసా ఒత్తయ్ తంక. కో అంచి సేవ కెరుల గే, జోక కచితుమ్ దేముడు అబ్బొ గవురుమ్ కెరెదె.

27 “ఓ బ, అప్పె అంచి పెట్టి ఒగ్గర్ బాద జతసి. ఆవ్ తుక కిచ్చొ సంగుక? ‘ఓ బ, ఈంజ సమయుమ్చి కామ్ అంక పిట్టవు’ మెన సంగుక గే? నాయ్, నెంజె. ఈంజ కామ్చి రిసాయి, సమయుమ్చి రిసాయి ఈంజ లోకుమ్తె ఆవ్ అయ్లయ్, గెద?”

28 ఓ బ, తుచి నావ్క గవురుమ్ కెరను” మెన దేముడు అబ్బొనక ప్రార్దన కెర్లన్, చి బేగి, ఆగాసుమ్ తెంతో జో దేముడు జోచి అవాడ్ సూనయ్లన్. కిచ్చొ మెన సూనయ్లన్ మెలె, “అంచి నావ్క గవురుమ్ కెర అస్సి, చి అన్నె గవురుమ్ కెరనిందె” మెన సంగిలన్.

29 పాసి టీవ తిల జనాబ్ సూన్ల, చి “ఉర్ముల్ కెర్లి” మెన జోవయింతె సగుమ్జిన్ సంగిల. అన్నె సగుమ్జిన్, మాత్తుమ్, “దేముడుచి దూత ఎక్కిలో జో తెన్ లట్టబ్లన్” మెన సంగిల.

30 యేసు జోవయింక, “ఈంజ అవాడ్ సూనయ్లిసి అంక దయిరిమ్ కెర్తి రిసా నాయ్, అంక దయిరిమ్ అస్సె. గని తుమ్కయ్ ‘నంపజతు’ మెన సూనయ్లన్.

31 కిచ్చొక మెలె, అప్పె జర్గు జంక తిలిన్చి రిసా ఈంజ లోకుమ్చ తీర్పు జవుల. అప్పె జర్గు జంక తిలిన్చి రిసా, ఈంజ లోకుమ్క అప్పెచి మట్టుక ఏలుప కెర్తొ సయ్తానుక బార్ కెర పెలవ దెయెదె.

32 అన్నె, మాన్సుల్ అంక బుయి తెంతో ఉక్కుల టీవడ్డి పొదిక దేసిమ్లు ఎత్తి తెంతొచ మాన్సుల్క అంచితె బుకారా ఆనిందె” మెన ఒత్త తిలసక యేసు సంగిలన్.

33 ‘ఉక్కుల టీవడ్డి పొదిక’ మెలి కోడుతె కిచ్చొ అర్దుమ్ మెలె, ఏక్ *సిలువతె మాన్సుల్ యేసుక టీవడ్డె, మొరెదె. జో సంగిలిన్తె జయ్యి అర్దుమ్.

34 జలె, యేసు జా కోడు సంగితికయ్, జనాబ్తెచ మాన్సుల్ ఆచారిమ్ జా కిచ్చొ మెల మెలె, “ ‘రచ్చించుప

కెర్తొసా జతో క్రీస్తు నే మొర్తె కెయఁక తెయఁక తా గెచ్చెదె’ మెన †మోసే పూర్గుమ్చొచి అత్తి దేముడు రెగ్గయ్ల ఆగ్గుల్తె తిలిసి సూన అస్సుమ్. గని తూయి జలె, ‘ఆవ్ మాన్సు జా జెర్మున్ అయ్లోసొక ఉక్కుల టీవడుక అస్సె’ మెన తుయి సంగితసి. దస్సి జలె మాన్సు జా జెర్మున్ అయ్లోసొ క్రీస్తు జయెదె గే, నెంజె గే?” మెన అన్మానుమ్ జలె.

35 జేవ్ దస్సి జతికయ్, యేసు జోవయింక, “అన్నె సగుమ్ దీనల్ అంచి ఉజిడి తుమ్చి తెన్ తయెదె. తుమ్ అందర్బుద్దిక దెర్ను నే సేడ్డి రిసా, ఈంజ ఉజిడి తతె తుమ్ ఈంజ ఉజిడతె ఇండ. కిచ్చొక మెలె, అందర్తె కో ఇండుల గే, కేనె గెతతి గే నేన్తి.

36 తుమ్ ఉజిడచ పుత్తర్లు జతి రిసా, ఈంజ ఉజిడి తుమ్తె తతె ఎద ఈంజ ఉజిడక పూర్తి నంపజంక దెర” మెన బోదన కెర్లన్. యేసు ఇసి సంగ కేడయ్లి పడ్డె, ఒత్త తెంతో బార్ జా, యూదుల్ నే చజితి రితి లుంకిల్ రితి తిలో.

యూదుల్ నే నంపజిన్చి రిసాచి కోడు

37 యేసు జోవయించి మొక్కి జోచి అదికారుమ్క రుజ్జు దెకయ్త ఎత్తివాట్ కమె కెర తిలె కి, జోక జేవ్ నంపజతి నాయ్.

38 జేవ్ నే నంపజిసి కిచ్చొక మెలె, యెసయా పూర్గుమ్చొచి అత్తి దేముడు రెగిడ్డి కోడు నెరవెర్పుప జతి రిసాయి.

“ఓ ప్రబువ, అమ్ సంగిలి తుచి కబుర్ సూన్లె కి, కో నంపజా అస్సి? కోయి నాయ్. తుచి అదికారుమ్క రుజ్జు దెకయ్త కమె దెకిలెకి, జోవయించి జా సెక్తికో చిన అస్సి? కోయి నాయ్”

మెన రెగిడ్డి కోడు.

39 జాకయ్ యేసుక నంపజంక నెత్తిర్.

40 పడ్డె జోవయించి సిచ్చుచి రిసా యెసయా పూర్గుమ్చొచి అత్తి జో ప్రబు రెగ్గయ్లిసి అన్నెక్తె కి జయ్యి అర్దుమ్.

“జోవయించ అంకివొ గుడ్డి కెర్లి రితి కెర, జోవయించి పెట్టి బేడు బందిలి రితి దేముడు కెర అస్సె.

‡ ‘జోవయించ అంకివొ దెకుత్ నాయ్, జోవయించి పెట్టి అర్దుమ్ కెరంతు నాయ్, ఆవ్ దెతి వర్దుమ్ నజనుక బుల జెతు నాయ్’ మెన అంచి సెలవ్”

మెన ప్రబు రెగ్గయ్లి కోడు.

41 యెసయా పూర్గుమ్చొ కిసి ఇసి మెలన్ మెలె, దేముడు దెకయ్లి సివుతె యేసుచి గవురుమ్చి గుర్తు దెక తిలో, చి జోచి రిసా రెగిడ్డన్.

* **12:33 12:33** ‘సిలువ’ కిసి తయెదె మెలె, ఏక్ టీవ్తి చి ఏక్ అడ్డుమ్ జతి దొన్సి డేడివొ రిత డండల్ బెదవుల జా సిచ్చు జతో మాన్సుక జా సిలువతె ఎంగ్లవ కెర, జోవయించ అత్తి చట్టొ చంపొ కెరవ, అత్తిచట్టొతె మేకుల్ పెట, నెంజెలి వాలివొ తెన్ బంద దా, సిలువ బుయ్యె టీవ రోవ కెర దస్సి ములుల. జో సిచ్చు జతోసా దస్సి ఒడొయ్ జా మొరెదె. రోమ్ దేసిమ్చి అలవాట్ తెన్ చి సిచ్చు, జా. † **12:34 12:34** తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్గుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె. ‡ **12:40 12:40** నెంజెలి. “నెంజెలి జోవయించ అంకివొ దెకిత, జోవయించి పెట్టి అర్దుమ్ కెరంత, చి ఆవ్ చెంగిల్ కెర్తి వరుమ్ నజనుక పసుల జెత”.

42 యూదులతె ఒగ్గర్జిన్ యేసుక నే నంపజలెకి, జోవయింతె ఒగ్గర్జిన్ వెల్లెల మాన్పుల్ కి నంపజల. గని మాన్పుల్చి మొక్కె ఒప్పన్తి నాయ్. కిచ్చొక మెలె, 'పరిసయ్యుల్ సూన్లె, అమ్క సబ గెరలె అన్నె పెసయితి నాయ్' మెన బిల.

43 కిచ్చొక దస్సి బిల మెలె, దేముడు దెతి గవురుమ్చి కంట, మాన్పు దెతి గవురుమ్కయ్ ఆస జా తిల.

44 జలె, ఎత్కిజిన్ సూన్తి రితి కేక్ గల యేసు కిచ్చొ మెన బోదన కెర్లన్ మెలె, "కో అంకయ్ నంపజతతి గే, ఎక్కి అంకయ్ నాయ్, గని అంక తెద్రయ్లోసాక నంపజతతి.

45 అంకయ్ కో దెకితతి గే, అంక తెద్రయ్లోసాక దెకితతి.

46 "ఈంజ లోకుమ్తె కిచ్చొక అయ్లయ్ మెలె, అందర్బుద్ది ఇండిత ఈంజ లోకుమ్చ మాన్పుల్క 'దస్సి తత్తు నాయ్, గని అంక నంపజా రచ్చించుప జత్తు' మెన దొర్కు జలి ఉజిడి తా ఈంజ లోకుమ్తె అయ్లయ్.

47 అంచ కొణ్ణో కో సూన్తతి గని కెర్తి నాయ్ గే, జోవయింక ఆవ్ తీర్పు కెరి నాయ్. కిచ్చొక మెలె, ఆవ్ ఈంజ లోకుమ్తె అయ్లిసి ఈంజ లోకుమ్చక తీర్పు కెర సిచ్చు కెర్తి రిసా నాయ్, గని జోవయింక రచ్చించుప కెర్తి రిసాయి అయ్లయ్.

48 "గని జాగర్త తా. కిచ్చొక మెలె, కో అంక నంప కెర్తి నాయ్, చి అంచ కొణ్ణో సూన కెరుక నెసితి గే, జోవయింక తీర్పు కెర సిచ్చుతె తెద్రయ్లిసి అస్సె. మెలె, ఈంజ లోకుమ్చక తీర్పు కెర్తి జా ఆకర్ దీసిక, ఆవ్ అప్పె సంగిల కొణ్ణో జోవయింక కచితుమ్ తీర్పు కెర సిచ్చుతె తెద్రవుల.

49 కిచ్చొక మెలె, అవ్వి కెర ఆవ్ కిచ్చొ సంగి నాయ్. ఆవ్ కిచ్చొ మెన లట్టబుక గే, కిచ్చొ సంగుక గే, అంక తెద్రయ్లో దేముడు అబ్బొయి అంక ఆడ్ర దా అస్సె.

50 అన్నె కేనె నాయ్, గని జోచి కోడు కెర్తినతయ్ పరలోకుమ్తె బెదితి కెయ్క తెయ్క చెంగిల్ తతి సెక్తి అస్సె మెన కచితుమ్ జాని. జాకయ్ ఆవ్ కిచ్చొ సంగితసి గే, దేముడు అబ్బొయి సంగిల్ రితి ఆవ్ సంగితసి."

13

యేసు జోచ సిస్సుల్క చట్టో దోవిలిసి

1 ఈంజ లోకుమ్ ముల దా దేముడు అబ్బొన్తె అన్నె ఉట్ట గెతి సమయమ్ అయ్లి మెన యేసు జానె. జో ఈంజ లోకుమ్తె నిసాన్ల బారజిన్ సిస్సుల్క అగ్గె తెంతో ప్రేమ కెర్తయ్, గని అప్పె, *పస్కా పండుగ్క ఏక్ దీసి అగ్గె, ఆకర్ ఎదచి జోచి ఎదివాల్ ప్రేమ సొస్టుమ్ దెకయ్లో.

2 జా సంజె, యేసు జోవయించ బారజిన్ సిస్సుల్ తెన్ ఎక్కితె అన్నిమ్ కెర్తతి. ఇస్కరియోతు సీమోనుచో యూదా

మెలో పుత్తుసి జోవయింతె అస్సె. జలె, యేసుక విరోదుమ్ సుదల్చి అత్తి దెర దెంక మెన సయ్తాన్ యూదాక సికడ అస్సె.

3 గని, 'దేముడు అబ్బొ అంచి అత్తి ఎత్కి సొర్పు కెర దా అస్సె, చి దేముడు అబ్బొ తెంతో ఉత్త అయ్లయ్, చి దేముడు అబ్బొతెయి ఆవ్ అన్నె ఉట్ట గతసి' మెన యేసు జానె.

4 జలె, అన్నిమ్ కెర్తె తిలి పొది యేసు ఉట్ట, జో గలన తిలి దిగిల్ సొక్క రితిసి తియ దా, జోవయించ సిస్సుల్క, జో గొత్తి సుదో జతి రితి గుర్తుక, ఏక్ తువ్వల్ కెరంటె బందన్లన్.

5 తెదొడి తప్పెలయ్ పాని సువ కెర, సిస్సుల్చ చట్టో దోవ జో బందన్లి తువ్వల్ తెన్ పుంచుక దెర్లన్. సగుమ్జిన్చ చట్టో దోవ పుంచ తా,

6 సీమోను పేతురుచ చట్టో దోవుక మెన జోతె పావెలన్. గని పేతురు జోక, "ప్రబు, తుయి అంచ చట్టో దోవుక గే? పోని!" మెన బమ్మ తెన్ సంగిలన్.

7 'పోని' మెన సంగితికయ్, యేసు జోక "ఆవ్ అప్పె కెర్తిసి తుక అప్పె అర్దుమ్ నాయ్. గని పడ్డొక అర్దుమ్ కెరంతె" మెన సంగిలన్.

8 పేతురు జోక అన్నె, "ప్రబు, తుయి అంచయ్ చట్టో కెయ్క కి దోవుక ఆవ్ ఒప్పి నాయ్" మెన ఒగ్గర్ జా సంగిలన్. యేసు జోక, "ఆవ్ తుక †సుబ్బుమ్ నే కెర్తె, అంచి రాజిమ్తె తుక కిచ్చొ వాట తయె నాయ్" మెన సంగిలన్.

9 పేతురు జోక, "ప్రబు, దస్సి జలె, అంచ చట్టో అత్తో బోడి కి, ఎత్కి దోవ గెలు!" మెన సంగిలన్.

10 తెదొడి యేసు జోక, "కో పాని నాయ తవుల గే, జోచ చట్టొక పిట్టవ, పూర్తి సుబ్బుమ్ జా తవుల. దస్సి, ఎక్కిలోక పిట్టవ, తుమ్ ఎత్కిజిన్ సుబ్బుమ్ జా అస్సున్" మెలన్.

11 యేసు కిచ్చొక దస్సి మెలన్ మెలె, కో జోక విరోదుమ్ సుదల్తె దెర దెయెదె గే జో జానె. జాకయ్ 'ఎక్కిలోక పిట్టవ తుమ్ ఎత్కిజిన్ సుబ్బుమ్ జా అస్సున్' మెన సంగ తిలో.

12 సిస్సుల్చ చట్టో దోవ కేడయ్లి పడ్డొ, జోచ పాలల్ అన్నె గలన, అన్నె అన్నిమ్తె వెన, యేసు జోవయింక, "ఆవ్ తుమ్క కెర్తి గుర్తుచి రిసా తుమ్క అర్దుమ్ జలి గే నాయ్ గే?

13 అల్లె, అంక 'గురు', 'ప్రబు' మెన తుమ్ సంగితను. బాద నాయ్. ఆవ్ నిజుమి తుమ్చో గురు, తుమ్చో ప్రబు.

14 ఆవ్ జలె, తుమ్చో ప్రబు తుమ్చో గురు జలెకి, తుమ్క సేవ కెర్తి ఏక్ గుర్తుక తుమ్చ చట్టో దోవితసి జలె, తుమ్ జా గుర్తుచి అర్దుమ్ కెరన తుమ్ కి ఎక్కిలోచ చట్టో ఎక్కిలో దోవిలి రితి జా, ఎక్కిలోక ఎక్కిలో సేవ కెర్తె తంక.

15 ఆవ్ అప్పె కెర్తిసి జా గుర్తుకయ్, తుమ్క ఆవ్ కెర్తి రితి తుమ్ ఎక్కిలోక ప్రేమ కెర్తె తంకయ్.

* 13:1 13:1 పస్కా పండుగ్క కీసి మెండపిల్లక అర్చితుమ్ దెవుల గే, దస్సి, ఈంజయ్ పండుగు దీసి యేసుయి పాపల్ గెచ్చయ్తి అర్చితుమ్ జయెదె.

† 13:8 13:8 13:1 చి ఎట్టెచి కోడు దెక.

16 తుమ్క నిజుమి కచితుమ్ ఆవ్ కిచ్చొ సంగితసి మెలె, సేవ కెర్తొసా జోచొ ఎజొమానిచి కంట వెల్లో నెంజె. దస్సి, తెద్రయ్ జలోసా, జలె, జోక తెద్రయ్లోసాచి కంట వెల్లో నెంజె.

17 జలె, ఈంజ ఎత్కిచి అర్దుమ్ కెరన్లదు మెలె, జా బుద్ది ఇండితె తిలె తుమ్క చెంగిలి.

విరోదుమ్ సుదల్తె దెర దెయెదె
(మత్త 26:20-25; మార్కు 14:17-21; లూకా 22:21-23)

18 “గని, ఆవ్ అప్పె సంగిలి బుద్ది తుమ్ ఎత్కిజిన్ జను నాయ్. కిచ్చొక మెలె, ఆవ్ నిసాన్లసచి బుద్ది ఆవ్ జాని. అప్పె జర్గు జతిసి కిచ్చొక జయెదె మెలె,

అంచి తెన్ అన్నిమ్ కెర్లొ ఎక్కిలో అంక తాప్ దిలి రితి కెరెదె మెన రెగిడ్లి కోడు అప్పె నెరవెర్పువ జంకయ్.

19 ఈంజ ఎత్కి జర్గు నే జతె అగ్గె ఆవ్ తుమ్క కిచ్చొక సంగితసి మెలె, జా జర్గు జలి మెలె, జా రుజ్జు దెక, ‘నిజుమి దేముడు తెద్రయ్లో క్రీస్తు రచ్చించువ కెర్తొసా’ మెన అంచి రిసా తుమ్ పూర్తి దయిరిమ్ తెన్ నంప జస్తె.

20 తుమ్క అన్నె కిచ్చొ నిజుమి కచితుమ్ ఆవ్ సంగితసి మెలె, ఆవ్ తెద్రయ్త మాన్పుల్క కో నంపజా మరియాద కెరుల గే, అంకయ్ నంపజా మరియాద కెర్లి రితి జయెదె. అంకయ్ నంపజా కో మరియాద కెరుల గే, అంక తెద్రయ్లోసాక నంపజా మరియాద కెర్లి రితి జయెదె” మెన సంగిలన్.

21 ఈంజేవ్ కొడొ సంగ కెర, యేసు జోచి మెన్పుతె బాద సేడ, సిస్సుల్క కిచ్చొ సాచి సంగిలన్ మెలె, “తుమ్క కిచ్చొ నిజుమి కచితుమ్ ఆవ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్ప కెర దెయెదె” మెన సంగిలన్.

22 జలె, కిచ్చొ రిసా సంగితయ్ గే నేన్తి, చి ఎక్కిలోక ఎక్కిలో అన్మానుమ్ తెన్ దెక దుకుమ్ జల.

23 గని యేసు ఒగ్గర్ ప్రేమ కెర్లొ సిస్సుడు ఎక్కిలో యేసుచి †గుండెచి ఉప్పిరి వెల వెస అస్సె.

24 జాకయ్, సీమోను పేతురు జో సిస్సుడుక సయన కెర, “కచి రిసా సంగితయ్ గే, సూన అమ్క సంగు” మెన సంగిలన్.

25 జాకయ్, యేసుచి గుండెచి ఉప్పిరి వెల తిలొ జో సిస్సుడు “ప్రబు, కచి రిసా దస్సి సంగిలది?” మెన పుసిలన్, చి

26 యేసు పొడి గండ దెర, “ఈంజ పొడి గండ రోస్తె బుడ్డవ కక్క దెయిందె గే, జొయ్యి” మెన సంగిలన్. సంగ, జా గండ బుడ్డవ కెర, ఇస్కరియోతు సీమోనుచొ పుత్తున్ జలో యూదాక దిలొ.

27 యూదా జా గండ నజన్లి బేగి, సయ్తాన్ జోక దెర్లన్. యేసు జానె, చి “తుయి కెరుక తిలిసి బే బేగి జర్గు కెరు!” మెన యూదాక సంగిలన్.

28 యేసు యూదాక కిచ్చొక దస్సి సంగిలన్ గే జా అన్నిమ్ కెర్లొ తిలసతె కోయి నేన్తి.

29 గని జోచి డబ్బుల్ పెటె యూదాచి అత్తి తిలి, చి ‘పండుగు అన్నిమ్క దొర్కు జలిసి గెన ఆను’ జలెకు, ‘బీద సుదల్క కిచ్చొ జవున్ దర్దుమ్ దేను’ మెన యేసు జా కోడు సంగ తయెదె మెన సగుమ్జిన్ ఉచర్ల.

30 జలె, జా గండ నజన, యూదా చట్టున బార్ జా ఉట్ట గెలన్. తెదొడి అందర్ జా తిలి.

ఎక్కిలోక ఎక్కిలో ప్రేమ కెర్లొ తా

31 యూదా బార్ జతికయ్, తిల సిస్సుల్క యేసు, “అప్పెయి జర్గు జతిసి తెన్ ఆవ్ మాన్పు జా జెర్కున్ అయ్లోసాచి గవురుమ్ డీసెదె, చి అంక జర్గు జతిన్చి రిసా దేముడు ప్రబుచి గవురుమ్ డీసెదె.

32 అంచితె జర్గు జతిన్తె దేముడుక గవురుమ్ జెయెదె, చి జా కామ్తె అంక కి జో గవురుమ్ కెరెదె. బేగి గవురుమ్ కెరెదె.

33 “ఓ పుత్తర్లు, అప్పె ఏక్ గడియయ్ తుమ్చి తెన్ ఇసి తయిందె, చి ఉట్ట గెచ్చిందె. ఆవ్ గెలె, అంక చజితె, గని యూదుల్క ఆవ్ సంగిలి రితి, ఆవ్ కేనె గెచ్చిందె గే, తుమ్ అప్పె ఒత్త జెంక నెతుర్పు.

34 “జలె, తుమ్క ఏక్ నొవి ఆగ్గు దెతసి. కిచ్చొ ఆగ్గు మెలె, తుమ్ ఎక్కిలోక ఎక్కిలో ప్రేమ కెర్లొ తా. ఆవ్ తుమ్క కెర్లొ ప్రేమ దెకవ అస్సి గే, దస్సి తూమ్ కి ఎక్కిలోక ఎక్కిలో ప్రేమ కెర్లొ తంక.

35 తుమ్చితె ఎక్కిలోక ఎక్కిలో దస్సి ప్రేమ కెర్లొ తిలె, తుమ్క ‘అమ్చ సిస్సుల్’ మెన ప్రెజల్ ఎత్కి చినుల. జయ్యి జోవయింక రుజ్జు తయెదె” మెన బోదన కెర్లన్.

36 తెదొడి సీమోను పేతురు “ప్రబు, కేనె గెతి రిసా తుయి సంగితసి?” మెన యేసుక పుసిలన్, చి యేసు జోక, “ఆవ్ కేనె గెతసి గే, తుయి అప్పె అంచి పట్టి జెంక నెతిర్ని, గని పట్టొక జెస్తె” మెన సంగిలన్.

37 జాకయ్ పేతురు జోక, “ప్రబు, ఆవ్ కిచ్చొక అప్పె తుచి పట్టి జెంక నెతిరి? తుచి రిసా ఆవ్ మొర కి గెచ్చిందె!” మెన సంగిలన్.

38 యేసు జోక, “అంచి రిసా తుయి మొర గెచ్చుక దయిరిమ్ గే? తుక కిచ్చొ నిజుమి కచితుమ్ ఆవ్ సంగితసి మెలె. ఆజి రాతిక, కుకుడొ నే వాస్తె అగ్గె, ‘జోక నేని’ మెన తుయి తివ్వెరి అంచి రిసా సంగితె” మెన సంగిలన్.

† 13:23 13:23 జోవయింక విందుల్ రిత అన్నిమ్తె బల్లచి సుట్టునంత బెంచివొ చి ఉప్పిరి ఇదిల్ ఎంగ్గ తిలి రితి ఒర్గు జా అన్నిమ్ కెరుల.

14

యేసు సిస్సుల్క దయిరిమ్ సంగిలిసి

1 తెదొడి యేసు సిస్సుల్క, “ఆవ్ ఉట్ట గెలె, తుమ్చ పెట్టి చింత గలన నాయ్. దేముడుక నంపజా దయిరిమ్ తెన్ తా. అంక కి నంప తెన్ తా.

2 జో అంచొ అబ్బొసి జలో దేముడుచి గెరి ఒగ్గర్ గదివొ అస్తి. తుమ్క కి ఒత్త టాన్ అస్సె. నెంజిలె తుమ్క సంగితయ్. తుమ్క జా టాన్ తెయార్ కెరుకయ్ ఆవ్ గెత్తసి.

3 ఆవ్ గెచ్చు తుమ్ తతి టాన్ తెయార్ కెర్లయ్ మెలె, తూమ్ కి అంచి తెన్ తంక మెన, అంచితె కడ నెతి రిసా అన్నె జెయిందె.

4 ఆవ్ గెతి టాన్చి వాట్ తుమ్ జాన్సు” మెన సంగిలన్.

5 జాకయ్ తోమా మెలో సిస్సుడు జోక, “ప్రబు, తుయి కేనె గెత్తసి గే నేన్దుమ్. జా వాట్ అమ్ కీసి జానుక జయెదె?” మెన పుసిలన్,

6 చి యేసు జోవయింక, “ఒత్త గెతి వాట్ ఆవ్వి. ఒత్త గెతి రిసా దొర్కు జలి సత్తిమ్ ఆవ్వి. ఒత్త గెతి రిసా దొర్కు జలి జీవు ఆవ్వి. అంక నంపజలెకయ్ మాన్సు దేముడు అబ్బొతె జెంక జయెదె. నెంజిలె కో జెంక నెత్తిర్తి. కేన్ వేర వాట్ నాయ్.

7 అంక తుమ్ నిజుమి జాన్తసు జలె, అంచొ దేముడు అబ్బొకయ్ జాన్తసు. అప్పె తెంతో తుమ్ జోక జాన్సు, జోక దెక అస్సున్” మెన సంగిలన్.

8 జలె, పిలివ్క అర్దుమ్ నాయ్ చి రిసా, “ప్రబు, దేముడు అబ్బొదక అమ్క దెకవు, చి అమ్క అన్నె కిచ్చొ నాయ్” మెన సంగిలన్.

9 యేసు జోక, “ఒ పిలివ్, తుమ్చి తెన్ ఆవ్ ఎత్తి దీసల్ తిలె కి, అప్పెక అంక చినిన్ నాయ్ గే? కో అంకయ్ దెక అస్తి గే, దేముడు అబ్బొన్క కి దెక అస్తి. జాకయ్, దేముడు అబ్బొదక అమ్క దెకవు మెన తుయి కిచ్చొక పునుక?

10 ఆవ్, అబ్బొసి జలో దేముడుచి పెట్టి తిలిసి, దేముడు అబ్బొ అంచి పెట్టి తిలిసి, తుయి నంప కెర్చి నాయ్ గే? తుమ్క ఆవ్ సంగితిసి సికడ్డిసి ఆవ్ అవ్వి ఉచర్లసి నెంజె. అంచి పెట్టి తిలొ దేముడు అబ్బొ అంచి అత్తి జోచ కమొ కెర్లయ్.

11 ఆవ్ అబ్బొసి జలో దేముడుచి పెట్టి అస్సి, దేముడు అబ్బొ అంచి పెట్టి అస్సె. ఈంజ కోడు నంప కెరు. నెంజిలె, ఆవ్ సంగిలి రిసా నే నంప కెర్లె, అంచి అత్తి జర్గు జత కమొక ఉచర నంప కెరు.

12 తుమ్క నిజుమి కచితుమ్ ఆవ్ కిచ్చొ సంగితసి మెలె, అంక కో నంపజవుల గే, ఆవ్ కెర్లకమొ జేవ్ కి కెరుల. ఆవ్ కెర్లసచి కంట జిన్లన కెరుల. కిచ్చొక మెలె, ఆవ్ దేముడు అబ్బొతె ఉట్ట గెత్తసి.

13 అంచి నావ్ తెన్ తుమ్ కిచ్చొ నజితె గే, ఆవ్ పుత్తుసి కెర్లెతె అబ్బొసి జలో దేముడుచి గవురుమ్ డీసున్ మెనయ్, జయి ఆవ్ జర్గు కెరిందె.

14 అంచి నావ్ తెన్ తుమ్ కిచ్చొ జలెకి నజితె కి, జర్గు కెర దెయిందె.

దేముడుచి నుద్ది తిలి ఆత్మ తెద్రవుక తిలిన్చి యేసు సంగిలిసి

15 “తుమ్ అంచి ఉప్పిరి ప్రేమ తెన్ తిలె, అంచ *కొణ్ణె రితి ఇండితె తస్సె.

16 తుమ్ దస్సి జలె, దేముడు అబ్బొన్క సంగిమె, చి అన్నెక్లొ తోడు కెర్లొసాక తుమ్తె తెద్రయెదె. జో తుమ్చి పెట్టి తా, కెయ్క తెయ్క తుమ్క తోడు తయెదె.

17 జో కొణ్ణె మెలె, పరలోకుమ్చి సత్తిమ్ తిలి సత్తిమ్ దెకయ్తి ఆత్మ. ఈంజ లోకుమ్చి బుద్ది తిల మాన్సుల్ జోక నంపజంక నెత్తిర్తి. కిచ్చొక మెలె, జో డీస్తాసా నెంజె, చి జోక చినితి నాయ్, నేన్తి. తూమ్ మాత్రుమ్, జోక జాన్సు. కిచ్చొక మెలె, జో తుమ్చి తెన్ తత్తయ్, †చి పడ్డొక తుమ్చి పెట్టి తయెదె.

18 “తుమ్క ములిలె, తుమ్ పొరబోదల్ తతి రితి కెరి నాయ్. తుమ్తె జెయిందె.

19 గడియయ్ తిలె, మాములుమ్ ఈంజ లోకుమ్చ మాన్సుల్ అంక అన్నె దెకితి నాయ్, గని తూమ్ అంక అన్నె దెకితె. మెలె, ఆవ్ జితనిచి రిసా తూమ్ కి జిన్సె.

20 ఆవ్ అబ్బొసి జలో దేముడుచి పెట్టి తిలిసి, తూమ్ అంచి పెట్టి తిలిసి, చి ఆవ్ తుమ్చి పెట్టి తిలిసి, తెదొడకయ్ తుమ్క అర్దుమ్ జెయెదె.

21 అంచ †కొణ్ణె కో నూన కెరుల గే, జెవ్వి అంక ప్రేమ కెర్లనయ్. కో అంకయ్ ప్రేమ కెర్లతి గే, అంచొ దేముడు అబ్బొ జోవయింకయ్ ప్రేమ కెరెదె. ఆవ్ కి జోక ప్రేమ కెర, అంచి సత్తిమ్చి రిసా జోక రుజ్జుల్ దెకయిందె, జోక ఆవ్ సొస్టుమ్ సొంత డీసిలి రితి” మెన యేసు సంగిలన్.

22 తెదొడి యూదా మెలో ఎక్కిలో, ఇస్కరియోతు యూదా నెంజె, వేరచొ జో, జలె, యేసుక “కిచ్చొక ఈంజ లోకుమ్చ మాములుమ్ మాన్సుల్క నాయ్, గని ఎక్కి అమ్కయ్ డీస్తె, తుచ రుజ్జుల్ దెకయ్తె?” మెన పుసిలో.

23 పుసిలె యేసు జోక, “అంచి ఉప్పిరి కో ప్రేమ తెన్ తవుల గే, అంచి కొణ్ణె రితి కెరుల, దస్సి జలసకయ్ దేముడు అబ్బొ ప్రేమ కెరెదె. దస్సి జలసతెయి దేముడు అబ్బొ ఆవ్ జెమ్దె, చి జోచి తెన్ బన జా జో తెన్ తా గెచ్చుమ్దె.

24 అంచి ఉప్పిరి కో ప్రేమ తెన్ తతి నాయ్ గే, జెవ్వి అంచ కొణ్ణె రితి కెర్చి నాయ్. తుమ్ నూన్తి ఈంజ కోడు, జలె, కచి మెలె, ఆవ్ అవ్వి ఉచర్లసి నెంజె. అంక తెద్రయ్లో అబ్బొసి జలో దేముడుచి కోడు.

* 14:15 14:15 నెంజిలె, ‘అంచ అగ్గుల్ రితి ఇండితె తస్సె’. † 14:17 14:17 నెంజిలె, “చి తుమ్చి పెట్టి అస్సె”. ‡ 14:21 14:21 నెంజిలె ‘అగ్గుల్’.

25 “జలె, ఆవ్ తుమ్చి తెన్ ఈంజ లోకుమ్తె తతె, ఆవ్వి ఈంజ బోదన ఎత్తి తుమ్క నూనవ అస్సి.

26 గని, ఆవ్ దేముడు అబ్బొతె గెలె, దేముడు అబ్బొ అంచి నావ్ తెన్ తుమ్క తోడు తతోసొక తెద్రయెదె. జో తోడు తతోసొ కొన్సొ మెలె, దేముడుచి సుద్ది తిలి అబ్బొసి జలొ దేముడుచి సుద్ది తిలి ఆత్మయి. జో అమ్చి ఆత్మయి తతోసొ తుమ్క ఎత్తి సికడెదె. ఆవ్ తుమ్క సంగిలిసి ఎత్తి తుమ్క ఉచార కెరయెదె.

27 “జలె, ఆవ్ తుమ్క సేంతుమ్ దా కెర ఉట్ట గెతసి. అంచ్ సేంతుమ్ తుమ్క దెతసి. ఈంజ లోకుమ్చ దెతి రగుమ్చి నెంజె. జాకయ్ కిచ్చొ బాదల్ అల్లర్ అయిలె కి, తుమ్చ పెట్టి చింత గలన నాయ్, బయిమ్ తియన నాయ్.

28 ‘ఆవ్ ఉట్ట గెలె కి, తుమ్తె అన్నె జెయిందె’ మెన సంగిలిసి నూన్లదు. తుమ్ అంచి ఉప్పిరి పూర్తి ప్రేమ తత్తదు జలె, ఆవ్ దేముడు అబ్బొతె గెతినచి రిసొ సర్ల జతదు. కిచ్చొక మెలె, దేముడు అబ్బొ అంచి కంట వెల్లో. ఒత్త గెలె, ఇన్నె తతి కంట అంక చెంగిలి, తుమ్క చెంగిలి.

29 జలె, జా ఎత్తి జర్గు నే జతె అగ్గె తుమ్క కిచ్చొక సంగితసి మెలె, తుమ్క ‘జా జర్గు జతి పొదిక, పూర్తి నంప తెన్ తా, బమ్మ నెంతె దయిరిమ్ తత్తు’ మెనయ్ అంచి ఆన.

30 “తుమ్చి తెన్ అన్నె ఒగ్గర్ లట్టబుక సమయుమ్ నాయ్. కిచ్చొక మెలె, ఈంజ లోకుమ్ ఈంజ మదెనె ఏలువ కెర్తొసొ, సయ్తాన్ జెతయ్. అంచి ఉప్పిరి జోక కిచ్చొ అదికారుమ్ నాయ్,

31 గని దేముడు అబ్బొ అంక తియార్లి కామ్ ఆవ్ కెరుక అస్సి. జో సంగిలి రితి ఆవ్ కెర్తె, అంక ‘నిజుమి, దేముడు అబ్బొనక ప్రేమ కెర్తయ్’ మెన లోకుమ్ ఎత్తిచ చినుల. అల్లె, జొమ్మ, గెచ్చుమ!” మెన సంగిలన్.

15

ద్రాచ రూక్చి టాలి

1 తెదొడి యేసు ఇసి మెన టాలి సంగిలన్. “ఆవ్ నిజుమ్ జలొ ద్రాచ రూకు జయిందె. అంచొ దేముడు అబ్బొ రూకుక పొస్తొసొ జయెదె.

2 జలె, అంచ కొన్నుతె కేన్ కొన్నుతె పంటొ దెరె నాయ్ గే, ఈంజొ రూకు పొస్తొ దేముడు అబ్బొ జా కొన్ను గెచ్చవ గెలెదె. గని కేన్ కొన్నుతె పంటొ దెరెదె గే, ‘అన్నె ఒగ్గర్ పంటొ దెర్చు’ మెన, కొన్నుల్ కుట్టవ గెలెదె.

3 “తుమ్క ఆవ్ నూనయ్లి కొణొ నూన్లదుచి రిసొ, తుమ్ సుద్ది జా అస్సున్.

4 జలె, ఆత్మక అంచి తెన్ బెద తా అంచి తెడి తుమ్ జియ అంచి సెక్తిక ఇండ, అంచి పెట్టి తా. ఆవ్ కి తుమ్చి

పెట్టి తయిందె. తీగెచి కొన్ను అజ జలె, ఒత్త కిచ్చొ పంటొ దెరుక నెత్తె. తీగె తెన్ ఎక్కి తిలెకయ్ ఒత్త పంటొ దెరెదె. దస్సి, తుమ్ ఆత్మక అంక ముల అజ జలె, తుమ్తె కిచ్చొ *పంటొ దెర్తి రితి జంక నెతుర్చు. అంచి తెన్ ఎక్కి తిలెకయ్ †పంటొ తుమ్తె దెరెదె.

5 “ద్రాచ రూకు అవ్వి, రూక్చి జీవు అంచి పెట్టి అస్సి. తుమ్ అంచ కొన్నుల్. ఆత్మక అంచి తెన్ బెద తా అంచి తెడి జియ అంచి సెక్తిక కో ఇండ అంచి పెట్టి తవుల గే, జోచి పెట్టి ఆవ్ తయిందె, చి జో తెన్ ఒగ్గర్ ‡పంటొ దెర్తి తయెదె. ఆవ్ నెంజలె, తుమ్ కిచ్చొ కెరుక నెతుర్చు.

6 కో ఆత్మక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, కామ్క నెంజిలి కొన్ను కుట్టవ వెంట గెలి రితి జయెదె, కొమ్మ జా మొర గెచ్చెదె. కొన్నుల్ దస్సి జలె, జోవయింక గుడ్డ కెర ఆగితె గల డయిల. కో ఆత్మక అంచి తెన్ బెద నే తతె అంచి తెడి నే తతె అంచి సెక్తిక నే ఇండితె అంచి పెట్టి తతి నాయ్ గే, దస్సి జవుల.

7 గని ఆత్మక అంచి తెన్ బెద తా అంచి తెడి జియ అంచి సెక్తిక తుమ్ ఇండ అంచి పెట్టి తా అంచి కోడు రితి తుమ్ కెర్తె తిలె, తుమ్ అంచితె కిచ్చొ నజితె గే, తుమ్చి రిసొ జర్గు జయెదె.

8 తుమ్ దస్సి జా చెంగిల్ కిపంటొ ఒగ్గర్ తుమ్తె దెర్తె, చి దేముడు అంచొ అబ్బొనక మాన్సుల్ గవురుమ్ కెరుల. జయ్యి పంటొ జోవయింక గవురుమ్ ఆనెదె, అంచ సిస్సుల్ తుమ్ కచితుమ్ జలిన్క రుజ్జు డీసెదె.

9 “దేముడు అంచొ అబ్బొ అంకయ్ కిసి ప్రేమ కెర్తయ్ గే, ఆవ్ కి తుమ్క దస్సి ప్రేమ కెర అస్సి. అంచి ప్రేమ తెడి తుమ్ తా.

10 దేముడు అంచొ అబ్బొచ *కొణొ ఆవ్ కెర్తె తా జోచి ప్రేమచి తెడి తా జోచి ప్రేమ తెన్ ఇండితసి. దస్సి, అంచయ్ కొణొ తుమ్ కెర్తె తిలె, అంచి ప్రేమచి తెడి తుమ్ తా అంచి ప్రేమ ఇండితె.

11 ‘అంచి సంతోసుమ్ తుమ్చి పెట్టి తవున్’ మెన, తుమ్క ‘పూర్తి సంతోసుమ్ జా తత్తు’ మెనయ్, ఈంజేవ్ కొణొ ఎత్తి ఆవ్ సంగ అస్సి.

12 “ఆవ్ తుమ్కయ్ కిసి ప్రేమ కెర అస్సి గే, తుమ్ కి ఎక్కిలోక ఎక్కిలో ప్రేమ కెర్తె తా, మెన తుమ్క ఆవ్ సంగితసి. ఈంజయి తుమ్క ఆగ్గు జా అస్సి.

13 ‘జితు’ మెన, జోవయించ మింతర్చుల్చి రిసొ కో జలెకు మొర్తి కంట, కిచ్చొ జిన్ని ప్రేమ నాయ్.

14 ఆవ్ తుమ్క సంగిల్ రితి తుమ్ కెర్తె, అంచ గోతుసుదల్ జా తస్తె.

* 15:4 15:4 ‘పంటొ’ నెంజిలె ‘ఆత్మపంటొ’. † 15:4 15:4 ‘పంటొ’ నెంజిలె ‘ఆత్మపంటొ’. ‡ 15:5 15:5 ‘పంటొ’ నెంజిలె ‘ఆత్మపంటొ’. § 15:8 15:8 ‘పంటొ’ నెంజిలె ‘ఆత్మపంటొ’. * 15:10 15:10 నెంజిలె ‘ఆగ్గుల్’ నెంజిలె ‘ఆడ్రల్’.

15 తుమ్మక 'గొత్తి సుదల్' రితి అప్పె తెంతో దెకి నాయ్. కిచ్చొక మెలె, జోవయించో ఎజోమాని కిచ్చొ కెర్తె తయెదె గే గొత్తి సుదల్ నేన్తి. ఆవ్, మాత్రమ్, అంచో అబ్బొన్తె సూన్సిసి ఎత్తి తుమ్మక సంగ అస్సి. జాచి రిసా తుమ్మక 'గోతుసుదల్' రితి దెకితసి.

16 "తూమ్ అంకయ్ నిసాన్సు నాయ్. ఆవ్ తుమ్మకయ్ నిసాన్యయ్. ఆవ్ తుమ్మక కిచ్చొక నిసాన అంచి కామ్ తియార్ అస్సి మెలె, తుమ్ ఈంజ లోకుమ్తె బార్ జతు, చి అంచి ఆత్మపంటో జోవయింతె దెర్తె తవున్ మెన 'జోవయింతె దెర్తి ఈంజ పంటో కెయ్క తెయ్క చెంగిల్ తా కామ్క జెతె తవున్'. తుమ్ అంక నిదాసుమ్ తిలెగిన, అంచి నావ్ తెన్ దేముడు అంచో అబ్బొతె తుమ్ కిచ్చొ నజీలె కి, తుమ్మక దెయెదె.

17 తుమ్మక కిచ్చొ ఆగ్గు దెతసి మెలె, ఎక్కిలోక ఎక్కిలో తుమ్ ప్రేమ కెర్తె తంకయ్.

నంపజలనక ఈంజ లోకుమ్ విరోదుమ్ జవుల

18 "ఈంజ లోకుమ్చ మాన్సుల్ తుమ్మక విరోదుమ్ జతతి జలె, అంక కి అగ్గె తెంతో విరోదుమ్ జా అస్సి.

19 ఈంజ లోకుమ్చ కమె కెర్తెన తుమ్ జతదు జలె, ఈంజ లోకుమ్చ మాన్సుల్ తుమ్మక ప్రేమ కెర్తె. గని, ఈంజ లోకుమ్చ తెంతో తుమ్మక ఆవ్ నిసాన్యయ్, చి ఈంజ లోకుమ్చ కమె తుమ్ కెర్పు నాయ్ చి రిసా ఈంజ లోకుమ్చ తుమ్మక విరోదుమ్ జా అస్సి.

20 "జలె, ఆవ్ తుమ్మక సంగిలి కోడు తుమ్ పచ్చ నాయ్. కేన్ కోడు మెలె, 'నేవ కెర్తెసా జోచో ఎజోమానిచి కంట వెల్లో నెంజె' మెలిసి. ఈంజ లోకుమ్చ మాన్సుల్ అంకయి అల్లర్ కెర అస్సి జలె, తుమ్మక కి అల్లర్ కెరుల. జేవ్ అంచయ్ కొడో రితి కెర్తెతి జలె, తుమ్చయ్ కొడో నూన కెరుల.

21 అంచి రిసాయి తుమ్మక అల్లర్ కెరుల మెలె, కిచ్చొక మెలె అంక తెద్రయ్లో దేముడుక జేవ్ నేన్తి.

22 "ఆవ్ జెతయ్ నాయ్ జలె, జోవయింక సుబుమ్ కబుర్ సంగితయ్ నాయ్ జలె, జా పాపుమ్ జేవ్ వయిత నాయ్. గని, అయ్లయ్, సంగిలయ్, చి అప్పె, 'నేన కెర దస్సి కెర్లమ్' మెన జేవ్ సంగుక నెతిర్తి. జా పాపుమ్ వయ అస్సి.

23 మెలె అంకయ్ కో విరోదుమ్ జవుల గే, దేముడు అబ్బొన్క విరోదుమ్ జా అస్సి.

24 అన్నె, కేన్ మాన్సుకి కెయ్ కి నే కెర్తె కమె ఆవ్ జోవయించి మొక్కె కెర్తయ్ నాయ్ జలె, జా పాపుమ్ వయిత నాయ్. గని అంక దెకయ్ అంక విరోదుమ్ జా అస్సి. జేవ్ అంకయ్ దెక విరోదుమ్ జలిసి జలె, అబ్బొక దెక విరోదుమ్ జలిసి జయెదె. దస్సి జా, అబ్బొన్క కి విరోదుమ్ జా అస్సి.

25 జోవయించి †మోసే పూర్గుమ్చొచి అత్తి దేముడు రెగ్గయ్ల ఆగ్గుల్తె పూర్గుమ్ దేముడు అబ్బొ రెగ్గయ్లిసి నెరవెర్పుప జంకయ్ ఇసి జా అస్సి. కేన్ కోడు మెలె, 'ఆరిక అంక విరోదుమ్ జలె.'

26 "దేముడు అంచో అబ్బొతె తెంతో ఆవ్ సంగిలో తోడ్ కెర్తెసాక తుమ్ సిస్సుల్తె తెద్రయిందె. జో అబ్బొచి పెట్టి తెంతో బార్ జా జెతోసా. నిజుమ్ జలి ఆత్మ, జో. జో తుమ్తె జా కెర, అంచి రిసాయి సాచి సంగెదె.

27 తూమ్ కి అంచి రిసా సాచుల్ జా అస్సున్. కిచ్చొక మెలె, అంచ కమె మొదోల్ కెర్తి తెంతో అంచి తెన్ని అస్సున్."

16

1 "ఆవ్ కిచ్చొక తుమ్మక ఈంజ ఎత్తి సంగ అస్సి మెలె, తుమ్మక 'తెదోడ్క బమ్మ జా అన్మానుమ్ జతు నాయ్' మెన జేవ్ అల్లర్ నే జతె అగ్గె తుమ్మక ఆవ్ సంగితసి.

2 జేవ్ దీసల్క తుమ్మక జోవయించ సబ గెరల్ తెంతో ఉదడ అన్నె పెనయ్తి నాయ్. అన్నె, 'ఇన్నెక మార్లె చెంగిలి, మార్లె దేముడుచి నేవ కెర తమ్దె' మెన సగుమ్జిన్ ఉచర తుమ్మక మారుల.

3 కిచ్చొక దస్సి కెరుల మెలె, జేవ్ అంక నేన్తి.

4 జా నే జతె అగ్గె తుమ్మక ఆవ్ కిచ్చొక సంగ అస్సి మెలె, జా సమయుమ్ జా అయ్లె, 'ఇసి జయెదె మెన సంగిలో' మెన తుమ్ ఉచార కెర్తె. జలె, తుమ్ అంచ సిస్సుల్ జలి మొదోల్ తెంతోయ్ ఈంజ ఎత్తి తుమ్మక ఆవ్ కిచ్చొక సంగుక నాయ్ మెలె, తుమ్చి తెన్ తిలయ్, చి సంగుక నాయ్.

తుమ్మక తోడ్ తతి రిసా అమ్చి ఆత్మ తుమ్చితె తెద్రయిందె

5 "అప్పె, అంక తెద్రయ్లోసాతె ఆవ్ అన్నె గెతసి. గని 'కేనె గెతసి?' మెన అప్పె తుమ్చితెకో అంక పుసున్ నాయ్.

6 ఆవ్ ఈంజ ఎత్తి తుమ్మక సంగిలి రిసా దుకుమ్ జా అస్సున్.

7 జలెకి, తుమ్మక కిచ్చొ సత్తిమ్ సంగితసి మెలె, ఆవ్ గెలెకయ్ తుమ్మక చెంగిలి. కిచ్చొక మెలె, ఆవ్ నే గెలె, అమ్చి ఆత్మ జతో ఆవ్ సంగిలో తోడ్ కెర్తెసా తుమ్మక తోడ్ జెయె నాయ్. గని ఆవ్ గెలె, తుమ్తె జోక తెద్రయిందె.

8 "జో అయ్లో మెలె, పాపుమ్చి రిసా, సత్తిమ్చి రిసా, తీర్పు కెర్తిసిచి రిసా ఈంజ లోకుమ్చ మాన్సుల్క రుజ్జుల్ దెకయెదె.

9 లోకుమ్ అంక నంపజయె నాయ్ చి రిసా పాపుమ్ వయ అస్సి మెన అంక నంపనెంజిలనక రుజ్జు దెకయెదె.

† 15:25 15:25 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడో ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అస్సి. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్గుమ్చొచి అత్తి రెగిడ్లి దేముడుచ ఆగ్గుల్ మెన రెగ్గవ అస్సి.

10 అంచో దేముడు అబ్బొన్తె ఆవ్ ఉట్ట గెచ్చిందె, అంక అన్నె తూమ్ ఇసి దెకున్ నాయ్. అంచి పున్నిమ్చి రిసా ఈంజ లోకుమ్చక జో రుజ్జు దెకయెదె.

11 జాచి రిసా ఈంజ లోకుమ్క అప్పెచి మట్టుక ఏలుప కెర్తొ సయ్తాన్ తీర్పు జా, జోచి పాపుమ్ వయ సిచ్చతె గెచ్చుక అస్సి మెన రుజ్జు దెకయెదె.

12 “ఆవ్ తుమ్క సంగితిసి కెత్తిగే అస్సి. గని, అప్పె సంగిలె తుమ్ ఒర్పువ జంక నెతుర్పు.

13 జలె జో, సత్తిమ్ జలి ఆత్మ జలొసా తుమ్చి పెట్టి అయ్లె, జొయ్యి సత్తిమ్తె తుమ్క ఇండయెదె. జోక, జొయ్యి కిచ్చొ సంగి నాయ్. జో ఒత్త అమ్తె కిచ్చొ నూనెదె గే, జయ్యి తుమ్క సంగెదె.

14 జో అంచితె తిలిసియి కడన తుమ్క సూనఎదె. జాచి రిసాయి అంక గవురుమ్ కెరెదె.

15 అబ్బొసి జలొ దేముడుచి ఎత్తి అంచి, జాకయ్ ‘జో తుమ్క సంగితిసి ఎత్తి అంచి’ మెన తుమ్క సంగిలయ్.

పడ్డొక తుమ్క సంతోసుమ్ జెయెదె

16 “ఇదిల్ కాలుమ్ గెలి పడ్డొ అంక తుమ్ దెకుక నెతుర్పు, అన్నె, ఇదిల్ కాలుమ్తె అంక దెకితె మెన సంగిలన్.

17 జోచ సిస్సుల్తె సగుమ్జిన్ ఎక్కిలో తెన్ ఎక్కిలో లట్టబ, గడియ గెలె, అంక దెకున్ నాయ్. ఒత్త తెంతో అన్నె గడియ గెలె, అంక అన్నె దెకితె మెన కిచ్చొక సంగిలన్. ఆవ్ ‘దేముడు అబ్బొతె ఉట్ట గెచ్చిందె’ మెన కిచ్చొక సంగిలన్?” మెన సంగితె తిల.

18 “గడియ గెలె మెన కిచ్చొ అర్దుమ్ తెన్ సంగితయ్? జో కిచ్చొచి రిసా సంగితయ్ గే నేనుమ్” మెన లట్టబన్.

19 జేవ్ జొయ్యి పుసితతి మెన, నా యేసు జానయ్ జేవ్చి తెన్ ఇసి సంగిలొ. అన్నె గడియ గెలె, తుమ్ అంక దెకున్ నాయ్. ఒత్త తెంతో. అన్నె గడియ గెలె, తుమ్ అంక అన్నె దెకితె మెన ఆవ్ సంగిలయ్, గెద. ఇన్నెచి రిసా ఎక్కిలో తెన్ ఎక్కిలో లట్టబ్బసు, నాయ్ గే?

20 తూమ్ దుకుమ్ జా ఏడ్తె. గని, లోకుమ్చ సర్ల జవుల తుమ్చి దుకుమ్ సర్లతెను తయెదె మెన తుమ్క కచితుమ్ సంగితసి.

21 లడెన్ జతి తేర్బోద, జలె, జాచి కంట్లు పావ జా అయ్లి మెలె, ఏడెదె, గెద. గని, లడెన్ జలి మెలె, ఈంజ లోకుమ్తె ఏక్ ‘బోద జెర్మిలో’ మెన జాచి సర్లక బేగి దుకుమ్ ఎత్తి పచ్చ గెలెదె.

22 దస్సి, ఆవ్ అప్పె గెలె, తుమ్క గడియ దుకుమ్ తయెదె. గని, ఆవ్ తుమ్చి తెన్ అన్నె దస్సుల్ జయిందె, చి తుమ్చి పెట్టి సంతోసుమ్ జా గెతె, చి కో కి తుమ్చితె తిలి సంతోసుమ్ కడుక నెత్తిర్తి.

23 జేవ్ దీసల్తె అంక తుమ్ కిచ్చొ కి పుసితసి నాయ్. తుమ్ దేముడు అబ్బొతె కిచ్చొ సంగిలె కి, అంచి నావ్ తెన్ దొర్కు జయెదె మెన తుమ్క కచితుమ్ సంగితసి.

24 అప్పె ఎద అంచి నావ్ తెన్ తుమ్ కిచ్చొ నజుక నాయ్. తుమ్చి సంతోసుమ్ పూర్తి జతి లెక నజ, దొర్కు జయెదె.

25 “ఈంజ సంగతి ఒండి కి అర్దుమ్ లుంకయ్ జలి రితి సంగ అస్సి. జలె ఆవ్ కెయ్యక జలెకి అర్దుమ్ లుంకయ్ జలి రితి తుమ్చి తెన్ నే లట్టబ్బె, అబ్బొన్చి రిసా తుమ్క సొస్టుమ్గ సూనయ్తి గడియ జెతయ్.

26 జా దీసల్ అయ్లి ఖొది అంచి నావ్ తెన్, తుమ్ నజితె. గని, దేముడుక తుమ్చి తెన్ ఆవ్ నెడిమి జా ప్రార్దన కెర్తిసి నెంజె మెన సంగుక నాయ్.

27 కిచ్చొక మెలె అబ్బొ తుమ్క ప్రేమించుప కెర్తయ్. తూమ్ అంక ప్రేమించుప కెర, అంక అబ్బొ జలొ దేముడు తెంతో బార్ జా అయ్లన్ మెన నంపజలదు.

28 దేముడు అబ్బొతెంతో ఆవ్ బార్ జా ఈంజ లోకుమ్తె అయ్లయ్. అన్నె, అప్పె ఈంజ లోకుమ్ ముల దా, ఒత్త జోతె అన్నె గెతసి” మెన సంగిలన్.

29 జోచ సిస్సుల్, జలె, “ఈందె, అర్దుమ్ లుంకయ్ జలి రితి కిచ్చొ కి నే సంగితె సొస్టుమ్గ లట్టబ్బసి.

30 తుయి ఎత్తి జాన్సి, చి అమ్ నే పుసితెకి, అమ్చి మెన్ను తిలిసి తుయి జాన్సి మెన అప్పె జానుమ్. దేముడుతె తెంతో తూయి బార్ జా అయ్లదు మెన నంపజా సంగితి కాయ్.

31 యేసు జోవయింక దెక, అప్పె తూమ్ నంపజతసు గే?

32 ఈందె తుమ్చితె ఒండిజిన్క కి కచి గెరి జొయ్యి సెదుర్వ జా అంక ఎక్కిలోకయి ముల దెతి గడియ జెతయ్, జా అస్సి. జలె అబ్బొ అంచితె అస్సి చి రిసా ఆవ్ ఎక్కిలోయి నెంజి.

33 “ఈంజ ఎత్తి కిచ్చొక తుమ్క సంగ అస్సి మెలె, ‘అంచి తెడి తుమ్క సేంతుమ్ తవున్’ మెనయ్. కిచ్చొక మెలె, ఈంజ లోకుమ్తె అల్లర్ సేడ్తె, గని దయిరిమ్ తెన్ తా. ఈంజ లోకుమ్తెచ అల్లర్చి ఉప్పిరి ఆవ్ జిన అస్సి” మెన సంగిలన్.

17

యేసు ప్రార్దన కెర్తిసి

1 యేసు ఈంజ ఎత్తి సంగ కేడవ, ఆగాసుమ్ పక్క దెక, పరలోకుమ్ తిలొ దేముడు అబ్బొన్క ప్రార్దన కెర్లన్.

“ఓ బ, అంచి సమయుమ్ జా అయ్లి మెన జాని. ఆవ్ తుచొ పుత్తుది తుచి గవురుమ్ దెకయ్తి రితి, ఆవ్ పుత్తున్ తా గవురుమ్ కెరు.

2 ఈంజ లోకుమ్ ఎత్తిచ మాన్సుల్చి ఉప్పిరి ఆవ్ పుత్తుక తుయి అదికారుమ్ దా అస్సిన్. కో అంక నంపజంక తుయి సెలవ్ దా అస్సిన్ గే, జెవ్వి తుచి రాజిమ్తె బెదితి,

మొదలై పరలోకుమతె గెచ్చు కెయక తెయక జతి రితి ఆవ్ దెంక మెన, తుయి అంచి అత్తి సార్పు కెర దా అస్సిన్.

3 తుయి ఎక్కిలోయి నిజుమ్ జలో దేముడు తుక, తుయి తెద్రయ్లో అంక, జేవ్ నంపజతిసి, అమ్క జేవ్ జాన్తిసి, ఆవ్ యేసు తుయి తెద్రయ్లో రచ్చించుప కెర్తొసొ జతో క్రిస్తు.

4 తుయి అంక తియార్తి కామ్ ఆవ్ పూర్తి నెరవెర్చుప కెర, ఈంజ లోకుమతె తుక గవురుమ్ ఆన అస్సి.

5 ఓ బ, ఈంజ లోకుమ్ నే జెర్మున్ జతె అగ్గె తెంతో తుచి తెన్ ఆవ్ ఒత్త తతె అంక కిసి గవురుమ్ తిలి గే, అప్పె తుచితె పరలోకుమతె అన్నె దస్సి గవురుమ్ జతి రితి కెరు.

6 “అంచ సిస్సుల్ జతి రితి, ఈంజ లోకుమ్చ మాన్సుల్తె సగుమ్జిన్క తుయి నిసాన, అంచి అత్తి సార్పు కెర దా అస్సిన్. తుయి కిసాచో గే ఈంజేవ్ దెకిత్ రితి ఆవ్ ఈంజ లోకుమతె జియ అస్సి. తుచయ్ మాన్సుల్ ఈంజేవ్, చి ఇన్నెక అంచి అత్తి తుయి సార్పు కెర దిలది, చి తుచి కోడు రితి ఈంజేవ్ నిదానుమ్ ఇండ అస్సి.

7 తుయి అంక దిలిసి ఎత్కిచి రిసొ ‘వేరచి నెంజె, గని తుయి దిలిసి’ మెన అప్పె జాన్తి. అంక తుయి తెద్రయ్లోసొ నిజుమ్ మెన చినిల.

8 ‘సంగు’ మెన తుయి సంగిలి కొడొ ఎత్కి ఇన్నెయింక ఆవ్ సంగ అస్సి, చి ఈంజేవ్ సూన, నంపజా, ఆవ్ తుచితె తెంతో ఉట్ట అయ్లిన్క ‘నిజుమ్’ మెన జాన్తి. తుయి అంక తెద్రవ అస్సిన్ మెన నంపజా అస్సి.

9 “ఇన్నెచి రిసొయి ఆవ్ అప్పె ప్రార్దన కెర్తసి. ఈంజ లోకుమ్చ ఎత్కిజిన్చి రిసొ ఇసి మెన ప్రార్దన కెరి నాయ్, గని ఈంజేవ్ తుయి అంచి అత్తి సార్పు కెర దిలసయ్చి రిసొ ప్రార్దన కెర్తసి. ఈంజేవ్ తుచయ్ మాన్సుల్.

10 అంచి ఒండి తుచయ్, తుచి ఒండి అంచయ్, చి ఈంజేవ్ నిదానుమ్ జిల్న్ తెన్ అంక గవురుమ్ జెతయ్.

11 “ఆవ్ తుచితె అప్పె అన్నె జెతసి చి అప్పె తెంతో ఆవ్ ఈంజ లోకుమతె తయె నాయ్. గని ఈంజేవ్, మాత్తుమ్ తవుల. సుద్ది తిలో ఓ బ, ఈంజేవ్ చెంగిల్ తతి రితి, *తుయి అంక దిలి తుచి నావ్చి సెక్కి ఇన్నెక రక్కు, చి ఆవ్ తుయి కిసి †ఎక్కి జా అస్సుమ్ గే ఈంజేవ్ కి ఎక్కి జా తంక తుచి నావ్ తెన్ ఇనయింక దెకు.

12 ‡ఆవ్ ఇనయింతెన్ బుల్లె తిలి పొది, తుయి అంక దిలి తుచి నావ్ తెన్ ఇన్నెక రకితె తిలయ్. ఆవ్ జేవ్క జాగరిత తెన్ రకిలయ్ చి, ఇనయింతె కో నాసెనుమ్ జతి నాయ్. నాసెనుమతె గెతో జో ఎక్కిలో పిట్టవ, జలె, తుయి పూర్గుమ్

రెగ్డయ్లి రితి నాసెనుమ్ జా అస్సి, దేముడుచి కొడొతె తిలి జా కోడు అప్పె నెరవెర్చుప జతి రిసొ.

13 “అప్పె, జలె, ఆవ్ తుచితె జెతసిచి రిసొ, ‘అంచి సంతోసుమ్ ఇన్నెచి పెట్టి నెరవెర్చుప జా కామ్ కెర్చు’ మెన ఈంజ ఎత్కి, అప్పె ఈంజ లోకుమతె ఆవ్ తతె, ఇన్నెచి మొక్కె తుక సూనయ్తసి.

14 “ ‘సంగు’ మెన తుయి సంగిలిసి ఎత్కి ఇన్నెయింక ఆవ్ సంగ అస్సి. ఆవ్ ఈంజ లోకుమ్చో నెంజి, చి అంచ సిస్సుల్ ఈంజేవ్ జలి తెంతో, ఈంజేవ్ కి ఈంజ లోకుమ్చ నెంజితిచి రిసొ, ఈంజ లోకుమ్చ ప్రెజల్ ఇన్నెయింక విరోదుమ్ దెకితతి.

15 జలె, తుక ‘ఈంజ లోకుమతె తెంతో ఇన్నెయింక కడ నెవును’ మెన అంచి ఆన నాయ్, గని ‘ఈంజ లోకుమతె ఈంజేవ్ తా గెలె, సయ్తాన్క, జోచి సేవక, ఈంజేవ్ దెర్చు నే సేడ్డి రితి రక్కు’ మెన తుక ప్రార్దన కెర్తసి.

16 “ఆవ్ కిసి ఈంజ లోకుమ్చో నెంజి గే, అంక నంపజలి తెంతో ఈంజేవ్ కి ఈంజ లోకుమ్చ నెంజితి.

17 ఈంజేవ్ పూర్తి తుచయ్ జా తుచి సేవ నిదానుమ్ కెర్తె తతి రితి, తుచి సత్తిమతె ఇన్నెక సుద్ది కెరు. తుచి కోడు సత్తిమ్.

18 తుయి కిసి అంకయ్ ఈంజ లోకుమతె తెద్రయ్లది గే, మాన్సుల్క ఈంజేవ్ సత్తిమ్ వాట్ దెకయ్తి రితి, ఆవ్ ఇన్నెక తెద్రవ దా అస్సి.

19 ఈంజేవ్ కి తుచి సత్తిమతె తుచయ్ జా, తుచి సుద్ది జా తుక నిదానుమ్ తత్తు మెనయ్, అంచి జివ్ తుచి అత్తి ఆవ్ సార్పు కెర దెతసి.

20 “ఎక్కి ఈంజేవ్ అంచ సిస్సుల్చి రిసొ ఇసి ప్రార్దన కెరి నాయ్. ఈంజేవ్ అంచి రిసొ సాచి సంగిలె, ఇన్నెయించి కోడు సూన అన్నె కో అంక నంపజా గెచ్చుల గే, జోవయించి రిసొ కి ఆవ్ ప్రార్దన కెర్తసి.

21 ఓ బ, తుయి కిసి అంచి పెట్టి అస్సిన్ గే, చి ఆవ్ కిసి తుచి పెట్టి అస్సి గే, దస్సి ఈంజేవ్ కి, జేవ్ కి, అమ్చి పెట్టి తా ఏఎక్కి జతు, చి దస్సి ఎక్కి జల మెలె, ఈంజ లోకుమ్చ అన్నె మాన్సుల్ దెకిలె, తుయి అంక తెద్రయ్లిసి జేవ్ కి నంపజవుల.

22 తుచి గవురుమతె అంక కిసి తుయి టీవడ అస్సిన్ గే, అంచి గవురుమతె ఆవ్ ఇన్నెయింక టీవడ అస్సి, చి ఆవ్, తూయి, కిసి ఎక్కి జా అస్సుమ్ గే, ఈంజేవ్ కి *ఎక్కి జతు మెనయ్ అంచి ఆన.

23 దస్సి, ఆవ్ ఇన్నెయించి పెట్టి, తుయి అంచి పెట్టి తమదె, చి ఈంజేవ్ పూర్తి †ఎక్కి జవుల. దస్సి జలె,

* 17:11 17:11 నెంజిలె, ‘తుయి అంచి అత్తి సార్పు కెర దిల ఈంజేవ్ సిస్సుల్క తుచి నావ్చి సెక్కి రక్కు’. † 17:11 17:11 నెంజిలె, ‘ఎక్కి ప్రేమయ్ అస్సుమ్ గే, ఈంజేవ్ కి ఎక్కిలో తెన్ ఎక్కిలో ఎక్కి ప్రేమయ్ తెన్ తవుల’. ‡ 17:12 17:12 నెంజిలె, తుయి అంచి అత్తి సార్పు కెర దిల ఈంజేవ్ సిస్సుల్ తెన్ ఆవ్ బుల్లె తిలి పొది తుచి నావ్ తెన్ ఇన్నెక రకితె తిలయ్.... § 17:21 17:21 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టొచి కోడు దెక.

* 17:22 17:22 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టొచి కోడు దెక. † 17:23 17:23 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టొచి కోడు దెక.

ఈంజ లోకుమ్ చ మాన్సుల్ కిచ్చొ దొన్ని చినుల మెలె, అంక తెద్రయ్ లోసా తుయి మెన చినుల, చి తుయి అంకయ్ కెద్ది ప్రేమ కెర అస్సిన్ గే, ఇన్నెయింక కి తుయి తెద్ది ప్రేమ కెర్తసి మెన చినుల.

24 “ఈంజ లోకుమ్ నే జెర్మున్ కెరై అగై తెంతో అంచి ఉప్పిర్చి తుచి ఎదివాట్ ప్రేమక అంక ఒగ్గర్ గవురుమ్ దా అస్సిన్. జలె, ఓ బ, తుయి అంక దిల సిన్సుల్ కి †ఆవ్ తిలిన్తె అంచి తెన్ తత్తు, చి తుయి అంక దిలి గవురుమ్ దెకుతు, మెన అంచి ఆన్.

25 పున్నిమ్ తిలో ఓ బ, ఈంజ లోకుమ్ చ తుక నేన తిలె కి, ఆవ్ తుక జాని, చి కచితుమ్ తుయి అంక తెద్రయ్ లిసి ఈంజేవ్ సిన్సుల్ జాన్తి.

26 తుయి అంక ప్రేమ కెర్లి ప్రేమ ఇన్నెయించి పెట్టి తవున్ మెన, ఆవ్ ఇన్నెయించి పెట్టి తంక మెన, తుయి కీసాచొ జా అస్సిన్ గే, ఇన్నెయింక ఆవ్ దెకవ అస్సి, దెకయ్ తె తయిందె” మెన దేముడు అబ్బొన్క యేసు ప్రార్దన కెర్లన్.

18

యేసుక విరోదుమ్ సుదల్ దెర్లిసి

(మత్త 26:47-56; మార్కు 14:43-50; లూకా 22:47-53)

1 యేసు ఈంజేవ్ కొడొ సంగ కేడవ, జోచ సిన్సుల్ తెన్ బార్ జా, కెద్దోను మెంతి లోయ ఒత్తల్తోచి ఒడ్డుతె జిన గెచ్చు, సిన్సుల్ తెన్ ఒత్త తిలి తోటతె పెసిల.

2 పుండితి రిసా యేసు జోచ సిన్సుల్ తెన్ ఒత్త గెచ్చుక అలవాట్చి రిసా, అప్పె ఒత్త గెచ్చు తవుల మెన, జోక విరోదుమ్ సుదల్తె దెర దెంక గెలో యూదాక అజ్జ.

3 జో యూదా జలె, వెల్లెల పూజర్లుతె చి పరిసయ్యుల్తె గెచ్చు, జోచ జమాన్లు సగుమ్జిన్క, సయన్యుమ్ సుదల్ సగుమ్జిన్క కడ ఆన, జేవ్, లాంతెర్లు దివ్వొ, అయ్దల్ దెరన, యేసు తిలిన్తె ఉట్ట అయ్ల.

4 జోక జర్లు జంక తిలిసి ఎత్కి యేసు జానె చి, జేవ్ దెర్తన ఒత్త పాచ జెతికయ్, జో పురైతో జా, “కక్క చజితను?” మెన జోవయింక పుసిలన్.

5 జేవ్ జోక, “నజరేతు గవ్విచొ యేసుక చజితనుమ్” మెన జబాబ్ దిల, చి యేసు జోవయింక “అవ్వి జో!” మెలన్. జోవయించి అత్తి జోవయింక దెర దెంక ఒప్పణ్ణొ యూదా జోవయింతెన్ ఒత్త టీచ అస్సె.

6 జలె, “అవ్వి జో” మెన యేసు సంగితికయ్, జోక దెరుక మెన అయ్ల జనాబ్ పడ్డె గుంచ బుయ్యె సీడ గెల.

‡ 17:24 17:24 నెంజిలి ‘అవ్ గెతిన్తె జా, అంచి తెన్ తత్తు’.

* 18:9 18:9 17:12 చి కోడు దెక. అన్నె కిచ్చొ రగుమ్క నాసెనుమ్ జతి నాయ్ మెలె, జేవ్ మెరై ఎదక యేసుక నిదానుమ్ తా: గెల.

† 18:13 18:13 ‘అన్నా’ అగై ఎత్కి వెల్లొ పూజరి జా తిలో.

‡ 18:13 18:13 13-14 ఈంజ మత్తెలి తోలితో

రెగిడ్ల పుస్తకల్తె ఏక్ పుస్తకమతె 13 నంబర్చి కోడు కేడ్లి బేగి 24 నంబర్చి కోడు గల అస్సి; 14 నంబర్చి కోడుచి కంట అగ్గె. § 18:14 18:14 11:50 చి కోడు దెక.

7 పడ్డె, “కక్క చజితను?” మెన యేసు జోవయింక అన్నెక్ సుట్టు పుసిలన్, చి “నజరేతు గవ్విచొ యేసుక” మెన అన్నెక్ సుట్టు సంగిల.

8 సంగిలె, యేసు జోవయింక “ ‘అవ్వి జో’ మెన తుమ్క సంగిలయ్, గెద. అంకయ్ చజితను జలె, అంకయ్ దెర, గని అంచి తెన్ తిలసక పోన” మెన జబాబ్ దిలన్.

9 చి యేసు అగై సంగ తిలి ఏక్ కోడు ఇన్నెయింతెన్ *ఏక్ రగుమ్క నెరవెర్లుప జలి.

“తుయి అంచి అత్తి సొర్ప కెర దిలసతె కో నాసెనుమ్ జతి నాయ్”

మెన దేముడు అబ్బొన్క తెదొడి సంగ తిలి కోడు.

10 జలె, సీమోను పేతురుక ఏక్ కండా తిలి. జో పేతురు జా కండా కడన, ఎత్కిక వెల్లొ పూజరిచొ గొతిమాన్సు ఎత్కిలోక కుంద, జోచి ఉజిల్ కండ్లి సింద గెలన్. జో గొతిమాన్సుచి నావ్ ‘మల్కు’.

11 పేతురు దస్సి కెర్తికయ్, “కండా తియ దేన్! దేముడు అబ్బొ అంక తియార్లి కామ్ దుకుమ్ సైమల్ జతిసి జలెకి, ఆవ్ జా కామ్ కెరుకయ్, జా దుకుమ్, జా సైమ ఓర్లుప జంకయ్” మెన పేతురుక యేసు సంగిలన్.

12 జలె, జేవ్ జమాన్లు, జోవయించొ అదికారి చి దేముడుచి గుడిచ సయన్యుమ్ సుదల్ యేసుక దెర, బంద గెల.

13 తోలితో † ‘అన్నా’ మెలోసాతె కడ నిల. జో కొన్సొ మెలె, కయప మెలో జా వెర్సిచొ ఎత్కిక వెల్లొ పూజరిచొ మామెసి.

‡ 14 ‘అమ్చ యూదుల్ నస్తుమ్ నే జతి రిసా ఎత్కిలో మెరై చెంగిలి’ మెన యూదుల్చ వెల్లెల మాన్సుల్క, ఎత్కిక వెల్లొ పూజరి కీ అగై సంగ తిలో. ఈంజొ కయప జో ఎత్కిక వెల్లొ పూజరి.

జోచొ సిన్సుడు నెంజి మెన పేతురు సంగిలిసి

(మత్త 26:69-70; మార్కు 14:66-68; లూకా 22:55-57)

15 యేసుక జేవ్ మాన్సుల్ దెర ఎత్కిక వెల్లొ పూజరితె కడ నెతె తిలి పొది, సీమోను పేతురు, అన్నెక్లో సిన్సుడు, దొగుల, జేవ్ దెర్తనచి పట్టి గెల. ఎత్కిక వెల్లొ పూజరి జో అన్నెక్లో సిన్సుడుక జానె, చి జో సిన్సుడు కి యేసు తెన్ ఎత్కిక వెల్లొ పూజరిచి గెరి తెడి పెసిలన్.

16 గని, పేతురు గుమ్ముమ్ పాసి, బయిలె టీచ జా తిలో. జలె, ఎత్కిక వెల్లొ పూజరి జాన్లొ జో అన్నెక్ సిన్సుడు అన్నె బార్ జా, గుమ్ముమె రకితి తేర్బోద గొత్తి సుదొక సంగ, పేతురుక తెడి కడ ఆన్లన్.

17 జా తేర్బోద గొత్తి సుదో పేతురుక దెక, “తుయి కి జో మాన్సుచో సిస్సుడు, కిచ్చొగె” మెలన్, గని “నెంజి” మెన పేతురు సంగిలన్.

18 జలె, ‘చల్లి’ మెన, ఎత్కిక వెల్లో పూజరిచ గొత్తి సుదల్ దేముడుచి గుడిచ సయన్యుమ్ సుదల్ తెన్ మెసి బోగుల్చి ఆగి లావ తపితె తిల. పేతురు కి, తప్పక మెన గెచ్చ, ఒత్త జోవయింతెన్ అస్సి.

ఎత్కిక వెల్లో పూజరి యేసుక పరిచ్చ కెర్లిసి
(మత్త 26:59-66; మార్కు 14:55-64; లూకా 22:66-71)

19 మదెనె ఎత్కిక వెల్లో పూజరి యేసుక పరిచ్చ కెర్లన్. జోచ సిస్సుల్చి రిసా, జోచి బోదనచి రిసా పరిచ్చ కెర్లన్.

20 యేసు జోక కిచ్చొ జబాబ్ దిలన్ మెలె, “అంచి బోదన, జలె, ఈంజ లోకుమ్చ ఎత్కిజిన్ సూన్తి రితి ఎదార్దుమ్ సంగ అస్సి. అమ్చ యూదుల్చ సబ గెరలె బోదన కెర్తె తిలయ్, చి దూరి పాసి తెంతో ఎత్కిజిన్ యూదుల్ బెర జెతికయ్ అమ్చి దేముడుచి గుడితె కి బోదన కెర్తె తిలయ్. ఆవ్ కెయ్య కి, కిచ్చొ కి లుంకచోరు సంగి నాయ్.

21 జాకయ్, కిచ్చొక అంకయ్ పుసుక? కిచ్చొ కిచ్చొ సంగ అస్సి గే, అంక సూన్లసకయ్ పుస” మెన యేసు జబాబ్ దిలన్.

22 యేసు దస్సి సంగితికయ్, పాసి టీవ తిలొ సయన్యుమ్ సుదో ఎక్కిలో యేసుక పెట, “ఎత్కిక వెల్లో పూజరిక తుయి దస్సి జబాబ్ దెంక బెదెదె గే? పోని!” మెన గొల కెర్లన్.

23 యేసు జోక కిచ్చొ జబాబ్ దిలన్ మెలె, “ఆవ్ సంగిలిసి తప్పు తిలెగిన, రుజ్జు దెకవ సాచి సంగ, గని, ఆవ్ సంగిలిసి సత్తిమ్ జతయ్. జాక, కిచ్చొక అంక పెటుక?” మెన సంగిలన్.

24 *తెదొడి అన్నా, యేసుక బందున్ తెన్ ఎత్కిక వెల్లో పూజరి జలొ కయవతె తెర్లయ్లన్.

యేసుచో సిస్సుడు నెంజి మెన పేతురు అన్నె సంగిలిసి
(మత్త 26:71-75; మార్కు 14:69-72; లూకా 22:58-62)

25 సీమోను పేతురు ఒత్త ఆగి తపితె అస్సి, జలె, ఒత్త తిల మాన్సుల్ జోక “తుయి కి యేసుచో సిస్సుడు, నెంజిన్ గే?” మెంతికయ్, జో “ఆవ్ నెంజి” మెలన్.

26 గని ఎత్కిక వెల్లో పూజరిచో గొతిమాన్సుచి కండో పేతురు అగ్గె సింద తిలొ. జలె, జో మాన్సుచో సొంత మాన్సు ఎక్కిలో ఒత్త తిలొ. జో, జలె, పేతురుక “అప్పె

తుయి జోవయింతెన్ తోటతె తిలది. తుక దెకిలయ్, గెద?” మెలన్.

27 గని, “నాయ్, జో మాన్సుక నేని!” మెన పేతురు సంగిలన్, చి జో సంగిల్ బేగి కుకుడో వాసిలన్.

రోమ అదికారి యేసుక పరిచ్చ కెర్లిసి
(మత్త 27:1-2,11-31; మార్కు 15:1-20; లూకా 23:1-25)

28 తెదొడి, యేసుక కయవ మెలొ జో ఎత్కిక వెల్లో పూజరి పుస కెర కేడయ్తికయ్, జా రోమ దేసిమ్ తెంతోచో అదికారిచి మేడతె జోక వెల్లెల మాన్సుల్ కడ నిల. గని, జోక కడ నిలన జా మేడ తెడి పెసితి నాయ్. కిచ్చొక మెలె, జేవ్ యూదుల్ జవుల, చి పస్కా మెలి జోవయించి వండుగు తిలి, చి ‘యూదుల్ నెంజిల మాన్సుల్చ గెరలె పెసిలె గార్ జమ్దె, చి గార్ జలె వండుగ్ అన్నిమ్ కంక గారు. వండుగు పిట్టెదె’ మెంతతి.

29 జాకయ్, పిలాతు మెలొ జో అదికారి బార్ జా, జోవయింతెన్ జా కెర “కిచ్చొ నేరిమ్ కెర్లొ మెన ఈంజో మాన్సుచి రిసా తుమ్ సంగితను?” మెన యూదుల్చ జేవ్ వెల్లెల మాన్సుల్చ పుసిలన్.

30 జేవ్ జోక “ఈంజో నేరిమ్ కెర్లొ నాయ్ జలె, ఇన్నెక తుచితె సార్పు కెరుక మెన కడ ఆన్తమ్ గే? నాయ్” మెన జబాబ్ దిల.

31 దస్సి సంగితికయ్, పిలాతు జోవయింక, “తుమ్ ఇన్నెక కడన, తుమి, దేముడు మోసి తెన్ దిలి తుమ్చ సొంత ఆగ్గుల్ రితి ఇన్నెక తీర్పు కెర!” మెలన్. దస్సి మెంతికయ్ జేవ్ జోక “ఆమ్ కెర్లి రితి వత్తల్ గల మార్తి సిచ్చ కెరుక జలె, ‘నాయిమ్ నాయ్’ మెన, తుమ్ రోమియులు ఒప్పున్ నాయ్” మెన జబాబ్ దిల.

32 జేవ్ దస్సి జబాబ్ దిలి తెంతో ‘†సిలువతె మొర గెచ్చిందె’ మెలి అర్దుమ్ తెన్, జో మొర్తిసి కిచ్చొ రగుమ్ జర్లు జతిన్చి రిసా యేసు అగ్గె సంగ తిలి కోడు నెరవెర్చువ జలి.

33 పడ్డొ పిలాతు, మేడచి తెడి అన్నె పెన, యేసుక బుకార్లన్. యేసుచి రిసాచ కొడొ నూన తిలొ, చి “తుయి యూదుల్చో రానొ గే?” మెన జోక పుసిలన్.

34 ఇసి పుస పరిచ్చ కెర్లికయ్, యేసు జోక, “తుయి అజ్జ కెర అంక దస్సి సంగితసి గే? నాయ్ మెలె, కో జెలికు వేర మాన్సు తుక †దస్సి మెన అంచి రిసా సంగ అస్తి గే?” మెన పుసిలన్.

35 జాచి రిసా, పిలాతు జోక “ఆవ్ యూదుడు గే, చి దస్సి మెనిందె? నెంజి, తుచ సొంత యూదుల్చ వెల్లెల మాన్సుల్, వెల్లెల పూజర్లు, తుక అంచితె సార్పు కెర అస్తి.

* 18:24 18:24 13 నంబర్చి కోడుచి ఎట్టొచి కోడుక దెక. † 18:32 18:32 12:32, 33క దెక. ‘సిలువ’ కిసి తయెదె మెలె, ఏక్ టీవ్తి చి ఏక్ అడ్డుమ్ జతి దొన్ని డేడివొ రిత డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోవయించ అత్తో చట్టొ చంపొ కెరవ, అత్తోచట్టొతె మేకుల్ పెట, నెంజిలె వాలివొ తెన్ బంద దా, సిలువ బుయ్యె టీవ రోవ కెర, దస్సి ములుల. జో సిచ్చ జతోసొ దస్సి ఒడయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా. ‡ 18:34 18:34 యూదుల్చో రానొ మెనంతయ్ మెన యేసుచి రిసా పిలాతుక సంగిలె, అంచి రోమ్ దేసిమ్చి అదికారుమ్ యేసు పిట్టవుక ఉచ్చర్లయ్ మెన పిలాతు కోపుమ్ జా మొర్తి సిచ్చ దెయెదె మెన యూదుల్చ వెల్లెల మాన్సుల్ కుత్త కెర తిల. లూకా 23:2.

కిచ్చొ కెర అస్సిన్, చి తుక దస్సి కెర్తతి?" మెన పిలాతు పుసిలన్.

36 యేసు, జలె, కిచ్చొ జబాబ్ దిలన్ మెలె, "అంచి రాజిమ్ ఈంజ లోకుమ్చి నెంజె. అంచి రాజిమ్ ఈంజ లోకుమ్చి జతి జలె, యూదుల్చ వెల్లెల మాన్సుల్చి అత్తి ఆవ్ దెర్ను నే సేడ్డి రితి అంచ గొత్తి సుదల్ యుద్దుమ్ కెర్త. గని అంచి రాజిమ్ ఈంజ లోకుమ్చి నెంజె" మెన జబాబ్ దిలన్.

37 యేసు దస్సి సంగితికయ్, పిలాతు జోక "దస్సి జలె, 'రానొ' మెన తుయి నిజుమ్ సంగితసి గే?" మెన అన్నె పరిచ్చ కెర్లన్, చి యేసు జోక, " 'రానొ' మెన తుయి అంక సంగితసి. ఆవ్ కిచ్చొక జెర్మిలయ్, కిచ్చొక ఈంజ లోకుమ్తె అయ్లయ్ మెలె, సత్తిమ్ దెకవుక, సత్తిమ్చి రిసా సాచి సంగుక అయ్లయ్. జయ్యి అంచి కామ్. కో సత్తిమ్తె బెదితస జవుల గే, అంక సంజవుల" మెన సంగిలన్.

38 యేసు దస్సి సంగితికయ్, పిలాతు మెలొ జో అదికారి, "కేతె, సత్తిమ్?" మెన సంగిలొ.

పిలాతు దస్సి సంగ కెర, మేడ తెంతొ బార్ జా, యూదుల్చ వెల్లెల మాన్సుల్ తిలిన్తె అన్నె గెచ్చు, "ఈంజొ కిచ్చొ నేరిమ్ నే కెర్లి రితి అంక డీస్తయ్.

39 తుమ్చి నీపస్కా వండుగ్క మాత్రుమ్, జేల్తె తిలొ కేన్ జవున్ జేలి జలొసాక తుమ్చి రిసా ఆవ్ విడ్డల్ కెరుక అంక అలవాట్. జలె, కక్క ఆవ్ ముల దెంక? తుమ్చ యూదుల్చొ ఈంజొ రానొక ముల దెంక?" మెన పిలాతు పుసిలన్.

40 గని జేవ్ కిసి జల మెలె, "ఈంజొ మాన్సుక పొని! బరబ్బుక ములు!" మెన ఒర్న దిల. బరబ్బు, జలె, మాన్సుక మొరయ్తెసా.

19

యేసుక సిలువ గల్లి రిసా సిచ్చ కెర్లిసి

1 జలె, పిలాతు తెదొడి కిచ్చొ కెర్లన్ మెలె, * 'పెట్లె సాలు కిచ్చొగె' మెన ఉచర, కొర్డల్ తెన్ పెటయిలన్.

2 ఒత్త తెంతొ, నయన్యుమ్ సుదల్ నగుమ్జిన్, యేసుక † మేడచి తెడి కడ నా కెర, ఆరి కొంకడ్డి రితి 'రానొ' మెన కంటకంపల్ తెన్ ఏక్ కిరీటుమ్ గంచ, జోచి బోడితె గల, ‡ ఊద రంగుచొ పాలుమ్ జోక గల దా తెయార్ కెర,

3 పాసి జా జోకర, "యూదుల్చొ రానొ, తుక జెయ్యి!" మెన మొక్కె పెట్లె.

4 తెదొడి, యూదుల్చ వెల్లెల మాన్సుల్ తిలిన్తె పిలాతు అన్నె బార్ జా, జోవయింక "ఓదె, జో కిచ్చొ నేరిమ్ నే కెర్లి రితి

అంక డీస్తయ్, చి జయి గుర్తుక, తుమ్క రుజ్జు దెకయ్తి రితి, తుమ్ తిలిన్తె ఆవ్ జోక బార్ కెర్లన్" మెన సంగితికయ్,

5 కంట కంపల్చి కిరీటుమ్ జోచి బోడి తతె, ఎరన పాలుమ్ జో గలన తతె, యేసుక బార్ కెర్ల, చి "ఈందె జో మాన్సు!" మెన, పిలాతు దెకయ్లన్.

6 యేసుక దెకిల్ బేగి, వెల్లెల పూజర్లు చి దేముడుచి గుడిచ నయన్యుమ్ సుదల్ కిసి జల మెలె, "జోక సిలువతె గల మొర్లి సిచ్చ కెరు! సిలువతె గలు!" మెన ఒర్నిల. జేవ్ దస్సి జతికయ్, "తుమి కడన సిలువతె గల! ఈంజొ కిచ్చొ నేరిమ్ నే కెర్లి రితి అంక డీస్తయ్. జా పూచి నెసి!" మెన పిలాతు సంగిలన్.

7 యూదుల్చ వెల్లెల మాన్సుల్ జోక కిచ్చొ జబాబ్ దిల మెలె, "అమ్క దేముడు మోసె తెన్ దిలి ఆగ్గుల్ అస్సె. జా ఆగ్గు కిసిచి మెలె, అమ్చొ దేముడు తెన్ కో జలెకు సమ్మందుమ్ సంగనె, 'వెల్లి పాపుమ్ కెర అస్సె' మెన, జో మాన్సు మొర్లి సిచ్చ జంక అస్సె. ఈంజొ, జలె, 'దేముడుచొ పుత్తుసి ఆవ్' మెనన, జయ్యి పాపుమ్ కెర అస్సె, చి మొర్లి సిచ్చ జో జంక అస్సె!" మెన వెల్లెల మాన్సుల్ సంగిల.

పిలాతు యేసుక అన్నె పరిచ్చ కెర్లిసి

8 పిలాతు, జలె, జేవ్ కొడొ నూన, బలె నీబియఁ గెచ్చు, యేసుక అన్నె కడన,

9 జా మేడచి తెడి అన్నె పెన, జోక, "తుయి కేనె తెంతొ అయ్లది?" మెన పుసిలన్. గని యేసు తుక్కె తా జబాబ్ దెయె నాయ్.

10 తుక్కె తతికయ్, పిలాతు జోక, "తుయి కిచ్చొక అంచి తెన్ లట్టబ్బి నాయ్? తుక విడ్డల్ కెరుక జవున్, నెంజిలె మొర్లి సిచ్చ దా సిలువతె గలుక జవున్, అంక అదికారుమ్ అస్సె మెన తుయి నేన్సి గే?" మెన సంగిలన్.

11 జో దస్సి సంగితికయ్, యేసు జోక కిచ్చొ జబాబ్ దిలన్ మెలె, "జా అదికారుమ్, జలె, దేముడు తుక దెతో నాయ్, జలె, అంచి ఉప్పిరి తుక కిచ్చొ అదికారుమ్ తత్తి నాయ్. గని, తుయి ఇన్నె ఏలుప కెరుక నాయిమ్. జాకయ్, తూయి అప్పె కెర్లిన్చి పాపుమ్ తొక్కి. తుచి అత్తి అంక సార్పు కెర్లనచి పాపుమ్ ఒగ్గరి!" మెన పిలాతుక యేసు సంగిలన్.

యూదుల్చ అత్తి పిలాతు యేసుక సార్పు కెర్లిసి

12 తెదొడి, యేసుక విడ్డల్ కెరుక మెన పిలాతు ఇస్టుమ్ జా, యూదుల్చ వెల్లెల మాన్సుల్ తిలిన్తె అన్నె బార్ జా, జోవయింక సంగిలన్, గని జేవ్ పిలాతుక కిచ్చొ మెన బియడ్ల మెలె, "ఎక్కిలొ 'రానొ' మెననె, జో తుచొ అదికారి

§ 18:39 18:39 పూర్ణమ్ పొది యూదుల్ బగుప్తు దేసిమి తా గొతిమాన్సుల్ జలిన్ తెంతొ ఎత్తి అదికారుమ్ తిలొ దేముడు విడ్డల్ కెర్లిసి ఏద కెర్లి రిసా యూదుల్ ఈంజ వస్కా వండుగు కెరుల. ఈంజయి వెర్ని యేసు పాపల్ తెంతొ విడ్డల్ కెర్లిసా జయెదె మెన నేన్తి. * 19:1 19:1 లూకా 23:16, 22క దెక. † 19:2 19:2 మత్తయి 27:27, మార్కు 15:16. ‡ 19:2 19:2 ఎరన చి నీలిమ్ రంగు బెదయ్లె, ఊద రంగు జయెదె. సార్ రంగు, § 19:8 19:8 పిలాతుచొ అదికారి జలొ రోమ్ దేసిమ్చొ కైసర్ రానొ, జలె, ఎత్తి అదికారుమ్ తిలొ దేముడుక నమ్మందుమ్ సంగితయ్ కి, చి 'జేక అమ్చి రోమ్చి అదికారుమ్చి ఉప్పిరి అన్నె విరోదుమ్ దెకవుల' మెన, 'అంక కి జా విరోదుమ్ దెకవుల' మెన జో పిలాతు బియఁ తయెదె.

జలో రోమ్ దేసిమ్చో *కైసర్ రానొక యుద్ధుమ్ కెర్లి రితి జయెదె, చి దసా మాన్సుక తుయి విడ్డల్ కెర్లి, 'కైసర్క విరోదుమ్ జలో' మెన తుచి రిసా కి నేరిమ్ వయడుక జయెదె" మెన పిలాతుక బియడ్ల.

13 జేవ్ కొడొ సంగ పిలాతుక దస్సి బియడ్డికయ్, ఒత్త జేవ్ తిలిన్తె పిలాతు యేసుక అన్నె బార్ కెరవ, మేడచి పురైచి సదై తిలి తీర్పు కెర్లి టాన్తె వెసిలన్. సద్దుర్క 'గబ్బతా' మెన యూదుల్చి ఎబ్బీ బాస తెన్ సంగుల.

14 ఈంజ కెయ్ జర్గు జలి మెలె, యూదుల్చి పస్సా పండుగ్గచి సెలవ్ కడన్లి తెయార్ కెర్లి అగ్గె దీసి, పాసి పాసి మెద్దెనె. పిలాతు, జలె, యేసుక అన్నె దెకవ, "అల్లె, తుమ్చో రానొ, ఈంజో!" మెన యూదుల్చి వెల్లెల మాన్సుల్క సంగిలన్.

15 జేవ్, "జోక అమ్చో రానొ మెంతసి గె? జో గెస్సు! మొర్పు! సిలువతె గలు!" మెన ఒర్పిల. జేవ్ దస్సి జతికయ్, పిలాతు జోవయింక అన్నె, "తుమ్చో రానొక ఆవ్ సిలువతె గల మారుక గే?" మెన జోవయింక కొంకడ్లన్. చి వెల్లెల పూజర్లు కిచ్చొ మెల మెలె, "ఎక్కి కైసర్ అమ్క రానొ. అన్నె కో నాయ్!" మెన సంగిల.

16 జేవ్ దస్సి సంగితికయ్, యేసుక సిలువతె గల మొర్పి సిచ్చ కెర్లి సెలవ్ దా, జోక జోవయింక అత్తి పిలాతు సార్ప కెర దిలన్. తెదొడి జమాన్లు యేసుక దెర నిల.

యేసుక సిలువతె గల మార్గిసి

(మత్త 27:32-44; మార్కు 15:21-32; లూకా 23:26-43)

17 తెదొడి, సిలువతె గల మారుక మెన, యేసుక దెర్ల, చి జోక గల్లి సిలువ జొయ్యి వయన బార్ జా, 'గొల్తో' మెలి మెట్టయ్ ఉట్ట గెల. ఎబ్బీ బాస తెన్ జా నావ్చి అర్దుమ్ కిచ్చొ మెలె, 'గిడ్డి పోలికచి టాన్'.

18 ఒత్త, జా †సిలువతె జోక గల, జోచి ‡అత్తిచట్టాతె మేకుల్ పెట, సిలువతె టీవడ రోవిల. యేసుచి సిలువ నెడిమి రోవ, జోచి డెబ్బి పక్క ఎక్కిలోక, ఉజెతో పక్క అన్నెక్లోక, దొగుల చోర్లక కి దస ఎక్కిక్ సిలువల్తె గల, దస్సి టీవడ్ల.

19 'యేసుచి సిలువచి బోడి గల' మెన పిలాతు ఏక దార్చిగండతె రెగ్గయిలన్. కిచ్చొ రెగ్గయిలన్ మెలె, "నజరేతు గవ్విచో యేసు, ఈంజో యూదుల్చో రానొ జయెదె" మెన రెగ్గయిలన్.

20 యేసుక సిలువతె గలిలి టాన్, జలె, యెరూసలేమ్ పట్టుమ్చి పాసిచి రిసా, యూదుల్ ఒగ్గర్జిన్ జా వాట్

గెచ్చుక జెంక జతె తిల, చి జా దార్చిగండతె కొడొ సదు కెర్ల. తిన్ని బాసల్ తెన్ కి పిలాతు జా దార్చిగండతె రెగ్గవ తిలో, జోవయింక సొంత ఎబ్బీ బాస తెన్ కి, రోమ్ దేసిమ్చి లాటిన్ బాస తెన్ కి, పడ్డొ ఒగ్గర్ బియ్యారి కెర్లి గ్రీకు దేసిమ్చి గ్రీకు బాస తెన్ కి, రెగ్గవ తిలన్. దస్సి తిలె, కో అయ్లె కి అర్దుమ్ కెరనుల, గెద,

21 చి 'జా దార్చిగండ దెకితస అమ్క ఆసుల' మెన యూదుల్చి వెల్లెల మాన్సుల్క లాజు, కోపుమ్, చి రిసా, జోవయింక వెల్లెల పూజర్లు పిలాతుతె గెచ్చు, " 'యూదుల్చో రానొ జయెదె' మెన రెగుడుక కిచ్చొక? జా పోని, గని 'యూదుల్చో రానొ ఆవ్ మెన ఈంజో మాన్సు సంగన్లొ' మెన రెగుడు!" మెన పిలాతుక సంగిల.

22 గని పిలాతు, "ఆవ్ రెగ్గయిలిసి ఆవ్ రెగ్గవ అస్సి. దస్సి తవును" మెన, మార్పువ కెరె నాయ్.

యేసుచి పాలల్ నయ్న్యమ్ సుదల్ వంటన్లిసి

23 నయ్న్యమ్ సుదల్, జలె, యేసుక సిలువతె గల టీవడ్డి పడ్డొ, జోచి పాలల్క చెత్తర్ వాటల్ కెర, వంటన్ల. జోచి దిగిల్ సొక్క కి తిలి, గని కుటు నెంతె వీన్లొ పాలుమ్ జా, చి దస్సి వంటనుక నెంజిలి.

24 జాక, "జా పాలుమ్ చిరుక పోని. చీటి గలుమ, చి కక్క సేడెదె గే, దెకుమ" మెన చీటి గలిల. కిచ్చొక ఇసి జర్గు జలి మెలె, దేముడు పూర్గుమ్ రెగ్గయిలి కోడు నెరవెర్పువ జంకయ్ ఇసి జలి.

"అంచ పాలల్ వంటనుల, చి అంచొ ఏక పాలుమ్క చీటి గలుల" మెన రెగిడ్డి కోడు.

25 నయ్న్యమ్ సుదల్, జలె, యేసుచి పాలల్క ఆన జా దస్సి కెర్ల, గని యేసుచి అయ్యసి, పడ్డొ క్లోప మెలో ఎక్కిలోచి తేర్పి మరియ, యేసుచి అయ్యస్చి అప్పుసి జయెదె, యేసుక పెద్దయసి జయెదె, పడ్డొ మగ్గల పట్టుమ్చి మరియ కి, జేవ్ తేర్బోదల్ యేసుచి సిలువచి పాసి టీవఁ అస్తి.

26 జలె, యేసు అయ్యస్క దెకిలన్, చి జో ఒగ్గర్ ప్రేమ కెర్లొ సిస్సుడు కి ఒత్త టీవ అస్సి మెన దెకిలన్, చి జో సిస్సుడుక దెకవ అయ్యస్క "ఓదె, తుచొ పుత్తుది!" మెన సంగ,

27 అయ్యస్క దెకవ, జో సిస్సుడుక "ఈందె, తుచి అయ్యది!" మెన సంగిలన్. జాక జయి గడియ తెంతొ జో సిస్సుడు దెకిత్ తంక మెన, సార్ప కెర దిలో, చి జయి గడియ తెంతొ జో సిస్సుడు జాక గెరి కడన్, 'అయ్య' మెన జాక పోసిలో.

* 19:12 19:12 'కైసర్' నెంజిలి 'వెల్లొ రానొ' మెనుల. 'సిజరు' మెలె, ఇంగ్లీస్ తెన్ బెదితి కోడు, 'కైసర్' మెలె, గ్రీకు బాస తెన్ బెదితి కోడు, 'వెల్లొ రానొ' మెలె, తెలుగు తెన్ బెదితి కోడు. † 19:18 19:18 'సిలువ' కిసి తయెదె మెలె, ఏక టీవ్చి చి ఏక అడ్డుమ్ జతి దొన్ని డెడివో రిత డండల్ బెదవుల. జా సిచ్చ జతొ మాన్సుక జా సిలువతె ఎంగ్లవ కెర, జోవయింక అత్తి చట్టా చంపా కెరవ అత్తిచట్టాతె మేకుల్ పెట, నెంజిలి వాలివో తెన్ బంద, సిలువ బుయ్యె టీవ రోవ కెర, దస్సి ములుల. జో సిచ్చ జతొసా దస్సి ఒడయ్ జా మొరెదె. ‡ 19:18 19:18 యోహాను 20:20, 25. లూకా 24:39.

యేసు మొర గెలిసి
(మత్త 27:45-56; మార్కు 15:33-41; లూకా 23:44-49)

28 తెదొడి 'అంచి కామ్ ఎత్తి కేడ గెలి' మెన యేసు జానన, "అంక తాన్ కెర్తయ్" మెన సంగిలన్. ఇన్నెతెన్ కి, దేముడు పూర్ణమ్ రెగ్గయ్లి కోడు నెరవెర్చువ జలి.

29 జలె, ఒత్త ఏక్ తప్పెలయ్ అమ్డి ద్రాచ రస్సుమ్ తిలి, చి ఏక్ బాంజు రితిసి జా రస్సుమ్తె బుడ్డవ కెర, ఏక్ రివ్వతె దెరవ కెర, యేసు చుప్పిర్తి రితి ఒత్తవ సయ్న్యుమ్ సుదల్ చంపొ కెర్ల.

30 జలె, యేసు జా రస్సుమ్ చుప్త కెర, "కీఅంచి కామ్ పూర్తి జలి" మెన సంగ, బోడి వంపొ కెర, జోచి ప్రానుమ్ దేముడు అబ్బొన్చి అత్తి సార్ప కెర దా, మొర గెలన్.

31 జా దీసి తెయార్ జతి దీసి. అన్నెక్ దీసి, సెలవ్ కడన్ల దీసి, 'మొర్త పీనుమ్లు సిలువల్తె తా గెలె గారు' మెన, 'బేగి మొర్తి చి అగ్గయ్ ఉత్తవ వెంట గెలుక జయెదె' మెన, యూదుల్చ వెల్లెల మాన్సుల్ పిలాతుతె గెచ్చు కెర, "సిలువల్తె గలిలసచ చట్టో బగయ్తు, చి పీనుమ్ల్క ఉత్తవ దా బేగి వెంట గెల్తు" మెన సెలవ్ నజిల, చి పిలాతు సెలవ్ దిలన్.

32 జాకయ్, సయ్న్యుమ్ సుదల్ గెచ్చు కెర, తొలితొ ఎక్కిలోచ పడ్డొ అన్నెక్లొచ, యేసు తెన్ బెద సిలువల్తె గలిల దొగుల చొర్లచ చట్టో బగవ గెల.

33 గని, యేసుతె అయ్లె, 'నాయ్, అగ్గయి మొర గెచ్చు అస్సె' మెన దెక, జోక చట్టో బగయితి నాయ్.

34 గని, జోవయింతె ఎక్కిలో యేసుక ఈంటె తెన్ పక్కయ్ బూసిలన్. బూసిల్ బేగి, లోయి కి పాని కి సూయి జలి.

35 తుమ్ ఈంజ సదు కెర్తన కి సూన్తన కి, తుమ్క 'జేవ్ కి పూర్తి నంపజతు' మెనయ్ జా ఎత్తి *దెకిలోసా జోచి సాచి సంగ అస్సె. జో సంగిలి సాచి సత్తిమ్, చి 'సత్తిమ్' మెన జో కచితుమ్ జానె.

36 ఈంజ కిచ్చొక ఇసి జర్గు జలి మెలె, ఇన్నెతెన్ దేముడు పూర్ణమ్ రెగ్గయ్లి కోడు నెరవెర్చువ జలి.

"జో అర్పితుమ్ జలోసాతె కేన్ ఆడు కి బగయితి నాయ్" మెన రెగిడ్లి కోడు, చి

37 "జేవ్ బూసిలోసాక జేవ్ దెక ఉచరుల" మెన అన్నెక్ కోడు అస్సె.

యేసుచి పీనుమ్ మెన్సున్తె ఎంగ్డవ దిలిసి

38 యూదుల్చ వెల్లెల మాన్సుల్తె ఎక్కిలో, అరిమతయ్ మెలి గవ్వెచొ యోసేపు మెలోసా, జో, జలె, యేసుచ సిస్సుడు, గని అన్నె వెల్లెల మాన్సుల్క బియఁ కెర,

§ 19:30 19:30 జో ఈంజ లోకుమ్తె బుల బుల దేముడు అబ్బొన్చి ప్రేమ అదికారుమ్ దెకయ్లిన్చి కామ్ ఇన్నెతెన్ కేడ్లి, గని అన్నె కిచ్చొ ముక్కిమ్చి జోవయింబి కామ్ ఇన్నెతెన్ కేడ్లి మెలె, జో పాపల్ గెచ్చయ్తి దొర్కు జలి అర్పితుమ్ జలిసి, పస్కా వండుగ్చొ మెండపిల్ల జలిసి. * 19:35 19:35 'జా ఎత్తి దెకిలోసా' మెన ఏక్ వేల ఈంజ పున్దుకుమ్ రెగిడ్లొ యోహాను సొంతచి రిసా సంగితయ్. * 20:1 20:1 సత్తు పొదుల్తె అగేచి దీసి

ఎదార్దుమ్ ఒప్పునె నాయ్. లుంకచోరు యేసుక సిస్సుడ్ రితొ జా అస్సె. జో, జలె, అప్పె పురె జా పిలాతుతె గెచ్చు కెర, "యేసుచి పీనుమ్ కావలె. దెర గెచ్చుమ్దే" మెన సంగితికయ్, పిలాతు సెలవ్ దిలో, చి పీనుమ్ దెర గెచ్చుక మెన, సిలువ తిలిన్తె అయ్లో.

39 అన్నెక్లొ కి అయ్లో. కొస్సొ మెలె, నీకొదేము మెలో పరిసయ్యుడు. యేసుచి బోదన సూనుక మెన, ఒగ్గర్ అగ్గయ్ రాతి, లుంకచోరు యేసుతె జా తిలోసా జొయ్యి. జో, జలె, అప్పె ఒగ్గర్ విలువ తిలి వాసెన సామన్ దెరన అయ్లో. జా వాసెన సామన్ కెడ్లి జాడుచి మెలె, పాసి పాసి యాబయ్ కేజిల్ చి జాడు.

40 జేవ్ దొగుల, జలె, యూదుల్ కెర్తి అలవాట్ కెర, వెల్లొ గండల్ విలువ బట్ట తెన్ జా వాసెన సామన్ బెదవ బెదవ, పీనుమ్క గుడియవ బందిల. పీనుమ్క దస్సి తెయార్ కెర మెస్సె వయ నిల.

41 యేసుక సిలువతె గలిలి టాన్చి పాసి, జలె, ఏక్ తోట అస్సె. జా తోటతె సాప్రయ్ డొల్లి కెర్లి గది తిలి రితి నొవి మెన్సున్ అస్సె. కక్క నే రోవిలిసి.

42 సెలవ్ కడన్ల దీసిక చి పండుగు దీసిక జా దీసి తెయార్ జతి దీసి రిసా 'దూరి వయ్యుక గారు' మెన్సు యూదుల్ సంగులచి రిసా, జా మెన్సున్ పాసి తతికయ్, యేసుచి పీనుమ్ ఒత్తయ్ తెడి ఎంగ్డవ దిల.

20

మెన్సున్ డంపితి పత్తురు ఒస్సుల్ జా తిలిసి
(మత్త 28:1-10; మార్కు 16:1-8; లూకా 24:1-12)

1 యేసుక విరోదుమ్ సుదల్ మార తిర్తత్క, *అయ్తర్ దీసి పెందలె, మగ్గల పట్టుమ్చి మరియ మెస్సి అయ్లి. అయ్లె, కిచ్చొ దెకిలి మెలె, సాప్రయ్ డొల్లి కెర్లి మెన్సున్క డంక తిలో పత్తురు కిసి గే ఒస్సుల్ జా అస్సె.

2 ఇసి జా అస్సె మెన దెక, బమ్మ జా, సీమోను పేతురు చి యేసు ఒగ్గర్ ప్రేమ కెర్లొ జో అన్నెక్లొ సిస్సుడు దొగుల ఎక్కితె తిలిన్తె మరియ నిగ గెచ్చు, "యేసు ప్రబుచొ పీనుమ్ మెన్సున్ తెంతొ ఉక్లన అస్తి, చి జోక కేనె అన్నె ముల దా అస్తి గే నేనుమ్" మెన జోవయింక సంగిలి.

యేసు జీవ్ జా ఉట్టినచి రుజ్జు అయ్లిసి

3 జా మరియ దస్సి సంగితికయ్, పేతురు, జో అన్నెక్లొ సిస్సుడు మెస్సి గెచ్చుక మెన బార్ జలె.

4 జేవ్ దొగుల నిగ గెలె, జో అన్నెక్లొ సిస్సుడు బేగి నిగ, పేతురుచి కంట తొలితొ మెస్సి పాచిలన్.

5 ఈంజొ తొలితో పాడు, వంపొ జా తెడి ఒయర దెకిలె, రితయ్ బట్ట గండల్ ఒత్త సేడ అస్తి మెన దెకిలన్, గని తెడి పెసె నాయ్.

6 తెదొడి, జోవయించి పడ్డె సీమోను పేతురు నిగ జా పావిలన్, చి మెస్సున్ తెడిక పెసిలన్. రితయ్ బట్ట గండల్ ఒత్త సేడ అస్సె.

7 చి జేవ్ గండల్క ఇదిల్ దూరిక, యేసుచి బోడి బంద తిలి బట్ట గండ, గుడియయ్ జలి రితి జా, అజ సేడ అస్సె.

8 తెదొడి, జో అన్నెక్లొ సిస్సుడు కి, మెలె, మెస్సె తొలితో పావిలోసా, మెస్సున్ తెడి పెన దెక, యేసుక 'జీవ్ జా ఉట్ట అస్సె' మెన, నంపజలన్.

9 యేసుక "మొర జీవ్ జా ఉట్టుక అస్సె" మెన అగ్గెయ్ తెంతో దేముడు రెగ్గవ తిలిసి సిస్సుల్ తెదొడి ఉచార అర్దుమ్ కెరనుక నేతయ్.

10 జలె, దెక కెర, యేసుక 'జీవ్ జా ఉట్ట అస్సె' మెన నంపజా, జేవ్ దొగుల సిస్సుల్ జోవయించ గెరలె ఉట్ట గెల.

మగ్గల పట్టుమ్చి మరియు యేసు డీసిలిసి (మార్కు 16:9-11)

11 మదెనె మగ్గల పట్టుమ్చి మరియు, ఏడ ఏడ మెస్సెచి బయిలె టీవ అస్సె. తెదొడి, ఏడ ఏడ, మెస్సెచి తెడి ఒయర్తి రిసా వంపొ జలి.

12 ఒయర్లె, కిచ్చొ దెకిలి మెలె, చొక్కిల పాలల్ గలన తిల దొగుల దూతల్ యేసుచి పీనుమ్ అగ్గె ఎంగ్డ తిలిన్తె దెకిలి. యేసుచి బోడి అగ్గె తిలిన్తె ఎక్కిలో, చట్టొ అగ్గె తిలిన్తె ఎక్కిలో వెన అస్తి.

13 ఈంజేవ్ జాక "అమ్మ, కిచ్చొక ఏడ్డసి?" మెన సంగిల. చి జా జోవయింక "అంచొ ప్రబుక దెర గెచ్చ అస్తి, చి జోక కేనె అన్నె ముల దా అస్తి గే నేని" మెన సంగిలి.

14 దస్సి మెన సంగ, కిసిగె పడ్డె పసిలి, చి యేసు ఒత్తయ్ టీవ తిలిసి దెకిలి. గని 'జొయ్యి' మెన చినుక నెత్త గెలి.

15 యేసు జలె, జాక "అమ్మ, కిచ్చొక ఏడ్డసి? కక్క చజితసి?" మెన సంగిలన్. జా, జోక 'తోట రూకుల్ పొస్తాసా' మెన ఉచర, జోక "బాబు, తూయి జలెకు జోక ఉక్కుల వేరతె నిలది జలె, జోక కేనె ముల దా అస్సిన్ గే, అంక సంగు, చి ఆవ్ జోచి పీనుమ్ దెర గెచ్చ రోవిందె" మెన సంగిలి. సంగితికయ్,

16 యేసు జాక "మరియ!" మెన, ఎక్కి జాచి నావ్ సంగిలన్. సంగిల్ బేగి జా, జోక చిన పసుల, "రబ్బోనీ!" మెన సంగిలి. అరమయ్ బాసతె 'రబ్బోనీ' మెలె, 'గురు' మెలి అర్దుమ్ తయెదె.

17 యేసు, జలె, జాక, "అంక చడు నాయ్. ఆవ్ అన్నె దేముడు అబ్బొతె వెగ గెచ్చుక నేతయ్. గని, తుయి కిచ్చొ కెరుక జయెదె మెలె, అంచ బావుడ్లు జల అంచ

సిస్సుల్తె గో, చి పరలోకుమ్ తిలొ తుమ్చొ దేముడు తుమ్చొ అబ్బొది జలొ అంచొ దేముడు అంచొ అబ్బొతె ఆవ్ ఉట్ట గెతసి మెన యేసుప్రబు సంగిలన్ మెన సంగు" మెన, జాచి అత్తి జోచ సిస్సుల్క కబుర్ తెద్రయ్లన్.

18 జాకయ్, మగ్గల పట్టుమ్చి జా మరియ, యేసుచ సిస్సుల్తె గెచ్చ, "యేసుప్రబుక దెక అస్సి!" మెన సంగ, జో సంగిలి కబుర్ ఎత్తి జోవయింక సంగిలి.

యేసు జోచ సిస్సుల్క డీసిలిసి

19 జా దీసి సంజె, సత్తరెక్క తొల్లి దీసి, మెలె యేసు జీవ్ జలి జా †అయ్తర్ దీసి సంజె, సిస్సుల్ ఎక్కితె బెర తిల. గని యూదుల్చ వెల్లెల మాన్సుల్క బియఁ కెర, కెప్పివొ డంపన లుంకిల్ రితి తిల. జేవ్ దస్సి బిలి రితి జా ఒత్త కెప్పివొ డంపన తతికయ్, యేసు జా కెర, జోవయించి నెడిమి టీవ, "తుమ్క సేంతుమ్ తవుసు!" మెన ఉంక్రయ్లన్.

20 దస్సి ఉంక్రవ కెర, 'అవ్వి' మెన దెకయ్తి రిసా, సిలువతె గలిలి పొది మేకుల్ అత్తితె పెట్టిన్చి మచ్చల్, పక్కయ్ బూసిలిన్చి మచ్చ, జోవయింక దెకయ్లన్, చి జేవ్, 'యేసుప్రబు' మెన జోక చిన, సర్దసంతోసుమ్ జల.

21 యేసు, జలె, జోవయింక అన్నె, "అంచి సేంతుమ్ తుమ్చి పెట్టి తవుసు. పరలోకుమ్ తిలొ దేముడు అబ్బొ ఈంజ లోకుమ్తె అంక కిసి తెద్రయ్లన్ గే, దస్సి ఈంజ లోకుమ్చ మాన్సుల్తె తుమ్క ఆవ్ తెద్రయ్తసి" మెన సంగిలన్.

22 ఇసి సంగ కెర, జోవయించి ఉప్పిరి పుజ దా, "దేముడుచి సుద్ది తిలి ఆత్తు తుమ్క ఆవ్ దెతసి. నజనా.

23 కచ పాపల్ తుమ్ చెమించుప కెరె గే, చెమించుప జా అస్తి. కచ పాపల్ చెమించుప నే జతి రితి తుమ్ కెరె గే, జా పాపుమ్ జోవయింక తయెదె" మెన సంగ యేసు ఉట్ట గెలన్.

24 యేసు జా సుట్టు సిస్సుల్క డీసిలిసి, జలె, 'కల్వల్తె జెర్మిలోసా' మెన ఆసిమ్ నావ్ తిలొ తోమా మెలోసా ఒత్త నాయ్.

25 చి జో తెన్ దస్సుల్ జలి పొది "యేసుప్రబుక దెకిలమ్!" మెన తిల సిస్సుల్ సంగిల. గని, తోమా జోవయింక, "జో జీవ్ జా తిలె, అంక రుజ్జు దెకాయితు. జోచ అత్తోతె దెకిలె, ఒత్త మేకుల్ పెట్ల మచ్చల్ తిలెకయ్, జేవ్ మచ్చల్ ఆవ్ చడ దెకిలెకయ్, పడ్డె జేవ్ జోక పక్కయ్ బూసిలిన్ తెడి ఆవ్ సొంత ఆతు గల దెకిలెకయ్, 'జొయ్యి' మెన నంపజయిందె" మెలన్.

26 జలె, ఒత్త తెంతో అన్నె అట్టు పొదుల్ గెతికయ్, యేసుచ సిస్సుల్ జా గెరి అన్నె అస్తి. గని, ఈంజ సుటు తోమా కి జోవయింతెన్ అస్సె. జా సుట్టుచి రితి జేవ్ కెప్పివొ డంపన తిలె కి, యేసు జా జోవయించి నెడిమి

† 20:19 20:19 సత్త పొదుల్తె అగేచి దీసి

టీచ, జోవయింక “తుమ్క సీంతుమ్ తవును!” మెన ఉంక్రయ్లన్.

27 తెదొడి, తోమాక దెక, “తుచి ఉంటి చంప కెర, అంచ అత్తో చడ దెకు! తుచి ఆతు చంప కెర, అంచి పక్కయ్ బూసిలిన్చి తెడి గల దెకు! అన్మానుమ్ జా నాయ్. నంపజా దయిరిమ్ జా!” మెన, యేసు జోక సంగిలన్.

28 తోమా సర్దసంతోసుమ్ జా, “అంచొ ప్రబు, అంచొ దేముడు!” మెన పూర్తి నముకుమ్ జా సంగిలన్.

29 జాకయ్ యేసు జోక, “అంక దెకిలి రిసా తుయి నంపజలది. అంక నే దెకిలెకి కో అంక నంపజవుల గే, జోక చెంగిలి!” మెన సంగిలన్.

30 ఇన్నె రెగిడ్లసచి కంట, జోచి అదికారుమ్ దెకయ్త వెల్లెల కమె ఒగ్గరి యేసు జోచ సిస్సుల్చి మొక్కె కెర్లన్, గని మొత్తుమ్తె ఎత్లయి రెగ్ల అస్సి.

31 ఈంజేవ్, జలె, కిచ్చొక రెగ్ల అస్సి మెలె, యేసుక ‘నిజుమి దేముడు తెద్రయ్లో రచ్చించుప కెర్లొసా క్రిస్తు జో’ మెన తుమ్క ‘నంపజతు’ మెనయ్ రెగ్ల అస్సి. తూమ్ కి సదు కెర్లన్ సూన్తన నంపజలె, తూమ్ కి యేసుప్రబుచి దయచి రిసా జోచి జీవ్క జియ, పరలోకుమ్చి రాజిమ్తె బెదితె.

21

యేసు సిస్సుల్క అన్నె డీసిలిసి

1 యేసు సిస్సుల్క డీస అన్నె సగుమ్ దీనల్ గెలి పడ్డె, తిబెరియ సముద్రుమ్తె, మెలె గలిలయతెచి సముద్రుమ్ రితి గడ్డె, జోచ సిస్సుల్ సగుమ్జిన్ తతికయ్, యేసు జోవయింక అన్నె డీస జో జీవ్ జలిన్క జోచి అదికారుమ్క రుజ్జు దెకయ్లన్. ఇసి జర్గు జలి.

2 ఏక్ దీసి, సీమోను పేతురు, ‘కల్వల్తె జెర్మిలోసా’ మెన ఆసిమ్ నావ్ తిలొ తోమా, జా గలిలయ ప్రాంతుమ్చి కానా గవ్విచొ నతనియేలు, జెబెదయి మెలోసాచ దొగుల పుత్తర్పుల్, చి అన్నె దొగుల సిస్సుల్, మొత్తుమ్ సత్తుజిన్, ఎక్కితె తిల, చి

3 “ఆవ్ మొస్సు దెరుక గెతసి” మెన సీమోను పేతురు సంగ బార్ జంక దెర్తికయ్, తిల సిస్సుల్ “ఆమ్ కి బెద జెమ్దె!” మెన సంగిల. జేవ్ ఎత్కిజిన్ బార్ జా, జోవయించి దోనితె వెగ, మొస్సు దెరుక గెల. గని జయి రాతి ఎక్కి మొస్సా కి దెర్తి నాయ్.

4 గని, రాత్ పయతె తతికయ్, ఒత్త ఒడ్డుతె యేసు టీచ అస్సి. గని ‘యేసు’ మెన సిస్సుల్ చినితి నాయ్.

5 జో, జలె, జోవయింక కేక్ గల, “ఓ గోతునుదల్, మొస్సు దెర అస్సన్ గే?” మెన పుసిలన్. చి “నాయ్, బాబు, కిచ్చొయ్ నాయ్!” మెన జబాబ్ దా కేక్ గల.

* 21:15 21:15 యూదుల్ చింబొ కతి నాయ్. ముక్కిమ్క పోడియొ కవుల.

6 యేసు, జలె, జోవయింక కిచ్చొ సంగిలన్ మెలె, “దోనిచి ఉజెతో పక్కయ్ వల గల, చి దొర్కు జవుల!” మెన కేక్ గలన్, చి జో సంగిల్ రితి జయ్యి పక్క వల గలిల. గలిలె, ఎత్తివాట్ మొస్సు బెర తిలి రిసా వల కడుక నెత్తిర్ల.

7 దస్సి జతికయ్, యేసు ఒగ్గర్ ప్రేమ కెర్లొ సిస్సుడు జోక చిన కెర, “అమ్చొ యేసుప్రబు, జో!” మెన పేతురుక సంగిలన్. జోక ‘అమ్చొ యేసుప్రబు’ మెన సీమోను పేతురు సూన్లి బేగి, కామ్చి రిసా జో కడ తిలి సొక్క అన్నె గలన, సముద్రుమ్తె డేచ, యేసుతె గెలన్.

8 గని, తిల సిస్సుల్ దోనితె తా, మొస్సు బెర తిలి వల ఒర్గొడ ఆన, పడ్డె అయ్ల. ఒగ్గర్ దూరి జెంక నాయ్. ఒడ్డు తెంతో పాసి పాసి ఎక్కి పుంజెక్ గజాలు దూరి తిల.

9 జలె, ఒడ్డుతె అయ్లె కిచ్చొ దెకిల మెలె, ఒత్త మెసి బొగుల్చి ఆగి తిలి, చి ఆగితె మొస్సు సిజితె తిల. పోడియొ కి తిల.

10 తెదొడి యేసు జోవయింక “తుమ్ అప్పె దెర్ల మొస్సు సగుమ్ ఆన” మెలన్,

11 చి సీమోను పేతురు దోనితె అన్నె వెగ, వల ఒడ్డుతె ఒర్గొడ ఆన్లన్. ఆన్లె, వెల్లెల మొస్సు బెరయ్ అస్తి. కెత్తి మెలె, పుంజెక్ యాబయ్ తిన్ని వెల్లెల మొస్సు. గని, ఎత్తివాట్ తిలె కి, వల చిరి జయె నాయ్.

12 “అల్లె, కంక జా,” మెన యేసు సిస్సుల్క బుకార్లన్. జేవ్ సిస్సుల్తె జలె, “తుయి కో?” మెన కో కి జోక పుసుక దయిరిమ్ నాయ్. జోక ‘యేసుప్రబు’ మెన జాన్తి.

13 జేవ్ దస్సి ఇదిల్ బితె తతికయ్, యేసు పురై జా, పోడియొ వెంట, వంట దిలన్. దస్సి మొస్సు కి వెంట, వంట దిలన్.

14 యేసు మొర జీవ్ జా ఉట్ట సిస్సుల్క డీసిలిసి ఇన్నెతెన్ తివ్వెర్ జలి.

పేతురుక యేసు చెమించుప కెర్లిసి

15 జేవ్ * అన్నిమ్ కెర కేడయ్లి పడ్డె, సీమోను పేతురుక యేసు బుకారా, ఇదిల్ దూరి కడన, జోక ఇసి మెలన్. “ఓ సీమోను, యోహానుచొ పుత్తుసి, ఇన్నెచి కంట అంక తుయి ఒగ్గర్ ప్రేమ కెర్లసి గే?” మెన పుసిలన్. పుసిలె, పేతురు “ఒయ్యి, ప్రబు, ఆవ్ తుక ప్రేమ కెర్లిసి తుయి జాన్ని” మెలన్. యేసు జోక “దస్సి జలె, విలువ జల మెండ పిల్లల్క చెంగిల్ అన్నిమ్ గొవుడు దొర్కు కెర్తె తతి రితి తా!” మెన సంగిలన్.

16 పడ్డె అన్నెక్ సుట్టు, “ఓ సీమోను, యోహానుచొ పుత్తుసి, అంక ప్రేమ కెర్లసి గే?” మెన పుసిలన్. పుసిలె, పేతురు జోక అన్నె, “ఒయ్యి, ప్రబు, ఆవ్ తుక ప్రేమ కెర్లిసి తుయి జాన్ని” మెన సంగిలన్. యేసు జోక అన్నె, “దస్సి

జలె, విలువ జల మెండల్క చెంగిల్ రకిత్ రితి తుయి దెకితె తా!" మెన సంగిలన్.

17 తెదొడి అన్నెక్ సుట్టు కి, పేతురుక యేసు పుసిలన్.

"ఓ సీమోను, యోహానుచొ పుత్తుసి, అంక ప్రేమ కెర్తసి గే?" మెన అన్నె పుసితికయ్, 'అంక ప్రేమ కెర్తసి గే?' మెన యేసు పుసిలిసి అప్పె తివ్వెర్ జలి రిసా, పేతురు మెన్ను ఒగ్గర్ దుకుమ్ జలన్, చి "ప్రబు, తుయి ఎత్తి జాన్సి. ఆవ్ తుక ప్రేమ కెర్తసి తుయి దెకితసి!" మెన అన్నెనంగిలన్, చి యేసు జోక "విలువ జల మెండల్క సరి జతి అన్నిమ్ దొర్కు కెర్లి రితి తుయి తా.

18 "తుక ఆవ్ అన్నె కిచ్చొ కచితుమ్ సంగితసి మెలె, తుయి ఉబెడొబొద తిలి పొది, తుకయ్ తూయి తెయార్ కెరన, ఇస్టుమ్ అయ్లి రితి బులై తిలది, గని తుయి మంత్రొ జలె పొది కీసి జస్తి మెలె, తుచ అత్తో చంపొ కెర్తె, చి వేర సుదొ తుక తెయార్ కెరెదె. చి తుయి ఇస్టుమ్ నెంజిలిన్తె తుక వయ నెయెదె" మెన పేతురుక యేసు సంగిలన్.

19 కిచ్చొక దస్సి సంగిలన్ మెలె, పేతురు మంత్రొ జలె పొది, విరోదుమ్ సుదల్ జోక †మారుల. దస్సి జయెదె మెలి గుర్తుకయ్ యేసు దస్సి మెలన్. జలె, ఒత్త తెంతొ యేసు పేతురుక, ‡"అంచి పట్టి జే!" మెలన్.

20 తెదొడి పేతురు వస్త, యేసు ఒగ్గర్ ప్రేమ కెర్లొ సిస్సుడు జోచి పట్టి జెతిసి దెకిలన్. కక్క మెలె, యేసు సిస్సుల్ తెన్ ఆకర్ అన్నిమ్ కెర్లి పొది, యేసుచి గుండెతె పెల వెన తిలొ సిస్సుడు. జొయ్యి, జా సుట్టు 'తుక విరోదుమ్ సుదల్తె దెర దెతోసా కొన్సొ?' మెన యేసుక పున దిలన్.

21 పేతురు, జలె, జో సిస్సుడుక దెక కెర, "ప్రబు, ఈంజొ మాన్సుక కిచ్చొ జయెదె?" మెన పుసిలన్.

22 పుసితికయ్, యేసు జోక, "ఆవ్ దేముడు అబ్బొతె పరలోకుమ్తె గెచ్చు ఈంజ లోకుమ్తె అన్నె జెతె ఎదక ఈంజొ తా, గెచ్చుక అంచి ఇస్టుమ్ జలె, తుక కిచ్చొ బాద? అంచి పూచి, జా. తుచి పూచి కిచ్చొ మెలె, ఆవ్ తియార్లి కామ్ కెరుక. అంచి పట్టి జే!" మెలన్.

23 జో అన్నెక్లొ సిస్సుడుచి రిసా యేసు సంగిలి జా కోడుచి రిసా సగుమ్జిన్ వడ్డొ కిచ్చొ సంగితె తిల మెలె, 'ఈంజొ అన్నెక్లొ సిస్సుడు మొరె నాయ్' మెంతె తిల. గని జో 'మొరె నాయ్' మెన యేసు సంగె నాయ్. ఎక్కి "ఆవ్ అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుకయ్ కిచ్చొ బాద?" మెనయ్ సంగ తిలొ.

24 ఈంజ ఎత్తిచి రిసా సాచి జలొసా, ఈంజ ఎత్తిచి రిసా రెగిడ్లొసా కొన్సొ మెలె, జొయ్యి సిస్సుడు. యేసు ఒగ్గర్ ప్రేమ కెర్లొసా. జోచి సాచి సత్తిమ్ మెన జానుమ్.

25 యేసు కెర్ల కమొ అన్నె ఒగ్గర్ అస్తి. జేవ్ కమొ ఎత్తిచి రిసా రెగుడుక జలె, జేవ్ కమొ ఎత్తివాట్ జవులచి రిసా

జోవయించి రిసా రెగిడ్ల పుస్తకల్ ఈంజ బూలోకుమ్ దెరుక నెత్తె. తెద్దిలి.

† 21:19 21:19 వేర పుస్తకల్తె కిచ్చొ అన్నె మెలె, వడ్డొ పేతురుక కీసి మార్ల మెలె, జోవయింక బొడి ఎట్టొ చట్టొ ఉప్పిరి ఒడొవ సిలువతె మార్ల. ‡ 21:19 21:19 క్రిస్టుచి రితి నిదానుమ్ ఇండితిసిచి కోడు, వడ్డొ సిలువతె జో కి మొర్తినచి అర్దుమ్ కి ఇన్నె తయెదె.

బారికుల్ కెర్ల కమె యేసుక్రీస్తుచ బారికుల్ కెర్ల కమె

యేసు సుద్ది తిలి ఆత్మ దెతి రిసా సంగిలినీ

1 ఓ దెయిపిలా, ఆవ్ తొలితో రెగిడ్డి *పుస్తకుమతె కిచ్చొచి రిసా రెగిడ్డయ్ గే జాన్సి. యేసు కెర్ల కమె, యేసు కెర సికడ్డిసి రిసా రెగిడ్డిసి.

2 మొదొల్ తెంతో, యేసు పరలోకుమతె తిలో దేముడు జలో అబ్బొన్తె అన్నె వెగ గెలి ఎదకచి రిసా ఎత్కి జా పుస్తకుమతె రెగిడ్డయ్. పడ్డో, జో దేముడు అబ్బొన్తె అన్నె వెగ నే గెతె అగ్గె, దేముడుచి సుద్ది తిలి ఆత్మ తెన్, జో అగ్గె నిసాన్ల సిస్సుల్క ఆడ్ర దా, జోచి †సుబుమ్ కబుర్ కామ్ జేవే కెర్లి రిసా, జో అగ్గు దా తిలో.

3 జో మొర గెచ్చ అన్నె జీవ్ జలి పడ్డో, జా అన్నెక్ దొన్ని విసా పొదుల్చి తెడి, జో జోవయింక నగుమ్ సుట్టు డీసయ్ జా, జో అన్నె జీవ్ జలిన్క జోవయింక ఒగ్గర్ రుజ్జుల్ దెకవ, †దేముడుచి రాజిమ్చి రిసా జోవయింక అన్నె సికడ్డె తిలో.

4 జేవ్ దొన్ని విసా పొదుల్చి తెడి ఏక్ సుట్టు, జోవయింతెన్ అన్నిమ్ కత్తె తా, జేవ్క కిచ్చొ ఆడ్ర దిలన్ మెలె, “తుమ్ కిచ్చొక రకుక మెలె, తుమ్ ఈంజ యెరూసలేమ్ పట్టుమ్ తెంతో నే గెతె, ఇన్నె తా. అంచి రిసా సూన్లినీ, అబ్బొ జలో దేముడు తుమ్క దెయిందె మెన అగ్గె తెంతో కోడు దిలినీ దొర్కు జతి ఎద రకితె తా.

5 యోహాను జలె, అగ్గె పానితె మాన్సుల్క బాప్తిసుమ్ దెతె తిలో, గని తుమ్క అప్పె కిచ్చొ జర్గు జయెదె మెలె, అన్నె ఒగ్గర్ దీసల్ నే గెతె అగ్గె, జా అమ్చి దేముడుచి సుద్ది తిలి ఆత్మతె తుమ్క బాప్తిసుమ్ దొర్కు జయెదె” మెన యేసు కిజోచ సిస్సుల్క సంగిలన్.

6 యేసు సిస్సుల్ తెన్ బెద తిలి పొది, జేవ్ జోక, “*ప్రబువ, అప్పె జలె, తుచి తెడి అమ్క ఆమి ఏలుప కెరంతి రితి కెర, అమ్చి ఇస్రాయేల్ దేసిమ్క జోవయింక అన్నె దెస్తెగె?” మెన పుసిల.

* 1:1 1:1 ‘లాకా’, మెలె యేసుక్రీస్తుచి రిసా లాకా రెగిడ్డి సాచిచి పుస్తకుమ్. † 1:2 1:2 ‘సుబుమ్ కబుర్’ మెలె, ఎత్కి అదికారుమ్ తిలో దేముడు దొర్కు కెర్లి రచ్చునచి కోడు. జో పాపల్ చెమించుప కెర్లిచి రిసాచి కబుర్. యేసుయి దొర్కు జలో రచ్చించుప కెర్లిసా జలిన్చి కబుర్. జో అర్చితుమ్ జా పాపల్ గెచ్చయలి రిసా మాన్సుల్ పరలోకుమచి రాజిమ్తె బెదితి అవ్కాసుమ్ దొర్కు జలిన్చి కబుర్. ‘సుబుమ్ కబుర్ కామ్’ మెలె, ఈంజ సుబుమ్ కబుర్ ఎత్కిచి రిసా సాచి జా జా బుల్లినీ, నెంజిలె సాంత టాన్తె కి సాచి సంగితె తతిసి. ‡ 1:3 1:3 ‘ఎత్కి అదికారుమ్ తిలో దేముడుచి రాజిమ్’ మెలె, 1 జోవయింక నంపజల మాన్సుల్చి పెట్టి జో ఏలుప కెర్లిసి, 2 జోవయింకి ఆత్మనెక్కి ఈంజ లోకుమతె కామ్ కెర్లిసి, 3 ఈంజ ఉగుమ్ మార్పుప జలె జో ఎదార్దుమ్ ఈంజ లోకుమతె ఏలుప కెర్లిసి, చి 4 పరలోకుమతె జో ఏలుప కెర్లిసి. § 1:5 1:5 యూదా అత్త్య కెరన మొర తిలన్ గెద. * 1:6 1:6 ‘ప్రబు’ మెలె కిచ్చొ అర్దుమ్ తయెదె మెలె, ఎత్కిచి కంట వెల్లొ తిలోసా, ఎత్కిక ఏలుప కెర్లిసా. ఒగ్గర్ సుట్టు యేసుకయ్ ‘ప్రబు’ మెనుల, గని ఎత్కి అదికారుమ్ తిలో దేముడు అబ్బొన్క కి ‘ప్రబు’ మెనుల. † 1:12 1:12 ‘ఒలీవ మెట్ట’ మెలె, ఒలీవ పండ్లు రూకుల్ జా మెట్టయ్ తవుల చి జా నావ్ తయెదె. ‡ 1:12 1:12 రమారమి తిన్ని పావ్ కిలోమిట్లర్లు దూరి జయెదె

7 పుసితికయ్, జోక సిస్సుల్క, “కేన్ కాలుమ్క, కేన్ సమయుమ్క, కిచ్చొ జర్గు జంక అస్సె గే, మెన ఎత్కిచి ఉప్పిరి తిలో దేముడు అబ్బొక అదికారుమ్తె తియ అస్సె.

8 దేముడుచి సుద్ది తిలి ఆత్మ తుమ్చి పెట్టి అయ్లి మెలె, తుమ్ సెక్కి జస్తె, అంచి రిసా సాచి జతి రితి, తుమ్ యెరూసలేమ్ పట్టుమ్తె, ఈంజ ఒండి యూదయ ప్రదేసిమ్తె, పడ్డో సమరయ ప్రదేసిమ్తె, పడ్డో ఒండి లోకుమ్చ దూరి దేసిమ్లుతె కి సాచి దెకయ్తె” మెన సంగిలన్.

యేసు పరలోకుమతె వెగ గెలిసి

9 యేసు ఇసి సంగ కేడయ్లి పడ్డో, జేవ్ సిస్సుల్ దెకితె తతికయ్, జో పరలోకుమతె అన్నె గెచ్చుక మెన ఉక్కిల్ జలో. జో వెగ గెతె తతికయ్, ఏక్ మబ్బు జోక లుంకడ్డి, చి సిస్సుల్ జోక అన్నె దెకుక నెత్తిర్ల.

10 జో పరలోకుమతె వెగ గెతె తతికయ్, సిస్సుల్ ఆగాసుమ్ పక్క ఆచారిమ్ తెన్ దెకితె తతికయ్, ఆదె, చొక్కిల పాలల్ గలన తిల దేముడుచ దూతల్ దొగుల జోవయింకి నెడిమి ఉత్ర జా టీవోజ జల,

11 “ఓ గలిలయ ప్రాంతుమ్చ మాన్సుల్, కిచ్చొక దస్సి ఆగాసుమ్ పక్క దెక దెక టీవోజ జా అస్సున్? తుమ్చి నెడిమి తెంతో ఉక్కిల్ జా పరలోకుమతె వెగ గెలో ఈంజో యేసు, పడ్డొక అన్నె ఉత్ర జెయెదె. జో కిసి పరలోకుమతె వెగ గెలో గే దెకిల్ రితి, దస్సెయి అన్నె ఉత్ర జెయెదె” మెన జేవ్క సంగిల.

సిస్సుల్ యెరూసలేమ్తె ప్రార్దన కెర్లిసి

12 తెదొడి జేవ్ జా †ఒలీవ మెట్ట తెంతో ఉత్ర జా, యేసుచ సిస్సుల్ యెరూసలేమ్ పట్టుమ్తె ఉట్ట అయ్ల. మెట్టక పట్టుమ్ పాసి తయెదె. కెద్ది దూరి మెలె, †సెలవ్ కడన్ల దీసి యూదుల్ ఇండితి ఎదిలి దూరి.

13 పట్టుమ్తె పావ కేనె గెల మెలె, జేవ్ సంగ తిలో ఒత్తచొ గేరుచి అంతస్తుమ్తెచి గదితె గెల. కొన్న మెలె, పేతురు, యోహాను, యాకోబు, అంద్రెయ, పిలిప్, తోమా, బర్తోలోమయి, మత్తయి, అల్ఫాయిచొ యాకోబు మెలో పుత్తున్, పడ్డో సాంత దేసిమ్ ఏలుప కెరంతి ఆస తిలి మందతె తిలో సీమోను, పడ్డో యాకోబు మెలో ఎక్కిలోచొ పుత్తున్ మెలో యూదా; మొత్తుమ్ ఎగరజన్ సిస్సుల్.

14 జో గెరి తా కిచ్చొ ఎక్కి నిదానుమ్ కెరై తిల మెలె, ప్రార్దన కెరై తిల. ప్రార్దన కెరుక మెన జోవయింతెన్ అన్నె కో కో జేవ్ పొదులె బెదితె తిల మెలె, యేసుచి అయ్యసి మరియ తెన్, జోక బావుడ్నివో, జోవయింక అన్నె నంపజల తేర్బోదల్ తిల.

15 జేవ్ దస్సి ప్రార్దన కెరై తిల పొదులె, ఏక్ దీసి, రమారమి కీసావు విస్సాజిన్ మాన్సుల్ ఒత్త బెర తతికయ్, జేవ్ ప్రబుక నంపజలనచి నెడిమి పేతురు టీవోజ జా, ఇసి మెన సంగిలన్.

16 “ఓ బావుడ్లు, అమ్చొ యేసుక జేలి కెర్క దెరవ దిలొ యూదాచి రిసా, దేముడుచి సుద్ది తిలి ఆత్మ సికయ్ తికయ్, దావీదు మెలొ పూర్గుమ్చొచి అత్తి సంగిలిసి కోడు జా, కచితుమ్ నెరవెర్పువ జంక అస్సె. జాకయ్, యూదాచి రిసా సంగిల్ రితి నెరవెర్పువ జలి.

17 మెలె, యూదా అమ్చి తెన్ యేసు నిసాన్లోసా జలొ, చి ఆమ్ కెర్తి సేవతె జో బెదుక ప్రబు సెలవ్ దా తిలొ.”

18 మదెనె యూదాక కిచ్చొ జర్గు జలి మెలె, జో యేసుక విక పాపుమ్ కెర్తి డబ్బుల్ తెన్ బుఁయి గెన్లో. జా బుఁయి తిలిన్తె సేడ గెలన్, చి పెట్టి బద్దల్ జతికయ్, పెట్టిచి అంతున్ ఎత్తి సూఁయి జా గెలి.

19 యెరూసలేమ్ పట్టుమ్చ మాన్సుల్ ఎత్తిజిన్ జాన్లి దీసి తెంతొ, జా బుఁయిక ‘అకెల్దామ’ మెన జోవయించి అరమయ్ బాస తెన్ సంగితతి. జా నావ్చి అర్దుమ్ కిచ్చొ మెలె, ‘లోయి సూఁయి జా తిలి బుఁయి*’.

20 జాకయ్ యూదాక జర్గు జలిసి తెన్, కీర్తన పుస్తకుమ్తె రెగిడ్లి కోడు నెరవెర్పువ జలి.

“జోవయించి టాన్ పాడ్ జలి బయిలు రితి జవున్, చి ఒత్త తెంతొ కో ఒత్త జితు నాయ్”

మెన రెగ్గ అస్సె. అన్నెక్ కోడు కి రెగ్గ అస్సె. కేన్ కోడు మెలె, “జోవయింక దా తిలి టాన్ జోవయింక పిట్టున్, చి వేర మాన్సుక దొర్కు జవున్.”

మెన రెగిడ్లిసి మెన, బెర తిలసక పేతురు సంగిలన్.

21-22 అన్నె కిచ్చొ మెలన్ మెలె, “జా కోడుచి రిసా, యేసుప్రబు అన్నె జివ్ జా ఉట్టిన్క అమ్చి తెన్ సాచి జా జోచి గవురుమ్ దెకయ్ తి రిసా, అన్నెక్ అమ్చి తెన్ బెదుక అస్సె. కొన్సొ మెలె, యోహాను బాప్తిసుమ్ దెతె తిలి, యేసుప్రబు అమ్చి తెన్ ఈంజ లోకుమ్తె బుల్తె తిలి మొదొల్ తెంతొ, యేసు పరలోకుమ్తె వెగ గెలి ఎదక అమ్చి తెన్ బుల్తె తిలొసా ఎక్కిలొ అమ్చి తెన్ బెదుక అస్సె” మెన పేతురు సంగిలన్.

23 సంగితికయ్, జేవ్తె తిల దొగులక టీవోజ కెల. జేవ్ దొగుల కొన్సొ మెలె, ‘బర్నబా’ మెన ఆసిమ్ నావ్ తిలొ

యోసేపు మెలొ యూస్తు మెలొ ఎక్కిలొ, చి మత్తియ మెలొ అన్నెక్కో.

24 జేవ్ దొగులతె ప్రబు కక్క నిసాన్దె గే, జానుక జతి రిసా, సిస్సుల్ ప్రార్దన కెర్ల. “ఓ ప్రబు, మాన్సుచి పెట్టి తిలి బుద్ది ఎత్తి తుయ్ జాన్సి.

25 తుయి దిలి సేవ, తుచొ బారికి జతి తుయి దిలి టాన్, యూదా నిస్కారుమ్ కెర్తి రితి జా నెన కెర, జోచి టాన్తె జో గెచ్చు అస్సె. జోక తుయి దా తిలి కామ్ కెర్తి రిసా, ఈంజేవ్ దొగులతె కక్క నిసాన అస్సిన్ గే, దయ కెర అమ్క రుజ్జు దెకవు” మెన ప్రార్దన కెర్ల.

26 ప్రార్దన కెర, చీటి గల్తిక మత్తియచి నావ్ సేడ్డి. జా రుజ్జు జతికయ్, ‘అమ్చి తెన్ ప్రబుచొ బారికి జవున్’ మెన, ప్రబుచి సుబుమ్ కబుర్ నూనయ్త ఎగరజిన్ †బారికుల్ జో మత్తియక బెదవన్ల, చి బారజిన్ అన్నె జా గెల.

2

నంపజలనచి పెట్టి దేముడు జోచొ ఆత్మ దిలిసి

1 యేసు మొర అన్నె జివ్ జా ఉట్ట సత్తు సంతల్ గెతికయ్, ‘పెంతెకోస్తు’ మెన యూదుల్చి పండుగు దీసి, యేసుక నంపజలన ఎత్తిజిన్ ఎక్కితె బెద అయ్ల.

2 జేవ్ ఒత్త ఎక్కితె బెద తతికయ్, ఆగాసుమ్ పక్క తెంతొ, వెల్లో వాదు గట్టిజ వీర్తి రితి వెల్లి అవాడ్ అయ్లి, చి గేర్ ఒండ్ జా అవాడ్ సప్పుడు బెర్తి.

3 తెదొడి, కిచ్చొ దెకిల మెలె, ఆగి లగితి రితిసి డీస ఉత్త జా చెదుర్పు జా, జోవయింక ఎక్కెళ్లచ బోడివొచి ఉప్పిరి ఆగివొ లగిల్ రితి జలి. జోవయింతె కక్క నే పిట్ట దస్సి జలి.

4 దస్సి జతికయ్, కక్క నే పిట్ట, దేముడుచి సుద్ది తిలి ఆత్మనెక్కి జోవయించి పెట్టి బెర అయ్లి, చి జోవయించి ఆత్మచి నెక్కి తెన్ దొర్కు జలి ఎదిలి, వేర వేర అగ్గె నేన్ల బాసల్ తెన్ జేవ్ లట్టబుక దెర్ల.

5 జేవ్ పొదులె, ఒగ్గర్ ఒగ్గర్ దేసిమ్లుతె చెదుర్పు జా తిల దేముడుక నిదానుమ్ తెన్ జొకర్త యూదుల్ అన్నె ఉట్ట జా * యెరూసలేమ్ పట్టుమ్తె జితె తిల.

6 జలె, యేసుక నంపజలనచి పెట్టి అబ్బొన్చి జోచి ఆత్మ బెర్తి జా అవాడ్ నూన, కేనె కేనె తెంతొ నిగ జా, ఒగ్గర్జిన్ జేవ్ యూదుల్ జా గెరి అయ్ల. అయ్లె, ఆచారిమ్ జల. కిచ్చొక మెలె, జోవయించ సాంత వేర వేర బాసల్ తెన్ యేసుచ సిస్సుల్ లట్టబై తిల; జేవ్ బాసల్ కెయ నే సిక తిలె కి,

§ 1:15 1:15 జలె పుంజెక్ విస్సాక్జిన్ * 1:19 1:19 నెంజలె ‘లోయిచి బాటి’. † 1:26 1:26 మత్తయి, మార్కు, లూకా, యోహాను రెగిడ్ల అగ్గెచ పుస్తకల్తె జేవ్ బారజిన్క ‘సిస్సుల్’ మెన రెగ్గ తిల, గని యేసు జోవయించి ఆత్మనెక్కి దా అదికారుమ్ దిలి తెంతొ జోవయించి రిసా రెగిడ్లన్ ‘బారికుల్’ మంతతి.

* 2:5 2:5 ఒండ్ లోకుమ్క ఎక్కి జా యెరూసలేమ్ పట్టుమ్తె ఎత్తి అదికారుమ్ తిలొ దేముడుచి గుడి తిలిచి రిసా ఒత్త గెచ్చు తిల.

7 ఆచారిమ్ జా ఎక్కిలోక ఎక్కిలో, “వేర వేర అమ్చ సొంత బాసల్ తెన్ ఈంజేవ్ లట్టబ్బన గలిలయులు జవుల గెద?

8 అమ్చ బాసల్ నేన్తి దస్సి జలె, కిసి జా అమ్చ బాసల్ తెన్ లట్టబ్తతి” మెన జేవ్ ఆచారిమ్ సంగితె తిల.

9 “అమ్ పార్దీ దేసిమ్చ, మాదీయులు, ఏలామియుల్, పడ్డో మెసాపొతమియ తెంతో చి, యూదయ తెంతోచ, కప్పదొకియ తెంతోచ, పొంతు తెంతోచ, ఆసియా తెంతోచ,

10 పుగియ తెంతోచ, పంపూలియా తెంతోచ, ఐగుప్తు దేసిమ్చ, పడ్డో కురేనియు పట్టుమ్చి సుట్టునంత తిలి లిబియ దేసిమ్ తెంతోచ. పడ్డో అన్నె కి అమ్తె సగుమ్జిన్ రోమ్ దేసిమ్ తెంతో ఆజి కాలి ఉట్ట జా అస్తి. జోవయింతె సగుమ్జిన్ యూదుల్ జెర్మిలస. సగుమ్జిన్ అగ్గె యూదుల్ నెంజిలె కి, దేముడుక నంపజా మార్పువ కెరన్లస కి అస్తి.

11 పడ్డో, క్రేతు దేసిమ్చ, అరేబియ దేసిమ్చ కి ఇన్నె అస్తి. అమ్ ఎత్తివాట్ దేసిమ్లు తెంతో ఉట్ట అయ్లె కి, అమ్చ సొంత బాసల్ తెన్ ఈంజేవ్ లట్టబ్, ఈంజెవు దేముడుచ ఆచారిమ్చ కమె అమ్క సూనయ్తతి!”

12 జోవయించి ఆచారిమ్చి రిసా అన్నె కిచ్చో మెన ఎక్కిలోక ఎక్కిలో సంగితె తిల మెలె, “అప్పె జర్గు జలిన్చి అర్దుమ్ కిచ్చో?” మెన పుసుక దెర్ల.

13 గని ఒత్త బెర అయ్లసతె అన్మానుమ్ జల మాన్పుల్ సగుమ్జిన్ కి తిల, జేవ్ కిచ్చో మెల మెలె, “ఈంజేవ్ మచ్చు అస్తి” మెన జేవ్చి రిసా ఆన్తె తిల.

పేతురు లట్టబ్బిసి

14 జలె తెదొడి పేతురు, ఎగరజిన్ సిస్సుల్చి నెడిమి టీవోజ జా, బెద తిల మాన్పుల్క సూన్తు మెన, గట్టిజ అవాడ్ కెరన, సంగుక దెర్లన్. జో ఇసి మెన సంగిలన్, “ఓ అమ్చ యూదుల్, ఈంజ యెరూసలేమ్ పట్టుమ్ తిలస ఎత్తిజిని, ఆవ్ అప్పె సంగితిసి సరిగా సూన, అర్దుమ్ కెరన్.

15 ఈంజేవ్ తుమ్ దెకిల మాన్పుల్క ‘మచ్చు అస్తి’ మెన తుమ్ మెన్పుతె ఉచర్లి రిసా మచ్చితి నాయ్. అప్పె పెందలె నొవ్వు గంటల్ జా అస్సె!

16 అప్పె జర్గు జలిన్చి రిసా దేముడు పూర్గుమ్ †జోచ కబుర్లు సంగిలో యోవేలు మెలోసాచి అత్తి సంగిలన్.

17 దేముడు కిచ్చో సంగితయ్ మెలె, ‘ఆకర్ దీసల్క దేసిమ్లు ఎత్తితె తిల మాన్పుల్చి పెట్టి అంచి ఆత్మ సువ దెయిందె. తుమ్చ పుత్తర్లు, దువిడ్డుచి

అత్తి అంచ కబుర్లు సంగిమ్దె. పడ్డో తుమ్చ ఉబెడ్డు, జలె, ఆవ్ దెకయ్త సివ్వుల్ దెకుల, తుమ్చ మంత్రమాన్పుల్ కి ఆవ్ దెకయ్త సివ్వుల్ దెకుల.

18 కచితుమ్, మున్పుబోదల్ జలెకి, తేర్బోదల్ జలెకి, అంచ సేవ కెర్తన ఎత్తిజిన్చి పెట్టి అంచి ఆత్మ సువ దెయిందె, చి అంచ కబుర్లు సంగితె తవుల.

19 ఆగాసుమ్తె కి, బూలోకుమ్తె కి, వెల్లెల వెల్లెల కమె కెర, అంచి అదికారుమ్క రుజ్జుల్ దెకయిందె. లోయి సూఁయి జతిసి, ఆగి లగితిసి, చి దుమ్మొ జతిసి.

20 ప్రబు అన్నె ఉత్త జతి జా వెల్లి దీసి నే జెతి అగ్గె పొద్దు అందర్ జయెదె, జోను లోయి రంగు జయెదె.

21 గని, తూయి నిజమి †పరలోకుమ్చో దేముడు, తుక నంపజతసి, అంక రచ్చించువ కెరు! మెన జోవయించి పెట్టి కో అంక ఎక్కి నిదానుమ్ నంపజవుల గే, జోవయించి పాపుమ్ చెమించువ కెర, జోవయింక రచ్చించువ కెరిందె.’

22 “దస్సి ఉచర కెర, ఒత్త బెద తిల యూదుల్క పేతురు అన్నె కిచ్చో మెలన్ మెలె, ఓ ఇస్రాయేలులు మెంత అమ్చ యూదుల్, ఏక్ కోడు తుమ్ సూన. నజరేతు గవ్విచో యేసు కిసి తిలో గే, తుమ్ జాన్పు. ‘జోక దేముడు దిలి అదికారుమ్ రుజ్జు జవున్’ మెన, దేముడు జోచి అత్తి తుమ్చి మొక్కె వెల్లెల వెల్లెల కమె కెరవ, రుజ్జుల్ డీసయ్లో.

23 జలె, ‘జర్గు జతిన్, జర్గు జవున్’ మెన దేముడు అగ్గెయి తెంతో రెగిడ్లి రితి, జో యేసుక మూర్పుడ్లుచి అత్తి తూమ్ సొర్పు కెర దా, కీసిలువతె గలవ మార్ద్రు.

24 జోక తుమ్ మార్లె కి, జో మొర్పు తెంతో విడ్డల్ జా, దేముడు జోక అన్నె జియడ్డో; యేసుచి ఉప్పిరి మొర్పుక అదికారుమ్ నాయ్.

25 “యేసు అగ్గె తెంతో జానన్లిన్ కిచ్చో మెలె అమ్చో దావీదు పూర్గుమ్చోచి అత్తి దేముడు రెగ్గయ్లో మెలె;

*దేముడు కెడ్డొడి తెదొడి అంక తోడు అస్సె మెన దెకిలయ్. కిచ్చో కి అంక బమ్మ నే కెర్తె, జో అంచి ఉజెతో పక్క తా తోడు తత్తయ్ మెన దెకిలయ్ చి ఆవ్ కదుల్ నే జయి.

26 జాక, సర్దనంతోనుమ్ జలయ్, చి జో ప్రబుచి గవురుమ్చి రిసా గనుమ్ గాయ్తోన్ జలయ్. జాకయ్, అన్నె, కిచ్చో జర్గు జలెకి, అంచి పెట్టి అంచి ఆగ్ కి ఆస తెన్ తయెదె.

27 ఆవ్ మొర్లె కి, ఆవ్ మొర్పుతె గెలె కి, జో అంక ఒత్త ములె నాయ్, తుచి సుద్ది తిలసచి ఆగ్ కువితె రితి నే ఒప్పన్తె.

† 2:16 2:16 పూర్గుమ్ పొది ఎత్తి అదికారుమ్ తిలో దేముడు కక్క గే నిసాన, “ఈంజ జా కబుర్ సంగు” మెన జోవయించి అత్తెన్కి జో మాన్పుచి పెట్టి దా లట్టబడె. ‡ 2:21 2:21 ‘పరలోకుమ్చో దేముడు’ మెన ఇన్నె రెగిడ్లిన్క గ్రీకు బాసతె తోలితో రెగిడ్ల పున్కల్తె ‘ప్రబు’ మెలె అర్దుమ్చి కోడు అస్సె. ‘ప్రబు’ మెలె, యేసుచి రిసా ఒగ్గర్ సంగితతి, గని దేముడు అబ్సొన్క కి ‘ప్రబు’ మెన సంగుల జా అర్దుమ్ కిచ్చో మెలె ఎత్తి ఏలువ కెర్తెసా జో దేముడు అబ్సొన్చి నావ్ ‘యెహోవ’ జయెదె, గని జా నావ్ దెరుక యూదుల్ బియఁ కెర ‘ప్రబు’ మెనుల. § 2:23 2:23 మార్కు 15:24చి ఎట్టొచి కోడు దెక. * 2:25 2:25 నెంజిలె ‘ప్రబు’.

28 జతి సెక్తి అంక దా అస్సిన, చి తుచితె పరలోకుమతె తియ తా, తుచితె ఆవ్ తతిన్క అంక పూర్తి సర్దనంతోసుమ్ కెర్తె.”†

పేతురు జేవ్ బెర తిల యూదుల్క ఏద కెరవ, అన్నె కిచ్చొ మెన బోదన కెర్లన్ మెలె,

29 “ఓ బావుడ్లు, అమ్చొ దావీదు పూర్ణుమ్చొచి రిసా కిచ్చొ మెన కచితుమ్ ఆవ్ సంగితసి మెలె, జో మాములుమ్ మాన్సు జా మొర గెలన్, చి జోక మెన్నె రోవ చి అప్పొక మెన్నున్ దస్సె అస్సె.

30 గని మాములుమ్ మాన్సు జలెకి, దేముడు ఒట్టు గలన్ కిచ్చొ మెన నే పిట్టి కచితుమ్ కోడు పూర్ణుల్క నూనయ్లిసి కబుర్లు జో జాన అస్సె. దేముడు జోవయింక కిచ్చొ సంగిలన్ మెలె;

తుమ్చి వమ్సుమ్చొ ఎక్కిలోక తుచి సింగాసనుమ్తె వెనడిందె”

31 జాకయ్, జో దేముడు సికయ్తికయ్, కిచ్చొ అగ్గె తెంతో దెకిలి రితి జా దావీదు రెగ్గ అస్సె మెలె;

“క్రీస్తు మొరై కి, మొర్నుతె నే తయెదె, జోచి ఆగ్ నే కువితె, అన్నె జీవ్ జా ఉట్టెదె.”

32 “జలె, ఈంజొ యేసుకయ్ దేముడు అన్నె జియడ్లొ మెన అమ్ ఇన్నె బెర్లన ఎత్తిజిన్ సాచి జా అస్సుమ్.

33 జో, జలె, అన్నె జీవ్ జా ఉట్ట దేముడు అబ్బొన్తె పరలోకుమతె వెగ గెచ్చు గవురుమ్ జా, జోచి ఉజెతో పక్క వెన అస్సె. చి జో దేముడు అబ్బొసి అగ్గె సంగ తిలి రితి, జోచి సుద్ది తిలి ఆత్మ వంట దెతిసి, పూర్తి జో తుమ్ అప్పొ దెకిలిసి నూన్లిసి జర్లు కెర అస్సె.

34 “దావీదు, జలె, పరలోకుమతె వెగ గెచ్చె నాయ్, గని జో ఇసి సంగిలన్.

దేముడు ప్రబు అంచొ ప్రబుక సంగిలన్.

35 ‘తుక విరోదుమ్ జలన తుచి చాటు సుఁదితి పొద్దొ జతి రితి కెర్తె ఎదక, తుయి అంచి ఉజెతో పక్క వెన తా.’

36 “జాకయ్, తుమ్ ఇస్రాయేలులు మెల అమ్చ యూదుల్ ఎత్తిజిన్క ఆవ్ కిచ్చొ కచితుమ్ సంగితసి మెలె, తుమ్ సిలువ గల మార్లొ యేసు అమ్క దొర్కు జలొ రచ్చించువ కెర్తొసా జతొ క్రీస్తు జా, ఎత్తిక ఏలువ కెర్తొ ప్రబు జవున్” ఇసి పేతురు రుజ్జు కెర్లన్.

37 ఈంజ ఎత్తి నూన కెర, ఒత్త బెర తిల యూదుల్, “నిజుమి దేముడుచొ పుత్తున్క మార పాపుమ్ కెర్లమ్ మెన జోవయించి పెట్టి దుకుమ్ తెన్ ఒప్పున, బియఁ గెచ్చ, ఓ బావుడ్లు, అమ్చి పాపుమ్ గెస్సు మెన అమ్ అప్పొ కిచ్చొ కెర్లె జయెదె?” మెన పేతురుక చి జోవయింతెన్ తిల యేసుచ అన్నె బారికుల్క పుసిల.

38 జేవ్క, పేతురు, “తుమ్ కెర్ల పాపల్చి రిసా దుకుమ్ జా పాపుమ్ ముల్లి బుద్ది జా యేసుక్రీస్తుక నంపజా, తుమ్చి పాపుమ్ గెచ్చయ్తి గుర్తుక జోచి నావ్ తెన్ బాప్తిసుమ్ కడన్. దస్సి కెర్లదు మెలె, దేముడుచి సుద్ది తిలి ఆత్మ తుమ్క దొర్కు జయెదె.

39 జోచి కక్క ప్రబు జలొ అమ్చొ దేముడు నిసాన్దె గే, ‘జోవయించి పెట్టి అమ్చి సుద్ది తిలి ఆత్మ దెయెదె’ మెన, తుమ్చి రిసా కి, తుమ్చ బోదల్చి రిసా కి, పడ్డొచ మాన్సుల్క కి, పడ్డొ దూరి దేసిమ్లుచ మాన్సుల్చి రిసా కి సంగ అస్సె” ఇసి పేతురు జేవ్క సంగిలన్.

40 పడ్డొ అన్నె సాచుల్ రుజ్జుల్ బెదవ, జోవయింక కిచ్చొ మెన బతిమాల్పా జా సంగిలన్ మెలె, “పాపుమ్బుద్ది తిల ఈంజ ఉగుమ్చ మాన్సుల్చి బుద్ది ముల, విడ్డల్ కెరన, రచ్చించువ జా” మెన సంగిలన్.

41 జోచి కోడు నూన నంపజలన, జలె, బాప్తిసుమ్ నజన్ల. చి జా దీసి రమారమి తిన్ని వెయిల్జిన్ మాన్సుల్ అగ్గె నంపజల సిస్సుల్ తెన్ బెదిల.

42 జా దీసి తెంతో, నిదానుమ్ తెన్ యేసుచ బారికుల్చి బోదన నూన్తె తా, సిస్సుల్ తెన్ సర్ల తెన్ బెద, మాన్సుల్చి పాపుమ్ గెచ్చయ్తిన్క యేసు బలి జలొచి జా గుర్తు దెకయ్తి పొడియె, ద్రాచ రస్సుమ్ కంక పింక అలవాట్ జల, జోవయింతెన్ నిదానుమ్ తెన్ ప్రార్దన కెర్తె తిల.

43 ఎత్తిజిన్ ఉచర ఉచర ఆచారిమ్ తెన్ తిల, చి జేవ్ బారికుల్చి అత్తి ప్రబు ఒగ్గర్ వెల్లెల కమొ జర్లు జలి.

44 పడ్డొ, నంపజలన ఎత్తిజిన్ సర్ల తెన్ ఎక్కి మెన్ను తెన్ తిల, చి బీద సుదల్, సామ్సార్లు, కోయి ముస్కు నే జతె, ఎక్కిలోక ఎక్కిలో తోడు దెతె తిల.

45 ఆస్తి తిల మాన్సుల్ జోవయించి వికన, నెంజిల మాన్సుల్క తోడు దెతె తిల. ఎక్కిలోక కొత్తు తిలెగిన, అన్నెక్లొ జోక తోడు దెంక.

46 దేముడుచి గుడితె బెద, ప్రబుక ఉచరుక మెన రోజుక గెతె తిల, చి జోవయించి గెరలె, ఎక్కిలోక ఎక్కిలో అన్నిమ్క బుకారా, జా పొడియె కా, జా ద్రాచ రస్సుమ్ పియఁ, సర్దనంతోసుమ్ తెన్ కట్టు తెన్ తిల.

47 దేముడుచి గవురుమ్ సంగితె తిల, చి ఎత్తిజిన్ జోవయింక మెన్సిత్ తిల, చి ప్రబు రోజుక కక్క కక్క నొవ మాన్సుల్క నిసాన రచ్చించువ కెర నంపజలన మొత్తుమ్చి సంగుమ్తె బెదయ్తె తిలన్.

3

జెర్మిల్ తెంతో సాట్టొ జలొసా చెంగిల్ జలిసి

† 2:28 2:28 యేసుక దేముడు అబ్బొసి అన్నె జియడెదె మెలెన్చి రిసాచి కోడు ఈంజ. యేసు దేముడు అబ్బొన్ తెన్ లట్టల్లి రితి కోడు.

1 ఏక్ దీసి, ప్రార్థన కెరుక బెదుక మెన, పేతురు చి యోహాను దేముడుచి గుడితె గెతె తిల. తెదోడి తిన్ని గంటల్ జా తిలి.

2 దేముడుచి గుడిక పాసి అయ్లె పొది, జెర్మిల్ తెంతో సొట్టో జలో ఎక్కిలోక మాన్సుల్ వయ నెతె తిల. రోజుక జోక వయన దేముడుచి గుడిచి కోటచి 'సూటి' మెన నావ్ తిలి గుమ్ముమ్ సొడి వెనడ్లె, గుమ్ముమె పెసిత తతె జో మాన్సు దర్ముమ్ నజీతె తిలో.

3 పేతురు చి యోహాను దేముడుచి గుడి తెడి పెసుక దెర్లిసి, జో దెక, "డబ్బుల్ దా" మెన, దెక నే దెకిల్ రితి జా సంగిలన్.

4 సంగిలె, పేతురు యోహాను జోక చెంగిల్ దెకిల. అన్నె పేతురు జోక, "అమ్క సరిగా దెకు" మెలన్.

5 దస్సి మెంతికయ్, 'కిచ్చో జవున్ దెవుల' మెన ఉచర, జో మాన్సు జోవయింక సరిగా దెకిలన్.

6 గని పేతురు జోక, "అంక వెండి కాసుల్ నాయ్, బజార్ కాసుల్ నాయ్, గని అంక తిలిసి తుక దెయిందె. నజరేతుచో యేసుక్రీస్తుచి నావ్ తెన్ ఉట్ట ఇండు" మెన సంగిలన్.

7 సంగ, జోచి ఉజిల్ ఆతు పేతురు దెర, జోక ఉట్టవ టీవో కెలన్. బేగి, జోచ చట్టో, ఆగ్ అడ్డొ డిట్టుమ్ జల.

8 డిట్టుమ్ జతికయ్, జో చట్టున ఉట్ట అద్దుర్ నెంతె టీవో ఇండుక దెర, సర్లక నచ్చ నచ్చ, దేముడుచి గవురుమ్ సంగ సంగ, దేముడుచి గుడితె పెసిలో.

పేతురు యూదుల్క బోదన కెర్లిసి

9 జో మాన్సు ఇండితె తిలిసి, దేముడుచి గవురుమ్ సర్ల తెన్ సంగితె తిలిసి ఒత్త బెర్ల పైజల్ ఎత్తి దెక కెర,

10 "ఒరె, ఈంజోయి రోజుక దేముడుచి గుడిచి గుమ్ముమె దర్ముమ్ నజ వెన తతోసా, గని చెంగిల్ జా ఇండితయ్" మెన, బమ్మ జా ఆచారిమ్ తెన్ ఎక్కిలోక ఎక్కిలో సంగితె తిల.

11 జో మాన్సు, జలె, పేతురుక చి యోహానుక ములుక నెతిర్లిసి జా జనాబ్ దెక, ఆచారిమ్ జా, జేవ్ తీగ్ల దేముడుచి గుడిచి వెల్లి పేడె గెచ్చ తతికయ్, ఈంజెచ్చు జనాబ్ బెద నిగ గెచ్చ, సొలోమోను రానొచి నావ్ తిలి పేడెక జోచి సుట్టునంత బెర గెల.

12 జేవ్ జనాబ్ దస్సి బెర అయ్లిసి దెక, పేతురు జోవయింక ఇసి మెన బోదన కెరుక దెర్లన్. "ఓ ఇస్రాయేలులు మెల అమ్చ యూదుల్, ఈంజో మాన్సుచి రిసా తుమ్ కిచ్చొక ఆచారిమ్ జతను? అమ్క కిచ్చొక దస్సి ఆచారిమ్ తెన్ దెకితను? అమ్చి సొంత సెక్తి తెన్, సొంత పున్నిమ్చి రిసా జోక చెంగిల్ కెర ఇండయ్ల మెన తుమ్ ఉచర్లను గె?"

13 "అమ్చ పూర్గుల్ జల అబ్రాహామ్క, ఇస్సాకుక చి యాకోబుక దేముడు, జోచో సేవ కెర్లిసా యేసుకయ్ అన్నె జియడ గవురుమ్ కెర దా అన్నె. తుమి యేసుక దెర పిలాతు

అదికారిచి అత్తి సొర్ప దిలదు, చి జో పిలాతు 'జోక విడ్డల్ కెరిందె, జో కేన్ తప్పు కెరె నాయ్' మెన తీర్పు సంగిలే కి, తుమ్ నే ఒప్పున్తె యేసుచి విలువ కడ్లదు.

14 తుమ్ దస్సి కెర, నుద్ది చి పున్నిమ్ తిలో క్రీస్తు రచ్చించుప కెర్లిసాచి మరియాద కడ్లదు. అత్య కెర్లి బరబ్బుక విడ్డల్ కెరు, జోకయ్ కావలె మెన, తుమ్ కోర్ప జా పిలాతుక సంగ.

15 ఎత్తి జీవుల్క జీవు దెతోసా, ఎత్తిక ఆదారుమ్ జలో యేసుక తుమ్ మార గెలదు. గని దేముడు జలో అబ్బొసి జోక అన్నె జియడ్లె మెన ఆమ్ దెక, సాచి జా అస్సుమ్.

16 జోచి అదికారుమ్చి రిసా జొయ్యి ఈంజో సొట్టో మెన తుమ్ అగ్గె తెంతో జాన్లొ మాన్సుక చెంగిల్ కెర అన్నె. యేసుకయ్ నంపజా జోచి నావ్ తెన్, ఉట్ట ఇండు మెన ఇన్నెక అమ్ సంగితికయ్, యేసుయి ఇన్నెక చెంగిల్ కెర్లన్. తుమ్చి మొక్కె ఈంజో మాన్సు పూర్తి చెంగిల్ జలిసి కీసి జర్లు జలి మెలె, యేసుయి దయిరిమ్ కెర, నంప కెరవ, చెంగిల్ కెర్లన్.

17 "జలె, అమ్చ బాపుడ్లు, ఉచర, తుమ్, తుమ్చ అదికారుల్, నేన కెర దస్సి కెర్లదు మెన జాని.

18 గని, దేముడు పూర్గుమ్ జో కబుర్ తెద్రయ్లన చి అత్తి సంగ తెద్రయ్లిసి, జో ఏలువ కెరయ్తో క్రీస్తు సేడుక తిల సైమల్ ఎత్తిచి రిసా పూర్గుమ్ కబుర్ సంగ తెద్రయ్లిసి. యేసుక తుమ్ మార్లిసి తెన్ జో దేముడు నెరవెర్చువ కెర అన్నె.

19 జలె, అమ్ కెర్ల పాపల్ వుంచి జతు మెన తుమ్ కోర్ప జలె, తుమ్ కెర్ల పాపల్చి రిసా పెట్టి పూర్తి దుకుమ్ జా, అజి తెంతో ప్రబుచి ఇస్టుమ్ రితి కెరుక పూర్తి కోర్ప జా మార్పువ జా, చి దేముడు తుమ్క పాసి కెరన, తుమ్క సెలవ్ కడన్లి పొది దిలి రితి, తుమ్చి ఆత్మల్క చెంగిల్ కెరెదె,

20 చి తుమ్క పూర్గుమ్ తెంతో సంగ తిలో రచ్చించుప కెర్లిసా జతో క్రీస్తుక తుమ్తె తెద్రయెదె. క్రీస్తు కొన్నె మెలె, యేసు.

21 జో క్రీస్తుయి పరలోకుమ్తె తంక. కెయ్యి ఎద జో ఒత్త తంక అన్నె మెలె, పూర్గుమ్ దేముడుచి కబుర్ సంగిలనచి అత్తి సంగిలిసి ఎత్తి నెరవెర్చువ జతె ఎద.

22 "మోసే పూర్గుమ్చొచి అత్తి దేముడు రెగ్డయ్లి కోడు ఏక్ కిచ్చొ మెలె;

అంచ కబుర్లు సంగు మెన పరలోకుమ్చొ ప్రబు జలో దేముడు అంకయ్ కీసి తెద్రయ్లో గే, దస్సి, తుమ్ యూదుల్తె జెర్మితో ఎక్కిలోక కబుర్ తెద్రయెదె. తుమ్క జో కిచ్చొ ఆడ్ర దెయెదె గే, జయ్యి తుమ్ కెర్లె.

23 జో కబుర్ జెతోసాక కో నూన్తి నాయ్ గె. 'ఆవ్ నిసాన్లె పైజల్తె తుమ్ బెదుక విలువ నాయ్' మెన జోవయింక దేముడు నాసెనుమ్ కెరెదె.

24 పడ్డొ, సమూయేలు పూర్ణమచొ తెంతొ అప్పెచి కాలుమ్ ఎద దేముడు కబుర్ తెద్రయలసతె కక్క నే పిట్టె, జేవ్ ఎత్కిజన్ ఈంజ కాలుమ్ జర్గు జతిసి, అజి జర్గు జతిన్చి రిసొ అగ్గె తెంతొ సంగ అస్తి.

25 జలె, దేముడుచి కబుర్ సంగ తిల జేవ్ పూర్ణుల్చ పుత్తర్లులు తూమ్. పడ్డొ తుమ్చి సెకుమ్తె పడ్డొక ఎక్కిలో జెర్దె. జోచి రిసొ ఈంజ లోకుమ్చ కుటుంబల్ ఎత్కిక దీవెన దొర్కు జయెదె. జోచి అత్తి అంచి వరుమ్ దెయిందె మెన దేముడు తుమ్చొ అబ్రాహామ్ పూర్ణమచొచి అత్తి తుమ్చ పూర్ణుల్చ నే పిట్టి ప్రమానుమ్ కెర సంగిలన్. జొ కోడుచి రిసొచి పుత్తర్లు కి తూమ్ జస్తి.

26 జలె, 'దొర్కు జలొ రచ్చించుప కెర్తొసొ' మెన ప్రబు జోచొ సేవ కెర్తొసొ జలొ యేసుక టీవడ. జో మొర్తికయ్ అన్నె జియడ, కత్తె తొలితొ తెద్రవ అస్సె మెలె, తూమ్ యూదుల్తెయి. కిచ్చొక మెలె, తుమ్క 'తుమ్చి పాపుమ్బుద్ది ముల చెంగిల్ జతు' మెన తుమ్కయ్ తొలితొ చి తెద్రవ అస్సె" మెన పేతురు ప్రెజల్క బోదన కెర్లన్.

4

పేతురుక యోహానులుక జేల్తె గలిలిసి

1 పేతురు చి యోహాను ప్రెజల్క దస్సి బోదన కెర్తె తతికయ్, యూదుల్చ పూజర్లు, దేముడుచి గుడిచొ ఎజొమాని, పడ్డొ సద్దుకాయ్యలు మెన పండితుల్ జోవయింతె ఉట్ట అయ్ల.

2 యేసు 'మొర అన్నె జివ్ జలొ' మెన ప్రెజల్క పేతురు చి యోహాను సికయ్తె తిలి రిసొ, జేవ్ వెల్లొ సుదల్ కోపుమ్ జొ అస్తి.

3 జోవయింక దెర్ల, గని సాంజ్ జలి రిసొ 'కలిక తీర్పు కెరుమ' మెన దస్సి జేల్తె గలిల.

4 జేవ్ వెల్లొ సుదల్ దస్సి కెర్లె కి, జేవ్ దొగుల కెర్లి బోదన సూన్లస ఒగ్గర్జన్ యేసుక నంపజయి గెల. ఇన్నెతెన్, నంపజలస కెత్తిజన్ జల మెలె, తేర్బోదల్, బాలబోదల్క పిట్టవ, రమారమి పాచ్ వెయిల్జన్ మున్నుబోదల్ తిల.

పేతురుక యోహానులుక పరిచ్చ కెర్లిసి

5 అన్నెక్ దీసి కిచ్చొ జర్గు జలి మెలె, సబ కెరుక మెన యూదుల్చ అదికారుల్, వెల్లెల మాన్సుల్, మోసి తెన్ దేముడు దిలి ఆగ్గుల్ సికడ్డస ఎత్కిజన్ యెరూసలేమ్ పట్టుమ్తె బెర జొ అస్తి.

6 జోవయింతె కో కో ముక్కిమ్ జొ సబ కెర్లి రిసొ జొ అస్తి మెలె, అగ్గె ఎత్కిక వెల్లొ పూజరి జొ తిలొ అన్నొచి జొవొసి జలొ తెదొడిచొ ఎత్కిక వెల్లొ పూజరి కయప, ఎత్కిక వెల్లెల పూజర్లు జతసచ కుటుంబల్చ మున్నుబోదల్ ఎత్కిజని. ఇనయింతె దొగుల కొన్న మెలె, యోహానుని అలెక్కంద్రు.

7 సబ కెరుక దెర్లి పొది, యోహానుక చి పేతురుక కడ ఆన నెడిమి టీవొ కెరన, జేవ్ చెంగిల్ కెర్లొ అగ్గె సొట్టొ జొ తిలొ మాన్సుక కి టీవొ కెర, జేవ్ దొగులక పరిచ్చ కెరుక దెర్ల. "ఈంజొ మాన్సుక కిసి ఇండయలదు? తుమ్చి సొంత సెక్కిక నెతుర్పు! కచి సెక్కి, కచి నావ్ తెన్ ఈంజ కామ్ కెర్లదు?" మెన కోపుమ్ తెన్ పరిచ్చ కెర్ల.

పేతురు జబాబ్ దిలిసి

8 తెదొడి పేతురు దేముడుచి సుద్ది తిలి ఆత్మసెక్కి జోచి పెట్టి బెర సెక్కి దెతికయ్, దయిరిమ్ జొ, జేవ్ వెల్లెల మాన్సుల్క ఇసి మెన జబాబ్ దిలన్; "యూదుల్చ అదికారుల్, వెల్లెల మాన్సుల్, తుమ్క ఆమ్ కిచ్చొ సంగుక?

9 అమ్ సొట్టొ మాన్సు ఎక్కిలోక చెంగిల్ కెర్లి రిసొ ఆజి తుమ్ అమ్క పరిచ్చ కెర్లను జలె,

10 నజరేతు గవ్వొచొ యేసుక్కిస్తుచి నావ్ తెన్ని తుమ్చి నెడిమి టీవొ జలొ ఈంజొ మాన్సు చెంగిల్ జొ అస్సె. జో యేసుక్కిస్తు తుమి సిలివ గల మార్లదు, గని దేముడు జోక అన్నె జియడ్లన్, చి జొయ్యి ఈంజొ మాన్సుక చెంగిల్ కెర అస్సె మెన తుమ్క చి అమ్చి ఇస్రాయేలులు ఎత్కిజిన్క ఆడ కచితుమ్ సంగితసి.

11 "గేరు బంద మాన్సుల్ నెస కెర ములిల పత్తుర్, గేర్ బందత బోడిపత్తుర్ జయెదె. తుమ్ జోక నెసిలె కి, పరలోకుమ్చి రాజిమ్క జొయ్యి వెల్లొ జొ అస్సె.

12 పాపుమ్ తెంతొ విడ్డల్ జొ పరలోకుమ్తె గెతి రచ్చన కచితె దొర్కు జతయ్ మెలె, యేసుతెయి అన్నె కత్తెయ్ నాయ్. కిచ్చొక మెలె, ఈంజ ఒండి లోకుమ్తె అన్నెకచి నావ్ తెన్ రచ్చించుప జంక కో కి నెతిర్లి" మెన పేతురు సంగిలన్.

13 పేతురుక చి యోహానుక, "ఈంజేవ్ ఒగ్గర్ నదు కెర్ల మాన్సుల్ నెంజితి రిత జాలర్లు ఈంజేవ్, వెల్లెల మాన్సుల్ నెంజితి, గని తెద్ది దయిరిమ్ తెన్ అమ్క బుద్ది సంగితతి" మెన, జేవ్ వెల్లెల మాన్సుల్ ఆచారిమ్ జల. అన్నె, యేసు తెన్ జేవ్ బుల్లె తిలి రిసొయ్ ఇసి తెలివి తెన్ దయిరిమ్ జొ అస్తి మెన వెల్లెల మాన్సుల్ చినిల.

14 పడ్డొ, అగ్గె సొట్టొ జొ తిలొ మాన్సు అప్పె చెంగిల్ జొ జోవయించి నెడిమి టీవొజ అస్సె మెన దెక కెర, జేవ్ అన్నె కిచ్చొ నింద సంగుక నెతిర్ల.

15 అన్నె కిచ్చొ సంగుక నెత్త కెర, యోహానుక చి పేతురుక సబ తెంతొ బార్ కెర, వెల్లెల మాన్సుల్ లట్టబన్ల.

16 "ఈంజేవ్ దొగుల మాన్సుల్చి రిసొ అమ్ కిచ్చొ కెర్లె జయెదె? కిచ్చొ సిచ్చ కెరుక నెతుమ్, కిచ్చొగె. కిచ్చొక మెలె, తెద్ది వెల్లి కామ్ ఇన్నెచి అత్తి జర్గు జొ అస్సె మెన ఈంజ యెరూసలేమ్తెచ మాన్సుల్ ఎత్కిజిన్ జాన్తి. ఆమ్ కి దెక అస్సుమ్, చి కిచ్చొ వేర సంగుక నెంజె.

17 గని, ఈంజ ఎత్కిచి రిసా అన్నె కో సూన్త నాయ్ మెన, ఈంజేవ్ దొగుల జోచి నావ్ తెన్ అన్నె కక్క కిచ్చొ నే సంగిత రితి బియడ ఆడ్ర దెమ” మెన తీర్పు సంగిల.

18 తెదొడి, జేవ్ దొగులక అన్నె బుకారా కెర, “తుమ్ జో యేసుచి నావ్ దెరుక నాయ్. జోచి నావ్ తెన్ అన్నె కక్క బోదన కెరుక నాయ్” మెన పేతురుకచి యోహానులుక ఆడ్ర దిల.

పేతురు చి యోహానులు దిలి జబాబ్

19 జేవ్ వెల్లెల మాన్సుల్ దస్సి సంగిలక, పేతురు, యోహాను, నే బితె దయిరిమ్ తెన్ కిచ్చొ సంగిల మెలె, “దేముడు సంగిలి కోడు అమ్ కెర్లె చెంగిల్ గే, తుమ్ మాన్సుల్ సంగిలి కోడు అమ్ కెర్లె చెంగిల్ గే, తూమ్ సరిగా ఉచర. జేవ్ దొన్నిచి రిసా జో దేముడు సొంత కిచ్చొ మెనెదె గే ఉచర.

20 అమ్ దెకిలిసి సూన్లసి, ఆమ్ మాన్సుల్క నే సంగితె తంక నెత్తమ్, నేన” మెన జేవ్ దొగుల యేసుచ బారికుల్ సంగిల.

21 ‘యేసుచి అదికారుమ్చి తెడి జో సొట్టో మాన్సు చెంగిల్ జలో’ మెన పైజల్ ఎత్కిజిన్ దేముడుచి గవురుమ్ సంగితె తిల. జేవ్చి రిసా, ‘జేవ్ దొగులక అమ్ సిచ్చ కెర్లె పైజల్ అమ్క అల్లర్ కెరుల’ మెన కిచ్చొ సిచ్చ కెరుక నెత్త కెర, ఎత్కి కోడకయ్ జోవయింక అన్నె బియడ కెర, వెల్లెల మాన్సుల్ జోవయింక విడల్ కెర్ల.

22 పైజల్ కిచ్చొక దేముడుచి గవురుమ్ ఒగ్గర్ నముకుమ్ తెన్ సంగితె తిల మెలె, జోవయింక గవురుమ్క రుజ్జు దెకయ్లి జా వెల్లి కామ్ జర్లు కెర్లిసి కక్క చెంగిల్ కెర్లిసి జయెదె మెలె, దొన్ని విసా వెర్పుల్ జలో సొట్టో జెర్మిలో మాన్సుక.

23 పేతురుక యోహానుక వెల్లెల మాన్సుల్ ముల్లికయ్, జోవయింక గోతుసుదల్తె జేవ్ దొగుల గెచ్చ, ఎత్కిక వెల్లెల పూజర్లు చి వెల్లెల మాన్సుల్ జోవయింక సంగిలిసి ఎత్కి సంగ దిల.

24 జేవ్ సూన కెర, జేవ్ ఎత్కిజిన్ ఎత్కి మెన్సు తెన్ బెద దేముడుక ఇసి మెన గట్టిజ అవాడ్ తెన్ ప్రార్దన కెరుక దెర్ల: “ఎత్కిచి కంట వెల్లి తిలో అమ్చో దేముడు ప్రబువ, పరలోకుమ్ బూలోకుమ్, సముద్రుమ్, జేవ్ ఎత్కితె తతిసి కిచ్చొ నే పిట్టె జెర్మయ్లోసా తూయి.

25 తుమ్చి సుద్ది తిలి ఆత్మ లట్టబ్తికయ్, తుచొ సేవ కెర్లొసా జలో అమ్చొ పూర్గుమ్చొ దావీదుచి చొడివాట్ తూయి సంగిలిసి కిచ్చొ మెలె,

దేముడుక నేన్ల దేసిమ్లుచ మాన్సుల్ కిచ్చొక జోవయింక నిస్కారుమ్ ఉచర వెల్లెల మాన్సుల్ మెనన్ల? అమ్చయ్ పైజల్ కి జోవయింక నేన్ల రిత జా, కిచ్చొక కామ్క నెంజిల కుట్రల్ జోవయింక రిసా ఉచర్ల?

26 ఒండి లోకుమ్చ రానలు, అదికారుల్, కుట్ర కెర్లి రితి ఎత్కితె బెద, దేముడుక కి, జో ఏలుప కెరయ్తో క్రీస్తుక కి యుద్దుమ్ కెర్లి రితి జల

మెన దావీదుచి అత్తి రెగ్గ అస్సె.

27 నిజుచి, ఈంజయి పట్టుమ్తె హేరోదు రానొ, పొంతి పిలాతు అదికారి, యూదుల్ నెంజిలన ఇస్రాయేలులు మెల అమ్చ యూదుల్, ఎత్కిజిని, దేముడుచి సుద్ది తిలో తూయి ఏలుప కెరయ్లో సేవ కెర్లొసా జలో యేసుక కుట్ర కెర, జోవయింక ఉప్పిరి యుద్దుమ్ కెర్లి రితి జల.

28 ‘జర్లు జవున్’ మెన తూయి అగ్గె తెంతో తుచి అదికారుమ్క సెలవ్ దా తిలిసి ఎత్కి, జోవయింక పెట్టిచి విస్సుమ్క జేవ్ జర్లు కెర్ల.

29 అప్పె కి, ప్రబుచ, ఈంజేవ్ తుచ సేవ కెర్లొసక బియడత్తి. గని ఇన్నొక కన్కారుమ్ దెక,

30 జొర్లొ తిల మాన్సుల్క ఇన్నొచి అత్తి చెంగిల్ కెర్లె తా, సుద్ది తిలో తుచొ సేవ కెర్లొసా యేసుచి నావ్ తెన్ జోచి అదికారుమ్క గుర్తు జత వెల్లి కమొ కెరవ కెరవ, ఈంజేవ్ పూర్తి దయిరిమ్ తెన్ తుచి సుబుమ్ కబుర్ సంగితి రితి ఇన్నొక తోడు తా, మెన ప్రార్దన కెర్లొసమ్” మెన, బెర తిలన ఎత్కిజిన్ ఎత్కి మెన్సు తెన్ ప్రార్దన కెర్ల.

31 దస్సి ప్రార్దన కెర కేడయ్లి బేగి, కిచ్చొ జర్లు జలి మెలె, జేవ్ సబ కెర్లె తిలి గేరు కదుల్ జంక దెర్లి, చి దేముడుచి సుద్ది తిలి ఆత్మ జోవయింక పెట్టి బెర పూర్తి సెక్తి దెత్తికయ్, పూర్తి దయిరిమ్ తెన్ దేముడు దిలి బోదన కెర్లిసి ఎత్కి సంగుక దెర్ల.

యేసుక నంపజలన కట్టు తెన్ తిలిసి

32 జేవ్ పొదులె, యేసుప్రబుక నంపతిలన ఎత్కిజిని, ఎత్కి ఆత్మ మెన్సు, ప్రేమ తెన్ తిల. “అంచయ్” మెన, జోవయింక కలుగు జల ఆస్తుల్చి రిసా జోవయింతె కో కి పొటి సంగితి నాయ్, గని జోవయింక కలుగు జలిస్క ‘అమ్ ఎత్కిజిన్చి’ మెన, సర్ల తెన్ ఎత్కిలోక ఎత్కిలో తోడు కెర్లె తిల.

33 వడ్డొ, దేముడు యేసుచి ఆత్మనెక్తి జోవయింక పెట్టి తిలి రిసా, జేవ్ బారజిన్ జోవయింక బారికుల్ పూర్తి దయిరిమ్ తెన్ యేసుప్రబు మొర అన్నె జిలిసిచి రిసా సాచి సంగితె తిల. జో ప్రబుచి దయచి ప్రేమ జేవ్ నంపజలన ఎత్కిజిన్చి పెట్టి బెర కామ్ కెర్లె తిలి.

34 జోవయింతె కక్క కి కొత్తు నాయ్. కిచ్చొక మెలె. జోవయింతె కక్క ఒగ్గర్ బుయి గే గెరల్ గే తయెదె గే, జో విక గెలెదె, చి జా వికిలి డబ్బిల్ ఆన కెర,

35 యేసుచ బారికుల్చి చట్టె తివుల. ‘నెంజిలనక దొర్కు జవున్’ మెన, నెంజిలనక వంట దెవుల. జాచి రిసా కక్క కి కొత్తు జయె నాయ్.

సత్తిమ్ జలో బర్బూ

36 యోసేపు మెలో ఎక్కిలో జోవయింతె తిలో. 'దయిరిమ్ కెర్లోసా' మెలి అర్దుమ్ తెన్ జోక 'బర్బూ' మెన, బారజిన్ బారికుల్ ఆసిమ్ నావ్ తియ తిల. జో, యూదుడు జలో లేవీ మెలో పూర్దుమ్చోచి సెకుమ్చో జయెదె. జో జెర్మిలి దేసిమ్ కేన్ మెలె, కుప్త మెలి దీవి దేసిమ్.

37 జో కిచ్చో కెర్ల మెలె, జోక కలుగు జలి ఏక్ బాటి జో విక కెర, జా వికిలి డబ్బుల్ దెరన, జేవ్ బారజిన్ బారికుల్క చటె తిలన్.

5

అననీయని సప్పీరా

1 అననీయ మెలో ఎక్కిలో, మాన్సు, సప్పీరా మెలి తేర్ని తెన్, దొగుల బెద జోవయించి బుయి ఏక్ విక కెర,

2 తేర్ని కి జాన్తె, జా బుయి వికిలి డబ్బుల్ సగుమ్ తియన కెర, ఎక్కి వాట యేసుచ బారికుల్తె అననీయ ఆన దిలన్.

3 ఆన్తికయ్, పేతురు జోక, "సయ్తాన్ తుచి పెట్టి సికడ అస్సె, చి దేముడుచి సుద్ది తిలి ఆత్మచి మొక్కె తుయి అబద్దుమ్ జా, జా బుయి వికిలి డబ్బుల్చి ఏక్ వాట తియన కెర, కిచ్చోక సయ్తానుక సూన జా పాపుమ్ కెర్లది?

4 జా బుయి నే వికితె అగ్గె, జా పూర్తి తుచి ఆస్తి జా తిలి. జా వికిలి పడ్డో కి, జా డబ్బుల్క సత్తిమ్ కెరుక పూర్తి తుచి పూచి. తుయి అప్పె ఉచర్ల మోసిమ్ కిచ్చోక? తుయి కెర్లిన్చి అర్దుమ్ పూర్తి ఉచరు. తుయి కెర్లిసి మాన్సుక అబద్దుమ్ సంగిలిసి, గని అన్నె ముక్కిమ్క కిచ్చో పాపుమ్ జలది మెలె, తుయి దస్సి కెర, దేముడుకయ్ అబద్దుమ్ సంగ అస్సిసి" మెన, అననీయక పేతురు తీర్పు సంగిలన్.

5 ఈంజేవ్ కొడో సూన్లి బేగి, అననీయ బుయ్యో సేడ మొర గెలన్. జో తప్పు కెర మొర్లిన్చి రిసా సూన్లన్ ఎత్తిజిన్ బియఁ గెల.

6 తెదొడి ఒత్త తిల ఉబెడల్ బట్ట తెన్ జోచి పీనుమ్ డంక, ఉక్కుల వయన, మెన్నె రోవ గెల.

7 రమారమి తిన్ని గంటల్ గెతికయ్, అననీయచి తేర్ని జేవ్ బారికుల్ తిలిన్తె అయ్లి. మున్సున్క జర్గు జలిసి జా నేనె.

8 జెతికయ్, పేతురు జాక పసుల, జా బుయి వికిలి డబ్బుల్చి రిసా జాక పునిలన్. అననీయ దిలి ఎదిలి డబ్బుల్చి రిసా సంగ, "తెద్దిలికయ్ జా బుయి వికిలదు గె?" మెన పుసితికయ్, జా "తెద్దిలికయ్" మెన సంగిలి.

9 పేతురు జాక, "తుమ్ దొగుతెర కుట్ట కెర అబద్దుమ్ సంగిలిసి, ప్రబుచి అత్మక కొంకడ్లి రితి జతయ్ మెన బిస్సు నాయ్ గె? ఆదె! సూను! తుచో మున్సుద్క రోవిలన అన్నె ఉట్ట జెతికయ్ అవాడ్ జెతయ్. అయ్లె, తుచి

పీనుమ్ ఉక్కుల వయన తుక కి మెన్నె రోవుక గెచ్చుల" మెన సంగిలన్.

10 సంగిల్ బేగి, జా కి జోచి చట్ట సేడ మొర గెలి. ఉబెడల్ గేర్ తెడి జా కెర, జాక, 'జా కి మొర అస్సె' మెన దెక కెర, జాక ఉక్కుల వయన మెన్నె గెచ్చు, మున్సున్చి సొడి జాక రోవిల.

11 జా దీసి జర్గు జలిన్చి రిసా, యేసుక నంపజలనచి సంగుమ్చ ఎత్తిజిని, సూన్ల అన్నె మాన్సుల్ ఎత్తిజిని, దేముడు యేసుచి ఆత్మసెక్తిచి రిసా బియఁ గెల.

12 జేవ్ బారజిన్ జోచ బారికుల్చి అత్తి ప్రబు ఒగ్గర్ ఒగ్గర్ వెల్లెల కమె జర్గు కెరయ్లన్. జేవ్ పొదులె, జేవ్ రోజుక దేముడుచి గుడితె పూర్దుమ్చోచి సాలోమోను నావ్ తిలి పేడె సబ కెరుక అలవాట్ జా తిల.

13 వేర మాన్సుల్ జోవయింతెన్ ఒత్త బెదుక బియఁ గెల, గని ప్రెజల్ ఎత్తిజిన్ జోవయింక ఒగ్గర్ గవురుమ్ దెకిత్ తిల.

14 అగ్గెచి కంట, అన్నె మున్సుబోదల్ ఒగ్గర్జిన్, తేర్బోదల్ ఒగ్గర్జిన్, ఒగ్గర్జిన్ మాన్సుల్ ప్రబుక పూర్తి నంపజా గెల.

15 ప్రెజల్ అన్నె కిచ్చో కెర్ల మెలె, పేతురు జోవయించి వాటు జవున్ అయ్లె, "ఎక్కి జోవయించి నీడ అమ్క సగుమ్జిన్క లయున్, జవున్" మెన, జొర్జొ తిల జోవయించ మాన్సుల్క వయన, మంచల్తె జవున్, అంతుర్నొతె జవున్, వాటులె నిజవ దిల.

16 యెరూసలేమ్ పట్టుమ్చి సుట్టునంతచ గెవ్వెలె తెంతో కి ఒగ్గర్జిన్ జాఁ కెర, జోవయించ జొర్జొ తిల మాన్సుల్క, బూతుమ్ దెర్ల మాన్సుల్క, కడ ఆన్ల, చి జేవ్ ఎత్తిజిన్ కి చెంగిల్ జల.

బారికుల్క దెర జేల్తె గలిలిసి

17 ఎత్తిక వెల్లో పూజరి, మాత్రుమ్, జోవయింతెన్ తిలన ఎత్తిజిని, సద్దుకయ్యులు మెల పండితుల్; యేసుచ బారికుల్చి ఉప్పిరి పూర్తి గోస జా బార్ జా,

18 జోవయింక దెర, మాములుమ్ జేల్తె గలిల.

19 గని, జా రాతి, ప్రబుచో దూత ఎక్కిలో జేల్తెచ కెప్పివో ఉగుడ కెర, బారికుల్క విడ్డల్ కెర బార్ కెర్లన్. చి జోవయింక,

20 "తుమ్ దేముడుచి గుడితె గెచ్చ పెన, నెడిమి టీవోజ, ప్రబుతె దొర్కు జతి పరలోకుమ్తె బెదితి ఆత్మతె జెర్మన్ జా జితి రచ్చనచి రిసాచి సుబుమ్ కబుర్ ప్రెజల్క పూర్తి బోదన కెర" మెన, దేముడుచ దూత ఆడ్ర దా సంగిలన్.

21 దూతచి కొడు సూన కెర, జేవ్ పెందలె ఉజిడి జలి పొది, దేముడుచి గుడితె పెన, బోదన కెరుక దెర్ల. దేముడుచి గుడితె బారికుల్ పెన బోదన కెర్తె తిలి మదెనె, ఎత్తిక వెల్లో పూజరి, జోవయింతెన్ బెదిలన, జోవయింక 'విడ్డల్ జా అస్తి' మెన నేన కెర, 'సబ కెరుమ' మెన ఇస్రాయేలుల సబతె వెసితన ఎత్తిజిన్క బుకారా కెర,

బారికుల్ కడ ఆనతి రిసా, జోవయించ జమాన్లుక జేల్తె తెద్రయ్ల.

22 జేవ్ జేలితె పావెలె, కెప్పివో ఉగిడ్లె, జేవ్ బారికుల్ ఒత్త నాయ్, చి వెల్లెల మాన్సుల్తె అన్నె బుల జా సంగిల.

23 “అమ్ జేల్తె గెలమ్, చి ఒత్త పావెలె, జేల్తెచ కెప్పివో సంజె తెంతో డిట్టుమ్ డంక అస్తి. చి అమ్చ జమాన్లు కెప్పివో సరిగా రకితె తిల, గని అమ్ కెప్పివో ఉగిడ్లె, తెడి కోయి నాయ్” మెన సంగిల.

24 సంగిలె, దేముడుచి గుడిచో ఎజోమానిచి వెల్లెల పూజర్లు నూన, పూర్తి ఆచారిమ్ జా, “ఇన్నెచి అర్దుమ్ కిచ్చో? అప్పె అన్నె కిచ్చో జర్లు జయెదె?” మెన, బమ్మ జల.

25 తెదొడి కో గే జేవ్ వెల్లొ మాన్సుల్తె జా కెర, “తుమ్ జేల్తె గలిలన దేముడుచి గుడితె టీవోజ పైజల్క సికడ్తతి” మెన సంగిల.

26 సంగితికయ్, దేముడుచి గుడిచ జమాన్లుచ ఎజోమాని, జోవయించ జమాన్లు తెన్ గెచ్చు, బారికుల్క దేముడుచి గుడి తెంతో బార్ కెర్ల. గని జోవయింక కిచ్చో దెబ్బల్ పెట్టి నాయ్, అల్లర్ కెరుక మెన చడిత్ కి నాయ్. కిచ్చొక మెలె, ‘జోవయింక అల్లర్ కెర్లె పైజల్ అమ్క పత్రల్ గల మార గెలుల’ మెన బియఁ గెల.

27 జలె, బారికుల్క దేముడుచి గుడి తెంతో బార్ కెర, జోవయించి సబ కెర్తి గేర్తె కడన, సబ కెర్తనచి మొక్కె టీవో కెలచి ఎత్తిక వెల్లొ పూజరి జేవ్క పరిచ్చ కెర్లె.

28 “ఈంజ జోచి నావ్ తెన్ తుమ్ పైజల్క సికడుక జయె నాయ్, మెన తుమ్క ఆడ్ర దిలమ్, గని ఒండి ఈంజ యెరూసలేమ్తెచ మాన్సుల్ ఎత్తిజిన్క తుమ్ సికడ అస్సున్. అన్నె, అమ్క, ‘తుమి జోవయింక మార్లదు’ మెన, జో మాన్సుచి రిసా అమ్కయ్ నింద కెర, అమ్కయి జా పాపుమ్ వయడుక ఉచర్తను” మెన బారికుల్క తీర్పు సంగిల.

29 పేతురు, బారికుల్ ఎత్తిచి రిసా కిచ్చో జబాబ్ దిలన్ మెలె, ఆమ్ కచి కోడు ముక్కిమ్క నూన కెరుక మెలె, మాన్సుచి కోడు నాయ్, గని దేముడుచి కోడు.

30 తుమ్ యేసుక సిలువతె టీవడ మార్లదు, గని అమ్చ పూర్గుల్చో దేముడు ప్రబు జోక అన్నె జియడ్లె.

31 “జలె, యేసుక అన్నె జియడ, అమ్చో దేముడు కిచ్చో కెర్లె మెలె, జోక జోచి ఉజెతో పక్క వెనడ, ఇస్రాయేలుల్ మెల యూదుల్క, ‘జేవ్ కెర్లె పాపల్క పెట్టి దుకుమ్ జా ముల జోక నంపజా, జోవయించి పాపుమ్ వుచి జవున్’ మెన, యేసుక, రచ్చించువ కెర్లెసా, ఏలుప కెర్లు మెన, జోక గవురుమ్ కెర అస్సె.

32 ఈంజ ఎత్తిచి రిసా ఆమ్ సాచుల్ జా అస్సుమ్. జోచి కోడు రితి కెర్లెనక దేముడు దిలి జోచి సుద్ది తిలి ఆత్మ కి సాచి జతయ్.”, మెన పేతురు సంగిలన్.

33 జేవ్ వెల్లెల మాన్సుల్ నూన ఒగ్గర్ కోపుమ్ జా, జేవ్ బారికుల్క మారుక కోర్ప జల.

గమలీయేల్ సంగిలి కొడె

34 గమలీయేల్ మెలో పరిసయ్యుడు ఎక్కిలో ఒత్త జేవ్ వెల్లెల మాన్సుల్తె తిలొ. జో మోసె తెన్ దేముడు దిలి ఆగ్గుల్ సికడ్లెసా జయెదె. జోక ఎత్తిజిని, ‘చెంగిల్ మాన్సు’ మెన గవురుమ్ కెరుల. జో మాన్సు టీవ, దేముడుచి గుడిచ జమాన్లుక, ‘ఈంజేవ్ మాన్సుల్క గడియ బార్ కెర తా’ మెన ఆడ్ర దిలన్.

35 బారికుల్క బార్ కెరవ, బెర తిల వెల్లెల మాన్సుల్క గమలీయేల్ ఇసి మెన సంగిలన్: “అమ్చ ఇస్రాయేలులుచ ఓ తుమ్ వెల్లెల మాన్సుల్, జేవ్ మాన్సుల్క తుమ్ కిచ్చో కెరుక ఉచర్లె గే, జాగర్ల తా.

36 జా సుట్టు జర్లు జలిన్చి రిసా ఏద కెర. జేవ్ పొదులె దూదా మెలో ఎక్కిలో ‘ఆవ్ వెల్లొ’ మెన సొంత గవురుమ్ సంగుక బుల్లె తిలొ, చి రమారమి చెత్తర్ పుంజోజిన్ మాన్సుల్ జోవయింతెన్ బెదిల. గని మాన్సు జోక మార్తికయ్, జోచ సిస్సుల్ చెదుర్ప జల, చి జా ఎత్తి ఆరి పాడె జా గెలి.

37 జాచి పడ్డె, పైజల్ లెక్క కెర్లె తిల పొదులె, గలిలయ ప్రాంతుమ్చో యూదా మెలో ఎక్కిలో కి వెల్లొ మెనన, సగుమ్జిన్క సికడ సిస్సుల్ కెరల్లె. గని జో కి మొర గెలో, చి జోచ సిస్సుల్ కి చెదుర్ప జా గెల.

38 “జాకయ్, తుమ్ అప్పె దెర్ల మాన్సుల్చ రిసా ఆవ్ కిచ్చో మెంతసి మెలె, ఈంజేవ్ మాన్సుల్క ముల. తుక్లె తా. కిచ్చొక మెలె, ఈంజేవ్ కెర్లిసి, మాన్సుల్ ఉచర్లిసి రిత జలె, జాచి ఇస్టుమ్క పాడె జయెదె, చి ఆమ్ పిట్టవుక మెన కిచ్చో కెరుక నాయ్.

39 గని ఏక్ వేల ఈంజేవ్ కెర్లిసి, దేముడు తియార్లిసి జలె, తుమ్ కెద్ది సిచ్చ కెర్లె కి, పిట్టవుక నెతుర్పు. జాగర్ల తా. ఈంజేవ్ కెర్లిసి దేముడు తియార్లిసి జలె, తుమ్ అల్లర్ కెర్లె, జో దేముడుక విరోదుమ్ సుదల్ కి జస్సె” మెన, జాగర్ల సంగిలన్.

సిస్సుల్ విడ్డల్ జలిసి

40 జో గమలీయేల్ దస్సి సంగితికయ్, వెల్లెల మాన్సుల్ నూన్ల, చి బారికుల్క అన్నె బుకారా కెర, కొర్లల్ తెన్ పెట, “తుమ్ యేసుచి నావ్ తెన్ కక్క కిచ్చో సికడుక జయె నాయ్” మెన ఆడ్ర దా, విడ్డల్ కెర్లె.

41 బారికుల్, జలె, కిచ్చో బుద్ది తెన్ జా సబ కెర్లిన్ తెంతో బార్ జల మెలె, ‘యేసుప్రబుచి నావ్క గవురుమ్ కెర్లి రిసా జోచి గవురుమ్ దెకయ్లి రిసా, అమ్ నిస్కారుమ్ జంక జలెకి, జొయ్యి అమ్క నిసాన విలువ రితి దెక అస్సె మెన అమ్క పూర్తి సర్ల’ మెన, సర్ల సేంతుమ్ తెన్ తిల.

42 అన్నె, దేముడుచి గుడితె కి, గెరి కి, యేసుక, 'జొయ్యి దొర్కు జలో క్రీస్తు రచ్చించుప కెర్తొసా' మెన, ప్రెజల్ క రోజుక సికడుక ములితి నాయ్.

6

నిసాన్ల సత్తుజిన్ సత్తిమ్ తిల మాన్సుల్

1 జా పొదులె, ఒగ్గర్ జిన్ మాన్సుల్ యేసుక నంపజా, జోచ సిస్సుల్ జా గెతె తిల. జోవయింతె తిల బీద సుదల్ ఎత్తిజిన్ క అన్నిమ్, కిచ్చొ కిచ్చొ తోడు దెంక ఇస్టుమ్ జలెకి, ఎతివాట్ జిన్ జా తిల, చి దొర్కు జలిసి ఎత్తిజిన్ క వంటుక నెతిర్ల, చి "ఎబ్రీ బాన లట్టబై రండెల్ మాన్సుల్ క సరిపుచుప జతిసి దెతతి గని అమ్చక నాయ్" మెన, గ్రీకు బాన లట్టబ్బన గోన కెర్ల.

2 జాకయ్, తెదొడి జేవ్ బారజిన్ యేసుచ బారికుల్ కిచ్చొ కెర్ల మెలె, యేసుక నిదానుమ్ నంపజలన ఎత్తిజిన్ క బుకారా కెర, "అము కెర్లొడి తెదొడి బీద సుదల్ క అన్నిమ్ వంటితె తంక జలె, *ప్రబుచి సుబుమ్ కబుర్ బోదన కెర్లిసి పిట్ట గెచ్చెదె. పిట్టె చెంగిల్ నాయ్.

3 జాక కిచ్చొ కెరుక మెలె, 'బీద సుదల్ క దెకుత్' మెన, తుమ్చి తెంతో సత్తుజిన్ క నిసాన, కీన మాన్సుల్ జేవ్ సత్తుజిన్ తంక మెలె, 'సరిగా మాన్సుల్ జేవ్' మెన, ఎత్తిజిన్ క జాన్లన జా తంక, చి ప్రబుచి ఆత్మ జోవయించి పెట్టి జేవ్చి కామ్ పూర్తి కెర్లి బుద్ది తిలన జేవ్ తంక; బుద్ది సుదల్ జేవ్ తంక. దస్సు మాన్సుల్ క తుమ్ నిసాన, చి జా సేవచి రిసా అమ్ జోవయింక అదికారుమ్ దెమ్దె.

4 "అమ్, కిచ్చొ కెరుక అస్సి మెలె, అము ప్రార్దన కెర్తె తంక, ప్రబుచి సుబుమ్ కబుర్ బోదన కెర్తె తంక" మెన బారజిన్ సంగితికయ్,

5 మొత్తుమ్ నంపజల మాన్సుల్ జా కోడుక సర్ల జల, చి బీద సుదల్ క దెకుక మెన కక్క నిసాన్ల మెలె, సైపను మెలొ ఎక్కిలొక; జో బలె నముకుమ్చొ, జోచి పెట్టి దేముడుచి సుద్ది తిలి ఆత్మ పూర్తి కామ్ కెర్లి బుద్ది జోక తయెదె. అన్నె దస మాన్సుల్ తె కక్క నిసాన్ల మెలె, పిలిప్, ప్రొకొరుక, నీకానోరుక, తీమోసుక, పర్మెనాస్క, నీకానొరు, జలె, జెర్మన్ క యూదుడు నెంజె, గని దేముడుక నంపజా, యూదుల్చి అలవాట్ తె బెద మార్పుప కెరన తిలొ. జో దూరి తిలి అంతియొకయ పట్టుమ్చొ మాన్సు.

6 ప్రెజల్ జేవ్ సత్తుజిన్ క నిసాన బారికుల్ తె కడ ఆన్తికయ్, జేవ్ ప్రార్దన కెర జోవయించ బోడివొ చడ అదికారుమ్ దిల.

సైపనుక విరోదుమ్ సుదల్ గోన కెర్లిసి

7 జేవ్ పొదులె, ఒగ్గర్ ఒగ్గర్ జిన్ మాన్సుల్ దేముడు దిలి యేసుచి రిసాచి సుబుమ్ కబుర్ సూన నంపజల. జా యెరూసలేమ్ పట్టుమ్ తె ప్రెజల్ ఒగ్గర్ జిన్ నంపజల, చి దేముడుచ పూజర్లు కి ఒగ్గర్ జిన్ నంపజా నిదానుమ్ జల.

8 పడ్డొ సైపను, ప్రబుచి ఆత్మ జోచి పెట్టి తిలి ఒగ్గర్ ప్రేమ సెక్తిచి రిసా, ప్రెజల్ తిలిన్ తె యేసుచి అదికారుమ్ దెకయ్ తి గుర్తుచ ఒగ్గర్ ఒగ్గర్ వెల్లొ కమె కెర్లన్.

9 గని యూదుల్ తెచ సగుమ్ జిన్ 'విడ్డల్ జలన' మెన నావ్ తియ్లి గుంపుచ జవుల. జోవయింక సొంత సబగేర్ తయెదె. జేవ్, పడ్డొ లిబియ దేసిమ్చి కురెనియు పట్టుమ్చ, ఐగుప్తు దేసిమ్చి అలెక్సంద్రియ పట్టుమ్చ, కిలికియ ప్రదేసిమ్చ, ఆసియా ప్రదేసిమ్చ తెన్, కోపుమ్ జా, "తుచి బోదన తప్పుచి కిచ్చొగె" మెన, సైపనుక ఆరి నింద కెర్ల.

10 గని ప్రబుచి ఆత్మ సైపనుచి పెట్టి సికడ్డికయ్, జో బోదన కెర్లిన్ తె బుద్ది గ్యానుమ్ ఒగ్గరి. చి జేవ్ కోపుమ్ జలన జినుక నెత్త లాజ్ జల.

11 జాకయ్ జేవ్ జోవయించి లాజ్చి రిసాచి గోసక గుట్టు తెన్ కిచ్చొ కెర్ల మెలె, వేర మాన్సుల్ క తోడు దెరన, " 'మోసె పూర్లుమ్చొచి అత్తి దేముడు దిలి ఆగ్గుల్చి రిసా, చి దేముడుచి రిసా ప్రెజల్ క కిచ్చొ కిచ్చొ సికడ, ఈంజొ సైపను మోసెక, దేముడుక, దూసుప కెర అస్సి. ఆమ్ సొంత సూన్లమ్' మెన తుమ్ సంగ" మెన జేవ్ తోడు దెరన్ల మాన్సుల్ క అబద్దుమ్ సాచి సికడ్ల.

12 జేవ్ కోపుమ్చ మాన్సుల్ దస్సి ప్రెజల్ క, వెల్లెల మాన్సుల్ క, మోసె తెన్ దేముడు దిలి ఆగ్గుల్ సికడ్డొసా సికడ్డన, సికడ్డికయ్, జేవ్ సైపను తె జా కెర, జోక దెర, సబ వెసితన తె కడ ఆన,

13 అబద్దుమ్ సాచి సంగితనక టీచొ కెల. "ఈంజొ మాన్సు కెర్లొడె తెదొడి ఈంజ దేముడుచి గుడిచి రిసా, మోసె పూర్లుమ్చొ రెగిడ్డి ఆగ్గుల్చి రిసా, అబద్దుమ్ సికడ్డె తత్తయ్.

14 ఈంజొ సంగిలిన్ కిచ్చొ ఆవ్ సూన అస్సుమ్ మెలె, 'సజరేతు గవ్విచొ యేసు, ఈంజ దేముడుచి గుడిక పాడ్ కెర, మోసెచి అత్తి దిల అమ్చ అలవాట్లు మార్పుప కెరు' మెన ఈంజొ సంగితె తత్తయ్" మెన జేవ్ మాన్సుల్ అబద్దుమ్ సాచి సంగిల.

15 గని ఒత్త సబతె వెసిలన ఎత్తిజిన్ సైపనుక చెంగిల్ దెకిలె, జోచి మొకొమ్ కిసి జా అస్సి మెలె, పరలోకుమ్చొ దూతచి మొకొమ్చి రితి డీసిలి.

7

సైపను సంగిలి బోదన

* **6:2 6:2** నెంజెలె 'ఎత్తి అదికారుమ్ తిలొ దేముడు దిలి సుబుమ్ కబుర్'. 'సుబుమ్ కబుర్' మెలె, ఎత్తి అదికారుమ్ తిలొ దేముడు దొర్కు కెర్లి రచ్చనచి కోడు. జో పాపల్ చెమించుప కెర్లిన్చి రిసాచి కబుర్. యేసు దొర్కు జలో రచ్చించుప కెర్తొసా జలిన్చి కబుర్. జో అర్పితుమ్ జా పాపల్ గెచ్చయ్లి రిసా మాన్సుల్ పరలోకుమ్చి రాజిమె తె బెదితి అవ్కాసుమ్ దొర్కు జలిన్చి కబుర్.

1 తెదొడి, “జేవ్ సంగిలి సాచి సత్తిమ్ గె?” మెన ఎత్కిక వెల్లో పూజరి సైపనుక పుసిలన్.

2 సైపను కిచ్చొ జబాబ్ దిలన్ మెలె, “ఓ బావుడ్లు, ఓ వెల్లెల మాన్సుల్, అంచి సాచి తుమ్ సూన. పూర్ణమ్, అమ్చొ అబ్రాహామ్ పూర్ణమ్చొ హారానుతె నే ఉట్ట గెతె అగ్గె, జో మెసాఫొతమియతె జితె తిలి పొది, గవురుమ్ తిలొ అమ్చొ దేముడు జోక డీన కెర,

3 ‘తుయి ఈంజ తుచి దేసిమ్ ముల, తుమ్చ సొంత మాన్సుల్క ముల, వేర దేసిమి ఉట్ట గో. *జా దేసిమి పాచితె ఎదక వాటు దెకయ్తె తయిందె’ మెన సంగితికయ్,

4 అమ్చొ అబ్రాహామ్ మెసాఫొతమియ తిలి జా కల్లియుచి దేసిమ్ ముల దా ఉట్ట గెచ్చు, హారాను దేసిమి గెచ్చు జితె తిలొ. జో అబ్రాహామ్చొ అబ్బొసి మొర గెతికయ్, దేముడు జోక ఒత్త తెంతొ తెద్రయ్తికయ్, తూమ్ అప్పె జితి దేసిమి ఉట్ట అయ్లొ.†

5 గని జో ఇన్నె జితె తిలి పొది, ఏక్ అడుగుచి ఎదిలి టాన్క సొంత మెనంతి రితి, జోక ప్రబు సెలవ్ దెయె నాయ్. గని, అబ్రాహామ్క ‡సంతానుమ్ తెదొడి నెంజిలె కి, దేముడు జోక, పడ్డొక ఈంజ దేసిమ్చి బుయి తుచి సొంత ఆస్తి తుకయ్ దా గెలిందె. తుకయ్, చి తుచి పెట్టి జెర్మితసక; తుచి సెకుమ్చక; కెయ్చ తెయ్చ తతి రితి దా గెలిందె మెన జో ప్రబు సంగిలన్.

6 “దేముడు జోవయింక అన్నె కిచ్చొ సంగిలన్ మెలె, తుమ్చి సెకుమ్తె పడ్డొక జెర్మితస ఏక్ కాలుమ్క, చెత్తర్ పుంజొ వెర్సులు వేరె దేసిమి సైమ తెన్ జితె తవుల, ఒత్త గొతిమాన్సుల్ జా జివుల.

7 గని జా కాలుమ్క జేవ్క ఏలుప కెర్తి దేసిమ్చక ఆవ్ సిచ్చు కెరిందె. చి సిచ్చు కెర్తె, తుమ్చి సెకుమ్చక ఒత్త తెంతొ విడ్డల్ జా, బార్ జా ఇత్తల్ ఉట్ట జా, జియ అంక బక్తి కెర్తె తవుల మెన ప్రబు వరుమ్ దా,§

8 అబ్రాహామ్చి సెకుమ్చ మున్సుబోదల్ ఎత్కిజిన్ జో దేముడుచ మాన్సుల్ జతి గుర్తుచి సున్మతి కెరనుక మెన అన్నెక్ *ప్రమానుమ్ దిలొ.† జాకయ్, అబ్రాహామ్ ఇస్సాకు జెర్మ అట్టు పొదుల్క జా గుర్తు కెర్తి సున్మతి కెర దిలొ. పడ్డొ ఇస్సాకు యాకోబుక ‡పాయిలన్, చి యాకోబు కీపుత్తర్పుల్క పాయిలన్. జేవ్ బారజిన్ జలె, అమ్చి సెకుమ్క తొలితొచ వెల్లెల మాన్సుల్ జల.

సైపను సంగిలి యోసేపుచి కత

9 “జలె, జేవ్ బారజిన్తె దెస్సుజిన్ అన్నసీంసి యోసేపు మెలొ జోవయించొ బావొన్క గోస జా, జా వాట్ అయ్లచి

ఐగుప్తు దేసిమ్చొ మాన్సు ఎక్కిలొతె *విక గెల. గని దేముడు జోక తోడు తా,

10 జో సేడ్ల సైమల్ ఎత్కి తెంతొ రచ్చించుప కెర్లన్. చి ఐగుప్తు దేసిమ్చొ పరో రానొ, యోసేపుక దెక, చెంగిలొ మాన్సు, బుద్ది తిలొసా ఈంజొ” మెన, జోక మెన్సిలన్, చి జోచి గెర్తె ఎత్కిచి ఉప్పిరి, ఒండి రాజిమ్చి ఉప్పిరి కి, ‘ఏలుప కెర్సు’ మెన జోక వెల్లో కెర్లొ. ఒత్త రానొక పిట్టవ యోసేపుక కో వెల్లో జతి నాయ్.

11 “జలె, †యోసేపు ఒత్త ఏలుప కెర్తె తతికయ్, ఒండి ఐగుప్తు దేసిమి, జోచ అన్నసీంసి తిలి కనాను దేసిమి కి కరు అయ్లి. చి ఎత్కిజిన్ గొప్పు సైమల్ జల, చి అమ్చ మాన్సుల్క కతిసి కేన్ కి దొర్కు జయె నాయ్.

12 గని, ‘ఒత్త ఐగుప్తు దేసిమి దాన్ తియ అస్తి’ మెన అమ్చొ యాకోబు పూర్ణమ్చొ సూన తా, దాన్ గెన్న ఆన్తు మెన, పుత్తర్లు జల అమ్చ మాన్సుల్క ఒత్త తెద్రయ్లన్.

13 దొయ్యెరి తెద్రయ్తికయ్, ఆవ్ తుమ్చొ బావొది మెన యోసేపు జోవయింక సంగిలన్. చి జా దీసి తెంతొ యోసేపుచి కుటుంబుమ్చ మాన్సుల్ రానొ జలొ పరో రానొ తెన్ అలవాట్ జల,

14 చి అబ్బొసి జలొ యాకోబుక, జోచి కుటుంబుమ్చ ఎత్కిక, గెర్చ ఎత్కిక, ‘ఇత్తల్ జా కతు. జితు!’ మెన, యోసేపు సంగ తెద్రయ్లన్. యాకోబుచి కుటుంబుమ్చ, గెర్చ, కెత్తిజిన్ జవుల మెలె, డబ్బయ్ పాచ్జిన్.

15 జలె, ‡యాకోబు జోచ మాన్సుల్ ఎత్కిజిన్ తెన్ ఐగుప్తు దేసిమి ఉట్ట గెల. యాకోబు ఒత్త జియ, ఒత్త మొర్లన్. జోచ పుత్తర్లు కి ఒత్త జియ మొర్ల, చి

16 జోవయింతె కో మొర్లె, కనాను దేసిమ్చి ‘సెకెము’ మెలి జేవ్ అగ్గె జితె తిలి బయిలు దేసిమ్తె పీనుమ్ వయన, రోవిల. కేన్ మెస్సె రోవిల మెలె, జా సుట్టు వెండి కాసుల్క ‘హమారు’ మెలొ ఒత్తచొ మాన్సుతె అబ్రాహామ్ మెస్సున్ గెన తిలొ. జయ్యి మెస్సె రోవిల.

మోసేచి మత్తెలి సైపను సంగిలిసి

17 “జలె, జేవ్ ఐగుప్తు దేసిమి బస జా రమారమి చెత్తర్ పుంజొ వెర్సుల్ జలి పొది, ‘ఐగుప్తుతెకీ జేవ్ నే ఉట్ట గెతె అగ్గె అబ్రాహామ్క సంగ తిలి దేసిమి అన్నె ఉట్ట గెతి సమయుమ్ జా అస్సె’ మెన దేముడు దెకిలన్. జా సమయుమ్ జా అయ్లి పొది, అమ్చి సెకుమ్చ జేవ్ బారజిన్ పుత్తర్పుల్చ మాన్సుల్ కెత్తిజిన్ జా తిల మెలె, ఒగ్గరజిన్ జా జెర్మ అస్తి.

* 7:37:3 ఆదికాండుమ్ 11:31, 12:1-3. † 7:47:4 ఆదికాండుమ్ 12:4-8. ‡ 7:57:5 ఆదికాండుమ్ 15:5, 7, 18, 17:8, 16-19. § 7:77:7 ఆదికాండుమ్ 15:13-14. * 7:87:8 ఆడ్ర † 7:87:8 ఆదికాండుమ్ 17:10-14. ‡ 7:87:8 ఆదికాండుమ్ 25:26. § 7:87:8 ఆదికాండుమ్ 35:22-26. * 7:97:9 ఆదికాండుమ్ 37 అద్యయుమ్. † 7:117:11 ఆదికాండుమ్ 41-50 అద్యయల్. ‡ 7:157:15 ఆదికాండుమ్ 46 అద్యయుమ్. § 7:177:17 17చి ఉప్పిర్చి తత్తి టాన్: నిర్గమకాండుమ్, లేవీయకాండుమ్ సంక్యాకాండుము, ద్విత్వియోపదేశ కాండుము (నిర్గ 1).

18 జేవ్ దన్ని ఒగ్గర్ ఒగ్గర్జిన్ జా గెతికయ్, అగ్గెచ పరో మెల రానల్ మొర్తికయ్, నొవొ పరో ఏలుప కెర్తయ్. జో యోసేపుక నేన్లొసా, జోచ మాన్సుల్క విరోదుమ్ జలోసా.

19 జో అమ్చ పూర్తుల్క మోసేమ్ కెర్తన్. కిసి మెలె, 'జేవ్ జిలె ఒగ్గర్జిన్ జా అమ్క జీనుల' మెన, ఎత్తిక మారుక మెన, జోవయించ నొవర్ జెర్మిల బోదల్క 'దెర్ను సేడ్తు' మెన, అబ్బుదింసిచి అత్తి పరో సైమ కెర దిలన్.

20 "జేవ్ పొదులె *మోసే జెర్మిలన్. దేముడు జోక ఒగ్గర్ ప్రేమ దెకిలన్, చి తిన్ని జొన్నొ ఎద జోవయించ అబ్బుదింసి కిసి గే గెరి లుంకడ పోసిల.

21 గని పడ్డొ, జోక అన్నె లుంకడుక నెత్త కెర, అబ్బుదింసి బార్ కెర్తికయ్, పరోచి దువిసి జోక ఉక్కుల గెరి నా, 'సొంత పూత్తు' మెలి రితి దెక, జోక పోసిలి.

22 జా పోస, ఐగుప్తు దేసిమ్చ గ్యానుమ్ ఎత్తి పండితుల్చి అత్తి సికడ్డి, చి వడ్డిలె, జో ఒగ్గర్ తెలివి తెన్ లట్టబెదె, కేన్ కామ్ కెర్లె కి, తెలివి నిదానుమ్ కెరెదె.

†మోసే తప్పు కెర బయిలు దేసిమి ఉట్ట నిగిలిసి

23 "జలె, మోసేక దొన్ని విసా వెర్పుల్ జలి పొది, 'అంచ బావుడ్లు జల అమ్చ ఇస్రాయేలుల్తె గెచ్చ దెకిన్దె' మెన ఉచర్లన్.

24 జో గెలన్, అన్నె, జోవయింతె ఎక్కిలోక ఐగుప్తు దేసిమ్చొ ఎక్కిలో పెట్టిసి దెకిలన్. దెక, జో దెబ్బల్ కయ్లోసాక తోడు గెచ్చ, దెబ్బల్ పెట్టొసాక పెట మార్లన్.

25 దన్ని కెర కిచ్చొ ఉచర్లొ మెలె, అంక లోకుమ్ కెర్లొ అమ్చొ దేముడు జోచి అత్తి అమ్క రచ్చించువ కెరెదె" మెన అమ్చ ఇస్రాయేలులు అర్దుమ్ కెరనుల, మెన ఉచర్లొ, గని దన్ని ఉచర్లి నాయ్.

26 అన్నెక్ దీసి, మోసే జా వాటు అయ్లె, ఇస్రాయేలులు దొగుల పెట్టపుట్టి జా అస్తి మెన దెక కెర, "సీంతుమ్ కెరయిందె" మెన ఉచర పాసి జా, కిచ్చొ మెలొ మెలె, "బావుడ్లు, తుమ్ ఎక్కి సెకుమ్చ మాన్సుల్, తుమ్ కిచ్చొక ఎక్కిలో తెన్ ఎక్కిలో జట్టి జా అన్నున్?" మెన పుసిలన్.

27 పుసితికయ్, తప్పు కెర్లొసా మోసేక సొడి పెలవ దా కిచ్చొ మెలన్ మెలె, తుయి కొన్నొ? అమ్చి ఉప్పిరి తుక అదికారుమ్ నాయ్, అమ్క తీర్పు కెరుక తుక సెక్తి నాయ్.

28 కాలి జో ఐగుప్తుచొ మాన్సుక తుయి పెట మార్ల దెబ్బల్ అంకయ్ ఆజి పెట్టె గె? మెన గగ్గొల్ జలొ.

29 దన్ని సంగితికయ్, 'అంక మారుల' మెన, జా ఐగుప్తు దేసిమి తంక బియె కెర, మోసే ఉట్ట నిగ, దూరి తిలి

బయిలు తిలి మిద్యాను మెలి దేసిమి ఉట్ట గెచ్చ, ఒత్త జితె తిలన్. ఒత్త తా, పెండ్లి జా దొగుల పుత్తర్పుల్క పాయిలన్.

‡దేముడు మోసేక డీసిలిసి

30 "అన్నెక్ దొన్ని విసా వెర్పుల్ గెతికయ్, ఏక్ దీసి, మోసే జా బయిలు టాన్చి సీనాయి డొగ్గె తతికయ్, ఒత్త మాములుమ్ కంటొ రూకు అన్నె, రుక్కి ఆగి లగుక దెర్లి. ఆగి లగితొ జా రూకు తెడి, దేముడుచ దూత రితొ జా మోసేక డీసిలన్.

31 మోసే దెక, ఆచారిమ్ జలొ. సరిగా దెకుక మెన ఇదిల్ పాసి గెచ్చుక దెర్లె, కిచ్చొ నూన్లొ మెలె,

32 'ఆవ్ తుచ పూర్తుల్చొ దేముడు. ఆవ్, అబ్రాహామ్చి, ఇస్సాకుచి, వడ్డొ యాకోబుచి, దేముడు.' మెన సంగ, దేముడుచి అవాడె అయ్లి. దన్ని జతికయ్, మోసే బియె, అద్దుర్ జా, దెకుక దయిరిమ్ జలొ నాయ్.

33 తెదొడి, ప్రబు జోక, 'తుచ జోడ్లు కడను. తుయి టీవొ జలి టాన్ ఒగ్గర్ సుద్ది అన్నె.

34 జేవ్ ఐగుప్తు దేసిమ్చ అంచ ప్రెజల్క కెర్లె అల్లర్ సైమల్ ఆవ్ దెక అన్నె. జేవ్ ఏడ్డిసి నూన అన్నె, చి జోవయింక విడ్డల్ కెర బార్ కెరయిందె మెన, ఆవ్ ఉత్త జా అన్నె. అప్పె, జే! జా కామ్చి రిసా ఐగుప్తు దేసిమి తుక అన్నె తెద్రయిందె.' మెన ప్రబు జలొ దేముడు మోసేక సంగిలన్.

35 "జో కిమోసేక జోవయించ మాన్సుల్, 'అమ్చి ఉప్పిరి తుక అదికారుమ్ నాయ్. అమ్క తీర్పు కెరుక తుక సెక్తి నాయ్' మెన అగ్గె సంగ తిల, గెద. గని జోవయింక ఏలుప కెరుక కి, జోవయింక విడ్డల్ కెర బార్ కెరుక కి మెన, రూక్తె డీసిలో దూత పోలిక జలొసాచి అత్తి దేముడు జోకయి ఆద్ర దా తెద్రయ్లో.

36 ప్రబుచి అదికారుమ్ తెడి జోవయింక విడ్డల్ కెర, బార్ కెర, వాట్ దెకయ్తె తిలి పొది, ప్రబుచి సెక్తి తెన్ ప్రబు సంగిల కిచ్చొ కిచ్చొ వెల్లొ కమె మోసే కెర్లన్. ఐగుప్తు దేసిమ్క నే ముల్లె అగ్గె కి, వడ్డొ 'ఎరన్' నముద్దుమ్తె, వడ్డొ జేవ్ ప్రెజల్ ఎత్తిజిన్ తెన్ జేవ్ దొన్ని విసా వెర్పుల్ జా బయిలు దేసిమి బుల్లె తిలి పొది కి.

37 "జలె, దేముడు అంకయ్ కిసి తెద్రయ్లన్ గే, జోచ కబుర్లు నూనయ్తి రిసా, జోచి కామ్ జర్లు కెర్లి రిసా, తుమ్చ ఇస్రాయేలుల్తెచొ అన్నెక్లొక పడ్డొక తెద్రవ టీవొ కెరెదె" మెన అమ్చ పూర్తుల్క సంగ తిలొసా జో మోసేయి.

38 అమ్చ పూర్తుల్ జల ప్రెజల్ ఎత్తి జట్టు తెన్ జా బయిలు దేసిమి బుల్లె తిలి పొది, దేముడుచొ దూత *సీనాయి డొగ్గె అన్నె డీస, మోసే తెన్ లట్టబ్లన్. చి దూతక చి అమ్చ పూర్తుల్క జో మోసే మదెనె జా, అమ్క దెంక

* 7:20 7:20 నిర్గమకాండుమ్ 2:1-10. † 7:22 7:23 23చి ఉప్పిరిచి తత్తి టాన్: నిర్గమకాండుమ్ 2:11-22. ‡ 7:29 7:30 30చి ఉప్పిరిచి తత్తి టాన్: నిర్గమకాండుమ్ 2:23, 3 అద్యయమ్ ఎద. § 7:35 7:35 నిర్గమకాండుమ్ 5-14 అద్యయల్. * 7:38 7:38 నిర్గమకాండుమ్ 19, 20 అద్యయల్, 24:12, 31:18.

మెన దేముడు సొంత రెగిడ్ల ఆగ్నల్, జీవ్ దెత ఆగ్నల్, జోతె నజన్లన్.

39 “గని అమ్చ పూర్ణమచ, జో సంగిలి కోడు సూనుక నెన కెర, జోక దూరి కెర్లి రితి జా, జేవ్ ముల దిలి †ఐగుప్తు దేసిమి తిలిన్క అన్నె కోర్ప జల,

40 అన్నె, మోసే డొగై తెంతో నే ఉత్త జెతె అగై, అహారోను మెలో మోసేచో అన్నొన్తె గెచ్చ కెర, అమ్క దేముడ్లు జా అమ్చి పురైతో గెచ్చ అమ్క వాటు దెకయ్తి రిసా, అమ్క బొమ్మల్ తెయార్ కెరు. అమ్క ఐగుప్తు తెంతో కడ ఆన్లొ జో మోసే కేనె ఉట్ట గెచ్చ అస్సె గే, ఆమ్ నేనుమ్ మెన ప్రైజల్ సంగిల.

41 జేవ్ పొదులె కిచ్చొ కెర్ల మెలె, వస్సా పిల్లచి రితిచి బొమ్మ ఏక తెయార్ కెర, జా బొమ్మక జొకర బలి దిల, చి జేవ్ కెర్లినచి రిసా సర్ల కెరన్ల.

42 జాచి రిసా, జేవ్ పొద్దుక, జోనుక, సుక్కల్క జొకర్లి ఇస్టుమ్ తిలె, దస్సచక జొకర్లు! మెన దేముడు జోవయింక ముల, సిచ్చ దిలన్. దస్సి జలిన్చి రిసా, జోవయింక కబుర్లు రెగిడ్లి దేముడుచి కొడొతె రెగ్లవ అస్సె.

ఓ ఇస్రాయేలుచి సెకుమ్చ, తుమ్ బయిలు దేసిమి బుల్లె తిలి పొది, అంకయి గొరైల్ గల్ల కండ బలి దెత తిలర్లు గె?

43 నాయ్. ‘దేముడ్లు’ మెన వేరచక జొకరుక కోర్ప జా, ‘మొల్లొక’ దేముడు మెన, గుడి బంద జొకర్లదు. సుక్కొ గుర్తు తిలో రొంపాయను మెలోసొక దేముడు మెన జొకర్లదు. దస్సచచ బొమ్మల్ కెర జొకర్లదు. తుమ్ దస్సి కెర్లి రిసా, బబులోను దేసిమి ఒత్తల్తో తుమ్ సర్ల నెంతె తతి రితి, తుమ్క ఒత్తచ మాన్సుల్ ఏలుప కెర్లు మెన, జేవ్ కడ నెత్తు, మెన సిచ్చ దెయిందె” మెన దేముడు రెగ్ల సిచ్చ దిలన్.

44 “జలె, జా బయిలు దేసిమి అమ్చ పూర్ణమచ బుల్లె తిలి పొది ఇదిలిసి దేముడుచి గుడి తిలి రితి, టంబుగుడ్లక తెయార్ కెర్లి దేముడుచి ‡గుడి ముక్కిమ్క జోవయింతెన్ తిలి. ఇసి తెయార్ కెర” మెన దేముడు మోసేక కిచ్చొ సంగిలన్ గే, జో సంగిలి పొలిక, జో సంగిల సామన్లుక తెయార్ కెర్ల.

45 ఒత్త తెంతో, మోసే కీమొర యెహోసువ మెలోసా వెల్లొ జలి పొది, అమ్చ పూర్ణమచ బయిలు దేసిమ్క జిన ఈంజ దేసిమి ఉట్ట అయ్ల. *దేముడు తోడు తతికయ్, ఒత్త జితె తిల వేర వేర సెకుమ్లుచ మాన్సుల్క అమ్చ పూర్ణమచ యుద్దుమ్ కెర ఉదడ గెల. తెదొడి కి, అమ్చ పూర్ణమచ జా

గుడి వయ ఆన్ల. †ఒత్త తెంతో, అమ్చో పూర్ణమచో దావీదు రానొ తిలి ఎదక కి జయ్యి గుడితె దేముడుక బక్తి కెర్లె తిల.

46 జో దావీదుక దేముడు ప్రబు ప్రేమ తిలో, చి యాకోబు బక్తి కెర్లె తిలో దేముడు ప్రబు కెయ్క తెయ్క తతి రితి దేముడుచి గుడి ఆవ్ జవున్ బందిందె మెన దావీదు ఆస జా ఉచర తిలో.

47 దసాచో బందుక మెన జో ప్రబు సెలవ్ దెయె నాయ్, చి దావీదుచో పుత్తుసి ‡సాలోమోను రానొ జలి పొది, జొయ్యి బందిలో.

48 “గని, ఎత్తిచి కంట వెల్లొ తిలో అమ్చో దేముడు ప్రబు కేనె జితయ్ మెలె, మాన్సు తెయార్ కెర్ల గుడితె తయె నాయ్. జోచి కబుర్లు సంగిలో పూర్ణమచోచి అత్తి రెగిడ్లి రితి;

49 పరలోకుమ్ అంచి సిజాసనుమ్. బూలోకుమ్ అంచ చట్టొ నుదితి పొద్దొ. జాకయ్, అంచి విలువచి దేముడుచి గుడి తూమ్ కీసి బందితె? అంచి రిసా గేర్ బందిలె, ఎక్కి ఒత్త తయిందె గె?

50 పరలోకుమ్ బూలోకుమ్ ఎత్తి అవ్వొ జెర్మయ్లయ్, మెన, ఎత్తిచి కంట వెల్లొ తిలో అమ్చో ప్రబు రెగ్ల అస్సె.” మెన జోవయింక పరిచ్చ కెర్ల వెల్లెల మాన్సుల్క సైపను బుద్ది సంగిలన్.

51 “పడ్డొ జోక పరిచ్చ కెర్ల జేవ్ వెల్లెల మాన్సుల్క సైపను, తుమ్ రాడ్ జీవ్చ మాన్సుల్, దేముడు సంగిలి సుద్ది గుర్తుచి సున్నతి అమ్ కెరన అస్సుమ్ మెన తుమ్ సంగితను, గని జా ఎత్తి తుమ్క కామ్క నెంజె. కిచ్చొక మెలె, తుమ్చి పెట్టి సుద్ది జను నాయ్, తుమ్చ కానొ సూనుక నెసితి, చి దేముడుచి సుద్ది తిలి ఆత్మ సికడ్డిసి తుమ్ ఒప్పున్ నాయ్. తుమ్చ పూర్ణమచ కీసి పాపుమ్ కెర్ల గే, తూమ్ కి దస్సి.

52 జేవ్ పొదులె, దేముడు కచి కచి అత్తి కబుర్లు తెర్లయ్లె, తుమ్చ పూర్ణమచ జోవయింక అల్లర్ కెరుక, జో తెర్లయ్లనతె కక్క నే పిట్టె. పడ్డొ, ‘పరలోకుమ్చి పున్నిమ్ తిలో క్రిస్తు రచ్చించుప కెర్లొసా జెంక అస్సె’ మెన జోవయింతె కో సంగిల గే, జేవ్ తుమ్చ పూర్ణమచ జోక మారుక. దస్సి కి, జో క్రిస్తు జెతికయ్, తుమి జోక నెన, గోస కెర, జోక మార గెలదు.

53 ‘ప్రైజల్క సికడ్డు’ మెన దేముడు దూతల్చి అత్తి తుమ్కయ్ జోచ ఆగ్నల్ దిలన్, గని జోచ ఆగ్నల్ రితి తుమ్ ఇండుక నెన, దస్సి కెర్లదు” మెన అన్నె సంగిలన్.

సైపనుక వత్తల్ గల మార్గిసి

54 జేవ్ వెల్లెల మాన్సుల్ ఈంజేవ్ కొడొ సూన, సైపనుచి ఉప్పిరిచి జేవ్చి కోపుమ్క రకుక నెత్త కెర, దంతో చప్లన్.

55 జో, మాత్తుమ్, జోచి పెట్టి దేముడుచి సుద్ది తిలి ఆత్మ బెర తతికయ్, ఆగాసుమ్ పక్క చెంగిల్ దెక, కిచ్చొ దెకిలన్

† 7:39 7:39 నిర్ణమకాండుమ్ 32 అద్యయమ్. ‡ 7:44 7:44 నిర్ణమకాండుమ్ 24:10-31 అద్యయమ్ ఎద. § 7:45 7:45 ద్వితియాపదేశ 34 అద్యయమ్. * 7:45 7:45 యెహోసువ 1-6 అద్యయల్. † 7:45 7:45 సమూయేలు దొన్నిచి పుస్తకుమ్ 7:1-17. ‡ 7:47 7:47 రానల్ మొదొల్ పుస్తకుమ్ 6 అద్యయమ్.

మెలె, దేముడుచి ఉజడి దెకిలన్, చి జో దేముడుచి ఉజెతో పక్క యేసు టీవోజ దెకిలన్.

56 జా దెక సైపను, “ఆదె, పరలోకుమ్ ఉగ్గి జలి రితి దెకితసి మెలె, మాన్సు జా జెర్మున్ అయ్లో క్రిస్తు రచ్చించుప కెర్తొసా దేముడుచి ఉజెతో పక్క టీవోజ అస్సె.” మెన సంగిలన్.

57 జో దస్సి సంగితికయ్, జోవయించి కోపుమ్చి ఒర్న దా, జేవ్చి కంగ్గో డంకన, జట్టు తెన్ జోచి ఉప్పిరి నిగ జా జోక దెర్ల.

58 జోక పట్టుమ్ తెంతో పెలవ దా బార్ కెర, జోక వత్తల్ గల మారుక దెర్ల. సాచి సంగ తిలస జోక వత్తల్ గలిలిన్తె బెదిల. వత్తల్ గలుక మెన, జేవ్చి ఉప్పిర్చ పాలల్ కడన కెర, సావులు మెలొ ఉబెడొ ఎక్కిలోచి చట్ట తిల.

59 జేవ్ మాన్సుల్ వత్తల్ గల మార్తె తతికయ్, సైపను ఇసి మెన ప్రార్దన కెర్లన్. “ప్రబు జలో ఓ యేసు, అంచి జివు తూయి తుచితె కడ నే” మెన కెర,

60 మొగ్రల్ టెక, గట్టిజ అవాడ్ తెన్ ఒర్న దా అస్సె, “ప్రబువ, ఈంజేవ్ అప్పె కెర్తి పాపుమ్ ఇన్నెయింక చెమించుప కెరు!” మెన ప్రార్దన కెర మొర గెలన్.

8

1 సైపను మొర్లిన్తె సావులు తిలన్. ‘మొర్పు’ మెన జో కి ఒప్పన తిలొ.

నంపజలన చెదుర్ప జా వేరతె ఉట్ట గెలిసి

జలె, జా దీసి తెంతో, యెరూసలేమ్ పట్టుమ్తె యేసుక నంపజలన మొత్తుమ్క నంపనెంజిల యూదుల్ ఒగ్గర్ ఒగ్గర్ అల్లర్ కెరుక దెర్ల. అల్లర్ కెర జోవయింక ఉదడ్డికయ్, నంపజలనతె ఒగ్గర్జిన్ చెదుర్ప జల. చెదుర్ప జా ఒండి యూదయ ప్రదేసిమి చి సమరయ ప్రదేసిమి గెల. యేసుచ బారికుల్, మాత్తుమ్, యెరూసలేమ్తె తాఁ గెల.

2 జా మదెనె, ప్రబుక సత్తిమ్ తిల యూదుల్ సగుమ్జిన్ సైపనుక రోవిల, ఏడుకులు జా ఒగ్గర్ దుకుమ్ తెన్ రోవిల.

నంపజలనక సావులు ఒగ్గర్ ఒగ్గర్ అల్లర్ కెర్తె తిలిసి

3 సావులు, మాత్తుమ్, యెరూసలేమ్తె క్రిస్తుక నంపజలనచి సంగుమ్క పాడ్ కెరుక ఉచర, జోవయింక ఒగ్గర్ ఒగ్గర్ అల్లర్ కెరుక దెర్లన్. జోవయించ గెరల్ ఎత్కితె గెచ్చు, పెస, జోవయించ మున్నుబోదల్క తేర్బోదల్క, ఎత్కిక దెర, జేతె గలయ్లన్.

4 చెదుర్ప జల యేసుప్రబుక నంపజలన, జలె, కిచ్చొ కెర్తె తిల మెలె, జోచి రిసాచి సుబుమ్ కబుర్ నూనయ్తె తా బుల్తె తిల.

* **8:12 8:12** ‘ఎత్కి అదికారుమ్ తిలొ దేముడుచి రాజిమ్’ మెలె, 1 జోవయింక నంపజల మాన్సుల్చి పెట్టి జో ఏలువ కెర్తిసి, 2 జోవయించి అత్తున్కి ఈంజి లోకుమ్తె కామ్ కెర్తిసి, 3 ఈంజి ఉగుమ్ మార్పువ జలె జో ఎదార్దుమ్ ఈంజి లోకుమ్తె ఏలువ కెర్తిసి, చి 4 పరలోకుమ్తె జో ఏలువ కెర్తిసి. † **8:12 8:12** నెంజిలె ‘నావ్’.

5 తెదొడి బారజిన్ బారికుల్తె తిలొ పిలిప్ మెలొసా, సమరయ ప్రదేసిమ్చి పట్టుమ్ ఏక్తె గెచ్చు, యేసుక్రిస్తు, ‘దొర్కు జలొ రచ్చించుప కెర్తొసా జొయ్యి’ మెన ప్రెజల్క బోదన కెర్తె తిలన్.

6 ఒత్తచ ప్రెజల్ జోచి బోదన సూన్ల, అన్సె, జోచి అత్తి జర్గు జల యేసుప్రబుచి నావ్ తెన్ వెల్లొ కమె దెక, ఒగ్గర్జిన్ ప్రెజల్ ఎక్కి ప్రేమ జా, జో సంగిలి బోదనక నంప కెర, యేసుక నంపజా గెల.

7 కిస కమె పిలిప్చి అత్తి జర్గు జల మెలె, బూతల్క ప్రబుచి నావ్ తెన్ ఉదడ్డె, జేవ్ బూతల్ ఒర్నువ జంక నెత్త కెర, గట్టిజ ఒర్న దా, పూర్తి ఉట్ట గెల. పడ్డొ ఉట్టుక నెత్తిర్ల మాన్సుల్, సొట్ట మాన్సుల్, చెంగిల్ జల.

8 జాకయ్ జా ఒండి పట్టుమ్తె ఎత్కిజిన్ సర్ల జల.

9 ఏక్ పట్టుమ్తె సీమోను నావ్ తిలొ మాన్సు జా. జో అగ్గె, జా పట్టుమ్తె, మంత్రుమ్ కెర్తన కిచ్చొ కిచ్చొ మాయచ గారెడ్లు కెర్తె తిలన్. కిచ్చొ కిచ్చొ వెల్లొ కమె కెర, ‘ఆవ్ వెల్లొ’ మెనన, సమరయ ప్రదేసిమ్చి ఎత్కిజిన్క ఆచారిమ్ కెరెదె.

10 జోచ కమె దెక, “దేముడుచి వెల్లి సెక్తి తిలొసా ఈంజొ” మెన, బాల వెల్లొ జా ప్రాంతుమ్చి ఎత్కిజిన్ జోక నంపజా తిల.

11 కిచ్చొక జోక దస్సి నంపజా మోసిమ్ జా తిల మెలె, జో ఒగ్గర్ వెర్గులు సయ్తాన్చ దస కమె కెర కెర జోవయింక ఆచారిమ్ కెర్తె తిలన్.

12 గని, దేముడుచి *రాజిమ్చి రిసా, యేసుక్రిస్తుచి †అదికారుమ్చి రిసా, పిలిప్ ప్రెజల్క బోదన కెర్తె తతికయ్, జోచ కొడొక నంపజా గెచ్చు కెర, తేర్బోదల్ కి మున్నుబోదల్ కి, బాప్తిసుమ్ నజన్.

13 సయ్తాన్చ కమె కెర్తొ జో సీమోను కి నంపజా, బాప్తిసుమ్ నజన, పిలిప్చి పట్టి బులుక దెర్లన్, అన్సె, యేసుప్రబుచి అదికారుమ్ తెన్ కెర్ల వెల్లొ కమె, జొర్జొల్ బాదల్ జల మాన్సుల్ చెంగిల్ జలిసి దెక దెక, జో కి బలే ఆచారిమ్ జలొ.

పేతురు యోహానులుక సమరయతె తెద్రయ్లిసి

14 జలె, సమరయచ మాన్సుల్ దేముడు దిలి యేసుప్రబుచి రిసాచి సుబుమ్ కబుర్ నూన నంపజా అస్తి మెన యెరూసలేమ్తెచ బారజిన్ బారికుల్ నూన కెర, ‘జోవయింతె గెచ్చు దెకుత్’ మెన, పేతురుక చి యోహానుక తెద్రయ్ల.

15 జేవ్ దొగుల ఒత్త పాచ కెర, నంపజలనక ‘దేముడుచి సుద్ది తిలి ఆత్మ జేవ్చి పెట్టి దొర్కు జవున్’ మెన ప్రార్దన కెర్ల.

16 కిచ్చొక మెలె, తెదొడి ఎద ఎక్కి యేసుప్రబుచి నావ్ తెన్ పానితె బాప్తిసుమ్ నజన తిల. జోచి ఆత్మచి నావ్ తెన్ నేతయ్, చి ఆత్మసెక్తి జేవ్క దొర్కు జంక నేతయ్.

17 జలె, తెదొడి పేతురు చి యోహాను జేవ్ నంపజల ప్రెజల్ ఎత్కిజిన్ ఎక్కెక్లక బోడి చడిల, చి దేముడుచి సుద్ది తిలి ఆత్మసెక్తి జోవయింక దొర్కు జలి.

18 జలె, 'యేసుచ బారికుల్ బోడి చడ్లెగిన, నంపజల మాన్సుల్క దేముడుచి సుద్ది తిలి ఆత్మ దొర్కు జతయ్' మెన మంత్రమ్ కెర్తె తిలొ సీమోను దెక కెర,

19 "అంక కి జా సెక్తి దా, డబ్బుల్ దెయిందె. ఆవ్ కి కక్క బోడి చడిందె గే, జోక కి దేముడుచి సుద్ది తిలి ఆత్మసెక్తి దొర్కు జలి రితి, జా సెక్తి అంక దా" మెన పేతురుక చి యోహానుక సీమోను సంగిలన్.

20 సంగితికయ్, పేతురు, జోక " 'డబ్బుల్ దిలె దేముడు దెతి జోచి సుద్ది తిలి ఆత్మసెక్తి వరుమ్ గెనుక జయెదె' మెన తుయి ఉచర్లి రిసా, తుచి డబ్బుల్ తుచి తెన్ నాసెనుమ్తె గెస్సు!

21 తుచి పెట్టి దేముడు తెన్ సత్తిమ్ జంక నాయ్, చి జోచి ఈంజ కామ్తె తుయి బెదుక జయె నాయ్.

22 తుయి ఉచర్లి వెల్లి ఈంజ పాపుమ్ చెమించుప జంక తుయి కోర్ప జతసి జలె, జోచి దయ తిలె తుక రచ్చించుప కెర్పు మెన, తుయి కెర్లి గార్ కామ్ ముల దా, పెట్టి పూర్తి దుకుమ్ జా జోక ప్రార్దన కెర సంగు. జో కిచ్చొ కెరెదె గే జోచి దయ.

23 సయ్తాన్చ పాపుమ్బుద్ది అప్పెక తుచి పెట్టి ఏలుప కెర్తయ్, అప్పెక తుచి పెట్టి ఆసల్ గోసల్ అస్సి మెన ఆవ్ దెకితసి" మెన పేతురు సీమోనుక సంగిలన్.

24 జలె, సీమోను బియఁ గెచ్చొ కిచ్చొ మెన బతిమాల్పా జా సంగిలన్ మెలె, "తుయి సంగిలి సిచ్చ అంచి ఉప్పీర్ నే జెతు మెన తుమి ప్రబుక ప్రార్దన కెరు." మెన సంగిలన్.

25 పేతురు, యోహాను, జలె, యేసుప్రబుచి రిసా సాచి సంగ, జోచి సుబుమ్ కబుర్ సూనవ కెర, ఒత్త తెంతో అన్నె బార్ జా, నమరయచ ఒగ్గర్ ఒగ్గర్ గెవ్విలె గెచ్చొ, బుల బుల, ప్రబుచి సుబుమ్ కబుర్ సంగ బోదన కెర్తె తా, యెరూసలేమ్తె అన్నె పావ అయ్ల.

పిలిప్ ఐతియొపీయు దేసిమ్చొ మాన్సుక బోదన కెర్లిసి

26 మదెనె, ప్రబుచొ దూత ఎక్కిలో పిలిప్తె జా కెర, "తుయి ఉట్ట ఇన్నె తెంతో బార్ జా, దచ్చెన పక్కచి వట్టె, మెలె యెరూసలేమ్ తెంతో గాజా పట్టుమ్ ఎద పావెతి వట్టె గో" మెన సంగిలన్.

27 పిలిప్ సూన, బార్ జా, జా వట్టె గెలన్. జా వట్టె గెతె తతికయ్, ఐతియొపీయు దేసిమ్చొ ఆండెరో జా వాట్ జెతె అస్సి. జో ఐతియొపీయు దేసిమ్చి 'కందాకె' మెలి రానిచొ

ఆదికారి, డబ్బుల్ దెకితో ఆదికారి జా అస్సి. దేముడుక బక్తి కెరుక మెన, జో యెరూసలేమ్తె జా తిలొ.

28 అప్పె అన్నె జోచి సొంత దేసిమి ఉట్ట గెతె అస్సి. జోచి రదుమ్తె వెస తా, దేముడుచ కబుర్లు సంగిలొ యెసయా పూర్లుమ్చొచి అత్తి రెగిడ్లి పుస్తకుమ్ సదు కెర్తె అస్సి.

29 జలె, ప్రబుచి ఆత్మ పిలిప్చి ఆత్మతె, "తుయి దెకితి రదుమ్క పాసి గెచ్చొ దెకు" మెన సంగితికయ్,

30 పిలిప్ జా రదుమ్తెచొ నిగ గెచ్చొ, యెసయా పూర్లుమ్చొచి అత్తి రెగిడ్లిసి పుస్తకుమ్ జో సదు కెర్లిసి సూన కెర, జోక, "తుయి సదు కెర్లిసి తుక అర్దుమ్ జెతయ్ గె?" మెన పుసిలన్.

31 "కో జవున్ అంక అర్దుమ్ సంగిలెకయ్ అంక కిన్ అర్దుమ్ జయెదె?" మెన జో సంగిలన్, చి 'అర్దుమ్ సంగున్' మెన, రదుమ్తె పిలిప్క వెగడ వెసడ్లన్.

32 దేముడుచి కేన్ కోడు జో సదు కెర్తె తిలొ మెలె, "మెండక కండ బలి కెర్లి రిసా ఉదడ నెత్తి రితి జోక ఆన్ల, నెంజిలె రోమల్ కత్తయ్తి మొక్కె మెండపిల్ల కిసి జమ్న తయెదె గె దస్సి ఈంజొ కి చోడి డంకన తుక్లె తయెదె.

33 ఇన్నెచి ఏలువ కడ్ల, చి ఇన్నెచి రిసా సరిగా తీర్పు జతి రితి ఒప్పితి నాయ్. ఇన్నెక 'బోదల్ పాయ్లన్' మెన కిసి సంగుక జయెదె? ఇన్నెక ఈంజ బూలోకుమ్తె జేవ్ మార్ల!"

34 జో ఆండెరో, పిలిప్క కిచ్చొ మెన పుసిలన్ మెలె, "దేముడు ప్రబుచ కబుర్లు సంగితో జో పూర్లుమ్చొ కచి రిసా ఇసి సంగితయ్? జోచి సొంతచి రిసా గే, కేన్ జవున్ వేర మాన్సుచి రిసా గె?" మెన పుసితికయ్,

35 పిలిప్ చోడి పుట్టవ, జో ఆండెరో సదు కెర్తె తిలి కోడుచి అర్దుమ్ తొలితో సంగ, యేసుచి రిసాచి సుబుమ్ కబుర్ ఎత్కి జోక బోదన కెర్లన్.

ఆండెరో బాప్తిసుమ్ నజన్సి

36 తెదొడి, జేవ్ దొగుల వట్టె గెతె తా పాని గాడు ఏక్ దెకిల. దెక, "ఆదె, పాని! ఆవ్ బాప్తిసుమ్ నజనుక కిచ్చొ అడ్డు కిచ్చొగె, నాయ్ గడ?" మెన జో ఆండెరో సర్ల జా సంగిలన్.

37 †పిలిప్ జోక "తుయి యేసుప్రబుక పెట్టి పూర్తి నంపజలది మెలె, బాప్తిసుమ్ నజనుక జయెదె." మెన సంగితికయ్, "యేసుక్తిస్తు దేముడు ప్రబుచొ పుత్తుసి, సీజిలొ దొర్కు జలొ రచ్చించుప కెర్తెసా జయెదె మెన ఆవ్ నంపజతసి." మెన ఆండెరో సంగిలన్.

38 తెదొడి రదుమ్క జో టీవొ కెర, పిలిప్ ఆండెరో దొగుల ఉత్త పానితె ఉత్తిర్ల, చి జో ఆండెరోక పిలిప్ బాప్తిసుమ్ దిలన్.

† 8:37 8:37 గ్రీకు బాస తెన్ ఈంజ మత్తెలి తొలితో రెగిడ్ల సగుమ్ పుస్తకల్తె 37 నంబర్చి కోడు తయె నాయ్. § 8:37 8:37 జలొ...రచ్చించుప కెర్తెసాచి కోడు దస్సి తయె నాయ్, గని జా అర్దుమ్ ఒత్త తయెదె.

39 తెదొడి, జేవ్ పానితె తెంతో అన్నె బార్ జతికయ్, *ప్రబుచి ఆత్మ పిలివ్క దెర నిలన్, చి ఆండెరో జోక అన్నె నే దెకిలన్. జో ఒగ్గర్ నర్లసంతోసుమ్ తెన్ సొంత దేసిమి ఉట్ట గెలన్.

40 పిలివ్ ఒత్త తెంతో అజోతు మెలి పట్టుమ్తె డీసిలన్. ఒత్త డీస కెర బార్ జా, ఉత్తర పక్క గెతి వట్టె గెచ్చు గెచ్చు, ఎత్తి పట్టులె గెచ్చులె ప్రబుచి సుబుమ్ కబుర్ నూనవ నూనవ, కైసరియ పట్టుమ్తె పావెలన్.

9

యేసుక నంపజలసక సావులు అల్లర్ కెర్తె తిలిసి

1 స్తవనుక మార్గినె తెదొడి బెద తిలో సావులు, ఈంజ మదెనె కిచ్చొ కెర్తె తిలో మెలె, యేసుప్రబుక నంపజా జోవయించ *సిస్సుల్ జలసక 'మారిందె' మెన బియడ్డె తిలో. జలె, కిచ్చొ కెర్తె మెలె, యెరూసలేమ్తె ఎత్తిక వెల్లో పూజరితె గెచ్చు కెర,

2 "దమస్కు పట్టుమ్తెచ అమ్చ యూదుల్చ సబ గెరల్చ అదికారుల్క ఆవ్ దెకయ్తి రిసా అంక ఉత్తల్ దె, చి ఆవ్ ఒత్త గెచ్చు, 'రచ్చన వాటు యేసుయి' మెన జోవయింక నంపజలసక చజిలె, జేవ్ తేర్బోదల్ జలెకి, మున్నుబోదల్ జలెకి, జోవయింక దెర బంద, ఇత్తల్ అమ్చి యెరూసలేమ్తె సిచ్చు కెరుక మెన కడ ఆనిందె" మెన సెలవ్ సంగిలన్.

3 జలె, సావులు ప్రయానుమ్ గెతె తా దమస్కు పట్టుమ్క పాసి అయ్లి పొది, ఓదె, ఆగాసుమ్ తెంతో అంకి అందర్ కెర ఉజిడి జోచి సుట్టునంత జా అడ్డు కెర్లె.

4 చి జో బుయ్యె సేడ నిజ తిలి పొది ఏక్ అవాడ్, "ఓ సావులు, సావులు, అంక కిచ్చొక సిచ్చల్ అల్లర్ కెర్తెసి?" మెన సంగిలిసి నూన్లన్.

5 బియఁ గెచ్చు, "తుయి కో, ప్రబు?" మెన జో పుసిలన్, చి "తుయి గోస కెర్తె యేసు, ఆవ్.

6 అల్లె, తుయ్ ఉట్ట ఈంజ పట్టుమ్తె గెచ్చు పెసు, చి ఒత్త తెంతో తుయి కిచ్చొ కెరుక అస్సె గే, తుక నూనయిందె" మెన యేసు సంగిలన్.

7 సావుల్ తెన్ బెద ప్రయానుమ్ కెర్తె తిల మాన్సుల్, జలె, జా అవాడ్ నూన్ల, గని కక్క నే దెక, కిచ్చొ మెనుక నెత్త కెర, టక్కున జా తిల.

8 సావులు, మాత్రుమ్, బుయి తెంతో ఉట్ట, టీవోజ, అంకివో ఉగిడ్లె, కిచ్చొ దెకుక నెత్తిర్లొ. జాకయ్ జేవ్ జోక ఆతు దెర, దమస్కు పట్టుమ్ తెడి ఇండవ నిల.

9 ఒత్త తిర్తె, కిచ్చొ నే కతె, కిచ్చొ నే పితె చువ్వె తా గుడ్డి జా తిలో.

అననీయక ప్రబు సావుల్తె తెద్రయ్లిసి

10 జలె, జా దమస్కు పట్టుమ్తె యేసుక నంపజలో నిదానుమ్ తిలో సిస్సుడు ఎక్కిలో తిలో. జోచి నావ్ అననీయ. జలె, యేసు సివ్వుతె జోక డీస కెర, జోచి నావ్ దెర్తికయ్, జో "అస్సి, ప్రబు" మెన జబాబ్ దిలన్,

11 ప్రబు జోక, "తుయి ఉట్ట, సొగ మెలి వీది గో, చి యూదా మెలో ఎక్కిలోచి గెరి గెచ్చు, 'తార్సు పట్టుమ్తె జెర్మిలో సావులు మెలోసా తెన్ దస్సుల్ జయిందె' మెన సంగు. జో జా గెరి తా ప్రార్దన కెర్తె అస్సె.

12 జో ప్రార్దన కెర్తె తతికయ్, జోక కిచ్చొ సివ్వు దెకవ అస్సి మెలె, అననీయ మెలో ఎక్కిలో జో సావులు తిలి గెరి జా కెర, పెస, జోక 'అన్నె దెకుస్' మెన జోచి బోడి చడెదె మెన, ఆవ్ సావుల్క సివ్వు దెకవ అస్సి" మెన ప్రబు జో అననీయక సంగిలన్.

13 గని అననీయ బియఁ కెర, "జో మాన్సుచి రిసా ఒగ్గర్జినె సంగ అస్సి, యెరూసలేమ్తె తిల తుచయ్ సుద్ది తిల మాన్సుల్క జో ఎదివాట్ అల్లర్ కెర అస్సె.

14 జో ఇత్తల్ అయ్లె, తుచి నావ్ దెర్తన ఎత్తిక దెర, బందుక మెన ఎత్తిక వెల్లెల పూజర్లు జోక సెలవ్ దా అస్తి" మెన సంగిలన్.

15 గని ప్రబు జోక, "ఒత్త గో, 'యూదుల్ నెంజిల వేర దేసిమ్చ మాన్సుల్క, రాసల్క, ఇస్రాయేలుల్క కి, అంచి నావ్ తెన్ అంచి రిసా సాచి జవున్' మెన ఆవ్ జోక నిసాన అస్సి.

16 జో కి అంచి నావ్ అంచి కామ్చి రిసా ఎత్తివాట్ అల్లర్ బాదల్ సేడెదె. జోక జా ఎత్తి దెకయిందె" మెన ప్రబు జబాబ్ దిలన్.

17 ప్రబు దస్సి సంగితికయ్, అననీయ బార్ జా గెచ్చు, ప్రబు సంగిలో గెరి పెస, సావుల్క బోడి చడ, "ఓ సావులు బావో, తుయి వట్టె జెతె తతికయ్ తుక డీసిలో యేసు తుక 'దెకుస్' మెన, దేముడుచి సుద్ది తిలి ఆత్మ తుచి పెట్టి తతి వరుమ్ తుక దొర్కు. జవున్ మెన అంక ఇన్నె తెద్రవ అస్సి" మెన అననీయ సంగిలన్.

18 సంగిల్ బేగి, సావుల్చ అంకివో తెంతో పొరల్ రితస కుసిడ్ల, చి జోచ అంకివో అన్నె డీసిల. తెదొడి జో ఉట్ట, బాప్తిసుమ్ నజన,

19 అన్నిమ్ కెర, అన్నె సత్తు జలో.

ఒత్త తెంతో, సావులు జా దమస్కు పట్టుమ్తె యేసుక నంపజల సిస్సుల్ తెన్ సగుమ్ దీసల్ తాఁ గెలో,

20 చి బేగి జోవయించ సబ గెరలె యేసుచి రిసా కిచ్చొ సాచి సంగితె తిలన్ మెలె, "నిజామి, అమ్చో దేముడుచో

* 8:39 8:39 'ప్రబుచి ఆత్మ పిలివ్క దెర నిలన్' నెంజిలె జో మంత్రిచి పెట్టి ప్రబుచి ఆత్మ బెర్తికయ్, జో దెతి నెక్తివరుమ్ జోవయింక దొర్కు. జలి, చి ప్రబుచి దూత పిలివ్క కడ నిలన్, చి... * 9:1 9:1 మత్తయి, మార్కు, లూకా చి యోహానుత 'సిస్సుల్' మెన ఒగ్గర్ సుట్టు సంగిలె యేసుచ బారజన్ సిసుల్కయి సంగితతి, గని ఈంజ కోడుతెచి రితి, కో జోవయింక నంపజా జోవయింక నిదానుమ్ ఇండుల గే, జేవ్ ఎత్తిజినె 'జోవయించ సిస్సుల్' మెనుక జయెదె.

ఎక్కిలో పుత్తున్ దొర్కు జలో రచ్చించుప కెర్తొసా, జో” మెన సాచి సంగితే తిలన్.

21 సావులుక, ‘జో ఇసి సాచి సంగితయ్’ మెన నూన, ఎత్తిజిన్ ఆచారిమ్ జా, “యెరూసలేమ్ పట్టుమ్తె ప్రబుచి నావ్ దెర్తన ఎత్తిజిన్క అగ్గె అల్లర్ కెర్తె తిలొసా ఈంజో, నెంజె గే? ఇన్నెచ నంపజలసక ఎత్తిక వెల్లెల పూజర్లుచి తీర్పు కెర సిచ్చ కెరవుక మెన దెర బందుక ఉచర, ఇత్తల్ అయ్లో” మెన కిచ్చొ ఉచరుక గే నేన గెల.

22 జలె, సావుల్క రోజుక ప్రబు అన్నె సెక్తి దిలో, చి దమస్కుతె జితె తిల యూదుల్చ సబతె జో బోదన కెర కెర, యేసుక, ‘నిజుమి దొర్కు జలో క్రీస్తు రచ్చించుప కెర్తొసా జో’ మెన తెలివి తెన్ రుజ్జుల్ బెదయ్తె తిలొ, చి నంపనెంజల యూదుల్ కిచ్చొ జబాబ్ దెంక గే నేన గెల.

సావుల్క మారుక మెన యూదుల్ కుట్ర ఉచర్ల

23 ఒగ్గర్ దీసల్ గెతికయ్, సావుల్క మారుక మెన యూదుల్చ వెల్లెల మాన్సుల్ కుట్ర ఉచర్ల,

24 గని జేవ్ కుట్ర ఉచర్లించి రిసా సావులు నూన్లొ. జోక మారుక మెన రోజుక అందరె మెద్దెనె పట్టుమ్చ గుమ్మలె మాన్సుల్ రకితె తవుల, చి రిసా,

25 జోచ సిస్సుల్ కిచ్చొ కెర్ల మెలె, ఏక్ దీసి అందరె జోక బోడోవ దా, పట్టుమ్చి డోక్ తిలి కోటతెచి గదితె వెగడ దా, ఏక్ గంపతె వెనడ దా, కిట్కివాట్ వాలివొ తెన్ కోట ఒత్తల్తో ఉత్తవ దిల, చి ఉట్టు నిగిలో.

26 జలె, సావులు, యెరూసలేమ్ పట్టుమ్తె పాచ జా, ప్రబుచ ఒత్తవ సిస్సుల్ తెన్ బెదుక ఉచర్లొ, గని జోవయింక “నిజుమి, మార్పువ జా ప్రబుచొ సిస్సుడు జా అస్సె” మెన నంప కెర్తి నాయ్, చి బియఁ గెల.

27 గని బర్నబా మెలోసా సావుల్క తోడు జా, బారికుల్తె కడ ఆన కెర, సావులు వట్టె గెతె తిలి పొది ప్రబుక దెకిలిసి, ప్రబు జో తెన్ లట్టల్లిసి, పడ్డొ దమస్కుతె సావులు దయిరిమ్ తెన్ యేసుచి నావ్ తెన్ బోదన కెర్లిసి ఎత్తిచి రిసా బర్నబా బారికుల్క సాచి సంగిలన్.

28 జాకయ్ జా దీసి తెంతొ యెరూసలేమ్తెచ ప్రబుచ జేవ్ బారికుల్ జోక సర్ల తెన్ బెదవన్ల, చి జోవయింతెన్ తా, రోజుక

29 ప్రబుచి నావ్ తెన్ దయిరిమ్ తెన్ బోదన కెర్తె తిలన్. పడ్డొ, యేసుక నే నంపజల గ్రీకు బాస లట్టబై యూదుల్క ప్రబుచి సాచి సావులు సంగితె తిలన్. రుజ్జుల్ బెదయ్తె తిలన్, గని జేవ్ జోక మారుక కోర్ప జా తిల.

30 జోక జేవ్ మారుక కోర్ప జలిన్చి రిసా సిస్సుల్ మెన కెర, జోక కైసరియ పట్టుమ్ ఎదక బోడోవ దాఁ కెర, ఒడతె వెగడ, జో జెర్మిలి తార్పు పట్టుమ్తె తెద్రవ దిల.

31 జలె, సావులు నంపజా మార్పువ జలిన్చి రిసా, జేవ్ పొదులె, ఒండి యూదయ ప్రదేసిమి, గలిలయ ప్రాంతుమ్తె

చి సమరయ ప్రదేసిమ్తె యేసుక నంపజలసక కో అల్లర్ కెర్తి నాయ్, చి అన్నె డిట్టుమ్ జల. ప్రబుక బియఁ సత్తిమ్ ఇండితె తిల, చి దేముడుచి సుద్ది తిలి ఆత్మ జోవయింక దయిరిమ్ కెర్తె తిలి, చి అన్నె ఒగ్గర్జిన్ నంపజా, జోవయింతెన్ బెదిల.

32 జేవ్ పొదులె, పేతురు ఒండి బుల్తె తా, నంపజలన ఎత్తిజిన్క దెకితె తిలొ, చి లుద్ద మెలి ఏక్ పట్టుమ్తె ప్రబుచయ్ జల మాన్సుల్ జితె తిలిన్తె జో తెన్ అయ్లో.

33 ఐనెయ మెలో ఎక్కిలో అస్సె. జో ఉట్టుక, కదుల్ జంక నెత్త కెర, అట్టు వెర్సుల్ అంతుర్నొతె ఎంగ్ల అస్సె.

34 పేతురు, జలె, జోక దెక, “ఓ ఐనెయ, యేసుక్రీస్తు తుక చెంగిల్ కెర్తయ్. ఉట్ట, తుచి అంతుర్నొ చెంగిల్ కెరన్” మెన సంగిలన్. సంగిలి బేగి, జో చెంగిల్ జా ఉట్టొ.

35 జో చెంగిల్ జలిసి, లుద్ద పట్టుమ్చ జా సారోసు ప్రాంతుమ్చ ఎత్తిజిన్ దెక, జోవయింతె ఒగ్గర్జిన్ ప్రబుక నంపజా మార్పువ జల.

36 జలె, యొప్పే మెలి పట్టుమ్తె తబితా, నెంజిలె దొర్కా మెలి నావ్చి తేర్బోద యేసుక సిస్సుడ్డి జా అస్సె. జా కిసి మాన్సు మెలె, మాన్సుల్క ఒగ్గర్ ప్రేమ దెకితె తయెదె, బీద సుదల్క ఒగ్గర్ తోడు కెర్తె తయెదె.

37 ఏక్ దీసి, జొల్లా సేడ మొర గెలి. జాక దోవ కెర సుబ్రుమ్ కెర, గెర్చి అంతస్తుమ్చి గదితె పీనుమ్ నిజడ దిల.

38 యొప్పే మెలి జా మాన్సు మొర్లి పట్టుమ్క పేతురు తిలి లుద్ద పట్టుమ్ దూరి నాయ్, చి పేతురుక ‘ఒత్త అస్సె’ మెన సిస్సుల్ నూన తా, “బే బేగి జె” మెన దొగులచి అత్తి సంగ తెద్రయ్ల.

39 పేతురు బేగి ఉట్ట, జోవయింతెన్ గెలన్. జా గెరి జో పాచిలె, జోక జా ఉప్పిరిచి గదితె బోడోవ దిల. ఒత్త జా పట్టుమ్చ రండెల్ మాన్సుల్ బెర అస్సి. జేవ్ పేతురుచి సుట్టునంత టీవ ఏడ ఏడ, జా మొర గెలి దొర్కా చెంగిల్ తిలి పొది ‘బీద సుదల్’ మెన, జోవయింక తున తిల పాలల్ ఎత్తి పేతురుక దెకయ్ల.

40 పేతురు, జలె, జేవ్ ఎత్తిజిన్క బార్ కెరవ దా, మొగ్గల్ టెక ప్రబుక ప్రార్దన కెర్లన్. తెదొడి, పీనుమ్క దెకిత్ రితి పసుల, “ఓ తబితా, ఉట్టు!” మెన జాక సంగిలన్. సంగితికయ్, అంకివొ ఉగిడ్డి, చి పేతురుక దెక, వెసిలి.

41 పేతురు జాక ఆతు దెర టీవడ్డొ, చి రండెల్ మాన్సుల్క చి ప్రబుచయ్ జల ఒత్త తిల అన్నె మాన్సుల్క బుకారా కెర, ‘జివ్ జా అస్సె’ మెన దెకయ్లన్.

42 జా ఒండి యొప్పే ప్రాంతుమ్తెచ మాన్సుల్ జేవ్చి రిసా నూన్ల, చి జోవయింతె ఒగ్గర్జిన్ ప్రబుక నంపజల.

43 పడ్డొ పేతురు ఒత్త చము పికయ్తో సీమోను మెలో ఎక్కిలోచి గెరి ఒగ్గర్ దీసల్ తా గెలన్.

10

కొర్నేలిక ప్రబు సివ్వుతె కబుర్ తెద్రయ్ లిసి

1 కైసరియ పట్టుమ్తె కొర్నేలీ మెలో మాన్సు ఎక్కిలో తిలో. రోమ్ దేసిమ్చి జమాన్లుతెచి ఇటలీ మెలి జటుచో *పుంజెక్జిన్ జమాన్లుక వెల్లో, జో.

2 కిసా మాన్సు మెలె, జో యూదుడు నెంజిలె కి, దేముడుక బియె, నిదానుమ్ తెన్ ఎక్కి జోకయి బక్తి కెర్తె తిలో. జోకయి ప్రార్థన కెర్తె తిలో చి యూదుల్చ బీద సుదల్క చెంగిల్ దెక దర్ముమ్ దెతె తయెదె. జోచి గెర్చ మాన్సుల్ ఎత్కిజిన్ కి దస్సి తిల.

3 ఏక్ దీసి, రమారమి తిన్ని గంటల్ మెద్దెనె, ప్రబు దెకయ్ లి సివ్వు ఏక్ దెకిలన్. కిచ్చో మెన జా సివ్వుతె సొస్టుమ్ దెకిలన్ మెలె, దేముడుచో దూత ఎక్కిలో జా గెరి పెన, జోక, “ఓ కొర్నేలీ” మెన బుకార్తెకయ్,

4 కొర్నేలీ అద్దుర్ జా దెక, “ప్రబువ, ఈంజి కిచ్చో?” మెన పుసిలన్, చి దూత జోక “తుచ ప్రార్థనల్ నూన, బీద సుదల్క తుయి దర్ముమ్ దిలిన్ దేముడు దెక, నర్ల జా అస్సె.

5 తుయి అప్పె కిచ్చో కెరుక అస్సె మెలె, యొప్పె పట్టుమ్తె మాన్సుల్క కబుర్ తెద్రవు, చి పేతురు మెలో సీమోనుక ఇత్తల్ కడ ఆను.

6 జోక ఒత్త కేనె చజుక మెలె, చమొ పికయ్తో సీమోను మెలో ఎక్కిలోతె తయెదె. జోచో గేరు నముద్దుమ్ సొడి తయెదె” మెన దూత సంగ ఉట్ట గెలన్.

7 కబుర్ సంగిలో జో దూత ఉట్ట గెతికయ్, కొర్నేలీ దొగుల జోచ గోతు మాన్సుల్క, చి దేముడుక నిదానుమ్చో జోచి తెడి తిలో జమాను సుదో ఎక్కిలోక బుకారా కెర,

8 దూత డీసిలిసి సంగిలిసి ఎత్కి జోవయింక సంగ కెర, యొప్పెతె జోవయింక కబుర్ తెద్రయ్ లన్.

పేతురుక ప్రబు దెకయ్ లి సివ్వు

9 అన్నెక్ దీసి, జేవ్ మాన్సుల్ కొర్నేలీ తెంతో ప్రయానుమ్ జెతె తా యొప్పెక పాసి జా గెతికయ్, పేతురు ఒత్త గెరి తా, ప్రార్థన కెరుక మెన, రమారమి మెద్దెనె ఒర్నె వెగిలో.

10 ఒత్త ప్రార్థన కెర్తె తిలె, జోక చూ కెర్లి. ‘కిచ్చోగె కతిసి కావలె’ మెన కబుర్ తెద్రయ్ తికయ్, ఎట్టోచ మాన్సుల్ తెయార్ కెర్తె తతికయ్, ప్రబుతె పేతురుచి మెన్సు పూర్తి తా, ప్రబు దెకయ్ లి సివ్వు ఏక్ పేతురు దెకిలన్.

11 కిచ్చో దెకిలో మెలె, పరలోకుమ్ ఉగ్గి జలి, చి ఏక్ వెల్లి తెర జాచ చెత్తర్ కోనల్తె దెరయ్ జా, బుయ్యె ఉత్త జెతె అస్సె.

12 జా తెరచి ఉప్పిరి కిచ్చో బెర అస్సె మెలె, బూలోకుమ్చ ఎత్కి రకల్ జంతువుల్, సొమ్ముల్, అయివో, ఆగాసుమ్చ పిట్టలు.

13 అన్నె, “ఓ పేతురు, ఉట్ట, కండ, పోడు కా” మెన ఏక్ అవాడ్ అయ్ లిసి పేతురు సూన్లో.

14 గని జో, “నాయ్, ప్రబు. నెంజె. ఆవ్ జెర్మిల్ తెంతో కిచ్చో గార్చి ఆవ్ కెయ్యకయి నాయ్” మెన ప్రబుక సంగిలన్,

15 జలె, అన్నెక్ సుట్టు ప్రబుచి జా అవాడ్చి జోచి తెన్ ఉంక్యలన్. కిచ్చో మెన సంగిలన్ మెలె, “ ‘సుద్ది అస్సె. కంక జయెదె’ మెన కిచ్చోచి రిసా దేముడు సంగ అస్సె గే, జాక తూయి ‘గారు’ మెన సంగు నాయ్” మెన సంగిలన్.

16 తివ్వెరి ఇసి జలి, చి పరలోకుమ్తె జా ఎత్కి అన్నె ఉక్కిల్ జలి.

17 జలె, “ఆవ్ దెకిలి సివ్వుచి అర్దుమ్ కిచ్చో?” మెన, పేతురు కిచ్చో. ఉచరుక గే నేన తతికయ్, ఏదె, కొర్నేలీ తెద్రయ్ ల మాన్సుల్, “సీమోనుచో గేరు కేన్ గేరు?” మెన పున సూన తా, ఒత్త గుమ్ముమె టీవోజ తిల.

18 “పేతురు మెలో సీమోను ఇన్నె జితె అస్సె గె?” మెన కేక్ గల.

19 పేతురు, జలె, ‘సివ్వుచి అర్దుమ్ కిచ్చో?’ మెన ఉచర్తె తతికయ్, ప్రబుచి ఆత్మ జోక, “ఈందె, తీగ్ల మాన్సుల్ తుక చజితతి.

20 తుయి ఉట్ట ఉత్త గో, చి తుక కేనె కడ నెవుల గే, అన్మానుమ్ నెంతె జోవయింతెన్ బెద గో. ఆవ్వి జోవయింక తెద్రవ అస్సె” మెన సంగిలన్.

21 జాకయ్ పేతురు జేవ్ మాన్సుల్తె ఉత్త జా, “తుమ్ చజితోసా అవ్వి. కిచ్చోక జా అస్సున్?” మెన పుసిలన్.

22 జేవ్, “కొర్నేలీ మెలో పుంజెక్జిన్ జమాన్లుక వెల్లో మాన్సు అమ్క తెద్రవ అస్సె. జో దేముడుక బితోసా, సత్తిమ్ తిలోసా. తుమ్చ యూదుల్ ఎత్కిజిన్ జోక, చెంగిలో మాన్సు జో, మెన సంగితతి. జోక, జలె, దేముడుచో దూత ఎక్కిలో డీస కెర, పేతురుక బుకారవన్, చి జో కిచ్చో సంగెదె గే తుయి సూను, మెన సంగితికయ్, తుక కడ నెతి రిసా అమ్క జో తెద్రవ అస్సె” మెన జేవ్ తీగ్ల పేతురుక సంగిల. తెదోడి “అన్నిమ్ కా కెర, అజిక ఇన్నె నిద్ర తా” మెన పేతురు గెరి బుకారా, జేవ్క మరియాద కెర్లన్.

పేతురు కొర్నేలీతె గెలిసి

23 అన్నెక్ దీసి పెందలె ఉట్ట, పేతురు, జేవ్ తీగ్ల తెన్, చి యొప్పెతెచ ప్రబుక నంపజల అన్నె సొవ్వుజిన్ తెన్, కొర్నేలీతె గెచ్చుక బార్ జల.

24 అన్నెక్ దీసి కైసరియ పట్టుమ్తె పాచ, పట్టుమ్తె పెసిలె, కొర్నేలీ జోవయింక రకితె తా. ‘పేతురు కిచ్చో మెనెదె గే నూన్తు’ మెన, జోవయించ మాన్సుల్క, జోచ గోతుల్ ఎత్కిక బుకారా కెర తెయార్ జా అస్సి.

* 10:1 10:1 పుంజెక్ నయ్ న్యుమ్ మాన్సుల్క అదికారి

25 జలె, పేతురు జోచి గెరి పావితికయ్, కొర్నేలీ దన్నుల్ జా జోచి చట్టె సెర్ను సేడ జొకర్లన్.

26 గని పేతురు జోక ఉట్టవ కెర, “తుయి టీవోజ, ఆవ్ కి తుచి రితో మాన్సు” మెన, జో తెన్ అన్నె లట్టబై తా,

27 గేర్ తెడి పెసిలె, ఒగ్గర్జన్ జనాబ్ ఒత్త బెర అస్సి.

28 జలె, పేతురు జోవయింక తెదొడి, “ఆమ్ యూదుల్, జలె, యూదుల్ నెంజిలనచ గెరలె పెనుక జలె, యూదుల్ నెంజిలన తెన్ బెదుక జలె, అమ్క గారు మెన తుమ్ జాన్సు. గని, ఆవ్ కిచ్చొ గారు మెనుక జయె నాయ్, కక్క నిస్కారుమ్ దెకుక జయె నాయ్, మెన దేముడు అంక అప్పె దెకవ అస్సె.

29 జాక, తుమ్ సంగ తెద్రయ్తికయ్, కిచ్చొ అన్యానుమ్ నెంతె అయ్లయ్. జలె, కిచ్చొచి రిసా అంక బుకారా అస్సున్?” మెన పుసిలన్.

30 కొర్నేలీ కిచ్చొ జబాబ్ దిలన్ మెలె, “ఎదిలి వేలయ్, అప్పెక చెత్తర్ పొదుల్ జయెదె, ఆవ్ తిన్ని గంటల్ మెద్దెనె గెరి ప్రార్దన కెరై తతికయ్, చొక్కిల ఉజిడ తిల పాలల్ గలన తిలో ఎక్కిలో అంచి పురై టీవోజ, అంక,

31 ‘ఓ కొర్నేలీ, తుయి ప్రార్దన కెరై తతిసి దేముడు నూన అస్సె. తుయి బీద సుదల్క దర్ముమ్ దెతె తతిసి దెక అస్సె.

32 జాకయ్, యొప్పే పట్టుమ్తె, చమొ పికయ్తో సీమోను మెలో ఎక్కిలో నముద్దుమ్ సాడి జితయ్. జోచి గెరి గెచ్చు, ఒత్త తిలో పేతురు మెలో సీమోనుచి రిసా పుసుతు మెన మాన్సుల్క కబుర్ తెద్రవు.’ మెన అంక జో దేముడుచొ దూత సంగిలన్.

33 సంగిల్ బేగి, తుచితె కబుర్ తెద్రయ్లయ్, చి తుయి తుచి దయక అయ్లది. అల్లె, సంగు మెన ప్రబు తుక కిచ్చొ ఆడ్ర దాఁ అస్సె గే, జా నూనుక మెన అమ్ ఎత్కిజిన్ దేముడుచి నావ్ తెన్ బెర అస్సుమ్”.

34 పేతురు చోండి పుట్టవ కిచ్చొ మెన తెదొడి బోదన కెర్లన్ మెలె, “దేముడు తేడల్ దెకె నాయ్ మెన ఆవ్ అప్పె సిక అస్సి.

35 కేన్ దేసిమి కో జోక బితతి, జోచి కోడ్ రితి కెర్తతి గే, జోవయింక తేడల్ నే దెకితె, జో ‘అంచయ్ మాన్సుల్’ మెన చెంగిల్ దెకితయ్ మెన అప్పె దెక అస్సి.

36 “జలె, ఇస్రాయేలులు మెల ఆమ్ యూదుల్తె దేముడు తెద్రయ్లి కబుర్ తుమ్ జాన్సు. యేసుక్రీస్తుచి తెడి పాపుమ్ గెతి వాటు దొర్కు జలి, చి దేముడుక మాన్సుల్క అడ్డు నాయ్ గే, చి సేంతుమ్ దొర్కు జలి మెలి కబుర్ జా, జో యేసుయి ఎత్కిక †ప్రబుయి.

37 జలె, తుమ్ కెర్ల పాపల్క పెట్టి దుకుమ్ జా బాప్తిసుమ్ నజన, మెన యోహాను బోదన కెర కెర పాపుమ్ గెతి గుర్తుక బాప్తిసుమ్ దెతె తిలి తెంతో, గలిలయ ప్రాంతుమ్తె

మొదొల్ జా అమ్ యూదుల్చి ఒండి యూదయ ప్రదేసిమి జా సుబుమ్ కబుర్ నూనయ్ జా అస్సె.

38 మెలె, నజరేతు గవ్వి వడ్డ తిలో యేసుక ‘ఈంజొయి అమ్చొ ప్రేమ తిలో పుత్తు, ఈంజొయి దొర్కు జలో రచ్చించువ కెర్లొసా’ మెన దేముడు జోచి సుద్ది తిలి ఆత్తుచి గుర్తు దెకవ సెక్తి అదికారుమ్ దిలిసి జాన్సు. పడ్డొ, దేముడు జోవయించి పెట్టి తిలి రిసా, మాన్సుల్క చెంగిల్ దెకితె తా, సయ్తాన్ అల్లర్ కెర్లన ఎత్కిజిన్క చెంగిల్ కెరై తా యేసు బుల్తె తిలిసి తుమ్ జాన్సు.

39 “అమ్ యూదుల్చి ఒండి దేసిమ్ కి, అమ్చి యెరూసలేమ్ పట్టుమ్తె కి, జో యేసు కెర్లిసి ఎత్కిక అమ్ సాచి జా అస్సుమ్. గని జోక సిలువతె †టీవో కెర మార్ల.

40 దేముడు అబ్బొసి తిర్తత్క జోక అన్నె జయడ, జో అన్నె జిలిన్క మాన్సుల్ రుజ్జు దెకిత్ రితి డీనయ్లన్.

41 కక్క డీసిలో మెలె, ఎత్కిజిన్ ప్రైజల్క నాయ్, గని జో దేముడు నిసాన్ల ఆమ్ కీసాచుల్కయి డీసిలన్. జో జీవ్ జా ఉట్టి పడ్డొ, జో తెన్ సగుమ్ సుట్లు అన్నిమ్ కయ్లమ్.

42 జలె, అమ్క డీన కెర, ప్రైజల్ ఎత్కిక అంచి రిసా బోదన కెర, జితనక మొర్లనక ఆకర్ దీసిక అద్వి తీర్పు కెరుక మెన దేముడు అబ్బొ అదికారుమ్ దా అస్సె. సంగ మెన, జోచి రిసా ఆమ్ సాచి జంక మెన, జో యేసుయి అమ్క ఆడ్ర దాఁ అస్సె.

43 జోచి రిసా కో జోక సంపజవుల గే, జోచి నావ్ తెన్ జోవయించ పాపల్ కచితుమ్ చెమించువ జవుల మెన కబుర్ తెద్రయ్లన ఎత్కిజిన్ సాచి జతతి” మెన పేతురు బోదన కెర్లన్.

44 పేతురు దస్సి బోదన కెరై తతికయ్, దేముడుచి సుద్ది తిలి ఆత్తు జా కోడు నూన్లన ఎత్కిజిన్చి పెట్టి బెర్లి.

45 పడ్డొ యూదుల్చి గుర్తు తిలి సున్నతి కెరంతి ఆగ్గు సంప కెర్ల, పేతురు తెన్ జా తిల, ప్రబుక సంపజల మాన్సుల్ ఆచారిమ్ జల. యూదుల్ నెంజిల జేవ్ అన్నె మాన్సుల్చి పెట్టి కి దేముడుచి సుద్ది తిలి ఆత్తు ప్రబు సువ దిలిన్చి రిసా.

46 జా సువ దిలిన్క కిచ్చొ గుర్తు దెకిల మెలె, జేవ్ మాన్సుల్ జేవ్ నే సికిల బాసల్ తెన్ లట్టబ, దేముడుచి గపురుమ్ సంగితె తిల. దస్సి జతికయ్, పేతురు,

47 “అమ్క జా సుట్టు జర్గు జలి రితి, ఇన్నెచి పెట్టి కి దేముడుచి సుద్ది తిలి ఆత్తు దొర్కు జా అస్సె. జాకయ్ ఇన్నెక అమ్ బాప్తిసుమ్ దెంక కిచ్చొ అడ్డు నాయ్. కో ‘పోని’ మెనుక బెదె నాయ్” మెన సంగ,

48 “జేవ్ ఎత్కిజిన్ యేసుక్రీస్తుచి నావ్ తెన్ బాప్తిసుమ్ నజన్తు” మెన ఆడ్ర దిలన్.

† 10:36 10:36 ఎత్కిచి ఉప్పిరి వెల్లొ తిలోసా, ఎత్కిక ఏలువ కెర్లొసా. ‡ 10:39 10:39 మత్తయి 27:32. § 10:41 10:41 మత్తయి 28, మార్కు 16, లూకా 24, యోహాను 20, 21 అద్యయల్.

ఒత్త తెంతో “సగుమ్ దీనల్ ఇన్నె తా” మెన పేతురుక బతిమాల్పు జా సంగిల.

11

యూదుల్ నెంజిల సుదల్ రచ్చించుప జలిన్

1 యూదుల్ నెంజిల మాన్సుల్ కి *యేసుచి రిసాచి సుబుమ్ కబుర్ నూన నంపజా మార్పుప జా అస్తి మెన, సిస్సుల్ తెన్ యూదయ ప్రదేసిమ్చి నంపజలన ఎత్తిజిన్ సూన్.

2 జలె, సగుమ్ దీనల్ గెతికయ్, పేతురు యెరూసలేమ్తె ఉట్ట అయ్లన్. యేసుక నంపజల ఒత్తచ మాన్సుల్, యూదుల్ పేతురుక జేవ్ గోల కెర్ల.

3 “ఆమ్ యూదుల్చి గుర్చుచి సున్నతి నే కెరన్లనచ గెరలె కిచ్చొక గెలది? జోవయింతెన్ కిచ్చొక అన్నిమ్ కయ్లది?” మెన గోల కెర్ల.

4 గోల కెర్లయ్, జర్గు జలిసి ఎత్తి వర్చ తెన్ పేతురు సంగిలన్.

5 “ఆవ్ యొప్పే పట్టుమ్తె తా ప్రార్లన కెర్లె తిలయ్. ప్రార్లన కెర్లె తా, ప్రబుతె అంచి మెన్సు పూర్తి తతికయ్, ప్రబు దెకయ్లి సిన్చి ఏక్ దెకిలయ్. జా సిన్చితె, వెల్లి తెర రితిసి జేవ్చ చెత్తర్ కోనల్తె దెరయ్ జా, పరలోకుమ్ తెంతో ఉత్త జెతె అస్సె. అంచి పాసి ఉత్త అయ్లి.

6 ఆవ్ సరిగా దెకిలయ్, పొస్త మంద, డొంగుర్చ జంతువుల్, అయివో గట్ట, ఆగాసుమ్చ పిట్టల్ జా తెరచి ఉప్పిరి అస్తి.

7 “పడ్డో ఏక్ అవాడ్ సంగిలిసి సూన్లయ్, ‘ఓ పేతురు, ఉట్ట, కండ పోడ కా.’ మెన సంగిలిసి సూన్లయ్.

8 గని, ‘నెంజె, ప్రబు. ఆవ్ జెర్మిలి తెంతో కిచ్చొ గార్చి ఆవ్ కెయ్య కయి నాయ్’ మెన సంగిలయ్.

9 సంగితికయ్, పరలోకుమ్ తెంతో జా అవాడ్ అన్నెక్ సుట్టు లట్టబ, కిచ్చొ మెన జబాబ్ దిలన్ మెలె, ‘సుద్ది అస్సె. కంక జయెదె’ మెన, కిచ్చొచి రిసా దేముడు సంగెదె గే, జాక తూయి గారు మెనుక జయె నాయ్ మెన సంగిలన్.

10 తివ్వెర్ ఇసి జలి, చి పరలోకుమ్తె జా ఎత్తి అన్నె ఉక్కిల్ జలి.

11 ఉక్కిల్ జలి బేగి, కైసరియ పట్టుమ్ తెంతో అయ్ల మున్సుబోదల్ తీర్ల ఆమ్ తిలి గెరి పాచ అయ్ల.

12 “జోవయింతెన్ బెద గో మెన ప్రబుచి ఆత్మ అంక ఆడ్ర దెతికయ్, జోవయింక తేడ నే దెకితె, బెద గెలయ్. అమ్చి తెన్ బెద అయ్ల సొవ్యుజిన్ ప్రబుక నంపజలన కి, అంచి తెన్ గెల, చి యూదుడు నెంజిలో జో కొర్నేలీచొ గెరి పెసిలమ్.

13 ప్రబుచొ దూత జా దీసి జోచి గెరి టీచ సంగ తిలిసి అమ్క కొర్నేలీ సంగిలన్. దూత సంగ తిలిసి కిచ్చొ మెలె, ‘జెవుసు’ మెన సీమోను పేతురుక కబుర్ తెద్రవు. జో యొప్పేతె అస్సె.

14 జో అయ్లె, అంచి ఏక్ కబుర్ తుమ్క నూనఎదె. జా కోడు నూన నంపజలె, తూయి, తుమ్చి గేర్చ మాన్సుల్, సేవ కెర్లన, ఎత్తిజిన్, పాపుమ్ తెంతో రచ్చించుప జస్సె, మెన జోక దూత సంగ తిలన్.

15 “ప్రబుచి సుబుమ్ కబుర్ ఆవ్ సంగుక దెర్తికయ్, ఆమ్ సిస్సుల్క చి అమ్చి తెన్ నంపజల యూదుల్క జా సుట్టు జర్గు జలి రితి, జా గేర్చక కి జర్గు జలి. దేముడుచి సుద్ది తిలి ఆత్మ జోవయించి పెట్టి అయ్లి.

16 దస్సి జర్గు జతికయ్, ప్రబు అగ్గె సంగ తిలి ఏక్ కోడు ఏదన్ల కెర్లయ్. ‘యోహాను, పాని తెన్ బాప్తిసుమ్ దెతె తిలో, గని పడ్డొక దేముడుచి సుద్ది తిలి ఆత్మ తెన్ తుమ్క బాప్తిసుమ్ దెమ్దె’ †మెన యేసు సంగిలిసి ఏద కెర, ‘ఓహో, ఇన్నెతెన్ నెరవెర్చుప జలి’ మెన చినిలయ్.

17 “జలె, ఆమ్ యేసు ‡క్రీస్తు ప్రబుక నంపజతికయ్ దేముడు అమ్చి పెట్టి జోచి ఆత్మ తతి వరుమ్ కిసి దిలన్ గే, జో అప్పె జేవ్ యూదుల్ నెంజిలనక కి దస్సి వరుమ్ దిలన్ మెలె, ఆవ్ మాన్సు, ప్రబుక, తుచి ఇన్సుమ్ పొని మెనుక బెదెదె గె? బెదె నాయ్!” మెన పేతురు సాచి సంగిలన్.

18 ఈంజ సాచి నూన తా జేవ్ గోల కెర తిల బారికుల్, చి ప్రబుక అన్నె నంపజలన, అన్మానుమ్ తంక నెత్తిర్ల, చి “దస్సి జలె, యూదుల్ నెంజిల మాన్సుల్ కి పాపుమ్బుద్ది ముల దా ప్రబుక నంపజలె, జేవ్ కి జోచి నావ్ తెన్ రచ్చించుప జవుల” మెన సర్ల తెన్ దేముడుక గవురుమ్ కెర్ల.

యూదుల్ నెంజిల మాన్సుల్ ప్రబుక నంపజా మార్పుప జలిసి

19 స్తైపను బోదన కెర్లె తిలి తెంతో గోస జల మాన్సుల్ అల్లర్ కెర్లి రిసా చెదుర్చు జా తిల యేసుక నంపజలన, ఈంజ మదెనె, ఉత్తర పక్క గెచ్చు, సముద్దుమ్చి పాసి తిలి పేనీకే ప్రాంతుమ్ ఎద పడ్డో సముద్దుమ్ ఒత్తల్తోచి కుప్ర, డిబ్బ దేసిమ్ ఎద, పడ్డో సిరియ ప్రదేసిమ్చి అంతియొకయ పట్టుమ్ పక్క బుల బుల, తెదొడి ఎద ఎక్కి యూదుల్కయ్ ప్రబుచి కీసుబుమ్ కబుర్ సికడై తిల.

20 గని అన్నె సగుమ్జిన్, కుప్ర డిబ్బ దేసిమ్చ, అన్నె జాక దచ్చెన పక్క తిలి సముద్దుమ్ ఒత్తల్తో తిలి కురేనియ పట్టుమ్చ, జా అంతియొకయ పట్టుమ్తె జా కెర, గ్రీకు

* 11:1 11:1 మెలె, ‘ఎత్తి అదికారుమ్ తిలో దేముడు దిలి సుబుమ్ కబుర్’. 6:7, 8:14 దెక. † 11:16 11:16 యోహాను 1:5. ‡ 11:17 11:17 ‘క్రీస్తు’ మెలె, ఎత్తి అదికారుమ్ తిలో దేముడు పూర్ణమ్ తెంతో ‘తెద్రయిందె’ మెన టీచడ్డో దొర్చు జలో రచ్చించుప కెర్లెసా. § 11:19 11:19 ‘సుబుమ్ కబుర్’ మెలె, ఎత్తి అదికారుమ్ తిలో దేముడు దొర్చు కెర్లి రచ్చుచి కోడు. జో పాపల్ చెమించుప కెర్లిచి రిసాచి కబుర్. యేసుయి దొర్చు జలో రచ్చించుప కెర్లెసా జతిచి కబుర్. జో అర్చితుమ్ జా పాపల్ గెచ్చయలి రిసా మాన్సుల్ పరలోకుమ్చి రాజిమ్తె బెదితి అవ్కాసుమ్ దొర్చు జలిన్చి కబుర్.

బాస లట్టబై యూదుల్ నెంజిలసక కి యేసుప్రబుచి రిసాచి సుబుమ్ కబుర్ బోదన కెర్ల.

21 జేవ్ బోదన కెర్లసక ప్రబు తోడు తతికయ్, జేవ్ గ్రీసు దేసిమ్చ సుదల్తె ఒగ్గర్జిన్ ప్రబుక నంపజా మార్పువ జల.

బర్నబాక అంతియొకయతె తెద్రయ్లిసి

22 ‘ఒత్తచ యూదుల్ నెంజిలస కి ప్రబుక నంపజా మార్పువ జా అస్తి’ మెన యెరూసలేమ్ పట్టుమ్చి సంగుమ్చ నంపజల యూదుల్ సూన కెర, బర్నబాక ఒత్త జా సిరియ ప్రదేసిమ్చి అంతియొకయతె తెద్రయ్ల.

23 జో ఒత్త పావ కెర, ‘జోచి దయచి రిసా దేముడు జేవ్ యూదుల్ నెంజిలసక వరుమ్ దా ఈంజ ఎత్తి జర్గు కెర అస్సి’ మెన రుజ్జుల్ దెక, సర్ల జలొ, అన్నె, “తుమ్ ప్రబుక ఏక్ మెన్సు నిదానుమ్ తా” మెన జోవయింక దయిరిమ్ సంగ బోదన కెర్లన్.

24 జో బర్నబా చెంగిలొ మాన్సు. జోచి పెట్టి దేముడుచి సుద్ది తిలి ఆత్మ పూర్తి కామ్ కెర్తి బుద్ది, ప్రబుచి ఉప్పిర్చి నముకుమ్, బెర తిలి. బర్నబా సగుమ్ దీసల్ ఒత్త తా బోదన కెర్తికయ్, అన్నె ఒగ్గర్జిన్ మాన్సుల్ ప్రబుక నంపజా మార్పువ జల.

బర్నబా సావుల్క ఒత్త కడ నిలిసి

25 ‘తోడు జెవున్’ మెన సావుల్క సంగుక మెన, బర్నబా తార్పు పట్టుమ్తె ఉట్టు గెలన్.

26 జోక అంతియొకయ పట్టుమ్తె కడ ఆన్లన్, చి వెర్సెక్ పూర్తి ఒత్త తా, ప్రబుక నంపజలసచి ఒత్తచి సంగుమ్తె బెదితె తా, ఒగ్గర్ ఒగ్గర్జిన్ మాన్సుల్క సరిగా బోదన కెర్ల. ఒత్త, యేసుక నంపజా సిస్సుల్ జలసక తొలితొ అంతియొకయతెయి ‘నంపజలస’ మెన సంగయ్ జల.

27 జేవ్ పొదులె, అన్నె కిచ్చొ జర్గు జలి మెలె, *ప్రబుచ †కబుర్లు సంగిత నంపజలస సగుమ్జిన్ అంతియొకయతె అయ్ల.

28 జోవయింతె ఎక్కిలొ, అగబు. జో జలె, సబతె టీవ, ప్రబుచి సెక్తిచి రిసా ప్రబుచి కిచ్చొ కబుర్ సంగిలన్ మెలె, ‘వలాన్ సమయుమ్క ఒండి లోకుమ్తె ఒగ్గర్ కరువు జెయదె’ మెన కబుర్ సంగిలన్. కేన్ కాలుమ్ జో సంగిలి కరువు జర్గు జలి మెలె, క్లాదియ రానొ ఏలుప కెర్తె తిల పొదులె జర్గు జలి.

29 అంతియొకయతె తిల ప్రబుచ ‡సిస్సుల్, జలె, జా కరుచి రిసా సూన కెర, సబ కెర కిచ్చొ ఉచర్ల మెలె, “కచి సెక్తి తిలి ఎది, జేవ్ డబ్బుల్ ఉక్కుల్మ, చి యూదయ ప్రదేసిమి

తిల అమ్చ నంపజలస బావుడ్లుక తోడు తెద్రవుమ్దె” మెన,

30 డబ్బుల్ ఉక్కుల, యెరూసలేమ్చి సంగుమ్చ వెల్లెల మాన్సుల్క అంట దెతు మెన, బర్నబా చి సావుల్చి అత్తి ఒత్త యెరూసలేమ్తె తెద్రయ్ల.

12

హేరోదు రానొ నంపజలసక అల్లర్ కెరుక

1 జా కరువు నే జతె అగ్గె, *హేరోదు రానొ యెరూసలేమ్ పట్టుమ్చి సంగుమ్చ నంపజలస సగుమ్జిన్క అల్లర్ కెరుక దెర్లన్.

2 జోవయింతె ఏక్ దీసి జేవ్ యేసుచ బారికుల్తె ఎక్కిలొక కండ మార్లన్. యోహానుచొ యాకోబు మెలొ అన్నొన్క.

3 ‘యాకోబుక మార్లి రిసా మాములుమ్ యూదుల్చ వెల్లెల మాన్సుల్ సర్ల జల’ మెన రానొ దెక, “పేతురుక కి మారిందె” మెన ఉచర, జోక కి జేలి కెర్లొ. గని, నే పులయ్ల పొడియొ కతి యూదుల్చి పస్కా పండుగు జా తిలి రిసా ‘అప్పె మారుక నెంజె’ మెన,

4 పేతురుక దెర జేలి కెర, ‘పండుగు కేడ్లె, పైజల్ సాచి జతి రితి సబ కెర మారిందె’ మెన, ఉచర, ‘ఎక్కి దడి చెత్తర్జిన్ జమాన్లు జోక రకుత్’ మెన సొడ జిన్ జమాన్లుక నిసాన్లన్. చెత్తర్జిన్ సావుస్ గంటల్ రకిలె అన్నెక్ చెత్తర్జిని సావుస్ గంటల్ రకుక.

5 దస్సి పేతురుక జేల్తె రకితె తిల, గని జా యెరూసలేమ్తెచి సంగుమ్ సుదల్ పేతురుచి రిసా దేముడుక ప్రార్లన కెరుక ములితి నాయ్. జేవ్ దస్సి ప్రార్లన కెర్తె తతికయ్,

6 కలిక జోవయింక బార్ కెర తీర్పు కెర మారిందె, మెన పండుగు కేడ్డికయ్ హేరోదు ఉచర్లన్. మదెనె పేతురుక కిసి అస్సి మెలె, జా రాతి, జోక ఏక్ పక్కయ్ ఎక్కిలొక, అన్నెక్ పక్కయ్ ఎక్కిలొక తా, దస్సి దొగుల జమాన్లుచి నెడిమి జో నిజయి అస్సి. పేతురుచ అత్తిలె గొల్సుల్ బందయ్ తిల. పడ్డొ జేల్ చి కెచ్చితె దొగుల జమాన్లు రకితె అస్తి.

7 జలె, పేతురు దస్సి జేలితె తతికయ్, ప్రబుచొ దూత ఎక్కిలొ జా కెర, జోచి పాసి టీవో జలన్, చి జా ఒండి గదితె వెల్లి ఉజిడి లగిలి. తెదొడి పేతురుక పక్కయ్ పెట, ఉట్టవ, “బేగి ఉట్టు” మెన సంగిలన్. బేగి, జోచ అత్తిచ గొల్సుల్ కున్ల గెల.

8 పడ్డొ, “తెయార్ జా జోడ్లు గలన” మెన దూత సంగిలన్. జో సంగిలి రితి పేతురు కెర్లన్, చి “తుచి డుప్పటి పంగుర్చి

* 11:27 11:27 యేసుప్రబు దేముడు అబ్బొన్చి ఉజెతో పక్క వెన జోవయింతెన్ ఏలువ కెర్లయ్; ఎబ్రియల్ 1:13. జాచి రిసా ‘ప్రబుచ కబుర్లు’ మెలె, అబ్బొన్చ యేసుచ కి జవుల. † 11:27 11:27 ‘ప్రబుచ కబుర్లు సంగితన్’ మెలె, జోచి అత్తి జోవయిం చి చొడి పుట్టయ్లె, జోచ కబుర్లు జేవ్ సంగుల. ‡ 11:29 11:29 బారికుల్ 9:1చి ఎట్టొచి కోడు దెక. * 12:1 12:1 హేరోదు రానొ రోమ్ దేసిమ్చి ప్రబుతుమ్చి తెడి ఏలువ కెర్తె తిలన్.

అంచి పట్టి జె” మెన దూత సంగితికయ్, సంగిల్ రితి పేతురు కెర్లన్.

9 దూతచి పట్టి ఇండ బార్ జా గెలన్, గని దూతచి అత్తి జర్గు జలిన్క ‘నిజుమి జర్గు జతయ్’ మెన నేనె. ‘ఈంజ సిన్న దెకితసి’ మెన జో ఉచర్లయ్.

10 జలె, రకితోసా ఎక్కిలోక ఒత్తల్తో జీన, అన్నెక్లొక ఒత్తల్తో కి జీన, పట్టుమ్తె ఉత్తిర్తి గుమ్ముమ్చి ఇనుముచి టట్టతె పావ అయ్లె, కిచ్చో జర్గు జలి మెలె, జాచి ఇష్టుమ్క జా ఇనుము టట్ట ఉగ్గి జలి, చి పేతురు దూతతెన్ బార్ జా ఏక్ వీది జీనై, బేగి దూత జోక ములిలన్.

11 ‘సిన్న నెంజె, నిజుమి జర్గు జలి’ మెన పేతురు అప్పె పూర్తి అర్దుమ్ కెరల్లన్, చి “హేరోదు జేలి కెర్లిసి తెంతో, గోస జల యూదుల్ ఉచర్లిసి ఎత్తి తెంతో, ఆవ్ విడ్డల్ జతి రిసా ప్రబు జోచో దూతక తెద్రయ్లో మెన, అప్పె కచితుమ్ జాని” మెన చెంగిల్ ఉచర.

12 ఉచర, వట్టె గెచ్చ, మార్కు మెన అన్నెక్ నావ్ తిలో యోహాను మెలోసాచి అయ్యన్ మరియచి గెరి పావెలన్. ఒత్త ఒగ్గర్జిన్ మాన్సుల్ బెర, జోచి రిసా ప్రార్లన కెర్తె అస్తి.

13 గుమ్ముమ్చి కెప్లితె జో పెట అవాడ్ కెర్తె, రోదే మెలి తేర్బోద దాక్ నాడి కెప్లి ఉగుడుక అయ్లి.

14 పేతురుచి అవాడ్ సూన, జాచి ఒగ్గర్ సర్ల సంతోసుమ్క ఉగుడుక పచ్చ కెర, గెరి నిగ గెచ్చ, పేతురు కెప్లి పాసి టీవెలిసి మెన సంగిలి.

15 “తుయి వెర్రి జా అస్సిన్” మెన, ఎత్తిజిన్ జాక సంగిల. గని, “నాయ్, నిజుమి, జో జా అస్సె” మెన, జా దయిరిమ్ తెన్ సంగితికయ్, “జోచో †దూత కిచ్చోగె జా తయెదె” మెల.

16 గని పేతురు కెవ్డిక పెట అవాడ్ కెరుక ములె నాయ్, చి సూన, ఉగుడ, జోక దెక ఆచారిమ్ జల.

17 జో, జలె, ‘తుక్లె తా’ మెల సయగ కెర, జో జేలితె తిలె, జేల్తె తెంతో ప్రబు విడ్డల్ కెర్లిసి ఎత్తి కిసి జర్గు జలి గే పూర్తి సంగ కెర, “యేసుచో బావోసి జలి యాకోబుక చి బావుడ్లు జల నంపజలన ఎత్తిక ఈంజ ఎత్తి తుమ్ సూనవ” మెన సంగ, పేతురు వేరతె ఉట్ట గెలన్.

అదికారుల్ పేతురుక నే డిసిలి రిసా జర్గు జలిసి

18 పెందలె, పేతురుక ‘విడ్డల్ జా అస్సె’ మెన జాన్తికయ్, జమాన్లు బమ్మ జా ఒగ్గర్ అల్లర్ జల.

19 “పేతురుక జేల్తె తెంతో భార్ కెర ఆన్తు” మెన హేరోదు ఆడ్ర దిలన్, గని ‘డిసె నాయ్’ మెన సూన, రకితనక పరిచ్చ కెర, జోవయింక మొర్తి సిచ్చ దా, జా యూదయ ప్రదేసిమ్చి యెరూసలేమ్ పట్టుమ్ ముల దా సముద్రుమ్

పక్కచి జా ప్రదేసిమ్చి కైసరియ పట్టుమ్తె గెచ్చ, ఒత్త తెంతో ఏలుప కెర్తె తిలో.

20 ఉత్తర పక్కచ తూరు పట్టుమ్చ, సీదోసు పట్టుమ్చచి రిసా హేరోదు ఒగ్గర్ పెట్టపెట్టి జలో. జాకయ్ జేవ్ పట్టుమ్చ ఒగ్గర్జిన్ బెద జా, హేరోదుచి మేడతె జా కెర, రానోచో గేర్క దెకితో మంత్రి జలో బ్లాస్టు మెలోసా తెన్ సినేతుమ్ కెరన, ‘రానో అమ్క సేంతుమ్ దెకున్’ మెన జోవయించి అత్తి సంగ తెద్రయ్ల. జోవయించి పేనీకే ప్రాంతుమ్తె కరువు తతికయ్, జో రానో ఏలుప కెర్తి గలిలయ ప్రాంతుమ్తెచ దాన్ జేవ్ కా కా జతతి. జేవ్ జా కంక జో రానో నే ఒప్పిలెగిన, చూక మొరుల.

21 జాకయ్, జో సంగిలి ఏక్ దీసి, హేరోదు, రానో జలి గుర్తు దెకయ్త జోవయించ చెంగిల పాలల్ ఎత్తి గలన, సింగాసనుమ్తె వెన, జోవయింక జోయ్యి గవురుమ్ ఆనన్తి రితి, బెర తిల జేవ్ మాన్సుల్క తెలివి తెన్ బోదన కెర్లన్.

22 దస్సి జతికయ్, పైజల్, “ఇన్నెక మాన్సు మెలమ్, గని మాన్సు నెంజె. ఈంజో లట్టబ్లె, దేముడు లట్టబ్లి రితి జతయ్!” మెన కేకుల్ గల పులయ్ల.

23 ‘దేముడు’ మెన పులయ్లె, జో ‘నెంజి’ మెనె నాయ్, ‘జోయ్యి దేముడు’ మెన దేముడుక గవురుమ్ కెరె నాయ్, చి బేగి, దేముడుదూత ఎక్కిలోచి అత్తి జోక మొర్తి సిచ్చ దిలన్, చి జో జితె తస్తె, కిచ్చో జోచి ఆగ్ కా గెల, చి మొర గెలన్.

24 గని ప్రబుచ సిస్సుల్ జోచి సుబుమ్ కబుర్ బోదన కెర్తె తిల, చి అన్నె ఒగ్గర్జిన్ ప్రబుక నంపజా మార్కుప జల.

25 హేరోదు రానో మొర గెచ్చ సగుమ్ దీసల్ గెలి పడ్డో, క్లోవుదియ రానో ఏలుప కెర్తె తిల పొదులె, బర్నబా సాపులు యెరూసలేమ్తె గెచ్చ, ‘కరువుక అల్లర్ జల మాన్సుల్క దెంక’ మెన, అంతియొకయతెచ నంపజలోస ఉక్కిలి డబ్బుల్ న దా జోవయించి కామ్ కేడవ కెర, బర్నబాచో సల్లోసి జలో మార్కు మెలో యోహానుక దెరన, యెరూసలేమ్ తెంతో ఉట్ట అయ్ల.

13

ప్రబు బర్నబాక చి సాపుల్క తెద్రయ్లిసి

1 అంతియొకయతెచ సంగుమ్తె ప్రబుచ కబుర్లు సంగితన సగుమ్జిన్చి, ప్రబుచి రిసా బోదన కెర్లన సగుమ్జిన్ తిల. జోవయింతె, బర్నబా, పడ్డో ‘సిడ్డొస్’ మెలో సుమెయోను, పడ్డో కురేనియు పట్టుమ్చో లూకియ, చెత్తర్ ప్రాంతుమ్లు ఏలుప కెర్తె హేరోదు మెలో రానోచి జతతె వడ్డిలో మనయేను, పడ్డో సాపులు.

2 ఏక్ దీసి జేవ్ ఎత్తిజిన్ ఎక్కితె తా చువ్వె తా ప్రబుక ప్రార్లన కెర్తె తతికయ్, జోవయింక దేముడుచి సుద్ది తిలి ఆత్మ

† 12:15 12:15 యూదుల్ తెన్ సగుమ్జిన్ కిచ్చో ఉచర్ల మెలె, ఎత్తి మాన్సుక వరలోకుమ్తె ఏక్ దూత తయెదె.

ఇసి సంగిలన్, “ ‘అంచి ఏక్ వెల్లి కామ్ కెర్తు’ మెన, బర్నబాక చి సాపుల్క ఆవ్ నిసాన అస్సి. జా కామ్చి రిసా అంచి అత్తి ఇన్నెక తుమ్ సార్ప కెర దెతి గుర్తు కెర” మెన సంగిలన్, చి
 3 అన్నె చువ్వె తా ప్రార్దన కెర జేవ్ దొగులక బోడి చడ తెద్రవ దిల.

4 దేముడుచి సుద్ది తిలి ఆత్మ దస్సి తెద్రయ్ తికయ్, బర్నబా చి సాపులు, సముద్రుమ్చి ఒడ్డుతెచి సెలూకయ్ పట్టుమ్తె ఉట్ట గెచ్చు, ఓడతె వెగ, సముద్రుమ్ జీన, సయ్ ప్రస్ కుప్ర దేసిమి ఉట్ట అయ్ల.

5 తొలితో జా దేసిమ్చి సలమీ పట్టుమ్తె గెచ్చు, యూదుల్చ సబ గెరలె * యేసుచి రిసాచి సుబుమ్ కబుర్ సూనవ, సాచి సంగిల. మార్కు మెలో యోహాను జోవయింతెన్ తోడు అయ్లో.

6 ఒత్త తెంతో జా సయ్ ప్రస్ దేసిమ్చి ఒత్తల్తో పక్కచి పాపు మెలి వెల్లి పట్టుమ్తె గెలె, దీసరి జా గార్డేల్ మాయల్ కెర్తో ఎక్కిలో అస్సి. ‘యేసుచొ పుత్తుసి’ మెలి అర్దుమ్ తెన్, ‘బర్యేసు’ మెలి నావ్ జో తియన అస్సి. జో యూదుడు జెర్మిలోసా, గని ఆరిక, ‘దేముడుచి కబుర్ ఈంజ’ మెన, సయ్ తాన్ సికడ్లి కోడు జో సంగెదె.

7 జా దేసిమి ఏలుప కెర్తో అదికారితె తయెదె. జో అదికారిచి నావ్ కిచ్చొ మెలె, ‘సెర్గి పవులు’. జో తెలివి మాన్సు జయెదె. జో కిచ్చొ కెర్తో మెలె, దేముడు దిలి † సుబుమ్ కబుర్ సూనుక ఇస్టుమ్ జా, బర్నబాక చి సాపుల్క బుకార్లన్.

8 జలె, ఎలుమ మెన నావ్ తియన్లో దీసరిక సంగుల. జా నావ్చి అర్దుమ్, దీసరి. జో అప్పె, ‘అదికారి క్రిస్తుక నంపజా మార్పుప జవున్ నాయ్’ మెన, సాపుల్క చి బర్నబాక అడ్డు కెరుక గెలో.

9 రోమ దేసిమ్చి బాస తెన్ ‘పవులు’ మెన అన్నెక్ నావ్ తిలో జో సాపులు, దేముడుచి సుద్ది తిలి ఆత్మచి సెక్తి జోవయించి పెట్టి బెర్రికయ్, జో ఎలుమక చెంగిల్ దెక,

10 “సయ్ తాన్చొ పుత్తుసి జస్సె, తుయి. తుచి పెట్టి మాయబుద్ది, ఒగ్గర్ గార్చి, పాపుమ్ తెన్ అస్సిన్. సత్తిమ్ ఎత్తిక విరోదుమ్ జస్సె, తుయి, సోగ తిల ప్రబుచ వట్టో వంకడ కెర్తో మాయల్ కెయ్ క ములితె?

11 ఈందె, ప్రబు తుక అప్పె సిచ్చు దెతయ్. తుయి గుడ్డి జా అప్పెచి మట్టుక పొద్దుక కి దెకిన్ నాయ్” పవులు సంగిలన్. సంగిల్ బేగి, జో మాన్సుక అంకివొతె గాండు డంకిలి రితి జా, పూర్తి గుడ్డి జలో, చి జోక ఎత్తి అందర్ జలి.

* 13:5 13:5 మెలె, ‘ఎత్తి అదికారుమ్ తిలో దేముడు దిలి సుబుమ్ కబుర్’. † 13:7 13:7 యేసుచి రిసాచి సుబుమ్ కబుర్. ‡ 13:15 13:15 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్ లి అగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సి. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్నుమ్చొచి అత్తి రెగ్గి దేముడుచ ఆగ్గుల్ మెన రగ్గవ అస్సి. § 13:17 13:17 అదికాండుమ్ 12 అద్యయమ్ తెంతో. * 13:17 13:17 అదికాండుమ్ 46 అద్యయమ్. † 13:17 13:17 నిర్గమకాండుమ్ 1 అద్యయమ్ తెంతో. ‡ 13:18 13:18 నిర్గమకాండుమ్, లేవీయకాండుమ్, సంక్యాకాండుము, ద్వివీయోపదేశ కాండుము. § 13:19 13:19 యోహోసువ. * 13:20 13:20 న్యాయాదివతులు.

ఒత్త తెంతో, అంక ఆతు దెర కో జలెకు అంక వాటు దెకయ్ తు ఎక్కిలో ఇండుక నెత్త కెర బతిమాల్పా జా ఏడ్డె తిలన్.

12 అదికారి, మాత్రుమ్, జర్గు జలిసి దెక కెర, ప్రబుచి చి సెక్తిచి రిసా జలె ఆచారిమ్ జా ప్రబుక నంపజలన్.

పవులు పిసిదియ ప్రాంతుమ్చి అంతియొకయతె బోదన కెర్గిసి

13 తెదొడి పవులు, జోవయింతెన్ తిలస, పాపు పట్టుమ్ ముల దా, ఓడతె వెగ సముద్రుమ్ జీన, అన్నె ఇండ గెచ్చు, పంపూలియా ప్రదేసిమ్చి పెర్గే పట్టుమ్తె అయ్ల. జేవ్ ఒత్త తిలి పొది, మార్కు మెలో యోహాను జోవయింక ముల దా, యెరూసలేమ్తె అన్నె ఉట్ట గెలన్.

14 పాపులీసి, మాత్రుమ్, ఇండ గెచ్చు పెర్గే జీన, గలతీయ ప్రదేసిమ్చి పిసిదియ ప్రాంతుమ్చి అంతియొకయ మెలి పట్టుమ్తె పావిల. బక్తి కెర్తి సెలవ్ కడన్ల దీసి, యూదుల్చ సబగేరి పెన, వెసిల.

15 † మోసే పూర్నుమ్చొచి అత్తి దేముడు రెగ్గయ్ల ఆగ్గుల్ జలెకు, పూర్నుల్చి అత్తి సంగిల దేముడుచ కబుర్లుచి ఏక్ వాట కో గే వెల్లో మాన్సు సదు కెర్రికయ్, “ఓ బావుడ్డు, ప్రెజల్క కిచ్చొ బోదన సంగితె గే సంగ” మెన పాపులీసిక జా సబగేర్చ అదికారుల్ పురె బుకార్ల.

16 జాకయ్, పవులు ఉట్ట, ప్రెజల్క ‘సూన్తు’ మెలి గుర్తుక ఆతు తెన్ సయ్న కెర, “ఓ ఇస్రాయేలులు మెల అమ్చ యూదుల్, పడ్డె అమ్చొ దేముడుక బిత తుమ్ యూదుల్ నెంజిలస, సూన.

17 ఇస్రాయేలులు మెల అమ్చ పూర్నుల్క ‘అంచయి మాన్సుల్ జతు’ మెన పరలోకుమ్ తిలో అమ్చొ దేముడు కిసిసాన్లన్. సగుమ్ దీసల్ గెతికయ్, జేవ్ * ఐగుప్తు దేసిమి ఉట్ట గెచ్చు ఒత్త అల్లర్ తెన్ తతికయ్, జోవయింక చెంగిల్ దెక, జో ప్రబు, జోవయించి సెక్తిక, జోవయింక ఒత్త తెంతో † విడ్డల్ కెర బార్ కెర్లన్.

18 జేవ్ † దొన్ని విసా వెర్పులు బయిలు దేసిమి బుల్తె తిలి పొది, జోవయించ నిడ్డు ఓర్పువ జా, జోవయింక నిదానుమ్ దెకితె తిలన్.

19 ఒత్త తెంతో, కీకనాను దేసిమ్తె సత్తు జాతివొచ మాన్సుల్క యుద్దుమ్తె అమ్చ పూర్నుమ్చ జీనీతి రితి జో జర్గు కెర, ‘ఈంజ దేసిమి ఈంజేవ్ జతు, ఇన్నెచి సొంత టాన్ జవున్’ మెన జోవయింక దొర్కు కెర్లన్.

20 “పడ్డొ, రమారమి చెత్తర్ పుంజొ యాబయ్ వెర్పుల్ గెతికయ్, జోవయించ కబుర్లు సంగితొ సమూయేలు మెలో పూర్గుమ్చొచి కాలుమ్ ఎద, ‘ఇన్నెక ఏలుప కెర్తు’ మెన, నాయిమ్ వాట్ దెకయ్త ఎక్కిలోచి పడ్డొ అన్నెక్కో *తీర్పు కెర్తస రితసక జో దేముడు అదికారుమ్ దిలన్.

21 “పడ్డొ, †‘అమ్క రానొ కావలె’ మెన అమ్చ పూర్గుమ్చ బతిమాల్ప జా సంగితికయ్, రానొక జో ప్రబు టీవడ్లన్. కొన్నొ తొలితొ జోవయింక రానొ జలో గే తుమ్ జాన్సు. బెన్యామీను చి వంసుమ్చొ కీషు మెలోసాచొ సావులు మెలో పుత్తుసి అమ్చొ తొలితొచొ రానొ జలో. జో దొన్ని విసా వెర్పుల్ ఏలుప కెర్తన్.

22 “పడ్డొ సావుల్క దూర్ కెర కెర, ‘రానొ జవున్’ మెన ‡దావీదుక నిసాన జో ప్రబు అదికారుమ్ దిలన్. జో దావీదుచి రిసా ఇసి సంగిలన్ ‘యెస్సయిచొ పుత్తున్ దావీదుక ఆవ్ నిసాన అస్సి. జోచి రిసా అంక సర్ద, అంచి పెట్టిచి ఇస్టుమ్ రితి జో నిదానుమ్ కెరెదె.’

23 “ ‘అమ్చ ఇస్రాయేలులుతె జెర్మ పాపుమ్ గెచ్చయ్తొ రచ్చించుప కెర్తొసా జవున్’ మెన పూర్గుమ్ తెంతొ ప్రమానుమ్ సంగిల్ రితి జర్గు కెర, జో అమ్చొ దేముడు ఈంజొ దావీదుచి సెకుమ్తె యేసుకయ్ జెర్మవ టీవడ అస్సి.

24 జో నే బార్ జతె అగ్గె, అమ్చి ఒండి ఇస్రాయేలు పైజల్క, ‘తుమ్ కెర్ల పావల్క పెట్టి పూర్తి దుకుమ్ జా బుద్ది జా, జా గుర్కుక బాప్తిసుమ్ నజన’ మెన బోదన కెర యోహాను బుల్లె తిలన్.

25 యోహాను జోచి కామ్ కెర కేడయ్తె తిల ఖొదులె, జోక ‘ఈంజొయి ఏక్ వేల అమ్చొ దేముడు పూర్గుమ్ సంగ తిలో రచ్చించుప కెర్తొసా జయెదె’ మెన నగుమ్జిన్ మాన్సుల్ ఉవర్తికయ్, అంక కో మెన ఉవర్తసు? దొర్కు జలో జో రచ్చించుప కెర్తొసా ఆవ్ నెంజి. గని అంచి పడ్డొ ఎక్కిలో జెయెదె. జో గలన్ల జోడ్లుచ వాలివొ యిప కడుక కి అంక విలువ నాయ్, మెన యేసుచి రిసా †యోహాను సాచి సంగిలన్” మెన పవులు సంగిలన్.

26 పడ్డొ పవులు అన్నె ఇసి సంగిలన్, “ఓ అమ్చొ పూర్గుమ్చొ అబ్రాహామ్చి సెకుమ్చ అమ్చ బావుడ్లు, అమ్చొ దేముడుక బిత తుమ్ అన్నె మాన్సుల్, ఈంజ రచ్చనచి రిసా ‘దొర్కు జలి’ మెన జో అమ్క కబుర్ తెద్రవ అస్సి.

27 యేసుక ‘దేముడు తెద్రయ్లో రచ్చించుప కెర్తొసా జొయ్యి’ మెన యెరూసలేమ్తెచ యూదుల్, జోవయించ అదికారుల్ తెన్ చినితి నాయ్. జోవయించి రిసా పూర్గుమ్

దేముడు సంగ రెగ్గయ్ల కొడొ అమ్చ యూదుల్ ఎత్తి సెలవ్ కడన్లి దీసి నదు కెర్తతి, గని అర్దుమ్ నే కెరన, ‘జోక మొర్తి సిచ్చ దెమ’ మెన తీర్పు కెర, జా దేముడుచ కొడొతె రెగిడ్డిసి నెరవెర్పుప కెర్ల.

28 మొర్తి సిచ్చ జతి కేన్ తప్పు జో నే కెర తిలె కి, జోవయింక జేవ్ పాపుమ్ వయడుక నెత్తిరె కి, ‘మొర్పు’ మెన *పిలాతు అదికారిక బలవంతుమ్ కెర, మొరవ.

29 జోచి రిసా పూర్గుమ్ రెగిడ్డిసి ఎత్తి జేవ్ నెరవెర్పుప కెర, సిలువ తెంతొ జోచి పీనుమ్ ఉత్తవ కెర, మెన్నె ఎంగ్డవ దిల.

30 జేవ్ దస్సి మార్లె కి, అమ్చొ దేముడు జోక అన్నె జియడ్డొ.

31 జలె, యేసు నే మొర్తె అగ్గె, గలిలయ ప్రాంతుమ్ తెంతొ యెరూసలేమ్ ఎద జోచ సిన్సుల్ జో తెన్ బెద జా తిల. జో †జీవ్ జా ఉట్ట, ఒగ్గర్ దీనల్ జోక డీస్తె తిలో. జాకయ్ జేవ్ సిన్సుల్ జోచి రిసా పైజల్ ఎత్తిక నూనయ్త సాచుల్ జా అస్సి.

32 ఆము కి, ‘దేముడు అమ్చ పూర్గుల్క ప్రమానుమ్ సంగిలిసి జెయిమ్ జా అస్సి’, నుబుమ్ కబుర్ నూనయ్తి రిసా ఇత్తల్ జా అస్సుమ్.

33 జో ప్రబు పూర్గుమ్ ప్రమానుమ్ సంగిలిసి అమ్చ పూర్గుల్చ బోదల్ జల ఆమ్ యూదుల్క వరుమ్ దెతి రితి జో కీసి జర్గు కెర అస్సి మెలె, యేసుక అన్నె జియడ అస్సి. దొన్ని కిర్తనుమ్తె అమ్చొ జో ప్రబు కిచ్చొ మెన యేసుచి రిసా రెగ్గయ్లో, ‘తూయి అంచొ పుత్తు, తుకయ్ ఆజి పాయిలయ్.’, మెన రెగ్గయ్లన్.

34 ‘క్రీస్తుక మారుల, గని మొర్పుతె తయె నాయ్. జియడిందె. మొర్పుతె అన్నె గెచ్చె నాయ్’ మెలి అర్దుమ్ తెన్ జో అన్నె కిచ్చొ సంగ రెగ్గయ్లన్ మెలె, దావీద్క అవ్ సజిలి రితి, తుక కచితుమ్ జేవ్ నుద్ది తిలి వరల్ దెయిందె” మెన సంగిలన్.

35 జాకయ్, అన్నెక్ కిర్తనుమ్తె రెగిడ్డి రితి, వరలోకుమ్చి నుద్ది తిలో ఆవ్ పుత్తుచి మొర్పుతె తతి రితి అంచి ఆగు కువుక తుయి ఒప్పిసి నాయ్, మెన దావీదు రెగిడ్లన్.

36 “దావీదు, జలె, జోచి కాలుమ్ దేముడు జోక దిలి కామ్ కెర కేడవ మొర్తికయ్, జోచ పూర్గుల్క రోవిలి రితి జోక కి రోవిల, చి మొర్పుతె తా గెలన్.

37 గని, దేముడు అన్నె జియడ్డొసా, జలె, ఎద్గరె నే కువితె, మొర్పుతె తత్తి రితి గెచ్చె నాయ్.

38 “జాకయ్, బావుడ్లు, తుమ్క కిచ్చొ మెన ఆవ్ కచితుమ్ నూనయ్తసి మెలె, పాపుమ్ చెమించుప కెర్తి

† 13:21 13:21 సమూయేలు మొదొల్ పుస్తకుమ్ 8, 9 అద్యయల్ తెంతొ. § 13:25 13:25 మత్తయి 3 అద్యయమ్. * 13:28 13:28 మత్తయి 27 అద్యయమ్. † 13:31 13:31 మత్తయి 28, లూకా 24, యోహాను 20, 21 అద్యయల్. ‡ 13:22 13:22 సమూయేలు మొదొల్ పుస్తకుమ్ 16 అద్యయమ్ తెంతొ.

రచ్చన కత్తెయ్ దొర్కు జతయ్ మెలె, మాన్సు జలో యేసుతెయి.

39 అగ్గె తెంతో అప్పె ఎద, 'అమ్చి పాపుమ్ గెస్సు' మెన, మోసి పూర్ణుమ్చొచి అత్తి రెగిడ్లి దేముడుచ ఆగ్గుల్ రితి కెర, జో సికడ్ల ఆగ్గుల్ బియ, అమ్చి యూదుల్ కెర్తి రితి తుమ్ కెర్తసు. గని కెర్తి కెర్తి కి, పాపుమ్ గెచ్చె నాయ్, గని యేసుకకో పూర్తి నంపజా తత్తతి గే, పాపుమ్ తెంతో విడ్డల్ జతి వరుమ్ జోవయింకయి దొర్కు జా అస్సె.

40 జాకయ్, తుమ్ జాగర్త తా, నెంజిలె, పూర్ణుల్చి అత్తి అమ్చొ దేముడు సంగిలి కబుర్ తిలిసి తుమ్క లయెదె.

41 ఆదె, తుమ్ నంప నెంజ ఆన్తన తా, తుమ్ దెక బమ్మ జా తుమ్చి పాపుమ్ తెన్ని మొర. తుమ్చి కాలుమ్క ఏక్ వెల్లి కామ్ అవ్ జర్గు కెరిందె. కెర్తి కి, సాచుల్ తుమ్క జా సంగతి సూనయ్లె కి, తుమ్ కెయ్క కి నంప కెర్సు నాయ్, మెన రెగిడ్లిసి" మెన పవులు బోదన కెర కేడయ్లన్.

42 పవులుచి బర్నబా ఒత్త తెంతో బార్ జతె తతికయ్, అన్నెక్ సెలవ్ కడన్లి దీసి అమ్క ఇసి బోదన సంగ మెన ప్రెజల్ బతిమాల్పా జా సంగిల.

43 జా సబ కుట్టితికయ్, ఒగ్గర్జిన్ యూదుల్, పడ్డొ దేముడుక నంపజా మార్పుప కెరన నిదానుమ్ తిల జోవయించ అన్నె బక్తుల్ కి, పవులుచి బర్నబాచి పట్టి గెల. జేవ్ దొగుల జలె, దేముడు కెర్తి దయచి తెడి తా, మెన బతిమాల్పా జా బోదన కెర్.

44 అన్నెక్ సెలవ్ కడన్లి దీసి అయ్లి, జలె, †యేసుచి రిసొచి సుబుమ్ కబుర్ పాపులీంసిచి అత్తి సూనుక మెన, ఒండి పట్టుమ్చ సబతె బెర అయ్ల.

45 జలె ఒత్త బెర అయ్ల జనాబ్క దెక, యూదుల్చ వెల్లెల మాన్సుల్ ఒగ్గర్ కోపుమ్ తెన్ గోస జా, పవులు సంగిలిన్ ఎత్తిక 'అబద్దుమ్' మెన వేర సంగ, జోక దూసుప కెర్.

46 తెదొడి పవులు బర్నబా తెన్ దయిరిమ్ తెన్ ఇసి సంగిలన్, "దేముడు దిలి సుబుమ్ కబుర్ తుమ్ యూదుల్కయ్ తొల్లితో సూనవుక తిలి, గని 'సత్తిమ్' మెన తుమ్ ఒప్పునుక నెన కెర వెంట గెలి రితి కెర 'దేముడుచి రాజిమ్తె బెద పరలోకుమ్తె గెతి జీవ్ దెతి వరుమ్ ఆమ్ నజనుక విలువ నాయ్' మెలి రితి తుమ్ పిట్టవన్తిన్క రుజ్జు జతయ్, చి రిసొ యూదుల్ నెంజిలనక సుబుమ్ కబుర్ సూనవుక దెర్నసుమ్.

47 ప్రబు అమ్క కిచ్చొ మెన ఆడ్ర దా అస్సె మెలె, ఒండి లోకుమ్చక 'రచ్చించుప జతు' మెన, అమ్చి ఉజిడి దెకయ్తి రితి జతి రితి, యూదుల్ నెంజిల మాన్సుల్క సుబుమ్ కబుర్ సూనయ్తి రిసొ తుమ్క తెద్రవ అస్సి, మెన ప్రబు సంగ అస్సె".

48 యూదుల్ నెంజిలన, జలె, ఈంజ కోడు సూన, నర్ల జా, దేముడు దిలి జా సుబుమ్ కబుర్క గవురుమ్ కెర్ల, చి 'పరలోకుమ్చి రాజిమ్తె బెదుత్' మెన జోవయింతె కక్క ప్రబు నిసాన తిలో గే, జెవ్వి నంపజల.

49 జా ఒండి ప్రాంతుమ్తె కి ప్రబుచి సుబుమ్ కబుర్ సూనయ్ జలి.

50 యూదుల్చ వెల్లెల మాన్సుల్, పట్టుమ్చ వెల్లెల తెరబోదల్తె మున్సుబోదల్తె గెచ్చ సికడ, జోవయించి అత్తి పవులుక చి బర్నబాక అల్లర్ కెర, జా పిసిదియ ప్రాంతుమ్ తెంతో ఉడడ గెల.

51 జేవ్ దొగుల, 'ప్రబుచి సుబుమ్ కబుర్ సూనుక, జేవ్ యూదుల్ అవ్కాసుమ్ పిట్టవన అస్తి' మెలి గుర్తుక, జేవ్చ చట్టొతెచి దూడి వంప్త గెల కెర, ఒత్త తెంతో తూర్పు పక్క తిలి ఈకొనియ పట్టుమ్తె ఉట్ట గెల.

52 జా అంతియొకయ పట్టుమ్తెచ ప్రబుక నంపజా జోవయించ సిస్సుల్ జలన మాలజ్ జతి నాయ్. దేముడుచి సుద్ది తిలి ఆత్మ జోవయించి పెట్టి బెర తతికయ్, సర్నసంతోసుమ్ జా, నిదానుమ్తె తిల.

14

పవులు బర్నబా ఈకొనియతె బోదన కెర్లిసి

1 ఈకొనియతె పవులు బర్నబా తా కెర, జా అన్నెక్ పట్టుమ్తె కెర్తి రితి, యూదుల్చి సబగేరి పెన, బోదన కెర్. ప్రబుచి ఆత్మసెక్తి తెన్ బోదన కెర్తికయ్, ఒగ్గర్ ఒగ్గర్జిన్, యూదుల్ కి, గ్రీసు దేసిమ్చ కి, నంపజల.

2 గని నంప నే కెర్ల యూదుల్చ వెల్లెల మాన్సుల్, నంపజల బావుడ్లుచి రిసొ యూదుల్ నెంజిలనక గోస సికడ అల్లర్ కెరయ్ల.

3 దస్సు అల్లర్ తిలె కి, దయిరిమ్ తెన్ ప్రబుచి సుబుమ్ కబుర్ సూనవ, పాపులీంసి ఒగ్గర్ దీసల్ ఒత్త తా గెల, ప్రబు జేవ్చి అత్తి వెల్లెల అద్బుతుమ్ కమె కెర, జోచి దయచి రచ్చనచి రిసొ సుబుమ్ కబుర్క 'సత్తిమ్' మెలి గుర్తుక రుజ్జుల్ దెకయ్లన్.

4 గని జా ఈకొనియ పట్టుమ్చ మాన్సుల్ దొన్ని జట్టు జల. జోవయింతె సగుమ్జిన్ యూదుల్చ వెల్లొ మాన్సుల్చి పచ్చెన జల, సగుమ్జిన్ పవులుచి బర్నబాచి పచ్చెన జల.

5 యూదుల్ నెంజిలన సగుమ్జిన్, యూదుల్ జలన సగుమ్జిన్, జోవయించ వెల్లెల మాన్సుల్ కి, 'జోవయింక దెర, పత్రల్ గల మారుమ' మెన కుట్ర ఉచర్ల.

6 గని దస్సి కుట్ర ఉచర అస్తి మెన జేవ్ దొగుల జాన్లి పొదిక, బే బేగి ఉట్ట గెచ్చ లుకయొనియ ప్రాంతుమ్చి లున్త, పడ్డొ దెర్చే మెంత పట్టలె, చి సుట్టునంతచ గవ్విలె గెచ్చ,

† 13:44 13:44 మెలె, 'ఎత్తి అదికారుమ్ తిలో దేముడు దిలి సుబుమ్ కబుర్'.

7 ఒత్తయ్ సుబుమ్ కబుర్ నూనయ్తె తిల.

లుస్తతె ఎక్కిలోక చెంగిల్ కెర్లిసి

8 జలె, పవులు లుస్తతె ఏక్ సుట్టు బోదన కెర్తె తతికయ్, చట్టో కదుల్ కెరుక నెతిర్లో మాన్సు ఎక్కిలో వెన తిలో. జెర్మిల్ తెంతో సొట్టో జా అస్సి. చట్టో లంబ అస్సి.

9 పవులు బోదన కెర్లిసి జో సూన్తె తతికయ్, పవులు జోక చెంగిల్ దెక, 'చెంగిల్ జతి నముకుమ్ జోక అస్సి' మెన చిన కెర,

10 అవాడ్ కెరన, "తుయి ఉట్ట సోగ జా టీవోజ" మెన సంగితికయ్, చట్టున ఉట్ట ఇండుక దెర్లో.

11 పవులుచి అత్తి కెర్లిసి జనాబ్ దెక కెర, జా లుకయొనియ ప్రాంతుమ్చి బాస తెన్, "దేముడ్లు మాన్సుల్చి రితి జా అమ్తె ఉత్త జా అస్సి" మెన కేకుల్ గల.

12 బర్నబాక "ద్యుపతి జయెదె" మెన సంగిల, అన్నె జేవ్ దొగులతె పవులు ఒగ్గర్ సంగితయ్చి రిసా, జోక "హార్మే జయెదె" మెన సంగిల.

13 ద్యుపతి, జలె, పట్టుమ్చి పురెత్తో గుడి తయెదె. జో పూజరి, జలె, పోతుల్క ఉదడ ఆన, పుల్లో బంతివొ దెరన, పట్టుమ్చి గుమ్ముమె జా కెర, పైజల్ తెన్ జేవ్ దొగులక బలి దెంక ఉచర్ల.

14 దస్సి ఉచర అస్తి మెన ప్రబుచ బారికుల్ జల బర్నబా చి పవులు సూన కెర, దుకుమ్క సొక్కల్ చిరన, జనాబ్ తిలిన్తె నిగ జా,

15 "తుమ్ మాన్సుల్ కిచ్చొక ఇసి జతను? ఆమ్ కి తుమ్చ రితయ్ మాన్సులి. తుమ్క 'ఇన వెర్రి కమొ ముల పరలోకుమ్ బూలోకుమ్ నముద్దుమ్, జాతె తిలిసి ఎత్తి జెర్మయ్లో, జీవ్ తిలో దేముడుకయ్ నంపజా చెంగిల్ జతు' మెనయ్, సుబుమ్ కబుర్ నూనవుక అయ్లమ్" మెన పవులుచి బర్నబా కేక్ గల.

16 "అగ్గెచ ఉగుమ్తె తిల మాన్సుల్ ఇన్ఱుమ్ అయ్ల రితి కెర జింక జో పరలోకుమ్చొ ప్రబు సెలవ్ దా తిలె కి,

17 జోచి అదికారుమ్చ, జోచి ప్రేమచ గుర్తులు దెకవుక జో ములె నాయ్. మెలె, చెంగిల కమొ కెర్తె తిలన్, కెర్తె తత్తయ్. కిసచ మెలె, తుమ్క 'సరిపుచుప జతి అన్నిమ్ దొర్కు జవున్, తుమ్క పెట్టితె సర్ద తెన్ జితు కతు' మెన, ఆగాసుమ్ తెంతో పాని పెటవ, బుఁయిచి పలితుమ్ దెరయ్తయ్" మెన సికడ్ల.

18 గని ఇసి బోదన కెర్లె కి, జేవ్ మాన్సుల్ బలి దెంక ఉచర్లిసి కస్టనె పిట్టయ్ల.

ప్రెజల్ పవులుక పత్తల్ గల మార్క దెకిల

19 తెదొడి పిసిదియ ప్రాంతుమ్చ అంతియొకయ చి ఈకొనియ పట్టుల్ తెంతో యూదుల్ సగుమ్జిన్ జా కెర,

ప్రెజల్క సికడ్డికయ్, పవులుక పత్తల్ గల మార్ల మొర గెలన్ మెన కెర, జోక 'మొరయి అస్సి' మెన ఉచర, పట్టుమ్ తెంతో ఒగ్గడ నా ములిల.

20 గని ప్రబుచ సిస్సుల్ జలన * అయ్ల అన్నె, జోచి సుట్టునంత బెర్దికయ్, జో చెంగిల్ జా ఉట్ట పట్టుమ్ తెడి అన్నె పెసిలన్. అన్నెక్ దీసి బర్నబా తెన్ బార్ జా, దెర్మే పట్టుమ్తె ఉట్ట గెల.

21 జా పట్టుమ్తె గెచ్చు సుబుమ్ కబుర్ నూనయ్తికయ్, ఒగ్గర్జిన్ మాన్సుల్ నంపజా ప్రబుచ సిస్సుల్ జల, చి ఈంజేవ్ దొగుల బుల జా లుస్తతె, ఈకొనియతె, చి అంతియొకయ్తె

22 అన్నె బోదన కెర, "తుమ్ నిదానుమ్ తా. దేముడుచి రాజిమతె బెదితి వరుమ్ ప్రబు తుమ్క అమ్క దిలెకి, కస్టల్ నెంతె పాఁచుమ్ నాయ్. కస్టల్ సేడ్డె తవ్దె, గని దయిరిమ్ తెన్ తా" మెన, ప్రబుక నంపజల సిస్సుల్ జలనచి అత్తు డిట్టుమ్ కెర్లె.

23 పడ్డె చువ్వె తా ప్రార్దన కెర, సికడ్డె తత్తు మెన, ఎత్తి సంగుమ్క దెకిత వెల్లెల మాన్సుల్ జతు మెన మాన్సుల్క నిసాన, జేవ్ నంపజలో యేసుప్రబుచి కామ్ జేవ్ కెర్లి రితి జేవ్చి అత్తి సొర్పు కెర్లె.

24 అన్నె ఒత్త తెంతో పావులీంసి పిసిదియ ప్రదేసిమ్ వాట్ గెచ్చు, పంపూలియా ప్రదేసిమ్తె జాఁ కెర,

25 పెర్గె పట్టుమ్తె సుబుమ్ కబుర్ నూనవ, అత్తాలియ పట్టుమ్తె పాఁచ కెర,

26 ఒత్త తెంతో ఓడతె వెగ, నముద్దుమ్ జిన, సిరియ ప్రదేసిమ్చి అంతియొకయ్తె అయ్ల. ఒత్త అగ్గె, చువ్వె తా ప్రార్దన కెర, ప్రబుచి సుబుమ్ కబుర్ కామ్ ఈంజేవ్ దొగుల కెర్లి రిసా ఇన్నెక్ దేముడుచి అత్తి సొర్పు కెర దా బార్ కెర తిల. జా కామ్ అప్పె జెయిమ్ జా అస్సి మెన రుజ్జు దెకయ్తి రిసా,

27 అప్పె ఉట్ట జా ఒత్త పాఁచ కెర, ఎత్తిజిన్క ఎక్కితె బుకారా కెర, దేముడు జోవయింపి అత్తి జర్గు కెర్లిసి ఎత్తిచి రిసా, పడ్డె యూదుల్ నెంజిలన కి నంపజా రచ్చింపుప జతి కోడు ప్రబు దిలిన్చి రిసా సాచి సంగిల.

28 ఒత్త తెంతో, ప్రబుచ ఒత్తచ సిస్సుల్ తెన్ ఒగ్గర్ దీసల్ తా గెల.

15

1 పవులు బర్నబా దస్సి సిరియ ప్రదేసిమ్చి అంతియొకయ్తె తిలి పొది, యెరూసలేమ్ పట్టుమ్ తిలి యూదుయ ప్రదేసిమ్ తెంతో సగుమ్జిన్ నంపజల యూదుల్ జా కెర, యూదుల్ నెంజిలసా, "అమ్చొ మోసి పూర్గుమ్చొచి అలవాట్ కెర యూదుల్ జతి గుర్తుచి సున్నతి కెరన్లెకయ్ పరలోకుమ్తె గెతి రచ్చున తుమ్క దొర్కు జయెదె" మెన సికడ్ల.

* 14:20 14:20 ఏక్ వేల అంతియొకయ తెంతో జా తిల.

2 “జేవ్ నంపజలి పొది కీసి జా సున్నతి నెంతె తిల, దస్సే తత్తు జా సున్నతి నెంతె కి రచ్చించుప జవుల” మెన, పవులుచి బర్నబా జేవ్ మాన్సుల్క జబాబ్ దిల. జేవ్ మాన్సుల్ సికడ్లిసిచి రిసా సగుమ్ దీసల్ బాద సేడ లట్టబై తిలె కి, జా తగు కుట్టె నాయ్. ప్రబుక నంపజలన “బారికుల్తె చి ఒత్తచి అమ్చి సంగుమ్చ అన్నె వెల్లెల మాన్సుల్తె గెచ్చ, ఈంజ తగుచి రిసా పుస సూన్తు” మెన, పవులుక చి బర్నబాక చి జేవ్ నిసాన అన్నె సగుమ్జిన్క యెరూసలేమ్తె తెద్రయ్ల.

3 జా కామ్చి రిసా జా అంతియొకయ పట్టుమ్చి సంగుమ్తెచ మాన్సుల్ పావులీసిక ప్రబుచి అత్తి సార్పు కెర దా తెద్రయ్తికయ్, పేనేకే ప్రదేసిమ్ వాట్ చి సమరయ ప్రదేసిమ్ వాట్ గెచ్చ గెచ్చ, యూదుల్ నెంజిలన యేసుక నంపజా మార్పుప జలిన్చి రిసా సూనయ్తె తిల చి, ఒత్తచ నంపజలన ఎత్తిజిన్ ఒగ్గర్ సర్దనంతోసుమ్ జల.

యెరూసలేమ్తె అగ్గె సబ కెర్లిసి

4 జేవ్ యెరూసలేమ్తె ఉట్ట జా పావిలి పొది, ఎత్తిజిన్ జోవయింప వెల్లెల మాన్సుల్ తెన్ చి, బారికుల్ తెన్, దస్సుల్ జా జోవయింక మరియాద కెల చి, దేముడు జోవయింపి అత్తి జర్గు కెర్లిసి, జోవయింక తోడు దిలిసి ఎత్తి సంగిలిసి.

5 గని యేసుప్రబుక నంపజల ఒత్తచ మాన్సుల్ సగుమ్జిన్, అగ్గె తెంతో పరిసయ్యుల్ మెంత పండితుల్చి జట్టుతె అస్సి, “యూదుల్ నెంజిల జేవ్ మాన్సుల్క అమ్చి గుర్తుచి సున్నతి కెరుక అస్సి చి, అమ్చొ మోసే పూర్గుమ్చొచి అత్తి దేముడు దిల ఆగ్గుల్ రితి జేవ్ కెరుక అస్సి” మెన, బలవంతుమ్ కెర్ల.

6 ఈంజ తగుచి రిసా సరిగా లట్టబ తీర్పు కెరుక మెన, బారికుల్, వెల్లెల మాన్సుల్ తెన్ వెసిల.

7 జా తగు సరిగా సూన ఉచర కేడయ్లి పొది, పేతురు టీవోజ, ఇసి మెన జోవయింక సంగిలన్. “ఓ బావుడ్లు, అమ్క ప్రబు జోచి ఆత్తుసెక్తి దిలి తోలితో చి దొరతి, ‘యూదుల్ నెంజిలన కి సుబుమ్ కబుర్ సూన నంపజతు’ మెన, అంచి అత్తి సూనయ్తి రిసా తుమ్ అమ్చొ దేముడు అంకయి నిసాన్లన్, మెన తుమ్ జాన్సు.

8 జలె, మాన్సుచి పెట్టి తిలిసి జాన్లో దేముడు మెన. నిజుమి, జేవ్ కి నంపజా రచ్చించుప జా అస్తి మెన సాచి జా రుజ్జు దెకవ అస్సి. అమ్చి పెట్టి దిలి రితి, జోవయింపి పెట్టి కి జోచి సుద్ది తిలి ఆత్తు దిలన్.

9 అమ్క జోవయింక తేడ నే దెకితె, జోవయింపి నముకుమ్చి రిసా, జోవయింపి పెట్టి జోవయింక కి సుద్ది కెర్లన్.

10 జలె, దేముడుక సికడుక ఉచర్తసు గే, జోచ సిస్సుల్ రిత జల జేవ్ యూదుల్ నెంజిల మాన్సుల్క దస్సి జాడు

వయడుక మెన కిచ్చొక ఉచర్తసు? జేవ్ ఆగ్గుల్ వయితి పూచి అమ్చ పూర్గుల్ కి, అమ్ కి, ఓర్పుప జంక, నెరవెర్పుప కెరుక, నెతిర్లమ్.

11 ‘ఎక్కి అమ్చొ ప్రబు యేసుచి దయచి రిసా జేవ్ కి అమ్ కి రచ్చించుప జా పరలోకుమ్తె గెచ్చుమ్దే’ మెన అమ్ నంపజా దయిరిమ్ జా అస్సుమ్” మెన, పేతురు సంగిలన్.

12 పేతురు దస్సి సంగితికయ్, బెర తిల ప్రెజల్ తుక్లె తా, యూదుల్ నెంజిలనతె పావులీసి గెతికయ్ జేవ్ యూదుల్ నెంజిలనచి రిసా ప్రబు జోవయింపి అత్తి కెర్ల వెల్లెల అద్బుతుమ్ కమె గుర్తులు ఎత్తిచి రిసా బర్నబా చి పవులు సాచి సంగిలిసి సూన్ల.

13 జేవ్ సాచి సంగ కేడయ్లి పడ్డొ, యాకోబు, జేవ్ సబ వెన ఉచర్లిసి బెదవ తీర్పు సంగిలన్. “ఓ బావుడ్లు, సూన,

14 దేముడు యూదుల్ నెంజిలనక ప్రేమ దెక ‘అంచి నావ్చి గవురుమ్ దెకయ్తి రితి, అమ్చ ప్రెజల్ జేవ్ కి జతు’ మెన జేవ్చి తెంతో సగుమ్జిన్క నిసాసుక దెర్లిన్చి రిసా, సీమోను పేతురు సాచి సంగ అస్సి.

15 దేముడు ప్రబుచ కబుర్లు పూర్గుమ్ రెగిడ్లనచ కొడొ కి జా సాచి తెన్ బెదితయ్.

16 ‘పడ్డొక ఆవ్ అన్నె జెయిందె, చి దావీదు పూర్గుమ్చొచి సేడ తిలి టంబుగేరు అన్నె బందిందె. జా పాడ్ జలిసి అన్నె నొవర్ కెర బందిందె.

17 లోకుమ్చ అన్నె మాన్సుల్, అన్నె, యూదుల్ నెంజిలనతె కో అంచి నావ్ తెడి తవుల గే, ప్రబుక చజ నంపజతు’ మెన,

18 పూర్గుమ్ తెంతో ఈంజ కబుర్ సూనయ్లొ దేముడు సంగ అస్సి”

19 జాకయ్ ఆవ్ కిచ్చొ తీర్పు సంగితసి మెలె, దేముడుక నంపజా మార్పుప జల, అమ్చ యూదుల్ నెంజిలనక అమ్ బాద సేడవుక బెదె నాయ్.

20 గని అమ్ కిచ్చొ కెర్లె చెంగిల్ మెన ఆవ్ ఉచర్తసి మెలె, ‘దేముడ్లు’ మెన బొమ్మల్ గట్టక దిలిసి కతు నాయ్, లంజెకమొ కెర్తు నాయ్, టొట్టొ మోడ మార్లి సిద్ద కతు నాయ్, లొయిఁ కతు నాయ్ మెన ఉత్తుమ్ రెగ్గవ తెద్రవుమ.

21 కేన్ పట్టుమ్తె కి, అగ్గెయి తెంతో మోసే పూర్గుమ్చొచి అత్తి రెగిడ్లి దేముడుచ ఆగ్గుల్ సూనయ్తతి, ఎత్తి సెలవ్ కడల్లి దీసి అమ్చ సబ గెరలె సదు కెర్తతి, చి ఈంజేవ్ ఆగ్గుల్చి రిసా సూన తవుల.

ఉత్తుమ్ రెగ్గ అంతియొకయతె తెద్రయ్లిసి

22 తెదొడి, బారికుల్క చి యెరూసలేమ్ పట్టుమ్చ సంగుమ్చ అన్నె వెల్లెల మాన్సుల్క, జా సంగుమ్చ మొత్తుమ్క కిచ్చొ అజ్జ అయ్లి మెలె, ‘పవులు చి బర్నబా తెన్ అమ్తె సగుమ్జిన్ అంతియొకయతె గెలె చెంగిలి’

మెన, బర్నబా మెలో యూదాక చి సీలయుక నిసాన. ఒత్తచ నంపజల సుదల్తె ఈంజెవు ముక్కిమ్ మాన్సుల్ జవుల.

23 ఇన్నెచి అత్తి తెద్రయ్తి ఉత్తమ్తె ఇసి రెగిడ్ల.

“అంతియొకయతె, జా ఒండి సిరియ ప్రదేసిమి, చి కిలికియ ప్రదేసిమ్తె తిల యూదుల్ నెంజిల నంపజలన్క, బారికుల్, యెరూసలేమ్చి సంగుమ్చ వెల్లెల మాన్సుల్ జల తుమ్చ బావుడ్లు రెగిడ్లి ఉత్తమ్. తుమ్క ‘చెంగిల్ తంక’ మెన ప్రబుక రోజుక ఉచర్తసుమ్.

24 కిచ్చొచి రిసా ఈంజ ఉత్తమ్ రెగిడ్లసుమ్ మెలె, అమ్చితె తెంతో సగుమ్జన్ బార్ జా తుమ్తె గెచ్చు కొడొ సంగ తుమ్క మెన్నుతె బాద సేడవ, సిక్కు కెర అస్తి మెన సూన అస్సుమ్, అమ్చి సెలవ్ నెంతె దస్సి కెర అస్తి.

25 జాకయ్ అమ్ సబ కెర్లమ్, అన్నె ఎక్కి కట్టు తెన్ ఉచర్లె, ‘చెంగిల్’ మెన అమ్క కిచ్చొ అజ్జ అయ్లి మెలె, ‘అమ్చ ప్రేమ తిల బర్నబాచి పవులు తెన్ కబుర్ గెతు’ మెన సగుమ్జన్క నిసాన తుమ్తె తెద్రయ్లె చెంగిలి మెన అజ్జ అయ్లి.

26 యేసుక్రీస్తు ప్రబుచి సుబుమ్ కబుర్ సూనయ్తి రిసా ఈంజేవ్ దొగుల ఎదివాట్ సైమల్ సేడ అస్తి.

27 యూదాక చి సీలయుక ఇనయింతెన్ తెద్రవ అస్సుమ్. ఇన్నె రెగిడ్లి రితి జేవ్ సొంత సంగుల.

28 “దేముడుచి సుద్ది తిలి ఆత్మ అమ్క కిచ్చొ బుద్ది సంగితయ్ మెలె, అమ్క కి కిచ్చొ చెంగిల్ డీస్తయ్ మెలె, తుమ్క, ‘కిచ్చొ కిచ్చొ అమ్చ ఆగ్గల్ అలవాట్ కెర్తు’ మెన అమ్ జాడు వయడ్లి రితి కెరుక బెదె నాయ్. ‘ఎక్కి ముక్కిమ్క కెర్తు’ మెన తుమ్క ఉచర్తసుమ్.

29 బొమ్మల్క గట్ర దిలిసి కా నాయ్, లోయి కా నాయ్, టొట్రో మోడ లోయి నే గెచ్చయ్లి సిద్ర కా నాయ్, చి లంజెకమొ కెర నాయ్. ఈంజేవ్ అలవాట్ కెర్లదు మెలె, తుమ్క చెంగిలి. చెంగిల్ తెన్ తా”, మెన రెగ్ల తెద్రయ్లె.

30 జేవ్ తెద్రయ్తికయ్, జేవ్ అంతియొకయతె ఉట్ట గెల, ఒత్త పావ కెర, నంపజలన్క ఎక్కితె బుకారా కెర, జా ఉత్తమ్ దిల.

31 జేవ్ యూదుల్ నెంజిలన సదు కెర, బుద్ది సంగితి దయిరిమ్ కెర్తి జా కబుర్చి రిసా సర్లసంతోసుమ్ జల.

32 యూదా చి సీలయు, జలె, ప్రబుచి ఆత్మ సికయ్త కబుర్లు సంగితన జవుల, చి ఒత్తచ నంపజలన్క ఒగ్గర్ బోదన కెర, బుద్ది సంగ, దయిరిమ్ కెర్ల.

33 సగుమ్ దీనల్ ఒత్త తా, ప్రబుచి కొడొ సంగ సంగ, దయిరిమ్ కెర కెర, జోవయించి ఒత్తచి కామ్ కేడయ్తికయ్, ‘జోవయింక తెద్రయ్లనతె అన్నె ఉట్ట గెతు’ మెన, జా

పట్టుమ్చ జోవయింక “సీంతుమ్ తెన్ గెచ్చు” మెన, సర్ల తెన్ యెరూసలేమ్తె అన్నె తెద్రయ్లె.

34 *సీలయు మాత్తమ్, ఒత్త తంక చెంగిల్ మెన ఉచర్లొ.

35 మదెనె, పవులు చి బర్నబా అంతియొకయతె తా, అన్నె ఒగ్గర్జన్ తెన్ కి, ప్రబుచి సుబుమ్ కబుర్ సూనయ్తె తిల.

బర్నబా, పవులు వేర వేరతె ఉట్ట గెలిసి

36 సగుమ్ దీనల్ గెలి పడ్డొ, “జొమ్మ, ప్రబుచి సుబుమ్ కబుర్ సంగ అమ్ అగ్గె బోదన కెర్ల ఎత్తి పట్టలె అన్నె గెచ్చు, నంపజలన్తె గెచ్చు, జోవయింక ‘కిసి అస్తి గే’ దెకుమ” మెన, పవులు బర్నబాక సంగిలన్.

37 బర్నబా, మాత్తమ్, “మార్కు మెలో యోహానుక జేవ్చి తెన్ కడ నెమ” మెన ఇస్టుమ్ జలన్.

38 గని, జా అగ్గెచి సుట్టు మార్కు జేవ్చి తెన్ బార్ జా తిలె కి, జా కామ్తె సరిగా నే బెదితె, జోక †ముల దా అన్నె ఉట్ట గెచ్చు తిలన్, చి ‘అప్పొ కడ నిలె, దస్సి అన్నె ములె దిలె కిసి’ మెన, పవులు సంగిలొ.

39 జాచి రిసా దొగుల దొన్ని మెన్నుల్ జా జట్టి జల చి, దొగుల దొన్ని పక్కలె ఉట్ట గెల. బర్నబా మార్కుక కడన, ఓడతె వెగ, సముద్రుమ్ జీన, కుప్ర, డిబ్బ దేసిమి ఉట్ట గెల.

40 గని ‘అంచి తెన్ ఈంజొ జెవున్’ మెన, పవులు సీలక నిసాన్లన్. అన్నె, ఒత్తచ నంపజలన ప్రార్లన కెర, చి కామ్చి రిసా జోవయింక ప్రబుచి అత్తి సార్ప కెర దెతికయ్, జేవ్ ఉట్ట గెల.

41 ఒండి సిరియ ప్రదేసిమి, చి ఒండి కిలికియ ప్రదేసిమ్తె గెచ్చు కేనె నంపజలనచ సంగుమ్లుతె గెచ్చు బోదన కెర డిట్టుమ్ కెర్తె తిల.

16

తిమోతి పవులు బోదన కెర్తిసి

1 ఒత్త తెంతో, గలతీయ ప్రదేసిమ్చ లుస్త్ర చి దెర్చే మెల పట్టుమ్లుతె పవులు చి సీలయు గెల. తిమోతి మెలో సిస్సుడు తిలన్. జో యూదుడుయి జలి అయ్యున్ తెన్, జోచి పట్టుమ్తె పవులు అగ్గె జా తిలిసి తెంతో ప్రబుక నంపజా అస్తి. తిమోతిచొ అబ్బొసి, మాత్తమ్, యూదుడు నెంజె, గ్రీకు దేసిమ్చొ, జో.

2 జో తిమోతి చి రిసా, “నిదానుమ్ తిలొసా” మెన లుస్త్ర చి ఈకొనియ పట్టల్తెచ బావుడ్లు ఎత్తిజిన్ సంగితె తిల.

3 జాకయ్, “జో కి అమ్చి తెన్ చి కామ్తె బెదున్” మెన పవులు సంగిలొ. జో నాడుచొ అబ్బొన్ ‘యూదుడు నెంజె! గ్రీకు దేసిమ్చొ మాన్సు జయెదె’ మెన, జో ‘పుత్తున్క యూదుల్చి గుర్తుచి సున్నతి కెర తయె నాయ్’ మెన,

* 15:34 15:34 గ్రీకు జాన్ తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 34 నంబర్చి కోడు తయె నాయ్. † 15:38 15:38 బారికుల్ 13:13.

ఎత్కిజిన్ జాన్తి రిసా 'జా సున్నతి తిమోతి నే కెరన తిలె, ఆమ్ గెతిన్తెచ యూదుల్ నిస్కారుమ్ దెకుల' మెన, జోక పవులు జా సున్నతి కెర దిలన్.

4 జలె, ఒత్తచ పట్టుల్ ఎత్కితె గెచ్చు గెచ్చు, యెరూసలేమ్తెచ బారికుల్చి ఒత్తచి సంగుమ్చ వెల్లెల మాన్సుల్ ఎత్కి సంగిలి తీర్పు నెరవెర్పుప కెర, మెన జేవ్ తీగ్గ సూనయ్ల.

5 జా ఒండి ప్రాంతుమ్తెచ సంగుమ్లుచ సుదల్ జలె, ప్రబుచి ఉప్పిర్చి నముకుమ్క అన్నె డిట్టుమ్ జల, చి రోజుక అన్నె మాన్సుల్ ప్రబుక నంపజా మార్పుప జా జోవయింతెన్ బెదిల.

పవులు మాసిదోనియ ప్రదేసిమ్తె తెద్రయ్లిసి

6 ఒత్త తెంతో పవులు సీలయు చి తిమోతి, గలతీయ ప్రదేసిమ్ వాట్ చి పుగియ ప్రాంతుమ్ వాట్ గెల. "ఆసియా ప్రదేసిమ్తె సుబుమ్ కబుర్ సూనవుక పోస" మెన దేముడుచి సుద్ది తిలి ఆత్మ సంగ తిలన్,

7 చి ఉత్తర పక్కచి వాటు గెచ్చు, ముసియ ప్రాంతుమ్తె పావెలె, బితునియ ప్రదేసిమి గెచ్చుక ఉచర్ల, గని జేవ్ ఒత్త గెచ్చుక కి యేసుచి ఆత్మ ఒప్పె నాయ్.

8 జాకయ్, ముసియ ప్రాంతుమ్ జిన, సముద్రుమ్ సొడిచి త్రోయ పట్టుమ్తె అయ్ల.

9 జేవ్ త్రోయతె నిద్ర తిలె, అందరె, ప్రబు దెకయ్లి సిన్చు పవులు దెకిలన్. మాసిదోనియ ప్రదేసిమ్చో మాన్సు ఎక్కిలో టీవోజ, "అమ్చి మాసిదోనియ దేసిమి ఉట్ట జే, చి అమ్క రచ్చించుప కెరు" మెన బతిమాల్ప జా బుకార్లన్.

10 పవులు జా సిన్చు దెకిల్ బేగి, జేవ్తె జర్గు జలిసి *అమ్క సంగితికయ్, ఒత్తచ మాన్సుల్క సుబుమ్ కబుర్ సూనయ్తి రిసా ప్రబు అమ్క మాసిదోనియతె తెద్రయ్తయ్ మెన అమ్ చిన కెర, బేగి పెందలె మాసిదోనియతె గెచ్చుక బార్ జలమ్.

11 జా పెందలె, త్రోయతె ఓడతె వెగ సముద్రుమ్ జిన, సమొత్తాకె మెలి డిబ్బ దేసిమి పాడ నిద్ర తా, అన్నెక్ దీసి సముద్రుమ్ అన్నె జిన, మాసిదోనియ ప్రదేసిమ్చి నెయపాలి రేవుతె పాడ ఉత్తిర్లమ్.

12 ఒత్త తెంతో మాసిదోనియక వెల్లి పట్టుమ్ జలి పిలిప్పితె ఇండ గెచ్చు, ఒత్త సగుమ్ దీసల్ తా గెలమ్. ముక్కిమ్క రోమ దేసిమ్చి ఒగ్గర్జిన్ తతె తిల.

13 జలె, †యూదుల్చి సెలవ్ కడన్లి దీసి, 'ఒత్త ప్రార్దన కెర్తతి' మెన, పట్టుమ్చి గుమ్ముమ్ ఒత్తల్తో బార్ జా, గాడు సొడి తిలిన్తె గెలమ్. గెలె, ప్రార్దన కెరుక మెన, తేర్బోదల్ సగుమ్జిన్ జా అస్తి. జేవ్ తిలిన్తె వెస, బోదన కెరుక దెర్లమ్.

* 16:10 16:10 ఇన్నె తెంతో లూకా మెలో ఈజ 'బారికుల్' చి పుస్తకుమ్ రెగిణ్ణెసా పావులిన్ తెన్ సగుమ్ సుట్టు బులితె తిలో. † 16:13 16:13 ఈజ పుస్తకుమ్ రెగిణ్ణె లూకా యూదుడు నెంజె.

లూదియ మెలి తేర్బోద ప్రబుక నంపజా మార్పుప జలిసి

14 ప్రార్దన కెరుక గెల జేవ్ తెర్బోదల్తె లూదియ మెలి ఎక్కి తిలి. జా సుది బట్టల్ గట్టచి రిసాచి ఊద రంగుచి బియ్యారి కెరెదె. ఆసియా ప్రదేసిమ్చి తుయత్తెర పట్టుమ్చి తేర్బోద, జా. జా అగ్గె తెంతో దేముడుక నిదానుమ్ జా జోక బక్తి కెర్తిసి. సూన్తి బుద్ది తిలిన్చి పెట్టి ప్రబు దెతికయ్, పవులు సంగిలి బోదన సూన, జా నంపజలి.

15 నంపజా, జేవ్చి గెర్చ ఎత్కిజిన్ తెన్ బాప్తిసుమ్ నజన్. "అంక 'ప్రబుక నిజామి నిదానుమ్ జా అస్సె' తుమ్క రుజ్జు అయ్లి జలె, ఇన్నె బోదన కెర్తె తిలె ఎదిలి సేంపుక అమ్తె తా" మెన అమ్క బలవంతుమ్ కెర్తి.

గుర్మయ్ని జలి రితి తేర్బోద ఎక్కిచి రిసా జర్గు జలిసి

16 జలె, ఏక్ దీసి, ప్రార్దన కెర్తిసితె అమ్ గెతె తతికయ్, గొతిమాన్సు జతి ఉబెడి ఎక్కి దస్సుల్ జలి. జా గుర్మయ్ని జా సివ్వల్ జంక అలవాట్ జలిన్. జాచి జా బుద్దిచి రిసా, జాచ ఎజోమాన్సుక ఒగ్గర్ డబ్బుల్ లాబుమ్ దొర్కు జతె తయెదె.

17 జా పవులిన్చి పట్టి జెంక దెర, కిచ్చో మెన కేకుల్ గల, జా తేర్బోద కిచ్చో మెన సంగిలి మెలె, "ఈంజేవ్, ఎత్కిచి కంట వెల్లొ దేముడుచ సేవ కెర్తన. పరలోకుమ్తె గెతి రచ్చున దొర్కు జతి వాట్చి రిసా తుమ్క సూనవుక జా అస్తి" మెన కేకుల్ గల్తె తిలి.

18 ఒగ్గర్ దీసల్ దస్సి పట్టి జా కేకుల్ గల్తె తతికయ్, పవులు, జోచి పెట్టి ఒగ్గర్ దుకుమ్ జా, జాచి పక్క పసుల, జాక దెర్లి బూతుమ్ తెన్, "ఇన్నెచి పెట్టి తెంతో బార్ జా, ఇన్నెక ములు, యేసుక్రిస్తుచి నావ్ తెన్ తుక సంగితసి" మెన పవులు జా బూతుమ్క ఉదడ గెలన్. చి జయ్యి తెదోడి బూతుమ్ బార్ జా ముల దా గెలన్.

పవులుక చి సీలయుక జేల్తె గలిలిసి

19 'జా తేర్బోద గుర్మయ్ని జతి తిలి పొది అమ్ దొర్కు కెరంతి డబ్బుల్ లాబుమ్ అప్పె తెంతో నాయ్' మెన జాచి ఎజోమాన్సు దెక కెర, పవులుక చి సీలక దెర, సంతవీది వెసిత పట్టుమ్చ అదికారుల్తె ఒగ్గోడ నిల.

20 "ఈంజేవ్ మాన్సుల్, యూదుల్, అమ్చి పట్టుమ్తె జా కెర ఒగ్గర్ అల్లర్ కెర్తతి.

21 అమ్ రోమియుల్ జా అలవాట్ కెరుక కమొ నాయిమ్ నాయ్ మెలె కి, జోవయింక రితిచ అలవాట్ సికడతె" మెన ఆరిచి నింద గలిల.

22 జనాబ్ ఎత్కి పవులిన్చి ఉప్పిరి కోపుమ్ జల, చి అదికారుల్ జేవ్ దొగులచ పాలల్ దెర కడ, జమాన్సు సుదల్ జోవయింక డండల్ తెన్ పెటుక మెన ఆడ్ర దిల.

* 16:10 16:10 ఇన్నె తెంతో లూకా మెలో ఈజ 'బారికుల్' చి పుస్తకుమ్ రెగిణ్ణెసా పావులిన్ తెన్ సగుమ్ సుట్టు బులితె తిలో. † 16:13 16:13 ఈజ పుస్తకుమ్ రెగిణ్ణె లూకా యూదుడు నెంజె.

23 జోవయింక దన్ని ఒగ్గర్ దెబ్బల్ పెట్టికయ్, అదికారుల్ జేల్తె గల, “జేవ్ క జాగర్ దెక” మెన, రకితనక ఆడ దిల.

24 రకితన జోవయింక తెడిచి గదితె గల కెర, జేవ్ నే విడ్డల్ జతి రితి, జోవయించ చట్టొక జాడు తిల బల్లల్క బెదితె డిట్టుమ్ బందిల.

25 జలె నెడుమ్ అందరె, పవులు చి సీలయు ప్రార్దన కెర కెర, దేముడుక గనుమ్ గాయితె తతికయ్, అన్నె జేలి జలన ఎత్తిజిన్ నూన్తె తిల.

26 తెదొడి బుయి కదుల్ జలి, చి పునాది తెంతో ఒండి జేల్ కదుల్ జలి. బేగి కెప్పివో ఎత్తి ఉగ్గి జల, చి జేలి తిలన ఎత్తిజిన్క బందిల గొల్పుల్ యిపి జల.

27 రకితోసా, జలె, చెద్దొయ్ జా, కెప్పివో ఉగ్గి జలిసి దెక కెర, ‘జేలి జలన ఎత్తిజిన్ ఉట్ట నిగ గెచ్చ తవుల’ మెన బియఁ కెర, జోచి కత్తి కడన, జోక జోయ్యి అత్య కెరన్క తయార్ జలో.

28 గని “తుయి తుక కిచ్చొ అల్లర్ కెరను నాయ్. ఆమ్ ఎత్తిజిన్ ఇన్నె అస్సుమ్” మెన, పవులు కేక్ గల్తికయ్,

29 జో రకితోసా, దివ్వొ లంబడ ఆన కెర, బమ్మ తెన్ జేవ్ తిలి గదితె పెన, బియఁ అద్దుర్ జా, పవులుచి సీలచి చట్టె సెర్పు సేడ, జోకర,

30 తిల జేలి తిలనక అన్నె డిట్టుమ్ బంద, పవులుక చి సీలక బార్ కెర, “బాబు ఇసి, ఆవ్ రచ్చించుప జా జతి రిసా ఆవ్ కిచ్చొ కెరుక?” మెన బతిమాల్పా జా పుసీలన్.

31 తెదొడి పావులీంసి, “ప్రబు జలో యేసుక్రీస్తుచి ఉప్పిరి తూయి నముకుమ్ తియ, తుయి తుచి గెర్చ ఎత్తిజిని, రచ్చించుప జస్తె” మెన,

32 ప్రబుచి సుబుమ్ కబుర్ జోవయింక బోదన కెర్ల. జోవయింక, వడ్డొ ఒండి జోవయించి గేర్చక సంగిలన్.

33 జేవ్ దొగులక జయి తెదొడి కడన, దెబ్బల్ పెట్టినచ గావ్వొ ఎత్తి దోవ సుబుమ్ కెర్లి బేగి, జో, జోచి గేర్చ ఎత్తిజిన్ బాప్తిసుమ్ నజన్.

34 జోచి గెరి కడన, జోవయింక అన్నిమ్ దా కెర, జేవ్ ఎత్తిజిని, దేముడుచి ఉప్పిరి నముకుమ్ తిల చి ఒగ్గర్ సర్దనంతోనుమ్ జల.

పవులు చి సీలయు విడ్డల్ జా పట్టుమ్ ములిలిసి

35 అన్నెక్ దీసి పెందలె, “జేవ్ మాన్సుల్క విడ్డల్ కెర” మెన, దెబ్బల్ పెట్ల జమాన్సుక సంగ, అదికారుల్ జేల్తె తెద్రయ్ల.

36 అదికారుల్ సంగిలిసి నూన, “తుమ్క ‘విడ్డల్ జా గెతు’ మెన అదికారుల్ సంగ తెద్రవ అన్తి. జాకయ్, బార్ జా, అల్లర్ నెంతె సేంతుమ్ తెన్ గెచ్చ”, రకితోసా పవులుక సంగిలన్.

37 గని పవులు జమాన్సుక, “ఎత్తిజిన్చి మొక్కె, రుజ్జుల్ నే నూన్తె, తీర్పు నే సంగితె, అమ్క పెట, జేల్తె గల అన్తి.

ఆమ్ కి రోమియుల్ జా అస్సుమ్చి రిసా అమ్క దన్ని, తీర్పు నే కెర్తె, సిచ్చ కెరుక నాయిమ్ నాయ్. అప్పె, కోయి సాచి నే జతె అమ్క విడ్డల్ కెరుక ఉచర్తసు, నెంజె. జేవ్ అదికారుల్ పూచి తెన్ సొంత జా కెర విడ్డల్ కెర బార్ కెర్తు” మెన, పవులు జబాబ్ దిలన్.

38 జమాన్సు, జలె, అదికారుల్తె అన్నె గెచ్చ, ఈంజేవ్ కొడొ ఎత్తి సంగ దిల, చి జేవ్ దొగులక, ‘జేవ్ కి రోమియుల్ జవుల’ మెన నూన కెర, “తప్పు కెర్లమ్” మెన బియఁ గెచ్చ,

39 అదికారుల్ జేల్తె జాఁ కెర, తప్పు ఒప్పున, జోవయింక బార్ కెర, “అమ్చి పట్టుమ్ ముల ఉట్ట గెచ్చ” మెన బతిమాల్పా జా సంగిల.

40 జేవ్ పవులుచి సీలయు, జలె, జేల్ తెంతో బార్ జా, లూదియచి గెరి గెచ్చ, బెర తిల బావుడ్డుక దస్సుల్ జాఁ, బుద్దిచి దయిరిమ్ సంగ కెర, ఉట్ట గెల.

17

పవులు చి సీలయు దెస్సలోనిక పట్టుమ్తె గెలిసి

1 పవులు, సీలయు, అంపిపొలి పట్టుమ్ వాట్ గెచ్చ, అపొల్లోసియ పట్టుమ్తె గెచ్చ, అన్నె బార్ జా, ఒండి మాసిదోనియ ప్రదేసిమ్క వెల్లి జలి దెస్సలోనిక పట్టుమ్తె ఉట్ట అయ్ల. ఒత్త, యూదుల్చి సబగేరు ఏక్ అస్సె.

2 పవులు, కేన్ పట్టుమ్తె అయ్లె, యూదుల్చి సబగేరి గెచ్చుక అలవాట్ కెరన అస్సె. చి ఒత్త కి, తిన్ని సెలవ్ కడన్లి దీనల్ వర్న తెన్ సబతె గెచ్చ, దేముడుచి కొడొతె తిలిసి రుజువు దెకవ దెకవ బోదన కెర్లన్.

3 కిచ్చొ ముక్కిమ్క బెదయ్లన్ మెలె, “దొర్కు జలో రచ్చించుప కెర్తొసా జతో క్రీస్తుక దేముడు తెద్రయెదె. తెద్రయ్లె, జో మొర అన్నె జిఁక అస్సె” దేముడుచి కొడొ తెన్ పూర్థుమ్ రెగ్గిలిసి సంగ, “యేసుయి, దేముడు సంగిలో క్రీస్తు మెన’ తుమ్క ఆవ్ సంగితసి” మెన పవులు సంగిలన్.

4 సగుమ్జిన్ నంపజా, పవులు చి సీలయు తెన్ బెదిల. దేముడుక నంపజా నిదానుమ్ తిల గ్రీసు దేసుమ్చ ఒగ్గర్జిన్, వడ్డొ ఒత్తచ వెల్లో సుదల్ తేర్బోదల్ కి ఒగ్గర్జిన్ నంపజల.

5 యూదుల్చ వెల్లెల మాన్సుల్, మాత్రుమ్, గోస జా, పట్టుమ్చ మూర్కుడ్డు సగుమ్జిన్క దెర, జనాబ్ ఒగ్గర్జిన్క సికడ, జా ఒండి పట్టుమ్తె గగ్గల్ కెరయ్ల. పావులీంసి కచితె జితె తిల మెలె, యాసోను మెలో ఎక్కిలోతె. తెదొడి, “పావులీంసిక దెర బార్ కెర ఎత్తిజిన్చి మొక్కె తీర్పు కెరుమ” మెన, జేవ్ వెల్లో సుదల్, జనాబ్, జోచి గెరి గెచ్చ, అల్లర్ కెర్ల,

6 గని పవులీంసి డిస్సి నాయ్, చి యాసోనుక చి అన్నె బావుడ్డు సగుమ్జిన్క దెర, పట్టుమ్చ అదికారుల్తె ఒగ్గొడ

నిల. “ఒండి బూలోకుమ్క మార్పుప కెర్ల జేవ్ దొగుల ఇన్నె కి జా కెర, అమ్కయ్ కి మార్పుప కెరుక ఉచర్తతి.

7 ఈంజొ యాసోను జోవయింతె బెద, జోవయింక టాన్ దా అస్సె. ‘అన్నెక్లో రానొ జా అస్సె’, ‘యేసు జో’ మెన ప్రెజల్క సికడ, అమ్చొ *కైసర్ రానొచి విలువ కడ, కైసర్ సంగిల ఆగ్గుల్క నే బెదిత రకుమ్లు సికడ్తతి” మెన, కేకుల్ గెల.

8 ప్రెజల్ ఎత్తి, పట్టుమ్చ అదికారుల్ కి, జా కొడొ సూన, బమ్మ జా,

9 “జేవ్ దొగుల అన్నె అల్లర్ నే కెర్తి రితి తుయి పూచి జా,” మెన, యాసోనుక బలవంతుమ్ కెర, విడ్డల్ కెర్ల.

బెరయ పట్టుమ్తె పవులు సీలయు బోదన కెర్లసి

10 తెదొడి, అందర్ జెతికయ్ బావుడ్లు బేగి పవులుక చి సీలయుక ఒత్త తెంతో ఇదిల్ దచ్చెన పక్కచి బెరయ పట్టుమ్తె వట్టె తెద్రయ్ల. జేవ్ ఒత్త పాఠ, యూదుల్చి సబగేరి గెల.

11 ఒత్తచ యూదుల్చ వెల్లెల మాన్సుల్, జలె, దెస్సలోనికతెచ యూదుల్చి కంట అమ్మయికుమ్ మాన్సుల్ జవుల. చి సర్ల తెన్ సుబుమ్ కబుర్ సూన, రోజుక, సత్తిమ్బుద్ది తెన్, ‘పావులీసి సంగితిసి దేముడుచి కొడొతె తిలిన్ తెన్ దస్సె అస్సె గే నాయ్ గె?’ మెన, రుజ్జు కెరంతి రిసా, దేముడుచి కోడు నిదానుమ్ పరిచ్చ కెర్తె తిల.

12 దస్సి కెర, ‘నిజుమ్’ మెన, జోవయింతె ఒగ్గర్జిన్ యూదులు యేసుక నంపజల. నంపజలస గ్రీకుదేసిమ్చ వెల్లెల సుదల్ చి తేరిబోదల్ సగుమ్జిన్, చి మున్సుబోదల్ కి ఒగ్గర్జిన్ నంపజల.

13 గని, దెస్సలోనిక మెలి పవులీసి అగ్గె గెచ్చ తిలి పట్టుమ్చ కోపుమ్ జల యూదుల్, పవులుక, ‘ఒత్త బెరయ పట్టుమ్తె కి †సుబుమ్ కబుర్ సూనయ్తయ్’ మెన సూన తా, బెరయతె ఉట్ట జా, జోవయించి సొంత పట్టుమ్తె కెర్తి రితి, ప్రెజల్చి జనాబ్క సికడ అల్లర్ కెరవుక ములితి నాయ్.

14 ‘అల్లర్ సేడ్సు నాయ్’ మెన, “నముద్రుమ్ పక్క ఉట్ట గో” మెన పవులుక బావుడ్లు తెద్రయ్ల. సీలయు, తిమోతి తెన్ జా పట్టుమ్తె తాఁ గెలో.

15 మదెనె, పవులుక బోడొవ దెతన జోవయింక సముద్రుమ్ సొడిచి ఏదెస్సు మెలి పట్టుమ్ ఎద కడ నిల, చి ఒత్త పాఠ, “బే బేగి అంచితె ఉట్ట జా” మెన, పవులు సీలయుక చి తిమోతిక కబుర్ రెగిడ్డికయ్, “న దెమ్దె” మెన జోవయింక బోడొవ దా తిలన జా ఉత్తుమ్ నజ, జోవయించి దెస్సలోనిక పట్టుమ్తె బుల గెల.

ఏదెస్సు పట్టుమ్తె పవులు కెర్లి బోదన

* 17:7 17:7 ‘కైసర్ రానొక’ ‘సీజరు రానొ’ కి ‘వెల్లో రానొ’ కి మెనుల; ‘కైసర్’ మెలె గ్రీకు బాస తెన్ బెదితయ్, ‘సీజరు’ మెలె ఇంగ్లీస్ తెన్ బెదితయ్, ‘వెల్లో రానొ’ మెలె తెలుగు తెన్ బెదితయ్. † 17:13 17:13 నెంజలె ‘ఎత్తి అదికారుమ్ తిలో దేముడు దిలి సుబుమ్ కబుర్’.

16 పవులు ఏదెస్సు తా, సీలయుక చి తిమోతిక రకితె తా, ‘దేముడ్లుచ బొమ్మల్ ఇన్నె ఒగ్గర్ అస్సి’ మెన దెక తా, ‘తప్పు కెర్తతి’ మెన, పెట్టి ఒగ్గర్ దుకుమ్ జా,

17 యూదుల్చి ఎత్తి సబగేరి గెచ్చ యూదుల్ తెన్ చి దేముడుక నిదానుమ్ తిల వేర మాన్సుల్ తెన్ లట్టబ లట్టబ బోదన కెర్తె తా. అయ్తర్ తెంతో సుక్తర్ ఎద, రోజుక పట్టుమ్చి సంతవీదె గెచ్చ, ఒత్త దస్సుల్ జల సుదల్ తెన్ లట్టబ లట్టబ బోదన కెర్తె తిలన్.

18 ఒత్త సంతవీదె ఏక్ దీసి, ఎపికూరీయు చి స్ట్రాయిక్ మెల అలవాట్చ పండితుల్ సగుమ్జిన్ జో తెన్ దస్సుల్ జల. జోవయింతె సగుమ్జిన్ కిచ్చొ మెల మెలె “ఈంజొ బుల్తోసా కిచ్చొ తెల్వచి సంగెదె గే నాయ్ గే దెకుమ” మెన ఉచర్ల. అన్నె సగుమ్జిన్, “వేర దేసిమ్చ దేముడ్లు చి రిసా సికడ్తయ్” మెల. జేవ్ కిచ్చొక ఇసి మెల మెలె, పవులు యేసుచి రిసా, జో మొర అన్నె జివ్ జలిన్చి రిసా సికడ్తె తిలో.

19 తెదొడి పవులుక దెర, ‘అరేయొపాగు’ మెలి జోవయించి సబ కెర్తి టాన్తె జోవయింక కడన కెర, “తుయి కెర్తి బోదనచి రిసా అమ్క పూర్తి అర్దుమ్ సంగు.

20 ఆమ్ నేన్ల కొడొ అమ్క సూనయ్తసి, చి జా అర్దుమ్ సూనుక ఇస్టుమ్ జతసుమ్” మెన సంగిల.

21 జా ఏదెస్సు పట్టుమ్చ, చి ఒత్త గోతు జెతనచి అలవాట్ కిచ్చొ మెలె, నొవ కొడొ, నొవ కబుర్లు సంగుక జవున్, సూన్తె తంక జవున్, జోవయింక ఆస. ఎత్తి ములుల, గని జయ్యి అలవాట్ జోవయింక ముక్కిమి.

‘అరేయొపాగు’ సబతె పవులు కెర్లి బోదన

22 పవులు ‘అరేయొపాగు’ మెలి కెర్తి టాన్తె నెడిమి టీవోజ, “ఓ ఏదెస్సు పట్టుమ్చ మాన్సుల్, దేముడ్లు మెలనచి రిసా తుమ్ ఒగ్గర్ ఉచర్తసు మెన, ఆవ్ దెకితసి.

23 ఆవ్ జెతికయ్ వట్టె తుమ్ జొకర్ల గుడివొ గట్ట దెకిలయ్. ఎత్తివాట్ అస్సి. జేవ్ గుడివొ మొత్తుమ్తె కేన్ దేముడుక పూజ కెర్తి టాన్ తిలిసి ఏక్ దెకిలయ్ మెలె, ‘అమ్ నేన్లొ దేముడుచి పూజ కెర్తి టాన్ ఈంజ’ మెన ఏక్తె రెగ్ల అస్సున్. తుమ్ అర్దుమ్ నేన్తె జొకర్లొ జో దేముడుచి రిసా తుమ్క సూనయిందె.

24 “జో దేముడు కేన్ దేముడు మెలె, ఈంజ లోకుమ్ జెర్లవ కెర, లోకుమ్తె తిలిసి ఎత్తి కి జెర్లయిలోసా. జో పరలోకుమ్క బూలోకుమ్క వెల్లో, ప్రబు, చి మాన్సుల్ తెయార్ కెర్ల గుడివొతె జో తయె నాయ్.

25 అమ్ మాన్సుల్ జోక కిచ్చొ తెయార్ కెర్లె జోక లాబుమ్ నాయ్. జోక కిచ్చొ కొత్తు నాయ్. ఎత్తిక జివ్ దెతొసా,

ఎత్కిక జియడ్తోసా జో, దొర్కు జతిసి ఎత్కి దొర్కు కెర్తోసా జోయ్యి.

26 ఎత్కి దేసిమ్లుచ మాన్సుల్క ఎత్కి రితి, ఎత్కి మొదొల్ తెంతో జో జెర్వ అస్సె. జో ఉచర, వేర వేర కాలుమ్లు దా, 'ఈంజేవ్ మాన్సుల్ ఇన్నె జితు, జేవ్ మాన్సుల్ ఒత్త జితు' మెన, ఈంజ బూలోకుమ్తె ఎత్కిజిన్క జితి టాన్, జోయ్యి దా అస్సె.

27 ఎత్కిజిన్క 'అంక ఆస జా చజుతు, అంచి తెన్ బెదుతు' మెన జో పరలోకుమ్చొ ఎత్కి జెర్వ కెర్లో దేముడు అవ్కానుమ్ దా అస్సె. గని ఎత్కి మాన్సుక జో పాసి అస్సె, జేవ్ నేన్లె కి, జాన్లె కి.

28 ఆమ్ జితి సెక్తి, ఆమ్ ఇండితి సెక్తి, ఆమ్ జెర్మితి సెక్తి, కచితె మెలె, జో తెయి.

'ఆమ్ నిజుమి జోవయించ బోదల్' మెన తుమ్చ సొంత పండితుల్ సగుమ్జిన్ కి రెగ్ల అస్తి.

29 "పరలోకుమ్చొ ఎత్కి జెర్మయిలో దేముడుచ బోదల్ జమ్దె జలె, జో కిసి బజార్ పోలిక గే, వెండి పోలిక గే, పత్తురు పోలిక గే, మాన్సు కెర్లి కేన్ పోలిక గే, మాన్సు తెయార్ కెర్లి కేన్ పోలిక గే, జయెదె? జయె నాయ్.

30 "అగ్గె మాన్సు నేన్లి పొది దన తప్పుల్ కెర్లిన్చి పాపుమ్ జో దేముడు వయ్యడె నాయ్. గని 'ఒండి లోక్కుమ్చ మాన్సుల్ అప్పె జోవయించి పాపుమ్ ఒప్పన, జేవ్ కెర్లె పాపల్క పెట్టి దుకుమ్ జా మార్పువ జతు' మెన జో ఆడ్ర దా అస్సె.

31 కిచ్చొక మెలె దేముడు టీవో కెర్లె మాన్సుచి అత్తి ఒండి లోకుమ్చ ఎత్కిక 'సత్తిమ్ జా అస్తి గే పాపుమ్ తెన్ని అస్తి గే' మెన జో సత్తిమ్ తెన్ తీర్పు కెరుక ఏక్ దీన్క నిసాన అస్సె. మొర్ల మాన్సు తెంతో జోక ఉట్టయ్లి రిసా జా నంపజంక మెన అమ్క రుజువు దా అస్సె."

32 ఎత్కిలోక 'మొర్లె కి అన్నె జియ అస్సె' మెన సూన, సగుమ్జిన్ ఆసిల. గని అన్నె సగుమ్జిన్, "అన్నెక్ నుట్టు ఇన్నెచి రిసా అమ్క బోదన కెర్లె జలె, సూనుమ్దె" మెల.

33 తెదొడి పవులు జేవ్చి నెడమె తెంతో ఉట్ట గెలన్.

34 గని సగుమ్జిన్ జోచి పట్టి గెచ్చ ప్రబుక నంపజల. జోవయింతె అరేయొపాగీగు మెలి ఒత్తచి సబతె వెసితో దియొనూసియు, పడ్డో, నంపజలి ఎక్కి కొన్ని మెలె, దామరి మెలిసి. జోవయింతెన్ అన్నె సగుమ్జిన్ కి నంపజల.

18

కొరిండ్ పట్టుమ్తె పవులు కెర్లి బోదన

1 ఒత్త తెంతో ఏదెన్ను పట్టుమ్ తెంతో బార్ జా, పవులు కొరిండ్ పట్టుమ్తె అన్నె ఉట్ట గెలన్.

2 ఒత్త పావ, అకుల మెలొ యూదుడు ఎత్కిలో తెన్ దన్నుల్ జలొ. జో పొంతు ప్రదేసిమి జెర్మిలోసా. జో, ప్రిస్కిల్ల

మెలి తేర్ని తెన్, దొగుతెర జా దొరతి ఇటలి దేసిమ్చి రోమ పట్టుమ్ తెంతో ఉట్ట జా అస్తి. యూదుల్ ఎత్కిజిన్ అమ్చి రోమ పట్టుమ్ ముల ఉట్ట గెతు, ఒత్త ఏలుప కెర్లె క్లాదియ రానొ ఆడ్ర దా అస్సె. పవులు జేవ్ దొగుతెరచి గెరి గెలన్, చి జోవయింతెన్ లట్టబ్లన్.

3 పవులు, అకుల ఎత్కి కామ్ కెర్తన జవుల, చి రిసా, పవులు జోవయింతెన్ బస జలొ, చి జేవ్ బెద కామ్ కెర్లె తిల. జేవ్ టంబుగుడ్డల్ తున తెయార్ కెర్లిసి.

4 జా పొదుల్, ఎత్కి సెలవ్ కడన్ల దీసి, పవులు యూదుల్చి సబగేరి గెచ్చ, దేముడుచి కొడొతె తిలిసి రుజు దెకవ యేసుక్రీస్తుచి రిసా యూదుల్క కి గ్రీసు దేసుమ్చ సుదల్క కి బోదన కెర్లె తిలొ.

5 సీలయు చి తిమోతి మాసిదొనియ తెంతో ఉట్ట అయ్లి పొది, పవులు కిచ్చొ కెర్లె తిలొ మెలె, "దేముడు 'తెద్రయిందె' మెన సంగిలొ రచ్చించుప కెర్లెసా జతో క్రీస్తు, యేసుయి." మెన సాచి జా రుజుల్ బెదవ దన్నె యూదుల్క బోదన కెర్లె తిలొ.

6 యూదుల్, మాత్తుమ్, జా బోదన సూనుక నెస కెర, ఒప్పితి నాయ్, చి జోక దూసుప కెర్లె. జేవ్ దన్నె జతికయ్, "తుమ్ నాసెనుమ్తె గెలె తుమ్చి పూచి. తుమ్క సుబుమ్ కబుర్ సూనవుక అంచి పూచి, కుట్టవన అస్సి అంచి పూచి నాయ్. అప్పె తెంతో యూదుల్ నెంజిలసతె గెచ్చ సుబుమ్ కబుర్ సూనయిందె" మెన, 'ఇన్నెచి దూడి కి లంబున్ నాయ్' మెలి గుర్తుక, జోచ పాలల్ పంప్ల కెర,

7 సబగేర్ ముల బార్ జా "ఇన్నెయి బోదన కెర్లె తయిందె" మెన, సబగేర్ సాడిచి గెరి గెలన్. జా గేర్, తీతియు యూస్తు మెలొ యూదుడు నెంజిలొ రోమియుడుచొ గేరు. గని దేముడుక జో నంపజా జోకయ్ ఒక్కి కెర్లయ్.

8 జా పొదులె, యూదుల్చి సబగేర్చొ ఎజోమాని జలొ క్రీస్తు యేసుప్రబుక నంపజలొ. జో, జోవయించి గేర్చ ఎత్కిజిని, ప్రబుక నంపజల జా కొరిండ్ పట్టుమ్చ యూదుల్ నెంజిల మాన్సుల్ ఒగ్గర్జిన్ కి, నంపజా, బాప్తిసుమ్ నజన్ల.

9 ఏక్ రాతి, ప్రబు సిప్ప తెన్ పవులుక, "తుయి బి నాయ్. అంచి సుబుమ్ కబుర్ తుయి సూనయ్తె తా. తుక్లె తంక నాయ్.

10 ఆవ్ తుక తోడె అస్సి, చి కో తుక కిచ్చొ ప్రమాదుమ్ కెర్లి నాయ్. ఈంజ పట్టుమ్చ మాన్సుల్ ఒగ్గర్జిన్ అంచి రిసా సూన నంపజంక అస్సె" పవులుక ప్రబు సంగిలన్.

11 ఒత్త తెంతో వెర్నెక్ ఆదు ఎద పవులు జా కొరిండ్ పట్టుమ్తె తా, దేముడు దిలి యేసుచి రిసాచి సుబుమ్ కబుర్ తిలిసి ఎత్కి ప్రెజల్క సికయ్తె తిలన్.

12 జా ఒండి అకయ ప్రదేసిమ్క గల్లియోను మెలొసా అదికారి జా తతికయ్. యూదుల్ ఎత్కి గోసతెన్ పవులుక దెర, అదికారిచి గెరి ఆన,

13 “అమ్మచో దేముడు మోసే తెన్ దిలి ఆగ్గుల్తె తిలి రితి దేముడుక బక్తి కెర్తినతె నాయిమి నెంజిలి అలవాట్ బెదయ్తి ప్రైజల్ క ఈంజో సికయ్తయ్” మెన, నింద కెర్ల.

14 పవులు జబాబ్ దెంక ఉచర్లొ, గని బేగి గల్లియోను యూదుల్ క, “ఈంజో మాన్సు కిచ్చొ జవున్ నేరిమ్ కెర్లొ జలె, తుమ్ యూదుల్ సంగితి తీర్పు సూనుక బెదితి,

15 గని, ఈంజ కిచ్చొ నేరిమ్ చి నెంజె. తుమ్ యూదుల్ చొ దేముడుక జోకర్తి అలవాట్ చి రిసాచి తగు ఈంజ, రిత కొడొద అర్దల్ చి తగు. ఇన తగుల్ అవ్ సూనుక నెసి” మెన,

16 తీర్పు కెర్తి టాన్ తెంతో జోవయింక ఉదర్లన్.

17 ఒత్త బెర తిల జనాబ్ యూదుల్ చి సబక అదికారి జలొ సొస్తానేనుక దెర, తీర్పు కెర్తి టాన్ చి పురైతో జోక దెబ్బల్ పెట్ల. గని గల్లియోను అదికారి తుక్లె తిలొ.

ప్రిస్కిల్ల చి అకుల తెన్ పవులు ఎపెసు పట్టుమ్ ఎద గలిసి

18 పవులు అన్నె ఒగ్గర్ దీసల్ ఒత్త తా, బావుడ్లుతె సెలవ్ నజన, సిరియ ప్రదేసిమి గెచ్చుక మెన బార్ జలొ. జో తెన్ ప్రిస్కిల్ల చి అకుల, దొగుతెర, గెల. వట్టె గెచ్చు, కెంక్రేయ పట్టుమ్తె పవులు సెండి ఉత్తవన్లొ, దేముడుక ఆతు ఉక్కుల గడియ సెండి ముల తిలన్ చి రిసా.

19 జలె, కెంక్రేయతె ఓడతె వెగ, సముద్రుమ్ జీన, ఎపెసుచి రేవుతె పావ, ప్రిస్కిల్లక చి అకులక ముల దిలన్. జో యూదుల్ చి సబ గెరి గెచ్చు, యూదుల్ తెన్ లట్టబ యేసుచి రిసా ‘జొయ్యి దేముడు తెద్రయ్ లొ క్రిస్తు రచ్చించుప కెర్లొసా’ మెన రుజ్జుల్ దెకవ సికణ్ణొ.

20 “అన్నె సగుమ్ దీసల్ అమ్ చి తెన్ తా”, మెన, జోక బలవంతుమ్ కెర్ల గని “దస్సె నే జయె.” మెలన్.

21 గని, బార్ జలి పొది, “దేముడుచి సెలవ్ తిలె, కెయ్యక జవున్ తుమ్తె అన్నె జెయిందె” మెన సంగ, ఓడతె అన్నె వెగ, ఎపెసు పట్టుమ్ ముల ఉట్ట గెలొ.

22 వెల్లి సముద్రుమ్ జీన, యూదయ ప్రదేసిమ్ చి కైసరియ రేవుతె బుల జా, ఓడ తెంతో ఉత్త జా యెరూసలేమ్ పట్టుమ్తె ఇండ గెచ్చు, ఒత్త చ బావుడ్లు తెన్ దస్సుల్ జా, బుల జా, ఓడతె అన్నె వెగ, సిరియ ప్రదేసిమ్ చి అంతియొకయ పట్టుమ్తె ఉట్ట గెలొ.

23 ఒత్త సగుమ్ దీసల్ తా, అన్నె బార్ జా, దూరి దూరి బుల వేర వేర పట్టుమ్లుతె గెచ్చు, జో అగ్గె గెచ్చు తిలి గలతీయ ప్రదేసిమి చి పుగియ ప్రాంతుమ్లుతె గెచ్చు, సిస్సుల్ క అన్నె సికడ సికడ బోదన కెర్తికయ్, జేవ్ అన్నె నిదానుమ్ దయిరిమ్ జల.

అపొల్లో ఎపెసుతె బోదన కెర్తిసి

24 మదెనె, ఐగుప్తు దేసిమ్ చి అలెక్సంద్రియ పట్టుమ్ చొ అపొల్లో మెలొ యూదుడు ఎక్కిలొ, ఆసియా ప్రదేసిమ్ చి

ఎపెసు పట్టుమ్తె ఉట్ట జా అస్సె. బోదన కెరుక, జలె, కొడొ చెంగిల్ బెదఎదె, చి దేముడుచి కొడొతె తిలిసి చెంగిల్ జానె.

25 అగ్గె తెంతో, యేసు ప్రబుతె రచ్చున జతిన్ చి బోదన సూన నంపజా అస్సె, చి ‘వేర మాన్సుల్ క సూనయిందె’ మెన, ఒగ్గర్ ఆస జా అస్సె. యేసుచి రిసా దేముడుచి కొడొతె సంగిలిసి చెంగిలి సరిగా బోదన కెరెదె. గని బాప్తిసుమ్ చి కోడు, జలె, ఎక్కి యోహాను పానితె బాప్తిసుమ్ దెతె తిలి అలవాట్ జో జానె, గని యేసుక్రీస్తుచి నావ్ తెన్ చి జోచి ఆత్మ తెన్ చి బాప్తిసుమ్ చి రిసా, కో జోవయింక సంగుక నేతయ్.

26 జో, యూదుల్ చి సబగేరి దయిరిమ్ తెన్, యేసుచి రిసా ‘దొర్కు జలొ రచ్చించుప కెర్లొసా జలొ క్రిస్తు జయెదె’ మెన బోదన కెరుక దెర్లన్. గని ప్రిస్కిల్ల చి అకుల సూన కెర, జోవయింక గెరి కడన కెర దేముడు దొర్కు కెర్లి రచ్చున వాటుచి రిసాచి సుబుమ్ కబుర్తె జో నేన్లిసి ఎత్తి సొస్టుమ్ గ సికణ్ణ.

27 జో అకయ ప్రదేసిమ్తె గెచ్చుక ఇస్టుమ్ జలన్, చి ‘చెంగిలి’ మెన, ఎపెసుచ బావుడ్లు ఒప్పున, “గో” మెన సంగ, “ఇన్నెక బెదవన” మెన అకయతెచ సిస్సుల్ క ఉత్తుమ్ రెగ్ల, జోచి అత్తి తెద్రయ్ ల. పణ్ణొ, జో సముద్రుమ్ జీన ఒత్త పావ, దేముడుచి దయచి రిసా యేసుక నంపజలనక జో ఒగ్గర్ తోడు కెర్లన్.

28 యూదుల్ వేర సంగిలే కి, ఎత్తిజీన్ సూన్ తి రితి, దేముడుచి కొడొతెచ తిలిసి కొడొ వెంట కెర, “యేసుయ దేముడు తెద్రయ్ లొ దొర్కు జలొ రచ్చించుప కెర్లొసా” మెన రుజ్జుల్ దెకయ్ లొ.

19

పవులు ఎపెసుతె ఉట్ట అయ్ లిసి

1 అపొల్లో ఒత్త అకయ ప్రదేసిమ్ చి కొరింది పట్టుమ్తె తతికయ్ పవులు, డొంగుర్ దేసిమ్ వాట్ ఉట్ట జా, ఎపెసు పట్టుమ్తె అయ్ లన్. సగుమ్ జీన్ సిస్సుల్ తెన్ పవులు దస్సుల్ జలన్,

2 అన్నె, జోవయింక, “తుమ్ నంపజలి పొది, దేముడుచి సుద్ది తిలి ఆత్మ తుమ్ చి పెట్టి జెతికయ్ నజన్లదు గె?” మెన పుసిలన్. జేవ్, “నాయ్. జో ఆత్మ ‘అస్సె, మాన్సుక దొర్కు జయెదె’ మెన ఆమ్ కెయ్య సూనుమ్ నాయ్” మెన సంగిల.

3 జలె పవులు, “దస్సి జలె, కేన్ బాప్తిసుమ్ నజన్లదు?” మెన పుసిలన్.

4 “యోహాను బోదన కెర్లి బాప్తిసుమ్” మెన, జబాబ్ దిల. జాకయ్, పవులు జోవయింక, “యోహాను బాప్తిసుమ్ కెర్లిసి కిచ్చొచి రిసా మెలె, తుమ్ కెర్ల పాపల్ చి రిసా పెట్టి దుకుమ్ జా, అంచి పణ్ణొ జెతొసొక నంపజా బోదన కెర్లె తిలన్. జా బుద్ది మార్పుప జతి గుర్తుకయ్ బాప్తిసుమ్ దెతె తిలన్. కచి

రిసా 'అంచి పడ్డో జెతోసా' సంగితె తిలో మెలె, యేసుచి రిసాయి" మెన పవులు సంగిలన్.

5 జేవ్ సిస్సుల్ నూన, యేసుప్రబుచి నావ్ తెన్ బాప్తిసుమ్ నజన్.

6 పడ్డో పవులు జోవయింక ఎక్కెక్క బోడి చడ ప్రార్దన కెర్లన్, చి దేముడుచి సుద్ది తిలి ఆత్మ జోవయించి పెట్టి అయ్లిచి రిసా, జేవ్ అగ్గె నేన్ల వేర వేర బాసల్ తెన్ లట్టబ్బ, చి చోడి పుట్టవ, ప్రబుచి ఆత్మ సికడ్ల కబుర్లు సంగుక దెర్ల.

7 జేవ్ రమారమి బారజిన్ తిల.

8 పడ్డో పవులు యూదుల్చి సబగేరి గెచ్చుక దెర, తిన్ జోన్సొ ఎద దేముడుచి రాజిమ్తె బెదితిన్చి రిసాచి సుబుమ్ కబుర్ సబతె బోదన కెర కెర, దేముడుచి కొడతెచి కొడొ రుజ్జుల్క బెదవ, దయిరిమ్ తెన్ బోదన కెర్తె తిలన్.

9 యూదుల్తె సగుమ్జిన్ రాడ్ జివ్చ తిల, చి సత్తిమ్ నూనుక నెన కెర, పట్టుమ్చ పైజల్చి మొక్కె 'యేసుక్రీస్తు దొర్కు జలి రచ్చన వాట్ జలో' మెన ఒప్పున్తి చి రిసా 'అబద్దుమ్' మెన, సికడ్తె తిల. జాకయ్ యూదుల్క సికడుక ముల దా, యేసుక నంపజత సిస్సుల్క అజయి కడన, తూరన్ను మెలో ఎక్కిలోచి వెల్లి గేరుతె రోజుక గెచ్చు, దేముడుచి కోడు బెదవ బెదవ, పవులు బోదన కెర్తె తిలన్.

10 దొన్సి వెర్నల్ ఎద, పవులు ఒత్త ఎపెసుతె సికడ్తె తిలో, చి జా ఒండి ఆసియా ప్రదేశిమ్చి మాన్సుల్, ఇస్టుమ్ తిల యూదుల్ కి, గ్రీసు దేశిమ్చక కి, ప్రబుచి సుబుమ్ కబుర్ నూన్.

11 పడ్డో, పవులుచి అత్తి దేముడు అద్బుతుమ్చ వెల్లెల కమె జర్గు కెర్తె తిలన్.

12 మాన్సుక జొర్లొ తిలె, కో గే పవులు దెర తిల రుమాలు జలెకు, కచ్చెలివో జలెకు, జేవ్ జొర్లొ తిల మాన్సుల్క నా దిలె, జొర్లొ తిల గెచ్చెదె, బూతుమ్ దెర తిలె, ములెదె.

13 జా పొదొలె బుల బుల, బూతల్ ఉదడ్త యూదుల్ సగుమ్జిన్ అవ్వి కెర యేసుప్రబుచి నావ్ దెరుక దెర, "పవులు బోదన కెర్తె యేసుచి నావ్ తెన్ బార్ జా గో!" మెన బూతల్క ఉదడుక దెర్ల.

14 జోవయింతె సగుమ్జిన్, స్కెవ మెలో యూదుడు ఎక్కిలోచొ సత్తుజిన్ పుత్తర్పులు. స్కెవ, ఎత్తిక వెల్లొ పూజరి జయెదె.

15 జేవ్ సత్తుజిన్ జోవయించ పుత్తర్పులు, దస్సి యేసుచి నావ్ దెర ఏక్ బూతుమ్ ఉదడుక దెర్లె, బూతుమ్ జబాబ్ దా జోవయింక, "యేసుక జాని, పవులుక జాని గని తూమ్ కొన్?" మెలన్.

16 చి బూతుమ్ దెర్లొ జో మాన్సు జేవ్ ఉదడుక ఉచర్లసచి ఉప్పిరి నిగ జా, సేడవ, జిన్లన్, చి జేవ్ సత్తుజిన్ దెబ్బల్క, జో గేర్ తెంతొ డుమ్డయ్ నిగ గెల.

17 జా ఎపెసు పట్టుమ్చ ఎత్తిజిన్ యూదుల్క, గ్రీసు దేశిమ్చక, జా జర్గు జలిసి జాన్సి, చి 'యేసుచి నావ్ వెల్లి, ఆరి దెరుక నెంజె' మెన చిన, బియఁ గెల.

18 పడ్డో, జోవయింతె నొవర్ నంపజలన ఒగ్గర్జిన్ జా కెర, జేవ్ కెర్ల పాపల్ ఎదార్దుమ్ ఒప్పున్.

19 జోవయింతె ఒగ్గర్జిన్ అగ్గె తెంతొ సయ్తాన్చి మాయకమె కెర్తన జా తిల. జేవ్ అప్పె జోవయించ పుస్తకమ్లు గట్ట ఆన కుడవన, ఎత్తిజిన్చి మొక్కె డయ గెల. జేవ్ డయ గెల పుస్తకల్ మొత్తుమ్చి విలువ లెక్క కెర్ల, కెద్దిచ జల మెలె, యాబయ్ వెయిలు వెండి బిల్లల్ చి విలువ జల్లె.

20 దస్సి, ఒండి జా ప్రాంతుమ్తె సుబుమ్ కబుర్ నూనయ్ జలి, చి ఒగ్గర్ ఒగ్గర్జిన్ మాన్సుల్ ప్రబుక నంపజా మార్పుప జల.

21 ఈంజ ఎత్తి జర్గు జలి పడ్డో, ప్రబుచి ఆత్మ జోవయించి పెట్టి సికడ్డికయ్, "మాసిదోనియచి వాటు, పడ్డో అకయ వాటు గెచ్చు యెరూసలేమ్తె గెచ్చిందె, చి ఒత్త గెలె, రోమ్తె కి ఆవ్ గెచ్చుక అస్సె" మెన పవులు ఒప్పున్.

22 జా పొదులె, పవులుచి కామ్తె బెదితె తిల తిమోతి చి ఎరస్తు జత మాన్సుల్క జోక అగ్గె మాసిదోనియతె తెద్రవ, పవులు ఆసియా ప్రదేశిమ్చి జా ఎపెసు పట్టుమ్తె అన్నె గడియ తా గెలో.

క్రీస్తుక నంపజతి రిసా అరెమి దేవిక జోకర్తన అల్లర్ జలిసి

23 జా పొదులె, యేసుక్రీస్తుక నంపజా రచ్చన జతి *వాటుచి రిసా తగు జలి.

24 కిచ్చొక మెలె, నరాబు జలో దేమేత్తి మెలోసా అరెమి దేవిక జోకర్త బొమ్మల్ వెండి సామన్క తెయార్ కెర్తయ్, చి జోవయింక, జోవయించి కామ్తె బెదితి సరాబుల్క లాబుమ్ ఒగ్గర్ దొర్కు జతె తయెదె.

25 జో ఏక్ దీసి జోతె కామ్ కెర్తసక ఎక్కితె బుకారా కెర, అన్నె సరాబుల్క బుకారా, జోవయింక, "ఈంజ అమ్చి కామ్చి రిసా అమ్క లాబుమ్ చెంగిల్ దొర్కు జతయ్, చి చెంగిల్ జితసుమ్.

26 గని అమ్చి ఎపెసుతె కి అమ్చి ఒండి ఆసియా దేశిమి కి, మాన్సుల్ తెయార్ కెర్ల దేముడ్లు బొమ్మల్ దేముడ్లు నెంజితి, మెన, ఈంజొ పవులు సికడ అస్సె, చి అమ్చి అలవాట్ ఒగ్గర్ ఒగ్గర్జిన్ ముల్తి రితి జో మార్పుప కెర అస్సె మెన తుమ్ దెకితసు, నూన్తసు.

27 జలె, ఈంజ అల్లర్ నే పిట్టయ్లె, అమ్చి కామ్ నిస్టోరుమ్ జయెదె. జా, దస్సి అన్నె, అమ్చి వెల్లి అరెమి దేవిక ఒండి ఈంజ ఆసియా దేశిమ్చ, ఒండి లోకుమ్చ జోకర్తతి. ఇన్నెచి గుడి ఆరి పాడ్ జలె, ఇన్నెచి విలువ గెచ్చెదె" మెన సికడ్లన్.

* 19:23 19:23 మెలె యేసుక నంపజలకయ్ పరలోకుమ్తె గెచ్చుక జయెదె మెలి బోదన.

28 జేవ్ సరాబుల్ సూన, ఒగ్గర్ కోపుమ్ జా, “అమ్చి ఎపెసుచి వెల్లి అరైమి దేవిక జెయ్యి, జెయ్యి!” మెన, కేకుల్ గలిల.

29 దస్సి, ఒండి పట్టుమ్ గగ్గోల్ జా గెలి. జా పట్టుమ్చ నచ్చగావితె టాన్ మెన, వెల్లి నబ తిలి. గాయియు చి అరిస్తార్కుక మాసిదోనియచ మాన్సుల్, జలె, పవులు తెన్ ఉట్ట జా తిల. జలె, సరాబుల్చి పచ్చెన గెల జా పట్టుమ్చి జనాబ్ జేవ్క దెర, జా నచ్చగావితె టాన్ తెడిక ఒగ్గోడ నిల.

30 “జేవ్క తోడ్ గెచ్చిందె” మెన, పవులు నచ్చగావితె టాన్ జనాబ్ తిలిసితె పెనుక ఉచర్లన్, గని ఒత్తచ సిస్సుల్ ఒప్పితి నాయ్.

31 పడ్డో, పవులుచ గోతుల్ జల జా ఆసియా ప్రదేసిమ్చ అదికారుల్ సగుమ్జిన్, “పోని, జా నచ్చగావితె టాన్తె పెను నాయ్, ప్రమాదుమ్” మెన, బతిమాల్పా జా కబుర్ తెద్రయ్ల.

32 జా ఒండి బెర తిల జనాబ్తెచ, జలె, సగుమ్జిన్ ఏక్ కోడు, సగుమ్జిన్ వేర కోడు, కేకుల్ గల్తె తిల. జోవయింక ఎక్కి ఉద్దెసుమ్ నాయ్, సిక్కు జా అస్సి. జేవ్ బెర అయ్లిసి కిచ్చొక గే, జోవయింతె ఒగ్గర్జిన్ నేన్తి.

33 యూదుల్ జలె, అలెక్కుండ్రు మెలో జోవయించో మాన్సు ఎక్కిలోక పురై తెద్రయ్ల, చి జనాబ్తె అన్నె సగుమ్జిన్ కి జోవయింక సికడ్డికయ్, జో పురై జా, ‘సూన’ మెన సయన కెర, దెర్ను సేడ్ల జేవ్ దొగులచి పచ్చెనచి తీర్పు సంగితో.

34 గని ‘యూదుడుయి జో’ మెన అరైమిక జోకర్తన చిన కెర, ఎక్కి అవాడ్ కెరన, దొన్ని గంటల్ పూర్తి, “అమ్చి వెల్లి దేవిక జెయ్యి, జెయ్యి!” మెన, కేక్ గలుక ములితి నాయ్.

35 పట్టుమ్క అదికారి, కస్టనె జనాబ్క ముద్దో కెర, “అమ్చి ఎపెసు పట్టుమ్చ పైజల్, తూమ్ సూన. వెల్లి అరైమి దేవిచి గుడి అమ్చి ఎపెసుతె అస్సె మెన ఒండి లోకుమ్చ జాన్తి. పడ్డో, ఆగాసుమ్ తెంతో సేడ్డి బొమ్మపత్తర్ ఇన్నెయి అస్సె మెన ఎత్కిజిన్ జాన్తి. జేవ్ దొన్ని అమ్మి రకితసుమ్.

36 జలె, ఈంజ సత్తిమ్క కో ‘అబద్దుమ్’ మెనుక నెతిర్చిచి రిసా తుమ్ కిచ్చొక గగ్గోల్ జతసు? బుద్ది నెంజిలితె కిచ్చొ బమ్మ కామ్ తుమ్ కెర నాయ్. సేంతుమ్ కెరన.

37 ఈందె తుమ్ కడ ఆన్ల ఈంజేవ్ మాన్సుల్ అమ్చి గుడిచి కిచ్చొ చడితి నాయ్, పాడ్ కెర్తి నాయ్, చి అమ్చి దేవిక దూసుప కెర్తి నాయ్.

38 “జలె, కచి రిసా గే ఈంజో దేమేత్తి, జోవయింతెన్ తిల సరాబుల్ ‘దావ దెమ్దె’ మెన ఉచర్తతి, అదికారిచి నబతె సూనవుక జయెదె, అమ్క తీర్పు కెర్తన అస్సి. ఎక్కిలోచి ఉప్పిరి ఎక్కిలో నాయిమ్ తెన్ని తగు కెర్త, జలె,

39 గని, అన్నె వేర బాదల్ అస్తి మెలె, మాములుమ్ తీర్పు కెర్తనతెన్, అమ్చి పట్టుమ్చి నబతె తగు సూనవయ్ తీర్పు కెరుక అస్సె.

40 “జాగర్ల! ఆజి జర్గు జలిన్చి రిసా, ఎపెసు పట్టుమ్చ పైజల్ ఇసి గగ్గోల్ జా ప్రబుతుమ్చి మరియాద కడ్ల, మెన, తుమ్చి రిసా నేరిమ్ వయడుక జయెదె. అమ్క ఏలుప కెర్తన అమ్క పుసిలె, ఆజిచి తగు కిచ్చొ బెదితిసి సంగుక నెత్తుమ్” మెన, పట్టుమ్చో అదికారి జనాబ్క సంగిలన్.

41 సంగ, బెర తిల జనాబ్ ఎత్కిక గెరి తెద్రయ్లన్.

20

పవులు గ్రీకు దేసిమ్తె కెర్తి ప్రబుచి కమె

1 జా పట్టుమ్చి గగ్గోల్ కేడ్డికయ్, ఒత్తచ సిస్సుల్క బుకారా, జోవయింక “దయిరిమ్ తా నిదానుమ్ తెన్ తా” మెన సంగ కెర, పవులు జోవయింతె సెలవ్ నజన, మాసిదోనియ ప్రదేసిమి గెచ్చొక, ఓడతె వెగిలన్.

2 సముద్రుమ్ జిన, మాసిదోనియతె పావ, జా ప్రదేసిమి బుల బుల, ఎత్కిజిన్క బోదన కెర, దయిరిమ్ సంగ, జా ప్రదేసిమ్ ఒత్తల్తో జిన గ్రీకు మెన అన్నెక్ నావ్ తిలి అకయ ప్రదేసిమి పావెలన్.

3 ఒత్త తిన్ జొన్నొ తా కెర, “ఓడతె వెగ సిరియ ప్రదేసిమి అన్నె ఉట్ట గెచ్చిందె” మెన సంగిలె, యూదుల్ జోక అల్లర్ కెరుక కుట్ట కెర అస్తి మెన జో సూన తా, జా వాటు గెచ్చొక ముల, అన్నె మాసిదోనియ వాట్ బుల గెలన్.

4 జోచి తెన్ అన్నె, బెరయ పట్టుమ్చో పుర్తుచో పుత్తుసి సోపత్తు, పడ్డో దెస్సలొనీక పట్టుమ్చ, అరిస్తార్కుక, చి సెకుండు. పడ్డో గలతీయ ప్రదేసిమ్చి దెర్చే పట్టుమ్చ, గాయియు చి తిమోతి, పడ్డో ఆసియా ప్రాంతుమ్చ తుకికు, చి త్రోపిము ఈంజేవ్ కి గెల.

5 జేవ్, అమ్క అగ్గె గెచ్చు సముద్రుమ్ జిన, ఆసియా ప్రదేసిమ్చి త్రోయ రేవుతె గెచ్చు, * అమ్చి రిసా రకితె తిల.

6 గని మాసిదోనియచి పిలిప్పి పట్టుమ్తె అమ్ పావ, నే పులయ్ల పోడియె కతి పండుగు కేడ్డికయ్, ఓడతె వెగ, పావ్ పొదుల్ ప్రయానుమ్ కెర, త్రోయ రేవుతె ఉత్త, సత్తు పొదుల్ ఒత్త జా పట్టుమ్తె తా గెలమ్.

7 జా †అయ్తర్ దీసి, సంజె సంగుమ్ సుదల్ ఎక్కిలోక ఎక్కిలో ప్రేమ తతి గుర్తుచి అన్నిమ్ బెద కా యేసుచి ఆగ్ బలి జలి గుర్తుచి పోడియె కా, జా రస్సుమ్ పింక మెన, తిన్ని మెట్టుచి ఏక్ గేరుచి ఉప్పిర్చి మెట్టుచి గదితె బెద తిలమ్, చి ‘కలిక ఉట్ట గెచ్చిందె’ మెన తా, ఒత్త బెర తిలసక పవులు బోదన కెర కెర, సొక్కు ఎద సికడ్డె తిలన్.

8 అమ్ బెర తిలి జా గదితె, ఒగ్గర్ దివ్వొ లగితె తిల.

* 20:5 20:5 ‘అం’ మెలె, ఈంజ ‘బారికుల్’ పుస్తకుమ్ రెగిడ్డో లూకా. ఇన్నె తెంతో పవులు తెన్ జో అన్నె బులుక దెరెదె. † 20:7 20:7 సత్తు పొదుల్తె అగేచి దీసి

9 ఐతుకు మెలో ఉబెడొ ఎక్కిలో కిట్టి ఉప్పిర్ వెస తిలన్. ఒత్త వెసిలె, పవులు అన్నె ఒగ్గర్ సేపు బోదన కెర్తె తతికయ్, జో ఉబెడొ జుమ కెర, పూర్తి నిజ గెలన్. వెసుక నెత్త కెర, జా ఉప్పిర్ తిలి మెట్టుచి కిట్టివాట్ ఎట్టా సేడ్లన్, చి జోక ఉక్కుల్క గెలె, మొర గెచ్చ అస్సె.

10 పవులు, ఉత్త గెచ్చ, వంపొ జా అత్తో తెన్ అమ్డ కెర ఉబెడొక గుండెతె పెలన, తిల మాన్సుల్క దెక, “తుమ్ బియఁ నాయ్. జోచి జీవు జోచి పెట్టి అస్సె” మెన దయిరిమ్ సంగిలన్.

11 తెదొడి పవులు, తిల మాన్సుల్ తెన్ జా గదితె అన్నె వెగ, జా పోడియొ కా జా రస్సుమ్ పియ, జా ప్రేమ అన్నిమ్ కెర తా, కుకుడొ వానెనె ఎద బోదన కెర్లన్, చి పెందలె ఉట్ట గెలన్.

12 జో ఉబెడొ, మాత్తుమ్, చెంగిల్ జలన్, ‘మొర గెలోసా జీవ్ జలన్’ మెన, ఒగ్గర్ సర్లసంతోసుమ్ తెన్ జోక గెరి నిల.

ఎపెసుతెచ సుదల్తె సెలవ్ కడన్సిసి

13 అస్సు రేవు ఎద గెచ్చుక మెన, బార్ జలమ్. పవులు, మాత్తుమ్, “ఇండ గెచ్చిందె” మెంతికయ్, ‘ఒత్త అస్సుతె ఓడతె వెగడుమదె’ మెన, ఆమ్ ఓడతె వెగిలమ్.

14 పవులు ఇండ జా అమ్చి తెన్ అస్సుతె దస్సుల్ జతికయ్, జోవయింక ఓడతె వెగడ, మితులేనే మెలి వెల్లి డిబ్బుతె అయ్లమ్.

15 ఒత్త తెంతో ఓడతె అన్నె బార్ జా, అన్నెక్ దీసి, కియొసు మెలి డిబ్బు ఒత్తల్తో పాఁచ, అన్నెక్ దీసి ఆసియా ప్రదేశిమ్చి మిలేతు రేవుతె ఉత్తిర్లమ్.

16 ఎపెసుతె గెచ్చుమ్ నాయ్, పవులు నెసిలన్. ఒత్త గెలె, జా ఆసియా ప్రదేశిమి సగుమ్ దీసల్ తంక జలె, యెరూసలేమ్తె పాఁవుక వాయిద జయెదె. తెర్లె, పెంతెకొన్సు పండుగు దీసి యెరూసలేమ్తె పాఁచ తయిందె మెన, పవులు ఆస జా అస్సె.

17 జాకయ్, మిలేతుతె తా, ‘ఎపెసు పట్టుమ్చ సంగుమ్చ వెల్లెల మాన్సుల్ ఇత్తల్ జెతు’ మెన, కబుర్ తెద్రయ్లన్.

18 జేవ్ జోచి పురె జెతికయ్ పవులు జోవయింక ఇసి మెలన్. “ఆవ్ తొలితో ఆసియాతె ఉట్ట అయ్లిసి తుమ్ ఏద కెర్తె. జా కెర, తుమ్చి తెన్ జితె తాఁ గెలయ్.

19 ఒత్త తా, కిచ్చొ బడాయ్ నే ఉచరంతె, ‘ప్రబుక సంపజతు’ మెలి ఆసక ఏడ ఏడ, యూదుల్చ కుట్టల్చి రిసా సైమల్ సేడ సేడ ప్రబుచి సేవ కెర్తె తిలిసి తుమ్ జాన్సు.

20 గని దన బాదల్ సేడ్లె కి, కామ్క జెతికయ్ కిచ్చొ జలెకి, నే ముల్తె నిదానుమ్ తెన్ తుమ్క సికడ్లె తిలయ్, చి సబగెరి ఎదార్దుమ్ కి, గెరల్ గెరల్ బుల కి, బోదన కెర్తె తిలయ్.

21 దస్సి, యూదుల్క కి గ్రీసు దేశిమ్చ సుదల్క కి, ‘తుమ్ కెర్ల పాపల్చి రిసా పెట్టి దుకుమ్ జా, దేముడుక నిదానుమ్

జంక, చి ప్రబు జలొ యేసుక్రీస్తుక సంపజంక ముక్కిమ్’ సాచి సంగితె తిలయ్.

22 “అప్పె, ఒత్త కిసి జయిందె గే నేని, గని ప్రబుచి ఆత్మ అంక పెట్టి కచితుమ్ సంగిల్ రిసా, ఆవ్ యెరూసలేమ్తె ఉట్ట గెతసి.

23 గని కిచ్చొ జాని మెలె, ఒత్త గెలె, జేలి జతిసి, సైమల్, అంక పిట్టె నాయ్ మెన, ఆవ్ కేన్ పట్టుమ్తె గెలె కి, దేముడుచి సుద్ది తిలి ఆత్మ అంక సికయ్తయ్.

24 గని, ఆవ్ జిలె కి మొర్లె కి బాద నాయ్. అంచి జీవుక విలువ దెకి నాయ్. ముక్కిమ్క అంక కిచ్చొ ఆస మెలె, దేముడు కెర్లె దయచి రిసాచి చి సాచి సంగితె తా మెన” యేసుప్రబు అంక కామ్ దా అస్సె. జలె, కెల్క కెల్లిన్తె జీనుక మాన్సుక కిసి పూర్తి ఆస తయెదె గే, దస్సి జో ప్రబు దిలి కామ్ పూర్తి నిదానుమ్ కెర కేడవుక అంచి ఆస.

25 “పడ్డె, ఈందె, తుమ్ ఎత్కిజిన్ ఆవ్ పరలోకుమ్చి రాజిమ్చి రిసాచి సుబుమ్ కబుర్ నూనయ్లన అప్పె తెంతో అంక అన్నె దెకున్ నాయ్ మెన ఆవ్ జాని.

26 జాకయ్, తుమ్ ఎత్కిజిన్చి మొక్కె, తుమ్ ఎత్కిజిన్ సాచి జతి రితి, తుమ్క ఆవ్ కిచ్చొ మెన సాచి సంగితసి మెలె, తుమ్చి రచ్చునచి రిసా అంక అన్నె కిచ్చొ పూచి నాయ్. అంచి జా పూచి కుట్టవన అస్సి.

27 దేముడు అంక సికడ్లిసి ఎత్కి తుమ్క బోదన కెర అస్సి, కేన్ కి ఆవ్ లుకడన్క నాయ్.

28 “తుమ్చి పూచి కిచ్చొ మెలె, ప్రబుచి ఇస్టుమ్ తెన్ జాగర్ల ఇండ, తుమ్ చెంగిల గొవుడ్లు జా, జోచి మంద జల, యేసుక సంపజలన ఎత్కిజిన్క చెంగిల్ దెకితె తా, సికడ్లె తంక. జోచొ సొంత పుత్తున్చి లొయి సువడ, జోవయింక కి ప్రబు గెనన అస్సె. తూమ్ జోక దెకితి రిసా, జోచి సుద్ది తిలి ఆత్మ తుమ్చి పెట్టి జో దా అస్సె.

29 ఆవ్ ఉట్ట గెలె, క్రూరుమ్చ డుర్కొ జత రిత మాయమాన్సుల్ తుమ్చి నెడమె జా కెర, ప్రబుచి మంద జల, జోక నిదానుమ్ తిలసక అల్లర్ కెరుక పిట్టితి నాయ్.

30 ‘యేసుచ సిస్సుల్ అమ్చి పట్టి జా జోవయింక పచ్చుత్’ మెన, తుమ్చితె తెంతొచ సగుమ్జిన్ కి సత్తిమ్ మార్పువ కెర్తె కొడొ సంగ సంగ సికడుల.

31 జాకయ్, జేవ్చి రిసా తుమ్ జాగర్ల తెన్ తా. అచ్చి కిసి జలయ్? కస్టుమ్ సేడ సేడ తిన్ని వెర్పుల్ పూర్తి, రాతి మెద్దెనె, రోజుక నే పిట్టె, తుమ్క జోవయింక సికడ్లె తిలయ్. జా తుమ్ పచ్చు నాయ్.

32 అప్పె దేముడుచి అత్తి తుమ్క ఆవ్ సొర్ప కెర దెతసి. జో దయ కెర్లిసి ఎత్కిచ కొడొ ఉచరుక ముల నాయ్. జయ్యి నిదానుమ్ పెట్టి తియన్లదు మెలె, తుమ్క అన్నె డిట్టుమ్ కెరెదె, చి జోచ సొంత మాన్సుల్ జంక జో నిసాన్లనక దిలి వాటచ తుమ్క పిట్టె నాయ్.

33 “ఆవ్ ఇన్నె బుల్తె తిలి పొది, కచి వెండి కచి బజరి, కచి పాలల్ క ఆన జయి నాయ్.

34 ఆవ్ అంచ సొంత అత్తో తెన్ కామ్ కెర కెర, అంచి రిసా, అంచి తెన్ కామ్ కెర్తనచి రిసా కి సరిపుచుప జతిసి దొర్కు కెరన జితె తిలయ్, మెన తుమ్ జాన్సు.

35 ‘నజితి కంట, దెంక చెంగిలి’ మెన, యేసుప్రబు సంగిలి కోడు నే పచ్చితె, దస్సి, సొంత అత్తో తెన్ కామ్ కెరయి, నెతిర్లసక తోడు కెరై తా, ‘దస్సి కెరై చెంగిల్’ తుమ్ క వాల్ దెకయ్లయ్”, పవులు బోదన కెర్లన్.

36 ఇసి సంగ కేడవ, పవులు మొగ్రల్ టెక సెర్ను సేడ, జేవ్ ఎత్తిజిన్ తెన్ ప్రార్లన కెర్లన్.

37 జేవ్ ఎత్తిజిన్ దుకుమ్ జల. అంకివొతె ఆసునో సూయి జలి, చి జోవయించి గుండెతె ఎక్కెళ్ల పెలన గివెడె దెర అమ్డ చుంబ,

38 కిచ్చొక ఒగ్గర్ దుకుమ్ జల మెలె, “తుమ్ అంక అన్నె దెకున్ నాయ్” మెన జో తెదొడి సంగిలి కోడుచి రిసా, తెదొడి బార్ జా ఓడతె పావితె ఎద, జోక వట్టె బొడొవ దిల.

21

1 జేవ్ మాన్సుల్తె సెలవ్ నజన, ఓడతె వెగ, ఓడ సోగ జినవ, కోసు మెలి డిబ్బతె పాచ నిద్ర తా, అన్నెక్ దీసి రోడెన్ డిబ్బతె పాచ, ఒత్త తెంతో సముద్రుమ్ జీన, పతర రేవుతె పావెలమ్.

2 ఒత్త పతరతె ఉత్త, పేనికే ప్రదేసిమ్తె గెతి ఓడ దొర్కు జతికయ్, వెగ బార్ జలమ్.

3 జా ఓడతె పాచ పొదుల్ గెచ్చు గెచ్చు, కుప్ర డిబ్బ అమ్చి డెబ్రి పక్కయ్ తతి రితి జీన, సిరియ ప్రదేసిమ్ పక్క పాచ, తూరు రేవుతె ఉత్తిర్లమ్. ఓడతె సావుకర్లు దువార్లి సామన్ ఒత్త ఉత్తవుక తిలి.

4 ఒత్తచ నంపజల సిస్సుల్ క చజ, సత్తరెక్ జోవయింతె తా గెలమ్. జేవ్, జర్లు జంక తిలిసి ప్రబుచి ఆత్మసెక్తిక చిన కెర, పవులుక, “యెరూసలేమ్తె గెలె తుక ప్రమాదుమ్, పోని” మెన సంగిల.

5 జలె, సత్తు పొదుల్ గెతికయ్, అన్నె బార్ జంక దెర్లమ్. జా తూరు పట్టుమ్చ నంపజలన్ ఎత్తిజిని, తేర్నివొతెన్ బోదల్ తెన్, పట్టుమ్చ గుమ్మల్ ఇత్తలతో అమ్క బొడొవ దా, సముద్రుమ్చి ఒడ్డుతె పాచడ్ల, చి అమ్ ఎత్తిజిన్ ఒత్త మొగ్రల్ టెక సెర్ను సేడ ప్రార్లన కెర, ఉట్ట, అమ్తె జోవయింతెన్ సెలవ్ నజన,

6 అమ్ ఓడతె వెగిలమ్, జేవ్ గెరి ఉట్ట గెల.

కైసరియ పట్టుమ్తె పావెలిసి

7 తూరు పట్టుమ్క ముల అన్నె ప్రయానుమ్ కెర, తొలెమాయి రేవుతె ఉత్త, ఒత్తచ బావుడ్లు తెన్ దస్సుల్ జా జోవయింతె ఎక్కి దీసి తా,

8 అన్నెక్ దీసి ఓడతె గెచ్చు, యూదయ ప్రదేసిమ్చి కైసరియ పట్టుమ్చి రేవుతె ఉత్త, సుబుమ్ కబుర్ సూనయ్తో పిలివ్చి గెరి గెలమ్. ‘బీద సుదల్ క దెకుత్’ మెన అగ్గెయి యెరూసలేమ్తెచ యేసుచ బారికూల్ సత్తుజిన్క నిసాన తిల. పిలివ్, జేవ్ సత్తుజిన్తె ఎక్కిలో. జోచి గెరి, సగుమ్ దీసల్ తా గెలమ్.

9 పిలిప్పుక చెత్తర్జిన్ పెండ్లి నే జల దువిసివొ తిల. ప్రబుచి ఆత్మ జోవయించి పెట్టి కిచ్చొ సికడెదె గే, జా కోడు ఈంజేవ్ ఉబెడివొ సంగుల.

10 పడ్డో, అమ్ ఒత్త తిల పొదుల్, ప్రబుచి ఆత్మ సికడ్ల కబుర్లు సంగితో అగబు మెలో యూదయచి అన్నెక్ పక్క తెంతో కైసరియ పట్టుమ్తె ఉట్ట అయ్లో.

11 జో అమ్తె జా కెర, పవులుచి కెరాంటె బందంతి వాలి నజ, గుర్తుక జోచ సొంత అత్తో చట్టో బందన, “దేముడుచి సుద్ది తిలి ఆత్మ కిచ్చొ కోడు సంగితయ్ మెలె, ఆవ్ కిసి అప్ప బందన అస్సి గే, దస్సి, ఈంజ వాలిచొ మాన్సుక యెరూసలేమ్ పట్టుమ్చ యూదుల్ బంద, యూదుల్ నెంజల అదికారుల్తె సార్ప కెర దెవుల” మెన ప్రబుచి కబుర్ సంగిలన్.

12 జా కోడు సూన, జా పట్టుమ్చ నంపజలన, అమ్ కి, “యెరూసలేమ్తెచయి, తుయి గో నాయ్!” మెన బతిమాల్పా జా సంగిలమ్.

13 జలె పవులు జోవయింక, “కిచ్చొక దస్సి ఏడ అంక పెట్టితె దుకుమ్ కెరయ్తను? అంక బందిలె బందుత్, జేలి కెర్లు, అన్నె, ఆవ్ మొర్లె యేసుప్రబుక గవురుమ్ జెయెదె మెలె, మొరిందె కి” మెన సంగిలన్.

14 “అమ్ కెడ్డి సంగిలే కి, జోక జయి మెన్ను” మెన, అమ్ చిన, “దస్సి జలె, ప్రబుచి ఇస్టుమ్ జర్లు జవున్!” మెన, తుక్లె జలమ్.

యెరూసలేమ్తె ఉట్ట గెలిసి

15 జా పడ్డో, జేవ్ పొదుల్ గెతికయ్, అమ్చి సామన్ సర్లు కెర, దెర, యెరూసలేమ్తె గెచ్చుక బార్ జలమ్.

16 అమ్చి తెన్, కైసరియ పట్టుమ్చ సిస్సుల్ జల నంపజలన సగుమ్జిన్. అగ్గెయి తెంతో సిస్సుడు జలో కుప్ర డిబ్బ దేసిమ్చొ మ్నాసానుచి గెరి నిద్ర తతి రిసా ఒత్త అమ్క కడ నిల.

17 అమ్ యెరూసలేమ్తె పావెతికయ్, బావుడ్లు సర్ల తెన్ అమ్క బెదవన్ల.

18 అన్నెక్ దీసి, పవులు అమ్చి తెన్ యాకోబుతె గెలమ్. ఒత్త సంగుమ్చ వెల్లెల మాన్సుల్ ఎత్తిజిన్ ఒత్త బెర తిల.

19 జోవయింతెన్ దస్సుల్ జా, యూదుల్ నెంజలనతె జో బుల్తె తిలి పొది జోవయింతెన్ దేముడు జోచి అత్తి జర్లు కెర్లిసి ఎత్తి, వర్లు తెన్, పవులు సాచి సంగిలన్.

20 జేవ్, సూన కెర సర్ల జా, “దేముడు జా ఎత్తి జర్లు కెర అస్సి” మెన, జో దేముడుచి గవురుమ్ సంగిల, గని

పవులుక కిచ్చో మెల మెలె, “ఓ, బావో, ఇన్నె, అమ్చ యూదుల్తెయి, లచ్చల్జీన్ ప్రబుక నంపజా అస్తి మెన తుయి దెకితసి. మోసేచి అత్తి పూర్గుమ్ దిల ఆగ్గుల్ రితి నిదానుమ్ కెర్తతి.

21 తుచి రిసా కిచ్చో మెన నూన అస్తి మెలె, తుయి యూదుల్ నెంజిలసచ దేసిమ్లుతె గెచ్చు, ‘మోసే పూర్గుమ్చోచి అత్తి దేముడు దిలిసి ఆగ్గుల్ తుమ్ పచ్చు, తుమ్చ పుత్తర్దుక అమ్చి గుర్తుచి సున్నతి కెరుక ముల, జా అలవాట్ విడ్డల్ ముల’, తుయి అమ్చ యూదుల్క సికడ్డసి.

22 జాకయ్, అమ్క కిచ్చో బాద మెలె, తుక ‘ఉట్ట జా అస్సి’ మెన కచితుమ్ సూనుల.

23 జాకయ్, తుయి కిచ్చో కెర్లె చెంగిల్ మెన తుక అమ్ కిచ్చో సంగితనుమ్ మెలె, అమ్తె చెత్తర్జిన్ ‘సెండి ఉత్తవుమ్దె’ మెన, దేముడుక ఆతు ఉక్కుల అస్తి.

24 జలె, జేవ్ చెత్తర్జిన్ తెన్ తుయి సుద్ది కెరన, దేముడుచి గుడితె గెచ్చు, జేవ్ సెండి ఉత్తయ్తి కర్పు ఎత్తి తూయి దేను. తుయి దస్సి కెర్లది మెలె, తుచి రిసా జేవ్ సూన్లిన్క తప్పు మెన చిన, జోకి అమ్చ ఆగ్గుల్ రితి సత్తిమ్ ఇండితయ్ మెన నంపజలన అమ్చ యూదుల్ ఎత్తిజిన్ దెకుల.

25 గని, యేసుక నంపజల యూదుల్ నెంజిలసక బాద నాయ్. జోవయించి రిసా జోవయింక కిచ్చో తీర్పు రెగ్గ తెద్రయ్లమ్ మెలె, బొమ్మల్క దిలిసి తుమ్ కా నాయ్, లోయి కా నాయ్, టోట్రో మోడ లోయి నే గెచ్చయ్లి సిద్ద కా నాయ్, చి లంజెకమొ కెర నాయ్, మెన, జా ఎక్కి ఆడ్ర దిలమ్” మెన పవులుక యెరూసలేమ్చ సంగుమ్ వెల్లెల మాన్సుల్ సంగిల.

26 జాకయ్, అన్నెక్ దీసి, పవులు జేవ్ సంగిల చెత్తర్జిన్ తెన్ సుద్ది మెన యూదుల్ సంగితి జా కామ్ కెరన, జోవయింక దేముడుచి గుడితె కడన, “సత్తు పొదుల్ గెలె, అమ్చి సుద్ది జతి కామ్ కేడ్లె, దొర్కు జలి అర్పితుమ్ దెమ్దె” మెన, ఒప్పన్.

27 జా కామ్చి జేవ్ ఒప్పున్ల సత్తు పొదుల్ కుట్టిసి పాసి జా, పూర్తి నే జతె అగ్గె, ఆసియా ప్రదేసిమ్చ యూదుల్చ వెల్లెల సుదల్ జా కెర, పవులుక దేవులుమ్తె తిలిసి దెక కెర, ప్రెజల్ ఎత్తిక సికడ్ల, చి జోక దెర్ల.

28 “ఓ అమ్చ ఇస్రాయేలుల్ ఎత్తిజిని, తోడు జా, ఈంజో మాన్సు కేనె గెలె కి, అమ్ యూదుల్చి రిసా, అమ్చ ఆగ్గుల్చి రితి, ఈంజ దేముడుచి గుడిచి రిసా, విరోదుమ్ సికడ్డయి. అన్నెక్ కిచ్చో తప్పు కెర అస్సి మెలె, ఈంజ దేముడుచి గుడి తెడి గ్రీసు దేసిమ్చ సుదల్క కడ ఆన, ఈంజ సుద్ది తిలి టాన్ గార్ కెర అస్సి” మెన ప్రెజల్క సికడ్ల.

29 కిచ్చోక ఈంజ ఆకర్చి కోడు సంగిల మెలె, అగ్గె ఏక్ సుట్టు, ఎపెను పట్టుమ్చో యూదుడు నెంజిలో త్రోపిము మెలోసా తెన్ పవులు పట్టుమ్తె బుల్తె తిలిసి దెక తిల, చి పవులుక, ‘జోవయింక దేముడుచి గుడి తెడి కడ నిలో, కిచ్చోగె’ మెన ఉచర తిల.

30 ఆసియా ప్రదేసిమ్చ యూదుల్చ జేవ్ వెల్లెల సుదల్, ప్రెజల్క దస్సి సికడ్డికయ్, పట్టుమ్చ యూదుల్ ఎత్తిజిన్ కోపుమ్ జా, నిగ జా, పవులుక దెర, దేముడుచి గుడి తెంతో ఒర్గొడ నిల. చి బేగి అదికారుల్ దేముడుచి గుడిచ కెప్పివొ డంకిల.

31 పవులుక బార్ కెర, మార గెల్ల, గని ఏలుప కెర్రి రోమ్ దేసిమ్చి జమాన్ సుదల్చి గెరి దేముడుచి గుడిక పాసి తిలి, చి ‘ఒండి యెరూసలేమ్ పట్టుమ్చ జనాబ్ గగ్గోల్ జతతి’ మెన జమాన్చో అదికారి దెక కెర,

32 సగుమ్జిన్ జమాన్లుక చి జోవయించ పుంజెక్ జిన్క వెల్లొక కడ ఆన, జేవ్ జనాబ్ బెర తిలిన్తె నిగ గెల. జేవ్ జనాబ్, జలె, జమాన్లుక చి జోవయించో అదికారిక దెక కెర, పవులుక పెటుక ముల దిల.

33 తెదొడి జమాన్లుచో అదికారి పాసి జా, పవులుక దెర, దొన్ని గొల్పుల్ తెన్ జోక బందయ్లన్. “ఈంజో కొన్నో? కిచ్చో కెర అస్సి?” మెన పుసిలన్.

34 జనాబ్చ సగుమ్జిన్ ఏక్ కోడు అన్నె, సగుమ్జిన్ వేర కోడు సంగ, కేకుల్ గల్తె తిల, చి జా గగ్గోల్క జో అదికారి కిచ్చో రుజ్జు సూనుక నెత్త కెర, “అమ్చి గెరితె ఇన్నెక కడన” మెన జమాన్లుక ఆడ్ర దిలన్.

35 పవులుక దెరన జా గెరిచి మేడచి గుమ్ముమె పావిత పీనెల్తె జమాన్లు వెగుక దెర్లె, జనాబ్ ఒగ్గర్ కోపుమ్ జా, జోచి ఉప్పిరి పెలపెలి జతె తిల చి రిసా, జమాన్లు పవులుక ఉక్కుల వయిల.

36 జనాబ్ ఒగ్గర్ కోపుమ్ తెన్ పట్టి జా, “జోక మొరవ, మొరవ” మెన కేకుల్ గల్తె తిల.

పవులు ప్రెజల్ తెన్ కొడొ జలిసి

37 పవులుక జమాన్లు జోవయించి మేడతె కడ నెతె తా, పీనెల్ వెగ గుమ్ముమ్ పాసి పావిలి పొది, “తుక ఆవ్ ఏక్ కోడు సంగుక సెలవ్ దెస్తె గే?” మెన గ్రీకు బాస తెన్ జోవయించో అదికారిక పవులు పుసిలన్. “గ్రీకు బాస జాన్సి గే?”

38 జా పొదులె, ఐగుప్తు దేసిమ్చో ఎక్కిలో ఈంజ దేసిమి జా కెర, ఈంజ దేసిమ్చక ఆక్రమించుప కెరుక ఉచర, చెత్తర్ వెయిల్జిన్ కత్తివొ దెరన్త మాన్సుల్క ప్రబుతుమ్చి ఉప్పిరి విరోదుమ్ సికడ, బయిలు దేసిమి పట్టి కడన తిలో, తూయి జో, కిచ్చోగె” మెన అదికారి సంగిలన్.

39 పవులు జోవయింక జబాబ్ దిలన్, “ఆవ్ యూదుడుయి, కిలికియ ప్రదేసిమ్చి తార్పు పట్టుమ్తె

* 21:39 21:39 ‘వెల్లి పట్టుమ్’ మెలె, రోమ్ పట్టుమ్క సంగ తయెదె.

జెర్మిలయ్, చి నాయిమ్క *వెల్లి పట్టుమ్చొ జయిందె, ఆవ్ ప్రెజల్క ఏక్ కోడు సంగుక దయ కెర అంక సెలవ్ దె” మెన అదికారిక సంగిలన్.

40 జో అదికారి సెలవ్ దిలన్, చి పవులు, పీనెల్చి ఉప్పిరి టీవొ జా కెర, ప్రెజల్క సయన కెర్లన్. జేవ్ పూర్తి తుక్లె జతికయ్, జోవయించి ఎబ్రి బాస తెన్ సంగుక దెర్లన్.

22

గగ్గోల్ జల యూదుల్క పవులు సంగిలిసి

1 కిచ్చొ మెన యూదుల్చి ఎబ్రి బాస తెన్ పవులు యూదుల్క సంగిలన్ మెలె, “బావుడ్లు, వెల్లి సుదల్, తుమ్ కెర్లి నిందక జబాబ్ సంగిందె. నూన” మెన,

2 ఎబ్రి బాస తెన్ సంగిలన్. ‘ఆమ్ యూదుల్చి బాస’ మెన నూన, అన్నె తుక్లె జల. జాకయ్ జోచి జబాబ్ జో సంగుక దెర్లన్.

3 ఆవ్ యూదుడుయి, కిలికియ ప్రదేసిమ్చి తార్పు పట్టుమ్తె జెర్మిలయ్, గని, ఈంజయి యెరూసలేమ్ పట్టుమ్తె వడ్డ, వెల్లి జలో అమ్చొ గమలీయేల్తె నదు కెర్లయ్. జో సికయ్తికయ్, అమ్చ పూర్లుల్చ ఆగ్గుల్ రితి నిదానుమ్ సిక కెర్తె తిలయ్, చి తూమ్ అప్పెక కిసి అస్సన్ గే, ఆవ్ కి దేముడుచి సేవ నిదానుమ్ తెన్ కెర్తె తిలయ్.

4 జాకయ్, యేసుతె రచ్చన జతి ఈంజ వాట్క నంపజలసక పూర్తి విరోదుమ్ జా, దెర బంద, మున్నుబోదల్క, తేర్బోదల్క జేల్తె గలయ్లయ్. సగుమ్జిన్క *మార్లిన్తె బెదిలయ్.

5 జా కోడుక ఎత్కిక వెల్లి పూజరి కి, సబతె వెసిత వెల్లెల మాన్సుల్ ఎత్కిజిన్ కి సాచి జా అస్తి. ‘యేసుక నంపజల ఒత్తచ మాన్సుల్క దెర, బంద, సిచ్చ కెరవుక’ మెన సెలవ్ నజన, దమస్కు పట్టుమ్తెచ వెల్లెల మాన్సుల్క దెకయ్తి రిసా, ఇన్నెచ ఎత్కిక వెల్లి పూజరితె ఉత్తల్ నజిలయ్.

6 “ప్రయానుమ్ గెతె తా, దమస్కుక పాసి అయ్లి పొది, రమారమి మెద్దెనె, పరలోకుమ్ తెంతొ చి వెల్లి ఉజిడి అంచి సుట్టునంత డిసిలి.

7 ఆవ్ బుయ్యె సెర్ను సేడ. ఏక్ అవాడ్ అంక సంగిలిసి ఆవ్ నూన్లయ్, ‘సావులు, సావులు, అంక కిచ్చొక అల్లర్ కెర్లసి?’ మెన సంగిలన్.

8 ‘తుయి కొన్సొ, ప్రబు?’ మెన జబాబ్ దిలయ్, చి జో అంక, ‘తుయి అల్లర్ కెర్తొ నజరేతు గవ్విచొ యేసు ఆవ్’, మెన అంక సంగిలన్.

9 “అంచి తెన్ తిలస, జలె, జా ఉజిడి దెకిల, గని అంచి తెన్ లట్టబ్బొసాచి అవాడ్ నూన్తి నాయ్.

10 తెదొడి, ‘ఆవ్ కిచ్చొ కెరుక, ప్రబు?’ మెన, ప్రబుక పుసిలయ్, జో అంక, ‘తుయి ఉట్ట, దమస్కు పట్టుమ్తె

గో, చి తుయి కిచ్చొ కెరుక అస్సె గే తుక ఒత్త నూనయిందె’, మెన, అంక సంగిలన్.

11 జలె అంకి అందర్ ఉజిడిచి రిసా, ఆవ్ గుడ్డి జతికయ్, అంచి తెన్ అయ్లస అంక ఆతు దెర, అంక వాట్ దెకయ్ల, చి దమస్కు పట్టుమ్తె పావెలయ్.

12 “ఒత్త, అననీయ మెలో ఎక్కిలో తిలో. కిసా మాన్సు మెలె, అమ్చొ దేముడుచ ఆగ్గుల్ రితి నిదానుమ్ కెరెదె, ఒత్తచ యూదుల్ ఎత్కిజిన్ జోక ‘చెంగిల్ మాన్సు’ మెనుల.

13 జో, అంచి తె జా కెర, అంచి పాసి టీవొజ, ‘సావులు, బావొ, తుచ అంకివొ డీసుల’ మెన సంగిలన్, తెదొడి అంకివొ చెంగిల్ జా జోక దెకిలయ్.

14 తెదొడి, జో, ‘అంచి ఇస్టుమ్ జో సికున్, పరలోకుమ్చి పున్నిమ్ తిలో క్రిస్తుక దెకున్, జోచి అవాడ్ నూన్సు.’ మెన, అమ్చ పూర్లుల్చొ దేముడు తుకయ్ నిసాన అస్సె.

15 చి తుయి దెకిలిన్, తుయి నూన్లిన్చి రిసా, జోచి రిసా, ఎత్కిజిన్ మాన్సుల్క సాచి సంగెదె.

16 అల్లె, కిచ్చొక రకితసి? ఉట్ట జోచి నావ్ దెర బాప్తిసుమ్ నజన, తుయి కెర్ల పాపల్ దోయి జా గెతి రిసా, జోచి రచ్చన నజను., మెన అననీయ అంక సంగిలన్.

17 “ఆవ్ యెరూసలేమ్తె అన్నెబుల అయ్లి పొది, ఏక్ దీసి, దేవులుమ్తె గెచ్చ ప్రార్దన కెర్తె తిలె, ప్రబుతె అంచి మెన్ను పూర్తి తా,

18 ‘బే బేగి యెరూసలేమ్ ముల ఉట్ట గో. ఇన్నె అంచి రిసాచి తుయి సంగితి సాచి నంప కెర్తి నాయ్.’, మెన ప్రబు అంక సంగిలన్.

19 ఆవ్ జోక, ప్రబువ, అవ్ అగ్గె అమ్చ యూదుల్చి కేన్ సబగేరి గెలె కి, తుక నంపజలసక చజ, జేల్తె గలిలయ్, పెటయ్లయ్.

20 పడ్డొ, తుచి సాచి జలో సైపనుక మార్లిన్తె అవ్ కి పాసి టీవొజ, ‘చెంగిల్’ మెంతె తిలయ్, జోక మార్లసచ సాక్కల్ గట్ట దెర తిలయ్. ఈంజ ఎత్కి జేవ్ అదికారుల్ కి జాన్తి. ఆవ్ ఇన్నె తా గెలె చెంగిల్ కిచ్చొగె మెన, ప్రబుక ఆవ్ సంగిలయ్.

21 జలె, అంక జో కిచ్చొ మెలన్, మెలె, ఉట్ట, గో. కిచ్చొక మెలె, తుయి దూరి గెచ్చ యూదుల్ నెంజిలసక సుబుమ్ కబుర్ నూనవుక మెన, ఆవ్ తెద్రయ్తసి మెన, ప్రబు అంక సంగిలన్.”, మెన పవులు జేవ్ యూదుల్క సంగిలన్.

పవులు సంగితికయ్ జనాబ్ కోపుమ్ జలిసి

22 జా కోడు సంగితె ఎద తుక్లె తా, జోవయింక జేవ్ యూదుల్ నూన్తె తిల. గని, యూదుల్ నెంజిలసచి రిసాచి కోడు నూన, కోపుమ్క గట్టిజ ఒర్ప, కిచ్చొ మెన కేకుల్ గల మెలె, “కిసా మాన్సు, ఈంజొ! ఈంజ లోకుమ్తె ఈంజొ కిచ్చొక జింక! ఇన్నెక మార గెల!” మెన జేవ్ కేకుల్ గల.

* 22:4 22:4 బారికూల్ 8:1, 9 అధ్యయమ్ తెంతొ.

23 జోవయించి ఒగ్గర్ కోపుమ్క, జోవయించ సొక్కల్ గట్ట కడన దెర పెట్టి రితి నయన కెర, మత్తి కి వెంట కెర గల్లె తతికయ్,

24 జమాన్లుచొ అదికారి కిచ్చొ కెరుక నేన కెర, “జోక కమె కెర్రి గేర్తె కడన కొర్డల్ తెన్ పెట పరిచ్చ కెర, కిచ్చొ నేరిమ్ జోక వయడ్తతి గే చి జోచి రిసొ కిచ్చొక దస్సి మెన ఒర్చ దిల గే జానుక” మెన, జమాన్లుక ఆడ్ర దిలన్.

పవులు రోమియుడు మెన జాన్లుప జలిసి

25 గని జేవ్ జోవయింక కొర్డల్ తెన్ పెటుక మెన బందితికయ్, పాసి టీవోజ తిలో పుంజెక్జీన్ జమాన్లుక వెల్లోక పవులు ఏక్ కోడు సంగిలన్. “సాచి నే నూన్తె, నే తీర్పు జలో రోమియుడుక పెట్టి సిచ్చ దెంక నాయిమ్ గే?” మెన పుసిలన్.

26 జా కోడు పుసితికయ్, జో పుంజెక్జీన్ జమాన్లుక వెల్లో సూన, వెయి జమాన్లుక వెల్లోతె గెచ్చ, “అమ్ కిచ్చొ కెరుక గే? ఈంజొ మాన్సు రోమియుడు” మెన సంగితికయ్,

27 జో అదికారి పవులుతె జా కెర, “తుయి రోమియుడు గే?” మెంతికయ్, “ఆవ్ రోమియుడుయి” మెన పవులు సంగిలన్.

28 జాకయ్, జో అదికారి, “రోమియుడు జతి రిసొ ఆవ్ ఒగ్గర్ డబ్బుల్ దిలయ్” మెన పుంజెక్జీన్ జమాన్లుక వెల్లో సంగిలన్. “గని ఆవ్ రోమియుడు జా †జెర్పిలయ్” మెన, పవులు జబాబ్ సంగిలన్.

29 బేగి, జోవయింక పెట పరిచ్చ కెరుక ఉచర్లన బియః కెర బార్ జల, చి పవులుక, జో రోమియుడు మెన, చి రుజ్జు నే నూన్తె రోమియుల్క సిచ్చ కెరుక, బందుక, నాయిమ్ నాయ్ మెన, ‘తప్పు కెర్లయ్’ మెన పుంజెక్జీన్ జమాన్లుక వెల్లో బియః గెలన్.

యాదుల్చ అదికారుల్క నబ వెసయ్లిసి

30 అన్నెక్ దీసి, పెందలె, “యాదుల్ కిచ్చొక జోక నింద కెర అస్తి గే సత్తిమ్ సూనిందె” మెన, జోక బందిల గొల్పుల్ యిప కెర, “వెల్లెల పూజర్లు, యాదుల్చి సబతె వెసితన ఎత్తిజీన్ జెతు, చి సబ వెసయిందె” మెన పుంజెక్జీన్ జమాన్లుక వెల్లో ఆడ్ర దిలన్. జేవ్ యాదుల్ జెతికయ్, పవులుక ఎట్టొతో జోవయింతె కడ ఆన, జోవయించి మొక్కె టీవో కెలన్.

23

1 పవులు, జలె, నే బితె సబ వెసిలనక దెక, “ఓ బావుడ్లు, ఆజి ఎద అమ్చొ దేముడుక సత్తిమ్ ఆవ్ ఇండితసి.”, మెన, మొదొల్ సంగిలన్.

† 22:28 22:28 పవులు యాదుల్చి సెకుమ్చొ జలెకి, అబ్బదింసిది కాలుమ్ తెంతొ ‘రోమియులు ఈంజివ్’ మెన నాయిమ్ తెన్ రుజ్జుల్ దెకయ్త కాగ్గల్ జోవయించి కుటుంబుమ్చక తిల. * 23:7 23:7 మాన్సుల్ మొర్లె అన్నె జితి నాయ్, దూతల్ తతి నాయ్, ఆత్మల్ బూతల్ డుంబల్ గట్ట తతి నాయ్ మెన సద్దూకయ్యులు సికడ్తతి

2 అననీయ మెలో ఎత్తిక వెల్లో పూజరి, “జోక చోండి పెట” మెన పవులుక పాసి తిలనక ఆడ్ర దిలన్.

3 తెదొడి, పవులు జోవయింక, “చున్నుమ్ దెరవ ముర్పి లుంకడ్డి కూడు జలో రితొ తుయి మాయమాన్సుక దేముడు తుకయ్ పెటదె! దేముడు మోసే తెన్ దిలి ఆగ్గుల్చి నాయిమ్ తెన్ అంచి రిసొచ రుజ్జుల్ సూన్తి రిసొ సబతె వెన అస్సున్, గని నాయిమ్ నెంతె అంక పెటయ్తసి. తుక కిచ్చొ సత్తిమ్?!” మెన, సంగిలన్.

4 పాసి తిలన, “దేముడుచొ ఎత్తిక వెల్లో పూజరిక దస్సి దూసుప కెరుక జయె నాయ్.” మెన సంగిల,

5 చి, “బావుడ్లు, జోక ‘ఎత్తిక వెల్లో పూజరి జయెదె’ మెన ఆవ్ నేని. జాన్తయ్, జలె, దస్సి లట్టబ్తయ్ నాయ్. ‘తుమ్చ అదికారుల్క దూసుప కెరుక జయె నాయ్’ మెన, దేముడుచి కొడొతె రెగ్గ అస్సె” మెన పవులు జబాబ్ దిలన్.

6 పడ్డె, ‘సబ వెసితనతె సద్దూకయ్యులు చి పరిసయ్యుల్ మెల పండితుల్ ఇన్నె అస్తి’ మెన పవులు దెక కెర, సబతె కిచ్చొ మెన కేక్ గలో మెలె, “ఓ బావుడ్లు, ఆవ్ పరిసయ్యుడుయి. అంచ పూర్లుల్ కి పరిసయ్యుల్, ‘మొర్లె అన్నె జివ్ జా ఉట్టుమ్దె’ మెన ఆవ్ పరిసయ్యుడు దయిరిమ్ తెన్ అస్సిచి రిసొ, అంక నింద కెర పరిచ్చ కెరయ్తతి.”, మెన సంగిలన్.

7 జో దస్సి సంగిల్ రిసొ, పరిసయ్యుల్ చి *సద్దూకయ్యులు గగ్గొల్ జల.

8 మాన్సుల్ మొర్లె అన్నె జితి నాయ్, దూతల్ తతి నాయ్, ఆత్మల్ బూతల్ డుంబల్ గట్ట తతి నాయ్ మెన సద్దూకయ్యులు సికడ్తతి. పరిసయ్యుల్, ‘మొర్లె జిమ్దె, దూతల్, ఆత్మల్ బూతల్, డుంబల్ గట్ట అస్తి’ మెన ఒప్పన్తతి, చి రిసొ, దొన్ని జట్లు జా ఒగ్గర్ గగ్గొల్ జల.

9 తెదొడి, పరిసయ్యుల్ చి జట్టుతెచ సగుమ్జీన్ మోసే తెన్ దేముడు దిలి ఆగ్గుల్ సికడ్తన టీచ కెర, “ఈంజొ మాన్సుతె కిచ్చొ తప్పు డీసె నాయ్. ఏక్ వేల కేన్ జవున్ ఆత్మ జవున్, దూత జవున్ ఇన్నెతెన్ లట్టబ్లొ” మెన సంగిల.

10 జా కోడు సూన కెర సద్దూకయ్యులు ఒగ్గర్ కోపుమ్ జల, చి జేవోజ జట్లు జలన అన్నె ఒగ్గర్ గగ్గొల్ జతికయ్, జమాన్లుచొ అదికారి, ‘యాదుల్ పవులుక ఎక్కె దడి దొన్ని పక్కలె దెర చిర మారుల’ మెన బియః కెర “తుమ్ జోవయింతె ఉత్త గెచ్చ, జోక జోవయించి నెడిమి తెంతొ ఉర్ల కడ దెర జా అమ్చి జమాన్లు గెరిచి మేడతె ఆన జోక రక” మెన, జమాన్లుక ఆడ్ర దిలన్.

పవులుక ప్రబు దయిరిమ్ సంగిలిసి

11 జా రాతి, యేసుప్రబు పవులుచి పాసి టీవోజ కెర, “తుయి బి నాయ్. ఈంజ యెరూసలేమ్తె తుయి కీసి అంచి రిసా సాచి సంగ అస్సిన్ గే, దస్సి, తుమ్క ఏలుప కెర్తి రోమ పట్టుమ్తె కి అంచి రిసా సాచి సంగితె” మెన ప్రబు జోక సంగిలన్.

పవులుక మారుక మెన యూదుల్ కుట్ర కెర్తిసి

12 అన్నెక్ దీసి పెందలె, యూదుల్ కుట్ర కెర, “పవులుక మార్తె ఎదక చువ్వె తన్నె తమ్దె” మెన ఆతు ఉక్కిల.

13 కెత్తిజిన్ జా కుట్ర కెర్ల మెలె, దొన్ని విసాజిన్చి కంట అన్నె ఒగ్గర్జిన్.

14 జేవ్ వెల్లెల పూజర్లు చి సబచ వెల్లెల మాన్సుల్తె గెచ్చ, ఇసి మెల, “పవులుక అమ్ మార్తె ఎదక చువ్వె తన్నె తమ్దె” మెన ఆతు ఉక్కుల అస్సుమ్.

15 జాకయ్, తూమ్, సబ వెసితన ఎత్కిజిన్ తెన్, రోమచ జమాన్లుచొ అదికారితె అప్పె గెచ్చ, ‘పవులుక అన్నె సరిగా పరిచ్చ కెర తీర్పు సంగుమ్దె. జోక కడ ఆను’ మెన జో అదికారిక సంగ. జో కడ ఆన్లె, జో పవులు తీర్పు కెర్తి గెరి పాసి నే జెతె అగ్గె, మారుమ్దె” మెన, కుట్ర కెర్ల.

16 జలె, పవులుక వట్టె దెర మార్తి కుట్రచి రిసా పవులుచి బేన్సిచొ పుత్తుసి సూన తా, జమాన్లు తతిన్తె గెచ్చ, తెడి పెన, పవులుక సంగిలన్.

17 పవులు పుంజెక్జిన్ జమాన్లుక వెల్లో ఎక్కిలోక బుకారా కెర, “జమాన్లుచొ అదికారితె ఈంజొ నాడుక కడ నే. ఏక్ కబుర్ ఈంజొ ఆన అస్సె” మెన సంగితికయ్,

18 అదికారితె కడన కెర, “జేలి జలో పవులు అంక బుకారా కెర, అదికారితె ఈంజొ నాడుక కడ నే. జోక కబుర్ ఆన అస్సె, మెన తెద్రయ్లన్”, మెన, పుంజెక్జిన్ జమాన్లుక వెల్లో సంగితికయ్,

19 అదికారి జో నాడుచి ఆతు దెర, జో తెన్ గెర్చి తెడి పెన గెచ్చ, కో నే సూన్తె, “అంక తుయి సంగితి కబుర్ కిచ్చొ?” మెన పుసిలన్.

20 “యూదుల్ కుట్ర కెర అస్తి. ఆరిక, పవులుక అన్నె సరిగా పరిచ్చ కెర తీర్పు కెర్తి రితి జా, తుక, ‘కలిక సబతె కడ ఆస్సు’ మెన తుక కబుర్ తెద్రవుక ఉచర అస్తి.

21 గని పోని. పవులుక వట్టె దెర మారుమ మెన, దొన్ని విసాజిన్చి కంట అన్నె ఒగ్గర్జిన్ రకితతి. జోక మార్తె ఎదక చువ్వె తన్నె తమ్దె మెన జేవ్ ఆతు ఉక్కుల అస్తి. తుక ‘ఆమ్ ఉచర్లె ఆడ్ర దెవున్’ మెన, రకితె అస్తి”, పవులుచొ బేన్సిచొ పుత్తుసి జమాన్లుచొ అదికారిక సంగిలన్.

22 జాక జో అదికారి, “అంక తుయి ఈంజ కబుర్ సంగిలిసి కక్క సంగు నాయ్” మెన నాడుక ఆడ్ర దిలన్.

23 తెదొడి జమాన్లుచొ అదికారి, దొగుల పుంజెక్జిన్ జమాన్లుక వెల్లోక బుకారా కెర, “దొన్ పుంజొజిన్ మాములుమ్ జమాన్లుక, గోడల్తె వెగిత డబ్బయ్జిన్

జమాన్లుక, దొన్ పుంజొజిన్ ఈంటల్ దెర్త జమాన్లుక ఆడ్ర దేను. నొవ్వ గంటల్ రాతిక తెయార్ జా తత్తు. కైసరియ పట్టుమ్ ఎదక జేవ్క తెద్రయిందె.

24 పడ్డె, పవులు వెగ గెతి రిసా, గోడలు దొర్కు కెరు. జో కిచ్చొ ప్రమాదుమ్ నే జతె పేలిక్సతె తుమ్ జోక బొడొవ దాస” మెన, జేవ్ దొగుల పుంజెక్జిన్ జమాన్లుక వెల్లోక ఆడ్ర దిలన్.

25 పేలిక్సక దెతి ఉత్తమ్ రెగిడ్డె.

26 “వెల్లో అదికారి జలో పేలిక్సక ఆవ్ క్లాదియ లూసియ తెద్రయ్తి ఉత్తమ్.

27 తుచితె ఆవ్ తెద్రయ్తో ఈంజొ మాన్సుక యూదుల్ దెర, మారిత, గని ఆవ్, అంచ జమాన్లు తెన్ జా కెర, దెక, జోక ‘రోమియుడు’ మెన సూన, రచ్చించుప కెర్లయ్.

28 జోక ‘కిచ్చొ నేరిమ్ వయడ్తతి గే సూనిందె’ మెన, జోవయించి సబతె టీవో కెలయ్,

29 ‘మొర్తి సిచ్చ జవున్, జేల్తె గల్తి సిచ్చ జవున్ ఆనన్తి కిచ్చొ నేరిమ్ కెరె నాయ్, గని ఎక్కి జోవయించి దేముడుచి నముకుమ్క బెదెతిసి, మోసే తెన్ దేముడు దిలి ఆగ్గుల్చి అలవాట్ పిట్టయ్తయ్ జోక నింద కెర్తతి’ మెన, అంక రుజ్జు అయ్లి.

30 తెదొడి, ‘జోక మారుక కుట్ర కెర అస్తి’ మెన, సూన్లయ్, బేగి తుచితె తెద్రయ్తసి, జోక నింద కెర్లసక, ‘జేవ్ కి తుచి తీర్పు కెర్తి టాన్తె గెచ్చ, జేవ్ వయడ్డి నేరిమ్చి రిసా తుచి మొక్కె జెవ్వి సాచి సంగుత్’ మెన ఆడ్ర దా అస్సి” పేలిక్స అదికారిక జమాన్లుచొ అదికారి ఉత్తమ్ రెగిడ్డెన్.

31 జాకయ్, జమాన్లుచొ అదికారి సంగిల్ రితి, జమాన్లు జా రాతి అంతిపత్తి మెలి పట్టుమ్ ఎద పవులుక బొడొవ దా కెర,

32 అన్నెక్ దీసి పెందలె ‘జోక కైసరియ పట్టుమ్ ఎద బొడొవ దెతు’ ఎక్కి గోడల్తె వెగిల జమానుక ముల, తిల జమాన్లు యెరూసలేమ్తె అన్నె బుల గెల.

33 పవులుక బొడొవ దిలన, జోవయింతెన్ కైసరియతె పాచ కెర, అదికారిక ఉత్తమ్ దా కెర, పవులుక జోచి పురె టీవో కెలన్.

34 తెదొడి అదికారి, జా ఉత్తమ్ నదు కెర, “తుయి కేన్ ప్రదేసిమ్చొ మాన్సు?” మెన పవులుక పుసిలన్. “కిలికియ ప్రదేసిమ్చొ ఆవ్” మెన పవులు జబాబ్ దిలో.

35 “దస్సి జలె, తుక నింద కెర్తన ఇన్నె పాచ అయ్లె, తుచి తగు సూనిందె” మెన సంగ కెర, “హేరోదు రానొచి మేడతె ఇన్నెక కడన రకుత్” మెన పేలిక్స అదికారి ఆడ్ర దిలన్.

24

1 పాచ్ పొదుల్ గెతికయ్, ఎత్కిక వెల్లో పూజరి అననియ, సబతెచ వెల్లెల సుదల్ తెన్, పవులు కెర్తి నింద వయడ్డికయ్ తెర్తుల్లు మెలో ఎక్కిలో తెన్, ఉట్ట అయ్ల.

అదికారిచి గెరితె జా కెర, పవులుచి రిసా జేవ్ సంగిలి నింద వయడ్ల.

2 తెదొడి, అదికారి పవులుక కడ ఆనయ్తకయ్, జో కెర్తి నిందచి తగు సంగుక మెన, తెర్తుల్లు సంగిలన్. “తూయి ఏలువ కెర్తికయ్, వెల్లో పేలిక్స్ అమ్చి ఒండి ప్రదేసిమ్క సేంతుమ్, చి తుచి దయచి రిసా, అమ్చి దేసిమ్చ కస్టల్ నస్టల్ మార్పుప జా అస్తి.

3 జాకయ్, తుచి ఎదివాట్ తోడుచి రిసా, అమ్చి సర్దసంతోసుమ్ తుక సూనయ్తసుమ్.

4 తుక ఒగ్గర్ కామ్ తయెదె, చి తుక ఒగ్గర్ కొడొ సూనవ అల్లర్ కెరుక నెనుమ్, గని దయ కెర దొన్ని కొడొ జవున్ సూను.

5 ఈంజొ మాన్సు బలే అల్లర్ కెర్తయ్. ఒండి లోకుమ్చ అమ్చ యూదుల్తె గెచ్చు, ప్రబుతుమ్చి ఉప్పిరి విరోదుమ్ కెర్తి రితి సికడ్తయ్. పడ్డొ నజరేతు గవ్విచొ యేసుచి అలవాట్ కెర మార్పుప జలనచి జట్టుతె జో ముక్కిమ్.

6 ఈంజ నెంతె అన్నె అమ్చి దేముడుచి గుడిక గార్ కెరుక ఉచర్లొ, గని జోక దెర పిట్టయ్లమ్. * అమ్చ ఆగ్గుల్ రితిచి అలవాట్తె కెర్తి రితి జోక తీర్పు కెర్తయ్,

7 గని జమాన్సుచొ అదికారి జలో లూసియ జా కెర, అమ్చి అత్తి తెంతొ జోక ఉర్ల కడన కెర, నేరిమ్ వయడ్తన పేలిక్స్ అదికారిచి తీర్పు కెర్తి టాన్తె గెతు., మెన ఆడ్ర దిలన్.

8 తూయి సొంత జో మాన్సుక పరిచ్చ కెర్తె, అమ్ వయడ్డి నేరిమ్ ఎత్కిచి రిసా తూయి సూన, రుజ్జుల్ దెకితె”.

9 యూదుల్ ఎత్కిజిన్ “సరిగా” మెన, జోచి సాచి బెదవ జేవ్ నేరిమ్లు వయడ్ల.

పవులు జబాబ్ దిలిసి

10 తెదొడి, ‘తుయి జబాబ్ దేసు’ మెన, పవులుక అదికారి సయ్న కెర్లన్, పవులు సంగిలన్. “తుయి ఒగ్గర్ వెర్పులు ఈంజ దేసిమి ఏలువ కెర్తె అస్సిన్చి రిసా దయిరిమ్ తెన్ ఆవ్ జబాబ్ దెతసి.

11 అప్పెక బార పొదుల్ జంక నేతయ్, దేముడుచి గుడితె బక్తి కెరుక మెన, ఆవ్ యెరూసలేమ్తె గెలయ్. తుక రుజ్జు కావలె మెలె, సాచుల్ అస్తి.

12 “ఆవ్ ఒత్త తా, దేముడుచి గుడితె జవున్, సబ గెరలె జవున్, పట్టుమ్తె జవున్, ఆవ్ కిచ్చొ వేర కొడు సికడ్డిసి దెక అస్తి గె? ఆవ్ ప్రెజల్క అల్లర్ కమె సికడ్డిసి దెక అస్తి గె? నాయ్!

13 పడ్డొ, అంచి రిసా జేవ్ అప్పె నింద కెర్తినక కిచ్చొ రుజ్జు దెకవుక నెతిర్తి.

* 24:6 24:6 గ్రీకు బాస తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 6 నంబర్చి ఆకర్ కొడుచి 7 నంబర్చి కొడు తయె నాయ్; మెలె, ‘అమ్చ’ తెంతొ ‘దిలన్’ ఎద. † 24:14 24:14 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగేచి పావ్ పుస్తకమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసి పూర్ణుమ్చిచి అత్తి రెగిడ్లి దేముడుచ ఆగ్గుల్ మెన రగ్గవ అస్సె.

14 గని తుచి మొక్కె ఆవ్ కిచ్చొ ఒప్పన్తసి మెలె, ‘తప్పు’ మెన జేవ్ సంగితి ‘యేసుక్రీస్తు దొర్కు జలి రచ్చున వాట్’ మెన ఒప్పన్తి నాయ్. సుబుమ్ కబుర్క నంపజా ఆవ్ ఇండ, అమ్చ † మోసి పూర్ణుమ్చొచి అత్తి దేముడు రెగ్గయ్ల ఆగ్గుల్ జలెకు, పూర్ణుల్చి అత్తి సంగిల దేముడుచ కబుర్లుతె తిలిసి ఎత్కి., జో దేముడుచ కబుర్లు రెగిడ్లిసి ఎత్కి., ఆవ్ నంప కెర్తసి.

15 ఈంజేవ్ ఒప్పన్తిసి ఆవ్ కి దయిరిమ్ తెన్ పూర్తి నంప కెర్తసి, సత్తిమ్ ఇండిలన అబద్దుమ్ ఇండిలనకి మొర్లె కి, జివ్ జా ఉట్ట గెచ్చుల.

16 జాకయ్, దేముడుక కి, మాన్సుల్క కి కిచ్చొ పాపుమ్ నే కెర్తి రిసా, ఆవ్ జాగర్త దెకన్తసి.

17 “ఒగ్గర్ వెర్పుల్ గెతికయ్, యూదుల్చ బీద సుదల్క తోడు దెంక మెన, ఒత్తచ మాన్సుల్ దిలి డబ్బుల్ దెరన అయ్లయ్, చి అమ్చొ దేముడుక కానుక దెంక మెన, దేముడుచి గుడితె గెలయ్.

18 సుద్ది జతి కారిమ్ కెరన ఆవ్ దేముడుచి గుడితె దస్సి బక్తి కెర్తె తతికయ్, ఆసియా ప్రదేసిమ్చ అమ్చ యూదుల్చ వెల్లెల మాన్సుల్ అంక దెకిల. గని కేన్ జనాబ్ గగ్గిల్ గుగ్గిల్ జలిసి కిచ్చొయ్ నాయ్.

19 అంచి రిసా ఆసియాచ యూదుల్ కిచ్చొ నేరిమ్ వయడుక ఇస్టుమ్ జతతి, జెవ్వి అప్పె ఇన్నె తుచి మొక్కె సాచి జంక జలె చెంగిల్ తత్తి.

20 గని జేవ్ నాయ్, చి ఈంజేవ్ యెరూసలేమ్చ మాన్సుల్ సబ కెర్తినతె ఆవ్ నింద జలి పొది, ఆవ్ కిచ్చొ తప్పు కెర్తినచి రుజ్జు దెకిల గే, సూన్ల గే, సంగుతు.

21 ఎక్కి కొడుచి రిసా జేవ్ సంగుక జయెదె. జోవయించి నెడిమి ఆవ్ టీవోజ తా, ‘మొర్లె కి జివ్ జా ఉట్టుమ్దె’ మెన ఆవ్ సంగితసిచి రిసా అంక ఆజి నింద కెర్తెతి.” దస్సి పవులు అదికారిక సంగిలన్.

పవులుక తీర్పు నే జతె జేల్తె రకితె తిలిసి

22 అదికారి జలో పేలిక్స్, యేసుక నంపజతి చి రిసా ఇదిల్ ఒగ్గర్ జానె, చి తీర్పు వాయిద కెర్తి రితి, “జమాన్సుచొ అదికారి జలో లూసియ ఇత్తల్ ఉట్ట అయ్లె, తుక వయడ్డి నేరిమ్చి తగు సూనిందె” మెన, పవులుక సంగిలన్.

23 పడ్డొ, ఒత్త తిలో పుంజెక్జిన్ జమాన్సుక వెల్లోక, “ఈంజొ మాన్సుక జేలి కెర, గని బంద గట్ర నాయ్, గదితె డంక నాయ్, చి జోచ గోతుసుదల్తె కో గోత్ అయ్లె కి, జోక దొర్కు జలిసి కిచ్చొ అన్లెకి, అడ్డు కెర నాయ్” మెన పేలిక్స్ ఆడ్ర దిలన్.

24 సగుమ్ దీసల్ గెలి పడ్డో, పేలిక్స్ అదికారి యూదుడుయి జలి ద్రుసిల్ల మెలి తేర్నిక కడ ఆన, పవులు జేలి తిలిన్తె అయ్ల. పవులుక “జెవున్” మెన పేలిక్స్ సంగ తెద్రయ్తికయ్, అయ్లొ. యేసుక్రీస్తుచి ఉప్పిరి నముకుమ్ తిలిన్చి బోదన సూన్ల.

25 పవులు బోదన కెర కెర, కిచ్చొచి రిసా సంగుక దెర్లన్ మెలె, పున్నిమ్చి రిసా, ఆన కెరంతి రిసా, చి ఆకర్ దీసిక లోకుమ్చ మాన్సుల్క యేసుప్రబు పరిచ్చ కెర †తీర్పు కెరుక తిలిన్చి రిసా సంగిలన్, చి పేలిక్స్, సొంత కెర్త తప్పుల్క ఉచర లాజ్ జా బియఁకెర, “అప్పెచి మట్టుక ఉట్ట గెచ్చ తా. అంక అవ్కాసుమ్ తిలె, తుక కెయఁక గే అన్నె బుకారిందె” మెన జోక తెద్రయ్లన్.

26 పడ్డో, పేలిక్స్ అన్నె కిచ్చొచి రిసా ఉచర్తె తిలొ మెలె, ‘విడ్డల్ జతి రిసా ఏక్ వేల పవులు లంచుమ్ దెయెదె’ మెన ఆన జా తిలొ. జాకయ్ ఒగ్గర్ సుట్టు జోక బుకారా బుకారా, జో తెన్ లట్టబ్బొ.

27 గని పవులుక ఒత్త జేలి కెర దొన్ని వెర్పుల్ గెతికయ్, పేలిక్స్ అదికారి వేరతె మార్పుప జలొ, చి పొర్కియన్ పెస్తున్ అదికారి జలొ. మార్పుప జలి పొది, యూదుల్క పులవుక మెన పవులు జేల్తె దస్సే తతి రితి పేలిక్స్ ముల దిలొ.

25

పవులుచి రిసా యూదుల్ అన్నె అల్లర్ ఉచర్లసి

1 ఏలుప కెరుక మెన, పెస్తున్ యూదయ ప్రదేసిమి ఉట్ట జా తిర్రతి గెలి పడ్డో, జోవయించి మేడ తిలి కైసరియ తెంతో బార్ జా, యెరూసలేమ్తె గెలొ.

2 వెల్లెల పూజర్లుచి యూదుల్చ అన్నె వెల్లెల మాన్సుల్ జోతె జా కెర, పవులుచి రిసా సంగిల.

3 అన్నె, “దయ కెర పవులుక యెరూసలేమ్తె తెద్రవు” మెన, బతిమాల్పా జా సంగిల. జో అయ్లె, వట్టె లుంక దెర మారుక మెన ఉచర్తె.

4 పెస్తున్, “పవులు ఒత్త కైసరియతె జేల్తె అస్సె, చి ఒగ్గర్ దీసల్ నే గెతె ఆవ్ ఒత్త అన్నె గెచ్చిందె” మెన సంగ.

5 “ఆవ్ ఒత్త గెచ్చుక బార్ జలె, తుమ్చ అదికారుల్ అంచి తెన్ బెద జెతు, చి జో మాన్సు కిచ్చొ నేరిమ్ కెర తిలె, రుజ్జు దెకవుతు!” మెన సంగిలన్.

పెస్తున్ పవులుచి తగు అన్నె సూన్లసి

6 పెస్తున్ ఎక్కి అట్టు గే దెస్సు గే పొదుల్ ఒత్త యెరూసలేమ్తె తా కెర, కైసరియతె అన్నె ఉట్ట అయ్లన్, చి అన్నెక్ దీసి పవులుచి తగుచ రుజ్జుల్ సూనుక వెన, పవులుక “జెవున్” మెన ఆడ్ర దిలొ.

7 పవులు యెరూసలేమ్ తెంతో అయ్ల. యూదుల్ జోవయించి సుట్టునంత టీవొజ కెర, కిచ్చొ కిచ్చొ వెల్లెల నేరిమ్లు ఒగ్గర్ సంగిల, గని రుజ్జుల్ దెకవుక నెతిర్ల.

8 తెదొడి పవులు “యూదుల్చ ఆగ్గుల్ రితి కెర్తినచి అలవాట్ ఉచర్లె కి, కిచ్చొ నేరిమ్ కెరి నాయ్, దేముడుచి గుడిచి రిసా కిచ్చొ నేరిమ్ కెరి నాయ్, చి అమ్క ఏలుప కెర్తొ *కైసర్చి రాజిమ్క కిచ్చొయ్ ఇదిలిసి నేరిమ్ కి కెరి నాయ్” మెన, జబాబ్ దిలన్.

9 పెస్తున్, మాత్ముమ్, యూదుల్క పులవుక మెన, పవులుక, “యెరూసలేమ్తె గెచ్చు ఈంజేవ్ అంక సూనయ్ల నేరిమ్లుచి రిసా తీర్పు కెరవనుక ఇస్తుమ్ జతసి గే?” మెన పుసిలన్.

10 గని పవులు జబాబ్ దిలన్, “†కైసరు వెల్లొ రానొ ఏలుప కెర్తి రితిచి గెరితె తీర్పు జంక మెన ఇన్నె ఆవ్ టీవొజ అస్సి. ఇన్నెయి అంచి తగు తీర్పు సరిగా జంక. యూదుల్క ఆవ్ కిచ్చొ తప్పు కెరి నాయ్. తుయి కి జా కోడు జాన్సి.

11 ఆవ్ తప్పు కెర్తయ్ జలె, మొర్తి సిచ్చుచి ఎదిలి నేరిమ్ కెర్తయ్ జలె, ఆవ్ మొర్లె కి బాద నాయ్. గని ఈంజేవ్ వయడ్ల నేరిమ్లు ఆరిచ జలె, అంక యూదుల్చి రితి తీర్పు కెర సిచ్చు కెరుక మెన ఇన్నెచి అత్తి అంక కో సొర్పు కెర దెంక నాయిమ్ నాయ్. కైసర్ వెల్లొ రానొ సొంత అంచి తగు సూన తీర్పు కెర్పు” మెన, సంగిలన్.

12 తెదొడి, పెస్తున్, జోవయించి సబచ అదికారుల్ తెన్ వెన లట్టబ్బ, చి పవులు, “ ‘కైసరు సొంత అంచి తగు సూన తీర్పు కెర్పు’ మెన ఇస్తుమ్ జలది. ఈంజ తగు జా సెలవ్ దెతయ్. కైసరుచి గెరి గో” మెన తీర్పు సంగిలన్.

పెస్తున్ పవులుచి రిసా పెస్తున్ అగ్రిప్ప రానొక సంగిలిసి

13 సగుమ్ దీసల్ గెతికయ్, ‘పెస్తున్ నొవర్ ఏలుప కెర్తయ్’ మెన, ఇదిల్ ఉత్తర పక్కచొ రానొ జలొ అగ్రిప్ప, బేన్సి జలి బెర్సికే తెన్, కైసరియతె గోత్ అయ్ల.

14 ఒగ్గర్ దీసల్ ఒత్త తతికయ్, పవులుచి తగుచి రిసా పెస్తున్ జో రానొక సంగిలన్. పేలిక్స్ ఏలుప కెర్లె తెంతో జేలి జలొ ఎక్కిలొ ఇన్నె అస్సె.

15 జలె, ఆవ్ యెరూసలేమ్తె గెచ్చు తిలి పొది, ఇన దన నేరిమ్లు కెర అస్సె, మెన వెల్లెల పూజర్లు చి యూదుల్చ అన్నె వెల్లెల మాన్సుల్ సంగ, తీర్పు కెర సిచ్చు కెరు మెన, అంక సంగిల.

16 “జేవ్ యూదుల్ దస్సి సంగితికయ్. నేరిమ్ వయడ్లన నేరిమ్ వయిలొసా ఎక్కితె తీర్పు కెర్తి టాన్తె జా తగు సూనవుక నే టీవొజతె అగ్గె, నేరిమ్ వయిలొసా జేవ్ నింద కెర్తినక జబాబ్ సంగుక అవ్కాసుమ్ నే దెతె అగ్గె,

‡ 24:25 24:25 కిచ్చొ తీర్పు మెలె, జోవయించి నంపజా సత్తిమ్ జలసక పరలోకుమ్తె కడ నెతిసి, గని నంప నెంజ అబద్ధమ్తె తాఁ గెలసక సిచ్చుతె గల్లిసి.

* 25:8 25:8 వెల్లొ రానొచి, రానొచి. † 25:10 25:10 సీజరు వెల్లొ రానొ, మెలె వెల్లొ రానొ, రోమ్ వట్టుమ్తె తా ఈంజ ‘బారికుల్’ చి పుస్తకుమ్తె సంగిల ప్రదేసిమ్లు ఎత్తిచి ఉప్పిరి ఏలుప కెర్తయ్. రోమ్ దేసిమ్చి ప్రబుతుమ్క వెల్లొ, జో.

అమ్మచ రోమియుల్చి అలవాట్ తెన్ జోక కచి అత్తి సార్పు దెంక జయె నాయ్, మెన, జబాబ్ దిలయ్.

17 జాకయ్, జేవ్ ఇత్తల్ ఉట్టు అయ్లి బేగి, వాయిద నే కెర్తె, అన్నెక్ దీసి తగు నూనవుక మెన తీర్పు కెర్తెనె వెన, జోక జెవున్ మెన, కడ ఆనయ్లయ్.

18 నేరిమ్ వయడ్డన టీవో జలి షాది, కిచ్చో విలువచ నేరిమ్లు వయడ్డి నాయ్.

19 జేవ్ కిచ్చోచ నిందల్ జోక సంగితె తిల మెలె, జోవయించో దేముడుచి అలవాట్చి కమెచి రిసా, పడ్డో యేసు మెలొ ఎక్కిలోక 'మొర అన్నె జిలొ' మెన పవులు సంగిలిన్క గగ్గోల్ జతె తిల.

20 జాకయ్, దస్స తగులు తీర్పు కెరుక నేన కెర, ఈంజేవ్ సంగిత నిందల్చి రిసా యెరూసలేమ్తె గెచ్చు తగు నూనవ తీర్పు కెరవనుక ఇస్టుమ్ జతసి గె? మెన పుసిలయ్.

21 గని, వెల్లో రానొ జలొ కైసరు సొంత తీర్పు కెర్పు, మెన మదెనె ఇన్నె జేలి తయిందె మెన పవులు ఇస్టుమ్ జతికయ్, కైసర్తె ఆవ్ తెద్రయ్తి ఎదక జోక రకితె తత్తు మెన, జేలితె అన్నె గలిలయ్," మెన పెస్తున్ సంగిలన్.

22 జాకయ్ అగ్రిప్ప రానొ, ఆవ్ సొంత జోచి తగు నూనుక అంక ఇస్టుమ్, మెన సంగిలన్, చి "దస్సి జలె, కలిక జోక నూన్తె" మెన, పెస్తున్ సంగిలన్.

అగ్రిప్ప రానొ పవులుచి తగు నూన్లసి

23 జలె, అన్నెక్ దీసి, అగ్రిప్ప రానొ, బెర్నీకే మెలి బేన్సి తెన్ బార్ జా, జమాన్లుచ అదికారుల్ తెన్, చి పట్టుమ్చ వెల్లో సుదల్ తెన్, గెరితె బగ్గర్ గవురుమ్ తెన్ జా కెర, వెసిల. పవులుక కడ ఆన మెన పెస్తున్ ఆడ్ర దెతికయ్, కడ ఆన్.

24 తెదొడి, బెర తిలనక పెస్తున్ "ఓ రానొ జలొ అగ్రిప్ప, ఇన్నె అయ్లన ఎత్తిజిన, ఈంజొ మాన్సుక తుమ్ దెకితసు. ఇన్నెచి రిసా జా సుట్టు యూదుల్ ఎత్తిజిని, యెరూసలేమ్తె కి ఇన్నెకి, అంక బలవంతుమ్ కెర, జో అన్నె జింక కిచ్చోక? మొర్పు! మెన, కేకుల్ గల్తె తిల.

25 గని, 'మొర్తి సిచ్చు జతి కేన్ నేరిమ్ కెరె నాయ్' మెన అంక డీసిలి, చి ఈంజొ, కైసరు వెల్లో రానొ సొంత అంచి తగు, నూన తీర్పు కెర్పు, మెన కోర్ప జతికయ్, దస్సి జలె, జో తెయి రోమ్తె తుక తెద్రయిందె మెన, ఇన్నెక బప్పన్లయ్.

26 గని, ఇన్నెచి రిసా అంచొ కైసరు ప్రబుక దెతి రిసా కిచ్చో నేరిమ్ రెగుడుక నేన అస్సి; కిచ్చో నేరిమ్ వయడ్డిసి నాయ్ చి రిసా ఎత్తిచి మొక్కె, ముక్కిమ్క తుచి మొక్కె, ఓ అగ్రిప్ప రానొ, జోక టీవో కెర అస్సి. కిచ్చో మెన మెలె, 'జేవ్ జోచి కొడొ నూన్లె, ఆమ్ ఇన్నెక పరిచ్చు కెర్లె, ఇన్నెచి రిసా కిచ్చో జవున్ రుజ్జు అమ్చొ వెల్లో రానొ కైసరుక రెగుడుక జయెదె'.

* 26:10 26:10 బారికూల్ 9 అద్యయమ్.

27 జలె, జేలి జలొ కేన్ మాన్సుక ఆరి, కిచ్చో నేరిమ్ వయడుక నేన్తె తెద్రవుక బెదితయ్ నాయ్, మెన ఆవ్ ఉచర్తసి" మెన ఇసి సంగిలన్.

26

అగ్రిప్ప రానొచి మొక్కె పవులు సాచి సంగిలిసి

1 తెదొడి, అగ్రిప్ప రానొ పవులుక, "తుయి సొంత జబాబ్ దెంక తుక సెలవ్ దెతసి" మెలన్, చి పవులు ఆతు తెన్ నయ్న కెర, ఇసి మెన జబాబ్ దిలన్.

2 "ఓ అగ్రిప్ప రానొ, యూదుల్ కెర్ల నిందల్ ఎత్తిచి రిసా తుచి మొక్కె ఆవ్ జబాబ్ దెంక సెలవ్ దొర్కు జలిచి రిసా అంక సర్ల.

3 యూదుల్ కెర్ల రకల్ ఎత్తి, యూదుల్చ తగుల్ ఎత్తి, తుయి జాన్సి. జాకయ్, తుయి 'బమ్మ నెంతె అంచి సాచి సరిగా నూనుక' మెన, ఆవ్ తుక జోకర్తసి.

4 ఆవ్ బాల తతె తెంతొ, అమ్చ సొంత మాన్సుల్తె కి ఈంజ యెరూసలేమ్ పట్టుమ్తె కి, ఆవ్ కిసి జిలయ్ గే యూదుల్ ఎత్తిజిన్ జాన్తి.

5 అమ్చి మొత్తుమ్చ అగ్గల్ ఎత్తిజిన్చి కంట నిదానుమ్ కెర్ల ఆమ్ పరిసయ్యుల్ బక్తి కెర్తి రితి ఆవ్ ఇండిలిసి మెన జేవ్ అగ్గయ్ తెంతొ జాన్తి. జేవ్ సత్తిమ్ సాచి సంగుక ఇస్టుమ్ ఒత్త జలె, ఇసి సంగిత.

6 అప్పె, జలె, కిచ్చోక అంక తగు కెర అస్తి మెలె, అమ్చ పూర్లుమ్చక అమ్చొ దేముడు సంగిలి కోడు ఆవ్ నంపజా దయిరిమ్ తెన్ తిలి రిసాయి.

7 జా కోడు సంగిలిన్క 'అమ్క జెయిమ్ జవున్!' మెన, అమ్చ బార సెకుమ్లుచ యూదుల్ రోజుక అందరె మెద్దెనె నిదానుమ్ తెన్ బక్తి కెర్తె. జేవ్ కోర్ప జతిన్చి ఆసచి రిసా మెన ఆవ్ నంపజతసిచి రిసా, ఓ రానొ, అంక నింద కెర్తె.

8 'మొర్లనక దేముడు జియడ్డయ్' మెన సంగిలె, కిచ్చోక తుమ్ ఎత్తిజిన్ నంప కెరుక నెత్తిర్తు?

9 "అగ్గెయి, జలె, నజరేతు గవ్విచొ యేసుక 'జొయ్యి దొర్కు జలొ రచ్చించుప కెర్తొసా' మెన మాన్సుల్ సంగిలె, 'అబద్దుమ్' మెన, మెన్సు నిదానుమ్ ఉచర, ఆవ్ అగ్గె నంపజలన్క జలె అల్లర్ కెర్తె తిలయ్.

10 యెరూసలేమ్తె జోవయింక *అల్లర్ కెర్లయ్. కిసి మెలె, వెల్లెల పూజర్లుచి సెలవ్ నజన, ప్రబుచయ్ జల మాన్సుల్క జేల్తె గలిలయ్, చి 'మొర్తి సిచ్చు జతు' మెన, ఆవ్ బప్పన్లయ్.

11 ఎత్తి సబగేరి గెచ్చు జోవయింక సిచ్చల్ కెర్తె తిలయ్, చి 'యేసుక రచ్చించుప కెర్తొసా జతో క్రిస్తు నెంజె మెన సంగ జోవయింక దూసుప కెర్తు' మెన, జోవయింక అల్లర్ కెర్లయ్. జోవయించి రిసా అంక వెర్తి కోపుమ్చి రిసా,

వేర దేసిమ్లుచ పట్నల్తె గెచ్చు కి, జోవయింక అల్లర్ కెరై తిలయ్.

12 “దస్సి, ఏక్ నుట్టు, ‘నంపజలన్క అల్లర్ కెరిందె’ మెన, వెల్లెల పూజర్లుచి సెలవ్ తెన్ జోవయించి అదికారుమ్ తెన్ ఏక్ దీసి దమన్సు. పట్టుమ్తె గెతి వట్టె గెతె తతికయ్,

13 ఓ రానొ, మెద్దెనె, పరలోకుమ్ తెంతో చి ఏక్ వెల్లి ఉజిడి దెకిలయ్. పొద్దుచి ఉజిడిచి కంట వెల్లి ఉజిడి. అంచి నుట్టునంత, అంచి తెన్ ప్రయానుమ్ కెరై తిలసచి నుట్టునంత డీస లగిలి.

14 జా దెక, ఆమ్ ఎత్కిజిన్ ఎట్టో సేడ్డికయ్, అమ్చి ఎట్టి బాస తెన్ ఏక్ అవాడ్ సంగిలిసి సూన్లయ్, ‘సావులు, సావులు, అంక కిచ్చొక అల్లర్ కెర్తసి? ఆవ్ సికడ్డిసి తుయి నెస కెర, తుకయి తూయి నొప్పి కెరంతసి?’, మెన సంగిలన్.

15 ‘తుయి కొన్సొ, ప్రబు?’ మెన పుసిలయ్, ‘తుయి అల్లర్ కెర్తొ యేసు అచ్చొ.

16 తుయి ఉట్ట, టీవోజ. కిచ్చొక తుక అప్పె డీస అస్సి మెలె, అంచ కమె కిచ్చొ దెక అస్సిన్ గే అన్నె కిచ్చొ అంచ కమె తుయి దెకితె గే, జా ఎత్కిచి రిసా తుయి సాచి సంగుక మెన, తుక ఆవ్ నిసాన తెద్రయ్తసి.

17 యూదుల్చి అత్తి కి, యూదుల్ నెంజిలసచి అత్తి కి, తుయి అల్లర్ సేడ్డె కి, ఆవ్ తుక రచ్చించుప కెరిందె. యూదుల్ నెంజిలసతె తుక తెద్రయ్తసి.

18 జేవ్ గుడ్డి జల రిత జా తిలె కి, దెక, అందర్బుద్ది ముల, ఉజిడ్ బుద్ది జా, నయ్తాన్చి సేవ కెరుక ముల, దేముడుచి సేవ కెర్తు’ మెన, ‘జేవ్ కెర్ల పాపల్ పుంచి జతు చి అంక నంపజా సుద్ది జల అన్నె మాన్సుల్ తెన్, జోవయింక కి టాన్ దొర్కు జవున్’ మెన తుక ‘జొయ్యి అంచి సాచి సంగుస్’ మెన, తుకయ్ ఆవ్ తెద్రయ్తసి.”, మెన అంక ప్రబు తెదొడి సంగిలన్.

19 “జాక, ఓ అగ్రిప్పు రానొ, పరలోకుమ్చొ ప్రబు జా దీసి దెకయ్లీన్క సూనయ్లీన్క నే పిట్టయ్తె నిదానుమ్ కెర,

20 తొలితో దమన్సుతె, పడ్డొ యెరూసలేమ్తె, పడ్డొ ఒండి యూదయ ప్రదేసిమి, పడ్డొ యూదుల్ నెంజిలసచ దేసిమ్లుతె గెచ్చు, ఒత్త కి, తుమ్ కెర్ల పాపల్చి రిసా పెట్టి దుకుమ్ జా ముల, దేముడుక తుమ్ నంపజా మార్పుప జలిన్క రుజ్జు జతి రితి నత్తిమ్ ఇండ మెన, బోదన కెరై తిలయ్.

21 జాకయ్, యూదుల్ దేముడుచి గుడితె అంక దెర, అంక మారుక కుట్ర కెర్ల.

22 “అజి ఎదక కి, దేముడు అంక తోడు తత్తయ్చి రిసా, బాల వెల్లొ ఎత్కిజిన్చి మొక్కె ఈంజ సాచి ఆవ్ సంగితసి. ‘జర్గు జయెదె’ మెన దేముడుచ కబుర్లు సంగిలన సంగిలిసి తెన్ మోసే పూర్నుమ్చొచి అత్తి దేముడు సంగిలిన్తెన్ బెదితి సాచి ఆవ్ సంగితసి. కిచ్చొ వేరచి నెంజె.

23 జేవ్ కిచ్చొ సంగిలిన్చి రిసా ఆవ్ సంగితసి మెలె, నైమల్ సేడ క్రిస్తు మొరుక అస్సె, చి అన్నె జివ్ జా ఉట్టితసక జో మొదొల్ సుదొ జయెదె, చి అమ్చ యూదుల్క కి, యూదుల్ నెంజిలసక కి జోచి ఉజిడి జో దెకయెదె, మెన, పూర్నుల్ సంగిలి కోడు” మెన పవులు సాచి సంగిలన్.

పెస్తున్, పవులు, అగ్రిప్పు లట్టబ్లిసి

24 పవులు దస్సి సాచి సంగితె తతికయ్, పెస్తున్ గట్టిజ అవాడ్ కెరన, “పవులు, తుయి వెర్రి జా అస్సిన్. తుయి ఒగ్గర్ నదు కెర్లిసి తుక వెర్రి కెర మార్పుప కెర్తయ్” మెన సంగిలన్.

25 “తుక జొబర, వెల్లొ పేస్తన్. ఆవ్ వెర్రి నెంజి! ఆవ్ సంగితిసి సత్తిమ్.

26 రానొక పుసు. ఈంజ ఎత్కి జోక ఎర్కె, చి దయిరిమ్ తెన్ జోవయించి మొక్కె ఆవ్ సంగితసి. ఈంజ ఎత్కి కిచ్చొ గుట్టుచి నెంజె. జో కి ఈంజ ఎత్కి కచితుమ్ సూన తయెదె” మెన, పవులు సంగ,

27 రానొచి పక్క ప్ల, “రానొ జలొ ఓ అగ్రిప్పు, ‘జర్గు జయెదె’ మెన అమ్చొ దేముడుచి కబుర్లు సంగితన పూర్నుమ్ రెగ్గయ్ల కొడొ తుయి నంపజతసి గే? తుయి ‘నంపజతయ్’ మెన జాని” మెన, పవులు సంగిలన్.

28 అగ్రిప్పు పవులుక, “అంక బే బేగి మార్పుప జా నంప జవున్, మెన తుయి ఉచర్తసి గే?” మెన పుసిలన్,

29 పవులు, “బే బేగి జవున్, ఆల్సిమ్ జవున్, గని ఎక్కి తుకయి మెని నాయ్. అజి అంచి కోడు సూన్తన ఎత్కిజిన్ కి ‘ఈంజేవ్ గొల్పుల్క పిట్టవ, అంచి రితి జా మార్పుప జతు!’ మెన ఆన తెన్ దేముడుక ఆవ్ ప్రార్థన కెర్తసి” మెన, పవులు రానొక సంగిలన్.

30 తెదొడి రానొ, పేలిక్స్, బెర్మీకే, చి జోవయింతెన్ వెస తిలస ఎత్కిజిన్ ఉట్ట, కెర,

31 బార్ జా, ఎక్కిలోక ఎక్కిలో కిచ్చొ మెల మెలె, “ఈంజొ మాన్సు కిచ్చొ మొర్తి సిచ్చుచి ఎదిలి తప్పు జవున్, జేలి జతిన్చి ఎదిలి తప్పు జవున్, కిచ్చొయ్ కెరె నాయ్” మెన సంగిల.

32 చి పెస్తున్క అగ్రిప్పు రానొ, “కైసరు వెల్లొ రానొ సొంత అంచి తగు సూన్సు మెన ఈంజొ మాన్సు సంగితొ నాయ్ జలె, ఇన్నెక విడ్డల్ కెరుక జతి!” మెన సంగిలన్.

27

రోమ పట్టుమ్తె పావులీంసి ప్రయానుమ్ గెచ్చుక దెర్లిసి

1 అమ్ ఇటలీ దేసిమి ప్రయానుమ్ గెచ్చుక మెన అదికారుల్ సంగితికయ్, పవులుక చి అన్నె జేలి తిలసక, ఔగుస్తు వెల్లొ రానొచి మెలి జమాన్లుతె, పుంజెక్జిన్ జమాన్లుక వెల్లొ యూలి మెలో ఎక్కిలోచి అత్తి సార్పు కెర్ల.

2 తెదొడి, వేర దేసిమ్చి అద్రముత్తియ పట్టుమ్చి ఓడ ఆనియా ప్రదేసిమ్చ రేవుల్ వాట్ గెచ్చెదె మెన, జా

ఓడతె వెగ బార్ జలమ్. అన్నె మాసిదోనియ ప్రదేసిమ్చి దెస్సలోనిక పట్టుమ్చో అరిస్తార్కు అమ్చి తెన్ తిలొ.

3 ఉత్తర పక్క గెచ్చు గెచ్చు, అన్నెక్ దీసి సీదోను రేవుతె ఉత్తిర్లమ్, చి యూలి, పవులుక చెంగిల్ దెక, జోచ ఒత్తచ గోతుసుదల్తె జో గోత్ గెచ్చు ఇదిల్ పుండ సుక్కుమ్ జంక మెన, సెలవ్ దిలన్.

4 పుండ, ఓడతె అన్నె వెగ, ఒత్త తెంతో అన్నె ఉత్తర పక్క గెచ్చు, తెదొడి వడమర పక్క గెచ్చు, కుప్త డిబ్బక జిన్లమ్. కుప్తక వేర పక్క గెతమ్, జలె, వాదు అల్లర్ కెర్తి.

5 ఒత్త తెంతో, కిలికియచి పంపూలియా ప్రదేసిమ్లు సొడి ఓడ తెన్ గెచ్చు గెచ్చు, లుకియ ప్రదేసిమ్చి మూర రేవుతె ఉత్తిర్లమ్.

6 ఇటలీతె గెతి అలెక్కుంద్రియ పట్టుమ్ తెంతో చి ఓడ ఒత్త తతికయ్, జా ఓడతె వెగ గెచ్చుక జయెదె మెన పుంజెక్జీన్ జమాన్లుక వెల్లో జాన కెర, అమ్క వెగయ్లన్.

7 సగుమ్ దీసల్ తిరిమ్ తిరిమ్ ఓడ తెన్ గెలమ్, గని తెదొడి వాదు అల్లర్ కెర్తి, చి క్షీదు రేవు పాసి అయ్లి పొది, అన్నె వడమర పక్క గెచ్చుక ఉచర్లె వాదు పూర్తి అడ్డు కెర్తికయ్, దచ్చెన పక్క గెచ్చు, క్రేతు డిబ్బచి సల్మోనే మెలి కొస్కుక కస్టనె జీన,

8 క్రేతుచి లాసేయ పట్టుమ్చి పాసి తిలి 'సూటి రేవుల్' మెలి టాన్తె పాచిలమ్.

వెల్లి వాదు అల్లర్ కెర్తిసి

9 ఒత్త సగుమ్ దీసల్ తిలమ్, చి చువ్వె తతి అమ్చి పండుగు కేడ్డికయ్, చల్లి పొది పాసి జెతయ్, చి జా పొదిచి వాదుక ఒత్త ఓడతె గెచ్చుక ప్రమాదుమ్చి రిసా,

10 "గోతుసుదల్, అమ్ అప్పె బార్ జలె, ఓడక, సామన్క, చి అమ్క ప్రమాదుమ్, ఒగ్గర్ నస్టుమ్ జమ్దె మెన దెకితసి" మెన, పవులు జాగర్ల సంగిలన్.

11 గని పవులు సంగిలిన్క పుంజెక్జీన్ జమాన్లుక వెల్లో విలువ నే దెకితె, ఓడ ఇండయ్తనచో ఎజోమాని, అన్నె ఓడచో ఎజోమాని దొగులచి కోడు సూన్లన్, చి

12 "ఈంజ రేవుతె వాదు సరిగా అడ్డు జయె నాయ్ చి రిసా ప్రమాదుమ్" మెన ఓడతె తిల మాన్సుల్ ఎత్తిజిన్ సంగ, "ఏక్ వేల క్రేతు డిబ్బచి పీనిక్స్ మెలి అన్నెక్ రేవుతె పాచిలె, ఇదిల్ వేర దిక్కుక మొక్కె జతయ్ మెలె, నైరుతి దిక్కుకచి వాయవ దిక్కుకచి చల్లి పొది ఒత్త రకిలె చెంగిల్ కిచ్చొగె" మెన సంగిల.

13 తెదొడి, దచ్చెన పక్క తెంతో ఉల్లువుల్లు వాదు కెర్తికయ్, 'అప్పె బార్ జలె చెంగిల్ కిచ్చొగె' మెన, ఓడక టీచో కెర్తి లంగరు మెలి ఇనుము సామన్ సముద్రుమ్ తెంతో కడ కెర, ఇండవుక దెర, క్రేతు డిబ్బచి గట్టుక పాసి గెచ్చు తా, ఇండయ్తె తిల.

14 గని ఈసాన్యమూల పక్క తెంతో జెతికయ్ వెల్లి వాదు బుయి పక్క తెంతో వీరుక దెర్తి,

15 చి జా వాదుక నెత్త కెర, ఓడ పసుల, వాదు గెతి దిక్కుతె వెల్లి జలి.

16 తెదొడి, కీసి గే, కొద మెలి ఇదిలిసి డిబ్బచి గట్టుతె జా కెర, ఓడ పడ్డొ కడ దోనిక కస్టనె ఓడతె వెగడ్లమ్.

17 డిట్టుమ్ జవున్ మెన, డిట్టుమ్ వాలివొ తెన్ ఒండి ఓడక బందిల. తెదొడి, సూర్తి మెలి ఇన్ను డిబ్బతె ఓడ వెల్లి జలె టక్కున దెరన గెలెదె మెన బియకెర, ఓడ తిరిమ్ ఉట్ట గెన్ను మెన, జేవ్చ వెల్లెల మాన్సుల్ తెరల్ గట్ట ఉత్తయ్ల.

18 గని, వాదు కెర్లల్ ఒగ్గర్ కెర, ఓడక ఒగ్గర్ అల్లర్ కెర్తికయ్, అన్నెక్ దీసి, ఓడతె దువార్తె తిలి సామన్ సముద్రుమ్తె గలుక దెర్ల, ఓడ సుల్కన జవున్ మెన.

19 గని వాదు తగుప జయె నాయ్, చి తిర్తక ఎత్తిజిని, బాల వెల్లో, సొంతయ్ బెద, ఓడ ఇండయ్తి సామన్ కి ఉక్కుల సముద్రుమ్తె గలిలమ్.

20 ఒత్త తెంతో, వాదు పాని గట్టిజ జతికయ్, ఒగ్గర్ దీసల్ జలి పొద్దు డీసె నాయ్, సుక్కుల్ డీస్తి నాయ్, చి రచ్చించుప జతి దయిరిమ్ ఎత్తిజిన్క పూర్తి గెలి.

21 జేవ్ మాన్సుల్ ఒగ్గర్ దీసల్ చువ్వె తతికయ్, పవులు జోవయించి నెడిమి పురె జా, "ఆవ్ తెదొడి సంగిలిసి సూన్తద్ జలె, క్రేతు తెంతో బార్ జతద్ నాయ్, ఈంజ నస్టుమ్ కస్టుమ్ సేడ్డద్ నాయ్.

22 ఈంజ ఓడ పాడ్ జా గెచ్చెదె, గని కేన్ మాన్సు మొర్పు నాయ్, అప్పె తుమ్ దయిరిమ్ తెన్ తా మెన ఆవ్ తుమ్క సంగితసి.

23 కీసి జాని మెలె, ఆజి రాతి, ఆవ్ నంపజలొ దేముడుచి దూత ఎక్కిలొ జా కెర, అంచి పాసి టీచ,

24 అంక, 'పవులు, తుయి బి నాయ్. తుయి కచితుమ్ *కైసర్చి పాసి టీచ జా జోక తుచి తగు సూనయ్తె. పడ్డొ, ఈందె తుచి తెన్ ఓడతె గెతన కి తుచి తెన్ రచ్చించుప జతు దేముడు తుక వరుమ్ దా అస్సె మెన,' దూత అంక సంగిలన్.

25 జాకయ్, గోతుసుదల్, తుమ్ దయిరిమ్ తా. అంక కబుర్ సంగిల్ రితి కచితుమ్ జర్లు జయెదె మెన ఆవ్ నంపజతసి.

26 గని మదెనె, కేన్ జవున్ డిబ్బతె ఓడ వెల్లి జంక అస్సె" ఇని పవులు సంగిలన్.

ఓడ డిబ్బచి గట్టుతె వెల్లి జలిసి

27 చొప్ల పొదుల్ గెతికయ్, అందరె, అద్రియ సముద్రుమ్తె అమ్చి ఓడ ఇండ నే ఇండిలి రితి జా తిరిమ్ గెతె తతికయ్, 'అమ్ బుయిక పాసి జెతనుమ్ కిచ్చొగె' మెన, ఇండయ్తనక అజ్జ అయ్లి.

* 27:24 27:24 వెల్లో రాసెచి.

28 చి 'సముద్రుమ్ కెడ్డి దీగ్ అస్సె గే దెకుమ' మెన కొల్ల దెకిలె, పుంజెక్ విస్సెక్ అడుగుల్ దీగ్ అస్సె. అన్నె ఇదిల్ దూరి గెచ్చు కొల్ల దెకిలె, తొంబయ్ అడుగుల్ దీగ్ జా అస్సె.

29 తెదొడి, "పత్రల్తె పెల్లి జలె అల్లర్ జమ్దె" మెన బియఁ కెర, 'ఓడ టీవొ కెర' మెన, ఓడచి పడ్డొ పక్క తెంతొ చెత్తర్ లంగర్లు సముద్రుమ్తె బుడ్డవ తా, "కెదొడ్క రాతి పాయదె." మెన ప్రార్దన కెరె తిల.

30 మదెనె, 'ఓడక ముల దోనితె వెగ బయిలె బార్ జమ' మెన ఓడ ఇండయ్తన, ఆరిక "ఓడచి పురైతొచ లంగర్లు బుడ్డయ్తనుమ్" మెన సంగ, లుంకచోరు ఓడచి దోని ఉత్తవ దిల.

31 జా పవులు దెక కెర, పుంజెక్జీన్ జమాన్లుక వెల్లొక చి జమాన్లుక, "ఈంజేవ్ మాన్సుల్ ఓడతె తిలెకయ్ రచ్చించుప జస్తె" మెన సంగిలన్.

32 చి దోనిచ వాలివొ జమాన్లు సుదల్ సింద, దోని ములయ్ల.

33 కుకుడొ వానెనె, "అప్పె చొప్ల పొదుల్ జయెదె, తుమ్ ఎత్తిజిన్ బియఁ తా చువ్వె అస్సన్.

34 జాకయ్, అన్నిమ్ కా సత్తు జా. తుమ్ కిచ్చొయ్ నస్సుమ్ నే జస్తె రచ్చించుప జస్తె, చి తుమ్క సెక్తి తయెదె. జేవ్క కి పవులు బలవంతుమ్ కెర,

35 పొడియొ దెర, ఈంజ అన్నిమ్ దా దయ కెర్లచి" మెన, దేముడుక జొకర కెర, ఏక్ గండ మోడ కంక దెర్లన్.

36 జేవ్ దెక, దయిరిమ్ జా, జేవ్ కి కంక దెర్ల.

37 జా ఓడతె మొత్తుమ్ దొన్ పుంజొ డబ్బయ్ సొప్పు జీన తిల.

38 జలె, ఎత్తిజిన్ సరిపుచుప జలిసి కయ్లి పడ్డొ, ఓడక 'అన్నె సుల్కన జవున్' మెన, సేసిలి గోదుమ్ ఎత్తి సముద్రుమ్తె గలిల.

39 †పొద్దు బార్ జతికయ్, 'ఈంజ కేన్ దేసిమ్చి బుయి గె?' మెన చినితి నాయ్, గని ఏక్ రేవు తిలిసిచి ఇస్సు తిలి సదూనుమ్చి ఒడ్డు దెకిల, అన్నె, "ఒత్త పావెలె, ఓడ ఒడ్డుతె ఒర్గొడ నెంక జయెదె" మెన, ఉచర్ల.

40 జాకయ్, జేవ్ బుడ్డవ తిల లంగర్లుచ వాలివొ యిప సముద్రుమ్తె ముల, దిక్కు దెకయ్త చట్టుచ వాలివొ బొడుగ కెర, ఓడక పురై తతి ఇదిలిసి తెర వెగడ, ఒడ్డు పక్క గెచ్చుక దెర్లమ్.

41 సముద్రుమ్ తెడిచి ఏక్ డిబ్బతె ఓడ పెల్లి జా, దెరన గెలి. పురైతొ పక్క టక్కున డిబ్బతె వెన గెలి, పడ్డొ పక్క కెర్లల్ పెట్టికయ్, ఓడ బద్దల్ జా గెలి.

42 "ఏక్ వేల ఒడ్డుతె పుంగ్ ఉట్ట నిగుల" మెన, జేలి తిలసచి రిసా జమాన్లు సుదల్ ఉచర, మారుక ఉచర్ల, గని,

† 27:39 27:39 రాతి పాయితికయ్

43 'పవులుక మొరుక జయె నాయ్' మెన, పుంజెక్జీన్ జమాన్లుక వెల్లొ అడ్డు కెర్లొ. "పుంగ్రితన, సముద్రుమ్తె డేవ ఒడ్డుతె పుంగ్, చి

44 పుంగ్రుక నేన్లన ఓడచ డండల్ బల్లలు దెర, ఒడ్డుతె పాచ" మెన ఆడ్ర దిలన్, చి కో నే పిట్టె, ఎత్తిజిన్ ప్రమాదుమ్ తెంతొ ఒడ్డుతె జీన్లమ్.

28

పవులుక అయి చడ్డెకి చెంగిల్ తిలిసి

1 ఆమ్ ఎత్తిజిన్ ప్రమాదుమ్ నెంతె బుయ్యె పావెలె, జా డిబ్బక మెలితె డిబ్బ మెన చినిలమ్.

2 మెలితె డిబ్బచ మాన్సుల్, జలె, అమ్క ఎత్తిజిన్క చెంగిల్ మరియాద కెర, 'పాని జా చల్లి కెర్తికయ్', అమ్క ఆగి లావ దిల.

3 జా ఆగిచి రిసా పవులు దొన్ని దారు కుడవ ఆగితె గల్తె తతికయ్, ఒగ్గర్ విస్సుమ్ దెతి అయి వేడిక బార్ జా, పవులుచి అత్తి చడ టక్కున జలి.

4 జోచి ఆతు తెంతొ అయి ఒడయ్ జా అస్సె మెన జేవ్ మెలితె డిబ్బచ మాన్సుల్ దెక కెర, "ఒహొ, ఈంజొ మాన్సు అత్య కెర్లొసా జా తయెదె. సముద్రుమ్తె నే మొర్లె కి, ఇన్నెచి పాపుమ్క మొరుక అస్సె, కిచ్చొగె" మెన సంగిల.

5 పవులు, మాత్తుమ్, ఆతు వీర దెతికయ్, అయి ఆగితె సేడ్డి, చి పవులు కిచ్చొ ప్రమాదుమ్ జయె నాయ్.

6 "ఈంజొ పుల గెచ్చ టక్కున జా సేడ మొర గెచ్చెదె" మెన ఉచర్ల, గని ఒగ్గర్ సేంపు రకిలెకి, కిచ్చొ జయె నాయ్ మెన దెక కెర, "ఒహొ, ఈంజొ దేముడు జా తయెదె" మెన ఉచర్ల.

7 ఒత్త అమ్ తిలిన్క పాసి, జా డిబ్బ దేసిమ్క వెల్లొ జలొ పొప్లి మెలొసొక బుయి తిలి. జో పొప్లి తెన్ దస్సుల్ జతికయ్, అమ్క తిరైతి ఒగ్గర్ మరియాద కెర్లన్.

8 జోచొ అబ్బొన్క జొర్లొ, చి పెట్టి దెర తిలిచి రిసా పవులు జొతె గెచ్చ ప్రార్దన కెర జోక బోడి చడితికయ్, జో చెంగిల్ జలన్.

9 దస్సి జర్లు జతికయ్, జా డిబ్బ దేసిమ్చ జొర్లొ తిల మాన్సుల్ ఎత్తిజిన్ పవులుతె జా కెర, చెంగిల్ జల.

10 జాకయ్ అమ్క ఒగ్గర్ గవురుమ్ కెర్ల, చి తిన్ని జొన్నొ గెలె, ఆమ్ అన్నె ఓడతె బార్ జంక దెర్లి పొది, అమ్క దొర్కు జలిసి ఎత్తి ఓడతె బెరయ్ల.

రోమ్ పట్టుమ్తె పావులీంసి పావెలిసి

11 జా తిన్ని జొన్నొ గెతికయ్, ఒండి చల్లి పొది జా డిబ్బతె తిలి ఏక్ ఓడతె వెగ, బార్ జలమ్. జా ఓడ అలెక్కంద్రియ పట్టుమ్ చి. జా ఓడచి బోడితె 'కల్వల్ దేవతల్' మెన బొమ్మల్ తిల.

12 జలె, జా ఓడతె సురకూసు రేవు ఎద ఉత్త, తిర్రతి తిలమ్.

13 ఒత్త తెంతో ఇదిల్ వంకిడి వాటు బుల, రేగియు మెలి రేవుతె పాచిలమ్. ఏక్ దీన్ గెతికయ్, దచ్చెన పక్క తెంతో చి వాదు కెర్లి, చి అన్నెక్ దీసి పొతియెలీ రేవుతె పాచిలమ్.

14 ఒత్త ఉత్తిరై, నంపజల బావుడ్లు తిల, చి “సత్తు పొదుల్ అమ్చి తెన్ తా” మెన బుకార్ల. జా సత్తు పొదుల్ గెతికయ్, బార్ జా, రోమ పట్టుమ్తె గెలమ్.

15 ఒత్త రోమక పాసి అయ్లె, నంపజల బావుడ్లు అమ్క “జా అస్తి” మెన సూన తా, దన్నుల్ జంక మెన, రోమక రమారమి దొన్ని విసా తిన్ని మయిలు దూరి తిలి అప్పీయా మెలి ఏక్ సంతవీది ఎదక, సగుమ్జిన్ అయ్ల. అన్నె సగుమ్జిన్ తిన్ని నిజతి గేర్లు మెలి రోమక ముప్పయ్ పాచే మయిలు దూరి తిలి గవ్వి ఎదక అయ్ల. జోవయింక దెక కెర, పవులు అమ్చో దేముడుక జోచి సర్ల సంగిలన్, చి దయిరిమ్ జలన్.

16 తెదొడి, ఆమ్ రోమతె పాచిలి పొది, పవులుక జేల్తె గల్తి నాయ్, గని ఇస్టుమ్ అయ్లిన్తె జో జింక సెలవ్ దా, జమాన్ ఎక్కిలోక రకయ్ల.

17 తిర్రతి గెతికయ్, పవులు ఒత్తచ యూదుల్చ వెల్లో సుదల్క, అదికారుల్క జోతె బుకార్లొ. జేవ్ ఒత్త ఎక్కితె బెదితికయ్, పవులు జోవయింక, “ఓ బావుడ్లు, అమ్చ యూదుల్క కిచ్చొ అల్లర్ కెరి నాయ్, అమ్చ పూర్లుల్చ విదల్ పిట్టవుక మెన ఆవ్ కిచ్చొ కెరి నాయ్, గని యెరూసలేమ్తె అంక జేలి కెర, రోమియుల్చి అత్తి అంక సార్పు కెర దిల.

18 రోమియులు అంక పరిచ్చు కెర, అంచి తగు సూన, ‘కిచ్చొ మొర్తి సిచ్చు ఆనన్తి తప్పు కెరె నాయ్’ మెన, జోవయింక రుజ్జు అయ్లిచి రిసా, అంక విడ్డల్ కెరుక ఇస్టుమ్ జల.

19 గని ఒత్తచ యూదుల్ ఒగ్గర్ జతికయ్, అంక అన్నె కిచ్చొ వాటు నాయ్, చి కైసరు వెల్లో రానొ సొంత అంచి తగు సూన తీర్పు కెర్పు మెన, ఆవ్ కోర్ప జలయ్. గని అమ్చ యూదుల్చి రిసా అంచి పెట్టి కిచ్చొ విస్సుమ్ నాయ్.

20 “తుమ్క ఆజి కిచ్చొక ఇన్నె బుకార్లయ్ మెలె, తుమ్చి తెన్ దన్నుల్ జంక, చి ఈంజేవ్ గొల్పుల్ తెన్ కిచ్చొక అంక బంద అస్తి మెలె, తెద్రయిందె మెన దేముడు ఆమ్ ఇస్రాయేలుల్క సంగిలో రచ్చింఛుప కెర్తొసాక, ఆవ్ నంపజా జోవయించి రిసా సాచి సంగిల్, రిసాయి.” మెన సంగిలన్.

21 జలె, జేవ్, “యూదయ తెంతో తుచి రిసా కేన్ ఉత్తల్ జెతి నాయ్, చి ఇత్తల్ అయ్ల అమ్చ యూదుల్ కోయి కి, తుచి రిసా కిచ్చొయ్ అల్లర్ సంగితి నాయ్,

22 గని, తుయి ఉచర్తిసి ఆమ్ సూనుక ఇస్టుమ్ జతసుమ్. తుయి బెదితి జట్టుచి రిసా ఎత్తిజిన్ ‘తప్పు’ మెన సంగితతి” మెన, పవులుక ఒత్తచ యూదుల్చ వెల్లో సుదల్ సంగిల.

23 జాకయ్, జేవ్ సంగిలి దీసి, జో తిలి గెరి ఒగ్గర్ ఒగ్గర్జిన్ యూదుల్ అయ్ల, చి పెందలె తెంతో సాంజ్ ఎద, దేముడుచి రాజిమ్తె మాన్సుల్ బెదుక అవ్కాసుమ్ దొర్కు జలి చి సాచి సంగ, *మోసే పూర్లుమ్చొచి అత్తి రెగిడ్డి దేముడుచ ఆగ్గుల్చ కొడొ, పడ్డొ మోసే పూర్లుమ్చొచి అత్తి దేముడు రెగ్గయ్ల ఆగ్గుల్, అన్నె పూర్లుల్చి అత్తి సంగిల దేముడుచ కబుర్లుచ కొడొ బెదవ, యేసుక ‘జొయ్యి దేముడు సంగ తిలొ రచ్చింఛుప కెర్తొసా’ మెన, బోదన కెర్తె తిలన్.

24 జోవయింతె సగుమ్జిన్ జో సంగిలిసి నంప కెర్ల, సగుమ్జిన్ నంప కెర్తి నాయ్.

25 జేవ్ దొన్ని జట్టు జా, ఎక్కి మెన్ను నే జతె ఉట్ట గెల. గని నే గెతె అగ్గెయి, పవులు ఇసి సంగిలన్. “యెసయా పూర్లుమ్చొచి అత్తి దేముడుచి సుద్ది తిలి ఆత్మ తుమ్చ పూర్లుల్క సంగిలి కోడు సరిగా అస్సె.

26 ‘అమ్చ యూదుల్తె గెచ్చు ఇసి మెన సంగ. తుమ్ సూన్తె, గని కచితుమ్ అర్దుమ్ కెరన్ను నాయ్. తూమ్ దెకితె, గని కచితుమ్ నంప కెర్పు నాయ్! మెన సంగు.

27 ఈంజేవ్ అమ్చ మాన్సుల్చి పెట్టి బేడు బంద అస్సె, జోవయించ కంగ్గొ బొయ్ర జా అస్తి, జోవయించ అంకివొ జేవ్ డంకన అస్తి. నెంజిలె, అంకివొ దెకిత, కంగ్గొ సూన్త, పెట్టి అర్దుమ్ కెరంత, చి ఆవ్ జోవయింక చెంగిల్ కెర్తి రితి అంచితె జెత.’ మెన సంగిలి కోడు.

28 “జాకయ్, తుమ్క, అమ్చో దేముడు దిలి రచ్చున యూదుల్ నెంజిలసక జో దా అస్సె. జెవ్వి సూనుల” మెన, పవులు సంగిలన్.

29 †పవులు ఇసి సంగితికయ్, యూదుల్, ఎక్కి మెన్ను నే జతె, దొన్ని జట్టు జా, ఉట్ట గెల.

30 పవులు, సొంత గేరు నజన అద్దె దా దొన్ని వెర్పుల్ ఒత్త జతె తా, కో అయ్లె కి మరియాద కెర,

31 దేముడుచి రాజిమ్చి రిసా, ప్రబు జలొ యేసుక్రీస్తుచి రిసా, కో అడ్డు నే కెర్తె, ఎదార్దుమ్ సుబుమ్ కబుర్ బోదన కెర్తె తిలన్.

* 28:23 28:23 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్ల ఆగ్గుల్ మెన అమ్ జాసుమ్. ఈంజ కొడొ ఎత్తి బైబిల్తె అగేచి పాచే పుస్తకమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్డి దేముడుచ ఆగ్గుల్ మెన రెగ్గవ అస్సె.
† 28:29 28:29 గ్రీకు బాస తెన్ ‘బారికుల్’ చి మత్తలి తొలితొ రెగిడ్ల సగుమ్ పుస్తకతె 29 నంబర్చి కోడు తయ నాయ్.

రోమియుల్ క రెగిడ్లి ఉత్త్రుమ్. బారిక్ జలో పవులు రోమ్ పట్టుమ్చ సంగుమ్చక రెగిడ్లి ఉత్త్రుమ్

మొదొల్ కోడు

1 రోమ్ పట్టుమ్తెచ దేముడు ప్రేమ కెర్ల జోచి సుద్ది జా జోచయ్ జంక మెన, జో నిసాన బుకార్ల మాన్సుల్క, యేసుక్రీస్తుక *గొత్తి సుదొ జలో పవులు రెగిడ్లి ఉత్త్రుమ్. దేముడు దిలి సుబుమ్ కబుర్ నూనయ్తి రిసా ఆవ్ జోచొ బారికి జంక మెన, యేసుక్రీస్తు అంక నిసాన బుకారా అస్సె. ఈంజయి కామ్ అంక సార్ప దా అస్సె.

2 ఈంజ సుబుమ్ కబుర్ తెద్రవుక మెన అగ్గెయి తెంతొ జోచ కబుర్లు సంగిలసచి అత్తి, జో రెగ్గయ్లి జో దిలి దేముడుచి కొడెతె ప్రమానుమ్ సంగ తిలన్.

3 సుబుమ్ కబుర్ మెలె, జో దేముడుచొ ఎక్కి పుత్తున్చి రిసాచి కబుర్. జో పుత్తున్క 'మాన్సు' మెన దెకిలె, అమ్ యూదుల్చొ దావీదు పూర్గుమ్చొచి సెకుమ్తె జెర్మిలన్.

4 అమ్చొ ప్రబు జలో యేసుక్రీస్తు, జో మొర గెచ్చు అన్నె జీవ్ జా ఉట్టిన్ రిసా దేముడుచి పూత్తు మెన దేముడుచి సుద్ది తిలి ఆత్తుచి ఒగ్గర్ సెక్తి తెన్ రుజు కెరన్లన్.

5 జలె, ఎత్తి దేసిమి జోక నంపజా జోచి కోడు నిదానుమ్ కెర జోచి నావ్ గవురుమ్ కెర్లు మెన మాన్సుల్క సుబుమ్ కబుర్ నూనయ్త జోచ బారికుల్ అమ్ జంక మెన, జో ప్రబు జోచి దయ అమ్క దా అస్సె.

6 యేసుక్రీస్తుచ సొంత మాన్సుల్ తూమ్ కి జంక మెన, జేవ్ తెన్ బెదుక మెన వేర వేర దేసిమ్లతె తుమ్క కి దేముడు బుకారా అస్సె.

7 అమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

రోమియుల్ క దెకుక మెన పవులుచి ఆస

8 తొలితొ కిచ్చొ మెలె, తుమ్ ఎత్తిజిన్చి రిసా †యేసుక్రీస్తుచి నావ్ దెర అంచొ దేముడుక అంచి సర్ల ఆవ్ సంగితసి. ప్రబుచి ఉప్పిరి తుమ్ రోమియుల్ తుమ్చి

* **1:1 1:1** నెంజిలె 'గొతి జలో రితొ', నెంజిలె 'సేవ కెర్లొసా'. † **1:8 1:8** మెలె, యేసుక్రీస్తు జోవయింక నంపజలసచి పాపుమ్ వయ గెచ్చయ్లి రిసా 'జొయ్యి మదెనె జతికయ్ ఎత్తి అదికారుమ్ తిలొ దేముడు అబ్బొసి అమ్చ ప్రార్దనల్ నూనెదె' మెనయ్, జయి దయిరిమ్క యేసుక్రీస్తుచి నావ్ దెర పవులు దేముడుక ప్రార్దన కెర్లయ్, అమ్ కి జోవయింక ప్రార్దన కెరుక జతయ్. ‡ **1:14 1:14** గ్రీసు దేసిమ్చ మాన్సుల్క మెనుక జతయ్, గని పవులు ఈంజ ఉత్త్రుమ్ రెగిడ్లి పొదులె, యూదుల్ నెంజిలె ఎత్తిజిన్క కి 'గ్రీసు దేసిమ్చక' మెనుక ఏక అలవాట్ తిలి.

§ **1:16 1:16** మెలె, క్రీస్తుకయ్ నంపజతొ ఎత్తి మాన్సు. యోహాను **1:12, 3:16, 18, 36.** * **1:16 1:16** తొలితొ యూదుల్క అవ్కాసుమ్ తంక చి పడ్డొకయ్ యూదుల్ నెంజిలసక అవ్కాసుమ్ తంక మెన ఎత్తి అదికారుమ్ తిలొ దేముడుచి సెలవ్. లూకా **24:47, బారికుల్ 1:8, 13:46.** † **1:17 1:17** జోచి సత్తిమ్ పున్సిమ్ జోవయింక నంపజలసక దొర్కు కెరన్తికయ్ అమ్క అన్నె బెదవంతయ్. ‡ **1:17 1:17** నెంజిలె 'చి జా సత్తిమ్ పున్సిమ్ అమ్క దొర్కు జలె, అన్నె నముకుమ్ పలోయ్తయ్'.

§ **1:17 1:17** నెంజిలె "ప్రబు దెతి పున్సిమ్ జలన జోవయింకి ఉప్పిరిచి నముకుమ్కయ్ ఇండుక" బాబక్కూకు **2:4** దెక.

నముకుమ్ తిలిన్చి రిసా ఒండి లోకుమ్చ మాన్సుల్ నూన అస్సి.

9 జోచొ పుత్తున్చి రిసాచి సుబుమ్ కబుర్ నూనవ నూనవ ఆవ్ సేవ కెర్లొ దేముడు అంచి రిసా సాచి జతయ్. ఆవ్ ప్రార్దన కెర్లి పొది, కెయ్క తెయ్క నే పిట్టె తుమ్చి రిసా జోక ఆవ్ సంగితసి.

10 తుమ్చి రిసా ఆవ్ ప్రార్దన కెర్లిన్తె ఏక కిచ్చొ మెలె, జోచి దయ తిలె, కీసి గే తుమ్తె ఆవ్ అప్పె జెంక వాట్ దెవున్ మెనయ్ ఆవ్ ప్రార్దన కెర్లసి.

11 తుమ్చి ఆత్తుక డిట్టుమ్ కెర్లి రితి తుమ్క కిచ్చొ జవున్ ఆత్తుసెక్తి దొర్కు కెర్లి రితి కిచ్చొ జవున్ కామ్క జెతిసి కెరుక మెన, తుమ్క దెకుక తుమ్తె గెచ్చుక అంక ఒగ్గర్ ఆస.

12 తుమ్చి ఆత్తుక డిట్టుమ్ కెరుక మెన సంగిలె, తూమ్ కి ఆవ్ కి, ఎక్కిలోక ఎక్కిలో నముకుమ్ దెకిలె అన్నె సర్ల దయిరిమ్ జమ్దె.

13 ఒ బావుడ్లు, తుమ్ కిచ్చొ జానుక అంచి ఇస్తుమ్ మెలె, యూదుల్ నెంజిలె అన్నె ఒగ్గర్జిన్తె ఆవ్ కీసి గెచ్చు ప్రబు దిలి పంట్ొ జోవయింతె లాయ అస్సి గే, తుమ్తె గెచ్చు, తుమ్తె కి దస్సి పంట్ొ లాయిక మెన ఆవ్ ఒగ్గర్ సుట్లు ఉచర అస్సి, గని అప్పెక అంక వాటు అడ్డు తా అస్సి.

14 †గ్రీసు దేసిమ్చక కి, గ్రీసు దేసిమ్చ నెంజిలసక కి, ఒగ్గర్ నదు కెర్లసక కి, నదు నేన్ల మాన్సుల్క కి ఆవ్ సుబుమ్ కబుర్ నూనవుక మెన, ప్రబు అంక పూచి తియార అస్సి.

15 జాకయ్, తుమ్ రోమ్ పట్టుమ్చక కి సుబుమ్ కబుర్ బోదన కెరుక మెన అంక ఒగ్గర్ ఇస్తుమ్ అస్సి.

నముకుమ్ వాట్కయ్ రచ్చన దొర్కు జతయ్

16 సుబుమ్ కబుర్చి రిసా అంక కిచ్చొ లాజ్ నాయ్. సుబుమ్ కబుర్చి ఉప్పిరి అంక పూర్తి దయిరిమ్. కింపజతొ ఎత్తి మాన్సు పాపుమ్ తెంతొ రచ్చించుప కెర్లి రిసా దేముడుచి సెక్తి సుబుమ్ కబుర్ తెయి అస్సి. జా రచ్చన క్రీస్తుక నంపజతన ఎత్తిజిన్క, * తొలితొ యూదుల్క, పడ్డొ యూదుల్ నెంజిలసక.

17 దేముడుచి పున్సిమ్ సుబుమ్ కబుర్ తెయి డిస్తయ్, దొర్కు జతయ్†. జో దెతి జా పున్సిమ్, జా రచ్చన, అమ్క కీసి దొర్కు జతయ్ మెలె, ‡పూర్తి నముకుమ్ వాటు. దేముడుచి కొడెతె జో సొంత రెగ్గయ్లి రితి, "ప్రబుచి

ఉప్పిర్చి నముకుమ్ కో పున్నిమ్ కీ జవుల గే జెవ్వి జివుల”.

దేముడుచి పున్నిమ్ నెసిలనచి రిసాచి తీర్పు

18 దేముడుక విరోదుమ్ జా మాన్సుల్క పాపుమ్ కెర కెర జోవయించి పెట్టిచి పాపుమ్తె సత్తిమ్క లుంకడ్డొ, దస్సి ఎత్కి మాన్సుచి ఉప్పిర్ జోచి కోపుమ్ జో దేముడు పరలోకుమ్ తెంతో నుఱ దా దెకయెదె, లయడెదె మెన రుజ్జు *డిన అస్సె.

19 దేముడుక జేవ్ విరోదుమ్ జలిసిచి అన్నె మాన్సుల్క జేవ్ కెర్ల పాపల్క ‘జోవయించి పాపుమ్’ మెన కీసి సంగుక జయెదె మెలె, జో దేముడుచి రిసా జేవ్ జానుక జతిసి ఎత్కి జోవయించి పెట్టి జాన్తి. కీసి మెలె, జోయ్యి సొంత జోవయింక దెకవ అస్సె.

20 కీసి మెలె, జో నే డీస్తాసా కీసా అస్సె గే, మెలె జోవయింక ‘కెయెక తెయెక తాఁ గెతి సెక్తి అదికారుమ్ జోకయ్ అస్సె. జోయ్యి దేముడు’ మెలి రుజ్జు లోకుమ్ జెర్మయ్లి తెంతో, జో తెయార్ కెర్లిస్ ఎత్కితె సొస్టుమ్ డీస్తయ్, చి తెదొడి తెంతో మాన్సుల్ పూర్తి చిన అస్తి. జాకయ్, ప్రబుచి మొక్కె “నేనుమ్” మెనుక నెతిరి.

21 దస్సి, జోవయింక ‘జోయ్యి దేముడు’ మెన జేవ్ జాన్లె కి ఒప్పన్తి నాయ్, జోక గవురుమ్ దెకితి నాయ్, జో దిలిన్క ‘తుయి దిలది’ మెన ఒప్పన్తి నాయ్, జోక సర్ల సంగితి నాయ్, గని వెర్రి బుద్ది జల, చి బుద్ది నెంజిల జోవయించ పెట్టి అందర్ జా గెల.

22 ‘జాన్ల మాన్సుల్ ఆమ్’ మెననయి జేవ్ బుద్ది నెంజిలన జా గెల.

23 అన్నె, నే మొర్తో కెయెక తెయెక జీవ్ తతో దేముడుక ముల దా, మాములుమ్ మొర్త మాన్సుల్చి రూపుమ్చ, పిట్టల్ రూపుమ్చ, జంతువుల్ రూపుమ్చ, అయివో రూపుమ్చ బొమ్మల్క ఇస్టుమ్ జా, దనచకయ్ జోకరుక దెర్ల.

24 జాకయ్ దేముడు జోవయింక కిచ్చొ సిచ్చ దిలన్ మెలె, “జోవయించి పెట్టిచ ఆసల్ రితి ఇండ లంజె కమొతె పూర్తి గెచ్చ, ఎత్కిలోక ఎత్కిలో జోవయించ ఆగ్గెక నిస్కారుమ్ కెరన, జోవయింక జెవ్వి మరియాద కడన్తి సిచ్చ సేడ్డు, కతు” మెనయ్, దస్సితెయ్ జో జోవయింక సార్పు కెర దిలన్.

25 దేముడుచి రిసాచి సత్తిమ్ గ్యానుమ్ జేవ్ నెన కెర అబద్ధుమ్క ఇస్టుమ్ జల, చి జో ఎత్కి జెర్మయ్లిసిచి సేవ కెరుక ముల కెర, జో తెయార్ కెర్లిన్కయ్ జోకరుక దెర, దనచచి సేవ కెర్తతి. గని జెర్మయ్లిసొకయ్ కెయెక కి జెయ్యి! ఆమేన్.

26 జలె, ‘జెర్మయ్లిసొక ముల కెర తయార్ జలిన్కయ్ జేవ్ కోర్ప జలి రిసాయి, జోవయించి ఆగ్గెచి పాపుమ్చ ఆసల్క దెర్ను సేడయ్ తత్తు’ మెన, దసితె జో దేముడు సార్పు కెర దిలన్. దస్సి, మాములుమ్ తెర్నిమున్ను జతిన్ ముల దా, జోవయించ తేర్బోదల్ తెన్ లంజె జంక దెర్ల.

27 జోవయించ మున్నుబోదల్ కి దస్సి, తెర్ని తెన్ చెంగిల్ జతిసి ముల దా, ఎత్కిలోక ఎత్కిలో పూర్తి వెర్రి ఆస జా, ఎత్కిలో తెన్ ఎత్కిలో లంజె వెట్కారుమ్ జా, జోవయించ ఆగ్గెతె ఆత్మల్తె జోవయించి జా పాపుమ్ కెలచి, పాడ్ జల.

28 అన్నె, దేముడుక ‘అస్సె. జోయ్యి దేముడు’ మెన జేవ్ ఒప్పనుక నెన కెర జోక వచ్చిల్ రిసా, కామ్క నెంజిలి బుద్దితె, పొరపాట్ ఇండితిన్తె జోవయింక జో సార్పు కెర దిలన్.

29 జోవయించి పెట్టి కిచ్చొ బెర్లి మెలె, ఎత్కి రగల్ పాపుమ్బుద్ది, పాపుమ్ కమొ, అన్నె మాన్సుల్చి అస్తిక ఆస జతిసి. కుస్సిదుమ్ కి బెర్లి. జోవయించి పెట్టి బెర్లు గోనల్, అత్తల్ కెర్తి బుద్ది, కొడొ జుజవ జట్టి జతిసి, మోసిమ్ కెర్తిసి, కుస్సిదుమ్ ఉచర్తిసి, దన బుద్దుల్ జల. జేవ్ అన్నె కీసచక జల మెలె, సొండెల్ జలన,

30 మాన్సుల్క ఆరిచ నిందల్ సంగ, జోవయించి నావ్ పాడ్ కెర్తన, పరలోకుమ్చో దేముడుక విరోదుమ్ కెర్తన, అన్నె మాన్సుల్క నిస్కారుమ్ కెర్తన, గవురుమ్ ఉచరంతన, ‘అన్నె కిచ్చొ కిచ్చొ గర్లు కమొ కెరుమ’ మెన ఉచర్త కుట్టల్ కెర్తన, అయ్యెస్అబ్బొన్చి కోడు నే నూన్తన జల.

31 జేవ్ బుద్ది నెంజిలన, జేవ్ ఒప్పన్లి కామ్ నే కెర్తన, ప్రేమ నేన్లన, కన్కారుమ్ నేన్లన.

32 “దన కమొ కెర్తన, మొర్తి సిచ్చక విలువ జతతి” మెన దేముడు తీర్పు కెర అస్సె మెన జేవ్ జాన్లె కి, దన కమొ ఇండితతి. చి దన కమొ అన్నె మాన్సుల్ ఇండిలె, మెన్సితతి, ‘చెంగిల్’ మెంతతి.

2

దేముడుచి పున్నిమ్చి తీర్పు

1 జాకయ్, ఓ మాన్సు కొన్సొ జలెకి, తుమ్ ఎత్కిలోక ఎత్కిలో ‘గర్లు’ మెన తీర్పు సంగిలె, తుమ్చ సొంత పాపల్చి రిసా తుమ్క కి జా తీర్పు లయతయ్. మెలె, అన్నెక్లొక ‘గర్లొ’ మెన తీర్పు సంగిలె, తుమ్క తుమి పాపుమ్ వయడ్లను. తుమ్ తీర్పు సంగిలో మాన్సు కొన్సొ జలెకి, జో కెర్త తప్పుల్తె తుమ్ కి ఇండితను.

2 ఆవ్ అగ్గె రెగిడ్లి జాబిత తప్పు కమొ కో కెరుల గే, దేముడు జోవయింక తీర్పు కెర, సిచ్చ కెరుక ఒప్పన అస్సె

* 1:18 1:18 నిలువతె యేసు మాన్సుచి పాపుమ్ వయ గెచ్చయ్లిన్తె నయ్తానుక మొర్కుక జిన పాడ్ కెర అస్సె; ఎబ్రియల్ 2:14. నయ్తానుక జిన పాడ్ కెర్లిన్ తెన్ నయ్తాను చి సేవ కెర్తిసి ఎత్కిచి ఉప్పిరి కి యేసు జిన పాడ్ కెర అస్సె.

మెన జానుమ్. అన్నె, జో సత్తిమ్చొ జతయ్చి రిసా జో కెర్రి తీర్పు సరిగచి మెన జానుమ్.

3 ఓ మాన్సు కో జలెకి, దస కమొ కెర్తనక జోవయించి పాపుమ్చి తీర్పు తుమ్ సంగిలె, తూమ్ కి దస కమొ కెర్లె, దేముడు దెతి సిచ్చ తుమ్కయ్ పిట్టెదె మెన ఏక్ వేల ఉచరంతసు గే?

4 నెంజిలె, 'ఆమ్ కిచ్చొ కెర్లె కి జోచి ఎదివాట్ దయ ఆమ్చి ఉప్పిరి అస్సె, చి ఓర్పుప జా అమ్క చెమించుప కెరెదె' మెన తుమ్క తూమ్ ఉచరంతసు గే? తుమ్క 'జోవయించ పాపల్ ఒప్పున ముల్తు' మెనయ్ జో దేముడు జోచి దయ దెకయ్తయ్ మెన నేన్సు గే?

5 తుమ్చి రాడ్ జివుక తుమ్చ పాపల్ ములుక నెస కెర, జో దేముడు దెతి సిచ్చ తుమ్క తుమి ఆనన్తసు. జా సిచ్చ కెయ్చ లయెదె మెలె, ఎత్తిజిన్క తీర్పు కెర సిచ్చ గే, బవుమానుమ్ గే దెతి జోచి సత్తిమ్క రుజ్జు దెకయ్తి వెల్లి దీసికయ్.

6 జోవయించి జివితుమ్క కేన్ మాన్సు కీస కమొ కెర్లె తవుల గే, జయ్యి దీసిక దసచక సరిజతిసి తీర్పుల్ జో జర్గు కెరెదె.

7 జా దీసి నే జతె అగ్గెచి మదెనె సగుమ్జిన్ పరలోకుమ్చి ఉజిడతె బెదితి, ప్రబు గవురుమ్ జతిన్తె బెదితి ఆస జా, జో దెతి సత్తిమ్క నిదానుమ్ ఇండుల. "జేవ్ పరలోకుమ్తె అంచి తెన్ కెయ్చ తెయ్చ జితి జివ్, జో దెయెదె.

8 గని సగుమ్జిన్ జోవయించి ఇస్టుమ్ అయ్లి రితి ఇండుక ఆస జా, సత్తిమ్ ఇండితిసి ముల కెర, పాపుమ్ ఇండితతి. జోవయించి ఉప్పిరి, జో దేముడుచి కోపుమ్ తయెదె, చి జో దెతి సిచ్చ కచితుమ్ జోవయింక లయెదె.

9 దేముడు జా సిచ్చ జర్గు కెర్లె, ముక్కిమ్క తొలితో యూదుల్తె, పడ్డొ *గ్రిసు దేసిమ్చతె కి, పాపుమ్ ఇండితో ఎత్తి మాన్సుక బాదల్ దుకుమ్ పిట్టె నాయ్,

10 తొలితో యూదుల్తె, పడ్డొ గ్రిసు దేసిమ్చ మాన్సుల్తె కి, సత్తిమ్ ఇండితో ఎత్తి మాన్సుక 'బవుమానుమ్' మెన దేముడు జోవయింక జోచి పరలోకుమ్చి ఉజిడతె బెదవ గవురుమ్ దా, సేంతుమ్ దెయెదె."

11 దేముడు తేడల్ దెకె నాయ్.

12 అమ్ యూదుల్క జో దిల ఆగ్గుల్ నేన్తె యూదుల్ నెంజిలనతె కో పాపుమ్ కెర తవుల గే, జేవ్ ఆగ్గుల్ నెంతె తీర్పు జా నాసెనుమ్తె గెచ్చుల, అన్నె, అమ్ యూదుల్ జేవ్ ఆగ్గుల్ జానుమ్. జేవ్ ఆగ్గుల్ జాన్ల అమ్ యూదుల్తె కో పాపుమ్ కెర తవుల గే, ఆగ్గుల్చి తెడి అస్తిచి జేవ్ ఆగ్గుల్ జోవయించి ఉప్పిరి సాచి జవుల, చి జోవయించి పాపుమ్చి సిచ్చ జేవ్ వయుల.

13 మోసిచి అత్తి దేముడు దిల ఆగ్గుల్ ఎక్కి సూన్తనయ్ నాయ్, గని జేవ్ ఆగ్గుల్తె బెదితి బుద్ది ఇండితనయి కో

జలె, జోవయింకయ్ దేముడు జోవయించి పాపుమ్ నే వయడ్డె జోవయించి దయకయ్ 'జోవయింక దొర్కు జలి పున్సిమ్ అస్సె' మెన దెకెదె. దెక జోవయించి సిచ్చ పిట్టయెదె.

14 పడ్డొ, యూదుల్ నెంజిలన, మోసి తెన్ దేముడు దిలి ఆగ్గుల్ నెంతె తిలె కి, ఒత్తచ ఆగ్గుల్ జేవ్ నేన తిలె కి, నేన జాన్ల రిత జా జేవ్ ఆగ్గుల్ తెన్ బెదితి బుద్ది జేవ్ ఇండిలె, జేవ్ ఆగ్గుల్ జేవ్ కెయ్ నే సూన్లె కి సదు నే కెర్లె కి, జేవ్ ఆగ్గుల్ జోవయించి పెట్టి కామ్ కెర్రి రితి జతయ్.

15 దొర్కు జలి ఇండడి దెకయ్త ఆగ్గుల్ దేముడు కిసి మోసి తెన్ దిలి ఆగ్గుల్తె రెగ్గవ అస్సె గే, 'దస్సి ఇండుతు' మెన జేవ్ మాన్సుల్చి పెట్టి జో రెగ్గ అస్సె మెన రుజ్జు జతయ్, అన్నె, 'సత్తిమ్' మెన జేవ్ సత్తిమ్ చినితిన్తె, 'పాపుమ్' మెన జేవ్ పాపుమ్ చినితిన్తె కి రుజ్జు జతయ్. అన్నె, జోవయింక జెవ్వి పరిచ్చ కెరన నిందల్ వయడన్లి రితి, నెంజిలె చెమించుప కెరన్లి రితి, జోవయించ సొంత కమొ 'చెంగిల్' గే 'గార్' గే జెవ్వి చినన ఒప్పునుల.

16 అమ్ సూనయ్లి సుబుమ్ కబుర్తె కిచ్చొ ఏక్ బెదితయ్ మెలె, జేవ్ ఇసి తీర్పు కెరంతిసి కెయ్చ పూర్తి జర్గు జయెదె మెలె, క్రిస్తు జలో యేనుచి అత్తి దేముడు మాన్సుల్చి పెట్టిచ గుట్టుల్ తిలిసి ఎత్తి తీర్పు కెర్రి జా వెల్లి దీసికయ్, తెదొడకయ్ పూర్తి రుజ్జు జయెదె.

యూదుల్క మోసి తెన్ దేముడు దిలి ఆగ్గుల్

17 గని ఒత్తచ తుమ్ యూదుల్, 'యూదుల్ ఆము' మెనన, 'ఆగ్గుల్ రితి దేముడు అమ్కయ్ దా అస్సెచి రచ్చున జమ్దె' మెన ఆగ్గుల్కయ్ నంప కెర్తను జలె, 'అమ్ యూదులి దేముడు తెన్ బెద అస్సుమ్' మెన గవురుమ్ ఉచరంతసు జలె,

18 మోసి తెన్ దేముడు దిలి ఆగ్గుల్తె తిలిసి ఎత్తి వెల్లెల మాన్సుల్ తుమ్క సికడ అస్తిచి రిసా, దేముడుచి ఇస్టుమ్ కిచ్చొ కిచ్చొ జతయ్ గే తుమ్ జాన్సు. జలె, చెంగిల్ తిలిన్తె గార్ తిలిసి నిన చెంగిల్చి మెన్సితసు జలె,

19 పడ్డొ 'గుడ్డి జలనక వాట్ దెకయ్తన ఆము' మెన, 'అందర్బుద్దితె తిలనక ఉజిడి దెకయ్తన ఆము' మెన,

20 'బుద్ది నెంజిలనక సికడన ఆము' మెన, 'బాలబోదల్క సికడ్తొసా జలమ్ ఆము' మెన, 'గ్యానుమ్ ఎత్తి సత్తిమ్ ఎత్తి మోసి తెన్ దేముడు దిలి ఆగ్గుల్తె అమ్తెయి, అమ్చ ఆగ్గుల్తెయి అస్సెచి దేముడు జా పూచి ఎత్తి అమ్కయ్ తియార అస్సె' మెన తుమ్ నిజుమి ఉచర్లె,

21 వేర మాన్సుల్క తుమ్ సికడన తుమ్కయ్ తూమ్ కిచ్చొ సికడన్సు నాయ్! 'చోరుక నాయ్' మెన తుమ్ బోదన కెర్లె కి, చోర్పు నాయ్ గే?

* 2:9 2:9 'గ్రిసు దేసిమ్చ' మెన ఇన్నె సంగిలె, యూదుల్ నెంజిలనక సంగితయ్.

22 ‘లంజికమొ కెర నాయ్’ మెన సంగిలే కి లంజికమొ కెర్తసు గే? ‘బొమ్మల్క జోకరుక నాయ్, వెట్కారుమ్!’ మెన ఒప్పనై కి, గుడివొతెచ బొమ్మల్ తుమ్ చోర దెర గెతసు గే? తుమ్ ఉచర.

23 ‘దేముడు మోసేచి అత్తి అమ్ యూదుల్కయ్ జోచ ఆగ్గుల్ దా అస్సె’ మెన తుమ్ గవురుమ్ ఉచరనైకి, ఆగ్గుల్క నిదానుమ్ నే కెరై దేముడుచి మరియాద కడ ఇండితసు గే?

24 తుమ్ అమ్చ యూదుల్ కి దస పాపల్ కెర్తసు. దేముడుచి కొడొతె పూర్గుమ్ తెంతో రెగిడ్లి రితి, †“తుమ్ యూదుల్చ కమొచి రిసా, యూదుల్ నెంజిల మాన్సుల్ దేముడుచి నావ్ దూసుప కెర్తతి”.

25 దేముడు దిల ఆగ్గుల్ రితి పూర్తి తప్పు నెంతె ఇండిలెకయ్ తుమ్ యూదుల్ జోచయ్ మాన్సుల్ జతి గుర్తుచి సున్నతిక విలువ తయెదె. గని జో దిల ఆగ్గుల్ ఇండితిసి తుమ్ పిట్టవనై, జోచయ్ మాన్సుల్ జతి గుర్తు దెకయ్తి జా సున్నతి తుమ్ కెరన తిలె కి, నే కెరన్లి రితి జయెదె.

26 జలె, జోచి అఱి జా సున్నతి నే కెరన్లొ మాన్సు కో జలెకు దేముడుచ ఆగ్గుల్ తెన్ బెదితి బుద్ది ఇండ ఆగ్గుల్తె సంగిలి దొర్కు జలి సత్తిమ్ నెరవెర్పుప కెర్లి రితి జలె, జో జా సున్నతి నే కెరన్లైకి, ఆత్మకయ్ జో జా సున్నతి కెరన్లి రితి జా అస్సె మెన జో దేముడు దెకె నాయ్ గే? దెకెదె.

27 దస్సి జలె, యూదుల్ నెంజిల మాన్సుల్ జోవయించి అఱి జా సున్నతి నే కెరన్లైకి, జోవయింతె సగుమ్జిన్ దేముడుచ ఆగ్గుల్ తెన్ బెదితి బుద్ది ఇండితతి. అన్సె, తుమ్ యూదుల్క మోసే తెన్ జోచ ఆగ్గుల్ దా తిలె కి, తుమ్చితె సగుమ్జిన్ ఆగ్గుల్చి కొడు నే కెరై పిట్టయ్తసు. జలె, లోకుమ్చ ఎత్కిజిన్క ప్రబు పరిచ్చ కెర్తి వెల్లి దీసి అయ్లె, ఈంజ మదెనె ప్రబుచి బుద్ది ఇండిల జేవ్ యూదుల్ నెంజిలన తుమ్క నేరిమ్ వయడ్డ సాచుల్ జవుల. మెలె, జోవయింక తుమ్క ప్రబు తీర్పు కెర్లె, తుమి తీర్పు సేడ పాపుమ్ వయితె.

28 మెలె, యూదుడు జెర్మ ఎక్కి అఱి కెరన్లి గుర్తు తిలొసాక ‘నిజుమ్చొ యూదుడు’ మెనుక నెంజె. పడ్డొ ముక్కిమ్క కలుసుప జలి సున్నతి అఱి కెరంతిసి నెంజె.

29 దస్సి జలె “కో నిజుమ్చ యూదుల్ జవుల?” మెన పుసిలె, ఆత్మకయ్ సుద్ది జలొ ఎత్కి మాన్సు. సత్తిమ్ దెతి సున్నతి కిచ్చొ మెలె, రెగ్గయ్లి ఆగ్గుల్చి రిసా అఱి కెరంతిసి నెంజె, గని మాన్సుచి పెట్టి దేముడుచి సుద్ది తిలి ఆత్మ జర్గు కెర్తిసి. జోవయించి ఆత్మకె కో సుద్ది జా జోచయ్ మాన్సుల్ జా తవుల గే, జెచ్చి నిజుమ్చ యూదుల్ జవుల. జోచయ్ జల మాన్సుల్క కిచ్చొ ముక్కిమ్ మెలె, మాన్సుల్ దెతి గవురుమ్ నాయ్, గని దేముడు దెతి గవురుమ్.

3

దేముడుచి సత్తిమ్ గెచ్చె నాయ్

1 జలె, వేర మాన్సుల్క చి కంట అమ్ యూదుల్క కిచ్చొ జిన్లి వరుమ్ అస్సె గే? నెంజిలె, అమ్ యూదుల్ జలి చినన్తి సున్నతి కెరంతిన్తె కిచ్చొ లాబుమ్, కిచ్చొ విలువ అస్సె గే?

2 అమ్ యూదుల్క లాబుమి, దేముడు తొలి సంగిల ప్రమానల్ దేముడుచ కొడొ అమ్ యూదుల్చి అత్తి జో సార్పు కెర దా అస్సె, జాక అమ్ చెంగిల్ దెకుక మెన, ఒత్త తిలిన్క అమ్ సాచి సూనవుక మెన.

3 దస్సి జలె, అమ్ యూదుల్తె సగుమ్జిన్ నముకుమ్ నెంజిలె కిచ్చొ జయెదె? జేవ్ నముకుమ్ నెంజిలిన్చి రిసా జోవయించొ అమ్చొ దేముడుక ‘నిదానుమ్చొ నెంజె’ మెనుక జయెదె గే?

4 ఎత్కి మాన్సు అబద్దుమ్ జలెకి, దేముడు సత్తిమ్ తయెదె. దేముడుచి కొడొతె పూర్గుమ్ జోవయించి రిసా జొయ్యి రెగ్గయ్లి రితి;

*“తుచ కొడొ నెరవెర్పుప జతిన్తె తుచి సత్తిమ్ రుజ్జు జయెదె, చి మాన్సుల్ తుక పరిచ్చ కెర్లె తుయి జిన్తె”.

5 గని అమ్ యూదుల్చి పాపుమ్చి రిసా అమ్ వెట్కారుమ్ నిస్కారుమ్ జా అస్సుమ్. జో దేముడుచి సత్తిమ్, మాత్తుమ్, జోక గవురుమ్ ఆన్తయ్. జలె, అమ్చి పాపుమ్క దెకిలె, జోచి సత్తిమ్క దెకిలె, జా తేడ డిస్సిన్తె జోకయ్ గవురుమ్ జెతయ్ జలె, అమ్ కిచ్చొ ఉచరుక? ‘అమ్ పాపుమ్ కెర్లిన్ చి జో సత్తిమ్ కెర్లిన్చి తేడ దెకిలె జోచి గవురుమ్ డిస్టయ్చి రిసా అమ్చి పాపుమ్తె జోకయ్ లాబుమ్’ మెన, జవున్, ‘అమ్చి పాపుమ్చి రిసా జో అమ్క సిచ్చ కెరుక బెదె నాయ్’ మెన అమ్ ఉచరుక గే? మాన్సుల్చి పాపుమ్ బుద్దికయ్ మాన్సు ఇసి ఉచరుక జయెదె.

6 దస్సి ఉచరుక నాయ్. ‘ఒండి లోకుమ్చ మాన్సుల్క ఆకర్క పరిచ్చ కెర తీర్పు కెర సిచ్చల్ దెయిందె, బవుమానల్ దెయిందె’ మెన జో ఒప్పున అస్సె. జలె, అమ్ యూదుల్చి పాపుమ్క ‘కిచ్చొ నెంజె’ మెలి రితి జో దెకితో జలె, ఒండి లోకుమ్చ మాన్సుల్క కో కిసి సత్తిమ్చి తీర్పు కెరుక జయెదె! బెదె నాయ్.

7 ‘దస్సి మెను నాయ్’ మెంతె. ‘అంచి అబద్దుమ్చి రిసా దేముడుచి సత్తిమ్ సొస్టుమ్ డీస జోచి గవురుమ్ దెకయ్తయ్ జలె, అంచి పాపుమ్చి సిచ్చ ఆవ్ కిచ్చొక వయుక?’ మెంతె, ఓ మాన్సు.

8 ‘చెంగిల్చి జర్గు జవున్ మెనయ్ పాపుమ్ కెరుమ్’ మెంతె సగుమ్జిన్. అమ్క “జేవ్ కి దస్సి సంగితతి” మెన, అమ్చి మరియాద కడన్తి రితి సగుమ్ జిని అమ్క నింద సంగితతి మెన తుమ్ జాన్సు. జలె, జేవ్ దస్సి సంగితన

† 2:24 2:24 యెసయా పుస్తకమ్ 52:5, యెహెజ్కేలు 36:22. * 3:4 3:4 కీర్తనలు 51:4

జోవయించి జా పాపుమ్చి సిచ్చ కి కతి రితి దేముడు లయడెదె. జోచి తీర్పు సరిగా అస్సె.

లోకుమ్ ఎత్తిచ మాన్యుల్ పాపుమ్ కెర్లస

9 జలె, కిచ్చొ ఉచరుక జయెదె? వేర మాన్యుల్చి కంట అమ్ యూదుల్క దేముడుచి సిచ్చ పిట్టయ్తసి కిచ్చొ జలెకు తయెదె గే? నాయ్, గెద! ఆవ్ జేవ్చి కంట గొప్ప సుదల్ గే, నెంజుమ్ గెద, ఆవ్ ఉప్పిరి రుజ్జు రెగ్గ దెకయ్లి రితి, ఎత్తి మాన్యు. యూదుల్ జలెకి, గ్రీసు దేసిమ్చ జలెకి, కో జలెకి, పాపుమ్క దెర్ను సేడ పాపుమ్ సుదల్ జా అస్సుమ్

10 దేముడుచి కొడెతె పూర్ణమ్ రెగ్గవ తిలి రితి, †“సత్తిమ్చొ మాన్యు కేనె కి నాయ్. ఎక్కిలో కి నాయ్.

11 కోయి బుద్ది తతోసా నాయ్, జీవ్ తిలో దేముడుక చజితోసా కోయి నాయ్.

12 ఎత్తి మాన్యు సత్తిమ్ ముల, కామ్క నెంజితిన్తె సేడ గెచ్చు అస్తి. కోయి సత్తిమ్ కెర్తి నాయ్, ఎక్కిలో కి నాయ్.”

13 †“జోవయించి డొంగొ ఉగిడ్ల మెస్సున్, జోవయించ కొడె గని. మోసిమ్ కెర్తి రిసాయి జీబు చోండి బులయ్ తతి. అయివొచి విస్సుమ్ జోవయించ ఒట్టోతెయి అస్సె.”

14 †“జోవయించి చోండి బెర్తు సాపెనల్ మూర్కుమ్ విస్సుమ్ అస్సె.

15 *జోవయించ చట్టో లోయి దెకుక మెన బే బేగి నిగుల.

16 నాసెనుమ్ కస్టుమ్ జోవయించి ఇండితి వట్టె అస్సె.

17 సేంతుమ్ వాట్ ఇండుక ఎద్దరె నేన్తి.

18 †దేముడుక ఎదిలి కి బితి నాయ్.”

19 మోసే తెన్ దేముడు దిలి ఆగ్గుల్తె కిచ్చొ కోడు తిలె కి, కక్క సంగితయ్ మెలె, జా ఆగ్గుల్చి రితి తెడిచ మాన్యుల్కయ్. కిచ్చొక మెలె, జోవయింతె కోయి దేముడుక జబాబ్ దెంక నెతిర్తి రితి ఎత్తి చోండి ముద్దో జంక, చి యూదుల్ కి నే పిట్టె, ఒండి లోకుమ్చ ఎత్తి మాన్యు దేముడుచి సిచ్చక జలిలెక జవుల, దేముడుచి పరిచ్చ జోవయించి తీర్పు జంక.

20 మెలె, దేముడు మోసే తెన్ దిలి ఆగ్గుల్చి రితి ఇండితి వాటు దేముడుచి మొక్కె ఈంజ లోకుమ్చొ కేన్ మాన్యుచి పాపుమ్ పుంచె నాయ్, చి ఆగ్గుల్ రితి మాన్యుల్క తీర్పు కెర్లె, జో కక్కయ్ ‘పున్నిమ్చొ’ మెనుక బెదె నాయ్. ఆగ్గుల్ అమ్చి పాపుమ్ పుంచితె నాయ్. అమ్చి పాపుమ్ దెకయ్తతి. జేవ్ ఆగ్గుల్తె తిలిన్చి రిసా అమ్చి పాపుమ్ చినితసుమ్.

యేసుక్రీస్తుక సంపజలె పున్నిమ్

21 ఆగ్గుల్తె నాయ్. గని వేరతెయ్ దేముడు జోవయించి పున్నిమ్ మాన్యుల్క దొర్కు కెర అస్సె. జాకయ్ †మోసే పూర్ణమ్చొచి అత్తి దేముడు రెగ్గయ్ల ఆగ్గుల్, అన్నె పూర్ణుల్చి అత్తి సంగిల దేముడుచ కబుర్లు కి అగ్గె తెంతో జా రుజ్జు డీస్తయ్. జలె, జా పున్నిమ్ ఆగ్గుల్ రితి నాయ్, గని వేరతెయ్ దొర్కు జలిసి అప్పాయి మాన్యుల్క జానయ్ జా అస్సె.

22 జా పున్నిమ్ యేసుక్రీస్తుచి ఉప్పిరి కో జోచి నముకుమ్ తివుల గే, జేవ్ ఎత్తిజిన్కయ్ ‘పున్నిమ్’ మెలి రితి దేముడు దెకెదె, జేవ్ కొన్న జలెకి జోచి పున్నిమ్తె జోవయింక వాట దెయెదె.

మాన్యుల్తె జో తేడల్ దెకె నాయ్.

23 మెలె, కో కి పాపుమ్ కెర దేముడు దెకయ్లి సత్తిమ్ ఇండుక నెత్త కెర, జోచి మొక్కె ఒడువ జా అస్తి.

24 జాకయ్, జో కిచ్చొ వాటు మాన్యుల్చి పాపుమ్ పుంచ అస్సె మెలె, జోచి దయకయ్ ఆరి అమ్క నీతిసుదల్ కెర అస్సె. కిసి మెలె, క్రీస్తు జలో యేసు అమ్చి పాపుమ్ వయిలిన్క జో దేముడు అమ్క సయ్తాన్చి రాజిమ్ తెంతో నెత్తవ గెల అస్సె.

25 అమ్ కెర్ల పాపల్క అమ్ జెతికయ్ సిచ్చ పిట్టయ్తి బలి జో జంక జోచి లోయి సూచుక మెన దేముడు అబ్బొసి జోవయింక టీవడ్లన్. జా రచ్చన వరుమ్ అమ్ మాన్యుల్క కి, క్రీస్తుచి ఉప్పిరి అమ్ అమ్చి నముకుమ్ తింక. జో అబ్బొసి జా బలి దిలిసి ఏక్ రుజ్జు దెకయ్తయ్. పాపుమ్క ‘పాపుమీ. జా పాపుమ్ గెలెకయ్ మాన్యుల్క అంచి తెన్ అన్నె బెదవనుక జయెదె’ మెన జో సత్తిమ్చి తీర్పు కెర్లిన్చి రుజ్జు దెకయ్తయ్. కిచ్చొక మెలె, జోచి పరలోకుమ్చి కన్కారుమ్ బుద్దిక అమ్చ అగ్గెచ పాపల్ సిచ్చ కెరుక వాయిద కెర తిలన్.

26 జో సత్తిమ్చ తీర్పుల్ కెర్తొసా జలిన్చి జా రుజ్జు ఈంజయి కాలుమ్క దెకవుక మెనయ్ వాయిద కెర్లన్. అన్నె కిచ్చొక మెలె, ‘కో యేసుకయ్ సంపజవుల గే, జోవయించి పాపుమ్ పుంచి జయెదె, జోవయింకయి పున్నిమ్ దెకిన్దె’ మెనయ్ రుజ్జు దెకయ్తి రిసాయి వాయిద కెర్లన్.

27 జాకయ్, ‘అమ్ యూదుల్కయ్ దేముడు మోసే తెన్ దిలి ఆగ్గుల్తె పున్నిమ్’ మెన అమ్ కిసి గవురుమ్ ఆననుక జయెదె! నెంజె. కిచ్చొచి రిసా, దేముడు మోసే తెన్ దిలి ఆగ్గుల్చి రితి అమ్ మాన్యుల్ కెర్ల కమొ కామ్క నెంజిలిన్చి రిసా నాయ్, కామ్క అయ్లి రిసా నాయ్, గని నముకుమ్ వాటు అమ్క రచ్చన దొర్కు జతయ్.

† 3:10 3:10 10-12 కీర్తనలు 14:2, 3 చి 53:3. † 3:13 3:13 కీర్తనలు 5:10, చి 139:4. § 3:14 3:14 కీర్తనలు 10:7. * 3:15 3:15 15-17: యెనయా 59:7-8. † 3:18 3:18 కీర్తనలు 36:2. † 3:21 3:21 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పావ్ వస్త్రకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్ణమ్చొచి అత్తి రెగిడ్లి దేముడుచ ఆగ్గుల్ మెన రగ్గవ అస్సె.

28 నిజమి, కిచ్చొ ఒప్పునతనుమ్ మెలె, కేన్ ఆగ్గుల్ రితి ఇండితిన్తె పున్నిమ్ నాయ్, జా నేన్సిన్చి రిసాయి కో నాసెనుమ్తె గెతి నాయ్, గని, ప్రబుచి ఉప్పిరి నముకుమ్ తిలెకయ్ మాన్సుచి పాపుమ్ పుంచి జయెదె, చి దేముడు జో మాన్సుక పున్నిమ్ మెలి రితి దెకెదె మెన ఒప్పునతనుమ్. జా రచ్చున రితి నముకుమ్ వాటు దొర్కు జతిసి.

29 నెంజిలె, దేముడు ఎక్కి యూదుల్కయ్ దేముడు జయెదె మెంతె గే? యూదుల్ నెంజిలనక కి జో దేముడు జయె నాయ్ గే? నిజమి, యూదుల్ నెంజిలనక కి జోయ్యి దేముడు.

30 కిచ్చొక మెలె, ఎత్కిక జో దేముడు, జో ఎక్కిలో. ఎక్కిలోతె ఏక్ రగుమ్ అన్నెక్లోతె అన్నెక్ రగుమ్ జతోసా నెంజెచి రిసా వేర వేర రచ్చున కెరె నాయ్, గని యూదుల్ జతి గుర్తుచి సున్నతి కెరన్లనక క్రిస్తుక నంపజా గెలె, జేవ్ నంపజలి రిసాయి జోవయించి పాపుమ్ జో పుంచెదె చి జోవయింక 'పున్నిమ్' మెలి రితి దెకెదె. అన్నె, జా సున్నతి నే కెరన్లన జోవయింక నంపజా గెలె, జోవయించి నముకుమ్చి రిసాయి జోవయించి పాపుమ్ కి, జో పుంచ జోక కి 'పున్నిమ్' మెలి రితి దెకెదె.

31 దస్సి జలె, ఎక్కి జోచి ఉప్పిర్చి అమ్చి నముకుమ్చి రిసాయి అమ్క 'పున్నిమ్ జల' మెలి రితి జో దెకెదె మెలె, జో దిల ఆగ్గుల్ అమ్ వెంట గెలుక గే? నెంజె. అమ్చి నముకుమ్చి రిసాయి జో దిల ఆగ్గుల్ తెన్ బెదితి సత్తిమ్ అమ్ ఇండుకయ్. దస్సి, జేవ్ ఆగ్గుల్తె తిలిసి నెరవెర్చువ కెరుమ్దే.

4

నముకుమ్ వాట్, దేముడుచి దయ వాటు రచ్చున

1 జలె, అమ్ యూదుల్చొ పూర్గుమ్చొ అబ్రాహామ్చి రిసా కిచ్చొ మెనుమ? ఆగ్గే రగుమ్చి అమ్చి జెర్కున్చి రిసా ఉచర్లె, అమ్ యూదుల్చి సెకుమ్క జో అబ్బొ జయెదె.

2 జలె, ఏక్ వేల జోచ కమొచి రిసాయి అబ్రాహామ్క పున్నిమ్ కలుగు జతి జలె, జో అబ్రాహామ్ గవురుమ్ ఉచరనుక జతి, గని జోవయించ కమొచి రిసాయి జోవయింక పున్నిమ్ మెన మాన్సుల్ ఉచర్లె కి, దేముడు దస్సి దెకె నాయ్.

3 * "అబ్రాహామ్ దేముడు సంగిలి కోడు నంప కెర్లి రిసాయి 'జోక పున్నిమ్' మెలి రితి జో ప్రబు దెకిలో" మెన దేముడుచ కొణొతె రెగ్గ అస్సె.

4 జలె, కో జలెకు కామ్ కెర్లె 'కామ్ కెర్లె' మెన దెతి కూలి దానుమ్ నెంజె, జా, చి అబ్రాహామ్ "నంప కెర్లి రిసాయి 'జోక పున్నిమ్' మెలి రితి ప్రబు దెకిలో" మెన దేముడుచి కోడు తెన్ రెగ్గవ అస్సె.

5 దస్సి, అబ్రాహామ్ తెన్ కిసి జర్గు జలి గే, అన్నె మాన్సుల్ తెన్ కి దస్సి జయెదె. మెలె, కిచ్చొ కామ్క జెతికయ్ కామ్ జేవ్ నే కెర్లె కి, కిచ్చొ కామ్ కి కామ్క నెంజిలె కి, పాపుమ్ కెర్లనక జోచి దయకయ్, జోవయించి పాపుమ్ పుంచితో దేముడుకయ్ కో నంప కెర్లె, జోవయించి నముకుమ్చి రిసాయి 'అంచి పున్నిమ్ జోవయింక దా అస్సి' మెలి రితి జో పాపుమ్ పుంచితో దేముడు దెకెదె.

6 దస్సి, "జోవయించ కమొచి రిసా నాయ్, గని జోచి దయచి రిసా దేముడు కక్క కక్క 'జోవయింక పున్నిమ్' మెలి రితి దెకెదె గే, జోవయింకయ్ చెంగిలి" మెన దావీదు పూర్గుమ్చొ ఏక్ కోడు రెగ్గ అస్సె.

7 † "కిచ్చొ తప్పుల్ చెమించువ జా అస్తి గే, కచ పాపల్ పుంచి జా అస్తి గే,

జోవయింకయ్ చెంగిలి.

8 కేన్ మాన్సుచి పాపుమ్ ప్రబు జోవయింక వయడె నాయ్ గే, జోకయ్ చెంగిలి" మెన రెగ్గ అస్సె.

9 జలె, ఈంజ చెంగిల్ వరుమ్ కక్క దొర్కు జతయ్? ఎక్కి యూదుల్ జతి గుర్తుచి సున్నతి కెరన్లనకయ్ దొర్కు జతయ్ గే జా సున్నతి నే కెరన్లనక కి దొర్కు జతయ్ గే? అబ్రాహామ్ నంపజలిన్కయ్ 'జోక పున్నిమ్' మెలి రితి ప్రబు జోచి దయక దెకిలన్ మెంతసుమ్.

10 జలె, ప్రబు జోక 'జోవయింక పున్నిమ్' మెలి రితి దెకిలిసి కెయ తెంతో? జా సున్నతి జో నే కెరంతె అగ్గె తెంతో గేర కెరన్లి పడ్డె గే? పడ్డె తెంతో నాయ్. అగ్గెయ్ తెంతో.

11 జా సున్నతి నే కెరంతె అగ్గె తెంతో జో నంపజలిన్చి రుజ్జు దెకయ్తి గుర్తుకయ్ పడ్డె జో జా సున్నతి కెరన్లె. దస్సి, జా సున్నతి నే కెరంతె కో నంపజా ప్రబు ఆరి దెతి పున్నిమ్ జా తవుల గే, జోవయింకయ్ అబ్రాహామ్ అబ్బొసి జయెదె. దస్సికయ్, జా సున్నతి నే కెరంతె అగ్గె కి ప్రబు 'జోవయింక పున్నిమ్' మెలి రితి అబ్రాహామ్క దెకిలో.

12 అన్నె, దస్సి కి, కో జా సున్నతి కెరన తిలె కి, జా సున్నతి నే కెరంతె అగ్గె తెంతో దేముడుచి కోడు నంప కెర్లె అబ్రాహామ్చి రితి జవుల గే, మెలె, జోచి రితి నంపజవుల గే, జోవయింకయ్ కి అబ్రాహామ్ అబ్బొసి జయెదె.

13 దస్సి, "ఈంజ లోకుమ్ ఏలువ కెర్లి వాట తుమ్క దొర్కు కెరిందె" మెన అబ్రాహామ్క చి 'జోచి సెకుమ్తె పడ్డె జెర్కుక తిలనక' మెలి కోడు, దేముడు సంగిలి ప్రమానుమ్ కేన్ వాట్ అయ్లి మెలె, ఆగ్గుల్ రితి వాట్ నాయ్, గని జో దేముడుచి కోడు జో నంపయ్ కెర్లన్చి రిసా 'జోవయింక పున్నిమ్' మెలి రితి జో దెకిలన్.

14 ఏక్ వేల దేముడు మోసి తెన్ దిలి ఆగ్గుల్ రితి కెర్లన, జేవ్ జా ఆగ్గుల్ రితి కెర్లి రిసాయి అబ్రాహామ్చ పుత్తర్లు జా

* 4:3 4:3 ఆదికాండుమ్ 15:6. † 4:7 4:7 కీర్తనలు 32:1-2.

ఏలుప కెరుక తత్తి జలె, దేముడు సంగిలి ప్రమానుమ్ కామ్క నెంజిలి, జా ప్రమానుమ్చి ఉప్పిర్చి నముకుమ్ కామ్క నెంజిలి.

15 అమ్ ఆగ్గుల్ తిలసచి ఉప్పిర్చి తీర్పు కిచ్చొ మెలె, 'పున్నిమ్ జా అస్తి' మెన కచి రిసా ఆగ్గుల్ సాచి జతి నాయ్. ఆగ్గుల్ తిలె, అమ్చ కమొక 'పాపుమ్చయ్' మెన రుజ్జు దెకవయ్ అమ్చి పాపుమ్చి రిసాచి సిచ్చ ఆన్తతి. అన్నెక్ కిచ్చొ మెలె, ఆగ్గుల్ నెంజిలిన్తె, ఆగ్గుల్ నేన్లసతె కో పాపుమ్ కెర అస్తి గే, నెంజిలె ఏక్ వేల పున్నిమ్ కెరుక జతి జలె 'పున్నిమ్ కెర అస్తి' గే ఆగ్గుల్ వాట్ రుజ్జు కెరుక నెంజె.

16 జేవ్ దొన్ని అల్లర్చి రిసా మాన్సుచి రచ్చనక దేముడు కిచ్చొ దిలో మెలె, జొయ్యి ఆదారుమ్ కెర్లిసి కిచ్చొ మెలె, కమొ నెంజె, గని రితి నముకుమ్ తెన్. కిచ్చొక మెలె, కమొ నాయ్, గని నముకుమ్ ఆదారుమ్ జలె, జా ప్రమానుమ్ జెయిమ్ జతిన్క దేముడుచి దయయ్ సాలు, అన్నె, జా ప్రమానుమ్ జోచి దయచి రిసా జెయిమ్ జయెదె జలె, అబ్రాహామ్చ పుత్తర్లు జలస ఎత్తిజిన్కయ్ జా ప్రమానుమ్ జెయిమ్ జయెదె. అబ్రాహామ్చ పుత్తర్లు యూదులి, అమ్చి దేముడు మోసే తెన్ దిలి ఆగ్గుల్ అమ్చ తిలసయ్ గని అన్నె కోయి నాయ్ మెన నాయ్, పడ్డొ 'అమ్ యూదుల్ ఎత్తిజిన్' మెన నాయ్. గని అబ్రాహామ్చి రితి దేముడుచి †కోడు నంప కెర్లన ఎత్తిజిని, జేవ్ యూదుల్ జలెకి నెంజిలె కి జోచ పుత్తర్లు జవుల. జోచి రితి నముకుమ్ తిల ఎత్తిజిన్క జో అబ్రాహామ్ అబ్బొ జయెదె.

17 దేముడుచ కొడొతె రెగ్డయ్లి రితి,

§ "ఒగ్గర్ దేసిమ్లుచ సెకుమ్లుచ మాన్సుల్క తూయి అబ్బొసి జతి రితి ఆవ్ సంగ అస్సి."

మెన అబ్రాహామ్క జో సంగిలన్. దస్సి, మొర్లనక జియడ్డొ, అగ్గె నెంజిలిన్క తిలిసి రిత బుకార్టొ దేముడుక అబ్రాహామ్ నంప కెర్లొ, దేముడుచి మొక్కె అమ్ జో దేముడుచి కోడు నంప కెర్లన ఎత్తిజిన్క అబ్రాహామ్ అబ్బొ జా అస్సి.

18 ఒగ్గర్ దేసిమ్లుచ సెకుమ్లుచక జో అబ్బొ జతిసి జెయిమ్ జతిసి జో అబ్రాహామ్క రుజ్జు నే డీసిలెకి, జో జా ఆస తెన్ తిలన్, అన్నె,

* "అగాసుమ్చ సుక్కల్ కిసి ఎత్తివాట్ అస్తి గే,

దస్సి తుమ్చి సెకుమ్తె పడ్డొ జెర్మితన ఎతివాట్జిన్ జవుల"

మెన జో దేముడు ప్రమానుమ్ సంగిలిసి జో నంప కెర్లన్.

‡ 4:16 4:16 'అబ్రాహామ్క ఎత్తి ఆదికారుమ్ తిలో దేముడు సంగిలి కోడు' మెలె, జోవయింది సెకుమ్తె పడ్డొ జెర్మితన పడ్డొక ఏలుప కెర్లిన్చి రిసాచి కోడు. జేవ్ పడ్డొ ఏలుప కెర్లిన్క యేసుక్రీస్తు ముక్కిమ్చొ జయెదె, చి జోవయింతెన్ ఏలుప కెరుల. పడ్డొ జో ఎత్తి ఆదికారుమ్ తిలో దేముడుచ కొడొ ఎత్తి, నంప కెరుక ముక్కిమ్, గని ముక్కిమ్క 'జోవయించి కోడు' మెలె, యేసుయి; యోహాను 1:1-2, 14; చి యేసుచి రిసాచి సుబుమ్ కబుర్, జోవయించి రిసా దేముడు మోసే తెన్ దిలి ఆగ్గుల్ సంగిలిసి ఎత్తి. § 4:17 4:17 ఆదికాండుమ్ 17:5. * 4:18 4:18 ఆదికాండుమ్ 15:5. † 4:25 4:25 చి ఒత్త తెంతో అమ్క జో 'పున్నిమ్' మెలి రితి దెకిలిసి.

19 ఆగ్గుక జో మంత్రొ జా పుంజెక్ వెర్పుల్ జా తా మొర్లి వయసు జా తిలె కి, తేర్పి జలి సారా గొడ్డు జా తిలె కి, జో అన్మానుమ్ జయె నాయ్.

20 కేన్ సుట్టు జా ప్రమానుమ్చి ఉప్పిరి అన్మానుమ్ జయె నాయ్, గని దేముడుక 'జా జెయిమ్ కెరెదె' మెన నముకుమ్ తా జోక గవురుమ్ దెతె తిలన్, చి జోచి నముకుమ్ అన్నె డిట్టుమ్ జలి.

21 'జో సంగిలి రితి దేముడు కెరుక తెరె' మెన పూర్తి నముకుమ్ తెన్ తిలో.

22 జాకయ్, 'జోచి నముకుమ్, జోక పున్నిమ్ జలి రితి జతయ్' మెన దేముడు తీర్పు కెర్లొ.

23 గని 'జోచి నముకుమ్, జోక పున్నిమ్ జలి రితి జతయ్' మెలి కోడు ఎక్కి జోచి రిసా నాయ్,

24 గని అమ్చి రిసా కి. అమ్చొ ప్రబు జలో యేసుక అన్నె జియడ్డొ దేముడు అబ్బొన్చి ప్రమానుమ్ అమ్ నంప కెర్లె, అన్నె మాన్సుల్క కి 'జోచి నముకుమ్ జోక పున్నిమ్ మెలి రితి జతయ్' మెంతి తీర్పు జోచి దయక కెరెదె.

25 అమ్చయ్ పాపల్ వయితి రిసా ప్రబు జలో యేసు అమ్క జెతి సిచ్చ సేడ్లన్. జా సిచ్చ అమ్క లయితిసి పిట్టవుక మెన. అన్నె, అమ్చి పాపుమ్ దస్సి †పుంచి జలిసి రుజ్జు జవున్ మెనయ్ దేముడు అబ్బొసి జోక అన్నె జియడ్లన్.

5

యేసుక్రీస్తుచి అత్తి అమ్క సేంతుమ్ జలిసి

1 జలె, నముకుమ్ వాట్ అమ్చి పాపుమ్ పుంచి జా అస్సి. అమ్చొ ప్రబు జలో యేసు అమ్చి పాపుమ్ పుంచిలి బలి జలి రిసా దేముడు తెన్ అమ్క సేంతుమ్ జలి.

2 దేముడుచి దయచి రిసా నముకుమ్ తెన్, జో అమ్క రచ్చన దొర్కు కెర అస్సి. ఈంజ రచ్చన అమ్క కేన్ వాట్ దొర్కు జా అస్సి మెలె, జో యేసుప్రబు అమ్చి పాపుమ్ పుంచితి బలి జలి వాటు, అన్నె జా రచ్చన అమ్క దొర్కు జలి తెంతో, దేముడుచి పరలోకుమ్చి ఉజిడతె అమ్ బెదుమ్దె మెలి ఆస అమ్క దొర్కు జా అస్సి, చి అమ్క ఒగ్గర్ సర్లసంతోసుమ్ జతసుమ్.

3 అన్నె కిచ్చొ మెలె, సుబుమ్ కబుర్ నూనయ్తి ప్రబు అమ్క దిలి కామ్చి రిసా, అమ్ బాదల్ సేడ్డిన్చి రిసా కి అమ్క సర్లసంతోసుమ్. బాదల్ సేడ్డె ఓర్పుప జా, నిదానుమ్ సిక్కుక జయెదె.

4 జేవ్ బాదల్ సేడ్డిసి అమ్క ఏక్ పరిచ్చ కెర్లి రితి జయెదె, చి అమ్ ఓర్పుప జా నిదానుమ్ సికిలె అమ్క "పరిచ్చతె

జీన్ల” మెన దేముడు జోచి సర్ల దెకవ అమ్చి పెట్టి అమ్క అన్నె ఆన దెయెదె, అమ్క అన్నె దిట్టుమ్ కెరెదె, చి

5 జా ఆనచి రిసా అమ్ సంపజలిసి జెయిమ్ జయెదె, లాజు జము నాయ్. దేముడు అమ్క దిలి దేముడుచి సుద్ది తిలి ఆత్మ తెన్ జోచి ప్రేమ అమ్చి పెట్టి సువ బెరవయ్ దా అస్సె. జయి అమ్క రుజ్జు.

6 అమ్క కిచ్చొ సెక్తి నెంజలి పొది, ‘చెంగిల్ సమయుమ్’ మెన అమ్ పాపుమ్ సుదల్క సయ్తాన్చి రాజిమ్ తెంతో రచ్చించుప కెర్తి రిసాయి క్రీస్తు మొర అమ్చి రిసాచి అర్పితుమ్ జలన్.

7 జలె, పున్నిమ్ డీస్తా కేన్ జవున్ మాన్సుక కిచ్చొ జవున్ బాద తెంతో రచ్చించుప కెరుక మెన కో మాన్సుల్ సొంత జీవు దెవుల గే? దెతి నాయ్. కేన్ గే ఏక్ సుట్టు కో జవున్ చెంగిలో మాన్సుక రచ్చించుప కెరుక మెన కో జలెకు మాన్సు దయిర్వమ్ జా మొరెదె.

8 గని, దేముడుచి ప్రేమ అమ్క కిసి రుజ్జు జతయ్ మెలె, అమ్ పాపుమ్ కెర్లస జా తతికయ్, అమ్క రచ్చించుప కెర్తి రిసా క్రీస్తు జోచి జీవు దిలన్.

9 జలె, దొర్కు జలి అర్పితుమ్ జో దిలిన్చి లోయిచి రిసా అమ్చి పాపుమ్ అప్పె పుంచి జా అస్సెచి రిసా, అన్నె, దేముడు అమ్క దెంక తిలి సిచ్చ అమ్క నే లయితి రితి, జో యేసుయి పిట్టవ అస్సె. జా సిచ్చ అమ్ సేడుక నాయ్.

10 మెలె, దేముడుక అమ్ విరోదుమ్ సుదల్ జా తిలి పొది, అమ్చి పాపుమ్ గెచ్చయ్తి రిసా జోచొ పుత్తుసి మొర్లిసి, అమ్క జోతె అన్నె బెదవ దిలన్. కెయ్ మెలె, జోక అమ్ విరోదుమ్ జా తిలి పొది. జలె, అన్నె, అమ్ అప్పె జో తెన్ అన్నె బెదయ్ అస్సుమ్ జలె, జో అన్నె జివ్ జా, జివ్ తతిన్చి రిసా నాసెనుమ్తె నే గెతె, పరలోకుమ్తె జోతె గెతి రచ్చన కచితుమ్ జమదె.

11 జో, పడ్డె అన్నె కిచ్చొ మెలె, అమ్చొ ప్రబు జలో యేసుక్రీస్తు జర్గు కెర్లిన్చి రిసా దేముడు అమ్క అన్నె బెదవన్లి రిసా, జో దేముడుచి తెడి అమ్ అప్పె అస్సుమ్చి రిసా, జోచి ఉప్పిరి అమ్క సర్లసంతోసుమ్ జతసుమ్.

ఆదామ్ తెంతో మొర్ను యేసు తెంతో జీవుమ్

12 ఎక్కిలో మాన్సు, తొలితొచొ మాన్సు జలో ఆదాము, పాపుమ్తె సేడ్లిన్ తెన్ ఒండి లోకుమ్తె పాపుమ్ అయ్లి, అన్నె పాపుమ్చి రిసా మొర్ను అయ్లి. జాకయ్ ఒత్త తెంతో ఎత్తి మాన్సు పాపుమ్ కెర అస్తి, కెర్తతి, చి ఎత్తిజిన్క మొర్ను అయ్లి.

13 దస్సి, కచితుమ్, దేముడు ఆగ్గుల్ రితి నే దిలి అగ్గెయి తెంతో ఈంజ లోకుమ్తె పాపుమ్ అస్సె. ‘గని ఆగ్గుల్ రితి నెంజలిన్తె జా పాపుమ్చి రుజ్జు సరిగా డీసె నాయ్, చి తీర్పు కెర సిచ్చ కెరుక నెంజె’.

14 జలెకి, ఆగ్గుల్ దిలిన్క *మదెనె జలో మోసే నే జెతె అగ్గె కి, తొలితొచొ ఆదాము తెంతో కి మాన్సుల్క మొర్ను ఏలుప కెర్తె తిలన్. †వేర పాపల్ జేవ్ కెర్తె కి, దేముడుచి కోడు పిట్టవన్లొ ఆదాము కెర్లి రగుమ్ పాపుమ్ నే కెర్లసచి ఉప్పిరి కి మొర్నుయి ఏలుప కెర్తె తిలన్. జలెకి, పడ్డె జెంక తిలో యేసుక ‡తొలితొచొ ఆదాము అమ్క టాలి జతయ్. ఆదాము ఏక్ కాలుమ్క మొదొల్చొ, †పాపుమ్చి మొర్ను ఏలుప కెర్తి కాలుమ్. పడ్డె యేసు అన్నెక్ కాలుమ్క మొదొల్చొ, పాపుమ్ గెచ్చవ పరలోకుమ్చి రాజిమ్ ఏలుప కెర్తి కాలుమ్.

15 పాపుమ్తె సేడ్లిన్క చి రచ్చన దిలిన్క తేడ. మెలె, ఎక్కిలో మాన్సు పాపుమ్ కెర్లిన్చి రిసా ఒగ్గర్జిన్ మొర్లమ్. గని దేముడుచి దయచి రిసా జో అన్నెక్లొ మాన్సు జలో యేసుక్రీస్తు జోచి ప్రేమక ఆరి దిలి రచ్చనచి ఒగ్గర్జిన్క జో దేముడు నెత్తవ కెరయ్ అస్సె.

16 అన్నె, జోచి దయక దేముడు దిలి వరుమ్క జర్గు జతిన్క చి జో ఎక్కిలో కెర్లి పాపుమ్క జర్గు జలిన్క ఒగ్గర్ తేడ. జా ఎక్కి పాపుమ్చి రిసాచి తీర్పు కిచ్చొ ఆన్లి మెలె, దేముడు దెతి సిచ్చ. గని, పడ్డె, అమ్ ఎత్తిజిన్ మాన్సుల్ ఒగ్గర్ పాపుమ్ కెర కెర అమ్ కెర్ల పాపల్ ఒగ్గర్ నిల్వ జా గెలి పొది, జో దేముడు జోచి దయక దిలి రచ్చన కిచ్చొ ఆన్లి మెలె, అమ్చి పాపుమ్ పుంచ దిలిసి.

17 దేముడు సంగిలి *కోడు జో ఎక్కిలో పిట్టవ పాపుమ్తె సేడ్లిసి తెంతో జా పాపుమ్చి సిచ్చ, మెలె మొర్నుయి, ఏలుప కెర్తయ్. జలెకి, అన్నె కిచ్చొ ముక్కిమ్క జర్గు జయెదె మెలె, జో అన్నెక్లొ జలో యేసుక్రీస్తుచి అత్తి దేముడుచి దయచి రిసాచి, జో ఆరి దిలి పున్నిమ్ కక్క కక్క దొర్కు జయెదె గే, జతిన్తె, మెలె పరలోకుమ్చి రాజిమ్తె, జేవ్ †ఏలుప కెరుల.

18 దస్సి జలె, ఎక్కిలో పాపుమ్ కెర్లిసి కిసి ఎత్తిజిన్క సిచ్చతె సేడయ్లి గే, దస్సి, జో అన్నెక్లొ పున్నిమ్ కెర్లిసి ‡జోక సంపజల ఎత్తిజిన్చి పాపుమ్ పుంచ జోవయింక జియడ్తయ్.

19 మెలె, ఎక్కిలో మాన్సు దేముడు సంగిలి కోడు నే కెర్లిన్చి రిసా †ఎత్తిజిన్ పాపుమ్ సుదల్ జా గెలమ్. దస్సి,

* 5:14 5:14 నిర్లమకాండుమ్ 19, 20 అద్యయల్. † 5:14 5:14 ఆదాము తెన్ ఎత్తి అదికారుమ్ తిలో దేముడు సొంత లట్టబ ఏక్ కోడు తిన్నగ సంగ తిలన్. తిన్నగ సంగిలి జా ఆడ్ర ఆదాము పిట్టయ్లన్. అదికాండుమ్ 2:15-17 వి 3 అద్యయమ్. ‡ 5:14 5:14 1 కొరిందిల్ 15:22, 45 § 5:14 5:14 అదికాండుమ్ 3 అద్యయమ్. * 5:17 5:17 14 నంబర్ కోడుచి ఎట్టొచి. 17 నంబర్? కోడు దెక. † 5:17 5:17 తిమోతిక రెగిడ్డి 2 నంబర్ ఉత్తయ్ 2:12. డీసయ్లిసి 5:10, 20:4, 6 చి 22:5. ‡ 5:18 5:18 నెంజలి ‘పాపుమ్ పుంచి జతి అవ్కాసుమ్, జోవయింక రాజిమ్తె జతి అవ్కాసుమ్, ఎత్తిజిన్క దొర్కు కెర్తయ్’. గని దొర్కు కెర్లి కి, జా నజిలకయ్. కిసి నజుక మెలె, యేసుక్రీస్తుకయ్ సంప కెరుకయ్. యోహాను 3:18, 1:12. § 5:19 5:19 3:10-12, 23 దెక. * 5:19 5:19 18 నంబర్ కోడు దెక.

జో అన్నెక్టో, దేముడు అబ్బొన్చి కోడు నూన కెర్లెన్చి రిసా *ఒగ్గర్ జిన్క 'జేవ్ పున్నిమ్ జల రిత జా అస్తి' మెన జో దేముడు కచితుమ్ దెకెదె.

20 ఆగ్గుల్ రితి మదెనె అయ్లి, గని కిచ్చొక మెలె, మాన్పుల్ పాపుమ్ ఇండితిన్చి రుజ్జు సొస్టుమ్ డీసున్ మెనయ్ దేముడు జా ఆగ్గుల్ రితి మదెనె దిలన్. గని మాన్పుచి పాపుమ్ దస్సి సొస్టుమ్ రుజ్జు జలెకి, అమ్క కిచ్చొ రుజ్జు అయ్లి మెలె, దేముడుచి దయ జా పాపుమ్చి జా ఆగ్గుల్ రితి జీన అన్నెయ్ కామ్ కెర్లె.

21 మెలె, పాపుమ్ మొర్ను ఆన, జా పాపుమ్ మొర్ను వాట్ కిసి ఏలుప కెర్లె తిలి గే, దస్సి, అమ్చొ ప్రబు జలొ యేసుక్రీస్తు మొర అమ్చి పాపుమ్ పుంచ, జోచి పున్నిమ్ అమ్క ఆరి దిలిన్కయ్ జోచి దయ ఏలుప కెర్పు మెనయ్, దేముడుచి దయయ్ జీన అస్సి. అమ్క 'పరలోకుమ్చి రాజిమ్తె బెద పరలోకుమ్చి జీవుక కెయ్క తెయ్క జియ్ ఆకర్కయ్ ఒత్తయ్ గెతు' మెనయ్ జా వరుమ్ దిలన్.

6

నంపజా పాపుమ్ ముల సత్తిమ్ ఇండుక

1 జలె, కిచ్చొ మెనుమ? 'అమ్చి పాపుమ్ దేముడు చెమించుప కెర్లెన్తె జోచి దయ ఒగ్గర్ డీసుక, ఒగ్గర్ అవ్కాసుమ్ దెమ' మెన అమ్ పాపుమ్ ఇండితె తంక గే?

2 దస్సి ఉచరుక నాయ్. పాపుమ్ ముల అమ్చి సొంత ఆత్మక మొర్ల రిత జలమ్ మెలె, పాపుమ్తె కిసి అన్నె ఇండుమ్దె?

3 యేసుక్రీస్తుచి నావ్ తెన్ బాప్తిసుమ్ జల అమ్ ఎత్తిజిని, జలె, జో మొర పాపుమ్ గెచ్చయ్లిన్చి గుర్తు జతి బాప్తిసుమ్ కడన్లెన్తె జో మొర్లెన్ తెన్ బెదిల్ రితి, జా మొర్ల రిత జలమ్ మెన నేన్పు గే?

4 జో యేసుచి ఆగ్గె మొర్లెన్తె అమ్ బెద, అమ్చి ఆత్మక మొర జో తెన్ రొయి జలి గుర్తుకయ్ అమ్ బాప్తిసుమ్ నజన్లమ్. దస్సి, అబ్బొన్ జలొ దేముడుచి సెక్కి క్రీస్తు కిసి మొర్ను తెంతో అన్నె జివ్ జా ఉట్లన్ గే, దస్సి, అమ్ ఈంజ బత్తుకయ్ నొవర్ జెర్మన్ జోచి ఆత్మతె జెర్మన్ జా సత్తిమ్ ఇండుకయ్ మెన, జో దేముడు అమ్క జియ్డ అస్సి.

5 జలె, జో మొర్లెన్తె ఆత్మక బెద జో తెన్ అంటుప జలి రితి జలమ్ మెలె, జో అన్నె జివ్ జా ఉట్లె జీవుక కచితుమ్ ఆమ్ కి జిమ్దె, చి మదెనె ఆగ్గెక అమ్ మొర్లె, ఆకర్క జోచి రితి ఆమ్ కి జివ్ జా ఉట్టుమ్దె.

6 అమ్చి ఆగ్గుతె ఏలుప కెర్లె తిలి అగ్గెచి పాపుమ్బుద్ది పూర్తి గెన్పు మెనయ్, పాపుమ్చి సేవ అమ్ అప్పె తెంతో కెరుక నాయ్ మెనయ్, పాపుమ్ అమ్చి అగ్గెచి ఆత్మజో తెన్ సిలువతె గలి జా మొర్లె మెన జానుమ్.

7 అమ్చి పాపుమ్చి ఆత్మ మొర తిలె, పాపుమ్ అమ్క ఏలుప కెర్లెన్ తెంతో విడ్డల్ జా అన్నుమ్.

8 గని అన్నె, క్రీస్తు తెన్ మొర్లమ్ మెలె, 'జో తెన్ జిమ్దె' మెన కి అమ్క దయ్రిమ్ అస్సి.

9 కిచ్చొక మెలె, క్రీస్తు మొర తా అబ్బొన్ అన్నె జియ్డొసా జా కెయ్క అన్నె మొరె నాయ్ మెన జానుమ్. అప్పె జోచి ఉప్పిరి మొర్నుక కిచ్చొయ్ అదికారుమ్ నాయ్.

10 జో మొర్లెన్, జలె, మాన్పుల్చి పాపుమ్ గెచ్చయ్తి బలి జలిసి. జా కామ్, జలె, ఎక్కి నుట్టుక పూర్తి జెయిమ్ జలిసి, కేడ్డిసి. గని జో అప్పె జితిసి, జలె, దేముడుచి గవురుమ్ కెయ్క తెయ్క దెకయ్తి రితి జో జితయ్. జో మొర్లెన్ ఎక్కి నుట్టుచి కామ్, జోచొ అబ్బొన్చి గవురుమ్ దెకయ్తిసి కెయ్క తెయ్క చి కామ్, కేడ్డిసి నెంజె.

11 జాకయ్ తూమ్ కి కిసి దెకనుక మెలె, 'అమ్చి పాపుమ్ గెలి. అమ్చి పాపుమ్చి ఆత్మ మొర్లి' మెనయ్, క్రీస్తు జలొ యేసుచి జీవుకయ్ నొవర్ జియ్ అన్నుమ్, చి దేముడుచి గవురుమ్ దెకయ్తి రితి అమ్ ఇండితె తంకయ్ మెన అర్దుమ్ కెరన దస్సి ఇండుక.

12 జాకయ్, మొర్ల తుమ్చ ఆగ్గెతె పాపుమ్ ఏలుప కెర్పు నాయ్, నెంజిలె తుమ్చి ఆగ్గెచ ఆసల్ జర్గు కెర్లె, పొన.

13 పాపుమ్ కమె కెర్లె అయ్దల్ జేవ్ జతి రితి, పాపుమ్తె తుమ్చ ఆగ్గెచ వాటల్ తుమ్ బెదవ నాయ్. గని, 'మొర్ను తెంతో జో అమ్క నెత్వం కెర జో తెన్ బెదవన దేముడు అమ్క జియ్డయ్ అస్సి, అమ్క జివ్వి కెర అస్సి' మెనయ్, జోచి అత్తి తుమ్చి ఆత్మ సొర్పు కెర దా, జోచి సత్తిమ్ దెకయ్త కమెచి రిసాచ అయ్దల్ జేవ్ జతి రితి, తుమ్చ ఆగ్గెచ వాటల్ జోచి అత్తి సొర్పు కెర దాన.

14 జోచి అత్తి సొర్పు కెర దిలదు మెలె తుమ్చి ఉప్పిరి పాపుమ్ ఏలుప కెరె నాయ్. కిచ్చొక మెలె, తుమ్ ఆగ్గుల్చి రితి తెడి నాయ్, గని జో దేముడుచి దయచి తెడి అన్నున్.

15 జలె, 'అప్పె ఆగ్గుల్ రితి తెడి ఆమ్ నాయ్. జోవయిం చి దయక దేముడు అమ్క చెంగిల్ దెకితయ్, చి అమ్ పాపుమ్ కెర్లె బాద నాయ్' మెంతసు గే? దస్సి ఉచరుక నాయ్.

16 జోచి సేవ కెరుక మెన కచి అత్తి తుమ్క తుమ్ ఒప్పున కెరన తస్తె గే, జోచయ్ గొతిమాన్పుల్ జా అన్నున్ మెన నేన్పు గే? పాపుమ్తె సొర్పు కెరన్లె, పాపుమ్చ గొతిమాన్పుల్ జస్తె, చి మొర్నుతె గెతె. దేముడుచి కోడు కెర్లెన్తె ఒప్పున కెరంతె జలె, జో దెతి పున్నిమ్ జస్తె.

17 దేముడుక జెయ్యి! పాపుమ్చి సేవ కెర పాపుమ్చ గొతిమాన్పుల్ తుమ్ అగ్గె జా తిలదు, గని తుమ్క అప్పె సికడ్డి తుమ్క అప్పె దిలి కోడ్ రితి ఇండుక తుమ్చి పెట్టి కోర్ప జా అన్నున్.

18 అన్నె, పాపుమ్ ఏలుప కెర్తిసి తెంతో దేముడు తుమ్క విడ్డల్ కెర, సత్తిమ్ ఇండితిన్క తుమ్ గొతిమాన్సుల్ జతి రితి కెర అస్సె.

19 మాన్సుల్ రోజుక అర్దల్ సంగితి రితి, టాలికయ్ 'గొతిమాన్సుల్' మెంతసి. కిచ్చొక మెలె, ఆత్మకమొచి రిసొచ కొడొ అర్దుమ్ కెరనుక తుమ్క ఇదిల్ బాద, చి 'అర్దుమ్ కెరంతు' మెనయ్ ఇసి టాలి తెన్ సంగితసి. జా అర్దుమ్ కిచ్చొ మెలె, లంజె వెట్కారుమ్చ కమొతె, పాపుమ్చి ఉప్పిరి పాపుమ్చ కమొతె తుమ్చ ఆగ్చ వాటల్ అగ్గె బెదవంతె తిలదు, గని అప్పె తెంతో తుమ్ కిచ్చొ కెరుక మెలె, దేముడు తుమ్క దిలి సుద్ది పూర్తి నెరవెర్చువయ్ జతి రితి, సత్తిమ్ కమొక ఇండితిన్తెయ్, తుమ్చ ఆగ్చ వాటల్ తుమ్ సొర్పు కెర దాస.

20 పాపుమ్చి సేవ కెర్త పాపుమ్చ గొతిమాన్సుల్ తుమ్ తిలి పొది సత్తిమ్ ఇండితి ముద్దొతెను నాయ్, 'అమ్ సత్తిమ్ ఇండుక నాయ్' మెన ఇస్టుమ్ అయ్లి రితి ఇండితె తిలదు.

21 గని జా పొదిచ తుమ్చ కమొచి రిసొ అప్పె ఉచర్లె తుమ్క లాజు. జేవ్ కమొ తుమ్క కిచ్చొ లాబుమ్ ఆన్ల? కిచ్చొ పలితుమ్ దెర్ల? లాబుమ్ నాయ్, కిచ్చొ చెంగిల్ పలితుమ్ నాయ్. దస్స కమొ మాన్సుక కేనె నెతతి మెలె, నాసెనుమ్తె, మొర్చుతెయి.

22 గని, పాపుమ్ ఏలుప కెర్తిస్ తెంతో విడ్డల్ జా దేముడుచ గొతిమాన్సుల్ తుమ్ జలి తెంతో, అప్పె కిచ్చొ పలితుమ్ దెర్తయ్ మెలె, జో దెతి సుద్ది జా, తుమ్ సుద్ది రితి ఇండితను, చి జో దెతి సుద్ది తుమ్క పరలోకుమ్తె బెదయ్తయ్, తుమ్క కెయ్క తెయ్క జియడ్డయ్.

23 జలె, పాపుమ్ జేవ్చి సేవ కెర్తసక బట్టాడి మొర్చుయి. గని, దేముడు జోవయించి సర్లక అమ్క ఆరి దిలి వరుమ్, అమ్చొ ప్రబు జలొ యేసుక్రీస్తుచి తెడి పరలోకుమ్తె గెచ్చు కెయ్క తెయ్క జితిసి.

7

ఆగ్గుల్ తెంతో విడ్డల్ జా క్రీస్తుచి తెడి తిలిన్

1 జలె, దేముడు మోసె తెన్ దిలి ఆగ్గుల్ జాన్ల బావుడ్లు, మాన్సు మొర తిలె నాయ్, గని జివ్వి తిలె పొదికయ్ జోచి ఉప్పిరి ఆగ్గుల్క అదికారుమ్ తయెదె మెన నేన్సు గే?

2 గని, కేన్ జవుస్ తేర్బోదచొ మున్సుసి జివ్వి తిలి ఎదిలి, ఆగ్గుల్చి రిసొ జోచి తెడి జా తయెదె, జా ఆగ్గు పిట్టవుక నెంజె. గని మున్సుస్ మొర గెలె, తెర్నిమున్సు చెంగిల్ తతి జా ఆగ్గు జేవ్చి ఉప్పిరి తయె నాయ్.

3 జాకయ్, మున్సుసి జీవ్ తిలె పొది జా తేర్బోద అన్నెక్లొక గెలె, జాక 'లంజె' మెనుల, గని మున్సుసి మొర గెలె, జా ఆగ్గు ముద్దొ కెర్తిస్ తెంతో జా పిట్టవ జా అస్సె, చి అన్నెక్లొక పెండ్లి జలె లంజె నెంజె.

4 దస్సి, బావుడ్లు, క్రీస్తుక సంప కెర జో తెన్ తుమ్ బెదిలి రిసొ, జో యేసుక్రీస్తుచి ఆగ్ మొర్తిస్ తెన్ తూమ్ కి మొర అస్సున్, చి రిసొ తుమ్చి ఉప్పిరి ఆగ్గుల్క అదికారుమ్ నాయ్. దస్సి, తుమ్ అప్పె ఆగ్గుల్చి తెడి నాయ్ చి రిసొ తుమ్ అన్నెక్లొచి అదికారుమ్చి తెడి తంక వాట్ తవున్ మెనయ్ దేముడు ఇసి జర్లు కెర్తన్. జో దేముడుచి గవురుమ్ దెకయ్తి రితి అమ్ ఆత్మపలితుమ్ దెరుక మెనయ్, మొర జివ్ జా ఉట్టొ జో క్రీస్తుచి తెడి అమ్ తంకయ్ మెనయ్ ఇసి జర్లు కెర్తన్.

5 ఈంజ ఆగ్చ అమ్చి పాపుమ్చ ఆసల్క అమ్ జితె తిలి పొది ఆగ్గుల్ అమ్చి పెట్టిచ ఆసల్క 'పాపుమ్చయ్' మెన దెకయ్తె తిల, చి జేవ్ ఆగ్గుల్ 'దస కమొ పొస' మెన సంగితికయ్, జేవ్ పాపల్ కెర్తి ఆస ఒగ్గర్ జా గెలి. పాపుమ్ కెర్తి జా ఆస ఒగ్గర్ జా అమ్చి ఆగ్చ వాటల్తె బార్ జా జేవ్చి కామ్ కెర్తె తా మొర్చు ఆన్తి పలితుమ్ దెర్తె తిలి.

6 గని అప్పె, క్రీస్తు తెన్ బెద అమ్ 'మొర్లి' తెంతో, ఆగ్గుల్ తెంతో పిట్టవ జా అస్సుమ్. అమ్క దెర బంద తిలి జా ఆగ్గుల్క అమ్చి ఉప్పిరి అదికారుమ్ నాయ్ చి రిసొ రెగిడ్ల ఆగ్గుల్చి తెడి నాయ్ గని దేముడుచి సుద్ది తిలి ఆత్మకయ్ నొవర్ జెర్మన్ జా, జయ్యి సెక్తికయ్ జోచి సేవ కెర్తనుమ్.

ఆగ్గుల్తె పాపుమ్ వాట్ చజ ఒగ్గర్ జా గెతిన్

7 జలె, కిచ్చొ మెనుమ? 'ఆగ్గులీ పాపుమ్' మెనుక జయెదె గే? నెంజె. దస్సి మెనుక జయె నాయ్. గని ఆగ్గుల్ తత్త నాయ్ జలె, 'ఆవ్' మెనుమ, 'ఆవ్ పాపుమ్ కెర్తొసొ' మెన ఆవ్ సరిగా చినంతయ్ నాయ్. "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తత్తి నాయ్ జలె, అన్నెక్లొచి ఆస్తిక ఆస జతిన్క 'పాపుమ్' మెన నేన్తయ్, ఆవ్ కి దస్సి పాపుమ్ కెర్తిసి చినంతయ్ నాయ్.

8 గని, పాపుమ్బుద్ది అంచి పెట్టి అగ్గె తెంతో తిలన్, చి "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తతికయ్, అంచి పెట్టిచి పాపుమ్ బుద్దికయ్ "దస్సి జలె, అన్నె మాన్సుల్చి ఆస్తిక ఆస జయిందె" మెనయ్ ఆస జలయ్, చి అన్నె ఒగ్గర్ ఆసల్, కిచ్చొ కిచ్చొచ ఆసల్ ఎత్తి జలయ్. ఆగ్గుల్ నేన్లె, అమ్చి పాపుమ్ నిజల్ రితి, జివ్ నెంజిల్ రితి తా కామ్ కెరె నాయ్.

9 'ఆవ్' మెనుమ, అగ్గెయి ఆగ్గుల్చి తెడి నే తస్తె, అంచి పాపుమ్క 'అస్సె' మెన నేన కెర, అంచి ఇస్టుమ్ అయ్లి రితి సర్ల తెన్ జితె తిలయ్, గని జా ఆగ్గు సూన్లి తెంతో పాపుమ్ అంచి పెట్టి అన్నె జివ్ జలన్, చి ఆవ్ మొర్తయ్.

10 దస్సి, 'జివ్ దెతి వాట్ దెకయెదె' మెన ఆవ్ సంప కెర్తి ఆగ్గు అంక మొర్తి సిచ్చు ఆన్లన్.

11 కీసి మెలె, పాపుమ్బుద్ది అంక మోసిమ్ కెర, 'చెంగిల్' మెన ఆవ్ సంప కెర్తి ఆగ్గు వాట్ బార్ జలన్.

12 మెలె, దేముడు మోసే తెన్ దిలి ఆగ్గుల్ సుద్ది అస్తి, ఒత్తచి ఎత్తి ఆగ్గు సుద్ది అస్సె, సత్తిమ్చ తీర్పుల్ దెకయ్తయ్, చెంగిల్ అస్సె.

13 దస్సి జలె, 'ఆవ్' మెనుమ, చెంగిల్చి అంక మార్లన్ గే? నాయ్. ఆగ్గుల్ చెంగిల, గని జా చెంగిల్ తిలిన్చి ఆగ్గు పిట్టవ పిట్టవ, పాపుమీ అంచి పెట్టి జేవ్చి కామ్ కెర కెరయి మార్లి. దేముడుచి సెలవ్ కిచ్చొ మెలె, ఆగ్గుల్ వాట్ పాపుమ్ జేవ్చి కామ్ కెరై తతిన్తెయి పాపుమ్క, పాపుమీ మెన మాన్సుల్ చినుత్ మెనయ్, పాపుమ్ ఆగ్గుల్ వాట్ పుల పుల కెద్ది మూర్కుమ్ జా గెతయ్ గే చినుక నెంజిలిన్చి జేవ్చి కామ్ పూర్తి డీసుకయ్ మెన, దేముడు సెలవ్ దిలన్.

14 జలె, దేముడు మోసే తెన్ దిలి ఆగ్గుల్క దేముడుచి సుద్ది తిలి ఆత్మకయ్ దిలస, జోచి ఆత్మతెయ్ బెదితస, మెన ఆమ్ జానుమ్, గని ఆవ్ మాన్సుక మాములుమ్ మాన్సుచి ఆగి, మాములుమ్ మాన్సుచి బుద్ది అస్సె, చి ఈంజ ఆగ్గెతె ఆవ్ తతి ఎదిలి సేంపు పాపుమ్ అంక నేన్లి రితి అస్సె. పాపుమ్చి గొతిమాన్సు ఆవ్.

15 ఆవ్ సొంత ఇండితిసి ఆవ్ అర్దుమ్ కెరనుక నెతిరత్సని. 'సత్తిమ్ కెరిందె' మెలె కి నెత్త తా, 'గర్ని' మెన ఆవ్ నెసితిసి ఆవ్ జర్గు కెర గెల సిక్కు జా గెతసి.

16 జలె, 'పాపుమ్' మెన ఆవ్ నెసితిసి ఆవ్ కెర్లసి జలె, జా పాపుమ్ నెసిలిసి తెన్ 'దేముడు దిల ఆగ్గుల్ చెంగిలి' మెన ఒప్పన్లి రితి జతయ్.

17 తెడిక తెడి దేముడుక ప్రేమ కెర్టొ అవ్వి జా పాపుమ్ కెర్టొసా నెంజి, గని ఆవ్ మాన్సుచి ఆగి తిలి పాపుమీ జా కామ్ కెర్లయ్.

18 మెలె, అంచి సొంత సెక్తిక, అంచి ఆగి, అంక కిచ్చొ సత్తిమ్ నాయ్ మెన జాని. 'చెంగిల్చి కెరిందె' మెన ఉచరిందె, గని మాన్సుచి అంచి సెక్తిక జర్గు కెరుక నెతిరి.

19 నెత్త, 'చెంగిల్' మెన ఆవ్ ఇస్టుమ్ జలిసి జర్గు నే కెర్టె, నెసిలి పాపుమ్ జర్గు కెరయ్ గెల్తసి.

20 జలె, 'పాపుమ్' మెన ఆవ్ నెసితిసి ఆవ్ కెర్లసి జలె, దేముడుక ప్రేమ కెర్టొ అవ్వి జర్గు కెర్లసి నెంజె, గని అంచి అగి జేవ్చి ఇస్టుమ్ కెర, పాపుమీ జర్గు కెర్లయ్.

21 దస్సి, కిచ్చొ ఆగ్గు డీస్తయ్ మెలె, 'సత్తిమ్ కెరిందె' మెన ఆవ్ ఉచర్లె పొది, పాపుమ్ పాసి రకితె అస్సె.

22 మెలె, అంచి పేట్ తెడి దేముడు మోసే తెన్ దిలి ఆగ్గుల్ రిసా ఇస్టుమ్ కెరుక ప్రేమయ్ అస్సి,

23 గని అంచి అగి కిచ్చొ ఆగ్గు జర్గు జతిసి ఆవ్ చినితసి మెలె, అంచి మెన్సుతె తిలిన్చి ఉప్పిరి జా వేరచి యుద్దుమ్ కెర, అంచి ఆగిచ వాటల్ తెన్ నెరవెర్చుప జతి పాపుమ్తె అంక దెర్చు సేడయ్తయ్.

24 అయ్యొ! కెద్ది బాద సేడ్తసి, జా ఎత్తి రిసా! మొర్చు ఆన్తి ఈంజ పాపుమ్చి ఆగ్గె తెంతో కో అంక రచ్చించుప కెరుల?

25 అమ్చొ ప్రబు జలొ యేసుక్రీస్తుచి రిసా దేముడుక జోబర! జొయ్యి రచ్చించుప కెరెదె! జొయ్యి అమ్క జినవ అస్సె! జలె, అప్పెచి మట్టుక అంచి మెన్సుక, జో తిలి ఆత్మక, దేముడు మోసే తెన్ దిలి ఆగ్గుల్చి రిసా దేముడుచి సేవ ఆవ్ కెర్లసి, గని అంచి ఆగ్గెక పాపుమ్చి సేవ కెర్లసి.

8

యేసు అమ్క పాపుమ్ తెంతో మొర్చు తెంతో పిట్టవ కెర్లసి

1 జలె, క్రీస్తు జలొ యేసుచి తెడిచ మాన్సుల్క జో జోచి పాపుమ్ పుంచ అస్సెచి రిసా లోకుమ్చ ఎత్తిక జో తీర్పు కెర్టె పొది జేవ్క కిచ్చొ సిచ్చ జంక నాయ్. నానినుమ్తె జేవ్ గెచ్చుక నాయ్.

2 కిచ్చొక మెలె, అమ్క ఏలుప కెర్టె పాపుమ్ చి మొర్చుచి ప్రమానుమ్చి సెక్తి తెంతో జివ్ దెతి దేముడుచి సుద్ది తిలి ఆత్మచి ఆగ్గుతె అమ్క పిట్టవ కెరయ్ అస్సె. జో యేసుచి అత్తి, యేసుతె జర్గు జలి కామ్వాట్ విడ్డల్ కెరయ్ అస్సె.

3 మెలె, మాన్సుచి ఆగి పాపుమ్ ఏలుప కెర్లయ్. అమ్చి ఆగి ఏలుప కెర, ఆగ్గుల్ నెరవెర్చుప కెరుక తిలిసి పాపుమ్ పిట్టయ్లి. జాకయ్ ఆగ్గుల్ అమ్చి పాపుమ్ గెచ్చువుక అమ్క చెంగిల్ కెరుక నెతిర్తి. జలె, దేముడు అమ్చి పాపుమ్ గెచ్చువ అమ్క సుద్ది కెరుక మెన మాన్సుచి ఈంజ పాపుమ్చి ఆగ్గె రూపుమ్ జోచొ సొంత పుత్తున్క ఈంజ లోకుమ్తె తెద్రయ్లన్. దస్సి పాపుమ్ పుంచితె బలి జో జతి రిసా అమ్చి అగి కామ్ కెర్టె పాపుమ్ జాక జెతికయ్, జో యేసుచి ఆగ్గె వాట్ పాపుమ్క సిచ్చ కెర గెల తీర్పు కెర్లన్*.

4 కిచ్చొక పాపుమ్క తీర్పు కెర్లన్ మెలె, ఆగ్గుల్తె సంగిలి దొర్చు జలి పున్నిమ్ అమ్చితె నెరవెర్చుప జవున్ మెనయ్. కచితె మెలె, అమ్చి ఆగ్గెచ ఆసల్క నాయ్ గని దేముడుచి సుద్ది తిలి ఆత్మచి సెక్తికయ్ కో ఇండుమ్దె గే, అమ్మి.

5 మాములుమ్ మాన్సుచి బుద్దిక, ఈంజ ఆగ్గెచ అమ్చి పాపుమ్చ ఆసల్క కో జితతి గే, ఈంజయి లోకుమ్తె తిలిన్ ఎత్తిక, ఈంజ ఆగ్గెచ ఆసల్ తిలిన్ ఎత్తికయ్ కోర్ప జతతి, ఉచర్లె తత్తతి. గని దేముడుచి సుద్ది తిలి ఆత్మచి సెక్తిక కో జితతి గే, జా ఆత్మయి సిక్డిన్కయ్ కోర్ప జతతి, ఉచర్లె తత్తతి.

6 ఈంజయ్ లోకుమ్చి, అమ్చి ఆగ్గెచ ఆసల్ జర్గు కెర్టెన్క కోర్ప జతిసి మాన్సుక మొర్చుతె నెయెదె, గని దేముడుచి సుద్ది తిలి ఆత్మక కోర్ప జతిసి అమ్క జివు దెతిసి, సేంతుమ్ దెతిసి జా అస్సె.

* 8:3 8:3 యోహాను 12:31-33 దెక, కొలోస్సియల్ 2:15 దెక.

7 మెలె, ఈంజ లోకుమ్చ, అమ్చి ఆగ్చ ఆసల్ జర్గు కెర్తినక కో కోర్ప జతతి గే, జో ఎత్తి అదికారుమ్ తిలో దేముడుక విరోదుమ్ జా అస్తి, విరోదుమ్ కెర్తతి. దస్సి పాపుమ్చి ఆత్మ తిలస దేముడుచి ఆగ్గుల్ సూన్తి నాయ్, కెర్తి నాయ్. నెత్తిర్తి.

8 మాములుమ్ మాన్సుచి జోచి సొంత బుద్దిక, జోచి ఆగ్చ ఆసల్క ఇస్టుమ్ అయ్లి రితి ఇండితన, దేముడుచి ఇస్టుమ్ కెరుక నెత్తిర్తి, జోక సర్ద కెరుక నెత్తిర్తి.

9 తుమ్, మాత్తుమ్, మాములుమ్ మాన్సుచి పాపుమ్బుద్దిచ నెంజున్, ఈంజ ఆగ్చ ఆసల్క జతన నెంజుసు, నాయ్ గెద? దేముడుచి సుద్ది తిలి ఆత్మ తుమ్చి పెట్టి అస్సి జలె, జోచి ఆత్మకయ్ జితసు. కేన్ మాన్సుచి పెట్టి క్రీస్తుచి ఈంజ ఆత్మ తయె నాయ్ గే, జో మాన్సు క్రీస్తుచొ నెంజె.

10 తుమ్చి పాపుమ్చి రిసా తుమ్చ ఆగ్ మొర్ల రిత జా అస్తి, గని క్రీస్తు తుమ్చి పెట్టి అస్సి జలె, క్రీస్తుచి పున్నిమ్చి రిసా జోచి ఆత్మక తుమ్ జివ్వి అస్సున్.

11 జో యేసుక అన్నె జియణ్ణో దేముడు అబ్బొన్చి ఆత్మ తుమ్చి పెట్టి జితయ్ జలె, క్రీస్తు జలొ జో యేసుక మొర్లు తెంతో విడ్డల్ కెర జియణ్ణో జో అబ్బొసి, మొర్ల తుమ్చయ్ ఆగ్క కి జియడెదె. తుమ్చి పెట్టి జితి జోచి ఆత్మపాలు, తుమ్చి పెట్టి జో దెతి జోచి ఆత్మకయ్ జియడెదె.

యేసు తెన్ అమ్ అబ్బొన్చ పుత్తర్లు

12 జాకయ్, బావుణ్ణు, అమ్ పూచి జా అస్సుమ్. జా పూచి అమ్ కిసి కుట్టవుక? మాములుమ్ మాన్సుచి బుద్దిక నాయ్, అమ్చి ఆగ్చ ఆసల్ జర్గు కెర్తినక నాయ్. జా ఎత్తి పొన్.

13 కిచ్చొక మెలె, మాములుమ్ మాన్సుచి బుద్దిక, తుమ్చి ఆగ్చ ఆసల్క, తుమ్ జితసు జలె, ఆత్మక మొర్తె. గని దేముడుచి సుద్ది తిలి ఆత్మచి సెక్తిక ఈంజ ఆగుచ కమొ గెచ్చవనయ్ గెల్లి జలె, మార్తె జలె, ఆత్మక జిస్తె.

14 కిచ్చొక మెలె, దేముడుచి సుద్ది తిలి ఆత్మసెక్తిక ఇండితో ఎత్తి మాన్సు, జో దేముడుచి పుత్తర్లు జవుల.

15 మెలె, జోచి ఆత్మ తుమ్చి పెట్టి అయ్లిసి తుమ్క గొతిమాన్సుల్ కెర బియడ్డిసి నెంజె. తుమ్చి అగ్గెచి బుద్దిచి రిసాచి బిడ్డి తెన్ తుమ్ అప్పె తంక నాయ్. జోచి ఆత్మ తుమ్చి పెట్టి అయ్లిసి తుమ్క జోవయించ పుత్తర్లులి కెర్తిసి. అప్పె “అంచ పుత్తర్లు తుమ్” మెన జో అమ్క దెకితయ్, చి “ఓ బ, ఓ బ” మెన జోక అమ్ ఉంక్రయ్లె, కిచ్చొ సెక్తిక ఉంక్రయ్తనుమ్ మెలె,

16 జోచ బోదల్ అమ్ జలిన్చి రిసా, జోచి సొంత ఆత్మ అమ్చి ఆత్మతె జోచ బోదల్ మెన సాచి దెతయ్చి, దస్సి ఉంక్రయ్తనుమ్.

17 అన్నె, జోవయించ బోదల్ జలమ్ మెలె, జోచి పుత్తున్ జలొ క్రీస్తు తెన్ జో దేముడుక తిలిన్తె అమ్క వాట జెయెదె. జా వాట అమ్క కిసి సేడెదె మెలె, జో యేసు సేడ్ల బాదల్తె అమ్ బెద ఓర్పుప జా జిన్లె, జోచి పరలోకుమ్తెచి ఉజిడ్తె జో గవురుమ్ జతిన్తె కి బెదుమ్దె.

18 జలె, బాదల్ సేడ్డిన్చి రిసా, చి యేసు తెన్ అమ్ గవురుమ్ జతిన్చి రిసా కిచ్చొ మెంతసి మెలె, దేముడు జా ఆకర్ దీసిక అమ్క కెర్తి గవురుమ్చి రిసా ఉచర్లె, ఈంజ ఉగుమ్చ బాదల్ కెత్తి జలెకి కిచ్చొ నెంజె.

19 జో దేముడుచ పుత్తర్లు అమ్ జలిసి, జా దీసిక అమ్ గవురుమ్ జతిన్తె పూర్తి రుజ్జు జతె ఎదక జెర్మయ్లిన్ ఎత్తి ఆస తెన్ రకితె అస్సి.

20 కిచ్చొక మెలె, తయార్ జలిన్ ఎత్తి అగ్గె తెంతో కిచ్చొ కిచ్చొ అల్లర్ సేడ సిక్కు జా అస్సి. జాచి ఇస్టుమ్క నాయ్, గని “కచితుమ్ సమయుమ్ జా అయ్లి మెలె చెంగిల్ కెరిందె” మెన దేముడుచి సెలవ్ నెరవెర్పుప జతిన్కయ్ ‘కచితుమ్ జర్లు జయెదె’ మెలి రితి దయిరిమ్ తెన్ తిలి రితి రకితయ్.

21 మెలె, దేముడుచ బోదల్ పూర్తి విడ్డల్ జా గవురుమ్ జతి పొదిక జెర్మయ్లిసి ఎత్తి కి జా పాడ్ జతిన్తె నానుమ్ జతిన్తె సేడ్డిన్ తెంతో విడ్డల్ జయెదె.

22 తేర్బోద లడెన్ జంక మెన కంట్లు పాచె జా అయ్లి పొది కిసి కస్టల్ నొప్పుల్ జా టింకితయ్ గే, దస్సి, జెర్మన్ జలిన్ ఎత్తి మొత్తుమ్ అప్పె ఎద కస్టల్ నొప్పుల్ తెన్ టింకయ్తయ్ మెన జానుమ్.

23 తెద్దిలి నాయ్ అమ్క జెతికయ్ దేముడుచి సుద్ది తిలి ఆత్మచి మొదొల్చి పంటో అమ్చి పెట్టి అస్సి. జలె, “అమ్చ ఆగ్క, ఈంజ లోకుమ్చ బాదల్ ఎత్తి తెంతో, దేముడు అన్నె గెనన్లిసి, అమ్ జోచ పుత్తర్లు జలిసి, కెయ్క పూర్తి డిసిదె? అమ్ అన్నె కెద్ది రకుక?” మెన అమ్ అమ్చి పెట్టి టింక టింక్రయ్ రకితసుమ్.

24 ‘అమ్చ ఆగ్క మార్పుప కెర్తిన జో జర్లు కెర్తినకయ్ జో అమ్క రచ్చించుప కెర అస్సి’ మెనయ్ ఆస తెన్ రకితసుమ్. జలె, ఉచరుమ, దెకిలిసి జర్లు జలిన్కయ్ ‘ఆస తెన్ రకితసుమ్’ మెనుక బెదె నాయ్. దెకిలిసి జర్లు జలిన్కయ్ కో ఆస తెన్ రకితి నాయ్.

25 గని అప్పెక నే దెకిలిన్క ‘కచితుమ్ జర్లు జయెదె’ మెన అమ్క ఆస తిలె, నిదానుమ్ తెన్ రకుమ్దె.

అమ్చ ప్రార్దనల్తె కి దేముడుచి సుద్ది తిలి ఆత్మ అమ్క తోడ తతిన్

26 దేముడుచి సుద్ది తిలి ఆత్మ అమ్క సెక్తి నెంజిలిన్ ఎత్తితె కి అమ్క తోడు తత్తయ్. ప్రార్దన కెరుక జలె, కిసి ప్రార్దన కెర్కుగే నేనుమ్, గని దేముడుచి సుద్ది తిలి ఆత్మ సొంత అమ్చి పెట్టి అమ్చ ప్రార్దనల్తె బెద అమ్ లట్టబుక నేన్లిన్, సంగుక నెత్తిర్లిన్క తోడు తత్తయ్, అమ్క సికడ్తయ్,

చి అమ్ సంగుక నెతిర్లిన్క లట్టబుక నేన్లిన్క అమ్చి పెట్టి అమ్ టింకితిన్చి అర్దుమ్ బెదయ్తయ్.

27 జలె, జోచి సుద్ది తిలి ఆత్మ అమ్ జోచయ్ జల అమ్చ ప్రార్దనల్తె తోడు తా, దేముడుచి ఇన్సుమ్ తిలిసి ఒత్త బెదయ్తయ్. జోచి ఆత్మ కిచ్చో అర్దుమ్ బెదయ్తయ్ గే జోయ్యి జానె. దస్సి, అమ్చి పెట్టి తిలిన్ ఎత్తి పరిచ్చ కెర్తొసాచి ఆత్మ సొంతయ్ అమ్చ ప్రార్దనల్తె అమ్క తోడ్ తత్తయ్, బెదితయ్.

దేముడు అమ్క జినయ్తిసి డిట్టుమ్ కెర్తిసి

28 అన్నె కిచ్చో దయిరిమ్ జతసుమ్ మెలె, దేముడుక ప్రేమ కెర్తనక, మెలె జోచయ్ జంక మెన దేముడు జోచి ఇన్సుమ్క బుకార్లనక కిచ్చో బాదల్ అయ్లె కి, జేవ్ బాదల్తె కి చెంగిల్ వలితుమ్ దెర్తి రితి జా ఎత్తి చెంగిల్క బెదిత్ రితి జో నెరవెర్పువ కెర్తయ్ మెన జానుమ్.

29 కో యేసుక్రీస్తుక సంపజా జో దెతి రచ్చన నజనుక గే జో దేముడు అగ్గె తెంతో జానె. జలె, జోచొ సొంత పుత్తున్ యేసుచ రిత అమ్ జంక మెన అమ్కయ్ జో నిసాన, జా జర్గు కెరుక ఒప్పన్లన్. దస్సి, అమ్ ఒగ్గర్ ఒగ్గర్ బావుడ్లివో జలసక యేసు తొల్పూర్ జలన్.

30 జలె, 'యేసుచ రిత జతు' మెన జో కక్క కక్క నిసాన్ల గే, జోవయింక బుకార్లన్. కక్క కక్క బుకార్లన్ గే, జోవయించి పాపుమ్ పుంచ 'అప్పె తెంతో పున్నిమ్ జా అస్తి' మెలి రితి దెకిలన్, చికచి కచి పాపుమ్ పుంచ 'పున్నిమ్ జా అస్తి' మెలి రితి దెకిలన్ గే, "జోవయింక పరలోకుమ్తె కడ నెయిందె, అంచి ఉజిడతె అంచి గవురుమ్తె బెదయిందె" మెనయ్ ఒప్పన్లన్, చి జర్గు కెరెదె.

31 జలె, ఈంజ ఎత్తి బెదవ కిచ్చో మెనుమ? దేముడు అమ్క తోడు అస్సె జలె, కో అమ్క పాడ్ కెరుక తెరితి! నెత్తిరి!

32 జోచొ సొంత పుత్తున్క బాదల్ నే పిట్టయ్తె, అమ్ ఎత్తిజిన్క పాపుమ్ తెంతో రచ్చించువ కెర్తి రిసా జోక బలి కెర మొర్పుతె సార్ప కెర దిలో. అమ్చి ఉప్పిరి జోవయింక తెద్ది ప్రేమ తిలి జలె, జో పుత్తున్క దెతిసి ఎత్తితె అమ్క కి వాట దెయె నాయ్ గే? దెయెదె.

33 దేముడు నిసాన్లచి ఉప్పిరి కో కిచ్చోయ్ నింద వయడుక తెరితి గే? కోయి నెత్తిరి! జో దేముడు సొంతయ్ అమ్చి పాపుమ్ పుంచ అస్సె. అమ్క 'పున్నిమ్' మెలి రితి దెకితయ్.

34 అమ్ జో నిసాన్లనక కో తీర్పు కెర, నాసెనుమ్తె తెద్రవుక తెరితి గే? కో నెత్తిరి! మొర అన్నె ముక్కిమ్క అన్నె జీవ్ జా ఉట్టిలో క్రీస్తు జలొ యేసు అబ్బిన్ దేముడుచి

ఉజెతో పక్క వెన అస్సె. జోయ్యి అమ్క సిచ్చ దెయెదె గే? నాయ్. జో సొంత అమ్చి పచ్చెనచి తీర్పు సంగితయ్.

35 జలె, క్రీస్తుచి ప్రేమ తెంతో కో జలెకి కిచ్చో జలెకి అమ్క పిట్టవ కెరుక తెరితి గే? జోవయింక అమ్క వీడువ కెరుక బాదల్ జవున్ తెరితి గే? ఇర్దుల్ జవున్ తెరితి గే? మాన్సుల్ కెర్త గోసల్ అల్లర్ తెరితి గే? చువ్వె తతిసి జవున్ తెరె గే? పాలల్ నెంజిలిన్ జవున్ తెరె గే? ప్రమాదల్ జవున్ తెరితి గే? మొర్తి సిచ్చ జవున్ తెరె గే? కిచ్చోయ్ అమ్క జోక వీడువ కెరుక నెత్తిరి!

36 దేముడుచ కొడతె పూర్గుమ్ రెగ్గయ్లి రితి, †“తుచి నావ్చి రిసా ఒండి మెద్దెనె అమ్క మార్తతి, 'కండ కత మెండల్ జేవ్' మెలి రితి అమ్క దెకితతి” మెన రెగ్గ అస్సె.

37 జో అమ్క ప్రేమ కెర అమ్చి పాపుమ్ వయిలోసాచి సెక్తిక ఇన బాదల్ ఎత్తితె అమ్ పూర్తి జిన అస్సుమ్, జినుమ్దె.

38 అమ్క కిచ్చో పూర్తి దయిరిమ్ మెలె, మొర్పు జవున్, జివ్ తతిన్ జవున్, కేన్ లోకుమ్చ దూతల్ జవున్, బూతల్ జవున్, అప్పె జర్గు జతిసి జవున్, పడ్డొక జర్గు జతిసి జవున్, కేన్ లోకుమ్చ సెక్తివో జవున్,

39 ఈంజ లోకుమ్క ఉప్పిరి తిలిసి జవున్ ఎట్టొ తిలిసి జవున్, జెర్మున్ జలిసి అన్నె కిచ్చో జలెకి, అమ్చొ ప్రబు జలొ క్రీస్తుయేసు అమ్క దొర్కు కెర్తి దేముడుచి ప్రేమ తెంతో వీడువ కెరుక నెత్తె మెన అంక పూర్తి దయిరిమ్ అస్సె.

9

దేముడు పూర్గుమ్ నిసాన్ల యూదుల్

1-2 అంచి పెట్టి ఒగ్గర్ దుకుమ్ బాద కెద్దొడ్ తెదొడ్ తాఁ గెతయ్. నిజుమి, క్రీస్తుచొ మాన్సు ఆవ్ సత్తిమ్ సంగితసి. జా దుకుమ్చి రిసా అంచి ఆత్మతె దేముడుచి సుద్ది తిలి ఆత్మ అంక సాచి జతయ్.

3 అంచి దుకుమ్ కిచ్చొక మెలె, జయ్యి సెకుమ్తె ఆవ్ జెర్మిలి రిసా జేవ్ అంచ సొంత మాన్సుల్ అంచ బావుడ్లు జవుల, చి జోవయింక 'యేసుక్రీస్తుక సంపజతు' మెన అంక కెద్ది ఆస మెలె, ఆవ్ క్రీస్తు తెంతో పిట్టవ జా నాసెనుమ్తె గెలి జోచి రచ్చన జోవయింక దొర్కు జతి జలె, జోచి ఉప్పిర్చి అంచి ప్రేమక జోవయింతె తెంతో విడ్డల్ జతయ్.

4 జోవయించి రిసా కిచ్చొక అంక తెద్ది ఆస అస్సె మెలె, 'అంచయ్ మాన్సుల్ జా అంకయ్ బక్తి కెర్త, అంచి గవురుమ్ దెకయ్తు' మెన దేముడు పూర్గుమ్ నిసాన *ఇస్రాయేలులు జోచ పుత్తర్పులు జతి జోచి †ఉజిడి, జోవయించి నెడిమి తతి వరుమ్ పూర్గుమ్ తెంతో దేముడు జోవయింక జోచి

† 8:36 8:36 కీర్తనలు 44:22. * 9:4 9:4 'ఇస్రాయేలులు' మెలె, తొలితో యాకోబు పూర్గుమ్చొక ఎత్తి అదికారుమ్ తిలో దేముడు జా నావ్ తిలో, ఆదికాండుమ్ 32:28. పడ్డొ జోవయించి సెకుమ్ మొత్తుమ్క 'ఇస్రాయేలులు' మెన నావ్ తిలన్. † 9:4 9:4 నిర్గమకాండుమ్ 33:18-23.

‡ప్రమానుమ్ కోడు దిలన్, జోచ కీఆగ్గుల్ దిలన్, జోచి *బక్తి కెర్తి ఆగ్గు దిలన్, †రచ్చించుప కెర్తొసా జెంక దిలిన్చి రిసాచ ప్రమానల్ దిలన్.

5 అబ్రాహామ్, ఇస్సాకు, యాకోబు జోవయించయ్ పూర్ణుమ్చ. అన్నె, జో మాన్సు జలిన్చి జెర్మున్క దెకిలె, జోవయించి సెకుమ్తె రచ్చించుప కెర్తొసా జలో క్రీస్తుయి జెర్మిలన్. ‡ఎత్కిచి ఉప్పిరి అదికారుమ్ తిలో దేముడుక జోబర! కెయెక తెయెక జోవయింక గవురుమ్ తవున్! ఆమేన్.

6 గని యూదుల్ ఒగ్గర్జిన్ అన్మానుమ్ జలిసి దెకిలె 'దేముడు పూర్ణుమ్ సంగిలి ప్రమానుమ్ కోడుక పిట్టి' మెన తుమ్ ఉచర నాయ్. పిట్టి నాయ్. కిచ్చొక ఇసి మెంతసి మెలె, †ఇస్రాయేలుచి సెకుమ్తె జెర్మిలనతె సగుమ్జిన్క 'ఇస్రాయేలులు' మెనుక నెంజె,

7 *అబ్రాహామ్చి సెకుమ్తె జెర్మిలన సగుమ్జిన్క 'జోవయించ బోదల్ జవుల' మెనుక నెంజె. అబ్రాహామ్చి పెట్టిచ సగుమ్జిన్ జోచ నిజామ్చ బోదల్ నెంజిలిన్చి అర్దుమ్ కిచ్చొ మెలె, పూర్ణుమ్ దేముడు అబ్రాహామ్క,

†“తుచి సెకుమ్చ ఎత్కితె ఎక్కి ఇస్సాకుచి తెడి జెర్మిలనకయ్

'తుచయ్' మెనిందె”
మెన ప్రమానుమ్ సంగిలన్.

8 ఈంజ టాలిచి అర్దుమ్ కిచ్చొ మెలె, మాములుమ్ ‡ఆగ్ జెర్మున్క జోచి సెకుమ్తె జెర్మిలన నాయ్, గని దేముడుచి †ప్రమానుమ్కయ్ జెర్మిలనక 'అబ్రాహామ్చి సెకుమ్చ' మెనుక జయెదె.

9 జా ప్రమానుమ్ సంగిలి పొది దేముడు అబ్రాహామ్క,
*“సంగిలి సమయుమ్ జా అయ్లి మెలె, ఆవ్ అన్నె జెయిందె,
చి సారాక పుత్తది జెర్మెదె”
మెన ప్రమానుమ్ సంగిలన్.

10 జా ఏక్, అన్నె, అమ్చొ పూర్ణుమ్చొ ఇస్సాకుచి తేర్చి రిబ్కా జో ఎక్కి మున్సున్ తెన్ కల్వల్క అంగి జలి పొది,

11 జేవ్ కల్వల్ ఇన్నె నే జెర్మితె అగ్గె, జోవయింతె కో సత్తిమ్ కో పాపుమ్ కెరుక నేతయ్ జలెకి, 'కచ కమొచి

రిసా నాయ్, గని కక్క నిసాన్ల అంచి ఇస్టుమ్ తయెదె గే, జోవయింకయ్ నిసాన' మెన మాన్సుల్క నిసాన బుకార్తి జోచి ఇస్టుమ్ జెయిమ్ జంక మెనయ్,

12 రిబ్కాక దేముడు,
†“దకిలోచి సేవ వెల్లో కెరెదె”

మెన సంగిలన్.
13 అన్నె, అన్నెక్తె జో,
‡“దకిలో జలో యాకోబుక ప్రేమ కెర్లయ్,
గని వెల్లో జలో ఏసావుక విరోదుమ్ జలయ్”
మెన రెగ్గయ్లన్.

14 జలె, అమ్ కిచ్చొ మెనుక? ఎత్కి అదికారుమ్ తిలో దేముడు కెర్లిన్క 'నాయిమ్ నాయ్, సత్తిమ్ నాయ్' మెనుక జయెదె గే? జయె నాయ్. దస్సి మెనుక నాయ్.

15 కిచ్చొక మెలె, మోసేక జో,
‡“కచి ఉప్పిరి దయ తియిదె గే, తియిదె.
కక్క కన్కారుమ్ దెకిన్దె గే, దెకిన్దె”

మెన సంగిలన్.
16 కేన్ మాన్సుచి ఇస్టుమ్తె నాయ్, కేన్ మాన్సుచ కమొతె నాయ్, గని దేముడుచి దయతె.

17 అన్నె, దేముడుచ కొడెతె రెగిడ్డి రితి, పడ్డొ ఇస్రాయేలుల్క అల్లర్ కెర్తె తిలో ఐగుప్తు దేసిమ్చొ రాడ్ జివ్ తిలో పరో రానొక దేముడు,

*“ఒండి లోకుమ్తె అంచి నావ్ సాడుప జవున్ మెన, తుచితె జర్గు జతి కామ్తె అంచి సెక్తి దెకయ్తి రిసాయి తుక ఆవ్ టీచడ అస్సి”
మెన సంగ తెద్రయ్లన్.

18 కచి ఉప్పిరి జోచి దయ తియెదె గే, జోచి ఇస్టుమ్. కచి జివ్ రాడ్ కెరెదె గే, జోచి ఇస్టుమ్!

19 దస్సి సంగిలె, “దస్సి జలె, దేముడుచి ఇస్టుమ్క జో కెర్తిసి జోచి పూచి. జాకయ్, జో కిసి కక్క పాపుమ్ వయడుక జయెదె! అమ్ రచ్చించుప జంక జోచి సెలవ్ నెంజిలె, కిసి అమ్చి పూచి జయెదె! జా పాపుమ్ వయుక కిసి అమ్చి పూచి జయెదె!” మెంతె,

20 గని, ఓ మాన్సు, తుయి కొన్నొ, చి దేముడుచి కోడుక జబాబ్ అన్నె దెతె! మత్తిక తెయార్ కెర్లి గేడి జాక తెయార్ కెర్లి కుమ్మరొక †“కిచ్చొక ఈంజయి రూపుమ్ అంక దిలది?”

‡ 9:4 9:4 ఆదికాండుమ్ 15:18, 17:1-21, 28:13, నిర్గమకాండుమ్ 2:24, 6:2-8, 19:5, 34:10-27, సమూయేలు దొన్నిచి పుస్తకమ్ 23:5. § 9:4 9:4 నిర్గమకాండుమ్ 20:1-17, ద్విత్వీయోపదేశ కాండుము 5:1-22, 10:1-5. * 9:4 9:4 నిర్గమకాండుమ్ 25-31 అద్యయల్. † 9:4 9:4 యెసయా 53 అద్యయమ్, యిర్మీయా 23:5-6. ‡ 9:5 9:5 నెంజిలె, 'ఎత్కిచి ఉప్పిరి అదికారుమ్ తిలో దేముడు జోయ్యి. జోవయింక జెయ్యి!...'. § 9:6 9:6 మెలె 'యాకోబుచి'. * 9:7 9:7 యాకోబుక అబ్రాహామ్ మంత్రొ అస్సిన్; అబ్బినొచొ అబ్బిన్ జయెదె. † 9:7 9:7 ఆదికాండుమ్ 21:12. అబ్రాహామ్చి తేర్చి సారాక బోదల్ నెంజితికయ్, 'అంచి గొతిమాన్సు జలి హాగరు తెన్ అంచి నావ్ తెన్ బోద పాయి' మెన సారా సంగితికయ్, అబ్రాహామ్ దస్సి కెర్లన్, చి 'ఇస్రాయేల్' మెన పుత్తు పాయిలన్. ఆదికాండుమ్ 16 అద్యయమ్. ‡ 9:8 9:8 తేర్చి సారాచి గొతిమాన్సు హాగరు తెన్ అబ్రాహామ్ పాయిలో పుత్తున్ ఇస్రాయేల్ ఆగెతె జెర్మున్ జలోసా జయెదె. మాన్సుచి ఇస్టుమ్కయ్ పాయిలోసా జోచి రిసా మాములుమ్ అబ్రాహామ్చి సెకుమ్తె జెర్మిలనక ఇస్రాయేల్చి పెట్టి జెర్మిలన, ఇస్రాయేల్చి సెకుమ్చ టాలి జయెదె. § 9:8 9:8 ఇస్సాకు ఎత్కి అదికారుమ్ తిలో దేముడుచి ప్రమానుమ్కయ్ జెర్మిలోసాచి రిసా ఎత్కి అదికారుమ్ తిలో దేముడుచి ప్రమానుమ్ నంప కెర్లనక, మెలె యెసుక్రీస్తుక నంప కెర్లనకయ్ ఇస్సాకుచి పెట్టి జెర్మిలన ఇస్సాకుచి సెకుమ్చ టాలి జయెదె. * 9:9 9:9 ఆదికాండుమ్ 17:19-21, 18:10, 14. † 9:12 9:12 ఆదికాండుమ్ 25:23. ‡ 9:13 9:13 మలాకి 1:2-3. § 9:15 9:15 నిర్గమకాండుమ్ 33:19. * 9:17 9:17 నిర్గమకాండుమ్ 9:13-16. † 9:20 9:20 యెసయా 29:16, 45:9.

మన పునెదె గే?

21 నాయ్. జా మత్తిచి ఉప్పిరి కుమ్మరొక పూర్తి అదికారుమ్. జయ్యి మత్తిబెండక సూటిచి గవురుమ్చి కెరెదె గే, గవురుమ్ నెంజిలి కామ్చి రిసాచి కెరెదె గే, జోచి ఇస్టుమ్.

22-23 జలె, పాపుమ్చి ఉప్పిర్చి జోవయించి కోపుమ్ దెకవుక మెన, జోచి సెక్తిచి రుజ్జు దెకవుక మెన దేముడుక ఇస్టుమ్ జలెకి, జోచి పరలోకుమ్చి ఉజిడితె, గవురుమ్తె పడ్డొక బెదవనుక మెన జో అగ్గె తెంతో నిసాన్ల గేడివొక జో కెర్తి ఎదివాట్ దయ జాన్తి ఎదక జోవయించి సిచ్చు జత నాసెనుమ్తె గెత, గేడివొ ఒండి పాపుమ్ జో మదెనె ఒగ్గర్ సేంపు ఒర్సుప జా రకితె తిలె, జోచి దయ!

24 జో ఎదివాట్ దయ కెర్ల నిసాన్ల గేడివొ కొన్స మెలె, ఆము. ఆమ్ కొన్స మెలె, యూదుల్ తెంతో ఆమ్ సగుమ్జిన్క జో బుకారా అస్సె, గని యూదుల్ నెంజిలస తెంతో కి అన్నె మాన్సుల్క బుకారా అస్సె.

25 జోచ కబుర్లు పూర్లుమ్ సంగితె తిలో హోసయ అత్తి దేముడుచ కొడొతె రెగిడ్లి రితి,

‡“అంచయ్ మాన్సుల్” మెన ఆవ్ అగ్గె నే సంగిలసక

తెదొడక ‘అంచయ్’ మెనిందె. ఆవ్ అగ్గె ప్రేమ నెంజిలిన్క ‘ఆవ్ ప్రేమ కెర్లిసి’ మెనిందె.”

26 §“అన్నె, ‘తూమ్ అంచ మాన్సుల్ నెంజుసు’ మెన అగ్గె జో సంగిలి టాన్తె తెదొడక ‘జీవ్ తిలో, జీవ్ దెతో దేముడుచ పుత్తర్లు జేవ్’ మెన మాన్సుల్ సంగుల.”

27 అన్నె, ఇస్రాయేలులు మెల అమ్చ యూదుల్చి రిసా దేముడుచ కబుర్లు సంగితె తిలో యెసయా పూర్లుమ్చొ కిచ్చొ సాడుప కెర్లి రితి జలన్ మెలె,

*“సముద్రుమ్చి ఒడ్డుచి ఇన్కుచ గిడ్డల్ కెత్తి జవుల గే, ఇస్రాయేలుచ పుత్తర్లు జల యూదుల్ దస్సి ఎత్తివాట్ జిన్ జవుల, గని జోవయింతె సేంసిల రిత ఎక్కి దొన్ని రిత రచ్చించుప జవుల.

28 కిచ్చొక మెలె, ఈంజ లోకుమ్చ మాన్సుల్చి ఉప్పిరి కిచ్చొ సిచ్చుచి

తిర్పు ప్రబు ఉచరెదె గే, సత్తు తెన్ తంద్రతెన్ జో జర్లు కెరెదె.” మెన రెగ్ల అస్సె.

29 అన్నె జా నే జతె అగ్గె తెంతో జో యెసయాచి అత్తి జో దేముడు ప్రబు రెగ్లయ్లి రితి జర్లు జా అస్సె. కిచ్చొ మెన మెలె,

†“అమ్క సిచ్చు నే జత బోదల్ సగుమ్జిన్ సేన్సి రితి

పరలోకుమ్చ ఎత్తి అదికారుమ్ తిలో దేముడు ప్రబు సెలవ్ దెతో నాయ్ జలె, ‡సాదోమ అన్నె గొమొరా పట్టల్చి రితి సిచ్చు జా కుడ్డె నాసెనుమ్ జతమ్” మెన రెగిడ్లి కోడు.

30 జలె, కిచ్చొ మెనుమ? ఈంజయి. సత్తిమ్ వాట్ నే చజిల యూదుల్ నెంజిలస దేముడు దెతి పున్నిమ్ జా అస్తి. కిసి మెలె, నముకుమ్ వాట్. యేసుక్రీస్తుక నంపజలి వాటు.

31 గని ఆగ్నల్ వాట్ పున్నిమ్ జంక ఉచర్ల అమ్చ ఇస్రాయేలుల్ మెల యూదుల్ ఆగ్నల్చ కమ్మొవాట్ పున్నిమ్ ఇండుక నెత్త ఆగ్నల్ తిలిసి నెరవెర్సుప నే కెర, ఒడుప జల.

32 నముకుమ్ వాట్ నాయ్ గని కమ్మొ వాటి రచ్చన దొర్కు కెరనుక ఉచర్ల. వట్టెచొ పత్రె పిన్ల నేడ్ల రిత జాఁ ఒడుప జా అస్తి.

33 వట్టెచొ పత్తురు మెలె, యేసుక్రీస్తు. యేసుక్రీస్తుచి ఉప్పిరి నంపజతిసి నే జతిన్చి రిసా అన్నెక్ కోడుతె తిలి రితి. కేన్ కోడు మెలె,

§“ఈందె, ‘సియోను’ మెల అమ్చ యూదుల్చి వట్టె ఏక పత్తురు ఆవ్ గల్లసి.

జేవ్ నంప నెంజ జో పత్రె, జో సాప్రయ్ పిసిర సేడుల.

గని జోచి ఉప్పిరి కో జో నముకుమ్ తివుల గే, జెవ్వి కచితుమ్ లాజ్ జతి నాయ్, ఒడుప జతి నాయ్” మెన రెగ్ల అస్సె.

10

యేసుక్రీస్తుకయ్ నంపజలెకయ్ రచ్చించుప జంక జతిన్

1 బావుడ్లు, నంపనెంజిల అమ్చ యూదుల్చి రిసా “జేవ్ కి నంపజా రచ్చించుప జతు” మెన అంక జివు డడ్డ దేముడుక ఆవ్ ప్రార్దన కెరె తత్తసి.

2 నిజామి దేముడుచి సేవ కెరుక యూదుల్ ఆస తెన్ అస్తి మెన ఆవ్ సాచి జతసి, గని జో దెతి రచ్చన కిసిచి గే అర్దుమ్ నే కెరన పొరపాట్ జా గెచ్చు అస్తి.

3 మెలె, దేముడు దెతి పున్నిమ్ కేన్ వాటు దొర్కు జతయ్ గే, అర్దుమ్ నే కెరంతె జోవయించి సొంత సెక్తిక పున్నిమ్ జంక ఉచర. దేముడు పున్నిమ్ దెతి వరుమ్ నజన్తి రితి దాక్ కెరంతి నాయ్.

4 మెలె, ఎక్కి క్రిస్తుచి, తెడి ఆగ్నల్ సికడ్డి పున్నిమ్ దొర్కు జతయ్, ఆగ్నల్తె కోర్ప జా జలిసి కుట్టయ్తోసా నెరవెర్సుప కెర్లొసా జొయ్యి, చి జోచి ఉప్పిరి కో జోవయించి నముకుమ్ తివుల గే, జోవయించి పాపుమ్ జో పుంచెదె.

5 మోసేచి అత్తి రెగిడ్లిసి ఏక్ కిచ్చొ అస్సె మెలె,

*“ఆగ్నల్తెచి పున్నిమ్ కో పూర్తి నిదానుమ్ ఇండుల గే,

‡ 9:25 9:25 హోసయ 2:23. § 9:26 9:26 హోసయ 1:10. * 9:27 9:27 యెసయా 10:22, 23. † 9:29 9:29 యెసయా 1:9. ‡ 9:29 9:29 అదికాండుమ్ 13:13, 18:20, 19:24-25. § 9:33 9:33 యెసయా 8:14, 28:16, యావేలు 2:32. * 10:5 10:5 లేవీయాండుమ్ 18:5.

జేవ్చి తెన్ జివుల”
మెన రెగ్గ అస్సె.

6 †గని నముకుమ్ వాట్ పున్ముమ్ జతిన్చి రిసాచి ఏక్ కోడు ఉచరుమ. “పరలోకుమ్తె కో వెగ గెచ్చుల? ‘క్రీస్తుక ఉత్రవ కడ ఆన్తి రిసా’ మెన్ము.”

7 నెంజిలె, “బూలోకుమ్క ఎట్టో లోకుమ్తె కో ఉత్ర గెచ్చుల?”; ‘క్రీస్తుక మొర్ను తెంతో వెగవ కడ ఆనుక’ మెన్ము. నాయ్, దస్సి మెన నాయ్.

8 నముకుమ్ వాట్ చి రచ్చునచి కోడు కేనె గెతిసి నెంజె, కిచ్చొ కామ్ కెర్తిసి నెంజె. రచ్చున దూరి నాయ్. రచ్చునచి కోడు పాసి అస్సె. తుమ్చి చోడితె, తుమ్చి పెట్టి అస్సె. మెలె, క్రీస్తుచి ఉప్పిర్చి నముకుమ్చి రిసా అమ్ సుబుమ్ కబుర్ బోదన కెర్తసుమ్. జయ్యి కోడు.

9 మెలె, యేసుక ‘పరలోకుమ్చొ ప్రబు జొయ్యి’ మెన మాన్సుచి మొక్కె కో నంగ ఒప్పన, ‘మొర్ను తెంతో దేముడు అబ్బొసి జోక విడ్డల్ కెర అన్నె జియడ్లన్’ మెన పెట్టి నిదానుమ్ నంపజవుల గే, జెవ్వి రచ్చించుప జవుల.

10 కిచ్చొక మెలె, †మాన్సు జోచి పెట్టి నంపజలె, జోచి పాపుమ్ వుంచి జయెదె. జోచి చోడి ఒప్పనై, జో రచ్చించుప జయెదె.

11 దేముడుచ కొడొతె రెగ్గయ్లిన్ ఉప్పిరి ఏక్ దెకిలమ్. కిచ్చొ మెలె,

‡“జోచి ఉప్పిరి జోచి నముకుమ్ తిలో కేన్ మాన్సుకి కచితుమ్ లాజ్ జతి నాయ్ ఓడుప జతి నాయ్”
మెన రెగ్గ అస్సె.

12 కొన్న మెలె, యూదుల్క గ్రీసు దేసిమ్చ సుదల్క కక్కయ్ దేముడు తేడ దెకె నాయ్. జొయ్యి ప్రబు ఎత్తికయ్ ప్రబు, చి జోక నంపజా, జో దెతి రచ్చున నజీతో ఎత్తి మాన్సుక జోచి వరుమ్ జో దెయెదె.

13 దేముడుచి కొడొతె రెగ్గయ్లి రితి;

*“ప్రబుచి రచ్చున నజన్తో ఎత్తి మాన్సు తుచితెయి రచ్చున అస్సె మెన ఒప్పన రచ్చించుప జయెదె”
మెన అస్సె.

సుబుమ్ కబుర్ సూనయ్తి వూచిచి రిసాచి కోడు

14 జలె, మాన్సుల్ క్రీస్తుక నంప నే జలె, జోవయించి రచ్చున కిసి నజుల! జోచి రిసా నే సూన తిలె, జోక కిసి నంపజవుల! కో బోదన కెరుక నే గెలె, కిసి జోచి రిసా సూనుల!

15 అన్నె దేముడు నే తెద్రయ్లె, మాన్సుల్ కిసి జోచి బోదన కెరుల! దేముడుచి కొడొతె రెగ్గయ్లి రితి;

†“సుబుమ్ కబుర్ కో బోదన కెరుల గే, జోవయించ చట్టో కెద్ది సూటి!”
మెన అస్సె.

16 గని సూన్ల అమ్చ ఇస్రాయేలుల్ ఎత్తిజిన్ నంపజా అస్తి మెన ఉచర నాయ్. యెసయాచి అత్తి దేముడు అన్నె రెగ్గయ్లి రితి;

‡“ప్రబు, అమ్ సూనయ్లిసి కో నంపజా అస్తి?”
మెన రెగిడ్లి కోడు.

17 జలె, కొడొ సూనయ్లెకయ్ మాన్సుల్ నంపజవుల. జేవ్ కిచ్చొ సూనుక మెలె, క్రీస్తుచి రిసాచి సుబుమ్ కబుర్ సూనవ బోదన కెర్తిసి.

యూదుల్ ఒగ్గర్జిన్ సూనుక నెసిలిన్

18 జలె, అమ్చ యూదుల్క ‘సుబుమ్ కబుర్ సూన తతి నాయ్ గే?’ మెన ఆవ్ పుసితసి. సూనయ్ అస్తి. జా ఒండి లోకుమ్తె సూనయ్ జలిన్చి రిసా దేముడుచి కొడొతె రెగ్గయ్లి ఏక్ కోడు బెదితయ్.

‡“జోవయించి అవాడ్ ఒండి లోకుమ్తె సూనయి జా అస్సె, ఎత్తి దిక్కుతె కెద్ది దూరి జలెకి, జోవయించ కొడొ సూనయ్ జా అస్తి”
మెన రెగ్గ అస్సె.

19 జలె, ఆవ్ అన్నె పుసితసి; ‘ఇస్రాయేలు పైజల్ అర్దుమ్ కెరంతి నాయ్ గే?’ మెన పుసితసి జలె, మోసేచి అత్తి దేముడు,

*“అంచ యూదుల్ నెంజిలనక తుమ్ యూదుల్ గోస జతి రితి కెరిందె,
బుద్ది నెంజిలి దేసిమ్చచి ఉప్పిరి తుమ్క కోపుమ్ జెతి రితి ఏక్ కామ్ జర్గు కెరిందె”

మెన యూదుల్ నెంజిలన నంపజలిన్చి రిసా యూదుల్ గోస జతిన్చి రిసా రెగిడ్లి కోడు.

20 పడ్డొ, యూదుల్ నెంజిలన క్రీస్తుక నంపజా దేముడు తెన్ బెదితిన్చి రిసా అన్నె సొస్టుమ్చి కోడు దేముడు యెసయాచి అత్తి రెగ్గ అస్సె.

†“అంక చజుక నే ఉచర్లన, అంక చజ అస్తి. అంచి రిసా నే పుసిలనక, ఆవ్ డీస అస్తి”
మెన రెగిడ్లి కోడు.

21 గని అమ్చ ఇస్రాయేలుల్చి రిసా జోచి అత్తి కిచ్చొ రెగ్గ అస్సె మెలె,

‡“కోడు నే సూన్త ఇస్టుమ్ అయ్లి రితి బుల్ల పైజల్క ఒండి మెద్దెనె అత్తో చంపొ కెర బుకార్తె తిలయ్, గని ఆవ్ దెతి వరుమ్ నెసిల”
మెన రెగ్గ అస్సె.

† 10:6 10:6 6-7 ద్వితీయోపదేశ కాండుము 30:12-14చి కోడు పవులు ఇన్నె బెదయ్తయ్. ‡ 10:10 10:10 నెంజిలె, మాన్సు జోవయించి పెట్టి నంపజా జోవయించి చోడి ఒప్పనై, జోవయించి పాపుమ్ వుంచి జయెదె, జో రచ్చించుప జయెదె. § 10:11 10:11 యోవేలు 2:32, రోమయుల్ 9:33. * 10:13 10:13 యోవేలు 2:32. † 10:15 10:15 యెసయా 52:7. ‡ 10:16 10:16 యెసయా 53:1. § 10:18 10:18 కీర్తనలు 19:4. * 10:19 10:19 ద్వితీయోపదేశ కాండుము 32:21. † 10:20 10:20 యెసయా 65:1. ‡ 10:21 10:21 యెసయా 65:2.

11

యూదులక దేముడు పూర్తి నే ములిలిన్

1 అప్పె కిచ్చొ పునితసి? జోవయించ యూదులక దేముడు పూర్తి ముల అస్సె గే? నాయ్! ఆవ్ సొంత కి ఇస్రాయేలుడు, అబ్రాహామ్ చి సెకుమ్తె జెర్మిలోసా, బెన్యామీను చి తెగతె జెర్మిలోసా.

2 జో దెతి రచ్చన తంక మెన జో అగ్గె తెంతో జాన్ల నిసాన మాన్సుల్క దేముడు ములె నాయ్. జా పొదిచ ఇస్రాయేలుల్చి రిసా కిచ్చొ మెన దేముడుచి మొక్కె ఏలీయా పూర్ణమ్చొ ఏడ తీర్పు సంగిలన్ గే దేముడుచి కొడెతె అస్సె.

3*“ప్రబు, తుచ కబుర్లు సంగితనక మార అస్సి. తుచి నావ్ తెన్ బందిల గుడివొ బొసుడవ అస్సి. అప్పె ఆవ్ ఎక్కిలోయి తుచ కబుర్లు సంగితోసా అస్సి, చి అంక కి మారుక కోర్ప జతతి” మెన ఏలీయా ఏడ్లన్.

4 గని దేముడు జొక
†“బయలు దేముడు’ మెలోసాక నే జొకరె అంకయ్ నిదానుమ్ తత్తు మెన సత్తు వెయిల్జిన్ యూదుల్ జా పాపుమ్తె నే సేడ్డి రితి పిట్టవ అస్సి”

మెన సంగిలన్.
5 అప్పె కి దేముడుచి దయక జో నిసాన సేసిల యూదుల్ అస్సి.

6 గని జోవయించి రచ్చన కమ్మోవాట్ నాయ్, గని జోచి దయ వాటు జోవయింక దొర్కు జా అస్సె. కమ్మోవాట్ నాయ్, నెంజిల దయ మెన సంగితిక, దయ జయె నాయ్.

7 జలె, కిచ్చొ రుజ్జు డీస్తయ్ మెలె, జేవ్ చజాక ఉచర్లిసి అమ్చ ఇస్రాయేలుల్క పిట్ట అస్సె. జోవయింతె కక్క దేముడు నిసాన్లన్ గే, జోవయింక దొర్కు జా అస్సె, గని తిలనక జోవయించి జీవ్ రాడ్ జా గెచ్చ, జా రచ్చన జేవ్ నజనుక నాయ్.

8 దేముడుచి కొడెతె రెగ్గయ్లి రితి;
‡“అప్పె ఎద కి ‘దెకుత్ నాయ్, సూన్తు నాయ్’ మెనయ్, జేవ్ గుడ్డి బొయ్రో తతి రితి, జుమితన తతి రితి, దేముడు జర్గు కెర అస్సె” మెన రెగిడ్డి కోడు.

9 పడ్డొ, దావీదు పూర్ణమ్చొచి అత్తి రెగిడ్డి రితి కి;
§“జోవయించి విందు అన్నిమ్ జోవయింక బొసు జలి రితి జా, జోవయింక దెర్ను సేడవ్సు, సిచ్చు అస్సు.

10 జేవ్ గుడ్డి జా దెకుత్ నాయ్, చి జోవయించి పాటి కుట్టి జలి రితి జా, జోవయించి పాపుమ్చి జాడు కెయెక తెయెక వయుతు” మెన రెగిడ్డి కోడు.

11 జలె, జేవ్ ఇస్రాయేలుల్ పిసిర్లిసి జలె, ‘పూర్తి సేడయ్ గెతు’ మెలి ఉద్దెసుమ్కయ్ దేముడు జర్గు కెర్లన్ గే? మెన ఆవ్ పునితసి. నాయ్! గని జేవ్ ఇస్రాయేలుల్ నంప నెంజి పొరపాట్ జతికయ్, రచ్చన దొర్కు జతి వాటు యూదుల్ నెంజిలనక దొర్కు జా అస్సె. ‘జేవ్ యూదుల్ నెంజిలన రచ్చించుప జతిసి అమ్చ ఇస్రాయేలుల్ దెక గోస జా బుద్ది ఉచరంతు’ మెనయ్ దేముడు దస్సి జర్గు కెర అస్సె.

12 జలె, జేవ్ ఇస్రాయేలుల్ పొరపాట్ జలిసి ఒండి లోకుమ్చక దేముడు దెతి సొమ్నూరుమ్ దొర్కు కెర అస్సె జలె, జేవ్ ఇస్రాయేలుల్ ఒడుప జలిసి యూదుల్ నెంజిలనక సొమ్నూరుమ్ కెర అస్సె జలె, జేవ్ యూదుల్ జల ఇస్రాయేలుల్ ఎత్కిజిన్ పడ్డొక రచ్చించుప జలె, లోకుమ్క అన్నె కెద్ది సొమ్నూరుమ్ జయెదె!

13 అప్పె, జలె, ఒత్త తిల తుమ్ యూదుల్ నెంజిలనక, జలె, ఆవ్ కిచ్చొ సంగితసి మెలె, తుమ్కయ్ సుబుమ్ కబుర్ సూనవుక మెన ప్రబు అంక జోచొ బారికి కెర తెద్రవ అస్సె. ఈంజ కామ్చి రిసా ఆవ్ ఒగ్గర్ సర్ల జతసి.

14 తూమ్ రచ్చించుప జతిసి అమ్చ యూదుల్ దెకిలె, ఇదిల్ జవున్ గోస జా, జోవయింతె నగుమ్జిన్ ప్రబుచి రిసాచి సుబుమ్ కబుర్క ఇస్టుమ్ జవుల, చి జో దొర్కు కెర్తి రచ్చన నజనుల. దస్సి జలె, జేవ్ కి రచ్చించుప జతి కామ్తె ఆవ్ ఇదిల్ బెద తయిందె.

15 ఈంజ కిచ్చొక అంచి ఆస మెలె, దేముడు అమ్చ యూదుల్క గడియ ములయ్లి రిసా, ఒండి లోకుమ్చ అన్నెమాన్సుల్ కి జోవయింతెన్ బెదుక వాటు అయ్లి. దస్సి కి దేముడు అమ్చ యూదుల్కయ్ అన్నె బెదవన్లె, మొర్ను తెంతో పిట్టవ జా జేవ్ కి నొవర్ జివుల.

రూక్తె కొమ్మల్ అంటుప కెర్లిన్

16 ‘నొవొ’ మెన తొలితో బలి దిలి పాకుమ్ దేముడుక దిలి రిసా సుద్ది జా అస్సె జలె, జా ఒండి పాకుమ్ సుద్ది జలి రితి జతయ్. అన్నె, రూక్చి చేరు సుద్ది జలె, కొమ్మల్ కి సుద్ది జవుల.

17 జలె, దేముడు నిసాన్ల ఇస్రాయేలుల్క ‘ఒలీవ రూకు’ మెనుమ. తుమ్ యూదుల్ నెంజిలనక ‘వెర్రి ఒలీవ రూక్చ కొమ్మల్’ మెనుమ. జలె, జో చెంగిలో ఒలీవ చెట్టెచ కొమ్మల్ సగుమ్ కండి జా సేడ అస్సి మెనుమ, అన్నె జా రూక్చ కొమ్మల్ గెలిన్తె తూమ్ యూదుల్ నెంజిల జా వెర్రి ఒలీవ రూక్చ కొమ్మల్ అంటుప జలదు, జో చెంగిలో రూక్చి చేరు దెతి సెక్కితె బెద తుమ్ చెంగిల్ జతి రిసాయి, జేవ్చి జివుక తుమ్ జతి రిసాయి.

18 దస్సికయ్, ‘జో చెంగిలో రూక్చ కొమ్మల్ జలమ్ ఆము’ మెన తుమ్ గవురుమ్ ఉచరన నాయ్. గవురుమ్ ఉచరనుక దెర్లె, తుమ్ కిచ్చొ ఉచార కెర మెలె, తుమ్చి

* 11:3 11:3 రానల్ మొదొల్ పున్కుమ్ 19:10, 14. † 11:4 11:4 రానల్ మొదొల్ పున్కుమ్ 19:18. ‡ 11:8 11:8 ద్వితియోపదేశ కాండుము 29:4, యెసయా 29:10. § 11:9 11:9 కిర్తనలు 69:22, 23.

సెక్తిక చేరు జియె నాయ్, గని చేరుచి సెక్తికయ్ తుమ్ జియె అస్సున్.

19 తూమ్ కిచ్చొ ఉచర్తె మెలె, “అము అంటుప జతి రిసాయి ఎజోమాని కొమ్మల్ సేడయ్లన్”.

20 జా కోడు కి నిజుమ్, గని జేవ్ జోవయించి అన్మానుమ్చి రిసా సేడయ్ జల. గని తుమ్ నముకుమ్ వాటు అంచుప జా టీవ్తిసి. జేవ్ క ఉప్పిర్ తుమ్చి రిసా తుమ్ గవురుమ్ ఉచరన నాయ్, గని దేముడుచి దయక తుమ్ భియ్.

21 కిచ్చొక మెలె, జో రూక్చ సాంత కొమ్మల్ అన్మానుమ్ జలిన్క జో జోవయింక సిచ్చుతె గలిలన్ మెలె, తూమ్ దస్సి అన్మానుమ్ జలె, తుమ్క కి కండ వెంట గెలెదె.

22 దేముడుచి దయచి రిసా కి, జో దెతి సిచ్చుచి సెక్తిచి రిసా కి, తుమ్ చెంగిల్ ఉచర. పొరపాట్ జా సేడ్లనక జేవ్ విలువ జలి సిచ్చు జో దెయెదె, గని జోచి దయచి తెడి తుమ్ తా నముకుమ్ వాట్ ఇండితె తిలె, జోవయించి దయ తుమ్చి ఉప్పిరి తయెదె. తుమ్ జా నముకుమ్ వాట్ నే ఇండిలె, తుమ్క కి కండ వెంట గెలెదె.

23 జేవ్ కి, జోవయించి అన్మానుమ్ ములిలె, జా రూక్తె అన్నె అంటుప జవుల. కిచ్చొక మెలె, జోవయింక అన్నె అంటుప కెర్తె సెక్తి దేముడుచి అత్తి అస్సె.

24 తూమ్ జలె, వెర్రి ఒలీవ రూక్చ కొమ్మల్ కండి జా తుమ్ మాములుమ్ నే బెదితో తోట ఒలీవ రూక్తె అంటుప జా అస్సున్ జలె, అన్నె సాంత జెర్మున్క తోట రూక్తె తా కండి జా తిల కొమ్మల్క జో ఒత్త అన్నె అంటుప కెరుక జయెదె!

25 తుమ్ సాంత గవురుమ్ నే ఉచరంతి రిసా, జో దేముడు బార్ కెర్లి ఈంజ గుట్టు సరిగా అర్దుమ్ కెరన, బావుడ్లు. కిచ్చొ మెలె, ‘నంపజంక’ మెన జో కెత్తిజిన్ యూదుల్ నెంజిలనక నిసాన్ల గే, జేవ్ ఎత్తిజిన్ ప్రబుతె జెతె ఎదక, ఏక్ వెల్లి వాట ఇస్రాయేలుల్ రాడ్ జివ్ జా అస్సి.

26 గని యూదుల్ నెంజిలనతె కక్క కక్క జో నిసాన అస్సె గే, జేవ్ ఎత్తిజిన్ నంపజల మెలె, ఇస్రాయేలుల్ ఎత్తిజిన్ రచ్చించుప జవుల. దేముడుచి కొడెతె,

*“†సియోనుతె రచ్చించుప కెర్తొసా జెర్దెదె.

‘యాకోబు’ మెన నావ్ తిల అమ్చ యూదుల్ తెంతో పాపుమ్బుద్ది జో ఉడడెదె”

అన్నె,

27 * “జోవయించి పాపల్ ఆవ్ కెయ్క గెచ్చవ గెలిందె గే, తెదొడ్క అంచి ఈంజ నే పిట్టి ప్రమానుమ్ కోడు నెరవెర్చుప జయెదె” మెన రెగ్గ అస్సె.

28 తుమ్కయ్ ‘నంపజా రచ్చించుప జతు’ మెన, అప్పెచి మట్టుక నుబుమ్ కబుర్చి రిసా దేముడుక జేవ్ యూదుల్

* 11:26 11:26 యెసయా 59:20, 21. † 11:26 11:26 ‘సియోనుతె’ మెలె, యూదుల్తె, ఇస్రాయేలుల్తె. ‡ 11:27 11:27 యిర్మీయా 31:34, యెసయా 27:9. § 11:34 11:34 యెసయా 40:13, యిర్మీయా 23:18. * 11:35 11:35 యోబు 41:11.

విరోదుమ్ సుదల్ జా అస్సి. గని జో జోవయింక నిసాన దెకిలె, జోవయించ పూర్తుల్క జో సంగిలి ప్రమానుమ్ కోడుచి రిసా, జో జోవయింక ప్రేమయ్ అస్సె.

29 కిచ్చొక మెలె, దేముడు దెతి వరుమ్, జో కక్క కక్క నిసాన బుకార్లిసి, జో మార్పుప కెరె నాయ్. జో దసాచొ నెంజె.

30 తుమ్ అగ్గె దేముడుచ కొడె నే సూన్తె పాపుమ్ తెన్ తిలదు, గని జేవ్ యూదుల్ జోచి కోడు ములిలి రిసా, జో తుమ్చి ఉప్పిరి దయ తియ తుమ్చి పాపుమ్ పుంచ అస్సె.

31 దస్సి జేవ్ అప్పె జోచి కోడు నే సూన్తె పాపుమ్ తెన్ అస్సి. కిచ్చొక మెలె, తుమ్క జో దేముడు రచ్చించుప కెర్లి వాట్కయ్ జేవ్ కి రచ్చించుప జతి రిసాయి.

32 యూదుడు జలెకి, యూదుడు నెంజిలె కి, ఎత్తి మాన్సుక జోచి దయ దెకవుక మెనయ్, ఎత్తిజిన్ ఎక్కి రితి జోచి కోడు నే సూన్లి పాపుమ్తె దెర్చు సేడుక మెనయ్ జో సెలవ్ దా అస్సె.

దేముడుచి గవురుమ్

33 దేముడుచి దయచి సామ్సారుమ్, జోచి బుద్ది, జోచి గ్యానుమ్ కెర్లి తమ్మనచి! జోచ తీర్పుల్ కెర్లి తెల్వచ! కెర్లి తెలివి మెలె, అమ్ మాన్సుల్ కోయి అర్దుమ్ కెరనుక నెత్తుమ్, మెనుక నెత్తుమ్! జోచ కమె అమ్ కోయి పరిచ్చ కెరుక నెత్తుమ్!

34 దేముడుచి కొడెతె,

§ “ప్రబుచి పెట్టి తిలిసి కో కెయ్ జాన అస్సి?

జోక కో బుద్ది సంగుక జయెదె? కోయి నాయ్” మెన అన్నె,

35 * “జో రునుమ్ జతి రితి కో కెయ్ జోక కిచ్చొ దా అస్సి?

కోయి నాయ్, కెయ్ నాయ్, కిచ్చొయ్ నాయ్” మెన రెగ్గ అస్సె.

36 కిచ్చొక మెలె, ఎత్తి జోతె తెంతో జెతయ్, జో జెర్మయ్లో. ఎత్తి జోచి తెడి అస్సె, చి జోచి గవురుమ్ దెకయ్తి రిసాయి అస్సె. కెయ్క తెయ్క జోవయింక జోబర! ఆమేన్.

12

ప్రబుచి ఆత్మసెక్తిక జియె

1 దేముడు దెతి రచ్చన జోచి దయకయ్ తుమ్క దొర్చు జలి రిసా, బావుడ్లు, ఆవ్ బతిమాల్పా జా తుమ్క కిచ్చొ సంగితసి మెలె, జేవ్ జోచయ్ తతి రితి, దేముడుక సర్ల కెర్లి రితి, జోక తుమ్చ ఆగ్ జీవ్ తిలి బలి దిలి రితి తుమ్ బుద్ది ఇండ. ఈంజ సేవ తుమ్క సరి జలిసి.

2 'ఎత్కిజిన్ ఇన దస కమొ కెర్తతి, అమ్ కి కెరుమ్' మెలి రితి ఈంజ కాలుమ్చ కమొ రితి తుమ్ ఇండ నాయ్. తుమ్చి ఆత్మతె నొవ మాన్సుల్ జా, చి ప్రబుచి ఇస్టుమ్ కిచ్చొ కిచ్చొ గే పూర్తి అజ్జ జస్తె. జోచి ఇస్టుమ్ కిచ్చొ మెలె, చెంగిల్ తిలిసి ఎత్కి, జోక సర్ద కెర్తిసి ఎత్కి, కిచ్చొ పొరపాట్ నెంజిలిన్ ఎత్కి మెన పూర్తి తుమ్ అజ్జ జస్తె.

3 మెలె, దేముడు అంక దిలి దయ తెన్ తుమ్క ఆవ్ కిచ్చొ బతిమాల్ప జా సంగితసి మెలె, తుమ్ కో గవురుమ్ ఉచరన నాయ్, గని తుమ్ ఎత్కి మాన్సు జాగర్త తెన్ సరిగా పరిచ్చ కెరన, నముకుమ్చి రిసా దేముడు కక్క కిచ్చొ సెక్తివరుమ్ దా అస్సె గే, తుమ్చితె ఎత్కి మాన్సు చినన, తుమ్క దిలి సెక్తి వాడిక కెర.

4 మెలె, ఎత్కి ఆగ్తె ఒగ్గర్ వాటల్ తవుల, అన్నె ఎత్కి వాటల్క ఎత్కి రితి కామ్ తయె నాయ్, గని ఏక్ వాటక ఏక్ కామ్, అన్నెక్ వాటక అన్నెక్ కామ్ తయెది.

5 దస్సి, అమ్ ఒగ్గర్జిన్ జలెకి, క్రిస్తుచి తెడి ఎత్కి ఆగ్ జా అస్సుమ్, చి ఎత్కిలోక ఎత్కిలో అమ్ తోడు తంక అమ్చి పూచి,

6 జాకయ్, అమ్చితె కక్క ప్రబు కిచ్చొ సెక్తివరుమ్ దా అస్సె గే, అమ్ ఎత్కి మాన్సు బుద్ది తెన్ జా సెక్తి వాడిక కెరుక. ప్రబుచ కబుర్లు సంగితి సెక్తి తిలోసా జలె, ప్రబు దిలి నముకుమ్ తెన్ సంగున్.

7 ప్రబు దిలి కిచ్చొ సేవ కెర్తొసా జలె, జా సేవ కెర్ను. ప్రబుచి బోదన కెర్తి సెక్తి తతోసా జలె, బోదన కెరుక.

8 ప్రబు దిలి సెక్తిక మాన్సుల్క జాగర్తల్ సంగితో దిట్టుమ్ దయిరిమ్ కెర్తొసా జలె, జాగర్తల్ సంగుక, దయిరిమ్ సంగుక. మాన్సుల్క తోడు దెంక సెక్తి తిలోసా జలె, దర్ముమ్ తెన్ దెవుసు. సంగుమ్క ఏలుప కెర్తి సెక్తి తిలోసా జలె, జోవయించి జా కామ్ నిదానుమ్ దెకన్సు. బాదల్ సేడ కన్యారుమ్ జలసక దెకితి సెక్తి తిలోసా జలె, సర్దబుద్ది తెన్ దెకున్.

సర్దబుద్ది ప్రేమబుద్ది తెన్ తా

9 ఎత్కి మెన్సు మాయ నెంతె మాన్సుల్క తుమ్ ప్రేమ దెకితె తా. గర్చి ఎత్కి దూరి కెర, చెంగిల్ తిలిసి దెరన.

10 బాబేన్క దెకితి సత్తిమ్ తెన్ ఎత్కిలోక ఎత్కిలో ప్రేమ దెకితె తా. దాకు కెరన ఎత్కిలోక ఎత్కిలో వెల్లో మెలి రితి దెక.

11 కెయెక బద్దుకుమ్ జా నాయ్, గని దేముడుచి సుద్ది తిలి ఆత్మ, తుమ్చి ఆత్మతె దీవు లగిల్ రిత తా, కెర్దొడ్ కి ప్రబుచి సేవ కెర్తినె తె తుమ్చి ఆత్మ పూర్తి బెదవ.

12 పరలోకుమ్తె తుమ్ బెదితి రచ్చన కచితుమ్ నెరవెర్పువ జంక తిలిన్చి దయిరిమ్క సర్దసంతోసుమ్ తా, బాదల్ ఒర్పువ జా, ప్రార్దన కెర్తె తా,

* 12:16 12:16 సామెతల్ 3:7. † 12:17 12:17 సామెతల్ 3:4. ‡ 12:19 12:19 ద్విత్వీయాపదేశ కాండుము 32:35 § 12:20 12:20 సామెతల్ 25:21, 22.

13 అన్నె సంపజలసక కొత్తుల్ తిలె, తుమ్క తిలిన్క తోడు దాస, చి అన్నె మాన్సుల్క గెరి బుకారా మరియాద దెక.

14 "జోక చెంగిల్ దెకు" మెన, తుమ్క అల్లర్ కెర్తనచి రిసా ప్రబుక తుమ్ ప్రార్దన కెర. "జోక ప్రబు సీచ్చ కెర్ను" మెన తుమ్ ఉచర నాయ్. జా పోన, గని 'జోక చెంగిల్ దెకున్' మెనయ్ తుమ్ కోర్ప జా.

15 అన్నె, సర్ద తెన్ తిలన తెన్ సంతోసుమ్ జా, ఏడ్డన తెన్ ఏడ్డి రితి తోడు తా.

16 ఎత్కిలో తెన్ ఎత్కిలో ఎత్కి మెన్సు తెన్ జియ. * గవురుమ్ జతిన్క ఆస నే జతె, బడాయ్ నెంజిలిన్తె బెద, కిచ్చొ గవురుమ్ ఉచరన నాయ్. తుమ్క తుమ్ బుద్ది తిలన మెన ఉచర నాయ్.

17 కో తుమ్క కిచ్చొ నస్టుమ్ కెర తిలె, జోక తుమ్ కిచ్చొ నస్టుమ్ అన్నెకెర నాయ్. † గని కో తుమ్క నింద కెరుక నెతిరి రితి, ఎత్కిజిన్ చినితి రితి సత్తిమ్ ఇండ.

18 ఎత్కిజిన్ తెన్ సేతుమ్ తెన్ తంక ఆస జా. దస్సి, ఎత్కి మెన్సు తెన్ తతిసి తుమ్ పిట్టవ నాయ్. జేవ్ పిట్టయ్లె, జోవయించి పూచి, గని తూమ్ పిట్టవ నాయ్.

19 ప్రేమ తిల బావుడ్లు, మాన్సుల్ తుమ్క అల్లర్ కెర్లె, జోవయింకయ్ తుమ్ అల్లర్ కెర నాయ్. పోన, దేముడు సీచ్చ కెర్లె, కెర్ను, గని తుమ్ తుక్కె తా. దేముడుచి కొడెతె,

‡ "సీచ్చ కెర్తి సెక్తి అంచి. ఏ జేవ్ అల్లర్ కెర్తనక ఆవ్వి సీచ్చ కెరిందె మెన ప్రబు సంగితయ్" మెన రెగ్గ అస్సె.

20 § "తుమ్చొ విరోదుమ్ సుదొక చూ తిలె, జోక అన్నిమ్ దాస.

జోక తాన్ తిలె, పితిసి దాస. తుమ్ దస్సి కెర్లదు మెలె,

జోచి బోడి ఆగి సువ దిలి రితి జయెదె, చి జో పూర్తి లాజ్ జా తప్పు చినంతిసి జోవయింక నొప్పి దెయెదె."

మెన దేముడుచ కొడెతె రెగ్గ అస్సె.

21 అన్నెక్తో తుమ్క కెర్లి గార్ తుమ్క జిన్తి రితి తుమ్ కోపుమ్ జా నాయ్, గని జో కెర్లి గార్ ఒడుప జా ప్రేమయ్ జిన్తి రితి, తుమ్చ విరోదుమ్ సుదల్క తుమ్ ప్రేమయ్ దెక.

13

అదికారుల్క బియె కెర ఇండ

1 దేసిమ్క ఏలుప కెర్త అదికారుల్క ఎత్కి మాన్సు బితు. కిచ్చొక మెలె, దేముడు సెలవ్ దెతో నాయ్ జలె, అదికారుల్ జా తత్త నాయ్, అన్నె, తిల అదికారుల్ ఏలుప కెరుక జో దేముడుచి ఇస్టుమ్.

‡ 12:19 12:19 ద్విత్వీయాపదేశ కాండుము 32:35 § 12:20 12:20

2 జాకాయ్, అదికారుల్చి కోడుక కో విరోదుమ్ కెర్తతి గే, దేముడు దిలిసచి ఉప్పిరి విరోదుమ్ కెర్తతి, అన్నె, కో జోచి సెలవ్చి ఉప్పిరి విరోదుమ్ కెర్తతి గే, జోవయింక జోయ్యి జెతి సిచ్చ కవుల.

3 అన్నెయ్ కిచ్చొక అదికారుల్క మరెయాద దెకుక మెలె, చెంగిల్ బుద్ది ఇండితనక నాయ్, గని గర్బ కమె కెర్తనకయ్ సిచ్చ కెరుల. అదికారి జలో కేన్ మాన్సుక 'సిచ్చ కెరెదె' మెలె బయిమ్ నెంతె జింక ఇన్సుమ్ జతసు జలె, సత్తిమ్ కెర, చి తుమ్క చెంగిల్ దెకెదె.

4 తుమ్క 'చెంగిల్ తత్తు' మెనయ్ దేముడు జోవయింక జా సేవ దా అస్సె. గని తుమ్ నేరిమ్లు కెరె జలె, తుమ్ బియఁ. కిచ్చొక మెలె, సిచ్చ కెరుక జోక అదికారుమ్ అస్సె. 'నేరిమ్ కో కెరుల గే, సిచ్చ కెర్పు' మెనయ్ దేముడు జోవయించి అదికారుమ్ జోవయింక దా అస్సె.

5 జాకాయ్, సిచ్చ నే సేడ్డి రిసా కి, గని అన్నెయ్ 'దేముడుచి మొక్కె అమ్ అదికారుల్క దస్సి దెకుక మెనయ్, అమ్చి పెట్టి సేంతుమ్ తంక జలె, దస్సి కెరుక అస్సె' మెనయ్ కి, అదికారుల్చి కోడు అమ్ బింక అస్సె.

6 ఇన్నెచి రిసా కి సిస్తు గట్ర దెతను. కిచ్చొక మెలె, సిస్తు నజిత సుంకర్లు చి అన్నె అదికారుల్ ఏలుప కెర తుమ్క దెకుక మెన, జోవయించి కామ్ దేముడు జోవయింక దా అస్సె.

7 జేవ్ ఎత్తిజిన్క దెతిసి జోవయింక దాన. సిస్తు నజుక అదికారుమ్ తిలనక సిస్తుచి డబ్బుల్ దాన, ప్రబుతుమ్క దెతిసి ప్రబుతుమ్క దాన. గవురుమ్క విలువ తిలనక గవురుమ్ దెక, చి మరెయాదక విలువ తిలనక మరెయాద దెక. దస్సి ఎత్తిజిన్క జేవ్చి జేవ్చి మరెయాద కెరుక.

ఎక్కిలోక ఎక్కిలో ప్రేమ కెరె తతిసి

8 ప్రేమ కెరుకయ్, గని వేర రునుమ్ కత్తెయ్ జా నాయ్. కిచ్చొక మెలె, అన్నె మాన్సుల్క కో ప్రేమ ఇండితయ్ గే, ఆగ్గుల్ ఎత్తితె దొర్కు జలిసి నెరవెర్పుప కెర్తయ్.

9 * 'లంజెకమె కెర నాయ్' మెలిన్ జలెకు, 'నరు అత్య కెర నాయ్' మెలిన్ జలెకు, 'చోర నాయ్' మెలిన్ జలెకు, 'అన్నె మాన్సుల్చి ఆస్తిక ఆన జా నాయ్' మెలిసి జలెకు, దేముడుచ ఆగ్గుల్ ఎత్తితె తిలిసి కి ఎక్కి ఒడుగుతె బెదితయ్. కేన్ ఒడుగుతె మెలె,

† "తుక తూయి కెద్ది ప్రేమ కెరంతసి గే, తుచి పాసిచొ మాన్సుక తెద్ది ప్రేమ తుయి కెరుక" మెన దేముడుచ కొడెతె రెగ్గవ అస్సె.

10 అమ్చి పెట్టి ప్రేమ తిలె, పాసిచొ మాన్సుక కిచ్చొ అల్లర్ కెరుక నెనుమ్. జాకాయ్, ప్రేమతెయి ఆగ్గుల్ ఎత్తి నెరవెర్పుప జతయ్.

ప్రబు అన్నె ఉత్త జెతి వెల్లి దీసి పాసి జెతయ్

11 అన్నె, ప్రబు సంగిలి సమయుమ్ పాసి జా అస్సె మెన జాన్సు. మెలె, అగ్గె నిజ తిలె కి, అప్పె ఉట్ట తెలివి జా తంకయ్ అస్సె. సమయుమ్ జా గెచ్చు అస్సె. అమ్ తొలితొ నంపజలి కంట, అమ్చి రచ్చన పాసి జా అస్సె.

12 రాత్ పాయితి రితి, ఉజిడ్ జయెదె. జాకాయ్ అందర్బుద్దిచ కమె వెంట గెల కెర, ఉజిడ్ బుద్దిచ అయ్దల్ గలనుమ.

13 మెద్దెనెచి ఉజిడ్తె బెదిత కమెతె ఇండుమ. మెలె, 'సర్ల కెర్తనుమ్' మెన వెట్కారుమ్ జతిసి, మచ్చితిసి పోన. లంజెకమె, ఆగ్గెచి ఆన ముద్దొ నే కెరంతిసి పోన. కొడె జాజవ జట్టి జతిసి, గోసల్ కెర్తిసి, పోన.

14 గని ప్రబు జలో యేసుక్రీస్తుచి బుద్ది గలన, మాన్సుచి ఆగ్గెచ తుమ్చ ఆనల్ నెరవెర్పుప నే కెరంతి రితి జాగర్త తా, దసచక కిచ్చొ వాటు దాన నాయ్.

14

ఇసి కెరె గారు దస్సి కెరె చెంగిలి

1 నంపజలన కిసి ఇండుక గే ఇదిల్ నేన్లొ కేన్ నంపజలనక బెదవన, గని ముక్కిమ్ నెంజిలిన్చి రిసా జోవయింతెన్ కామ్క నెంజిల కొడె జాజవుక పోన.

2 ఏకచి రిసా ఉచరుమ. "కిచ్చొ కి కంక జయెదె" మెన, దయిరిమ్ తిలొసా ఉచరెదె, గని "ఈంజ జా గారు" మెంతి అలవాట్ తెంతొ పూర్తి విడ్డల్ నే జలొసా కో జలెకు ముక్కల్ గట్ర కయె నాయ్.

3 జలె, తుమ్చితె నే కతోసాక, కతోసా నిస్కారుమ్ దెకున్ నాయ్, చి కతోసాక, నే కతోసా నిస్కారుమ్ దెకున్ నాయ్. కిచ్చొక మెలె, దేముడు ఇన్నెక కి జోవయింక కి బెదవన అస్సె.

4 అన్నెక్లొచొ సేవ కెర్తొనెచి రిసా తుమ్చితె కో తీర్పు కెరుక కొన్సు? జోవయింక 'చెంగిల్' మెనుక గే 'గార్' మెనుక గే కచి సెక్తి మెలె, జోచొ సొంత ఎజొమానిచి సెక్తి, అన్నె కచి నాయ్. జో నిజుమి నంపజలొన్ జలె, కో వేర ఉచర్లె కి, జో టీవెదె. కిచ్చొక మెలె, జోక టీవెడుక ప్రబుక సెక్తి అస్సె.

5 పడ్డె, ఏక్ దీసిచి కంట అన్నెక్ దీసిక 'ఎల్లకాలుమ్చి రిసా ముక్కిమ్చి' మెన ఎక్కిలో ఉచరెదె, గని అన్నెక్లొ జలె, ఎత్తి దినాల్క ఎక్కి రితి దెకితయ్. ఎత్తి మాన్సు ఈంజేవ్ దొన్నితె కేన్ రగుమ్ ఉచర్తను గే, సరిగా ఉచర తా. ఎత్తి మెన్సు నిదానుమ్ ఇండ.

6 దీసిక, "ప్రబుచి గవురుమ్ దెకయ్తి రిసా ఈంజ జా కామ్ పలాన దీసి కెరె చెంగిల్" మెన కో ఉచర్తయ్ గే, ప్రబుచి గవురుమ్ ఉచర్తయ్. దస్సి, 'తుయి దిలిసి' మెన దేముడుక ఉచరయ్ కో ముక్కల్ కతయ్ గే, ప్రబుక గవురుమ్ దెతయ్. దస్సి కి, ముక్కల్ నే కతోసా కో జలె, జో కతిన్క 'తుయి

* 13:9 13:9 నిర్గమకాండుమ్ 20:13-15, 17. ద్వితీయాపదేశ కాండుము 5:17-19, 21. † 13:9 13:9 లేవీయకాండుమ్ 19:18.

దిలిసి' మెన దేముడుక ఉచర్లె, జో కి ప్రబుక గవురుమ్ దెతయ్.

7 అమ్చి రిసా అమ్మి జిము నాయ్, మొరుమ్ నాయ్.

8 అమ్ జిలె, ప్రబుచి సేవచి రిసాయి జితసుమ్. అమ్ మొర్లె, జా కి జోచి సేవ. జాకయ్, అమ్ జిలె కి మొర్లె కి, జోచయ్ మాన్సుల్ అమ్. జొయ్యి అమ్చో ఎజొమాని.

9 ఇసికయ్ క్రీస్తు మొర్లన్ చి అన్నె జిలన్. మెలె, మొర్లుక జిని కెరె, మొర్లనక కి, జితనక కి జో ప్రబు జా, ఎజొమాని జా, ఏలువ కెరుకయ్.

10 తుమ్క బావుడ్లు జల అన్నె నంపజలన్ చి రిసా తుమ్ కిచ్చొక అల్లర్చ తీర్పుల్ ఉచర్లెను, నిస్కారుమ్ ఉచర్లెను? లోకుమ్చక జో పరిచ్చ కెర్లె వెల్లి దీసిక అమ్ ఎత్తిజిన్ ప్రబుచి మొక్కె టీచ, జోచి అత్తి తీర్పు జమదె.

11 దేముడుచి కొడొతె,
"అవ్ కచితుమ్ జివ్వి అస్సి. దస్సి, కచితుమ్, అంచి చట్టె ఎత్తి మాన్సు మొగ్రల్ టెక సెర్ను సేడుల, చి 'తుయి దేముడు. తీర్పు కెరుక తుచి అత్తి అస్సె' మెన ఎత్తి చోండి ఒప్పునుల మెన ప్రబు సంగితయ్" మెన రెగ్డవ అస్సె.

12 జలె, ఈంజ లోకుమ్తె అమ్ ఇండిలి బుద్దిచి రిసా దేముడు సొంతచి మొక్కె తెదొడక అమ్ ఎత్తి మాన్సు సాచి నజనుక తయెదె.

13 జాకయ్, అప్పె తెంతో ఎక్కిలోచి ఉప్పిరి ఎక్కిలో తీర్పుల్ కెరుమ నాయ్, గని కేన్ బావొ ఆత్తుక నే పిసిర్లి రితి, కేన్ పొరపాట్ నే జతి రితి, జో ఆత్తుక డిట్టుమ్ జతిసి నే పిట్టి రితి, ఎక్కి మెన్సు తెన్ ఇండుక అమ్చి పెట్టి ఒప్పునుమ.

14 ప్రబుచి తెడి తా కిచ్చొ జాని, కిచ్చొ పూర్తి దయిరిమ్ తెన్ అస్సి మెలె, జేవ్చి సొంత సెక్కిక కిచ్చొ వస్తువచి రిసా 'గార్' మెనుక నెంజె. గని జాక 'గార్' మెన కో దెకితయ్ గే, జోకయ్ జా గారు జయెదె.

15 జాకయ్, తుమ్ కేన్ జవున్ రగుమ్ కతిసి అన్నెక్లొచి ఆత్తుతె జోవయింక అల్లర్ కెరెదె మెన తుమ్ జాన జానయ్ కయ్లె, తుమ్ ప్రేమయ్ ఇండుక ముల తస్సె. తుమ్ కేన్ జవున్ రగుమ్ కయ్లె ప్రబు మొర రచ్చించుప కెర్లె అన్నెక్లొచి ఆత్తుతె జోక పాడ్ కెరెదె జలె, జా కంక పొన.

16 జాకయ్, 'చెంగిల్' మెన కేన్ అలవాట్చి రిసా తుమ్ జాన్సు జలెకి, వేర మాన్సుల్చి మొక్కె జా కామ్చి రిసా ప్రబుచి నావ్ నిస్కారుమ్ జయెదె జలె, జా నే కయ్లె చెంగిలి.

17 కిచ్చొక మెలె, దేముడుచి రాజిమ్తె బెదితిన్క కతిసి పితిసి ముక్కిమ్ నాయ్, గని దేముడుచి సుద్ది తిలి ఆత్తు దెతి సత్తిమ్ సెంతుమ్ అన్నె సంతోసుమ్, జేవ్ ముక్కిమ్.

18 ఈంజేవ్ వరుమ్ ఇండితి రితి కో క్రీస్తుచి సేవ కెరుల గే, 'చెంగిల్' మెన దేముడు కి మాన్సుల్ కి దెకుల.

19 జాకయ్, ఎక్కి మెన్సు తెన్ తతిన్చి రిసా, ప్రబుచి ఉప్పిరిచి అన్నె మాన్సుల్చి నముకుమ్ డిట్టుమ్ కెర్లిన్చి రిసా కిచ్చొ కిచ్చొ కామ్క జయెదె గే, జయ్యి ముక్కిమ్ ఉచర్లె తమ్మ.

20 ఎక్కి కతిసి నే కతిన్చి రిసా మాన్సుచి పెట్టి దేముడు కెర్లి కామ్ తుమ్ పాడ్ కెరె నాయ్. నిజుమి ఎత్తిక కి 'కంక జయెదె' మెనుక జయెదె, సుద్ది అస్సె, గని ఆమ్ కతిన్చి రిసా, అన్నెక్లొ జోచి ఆత్తుతె తప్పు జలి రితి జయెదె జలె, అమ్చి తప్పు.

21 తుమ్ ముక్కల్ కతిసి జవున్, కేన్ రగుమ్ పితిసి జవున్, కిచ్చొ కామ్ కెర్లిసి జవున్, తుమ్చో బావొ జతో కేన్ నంపజలనచి ఆత్తుతె జోవయింక పాడ్ కెరెదె జలె, జా కామ్ తుమ్ ములిలె చెంగిలి.

22 జలె, 'ఇసి దస్సి కెర్లె చెంగిల్' మెన తుమ్చి పెట్టి కిచ్చొ నముకుమ్ అస్సున్ గే, తుమ్చి పెట్టి దేముడుకయ్ ఒప్పున. 'అవ్ కయ్లె తప్పు నెంజె' మెన కక్క దయిరిమ్ తయెదె చి 'అవ్ కయ్లె కచి ఆత్తుతె జోవయింక పాడ్ కెరె నాయ్' మెన జో జాన్లె, జో మాన్సుక చెంగిలి.

23 గని 'కయ్లె తప్పు' మెన కో ఉచరయ్ కయ్లె, ప్రబుచి సిచ్చ ఆనన్తయ్. కిచ్చొక మెలె, జో కయ్లిసి జోచి పెట్టి జో ఉచర్లిన్ తెన్, జోవయించి నముకుమ్ తెన్, బెదె నాయ్. 'పలాన కామ్ కెర్లె చెంగిల్' మెలి దయిరిమ్ అమ్చి పెట్టి నెంజిలె, జా కామ్ అమ్ కెర్లె పాపుమ్ జతసుమ్.

15

దేముడుచి గవురుమ్ దెకవుక

1 అమ్ ఆత్తుక డిట్టుమ్ తిలన జలె, డిట్టుమ్ నెంజిలనచి జాడు వయిలి రితి జోవయించ అన్మానల్ ఓర్పువ జా అమ్చి ఇస్తుమ్ గడియ ములిలె చెంగిలి.

2 అన్నె మాన్సుల్క 'ఆత్తుక డిట్టుమ్ జా చెంగిల్ జతు' మెన, జోవయించి ఇస్తుమ్ తిలిన్క మరియాద్ దెకుమ.

3 కిచ్చొక మెలె, క్రీస్తు ఎక్కి జోచి సొంతయ్ ఇస్తుమ్క కిచ్చొ కెరె నాయ్, గని దేముడుచి కొడొతె రెగిడ్లిసి జొయ్యి సంగిలి

*"దేముడు ఓ బ, తుక మాన్సుల్ కెర్లె నిందల్ అంకయ్ లయ అస్సి" మెన జో సంగిల్ రితి అస్సె.

4 జలె, పూర్లుమ్ రెగిడ్లిసి కిచ్చొక రెగ్ల అస్సె మెలె, అమ్కయ్ 'సిక్కుత్' మెనయ్ రెగ్ల అస్సె. దస్సి, దేముడుచి కొడొతె రెగ్లయ్లిసి అమ్క నిదానుమ్ దయిరిమ్ సికడ్లె, అమ్ దయిరిమ్ డిట్టుమ్ జమదె.

5 యేసుయి జో ఇండిలిన్క తుమ్క వాట్ దెకయ్లి రితి తుమ్ ఎక్కిలో తెన్ ఎక్కిలో దస్సి ఎక్కి మెన్సు తెన్ జతి రితి, నిదానుమ్ దెతో దయిరిమ్ దేముడు తుమ్క సెక్కి దెవును,

6 చి తుమ్ ఎక్కి మెన్సు తెన్ ఎక్కి అవాడ్ రితి జా, అమ్చొ ప్రబు జలో యేసుక్రీస్తుచొ అబ్బొన్ జలో దేముడుచి గవురుమ్ దెకయ్తె తస్తె.

7 జాకయ్, క్రీస్తు తుమ్కయ్ బెదవన్లి సర్ద తెన్, దేముడుచి గవురుమ్ దెకయ్తి రిసా తూమ్ కి ఎక్కిలోక ఎక్కిలో బెదవన.

8 కిచ్చొక మెలె, తుమ్క ఆవ్ కిచ్చొ మెంతసి మెలె, క్రీస్తు యూదుల్క సేవ కెర్తొసా రితొ జలో. కిచ్చొక మెలె, దేముడుచి సత్తిమ్ దెకవుక. కీసి మెలె, జోవయించ పూర్గుల్క దేముడు దిల ప్రమానల్ నెరవెర్పువ కెర్తి రిసా.

9 అన్నె కిచ్చొచి రిసా మెలె, యూదుల్ నెంజిలసక కి జో దెతి రచ్చన జో దొర్కు కెర్లె, జోవయించి దయ కన్కారుమ్చి రిసా జేవ్ కి దేముడుక గవురుమ్ దెతు మెనయ్. దేముడుచి కొడెతె దావీదు పూర్గుమ్చొ;

‡“జేవ్ కి, యూదుల్ నెంజిలస తెన్ కి సర్ద జా, గాయ గాయ తుచి నావ్ గవురుమ్ కెరుమ్దే” మెన రెగ్గ అస్సె.

10 పడ్డొ దేముడుచి కొడెతె,

§“జోవయించ సొంత మాన్సుల్ తెన్ తూమ్ కి, యూదుల్ నెంజిలస, సర్దసంతోసుమ్ జా”

మెన మోసేచి అత్తి రెగ్గ అస్సె.

11 పడ్డొ దావీదుచి అత్తి అన్నె రెగ్గిసి,

*“యూదుల్ నెంజిల ఎత్తి దేసిమ్చ, ఒండి లోకుమ్చ మాన్సుల్, ప్రబుచి గవురుమ్ గాయ” మెన రెగ్గ అస్సె.

12 పడ్డొ అన్నె, యెసయాచి అత్తి దేముడుచి కొడెతె,

†“యెస్సయిచి సెకుమ్తె ఎక్కిలో జెర్దెదె.

జొయ్యి ఉట్ట, యూదుల్ నెంజిలసక ఏలువ కెరెదె, చి జోచి ఉప్పిరి నముకుమ్ తియ, జేవ్ యూదుల్ నెంజిలస రచ్చనచి దయిరిమ్ తెన్ తవుల” మెన రెగ్గి కోడు.

13 జలె, రచ్చన జతి దయిరిమ్ దెతో దేముడు సొంత తుమ్చి పెట్టి జోచి నముకుమ్చి సర్ద సేంతుమ్ దెవుసు, చి దేముడుచి సుద్ది తిలి ఆత్మచి సెక్తి తుమ్చి ఆత్మతె తా, తుమ్చి ఆత్మ పూర్తి డిట్టుమ్ దయిరిమ్ జా గెచ్చెదె.

యూదుల్ నెంజిలసతె పవులు ప్రబుచి కామ్ కెర్లిసి

14 ఆవ్, బావుడ్లు, తుమ్చి రిసా కిచ్చొ దయిరిమ్ తెన్ అస్సి మెలె, తుమ్చి పెట్టి ప్రబుచి సత్తిమ్ అస్సె. జో దెతి

గ్యానుమ్ అస్సె, చి ఎక్కిలోక ఎక్కిలో బుద్ది సంగుక తుమ్క సెక్తి అస్సె. జా ఎత్తిచి రిసా అంక దయిరిమ్.

15 గని, సగుమ్ కమొచి రిసా తుమ్క ఇదిల్ గట్టిజ సంగిల్ రితి రెగ్గ అస్సి, తుమ్క పచ్చుత్ నాయ్ మెన. దేముడు అంక దిలి అదికారుమ్ వరుమ్చి రిసా ఆవ్ జా రెగుడుక జయెదె.

16 జో దిలి అదికారుమ్ వరుమ్ మెలె, యేసుక్రీస్తుచి రిసాచి జోచి సుబుమ్ కబుర్ సూనవ సూనవ, జో దేముడుచి సేవ కెర్తొ పూజరి మెలి రితొ ఆవ్ జంక మెన జో నిసాన కామ్ తియార్లి వరుమ్. మెలె, యూదుల్ నెంజిలసక క్రీస్తుక నంపజా దేముడుచి సుద్ది తిలి ఆత్మచి సెక్తిక జేవ్ జోచయ్ జా, సుద్ది జా దేముడుక సరి జలి బలి జతి రితి, జోచి అత్తి ఆవ్ సొర్పు కెర దెంక.

17 జలె, దేముడుచి సేవ ఆవ్ కెర్లిన్చి రిసా ‘చెంగిల్చి’ మెన క్రీస్తు జలో యేసుచి తెడి అంక దయిరిమ్.

18 మెలె, యూదుల్ నెంజిలస జోవయించి ఉప్పిర్చి నముకుమ్ ఇండితి రితి క్రీస్తుయి అంచి అత్తి జర్గు కెర్లిన్చి రిసాయి ఆవ్ సంగితసి. జో ప్రబు కీసి ఈంజ కామ్ అంచి అత్తి జర్గు కెర్లన్ మెలె, ఆవ్ బోదన కెర్లిన్తె, ఆవ్ ఇండిలి బుద్దితె,

19 జో అంచి అత్తి కెర్ల జోచి గుర్తుచ వెల్లొ కమొతె, జో దిలి దేముడుచి సుద్ది తిలి ఆత్మచి సెక్తికయ్ జర్గు కెర్లన్. దస్సి, జోచి సెక్తికయ్, యెరూసలేమ్ పట్టుమ్ తెంతొ తుమ్క సముద్దుమ్ ఒత్తల్తొచి ఇల్లూరికు ప్రదేసిమ్చి ఎదిలి దూరిక క్రీస్తుచి సుబుమ్ కబుర్ జా ఎత్తితె ఆవ్ సూనవ అస్సి.

20 దస్సి, అంచి ఆస కిచ్చొ మెలె, వేర మాన్సు పునాది కెర్లి ఉప్పిరి బందుక నెన, క్రీస్తుక మాన్సుల్ నంపజా తిలిన్తె నాయ్, గని వేరతెయ్, మాన్సుల్ జోక నేన్లిన్తెయ్ సుబుమ్ కబుర్ సూనవుక అంచి ఆస.

21 దేముడుచి కొడెతె;

‡“జోచి రిసా కో అగ్గె నే సూనయ్లస సూన, జేవ్ గుడ్డి మెలి రితి జలిసి గెచ్చ, దెకుల. జోచి రిసా కెయ్క నే సూన్లస అర్దుమ్ కెరనుల” మెన రెగ్గయ్లి కోడు.

రోమ్ పట్టుమ్చ గెచ్చుక మెన పవులు ఉచర్లిసి

22 జలె, సుబుమ్ కబుర్ నే సూన్ల టాన్లుతె గెచ్చ సూనవుక అంచి కామ్ తిలి రిసా, అప్పొక తుమ్తె జెంక అంక వాటు తయె నాయ్.

23 గని అప్పొ, ఈంజేవ్ ప్రాంతుమ్లుతె అంక అన్నె కామ్ నాయ్ మెన, ఒగ్గర్ వెర్సుల్ తెంతొ తుమ్తె జెంక అంచి ఆసచి రిసా,

† 15:8 15:8 ఈంజ ఉత్తమ్ తొలితొ రెగ్గి కార్గల్తె కిచ్చొ అస్సి మెలె, ‘యూదుల్ జతి గుర్తుచి సున్నతి కెరన్లసక సేవ కెర్తొసా...’ ‡ 15:9 15:9 సమూయేలు దొన్చి పున్కుమ్ 22:50, కీర్తనలు 18:49. § 15:10 15:10 ద్వితియాపదేశ కాండుము 32:43. * 15:11 15:11 కీర్తనలు 117:1. † 15:12 15:12 యెసయా 11:10. ‡ 15:21 15:21 యెసయా 52:15.

24 స్పృయిను దేసిమి ఆవ్ గెతి పొదిక, వట్టె తుమ్తె గోత్ జా తుమ్క దెకుక ఉచర్తసి. సర్ల తెన్ గడియ తుమ్చి తెన్ తా పుండిలయ్ మెలె, తుమి అంక బార్ కెర వట్టె తెద్రయ్తె.

25 గని అప్పె యెరూసలేమ్తె ఉట్ట గెతసి; ఒత్తచ నంపజలన్క తోడు న దెంక.

26 మాసిదోనియచ చి అకయచ నంపజలన్క యెరూసలేమ్చ యూదుల్చ బీద జల నంపజలన్క తోడు ఉక్కుల తెద్రవుక ఇస్టుమ్ జల.

27 ఈంజేవ్ ఇస్టుమ్ జల, గని అన్నె జేవ్ యెరూసలేమ్చ నంపజలన్తె రునుమ్ జలి రితి జా అస్తి. మెలె, యూదుల్కయ్ దేముడు దిల ఆత్మవరల్తె ఈంజేవ్ యూదుల్ నెంజిలనక వాట అయ్లి రిసా రునుమ్ జలి రితి జా అస్తి, చి జేవ్ యూదుల్క కిచ్చొ జవున్ ఈంజ లోక్కుమ్తె కామ్క జెతికయ్ తోడు ఈంజేవ్ యూదుల్ నెంజిలన దిలె, చెంగిలి.

28 జాకయ్, ఈంజేవ్ ఉక్కిలి తోడు నా దెతి కామ్ కుట్టయ్లయ్ మెలె, స్పృయిన్తె గెతి వట్టె తుమ్తె జెయిందె,

29 చి తుమ్తె పాచ అయ్లె, క్రీస్తు దెతి ఆత్మసిక్తి అంచి పెట్టి బెర తా జా సుక్తి తెన్ని జెయిందె మెన జాని.

రోమియల్ పవులుచి రిసా ప్రార్లన కెరుక

30 బావుడ్లు, 'అమ్చొ ప్రబు జలో యేసుక్రీస్తుచి నావ్ తెన్ చి దేముడుచి సుద్ది తిలి ఆత్మచి ప్రేమక, అంచి రిసా దేముడుక తుమ్ ప్రార్లన కెర కెర అంక తోడు తా' మెన తుమ్క ఆవ్ బతిమాల్పా జా సంగితసి.

31 కిచ్చొచి రిసా మెలె, ఆవ్ అప్పె గెతి యూదయ ప్రదేసిమ్చ యేసుచి రిసా అన్యానుమ్ తిలసతె ఆవ్ దెర్ను నే సేడ్డి రిసా, పడ్డొ ఒత్తచి యెరూసలేమ్ పట్టుమ్చ నంపజలనచి రిసాచి అంచి సేవ జోవయింక చెంగిల్ సేడ్డు మెనయ్ తుమ్ ప్రార్లన కెర.

32 దస్సి జెయిమ్ జలి మెలె, సర్లసంతోసుమ్ తెన్ ఆవ్ తుమ్తె జెంక జయెదె, చి తుమ్చి తెన్ తా సర్ల తెన్ పుండుక జయెదె.

33 సేంతుమ్ దెతో దేముడు సొంత తుమ్చి తెన్ తవున్! ఆమేన్.

16

సర్ల తెన్ సంగుమ్తె బెదవనుక

1 క్రీస్తుచి తెడి అమ్క అప్ప జలి పిబే, కెంకైయ పట్టుమ్చి సంగుమ్తె వెల్లొ తేర్బోద జా ప్రబుచి సేవ కెర్తయ్. జాక 'సత్తిమ్చి' మెన ఆవ్ సాచి జతసి.

2 తుమ్తె జా అయ్లె, ప్రబుచయ్ జల మాన్సుల్క దెకితి మరియాద తెన్ జాక బెదవన, చి కిచ్చొ కామ్తె జేవ్ కి తోడు కావలె మెలె, తోడు తా. కిచ్చొక మెలె, అగ్గె తెంతొ ఒగ్గర్జిన్ నంపజలనక జా తోడు కెర అస్సె, అంక కి.

3 యేసుక్రీస్తుచి కామ్ అంచి తెన్ బెద కెర్ల ప్రిస్కిల్లక చి అకులక అంచి ప్రేమ సంగ.

4 అంక 'మొర్ను నాయ్' మెన జా సుట్టు జెచ్చి ప్రమాదుమ్ జల. ఎక్కి ఆవ్ మెన నాయ్, గని యూదుల్ నెంజిల బావుడ్లుచ సంగుమ్లు ఎత్కి జేవ్ దొగులచి కామ్చి రిసా అంచి తెన్ జోవయింక సర్ల కి సంగితసుమ్.

5 జోచి గెరి సబ కెర్తి సంగుమ్చ ఎత్కిజిన్క అంచి ప్రేమ సంగ. ప్రేమ తిలో ఎపైనెటుక అంచి ప్రేమ సంగ. ఒండి ఆసియా ప్రదేసిమ్తె జోయ్యి తొలితొ ప్రబుక నంపజా మార్పుప జలో.

6 తుమ్చితె నిదానుమ్ కామ్ కెర్లి మరియక కి సంగ,

7 పడ్డొ అంచ బందుగుల్ జత అంద్రోనిక చి యూనియక కి. అంచి తెన్ జేవ్ జేలి జా తిల. ప్రబుచి సుబుమ్ కబుర్ సంగిత బారికుల్తె జోవయింక గవురుమ్ దెకితతి, చి అంచి కంట అగ్గెయి క్రీస్తుచ మాన్సుల్ జల.

8 పడ్డొ, ప్రబుచి తెడి ఆవ్ ప్రేమ తిలో అంప్లియతునక అంచి ప్రేమ సంగ.

9 పడ్డొ క్రీస్తుచి కామ్తె అమ్చి తెన్ బెదిలో ఊర్బానుక, చి ప్రేమ తిలో స్థాకునక అంచి ప్రేమ సంగ.

10 క్రీస్తుక సత్తిమ్ తిలో అపెల్లెక చి అరిస్థాబూలుచి కుటుంబుమ్చ ఎత్కిజిన్క సంగ.

11 అన్నె, అంక బందుగుడు జతో హెరోదియోనుక చి నార్కిస్సు చి కుటుంబుమ్తె ప్రబుక నంపజలనక సంగ.

12 పడ్డొ, ప్రబుచి కామ్ కెర్ల త్రుపైనా చి త్రుపోసా మెల తేర్బోదల్క జోబర సంగ. పడ్డొ ప్రబుచి కామ్ నిదానుమ్ కెర్లొ ప్రేమ తిలో పెర్నిసుక జోబర సంగ.

13 పడ్డొ ప్రబుచి తెడి ఒగ్గర్ బుద్ది సుదొ జలో రూపుక చి అంక అయ్య మెలి రితి జలి జోచి అయ్యన్క అంచి ముద్దుచి జోబర సంగ.

14 పడ్డొ అసుంక్తితుక, ప్లెగోసుక, హెర్మేకుక, పత్రోబక, హెర్మాకుక చి జోవయింతెన్ తిల బావుడ్లు ఎత్కిక అంచి ప్రేమ జోబర సంగ.

15 పడ్డొ పిలోలోగుక, యూలియాక, నేరియక, జోవయింక బేనిక, ఒలుంపాకుక, చి జోవయింతెన్ తిల బావుడ్లు ఎత్కిజిన్క అంచి ప్రేమ సంగ.

16 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ ఎక్కిలోక ఎక్కిలో సుద్ది తిలి ముద్దు తెన్ జోకర. ప్రబుచ సంగుమ్లు ఎత్కి తుమ్క జోవయింక ప్రేమ సంగ తెద్రయ్తతి.

17 జలె, బావుడ్లు, తుమ్క కిచ్చొ బతిమాల్పా జా సంగితసి మెలె, తుమ్క సికడ్డి బోదన నాయ్, గని వేరచి సికడ జట్లు కెర్త అన్యానల్ కెర్తన కొన్సగె చిన కెర, జోవయింక తుమ్ సూన నాయ్. దూరి కెర.

18 దన మాన్సుల్ అమ్చొ ప్రబు జలో క్రీస్తుక నాయ్, గని జోవయింక సొంత ఆసల్కయ్ సేవ కెర్తతి, అన్నె, తేలిక

లట్టబ మాన్యుల్క పులవ, ఒగ్గర్ తెలివి నెంజిల మాన్యుల్క మోసిమ్ కెర్తతి.

19 ప్రబుచి కోడు తుమ్ సొంత నిదాసుమ్ కెర్తిసి ఎత్తిజిన్ జాన్తి, చి తుమ్చి రిసొ అంక సర్ల, గని తుమ్క 'చెంగిల్చితె తెలివి తత్తు, గని గర్చి నేన్తు' మెనయ్, తుమ్చి రిసొ అంక ఆస.

20 దస్సి జలదు మెలె, తుమ్చ చట్టో సయ్తాన్క సుఁద బీడవ జిన్తి రితి, సేంతుమ్ దెతో దేముడు జినవదె. అమ్చొ ప్రబు జలో యేసుక్రీస్తుచి దయ తుమ్చి తెన్ తవున్!

21 అంచి తెన్ ప్రబుచి కామ్ కెర్తో తిమోతి తుమ్క జోచి ప్రేమ సంగ తెద్రయ్తయ్. దస్సి కి లాకియ, యాసొను చి సొసిపత్తు, అంచ బందుగులు.

22 పవులు సంగితి ఈంజ ఉత్తమ్ రెగిణ్ణో తెర్రియు మెలో ఆవ్ ప్రబుచి తెడి అంచి ప్రేమ సంగ తెద్రయ్తయ్.

23 ఆవ్ ఈంజ ఉత్తమ్ సంగ రెగ్లయ్తో పవులుక టాన్ దిలో, ఒండి సంగుమ్క టాన్ దెతో గాయియు తుమ్క జోవయించి ప్రేమ సంగ తెద్రయ్తయ్. దస్సి కి ఈంజ పట్టుమ్చ కమొచి డబ్బుల్ దెకితో ఎరస్తును, చి అమ్చొ బావొ జలో క్షర్తును జోవయించి ప్రేమ సంగ తెద్రయ్తయ్.

24 *అమ్చొ ప్రబు జలో యేసుక్రీస్తుచి దయ తుమ్ ఎత్తిజిన్ తెన్ తవున్! ఆమేన్.

25 జలె, 'నూనవు' మెన అంక దిలి సుబుమ్ కబుర్ వాటు యేసుక్రీస్తుచి రిసొ బోదన కెర్తి వాటు తుమ్క డిట్టుమ్ కెర్తో దేముడుక జోబర! జా సుబుమ్ కబుర్తె బెదితి గుట్టు జో అప్పె బార్ కెర అస్సె. మదెనె, అగ్గె తెంతో లుంకడ తిలో.

26 జలె, యూదుల్ నెంజిలసక కి జోవయించి రచ్చన దొర్కు జలి రిసొచి, ఈంజ గుట్టు జో అప్పె బార్ కెర అస్సె, చి జోవయించ కబుర్లు పూర్ణమ్ సంగిలస రెగిణ్ణిసి సూనయ్ జతిన్తె ఒండి లోకుమ్తె ఎత్తి దేసిమ్చక జాన్సున్ మెన కెయఁక తెయఁక తా గెతో దేముడుచి ఆడ్ర, ఒండి లోకుమ్తె మాన్యుల్ నంపజా జోచి కోడ్ రితి ఇండుత్ మెనయ్.

27 జలె, యేసుక్రీస్తుచి అత్తి జర్గు జలి కామ్చి రిసొ ఎత్తి గ్యానుమ్ తిలో ఎక్కిలో దేముడుక కెయఁక తెయఁక జోబర!

* 16:24 16:24 ఈంజ ఉత్తమ్ రెగిణ్ణ తొలితొచ పుస్తకుమ్ సగుమ్తె 24నంబర్చి కోడు తయె నాయ్.

కొరిందియుల్క రెగిడ్లి మొదొల్చి ఉత్తుమ్ బారిక్ జలో పవులు కొరిండ్ పట్టుమ్చి సంగుమ్చక రెగిడ్లి మొదొల్చి ఉత్తుమ్

మొదొల్ కోడు

1 యేసుక్రీస్తుచి తెడి సుద్ది జా దేముడచయ్ మాన్సుల్ జల కొరింది పట్టుమ్చి సంగుమ్ సుదల్క పావులు అమ్చొ బావుడు జలో సొస్తానేసు తెన్ రెగిడ్లి ఉత్తుమ్.

2 క్రీస్తు జలో యేసుచి రిసా సుబుమ్ కబుర్ నూనయ్తో జోచొ బారికి అవ్ జంక మెనయ్ దేముడు జోచి ఇస్తుమ్క అంక నిసాన అస్సె. అమ్చొ ప్రబు జోచొ ప్రబు జలో యేసుక్రీస్తుతె 'తుచితెయ్ రచ్చన అస్సె. తుయి ప్రబు' మెన జోచి నావ్ దెరన్తన ఎత్తిజిన్ తెన్ తుమ్క కి 'అంచి సుద్ది జా అంచయ్ మాన్సుల్ జతు' మెనయ్, దేముడు బుకార అస్సె.

3 జలె, అమ్క తుమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

4 తుమ్చి రిసా ఎత్తి అదికారుమ్ తిలో దేముడుక రోజుక ప్రార్దన కెర అంచి సర్ల జోక నూనయ్తసి. కిచ్చొచి రిసా మెలె, యేసుక్రీస్తుక తుమ్ నంపజా అప్పె జోచి తెడి తిలి రిసా జోచి దయక దేముడు తుమ్క దిలి రచ్చనచి రిసాయి.

5 మెలె, జా రచ్చన దిలి తెంతొ క్రీస్తుచి తెడి గ్యానుమ్ ఎత్తి, జా గ్యానుమ్ బోదన కెర్తి సెక్తి ఎత్తి, తుమ్క కలుగు జలి రిసా పూర్తి ఎత్తితె సొమ్నారుమ్ జా అస్సెన్.

6 దస్సి, క్రీస్తుచి రిసా అమ్ సంగిలి సాచి తుమ్చి పెట్టి రుజ్జు జా అస్సె.

7 జాకయ్, అమ్చొ ప్రబు జలో యేసుక్రీస్తు జోచి గవురుమ్ తెన్ అన్నె ఉత్త జెతిన్క తుమ్ రకితె ఎద, అవ్సురుమ్ జలి కిచ్చొ ఆత్మసెక్తి కి తుమ్క పిట్టె నాయ్.

8 ఆకర్ దీనల్క లోకుమ్చక ప్రబు జలో క్రీస్తు వెల్లి పరిచ్చ, వెల్లి తీర్పు కెర్తె ఎదక, తుమ్ పొరపాట్ నే జతి రితి జొయ్యి తుమ్క జా సెక్తి దెతె తయెదె.

9 పుత్తున్ జలో అమ్చొ ప్రబు జలో యేసుక్రీస్తు తెన్ తుమ్ బెదితి రిసా తుమ్క బుకార్లో దేముడు నిదానుమ్చొ, జో సంగిల్ రితి కెరెదె, జో సంగిలిసి జర్గు కెరెదె.

గోసల్ పొన మెన పావులు గోల కెర్లిసి

10 బు బావుడ్లు, అమ్చొ ప్రబు జలో యేసుక్రీస్తుచి నావ్ తెన్ కిచ్చొ మెన అవ్ తుమ్క బతిమాల్య జా సంగితసి మెలె,

* 1:19 1:19 మెనయా 29:14.

తుమ్ జట్టి నే జతె, ఎక్కి మెన్సు జా, ఎక్కి కట్టు జా, తుమ్ ఎక్కి బుద్ది ఎక్కి మెన్సు జా చెంగిల్ జా.

11 బావుడ్లు, కిచ్చొక ఇసి మెంతసి మెలె, తుమ్తె సగుమ్జిన్ జట్టి జా అస్తి మెన క్లోయెచ గెరచ సుదల్ అంక సంగ అస్తి.

12 మెలె, "అవ్ పావుల్చొ సుదొ" జవున్, "అవ్ అపొల్లోచొ సుదొ" జవున్, "అవ్ కేపాచొ సుదొ" జవున్, నెంజిలె "అవ్ క్రీస్తుచొ సుదొ" జవున్ మెన తుమ్ ఎత్తిజిన్ తేడల్ ఉచరన సంగన్తను మెన్ ఆవ్ జాని.

13 క్రీస్తుచి ఆగ్ సింద వాటల్ కెర అస్సెన్ గే? తుమ్చి పావుమ్ గెచ్చయ్తి రిసా అవ్ పావులు సిలువతె మొర్లయ్ గే? అవ్ పావులుచి నావ్ తెన్ బాప్తిసుమ్ నజన్దరు గే?

14 నాయ్. క్రీస్తుక చి గాయియుక పిట్టవ అవ్ కక్క బాప్తిసుమ్ నే దిలి రిసా అంక చెంగిలి.

15 కక్క కక్క బాప్తిసుమ్ దెతయ్ జలె, 'పావుల్చి నావ్ తెన్ బాప్తిసుమ్ సంగిలమ్' మెన ఏక్ వేల తుమ్తె సగుమ్జిన్ సంగిత్త.

16 స్తెపనుచి గేరచక బాప్తిసుమ్ దిలయ్, గని అన్నె కక్క బాప్తిసుమ్ దిలయ్ గే నాయ్ గే పచ్చ అస్సి. నాయ్, కిచ్చొగె.

17 క్రీస్తు అంక తెద్రయ్లిసి బాప్తిసుమ్ దెతి రిసా నాయ్, గని సుబుమ్ కబుర్ నూనవ అవ్ బోదన కెర్తి రిసాయి. పడ్డె, ఒగ్గర్ తెల్విచ కొడెచి ఉప్పిరి కొడె బెదయ్తి రితి అవ్ బోదన కెర్తి రితి తెద్రయె నాయ్. దస్సి బోదన కెర్తయ్ జలె, క్రీస్తు సిలువతె మొర మాన్సుల్క పావుమ్ తెంతొ రచ్చించుప కెర్తిన్ ముక్కిమ్ జలిన్క లుంకడ్లి రితి జతి. రచ్చించుప కెర్తి సెక్తి జో మొర అర్చితుమ్ జలిన్తెయి అస్సె.

క్రీస్తు దేముడుచి సెక్తి గ్యానుమ్

18 మొర పావుమ్తె గెతన, జలె, ప్రబు సిలువతె మొర అర్చితుమ్ జలిన్చి కోడు నూన్లె, నాసెనుమ్ జతనక కి వెర్తి గని అమ్ రచ్చించుప జతనక, జలె, దేముడుచి సెక్తి మెన జానుమ్.

19 కిచ్చొక మెలె, దేముడుచి కొడెతె,

*"పండితుల్చి గ్యానుమ్క పాడ్ కెరిందె,

తెలివి మాన్సుల్చి తెలివి పిట్టయిందె"

మెన రెగ్గవ అస్సె.

20 ఒగ్గర్ బుద్ది తిల సుదొ కేతె? మోసె తెన్ దేముడు దిలి ఆగ్గల్ సికడ్డన కేతె? ఈంజ ఉగుమ్తె తెలివి తెన్ కొడె బెదవ రుజ్జుల్ దెకయ్తన కేతె? ఈంజ లోకుమ్చి గ్యానుమ్క 'గ్యానుమ్ నెంజె' మెన, దేముడు దెకవ అస్సె.

21 కీసి మెలె, కెర్తి గ్యానుమ్ కలుగు జలెకి, ఈంజ లోకుమ్చ మాన్సుల్ దేముడుక నేన్ల. 'మాన్సుచి సొంత గ్యానుమ్ జోపయిం చి సొంత సెక్తిక జేవ్ నెతిర్లెకయ్ చెంగిలి' మెన, జోచి పెట్టిచి గ్యానుమ్క దేముడు జానయ్

దస్సి జర్గు కెర్లన్. జాకయ్, అమ్ బోదన కెర్తి సుబుమ్ కబుర్ 'గ్యానుమ్ నెంజె' మెన జోవయించి సొంత సెక్తి మాన్సుల్ ఉచర్లె కి, జా సుబుమ్ కబుర్ తెయి మాన్సుల్క రచ్చించువ కెరుక జో దేముడు సర్ల జలో. గని సుబుమ్ కబుర్ నంప కెర్తిన్క 'తెలివి నాయ్' మెన మాన్సుల్ సంగితతి.

22 మెలె, 'జోచి సత్తిమ్క రుజ్జు దెకయ్త వెల్లెల కమె దెకయ్తెకయ్ నంపజమ్దె, నెంజిలె నాయ్' మెన యూదుల్ సంగిల. 'కొడొ తెలివి తెన్ బెదయ్తెకయ్ జా బోదనక విలువ దెకుక జయెదె' మెన గ్రీకుల్ సంగిల.

23 గని "క్రిస్తు సిలువతె మొర అర్పితుమ్ జలిన్తెయి మాన్సుచి రచ్చన" మెన అమ్ బోదన కెర్లసుమ్. ఇసి బోదనక అడ్డు మెన యూదుల్ సంగితతి, 'తెలివి నాయ్' మెన యూదుల్ నెంజిలన సంగితతి.

24 గని దేముడు నిసాన బుకార్లసక, జేవ్ యూదుల్ జలెకి, †గ్రీకుల్ జలెకి, జో దేముడుచి సెక్తి కి గ్యానుమ్ కి క్రిస్తుతెయ్ అస్సె. క్రిస్తు దేముడుచి సెక్తి, జోయ్యి జోచి గ్యానుమ్.

25 దేముడు కెర్తిన్క 'బుద్దిచి నెంజె' మెన మాన్సుల్ ఉచర్లె కి, జా కేన్ మాన్సుచి గ్యానుమ్చి కంట వెల్లి. జో దేముడుచి అప్పు కేన్ మాన్సుచి సెక్తిచి కంట ఒగ్గర్ సెక్తిచి.

26 బావుడ్లు, ప్రబు తుమ్కయ్ నిసాన బుకార్లొ. జలె, తుమ్తె తొక్కిజిన్క ఈంజ లోకుమ్చి గ్యానుమ్ ఒగ్గర్ కల్లప జా అస్సె. తుమ్తె తొక్కిజిని వెల్లెల మాన్సుల్ జా అస్సున్. తుమ్తె తొక్కిజిని వెల్లెల కుట్టంబల్తె జెర్లిలదు.

27 గని దేముడు, ఈంజ లోకుమ్తె తెలివి నెంజిలనకయ్ నిసాన్లన్. కిచ్చొక మెలె, తెలివి తిలనక కి లాజ్ కెరుక మెన. సెక్తి తిలనక కి లాజ్ కెరుక మెన ఈంజ లోకుమ్తె సెక్తి నెంజిలనక దేముడు నిసాన్లన్.

28 పడ్డొ ఈంజ లోకుమ్తె విలువ జలిన్క 'కిచ్చొ నెంజె' మెన రుజ్జు తంక ఈంజ లోకుమ్తె విలువ నెంజిలనక, నిస్కారుమ్ జలనక, కిచ్చొ నెంజిలనక జో దేముడు నిసాన్లన్.

29 కిచ్చొక మెలె, దేముడుచి మొక్కె కేన్ మాన్సు గవురుమ్ ఉచరనుక బెదె నాయ్ మెన రుజ్జు దెకవుక.

30 యేసుక్రిస్తుచి తెడి తుమ్క జియడ్లొ దేముడు జొయ్యి, అమ్చి గ్యానుమ్, అమ్చి పున్నిమ్, అమ్చి సుద్ది, అమ్చి రచ్చన క్రిస్తుతెయ్ మెన దేముడు అబ్బొసి జోకయ్ అమ్చి రిసా టీవొ కెలన్.

31 జాక దేముడుచి కొడొతె,

‡ "మాన్సుల్ గవురుమ్ సంగుక ఇస్తుమ్ జలె,

కచి రిసా సంగుత్ మెలె, ప్రబుచి రిసాయి"

మెన రెగ్గవ అస్సె.

† 1:24 1:24 ఇన్నె 'గ్రీకుల్' మెలె, యూదుల్ నెంజిలన మొత్తమ్క సంగితయ్.

2 1 ఓ బావుడ్లు, ఆవ్ తుమ్తె తెదొడి జా కెర దేముడుచి చి సాచి సూనయ్లి పొది ఒగ్గర్ తెలివి గ్యానుమ్ కొడొ బెదవయ్ బోదన కెర్తి నాయ్.

2 ఆవ్, 'యేసుక్రిస్తుచి రిసాయి మెలె, సిలువతె మొర జర్గు కెర్లి యేసుక్రిస్తుచి రిసా నెంజిలె, అన్నె కిచ్చొ కి తుమ్చి మదెనె అన్నె కిచ్చొ నేని మెన వేరచి బెదవుక నెంజె' మెనయ్ దస్సి కెర్లయ్.

3 పడ్డొ తుమ్చితె తిలి పొది, 'సొంత సెక్తిక కిచ్చొ కెరుక నెతిరి' మెన బయిమ్ తెన్ బల్ అడ్డుర్ తెన్ తిలయ్.

4 తుమ్చి నముకుమ్ మాన్సుల్చి గ్యానుమ్ తెన్ నే జతె, గని దేముడుచి సెక్తి తెన్ ఆదారుమ్ కెరన తంక మెన,

5 ఆవ్ లట్టబ్బె కి చి సాచి సూనయ్లె కి, తెలివి గ్యానుమ్చ తియాన కొడొ నే బెదయ్తె, సుద్ది తిలి ఆత్మచి దేముడుచి సెక్తి దెకయ్తి రిసాయి మెన సంగితసి మెనయ్ ఇసి జర్గు జంక మెన జోచి సెలవ్.

ఆత్మతె వడ్డిలనక ప్రబుచి గ్యానుమ్ సికడ్డిసి

6 ఆత్మతె వడ్డిలనక గ్యానుమ్ తెన్ సికడ్డునుమ్, జా గ్యానుమ్ కేడయ్ గెతి చి జా ఈంజ ఉగుమ్చి గ్యానుమ్ నెంజె, ఈంజ ఉగుమ్తె విలువ కెర్లనచి గ్యానుమ్ నెంజె.

7 అమ్ సికడ్డి గ్యానుమ్ దేముడుచి గుట్టు తెన్ తిలి లుంకడ్డి గ్యానుమ్; ఈంజ గ్యానుమ్ గుట్టు తెన్ లుంకడ తయె నాయ్. ఉగల్ ఎత్తిచి కంట అగ్గెయి దేముడు అమ్చి రిసా 'పరలోకుమ్చి ఉజిడతె బెదుతు' మెన ఉచర జర్గు కెర్లి గ్యానుమ్.

8 ఈంజ ఉగుమ్చ అదికారుల్ కోయి ఈంజ గ్యానుమ్క అర్దుమ్ కెరంతి నాయ్; జా అర్దుమ్ జోక జతి జలె గొప్పు ఉజిడచొ రుపుమ్చొ గవురుమ్ తిలొ ప్రబుక సిలువ గల మారిత నాయ్.

9 గని దేముడుచి కొడొతె,

"ఇన్నెచి రిసా దేముడు తెయార్ కెర అస్సె"

జోక ప్రేమ కెర్లనక కిచ్చొ దెంక మెన తెయార్ కెర్లిసి

* "జా కేన్ అంకితె డీసె నాయ్,

కేన్ కంగ్గొతె సుని జయె నాయ్,

కేన్ మాన్సు జోచి పెట్టి ఉచరుక నెతిర్లిసి"

మెన రెగ్గవ అస్సె.

10 అమ్క జలె దేముడు ఎత్తి జోచి ఆత్మ తెద్రవ రుజ్జు దెకవ అస్సె; జా ఆత్మ ఒండిక, దేముడు గుట్టుల్చి రుజ్జుల్ కి జోచి ఆత్మ రుజ్జు దెకయెదె.

11 ఏక్ మాన్సుచి ఉద్దెనుమ్ జోచితె తిలి మాన్సుచి సొంత ఆత్మక పిట్టవ, జో మాన్సుచి పెట్టి తిలిసి కో జాన్తి గే?

‡ 1:31 1:31 యిర్మీయా 9:24.

* 2:9 2:9 యెసయా 64:4.

దస్సి, దేముడుచి ఉద్దేశములు దేముడుచి సుద్ది తిలి ఆత్మక ముల, జోచి ఉద్దేశము అన్నె కోయి నేనీతి.

12 దేముడు అమ్క దిల ఆత్మ కిసిచి గే అమ్ అర్దుమ్ కెరనుక. అమ్ ఈంజ లోకుమ్చి ఆత్మ నెంజె, గని దేముడు తెంతో చి జతి సుద్ది తిలి ఆత్మయి అమ్ పాయ అస్సుమ్.

13 మాన్సుచి గ్యానుమ్ సికడ్డ కొడో తెన్ నాయ్, ఆత్మ సమ్మందుమ్ జలి కారిమ్చి కామ్ ఆత్మ సమ్మందుమ్ జలి కారిమ్చి కామ్ సరి కెరన, ఆత్మ సికడ్డ కొడో తెన్ ఈంజ సుద్ది తిలి ఆత్మ అమ్క సికడ్డిసి, అమ్ సికడ్డనుమ్.

14 లోకుమ్చొ సమ్మందుమ్ జల మాన్సు దేముడుచి సుద్ది తిలి ఆత్మచ కబుర్లు నెసె, దనచ జోక వెర్రిలెక అస్సె, జో అర్దుమ్ కెరనుక నెత్తె. దనచక ఆత్మతె జెర్మున్ తిలెకయి అర్దుమ్ కెరనుక జయెదె గని జోవయింక జా ఆత్మ నాయ్ చి నెత్తిరి.

15 ఆత్మ సమ్మందుమ్ జలోసా మాన్సుల్క ఒండి అర్దుమ్ కెరనెదె, గని జోక కేన్ మాన్సు తీర్పు కెరుక నెత్తిరి.

16 † “ప్రబుచి పెట్టి తిలిసి జాన జోక సికడుక తెరిలస కో? అమ్క జలె క్రీస్తుచి మెన్సు అస్సె.”

3

ఆత్మక వడ్డిలస నెంజున్

1 బావుడ్లు, తుమ్చి తెన్ ‘ఆత్మక వడ్డిల మాన్సుల్ తెన్ కొడో జలి రితి ఆవ్ కొడో జంక నెత్తిర్లయి. ఈంజ లోకుమ్చ ఆగ్చ సమ్మందుమ్చ మాన్సుల్ మెనయ్, క్రీస్తుతె బాలబోదలీ’ మెన, తుమ్చి తెన్ కొడో జంక తిలి.

2 అగ్గె తుమ్క సత్తు నాయ్ చి రిసా రితి దూదు పియడ్లయ్, చి పోసిలయ్ గని చింబొ కవడ తుమ్క పోసి నాయ్. తుమ్ అప్పెక కి ఆగ్చి సమ్మందుమ్చ రిత జా అస్సున్చి రిసా అప్పెక కి తుమ్ వడితన్ నాయ్.

3 తుమ్చితె కుసిదుమ్, గోనల్ తిలె, తుమ్ ఆగ్చి సమ్మందుమ్చ మాన్సుల్చి రితి ఇండితన నెంజున్ గే?

4 ఎక్కిలో ఆవ్ పావుల్చొ సుదొ, అన్నెక్కో ఆవ్ అపొల్లోచొ సుదొ, మెన సంగిలె పొది తుమ్ లోకుమ్చ సమ్మందుమ్ జల మాన్సుల్ నెంజున్ గే?

5 అపొల్లో కొన్సొ? పవులు కొన్సొ? సేవ కెర్తనయ్ గెద. ఎక్కిక్లక ప్రబు దిలిసి తెన్ జేవ్చి తెంతోయ్ తుమ్ నంపజలదు

6 ఆవ్ రోవిలయ్, అపొల్లో పాని సువిలన్, జియడ వడ్డయ్లోసా దేముడి.

7 జాకయ్, జియడ వడ్డయ్లో దేముడుతెయి గని, రోవిలోసాతె జలెకి, పాని సువిలోసాతె జలెకి కిచ్చొ కి నాయ్.

8 రోవిలోసాక పాని సువిలోసాక ఎక్కి ఉద్దేశము. ఎత్తి జిన జేవ్ కెర్లి కామ్చి కస్టుమ్కయ్ జితుమ్ నజనుల.

9 అమ్ దేముడు తెన్ బెద కామ్ కెర్తనుమ్; తుమ్ దేముడుచి పంటొ పికయ్లి బుయి, దేముడుచి గేరు జా అస్సున్.

ప్రబుచి ఆత్మగేర్చి టాలి

10 దేముడుచి దయక జో అంక దిలి ఇదిలి సెక్కిక, గేర్ బందుక చెంగిల్ జాన్లొ బందితోసాచొ రిత్తొ జా, ఆవ్ పునాది తెయార్ కెర్లయ్, చి జేవ్చి ఉప్పిరి అన్నెక్కో గేర్ బందితయ్. జా పునాదిచి ఉప్పిరి తుమ్ ఎత్తిజిన్ తుమ్చి వాట కిసి బందితె గే జాగర్త తా.

11 ఎక్కి పునాదిచి ఉప్పిరి జా గేర్ బందిలెకయ్ జా గేర్ తయెదె; మెలె, యేసుక్రీస్తు జలి పునాదిచి ఉప్పిరి బందిలెకయ్. వేర పునాది తెయార్ కెరుక కో నెత్తిరి.

12 జలె, జా పునాదితె కో బజార్ తెన్, కో వెండి తెన్, కో వజ్రమానిక్యల్ తెన్, కో దారు తెన్, కో పెయ్యడి తెన్, కో పీరి తెన్ గేర్ బందిలె,

13 జేవ్ ఎక్కిక్ల బందిలిన్క ‘తయెదె గే నాయ్ గే’ ఆకర్కయ్ డీసెదె. ప్రబు సంగిలి వెల్లి దీసికయ్ డీసెదె. కిసి మెలె, ఆగిచి పరిచ్చతె డీసెదె. ఎక్కిక్లక కమె కినచగె ఆగితె పరిచ్చ జలి రితి జా డీసెదె.

14 జో పునాది కెలోసాతె బందిలి కేన్ మాన్సుచి కామ్ జా పరిచ్చతె జిన్లె, జో మాన్సుక బవుమానుమ్ దొర్కు జయెదె.

15 జో పునాదితె బందిలో కేన్ మాన్సుచి కామ్ డడ్డ గెచ్చెదె గే, జోక నస్టుమ్ తయెదె, గని జోయ్యి రచ్చించుప జయెదె. గని ఆగి తెంతొ కిసి గే ఉర్లి జలి రితి జా జో రచ్చించుప జయెదె.

నంపజలస ప్రబుచి దేముడుచి గుడి జవుల

16 దేముడుచి గుడి తుమ్ జస్తె మెన నేన్సు గే? జోచి ఆత్మ తుమ్చి పెట్టి అస్సె మెన నేన్సు గే?

17 జలె, దేముడుచి గుడి కో పాడ్ కెరెదె గే, జోక, జో దేముడుయి పాడ్ కెరెదె. కిచ్చొక మెలె, దేముడుచి గుడి జోకయ్ సుద్ది తంక అస్సె. జా దేముడుచి గుడి తుమి జా అస్సున్.

18 తుమ్క తుమ్ మోసిమ్ కెర నాయ్. ‘ఈంజ ఉగుమ్చి గ్యానుమ్క ఆవ్ తెలివి’ మెన కో ఉచరనెదె గే, పరలోకుమ్చి గ్యానుమ్ జో దొర్కు కెరంతి రితి ఈంజయ్ ఉగుమ్చి గ్యానుమ్క గవురుమ్ కెరుక ముల నేన్లొ రిత్తొ జవున్.

19 కిచ్చొక మెలె, ఈంజయ్ లోకుమ్చి గ్యానుమ్ దేముడుచి మొక్కె గ్యానుమ్ నెంజె. జో రెగ్డయ్లి కేన్ కోడుతె ఈంజ సత్తిమ్ డీస్తయ్ మెలె,

* “తెలివి తిల జోవయింప మోసిమ్లుతెయి

దేముడు జేవ్ తెలివి మాన్సుల్క దెర
జేవ్ ఉచర్చిసి పిట్టయ్తయ్”

మెన రెగిడ్డి కోడు.

20 జోచి అన్నెక్ దస్సి కోడు కిచ్చొ మెలె,

† “ఈంజ లోకుమ్చి గ్యానుమ్క నంపజలనచి పెట్టి
ఉచర్చనక

కామ్క నే జయె మెన ప్రబు జానె”

మెన రెగిడ్డి కోడు.

21 జాకయ్, కేన్ మాన్సుక ‘జొయ్యి వెల్లో’ మెలి రితి
మాన్సుక గవురుమ్ కెర నాయ్. ఎత్తి తుమ్చి జా అస్సె.

22 పవులు కి, అపొల్లో కి, కేపా కి, అమ్ సికడ్డన తుమ్
ఎత్తిజిన్క దొర్కు జా అస్సుమ్. ఈంజ లోకుమ్ కి, జివు కి,
మొర్కు కి, ఈంజ ఉగుమ్ కి, జెతి ఉగుమ్ కి, ఎత్తి తుమ్చి
జా అస్సె.

23 పడ్డా, తుమ్ క్రీస్తుచి తెడి అస్సున్, తుమ్క జొయ్యి
ఏలుప కెర్తయ్; చి క్రీస్తు దేముడు అబ్బొన్చి తెడి అస్సె.

4

అపొల్లోక చి పవులుక కీసి దెకుక

1 తుమ్ అమ్క కీసి దెకుక మెలె, యేసుక్రీస్తుచ సేవ కెర్తన
ఆము. తుమ్ ‘పాడ్ జంక నాయ్’ మెన దేముడుచ గుట్టుల్
రకితన ఆమ్. అమ్ దస్సి జలిన్క తుమ్ మరియాద దెకుక
తుమ్చి పూచి,

2 అన్నె, కేన్ జవున్ ఎజొమానిచి ఆస్తిక రకితొసా, జలె,
నిదానుమ్ తెన్ నముకుమ్ జతొసా తంక జోచి పూచి. జాక,
ఆమ్ దస్సి నిదానుమ్ తెన్ నముకుమ్ జతన జంక అమ్చి
పూచి.

3 గని తుమ్ జవున్, మాన్సుచి కేన్ తీర్పు కెర్తి గేర్ జవున్,
అంక పరిచ్చ కెర తీర్పు కెర్లె, అంక బాద నాయ్. ఆవ్ కి
సొంత తీర్పు కెరనీ నాయ్.

4 దేముడుచి మొక్కె పూచి తెన్ జోచి కామ్ ఆవ్ కెర అస్సి.
జా కామ్ కెర్లిన్తె ఆవ్ కిచ్చొ పొరపాట్ కెర్లిసి ఆవ్ నేని. గని
అంక ‘తప్పు జో నెంజె’ మెన ఎక్కి అంచి సొంత కోడు రుజ్జు
దెకవ నాయ్. జో ప్రబుయి అంక తీర్పు కెర్తొసా.

5 జాకయ్, జా సమయుమ్ నే జతె అగ్గె, మెలె, ప్రబు అన్నె
నే జెతె అగ్గె, తుమ్ అంక తీర్పు కెర నాయ్. మాన్సుల్క
దస్సి తీర్పు కెర్లిసి తుమ్ ముల. అందర్తె లుంకీల్ రితి
తిలిసి ఎత్తి, మాన్సుచి పెట్టిచ ఉడ్డెనుమ్లు ఎత్తి జొయ్యి
జోచి ఉజ్జడతె పరిచ్చ కెర తీర్పు కెరెదె. తెదొడ్కయ్ దేముడు
సొంత ఎత్తిజిన్క జేవ్చ కెర్ల కమొ తీర్పుల్ సంగెదె.

6 అంచి రిసాచి అపొల్లోచి రిసా ఆవ్ ఇన టాలివొ
కిచ్చొక సంగ అస్సి మెలె, తుమ్చి రిసా, బావుడ్లు, తుమ్క

‘సిక్కుత్’ మెనయ్, దేముడు రెగ్డయ్లిన్చి కంట కిచ్చొ
వేరచి అమ్ దొగుల కిచ్చొ బెదవుమ్ నాయ్, దస్సి తుమ్ కి
వేరచి జా బోదనతె బెదవ నాయ్. ఆవ్ అపొల్లో, జలె, అమ్
దొగుల సుబుమ్ కబుర్తె కిచ్చొ వేరచి బెదవుమ్ నాయ్, చి
అమ్తె కక్క ‘వెల్లో’ మెన తుమ్ సంగుక నాయ్. ‘ఆవ్
వెల్లో’ మెన జవున్ ఆవ్ సంగి నాయ్, జో సంగె నాయ్. దస్సి
తుమ్చితె కో కిచ్చొ వేరచి నే బెదయ్లె, తుమ్చితె కి ‘ఆవ్
వెల్లో, జో దాక్’ మెన తేడల్ దెకన బులుక బెదె నాయ్.

7 జలె, తుమ్క దెకిలె, కక్క ‘వెల్లో’ కక్క ‘దాకు’ మెనుక
జతయ్ గే? దేముడు దిలి కంట తుమ్క కిచ్చొ అస్సె గే?
దేముడు తెంతొ పయిలిసి జలె, జా జొయ్యి నే దిలి రితి
కిచ్చొక తుమ్ గవురుమ్ సంగితను!

8 ‘ఎత్తితె సొమ్మారుమ్ జా అస్సుమ్’ మెన తుమ్
ఉచరంతను. అమ్క పడ్డా ముల తుమ్ రాసల్ జా అస్సున్,
జలె! తుమ్ నిజుమి ఏలుప కెర్తదు జలె, ఆమ్ కి తుమ్చి
తెన్ ఏలుప కెరుక జతి! సర్ల జతమ్!

పావులీంసి నిస్కారుమ్ జలిన్

9 అమ్ క్రీస్తుచి సుబుమ్ కబుర్ సూనయ్త బారికుల్క
మాన్సుల్ ఎత్తిచి కంట అమి నిస్కారుమ్ డీస్తనుమ్,
*మొర్తి సిచ్చ కలుగు జల మూర్కుడ్లు రిత డీస్తనుమ్, మెన
దేముడు సెలవ్ దిలి రితి అంక డీస్తయ్. అన్నె మాన్సుల్
జోవయంక దెక ఆస్తి గే, అమ్ యేసుచ బారికుల్క కి
లోకుమ్ ఎత్తిచ, జేవ్ దూతల్ జలెకి మాన్సుల్ జలెకి,
ఆసిల్ రితి జతతి.

10 ‘క్రీస్తుచి సుబుమ్ కబుర్ సూనవుక ముక్కిమ్’
మెనయ్, ఆమ్ నేన్ల మాన్సుల్ రిత డీస్తనుమ్. తూమ్
మాత్తుమ్, క్రీస్తుచి తెడి బుద్ది సుదల్ జా అస్సున్, కిచ్చొ
గే! తుమ్క ‘దస్సి ఉచరంతతి’ మెలి రితి డీస్తయ్, ఆమ్,
జలె, సెక్తి నెంజిల్ రితి డీస్తనుమ్. అమ్కయ్ సెక్తి అస్సె మెన
తుమ్క తుమి ఉచర్తను. నిజుమి, మాన్సుల్ తుమ్కయ్
గవురుమ్ దెకితతి, అమ్కయ్ నిస్కారుమ్ దెకితతి.

11 అప్పె ఎద ఆమ్ చువ్వె తన్నె అస్సుమ్. అమ్క
సరిపుచుప జత పాలల్ నాయ్, మాన్సుల్ అమ్క పెట్టి తతి,
అమ్క గెరల్ నాయ్.

12 సొంత అత్తో తెన్ కామ్ కెర జతనుమ్. మాన్సుల్
అమ్క దూసుప కెర్లె, చెంగిల్ తత్తు మెన అమ్ ప్రార్దన
కెర్తనుమ్. జేవ్ అమ్క అల్లర్ కెర్లె, ఓర్పుప జతనుమ్.

13 అమ్చి నావ్ జేవ్ కడ్డె, సేంతుమ్ కెర్తనుమ్.
మాన్సుచి మొక్కె ఒండి లోకుమ్చి తొక్కు ఉస్తా జా అస్సుమ్.

† 3:20 3:20 క్రీస్తులు 94:11. * 4:9 4:9 మొర్తి సిచ్చ కలుగు జల మాన్సుల్ జోవయించి జా సిచ్చతె వట్టె గెతె తిలె పొడి కీసి అన్నె మాన్సుల్ జోవయంక
దెక ఆస్తి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆసిల్ రితి జతతి.

14 ఇసి మెన ఆవ్ తుమ్ కిచ్చొక రెగిడ్లసి మెలె, తుమ్ కి లాజ్ కెర్తి రిసా నాయ్, గని తుమ్ అంచ బోదల్ రిత జత, చి తుమ్ క 'బుద్ది తిలి' మెనయ్ ఇసి రెగ్గితసి.

15 కిచ్చొక మెలె, క్రీస్తుచి తెడి తుమ్ కి సికడ్డన ఒగ్గర్జిన్ తిలె కి, జోవయించి తెడి ఒగ్గర్జిన్ క 'అబ్బొ' మెనుక నెతుర్పు. సుబుమ్ కబుర్ అవ్వి తొలితో సూనయ్ లి రిసా, క్రీస్తు జలో యేసుచి తెడి అవ్వి తుమ్ క అబ్బొది జా అస్సి.

16 జాకయ్, 'అంకయ్ దెక సిక అంచి రితి ఇండ' మెన తుమ్ క ఆవ్ బతిమాల్ప జతిసి.

17 జాకయ్ ప్రేమ తిలో నిదానుమ్ తిలో ప్రబుచి తెడి అంక పూత్తు జలో తిమోతిక తుమ్ తె ఆవ్ తెద్రవ అస్సి. కిచ్చొక మెలె, ఆవ్ క్రీస్తుచి తెడి కిసి ఇండితసి గే, సంగుమ్ లు ఎత్తితె కిచ్చొ బోదన కెర్తసి గే, తుమ్ క జో ఉచార కెరయ్ తి రిసా, తుమ్ క 'ఉచార కెర బుద్ది తత్తు' మెనయ్.

18 ఆవ్ 'అమ్ తె అన్నె జెయె నాయ్' మెన తుమ్ చితె సగుమ్ జిన్ ఉచార పుల అస్సున్.

19 గని ప్రబు సెలవ్ దిలె, తుమ్ తె బే బేగి జెయిందె, చి జేవ్ పులిల మాన్పుల్ చ కొడొచి రిసా రుజ్జుల్ సూనుక నెసి, గని జోవయించి సెక్తిచ రుజ్జుల్ పరిచ్చ కెరిందె.

20 కిచ్చొక మెలె, దేముడుచి రాజిమ్ మాన్పుచి పెట్టి తిలిన్ కిచ్చొ రుజ్జు జయెదె మెలె, మాన్పుచ కొడొ నాయ్, గని ప్రబుచి ఆత్మసెక్తి మాన్పు ఇండితి బుద్దితెయి డీనెదె, జయ్యి రుజ్జు జయెదె.

21 జలె, తుమ్ చి ఇస్టుమ్ కిచ్చొ ఆవ్ అయ్ లె, సిచ్చు కెర్తి డండొ దెరన్లి రితి జెంక గే, ప్రేమ ముద్దు తెన్ జెంక గే? ప్రేమ ముద్దు తెన్ ఆవ్ అయ్ లె సర్ద జస్తె, జలె, తుమ్ బుద్ది ఇండ.

5

లంజె జలో ఎక్కిలోచి రిసా పవులు తీర్పు సంగిలిసి

1 తుమ్ చితె ఎక్కిలోక, అన్నెక్కిచి ఉపిరి జలె, 'లంజె వంసుమ్ చొ జా జితయ్' మెన సంగితతి. అన్నె, జొయ్యి జితి రగుమ్, జలె, ప్రబుక నేన్ల మాన్పుల్ కి తెద్ది పాపుమ్ తెన్ జితి నాయ్! కిసి లంజె జా అస్సి మెలె, అబ్బొన్ చి తేర్చి తెన్ లంజె జితయ్!

2 జలెకి, తుమ్ లాజు జసు నాయ్, పుల అస్సున్! కిసి! జా పాపుమ్ చి రిసా తుమ్ విసారుమ్ జతదు జలె, జతి! జా పాపుమ్ కెర్తొసాక తుమ్ దూరి కెర తుమ్ చి తెన్ అన్నె బెదవన నాయ్.

3 ఆగుక, జలె, ఆవ్ తుమ్ చి తెన్ నెంజిలె కి, ఆత్మక తుమ్ చి తెన్ అస్సి. తుమ్ చి తెన్ ఆవ్ పూర్తి తిలి రితి అస్సి.

4 జలె, దస్సి పాపుమ్ కెర్తొ జో మాన్పుచి రిసా ఆవ్ అప్పె కి తీర్పు ఉచర అస్సి. తుమ్ సంగుమ్ తె బెదిలె పొది, ఆత్మక

ఆవ్ కి తుమ్ చి తెన్ బెదిల్ రితి జయిందె, చి యేసుక్రీస్తుచి సెక్తి తుమ్ చి తెన్ తా,

5 జో మాన్పుచి ఆగ్ పాడ్ జతి రితి జోక నయ్ తాన్ చి అత్తి తుమ్ సార్పు కెర దాస; సిచ్చు జో జలె, ప్రబు జలో యేసు లోకుమ్ చక తీర్పు కెర్తి జా ఆకర్ దీసిక జో మాన్పుచి ఆత్మయి రచ్చించుప జతయి.

అన్నె బుద్దుల్ చి రిసా తీర్పు సంగిలిసి

6 దస్సి పాపుమ్ కెర్తొన్ చి రిసా 'అమ్ చి సెక్తిక అమ్ ఇండితసుమ్' మెన తుమ్ పులిలిసి చెంగిల్ నాయ్. పొడియె కెర్తి పాకుమ్ తె పులయ్ తి పీట్ ఇదిలిదిల్ తిలె కి, ఒండి పాకుమ్ పులెదె మెన నేన్పు గే?

7 అగ్గెచి పాపుమ్ కెర్తి బుద్దిచి తుమ్ గెచ్చవన గెల; తుమ్ సుద్ది జతి రిసా, *పాపుమ్ గెచ్చయ్ లి గుర్తుచి పస్కా పండుగు మెండపిల్ల రిత, క్రీస్తు అమ్ చి పాపుమ్ గెచ్చయ్ తి అర్చితుమ్ జలి తెంతో తుమ్ క 'సుద్ది జల' మెన దెకితయ్.

8 జాకయ్, జా పండుగు కెర్తి రితి జా, జో అమ్ క సుద్ది కెర్తొన్ చి రుజ్జు డీస్తి రితి ఇండుమ. అమ్ చి ఆత్మక పాడ్ కెర్తి అగ్గెచి బుద్ది, మెలె మూర్కుమ్ బుద్ది, పాపుమ్ బుద్ది, అమ్ క గార్ కెరెదె, చి జా పొన. జా పులయ్ తి పీట్ నెంజిలి పాకుమ్ తె బెదితి నిదానుమ్ సత్తిమ్ జా సుద్ది జమ.

9 'లంజెచ మాన్పుల్ తెన్ బెద నాయ్' మెన అగ్గెచి ఉత్తమ్ తె తుమ్ క రెగిడ్లయ్.

10 మాములుమ్ ప్రబుక నేన్ల ఈంజ లోకుమ్ చ లంజె జలన, ఆసల్ జలన, చోర్లు, బొమ్మల్ క జొకర్తనచి రిసా సంగి నాయ్. దస మాన్పుల్ తెన్ ఎధరె నే బెదుక జలె, ఈంజ లోకుమ్ క పూర్తి ములయ్ తయెదె.

11 కిచ్చొ అర్దుమ్ తెన్ దస్సి రెగిడ్లయ్ మెలె, కో జలెకు 'నంపజలన' మెనన్లొసా లంజె జతొసా, ఆసల్ జతొసా, బొమ్మల్ క జొకర్తొసా జలె, మాన్పుక దూసెనల్ కెర్తొసా జలె, మత్తిలోసా జలె, చోరు జలె, దసాచొక తుమ్ బెదవన నాయ్. జోవయింతెన్ అన్నిమ్ కి కెర నాయ్.

12 జలె, నంపజలన్ నెంజిలనక తీర్పు కెరుక అంచి కామ్ నెంజె. గని ప్రబుచి సంగుమ్ తె బెదిలనకయ్ తీర్పు కెరుక, మాత్తుమ్, సంగుమ్ చ తుమ్ నంపజలనచి పూచి.

13 సంగుమ్ తె నే బెదిలనక తీర్పు కెర్తొసా దేముడు, గని † "తుమ్ చి తెన్ బెదిలో కొన్సొ జలెకు పాపుమ్ కెర్తొసా జలె, తుమ్ తె తెంతో ఉదడ గెల" మెన ప్రబు జోచయ్ జల మాన్పుల్ చి రిసా పూర్గుమ్ రెగ్గయ్ లి తీర్పుకోడు అస్సి.

6

నంపజలన తీర్పు కెర్తి గేర్చ తగు కెరుక పొన

* 5:7 5:7 పస్కా పండుగు దీసి యేసు అమ్ చి పాపుమ్ గెచ్చయ్ తి అర్చితుమ్ జలన్. † 5:13 5:13 ద్వితియాపదేశ కాండుము 17:7, 19:19, 22:21, 24 చి 24:7.

1 తుమ్చితె ఎక్కిలోక ఎక్కిలో జట్టి జా తిలె, నంపజలసచి ముక్కె నే గెతె, కిచ్చొక ప్రబుక నంప నెంజిలసతె జోవయించి తీర్పు కెర్తి గేరతె తగు కెర్తసు? జా తప్పు.

2 నంపజలస ఒండి లోకుమ్చక తీర్పు కెరుల మెన నేన్ను గే? ఒండి లోకుమ్చక తుమ్ తీర్పు కెరుక అస్సె జలె, ఇన ఇదుద్ద తగుల్ తుమ్ సంగుమ్తె సూనుక నెతుర్పు గే?

3 దూతల్క కి అమ్ తీర్పు కెరుక అస్సె మెన కి నేన్ను గే? దస్సి కెరుమ్దే జలె, ఈంజయ్ లోకుమ్చ తగుల్ సూనుక అమ్క అన్నెయ్ అదికారుమ్ అస్సె.

4 జలె, తుమ్క ఈంజ లోకుమ్తె తగుల్ తిలె, కిచ్చొక ప్రబుచి సంగుమ్క కామ్క జెత మాన్సుల్చి మొక్కె నే సూనయ్తె వేర మాన్సుల్చ తగుల్తె కుట్టయ్తను?

5 తుమ్క లాజ్ నాయ్ గే? ప్రబుక నంపజల తుమ్ బావుడ్లుతె కో బుద్ది మాన్సు తయె నాయ్ గే, చి జోచి మొక్కె సూనయ్తె జో తగు కుట్టవుక నెంజె గే?

6 జలె, తుమ్ నంపజలస బావొక బావొ తగుల్ కెర్తసు, చి ప్రబుక నంపనెంజిలసక వెనడ్తసు!

7 అన్నె కిచ్చొ మెంతసి మెలె, ఎక్కిలోక ఎక్కిలో తుమ్ తగు కెర్తె, నంపనెంజిల మాన్సుల్ దెకిలె తుమ్క ఆసుల. తుమ్ నంపజలసచి నావ్ దెకెదె. దస తగుల్ జతి కంట మాన్సుల్ తుమ్క కెర్త తప్పుల్ ఓర్పుప జంక చెంగిలి, మోసిమ్ జంక చెంగిలి.

8 తుమ్చ సొంత బావుడ్లుక కి తుమ్, ఎక్కిలోక ఎక్కిలో పాపుమ్ కెర మోసిమ్ కెర్తసు.

సుద్ది నెంజిలస దేముడుచి రాజిమ్తె బెదుక నెంజె

9 సుద్ది నెంజిల మాన్సుల్ దేముడుచి రాజిమ్తె బెదుక నెంజె మెన నేన్ను గే? తుమ్ మోసిమ్ జా నాయ్. పెండ్లి నే జతస, జలస లంజెకమొ కెర్తస, బొమ్మల్క జొకర్తస జలెకు, మున్నుబోదల్ తెన్ మున్నుబోదల్, తేర్బోదల్ తెన్ తేర్బోదల్ లంజె జతస జలెకు,

10 చోర్లు జలెకు, డబ్బుల్క ఒగ్గర్ ఆస జతస జలెకు, మత్తాలల్ జలెకు, మాన్సుల్క దూసుప కెర్తస జలెకు, మాన్సుల్క బియడ లాబుమ్ కెరంతస జలెకు, దేముడుచి రాజిమ్తె బెదుక నెత్తిర్తి.

11 తుమ్ అగ్గెయి దస మాన్సుల్ జా తిలదు, గని ప్రబు జలో యేసుక్రీస్తుచి నావ్ తెన్, చి దేముడుచి సుద్ది తిలి ఆత్మతె తుమ్ దోయి జా, ప్రబుచయ్ జా, పాపుమ్ నే కెర తిలి రితి సుద్ది జలదు, చి తుమ్క 'పున్నిమ్ జల' మాన్సుల్ జా అస్సున్.

12 జలె, "అంక ఇస్టుమ్ జలిసి కేన్ కి కెరుక అంక అక్కు అస్సె, గని సగుమ్ కమొ కెర్తె చెంగిల్ నాయ్. అంక ఇస్టుమ్

జలిసి కేన్ కి కెరుక అంక అక్కు అస్సె, గని కిచ్చొ అలవాట్క గొతిమాన్సు రితో అవ్ జా తయిందె.

13 "అన్నిమ్ మాన్సుచి పేట్కయ్, పేట్ అన్నిమ్కయ్" మెన సంగితసుమ్, చి ఆకర్క దొన్ని కి ప్రబుయి గెచ్చవ గెలెదె. గని, మాన్సుచి ఆగ్ లంజె జతి రిసొ నెంజె గని ప్రబుచి రిసొయి, దస్సి ప్రబు ఆగ్చి రిసొయి.

14 అన్నె, యేసుప్రబుక దేముడు అబ్బొసి అన్నె జియడ్లె, చి జోచి సెక్తి అమ్క కి జియడెదె.

15 క్రీస్తుచి ఆగ్క తుమ్చ ఆగ్ వాటల్ జవుల మెన తుమ్ నేన్ను గే? జేవ్ దస్సి జలె, క్రీస్తుచ వాటల్ కడ గెల కెర సొనిక బెదవుక బెదెదె గే? నెంజె!

16 సొని తెన్ కో బెదెదె గే, జా తెన్ ఎక్కి ఆగ్ జతయ్ మెన నేన్ను గే? కిచ్చొక మెలె,

*"జేవ్ దొగుల ఎక్కి ఆగ్ జా తవుల"

మెన దేముడుచి కొడొతె రెగ్డయిలయ్ అస్సె.

17 గని, ప్రబు తెన్ కో బెద అస్తి గే, జో తెన్ ఎక్కి ఆత్మయి జా తవుల.

18 జాకయ్, లంజెకమొ దూరి కెరస. దసితె ఎద్దరె బెద నాయ్. మాన్సుల్ కెర్తి అన్నె ఎత్తి పాపుమ్, జలె, జోచి ఆగ్క దూరి అస్సె, జోచి ఆగ్క బయిలె అస్సె, గని కో లంజె జయెదె గే, జోచి సొంత ఆగ్కు పాపుమ్ కెర పాడ్ కెర్తయ్.

19 తుమ్చి ఆగ్, తుమ్చి పెట్టి తిలి దేముడు దిలి జోచి సుద్ది తిలి ఆత్మక గుడి జా అస్సె మెన తుమ్ నేన్ను గే? తుమ్క తుమి ఇస్టుమ్ అయ్లి రితి ఏలుప కెరనుక తుమ్క అదికారుమ్ నాయ్.

20 దేముడు ఒగ్గర్ కరిద్క తుమ్క †గెన అస్సె. జాక, తుమ్చి ఆగ్ తెన్ జోక గవురుమ్ కెర్తి రితి తుమ్ సుద్ది తెన్ ఇండ.

7

పెండ్లి జతిన్ చి నే జతిన్

1 జలె, తుమ్ రెగ్ల పుసిలిన్క జబాబుల్ రెగిడిందె. పెండ్లి నే జా తిలొ మున్నుబోద, జలె, తేర్బోదక నే చడ్లె చెంగిలి.

2 గని జో మాన్సు పెండ్లి నే జా తిలె, సయ్తాన్ ఉచర్తిసి రితి లంజెకమొ నే కెరవుక మెన, ఎత్తి మున్నుబోదక సొంత తెర్తి తిలె, ఎత్తి తేర్బోదక సొంత మున్నుసి తిలె చెంగిలి.

3 మున్నుసి తేర్తిక జోచి పూచి తిలిసి దెంక, తేర్తి మున్నున్క జేవ్చి పూచి తిలిసి దెంక.

4 కిచ్చొక మెలె, జాచి సొంత ఆగ్క ఇస్టుమ్ అయ్లి రితి ఏలుప కెరుక తేర్తిక అదికారుమ్ నాయ్; మున్నుసి ఏలుప కెర్తయ్. దస్సి, జోచి సొంత ఆగ్క ఇస్టుమ్ అయ్లి రితి ఏలుప కెరుక మున్నున్క అదికారుమ్ నాయ్; తేర్తి ఏలుప కెర్తయ్.

* 6:16 6:16 అదికారుమ్ 2:24. † 6:20 6:20 మెలె, జోవయించి లోయి సువ జోవయించి పాపుమ్ పుంచ సయ్తాన్చి రాజిమ్ తెంతో జోవయింక నెత్తివన అస్సె.

5 తుమ్తె కేన్ జవున్ దొగుతెర ఎక్కి ఉద్దెసుమ్ ఉచర ప్రార్థన నిదానుమ్ కెర్తి రిసాయి గడియకయ్ ఎక్కిలోక ఎక్కిలో దూర్ జా తంక జయెదె, నెంజిలె పోన. గని ప్రార్థన కెర్తి జా కామ్ కెర కేడయ్లదు మెలె, అన్నె మాములుమ్ బెద, నెంజిలె తుమ్ * ఆగ్గక ఆసక ముద్దొ కెర నెతిర్లె, సయ్తాన్ తుమ్క పాపుమ్ కెరవుక ఉచరెదె.

6 ప్రార్థనల్చి రిసా గడియ అంక తంక జయెదె మెన కిచ్చొక సంగితసి మెలె, ఆడ్ర నెంజె, గని దస్సి కెరుక చెంగిల్ జయెదె.

7 అన్నె, తుమ్ ఎత్తిజిన్ అంచి రితి పెండ్లి నెంతె తత్తదు జలె, 'చెంగిలి' మెన్తయ్, గని ఎత్తి మాన్సుక దేముడు దిలి వరుమ్ జోకయ్ తయెదె; ఎక్కిలోక ఏక్ వరుమ్, అన్నెకొక అన్నెక్ వరుమ్ దా అస్సె.

8 పెండ్లి నే జలసక చి రండెల్ మాన్సుల్క ఆవ్ కిచ్చొ మెంతసి మెలె, 'అంచి రితి జేవ్ దస్సి తిలె జోవయింక చెంగిలి'.

9 గని, జేవ్ ఓర్పువ జంక నెతిర్లె, పెండ్లి జతు. కిచ్చొక మెలె, ఒగ్గర్ ఆగ్గ ఆసక వడ్డితి కంట పెండ్లి జంక చెంగిలి.

10 పెండ్లి జలసక కిచ్చొ ఆడ్ర దెతసి మెలె; ఆవ్ నాయ్, గని ప్రబుచి ఆడ్ర ఈంజ; తేర్చి మున్సున్క ములుక నెంజె.

11 గని ఏక్ వేల ముల దిలె, దస్సి తవున్, నెంజిలె మున్సున్ తెన్ అన్నె బెదున్. పడ్డొ మున్సుసి తేర్చిక ములవుక పోని.

12 తుమ్తె అన్నె సగుమ్జిన్క కిచ్చొ మెంతసి మెలె; ప్రబు సంగిలిసి నెంజె, గని అవ్వి సంగితసి. ప్రబుక సంజలొ కేన్ బావొచి తేర్చి ప్రబుక సంపనెంజిలిసి జయెదె గే, జా 'జో తెన్ జయిందె' మెన్తయ్ జలె, జో జాక ములుక నెంజె.

13 దస్సి, కేన్ సంపజలి తేర్బోదచొ మున్సుసి సంపనెంజిలొసా జలె, 'జా తెన్ జయిందె' మెన జో సంగిలె, జా కి జోక ములుక నెంజె.

14 కిచ్చొక మెలె, సంపజలి తేర్చిచి సుద్దిచి రిసా, సంపనెంజిలొ మున్సుసి కి సుద్ది జయెదె, చి సంపజలొ మున్సున్చి సుద్దిచి రిసా సంపనెంజిలి తేర్చి కి సుద్ది జయెదె. నెంజిలె, తుమ్చితె దస్సి జల కుటుంబల్చ బోదల్ సుద్ది జత నాయ్. గని అప్పె సుద్ది జా అస్తి.

15 గని జేవ్ దొగుతెరతె సంపనెంజిలొ మున్సుసి జలెకు సంపనెంజిలి తేర్చి జలెకు ములుక కోర్ప జతయ్ జలె, ములుసు. దస్సి జా తిలె, సంపతిలొసా జవున్ సంపతిలిసి జవున్ మున్సున్ తెన్ గే తెర్చి తెన్ గే తంక పూచి నాయ్. కిచ్చొక మెలె, 'సెంతుమ్ తెన్ జతు' మెనయ్ ప్రబు అమ్క బుకారా అస్సె.

16 సంపనెంజిలొ మున్సుసి తుచి తెన్ తత్తో జలె, మున్సుది ప్రబుక సంపజా రచ్చించువ జతి రితి తుయి జోక

సికడుక తెరితది గే నెతిర్తది గే నేన్చి. దస్సి, సంపనెంజిలి తేర్చి, మున్సుబోద తుచి తెన్ తత్తి జలె, జా సంపజా రచ్చించువ జతి రితి సికడుక తెరితది గే నెతిర్తది గే, నెసి. జాకయ్ తుమ్ సిచ్చ కెరన నాయ్.

ప్రబు బుకార్లి పొది కిసి తిలె, దస్సి తంక

17 ప్రబుచ సంగుమ్లు ఎత్తిచి రిసా కిచ్చొ ఆడ్ర కెర అస్సి మెలె, కేన్ మాన్సుక ప్రబు కిచ్చొ వరుమ్ దా అస్సి గే, జో మాన్సు జయ్యి వరుమ్ రితి జింక. కిసి జింక మెన దేముడు జోక బుకారా అస్సి గే, దస్సి జింక.

18 ప్రబు బుకార్లి పొది కో యూదుల్చి గుర్తుచి సున్నతి కెరన తిల గే, జా గుర్తుచ మచ్చల్ గెచ్చవుక పోన. ప్రబు బుకార్లి పొది కో జా గుర్తు కెరన తతి నాయ్ గే, కెరసుక ఉచర్చు నాయ్.

19 కిచ్చొక మెలె, దేముడుచ కొడొ రితి ఇండుకయ్ ముక్కిమ్.

20 ప్రబు బుకార్లి పొది కిసి తిల గే, ఎత్తి మాన్సు దస్సి తంక.

21 ప్రబు బుకార్లి పొది గొతిమాన్సుల్ జా తిలదు గే, బాద నాయ్. విడ్డల్ జంక వాటు తిలె, విడ్డల్ జా. కిసి తిలె కి, బాద నాయ్.

22 కిచ్చొక మెలె, గొతిమాన్సు తిలి పొది ప్రబు బుకార్లిసా జలె, ప్రబుచి తెడి †విడ్డల్ జలొసా జతయ్. దస్సి కి, విడ్డల్ తిలి పొది కక్క ప్రబు బుకారా అస్సి గే, జో క్రిస్తుచొ గొతిమాన్సు జతయ్.

23 క్రిస్తుచి లొయి తెన్ దేముడు ‡తుమ్క గెన అస్సి. జాక, మాన్సుచి ఇస్టుమ్ రితి తుమ్ ఇండుక నాయ్.

24 జాకయ్, బావుడ్లు, ప్రబు బుకార్లి పొది కిసి ఎత్తి మాన్సు తిలదు గే, దేముడుచి తెడి దస్సి తత్తు.

పెండ్లి నే జలసచి జలసచి రిసా సంగిలిసి

25 పెండ్లి నే జలసచి రిసా, జలె, ప్రబు అంక కిచ్చొ ఆడ్ర దెయె నాయ్, గని ప్రబు అంక సంప అస్సె, జోవయించి దయ అంచి ఉప్పిరి అస్సిచి రిసా నిదానుమ్ అస్సి, చి ఆవ్ ఉచర్చిసి ఆవ్ సంగిందె.

26 కిచ్చొ ఆవ్ ఉచర్చిసి మెలె, అప్పె జెత అల్లర్చి రిసా దస్సి తంక చెంగిలి.

27 కేన్ మున్సుబోద తెర్చి ఆన తిలె, విడ్డల్ జంక ఉచర్చు నాయ్. తెర్చి నే ఆన తిలె, పెండ్లి జంక ఆన జవున్ నాయ్.

28 గని ఏక్ వేల పెండ్లి కెరన్లె పాపుమ్ నెంజె. దస్సి తేర్బోద కి పెండ్లి కెరన్లె పాపుమ్ నెంజె. గని పెండ్లి జలసక ఈంజ లొక్కుమ్చ బాదల్ తయెదె. దన బాదల్ తుమ్ సేడుక అంక ఇస్టుమ్ నాయ్.

* 7:5 7:5 ఆగ్గక ఆసక ఓర్పువ జంక నెతిర్లె † 7:22 7:22 సయ్తాన్చి రాజిమ్ తెంతొ విడ్డల్ జలొసా. ‡ 7:23 7:23 నెంజెలె, 'సయ్తాన్చి రాజిమ్ తెంతొ తుమ్క నెతోవన అస్సె'.

29 బావుడ్లు, కిచ్చొక ఇసి మెన ఆవ్ సంగితసి మెలె, అప్పె తెంతో ఆకర్ దీసి ఎద తొక్కి సమయుమ్ అస్సె. జాకయ్, తెర్ని అన్లస అప్పె తెంతో తెర్ని నే ఆన్లి రితి ప్రబుచి కామ్కయ్ నిదానుమ్ జితు.

30 'కిచ్చొ జలెకి, ప్రబుచి కామ్ ముక్కిమ్' మెనయ్, ఏడ్డస నే ఏడ్డిసి రితి జితు, సర్ల తెన్ తిలస సర్ల నెంజిల్ రితి జితు. అస్సి గెన్లస కీసి జింక మెలె, కిచ్చొ నెంజిలి రితి జితు.

31 అన్నె, ఈంజ లోకుమ్తె తిలిసి వాడిక కెర్తస కీసి జింక మెలె, దస్సిచిక దెర్లు నే సేడ్డి రితి జితు. అప్పె సంగిలిసి ఎత్తి కిచ్చొక మెలె, ఈంజ లోకుమ్చి రితి తిలిసి ఎత్తి పూర్తి పాడ్ జా గెతిసి.

32 'తుమ్చి మెన్సుతె ఈంజ లోకుమ్చ బాదల్ తత్తు నాయ్' మెనయ్ తుమ్చి రిసా అంచి ఆస. పెండ్లి నే జలో మున్సుబోద, జలె, ప్రబుచ కమొచి రిసా మెన్సు దెతయ్, ప్రబుచ ఆసల్ కెరుక ఆస జతయ్.

33 పెండ్లి జలో మున్సుబోద ఈంజయ్ లోకుమ్చ కమొచి రిసాచి తేర్చిచ ఆసల్ జర్లు కెరుక అల్లర్ జతయ్.

34 చి జోవయింక దొన్ని మెన్సుల్ తత్తయ్. దస్సి, పెండ్లి నే జలి తేరబోద గే, ఉబెడి గే జలె, ప్రబుచ కమొచి రిసా మెన్సు దెతయ్, ఆగుక కి ఆత్మక కి సుద్ది తంక, ప్రబుక ఎక్కి నిదానుమ్ తంక ఆస జతయ్. గని పెండ్లి జలి తేరబోద, జలె, ఈంజ లోకుమ్చ కమొచి రిసా కి, మున్సున్చ ఆసల్ జర్లు కెరుక కి అల్లర్ జతయ్.

35 ఈంజ ఎత్తి తుమ్క కిచ్చొక ఆవ్ సంగితసి మెలె, తుమ్క 'చెంగిల్ తత్తు' మెనయ్ సంగితసి. తుమ్క జాడు వయడ్డి రిసా నాయ్, గని బుద్దివాటు దెకయ్తి రిసాయి. తుమ్క 'ప్రబుక ఎక్కి మెన్సు నిదానుమ్ జితు' మెన అంచి ఆస.

36 జోక దెంక సంగ తిలి నాడిక ఎక్కిలో నే అన్నె, ఆసక ఓర్పువ జంక నెతిర్లె, రకనుక నెతిర్లె, పెండ్లి జతి జోచి ఇస్టుమ్ కెరన్సు. పెండ్లి జంక పాపుమ్ నెంజె.

37 గని, కక్క మెన్సు డిట్టుమ్ తిలె, జో ఓర్పువ జంక తెర జోచి ఆస రకనుక తెర్లె, జా దుయిన్క మింతున్ జా, నే ఆనుక దయిరిమ్ తిలె, దస్సి తాఁ గెలె, చెంగిలి.

38 జాక, జో సంగ తిలి దుయిన్క కో పెండ్లి జలె చెంగిలి, గని కో పెండ్లి జయె నాయ్ గే, జోక ఒగ్గర్ చెంగిలి.

39 మున్సుసి జివు తిలె ఎద, తేర్ని జోకయ్ తంక. గని మున్సుసి మొర గెలె, జా ఇస్టుమ్ జలోసాక పెండ్లి జంక జయెదె; గని ప్రబుచి సెలవ్ రితి జలెకయ్.

40 జా దస్సి తాఁ గెలె, జాకయ్ చెంగిలి, మెన ఆవ్ ఉచర్తసి. దేముడుచి సుద్ది తిలి ఆత్మ కి దస్సి మెన అంచి పెట్టి సికడ్డయ్ మెన ఆవ్ ఉచర్తసి.

8

బొమ్మల్క దిలిసి కతిన్చి రిసాచి కోడు

1 జలె, బొమ్మల్క దిలి అన్నిమ్చి రిసా ఉచరుమ. తుమ్ తుమ్చి ఉత్తుమ్తె రెగిడ్లి రితి 'అమ్ ఎత్తిజిన్క గ్యానుమ్ అస్సె' మెన జానుమ్. గని 'గ్యానుమ్ మాన్సుక పులయ్తయ్' మెన కి జానుమ్. ప్రేమయ్, మాత్తుమ్, మాన్సుక డిట్టుమ్ కెర్తయ్.

2 "అంక గ్యానుమ్ అస్సె" మెన కో ఉచరంతయ్ గే, జో జానుక ముక్కిమ్ తిలిసి జో అప్పెక నేనె.

3 గని, దేముడుక కో ప్రేమ కెర్తయ్ గే, జో దేముడు జోకయ్ జానె.

4 జాకయ్, బొమ్మల్క అన్నిమ్ దిలిన్చి రిసా ఉచర్లె, ఈంజ లోకుమ్చ 'బొమ్మల్క కిచ్చొ జివు నాయ్' మెన జానుమ్, అన్నె, 'జీవ్ తిలో దేముడు ఎక్కిలోయి అస్సె. అన్నె కోయి నాయ్' మెన కి జానుమ్.

5 మెలె, అన్నెక్ లోకుమ్తె కి బూలోకుమ్తె కి ఒగ్గర్ వేర వేర వస్తువల్క 'దేముడ్లు జతతి' మెన మాన్సుల్ సంగితతి. నిజుమి మాన్సుల్క కిచ్చొ కిచ్చొ 'దేముడ్లు' 'ప్రబులు' ఒగ్గర్ జతతి.

6 మాన్సుల్ దస్సి సంగిలే కి, అమ్క ఎక్కిలోయి దేముడు. కొన్సొ మెలె, ఎత్తికయ్ అబ్బొ జలో దేముడు. జో ఎత్తి జెర్మయిలోసా, చి జోచి రిసాయి అమ్ ఎత్తిజిన్ జతసుమ్. వడ్డో అమ్క ఎక్కిలో ప్రబు. కొన్సొ మెలె, యేసుక్కిస్తు. *జోచి అత్తి ఎత్తి జెర్మన్ జలి, జోయ్యి అంక జెర్మయ్లన్ చి రిసా అమ్ జితసుమ్.

7 జలెకి, 'బొమ్మల్క సెక్తి నాయ్' మెన సగుమ్జిన్ అప్పెక నేన్తి; జా గ్యానుమ్ జేవేక నాయ్. సగుమ్జిన్ అగ్గె తెంతో బొమ్మల్క జోకరుక అలవాట్ జా తిల, చి 'బొమ్మల్క దిలిసి అమ్ నంపజలస కయ్లె అమ్క పాడ్ కెరెదె' మెన బితతి, చి జోవయించి మెన్సుతె బమ్మ జవుల. కయ్లె, 'గార్ జలమ్, పొరపాట్ జలమ్' మెన 'మెన్సుక పాడ్ జలమ్' మెన నిస్సారుమ్ దెకనుల.

8 అమ్ కతిసి, జలె, దేముడుక పాసి ఆనె నాయ్, దూరి కెరె నాయ్. నే కయ్లె నస్టుమ్ నాయ్ కయ్లె లాబుమ్ నాయ్.

9 గని, కిచ్చొచి రిసా తుమ్ జాగర్త తంక మెలె, 'కంక జయెదె' మెన తుమ్ ఇస్టుమ్ అయ్లి రితి కెర్లె, ఏక్ వేల †మెన్సు డిట్టుమ్ నెంజిలో అన్నెక్లో నంపజలస తుక దెక, జో కి వడ్డో కయ్లె, 'తప్పు కెర్తయ్' మెన ఉచరన ఉస్సుర్ జయెదె, చి జోచి మెన్సుతె జో పొరపాట్ కెర్లె రితి జయెదె.

10 దస్సి తుమ్చితె కో జలెకు కేన్ జవున్ బొమ్మచి గుడితె వెస బలి దిలిసి కయ్లె, ఆత్మక డిట్టుమ్ నెంజిలో నంపజలస కో జలెకు జోక ఒత్త దెకిలె, 'జో గ్యానుమ్

* 8:6 8:6 యోహాను 1:1-4 దెక. † 8:9 8:9 రోమియల్ 14 అద్యయిమ్, ముక్కిమ్క 14:13-23 దెక.

తిలోసా కతయ్, ఆవ్ కి కయ్లె బాద నాయ్, కిచ్చొగే' మెన దయిరిమ్ నెంజ, దయిరిమ్ జా జో కి కయ్లె, 'వేర దేముడ్డుక దిలిసి కయ్లయ్. క్రీస్తుక ములిల్ రితి జతయ్' మెన జో పడ్డో బమ్మ జయెదె.

11 దస్సి జలె, జో మాన్సుక 'పాపుమ్ తెంతో రచ్చించుప జవున్' మెనయ్ క్రీస్తు మొర తిలె కి, తుమ్చి 'గ్యానుమ్' చి రిసాయి ఆత్మక డిట్టుమ్ నెంజిలో జో మాన్సు జోచి ఆత్మతె పాడ్ జలి రితి జయెదె.

12 దస్సి, జేవ్ ఆత్మక డిట్టుమ్ నెంజిలసచి ఆత్మ పాడ్ కెర తుమ్ పాపుమ్ కెర, క్రీస్తుక కి పాపుమ్ కెర్లి రితి జతను.

13 జాకయ్, ఆవ్ ముక్కల్ జవున్ కతిసి జలెకు బావో జలో కేన్ జవున్ నంపజలసక †పాపుమ్ కెరయెదె జలె, ఆవ్ ముక్కల్ కయి నాయ్!

9

ప్రబు నిసాన్లోచి రిసా పవులు రుజ్జు జలిన్

1 అంక పరిచ్చ కెర్తసు జలె, క్రీస్తుచి తెడి ఆవ్ విడ్డల్ జలోసా నెంజి గే? జోచి చి రిసా జోచో బారికి ఆవ్ జయి నాయ్ గే? అమ్చో ప్రబు జలో యేసుక ఆవ్ సొంత దెకుక నాయ్ గే? తుమీ ప్రబుచి తెడి ఆవ్ మార్సుప కెర్లసచి పలితుమ్ తుమ్ నెంజున్ గే?

2 ఆవ్, 'ప్రబుచో బారికి నెంజె' మెన వేర మాన్సుల్ అంచి రిసా ఉచర్లె కి, దసాచో ఆవ్ తిలిన్క తుమి సాచుల్ జస్తె. ప్రబుచి బారికి కామ్క జో అంక నిసాన్చిసి. కిచ్చొతె రుజ్జు జతయ్ మెలె, తుమ్ ప్రబుచి తెడి తిలిసి, అంచి అత్తి జోచి రిసా నూన నంపజలదు, అంక జో దిలి కామ్ తుమ్చితెయ్ జెయిమ్ జలి.

3 అంక పరిచ్చ కెర్తసక అంచి జబాబ్ ఈంజయి.

4 ప్రబుచి ఈంజ కామ్ కెర్తస, కంక పింక విలువ నాయ్ గే, నాయిమ్ నాయ్ గే, బెదె నాయ్ గే?

5 ప్రబుచ బావుడ్చిచో చి *కేపా చి ప్రబుచ అన్నె బారికుల్చి రితి అమ్ తెర్చి ఆన అమ్చి పట్టి కడ నెంక అమ్క విలువ నాయ్ గే?

6 ప్రబుచ బారికుల్ మొత్తుమ్తె ఎక్కి బర్నబా చి ఆవ్, జలె, అత్తో తెన్ కామ్ కెర కెరయ్ జింక ములుక విలువ నాయ్ గే? ఎక్కి అమ్మి కామ్ కెర కెరయ్ జింక ములుక విలువ నాయ్ గే?

7 జమాను సుదో సొంత గెర్చి డబ్బుల్ ఆనన జమాన్లుచ కామ్ కెరెదె గే? కో ద్రాసతోట గల కెర ఒత్తచ కాయల్ జో కంక నెంజి గే? మంద రకితో గొవుడు మందచి దూదు నే పితె కో తవుల?

8 ఆవ్ మాన్సు అమ్మి కెరయ్ ఇసి సంగితసి గే? దేముడుచ †మోసే పూర్ణుమ్చోచి అత్తి రెగ్డయ్ల దేముడుచ ఆగ్గుల్ కి ఇసి సంగితతి.

9 † "గిడ్డల్ కెల్నె సుదయ్తె పొది సుదయ్తో బెయిలుచి మూంతి బందుక పొన" మెన మోసే పూర్ణుమ్చోచి అత్తి రెగిడ్డి దేముడుచి ఆగ్గుల్తె ఇసి రెగ్డవ అస్సె. జలె, ఎక్కి బెయిలల్ చి రిసా జో ఉచర్తయ్ గే?

10 కచితుమ్ అమ్చి రిసాయ్ ఈంజ కోడు సంగితయ్ మెన ఆవ్ నంపజతసి. కిచ్చొక మెలె, కేస్త్రాసా కేసెలె, పంటో లాయిలొసా పంటో లాయిలె, జో కి ఈంజో కి 'పంటోచి వాట నజనుక జయెదె' మెన ఆస తెన్ తవుల, నజనుక విలువ జవుల.

11 ఆమ్, జలె, తుమ్చితె ఆత్మచి బిఁగల అస్సుమ్ మెలె, అమ్క తుమ్ కిచ్చొ జవున్ దెంక నెంజె గే? అమ్క కిచ్చొ జవున్ వాట జెంక బెదె నాయ్ గే?

12 ప్రబుచి కామ్ కెర్ల వేర మాన్సుల్ తుమ్చితె వాట నజనుక విలువ తిలె, అమ్ అన్నె విలువ జము నాయ్ గే? అమ్మి తోలితో తుమ్క సుబుమ్ కబుర్ నూనయ్లమ్, గెద. జలె, జా నజనుక అమ్ విలువ జలెకి, జా అమ్ నజనుక నాయిమ్ తిలె కి, అమ్క జెతిసి నజనుమ్ నాయ్. ప్రబుచి సుబుమ్ కబుర్ తుమ్ నూన్తిన్క కిచ్చొ అడ్డు కెరుక నెన కెర, కిచ్చొ కస్టుమ్ కి ఓర్పువ జమెదె.

13 దేముడుచి గుడిచి కామ్ కెర్ల సేవ కెర్తస, జలె, దేముడుచి గుడిచి జేవ్చి వాట నజ కతతి. బలిచి కామ్ కెర్ల సేవ కెర్తస జా బలి దిలి టాన్తె దెతిసి జోవయించి వాట నజ కతతి మెన నేన్సు గే?

14 దస్సి, "సుబుమ్ కబుర్ నూనయ్తస జోవయించి జా కామ్చి రిసాచి వాటక జితు కతు" మెన ప్రబు ఆడ్ర దిలన్.

15 జలెకి దస్సి ఆవ్ కిచ్చొ జలెకి నజనుక నాయిమ్ తిలె కి, ఆవ్ నజనుక నాయ్. చి 'దస్సి తోడు దొర్కు కెరనుక ఉచరయ్ ఉత్తల్ రెగిడ్డయ్' మెన తుమ్ అంచి రిసా ఉచర నాయ్. కిచ్చొక మెలె, 'ఆవ్ నజి నాయ్' మెన ఆవ్ గవురుమ్ సంగితిన్క కో అడ్డు కెర్లి కంట మొరుక కి సర్ల జయిందె.

16 సుబుమ్ కబుర్ నూనయ్తి రిసా కిచ్చొ గవురుమ్ నజనుక బెదె నాయ్. కిచ్చొక మెలె, జా సుబుమ్ కబుర్ నే నూనయ్లె నెంజె, అయ్యె! ఆవ్ సుబుమ్ కబుర్ నే నూనయ్లె, అంక నస్టుమ్!

17 ఎక్కి అంచి సొంత ఇస్టుమ్కయ్ ఈంజ కామ్ కెర్తయ్ జలె, 'జో కెర్లి రిసా జోవయింక బవుమానుమ్ దెంక అస్సె' మెనుక జతి. గని ఆవ్ ఈంజ కామ్ కెర్లిసి ఎక్కి ఆవ్ ఇస్టుమ్ జలిసి నెంజె. ఆవ్ ఈంజ కామ్ కెరుక మెన ప్రబు

‡ 8:13 8:13 8:9 దెక, చి రోమియల్ 14:23. * 9:5 9:5 మెలె, 'పేతురు'. † 9:8 9:8 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్డయ్ల ఆగ్గుల్ మెన అమ్ జానుమ్. ఈంజ కొడో ఎత్తి బైబిల్తె అగేచి పావ్ పుస్తకుమ్తె రెగ్డయ్ జా అస్సె. ఈంజ దెకపుక మెన కుపియ బాసతె నొయి ప్రమానుమ్తె మోసే పూర్ణుమ్చోచి అత్తి రెగిడ్డి దేముడుచ ఆగ్గుల్ మెన రగ్డవ అస్సె. ‡ 9:9 9:9 ద్వితీయోపదేశ కాండుము 25:4.

అంక పూచి కెర అస్సె. కిచ్చొ దొర్కు జలెకి, నే దొర్కు జలెకి, ఈంజ కామ్ కెరుకయ్ అంచి పూచి.

18 జలె, అంచి బవుమానుమ్ కిచ్చొ మెలె, సుబుమ్ కబుర్ సూనయ్ తి రిసా ఆవ్ నజనుక విలువ తిలిన్క ఆవ్ ఆస నే జతె, 'తుమ్క ఆరి దొర్కు జవున్' మెనయ్ ఆవ్ కిచ్చొ నే నజితె, తుమ్క జాడు వయడుక నెన కెర, డబ్బుల్ గట్ట నే నజితె ఆరి బోదన కెర్తసి.

ఎత్తి రగల్ మాన్యుల్క సుబుమ్ కబుర్ సూనవుక

19 దస్సి, ఆవ్ కేన్ మాన్యుచొ గొతిమాన్యు నెంజిలె కి, ఒగ్గర్జినక 'ప్రబుక సంపజా రచ్చించుప జతు' మెనయ్ అంచి సర్తక ఎత్తిజినక గొతిమాన్యు రితొ జా అస్సి.

20 'యూదుల్ సంపజతు' మెన, యూదుడు రితొ జలయ్. మెలె, పూర్గుమ్ మోసేచి అత్తి దేముడు దిల ఆగ్గుల్క బితసక 'సంపజతు' మెనయ్, దేముడు మోసే తెన్ దిలి ఆగ్గుల్క బితసా రితొ జలయ్. ఆవ్ జా అలవాట్ తెంతొ ఆత్మక విడ్డల్ జా తిలె కి.

21 దేముడు మోసే తెన్ దిలి ఆగ్గుల్ రితి నే కెర్తసక, మెలె యూదుల్ నెంజిలసక, జలె, 'జేవ్ కి ప్రబుక సంపజా రచ్చించుప జతు' మెనయ్, యూదుడు నెంజిలొ రితొ జలయ్. మెలె, దేముడుక నిదానుమ్ తా, జోచి కొడ్ రితి నిదానుమ్ ఇండితె తిలయ్, గని క్రిస్తు సంగిలి ఆగ్గుల్చి రితి, కి 'ప్రేమయ్ ముక్కిమ్' మెనయ్, జోచి ప్రేమ తెడి అమ్చ యూదుల్చ ముక్కిమ్ నెంజిల దేముడు మోసే తెన్ దిలి ఆగ్గుల్చి జాడు యూదుల్ నెంజిలసక వయడి నాయ్.

22 ఆత్మక డిట్టుమ్ నెంజిలసక 'జేవ్ కి ప్రబుక సంపజా రచ్చించుప జతు' మెనయ్, 'బమ్మ కెర్లె అన్మానుమ్ జవుల' మెనయ్, జోవయింక బమ్మ నే కెర్తి రిసా జోవయించొ రితొ జలయ్. 'కీసి జలె సగుమ్జినకయ్ జవున్ రచ్చించుప కెరిందె' మెనయ్ జోవయించ విడ్డల్క, ఆత్మల్క నిస్కారుమ్ నే దెకితె, ఎత్తిజినక మరియాద దెక అస్సి.

23 'ఎత్తిజిన సుబుమ్ కబుర్ సూన్తు, సంపజా రచ్చించుప జతి అవ్కాసుమ్ నజన్తు' మెనయ్, పడ్డొ, 'సంపజలన ఎత్తిజిన తెన్ ఆవ్ కి సుబుమ్ కబుర్ తెచ వరల్తె బెదిందె' మెనయ్.

పరలోకుమ్చి బవుమానుమ్

24 కేన్ జవున్ నిగితి కెల్తెతె ఒగ్గర్ జిని నిగుల, గని ఎత్తిచి కంట బే బేగి నిగితొసా ఎక్కిలొ జినెదె, చి జోకయ్ బవుమానుమ్ దొర్కు జయెదె మెన తుమ్ నెను గే. పరలోకుమ్చి బవుమానుమ్ దొర్కు కెరంతి రిసా తుమ్చితె ఎత్తి మాన్యుకి నిదానుమ్ నిగ జిన.

§ 9:21 9:21 మత్తయి 22:37-40, యోహాను 13:34-35, 15:12, 17. నిర్గమకాండుమ్ 14:16. † 10:3 10:3 నిర్గమకాండుమ్ 16 అద్యయిమ్. యోహాను 4:10-14. † 10:5 10:5 నిర్గమకాండుమ్ 14:20-24, 28-35, ద్వితీయోపదేశ కాండుము 1:34-40. † 10:7 10:7 నిర్గమకాండుమ్ 32 అద్యయిమ్. ముక్కిమ్క 32:2-6.

25 నిగిత కెర్లయ్తె బెదితన, జలె, జోవయించి ఆగ్ డిట్టుమ్ జతి రితి, ఆగ్గుక ఎత్తి రగల్ కచితుమ్ ముద్దొ కెరుక సికనుల. జేవ్ దస్సి సిచ్చ రితి కెరంతిసి కిచ్చొక మెలె, ఆరి పాడ్ జతి ఈంజయ్ లోకుమ్తె బెదితి బవుమానుమ్ దొర్కు కెరనుక. ఆమ్, మాత్తుమ్, కిచ్చొక కచితుమ్ ముద్దొ కెరంతసుమ్ మెలె, పాడ్ నే జతి పరలోకుమ్చి బవుమానుమ్కయ్.

26 ఆవ్ కేనె గెతసి గే పాచ్చిల్ రితి నిగి నాయ్. వాదు తెన్ పొరాటుమ్ జలి రితి నే జయి, దెబ్బ కేనె నే లయితి రితి కెల్లె నాయ్.

27 అంచి ఆగ్గుక ఆవ్ ముద్దొచి బుద్ది సికయ్తని కెర్తసి, అంచ ఆసల్క ముద్దొ కెరంతసి. నెంజిలె, తొలితొ వేర మాన్యుల్క బోద కెర సికడ తిలె కి, ఏక్ వేల అవ్వి ఓడుప జలె, కెద్ది తప్పు జయిందె. అంక జెతికయ్ జా బవుమానుమ్ నజన్తి అవ్కాసుమ్ ఆవ్వి పిట్టవనై, కెద్ది పాపుమ్!

10

యూదుల్చి రితి పొరపాట్ జతిన్తె తుమ్ కెరుక నాయ్

1 తుమ్ కిచ్చొక జాగర్త తెన్ తంక మెలె, బావుడ్లు, అమ్చ పూర్గుమ్చ కీసి జల గే, ఉచరుమ. తుమ్ పచ్చ నాయ్. ఉచర్లె, కామ్క జెయెదె. దేముడు జోవయించి పుర్లె ఇండయ్లి *మబ్బుచి ఎట్టొ జేవ్ ఎత్తిజిన వెల్లి బయిలె బుల్లె తిల, †సముద్రుమ్చి బుయి వాట్ జేవ్ ఎత్తిజిన సముద్రుమ్తె ఇండ గెల.

2 దస్సి, మబ్బుచి పట్టి ఇండ, సముద్రుమ్ దస్సి డేవ, మోసే తెన్ బాప్తిసుమ్ నజన్తి రితి జల.

3 ఎత్తి ఎక్కి †ఆత్మ అన్నిమ్ కయ్ల,

4 ఒండిజిన కిఆత్మ సమ్మందుమ్ జలి పాని పిల. ఆత్మ సమ్మందుమ్ జలి రంగ్ని తెంతొ సువి జలిని పాని జేవ్ పిల. జో ఆత్మ రెంగ్ని కొస్సొ మెలె, *క్రిస్తు.

5 దస్సి జలెకి, జోవయింతె ఒగ్గర్జినచి ఇండిలిసి రిసా అమ్చొ దేముడుక సర్తతయె నాయ్. అన్సె, జా వెల్లి బయిలె జేవ్ †పాపుమ్తె గెతికయ్, దేముడు సంగ తిలి దేసిమి జేవ్ నే పావితె మొరుక మెన జో సిచ్చ దిలన్.

6 జలె, జేవ్ ఆస జలి రితి ఆమ్ ఆస జంక నాయ్ మెల, అమ్క బుద్ది సికితి రితి జా ఎత్తి అమ్క కిచ్చొ కామ్క జెయెదె మెలె, అమ్క జాగర్త దెకయ్తయ్.

7 † "ప్రెజల్ కంక పింక వెన, నచుక ఉట్టిల"

* 10:1 10:1 నిర్గమకాండుమ్ 13:21, 14:19. † 10:1 10:1

§ 10:4 10:4 నిర్గమకాండుమ్ 15:22-25, 17:5-6. * 10:4 10:4

ద్వితీయోపదేశ కాండుము 1:34-40. † 10:7 10:7 నిర్గమకాండుమ్ 32

మెన జేవ్ సగుమ్జిన్ పాపుమ్ జా బొమ్మక జొకర్తిన్చి రిసా దేముడుచి కొడొతె రెగ్గవ అస్సె. జా పాపుమ్ తుమ్ కెరుక పోస.

8 పడ్డొ, జోవయింతె కీబగ్గర్ జిని లంజె జా ఎక్కె దీసి విస్సెక్ తిన్ని వెయిల్ జిని మొర గెల. అమ్ నంపజలన్ జా పాపుమ్ కెరుక నాయ్.

9 పడ్డొ, జోవయింతె సగుమ్జిన్ దేముడు ప్రబుక కొకడ్డి రితి పాపుమ్ కెర్ల, చి జో* అయివొ తెద్రయ్ తికయ్, చడ్ల, చి జయ్యి సిచ్చ జల. ప్రబుక అమ్ నంపజలన్ పరిచ్చ కెర్లి రితి కొకడుక నాయ్.

10 పడ్డొ, జో దేముడు ప్రబు తోడు తిలె కి, జోవయించి రిసా కొప్పుమ్ జతె తిల, చి మొరయ్ తోసా దేముడుదూతచి అత్తి జేవ్ మొర గెల.

11 జోవయింతెచ మాన్సుల్క జేవ్ సిచ్చల్ కిచ్చొక కామ్క అయ్లె మెలె, జోవయింక 'జాగర్త తెన్ తత్తు' మెన రుజ్జుల్ దెకయ్లె. పడ్డొ, జో దేముడు కిచ్చొక జా ఎత్తిచి రిసా దేముడుచి కొడొతె రెగ్గయ్ లో మెలె, అమ్ ఉగుమ్చి ఆకర్తె జిత మాన్సుల్క 'సిక్కుతు' మెనయ్ రెగ్గవ అస్సె.

12 జాకయ్ కో 'ఆవ్ చెంగిల్ అస్సి' మెన ఉచరంతయ్ గే, పాపుమ్తె దెర్ను నే సేడ్డి రితి జాగర్త దెకన్సు.

13 తుమ్క దెరుక జెత పాపల్ అగ్గెయ్ తెంతొ మాన్సుల్క దెర్తతి, కిచ్చొ నొవచ నెంజితి, గని దసచతె తుమ్ దెర్ను నే సేడ్డి రితి తుమ్ కిచ్చొ దయిరిమ్ తంక జయెదె మెలె, దేముడు నిదానుమ్ తతోసా, చి సత్తిమ్ ఇండుక తుమ్క ఇస్టుమ్ తిలె, సయ్తాన్ తుమ్క పాపుమ్ కెరయ్తి రితి దేముడు సెలవ్ దెయె నాయ్. తుమ్ జా పాపుమ్ నే కెర్తి రితి తుమ్క దొర్కు జలి సెక్తి దెయెదె, కేన్ సమయ్ముక సయ్తాన్ దస్సి అల్లర్ కెరుక జెయెదె గే, తుమ్ ఓర్పువ జా జినుక తెరితి రిసా విడ్డల్ జతి వాటు జో దేముడు దెకయెదె.

బొమ్మల్క జొకర్తిన్చి రిసా జాగర్త సంగిలిసి

14 ప్రేమ తిల బావుడ్లు, బొమ్మల్క జొకర్తిన్క దూరి తా, దసితె బెదె నాయ్.

15 తుమ్క 'బుద్ది తిలస' మెన ఆవ్ తుమ్క ఇసి సంగితసి. ఆవ్ అప్పె సంగితిన్చి రిసా తుమ్ సొంత చెంగిల్ ఉచర.

16 'తుయి దిలిసి ఈంజ' మెన ప్రబుచి నావ్ తెన్ అమ్ జోబర కెర ద్రాచ రస్సుమ్ పిలె, జోచి నూయి జలి లోయిచి రిసా దొర్కు జలి రచ్చనతె అమ్ బెదిలిన్చి గుర్తు జయెదె. జోచి నావ్ తెన్ అమ్ పొడి గండల్ కెర కయ్లె, జోచి ఆగ్ మొర అమ్చి పాపుమ్ జో వయ్లినతె అమ్ బెదితి గుర్తు జతయ్.

17 జా ఎక్కి పొడి కతి ఎక్కి గుర్తు అమ్ ఎత్తిజిన్ నంపజలన్క తనుమ్చి రిసా, అమ్ ఒగ్గర్జిన్ జలెకి, జా

ఎక్కి పొడి కయ్లి రిసా, అమ్ క్రీస్తు తెన్, ఎక్కిలో తెన్ ఎక్కిలో ఎక్కి ఆగ్ జా అస్సుమ్.

18 పూర్ణుమ్చి రితి దేముడుక బలి దెత అమ్చ ఇస్రాయ్ లుల్చి రిసా ఉచర. జా బలి దిలిసి కయ్లె, జా కతస ఎత్తిజిన్ జా బలి దిలిన్తె బెదిలి గుర్తు జతయ్.

19 జలె, బొమ్మక దిలి కిచ్చొ బలిక కిచ్చొ సెక్తి అస్సె గే? బొమ్మక కిచ్చొ సెక్తి తయెదె గే? కిచ్చొ నాయ్.

20 కిచ్చొ మెంతసి మెలె, దేముడుక నేన్ల మాన్సుల్ బలి దెతిసి కక్క దెతతి మెలె, దేముడుక నాయ్, గని బూతల్కయ్. తూమ్ బూతల్క జొకర, జోవయింతెన్ బెదుక అంక ఇస్టుమ్ నాయ్!

21 కిచ్చొక మెలె, ప్రబు తెన్ బెదె పిలి పడ్డొ, బూతల్ తెన్ బెదె పింక ఎద్దరె బెదె నాయ్. ప్రబుచి అన్నిమ్ చి బూతల్చి అన్నిమ్ ఎక్కిలో మాన్సు కో జలెకు కంక బెదె నాయ్. దొన్ని బెదితి నాయ్.

22 దస్సి జలె, ప్రబుక అమ్ కొంకడ కొప్పుమ్ కెరుక జయెదె గే? నెంజె, గెద. జోచి కంట అమ్క సెక్తి గే? నాయ్ గెద.

నంపజలసక అక్కు

23 జలె, "కిచ్చొచి రిసా కి 'గార్' మెనుక నెంజె" మెన సంగితసుమ్. జా నిజుమ్, గని అమ్ సగుమ్ కమొ కెర్లె, అన్నె మాన్సుల్క చెంగిల్ తయె నాయ్. "కిచ్చొచి రిసా కి 'గార్' మెనుక నెంజె" మెన అమ్ నంపజలస సంగితసుమ్ గని సగుమ్ కమొ కెర్లె, మాన్సుచి నముకుమ్క చెంగిల్ కెరె నాయ్.

24 కో నంపజలస సొంత లాబుమ్క ఆస జతు నాయ్, గని అన్నె మాన్సుల్కయ్ 'చెంగిల్ జతు' మెనయ్, ఆస తెన్ తంక.

25 తుమ్చి మెన్సు నే కెరతె, నే పుసితె కటికి సుదొతెచి ముక్కల్ గెనుక జలె, 'బలి దిలిసి జయెదె గే నెంజె గే?' మెన నే బితె, లాజ్ నెంతె గెన్న కంక జయెదె.

26 కిచ్చొక మెలె, దేముడుచి కొడొతె రెగ్గయ్ లి రితి, "లోకుమ్ కి, లోకుమ్తె తిలిసి కి, ఎత్తి ప్రబుచి" మెన రెగిడ్డిసి సత్తిమ్.

27 పడ్డొ, ప్రబుక నంపనెంజిలో కేన్ మాన్సు తుమ్క అన్నిమ్క బుకార్లె, ఇస్టుమ్ తిలె, గెచ్చ, చి కిచ్చొ లాజ్ నెంతె కిచ్చొ నే పుసితె, జో కిచ్చొ దెయెదె గే, కా.

28 గని "ఈంజ బొమ్మక బలి దిలిసి" మెన తుమ్క కో జాకు సంగిలె, 'జేవ్ జా కయ్లె జోక పాపుమ్ కెరవ తయిందె చి అంక పాపుమ్ లయెదె' మెనయ్ జో మాన్సు సత్తిమ్క తుమ్క జాగర్త సంగిలిన్చి, సత్తిమ్ జోక పిట్టున్ నాయ్ మెన, జో అన్మానుమ్ నే జతి రిసా జా కా నాయ్.

29 తుమ్చి పెట్టిచి సత్తిమ్ తతి రిసా నాయ్, గని సత్తిమ్కయ్ జో మాన్సు తుమ్క సంగ తయెదె, చి జో అన్మానుమ్ నే జతి రిసాయి తుమ్ కా నాయ్. 'కంక నెంజె'

మెన వేర మాన్సుల్చి మెన్సు తెన్ అంక కిచ్చొక తీర్పు జర్గు జయెదె.

30 'ప్రబు దిలొ' మెన ఆవ్ సర్ల తెన్ జా కయ్లె, కో మాన్సుల్ అంక నింద కెరుక తెరితి గే? నెత్తిర్. ప్రబుచి నావ్ తెన్ జొబర సంగ కెర ఆవ్ కయ్లె, జాచి రిసొ అంక కో నింద కెరుల?

31 గని కంక జలెకి, పింక జలెకి, కిచ్చొ కామ్ కెరుక జలెకి, దేముడుచి గవురుమ్ దెకయ్తి రితి కెర.

32 యూదుల్ జవున్, గ్రీసు దేసిమ్చ జవున్, దేముడుచి ఆగ్ జతి సంగుమ్ జత నంపజలన్ పొరపాట్ నే జతి రితి తుమ్ కిచ్చొ అడ్డు కెర నాయ్.

33 అంచి సొంత లాబుమ్ పొని, గని ఎత్కిజిన్క 'జేవ్ రచ్చించుప జా చెంగిల్ జతు' మెనయ్, కిచ్చొ కామ్ తిలె కి ఆవ్ ఎత్కిజిన్క మరియాద కెర్తి రితి ఇండితసి.

11

సంగుమ్లుతె కిన్ తంక గే

1 ఆవ్ క్రీస్తుక దెక కిసి ఇండితసి గే, తుమ్ కి అంక దెక దస్సి ఇండ.

2 అంక తుమ్ కెర్టొడి తెదొడి ఉచార కెర్తను, చి రిసొ బావుడ్లు, ఆవ్ సూనయ్లి రితి, అమ్ నంపజలనక దిలిసి తుమ్ కెర్తను, చి రిసొ అంక సర్.

3 అమ్చ మున్సుబోదల్ ఎత్కిజిన్క *బోడి కొన్సొ మెలె, క్రీస్తు. పడ్డొ, ఎత్కి తేర్బోదక బోడి కొన్సొ మెలె, మున్సుసి. పడ్డొ క్రీస్తుక బోడి కొన్సొ మెలె, దేముడు మెన తుమ్ జాననుక అస్సి.

4 కేన్ మున్సుబోద బోడి డంకనయ్ ప్రార్తన కెర్లె జవున్, దేముడుచ కబుర్లు సంగిలె జవున్, జోచి బోడిక నిస్కారుమ్ కెరంతయ్.

5 కేన్ తేర్బోద బోడి నే డంకింతె ప్రార్తన కెర్లె జవున్ దేముడుచ కబుర్లు సంగిలె జవున్, జాచి బోడి నిస్కారుమ్ కెరంతయ్; జాచి బోడి బోడ్లె రితి జతయ్.

6 కిసి మెలె, తేర్బోద బోడి డంకనుక నెసిలె, జాచి నెండి కత్తవన్లెకయ్ చెంగిలి, గని నెండి బోడనుక జవున్ కత్తవనుక జవున్ నెంజె మెలె, బోడి డంకనయ్ తంక.

7 కిచ్చొక ఇసి సంగితసి మెలె, మున్సుబోదక జెర్మయ్లి పొది, "అంచి పొలిక అంచి గవురుమ్ ఇన్నెతె డిసున్" మెన, దేముడు జెర్మయ్లన్. గని తేర్బోద జలె మున్సుబోదచి గవురుమ్ దెకయ్తయ్.

8 కిచ్చొక మెలె, మొదొల్క మున్సుబోద తేర్బోద తెంతొ జెర్మన్ జయె నాయ్. మున్సుబోద తెంతొ తేర్బోద జెర్మన్ జలి.

9 తేర్బోదక తోడు తతి రిసొ మున్సుబోద జెర్మయ్ జయె నాయ్, గని మున్సుబోదక తేర్బోద తోడ్ తతి రిసొయి తేర్బోదక జెర్మవ అస్సి.

10 జాకయ్, దూతల్ కి దెకితతి రిసొ, తేర్బోదచి ఉప్పిర్చొ మున్సున్చి అదికారుమ్చి గుర్తు దెకయ్తి రిసొయి జా తేర్బోద బోడి డంకనుక అస్సి.

11 జలె ప్రబుతె మున్సున్క అంగ తేర్బోద నాయ్, తేర్బోదక అంగ మున్సుబోద నాయ్. క్రీస్తుచి తెడి తేర్మిక మున్సుసి తోడు, మున్సున్క తేర్మి తోడు అస్సి.

12 తొలితొ తేర్బోద మున్సుబోదచి తెంతొ జెర్మన్ జలెకి, అప్పె తేర్బోదచి పెట్టి మున్సుబోద జెర్మితయ్. మున్సుబోదల్ కి, తేర్బోదల్ కి, ఈంజ లోకుమ్తె తిలిసి ఎత్కి కి దేముడు జెర్మయ్లొ. ఎత్కిచి మొదొల్ దేముడు.

13 తుమ్ సొంత తీర్పు ఉచర. బోడి నే డంకింతె తేర్బోద దేముడుక ప్రార్తన కెరుక సూటి గే?

14 ఒండి లోకుమ్క దెకిలె, 'మున్సుబోదచి నెండి దీగు జా తిలె సూటి నాయ్' మెన నేనుమ్ గే?

15 'తేర్బోదక నెండి దీగు తిలె జాక గవురుమ్' మెన నేనుమ్ గే? కిచ్చొక మెలె, జాక మరియాద తెన్ డంకితయ్. దస్సికయ్ దేముడు జాక దిగిల్ నెండి దా అస్సి.

16 ఈంజ కోడుచి రిసొ కో జలెకు వేర సికడుక ఉచర్తయ్ గే, తుమ్ కిచ్చొ జానుక మెలె, కిచ్చొ వేర రిత కెరుక నెంజె మెన ఒప్పన్, పడ్డొ ప్రబుచ సంగుమ్లు ఎత్కితె ఇసి కెర్తతి.

ప్రబుచి ఆగ్చి లోయిచి గుర్తు తిలి పొడి, ద్రాచ రస్సుమ్

17 వేరచి రిసొ తుమ్క మెన్సుక జతయ్ జలెకి, ఏక కోడుచి రిసొ అంచి విసారుమ్ ఆవ్ సంగుక అస్సి. కిచ్చొచి రిసొ మెలె, ప్రబుచి నావ్ తెన్ తుమ్ సంగుమ్తె సబ కెరుక బెదిలె, కామ్క జెతికయ్ బుద్ది తెన్ నాయ్, గని కామ్క నెంజిలి బుద్ది తెన్ బెదితను.

18 కిచ్చొ బుద్దిచి రిసొ ఆవ్ సంగితసి మెలె, ఎక్కి, 'సంగుమ్' మెన తుమ్ బెదితి పొది ఎక్కి మెన్సు తెన్ నాయ్. జల్లు జలి రితి జతను, మెన తుమ్చి రిసొ ఆవ్ సూన అస్సి. జా కోడు ఇదిల్ నంప కెరుక జతయ్.

19 తుమ్తె కో సత్తిమ్ అస్సి గే, కో నాయ్ గే చినితి రిసొ దన జల్లు తంకయ్ మెన ఏక్ వేల తుమ్ ఉచర్తను గే? దస్సి ఉచరుక పిట్టె నాయ్.

20 తుమ్ బెద సబ కెర్తి పొది పొడి చి ద్రాచ రస్సుమ్ కయ్లె పిల్లె, 'యేసుప్రబు దిలి అన్నిమ్ ఈంజ' మెన తుమ్ సంగిలె కి, దస్సి మెనుక నెంజె.

21 కిచ్చొక మెలె, తుమ్ సొంత ఆన్నిసి కక్క నే దెతె, సొంత జాయి గెతను, చి సగుమ్జిన్క నెంజ తా జోవయింక పెట్టి బెరె నాయ్. చి సగుమ్జిన్ మచ్చ గెతతి!

22 అబ్బువోమ్మ! తుమ్క గెరల్ నాయ్ గే, చి నే జెతె అగ్గె చూ తాన్ గెచ్చవంతి రితి గెరి కంక పింక నెంజె గే? నెంజెలె, ప్రబుచి సంగుమ్తె బెదిలనక నిస్కారుమ్ ఉచర,

* 11:3 11:3 ఎపెసు 1:22-23, 4:15-16, 5:23. కొలోస్సియల్ 1:18, 2:10.

12

జోవయింతె నెంజిలనక నిస్కారుమ్ కెరుకయ్ మెన దస్సి కెర్తను గే? తుమ్క ఆవ్ కిచ్చొ సంగిలె జయెదె? దస్సి కామ్చి రిసా తుమ్క 'చెంగిల్ కెర్తతి' మెన ఆవ్ సంగుక బెదెదె గే? నాయ్, గెద, బెదె నాయ్! నెంజె!

23 ప్రబుతె అంక దొర్కు జలిన్చి రిసా, ఆవ్ తుమ్కయ్ సార్పు కెర దిలిసి కిచ్చొ మెలె, జోక విరోదుమ్ సుదల్చి అత్తి సార్పు కెర దిలి జా రాతి, యేసుప్రబు పొడి దెర,

24 దేముడు అబ్బొన్క జోబర సంగ ప్రార్దన కెర, మోడ కెర, "ఈంజ, తుమ్చి రిసా †బలి జతి అంచి ఆగుక గుర్తు. ఈంజ కెర అంక ఉచార కెర కెయెక కంక, అంచి రిసాయి ఉచర్తె తా" మెన ప్రబు సిస్సుల్క దిలన్.

25 జా అన్నిమ్ కయ్లి పడ్డె, ద్రాచ రస్సుమ్చి గలన్ దెర ప్రార్దన కెర, "ఈంజ గలన్చి రస్సుమ్ కిచ్చొ గుర్తుచి రిసా మెలె, అంక నంపజతనచి పాపుమ్ పుంచితె అంచి లోయిచి గుర్తు ఈంజ. ఈంజ, అంచి నొవి ప్రమానుమ్ జర్గు జతిన్చి గుర్తు. ఈంజ కెర అంక ఉచార కెర కెయెక పిలెకి, అంచి రిసాయి ఉచర్తె తా" మెన సంగ పియడ్లన్.

26 కిచ్చొక మెలె, జా పొడియె కెయెక కయ్లె, జా ద్రాచ రస్సుమ్ కెయెక పిలె, ప్రబు మొర అర్చితుమ్ జలిన్చి గుర్తు దెకయ్తను, సాడుప కెర్లి రితి జతను. జో ఈంజ లోకుమ్తె అన్నె జెతె ఎదక జయ్యి గుర్తు దెకయ్తె తా.

27 జలె, కిచ్చొ వేర బుద్ది తెన్ కో జా పొడియె కయ్లె, జా ద్రాచ రస్సుమ్ పిలె, ప్రబుచి ఆగుక జోచి లోయిక దూసుప కెర్లి రితి, విలువ నే దిలి రితి, పాపుమ్ వయుల.

28 జాకయ్, కేన్ మాన్సు జా పొడి కయెదె గే, జా లోయి పియెదె గే, తొలితొ జోక జోయ్యి పరిచ్చ కెరన, సిలువతె ప్రబు జర్గు కెర్లి కామ్ ఉచరయ్ కవున్ పివును.

29 కిచ్చొక మెలె, 'ప్రబుచి ఆగుచి గుర్తు, జోచి లోయిచి గుర్తు ఈంజ' మెన సరిగా నే ఒప్పున్తె కో ఈంజ కవుల గే, పివుల గే, జో సిచ్చకయ జాక పియ జా పాపుమ్ వయనుల.

30 దస్సికయ్ తుమ్చితె ఒగ్గర్జిన్ చెంగిల్ నెంతె జబ్బుల్ జా అస్సున్, చి సగుమ్జిన్ కి మొర గెచ్చ అస్తి.

31 అమ్ సొంత పరిచ్చ కెరన బుద్ది కెరంతె తత్తమ్ జలె, ఇస సిచ్చల్ జతె తత్తమ్ నాయ్.

32 గని ప్రబు అమ్క అప్పె సిచ్చ కెర్లె, కిచ్చొక జా సిచ్చ కెర్తయ్ మెలె, అమ్క "అప్పె సిక్కత్, చి ఈంజ లోకుమ్చి రితి కెర్తనక లయితి జా ఆకర్ దీసిచి జా వెల్లి సిచ్చ జతు నాయ్." మెనయ్, ప్రబు అమ్క రచ్చించుప కెర్తయ్.

33 జాకయ్, బావుడ్లు, జా పొడి కంక, జా రస్సుమ్ పింక తుమ్ బెదిలె, బమ్మ నే జతె ఎక్కిలోక ఎక్కిలో రక.

34 నెంజిలె, కిచ్చొ ఆన బుద్ది తెన్ కయ్లె పిలె, తీర్పు జా ప్రబుచి సిచ్చ జస్తె. కక్క చూ తిలె, గెరి అన్నిమ్ కెర్పు. వేర ఇస ఆడ్రల్, జలె, తుమ్చితె అయ్లె సంగిమ్దె.

ప్రబు దెత సెక్తివరల్

1 అన్నె మాన్సుల్చి పెట్టి ప్రబు దిల జోచి ఆత్మ దా సెక్తి వరల్చి రిసా తుమ్ నేన తంక, అంక ఇస్టుమ్ నాయ్.

2 తుమ్ ప్రబుక నేన్లి పొది మోసిమ్ జా, నయ్తాన్ ఉదడ్లి రితి ఇత్తల్ ఒత్తల్ గెతె తా, జీవ్ నెంజిల బొమ్మల్క జోకర్తె తిలదు.

3 తుమ్ అన్నె దస్సి మోసిమ్ నే జతి రిసా తుమ్ కిచ్చొ అర్దుమ్ కెరనుక అంచి ఆస మెలె, దేముడుచి సుద్ది తిలి ఆత్మకచి పెట్టి తిలె, జో మాన్సు యేసుక దూసుప కెరుక జోచి పెట్టి తయె నాయ్. జోక సాపెనచి కోడు జో సంగుక నెత్తె. పడ్డె, జో ప్రబుచి ఆత్మ మాన్సుచి పెట్టి తిలెకయ్ "యేసు దేముడు ప్రబుయి" మెన జో మాన్సు ఒప్పునుక తెరె.

4 దేముడుచి సుద్ది తిలి ఆత్మ ఎక్కిలోయి, వేర వేర సెక్తివరల్ దెయెదె. వేర వేర సెక్తివరల్, వేర వేర మాన్సుల్క జో దిలెకి, జో ఎక్కిలోచి ఆత్మయి జేవ్ ఎత్తి సెక్తివరల్ దెతోసా.

5 దేముడు జోచి ఆత్మవాటు వేర వేర సేవల్ వేర వేర మాన్సుల్క జో దెయెదె, గని జా సేవ ఎక్కిలో ప్రబుచి రిసాయి.

6 దేముడు రగల్ రగల్ కమె కెరెదె, ఎక్కిలో ఇసి కెరెదె, అన్నెక్లొ దస్సి కెరెదె, గని జేవ్ కమె కెర్త సెక్తివరల్ ఎత్తి దెతోసా ఎక్కి దేముడు.

7 దేముడు ఎత్తి మాన్సుక జోచి ఆత్మసెక్తి వరుమ్ దా అస్సె, ఈంజ అమ్ దెకితనుమ్, జోక నంపజల మాన్సుల్ మొత్తుమ్ 'చెంగిల్ తత్తు' మెన, ఎత్తి మాన్సుక ఆత్మసెక్తి వరుమ్ దేముడు దెయెదె.

8 కిచ్చొ మెలె, సుద్ది తిలి జోచి ఆత్మ ఎక్కిలోచి పెట్టి తా, జో మాన్సు ఒగ్గర్ బుద్ది తెన్ ప్రబుచి బోదన కెరుక జో సెక్తి దెతయ్. అన్నెక్లొచి పెట్టి ప్రబుచి జయ్యి ఆత్మ తా, ఆత్మతె గ్యాగుమ్ జో మాన్సు సంగుక ప్రబు సెక్తివరుమ్ దెతయ్.

9 అన్నెక్లొచి పెట్టి జయ్యి ఆత్మ తా నముకుమ్, సెక్తివరుమ్ దెతయ్. అన్నెక్లొచి అత్తి వేర వేర జబ్బుల్ తిల మాన్సుల్క చెంగిల్ కమె జర్గు జతు మెన ఒగ్గర్ కెర్త సెక్తివో జో దెతయ్.

10 అన్నెక్లొక జోవయించి అదికారుమ్ దెకయ్త రకుమ్లు అద్దుతుమ్ కమె కెర్తి సెక్తి, అన్నెక్లొచి చోడి పుట్టవ ప్రబు జోచ కబుర్లు సంగెదె, అన్నెక్లొక వేర వేర బుద్దివొక 'ప్రబు సికడ్లన గే నెంజితి గే' చినితి సెక్తివరుమ్ దెయెదె. అన్నెక్లొ వేర రగల్ జో అగ్గె నే సికిల బాసల్ తెన్ లట్టుబుక సెక్తివరుమ్ దెతయ్. అన్నెక్లొక బాసల్చి అర్దుమ్ సంగుక సెక్తివరుమ్ దా అస్సె.

11 ఈంజేవ్ సెక్తివరల్ ఎత్తి కేనె తెంతొ జెతయ్ మెలె, ప్రబుచి ఎక్కి ఆత్మయి, జేవ్ ఎత్తిజిన్చి పెట్టి జేవ్ వేర వేర

† 11:24 11:24 నెంజిలె, 'గండల్ జలి' బలి జలి

కమొ కెర్తయ్. కేన్ మాన్సుక కేన్ సెక్తివరుమ్ జో దెయెదె గే, జోచి ఇష్టుమ్.

ఎక్కి ఆగ్ ఒగ్గర్ వాటల్

12 కేన్ జవున్ ఆగ్ కిసి ఒగ్గర్ వాటల్ తవుల గే, జేవ్ వాటల్ ఒగ్గర్ జలెకి బెద ఎక్కి ఆగ్ కిసి జయెదె గే, దస్సి, క్రిస్తుచి ఎక్కి ఆగ్ జా నంపజలన మొత్తుమ్ బెదిలిసి.

13 అమ్ యూదుల్ జలెకి, *గ్రీసు దేసిమ్చ జలెకి, గొత్తి మాన్సుల్ జలెకి, గొత్తి మాన్సుల్ నెంజిలె కి, ఎక్కి ఆగ్తె ఎక్కి ఆత్మతె అమ్ నంపజలన జా బాప్తిసుమ్తె బెదిలమ్; అమ్ ఎత్తిజిన్క ప్రబు జోచి ఎక్కి ఆత్మతెయి పియడ్లన జలమ్, అమ్క ఒండిక ఎక్కి ఆత్మయి దా అస్సె.

14 అమ్చి ఆగ్క ఎక్కి వాట తయె నాయ్. అమ్చి ఆగ్తె ఒగ్గర్ వాటల్ తవుల.

15 “ఏక్ వేల చాటు ఆవ్ ఆతు నెంజి, జలె ఆవ్ ఈంజ ఆగ్క వాట నెంజి” మెన సంగిలె కి, ఆగ్క జా చాటు కచితుమ్ ఏక్ వాట జా తత్తయ్.

16 “ఆవ్ అంకి నెంజిచి రిసా ఆగ్క వాట నెంజి” మెన కంగ్గో జవున్ ఏక్ వేల సంగిలె కి, జా ఆగ్క జా కంగ్గో కచితుమ్ వాట జా తత్తయ్.

17 జలె ఆగ్ ఒండి అంకి జలె, కిసి సూనుక జతి? ఆగ్ ఒండి కంగ్గో జలె, కిసి జుంగుక జతి!

18 ప్రబు జాన జానయ్ ఆగ్తె కిచ్చో కిచ్చో వాటల్ జో ఉచర్లి రితి బెదవ అస్సె.

19 జేవ్ ఎత్తి ఎక్కి వాట జత జలె, ఆగ్ ఒండి కేనె తత్తి?

20 నిజుమి ఆగ్ ఒగ్గర్ వాటల్ తిలె కి ఎక్కి ఆగ్ జతతి.

21 జాకయ్, “తుయి తంక అంక నాయ్” మెన ఆతుక అంకి సంగుక బెదె నాయ్. “తుయి తంక అంక నాయ్” మెన చట్టోక బోడి సంగుక బెదె నాయ్.

22 జలె, నాయ్, ఆగ్తెచ అప్పు డీస్త వాటల్ నెంజిలె, జింక నెంజె,

23 చి ఆగ్తె గవురుమ్ నెంజిల వాటల్క ‘డిసిలె లాజు’ మెన, గవురుమ్ కెర్త పాలల్ గలంతసుమ్. దెకుక సూటి నెంజిల అమ్చి ఆగ్తె వాటల్ ఒగ్గర్ సూటి దెకయ్త.

24 ‘డిసుక సూటి’ మెన, తిల వాటల్క లుంకడుక నాయ్.

25 జలె దేముడు, ఒండి ఆగ్ ఎక్కి సేంతుమ్ తతి రితి, ఆగ్చి వాటల్ ఎత్తి అన్నె ఆగ్ వాటల్క గవురుమ్ దెకిత్ రితి, తొక్కి గవురుమ్చ ఆగ్ వాటల్క ప్రబు ఒగ్గర్ గవురుమ్ దెతి రితి బెదవ అస్సె.

26 ఒండి ఆగ్చి ఏక్ వాటక నొప్పి అయ్లె, తిల వాటల్ ఎత్తిక బాద. ఒండి ఆగ్తెచి ఏక్ వాటక గవురుమ్ అయ్లె, తిలి ఎత్తి వాటల్క సర్ద.

27 జలె, తుమ్ జోక నంపజలన మొత్తుమ్ క్రిస్తుచి ఆగ్ జా అస్సున్, చి తుమ్చితెచో ఎత్తి మాన్సు క్రిస్తుచి ఆగ్క వాట జయెదె.

28 పడ్డో, దేముడు మొత్తుమ్ సంగుమ్తె వేర కమొచి రిసా, ప్రబు వేర వేర మాన్సుల్క నిసాన అస్సె. తొలితొ జోచి నావ్ తెన్ బుల బుల సుబుమ్ కబుర్ సూనయ్త బారికుల్, పడ్డో జోచ కబుర్లు సంగితనక, పడ్డో బోదన కెర్తన, పడ్డో జోచి సెక్తిక జోచి అదికారుమ్ దెకయ్త వెల్లెల కమొ కెర్తన, పడ్డో జబ్బు తెన్ తిల మాన్సుల్క చెంగిల్ కెర్తన, పడ్డో బాదల్ తిల మాన్సుల్క తోడు కెర్తన, పడ్డో సంగుమ్చ కిచ్చో కిచ్చో కమొక ఏలువ కెర్తన, పడ్డో వేర వేర బాసల్ తెన్ ప్రబుచ కొడో సంగితనక తిలన్.

29 ఎత్తిజిన్ ప్రబుచ బారికుల్ జవుల గే? ఎత్తిజిన్ జోచ కబుర్లు సంగితన జవుల గే? ఎత్తిజిన్ బోదన కెర్తన జవుల గే? ఎత్తిజిన్ వెల్లెల వెల్లెల కమొ కెర్తన జవుల గే?

30 ఒండి జబ్బుల్ తిల మాన్సుల్క చెంగిల్ కెర్తి సెక్తి ఎత్తిజిన్క తయెదె గే? వేర వేర బాసల్ తెన్ ప్రబుచ కొడో సంగితి వరుమ్ ఎత్తిజిన్క తయెదె గే? జేవ్ వేర బాసల్ తెన్ కొడోచ అర్దల్ సంగుక ఎత్తిజిన్క సెక్తి తయెదె గే?

31 జలె తుమ్చి పెట్టి ముక్కిమ్చయ్ ఆత్మవరల్క తుమ్ ఆన జా. ఈంజయి నెంజి, అన్నె చెంగిలి వాటు దెకయిందె.

13

ఎత్తిచి కంట ప్రేమయ్ ముక్కిమ్

1 మాన్సుల్చ బాసల్ తెన్ కి, దూతల్చ బాసల్ తెన్ కి ఆవ్ లట్టజ్జె కి, అంచి పెట్టి ప్రేమ నెంజిలె, రితి టమ్ము జవున్, కంచు గంటో బజయ్లి అవాడ్ రితి జతయ్.

2 పడ్డో, ఏక్ వేల ప్రబుచ కబుర్లు సంగుక అంక సెక్తి తిలె కి, ప్రబుచ గుట్టుల్ ఎత్తి జోచి రిసాచి గ్యానుమ్ ఎత్తి ఆవ్ జాన్లె కి, డొంగ్గల్ ఉట్టవ ఎదిలి నముకుమ్ అంక తిలె కి, అంచి పెట్టి ప్రేమ నెంజిలె, కామ్క నెంజిలోసా జయిందె.

3 అంక కలుగు జలిసి ఎత్తి ఏక్ వేల బీద సుదల్క పూర్తి వంట దిలెకి, ‘పున్నిమ్’ మెన బలి జతి రితి ఆవ్ ఏక్ వేల అంచి ఆగ్ ఆగితె డయాడ్లెకి. అంచి పెట్టి ప్రేమ నెంజిలె, అంక ఎద్గెరె కామ్క నెంజె.

4 ప్రేమ, జలె, అమ్చి పెట్టి తిలె, బాదల్ ఓర్పువ జా జినుమ్దె. మెత్తన తా మాన్సుల్క కన్కారుమ్ దెకుమ్దె. ప్రేమ అమ్చి పెట్టి తిలె, గోసల్ జము నాయ్. అమ్చి సొంత గవురుమ్ సంగనుమ్ నాయ్. సొంత గవురుమ్ ఉచరనుమ్ నాయ్.

5 అన్నె మాన్సుల్చి మరియాద కడుమ్ నాయ్. ప్రేమ అమ్చి పెట్టి తిలె, అమ్చి సొంత ఇష్టుమ్ జర్గువ కెరుక

* 12:13 12:13 గ్రీసు దేసిమ్చ మాన్సుల్క సంగుల, గని ఇన్నె ‘గ్రీసు దేసిమ్చ’ మెన సంగిలె, యూదుల్ నెంజిలన మొత్తుమ్కయ్ సంగితయ్.

ఆస జము నాయ్. కోపుమ్ దెకవుమ్ నాయ్. పెట్టి కోపుమ్ తియనుమ్ నాయ్.

6 అమ్చి పెట్టి ప్రేమ తిలె, పాపుమ్ దెకిలె సర్ల జము నాయ్, గని సత్తిమ్ తిలి కిచ్చొ జవున్ కామ్ దెకిలె, సర్లయ్ జమ్దె.

7 అమ్చి పెట్టి ప్రేమ తిలె, అన్నెక్ మాన్సుల్చ తప్పుల్క ఓర్పువ జమ్దె. నముకుమ్ తెన్ తమ్దె. 'ఎత్తి చెంగిల్ జయెదె' మెన దయిరిమ్ తెన్ తమ్దె. ఎత్తి బాదల్ ఓర్పువ జా నిదానుమ్ తమ్దె.

8 ప్రేమ, జలె, కెయ్క కి కేడె నాయ్. గని ప్రబుచ కబుర్లు సంగితి కాలుమ్, మాత్తుమ్, కేడెదె. వేర వేర బాసల్ తెన్ ప్రబుచ కొడొ లట్టబ్బిసి కి కేడెదె. గ్యానుమ్ సికడ్డిసి కేడెదె.

9 కిచ్చొక మెలె, అప్పె ఆవ్ గ్యానుమ్ ఇదిలిన్ జానుమ్. ప్రబుచ కబుర్లు సంగితిసి కి ఇదిలిదిల్ సంగితనుమ్.

10 గని పూర్తి జతిన్చి కాలుమ్ అయ్లె, అమ్ ఇదిలిదిల్ జాన్లిసి కేడెదె.

11 ఆవ్ బాల తిలి పొది బాలబోదచి రితి లట్టబ్బె తిలయ్, బాలబోదచి బుద్ది తెన్ తిలయ్, బాలబోదచి రితి ఉచర్తె తిలయ్. గని వడ్డిలి తెంతొ, బాలబోదచి రితి ఇండుక ములిలయ్.

12 అప్పెచి మట్టుక ప్రబుచి ఎత్తి కిసి చినితనుమ్ మెలె, గాండు డంకిల్ రితి సొస్టుమ్ డిసె నాయ్; అర్దుమ్తె దెకిలి రితి. గని తెదొడ్కయ్, కిచ్చొ అడ్డు నెంతె, సొస్టుమ్ దెకుమ్దె, అర్దుమ్ కెరనుమ్దె. ఆవ్, జలె, అప్పె ఇదిలిదిల్ జాని. తెదొడ్కయ్ పూర్తి అర్దుమ్ జెయెదె. ప్రబు అప్పె కి అగ్గె తెంతొ అంకయ్ కిసి పూర్తి జానె గే, దస్సి, తెదొడ్కయ్ జోక ఆవ్ పూర్తి జానిందె, అంక పూర్తి అర్దుమ్ జెయెదె.

13 జలె, తిన్ని పాడ్ నే జతె కెయ్క తెయ్క తాఁ గెచ్చుల. కిచ్చొ కిచ్చొ మెలె, ప్రబుచి రిసాచి నముకుమ్, పడ్డొ ప్రబుచి తెడిచి ఆస, పడ్డొ ప్రబు దెతి ప్రేమయి. గని, జేవ్ తిన్నితె ప్రబు దెతి ప్రేమయి గొప్పచి.

14

ఎత్తిజిన్ జాన్లి బాస తెన్ ప్రబుచ కబుర్లు సంగితిసి

1 ప్రబుచి ప్రేమ తెన్ తంక తుమ్ ఆస జా, పడ్డొ, జోవయించి ఆత్మచ సెక్తివరల్క ఆస జా. జేవ్ వరల్తె ముక్కిమ్క దేముడుచ కబుర్లు సంగితి సెక్తివరమ్కయ్ ఆస జా.

2 కిచ్చొక మెలె, కేన్ జవున్ వేర బాస తెన్ ఎక్కిలో లట్టబ్బె, ప్రబు తెన్ని లట్టబ్తయ్, గని మాన్సు తెన్ నాయ్. మెలె, దేముడుచి సుద్ది తిలి ఆత్మచి తెడి ప్రబుచ గుట్టుల్ జో మాన్సు సంగితయ్, గని సూన్తో కేన్ మాన్సుక అర్దుమ్ జెయె నాయ్.

3 గని, తిలస ఎత్తిజిన్ జాన్తి బాస తెన్ ప్రబుచ కబుర్లు కో సంగిలె, సూన్తసక జోవయించి ఆత్మతె డిట్టుమ్ కెరెదె.

జేవ్ నేన్లిసి జేవ్ సికుక జయెదె, చి నెతిర్లిన్క దయిరిమ్ జంక జయెదె.

4 తిలస నేన్లి బాస తెన్ కో లట్టబ్బె, జో లట్టబ్బొసాకయ్ లాబుమ్, గని తిలస జాన్లి బాస తెన్ ప్రబుచ కబుర్లు కో సంగిలె, నంపజల సంగుమ్ మొత్తుమ్కయ్ లాబుమ్.

5 జలె, తుమ్ ఎత్తిజిన్ ప్రబు దెత వేర బాసల్ తెన్ లట్టబ్బె అంక సర్ల, గని అన్నె కిచ్చొ ఆస జతసి మెలె, తుమ్క 'మాన్సుల్ అర్దుమ్ కెరంతి రితి ప్రబుచ కబుర్లు సంగుతు' మెనయ్ అంచి ఇస్టుమ్. సంగుమ్చ మాన్సుల్ అర్దుమ్ కెరంతి రితి సొంత బాస తెన్ కో జలెకు అర్దుమ్ సంగిలెకయ్, సూన్తసక లాబుమ్, ఆత్మతె వడ్డుల తిలస నేన్లి బాస తెన్ ప్రబుచి కిచ్చొ జవున్ కోడు సంగితి కంట, తిలస జాన్లి బాస తెన్ ప్రబుచి కబుర్ సంగిలె చెంగిలి.

6 బావుడ్డు, ఆవ్ తుమ్చితె జా కెర తుమ్ నేన్లి బాస తెన్ లట్టబ్బె, తుమ్ అర్దుమ్ కెరంతి రితి ప్రబు దెకయ్లిసి కిచ్చొ జలెకు నే సంగిలె తుమ్క కిచ్చొ లాబుమ్? ఆవ్ తుమ్చి పాసి జా దేముడుచి సత్తిమ్ సూనవుక నెంజిలె, దేముడుచి రిసా తుమ్క నొవి గ్యానుమ్చి సికడ్డె జలెకు, జో సంగిలి కబుర్ నే సూనయ్లె జలెకు, జోచి బోద నే సంగిలె జలెకు, అవ్ దస్సి నే కెరె తుమ్క కిచ్చొ లాబుమ్! కిచ్చొ లాబుమ్ నాయ్.

7 మూరి జలెకు, వీన జలెకు జివ్ నెంజిల రితయ్ బజింత్రలు, కి అనాడ్ జయెదె. బజెనక ఉచర్లె సొస్టుమ్ నే బజిలె, మాన్సుల్ రాగుమ్ కిసి చినుల?

8 పడ్డొ, జమాన్లుచి నప్పిర్మూరి జవున్ సొస్టుమ్ నే బజిలె, యుద్దుమ్ కెరుక మెన జేవ్ జమాన్లుతె కో తెయార్ జవుల?

9 తుమ్చి తెన్ కి దస్సి, తుమ్ సొస్టుమ్ అర్దుమ్ కెరంతి రితి తుమ్చి జిబ్ తెన్ నే లట్టబ్బె, లట్టబ్బె బాస తెన్ తుమ్ కిచ్చొ సంగిలిసి కిసి జాననుమ్దె? తుమ్ మాన్సుల్క నాయ్, గని ఆరి వాదు తెన్ లట్టబ్బె రితి తస్సె.

10 నిజమి, ఈంజ లోకుమ్తె ఒగ్గర్ ఒగ్గర్ బాసల్ తవుల, చి జేవ్ బాసల్ ఎత్తితె అర్దుమ్ నెంజిల కొడొ తయె నాయ్.

11 గని, కేన్ బాస ఆవ్ నేన్లె, జా బాస తెన్ ఎక్కిలో లట్టబ్బె, జో అంక వేరయ్ దేసిమ్చ మాన్సు జయెదె, ఆవ్ కి జోక వేరయ్ దేసిమ్చ మాన్సు జయిందె.

12 తుమ్చి తెన్ కి దస్సి. ప్రబుచ ఆత్మవరల్క తుమ్క ఆస అస్సెచి రిసా, ముక్కిమ్క నంపజలన మొత్తుమ్ ఆత్మక వడ్డితి రితి ప్రబు దిల వరల్ బుద్ది తెన్, నిదానుమ్ తెన్ దెరనుక అస్సె.

వేర బాస తెన్ లట్టబ్బె కిన్ తంక

13 ఎత్తిజిన్క కామ్క జెతి, ప్రబుచి కోడు కో వేర బాస తెన్ లట్టబ్బె, 'జా అర్దుమ్ సంగితి సెక్తి దొర్కు జవున్' మెనయ్ తుమ్ ప్రార్దన కెరె.

14 అమ్ నేన్ని బాస తెన్ ఆవ్ జవున్ ప్రార్దన కెర్లె, అంచి ఆత్మయి ప్రార్దన కెర్తయ్, గని అర్దుమ్ నెంజిలి రిసా అంచి బుద్దితె పలితుమ్ దెరె నాయ్.

15 జాకయ్, ఆవ్ కిచ్చొ కెరుక? ఆత్మ తెన్ కి ప్రార్దన కెరిందె, మెన్సు తెన్ కి ప్రార్దన కెరిందె. ప్రబుచ గనుమ్లు ఆత్మ తెన్ గాయిందె, చి మెన్సుతె అర్దుమ్ తెన్ కి గాయిందె.

16 నెంజిలె, ఏక్ ఆత్మ తెన్ని తుమ్చితె ఎక్కిలో ప్రబుక కిచ్చొ జవున్ సర్ద తెన్ జోబర సంగిలె, జా సెక్తివరుమ్ నెంజిలన జో సంగిలిన్చి కోడుచి అర్దుమ్ నేన కెర, జో మాన్సుచి సర్దచి జా ప్రార్దనతె కిసి జోచి మెన్సు బెదవ “*తెద్దిలి’ మెన ఒప్పునుల? నెత్తిర్తి!

17 నిజుమి జో మాన్సు జోచి సర్ద సంగ తయెదె, గని సూన్తో మాన్సుక కిచ్చొ లాబుమ్ నాయ్.

18 తుమ్ ఎత్కిజిన్చి కంట ఆవ్ వేర బాసల్ తెన్ ఒగ్గర్ లట్టబ్బసిచి రిసా ప్రబుక అంచి సర్ద ఆవ్ సంగితసి.

19 గని, సంగుమ్తె ఆవ్ తిలి పొది అన్నెక్కో అర్దుమ్ నే కెరంతి, జేవ్ నేన్ని బాస తెన్ దెస్సు వెయిలు కొడొ లట్టబ్బి కంట, జేవ్ అర్దుమ్ కెరంత బాసచ పాచ్ కొడొ జోవయింక బోదన కెర్తి రితి లట్టబుక అంక ఇస్టుమ్.

నంపజలన ఆత్మక వడ్డిత రితి సంగుమ్తె కిచ్చొ కెరుక

20 బావుడ్లు, బాలబోదల్చి బుద్ది తెన్ తుమ్ తా నాయ్. పాపుమ్చి కామ్క జలె, నేన్ల బాలబోదల్ రిత తా, గని బుద్దిచి కామ్క జలె వడ్డిల రిత జా.

21 †మోసే పూర్గుమ్చొచి అత్తి దేముడు రెగ్గయ్ల ఆగ్గుల్తె రెగ్గయ్లి కోడు కిచ్చొ మెలె,

‡“ ‘వేర బాసల్ తెన్ వేర దేసిమ్లుచ మాన్సుల్చి

చొండివాట్

ఈంజ దేసిమ్చక బోద కెరిందె.

కెర్లె కి, సూన్తి నాయ్’ మెన

ప్రబు సిచ్చుచి తీర్పు సంగితయ్.”

22 జా కోడు సదు కెర్లె, నంపతిలనక నాయ్, గని నంపనెంజిలనకయ్ జేవ్క అన్మానుమ్చి పాపుమ్ లయితి గుర్తుకయ్ జేవ్ నేన్ల బాసల్ తెన్ లట్టబ్బిన్క ప్రబు సెలవ్ దెతయ్. జాన్లి బాస తెన్ ప్రబుచ కబుర్లు సంగితిసి, మాత్తుమ్, నంపనెంజిలనచి రిసా నాయ్, గని నంపజతనకయ్ ‘అర్దుమ్ కెరంతు’ మెనయ్ ప్రబు సెలవ్ దెతయ్.

23 జలె, నంపజలన మొత్తుమ్ సంగుమ్తె బెదితి పొది ఎత్కిజిన్ జేవ్ వేర వేర బాసల్ తెన్ లట్టబ్బె తిలె, వేర

మాన్సుల్ జలెకు, ఎద్దరె నంప నెంజిలన జలెకు తెడి అయ్లె, తుమ్ ఎత్కిజిన్క ‘వెర్తి జా అన్తి’ మెనుల.

24 జాన్లి బాస తెన్ ప్రబుచ కబుర్లు ఎత్కిజిన్ సంగిలె, నంపనెంజిలొసా జవున్, వేర మాన్సు జవున్ తెడి అయ్లె, ఎత్కిజిన్ సంగితిసి సూన, జోవయించి పాపుమ్ చినన, జేవ్ ఎత్కిజిన్చి అత్తి సంగిలిన్క జో మాన్సు పరిచ్చొ జలి రితి జతయ్. దేముడు దెతి తీర్పుల్ సూన్తయ్, చి

25 జోవయించి పెట్టి తిల గుట్టుల్ జోవయింక సొస్టుమ్ డీనుల, చి జోవయించి మొక్కె సెర్పు సేడ, ప్రబుక బక్తి కెరెదె, చి దేముడు తుమ్చి తెన్ తిలిసి జో ఒప్పునెదె.

26 జలె, అన్నె కిచ్చొ తుమ్క సంగుక, బావుడ్లు? తుమ్ సంగుమ్తె బెద వెసితి పొది తుమ్చితె ఎత్కి మాన్సుక కిచ్చొ జవున్ ఆత్మసెక్తి తయెదె. ఎక్కిలోక ఏక్ గనుమ్ గయిందె మెన తయెదె, అన్నెక్కోక కిచ్చొ జవున్ బోదన కెరుక మెన తయెదె, అన్నెక్కోక ప్రబు కిచ్చొ జవున్ దెకవ తిలిసి సంగుక మెన తయెదె, అన్నెక్కో కేన్ జవున్ ఆత్మబాస తెన్ కిచ్చొ జవున్ సంగెదె మెన తయెదె, అన్నెక్కోక జా కోడుచి అర్దుమ్ సంగెదె మెన తయెదె. సంగుమ్తె కిచ్చొ కెర్లె కి ఎత్కిజిన్క కామ్క జెతి రితి తుమ్ కెర.

27 కో ఆత్మబాసల్ తెన్ లట్టబ్బన తిలె, ఎక్కి, దొగుల గే తీగ్ల వర్స తెన్ జేవ్ బాసల్ తెన్ లట్టబ్బు, చి ఎక్కిలో జా అర్దుమ్ సంగును.

28 గని, అర్దుమ్ సంగితొసా ఒత్త నెంజిలె, వేర వేర బాసల్ తెన్ లట్టబ్బొసా సంగుమ్తె తుక్లె తా. జోక జొయ్యి బాసల్ ప్రబు తెన్ లట్టబుక, గని కో సూన్తి రితి నాయ్.

29 పడ్డొ, ప్రబుచ కబుర్లు సంగితన దొగుల తీగ్ల జోచ కబుర్లు సంగుతు, చి తిల మాన్సుల్ జేవ్ సంగితిన్చి అర్దుమ్ ఉచరంతు.

30 అన్నెక్కోక ఒత్త వెన తిలొసాక ప్రబు కిచ్చొ దెకయ్లె, అగ్గెచొ తుక్లె తంక.

31 కిచ్చొక మెలె, ఎత్కిజిన్ వర్స తెన్ని ఎక్కిలోచి పడ్డొ అన్నెక్కో ప్రబుచ కబుర్లు సంగుక జయెదె. దస్సి వర్స తెన్ లట్టబ్బె, ఎత్కి మాన్సు కిచ్చొ జవున్ సికుక జయెదె, ఎత్కి మాన్సు కిచ్చొ జవున్ అర్దుమ్ సూనుక జయెదె; జాగర్ల సంగితిన్ జలెకి, దయిరిమ్ సంగితిన్ జలెకి.

32 ప్రబుచి కబుర్ జో సంగితి సెక్తిక ముద్దొ కెర్తి సెక్తి జోచి అత్తి అస్సె. తుక్లె తంక సూటి తిలె, తెరె.

33 దేముడు జోచి సంగుమ్తె సేంతుమ్ దెతోసా గని జో అల్లర్లు కెర్తొసా నెంజె.

34 ప్రబుచ మాన్సుల్చ సంగుమ్లు ఎత్కితె కెర్తి రితి, ఒత్తచి సంగుమ్తె కి తేర్బోదల్ తుక్లె తంక. జేవ్ లట్టబుక

* 14:16 14:16 తెద్దిలి మెలె ఆమెన్. † 14:21 14:21 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రగ్గవ అస్సె. ‡ 14:21 14:21 యెసయా 28:11-12, ద్వితియోపదేశ కాండుము 28:49.

సెలవ్ నాయ్, దేముడు మోసే తెన్ దిలి ఆగ్గుల్తె రెగిడ్లి రితి మున్నుర్పుల్చి తెడి జేవ్ తంక.

35 జేవ్ కిచ్చో జవున్ పుసుక మెలె, మున్నుర్పుల్క గెరి పున తంక. తేర్బోద సంగుమ్తె లట్టబుక చెంగిల్ నాయ్.

36 తుమ్ వేర ఉచర్తసు జలె, దేముడుచి కోడు తుమ్చితెయ్ మొదొల్ జలి గే? నెంజిలె, ఎక్కి తూమ్ సూన అస్సున్ గే?

37 'ప్రబుచ కబుర్లు సంగితోసా ఆవ్' మెన అన్నె కో ఉచర్లె, 'ప్రబుచి ఆత్మనెక్కి తతోసా ఆవ్' మెన అన్నె కో ఉచర్లె, ఆవ్ తుమ్క రెగిడ్లిన్క 'ప్రబుయి దిలిసి ఆడ్ర' మెన జో బప్పునుక.

38 జో ఈంజ బప్పునె నాయ్ గే, జో మాన్సుక 'ప్రబుచి ఆత్మనెక్కి తిలోసా' మెన ఆమ్ బప్పునుమ్ నాయ్.

39 జలె, బావుడ్లు, ప్రబుచ కబుర్లు సంగిమ్దె మెన తుమ్ ఆస జా, చి జోచి ఆత్మనెక్కిక వేర బానల్ తెన్ లట్టబ్బిన్క అడ్డు కెర నాయ్,

40 గని కిచ్చో కెర్లె కి, బుద్ది తెన్ మరియాద్ తెన్ సేంతుమ్ తెన్ కెరన.

15

యేసుక్రీస్తు మొర కచితుమ్ అన్నె జివ్ జలిన్

1 జలె, అప్పె బావుడ్లు, సుబుమ్ కబుర్ సంగితి రిసాచి తుమ్క ఉచార కెరయిందె. ఈంజ సుబుమ్ కబుర్ తుమ్క సూనయ్లి పొది కిచ్చో కిచ్చో సంగిలమ్ గే, తుమ్ ఉచర. జా ఎత్తి తుమ్ సూన నంపజలదు.

2 ఆవ్ సంగిలి సుబుమ్ కబుర్చి తుమ్ నే పచ్చితె నిదానుమ్ జా అస్సున్ జలె, జాచి రిసా రచ్చించుప జతె అస్సున్. గని నంపజలన తెన్ తుమ్ బెదిలిసి ఆరిచి జలె, తుమ్క నముకుమ్ నాయ్.

3 జలె, అంక దిలిన్క 'ఎత్తిచి కంట ముక్కిమ్చి, జా' మెనయ్ తుమ్క ఆవ్ అన్నె తిలయ్. కిచ్చో కోడు మెలె, 'జర్గు జయెదె' మెన పూర్గుమ్ దేముడుచి కొడొతె రెగ్గయ్లి రితి, అమ్చ పాపల్ గెచ్చయ్తి బలి జతి రిసా క్రీస్తు మొర,

4 రోయి జా, 'జర్గు జయెదె' మెన దేముడుచి కొడొతె అగ్గె రెగిడ్లి రితి తిర్రతక అబ్బొసి జోక అన్నె జియడ ఉట్టయ్లన్.

5 *కేపాక, పడ్డొ బారజిన్ సిస్సుల్ మొత్తుమ్క డీసిలన్.

6 పడ్డొ పాచ్ పుంజో జిన్చి కంట ఒగ్గర్జిన్ నంపజలనక ఎక్కి సుటు డీసిలన్. జోవయింతె అప్పెక ఒగ్గర్జిన్ జివ్వి అస్తి, గని సగుమ్జిన్ మొర గెల.

7 పడ్డొ, యాకోబుక డీసిలన్. పడ్డొ సుబుమ్ కబుర్ సూనవుక మెన జో నిసాన్ల బారికుల్ ఎత్తిజిన్క డీసిలన్.

8 పడ్డొ, ఆవ్ అగ్గె జోచో సిస్సుడు నెంజ తా, ఆవ్ సరి జతి సమయుమ్క నే జెర్మిలోసా జలె కి, ఆకర్క అంక కి డీసిలన్.

* 15:5 15:5 మెల 'పేతురుక'. † 15:9 15:9 బారికుల్ 9:1-3. ‡ 15:10 15:10 బారికుల్ 9:4-6. § 15:21 15:21 రోమియల్ 5:14-21, ఆదికాండుమ్ 3 అద్యయిమ్.

9 జోచ బారికుల్ ఎత్తిచి కంట ఆవ్ దాక్ జయిందె. 'జోచో బారికి' మెననుక ఆవ్ విలువ కి నాయ్. కిచ్చోక మెలె, జో దేముడుచ బక్తుల్ జల నంపజలన్క ఆవ్ అగ్గె † అల్లర్ కెర్లె తిలయ్.

10 గని జో దేముడుచి దయచి రిసా ‡ రచ్చించుప జా జోచో బారికి ఆవ్ జా అస్సి, చి అంక కెర్లి దయ ఆరిచి నెంజె. జేవ్ ఎత్తిజిన్చి కంట ఆవ్ ఒగ్గర్ కామ్ కెర అస్సి, జా అంచి సాంత నెక్కి తెన్ నాయ్, గని అంచి పెట్టి తిలి దేముడుచి దయయ్ అన్నె ఈంజ కామ్ కెరవ అస్సి.

11 ఆవ్ సుబుమ్ కబుర్ సూనయ్లె కి, జేవ్ సూనయ్లె కి, అమ్ ఒండి ఈంజయ్ ఎక్కి సుబుమ్ కబుర్ బోదన కెర్తసుమ్చి, తుమ్ నంపజలదు.

క్రీస్తు అన్నె జివ్ జా ఉట్టిసి మాన్సుల్ అన్నె జివ్ జా ఉట్టుక

12 జలె, క్రీస్తు 'మొర్తికయ్, దేముడు జోక అన్నె జియడ ఉట్టయ్లన్' మెన సుబుమ్ కబుర్ తిలె, 'మొర్లస అన్నె జివ్ జా ఉట్టితి నాయ్' మెన తుమ్చితె సగుమ్జిన్ కిసి సంగుక జయెదె?

13 మొర, అన్నె జివ్ జా ఉట్టుక నెంజె మెలె, క్రీస్తు కి 'జివ్ జా ఉట్టె నాయ్' మెనుక జయెదె.

14 క్రీస్తు అన్నె జివ్ జా ఉట్టె నాయ్ జలె, ఆవ్ బోద కెర్లిసి, తుమ్చి నముకుమ్ ఎత్తి, ఆరి.

15 అన్నె దస్సి తిలె, దేముడుచి రిసాచి అమ్చి సాచి అబద్దుమ్చి జా తయెదె. కిచ్చోక మెలె, జోక 'క్రీస్తుక అన్నె జివ్ కెర ఉట్టయ్లన్' మెన సాచి సంగిలమ్. గని 'మొర్లస జివ్ జా ఉట్టితి నాయ్' మెలిన్ ఏక్ వేల నిజుమ్ జలె, యేసుక కి జో దేముడు జియడ ఉట్టవ తయె నాయ్.

16 కిచ్చోక మెలె, మొర్లస అన్నె జివ్ జా ఉట్టితి నాయ్ మెలె, 'క్రీస్తు కి అన్నె జివ్ జా ఉట్టె నాయ్.'

17 క్రీస్తు అన్నె జివ్ జా ఉట్టె నాయ్ మెలె, తుమ్చి నముకుమ్ ఆరి అస్సి మెనుక జతి, చి అప్పెక తుమ్చ పాపల్ తెన్ని అస్సున్ మెనుక జయెదె.

18 జా నిజుమ్ జలె, క్రీస్తుక నంపజలన మొర్లస కి నాసెనుమ్తె గెచ్చ తవుల.

19 ఎక్కి ఈంజ లోకుమ్తెచి అమ్చి జివితుమ్చి రిసా క్రీస్తు అమ్క కామ్క జయెదె మెన అమ్చి నముకుమ్ తిలె, ఈంజ లోకుమ్చ మాన్సుల్ ఎత్తిచి కంట, అమ్మి నిస్కారుమ్ తిలన జమ్దె.

20 గని నిజుమి క్రీస్తు మొర్లు తెంతో జివ్ జా ఉట్ట కెర, మొర అన్నె జివ్ జా ఉట్టుక తిలనకతె తొల్పూర్ జా అస్సి.

21 క్రీతొలితొచో మాన్సు ఆదాము పాపుమ్ కెర్లించి రిసా మొర్ను మొదోల్ జా అయ్లి. గని మొర్ను తెంతో అన్నె జీవ్ జా ఉట్టుక అన్నెక్లో మాన్సు తెంతో అయ్లి.

22 ఆదాముచి తెడి ఈంజ లోకుమ్చ ఎత్కిజిన్ మొర గెతతి, దస్సి క్రీస్తుచి తెడి తిలన ఎత్కిజిన్ అన్నె జీవ్ జా ఉట్టుల.

23 గని ఎత్కిజిన్ సరిగా వర్న తెన్ అన్నె జీవ్ జా ఉట్టుక అస్సె. తొలితో తొల్పుర్ జలో క్రీస్తు అన్నె జీవ్ జా ఉట్టు అస్సె. పడ్డె, జో ఈంజ లోకుమ్చె అన్నె ఉత్త జెతి దీసిక జోచయ్ జల మాన్సుల్ కి జీవ్ జా ఉట్టుల.

24 జా జర్గు జలి పడ్డొక, ఆకర్క, *అదికారుమ్ తిలిన్ ఎత్కిచి ఉప్పిరి, †అదికారుమ్ ఎత్కిచి ఉప్పిరి, ‡సెక్కివో ఎత్కిచి ఉప్పిరి జో జీన గెచ్చ కెర, యేసు జోచి రాజిమ్ దేముడు అబ్బోన్చి అత్తి అన్నె సార్ప కెర దెయెదె. తెదొడి ఆకర్ జయెదె.

25 మదెనె, జోచ విరోదుమ్ సుదల్ ఎత్కిక, జో జిన్తె ఎదక, క్రీస్తు సొంత ఏలుప కెరుక అస్సె.

26 జా ఆకర్క నాననుమ్ జలి విరోది, మొర్ను.

27 క్రీ“జో ఏలుప కెర్తి రిసా, దేముడు ఎత్కి జోచి అత్తి సార్ప కెర దా అస్సె” మెన రెడ్డె అస్సె. మదెనె క్రీస్తుచి అత్తి ఎత్కి సార్ప కెర దిలోసా అబ్బోసి. జో అబ్బోన్కయ్ పిట్టవ, ఎత్కి క్రీస్తుచి అదికారుమ్ తెంతో అస్సె.

28 క్రీస్తు ఎత్కిక జీన కేడయ్లె, ఈంజ మదెనె జోచి అత్తి జా ఎత్కి సార్ప కెర తిలో అబ్బోన్చి అత్తి తెదొడకయ్ జోయ్యి అన్నె సార్ప కెర దా, జోయ్యి అబ్బోన్చి తెడి కి తయెదె. దస్సి దేముడు అబ్బోసి ఎత్కిక పూర్తి సొంత ఏలుప కెరెదె.

అన్నె జీవ్ జా ఉట్టుమ్దెచి రిసా బుద్ది ఇండ

29 మొర్లన అన్నె జీవ్ జా ఉట్టితినాయ్ మెలె, సగుమ్జిన్ కిచ్చొక మొర్లనచి రిసా బాప్తిసుమ్ నజన్తతి? మొర్లన ఎద్దెరె అన్నె జీవ్ జా ఉట్టితినాయ్ జలె, జోవయించి రిసా సగుమ్జిన్ కిచ్చొక బాప్తిసుమ్ నజన్తతి?

30 మొర్లన అన్నె జీవ్ జా ఉట్టితినాయ్ జలె, ‘మొర్లిసి జీవ్ జా ఉట్టుల’ మెన ఆవ్ కిచ్చొక కెడ్డె తెదొడ మొర్తి ప్రమాదుమ్ ఆనయ్తసి? జీవ్ జా ఉట్టుక నెంజె మెలె, ఇసి జతె తత్తయ్ గే?*

31 నాయ్, బావుడ్లు, తుమ్ నంపజలి రిసా ఆవ్ ప్రబుచి తెడి కెద్ది గవురుమ్ ఉచరంతసి గే, తెద్ది కచితుమ్ ఆవ్ కిచ్చొ సంగితసి మెలె, రోజుక ఆవ్ మొర్తసి.

32 ఎపెసు పట్టుమ్తె, జేవ్ కెల్క కెల్లి రితి ఆవ్ జంతువుల్ తెన్ జుజ్జిల్ రితి జలయ్. ఆవ్ దస్సి జతిన్తె ఈంజయ్ లోకుమ్చె అంక కిచ్చొ లాబుమ్! కిచ్చొయ్ లాబుమ్ నాయ్. మొర్లన అన్నె జీవ్ జా ఉట్టితినాయ్ జలె, ప్రబుచి రిసా కిచ్చొ అల్లర్ సేడ్లె కక్క లాబుమ్ నాయ్, చి †“కలిక ఆవ్ మొరిందె చి రిసా ఆజి కంక, పియ కెర, ఎదిల్ సర్ద కెరుమ!”

మొనుక జతి.

33 తుమ్ మోసిమ్ జా నాయ్! “పాపుమ్బుద్దిచ మాన్సుల్ తెన్ బెదిలె, చెంగిల్ బుద్ది తిలోసా కి పాడ్ జయెదె” మెన సంగితి కోడు నిజమ్.

34 అల్లె, ఉట్టు! బుద్ది జా పాపుమ్ ముల! సగుమ్జిన్ దేముడుక ఎద్దెరె నేన్తె, చి జోవయించ రుజ్జుల్ దెకవుక అస్సె! తుమ్క ‘లాజ్ జా జతు’ మెనయ్ ఆవ్ ఇసి సంగితసి.

మొర, నోచి పొలిక జా పరలోకుమ్చె జెర్తితిన్

35 గని తుమ్చితె కో గే కిచ్చొ పునెదె మెలె, “మొర గెలన కిసి జా అన్నె జీవ్ జా ఉట్టుల? ఉట్టె, కిచ్చొ రగుమ్ ఆగ్ తెన్ తవుల?” మెన పునెదె.

36 ఓ బుద్ది నెంజోలోసా, తుక వెర్తి! కిచ్చొ జవున్ బి గలిలె, ఉప్పిర్చి చామ్ మొర్లెకయ్ జియ మొక్క జయెదె!

37 బీ గలితోసా గోదుమ్ గే, కిచ్చొ జవున్ వేర గిడ్డల్ గే పంట్లో జంక జలె, జేవ్చి రూపుమ్ జా గలిలి బీక వేర జతయ్. జా గలిలి బి ఎత్కి గిడ్డయ్, జా ఉట్టితినె మొక్కయ్.

38 గని జా బి జీవ్ జా ఉట్ట గజ్జల్ జంక జలె, జో నిసాన్లి రూపుమ్ దేముడు దెయెదె. ఏక్ రగుమ్ గిడ్డల్చ మొక్కల్క ఏక్ రూపుమ్, అన్నెక్ రగుమ్ గిడ్డల్చ మొక్కల్క అన్నెక్ రూపుమ్ జో దెయెదె.

39 ఆగ్ తిలసక జలె, వేర వేర రగల్ రూపుమ్లు తవుల. మాన్సుల్క ఏక్ రగుమ్, జంతువుల్క అన్నెక్ రగుమ్, పిట్టల్క అన్నెక్ రగుమ్, మొస్సుక అన్నెక్ రగుమ్.

40 పడ్డె వేర లోకుమ్చ జివుల్క ఏక్ రగుమ్ రూపుమ్లు తవుల, గని ఈంజ లోకుమ్చ జివుల్క వేర రగుమ్ రూపుమ్లు తవుల. వేర లోకుమ్చె తిలిన్చి ఉజిడి ఏక్ రగుమ్ డీసెదె, ఈంజ లోకుమ్చె తిలిన్చి ఉజిడి అన్నెక్ రగుమ్ డీసెదె.

41 పొద్దుక ఏక్ రగుమ్ ఉజిడి తయెదె, సుక్కల్క ఏక్ రగుమ్ ఉజిడి తయెదె, జోనుక అన్నెక్ రగుమ్ ఉజిడి తయెదె. అన్నె ఏక్ సుక్కొచి ఉజిడి ఏక్ రగుమ్, అన్నెక్ సుక్కొచి ఉజిడి అన్నెక్ రగుమ్ తవుల.

* 15:24 15:24 ఎపెసు 1:21 దెక. జేవ్ పొదులె ఈంజేవ్ తిన్ని కొడొ సంగిలె, దూతల్ బూతల్ గల్లచి రిసా సంగితె తిల. కొలోస్సియుల్ 1:16 కి దెక.

† 15:24 15:24 ఎపెసు 1:21 దెక. జేవ్ పొదులె ఈంజేవ్ తిన్ని కొడొ సంగిలె, దూతల్ బూతల్ గల్లచి రిసా సంగితె తిల. కొలోస్సియుల్ 1:16 కి దెక.

‡ 15:24 15:24 ఎపెసు 1:21 దెక. జేవ్ పొదులె ఈంజేవ్ తిన్ని కొడొ సంగిలె, దూతల్ బూతల్ గల్లచి రిసా సంగితె తిల. కొలోస్సియుల్ 1:16 కి దెక.

§ 15:27 15:27 కీర్తనలు 8:6. * 15:30 15:30 మెలె, జో దస్సి మెన సుబుమ్ కబుర్ సూనయ్తె తత్తయ్, చి జా కోడు సూసుక నెసిలన కొపుమ్ జా జోవయింక మారుక ఉచర కిచ్చొ కిచ్చొ సిచ్చల్ కెర్తతి. † 15:32 15:32 యెసయా 22:13.

42 మొదలన అన్నె జీవ్ జా ఉట్టితిన్ తెన్ కి దస్సి. బి గలిలి ఈంజ ఆగ్ జలె, మొర్తినీ. అన్నె జీవ్ జా ఉట్టితిసి, జలె, మొర్తినీ నెంజె.

43 బి గలిలి ఈంజ ఆగ్ గవురుమ్ నాయ్. అన్నె జీవ్ జా ఉట్టి మాత్రుమ్, అమ్చి ఆగ్ పరలోకుమ్చి ఉజిడ్ తెన్ గవురుమ్ తెన్ తయెదె. బి గలిలి ఈంజ ఆగ్ సెక్తి నాయ్, గని అన్నె జీవ్ జా ఉట్టి, అమ్చి ఆగ్ పరలోకుమ్చి సెక్తి తెన్ తయెదె.

44 బి గలిలి ఈంజ ఆగ్ ఈంజ లోకుమ్చి ఆగుచి జయెదె, గని అన్నె జీవ్ జా ఉట్టి, పరలోకుమ్చి ఆగ్ రగుమ్ తయెదె. ఈంజ లోకుమ్చి ఆగ్ రగుమ్చ ఆగ్చ అస్సి జలె, పరలోకుమ్చి ఆగ్చ రగుమ్చ ఆగ్లు కి తవుల.

45 దేముడుచి కొడతె రెగ్డయ్లి రితి;

‡“దేముడు తొలితో జెర్మయిలో మాన్సు ఆదాము జీవ్ తిలి ప్రానుమ్ జలన్”

క్రిస్తు జలో ఆకర్చో ఆదాము, మాత్రుమ్, జీవ్ దెతో ఆత్మయి జలన్.

46 ఆత్మతె జెర్మన్ జలసి తొలితో జయె నాయ్. తొలితో ఆగ్కయ్ జెర్మన్ జయెదె. పడ్డోకయ్ ఆత్మతె జెర్మన్ జయెదె.

47 తొలితోచో మాన్సు బుయిచి మత్తి తెంతో జెర్మిలోసా జలన్. పడ్డోచో మాన్సు, మాత్రుమ్, పరలోకుమ్ తెంతో జెర్మిలన్.

48 మత్తి తిలోసా కిసా తిలో గే, జోచి పడ్డో జెర్మిల మత్తి తెన్ తిలన ఎత్తిజిన్ దస్సయ్. పరలోకుమ్ తిలోసా కిసా గే, పరలోకుమ్చి జెర్మన్ జలన ఎత్తిజిన్ కి దస్సయ్ జవుల.

49 అప్పె మత్తితె తిలోసాచి పోలికతెన్ అస్సుమ్. దస్సి, పరలోకుమ్ తిలోసాచి పోలిక కి జమ్దె.

50 బావుడ్లు, ముక్కిమ్క తుమ్క ఆవ్ కిచ్చో సంగితసి మెలె, ఈంజ లోకుమ్చి ఆగ్ ఈంజ లోకుమ్చి లోయి దేముడుచి రాజిమతె బెదుక నెత్తె. మొర్తినీ నే మొర్తినీతె గెచ్చుక నెత్తె. మొర్తినీక ఒత్తయ్ వాట తయె నాయ్. జాకయ్, ఒత్తయ్ గెచ్చుక జలె, మొర్తినీ జతిక నే మొర్తినీక పాయె నాయ్.

51 ఈందె, దేముడు దెకయ్లి గుట్టు తుమ్క సంగితసి. ఆమ్ ఎత్తిజిన్ మొరుమ్ నాయ్, అమ్ నంపజలన ఎత్తిజిన్ మార్పుప జమ్దె.

52 ఈంజ ఉగుమ్చి ఆకర్క ప్రబు నప్పిర్మూరి పుజిలె, అంకి రెప్ప నే పెడ్డె బేగి మార్పు జమ్దె. జో నప్పిర్మూరి పుజిలె, మొర్లన పరలోకుమ్తె బెదితి నే మొర్తి పోలిక జా అన్నె జీవ్ జా ఉట్టుల కి, జీవ్ తిలసయ్ కి దస్సి పోలిక జా మార్పుప జవుల.

53 కిచ్చోక మెలె, పాడ్ జతి ఈంజ ఆగ్ పాడ్ నే జతి రగుమ్ జా మార్పుప జంక అస్సి. మొర్తి ఈంజ ఆగ్ నే మొర్తి

రగుమ్ జా మార్పుప జంక అస్సి.

54 పాడ్ జతిసి పాడ్ నే జతిసి జా మార్పుప జలి మెలె, దేముడుచి కొడతె రెగ్డయ్లి కోడు తెదొడ్కయ్ నెరవెర్పుప జయెదె.

‡“మొర్తుక పాడ్ కెర గెల కెర, పరలోకుమ్చో దేముడు జీన అస్సి”

మెన ఏక్, పడ్డె,

55 *“ఓ మొర్తు, కేతె జిన్లది?”

ఓ మొర్తు, కేతె తుచి విస్సుమ్?!”

మెన అన్నెకో కోడు నెరవెర్పుప జయెదె.

56 జలె, మొర్తుచి విస్సుమ్ కేతె మెలె, పాపుమ్తె. †దేముడు తొలితో దా తిలి ఆగ్గుల్ పాపుమ్చి సెక్తి.

57 గని, జో దేముడుక జెయ్యి! అమ్చో ప్రబు జలో యేసుక్రిస్తుచి అత్తి జో అమ్క జీనవ అస్సి!

58 జాకయ్, ప్రేమ తిల బావుడ్లు, డిట్టుమ్ తా అన్మానుమ్ నే జతె, ప్రబుచి తెడి తుమ్ సైమ సేడ కెర్తి కామ్ ఆరి కామ్క నెంజిలినీ నెంజె మెన జానయ్, జోచి కామ్ తుమ్ నిదానుమ్ తెన్ కెర్తె తా.

16

బీదల్చి రిసా డబ్బుల్ ఉక్కుల్క

1 జలె, యెరూసలేమ్తెచ యూదుల్తెచ బీద జల నంపజలనచి రిసా డబ్బుల్ ఉక్కులిన్చి రిసా కిచ్చో మెంతసి మెలె, గలతీయ ప్రాంతుమ్చ సంగుమ్లక్ ఆవ్ సంగిలి రితి, తుమ్కయ్ కి “దస్సి కెర” మెన ఆవ్ సంగితసి.

2 మెలె, ఎత్తి అయ్తరి తుమ్చితె ఎత్తి మాన్సు, గలి సత్తరెక్క ప్రబు కెర్తి లాబుమ్ జోవయింక దొర్కు కెర తయెదె గే జేవ్ దెక, జాక ఏక్ వాట తియ తంక, చి సత్తరెక్క సత్తరెక్క సర్దు కెర్తి, ఒగ్గర్ జా తయెదె. చి ఆవ్ జెతి పొదిక ఉక్కుల్క తుమ్ బమ్మ జంక నాయ్.

3 పడ్డె, ఆవ్ అయ్లె, ‘నిదానుమ్ కెరుల’ మెన తుమ్ కక్క కక్క నిసాన్తె గే, జా గుర్తుక ఆవ్ ఉత్తల్ రెగ్డ దెయిందె, చి తుమ్ ఉక్కుల దెతి డబ్బుల్ యెరూసలేమ్ పట్టుమ్తె జోవయించి అత్తి తెద్రయిందె.

4 ఆవ్ కి గెలె చెంగిల్ మెన డీసిలె, అంచి తెన్ జేవ్ జెవుల.

కొరిందిల్తె వవులు గోత్ గెచ్చుక ఉచర్లిన

5 ఆవ్ మాసిదోనియ వాట్ గెచ్చుక ఉచర అస్సి, చి ఒత్త గెలయ్ మెలె, తుమ్తె గోత్ జెయిందె,

6 చి ఏక్ వేల ఇదిల్ ఒగ్గర్ సేంపు తుమ్చి తెన్ తయిందె, నెంజిలె ఒండి చల్లి పొది కి ఒత్త తంక జయెదె, చి ఒత్త తెంతో ఆవ్ కేన్ ప్రయానుమ్ గెలె కి, తుమి అంక బార్ కెర తెద్రవుక జయెదె.

7 ఆవ్ అప్పె వాట్ గెతి పొది తుమ్క గడియ దెక ఉట్ట గెచ్చుక నెసి, గని ప్రబు సెలవ్ దిలె, పడ్డొ గెలె, తుమ్చి తెన్ సగుమ్ సేంపు తా గెచ్చుక జయెదె. జయ్యి అంచి ఆస.

8 గని మదెనె, పెంతెకొస్తు పండుగు ఎద ఇన్నె ఎపెసుతె తయిందె.

9 కిచ్చొక మెలె, అప్పె ఇన్నె నుబుమ్ కబుర్ కామ్ ఒగ్గర్ కెరుక అంక వాటు దొర్కు జా అస్సె. గని విరోదుమ్ నుదల్ ఒగ్గర్జిన పిట్టవుక ఉచర అస్తి, చి ఆవ్ తిలెకయ్ చెంగిలి.

తిమోతి కొరింధీతె గెచ్చుక తిలిసి

10 తిమోతి తుమ్తె అయ్లె, తుమ్ సర్ల తెన్ బెదవన. ఆవ్ కెర్తి రితి, జో కి ప్రబుచి కామ్ కెర్లయ్.

11 జాకయ్, జో దాకు జలెకి కో జోక నిస్కారుమ్ దెక నాయ్. జో అంచితె అన్నె ఉట్ట జెంక మెన బార్ జతి పొదిక సర్ల తెన్ తుమ్ జోక అన్నె తెద్రవ. ఆవ్ తెద్రయ్ల అన్నె బావుడ్లు తెన్ జో ఉట్ట జెతిన్క ఆవ్ రకితసి.

12 అన్నె బావుడ్లు తెన్ తుమ్తె గోత్ గెస్సు మెన, అమ్చొ బాచొ జలో అపొల్లోక బలవంతుమ్ కెర్లయ్, గని అప్పె గెచ్చుక జోక సెలవ్ నాయ్. జోక వాటు తిలె, పడ్డొకయ్ తుమ్తె జెయెదె.

13 తుమ్ తెలివి తెన్ జాగర్ల తెన్ తా, తుమ్చి నముకుమ్ డిట్టుమ్ దెరన, దయిరిమ్ తెన్ ఇండ, డిట్టుమ్ తా.

14 తుమ్ కిచ్చొ కెరుక జలెకి, ప్రేమయ్ తెన్ కెర.

15 జలె, బావుడ్లు, ఒండి అకయ ప్రాంతుమ్తె స్తెపనుచి గెర్చ తొలితొ ప్రబుక నంపజల, చి ఎక్కి నిదానుమ్ తెన్ నంపజలన్క దెక తోడు తా అస్తి.

16 దస మాన్సుల్క చి అమ్చి తెన్ నైమ సేడ ప్రబుచి కామ్ నిదానుమ్ కెర్ల ఎత్కిజిన్క తుమ్ మరియాద దెక.

17 స్తెపను, పొర్మానాతు, చి అకయక ఇన్నె ఉట్ట అయ్లిన్చి రిసా అంక ఒగ్గర్ సర్ల. కిచ్చొక మెలె, తుమ్ ఇన్నె నెంజిలె కి, జేవ్ అయ్లిన్ తెన్ తుమ్ అంచి తెన్ తిలి రితి జతయ్.

18 తుమ్చి ఆత్మక జేవ్ కిసి అన్నె డిట్టుమ్ కెర్ల గే, దస్సి అంకయ్ కి సర్ల కెర అస్తి. దస మాన్సుల్క తుమ్ మరియాద దెక.

కచి కచి ముద్దు సంగ తెద్రయ్లిసి

19 ఆసియా ప్రదేసిమ్చ సంగుమ్లు ఎత్కి తుమ్క జోవయించి ప్రేమ సంగ తెద్రయ్తతి. పడ్డొ అకుల ప్రిస్కిల్ల జోవయించి గెరి సబ కెర్తి సంగుమ్చ ఎత్కిజిన్ తెన్ ప్రబుచి నావ్ తెన్ చి జోవయించి ప్రేమ కి సంగ తెద్రయ్తతి.

20 నంపజల ఇన్నెచ బావుడ్లు ఎత్కిజిన్ జోవయించి ప్రేమ సంగ తెద్రయ్తతి. ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జోకర.

ఆకర్ కోడు

21 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్లసి. ఆవ్ రెగ్లయ్లిసి తుమ్ జాన్సు.

22 తుమ్చితె కో ప్రబుక ప్రేమ కెరె నాయ్ గే, ప్రబు జోక సిచ్చుతె తెద్రవున్. అమ్చొ ప్రబు, తుయి జె!

23 ప్రబుచి దయ తుమ్చి తెన్ తవున్.

24 యేసుక్రీస్తుచి తెడి అమ్చి ప్రేమ కి తుమ్చి తెన్ తవున్. *తెద్దిలి.

* 16:24 16:24 తెద్దిలి మెలె ఆమేన్.

కొరింధియుల్క రెగిడ్డి దొన్నిచి ఉత్తుమ్ బారిక్ జలో పవులు కొరింధ్ పట్టుమ్చ సంగుమ్చక రెగిడ్డి దొన్నిచి ఉత్తుమ్

మొదొల్ కోడు

1 దేముడుచి సెలవ్చి రిసా, క్రీస్తు జలో యేసుచి రిసా సుబుమ్ కబుర్ సూనయ్తో జోచొ బారికి జా అస్సి పవులు రెగిడ్డిసి. కొరింధ్ పట్టుమ్తెచి దేముడుచ సంగుమ్చక, చి ఒండి అకయ ప్రదేసిమ్తెచ జోచయ్ జల అన్నె మాన్సుల్క ఆవ్ పవులు తిమోతి తెన్ రెగిడ్డి ఉత్తుమ్.

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్.

3 ఎత్తి దయక అబ్బొ జలో, అమ్చి ఆత్తుతె అమ్క డిట్టుమ్ దయిర్చి కెర్తొ దేముడు జలో, అమ్చొ ప్రబు జలో యేసుచొ దేముడు అబ్బొన్కయ్ జోబర.

4 అమ్చ బాదల్ ఎత్తితె జో అమ్క డిట్టుమ్ దయిర్చి కెర్తయ్, చి జో అమ్కయ్ కెర్తి డిట్టుమ్ దయిర్చిచి రిసా, అన్నె కీస బాదల్ సేడ్డనక ఆమ్ కి డిట్టుమ్ దయిర్చి కెరుక జతయ్.

5 కీసి మెలె, క్రీస్తు సేడ్డ సైమల్తె ఆమ్ కీసి బెదితసుమ్ గే, దస్సి, జోచి తెడి తా, జో దెతి డిట్టుమ్తె దయిర్చిచి కి అమ్ బెదితసుమ్.

6 తుమ్క 'డిట్టుమ్ దయిర్చి జతు, రచ్చించుప జతు' మెనయ్ అమ్ సైమల్ సేడ్డసుమ్. తుమ్కయ్ 'డిట్టుమ్ దయిర్చి జతు' మెనయ్ ప్రబుయి అమ్కయ్ డిట్టుమ్ దయిర్చి కెర్తయ్. ఆమ్ సేడ్డ అల్లర్ తుమ్ కి సేడ బమ్మ నే జతె ఓర్పుప జలె, జోచి డిట్టుమ్ దయిర్చి తుమ్ కి జస్తె.

7 తుమ్చి రిసాచి అమ్చి నముకుమ్ పిట్టె నాయ్. కిచ్చొక మెలె, అమ్ సేడ్డ సైమల్ తుమ్ కి సేడ్డె, అమ్కయ్ దొర్కు జతి డిట్టుమ్ ఆన దయిర్చి తుమ్కయ్ కి దొర్కు జయెదె.

8 ఓ బావుడ్డు, ఆసియా ప్రదేసిమ్తె అమ్ సేడ్డి బాద కెడ్డి గే తుమ్ నే జాన్తి రితి జలె, చెంగిల్ నాయ్ మెన అమ్ ఉచర్తసుమ్. జా బాద కెడ్డి మెలె, అమ్క కెడ్డి పెల్లితె తిలి మెలె, 'ఓర్పుప జంక నెత్తుమ్ ఒగ్గర్ మొరుమ్దె గె కిచ్చొగె' మెలి రితి అన్మానుమ్ అమ్క పెలిత్ తిలి.

9 నిజుమి, మొర్తి సిచ్చ అమ్ వయిలి రితి అమ్క పెట్టి డీసిలి; తెడ్డి బాద తిలి. గని అమ్ తెడ్డి బాద సేడుక ప్రబు కిచ్చొక సెలవ్ దిలన్ మెలె, అమ్చి సొంత సెక్కిక అమ్ నే నంప కెర్తె, మొర్తనక అన్నె జయడ్డొ దేముడుకయ్ అమ్

నంప కెరుకయ్ అస్సెచి రిసాయి జో జా సెలవ్ దిలన్. సొంత సెక్కిక కిచ్చొ నెత్తుమ్.

10 తెడ్డి ప్రమాదుమ్ తెంతో జో అమ్క రచ్చించుప కెర్లన్, చి అన్నె దస్సి అల్లర్ సేడ్డె, అన్నె అమ్క రచ్చించుప కెరెదె మెన అమ్క దయిర్చి. 'జొయ్యి అమ్క అన్నె రచ్చించుప కెరెదె' మెన, జోచి ఉప్పిరి అమ్ పూర్తి నముకుమ్ తియ అస్సుమ్.

11 అమ్చి రిసా తుమ్ కి ప్రార్థన కెర కెర అమ్క తోడు తా, చి ఒగ్గర్జిన్ ప్రార్థన కెర్తి రిసా ప్రబు అమ్క రచ్చించుప కెర్తొ మెనయ్, ఒగ్గర్జిన్ జోచి సర్ద సంగుల.

కొరింధిల్క పవులు నిదానుమ్ కెర్లిసి

12 జలె, సర్ద తెన్ కిచ్చొ సాచి సంగితసుమ్ మెలె, ప్రబుచి సుద్ది తెన్ జోచి ఎక్కి నిదానుమ్ తెన్ ఈంజ లోకుమ్తె, ముక్కిమ్క తుమ్చితెయ్ ఇండ అస్సుమ్; మాన్సుచి సెక్కి గ్యానుమ్క నాయ్, గని దేముడుచి దయచి సెక్కిక.

13 దస్సి, కిచ్చొ లుంకడ్డి రితి నాయ్, గని ఎత్తి తుమ్ సొస్టుమ్ అర్దుమ్ కెరంతి రితి జయ్యి అర్దుమ్ అమ్ రెగ్గితసుమ్.

14 ప్రబు జలో యేసు ఈంజ లోకుమ్చక తీర్పు కెర్తి వెల్లి దీసిక 'చెంగిల్ అస్తి' మెన తుమ్చి రిసా ఆమ్ కీసి సర్ద జమ్దె గే, అమ్చి రిసా తుమ్క దస్సి సర్ద తంక జయెదె మెన తుమ్ అప్పె ఇదిల్ అర్దుమ్ కెరన అస్సున్. తుమ్క 'జా కోడు పూర్తి అర్దుమ్ కెరంతు' మెనయ్ అంచి ఆన.

15 అంచి ఈంజ దయిర్చిచి రిసా తుమ్తె తొలితో జెంక ఉచర తిలయ్. గెచ్చుక జతి జలె, తుమ్క దొవ్వెర్ దెకితయ్, తివ్వెరి సర్ద జతయ్.

16 తొలితో మాసిదొనియ ప్రదేసిమి గెతె తిలి వట్టె తుమ్తె గోత్ గెచ్చుక చి జా మాసిదొనియ ప్రదేసిమ్ తెంతో అన్నె వట్టె ఉట్ట అయ్లె పొది కి తుమ్తె జెంక ఉచర తిలయ్. దస్సి, ఆవ్ అన్నె యూదయ ప్రదేసిమ్తె గెచ్చుక బార్ జలె పొది తుమి అంక బార్ కెర తెద్రయ్తదు.

17 జలె, దొన్ని మెన్సుల్ తా 'జెయిందె' మెలయ్ గే? మాములుమ్ ఈంజ లోకుమ్చి బుద్ది తెన్ 'జెయిందె' జవున్ మెన దొన్ని మెన్సుల్ తా ఆరి సంగిమ్దె గే? జెంక ఉద్దెసుమ్ నెంజిలె 'జెయిందె' మెనిందె గే?

18 ఆవ్ దసా మాన్సు నెంజి. కచితుమ్ దేముడు నముకుమ్చొ, జాకయ్ ఆమ్ తుమ్క సంగితి దేముడుచి కొడొ ఆరి నెంజె గని కెయ్యక కి నిజుమి.

19 దేముడుచొ పుత్తుసి జలో యేసుక్రీస్తు; *సిల్వాను తిమోతి చి ఆవ్ తుమ్తె బోదన కెర్తొ క్రీస్తు; దసాచొ నెంజె. సంగిల్ రితి జో కెరెదె. ఆమ్ కి దస్సి.

* 1:19 1:19 జోవయిచి అస్సెక్ నావ్ సీలయ్యు. బారికుల్ 15:27.

20 దేముడు అబ్బొసి సంగ తిలి ఎత్కి కోడు, ఎత్కి ప్రమానుమ్ క్రీస్తుతెయ్ కచితుమ్ నెరవెర్పుప జతయ్. దస్సికయ్, క్రీస్తుచి నావ్ తెన్ని †తెద్దిలి మెన సంగితసుమ్. ఇసి ఒప్పన్లె, దేముడుక గవురుమ్ దెతసుమ్; 'క్రీస్తుతెయ్ ఎత్కి నెరవెర్పుప కెర్తయ్' మెనయ్.

21 అన్నె, దేముడు అబ్బొసి సొంత అమ్క తుమ్క క్రీస్తుచి తెడి డిట్టుమ్ కెర్తయ్, చి జోచి కామ్ కెరుక మెన అమ్క నిసాన అదికారుమ్ దా అన్నె.

22 జొయ్యి అమ్క 'అంచయ్ మాన్సుల్' మెన జోచి ముద్ద గల అన్నె, చి జోతె అమ్క దొర్కు జతి వాటక 'కచితుమ్ దెయిందె' మెన అమ్క అప్పె కి రుజ్జు తతి రిసా, అమ్చి పెట్టి జోచి ఆత్మ దా అన్నె.

కొరింథిల్క పవులు దుకుమ్ కెరుక నెసిలిన్చి కోడు

23 గని దేముడు అంచి రిసా సాచి జవున్! తుమ్తె కొరింద్తె ఆవ్ కిచ్చొక అన్నె జెంక నేతయ్ మెలె, తుమ్క సిచ్చ కెరుక నెసి.

24 తుమ్చి నముకుమ్చి ఉప్పిరి ముద్దొ కెరుక అమ్క అదికారుమ్ నాయ్, తుమ్క ఏలుప కెరుక అమ్క ఇస్తుమ్ నాయ్. నముకుమ్క జలె, డిట్టుమ్ అన్నున్. గని, తుమ్క 'సర్దనంతొసుమ్ తెన్ తత్తు' మెనయ్, తుమ్క తోడ్ తంకయ్ అమ్చి ఉడ్డెసుమ్.

2

1 జాకయ్, జా సుట్టుచి రితి ఆవ్ తుమ్తె జా తుమ్క దుకుమ్ కెరుక నెసి.

2 ఆవ్ తుమ్క దుకుమ్ కెర్లె, తుమ్చి దుకుమ్క ఆవ్ దుకుమ్ జతిసి అన్నె కో అంక సర్ద కెర్తొసా తయెదె? తూమ్ కి దుకుమ్ జా తన్నె, ఆవ్ కి దుకుమ్ జా తయిందె.

3 జా ఉత్తమ్తె కిచ్చొక జా ఏక్ కోడు రెగిడ్లయ్ మెలె, ఆవ్ తుమ్తె దస్సి అయ్లె తుమ్ అంక సర్ద తెన్ బెదవంతన అంక దుకుమ్ కెర్తదు. జా ఓర్పుప జంక నెతిర్తయ్. అగ్గె తెంతొ తుమ్క ఆవ్ నంప కెర తిలయ్, చి 'అంక సర్ద తిలె తుమ్కయ్ కి సర్ద తయెదె' మెన ఉచర తిలయ్.

4 జా సుట్టు తుమ్క ఉత్తమ్ రెగిడ్లిసి, జలె, తుమ్క దుకుమ్ కెరయ్తి ఇస్తుమ్ తెన్ రెగ్గి నాయ్, గని తుమ్క అంచి ఒగ్గర్ ప్రేమ దెకయ్తి రిసాయి దస్సి రెగిడ్లయ్. పెట్టి ఒగ్గర్ బాద సిడ ఏడ, ఏడయ్ రెగిడ్లయ్.

5 జో మాన్సు అంక దుకుమ్ కెరయ్లిసి, జలె, ఎక్కి అంకయ్ దుకుమ్ కెరయ్లిసి నెంజె. దస్సి కెర తుమ్ ఎత్కిజిన్క కి ఇదిల్ జవున్ దుకుమ్ కెర తయెదె. గని జోక జా పూచి ఒగ్గర్ వయడుక నెసి.

6 ఎత్కిజిన్ జోక సిచ్చ రితి కెర్లిసి సరి జలి.

† 1:20 1:20 గ్రీకు జాన తెన్ 'అమేన్' మెనుల.

7 జాకయ్, ఒగ్గర్ దుకుమ్క జో పాడ్ నే జతి రిసా తుమ్ అప్పె జోక చెమించుప కెర బెదవన డిట్టుమ్ దయిరిమ్ కెర.

8 'జోచి రిసాచి తుమ్చి ప్రేమ జోక దెకవ' మెన ఆవ్ బతిమాల్ప జా సంగితసి.

9 అంచి కోడు సూన కెరుల గే నాయ్ గె మెన రుజ్జు దెకుక 'జోక తుమ్ సిచ్చ కెర' మెన జా తుమ్క ఉత్తమ్తె రెగిడ్లయ్.

10 తుమ్ కక్క చెమించుప కెర్లె, ఆవ్ కి జోక చెమించుప కెర్తసి. ఆవ్ కిచ్చొ చెమించుప కెరుక తిలి మెలె, తుమ్చి రిసాయి చెమించుప కెర్లయ్ మెలె, క్రీస్తుచి మొక్కె ఆవ్ సంగితసి.

11 కిచ్చొక మెలె, నయ్తాన్ అమ్చి ప్రేమ పిట్టవుక ఉచరెదె. జోచి కుత్తల్ జానుమ్చి రిసా 'జో అమ్చి ఉప్పిరి జినున్ నాయ్' మెనయ్ ఆవ్ ఇసి తీర్పు కెర అన్నె.

పవులు మాసిదొనియ ప్రదేసిమ్తె గెలిన్

12 జలె, క్రీస్తుచి సుబుమ్ కబుర్ కామ్చి రిసా ఆవ్ త్రోయ పట్టుమ్తె గెచ్చు పావిలయ్. సుబుమ్ కబుర్ ఆవ్ సూనయ్తి రిసా ప్రబు అగ్గెచి అవ్కాసుమ్ దిలన్.

13 గని, బావొ జలొ తీతు తుమ్చితె తెంతొ ఒత్త బుల జెంక నేతయ్చి రిసా బాద సిడ జా పట్టుమ్చతె సెలవ్ నజన, అన్నె బార్ జా సముద్దుమ్ జిన, మాసిదొనియ ప్రదేసిమి ఉట్ట గెలయ్.

సుబుమ్ కబుర్ కామ్చి రిసాచి సర్ద

14 గని దేముడుక జోబర, నయ్తాన్ అల్లర్ కెర్లె కి, క్రీస్తుచి తెడి జో దేముడు అమ్క జినయ్తయ్, చి జిన్లొ క్రీస్తుచి పట్టి అమ్ కేనె గెలె కి, కెయ్క తెయ్క జోక జాన్తిన్చి వాసిన అమ్చి అత్తి జో ఒండి దెకయ్తయ్.

15 కిసి మెలె, రచ్చన జతసక కి, నాసెనుమ్ జతసక కి దేముడు అబ్బొన్క డయిలి దూపుమ్ వాసిన రితొ క్రీస్తుచి వాసిన ఆమ్.

16 జా వాసెనక దెక, జలె, నాసెనుమ్ జతసక కి అమ్ మొర్నుచి వాసెన, గని రచ్చించుప జతసక కి జివుమ్చి వాసెన జా అన్నుమ్. దస్సి జలె, ఇసి ప్రబుచి కామ్ కెరుక కేన్ మాన్సు విలువ జవుల?

17 ఆమ్, జలె, జేవ్ వేర మాన్సుల్చి రితి లాబుమ్క ప్రబుచి కోడు సికయ్తన నెంజుమ్. అమ్ విలువ నెంజిలె కి, ఎక్కి నిదానుమ్ తెన్ తిలిసి తిలి రితి, నెంజిలిసి నే తిలి రితి దేముడుచి మొక్కె జోచి అదికారుమ్ తెన్ క్రీస్తుచి తెడి తా జోచి కోడు సూనయ్తసుమ్.

3

అమ్చి సత్తిమ్చి రుజ్జుక ప్రబు సాచి

1 అమ్ అన్నె అమ్చి సొంత గవురుమ్ నజనుక దెర అస్సుమ్ గే? నెంజెలి, అమ్చి సత్తిమ్చి రుజ్జుక తుమ్తె సాచి ఉత్తల్ నజనుమ్దె గే? సగుమ్జిన్క దస సాచి రుజ్జుల్ తంక, గని అమ్క నాయ్.

2 తుమ్కయ్ దెకిలె, అమ్చి సత్తిమ్క రుజ్జు దెకయ్తి ఉత్తుమ్ రితి తుమి జతను; తుమ్చి పెట్టి రెగిడ్డి జా ఉత్తుమ్ ఎత్తిజిన్ నదు కెర అర్దుమ్ కెరనుక జయెదె.

3 పడ్డో, అన్నె కిచ్చొ సొస్తుమ్ డిస్తయ్ మెలె, క్రీస్తు సొంత రెగిడ్డి అమ్చి అత్తి వేర మాన్సుల్తె తెద్రయ్లి ఉత్తుమ్, తూమ్ జస్తె మెన డిస్తయ్. సిర్ర తెన్ రెగిడ్డిసి నెంజె, గని జివ్ తిలో దేముడుచి సుద్ది తిలి ఆత్మయి రెగిడ్డిసి జా, పత్రె రెగిడ్డిసి నెంజె, గని మాన్సుచి పెట్టి రెగిడ్డిసి.

4 క్రీస్తుచి తెడి, దేముడు అబ్బొన్చి మొక్కె దస్సి మెన అమ్క దయిరిమ్.

దేముడు దిలి అగ్గెచి ప్రమానుమ్

5 అమ్చి సొంత సెక్తిక కిచ్చొ కెరుక తెరుమ్ మెన ఉచరుమ్ నాయ్, నెత్తుమ్. అమ్చి సెక్తి కేనె తెంతో జెతయ్ మెలె, దేముడు తెంతయ్.

6 యేసుక నంపజత మాన్సుల్క జో దిలి నొవి ప్రమానుమ్చి రిసా అమ్ సూనవుక మెన జొయ్యి అమ్క సెక్తి దా అస్సె. ఈంజ నొవి ప్రమానుమ్ తిలిసి కిచ్చొ పత్రె గే, పున్తుకమ్తె గే రెగిడ్డి కిచ్చొ కిచ్చొ ఆగ్గుల్చి నెంజె, గని జో దేముడుచి సుద్ది తిలి ఆత్మ మాన్సుచి పెట్టి రెగిడ్డిసి.

*పత్తల్తె జవున్, కాగ్గుల్తె జవున్, రెగిడ్డి ఆగ్గుల్ అమ్ మాన్సుల్చి పాపుమ్ దెకవయ్ అమ్క నింద కెర మార్త, గని మాన్సుచి పెట్టి దేముడుచి సుద్ది తిలి ఆత్మ రెగిడ్డిసి మాన్సుక †జయడ్డయ్.

7 జలె, పత్రె రెగిడ్డి ఆగ్గుల్చి మాన్సుల్క మార్తి సేవ దేముడు మోసే పూర్గుమ్చొచి అత్తి దిలి పొది, జో దేముడుచి పరలోకుమ్చి ఒగ్గర్ ఉజిడి తెన్ గవురుమ్ తెన్ దొర్కు జలి. కెడ్డి ఉజిడి కెడ్డి గవురుమ్ మెలె, దేముడు తెన్ జో దస్సుల్ జా తిలిన్చి ఉజిడ్క గవురుమ్క ఇస్సాయేలు పైజల్ మోసేచి మొక్కె దెకుక నెత్తిర్ల. పూర్గుమ్చి జా ఆగ్గుల్ తెన్ చి ప్రమానుమ్చి ఉజిడి గవురుమ్, మాత్తుమ్, తొక్కి జా జా, కేడ గెలి.

8 దస్సి కేడయ్ గెతి గవురుమ్ ఉజిడిచి కంట, దేముడుచి సుద్ది తిలి ఆత్మచి సెక్తిచి సేవచి గవురుమ్ ఉజిడి ఒగ్గర్ జయె నాయ్ గే? జయెదె.

9 కిచ్చొక మెలె, మాన్సుక నింద కెర్తి ఆగ్గుల్ సేవచి గవురుమ్ ఉజిడి ఒగ్గర్ తిలె, మాన్సుచి పాపుమ్ పుంచ జోవయింక పున్నిమ్ దెతి సేవక అన్నె ఒగ్గర్ గవురుమ్ ఒగ్గర్ విలువ తయెదె.

10 ఇన్నెచి రిసా కిచ్చొ మెనుక జయెదె మెలె, జాచి కంట జిన్ని గవురుమ్ జిన్ని విలువ తిలిన్చి రిసా, అగ్గెయ్ గవురుమ్చి విలువ తిలిన్క అప్పెయి కిచ్చొ గవురుమ్ కిచ్చొ విలువ నాయ్.

11 కేడయ్ గెలిన్క గవురుమ్ విలువ తిలి జలె, కెడ్డోడె తెదోడె తాఁ గెతిన్క అన్నె ఒగ్గర్ గవురుమ్ ఒగ్గర్ విలువ తయెదె.

12 ఇసి మెన అమ్క దయిరిమ్చి రిసా, దయిరిమ్ తెన్ ఈంజ నొవి ప్రమానుమ్చి రిసాచి సత్తిమ్ సూనయ్తనుమ్.

13 మోసేచి రితి అమ్ జము నాయ్. జో, జలె, 'కేడ గెతి జా ఉజిడి కేడ గెతిసి ఇస్సాయేలుల్ మెల అమ్చ పైజల్ దెకుత్ నాయ్,' మెనయ్, దేముడుతె తెంతో ఉట్ట అయ్లి పొది లాజ్ జా మొక్కె డంకన్లొ.

14 జలె, జేవ్ ఇస్సాయేలుల్ కీన జల మెలె, జోవయించి పెట్టి బేడు బందిల్ రితి జల, చి ఆజి ఎద కి అగ్గెచి ప్రమానుమ్చి వాట జేవ్ నదు కెర్లె పొది, మొక్కె డంకన తతి రితి పెట్టి సత్తిమ్ చినితి నాయ్. కిచ్చొక మెలె, క్రీస్తుచి తెడి మాన్సు తిలెకయ్ జా డంకిలిసి దేముడు కడ వెంట గెలెదె.

15 నిజుమి, ఆజి ఎద మోసేచి అత్తి రెగిడ్డిసి దేముడుచ కొణా జేవ్ కెయ్యు నదు కెర్లెకి, జోవయించి పెట్టి యేసుక్రీస్తుచి రిసాచి సత్తిమ్ చినుక నెత్తిర్తి.

16 గని, మాన్సు మార్పువ జా ప్రబుతె అయ్లె, జా డంక అడ్డు జలిసి కడి జతయ్, చి జో ప్రబుచి సత్తిమ్ చినుల.

17 అన్నె ప్రబు ఆత్మయి జయెదె, చి దేముడుచి సుద్ది తిలి ఆత్మ కేనె తయెదె గే, ఒత్తయ్ రచ్చున తయెదె. ప్రబుచి ఆత్మ అమ్చి పెట్టి తిలె, ఆగ్గుల్చి సేవచ గెతిమాన్సుల్ తము నాయ్, విడ్డల్ జా తమ్దె.

18 అన్నె, దేముడుచి సుద్ది తిలి ఆత్మతె జెర్మున్ జల అమ్ ఎత్తిజిని, కిచ్చొ డంకిలిసి అడ్డు నెంతె ప్రబుచి ఉజిడి జోచి గవురుమ్ దెకితె తా, జోచి ఉజిడ్తె గవురుమ్తె బెద, జోచి పోలిక జతి రితి తిరిమ్ తిరిమ్ మార్పువ జతె అస్సుమ్, చి జోచి ఉజిడి జోచి గవురుమ్ తిరిమ్ తిరిమ్ అగ్గెచి కంట అమ్ ఇండితిన్తె అన్నె డిస్తయ్. ఈంజ ఉజిడి ఈంజ గవురుమ్ దేముడుచి సుద్ది తిలి ఆత్మయి జలొ ప్రబు తెంతయ్ జెతయ్. జొయ్యి జా కామ్ జర్గు కెర్తయ్.

4

సుబుమ్ కబుర్ కామ్ నిదానుమ్ తెన్ కెర

1 జలె, దేముడుచి దయక చి సేవ అమ్క జో సొంత తియార్ అస్సెచి రిసా, అమ్చి నిదానుమ్ దయిరిమ్ పిట్టె నాయ్.

2 కిచ్చొ పాపుమ్ తెన్ మాయ తెన్ బోదన కెరుక నెసిలమ్, నెనుమ్. కిచ్చొ మోసిమ్ కెరుమ్ నాయ్, ప్రబుచి సుబుమ్

* 3:6 3:6 రోమియల్ 7:5, 8-11, నిర్గమకాండుమ్ 24:12, 31:18. † 3:6 3:6 రోమియల్ 6:6.

కబుర్తె కిచ్చొ వేరచి బెదవుమ్ నాయ్, గని సొమ్ముమ్ సత్తిమ్ సంగితనుమ్. దస్సికయ్ కో సూనై కి 'సత్తిమ్' మెన అమ్చి రిసా ఒప్పునుక జయెదె. 'సత్తిమ్' మెన దేముడు కి ఒప్పునెదె.

3 అమ్ బోదన కెర్తిస్ సుబుమ్ కబుర్చి అర్దుమ్ ఇదిల్ లుంకిల్ రితి జలె, కక్కయ్ లుంక తయెదె మెలె, నాసెనుమ్ జతసకయ్.

4 జోవయింకయ్, జలె, జేవ్ నంప నే జతసకయ్, ఈంజ లోకుమ్క ఏలుప కెర్తొ నయ్తాన్; నాసెనుమ్ జతస జోక 'దేముడు' మెనుల; జొయ్యి జోవయించి మెన్సుక గుడ్డి కెర అస్సె. కిచ్చొక మెలె, 'దేముడుచి పొలిక పూర్తి తిలో క్రీస్తుచి గవురుమ్ దెకయ్తి సుబుమ్ కబుర్చి ఉజిడ్ జతి సత్తిమ్ దెకుత్ నాయ్' మెనయ్ జేవ్ మాన్సుల్క జో నయ్తాన్ జోవయించి మెన్సుక గుడ్డి కెర అస్సె.

5 అమ్ బోదన కెర్తసి, జలె, అమ్చి రిసాచి నెంజె, గని యేసుక్రీస్తుక 'ఎత్తిక ఏలుప కెర్పు' మెన దేముడు అబ్బొసి జోక ప్రబు కెరయ్ అస్సె మెనయ్ అమ్ బోదన కెర్తసుమ్. జో యేసుచి సేవ చి ప్రేమచి రిసా తుమ్చ *సేవ కెర్తన రిత జా అస్సుమ్.

6 కిచ్చొక మెలె,

†“అందర్ తెంతో ఉజిడ్ జవున్”

మెన సంగిలో దేముడు అమ్చి పెట్టి జోచి ఉజిడి దా అస్సె. కిచ్చొక మెలె, క్రీస్తుచి మొక్కా డిస్తి ఆవ్ దేముడుచి గ్యానుమ్ ఉజిడి మాన్సుల్ దెక చిన అంక జాన్తు అంచి ఉజిడితె జెతు మెనయ్, జో దేముడు ఈంజ సేవతె అమ్క బెదవ అస్సె.

ప్రబుచ కామ్ జోచి అత్తి జో జోచి సెక్తి తెన్ కెర్తయ్

7 దేముడు జోచి ఈంజ ఉజిడ్ సొమ్పూరుమ్ రితయ్ గేడివొతె బెరవ అస్సె. కిచ్చొక మెలె, అమ్ గేడివొక సెక్తి నాయ్, ఏలువ నాయ్ చి రిసా అమ్ సెక్తి నెంజిలసచి అత్తి జో జోచి కామ్ కెర్లె, 'దేముడుచియి, మాన్సుచి నెంజె' మెన జా సెక్తిక మాన్సు చినుక జయెదె.

8 రగరగాల్చ బాదల్ అమ్క పెలిలెకి, పెల్లి జా బీడ గెచ్చుమ్ నాయ్; జోచి సెక్తిచి రిసా, సగుమ్ బాదల్ కిచ్చొక సేడ్తసుమ్ గే అమ్ అద్దుమ్ కెరనుక నెత్తిర్లె కి, జో దిలి కామ్చి రిసా ఆస నెంజిలస జము నాయ్.

9 విరోదుమ్ సుదల్చి అత్తి అమ్ అల్లర్ జలెకి ప్రబు అమ్క ములె నాయ్. అమ్చ విరోదుమ్ సుదల్ అమ్క బూసిల్ రితి కెర్లె కి, మొరుమ్ నాయ్.

10 యేసు కీసి మొర్తి రితి జతె తా బాదల్ సేడ్తె తిలన్ గే, అమ్ కి ఈంజ జివితముమ్క మొర్తె తతి రితి అస్సుమ్. గని అమ్ మొర్తి రితి జా సెక్తి నెంజిలిన్తెయి యేసుచి సెక్తి

డిస్తయ్. యేసు అన్నె జివ్ జా పరలోకుమ్తె ఏలుప కెర్తి సెక్తి, అమ్ సెక్తి నెంజిలస రచ్చున జతిన్తె డిస్తయ్.

11 కిచ్చొక మెలె, యేసుచి జివ్ అమ్చి మొర్తి ఆగ్తె డిసున్ మెనయ్, అమ్చి ఈంజ జివితముమ్తె యేసుక్రీస్తుచి నావ్చి రిసా అమ్ మొర్తుక దెర్పు సేడ్తసుమ్.

12 జలె, అమ్ మొర్తసుమ్, తూమ్ జితసు!

13 గని

‡“నంప జలయ్ చి సంగిలయ్”

మెన పూర్గుమ్ సంగిలో రితి అమ్ కి నంపజా అస్సుమ్చి రిసా అమ్ కి అమ్చి నముక్కుమ్ తిలిసి సంగితనుమ్.

14 ఇసి దయిరిమ్ తెన్ అమ్ నంపజలిసి కిచ్చొక సంగితె తత్తసుమ్ మెలె, ప్రబు జలె యేసుక అన్నె జియడ ఉట్టయ్లోసా జోవయించి నావ్ తెన్ అమ్కయ్ కి అన్నె జియడ ఉట్టవ, తుమ్క అమ్క జోతె కడ నెయెదె మెన జానుమ్.

15 కిచ్చొ కిచ్చొ బాదల్ కిచ్చొక ఓర్పుప జతసుమ్ మెలె, తుమ్చి రిసాయి. మెలె, ప్రబుచి రచ్చున అన్నె ఒగ్గర్జిన్క పావెలె, ప్రబుచి దయచి రిసా అన్నె ఒగ్గర్జిన్ జోక జోచి సర్ల తెన్ జోబర సంగ జోక గవురుమ్ కెరుల.

16 జాకయ్ అమ్చి దయిరిమ్ పిట్టె నాయ్. అమ్చి ఈంజ లోకుమ్చి ఆగ్ పాడ్ జతె తిలె కి కువితె తిలె కి, రోజుక అమ్చి ఆత్మ అన్నె నొవర్ జెర్తిల్ రితి జా సెక్తి జతయ్.

17 ఈంజ మదెనె చి ఇదిలిదిల్ అల్లర్ కిచ్చొ కామ్క జెతయ్ మెలె, పరలోకుమ్తెచి నే కేడ్తి ఒగ్గర్ ఉజిడ్తె గవురుమ్తె అమ్ బెదితి రిసా అమ్క దొర్పు జయెదె.

18 అప్పె డిస్తిన్చి ఉప్పిరి నముక్కుమ్ తిము నాయ్; పరలోకుమ్తెచి నే డిస్తిన్కయ్ నంప కెర్తసుమ్. కిచ్చొక మెలె, డిస్తిన్ పాడ్ జతిసి, నే డిస్తిన్ పరలోకుమ్తెచి జలె, తాఁ గెచ్చెదె.

5

పరలోకుమ్తె అమ్ తతిసి

1 అన్నె కిచ్చొ జానుమ్ మెలె, ఈంజ లోకుమ్తె అమ్ జతి కుడియ జతి అమ్చి ఆగ్ పాడ్ జలెకి, పరలోకుమ్తె అమ్క కెయ్క తెయ్క తాఁ గెతి గేర్ అమ్చొ దేముడు అమ్క దా అస్సె. కేన్ మాన్సు తెయార్ కెర్తిసి నెంజె, దేముడు తెయార్ కెర్తిసి, జా.

2 నిజామి, ఈంజ లోకుమ్తె తిలె పొది దుక్కుమ్ జతసుమ్, చి పరలోకుమ్చి అమ్చి గేర్ నజనుక ఆస జతసుమ్.

3 జా గేర్ మెలిసి నజున్లె, పాలుమ్ గలన్లి రితి జయెదె, చి అమ్ డుమ్డి తయె నాయ్.

4 ఈంజ అప్పెచి కుడియతె అమ్ తతి పొది, అమ్చ బాదల్ చి రిసా దుక్కుమ్ తెన్ అస్సుమ్. ఈంజ కుడియ, ఈంజయ్ పాలుమ్, గెన్ను మేనుమ్ నాయ్, గని అన్నె

* 4:5 4:5 నెంజెలె, 'గొతిమాన్సుల్, గొత్తి మాన్సుల్'. † 4:6 4:6 ఆదికాండుమ్ 1:3. ‡ 4:13 4:13 కీర్తనలు 116:10.

చెంగిల్ గేర్ చెంగిల్ పాలుమ్ గలన్తి రిసా, పరలోకుమ్చి జా గేర్ జయి పాలుమ్ గలన్తమ్ మెలె, అమ్చి ఈంజ లోకుమ్చి మొర్కుక పరలోకుమ్చి నే కేడ్డి జివు తతిసి జిన గచ్చెదె.

5 పరలోకుమ్తె జితి రిసా అమ్క తెయార్ కెర్లొసా దేముడుయి, చి 'జర్గు జయెదె' మెన అమ్క కిచ్చొ గుర్తు జో దా అస్సె మెలె, దేముడుచి సుద్ది తిలి ఆత్మ అమ్చి పెట్టి జో దా అస్సె.

6 జాకయ్, కిచ్చొ జలెకి అమ్క దయిరిమ్. ఈంజయ్ ఆగ్తె, ఈంజయ్ లోకుమ్తె అమ్ జితి పొది, ప్రబుక దూరి అస్సుమ్ మెన జానుమ్.

7 పరలోకుమ్తెచి ప్రబు అమ్క దిలి అప్పె దస్సె డీసె నాయ్, గని జాక 'అస్సె' మెలి నముకుమ్ తెన్ని ఇండ్డితసుమ్.

8 'అమ్ పరలోకుమ్తె గెచ్చుమ్దే' మెన దయిరిమ్ తెన్ అస్సుమ్, చి 'ఈంజ ఆగుక ముల ప్రబుతె గెచ్చె జిలె చెంగిలి' మెన జానుమ్.

ప్రబుచి ఇస్టుమ్ రితి కెర్తి ప్రేమ

9 జలె, ఇన్నె ఈంజ అగి అమ్ జింక తిలె కి, ఒత్త పరలోకుమ్తె గెచ్చుక తిలె కి, అమ్చి ఆస కిచ్చొ మెలె, ప్రబుక సర్ల కెర జోచి ఇస్టుమ్ రితి కెరుకయ్.

10 ఈంజ లోకుమ్తె ఈంజ అగి తిలె పొది అమ్చితె కో సత్తిమ్తె ఇండిల గే పాపుమ్తె ఇండిల గే, క్రీస్తుచి అత్తి అమ్ తీర్పు జంక, అమ్ జోచి మొక్కె టీవో జతి జా దీసిక జలె, ఈంజ జివితుమ్తె కో సత్తిమ్ ఇండ తవుల గే, జోక బవుమానుమ్, కో పాపుమ్తె ఇండ తవుల గే, జోవయింకయ్ సిచ్చ ప్రబు దెయెదె.

11 ప్రబు లోకుమ్చక పరిచ్చ కెర తీర్పు కెరెదె మెన జానయ్, జా బయిమ్ తెన్ మాన్సుల్క సికడ్డునుమ్. అమ్చి సత్తిమ్ జో దేముడు జానె, చి తుమ్చి పెట్టి తూమ్ కి చినితసు, కిచ్చొగె. తుమ్క 'చినుత్' మెనయ్ అమ్చి ఆస.

12 తుమ్తె అమ్క గవురుమ్ దొర్కు జెయెదె మెన తుమ్ ఉచర నాయ్. గని, మాన్సుచి పెట్టి తిలిసి నే చినితె మాన్సు ముక్కిమ్చొ రితో డీసిలెకయ్ గవురుమ్ కెర్తస సగుమ్జిన్ అమ్చి రిసా తుమ్క అన్మానుమ్ సికడ్డుతి. తుమ్క 'జేవ్ అన్మానుమ్ సికడ్డుక కిసి జబాబ్ దెంక గే జాన్తు' మెనయ్ అమ్ ఇసి సొంతచి రిసాచి సాచి రెగిడ్డునుమ్. అమ్చి సత్తిమ్ జాన్లె, తుమ్ జబాబ్ దెంక జాన్తె, జాకయ్ తుమ్క సంగితసుమ్. గవురుమ్ ఆసనుక ఉచర కిచ్చొయ్ కెరుమ్ నాయ్.

13 జలె, అమ్క 'వెర్తి జల' మెన తుమ్ తీర్పు ఉచర్లె జలె, 'అమ్ వెర్తి రితి డీస్టన్తె దేముడుక లాబుమ్ తిలె దస్సి డీసుమ' మెంతసుమ్. జోచి కామ్ కెర్తి ఆసకయ్ ఇసి జతసుమ్. నాయ్ మెలె, 'బుద్ధికయ్ దస్సి సంగితతి' మెన

అమ్చి రిసా తుమ్ ఒప్పున్లె, చెంగిలి. తుమ్కయ్ 'చెంగిల్ జతు' మెనయ్ ఇసి జతసుమ్.

14 క్రీస్తు ప్రేమచి రిసా అమ్ తుక్లె తంక నెత్తుమ్. అమ్క జోచి ప్రేమ వెలయ్తయ్. క్రీస్తు ఎక్కిలో అమ్ ఎత్కిజిన్చి పాపుమ్ గెచ్చయ్తి రిసా మొర్లన్ మెన అమ్ దెకితసుమ్. జో మొర్లిన్ తెన్ అమ్ ఎత్కిజిన్ మొర్లె రిత జా జోక సంపజలి తెంతో సొంత ఇస్టుమ్ జర్గు కెర్తి రితి ఇండుమ్ నాయ్.

15 కిచ్చొక మొర్లన్ మెలె, అమ్ జతస ఎత్కిజిన్క 'సొంత ఇస్టుమ్ అయ్లి రితి నాయ్, గని జోచి రిసా మొర అన్నె జితొసాక గవురుమ్ కెర్తి రితి జతు' మెనయ్ జో మొర్లన్.

క్రీస్తుచి తెడి నొవ మాన్సుల్

16 అప్పె తెంతో మాములుమ్ జోచి ఈంజ లోకుమ్చి జెర్కున్క కక్కయ్ దెకుమ్ నాయ్. అగ్గెయ్ క్రీస్తుచి మాములుమ్ ఈంజయ్ లోకుమ్చి జెర్కున్కయి కిసి తిలొ గే, దస్సి జోక దెకిత్ తిలమ్, గని అప్పయి జోక దస్సి దెకుమ్ నాయ్. జో దేముడు జలిన్ రుజ్జు జలిన్కయ్ జోక దెకితసుమ్.

17 గని, కో క్రీస్తుచి తెడి తవుల గే, జోచి అగ్గెచి జెర్కున్క మొర్లి రితి జా తా జోచి అత్తుతె జెర్కున్ జా నొవర్ రగుమ్ జా అస్సి. నొవర్ జెర్కున్ జలి రితి జా అస్సి. అగ్గెచి గెచ్చె, నొవిచి బార్ జా అస్సి, చి నొవిచికయ్ దెకితసుమ్.

18 మాన్సు నొవర్ జతి ఈంజ వరుమ్ కేనె తెంతో జెతయ్ మెలె, దేముడు తెంతో. జో క్రీస్తుచి నావ్ తెన్ అమ్చి పాపుమ్ వుంచ కెర అమ్క జోక అడ్డు తిలి పాపుమ్ గెచ్చవ గెల కెర అమ్క అన్నె బెదవన్లన్, చి 'వేర మాన్సుల్ కి అమ్చొ క్రీస్తుక సంపజలె జోవయింక కి దస్సి అన్నె బెదవనిందె' మెనయ్ జోచి సుబుమ్ కబుర్ నూనయ్తి సెవ జో దేముడు అమ్క తియార అస్సి.

19 మెలె, క్రీస్తు బలి జలిన్ తెన్ జోవయించి పాపుమ్ వుంచ నే వయడ్లె, దేముడు లోకుమ్చక బెదవంతె అస్సి, చి జో బెదవంతిన్చి కబుర్ నూనయ్తిసి అమ్చి అత్తి జో సార్పు కెర దా అస్సి.

20 జాకయ్, క్రీస్తుచ బారికుల్ జా అస్సుమ్. 'క్రీస్తుక సంపజతు' మెనయ్ దేముడు అబ్బొసి అమ్చి అత్తి మాన్సుల్క బుకార్తయ్. జాకయ్, 'దేముడు తెన్ బెదితి వరుమ్ తుమ్ నజనా' మెనయ్, క్రీస్తుచి నావ్ తెన్ తుమ్క అమ్ బతిమాల్పా జా సంగితసుమ్.

21 అమ్క 'అంచి పున్నిమ్ జతు' మెనయ్ పాపుమ్ నెంజిలొ పాపుమ్ నేన్లొ జోచొ పుత్తుసి అమ్చి పాపుమ్ రితి దేముడు అబ్బొసి జోక టీవడ్లె.

6

రచ్చన నజన్తి సమయుమ్ నిజుమి జా అస్సె

1 జలె, “దేముడుచి రచ్చన నజనా” మెన సంగితసుమ్, గని జోచి నావ్ తెన్ అన్నె కిచ్చొ మెంతసుమ్ మెలె, జోచి దయ ఆరి నజన తా నాయ్.

2 కిచ్చొక మెలె,

*“చెంగిల్ సమయుమ్క తుమ్చ ప్రార్థన సూన అస్సి, చి ఆవ్ రచ్చన కెర్తి కాలుమ్క తుమ్క తోడు జా అస్సి” మెన పూర్ణుమ్ తెంతో దేముడుచి కొడతె రెగ్గవ అస్సి. అల్లె! ‘చెంగిల్’ మెలి జా సమయుమ్ అప్పెయి. రచ్చన జతి జా కాలుమ్ అప్పెయి.

సుబుమ్ కబుర్ రిసా పవులు అల్లర్ జలిసి

3 అమ్ ప్రబుచి సేవ కెర్తిన్ తె కేన్ నింద నే జెతె, కో కిచ్చొ సంగుక నెత్తి రితి, కచి నముకుమ్ పిట్టయ్తి కిచ్చొయ్ అడ్డు కెరుమ్ నాయ్.

4 ప్రబుచి సేవ పూర్తి నిదానుమ్ కెర్తసుమ్ మెన సాచి సంగనతసుమ్. ఇన్నెచి రుజ్జు కిచ్చొ మెలె, కిచ్చొ కిచ్చొ ఒగ్గర్ అల్లర్ ఒర్పువ జా నిదానుమ్ తెన్ అస్సుమ్. కిచ్చొ అల్లర్ మెలె, బాదల్, సైమల్, కస్టల్, ఇర్కులు,

5 కొర్తల్చ దెబ్బలు, జేలి జలిసి, జట్టు తెన్ నిగ జా మాన్పుల్ అమ్క అల్లర్ కెర్తిసి, ఒగ్గర్ కామ్ కెర టక్కిలిన్, గూన్ నెంజిలిసి అందర్లు, చువ్వె తిలిసి; దనచ ఎత్తి నిదానుమ్ తెన్ ఒర్పువ జా అస్సుమ్.

6 పడ్డొ జోచి సేవచి అమ్చి నిదానుమ్ అమ్ ఇండిలి బుద్దితె కి డిస్తయ్. వేర బుద్దుల్ అమ్ నే జలిన్తె, ప్రబుచి ఎత్తి అమ్ జాన్తిన్తె, మాన్పుల్చ తప్పుల్ అమ్ ఒర్పువ జతిన్తె, మాన్పుల్చ అమ్ మరియాద దెకితిన్తె, దేముడుచి సుద్ది తిలి ఆత్మ అమ్చి పెట్టి తిలిన్తె, మాయ నెంజిలి అమ్చి ప్రేమతె.

7 సత్తిమ్చి బోదన అమ్ కెర్తిన్తె, దేముడుచి సెక్తి అమ్చ కమెతె డిస్తిన్తె, ఈంజ ఎత్తితె అమ్చి నిదానుమ్ డిస్తయ్. డెబ్బి పక్క కి, ఉజెతో పక్క కి, కామ్క జెత పున్నిమ్చి అయ్దల్ వాడిక కెరన నిదానుమ్ తత్తసుమ్.

8 జాకయ్, గవురుమ్ జలెకి, నిస్కారుమ్ జలెకి, మాన్పుల్ అమ్క ‘చెంగిల్చ’ మెలె కి, ‘గార్పు’ మెలె కి, నిదానుమ్ తత్తసుమ్. సగుమ్జిన్ అమ్క ‘మాయచ’ మెంతతి, గని సత్తిమ్ కెర్తసుమ్.

9 సగుమ్జిన్ అమ్క విలువ దెకిత్ నాయ్, గని సగుమ్జిన్ విలువ దెకిత్తి. ‘బే బేగి మొరుల’ మెన అమ్క సగుమ్జిన్ ఉచర్తతి, గని జితసుమ్. దెబ్బల్ కతసుమ్ గని మొరుమ్ నాయ్.

10 అమ్చ బాదల్క దుకుమ్ జంక జతయ్, గని సర్లసంతోసుమ్ తెన్ అస్సుమ్. ఈంజ లోకుమ్చి ఆస్తిక ఉచర్లె బీద అస్సుమ్, గని ఒగ్గర్జిన్క సామ్సారుమ్

కెర్తసుమ్. అమ్క కిచ్చొ నెంజిలె కి, ఎత్తి కలుగు జలి రితి జా అస్సుమ్.

అమ్క కి తుమ్ ఎదిలి ప్రేమ కెర

11 ఓ తుమ్ కొరిందిలు, కిచ్చొ నే లుంకడ్డె ఈంజ ఎత్తి తుమ్క ఎదార్దుమ్ సొస్టుమ్ సంగ అస్సుమ్. అమ్చి పెట్టితె తుమ్క ఒగ్గర్ ప్రేమయ్ అస్సుమ్.

12 అమ్చి రిసాచి తుమ్చి ప్రేమక ఆమి కిచ్చొ ఇర్కు కెరుమ్ నాయ్. తుమ్చి సొంత పెట్టి తుమి ఇర్కు కెరంతసు.

13 అంచ బోదల్ జల రిత ఓ తుమ్ కొరిందిల్, తుమ్క ఆవ్ కిచ్చొ మెంతసి మెలె, ఆమ్ తుమ్కయ్ కిసి ప్రేమ అస్సుమ్ గే, తూమ్ కి దస్సి అమ్కయ్ ప్రేమ కెర మెన ఆవ్ బతిమాల్ప జా సంగితసి.

14 ప్రబుక నంప నెంజిలస తెన్ తుమ్ లంకె జా నాయ్. పాపుమ్తె పున్నిమ్ తిలిసి కిసి బెదెదె?! నెంజిలె, అందర్బుద్ది తెన్ ఉజిడ్ బుద్ది కిసి బెదెదె? బెదె నాయ్!

15 ‘బెలియాల్’ మెలో సయ్తాన్ తెన్ క్రిస్తు కిసి బెదెదె? బెదె నాయ్! నంపనెంజిలోసా తెన్ నంపజలోసాక కిసి వాట తియిదె? తయె నాయ్!

16 దేముడుచి గుడి, జలె, బొమ్మల్క జొకర్తిన్ తెన్ కిసి బెదెదె? నెంజె! కిచ్చొక ఆవ్ ఇసి సంగితసి మెలె, జివ్ తిలో దేముడుచి గుడి ఆము. పూర్ణుమ్ దేముడుచి కొడతె రెగ్గయ్లి రితి,

†“జోచి పెట్టి ఆవ్ జియిందె,

జోచి తెన్ ఆవ్ బులిందె,

ఆవ్ జోవయించో దేముడు జియిందె.

జెవ్వి అంచ వైజల్ జవుల”

మెన అన్నె,

17 ‡“జాకయ్ ‘అంక నంప నెంజిలస తెంతో తుమ్ బార్ జా’

మెన ‘సుద్ది నెంజిలిసి తుమ్ చడ నాయ్.

దస్సి ఎక్కి నిదానుమ్ జలదు మెలె,

తుమ్క బెదవనిందె’ మెన ప్రబు సంగితయ్”

మెన అన్నె,

18 §“అంచ బోదల్ మెనయ్ తుమ్కయ్ అబ్బొది జియిందె,

చి అంక ‘అబ్బొ మెనయ్ అంచ పుత్తర్లు దువొ జస్తె’

మెన ఎత్తి సెక్తి అదికారుమ్ తిలో ప్రబు సంగితయ్.”

మెన రెగ్గ అస్సి.

7

సుద్ది జతిన్

1 జాకయ్, ప్రేమ తిల బావుడ్డు, దేముడు అమ్క ఈంజేవ్ ప్రమానల్ సంగ అస్సిచి రిసా, అమ్చి ఆగ్గేక, అమ్చి ఆత్మక కిచ్చొ గార్ కెరెదె గె, జా గెచ్చవన గెల కెరయ్,

* 6:2 6:2 యెసయా 49:8. † 6:16 6:16 లేవీయకాండుమ్ 26:12, యిర్మీయా 32:38, యెహెజ్కేలు 37:27. ‡ 6:17 6:17 యెసయా 52:11, యెహెజ్కేలు 20:34, 41. § 6:18 6:18 సమూయేలు దొన్నిచి పుస్తకమ్ 7:14, 7:8.

దేముడు ప్రబుక బియఁ కెర, అమ్ సుద్ది జంక *దెర్లిసి పూర్తి జతి రితి జోచి సుద్ది ఆననుమ.

2 అమ్క తుమ్చి పెట్టితె బెదవన. అమ్ కక్క తప్పు కెరుమ్ నాయ్, కక్కయ్ పాడ్ కెరుమ్ నాయ్, కక్కయ్ మోసిమ్ కెర లాబుమ్ కెరనుమ్ నాయ్.

3 తుమ్క నింద కెర్తి రిసా ఇసి సంగి నాయ్, అగ్గె కిచ్చొ మెన రెగిడ్లయ్ మెలె, 'అమ్చ జీవుతె తుమ్చి రిసా ప్రేమయ్ అస్సుమ్' బెద మొరుమ్దె, బెద జిమ్దె.

4 తుమ్చి రిసా అంక నముకుమ్ ఒగ్గర్ అస్సె, తుమ్ అంచి అత్తి సూన నంపజలదు చి రిసా ఆవ్ గవురుమ్ సంగితసి, తుమ్చి రిసా అంచి పెట్టి పూర్తి దయిరిమ్ అస్సె. అమ్చ బాదల్ ఒగ్గర్ జలెకి, అంచి పెట్టి సంతోసుమ్ బెరయ్ అస్సె.

5 †మాసిదోనియ ప్రదేసిమి అమ్ ఉట్ట అయ్లి పొది అమ్చి ఆగ్గెక సుక్కుమ్ నాయ్, గని ఎత్తి రగల్ బాదల్ సేడ్డెయ్ తిలమ్; విరోదుమ్ సుదల్ కెర్ల అల్లరచి రిసా కి, అమ్చి పెట్టిచి బయిమ్చి రిసా కి,

6 గని ముసుర్ను జలసక డిట్టుమ్ దయిరిమ్ కెర్తొ దేముడు, జలె, తీతుక అమ్తె తెద్రవ అమ్క దయిరిమ్ కెర్తొ.

7 ఎక్కి తీతు అయ్లిసి తెన్ దయిరిమ్ జము నాయ్, గని తుమ్చి నిదానుమ్ దెక జోయ్యి దయిరిమ్ జలిన్క అమ్కయ్ కి జో దయిరిమ్ కెర్తొ. మెలె, అంక అన్నె దస్సుల్ జంక చి తుమ్చి ఆస, అంక తుమ్ దుకుమ్ కెర తిలిన్చి రిసాచి తుమ్చి దుకుమ్, అంచి రిసాచి తుమ్చి ప్రేమ నిదానుమ్చి రిసా అమ్క సంగిలన్, చి అన్నె ఒగ్గర్ సర్ల జలయ్.

8 అంచి ఉత్తమ్తె ఆవ్ రెగిడ్లిన్ తెన్ తుమ్క ఆవ్ దుకుమ్ కెర్లె కి, ఆవ్ ఉచరక నాయ్. విసారుమ్ జా తిలయ్, గని తప్పు కెరి నాయ్ మెన జాని. జా ఉత్తమ్ తుమ్క దుకుమ్ కెర్లె, గని గడియకయ్ మెన ఆవ్ దెకితసి.

9 జలె, అంక సర్ల. తుమ్క దుకుమ్ కెర్లి రిసా నాయ్, గని తుమ్ దుకుమ్ జా తప్పు ఒప్పున చెంగిల్ జలదు చి రిసాయి. మెలె, తుమ్చి దుకుమ్ ప్రబుచి సత్తిమ్ తుమ్క ఉచరవడ్లిన్చి రిసాయి తుమ్క అమ్ కెర్లిసి కిచ్చొ సంతోసుమ్ కెరె నాయ్.

10 కిచ్చొక మెలె, ప్రబు ఉచర్తిసి దుకుమ్ అమ్ మాన్సుల్చి పెట్టి అయ్లె, అమ్ కెర్లె పాపల్ ఒప్పున బుద్ది జంక ఇస్టుమ్ జిమ్దె, చి ప్రబుచి రచ్చున నజనుమ్దె. జా రచ్చునచి రిసా 'చెంగిల్ జలమ్' మెనయ్, అన్నె దుకుమ్ తయె నాయ్. గని ఈంజయ్ లోకుమ్చి బుద్దిచి దుకుమ్ అమ్ పెట్టి తియనె, అమ్క మొర్ను జెయెదె.

* 7:1 7:1 కొరింథిల్ రెగిడ్లి దొన్ని నంబర్ ఉత్తమ్ 3:18, దెస్సులొనికుల్ రెగిడ్లి ఏక్ నంబర్ ఉత్తమ్ 5:23. † 7:5 7:5 జేవ్ కొరింథిల్ తిలి అకయ ప్రదేసిమ్క మాసిదోనియ ప్రదేసిమ్ ఉత్తర పక్క అస్సె. * 8:2 8:2 రోమియల్ 15:25-27.

11 ఈందె, దేముడు తెద్రయ్లి దుకుమ్ తుమ్చి పెట్టి కెర్లి నిదానుమ్ ఉట్టవ అస్సె! నిజమ్, తుమ్చి సత్తిమ్ దెకయ్తి ఆస ఉట్టవ అస్సె! జా తప్పుచి రిసా లాజ్ జా తుమ్చి ఉప్పిరి తుమ్ కిప్పుమ్ జలదు, దేముడుచి తీర్పుక బిలదు, అమ్చి తెన్ అన్నె బెదుక ఆస జలదు, సత్తిమ్ జంక ఆస జలదు. జా తప్పుచి రిసా సరిగా తీర్పు కెర్లదు. జా ఎత్తితెయి తుమ్ అప్పె సత్తిమ్ జలిసి డిస్తయ్.

12 జాకయ్, ఆవ్ తుమ్క రెగిడ్లిసి దుకుమ్చి తిలె కి, ఒత్త కిచ్చొ లాబుమ్ మెలె, ముక్కిమ్క తప్పు కెర్లొసాక ఉచరి నాయ్, ముక్కిమ్క అల్లర్ సేడ్డెసాక ఉచరి నాయ్, గని జా ఉత్తమ్చి రిసా ముక్కిమ్క కిచ్చొచి రిసా ఉచర్తిసి మెలె, అమ్చి రిసాచి తుమ్చి ఒగ్గర్ ఆస, ప్రబుచి మొక్కె తుమ్ అప్పె చినన అస్సున్.

13 తుమ్ చెంగిల్ జలిన్చి రిసా అమ్క సర్ల, అమ్క అన్నె డిట్టుమ్ దయిరిమ్ కెర్లి. అమ్ సొంత సర్ల జలిన్చి కంట కిచ్చొక అన్నెయ్ సంతోసుమ్ జా అస్సుమ్ మెలె, తీతు తుమ్తె జా దెకిలి తెంతో, తుమ్చి రిసాచి జోచి అగ్గెచి అన్మానుమ్ నాయ్, చి సర్లసంతోసుమ్ జో జా అస్సె.

14 తుమ్చి రిసా అంచి సర్ల, ఆవ్ గవురుమ్ ఉచరంతిసి, జోక అగ్గె తెంతో సంగితె తిలయ్, చి జో తుమ్తె గెలి పొది జోచి మొక్కె కిచ్చొ తప్పుల్ కెర అంక లాజ్ కెరయ్సు నాయ్, అంచి మరియాద కడ్సు నాయ్. అమ్ తుమ్కయ్ సంగిలిసి ఎత్తిచి సత్తిమ్ కిసి రుజ్జు జలి గే, దస్సి తుమ్చి రిసా ఆమ్ తీతుక సంగిలిసి నిజమ్ జలి.

15 అప్పె జో తుమ్క అగ్గెచి కంట ఒగ్గర్ ప్రేమ ఉచర్తయ్. ప్రబుచి ఇస్టుమ్ తుమ్ ఎత్తిజిన్ కెర్లిన్చి రిసా కి, తుమ్ ఎత్తిజిన్ బియఁ అద్దుర్ తెన్ జోక బెదవన్లిన్చి రిసా కి జో ఉచార కెర్తయ్.

16 జలె, తుమ్చి రిసా ఆవ్ పూర్తి దయిరిమ్ జా అస్సిచి రిసా అంక ఒగ్గర్ సర్లసంతోసుమ్.

8

యెరూసలేమ్చి సంగుమ్చ తోడు దెతిన్చి రిసా

1 అప్పె, బావుడ్లు, తుమ్క కిచ్చొ సంగితనుమ్ మెలె, మాసిదోనియ ప్రదేసిమ్చ ప్రబుచ సంగుమ్లుచ మాన్సుల్చి పెట్టి దేముడు ప్రేమ సికడ్లిసి రుజ్జు జా అస్సె.

2 కిసి మెలె, జోవయించి నిదానుమ్ పరిచ్చు జలి రితి జా జేవ్ ఒగ్గర్ కస్టల్ సేడ్డె తిలె కి, జేవ్ ఒగ్గర్ బీద జలెకి, ప్రబుచి, జోవయించి ఎదివాట్ సర్లచి రిసా ఒగ్గర్ దర్ముమ్ తెన్ అన్నె జేవ్క *తోడు దా అస్సి.

3 జేవ్చి రిసా ఆవ్ కిచ్చొ సాచి సంగితసి మెలె, జోవయించి సెక్తి తిలి ఎదిలి, నాయ్, గని జోవయించి సొంత ఇస్టుమ్క తెర్లి ఎదిలి కంటయ్ అన్నె జేవ్ ఒగ్గర్ దా అస్తి.

4 † యెరూసలేమ్ చ నంపజలసక తోడ్ దెతిన్తె ఆమ్ కి బెదుమ్దె' మెనయ్ అమ్క బలవంతుమ్ కెర్ల.

5 'ఇసి దస్సి కెరుల' మెన మాములుమ్ అమ్ ఉచర్లి రితి నాయ్, గని 'అమ్చి అత్తి ప్రబు జోవయించి ఇస్టుమ్ పూర్తి కెర్లు' మెన, తొలితొ ప్రబుచి అత్తి జోవయించి జీవ్ సార్లు కెర, పడ్డె జోవయించి తెడి అమ్చి అత్తి దిల.

6 జాకయ్ తుమ్ కొరిందిల్చి రిసా కి అమ్ ఉచర్లమ్, చి బీద సుదల్క దెతి దర్ముమ్ †తుమ్ ఉక్కిల్తినీ, తీతు మొదొల్ కెర్లిక 'పూర్తి జర్లు జవున్' మెన, తీతుక బలవంతుమ్ కెర అస్సుమ్.

7 జలె, నముకుమ్క, ప్రబుచి గ్యానుమ్క, జోచి గ్యానుమ్ సొస్టుమ్ బోదన కెర్లిక, నిదానుమ్క, చి అమ్చి ఉప్పిర్చి తుమ్చి ప్రేమక, దస్సిచి ఎత్కిక తుమ్ కీసి నిదానుమ్ జా అస్సున్ గే, దస్సి ఈంజ దర్ముమ్ దెతిన్క కి దయ ఒగ్గర్ జతి రితి తుమ్ దెకన.

8 ఆవ్ ఇసి సంగితిసి ఆడ్ర దెతిసి నెంజె, గని మాసిదోనియ ప్రదేసిమ్చ జేవ్ అన్నె మాన్సుల్ తోడు దా సత్తిమ్ కెర్లిక తూమ్ దెక తుమి పరిచ్చ కెరనై, బీద సుదల్క తోడు కెర్లి తుమ్చి ఉద్దెసుమ్క 'నిజుమ్చి' మెన తుమ్ రుజ్జు దెకయ్తి అవ్కాసుమ్ తుమ్క దొర్కు జవున్ మెనయ్ ఆవ్ తుమ్క ఉచరయ్తసి.

9 ప్రబు జలొ యేసుక్రీస్తు సొంత కి జోచి దయక కిచ్చొ కెర్లన్ గే జానుమ్. మెలె, పరలోకుమ్చి సొమ్సారుమ్ జోక తిలె కి, తుమ్చి రిసా బీద కెరనై; తుమ్క సొమ్సారుమ్ కెరుక మెనయ్ జో బీద జలన్.

10 జలె, ఈంజ డబ్బుల్ ఉక్కిల్లి కామ్చి రిసా కిచ్చొ ఉచర తుమ్క ఆవ్ సంగితసి మెలె, వెర్సెక్ అగ్గె తుమ్ ఇస్టుమ్ జా మొదొల్ కెర్లిసి తుమ్ అప్పె పూర్తి జర్లు కెర్లె చెంగిలి.

11 తుమ్క జా ఇస్టుమ్ అస్సె. జలె, జా జర్లు కెర్లెకయ్ జా ఇస్టుమ్ నెరవెర్లువ జయెదె. తుమ్ తెర్లి ఎదిలికయ్ జర్లు కెర.

12 ఎక్కిలొ దెంక మెన తెయార్ మెన్సు తెన్ తిలె, జాక సెక్తిక జిన్లిన్ నెంజె గని తిలిస్తయ్ సర్ల తెన్ దిలె ఇస్టుమ్ జయెదె. నెతిర్లిసి నే కెర్లె, మాన్సుక నింద నాయ్.

13 వేర మాన్సుల్క జేవ్చి పూచి వయడ నాయ్, తుమ్కయ్ జా జాడు ఎత్కి వయతు మెని నాయ్,

14 గని, 'ఎత్కిక సమానుమ్ జతిసి తవున్' మెన జోవయింక నెంజిలిసి రిసా తుమ్చి సొమ్సారుమ్క తుమ్ అప్పె దాస. ఏక్ వేల పడ్డెక తుమ్కయ్ కొత్తు తిలె, జేవ్

తుమ్కయ్ తోడు కెరుక జయెదె, చి ఎత్కిజిన్క సమానుమ్ జతిసి తయెదె.

15 పూర్లుమ్ దేముడుచి కొడెతె రెగ్గయ్లి ఏక్ కోడుచి అర్దుమ్ తుమ్ ఉచర.

కి "ఒగ్గర్ కుడవల్లొసాక కిచ్చొ సేసె నాయ్, గని తొక్కి కుడవల్లొసాక కిచ్చొ కొత్తు తయె నాయ్" మెన రెగిడ్డి కోడు.

తీతుక కొరింద్ వట్టుమ్తె అన్నె తెద్రయ్లి

16 దేముడుక జోఒర! తుమ్చి రిసా జో తీతుచి పెట్టి కి జోవయించి ప్రేమ దా అస్సె.

17 "కొరింద్తె ఈంజ కామ్క గో" మెన అమ్ బతిమాల్పా జా సంగితికయ్, "గెచ్చిందె" మెలన్. గని ఎక్కి ఆమి సంగిల్ రిసా నాయ్, గని అన్నెయ్, తుమ్చి రిసాచి జోచి ప్రేమకయ్ జోచి సొంత ఇస్టుమ్కయ్ జెతయ్.

18 జో తెన్ అన్నె కక్క తెద్రయ్తనుమ్ మెలె, జో సుబుమ్ కబుర్ సూనయ్తనచి రిసా ఎత్కి సంగుమ్లుతె, ఎత్కిజిన్ మెన్సితో బావొక తెద్రయ్తనుమ్.

19 పడ్డె, 'ప్రబుచి గవురుమ్ దెకయ్తి అమ్చి ప్రేమ దెకయ్తి ఈంజ తోడు దెతి కామ్తె అమ్చి తెన్ బులున్' మెనయ్ సంగుమ్లుచ జోక నిసాన అస్సి. జో, జలె, తీతు తెన్ గెతయ్.

20 అమ్ డబ్బుల్ ఉక్కుల వంట దెతి ఈంజ దర్ముమ్చి సేవచి రిసా కో అమ్క నింద నే కెర్లి రితి, ఈంజ కామ్తె కిచ్చొ పొరపాట్ బెదవుమ్ నాయ్, కిచ్చొ పొరపాట్ బెదయ్లి రితి డీసుక కి నెనుమ్,

21 చి ప్రబుచి మొక్కె కి, మాన్సుచి మొక్కె కి, కిసి సత్తిమ్ కెరుక గే సరిగా ఉచర అస్సుమ్. జాకయ్, సంగుమ్లుచ నిసాన మాన్సుక కి అమ్చి తెన్ ఈంజ తోడు దెతిన్తె బెదవన అస్సుమ్.

22 అన్నె, జేవ్ దొగుల తెన్ అన్నెకొ బావొక తెద్రయ్తనుమ్. ఇన్నెక అగ్గె తెంతొ కిచ్చొ కిచ్చొ కమొ దా అస్సుమ్ చి కిచ్చొ కామ్తె కి నిదానుమ్ కెర్లయ్ మెన రుజ్జుల్ దెక అస్సుమ్. తుమ్చి రిసాచి జోవయించి ఒగ్గర్ నముకుమ్చి రిసా, వేర కమొచి కంట తుమ్తెయ్ గెచ్చుక అన్నె ఒగ్గర్ ప్రేమ ఈంజొ జా అస్సె.

23 తీతు, జలె, తుమ్చి రిసాచి అంచి సేవతె జో అంచి తెన్ ఎక్కి రితి బెద అస్సె. జేవ్ అన్నె దొగుల బావుడ్లు, జలె, సంగుమ్లుచి నావ్ తెన్ జోవయించ బారికుల్ జల రితె జా గెతతి, క్రీస్తుచి గవురుమ్ దెకయ్తతి.

24 జాకయ్, తుమ్చి ప్రేమక, చి ఈంజేవ్క ఆవ్ తుమ్చి రిసా నముకుమ్ సంగిలిన్క, 'నిజుమి జో సంగిల్ రితి జా అస్సి' మెనయ్ సంగుమ్లు రుజ్జు దెకిత్ రితి కెర.

† 8:4 8:4 యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతొచ నంపజలస తోడు తెద్రయ్లి. బారికుల్ 1:28-30. † 8:6 8:6 కొరిందిల్క రెగిడ్డి ఏక్ నంబర్ ఉత్తమ్ 16:1-4. § 8:15 8:15 నిర్లమకాండుమ్ 16:18.

9

దర్మము ఉక్కుల దెతిన్చి రిసా అన్నె సంగిలిసి

1 జలె, *యెరూసలేమ్తెవ నంపజలసక దెతి తుమ్ ఉక్కిల్లి డబ్బుల్చి రిసా అమ్ అన్నె రెగుడుక కిచ్చొక?

2 జా ఉక్కుల దెంక తుమ్ కోర్ప జలిసి ఆవ్ జాని, చి మాసిదోనియ ప్రదేసిమ్చ నంపజలసక తుమ్చి రిసా ఆవ్ సంగితిసి. కిచ్చొ సంగితసి మెలె, †“అకయ ప్రదేసిమ్చ నంపజలస పూర్ణుమ్ తెంతో జోవయించి డబ్బుల్ దెంక తెయార్ జా అస్తి” మెన ఆవ్ సంగితసి. జా దర్మము ఉక్కుల దెతి తుమ్చి సర్దచి రిసా సూన్లి రిసాయి జేవ్ మాసిదోనియచ ఒగ్గర్ జిని జా కామ్తె బెదుక కోర్ప జా అస్తి.

3 జలె, ఈంజేవ్ బావుడ్డుక కిచ్చొక తుమ్తె తెద్రయ్తసి మెలె, ‘జా డబ్బుల్ ఉక్కుల తెయార్ జా అస్తి’ మెన తుమ్చి రిసా అమ్ సర్ద సంగిలిసి అబద్దుమ్ నే జతి రితి తుమ్క ‘నిజామి తెయార్ జా తత్తు’ మెన ‘తుమ్ దెక’ మెనయ్ ఆవ్ జేవ్క తెద్రయ్తసి.

4 నెంజిలె, పడ్డో అంచి తెన్ ఈంజ మాసిదోనియచ నంపజలస సగుమ్జిన్ తుమ్తె అయ్లె, తుమ్ తెయార్ నే జా తిలె, అమ్చి మరియాద గెచ్చెదె; అమ్చి కి తుమ్చి కి. ‘సత్తిమ్ కెరుల’ మెన అమ్ దయిరిమ్క సంగిలిసి పిట్ట తయెదె చి రిసా.

5 జాకయ్, ‘అంచి కంట జేవ్ అగ్గె గెచ్చ తుమ్ సంగిలి దర్మము దెతిన్కయ్ తుమ్క తెయార్ కెర తత్తు’ మెనయ్ జేవ్క బలవంతుమ్ కెర్లయ్. దస్సి, తుమ్ అగ్గెయి జా డబ్బుల్ తెయార్ కెర తిలె, సర్ద తెన్ దెతె, ఆరి ఇస్టుమ్ నెంజిల్ రితి నాయ్.

ముస్కి బుద్దిచి రిసాచి దర్మము బుద్దిచి రిసాచి కోడు

6 ఆవ్ కిచ్చొ మెంతసి మెలె, కో ముస్కి తెన్ బి గలెదె గే, తొక్కి పలితుమ్చి పంటో లాయెదె. కో దర్మము తెన్ బి గలెదె గే, ఒగ్గర్ పంటో లాయెదె.

7 ఎత్తి మాన్సు సరిగా ఉచర, ‘దెంక చెంగిలి’ మెన కెదిలిచి రిసా ఉచరె గే, తెద్దిలి దెంకయ్. గని కో బలవంతుమ్ కెర్లి రితి దుకుమ్ తెన్ పొన, సర్ద తెన్ని. సర్ద తెన్ దెతోసాక దేముడు ప్రేమయ్ దెకెదె.

8 చెంగిల్ తిలిసి ఎత్తి దయ తుమ్క మొచ్చ తెన్ దెంక దేముడుచి అత్తి అస్సి, చి తుమ్క సరిపుచుప జతిసి కి, పడ్డో కిచ్చొ కిచ్చొ చెంగిల్ కమొక తుమ్ మొచ్చ తెన్ దెంక తెరితి రిసా కి, సరిపుచుప జతిసి తుమ్క దెంక జోచి ఇస్టుమ్.

9 దేముడుచ కొడొతె పూర్ణుమ్ రెగ్డయ్లి అస్సి.

‡“జోవయింక తిలిసి జో వంట దెతయ్, బీద సుదల్క జో దర్మము తెన్ దెతయ్,

* 9:1 9:1 క్రీస్తు యెరూసలేమ్తె మొర జీవ్ జలన్, గెద, చి తొలితొ ఒత్తయ్ మాన్సుల్, క్రీస్తుచ సిస్సుల్ తెన్, జోవయింక నంపజల. యెరూసలేమ్ పట్టుమ్చి యూదయ ప్రదేసిమ్ కారు జా తతికయ్, వేర తెంతెచ నంపజలస తోడు తెద్రయ్ల; అకయ ప్రదేసిమ్చ కి మాసిదోనియ ప్రదేసిమ్చ కి; బారికుల్ 1:28-30. † 9:2 9:2 ఆజి కాలి అకయ ప్రదేసిమ్క చి మాసిదోనియ ప్రదేసిమ్క ‘గ్రీకు ప్రదేసిమ్’ మెంతతి. ‡ 9:9 9:9 క్రీస్తునలు 112:9.

జోవయించి జా సత్తిమ్ కెయక తెయక తాఁ గెచ్చెదె.”

10 తుమ్ బి గల్లి రిసా బి దెతో ప్రబు, తుమ్ కతి రిసా అన్నిమ్ దెతో ప్రబు, సరిపుచుప జతిసి తుమ్క దెయెదె, పలితుమ్ దెయెదె, చి తూమ్ దర్మము తెన్ బెదయ్తిన్ చి సత్తిమ్చి పలితుమ్ జో ఒగ్గర్ తయెదె.

11 తుమ్ దర్మము తెన్ దెతి రిసా ఎత్తితె సామ్సూరుమ్ రితి జస్తె. అమ్చి అత్తి తుమ్ జా దిలె, అమ్ బీద సుదల్క దెమ్దె, చి దేముడుక జేవ్ జోచి సర్ద దెకవ జోక గవురుమ్ కెరుల.

12 దస్సి, ఈంజ దర్మముచి సేవ కెర్లె, బీద జల నంపజలసక కామ్క జెతిసి దొర్కు జలిసి దా తస్సె, పడ్డో అన్నె, “దేముడు దొర్కు కెరయ్లొ” మెన జోక జోకర జేవ్ ఒగ్గర్ గవురుమ్ కెరుల.

13 ఈంజ కామ్ తుమ్క ఏక్ పరిచ్చ రితి జయెదె. ఈంజ సేవ తుమ్ చెంగిల్ కెర్లె, తుమ్చి సత్తిమ్క రుజ్జు జయెదె. చి క్రీస్తుచి సుబుమ్ కబుర్ ఒప్పున జోక బియఁ తుమ్ ఈంజ సత్తిమ్ కెర్లిన్చి రిసా, దేముడుక గవురుమ్ జయెదె. పడ్డో, జేవ్ బీద జల నంపజలసక చి అన్నె బావుడ్డు ఎత్తిక తుమ్ కోడ దిలిన్చి దర్మముచి రిసా గే దేముడుక గవురుమ్ జెయెదె.

14 అన్నె, తుమ్చి పెట్టి దేముడు జోచి దయక దర్మము బుద్ది దిలి రిసా జేవ్ మాన్సుల్ తుమ్క ఒగ్గర్ ప్రేమ జా, తుమ్క దెకుక మెన ఆస తెన్, తుమ్చి రిసా కి జేవ్ ప్రార్దన కెరుల.

15 క్రీస్తుచి అత్తి దేముడు అమ్క దిలి వరుమ్ కెర్లి గే కో సంగుక నెత్తిర్. జోచి ఎదివాట్ దర్మముచి రిసా జోక జోఒర.

10

బుద్ది నే జా తిలె సిచ్చ కెరుక తయెదె

1 క్రీస్తు కిసి మెత్తన తా మాన్సుల్క కన్కారుమ్ దెకితె తిలన్ గే తుమ్ జాన్సు. జలె, ఆవ్ పవులు, క్రీస్తుచి కన్కారుమ్ దెకితి దస్సి బుద్ది తెన్ సొంత తుమ్క బతిమాల్ప జతిసి. అమ్చి రిసా సగుమ్జిన్ మాన్సుల్ సంగితిన్ కిచ్చొ మెలె, తుమ్చి మొక్కె మెత్తన అస్సి, గని ఉట్ట గెలె పడ్డో దయిరిమ్ తెన్ ఆవ్ గోల కెర్లసి, బెర్లె!

2 జలె, కిచ్చొ అప్పె బతిమాల్ప జా ఆవ్ సంగితసి మెలె, ఆవ్ తుమ్తె అన్నె అయ్లె పొదిక ఆవ్ ఇసి దయిరిమ్ తెన్ గోల కెరుక నెంజితి రితి, జేవ్ అల్లర్చ మాన్సుల్ బుద్ది జా తత్తు, నెంజిలె అప్పె కిసి డీస్తయ్ మెలె, అయ్లె కచితుమ్ జోవయింక గోల కెరుక తయెదె. అమ్క ‘మాములుమ్ ఈంజయ్ లోకుమ్చ ఆసల్ ఇండితతి’ మెన జేవ్ మాన్సుల్ అమ్క నింద కెర్తతి, గెద.

3 జలె, అమ్ ఈంజయ్ లోకుమ్తె జలె కి, ఆమ్ కెర్తి యుద్దుమ్ ఈంజయ్ లోకుమ్చి రగుమ్చి యుద్దుమ్ నెంజె. ఆత్మయుద్దుమ్ ఈంజ.

4 పాపుమ్చి ఉప్పిరి యుద్దుమ్ కెర్త అమ్చ అయ్దల్ ఈంజయ్ లోకుమ్చ నెంజెతి. అమ్చయ్ అయ్దల్ దేముడుచి సెక్తిచ అయ్దల్, చి సయ్తాన్చి సెక్తి తిలిన్ ఎత్తిచి ఉప్పిరి; కేన్ ఒగ్గర్ సెక్తిచి జలెకి; ఈంజేవ్ అయ్దల్ జీనుల.

5 దేముడు దిల ఆత్మఅయ్దల్ తెన్ని జోవయిం చి ఉప్పిరి విరోదుమ్ జత కొణొచి ఉప్పిరి జిన్తనుమ్, జోవయింక మాన్సుల్ జాన్తిన్క పిట్టయ్తి బడాయ్ తిల కొణొ ఎత్తిచి ఉప్పిరి జిన్తనుమ్, చి మాన్సుచి మెన్సు తిలి ఎత్తి ఉచరన మార్పుప జా క్రీస్తుక బితి రితి, జోవయిం చ జేవ్ ఉచరన మార్పుప కెర్తనుమ్.

6 అన్నె, దేముడుచి ఇస్టుమ్ రితి ఇండితి రితి తుమ్ కొరిందిల్ బుద్ది జలదు మెలె, అమ్ అయ్లె కో సేంసిల మాన్సుల్ బుద్ది నే జా తిలె, జోవయిం చ తప్పుల్క ప్రబుచ అయ్దల్ తెన్ సిచ్చ కెరుక బిము నాయ్.

7 తుమ్చి మొక్కె తిలిన్కయ్ తుమ్ దెకితె తత్తసు. 'క్రీస్తుచ ఆము' మెన తుమ్చితె కో ఉచరంతతి గే, జేవ్ కిసి క్రీస్తుచ జా అస్తి గే, అమ్క 'జేవ్ కి క్రీస్తుచ' మెనయ్ ఒప్పన్తు.

8 తుమ్క పాడ్ కెరుక నాయ్ గని క్రీస్తుచి తెడి డిట్టుమ్ కెరుకయ్ మెనయ్ జోవయిం చి కామ్చి రిసా ప్రబు అంక అదికారుమ్ దా అస్సి. జా అదికారుమ్చి రిసా ఆవ్ ఏక్ వేల ఇదిల్ ఒగ్గర్ సంగిలె కి, అంచి మరియాద గెచ్చుక జో సెలవ్ దెయె నాయ్.

9 ఆరి బియడ్డి రిసా ఇన ఉత్రల్ రెగ్గి నాయ్. దస్సి ఉచర నాయ్.

10 "జోవయిం చ ఉత్రల్తె డిట్టుమ్ డిస్తయ్, గట్టిజ సంగితయ్, గని ఇన్నె తిలె పొది జో బియ్ కెర జా కిచ్చొ గట్టిజ సంగె నాయ్" మెన అంచి ఉప్పిరి గోస జలన సంగితతి.

11 జలె, జేవ్ మాన్సుల్ కిచ్చొ అర్దుమ్ కెరంతు మెలె, అమ్ నెంజిలె పొది ఉత్తుమ్తె కిచ్చొ రెగుడుమ్దె గే, అయ్లె పొది కచితుమ్ జర్గు కెరుమ్దె.

12 జోవయిం చి సొంత గవురుమ్ సంగన్త జేవ్ సగుమ్జిన్క దెకిలె, 'జోవయింతెన్ సమ్మందుమ్ జలన ఆము' మెననుక నెనుమ్, జోవయింక దెక పరిచ్చ కెరనుక నెనుమ్. బెదె నాయ్. జేవ్ ఎక్కిలోక ఎక్కిలో దెక దస తిర్పుల్ కెరంతిసి వెల్లో మెనంతిసి నూటి నాయ్. దస్సి జా జా, బుద్ది నెంజిల రిత జతతి.

పావులీంసి సొంత గవురుమ్ సంగన్తి రితి జలిన్

* 10:17 10:17 యిర్మీయా 9:24. * 11:3 11:3 ఆదికాండుమ్ 3:1-7.

13 సత్తిమ్ జతి కంట అన్నె గవురుమ్ సంగనుమ్ నాయ్. గని దేముడు అమ్క వంట దిలి ఎదిలి గవురుమ్ సంగనుమ్దె; సుబుమ్ కబుర్ తెన్ తుమ్చి ఎద అమ్ పాచ్చుక మెన జో అమ్క దా అస్సి. చి జాచి రిసా సంగనుమ్దె.

14 తుమ్తెయ్ గెత్తి రితి అమ్క దిలి సేవ పావెత్తి నాయ్ జలె, అమ్ తుమ్కయ్ కిచ్చొ సంగుక బెదితి నాయ్. గని దూరి జలెకి, క్రీస్తుచి సుబుమ్ కబుర్ సూనయ్తి రిసాయి ఎత్తిచి కంట ఆమి తొలితో తుమ్తె అయ్లమ్.

15 సత్తిమ్చి కంట అన్నెయ్ గవురుమ్ సంగనుమ్ నాయ్. వేర మాన్సు సైమల్ సేడ కామ్ కెర్లిన్క 'ఆమ్ కెర్లమ్' మేనుమ్ నాయ్. గని అమ్చి ఆస కిచ్చొ మెలె, తుమ్చి నముకుమ్ వడ్డిలె, తుమ్చి ప్రాంతుమ్తె అన్నె ఒగ్గర్ గెచ్చొలె ప్రబుచి కామ్ అమ్ కెర్తి వాల్ దొర్కు జయెదె,

16 చి తుమ్చి ఒత్తల్తొచ ప్రాంతుమ్లుతె కి అమ్ సుబుమ్ కబుర్ సూనవుక జయెదె; వేర మాన్సుల్ కెర్లిన్క 'ఆమ్ కెర్లమ్' మెన నే సంగితె.

17 జలె,
* "కో కచి గవురుమ్ సంగుక జలె,
ప్రబుచి గవురుమ్ సంగుతు"

మెన దేముడుచి కొణొతె రెగ్గ అస్సి, గెద.

18 కిచ్చొక మెలె, సొంత గవురుమ్ సంగన్తె కిచ్చొ గవురుమ్ నెంజె, గని ప్రబు కక్కయ్ గవురుమ్ కెరెదె గే, జో మాన్సు నిజుమి గవురుమ్ జయెదె.

11

తప్పుచి బోద సూన మోసిమ్ జతు నాయ్

1 ఆవ్ అప్పె ఇదిల్ తెలివి నెంజిల్ రితి లట్టబ్బె, దయ కెర ఒర్పుప జా! అంచి రిసా కిసి జలెకి తుమ్ దస్సి కెర్తను.

2 తుమ్క 'ప్రబుతె పూర్తి నిదానుమ్ జతు' మెనయ్ అంక ఆస. ఎక్కి మున్సున్క నీదానుమ్ తిలి తేర్చి తుమ్ జతి రితి, పెండ్లిక క్రీస్తుక తుమ్క నావ్ కెర సొర్పు దిలయ్.

3 గని పూర్ణమ్ అయి రూపుమ్ జా తిలొ సయ్తాన్ జోచి మాయక కిసి * హవ్వక మోసిమ్ కెర్లొ గే, దస్సి తుమ్క 'క్రీస్తుక ఎక్కి మెన్సు నిదానుమ్ తత్తు నాయ్' మెన, తుమ్చి చెంగిల్ బుద్ది జో సయ్తాన్ మార్పుప కెరెదె మెన అమ్క బయిమ్.

4 ఆవ్ కిచ్చొక ఇసి ఉచర్తసి మెలె, కో జలెకు తుమ్తె జా కెర, యేసుచి రిసా అమ్ బోదన కెర్లిసి నాయ్, గని వేరచి సికడ్లె, తుమ్ బే బేగి జో మాన్సుక నంప కెర్తను. నెంజిలె, తుమ్క దిలి దేముడుచి సుద్ది తిలి ఆత్మ నాయ్ గని వేరయ్ ఆత్మ తుమ్క దొర్కు జలె, నెంజిలె తుమ్ నంపజలి సుబుమ్ కబుర్ నాయ్ గని వేరయ్ కోడు సూన్లె, తుమ్ జా వేరచి నంపజా తుమ్ బే బేగి మార్పుప జతసు.

5 వేర సికడ 'ఒగ్గర్ వెల్లో బారికుల్' మెన తుమ్ సంగిత జేవ్ వేర మాన్సులచి కంట ఆవ్ ఎద్దికి దాక్ జయి నాయ్ మెన ఆవ్ జాని.

6 లట్టుబుక ఆవ్ తెలివి నెంజిలె కి, ప్రబుచి గ్యానుమ్ అంక అస్సి. కెయక కి కిసి జలె కి ఈంజ గ్యానుమ్ తుమ్క సొస్తుమ్ జానవ అస్సి.

7 తుమ్క 'చెంగిల్ జతు' మెన, తుమ్తె కిచ్చొ తోడు నే నజితె దాక్ కెరనయి దేముడుచి సుబుమ్ కబుర్ ఆవ్ సికడ్డిసి పాపుమ్ గే?

8 వేర సంగుమ్లుచి డబ్బుల్ ఆవ్ నజన చోర్లి రితి జా అస్సి. ప్రబుచి నావ్ తెన్ తుమ్కయ్ సేవ కెర్తి అంచి ఆసచి రిసా జా డబ్బుల్ జోవయింతె నజిలయ్.

9 పడ్డొ, తుమ్చి తెన్ ఆవ్ తిలి పొది అంక కొత్తు తిలె, తుమ్చితె కక్కయ్ కి జా జాడు వయడి నాయ్. మాసిదోనియ ప్రదేసిమ్ తెంతో అయ్ల బావుడ్లు అంక కొత్తు తిలిసి ఎత్కి దిల. జాకయ్ తెదొడి తుమ్క జా జాడు వయడి నాయ్, చి అప్పె తెంతో కి కిచ్చొ జాడు కి తుమ్క వయడుక నేసి.

10 క్రీస్తుచి సత్తిమ్ అంచి పెట్టి కిసి అస్సి గే, ఈంజ ఒండి అకయ ప్రదేసిమ్తె ఆవ్ డబ్బుల్ గట్ట నే నజితిన్చి రిసా కో వేరయ్ సంగుత్ నాయ్. జేవ్ వేర సంగుక వాట్ దెయి నాయ్. ఆవ్ అప్పెక కెర్లి రితి దస్సి కెర్తె తయిందె.

11 కిచ్చొక? తుమ్క ప్రేమ కెరి నాయ్ గే? తుమ్క ఆవ్ ప్రేమ కెర్తిసి 'నిజమి' మెన దేముడు జానె.

మోసిమ్ కెర్త బారికుల్

12 'సుబుమ్ కబుర్ కామ్చి రిసా డబ్బుల్ నజనయ్ అమ్చి రితి జేవ్ కి కెర్తతి' మెన, డబ్బుల్ ఆసక సుబుమ్ కబుర్ సూనయ్త జేవ్ అన్నె మాన్సుల్ అమ్చి రిసా సంగితతి. ఈంజ కామ్ జేవ్ కెర్తక అదికారుమ్ నాయ్. పడ్డొ, జోవయింబి రితి అమ్ నే కెర్తినక రుజ్జు తతి రితి, ఆవ్ అప్పె ఎద డబ్బుల్ గట్ట నే నజితె సుబుమ్ కబుర్ కామ్ ఆరి కెర్తె తయిందె.

13 దస మాన్సుల్ అబద్దుమ్కయ్ "ప్రబు అమ్క ఈంజ కామ్ తియార అస్సి. జోచ బారికుల్ ఆమ్" మెనన ఆరి సంగితతి. మోసిమ్ కెర్తన, జేవ్. ఆరిక క్రీస్తుచ బారికుల్ ఆమ్ మెనంతతి.

14 దస్సి కెర్తతి మెన తుమ్ ఆచారిమ్ జంక నాయ్. సయ్తాన్ కి మోసిమ్ కెర పరలోకుమ్చి ఉజిడిచొ దూత రితో డీనుక జానె.

15 జాకయ్ జోచ సేవ కెర్తన కి 'పరలోకుమ్చి సత్తిమ్చ సేవ కెర్తన అమ్' మెన ఆరి సంగనుల ఆచారిమ్ నెంజె. గని జేవ్ కెర్త కమొ కొల్లి ఆకర్క సిచ్చయ్ జవుల.

16 జలె, అన్నెక్ సుట్టు ఆవ్ సంగితసి. కిచ్చొ మెలె, అంక వెర్రి మెన కో ఉచర నాయ్. గని 'వెర్రి' మెన ఉచరై, అంక బెదవన జా, చి అంక ఇదిల్ జవున్ గవురుమ్ తయెదె.

17 ఆవ్ అప్పె సంగితిసి ప్రబు సంగిలిసి మెన నెంజె, గని దయిరిమ్ తెన్ ఇసి గవురుమ్ సంగుక తెలివి నెంజిల్ రితో జతసి.

18 ఒగ్గర్జిన్ ఈంజ లోకుమ్చ కమొచి రిసా గవురుమ్ సంగనుల. ఆవ్ కి గవురుమ్ సంగనిందె.

19 తుమ్క బుద్ది అస్సిచి రిసా బుద్ది నెంజిలసక సర్ల తెన్ ఓర్పుప జతను!

20 మెలె, ఎక్కిలో తుమ్క దెర్ను సేడయ్లె, నెంజిలె మోసిమ్ కెర తుమ్చి అత్తి లాబుమ్ కెరన్లె, నెంజిలె బడాయ్ జా వెల్లో మెనన్లె, నెంజిలె తుమ్క మొక్కె పెట్టె, తుమ్ ఓర్పుప జతను!

21 దస అల్లర్ కమొ కెరుక ఆమ్ నెతిర్లమ్ మెన లాజ్ తెన్ ఆవ్ ఒప్పునుక, ఏక్! గని జోవయింతె కో కిచ్చొచి రిసా గవురుమ్ సంగన్లె; ఆవ్ అప్పె తెలివి నెంజిల్ రితి లట్టుబ్బసి; ఆవ్ కి దస్సిచి రిసా గవురుమ్ నజనుక దయిరిమ్ అస్సి. ఆవ్ తెలివి నెంజిల్ రితి కొడొ జతసి.

22 జేవ్ ఎబ్రియిల్ జవుల గే? ఆవ్ కి ఎబ్రియిడు! జేవ్ ఇస్రాయేలుల్ జవుల గే? ఆవ్ కి ఇస్రాయేలుడు. జేవ్ అబ్రాహామ్చి సెకుమ్తె జెర్మిల గే? ఆవ్ కి జోచి సెకుమ్తె జెర్మిలయ్.

23 జేవ్ క్రీస్తుచ సేవ కెర్తన గే? జలె, జోవయింబి కంట ఆవ్ చెంగిల్చి. ఆవ్ అప్పె వెర్రి రితి లట్టుబ్బె తుమ్ చెమించుప కెర. జోవయింబి కంట ఆవ్ కిసి చెంగిల్చి జోచో సేవ కెర్తొసా జయిందె మెలె, జోచి సుబుమ్ కబుర్ సూనయ్తి రిసా జోవయింబి కంట ఆవ్ అన్నె ఒగ్గర్ కామ్ కెర అస్సి, ఈంజ కామ్చి రిసా అన్నె ఒగ్గర్ సుట్టు జేలి జా అస్సి, ఒగ్గర్ సుట్టు దెబ్బల్క సిచ్చ జా అస్సి, ఒగ్గర్ సుట్టు మొర్తి రితి జా తిలయ్.

24 యూదుల్చ వెల్లెల మాన్సుల్ పాచ్ సుట్టు కొర్ల తెన్ ముప్పయ్నొవ్వు దెబ్బల్చి సిచ్చ అంక పెట అస్తి.

25 తివ్వెరి డండల్ తెన్ అంక పెట అస్తి, ఏక్ సుట్టు పత్తల్ గల అంక మారిత, తివ్వెరి ఓడతె గెలి పొది ఓడ పత్తె లయతయికయ్ డుజ గెతయ్, ఏక్ సుట్టు ఒండి మెద్దెనె ఒండి సరారాతి సముద్దుమ్తె సేడ తిలయ్.

26 ఒగ్గర్ సుట్టు దూరి ప్రయానుమ్ గెచ్చ అస్సి. దసితె గడ్డొ జీన్తి ప్రమాదుమ్, చోర్లుచి రిసాచి ప్రమాదుమ్, అంచి సొంత దేసిమ్చ మాన్సుల్చి రిసాచి ప్రమాదుమ్, యూదుల్ నెంజిలసచి అత్తి ప్రమాదుమ్ కి జా అస్సి. పట్టుల్తె, బయిలు దేసిమ్లుతె, సముద్దుమ్తె కి ప్రమాదల్ జా అస్సి. మోసిమ్క 'నంపజలస ఆమ్' మెనన్లసచి అత్తి కి ప్రమాదల్ జా అస్సి.

27 ఒగ్గర్ కామ్ కెర కెర సైమల్ సేడ అస్సి. ఒగ్గర్ రాతివో నిజె నాయ్, ఒగ్గర్ సుట్టు చువ్వె తన్నె తా అస్సి, ఒగ్గర్ సుట్టు అంక అన్నిమ్ దొర్కు జయె నాయ్, ఒగ్గర్ సుట్టు చల్లిక, పాలల్ నెంజిలిన్క బాద సేడ అస్సి.

28 జేవ్ ఆవ్ సేడ్ల బాదల్ ఎత్కిక పిట్టవ అన్నె కిచ్చొ మెలె, ప్రబుచ సంగుమ్లు ఎత్కిక 'చెంగిల్ తత్తు' మెనయ్ ఉచర్త తతిసి అంక పెల్లితయ్, కామ్ రితి జతయ్.

29 కో డిట్టుమ్ నెంజిలె, ఆవ్ కి డిట్టుమ్ నెంజిలి రితి దుకుమ్ జతసి; జోవయించి జాడు వయిలి రితి. కో పాపుమ్తె దెర్ను సేడ్లె, అంక ఒగ్గర్ దుకుమ్ తయె నాయ్ గే? ఒగ్గర్ దుకుమ్ జతసి.

30 జలె, ఆవ్ గవురుమ్ నజనుక జలె, కిచ్చొచి రిసా గవురుమ్ సంగనిందె మెలె, ఆవ్ అప్పు తిలిన్చి రిసాయి గవురుమ్ సంగనిందె.

31 ఆవ్ సంగిలిన్ ఎత్కిక 'అబద్దుమ్ నెంజె' మెన ప్రబు జలో యేసుక అబ్బొన్ జలో కెయెక తెయెక మెచుప జతొసా మెన దేముడు జానె.

32 పడ్డె, అన్నె ఏక్ బాద ఆవ్ సేడ్లిన్చి రిసా గవురుమ్ నజనుక పచ్చ గెలయ్. కిచ్చొచి మెలె, దమస్కు పట్టుమ్తె అంక 'దెర్తు' మెన జా సుట్టు అరెత రానొచి తెడిచొ అదికారి జా పట్టుమ్చ సయన్యుమ్ సుదల్క రకడ్లన్,

33 గని సంపజలస అంక †గంపతె వెనడ పట్టుమ్చి కోటచి ఉప్పిర్చి గదితె వెగడ దా, కిట్టివాల్ వాలివొ తెన్ కోటచి ఒత్తల్తో ఉత్తవ దిల, చి జో అదికారితె దెర్ను నే సేడ్లె ఉట్ట అయలయ్.

12

పవులు చి సిచ్చ

1 జలె, ఆవ్ గవురుమ్ నజనుక అస్సి. గవురుమ్ సంగనె అంక లాబుమ్ నాయ్, గని ప్రబు దెకయల సిచ్చల్చి రిసా, జో దెకయల రుజ్జుల్చి రిసా ఆవ్ సంగిందె.

2 క్రీస్తుచొ మాన్సు ఎక్కిలోక జాని. అప్పె చొవ్ల వెర్చుల్ జలి, ఈంజొ మాన్సు పరలోకుమ్తె ప్రబు తిలిన్తె ఉక్కిల్ జలో. ఈంజొ మాన్సు ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఉక్కిల్ జలి గే నేని, దేముడు జానె.

3 గని పరలోకుమ్చి ఒత్తచి పరదీసుతె నిజామ్ ఉక్కిల్ జలో మెన జాని. ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఒత్త గెలి గే నేని, గని దేముడు జానె.

4 ఒత్త కిచ్చొ సూన్లొ గే కేన్ మాన్సుకి అన్నె సంగుక నెత్తె, సంగుక నెంజె.

5 ఈంజొ మాన్సుచి రిసా ఆవ్ గవురుమ్ సంగిందె, గని అంచి నావ్ తెన్, జలె, ఎక్కి ఆవ్ అప్పు తిలిన్చి రిసాయి సంగనిందె. గని వేరచి రిసా, జలె, గవురుమ్ సంగి నాయ్.

6 ఆవ్ గవురుమ్ నజనుక ఉచర్లె, అంక వెర్చి మెనుక, బుద్ది నెంజిలొసా మెనుక నెంజె. కిచ్చొక మెలె, ఆవ్ సంగితిసి సత్తిమ్ గని అంచితె దెకితి కంట సూన్తి కంట కో అంక అన్నె గవురుమ్ ఉచరుక అంక ఆస నాయ్ చి రిసా తుక్లె తయిందె.

7 పడ్డె, ప్రబు అంక ఒగ్గర్ రుజ్జుల్ దెకయ్లిన్చి రిసా ఆవ్ నే పులితి రితి, అంక ఏక్ బాద తంక జో సెలవ్ దా అస్సి. కిచ్చొ మెలె, సయ్తాన్ అంక అల్లర్ కెర్తి రితి అంచి అగి కంటొ బూస్తి రితి ఏక్ బాద దా అస్సి; అంక 'పులున్ నాయ్' మెన.

8 జలె, 'ఈంజ బాద అంక ములున్' మెన, తివ్వెరి ప్రబుక బతిమాల్పా జా ప్రార్దన కెర్లయ్,

9 గని జో అంక, "అంచి దయ తుక సరిపుచుప జయెదె. తుయి అప్పు తిలె, తుచి అత్తి ఆవ్ కెర్తెన్తె అంచి సెక్తి పూర్తి డీసెదె" మెనయ్, ప్రబు సంగిలన్. జాకయ్ ఆవ్ అప్పు తిలిసి అన్నె సర్ల తెన్ ఒప్పనిందె, చి క్రీస్తుచి సెక్తి అంచితె కామ్ కెరెదె.

10 జాకయ్, క్రీస్తు గవురుమ్ జతి రిసా ఆవ్ అప్పు తిలె, మాన్సుల్ అంక నిస్కారుమ్ కెర్లె, ఆవ్ సైమల్ సేడ్లె, విరోదుమ్ సుదల్ అంక అల్లర్ కెర్లె. ఆవ్ కస్టల్ సేడ్లె, అంక సర్ల. కిచ్చొక మెలె, ఆవ్ అప్పు తిలె పొది, ఆవ్ అప్పు తిలిన్తె ప్రబుచి సెక్తి బార్ జా జోచి గవురుమ్ దెకయ్తయ్.

సత్తిమ్ నెంజిల 'బారికుల్'

11 ఆవ్ ఈంజ ఎత్కి సంగిలిసి తెలివి నెంజిల్ రితి, గని ఆవ్ సంగిత్ రితి తుమి పులయ్లదు. తుమి అంచి రిసా 'సత్తిమ్చొ' మెన సాచి సంగితదు జలె, జతి. కిచ్చొక మెలె, జేవ్ వేరయ్ మాన్సుల్; 'ఒగ్గర్ వెల్లొ బారికుల్' మెన తూమ్ సంగితస; కిచ్చొ నెంజిలె కి ఆవ్ జోవయించి కంట ఇద్దికి దాక్ నెంజి.

12 క్రీస్తుక సత్తిమ్చొ బారికి ఆవ్ జలిన్క రుజ్జుల్ దెకయ్త కమె తుమ్చి మొక్కె జర్లు జల. మెలె, ఒగ్గర్ బాదల్ సేంతుమ్ తెన్ ఓర్చుప జలయ్, చి ప్రబు జోవయించి సెక్తిచ రుజ్జుల్ దెకయ్లో, ఈంజ లోకుమ్తె నెంజిల కమె దెకయ్లో, వెల్లెల వెల్లెల కమె జర్లు కెర్లొ.

13 జలె, ప్రబుచ అన్నె సంగుమ్లుచి కంట తుమ్క కిచ్చొ పిట్టి? ఎక్కి పిట్టి మెలె, ఆవ్ జతి డబ్బుల్ తుమ్తె నజి నాయ్. ఈంజ తప్పు అంక చెమించుప కెర, 'తప్పు' మెంతసు జలె!

అమ్తె లాబుమ్ కెరన్లది, అమ్క మోసిమ్ కెర్లది

14 ఈందె, అన్నెక్ సుట్టు తుమ్తె జెంక తెయార్ జా అస్సి. ఇన్నెతెన్ ఆవ్ అయ్లిసి తివ్వెరి జయెదె. అయ్లె, తుమ్క కిచ్చొ జాడు వయడి నాయ్. కిచ్చొక మెలె, తుమ్చి ఆస్తి ఆవ్ నెసి, గని తుమ్చి ప్రేమకయ్ అంచి ఆస. *అయ్యన్క

† 11:33 11:33 బారికుల్ 9:23-25. * 12:14 12:14 పవులు జేవ్ కొరింధిల్క అయ్యన్ అబ్బొన్ రిత్ జయెదె, గెద. జొయ్య జోవయంక తొలితో సుబుమ్ కబుర్ సూనయ్లో, గెద.

అబ్బొనక పొస్తి రితి బోదలీ కుడవక కెరనుక పూచి నాయ్, గని జోవయించ బోదల్క పొస్తి రిసా అయ్యసి అబ్బొన కుడవక కెర అస్సె.

15 తుమ్చ ఆత్మల్క 'చెంగిల్ జతు' మెన ఆవ్ సర్ల తెన్ నస్టుమ్ జయిందె, అంచి జీవు దెయిందె. ఆవ్ తుమ్క ఒగ్గర్ ప్రేమ కెర్లె, తుమి అంక తొక్కి ప్రేమ కెర్లె చెంగిల్ గే? తుమ్ ఉచర.

16 నాయ్, ఆవ్ జితిన్చి జాడు తుమ్క వయడి నాయ్, గని 'జో మోసిమ్చొ, తెలివి తెన్ అమ్క మోసిమ్ కెర్లె' మెన తుమ్ అంక సంగితను.

17 జలె, తుమ్తె ఆవ్ తెద్రయలన చి అత్తి తుమ్తె కెయ్ కిచ్చొ లాబుమ్ కెరన్లయ్ గే? నాయ్, గెద.

18 'గో' మెన తీతుక బలవంతుమ్ కెర్లయ్, చి జో తెన్ జో అన్నెక్ బావొక తెద్రయలయ్. తీతు జవున్ తుమ్క మోసిమ్ కెర్లె గే? నాయ్, గెద. ఆమ్ కి జోచి బుద్ది తెన్ ఇండుమ్ నాయ్ గే? ఆమ్ కి జోచి రితి జిము నాయ్ గే?

తుమ్తె జెతి పొదిక తుమ్ సత్తిమ్ జా తా

19 అమ్చి సత్తిమ్ సంగితిన్క 'ఎక్కి జోవయించి సొంత నావ్ తతి రిసాయి అమ్చి మొక్కె సంగితతి' మెన ఉచరై తిలదు గే? నాయ్, అమ్చి ఉద్దెనుమ్ దస్సి నాయ్. క్రీస్తుచి తెడి దేముడుచి మొక్కె సంగిలమ్, సంగితనుమ్.

20 కిచ్చొక మెలె, ఆవ్ తుమ్తె తిలె, తుమ్ వేర మార్పుప జా తస్సె మెన, పడ్డొ తుమ్ అంకయ్ దెకిలె, 'జో దస్సి అస్సె, చి అమ్క ఇస్టుమ్ నాయ్' మెన తుమ్ సంగితె మెనయ్ అంక బయిమ్. అన్నె కిచ్చొ మెలె, తుమ్ జట్టు తెన్, గోసల్ తెన్, కోపల్ తెన్, 'అన్నె మాన్సుల్ కీన్ జలె జతు గని అమ్మి చెంగిల్ కెరనుమ' మెలి రితి బుద్ది తెన్ ఏక వేల తస్సె. ఎక్కిలోచి రిసా ఎక్కిలో ఆరిచ నిందల్, సొండెల్ కొడొ సంగితె తస్సె, పుల తస్సె, ముద్దొ నెంతె తస్సె మెన ఆవ్ బితసి.

21 అన్నె కిచ్చొచి రిసా ఆవ్ బితసి మెలె, ఆవ్ తుమ్తె అన్నె అయ్లె, తుమ్చి రిసా దేముడుచి మొక్కె లాజ్ జయిందె, చి తుమ్చి తెచ పాపుమ్ కెర అప్పెక పాపుమ్ నే ఒప్పన్లనచి రిసా ఆవ్ ఏడుక తయెదె. కేన్ పాపల్ మెలె, లంజెబుద్ది, లంజెకమొ, ఆగ్చ ఆసల్ ముద్దొ నే కెరంతిసి, దసచ జేవ్ ఇండితిసి.

13

ప్రబుచి సెక్తి తెన్ తీర్పు కెరుక తయెదె

1 ఆవ్ తుమ్తె అన్నె అయ్లె ఇన్నెతెన్ తివ్వెరి జయెదె. అయ్లె, కక్క తీర్పు కెరుక జలె, దొగుల తీర్ల సాచుల్చి సాచి బెద, రుజ్జు జంక.

2 అగ్గె పాపుమ్ కెర్లనక చి జేవ్ అన్నె ఎత్తిజిన్క అగ్గె జాగర్ల సంగిలయ్; సిచ్చ కెరుక జయెదె, మెన. ఆవ్ అప్పె ఒత్త నెంజిలె కి, జా సుట్టు ఆవ్ ఒత్త గెచ్చ తిలి పొది; తెదొడి

ఆవ్ తివ్వెరి తుమ్తె జా తిలయ్, గెద. జలె, తెదొడి సంగిలి రితి, అప్పె కిచ్చొ సంగితసి మెలె, ఆవ్ అయ్లె పొది జేవ్ చెంగిల్ నే జా తిలె, కచితుమ్ తీర్పు కెర సిచ్చ దెయిందె.

3 "తుయి సంగితిన్క 'క్రీస్తు సంగిలిసి' మెన అమ్ చినితి రిసా రుజ్జు దెకవు" మెన అంక తుమ్ కొంకడ్లను. ఆవ్ అయ్లె, రుజ్జు దెకితె. తుమ్చి రిసా క్రీస్తు అప్పు జయె నాయ్. తుమ్తె జోచి సెక్తి దెకయ్తయ్!

4 నిజామి, జో మాన్సు జెర్మన్ జలిన్క అప్పు తతికయ్, సిలువతె జోక మార్ల, గని దేముడుచి సెక్తిక జో జీవ్ జా ఉట్ట జితయ్. అన్నె, జో తెన్ ఆమ్ కి అప్పు అస్సుమ్, గని తుమ్క 'చెంగిల్ జతు' మెనయ్ అమ్ తుమ్క బుద్ది సంగుక సిచ్చ కెరుక మెలె, యేసుక జియడ్డొ దేముడుచి సెక్తికయ్ జర్లు కెరుమ్దె. క్రీస్తు తెన్ జయి సెక్తిక జితనుమ్.

5 తుమ్, తుచి నముకుమ్తె నిదానుమ్ జా అస్సున్ గే నాయ్ గే, తుమ్క తుమి పరిచ్చ కెరన. రుజ్జుల్ దెకన. యేసుక్రీస్తు తుమ్చి పెట్టి అస్సె మెన తుమ్క తుమి నేన్సు గే? గని ఏక వేల జో తుమ్చి పెట్టి నాయ్ జలె, చి పరిచ్చతె తుమ్ ఓడుప జా అస్సున్.

6 జా పరిచ్చతె ఆమ్, జలె, ఓడుప నే జలిసి తుమ్క రుజ్జు డీసున్ మెన అంచి ఆస.

7 అమ్చి సత్తిమ్ రుజ్జు జతి రిసా నాయ్, గని ఆమ్ ఓడుప జలి రితి డీసిలెకి నే డీసిలెకి, 'చెంగిల్ తిలిన్ కెర్లు' మెన, 'పాపుమ్ కెర్లు నాయ్' మెన, తుమ్చి రిసా దేముడుక అమ్ ప్రార్దన కెర్లనుమ్.

8 సత్తిమ్ పిట్టవుక నెత్తుమ్, సత్తిమ్ పిట్టవుక అమ్క ఇస్టుమ్ నాయ్. సత్తిమ్ కెర్లి రిసాయి అమ్చి ఆస.

9 అమ్ అప్పు తిలె, తూమ్ డిట్టుమ్ తిలె, అమ్క సర్ల. అమ్ కిచ్చొచి రిసా ప్రార్దన కెర్లనుమ్ మెలె, తుమ్క 'అప్పెచి కంట ఆత్మక అన్నె చెంగిల్ జతు' మెనయ్ ప్రార్దన కెర్లనుమ్.

10 తుమ్క ఆవ్ దూరి తిలి పొది ఆవ్ కిచ్చొక ఇసి రెగిడ్లసి మెలె, ఆవ్ అయ్లె పొదిక ప్రబు దిలి అంచి అదికారుమ్క తుమ్క సిచ్చ కెరుక నెంజిలె, అంక సర్లయ్ తయెదె. జా అదికారుమ్ ముక్కిమ్క అంక కిచ్చొక ప్రబు దా అస్సె మెలె, నంపజలసక పాడ్ కెరుక నాయ్, గని జోవయించి ఆత్మక డిట్టుమ్ కెరుకయ్ దా అస్సె.

ఆకర్ కోడు

11 జలె, బావుడ్లు, తుమ్ చెంగిల్ తా, పూర్తి బుద్ది తెన్ ఇండుక ఆస జా మార్పుప కెరన మెన ఆవ్ బతిమాల్పా జా సంగిలిసి దెరన, ఎక్కిలో తెన్ ఎక్కిలో ప్రేమ తెన్ తా. సేంతుమ్ తెన్ బెద కట్టు తెన్ జియ, చి ప్రేమ తిలె సేంతుమ్ తిలె దేముడు తుమ్చి తెన్ తయెదె.

12 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జొకర.

13 ఇన్నెచ నంపజల బావుడ్లు ఎత్కిజిన్ తుమ్క జోవయించి ప్రేమ సంగ తెద్రయ్తతి.

14 ప్రబు జలో యేసుక్రీస్తుచి దయ, దేముడుచి ప్రేమ, అన్నెజోచి సుద్ది తిలి ఆత్మ దెతి కట్టు తుమ్ ఎత్కిజిన్చి పెట్టి తవున్, తుమ్చి నెడిమి తవున్.

గలతియుల్క రెగిడ్లి ఉత్త్రమ్ బారిక్ జలో పవులు గలతియు పట్టుమ్చ సంగుమ్చక రెగిడ్లి ఉత్త్రమ్

మొదొల్ కోడు

1-2 కేన్ మాన్సు నిసాన తెద్రయలిసి నెంజె, కేన్ మాన్సు తెంతో జలిసి నెంజె, యేసుక్రీస్తు, జోక అన్నె జియడ్లొ దేముడు అబ్బొసి తెన్ని, సొంత అంక నిసాన 'అమ్చొ బారిక్' మెన యేసుక్రీస్తుచి నుబుమ్ కబుర్ కామ్ కెర్రి రిసా జో దిలి అదికారుమ్ తెన్ బులితో జోక బారిక్ జలో పవులు, చి అంచి తెన్ తిల బాపుడ్లు, గలతియ ప్రదేసిమ్చ సంగుమ్చక రెగిడ్లి ఉత్త్రమ్.

3 దేముడు అబ్బొస్చి అమ్చొ ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

4 అమ్చ పాపల్ వయన గెచ్చయతి రిసా, ఈంజ పాపుమ్చి ఉగుమ్చి సయతాన్చి తెంతో అమ్క ములవుక మెన మెనయ్, అమ్చొ అబ్బొ జలో దేముడుచి ఇస్టుమ్క, జో క్రీస్తు జోచి సొంత జివు దా మొర గెలన్.

5 జా కామ్చి రిసా కెయక తెయక దేముడు అమ్చొ అబ్బొక జోబర! * ఆమేన్.

సత్తిమ్ బోద సంగితిన్చి రిసాచి కోడు

6 'అంచ మాన్సుల్ జతు' మెన క్రీస్తు కెర్లి దయ వాట్ తుమ్క బుకార్లొ దేముడుక తుమ్ గడియ నంపజలిన్ తెంతో, తెద్ది బే బేగి ముల 'నుబుమ్ కబుర్' మెన వేర మాన్సుల్ సికడ్లిసి తుమ్ సూన్తనుచి రిసా అంక ఆచారిమ్!

7 జా వేర కోడుక 'నుబుమ్ కబుర్' మెనుక నెంజె, గని సగుమ్జిన్ క్రీస్తుచి రిసాచి నుబుమ్ కబుర్ † మార్పువ కెరుక ఇస్టుమ్ జా, తుమ్క సిక్కు కెర్తతి.

8 జలె, ఆమ్ కి, పరలోకుమ్చొ కేన్ జవున్ దూత కి, ఆమ్ సూనయ్లి కంట వేరచి 'నుబుమ్ కబుర్' కో సికడ్లె, జోచి సిచ్చ వయన నాసెనుమ్తె గెతు.

9 అమ్ అగ్గె సంగిల్ రితి, అప్పె ఆవ్ అన్నె దస్సి సంగితసి. తుమ్ తెదొడి నంపజలి చి కంట 'నుబుమ్ కబుర్' మెన కో తుమ్క కిచ్చొ వేరచి సికడ్లె, దేముడు దెతి జోచి సిచ్చ వయన నాసెనుమ్తె గెతు!

* 1:5 1:5 తెద్దిలి మెన ఆమేన్ † 1:7 1:7 బారికుల్ 15:1, 5, 24 'అమ్చొ మోసి పూర్ణుమ్చొచి రితి కెర యూదుల్ జతి గుర్తుచి సున్నతి కెరన్లకయ్ పరలోకుమ్తె గెతి రచ్చన తుమ్క దొర్కు జయెదె' మెన సిరియ ప్రదేసిమ్చి అంతియకయత కిసి సికడ తిల గే గలతియుల్క కి మాన్సుల్ దస్సి సికడ తిల.

‡ 1:10 1:10 నెంజెలి 'గొతిమాన్సు రితొ' నెంజెలి 'గొతి జలి రితి'. § 1:13 1:13 బారికుల్ 9:1-2. * 1:16 1:16 దమన్సు పట్టుమ్తె పవులు గెతె తిలి వట్టె డిసయలన్. బారికుల్ 9:3-9. † 1:17 1:17 ఏక్ వేల ప్రార్దన కెరుక చి జో మార్పువ జలిన్చి రిసా చెంగిల్ ఉచరుక మెన ఒత్త గెలన్. 'బారికుల్' పుస్తకుమ్తె జో ఒత్త గెలిన్చి రిసా సంగి నాయ్. ‡ 1:17 1:17 బారికుల్ 9:22, 23 మొదొల్. § 1:18 1:18 నెంజెలి 'కేపా' మెన, పేతురుక అరమయ్ బాస తెన్ సంగుల. ఈంజ ఉత్త్రమ్ రెగిడ్లి తొలితోచ పుస్తకుమ్ సగుమ్తె 'కేపా' మెన రెగ్గ అస్సి. * 1:18 1:18 బారికుల్ 9:26-29.

నుబుమ్ కబుర్ క్రీస్తుతెయ్ సికిలిసి

10 జలె, 'వేరచి పోన. ఆవ్ సికడ్లిసి దె' మెన, మాన్సుతె జవున్, దేముడుతె జవున్ గవురుమ్ ఆనన్తి రిసాయి ఆవ్ సంగితసి గే? మాన్సుల్క మెన్సు వడంతి రిసా ఇసి జతసి గే? నాయ్, మాన్సుల్క మెన్సు వడనుక అప్పెక అంక ఆన తత్తి జలె, క్రీస్తుక † గొత్తి సుదొ రితొ జతయ్ నాయ్.

11 ముక్కిమ్క తుమ్ కిచ్చొ జానుక అస్సి మెలె, అంచి అత్తి సికడ్లి నుబుమ్ కబుర్ మాన్సు అవ్వి ఉచర్లిసి నెంజె.

12 'అమ్క దిలిసి' మెన కేన్ మాన్సు సంగిలి బోదన సూన్లి వాట్ నాయ్, కేన్ మాన్సు అంక సికడ్లి వాట్ నాయ్, గని నుబుమ్ కబుర్ అంక కేన్ వాట్ అయలి మెలె, యేసుక్రీస్తు సొంతయ్ అంక డీస దెకయ్లన్.

13 అమ్చ యూదుల్చి రితి ఆవ్ అగ్గె కెర్తె తిలిసి, సంగుమ్లు ఎత్కిక ఆవ్ అగ్గె కిగట్టిజ సిచ్చల్ కెర్తె తిలిసి సూన అస్సున్. దేముడుచ జేవ్ సంగుమ్లు మొత్తుమ్క పూర్తి పాడ్ కెరుక ఆవ్ ఉచర్తె తిలయ్.

14 అన్నె, అమ్చ పూర్ణుమ్చ దిలి రితి నెరవెర్పువ కెరుకయ్ మెన అంక ఒగ్గర్ ఒగ్గర్ ఆన తిలి, చి అమ్ యూదుల్చి గ్యానుమ్ అమ్ యూదుల్చ అలవాట్క దెకిలె, అమ్చ ప్రైజల్తెచ అంచి జతచ ఉబెడల్తె అవ్వి ఒగ్గర్ సిక తిలయ్.

15 గని కిచ్చొ జలి మెలె, ఆవ్ నే జెర్మితె అగ్గె తెంతో అంక నిసాన్లొ జోచి దయక అంక బుకార్లొ దేముడు

16 అంక జోచొ దేముడు పుత్తున్క * డిసయ్లన్; యూదుల్ నెంజెలసతె ఆవ్ గెచ్చ జో యేసుచి రిసా సూనయ్తి రిసాయి మెన, జో అంక బుకార్తికయ్, మాన్సుక పుసి నాయ్.

17 అన్నె, అంచి కంట అగ్గె యేసు ప్రబుచ బారికుల్ జలసక పుసుక మెన యెరూసలేమ్తె గెచ్చి నాయ్, గని అరేబియ దేసిమ్చి బయలు దేసిమి † ఉట్టు గెలయ్, చి ‡ పడ్డె దమన్సు పట్టుమ్తె అన్నె ఉట్టె అయ్లయ్.

యెరూసలేమ్తె పవులు గెచ్చ తిలిన్

18 ఒత్త తెంతో, అగ్గె నాయ్, గని తిన్ని వెర్పుల్ గెతికయ్, ప్రబుక బారికి జలో కిపేతురు తెన్ దస్సుల్ జంక మెన, * యెరూసలేమ్తె గెలయ్, చి జో తెన్ పనర పొదుల్ తిలయ్.

19 గని ఒత్త తిలి పొది ప్రబుక బావొన్ జలో యాకోబుక దెకిలయ్, గని ప్రబుచ అన్నె బారికుల్ తెన్ తెదొడి దస్సుల్ జయ్యి నాయ్.

20 ఈంజీవ్ ఆవ్ రెగిడ్డ కొడొక 'కిచ్చొ అబద్దుమ్ నెంజితి' మెన, దేముడు సాచి జతయ్.

21 ఒత్త తెంతొ కేనె గెలయ్ మెలె, సిరియ చి †కిలికియ ప్రాంతుమ్లుతె గెలయ్.

22 తెదొడి ఎద కి యెరూసలేమ్తె నాయ్, గని †యూదయ ప్రదేసిమ్తెచ అన్నె సంగుమ్లుచ నంపజలస్క అంక దెకిలె, అంక 'జొయ్యి' మెన నేన్తి.

23 తెదొడి ఎద అంక జేవ్ దెకుక నేతయ్, గని 'అమ్క అగ్గె అల్లర్ కెర్తె తిలోసా జో. అగ్గె పాడ్ కెరుక జో ఆన తిలి ప్రబుచి ఉప్పిర్చి నముకుమ్ జొయ్యి ఆజి బోదన కెర్తయ్' మెన అంచి రిసా సూన్ల,

24 అన్నె, అంచి రిసా దేముడుక గవరుమ్ సంగితె తిల.

2

యూదుల్ జతి గుర్తుచి తగు

1 ఒత్త తెంతొ అన్నెక్ చొద్ద వెర్పుల్ గెతికయ్, ఆవ్ తీతుక కడన బర్బుజా తెన్ *యెరూసలేమ్తె అన్నె గెలమ్.

2 'గో' మెన ప్రబుయి అంక జోచి ఇస్తుమ్ దెకయ్తికయ్ గెలయ్, చి 'సుబుమ్ కబుర్' మెన యూదుల్ నెంజిలసతె ఆవ్ కిచ్చొ ఎత్తి బోదన కెర్తె తత్తసి గే, యెరూసలేమ్తెచ సగుమ్జిన్ వెల్లో మాన్సుల్చి మొక్కె †సాచి సంగిలయ్. కచి కచి మొక్కె మెలె, 'సత్తిమ్చ' మెన తుమ్ నంపజలస జాన్తసచి మొక్కె. కిచ్చొక జోవయించి మొక్కె సంగిలయ్ మెలె, ఆవ్ సూనయ్తి సుబుమ్ కబుర్క 'తప్పు నెంజె' మెన జేవ్ రుజ్జు సంగుత్ మెన. నెంజిలె, జేవ్ రుజ్జు నే సంగిలె, సగుమ్జిన్ ఏక్ వేల అన్మానుమ్ తెన్ తత్త, చి అంచి కామ్ పాడ్ కెరుక ఉచర్త.

3 జలె, అంచి తెన్ తీతు ఒత్త తిలో. గని, జో గ్రీసు దేసిమ్చొ జలెకి, యూదుడు జతి గుర్తుచి సున్నతి జో కెరసుక మెన జేవ్ సత్తిమ్చ వెల్లెల మాన్సుల్ బలవంతుమ్ కెర్తె నాయ్.

4 సత్తిమ్ నెంజిల నంపజలసక మాత్తుమ్, కో గే లుంకచోరు ఒత్త కడ ఆన తిల. జేవ్ కిచ్చొక ఒత్త పెసిల మెలె, అమ్చ యూదుల్చ పూర్గుల్చ ఆగ్గుల్చి జా సున్నతి కెరంతి జాడు అమ్ నంపజలస నే వయితిసి దెకిలె, జేవ్ †జాడ్లు అమ్ వయితి రితి అమ్క సికడుక మెన ఉచర తిల. జెచ్చొ అమ్క అల్లర్ కెర్తె.

† 1:21 1:21 జో జెర్మిలి పట్టుమ్ తార్పు కిలికియ ప్రదేసిమి తిలి. తార్పుతె గెలిన్క బారికుల్ 9:30 దెక. జా ప్రాంతుమ్ జేవ్ అన్నె బారికుల్ తిలి యెరూసలేమ్క బగ్గర్ దూరి తయెదె. † 1:22 1:22 యెరూసలేమ్ యూదయ ప్రదేసిమ్తె అన్నె. * 2:1 2:1 బారికుల్ 15:1-4. † 2:2 2:2 బారికుల్ 15:4, 12. ముక్కిమ్క పేతురుచి మొక్కె చి యాకోబుచి మొక్కె సంగిలన్. బారికుల్ 15:7, 13. † 2:4 2:4 యూదుల్ జతి గుర్తుచి సున్నతిచి రిసాచి కోడు. బారికుల్ 15:1, 5 దెక. జా సున్నతి కెరన్లె, యూదుల్చ ఆగ్గుల్ ఎత్తి కి జేవ్ నిదానుమ్ కెరుక మెన బలవంతుమ్ కెరుక ఉచరల. § 2:7 2:7 నెంజిలె, 'యూదుల్ జతి గుర్తుచి సున్నతి కెరన్లసతె'. * 2:7 2:7 'యూదుల్ జతి గుర్తుచి సున్నతి నే కెరన్లసతె'. † 2:8 2:8 నెంజిలె, 'యూదుల్ జతి గుర్తుచి సున్నతి కెరన్లసతె'. † 2:9 2:9 నగుమ్తె 'కేపా' మెన అరమయ్ బాస తెన్ చి జోవయించి నావ్ రెర్తె అన్నె. § 2:9 2:9 బారికుల్ 15:22-35. * 2:9 2:9 నెంజిలె 'యూదుల్ జతి గుర్తుచి సున్నతి కెరన్లసతె'. † 2:11 2:11 నగుమ్తె పేతురుక 'కేపా' మెన జోవయించి అన్నెక్ నావ్ రెర్తె అన్నె.

5 గని, దేముడుచి దయచి రిసాచి క్రీస్తుచి తెడిచి రచ్చనచి రిసాచి సుబుమ్ కబుర్తె కిచ్చొ కారిమ్లు, యూదుల్చ ఆగ్గుల్చి నే బెదయ్తె తుమ్క దస్సి దొర్కు జస్తె తవున్ మెనయ్, ఎక్కి నిమ్ముమ్ కి జేవ్ సంగిలి కోడుక బియఁ, అమ్ సంగిలి సుబుమ్ కబుర్ మార్పుప కెరుమ్ నాయ్.

6 పడ్డొ 'వెల్లెల మాన్సుల్' మెన ఎత్తిజిన్ సంగితస కి ఆవ్ సంగితి సుబుమ్ కబుర్తె కిచ్చొ వేరచి బెదయ్తి నాయ్. జేవ్ వెల్లెల మాన్సుల్ జలెకి నెంజిలె కి అంక తేడ నాయ్; దేముడు తేడల్ దెకె నాయ్. జేవ్ వెల్లెల మాన్సుల్ మెలసతె కిచ్చొ నొవిచి సిక్కి నాయ్.

7 †యూదుల్తె జో గెచ్చుక సుబుమ్ కబుర్ సాట్టు కెరుక మెన ప్రబు పేతురుక కీసి అదికారుమ్ దా అన్నె గే, దస్సి, *యూదుల్ నెంజిలసతె ఆవ్ గెచ్చుక మెనయ్, ప్రబు తెద్రవ అన్నె మెన జేవ్ యెరూసలేమ్తెచ వెల్లెల మాన్సుల్ దెక ఒప్పన్ల.

8 †యూదుల్ జలసతె పేతురుక తెద్రవ జోచి అత్తి కామ్ కెర్తొ ప్రబు, అంచి అత్తి యూదుల్ నెంజిలసతె కామ్ కెర్తయ్.

9 జలె, జోచొ బారికి జతి ప్రబు అంక దిలి వరుమ్ జేవ్ వెల్లెల మాన్సుల్ చిన కెర, యూదుల్చ నంపజలస్క ముక్కిమ్ జలొ యాకోబు, †పేతురు అన్నె యోహాను కిచ్చొ కెర్ల మెలె, †బర్బుజాక చి అంక ప్రేమ తెన్ ఆతు దెర జోకర, యూదుల్ నెంజిలసతె ఆమ్ గెచ్చుక మెన, *యూదుల్తె జేవ్ గెచ్చుక మెన, ఒప్పన్ల.

10 అమ్క ఎక్కి కామ్చి రిసా బలవంతుమ్ కెర్ల. కిచ్చొ మెలె, యూదుల్తెచ బీద జల నంపజలసక ఆము చి యూదుల్ నెంజిల నంపజలసక నే పచ్చితె తోడు దెంక. జా కోడు, నర్ల తెన్ ఒప్పన్లయ్, దస్సి కెర్తనుమ్.

పేతురు తెన్ తేడల్ దెకిలిన్

11 గని †పేతురు జా సుట్టు అంతియొకయతె ఉట్టు అయ్లి పొది, జోక అడ్డు నెంతె ఎదార్దుమ్ తీర్పు సంగిలయ్. కిచ్చొక మెలె, జో పొరపాట్ జా తిలన్.

12 కిసి మెలె, 'సున్నతి కెరసుక ముక్కిమ్' మెంతస సగుమ్జిన్ యాకోబు తెంతొ నే ఉట్టు జెతె అగ్గె, యూదుల్ నెంజిలసతె జో పేతురు కంక అలవాట్ జా తిలన్. గని జేవ్ జెతికయ్, 'యూదుల్ జతి గుర్తుచి సున్నతి కెరన్లకయ్ రచ్చొచుప జంక జయెదె' మెంతి కోడు బియఁ కెర, గుంచ యూదుల్ నెంజిలసతె కంక ములిలన్.

13 ఒత్తచ యూదుల్ జల నంపజల ఎత్కిజిన్ కి జో తెన్ దస్సి గుంచ దొన్ని మెన్సుల్ ఇండిల, చి బర్బూ కి జోవయించి ఉప్రమెన్సుతె ఇదిల్ బెదిల్ రితి జలో.

14 దస్సి కెర, 'దేముడుచి దయకయ్ యేసుక్రీస్తు పాపుమ్ గెచ్చయ్లిన్చి రిసాయి రచ్చించుప జమ్దె' మెన జోవయించి పెట్టి జాన్లె కి, 'యూదుల్చ ఆగ్గు కారిమ్లు ముక్కిమ్చి' రితి జేవ్ ఇండిలె, సుబుమ్ కబుర్తె ముక్కిమ్ తిలిన్క అడ్డు కెర్లి రితి జతయ్. దస్సి జతతి మెన దెక కెర, జేవ్ ఎత్కిజిన్చి మొక్కె †పేతురుక కిచ్చొ మెలయ్ మెలె, "తుయి యూదుడు జెర్బు యూదుడు నెంజిలో రితో జియె ఎత్కిజిన్ తెన్ బెదితసి జలె, యూదుల్ జతి రితి జేవ్ జంక మెన యూదుల్ నెంజిలసక తుయి కిచ్చొక బలవంతుమ్ కెర్లసు!" మెన గోల కెర్లయ్.

యేసుకయ్ నంపజలిన్తెయి అమ్చి రచ్చన

15 జెర్బున్తె యూదుల్ జల ఆమ్, ఆగ్గుల్ నేన్ల పాపుమ్ కెర్లన జల యూదుల్ నెంజిలస నెంజిలె కి,

16 యేసుక్రీస్తుక నంపజలెకయ్ అమ్చి పాపుమ్ పుంచి 'జయెదె' మెన జానుమ్. 'పున్నిమ్ జా అస్తి' మెలి రితి ప్రబు దెకితి వరుమ్ ఆగ్గుల్ రితి ఇండితిన్తె కక్కయ్ దొర్బు జయె నాయ్ మెన అమ్ జాన, ఆగ్గుల్చి ఉప్పిరి నముకుమ్ నే తితె, క్రీస్తుకయ్ అమ్ నంపజలె అమ్చి పాపుమ్ పుంచ అమ్క 'పున్నిమ్ జా అస్తి' మెలి రితి దేముడు దెకెదె మెన జానయ్, ఆమ్ కి క్రీస్తు జలో యేసుక నంపజా అస్సుమ్.

17 యూదుల్ నెంజిలసక 'అమ్చి ఆగ్గుల్ రితి కెర్లి నాయ్ చి పాపుమ్ కెర్లన, జేవ్' మెన అమ్చ యూదుల్ సంగితతి, గెద. జలె, ఎక్కి క్రీస్తుకయ్ అమ్ నంపజలె అమ్చి పాపుమ్ పుంచ అమ్క 'పున్నిమ్ జా అస్తి' మెలి రితి దేముడు దెకెదె, మెలె అమ్ యూదుల్చ నంపజలస ఆగ్గుల్ రితి ములిలి రిసా యూదుల్ నెంజిలస తెన్ ఆమ్ కి పాపుమ్ కెర్లన జతసుమ్ మెనుక జలె, క్రీస్తుక 'జొయ్యి పాపుమ్ కెరయ్లో' మెనుక జతి. దస్సి మెన జోచి విలువ కడ్డిసి ఉచరుక పొన!

18 జలె, సేడ గెలిసి అన్నె ఆవ్ బందిలె అంక అవ్ పాపుమ్ కెర్లసా జయిందె గెద?

19 కిచ్చొక మెలె, ఆవ్ ఆగ్గుల్ రితి అగ్గె ఇండ తా, 'రచ్చనక కామ్క నెంజె' మెన, ఆగ్గుల్క నంప కెర్లి రితిచి తెడి జింక ములిలయ్. కిచ్చొక మెలె, దేముడుచి రిసా జితసుమ్.

20 క్రీస్తు సిలువతె మొర్లిన్తె ఆవ్ బెద మొర అస్సి. †అప్పె అంచి సొంత జివు జియి నాయ్. క్రీస్తుచి రిసా ఆవ్ జితసి, అన్నె, ఈంజ అగె ఆవ్ అప్పె జితిసి కిచ్చొ సెక్తిచి

‡ 2:14 2:14 సగుమ్తె పేతురుక 'కేపా' మెన జోచి అన్నెక్ నావ్ రెర్ల అస్సి. జతయచి రిసా ఆవ్ జితసి, అన్నె... * 3:8 3:8 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెర్లయ్లో ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగెచి పావ్ పుస్తకుమ్తె రెర్లయ్ జా అస్సి. ఈంజ దెకవుక మెన కుమియ బాసతె నొయ ప్రమానుమ్తె మోసి పూర్ణుమ్చొచి అత్తి రెగిడ్లి దేముడుచ ఆగ్గుల్ మెన రద్దవ అస్సి. † 3:8 3:8 అదికాండుమ్ 12:3, 18:18, 22:18.

మెలె, అంక ప్రేమ కెర అంచి రిసా జోక జొయ్యి అర్పితుమ్ జా జోచి జివు దా రచ్చించుప కెర్లొ దేముడు పుత్తున్చి ఉప్పిర్చి నముకుమ్కయ్ ఆవ్ జితసి.

21 దేముడు దయ కెర్లిన్క 'సరిపుచుప జయె నాయ్' మెలి రితి ఇండి నాయ్. కిచ్చొక మెలె, ఆగ్గుల్ వాట్ తుమ్చి పాపుమ్ పుంచి జా పున్నిమ్ జంక జతి జలె, క్రీస్తు ఆరికయ్ మొర గెలన్.

3

యేసుక్రీస్తుచి ఉప్పిర్చి నముకుమ్ సాలు

1 బుద్ది పిట్టవన్ల ఓ తుమ్ గలతియల్, తుమ్క కో ఇసి మోసిమ్ కెర అస్తి? యేసుక్రీస్తు సిలువతె మొర్లిసి తుమ్ సొంత దెకిల్ రితి జతి రితి తుమ్క సొస్తుమ్ దెకవ తిలయ్. మదెనె కిసి జా మోసిమ్ జలదు!

2 తుమ్క ఎక్కి పుసిందె; దేముడుచి యేసుచి ఆత్మ తుమ్చి పెట్టి అయ్లిసి కిచ్చొచి రిసా? ఆగ్గుల్చ కమొచి రిసా గే, యేసుక్రీస్తుచి రిసాచి సుబుమ్ కబుర్ నూన జోక నంపజలిన్చి రిసాయి గే? సుబుమ్ కబుర్ నూన నంపజలిన్చి రిసాయి గెద.

3 తుమ్క ఎదిలి బుద్ది కి నాయ్ గే? ప్రబుచి ఆత్మకయ్ చెంగిల్ జంక దెర, మాన్సుచి సెక్తిచ కమొ తెన్ పూర్తి కెరనుక ఉచర్లసు గే?

4 ప్రబు తుమ్చితె జర్బు కెర్లిసి ఎత్కి ఆరి గే? ఏక్ వేల జా ఆరి జర్బు జంక జతి జలె.

5 జోచి ఆత్మ దా తుమ్తె జోచి అదికారుమ్ దెకయ్త వెల్లో కమొ కెర్లొసా, జలె, ఆగ్గుల్చి రిసా జెయిమ్ కెర్లయ్ గే, మాన్సుల్ జోవయించి సుబుమ్ కబుర్ నూన నంప కెర్లి రిసాయి జర్బు కెర్లయ్ గే, తుమ్ చెంగిల్ ఉచర. జోవయించి సుబుమ్ కబుర్ మాన్సు నూన నంప కెర్లి రిసాయి.

నముకుమ్ తితసకయ్ దేముడు 'పున్నిమ్' మెన దెకితయ్

6 దస్సి అమ్చొ పూర్ణుమ్చొ అబ్రాహామ్చి రిసా రెర్ల అస్సి. కిచ్చొ మెన మెలె, "దేముడు ప్రబుచి కోడు జో నంప కెర్లన్చి రిసా జోక 'పున్నిమ్ జా అస్సి' మెలి రితి జోచి దయక జో దెకిలో" మెన రెగిడ్లిసి.

7 జా కోడుతె కిచ్చొ రుజ్జు డీస్తయ్ మెలె, ప్రబుక నంపజతసయ్ అబ్రాహామ్చ పుత్తర్లు జవుల.

8 దస్సికయ్, జోవయించి నముకుమ్చి రిసా యూదుల్ నెంజిలసక దేముడు జోక 'పున్నిమ్ జా అస్సి' మెలి రితి దెకెదె మెనయ్ *మోసి పూర్ణుమ్చొచి అత్తి రెగిడ్లి దేముడుచ

§ 2:20 2:20 నెంజిలె, 'అప్పె ఆవ్వి జియి నాయ్, గసి క్రీస్తుయి అంచి పెట్టి

జతయచి రిసా ఆవ్ జితసి, అన్నె... * 3:8 3:8 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెర్లయ్లో ఆగ్గుల్ మెన అమ్ జానుమ్. ఈంజ కొడొ ఎత్కి బైబిల్తె అగెచి పావ్ పుస్తకుమ్తె రెర్లయ్ జా అస్సి. ఈంజ దెకవుక మెన కుమియ బాసతె నొయ ప్రమానుమ్తె మోసి పూర్ణుమ్చొచి అత్తి రెగిడ్లి దేముడుచ ఆగ్గుల్ మెన రద్దవ అస్సి. † 3:8 3:8 అదికాండుమ్ 12:3, 18:18, 22:18.

ఆగ్నల్తె అగ్గె తెంతో రెగ్గ అస్సె. అగ్గెయి తెంతో అబ్రాహామ్ క సుబుమ్ కబుర్ సంగిలి కోడుతె,
 †“తుచి వంసుమ్ వాట్ దేసిమ్లు ఎత్కిక చెంగిల్ వరుమ్ దొర్కు కెరిందె”

మెన జో దేముడు రెగిడ్డి కోడు.

⁹ జలె, ఇన్నెతెన్ కిచ్చో రుజ్జు జతయ్ మెలె, ప్రబుచి ఉప్పిరి నముకుమ్ తిత్తన కో జవుల గే, ప్రబుచి ఉప్పిరి నముకుమ్ తిలో అబ్రాహామ్ తెన్ జోవయింక కి ప్రబుచి దీవెన దొర్కు జతయ్.

క్రీస్తు జా సిచ్చ తెంతో అమ్క విడ్డల్ కెర అస్సె

¹⁰ ‘ఆగ్నల్ రితితె అమ్చి రచ్చన’ మెన ఉచరంతన జలె, నాసెనుమ్ జతి, సిచ్చచి సాపెనతె దెర్కు నేడ అస్తి. కిచ్చొక మెలె, మోసే పూర్గుమ్చొచి అత్తి దేముడు రెగ్గయ్ల ఆగ్నల్ రెగిడ్డి రితి,

‡“మోసే పూర్గుమ్చొచి అత్తి దేముడు రెగ్గయ్ల ఆగ్నల్తె రెగ్గయ్లి ఎత్కి ఆగ్గు కో పూర్తి నిదానుమ్ నే కెరె, నాసెనుమ్ జతి ఆవ్ దిలి సిచ్చతె గెచ్చుల”

మెన సెలవ్ రెగ్గ అస్సె.

¹¹ జలె, కిచ్చో రుజ్జు డీస్తయ్ మెలె, ఆగ్నల్ రితి కెర్తిసి జో దేముడుచి మొక్కె కేన్ మాన్సుచి పాపుమ్ పుంచె నాయ్, జోవయింక పున్నిమ్ దెయె నాయ్. కిచ్చొక మెలె, దేముడుచి కొణ్ణెతె కిచ్చొ రెగ్గ అస్సె మెలె,

*“కో పున్నిమ్ మాన్సుల్ జవుల గే, జెవ్వి నముకుమ్ జా జివుల”
 మెన రెగ్గ అస్సె.

¹² దేముడు మోసే తెన్ దిలి ఆగ్నల్ తెన్ తిలి నముకుమ్చి రిసా నాయ్, గని జా ఆగ్నల్చి కో ఇండుల గే జేవ్ జివుల.

†“జా ఆగ్నల్ రితి కో జలె పూర్తి నిదానుమ్ కెరుల గే, జెవ్వి జేవ్ ఆగ్నల్చి సెక్కిక జివుల”

మెన రెగ్గ అస్సె. గని కోయి పూర్తి నిదానుమ్ కెరుక నెత్తిర్తి.

¹³ జలె, క్రీస్తు అమ్చి పాపుమ్చి రిసాచి సిచ్చ వయన, ఆగ్నల్ రితిచి జా సిచ్చచి సాపెన తెంతో అమ్క నెత్తివ కెర విడ్డల్ కెర అస్సె. అమ్చి పాపుమ్ జో వయిలి కోడుక కిచ్చొ రుజ్జు మెలె,

‡“సిలువతె ఒణ్ణెయ్ జా మొర్తి సిచ్చ జతో ఎత్కి మాన్సుచి సాపెన వయెదె”
 మెన దేముడుచి కొణ్ణెతె రెగ్గ అస్సె.

¹⁴ జో అమ్చి పాపుమ్ కిచ్చొక వయిలన్ మెలె, అమ్చొ అబ్రాహామ్ పూర్గుమ్చొక దిలి రచ్చన వరుమ్ జో క్రీస్తు జలో యేసుచి తెడి నముకుమ్ తెన్ యూదుల్ నెంజిలనక

కి దొర్కు జవున్ మెన, దేముడు సంగిలి ప్రమానుమ్ నెరవెర్కుప జవున్ మెనయ్.

ఆగ్నల్ వాట్ నాయ్, గని దేముడుచి ప్రమానుమ్ వాట్ రచ్చన

¹⁵ ఓ బావుడ్లు, మాముల్ మాన్సుల్ తెన్ జర్గు జతిన్చి ఏక్ టాలి ఉచరుమ. కేన్ జవున్ మాన్సుచి అత్తి దెతిసి కిప్రమానుమ్, సాచుల్చి మొక్కె జలి పిమ్మటి, కోయి వేర మాన్సు జా మార్కుప కెరుక జయె నాయ్. ‘కామ్క నెంజె’ మెనుక జయె నాయ్, కిచ్చొ వేరచి బెదవుక జయె నాయ్.

¹⁶ జలె, అబ్రాహామ్క చి జోచి సెకుమ్తె పడ్డె జెర్కుక తిలోసాకయ్ దేముడు ప్రమానుమ్ కెర సంగిలన్. ఒగ్గరెజిన్క సంగితి రితి, “తుచి సెకుమ్తె జెర్కుక తిలనక” మెన జో రెగిడ్డిన్తె నాయ్. ఎక్కిలోయిచి రిసా సంగితి రితి; “తుచి సెకుమ్తె జెర్కుక తిలోసాక” మెన రెగ్గ అస్సె. కచి రిసా మెలె, క్రీస్తుచి రిసాయి.

¹⁷ జలె, ఆవ్ సంగితి అర్దుమ్ కిచ్చొ మెలె, అగ్గె అబ్రాహామ్చి మొక్కె దేముడు జేవ్ ప్రమానల్చి కోడు సంగ ముద్ద దిలన్. ఒత్త తెంతో, చెత్తర్ పుంజో ముప్పయ్ వెర్కుల్ గెలెకయ్ జో ఆగ్నల్ రితి దిలన్. జో అగ్గె సంగ తిలి ప్రమానుమ్క, కామ్క నెంజె రితి పడ్డె అయ్ల ఆగ్నల్ మార్కుప కెరుక నెత్తిర్తి.

¹⁸ జలె, దేముడు దెతి వాట దొర్కు జతి వరుమ్ ఆగ్నల్ వాట్ జెతి జలె, జోచి ప్రమానుమ్ కామ్క నెంజితి, గని ప్రమానుమ్ వాట్కయ్ అబ్రాహామ్క జోచి దయ తెన్ వరుమ్ దిలన్.

¹⁹ దస్సి జలె, ఆగ్నల్ రితి కిచ్చొ కామ్క జెతయ్? కిచ్చొ మెలె, రచ్చన వరుమ్చి దేముడు సంగిలి ప్రమానుమ్ నెరవెర్కుప కెర్తొ జెర్కుక తిలోసా నే అయ్లి మదెనె కామ్క అయ్లి; మాన్సుల్చి బుద్దిక ‘పాపుమ్చి’ మెన రుజ్జుల్ దెకయ్తె తతి రిసా అయ్లి. పడ్డె, మదెనె జతో మాన్సు జలో మోసేచి అత్తి దూతల్ జేవ్ ఆగ్నల్ దిల.

²⁰ జలె, ఆగ్నల్ దిలిన్తె దూతల్, మోసే, మదెనె జల, గని అగ్గె తెంతో చి ప్రమానుమ్ సంగిలిసి జలె, దేముడు, సాంత, కోయి మదెనె నే జతె జా ప్రమానుమ్ దిలో, దేముడు ఎక్కిలో.

²¹ జలె, దేముడుచ ప్రమానల్క జో దిల జేవ్ ఆగ్నల్ విరోదుమ్ అస్తి గే? నాయ్. *పరలోకుమ్తె అమ్ బెదితి రచ్చన దెతి సెక్కిచి ఆగ్గు జో దెతో జలె, అమ్ పున్నిమ్ జతి రచ్చన నిజుమి ఆగ్నల్ వాటి దొర్కు జతి.

‡ 3:10 3:10 ద్వితీయోపదేశ కాండుము 27:26. § 3:11 3:11 హబక్కుకు 2:4. * 3:11 3:11 ఈంజి కోడుచి అర్దుమ్ దీగు తెన్ సంగిలి, ఇసి జయెదె: ప్రబుచి ఉప్పిరి కో నముకుమ్ తివుల గే, జోవయించి నముకుమ్చి రిసా జోవయించి పాపుమ్ పుంచ జోవయింకయ్ ‘పున్నిమ్’ మెలి రితి జో దెకెదె, చి రచ్చించువ జా జివుల. † 3:12 3:12 లేవీయకాండుమ్ 18:5. ‡ 3:13 3:13 ద్వితీయోపదేశ కాండుము 21:23. § 3:15 3:15 అప్త * 3:21 3:21 నెంజిలి జివు దెతి సెక్కిచి ఆగ్గు....

22 గని దేముడుచి కొడొ సదు కెర్లె కిచ్చొ రుజ్జు డీస్తయ్ మెలె, ఎత్తి కి పాపుమ్తె దెర్పు సేడయి అస్తి; జేలి జలి రితి; చి ఎత్తి జోవయించి సిచ్చ వయుక అస్సె. కో యేసుక్రీస్తుక నంపజవుల గే, జా పాపుమ్ జా సిచ్చ తెంతో జెవ్వి రచ్చించువ జా మెన దేముడు ప్రమానుమ్ సంగ తిలో.

23 జలె, యేసుక నంపజతి వాటు నే జెతె అగ్గె, ఆగ్గులి అమ్క ముద్దొ కెర్తె తిల. యేసుక నంపజా రచ్చించువ జతి జా వాట్ డీసిల్ ఎదక ఆగ్గులి అమ్క జేలి కెర తిల.

24 దస్సి, క్రీస్తు అయ్లి సమయుమ్ ఎద ఆగ్గుల్ అమ్క ఇండయ్తోసా జలి రితి జా, అమ్క ముద్దొ కెర్తె తిల; జో అయ్లె, జోచి ఉప్పిరి అమ్చి నముకుమ్ తిలె, దేముడుచి ఆసచి రిసా జా నముకుమ్ వాట్కయ్ అమ్క పున్నిమ్ దొర్కు జవున్.

25 గని, యేసుచి ఉప్పిరిచి నముకుమ్ వాటు దొర్కు జలి తెంతో, జా ఇండయ్తోసా జతి ఆగ్గుల్చి ముద్దొతె అమ్ నాయ్.

26 కిచ్చొక మెలె, †క్రీస్తు జలో యేసుచి ఉప్పిరిచి తుమ్చి నముకుమ్చి రిసాయి, జోవయించి తెడి తుమ్ ఎత్తిజిన్ దేముడుచ పుత్తర్లు జలదు.

27 మెలె, క్రీస్తుచ సొంత మాన్సుల్ జతి గుర్తుక తుమ్తె కో బాప్తిసుమ్ నజన అస్సున్ గే, నొవ పాలల్ గలన్లి రితి క్రీస్తుక గలన అస్సున్.

28 దస్సికయ్, తుమ్చితె 'యాదుడు' మెన, 'గ్రీసుడు' మెన, 'గొతిమాన్సు' మెన, 'గొతి నెంజిలో మాన్సు' మెన, 'మున్సుబోద' మెన, 'తేర్బోద' మెన, తేడల్ నాయ్. కిచ్చొక మెలె, తుమ్ ఎత్తిజిన్ క్రీస్తు జలో యేసుచి తెడి ఎక్కి జా అస్సున్.

29 తుమ్ క్రీస్తుచ మాన్సుల్ జలదు మెలె, 'బగ్గర్జిన్ తుచ పుత్తర్లు రిత జవుల' మెన దేముడు అబ్రాహామ్క సంగిలన తూమ్ జా అస్సున్, జో అబ్రాహామ్చి వాట తుమ్కయ్ కి సేడ్తయ్.

4

దేముడుచి దయచి రిసా జోచ పుత్తర్లు

1 జలె, ఆవ్ కిచ్చొ మెంతసి మెలె, ఎజోమానిచొ పుత్తుసి బాల తతె, గొతిమాన్సుచి రితి దాకు జా అబ్బొన్చి తెడి తయెదె; అబ్బొన్చి అస్తి ఎత్తి జోచి అస్తి జయెదె మెలె కి.

† 3:26 3:26 'క్రీస్తు' మెలె, పూర్ణమ్ తెంతో 'తెద్రయిందె' మెన ఎత్తి అదికారుమ్ తిలో దేముడు సంగిలో దొర్కు జలో రచ్చించువ కెర్తొసా. * 4:10 4:10 జేవ్ యూదుల్ నెంజిలనచ సిస్టల్తె దస ఆగ్గుల్ తవుల, యూదుల్చి అలవాట్తె కి దస ఆగ్గుల్ తిల మెనుక జయెదె. జేక, జేవ్ గలతియుల్చ నంపజలన యూదుల్ జతి గుర్తుచి సున్నతి కెరంతిసి గట్రచ ఆగ్గుల్క బిలె, జోవయించి అగ్గెచి రితచ ఆగ్గుల్తె, మెలె, ఈంజ జా కెర్లె గార్ మెంత ఈంజ జా కెర్లె పున్నిమ్ మెంత ఆగ్గుల్తె అన్నె దెర్పు సేడ్డి రితి జతయ్. † 4:12 4:12 జో యూదుడు జెర్లిలకి, జోవయింతెన్ బెద జోవయించి రితి జా తిలన్. జేక, జేవ్ జోవయింక దెక జోతె ఇదిల్ సికుక జయెదె.

2 జా మదెనె, అబ్బొసి అగ్గె తెంతో రెగిడ్డి దీసి ఎద, జో ఉబెడొ జోక దెకిత వెల్లెల మాన్సుల్చి, ఇండయ్తోసాచి, ముద్దొచి తెడి తయెదె.

3 అమ్చి తెన్ కి దస్సి, ఆత్మక అమ్ బాలబోదల్ రిత తిలె పొది, మాములుమ్ ఈంజ లోకుమ్చి, బాలబోదల్ అర్దుమ్ కెరంతి ఎదిలి గ్యానుమ్క గొతిమాన్సుల్ రిత జా తిలమ్.

4 గని కాలుమ్ బెర్దు జా అయ్లి పొది, దేముడు జోచొ సొంత పుత్తున్క తేర్బోదచి పెట్టి జెర్మయ్లి రితి, ఆగ్గుల్ రిత యూదుల్తె జెర్మయ్లి రితి ఈంజ లోకుమ్తె తెద్రయ్లన్.

5 కిచ్చొక మెలె, ఆగ్గుల్చి తెడి అమ్ తిలనక జా ఆగ్గుల్ రితి పాపుమ్ వయడ్డిసి తెంతో నెతోవ గెల ములయ్లో మెనయ్, అమ్ ఎత్తిజిన్ నంపజలనక 'అంచ పుత్తర్లు జతు' మెనయ్, జో దేముడు అబ్బొసి జోచొ పుత్తున్క తెద్రయ్లన్.

6 పడ్డొ తుమ్క 'జేవ్ కి నిజుమి జోవయించ పుత్తర్లు జల' మెన అమ్ జాన్లి రిసా, దేముడు జోచొ పుత్తున్చి ఆత్మ అమ్చి పెట్టి తెద్రవ అస్సె, చి జా కోడు ఒప్పన్తి సర్దక 'ఓ బ, ఓ బ' మెన అమ్ జోక ఉంక్రయ్తనుమ్.

7 దస్సి, దేముడుచి దయచి రిసా, తుమ్ అప్పె తెంతో అగ్గెచి రితి గొతిమాన్సుల్ నెంజును. జోచ పుత్తర్లు జా అస్సున్, చి జోచ పుత్తర్లు జలదు మెలె, జోచి రాజిమ్తె తుమ్క వాట అస్సె.

గలతియుల్క జాగర్త సంగిలిసి

8 అగ్గెయి, దేముడుక తుమ్ నేన్లి పొది, 'దేముడ్లు' మెన దేముడ్లు నెంజిలనక గొతిమాన్సుల్ రిత జా తిలదు.

9 గని, అప్పె, తుమ్ దేముడు తెన్ బెదిలి తెంతో, మెలె, జో తుమ్క కి బెదవన్లి తెంతో, తుమ్ జోచ గొతిమాన్సుల్ రిత అన్నె జంక ఇస్టుమ్ జలి రితి జా, కిచ్చొక దస ఎద్దరె సెక్తి నెంజిల కమొతె అన్నె బెదిల్ రితి జంక దెర్తున్?

10 దీసిక, జోనుక, కాలుమ్క, వెర్కుక కిచ్చొ కారిమ్లు కెర్లె కామ్క జెయెదె మెన *జాడ్లు వయడ్డ ఆగ్గుల్తె తుమ్ అన్నె దెర్పు సేడ్డను!

11 జాకయ్, 'దస అల్లర్ తెంతో విడ్డల్ జతు' మెన తుమ్చి రిసా ఆవ్ సైమ సేడ్డిసి ఎత్తి ఆరి పాడ్ జా గెతయ్ మెన ఆవ్ బితసి.

వవులుచి రిసా గలతియుల్ అన్మానుమ్

12 ఓ బాపుడ్లు, తుమ్క ఆవ్ కిచ్చొ బతిమాల్పా జా సంగితసి మెలె, తూమ్ అంచి రితి జా. ఆవ్ కి తుమ్చొ రితో జా అస్సి.†

ఆవ్ తుమ్చి తెన్ తిలి పొది, తుమ్ అంక కిచ్చొ పొరపాట్ కెర్చు నాయ్.

13 అంచి అగి ఏక్ బాద తిలి రిసాయ్, తుమ్తె తెదొడి తా సుబుమ్ కబుర్ సూనవుక అంక వాట్ అయ్లి మెన జాన్సు.

14 తెదొడి అంచి బాద తుమ్క అల్లర్ కెర్లె కి, అంక ఆసున్ నాయ్, నిస్కారుమ్ దెకున్ నాయ్, గని దేముడుచొ దూత ఎక్కిలో జో, నెంజిత 'క్రిస్తుయేసు రితో' మెలి రితి అంక దెక, మరియాద కెర్లదు.

15 జలె, అంచి రిసాచి తుమ్చి తెదొడచి సర్ల అప్పె కేతె? తెదొడి అంచి బాద చి రిసా, తెర్లె తుమ్చ సొంత అంకివ్ కడ కెర అంక దెతదు మెన ఆవ్ సాచి సంగితసి.

16 దస్సి జలె, మదెనె "ఆగ్నల్ వయడ్డి జాడు వయ్తినతె తుమ్ అన్నె గెచ్చు పొరపాట్ జతను" మెన తుమ్క ఆవ్ సత్తిమ్ సంగిలి రిసా 'తుమ్క విరోదుమ్ జా అస్సె' మెన అంచి రిసా ఉచర్లసు గే?

17 ఆగ్నల్క సంపజా బలవంతుమ్ కెర్లస, జలె, తుమ్క పులయ్తతి; గని బుద్ది నెంజిలి కామ్ ఉచరయ్ దస్సి కెర్లతి. మెలె, జోవయింకయ్ తుమ్ వెల్లొ మెన దెకుక జోవయించి ఆస, చి అంక తుమ్క దూరి కెరుక ఉచర అస్తి.

18 చెంగిల్ కామ్క, జలె, మాన్సు అమ్క మెన్సిలె చెంగిలి. అంక, జలె, ఎక్కి ఆవ్ తుమ్చి తెన్ తిలె పొది నాయ్, గని ఆవ్ ఉట్ట అయ్లె పొది కి సర్ల తెన్ దెకితదు, జలె, సర్ల జతయ్.

19 ఓ పుత్తర్లు, క్రీస్తు తుమ్ ఇండితి రితితె సరిగా డీస్తె ఎదక అన్నె అంక బోద పాయితి తేర్బోదచి రితి నొప్పి!

20 తుమ్చి తెన్ ఆవ్ అప్పె తంక జతి, జలె, తుమ్క 'నాయ్, నిదానుమ్ అస్తి' మెన ఆవ్ రుజ్జు దెకుక జతి, జలె, సర్ల జతయ్. మదెనె, తుమ్చి రిసా కిచ్చొ కెరుక గే ఆవ్ నేన గెచ్చు అస్సి.

గొతిమాన్సు గొతి నెంజిల్ మాన్సు

21 దేముడు మోసే తెన్ దిలి ఆగ్నల్చి రితిచి తెడి తంక తుమ్ ఇస్టుమ్ జలస అంక జబాబ్ సంగ. దేముడు మోసే తెన్ దిలి ఆగ్నల్తె తిలిసి సూన్సు నాయ్ గే?

22 ఒత్త రెగిణ్ణిసి ఏక్ కిచ్చొ మెలె, అబ్రాహామ్క దొగు పుత్తర్లు తిల. ఎక్కిలో హాగరు మెలి గొతిమాన్సుచి పెట్టి జెర్మిలన్. అన్నెక్లొ, జలె, తేర్ని జలి సారాచి పెట్టి జెర్మిలన్.

23 జా గొతిమాన్సు జలి హాగరు చి పెట్టి జెర్మిలొసా, జలె, ‡మాన్సుచి ఇస్టుమ్కయ్ జెర్మిలన్. గని, తేర్ని జలి సారాచి

‡ 4:23 4:23 ఆదికాండుమ్ 16:1-5. సంతానుమ్ నెంజితికయ్, 'అంచి గొతిమాన్సు హాగరు తెన్ సంతానుమ్ పాయి' మెన సారా మున్సున్ జలొ అబ్రాహామ్క సికడ్లన్, చి హాగరు పుత్తు పాయ సారాక నిస్కారుమ్ దెకుక దెర్లన్. § 4:23 4:23 ఆదికాండుమ్ 17:15-19. * 4:27 4:27 యెసయా పుస్తకుమ్ 54:1.

† 4:27 4:27 సారా. ‡ 4:27 4:27 సారా. § 4:27 4:27 హాగరు. * 4:27 4:27 సారా. † 4:27 4:27 యెసుక్రిస్తుక సంపజలో ఎత్కి మాన్సు అత్తుక అబ్రాహామ్చి గొతి నెంజిలి సంతానుమ్ జవుల. జోవయించి రిసా 'ఒగ్గర్జిన్ పుత్తర్లు' మెన పవులు ఇన్నె సంగితయ్. ‡ 4:30 4:30 ఆదికాండుమ్ 21:10. § 4:30 4:30 యెసుచి ఉప్పిరి నముకుమ్ తిలసచి టాలి. * 4:30 4:30 ఆగ్నల్చి ఉప్పిరి నముకుమ్ తియ్ ఆగ్నల్క గొతిమాన్సుల్క చి టాలి.

పెట్టి జెర్మిలొసా, జలె, దేముడు సంగిలి కీప్రమానుమ్చి రిసా జెర్మిలన్.

24 ఈంజ మత్తెలి, జలె, అమ్క టాలి దెకయ్తయ్. ఈంజేవ్ దొగుల తేర్బోదల్క దెకిలె, దేముడు సంగిలి దొన్ని ప్రమానుమ్చి రితి జతయ్. ఏక్ ప్రమానుమ్ జో సీనాయి డొంగుర్తె ఆగ్నల్ దిలిన్చి ప్రమానుమ్. అన్నెక్ ప్రమానుమ్, హాగరు మెలి జా గొతిమాన్సుచి రితి జా, గొతి జత మాన్సుల్ పాయితయ్.

25 అరోబియ దేసిమ్చి సీనాయి డొంగుర్తె దిలి ఆగ్నల్క టాలి జతయ్. జలె, అప్పె ఈంజ లోకుమ్చి యెరూసలేమ్ పట్టుమ్క కి టాలి జయెదె. కిసి మెలె, యెరూసలేమ్ పట్టుమ్, యూదుల్ జల జేవ్చ బోదల్ తెన్, ఆగ్నల్క గొతి జా అస్సె.

26 గని సారా టాలి జలి పరలోకుమ్ తిలి యెరూసలేమ్ పట్టుమ్, జలె, గొతి జలిసి నెంజె. యెసుప్రబుక సంపజలసక జయ్యి అయ్య.

27 సారాక చి హాగరుక జర్గు జలిన్చి రిసా దేముడుచి కొడొతె రెగిణ్ణి రితి,

* "†గొడ్డు జలి తేర్బోద, తుయి సర్ల జా!

‡నొప్పుల్ నే జలి తేర్బోద, తుచి సర్లక కేక్ గలు!

కిచ్చొక మెలె, కీమున్సున్ తెన్ అగ్గె తెంతో బోద పాయిలి గొతిమాన్సుచి కంట,

జా గొతిమాన్సు నిస్కారుమ్ దెకిలి అగ్గె బోదల్ నెంజిలి *తేర్బోదక

అన్నె ఒగ్గర్జిన్ †పుత్తర్లులు జెర్మ అస్తి."

28 అబ్రాహామ్చి తేర్ని జతి సారాక "తుచి పెట్టి అబ్రాహామ్క సంతానుమ్ దెయిందె" మెన దేముడు సంగ తిలన్. జా ప్రమానుమ్క జెర్మిలొసా ఇస్సాకు. జలె, బావుడ్లు, ఇస్సాకుచి రితి, అమ్ యెసుక సంపజలస ప్రమానుమ్చి రిసాచ బోదల్ జలమ్.

29 జలె, జా పొది, దేముడుచి సుద్ది తిలి ఆత్మచి ఇస్టుమ్క జో జెర్మయ్లో ఇస్సాకుక, మాన్సుచి ఇస్టుమ్క జెర్మిలో హాగరు చి పెట్టిచొ ఇస్సాయేల్ అల్లర్ కెర్లె తిలన్. అప్పె కి, ఆగ్నల్ రితి గొతి జలి రితి జా ఆగ్నల్చి రితి సేవ కెర్లస జా గొతి ప్రమానుమ్ తెంతో విడ్డల్ జల సంపజలసక అల్లర్ కెర్లతి.

30 గని, దేముడుచి కొడొతె రెగ్డయ్లిసి కిచ్చొ మెలె,

‡ "గొతిమాన్సుక చి జేవ్ తెన్ జేవ్చొ పుత్తున్క ఉదడ గెలు.

కిచ్చొక మెలె, గొతి నెంజిలి మాన్సుచొ కీపుత్తున్క దొర్కు జతి వరుమ్తె గొతి తిలి మాన్సుచొ *పుత్తున్క వాట నాయ్” మెన రెగిడ్లి కోడు.

31 జలె, బావుడ్లు, అమ్ యేసుచి ఉప్పిరి నముకుమ్ తిలన గొతిమాన్సుల్చ బోదల్ నెంజుమ్. గొతి నెంజిలి మాన్సుల్చ ఆము.

5

యూదుల్ జతి గుర్తుచి సున్నతి రిసొ పవులు తీర్పు సంగిలిసి

1 అమ్క ‘ఆగ్గుల్ ప్రమానుమ్చి గొతి సేవ తెంతొ విడ్డల్ జలి రితి ఇండుత్’ మెనయ్, క్రీస్తు అమ్క విడ్డల్ కెర అస్సె. జాకయ్, తుమ్ జోవయించి తెడి డిట్టుమ్ తా, ఆగ్గుల్క గొతిమాన్సుల్ రిత జతిన్తె అన్నె దెర్ను సేడ నాయ్.

2 జలె, ఆవ్ పవులు తుమ్క కిచ్చొ మెంతసి మెలె, యూదుల్ జతి గుర్తుచి జా సున్నతి తుమ్ కెరన్లె, క్రీస్తుక విరోదుమ్ జలి రితి, చి క్రీస్తు ఆరి దొర్కు కెర్లి రచ్చనక తుమ్ నే విలువ దిలి రితి జయెదె.

3 జా సున్నతి కెరసుక ఉచర్తొ ఎత్తి మాన్సుక ఆవ్ కిచ్చొ రుజ్జు సంగితసి మెలె, యూదుల్చ ఆగ్గుల్చి ఎత్తి కోడు జో మాన్సు నిదానుమ్ కెరుక అస్సె, కెరుక ఒప్పున అస్సె.

4 ‘యూదుల్చ ఆగ్గుల్ వాట్ అమ్క పున్నిమ్ దొర్కు జయెదె, అమ్చి పాపుమ్ గెచ్చెదె’ మెన కో ఉచర్తసు జలె, తుమ్ క్రీస్తుక విరోదుమ్ జలి రితి జా ముల అస్సెన్. మెలె, జోచి దయ వాటు దొర్కు జలి రచ్చనచి తెడి తెంతొ ఎట్టొ సేడ అస్సెన్.

5 అమ్ ఎక్కి ప్రబుచి ఉప్పిరి నముకుమ్ తిలయ, అమ్చి పెట్టి దిలి జోచి ఆత్మ తెన్, జోయ్యి అమ్చి పాపుమ్ పుంచ అస్సె, చి జోచి పున్నిమ్చి రిసొ దయిరిమ్ తెన్ రకితసుమ్.

6 క్రీస్తుచి తెడి తిలె, యూదుల్చి గుర్తుచి సున్నతి కెరన తిలె లాబుమ్ నాయ్, నే కెరన్లె నస్టుమ్ నాయ్. జా కెరంతిన్తె నే కెరంతిన్తె కిచ్చొ నాయ్. గని కిచ్చొ కామ్క జెతయ్ మెలె, ఎక్కి క్రీస్తుకయ్ నంపజతిసి, చి ప్రేమ ఇండితిన్తె జా నముకుమ్ దెకయ్తిసి.

7 తుమ్ అగ్గెయి నముకుమ్తె ఇండితె తిలదు. ప్రబుచి దయ వాటుచి రచ్చనచి సత్తిమ్ తెన్ బెదితి రితి తుమ్ ఇండితిసి కో అడ్డు కెర్ల?

8 జా సున్నతి కెరంతి ఆగ్గుల్చి రితి అప్పె ఉచర్తి కామ్ తుమ్క బుకార్లొ క్రీస్తు సికడ్లిసి నెంజె.

9 జాగర్త, పాకుమ్తె ఇదిలిదిల్ పులయ్తి పిట్ సేడ తిలె, ఒండి పాకుమ్ పుల గెచ్చెదె, గెద.

10 జలె, తుమ్క ‘అంచి కంట వేర ఉచర్తి నాయ్’ మెన, ప్రబుచి తెడి అంక దయిరిమ్. అన్నె, తుమ్క సిక్కు కెర్లొసొ, జో కొన్సొ జలెకి, జోచి పాపుమ్చి సిచ్చొ జో వయెదె.

11 బావుడ్లు, ఆవ్ అప్పెక ‘యూదుల్చి గుర్తుచి సున్నతితె, యూదుల్ జతిన్తె రచ్చన’ మెన సికడ్లిసొ ఆవ్ జతయ్ జలె, కిచ్చొక జేవ్ అంక అల్లర్ కెర్తతి? ఆవ్ అప్పెక దస్సి సికడ్తయ్ జలె, ‘యేసు సిలువతె మొర్లిసి అమ్చి పాపుమ్ గెచ్చయ్తిన్క సాలు’ మెన ఆవ్ సంగుక నెంజితి, చి జోవయింక నొప్పి దెతయ్ నాయ్.

12 జలె, తుమ్క సిక్కు కెర్తన జోవయింక జెవ్వి ఒండి కుటవన గార్ కెరంతు, మెన అవ్ ఉచర్తసి!

యేసుక నంపజలన ప్రబుచి ఆత్మక ప్రేమతె ఇండుక

13 ‘ఆగ్గుల్చి ప్రమానుమ్క గొతి సేవ తెంతొ విడ్డల్ జలి రితి ఇండుత్’ మెన ప్రబు తుమ్క బుకార్లన్, బావుడ్లు. గని ‘ఆగ్గుల్చ గొతిమాన్సుల్ నెంజుమ్, చి ఆగ్గక ఇస్టుమ్ అయ్లి రితి ఇండుక జయెదె’ మెన తుమ్ ఉచర నాయ్, గని ప్రబుచి ప్రేమ తెన్ తా, ఎక్కిలోక ఎక్కిలో సేవ కెర్తె తా.

14 కిచ్చొక మెలె, దేముడు మోసే తెన్ దిలి ఆగ్గుల్ ఎత్తి ఎక్కి ఈంజ కోడుతె బెదితయ్. కేన్ కోడుతె మెలె,

*“తుమ్కయ్ తూమ్ కెర్తి ప్రేమ కెరంతసు గే, పక్కయ్చొక తుమ్ తెర్తి ప్రేమ కెరుకయ్”

మెన రెగిడ్లి కోడు.

15 గని తుమ్ కుస్సిదుమ్ తెన్ తా ఎక్కిలోక ఎక్కిలో చప్ల చుప్లి రితి జతసు జలె, తుమ్ ఎత్తిజిన్ ఎక్కిలోచి అత్తి ఎక్కిలో ఆత్మక నాసెనుమ్ నే జతి రితి జాగర్త తెన్ తా.

16 జలె, ఆవ్ కిచ్చొ సంగితసి మెలె, దేముడుచి సుద్ది తిలి ఆత్మచి సెక్తిక ఇండ, తుమ్చి ఆగ్గచ ఆసల్ జర్గు కెర్తి రితి ఇండుక పోస.

17 కిచ్చొక మెలె, అమ్ మాన్సుల్చి ఆగ్గుచ ఆసల్, దేముడుచి సుద్ది తిలి ఆత్మక విరోదుమ్ జతయ్, అన్నె, మాన్సుచి ఆగ్గచ ఆసల్క జోచి ఆత్మచి ఇస్టుమ్క విరోదుమ్ జతయ్, చి రిసొ జేవ్ దొన్ని యుద్దుమ్ రితి కెరంతిన్తె తుమ్ నెడిమి సేడ, తుమ్ ఇస్టుమ్ జలిసి జర్గు కెరుక నెతుర్పు.

18 గని తుమ్ దేముడుచి సుద్ది తిలి ఆత్మచి సెక్తిక ఇండితసు జలె, దేముడు మోసే తెన్ దిలి ఆగ్గుల్ తెడిచ మాన్సుల్ నెంజున్.

19 జలె, మాన్సుచి ఆగ్గచ ఆసల్ రితి ఇండితిన్తె ఇనచ తయెదె మెన కిచ్చొ కిచ్చొచి రిసొ ఎత్తిజిన్ చినుక జయెదె మెలె, లంజెకమొ, లంజెబుద్ది, ఆగ్గచి ఆస ముద్దొ నే కెరంతిసి,

20 బొమ్మల్క జొకర్తసి. అన్నెక్ కిచ్చొ మెలె, మెంగిర్తిసి, దోసుమ్ గట్ట కెర్తిసి, గుర్తయ్ గట్ట వెసితిసి, దస్సిచి. పడ్డె,

* 5:14 5:14 లేవీయకాండుమ్ 19:18, మత్తయి 19:19.

విరోధుడు, కొడొ జుజువ ఎక్కిలోక ఎక్కిలో గగ్గోల్ జతిసి, గోసబుద్ది, కోపుమ్, గార్ ఆసల్, జట్టు జతిసి, ఎక్కిలో ఉచర్తినీచి ఉప్పిరి అన్నెక్కో నిస్కారుమ్ ఉచర్తినీ,

21 గోసల్ కెర్తినీ, మచ్చితిసి, 'సర్ల కెర్తసుమ్' మెన వెట్కారుమ్ జతిసి, దస్సు కమొ. దసచ పోస. ఆవ్ అగ్గె తెంతో జాగర్ల సంగిల్ రితి, అప్పె కి తుమ్క కిచ్చో జాగర్ల సంగితసి మెలె, దస కమొ కెర్తస జలె, దేముడుచి రాజిమ్తె జోవయింక కిచ్చో వాట తయె నాయ్.

ప్రబుచి ఆత్మపలితుమ్ దెర్ల కమొ

22 గని, దేముడుచి సుద్ది తిలి ఆత్మ అమ్చి పెట్టి తిలె, కిచ్చో పలితుమ్ దెరెదె మెలె, ప్రేమ, సంతోసుమ్, సేంతుమ్, ఒగ్గర్ సేంతుమ్, దయ దర్ముమ్, చెంగిల్ బుద్ది, నముకుమ్, ఒర్పుప జా మెత్తన తతిబుద్ది, దర్ముమ్ నిదాసుమ్ బుద్ది,

23 గవురుమ్ నే దెకన్తె అన్నె మాన్సుల్క మరియాద దెకితిసి, ముద్దో కెరంతిసి. ఇసచక కేన్ ఆగ్గు కి పోస మెనె నాయ్.

24 అన్నె, క్రీస్తు జలొ యేసుక నంపజా సొంత జల మాన్సుల్, జోవయించ ఆగ్గెచ పాపుమ్చి బుద్దిచి సొంత ఆసల్ క్రీస్తు మొర్లి సిలువతె గల ముల దా అస్తి.

25 దేముడుచి సుద్ది తిలి ఆత్మ తెన్ జీవ్ జా అస్సుమ్ జలె, జోచి ఆత్మసెక్కిక దస్సి ఇండుమ.

26 దస్సి, అమ్చి పెట్టి కిచ్చో గవురుమ్ ఉచరనుక పోస. ఎక్కిలోక ఎక్కిలో కోపల్ కెరవుక పోస, ఎక్కిలోచి ఉప్పిరి ఎక్కిలో గోసల్ జంక పోస.

6

ఎత్కిక చెంగిల్ కెర్తినీచి

1 బావుడ్లు, తుమ్తె కేన్ మాన్సు కిచ్చో పాపుమ్తె దెర్లు సేడ అస్సె జలె, జో అన్నె బుద్ది జతి రితి, తుమ్ ఆత్మ వడ్డెలస జోవయింక బమ్మ నే కెర్తి బుద్ది తెన్ జోవయింక చెంగిల్ వాటు దెకవ. పడ్డె, తుమ్ సొంత పాపుమ్ నే సేడ్డి రితి, జాగర్ల దెకన.

2 ఎక్కిలోచ జాడ్లు అన్నెక్కో వయితి రితి, ఎక్కిలోక ఎక్కిలో తోడు తా. దస్సి కెర్తె, ప్రేమచి రిసాచి క్రీస్తు దిలి *ముక్కిమ్ ఆగ్గు నెరవెర్పుప కెర్తె.

3 కిచ్చోక మెలె, కో జలెకు ఆరిచో జా తా, జోక జోయ్యి నిసాన్లొ మాన్సు మెన ఉచరంతయ్ గే, జోక జోయ్యి మోసిమ్ కెరంతయ్.

4 జాకయ్, ఎత్కి మాన్సు జోవయించి సొంత కామ్ పరిచ్చు కెరన్సు, చి అన్నె మాన్సుల్చ కమొచి రిసా తీర్పు నే కెర్తె, సొంతయ్ కామ్ దెక్కన జాక 'చెంగిల్' గే 'గార్' గే చిననుక జయెదె, చి 'చెంగిల్' మెలె, జో సర్ల జంక జయెదె.

* 6:2 6:2 మత్తయి 22:37-40, మార్కు 12:28-31.

5 కిచ్చోక మెలె, సొంత కామ్చి రిసా ఎత్కి మాన్సుక జోచి పూచి.

6 ప్రబుచి కోడు సంగితోసాక సికితస, జోక తిలిన్ ఎత్కితె సికడ్డసక చెంగిల్ వాట దెంక అస్సె.

7 తుమ్ మోసిమ్ కెరన నాయ్. దేముడుక కొంకడ్డి రితి కెర్లె జీనుక నెంజె. కిచ్చోక మెలె, ఎత్కి మాన్సు కిచ్చో రగుమ్ బి గలెదె గే, దస్సిచి పంటొ లాయెదె.

8 సొంత ఆగ్గెచ ఆసల్ జర్గు కెరంతి రితి బి కో గలుల గే, జా దెర్లి పంటొ కిచ్చో లాయిల మెలె, జోవయించి సొంత నానెనుమ్. గని, దేముడుచి సుద్ది తిలి ఆత్మక చి బి కో గలుల గే, జా దెర్లి పంటొ కిచ్చో లాయిల మెలె, పరలోకుమ్తె బెద్ద కెయ్క తెయ్క చెంగిల్ జితిసి.

9 అన్నె, చెంగిల్ కమొ కెరుక బద్దుకుమ్ జమ నాయ్. కిచ్చోక మెలె, చెంగిల్ కమొ కెరుక మదెనె అమ్చి మెన్సు నే బగిలె, జా చెంగిల్ పంటొ లాయుమ్దె.

10 జాకయ్, కేన్ వాటు అయ్లె, ఎత్కిజిన్ మాన్సుల్క చెంగిల్చి కెరుమ, తోడు కెర్తె తమ; ముక్కిమ్క, ప్రబుచి ఉప్పిరి నముకుమ్ తిలి రిసా జోవయించి కుటుంబుమ్ జలసకయ్.

సున్నతిచి రిసా బలవంతుమ్ కెర్తినీచి రిసా

11 కెర్తి వెల్లొ అలవాట్లు తెన్ ఆవ్ సొంత ఆతు తెన్ తుమ్క రెగిడ్డసి గే చిన.

12 'యూదుల్ జతి గుర్తుచి సున్నతి తుమ్ కెరన' మెన తుమ్క బలవంతుమ్ కెర్తస కిచ్చోక దస్సి జతతి మెలె, జేచి గవురుమ్కయ్ కెర్తతి. 'ఎక్కి క్రీస్తు సిలువతె మొర్లిన్తెయి అమ్చి రచ్చన' మెన ఒప్పన్లెగిన, అన్నె మాన్సుల్ జేచి అల్లర్ కెరుల మెనయ్ బియ్కెర, జేవ్ దస్సి కెర్తతి.

13 పడ్డె, జేవ్ జా సున్నతి కెరన్లసయ్ కి యూదుల్చ ఆగ్గుల్క నిదానుమ్ కెర్తి నాయ్, గని 'జోవయింక కి అమ్మి మార్పుప కెర్లమ్' మెన గవురుమ్ అననుక ఉచరయ్, తుమ్క 'సున్నతి కెరంతు' మెన బలవంతుమ్ కెర్తతి.

14 ఆవ్, జలె, ఎత్కిక పిట్టవ, కిచ్చో వేరచిచి ఉప్పిరి గవురుమ్ ఉచరనుక నెసి. ఎక్కి అమ్చో ప్రబు జలొ క్రీస్తు సిలువతె మొర్లిన్కయ్ గవురుమ్ ఉచర్తసి. జో మొర అంక పాపుమ్ తెంతో రచ్చించుప కెర్తి రిసా, ఈంజ లోకుమ్తె తిలిసి ఎత్కి అంక మొర్లి రితి జా అస్సె. ఆవ్ కి ఈంజ లోకుమ్తె తిలిన్కయ్ సిలువ గెలన అస్సి, చి అంచి ఉప్పిరి జా ఎత్కిక కిచ్చో సెక్తి నాయ్, దస్సిచి అంక ఆస నాయ్.

15 యూదుల్చి గుర్తుచి సున్నతి కెరన తిలె కి లాబుమ్ నాయ్. నే కెరన తిలె కి నస్టుమ్ నాయ్. కిచ్చో ముక్కిమ్ మెలె, దేముడుచి సుద్ది తిలి ఆత్మ తెన్ నోవర్ జెర్లిలిసి.

16 యేసుక నంపజా నిజామ్చ ఇస్రాయేలులు జల దేముడు నిసాన్ల జోచయ్ మాన్సుల్క, జోచి ఆత్మక జెర్లు

జోచి ఆత్మ నే సెక్తిక ఇండిత మాన్సుల్కయ్ జో సేంతుమ్,
కన్కారుమ్ దెకున్.

¹⁷ జలె, ఈంజ తగుచి రిసా అప్పె తెంతో అన్నె కో అంక
అల్లర్ కెర్తు నాయ్. అంచి సత్తిమ్క రుజ్జు కావలె మెలె,
యేసుచి నావ్చి రిసా ఆవ్ నైమల్ సేథ్ల మచ్చల్ అంచి అఱి
అస్సి.

¹⁸ తుమ్చి ఆత్మ తెన్ ప్రబు జలొ అమ్చొ యేసుక్రీస్తుచి
దయ తా తుమ్క తోడు తవుసు, బావుడ్లు. ఆమేన్†.

ఎపెసియుల్ క రెగిడ్లి ఉత్త్రుమ్ బారిక్ జలో పవులు ఎపెసు పట్టుమ్చ సంగుమ్చక రెగిడ్లి ఉత్త్రుమ్.

మొదొల్ కోడు

1 దేముడుచి సెలవచి రిసా క్రీస్తు రచ్చించుప కెర్తొసా జలో యేసుచి నుబుమ్ కబుర్ కామ్ కెర్తి రిసా, జో దిలి అదికారుమ్ తెన్ జోక బారికి జలో ఆవ్ పవులు, *ఎపెసు పట్టుమ్తెచ †క్రీస్తు జలో యేసుక నంపజా, సుద్ది జా జోచయ్ మాన్సుల్ జా, జోచి తెడి తా నిదానుమ్ జలసక, రెగిడ్లి ఉత్త్రుమ్.

అగ్గె తెంతో దేముడు ఉచర్లి రచ్చన

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ, సేతుమ్, తుమ్చి ఉప్పిరి తవున్!

3 అమ్చొ ప్రబు జలో యేసుక్రీస్తుక దేముడు జలో అబ్బొన్ జలో దేముడుక జెయ్యి! క్రీస్తుచి అత్తి జో అమ్క దయ కెర, ‡జోచి రాజిమ్తె అమ్క బెదవ, ఆత్మవరల్ ఎత్తి అమ్క జో దా అస్సె.

4 దస్సి, అమ్క, 'క్రీస్తుచి తెడి జోచి పరలోకుమ్చి సుద్ది జా అంచి మొక్క పున్చిమ్ జతు' మెన, లోకుమ్ నే జెర్మితె అగ్గె తెంతో జో అమ్క నిసాన్లన్.

5 అగ్గె తెంతో, జోచి ప్రేమక ఉచర, జోచి సొంత ఇస్తుమ్క, 'అంచొ పుత్తు జలో యేసుక్రీస్తుచి తెడి జేవ్ కి అంచ పుత్తుర్లు జవుల' మెన, అమ్క వరుమ్ దిలన్.

6 పూర్తి ప్రేమ జలో పుత్తున్చి అత్తి గవురుమ్ జలి జోచి ఎదివాల్ కీదయ అమ్చి ఉప్పిరి జో తిలన్; జోచి నావ్ గవురుమ్ జవున్!

7 జో యేసుయి సెలువతె జోచి లోయి గేడవ అమ్చి పాపుమ్ పుంచ, అమ్ కెర్ల పాపల్ చెమించుప కెర, అమ్క *నెతోవ గెల అస్సె;

8 జోచి ఎదివాల్ దయ అమ్చి ఉప్పిరి దేముడు అబ్బొసి తిలి రిసా అమ్క †నెతోవ గెల అస్సె.

9 ఎత్తి అర్దుమ్ చినుత్ బుద్ది తెన్ జో దేముడు అబ్బొసి అగ్గె తెంతో ఉచర్లిసి మదెనె గుట్టు తిలి రితి జా తిలె కి, అమ్ నూన్తి రితి, జో అప్పె బార్ కెర అస్సె.

10 మెలె, క్రీస్తు జలో రచ్చించుప కెర్తొసాక తెద్రవుక మెన, దేముడు ఉచర్ల దీసల్ బెర్తి కాలుమ్క జెయిమ్ కెరిందె మెన జో అగ్గె తెంతో ఉచర్లిసి. కిచ్చొక క్రీస్తు జలో రచ్చించుప కెర్తొసాక జో తెద్రవుక తిలి మెలె, పరలోకుమ్తె తిలిసి ఎత్తి కి, బూలోకుమ్తె తిలిసి ఎత్తి కి ఎత్తి కి జో క్రీస్తుచి తెడి ఎక్కి కట్టు జతి రితి బెదవుక.

11 జోచి సొంత ఇస్తుమ్క ఎత్తి జర్లు కెర్తొ దేముడు 'చెంగిల్' మెన కిచ్చొ ఉచర్తయ్ గే, జా ఎత్తి కచితుమ్ జర్లు జయెదె. 'జర్లు జవున్' మెన అమ్చి రిసా జో ఉచర్లిసి కి జో క్రీస్తుచి అత్తి జర్లు జలి.

12 కిచ్చొ మెలె, జో దేముడుచి గవురుమ్ ఈంజ లోకుమ్తె డీస్తి రితి అమ్ ఇండుక మెన, క్రీస్తుక నంపజా జోవయిచి తెడి దయిరిమ్ జలసక అగ్గెయి తెంతో జోవయిచి సెలవ, అగ్గెయి తెంతో జా వరుమ్ దా అమ్క జోయ్యి నిసాన అస్సె.

13 సత్తిమ్ తిలి ‡కోడు, మెలె తుమ్ యూదుల్ నెంజిలన కి రచ్చించుప జతి వరుమ్ దొర్కు జతి సుబుమ్ కబుర్ తుమ్ కి నూన నంపజా అయ్లి రిసా, 'జా వరుమ్ దిలి రుజ్జుక అంచ మాన్సుల్చి పెట్టి అంచి ఆత్మ దెయిందె' మెన దేముడు ప్రమానుమ్ కెర తిలి జోచి సుద్ది తిలి ఆత్మ తుమ్చి పెట్టి కి దా తుమ్క 'అంచయ్' మెన జోచి ముద్ర దా అస్సె.

14 అమ్ నంపజలసక కీనెతోవ గెల అస్సి, చి పరలోకుమ్తె బెదితి వాట తుమ్క కచితుమ్ దొర్కు కెర అస్సి మెనయ్ జో ప్రమానుమ్ కెర్లిసి పూర్తి జర్లు జతె ఎదక ఈంజ బజాన్ జయెదె. ఈంజ ఎత్తిచి రిసా జోచి గవురుమ్ డీసెదె.

పవులు ప్రార్దన కెర్లిసి

15 ఈంజ తుమ్క జోచి సుద్ది తిలి ఆత్మ దిలి వరుమ్చి రిసా, ప్రబు జలో యేసుచి ఉప్పిరి తుమ్ నముకుమ్ తిలి రిసా, పడ్డొ జోచయ్ జల మాన్సుల్ ఎత్తిజిన్క తుమ్ ప్రేమ కెర్లిన్చి రిసా అమ్ నూన్లి రిసా,

16 ఆవ్ ప్రార్దన కెర్తె పొది తుమ్చి రిసా అమ్చొ దేముడుక అంచి సర్ల సంగుక ములి నాయ్.

17 తుమ్చి రిసా ఆవ్ కిచ్చొ ఆన జా ప్రార్దన కెర్తెసి మెలె, అమ్చొ ప్రబు జలో యేసుక్రీస్తుక దేముడు జలో, పరలోకుమ్చి ఉజిడ్ జలో అబ్బొన్ జలో, గవురుమ్ తిలొ దేముడు, తుమ్చి పెట్టి జోచి ఆత్మ తా కామ్ కెర కెర, జోక తుమ్ పూర్తి జాన్తి రితి తుమ్క బుద్ది గ్యానుమ్ దెవును, దొర్కు జలిసి దెకవును.

* 1:1 1:1 బయబిల్ తొలితో రెగిడ్ల సగుమ్ పున్కల్తె ఈంజ కోడుతె ఎపెసు పట్టుమ్తెచి కోడు తయె నాయ్. † 1:1 1:1 'క్రీస్తు' మెలె 'తెద్రయిందె' మెన పూర్లుమ్ ఎత్తి అదికారుమ్ తిలొ దేముడు యూదుల్క సంగిలొ దొర్కు జలో రచ్చించుప కెర్తొసా. ‡ 1:3 1:3 పరలోకుమ్తె అమ్క బెదితి కోడు, ఈంజ. § 1:6 1:6 అమ్క ఎద్దెర పున్చిమ్ నెంజిలె కి జోచి ఎదివాల్ దయ, ఆరి, అమ్క దిలన్; * 1:7 1:7 నెంజిలె 'విడ్డల్ కెర అస్సె', నెంజిలె 'రచ్చించుప కెర అస్సె'. † 1:8 1:8 నెంజిలె 'విడ్డల్ కెర అస్సె', నెంజిలె 'రచ్చించుప కెర అస్సె'. ‡ 1:13 1:13 నెంజిలె 'కబుర్'. § 1:14 1:14 7 నంబర్చి ఎట్టొచి కోడు దెక. * 1:18 1:18 రోమియులు 8:18-25, కొలోస్సియుల్ 1:5 దెక.

18 తుమ్చ ఆత్మ అంకివో దస్సి చెంగిల్ దెకిత్ రితి జలె, తుమ్ *కిచ్చో దయిరిమ్ జతి రితి జో తుమ్క నిసాన, దేముడుక నంపజలన తెన్ 'తుమ్క దెయిందె' మెన జో ప్రమానుమ్ కెర్లి పరలోకుమ్చి ఎదివాట్ సొమ్నారుమ్ వాట కిసిచి గే, కెర్లి విలువచి గే,

19 పడ్డో, అమ్ నంపజలనచి పెట్టి జోచి కామ్ కెర్లి ఆత్మసెక్తి కెర్లి సెక్తి గే, జా ఎత్కి తుమ్ సికితె, జయ్యి అంచి ఆన.

యేసుక దేముడు అబ్బొసి అదికారుమ్ దిలిన్

20 క్రీస్తుతెయ్ జోచి జా ఎదివాట్ సెక్తి తిలిసి ముక్కిమ్క కత్తె నెరవెర్చుప కెర్లన్. జోచి సెక్తిచి రిసాచి జా కామ్ ఎత్కి కిసి ముక్కిమ్క జెయిమ్ కెర్లన్ మెలె, క్రీస్తుక అన్నె జియడ ఉట్టవ, పరలోకుమ్తె కడ నా, ఒత్త జోచి సొంత ఉజిల్ పక్కయ్ గవురుమ్ తెన్ వెనవాన అస్సె.

21 ఒత్త జోక అబ్బొసి కెర్లి గవురుమ్ దిలన్ మెలె, †కిచ్చో అదికారుమ్ తిలిసి ఎత్కిచి ఉప్పిరి, ఎత్కి#అదికారుల్చి ఉప్పిరి, †సెక్తివొచి ఉప్పిరి, *ఎలుప కెర్లి ఎత్కి సెక్తి అదికారుమ్ తిలనచి ఉప్పిరి, జేవ్ మాయలోకుమ్చ జలెకి, కేన్ లోకుమ్చ జలెకి, కిచ్చో నావ్ తిలిసి నే పిట్టె ఎత్కిచి ఉప్పిరి, ఈంజ ఉగుమ్తె జర్గు జతిన్చి ఉప్పిరి కి, జెతి ఉగుమ్తె జర్గు జతిన్చి ఉప్పిరి కి, జోక అబ్బొసి ఎత్కిచి ఉప్పిరి వెల్లో కెర అస్సె.

22 జెర్మయ్లి ఎత్కి క్రీస్తుచి చట్టె అబ్బొసి తియ, నంపజలనక కిచ్చో కామ్చి రిసా జలె కి, క్రీస్తు బోడి జతి రితి జో కెర అస్సె.

23 నంపజలన మొత్తుమ్క 'క్రీస్తుచి ఆగ్' మెనుక జయెదె. జోచి ఆగ్ పూర్తి జంక ఎత్కి పూర్తి కెర్తొసా జొయ్యి.

2

దేముడుచి దయకయ్ క్రీస్తు తెన్ ఏలుప కెర్తిసి

1 తుమ్ కెర్ల తప్పుల్ పాపల్చి రిసా తుమ్ మొర తతికయ్, తుమ్క జో, క్రీస్తు తెన్ జీవ్ కెర దిలన్.

2 అగ్గె పాపుమ్ ఇండితె తా, ఈంజ లోకుమ్చి బుద్దిచ, ఈంజ ఉగుమ్చ కమొతె తుమ్ గెతె తిలదు. పాడ్ జల ఆత్మల్ బూతల్ గట్ట ఎత్కిక ఏలుప కెర్తొ సయ్తాన్చి పట్టి గెతె తిలదు. దేముడుచి కోడు కెరుక నెసిత ఎత్కిజిన్చి పెట్టి జో సయ్తాన్చి ఆత్మ జోవయించి కామ్ కెర్తయ్.

3 దేముడుచి కోడు కెరుక నెసిత ఎత్కిజిన్చి రితి ఆమ్ కి అగ్గె మొర తా, పాపుమ్చ ఆసల్ జితె తా, అమ్చి

ఆగ్చి ఆసల్, అమ్చ సొంత వేర వేర బుద్దుల్చ ఆసల్ రితి ఇండితె తిలమ్చి రిసా, లోకుమ్చ మాములుమ్ ఎత్కిజిన్ కిసి సొంత సెక్తిక దేముడు దెతి సిచ్చతె గెతి జెర్మన్ తెన్ అస్తి గే, అమ్ కి దస్సి తిలమ్.

4 గని, దేముడు ఎదివాట్ కన్కారుమ్ దెకితోసాచి రిసా, జోచి ఎదివాట్ ప్రేమ అమ్చి ఉప్పిరి తియ,

5 అమ్ కెర్ల పాపల్చి రిసా, అమ్ ఆత్మక మొర్లన జలెకి, క్రీస్తు అన్నె జిలిన్ తెన్ అమ్క జియడ్లన్. పూర్తి జోచి దయచి రిసా తుమ్ *రచ్చించుప జలదు.

6 జలె, దేముడు అబ్బొసి క్రీస్తు యేసుక జియడ్లిన్ తెన్ అమ్క జియడ, జోచి పరలోకుమ్చి రాజిమ్తె కిసి వెగడ ఒత్త వెనడ్లన్. ఆమ్ జోచయ్ జలి రిసా, అమ్క కి జా రాజిమ్తె వెగడ, అమ్క కి ఒత్త వెనడ్లి రితి కెర అస్సె. మెలె, ఆమ్ కి జో తెన్ జోచి †రాజిమ్తె ఏలుప కెర్తసుమ్.

7 జో దేముడు కిచ్చోక అమ్క దస్సి దయ కెర అస్సె మెలె, యేసుక్రీస్తు కెర్లిన్ ఎత్కి తెన్ జో అమ్క ఎదివాటు దయ కెర్లిసి. పడ్డో జెత ఉగల్తె పలితుమ్ దెర, జోవయించి దయ కెర్లి మొచ్చుచి గే రుజ్జు దెకయెదె. జోచి దయ కెర్లి గే కో మీనుక నెత్తిరి.

8 ముక్కిమ్క కిచ్చో అర్దుమ్ తుమ్ కెరన మెలె, తుమ్ సయ్తాన్చి రాజిమ్ తెంతో రచ్చించుప జలిసి తుమ్ కిచ్చో కెర్లిన్చి రిసాచి నెంజె; పూర్తి దేముడుచి దయచి రిసాచి కామ్ జా. పడ్డో, జో దయ కెర్లిసి తుమ్ నంపజా నజన్తికయ్, తుమ్క దొర్కు జలి.

9 కేన్ మాన్సు కెర్ల కిచ్చో కమొచి సెక్తిక జో మాన్సు రచ్చించుప జంక నెత్త. నెంజెలె, జోవయించ సొంత కమొచి సెక్తిక రచ్చించుప జంక జతి జలె, మాన్సుల్ పులుక జతి. గని జోవయించి సొంత సెక్తిక కో నెత్తిరి, చి పులుక నెంజె.

10 అమ్ ఆత్మక జలిసి జొయ్యి అమ్క నొవర్ జెర్మయ్లిసి. యేసుక్రీస్తుచి అత్తి దేముడు ఆత్మక అమ్క కిచ్చోక నొవర్ జెర్మయ్లిలో మెలె, అమ్క 'సత్తిమ్ ఇండుతు' మెన, జో అగ్గె తెంతో ఉచర్ల కమొ అమ్ నిదానుమ్ కెరుకయ్ మెనయ్ దస్సి కెర్తొ.

యూదుల్ నెంజిలన అప్పె పాసి జా అస్తి

11 జాకయ్, తుమ్ పచ్చ నాయ్. కిచ్చో మెలె, ఆగుక దెకిలె తుమ్ యూదుల్ నెంజిలన జస్సె. తుమ్ యూదుల్ నెంజిలనక యూదుల్ తిలన అగ్గె, 'దేముడు దిలి అమ్చి గుర్తుచి సున్నతి కెరంతి నాయ్, చి ఆత్మక సుద్ది జతి నాయ్'

† 1:21 1:21 జేవ్ పొదులె ఈంజేవ్ చెత్తర్ కొడొ ఎత్కి సగుమ్ సుట్టు దూతల్, బూతల్ ఆత్మల్ గట్టక సంగుల. ‡ 1:21 1:21 జేవ్ పొదులె ఈంజేవ్ చెత్తర్ కొడొ ఎత్కి సగుమ్ సుట్టు దూతల్, బూతల్ ఆత్మల్ గట్టక సంగుల. § 1:21 1:21 జేవ్ పొదులె ఈంజేవ్ చెత్తర్ కొడొ ఎత్కి సగుమ్ సుట్టు దూతల్, బూతల్ ఆత్మల్ గట్టక సంగుల. * 1:21 1:21 జేవ్ పొదులె ఈంజేవ్ చెత్తర్ కొడొ ఎత్కి సగుమ్ సుట్టు దూతల్, బూతల్ ఆత్మల్ గట్టక సంగుల. * 2:5 2:5 నెంజెలె, పాపుమ్ తెంతో, తుమ్చి పాపుమ్చి రిసాచి సిచ్చ తెంతో, ఆత్మమొర్పు తెంతో. † 2:6 2:6 ఆకర్క పరలోకుమ్తె జోవయింతెన్ ఏలుప కెరుమ్దె. పరలోకుమ్ జోవయించి ఆత్మరాజిమ్, చి జా రాజిమ్తె అమ్ బెదయ్ జలి రితి జా బెద అస్సుమ్, చి అప్పె తెంతో కి జోవయింతెన్ ఏలుప కెరుక దెర అస్సుమ్ మెనుక జయెదె. డీనయ్లిసి 5:10, 20:6 కి దెక.

మెన, రితి ఆగి మాన్సులి కెర్తి జా గుర్తు కెర్చు నాయ్ చి రిసా తుమ్క నిస్కారుమ్ దెకిత్ తిల.

12 జలె, తుమ్ కిచ్చొ వచ్చు నాయ్. మెలె, జా పొది క్రిస్తుక దూరి తిలదు, పడ్డొ 'అమ్చి ఇస్రాయేల్చ ప్రెజల్' మెలి దేముడుచి రాజిమ్తె తుమ్ బెదుక నెంజిలిసి, అన్నె, జో దేముడు ప్రమానుమ్ కెర్ల తెదొడచ నే పెట్ట సరిగచి కోడచ వరల్తె తుమ్క వాట తిలి నాయ్, చి జోచి రచ్చున తుమ్క నే దొర్కు జలి రిసా, ఈంజ లోకుమ్తె దేముడు నెంజిలన జా తిల.

13 గని అప్పె, యేసుక్రిస్తు ఈంజ లోకుమ్చ చి పాపుమ్ వయ్ జోచి లోయి నువ దా జా పాపుమ్ పుంచిలిన్చి రిసా, తుమ్ అగ్గె జోవయింక దూరి తిలనక దేముడుక జో యేసు పాసి కెర అస్సె.

యాదుల్క యాదుల్ నెంజిలనక కి ఎక్కి రాజిమ్తె బెదయ్లిసి

14 'అమ్ యాదులి' మెన, 'తుమ్ యాదుల్ నెంజిలన' మెన, అమ్ యాదుల్చి దేముడుచి గుడితె అమ్క తుమ్క †అడ్డు కెర్తి ఆగ్గుల్ తయెదె. జలె, క్రిస్తుయి మొర అమ్ దొన్ని జట్టుచక మదెనె జా అమ్క దొర్కు జలి సేంతుమ్ జోయ్యి జా, అమ్క తుమ్క అడ్డు తిలి విరోదుమ్ జోయ్యి సేడవ అస్సె. జలె, జో దస్సి సేంతుమ్ కెరవ, ఆము తూమ్ ఎక్కి జట్టుచ జతి రితి కెర అస్సె.

15 కీసి మెలె, పూర్ణుమ్చ ఆగ్గుల్క ఆడ్రల్క నంప కెర్తి రితి పోన, అప్పె తెంతో కామ్క నెంజిలి, అగ్గె దొన్ని జట్టు జల అమ్ మాన్సుల్క సేంతుమ్ కెరయ్లి రితి, 'అంచి తెడి ఎక్కి జట్టు జతు' మెన, ఈంజ లోకుమ్చ చి పాపుమ్ జోయ్యి జోచి అగి వయన, అర్పితుమ్ జలన్.

16 'జేవ్ దొన్ని జట్టు తెంతోచ మాన్సుల్ అంక నంపజా ఎక్కి ఆగ్గె జతి రితి దేముడు అబ్బొ తెన్ అన్నె బెదయ్ జతు' మెన యేసు సిలువతె మొర్లి కామ్ తెన్ అమ్చి తుమ్చి అగ్గెచి విరోదుమ్ గెచ్చవ గెలన్.

17 అన్నె, తుమ్ దేముడుక దూరి తిలనక కి, దేముడుక పాసి రిత జల అమ్ యాదుల్క కి, జో సేంతుమ్ దెతిన్చి రిసా బోదన కెరుక కి అయ్లన్.

18 మెలె, యేసుచి అత్తి తుమ్క కి అమ్క కి జోచి అబ్బొన్చి ఎక్కి ఆత్మ దొర్కు జా అస్సెచి రిసా, తూమ్ కి ఆమ్ కి దేముడు అబ్బొన్ తెన్ బెద ఎక్కి జట్టు జంక వాట్ అయ్లి.

19 జలె, ఈంజ ఎత్కిచి రిసా తుమ్ అప్పె వేర మాన్సుల్ నెంజున్. తూమ్ కి దేముడుచి గేర్తె బెద, అమ్ నంపజలన్ తెన్ జోచయ్ మాన్సుల్ జా, తూమ్ కి దేముడుచి రాజిమ్చ జా అస్సెన్.

20 జోచి గేర్క పునాది కిచ్చొ జయెదె మెలె, సుబుమ్ కబుర్ సంగిత జోచ బారికుల్, చి జోచి ఆత్మసెక్తిక జోచ కబుర్లు సంగితన. జా కెర ఎత్కిక బోడిపత్తుర్ కొన్సొ మెలె, యేసుక్రిస్తు.

21 జా గేరు మొత్తుమ్ జోచి సెక్తిక బెద, ప్రబు తెన్ టీవ, దేముడుచి సుద్ది తిలి గుడి జతి రితి వడ్డితయ్.

22 దేముడు జతి జా దేముడుచి సుద్ది తిలి ఆత్మ గుడి జతిన్తె తూమ్ కి క్రిస్తుచి తెడి తా వాటల్ జా బెద బండుక అస్సెన్.

3

యాదుల్ నెంజిలనకె సుబుమ్ కబుర్ నూనవుక ప్రబు వవులుక తెద్రయ్లిసి

1 జలె, తుమ్ యాదుల్ నెంజిలనకయ్ సుబుమ్ కబుర్ ఆవ్ నూనవుక మెన యేసుక్రిస్తు అంక తెద్రయ్లి. తుమ్క నూనయ్లి రిసా, అంక, అమ్చ యాదుల్ *జేలి కెరన అస్తి.

2 తుమ్కయ్ 'సుబుమ్ కబుర్ నూన నంపజా అంచి ఆత్మగేర్తె జేవ్ కి బెదుత్' మెనయ్. దేముడు జోచి దయచి రిసా అంచి అత్తి జా సుబుమ్ కబుర్ నూనయ్తి కామ్ సార్చ కెర్లిన్చి రిసా తుమ్ నూన అస్సెన్.

3 వడ్డొ, జోచి జా గుట్టు జా తిలిసి ప్రబు సొంతయ్ అంక †దెకయ్లన్ మెన కి, నూన అస్సెన్. ‡ఈంజ గుట్టుచి రిసా ఇదిల్ కొట్టు సంగ ఈంజ ఉత్తుమ్తె అగ్గె రెగ్ల అస్సి.

4 ఈంజ తుమ్ నదు కెర్లె, క్రిస్తుచి గుట్టు తిలిసిచి రిసా ఆవ్ జాన్లిసి తుమ్ అర్దుమ్ కెరంతె.

5 జా గుట్టు, జలె, అగ్గెచ ఉగల్తె ఈంజ లోకుమ్చ మాన్సుల్క జాన్తి నాయ్. గని జోచి సుద్ది తిలి ఆత్ తెన్ దేముడుచి సుద్ది జల కబుర్లు సంగితనక, జోచి రిసాచ బారికుల్క, క్రిస్తు జా గుట్టు అప్పె జానవ అస్సె.

6 జా గుట్టు కిచ్చొ మెలె, క్రిస్తుక నంపజల యాదుల్ నెంజిలన కి అమ్చి తెన్ దేముడు దెతి రచ్చున వాట నజన్తి వాటు అయ్లిసి. సుబుమ్ కబుర్ నూనయ్లి తెంతో, జేవ్ కి క్రిస్తుక నంపజా దేముడుచ పుత్తర్లు జా క్రిస్తుచి †ఆగ్గె జతిన్తె బెద, క్రిస్తు జలొ యేసుచి తెడి జేవ్ తిలి రిసా, దేముడు ప్రమానుమ్ కెర్లిసి ఎత్కితె జోవయింక కి వాట దొర్కు జా అస్సె.

7 అంచి పెట్టి కమొ కెర్తి జోచి ఆత్మసెక్తిచి రిసా, దేముడు అంక ద్రిలి జోచి దయక వరుమ్చి రిసా ఆవ్ ఈంజయ్ సుబుమ్ కబుర్ నూనయ్తో సేవ కెర్లొసా జలయ్.

† 2:14 2:14 యాదుల్చి దేముడుచి గుడితె నిజమి దస్సి అడ్డు కెర్తి కోట తిలి. రెగ్లె, మెన ఒగ్గర్జిన ఉచర్తతి. బారికుల్ 28:16, 30, 31 దెక. కైసరియతె కి జేలి జా తిలొ; బారికుల్ 23:25, పిలిప్పితె కి; బారికుల్ 16:23, చి యెరూసలేమ్తె కి; బారికుల్ 21:33 జేలి జా తిలొ. ఎవెసుతె కి మెన నగుమ్జిన ఉచర్తతి, గని రుజ్జు నాయ్. పిలిప్పితె చి యెరూసలేమ్తె జేలి జలిసి తొక్కి దీనల్చి. † 3:3 3:3 బారికుల్ 9:3-6, 15, గలతీయల్ 2:9 దెక. ‡ 3:3 3:3 1:9, 10 చి 2:11-22 దెక. § 3:6 3:6 రోమియల్ 12:4, 5, కొరిదిల్ 1 నంబర్ ఉత్తుమ్ 12 అద్యయమ్, ముక్కిమ్క 12:12, చి ఎవెసు 1:23 దెక.

* 3:1 3:1 రోమ్ పట్టుమ్తె జో జేలి జా తిలి పొది ఈంజ ఉత్తుమ్ వవులు

8 జోచయ్ జల మాన్సుల్ మొత్తుమ్తె తొక్కి విలువచచి కంట ఆవ్ అన్నె తొక్కి విలువచో జలెకి, జోచి దయక జో అంకయ్ దిలన్. క్రీస్తుతె దొర్కు జతి పరలోకుమ్చ సొమ్మారుమ్ కెడ్డి గే, కేన్ మాన్సు పూర్తి అర్దుమ్ జంక నెత్తిరై కి, తుమ్ యూదుల్ నెంజిలసక ఆవ్ బోదస కెరుక మెనయ్, జో అంక నిసాన్లన్.

9 అన్నె, తుమ్ యూదుల్ నెంజిలసక కి జో రచ్చన దొర్కు కెర్లన్చి రిసాచి ఎత్తి జెర్మయ్లో దేముడు అగ్గెచ ఉగల్తె లుంకణ్ణి గుట్టు ఈంజ లోకుమ్ ఎత్కిచ అర్దుమ్ కెరంతి రితి ఆవ్ సూనవుక నిసాన్లన్.

10 కేన్ లోకుమ్చ *ఆత్మల్ దూతల్ బూతల్, ఎత్కి కి, యేసుప్రబుక నంపజలన బెదిలిసి మొత్తుమ్క దెకిలె, దేముడుచి ఎదివాట్ సత్తిమ్ కెడ్డి గే, కిసి నెరవెర్చుప జతయ్ గే, చినుతు మెనయ్, జోయ్యి అంక ఈంజ కామ్ దా అస్సె.

11 తుమ్ యూదుల్ నెంజిల నంపజలన కి జోచి ఆత్మగేరెతె బెదితిన్క 'జర్గు కెరిందె' మెన దేముడు అగ్గెయి తెంతో ఉచర్లసి అమ్చో ప్రబు జలో యేసుక్రీస్తుచి అత్తి †జర్గు కెర్లె.

12 'ఈంజో యేసుక్రీస్తు అమ్చి పాపుమ్ గెచ్చయ్తి అర్పితుమ్ జలి రిసా, అమ్ జోక నంపజలి రిసా, లాజ్ నెంజితె దేముడుతె గెచ్చుమ్దే' మెన అమ్క పూర్తి దయిరిమ్ అస్సె.

13 జాకయ్, తుమ్క ఆవ్ సుబుమ్ కబుర్ సూనయ్లి రిసా ఆవ్ అప్పె జేలి జా సైమల్ సేడ్డిన్చి రిసా తుమ్ బమ్మ జా అన్మానుమ్ జా నాయ్. తుమ్ యూదుల్ నెంజిలసకయ్ 'చెంగిల్ జతు' మెనయ్ ఇసి జలయ్. జాకయ్ తుమ్ సర్ల తెన్ తా.

పవులు ప్రార్దన కెర్లసి

14 జలె, పరలోకుమ్తె కి బూలోకుమ్తె కి కేన్ కుటుంబుమ్చ జలెకి, దేముడు అబ్బోన్చి రిసాయి జేవ్ ఎత్కిక నావ్ అస్సె.

15 మొగ్రల్ టెక జోవయింక ఆవ్ కిచ్చో మెన ప్రార్దన కెర్లసి మెలె,

16 జోచి ‡ఎదివాట్ సత్తిమ్క, తుమ్చ ఆత్మల్తె జోచి ఆత్మ తా, తుమ్క పూర్తి డిట్టుమ్ కెర్చు మెన,

17 అన్నె, తుమ్చి నముకుమ్ తెన్ చి జోచి ఆత్మ తెన్ తుమ్చి పెట్టి క్రీస్తు జివున్ మెన, ఆవ్ ప్రార్దన కెర్లసి. దస్సి, జోచి ప్రేమతె చెర్రో గలిల్ రితి జస్తె, జోచి ప్రేమతె తుమ్ డిట్టుమ్ జస్తె.

* **3:10 3:10** నెంజిలె, 'అదికారుమ్ తిలన, అదికారుల్ ఎత్కి కి'. ఇన్నె 'అదికారుమ్ తిలన', 'అదికారుల్' మెలె, ఆత్మల్ దూతల్ బూతల్చి అర్దుమ్ కెరసుక జయెదె. 1:21 దెక చి 1:21చి ఎట్టెచి కోడు దెక. † **3:11 3:11** మెలె, యేసు అమ్చి పాపుమ్ వయ గెచ్చవ జివ్ జా జోవయిచి ఆత్మ దొర్కు కెర్లసి తెన్ని జర్గు కెర్లె. ‡ **3:16 3:16** నెంజిలె 'ఎదివాట్ సొమ్మారుమ్క'. § **3:21 3:21** 1:1చి ఎట్టెచి కోడు దెక. *

18 చి ప్రబుచో సుద్ది జలన ఎత్కిజిన్ తెన్ తుమ్క కిచ్చో సెక్తి జెయెదె మెలె, జోచి ప్రేమ కెడ్డి రూండు కెడ్డి దీగు గే, తుమ్క అర్దుమ్ జెయెదె.

19 జలె కో జానుక నెతిరి క్రీస్తుచి ఎదివాట్ ప్రేమ తుమ్ జాన్తె, చి దేముడు తుమ్చి పెట్టి బెర, తుమ్క పూర్తి కెరెదె. జయ్యి ఎత్కి అంచి ఆస.

20 అప్పె, జలె, అమ్చో దేముడుక ఒగ్గర్ ఒగ్గర్ గవురుమ్ కలుగు జవున్! అమ్ నజిల్ కంట, అమ్ ఉచర్ల కంట, ఒగ్గర్ చెంగిల్ కెరుక తెరితొసా జో. కిసి మెలె, జోవయిచి ఆత్మసెక్తి అమ్చి పెట్టి కామ్ కెర కెరయ్ అమ్క చెంగిల్ కెరెదె!

21 జాక, ఉగుమ్చి ఉప్పిరి ఉగుమ్క, కెయెడ తెయెడ నే పిట్టె, క్రీస్తు జలో యేసుతె, చి జోచి ఆగ్ జల జోక నంపజలన మొత్తుమ్ ఇండితిన్తె దేముడుచి గవురుమ్ డిస్తె తవును! ఆమేన్.

4

తుమ్ ఎక్కి ప్రేమతె ఇండ

1 జలె, ఆవ్ పవులు, ప్రబుచి సుబుమ్ కబుర్ సూనయ్లి రిసా *జేలి జలోసా, తుమ్క కిచ్చో బలవంతుమ్ జా సంగితసి మెలె, ప్రబు తుమ్క నిసాన తుమ్ జోచయ్ జా సత్తిమ్ ఇండితి రిసా తుమ్క బుకారా అస్సె. జో తుమ్క బుకార్లి వరుమ్క విలువ దెకితి ఎదిలి సత్తిమ్తె తుమ్ జివ.

2 కిసి మెలె, తుమ్క తూమ్ గవురుమ్ నే ఉచరంతె మెత్తన తా, సేంతుమ్ తెన్ అల్లర్ ఒర్చుప జా, ఎక్కిలోక ఎక్కిలో ప్రేమ తెన్ తుమ్ జోవయింక ఒర్చుప జా,

3 ఎక్కి ఆత్మ, ప్రబుచి ఆత్మ తా, కట్టు తెన్ తతి ఆస తెన్ తా, దస్సి కట్టు తెన్ తతి రితి తుమ్ దెకన. ప్రబుచి సేంతుమ్ తుమ్చి వెట్టి తిలె, దస్సి ఎక్కి కట్టు తెన్ తస్తె.

4 కిచ్చోక మెలె, ప్రబుక నంపజల అమ్ ఎత్కిజిన్ జోచి ఎక్కి ఆగ్ జా అస్సుమ్, అమ్ ఎత్కిజిన్చి పెట్టి జోచి ఎక్కి ఆత్మ అస్సె, చి అమ్చి తెన్ పరలోకుమ్తె గెతి వరుమ్ తుమ్క దొర్కు జవున్ మెన దేముడు తుమ్క బుకార్లి రిసా అమ్ ఎత్కిక ఎక్కి ఆస.

5 పడ్డె, అమ్ నంపజలన ఎత్కిజిన్క అన్నె కిచ్చో మెలె, అమ్క ఎక్కిలో ప్రబు, ఎక్కి నముకుమ్, ఎక్కి బాప్తిసుమ్.

6 అమ్ ఎత్కిజిన్క ఎక్కిలో దేముడు, ఎక్కిలో అబ్బో. ఎత్కిచి కంట వెల్లో జలోసా, జో. జో ఎత్కితెయి అస్సె, జోచ పైజల్ ఎత్కిజిన్చి పెట్టి జో జితయ్.

ప్రబుచి ఆత్మ జోచ మాన్సుల్చి పెట్టి తా

* **3:10 3:10** నెంజిలె, 'అదికారుమ్ తిలన, అదికారుల్ ఎత్కి కి'. ఇన్నె 'అదికారుమ్ తిలన', 'అదికారుల్' మెలె, ఆత్మల్ దూతల్ బూతల్చి అర్దుమ్ కెరసుక జయెదె. 1:21 దెక చి 1:21చి ఎట్టెచి కోడు దెక. † **3:11 3:11** మెలె, యేసు అమ్చి పాపుమ్ వయ గెచ్చవ జివ్ జా జోవయిచి ఆత్మ దొర్కు కెర్లసి తెన్ని జర్గు కెర్లె. ‡ **3:16 3:16** నెంజిలె 'ఎదివాట్ సొమ్మారుమ్క'. § **3:21 3:21** 1:1చి ఎట్టెచి కోడు దెక. *

7 పడ్డో క్రీస్తుచి దయచి రిసా జో అమ్ ఎత్కిజిన ఎక్కెక్కక జోచి ఆత్మసెక్తి వరుమ్ దా అస్సె. కెద్ది సెక్తి దెయెదె గే, కీసి సెక్తి దెయెదె గే, జోచి దయ.

8 జాకయ్, పూర్గుమ్ దేముడుచి కొడతె రెగ్గయ్లి రితి, †“జోవయించ విరోదుమ్ సుదల్క జిన జేలి కెర్లి రితి జా, జో పరలోకుమ్తె గెచ్చు జోవయించ మాన్సుల్క ఆత్మవరల్ దిలన్” మెన అస్సె.

9 జోక ‘ఒత్త వెగ గెలన్’ మెలె, కిచ్చొ అర్దుమ్ మెలె, జో తొలితె జోచి గవురుమ్ ముల పరలోకుమ్ తెంతొ ఉత్త్ర జా, బూలోకుమ్చి కంట ఎట్టొక మెలి రితి ఉట్ట జా అయ్లో.

10 ఉత్త్ర జా అయ్లోసా అన్నె ఎత్కిచి కంట ఉప్పిర్ వెగిల్ రితి జా, పరలోకుమ్తె అన్నె వెగ గెలన్; జో తిలిన్క జోచి సెక్తిక ఎత్కిక పూర్తి కెర్లి రిసా.

11 జో దిల ఆత్మసెక్తి వరల్ కిచ్చొ కిచ్చొ మెలె, జోచ మాన్సుల్ సగుమ్జిన బారికుల్ జంక మెన జో నిసాన, పడ్డో ‡జోచి ఆత్మసెక్తిక జోచ కబుర్లు నూన సంగితి రిసా అన్నె సగుమ్జినక నిసాన్లన్. పడ్డో జోక నేన్ల మాన్సుల్క జోచి రిసా సికడ్డి రిసా, అన్నె సగుమ్జినక నిసాన్లన్. పడ్డో, జోక నంపజలసక గొవుడు జా సికడ్డి రిసా అన్నె సగుమ్జినక నిసాన్లన్.

12 జేవ్ వేర వేర సెక్తివొ జోచయ్ జల మాన్సుల్క కిచ్చొక జో దా అస్సె మెలె, జోచి జేవ్ కెర్లి సేవక సెక్తి తంక, పడ్డో, క్రీస్తుచి ఆగ్ పూర్తి జతి రితి నంపజలన మొత్తుమ్ బెదితిసి పూర్తి జంక, చి

13 అమ్ ఎత్కిజిన ఎక్కి నముకుమ్ జా దేముడు పుత్తున్చి రిసా ఎక్కి రితి జాన, అమ్ పూర్తి ఆత్మపలితుమ్ దెర్తి రితి ఆత్మక పూర్తి వడ్డిల్ రితి జా, క్రీస్తు కీసి సత్తిమ్క పూర్తి జా అస్సె గే, అమ్ కి దస్సి పూర్తి జంక.

14 ఆత్మక దస్సి వడ్డిలమ్ మెలె, బాలబోదల్చి రితి అమ్ పొరపాట్ జతె తంక నాయ్. కో నొవి కోడు సంగిలె నంప కెర, కో వేర కోడు సంగిలె నంప కెరుక జతె తా, మాన్సుల్ అచ్చొ ఉచర్ల మోసిమ్ కొడొ సూన్తె తా, జోవయించ మాయకమొక నంపజా, వాడుక ఇత్తల్ ఒత్తల్ గెతె కెర్లల్ రితి జంక నాయ్. గని, ప్రబుచి తెడి ఆత్మక పూర్తి వడ్డిలమ్ మెలె, ఇత్తల్ ఒత్తల్ గెతె తము నాయ్, గని ఎక్కి నిదానుమ్ తెన్ తమ్మెదె.

15 అమ్ దస్సి ఇత్తల్ ఒత్తల్ నే గెతి రితి జంక మెలె, పూర్తి జంక మెలె, పూర్తి ప్రేమ తెన్ ఎక్కిలోక ఎక్కిలో ఎక్కి సత్తిమ్ సంగితె తంక, చి బోడి జలో క్రీస్తుచి ఆత్మతె బెద, ఎత్కితె బుద్ది జతి రితి ఆత్మక అమ్ వడ్డుక.

16 క్రీస్తు అమ్క బోడి జయెదె, చి జోచి ఆగ్చ వాటల్ కిచ్చొ జవుల మెలె, అమ్ జోచి ఆగ్చ వాటల్ మొత్తుమ్

జోచి తెడి తా జోచి సెక్తి తెన్ చెంగిల్ కట్టు తెన్ తా అమ్ ఎక్వక్ వాట, అమ్క దిల కమొ నిదానుమ్ కెర్లి తిలె, ఈంజ ఆగ్ ప్రేమ తెన్ వడ్డ తా, పూర్తి డిట్టుమ్ జయెదె.

అగ్చ బుద్దివొ తుమ్ పూర్తి ముల

17 జలె, ప్రబుచి కీనావ్ తెన్ ఆవ్ తుమ్క కిచ్చొ ముక్కిమ్క బలవంతుమ్ కెర సంగితసి మెలె, దేముడుక నేన్ల యూదుల్ నెంజిలన కీసి జోవయించి మెన్ను చి వెర్లి ఉద్దెసుమ్ల్క ఇండితతి గే, తూమ్ దస్సి ఇండ నాయ్.

18 జేవ్చి ఆత్మతె గుడ్డి జా జోవయించి పెట్టి బుద్ది నెంజిలి రిసా దేముడుచి సుద్ది తిలి ఆత్మజివ్ జతిన్క దూరి అస్తి, జోవయంక వేరయ్ మాన్సుల్ జా అస్తి. కిచ్చొక మెలె, జోవయించి సత్తిమ్ జేవ్ నెన, రాడ్ జివ్చ జా అస్తి.

19 రాడ్ జివ్చ జా, కన్కారుమ్ పచ్చ, ఎద్దెర ముద్దొ నే కెరంతె లంజె ఆసల్చ కమొతె పూర్తి గెచ్చ, గర్బ కమొ ఎత్కితె ఆస జా గెచ్చ అస్తి.

20 తుమ్ క్రీస్తుచి తెడి సికిలిసి దస్సి నాయ్;

21 తుమ్ జోచి కోడు సూన్లదు మెలె, జోచి తెడి తా జోతెయ్ సికిలదు మెలె. నాయ్, గెద, యేసుతె సత్తిమ్ అస్సి.

22 జలె, జోచి కోడు సూన్లదు మెలె, జోతె సికిలదు మెలె, ఈంజ లోకుమ్చ మాన్సుల్చి బుద్ది తుమ్ అగ్ ఇండితె తిలిసి పొన. ముర్కి పాలుమ్ తుమ్ కడ వెంట గెలి రితి జా, అగ్చి బుద్ది ముల. జా ఎత్కి బెర్తు ఆసల్చ మోసిమ్లు జా, పూర్తి నాసెనుమ్ కెర్లిసి.

23 జా గర్చి ఎత్కి ముల, తుమ్చి పెట్టి తుమ్చి ఆత్మ తుమ్చి మెన్నుతె నొవర్ జా బుద్ది జా.

24 దేముడు దెతి నొవర్ ఆత్మతె జెర్మున్ గలన జయ్యి రితి ఇండ. జో ఆత్మతె జెర్మున్ మెలె, దేముడుచి రితి జతి రితి జోచి సత్తిమ్క జోచి సుద్దిక తుమ్చి ఆత్మతె నొవర్ జెర్మున్ జలి రితి జతిసి.

కీస బుద్దివొ ముల, కీసి బుద్ది జంక

25 తుమ్ సత్తిమ్ జంక మెన జో తుమ్క నొవర్ జెర్మయ్లో, తుమ్ అబద్దుమ్ ముల ఎత్కిజిన ఎక్కిలో తెన్ ఎక్కిలో సత్తిమ్ కొడొ జా. కిచ్చొక మెలె, అమ్ ఎత్కిజిన్ యేసుప్రబుచి ఎక్కి ఆగ్చ వాటల్ జా అస్సుమ్.

26 తుమ్ కోపుమ్ జంక జలె, పొపుమ్ జతి రితి నెరవెర్చుప కెర నాయ్. కోపుమ్ జలె, పొద్దు నే గెతె సేంతుమ్ జా,

27 నెంజిలె తుమ్చి కోపుమ్ నెరవెర్చుప కెర తుమ్క పొపుమ్ కెరయ్తి రితి సయ్తానుక వాట్ దా తస్సె, పొన.

† 4:8 4:8 కీర్తనలు పుస్తకమ్ 68:18. ‡ 4:11 4:11 జోవయించి ఆత్మ జోవయించి చోడి పుట్టయ్లె జోవయించ కబుర్లు సంగుల. § 4:17 4:17 నెంజిలె ‘ప్రబుచి తెడి తా’.

28 అగ్గి చోర్తె తిలస అప్పె తెంతో చోర్తు నాయ్, గని బాద సేడ్లసక తోడు నెంజిలసక తోడు దెతి రిసా, జోచ అత్తో సత్తిమ్ కమొ కెర కెర, మాములుమ్ కామ్ కెర కెర జియ కతు.

29 తుమ్ లట్టబ్బిన్తె కిచ్చో గర్చి బెదవ నాయ్, గని కిచ్చో కామ్ తిలె, ఒత్త చెంగిల్క కామ్క జెతిసి కిచ్చో జలె జయ్యి లట్టబ, చి తుమ్ లట్టబ్బిసి సూన్తసతె బుద్ది పలితుమ్ దెరెదె.

30 పడ్డొ, 'సయ్తాన్చి రాజిమ్ తెంతో తుమ్క ఆవ్ నెతోవ గెలిసి కచితుమ్ జెయిమ్ జయెదె' మెన జా రుజ్జుక దేముడు తుమ్చి పెట్టి జోచి సుద్ది తిలి ఆత్మ దా జోవయించి ముద్ద దా అస్సె. జాకయ్, జా ఆరి తిలి రితి దేముడుచి సుద్ది తిలి ఆత్మక దుకుమ్ కెర నాయ్.

31 పెట్టి విస్సుమ్ తతిసి, కోపుమ్ దెకయ్తిసి, కోపుమ్ దెరన్తిసి, గగ్గల్, దూసెనల్, కుస్సిదుమ్ ఎత్తి తుమ్క దూరి కెర.

32 చి ఎక్కిలోక ఎక్కిలో మెత్తన తా, కన్యారుమ్ దెక, యేసుక్రీస్తుచి అత్తి దేముడు అబ్బొసి తుమ్క కిసి చెమించుప కెర అస్సె గే, తూమ్ కి దస్సి ఎక్కిలోక ఎక్కిలో చెమించుప కెర.

5

ప్రబుచి ప్రేమతె తుమ్ ఇండ

1 దేముడుచ ప్రేమ తిల బోదల్ తుమ్ అప్పె జలి రిసా, జో కిసి కెర్తయ్ గే దెక, తూమ్ కి దస్సి కెర,

2 చి క్రీస్తు కిసి అమ్క ప్రేమ తా దేముడు అబ్బొన్క దెతి దొర్కు జలి చెంగిల్ వాసెన తిలి అర్చితుమ్ జా, అమ్చి పాపుమ్ పుంచిత రిసా జోచి సొంత జీవ్ దా మొర గెలన్ గే, తూమ్ కి దస్సి ప్రేమతె ఇండ.

3 లంజెకమొచి రిసాచ కొడొ జలెకు, లంజెబుద్దిచి రిసాచ కొడొ జలెకు, అన్నె మాన్సుల్చి ఆస్తిక ఆస జత కమొచి రిసాచ కొడొ జలెకు తుమ్ లట్టబా కి నాయ్. దసచచి రిసా ప్రబుచ సుద్ది జల మాన్సుల్ లట్టబుక కి బెదె నాయ్.

4 తుమ్ లట్టబ్బిన్తె వెట్కారుమ్చ కొడొ పొస, కామ్క నెంజిత కొడొ పొస, వెర్రి కొడొ పొస; దసచ సూటి నాయ్. దసచ ఎత్తి పొస, గని దేముడు కెర్లి దయచి రిసా జోక తుమ్చి సర్ద సంగిత కొడొయ్ లట్టబ.

5 కేన్ కోడు ఏక్ తుమ్ కచితుమ్ దెరన మెలె, కేన్ లంజె ఇండితోసా, లంజెబుద్ది సికడ్డెసా, అన్నె మాన్సుల్చి ఆస్తిచి ఆసక జితొసా కో జలెకు, జోవయించి ఆస జోవయింక దేముడు రితి జా, దేముడుక 'జో అమ్క నాయ్' మెలి రితి విరోదుమ్ కెర్లి రితి జతయ్, గెద; కో దస బుద్దిచొచ జలె, క్రీస్తుచి దేముడు అబ్బొన్చి రాజిమ్తె జోవయింక కేన్ వాట కి దొర్కు జయె నాయ్.

ఉజిడబుద్దితె తుమ్ ఇండ

* 5:8 5:8 నెంజిలె ప్రబుచి తెడి అస్సున్ చి జోవయించి ఉజిడి జా అస్సున్.

6 కామ్క నెంజిత కొడొ లట్టబ దస పాపుమ్ కమొచి రిసా కో తుమ్క మోసిమ్ కెర్లి రితి తుమ్ దెర్కు సేడ నాయ్. దస పాపల్చి రిసా జోచి కోడు నే సూన్త మాన్సుల్క దేముడు జోచి కోపుమ్చి సిచ్చ దెయెదె.

7 జాకయ్ దస కమొతె తుమ్ బెద నాయ్.

8 కిచ్చొక మెలె, తుమ్ అగ్గె అందర్బుద్దితె ఇండిలదు, గని అప్పె ప్రబుచి తెడి ఉజిడ్ జా అస్సున్. ఉజిడ్చ బోదల్ రితి ఇండ.

9 కిచ్చొక మెలె, ఉజిడ్చి పలితుమ్ దెర్లిసి కిచ్చొతె చినుక జయెదె మెలె, చెంగిల్ తిలిసి ఎత్కితె, పొరపాట్ నెంతె తిలిన్ ఎత్కితె, సత్తిమ్ తిలిన్ ఎత్కితె.

10 పడ్డొ, కిచ్చొ ఎత్కిక చెంగిల్ మెన ప్రబు మెనెదె గే, తుమ్ అజ్జ కెరన.

11 అందర్బుద్దిచ కమొతె తుమ్ ఎద్దె బెద నాయ్. దస్సు కమొ కిచ్చొ చెంగిల్ పలితుమ్ దెర్లి నాయ్. అన్నె మాన్సుల్ దస్సుచతె దెర్కు నే సేడ్డి రితి, ఉజిడ్చి పాసిక దస్సు కమొ ఆస, జోవయింక 'పాపుమ్చ' మెన రుజ్జుల్ దెకవ.

12 జేవ్ మాన్సుల్ గుట్టు తెన్ కెర్లె కమొచి రిసా సంగుక కి లాజ్.

13 గని, కిచ్చొ జలెకు అందర్ తిలిసి ఉజిడ్క పాసి అయ్లె, జాక 'జా పాపుమ్చి' మెన, రుజ్జు డిస్తయ్. కిచ్చొక మెలె, జా ఉజిడి ఒత్తయ్ దెకయ్ జా దెకయ్తయ్.

14 అమ్ ఒప్పన్తె కోడు ఏక్ ఇన్నె బెదితయ్. కేన్ కోడు మెలె,

"ఓ నిజిలోసా, తెలివి జా ఉట్టు!

మొర తిలోసా, జీవ్ జా ఉట్టు,

చి క్రీస్తు తుక జోచి ఉజిడి దెకయెదె"

మెలిసి.

15 తుమ్ కిసి ఇండితె గే చెంగిల్ ఉచర, జాగర్ల తెన్ తా. బుద్ది నెంజిలసచి రితి తుమ్ ఇండ నాయ్, గని చెంగిల్ బుద్దితె ఇండ.

16 కిచ్చొ కిచ్చొ చెంగిల కమొ కెరుక వాట్ అయ్లె, తెలివి తెన్, జా వాట్ అడ్డు నే కెర్లి రితి, నే పిట్టయ్తె, చెంగిల్ పలితుమ్ దెర్లి రితి జేవ్ కమొ తుమ్ కెర. కిచ్చొక మెలె, ఈంజ కాలుమ్ ఒగ్గర్ పాపుమ్చి, చి చెంగిల కమొక కెర్లి సమయమ్ తయెదె గే, నేనుమ్.

17 జాకయ్, బుద్ది నేన్ల మాన్సుల్ రిత తుమ్ జా నాయ్, గని కిచ్చొ బుద్ది తుమ్ ఇండుక ప్రబుచి ఇస్టుమ్ అస్సె గే, తుమ్ అర్దుమ్ కెరన.

18 తుమ్ సూరు పియ మచ్చు నాయ్. కిచ్చొక మెలె, జా చెంగిల్చిక పాడ్ కెర నాసెనుమ్ కెర్లిసి. గని దేముడుచి సుద్ది తిలి ఆత్మ తుమ్చి పెట్టి వేర జతయ్.

19 ఎక్కిలో తెన్ ఎక్కిలో ప్రబుచి గవురుమ్ సంగిత కిచ్చొ కిచ్చొ రగల్ గనుమ్లు గాయితె తా. జేవ్ గనుమ్లుతె

కిచ్చొ ఏక్ రగుమ్ తుమ్ గాయ మెలె, కీర్తనలు. తుమ్చి పెట్టి పూర్తి సర్ల తెన్ ప్రబుచి గవురుమ్ సంగిత గనుమ్లు, బజెన తెన్ కి గాయతె తా,

20 కెయకకి, కిచ్చొ జలె కి, కిచ్చొచి రిసా కి 'జొయ్యిదిలో' మెన, అమ్చొ ప్రబు జలో యేసుక్రీస్తుచి నావ్ తెన్ అబ్బొన్ జలో దేముడుక తుమ్చి సర్ల తుమ్ సంగితె తా.

తెర్నిమున్ను ప్రేమ దెకితిన్

21 క్రీస్తుక మరియాద దెకితి రితి, తుమ్ ఎక్కిలోక ఎక్కిలో పోటి నే కెర్తె, ఎక్కిలోతె ఎక్కిలో దాక్ కెరన, ఎక్కిలోక ఎక్కిలో సేవ కెర్తె తా.

22 తుమ్ తేర్బోదల్ తుమ్చ మున్నర్లుచి తెడి తా, దాక్ కెరన జోవయించి కోడు సూన, ప్రబుకయ్ గవురుమ్ కెర్లె రితి అంప్టా జా తంక.

23 కిచ్చొక మెలె, క్రీస్తుక నంపజలస మొత్తుమ్ జోచి †ఆగ్ జతనుమ్. జా ఆగ్ జో క్రీస్తు బోడి. జా ఆగ్ జో సొంత రచ్చించుప కెర్తెసా జయెదె. దస్సి కి, తేర్నిక మున్నుసి బోడి జయెదె.

24 జోచి ఆగ్ జత నంపజలస మొత్తుమ్ క్రీస్తుచి తెడి అన్నుమ్, గెద. దస్సి, ఎత్తిచి రిసా తేర్ని మున్నునచి తెడి అస్సె, జోవయించి కోడు సూనుక అస్సె.

25 తుమ్ మున్నుబోదల్ తుమ్చ తెర్నివొక ప్రేమ కెర్తె తా. కిచ్చొక మెలె, క్రీస్తుచి ఆగ్ జత నంపజలస సంగుమ్క 'చెంగిల్ జతు' మెన, బోడి జలో క్రీస్తు జోచి జీవ్ దిలన్.

26 కిచ్చొక మెలె, ‡పాని సువ సుద్ది కెర్తి రితి, జా ఆగ్ జోచి కోడు తెన్ దోవతి రితి కెర, జా ఆగ్ జోచి జా గెతి రితి, పూర్తి సుద్ది కెర్తి రిసా దస్సి కెర్లన్.

27 కిచ్చొక మెలె, జోచి ఆగ్ జత అమ్, నంపజలస మొత్తుమ్ జోక పూర్తి సూటి తిలి తెర్ని జతి రితి, జొయ్యి గవురుమ్ తెన్ ఆనన్తి రిసా, జా పూర్తి సూటి జతిసి కీసి మెలె, కిచ్చొ ఆత్మ మచ్చల్ సర్లల్, దస్సచ కిచ్చొయ్ నెంతె, జా పూర్తి ప్రబుచి, పూర్తి పొరపాట్ నెంజ, సుద్ది సూటి జతిసి.

28 జలె, జోచి ఆగ్ జల నంపజలస సంగుమ్క ప్రబు కీసి ప్రేమ కెర సుద్ది కెర్తయ్ గే, మున్నుసి కీసి జోవయించి ఆగ్ జొయ్యి కీసి ప్రేమ కెరెదె గే, జో దస్సి జోవయించి తేర్నిక ప్రేమ దెకుకయ్. కో తేర్నిక ప్రేమ కెర్తయ్ గే, జోకయ్ జొయ్యి ప్రేమ కెరన్లె రితి జతయ్.

29 కేన్ మాన్సుల్ కి జోచి సొంత ఆగుక కెయ విరోదుమ్ జతి నాయ్. నాయ్, గెద. పొసనుల, చెంగిల్ దెకనుల. దస్సి, క్రీస్తు జోచి ఆగ్ జత నంపజలస మొత్తుమ్ బెదిలిన్క పొస్యయ్, దెకితయ్.

30 అమ్ జోచి సొంత ఆగ్ జలి రిసా.

31 దేముడుచి కోడుతె రెగ్డయ్లిన్ కీసి అస్సె మెలె, కి "జాకయ్, మున్నుబోద, అయ్యున్అబ్బొన్క ముల, తెర్ని ఆన, జా తెన్ ఎక్కి నిదానుమ్ జయెదె, చి జేవ్ దొగుతెర ఎక్కి ఆగ్ జా గెచ్చుల"

మెన రెగ్డ అస్సె.

32 క్రీస్తుక నంపజలస మొత్తుమ్ బెద జోచి ఆగ్ జతిన్క పెండ్లి జా చెంగిల్ దెకితి ఈంజ టాలిచి అర్దుమ్ వెల్లి.

33 గని మాములుమ్ తెర్నిమున్ను చి అర్దుమ్ కి ఉచరుక జయెదె. మెలె, తుమ్చి తెచ మున్నుబోదల్ కో జలెకి, తేర్నివొక ప్రేమ దెకుత్. పడ్డె, తేర్ని మున్నున్క మరియాద దెకుక అస్సె.

6

బోదల్ అయ్యున్ అబ్బొన్

1 తుమ్ బాలబోదలు, *ప్రబుచి తెడి అయ్యున్అబ్బొన్చి కోడు సూన. ఈంజ ప్రబుచి ఇన్లుమ్.

2 పూర్గుమ్ దేముడు రెగ్డయ్లి జా కోడు కిచ్చొ మెలె, †"అయ్యున్అబ్బొన్క గవురుమ్ కెర. ప్రమానుమ్ తెన్ ఆగ్గుల్క ఈంజ తొలితొ చి.

3 మెలె, అయ్యున్అబ్బొన్క గవురుమ్ కెర్లె, తుమ్క చెంగిల్ తయెదె, చి ఈంజ లోకుమ్తె ఒగ్గర్ దీసల్ జస్తె"

మెన రెగ్డ అస్సె.

4 తుమ్ అబ్బుదింసి, జలె, ఆరి తుమ్చ బోదల్క కోవుమ్ కెరవ నాయ్, గని ప్రబు దెతి బుద్ది తెన్ జోవయింక ముద్దొ కెర, ప్రబుచి ఎత్తి సికడ పొన.

సేవ కెర్తన ఎజొమాన్లు

5 కో గొతిమాన్సుల్ జలె, క్రీస్తుక గవురుమ్ కెర్తి రితి తుమ్చ పెట్టితె ఎజొమాన్లుక బియ, ఎక్కి నిదానుమ్ తా, జోవయించి కోడు రితి కెర.

6 మాములుమ్ మాన్సుల్చి గవురుమ్ ఆనన్తి బుద్ది తిలి రితి, ఆరి డీసుకయ్ నిదానుమ్ తిలి రితి తుమ్ జా నాయ్. గని దేముడుచి ఇన్లుమ్ రితి కెర్తి రిసాయి తుమ్ ‡క్రీస్తుచ సేవ కెర్తన తిలి రిసా, తుమ్చి పెట్టిచి ప్రేమ తెన్ కెర.

7 మెలె, మాన్సుల్క మెన్చ వడంతి రిసా నాయ్, గని ప్రబుక సర్ల తెన్ సేవ కెర్తి రితి, తుమ్చ ఎజొమాన్లుచి సేవ తుమ్ సర్ల తెన్ కెర.

8 కేన్ మాన్సు, గొతిమాన్సు జలెకి నెంజలె కి, కిచ్చొ చెంగిల్చి కెర్లె కి, ప్రబు జోవయింక చెంగిల్ దెక బవుమానుమ్ దెయెదె మెన జాన్సు.

† 5:23 5:23 1:23, 4:4 దెక. ‡ 5:26 5:26 నెంజలె, 'బాప్తిసుమ్క చి జోవయించి కోడుక జేక పూర్తి సుద్ది కెర జా జోచి జా గెతి రితి కెర్తి రిసా'. § 5:31 5:31 అదికాండుమ్ 2:24. * 6:1 6:1 మెలె 'ప్రబుచి తెడి అస్సెనచి జోవయించి ప్రేమబుద్ది తుమ్చి పెట్టి తిలె జోవయించి ప్రేమకయ్ అయ్యున్అబ్బొన్చి కోడు సూన్తె'. † 6:2 6:2 ద్విత్వీయోపదేశ కాండుము 5:16. ‡ 6:6 6:6 నెంజలె 'క్రీస్తుక గొత్తి మాన్సుల్ రిత తిలి రిసా', నెంజలె 'క్రీస్తుక గొత్తి రితి జలి రిసా'.

9 తుమ్ ఎజోమాన్లు, తుమ్చ గొతిమాన్సుల్క దస్సి ప్రేమ దెక, జోవయింక బియడ నాయ్. జోవయింక తుమ్క ఎజోమాని జతో దేముడు పరలోకుమ్తె అస్సె, చి జో కక్క మొకమాటుమ్ దెకె నాయ్.

సయతానుక జీన్తి రిసా ఆత్మ డిట్టుమ్ కెరనుక అస్సె

10 జలె, ఆకర్క కిచ్చో మెన అవ్ రెగిడ్డసి మెలె, ప్రబుచి తెడి డిట్టుమ్ తా, జోచి ఆత్మసెక్తి దెరన ఇండ.

11 సయతానుక తుమ్ జీన్తి రితి, దేముడు దెతి కిచ్చో నే లయితి ఇనుము సొక్క తుమ్ గలన.

12 కిచ్చోక మెలె, మాన్సుల్క మాన్సుల్ కెర్తి యుద్దుమ్ నెంజె, ఈంజ, గని కో కో యుద్దుమ్ కెర్తనచి ఉప్పిరి అమ్ జీనుక అస్సె మెలె, కివిలుప కెర్త గర్చ ఆత్మల్చి ఉప్పిరి, *జోవయించి తెడి ఏలుప కెర్త ఆత్మల్చి ఉప్పిరి, ఈంజ ఉగుమ్చి అందర్ తిలి సయతాన్చి రాజిమ్తె ఏలుప కెర్త ఒగ్గర్ గార్చి సెక్తిచి ఉప్పిరి, మాన్సుల్క పాడ్ కెర్త బూతల్చి ఉప్పిరి, మాయలోకుమ్చ సెక్తివో ఎత్కిచి ఉప్పిరి అమ్ జీనుక అస్సె.

13 జాకయ్, కేన్ సమయుమ్క సయతాన్చ జేవ్ సెక్తివో అల్లర్ కెరుక ఉచరుల గే, దేముడు జా యుద్దుమ్క దిలి కిచ్చో నే లయితి 'ఇనుము సొక్క' మెన టాలిక సంగితిన్ ఎత్కి తుమ్ గలన తెయార్ జా తా, చి జా యుద్దుమ్క టీవ్క తుమ్క సెక్తి తయెదె, చి జీన టీవ్తె.

14 కిచ్చో నే లయితి జా కిచ్చో కిచ్చో తుమ్ గలన మెలె, సత్తిమ్ తుమ్క పట్క రితి జయెదె. ప్రబు దిలి పున్నిమ్ తుమ్క ఇనుము సొక్క జయెదె,

15 మాన్సుల్క దేముడు తెన్ బెదయ్తి సేంతుమ్ దెతిన్చి రిసాచి సుబుమ్ కబుర్ సూనయ్తి రిసా తెయార్ జతిసి తుమ్క డిట్టుమ్చ జోడ్లు జయెదె.

16 పడ్డో అస్సె, ప్రబుచి ఉప్పిర్చి నముకుమ్ తుమ్క డాలు జయెదె. జో గలన్లె, ఆగి లగిత సయతాన్ విందిత కండో నే లయితి రితి నెతోవ విజయ్తె.

17 పడ్డో, ప్రబు దెతి రచ్చన తుమ్చి బోడిక ఇనుము టోపి జయెదె. పడ్డో ఎత్కి అదికారుమ్ తిలో దేముడు రెగ్గయ్ల కొడో జోచి ఆత్మచి కండా దస్సి తుమ్ గలన.

18 అస్సె, దేముడుచి సుద్ది తిలి ఆత్మసెక్తి తుమ్చి పెట్టి తోడు తా, కెడ్డోడ్ కి ప్రార్దన కెర, ప్రబుచి తోడు నజన్తె తా. ప్రార్దన కెర్తె తతి రిసా తెలివి తెన్ తా, ఎక్కి నిదానుమ్ తా, దేముడుచి సుద్ది సుదల్ ఎత్కిచి రిసా 'చెంగిల్ తత్తు' మెన తుమ్ ప్రార్దన కెర.

19 పడ్డో, †చి గుట్టు ఆవ్ దయిరిమ్ తెన్ సుబుమ్ కబుర్ సూనయ్తి రితి ప్రబు అంక సెక్తి దెవున్ మెన, అంచి రిసా కి తుమ్ ప్రార్దన కెర్తె తా.

20 జా సుబుమ్ కబుర్ సూనయ్లి రిసా ప్రబుచి అదికారుమ్ తెన్ తిలో బారికి రితో జా ఆవ్ ఇసి జేల్తె తా గొల్సుల్ తెన్ బందయ్ జా అస్సి. జలెకి, ప్రబుచి ఇస్టుమ్ కిసి తిలె ఆవ్ దయిరిమ్ తెన్ ఈంజ సుబుమ్ కబుర్ సూనయ్తి రితి జో ప్రబు సెక్తి దెవున్ మెన, అంచి రిసా తుమ్ ప్రార్దన కెర.

21 జలె, ఆవ్ కిసి అస్సి గే కిచ్చో కెర్తిసి గే తుమ్ జాన్తి రిసా, ప్రేమ జలో అమ్క బావో జతో, ప్రబుచి తెడి అంక తుమ్క సేవ నిదానుమ్ కెర్తె తుకికు తుమ్క సంగెదె.

22 జాకయ్ జోక ఆవ్ తెద్రవ అస్సి. అమ్ కిసి సంతోసుమ్ గే తుమ్క జానవుక మెన, తుమ్చి పెట్టి తుమ్ దయిరిమ్ జతి రితి జో తుమ్క దయిరిమ్ సంగెదె.

ఆకర్ కోడు

23 దేముడు అబ్బోసి దెతి ప్రబు జలో యేసుక్రీస్తు దెతి సేంతుమ్, ప్రేమ, నముకుమ్ ప్రబుచి తెడి తిల ఒత్తచ బావుడ్లు ఎత్కిక కలుగు జవున్!

24 అమ్చో ప్రబు జలో యేసుక్రీస్తుక కో పూర్తి నే మొర్తి ప్రేమ కెర్తసు గే, జోచి దయ తుమ్చి ఉప్పిరి తవుసు!

§ 6:12 6:12 నెంజలె, 'అదికారుమ్ తిలిసి ఎత్కిచ ఉప్పిరి'. * 6:12 6:12 నెంజలె, 'అదికారుల్ ఎత్కిచి ఉప్పిరి'. † 6:19 6:19 చి రిసాయి 'చి గుట్టు' మెన సంగితయ్, నెంజలె, యూదుల్ నెంజలన కి పాపుమ్ తెంతో రచ్చించుప జతి, ఎత్కి అదికారుమ్ తిలో దేముడు తెన్ జేవ్ బెదితి వాటు అయ్లన్చి రిసా సంగితయ్. 1:9-10, 3:1-6.

పిలిప్పియుల్క రెగిడ్లి ఉత్త్రుమ్ బారిక్ జలో పవులు పిలిప్పి పట్టుమ్చ సంగుమ్చక రెగిడ్లి ఉత్త్రుమ్

మొదొల్ కోడు

1 పిలిప్పి పట్టుమ్తెచ *క్రీస్తు జలో యేసుక నంపజా జోచి సుద్ది జా జోచయ్ జా, జోచి తెడి తిల మాన్సుల్క, పడ్డో తుమ్చ సేవ కెర్తొన్క చి జోచి తెడి సంగుమ్చి సేవ కెర్తొ అన్నె వెల్లెల మాన్సుల్క, యేసుక్రీస్తుచి సేవ కెర్తొ జోచ †గొత్తి మాన్సుల్ జల పవులు, అన్నె తిమోతి రెగిడ్లి ఉత్త్రుమ్.

2 అమ్క అబ్బొ జలో దేముడు అన్నె ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

పిలిప్పియుల్చి రిసా పవులుచి సర్ద

3 తుమ్చి రిసా ఆవ్ కెయ్చ ఉచర్లె కి, తుమ్చి రిసా అంచి సర్ద ఆవ్ దేముడుక సంగితసి.

4 తుమ్చి రిసాచి ఎత్కి అంచి ప్రార్దన పూర్తి సర్ద తెన్ కెర్తసి.

5 కిచ్చొక ఒగ్గర్ సర్ద జతసి మెలె, తుమ్ నంపజలి †మొదొల్ తెంతో, అప్పె ఎద కి తుమ్ అంచి తెన్ బెద, సుబుమ్ కబుర్ సూనయ్తినె అంక కితోడు అస్సున్.

6 దేముడు తుమ్చి పెట్టి మొదొల్ కెర్లి చెంగిల్ కామ్, యేసుక్రీస్తు ఈంజ లోకుమ్తె అన్నె ఉత్త్ర జెతి దీసి ఎదక, జో దేముడు అబ్బొసి జా కామ్ సొంత పూర్తి జర్గు కెరెదె మెన, అంక దయిరిమ్ అస్సు.

7 తుమ్ ఎత్కిజిన్చి రిసా ఆవ్ ఇసి ఉచరుక చెంగిల్. కిచ్చొక మెలె, తుమ్చి రిసా అంక ఒగ్గర్ ప్రేమ, అంక దిలి దేముడుచి దయ తెన్ అంచి తెన్ తూమ్ బెద అస్సున్. సుబుమ్ కబుర్చి రిసా ఆవ్ *జేలి జలి సైమతె కి, చి రిసా జబాబుల్ దెతినెతె కి, రుజ్జుల్ దెకయ్తినెతె కి, తుమ్ ఎత్కిజిన్ ఆత్మతె అంచి తెన్ బెద తోడు అస్సున్.

8 క్రీస్తు జలో యేసు అమ్క కెర్ది ప్రేమ దెకితయ్ గే, దస్సి ప్రేమ తెన్ తుమ్క ఆవ్ తెర్ది ఉచర్లె తత్తసి మెన, దేముడు సాచి అస్సె.

9 తుమ్చి అప్పెచి ప్రేమ అన్నె ఒగ్గర్ జవున్ మెన అంచి ప్రార్దన. ప్రబుచి రిసాచి గ్యానుమ్చి కిచ్చొ కిచ్చొ ఎత్కి అర్దుమ్ కెరంతి కిచ్చొ కిచ్చొ ఎత్కి చినితి బుద్ది జా ప్రేమతె ఒగ్గర్ జవున్ మెన ప్రార్దన కెర్తసి.

10 ఆత్మక దస్సి వడ్డెలదు మెలె, చెంగిల్ తిలిన్క గార్ తిలిన్క నిసుక జాన, చెంగిల్చిక మెన ఇస్తుమ్ జస్తె, చి క్రీస్తు అన్నె ఉత్త్ర జా తీర్పు కెర్తి జా వెల్లి దీసి ఎదక తుమ్ ఎత్కిజిన్ ఎక్కి మెన్సు నిదానుమ్ జస్తె, చి తుమ్క 'పొరపాట్ జల' మెన కో సంగుక నెత్తిర్తి.

11 తుమ్ దస్సి ప్రేమ, ఆత్మచి గ్యానుమ్ జలె, యేసుక్రీస్తుతె దొర్కు జతి పున్నిమ్చి పూర్తి పలితుమ్ తుమ్చి పెట్టి దెర్లె తయెదె, చి దేముడుచి నావ్, జోచి గవురుమ్ టీవెదె.

పవులు జేలి జా చెంగిల్ పలితుమ్ దిలిసి

12 బావుడ్డు, తుమ్ కిచ్చొ జానసుక మెన అవ్ ఆస జతసి మెలె, అంక జర్గు జలి కస్తుమ్ ఆరి తయె నాయ్, గని సుబుమ్ కబుర్ సూనయ్తినెక కామ్క జా అస్సె.

13 కీసి మెలె, క్రీస్తుక ఆవ్ నిదానుమ్ తిలి రిసాయి ఆవ్ జేలి జలిసి మెన వెల్లి అదికారిచి గేర్ జలి అదికారుల్క, అన్నె ఎత్కిజిన్ జాన అస్తి.

14 పడ్డో అన్నె, ఆవ్ జేలి జలి తెంతో ఇన్నెచ నంపజలన †ప్రబుచి తెడి ఒగ్గర్ దయిరిమ్ జా, బయిమ్ నెంతె దేముడుచి †కోడు ఒగ్గర్ దయిరిమ్ తెన్ సూనయ్తతి.

15 సగుమ్జిన్ జోవయించి పెట్టిచి అంచి ఉప్పిర్చి గోసక, కుస్సిదుమ్ ఉచర సుబుమ్ కబుర్ సూనయ్తతి, గని అన్నె సగుమ్జిన్ అమ్చి తెన్ సర్ద తెన్ తా సూనయ్తతి.

16 ఈంజేవ్ జలె, ప్రేమకయ సూనయ్తతి. చి సత్తిమ్ ఆవ్ రుజ్జు దెకయ్తి రిసాయి ఆవ్ ఇన్నె జేలి తెన్ తంక దేముడుచి సెలవ్ మెన ఈంజేవ్ జాన్తి.

17 జేవ్ గోసచ, జలె, వెల్లి కెరనుక ఉచర గార్ ఆస తెన్ సుబుమ్ కబుర్ సూనయ్తతి. జోవయించి పెట్టి నిదానుమ్ తతి నాయ్, గని ఆవ్ జేలి జలోసాక అంక నొప్పి దెంక ఉచరయ్ సూనయ్తతి.

18 జలె, కిచ్చొ? జోవయించి పెట్టిచి బుద్ది మాయచి జలెకి, సత్తిమ్చి జలెకి, క్రీస్తుచి రిసాయి జేవ్ సాడుప కెర్తతి. జాచి రిసా అంక ఒగ్గర్ సర్ద.

* 1:1 1:1 'క్రీస్తు' మెలె, 'తెర్దయిందె' మెన పూర్ణుమ్ ఎత్కి అదికారుమ్ తిలో దేముడు యూదుల్క సంగ తిలో దొర్కు జలో రచ్చించుప కెర్తొసా. † 1:1 1:1 నెంజెల 'గొతిమాన్సుల్ రిత'. ‡ 1:5 1:5 బారికుల్ 16:12-40. § 1:5 1:5 పిలిప్పియుల్ 1:19 ప్రార్దన కెర తిల. 2:25-30 ఎవప్రాదితుక పవులుతె తోడు తెర్దవ తిల, చి 4:10-11 చి 14-18 డబ్బుల్ తెర్దవ తిల. * 1:7 1:7 పవులు రోమ్తె జేలి జలి పొది ఈంజ ఉత్త్రుమ్ రెగిడ్లి మెన ఒగ్గర్జిన్ ఉచర్తతి. బారికుల్ 28:16, 30, 31 దెక. పిలిప్పియుల్ 4:22 దెక. కైసర్ రానో రోమ్ పట్టుమ్తె తయెదె. పిలిప్పియుల్ 1:13 దెక. ప్రేతీరియచ అదికార్లు కి రోమ్తె తవుల. కైసరియ పట్టుమ్తె కి పవులు జేలి జా తిలో; బారికుల్ 23:23-24:27. పిలిప్పియె కి; బారికుల్ 16:23, అన్నె యెరూసలేమ్తె; బారికుల్ 21:33..., గని పిలిప్పియె చి యెరూసలేమ్తె ఒగ్గర్ దీనల్ జేలి తయె నాయ్. ఎవెసుతె కి జేలి జా తిలన్ మెన సగుమ్జిన్ ఉచర్తతి, గని రుజ్జు నాయ్. † 1:14 1:14 మెలె, 'పవులు జేలి జలెకి ప్రబు జోవయింక తోడు అస్సె మెన రుజ్జుల్ దెక దయిరిమ్ జా....' ‡ 1:14 1:14 నెంజెల 'సుబుమ్ కబుర్', నెంజెల 'కబుర్'.

మొరై చెంగిల్ గే జిలె చెంగిల్ గే

19 పడ్డె, అన్నె కిచ్చొ సర్ల కచితుమ్ జయిందె మెలె, తుమ్ ప్రార్లన కెర్లి రిసా, యేసుక్రీస్తుచి ఆత్మ అంక తోడు తిలి రిసా, ఈంజేవ్ బాదల్ ఎత్తితె రచ్చించుప జయిందె మెన జాని.

20 క్రీసి మెలె, ఆవ్ ఓడుప జయి నాయ్, గని ఆవ్ పూర్తి దయిరిమ్ తయిందె, చి అప్పె కి కెయక కి, ఆవ్ జిలె కి మొరై కి, అంచి అగి క్రీస్తుచి గవురుమ్ డీసెదె మెన అంచి ఆస, అంచి దయిరిమ్.

21 కిచ్చొక మెలె, ఈంజ అగి ఆవ్ జిలె, క్రీస్తుచి రిసాయి జితసి, జోచి కామ్ కెర్లి రిసాయి జితసి. ఆవ్ మొరై, జోతె గెచ్చిందె, చి అంకయ్ లాబుమ్.

22 ఆవ్ ఈంజయ్ అగి జింక జిలె, క్రీస్తుచి కామ్క జెయిందె. గని జితిన్తె మొర్లిన్తె కేన్ నిసాన్దె గే, నేని.

23 ఈంజేవ్ దొన్ని మెన్సుల్ తా ఆవ్ అల్లర్ జతసి. అంచి సొంత ఇస్తుమ్ కేన్ మెలె, మొరై క్రీస్తుతయ్ గెచ్చుక; ఈంజ లోకుమ్తె ఆవ్ తతి కంట అంక జయ్యి లాబుమ్.

24 గని తుమ్చి రిసా ఆవ్ ఈంజ అగి జిలె చెంగిలి. జాకయ్ జయ్యి ముక్కిమ్.

25 ఈంజ కోడు నిజుమ్ మెనయ్, తుమ్ ఆత్మక అన్నె వడ్డితి రితి క్రీస్తుచి తెడి నముకుమ్ తెన్ తుమ్ సర్లసంతోసుమ్ తతి రితి, ఇసి తా తుమ్చి తెన్ తయిందె మెన ఆవ్ కచితుమ్ జాని.

26 దస్సి, తుమ్చితె ఆవ్ అన్నె అయ్లె, యేసుక్రీస్తుచి తెడి అంచి రిసా తుమ్క ఒగ్గర్ సర్ల జస్తె.

క్రీస్తుచి తెడి ఎక్కి నిదానుమ్ తా

27 క్రీస్తుచి సుబుమ్ కబుర్క గవురుమ్ కెర్లి రితి ముక్కిమ్క బుద్ది ఇండ, చి తుమ్క సొంత దెకిత్ రితి ఆవ్ తుమ్తె అయ్లె కి, నాయ్ మెలె నెత్త వేరతె తిలె కి, తుమ్క 'ఎక్కి ఆత్మ నిదానుమ్ తా డిట్టుమ్ టీఱ, సుబుమ్ కబుర్చి సత్తిమ్ వేర మాన్సు నంప కెర్లి రితి ఎక్కి మెన్సు, ఎక్కి కట్టు తెన్ బెద,

28 కిచ్చొచి రిసా కి విరోదుమ్ సుదల్క నే బితె క్రీస్తుచి పచ్చెనచి కామ్ కెర్తతి' మెన తుమ్చి రిసా సూనిందె. తుమ్చి నిదానుమ్ తుమ్చ విరోదుమ్ సుదల్క కిచ్చొ రుజ్జు దెకయెదె మెలె, జేవ్ నాసెనుమ్ జతిసి, అన్నె తుమ్ రచ్చున జతిసి. కిచ్చొక మెలె, దేముడు సొంత ఇసి జర్గు కెర్తయ్.

29 మెలె, క్రీస్తుచి నావ్ గవురుమ్ జతి రిసా తుమ్ జోక నంప కెరుక మెన, గని అన్నె కిచ్చొ మెలె, అల్లర్ సేడ ఒర్పుప జా జినుక మెన, దేముడు తుమ్క వరుమ్ దా అస్సె.

30 కిచ్చొక మెలె, తుమ్ అంచితె దెకిలి రితి, అంక తిలిసి మెన అప్పె తుమ్ సూన్లి రితి అల్లర్ తుమ్క కి అస్సె.

2

క్రీస్తుచి రితి, దాక్ కెరన

1 జిలె, క్రీస్తుతె తిలి పొది తుమ్క దయిరిమ్ దొర్కు జతయ్ మెలె, ప్రేమ తుమ్క పెల్లితయ్ మెలె, దేముడుచి సుద్ది తిలి ఆత్మ తుమ్చి పెట్టి అస్సె మెలె, తుమ్చి పెట్టి ముద్దుచి కన్కారుమ్ అస్సె జిలె,

2 ఎక్కి ఉద్దెసుమ్ తెన్, ఎక్కి ప్రేమ తెన్, పూర్తి ఎక్కి కట్టు తెన్, ఎక్కి మెన్సు తా, చి అంక పూర్తి సర్లసంతోసుమ్ కెర్తె.

3 సొంత గార్ ఆసక, సొంత గవురుమ్క, తుమ్ కిచ్చొ కెర నాయ్, గని దాక్ కెరన, ఎక్కిలోక ఎక్కిలో జోచి కంట వేర మాన్సుల్క గవురుమ్ దెకిత్ తా.

4 తుమ్తె ఎత్తి మాన్సు ఎక్కి సొంత దెకన నాయ్, గని, ఎక్కిలోచి రిసా ఎక్కిలో 'చెంగిల్ జతు' మెన తుమ్ వేర మాన్సుల్క కి చెంగిల్ దెక.

5 క్రీస్తుక తిలి జోచి తెడి దొర్కు జతి బుద్ది తుమ్చి పెట్టి తుమ్ తియన.

6 కిచ్చొ నే జెర్మయ్లి అగ్గె తెంతో కి

దేముడు తెన్ జో ఎక్కి జిలెకి,

'దేముడు' మెనన గవురుమ్ ఆనసుక ఉచరె నాయ్,

7 గని, జొయ్యి దాకు కెరన, మాన్సు జా జెర్మన్ జా,

గొత్తి సుదొ రితి జలన్.

8 దస్సి, మాన్సు జా జెర్మన్ జా జో జోకయి దాకు కెరన

దేముడు అబ్బొన్చి సెలవ్ కోడు జర్గు కెర,

మాన్సు సేడ్డి మొర్నుతె సేడ్డన్;

సిలువతె మొరై గెలో.

జిలె,

9 దేముడు అబ్బొన్చి సెలవ్ కోడు జర్గు కెర జో మొర్లి రిసా,

దేముడు అబ్బొసి జోక ఎత్తిచి కంట వెల్లో కెర

జోక ఎత్తి నవ్వొచి కంట వెల్లి నావ్ తియ అస్సె.

10 'జో యేసుచి నావ్ సూన ఎత్తి మాన్సు

మొగ్రల్ టెక జోవయింక జోకర' మెనయ్.

జేవ్ పరలోకుమ్తె తిలె కి, బూలోకుమ్తె తిలె కి,

పాతలలోకుమ్తె తిలె కి, కేనె తిలె కి

జోక జొకర్లు మెనయ్

దస్సి కెర అస్సె;

11 చి 'యేసుక్రీస్తు ప్రబుయి' మెన

ఎత్తి చోడి తెనె ఒప్పన్తు మెనయ్, చి

జోకయ్ గవురుమ్ జవున్

దేముడు అబ్బొన్కయ్

గవురుమ్ జెయెదె, దస్సి కెర అస్సె.

బుద్ది ఇండితిన్తె ప్రబుచి సత్తిమ్చి రుజ్జు తుమ్ దెకవ

12 జిలె, బావుడ్లు, అగ్గె తెంతో ఆవ్ తుమ్చి తెన్ తిలి పొది అంచి కోడు సూన్లదు. దస్సి అప్పె, ఆవ్ నెంజిలి పొది

ఒగ్గర్ బియఁ దేముడు దిలి *రచ్చన తెన్ బెదితి బుద్ది తుమ్ ఇండితె తా.

13 కిచ్చొక మెలె, జోచి ఇస్టుమ్ రితి కెర్తినక తుమ్ ఏక్ ఇస్టుమి జతి రితి నాయ్, గని తుమ్ జర్గు కెరుకయ్ మెన, తుమ్చి పెట్టి జో కామ్ కెర తుమ్క దేముడు సెక్తి దెతయ్.

14 తుమ్ మూర్కుమ్ జల వంక్టో జల మాన్సుచి నెడ్మె పాపుమ్ నెంజిలన రిత, మచ్చల్ నెంజిలన, అన్నె నింద నే గల్తి రితి దేముడుచి పుత్తర్పులు జతి రితి తంక, అగాసుమ్తె జోచి ఉజిడి దెకయ్త సుక్కల్ రిత తుమ్ జస్తె.

15 కిచ్చొకామ్ తిలె కి, తెడి తెడి నే బాద సేడ, నే అన్మానల్ జా ఎత్తి కమె తుమ్ కెర.

16 పడ్డో, జివు దెతి సుబుమ్ కబుర్ తుమ్ †డిట్టుమ్ దెరన, చి క్రిస్తు అన్నె ఉత్ర జా ఈంజ లోకుమ్చక తీర్పు కెర్తి వెల్లి దీసిక, 'అంచి సైమ, అంచి కామ్ ఆరి కామ్క జెతిసి నెంజె' మెన దెక కెర, ఆవ్ సర్ద జయిందె.

17 తుమ్క క్రిస్తు ప్రబుక నంపజా నిదానుమ్ తెన్ జోచి సేవ కెర్తసి చి రిసా ఆవ్ ఏక్ వేల సుచ దిలి బలి జతి రితి జంక జలెకి, తుమ్ ఎత్తిజిన్చి సర్దతె ఆవ్ బెదితసి.

18 తూమ్ కి ఇసి సర్ద తెన్ తా, అంచి సర్దతె బెద.

తిమోతిక జోవయింతె తెద్రవుక

19 తుమ్చి రిసాచి కబుర్ సూన్లె సర్ద జయిందె మెన, ప్రబు జలో యేసు సెలవ్ దిలె తిమోతిక తుమ్తె బే బేగి తెద్రవుక మెన అవ్ ఆస జతసి.

20 తిమోతిక ముల అన్నె కో దస మాన్సుల్ అంక తోడు నాయ్. తుమ్క చెంగిల్ జతు మెన జోయ్యి పూర్తి నిదానుమ్ తయెదె.

21 జేవ్ తిల మాన్సుల్ జలె, యేసుక్రిస్తుచి కామ్ కెరుక పచ్చితె తా, ఎత్తిజిన్ జోవయించి సొంతయ్ లాబుమ్ దెకన్తతి.

22 గని తిమోతి చి నిదానుమ్ జాన్సు. అంక జో అబ్బొ మెన దెకిల్ రితి జా, పుత్తు రితో జా, సుబుమ్ కబుర్చి రిసా అంచి తెడి జో ప్రబుచి సేవ కెర్తసి జాన్సు.

23 జాకయ్, ఆవ్ కిసి †జయిందె గే తుమ్ సూన్లె, బేగి జోక తుమ్తె తెద్రయిందె.

24 అన్నె, †ప్రబుచి తెడి అంక కిచ్చొ నముకుమ్ మెలె, జో సెలవ్ దిలె, ఆవ్ కి సొంత జెంక వాట్ తయెదె మెన అవ్ ఉచర్తసి.

ఎపప్రాదితుక జోతె తెద్రయ్లిన్చి

* 2:12 2:12 'రచ్చన', 'రచ్చించువ జతిసి' మెన ఇన్నె నంగిలె, పాపుమ్ తెంతో చి రచ్చనక నంగితసుమ్. అమ్ కెర్ల పాపల్చి రిసా లయితి సిచ్చ తెంతో నయ్తాన్చి రాజిమ్ తెంతో అమ్క ఎత్తి అదికారుమ్ తిలో దేముడు యేసుచి అత్తి రచ్చించువ కెర్తసి. † 2:16 2:16 నెంజెల 'సూనయ్తె తా'. ‡ 2:23

2:23 ఏక్ వేల జో జేలి జలిన్క రకుములు జతిన్క ఉచర్తయ్. § 2:24 2:24 మెలె 'ప్రబుచి తెడి ఆవ్ తిలి రిసా' అన్నె 'ప్రబుచి ఒగ్గర్ సెక్తిచి రిసా'. * 2:29

2:29 మెలె, 'ప్రబుచి తెడి తుమ్ తిలి రిసా, అన్నె ప్రబు సొంత జోవయింక బెదవన అన్నెచి రిసా పూర్తి...' * 3:1 3:1 మెలె, 'తుమ్ జోవయించి తెడి అన్నె చి జో తెయి సర్దనంతోనుమ్ అన్నెచి రిసా, సర్ద...' † 3:2 3:2 నగుమ్జిన్ నంపజలన జల యూదుల్, చి యూదుల్ నెంజెల నంపజలనతె గెతె తా, జోవయించి సున్నతిచి రిసా బలవంతుమ్ కెర్తె తిల; జా సున్నతి కెర్లకయ్ పాపుమ్ తెంతో రచ్చించువ జంక జయెదె, పరలోకుమ్తె గెచ్చుక జయెదె; మెన సికడ్లి రితి.

25 ఎపప్రాదితుక తుమ్తె తెద్రయ్లె చెంగిలి మెన ఆవ్ తెద్రయ్తసి. అంక జో బావొ జా అన్నె, అంచి తెన్ బెద సుబుమ్ కబుర్ కామ్ కెర అన్నె, అంచి తెన్ జా కామ్చి రిసా బాదల్ ఒర్పుప జా అన్నె, తూమ్ జోచి అత్తి అంక తోడు కెర్తి రితి, తుమ్చి తెంతో కబుర్ జా అంక తోడు కెర అన్నె.

26 కిచ్చొక జోవయింక తుమ్తె అన్నె తెద్రయ్తసి మెలె, ఒగ్గర్ దీసల్ జలి తుమ్క దెకె నాయ్ చి ఒగ్గర్ ఉచర్తయ్. పడ్డో, జో జొర్ణా సేడ్డిన్చి రిసా తుమ్ సూన్లెచి రిసా చింత గలన తవుల మెన జో దుకుమ్ సేడ అన్నె.

27 నిజుమి, జో మొర్తి రితి జలె, గని దేముడు జోక కన్కారుమ్ రచ్చించువ కెర్లన్. జోకయ్ నాయ్ అంక దుకుమ్చి ఉప్పిరి దుకుమ్ నే కలుగు జతి రితి కన్కారుమ్ దెకయ్లొ.

28 జాకయ్, జోక అన్నె దెక తుమ్ సర్ద జతి రిసా, జోక తుమ్తె బే బేగి తెద్రవుక ఆవ్ ఆస జా అన్నె. దస్సి, గెలొ మెలె తుమ్చి రిసా ఆవ్ ఇసి బాద సేడుక నాయ్.

29 జాకయ్, *ప్రబుచి తెడి ఒగ్గర్ సర్ద తెన్ జోక తుమ్ అన్నె బెదవన. అన్నె దస మాన్సుల్ ఎత్తిజిన్క తుమ్ గవురుమ్ దెక.

30 కిచ్చొక మెలె, అంచి రిసా తుమ్ ఉచర కెరుక నెత్తిర్తి తోడు పూర్తి జర్గు కెరుకయ్ మెన, క్రిస్తుచి కామ్చి రిసా తెదొడి జో మొర గెతో.

3

ప్రబుచి తెడి సర్ద తతిన్

1 అన్నె, ముక్కిమ్క బావుడ్లు, *ప్రబుచి తెడి తుమ్ సర్దనంతోనుమ్ తా. తుమ్క ఈంజ ఎత్తి అన్నె రెగుడుక అంక బాద నాయ్, చి ఆత్మక తుమ్క చెంగిల్ జర్గు జయెదె.

2 సూనర్లు రిత ప్రబుక విరోదుమ్ జలనచి, చెంగిల్ కెర్తసుమ్ మెన, గార్ కెర్తె రిసా తుమ్ జాగర్ద తెన్ తా. మాన్సుచి అగి చి జోవయించి గుర్చి †సున్నతిచి రిసా జేవ్ బలవంతుమ్ కెర్తసచి రిసా తుమ్ జాగర్ద తెన్ తా.

3 ముక్కిమ్క ప్రబుకయి కెర్తి సున్నతి కెర్లన్లన కొన్న మెలె, ఆము. కిసి మెలె, దేముడుచి సుద్ది తిలి ఆత్మచి సెక్తిక జోచి సేవ కెర్తె తా, ఆగుక కమెచి నంప నే కెర్తె, రచ్చించువ జంక జలె క్రిస్తుయి సాలు మెనయ్ ఎక్కి క్రిస్తు జలో యేసుచి ఉప్పిరి అమ్చి నముకుమ్ తియ, జోచి రిసాయి దయిరిమ్ తెన్ సర్ద తెన్ అన్నుమ్.

4 ఆగుక నంప కెర్తినచి రిసా ఉచరై జలె, దస్సిచిక నంప కెరుక కామ్క జెతి జలె, అవ్వి పవులు ఒగ్గర్ దయిరిమ్ తంక జతి. 'అగి జర్లు కెర్తినచి రిసా అంక చెంగిలి' మెన కో ఉచరంతతి గే, జోవయించి కంట అంకయ్ చెంగిల్ మెనుక జతి.

5 మెలె, యూదుల్చ ఆగ్గుల్ రితికయ్, ఆవ్ జెర్లు అట్టు పొదుల్చ అంక జా గుర్తుచి సున్నతి కెర్ల. ఆవ్ ఇస్రాయేలుడు, బెన్యామీను చి సెకుమ్తె జెర్మిలయ్, సీఎబ్రియుల్తె జెర్మి ఎబ్రియుడు జా జయ అస్సి. యూదుల్చ ఆగ్గుల్ రితి కెర్తినక దెకిలె, *పరిసయ్యుడు జయిందె. అమ్ పరిసయ్యుల్ చి నిదానుమ్ రితి ఆవ్ కెర్తె తిలయ్.

6 జా రితి అంచి ఒగ్గర్ నిదానుమ్ ఆవ్ కీసి నెరవెర్చుప కెర్తె తిలయ్ మెలె, నంపజలనక సిచ్చల్ కెర్తె తిలయ్. చి అమ్చ ఆగ్గుల్చి పున్నిమ్చి రితి ఆవ్ కెర్తె తిలిన్క దెకిలె. పొరపాట్ నెంతె తిలయ్.

7 గని, జా ఎత్తితె అంక కిచ్చో లాబుమ్ తిలి గే, క్రీస్తుకయ్ పూర్తి నిదానుమ్ జంక మెన, ఎక్కి జోచి ఉప్పిరి అంచి నముకుమ్ పూర్తి తింక మెనయ్, జా వేరచి ఎత్తిక 'సంతోసుమ్' మెన దెక, ముల అస్సి.

8 నిజుమి 'అంచో ప్రబు జలో రచ్చించుప కెర్తొసా జలో క్రీస్తు జలో యేసుక జాన జో తెన్ ఇండితిసి ఎత్తిచి కంట చెంగిలి' మెనయ్, వేరచి ఎత్తిక నస్తుమ్ మెన దెకితసి, క్రీస్తుచి రిసాచి అంచి ప్రేమచి రిసా వేరచి ఎత్తి పిట్టవన అస్సి, వేరచి ఎత్తిక ఉస్టా మెన దెకితసి. కిచ్చోక మెలె, ముక్కిమ్క క్రీస్తుయి అంక కావలె, జోయ్యి అంక లాబుమ్,

9 చి జోచి తెడి తా, అంచి సొంత సెక్కిచి పున్నిమ్, మెలె ఆగ్గుల్ రితి కెర్తి పున్నిమ్ తెన్ తయె నాయ్; కక్క దస్సిచి పున్నిమ్ దెయె నాయ్, గని అంక కిచ్చో పున్నిమ్ తయెదె మెలె, క్రీస్తుక నంపజలి వాట్క దొర్కు జతి పున్నిమ్. మెలె, జోక కో నంపజా గెలె, 'అంచో క్రీస్తుచి పున్నిమ్ జోక' మెన దేముడు జోచి సర్లక అమ్క దెకితయ్.

10 వేరచి ఎత్తి ముల ఆవ్ అన్నె కిచ్చో ఆస జతసి మెలె, జోవయింక జానయ్ జో అన్నె జివ్ జలి సెక్కిచి వరుమ్ నజన, జా సెక్కిక జోవయింతెన్ ఇండుక పూర్తి అలవాట్ జా, జో సేడ్ల సైమల్తె బెద, జో మొర్లి పొది కీసి తిలొ గే, ఆవ్ కి దస్సి బుద్ది జంక,

11 చి దేముడు అబ్బొన్చి దయ తిలె, ఆవ్ మొర్లె, పరలోకుమ్తె గెచ్చిందె.

ప్రబు దెతి బవుమానుమ్ నజన్తి రితి నిదానుమ్

‡ 3:5 3:5 'ఇస్రాయేలుడు' మెలె, యూదుడు, 'ఎబ్రియుల్' మెలె 'యూదుల్'.

* 3:5 3:5 'పరిసయ్యుడు' మెలె, యూదుల్తె పరిసయ్యుల్కయ్ ఒగ్గర్ గ్యూనుమ్ తయెదె, యూదుల్చ ఆగ్గుల్ జెవ్వి ఒగ్గర్ నిదానుమ్ కెరుల, జేవ్ ఆగ్గుల్చి రిసా బలవంతుమ్ కెరుల, చి దూతల్, బూతల్, డుంబల్, ఆత్మల్క 'అస్తి' మెన నంప కెరుల, చి 'మొర్లె అన్నెక్ లోకుమ్తె గెచ్చుమదే' మెన నంప కెరుల. * 4:1 4:1 మెలె, ప్రబుచి తెడి తా, జోచి డిట్టుమ్క తుమీ డిట్టుమ్ టీచ.

నిగుక మెలి టాలి

12 'ప్రబు దెతి బవుమానుమ్ నజన్తి రితి జిన్లయ్' మెని నాయ్, 'ఆవ్ పూర్తి పున్నిమ్ జా అస్సి' మెని నాయ్, గని జోచొ సొంత మాన్సు జంక మెన క్రీస్తుయేసు అంక బెదవన అస్సి చి రిసా, జా బవుమానుమ్ నజనుక మెన ఆవ్ ఒగ్గర్ సెక్కి తెన్ నిగితసి.

13 బావుడ్లు, అంచి సెక్కికయ్ జిన అస్సి మెని నాయ్, గని ఎక్కి కిచ్చో కెర్తసి మెలె, అగ్గెచి ఎత్తి పచ్చ గెల కెర, పురైతో తిలి గురితె దొర్కు జతిసి నజనుక మెన ఎక్కి ఆస జా,

14 యేసుక్రీస్తుచి నావ్ తెన్ దేముడు దెతి బవుమానుమ్ నజనుక మెన, గురి దెక నిగితసి.

15 అమ్తె ఆత్మక కో వడ్డ అస్సి జలె, ఇసి బుద్ది తెన్ తమ. 'పూర్తి పున్నిమ్ జలమ్' మెన జవున్, 'జా గురితె నిగితి ఆస రితిసి నాయ్' మెన జవున్ తుమ్చితె కో ఏక వేల వేర ఉచరై, తుమ్క దేముడు దెకవ సికడెదె.

16 గని ముక్కిమ్క అప్పెక కిచ్చో బుద్ది జో అమ్క సికడ అస్సి గే, జయ్యి నిదానుమ్ ఇండుమ.

17 బావుడ్లు, ఆవ్ కీసి ఇండితసి గే దెక తూమ్ కి ఇసి ఇండ, చి ఆమ్ ఇండితి రితి కో ఇండితతి గే దెక.

18 కిచ్చో జాగర్త ఆవ్ సంగితసి మెలె, ఆవ్ అగ్గె తెంతో తుమ్క సగుమ్జినచి రిసా ఒగ్గర్ సంగ అస్సి, చి అప్పె కి ఏడ ఏడయ్ సంగితసి. కిచ్చోక మెలె, 'పరలోకుమ్చి సుద్ది జా, జా సుద్ది రితి ఇండుతు' మెనయ్, క్రీస్తు సిలువతె మొర జోవయింక రచ్చించుప కెర్తన్, గని జాచి ఉప్పిరి విరోదుమ్ కెర్లె రితి జేవ్ ఒగ్గర్జన్ తప్పు బుద్దితె ఇండితతి.

19 జేవ్ నాసెనుమ్తె గెచ్చుల, జోవయించి పెట్టి జోవయింక దేముడు, జోవయించి పాపుమ్చి రిసా జోవయింక సర్ల, ఈంజయ్ లోకుమ్తె తతిసి ఎత్తికయ్ జోవయింక ఆస.

20 గని, ఆమ్ జతి రాజిమ్ పరలోకుమీ, చి ఒత్త తెంతో అన్నె జెతో రచ్చించుప కెర్తొసాక, ప్రబు జలో యేసుక్రీస్తుకయ్ అమ్ ర్కెతనుమ్.

21 కీసి మెలె, ఎత్తి జోచి తెడి తియ ఏలుప కెర్తి జోచి సెక్కికయ్ జో అమ్చి ఈంజ మాములుమ్ ఆగ్గే మార్పుప కెర, పరలోకుమ్చి ఉజిడ్ తెన్ చి జోచి ఆగ్గే ఈంజ జతి రితి తెదొడ్క మార్పుప కెరెదె.

4

ప్రబుచి తెడి తుమ్ డిట్టుమ్ టీచ

1 అంక, ప్రేమ తిల బావుడ్లు, *ప్రబుచి తెడి తుమ్ డిట్టుమ్ టీచ. తుమ్క ఆవ్ ప్రేమ అస్సి, తుమ్తె గెచ్చుక

ఒగ్గర్ ఇస్టుమ్ జా అస్సి. తుమీ అంచి సర్ల, అంచి బవుమానుమ్.

2 తుమ్ జట్టి జలిసి ముల †ప్రబుచి తెడి ఎక్కి కట్టు తా మెన, యువోదియక చి సుంటుకేక ఆవ్ బతిమాల్పా జా మెన సంగితసి.

3 పడ్డో తాయి, అంచి తెన్ ప్రబుచి కామ్తె బెద అంక సత్తిమ్ కెర్టో బావో, ఈంజేవ్ తేర్బోదల్క సేంతుమ్ కెరవు. అగ్గె తెంతో అంచి తెన్ బెద ప్రబుచి సుబుమ్ కబుర్చి కామ్ కెరుక మెన సైమల్ సేడ అస్తి. అన్నె కచి తెన్ మెలె, క్లెమెంతు తెన్, చి 'పరలోకుమ్తె గెచ్చుల' మెన దేముడు కచ కచ నవ్వో రెగిడ్డి జోచి పుస్తకుమ్తె నవ్వో తిల మాన్సుల్ ఎత్తిజిన్ తెన్ కి తోడు కెరవు.

కెడ్డోడి కి సర్లసంతోసుమ్ తెన్ ప్రార్దన కెర

4 కెడ్డోడె తెడి †ప్రబుచి తెడి తుమ్ సర్లసంతోసుమ్ తా. అన్నె సంగితసి. 'సర్లసంతోసుమ్ తా' మెంతసి.

5 తుమ్ ఇని మెత్తన తతిసి ఎత్తిజిన్ దెక చినితి రితి తుమ్ ఇండ. ప్రబు కీపాసి జా అస్సె.

6 కిచ్చోచి రిసా కి తుమ్ చింత గలన నాయ్, గని కిచ్చోచి రిసా కి ప్రార్దన కెర్టె తా తుమ్క కోర్ప జలిసి సంగ, జో దిలిసి ఎత్తిచ రిసా తుమ్చి సర్ల సంగ, తుమ్చ ఆసల్ దేముడుకయ్ తుమ్ సంగ.

7 దస్సి, అమ్ మాన్సుల్ *మీనుక నెత్తిర్లి దేముడుచి ఎదివాట్ సేంతుమ్, చి క్రీస్తు జలో యేసుచి తెడి తా, జా సేంతుమ్ తుమ్చి పెట్టి తుమ్చి మెన్సుతె రకితె తయెదె.

8 ఆకర్క, బావుడ్లు, కిచ్చో మెంతసి మెలె, సత్తిమ్ తిలిసి ఎత్తి, మరియాద తిల కమె ఎత్తి, నాయిమ్ తిలిసి ఎత్తి, సుద్ది తిలిసి ఎత్తి, సూటి తిలిసి ఎత్తి, 'చెంగిల్' మెన ఎత్తిజిన్ సర్ల జతిసి ఎత్తి, కిచ్చో జలెకి చెంగిల్చి, 'చెంగిల్' మెన దేముడు ఒప్పుతిసి ఎత్తి, దనచయ్ ఎత్తిక ఉచర్టె తా, దస్సయ్ కమె తుమ్ కెర్టె తా.

9 అంచితె తుమ్ సికిలిసి, దెకిలిసి, సూన్లిసి, 'సత్తిమ్' మెన ఒప్పున్లిసి, జా ఎత్తి కెర, చి సేంతుమ్ దెతో అమ్చో దేముడు తుమ్చి తెన్ తయెదె.

తిలె కి నెంజిలె కి ప్రబు సేంతుమ్ దెతిసి

10 తుమ్ అప్పె అన్నెక్ సుట్టు అంచి రిసా ఉచర్దసు మెన సూన తా ప్రబుచి తెడి ఒగ్గర్ సర్ల తెన్ అస్సి. అగ్గె తెంతో కి అంచి రిసా ఉచర్టె తిలదు, గని అంక తోడు దెంక తుమ్క అగ్గె వాటు తయె నాయ్.

11 అంక నెంజిలిన్చి రిసా ఏడుక మెన సంగి నాయ్. కిచ్చోక మెలె, ఆవ్ కిసి జలెకి, అంక కిచ్చో జలెకి, చింత నే గలంతె సేంతుమ్ తెన్ ఓర్పుప జంక మెన సిక అస్సి.

12 ఎక్కిక్ సుట్టు కొత్తుచి రిసా బాదల్ సేడ అస్సి, ఇదిల్ ఒగ్గర్ తిలిన్చి రిసా కి సర్ల జా అస్సి. దొన్ని కి జాని. కిచ్చోచి రిసా కి, కిచ్చో జలెకి, తిలె కంక నెంజిలె చువ్వె తంక, సామ్సారుమ్ తిలె కి, కొత్తు తిలె కి, కిసి ఓర్పుప జంక గే ఆవ్ సిక అస్సి.

13 మెలె, క్రీస్తు అంక సెక్తి దెతె తత్తయ్చి రిసా కిచ్చో జలెకి కెరుక తెరి.

14 జలెకి, అంచి అప్పెచి బాదతె తుమ్ బెద తోడు దిలిసి చెంగిలి.

15 ఆవ్ సుబుమ్ కబుర్ సూనవుక దెర్లి మొదోల్క, ఆవ్ తుమ్చి మాసిదోనియ ప్రదేసిమ్ ములిలి పొది, ఎక్కి తుమి గని వేర సంగుమ్లుతె ఎక్కి కి తోడ్ దెతి నాయ్, ఎక్కిలోక ఎక్కిలో తోడ్ దెతిన్తె అమ్చి తెన్ ఎక్కి తుమి బెదిలదు.

16 ఆవ్ దెస్సలోనిక పట్టుమ్తె తిలి పొది కి అన్నె అన్నె తోడు తెద్రయ్లదు.

17 జలె, తోడుకయ్ అంక ఆస నాయ్, గని అంచి ఆస కిచ్చో మెలె, కిచ్చోచి రిసా ఆవ్ సర్ల జతసి మెలె, తుమ్ తోడు దిలిసి తుమ్కయ్ లాబుమ్ దెతయ్.

18 నాయ్, గెద, అంక పూర్తి తోడు దా అస్సున్. నాయ్, దొర్కు జలి కంట అన్నెయ్ తోడు ఈంజ. తుమ్ తెద్రయ్లి తోడు ఎత్తి. ఎవప్రొదితు అంక దా అస్సి. జా తోడు దిలిసి కిసి జయెదె మెలె, దేముడుక చెంగిల్ దూపుమ్ డయిలి రితి, బలి దిలి రితి, జోక సర్ల కెరెదె.

19 జలె, తుమ్క కిచ్చో కొత్తు గే, బాద గే అయ్లె కి, జోచి పరలోకుమ్చి సామ్సారుమ్క దేముడు కవలుసుప జలిసి ఎత్తి క్రీస్తు జలో †యేసుచి తెడి తుమ్క దొర్కు కెరెదె.

20 ఉగుమ్చి ఉప్పిరి ఉగుమ్క అమ్చో దేముడు అమ్చో అబ్బొక జెయ్యి! †ఆమేన్.

21 క్రీస్తు జలో యేసుచి తెడి తిలో జోవయించి సుద్ది జలో ఒత్తచో ఎత్తి మాన్సుక తుమ్ అంచి ప్రేమ సంగ. అంచి తెన్ తిల బావుడ్లు కి తుమ్క జోవయించి ప్రేమ సంగ తెద్రయ్తతి.

22 జో ప్రబుచి సుద్ది జా జోచయ్ జల మాన్సుల్ ఎత్తి తుమ్ పిలిప్పి పట్టుమ్చక జోవయించి ప్రేమ సంగ తెద్రయ్తతి. ముక్కిమ్క కొన్న మెలె, కిక్సెనర్ రానొతె కామ్ కెర్ల నంపజలసక సంగ.

23 ప్రబు జలో యేసుక్రీస్తుచి దయ తుమ్చి ఆత్మ తెన్ తవున్.

† 4:2 4:2 మెలె, 'జోవయించి తెడి అస్సున్, చి జో కట్టు దెతోసా. జాచి రిసా తుమ్క కి జా కట్టు బుద్ది తంకయ్'. † 4:4 4:4 మెలె, ప్రబుచి తెడి అస్సున్. జో సర్లసంతోసుమ్ దెతోసా. జేక, జోవయించి సర్లసంతోసుమ్ నజన జోవయించి సర్లసంతోసుమ్ తెంతో! జోవయించి తెడి తిలె, దస్సి బుద్ది తంక తయెదె. § 4:5 4:5 నెంజిలె, 'అన్నె జెతిసి పాసి జా అస్సె'. * 4:7 4:7 నెంజిలె 'అర్దుమ్ కెరనుక నెత్తిర్లి...' † 4:19 4:19 యేసుచి తెడి జేవ్ నంపజలన అస్తిచి రిసా, చి జోవయింప వరల్ ఎత్తి యేసుచి అత్తి దెతయ్చి రిసా 'యేసుచి తెడి' మెన రెడ్గ అస్సి. † 4:20 4:20 ఈంజేవ్ పుస్తకుమ్ తోలితో రెగిడ్డి గ్రీకు బాస తెన్ 'తెద్దిల' మెలిన్క 'ఆమేన్' మెనుల. § 4:22 4:22 నెంజిలె 'వెల్లో రానొతె'.

కొలోస్సియుల్ క రెగిడ్లి ఉత్త్రమ్ బారిక్ జలో పవులు కొలోస్సి పట్టుమ్చ సంగుమ్చక పవులు రెగిడ్లి ఉత్త్రమ్

మొదొల్ కోడు

1 కొలోస్సి పట్టుమ్తెచ క్రీస్తుక నంపజా జోచి సుద్ది జా జోచయ్ జల జోచి తెడి తా నిదానుమ్ జల బావుడ్లుక,

2 దేముడుచి సెలవ్చి రిసా *క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జో దిలి అదికారుమ్ తెన్ జోచొ బారికి జలో ఆవ్ పవులు, బావొ జలో తిమోతి తెన్, రెగిడ్లి ఉత్త్రమ్.

అమ్క అబ్బొ జలో దేముడుచి దయ సేంతుమ్ తుమ్చి ఉప్పిరి తవుసు!

జేవ్ కొలోస్సి పట్టుమ్చచి రిసా పవులు జోవయించి సర్ల సంగ ప్రార్దన కెర్తె తిలిన్చి కోడు

3 తుమ్చి రిసా కెయ ప్రార్దన కెర్లె కి, అమ్చొ ప్రబు జలో యేసుక్రీస్తుచొ అబ్బొన్ జలో దేముడుక తుమ్చి రిసా అమ్చి సర్ల సంగితసుమ్.

4 కిచ్చొక మెలె, జో క్రీస్తు యేసుచి ఉప్పిరి తుమ్ నంపతిలిన్చి రిసా, పడ్డొ జోచయ్ జల నంపజలన ఎత్తిజిన్క తుమ్ ప్రేమ కెర్తెన్చి రిసా, అమ్ సూన అస్సుమ్.

5 పరలోకుమ్తె తుమ్చి రిసా తియఁ తిలిసి ఆసతె దెకితె తిలి రిసా, తుమ్క పెట్టి తిలి నముకుమ్చి ప్రేమచి, రిసా తుమ్ ఇసి జా అస్సున్. జా ఆసతె దెకితె తిలిన్చి రిసా తుమ్ సత్తిమ్చి †కబుర్తె, మెలె సుబుమ్ కబుర్తె, అగ్గె సూన్లదు.

6 సుబుమ్ కబుర్ తుమ్క దొర్కు జా అయ్లి తెంతొ, ఎక్కి తుమ్కయ్ దొర్కు జలి మెన నాయ్. ఒండి లోకుమ్తె సూనయ్ జతయ్, చి కేనె సూనయ్ జలెకి, ఆత్మపలితుమ్ జెతయ్. దస్సి, తుమ్ తొలితొ సూన ప్రబుచి దయచి వరుమ్చి రిసా పూర్తి అర్దుమ్ కెరన్లి దీసి తెంతొ, తుమ్తె కి సుబుమ్ కబుర్ ఆత్మపలితుమ్ జెతయ్.

7 ప్రేమ జలో అమ్చి తెన్ ప్రబుచొ సేవ కెర్తొసా జలో ఎవప్రా, జలె, ప్రబుచి ఈంజ సుబుమ్ కబుర్ సరిగా, కిచ్చొ వేరచి నే బెదయ్తె సికడ్డికయ్, పూర్తి అర్దుమ్ కెరన్లదు. అమ్ ఒత్త గెచ్చుక నెత్తిర్తి రిసా జొయ్యి అమ్చి నావ్ తెన్

* 1:2 1:2 'క్రీస్తు' మెలె, 'తెద్రయిందె' మెన ఎత్తి అదికారుమ్ తిలో దేముడు పూర్ణుమ్ సంగిలో దొర్కు జలో రచ్చించువ కెర్తొసా. † 1:5 1:5 నెంజెలె 'కోడుతె'. ‡ 1:14 1:14 ఈంజ ఉత్త్రమ్ తొలితొ రెగిడ్ల సగుమ్ పుస్తకల్తె కిచ్చొ అస్సె మెలె, జోచి లొయి సువ, అమ్క నెత్తవ గెల అస్సె, మెలె, అమ్చి పాపుమ్ చెమించువ కెర అస్సె. § 1:15 1:15 నెంజెలె, 'జెర్తయ్లిసి ఎత్తిక'. గని జెర్తయ్లిసి జయె నాయ్, జో. దేముడి జా జో ఎత్తిచి కంట అగ్గెయ్ తిలో. యోహాను 1:1-2, 14. * 1:17 1:17 'తొలితొచొ' మెలె, జో తొలితొ తెంతొ అస్సె, చి జొయ్యి ముక్కిమ్చొ. † 1:18 1:18 ఎవెసు 1:22-23, 4:16.

మెలి రితి, క్రీస్తుక నిదానుమ్ తిలో సేవ కెర్తొసా జా ఒత్త తుమ్క సుబుమ్ కబుర్ సూనవ సికడ అస్సె.

8 పడ్డొ, ప్రబుచి ఆత్మ తుమ్చి పెట్టి దెతి తుమ్చి ప్రేమచి రిసా జో ఎవప్రా అమ్క సంగ అస్సె.

9 జాకయ్, తుమ్చి నముకుమ్చి అన్నె నంపజలసక చి ఉప్పిర్చి తుమ్చి ప్రేమచి రిసా, అమ్ సూన్లి దీసి తెంతొ, తుమ్చి రిసా ప్రార్దన కెరుక ములుమ్ నాయ్. ఆత్మచి బుద్ది, ఆత్మతె గ్యానుమ్ ఎత్తి దేముడు తుమ్చి పెట్టి బెరవును, చి అమ్ జోచ మాన్సుల్ జా ఇండుక మెన జోచి ఇస్టుమ్ కిచ్చొ కిచ్చొ జతయ్ గే, తుమ్ పూర్తి జాన్తు మెనయ్ తుమ్చి రిసా ప్రార్దన కెర్తెసుమ్.

10 జోచి ఇస్టుమ్ జాన్లె, జోచి బుద్ది గ్యానుమ్ తెన్ తిలె, ప్రబుచి విలువ దెకయ్తి రితి తుమ్ ఇండితె. దస్సి, చెంగిల్ కమె ఎత్తితె ఇండ పలితుమ్ దెర దెర, అగ్గెచి కంట దేముడుక రోజుక ఒగ్గర్ జాన జాన, జోచి ఇస్టుమ్ రితి ఇండ ఇండ, జోక పూర్తి సర్లసంతోసుమ్ కెర్తె.

11 అన్నె కిచ్చొ మెన అమ్ ప్రార్దన కెర్తెసుమ్ మెలె, జోచి పరలోకుమ్చి సెక్తిక తుమ్చి పెట్టి జోచి సెక్తి బెరవ డిట్టుమ్ కెర్పు, చి తుమ్చి పెట్టి జో దెతి సంతోసుమ్క తుమ్ ఎత్తి బాదల్ సేంతుమ్ తెన్ ఓర్పువ జా నిదానుమ్ తా.

12 ఎత్తిక అబ్బొ జలో దేముడుక తుమ్చి సర్ల సంగితె. కిచ్చొక మెలె, జోచయ్ సుద్ది జల మాన్సుల్ ఎత్తిజిన్ తెన్ జోచి ఉజెడి రాజిమ్తెచి సొమ్నూరుమ్తె అమ్క వాట సేడ్డి రితి జోవయించి దయక అమ్క విలువ దెక అస్సె.

13 మెలె, సయ్తాన్ ఏలువ కెర్తి అందర్ రాజిమ్ తెంతొ అమ్క విడ్డల్ కెర, ప్రేమ తిలో జోచొ సొంత పుత్తున్చి రాజిమ్తె అమ్క జో అబ్బొన్ బెదవ అస్సె.

14 మెలె, జో పుత్తున్తెయి అమ్చి రచ్చున. ‡అమ్ కెర్లె పాపల్ జొయ్యి చెమించువ కెర, నెత్తవ గెల అస్సె.

ఎత్తిక ఆదారుమ్ జలోసా యేసుయి

15 యేసుతె అమ్, నే డిస్తా దేముడుచి పొలిక డిస్తయ్. కిజెర్మున్ ఎత్తిక జో తొల్పుర్, జో వెల్లో.

16 కిచ్చొక మెలె, ఎత్తి కి యేసు తెన్ జెర్మున్ జలి. కేనె తిలె కి, పరలోకుమ్తె తిలె కి, బూలోకుమ్తె తిలె కి, కేన్ లోకుమ్తె తిలె కి, నే డిస్సిసి జలెకి, డిస్సిసి జలెకి, కేన్ లోకుమ్చ సజాననల్తె తిలస కి, ఏలువ కెర్తి సెక్తి అదికారుమ్ తిలస కి, అదికారుమ్ తిలిసి ఎత్తి, అదికారుల్ ఎత్తి, పరలోకుమ్చ జలెకి, బూలోకుమ్చ జలెకి, ఎత్తి కి జోచి అత్తి జెర్మయ్ జలి. జోచి రిసాయి జెర్మయ్ జలి.

17 * ఎత్కిచి కంట తొలితో తిలో నుదొ జొయ్యి, ఎత్కిక ఆదారుమ్ జలోసా జొయ్యి. జో నెంజిలె, జేవ్ తత్త నాయ్.

18 పడ్డో, జోచి †ఆగ్ జల నంపజలన బెదితిన్ మొత్తుమ్క జో బోడి, జో మొదోల్. మొర్నుక జిన జితనక జో తొల్పర్. కిచ్చొక మెలె, కిచ్చొచి రిసా కి జో వెల్లో తంక.

19 క్రీస్తుచి పెట్టి పూర్తి తంక మెన, దేముడుచి ఇస్తుమ్ జలి.

20 పడ్డో యేసుక్రీస్తు సిలువతె అర్పితుమ్ జా జోచి లోయి సువిలి వాటు పాపుమ్ పుంచితినచి నెక్కిక ‡బూలోకుమ్తె తిలిసి ఎత్కి, పరలోకుమ్తె తిలిసి ఎత్కి, కేన్ లోకుమ్తె తిలిసి ఎత్కి క్రీస్తుచి తెడి జేవ్ ఎత్కి జో తెన్ కీసేంతుమ్ జతి రితి అన్నె బెదవనుక మెన దేముడుచి సర్ద జలి.

యేసుచి అత్తి దేముడు బెదవనన

21 తుమ్ కొలోస్సియుల్కి అగ్గె జోక వేరయ్ మాన్సుల్ జా, తుమ్చ ఆత్మల్తె జోక విరోదుమ్ జా తిలి రిసా వెర్రి వెర్రి కమొ కెర్తె తిలదు.

22 గని, జోచి ఆగ్ మొర్లిన్ తెన్ తుమ్చి పాపుమ్ వయ తుమ్క కి జో బెదవన అస్సె. కిచ్చొక మెలె, తుమ్ జోచి సుద్ది జా, జోచయ్ జా, తప్పు నెంతె, కిచ్చొ గర్చికి నెంతె జా, దేముడు అబ్బొన్చి మొక్కె జో తుమ్క టీవొ కెరెదె.

23 గని జా జర్గు జంక మెలె, తుమ్ ఆత్మక డిట్టుమ్ జా జొయ్యి పునాది జతిన్తె టీవ, * 'పరలోకుమ్తె గెతి వాటు అమ్క దొర్కు జలి' మెంతి దయిరిమ్ దెతి తుమ్ సూన్లి సుబుమ్ కబుర్ నే ములై అన్మానుమ్ నే జతె, వేరతె నే గెతె, ప్రబుచి ఉప్పొర్చి నముకుమ్ తుమ్ నిదానుమ్ తంక. జెర్మయ్లిసి ఎత్కిక ఈంజ సుబుమ్ కబుర్ ఈంజ ఒండి లోకుమ్తె సూనయ్ జా అస్సె. ఆవ్ పవులు కి ఈంజ సుబుమ్ కబుర్ సూనయ్తి రిసా, ప్రబుచొ సేవ కెర్తొసా జా అస్సె.

24 ఆవ్ జలె, 'తుమ్క లాబుమ్ దొర్కు జవున్' మెన ఆవ్ †అల్లర్ సేడ్లె కి, అంక సర్ద. కిచ్చొక మెలె, ఆవ్ ఇన అల్లర్ సేడ్లెసి కిసి జతయ్ మెలె, క్రీస్తు సేడ్లె అల్లర్తె ఆవ్ బెద ఒత్త సేంసిలిసి ఆవ్ ఒర్పువ జా కుట్టయ్లి రితి జతయ్. కిచ్చొక మెలె, జోచి ఆగ్ జల జోచయ్ సంగుమ్క 'జోచి కబుర్ సూన్తు' మెనయ్, ఆవ్ ఈంజేవ్ సైమల్ సేడ్లెసి.

25 జోచయ్ జల మాన్సుల్ మొత్తుమ్క ఆవ్ ఈంజ ‡సేవ కెర్తె రిసా ప్రబు అంక తెద్రవ అస్సె. దస్సి, తుమ్చి రిసా కి, అంచి కోడు పూర్తి తుమ్ జానుక మెనయ్, జొయ్యి అంక తెద్రవ అస్సె.

26 జా కోడు కిచ్చొ జయెదె మెలె, ఉగల్చి ఉప్పొరి ఉగల్చ మాన్సుల్ నే సూన్తి రితి జో కీలుంకడ తిలి గుట్టు. జా

అగ్గె లుంకడ తిలె కి, అప్పెయి జోక నంపజల జోచయ్ జల మాన్సుల్క జో సూనవ అస్సె.

27 తుమ్తె తెద్రయిందె మెన యూదుల్క దేముడు సంగ తిలో దొర్కు జలో రచ్చించుప కెర్తొసా జలో క్రీస్తు, ఉజిడ్ తిలి గవురుమ్చి ఆన తుమ్ యూదుల్ నెంజిలనచి పెట్టి కి అస్సె. పరలోకుమ్తె గెతి వరుమ్చి దయిరిమ్ తుమ్కయ్ కి దొర్కు కెర అస్సె. జయ్యి కోడు జోచి గుట్టు జా తిలి. జా రచ్చన కెత్తిజిన్ యూదుల్ నెంజిలనక కెద్ది సొమ్నారుమ్ కెర్తయ్! కెద్ది వెల్లి కోడు, ఈంజ. జయ్యి గుట్టు జోచయ్ జల మాన్సుల్కయ్ జో జానవుక ఇస్తుమ్ జలో!

28 జలె, ఆకర్క తీర్పు జంక మెన ఎత్కిజిన్ దేముడుచి మొక్కె టీవొ కెరుక మెన, క్రీస్తుక నంపజల మాన్సుల్ ఆత్మ తెన్ పూర్తి వడ్డిల మెలె, జోవయింతె ఎత్కి మాన్సు పూర్తి జా జోవయించి మొక్కె టీవొ జలె, అమ్ జోవయింక బవుమానుమ్ దిలి రితి జయెదె. జాకయ్, * 'ఆత్మ తెన్ పూర్తి వడ్డుతు' మెనయ్, క్రీస్తుచి రిసా బాల వెల్లో ఎత్కిజిన్క అమ్ సూనయ్తె తా, వేర బుద్దివొచి రిసా జాగర్ద సంగితనుమ్, జోచి రిసాచి గ్యానుమ్ ఎత్కి జోవయింక సికడ్డునుమ్.

29 జోక ఆత్మక పూర్తి వడ్డుత్! మెనయ్, అంచి పెట్టి జో మొచ్చు తెన్ దెతి జోచి ఎదివాట్ సెక్కి ఎత్కి తెన్ని, పూర్తి మెన్సు దా, జోచి కామ్ ఆవ్ కెర్తె తత్తసి.

2

1 తుమ్చి రిసా కి, లవొదికయ్ పట్టుమ్చ నంపజలనచి రిసా కి, అన్నె, అంక నే దెకిల అన్నె నంపజలనక ఎత్కిజిన్చి రిసా కి, 'ఆత్మతె వడ్డుత్' మెన ఆవ్ కెద్ది ఆన తెన్ ఉచర్తసి గే ప్రార్దన కెర్తసి గే తుమ్ జానుక మెన అంచి ఆన.

2 తుమ్ జేవ్ ఎత్కిజిన్చి రిసా ఆవ్ కిచ్చొ మెన ఆన జతసి మెలె, జేవ్ ఎత్కిజిన్ మొత్తుమ్ ఎక్కి ప్రేమ ఎక్కి కట్టు జా జోవయించి పెట్టి దయిరిమ్ డిట్టుమ్ జతు, చి జోవయింక పూర్తి అర్దుమ్ జెయెదె, చి క్రీస్తుచి తెడి అస్సుమ్చి చెంగిల్ తమ్దె మెన పూర్తి దయిరిమ్ జవుల, చి దేముడుచి గుట్టు జానుల, మెలె క్రీస్తుకయ్ జానుల మెన తుమ్చి రిసా ఆవ్ ఆన జతసి.

3 జో క్రీస్తుచి పెట్టి బుద్ది గ్యానుమ్చి సొమ్నారుమ్ ఎత్కి ఒత్తయ్ లుంకిల్ రితి అస్సె.

4 తుమ్క కిచ్చొక ఆవ్ ఇసి సంగితసి మెలె, సూటి డిన్వ తెలివి కొడె తెన్ కా తుమ్క మోసిమ్ నే కెర్తి రితి తుమ్ జాగర్ద తా.

5 ఆగ్క మెలె, ఆవ్ తుమ్క దూరి అస్సె, గని ఆత్మక తుమ్చి పాసి తా, తుమ్ అప్పె సుద్ది ఇండితిసి, క్రీస్తుచి

‡ 1:20 1:20 రోమియల్ 8:20-23. § 1:20 1:20 ఎవెసు 1:9-10.

* 1:23 1:23 27వ కోడు, చి 1:5వ కోడు దెక. † 1:24 1:24 జో జేలి జా తిలన్. 4:3, 10 దెక. ‡ 1:25 1:25 ఎవెసు 3:1-13. § 1:26 1:26 ఎవెసు 1:9, 3:3-4. * 1:28 1:28 ఎవెసు 4:12-14.

ఉప్పిర్చి తుమ్చి నముకుమ్ డిట్టుమ్ తిలిన్చి రిసా ఆవ్ నూన్లి రిసా, సర్ల తెన్ అస్సి.

6 జలె, ప్రబు జలో క్రీస్తు యేసుక తుమ్ సంపజా తిలదు.

7 జలె, జోచితె *చెర్లొ గల డిట్టుమ్ టీవొ జా తిలి రితి, చెంగిల్ గేర్ జా తంక మెన కీసి డిట్టుమ్ పునాదితె జా తంక ముక్కిమ్ మెలె, దస్సి, జో క్రీస్తు పునాది జతిన్చి ఉప్పిరి తుమ్ టీవొ డిట్టుమ్ జా, చి జోచి తెడి ఆత్మతె వడ్డ, క్రీస్తుచి ఉప్పిర్చి నముకుమ్చి రిసా ఎపప్రా తుమ్క సికడ్డిని ఎత్కి దెరన, అన్నె డిట్టుమ్ జతె తా. జో ప్రబు కెర్లి దయ ఎత్కిచి రిసా జోక తుమ్చి సర్ల దెకయ్తె తా, జోచి తెడి జియ జో దెతి బుద్దితె తుమ్ ఇండ.

8 తెలివి తెన్ కొణొ బెదవ వేర బోదన కెర్లిసి తెన్ రితయ్ కొణొ తెన్ మాన్సుల్ అవ్వి ఉచర్ల అలవాట్ కమొ, †ఆగ్నల్క, ఆత్మల్క, దూతల్క బూతల్క, బిత అలవాట్ కమొ మాన్సుల్ సికడ తుమ్క మోసిమ్ కెరుక ఉచరుల. దసితె తుమ్ దెర్ను నే సేడ్డి రితి తుమ్ జాగర్త తా. జా క్రీస్తు సికడ్డిని నెంజె ఈంజ లోకుమ్తె బెదితిసి.

9 దేముడు కిచ్చొ నే పిట్టె, జొయ్యి పూర్తి ఆగ్న రూపుమ్ తెన్ క్రీస్తుచి పెట్టి జితయ్.

10 చి ‡అదికారుమ్ తిలిన్ ఎత్కిచి ఉప్పిరి, †అదికారుల్ ఎత్కిచి ఉప్పిరి తిలో క్రీస్తుచి తెడి తుమ్ ఆత్మక పూర్తి దా అస్సున్.

11 పూర్ణుమ్చి అలవాట్ తెన్ అమ్చ యూదుల్ 'దేముడుచ మాన్సుల్ ఆము' మెనన, జోచి సుద్ది కారిమ్చి సున్నతి కెరనుల. జా, జలె, ఎక్కి అగి జర్గు జతిసి. తూమ్, మాత్రుమ్, అప్పె క్రీస్తుచి తెడి కీసి జా అస్సున్ మెలె, క్రీస్తుచి తెడి సుద్ది కెర్లి సున్నతి కెరన్లి రితి జా అస్సున్. మాన్సు అగి కెరన్లి సున్నతి నెంజె, గని ఈంజ ఆగ్నచ ఆసల్ బుద్దుల్ సింద వెంట గెలిసి.

12 క్రీస్తు మొర్లిన్ తెన్ తుమ్చి ఈంజ ఆగ్నచ ఆసల్చి జీవ్ మొర గెలన్, ఈంజ ఆత్మజీవ్ తుమ్క కీసి దొర్కు. జలి మెలె, క్రీస్తుక మొర్లన తెంతో జియడ్లొ దేముడుక సెక్కిక తుమ్ సంపజలదు. చి జో అన్నె జీవ్ జా ఉట్లీన్ తెన్ జోచి ఆత్మక తుమ్ ఆత్మజీవ్ జా ఉట్లదు. ఇన్నెచి గుర్తుక బాప్తిసుమ్ నజన్లదు.

13 పడ్డొ, తుమ్ పాపుమ్ కెర్తె తా అగ్గె ఆత్మక మొర్లనయ్ జా తిలదు, ఆగ్నక యూదుల్చి సుద్ది సున్నతి నెంతె తిలదు, తుమ్ దస్సి మొర్లనయ్ జా తతికయ్, దేముడు అబ్బొసి క్రీస్తుక అన్నె జియడ, జో తెన్ కి తుమ్క జియడ్లన్. కీసి

మెలె, జోక సంపజల ఎత్కిజిన్చ పాపల్ ఎత్కి అమ్క చెమించుప కెర్లన్.

14 మెలె, పూర్ణుమ్ తెంతోచ ఆగ్నల్ అమ్చి ఉప్పిరి దావ రెగిడ్డి రితి జతయ్. గని, జా ఆగ్నల్చ నిందల్ ఎత్కి జో దేముడు అబ్బొసి పుంచ గెలన్. కీసి మెలె, క్రీస్తు మొర్లి సిలువతె జా ఆగ్నల్క మేకుల్ తెన్ పెట ముల దిలి రితి పుంచ గెలన్.

15 దస్సి కెర, దస ఆగ్నల్చ నిందల్చ కోడ్లు వయడ్డ అమ్క పాపుమ్ సికడ్డ ఆత్మల్, దూతల్, బూతల్, గట్టచి సెక్కి పాడ్ కెర గెల కెర, ఎత్కిచి మొక్కె జోవయింక లాజ్ కెరవ, క్రీస్తు జోవయించి ఉప్పిరి జీన్లన్. అమ్ క్రీస్తుక సంపజలనచి ఉప్పిరి దసచక కి కిచ్చొ సెక్కి నాయ్.

16 జాకయ్, కతిసిచి రిసా పితిసిచి రిసా 'ఈంజ గార్, జా గార్' మెన జవున్, నెంజెలె, 'పండుగు దీసి, ఆమన్ దీన్చి రిసా, నెంజెలె బక్కి కెర్లి సెలవ్ కడన్లి దీసి రిసా, కిచ్చొ కిచ్చొ కెర్లె గార్' మెన తుమ్క కో సంగుత్ అవ్కాసుమ్ దాస నాయ్, సికడ్డె నూన నాయ్.

17 పడ్డొ జర్గు జతిన్క దసచ ఎత్కి ఎక్కి నీడ. జా నీడ గల్తొసా క్రీస్తు.

18 జాకయ్, "చువ్వె తా దూతల్ గట్టక తుమ్ జోకర" మెన కో సికడ్డె, తుమ్ దెర్ను నీడ నాయ్. "దసచక నే జోకర్లె కిచ్చొగె పిట్టెదె" మెన బియడ్డనక తుమ్ బియఁ నాయ్. దస కమొ సికడ్డెసా కో జలెకు కిచ్చొక సంప కెర్లయ్ మెలె, రిత సివ్వుల్క, దస్సి జోచి సొంత మెన్సు తిలిన్క 'వెల్లిచి' మెన పుల.

19 క్రీస్తుక, మెలె బోడిక, జో మాన్సు అజ జా ముల అస్సి. జో బోడి తెన్ బెద తిలెకయ్ ఆగ్నక పున్లి తా, అత్తుల్ నరల్ ఎత్కి తమ్మన కట్టు తెన్ తా, దేముడు దెతి జివుకయ్ వడ్డతె తయెదె.

20 క్రీస్తు తెన్ తుమ్ బెద, జో మొర్లిన్ తెన్ బెదిల్ రితి జా, తుమ్చి ఈంజ లోకుమ్చి పాపుమ్చి మొర్లి ఆత్మ మొర, *మాయలోకుమ్చ బూతల్, దూతల్, ఆత్మల్, గట్టచి సేవ కెరుక ముల విడ్డల్ జలదు జలె, కిచ్చొక జా పాపుమ్చి ఆత్మ తెన్ అప్పెక తిలి రితి ఇండితను?

21 మెలె, మాన్సుల్ వాడిక కెర కేడయ్త రిత ఆగ్నల్చి రిసా, అలవాట్చ కమొచి రిసా 'దెరుక గారు, కంక గారు' నెంజెలె, 'చడుక గారు' మెల వెర్లి ఆగ్నల్క కిచ్చొక బితను?

22 దసచ ఒండి మాన్సుల్ ఆరి ఉచర సికయ్లిసి.

23 మాన్సుల్ అవ్వి కెర్ల దస జాడ్లు రిత వయన్లె, సిచ్చల్ కెరన్లె, ఆగ్నక సిచ్చల్ కెరన్లె, గ్యానుమ్ రితి పున్నిమ్ రితి

* 2:7 2:7 ఏవెను 3:17 దెక. † 2:8 2:8 నెంజెలె, 'బాలబోదల్ అర్దుమ్ కెరంతి ఎదిలి గ్యానుమ్చ సిన్లు'. ‡ 2:10 2:10 ఆత్మల్, దూతల్, బూతల్చి అర్దుమ్ కి ఈంజీవ్ కొణొతె ఉచరుక జయెదె. కొలొస్సియల్ క్రీస్తుక నే సంపజతె అగ్గె, ఆత్మల్ దూతల్ బూతల్ ఎత్కిక బితె తిల. § 2:10 2:10 ఆత్మల్, దూతల్, బూతల్చి అర్దుమ్ కి ఈంజీవ్ కొణొతె ఉచరుక జయెదె. కొలొస్సియల్ క్రీస్తుక నే సంపజతె అగ్గె, ఆత్మల్ దూతల్ బూతల్ ఎత్కిక బితె తిల. * 2:20 2:20 నెంజెలె, 'బాలబోదల్చి ఎదిలి గ్యానుమ్చి అలవాట్ ముల....'

డీసెదె, గని అమ్చి పట్టిచి పాపుమ్బుద్దిచ ఆసల్క దన ఆగ్గుల్ ముద్దొ కెరుక నెతిరి, గెచ్చవుక నెతిర్తి.

3

పరలోకుమ్ తిలిస్క ఆస జంక

1 క్రీస్తు తెన్ తుమ్ బెద జో తెన్ జీవ్ జా ఉట్ట, జోచి ఆత్మతె తుమ్ జీవ్ జలదు. జలె, జో జీవ్ జా ఉట్ట, ఉప్పిరి, దేముడు అబ్బొనచి ఉజెతో పక్క పరలోకుమ్తె వెన అస్సె. జాకయ్, జో ఉప్పిర్ వెన తిలిస్కెచి ఎత్కిక తుమ్ ఆస జా.

2 ఈంజ లోకుమ్తె తిలిస్క ఆస జా నాయ్. పరలోకుమ్చిక ఆస జా.

3 కిచ్చొక మెలె, ఈంజ లోకుమ్తె తుమ్ మొరయి అస్సున్, చి దేముడుచి తెడి క్రీస్తుతెయ్ తుమ్చి జివు క్రీస్తుతె దేముడుచి తెడి లుంకడ అస్సె.

4 అమ్చి జివు తిలొ క్రీస్తు కెయ్చ అన్నె ఉత్త్ర జా డీసెదె గే, తుమ్ కి తెదొడక జో తెన్ పరలోకుమ్చి గవురుమ్ తెన్ జతిస్కె డీస్సె.

5 జాకయ్, తుమ్చి పెట్టి ఈంజ లోకుమ్చి బుద్దిచి కిచ్చొ జలెకు తయెదె గే, జాక తుమ్ గెచ్చవ గెల; జాక మార. కీస బుద్దివొ మెలె, లంజెకమొ, లంజెబుద్ది, ఆగ్చి ఆస ముద్దొ నే కెరంతిసి, గార్చిచి ఉప్పిర్చి ఆస, పడ్డొ అన్నె మాన్సుల్చి ఆస్తి దొర్పు కెరంతి ఆస; ఇనిచి జలె, సత్తిమ్ తిలొ దేముడుక ముల వేర దేముడు మెలొసాక ప్రేమ కెర్లి రితి జతయ్, జాక 'దేముడు' మెలి రితి కెర్లి బొమ్మక జోబర కెర్లి రితి జతయ్.

6 దన కమొచి రిసా *జోచి కోడు రితి కెరుక నెసిల మాన్సుల్క దేముడుచి కోపుమ్చి సిచ్చ లయెదె.

7 అగ్గె తుమ్ జేవ్చి నెడమె జితి పొది దసచ ఎత్కి కెర ఇండితె తిలదు.

8 గని అప్పె దసచ ఎత్కి కి తుమ్క దూరి కెర. కీసచ మెలె, కోపుమ్ దెకయ్తిసి, కోపుమ్ దెరన్తిసి, కుస్సిదుమ్, దూసెనల్, వెట్కారుమ్చ కొడొ.

9 పడ్డొ, ఎక్కిలోక ఎక్కిలో అబద్దుమ్ సంగ నాయ్, కెర నాయ్. కిచ్చొక మెలె ఈంజ లోకుమ్చి పాడ్ జలి ఆగ్చి జెర్మున్ ఇండితిసి కడ వెంట గెల కెర,

10 తుమ్ జేవ్క ముల, నొవి మాన్సుక గలన అస్సున్. ఈంజ గ్యానుమ్ తెన్ జా జెర్మయ్లో దేముడుచి రూపుమ్ తెన్ నొవి బుద్ది దెరన అస్సున్.

11 ఈంజ నొవి ఆత్మతె జెర్మున్ జల మాన్సుల్తె కిచ్చొ తేడల్ నాయ్. 'గ్రీసు దేసిమ్చ' మెన దేముడు సంగె నాయ్, 'యూదుల్' మెన నాయ్. 'యూదుల్చి గుర్తుచి సున్నతిచ' మెనె నాయ్, 'జా సున్నతిచ గుర్తు నెంజిలస' మెనె నాయ్, 'నేన్ల మాన్సుల్' మెనె నాయ్, 'డొంగుర్ దేసిమ్చ' మెనె నాయ్, 'గొతిమాన్సుల్' మెనె నాయ్, 'గొతి నెంజిలస' మెనె

నాయ్. జోచి మొక్కె దస తేడల్ నాయ్, గని ఎత్కిజిన్క క్రీస్తుయి ముక్కిమ్, అన్నె కేన్ రగుమ్చ మాన్సుల్ జలెకి, జోచ మాన్సుల్ ఎత్కిజిన్చి పెట్టి జో అస్సె.

12 జలె, దేముడు నిసాన్ల తుమ్ జోచయ్ సుద్ది జల జో ప్రేమ కెర్లన, తుమ్ ఎత్కిజిన్ కిచ్చొ కిచ్చొ బుద్దివొ గలన మెలె, కన్కారుమ్ దెకితిసి, మెత్తన తతిసి, గవురుమ్ నే ఉచరంతె, అన్నె మాన్సుల్క మరియాద దెకితిసి, సేంతుమ్ తెన్ బాదల్ ఓర్పుప జా

13 ఎక్కిలోక ఎక్కిలో ఓర్పుప జతిసి. పడ్డొ, కిచ్చొ జవున్ తప్పుచి రిసా ఎక్కిలో అన్నెక్కోక నింద కెరుక జతి జలె, చెమించుప కెర. ప్రబు తుమ్క కీసి చెమించుప కెర అస్సె గే, తుమ్ కి ఎక్కిలోక ఎక్కిలో చెమించుప కెరుక అస్సె.

14 ఎత్కిచి కంట ముక్కిమ్క తుమ్ కిచ్చొ బుద్ది గలన మెలె, ప్రేమయ్. కిచ్చొక మెలె, ఎత్కి ఎక్కి కట్టు తెన్ తతి రిసా ప్రేమ ఆదారుమ్ జతయ్, జయ్యి బెదెదె.

15 పడ్డొ, క్రీస్తు దెతి సేంతుమ్ తుమ్చి పెట్టి ఏలుప కెర్లి రిసా వాల్ దాస. ఎక్కిలో తెన్ ఎక్కిలో సేంతుమ్ తత్తి రిసాయి జోచి ఎక్కి ఆగ్తె తుమ్ బెదుక మెన జో బుకార్లన్. పడ్డొ, జో కెర్లి దయచి రిసా జోక తుమ్చి సర్ల తుమ్ దెకవ.

16 పడ్డొ, క్రీస్తుచ కొడొ తుమ్చి పెట్టి బన జా కామ్ కెర్తె తతి రితి తుమ్ టాన్ దాస, చి జో దెతి బుద్ది తెన్ నిదానుమ్ తెన్ ఎక్కిలోక ఎక్కిలో జోచి సత్తిమ్ సికడె తా. తుమ్తె కో పొరపాట్ నే జతి రితి బుద్ది సంగ జాగర్త సంగితె తా, చి దేముడు కెర్లి దయ ఎత్కిచి రిసా తుమ్చి సర్ల జోక దెకయ్తి రితి, జోచి గవురుమ్ సంగిత గనుమ్లు గాయితె తా. జేవ్ గనుమ్లుతె కిచ్చొ ఏక్ రగుమ్ తుమ్ గాయ మెలె, కీర్తనల్ గట్ట.

17 తుమ్ కిచ్చొ లట్టబుక జలెకి, కిచ్చొ కెరుక జలెకి, ప్రబు జలొ యేసుచి నావ్ తెడి లట్టబ జవున్, జర్గు కెర జవున్, చి జోచి నావ్ తెన్ దేముడు జలొ జోచొ అబ్బొన్క తుమ్చి సర్ల తుమ్ సంగ.

కేన్ గేరుచ జలెకి ఎక్కిలోక ఎక్కిలో దెకితిసి

18 తేర్బోదలు, జలె, తుమ్చ ముస్సర్లుచి తెడి దాక్ కెరన, జోవయిచి కోడు సూన్తె తా. ప్రబుచి తెడి అస్సున్చి ఇసి కెర్లె సూటి,†

19 ముస్సర్లులు, జలె, తెర్లివొక ప్రేమ కెర, జోవయిచి కుస్సిదుమ్ దెక నాయ్.

20 బోదల్ జలె, కేన్ కామ్చి రిసా జలెకి, అయ్యన్అబ్బొన్చి కోడు సూన. 'దస్సి కెర్లెకయ్ తుమ్క చెంగిలి' మెన ప్రబుచి కోడు.

* 3:6 3:6 'జోవయిచి' తెంతొ 'మాన్సుల్క' ఎదచి కోడు ఈంజ ఉత్తమ్ తొత్తో రెగిడ్ల సగుమ్ పుస్తకల్తె తయె నాయ్. † 3:18 3:18 మెలె, ప్రబుచి తెడి అస్సి, చి ముస్సర్లుల్క గవురుమ్ దెకితె, ప్రబుక గవురుమ్ దెకిల్ రితి జయెదె. కొరిందీల్క రెగిడ్లి ఏక్ నంబర్ ఉత్తమ్ 11:3, ఎవెసు 5:22-24.

21 తుమ్ అబ్బుదింసి ఆరి తుమ్చ బోదల్క కోపుమ్ కెరవ నాయ్, నెంజిలె అన్మానుమ్ జా సిక్కు జవుల.

22 గొతిమాన్సుల్ జలె, కేన్ కామ్చి రిసా కి, ఈంజ లోకుమ్చ తుమ్చ ఎజొమాన్లుచి కోడు సూన, జేవ్ సంగిల్ రితి కెర. ఆరి డీసుక, మాన్సుల్క మెన్సు వడంతి రిసా నాయ్, గని ఎక్కి మెన్సు ప్రబుకయ్ గవురుమ్ కెర్తి రితి తుమ్చ ఎజొమాన్లుక నిదానుమ్ సేవ కెర.

23 కేన్ కామ్ కెరుక మెలె కి, ఎక్కి మాన్సుచి సేవ కెర్తి రితి పోన, గని ప్రబుచి సేవ కెర్తి బుద్ది తెన్సి, సర్ల తెన్ కెర.

24 కిచ్చొక మెలె, తుమ్ నిదానుమ్ కెర్తి రిసాచి బావుమానుమ్క ప్రబు సొంత జోచి రాజిమ్తె వాటల్ తుమ్క దెయెదె మెన జాన్సు, గెద. దస్సి నిదానుమ్ కెర్తిసి జలె, ప్రబు జలో క్రీస్తుచి సేవ కెర్తిసి జయెదె.

25 కో పాపుమ్ కెర్లె, జోచి సిచ్చ జోక లయెదె. జో దాక్ జలెకి, వెల్లో జలెకి, అన్సె, సిచ్చ దెతిన్తె కి దేముడు కక్క మొకమాటుమ్ దెకె నాయ్, ఎజొమాన్లుక చి గొతిమాన్సుల్క జవున్ తేడల్ దెకె నాయ్.

4

‘ప్రార్దన కెర్తె తా’

1 ఎజొమాన్లు, తుమ్చ గొతిమాన్సుల్క సరిగా చెంగిల్ దెకితె తా, జోవయింక దెతిసి దాన. తుమ్క కి పరలోకుమ్తె ఎజొమాని అస్సె.

2 నిదానుమ్ తెన్ బద్దుకుమ్ నే జితె దేముడుచి దయ ఎత్తిచి రిసా జోవయింక తుమ్చి సర్ల సంగ ప్రార్దన కెర్తె తా.

3 అమ్చి రిసా కి ప్రార్దన కెర. కిచ్చొక మెలె, అమ్ కిసి గే జోవయింక సుబుమ్ కబుర్ కోడు, మెలె క్రీస్తుచి రిసాచి *గుట్టు, అమ్ సూనయ్తె తతి రిసా, జో అమ్క వాట్ దెవుసు మెన ప్రార్దన కెర. జా సుబుమ్ కబుర్ జా గుట్టు ఆవ్ సూనయ్లి రిసా ఆవ్ †జేలి జా అస్సె.

4 జా సుబుమ్ కబుర్ జా గుట్టు అన్సె సూనవుక అస్సె, చి ఆవ్ కిసి సంగిలె సొస్టుమ్ జయెదె గే జో అంక సికడ్సు మెన తుమ్ ప్రార్దన కెర.

మరియాద తెన్ ఇండ, లట్టబా

5 తుమ్క దిలి సమయుమ్ పాడ్ నే కెరంతి రితి, దేముడుచి క్రీస్తుచి గవురుమ్ దెకయ్త అవ్కాసుమ్ గెనస్సి రితి, వేర మాన్సుల్క తుమ్ మరియాద దెకితె తా.

* 4:3 4:3 ‘క్రీస్తుచి రిసాచి గుట్టు’ మెన సంగిలె, క్రీస్తు రచ్చింతువ కెర్తెసా జలిన్చి రిసా సంగితయ్, కొలోస్సియులు 2:2. నెంజిలె క్రీస్తుతెచి రచ్చన యూదుల్ నెంజిలనక కి దొర్కు జలిన్చి రిసా సంగితయ్, కొలోస్సియులు 1:26-27, ఎపెసు 3:3-6. నెంజిలె ఎత్తి కి క్రీస్తుచి తెడి ఎత్తి అదికారుమ్ తిలో దేముడు బెదవంతిన్చి రిసా, ఎపెసు 1:9-10. † 4:3 4:3 రోమ్ పట్టుమ్తె జో జేలి జా తిలి పొది ఈంజ ఉత్తుమ్ పవులు రెగిడ్లె, మెన ఒగ్గర్జన్ ఉచర్తతి. బారికుల్ 28:16, 30, 31 దెక. కైసరియతె కి జేలి జా తిలో; బారికుల్ 23:25, పిలిప్పితె కి; బారికుల్ 16:23, చి యెరూసలేమ్తె; బారికుల్ 21:33. ఎపెసుతె కి మెన సగుమ్జన్ ఉచర్తతి, గని రుజ్జు నాయ్. పిలిప్పితె చి యెరూసలేమ్తె జేలి జలిసి తొక్కి దీనల్చి. ‡ 4:10 4:10 జో అరిస్టార్కుక నిజుమి జేలి జా తిలో గే ఎక్కి జో పవులు తెన్ బెద జా బాద ఒర్పువ జలి రిసా దస్సి మెన్తయ్ గే నేసుమ్. § 4:12 4:12 నెంజిలె ‘యేసుక గొత్తి సుదొ రిత్తి జలో’, నెంజిలె ‘యేసుక గొత్తి రిత్తి జలో’.

6 తుమ్ లట్టబిసి సూటి తవున్. బమ్మ తెన్ లట్టబా నాయ్, గని సరిగా ఉచర, చెంగిల్ బెదవ, కామ్క జెతిసి లట్టబ, చి కక్క కిచ్చొ జబాబ్ దెంక గే, అజ్జ తయెదె.

7 ఆవ్ ఇన్నె కిన్ అస్సి గే, తుకికు తుమ్క జానయెదె. ప్రబుచి తెడి అమ్క జో ప్రేమ జలో బావొ జయెదె, చి నిదానుమ్ సేవ కెర్తెసా జా, అమ్చి తెన్ ప్రబుచొ గొతిమాన్సు రిత్తి జో జయెదె.

8 తుమ్తె ఆవ్ జోక కిచ్చొక తెద్రవ అస్సి మెలె, ఇన్నె అమ్ కిసి అస్సుమ్ గే తుమ్క జో ఒత్త సంగితి రిసా, చి తుమ్క మెన్సుతె జో దయిరిమ్ కెర్తి రిసా,

9 పడ్డొ, నిదానుమ్ తిలో ప్రేమ తిలో బావొ జలో తుమ్చొ సొంత మాన్సు ఒనేసిముక కి తెద్రయ్తసి. ఇన్నె జర్గు జలిసి ఎత్తి తుమ్క జేవ్ దొగుల సంగుల.

పవులు తెన్ తిలనచి ప్రేమ సంగ తెద్రయ్లిసి

10 ఇన్నె కో కో తుమ్క జోవయింక ప్రేమ సంగ తెద్రయ్తతి మెలె, అంచి తెన్ †జేలితె తిలో అరిస్టార్కుక, పడ్డొ బర్నబాచొ సల్లోసి మార్కు ఇన్నెచి రిసా అగ్గె తుమ్క కబుర్ తెద్రవ అస్సి. జో తుమ్తె అయ్లె, టాన్ దాన.

11 పడ్డొ యూస్టు మెన అన్నెక్ నావ్ తిలో యేసు మెలొసా కి జోచి ప్రేమ తుమ్క సంగ తెద్రయ్తయ్. దేముడుచి రాజిమ్చి రిసాచి సుబుమ్ కబుర్ కామ్ ఆవ్ కెర్తిన్తె, ఎక్కి ఈంజేవ్ తీగ్లయ్ యూదుల్ బెద అస్సి. ఈంజేవ్ అంక ఒగ్గర్ తోడు జా అస్సి.

12 పడ్డొ, క్రీస్తు జలో కియేసుక సేవ కెర్తెసా జలో తుమ్చొ సొంత మాన్సు ఎపప్రా కి తుమ్క జోచి ప్రేమ సంగ తెద్రయ్తయ్. తుమ్క ‘ఆత్మక పూర్తి వడ్డ డిట్టుమ్ టీచ, పూర్తి దయిరిమ్ తెన్ ప్రబుచి ఇస్టుమ్ రితి ఇండితె తత్తు’ మెన, తుమ్చి రిసా కెర్తెడె తెదొడి జో ప్రార్దన కెర్తె తత్తయ్.

13 జోచి రిసా ఆవ్ కిచ్చొ సాచి సంగితసి మెలె, తుమ్చి రిసా కి, లవొదికయ్ పట్టుమ్చచి రిసా కి, చి హియోరాపోలి పట్టుమ్చచి రిసా కి, జో ఒగ్గర్ కామ్ కెర్తయ్.

14 పడ్డొ, ప్రేమ జలో డాక్టర్ జలో లూకా చి దేమా తుమ్క జోవయింక ప్రేమ సంగ తెద్రయ్తతి.

15 లవొదికయ్ పట్టుమ్తెచ బావుడ్లు జల నంపజలనక చి నుమ్పాక, చి జేవ్చి గెరి సబ కెర్తి సంగుమ్చక అంచి ప్రేమ సంగ.

16 పడ్డొ, తుమ్తె ఈంజ ఉత్తుమ్ నదు కెర సూనయ్లదు మెలె, లవొదికయ్ పట్టుమ్తెచ సంగుమ్తె కి నదు కెరవ

సూనవ. పడ్డొ, జా లవొదికయ పట్టుమ్తె సంగుమ్తె ఆవ్ తెద్రయ్లి ఉత్తుమ్ తూమ్ కి సదు కెర.

17 పడ్డొ, 'ప్రబు తుక దిలి కామ్ తుయి నిదానుమ్ తెన్ పూర్తి కెర కుట్టవు' మెన అర్కిప్పుక కి తుమ్ సంగ.

18 ఆవ్ పవులు సొంత ఆతు తెన్ ఈంజ ముద్దు సంగితి ఆకర్ కోడు రెగ్గితసి. ఆవ్ జేలి జలిన్చి రిసొ తుమ్ ప్రార్దన కెరుక పవు నాయ్. ప్రబుచి దయ తుమ్చి తెన్ తవును!

దెస్సలొనీయుల్క రెగిడ్లి మొదొల్చి ఉత్తమ్ బారిక్ జలో పవులు దెస్సలొనీక పట్టుమ్చ సంగుమ్చక రెగిడ్లి మొదొల్చి ఉత్తమ్

మొదొల్ కోడు

1 దేముడు అబ్బొనక చి ప్రబు జలో యేసుక్రీస్తుక సంపజా జోచి తెడి తిల దెస్సలొనీక పట్టుమ్చి సంగుమ్చక *సిల్వానన్ చి తిమోతి, పవులు రెగిడ్లి ఉత్తమ్.

†దేముడు అబ్బొనచి యేసుచి దయ సేతుమ్ తుమ్చి ఉప్పిరి తవున్.

జేవ్ దెస్సలొనీకుల్ చి రిసాచి సర్ల

2 అమ్ కెయ ప్రార్దన కెరై కి, కెయఁక తెయఁక దెస్సలొనీక తుమ్ ఎత్తిజిన్చి రిసా దేముడుక అమ్చి సర్ల అమ్ సంగితసుమ్.

3 జో అమ్క అబ్బొ జలో దేముడుక అమ్చి సర్ల సూనయతె తత్తసుమ్. ప్రబు జలో అమ్చొ యేసుక్రీస్తుచి ఉప్పిర్చి తుమ్చి నముకుమ్, తుమ్చ కమొతె బార్ జతయచి రిసా; సైమల్ సేడుక జలెకి, జోవయించి ఉప్పిర్చి తుమ్చి ప్రేమచి రిసా తుమ్ ఒగ్గర్ కామ్ కెర్తసు; పడ్డె, ‡జోవయించి ఉప్పిర్చి తుమ్చి దయిరిమ్చి రిసా తుమ్ ఎత్తి బాదల్ ఓర్పువ జా నిదానుమ్ తత్తసు. ఈంజేవ్ రిసా అమ్చి సర్ల జోవయింక సంగితసుమ్.

దెస్సలొనీక దేముడు నిసాన్లినచి రుజ్జు

4 జలె, దేముడు ప్రేమ కెర్త ఓ బావుడ్లు, జోవయించి సేవ తుమ్. కెరై రిసా తుమ్క జో నిసాన అస్సె మెన జానుమ్.

5 అమ్చి అత్తి తుమ్తె అయలి సుబుమ్ కబుర్ రిత కొడొయ్ సూనయలిసి నెంజె. నాయ్, గెద, దేముడుచి సుద్ది తిలి ఆత్మచి సెక్తి జా సుబుమ్ కబుర్తె సీతతికయ్, 'పలితుమ్ దెరెదె' మెన అమ్చి పెట్టి దయిరిమ్ తిలి, అన్యె, ప్రబుచి జా ఆత్మ తుమ్చి పెట్టి సీకడ్డికయ్ తుమ్చి పెట్టి ఈంజ చి సత్తిమ్ తుమ్ చిన, పూర్తి దయిరిమ్ జా సంపజలదు. తుమ్చి తెన్ అమ్ తిలి పొది, తుమ్క

* 1:1 1:1 నెంజెలి, సిల్వానన్క 'సీలయ' కి మెనుల. † 1:1 1:1 'ఎత్తి...యేసుచి' ఎదచి కోడు ఒత్త తయె నాయ్, గని జా అర్దుమ్ తయెదె. ‡ 1:3 1:3 10 నంబర్చి కోడుతె దెకిలి, యేసుక్రీస్తు ఈంజ లోకుమ్తె అన్యె ఉత్త జెయెదె మెనయ్ దయిరిమ్ తెన్ అస్సె, జోవయింక రకితతి. § 1:5 1:5 రోయియల్ 1:16 దెక. * 1:6 1:6 బారికుల్ 17:1-8 దెక. † 1:7 1:7 ఆజి కాలి ఈంజేవ్ దొన్ని ప్రదేసిమ్లు మొత్తమ్క 'గ్రీకు దేసిమ్' మెనుల. ‡ 1:7 1:7 పాపులీని అకయ ప్రదేసిమ్చి కొంద్ పట్టుమ్తె తిలి పొది బెర్త ఈంజ ఉత్తమ్ రెగిడ్లి. * 2: 2:1 సగుమ్జిన్ విరోదుమ్ సుదల్ బెర్త, 'కిచ్చిగి మాయకాయ్ బోదన కెర్తయ్' మెన గోన సీకడ తిల. † 2:2 2:2 బారికుల్ 7:1-8 దెక.

'ప్రబుచి సత్తిమ్ దెకుత్' మెన కిచ్చొ బుద్ది ఇండితె తిలమ్ గే తుమ్ దెక అమ్చి సత్తిమ్ రుజ్జుల్ దెకిలదు గెద.

6 దస్సి, అమ్క దెక సీక తుమ్ అమ్చి రితి జలదు, ప్రబుచి బుద్ది దెరన్లదు. మెలె, సుబుమ్ కబుర్ తుమ్ సర్ల తెన్ సూన్తికయ్ మాన్సుల్ *పిట్టవుక ఉచర అల్లర్ కెరై కి, దేముడుచి సుద్ది తిలి ఆత్మ తుమ్చి పెట్టి సీకడ్డికయ్, జో దెతి సర్ల తెన్ తుమ్ సంపజలదు.

7 దస్సి, తుమ్ సంపజలి సర్ల నిదానుమ్ దెకయ్, తుమ్చి ఒండి †మాసిదోనియ ప్రదేసిమ్తె కి, ‡అమ్ అప్పె తతి ఒండి అకయ ప్రదేసిమ్తె కి, ప్రబుక సంపజలన సీకతతి.

8 ప్రబుచి సుబుమ్ కబుర్ మొదొల్క తుమ్తె, పడ్డె తుమ్చి ఒండి మాసిదోనియతె కి ఈంజ ఒండి అకయతె కి సూనయ్ జా అస్సె, అన్నె దూరితె కి. గని అన్నెయ్ కిచ్చొ సర్ల జతసుమ్ మెలె, ప్రబుక తుమ్ సంపజలిసి కేన్ పక్క కి జాన్సువ జా అస్సె, చి తుమ్క సంపజా అస్తి మెన ఆమ్ కక్కయ్ సాచి సంగుక నాయ్.

9 ఎత్తిజిన్ రుజ్జుల్ దెక తా జెచ్చి అమ్కయ్ సాచి సంగితతి. కిచ్చొ సాచి మెలె, అమ్ తుమ్తె గెలిసి తుమ్తె పలితుమ్ దెర్లిసి సంగితతి. మెలె, బొమ్మల్క జొకరుక ముల, నిజుమ్ తిలో జీవ్ తిలో దేముడుచి సేవ కెరుమ్దే మెన తుమ్ మార్పువ జలదు.

10 జో దేముడుచొ పుత్తుసి యేసు అమ్ మాన్సుల్చి పాపుమ్ వయన సిలువతె మొర, అమ్చి పాపుమ్చి రిసా అమ్ ఆకర్ దీసి జంక తిలి సీచ్చ అమ్క పిట్టయ్లన్. జో యేసుక దేముడు అబ్బొసి అన్నె జియడ్లన్. చి జో పరలోకుమ్తె గెలిన్ తెంతో బూలోకుమ్తె అన్నె ఉత్త జెంక అస్సె. జో అన్నె ఉత్త జెతిన్క తుమ్ దెస్సలొనీకుల్ నిదానుమ్ తెన్ రకితిన్చి రిసా కి జేవ్ ఎత్తిజిన్ సాచి సంగితతి.

2

*'అమ్ సుబుమ్ కబుర్ సూనయ్లిసి కిచ్చొ వేర బుద్దిక కెర్లిసి నెంజె' మెన పవులు జబాబ్ దిలి రితి సంగిలిసి.

1 బావుడ్లు, అమ్ తుమ్తె గెలిన్క 'ఆరిచి నెంజె' మెన తుమ్ సొంత కి జాన్సు.

2 అమ్ తుమ్చి దెస్సలొనీకతె నే గెతె అగ్గె పిలిప్పి పట్టుమ్తె ప్రబుచి సుబుమ్ కబుర్ నెతికయ్. అమ్క ఒత్తచ మాన్సుల్ కెర్తి అల్లర్ కెర తిలి, కెర్తి నిస్కారుమ్ కెర తిల, తుమ్ జాన్సు. ఒత్త దస అల్లర్ జలెకి, 'దేముడు

అమ్మక తోడు తయెదె' మెన దయిరిమ్ తా, తుమ్తె గెచ్చు జో తెద్రయ్లీ సుబుమ్ కబుర్ సూనయ్లమ్, ఒత్త కి †మాన్సుల్ పిట్టవుక ఉచర అల్లర్ కెర్లె కి.

3 అమ్ బోదన కెర్లిసి తప్పుచి నెంజె, కిచ్చో లంజెబుద్ది ఉచర బోదన కెర్లిస్ నెంజె, చి కక్క మోసిమ్ కెరుక ఉచర్లిస్ నెంజె.

4 దేముడు అమ్మక నంప కెర, జోచి సుబుమ్ కబుర్ అమ్ జాన్సుప కెర్లి రిసా అమ్మక నిసాన బులయ్తయ్చి రిసా, 'సికడ' మెన జో అమ్మక కిచ్చో సికడె, జయ్యి అమ్ బోదన కెర్లసుమ్. మాన్సుల్క మెన్స వడనుక అమ్చి ఆస నాయ్. దేముడు సొంత తియార్లి కామ్ కెరుకయ్ అమ్చి ఆస. అమ్చి పెట్టిచి బుద్ది జోకయ్ ఎర్కె.

5 కెయ్ కిచ్చో పులయ్త కొడో లట్టబుమ్ నాయ్. పడ్డో డబ్బుల్ ఆసక కి, కిచ్చోయ్ ఆసక కి, కిచ్చోయ్ మాయ కెరుమ్ కి నాయ్, తుమ్ జాన్సు. దేముడు కి అమ్చి సత్తిమ్క సాచి జతయ్.

6 పడ్డో, తుమ్తె కి కత్తె కి మాన్సుల్తె గవురుమ్ ఆననుక ఉచరుమి నాయ్. క్రీస్తుచ బారికుల్ జా అస్సుమ్చి రిసాచి అమ్చి అదికారుమ్చి రిసా తుమ్ అమ్మక విలువ దెకుక కి బెదెదె, గని అమ్మక జా ఆస కి నాయ్.

తుమ్క బాద నే సేడయ్తి రితి మెత్తన తా సొంత కామ్ కెర కెరయ్ జిలమ్

7 తుమ్తె గెచ్చు తా తుమ్క మెత్తన తిలమ్, బోదల్క అయ్యసి కిసి ముద్దు కెర్లె తా పోనెదె గే, ఆము తుమ్కయ్ దస్సి దెకితె తిలమ్.

8 అన్నె, తుమ్క దస్సి ముద్దు తా, 'జేవ్ కి దేముడుచి సుబుమ్ కబుర్ సూన †రచ్చించుప జతు' మెన ఆస జా సుబుమ్ కబుర్ సూనయ్లమ్. గని, తుమ్క 'జతు' మెనయ్ అమ్చి జీవు కి దెతమ్; తుమ్క తెద్ది ప్రేమ జా తిలమ్.

9 అమ్ ఒత్త కస్తుమ్ సేడ సేడ కిటంబుగుడ్డల్ తెయార్ కెర కెరయ్ జితె తిలిసి తుమ్ ఏద కెర్లె. రాతి మెద్దెనె జా *కామ్ కెర్లె తిలమ్. కిచ్చోక మెలె, దేముడుచి సుబుమ్ కబుర్ బోదన కెర్లి రిసా తుమ్తె తిలి పొది అమ్క పోస్తి రిసా కక్క నైమ సేడవుక నెన కెర, దస్సి కామ్ కెర కెరయ్ జితె తిలమ్.

పవులీసి అబ్బుదిసి రిత జా బోదన కెర్లె తిలిచి

10 తుమ్తె అమ్ సుద్ది ఇండిలిసి, సత్తిమ్ ఇండిలిసి, వేర వాట్ నెంతె సరిగా ఇండిలిసి తుమ్ ప్రబుక నంపజలన దెక సాచుల్ జా అస్సున్. దేముడు కి సొంత సాచి అస్సె.

11 బోదల్క అబ్బొసి కో జలెకు దొర్కు జలిసి ఎత్తి కిసి ప్రేమ తెన్ జోవయింక సికడెదె, దస్సి తుమ్క ఎక్కెక్లక కి

కిసి నిదానుమ్ ఇండుక గే సికడ సికడ దయిరిమ్ సంగితె తిలమ్.

12 అన్నె, జోవయించి సొంత రాజిమ్తె తుమ్ బెదితి రితి జోవయింతెన్ తుమ్ గవురుమ్ జతి రితి జోవయించి దయక దేముడు తుమ్క నిసాన అస్సె. 'జోవయింక గవురుమ్ కెర్లి రితి తుమ్ ఇండ' మెన బతిమాల్ప జా సంగితె తిలమ్, తుమ్ జాన్సు.

సుబుమ్ కబుర్క దెస్సలాసికల్ నంపజలిన్చి

13 జలె, అన్నె కిచ్చోచి రిసా దేముడుక రోజుక అమ్చి సర్ల సంగితసుమ్ మెలె, జోవయించి అమ్ సూనయ్లీ సుబుమ్ కబుర్ తుమ్ సూన, జాక 'మాన్సు కచి ఉచర్లిసి నెంజె, గని దేముడు సొంతయ్చి కోడు ఈంజ' మెన తుమ్ సత్తిమ్ చిన నంపజలదు. జయ్యి సుబుమ్ కబుర్ అప్పె తుమ్ నంపజలన్ చి పెట్టి కామ్ కెర్లయ్.

14 క్రీస్తు జలో యేసుక నంపజల దేముడుచి తెడిచ యూదయ్ ప్రదేసిమ్చ సంగుమ్ల్చక కిసి జలె గే, తూమ్ కి, బావుడ్లు, దస్సి జలదు. మెలె, తూమ్ తుమ్చి దేసిమ్చచి అత్తి సేడ్ల అల్లర్లు జేవ్ కి జోవయించ సొంత యూదుల్చి అత్తి జేవ్ సేడ్ల.

15 జేవ్ యూదుల్చ వెల్లెల మాన్సుల్ అన్నె అగ్గె ప్రబు జలో యేసుక మార్ల, చి అన్నె అగ్గె, దేముడు అబ్బొన్చ కబుర్లు సంగిల పూర్లుల్క కి మార్ల. అమ్కయ్ కి జేవ్ అల్లర్ కెర †ఉదడ్ల.

16 యూదుల్ నెంజిలసక 'ప్రబుక నంపజా †రచ్చించుప జతు' మెన అమ్ బోదన కెరుమ్దే మెలె, జేవ్ అడ్డు కెరుక ఉచర్లతి. దస్సి కెర, దేముడుక కి ఈంజ లోకుమ్చ మాన్సుల్ ఎత్తిక కి విరోదుమ్ సుదల్ రిత జతతి. దస్సి కెర, జోవయించి పాపుమ్ పూర్తి బెరవంతతి. గని దేముడు దెతి సిచ్చు కచితుమ్ జోవయింక ఎదిలి కి పిట్టె నాయ్. మొదోల్ జా అస్సె.

దెస్సలాసికతె గెచ్చుక పవులు ఆస జలిసి

17 ఓ బావుడ్లు, తుమ్చి తెన్ అమ్ అప్పె సగుమ్ దీసల్ నెంజిల్ రిసా, పొరబోదల్ రిత అమ్ జా అస్సుమ్. గని అప్పె దూరి జా తిలె కి, అత్తుక పాసి అస్సుమ్ మెలి కోడు. తుమ్తె అన్నె బే బేగి గెచ్చు తుమ్క సొంత అన్నె దెకుక జలె ఆస తెన్ అస్సుమ్.

18 గెతమ్, ఆవ్ పవులు సర్ల తెన్ 'బార్ జా గెచ్చిందె' మెన ఒగ్గర్ సుట్టు ఉచర్లయ్, గని సయ్తాన్ అమ్క పిట్టయ్లో.

19 తుమ్ అన్మానుమ్ జా నాయ్. అమ్చి దయిరిమ్, అమ్చి సర్ల, అమ్చి గవురుమ్ కిచ్చో మెలె, ప్రబు జలో

‡ 2:8 2:8 మెలె, పాపుమ్ తెంతో, నయ్తాన్చి రాజిమ్ తెంతో.

§ 2:9 2:9 బారికుల్ 18:3 దెక.

* 2:9 2:9 కిచ్చోగె లాబుమ్ దొర్కు కెరంతి రిసా

సుబుమ్ కబుర్క కెర్లయ్ మెన విరోదుమ్ సుదల్ గోసక సంగ తిల.

† 2:15 2:15 బారికుల్ 17:1-13.

‡ 2:16 2:16 మెలె పాపుమ్ తెంతో, నయ్తాన్చి

రాజిమ్ తెంతో.

అమ్చొ యేసు ఈంజ లోకుమ్తె అన్నె ఉత్త జెతికయ్ దీసిక ఆమ్ జోవయించి మొక్కె టీవెలె, తుమి కి అమ్చి తెన్ ఒత్త టీవెలె.

²⁰ తుమ్ అమ్చి బవుమానుమ్ జలి రితి జా అస్సున్, తుమ్ అమ్చి సర్ల.

3

తిమోతిక దెస్సలొనీకతె తెద్రయ్లినచి

1 జలె, తుమ్క అమ్ దూరి తిలిసి అమ్ అన్నె ఓర్పువ జంక నెత్త కెర, 'అమ్ *ఏదెస్సతె మాలజ్ జా తంక జలె తమ, గని తిమోతిక జవున్ దెస్సలొనీకతెచ బావుడ్లుతె తెద్రవుమ' మెన,

2 జోవయింక తుమ్తె తెద్రయ్లమ్. జో బావొ కి క్రీస్తుచి రిసొచి సుబుమ్ కబుర్ నూనయ్తి రిసొ దేముడుచొ సేవ కెర్తొసొ జా అస్సె, చి ప్రబుచి ఉప్పిరిచి తుమ్చి నముకుమ్ అన్నె డిట్టుమ్ కెర్సు, చి కిచ్చొయ్ అల్లర్ తుమ్తె కచి నిదానుమ్ పిట్టయ్తు నాయ్ మెన తుమ్క బుద్ది దయిరిమ్ సంగున్ మెనయ్ తెద్రయ్లమ్.

3 తుమ్చి నముకుమ్చి రిసొ కో కో తుమ్క అల్లర్ కెర్తెతి. అమ్ ప్రబుక నంపజలన దస సైమల్ సేడుక అస్సె మెన తూమ్ కి జాన్సు.

4 తుమ్చి తెన్ అమ్ తిలి పొది కి "అమ్ ఇన సైమల్ సేడుక అస్సె" మెన సంగితె తిలమ్, దస్సి జర్గు జలి జాన్సు.

5 జలె, తుమ్క అమ్ దూరి తిలె, తుమ్క 'కిసి జా అస్సి గె' నేన్లిన్కచి దుకుమ్ ఓర్పువ జంక నెత్తిర్లయ్చి రిసొ 'ఏక్ వేల సయ్తాన్ కిసిగె జోవయింక అల్లర్ కెర, జోవయించి నిదానుమ్ పిట్టవ తయెదె. పిట్టవ తిలె, ఆరి ఒత్త సైమ సేడ తమ్దె' మెన, 'నంప తెన్ అస్సి గె నాయ్ గె నూనిందె' మెనయ్, తిమోతిక తుమ్తె తెద్రయ్లయ్.

తిమోతి అన్నె ఉట్ట జా సర్ల కోడు సంగిలిసి

6 దస్సి అప్పె తుమ్తె తెంతో తిమోతి అమ్తె అన్నె ఉట్ట జా, ప్రబుచి ఉప్పిరిచి తుమ్చి నముకుమ్చి రిసొ, తుమ్చి ప్రేమచి రిసొ, సర్లచి కోడు ఆన అస్సె. పడ్డె, అప్పెక అమ్క తుమ్ ప్రేమ తిలిసి, అమ్క నే పచ్చ తిలిసి, ఆము తుమ్కయ్ దెకుక కెడ్డి ఆన తెన్ అస్సుమ్ గే తూమ్ అమ్కయ్ దెకుక తెడ్డి ఆన తెన్ అస్సున్ మెనయ్ జో అప్పె అమ్క సంగ అస్సె.

7 బావుడ్లు, ఈంజ మదెనె అమ్ ఒగ్గర్ సైమల్ బాదల్ సేడ్డె తిలె కి, తుమ్క నిదానుమ్ అస్తి మెన తుమ్చి నముకుమ్చి రిసొచి కోడు అమ్ సూన్లి రిసొ, అన్నె దయిరిమ్ జా అస్సుమ్.

* **3:1 3:1** పవులు ఎక్కిలో ఏదెస్సతె గెలన్; బారికుల్ 17:14-15. గని ఒత్త తెంతో తిమోతి ఉట్ట అయ్లో కిచ్చొగె, చి ఒత్త తెంతో పవులు జోవయింక దెస్సలొనీకతె అన్నె తెద్రయ్లన్. ఒత్త తెంతో పవులు కొరింద పట్టుమ్తె గెలన్; బారికుల్ 18:1. జో కొరిందతె తిలి పొది; బారికుల్ 18:5; తిమోతి ఉట్ట అయ్లన్, చి తెదొడి, జెతె, పవులు ఈంజ ఉత్తుమ్ రెగిడ్లన్; తిమోతి చి సిల్వానస్ తెన్.

8 తుమ్ ప్రబుచి తెడి నిదానుమ్ తిలె, అమ్క సరి జతయ్. జా కోడు నూన అన్నె జలి రితి జా అస్సుమ్.

9 తుమ్చి రిసొ దేముడు అమ్చి పెట్టి దిలి సర్ల సంతోసుమ్చి రిసొ, అమ్చి సర్ల జోవయింక దెకయ్తి రిసొ జోవయింక కిచ్చొ దిలె జయెదె?

10 తుమ్తె గెచ్చ తుమ్క సొంత దెకుక కి, అన్నె, తుమ్ పూర్తి సికితిన్తె కిచ్చొ జలెకు నముకుమ్తె ఇదిల్ పెట తిలె జా చెంగిల్ కెరుక కి, బలే ఆన జా అస్సుమ్ చి రాతి మెద్దెనె ప్రార్దన కెర్తె తత్తసుమ్.

దెస్సలొనీకుల్క పవులు ప్రార్దన కెర్లిసి

11 అమ్ తుమ్తె జెతికయ్ రితి అమ్క అబ్బొ జలొ అమ్చొ దేముడు సొంత, అన్నె పుత్తున్ జలొ ప్రబు జలొ అమ్చొ యేసు అమ్క వాట్ దెకయ్ దె.

12 పడ్డె, ఆము తుమ్కయ్ కిసి ప్రేమ అస్సుమ్ గే, దస్సి ఎక్కిలోక ఎక్కిలో, అన్నె ఎత్తిజిన్క, తూమ్ రోజుక అన్నె ఒగ్గర్ ప్రేమ కెర్తి రితి తుమ్చి పెట్టి ప్రబు సికడ్సు.

13 అన్నె, తుమ్చి పెట్టి పూర్తి నిదానుమ్ దెవుసు, చి ప్రబు జలొ అమ్చొ యేసు పరలోకుమ్ తెంతో జోవయించయ్ జలన ఎత్తిజిన్ తెన్ ఈంజ లోకుమ్తె అన్నె ఉత్త జెతికయ్ దీసిక, తుమ్క 'పొరపాట్ నెంతె పూర్తి సుద్ది జా, అంచయ్ జా అస్తి' మెన, అమ్క అబ్బొ జలొ అమ్చొ దేముడు ఒప్పునుక జయెదె.

4

తుమ్ దేముడుక సర్ల కెర్తి రితి ఇండ

1 జలె, తుమ్క అన్నె కిచ్చొ సంగుక మెలె, బావుడ్లు, దేముడుక సర్ల కెర్తి రిసొ కిచ్చొ బుద్ది రితి ఇండుక గే అమ్తె తుమ్ సికిలదు. దస్సి సత్తిమ్ ఇండుక దెర అస్సున్చి రిసొ అమ్క సర్ల, జలె. "సత్తిమ్ ఇండుక అన్నె రోజుక సికితె తా" మెన అమ్క ప్రబు జలొ యేసు దిలి అదికారుమ్క అమ్ తుమ్క ముక్కిమ్క బతిమాల్పా జా సంగితసుమ్.

2 ప్రబు జలొ యేసుచి నావ్ తెన్ తుమ్క కిచ్చొ కిచ్చొ ఆడ్రల్ దిలమ్ గే జాన్సు, గెద.

3 దేముడుచి ఇస్టుమ్ ఏక్ కిచ్చొ మెలె, తుమ్ అగ్గెవ బుద్దుల్ ముల, జోచి సుద్ది జా పూర్తి జోచయ్ మాన్సుల్ తుమ్ జా గెచ్చుక.

జలె, దస్సి పూర్తి చెంగిల్ సుదల్ జంకయ్ జాఁకెర, కిచ్చొ మెలె, లంజె కమొతె నే కెర్తె, పూర్తి దస బుద్దుల్ ములుక ఈంజ దేముడ్చి ఉడ్డెసుమ్.

4 లంజె పాపుమ్ నే జతి రితి, తుమ్ ఎత్రిజిన్ తుమ్చి ఆగ్చ అసల్ ముద్దొ కెరన, సుద్ది తెన్ తా మరియాద తెన్ తా, చి పెండ్లి జలె, తెర్నిమున్ను జా సత్తిమ్ తా.

5 దేముడుక నేన్ల మాన్సుల్, జలె, జోవయించి ఆగ్చి ఆసల్ జోవయింక ఇండయెదె, తూమ్ దస్సి జా నాయ్.

6 తుమ్చితె కో కి కక్క కి దస్సి పాపుమ్ కెర నాయ్, దస్సి మోసిమ్ తుమ్చి బావుడ్లి కి కెర నాయ్. దస్సి పాపుమ్ కెర్లదు మెలె, ప్రబు పచ్చ నాయ్. కచితుమ్ సిచ్చ దెయెదె. అగ్గె తుమ్క గట్టిజ సంగిలమ్.

7 దేముడు కిచ్చొచి రిసా అమ్క నిసాన అస్సి మెలె, అమ్క 'లంజె జతు' మెన నాయ్, గని అమ్ జోవయించి పరలోకుమ్చి సుద్ది జా జోచయ్ జతి రిసాయి.

8 దస్సి రిసా, లంజె నే జతిన్చి ఈంజ ఆగ్గు తుమ్తె కో పిట్టయ్లె, మాన్సుచి మరియాద కడ్డయ్. గని అస్సె, ముక్కిమ్క, దేముడుచి మరియాద కడ్లి రితి జతయ్. తుమ్క 'సుద్ది జతు' మెనయ్ దేముడు జోచి సుద్ది తిలి ఆత్మ తుమ్చి పెట్టి దెతయ్.*

ఎక్కిలోక ఎక్కిలో ప్రేమ దెకితిసి

9 ఎక్కిలోక ఎక్కిలో ప్రేమ కెర్తినచి రిసా తుమ్ కో కిచ్చొ కబుర్ రెగుడుక నాయ్. ఎక్కిలోక ఎక్కిలో ప్రేమ కెర్తిన దేముడు సొంతయ్ తుమ్చి పెట్టి సికడ అస్సె.

10 అస్సె, 'ఒండి మాసిదోనియ ప్రదేసిమ్తెచ బావుడ్లుక ప్రేమ కెర్తతి' మెన, నిజుమి తుమ్చి రిసా సంగుక జతయ్. గని, 'రోజుక అస్సెయ్ ప్రేమ కెరుక తుమ్ సిక్క, బావుడ్లు' మెన, తుమ్క బతిమాల్పా జా సంగితనుమ్.

11 పడ్డె బమ్మనెంతె జింక ఆస జా, అస్సె మాన్సుల్క పోటి నే కెర్తె, సొంత కామ్ తుమ్ దెకన్తె తా, అస్సె, అమ్ అగ్గె ఆడ్ర దిలి రితి, బద్దుకుమ్ నే జతె తుమ్ జితి కామ్ నిదానుమ్ కెర కెర కతె జితె తా.

12 దస్సి సొంత కామ్ కెర కెర జితె తిలె, తుమ్ కత్తె కత్తె నజిత్ తంక నాయ్, చి అస్సె మాన్సుల్చి మొక్కె నిస్కారుమ్ జను నాయ్, గని తుమ్క 'సత్తిమ్ మాన్సుల్' మెన గవరుమ్ దెకుల.

ప్రబు ఉత్త జెతిసి

13 ప్రబుక నంపజా మొర గెలసచి రిసా, బావుడ్లు, తుమ్ †అన్మానుమ్ జా నాయ్. కిసి జవుల గే తుమ్ నేన తంక అమ్క ఇష్టుమ్ నాయ్.

యేసుప్రబుక నేన్లసచ మాన్సుల్ కో జలె మొర్లె, ఒగ్గర్ దుకుమ్ జా ఏడుకుడు జవుల, 'యేసుప్రబుక నంపజలె

పరలోకుమ్తె గెతి వాటు తయెదె' మెన నేన్తి చి రిసా జోవయించి ఉప్పిర్చి నముకుమ్చి దయిరిమ్ జోవయింక నాయ్. జలె, తూమ్ దస్సి దుకుమ్ జంక నాయ్.

14 కిచ్చొక మెలె, యేసు మొర అస్సె జివ్ జా ఉట్లన్ మెన అమ్ నంపజతనుమ్. దస్సి, యేసుక నంపజా మొర్ల మాన్సుల్ జోవయించి తెడి అస్తిచి రిసా, దేముడు యేసుక ఈంజ లోకుమ్తె అస్సె తెద్రయ్తి పొదిక, జోవయింతెన్ జోవయింకయ్ కి కడ ఆనెదె.

15 ప్రబు సొంత జాన కెర ఏక్ కోడు కిచ్చొ మెన తుమ్క అమ్ సంగితనుమ్ మెలె, యేసుప్రబు అస్సె ఉత్త జెతి ఎద ఈంజ లోకుమ్తె కో నంపజలస జితె తమ్దె గే, నంపజా మొర్లసచి కంట అగ్గె జము నాయ్, జోవయించి కంట తొలితో జోవయింతెన్ బెదుమ్ నాయ్.

16 తెదోడ్క కిచ్చొ జర్గు జయెదె మెలె, పరలోకుమ్చ దూతల్తె చొ, వెల్లో దూత ఎక్కిలో కేక్ గల సాడుప కెర్లె, పరలోకుమ్చి బజెన చి దేముడు బజన నప్పిర్మూరి అవాడ్ తెన్, చి యేసుప్రబు అదికారుమ్ తెన్ పరలోకుమ్ తెంతో ఉత్త జెయెదె. నంపజా మొర్లస తొలితో జివ్ జా ఉట్టుల.

17 పడ్డె, ఆగాసుమ్తె ప్రబు తెన్ దస్సుల్ జతి రిసాయి అమ్ ఈంజ లోకుమ్తె జితన కి, జేవ్ మొర జివ్ జా అస్సె ఉట్లన తెన్ మబ్బుతె ఎక్కితె ఉక్కిల్ జమ్దె. ఒత్త తెంతో కెయ్క తెయ్క జో తెన్ తమ్దె.

18 జాకయ్, ప్రబుక నంపజా తుమ్చితె కచగె మాన్సుల్ మొర తిలె, తుమ్ ఎక్కిలోక ఎక్కిలో ఈంజేవ్ కొడె ఉచరవడ దయిరిమ్ సంగితె తా.

5

ప్రబు కెయ్క అస్సె జెయెదె గే కో మాన్సు నేన్లసిచి

1 గని, బావుడ్లు, ప్రబు కెయ్క కిసి కాలుమ్క అస్సె జెయెదె గే, జా, జాచి రిసా తుమ్క అమ్ కో అస్సె కిచ్చొ రెగ్గ సికడుక నాయ్.

2 ప్రబు అస్సె ఉత్త జా ఈంజ లోకుమ్చక పరిచ్చె కెర తిర్పు కెర్తి జా వెల్లి దీసి చోరు అందరె అయ్లి రితి జెయెదె. కో* నేన్లె పొది జెయెదె.

3 జేవ్ దినాల్క, ఈంజ లోకుమ్చ మాన్సుల్ కిసి జతె తవుల మెలె, "ఈంజ లోకుమ్క బాదల్ నాయ్, సేంతుమ్ సుక్కుమ్ తెన్ అస్సుమ్" మెన జేవ్ ఉచరన ప్రబుక పచ్చ తిలె పొది జా దీసిచి జేవ్ నే ఉచర్లె వెల్లి సిచ్చ, నాసెనుమ్ జతిసి, జోవయింక చట్కున లయెదె. తేర్బోదక కంట్లు పావ అయ్లె పొది జేవ్ నొప్పుల్ కిసి పిట్టవనుక నెంజె గే, దస్సి. జా సిచ్చ అయ్లె, పిట్టవనుక నెతిరి.

* 4:8 4:8 కొరిందీల్క రెగిడ్లి ఏక్ నంబర్ ఉత్తమ్ 6:15-20 దెక. అమ్చి ఆగ్ ప్రబుచి దేముడుచి గుడి. జోవయించి దేముడుచి గుడి లంజెతె బెదయ్లె, జోచి మరియాద కడ్లి రితి జతయ్. † 4:13 4:13 'ప్రబు బే బేగి అస్సె ఉత్త జెయెదె, చి అమ్క జోతె కడ నెయెదె' మెలి రితి నూన తిల, కిచ్చొగె, చి మదెనె జోవయింతె తిలన సగుమ్జన్ మూర తిల కిచ్చొగె, చి 'జేవ్ కిసి జవుల గే?' మెన బియ్ తిల. కిచ్చొగె. * 5:2 5:2 మత్తయి 24:42-44వి కొడె దెకిలె, యేసు సొంత కి ఇసి సంగిలన్. † 5:3 5:3 అస్సె ఒగ్గర్ వూర్లుమ్ రెగిడ్లిసి ఏక్ దెక. యిర్మీయా 6:14-15, 8:11-12.

ప్రబుక సంపజలసక దయిరిమ్ జాగర్త సంగ రెగిడ్డిసి

4 తూమ్, బావుడ్లు, సంపజలస, అందర్బుద్దిచ నయ్తాన్చి రాజిమ్చ మాన్సుల్ నెంజున్చి రిసా, జా దీసి కెయ్చక జెయెదె గే అమ్ నేన్లె కి, అయ్లె, చోరు అయ్లి రితి తుమ్క జా బమ్మ కెరుక నాయ్.

5 కిచ్చొక మెలె, తూమ్ అము ప్రబుక సంపజలస ఎత్తిజిన్ జోచి ఉజిడ్ తిలి ఆత్మక నొవర్ జెర్మిలస జా, మెద్దెన్చి తెలివి తిలి రితి జోవయింక రకుక అస్సె. జోచి ఇస్టుమ్ రితి ఇండుక అస్సె. అందర్బుద్దిచ, నయ్తాన్చి రాజిమ్చ నెంజుమ్.

6 జాకయ్, నిదాసుమ్ నెంజిల జామ నిజిల్ రిత జల జేవ్ వేర మాన్సుల్చ రిత అమ్ జంక పోని. అము, నే జుమిల రిత తా, నే మచ్చిల రిత తా, బుద్ది తంక.

7 కిచ్చొక మెలె, నిజితిసి, జలె, అందర్తె బెదితిసి. మచ్చితిసి అందర్తె బెదితిసి.

8 గని జోచి ఉజిడ్చి ఆత్మ తెన్ అమ్ జెర్మ అస్సుమ్చి రిసా అమ్చి ఆత్మ నే మచ్చిల్ రితి తా అమ్ బుద్ది తంక అస్సె. ప్రబుచి ఉప్పిరి పూర్తి నముకుమ్ తియ, తుమ్ ఎక్కిలోక ఎక్కిలో ప్రేమ కెర్తె తా. యుద్దుమ్తె గుండెచి పురైతో ఇనుము డాలు దెర తిలె కీసి ఈంటె గట్ర లయె నాయ్, దస్సి ప్రబుచి ఉప్పిర్చి నముకుమ్చి ఎక్కిలోక ఎక్కిలో ప్రేమ కెర్తిసి అందర్బుద్దిచి ఉప్పిర్చి యుద్దుమ్తె అమ్క కామ్క జెయెదె. పడ్డొ, యేసుప్రబు తుమ్క తుమ్చి పాపుమ్చి సిచ్చ తెంతో రచ్చించుప కెర్తయ్చి రిసాచి దయిరిమ్ తెన్ తా. అందర్బుద్దిచి ఉప్పిర్చి యుద్దుమ్తె అమ్క బోడి కిచ్చొ నే లయితి రిసా గలంతి ఇనుము టోపిచి రితి జా దయిరిమ్ జయెదె.

9 కిచ్చొక మెలె, ప్రబుక సంపనెంజిల మాన్సుల్ సిచ్చ జతిసి అమ్ సేడుక దేముడు సెలవ్ దెయె నాయ్. గని ప్రబు జలో అమ్చొ యేసుక్రీస్తుక అమ్ సంప కెర్తియ్, అమ్చి పాపుమ్చి రిసాచి సిచ్చ అమ్క నే లయితి రితి జో యేసుచి అత్తి అమ్ రచ్చించుప జంక మెనయ్ జోచి సెలవ్.

10 జో యేసు అన్నె ఉత్త జెతికయ్ పొదిక, అమ్ జివ్ తిలె కి మొర తిలె కి, జోవయింతెన్ అమ్ బెద జితి రిసాయి జో యేసు మొర అమ్చి పాపుమ్ గెచ్చయ్లిసి.

11 ఈంజేవ్ కొడొచి రిసా తుమ్ ఎక్కిలోక ఎక్కిలో దయిరిమ్ కెరంతసు. అన్నె, తుమ్ ఎత్తిజిన్ పూర్తి కిచ్చొయ్ అన్యానుమ్ నెంతె డిట్టుమ్ జతి రితి, ఈంజ ఎత్తిచి రిసా ఎక్కిలోక ఎక్కిలో దయిరిమ్ కెర్తె తా.

బుద్ది ఇండితన్చి రిసా ఆకర్ కొడొ

12 ఆకర్చి, బావడ్లు, తుమ్క అన్నె కిచ్చొ ముక్కిమ్క బతిమాలూ జా సంగితసుమ్ మెలె, ప్రబుచి కామ్ తుమ్తె

కెర్తె తా జోచి అదికారుమ్చి తెడి తుమ్క దెకిత బుద్ది సికడ్డసక తుమ్ మరియాద దెకితె తా.

13 జోవయింక కామ్చి రిసా జోవయింక ఒగ్గర్ ప్రేమ గవురుమ్ దెకితె తా. పడ్డొ, ఎక్కిలో తెన్ ఎక్కిలో తుమ్ కట్టు తెన్ తా.

14 పడ్డొ అన్నె కిచ్చొ బుద్ది సంగితసుమ్ మెలె, బావుడ్లు, బద్దుకుమ్ జలసక బుద్ది సికడ, దయిరిమ్ నెంజిలసక దయిరిమ్ కెర, ఆత్మక తొక్కి సెక్కి తిలసక తోడు తా, చి జోవయింతె కక్క జోవయించ తప్పల్క కోపుమ్ నే దెకయ్తె, జేవ్ సికితిసి, డిట్టుమ్ జతిసి పాడ్ నే కెర్తి రితి ఓర్పుప జా.

15 కో తుమ్క అల్లర్ కెర్తె, జోవయింక తుమి అల్లర్ కెర నాయ్. తుమ్ దస్సి తప్ప నే జతి రితి జాగర్త దెకన. కెర్తెడి కి ఎక్కిలోక ఎక్కిలో కామ్క జెతికయ్ రితి తోడు కెర్తె తంక ఆస జా. ఎక్కి ప్రబుక సంపజలసకయ్ మెన నాయ్, కక్కయ్ కి.

16 కిచ్చొ జర్గు జలెకి, సర్ల తెన్ తా.

17 బద్దుకుమ్ నే జెతె ప్రార్దన కెర్తె తా.

18 కిచ్చొ జర్గు జలెకి 'ఈంజ జర్గు జంక తుయి సెలవ్ దిలది' మెన, దేముడుక సర్ల తెన్ని ఒప్పన, సర్ల తెన్ తా. †క్రీస్తు జలో యేసుచి తెడి అస్సున్చి రిసా కిచ్చొ జలెకి తుమ్ దస్సి బుద్ది తంక దేముడుచి ఇస్టుమ్.

19 దేముడుచి సుద్ది తిలి ఆత్మ జర్గు కెర్తిసి పిట్టవుక పోన.

20 మాన్సుచి అత్తి ప్రబుచ కబుర్లు సంగితిన్క నిస్కారుమ్ కెర నాయ్.

21 గని, 'ప్రబుచి కబుర్ ఈంజ' మెన కో జవున్ కిచ్చొ జవున్ కోడు సంగిలె, 'ప్రబు సికడ్డిన్ తెన్ బెదితయ్ గే నాయ్ గె' మెన అజ్జ కెరంతి రిసా జా కోడు తుమ్ పరిచ్చ కెర. ప్రబు సికడ్డిన్ తెన్ బెదితయ్ మెలె, దెరన.

22 గని బెదె నాయ్ జలె, 'గర్చి' మెన దూరి కెర; కిచ్చొ గర్చి కామ్ జలెకి.

23 తుమ్ జోచయ్ జా పూర్తి సుద్ది జతి రితి, మాన్సుల్క సేంతుమ్ ఆన్తో దేముడు సాంత తుమ్క మార్పుప కెర్తె తవుసు, చి ప్రబు జలో అమ్చొ యేసుక్రీస్తు ఈంజ లోకుమ్తె అన్నె ఉత్త జెతికయ్ ఎద తుమ్ ఎత్తిజిన్క తుమ్చి ఆత్మ జివు ఆగ్ పూర్తి పొరపాట్ నెంతె తవుసు.

24 తుమ్క బుకార్లొ కెర్లొ అమ్చొ దేముడు నముకుమ్ జలోసా. ఈంజ ఎత్తి జోయ్యి జర్గు కెరెదె.

25 బావుడ్లు, అమ్చి రిసా తుమ్ ప్రార్దన కెర్తె తా.

26 ప్రబుచి ప్రేమచి రిసాచి అమ్చి ముద్దు ఒత్త సంపజల బావుడ్లు ఎత్తిజిన్క దెకయ్లి రితి తుమ్ జోవయింక సుద్ది తిలి ముద్దు తెన్ జోకర.

† 5:18 5:18 నెంజిలె, కిచ్చొ జలెకి తుమ్ దస్సి బుద్ది తంక మెన ఎత్తి అదికారుమ్ తిలొ దేముడుచి ఇస్టుమ్, క్రీస్తుచి అత్తి అమ్క జో దెకయ్లి రితి.

27 ఒత్త నంపజలస ఎత్కిజిన్ సూన్తి రితి ఈంజ ఉత్తమ్ తుమ్ సదు కెర మెన ప్రబుచి నావ్ తెన్ తుమ్క ఆవ్ సంగితసి.

28 ప్రబు జలో అమ్చొ యేసుచి దయ తుమ్చి తెన్ తవున్!

దెస్సలొనీయుల్క రెగిడ్లి దొన్నిచి ఉత్త్రుమ్ బారిక్ జలో పవులు దెస్సలొనీక పట్టుమ్చ సంగుమ్చక రెగిడ్లి దొన్నిచి ఉత్త్రుమ్

మొదొల్ కోడు

1 అమ్క అబ్బొ జలో దేముడుక చి ప్రబు జలో యేసుక్రీస్తుక నంపజా జోచి తెడి తిల దెస్సలొనీక పట్టుమ్చ సంగుమ్చక *సిల్వానస్ చి తిమోతి, పవులు రెగిడ్లి ఉత్త్రుమ్.

2 దేముడు అబ్బొనీచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

3 తుమ్చి నముకుమ్ అన్నె ఒగ్గర్ జా గెతయ్, చి తుమ్ ఎత్తిజిన్ ఎక్కిలోక ఎక్కిలో రోజుక అన్నె ఒగ్గర్ ప్రేమ కెర్తసుచి రిసా, దేముడుక అమ్చి సర్దనే సంగిలె నెంజె. తుమ్చి రిసా రోజుక అమ్చి సర్ద జోవయింక సంగితసుమ్.

4 అన్నె ప్రబుక విరోదుమ్ జలస, తుమ్క ఒగ్గర్ అల్లర్ కెర్తె తిలె కి, తుమ్ కిచ్చొ కిచ్చొ ఒగ్గర్ బాదల్ సేడ్తె తిలె కి, తుమ్ నిదానుమ్ తా ఓర్పువ జతసు, చి తుమ్చి నముకుమ్ పిట్టె నాయ్. జాకయ్ దేముడుచ కేన్ సంగుమ్లుతె గెలె జవున్, కబుర్ తెద్రయ్లె జవున్, తుమ్చి రిసాయి దయిరిమ్ తెన్ అమ్చి సర్ద అన్నె నంపజలసక అమ్ సంగితసుమ్.

5 జోచి రాజిమ్తె తుమ్ బెదిల్ రిసా తుమ్ †అల్లర్ సేడుక మెన దేముడు తుమ్క విలువ మెలి రితి దెక అస్సె. ‘దస్సి తీర్పు కెర అస్సె’ మెన, అన్నె జా తీర్పుక ‘సత్తిమ్చి’ మెన కిచ్చొతె రుజ్జు జతయ్ మెలె, తుమ్ ఈంజేవ్ బాదల్ ఓర్పువ జా నిదానుమ్ తిలిన్తెయ్ రుజ్జు జతయ్; ‡జోచి రాజిమ్తె తుమ్ బెదిల్ రిసా తుమ్ జేవ్ అల్లర్ సేడ్తసు.

6 దేముడు సత్తిమ్ తీర్పు కెర్తొసా జలిన్చి రుజ్జు కిచ్చొతె డిస్తయ్ మెలె, తుమ్క అల్లర్ కెర్తసక జో సిచ్చు కెరెదె.

7 చి జోచి కామ్క బాదల్ సేడ అమ్ ఎత్తిజిన్క జో సుక్కుమ్ దెతి పొదిక తూమ్ కి దస బాదల్ సేడ్తసక కి జా సుక్కుమ్ దెయెదె. కెయ్క మెలె, ప్రబు జలో యేసు క్రిజోచి అదికారుమ్ దెకయ్త పరలోకుమ్చ దూతల్ తెన్,

* **1:1 1:1** నెంజెలె ‘సీలయ్’ బారికుల్ 15:22, 16:19, 17:4, వడ్డొ కొందిల్క రెగిడ్లి 2 నంబర్ ఉత్త్రుమ్ 1:19, చి పేతురు రెగిడ్లి 1 నంబర్ ఉత్త్రుమ్ 5:12 దెక. † **1:5 1:5** బారికుల్ 5:41క దెకిలె, జోవయింక నావ్ జోవయింక కామ్చి రిసా, అమ్ అల్లర్ బాదల్ సేడుక జో సెలవ్ దిలె కిచ్చొ రుజ్జు దెకయ్తయ్ మెలె, జోవయింక బెదుక జో అమ్క విలువ మెలి రితి దెకిలిసి. ‡ **1:5 1:5** నెంజెలె, ‘అన్నె తుమ్ పరలోకుమ్తె గెతెచి రిసా మదెనె ఈంజేవ్ బాదల్ వాల్ తుమ్క అత్తక డిట్టుమ్ పూర్తి కెర తెయార్ కెర్తయ్.’ యాకోబు 1:2-4 దెక. § **1:7 1:7** నెంజెలె ‘జోవయింక ఒగ్గర్ సెక్తిచ పరలోకుమ్చ దూతల్ తెన్ ఉత్త్ర జా....’

* **1:9 1:9** నెంజెలె, ‘మొర్పుతె’. మెలె, అత్తమొర్పుతె, ఆకరచి మొర్పుతె. డీసయ్లిసి 2:11, 20:6, 20:14, 21:8.

సుట్టునంత ఆగి లగితి రితి జా జో ఉత్త్ర జా జోవయింక గవురుమ్ రుజ్జు జతి పొదిక ఈంజ ఎత్తి జర్గు జయెదె.

8 చి దేముడుక నేన్లసక, ప్రబు జలో అమ్చొ యేసుచి సుబుమ్ కబుర్ రితి నే కెర్తసక సిచ్చు కెరెదె.

9 జోవయింక సిచ్చు కిచ్చొ మెలె, *నాసెనుమ్తె గెచ్చు నాసెనుమ్తెయి కెయ్క తెయ్క తాఁ గెచ్చుల, చి ప్రబుతె జేవ్ గెచ్చుక నెతిర్తి, జోవయింక ఒగ్గర్ సెక్తిచి రిసాచి జోచి ఒగ్గర్ ఉజిడ్చి రిసా జేవ్ జోవయింక దెకుక నెతిర్తి.

10 జా కెయ్క జర్గు జయెదె మెలె, జో అన్నె ఉత్త్ర జెతికయ్ దీసిక. జో జెతిసి కిచ్చొచి రిసా మెలె, జోక నంపజా జోచి సుద్ది జా జోచయ్ జలస జో తెన్ బెద గవురుమ్ జతిన్తె గవురుమ్ జతి రిసా, చి జేవ్ జోక దెక ఆచారిమ్ చి సర్ద జతి రిసా. జోచి రిసా అమ్ తుమ్క సంగిలి సాచి తుమ్ నంపజలదు, చి తూమ్ కి ఒత్త బెదితె.

దెస్సలొనీక పవులింసి ప్రార్దన కెర్తిసి

11 జెంక తుమ్చి రిసా రోజుక ప్రార్దన కెర్తసుమ్. కిచ్చొ మెన మెలె, తుమ్ జోచయ్ జా, జోచి పరలోకుమ్చి రాజిమ్తె తుమ్ బెదుక మెన దేముడు తుమ్క బుకార అస్సె, చి జో తుమ్క బుకార్లి కెర్తెన్క తుమ్ విలువ జతి రితి కెర్పు. తుమ్ ఉచర్లి కేన్ చెంగిల్ కామ్ కి, తుమ్చి నముకుమ్చి రిసాచి ఎత్తి కామ్ కి జోవయింక ఆత్మసెక్తిక జెయ్యిమ్ కెర్పు.

12 తుమ్ ఇండితిన్తె అమ్చొ ప్రబు జలో యేసుచి నావ్ గవురుమ్ జయెదె, జోవయింక తెడి తూమ్ కి గవురుమ్ జస్తె. దేముడుచి ప్రబు జలో యేసుక్రీస్తుచి దయయ్ ఈంజ ఎత్తి జర్గు జతి రిసా ప్రార్దన కెర్తసుమ్.

2

1 బావుడ్లు, అమ్చొ ప్రబు జలో యేసుక్రీస్తు అన్నె ఉత్త్ర జెతిన్చి రిసా, జోక నంపజలస ఎత్తిజిన్ జోతె గెచ్చు జో తెన్ ఎక్కితె బెదితిన్చి రిసా, తుమ్క ఆవ్ కిచ్చొ మెన అప్పె బతిమాల్పా జా సంగితసి మెలె,

2 జా దీసి నే జెతె అగ్గె, అబద్దుమ్క, “దీసి పాచ అయ్లి గె. సిచ్చు దెకిలయ్, ప్రబుచి కోడు, ఈంజ” మెన కో జవున్ కిచ్చొ జవున్ ఆత్మచి సెక్తిక సంగిలె, నెంజెలె “దీసి పాచ అయ్లి గె” మెన కేన్ జవున్ మాన్సు సొంత సెక్తిక ఉచర సంగిలె, నెంజెలె “దీసి పాచ అయ్లి మెన అమ్చి తెన్ ఉత్త్రుమ్తె అయ్లి” మెన కో జవున్ సంగిలె, తుమ్చి మెన్సు తుమ్ బమ్మ జా నాయ్, నంప కెర నాయ్.

3 కోయి దస కొడొ సంగిలె, తుమ్ మోసిమ్ సేడ నాయ్. కిచ్చొక మెలె, ప్రబు అన్నె జెతికయ్ జా దీసి నే జతె అగ్గె, తొలితొ, ఒండి లోకుమ్చ ఎతివాట్జిన్ మాన్సుల్ దేముడుక విరోదుమ్ జతి వెల్లి బాద జర్గు జంక అస్సె. దేముడు సంగిలిన ఎత్కిక విరోదుమ్ జలో *పూర్తి వెల్లి మూర్కుమ్ బుద్ది జలోసా ఈంజ లోకుమ్తె బార్ జంక అస్సె, జో పూర్తి నాసెనుమ్ జా గెతోసా.

4 జో వెల్లి మూర్కుడు కిసి జయెదె మెలె, కేన్ దేముడు మెలోసాక కి కేన్ జొకర్తి వస్తవక కి జో విరోదుమ్ కెర, “ఆవ్ వెల్లి” మెనన, దేముడుచి గుడితెచి ముక్కిమ్ జలి టాన్తె వెస కెర, “ఆవ్ దేముడు” మెనన సంగెదె.

5 తుమ్చి తెన్ ఆవ్ తిలి పొది కి తుమ్క ఈంజ ఎత్కి సంగిలయ్. ఏద కెర్న నాయ్ గె?

6 జలె, దేముడు సెలవ్ దిలి కాలుమ్కయ్ జో మూర్కుడు బార్ జంక జయెదె. గని అప్పె నే బార్ జంక కిచ్చొ అడ్డు తయెదె గే తుమ్ జాన్సు.

7 మదెనె జో మూర్కుడుచి బుద్ది ఈంజ లోకుమ్తె జేవ్చి పాపుమ్ లుంక, చోరు తిరీమ్ తిరీమ్ కెర్తయ్, గని జోక అడ్డు కెర్తొసా అడ్డు కెరుక ములిలెకయ్, జా బాద ఎదార్దుమ్ జా పూర్తి అల్లర్ కెరెదె.

8 తెదొడకయ్ జో మూర్కుడు బార్ జా జోవయింకి కామ్ ఎదార్దుమ్ కెరెదె. గని ప్రబు జలో యేసు అన్నె ఉత్త జా డిస్సిన్కయ్ జొయ్యి జో మూర్కుడుచి సెక్తి గెచ్చవయ్ గెలెదె. చి రితి జోచి చోండి తెంతొ జెతికయ్ † వాదుకయ్ జోవయింక మారయ్ గెలెదె.

9 జో మూర్కుడు జలోసా కేనె తెంతొ జా తయెదె మెలె, సయ్తాన్చి సెక్తి తెంతొ బార్ జా తయెదె. అయ్లె, జో సయ్తాన్చి ఒగ్గర్ సెక్తి తెన్ అబద్దుమ్చ ‡ మాయల్ జత వెల్లి వెల్లి కమె గట్టిజ కెర కెర,

10 నాసెనుమ్తె గెచ్చుక తిలసక మోసిమ్ కెరెదె. కిచ్చొక మెలె, సత్తిమ్ తిలిసి జేవ్ ప్రేమ కెరుక నెసిలచి రిసా రచ్చన జతి నాయ్.

11 సత్తిమ్ జేవ్ నెసిలి రిసా, ‘అబద్దుమ్, జలె, నంప కెర్తు’ మెన, ‘జేవ్ ఆత్మ గుడ్డి జతి రితి జా మోసిమ్తె దెర్ను సేడ్డు’ మెన దేముడు సార్పు కెర తయెదె.

12 దస్సి, కో సత్తిమ్ నంప కెర్తి నాయ్, గని పాపుమ్క ఆస జవుల గే, సిచ్చతె గెచ్చుల.

ప్రబుక నంపజలస రచ్చనతె గెతిన్చి

* 2:3 2:3 డీసయ్లిన్చి పుస్తకుమ్తె దసా మాన్సుచి రిసాచ కొడొతె ‘జంతు’ మెన టాలి తెన్ సంగితయ్. డీసయ్లిసి 12:9, చి 13 అద్యయిమ్ తెంతొ 17 అద్యయిమ్ ఎద, చి 19, 20 అద్యయల్ దెక. † 2:8 2:8 నెంజిలె ‘కోడుక’. డీసయ్లిన్ 19:21తె సయ్తాన్చి సేవ కెర్తె తిలసచ సయ్స్యముల్క ప్రబు జోవయింకి చోండితెచి కడ్డుమ్క మారెదె. జా కండా జోవయింకి కోడుకయ్ టాలి జతయ్. ఇన్నె కోడుచి అర్దుమ్ కి ఉచరుక జయెదె. ‡ 2:9 2:9 డీసయ్లిసి 12:9, చి 13 అద్యయిమ్ దెక. 13:13తె మాయచ వెల్లి వెల్లి కమెచి కోడు అస్సె. § 2:13 2:13 నెంజిలె, ప్రబుక నంపజతన మొత్తుమ్తె తూమ్ నొవొ

జతి రితి తొలితొ నంపజంక మెనయ్ జో నిసాన్ల మెన ఈంజ ఎత్కి తొలితొ రెగ్గె నగుమ్ పుస్తకల్తె అస్సె. * 2:13 2:13 మెలె, పాపుమ్తె తెంతొ, జేవ్ కెర్తె పాపల్చి సిచ్చ తెంతొ, చి సయ్తాన్చి రాజిమ్ తెంతొ రచ్చించుప జంక.

13 ప్రబు ప్రేమ కెర్తె ఓ బావుడ్లు, తుమ్చి రిసా దేముడుక అమ్చి సర్త నే సంగిలె నెంజె. రోజుక తుమ్చి రిసా జోవయింక అమ్చి సర్త సంగితసుమ్. కిచ్చొక మెలె, కీతుమ్ *రచ్చించుప జంక మెన మొదొల్ తెంతొ జో నిసాన్లన్. కిసి రచ్చించుప జంక మెలె, తుమ్ జోవయించయ్ జతి రితి జోవయింకి సుద్ది తిలి ఆత్మ తుమ్క సుద్ది కెర్తి వాటు, చి సత్తిమ్ తుమ్ నంప కెర్తి వాటు.

14 ప్రబు జలో అమ్చొ యేసుచి గవురుమ్తె తుమ్ బెదితి రిసా, తుమ్ ఇసి సుద్ది జంక సత్తిమ్ నంప కెరుక మెన దేముడు తుమ్క బుకార్లన్. కేన్ వాటు బుకార్లన్ మెలె, అమ్ సుబుమ్ కబుర్ సూనయ్లి వాటు.

15 జాకయ్, బావుడ్లు, తుమ్ డిట్టుమ్ టీచ, చి అమ్చి అత్తి దిలిసి ఎత్కి, మెలె, అమ్ ఒత్త తిలి పొది సికడ్డిసి కి ఇన్నె తెంతొ ఉత్తుమ్ రెగ్గె సికడ్డిసి కి, తుమ్ డిట్టుమ్ దెరన, జయి రితి ఇండ.

దెస్సలాసికచ రిసా పవులింసి ప్రార్దన

16 ప్రబు జలో అమ్చొ యేసుక్రీస్తు, అన్నె అమ్క అబ్బొ జలో దేముడు జోవయింకి దయక అమ్క ప్రేమ తా, కెయ్క తెయ్క తిలి దయిరిమ్ దెతి పరలోకుమ్తె గెచ్చ జతి దయిరిమ్ కి అమ్ ఎత్కిజిన్క దా అస్సి.

17 జలె, ‘తుమ్చి పెట్టి తుమ్క జోవయింకి ఆత్మకచి దయిరిమ్ కెర్తె తా తుమ్ కెయ్క తెయ్క సత్తిమ్ ఇండితి రితి సత్తిమ్ లట్టబ్బి రితి తుమ్క డిట్టుమ్ నిదానుమ్ కెర్తె తత్తు’ మెన అమ్ ప్రార్దన కెర్తెనుమ్.

3

అమ్చి రిసా కి ప్రార్దన కెర

1 పడ్డొ అన్నె కిచ్చొ మెలె, బావుడ్లు. ప్రబుచి సుబుమ్ కబుర్ తుమ్తె సూనయ్తికయ్ జా కిసి తుమ్తె పలితుమ్ దెర్లి గే, అమ్ ఇన్నె సుబుమ్ కబుర్ సూనయ్తిసి కి అడ్డు నెంతె జిన పలితుమ్ దెర్తె తవున్ మెన అమ్చి రిసా తూమ్ ప్రార్దన కెర.

2 బుద్ది నెంజిల కుస్సిరుమ్చ మాన్సుల్ కెర్తె అల్లర్ తెంతొ అమ్ రచ్చించుప జతి రితి తుమ్ ప్రార్దన కెర. సగుమ్జిన్ ప్రబుక నంప కెర్తి నాయ్, గెద.

3 ప్రబు, నముకుమ్ జలోసా, చి తుమ్ ఆత్మక డిట్టుమ్ తతి రితి జో సెక్తి దెయెదె, చి సయ్తాన్ కెరయ్త అల్లర్ తుమ్క నే లయితి రితి జొయ్యి అడ్డు దెయెదె.

4 తుమ్చి రిసా 'అమ్ సంగిల్ రితి నిదానుమ్ కెర్తతి, నిదానుమ్ కెర్తె తవుల' మెన ప్రబుచి తెడి దయిరిమ్ తెన్ అస్సుమ్.

5 జోవయించి ఇస్టుమ్ రితి తుమ్ కెర్తి రితి, దేముడుచి ప్రేమ క్రిస్తు పుత్తున్చి నిదానుమ్, తుమ్చి పెట్టి ప్రబు దెవుసు.

కామ్ కెర కెర జితిన్చి రిసా

6 బావుడ్లు, ప్రబు జలో అమ్చో యేసుక్రిస్తుచి నావ్ తెన్ తుమ్క కిచ్చో ఆడ్ర దెతసుమ్ మెలె, ప్రబుక నంపజలో కేన్ బావో కిచ్చో కామ్ నే కెర్తె బద్దుకుమ్ జా జితయ్ గే, 'నిదానుమ్ తెన్ కామ్ కెర కెర జయ' మెన అమ్ సంగిలిసి పిట్టవన్తయ్. దసాచోక తుమ్ దూరి తా.

7 అమ్ కెర్తి రితి తుమ్ దెక సికిలె చెంగిలి మెన తుమ్ సొంత జాన్సు. తుమ్చి తెన్ అమ్ తిలి పొది బద్దుకుమ్ జము నాయ్.

8 చి డబ్బుల్ నే దెతె కచి అన్నిమ్ కమొ నాయ్, గని కక్క బోద నే కెర్తి రిసా, సైమ సేడ సేడ రాతి మెద్దెనె *సొంత కామ్ కెర కెరయ్ జితె తిలమ్.

9 జితిసి గట్ట తుమ్తె ఆరి నజుక జతి, చి అమ్చి కామ్చి రిసా, గని 'అమ్క దెక జేవ్ కి బుద్ది సిక్కుత్' మెన, దస్సి సొంత కామ్ కెర కెరయ్ జిలమ్.

10 కిచ్చోక మెలె, "కో కామ్ కెరె నాయ్ గే, కవున్ కి నాయ్" మెన ఆడ్ర దిలమ్.

11 తుమ్క కిచ్చోక సంగితసుమ్ మెలె, తుమ్తె సగుమ్జిన్ బద్దుకుమ్ జా కామ్ నే కెర్తె, ఆరి బుల బుల వేర మాన్సుల్చి కామ్ పిట్టయ్తతి మెన సూన అస్సుమ్.

12 దస మాన్సుల్చి రిసా ప్రబు జలో యేసుక్రిస్తుచి నావ్ తెన్ కిచ్చో ఆడ్ర దెతసుమ్, కిచ్చో బతిమాల్పా జా సంగితసుమ్ మెలె, "బమ్మ నెంతె పూచి తెన్ తుమ్ సొంత కామ్ కెరనయి జయ" మెంతసుమ్.

13 బావుడ్లు, చెంగిల్ కామ్క జెతిసి ఎత్తి కెరుక తుమ్ బద్దుకుమ్ జా నాయ్.

14 ఈంజ ఉత్తుమ్తె అమ్ సంగిల్ రితి కో కెరె నాయ్ గే, 'జోవయింక బుద్ది జెతికయ్ రితి గడియ లాజ్ జవున్' మెన, జో కొన్సో గే తుమ్ దెక చి జోవయింక జా మదెనె తుమ్తె బెదవన నాయ్.

15 జోవయింక విరోదుమ్ దెక నాయ్, గని జోవయింక 'క్రిస్తుచి తెడి బావో జయెదె' మెన, జోవయింక బుద్ది జెతి ఎదక జోవయించి పూచి జో కెర్తి రితి జోవయింక సికడ.

ఆకర్చి ప్రార్థన

16 సేంతుమ్ దెతో ప్రబు సొంత తుమ్చి పెట్టి జోవయించి సేంతుమ్ పూర్తి దెతె తవున్. తుమ్ ఎత్తిజిన్క ప్రబు తోడు తవున్.

17 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డసి. అంచి ఎత్తి ఉత్తుమ్క 'అంచి' మెన ఆవ్ ఇసి రెగిడ్డిసి గుర్తు జవున్. అంచి రెగ్డుక ఇసి తయెదె.

18 అమ్చో ప్రబు జలో యేసుక్రిస్తుచి దయ తుమ్క ఎత్తిజిన్ తెన్ తవున్!

* 3:8 3:8 పవులు టంబుగుడ్డల్ తున తెయార్ కెరెదె.

తిమోతిక రెగిడ్లి మొదోల్చి ఉత్త్రమ్ బారిక్ జలో పవులు తిమోతిక రెగిడ్లి మొదోల్చి ఉత్త్రమ్

మొదోల్ కోడు

1-2 యేసుక్రీస్తుచి రిసా అంచితె సిక నంపజా నిదానుమ్ జా అంచో పుత్తు జలో రితో ప్రేమ తిలో తిమోతిక జో *క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జోచో బారికి జలో ఆవ్ పవులు రెగిడ్లి ఉత్త్రమ్.

†సుబుమ్ కబుర్ సూనయ్తి రిసా ఆవ్ బులుక మెన అమ్చో రచ్చించుప కెర్తొసా జలో ‡దేముడు, పరలోకుమ్తె అమ్ బెదితి దయిర్మ్ దిలో క్రీస్తు జలో యేసు ఆడ్ర దా అస్తి.

§అబ్బోస్ జలో దేముడుచి అమ్చో ప్రబు జలో క్రీస్తుచి దయ కన్యారుమ్ సేంతుమ్ తుమ్చి ఉప్పిరి తవున్!

సగుమ్జిన్ వేర కోడు సికడ్లిన్చి రిసా

3 ఆవ్ మాసిదోనియ ప్రదేసిమి గెతె తిలి పొది తుక ఆవ్ బలవంతుమ్ కెర్తిసి కిచ్చొగె జాన్సి. జా కోడు తుయి నిదానుమ్ కెరు. కిచ్చొ మెలె, “ఒత్తచ అమ్చ నంపజలసతెచ జేవ్ సగుమ్జిన్ వేర కోడు నే సికయ్తి రితి తుయి ఎపెసు పట్టుమ్తె తా జోవయింక ఆడ్ర దా కెరు” మెలయ్. ఆవ్ అన్నె దస్సి సంగితసి.

4 మాన్సుల్ కవి ఉచర్ల రితయ్ మత్తెలివో, ఉగల్చి ఉప్పిరి ఉగల్చ, పూర్గుల్చ సెకుమ్లుతె జెర్తిలసచి రిసాచ మత్తెలివోచ, కొడొచి ఉప్పిరి కొడొచ తగులు ఉచర్తె తత్తతి. జా కామ్క నెంజె. దసచచి రిసా ఉచర్తె తిలె, ఆరి సత్తిమ్ నెంజిలిన్ కి ఒత్త బెద తయెదె, చి ఆరి లట్టబై తవుల, చి ముక్కిమ్క దేముడు దిలి కామ్క అడ్డు కెరెదె. జోవయించి కామ్ జర్గు కెర్తిన్క కిచ్చొ ముక్కిమ్ మెలె, యేసుక్రీస్తుచి ఉప్పిర్చి నముకుమీ.

5 ఈంజ ఆడ్ర అమ్ కిచ్చొక దెతసుమ్ మెలె, జేవ్ మాన్సుల్ కెర్తి రితి తగుల్ కెరయ్తి రితి నాయ్, గని తుమ్చి ఉప్పిర్చి ప్రేమయ్చి రిసా. ఈంజ అమ్చి ప్రేమ కిచ్చొ మాయచి నెంజె. అంచి పెట్టిచి సత్తిమ్కయ్, ‘సత్తిమ్ కెర్తసుమ్’ మెన జాన్తి దయిర్మ్ జయి, చి కిచ్చొ మాయ నెంజిలి అమ్చి నముకుమ్కయ్చి ప్రేమయ్ ఈంజ.

* 1:1-2 1:1-2 ‘క్రీస్తు’ మెలె, ‘దొర్పు జలో రచ్చించుప కెర్తొసాక తెర్తయిందె చి అంచయ్ జల మాన్సుల్క జో ఏలుప కెరెదె’ మెన ఎత్తి అదికారుమ్ తిలో దేముడు పూర్గుమ్ తెంతొ సంగ తిలో. జలె, యూదుల్ తెన్ ‘క్రీస్తు’ మెలె, జో రచ్చించుప కెర్తొసాచి అర్దుమ్ తయెదె. † 1:1-2 1:1-2 ‘సుబుమ్ కబుర్’ మెలె, యేసుక్రీస్తు ఈంజ లోకుమ్తె జా అమ్చి పాపుమ్ వయ అమ్క సయ్తాన్చి రాజిమ్ తెంతొ విడ్డల్ కెర పరలోకుమ్చి రాజిమ్తె బెదయ్లిన్చి రిసాచి కబుర్. ‡ 1:1-2 1:1-2 నెంజెలె, ‘దేముడు, పరలోకుమ్తె అమ్ బెదితి వాబు జలో క్రీస్తుయెను; యోహాను 14:4, 6; ఆడ్ర దా అస్తి. పరలోకుమ్తె అమ్ బెదితి వాబు క్రీస్తుచి రిసా జోచి ఉప్పిరి అమ్చి దయిర్మ్ అన్నె, జోయ్యి అమ్క దొర్పు జలి దయిర్మ్.’ § 1:1-2 1:1-2 నెంజెలె ‘అమ్క అబ్బొ జలో...’

6 సగుమ్జిన్ మాన్సుల్, వేర బుద్దుల్తె బెదిత కామ్క నెంజిల కొడొ లట్టబైన్తె అలవాట్ జా దసితె గెచ్చ మాన్సుప జా అస్తి.

7 ‘దేముడుచ ఆగ్గుల్ సికడ్లస అమ్’ మెనంతతి, గని జేవ్ సొంత సంగితిన్చి అర్దుమ్ నేన్తి, చి ‘ఈంజేవ్ జేవ్ కొడొచ ఆగ్గుల్చ అర్దుల్ ఇసి దస్సి’ మెన జేవ్ సంగిలే కి, జేవ్ అర్దుల్ జేవ్ కి నేన్తి.

8 దేముడు మోసె తెన్ దిలి ఆగ్గుల్చి అర్దుమ్ సరిగా నాయిమ్ తెన్ సికడ్లె తిలె చెంగిలి మెన అమ్ జానుమ్.

9 గని తుమ్ ముక్కిమ్క కిచ్చొ ఉచర మెలె, సత్తిమ్ ఇండిత మాన్సుల్చి రిసా నాయ్, గని దేముడు పూర్గుమ్ తెంతొ ఆగ్గుల్ దా అస్సి మెలె, ఆగ్గుల్ తెన్ బెదితి బుద్ది నెంజిల చి సొంత ఇస్టుమ్ అయ్లి రితి ఇండితసచి రిసా, దేముడుక విరోదుమ్ జలి రితి ఇండితస చి పాపుమ్ సుదల్చి రిసా, దేముడుచి సుద్ది బుద్ది నెంజిలస చి జోవయింక ఆన్తసచి రిసా ఆగ్గుల్ దా అస్సి. అన్నె కచి రిసా మెలె, అబ్బుదింసిక జవున్, అయ్యిఅబ్బొ అత్య కెర్తసచి రిసా, కేన్ మాన్సుక జవున్ అత్య కెర్తసచి రిసా,

10 లంజెబుద్ది ఇండితసచి రిసా, మున్సుబోదల్ తెన్ మున్సుబోదల్ లంజెకమె కెర్తసచి రిసా, మాన్సుల్క దెర లాబుమ్ కెరంతసచి రిసా కి, అబద్దుమ్బుద్ది ఇండితస చి అబద్దుమ్ సాచి సంగితసచి రిసా కి, మెనయ్ దేముడు ఆగ్గుల్ దా అస్సి. అన్నె, జో దేముడు సికడ్లిన్తె కిచ్చొ బుద్ది జలెకి బెదె నాయ్ గే, జా ఎత్తిచి రిసా జో ఆగ్గుల్ దా అస్సి.

11 దేముడు సికడ్లిసి కేనె ముక్కిమ్క డీస్తయ్ మెలె, అంక ‘సూనవు’ మెన పరలోకుమ్చి సంతోసుమ్ తిలో దేముడుచి పరలోకుమ్చి ఉజిడి పరలోకుమ్చి గవురుమ్చి రిసాచి సుబుమ్ కబుర్ తెయి డీస్తయ్.

దేముడు పవులుక దయ కెర్తన్

12 ఈంజ సుబుమ్ కబుర్ కామ్తె అంక బుకార్లొ అమ్చో ప్రబు జలో యేసుక్రీస్తుక అంచి సర్ల ఆవ్ సంగితసి. అంక ‘నిదానుమ్ కెరెదె’ మెన అంక నంప కెర్తి రితి, ఆవ్ జోవయించి సేవ కెరుక ఆవ్ విలువ తిలి రితి జో దెక, అంక నిసాన ఈంజ సేవక దొర్పు జలి సెక్తి ఎత్తి జో దా అస్సి.

13 అగ్గె, జలె, జోవయింక ‘దేముడు నెంజె’ మెన ఆవ్ దూసుప కెర్తె తిలయ్, జోవయింక విరోదుమ్ జా జోవయించ మాన్సుల్క అల్లర్ కెర్తె తిలయ్, జోవయింక నిస్కారుమ్ దెకితె తిలయ్. గని ఆవ్ నేన కెర అన్యాయమ్ జా దస్సి కెర్తయ్, చి జోవయించి దయక జో అంక చెమించుప కెర్తన్,

14 అన్నె, అమ్మచో దేముడు ప్రబుచి ఎదివాల్ దయక యేసుక్రీస్తుక నంపజతనకయ్ దొర్కు జతి నముకుమ్ ప్రేమయ్ అంచి పెట్టి జెర్మయ్లన్.

15 కేన్ కోడుచి సత్తిమ్ కచితుమ్ జో దస్సి కెర్లిసి దెకయ్తయ్ మెలె, 'పాపుమ్ సుదల్కయ్ రచ్చించుప కెర్లి రిసాయి యేసుక్రీస్తు ఈంజ లోకుమ్తె బార్ జలన్' మెలిసి. ఆవ్ కి పూర్తి పాపుమ్చో, ఎత్కిజిన్చి కంట ఆవ్ ఒగ్గర్ పాపుమ్చో.

16 గని జో దేముడు కిచ్చొచి రిసా అంచి ఉప్పిరి జోవయించి దయ తిలన్ మెలె, ఆవ్ పూర్తి పాపుమ్చో కెర్లి అల్లర్ జో ఓర్పువ జా చెమించుప కెర్లిన్ తెన్ జోవయించి ప్రేమ పూర్తి రుజ్జు జంకయ్. దస్సి, జో నిసాన్లసతె కో అంక దెకిలె, ఆమ్ కి రచ్చించుప జా పరలోకుమ్తె గెచ్చుమ్దే మెన దయిరిమ్ జా నంపజవుల.

17 ఎత్కి ఉగలు ఏలుప కెర్లి రానొ జలో నే మొర్లి, నే డిస్టా ఎక్కి దేముడుక ఉగల్చి ఉప్పిరి ఉగల్క పరలోకుమ్చి గవురుమ్, మరియాద కలుగు జవున్! ఆమేన్.

తిమోతిక పవులు దిలిసి ఆడ్ర

18 తిమోతి, అంచో వుత్తున్, కిచ్చొ ఆడ్ర తుక దెతసి మెలె, కిచ్చొ కామ్ తుచి అత్తి సార్ప కెర దెతసి మెలె, తుక 'అంచి సుబుమ్ కబుర్ కామ్చి రిసా బుల్లు' మెన జా దీసి జోవయించ కబుర్లు సంగితసచి అత్తి దేముడు సంగిలిసి తుయి జగ్గు కెరు. పాపుమ్చి ఉప్పిర్చి ఆత్మయుద్దుమ్తె జా దీన్చ జో సంగిల కొడొ తుక ఆత్మాయ్దల్ జతు; జోవయించి సుబుమ్ కబుర్ వేర బుద్దుల్ చి ఉప్పిరి జిన్తి రితి

19 చి సత్తిమ్క నిదానుమ్ తా, పాపుమ్ నే ఇండితె, 'చెంగిల్' మెన తుయి జాన్లిసి పూర్తి మెన్ను నిదానుమ్ కెరయ్ దయిరిమ్ తెన్ ప్రబుచి కామ్ కెరు. సగుమ్జిన్, జలె, 'చెంగిల్' మెన జేవ్ జాన్లిసి నెన ముల కెర, జేవ్ అగ్గె ఒప్పన తిలి నముకుమ్ జెవ్వి పాడ్ కెరన గెల అస్తి.

20 జోవయింతె కొన్న మెలె, హుమెనెయును చి అలెక్కండ్రు. దస్సి కెర, దేముడుచి మరియాద కడ అస్తి. 'దస్సి పాపుమ్ ముల సిక్కుతు' మెనయ్, జేవ్ సిచ్చు జతి రితి జోవయింక క్రీస్తుచి నావ్ తెన్ సయ్తాన్చి అత్తి ఆవ్ సార్ప కెర దా అస్సి.

2

దాక్వెల్లో చి రిసా సంగుమ్చ ప్రార్దన కెర్లిన్చి రిసాచి కోడు

1 తొలితొ తుక ఆవ్ కిచ్చొ మెంతసి మెలె, తుమ్ ప్రార్దన కెర్లిన్చి రిసా కిచ్చొ ఏక్ కోడు ఆవ్ బతిమాల్ప జా సంగితసి మెలె, దాకువెల్లో ఎత్కిజిన్చి రిసా, జోవయింక కామ్క జెతిసి దొర్కు జతి రితి తుమ్ ప్రార్దనల్ కెర. జోవయింక ప్రబు

తోడు తతి రితి ప్రార్దనల్ కెర, చి ప్రబు కెర్లి దయ కమొచి రిసా కి జోవయింక తుమ్చి సర్ద సంగ.

2 అన్నె కిచ్చొ మెలె, దేసిమ్క ఏలుప కెర్లి అదికారుల్ ఎత్కిజిన్చి రిసా అమ్క చెంగిల్ దెకుత్ మెనయ్ తుమ్ ప్రార్దన కెర. అమ్ ఎత్కిజిన్ అల్లర్ నెంతె సేంతుమ్ తెన్ జింక జయెదె, అడ్డు నెంతె ప్రబుక బక్తి కెరుక జయెదె, చి మరియాద తెన్ జిమ్దె.

ఎత్కిజిన్ నంపజా రచ్చించుప జతు మెన ప్రబుచి ఉద్దెసుమ్

3 దస్సి ప్రార్దన కెర్లి చెంగిలి, అన్నె 'చెంగిలి' మెన అమ్చో రచ్చించుప కెర్లిసా జలో దేముడు ఒప్పన్తయ్.

4 కిచ్చొక మెలె, 'సత్తిమ్ జాన్తు! రచ్చించుప జతు' మెనయ్ మాన్సుల్ ఎత్కిజిన్చి రిసా జోవయించి ఉద్దెసుమ్.

5 కిచ్చొ సత్తిమ్ జాన్తు మెన ఇస్టుమ్ జతయ్ మెలె, జో ఎక్కిలోయి దేముడు జలిసి, చి జోవయింక చి మాన్సుల్క మదెనె జతొసా ఎక్కిలోయి తిలిసి, మాన్సు జా జెర్మన్ అయ్లో రచ్చించుప కెర్లిసా జలో క్రీస్తు జలో యేసుయి. అన్నెయ్ కిచ్చొ సత్తిమ్ జేవ్ జానుక జోవయించి ఇస్టుమ్ మెలె,

6 జో కెర్లి ముక్కిమ్ కామ్. మెలె, 'సయ్తాన్చి రాజిమ్ తెంతొ రచ్చించుప జతి వరుమ్ ఒండి లోకుమ్చ మాన్సుల్ సంగితి అవ్కానుమ్ తవున్' మెనయ్ జోవయించి సొంత జివ్ దా మొర గెచ్చు, అమ్క సయ్తాన్ తెంతొ జో నెతోవ గెలిసి. ఈంజయ్ కోడుచి సత్తిమ్ సరిగా సమయుమ్ దేముడు అమ్క రుజ్జు దెకయ్లో.

7 దస్సి, "తుయి అంచో బారికి జా అంచి అదికారుమ్ తెన్ యూదుల్ నెంజిల ఎత్కిజిన్క, మాన్సుల్తె గో, చి జోవయింక సుబుమ్ కబుర్ సూనవ బోదన కెరు" మెనయ్ ప్రబు అదికారుమ్ దా అంక తెద్రవ అస్సి. కో జవున్ వేర సంగిలె, తుమ్ నంప కెర నాయ్. ఆవ్ సత్తిమ్ సంగితసి.

ప్రబుక కిసి మరియాద దెంక గే

8 ప్రార్దనల్చి రిసా జలె, అంచి ఇస్టుమ్ కిచ్చొ మెలె, తుమ్ కేన్ బెద జెతి పొది మున్నుబోదలీ ప్రార్దన కెర్లు. దేముడుక పూర్తి సత్తిమ్ తా, పెట్టి కిచ్చొ కోవుమ్ నెంతె, కిచ్చొ జట్టి జతిసి నెంతె. సుద్ది తిలి అత్తో ఉక్కుల ప్రార్దన కెర్లు.

9 దస్సి, కి, తేర్బోదలు కక్కయ్ లాజ్ నే కెర్లి రితి, బుద్ది తెన్ బడాయ్ నెంతె, చెంగిల్ బందన తంక. సెండి తెన్ బడాయ్చి పొని. బజార్ గే వెండి గే ముత్యల్ గే తియసుక పొని. బడాయ్చ పాలల్ కి పొని. మరియాద తెన్ని తంక.

10 దేముడుక బక్తి కెర్లి కేన్ తేర్బోదక కి సూటి కెర్లిన్ కిచ్చొ ముక్కిమ్ మెలె, మాన్సుల్క కన్కారుమ్ దెకిత జేవ్చ కమొ.

11 తేర్బోదల్, జలె, ప్రార్దనక బెద జెతన, తుక్లె తా వెన కిచ్చొ గవురుమ్ నే ఉచరంతె, సూన సూన సికితె తత్తు.

12 ప్రార్థనక బెద జెతన కేన్ తేర్బోద కి బోదన కెరుక ఆవ్ ఒప్పి నాయ్, మున్నుబోదల్చి ఉప్పిరి అదికారుమ్ జేవ్ ఆననుక ఆవ్ ఒప్పి నాయ్, తుక్కె తంకయ్.

13 ఆదాము మెలో మున్నుబోదక దేముడు తొలితో జెర్మయలన్. పడ్డొకయ్ తేర్చి జలి హవ్వక జెర్మయలన్.

14 పడ్డొ, సయ్తాన్చి అత్తి తొలితో మోసిమ్ జలోసా ఆదాము నెంజె, హవ్వ మెలి జా తేర్బోద సయ్తాన్చి కోడు సూన పూర్తి మోసిమ్ జా గెచ్చ, దేముడుచి సెలవ్కోడు పిట్టవ తొలితో పొరపాట్ జలి.

15 ఒత్త తెంతొ, కస్టల్ నొప్పుల్ తెన్ తేర్బోదల్, బోదల్ పాయిక మెన దేముడు దా అస్సె. గని జేవ్ కస్టల్ జలెకి, కేన్ తేర్బోద ప్రబుక నంపజా నిదానుమ్ తా ప్రేమ తెన్ ఇండ, వేర బుద్దుల్ నెంతె, ప్రబుచి సుద్ది తెన్ సత్తిమ్ తెన్ ఇండెది, జయ్యి రచ్చించుప జయెదె.

3

కీసా మాన్సు సంగుమ్చొ పాస్టర్ జంక

1 'ప్రబుచి కోడు' మెన ఏక కిచ్చొ కచితుమ్ తుమ్ దెరసుక మెలె, సంగుమ్క పాస్టర్ జంక కో ఉచర్తయ్, చెంగిల్ కామ్ ఉచర్తయ్.

2 జలె, పాస్టర్ జతోసా కీసా మాన్సు తంక మెలె, జోవయింక 'సత్తిమ్చొ మాన్సు' మెన ఎత్తిజిన చినితి రితి జో తంక. జోవయింక ఎక్కిలి తేర్చి తంక, *కిచ్చొతె కి నిదానుమ్ బుద్ది ఇండితొసా జో తంక, బుద్ది సుదొ జో జంక, †జో ఇండితినక వేర మాన్సుల్చి మరియాద నే కడ్డొసా, వేర తెంతొ జెత మాన్సుల్క మరియాద కెర్తొసా జా, జోవయింక అన్నిమ్ గే టాన్ గే దెంక, చి తెలివి తెన్ బోదన కెర్తొసా జో తంక.

3 సూర్ పితోసా, బేగి కోపుమ్ జతోసా పొని, మెత్తన మాన్సు కావలె. గగ్గొల్ జతోసా పొని, డబ్బుల్ ఆస జతోసా పొని.

4 జోవయింక సొంత గేరుక జో బుద్ది తెన్ ఏలుప కెరుక, చి జో సంగిలి కోడు జేవ్ సూన్తి రితి, జోవయింక అన్నె మాన్సుల్క జేవ్ మరియాద దెకిత్ రితి, జోవయింక బోదల్క జో సికడుక.

5 కిచ్చొక మెలె, జోవయింక సొంత గేర్క బుద్ది తెన్ ఏలుప కెరుక జో నేన్లె, దేముడుచి సంగుమ్చ మాన్సుల్క కీసి దెకెది!

6 నొవర్క నంపజలొసా పాస్టర్ జంక బెదె నాయ్. దస్సి అదికారుమ్ నొవర్క నంపజలొసాక దిలె, గవురుమ్క పులదె. ‡సయ్తాన్ మొదొల్క దస్సి పులిలన్, చి జో సిచ్చ

జంక అస్సె. జలె, జో మాన్సు దస్సి పులిలె, జో కి జా సిచ్చ సేడుక జయెదె.

7 పాస్టర్ జతోసాక వేర మాన్సుల్ 'సత్తిమ్చొ మాన్సు' మెన చినితి రితి జో ఇండుక. నెంజెలె, †జోవయింక మరియాద గెలె, 'జిన్లయ్' మెన సయ్తాన్ సర్ల జయెదె.

సంగుమ్చి వెల్లెల మాన్సుల్ కీన్ తంక

8 సంగుమ్చి సేవ కెర్తె అన్నె వెల్లొ జతన కి దస్సి మరియాద ఆనన్తి సుద్ది ఇండితన తంక. కిచ్చొ మాయబుద్ది నెంజెలన జేవ్ తంక. మాయకొడొ లట్టబ్బన పొని. సూర్ నే పితోసా, డబ్బుల్ ఆస తిలన పొని.

9 జోవయింక పెట్టి కిచ్చొ మాయ నెంతె ప్రబు సికడ్డిసి, చి ప్రబుక నంప కెర్తె ఎత్తిజినక రచ్చన దొర్పు, జతయ్చి రిసాచి జో బార్ కెర్లి గుట్టు, పూర్తి నిదానుమ్ జేవ్ నంపజా తంక.

10 జా సేవక జోవయింక నే నిసాన్లె, జా కామ్ నే దెతె అగ్గె, జేవ్ నంపజా నిదానుమ్ తతిసి జేవ్ ఇండితిన సరిగా పరిచ్చ జా రుజ్జు డీసుక. జోవయింక 'నిజామి నంపజా సత్తిమ్ ఇండితతి' మెన రుజ్జు అయ్లె, జా సేవతె బెదవుక జయెదె.

11 దస్సి కి, దస్సి కామ్తె బెదిత తేర్బోదలు కి మరియాద ఆనన్తి సుద్ది ఇండితన తంక. సొండెలివొ పొని. కిచ్చొతె కి నిదానుమ్ కెరన బుద్ది ఇండుతు. కిచ్చొ రగుమ్ కామ్ జేవ్ కెర్లె కి, నముకుమ్ జల మాన్సుల్ జతు.

12 జలె, జా సేవ కెర్తె మున్నుబోదల్ అన్నె కీన్ మాన్సుల్ తంక మెలె, ఎక్కి తెర్చి తెన్ తంక, పడ్డొ జోవయింక బోదల్క జోవయింక గేర్క చెంగిల్ ఏలుప కెర్తెన జా తత్తు.

13 కిచ్చొక మెలె, కో దస్స వెల్లెల మాన్సుల్ రిత జా సంగుమ్చి సేవ నముకుమ్ తెన్ నిదానుమ్ కెరుల గే, మాన్సుల్ జోవయింక గవురుమ్ దెకుల, అన్నె యేసుక్రీస్తుచి సుబుమ్ కబుర్ కామ్ జేవ్ లాజ్ నెంతె కెరుక ఒగ్గర్ దయిరిమ్ జవుల, అన్నె, జా సుబుమ్ కబుర్క 'సత్తిమ్' మెన మాన్సుల్ దయిరిమ్ జవుల.

ప్రార్థనక బెద జెతి పొది కీసి తంక

14-15 తుమ్చితె బే బేగి గెచ్చుక అంక ఇస్టుమ్, గని 'ఏక్ వేల ఆవ్ ఆల్నిమ్ జా గెలె, ప్రబుచి కుటుంబుమ్ జల రిత సంగుమ్చ కీసి ఇండుక గే, సంగుమ్తె కీసి నిదానుమ్ తెన్ తంక గే మదెనె సిక తత్తు' మెనయ్ ఈంజేవ్ కొడొ ఆవ్ రెగిడ్డిసి. ప్రబుక నంపజలన మొత్తుమ్ జివ్ తిలొ ఎక్కిలొ దేముడుకయ్ కుటుంబుమ్ రితి గేర్ రితి జయెదె. జా కుటుంబుమ్క గేర్క దెకిలె, దేముడుచి బోదనచి సత్తిమ్క డిట్టుమ్ టీచడ్డి స్తంబుమ్ రితి జయెదె.

* 3:2 3:2 గ్రీకు బాన చి జా కోడుతె సూరు గట్ట పితిన్ ముద్దొ కెరంతినచి అర్దుమ్ కి, వేర కమె ఎత్తితె ముద్దొ కెరంతినచి అర్దుమ్ కి, తయెదె. † 3:2 3:2 నెంజెలె 'ప్రబుచి గవురుమ్ దెకయ్తి సుద్ది తెన్ తతోసా తంక'. ‡ 3:6 3:6 తొలితో సయ్తాన్ దూత జా తిలన్. § 3:7 3:7 అన్నెయ్ సంగుమ్చి మరియాద కి గెచ్చెదె, ఎత్తి అదికారుమ్ తిలొ దేముడుచి మరియాద కి గెలి రితి డీసెదె.

16 దేముడుచి గుట్టు కో అగ్గే నేనై కి, అప్పె జానయ్ జా గుట్టు కెద్ది ముక్కిమ్చి మెలె,
 “జో ఈంజ లోకుమ్తె మాన్సు జా జెర్మున్ అయ్లన్, చి జోవయింక ‘అస్సె’ మెన మాన్సుల్క రుజ్జు అయ్లి.
 జోవయించి ఆత్మసెక్తిక ‘నిజుమి దేముడుచొ పుత్తుసి జయెదె’ మెనయ్ రుజ్జు అయ్లి.
 పరలోకుమ్చ దూతల్ కి జోవయింక దెకితె తిల.
 ఒండి లోకుమ్చ దేసిమ్లతె జోవయించి రిసా సూనయ్ జతయ్.
 ఈంజ లోకుమ్తెచ మాన్సుల్ ఒగ్గర్జిన్ జోవయింక సంపజయి అస్తి.
 ఉక్కిల్ జా పరలోకుమ్తె వెగ గెచ్చు గవురుమ్ జయి అస్సె”
 మెన ఒప్పన అస్సుమ్ గెద. జా నిజుమ్.

4

తిమోతిక దెతి బోదన

1 దేముడుచి సుద్ది తిలి ఆత్మ కిచ్చొ ఏక్ కోడు కచితుమ్ సంగితయ్ మెలె, పడ్డొక సగుమ్జిన్ క్రీస్తుచి ఉప్పిర్చి నముకుమ్ పిట్టవన, మోసిమ్ కెర్త ఆత్మల్క చి బూతల్ సికడ్డన్క సూనుల.

2 కిసి దస్సి మోసిమ్ జవుల మెలె, కిచ్చొ చెంగిల్ గే పాపుమ్ గే చినితి సెక్తి పిట్టవన్ల మాన్సుల్ ‘సత్తిమ్’ మెన జోవయింక అబద్దుమ్ సంగుల.

3 ‘పెండ్లి జంక గారు’ మెనుల, అన్సె, కిచ్చొ కిచ్చొచి రిసా ‘జా కంక గారు’ మెన దన అబద్దుమ్చ మాన్సుల్ సికడుల; ‘సర్ల తెన్ కతు’ మెనయ్ ఎత్తి అదికారుమ్ తిలొ దేముడు జెర్వువ జోవయింక సంపజా సత్తిమ్ జాన్తనక జేవ్ వస్తువల్ దా తిలె కి.

4 నాయ్, గెద, దేముడు జెర్వుయ్లిసి ఎత్తి చెంగిలి, చి “తుయి దిలది” మెన సర్ల తెన్ జోవయింక ఒప్పన్లె, కిచ్చొయ్ కి కంక జయెదె.

5 కిచ్చొక మెలె, “కంక జయెదె” మెన దేముడు సంగిలి కోడుచి రిసా గే, పడ్డొ కతోసా జోవయింక ప్రార్దన కెర్లి రిసా కి జా వస్తువ సుద్ది అస్సి.

6 జలె, ఒత్తచ సంపజలనక తుయి ఈంజ ఎత్తి సికడ్లె, క్రీస్తు జతో యేసుక చెంగిలొ సేవ కెర్తొసా జస్సె. అన్సె, క్రీస్తుచి ఉప్పిర్చి నముకుమ్చి బోదన, సరిగచి బోదన, తుయి అప్పెక నిదానుమ్ ఇండిలి సత్తిమి తుచి పెట్టి పలితుమ్ దెరెదె.

7 మాన్సుల్ అవ్వి ఉచర్లి దేముడుక విరోదుమ్ జతిసి చి మంతిరివొచ వెర్లి వెర్లి కొడ్లి చి జోవయించ మత్తెలివొక తుక దూరి కెరు.

ప్రబుచి సేవ ఎక్కి నిదానుమ్ కెరుక పూచి తెన్ అలవాట్ కెరను.

8 కిచ్చొక మెలె, కామ్ కెర కెర ఆగ్గే డిట్టుమ్ కెరంతి అలవాట్ చెంగిలి, గని ప్రబుచి సేవ కెర్తొనె *ఆత్మక నిదానుమ్ కెరన్లె, ఆత్మకయ్ డిట్టుమ్ జలె, మాన్సుక ఒగ్గర్ చెంగిలి. కిచ్చొక మెలె, ఈంజ లోకుమ్తె కి కామ్క జెతయ్, పరలోకుమ్తె గెలె కి కామ్క జయెదె.

9 ‘ప్రబుచి కోడు, ఈంజ’ మెన కచితుమ్ దెరను.

10 కిచ్చొక మెలె, అమ్ ఆత్మక ప్రబుక పూర్తి నిదానుమ్ జా ఆత్మక డిట్టుమ్ జతి రిసా కిచ్చొక బద్దుకుమ్ నే జతె సైమల్ కెరన్లి రితి ఒత్త అస్సుమ్ మెలె, జివ్ తిలొ ఎక్కిలొ దేముడుచి ఉప్పిరి అమ్చి దయిరిమ్ తియ అస్సుమ్. జోయ్యి ఎత్తిజిన్క రచ్చించువ కెర్తొసా, అన్నె ముక్కిమ్క జోవయింక సంపజలనకయ్.

11 ఈంజ బోదన ఎత్తిచ కొడొ తుయి అదికారుమ్ తెన్ సికడ్లె తా.

12 తుయి ఉబెడొ రిలొ దాక్ జలెకి, తుక జేవ్ నిస్కారుమ్ నే దెకితె తుక దెక సికిత్ రితి తుయి ప్రేమ తా, ప్రబుచి ఉప్పిర్చి నముకుమ్క డిట్టుమ్ నిదానుమ్ తా, ప్రబుచి సుద్ది తా, చెంగిల్ లట్టబై తా, సత్తిమ్ ఇండితె తా. తుయి దస్సి జలె, తుక దెక జేవ్ కి సికుల.

13 ఆవ్ జెతె ఎదక సంగుమ్తె దేముడుచి కొడొ సదు కెర్తె తా, బుద్ది సికడ్లె తా, చి బోదన కెర్తె తా.

14 పడ్డొ, జా సుట్టు, ప్రబుచి సంగుమ్చ వెల్లొ మాన్సుల్చి సబతె తిలన తుక †బోడి చడ ప్రార్దన కెర్తికయ్, జోవయించ కబుర్లు సంగితొ ఎక్కిలొచి అత్తి దేముడు తుచి రిసా కోడు సంగిలన్. జో దేముడు తెదొడి దిలి వరుమ్ తుయి పాడ్ కెరు నాయ్; నిదానుమ్ వాడిక కెర్తె తా.

15 జలె, తుచి పూచి తిలి ఈంజ ఎత్తి తుయి ఎక్కి మెన్సు నిదానుమ్ కెర్తె తా, చి తుక ‘ఆత్మక వడ్డ అస్సి, డిట్టుమ్ అస్సి, జోవయింక సంప కెరుక జయెదె’ మెన ఎత్తిజిన్ చినుల.

16 తుయి జాగర్త దెకను. తుయి కిచ్చొ సికడ్లె గే సరిగా ఉచర, సిక్కడు. జా బోదన సరిగా నిదానుమ్ సికడ్లె తా. కిచ్చొక మెలె, జా సుబుమ్ కబుర్ తెయి తుచి రచ్చన కి, సూన్తనచి రచ్చన కి.

5

వేర వేర మాన్సుల్క కిసి దెకుక గే సంగిలిసి

1 కేన్ జవున్ మంత్రొ మాన్సుల్క కిచ్చొ జవున్ కెర తిలె సరి కెర గని, జోవయింక గోల కెర నాయ్. గని అబ్బొద్క కిసి మరియాద తెన్ సంగుక జయెదె, ప్రేమ తెన్ జో మాన్సుల్క సంగు. ఉబెడల్క ‘అన్నొబావొ’ మెలి రితి దెక.

2 మంత్రొవొ తేర్బోదల్క ‘అయ్య’ మెలి రితి దెక, ఉబెడివొక ‘బేని’ మెలి రితి పూర్తి సుద్ది తిలి మెన్సు తెన్ దెక.

* 4:8 4:8 కొరిందల్క రెగ్లి ఏక్ నంబర్ ఉత్తమ్ 9:24-27 దెక. † 4:14 4:14 1:8, చి తిమోతిక రెగ్లి 2 నంబర్ ఉత్తమ్ 1:6 దెక.

3 మాలజ్ జా నిజుమ్ రండెల్ జల తేర్బోదల్క గవురుమ్ దెక తోడ్ కెర చెంగిల్ దెకితె తా.

4 గని, కేన్ రండెల్ మాన్సుక పుత్తర్లు జవున్, దువిసివో జవున్, నత్తుర్నివో జవున్, నత్తిన్నివో జవున్ అస్తి జలె, జెవ్వి ముక్కిమ్క జోవయించి సొంత మాన్సుల్క దెకితి పూచి కెరనుక సిక్కుతు, అయ్యుసీసీ పాయిలి నైమ నెతోయిలి రితి. 'దస్సి కెరుక చెంగిలి' మెన దేముడు సంగితయ్.

5 గని కో నిజుమ్ రండెలి జా, జాక కోయి మాన్సు తోడు నెంజిలె, దేముడుక 'జోయ్యి రచ్చించుప కెర్లు' మెన, జా మాన్సు రాతి మెద్దెనె జోవయింక ప్రార్దన కెర్తె తయెదె. జో తెన్ తోడ్ నజీతె తయెదె.

6 గని వేర బుద్దుల్ చి జలె, జేవ్చి ఆనల్కయ్ సుకుమ్ తెన్ జలె కి, దస్సి జలె జితె పొది ఆత్మక మొర్లి రితి జా తయెదె.

7 జలె, రండెల్ మాన్సుల్చి మరియాద నే గెతి రితి జేవ్ జితి రిసా, ఇసి ఆడ్ర దేసు.

8 కో జలెకు జోవయించ సొంత మాన్సుల్క, అన్నె ముక్కిమ్క సొంత కుటుంబుమ్క చెంగిల్ దెకి నాయ్ గే, పొసె నాయ్ గే, జో మాన్సు ప్రబుక నే నంపజలి రితి జా, నంపనెంజిలోసాచి కంట పాపుమ్చో జయెదె.

9 కేన్ రండెల్ మాన్సుచి వయసు అరవయ్ వెర్పుల్క తోక్కి నెంజిలె, జా ఎక్కిలోక పెండ్లి జా తిలిసి జలె, సంగుమ్చి సేవ కెర్లనతె జాక టీవడుక జయెదె.

10 గని జాక కిసి మాన్సు మెన ఎత్కిజిన్ జానుక మెలె, కన్కారుమ్ దెకితి మాన్సు జా తంక, జేవ్చి బోదల్క చెంగిల్ పొస తంక, వేర తెంతో అయ్ల మాన్సుల్క మరియాద కెర తతె తంక, గోత్ అయ్ల నముకుమ్ జల వెల్లెల మాన్సుల్క చట్టో దోవ తంక, బాదల్ తిలనక తోడు కెర తంక. కిచ్చో జలెకి చెంగిల కమొ కెర్తి మాన్సు జా తంక.

11 గని తోక్కి వయసుచ రండెల్ మాన్సుల్క సంగుమ్చి సేవతె తుమ్ టీవడ నాయ్. వేర ఆసల్ జా ప్రబుక పచ్చిల్ రితి జలె, అన్నె పెండ్లి జంక ఆస జవుల.

12 జేవ్ "ప్రబుచి సేవ కెర్తె తయిందె, అన్నె పెండ్లి జంక నెసి" మెన తొలితో సంగ తా, జా సేవతె బెదిలె పడ్డె అన్నె పెండ్లి జా ములిలె, అబద్దుమ్ జలి నింద సేడుల.

13 పడ్డె, రండెల్ జల ఉబెడిబ రితనక ఎత్కి తోడు దిలె, బద్దుకుమ్ జా పేడివో పేడివో బుల బుల, సొండెల్ కొణొ సికుల. వేర మాన్సుల్చి కామ్చి నెడిమి జా జోవయించి కామ్ పిట్టవుల, నెంజిల కొణొ లట్టబుల.

14 జాకయ్, తోక్కి వయసుచ రండెలివో అన్నె పెండ్లి బోదల్ పాయ జోవయించి గేర్ తిలిసి ఎత్కి చెంగిల్ దెకుత్, చి జోవయించి రిసా అమ్ కో నయ్తాన్చ మాన్సుల్ అమ్క నింద కెరుక వాట్ తయె నాయ్.

15 రండెల్ జల ఉబెడిబ సగుమ్జిన్ ప్రబుచి సేవ ముల దా నయ్తాన్ సికడ్డి బుద్దితె గెచ్చ అస్తి.

రండెల్ మాన్సుల్క కో దెకుక

16 జలె, ప్రబుక నంపజలి కేన్ మాన్సుచ మాన్సుల్తె రండెల్ మాన్సుల్ అస్తి జలె, జా నంపజలి మాన్సు జోవయింక దెకితె తవున్. జేవ్చయ్ రండెలివొక సంగుమ్ పొసుక పొని. చి ఎద్దరె తోడ్ నెంజిల రండెలివొక తోడు కెర్తి డబ్బుల్ సేనడ జోవయింకయ్ తోడ్ దెతె.

17 ప్రబుచి సంగుమ్చి సేవ కెర్తె వెల్లో మాన్సుతె కో చెంగిల్ ఏలుప కెర్తెతి, ముక్కిమ్క జోవయింతె కో నిదానుమ్ బోదన కెర్తెతి బుద్ది సికడ్డితి, వేర వెల్లో మాన్సుల్క చి కంట జోవయింక ప్రెజల్ ఒగ్గర్ విలువ దెక అన్నెయ్ తోడు దెతు.

18 కిచ్చోక మెలె, దేముడుచి కోడు మోసేచి అత్తి రెగిడ్డినతె కిచ్చో మెన ఏక్ టాలి ఉచరుక జయెదె మెలె,

* "కెల్నె గిడ్డల్ దాన్ సుడయ్తె పొది సుడయ్త బెయిలల్క మూంతి బండుక నెంజె. పొస" పడ్డె, † "కామ్ కెర్తెసా జోవయించి జతమ్ నజనుక నాయిమ్" మెన సంగిలి కోడుచి అర్దుమ్ తుమ్ కెరన.

19 సంగుమ్చ వెల్లెల మాన్సుల్తె కక్క జవున్ కో జలెకు కిచ్చో జవున్ నింద కెర తిలె, దొగుల తీగ్ల సాచుల్చి సాచి సూన్లెకయ్, జా సాచి బెదిలెకయ్, జా నింద సూన్తి రితి విలువ దెకు.

20 గని కో సంగుమ్చ వెల్లెల మాన్సుల్ పొరపాట్ జస్తె తత్తతి గే, సంగుమ్చ ఎత్కిజిన్చి మొక్కె జోవయింక తీర్పు సంగు, చి దెక తా తిల మాన్సుల్ దస తప్పుల్ కెరుక బియుల.

21 దేముడుచి మొక్కె, యేసుక్రీస్తుచి మొక్కె, పరలోకుమ్చ దూతల్చి మొక్కె, తుక ఆవ్ ముక్కిమ్క సంగితసి మెలె, రుజ్జుల్ సరిగా నే సూన్తె తీర్పుల్ కెరు నాయ్ అన్నె కక్క మొకమాటుమ్ నే దెకితె తీర్పు కెరు.

22 పడ్డె, బమ్మ తెన్ కక్క బోడి చడ ప్రబుచి కామ్క అదికారుమ్ దేసు నాయ్. చెంగిలో నెంజిలో మాన్సుక దస్సి అదికారుమ్ దిలె, జోవయించి పాపుమ్తె తుయి బెదిల్ రితి జయెదె. అన్నె మాన్సుల్చి పాపుమ్తె తుయి బెదు నాయ్. దసితె దెర్లు నే సేడ్డె, ప్రబుచి సుద్ది తెన్ తా.

23 పడ్డె, సుద్ది కావలె మెన తుయి రితి పాని పితసి, కిచ్చోగె. గని అప్పె తెంతో తుచి పెట్టిచి బాద చి తుచి ఆగ్చ అన్నె బాదల్ చి రిసా ఓస్తు మెన ఇదిల్ ద్రాచ రస్సుమ్ పి.

24 జలె, తీర్పు కెర్తెన్చి రిసా అన్నె కిచ్చో మెలె, బమ్మ తెన్ తీర్పు కెరు నాయ్. సగుమ్జిన్ పాపుమ్ కెర్తిసి సొస్తుమ్ డిస్తయ్, చి రుజ్జు కెరుక జతయ్. గని అన్నె సగుమ్జిన్ కెర్తి పాపుమ్ లుంక తా, ఎక్కి పడ్డెకయ్ డిసిదె.

* 5:18 5:18 ద్వితియోపదేశ కాండుము 25:4. † 5:18 5:18 లాకా 10:7.

25 దన్ని కి, సత్తిమ్ కమొ సొస్తుమ్ డీనుల, గని మొదోల్కయ్ నే డీసిలెకి, ఎల్లకాలుమ్ లుంకడుక నెంజె.

6

ఎజొమాన్లుక గొతిమాన్సుల్, గొతిమాన్సుల్క ఎజొమాన్లు కీసి దెకుక గే సంగిలిసి

1 కో నంపజల గొతిమాన్సుల్ జా అస్తి గే, జోవయించ ఎజొమాన్లుక గవురుమ్ దెకితె తత్తు, చి జేవ్ ఇండితి బుద్దిచి రిసా ప్రబుచి నావ్ జవున్ జోవయించి సుబుమ్ కబుర్ జవున్ కో నిస్కారుమ్ ఉచరుక నాయ్.

2 జేవ్ గొతి మాన్సుల్తె కచ ఎజొమాన్లు నంపజల జవుల గే, *అమ్చ ఎజొమాన్లు ఆము ఎక్కి రిత జలమ్ గే మెన ఉచరుక జలెకి, జేవ్ గొతిమాన్సుల్ జోవయించ ఎజొమాన్లుక గవురుమ్ దెకుక ముల్తు నాయ్. 'జేవ్ ఎజొమాన్లు కి ప్రబుక నంపజలన' మెనయ్ జయి ప్రేమకయ్ అగ్గెచి కంట అన్నె నిదానుమ్ జోవయించి సేవ కెరుక. ఇన నిదానుమ్ బుద్దుల్ తుయి సికడు.

డబ్బుల్ ఆసక వేర బుద్దుల్ చి రిసా సంగిలిసి

3 జలె, ప్రబు జలొ యేసుక్రీస్తుచ చెంగిల్ కెర్త బుద్ది కొడొక చి జోవయింతెన్ బెదితి సుద్దిబోదనక కో నెన కెర వేర సికడె,

4 గవురుమ్క జాని మెనన్లె కి, జో కిచ్చోయ్ నేనె. ప్రబుచి సర్లబుద్ది జోవయించి పెట్టి నెంజిలి రిసా, ఆరిచ కొడొచి ఉప్పిరి కొడొ తెలివి తెన్ బెదవ జుజయ్తి ఆసయి తెన్ జో మాన్సు తయెదె. కొడొ తెన్ దన్ని జుజయ్తిసి, చి దన్నిచిక జట్లు జతిసి, జలె, కిచ్చో పలితుమ్ దెర్తయ్ మెలె, గోనల్, టంటల్లు, దూసెనల్, ఎక్కిలొచి ఉప్పిరి అన్నెక్లొ అన్మానల్ జతిసి,

5 నే కుట్టిత తగులు, దసయ్ బాదల్. దసయ్ బుద్దుల్ జత మాన్సుల్చ ఆత్మల్ పాడె జా అస్తి, జోవయించి పెట్టి కిచ్చోయ్ సత్తిమ్ నాయ్. 'దేముడుచి కామ్ కెర్తి రితి అమ్ డీసిలె, డబ్బుల్ లాబుమ్ జయెదె' మెన ఉచర నాయ్ దేముడుచి రిసా దన తెలివి కొడొ మాన్సుల్క సికడతె.

6 నిజుమి దేముడుచి కామ్ కెర్లె లాబుమ్ తయెదె. గని డబ్బుల్చి లాబుమ్ నెంజె, అన్నె 'జో దిలిసి సాలు' మెలి రితి సేంతుమ్ అమ్చి పెట్టి తిలెకయ్ అమ్క జా లాబుమ్, ఆత్మయి రగుమ్ లాబుమ్ తయెదె.

7 'జో దిలిసి సాలు' మెలి బుద్ది తెన్ అమ్ కిచ్చొక తంక మెలె, అమ్ జెర్లు ఈంజ లోకుమ్తె కిచ్చొ ఆనుమ్ నాయ్, చి మొర్లె కచితుమ్ ఈంజ లోకుమ్ తెంతో కిచ్చోయ్ నెము నాయ్.

8 గని అమ్క కతిసి గలంతిసి తిలె, సాలు.

9 గని ఈంజ లోకుమ్చి సొమ్సారుమ్ జంక ఆస జలన సయ్తాన్చ కమొ కెరయ్తిన్తె దెర్లు సేడ్తె, బోనుతె సేడ్తి రితి. దన్ని ఆన తిల మాన్సుల్ బుద్ది నెంజిల పాడె కెర్త ఆసల్తె దెర్లు సేడ్తె. దన ఆసల్ మాన్సుల్క పూర్తి పాడె కెర నాసెనుమ్ కెర్తె.

10 కిచ్చొక మెలె, పాపల్ ఎత్కిక డబ్బుల్ ఆస చేరు రితి జా ఆదారుమ్ జయెదె. దన్ని ఆస జలి రిసా, సగుమ్జిన్ నంపజల ప్రబుక ముల, ఒగ్గర్ బాదల్ జా జోవయించి పాపుమ్ కతతి.

నిదానుమ్ తా మెన తిమోతిక పవులు రెగిడ్డిసి

11 తుయి, మాత్రుమ్, దేముడుచొ మాన్సు. దన్ని పాపుమ్చి ఎత్కిక తుయి దూరి తా. కిచ్చొచి రిసా తుయి ఆస జంక మెలె, సత్తిమ్ ఇండితిసి, ప్రబుక పూర్తి నిదానుమ్ తతిసి. నముకుమ్ తతిసి, ప్రేమ, బాదల్ ఓర్పుప జతి సెక్తి, గగ్గొల్ నే జతి సేంతుమ్ బుద్ది మెత్తన బుద్ది తతిసి, దసచకయ్ తుయి ఆస జా.

12 తుచి నముకుమ్చి బవుమానుమ్ దొర్కు జతె ఎదక తుయి పూర్తి నిదానుమ్ ప్రబుచి కామ్ కెర్లె తా. ఒగ్గర్జిన్ సాచుల్చి మొక్కె ప్రబుక తుయి నంపజలిసి తుయి ఒప్పల్లి తెంతో, పరలోకుమ్తె గెచ్చు కెయ్క తెయ్క తా గెతి చి జోవయింతెన్ అప్పె ఇండితి వరుమ్ తుక ప్రబు దిలన్, గెద. జా వరుమ్ దెరను.

13 యేసుక్రీస్తు †పొంతి పిలాతు అదికారిచి మొక్కె సాచి సంగ ఒప్పల్లొ, గెద. జలె, ఎత్కిక జీవ్ దెతో జీవ్ తిలొ దేముడుచి మొక్కె పడ్డొ జో క్రీస్తుచి మొక్కె

14 తుక కిచ్చొ ఆడ్ర అవ్ దెతీసి మెలె, ప్రబు జలొ అమ్చొ యేసుక్రీస్తు ఈంజ లోకుమ్తె అన్నె ఉత్త జెతి ఎదక, ప్రబుచి సుద్దిచి రుజ్జు తతి రితి, జోవయించి గవురుమ్ నే కడ్డ రిసా, ప్రబు తుక తియార్లి కామ్ తుక దిల ఆడ్రల్ ఎత్కి. తుయి నిదానుమ్ కెర్లె తా.

15 యేసుప్రబు కెయ్క అన్నె ఉత్త జెయెదె మెలె, దేముడు అబ్బొసి కెయ్క జర్గు కెరెదె గే, తెదొడకయ్. జో దేముడు అబ్బొసి ఎత్కిచి కంట వెల్లొ తిలొ ఎక్కిలొ దేముడు, రాసల్క రానొ జలొ, ఎజొమాన్లుక ఎజొమాని జలొసా.

16 జో దేముడు అబ్బొసి ఎక్కిలొ నే మొర్లె ఎల్లకాలుమ్ తతోసా. జో జతి పరలోకుమ్చి ఉజిడి కెద్ది మెలె, కోయి ఇదిల్ పాసి కి గెచ్చుక నెతిరి. కో మాన్సు కెయ్క కి జోవయింక దెకితి నాయ్, దెకుక నెతిర్తి. జోవయింక గవురుమ్ అదికారుమ్ కెయ్క తెయ్క తవున్! ఆమేన్.

సొమ్సార్లుక సంగిలి కొడొ

17 జలె, ఈంజ లోకుమ్చి అస్తి కలుగు జల సొమ్సార్లు జల నంపజలన్క తుయి కిచ్చొ ఆడ్ర దేను మెలె, గవురుమ్

* 6:2 6:2 తీతు 2:9-10 దెక. † 6:13 6:13 మత్తయి 27:11, మార్కు 15:2, లూకా 23:3, యోహాను 18:33-37.

ఉచరంతు నాయ్, పడ్డొ, సొమ్నారుమ్క నంప కెర్తు నాయ్. జొ ఎత్తి పాడ్ జతిసి. గని దేముడుచి ఉప్పిరి జోవయించి నముకుమ్ పూర్తి తిత్తు. అమ్ మాన్సుల్ సంతోసుమ్ తెన్ వాడిక కెర్తి రితి అమ్క దొర్కు. జలిసి ఎత్తి దెతోసొ జొయ్యి, గెద.

18 జేవ్ సొమ్నార్లు, జలె, కీసి తంక మెలె, అన్నె మాన్సుల్క కన్కారుమ్ దెకిత ఒగ్గర్ కమొ కెర్తు. దస్సి తిలె, ఆత్మక సొమ్నారుమ్ జవుల. జేవ్ ముస్కు నే జతె, నెంజిలనక సర్ల తెన్ దర్ముమ్ తెన్ దెతు.

19 దస్సి ఇండిలె, జోవయింక కలుగు జతి ఆత్మక సొమ్నారుమ్ పడ్డొక కి జోవయింక కామ్క జెయెదె, మొల్లె పరలోకుమ్తె గెచ్చు కెయెక తెయెక చెంగిల్ జతి వరుమ్ ప్రబు దిలిసి జోవయింక జెయిమ్ జయెదె.

ఆకర్ కోడు

20 ఓ తిమోతి, ప్రబు తుచి అత్తి సొర్పు కెర దిలి, జోవయించి కామ్ తుయి కెర్తి వరుమ్ దెర నాయ్, జోవయించి సత్తిమ్ సికడ్తె తా. సుద్ది నెంజిల ఆరిక ఆరిచ కొడొ, దేముడుక దస కొడొ విరోదుమ్ జతతి, గెద, దస కొడొక, చి 'గ్యానుమ్' మెన గ్యానుమ్ నెంజిలిన్క, చి మాన్సుల్ కొడొ జుజయ్తిన్క తుయి దూరి కెరు.

21 కిచ్చొక మెలె, 'గ్యానుమ్' మెన గ్యానుమ్ నెంజిలిన్క 'జయ్యి సత్తిమ్' మెన సగుమ్జిన్ సంగ సికడ, నంపజల సుబుమ్ కబుర్తె ముక్కిమ్ తిలిసి పిట్టవన, పొరపాట్ జొ అస్సి.

ప్రబుచి దయ తుమ్చి తెన్ తవున్.

తిమోతిక రెగిడ్లి దొన్నిచి ఉత్త్రమ్ బారిక్ జలో పవులు తిమోతిక రెగిడ్లి దొన్నిచి ఉత్త్రమ్

మొదొల్ కోడు

1-2 ప్రేమ తిలో అంక పుత్తు జలో రితో తిమోతిక, దేముడుచి సెలవచి రిసా యేసుక్రీస్తుచి రిసా సుబుమ్ కబుర్ కామ్ కెర్తి రిసా జోచొ బారికి జలో ఆవ్ పవులు రెగిడ్లి ఉత్త్రమ్.

“అంచొ పుత్తు జలో యేసుక్రీస్తుక కో నంపజవుల గే, జేవ్ పరలోకుమ్చి రాజిమ్తె బెద, మొర్లె అంచి తెన్ జింక ఆవ్ వరుమ్ దెతసి” మెన ప్రమాసుమ్ కెలో దేముడు అంక జోవయించి కామ్క నిసాన అదికారుమ్ దా అస్సె.

జలె, దేముడు అబ్బొన్చి అమ్క ప్రబు జలో క్రీస్తు జలో యేసుచి దయ కన్యారుమ్ సేంతుమ్ తుచి ఉప్పిరి తవున్!

తిమోతి చి నముకుమ్చి రిసా పవులు సర్ల జలిసి

3 దేముడుచి సేవ పొరపాట్ నెంతె సత్తిమ్ తెన్ ఆవ్ కెర్తిసి మెన అంక దయిరిమ్. అంచ పూర్ముచ కి జోకయ్ జోకరై తిల. ఆవ్ కెయ్య ప్రార్దన కెర్లె కి, తుక నే వచ్చితె, తుచి రిసా జో దేముడుక అంచి సర్ల ఆవ్ సంగితసి.

4 తుక అన్నె దెకుక కోర్ప జా, రాతి మెద్దెనె ఉచర్తె తత్తసి. తుక అన్నె దెకిలె, పూర్తి సర్ల జయిందె. తుయి ఏడ్లిసి ఆవ్ ఏద కెర్తసి,

5 చి మాయ నెంజిలి తుచి నిదానుమ్చి నముకుమ్చి రిసా ఉచర్లె, మంతిరెఅప్పది జలి లోయి చి అయ్యద్ జలి యునికే చి అగ్గె తెంతో చి నముకుమ్ తిలిసి ఆవ్ ఏద కెర్తసి. జోవయించి ఎదిలి నముకుమ్ తుచి పెట్టి కి తయెదె.

6 జాకయ్ తుక ఆవ్ అప్పె కిచ్చొ ఉచరవడ్డసి మెలె, జా సుట్టు ఆవ్ తుక బోడి చడ ప్రార్దన కెర్లిన్ తెన్ దేముడు తుచి పెట్టి దిలి వరుమ్ అన్నె ఒగ్గర్ పలితుమ్ దెర్తి రితి తుయి వాడిక కెర్తె తా.

7 కిచ్చొక మెలె, జోవయించి ఆత్మ అమ్చి పెట్టి దిలిసి అమ్క బియ్యారల్ తత్తు మెన నాయ్, గని “అంచి పరలోకుమ్చి ఆత్మసెక్కి, అంచి ప్రేమ, అంచి తిరించి బుద్ధి జోవయించి పెట్టి కామ్ కెర్తె తా పలితుమ్ దెర్చు”.

8 జాకయ్, పూర్తి దయిరిమ్ తెన్ తా, అమ్చొ యేసుప్రబుచి రిసాచి సాచి సంగుక తుయి లాజ్ జా నాయ్, గని తుచి పెట్టి తిలి దేముడుచి సెక్కిక సుబుమ్ కబుర్

సూనయ్తి రిసాచి అల్లర్ తుయి కి ఓర్చుప జా. పడ్డొ, జోవయించి రిసా ఆవ్ జేల్తె తిలిన్క లాజ్ జా నాయ్.

9 ఈంజొ దేముడు అమ్క నిసాన సయ్తాన్చి రాజిమ్ తెంతో రచ్చించుప కెర, జోవయించి సుద్ది అమ్ ఇండిత రితి అమ్క బుకారా అస్సె. అమ్క కిచ్చొ పున్నిమ్ అమ్ కెర్లిన్చి రిసా నాయ్, గని “క్రీస్తు రచ్చించుప కెర్తొసా జతో యేసుచి అత్తి జోవయించి ఉప్పిరి అంచి దయ తియిదె” మెనయ్, కిచ్చొ నే జెర్లయ్లి అగ్గె తెంతో సాంత *ఇస్టుమ్ జా అమ్క జా వరుమ్ దిలన్.

10 అమ్చొ రచ్చించుప కెర్తొసా జలో యేసుక్రీస్తు ఈంజ లోకుమ్తె బార్ జలిసి తెన్ ఈంజ జో దిలి వరుమ్ రుజ్జా జా అస్సె. యేసుప్రబు మొర్చుచి ఉప్పిరి జిన పాడ్ కెర గెల కెర, పరలోకుమ్తె గెతి జివ్, ‘పరలోకుమ్తె గెతి అవ్కాసుమ్ దొర్చు జయెదె’, ‘నాసెనుమ్తె గెచ్చుక పిట్టుక జయెదె’ మెన రుజ్జా దెకవ, జా రుజ్జా జలిన్చి రిసాచి సుబుమ్ కబుర్ అమ్క దొర్చు కెర అస్సె.

11 జలె, ఈంజ సుబుమ్ కబుర్ ఆవ్ సూనవ బోదన కెర్తి రిసా జోవయించి బారికి జా బులుక మెన, ప్రబు అంక నిసాన అదికారుమ్ దిలన్.

12 ఈంజయి కామ్ ఆవ్ కెర్లి రిసా ఆవ్ ఇన సైమల్ సేడ్డసి. గని అంక లాజ్ నాయ్. కిచ్చొక మెలె, ఆవ్ నంపజలోసాక జాచి, చి †జోచి అత్తి ఆవ్ సార్చు కెర్లిసి కిచ్చొ పాడ్ నే జతి రితి, లోకుమ్చ మాన్సుల్క తీర్చు కెర ఏలుప కెరుక మెన ప్రబు గవురుమ్ తెన్ అన్నె జెతికయ్ జా వెల్లి దీసి ఎదక జో దెకుక జోక సెక్కి అస్సె మెన అంక పూర్తి దయిరిమ్ అస్సె.

13 జలె, అంచితె తుయి సూన్ల బోదన కొణొ రితి యేసుక్రీస్తుచి తెడిచి నముకుమ్చి ప్రేమ తెన్ తుయి నంపజలన్క సెక్డుక ములు నాయ్.

14 దేముడుచి సుద్ది తిలి ఆత్మ అమ్చి పెట్టి సెక్డొ ప్రబు తుచి అత్తి సార్చు కెర దిలి సత్తిమ్ కిచ్చొ పాడ్ నే జతి రితి తుయి జాగర్ల దెకితె తా.

15 ఆసియా ప్రదేసిమ్చ ఎత్రిజిన్ అంక ములిల మెన జాన్సి. జోవయింతె పుగెల్లు చి హెర్మొగెనే, గెద.

16 గని ఒనేసిపొరుక, జలె, జోవయించి గెర్చ ఎత్రిజిన్క ప్రబు కన్యారుమ్ దెకితె తవున్. జో ఒగ్గర్ సుట్టు అంక ప్రేమ దెకవయ్ దయిరిమ్ కెర్లన్. ఆవ్ జేల్తె తిలిన్చి రిసా జో లాజ్ జయె నాయ్.

17 జో ఇత్తల్ ఈంజ రోమ్ పట్టుమ్తె జా, సర్ల తెన్ అంక చజ జా తోడు దిలన్.

18 ‘యేసుప్రబు అన్నె ఉత్త్ర జా లోకుమ్చక తీర్చు కెర్తి జా వెల్లి దీసిక ఒనేసిపొరుచి ఉప్పిరి జో కన్యారుమ్ తితి రితి దేముడు వరుమ్ దెవున్’ మెనయ్ అంచి ప్రార్దన ఎపెసుతె జో తోడ్ కెర్లిన్ ఎత్రి. తుయి పూర్తి జాన్సి.

* 1:9 1:9 రోమియల్ 8:29-30, ఎపెసు 1:5. † 1:12 1:12 నెంజిలె, ‘అంచి అత్తి జో సార్చు కెర్లిసి కిచ్చొ....’

2

తిమోతిక పవులు అన్నె నిదానుమ్ సంగిలిసి

1 అంచొ పుత్తు, క్రీస్తు జలో యేసుచి దయక తుక జో దిలి సెక్కిక తుయి డిట్టుమ్ తా.

2 చి ఒగ్గర్ సాచుల్చి మొక్కెతుయి అంచితె నూన్లిసి ఎత్తి జేవ్ కి అన్నె మాన్పుల్క సికడ్డి రితి, నిదానుమ్ తిల అన్నె మాన్పుల్క తుయి సికడు.

3 పడ్డొ, చెంగిలో తిలో కేన్ జమాను కిసి బాదల్ ఓర్పుప జా నిదానుమ్ కెరెదె గే, తుయి కి ప్రబుచి కామ్చి రిసా బాదల్ సేడ్డిసి తుయి కి ఓర్పుప జా నిదానుమ్ తా.

4 పడ్డొ, జమాన్లుతె బెదితోసా చెంగిలోచొ జలె, కామ్తె తిలె, వేర మాములుమ్ మాన్పుల్చ కమొతె జో బెదె నాయ్, నెంజిలె వేరచితె బెదిలె, సిక్కు జా జోవయింక దిలి కామ్ పిట్టయెదె. జోచొ ఎజోమాని మెన్సితి రితి జో తియార్లి కామ్ చెంగిల్ కుట్టవుక మెన మెన్సు దా ఎక్కి నిదానుమ్ కెరెదె.

5 పడ్డొ, నిగితి కెల్క జవున్ బెదితోసా జలె, జేవ్ కెర్లయ్చి బెదితి రితి కెర్లయ్ జో జిన గురి నజనుక జయెదె.

6 పడ్డొ, పంటొ లాయిలె పొది, కో తొలితొ జోవయించి వాట నజనుక విలువ మెలె, నిదానుమ్ కామ్ కెర్లొ తిలోసా విలువ, బద్దుకుమ్చొ నాయ్, గని నిదానుమ్ కెర్లొసా.

7 ఆవ్ ఇన్నె రెగిడ్ల టాలివొచి రిసా చెంగిల్ ఉచరు. తుయి పూర్తి అర్దుమ్ కెరంతి రితి ప్రబు తుక సికడెదె.

చి సెక్కి

8 యేసుక్రీస్తు దావీదు పూర్గుమ్చొచి సెకుమ్తె జెర్మ మొర అన్నె జిలిసి ముక్కిమ్క తుయి ఉచార కెరంతె తా. జోచి రిసా ముక్కిమ్క ఆవ్ సుబుమ్ కబుర్ బోదన కెరుక మెన ప్రబు అంచి అత్తి కామ్ సార్ప కెర దా అస్సె, గెద.

9 జయ్య సుబుమ్ కబుర్ ఆవ్ నూనయ్తె తిలి రిసా ఇన సైమల్ సేడ అస్సి, కిచ్చొ జవున్ నేరిమ్ కెర్లొసా మెన దెకిల్ రితి అంక ఈంజేవ్ గొల్పుల్ బంద అస్సి. గని అంక కిచ్చొ దయిరిమ్ మెలె, దేముడుచి సుబుమ్ కబుర్ కోడు బందుక నెత్తిర్తి.

10 జాకయ్ దేముడు నిసాన్లసక 'నూన నంపజా క్రీస్తు జలో యేసుచి నావ్ తెన్ పాపుమ్ తెంతొ రచ్చించువ జా పరలోకుమ్తె గెచ్చ కెయ్క తెయ్క చెంగిల్ తత్తు' మెనయ్, కిచ్చొ సైమల్ జలెకి ఆవ్ ఓర్పుప జతసి.

11 'దేముడుచి కోడు ఈంజ' మెన ఏక్ కిచ్చొ కచితుమ్ దెరన్తనుమ్ మెలె, "జోవయింతెన్ మొర్లమ్ మెలె, కచితుమ్ జోవయింతెన్ జిమ్దె.

12 జోవయించి నావ్చి రిసా బాదల్ ఓర్పుప జలమ్ మెలె, కచితుమ్ జోవయింతెన్ *ఏలువ కెరుమ్దె.

'జోవయింక నేనుమ్' మెలి రితి ఇండిలె, జో కి అమ్క 'జోవయింకయ్ నేని' మెన జో అమ్క తియనె నాయ్.

13 ఆమ్ నిదానుమ్ నెంజిలె కి, జో ఎక్కి నిదానుమ్ తా గెతయ్."

జోవయించి సత్తిమ్చి రిసా జో అబద్దుమ్ కెరుక నెత్తె, జోవయించి కోడు పిట్టవుక నెత్తె.

కామ్క నెంజిత కొడొ జుజయ్తిన్చి రిసా జాగర్త సంగిలిసి

14 ఈంజ ఉప్పిర్చి కోడుచి రిసా ఒత్తచ నంపజలన్క తుయి ఏద కెరవు, చి 'కామ్క నెంజిల రితయ్ కొడొ జుజయ్తిసి ముల' మెన ప్రబుచి నావ్ తెన్ జోవయింక జాగర్త సంగు.

15 తుచి కామ్క 'చెంగిల్ కెర్లయ్' మెన దేముడు ఒప్పన్తి రితి జోవయింక ఎక్కి నిదానుమ్ జంక తుయి ఎక్కి ఆన జా, డెంగై సోగ వాటు గగ్గడ్డి రితి, నూన్తన పూర్తి అర్దుమ్ కెరంతి రితి, దేముడుచి సుబుమ్ కబుర్ సరిగా సిక్కుడు. దస్సి నిదానుమ్ తిలె, తుక జో దిలి కామ్క 'నిదానుమ్ కెర్లయ్' మెనయ్ తుయి లాజ్ జంక నాయ్.

16 జలె, దేముడుచి మరియాద కడ రితి కామ్క నెంజిల కొడొ లట్టబ్బిసి, కొడొ జుజయ్తిసిక దూరి తా. దన కొడొతె బెదిలె, మాన్పుల్ అన్నె ఒగ్గర్ పాడ్ జతి రితి దేముడుక జోవయింక దూరి కెర్లి రితి జయెదె.

17 కివ్వొ జలి గావు ఒగ్గర్ జలె, ఒండొయి మాన్పుక కా గెల కిసి పాడ్ కెరెదె గే, దస్సి, దన కామ్క నెంజిల కొడొ లట్టబ్బిసి మాన్పుచి ఆత్తుక పాడ్ కెరెదె. దస్సి జల మాన్పుల్, హుమెనైయును చి పిలేతును.

18 జేవ్ కిచ్చొ ఏక్ తప్పు సికడ్డతి మెలె, "మొర్ల మాన్పుల్క దేముడు జియడెదె మెలిసి పడ్డొకయ్ జర్గు జయెదె మెలిసి అబద్దుమ్. అగ్గెయి తెంతొ ఆత్తు రగుమ్క జర్గు జా అస్సె. ఆగ్ రగుమ్క జర్గు జంక నెంజె" మెన జేవ్ సికడ, సగుమ్జిన్చి నముకుమ్ పాడ్ కెర్తతి.

19 గని దేముడుచి రాజిమ్క 'గేరు' మెన దెకిలె, జా గేరుచి పునాదితె కిచ్చొ రెగ్గ అస్సె మెలె,

† "కో జోవయింక నిదానుమ్ తా జోచయ్ జా అస్తి గే ప్రబు జానె" పడ్డొ, "ప్రబుచి నావ్ కో దెర్తతి గే, పాపుమ్తె బెదుత్ నాయ్, గని ముల దెతు!" మెన రెగ్గ అస్సె.

20 జలె, కేన్ జవున్ వెల్లో గెరి ఎత్తి రగల్ గెర్చి కామ్చ సామన్లు తవుల. సగుమ్ బజర్చ, సగుమ్ వెండిచ, గని దారు తెన్ కి మత్తి తెన్ తెయార్ కెర్లన కి తవుల. జేవ్ సామన్లుతె సగుమ్, జలె, మాములుమ్ మరియాదచ కమొక వాడిక కెర్లన. సగుమ్, జలె, నిస్కారుమ్ కమొక వాడిక కెర్లన.

* 2:12 2:12 కొరిందిల్క రెగిడ్లి 1 నంబర్ ఉత్తమ్ 4:8, డీనయ్లిసి 5:10, 20:4, 6 చి 22:5. † 2:19 2:19 నంక్యాకాండుము 16:5, 26.

21 జల కేన్ మాన్సు ఆత్మ నిస్కారుమ్ కెర్తి పాపుమ్ గెచ్చువన గెలె, జలె, మరియాద కామ్ కెర్తి సామన్చి రితి జయెదె. జో దస్సి సుద్ది జలె, కేన్ చెంగిల్ కామ్చి రిసా కి జో గేర్చో ఎజోమానిక జో కామ్క జెయెదె. ప్రబుచి కామ్క తుయి దస్సి సుద్ది తిలి కామ్క జెతికయ్ వస్తు జా.

22 జాకయ్, బుద్ది నెంజిల ఉబెడల్ జత ఆసల్క తుయి దూరి తా, సుద్ది ఆత్మ తెన్ ప్రబుక ఎక్కి నిదానుమ్ తా జోవయించి నావ్ దెర్తన ఎత్కిజిన్ తెన్, సత్తిమ్బుద్ది, నిదానుమ్చి నముకుమ్, ప్రేమ, సేంతుమ్కయ్, జేవ్ తుయి కోర్ప జతె తా.

23 బుద్ది నెంజిల కామ్క నెంజిల కొణొ జుజయ్తిన్క దూరి తా. దనచతె బెదిలె మాన్సుల్ ఎక్కిలోక ఎక్కిలో గగ్గల్ జా జట్టి జతతి.

24 పడ్డొ, ప్రబుచి సేవ కెర్తొ కేన్ మాన్సు జలెకి, గగ్గల్ జతొసా జంక జయె నాయ్. జో కిసా తంక మెలె, మెత్తన తా ఎత్కిజిన్క చెంగిల్ దెకితొసా, తెలివి తెన్ చెంగిల్ బోదన కెర్తొసా, కుస్సిదుమ్ నే జతె బాదల్ ఓర్పుప జతొసా జంక.

25 పడ్డొ, చి బోదనక వేరయ్ సంగిత మాన్సుల్చి ఉప్పిరి గగ్గల్ నే జతె జో మాన్సు మరియాద తెన్ సరిగా అర్దుమ్ సంగుక సికుక. దస్సి మరియాద తెన్, 'జో మాన్సు తప్పు ఒప్పున విసారుమ్ జా సత్తిమ్ దెరన్సు' మెన ఏక్ వేల దేముడు సెలవ్ దెయెదె,

26 చి సయ్తాన్తె దెర్ను సేడ్డిన్ తెంతొ, జోవయించి ఇన్సుమ్ రితి కెర్తె తిలిన్తె తెంతొ జో మాన్సు విడ్డల్ జయెదె, చి బుద్ది జా ప్రబుచి ఇన్సుమ్ రితి కెరుక దెరెదె.

3

ఆకర్ దినాల్క మాన్సుల్చ బుద్ది

1 అప్పె, మాత్తుమ్, కిచ్చొ మెన తుయి చిను మెలె, ఈంజ ఉగుమ్చ ఆకర్ దినాల్క నెంజిల బాదల్ జెవుల.

2 తెదొడ్క మాన్సుల్ కిసి జవుల మెలె, వేర మాన్సుల్చ బాదల్క నే ఉచర్తె, 'అమ్మి చెంగిల్ తమ' మెనయ్ ఎక్కి జోవయింకయ్ జెవ్వి ఉచరంతె తవుల, డబ్బుల్ ఆస జయి గెచ్చుల, సొంత గవురుమ్ సంగితె తవుల, బడాయ్ జతె తవుల, మాన్సుల్క చి దేముడుక దూసుప కెర్తె తవుల, అయ్యసినిచి కోడు నే సూన్తె, జేవ్ పాయ పోసిలి సైమ సేడ్డిన్ నేన్లి రితి జేవ్ అయ్యసినిక తోడ్ కెరుక ములుల, దేముడుచి సుద్ది నెంజిలన జవుల,

3 కన్కారుమ్ నేన్తె తవుల, మాన్సుల్ కట్టు తెన్ తంక నెసుల, కుస్సిదుమ్క అన్నె మాన్సుల్చి ఉప్పిరి ఆరిచ నిందల్ సంగితె తవుల, నే నేన్లన జవుల, మాన్సుల్క బియడ్డన జవుల, చెంగిల్ తిలిసి ఎత్కిక విరోదుమ్ సుదల్ జవుల,

4 ఉప్రమెన్సు తెన్ తవుల, 'వేర మాన్సుల్క బాద కెర్తసుమ్' మెన నే దెకితె ఇన్సుమ్ అయ్లి రితి కెరుల, పుల తా బులుల, దేముడుక పచ్చ ఇన్సుమ్ అయ్లి సర్ల కెరంతె తవుల,

5 చి 'దేముడుక జోకర్తసుమ్' మెనన మాన్సుల్చి మొక్కె కిచ్చొ కిచ్చొ కమె కెర్తె కి, జేవ్ ఇండితిసి దెకిలె, జోవయించి ఆత్మసెక్తిక జితి నాయ్, చి జేవ్ సంగితిన్ తెన్ జేవ్ ఇండితిసి బెదె నాయ్, జోవయించి సెక్తిచి రుజ్జు దెకయ్తి నాయ్. దన మాన్సుల్క తుమ్ బెదవన నాయ్, జోవయింక దూరి తా.

6 ఉప్రమెన్సుక "దేముడుచి కామ్ కెర్తసుమ్" మెన, దన మున్సుబోదల్తె సగుమ్జిన్ కిచ్చొ కెర్తతి మెలె, కచ కచ గెరలె సినేతుమ్ కెరన, తకు బుద్దిచ తేర్బోదల్క దెర్ను సేడవ, ఇన్సుమ్ అయ్లి రితి సికడ్డతి. దన తేర్బోదల్ తవుల. జేవ్ కిచ్చొ కిచ్చొ పాపల్ కెర కెర పాపుమ్ వయన తా విడ్డల్ జంక నెత్త కిచ్చొ కిచ్చొ ఆసల్క దెర్ను సేడ.

7 కేన్ వెర్రి కోడు సికడ్డకి సూన, సత్తిమ్ చినుక ఎద్దెరె నెత్తిరి.

8 పూర్గుమ్, మోసేచి కోడు ఒప్పునుక యన్సేన్ చి యంబై నెస కెర కిసి వేరయ్ సికడ్డ గే, దస్సి ఈంజేవ్ అప్పెచ మాన్సుల్ సత్తిమ్ నెస కెర, వేరయ్ సికడ్డతి. ఈంజేవ్ ఆత్మక పాడ్ జలన, సత్తిమ్చి నముకుమ్ నెంజిలన.

9 గని జినుక నెత్తిరి. కిచ్చొక మెలె, జేవ్ పూర్గుమ్చ దొగులచి పొరపాట్ బుద్ది కిసి రుజ్జు జలి గే, దస్సి ఈంజేవ్ అప్పెచ మాన్సుల్చి బుద్దిక కి 'పాపుమ్చి' మెన ఎత్కిజిన్ చినుల.

పవులు తిమోతిక సికడ్డిసి

10 అప్పె, మాత్తుమ్, తుక కిచ్చొ రెగిడ్డిసి మెలె, అంచి బోదన, ఆవ్ ఇండితి బుద్ది, ప్రబుచి కామ్ కెర్తి ఆస తెన్ ఆవ్ జితిసి, అంచి నముకుమ్, బాదల్ ఓర్పుప జా ఆవ్ సేంతుమ్ తతిసి, అంచి ప్రేమ, అంచి నిదానుమ్,

11 మాన్సుల్ అంక కెర్ల అల్లర్లు, ఆవ్ సేడ్ల బాదల్, పడ్డొ *అంతియొకయ పట్టుమ్తె ఈకొనియ పట్టుమ్తె, చి లుస్త పట్టుమ్తె విరోదుమ్ సుదల్ కెర్ల అల్లర్ ఓర్పుప జలయ్ గే, తుయి దెక అస్సిన్. గని జేవ్ కెత్తి అల్లర్ కెర్ల కి, ఎత్కి తెంతొ ప్రబు అంక రచ్చించుప కెర్లొ.

12 గని ఆవ్వి మెను నాయ్. కో జలెకి యేసుక్రీస్తుచి తెడి సత్తిమ్ ఇండుక మెన్సు దా అస్తి గే, కచితుమ్ విరోదుమ్ సుదల్చి అత్తి సైమల్ సేడుల.

13 పాపుమ్ ఇండితన, ఉప్రమెన్సుచి మాన్సుల్, మాత్తుమ్, వేర మాన్సుల్క మోసిమ్ కెర్తె తా, జెవ్వి కి మోసిమ్తె దెర్ను సేడ అన్నె అన్నెయ్ పాడ్ జతె తవుల.

* 3:11 3:11 బారికుల్ 13:50-14:20 డెక.

14 తుయి, మాత్రుమ్, తుయి సికిలిసి తుయి దయిరిమ్ జా డిట్టుమ్ సంపజలిసి ఎద్దరె నే ములితె, పూర్తి నిదానుమ్ తా. కత్తె కత్తె తొలితో సికిలది గే పచ్చు నాయ్.

15 పడ్డో, దేముడుచి కొడోతె రెగ్గయల కొడో బాల తెంతో పూర్తి అలవాట్ జా అస్సి. క్రీస్తు జలో యేసుక సంపజా రచ్చించుప జతిసి జేవ్ కొడోతెయి జానయ్ జతయ్.

16 దేముడుచి కొడో ఎత్తి జోచి ఆత్మ మాన్యుల్చి అత్తి రెగ్గయలో. ఇసి రెగ్గయలి కొడో ఎత్తి, జో సికడ్డిసి అమ్ ఒత్తయ్ సికుక జయెదె. పాపుమ్చి రిసా జాగర్త సంగితిసి ఒత్తయ్ తయెదె, పాపుమ్ ముల కిసి బుద్ది జంక గే సికడ్డిసి ఒత్తయ్ తయెదె, చి సత్తిమ్ ఇండుక సికయ్తిసి ఎత్తి ఒత్తయ్ తయెదె.

17 దేముడుచి సేవ కెర్తొ కేన్ మాన్యుకి జేవ్ కొడో పెట్టి నిదానుమ్ తియనై, జా కామ్ నిదానుమ్ కెర్తి రితి దొర్కు జలి గ్యానుమ్ ఎత్తి సెక్తి ఎత్తి దేముడుచి కోడు సదు కెర్తినతయ్ దొర్కు జయెదె.

4

పవులు తిమోతిక నిదానుమ్ సంగిలిసి

1 మొర్తనక జితనక 'సంపజల గే నాయ్ గే' మెన బవుమానల్ గే సిచ్చల్ గే దెంక మెన క్రీస్తు ఆకర్ దీసిక పరిచ్చ కెర తీర్పు కెరుక అస్సి. పడ్డో జో తెదొడ్క అన్నె ఉత్త జా అయ్లె, జోవయించి అదికారుమ్ నజన ఏలుప కెరుక అస్సి. జలె, దేముడుచి మొక్కె, క్రీస్తు జలో యేసుచి మొక్కె, జోవయించి నావ్ తెన్ తుక ఆవ్ జాగర్త సంగితసి మెలె,

2 క్రీస్తుచి రిసా తుయి సుబుమ్ కబుర్ సూనయ్తె తా. కెయక కి, ఇస్టుమ్ తిలె కి నెంజిలె కి, కెడ్డొడ్ తెదొడ్ నిదానుమ్ తెన్ జా సుబుమ్ కబుర్ సూనయ్తె తా. పాపుమ్చి రిసా తీర్పుల్ సంగు, పాపుమ్ కెర్తినచి రిసా జాగర్తల్ సంగు, బుద్ది సికడ సంపజలన్క డిట్టుమ్ కెరు, చి అల్లర్ జలెకి, బద్దుకుమ్ నే జతె, బమ్మ నే జతె, బోదన కెర్తె తా.

3 ఏక్ కాలుమ్ జెతయ్. జా కాలుమ్క ఒగ్గర్జిన్ మాన్యుల్ కిసి జవుల మెలె, బుద్ది కొడో సూనుక నెన కెర, జోవయించ కంగ్గల్క కజ్జర్ తిలి రితి కిచ్చొ కిచ్చొ వేర వేర నొవ కొడో సూనుక ఆస జా, కో జేవ్ సూనుక ఇస్టుమ్ జలిసి సికడుల గే, దన మాన్యుల్క ఎక్కిలోచి పడ్డో అన్నెక్కోక ఆనవ.

4 సత్తిమ్ సూనుక ముల, మాన్యుల్ జెవ్వి ఉచర్ల మత్తెలివో సంప కెరుల.

5 తుయి, మాత్రుమ్, మచ్చిల్ రితి బుద్ది నే జతె, తెలివి నిదానుమ్ తెన్ తా, బమ్మ నే జతె బాదల్ ఓర్పువ జా,

క్రీస్తుచి రిసాచి దేముడు సుబుమ్ కబుర్ సూనయ్తె తా, జో దేముడు తియార్లి కామ్ పూర్తి కెరు.

6 ఆవ్, జలె, *ప్రబుచి అత్తి అంచి ప్రానుమ్ ఆవ్ సార్పు కెర్తి సమయుమ్, ఆవ్ ఉట్ట గెతి పొది, పాసి జా అస్సి.

7 చెంగిలో జమాను యుద్దుమ్తె కిసి నిదానుమ్ కెరెదె గే, కెర్లయ్తె నిగితొసా కిసి ఎక్కి మెన్పు తెన్ నిగెదె గే, ఆవ్ దస్సి నముకుమ్తె నిదానుమ్ కెర అస్సి.

8 జాకయ్, ఆవ్ సత్తిమ్ కెర్తినచి బవుమానుమ్ అంక రకితయ్. కేన్ బవుమానుమ్ మెలె, సత్తిమ్ తీర్పు కెర్తొ తీర్పు కెర్తొసా జతో ప్రబుయి ఉత్త జా జో తీర్పు కెర్తి వెల్లి దీసిక దెతిసి. ఎక్కి అంకయ్ బవుమానుమ్ తయెదె మెను నాయ్, గని జేవ్ ఎత్తిజిన్కయ్ కో జో అన్నె ఉత్త జెతిన్క రక నిదానుమ్ కెర తవుల గే.

పవులు మాలజ్ జా తిమోతిక బుకార్లిసి

9 తెర్లె, అంచితె బే బేగి జే.

10 కిచ్చొక మెలె, దేమా, జలె, ఈంజ లోకుమ్తె తతిన్క ప్రేమ తా, అంక మోసిమ్ కెర ముల దా దెస్సలోసిక పట్టుమ్తె ఉట్ట గెచ్చు అస్సి. క్రేస్సే, జలె, గలతీయ ప్రదేసిమ్తె, తీతు, జలె, దలృతీయ ప్రదేసిమ్తె ఉట్ట గెచ్చు అస్సి.

11 ఎక్కి లూకా అంచి తెన్ అస్సి. తుయి జెతి పొది మార్కుక కడ ఆను. జో అంచి కామ్తె అంక జలె తోడ్ తయెదె, చెంగిల్ సేవ కెరెదె. అగ్గె తెంతో దస్సి అస్సి.

12 తుకికుక ఎవెసుతె తెద్రవ అస్సి.

13 తుయి జెతి పొది, త్రోయ పట్టుమ్తె కర్పుచి గెరి ఆవ్ ములిలి గొంగ్గల, పడ్డో అంచ పుస్తకల్, చి ముక్కిమ్క ఆవ్ రెగిడ్ల పుస్తకుమ్ ఆను.

14 సరాబు జలో అలెక్సంద్రు, జలె, అంక ఒగ్గర్ సైమ సేడయ్లో. ప్రబుయి తీర్పు కెర జోవయించ కమొచి రిసాచి సిచ్చ జోవయంక దెయెదె.

15 తుయి, మాత్రుమ్, జోవయించి రిసా జాగర్త తా. కిచ్చొక మెలె, అమ్ సంగిలి చి ఉప్పిరి జో బలే విరోదుమ్ కెర్లె.

16 †అదికారుల్చి మొక్కె అంక తొలితో పరిచ్చ కెర్తినతె కోయి అంక తోడు సంగితి నాయ్. మాయబుద్ది తిలి రితి జేవ్ ఎత్తిజిన్ తుక్లె తా అంక ములిల రితి జల. జోవయించి జా పాపుమ్ జేవ్ నే వయితి రితి ప్రబు చెమించుప కెర్పు!

17 గని తెదొడి జా అదికారుల్చి మొక్కె ప్రబుయి అంక తోడు తా, ఒత్త బెర తిల యూదుల్ నెంజిలన సూన్తి రితి సుబుమ్ కబుర్ పూర్తి ఆవ్ సూనయ్తి రితి అంక సెక్తి దిలన్. చి జొయ్యి తోడు తతికయ్, ప్రమాదుమ్ నే జతి రితి

* 4:6 4:6 నెంజిలె, 'ఆవ్ బలి జతి సమయుమ్...'. జో నిజుమి బలి జయె నాయ్, గని జో మొరుక తిలన్చి టాలికయ్ దస్సి సంగితయ్. † 4:16 4:16 ఈంజ ఉత్తమ్ రెగిడ్లి పొది పవులు రొమ్తె జేలి జా తిలో, బెర్తె. బారికుల్ 28:16-31 దొన్ని వెర్పుల్ ఒత్త ఒగ్గర్ అల్లర్ నెంతె తిలన్, చి పడ్డో, బెర్తె, జోవయించి తగు సూన్.

రచ్చించుప జలయ్‡, వాగుచి చోడి తెంతో రచ్చించుప జలి రితి.

18 కచితుమ్, సయ్తాన్ కెరయ్త ప్రమాదల్ ఎత్తి తెంతో ప్రబు అంక రచ్చించుప కెర, పరలోకుమ్తె అంక తియనెదె. జోవయింక కెయెక తెయెక ఉగల్చి ఉప్పిరి ఉగల్క గవురుమ్ కెరై తత్తు! ఆమేన్.

ఆకర్ కోడు

19 ప్రిస్కిల్లక చి అకులక పడ్డో ఒనేసిపారుచి గెర్చ ఎత్తిజిన్క అంచి ముద్దు సంగు.

20 ఎరస్తును కొరింది పట్టుమ్తె తా గెలో. త్రోపిముక, జోక జీవ్ చెంగిల్ నాయ్ చి రిసా మిలేతు పట్టుమ్తె ముల దిలయ్.

21 తెరై, చల్లి పొది నే జెతె జే. యుబూలన్, పుదెన్స్, లీను, క్లొదియ చి ఇన్నెచ నంపజల బావుడ్లు జల రిత ఎత్తిజిన్ తుక జోవయించి ప్రేమ సంగ తెద్రయ్తతి.

22 ప్రబు తుచి ఆత్మ తెన్ తవున్! జోవయించి దయ తుమ్ ఎత్తిజిన్చి ఉప్పిరి తవున్!

‡ 4:17 4:17 జా సుట్టు పవులుచి తగు సూన్సి విడ్డల్ కెరై, బెరై, గని పడ్డో అన్నెక్ సుట్టు దెర, తగు కెర, బోడి గండల్ కెర మార్ల మెన సగుమ్జిన్ ఉచర్తతి.

తీతుక రెగిడ్లి ఉత్త్రుమ్ బారిక్ జలో పవులు తీతుక రెగిడ్లి ఉత్త్రుమ్

సుబుమ్ కబుర్ కామ్ కెర్తి రిసా పవులుక ప్రబు నిసాన్లినీ

1 దేముడు నిసాన్లసచి నముకుమ్చి రిసా,

2 నే మొరై కెయడ తెయడ జతి బత్తుచి రిసా, ఆన తెన్ బక్తిక మూలుమ్ జతి నిజుమ్తి రిసా, “పరలోకుమ్తె మాన్సుల్ బెదితి వాటు ఆవ్ దొర్కు కెరిందె” మెన, అబద్దుమ్ కెయ్య నే జతో దేముడు కిచ్చో నే జెర్మయ్తె అగ్గె తెంతో ప్రమానుమ్ సంగ దిలో. జొయ్యి జా ప్రమానుమ్ సంగిలి రిసా అమ్క పూర్తి దయిరిమ్.

3 “పరలోకుమ్తె మాన్సుల్ బెదితి రచ్చనచి వాటు ఆవ్ దొర్కు కెర్లినచి కోడు పలాన్ సమయుమ్క బార్ కెరిందె” మెన జో అమ్చో రచ్చించుప కెర్తొసా జలో దేముడు అగ్గె తెంతో ఉచరయ్ తిలన్, చి “తుయి సూనవు” మెన ఆడ్ర దా అంచి అత్తి సార్ప కెర దిలి సుబుమ్ కబుర్ ఆవ్ సూనయ్లిన్ తెన్ అప్పె జా కోడు బార్ కెర అస్సె.

4 సొంత పుత్తు జలో రితో తీతుక, అమ్చి ఎక్కి నముకుమ్చి రిసా అబ్బొసి జలో రితో ఆవ్ పవులు రెగిడ్లి ఉత్త్రుమ్. దేముడు అబ్బొన్చి అమ్చో రచ్చించుప కెర్తొసా జలో *క్రిస్తు యేసుచి దయ సేంతుమ్ తుచి తెన్ తవున్.

5 ఒత్త క్రేతు డిబ్బితె తుక కిచ్చొక ములిలయ్ మెలె, ఒత్తచ సంగుమ్లుతె కిచ్చొ కిచ్చొ పిట్ట అస్సె గే, తుయి చెంగిల్ నెరవెర్చుప కెర్తి రిసా. జేవ్ కమొతె కిచ్చొ ఏకచి రిసా సంగిలయ్ మెలె, జాన్సి, గెద. “ఒత్తచ ఎత్తి పట్టుమ్తెచ సంగుమ్లక జేవ్ దెకిత్ రిసా †వెల్లెల మాన్సుల్క నిసాన్లొ, చి జోవయింక అదికారుమ్ దేసు” మెలయ్. దస్సి కెరు.

6 కిస మాన్సుల్క జా అదికారుమ్ దెంక మెలె, ‘జేవ్ పొరపాట్ ఇండితన నెంజితి’ మెన ఎత్తిజిన్ జానుక. ఎక్కి తెర్పితెన్చో మాన్సు, చి జోచ బోదల్, యేసుప్రబుక నంపజా తా, ఆరి సొంత ఇస్తుమ్ కెర్తి రితి డబ్బుల్ గట్ట పాడ్ నే కెర్తన జా తంక, చి జోవయించ ‡అయ్యోస్అబ్బొన్చి కోడు సూన్తన జేవ్ బోదల్ తంక.

7 కిచ్చొక మెలె, సంగుమ్క పాస్టర్ జతో కేన్ వెల్లో మాన్సు దేముడుచి గేర్చి కామ్ దెకితోసా జయెదె. జాకయ్ జో సత్తిమ్ ఇండితోసా తంక, పొరపాట్ ఇండితోసా తంక నాయ్.

* 1:4 1:4 ‘క్రిస్తు’ మెలె, దొర్కు జలో రచ్చించుప కెర్తొసాక వడ్డొక తెద్రయిందె; మెన పూర్ణుమ్ తెంతో ఎత్తి అదికారుమ్ తిలో దేముడు యూదుల్క ప్రమానుమ్ సంగ తిలో. గ్రీకు బాస తెన్ జో రచ్చించుప కెర్తొసాక ‘క్రిస్తు’ మెనుల, ఎబ్రి బాస తెన్ జోవయింక ‘మస్సీయన్’ మెనుల. † 1:5 1:5 జేవ్ వెల్లెల మాన్సుల్ జతినతె వయసు ముక్కిమ్ నాయ్, గని ప్రబుచి బుద్ది జోవయింక తిలిసి ముక్కిమ్. ‡ 1:6 1:6 జా బుద్ది తిలె, అస్సె వెల్లెల మాన్సుల్చి కోడు కి సూనుల, గెద.

§ 1:11 1:11 మెలె, ఎత్తి అదికారుమ్ తిలో దేముడుచి దయ వాటు, యేసుక్రిస్తుక నంపజతి వాటుయి రచ్చించుప జంక జయెది చి నముకుమ్. రోమియుల్ 3:23, 24, 28, 30, చి 4 అధ్యయిమ్, చి గలతీయుల్ 2:16. * 1:12 1:12 మెలె, ‘క్రేతు డిబ్బుచ మాన్సుల్’. † 1:14 1:14 తిమోతిక రెగిడ్లి ఏక నంబర్ ఉత్త్రుమ్ 4:3-4. ‡ 1:15 1:15 తిమోతిక రెగిడ్లి ఏక నంబర్ ఉత్త్రుమ్ 1:4-5.

అన్నె మాన్సుల్క నే సూన్తె సొంత ఇస్తుమ్ అయ్లి రితి కెర్తొసా జో తంక నాయ్, బేగి కోపుమ్ సేడ్తోసా నే జా జంక, మత్తిలోన్ జవున్, పెట్టొసా బియడ్తోసా జవున్, గార్ వాట్తె డబ్బుల్ ఆన జతోసా జవున్ జో తంక నాయ్.

8 వేర తెంతో అయ్లసక మరియాద దెకితోసా, చెంగిల్ తిలిన్ ఎత్తిక ప్రేమ కెర్తొసా, చెంగిల్ బుద్ది సుదో, సుద్ది తెన్ సత్తిమ్ నాయిమ్ ఇండితోసా, ప్రబుచి సేవ ఎక్కి సత్తిమ్ తెన్ కెర్తొసా, ముద్దొ కెరంతొసా జా తంక.

9 వడ్డొ, దేముడు అమ్క దిలి జోచి నిదానుమ్ తెన్ చి యేసుచి రిసాచి చి బోదన అమ్ జోచ బారికుల్క సికడ అస్సుమ్. జయ్యి బోదన జో ఎక్కి నిదానుమ్ దెరనుక అస్సె. కల్లి నెంజిలిసి సరి జతి బోద కెరుక జోక సెక్తి తయెదె, చి జా సుబుమ్ కబుర్ నెన వేర సికడ్తనక సరిగా జబాబ్ దెంక జోక సెక్తి తయెదె.

10 సరిగా జబాబ్ దెంక పాస్టర్క సెక్తి తంక ముక్కిమ్. కిచ్చొక మెలె, కోడు నే సూన్త బుద్ది నెనిత మాన్సుల్ ఒగ్గర్జిన్ అస్తి. ఆరిచ కొడొ జేవ్ లట్టబై తవుల. మోసిమ్చి బోదన కెర్తె తవుల. దస్సి కెర కో కో ఒగ్గర్ అల్లర్ కెర్తతి మెలె, ‘యూదుల్చి సుద్ది గుర్తుచి సున్నతి నే కెరన్లె సత్తిమ్ నాయ్’ మెన సికడ్తన.

11 జోవయింక ముద్దొ కెరుక అస్సె. కిచ్చొక మెలె, జేవ్ సికడుక నాయిమ్ నెంజిలి అబద్దుమ్ జేవ్ లాబుమ్ ఆననుక ఉచర సికడ, పూర్తి సగుమ్ కుటుంబల్క సిక్కు కెర, జోవయించి కిసముకుమ్ పాడ్ కెర్తతి. జెవ్వి చోడి డంకవుక అస్సె.

12 జేవ్ మోసిమ్ కెర్తనతెచో సొంత ఎక్కిలో సొంత కిచ్చొ ఏక మెన అస్సె మెలె, “అమ్చ *క్రేతియులు అగ్గె తెంతో అబద్దుమ్చి, మూర్కుడ్లు, బద్దుకుమ్చ, జోవయించి పెట్టి బెరవంతి ఆనక జితనయ్” మెన సంగ అస్సె.

13 జా సాచి సత్తిమ్. జాకయ్, జోవయించి తప్పు జేవ్ పూర్తి అర్దుమ్ జతి రితి సొస్తుమ్ గట్టిజ సంగు, చి

14 అమ్చ యూదుల్చ పూర్ణుల్ తెంతొచ మాన్సుల్ అవ్వి ఉచర్ల మత్తెలివొ కి, సత్తిమ్ నెనిత మాన్సుల్ సికడ్ †కొడొ కి బింక పిట్టవన, యేసుప్రబుచి ఉప్పొర్చి నముకుమ్ తెన్ బెదితి బోద జేవ్ ఎక్కి నిదానుమ్ నంప కెర, ఆత్మక చెంగిల్ జంక జయెదె.

15 ఆత్మక సుద్ది జలస, జలె, కతిసి పితిసి చడితిసి చెంగిల్ మెనుల. కిచ్చొ వస్తువ కి జోక ‡సుద్ది తయెదె. గని, జోవయించి పాపుమ్క ఆత్మ పాడ్ జా ప్రబుచి ఉప్పొరి

అన్మానుమ్ జలస, జలె, జోవయింక కిచ్చొ వస్తువ నుద్ది తయె నాయ్. జోవయించి సొంత మెన్ను కి పూర్తి గార్ జా అస్తి, చి కిచ్చొ కెర్లె చెంగిల్ మెన జాన్లె కి, చెంగిల్ ఇండుక పిట్టవన, జోవయించి బుద్ది గార్ జా జోవయించి ఆత్మ పాడ్ కెరన అస్తి.

16 “దేముడుక జానుమ్” మెనంతతి, గని జోవయించ కమొక దెకిలె, ‘దేముడుక నేనతి’ మెన పూర్తి రుజ్జు జతయ్. జేవ్* వెట్కారుమ్ జా అస్తి, ప్రబుచి కోడు సూనతి నాయ్, జేవ్చి కిచ్చొ చెంగిల్ కామ్క నెంజితన.

2

తీతు కిచ్చొ కిచ్చొ బుద్దుల్ సికడుక గే పవులు రెగిడ్డిసి

1 తుయి, మాత్తమ్, తీతు, ముక్కిమ్క తుయి కిచ్చొ కెరుక మెలె, సరి జతి బోదనతె బెదితిసి ఎత్తి సికడె తా

2 మంత్రమాన్సుల్క తుయి కిచ్చొ బుద్ది సికడు మెలె, కిచ్చొతె కి *ముద్దొ కెరన బుద్ది ఇండుతు, మరియాద బుద్ది ఇండుతు, బుద్ది నుదల్ తత్తు, చి ప్రబుచి ఉప్పిర్చి నముకుమ్క, ప్రేమక, చి నిదానుమ్క జోవయించి ఆత్మతె చెంగిల్ దెరనుక జా తత్తు.

3 పడ్డొ మంతిర్ మాన్సుల్క కిచ్చొ సిక్కడు మెలె, జేవ్ కి దేముడుక గవురుమ్ దెతి రితి జోచి సుద్ది మరియాద ఇండుతు, †సొండెల్ జతు నాయ్, చి సూరు గట్టక దెర్ను సేడ్డు నాయ్. జేవ్ కిచ్చొ ముక్కిమ్క కెరుక మెలె, చెంగిల్ తిలిసి ఎత్తి సికడ.

4 జోవయించ ఉబెడివొక బుద్ది ఆనవుక. కీన బుద్దుల్ జోవయింక జేవ్ సికడుక మెలె, జోవయించ మున్నర్పుల్క చి బోదల్క జేవ్ ప్రేమ దెకితె తంక,

5 జేవ్ బమ్మబుద్ది ముద్దొ కెరన బుద్ది ఇండుక, లంజె కెర్తిన్తె ఉచర్తిన్తె ఎద్దరె నే బెదుక, గెర్చి కామ్ చెంగిల్ నిదానుమ్ కెరుక, మాన్సుల్క చెంగిల్ దెకితె తంక, చి జోవయించ మున్నర్పుల్చి తెడి తా దాక్ కెరన, జోవయించి కోడు సూసుక. సంగుమ్చ తేర్బోదల్ కిచ్చొక ఇన బుద్దుల్ ఇండుక మెలె, ఇసి ఇండిలె, ‘నాయ్ గెద, పొరపాట్ జతి నాయ్’ మెన దెక, దేముడు దిలి తుమ్ సూనయ్తి యేసుచి రిసొచి నుబుమ్ కబుర్క ఒత్తచ కేన్ మాన్సుల్ నిస్కారుమ్ ఉచరుక నెత్తిర్తి.

6 దస్సి, ఉబెడల్క కిచ్చొ సిక్కడు మెలె, “ఆసల్ రకన తుమ్ బుద్ది ఇండ” మెన తుయి బలవంతుమ్ కెరు.

7 అన్నె, జేవ్ తుచ కమొ దెక సికిత్ రితి చెంగిల కమొ కిచ్చొ జలెకి నిదానుమ్ కెర్లె తా. అన్నె, తుయి బోదన కెర్తిన్తె సత్తిమ్బుద్ది చి మరియాద దెకవు.

8 అన్నె, జా బోదనతె కీన కొడొ కావలె మెలె, నిజుమ్తె వడితె కొడొయ్, ‘తప్పు’ మెన కో సంగుక నెతిర కొడొయ్. దస్సి తిలె, కో వేర సంగితొసొ జలె, కిచ్చొ తప్పుచి రిసొ అమ్క సంగుక నెత్త, లాజ్ జా, జోచి తప్పు చినెదె.

9 పడ్డొ గొతిమాన్సుల్క తుయి కిచ్చొ బుద్ది సిక్కడు మెలె, ‡‘ఆమ్ కి నంపజలస జా అస్సుమ్ చి వెల్లొ జలమ్’ మెన నే ఉచరంతె పోటి నే కెర్లె జోవయించ ఎజొమాన్సుచి తెడి తా జోవయించి కోడు సూన, కిచ్చొ కామ్చి రిసొ జలెకి, జోవయింక సత్తిమ్ కెర్లె తత్తు. జా కామ్ జేవ్ కీసి కెరుక ఎజొమానిచి ఇష్టుమ్ తయెదె గే, దస్సి కెరుక. పడ్డొ, జోవయించ ఎజొమాన్సుచి కోడు నెత్తివుక నాయ్.

10 పడ్డొ చోరుక నాయ్. గని పూర్తి సత్తిమ్ నిదానుమ్ తత్తు. కిచ్చొక మెలె, దస్సి సత్తిమ్ ఇండిలె, దేముడు అమ్చొ రచ్చించుప కెర్లొసొ దిలి చి బోదనచి సత్తిమ్ జేవ్ ఇండితిన్తె రుజ్జు డీసెదె, చి జాకయ్ ‘సత్తిమ్’ మెన అన్నె మాన్సుల్ దెక ఒప్పునుల.

11 దస్సి, ‘బూలోకుమ్చ కీకేన్ రగుమ్చ మాన్సుల్క కి రచ్చించుప జతి వాటు దొర్కు కెరిందె’ మెన దేముడు కెర్లె దయ అస్సె, డీస అస్సె.

12 జా దయ అమ్క కిచ్చొ సికడయ్ మెలె, దేముడుక విరోదుమ్ జల వెర్రి కమొ వెర్రి ఆసల్ ముల మార్పువ జా, బుద్ది జా, సత్తిమ్ ఇండ, జో దేముడుచి గవురుమ్ రుజ్జు జతి రితి ఈంజ లోకుమ్తె జియె.

13 జర్లు జయెదె’ మెన అమ్ పూర్తి దయిర్మ్ నముకుమ్ తిలి జో దెతి సర్దవరుమ్ జెయిమ్ జతిన్క అమ్ నిదానుమ్ రకితె తంక. మెలె, ఎత్తిచి కంట వెల్లొ జలొ పరలోకుమ్చొ దేముడు అమ్చొ రచ్చించుప కెర్లొసొ జలొ యేసుక్రీస్తు ఉత్త జెతిన్క చి జో అన్నె ఉత్త జెతిన్ తెన్ పరలోకుమ్చి గవురుమ్ డీస్టిన్క అమ్ ప్రేమ తెన్ రకితె తంక.

14 పాపుమ్ ఎత్తి తెంతొ అమ్క *నెత్తివితి రిసొ, చి ‘అంచ సొంత మాన్సుల్ జా సత్తిమ్ కమొ కెర్తి ఆస తెన్ ఇండుత్’ మెన అమ్క సుద్ది కెర్తి రిసొ, అమ్చి రిసొ యేసు జోచి జీవ్ దా మొర గెలన్.

15 జలె, తీతు, ఈంజ ఎత్తి తుయి సికడె తా. ఒత్తచ నంపజలస సత్తిమ్ ఇండుక అన్నె నిదానుమ్ సికిత్ రితి, ప్రబు తుక దిలి అదికారుమ్ తెన్ జోవయించ తప్పుల్

§ 1:15 1:15 తిమోతిక రెగిడ్డి ఏక్ నంబర్ ఉత్తమ్ 4:2. * 1:16 1:16 ప్రబుచి మొక్కె చి మాన్సుల్చి మొక్కె. * 2:2 2:2 గ్రీకు బాస చి జా కోడుతె సూర్లు గట్ట పిత్తిసి ముద్దొ కెరంతిన్చి అర్దుమ్ కి వేర కమొ ఎత్తితె ముద్దొ కెరంతిన్చి అర్దుమ్ కి తయెదె. † 2:3 2:3 నెంజిలె, ‘జట్టి కెరయ్త ఆరిచ నిందల్ కెర్లు నాయ్’. ‡ 2:9 2:9 తిమోతిక రెగిడ్డి ఏక్ నంబర్ ఉత్తమ్ 6:1-2 దెక. § 2:11 2:11 మెలె, మున్నబోదల్క, తేర్బోదల్క బాల వెల్లొక, గొతిమాన్సుల్క, గొతి నెంజిల మాన్సుల్క, ఎత్తి జాతుల్చక, దేసిమ్లు ఎత్తిక, బాసల్ ఎత్తిక. కొరిందల్క రెగిడ్డి ఏక్ నంబర్ ఉత్తమ్ 12:13, గలతియల్ 3:28, కొలోస్సియల్ 3:11, డీసయ్లిసి 5:9. * 2:14 2:14 నెంజిలె ‘అమ్క అన్నె గెనన విడ్డల్ కెర్తి రిసొ....’

జోవయింక దెకవు, చి జేవ్ బుద్ది జతి రితి జోవయింక సత్తిమ్ దెకవ దయిరిమ్ నిదానుమ్ సంగు. జా ఎత్తితె తుక కో నిస్కారుమ్ నే దెకిత్ రితి గని తుక మరియాద దెకిత్ రితి తుచి కామ్ కెరు ఇండు.

3

చెంగిల్ కమొ కెరుక

1 ఒత్తచ నంపజలోసక తుయి కిచ్చొ ఉచార కెరవు మెలె, దేసిమ్ ఏలుప కెర్తసచి అదికారుల్చి కోడు సూన, జోవయింక మరియాద కెరుక. ప్రబుతుమ్చ ఆడ్రచి రితి జేవ్ ఇండుక. *కేన్ చెంగిల్ కామ్ అయ్లెకి, తోడు కెర్తి బుద్ది తెన్ జా కామ్ కెర్తు.

2 పడ్డొ, కక్క దూసుప కెర్తు నాయ్, చి జట్టు జతిసి దూరి కెరంత, మెత్తన తత్తు, కేన్ మాన్సుల్క కి పూర్తి మరియాద కెర్తె తత్తు.

3 ఆమ్ కి సొంత అగ్గె బుద్ది నెంతె తిలమ్, కోడు నే సూన్తన తిలమ్, మోసిమ్ జా పాపుమ్తె గెతె తిలమ్, వేర వేర ఆసల్ ఊసిల్క దెర్పు సెడ తిలమ్, కుస్సిదుమ్ తెన్ గోసల్ తెన్ జతె తిలమ్, అమ్ ఇండిత్ తిలి బుద్ది దెకిలె అన్నె మాన్సుల్ అమ్క 'వెట్కారుమ్చ' మెంతె తిల, చి ఎక్కిలోక ఎక్కిలో విరోదుమ్ కెర్తె తిలమ్.

4 గని దేముడు అమ్చొ రచ్చించుప కెర్తొసాచి దయ ప్రేమ †రుజ్జు జా అమ్క డీసిల్ తెంతొ,

5 జో అమ్క రచ్చించుప కెర్లొ, అమ్ కిచ్చొ పున్నిమ్ కెర్లి రిసా నాయ్, గని పూర్తి జోచి పెట్టిచి కన్కారుమ్చి రిసా అమ్క నొవర్ జెర్మయ్లి రితి కెర, జోచి సుద్ది తిలి ఆత్తుక అమ్చి పెట్టి దా అమ్క దోవ, సుద్ది కెర, అమ్క మార్పుప కెర్లన్.

6 దేముడుచి సుద్ది తిలి ఆత్తు జోవయించి ఎదివాట్ దర్ముమ్ తెన్ అమ్చి ఉప్పిరి సుచ దిలన్. అమ్చొ రచ్చించుప కెర్తొసా జలో †యేసుక్రీస్తుచి అత్తి సుచ దిలన్.

7 కిచ్చొ దొన్నిచి రిసా మెలె, అమ్ అగ్గె తెంతొ పూర్తి పాపుమ్ సుదల్ జలెకి అమ్ పున్నిమ్ జలి రితి జో దెకుక జోచి సర్ల. జోచి దయ వాటు అమ్ జోచ పుత్తర్లు జా పరలోకుమ్చి రాజిమ్తె బెదితి వరుమ్ దొర్కు జలి దయిరిమ్ అమ్క తంక మెనయ్ ఈంజ ఎత్తి జర్గు కెర్లన్.

8 "ప్రబుచి కోడు ఈంజ" మెన కచితుమ్ దెరను. అమ్చొ దేముడుక నంపజలస బుద్ది జా కీచెంగిల కమొ నిదానుమ్ ఇండుక ఎక్కి ఆన జంక సిక్కుత్ మెన ఈంజేవ్ కొడొ తుయి దయిరిమ్ తెన్ గట్టిజ సంగితె తా మెన అంచి ఆస. చెంగిల కమొ ఇండిలె, ఎత్తిజిన్క కామ్క జెయెదె.

* 3:1 3:1 నెంజలె, 'దేసిమ్క తోడు కెర్తి కేన్ కామ్....' † 3:4 3:4 యేసు అయ్లిన్ తెన్, జో అమ్చి పాపుమ్ గెచ్చయ్తి అర్పితుమ్ జలిన్ తెన్. ‡ 3:6 3:6 జో మొర పరలోకుమ్తె ఉట్ట గెలిన్క చి జో ప్రార్థన కెర్లినక యేసు అబ్బొన్చి జోవయించి సుద్ది తిలి ఆత్తు జెతికయ్ వాటు దొర్కు కెర్లన్. యోహాను 14:16, 16:17. § 3:8 3:8 నెంజలె 'చెంగిల్ కామ్ దొర్కు కెరనుక దెకనుక సిక్కుత్' మెన.... * 3:14 3:14 నెంజలె 'చెంగిల్ కామ్ దొర్కు కెరనుక దెకనుక సిక్కుత్'.

9 గని తెలివి డీసుక ఉచర సగుమ్జిన్ కిచ్చొ కిచ్చొ కొడొ పుసితె తత్తతి. దస బుద్ది నెంజలె తగుల్ పొన, పూర్లుల్చ సెకుమ్లుతె జెర్మిలసచి రిసాచ ఆరిచ మత్తెలివొ పొన, కొడొ జుజవ జట్టి జతిసి పొన, అమ్ యూదుల్చ ఆగ్గుల్చి రిసాచ కొడొచ తగుల్ పొన. దసచతె లాబుమ్ నాయ్, కామ్క నెంజలి, కిచ్చొ చెంగిల్ దెర్తి నాయ్ చి రిసా దసచ దూరి కెరు.

10 కేన్ మాన్సు జలెకు కొడొ జుజయ్తిన్ గట్టక ఒత్తచ నంపజలసక జట్టు జట్టు కెరయ్తి రితి జలె, తొలితొ చి సుట్టు జవున్, తివ్వెరి జవున్, జోక జాగర్త నంగ తా, చి ఒత్త తెంతొ జో అన్నె అల్లర్ కెర్లె, జో తెన్ బెద నాయ్.

11 దసా మాన్సు మార్పుప జా గార్ జా అస్సె, పాపుమ్ జా అస్సె మెన తుయి జాన్చి. జోచి పాపుమ్ జోచ కమొతె రుజ్జు జతయ్. జోచి పాపుమ్ జో వయ జోచి సొంత సిచ్చ ఆనన అస్సె.

తీతుక పవులు బుక్కార్లిసి

12 అర్తెమాక గే, తుకికుక గే తుచితె ఆవ్ తెద్దయ్లె, నికొపొలి పట్టుమ్తె అంచితె బే బేగి జెంక చజు. చల్లి పొది ఒత్తయ్ తంక ఉచర అస్సె.

13 పడ్డొ, ఆగ్గుల్చ తీర్పుల్ రుజ్జుల్ సంగితొ జేనాను చి అపొల్లొ ప్రయానుమ్క అన్నె బార్ జతి పొదిక ప్రయానుమ్క జోక కిచ్చొ కొత్తు. నే తతి రితి, కామ్క జెతిసి ఎత్తి దొర్కు కెరు.

14 పడ్డొ, అమ్చ నంపజలోసక ఆరి పలితుమ్ నే దెర్తి రితి కామ్క నెంజలి రితి నే జతె, బాద తిల తోడు నెంజిల మాన్సుల్క తోడు దెతి రిసా *చెంగిల్ కమొతె బెద కమొతె నిదానుమ్ కెరుక జేవ్ అలవాట్ జత్తు.

15 అంచి తెన్ తిలస ఎత్తిజిన్ తుక జోవయించి ప్రేమ సంగ తెద్దయ్తతి. అమ్చి తెన్ ప్రబుచి ఉప్పిర్చి ఎక్కి నముకుమ్ తా ఒత్త తిల అమ్క ప్రేమ కెర్తనక అమ్చి ప్రేమ సంగు.

తుమ్ ఒత్త తిలస ఎత్తిజిన్చి ఉప్పిరి ప్రబుచి దయ తవున్!

పిలేమోసుక రెగిడ్లి ఉత్త్రమ్ బారిక్ జలో పవులు పిలేమోసుక రెగిడ్లి ఉత్త్రమ్

మొదొల్ కోడు

1-2 ప్రేమ తిలో అమ్చి తెన్ ప్రబుచి కామ్తె బెదిలో *పిలేమోసుక, పడ్డో అమ్చి బేని జలి అప్పియక, చి అమ్చి తెన్ చి కామ్ కెర్టో †అర్కిప్పుక కి, పడ్డో తుచి గెరి సబ కెర్టి సంగుమ్చ ఎత్కిక, క్రీస్తు జలో యేసుచి సుబుమ్ కబుర్ ఆవ్ సూనయలి రిసా ఆవ్ ‡జేలి జలో పవులు అమ్చొ బావొ జలో తిమోతి తెన్ రెగిడ్లి ఉత్త్రమ్.

3 అమ్క అబ్బొ జలో దేముడుచి, ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

పిలేమోసుచి రిసా పవులు సర్ల రెగిడ్లిసి

4 ఓ పిలేమోసు, ప్రార్దన కెర్టె పొది తుక కెయక ఉచర్లె కి, అంచొ దేముడుక తుచి రిసా అంచి సర్ల ఆవ్ సంగితసి.

5 కిచ్చొక మెలె, ప్రబు జలో యేసుక తుయి నంపజలిన్చి రిసా, చి జోవయింక నంపజా సుద్ది జా జోచయ్ జల మాన్సుల్ ఎత్కిజిన్క తుయి ప్రేమ కెర్టె తతిన్చి రిసా ఆవ్ సూన్తె తత్తసి.

6 అన్నె మాన్సుల్ క్రీస్తుక నంపజతి రితి, జోచి ఉప్పిర్చి తుచి నముకుమ్తె తుయి జోవయింక బెదవంతసి. తుయి దస్సి జతిసి పలితుమ్ దెర్సు చి క్రీస్తుచి తెడి అమ్క దొర్కు జతి చెంగిల్ తిలిసి ఎత్కిచి రిసా అర్దుమ్ కెరన జేవ్ అన్నె మాన్సుల్ కి దెరన్తు మెన కి ఆవ్ ప్రార్దన కెర్తసి.

7 అన్నె కిచ్చొచి రిసా ఆవ్ ప్రార్దన కెర్తినతె అంచి సర్ల సంగితసి మెలె, బావొ, తుచి ప్రేమచి రిసా అంక ఒగ్గర్ సర్లనంతోసుమ్ జా అస్సె. కిచ్చొక మెలె తుచి ప్రేమచి రిసా ప్రబుచయ్ జల మాన్సుల్ ఎత్కిజిన్చి పెట్టిచి దయిరిమ్ తుయి అన్నె జియడ్లి రితి కెర అస్సిసి.

ఒనేసిముక పిలేమోసుతె అన్నె తెద్రయ్లిసి

* **1:1-2 1:1-2** జో సామ్మరి జా తిలో, కిచ్చొగె, జోవయింక గొతిమాన్సు తిలో; 10-16చి కొడె. అన్నె, మాన్సుల్ గోత్ అయ్లె, జేవ్ తతా గదివొ జోవయింబి గెరి తిల, బెర్తె, 22చి కోడు దెక. † **1:1-2 1:1-2** కొలోస్సియల్ 4:17 దెక. కొలోస్సియల్చి సంగుమ్తె జో అర్కిప్పుక కి ప్రబుచి కామ్ కెరెదె, కిచ్చొగె. ‡ **1:1-2 1:1-2** రోమ్ పట్టుమ్తె జో జేలి జా తిలి పొది ఈంజ ఉత్త్రమ్ రెగిడ్లి, మెన ఒగ్గర్జిన్ ఉచర్తతి. బారికుల్ 28:16 దెక. నెంజిలె, కైసరియ పట్టుమ్తె, బారికుల్ 23:23-24:27, నెంజిలె ఎవెసు పట్టుమ్తె, గని ఎవెసుతె జో జేలి జలిన్క రుజ్జా నాయ్. పిలిప్పితె; బారికుల్ 16:23; చి యెరూసలేమ్తె; బారికుల్ 21:33; కి జేలి జా తిలన్, గని ఒగ్గర్ దీసల్ నాయ్. § **1:10 1:10** పవులు జోవయింక సికడ్లికయ్, కిచ్చొగె, జో ఒనేసిము క్రీస్తుక నంపజలో, చి దస్సికయ్, చి జోవయింబి ప్రేమకయ్, దస్సి సంగితయ్. * **1:11 1:11** కొలోస్సి పట్టుమ్చొ మాన్సు జయెదె. కొలోస్సియల్ 4:8-9 దెక. † **1:11 1:11** 'ఒనేసిము' మెలి నావ్క కిచ్చొ అర్దుమ్ తయెదె మెలె, 'కామ్క జెతోసా'. ఒగ్గర్జిన్ గొతిమాన్సుల్క, బెర్తె, జా నావ్ తిలి. జో అగ్గె కిచ్చొక కామ్క నెంజిలో మెలె, జో ఉట్టు నిగ తిలి రిసా; 15చి కోడు, చి ఏక్ వేల చోర తిలో, 18-19చి కోడు. ‡ **1:16 1:16** నెంజిలె 'తుయి కి జో కి కొలోస్సియల్చి రిసా ఆగ్గెక తుక బావొ జయెదె, గని అన్నె....' § **1:16 1:16** నెంజిలె 'ప్రబుచి తెడి తుక ప్రేమ తిలో....'

8 జాకయ్, ఏక్ కామ్చి రిసా తుక సంగుక అంక దయిరిమ్. జా కామ్ తుయి జర్గు కెరుక ముక్కిమ్చి రిసా తుక ఆడ్ర దెంక కి క్రీస్తుచి తెడి అంక దయిరిమ్ అస్సె,

9 గని అంచి ప్రేమక తుక ఆడ్ర దెయి నాయ్, గని ఆవ్, మంత్రో మాన్సు, క్రీస్తు జలో యేసుచి సుబుమ్ కబుర్ సూనయలి రిసా జేలి జలో పవులు, తుక ఆవ్ ప్రార్దన కెర్లి రితి బతిమాల్పా జా

10 కిచ్చొ నజితసి మెలె, అన్నె పుత్తు రితో జలో ఒనేసిముచి రిసా తుక ఆవ్ బతిమాల్పా జతసి. ఆవ్ జేలి జలి తెంతో జోవయింక కీఅబ్బొసి రితో జా అస్సి.

11 అగ్గె, మాత్త్రమ్, జో *ఒనేసిము తుక గొతిమాన్సు జలెకి, తుక †కామ్క నెంజిలో. గని అప్పె, జలె, తుక కి అంక కి కచితుమ్ కామ్క జెయెదె.

12 జలె, అంచి సొంత జీవు తెద్రయ్లి రితి; తుచితె జోవయింక ఆవ్ అన్నె తెద్రయ్తసి.

13 సుబుమ్ కబుర్ ఆవ్ సూనయలి రిసా ఆవ్ జేలి జలిన్తె జో అంక అన్నె తోడు తతి రితి, జోచి అత్తి తుయి అంక తోడు దిలి రితి, జోక ఇన్నె అన్నె సేంపు తియంతయ్,

14 గని, తుచి సెలవ్ నెంతె అన్నె తియంతయ్ జలె, తుక బలవంతుమ్ కెర్లి రితి జయెదె మెన, నెసిలయ్. తుచి ఇస్టుమ్క తుయి సొంత తెద్రయ్లె జలె, బాద తయె నాయ్.

15 తుచితె తెంతో జో ఉట్టు నిగ గడియ వేరతె తిలిసి కిచ్చొక గే జర్గు జలి మెన ఆవ్ ఉచర్తిసి కిచ్చొ మెలె, జో అప్పె తెంతో అగ్గెచి బుద్ది నెంతె తుక నిదానుమ్ తా ఒగ్గర్ దీసల్చి చెంగిల్ సేవ కెర్లి రిసాయి ఇసి జర్గు జంక ప్రబు సెలవ్ దిలన్.

16 అప్పె తెంతో జో తుక రితోయి గొతిమాన్సు నెంజె. ‡అంక తుక జో గొతిమాన్సు జయెదె, గని అన్నె జో కీప్రబుక నంపజా, బుద్ది మార్సుప జా ఆత్మక తుక ప్రేమ తిలో బావొ కి జా అస్సిచి, పూర్తి నిదానుమ్ తయెదె. ఇన్నె అంక దస్సి నిదానుమ్ తిలో. అన్నె తుకయ్ కి దస్సి నిదానుమ్ తయెదె.

17 జాకయ్, 'ప్రబుచి సుబుమ్ కబుర్ కామ్తె జో అంచి తెన్ బెద అస్సె' మెన తుయి అంక ప్రేమ అస్సిన్ జలె, తుయి అంకయ్ కిసి బెదవంతె గే, జో ఒనేసిముక కి దస్సి బెదవను.

18 జో తుక కిచ్చొ నస్తుమ్ కెర తయెదె గే, జో తుక కిచ్చొ రునుమ్ జా అస్సె మెలె, ఆవ్వి పూచి జా తుక దెయిందె.

19 ఆవ్ పవులు, సొంత ఆతు తెన్ ఇసి మెన రెగిడ్లిసి. ఆవ్ సొంత పూచి జా, ఒనేసిము తుక దెంక తిలిసి ఆవ్వి

దా గెలిందె. తూయి, మాత్రుమ్, తుచి ఆత్మ తెన్ జెర్మున్చి రిసా అంకయ్ రునుమ్ జలి రితి జా అస్సిసి, గని తుక సంగుక నెసి.

²⁰ గని, బావో, *ప్రబుచి తెడి అంక ఇదిల్ జవున్ లాబుమ్ తుచితె దొర్కు జతి రితి, దయ కెర, అంచి పెట్టి ఆవ్ సర్ద జతి రితి, ప్రేమచి రిసా జో మాన్సుక తుయి చెమించుప కెరు.

²¹ 'సంగిలి కోడు నూనెదె. నాయ్, అన్నెయ్ చెంగిల్ కెరెదె' మెన తుచి రిసా అంక దయిరిమ్చి రిసా, ఆవ్ ఇసి మెన తుక కబుర్ రెగిడ్డసి.

²² మదెనె, అంచి రిసా ఒత్త ఏక్ గది తెయార్ కెర. అంక 'విడ్డల్ జా అమ్తె గోత్ జెవున్' మెన అంచి రిసా ప్రార్దన కెర్తసు. జలె, తుమ్చ ప్రార్దనల్చి రిసా ప్రబు అంక వాట్ దెవున్ మెన అంచి ఆస.

ఆకర్ కోడు

²³ క్రీస్తు జలో యేసుచి తెడి అంచి తెన్ †జేలి రితో జలో ‡ఎవప్రా తుక జోచి ప్రేమ సంగ తెద్రయ్తయ్.

²⁴ అన్నె కొన్న మెలె, అంచి తెన్ ప్రబుచి కామ్ కెర్తన మార్కు, అరిస్తార్కు, దేమా, చి లూకా, జోవయించి ప్రేమ కి సంగ తెద్రయ్తతి.

²⁵ ప్రబు జలో యేసుక్రీస్తుచి దయ తిలిసి ఎత్తి తుమ్చి ఆత్మతె తవున్.

* 1:20 1:20 నెంజిలె 'ప్రబుచి తెడి తుయి కి ఆవ్ కి అస్సుమ్, చి....' † 1:23 1:23 జో ఎవప్రా నిజుమి జేలి జా తిలో గే ఎక్కి జో వవులు తెన్ బెద జా బాద ఓర్పువ జలి రిసా దస్సి మెన్తయ్ గే నేనుమ్. ‡ 1:23 1:23 జో ఎవప్రా కి కొలోస్సియుడు; కొలోస్సియుల్ 4:12; చి కొలోస్సితెచి సంగుమ్ మొదోల్ కెర తిలో; కొలోస్సియుల్ 1:7.

ఎబ్రియూల్ క రెగిడ్లి ఉత్తమ్* ఎబ్రియూల్ క రెగిడ్లి ఉత్తమ్

యేసుక్రీస్తు ఒగ్గర్ ముక్కిమ్

1 ఒగ్గర్ వేర వేర రగల్ తెన్ జోచ †కబుర్లు సంగిలసచి అత్తి దేముడు అమ్చ పూర్తులక జా పొది జోచ కొణొ లట్టబ్బన్.

2 గని, ఈంజ ఉగుమ్చి ఆకర్చ పొదులె, జోచొ సొంత పుత్తున్చి అత్తి అమ్క జోచి †కోడు లట్టబ అస్సె. 'జోచి ఈంజ ఎత్కి' మెనయ్, ఎత్కి కి జోక అక్కునుదొ మెనయ్, దేముడు జో పుత్తున్క నిసాన అదికారుమ్ దా అస్సె. జో పుత్తున్చి అత్తి ఎత్కి లోకుమ్క జెర్మయ్లన్.

3 జో పుత్తున్తె దేముడుచి పరలోకుమ్చి ఉజిడి గవురుమ్ పూర్తి డీస్తయ్, చి నిజుమ్ దేముడు కీసా అస్సె గే, పుత్తుసి కిచ్చొ నే పిట్టె కీదస్సాయి అస్సె. జో పుత్తుసి జోచి సెక్తి కోడుకయ్ లోకుమ్లు ఎత్కి కి జోయ్యి ఏలుప కెర్తయ్. అన్సె, పాపల్ పుంచి జతి మాన్సుల్ నుద్ది జతి వాటు జో తెయారొ కెర తా, పరలోకుమ్తె దేముడుచి ఉజెతో పక్క వెసిల్న్.

4 జో ఒత్త నే వెసితె అగ్గె, దూతల్చి కంట జోచి విలువ ఒగ్గర్ తిలిన్చి రుజ్జు అయ్లి. జోచి నావ్ జోవయించి నావ్చి కంట కెద్ది విలువ జతయ్ గే, తెద్ది వెల్లో జో జా అస్సె.

5 కిచ్చొక జో ఇదిలి వెల్లో జా అస్సె మెన జానుమ్ మెలె, దేముడుచి కోడుతె రెగ్గయ్లి రితి, కేన్ దూతక;

*"తుయి అంచొ సొంత పుత్తు, తుక ఆజి ఆవ్ జెర్మయ్లయ్ అస్సి."

మెన దేముడు కెయ్య సంగిలన్ గె? నాయ్ గెద, కేన్ దూతక జో దస్సి సంగె నాయ్. నెంజిలె,

†"జోక అబ్బొసి జయిందె, చి జో అంక పుత్తు జయెదె"

మెన కేన్ దూతక కెయ్య సంగిలన్ గె? జోవయింక దస్సి సంగె నాయ్.

6 పడ్డె, అన్సె, జో తొల్పూర్ జతో క్రీస్తుక ఈంజ లోకుమ్తె దేముడు జెర్మయ్లి పొది,

*

: 1:0 ఈంజ ఉత్తమ్ రెగిడ్లిసా ఈంజ ఉత్తమ్తె కిచ్చొ ముక్కిమ్ దెకయ్తయ్ మెలె, ఈంజయి లోకుమ్చి యూదుల్చి దేముడుచి గుడి, పరలోకుమ్క, మెలె ఎత్కి అదికారుమ్ తిలో దేముడు తతి టాన్క ఎత్కి టాలి జతయ్, నీడయ్ జతయ్. దస్సి, యూదుల్ కెర్తి రితి సేవ కెర్త వెల్లెల పూజర్లుచి కామ్ యేసు పరలోకుమ్తె కెర్తి సేవక ఎత్కి టాలి జతయ్, నీడయ్ జతయ్. 'యేసు జోవయింక నంపజలసచి పాపుమ్ గెచ్చవ, పరలోకుమ్తె దేముడు అబ్బొన్చి మొక్కె అమ్క తోడు తతి తెంతొ జా అగ్గెచి రితి నాయ్' మెన ఈంజ ఉత్తమ్తె రెగిడ్లిసి రుజ్జు దెకయ్తయ్. † 1:1 1:1 దేముడుచి కబుర్లు సంగిలస మెలె, జా కామ్క కక్క జో నిసాన తయెదె గే, జోవయించి అత్తుక జోవయించి చొండి పుట్టవ జోవయించ కబుర్లు సంగెదె. జోవయింతె సగుమ్జిన్చి అత్తి కి జోవయించ కొణొ రెగ్గయ్లన్, పూర్తుమ్ పొది. † 1:2 1:2 క్రీస్తు సంగిలిసి, జో బోదన కెర్లిసి, జో కెర్ల కమె, జో ఇండిలి బుద్ది, జో మొర అన్సె జలిసి, జా ఎత్కితయి ఎత్కి అదికారుమ్ తిలో దేముడు జోవయించి అత్తి అమ్క జోవయించి కోడు సంగిల్ రితి జతయ్; జో ఎత్కి అదికారుమ్ తిలో దేముడుచి కోడు జో యేసుక్రీస్తుయి, మెలి రితి. యోహాను 1:1-4, 14 దెక. § 1:3 1:3 కొల్స్సియూల్ 1:15-17, 19, చి 2:19 దెక. * 1:5 1:5 కిర్తనలు 2:7 † 1:5 1:5 నమూయేలు దొన్నిచి పుస్తకుమ్ 7:14. † 1:6 1:6 ద్వితీయోపదేశ కాండుము 32:43, కిర్తనలు 97:7. § 1:7 1:7 కిర్తనలు 104:4. * 1:8 1:8 కిర్తనలు 45:6-7. † 1:10 1:10 కిర్తనలు 102:25-27. † 1:13 1:13 కిర్తనలు 110:1, మత్తయి 22:44, ఎబ్రియూల్ 10:13.

‡"ఆవ్ దేముడుచ దూతల్ ఎత్కి జోకయ్ బక్తి కెర్తు!"
మెలన్.
7 పడ్డె దూతల్చి రిసా కిచ్చొ మెన్తయ్ మెలె,
§"జో జోచ దూతల్క వాదుల్ రిత, జోచ సేవ కెర్తసక ఆగివొ లగితి రిత జో జర్గు కెర్తయ్."
మెన సంగితయ్.
8 గని జోచొ సొంత పుత్తుసి రిసా కిచ్చొ మెన్తయ్ మెలె,
* "ఒ దేముడు, తుచి సిజాసనుమ్ కెయక తెయక తతిసి,
నీతి మెలొ రానొచి డండొ తెన్ తుయి ఏలుప కెర్తసి.
9 నీతిచి ఉప్పిరి ప్రేమ తా, గని అబద్దుమ్ ఎగ్గరె నెన అస్సిన్.
జాకయ్ తుయి అన్సె తుచి తెన్ తిలి ఎత్కి జివుల్చి కంట వెల్లో జంక మెన
దేముడు, తుచొ దేముడు, తుచి ఉప్పిరి పూర్తి సర్తసంతోసుమ్ జా తుక నిసాన అదికారుమ్ దా, తుచి బోడితె జోచి తేల్ సువ దా అస్సె."
10 దేముడు అన్సె కిచ్చొ మెన్తయ్ మెలె,
†"తుయి, ప్రబు, కిచ్చొ నెంజిలి పొది బూలోకుమ్ జెర్మయ్లది, చి ఆగాసుమ్ తిలిసి ఎత్కి తుచి అత్తిచి కమె.
11 బూలోకుమ్ ఆగాసుమ్ జలె, పాడ్ జయెదె గని తుయి తియొఁ జా తస్సె.
పాలల్చ రిత జేవ్ పోర్న జా పాడ్ జవుల,
12 చి డుప్పటిక కీసి మడ్డ కెరుక జయెదె గే, దస్సి జాక తుయి మడ్డ కెర్తె, చి మార్పుప జయెదె. గని తుయి కీసి అస్సిన్ గే, దస్సి తాఁ జస్సె, కెయక తెయక తాఁ జస్సె"
మెన దేముడు పుత్తున్క సంగితయ్, గని,
13 ‡"జలె తుచ విరోదుమ్ సుదల్క తుచి సుదితి పొద్రొ జేవ్ జతి రితి ఆవ్ జర్గు కెర్తె ఎదక, అంచి ఉజిల్ పక్క తుయి వెన తా" మెన కేన్ దూతక కెయ్య జవుకు సంగిలయ్ గె?
14 జేవ్ దూతల్ కిచ్చొ జవుల మెలె, రచ్చున దొర్కు జత ప్రబుచ మాన్సుల్క 'చెంగిల్ తత్తు' మెనయ్ జోవయింక

దెకిత దేముడుచి సేవ కెర్త జీవుల్ మెన దేముడు జోవయింక జా సేవ దా అస్సె. జేవ్ జోచి సేవ కెర్తనయ్.

2

యేసు మాన్యుల్చి పాపుమ్ గెచ్చయ్లీసి

1 జలె, అమ్ జేవ్చి సత్తిమ్ నే పచ్చితి రితి, నే ముల్లి రితి అమ్ పెట నే దెర గెతె నూన్లీచి చి రిసా చెంగిల్ ఉచర, అమ్ ఏదాస్ట కెరుక.

2 మెలె పూర్గుమ్చి *ఆగ్గుల్చి ప్రమానుమ్చి రిసా దూతల్ జానవ కెర ఎత్తి కోడు నిజుమ్చి జలె, అన్సె, మాన్యుల్ ఆగ్గుల్చి కోడు పిట్టయ్లె, దేముడుచి కేన్ జవున్ కోడు నే కెర్లె, కిసి జేవ్ దూతల్చి అత్తి జో సంగిలి ఎదిలి సరిగా సీచ్చ జవుల జలె,

3 అప్పెచి ప్రబు దెతి ఈంజ వెల్లి రచ్చనక ఆమ్ విలువ నే దెకితె, విలువ నే కెర్లె, అమ్చి సీచ్చ కిసి పిట్టెద? పిట్టె నాయ్. ఈంజ రచ్చన, జలె, యేసుప్రబు తొలితో సొంతయ్ జానయ్లి రిసా, జోక తొలితో నూన్లస అమ్కయ్ సాచి సంగిల.

4 పడ్డో, అన్సె, జో యేసుక్రీస్తుచి అత్తి జో దెతి రచ్చనచి రిసా దేముడు సొంత వేర వేరతె రుజ్జుల్ దెకయ్లన్. కిచ్చో కిచ్చోతె జా రచ్చనచ రుజ్జుల్ దెకయ్లన్ మెలె, జోచి అదికారుమ్ దెకయ్త వెల్లొ కమె కెర్లినతె, చి దేముడుచి సుద్ది తిలి జోచి ఆత్మవరల్ జోచి ఇన్సుమ్క కక్క కక్క వంట దిలిన్తెయి ఈంజ రచ్చనచి రిసా జోచి సాచి దా అస్సె.

5 అమ్ సంగితి †జెతికయ్ లోకుమ్ ఏలువ కెరుక దూతల్చి అత్తి దేముడు సార్ప కెర దెయె నాయ్.

6 కేనె గే రెగిడ్లి ఇసి సాచి అస్సె. ఇసి మెలిసి;
‡“మాన్యుక తుయి ఉచరన్క జో కిచ్చో విలువసా? నెంజిలె, మాన్యు జా జెర్మున్ అయ్లోసాక కిచ్చోక తుయి విలువ దెకితసి?

7 దూతల్చి కంట జోక ఇదిలి దాక్ తతి రితి తుయి జర్గు కెర్లది,

గని అప్పె జోక గవురుమ్ కెర అదికారుమ్ దా, జోక ఏలువ కెరవ అస్సిసి.

8 జోచి చాటు సుదెతి రితి ఎత్తి జోచి అత్తి తుయి సార్ప కెర దా అస్సిసి”
మెన రెగ్గ అస్సె. జలె, దేముడు ఎత్తి జోచి అత్తి సార్ప కెర దా అస్సెచి రిసా జో ఏలువ నే కెర్లిసి కిచ్చో కి నాయ్. ఎత్తి జోచి అత్తి తతిన్చి రుజ్జు అప్పెచి మట్టుక అమ్క సరిగా డీసె నాయ్.

9 గని ఇన్నె ‘మాన్యు జా జెర్మున్ అయ్లోసా’ మెన యేసుకయ్ సంగితనుమ్. యేసుకయ్ దెకితనుమ్. జో గడియయ్ దూతల్చి కంట దాకు జలె, గని దేముడు అబ్బొన్చి దయచి రిసా ఎత్తి మాన్యుచి నావ్ తెన్ అమ్చి సీచ్చ వయంతి రిసా జో బాదల్ సేడ మొర్లిన్చి రిసా జో అప్పె ఎత్తి అదికారుమ్ గవురుమ్ జా కిరీటుమ్ గలన ఏలువ కెర్తయ్.

10 కిచ్చోక ఇసి జర్గు జలి మెలె, ఒగ్గర్జిన్ మాన్యుల్క జోచి పరలోకుమ్చి ఉజిడతె గవురుమ్తె బెదవంతి రిసా మాన్యుల్క రచ్చన దొర్కు కెర్లొసా కిబాదల్ ఒర్పువ జతి వాటుయి జీన సరి జలె రచ్చించువ కెర్లొసా పూర్తి జంక ఎత్తిక ఆదారుమ్ తిలె, ఎత్తి ఏలువ కెర్లొ దేముడు జర్గు కెర్లిసి చెంగిలి, పూర్తి బెదితయ్.

11 నిజుమి, సుద్ది కెర్లొ యేసుక చి జో యేసు సుద్ది కెర్తసక ఎక్కి మొదోల్; దేముడు అబ్బొసి. జాకయ్, జోవయింక ‘అంచ బావుడ్లు’ మెనుక యేసుక లాజ్ నాయ్.

12 * “అంచ బావుడ్లుతె తుచి నావ్ తుచి గవురుమ్ సూనయిందె, సంగుమ్చి నెడమె తుచి గవురుమ్ గాయిందె” మెలి కోడుతె, అన్సె,

13 † “జోచి ఉప్పిరి అంచి నముకుమ్ తియిందె” చి అన్సె,
‡ “ఇన్నె ఆవ్ అస్సి, చి దేముడు అంక దిల జోచ బోదల్ అంచి తెన్ అస్సి”
మెన యేసు సంగిల్ రితి రెగిడ్లి కోడుతె ఇసి ఒప్పణ్ణొ.

14 జలె, ఎక్కి ఆగ్, ఎక్కి లోయి బోదల్ ఎత్తిక తయెదె చి రిసా, సొంత కి ఈంజయ్ అమ్ మాన్యుల్చి ఆగుతె, ఈంజయి లోయితె జో యేసు మాన్యు జా జెర్మున్ జా బెదిలన్. కిచ్చోక మెలె, మాన్యు సేడ్డి మొర్కు జో సేడ జీన, మొర్కుచి ఉప్పిరి అదికారుమ్ తిలె సయ్తాన్చి ఉప్పిరి జీనుక మెనయ్ అమ్చి అగు అమ్చి లోయి జో దెరన్లన్.

15 జోవయించి ఒండి జీవితమ్క మొర్కుచి ఉప్పిర్చి బయిమ్క దెర్కు సేడ్ల ఎత్తిజిన్క విడ్డల్ కెరుక మెనయ్ దస్సి జా జీనుక ఒప్పన, దస్సి జా జిన్లన్.

16 కిసి మెలె, ఈంజ ఎత్తి కక్కయ్ రచ్చించువ కెరుక మెలె, దూతల్క రచ్చించువ కెరుక నాయ్ గని కిఅబ్రాహామ్చి సెకుమ్తె జెర్మిలసక ‘రచ్చించువ జతు’ మెనయ్.

17 జాకయ్, దేముడుచి సేవ కెర్లొ కన్కారుమ్ దెకితో నిదానుమ్చో పూజరి జా, ప్రెజల్చ పాపల్ పుంచ దా జోవయింక దేముడు తెన్ అన్నె బెదయ్తి రితిచి అర్పితుమ్

* 2:2 2:2 నిర్గమకాండుమ్ 20 అద్యయిమ్, 31:18 చి ద్వితీయోపదేశ కాండుము 5:6 దెక. † 2:5 2:5 యెసయా 65:17, 66:22, లూకా 21:33, డీనయ్లిసి 5:10, 21:1, తిమోతిక రెగిడ్లి 2 నంబర్ ఉత్తమ 2:12. ‡ 2:6 2:6 కీర్తనలు 8:4-6. § 2:10 2:10 18మా కోడు దెక. * 2:12 2:12 కీర్తనలు 22:22. † 2:13 2:13 యెసయా 8:17. ‡ 2:13 2:13 యెసయా 8:18. § 2:16 2:16 గలతియూల్ 3:6-9, చి రోమియూల్ 4 అద్యయిమ్ దెక. ‘అత్తుక అబ్రాహామ్చి సెకుమ్తె జెర్మిలస’ మెలె, అబ్రాహామ్చి రితి నముకుమ్ తిలస.

జతి రిసాయి, ఎత్కి రగల్ క ఎత్కి బాదల్ తె ప్రెజల్ జల జోవయించ బావుడ్లుచి రితి జో జంక తిలి. జో మాన్సుల్ చి రితి జా జోవయింక జెత రగల్ బాదల్ జో ఓర్సుప జలెకయ్ జో చెంగిలో పూజరి జా కన్యారుమ్ దెకెదె మెనయ్.

18 దస్సి, జో సొంత బాదల్ సేడ పరిచ్చ జా జిన్లి రిసా, జేవ్ బాదల్ సేడ పరిచ్చ జత అన్నె మాన్సుల్ క జో తోడు తంక తెరె.

3

మోసే కంట దేముడుచొ వుత్తుసి వెల్లో

1 జాకయ్, ప్రబుచి సుద్ది జా జోచయ్ జల ఓ బావుడ్లు, పరలోకుమ్ తె బెదుక తుమ్ నిసాన జా జో బుకార్లన, దేముడుచొ బారికి జలో, చి జోచొ ఎత్కిక వెల్లో పూజరి జలో మెన యేసుచి రిసా అమ్ ఒప్పన అస్సుమ్. జలె, జోచి రిసా ఉచరుమ.

2 దేముడుచి గేర్ జల యూదుల్ తె తా మోసే కిసి జో దేముడుచి కామ్ నిదానుమ్ కెరై తిలో గే, దస్సి ఈంజ బారికి జతి రితి కామ్ ఎత్కిక వెల్లో పూజరి కెరై రితి, కామ్ క నిసాన్లో దేముడుక యేసుయి నిదానుమ్ తిలన్.

3 గని గేరుచి కంట అన్నె గేర్ బందిలోసాక కిసి ఒగ్గర్ విలువ తయెదె గే, దస్సి, దేముడుచి గేర్ చతె తిలో మోసేచి కంట యేసుయి జా గేర్ బందిలోసా జా తా, అన్నె ఒగ్గర్ గవురుమ్ క విలువ జతయ్.

4 ఎత్కి గేరు, కచి అత్తి గే బందిలిసి, గని ఎత్కి బందిలోసా దేముడుయి.

5 జలె, దేముడు పణ్ణొక సంగిత కొణెచి రిసా సాచి గుర్తు సంగితి రిసా, జో దేముడుచి గేర్ ఎత్కితె మోసే నిదానుమ్ చొ సేవ కెరైసా జలో.

6 గని క్రిస్తు ఈంజ లోకుమ్ తె జా కెర, జో వుత్తుసి జలి రిసా, దేముడుచి గేరు నిదానుమ్ ఏలువ కెరై తిలన్. ఆకర్ ఎద జోచి ఉప్పిర్ చి అమ్ చి డిట్టుమ్ దెరన్లె, జో రచ్చన దా అమ్ క పరలోకుమ్ తె బెదయ్ లిన్ చి అమ్ చి దయిరిమ్, ఆస అమ్ దెరన్లె, జోచి గేర్ చయ్ ఆము జా అస్సుమ్.

యేసు దెతి విస్తాంతి రచ్చన తుమ్ పిట్టవన నాయ్

7 “జాకయ్, దేముడుచి సుద్ది తిలి ఆత్మ సంగిలి రితి;

* జేవ్ అగ్గెచ ప్రెజల్ చి పెట్టి బేడు బందిల్ రితి జా, జోచి కోడు నే సూన్లి రితి జల.

తూమ్, జలె, ఆజి జోచి అవాడ్ తుమ్ సూన్లె, దస్సి నే జతి రితి, జాగర్త దెకన.

8 పూర్ణుమ్, † జోచి కోడు సూనుక నెన

జా బయిలు దేసిమి బులై తిలి పొది

* 3:7 3:7 క్రిస్తనలు 95:7-11. † 3:8 3:8 నిర్ణమకాండుమ్ 13-40 అద్యయల్, లేపీయకాండుమ్, సంక్యాకాండుము, ద్విత్తియోపదేశ కాండుము. ముక్కిమ్ క నిర్ణమకాండుమ్ 32 అద్యయిమ్, చి సంక్యాకాండుము 14 అద్యయిమ్ దెక. ‡ 3:11 3:11 తెదొడచి జో దెంక ఉచర తిలి విస్తాంతి కిచ్చొ మెలె, కనాను దేసిమ్ జోవయించి తా గెతి రితి దెతిసి. జా దేసిమ్ అప్పె పరలోకుమ్ చయ్, జా విస్తాంతి పరలోకుమ్ చి విస్తాంతికయ్, టాలి జయెదె. § 3:15 3:15 క్రిస్తనలు 95:7-8.

* 3:17 3:17 నిర్ణమకాండుమ్ 32 అద్యయిమ్, సంక్యాకాండుము 14, ముక్కిమ్ క 14:27-30.

ప్రెజల్ జోక పరిచ్చ కెరై రితి, రాడ్ జీవు జతె తిల.

9 జో దేముడు సంగిలి రితి;

అంచి ఉప్పిరి అన్మానుమ్ జా పరిచ్చ కెరై రితి జా

జేవ్ జా దొన్ని విస్సా వెర్సుల్ అంచ కమొ దెకిలెకి కిసి జల గే,

తుమ్ దస్సి జా నాయ్.

10 జేవ్ దస్సి అన్మానుమ్ జతికయ్, జా ఉగుమ్ చచి రిసా ఆవ్ కోపుమ్ జా, జోవయించి పెట్టి, కెయెక తెయెక అంచి వాటు ముల పిట గెతతి.

అంచి ఇన్ముమ్ నేన్లి రితి ఇండితతి మెలయ్, చి

11 ‘అంచి † సుక్కుమ్ తె జేవ్ కెయెక బెదుక ఆవ్ ఒప్పి నాయ్’ మెన ఒట్టు గలన అంచి కోపుమ్ క ఒప్పన్లయ్” మెన, సంగితయ్.

12 జలె, బావుడ్లు, జీవ్ తిలో జీవ్ దెతో దేముడుక తుమ్ దూరి నే జతి రితి, తుమ్ తె కిచ్చొ పెట్టి గర్చి జోచి ఉప్పిర్ అన్మానుమ్ చి ఆత్మ నే తతి రితి, తుమ్ జాగర్త దెకన.

13 గని ‘ఆజి’ మెన ఈంజ కాలుమ్ క కెత్తి పొదుల్ సేనతయ్ గే, రోజుక తుమ్ ఎక్కిలోక ఎక్కిలో జాగర్త సంగ, దయిరిమ్ సంగ; పాపుమ్ చి మోసిమ్ క తుమ్ తె కో దెర్ను నే సేడ్డి రితి, తుమ్ చి పెట్టి బేడు నే బందితి రితి,

14 అమ్ నంపజలి మొదొల్ తెంతొ చి జోవయించి రిసాచి దయిరిమ్ అమ్ ఆకర్ ఎద దెరన్లెకయ్ క్రిస్తు తెన్ వాట నజన తమ్ దె.

15 § “ఆజి, జోచి అవాడ్ తుమ్ సూన్లె, జోచి కోడు నెసిల జేవ్ అగ్గెచ ప్రెజల్ చి రితి జా నాయ్. తుమ్ చి పెట్టి జోచి రితి బేడు నే బందిత్ రితి జాగర్త దెకన్.” మెన రెగిడ్డిసి తుమ్ పచ్చ నాయ్.

16 జలె, జేవ్ సూన నెసిలన కొన్న మెలె, మోసే పూర్ణుమ్ చొచి తెడి ఐగుప్పు దేసిమ్ తెంతొ, జేవ్ గొతిమాన్సుల్ జలిన్ తెంతొ, బార్ జా ముల విడ్డల్ జల అమ్ చ యూదుల్ ఎత్కిజిని.

17 అన్నె, జేవ్ దొన్ని విస్సా వెర్సుల్ పూర్తి కచి రిసా దేముడు కోపుమ్ జలో మెలె, * పాపుమ్ కెర్లనచి రిసా జా బయిలు దేసిమి జేవ్ మొర్తి రితి జో దేముడు సిచ్చ దిలన్.

18 పణ్ణొ, జోచి సుక్కుమ్ తె నే బెదుక మెన కచి రిసా జో ఒట్టు గలన్లొ మెలె, జోచి కోడు నే కెర్లనచి రిసాయి గెద?

19 జాకయ్ కిచ్చొ అమ్ క జానుక జతయ్ మెలె, జోవయించి అన్మానుమ్ చి రిసా జా సుక్కుమ్ తె జేవ్ బెదుక వాటు నే దిలో.

4

ప్రబుచయ్ జల మాన్సుల్క దొర్కు జతి విస్త్రాంతి

1 జలె, జో ప్రమానుమ్ సంగిలి రితి, జోచి *సుక్కుమ్తె బెదితి వాల్ తతె ఎద, తుమ్తె కో జా సుక్కుమ్తె పాచుక నే పిట్టవన్తి రితి జిమ.

2 కిచ్చొక మెలె, పూర్ణుమ్చ మాన్సుల్కయ్ కెయెడ కి తత్తిసి సుక్కుమ్చి అవ్కాసుమ్చి రిసాచి సుబుమ్ కబుర్ దొర్కు జలి. దస్సి, అమ్క కి సుక్కుమ్చి అవ్కాసుమ్చి రిసాచి సుబుమ్ కబుర్ దొర్కు జా అస్సె. గని జేవ్ నూన్ల జా కోడు జోవయింక కామ్క నెంజిలి. కిచ్చొక మెలె, నిజుమ్కయ్ నూన్లనచి పెట్టిచి రితిచి నముకుమ్ తిల తెన్ బెదిత్ నాయ్. జాకయ్ నూన్ల కొడొ జోవయింక కామ్క నెంజిల్ రితి జలి.

3 అమ్ యేసుక్రీస్తు ప్రబుక నంపజలన, మాత్తూమ్, జా సుక్కుమ్తె బెదితసుమ్. జేవ్ పూర్ణుమ్చచి పాపుమ్చి రిసా దేముడు సంగిలి తీర్పు అగ్గె రెగిడ్లయ్.†

‡“అంచి సుక్కుమ్తె జేవ్ కెయెడ బెదుక ఆవ్ ఒప్పి నాయ్, మెన

ఒట్టు గలన అంచి కోపుమ్క ఒప్పన్లయ్” మెన రెగిడ్లి కోడు. జో దేముడు, మాత్తూమ్, లోకుమ్ జెర్మయ్లి పొది జో సొంత జోచయ్ కమొ కేడవన జో తెదొడి సెలవ్ కడన తిలె కి, జోవయింక దస్సి మెన ఒప్పన్లన్.

4 ‘సెలవ్ కడన్లన్’ మెన సంగిలె, కీసావ్వు పొదుల్ ఆగాసుమ్, బూలోకుమ్, లోకుమ్తె తిలిసి ఎత్తి జెర్మయ్లి పడ్డె, అన్నెక్ దీసి *‘సెలవ్ కడన్ల దీసి’ మెనయ్ జోచి జా సెలవ్ కడన్ల దీసిచి రిసా కేనె గే కిచ్చొ సంగ అస్సె మెలె,

†“అంచ కమొ సావ్వు పొదుల్ కెర కేడవ, అన్నెక్ దీసి సెలవ్ కడన్లయ్” మెన సంగ అస్సె.

5 జేవ్ పూర్ణుల్, జలె, అమ్ అగ్గె రెగిడ్లి రితి:

‡“అంచి సుక్కుమ్తె జేవ్ కెయెడ బెదుక ఆవ్ ఒప్పి నాయ్”

మెన జోవయించి రిసా జో సంగ అస్సె.

6 జలె, అన్నె సగుమ్జిన్ దేముడుచి సుక్కుమ్తె బెదుక జలన బెదుక నేతయ్. జా ఏక్, పడ్డె అన్నెక్ కిచ్చొ మెలె, జా సుక్కుమ్చి రిసాచి సుబుమ్ కబుర్ అగ్గె నూన్లన జో దేముడుచి కోడు కెరుక నెసిలి రిసా జోచి జా సుక్కుమ్తె బెదితి నాయ్.

* 4:1 4:1 పూర్ణుమ్చ యూదుల్క జలె, తెదొడిచి ప్రమానుమ్క చెంగిలి ఈంజయ్ లోకుమ్చి కనాసు దేసిమి జేవ్ గెచ్చుక అవ్కాసుమ్ తిలి, గని పిట్టవన్. అమ్క, జలె, అప్పెచి అవ్కాసుమ్ కిచ్చొ మెలె, ఎత్తి అదికారుమ్ తిలో దేముడుచి సేంతుమ్తె బెదితిసి చి పరలోకుమ్తె గెతిసి. † 4:3 4:3 3:11 దెక ‡ 4:3 4:3 కీర్తనలు 95:11. § 4:4 4:4 ఆదికాండుమ్ 1 అద్యయమ్. * 4:4 4:4 ఆదికాండుమ్ 2:1-3. † 4:4 4:4 ఆదికాండుమ్ 2:2. ‡ 4:5 4:5 కీర్తనలు 95:11. § 4:7 4:7 3:7-8 దెక. * 4:12 4:12 డీనయ్లిసి 1:16. † 4:14 4:14 మాములుమ్ ఈంజయ్ లోకుమ్చి దేముడుచి గుడితె జర్ణు జతిసి ఉచర్లె, యూదుల్క ఎక్కిలోయి యెరూసలేమ్చి జోవయించి ఎక్కి దేముడుచి గుడితె తెడిక తెడిచి గదితె గెచ్చు అర్చితుమ్ దెంక జయెదె. వెర్చెకక ఎక్కి సుట్టు జా గదిక అడ్డు కెర్తి తెరక జీన ఒత్త పెన జా కామ్ కెరెదె. జొయ్యి మాన్సుక ‘ఎత్తిక వెల్లో పూజరి’ మెనుల. ఎబ్రియూల్ 9:1-7 దెక. ఈంజయ్ లోకుమ్చి దేముడుచి గుడితె జర్ణు జతిసి, జలె, యేసు పరలోకుమ్తె జర్ణు కెర్తినక టాలి జతయ్.

7 అన్నెక్ దీసి మెలి కోడు జో నిసాన, జోచి సుక్కుమ్తె బెదుక అమ్క అన్నెక్ అవ్కాసుమ్ దా కెర, ఈంజ అవ్కాసుమ్క ‘ఆజి’ మెన, అమ్ అగ్గె రెగిడ్లిన్తె సంగిల్ రితి,

§“ఆజి జోచి అవాడ్ తుమ్ నూన్లె, తుమ్చి పెట్టి బేడు నే బందిత్ రితి

తుమ్ జాగర్త దెకన” మెన్తయ్.

8 మెలె, దేముడు సంగిలి కనాసు దేసిమి జేవ్ పాచ పెసితి రితి యెహోసువ కడ నిలన్, గని జా తెన్ జా కోడు పూర్తి నెరవెర్చువ జతి జలె, అన్నెక్ దీసిచి రిసా ‘తెదొడకయ్ సుక్కుమ్ దొర్కు కెరిందె’ మెన దేముడు సంగితో నాయ్, సంగుక జతి నాయ్.

9 జాకయ్, దేముడుచి సెలవ్ కడన్ల దీసితె బెదితి వాటు మాన్సుల్క అప్పెక దొర్కు జతయ్.

10 మెలె, దేముడు జోచి కామ్ కేడవ కిసి సెలవ్ కడన్లొ గే, దస్సి జో దెతి సుక్కుమ్తె కో బెదెదె గే, జో మాన్సుకి జోచి కామ్ కెర కేడవ సెలవ్ కడనెదె.

11 జాకయ్, జా సుక్కుమ్తె అమ్ కి బెదితి రితి నిదానుమ్ కెరుమ; జేవ్ పూర్ణుల్చి రితి జోచి కోడు నెన అమ్తె కో దస్సి పాపుమ్తె నే సేడ్డి రితి.

12 కిచ్చొక మెలె, దేముడుచి కోడు దొన్ని పక్కలె వాండి తిలి ఎత్తి కత్తిచి కంట *లగున్ అస్సె, చి జా కోడు జివ్వి తా కామ్ కెర కెరయ్ మాన్సుచి ఆత్మ చి జీవు అత్తు జతిన్తె, అత్కుల్ చి ఆడుచి ములువ బెదితిన్తె బెర, మాన్సుల్చి పెట్టిచ ఉద్దెసుమ్లు పరిచ్చు కెర, జోవయింక ‘చెంగిల్ అస్తి’ గే నాయ్ గే మెన తీర్పు కెర్తయ్.

13 అన్నె జెర్మయ్లిన్ ఎత్తి కి జోచి మొక్కె లుంకుక నెత్తె, గని అమ్క పరిచ్చు కెర్తొసాచి మొక్కె ఎత్తి డుమ్డి తా ఎదార్లుమ్ డీస్తయ్; అమ్చ ఉద్దెసుమ్లు కి ఆకర్కయ్ జోచి మొక్కె అమ్ ఎత్తిజిన్ సాచి నజనుక తయెదె.

యేసు అమ్చి రిసా ఎత్తిక వెల్లో పూజరి జా అస్సె

14 జలె, యేసు దేముడుచొ సొంత పుత్తుసి జా తా, పరలోకుమ్తె తెడిక తెడి దేముడు అబ్బొన్తెయి పెస గెచ్చు తా, అమ్చి రిసాచొ వెల్లో †ఎత్తిక వెల్లో పూజరి జా అస్సెచి రిసా, జోచి రిసా అమ్ ఒప్పన్తిసి డిట్టుమ్ పోసనుమ్.

15 కిచ్చొక మెలె, అమ్చొ ఎత్తిక వెల్లో పూజరి జతొ జో యేసు అమ్చి సెక్తి నెంజిలిసి నేన్లొసా అమ్చి సెక్తి

నెంజిలిన్చి ఉప్పిర్చి కన్యారుమ్ నేన్లోసా నెంజె, గని అమ్చ బాదల్ ఎత్తి జొయ్యి కి సేడ, అమ్చి రితి పరిచ్చు జాఁ అస్సె. గని జో పాపుమ్ నే కెర్తె జీన అస్సె.

16 జలె, కామ్క జెతికయ్ సమయుమ్క జోచి తోడు తతి రితి జో అమ్క కన్యారుమ్ దెకితి వరుమ్ అమ్ నజనుక, జోచి దయ అమ్ చజనుక మెన, దయిరిమ్ తెన్ జోచి దయ దెతి సిజాననుమ్క పాసి జెమ.

5

1 మాన్సుల్ తెంతో దేముడు నిసాన ఎత్తి ఎత్తిక వెల్లో పూజరిచి కామ్ కిచ్చొ మెలె, 'మాన్సుల్చి పాపుమ్ గెస్సు' మెనయ్ దేముడుచి మొక్కె జేవ్ మాన్సుల్చి నావ్ తెన్ బలివొ దెంక అస్సె.

2 జో పూజరి కి మాములుమ్ మాన్సు జా సొంత సెక్తి నెంజిలోసాచి రిసా నేన్లసక చి తప్పు జలసక మెత్తన దెకెదె.

3 జోవయించి సొంత సెక్తి నెంజిలిన్చి రిసా, ఎక్కి అన్నె మాన్సుల్చ పాపల్చి రిసా నాయ్, గని సొంత పాపల్చి రిసా కి జో బలివొ దెంక అస్సె.

4 అన్నె, ఎత్తిక వెల్లో పూజరి ఎక్కిలో జతిసి జో మాన్సుచి సొంత ఇస్టుమ్క జర్గు జతిన్ నెంజె. 'ఆవ్ పూజరి' మెన జో మాన్సు సొంత ఇస్టుమ్క టీవ్క నాయ్. దేముడు సొంత నిసాన జో ఎత్తిక వెల్లో పూజరి జంక జోక అదికారుమ్ తయెదె. దేముడు టీవ్కెయ్, యూదుల్చొ పూర్గుమ్చొ తొలితొచొ ఎత్తిక వెల్లో పూజరి జలో అహరోసుక కిసి దేముడు బుకార్లో గే, దస్సి, జో దేముడు సొంత జో మాన్సుక బుకారుక.

5 దస్సి కి క్రీస్తు ఎత్తిక వెల్లో పూజరి జతిసి సొంత ఇస్టుమ్క గవరుమ్ కెరన్లిసి నెంజె, గని జోచి రిసా:

*"తుయి అంచొ సొంత పుత్తు, ఆజి తుక పాయ అస్సి"

మెన సంగిలో దేముడు సొంత జోక నిసాన అదికారుమ్ దిల్లన్.

6 దేముడు అన్నెక్తె సంగ రెగ్గయ్లి రితి;

†"‡మెల్కీసెదెక్ కిసా పూజరి తిలో గే, తుయి దసా పూజరి జా కెయ్క తెయ్క తా జా కామ్ కెర్తె" మెన జోచి రిసా రెగ్గ అస్సె.

7 యేసు మాన్సు జా జెర్మున్ జా ఈంజ లోకుమ్తె బుల్తె తిలి పొది, జలె, గట్టిక కేకుల్ గల ఏడ ఏడ, జోక మొర్సు తెంతో పిట్టవుక సెక్తి తిలో దేముడుక ప్రార్థనల్ కెర్తె తిలన్, చి దేముడు అబ్బొన్క జో బిలోసాచి రిసా, జో దేముడు అబ్బొసి జోచ ఆసల్ సూన్తె తిలన్.

8 జలె, జో జోచొ పుత్తున్ జలెకి, దేముడుచి కోడు పూర్తి నిదానుమ్ కెర్తె కిసి తయెదె గే, కిచ్చొ సైమల్ దుకుమ్

* 5:5 5:5 క్రిస్తలు 2:7. † 5:6 5:6 క్రిస్తలు 110.4, చి ఎబ్రియూల్ 7:7 దెక. ‡ 5:6 5:6 జో మెల్కీసెదెక్ రాసొ కి పూజరి కి జా తిలో. ఆదికాండుమ్ 14:18. జో యెరూసలేమ్తె విలుప కెర్తె తిలో, ఒగ్గర్ పూర్గుమ్ పొది, యూదుల్ ఒత్త నే బన జతె అగ్గె. క్రీస్తు ఈంజ లోకుమ్తె బుల్తె తిలి పొది, యూదుల్చి దేముడుచి గుడి యెరూసలేమ్తె తిలి. 7:1-3 కి దెక. * 6:2 6:2 నెంజెలె 'బాప్తిసుమ్ నజన్తినచి రిసాచి....'

నొప్పుల్ జంక జయెదె గే, జొయ్యి దస్సి పూర్తి ఓర్పుప జా అజ్జయ్ జలో, చి జో జేవ్ బాదల్ ఓర్పుప జలిన్ తెన్ జో దేముడు అబ్బొన్చి కోడు పూర్తి కెర్లిన్చి రుజ్జు అయ్లి.

9 అన్నె, జేవ్ బాదల్ సేడ ఓర్పుప జలిన్తె జోచి సెక్తి జోచి సత్తిమ్ పూర్తి రుజ్జు జతికయ్, పరలోకుమ్తె బెదె కెయ్క తెయ్క తతి రచ్చున జోచి కోడు సూన కెర్తొ ఎత్తి మాన్సుకయ్ జొయ్యి దొర్కు కెర్లన్.

10 కిసి మెలె, 'మెల్కీసెదెక్చొ రితి జో జంక' మెన దేముడు జోక 'ఎత్తిక వెల్లో పూజరి' మెనయ్ నావ్ తిలి.

ఆత్మక నే వడ్డితె నేన్ల బాలబోదల్ రిత తా

11 ఈంజ ఎత్తిచి రిసా అమ్ ఒగ్గర్ సంగుక జతి, గని తుమ్చ కంగ్గల్ బొయ్ర జల రిత జలి రిసా జా అర్దుమ్ సంగుక అల్లర్ జతసుమ్.

12 కిచ్చొక మెలె, తుమ్ ఎదిలి ఎద అన్నె మాన్సుల్క సికడ్డన జంక జతి, గని దేముడుచి కోడుతె ముక్కిమ్ తిలిన్ ఎత్తి మొదొల్ తెంతో తుమ్క సికడుక అవ్సురుమ్ జలి. తుమ్క అప్పక కి దూదు అవ్సురుమ్, మాములుమ్ అన్నిమ్ కతి రితి తుమ్ వడ్డుక నేతయ్.

13 కో రితి దూదుక జితయ్ గే, బాలబోదల్ రితొ తా, సత్తిమ్చి రిసాచి బోదన అర్దుమ్ కెరనుక నెత్తె, సత్తిమ్ ఇండితినచి రిసాచి బోదన నెరవెర్పుప కెరుక నెత్తె.

14 గని మాములుమ్ సెక్తిచి అన్నిమ్ కక్క కవడుక జయెదె మెలె, కిచ్చొ కిచ్చొక 'గర్చి' గే 'చెంగిల్చి' గే నిసితి రితి అలవాట్ కెరన సత్తిమ్ ఇండితి వాట్ సిక కెర అగ్గె ఇండితనకయ్.

6

ప్రబుక నంప కెర పడ్డొ అన్నె ముల్తినచి రిసా

1 జాకయ్, క్రీస్తుచి రిసా మొదొల్క ఇదిలిదిల్ సికితిన్తె నే టీవు తతె, ఆత్మతె వడ్డుమ. ఎక్కి మొదొల్ తెంతో చి ఇదిలి నముకుమ్తె తంక నాయ్. కిన్చతె మెలె, కామ్క నెంజిత కమొక దుకుమ్ జా ముల దేముడుక నంపజంక దెర్లిసి,

2 సుద్ది కెరంతి *దొవన్తినచి రిసాచి బోదన, బోడిలె చడితినచి రిసాచి బోదన, మొర్లన అన్నె జీవ్ జంక తిలిన్చి రిసాచి బోదన, ఆకర్ దీసిక చి వెల్లి పరిచ్చు చి జేవ్చ తిర్పుల్చి రిసాచి బోదన.

3 ఇసి దనచ ఎత్తి కి మొదొల్, చి ప్రబు సెలవ్ దిలె, ఎక్కి దనచక ఉచరుక ముల దా, ఆత్మతె వడ్డుమ్దె.

4 కిచ్చొక మెలె, కేన్ జవున్ మాన్సు తొలితో నంపజా ప్రబుచి ఉజిడతె జా, పరలోకుమ్చి రచ్చన వరుమ్ చక దెక, దేముడుచి సుద్ది తిలి ఆత్మతె వాట దొర్కు జలి,

5 దేముడుచి కోడుచి రుసి చక తా, జెతికయ్ ఉగుమ్చి సెక్కి చక తిలె, పట్టో జేవ్ పొరపాట్ జా క్రీస్తుక ములిలె, జోవయించి పాపుమ్చి రిసా జేవ్ దుకుమ్ జతి రితి జేవ్క చెంగిల్ వాట్తె అన్నె కడ ఆనుక నెంజె. కో నెత్తిర్తి.

6 కిచ్చొక మెలె, జేవ్ జోక ములిలిసి జేవ్ సొంత, దేముడుచి పుత్తుక అన్నె సిలువతె గల మార్లి రితి జతయ్, చి అన్నె మాన్సుల్ జోక నిస్కారుమ్ కెర జొక్కర్లి రితి జోచి నావ్ కడ్డి రితి జతయ్.

7 కీసి మెలె, జేవ్తె ఒగ్గర్ సుట్టు పెట్టి పాని కేన్ బుఱుయి పియ తా, జా బుఱుయ్యె పంటో పికడ్డసక చెంగిల్ కామ్క జెతికయ్ పంటో దిలె, దేముడు తెంతో జేవ్చి వాటచి వరుమ్ జా బుఱుయి నజన్తయ్.

8 గని, జా బుఱుయి రితయ్ కంట రూకుల్ గట్ర దిలె, కామ్క నెంజిలిసి, చి జాక సాపెనల్ దెంక జయెదె. ఆకర్క జేవ్క డయ్ గెలుకయ్ తయెదె.

దయిరిమ్ కొడొ సంగిలిసి

9 అమ్ ఇసి జాగర్త సంగిలే కి, తుమ్చి రిసా, బావుడ్లు, కిచ్చొ ఉచర్తసుమ్ మెలె, ఈంజ రచ్చనతె బెదిత అన్నె చెంగిలి వరల్ తుమ్క దొర్కు జవున్ మెన అమ్క దయిరిమ్.

10 కిచ్చొక మెలె, దేముడుచి రిసాచి తుమ్చి కామ్, అగ్గె కి అప్పె కి జోచయ్ జల మాన్సుల్క తుమ్ తోడు కెర, జోచి ఉప్పిరిచి తుమ్చి ప్రేమ దెకయ్లిసి జో పచ్చె నాయ్ మెన, దస్సి పొరపాట్ తీర్పుచొ నెంజె మెన, అమ్క దయిరిమ్.

11 తుమ్చి రిసా అన్నె కిచ్చొ ఆస జా అస్సుమ్ మెలె 'జర్గు జయెదె' మెన తుమ్ నంపజలిసి పూర్తి నెరవెర్పుప జతి రితి తుమ్ ఎక్కి నిదానుమ్ ఎక్కి ఆస తంక.

12 తుమ్ దస్సి నిదానుమ్ తాఁ గెలె, బద్దుకుమ్ నే జతె, దేముడు ప్రమానుమ్ సంగిలిన్చి వాట జోవయించి నముకుమ్చి జోవయించి నిదానుమ్చి రిసా కలుగు జత అన్నె మాన్సుల్చి రితి తుమ్ ఇండితె, జయ్యి అమ్చి ఆస.

అబ్రాహామ్ నంపజా నిదానుమ్ తతికయ్ జెయిమ్ జలిన్

13 అబ్రాహామ్ పూర్గుమ్చొక దేముడు ప్రమానుమ్ సంగిలి పొది, జో దేముడు సొంతచి కంట కెయ్ కో వెల్లో తతి నాయ్ చి రిసా, అన్నె వెల్లో సుదొచి నావ్ దెర ఒట్టు గలుక అవ్కాసుమ్ నాయ్ చి రిసా, జోచి సొంతయ్ నావ్ తెన్ ఒట్టు గలన,

† 6:14 6:14 అదికాండుమ్ 22:17. ‡ 6:20 6:20 యూదుల్చి దేముడుచి గుడితె తెడిక తెడిచి గదితె ఎక్కి ఎత్తిక వెల్లో పూజరి గని అన్నె లోయి నే గెతి రితి తెర అడ్డు తయెదె. పరలోకుమ్తెచొ ఎత్తిక వెల్లో పూజరి, జలె, యేసుయి. జొయ్యి ఒత్త అడ్డు తిలిన్క జీన అన్నె, చి జోవయింక నంపజలనకయ్ కి జీనయ్తయ్. యేసు మొర్లిన్ తెన్ని యెరూసలేమ్తె యూదుల్చి దేముడుచి గుడితెచి తెర ఉప్పిర్ తెంతో ఎట్టో ఎద పూర్తి చిరి జా గండల్ జలి. దస్సి జర్గు జలిసి టాలి జా అమ్క కిచ్చొ రుజ్జు దెకయ్తయ్ మెలె, జో మొర్లిన్ తెన్ని అమ్క చి ఎత్తి అదికారుమ్ తిలొ దేముడుక అడ్డు తిలి పాపుమ్ గెచ్చయ్లిసి. మత్తయ 27:51, మార్కు 15:38, లూకా 23:45, ఎబ్రియూత్ 9:1-3, 10:19-20. * 7:1 7:1 అదికాండుమ్ 14:17-20. † 7:2 7:2 జోవయించి నావ్చి అర్దుమ్ కిచ్చొ మెలె, 'పున్నిమ్ అంచొ రానొ'.

14 కిచ్చొ ప్రమానుమ్ సంగిలన్ మెలె, †“తుక కచితుమ్ దీవెన దా జెయిమ్ కెర తుమ్చి సెకుమ్చ ఒగ్గర్ జిన్ జతి రితి జర్గు కెరిందె”

15 దస్సికయ్, అబ్రాహామ్ నిదానుమ్ తా ఎత్తి ఒర్గుప జతికయ్, జా ప్రమానుమ్ తిలిసి జోక దొర్కు జలి.

16 మాన్సుల్, జోవయించి కంట కేన్ జవున్ వెల్లో సుదొచి నావ్ దెర ఒట్టు గల్తె, చి జోవయించ తగుల్ ఎత్తితె ఒట్టు గలిలె, 'నిజామ్' మెంతతి.

17 దస్సి జో సంగిలి ప్రమానుమ్తె వాట నజన్తనక జోచి కోడు పిట్టె నాయ్ మెన, జోచి ప్రమానుమ్చి సత్తిమ్చి రుజ్జు దెకవుక మెన, జో ప్రమానుమ్ కెర్లిన్క 'నిజామ్ జర్గు జయెదె' మెలి గుర్తుక దేముడు ఒట్టు గలన్లన్.

18 దస్సి, దొన్ని నే పిట్ట కమొచి రిసా, మెలె ప్రమానుమ్చి రిసా కి జో ఒట్టు గలన్లిన్చి రిసా కి, జో దేముడు అబద్దుమ్ జంక నెత్తెచి రిసా, అమ్ పరలోకుమ్తె పావెతి వరుమ్చి ప్రమానుమ్చి ఉప్పిర్చి దయిరిమ్, అమ్ డిట్టుమ్ దెరన్తి రితి, అమ్ జోచి రచ్చనతె నిగ అయ్లన దయిరిమ్ తంక జయెదె.

19 కేన్ జవున్ దొన్ని, జలె, వేరతె నే గెతి రితి లంగరు కీసి జాక డిట్టుమ్ టీవడెదె గే, దస్సి, పరలోకుమ్తె జో అమ్క పావెత్తి వరుమ్చి ఈంజ అమ్చి దయిరిమ్ అమ్చి ఆత్మక అమ్క డిట్టుమ్ టీవడ్డయ్. అమ్క జో దిలి ఈంజ వరుమ్, జలె, అమ్క అడ్డు తిలి తెర ఒత్తల్తో అమ్ జీన తెడిక తెడిచి గదితె సెసితి రితి, పరలోకుమ్తెయి పావడ జీనయ్తయ్.

20 ఒత్త జా †తెర ఒత్తల్తో మెలి కోడు యేసు అమ్చి నావ్ తెన్, అమ్క రచ్చన దొర్కు కెర్తి రిసాయి పురెతో నిగ గెచ్చు పాచ అస్సె గెద, చి రానొ జలొ మెల్కీసెదెక్చొ రితి ఎత్తిక వెల్లో పూజరి జో జా, కెయ్క తెయ్క అమ్క దేముడు అబ్బొన్చి మొక్కె తోడు తయెదె.

7

మెల్కీసెదెకు కెయ్క తెయ్క పూజరి

1 ఈంజొ మెల్కీసెదెకు, జలె, ఒగ్గర్ పూర్గుమ్ పొది సాలేమ్క రానొ జలొసా, ఎత్తిచి ఉప్పిరి వెల్లో జలొ దేముడుచి నేవ కెర్తొ పూజరి జలొసా, జలె. రానల్క జీన మార్లిన్ తెంతో *అబ్రాహామ్ పూర్గుమ్చొ బుల జెతె తిలి పొది, జో మెల్కీసెదెక్ జోవయింక దస్సుల్ జా జోక చెంగిల్ వరుమ్ దిలన్.

2 వరుమ్ దెతికయ్, జో మెల్కీసెదెక్ మరియాద కెర్తి రితి అబ్రాహామ్ జోక కలుగు జలిసి ఎత్తితె దెస్సు వాటల్క ఏక

వాట దిలన్. జో మెల్కీసెదెక్, జలె, ముక్కిమ్క జోచి నావ్చి అర్దుమ్ తిలి రితి †పున్నిమ్క రానో జలొసా, పడ్డొ సాలేమ్ పట్టుమ్క కి జో రానో. ‡సాలేమ్క జో రానో జయెదె మెలె, సాంతిక్ సేంతుమ్క జో రానో జయెదె.

3 జోవయింక కేన్ అబ్బొన్ అయ్యున్ పాయితి నాయ్, జో కేన్ సెకుమ్చో నెంజె, చి జోచి జీవితమ్క 'మొదొల్ జలి' జవున్ 'కేడ గెలి' జవున్ మెనుక నెంజె. దనచ జోక నాయ్, చి దేముడుచో పుత్తున్ రితొ జా, కెయెక తెయెక జోచొ పూజరి జా తత్తయ్.

4 జో మెల్కీసెదెక్ కెడ్డొ వెల్లొ సుదొ జయెదె గే, అప్పె ఆవ్ రెగిడ్డొ కొడొతె తుమ్ అర్దుమ్ కెరన. అమ్చొ పూర్గుమ్చొ జలొ అబ్రాహామ్ కి జోక కలుగు జలిసి ఎత్కితె దెన్ను వాటల్క ఏక్ వాట దా గెలన్. జో దస్సి కెర్లిన్ తెన్ మెల్కీసెదెక్క 'ఒగ్గర్ వెల్లొ' మెన ముక్కిమ్చొ అమ్చొ పూర్గుమ్చొ అబ్రాహామ్ ఒప్పన్లన్ మెన రుజ్జు జతయ్.

5 అహారోనుచి తెడి ప్రెజల్ ఎత్కిక కిలేవీ పూర్గుమ్చొచి తెగచ మున్నుబొదల్ పూజర్లు జా, దేముడుచి కొడొతె రెగిడ్డి రితి, ప్రెజల్ ఎత్కిక కలుగు జలిసిచి దెన్ను వాటల్క ఏక్ వాట నజనుక దేముడుచి ఆగ్గు జా అస్సె. కత్తెయ్ జేవ్ సంగుక మెలె, జోచ బావుడ్లు జల అబ్రాహామ్చి సెకుమ్చ అన్నె తెగల్చతె; జేవ్ కి అబ్రాహామ్చి సెకుమ్చ జలెకి.

6 పడ్డొ, కేన్ సెకుమ్ నెంజిలొ ఈంజొ మాన్సు జలొ మెల్కీసెదెక్, మాత్తుమ్, అబ్రాహామ్చి అత్తి దెన్ను వాటల్క ఏక్ వాట నజన్లొ. పడ్డొ, దేముడు ప్రమానల్ దిలొ జో అబ్రాహామ్క మెల్కీసెదెకు చెంగిల్ వరుమ్ దిలన్.

7 దాకు సుదొక వెల్లొ సుదొ దీవెన కెరెదె మెన ఎత్కిజిన్ జాన వేర సంగితి నాయ్.

8 పడ్డొ, ఈంజ లోకుమ్తె దెన్ను వాటల్క ఏక్ వాట నజిన్తన మొర్తయ్ మాన్సుల్ జవుల, గని పరలోకుమ్తె నజన్తోసా, జలె, జోవయింక 'జివ్వి అస్సె' మెన దేముడుచి కొడొతె పూర్తి రుజ్జు జా అస్సె.

9 పడ్డొ అన్నె కిచ్చొ మెనుక జయెదె మెలె, దెన్ను వాటల్క ఏక్ వాట నజితె తిలొ లేవీ పూర్గుమ్చొ, జోచి సెకుమ్తె జెర్మిల పడ్డొచ పూజర్లు తెన్ సాంత అబ్రాహామ్చి అత్తి మెల్కీసెదెక్క దెతి వాట దిలన్, దెతతి, మెనుక జయెదె.

10 కీసి మెలె, అబ్రాహామ్ తెన్ మెల్కీసెదెక్ దస్సుల్ జలి పొది, జో *లేవీ తెదొడి కి అబ్రాహామ్చి పెట్టి తిలన్ మెనుక జయెదె. అబ్రాహామ్చి సెకుమ్తె పడ్డొ జెర్మిలన్.

మెల్కీసెదెక్ జలొ రితొ క్రీస్తు పూజరి

11 పడ్డొ, 'లేవీచి తెగతె జెర్మిలన పూజర్లు జేవ్ కెర్తి కమొతె మాన్సుల్చి పాపుమ్ జా వాట్ గెలి చి పున్నిమి

‡ 7:2 7:2 'సాలేమ్' మెలి నావ్చి అర్దుమ్ కిచ్చొ మెలె, 'సేంతుమ్' 'సాంతి'. సెకుమ్తె పూజర్లు పడ్డొ జెర్మిల. జయ్యి సెకుమ్తె జెర్మిల. † 7:17 7:17 కీర్తనలు 110:4 చి ఎబ్రియూల్ 5:6 దెక. ‡ 7:19 7:19 రోమియూల్ 3:20-22, 8:3-4. § 7:21 7:21 కీర్తనలు 110:4.

పూర్తి జా అస్తి' మెనుక జతి జలె; జయ్యి ప్రమానుమ్చి తెడి ప్రెజల్క ఆగ్గుల్ దొర్కు జలి, గెద; జలె, ఒత్త సుద్ది జతిసి పూర్తి జతిసి దొర్కు జతి జలె, అహారోనుచి రితి, మెలె, లేవీయూల్చి రితి ముల, 'మెల్కీసెదెక్చొ రితొ పూజరి జంక' మెన కిచ్చొక యేసుక దేముడు టీవొ కెలాన్?

12 వేర రగుమ్ పూజరి జతి రితి మార్నుప కెర్లె, వేర రగుమ్ ఆగ్గుల్ కి మార్నుప జెతయ్.

13 ఈంజేవ్ కొడొ కచి రిసా గే, జో అగ్గెచ పూజర్లు జెర్మిలి తెగచొ నెంజె. ఇన్నెచి తెగతెచ కోయి అగ్గె పూజర్లు జతి నాయ్.

14 మెలె, లేవీచి తెగతె నాయ్, గని యూదాచి తెగతెయి అమ్చొ యేసుప్రబు జెర్మిలన్ మెన ఎత్కిజిన్ జాన్ల, చి ఈంజ తెగచి రిసా పూజర్లు జతి కేన్ కోడు కి అమ్క ఆగ్గుల్ దిలొ మోసే పూర్గుమ్చొ సంగె నాయ్.

15 అగ్గెచి ప్రమానుమ్చి, అప్పెచి ప్రమానుమ్చి తేడ కీసి అన్నె సొస్టుమ్ డీస్తయ్ మెలె, మెల్కీసెదెక్చొ రితొచొ ఈంజొ అన్నెక్లొ పూజరి ఆయ్లిన్ తెన్ని డీస్తయ్.

16 మెలె, ఈంజొ పూజరి జలిసి కీసిచి మెలె, ఆగ్గుల్చి మొక్కె నాయిమ్ తిలి రితి కేన్ జవున్ తెగతె జెర్మిలి రిసా ఎక్కిలొ పూజరి జతిన్చి రితి నెంజె, గని కెయెక తెయెక నే మొర్తె చెంగిల్ తతి జివ్వి జో యేసు తిలిన్చి సెక్తికయ్ జో పూజరి జా అస్సె.

17 మెలె జోచి రిసా దేముడుచి కోడు సాచి సంగిలి రితి; † "మెల్కీసెదెక్ కీసా పూజరి జా తిలొ గే, తుయి దసా పూజరి జా కెయెక తెయెక తా జా కామ్ కెర్తె" మెన రెగిడ్డిసి.

18 జలె, అగ్గెచ ఆగ్గుల్క దెకిలె, జేవ్చి సెక్తి నెంజిలిన్చి రిసా జా కామ్క నెంజిలి రిసా "జా పొని" మెన దేముడు సంగితయ్.

19 ‡కిచ్చొయ్ పూర్తి జతి రితి జా ఆగ్గు రితి కో జర్లుప కెరుక నెత్తిర్. గని నొవి కోడు బార్ జలి తెంతొ, అన్నె వెల్లి వరుమ్చి రిసాచి దయిరిమ్ అమ్క దొర్కు జా అస్సె. మెలె, ఈంజ వరుమ్చి రిసా, ఈంజయ్ వరుమ్చి ఉప్పిర్చి దయిరిమ్చి రిసా, ఆమ్ దేముడుక పాసి జా జెతనుమ్.

20 అన్నె, యేసు పూజరి జతి ఈంజ నొవి వరుమ్ ఒట్టు నెంజిలిసి నెంజె. ఒట్టు తెన్ చి జతయ్, చి అన్నె విలువ అస్సె.

21 అగ్గెచి ప్రమానుమ్క పూజర్లు జలన, జలె, ఒట్టు నెంతె పూజర్లు జల, గని ఈంజ నొవి వరుమ్ జలె, ఒట్టు గలిలిసి. కిచ్చొ ఒట్టు గలిలిన్ మెలె,

§ "తుయి కెయెక తెయెక తతొ పూజరి, మెన ఆవ్ దేముడు ఒట్టు గలన అస్సి, చి

§ 7:5 7:5 నిర్గమకాండుమ్ 32:25-29, 38:21. * 7:10 7:10 లేవీచి

అంచి మెన్ను ఆవ్ మార్పుప కెరనీ నాయ్”
మెన దేముడు యేసుచి రిసా ఒట్టు గలన అస్సె.

22 దస్సి, అగ్గెచి ప్రమానుమ్ కోడుచి కంట యేసు మదెనె జతి ప్రమానుమ్ కోడు కచితుమ్ జెయిమ్ జతిసి మెనయ్ ఈంజ కోడుతె రుజ్జు జతయ్.

23 అగ్గెచ పూజర్లు ఒగ్గర్జిన్ జల. కిచ్చొక మెలె, జేవ్ మొర్తసయ్ జవులచి రిసా కెయక తెయక పూజర్లు జా తంక నెత్తి. ఎక్కిలో మొర్లె, *అన్నెక్కో పూజరి జంక, మెలి రితి జతతి.

24 గని ఈంజో యేసు కెయక తెయక తాఁ గెతోసా జా అస్సెచి రిసా ఈంజోయి పూజరి జలిసి కెయక తెయక తాఁ గెతిసి.

25 జాకయ్, ఇన్నెచి తెడి కో ఎద్దికి అదికారుమ్ తిలో దేముడుక పాసి మెలి రితి జెతతి గే, జేవ్ కెయక తెయక రచ్చనతెయి తతి రితి పూర్తి రచ్చన దెంక ఈంజోయి తెరె; దేముడుక చి అమ్క ఈంజోయ్ మదెనె జా అమ్ నంపజల మాన్సుల్చి రిసా దేముడుచి మొక్కె టీవ ప్రార్దనల్ కెర్తతి రితి కెయక తెయక జివ్వి అస్సె.

26 పరలోకుమ్చి సుద్ది తిలో కిచ్చొ పారపాట్ నెంజిలో, కిచ్చొ గర్చి నెంజిలో, ఎద్దరె పాపుమ్ నెంజిలో, ఆగానుమ్చి ఉప్పిరి వెగ వెల్లో పూజరి అమ్క దొర్కు జంక దొర్కు జలో.

27 జేవ్ అన్నె ఎత్తిక వెల్లెల పూజర్లుచి రితి జో రోజుక అర్పితల్ దెంక నాయ్. జెవ్వి పూజర్లు, జలె, తొలితో జోవయించ సొంత పాపల్చి రిసా, పడ్డె ప్రజల్చ పాపల్చి రిసా, అర్పితల్ దెతతి. జో, జలె, పాపుమ్ సుదో నెంజె, చి సొంతచి రిసా అర్పితుమ్ దెంక, నాయ్, చి ప్రెజల్చి రిసా ఎక్కి సుట్టు జోచి సొంత జీవ్ దా, కెయక తెయక కామ్క జెతిన్ జలి అర్పితుమ్ జలన్.

28 దస్సి, కిచ్చొ దెకితసుమ్ మెలె, సెక్తి నెంజిల మాన్సుల్ పూజర్లు జతిసి ఆగ్గెచి ప్రమానుమ్తె తయెదె, గని ఆగ్గెచి కంట పడ్డె అయ్లి జో ఒట్టు గలన్లి కోడుకయ్ దేముడు కిచ్చొ సెలవ్ దిలో మెలె, పూర్తి జలో జోచొ పుత్తున్కయ్ ‘కెయక తెయక తతో పూజరి జవున్’ మెనయ్ జో దేముడు జోక టీవడ అస్సె.

8

యేసు పరలోకుమ్తె అబ్బొన్చి ఉజెతో పక్క వెన అస్సె

1 జలె, అమ్ సంగితిన్చి అర్దుమ్ కిచ్చొ మెలె, దసా కెయక తెయక తతో పూజరి అమ్క అస్సె. జో పరలోకుమ్చొ వెల్లో రానొ జలో దేముడు అబ్బొన్చి ఉజెతో పక్క వెన తా,

2 మాన్సుచి అత్తి నాయ్ గని దేముడు ప్రబుచి అత్తి తెయార్ జలి పరలోకుమ్చి నిజుమ్ జలి టంబుగుడితె,

* 7:23 7:23 ఎక్కె దడి మొత్తుమ్ విస్కె చెత్తర్జిన్ మాములుమ్ పూజర్లు తవుల, పడ్డె ఎత్తిక వెల్లో పూజరి కి తయెదె. * 8:5 8:5 నిర్గమకాండుమ్

25:40. † 8:8 8:8 యిర్మీయా 31:31-32. ‡ 8:8 8:8 యూదుల్క ‘ఇస్రాయేలుచి గేర్చ’ మెనుల కి. § 8:8 8:8 ‘యూదా’ మెలె, ఇస్రాయేల్ మెలో యాకోబుచొ పుత్తున్ జలో యూదా.

పరలోకుమ్చి ఒగ్గర్ సుద్దిచి, తెడిక తెడిచి గదితె, జోచి సేవ కెర్తయ్.

3 జలె, బలివొ అర్పితల్ దెంక మెన ఎత్తి పూజరి నిసాన అస్సి. జాకయ్, ఈంజో పూజరి కి కిచ్చొగె బలి దెంక జోచి అత్తి కిచ్చొ జకు తంక అస్సె.

4 జలె, బూలోకుమ్తె అప్పె తత్తో జలె, ఈంజో పూజరి జా తత్తో నాయ్. కిచ్చొక మెలె, ఆగ్గెల్ రితి తెన్ బలివొ దెత పూజర్లు లేచిచి సెకుమ్చ అస్సి. ఈంజో, మాత్రుమ్, జా సెకుమ్చొ నెంజె.

5 అమ్ యూదుల్చ ఈంజోయ్ లోకుమ్చ జేవ్ పూజర్లు, జలె, జోవయించి కామ్ కిసిచి మెలె, పరలోకుమ్చి దేముడుచి గుడితె జర్లు జతిన్క టాలి రితి నీడ రితి జా, ఒత్తచి టంబుగుడ్డ ఒత్తచి దేముడుచి గుడితె జర్లు జతిన్క ఇదిల్ అర్దుమ్ జవున్ దెకయ్తయ్. కిసి మెలె, జా టంబుగుడ్డ పూర్లుమ్ మోసే బందవుక దేముడు సంగిలి పొది, జో దేముడు ప్రబు కిచ్చొ మెన జోక ఆడ్ర దిలన్ మెలె, *“జా డొంగురుతె తుక ఆవ్ దెకయ్లి రూపుమ్కయ్ ఎత్తి తెయార్ కెరుక దెకను. జయ్యి రూపుమ్చి బందవు” మెలన్.

నొవి ప్రమానుమ్చి రిసాచి కోడు

6 ఈంజో యేసు అప్పె అన్నె ఒగ్గర్ ప్రమానల్క కి నిసాన జా, అన్నె ఒగ్గర్ ఆగ్గెల్క నెడిమిచొ జా తంక మెన, అన్నె ఎత్తిక వెల్లో కామ్ కెర్తసా జలో. కిచ్చొక మెలె, అన్నె ఈంజ చెంగిల్ ప్రమానల్ జర్లు జతిసి.

7 తొలితో చి ప్రమానుమ్ కిచ్చొ పిట్టిన్ నెంజిలిసి జతి, జలె, అన్నెక్ ప్రమానుమ్ దొర్కు జతి నాయ్.

8 జా ప్రమానుమ్ దొర్కు జలసక ‘జా ప్రమానుమ్తె పిట్ట, పిట్టవన్ల’ మెన ఎత్తి అదికారుమ్ తిలో దేముడు ఒప్పన్తిసి కిచ్చొ కోడుతె రుజ్జు జతయ్ మెలె,

†“ఇస్రాయేలుచి గేర్చక చి కియూదాచి గేర్చక ఆవ్

నొవి ప్రమానుమ్ దెత దీసల్ జెవుల”

మెన ప్రబు సంగితయ్.

9 “జా నొవి ప్రమానుమ్, జలె, జోవయించ పూర్లుల్క ఆవ్ దిలి ప్రమానుమ్చి రితిచి నెంజె. జోవయించి ఆతు దెర జోవయింక ఐగుప్తు దేసిమ్ తెంతో విడ్డల్ కెర

కడ దెర నిలి దీసి జా ప్రమానుమ్ దిలయ్.

గని, అంచి జా ప్రమానుమ్క సత్తిమ్ కెర్తె నాయ్,

సత్తిమ్ ఇండితి నాయ్ చి రిసా ఆవ్ పనుల

జోవయింక ములిల్ రితి జా దెకి నాయ్,

మెన ప్రబు సంగితయ్.”

మెన జో దేముడు రెగ్డయ్ లి కోడు అస్సె. గని ఒత్త తెంతో కిచ్చొ దయిరిమ్ దెతి కోడు సంగితయ్ మెలె,
*

10 “గని, అమ్చ ఇస్రాయేలుల్ మెలి గేర్చక పడ్డొచ దీసల్క నొవి ప్రమానుమ్ దెయిందె మెన ప్రబు కిచ్చొ సంగితయ్ మెలె, జోవయించ ఆత్తుల్తె అంచ ఆగ్గుల్ ఆవ్ తియిందె, జోవయించి పెట్టి అంచ ఆగ్గుల్ రెగిడిందె, చి ఆవ్ జోవయించొ దేముడు జయిందె, చి జేవ్ అంచయ్ పైజల్ జా తవుల.

11 అన్నె, జేవ్ దీసల్క జేవ్ ఎక్కిలోక ఎక్కిలో బుద్ది సికడుక తయె నాయ్. జోవయించ బావుడ్డివొక ప్రబు తెన్ తుమ్ బెద, మెన ఎత్తి మాన్సు సికడుక తయె నాయ్. కిచ్చొక మెలె, జేవ్ దీసల్క జేవ్ బాల వెల్లో కి ఎత్తిజిన్ అంక జానుల.

12 కిచ్చొక మెలె, జోవయించ పాపల్ ఆవ్ చెమించుప కెరిందె, జోవయించ తప్పుల్ ఆవ్ వచ్చు గెలిందె” మెన దేముడు ప్రబు సంగితయ్.

13 దస్సి నొవి ప్రమానుమ్చి రిసా సంగ, అగ్గెచిక ‘కామ్క నెంజె’ మెన ఒప్పున్తయ్. అన్నె, కామ్క నెంజెలి రితి జతిసి పొర్ని జా పూర్తి కేడయ్ గెచ్చెదె.

9

దేముడుచి గుడితె కిచ్చొ కిచ్చొ తిలిసి

1 జలె, అగ్గెచి ప్రమానుమ్తె కిసి బక్తి కెరుక గే ఆగ్గుల్ తిలి, చి ఈంజ లోకుమ్చి రగుమ్చి ప్రబుక బక్తి కెర్తి టాన్ తిలి.

2 మెలె, టంబుగుడ్డ తెయార్ కెర్ల, చి యూదుల్చ పైజల్ ఎత్తిజిన్ పెసితి పుర్రెతోచి టంబుగుడ్డ గదితె దీవుకంబుమ్చి పొడియె బలి దెతి బల్ల తిల. జా గదిక దేముడుక సుద్ది తతి టాన్ మెనుల.

3 పడ్డొ, జా వెల్లి గదిచి గుమ్ముమె తెర ఒడొవ తిల, అన్నె తెడిక, జా గది జీన్లె, అన్నెక్ టంబుగుడ్డ గది తిలి. జాక ‘దేముడుక ఒగ్గర్ సుద్ది తతి టాన్’ మెనుల. జాక అన్నెక్ తెర గూడు తిలి.

4 జా తెడిక తెడిచి గదితె దూపుమ్ డయితి బజర్చి పీటుమ్ తిలి, చి దేముడుచి తెదొడ్చి ప్రమానుమ్క గుర్తు జతి పెట్టె తిలి. జా పెట్టెతె ఎత్తి వక్కలె ఉప్పిరి బజార్ పుజడ తిల. జా పెట్టెచి తెడి *మన్నా మెన పరలోకుమ్ తెంతో దేముడు పూర్గుమ్ సువ తిలి అన్నిమ్ ఇదిల్ దెర్లి బజర్చి మర్తముంత తిలి. పడ్డొ అన్నె అగ్గె ఐగుప్తు దేసిమి జేవ్ అమ్చ యూదుల్ తిలి పొది గజల్ జా తిలి

* 8:9 8:9 యిర్మీయా 31:33-34. * 9:4 9:4 నిర్గమకాండుమ్ 16:1-35.

అహరోసుచి †టెక్సి డండొ, పడ్డొ జా పొర్ని ప్రమానుమ్చ ఆగ్గుల్ రెగిడ్డ ‡పత్తల్ తిల.

5 జా పెట్టెచి ఉప్పిరి, మెలె, దేముడు పాపల్ చెమించుప కెర్తి గుర్తుచి జా పెట్టెచి ఉప్పిరి దొన్ని బజర్చ దూతల్చ బొమ్మల్ టీవ, జా పెట్టెక దెకిల్ రితి వంపొ జా తిల. ఈంజ ఎత్తిచి రిసా అన్నె ఒగ్గర్ సంగుక నెత్తుమ్.

6 జా ఎత్తి తెయార్ జలి తెంతో, జా టంబుగుడ్డచి పుర్రెతోచి గదితె పూజర్లు గెచ్చుక జెంక జతె తా జోవయించి సేవచ నీతికమె కెర్తె తత్తతి.

7 గని తెడిక తెడిచి గదితె ఎక్కి, ఎత్తిక వెల్లో పూజరి, వెర్నెక్క ఎక్కి సుట్టు గెతయ్. గెలె, లోయి నెంజతె బెరుక నాయ్. నే జాన్తి రితి కెర్ల జోచ పాపల్చి రిసాచి, పైజల్చ పాపల్చి రిసా బలి దెతి లోయ్ తెన్ బెరుక అస్సె.

8 ఈంజ టాలి దెకవ దేముడుచి సుద్ది తిలి ఆత్తు కిచ్చొ అర్దుమ్ దెకయ్తయ్ మెలె, జా పుర్రెతోచి గదిచి తెడిచి తెర అడ్డు టీవ్తి ఎదిలి సేంపు, దేముడుక ఒగ్గర్ సుద్ది తిలి తెడిక తెడిచి గదితె పెసుక మాన్సుల్క వాటు నాయ్.

9 జా పుర్రెతోచి గదితె ఒడొయ్ జలి జేవ్చి జా తెర కిచ్చొచి రిసా టాలి జయెదె మెలె, ఈంజయి ఉగుమ్కయ్ టాలి జతయ్. దేముడుక ఈంజ ఉగుమ్తె కో నంపజా గెచ్చుల గే, ఉగుమ్ కేడ్లె జోతె గెచ్చుక అడ్డు తయె నాయ్. జా రితితె, జలె, బక్తి కెర్తొసాచి ఆత్తుక సుద్ది కెరుక నెత్తెర బలివొ అర్పితల్ దెతతి.

10 దసచ రితి అన్నిమ్, పితిసి, ఆగ్గె దొవన్తిసి, ఎక్కి ఆగ్గెకయ్ కామ్క జెత ఆగ్గుల్ జతతి. నొవి ఆగ్గుల్, నొవి వరుమ్ జర్లు నే జతె అగ్గె రకితె తిలిసి, జా.

క్రీస్తు పూజరి జా అర్పితుమ్ జలిసి

11 గని చెంగిల్ ప్రమానుమ్ అయ్లిన్క క్రీస్తు ఎత్తిక వెల్లో పూజరి జా అయ్లిన్ తెన్, మాన్సు తెయార్ నే కెర్లి, ఈంజయ్ రగుమ్ జెర్మున్ నే జలి, అన్నె వెల్లి అన్నె పూర్తి జలి రగుమ్చి టంబుగుడ్డతె, మెలె పరలోకుమ్తె దేముడు అబ్బొన్ తిలిన్తెయి పెస,

12 దేముడుక ఒగ్గర్ సుద్ది తతి టాన్తె కెయెక తెయెక కామ్క జెతికయ్, ఎక్కి సుట్టుయి యేసు పెసిలన్. పెస, గొర్రెల్చి, వస్సా పిల్లల్చి లోయి నాయ్, గని జోచి సొంత లోయి దా కెర, అమ్ అన్నె కెయెక విడ్డల్ నే జతి రితి అమ్క అన్నె నెతోవన అమ్క జత బెదయ్లన్.

13 మెలె, గార్ జల మాన్సుల్చి ఉప్పిరి గొర్రెల్చి జవున్, వస్సా పిల్లల్చి జవున్ లోయి చించితిసి, నెంజలె వస్సి పిల్లక డయిలిన్చి సార్ వించితిసి, ఎక్కి జోవయించి ఆగుచి కీడు గెచ్చయ్తి రితి జతయ్.

† 9:4 9:4 నిర్గమకాండుమ్ 7:8-13. ‡ 9:4 9:4 నిర్గమకాండుమ్ 32:15-16.

14 గని అమ్చి పాపుమ్ గెచ్చయ్తి అర్పితుమ్ జంక మెనయ్ క్రీస్తు జోచి పరలోకుమ్చి తా గెతి ఆత్మసెక్తిక జోచి జీవ్ దా మొర్లన్. జా అగ్గెచి ప్రమానుమ్చ ఆర్పితుమ్లు మాన్సుచి ఆగుక సుద్ది కెర్తయ్ జలె, జోవయించి ఆత్మక యేసు దిలి సొంత లోయి అన్నె కెర్ది కామ్ కెరెదె! జాకయ్, జీవ్ తిలో జీవ్ దెతి దేముడుచి నేవ అమ్ కెర్ది రితి, కామ్క నెంజిల మొర్తి రిత అమ్చ కమొ జో వుంచ గెల కెర, అమ్ లాజ్ జంక నెంజితి రితి, అమ్చి ఆత్మ జో సుద్ది కెరెదె,

15 దస్సి, ఈంజ నొచి ప్రమానుమ్క ఈంజోయి దేముడు అబ్బొన్క చి అమ్క మదెనె జతోసా జా అస్సె. దస్సి, ఈంజో మొర దొర్కు జలి అర్పితుమ్ జలిన్ తెన్ అగ్గెచి ప్రమానుమ్చ కొడొ అమ్ పిట్టవన పాపుమ్ జలిన్చి సిచ్చ తెంతో అమ్క విడ్డల్ కెర నెతోవ గెల అస్సె. కిచ్చొక ఇసి జర్గు కెర అస్సె మెలె, కక్క జో బుకారా తయెదె గే, ప్రమానుమ్ జలి కెయక తెయక చెంగిల్ తతి వాట్ జోవయింక దొర్కు కెరుక మెనయ్.

16 అన్నె కిచ్చొ ఉచరుక జయెదె మెలె, 'అవ్ మొర్లె అంచి ఆస్తి ఇసి దస్సి వంట దెతు' మెన మాన్సు ఏక కాగ్తుమ్ రెగ్డ తిలె, జేవ్ వాటల్ వంట దెంక జలె, తొలితో జో మాన్సు మొర్లెన్చి రిసా రుజ్జు జంక.

17 కిచ్చొక మెలె, మాన్సు మొర్లెకయ్ జో రెగిడ్డి దస్సి కాగ్తుమ్ కామ్క జెయెదె, గని జా రెగ్డయ్లోసా జీవ్ తిలి పొది కామ్క జెయె నాయ్. దస్సికయ్ జోచి ఆస్తిచి వాట జోచ మాన్సుల్క దొర్కు జవున్ మెనయ్ యేసు మొర గెలన్.

18 ఇసి, తొలితో చి ప్రమానుమ్ కి లోయి సూయి జలిన్చి జలి.

19 మెలె, ప్రెజల్ ఎత్కిక దేముడుచ ఆగ్గుల్చి ఎత్కి ఆగ్గు మోసె పూర్లుమ్చొ సూనవ కేడయ్లి వడ్డొ వస్సా పిల్లల్క చి, గొరెల్క కండ జోవయించి లోయి దెరన, పాని, ఎరన ఊలు, హిస్సొపు మొక్కచ రొడ్డల్ తెన్ జేవ్ ఆగ్గుల్ రెగిడ్డిన్చి ఉప్పిరి కి, ప్రెజల్ ఎత్కిచి ఉప్పిరి కి చించ దా,

20 "ఇసి కెర మెన దేముడు తుమ్క ఆడ్డ దిలి ప్రమానుమ్చి గుర్తుచి లోయి ఈంజ" మెన సంగిలన్.

21 దస్సి కి, జా టంబుగుడ్డతెచి బక్తి కెర్తినె వాడిక కెర్తి సామన్ ఎత్కితె జా లోయి చించ దిలన్.

22 నిజుమి, ఆగ్గుల్ రితి తెన్, కేన్గె ఏక్క ముల, ఎత్కి వస్తువక లోయికయ్ సుద్ది కెరుల, చి లోయి నే సూయి జలె, పాపల్ చెమించుప జయె నాయ్.

యేసు అమ్చి పాపుమ్ వుంచ దా

23 దస్సి పరలోకుమ్తె జతిన్క టాలి జతిసి ఎత్కి లోయి సూయి జతిన్ తెన్ దస కమొకయ్ సుద్ది జంక అగ్గెయి దొర్కు జా తిలి, గని పరలోకుమ్తె బెదితిసి ఎత్కి అన్నె

చెంగిలి బలి జతిన్కయ్ సుద్ది జంక దొర్కు జలి. మెలె, క్రీస్తు బలి జలిన్కయ్.

24 మెలె, దేముడుక సుద్ది తతి టాన్తె క్రీస్తు పెన అస్సె. జా టాన్ మాన్సు తెయార్ కెర్లిన్ నెంజె, గని పరలోకుమ్, చి దేముడుచి సొంతచి మొక్కె క్రీస్తు టీవ అమ్చి పచ్చెన జతయ్.

25 పడ్డొ అన్నె, జోచి సొంత నెంజిలి లోయి దెరన, మాములుమ్ ఎత్కిక వెల్లో పూజరి కో జలెకు వెర్నెక్ ఏక సుట్టు ఈంజయ్ లోకుమ్తె తిలి దేముడుచి గుడితెచి, ఒగ్గర్ సుద్ది తిలి టాన్తె పెసుక జతయ్. గని ఒగ్గర్ సుట్టు క్రీస్తు అర్పితుమ్ జంక నాయ్, కెయక తెయక అర్పితుమ్ జతె తంక నాయ్.

26 దస్సి జతి జలె, లోకుమ్ జెర్మయ్ జలి మొదొల్ తెంతో ఒగ్గర్ సుట్టు జో జా సైమ సేడుక తత్తి. గని, ఉగుమ్చి ఆకర్ పొది జోచి సొంత జీవ్ దా, మాన్సుల్చి పాపుమ్ గెచ్చయ్తి అర్పితుమ్ జా, పాపుమ్ గెచ్చవుక మెన ఎక్కి సుట్టు జో టీవెలిన్ సరి జా అస్సె.

27 అన్నె, మాన్సుల్ కీసి ఎక్కి సుట్టు మొరుక అస్సె గే, చి పడ్డొ దేముడుచి పరిచ్చ జవుల గే,

28 దస్సి, క్రీస్తు, ఒగ్గర్జిన్చ పాపల్ వయన గెచ్చవ గెలుక మెన సరిపుచుప జతి జా, ఎక్కి సుట్టు మొర గెలన్. చి అన్నెక్ సుట్టు డీసెదె; పాపుమ్ గెచ్చయ్తి రిసా నాయ్ గని సర్ద తెన్ జోవయింక రకితన రచ్చన జతిసి పూర్తి నెరవెర్సుప జతి రితి జర్గు కెరుకయ్ మెన జో అన్నె డీసెదె.

10

యేసు ఎక్కి సుట్టు మొర్లిన్కయ్ అమ్ సుద్ది జలిన్

1 జలె, వెర్నెక్ వెర్నెక్ దేముడుక బలివొ దెతతి అన్నె 'ఇసి కెర్లె దేముడుక పాని జెమ్దె' మెన ఉచర్తతి, గని వెర్నెక్ వెర్నెక్, జేవ్ బలివొ దిలెకి జోవయించి పాపుమ్ గెచ్చె నాయ్. జేవ్ బలివొ దెతి ఆగ్గుల్ రితి సొంతయ్ రచ్చన దొర్కు కెర్తిసి నెంజె, గని జా రచ్చన జర్గు జతిన్క ఎక్కి టాలి ఎక్కి నీడయ్ జతయ్.

2 జేవ్ బలివొ పాపుమ్ గెచ్చవుక తెరితి జలె, 'జెయిమ్ జలి' మెన అమ్చ యూదుల్ దసచ ములిత. నాయ్ గె? మెలె, బక్తి కెర్లన ఎక్కి సుట్టుకయ్ సుద్ది జత జలె, బలి దిలి పడ్డొ 'పాపుమ్ తెన్ అస్సుమ్' మెన అన్నె ఉచర్త నాయ్.

3 గని ఈంజేవ్ బలివొ దెతిన్ తెన్ వెర్నెక్ వెర్నెక్ మాన్సుల్ జోవయించి పాపుమ్చి రిసా ఉచరుక జతయ్. అమ్క ఏదాస్ట కెరయ్తయ్.

4 కిచ్చొక మెలె. వస్సా పిల్లల్చి గొరెల్చి లోయి అమ్చి పాపుమ్బుద్ది గెచ్చవుక ఎద్దరె నెత్తె.

* 10:5 10:5 కీర్తనలు 40:6-8.

5 జాకాయ్, క్రీస్తు ఈంజు లోకుమ్తె అయ్లి పొది దేముడు అబ్బొన్ తెన్ జో లట్టల్లి రితి కిచ్చొ అస్సె మెలె,

*“బలివొ అర్పితల్ తుయి నెసిలది, గని

‘దొర్కు జలి బలి’ మెన అంక తుయి ఆగ్ తెయార్ కెర అస్సిసి.

6 డయిత అర్పితల్చి రిసా, పాపల్ గెచ్చయ్తి గుర్తుచ అప్పెకచ అర్పితల్చి రిసా

తుక కిచ్చొ ఇస్టుమ్ నాయ్.

7 తెదొడి,

దేముడుచి కొడెతె అంచి రిసా తుయి రెగ్గయ్లి రితి,

ఆవ్ కిచ్చొ మెలయ్ మెలె,

ఈందె, దేముడు ఓ బా,

తుచి ఇస్టుమ్ జెయిమ్ కెరుక మెన

ఆవ్ జా అస్సి” మెలయ్.

8 జలె, జా కోడు దెకిలె, “బలివొ, అర్పితల్, డయిల బలివొ, అప్పెకచ పాపుమ్ గెచ్చయ్తి గుర్తుచ బలివొచి రిసా తుక కిచ్చొ ఇస్టుమ్ నాయ్, దనచ నెసిలది” మెన జో సంగ కెర; ఆగ్గల్ రితి దనచ దెతతి, జలె, జో దస్సి సంగ కెర

9 అన్నె కిచ్చొ కోడు ఒత్త బెదయ్లో మెలె, “ఈందె తుచి ఇస్టుమ్ జెయిమ్ కెరుక మెనయ్ ఆవ్ జా అస్సి” మెలన్. జో దస్సి సంగిలన్ తెన్ పొర్ని ప్రమానుమ్క ‘జా పొన. కామ్క నెంజె’ మెన్తయ్. ‘నొవిచి ప్రమానుమ్ అవ్సురుమ్. ఈంజయి దొర్కు జలిసి’ మెన నొవిచిక టీవడ్డి రిసా పొర్నిచి ముల దిల.

10 జోచి ఈంజయ్ సెలవ్క, యేసుక్రీస్తుచి ఆగ్ జా ఎక్కి సుట్టు మొర్లిన్కయ్, కెయ్క తెయ్క చెంగిల్ తతి రితి జోచి సుద్ది అమ్ జాఁ జోచయ్ జా అస్సుమ్.

11 పడ్డె యూదుల్చొ ఎత్తి పూజరి రోజుక జో సేవ కెర్తిన్తె టీవ ఏకేచి ఉప్పిరి అన్నెక్, జాచి ఉప్పిరి అన్నెక్ ఒగ్గర్ బలివొ దెతె తత్తయ్; పాపుమ్ గెచ్చవుక నెతిర్త బలివొ దెతె తత్తయ్.

12 గని ఈంజొ క్రీస్తు, కెయ్క తెయ్క కామ్క జెతి రితి ఎక్కి సుట్టు పాపుమ్ గెచ్చయ్తి దొర్కు జలి అర్పితుమ్ దా కెర, దేముడుచి ఉజెతో పక్క వెసిలన్.

13 ఒత్త వెన తా జోక విరోదుమ్ సుదల్ జలస జోచ చట్టో సుదితి పొర్తో జతె ఎదక రకితయ్.

14 దస్సి ఎక్కి సుట్టు జో సొంత అర్పితుమ్ జా, సుద్ది జా, జోచయ్ జల మాన్సుల్క పూర్తి కెర్తిసి కెయ్క తెయ్క కామ్క జెతి రితి జో జర్గు కెర అస్సె.

15 అమ్క జో పూర్తి కెర్తిన్చి రిసా దేముడుచి సుద్ది తిలి ఆత్మ ఇసి మెన సాచి సంగ అస్సె.

16 †“ప్రబు సంగిలసి కిచ్చొ మెలె,

జేవ్ దీసల్కచి పడ్డెక జోవయింక కిచ్చొ ప్రమానుమ్ దెయిందె మెలె,

జోవయించి పెట్టి అంచ ఆగ్గల్ తియిదె,

జోవయించ అత్తల్తె అంచ ఆగ్గల్ రెగిడిందె”

మెన సంగ అన్నె కిచ్చొ మెన్తయ్ మెలె,

17 ‡“తెదొడ్ తెంతొ జోవయించ పాపల్, జోవయించ తప్పుల్

ఆవ్ ఏదాస్ట నే కెరై పచ్చయ్ గెలిందె”

మెన దేముడు సంగితయ్.

18 జలె, పాపల్ చెమించుప జా అస్తి మెలె, పాపుమ్ గెచ్చయ్త అన్నె అర్పితల్ నాయ్.

దేముడుక పాసి గెచ్చ సత్తిమ్ ఇండుమ

19 జాకాయ్, బావుడ్లు, అమ్చి పాపుమ్ గెచ్చయ్తి రిసా యేసుక్రీస్తు జోచి లోయి సువ దిలి రిసా, దేముడుచి పరలోకుమ్చి జోచి గుడితె, జోచి సుద్ది టాన్తె అమ్ పెసుక అమ్క దయిరిమ్చి రిసా,

20 మెలె, జోవయించి దేముడుచి గుడి అగ్గె డంక తిలి తెరచి తెడి పెసితి నొవి, జివ్ తిలి జివ్ దెతి వాటు, మెలె, నీజోచి ఆగ్ వాట్ గెచ్చుక మెలి కోడుచి దయిరిమ్ దా అస్సె.

21 అన్నె, దేముడుచి గెరి అమ్క వెల్లో పూజరి జో జా కెర తోడు అస్సె.

22 అమ్చి పెట్టి నిదానుమ్ తా జోవయించి ఉప్పిర్చి నముకుమ్చి రిసా పూర్తి దయిరిమ్ తా, అమ్చి ఆత్మతె ‘అమ్క పాపుమ్ నాయ్, జో అమ్క సుద్ది కెర అస్సె’ మెలి దయిరిమ్ అమ్ జతి రితి, అమ్చి ఆత్మక సుద్ది కెర్తి పానిక జో అమ్క చించ దిలి రితి కెర అస్సె, అమ్చి ఆగ్ *దోవిలి రితి కెర అస్సె మెన, జోక పాసి జెమ.

23 అమ్చి దయిరిమ్ ఒప్పన్తిసి అన్మానుమ్ నే జతె దెరనుమ. కిచ్చొక మెలె, ‘ఆవ్ దెతి రచ్చన వరుమ్ కో నజనుల గే, కచితుమ్ రచ్చించుప జవుల’ మెన అమ్క ప్రమానుమ్ సంగిలోసా నిదానుమ్చొ.

24 అన్నె, ప్రేమ కెరయ్తి రితి, చెంగిల కమొ కెరయ్తి రితి, ఎక్కిలోక ఎక్కిలో కిసి చెంగిల్ కెరుక గే, ప్రేమ దెకవుక గే ఉచర్తె తమ.

25 సంగుమ్చ సబతె బెదుక నే పిట్టె, సగుమ్జిన్ జెంక ములితతి గెద, జలె, సబతె బెదుక నే పిట్టె ఎక్కిలోక ఎక్కిలో డిట్టుమ్ దయిరిమ్ కెరై తమ. ముక్కిమ్క కిచ్చొక ఇసి జమ మెలె, ప్రబుచి వెల్లి దీసి పాసి జా జెతయ్.

సత్తిమ్ జాన జానయ్ ముల్తినచి రిసా జాగర్త

† 10:16 10:16 యిర్మీయా 31:33. ‡ 10:17 10:17 యిర్మీయా 31:34. § 10:20 10:20 మెలె, జోవయించి ఆగ్ మొర అర్పితుమ్ జలి రిసా పరలోకుమ్తె బెదితి వాటు అయ్లి. * 10:22 10:22 బాప్తినుమ్చి రిసా సంగితయ్ మెన సగుమ్జిన్ సంగితతి.

26 జలె, నత్తిమ్ చిన నంప కెర్లమ్ మెలె, జాచి పడ్డొ జాన జానయ్ పాపుమ్ ఇండితె తిలె, పాపల్ గెచ్చయ్తి రిసా జో అర్పితుమ్ జలిసి అమ్క అన్నె బలివో నాయ్.

27 దస్సి జలె అమ్క కిచ్చొ రకితయ్ మెలె, ప్రబు పరిచ్చ కెర సిచ్చ కెర్తిసి, చి జోక విరోదుమ్ సుదల్ జలన ఎత్కిక గల్తి వెల్లి ఆగి గోయ్తె గలి జతిసి.

28 మోసే పూర్ణుమ్చొచి అత్తి దేముడు దిల ఆగ్గుల్ కో పిట్టవ తప్పు కెర్తతి గే, జోవయింక పరిచ్చ కెర్లిన్తె 'జో నిజుమ్ తప్పు కెర్లొ' మెన దొగుల తీగ్లచి సాచి రుజ్జు దెకయ్లె, కన్యారుమ్ నెంతె జోక మొర్తి సిచ్చ దెవుల.

29 జలె, దేముడుచొ పుత్తున్క నంప కెరుక నిదానుమ్ కెరుక నెన, సుద్ది కెర్తి జా నొవి ప్రమానుమ్చి రిసా సువ దిలి యేసుచి లోయి దూసుప కెర, ప్రబుచి దయ కెర్తి జోచి రచ్చన దెతి జోచి పరలోకుమ్చి ఆత్మక కో కోపుమ్ కెరవ తవుల గే, జోక అన్నెయ్ కెర్తి సిచ్చ లయెదె.

30 కిచ్చొక మెలె,

†“సిచ్చ కెర్తి కామ్ అంచి.

దెంక తిలి సిచ్చ ఆవ్ కచితుమ్ దెయిందె”

మెన సంగిలో దేముడుక జానుమ్. పడ్డొ, జో అన్నె సంగిలిసి కిచ్చొ జానుమ్ మెలె,

‡“జోవ ప్రజల్క ప్రబు తీర్పు కెర సిచ్చల్ గే, బవుమానల్ గే దెయెదె”

మెలిసి.

31 సిచ్చ జంక మెన జివ్ తిలో జివ్ దెతో దేముడుచి అత్తి మాన్సు దెర్ను సేడ్లె బింకయ్ జయెదె!

ప్రబు అన్నె ఉత్ర జెతిన్క రకితె తా

32 గని, అగ్గెచ దీనల్ తుమ్ ఏదాన్ణ కెర. తెదొడి క్రిస్తుచి రిసాచి నత్తిమ్ తుమ్ తొలితొ నూన చినిలి పొది ఒగ్గర్ స్రెమల్ బాదల్ సేడ్లె కి ఓర్పువ జలదు.

33 నగుమ్ సుట్టు కి ఎదార్లుమ్ ఎత్కిజిన్చి మొక్కె దూసుప జలదు, కస్టల్ సేడ్లెదు, చి అన్నె దన బాదల్ సేడ్లెనచి జాడు బెద వయిలి రితి జలదు.

34 కిసి మెలె, జేలి జలనక కన్యారుమ్ జలొ, చి విరోదుమ్ సుదల్ తుమ్చి ఆస్తి దెర గెతికయ్, పరలోకుమ్తె అన్నె చెంగిల్చి, అన్నె తాఁ ఆస్తి గెతిసి దొర్కు జా అన్నె మెన జాన కెర, సర్ల తెన్ తిలదు.

35 జాకయ్, తుమ్చి డిట్టుమ్ తుమ్చి దయిరిమ్ తుమ్ వెంట గెల నాయ్. జేవేతె వెల్లి బవుమానుమ్ దొర్కు జతయ్.

36 జాకయ్, దేముడుచి ఇస్టుమ్చి రితి ఇండ. జో ప్రమానుమ్ సంగిలిసి తుమ్ నజన్తి రిసా తుమ్క ఒగ్గర్ నిదానుమ్ తంక.

37 కిచ్చొక మెలె, జో సంగిలిసి కిచ్చొ మెలె,

‡“అన్నె గడియయ్ గెలె జెతె తిలోసా జెయెదె, ఆల్లిమ్ నే కెర్తె జయెదె.

38 గని, ఆవ్ దిలి రచ్చన అంచి పున్నిమ్ కో జా తవుల గే,

జోవయింక నముకుమ్చి నిదానుమ్క జివుల, గని జోవయింతె కో పడ్డొ గుంచెలె,

జోవయింక రిసా అంక ఆత్మతె కిచ్చొ సర్ల తయె నాయ్”

మెన దేముడు సంగితయ్.

39 గని జలె ఆవ్ పడ్డొ గుంచ నాసెనుమ్తె గెతన నెంజుమ్.

నిదానుమ్ నముకుమ్ తా అమ్చి ఆత్మ చెంగిల్ తతి రితి దెకన్తన ఆము.

11

పూర్ణుమ్చ నముకుమ్ తెన్ డిట్టుమ్ తిలిసి

1 జలె, నముకుమ్ కిచ్చొ మెలె, అమ్ ఆస జలి కిచ్చొ జవున్ కామ్క 'కచితుమ్ జర్లు జయెదె' మెలి ఆస, నే డిసిలిన్క 'అస్సె' మెన అమ్చి పెట్టి కచితుమ్ జాన్తిసి.

2 జా నముకుమ్ కామ్క జెతయ్ మెన కిసి జానుమ్ మెలె, జోవయింక నముకుమ్చి రిసాయి అమ్చ కో కో పూర్ణుల్చి రిసా దేముడు సర్ల జా 'జేవ్ అంచయ్ మాన్సుల్' మెన ఒప్పున్లన్.

3 అన్నె, దేముడుచి *కోడుకయ్ లోకుమ్ జెర్మిలి మెన నముకుమ్కయ్ ఆమ్ చినితసుమ్. దస్సి, ఈంజ డిస్తి లోకుమ్, డిస్తిన్ తెనె నే తెయార్ జలి మెన ఆమ్ నముకుమ్ తెన్ జాన అన్నుమ్.

4 హేబెలు †జోచి నముకుమ్చి రిసా అన్నొన్ జలొ కయూసుచి కంట చెంగిల్ అర్పితుమ్ దిలిసి దేముడు మెన్సిలన్. జోచి జా నముకుమ్చి రిసాయి 'జోక పున్నిమ్' మెలి రితి దేముడు హేబెలుక దెకిలొ. కిసి జానుమ్ మెలె, జో హేబెలు దిలిసి రిసా దేముడు సర్ల తెన్ సంగిలో మెన ఆమ్ జానుమ్. జో హేబెలు, జలె, మొర్లన్, గని జోచి నముకుమ్ అప్పొక అమ్క లట్టబ్తయ్.

5 జోచి నముకుమ్చి రిసా ‡హానోకు నే మొర్తె పరలోకుమ్తె ఉక్కిల్ జలన్. అన్నె, దేముడు సొంతయ్ జోక కడ నిలి రిసా ఒత్త తెంతొ కో జోక చజాక నెత్తర్. జో నే గెతె అగ్గె కి 'ఆవ్ మెన్సితోసా' మెన దేముడు రుజ్జుల్ దెకవ తిలొ.

6 నముకుమ్ నెంజిలె, దేముడుక సర్ల కెరుక నెత్తుమ్. మెలె, కో దేముడుక పాసి జెంక ఇస్టుమ్ జలె, దేముడు

† 10:30 10:30 ద్విత్వీయాపదేశ కాండుము 32:35. ‡ 10:30 10:30 ద్విత్వీయాపదేశ కాండుము 32:36, క్రిరనలు 135:14. § 10:37 10:37 హాబక్కుకు 2:3-4. * 11:3 11:3 ఆదికాండుమ్ 1:1-2. † 11:4 11:4 ఆదికాండుమ్ 4:1-7. ‡ 11:5 11:5 ఆదికాండుమ్ 5:24. § 11:7 11:7 ఆదికాండుమ్ 6:5-8:22.

‘అన్నె’ మెన, చి ‘జోక ఇస్టుమ్ జా చజితనక దెకితయ్’ మెన జో మాన్సుక నముకుమ్ తంకయ్.

7 తెదొడి అన్నె, నే జర్గు జలిన్క ‘జర్గు జయెదె’ మెన దేముడు కీనోవహుక సంగితికయ్, జోచి నముకుమ్చి రిసాయి ‘నిజుమ్ జర్గు జయెదె’ మెన దేముడుక బియఁ నోవహు దయిరిమ్ జా దేముడు సంగిలి రితి కెర, జోచి కుటుంబుమ్చక ఉగుమ్ గెడ్పువ కెర్లిన్ తెంతో రచ్చించువ కెర్లి రిసా, జా వెల్లి ఓడ రితిసి బందిలో. దస్సి కెర, లోకుమ్చ ఎత్తి నంపనెంజిలనక జోవయించి పాపుమ్చి సిచ్చచి రుజ్జు దెకయ్లో, చి నముకుమ్ వాట్ జెతికయ్ పున్నిమ్తె జోయ్యి వాట నజ్జొ.

8 ‘జోక పడ్డొ ఆవ్ దొర్కు కెరుక తిలి కానాను దేసిమ్తె గెస్సు’ మెన, “బార్ జా” మెన దేముడు *అబ్రాహామ్క బుకార్తికయ్, జో కేనె గెచ్చెదె గే వాట్ నేన్లె కి, జోచి నముకుమ్చి రిసా అబ్రాహామ్ నూన కెర బార్ జలన్;

9 దస్సి, జోచి నముకుమ్చి రిసా, జా జోచి సొంత దేసిమ్ నెంజిలె కి, “తుక చి తుచి సెకుమ్చక దెయిందె” మెన దేముడు ప్రమానుమ్ కెర తిలి కానాను దేసిమి బుల్తె తిలో, అన్నె జో, జా ప్రమానుమ్తె జో తెన్ వాట నజిత జోచి పెట్టిచొ ఇస్సాకు కి, ఇస్సాకుచి పెట్టిచొ యాకోబు కి టంబుగుడ్డల్తె జియ బుల్తె తిల.

10 కిచ్చొక మెలె, చెంగిల్ పునాది తిలి †పట్టుమ్క ‘జెయెదె’ మెన అబ్రాహామ్ నంప తెన్ తిలన్. కేన్ పట్టుమ్ మెలె, దేముడు సొంత బందితిసి, జెర్మయ్లి పట్టుమ్.

11 దస్సి, జాచి నముకుమ్చి రిసా అబ్రాహామ్చి తేర్చి ‡సారా, జా మంతిరి జా గెచ్చ, బోదల్ పాయితి వయసు జిన తిలె కి, జా ప్రమానుమ్ సంగిలో దేముడుక ‘జో సంగిల్ రితి జర్గు కెరెదె’ మెన నంపజలి రిసా, అంగి జతి సెక్కి జాక దొర్కు జలి.

12 జలె, ఎక్కిలో మాన్సు అబ్రాహామ్చి పెట్టి జో మొర్తొ రితో మంత్రో జా తిలె కి, ఆగాసుమ్చ సుక్కల్చ రిత, నముదుమ్చి ఒడ్డుచి ఇన్కుచ గిడ్డల్ రిత, కిసి కో లెక్క కెరుక నెత్తిర్, దస్సి ఎతివాట్జన్ మాన్సుల్ జోచి సెకుమ్తె జెర్మన్ జల.

ఈంజ బూలోకుమ్తె టాన్ నెంజిలన ఆము

13 అమ్ ఉప్పిరి సంగిల మాన్సుల్ ఎత్తిజిని, జోవయింక ప్రమానుమ్ సంగిలిసి జర్గు నే జతె అగ్గె, జాకయ్ ‘కచితుమ్ జర్గు జయెదె’ మెన నముకుమ్ తెన్ని మొర గెల. దూరి తెంతో దెకిల్ రితి జా, జా ప్రమానుమ్ సంగిలిసి నజ్జి రితి జాయి మొర్ల. ‘ఈంజ బూలోకుమ్తె టాన్ నెంజిలన

ఆము, అమ్క ముక్కిమ్ జలి లోకుమ్ వేరచి’ మెన చిన కెర మొర్ల.

14 జలె, ఇసి లట్టబ్బె, జేవ్ సొంత దేసిమ్ చజితత్ మెన రుజ్జు దెకయ్లి రితి జతయ్.

15 జేవ్ ముల దా బార్ జలి దేసిమ్క అన్నె గెచ్చుక మెన ఆస తిలి పొది, జేవ్ ఒత్త అన్నె గెచ్చుక వాటు తత్తి.

16 అన్నె చెంగిలి దేసిమ్క ఆస జా అస్తి; కేన్ మెలె, పరలోకుమ్చి. జో జేవ్చొ దేముడు జా తంక దేముడు లాజే జయెక నాయ్. జోవయింక ఏక్ పట్టుమ్ జో తెయార్ కెర్లిన్ తెన్ రుజ్జు జతయ్.

17 అబ్రాహామ్ దేముడుచి అత్తి పరిచ్చ జలి పొది, ‘తుక సంతానుమ్ దెయిందె’ మెన ప్రమానుమ్ సంగ తిలో దేముడుక జోచొ ఎక్కిలో పుత్తున్ ఇస్సాకుక నముకుమ్ తెన్ కి అర్చితుమ్ దెంక కి తెయార్ జలన్.

18 మెలె, జో పుత్తున్చి రిసా

*“ఇస్సాకుచి తెడి తుచి సెకుమ్తె ఒగ్గర్జిన్ జెర్మల”

మెన దేముడు సంగ తిలె కి.

19 దస్సి ‘మొర గెలనక దేముడు జియడుక తెరె’ మెన కి అబ్రాహామ్ నముకుమ్ తెన్ తిలో. జాకయ్, జో మొరుక తిలో ఇస్సాకుక అన్నె జియడ, దేముడు జోక అబ్రాహామ్ అబ్బొన్క అన్నె దొర్కు కెర్లన్.

20 దేముడుక ‘చెంగిల్ వరల్ దెత్తొసా జో’ మెనయ్, జోచి నముకుమ్చి రిసా, †ఇస్సాకు జోచ పుత్తర్లు జల యాకోబుక చి ఏసాపుక దయిరిమ్ తెన్ చెంగిల్ వరుమ్లు సంగిలన్.

21 దస్సి కి, జోవయించి నముకుమ్చి రిసా ‡యాకోబు, జోచి మొర్ను పురె జా అయ్లి పొది, జోచి టెక్నొ డండెచి ఉప్పిరి బోడి వంపొ కెర దేముడుక ఉచర, జోచొ పుత్తుసి యోసేపుచ దొగుల పుత్తర్లు ఎక్కెక్లక చెంగిల్ వరల్ సంగిలన్.

22 జోచి నముకుమ్చి రిసా కియోసేపు, జో మొర్చి సమయుమ్ జా అయ్లి పొది, జోచ ఇస్సాయేలుల్ పడ్డొక ఐగుప్తు దేసిమ్ తెంతో బార్ జంక తిలిన్చి రిసా, చోండి పుట్టవ సంగ కెర, జోచి పీనుమ్ ఐగుప్తు తెంతో దెర గెచ్చ జేవ్ కేనె నా రోవుక గే సంగిలన్.

23 *మోసే జెర్మిలి పొది, జోక ‘నూటిచొ’ మెన దెక కెర, జోచి నముకుమ్చి రిసా ‘జోక మార్తనతె జో దెర్ను సేడ్పు నాయ్’ మెనయ్, అయ్యసి అబ్బొసి తిన్ని జొన్నొ పూర్తి జోక లుంకడ తిల; జో రానొ “ఇదుద్ల నాడ్లు ఎత్తి మొరుక” మెన ఆడ్డ దిలిన్క నే బితె.

24 పడ్డొ, జో మోసే వెల్లొ మాన్సు జలి పొది, జోచి నముకుమ్చి రిసా †మోసే జో రానొచి దువిన్చి పుత్తున్ నే బుకారవన్క,

* 11:8 11:8 ఆదికాండుమ్ 11:31-12:9. † 11:10 11:10 పరలోకుమ్క, పరలోకుమ్చి ‘నవి యెరూసలేమ్’ మెలిన్క టాలి జయెదె. డీనయ్లిసి 21:2 దెక. ‡ 11:11 11:11 ఆదికాండుమ్ 18:1-15. § 11:17 11:17 ఆదికాండుమ్ 22:1-18. * 11:18 11:18 ఆదికాండుమ్ 21:12. † 11:20 11:20 ఆదికాండుమ్ 27:1-41. ‡ 11:21 11:21 ఆదికాండుమ్ 48:8-20. § 11:22 11:22 ఆదికాండుమ్ 50:24-25. * 11:23 11:23 నిర్గమకాండుమ్ 1:22:2:2. † 11:24 11:24 నిర్గమకాండుమ్ 2:11-16.

25 జా రాజిమ్చితె నే బెదితె, దసచి సర్దల్ నెన పిట్టవన, దేముడుచ జోచయ్ మాన్సుల్చ కస్టల్తె బెదుక సర్ద జల్.

26 జలె, 'దేముడు అబ్బోన్చి ఇస్టుమ్ తిలిన్ జర్గు కెరుకయ్ ముక్కిమ్' మెన యేసుక్రీస్తుచి రిసా కిసి సైమల్ సేడ్లె, 'ఐగుప్తు దేసిమ్చి సామ్నారుమ్ కలుగు కెరంతి కంట దేముడుచి కామ్ జర్గు కెరుకయ్ ముక్కిమ్' మెనయ్ ఒప్పున్లొ. కిచ్చొక మెలె, 'దేముడు దెతి బవుమానుమ్ ముక్కిమ్' మెన దెకితె తిలన్.

27 జోచి నముకుమ్క, జో పరో రానొచి కోపుమ్క నే బితె ఐగుప్తు దేసిమ్ ముల దిలో. కిసి మెలె, నే డిస్తా దేముడుక దెకితె తిలి రితి జా, నిదానుమ్ తెన్ ఎత్తి ఓర్పువ జలన్.

28 జోచి నముకుమ్చి రిసా, †ఐగుప్తు దేసిమ్చ తొల్పుర్ బోదల్క మార్తో దేముడుచి దూత జోవయింప ఇస్రాయేలుల్చ బోదల్క నే చడితి రితి, 'పస్కా పండుగు' మెన దేముడు సంగిలి రితి మొదొల్ కెర్లన్, చి జేవ్ ఇస్రాయేలుల్చ గెరల్ ఎత్తిచ దార్బంద్రల్తె మెండొప్పిచి లోయి చింప దిల.

29 "తుమ్క ఐగుప్తు దేసిమ్ తెంతొ రచ్చింపువ కెరిందె" మెన దేముడు సంగిలిన్చి ఉప్పిర్చి జోచి నముకుమ్చి రిసా, మాములు వాట్ ఇండిలి రితి జా, కి'ఎరన' మెలి సముద్దుమ్ ఇస్రాయేలుల్చ ప్రెజల్ ఇండ జిన్ల. గని ఐగుప్తు దేసిమ్చ "అమ్ కి దస్సి జినుమ్దె" మెన ఉచర కెర్లె పొది బుడ్ల గెల.

30 'దేముడు అమ్క తోడు తయెదె' మెన జోవయింపి నముకుమ్చి రిసా జేవ్ పూర్గుమ్చ ఇస్రాయేలులు సత్తు పొదుల్ రోజుక *యెరికో పట్టుమ్చి వెల్లి కోటచి సుట్టునంత ఇండ బుల్లికయ్, జా కోట సేడయ్ గెలి.

31 లంజె జియ తిలి †రాహాబు, అమ్ యూదుల్క వేరయ్ మాన్సు జలెకి, దేముడుక 'జొయ్యి వెల్లి, జొయ్యి పరలోకుమ్చో దేముడు' మెలి జాచి నముకుమ్చి రిసా, దేముడుక నంపనెంజిల జా పట్టుమ్చ అన్నె మాన్సుల్ తెన్ తెదొడి మొరె నాయ్. కిచ్చొక మెలె, దేముడుచి నావ్ తెన్ లుంకచొరె పట్టుమ్ దెకుక అయ్ల ఇస్రాయేలుల్క మరియాద కెర తిలి.

నముకుమ్చి రిసా దేముడు జర్గు కెర్లెసి

32 అన్నె కిచ్చొ మెనుమ? గిద్యోను, బారాకు, సమ్నోను, యెప్తా, దావీదు, సమూయేలు, దేముడుచ కబుర్లు సంగిల మాన్సుల్ ఎత్తిచి రిసా సంగుక సమయమ్ నాయ్.

33 జోవయింపి నముకుమ్చి రిసా రాజిమ్లుక జిన్ల, సత్తిమ్చ తీర్పుల్చ రుజ్జుల్ దెకవ, తప్పుల్ కెర్లసక సిచ్చు దా, ప్రెజల్క బుద్ది సికడ్ల, దేముడు జోక ప్రమానల్ దా జెయిమ్

‡ 11:28 11:28 నిర్గమకాండుమ్ 12:1-36. § 11:29 11:29 నిర్గమకాండుమ్ 14:1-31. * 11:30 11:30 యెహోసువ 2:1-24. † 11:31 11:31 యెహోసువ 6:1-25.

కెర్లికయ్ సర్ద జల. సింపుమ్లు జేవ్క కంక మెన మొక్కె అయ్లి పొది జేయ్చి చొడివొ డంకిల.

34 వెల్లొ ఆగివొ విజయ్ల, యుద్దుమ్తె కత్తివొ తెనె కండితిన్ పిట్టవన్ల, అప్పు తిలి పొది సెక్తి జల, యుద్దుమ్తె జోవయింప విరోదుమ్ సుదల్చి ఉప్పిరి జిన ఉదడ్ల.

35 జేవ్తె మొర్లసక దేముడు అన్నె జియడ్డికయ్, జోవయింప తేర్బోదల్క అన్నె దొర్కు జల. దేముడుక నిదానుమ్ తిల అన్నె సగుమ్జిన్, 'అన్నె చెంగిలి లోకుమ్తె పడ్డొక అన్నె జివ్ జా ఉట్టుమ్దె' మెనయ్, సిచ్చల్ తెంతొ విడ్డల్ నే కెరంతె, జేవ్ సిచ్చల్తె మొర్ల.

36 అన్నె, విరోదుమ్ సుదల్ దూసుప కెర్లిసి, కొర్డల్చ దెబ్బల్ అదికారుల్ పెట్టిసి, గొల్పుల్ తెన్ బందితిసి, జేల్తె గల్లిసి అన్నె సగుమ్జిన్ ఓర్పువ జల.

37 సగుమ్జిన్ మాన్సుల్క పత్తల్ తెన్ పెట మార్ల, సగుమ్జిన్ మాన్సుల్క రంపుమ్ తెన్ సింద దొన్ని గండల్ కెర గెల. సగుమ్జిన్ కత్తిచ దెబ్బల్క మొర్ల, సగుమ్జిన్ మెండల్చ గొర్లెల్చ చమె గలన బులిల, మాలజ్ జా, సైమల్ సేడ, మాన్సుల్చి అత్తి నిస్కారుమ్ జల.

38 బయిలె, డొంగ్రలె, పత్రాలె పారతె, బుయి గొయితె నిద్ర తా బుల్లె తిల. జేవ్ చెంగిల మాన్సుల్ ఈంజ లోకుమ్తె తంక ఈంజ పాపుమ్చి లోకుమ్క జేవ్ విలువ కెర్లి నాయ్.

39 అన్నె, జేవ్ ఎత్తిజిన్ జోవయింపి నముకుమ్ డిట్టుమ్ తిలిన్చి రిసా దేముడు జోవయింపి రిసా చెంగిల్ సాచి దెకయ్లెకి రుజ్జుల్ దెకయ్లెకి, జో దేముడు ప్రమానుమ్ సంగిలిసి జోవయింపయ్ పొదులె జర్గు జంక నాయ్.

40 కిచ్చొక మెలె, అమ్కయ్ కి జోవయింతెన్ బెదవనుక మెనయ్ జో దేముడు అన్నె చెంగిల్చి జర్గు కెరుక ఉచర తిలో. మెలె, అమ్ నెంతె జేవ్ కి పూర్తి నే జతి రితి జా జో సంగిలి ప్రమానుమ్ జర్గు కెర్లిసి వాయిద కెర్లన్; అమ్ పడ్డొ జెర్మిలన కి జోవయింతెన్ జా ప్రమానుమ్తె బెదుకయ్ మెన వాయిద కెర్లన్.

12

క్రీస్తుచి రితి ఆమ్ కి బాదల్ ఓర్పువ జంక

1 జాకయ్ పూర్గుమ్ తెంతొ దేముడుచి ఉప్పిర్చి నముకుమ్తె ఇండిలన ఈంజేవ్ ఎతివాట్జిన్ సాచి జతన మబ్బుల్ రితి అమ్చి సుట్టునంత తా, అమ్క వాట్ దెకయ్లి రితి జా అస్తిచి రిసా, అమ్క అడ్డు కెర్లి ఎత్తి జాడు, అమ్క లంబితి ఎత్తి పాపుమ్ ముల దా, ప్రబు అమ్క నిగయ్తి పందెమ్తె నిగుమ.

2 కిచ్చొ సెక్తిక అమ్ నిగుక మెలె, అమ్చి నముకుమ్ మొదొల్ కెర్లొ చి పూర్తి కెర్లొ యేసుక దెక, దెకయ్ నిగుమ. జో,

జలె, జోక తియ తిలి సర్ల సంతోసుమ్క ఉచర, నిలువతె గల్లి సిచ్చ ఓర్పువ కెర్లన్. దస్సి నిస్కారుమ్ జతిసి నే బితె, చి అప్పె దేముడు అబ్బొన్చి సిజాసనుమ్చి ఉజెతో పక్కయ్ జో వెన అస్సె.

3 తుమ్ అల్పువ నే జతి రిసా అన్మానుమ్ నే జతి రిసా, జలె, పాపుమ్ కెర్లనచి అత్తి, జోచి ఉప్పిర్చి విరోదుమ్చి రిసాచ సిచ్చల్ ఓర్పువ జలో, జో కెర్ది బాద సేడ్లెకి నిదానుమ్ తిలో యేసుచి రిసా తుమ్ ఉచర.

4 తూమ్, జలె, పాపుమ్చి ఉప్పిర్చి ఈంజ యుద్దుమ్ కెర్సినె, తుమ్ జోచి నావ్చి రిసా అల్లర్ సేడ అస్సున్, గని అప్పెక తుమ్చి లోయి నూయి జతి రితి, మెలె, మొర్ది రితి ఎదిలి సైమ తుమ్ సేడుక నేతయ్. తుమ్ అన్మానుమ్ నే జతె ఎత్తి ఓర్పువ జా.

కక్కయ్ దేముడు ప్రేమ తయెదె గే, జోకయ్ సిచ్చల్ దా సికడెదె

5 అన్నె, తుమ్ జోచ పుత్తర్లు జలిన్చి రుజ్జు దెకయ్తి తీర్పు దేముడుచి కొడొతె రెగ్గయ్లిసి తుమ్ పచ్చ గెలదు గె? కిచ్చో తీర్పు సంగిలిసి మెలె,

*“ఓ అంచొ పూత్తు, దేముడు తుక బుద్ది సికడ్డ సిచ్చల్క ‘కిచ్చొ నెంజితి’ మెలి రితి తుయి ఉచరు నాయ్.

అన్నె, జో తుక దస్సి సిచ్చ కెర్లె, తుయి దయిరెమ్ పిట్టవన అన్మానుమ్ జా నాయ్.

6 కిచ్చొక మెలె, కక్క జో ప్రేమ తయెదె గే, ‘సిక్కుత్’ మెనయ్ జోకయ్ సిచ్చ కెరెదె, చి జో బెదవన్లొ ఎత్తి పుత్తన్క ‘బుద్ది జవున్’ మెనయ్ సిచ్చల్ దెయెదె” మెన సంగ రెగ్గవ అస్సె.

7 జలె, ఇన బాదల్ తుమ్ ఓర్పువ జంక తిలిసి కిచ్చొక మెలె, తుమ్ దేముడు అబ్బొన్తె సిక డిట్టుమ్ జతి రిసాయి జో దేముడు తుమ్క “అంచ పుత్తర్లుయి” మెన దెకితయ్. మెలె, కేన్ పుత్తన్క అబ్బొసి కిచ్చొ సిచ్చ దా సికడె నాయ్ గె? మాన్సుచొ అబ్బొసి జలె, సిచ్చ దా సికడెదె.

8 అబ్బొదింసిచి అత్తి ఎత్తిజిన్ జత బుద్ది సికడ్డ కిచ్చొ సిచ్చల్ తుమ్ నే జలె, లంజెపెట్టి జెర్మిల రిత జా, జో ప్రబుచ సొంత పుత్తర్లు నెంజిల రిత జతదు.

9 అన్నె, ఈంజ లోకుమ్చ అమ్ ఎత్తిజిన్చ అబ్బొసింసి అమ్క సిచ్చల్ దా బుద్ది సికడ అస్తి, చి జాకయ్ జేవ్క మరియాద దెక అస్సుమ్. దసె జలె, అమ్చ ఆత్మల్క అబ్బొ జతో దేముడుచి తెడి తా, జోచి కోడు నూన అమ్ బుద్ది జలె, ఆత్మక జిమ్దె, అన్నె చెంగిల్ జిమ్దె.

* 12:5 12:5 సామెతల్ 3:11-12. † 12:16 12:16 ఆదికాండుమ్ 25:27-34. ‡ 12:18 12:18 నిర్గమకాండుమ్ 19:16-19, 20:18-21. § 12:19 12:19 నిర్గమకాండుమ్ 19:8-9. * 12:20 12:20 నిర్గమకాండుమ్ 19:12, 13.

10 అమ్చ ఈంజ లోకుమ్చ అబ్బొసింసి గడియ జోవయించి ఇస్టుమ్ అయ్లి రితి సిచ్చల్ దిల, గని అమ్క ‘చెంగిల్ జతు. అంచి సుద్దితె బెదుతు’ మెనయ్ అమ్క బుద్ది సికడ్డ సిచ్చల్ దేముడు అమ్చొ అబ్బొయి దెతయ్.

11 జా సిచ్చ జతి గడియయ్ ఎత్తి సిచ్చ సర్ల నే దెయె, గని నొప్పి దెతయ్. జలె పడ్డొ జేవ్చి రిసాచి ముద్దొ జలనక జా సిచ్చ పాయితి రిసా కిచ్చొ లాబుమ్, మెలె, జో దెతి పున్నిమ్ అన్నె సేతుమ్ దొర్కు జయెదె.

దేముడు దిలి వరుమ్ కెర్దిచి గే ఏదాన్లు కెరన డిట్టుమ్ జా

12 జాకయ్, కొర్పు జల తుమ్చ అత్తో, సెక్తి నెంజిల తుమ్చ మొగ్గల్ తుమ్ నే ముచ్చిల్తె దెకన.

13 ఇదిల్ సొట్టి జలిసి అన్నె సొట్టి నే జతె పూర్తి చెంగిల్ జతి రిసా తుమ్చ చట్టొ చెంగిల్ ఇండిత్ రితి, సొగ వాటు తుమ్ తెయార్ కెర.

14 అన్నె, ఎత్తిజిన్ మాన్సుల్ తెన్ సేతుమ్ కట్టు తెన్ తతి రితి తుమ్ దెకన. అన్నె, ప్రబు దెతి సుద్ది జంక తుమ్ ఆన జా. జయ్యి సుద్ది నెంజిలె, కో కి దేముడుక దెకుక నెతిర్తి.

15 తుమ్చితె కక్క కి ప్రబుచి రచ్చన నే పిట్టి రితి తుమ్ దెకన. కోడ్ దెతి కేన్ చెరో తుమ్చితె నే ఉట్టితి రితి తుమ్ దెకన. దస్సి కోడ్చి చేర్ కేన్ జలెకి ఉట్లె, జాచి రిసా గలిబిలి జా కెర ఒగ్గర్జిన్ ఆత్మక పాడ్ జంక జయెదె, జా పొన.

16 పడ్డొక, తుమ్చితె కో లంజె నే జతి రితి దెకన. పడ్డొ † ఏసాపు పూర్లుమ్చొ జలి రితి తుమ్ జా నాయ్. జో ఎక్కి పూటచి అన్నిమ్ దొర్కు కెరంతి ఆనకయ్ అబ్బొన్ దెంక తిలి జో తొల్పుర్ జెర్మిలిన్చి రిసాచి దొర్కు జతి అక్కు బావొన్తె విక గెల్లో.

17 పడ్డొ జా వాట దొర్కు జతి అక్కు నజనుక ఉచర్లొ, గని అబ్బొసి నే దిలో, చి జో కెర్ది ఏడ్లెకి, జో జర్లు కెరన్లిసి మార్పువ జంక వాటు తిలి నాయ్.

18 తుమ్ పాచ అయ్లి టాన్, సీయోను డొంగ్రు నెంజె. జా డొంగ్రు ఈంజయ్ లోకుమ్చి. చడితిసి, జా. పూర్లుమ్చ అమ్చ ఇస్రాయేలులు జా డొంగ్రుతె జా కెర కిచ్చొ దెకిల నూన్ల మెలె, ‡ వెల్లి ఆగి, అందర్, చిమ్మున జలిసి, తుపాన్ జతిసి.

19 నప్పిర్మూరి బజితిన్చి అవాడ్, బింక జతి వెల్లి కిఅవాడ్. తెదొడి పూర్లుమ్ జా వెల్లి అవాడ్క బియె కెర, “అప్పె తెంతొ జా వెల్లి అవాడ్ జలోసా అమ్క కోడ్ లట్టబ కబుర్లు సంగుక నాయ్” మెన ప్రెజల్ బతిమాల్పా జా సంగ తిల.

20 కిచ్చొక మెలె,

*“కేన్ జంతు కి ఈంజ డొంగుర్ చడిలె, జాక పతల్ గల మారుక అస్సె”

మెన దేముడుచి జా అవాడ్ ఆడ్ర దిలన్. జా ఆడ్ర సంగిలిసి ఓర్పుప జంక అమ్చ ఇస్రాయేలుల్ నెత్తిర్.

21 అన్నె, తెదొడి జర్గు జలిసి దెకుక కి కెద్ది బయిమ్చి మెలె, జేవ్ ప్రజల్క ఏలుప కెర్తె తిలో వాట్ దెకయ్తె తిలో మోసే కి “బియ అద్దుర్ జా గెలో” మెన సంగిలన్.

22 జేవ్ పూర్గుమ్చ తెదొడి పావిలి సీయోను డొంగ్రు, జలె, †బయిమ్చి, గని తూమ్ కేనె పాచ అస్సున్ మెలె, పరలోకుమ్చి †సీయోను డొంగ్రుతె, జీవ్ తిలో, జీవ్ దెతో దేముడుచి పట్టుమ్తె, †పరలోకుమ్చి యెరూసలేమ్ పట్టుమ్తె, పడ్డొ కో లెక్క కెరుక నెత్తిర్ ఎతివాట్జిన్ దూతల్ పండుగు కెర్తి రితి సర్త తిల బెర్లిన్తె, జా అస్సున్.

23 అన్నె కిచ్చొతె జా అస్సున్ బెద అస్సున్ మెలె, *తోల్సర్ జెర్తిల రిత పరలోకుమ్తె బెదిలసచి †పదుతె తిలసతె, అన్నె, ఎత్తిచి ఉప్పిరి దేముడు జలో మాస్సుల్ ఎత్తిక పరిచ్చ కెర్ తీర్పు కెర్తొసా †తిలిన్తె, అన్నె, దేముడుక సత్తిమ్ ఇండిల ప్రబుచి సుద్ది జా పూర్తి జల మాస్సుల్చ ఆత్తల్ తిలిన్తె జా అస్సున్,

24 అన్నె ముక్కిమ్క కత్తె మెలె, దేముడు దిలి నోవి ప్రమానుమ్క, జోక చి మాస్సుల్క నెడమె జతో యేసుతె, చి పూర్గుమ్చో †హేబెలు చి లోయిచి కంట చెంగిల్ లట్టబ్బి, చించ గెలి యేసుచి లోయితె పాచ జా అస్సున్.

25 తుమ్చి తెన్ లట్టబ్బి దేముడుక తుమ్ నే సూన్తి రితి, నంప నే జతి రితి తంక నాయ్ మెన తుమ్ జాగర్త దెకన. కిచ్చొక మెలె, ఈంజ బూలోకుమ్తె తిలో మోసే పూర్గుమ్చో జోక జాగర్త సంగిలిసి జేవ్ నే సూన్లి రిసా జేవ్ పూర్గుమ్చ సిచ్చ పిట్టవనుక నెత్తిర్. జలె, పరలోకుమ్ తెంతో అమ్క జాగర్త సంగితో దేముడుక ఆమ్ నే సూన్లె, అన్నె కీసి సిచ్చ పిట్టవనుక జయెదె?! జయె నాయ్!

26 *జా దీసి జోచి అవాడ్ ఒండి బూలోకుమ్క కదుల్ కెర్తి. గని అప్పె ‘కచితుమ్ జర్గు కెరిందె’ మెన కిచ్చొ ప్రమానుమ్ జో సంగ అస్సి మెలె,

†“అన్నెక్ సుట్టుక ఎక్కి బూలోకుమ్కయ్ నాయ్,

గని అన్నె, ఆగాసుమ్క కి కదుల్ కెరిందె”

మెన్తయ్.

27 ‘అన్నె అన్నెక్ సుట్టుక’ మెన సంగిలిసి అమ్క కిచ్చొ అర్దుమ్ దెకయ్తయ్ మెలె, జెర్మయ్ జలిన్ కదుల్ కెర్లిన్క

జాక గెచ్చవ గెల్తి సమయుమ్. జయి గెచ్చవుక కిచ్చొక మెలె, కదుల్ కెర్తె కి పాడ్ జంక నెత్తిర్లిన్క ‘తా గెస్సు’ మెనయ్.

28 జాకయ్, కో కదుల్ కెర పాడ్ కెరుక నెత్తిరి పరలోకుమ్చి రాజిమ్ అమ్క దొర్కు జా అస్సిచి రిసా, దేముడు దిలి జా వరుమ్చి ఉప్పిరి సర్త జా, సరి జతి బక్కి కెర జోక మరియాద కెర, బియఁ ఇండుమ.

29 కిచ్చొక మెలె, అమ్చో దేముడు డయితో ఆగిచో రితో అస్సి.

13

ప్రేమ, సత్తిమ్, సేంతుమ్ తెన్ ఇండుక

1 ‘అమ్చ బావుడ్లు’ మెన దెకిల్ రితి తుమ్ నంపజలసక ఎక్కిలోక ఎక్కిలో ప్రేమ కెర్తె తా.

2 వేర తెంతో జెత మాస్సుల్క మరియాద దెకుక తుమ్ పచ్చ నాయ్. కిచ్చొక మెలె, ‘దూతల్’ మెన నేన్లె కి, గోత అయ్ల దూతల్క కి సగుమ్జిన్ మరియాద కెర అస్సి.

3 జేలితె గలిలసక కన్కారుమ్ ఉచర దెక, జోవయింతెన్ తుమ్ జేలితె తిలి రితి ఉచరన, జోవయించి జాడు వయన. పడ్డొ, తుమ్ జోవయింతెన్ ఎక్కి ఆగ్గెతె బెదిలస మెన, అన్నె మాస్సుల్చి అత్తి వేర వేర అల్లెరిలు సేడ్ల నంపజలసక దస్సి తోడు తా.

4 పెండ్లి మెలిన్క చెంగిలి మెన ఎత్తి విలువ దెక గవురుమ్ కెరుక అస్సి. పెండ్లితె తెర్పిముస్సు చి నెడమె సత్తిమ్ తంక మెన తుమ్తె కో లంజె జా నాయ్. లంజె ఉచర్తసక చి లంజె జతసక దేముడు తీర్పు కెర సిచ్చ దెయెదె.

5 తుమ్చి జీవితుమ్తె డబ్బుల్ ఆస దూరి కెరన, తుమ్క తిలిన్క ‘జయెదె’ మెన సేంతుమ్ తెన్ జియ.

*“తుమ్క కెయఁక కి ములి నాయ్, పవ్నసి నాయ్.”

మెన దేముడు ప్రమానుమ్ కెర సంగ అస్సి.

6 జాకయ్,

†“ప్రబు అమ్క తోడు అస్సి, ఆవ్ బియఁ నాయ్.

అంక పాడ్ కెర్తి రితి మాస్సుల్ అంక కిచ్చొ కెరుక నెత్తిర్”

మెన అమ్ దయిరిమ్ తెన్ సంగుక జతయ్.

తుమ్క దెకయ్ల వెల్లో సుదల్క నే పచ్చితె, చెంగిల్ ఇండ

7 దేముడుచి సుబుమ్ కబుర్ తుమ్క సూనయ్ల, తుమ్క వాట్ దెకయ్లసక తుమ్ పచ్చ నాయ్. జేవ్ జోవయించి జీవితుమ్క ఇండిలిన్క కిచ్చొ పలితుమ్ దెర్ల గే

† 12:22 12:22 ‘బయిమ్చి’ మెలె, ఒత్త ‘సీనాయి’ డొంగ్రుతె ఎత్తి అదికారుమ్ తిలో దేముడు మోసేక ఆగ్గెల్ దిలన్. జేవ్ ఆగ్గెల్ తెన్ సిచ్చల్ కి దిలన్, పడ్డొ తెదొడి ప్రజల్ జో ఎత్తి అదికారుమ్ తిలో దేముడుక పాసి గెచ్చుక ప్రమాదుమ్. గని ఈంజ 22 నంబరిచి కోడుతె సంగితి ‘సీయోను’ డొంగ్రుతె, మెలె పరలోకుమ్తె, దస్సి బయిమ్ తంక నాయ్. యేసుక నంపజల మాస్సుల్చి పాపుమ్ గెలి రిసా అడ్డు నెంతె బయిమ్ నెంతె జోతె గెచ్చుక జయెదె. జా తేడ ఇన్నె దెకయ్తయ్.

‡ 12:22 12:22 డీసయ్లిసి 14:1 దెక. § 12:22 12:22 డీసయ్లిసి 21:2. * 12:23 12:23 రోమియుల్ 8:29, కొలోస్సియుల్ 1:15, 18, డీసయ్లిసి 1:5, చి ఎబ్రియల్ 2:11-14 దెక. † 12:23 12:23 లూకా 10:20, పిలిప్పియుల్ 4:3, డీసయ్లిసి 13:18, 17:8, 20:15, 21:27 దెక.

‡ 12:23 12:23 ఆదికాండుమ్ 18:5, ఎబ్రియల్ 4:13, 10:30. § 12:24 12:24 ఆదికాండుమ్ 4:2-16, ముక్కిమ్క 4:10. హేబెలు చి లోయి ‘సిచ్చ దేన్, సిచ్చ దేను!’ మెలి రితి కేక్ గల్తయ్. యేసుచి లోయి ‘చెమించుప కెరు, చెమించుప కెరు!’ మెన కేక్ గల్తయ్. * 12:26 12:26 నిర్గమకాండుమ్ 19:18.

† 12:26 12:26 హాగ్గయ్ 2:6. * 13:5 13:5 ద్విత్వియోపదేశ కాండుము 31:6. † 13:6 13:6 కిర్తనలు 118:6

తుమ్ ఉచర. జోవయించి నముకుమ్చి ఎదిలి నముకుమ్ తూమ్ జోవయించి పట్టి ఇండ.

8 యేసుక్రీస్తు కాలి కిసా తిలో గే, ఆజి కి దస్సాయి తా, కెయెక తెయెక కి దస్సాయి తయెదె.

9 వేర వేర నముకుమ్చి బోదన నూన తుమ్ మోసిమ్ జా సత్తిమ్ తిలిసి తుమ్ ముల నాయ్. మెలె, జేవ్చ కమొచ పండుగ్ అన్నిమ్ జవున్, కిచ్చొ కిచ్చొ కతిన్ నే కతిసి జవున్, జోవయింక సంప కెర్ల మాన్సుల్క చెంగిల్ కెరె నాయ్. ముక్కిమ్క ప్రబుచి దయ జో అమ్క దెతిన్కయ్ అమ్చి పెట్టిచి ఆత్మ డిట్టుమ్ జంక అస్సె.

10 అమ్ సంపజలసక వేర బలి దెతి టాన్ మెలి కోడు దొర్కు జా అస్సె. యేసు మొర్లిసి. ఈంజయ్ బలి దెతి టాన్తె దిలి బలి అగ్గెచి రితిచి టంబుగుడ్డచి సేవ కెర్ల, ఆగ్గుల్క సంప కెర్లి రితిచి ఉప్పిరి నముకుమ్ తితస కంక నాయిమ్ నాయ్.

11 జయ్యి రితి ఎత్కిక వెల్లెల పూజర్లు గొర్రెల్క దేముడుచి గుడితె ఆన 'పైజల్చి పాపుమ్ గెస్సు' మెన గొర్రెల్చి లోయి తెడిచి ఒగ్గర్ సుద్ది తిలి గదితె ఆన, సువ తా, జేవ్ గొర్రెల్చ పినుమ్లుక బయిలె కడన కెర, జా బయిలె డయ గెల్లతి.

12 కిచ్చొక మెలె, దస్సి, దేముడు అబ్బొన్తె అన్నె బెదవుక మెన, జోచి సొంత లోయి తెన్ పైజల్క సుద్ది కెరుక మెన, యేసు కి †పట్టుమ్చి కోట ఒత్తల్తొచి బయిలె మొర్లన్.

యేసు సైమల్ సేడ్లిన్తె అమ్ కి బెదుమ

13 జాకయ్, అమ్ కి, గావ్ ఒత్తల్తొచి బయిలె జోతె గెచ్చ, జో సేడ్ల సైమల్ అమ్ కి సేడుమ.

14 కిచ్చొక మెలె, కెయెక తెయెక తా గెతి పట్టుమ్ ఇన్నె అమ్క నాయ్, గని దస్సిచి తిలి కీచెంగిల్ పట్టుమ్చి రిసా రకితసుమ్.

15 రోజుక దేముడుక బలి దిలి రితి, జో అమ్క దిలి ఆత్మసెక్కిక జోక గవురుమ్ కెరుమ. కిసి బలి మెలె, జోచి నావ్చి విలువ ఒప్పున గవురుమ్ సంగితిసి.

16 అన్నె, మాన్సుల్క చెంగిల్ దెకుక, చి తుమ్క కలుగు జలిన్క అన్నె మాన్సుల్క తోడు దెంక ముల నాయ్. కిచ్చొక మెలె, దనచక 'బలివొ' మెనయ్ దేముడుక సర్ల.*

తుమ్క సికడ్డసక మరియాద కెర

17 తుమ్క సికడ్డసచి కోడు తుమ్ నూన, దాక్ కెరన, తుమ్చి సొంత ఇన్సుమ్ కెరుక ముల దా, జోవయించి కోడుక మరియాద కెర. కిచ్చొక మెలె, తుమ్చ ఆత్మల్క 'చెంగిల్ తత్తు' మెనయ్ సికడ్డతి, అన్నె, క్రీస్తు ఈంజ లోకుమ్తె అన్నె ఉత్త జా ఎత్కిజిన్క పరిచ్చ కెర్లి దీసి జెయెదె. అయ్లె, "దేముడు అమ్క దిలి కామ్క 'చెంగిల్ కెర్లమ్' గే 'గార్ కెర్లమ్' గే జో దేముడుచి మొక్కె అమ్ సాచి నజనుక

తయెదె" మెన జానయ్ తుమ్క జేవ్ సికడ్డతి, దెకితతి. జేవ్ తుమ్క సికడ్డన దుకుమ్ నెంతె సర్ల తెన్ ఏలుప కెర్లి రితి తుమ్ జోవయించి తెడి తా. జోవయింక అల్లర్ కెర్లె, దుకుమ్ జవుల చి తుమ్క లాబుమ్ తయె నాయ్.

అమ్చి రిసా ప్రార్దన కెర

18 అమ్చి రిసా తుమ్ ప్రార్దన కెర్లె తా. 'అమ్ పొరపాట్ జము నాయ్ గని ఎత్కిక సత్తిమ్ కెరుక ఆన తెన్ అస్సుమ్' మెన అమ్చి పెట్టి అమ్ జానుమ్.

19 అన్నె కిచ్చొక 'ప్రార్దన కెర్లె తా' మెన తుమ్క ఆవ్ బతిమాల్ప జా సంగితసి మెలె, ఆవ్ అన్నె బే బేగి తుమ్తె అన్నె జెంక దేముడు వాటు దెవున్ మెనయ్ తుమ్ ప్రార్దన కెర.

20 జలె, జోచ మెండల్ జల అమ్ సంపజలసక ముక్కిమ్ జలో గొవుడు జలో అమ్చొ ప్రబు జలో యేసుక అన్నె జియడ్లొ సేంతుమ్ దెతో దేముడు, కెయెక తెయెక కామ్క జెతికయ్ జోచి ప్రమాసుమ్చి రిసాచి నూయి జలి లోయిచి సెక్కి తుమ్క తోడు తవున్.

21 జోచి ఇన్సుమ్ రితి తుమ్ ఇండితి రితి తుమ్క దొర్కు జలిసి ఎత్కి దెవున్, చి జో మెన్సితి బుద్ది తుమ్చి పెట్టి తతి రితి తుమ్చి పెట్టి కామ్ కెర్లె తవున్. యేసుక్రీస్తుచి అత్తి ఈంజ ఎత్కి జర్లు కెరెదె. జోక కెయెక తెయెక పరలోకుమ్చి గవురుమ్ తవును! ఆమేన్.

ఆకర్ కోడు

22 జలె, బావుడ్లు, ఇదిల్ కొట్టు తెన్ ఆవ్ రెగిడ్లి ఈంజ జాగర్ల సంగితి దయిరిమ్ సంగితి ఉత్తుమ్ తుమ్ ఒర్పుప జా.

23 అమ్చొ బావొ జలో తిమోతిక †విడ్డల్ కెర అస్తి మెన తుమ్ జాన్క మెన ఆవ్ ఆన జతసి. జో బే బేగి ఉట్ట అయ్లె, అంచి తెన్ జో జెయెదె, చి బెద తుమ్తె జా తుమ్క దెకుమ్దె.

24 తుమ్క బోదన కెర్ల ఎత్కిజిన్క చి ప్రబుచయ్ జల అన్నె ఎత్కిజిన్క అమ్చి ప్రేమ తుమ్ సంగ. ఇటలీ దేసిమ్ తెంతొచ సంపజలన్ ఎత్కిజిన్ తుమ్క జోవయించి ప్రేమ సంగ తెర్లయ్తతి.

25 తుమ్ ఎత్కిజిన్ తెన్ ఎత్కి అదికారుమ్ తిలో దేముడుచి దయ తవున్! ఆమేన్‡.

‡ 13:12 13:12 యెరూసలేమ్ ఒత్తల్తొ. లూకా 23:32-33, యోహాను 19:17-18, మార్కు 15:20-22, మత్తయి 27:31-33. § 13:14 13:14 మెలె, పరలోకుమ్. డీనయ్లిసి 21:2 దెక. * 13:16 13:16 కొరిందీల్క రెగిడ్లి వీక్ సంబర్ ఉత్తుమ్ 10:31 దెక. † 13:23 13:23 జెయిల్తె తెంతొ, కిచ్చొగి. ‡ 13:25 13:25 తెద్దిలి

యాకోబు రెగిడ్లి ఉత్తమ్ బారిక్ జలో యాకోబు రెగిడ్లి ఉత్తమ్

1 దేముడుచి, ప్రబు జలో యేసుక్రీస్తుచి సేవ కర్తొ జోచో *గొత్తి సుదొ జలో †యాకోబు, వేర వేర దేసిమ్లుతె చెతుర్పు జల ‡బార తెగల్చ యూదుల్క, జొబర సంగ కెర రెగిడ్లి ఉత్తమ్.

అల్లర్ సేడ్డిన్చి రిసా దయిరిమ్ కోడు

2 బావుడ్లు, తుమ్ వేర వేర అల్లర్ సేడ పరిచ్చ రితి జలె, 'చెంగిల్' మెన పూర్తి సర్ల తెన్ తా

3 కిచ్చొక మెలె, తుమ్చి నముకుమ్ అల్లర్లు వాట్ పరిచ్చ జలె, జిన్లె, తుమ్చి పెట్టి పూర్తి నిదానుమ్ జస్తె.

4 ప్రబుచి అత్తక తుమ్ పూర్తి జతి రితి, తప్పు నే జతి రితి, తుమ్చి అత్తకె కిచ్చొ చెంగిల్చి నే పిట్టి రితి, జేవ్చి కామ్ పూర్తి జర్లు కెర్తి రితి తుమ్ నిదానుమ్ కెరన.

5 ఇన అల్లర్ పరిచ్చల్తె కీసి ఇండుక గే తుమ్తె కో జలెకు నేన్లెగిన, దేముడుక పున. కో పుసిలె, నే గోల కెర్తె, దర్ముమ్ తెన్ జో బుద్ది తయెదె.

6 గని ముక్కిమ్క ఎక్కి నముకుమ్ తెన్, కిచ్చొ అన్మానుమ్ నెంతె, పున. కిచ్చొక మెలె, కక్క అన్మానుమ్ తయెదె గే, గట్టిజ వాదు వీరె నముదుమ్చ కెర్లల్ కీసి ఇత్తల్ ఒత్తల్ లయెదె గే, జో మాన్సు దస్సి జయెదె.

7 నిజమి, దసా మాన్సుక దొన్ని మెన్సుల్ తయెదె. కిచ్చొ కామ్తె కి జోక ఎక్కి నిదానుమ్ తయె నాయ్.

8 దసా మాన్సు, జలె, కీసి ప్రబుతె నజల్లె కి కిచ్చొ కి దొర్కు జయదె మెన ఉచరుక జయె నాయ్!

అల్లర్ సేడ్డిసి ఓర్పుప జతిన్చి కొడొ

9 కీకేన్ జవున్ బావొ దాక్ జలె, బీద సుదొ జలె, దేముడు జోక గవురుమ్ రితి కెర అస్సె, జోక అత్త సొమ్సారుమ్ కెర అస్సెచి రిసా సర్ల జవున్.

10 దస్సి, సొమ్సారి జలో బావొ కో జలెకు ప్రబుచి తెడి దాక్ జంక జలెకి, ఏక్ వేల బీద జంక జలెకి, జో కి జోచి పెట్టి సర్ల తియన్సు. కిచ్చొక మెలె, బయిలుచి చివ్వర్చ పుల్లో కీసి పొర్లు జా సుకులగె, జో మాన్సుకి ఆకర్క మొరెదె.

11 బయిలుచి చివ్వర్ జలె, పొద్దు బార్ జా గట్టిజ వాదు ఒప్పడె కెర్లె, జేవ్చ పుల్లో సుకిల్ రితి పాడ్ కెర్తయ్. దస్సి

సుకా గెచ్చ గెస్త గెతతి. జోవయించి సూటి గెతయ్. దస్సి, జోచ కమొ కెర్లె కెర్లె సొమ్సారి కి మొరెదె.

12 ప్రబుచి రిసా కో నిదానుమ్ తెన్ కిచ్చొ కిచ్చొ అల్లర్ ఓర్పుప జవుల గే, జోక చెంగిలి. కిచ్చొక మెలె, పాపుమ్తె దెర్లు నే సేడ్డె జేవ్ అల్లర్ సేడ్డి పరిచ్చతె జిన్లె, దేముడు దెతి వరలోకుమ్తె జేవ్ గెతి కిరీటుమ్ జోక దొర్కు జయెదె. దేముడు ప్రమానుమ్ కెర్లి కోడు 'కో అంక ప్రేమ కెర్తి రితి ఇండుల గే, జోవయంకయ్ బెదవనిందె'.

13 గని అల్లర్ సేడ్డ పరిచ్చల్ జతె పొది, కో పాపుమ్ కెరుక ఉచర్లె జవున్, పాపుమ్ కెరుక దెర్లె జవున్, "దేముడు అంక పాపుమ్ కెరయ్తయ్" మెనున్ నాయ్. కిచ్చొక మెలె, దేముడు పాపుమ్తె బెదితోసా నెంజె, పాపుమ్తె ఎద్దర బెదె నాయ్, కో కి, కిచ్చొ కి జోక పాపుమ్ కెరవుక నెత్తిర్, చి 'పాపుమ్ కెర్లు' మెన కిచ్చొ రిసా ఉచరె నాయ్, కేన్ పాపుమ్ కెరె నాయ్.

14 మాన్సుక పాపుమ్ సికయ్తిసి కిచ్చొ మెలె, జోచి సొంత *పెట్టిచ గార్ ఆసలి జోక సికయ్తయ్, పెలయ్తయ్.

15 మాన్సుచి పెట్టి ఆస మొదొల్ జా జెర్లు, గజ్జల్ జా వడ్డ, పాపుమ్ వీరయిత్తయ్. ఒత్త తెంతో, జా పాపుమ్ వడ్డ వడ్డ పూర్తి జా, మొర్లు వీరయిత్తయ్.

చెంగిల్ తిలిసి ఎత్తి దేముడు తెంతో జెతిసి

16 నాయ్, బావుడ్లు, తుమ్ మోసిమ్ సేడ నాయ్.

17 చెంగిల్ తిలిస్ ఎత్తి, సత్తిమ్ తిలిస్ ఎత్తి పరలోకుమ్ తెంతో జెతయ్. ఉజిడ్ ఎత్తిక అబ్బొసి జలో దేముడు తెంతో జెతయ్. జో మార్పుప జతోసా నెంజె, జోచి ఉజిడి కెయ్య నీడ జయె నాయ్.

18 జోచి సొంత ఇస్టుమ్క, జోచి సత్తిమ్ కోడుచి సెక్కికయ్ అమ్క జో జెర్తయ్లన్. కిచ్చొక మెలె, జో జెర్తయ్లన కెర్లన ఎత్తికె అమ్ జోక దిలి †నొవొ జతి రితి అమ్క నొవర్ జెర్తయ్లన్.

19 ప్రేమ తిల బావుడ్లు, ముక్కిమ్క తుమ్ కిచ్చొ దెరన మెలె, తుమ్తె ఎత్తి మాన్సు బుద్ది కొడొ సరిగా సూన్తన జా, బమ్మ తెన్ లట్టబ్బన నే జతె, బే బేగి కోపుమ్ జా నాయ్.

20 కిచ్చొక మెలె, మాన్సుచి కోపుమ్ దేముడుచి పున్నిమ్క వాట్ దెయె నాయ్, జోచ పున్నిమ్ కమొ జర్లు కెరె నాయ్.

21 జాకయ్, మర్కుటుమ్ బుద్ది ఎత్తి, తుమ్చి పెట్టి గుడియయ్ జలి కుస్సిదుమ్ ఎత్తి తుమ్చి పెట్టి తెంతో వెంట గెల కెర, దాక్ కెరన, కోపుమ్ నే జతె, దేముడు తుమ్చి పెట్టి రోవిలి జోచి కోడు సేంతుమ్ తెన్ తుమ్ సూన

* **1:1 1:1** నెంజెలె 'గొతిమాన్సు' నెంజెలె 'సేవ కెర్లొసా'. † **1:1 1:1** ఈజో యాకోబు యేసుచో బావొన్ జా తిలో, బెర్లె. మరియు చి యోసీపుచి పెట్టిచో. యెరూసలేమ్చ నంబజలనచి నబక వెల్లొ తిలో. బారికుల్ 15:6-29, 21:18, గలతి 1:19, 2:9, 12. ‡ **1:1 1:1** 'బార తెగల్' మెలె, ఒగ్గర్ పూర్లుమ్ తెంతో, యాకోబుచ బార పుత్తర్లు తెంతో యూదుల్తె బార తెగల్ అస్సి. ఎత్తి పుత్తన్ తెంతో ఏక్ తెగ. § **1:9 1:9** 1 కొరెంది 7:22 దెక. * **1:14 1:14** 3:15 దెక. † **1:18 1:18** సంక్యా 15:19-21, ద్వితీ 18:3-4, రోమి 11:16.

సూన జాక పోసన. జా కోడు తుమ్చ ఆత్మల్క రచ్చించువ కెరుక తెరె.

22 గని దేముడుచి కోడు ఎక్కి సూన్తనయ్ తుమ్ జా నాయ్. ఎక్కి సూన్తనయ్ గని జోచి కోడు నే కెర్తన జలె, తుమ్ మోసిమ్ కెరన తస్తె. జోచి కోడె రితి ఇండ, చి తుమ్చి ఆత్మతె పలితుమ్ దెరెదె.

23 జోచి కోడు ఎక్కి సూనయ్ కో దస్సి ఇండె నాయ్ గే, కిసి జతయ్ మెలె, అద్దుమ్తె మాములుమ్ మొకోమ్ దెకన్తోసాచి రితి జతయ్.

24 జో మాన్సు అద్దుమ్తె దెకన పన్ల ఉట్ట గెచ్చు, కిసి డిసిలో గే బేగి వచ్చు గెల్తయ్.

25 గని, ఎత్కిక †అదారుమ్ తిలి ఆగ్గుకో చెంగిల్ అర్దుమ్ కెరన పోసన జా ఆగ్గుచి ఉప్పిరి నిదానుమ్ జయెదె గే, జోచి రితి సూన పవ్సితోసా నే జతె, జా ఆగ్గు కెర్తొసాయి జయెదె, చి జా ఆగ్గు రితి జో ఇండితిసి పాపల్, తప్పుల్, ఇండితిస్ తెంతో జో మాన్సుక విడ్డల్ కెరెదె, చి జా ఆగ్గు రితి ఇండితిస్తె జోక చెంగిల్ జయెదె, ఆత్మపలితుమ్ దెరెదె.

దేముడుచి నిజుమ్చి బక్తి

26 “దేముడుచి బక్తి ఆవ్ కెర్తసి” మెన కో ఉచరంతయ్ గే, జోచి చోండి తెన్ ఇస్టుమ్ అయ్లి రితి లట్టబ్తయ్ గే, జోవయించి పెట్టి జోక జొయ్యి మోసిమ్ కెరంతయ్. జోవయించి బక్తి ఆరి జతయ్.

27 అమ్క అబ్బొ జలో దేముడుచి మొక్కె మాన్సు కెర్తి కిచ్చొ బక్తి సత్తిమ్చి నిజుమ్చి జయెదె మెలె, అమ్ జోచి సేవ కెర్తినక ‘సత్తిమ్చి నిజుమ్చి’ మెన కిస కమొ రుజ్జు దెకవుల మెలె, పొర బోదల్చ, రండెల్ మాన్సుల్చ బాదల్ దెక అమ్ తోడె కెర్తెసి, పడ్డొ ఈంజ లోకుమ్చ పాపుమ్ కమొతె అమ్ నే బెదితె ఆత్మ సుద్ది తతిసి.

2

సామ్మార్లుక బీద సుదల్క తేడల్ నే దెకుత్

1 బావుడ్లు, పరలోకుమ్చి ఉజిడి తిలో అమ్చొ ప్రబు జలో యేసుక్రీస్తుక తుమ్ నంపజలి రిసా, తిలసక నెంజిలసక తేడల్ దెక నాయ్.

2 మెలె, దొగుల సబతె అయ్లె, ఎక్కిలో జలె, బజర్చ ముద్దివొ ఉంగారల్ తియన చెంగిల్ పాలల్ గలన అయ్లె, గని అన్నెక్లొ బీద తా పొర్న పాలల్ గలన తా జో కి అయ్లె,

3 చెంగిల పాలల్ తిలోసాక తుమ్ చెంగిల్ దెక, “ఈందె, ఇన్నె చెంగిల్తె వెసు” మెన పురె బుకార్లె, గని బీద సుదొక “ఒత్త టీచ” జవున్, “అంచి చట్ట వెసు” మెన జవున్ సంగిలె,

4 తుమ్ దొన్ని మెన్సుల్ జా తప్పుచ తీర్పుల్ కెర్తన జా తస్తె.

5 తుమ్ సూన, ప్రేమ తిల బావుడ్లు. ఈంజ లోకుమ్చి దనుమ్క దెకిలె, ఒగ్గర్జిన్ బీద సుదల్ అస్తి. జలె, *జోవయింతె ఒగ్గర్జిన్క దేముడు నిసాన, జోచి నముకుమ్ జతు మెనయ్, జోక ప్రేమ కెర్తనక జో దెతి వాటతె బెదుత్ మెనయ్, మెలె, పరలోకుమ్తె బెదుత్ మెనయ్.

6 తూమ్, బీద సుదల్క నిస్కారుమ్ దెక అస్సున్. తుమ్క కో నస్టల్చ మోసిమ్లు కెర్తతి గే తుమ్ ఉచర. బీద సుదల్ నాయ్, గని సామ్మార్లుయి దస్సి కెర్తతి. జెవ్వి తుమ్క తీర్పు కెర్తి గెరితె వెలన తగుల్ కెర్తతి.

7 పడ్డొ, తుమ్ క్రీస్తుక నంప కెర్తికయ్, జోచి నావ్ తెన్ బాప్తిసుమ్ నజన్లదు, గెద. జలె, జోచి నావ్, గవురుమ్చి నావ్, కో దూసుప కెర్తతి మెలె, బీద సుదల్ నాయ్, గని సామ్మార్లుయి.

8 దేముడుచి కొడొతె రెగిడ్లి రితి, †“తుమ్క తూమ్ కెర్తి ప్రేమ కెరంతసు గే, తుచి పాసిచొ మాన్సుక కి తెద్ది ప్రేమ కెర్తె తా”

మెన పరలోకుమ్చొ రానొ జలో దేముడు దిలి ముక్కిమ్చి ఆగ్గు తుమ్ ఇండితిస్తె నెరవెర్పుప కెర్తె, తుమ్క చెంగిలి.

9 గని, జా ఆగ్గు నెరవెర్పుప నే కెర్తి రితి తుమ్ తేడల్ దెకిలె, పాపుమ్ ఇండితసు, చి ఆగ్గుల్చి మొక్కె పాపుమ్ సుదల్చి సిచ్చక విలువ జా అస్సున్.

10 కిచ్చొక మెలె, ఆగ్గుల్ ఎత్కి నిదానుమ్ కో కెర్తె, గని మొత్తుమ్తె ఎక్కి జవున్ పిట్టయ్లె, మొత్తుమి పిట్టయ్లోసా జతయ్, చి మొత్తుమ్చి సిచ్చక జో మాన్సు విలువ జా అస్సె.

11 కిచ్చొక మెలె, ‡“లంజెకమొ కెర నాయ్” మెన సంగిలోసా, §“నరు అత్య కెర నాయ్”

మెన సంగిలోసా ఎక్కిలోయి. జలె, తుమ్ లంజెకమొ నే కెర్తె కి నరు అత్య కెర్తెగిన, జో దేముడు దిల ఆగ్గుల్ మొత్తుమ్చి మొక్కె పాపుమ్ కెర్తన జా అస్సున్.

12 జలె, అమ్చ పాపుమ్చ ఆసల్, తప్పుల్ తెంతో అమ్క విడ్డల్ కెర్తి *మాన్సుల్క ప్రేమ కెర్తి కన్కారుమ్ దెకితి ఆగ్గుక దెకయ్ దేముడు తుమ్క తీర్పు కెరెదె. అమ్క ‘జయ్యి ఆగ్గు రితి ఇండిల గే నాయ్ గే’ మెన జో తీర్పు కెరెదె. జయి కోడు నే పచ్చితె తుమ్ లట్టబా, ఇండ.

13 కిచ్చొక మెలె, కో అన్నె మాన్సుల్క కన్కారుమ్ దెకె నాయ్ గే, దేముడు జోకయ్ తీర్పు కెర్తిస్తె జోకయ్

‡ 1:25 1:25 2:18 దెక. * 2:5 2:5 కొరిందీల్క రెగిడ్లి 2 నంబర్ ఉత్తమ్ 1:27-29. † 2:8 2:8 లేవీయకాండుమ్ 19:18 మత్తయ 22:39, చి యోహాను 13:34 దెక. ‡ 2:11 2:11 నిర్గమకాండుమ్ 20:14, ద్వితీయోపదేశ కాండుము 5:18. § 2:11 2:11 నిర్గమకాండుమ్ 20:13, ద్వితీయోపదేశ కాండుము 5:17. * 2:12 2:12 1:25, చి 2:8 అన్నె దెక.

కన్యారుమ్ దెకుక బెదె నాయ్. గని, కో అన్నె మాన్సుల్క కన్యారుమ్ దెకితయ్ గే, జోక తీర్పు కెర్తి పొదిక జో ప్రబు జోకయ్ కన్యారుమ్ దెకెదె.

14 బావుడ్లు, “ప్రబుక నంప కెర్తసి” మెన ఎక్కిలో సంగిలే కి, జో బుల్లి బుద్ది దస్సి నముకుమ్ తెన్ నే బెదిలె, కిచ్చోయ్ లాబుమ్! ‘నముకుమ్’ మెన జో మాన్సు రితి సంగితిసి జోక రచ్చించుప కెరుక తెరె గే? తుమ్ ఉచర.

15 నంపజలొన్తె కేన్ జవున్ బావొక గే, బేనిక గే, సరిపుచుప జత పాలల్ నెంజిలె జవున్, సరిపుచుప జతి రోజుకచి అన్నిమ్ దొర్కు కెరంతి సెక్తి జవున్ నెంజిలె,

16 కో జలెకు జోక “చెంగిల్ తా. తుమ్క పాలల్ చి అన్నిమ్ దొర్కు జవున్” మెన సంగిలె, గని సరి జతి తోడు నే దిలె, కిచ్చో లాబుమ్! కామ్క నెంజె.

17 దస్సి, రితి నముకుమ్ సంగన్లె, గని కామ్క జెతికయ్ కామ్ నే కెరె, జా నముకుమ్ ఆరిచి.

18 “తుకయ్ నముకుమ్, గని అంకయ్ కమె” మెన కో జలెకు అన్నెక్లోక సంగిలె, జో అన్నెక్లోక ఆవ్ కిచ్చో జబాబ్ దెయిందె మెలె, “తుచ కమె నెంతె తుచి నముకుమ్ అంక రుజ్జు జయె నాయ్. కేన్ జవున్ కామ్ కెర్లెకయ్ నముకుమ్ చినుక జయెదె. ఆవ్, జలె, అంచ కమెకయ్ అంచి నముకుమ్ దెకయిందె” మెనయ్ జబాబ్ దెయిందె.

19 †“ఎక్కిలో దేముడు ఎక్కిలోయి అస్సె” మెన తుమ్ నంప కెర్తసు. జా సరిగా, గని దస్సి మెన బూతల్ కి బప్పన్తతి. గని బప్పన జేవ్ జంక బియఁ అద్దుర్ జా గెతతి.

20 చెంగిలి నే ఉచర్తో ఓ మాన్సు, తుయి కో జలెకు, కమెతె నే రుజ్జు జతి నముకుమ్క ‘ఆరిచి’ మెన, ఆవ్ తుక రుజ్జు దెకవుక తుక కావలె గే?

21 జలె, ‡ “‘బలి’ మెన పుత్తుద్క కండ దె” మెన దేముడు సంగిలి రితి పుత్తున్ జలో ఇస్సాకుక అబ్రాహామ్ బలి దెలి టాన్తె బంద తెయార్ కెర్లిన్ తెన్, జో కెర్లి జా కామ్చి రిసాయి, “నిజామి అన్నెపూర్తి నంప కెర్తయ్, సత్తిమ్ తెన్ అస్సె” మెన, దేముడు ‘జోక పున్నిమ్’ మెలి రితి అబ్రాహామ్క తీర్పు దెకె నాయ్ గే?

22 మెలె, జో అబ్రాహామ్చ కమెతె జోచి నముకుమ్ బెద కామ్ కెరె తిలి, చి జోవయింప కమెతె జోచి నముకుమ్ బార్ జా నెరవేర్చువ జలి.

23 దస్సి, జా కామ్తె జోచి నముకుమ్ రుజ్జు జలి రిసా,

§“అబ్రాహామ్ దేముడు సంగిలి కోడు నంప కెర్లి రిసాయి ‘జోక పున్నిమ్’ మెలి రితి ప్రబు దెకిలన్”

మెన రెగిడ్డిన్క ‘నిజామ్’ జతయ్. *‘దేముడుచో మింతున్’ మెన కి అబ్రాహామ్చి రిసా దేముడుచి కొడొతె రెగ్గ అస్సె.

24 దస్సి, ఎక్కి సంగన్లి నముకుమ్చి రిసా నాయ్, గని జా నముకుమ్ జోచి కమెతె బార్ జా రుజ్జు జలి రిసాయి, దసా మాన్సుక ‘సత్తిమ్చో. పున్నిమ్చో’ మెలి రితి దేముడు దెకితయ్.

25 అగ్గె లంజె జియ తిలి రాహాబు తెన్ కి దస్సి. జేవ్చి †వీక్ కామ్చి రిసా, మెలె, జా సుట్టు కబుర్ అయ్ల పూర్గుల్క జా మరియాద కెర, జోచ విరోదుమ్ సుదల్తె జేవ్ దెర్పు నే సేడ్డి రితి లుంకడ, వేర వాట్ తెద్రవ దిలి రిసా, ‘జాక పున్నిమ్’ మెలి రితి దేముడు దెకిలన్.

26 జలె, జీవ్ నెంజిలె ఆగ్గె కిసి మొర తయెదె గే, దస్సి, మాన్సు ఇండిత కమెతె నే బార్ జలె, జో సంగితి నముకుమ్ కామ్క నెంజె, మొర అస్సె.

3

కొడొ లట్టబ్బిన్తె జాగర్త దెకసుక

1 బావుడ్లు, తుమ్తె ఒగ్గర్ జిన్ బోదన కెర్తన జతు నాయ్. కిచ్చోక మెలె, అమ్ బోదన కెర్తనచి పూచి ఒగ్గరి, చి ఆకర్ దీసల్క ప్రబు అమ్క పరిచ్చు కెర తీర్పు కెర్తి పొదిక, అమ్క జో తియార్లి జా కామ్చి రిసా ముక్కిమ్క అమ్కయ్ తీర్పు కెరెదె.

2 అమ్తె కో కి తప్పుల్ సంగుక జయెదె, చి కొడొ లట్టబ్బిన్తె కో కిచ్చో తప్పుల్ నే సంగుక తెరె, జో మాన్సుక ‘జోచి ఆగగుచి ఉప్పిరి జోపూర్తి ఏలుప కెర్తయ్, జో మాన్సుతె కిచ్చోయ్ పొరపాట్ నాయ్’ మెనుక జతయ్.

3 జేవ్ కేన్ దిక్కు ఇండుక అమ్చి ఇస్టుమ్ తయెదె గే, ఒత్తయ్ ఇండుత్ మెన, గోడల్చ చొండిలె కలెమ్ చప్లయ్లె జోచి ఒండి ఆగగుక బులవుక జయెదె.

4 ఓడల్ తెన్ కి దస్సి. ఓడ వెల్లి జలెకి, దిక్కు దెకయ్తి జాచి చట్టు జాచి కంట ఇదిలిసి జయెదె. జలె, జా ఓడక గట్టిజ వాదు పెలిలెకి, ఓడచి కంటో దిక్కు దెకయ్తి జా చట్టు ఇదిలిసి జలెకి, ఇండయ్తొసా జా చట్టు బుడ్డవ కేన్ పక్క దెకయెదె గే, జయ్యి పక్క ఓడ గెచ్చెదె.

5 దస్సి, ఒండి ఆగగుక జీబు ఇదిలిసి జలెకి, లట్టబ్బె జాక కెర్తి సెక్తి! అస్సె, కెర్తి డొంగుర్చ రూకుల్క ఏక్ ఇదిలిసి ఆగి డయ గెలెదె!

6 దస్సి, జీబు ఆగిచి రితి జయెదె. అమ్చి ఒండి ఆగగుతె జీబు కెర్తి పాపుమ్ కెరయెదె! అమ్చి ఒండి ఆగగుక గార్ కెరెదె. అమ్ జెర్మిల్ తెంతొ మొరై ఎదక ఈంజ లోకుమ్తెచి అమ్చి బత్తుతె జర్గు జతిసి ఎత్తిక జీబు ఏలుప కెర్తయ్. మాన్సు జాగర్త నెంజిలె, అమ్చి చొండితె వెల్లి ఆగి సేడ్డి రితి జయెదె.

† 2:19 2:19 గలతీయల్ 3:20, రోమీయల్ 3:30, మార్కు 12:29. ‡ 2:21 2:21 ఆదికాండుమ్ 22:1-18. § 2:23 2:23 ఆదికాండుమ్ 15:6, రోమీయల్ 4:3, 5, 9. * 2:23 2:23 2 దిన: 20:7. † 2:25 2:25 యెహోనువ 2:1-24, 6:1-25.

7 మెలె, ఎత్కి రగుమ్ జంతువుల్క, పిట్టల్క, అయివో గట్టక, మొస్సు గట్టక మాన్సు ముద్దో కెరుక జయెదె. జేవ్క మాన్సుల్ ముద్దో కెర ఆస్తి, గని

8 జీబుక కేన్ మాన్సు ముద్దో కెరుక నెతిర్తి. జీబు తుక్లె తంక నెత్త, ఒగ్గర్ ప్రమాదుమ్ దెకయ్తయ్, జాచితె మొర్తి విస్సుమ్ బెర్తు తయెదె.

9 జీబు తెన్ అబ్బో జలొ దేముడు ప్రబుక గవురుమ్ సంగితనుమ్, గని మాన్సుల్క దూసుప కెర్తనుమ్, జోచి పోలిక జేవ్ జెర్నన్ జలెకి. దస్సి, కెద్ది తప్పు కెర్తనుమ్!

10 ఎక్కి చోడి తెంతో గవురుమ్ సంగితిసి, దూసుప కెర్తిసి బార్ జతయ్. బావుడ్లు, ఈంజ తప్పు. ఇనిచి పోన.

11 ఎక్కి గొయి తెంతో ఊంట పుట్టె, చెంగిలో పానిచి కారు జలి గర్చి పాని దెయెదె గే? నాయ్ గెద.

12 పడ్డొ, బావుడ్లు, *అంజూరుమ్ రూక్తె ఒలివ పండ్లు దెరుల గే? నెంజెలె, ద్రాచ చెట్టె బొడ్డ పండ్లు దెరుల గే? నాయ్, గెద. దస్సి, కారు జలి పానిచి ఊంట చెంగిలో పాని దెయె నాయ్.

పరలోకుమ్ తెంతో చి గ్యానుమ్ కిసి తయెదె

13 తుమ్తె కక్కయ్ బుద్ది గ్యానుమ్? ‘అంకయ్ గ్యానుమ్’ మెన కో ఉచరన్లె, జా గ్యానుమ్తె బెదితి బుద్ది తెన్, గవురుమ్ నే ఉచరంతె, జా గ్యానుమ్తె బెదిత కమొ ఇండ రుజ్జు దెకవును.

14 గని తుమ్చి పెట్టి గోసచి విస్సుమ్ తిలె, సొంత గవురుమ్ ఆనన్తి ఆన తిలె, ‘ఆమ్ నత్తిమచ’ మెన తుమ్ ఉచరన నాయ్, అబద్దుమ్ జస్తె.

15 తుమ్చి పెట్టి దస్సు బుద్దుల్ తిలె, తుమ్చి గ్యానుమ్ కేనె తెంతో జెతయ్ మెలె, పరలోకుమ్ తెంతో నాయ్, గని ఈంజయ్ లోకుమ్చి తెంతోయ్, మాములుమ్ †ఆగ్ రగుమ్, బూతల్ తెంతో చి రగుమ్ జతయ్.

16 గోసలు, సొంత గవురుమ్ ఆనన్త ఆసల్ కేనె తవుల గే, ఒత్తయ్ కిచ్చో ముద్దో తయె నాయ్, గొడ్డల్ తయెదె, చి మాన్సుల్ ఎత్కి పాపుమ్ ఇండుక అలవాట్ జవుల.

17 గని పరలోకుమ్ తెంతో అయ్లి గ్యానుమ్, ప్రబుచి సుద్ది తెన్, సేంతుమ్ బుద్ది తెన్, మెత్తన బుద్ది తెన్, సొంత ఇస్టుమ్ జర్గు కెరుక ఒగ్గర్ నే తతె, వేర మాన్సుల్చి కోడు మరియాద తెన్ నూన్తి బుద్ది తెన్ తా, కిచ్చోయ్ ఉప్రమెన్సు నెంతె తయెదె.

18 అన్నె, పున్నిమ్ కేనె పలితుమ్ దెరెదె మెలె, సేంతుమ్ కెరయ్త మాన్సుల్చి అత్తి సేంతుమ్చి బీ గలిలిన్తెయ్ పలితుమ్ దెరెదె.

* 3:12 3:12 అంజూరుమ్ రూకు బొడ్డ రూకు రితి తయెదె. † 3:15 3:15 1:14 దెక. ‡ 4:10 4:10 పేతురు రెగిడ్డి ఏక్ నంబర్ ఉత్తమ్ 5:5-10.

4

దేముడు సంగిలి రితి ఇండుక

1 తుమ్చితె తగుల్ జతిసి, జట్టి జతిసి కేనె తెంతో జెతయ్ గే తుమ్ ఉచర. కేనె తెంతో మెలె, తుమ్చి అగుతె జట్టి జత ఆసల్ తెంతోయ్.

2 కిచ్చో జలెకి ఆన జతను, చి జా దొర్కు నే జలె, అన్నెక్కోక మార్తను. దస గోసల్ తెన్ తత్తను, గని తుమ్ ఆన జలిసి దొర్కు నెంజె, చి గొడ్డల్ తగుల్ జతె తత్తను. కిచ్చోక తుమ్క దొర్కు జలిసి దొర్కు నెంజె మెలె, దేముడుక పుసున్ నాయ్.

3 నెంజెలె, పుసిలెకి, దొర్కు నెంజె. కిచ్చోక మెలె, గర్చి బుద్ది తెన్ పుసితను. మెలె, తుమ్చి పెట్టిచ ఆసల్ జర్గు కెరన్కయ్ ఉచర పుసితను.

4 కేన్ జవున్ తేర్బోద మున్సున్క ముల దా లంజె జలి రితి, తుమ్ దేముడుక ముల, ఈంజయ్ లోకుమ్చి బుద్దితె గెచ్చ అస్సున్! ఈంజయ్ లోకుమ్చి దనుమ్క ఆన జతిసి దేముడుక విరోదుమ్ జతయ్ మెన నేన్సు గే? జాకయ్, ఈంజయ్ లోకుమ్చి పచ్చెన కో గెతయ్ గే, దేముడుక విరోదుమ్ సుదొ జతయ్.

5 *“అమ్ మాన్సుల్చి పెట్టి జో దిలి ఆత్మ జోకయ్ నిదానుమ్ తవున్ మెన జోచి ఆన” మెన అగ్గె తెంతో దేముడుచి కొడొతె రెగ్గ అస్సె. జా కోడు ఆరి ఒత్త అస్సె మెన ఉచర్తను గే?

6 అన్నె, అమ్ వేర ఆసల్ నే జతి రితి ప్రబు అమ్క దయ కెర దొర్కు జలి తోడు తయెదె. జాకయ్, దేముడుచి కొడొతె అన్నె కిచ్చో రెగ్గ అస్సె మెలె, †“గవురుమ్ ఉచరంతనక దేముడు దూరి కెర్తయ్, గని కో దాక్ కెరనుల గే, జోవయింకయ్ జోచి దయచి తోడు దెయెదె” మెన రెగ్గ అస్సె.

7 జాకయ్, దేముడుచి తెడి జా, దాక్ కెరన జోవయించి ఇస్టుమ్ రితి ఇండుక తుమ్ కోర్ప జా. దస్సి జలదు మెలె, నయ్తాన్ పాసి అయ్లి రితి జా జోచి బుద్ది సికడుక జవున్ కిచ్చో వేర అల్లర్ కెరుక జవున్ ఉచరె, జోక “ఉట్ట గో!” మెలె, జో ఉట్ట నిగెదె.

8 దేముడుక పాసి జా, చి జో తుమ్కయ్ పాసి జెయెదె. తుమ్ పాపుమ్ కెర్తన తుమ్చి ఆత్మచ అత్తో సుద్ది కెరన. తుమ్ దొన్ని మెన్సుల్ తిలన, తుమ్చి పెట్టి ఎక్కి ప్రబుచయ్ జా జోచి సుద్ది జా, జోక ఎక్కి నిదానుమ్ జా.

9 తుమ్చ కమొచి పాపుమ్ ఉచరన పెట్టి బాద సేడ, లాజ్ జా దుకుమ్ జా ఏడ, దస కమొ ముల. పాపుమ్ కమొచి ఆగుక ముల్లి బుద్ది జా తుమ్ ఏడ. పాపుమ్ కమొచి నర్ద ముల్లి బుద్ది జా తుమ్ దుకుమ్ జా.

* 4:5 4:5 నిర్ణమకాండుమ్ 20:5-6. † 4:6 4:6 సామెతల్ 3:34. ‡ 4:10 4:10 పేతురు రెగిడ్డి ఏక్ నంబర్ ఉత్తమ్ 5:5-10.

10 దేముడుచి మొక్కె దాక్ కెరన, చి జో తుమ్క టీవడెదె. ‡

మాన్సుల్క తీర్పు నే కెరుక

11 బావుడ్లు, ఎక్కిలోచి రిసా అన్నెక్కో దూసుప కెర్త తీర్పు కొడొ లట్టబా నాయ్. అన్నెక్కోచి రిసా దూసుప కెర్త తీర్పు కొడొ కో లట్టబుల గే, దేముడు దిలి ఏఆగ్గుక కి దూసుప కెర తీర్పు కెర్తయ్. దేముడుచి ఆగ్గుచి ఉప్పిరి తుమ్ తీర్పు కెర్తసు జలె, జోచి ఆగ్గు రితి ఇండున్ నాయ్, గని జోచి ఆగ్గుచి కంట వెల్లో కెరసుక ఉచర్లి రితి జతసు.

12 *మోసే పూర్లుమ్చోచి అత్తి ఆగ్గుల్ దెతోసా తీర్పు కెర్తొసా ఎక్కిలోయి. అన్నె కోయి నాయ్. రచ్చించుప కెరుక నాసెనుమ్ కెరుక అదికారుమ్ తిలోసా. ఎక్కిలోక అన్నెక్కో తీర్పు కెరుక తుమ్ కొన్స!

అమ్చి బత్తు దేముడుచి అత్తి అస్సె

13 అల్లె, “అజి గే కలిక గే వలాన్ పట్టుమ్తె గెచ్చ వెర్సెక్ రోజుక బియ్యార్ కెర కెర లాబుమ్ కెరనుమ్దె” మెన జవున్ తుమ్ దయిరిమ్ ఉచర్తన జాగర్త ఉచర.

14 కలిక కిచ్చొ జర్లు జయెదె గే నేన్సు. తుమ్చి బత్తు కిసిచి? తుమ్ కిసి జస్తె మెలె, గాందుచి రితి జా, కెయ గే డీన, గడియయ్ తా, అన్నె డీసున్ నాయ్.

15 నాయ్, సొంత సెక్తిక దస్సి దయిరిమ్ నే జతె, తుమ్ కిచ్చొ ఉచరుక చెంగిల్ మెలె, “ప్రబు సెలవ్ దిలె జిమ్దె, చి ఈంజ జా కామ్ కెర్తుమ్దె” మెన.

16 అప్పె తుమ్ కిసి జతసు మెలె, తుమ్చి సొంత సెక్తిక సంపజా, దయిరిమ్ గవురుమ్ ఉచరంతసు. దస్సి సొంత సెక్తిక దయిరిమ్ గవురుమ్ ఉచరంతిసి తప్పు.

17 జలె, కిచ్చొ కెర్లె కిసి ఇండిలె చెంగిల్ గే కో జాన జానయ్ దస్సి నే కెర్లె నే ఇండిలె, జో మాన్సుక జా తప్పు పాపుమ్ జతయ్.

5

మాన్సుల్క మోసిమ్ కెర్లెన్చి రిసా తీర్పు

1 అల్లె, తుమ్ సొమ్మార్లు కో జలెకు, పాసి జెత తుమ్క లాయిత కస్టల్చి రిసా తుమ్ ఏడుక దెర.

2 తుమ్చి సొమ్మారుమ్ కువ గెచ్చ అస్సె, తుమ్చ పాలల్క నుస్సి కా గెల అస్సె,

3 తుమ్చి బజార్ సామన్, వెండి సామన్క చెద్ద కా గెల అస్సె. తుమ్ కి పాడ్ జతిన్క ఈంజ సామన్ ఎత్తి కువిలిసి చెద్ద కా గెలిసి రుజ్జు జయెదె. కిచ్చొ రుజ్జు మెలె, ఈంజ నాసెనుమ్ ఆగి డడ్డిల్ రితి తుమ్చి ఆగేక కి కా గెలెదె.

దస్సి, ఆకర్ దీసల్చి రిసా ఈంజ సిచ్చ సంపాదన కెరన అస్సున్. ఆకర్క దస్సి సిచ్చ జస్తె.

4 ఆదె, తుమ్చి బుయిచి పంటో లాయిల కూలి మాన్సుల్చి కూలి డబ్బుల్ తుమ్ మోసిమ్ కెర తియన్లదు. జా కూలి డబ్బుల్ కేక్ గల తుమ్క నింద సంగితయ్. జా పంటో లాయిలసచి ఏడుక ఎత్తిక ఏలుప కెర్తొ పరలోకుమ్చొ ప్రబు సూన అస్సె.

5 ఈంజయ్ లోకుమ్తె సుక్కుమ్ తెన్ తుమ్చి పెట్టి ఇస్టుమ్ అయ్లి రితి జియ అస్సున్. ‘కండుక’ మెన తుమ్ బెయిలల్ గొరెల్ గట్టక కిసి బలుమ్ కెర్తసు గే, దస్సి, మొర్తి సిచ్చ కతి రిసా తుమ్క తుమి బలుమ్ కెరన అస్సున్!

6 పాపుమ్, సత్తిమ్చ మాన్సుల్క నిందల్ కెర మార అస్సున్. తుమ్క జేవ్ జబాబ్ నే దెతె తుక్లె అస్సి.

యేసు అన్నె జెతె ఎదక నిదానుమ్ తెన్ రకుక

7 జలె, బావుడ్లు, ప్రబు అన్నె జెతె ఎదక తుమ్ నిదానుమ్ తా రక. ఈందె, రయ్తు బి గల తిలె, తొలి పాని ఆకర్ పాని వెట పంటో పికిత్ ఎదక, ఈంజ లోకుమ్చి జా విలువచి పంటో లాయితి సమయుమ్ జెతె ఎదక బమ్మ నెంతె, జో రయ్తు ర్కెదె.

8 తుమ్ కి దస్సి నిదానుమ్ తెన్ రక. నిజామి, తుమ్చి ఆత్మతె డిట్టుమ్ జా. కిచ్చొక మెలె, ప్రబు అన్నె జెతికయ్ సమయుమ్ పాసి జా అస్సె.

9 ఎక్కిలోచి రిసా అన్నెక్కో నిందల్ ఉచర నాయ్, చి ప్రబు తుమ్కయ్ నిందల్ కెరుక తయె నాయ్. ఓదె, ఈంజ లోకుమ్చి గుమ్ముమ్ ఒత్తల్తో మెలి రితి తీర్పు కెర్తొసా జతో జో ప్రబు టీవ, మాన్సుల్క పరిచ్చ కెర తీర్పు కెరుక మెనయ్ రకితయ్.

10 బావుడ్లు, బాదల్ ఓర్పుప జతిన్చి నిదానుమ్చి రిసా తుమ్క రుజ్జు తంక మెలె, దేముడు ప్రబుచి నావ్ తెన్ జోచ కబుర్లు సూనయ్ల పూర్లుల్చి రిసా తుమ్ ఉచర. జోవయిచి నిదానుమ్ దెక, తుమ్ కి దస్సి నిదానుమ్ జా.

11 ఈందె, జోవయింతె కో నిదానుమ్ తా గెల గే, ‘జోవయింకయ్ చెంగిలి’ మెన సంగితసుమ్. *యోబు పూర్లుమ్చొ ఒగ్గర్ ఒగ్గర్ అల్లర్ సేడ్లె కి, జో నిదానుమ్ తా గెలిన్చి రిసా సూన అస్సున్. జో యోబు నిదానుమ్ తతికయ్, దేముడు జర్లు కెర్లెసి, కన్కారుమ్ దెకిలిసి, రచ్చించుప కెర్లెన్చి రిసా సూన అస్సున్, గెద. దస్సి, తుమ్ కి దేముడుచి దయ దెక అస్సున్.

ఒట్టు నే గలనుక

12 ముక్కిమ్క, బావొ, పరలోకుమ్చి సాచి జవున్, బుయిచి సాచి జవున్, కిచ్చొచి సాచి జలెకి ఒట్టు గలన

§ 4:11 4:11 ముక్కిమ్ జలి ఆగ్గు జలె, ఎత్తి అదికారుమ్ తిలో దేముడుక చి అన్నె మాన్సుల్క ప్రేమయ్ కెర్లెసి. మత్తయి 22:37-40, మార్కు 12:30, 31, 33 చి లూకా 10:27. యాకోబు 2:8 కి దెక. * 4:12 4:12 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సె. * 5:11 5:11 యోబు పుస్తకుమ్ దెక.

నాయ్. 'నాయ్' మెనుక జలె, 'నాయ్' మెన. 'ఎఁ ఎఁ' మెనుక జలె, 'ఎఁ ఎఁ' మెన. దస్సి, ఒట్టు నే గలంతె రితి సత్తిమి సంగ.

13 తుమ్తె కో కిచ్చొ జవున్ అల్లర్ సేడ అస్సె జలె, ప్రార్దన కెర్పు. తుమ్చితె కక్క సర్ల అస్సె గే, ప్రబుచి గవురుమ్ గాయుసు.

14 తుమ్చితె కక్క జొర్ణొ గే జబ్బు గే అస్సె జలె, ప్రబుక నంపజలనచి సంగుమ్చ వెల్లెల మాన్సుల్క బుకార్డు, చి జేవ్, ప్రబుచి నావ్ తెన్, జా బాద తిలోసాచి తేల్ సువ, జోచి రిసా ప్రార్దన కెర్దు.

15 ప్రబుచి ఉప్పిరచి నముకుమ్ తిలి ప్రార్దన, జా బాద తిలోసాక రచ్చించుప కెరెదె, చి ప్రబు జోక చెంగిల్ కెరెదె. అన్నె, జో బాద సేడ్డిసి కిచ్చొ జవున్ జో కెర్లి పాపుమ్చి రిసాచి జలె, జా పాపుమ్ కి జోక చెమించుప జయెదె.

16 జాకయ్, తుమ్ కెర్ల పాపల్ ఎక్కిలోచి మొక్కె అన్నెక్కో బప్పన, ఎక్కిలోచి రిసా అన్నెక్కో ప్రార్దన కెర, తుమ్చ బాదల్ ప్రబు చెంగిల్ కెర్లి రితి, తుమ్క జో చెంగిల్ దెతి రితి. ప్రబుక సత్తిమ్ నిదానుమ్ తిలో మాన్సు ప్రార్దన కెర్లె, జా ప్రార్దన జలె కామ్ కెర్లయ్.

17 †వలీయా హార్గుమ్చొ జలె, అమ్చొ రితొ మాములుమ్ మాన్సు, చి "పాని పెటున్ నాయ్" మెన జా సుట్టు ఎక్కి మెన్సు తెన్ ప్రార్దన కెర్లికయ్, తిన్ని వెర్సుల్ సొవ్వు జొన్నొ పూర్తి జా దేసిమి పాని పెటె నాయ్.

18 తెదొడి అన్నె ప్రార్దన కెర్లన్, చి ఆగాసుమ్ తెంతొ పాని పెట్టి, చి ఈంజ బూలోకుమ్తె పలితుమ్ అన్నె దెర్లి.

19 బావుడ్లు, సత్తిమ్ ముల కో జలెకు పాపుమ్త ఉట్ట గెచ్చ తయెదె జలె, జోక కో సత్తిమ్ వాట్ అన్నె దెకవ ఆనుల గే,

20 జో కిచ్చొ జానున్ మెలె, జో పాపుమ్ కెర్లొసా పాపుమ్ వాటు అన్నె నే గెతి రితి జోక కో సత్తిమ్తె అన్నె కడ ఆనుల గే, మొర్నుతె జో మాన్సు నే గెతి రితి జోక రచ్చించుప కెర తయెదె, చి జోచ బగ్గర్ పాపల్ చెమించుప జతి రితి అవ్కాసుమ్ దొర్కు కెర తయెదె.

† 5:17 5:17 రాసల్ మొదొల్ పుస్తకుమ్ 17:1, 18:41-45.

పేతురు రెగిడ్లి మొదొల్చి ఉత్త్రమ్ బారిక్ జలో పేతురు రెగిడ్లి మొదొల్చి ఉత్త్రమ్

1 యేసుక్రీస్తు బారికి జలో పేతురు, పొంతు, గలతీయ, కప్పదొకియ, ఆసియా చి బితునియ ప్రదేసిమ్లుతె సొంత టాన్ నెంజిల వేర వేరతెచ తిల నంపజలన్క, రెగిడ్లి ఉత్త్రమ్.

2 యేసుక్రీస్తుచి ఇస్తుమ్ రితి తుమ్ ఇండుక మెన, జోచి సుచి జలి లోయిక తుమ్చి పాపుమ్ వుంచి జంక మెన, అబ్బొన్ జలో దేముడు * అగ్గె తెంతో ఉచర తుమ్క నిసాన అస్సె, చి దస్సి జతి సెక్తి తుమ్క తంక మెన, తుమ్ జోచయ్ మాన్సుల్ జంక మెన, తుమ్క దేముడుచి సుద్ది తిలి ఆత్మ సుద్ది కెర అస్సె. జలె, ప్రబుచి దయ, జోచి సేంతుమ్ తుమ్క కొత్తు నెంజితె తవున్.

దేముడు దిలి రచ్చనచి రిసాచి దయిరిమ్

3 అమ్చొ ప్రబు జలో యేసుక్రీస్తుచొ దేముడు అబ్బొన్క జొబర! జోచి ఎదివాట్ దయక, అమ్క నొవర్ జెర్మవ అస్సె. యేసుక్రీస్తు మొర్ను తెంతో అన్నె జీవ్ జా ఉట్టిన్చి రిసా ఆమ్ కి అన్నె జీవ్ జా ఉట్ట పరలోకుమ్తె గెచ్చుమ్దే మెన

4 జివమ్ తెన్ బెద తిలి ఆసతె అమ్క నొవి జెర్మన్చి రిసా, నే గార్ జతి, కలి నెంజిలిసి పరలోకుమ్తె తుమ్క దేముడు దిలి వాట తుమ్క రక్తితయ్.

5 ఆకర్ దీనల్క పూర్తి డీసుక తెయార్ తిలి రచ్చన తుమ్క నే పిట్టుక మెన, దేముడు ప్రబు జోచి సెక్తి తుమ్చి నముకుమ్ వాట్ తుమ్క తోడ అస్సె.

6 ఆకర్ దీనల్చి రచ్చనచి రిసా తుమ్ సర్ద తెన్ జతసు. గని రకుమ్ రకుమ్చ కస్టుమ్ తెన్ అప్పె ఇదిల్ కాలుమ్క తుమ్క ధుకుమ్ జయెదె.

7 జేవ్ అర్ల సేడ్డిన్తె కిచ్చొ లాబుమ్ మెలె, తుమ్చి నముకుమ్క సత్తిమ్చి గే నెంజె గే తుమ్ జేవ్ అర్ల సేడ్డిన్తె డీసెదె. బజర్క 'సత్తిమ్చి గే నెంజె గే' మెన రుజ్జు తంక మెలె, జేవ్క ఆగితె పరిచ్చ కెరుల. బజార్ జలె, విలువ జలెకి పాడ్ జతి వస్తువ. జలె, తుమ్చి నముకుమ్ బజర్చి కంట బగ్గర్ విలువ, చి జా పరిచ్చ జలె, జిన్లె, యేసుక్రీస్తుచి పరలోకుమ్చి ఉజిడి గవురుమ్ పూర్తి డీస్తి ఆకర్ దీన్క జా తుమ్చి నముకుమ్క 'సత్తిమ్చి' మెన, జోచి పరలోకుమ్చి ఉజిడితె గవురుమ్తె తుమ్క జో వాట దెయెదె.

* 1:2 1:2 రోమియల్ 8:29-30, ఎపెసు 1:5, 11-12 చి తీతు 1:1 దెక.

† 1:12 1:12 మెలె, జేవ్ పూర్తుల్చి కాలుమ్ నాయ్, గని పడ్డె అయ్లనచి కాలుమ్ యేసు బార్ జంక తిలి, చి ఎక్కి యూదుల్ నాయ్, గని యూదుల్ నెంజిలన కి యేసుచి తెడిచి రచ్చన నజనుక ఈంజయి కాలుమ్ అవ్కాసుమ్ దొర్కు జలి. రోమియల్ 11:11, 25, గలతీయల్ 3:8, 9, 14, ఎపెసు 3:6, చి పేతురు రెగిడ్లి ఏక్ నంబర్ ఉత్త్రమ్ 1:20 దెక. ‡ 1:16 1:16 తేపీయకాండుమ్ 11:44-45, 19:2, 20:7.

8 జోక తుమ్ సొంత అంకివో తెన్ నే దెకిలెకి, జోక ప్రేమయ్ అస్సెన్. జోక అప్పె దెకుక నెంజిలె కి, జోక నంపజా అస్సెన్, చి మాన్సు అర్దుమ్ కెరుక నెత్తిర్తి పరలోకుమ్చి ఎదివాట్ సర్దనంతోనుమ్ తుమ్చి పెట్టి బెరయ్ అస్సె.

9 తుమ్చి జా నముకుమ్చి రిసా, తుమ్చ ప్రానుమ్క రచ్చన తుమ్క దొర్కు జా అస్సె.

10 తుమ్క దొర్కు జతి ఈంజ రచ్చనచి రిసాచ దేముడుచ కబుర్లు పూర్తుమ్ సంగిలన, ఈంజయి రచ్చనచి రిసా ఒగ్గర్ పుసితె తిల.

11 కిచ్చొ పుసీల మెలె, "అమ్చి పెట్టి క్రీస్తుచి ఆత్మ సంగిల జో సేడుక తిల బాదల్ జో పడ్డొక గవురుమ్ జంక తిలిసి కేన్ సమయుమ్క జర్గు జంక, కీసి సమయుమ్క జర్గు జంక అస్సె?" మెన పుసీల.

12 దేముడు జోవయింక దెకయ్లన్. కిచ్చొ దెకయ్లన్ మెలె, జేవ్ జా కబుర్ సంగితి సేవ కెర్తిక జోవయించి రిసా నాయ్, గని తుమ్చి రిసాయి మెన దేముడు జోక దెకయ్లన్†. జా సుబుమ్ కబుర్ తుమ్ రచ్చించుప జతిన్చి రిసా, పరలోకుమ్ తెంతో తెద్దయ్లి దేముడుచి సుద్ది తిలి ఆత్మచి తెడి, తుమ్క సుబుమ్ కబుర్ బోదన కెర్ల మాన్సుల్చి అత్తి జానయ్తెయ్. జా సుబుమ్ కబుర్తె తిలిసి ఎత్తి పూర్తి అర్దుమ్ కెరసుక పరలోకుమ్చ దూతల్ కి ఒగ్గర్ ఆస తెన్ అస్సి.

దేముడుచి సుద్దిచి రితి ఇండ

13 జలె, ప్రబు జలో యేసుతెచి రచ్చన తుమ్కయ్ దొర్కు జలి రిసా, తుమ్చ మెన్సు తుమ్ డిట్టుమ్ కెరన, నే మచ్చిల్ రితి, ముద్దొ కెరన, తెలివి తా, జో అన్నె ఉత్త్ర జా జోచి పరలోకుమ్చి ఉజిడి గవురుమ్ పూర్తి డీస్తి ఆకర్ దీసిచి రిసా ఆస తా, తుమ్క దెతి దయచి రిసా ఉచర, జా రచ్చన కచితుమ్ దొర్కు జతి రితి పూర్తి దయిరిమ్ జా, జయ్యి నముకుమ్ పూర్తి డిట్టుమ్ దెరన.

14 జో ప్రబుచి ఇస్తుమ్ నిదానుమ్ కెర్ల బోదల్ జా, తుమ్ అగ్గె నేన్లి పొదిచ తిల ఆగ్చి గార్ ఆసల్ రితి తుమ్ ఇండ నాయ్.

15 తుమ్క నిసాన బుకార్లొసా కీసి పూర్తి సుద్ది అస్సె గే, తుమ్ కి కిచ్చొ కామ్తె కి కెయ్లక తెయ్లక దస్సి సుద్ది తెన్ ఇండ.

16 దేముడుచి కొడొతె,

‡ "ఆవ్ కీసి సుద్ది అస్సి గే,

తుమ్ కి ఇసి సుద్ది తంకయ్"

మెన రెగిడ్లన్.

17 కక్కయ్ మొకమాటుమ్ నే దెకితో, ఎత్కి మాన్సుక జేవ్ కెర్ల కమొ కొల్లి తీర్పు కెర 'చెంగిల్' గే 'గార్' గే సంగితోసాక 'అబ్బొ' మొన ఉంక్రయ్తను జలె, ఈంజ తుమ్చి కీసాంత టాన్ నెంజిలిన్తె తుమ్ గడియ జితె పొది జోవయించి మరియాద దెకయ్తి రితి జాగర్త తెన్ నిదానుమ్ ఇండ.

18 తుమ్చ పూర్గుల్ దిలి అగ్గెచి కామ్క నెంజిలి ఇండుక తెంతో, తుమ్ విడ్డల్ జంక మెనయ్ దేముడు ప్రబు తుమ్క నెతోవన్లొ మెన జాన్సు. కీసి నెతోవన్లొ మెలె, వెండి గే బజార్ గే దస పాడ్ జత పస్తువల్ దా గెనె నాయ్,

19 గని కిచ్చొ గార్ నెంజిలి కిచ్చొ మచ్చల్ సర్దల్ నెంజిలి గొరెక బలి దిలి రితి జోచొ పుత్తున్ జలొ క్రిస్తుచి లొయి *సువ దిలన్.

20 ఈంజ లోకుమ్ జెర్మిన్ నే జతె అగ్గె తెంతో దేముడు అబ్బొసి "క్రిస్తు రచ్చించువ కెర్లొసాక తెద్రయందె" మెన నిసాన్ల తిలన్, గని కెయ్ క్రిస్తు బార్ జలన్ మెలె, తుమ్చి రిసాయి 'రచ్చించువ జతు' మెనయ్ ఈంజ ఆకర్ సమయ్యుమ్తెయ్ బార్ జలన్.

21 క్రిస్తుచి రచ్చన నజన తా జోచి తెడి దేముడుచి ఉప్పిరి తుమ్చి నముకుమ్ తియ అస్సున్. "జో రచ్చించువ కెరె" మెన, జోచి ఉప్పిరి దయిరిమ్ జా అస్సున్. మెలె, క్రిస్తుక జో మొర్పు తెంతో జియడ గవురుమ్ కెర్లొచి రిసా, తుమ్చి నముకుమ్ తుమ్చి దయిరిమ్ దేముడుచి ఉప్పిరి అస్సె.

22 జలె, దేముడుచి సత్తిమ్ కోడు దెరన జా కోడ్ రితి ఇండుక ఒప్పున తుమ్చి ఆత్మక సుద్ది కెరన అస్సున్, చి దస్సి జా తిలె, కిచ్చొ మాయ నెంతె తుమ్ ఏక్ బావొక అన్నెక్లొ ప్రేమ కెరుక జయెదె. జాకయ్, తుమ్చి పెట్టి పూర్తి నిదానుమ్ ఎక్కిలోక ఎక్కిలో ప్రేమయ్ కెర.

23 తుమ్ నొవర్ జెర్మ అస్సున్. జా నొవర్ జెర్మన్ జలిసి నాసెనుమ్ జతి బి గలిలిసి నెంజె, గని జివ్ తిలి, కెయ్క కి తా గెతి దేముడుచి కోడు తెన్ ఈంజ జెర్మన్ తుమ్ జెర్మన్ జలదు.

24 దేముడుచి కోడుతె జో రెగ్గవ తిలి రితి, † "ఈంజ లోకుమ్చ మాన్సుల్ ఎత్కి చివ్వర్చి రితి జతతి, జోవయించి గవురుమ్ చివ్వర్చ పుల్లొచి రితి జతయ్.

జా చివ్వర్ వాడువ జతయ్, జేవ్చ పుల్లొ సుకా గెచ్చ గెన్న గెతతి.

25 దేముడుచి కోడు, మాత్తుమ్,

§ 1:17 1:17 జేవ్ నంపజలన వేర వేరతె నంపజలన నెంజిలనతె జితె తిల, వడ్డొ 'సాంత టాన్ నెంజిలిన్' మెలన్క అన్నె కిచ్చొ అర్దుమ్ తయెదె మెలె, పరలోకుమీ నంపజలనచి సాంత టాన్ జయెదె, చి రిసా బూలోకుమ్క 'అమ్చి సాంత టాన్ నెంజె' మెనుక జయెదె. కొరిందిల్క పవులు రెగిడ్డి దొన్ని నంబర్ ఉత్తుమ్ 5:1-2, వీలిప్పియల్ 3:20, ఎబ్రియల్ 11:9, 10, 13. * 1:19 1:19 యోహాను 19:17-37, ముక్కిమ్క 34, 37. లూకా 22:44, మత్తయి 26:28, లూకా 22:30, యోహాను 6:53-56. † 1:24 1:24 యెసయా 40:6-8. * 2:4 2:4 యేసుక్రిస్తుచి రిసా సంగితయ్. లూకా 20:17-18, మత్తయి 21:42-44, మార్కు 12:10, రోమియల్ 9:32-33. † 2:6 2:6 యెసయా 28:16. ‡ 2:7 2:7 కిర్కనలు 118:22. § 2:7 2:7 'దేముడుచి గుడి బందిలన' మెలె, జోవయంక నంప నే కెర్ల యూదుల్చ వెల్లెల మాన్సుల్. ఎత్కి అదికారుమ్ తిలొ దేముడుక బక్తి కెర్ల యూదుల్క సికడ్డన, జేవ్, గని యెనుక 'జొయ్యి ఎత్కి అదికారుమ్ తిలొ దేముడు తెద్రయ్లో క్రిస్తు రచ్చించువ కెర్లొసా' మెన ఒప్పునుక నెసిల, మార్గ. మత్తయి 21:42-46 దెక. * 2:8 2:8 యెసయా 8:14.

కెయ్క తెయ్క తా గెచ్చెదె"

జలె, జివ్ దెతి తా గెతి జోవయించి కోడు కిచ్చొ మెలె, తుమ్క బోదన కెర్లి సుబుమ్ కబుర్.

2

1 జాకయ్, దేముడు చెంగిల్ సుదొ మెన తుమ్ చక దెక తిలె, కుస్సిదుమ్ ఎత్కి, మోసిమ్బుద్ది ఎత్కి, మాయబుద్ది ఎత్కి, గోస జతిసి ఎత్కి, దూసుప కెర్లిసి, గోస లట్టబ్బిసి ఎత్కి, తుమ్తె తెంతో వెంట గెల.

2 తుమ్చి రచ్చనతె వడ్డితి రిసా, నొవర్ జెర్మిల బోదల్ రిత జా, కిచ్చొ వేరచి నే బెదిలి సత్తిమ్ తిలి దేముడుచి కోడు జలి ఆత్మయి దూదుక తుమ్ ఆన జా తంక.

3 జాకయ్, జా దయచి రచ్చనతె తుమ్ డిట్టుమ్ జా తా.

4 మాన్సుల్ నెసిలొ గని దేముడుచి మొక్కె గవురుమ్ తిలొ విలువ జలొ జివ్ తిలొ, జివ్ దెతో *పత్రె తుమ్ జా.

5 జోతె అయ్లె, తుమ్ కి జివ్ తిల పత్రల్ రిత జా, ప్రబుచి ఆత్మతె గేర్ బెద బందితి రితి సుద్ది తిల పూజర్లు జా, దేముడుచి సేవతె బెద, జో యేసుక్రిస్తుచి తెడిచ దేముడు మెన్సితె ఆత్మ బలుల్ దెతన జస్తె.

6 దేముడుచి కొడొతె † "ఈందె, సీయోను డొంగ్రుతె, ఏక్ పత్తుర్క టీవడ్డసి.

అంచి గేరుక బోడిపత్తుర్ జో జా, ఎత్కిక ఆదారుమ్ జయెదె. జో ఆవ్ నిసాన్లొ గవురుమ్ కెర్లొ, అంక ఒగ్గర్ విలువ జలొసా జయెదె.

జోవయంక కో నంపజవుల గే, కచితుమ్ జేవ్ అంచి మొక్కె లాజ్ జంక నాయ్" మెన రెగ్గ అస్సె.

7 జాకయ్, తుమ్ నంపజలనక జో విలువ జతయ్. గని నంపనెంజిలనక జో కీసి జతయ్ మెలె, దేముడుచి అన్నెక్ కోడుతె అస్సె. కేన్ కోడు మెలె,

‡ " 'కామ్క నెంజె' మెన కీబందిలన జో ఏక్ పత్తురు పిట్టవుక మెన ఉచర్లె కి, జొయ్యి పత్తురు బోడిపత్తుర్ జయి అస్సె" మెన రెగిడ్డిసి.

8 అన్నెక్ కి,

* "నంప నెంజిలన పిసిర్లొ పత్తురు జో జయెదె, జోవయంక సేడయ్తో సాప్ర జో జయెదె"

మెన రెగిడ్డిసి. ఈంజ కోడు కీసి నెరవెర్నువ జతయ్ మెలె, 'జర్లు జయెదె' మెన అగ్గె తెంతో దేముడు సంగిలి రితి,

జోవయించి కోడు నే నూన్లి రిసా జేవ్ నే కెర్లి రిసా వాట్ పిట్టవన్తతి. జయి జోవయించి తీర్పు.

9 గని తుమ్క, దేముడు కిసి దెకితయ్ మెలె, 'ఆవ్ నిసాన్లి నెకుమ్చ' మెన, 'అంచి రాజిమ్చ †పూజర్లు' మెన, 'అంచి సుద్ది తిల జాతి' మెన, 'అంచ సొంత ప్రెజల్' మెనయ్ జో దెకితయ్. అందర్ తెంతో తుమ్క బుకారా కెర, జోచి పరలోకుమ్చి ఉజిడతె గవురుమ్తె బెదయ్లో యేసు ప్రబుచ ఒగ్గర్ వెల్లో కమొచి రిసా తుమ్ సాచి సూనవుక మెనయ్ తుమ్క దస్సి నిసాన అస్సె.

10 అగ్గె తుమ్ 'దేముడుచ మాన్సుల్ ఆము' మెననుక నెతిర్లదు, గని అప్పె దేముడుచ ప్రెజల్ జా అస్సున్. అగ్గెయి తుమ్క కన్కారుమ్ దొర్కు జయె నాయ్, గని అప్పె దేముడు తుమ్క కన్కారుమ్ దెక రచ్చించుప కెర అస్సె.

11 ప్రేమ తిల బావుడ్లు, తుమ్క ఆవ్ కిచ్చొ బతిమాల్పా జా సంగితసి మెలె, తుమ్ గడియ తుమ్చి సొంత టాన్ నెంజిలిన్తె అస్సున్. జలె, ఈంజ తుమ్చి సొంత †టాన్ నెంజిలిన్తె తుమ్ జితె తా, తుమ్చి ఆత్మచి ఉప్పిరి యుద్దుమ్ కెర్త ఈంజ లోకుమ్చి ఆఁగుచ ఆసల్ జర్గు నే కెర్లి రితి, తుమ్ ముద్దొ కెరన.

12 దేముడుక నేన్ల యూదుల్ నెంజిల ఒత్తచ మాన్సుల్తె తా తుమ్ చెంగిల్ బుద్ది తెన్ ఇండ, చి జోవయింతె ఏక్ వేల కో గే తుమ్క 'తప్పల్ కెర్తన' మెన దూసుప కెర్లె, తుమ్ సత్తిమ్ ఇండితిన్చి రుజ్జు జేవ్ దెకిలె, ప్రబు తీర్పు కెరుక జెతి దీసిక తుమ్చి రిసా దేముడుక గవురుమ్ కెరుల.

అదికారుల్క మరియాద దెకుత్

13 ప్రబుచి మరియాద టీవడ్డి రిసా, ఈంజ లోకుమ్చొ ఎత్తి అదికారిక తుమ్ మరియాద దెక. దేసిమ్క వెల్లో జా ఏలుప కెర్లొసాక కి,

14 'నేరిమ్ కెర్తనక సిచ్చ కెర్తు' మెన జవున్ 'చెంగిల్ కెర్త మాన్సుల్క బవుమానుమ్ దెతు' మెన జవున్ దేసిమ్క ఏలుప కెర్లొసా తెద్దయ్ల అదికారుల్క కి తుమ్ మరియాద దెక.

15 కిచ్చొక మెలె, తుమ్ సత్తిమ్ ఇండితిన్ తెన్, నేన్ల మాన్సుల్చి వెరిక, తప్పు మెన తుమ్ రుజ్జు దెకవ ముద్దొ కెరుక దేముడుచి ఇస్టుమ్.

16 క్రిగ్గుల్క గొతిమాన్సుల్ జల రిత తుమ్ జయ నాయ్. దనచ నెంజున్. గని 'ఆగ్గుల్చ గొతిమాన్సుల్ నెంజుమ్, చి ఇస్టుమ్ అయ్లి రితి జింక జయెదె' మెన తుమ్ ఉచర నాయ్, దస్సి పాపుమ్తె గెచ్చు నాయ్. గని, దేముడుచ కామ్ కెర్తన, జోచయ్ గొతిమాన్సుల్ రిత జా, జోచి ఇస్టుమ్ రితి తుమ్ ఇండ.

† 2:9 2:9 డీనయ్లిసి 1:6 దెక. ‡ 2:11 2:11 జేవ్ నంపజలన వేర వేరతె నంపజలన నెంజిలనతె జితె తిల, పడ్డొ 'సొంత టాన్ నెంజిలిన్' మెలిన్క అస్సె కిచ్చొ అర్దుమ్ తయెదె మెలె, పరలోకుమ్ నంపజలనచి సొంత టాన్ జయెదె, చి రిసా బూలోకుమ్క 'అమ్చి సొంత టాన్ నెంజె' మెనుక జయెదె. కొరిందిల్క పవులు రెగిడ్డి 2 నంబర్ ఉత్తమ్ 5:1-2, వెలిప్పియిల్ 3:20, ఎత్తియిల్ 11:9, 10, 13. § 2:16 2:16 గలతియిల్ 5:1. * 2:18 2:18 ఎవెసు 6:5-10, కొలొస్సియిల్ 3:22-4:1.

17 ఎత్తిజిన్ మాన్సుల్క తుమ్ మరియాద దెక. బావుడ్లు జల నంపజలన్క ప్రేమ దెక. దేముడుక తుమ్ బియె. దేసిమ్క వెల్లో రానొక గవురుమ్ కెర.

18 గొతిమాన్సుల్ కి జలెకి, తుమ్చ ఎజొమాన్సుక మరియాద దెక. *మెత్తన తా కన్కారుమ్ దెకిత ఎజొమాన్సు జేవ్ జలెకి, కన్కారుమ్ నేన్లన జేవ్ జలెకి జేవ్ సంగిలి కోడు కెర.

19 కిచ్చొక మెలె, తప్పు నే కెర్లె కి, కచి గే అత్తి తుమ్చితె కో అర్ల సేడ దేముడుచి గవురుమ్ టీవడ్డి రితి ఒర్పుప జలె, జో దేముడు జో మాన్సుక 'చెంగిలొసా చొ' మెనెదె.

20 తుమ్ తప్పు కెర్లి రిసా దెబ్బల్ కయ్లె పొది సేంతుమ్ తెన్ ఒర్పుప జలె, కిచ్చొ పున్నిమ్ నాయ్! గని, తుమ్ సత్తిమ్ కెర్లె కి సిచ్చ సేడ్డె సేంతుమ్ తెన్ ఒర్పుప జలె, దేముడు తుమ్క 'చెంగిలచ' మెన్తయ్.

21 దస్సి సేంతుమ్ తెన్ తుమ్ తంక మెనయ్ దేముడు తుమ్క బుకారయ్ అస్సె. కిచ్చొక మెలె, తుమ్చి పాపుమ్ గెన్సు మెనయ్ క్రిస్తు బాదల్ ఒర్పుప జా, తూమ్ కి జోచ అజ్జుల్తె ఇండుక మెలి కోడు తుమ్క జో వాట్ దెకవ అస్సె.

22 జో, జలె, కెయ్య కిచ్చొయ్ పాపుమ్ కెరె నాయ్. కిచ్చొయ్ మోసిమ్ కోడు లట్టబె నాయ్.

23 మాన్సుల్ జోక దూసుప కెర్లె, జోవయింక జో దూసుప నే కెర్తె తుక్లె తిలొ. జోక జేవ్ అర్ల కెర్లె కి, జోవయింక జో బియెడె నాయ్, గని సత్తిమ్ తీర్పు కెర్లొ దేముడు అబ్బొన్చి అత్తి జోచి జీవ్ జో సార్ప కెర దిలన్.

24 జో యేసు సొంత ఆమ్ కెర్లె పాపల్ జోచి ఆఁగి వయన, సిలువతె మొర్లన్. పాపుమ్ ముల అమ్చి సొంత ఆత్మక మొర్ల రిత జా సత్తిమ్ ఇండితి రితి అమ్ జింక మెనయ్. జో యేసు కయ్ల దెబ్బలు తుమ్క చెంగిల్ కెర అస్సె.

25 తుమ్ అగ్గెయి వాట్ పిట్టవన చెదుర్పు జల మెండల్చ రిత జా తిలదు, గని అప్పె తుమ్చ ఆత్మల్ రకితో చెంగిలొ గొవుడుతె అన్నె బుల జా అస్సున్.

3

తేర్బోదల్ బుద్ది ఇండుక

1 తుమ్ తేర్బోదల్ కి, దాక్ కెరన తుమ్చ మున్సర్లుచి అదికారుమ్క మరియాద దెక. తుమ్ దస్సి ఇండిలె, జోవయింతె సగుమ్జిన్ అప్పెచి ఎదక ప్రబుచి కొణొ రితి నే ఇండిలెకి, జోవయించ తుమ్ తేర్బొ ప్రబుచి కోడు నే సికడ్డికి,

2 తుమ్చి సత్తిమ్చి ఇండుక, మరియాదచి ఇండుక, జేవ్ దెక దెక, ప్రబుక సంపజా, మార్పువ జవుల.

3 తుమ్ తేర్బోదలు “*సూటి కెరసుమ్దె” మెలె, మాములుమ్ డీస్టిన్క ముక్కిమ్ నే ఉచరె, సెండి సూటి కెరంతిన్ జవున్, బజార్ గట్ర తియంతిన్ జవున్, చెంగిల చెంగిల పాలల్ బందంతిసి గలంతిసి జవున్ తుమ్ విలువ దెక నాయ్.

4 గని, తుమ్క కిచ్చొ సూటి కెర్పు మెలె, దేముడుచి మొక్కి ఒగ్గర్ విలువ జతి, కెయక నాసెనుమ్ నే జతి పేట్చి తెడిచొ మాన్సు ప్రబుచి మెత్తన బుద్ది, సేంతుమ్ బుద్ది జా తుమ్చి పెట్టి తవున్.

5 అగ్గెచ పొదులె దేముడుచి ఉప్పిరి నముకుమ్ తిల తేర్బోదల్ జోవయించి సుద్ది తిలి ఆత్మచి సూటిక తెయార్ జా మున్నర్పుల్చి అదికారుమ్క మరియాద దెకితె తిల.

6 పూర్ణుమ్చి సారా దస్సి మున్నున్ జలో అబ్రాహామ్క ‘ఎజోమాని’ మెన, జోచి అదికారుమ్క మరియాద దెకితె తిలి. జోచి కోడు సూన్తె తిలి. తూమ్ కి సత్తిమ్ ఇండిలె, తుమ్ కిచ్చొక కి బమ్మ జంక నాయ్, చి జా సారాచ బోదల్ రిత జన్తె.

మున్నుబోదల్ తేర్పివొక కిసి దెకుక

7 దస్సి, తుమ్ మున్నుబోదల్, తుమ్చ తేర్పివొక బమ్మ నే కెర్తి బుద్ది తెన్ పొస. జోవయింతెన్ జియ తేర్బోదక తొక్కి సెక్తి తయెదె మెన చిన, తుమ్తె ఎత్కి మున్నుబోద తేర్పిక మరియాద్ దెక. జోవయింక జాకయ్ కిచ్చొక దొగుతెర ఇసి ప్రేమ దెకుక మెలె, తుమ్ ఎత్కి దొగుతెరకయ్ దేముడు జోవయించి దయక జోవయించి రచ్చన వరుమ్చి వాట దా అస్సె. తుమ్ మున్నుబోదల్ తుమ్చ తేర్పివొక ఇసి ప్రేమ దెకిలె, అడ్డు నెంతె దేముడు తుమ్చ ప్రార్దనల్ సూనెదె. తుమ్చ ప్రార్దనల్క అడ్డు నే జతి రితి జోవయింక ఇసి ప్రేమ దెకుత్.

ఎక్కిలోక ఎక్కిలో ప్రేమ తెన్ తంక

8 జలె, తుమ్ ఎత్కిజిన్ ఎక్కి ప్రేమయ్ తా, ఎక్కిలోక ఎక్కిలో కన్కారుమ్ దెక, సంపజలస ఎత్కిజిన్క బాబేన్ దెకితి ప్రేమ దెక, ముద్దు కెర, సొంత గవురుమ్ నే ఉచరంతె, ఎక్కి మెన్ను తెన్ తా.

9 ఎక్కిలోక అన్నెక్కో అర్ల కెర తిలె, జో అర్ల సేడ్డోసా అర్ల కెర్లొసాక అన్నె అర్ల కెరుక పోని. ఎక్కిలోక అన్నెక్కో దూసుప కెర తిలె, దూసుప జలోసా, దూసుప కెర్లొసాక అన్నె దూసుప కెరుక పోని. జో ఎక్కిలోక జో అన్నెక్కో ‘చెంగిల్ తవున్’ మెన దెకున్. తుమ్క దేముడుచి దయ దొర్కు జవున్ మెనయ్

తుమ్ ఇసి ప్రేమయ్ ఇండుక మెనయ్, తుమ్క జో నిసాన అస్సె.

10 పూర్ణుమ్ దేముడుచి కొడతె రెగ్గయ్లి రితి, †“సర్ల తెన్ జింక చి చెంగిలి సమయుమ్ దెకుక మెన

కో జలెకు ఇస్టుమ్ జయెదె గే,

జోవయించి చోడి కిచ్చొ గర్చి నే లట్టబ్బి రితి,

జోవయించ ఒట్టో కిచ్చొ మోసిమ్ నే లట్టబ్బి రితి దెకన్సు.

11 దసా మాన్సు పాపుమ్ దూరి కెరన సత్తిమ్ ఇండుసు,

సేంతుమ్ చజ సేంతుమ్ ఇండుసు.

12 కిచ్చొక మెలె, పున్నిమ్ ఇండితనక ప్రబు దెకెదె,

జోవయించ ప్రార్దనల్ జో సూనెదె,

గని పాపుమ్ ఇండితనక జో దెకె నాయ్, సూనె నాయ్.”

13 చెంగిల్ కమె కెర ఇండితి ఆస రితి తుమ్ ఇండిలె తుమ్క కో అర్ల కెరుల? కోయి నాయ్!

14 గని, సత్తిమ్ తుమ్ ఇండిలి రిసా ఏక్ వేల కో జలెకు అర్ల కెర్లె, దేముడు తుమ్క ‘చెంగిల్’ మెనెదె. దస అర్ల కెర్లనక తుమ్ బియఁ నాయ్. జోవయించి రిసా బమ్మ నే జతె,

15 ‘పరలోకుమ్చొ ప్రబుయి జో’ మెన, తుమ్చి పెట్టి నిదానుమ్ క్రీస్తుక దెతి గవురుమ్ దాస. జో ప్రబుచి రిసాచి తుమ్చి పెట్టిచి దయిరిమ్చి రిసా కో “జేవ్చి సత్తిమ్క తుమ్ రుజ్జు దెకవ” మెన కెయఁ జవున్ తుమ్క పుసిలె, సరి జతి జబాబ్ దెంక తెయార్ జా తా. గని, ‡జబాబ్ దెంక జలె, బడాయ్ నెంతె మరియాద తెన్ లట్టబా.

16 అన్నె, ‘సత్తిమ్’ మెన తుమ్చి పెట్టి జాన్తిసి జర్లు కెర్లె రితి తుమ్ ఇండ, చి క్రీస్తుచి తెడి తుమ్ సత్తిమ్ ఇండితిన్చి రిసా తుమ్క బియడ్డన దూసుప కెర్లె, జేవ్ కెర్ల నిందల్క ‘ఆరిచ’ మెన జేవ్ చినన, లాజ్ జవుల.

17 తప్పు కెర్లె రిసా సిచ్చ జతి కంట, సత్తిమ్ కెర్లె రిసా సిచ్చ జంక చెంగిలి. తుమ్ సత్తిమ్ కెర్లె రిసా సిచ్చ జంక ఏక్ వేల దేముడుచి సెలవ్ తయెదె.

18 మెలె, క్రీస్తుక దెకిలె, క్రీస్తు కి దస్సి, జో పూర్తి సత్తిమ్ తిలె కి, పాపుమ్ జలోసక ‘జోవయించి పాపుమ్ గెన్ను’ మెన జో మొర్లిన్ తెన్ అమ్చి పాపుమ్ పూర్తి గెచ్చవయ్ గెలన్. జా ఏక్కి సుట్టు జో బలి జలిసి సరిచ్చుప్ప జెయెదె. అమ్క దేముడు అబ్బొన్తె అన్నె కడ ఆన్తి రిసా మొర అమ్చి పాపుమ్ గెచ్చయ్లన్. ఈంజ లోకుమ్చి ఆగ్ రగుమ్క జోక మార్ల, గని జోచి ఆత్మక దేముడు అబ్బొసి జోక అన్నె *జియడ్డన్.

19 జో మొర్లి పొది యేసు కేనె గెలన్ మెలె, బూలోకుమ్క ఎట్టో లోకుమ్తె జేలి జల, ఆకర్ దీసిచి పరిచ్చక సిచ్చక రకిత

* 3:3 3:3 ఎవెసు 6:5-10, కొలోస్సియల్ 3:22-4:1. † 3:10 3:10 కీర్తనలు 34:12-16. ‡ 3:15 3:15 మత్తయి 10:19, మార్కు 13:11, లూకా 12:12. § 3:18 3:18 రోమీయుల్ 6:10, ఎబ్రియల్ 7:27, 9:12, 28 చి 10:10 దెక. * 3:18 3:18 లూకా 24:39 దెక. ఆత్మ రగుమ్చి ఆగ్ తెన్ యేసు అన్నె జిలన్. కొరిందిల్క పవులు రెగిడ్డి ఏక్ నంబర్ ఉత్తమ 15:44, వీలిప్పియల్ 3:21. చి ఎబ్రియల్ 10:5 దెక.

ఆత్మల్ తిలినతె జోవయించి ఆత్మక జో ఉత్త గెచ్చు, దేముడు అబ్బొనచి కోడు సాడువ కెర్లన్.

20 అగ్గెయి, పూర్ణుమ్ పొది, †నోవహుచి కాలుమ్తె “అంక నంపజా రచ్చించువ జతు” మెన దేముడు సిచ్చ వాయిద కెర రకిలెకి, జో నోవహు, జా ఓడ బందితె తిలి పొది జోచి కోడు సూనుక నెసిలనచ ఆత్మల్క సుబుమ్ కబుర్ కోడు సాడువ కెర్లన్. జలె, జా ఓడతె తొక్కిజిని, మెలె, ఎక్కి అట్టు జిన్ మాన్సుల్ పానితె రచ్చించువ జల.

21 జా సమయుమ్తె జేవ్ దస్సి పానితె రచ్చించువ జలిసి, జలె, బాప్తిసుమ్క టాలి జతయ్. మెలె, పానితె బాప్తిసుమ్ జతిసి తుమ్క రచ్చించువ కెర్రి గుర్తు జతయ్. కిసి మెలె, తుమ్చి ఆఁగుచి ముర్కి, దొవన్తినచి రిసా నాయ్, గని యేసుక్రీస్తు అన్నె జివ్ జా ఉట్టి రిసా దేముడుచి మొక్కె తుమ్చి పాపుమ్ గెలి గుర్తుయి బాప్తిసుమ్ దెకయ్తయ్. ప్రబుక నంపజలన జోవయించి బుద్ది మార్పువ జా ప్రబుకయ్ గవురుమ్ కెర్రి రితి ఇండుక ఇస్టుమ్ జలిన్చి గుర్తు బాప్తిసుమ్తెయి దెకయ్తతి.

22 జలె, జో క్రీస్తు జివ్ జా ఉట్ట కెర పరలోకుమ్తె వెగ గెచ్చు, దేముడు అబ్బొనచి ఉజెతో పక్క వెస తా, †దూతల్చి ఉప్పిరి, అదికారుల్చి ఉప్పిరి, నక్తుల్ ఎత్కిచి ఉప్పిరి ఏలువ కెర్తయ్.

4

ఆగ్గక బాదల్ సేడ్లె బుద్ది చెంగిల్ జతిన్చి కోడు

1-2 క్రీస్తు, జలె, మాన్సుచి జోచి ఆఁగుతె బాదల్ సేడ్లన్. జాకయ్, *‘ఆమ్ కి జోచి రితి బాదల్ సేడ ఓర్పువ జమ’ మెన తుమ్ డిట్టుమ్ కెరన. కిచ్చొక మెలె, జో తెన్ మెలి రితి ఆఁగుక కో బాదల్ సేడ తయెదె గే, ఒత్త తెంతో ఈంజ అఁగి జతె ఎదిలి సేంపుక మాన్సుచ ఆసల్ రితి నాయ్, గని దేముడుచి ఇస్టుమ్ కిసి అస్సె గే, దస్సి ఇండుక మెన, జో మాన్సు పాపుమ్ ముల అస్సె.

3 దేముడుక నేన్లసచి రితిచి తుమ్చి అగ్గెచి ఇండుక అగ్గెయ్చి మెన, తుమ్ దసితె అన్నె గెచ్చు నాయ్. దేముడుక నేన్లన జోవయించి ఆఁగెచి ఆస ముద్దొ నే కెరంతి రితి, ఆసల్ రితి, మచ్చితి రితి, ‘సర్ల కెర్లనుమ్’ మెన వెట్కారుమ్ జతి రితి, ‘సర్ల కెర్లనుమ్’ మెన సూర్లు పితి రితి, వెట్కారుమ్ జా బొమ్మల్క జోకర్తి రితి జతతి.

† 3:20 3:20 అదికాండుమ్ 6-9 అద్యయల్. ‡ 3:22 3:22 ఎవెసు 1:21, 6:12, కొలొస్సియల్ 1:16, 2:10, 15, చి తీతు 3:1 దెక. * 4:1-2 4:1-2 రోమియల్ 8:17, వెలిప్పియల్ 1:29-30, తిమోతిక పవులు రెగిడ్డి 2 నంబర్ ఉత్తమ్ 2:12. † 4:6 4:6 3:19 దెక. ‡ 4:8 4:8 ఎత్కి అదికారుమ్ తిలొ దేముడు అమ్చ ఒగ్గర్ తప్పుల్ జోవయించి ప్రేమయెచి రిసా ఓర్పువ జా చెమించువ కెర్తయ్. దస్సి ప్రేమ అమచి వెట్టి తా, ఆమ్ కి దస్సి అన్నె మాన్సుల్చ తప్పుల్ ఓర్పువ జా చెమించువ కెరుక. పడ్డె, అమ్ దస్సి ప్రేమ కెర్లె, జయి కి జో దెక అమ్క కన్కారుమ్ దెకె. మత్తయి 6:12, 14, 15 దెక. § 4:10 4:10 రోమియల్ 12:6-8 దెక.

4 తుమ్ అప్పె జోవయింతెన్ దస బుద్ది నెంజిల అలవాట్లుతె బెదున్ నాయ్ చి రిసా జేవ్ ఆచారిమ్ జా తుమ్క దూనువ కెర్తతి.

5 గని ఆకర్క, మొర్లసక జివ్ తిలసక తీర్పు కెరుక తెయార్ జలొ ప్రబుచి మొక్కె జేవ్ జోవయించి పాపుమ్ ఒప్పన సిచ్చ జంక అస్సె.

6 దస్సికయ్, †మొర్లసక కి సుబుమ్ కబుర్ సూనయ్లో కిచ్చొక మెలె, మాన్సుచి జోవయించి ఆఁగ్క మాన్సుల్ సేడ్లె జోవయించి పాపుమ్చి సిచ్చ జేవ్ జలెకి, దేముడు జోవయించి ఆత్మక కిసి జతయ్ గే, జేవ్ కి దస్సి జంక అవ్కానుమ్ తంక.

7 ఈంజ ఎత్కిక ఆకర్ దీసి పాసి జా జెతయ్. జాకయ్, ప్రార్లనల్ కెర్లె తతి రిసా తుమ్ మచ్చిల్ రితి నే జతె తెలిచి తా ముద్దొ కెరన, బుద్ది ఇండుక జాగర్త తా.

8 ముక్కిమ్క, ఎక్కిలోక ఎక్కిలో పూర్తి ప్రేమయ్ ఇండ దెకితె తా. దస్సి ప్రేమ దెరన. కిచ్చొక మెలె, †ఒగ్గర్ తప్పుల్క ప్రేమయ్ ఓర్పువ జా చెమించువ కెర్తయ్.

9 అన్నె, తుమ్చితె ఎక్కిలోతె అన్నెక్కో అయ్లె, కోపుమ్ నెంతె గడ్లు నెంతె, సర్ల తెన్ జోవయింక మరియాద కెర.

10 దేముడు తుమ్క కిచ్చొ సెక్తి దా తిలె, జోచి దయచ, జో దెత వేర వేర కీసెక్తివరల్ పొరపాట్ నెంతె జోచి బుద్ది రితి, అన్నె మాన్సుల్ చెంగిల్ తతి రితి తుమ్ వాడిక కెర దాసా.

11 దస్సి, బోదన కెర్లెసా జలె, దేముడుచి తెడి తా జొయ్యి దిల కొడొ లట్టబ్బు. దస్సి కి, కో అన్నె మాన్సుల్క తోడ్ కెర్లెసా జలె, దేముడు దెతి సెక్తికయ్ జో జా తోడ్ కామ్ కెర్పు. తుమ్ దస్సి ఇండిలెగిన, యేసుక్రీస్తుచి రిసా దేముడుచి గవురుమ్ ఎత్కితె రుజ్జు డీసెదె. కెయఁక తెయఁక జోవయింక గవురుమ్ అదికారుమ్ తవును!

జెత బాదల్ చి రిసా దయిరిమ్ సంగితిసి, జాగర్త సంగితిసి

12 అన్నె, ప్రేమ తిల బావుడ్లు, తుమ్క అప్పె జెతికయ్ ఆగి మెలి రితిచి పరిచ్చచి రిసా తుమ్ ఆచారిమ్ జా నాయ్. ‘అమ్క దస్సిచి కిచ్చొక లయక?’ మెన తుమ్ ఉచర్లె, జా జర్లు జతిసి కిచ్చొ ఆచారిమ్చి నెంజె. కిచ్చొక తుమ్క జర్లు జతయ్ మెలె, తుమ్చి నిదానుమ్ పరిచ్చ జా రుజ్జు జంక.

13 ‘క్రీస్తు సేడ్లె బాదల్తె ఆమ్ కి బెదితనుమ్’ మెన తుమ్ సర్లనంతోనుమ్ జా, చి జోచి గవురుమ్ పూర్తి డీస్తి దీసిక ఒత్తయ్ కి జో తెన్ సర్లనంతోనుమ్ జస్సె.

14 “అమ్ నంపజలన” మొన తుమ్ ఒప్పున్లి రిసా మాన్సుల్ తుమ్క దూసుప కెర్లె, తుమ్క చెంగిలి. కిచ్చొక మెలె, దేముడుచి ఉజిడెచి అత్తు తుమ్చి తెన్ తా గెచ్చు తుమ్క తోడు తా సెక్తి దెతె తత్తయ్.

15 గని, మార్తోస్ జలెకి, ‘చోర్తోస్’ జలెకి, ‘నేరిమ్ కెర్తోసా’ జలెకి, ‘వేర మాన్సుల్చి కామ్చి నెడిమి జా పోటి కెర్తోసా’ జలెకి, మొన తుమ్చితె కక్క కో నింద కెర్తి రితి వాట్ దాన నాయ్. దన కమొ కెర బాద సేడ్త తుమ్క చెంగిల్ నాయ్.

16 గని, ‘నంపజలన’ మొన తుమ్ ఒప్పున్లి రిసాయి తుమ్చితె కో కచి అత్తి బాదల్ సేడ్తె, లాజ్ జంక నాయ్. ‘నంపజలన’ మొన జా నావ్ దెరన్లిసి చెంగిల్ మొన, జో నంపజలన దేముడుక గవురుమ్ దెవును!

17 కిచ్చొక మెలె, దేముడు మాన్సుల్క పరిచ్చు కెర్తి సిచ్చు కెర్తి సమయుమ్ పాసి జా అస్సె. జలె, జో పరిచ్చు కెర్తిసి తీర్పు కెర్తిసి అమ్ నంపజలనతెయ్ మొదొల్ జతయ్ జలె, దేముడుచి నుబుమ్ కబుర్ రితి ఇండుక నెసిత మాన్సుల్ ఆకర్క కెర్తి సిచ్చు జవుల!

18 జో దేముడు పూర్ణుమ్ రెగ్డయ్లి రితి;

*“సత్తిమ్ జలొ మాన్సు †కన్లనె రచ్చించుప జతయ్ జలె, దేముడుక నే బితన, పాపుమ్ కెర్లన, కిసి రచ్చించుప జవుల! రచ్చించుప జంక నెత్తిర్!”

19 జాకయ్, దేముడుక నిదానుమ్ తా జోవయించి సెలవ్క కో ఈంజ లోకుమ్తె సిచ్చల్ అర్ల సేడ్తె గే, ఎత్కిక జెర్మున్ కెర్తో నిదానుమ్ తిలొ జో దేముడుచి అత్తి జోవయించ అత్తుల్ సార్పు కెర దా, చెంగిల్ కమొ కెర్తె తత్తు!

5

సంగుమ్చ వెల్లెల మాన్సుల్ కిసి ఇండుక

1 తుమ్చి తెచ సంగుమ్చ వెల్లెల మాన్సుల్క, జలె, ఆవ్ ఏక్ కోడు సంగిదె. తుమ్చి తెన్ కి నంపజలనక ఆవ్ వెల్లొ జలొసా తా, క్రిస్తు సేడ్త బాదల్ సొంత దెకిలొసా జా, పడ్తె తెదొడక రుజ్జు జా డిసుక తిలి పరలోకుమ్చి ఉజిడెతె గవురుమ్తె బెదితొసా జా, ఆవ్ తుమ్తెచ వెల్లొ మాన్సుక కిచ్చొ బతిమాల్పా జా సంగితసి మెలె,

2 తూమ్ దెకిత్తి వాట దేముడుచ మెండల్ జల నంపజలనక తుమ్ నిదానుమ్ దెకితె తా, తుమ్క కో బలవంతుమ్ కెర్తి రితి నాయ్, గని దేముడుచి ఇస్టుమ్ రితి పూర్తి మెన్సు దా జోవయింక సర్ల తెన్ దెకితె తా. డబ్బుల్ ఆసక నాయ్, గని సర్లబుద్ది తెన్ కెర్తె తా.

3 పడ్తె, జా మందతెచ మాన్సుల్క బియడ్తి రగుమ్ ఏలుప కెర నాయ్, గని జేవ్ కిసి సత్తిమ్ ఇండుక గే దెకిత్ రితి తూమ్ దస్సి సత్తిమ్ ఇండ దెకవ.

4 తూమ్ దస్సి ఇండ వాట్ దెకయ్లదు మెలె, ఎత్కిచి కంట వెల్లొ గొవుడు జతో క్రిస్తు ఆకర్ దీసిక ఎత్కిజిన్క డిస్తి పొదిక ప్రబుచి గవురుమ్ నే గెతి బవుమానుమ్ తుమ్ ఎత్కిజిన్క దొర్కు జయెదె.

5 పడ్తె, సంగుమ్క దెకిత వెల్లెల మాన్సుల్చి తెడి తుమ్ అన్నె నంపజలన దాక్ కెరన, జేవ్ వెల్లెల మాన్సుల్చి కోడుక మరియాద కెర. తుమ్ ఎత్కిజిన్ సొంత గవురుమ్ నే ఉచరంతె, ఎత్కిలొచి మొక్కె ఎత్కిలొ దాక్ కెరన, ఎత్కిలొచి సేవ ఎత్కిలొ కెర. పూర్ణుమ్ దేముడుచి కొడెతె రెగ్డయ్లి రితి,

*“సొంత గవురుమ్ ఉచరంతనక దేముడు దూరి కెర్తయ్, గని కో దాక్ కెరనుల గే, జోవయింకయ్ జోచి దయచి తోడు జో దెయెదె” మొన రెగిడ్లి కోడు.

6 జాకయ్, ఎత్కిచి కంట సెక్తి తిలొ దేముడుచి అత్తి తుమ్చి బత్తు సార్పు కెర దా జోచి తెడి దాక్ కెరన, చి జో ఒప్పున్లి సమయుమ్క గవురుమ్ తెన్ తుమ్క టీవడెదె.

7 బాదల్ సేడ్తి తుమ్చి బయిమ్ ఎత్కి జో వయితి రితి తుమ్ సార్పు కెర దాస. కిచ్చొక మెలె, తుమ్క ‘చెంగిల్ తత్తు’ మొన, తుమ్చ బాదల్ వయిక జో ఇస్టుమ్ జతయ్.

8 మచ్చిల్ రితి బుద్ది నే జతె తుమ్ ముద్దొ కెరన, తెలివి తా జాగర్త తా. కిచ్చొక మెలె, తుమ్క నేరిమ్ వయడుక ఇస్టుమ్ జలొ సయ్తాన్ కక్క జలెకు గీడుక కోర్ప జా, ఒర్నితో సింపుమ్చి రితి బులితె తత్తయ్.

9 ఒండి లోకుమ్చ బావుడ్లు జల నంపజలనక కి ఇన బాదల్ సేడుక అస్సె మొన జాన, తుమ్చి నముకుమ్ డిట్టుమ్ తా జో సయ్తాన్చి ఉప్పిరి జినుక తుమ్ టీవ.

10 అన్నె, గడియ బాదల్ సేడ ఓర్పువ జలదు మెలె, క్రిస్తుచి నావ్ తెన్ తుమ్ జోచి కెయ్క తెయ్క తతి పరలోకుమ్చి ఉజిడెతె గవురుమ్తె బెదుక మొన తుమ్క నిసాన బుకార్లొ ఎత్కి దయ కెర్తో దేముడు సొంత తుమ్క పూర్తి కెర, డిట్టుమ్ కెర, జిన్తి సెక్తి దెయెదె.

11 జో కెయ్క తెయ్క ఏలుప కెర్పు! ఏలుప కెరెదె. జోక జోబర! ఆమేన్.

ఆకర్ కోడు

12 ‘ఈంజ నుబుమ్ కబుర్ నిజుమి దేముడు దిలిసి’ మొన సాచి సంగ తుమ్క డిట్టుమ్ కెరుక మొన, జోక ‘నిదానుమ్ తిలొ బావొ’ మొన సిల్వానన్క నంపజా జోచి అత్తి తుమ్క ఈంజ ఉత్తుమ్ రెగ్డవ అస్సి. ప్రబు దిలి ఈంజ నిజుమ్ జలి దయతె తుమ్ డిట్టుమ్ టీవ.

13 దేముడు అమ్క తుమ్క కిసి నిసాన అస్సి గే, దస్సి ‘అంచయ్ మాన్సుల్ జతు’ మొనయ్ ఈంజ †బబులొసు

* 4:18 4:18 సామెతల్ 11:31. † 4:18 4:18 కన్లనె మెలె, రచ్చించుప నే జలి రితి జా కిసి గే రచ్చించుప జతయ్. * 5:5 5:5 సామెతల్ 3:34, యాకోబు 4:6. † 5:13 5:13 ‘బబులొసు’ మెలె, ఏక్ వేల రోమ్ పట్టుమ్క టాలి జతయ్. డిసయ్లిసి 17 అద్యయిమ్చి జా అద్యయిమ్తెచ కొడెచ ఎట్టెచ కొడె దెక.

పట్టుమీతె కి మాన్సుల్క నిసాస అస్సె. జో నిసాన్లిసి ఈంజి
సంగుమ్చ కి తుమ్క జోవయించి జోబర సంగితతి. అంక
పుత్తు జలో రితో మార్కు జోచి జోబర సంగితయ్.

¹⁴ ప్రబుచి ప్రేమక తుమ్ ఎక్కిలోక ఎక్కిలో జొకర.

క్రీస్తుచి తెడిచ తుమ్ ఎత్తిజిన్క జోచి సేంతుమ్ తవున్!

పేతురు రెగిడ్లి దొన్నిచి ఉత్త్రుమ్ బారిక్ జలో పేతురు రెగిడ్లి దొన్నిచి ఉత్త్రుమ్

మొదొల్ కోడు

1 అమ్చొ దేముడు అమ్క రచ్చించుప కెర్తొసొ జలో యేసుక్రీస్తుచి పున్నిమ్చి రిసొ, జోచి దయక అమ్ నంపజలన తెన్ ఎక్కి విలువచి నముకుమ్ తిల నంపజలనక, యేసుక్రీస్తుక *సేవ కెర్తొసొ జా జోచి బారికి జలో †సేమోసు పేతురు రెగిడ్లి ఉత్త్రుమ్.

2 దేముడుచి ప్రబు జలో అమ్చొ యేసుక్రీస్తుచి ఉప్పిర్చి గ్యానుమ్ తుమ్చి పెట్టి జాన్సుప జా, జోక తుమ్ రోజుక అన్నెయ్ జాన్తిన్చి రిసొ తుమ్క జోచి దయ జోచి సేంతుమ్ అన్నె ఒగ్గర్ జవున్!

3 దేముడు జోచి పరలోకుమ్చి సెక్కి అదికారుమ్కయ్ తెన్, జోచి సొంత పరలోకుమ్చి గవురుమ్చి ఉజ్జిడతె, జోచి చెంగిల్చి రిసొ అమ్క నిసొన బుకర్లొసొక అమ్ జాన్తి వాటు పరలోకుమ్తె బెదితి జీవ్, పరలోకుమ్చి సత్తిమ్ సుద్ది ఇండితి సెక్కి అమ్క దొర్కు జతి రితి, ఎత్తి అమ్క దా అస్సె.

4 దస్సి, ఎత్తిచి కంట విలువ తిల జోచ ప్రమానల్ అమ్క దా అస్సె. కిచ్చొక మెలె, జేవ్ ప్రమానల్చి సెక్కిక ఈంజ ఆగ్చ గార్ ఆనల్చి రిసొచి ఈంజ లోకుమ్చి పాపుమ్ తెంతో తుమ్ పిటవన్క, చి అన్నె, జోచి ఆత్మ తుమ్చి పెట్టి జా, దేముడుచి రితి తుమ్ మార్పుప జా జోచి తెన్ పావుక మెన తుమ్క దా అస్సె.

5 జాకయ్, తుమ్ నిదానుమ్ చజ దెరన తుమ్చి నముకుమ్తె చెంగిల్ గునుమ్ బెదవుక అస్సె. జా చెంగిల్ గునుమ్తె గ్యానుమ్,

6 జా గ్యానుమ్తె ఆన ముద్దొ కెరంతిసి బెదవ, ఆన ముద్దొ కెరంతిన్తె నిదానుమ్ బెదవ, జా నిదానుమ్తె దేముడుక బితిసి బెదవ,

7 జా దేముడుక బితిసి తెన్ నంపజలనక ముద్దు కెర్తి ప్రేమయ్ బెదవ, చి ప్రేమయ్ తెన్ కన్కారుమ్ బెదవ తంక.

8 ఇన బుద్దుల్ తుమ్ ఇండుక దెర అన్నె అలవాట్ జలె, అమ్చొ ప్రబు జలో యేసుక్రీస్తుక జాన్తిన్తె తుమ్ కామ్క నే అయ్లన్ నే జస్సె, జోచి రిసొ పలితుమ్ దెర్తె.

* 1:1 1:1 నెంజెలి, 'గొతిమాన్సు', నెంజెలి 'గొత్తి నుజ్'. † 1:1 1:1 నెంజెలి 'సేమోసు'. జోవయిచి అన్నెక్ నావ్ 'పేతురు'. బారికుల్ 15:7, 14 దెక.

‡ 1:13 1:13 కొరింథిల్క పవులు రెగిడ్లి 2 నంబర్ ఉత్త్రుమ్ 5:1, 4 దెక. § 1:14 1:14 యోహూసు 21:18-19 దెక. * 1:15 1:15 పేతురు బోదన కెర కెర సంగిలిన్ ఎత్తి మార్కు రెగ్ల చి రిసొచి జోవయిచి సొచి రెగిడ్లిన్, మెన మాన్సుల్ సంగితతి. జేక, ఇన్నె జా మార్కుచి రిసొ ఏక వేల సంగితయ్ మెన సగుమ్జన్ ఉచర్తతి. † 1:16 1:16 మత్తయి 17:1-5, మార్కు 9:2-7, లూకా 9:28-35 దెక. ‡ 1:17 1:17 మత్తయి 17:5.

9 ఇన బుద్దుల్ కక్క తయె నాయ్ గే, జో మాన్సు గుడ్డి జలి రితి జా, జోచ ఆత్మ అంకివొ సరిగా డిస్తి నాయ్, జోక దూరి తిలిసి నే డిసిల్ రితి జతయ్, చి జో అగ్గె పాపుమ్ ఇండిలిన్తె జో అన్నె నే ఇండిత్ రితి దేముడు జోక విడ్డల్ కెర్లిసి, చెమించుప కెర్లిసి, జో పచ్చ అస్సె.

10 జాకయ్, బావుడ్లు, తుమ్క దేముడు నిసొన బుకార్లి వాట్ ఇండుక ఆన జా అన్నె నిదానుమ్ జతి రితి తుమ్ దెకన. తుమ్ ఇసి నిదానుమ్ జలె, వెర్తి బుద్దితె అన్నె సేడ్సు నాయ్.

11 దస్సి కి అమ్చొ ప్రబు అమ్చ రచ్చించుప కెర్తొసొ జలో యేసుక్రీస్తుచి పరలోకుమ్చి రాజిమ్తె తుమ్ బెదుక మెన జో పూర్తి సర్ల తెన్ తుమ్క వాట్ దెయెదె.

12 తుమ్క దిలి సత్తిమ్తె తుమ్ డిట్టుమ్ జలెకి, ఈంజ ఎత్తి తుమ్ జాన్లె కి, కెయెఱ కి తుమ్క ఆవ్ ఉచార కెరయ్తె త్రయిందె.

13 ఆవ్ ఈంజ †కుడియ జలి రితి మొర్తి ఆగ్తె తతి ఎద తుమ్క ఉచార కెరవుక అంచి పూచి మెన జాని.

14 అమ్చొ ప్రబు జలో యేసుక్రీస్తు అంక కిదెకయ్లి రితి, ఆవ్ ఈంజ కుడియ జలి రితి మొర్తి ఆగ్ ముల్లి సమయుమ్ పాసి జెతయ్ మెన జాని.

15 జాకయ్, అన్నె, ఆవ్ ఉట్ట గెలి పడ్డొ కి ఈంజ ఎత్తి తుమ్ ఉచార కెర్తి రితి *దెకిన్దె.

16 అమ్చొ ప్రబు జలో యేసుక్రీస్తుచి సెక్కి తిలిన్చి రిసొచి జో అన్నె ఉత్త్ర జెతిన్చి రిసొ తుమ్క అమ్ జానవ కెర, కో తెలివి మాన్సు అచ్చొ ఉచర్లిసి నెంజె. జోచి †పరలోకుమ్చి గవురుమ్ తిలి ఉజిడి జో జతిసి అమ్ సొంత దెక అస్సెమ్.

17 కెయ మెలె, కిసి మెలె, దేముడు అబ్బొసి జోక గవురుమ్ ఉజిడి కెర్లిన్తె, చి

‡“ఈందె, ఈంజొయి అంచొ ప్రేమ తిలో పూత్తు. ఇన్నెచి రిసొ అంక ఒగ్గర్ సర్లసంతోసుమ్” మెన పరలోకుమ్చొ దేముడు అబ్బొసి జోచి అవాడ్ సూనయ్లి పొది,

18 పరలోకుమ్ తెంతో చి జా అవాడ్ అమ్ సొంత సూన్లమ్. కిసి మెలె, అమ్ కి సొంత జో తెన్ జా సుద్ది తిలి డొర్గె తిలమ్.

19 పూర్ణుమ్ దేముడు జోచ కబుర్లు సంగిలనచి అత్తి సంగిలిన్ ఎత్తి కచితుమ్ జర్లు జయెదె, మెన అమ్ తెదొడి దెకిలిన్చి రిసొ అమ్క రుజ్జు అయ్లి. జాకయ్, దేముడు సంగిలి ఈంజ కబుర్ తుమ్ డిట్టుమ్ దెరన, రాత్ పాయితి పెందాలె దిస్తి సుక్కొ తుమ్చి పెట్టి ఉజిడ్ జతి రితి ప్రబు అన్నె జెతికయ్ జా వెల్లి దిసి జెతె ఎదక అందర్తె ఉజిడ్ దిస్తి

దీవు రగుమ్ జా అస్సె. జాకయ్ తుమ్ జాగర్త తెన్ దెకన్లె తుమ్క చెంగిల్ తయెదె.

20 ముక్కిమ్క తుమ్ కిచ్చొ అర్దుమ్ కెరన మెలె, దేముడుచి కోడుతె రెగ్డయ్లిన్తె జోచి కేన్ కోడు కి కిసి అర్దుమ్ కెరనుక జలె, మాన్సు సొంత జొయ్యి అర్దుమ్ ఉచర్నన్తి రితి జయె నాయ్. జో దేముడు సొంత దిలి అర్దుమ్ అమ్ కెరనుక అస్సె.

21 కిచ్చొక మెలె, దస కబుర్లుతె కేన్ కి కెయెక కి మాన్సుచి సొంత పెట్టిచి ఉచరన్తతి తెంతో చి నెంజె. గని దేముడుచి సుద్ది తిలి ఆత్మ కేన్ కేన్ మాన్సుల్క దెర్లి గే, దేముడుచి సొంత కొడొ జేవ్ మాన్సుల్ లట్టబ్బ, రెగిడ్ల. జేవ్ జోచయ్ కొడొ.

2

అబద్దుమ్క సంగితస సికడ్డి రిసా

1 “దేముడుచ కబుర్లు సంగితసుమ్” మెన అగ్గెచ పొదులె, పూర్లుమ్, అబద్దుమ్క కి అమ్చ ప్రెజల్తె, అమ్చ ఇస్రాయేలుల్తె, సగుమ్జిన్ బార్ జల. దస్సి, తుమ్తె కి అబద్దుమ్చి బోదస కెర్తస తవుల. జేవ్ మాన్సుల్ కిచ్చొ కెరుల మెలె, నాసెనుమ్ కెర్త ఇస్టుమ్ అయ్ల జోవయించ అబద్దుమ్ తిరిమ్ తిరిమ్ సికడ, ‘పాపుమ్ తెంతో రచ్చించుప జతు’ మెన జోచి జివ్ దా జోవయింక గెనన్లొ *ప్రబుక ‘దేముడు నెంజె’ మెన సంగిల్ రితి జా, జోచి మరియాద కడ్డి రితి ఇండుల. జేవ్ దస్సి కెర, జోవయింక జెవ్వి చట్కున పూర్తి నాసెనుమ్ ఆననుల.

2 జేవ్ లాజ్ నెంతె కెర్త పాపల్ దెక దెక, అన్నె ఒగ్గర్జిన్ జోవయించి పట్టి గెచ్చుల, చి “ఒహొ, సత్తిమ్ తిలొ దేముడుక జొకర్తతి, గని దసయ్ కమె కెర్తతి” మెన, అన్నె మాన్సుల్ నిస్కారుమ్ సంగుల, చి జోవయించి ఇండుకతె ప్రబుచి సత్తిమ్ వాటు నిస్కారుమ్ డీసెదె.

3 జోవయించి పెట్టిచ ఆసల్క తెలివి కొడొ బెదవ బెదవ, తుమ్ కి అబద్దుమ్ సంపజతి రితి తుమ్క మోసిమ్ కెర లాబుమ్ కెరనుల. జలె, అగ్గె తెంతో జోవయించి సిచ్చ దేముడు సంగ అస్సె, జోవయించి సిచ్చ రకితె అస్సె, చి జోవయించి నాసెనుమ్ కచితుమ్ జోవయింక లయెదె.

4 అగ్గెయి పరలోకుమ్చ దూతల్ సగుమ్జిన్ †పాపుమ్ కెర పాపుమ్తె సేడ్డి రిసా, దేముడు జోవయింక సిచ్చ కెరుక నే పిట్టయ్తె, వెల్లి ఆగిచి గొయిచితె ఎత్కిచి కంట ఎట్టొ

తిలిన్తె జోవయింక గల దా, ఎత్కిక తీర్పు కెర్తి ఆకర్ దీసిచి వెల్లి సిచ్చ జతె ఎదక జేవ్ రకితి రిసా, జోవయింక ఎత్కిచి కంట †అందర్ తిల బోన్లుతె గలయ్ అస్సె.

5 పడ్డొ, పూర్లుమ్చ మాన్సుల్చి రిసా ఉచర్లె, జోవయించి పాపుమ్చి సిచ్చ జోవయింక నే పిట్టయ్తె, జేవ్ పొదులె సత్తిమ్ సాడుప కెర్తె తిలొ ఎత్కి కి నోవహుక చి జో తెన్ అన్నె సత్తుజిన్ జోచి కుటుంబుమ్చ మాన్సుల్క రచ్చించుప కెర, ఒండి లోకుమ్చ పాపుమ్చ మాన్సుల్ ఎత్కిజిన్ మొర్తి రితి, దేముడు వెల్లొ పాని పెటవ బూరుమ్తె డుజడ గెలన్.

6 పడ్డొ, పూర్లుమ్ పొదిచ *సాదొమ చి, గొమొరా మెల పట్టల్ సార్ జతి రితి దేముడు సిచ్చ దా, కిచ్చొ జివ్ నే తతి రితి పూర్తి నాసెనుమ్ కెర పుంచ దా, పడ్డొక పాపుమ్ ఇండిత మాన్సుల్క ‘పాపుమ్తె గెలె, సిచ్చ జంక అస్సె’ మెన రుజ్జు తతి రితి దేముడు జర్లు కెర్లొ.

7 గని, ఒత్తచ పాపుమ్ సుదల్ ముద్దొ నే కెరంతిసి, జోవయించ ఆసల్క కమె దెక దెక బాద సేడ్డొ సత్తిమ్ ఇండిలొ †లోతుక రచ్చించుప కెర్లొ.

8 జో సత్తిమ్చొ మాన్సు జేవ్ పాపుమ్చ మాన్సుల్తె జితె తా దెకిలిన్ సూన్లినచి రిసా, జేవ్ కెర్తె తిల జోవయించ ఆసల్ ముద్దొ నే కెరంత పాపల్చి రిసా, రోజుక జోచి పెట్టి దుకుమ్ సేడ్డొ తిలొ.

9 జలె, ఈంజ ఎత్కి బెదయ్లె కిచ్చొ దెకితసుమ్ మెలె, జోవయింక నిదానుమ్ తిలసక బాదల్ తెంతో రచ్చించుప కెరుక కి, పడ్డొ వెల్లి తీర్పు కెర్తి ఆకర్ దీసిచి సిచ్చ జతె ఎదక సత్తిమ్ నెంజిలసక సిచ్చతె రకుక కి దేముడు జానె.

10 †ముక్కిమ్క కక్క సిచ్చ దెంక మెలె, మరియాద గెత ఆసల్ రితి ఇండితసక చి అదికారుమ్క నే బితసక. జోవయించ వెట్కారుమ్చ ఆసల్క ఇండిత, అదికారుమ్క నే బిత మాన్సుల్, జలె, సొంత సెక్తిక సంపజా తా దయిరిమ్ తెన్ ఇస్టుమ్ అయ్లి రితి ఇండితస జా, దేముడు కబుర్ తెద్రయ్త పరలోకుమ్చి ఉజిడ్చి గవురుమ్ తిల దూతల్ గట్టక కీదూసుప కెరుక కి బితి నాయ్.

11 *పరలోకుమ్చ దూతల్, మాత్రుమ్, జేవ్ మాన్సుల్చి కంట జోవయింక ఒగ్గర్ సెక్తి అదికారుమ్ తిలె కి, ప్రబుచి మొక్కె జేవ్ తిలె కి, జేవ్ మాన్సుల్క దూసుప కెర్తి తీర్పు నే సంగితె తుక్లె తత్తతి.

12 †జేవ్ మాన్సుల్, మాత్రుమ్, కీస జతతి మెలె, జంతువుల్చ రిత, జంతువుల్ రిత గునుమ్ తా,

* 2:1 2:1 యూదా, చెత్తర్ నంబర్చి కోడు దెక. † 2:4 2:4 ఆదికాండుమ్ 6:1-7. ‡ 2:4 2:4 నెంజెలె, ‘గొల్లల్ తెన్ బంద అస్సె, గెద’. యూదాతె 6 నంబర్ కోడు కి దెక. § 2:5 2:5 ఆదికాండుమ్ 6, 7 అద్యయల్. * 2:6 2:6 ఆదికాండుమ్ 18:20-29. యూదాతె 7 నంబర్చి కోడు కి దెక. † 2:7

2:7 ఆదికాండుమ్ 19:12. ‡ 2:10 2:10 యూదా 8 నంబర్చి కోడు దెక. § 2:10 2:10 పూర్లుమ్, ఎత్కి అదికారుమ్ తిలొ దేముడు దెతి సిచ్చ జర్లు కెరుక మెన మాన్సు రూపుమ్ జల దొగుల దూతల్ ఏక్ సుట్టు సాదొమ పట్టుమ్తె గెతికయ్, జా పట్టుమ్చ మున్సుబోదల్ జేవ్ దూతల్క లంజె కెర జోవయించి మరియాద కడక ఉచర్లె. ఎత్కి అదికారుమ్ తిలొ దేముడు జోవయింక అడ్డు కెర గుడ్డి కెర్లెన్. ఆదికాండుమ్ 18:20, 22, చి 19:1-11. పేతురు ఈంజ ఉత్రుమ్ రెగిడ్లి పొదులె కి ప్రబుచ కబుర్లు సంగిల మాన్సుల్క పాపుమ్చ మాన్సుల్ దూసుప కెర్తె తిల. చి అగ్గెచి ఇన్నెక టాలి జతయ్. * 2:11 2:11 యూదా 9 నంబర్చి కోడు దెక. † 2:12 2:12 యూదా 10 నంబర్చి కోడు దెక.

జోవయించి పెట్టి అయ్యలసి అర్దుమ్ నెంతె దస్సి జర్గు కెర్తతి, చి బోనుతె దెర్ను సేడ మొర్తి రిసాయి జెర్వు తవుల. జలె, జేవ్ మాన్సుల్, దస్సి, జేవ్ నేన్లినచి రిసా దూనుప కెర్త తీర్పుల్ సంగ సంగ, జంతువుల్చి రితి జోవయించి నాసెనుమ్ జెవ్వి జవుల.

13 జోవయించి పాపుమ్ జెవ్వి కవుల. కీస కమొతె జేవ్ మాన్సుల్ సర్ల జతతి మెలె, లాజ్ నెంతె మెద్దెనచి ఉజిడతె కి ఇన్సుమ్ అయ్యల కమొ కెర్తతి. †ముర్కిచ మర్కుల్ రిత జా, ప్రబుచి ప్రేమ దెకయ్త తుమ్చ అన్నిమ్తె బెద కతె తా, జా సుద్దిచిక వెట్కారుమ్ కెర్తి రితి, జోవయింక ఇన్సుమ్ అయ్యల జోవయించి పెట్టిచ ఆసల్ లాజ్ నెంతె జర్గు కెరంతతి.

14 జోవయించ అంకివొ బెర్తు లంజె దెకుక. జేవ్ జా పాపుమ్ కెరుక కెయ్క ముల్లి నాయ్. డిట్టుమ్ నెంజిల నంపజలసక సికడ పాపుమ్ కెరయ్తతి. ఆసచి అలవాట్ కెరనయ్ అస్తి, రితి పాపుమ్చ బోదల్, జేవ్.

15 సత్తిమ్చి వాటు ముల దా, ఇన్సుమ్ అయ్యలి వేర వాట్ బుల, బెయోరుచొ పుత్తున్ కీబిలామ్చి పట్టి గెచ్చ, జో గెలి వాట్ గెచ్చ అస్తి. పాపుమ్తె లాబుమ్ కెరనుక జోవయించి అలవాట్, జోచి సర్ల!

16 జో* బిలామ్చి సొంత పాపుమ్చి రిసా, దేముడు జోక తీర్పు కెర్లన్. మెలె, నే లట్టబ్బి గాడ్డె మాన్సుచి అవాడ్క లట్టబ, బిలామ్క కోడు సంగ, జో ఉచర్లి వెర్రి కామ్ అడ్డు కెర్లి.

17 జలె, పాపుమ్చ జేవ్ మాన్సుల్ కీస జతతి మెలె, పాని నెంజిల ఉటల్చి రిత, †వాదు పెట్టనిలి పాని నెంజిల్ మబ్బుల్చ రిత జా అసున్. ఆకర్ దీసచి రిసా కిచ్చొ వాట జోవయింక రకితయ్ మెలె, అందర్చి ఉప్పిరి అందర్.

18 కిచ్చొక మెలె, వెర్రి కమొచి రిసా గవురుమ్ లట్టబన, పాపుమ్ తెంతొ నొవర్ విడ్డల్ జల నొవ నంపజలసక సికడ సికడ, ఆగెచ ఆసల్ జర్గు కెరంతిన్తె జోవయింక అలవాట్ కెర్తతి.

19 †“ఆగ్గుల్చ గొతిమాన్సుల్ నెంజున్, ఆగ్గుల్ తెంతొ విడ్డల్ జా అస్సున్. తుమ్ కిచ్చొ కెర్లె కి బాద నాయ్” మెన సికడ, వేర అర్దుమ్ బెదవ పాపుమ్ సికయ్తతి. గని జేవ్ దస్సి సికడన కిచ్చొచ గొతిమాన్సుల్ జా అస్తి మెలె, మొర్ను దెత ఆసల్చ గొతిమాన్సుల్ జా అస్తి. కిచ్చొక మెలె, కేన్ అలవాట్ మాన్సుక ఏలుప కెర్తయ్ గే, జా అలవాట్తె జో మాన్సు గొతిమాన్సు జా అస్సి.

20 దస్సి అమ్చొ ప్రబు అమ్చొ రచ్చొచుప కెర్లొసా జలొ

యేసుక్రీస్తుక జాన్లి సెక్తిక ఈంజయ్ లోకుమ్చి పాపుమ్ ఇండుక తెంతొ విడ్డల్ జా తా, జేవ్ జా పాపుమ్ వాట్ అన్నె గెచ్చ సిక్కు జా దెర్ను సేడ్లె, జేవ్ అగ్గయి తిలి పాపుమ్చి కంట అన్నెయ్ నాసెనుమ్ జా గెచ్చ అస్తి.

21 దేముడు దిలి పరలోకుమ్చి సుద్ది సెలవ్ జేవ్ జాన జానయ్ ములిలి కంట, జా సత్తిమ్ వాట్ జేవ్ కెయ్య నే జాన్లె చెంగిల్ తత్తి.

22 సత్తిమ్ తిలి టాలితె సంగిల్ రితి, జోవయింక జర్గు జా అస్సి. మెలె, సొంత ఒక్కస్సి అన్నె కతయ్ సూనొ, చి అండ్రి దోయి జా తిలె, బుర్లతె ఎంగ్ల జా అన్నె ముర్కి కలొయ్ జతయ్.

3

క్రీస్తు ప్రబు అన్నె ఉత్ర జెతి దీసి

1 ఈది తుమ్క ఆవ్ రెగ్గిలి దొన్నిచి ఉత్తుమ్. ప్రేమ తిల బావుడ్లు, చి దొన్నితె కి అంచి ఉద్దెనుమ్ కిచ్చొ మెలె, సత్తిమ్చి నిదానుమ్చి తుమ్చి మెన్సుతె తుమ్క ఏక్ కోడు ఉచర్లసి రిసా, తుమ్క ఆత్మ డిట్టుమ్ కెర్తి రిసా.

2 కిచ్చొ కోడు మెలె, *‘జర్గు జయెదె’ మెన దేముడుచ కబుర్లు సంగిలస సంగిలిసి ఎత్కి, పడ్డొ ప్రబు జలొ రచ్చొచుప కెర్లొసా జోవయించ బారికుల్చి అత్తి తుమ్క సంగిల సెలవ్ కొడొ ఎత్కి తుమ్ కెర మెనయ్ ఈంజ ఉత్తుమ్ రెగిడ్చిసి.

3 తొలితొ ముక్కిమ్క కిచ్చొ అర్దుమ్ తుమ్ కెరనుక మెలె, ఆకర్ దీసల్క †అన్మానల్చ మాన్సుల్ సత్తిమ్చి ఉప్పిరి ఆస్సన జా కెర, జోవయించి పెట్టిచి పాపుమ్చ ఆసల్ రితి ఇండ.

4 కీస కొడొ లట్టబుల మెలె. †“అన్నె జెయిందె, మెన జో క్రీస్తు సంగిలిసి కేతె జర్గు జలి? అమ్చ పూర్నుమ్చ జియ మొర్లి తెంతొ కి, అన్నె అగ్గ తెంతొ, లోకుమ్ జెర్మున్ జలి తెంతొ కి, ఎత్కి మాములుమ్ అగ్గెచి రితి జర్గు జతయ్.” మెన సంగుల.

5 దస్సి సంగితస జాన జానయ్ కిచ్చొ కోడు ఉచరుక నెసితి మెలె, ఒగ్గర్ ఒగ్గర్ అగ్గయ్ తెంతొ ‘జర్గు కెరిందె’ మెన దేముడు ఒప్పన్తికయ్, ఆగాసుమ్ అస్సి, చి కీపాని తెంతొ, పానితె జర్గు జలిన్చి రిసా, బూలోకుమ్ జెర్మున్ జలి.

6 అన్నె, బూలోకుమ్ తెదొడి తిలిసి వెల్లొ పానిచి *బూరుమ్క సిచ్చొ జా నాసెనుమ్ జలి.

† 2:13 2:13 యూదా 12 నంబర్చి కోడు దెక. § 2:15 2:15 యూదా 11 నంబర్చి కోడు దెక. * 2:16 2:16 యూదా 11 నంబర్చి కోడు కి దెక. బిలామ్ ఎత్కి అదికారుమ్ తిలొ దేముడుచ కబుర్లు సంగితొసా జలెకి, చెత్తర్ తప్పుల్ కెర్లొ. ఎత్కి అదికారుమ్ తిలొ దేముడుచి కోడు మార్పుప కెరుక ఉచర్లొ ఎత్కి అదికారుమ్ తిలొ దేముడుక విరోదుమ్ తిల మాన్సుల్ “డబ్బుల్ దెమ్దె” మెంతికయ్, జా డబ్బుల్ అసకయ్ ఎత్కి అదికారుమ్ తిలొ దేముడుచి కోడు పిట్టవుక ఉచర్లొ, సంక్యాండుము 22:2-35, 31:16. పడ్డొ, బొమ్మల్క బలి దిలిసి ప్రెజల్ కంక సికడ్లె, చి ప్రెజల్ లంజె జతి రితి సికడ్లె, డీనయ్లిసి 2:14. † 2:17 2:17 యూదా 12, 13 నంబర్చి కోడు దెక. † 2:19 2:19 యూదా 4 నంబర్చి కోడు దెక. * 3:2 3:2 యూదా 17 నంబర్చి కోడు దెక. † 3:3 3:3 యూదా 18 నంబర్చి కోడు దెక. † 3:4 3:4 యోహాను 14:3, 28 దెక. § 3:5 3:5 అదికాండుమ్ 1:2, 6, 7. * 3:6 3:6 అదికాండుమ్ 6-8 అద్యయల్.

7 జలె, దేముడుచి దస్సి సెలవక కి, జోచి కోడుకయ్, అప్పెచి ఈంజయ్ బూలోకుమ్ ఈంజయ్ ఆగాసుమ్ కి డడ్డ గెతి సమయుమ్క రకితె అస్తి. జో వెల్లి తీర్పు కెర్తి, జోక నెన పాపుమ్ ఇండిల మాన్సుల్క నాసెనుమ్ కెర్తి దీసి ఎదక దేముడు రకితె అస్సి.

8 గని, ప్రేమ తిల బావుడ్లు, ఏక్ కోడు తుమ్ పచ్చ నాయ్. కిచ్చొ మెలె, ప్రబుచి మొక్కె ఎక్కి దీసి వెయి వెర్చుల్చి రితి జతయ్, చి వెయి వెర్చులు ఎక్కి దీసిచి రితి జతయ్.

9 ప్రబు సంగిలి ప్రమానుమ్ జో నెరవెర్చుప కెరుక ఆల్సిమ్ కెర్తయ్ మెన సగుమ్జిన్ ఉచర్లె కి, జో ఆరి ఆల్సిమ్ కెరె నాయ్. కిచ్చొక మెలె, “జోవయింతెన్ కోయి నాసెనుమ్తె గెతు నాయ్, గని జేవ్ ఎత్తిజిన్ జోవయించి పాపుమ్ చినన ముల్తు” మెన, తుమ్చి రిసాయి జో ఆల్సిమ్ కెర్తయ్.

10 గని, జా వెల్లి దీసి జెతిసి కిసి తయెదె మెలె, కో నేన్లె పొది చోరు అయ్లి రితి జెయెదె. తెదోడక వెల్లి అవాడ్ వీర్లి రితి కెర, ఆగాసుమ్తె తిలిసి డడ్డ గెచ్చు ఆగాసుమ్ కేడయ్ గెచ్చెదె, చి ఈంజ బూలోకుమ్ జేవ్చ కమె తెన్ని డడ్డయ్ గెచ్చెదె.

11 అప్పె తిలిసి ఎత్తి దస్సి జా గెచ్చుక అస్సి. జలె, కిస మాన్సుల్ జా తుమ్ ఇండుక మెలె, మాన్సుల్చి మొక్కె సుద్ది తెన్ ఇండ, దేముడు తెన్ బెద నిదానుమ్ ఇండ,

12 జోచి వెల్లి దీసి జెతె ఎదక ఎక్కి ఆస నిదానుమ్ †రకితె తా, జో కిబే బేగి జెతిస్కయ్ రితి ప్రార్దన కెర, సత్తిమ్ ఇండ. జా దీసిచి కామ్క ఆగాసుమ్ డడ్డ గెచ్చు కేడెదె, చి జా ఆగిక ఒత్త తిలిసి ఎత్తి జూర గెచ్చెదె.

13 జలెకి, జో ప్రమానుమ్ సంగిలిస్క రకితసుమ్. కిచ్చొక మెలె, * నొవి ఆగాసుమ్క, చి సత్తిమ్ బెర్లి నొవి బూలోకుమ్క రకితసుమ్.

14 జాకయ్, ప్రేమ తిల బావుడ్లు, ఇన్నెక తుమ్ రకితసు చి రిసా, ప్రబు జా కెర తుమ్క చజలె, కిచ్చొ ముర్కి నెంతె కిచ్చొ పొరపాట్ నెంతె, జోచి సేంతుమ్ తుమ్చి పెట్టి కామ్ కెర్తె తా, సుద్ది తంక తుమ్ దెకన.

15 అన్నె, అమ్చొ ప్రబు ఆల్సిమ్ కెర్తిస్క ఉచర్లె, తుమ్ కిచ్చొ చిన మెలె, జో వాయిద కెర్తిస్కె అన్నె మాన్సుల్ రచ్చించుప జంక జో అవ్కాసుమ్ దెతయ్. ప్రబు జోక దిలి గ్యానుమ్చి రిసా పవులు కి ఇన్నెచి రిసా ఇసి సంగ రెగిడ్లన్†

16 జోచ ఉత్తల్ ఎత్తితె రెగిడ్లి రితి. జోచ ఉత్తల్తె తిలిసి సగుమ్ అర్దుమ్ కెరనుక ఇదిల్ అల్లర్ జంక జతయ్. జేవ్ కొడొ సగుమ్జిన్ నేన్ల మాన్సుల్, దొన్ని మెన్సుల్

తిల మాన్సుల్, జోవయించి సొంతయ్ ఇస్టుమ్ అయ్లి రితి మార్చుప కెర, వేరయ్ అర్దుమ్ సికడ్డతి. దేముడుచి కొడొతెచ అన్నె కొడొ కి దస్సి మార్చుప కెర్తతి. జలె, జోవయింక జెవ్వి నాసెనుమ్ కెరంతతి.

17 జలె, ప్రేమ తిల బావుడ్లు, ఈంజ ఎత్తి జర్గు నే జతె అగ్గె సూన జాన్సుచి రిసా, దేముడుచి కోడు నే సూన్త మాన్సుల్చి పట్టి తుమ్ నే గెతి రితి, తుమ్చి సొంత నిదానుమ్ తుమ్ నే పిట్టవనతి రితి, తుమ్ జాగర్త తెన్ తా.

18 అమ్చొ ప్రబు, అమ్చొ రచ్చించుప కెర్తెసా జలొ యేసుక్రీస్తుచి దయతె ఇండ, జోచి గ్యానుమ్ పోసన, ఆత్తుక తుమ్ వడ్డ. అప్పె, కి, జా ఆకర్ దీసి ఎద కి కెయక తెయక కి జోక జోబర! ఆమేన్.

† 3:10 3:10 డీనయ్లిసి 8:7, 21:1, మత్తయి 5:18, 24:35, మార్కు 13:31, లూకా 21:33, యోహాను రెగిడ్లి ఏక్ నంబర్ ఉత్తమ్ 2:17. ‡ 3:12 3:12 దెస్సలొనీకుల్క రెగిడ్లి 1 నంబర్ ఉత్తమ్ 1:10, రోమియుల్ 8:19-25, కొరిందీల్క రెగిడ్లి 1 నంబర్ ఉత్తమ్ 1:7, గలతీయుల్ 5:5, పిలిప్పీయుల్ 3:20, ఎబ్రియుల్ 9:28. § 3:12 3:12 “జెవున్” మెన ప్రార్దన కెరుక జయెదె, మత్తయి 6:10, చి ‘ఒండి లోకుమ్తె సుబుమ్ కబుర్ సూసయ్ జలె జా దీసి జెయెదె’ మెన కేన డీస్టయ్ మెలె, మత్తయి 24:14తె. * 3:13 3:13 డీనయ్లిసి 21:1. † 3:15 3:15 నంబర్ కోడుచి ఎట్టొచి కోడు దెక. రోమియుల్ 2:4, చి డీనయ్లిసి 2:21 కి దెక.

యోహాను రెగిడ్లి మొదొల్చి ఉత్త్రమ్ బారిక్ జలో యోహాను రెగిడ్లి మొదొల్చి ఉత్త్రమ్

1 మొదొల్ తెంతో తిలిసి, అమ్ సూన్లిసి, అమ్చ సొంత అంకివో దెకిలిసి, దెక సొంత అత్తో చడ్లిసి చి రిసొ తుమ్క సూనయ్తనుమ్, రెగ్గితనుమ్. * మెలె, †ఎత్కిక దొర్కు జలి జీవ్ జలిసి, దొర్కు జలి జీవ్ జోతె దొర్కు జతిన్చి రిసొచి దేముడుచి కోడు జలి జీవ్ దెతి దేముడుచి కోడుతె తిలిన్చి రిసొ రెగ్గితనుమ్.

2 క్రిస్తు జలో దెకయ్ జలి జీవుక †ఈంజ లోకుమ్తె జో జెర్కున్ జా అయ్లిన్ జిలిన్ తెన్ అమ్క రుజ్జు జా అస్సె. అమ్ దెకిలమ్, సాచి జా సంగితనుమ్, చి జో 'ఎత్కిచి కంట అగ్గె తెంతో దేముడు తెన్ తిలి కెయ్క తెయ్క తాఁ గెతి జీవు, చి జో ఈంజ లోకుమ్తె జెర్కున్ జా అమ్క డీన అస్సె' మెన ఒప్పున, తుమ్క సూనయ్తనుమ్.

3 అమ్ దెకిలిసి, అమ్ సూన్లిసి కిచ్చొక తుమ్కయ్ సూనయ్తనుమ్ రెగ్గితనుమ్ మెలె, తుమ్క ప్రబు దెతి రచ్చన, జో దెతి సర్దచి వాటతె అమ్చి తెన్ బెదుత్. అమ్చి తెన్ తుమ్చి తెన్ బెదితిన్చి కట్టు దేముడు అబ్బొన్ తెన్ చి జోచొ పుత్తున్ జలో యేసుక్రిస్తు తెన్ అమ్క బెదవ అస్సె.

4 అమ్చి సర్దనంతోనుమ్ పూర్తి జవున్ మెనయ్ ఈంజ ఉత్త్రమ్ రెగిడ్లనుమ్.

దేముడుచి ఉజిడతె ఇండ

5 ప్రబుతె సూన తుమ్కయ్ అమ్ సూనయ్తి కబుర్ కిచ్చొ మెలె, దేముడు కిఉజిడి జా అస్సె, చి జోతె కిచ్చొ అందర్ నాయ్.

6 జో తెన్ బెద జో తెన్ ఇండితనుమ్ మెనంతనుమ్, గని *అందర్బుద్ది తెన్ ఇండితనుమ్ జలె, అబద్దుమ్చ జా సత్తిమ్ ఇండుమ్ నాయ్.

7 గని, జో కిసి ఉజిడి అస్సె గే, ఆమ్ కి దస్సి †ఉజిడ్ బుద్ది తెన్ ఇండితనుమ్ జలె, ఎక్కిలో తెన్ ఎక్కిలో బెద ఎక్కి కట్టు తెన్ ఇండితనుమ్, చి జోచొ పుత్తుసి యేసు †సిలువతె జో మొర అర్నితుమ్ జలిన్చి జోచి సూఁయి జలి లోయి అమ్చి పాపుమ్ ఎత్కి పుంచ అమ్క సుద్ది కెరై అస్సె.

పాపుమ్ ఒప్పున్తిన్చి రిసొ

* **1:1 1:1** నెంజెలె, 'మెలె, దొర్కు జలి జీవ్ తిలి దొర్కు జలి జీవ్ దెతి కోడు జలో యేసుక్రిస్తుచి రిసొ రెగిడ్లనుమ్'. యోహాను 1:1-4, 14 దెక. † **1:1 1:1** యోహాను 1:4, బారికుల్ 5:20 దెక. ‡ **1:2 1:2** యోహాను 1:14. § **1:5 1:5** యోహాను 1:4, 5, 9, 14, 8:12, 9:5, 12:46, యాకోబు 1:17 దెక. * **1:6 1:6** యోహాను 3:19, 20, 11:9-10, 12:35, కొరింథిల్క రెగిడ్లి 2 నంబర్ ఉత్త్రమ్ 6:14. † **1:7 1:7** మత్తయి 5:14, 16, యోహాను 3:21, 12:36, బారికుల్ 13:47, రోమియుల్ 13:12, ఎవెసు 5:8, దెస్సలొసికుల్క రెగిడ్లి 1 నంబర్ ఉత్త్రమ్ 5:5 దెక. ‡ **1:7 1:7** కొలోస్సియుల్ 1:20, 2:14, పేతురుక రెగిడ్లి 1 నంబర్ ఉత్త్రమ్ 2:24, మత్తయి 27:32-54, మార్కు 15:21-39, లూకా 23:26-48, యోహాను 19:17-37 దెక. § **1:10 1:10** రోమియుల్ 3:10, 23, 5:12. * **2:2 2:2** 1:7 చి ఎట్టొచి చి కోడు దెక. † **2:6 2:6** యోహాను 15:3-10 దెక.

8 'అమ్క పాపుమ్ నాయ్' మెన అమ్ ఏక్ వేల సంగనై, అమ్క ఆమి మోసిమ్ కెరంతనుమ్, సత్తిమ్ అమ్చి పెట్టి నాయ్.

9 గని అమ్ కెర్ల పాపల్ దేముడుచి మొక్కై అమ్ ఒప్పునై, జో నిదానుమ్ సత్తిమ్ కెర్లొసా, చి అమ్చి పాపుమ్ చెమించుప కెర అమ్ పాపుమ్ తెన్ నే తతి రితి జో అమ్క సుబ్బుమ్ కెరెదె.

10 అమ్ కెర్లి పాపుమ్క 'పాపుమ్ కెరుమ్ నాయ్' మెన అమ్ సంగిలె, జోకయ్ 'అబద్దుమ్చొ' మెన సంగిల్ రితి జతనుమ్, చి జోచి కోడు అమ్చి పెట్టి నాయ్, 'పాపుమ్ సుదల్' మెన జో అమ్క సంగిలి కికోడు ఒప్పునుమ్ నాయ్.

2

పాపుమ్ కెరుక పొన

1 అంచ ప్రేమ తిల పుత్తర్లు, తుమ్క 'పాపుమ్ కెర్లు నాయ్' మెనయ్ తుమ్క ఆవ్ ఈంజ రెగిడ్లిసి. గని ఏక్ వేల అమ్ కో పాపుమ్ కెర్లె, ఎత్కిక అబ్బొ జలో దేముడు లోకుమ్ ఎత్కిచ మాన్సుల్క తీర్పు కెర్తిన్తె, అమ్క ఎక్కిలో తోడ్ సంగితొసా అస్సె. పూర్తి పున్నిమ్ తిలో యేసుక్రిస్తు.

2 అమ్ కెర్ల పాపల్ గెచ్చయ్తి *బలి జో జా అస్సె. ఎక్కి అమ్మి కెర్ల పాపల్ మెన నాయ్, గని ఒండి లోకుమ్చ మాన్సుల్ కెర్ల పాపల్ గెచ్చయ్తొసా జో జా అస్సె.

3 'జోక అమ్ జానుమ్' మెన అమ్ కిసి జాన దయిరిమ్ తంక జయెదె మెలె, జోచ ఆగ్గుల్ రితి ఇండితనుమ్ జలెకయ్.

4 'జోక జాని' మెన కో జలెకు సంగితయ్ గని జోచ ఆగ్గుల్ నే సూన్లి రితి జా కెర్తయ్ నాయ్ జలె, జో మాన్సు అబద్దుమ్చొ, చి జోచి పెట్టి సత్తిమ్ నాయ్.

5 గని, ప్రబుచి కోడు కో కెర్తయ్ గే, జోచి పెట్టి దేముడుచి ఉప్పిరచి ప్రేమ పూర్తి జా అస్సె. జలె, 'దేముడుచి రచ్చనచి తెడి అస్సుమ్' మెన అమ్ కిసి పూర్తి దయిరిమ్ జంక జయెదె మెలె,

6 '†జోచి తెడి అస్సుమ్. జో తెన్ బెద అస్సుమ్. జోచి జీవ్క జితనుమ్' మెన సంగనై, యేసుక్రిస్తుయి ఇండిలి రితి ఆమ్ కి ఇండుకయ్.

ఎక్కిలోక ఎక్కిలో ప్రేమ కెర

7 ప్రేమ తిల గోతునుదల్, తుమ్క ఆవ్ రెగిడ్లిసి నొవి ఆగ్గు నెంజె, గని మొదొల్ తెంతో తుమ్క దొర్కు జలి ఆగ్గు. అగ్గె తెంతో చి జా ఆగ్గు తుమ్ సూన్లి కోడు.

8 జలెకి, యేసుక్రీస్తు దిలి †నొవి ఆగ్ను తుమ్క ఆవ్ రెగిడ్డసి. తుమ్ ఎక్కిలోక ఎక్కిలో ప్రేమ కెరుకయ్. ఈంజ ఆగ్ను జో యేసుక్రీస్తుచి తెడి నెరవెర్చుప జతయ్, తుమ్చి తెడి కి నెరవెర్చుప జతయ్. కీసి మెలె, అందర్ కేడ గెతె అస్సె, చి నిజమ్చి ఉజడి అప్పె కి లగుక దెర అస్సె.

9 'ఉజడిచి తెడి అస్సి' మెన కో సంగనై కి జోచొ కేన్ బావొక జో విరోదుమ్ అస్సె జలె, జో అప్పెక అందర్చి తెడి అస్సె.

10 జోవయించ బావుడ్లు జలె రిత అన్నె మాన్సుల్క కో ప్రేమ కెర్తయ్ గే, జొయ్యి ఉజడిచి తెడి జితయ్, చి ఈంజ ఉజడితె కక్క తప్పు కెరయ్తెసి కిచ్చొ కి తయె నాయ్.

11 గని, బావొ జలొ అన్నె కేన్ మాన్సుక కో విరోదుమ్ కెర్తయ్ గే, అందర్చి తెడి అస్సె. అందర్చి తెడి ఇండితయ్, చి జో కేన్ గెతయ్ గే జో నేనె. కిచ్చొక మెలె, అందర్ జోక గుడ్డి కెర అస్సె.

12 ప్రేమ తిల బోదల్, తుమ్క కిచ్చొక రెగిడ్డసి మెలె, జో యేసుక్రీస్తుచి నావ్చి రిసా జోచి నావ్చి తెడి తుమ్ కెర్ల పాపల్ చెమించుప జా అస్సి.

13 తుమ్ అబ్బదింసి మొదొల్ తెంతొ జోక తుమ్ జాన్సుచి రిసా తుమ్క రెగ్గితసి. తుమ్ ఉబెడల్, పాపుమ్ కెరయ్తో సయ్తానచి ఉప్పిరి తుమ్ జీన అస్సున్చి రిసా తుమ్క రెగ్గితసి. తుమ్ బాలబోదల్, ఎత్కిక అబ్బొ జలొ దేముడుక తుమ్ జాన్సుచి రిసా తుమ్క రెగ్గితసి.

14 అబ్బదింసిక, తుమ్ మొదొల్ తెంతొచొక తుమ్ జోక జాన్సుచి రిసా తుమ్క రెగ్గితసి. ఉబెడల్, తుమ్ ఆత్మతె డిట్టుమ్ జా అస్సున్, చి దేముడుచి కోడు తుమ్చి పెట్టి అస్సె, తుమ్చి పెట్టి కామ్ కెర్తయ్, చి సయ్తానుక తుమ్ జీన అస్సున్చి రిసా తుమ్క రెగ్గితసి.

15 ఈంజ లోకుమ్క చి ఈంజ లోకుమ్చి కిచ్చొ కి తుమ్ ప్రేమ జా నాయ్. ఈంజ లోకుమ్చి కో ప్రేమ అస్సి గే, ఎత్కిక అబ్బొ జలొ దేముడుచి ఉప్పిర్చి ప్రేమ జోచి పెట్టి నాయ్.

16 కిచ్చొక మెలె, ఈంజ లోకుమ్తె తిలిన్ ఎత్కి, ఆగ్ ఆన జతిసి, అంకివొ ఆన జతిసి, ఆస్తిచి గవురుమ్ కి, ఎత్కిక అబ్బొ జలొ దేముడుచి తెంతొ చి బుద్ది నెంజె, గని ఈంజయ్ లోకుమ్చి బుద్దిచి, జా.

17 అన్నె, ఈంజ లోకుమ్, ఈంజ లోకుమ్చి ఆస్తిచి ఉప్పిరి ఆన జతిసి ఎత్కి కేడయ్ గెతిసి, గని దేముడుచి ఇస్టుమ్ రితి కో ఇండుల గే, జెవ్వి కెయ్క తెయ్క తా గెచ్చుల.

క్రీస్తుక విరోదుమ్ తిలొసా

18 ప్రేమ తిల పుత్తర్లు, ఆకర్చి గడియ, ఈంజ. క్రీస్తుచి ఉప్పిరి విరోదుమ్ తిలొసా బార్ జయెదె మెన నూన

అస్సున్, గెద. దస్సి, అప్పె క్రీస్తుచి ఉప్పిరి విరోదుమ్ జలన ఒగ్గర్జిన్ బార్ జా అస్సి. జాకయ్, ఇన్నెక 'ఆకర్చి గడియ ఈంజ' మెన జానుమ్.

19 'జోచి ఉప్పిరి జేవ్ విరోదుమ్ జలన అమ్చితె తెంతొ బార్ జా గెల' మెనుక జయెదె, గని జోవయింక 'అమ్చి తెన్ ఎక్కి జా తిల' మెనుక నెంజె. కిచ్చొక మెలె, అమ్చి తెన్ ఎక్కి జత జలె, అమ్చి తెన్ తా గెత. గని నాయ్, బార్ జా ముల దిల, చి అమ్చి తెన్ ఎక్కి నెంజితి మెన రుజ్జు డీస్తయ్. జేవ్ ముల్తిన్ తెన్ జా రుజ్జు డీసుక మెన సెలవ్ తిలె.

20 తూమ్, మాత్తుమ్, పరలోకుమ్చి సుద్ది తిలొసా జోచి ఆత్మక తుమ్క బోడి ఉప్పిర్ సువిల్ రితి జా, 'అంచయ్' మెలి రితి తుమ్క జోచి గుర్తు కెర అస్సె. జాకయ్, తుమ్ జోచయ్ జలన ఎత్కిజిన్ సత్తిమ్ జాన్సు.

21 జలె, తుమ్క 'సత్తిమ్ నేన్తి' మెన రెగ్గి నాయ్, గని సత్తిమ్ జాన్సుచి రిసాయి రెగిడ్డసి. కేన్ అబద్దుమ్ తిలె, సత్తిమ్ తెంతొ జెయె నాయ్ మెన కి జాన్సు.

22 జలె, కొన్సొ జో అబద్దుమ్ జతొసా జయెదె మెలె, యేసుక 'జోచి రాజిమ్తె మాన్సుల్క బెదయ్తో రచ్చించుప కెర్తొసా జతి దేముడు తెద్రయ్లో క్రీస్తు జో నెంజె' మెన సంగితొసా సికడ్డెసా. క్రీస్తుచొ దేముడు అబ్బొన్క 'అబ్బొన్ నెంజె', క్రీస్తు పుత్తున్క 'దేముడుచొ పుత్తున్ నెంజె' మెన కో సంగితయ్ సికడ్డయ్ గే, జొయ్యి క్రీస్తుచి విరోదుమ్ జలొసా.

23 క్రీస్తు పుత్తున్క 'దేముడుచొ పుత్తున్ నెంజె' మెన కో సంగితయ్ సికడ్డయ్, జోక ఎత్కిక అబ్బొ జలొ జో దేముడుచొ మాన్సు నెంజె, జో మాన్సుచి పెట్టి నాయ్. క్రీస్తు పుత్తున్క 'దేముడుచొ పుత్తుసి నిజమి జొయ్యి జయెదె' మెన కో* ఒప్పన్తయ్ గే, దేముడు అబ్బొన్చొ మాన్సుకి జో జా అస్సె, జోవయించి పెట్టి ఎత్కిక అబ్బొ జలొ దేముడు అస్సె.

24 క్రీస్తుచి రిసా తుమ్ మొదొల్ తెంతొ నూన్సి తుమ్చి పెట్టి తా గెన్సు. తుమ్ మొదొల్ తెంతొ నూన్సి తుమ్చి పెట్టి తా గెలె, కామ్ కెరె తిలె జలె, దేముడు పుత్తున్చి తెడి కి దేముడు అబ్బొన్చి తెడి కి తా గెతె, జోచి తెన్ †ఇండితె తస్సె.‡

25 జోచి రాజిమ్తె అప్పె కి బెదితి, పరలోకుమ్తె కెయ్క తెయ్క జితి చెంగిల్ తతి వాట అమ్క తుమ్క జో ప్రమానుమ్ సంగిలిసి కోడు.

26 తుమ్క మోసిమ్ కెరుక ఉచర్తనచి రిసా తుమ్క ఈంజ రెగ్గితసి.

27 గని ప్రబు జోచి ఆత్మతేల్ తుమ్క బోడి ఉప్పిర్ సువిల్ రితి జలి గుర్తు తుమ్చి పెట్టి తత్తయ్ కామ్ కెర్తయ్. మెలె,

‡ 2:8 2:8 యోహాను 13:34 చి మత్తయి 22:37-40. రోమియుల్ 10:9-10 దెక. † 2:24 2:24 2:6 దెక.

§ 2:23 2:23 3:23, 4:15, 5:1, 5, 13, 20 దెక.

‡ 2:24 2:24 యోహాను 15:4-10.

* 2:23 2:23 మత్తయి 10:32-33 చి

జోచి ఆత్మ తుమ్చి పెట్టి తత్తయ్ తుమ్క సికడ్తయ్, చి తుమ్క కోమాన్సు సికడుక నాయ్. జలె, జోచి ఆత్మ తుమ్క కిసి ఎత్కిచి రిసా సికడ్తయ్ గే, చి జోచి ఆత్మ కిసి సత్తిమ్ తా కిచ్చో అబద్దుమ్ జయె నాయ్ గే, జా ఆత్మ తుమ్క సికడ్డి రిసా, యేసుప్రబుచి తెడి తుమ్ తా జోచి జీవ్క జోచి ఆత్మసెక్తిక జో తెన్ ఇండితె.

28 అన్నె, అప్పె, ప్రేమ తిల పుత్తర్లు, 'యేసుప్రబుచి తెడి తుమ్ తా. జోచి జీవ్కయ్ జోచి ఆత్మసెక్తిక జియె జో తెన్ ఇండ' మెన అన్నె సంగితసి. ఇసి తాఁ గెలమ్ మెలె, జో అన్నె జెతి పొదిక, అన్నె డిస్సి పొదిక అమ్ లాజ్ నే బెట్టె, నే గుంచితె, దయిరిమ్ తెన్ తమ్దె.

29 జో 'పున్నిమ్చొ' మెన జాన్సు జలె, అన్నె కో సత్తిమ్ ఇండితతి గే, జేవ్ కి జోచి ఆత్మ తెన్ జెర్మన్ జా అస్తి మెన తుమ్ జాన.

3

1 ఎత్కిక అబ్బొ జలో దేముడు అమ్క *“అంచయ్ బోదల్, తూమ్” మెన అమ్క నావ్ తియె అమ్క కెడ్డి ప్రేమ కెర అస్సె గే తుమ్ ఉచర! జో దస్సి కెర్తికయ్, నిజుమి జోచ బోదల్ జలమ్! దస్సి మెన ఈంజయ్ లోకుమ్చి బుద్దిచ మాన్సుల్ కిచ్చొక తుమ్క చినితి నాయ్ మెలె, †జోకయ్ నేన్త్తి.

2 ప్రేమ జల గోతుసుదల్, అమ్ అప్పె కి దేముడుచ బోదల్ జా అస్సుమ్. అమ్ తెదొడక కిసి జమ్దె గే అప్పె డిసె నాయ్, గని కిచ్చొ జానుమ్ మెలె, యేసుప్రబు అన్నె డిసిలె, †జోచి రితి పూర్తి జమ్దె. జో కిసి అస్సె గే, తెదొడకయ్ కిచ్చొ అడ్డు నెంతె జోక సొస్టుమ్ దెకుమ్దె.

3 అన్నె, మదెనె, జోచి ఉప్పిరి కో ఇసి దయిరిమ్ తత్తచి జోక రకితతి గే, జో కిసి సుద్ది అస్సె గే, జేవ్ కి జోచి రితి సుద్ది కెరంతి రితి దెకన్తె తవుల.

4 పాపుమ్ కెర్తొ ఎత్కి మాన్సు ఆగ్నల్ పిట్టయ్తయ్. ఆగ్నల్ పిట్టయ్తసి ఎత్కి పాపుమ్.

5 పాపల్ గెచ్చువుక మెన యేసుప్రబు బార్ జలో మెనయ్, పడ్డె జోతె కిచ్చొయ్ పాపుమ్ కి నాయ్ మెనయ్, తుమ్ జాన్సు.

6 కిజోచి తెడి తతో కేన్ మాన్సు పాపుమ్ ఇండె నాయ్. కో పాపుమ్ ఇండితయ్ గే, ప్రబుక *దెకిలోసా నెంజె, జోక జాన్లోసా నెంజె.

7 ప్రేమ తిల పుత్తర్లు, తుమ్క కో మోసిమ్తె సేడవుక తుమ్ వాల్ దాన నాయ్. మెలె, కో సత్తిమ్ ఇండితయ్ గే, జో యేసుచి రితి జోచి తెన్ పున్నిమ్చొ జతయ్.

8 కో పాపుమ్తె ఇండితయ్ గే, సయ్తాన్చొ జయెదె. మొదొల్ తెంతొ సయ్తాన్ పాపుమ్ కెర్తొసా. సయ్తాన్చ కమొ గెచ్చువ గెలుకయ్ దేముడుచొ పుత్తుసి ఈంజ లోకుమ్తె బార్ జలొ.

9 దేముడుచి సుద్ది తిలి ఆత్మతె జెర్మన్ జలొ కేన్ మాన్సు పాపుమ్ ఇండె నాయ్. దేముడుచి సుద్ది తిలి ఆత్మ జోచి పెట్టి అస్సె, చి జో జా ఆత్మక జెర్మిలి రిసా జో మాన్సు పాపుమ్ ఇండుక నెత్తె.

10 ఇసికయ్ కో దేముడుచ బోదల్ జవుల గే, కో సయ్తాన్చ బోదల్ జవుల గే, చినుక జయెదె. కో సత్తిమ్ ఇండె నాయ్ గే, పడ్డె †జోచ బావుడ్లు జల అన్నె మాన్సుల్క ప్రేమ దెకె నాయ్ గే, జో దేముడుచి సుద్ది తిలి ఆత్మ జెర్మన్చొ మాన్సు నెంజె.

ఎత్కిలోక ఎత్కిలో ప్రేమ కెరుక

11 తుమ్ మొదొల్ తెంతొ సూన్లి కబుర్ ఈంజ, అమ్ ఎత్కిలోక ఎత్కిలో †ప్రేమయ్ తంక.

12 బావొన్క మార్లొ, ఎత్కిక పాపుమ్ సికడ్డె సయ్తాన్ తెన్ బెదిలో కయ్యానుచి రితి తంక నాయ్. అన్నె, జో కిచ్చొక బావొన్క మార్లొ మెలె, జోచ సొంత కమొ పాపుమ్చ, బావొన్చ కమొ పున్నిమ్చచి రిసా దెకుక నెత్త గోసక మార్లొ.

13 బావుడ్లు, ఈంజ లోకుమ్చ మాన్సుల్ తుమ్చి విరోదుమ్ జలిన్క తుమ్ ఆచారిమ్ జా నాయ్.

14 మొర్నుక ముల జీవ్ జతీన్తె పాచ జా అస్సుమ్ మెన జానుమ్. నంపజల బావుడ్లుక ప్రేమ కెర్తసుమ్చి రిసా జానుమ్. కో ప్రేమ తెన్ తయె నాయ్ గే, మొర్నుతెయి అస్సె మెన జానుమ్.

15 జోచొ కేన్ బావొచి ఉప్పిరి కో విరోదుమ్ తత్తయ్ గే, అత్య కెర్తొసా జతయ్, చి అన్నె కిచ్చొ జానుమ్ మెలె, అత్య కెర్తొ కేన్ మాన్సుచి పెట్టి పరలోకుమ్తె బెదితి కెయఁక తెయఁక చెంగిల్ తతి జీవ్ నాయ్.

16 కిచ్చొతె సత్తిమ్చి ప్రేమ చినుక సికిలమ్ మెలె, 'పాపుమ్ తెంతొ రచ్చించువ జతు' మెనయ్ యేసుప్రబు అమ్చి రిసా జోచి జీవ్ దా మొర్లన్. అన్నె, అమ్చ బావుడ్లుక 'చెంగిల్ జతు' మెనయ్ అమ్ కి అమ్చి జీవ్ దిలె, చెంగిలి.

17 గని కక్క ఈంజయ్ లోకుమ్చి అస్తి తత్తయ్ గే, చి జోచొ కేన్ బావుడ్లిక కొత్కు అస్సి మెన దెకిలె, గని జోక కన్కారుమ్ దెకె నాయ్ గే, దేముడుచి ప్రేమ జో మాన్సుచి పెట్టి అస్సె మెన కిసి సంగుక జయెదె! బెదె నాయ్.

18 ప్రేమ తిల పుత్తర్లు, రిత కొణొకయ్ అమ్ ప్రేమ కెరుక పొన, గని సత్తిమ్చి ప్రేమ అమ్చి పెట్టి తా, అమ్చ

* 3:1 3:1 యోహాను 1:12-13. † 3:1 3:1 యోహాను 1:10-11, 8:54-55, 14:7, 17, 16:2-3, 17:25. ‡ 3:2 3:2 రోమియుల్ 8:19, 29, కొరింధిల్క రెగిడ్డి 2 నంబర్ ఉత్తమ్ 3:18, వీలిప్పియల్ 3:21, కొరింధిల్క రెగిడ్డి 1 నంబర్ ఉత్తమ్ 15:49-50. § 3:6 3:6 2:6, 24, 27, 28 దెక, చి 3:24, 4:13, 16 దెక. * 3:6 3:6 యోహాను రెగిడ్డి 3 నంబర్ ఉత్తమ్ 11 నంబర్ కోడు దెక. † 3:10 3:10 2:9, 10 దెక. ‡ 3:11 3:11 2:7-11 దెక.

కమొతెయి అమ్చి ప్రేమ దెకవుమ, అమ్చ కమొతెయి నెరవెర్చుప జవున్!

19 ఇసి, అమ్చి ప్రేమ అన్నె మాన్సుల్క తోడ్ కెర్త కమొతెయి బార్ కెర్లెకయ్ 'సత్తిమ్ జలమ్' మెన చినుమ్దె, చి కెయెక జవున్ కీ 'సత్తిమ్చ నెంజుమ్ సిచ్చక విలువ జలన ఆము' మెన లాజ్ జా అమ్చి పెట్టి బాద సేడ్లె, 'జో దిలి ప్రేమ అమ్చ కమొతె నెరవెర్చుప కెర్తసుమ్' మెన ఉచార కెరన.

20 ప్రబుచి మొక్కె అన్నె దయిరిమ్ జమ్దె, 'లాజ్ నెంతె జోచి మొక్కె టీవ్క జయెదె' మెన అమ్చి పెట్టి అన్నె దయిరిమ్ జమ్దె. కిచ్చొక మెలె, *అమ్చి పెట్టి తిలిన్చి కంట జో వెల్లో, చి జో ఎత్తి జానె.

21 జలె, ప్రేమ తిల గోతుసుదల్, అమ్చ కమొచి రిసా అమ్చి పెట్టి అమ్ లాజ్ జంక నాయ్ జలె, దేముడుచి మొక్కె అమ్క దయిరిమ్ తయెదె.

22 అన్నె, జోవయించి మొక్కె అమ్ లాజ్ జంక నాయ్ జలె, జోచి ఇస్టుమ్ రితి ఇండితసుమ్చి రిసా జో మెన్చితిసి కెర్తసుమ్చి రిసా, జోతె అమ్ కిచ్చొ సంగిలె, జో అమ్క దొర్కు కెర్తయ్.

23 ఈంజయి జోచి ఆగ్గు. జోచొ పుత్తున్ జలొ యేసుక్రీస్తుచి నావ్చి ఉప్పిరి అమ్క నముకుమ్ తంక, యేసుక †నిజుమి దేముడుచొ పుత్తుసి, నిజుమి జోచొ పుత్తున్ జా జోచి అదికారుమ్ తిలొ తెద్రయిందె మెన జో సంగ తిలొ క్రీస్తు రచ్చించుప కెర్తొసా జొయ్యి మెనయ్ జోచి ఉప్పిరి అమ్ అమ్చి నముకుమ్ తంక, చి జో క్రీస్తు ప్రబు అమ్క ఆడ్ర దిలి రితి, ఎక్కిలోక ఎక్కిలో అమ్ ప్రేమయ్ కెరుక.

24 జోచ ఆగ్గుల్ రితి ఇండితన ఎత్తిజిన్ ‡జోచి తెడి తత్తతి, జోచి జీవ్క జోచి ఆత్మనెక్కిక జితతి, చి జోవయించి పెట్టి జొయ్యి తత్తయ్, జోవయింక జొయ్యి తోడు తత్తయ్, అన్నె, అమ్చి పెట్టి జో తతిసి జో అమ్క తోడ్ తతిసి అమ్ కిసి జానుమ్ మెలె, అమ్చి పెట్టి జో దిలి జోచి ఆత్మ తతికయ్ జానుమ్.

4

ఆత్మల్క కిసి చినుక జయెదె

1 ప్రేమ తిల గోతుసుదల్, ఎత్తి ఆత్మ సంగితిన్క 'దేముడుచి కోడు ఈంజ' మెన నే పరిచ్చ కెర్తె తుమ్ నంప కెర నాయ్. గని నిజుమి దేముడుచ జతతి గే నాయ్ గే, తుమ్క కిచ్చొ కిచ్చొ సికడ్డనచ ఆత్మల్ తుమ్ పరిచ్చ కెర.

§ 3:19 3:19 డీనయ్లిసి 12:9-11 దెకిలె, సయ్తాన్ అమ్క 'ఇసి దస్సి కెర్ల' మెన ఎత్తి అదికారుమ్ తిలొ దేముడుచి మొక్కె అమ్క నేరిమ్లు వయడుక ఉచర్తయ్, గని క్రీస్తు అమ్చి పాపుమ్ వయ గెచ్చయ్లి రిసా ఎత్తి అదికారుమ్ తిలొ దేముడు అమ్క జా నేరిమ్ వయడె నాయ్, చి సయ్తాన్ ఓడుప జతయ్.

* 3:20 3:20 కిచ్చొ జవున్ అమ్ కెర్లె కామ్క 'తప్పు కెర్లమ్' నెంజిలె, 'ఏక్ వేల తప్పు కెర్లమ్. లాజు' మెన అమ్చి పెట్టి బాద సేడ్లె, జా కామ్క 'తప్పు గే నెంజి గే' జొయ్యి జానె, చి కిచ్చొక దస్సి కెర్లమ్ గే జొయ్యి జానె, చి తప్పు కెర్లె కి జో చెమించుప కెరుక జోవయింక సెక్తి అన్నె. చి అమ్చి ఉప్పిర్చి అమ్చి అన్యాయమ్ జో గెచ్చవుక తెర. † 3:23 3:23 2:23, 4:15, 5:1, 5, 13 చి 5:20 దెక. ‡ 3:24 3:24 2:6, 24, 27, 28, 4:13, 16, చి యోహాను 15:3-10 దెక.

కిచ్చొక మెలె, 'దేముడుచ కబుర్లు అమ్మి సంగితసుమ్' మెన అబద్దుమ్క ఒగ్గర్జిన్ ఈంజ లోకుమ్తె బార్ జా అస్సి.

2 దేముడుచి సుద్ది తిలి ఆత్మ తెంతొ తిలిసి కిసి చినుక జయెదె మెలె, యేసుక 'జో నిజుమి క్రీస్తు జలొ దొర్కు జలొ రచ్చించుప కెర్తొసా, నిజుమి దేముడుచొ పుత్తున్ జా, జో మాన్సు జా జెర్మన్ జా బార్ జలన్' మెన కేన్ ఆత్మ ఒప్పునుల గే, జో ఆత్మ దేముడు తెంతొచ మెనయ్ చినుక జయెదె,

3 అన్నె, యేసుక 'జొయ్యి' మెన కేన్ ఆత్మల్ ఒప్పున్తి నాయ్ గే, జేవ్ దేముడు తెంతొచ ఆత్మల్ నెంజితి. 'బార్ జయెదె' మెన తుమ్ సూన్చి ఆత్మ, మెలె, క్రీస్తుచి ఉప్పిరి విరోదుమ్ జలొసాచి ఆత్మ, అప్పెయి కి ఈంజ లోకుమ్తె బార్ జయె అస్సె.

4 ప్రేమ తిల పుత్తర్లు, తుమ్ దేముడుచ మాన్సుల్ జా అస్సున్, జోచి ఆత్మతె జెర్మన్ జా అస్సున్, చి జేవ్ అబద్దుమ్చచి ఉప్పిరి తుమ్ జీన అస్సున్. కిసి మెలె, ఈంజ లోకుమ్తె తతొసాచి కంట తుమ్చి పెట్టి తతొసా వెల్లో.

5 జేవ్ అబద్దుమ్చ ఆత్మల్చ మాన్సుల్ ఈంజయి లోకుమ్చ జవులచి రిసా, జేవ్ సంగితిసి ఈంజయ్ లోకుమ్చి బుద్దిచి, చి జోచి కోడు ఈంజయి లోకుమ్చ మాన్సుల్ సూన్తతి.

6 ఆమ్, మాత్తుమ్, దేముడుచ మాన్సుల్ జా అస్సుమ్, జోచి ఆత్మ తెన్ జెర్మన్ జా అస్సుమ్, చి జో దేముడుక కో జాన్తి గే, అమ్చి కోడు సూన్తతి, చి కో దేముడుచ మాన్సుల్ జతి నాయ్ గే, అమ్చి కోడు జేవ్ సూన్తి నాయ్. ఇసి, జలె కేన్ ఆత్మ సత్తిమ్చి గే కేన్ ఆత్మ తప్పుచి గే చినుక జయెదె.

దేముడు ప్రేమయ్

7 ప్రేమ తిల గోతుసుదల్, ఎక్కిలోక ఎక్కిలో ప్రేమ కెరుమ! ప్రేమ దేముడు తెంతొ చి, చి కో ప్రేమ ఇండితయ్ గే, జో దేముడుచి సుద్ది తిలి ఆత్మ తెన్ జెర్మన్ జా అస్సె, చి దేముడుక జో జానె.

8 గని కో ప్రేమ ఇండితి నాయ్ గే, దేముడుక నేన్తి. కిచ్చొక మెలె, దేముడు ప్రేమయి జా అస్సె.

9 కిచ్చొతె దేముడుచి ప్రేమ డీన అమ్క రుజ్జు జలి మెలె, జో దేముడు జోచొ సొంత పుత్తున్క ఈంజ లోకుమ్తె తెద్రయ్లన్. జో బలి జలిన్క అమ్చి పాపుమ్ గెచ్చవ పరలోకుమ్తె బెదితి జీవ్ అమ్క దెతి రిసా.

10 ప్రేమ ముక్తికీ కిచ్చితే డీస్తయ్ మెలె, అమ్ దేముడుక కిచ్చొ ప్రేమ కెర్తెనెతె నాయ్, మాన్సుల్చి అమ్చి ప్రేమ కిచ్చొ నెంజె, గని జోయ్యి అమ్క ప్రేమ కెర, అమ్ కెర్ల పాపల్ పుంచితె అర్చితుమ్ జో జతి రిసా, జోచొ పుత్తున్క ఈంజ లోకుమ్తె తెద్రయ్లో.

11 జలె, ప్రేమ తిల గోతుసుదల్, ఎత్తి అదికారుమ్ తిలొ దేముడు అమ్క తెద్ది ప్రేమ కెర్లొ జలె, అమ్ కి ఎక్కిలోక ఎక్కిలో తెద్ది ప్రేమ కెరుక.

12 కేన్ మాన్సు కెయ్ దేముడుక దెకుక నాయ్. గని అమ్ ఎక్కిలోక ఎక్కిలో ప్రేమ కెర్లనుమ్ మెలె, దేముడు అమ్చి పెట్టి తత్తయ్, చి అమ్చితె జోచి ప్రేమ పూర్తి జా నెరవెర్పుప జతయ్, రుజ్జు జతయ్. జోచి ప్రేమక జయ్యి రుజ్జు మాన్సుల్ దెకుక జతయ్.

13* ప్రబుచి తెడి తత్తనుమ్, జోచి జీవ్క జితనుమ్, చి జో అమ్చి పెట్టి తత్తయ్ మెన కిసి జానుమ్ మెలె, జోచి సొంత ఆత్మ అమ్చి పెట్టి జో దిలిన్చి రిసా.

14 ఈంజ లోకుమ్చ మాన్సుల్క దొర్కు జలొ రచ్చించుప కెర్లొసా జో జంక మెన, జోచొ పుత్తున్క ఎత్కిక అబ్బొ జలొ దేముడు తెద్రవ అస్సె మెన అమ్ దెక కెర సాచి సంగితనుమ్.

15 యేసుక †దేముడుచొ పుత్తుసి మెన కో ‡బప్పసుల గే, జోవయించి పెట్టి దేముడు తత్తయ్, చి జేవ్ దేముడుచి తెడి అస్సి, జోచి జీవ్క జితతి.

16 దస్సి, దేముడు అమ్చి ఉప్పిరి ప్రేమ తిలిసి, అమ్చి ఉప్పిర్చి జోచి ప్రేమ, జానుమ్ నంపజా అస్సుమ్. దేముడు ప్రేమయి, చి కో ప్రేమయ్చి తెడి తత్తయ్ ప్రేమ ఇండితయ్ గే, దేముడుచి తెడి తత్తయ్, జోచి జీవ్కయ్ జితయ్, చి దేముడు జో మాన్సుచి పెట్టి తత్తయ్.

17 కిచ్చొక దేముడుచి ప్రేమ అమ్చి తెన్ కిపూర్తి జా నెరవెర్పుప జంక జోచి సెలవ్ మెలె, అమ్క ఎత్కిజిన్క పరిచ్చ కెర్లె వెల్లి దీసికయ్ 'సత్తిమ్ కెర్లమ్' మెన దయిరిమ్ తత్తు మెనయ్ జో జా సెలవ్ దెతయ్. జా దయిరిమ్ అమ్ కిచ్చొక జంక జయెదె మెలె, జో కిన్ జా అస్సె గే, అమ్ ఈంజయ్ లోకుమ్తె దసయ్ అసుమ్. జోయ్యి కిసి ప్రేమ అస్సె గే, అమ్ కి జోచి ప్రేమక మాన్సుల్క ప్రేమయ్ కెర్లనుమ్.

18 ప్రేమచి తెడి అమ్ తిలె, ప్రేమ అమ్ ఇండిలె, అమ్చి పెట్టి కిచ్చొ బయిమ్ తయె నాయ్. గని ప్రేమ పూర్తి తిలె, జా ప్రేమ బయిమ్ గెచ్చవ గెల్తయ్. బయిమ్ సిచ్చ జతిన్ తెన్ బెదితిసి, 'సిచ్చ జుమ్దె' మెన అమ్ ఉచర్లె బిందె, చి కో బితయ్ గే, జోచి పెట్టి ప్రేమ పూర్తి జంక నెరవెర్పుప జంక

నేతయ్ మెన రుజ్జు జతయ్.

19 దేముడు తొలితో అమ్కయ్ ప్రేమ కెర్లొచి రిసాయి ఆమ్ జోక ప్రేమ కెర్లనుమ్.

20 జలె, దేముడుక ఆమ్ ప్రేమ కెర్లన్ మెన కో సంగితయ్ గే, జో జోచి బావుడ్డిక ప్రేమ కెరె నాయ్ గే, జో అబద్దుమ్చొ. కిచ్చొక మెలె, కేన్ జవున్ దెకిలొ బావొక కో ప్రేమ కెర్లయ్ నాయ్ గే, జో నే దెకిలొ దేముడుక కిసి ప్రేమ కెరెదె! నెత్త!

21 అస్సె, జో కిచ్చొ ఆగ్గు అమ్క దా అస్సె మెలె, కో దేముడుక ప్రేమ అస్సి గే, జోచ బావుడ్డివొక ప్రేమ కెరుకయ్.

5

క్రీస్తుచి ఉప్పిర్చి నముకుమ్చి ప్రేమ

1 యేసుక *తెద్రయిందె మెన దేముడు పూర్గుమ్ సంగిలొ దొర్కు జలొ రచ్చించుప కెర్లొసా జలొ క్రీస్తు జోయ్యి మెన నంప కెర్లొ ఎత్కి మాన్సు దేముడుచొ బోద జయెదె, అస్సె, కో అబ్బొన్క ప్రేమ కెర్లయ్ గే, జో అబ్బొన్చ అస్సె బోదల్క కి ప్రేమయ్ కెర్లయ్.

2 దేముడుచ బోదల్క అమ్ ప్రేమ కెర్లసి కిచ్చొ రుజ్జుతె డీస్తయ్ మెలె, దేముడుకయ్ అమ్ ప్రేమ తా, అమ్ జోచి ఆగ్గుల్ రితి †ఇండితిన్తె,

3 దేముడుచి ప్రేమ అమ్చి పెట్టి తిలె, జోచ ఆగ్గుల్ రితి ఇండుమ్దె. అస్సె, జోచ ఆగ్గుల్ జాడు వయడ్డన నెంజితి.

4 కిచ్చొక మెలె, దేముడుచి సుద్ది తిలి ఆత్మతె జెర్నున్ కో జా తవుల గే, ఈంజ లోకుమ్చ ‡బుద్దివొచి ఉప్పిరి జీన్తతి. ఈంజయ్ లోకుమ్చ బుద్దివొచి ఉప్పిరి జీన్తతిని కిచ్చొ మెలె, యేసుచి ఉప్పిర్చి అమ్చి నముకుమ్.

5 మెలె, కో ఈంజ లోకుమ్చ బుద్దివొచి ఉప్పిరి జీన్తతి మెలె, యేసుకయ్ 'జోయ్యి దేముడుచొ పుత్తుసి' మెన కో నంపజా అస్సి గే, జెచ్చి.

6 పాని వాట్ లోయి వాట్ గెచ్చ అస్సె బార్ జా జో దేముడుచొ పుత్తున్ జలిన్ రుజ్జు జలొసా, జో రచ్చించుప కెర్లొసా జలొ, యేసుక్రీస్తు. జో ఎక్కి పాని వాట్ గెచ్చ బార్ జయె నాయ్ గని పాని తెన్ లొయిఁ తెన్ బార్ జా అస్సె. అస్సె ఈంజ చి రిసా దేముడుచి సుద్ది తిలి ఆత్మ సాచి సంగితయ్, కిచ్చొక మెలె దేముడుచి సుద్ది తిలి ఆత్మ సత్తిమ్ జా అస్సె.

7 అస్సె, యేసుక 'దేముడుచొ పుత్తుసి జోయ్యి', 'దేముడు తెద్రయ్లో రచ్చించుప కెర్లొసా జలొ క్రీస్తు జోయ్యి' మెన పానితెచి సాచిచి జోవయించి సూయి జలి లోయిచి సాచి తెన్ బెదితి సాచి సంగితొసా కొన్సొ మెలె, దేముడుచి

* 4:13 4:13 2:6, 24, 27, 28 చి 3:6, 24 చి 4:16 దెక, చి యోహాను 15:3-10 దెక. † 4:15 4:15 2:23, 3:23, 5:1, 5, 13 చి 5:20 దెక. ‡ 4:15

4:15 మత్తయి 10:32-33 చి రోమియల్ 10:9-10 దెక. § 4:17 4:17 12 నంబర్ కోడు దెక. * 5:1 5:1 2:23, 3:23, 4:15, 5:5, 13, 20 దెక.

† 5:2 5:2 మెలె, అమ్ కిన్ కిన్ మాన్సుల్క ప్రేమ దెకవుక గే జోవయించ ఆగ్గుల్తె, యేసుక్రీస్తుచ కొడతె, మోసి తెన్ దేముడు దిలి ఆగ్గుల్ ఎత్కితె జో దెకవ అస్సె.

‡ 5:4 5:4 కిన్ బుద్దివొ మెలె, గోనల్, ఆనల్, చోర్బుద్ది, కోపుమ్బుద్ది, దసచ ఎత్కి.

సుద్ది తిలి ఆత్మయి. జోవయించి ఆత్మచి సాచి ముక్కిమ్. కిచ్చొక మెలె, జోవయించి ఆత్మ సత్తిమచి.

8 జోక, కిచ్చొక జల తిన్ని సాచుల్ అస్తి, చి జోవయించి సాచి బెదితయ్, కిచ్చొ కిచ్చొ సాచుల్ మెలె, జా పాని, జా లోయి, చి దేముడుచి సుద్ది తిలి ఆత్మ.

9 అమ్ మాన్సుల్చి సాచి నంప కెర్తసుమ్ జలె, దేముడుచి సాచి అన్నెయ్ నంపజతిసి. అన్నె, దేముడుచి సాచి కిచ్చొ మెలె, యేసుక 'ఈంజొయి అంచొ పుత్తు' మెన జొయ్యి సాచి సంగ అస్సె.

10 పడ్డె, దేముడుచొ పుత్తున్కయ్ 'నిజుమి జోచొ పుత్తుసి' మెన కో నంపజవుల గే, జోవయించి పెట్టి దేముడుచి సాచి అస్సె. 'ఈంజొ అంచొ పుత్తు' మెన దేముడు సాచి సంగిలిన్చ ఉప్పిరి కో నముకుమ్ తితి నాయ్ గే, జోచి కోడు నంపజతి నాయ్ చి రిసా, జోక 'అబద్దుమ్చొ' మెన సంగిల్ రితి జతయ్.

11 జలె, సత్తిమచి సాచి కిచ్చొ మెలె, పరలోకుమ్చి రాజుమ్తె జితి వాట, జాక దొర్కు జలి జీవు, దేముడు అమ్క దా అస్సె, చి ఈంజ జీవ్ కచి తెడి అస్సె. కత్తెయ్ దొర్కు జతయ్ మెలె, జోచొ పుత్తున్చి తెడి అస్సె, జో తెయి దొర్కు జతయ్.

12 కచి పెట్టి దేముడుచొ పుత్తున్ అస్సె గే, జోకయ్ జా జీవు. దేముడుచొ పుత్తుసి కచి పెట్టి తయె నాయ్ గే, పరలోకుమ్తె గెతి వాట, జాక దొర్కు జలి జీవు, జోకయ్ దొర్కు జయె నాయ్.

13 దేముడుచొ పుత్తున్చి నావ్క 'జయ్యి. జొయ్యి క్రిస్తు రచ్చించుప కెర్లొసా' మెన తుమ్ జోక నంపజలసక 'పరలోకుమ్తె గెతి కెయ్క తెయ్క తా గెతి వాటచి జాక దొర్కు జలి జీవు దొర్కు జలిన్చి రిసా తుమ్క దయిరిమ్ తవున్' మెనయ్ ఈంజ ఆవ్ రెగిడ్డసి.

14 అన్నె, జోచి తెడి అమ్క అన్నెయ్ కిచ్చొ దయిరిమ్ మెలె, జోచి ఇస్తుమ్ తెన్ బెదితిసి కిచ్చొ జవున్ జోతె అమ్ నజిలె, జో సూన్తయ్.

15 అన్నె, 'అమ్ కిచ్చొ నజిలె జో సూన్తయ్' మెన జానుమ్ జలె, జోతె అమ్ సంగిలిన్క 'దొర్కు జలి' మెన ఒప్పిన్ల రితి, 'కచితుమ్ దొర్కు జయెదె' మెన జానుమ్.

16 నంపజలొ కేన్ జవున్ బావొ మొర్నొ ఆన్తి పాపుమ్ కెర్లెగిన, అన్నెక్లొ బావొన్ దెకిలె, జా పాపుమ్ జోక మొర్నొ సిచ్చు నే ఆన్తి రిత, "జోక చెమించుప కెరు మెన" జో అన్నెక్లొ దేముడుక ప్రార్దన కెర్లె, చి కచి పాపుమ్ మొర్నొ సిచ్చు ఆన్తిన్ నెంజె జలె, జో అన్నెక్లొ ప్రార్దన కెర్లి రిసా, జో పాపుమ్ కెర్లొసాక దేముడు జీవ్ దెయెదె. గని మొర్నొ సిచ్చు ఆన్తి పాపుమ్ కి తయెదె. కో దస్సి పాపుమ్ కెర్లె, జోచి రిసా ప్రార్దన కెర మెని నాయ్.

17 గార్చి కిచ్చొ జలెకి పాపుమీ, గని సగుమ్ రగల్ పాపుమ్ మొర్నొ సిచ్చు ఆన్తన నెంజితి.

18 'కో దేముడుచి తెన్ జెర్మున్ జా అస్తి గే, పాపుమ్తె ఇండితి నాయ్' మెన జానుమ్. దేముడుచి పెట్టిచొ క్రిస్తు దస మాన్సుల్క రకితయ్చి రిసా, పాపుమ్ సికడ్డొ సయ్తాన్ జెచ్చొ మాన్సుల్క చడె నాయ్.

19 అమ్మి జలె, 'దేముడుచ బోదల్ జా అస్సుమ్' మెన జానుమ్, అన్నె, అప్పెక ఒండి లోకుమ్ జో పాపుమ్ కెరయ్తో సయ్తాన్చి అత్తి అస్సె మెన కి జానుమ్.

20 అన్నెయ్ కిచ్చొ జానుమ్ మెలె, నిజుమ్చొ దేముడుక అమ్ జాన్తి రితి జో దేముడుచొ సొంత పుత్తుసి బార్ జా కెర, జోక చినితి జోక జాన్తి సెక్తి అమ్క దా అస్సె మెన జానుమ్. అన్నె, సత్తిమ్ తిలొ దేముడుచి తెడి, జోచొ పుత్తున్ యేసుక్రిస్తుచి తెడి అస్సుమ్. ఈంజొయి నిజుమ్ తిలొ ఎక్కిలొ దేముడు. పరలోకుమ్తె బెదితి కెయ్క తెయ్క చెంగిల్ తతి వాట యేసుక్రిస్తుతెయ్ దొర్కు జతయ్, జోక దొర్కు జలి జీవ్ జొయ్యి.

21 ప్రేమ తిల పుత్తర్లు, బొమ్మల్క జొకర్తిన్క తుమ్ దూరి తా.

యోహాను రెగిడ్లి దొన్నిచి ఉత్త్రమ్ బారిక్ జలో యోహాను రెగిడ్లి దొన్నిచి ఉత్త్రమ్

1 దేముడు నిసాన్ని *అమ్మక చి ఆవ్ చి సత్తిమ్ జాన్తన ఎత్తిజిన్ నిజుమి ప్రేమ కెర్త తుచ బోదల్క ఆవ్ వెల్లో జలోసా రెగిడ్లి ఉత్త్రమ్.

2 కిచ్చొక ఇసి ప్రేమ తెన్ అస్సుమ్ మెలె, దొర్కు జలి †సత్తిమ్ అమ్చి పెట్టి అస్సె, చి కెయెడ తెయెడ అమ్చి తెన్ తాఁ గెచ్చెదె.

3 ఎత్తిక అబ్బొ జలో దేముడు తెంతో చి జో అబ్బొన్చొ పుత్తున్ జలో యేసుక్రీస్తు తెంతో జోచి దయ జోచి కన్యార్దుమ్ జోచి సేంతుమ్ అమ్చి తుమ్చి తెన్ తయెదె, చి జోచి సత్తిమ్ జోచి ప్రేమ తెన్ తమ్దె.

4 ఎత్తిక అబ్బొ జలో దేముడు దిలి ఆగ్గు రితి తుచ బోదల్ జల నంపజలనతె సగుమ్జిన్ సుబుమ్ కబుర్తె తిలిన్చి సత్తిమ్ ఎత్తి నిదానుమ్ నంప తా, జా సుబుమ్ కబుర్తె తిలిన్ తెన్ బెదితి సత్తిమ్ ఇండితతి మెన నూన ఒగ్గర్ సర్ద జలయ్.

5 అన్నె, అప్పె, అమ్మ, తుమ్క ఏక్ కోడు బతిమాల్పా జా రెగిడ్లిసి. తుమ్క నొవి ఆగ్గు రెగిడ్లిసి నెంజె, గని మొదొల్ తెంతో చి ఆగ్గు ఈంజ. కిచ్చొ మెలె, అమ్ ఎక్కిలోక ఎక్కిలో †ప్రేమయ్ కెరుక.

6 అన్నె, ప్రేమ కిచ్చొ జతయ్ మెలె, ఎత్తిక అబ్బొ జలో దేముడుచ ఆగ్గుల్ రితి అమ్ ఇండుక. మొదొల్ తెంతో తుమ్ నూన్సి ఆగ్గు కిచ్చొ మెలె, తుమ్ ప్రేమయ్ ఇండుక.

మోసిమ్ బోదచి రిసా జాగర్ద

7 అన్నె, ఒగ్గర్జిన్ మోసిమ్ సంగితన ఈంజ లోకుమ్తె బార్ జా బుల్తతి, యేసుక క్ దేముడుచొ పుత్తుసి జో, జో దొర్కు జలో రచ్చొంచుప కెర్తొసా జలో క్రీస్తు జా, మాన్సు జా జెర్మున్ జా అస్సె' మెన ఒప్పనుక నెసితన. దన మాన్సుల్ మోసిమ్చ, క్రీస్తుచి ఉప్పిరి విరోదుమ్ జలన.

* **1:11:1** 'అమ్మ' ఇస్సె సంగిలె, కేన్ జివున్ సంగుమ్క టాలి జతయ్ మెన, చి 'తుచ బోదల్' మెన సంగిలె, జా సంగుమ్తెచ మాన్సుల్కయ్ టాలి జతయ్ మెన సంగుమ్జిన్ ఉచర్తతి. † **1:2:1:2** యోహాను 14:6, 16-17 దెకిలె, యేసుయి దొర్కు జలి సత్తిమి, చి జోవయింబి పరలోకుమ్చి సుద్ది సత్తిమ్ తిలి ఆత్మ అమ్చి పెట్టి జో దా అస్సె. యోహాను 8:32, 36 కి దెక. వడ్డె, యేసు సంగిలిసి, దేముడు అబ్బొసి సంగిలిసి, జోవయింబి సుబుమ్ కబుర్ సత్తిమి; యోహాను 8:45-47, చి యోహాను రెగిడ్లి ఈంజ 2 నంబర్ ఉత్త్రమ్ 9-10, గలతీయల్ 2:5. కొలోస్సియల్ 1:5 కి దెక. ‡ **1:5:1:5** యోహాను రెగిడ్లి 1 నంబర్ ఉత్త్రమ్ 2:8 దెక, చి యోహాను 13:34, చి మత్తయి 22:37-40. § **1:7:1:7** యోహాను రెగిడ్లి 1 నంబర్ ఉత్త్రమ్ 2:23, 3:23, 4:15, 5:1, 5, 13, 20 దెక. * **1:9:1:9** యోహాను రెగిడ్లి 1 నంబర్ ఉత్త్రమ్ 2:23, 5:12 దెక. † **1:13:1:13** 1 నంబర్ కోడుతె తిలి రితి, 'బేన్ది' మెలిసి ఏక్ వేల అన్నెక్ సంగుమ్క టాలి జతయ్. చి 'బేన్దిచ బోదల్' మెన సంగిలె, జా అన్నెక్ సంగుమ్తెచ మాన్సుల్కయ్ టాలి సంగితయ్. ‡ **1:13:1:13** 1 నంబర్ కోడుతె తిలి రితి, 'బేన్ది' మెలిసి ఏక్ వేల అన్నెక్ సంగుమ్క టాలి జతయ్. చి 'బేన్దిచ బోదల్' మెన సంగిలె, జా అన్నెక్ సంగుమ్తెచ మాన్సుల్కయ్ టాలి సంగితయ్.

8 జలె, తుమ్ సైమ సేడ దొర్కు కెరన్లి బవుమానుమ్ నే పిట్టవన్తి రితి, గని తుమ్చి బవుమానుమ్ పూర్తి దొర్కు కెరంతి రితి జిన్తి రితి, తుమ్ దెకన.

9 కోపురె గెతి రితి వెల్లో మెనన క్రీస్తుచి బోదనక నిదానుమ్ తయె నాయ్ గే, జో మాన్సు *దేముడుచొ నెంజె. దేముడు అబ్బొన్ కి జోచి పెట్టి నాయ్. గని, క్రీస్తుచి బోదనకయ్ కో నిదానుమ్ అస్తి గే, అబ్బొన్ జలో దేముడుచ కి పుత్తున్ జలో యేసుచ కి జా అస్తి. అబ్బొన్ కి పుత్తున్ కి జోచి పెట్టి అస్సె.

10 ఈంజయ్ బోదన నే ఆన్తె కో తుమ్తె అయ్లె, గెరి టాన్ దాన నాయ్, జోక జోకర నాయ్.

11 కిచ్చొక మెలె, కో జోక జోకర్తయ్ బెదవంతయ్ గే, జో మాన్సుచి తప్పు కామ్తె బెదిల్ రితి జతయ్.

12 తుమ్క అన్నె ఒగ్గర్ రెగుడుక జతి, గని కాగ్గుమ్క సిర్క రెగుడుక నెసి. తుమ్క అమ్క పూర్తి సర్దనంతోనుమ్ కెర్తి రితి తుమ్తె సొంత జా దెకయి లట్టబుక ఇస్టుమ్ జతసి.

13 దేముడు నిసాన్ని తుచి ఇన్నెచి †బయ్దిచ ‡బోదల్ రిత జలన తుమ్క జోచి జోబర సంగితతి.

యోహాను రెగిడ్లి తిన్నిచి ఉత్త్రమ్ బారిక్ జలో యోహాను రెగిడ్లి తిన్నిచి ఉత్త్రమ్

1 సత్తిమ్క ఆవ్ ప్రేమ తిలో గాయుక ఆవ్ వెల్లో జలోసా రెగిడ్లి ఉత్త్రమ్.

2 ప్రేమ తిలో మింత, తుక చెంగిల్ తవున్, మెన ఆవ్ ప్రార్దన కెర్తసి. తుచి ఆత్తుతె చెంగిల్ అస్సిన్ మెన జాని.

3 కీసి మెలె, బావుడ్లు జల సగుమ్జిన్ అయ్లి పొది, తుయి సత్తిమ్ ఇండితిన్చి రిసా సాచి సంగిల, చి ఒగ్గర్ సర్దసంతోసుమ్ జలయ్.

4 ఎత్తిచి కంట అంక కిచ్చొ కోడు ఒగ్గర్ సర్ద కెర్తయ్ మెలె, అంచ బోదల్ సత్తిమ్ ఇండితిసి ఆవ్ నూనై, జయ్యి అంక ఒగ్గర్ సర్దసంతోసుమ్ కెర్తయ్. జాచి కంట అంక జిన్లి సర్ద నాయ్.

5 ప్రేమ తిలో మింత, బావుడ్లుక తుయి కిచ్చొ తోడు కెర్తె, నిదానుమ్చి కామ్, జా, ముక్కిమ్క వేర తెంతో అయ్లసక, జలె,

6 ఇన్నెచి సంగుమ్చి మొక్కై తుచి ప్రేమచి రిసా, ఇన్నె అయ్ల బావుడ్లు సంగ అస్తి. దేముడుచి సేవక బెదితి ప్రేమ తెన్ దస మాన్సుల్క మరియాద దెక జేవ్ గెతి వాట్క సరి జతి తోడ్ దాయి అన్నె తెద్దయ్లె, చెంగిలి. దస్సి కెర్తె తా.

7 కిచ్చొక మెలె, 'ప్రబుచి సేవకయ్' మెన జేవ్ బార్ జా అస్తి, చి ఎత్తి అదికారుమ్ దేముడుక నంప నే జలసతె కిచ్చొయ్ తోడు నజితి నాయ్.

8 జాకయ్, అమ్ నంపజలసక కి దస మాన్సుల్క తోడు దెంక చెంగిలి. దస్సి కెర్తె, సత్తిమ్చి రిసాచి జోవయించి సేవతె ఆమ్ కి జోవయింతెన్ బెద తమ్దె.

9 తుమ్తెచి సంగుమ్క కిచ్చొగె రెగ్లి అస్సి గని దియొత్తెపె సొంత గవురుమ్ ఉచరన వెల్లో మెనన, అంచి అదికారుమ్క 'అస్సె' మెన ఒప్పనె నాయ్.

10 జాకయ్, ఆవ్ తుమ్తె అయ్లె, జో అంచి రిసా గర్బ కొణ్ణె, ఆరిచ నిందల్చ కొణ్ణె సంగితె తతిన్చి రిసాచి తీర్పు సంగుమ్దె. జా తప్పుచి కంట అన్నె కిచ్చొ తప్పు జో కెర్తయ్ మెలె, సత్తిమ్చ వేర తెంతెచ బావుడ్లుక మరియాద దెకె నాయ్, చి 'మరియాద దెకుమ్దె' మెన ఇస్టుమ్ జత అన్నె మాన్సుల్క పిట్టవ, సంగుమ్ తెంతో ములయ్తయ్.

11 ప్రేమ తిలో మింత, గర్చిక దెక తుయి సిక్కు నాయ్, గని చెంగిల్చిక దెక దస్సి ఇండు. కో సత్తిమ్ ఇండితయ్ గే, దేముడుచొ మాన్సు జతయ్. కో గర్చి బుద్ది ఇండితయ్ గే, దేముడుక *నే దెకిలోసా మెలి రితి జతయ్.

12 దేమేత్తి చి రిసా ఎత్తిజిన్ 'చెంగిలోసా' మెన సాచి సంగితతి, జోచి సత్తిమ్ కి జోచి రిసా సాచి జతయ్. ఆవ్ కి జోచి రిసా 'చెంగిలోచొ' మెన సాచి సంగితసి, అన్నె, అంచి సాచిక 'సత్తిమ్చి' మెన తుయి జాన్సి.

13 తుక అన్నె ఒగ్గర్ రెగుడుక జతి, గని పుస్తకుమ్చి సిర్ర తెన్ రెగుడుక నెసి.

14 బే బేగి తుమ్తె జెంక ఉచర్తసి, చి అయ్లె, ఆవ్ తుయి ఎక్కిలోక ఎక్కిలో దెక సొంత లట్టుబుమ్దె.

15 తుక సేంతుమ్ తవున్. తుచ అమ్చ గోతునుదల్ తుక జోవయించి జోబర సంగితతి. ఒత్తచ గోతునుదల్ ఎత్తిజిన్క అంచి జోబర సంగు.

* 1:11 1:11 యోహాను రెగిడ్లి 1 నంబర్ ఉత్త్రమ్ 3:6 దెక.

యూదా రెగిడ్లి ఉత్త్రమ్ బారిక్ జలో యూదా రెగిడ్లి ఉత్త్రమ్

1 దేముడు అబ్బొన్చి తెడి ప్రేమ తిల, *యేసుక్రీస్తుచి రచ్చనచి తెడి తిల, జేవ్ నిసాన బుకార్లనక యేసుక్రీస్తుక †సేవ కెర్లొసా జలో, యాకోబుచో బావోన్ జలో, యూదా రెగిడ్లి ఉత్త్రమ్.

2 ప్రబుచి కన్యారుమ్, సేంతుమ్చి ప్రేమ అన్నె తుమ్క ఒగ్గర్ కలుగు జవున్!

దేముడుక విరోదుమ్ జలిన్చి రిసా జాగర్త తత్తి కోడు

3 ప్రేమ తిల బావుడ్లు, అంచి తుమ్చి రచ్చనచి రిసా తుమ్క ఉత్త్రమ్ రెగుడుక ఒగ్గర్ ఇస్తుమ్ జలయ్. గని, కిచ్చొచి రిసా ముక్కిమ్క అప్పెయి రెగుడుక మెన అంక జానయ్ జలి మెలె, అము తూమ్ ప్రబుచి సుద్ది జా జోచయ్ జల మాన్సుల్క ముక్కిమ్క దిలి సుబుమ్ కబుర్ మొత్తుమ్చి నముకుమ్ పాడ్ నే జతి రితి తుమ్ దెక, వేర మాన్సుల్ వేర సికడ్లె ప్రబు అమ్క దిలి జా బోదచి రిసా చెంగిల జబాబుల్ తుమ్ దాస.

4 కిచ్చొక మెలె, “ఈంజ బోదనక జేవ్ నిదాసుమ్ నెంజలి రిసా సిచ్చ జతు” మెన దేముడు ఒగ్గర్ అగ్గె తెంతో రెగిడ్లన సగుమ్జిన్ తుమ్చి సంగుమ్తె ఉప్రమెన్నుక లుంకచోరు †బెద అస్తి. దేముడుక నేన్ల జోవయింబి ఉప్పిరి విరోదుమ్ జల జేవ్ మాన్సుల్ కిచ్చొ కెర్తతి మెలె, కీదేముడు అమ్క అగ్గుల్ రితి తెంతో విడ్డల్ కెర అస్సి, చి అమ్ కిసి ఇండిలెకి బాద నాయ్. అమ్ కిచ్చొ కెర్లె కి, జోచి దయక అమ్క రచ్చించుప కెరెదె మెన సంగ, దేముడుచి కోడు మార్పుప కెర్తతి, చి జోవయింబి అగ్గెచ ఆసల్ ముద్దో నే కెరంతె “దస్సి ముద్దో కెరనుక నాయ్” మెన అన్నె మాన్సుల్క కి సికడ్లతి, చి అమ్చో ఎత్తి ఎజొమాని, ఎక్కి ప్రబు జలో యేసుక్రీస్తుక *దేముడు నెంజె మెన సంగిల్ రితి జా, జోచి మరియాద కడ్లి రితి ఇండితత్తి.

5 జలె, తుమ్క “కెయెక పచ్చుత్ నాయ్” మెన తుమ్క అమ్ అగ్గె పూర్తి సూనయ్లమ్. తెదొడి సూన్తదు జలె,

జతి. గని తుమ్క అన్నె ఉచార కెరయిందె. ఐగుప్తు దేసిమ్ తెంతో అమ్చ ప్రెజల్ జల ఇస్రాయేలుల్క రచ్చించుప కెర్లొ దేముడు పడ్డో జేవ్ ప్రెజల్తెచ జోవయింక నంపనెంజిలసక †మొర్తి సిచ్చ దిలన్.

6 అన్నె, జోవయింక దిలి కామ్, జోవయింక దిలి టాన్ ములిల †దేముడుచి దూతల్క దేముడు కిచ్చొ సిచ్చ దా అస్సి మెలె, ఎత్తిక తీర్పు కెర్తి ఆకర్ దీన్క, ముక్కిమ్ జలి దీసిక జేవ్ సిచ్చ జతె ఎదక, ఎట్టొచి కంట ఎట్టొ తిలిన్చి అందర్తె జేవ్ రకితి రితి, కో కెయెక యిప్పుక నెతిర గొల్పుల్ తెన్ జో బంద దా అస్సి.

7 దస్సియి కి, అమ్క అన్నెక్ కామ్ జాగర్త దెకయ్తయ్. కేన్ మెలె, కీసాదొమ చి గొమొరా పట్టల్ చి జోవయింబి సుట్టునంతచ పట్టల్చ మాన్సుల్ కి దేముడు సెలవ్ నే దిలి రితి వేరయ్ ఆసల్ జా, మున్నుబోదల్ తెన్ మున్నుబోదల్ సాని జతె తిల. అమ్క జాగర్త దెకయ్తి రిసా జోవయింబి సిచ్చ కిచ్చొ మెలె, అగితె సిచ్చ జల, చి కెయెక నే విజితి అగితె జేవ్ సిచ్చ జవుల.

8 దస్సి, *తుమ్చి సంగుమ్తె బెదిల ఉప్రమెన్నుచి ఈంజేవ్ మాన్సుల్ కి, వెర్రి సివ్వుల్ దెకిల్ రిత జా, లంజెకమొ కెర జోవయింబి అగ్గె గార్ కెరంతతి, దేముడుచి అదికారుమ్క బితి నాయ్, చి జో దేముడు కబుర్ తెద్రయ్ల పరలోకుమ్చి గవురుమ్చి ఉజిడ్చ దేముడుచ దూతల్క †దూసుప కెర్తతి.

9 †గని మోసే పూర్గుమ్చో కీమొర్లిన్తె జోచి అగ్గెచి రిసా వెల్లొ దూత జలో మికాయేలుచి ఉప్పిరి సయ్తాన్ వాదన కెర్లి పొది, మికాయేలు సయ్తానుక దూసుప కెర్లి తీర్పు సంగుక అదికారుమ్ ఉచరనె నాయ్, గని ఎక్కి ఈంజ, “ప్రబుయి తుక తుచి తప్పుచి తీర్పు సంగున్” మెలన్.

10 *అమ్ అప్పె సంగిత ఉప్రమెన్నుచ మాన్సుల్, మాత్తమ్, జేవ్ అర్దుమ్ నే కెరన్లిసి కిచ్చొ జలెకి జేవ్క దూసుప కెర్తతి, అన్నె, జంతువుల్ రిత అర్దుమ్ నెంతె జోవయింబి అగ్గెచ ఆసల్ కిసి దస్సి జర్గు కెరంతతి గే మెన జేవ్ కి దస్సి, బుద్ది నెంతె, జోవయింబి అగ్గెచ ఆసల్ కెర కెర పాడ్ కెరంతతి. జా ఆస జర్గు కెరంతిసి జోవయింక సొంత పాడ్ కెర్తయ్.

* 1:1 1:1 నెంజెలె, యేసుక్రీస్తుచి సేవ కెర్తు మెన తుమ్ నానెనుమ్ నే జతి రితి ఎత్తి అదికారుమ్ తిలో దేముడు దెక తిల,.... † 1:1 1:1 నెంజెలె గొతిమాన్సు నెంజెలె గొత్తి సుదె. † 1:4 1:4 పేతురు రెగిడ్లి 2 నంబర్ ఉత్త్రమ్ 2:1 చి కోడుతె ‘దస్సి జర్గు జయెదె’ మెన సంగిలన్. ఇన్నె, యూదా రెగిడ్లిన్తె ‘జర్గు జలి’ మెన దెకితనుమ్. § 1:4 1:4 పేతురు రెగిడ్లి 2 నంబర్ ఉత్త్రమ్ 2:19 దెక. * 1:4 1:4 పేతురు రెగిడ్లి 2 నంబర్ ఉత్త్రమ్ 2:1 దెక. † 1:5 1:5 నిర్లమకాండుమ్ 32:1-28, 35, నంకొక్కాండుము 11:1, 14:29, 30, 35. † 1:6 1:6 అదికాండుమ్ 6:1-7, పేతురు రెగిడ్లి 2 నంబర్ ఉత్త్రమ్ 2:4. జేవ్ దూతల్ మాన్సుల్చ తేర్బోదల్ తెన్ లంజె జల. § 1:7 1:7 అదికాండుమ్ 18:20-29 చి పేతురు రెగిడ్లి 2 నంబర్ ఉత్త్రమ్ 2:6 దెక. * 1:8 1:8 పేతురు రెగిడ్లి 2 నంబర్ ఉత్త్రమ్ 2:10 దెక. † 1:8 1:8 పూర్గుమ్ ‘దేముడు దెతి సిచ్చ జర్గు కెరుక’ మెన మాన్సు రూపుమ్ జల దొగుల దూతల్ ఏక్ సుట్టు సాదొమ పట్టుమ్తె గెతికయ్, జా పట్టుమ్చ మున్నుబోదల్ జేవ్ దూతల్క లంజె కెర జోవయింబి మరియాద కడుక ఉచర్ల. ఎత్తి అదికారుమ్ తిలో దేముడు జోవయింక అడ్డు కెర గుడ్డి కెర్లన్. అదికాండుమ్ 18:20, 22, చి 19:1-11. యూదా ఈంజ ఉత్త్రమ్ రెగిడ్లి పొదులె కి ప్రబుచ కబుర్లు సంగిల మాన్సుల్క పాపుమ్చ మాన్సుల్ దూసుప కెర్తి తిల, చి అగ్గెచి ఇన్నెక టాలె జతయ్. † 1:9 1:9 పేతురు రెగిడ్లి 2 నంబర్ ఉత్త్రమ్ 2:11 దెక. § 1:9 1:9 ద్వితియాపదేజ కాండుము 34:1-8. * 1:10 1:10 పేతురు రెగిడ్లి 2 నంబర్ ఉత్త్రమ్ 2:12. † 1:11 1:11 అదికాండుమ్ 4:1-16.

11 అయ్యో! జోవయించి సిచ్చ కెద్ది సిచ్చ! కిచ్చొక మెలె, †బావొనక మార్లొ కయూను పూర్లమచొ గెలి వాట్ ఇండితతి, చి కిచ్చొ కిచ్చొ డబ్బుల్ లాబుమ్క ఆస జా, ‡బిలామ్ పూర్లమచొ కెర్లి తప్పుతె జేవ్ కి జోవయించి బుద్ది వికంతతి, చి కోరహు పూర్లమచొ కిసి మోసేచి దేముడు దిలి అదికారుమ్ పాడ్ కెరుక ఉచర్లొ గే, జేవ్ కి దస్సి, దేముడుచి కామ్ జోచి అదికారుమ్ పిట్టవుక ఉచర్లతి, చి కోరహు చి జోచి పచ్చెన గెల మాన్సుల్చి రితి నాసెనుమ్చి సిచ్చ జా *మొరుల.

12 పడ్డొ, ప్రబుచి తెడిచి తుమ్చి ప్రేమ దెకయ్తి గుర్తుచి †అన్నిమ్ కెర్లిన్తె జేవ్ ఉప్రమెన్సుచ మాన్సుల్ బెద, అన్నె మాన్సుల్క నాయ్, గని జోవయింక జెవ్వొ దెకన, ఇస్టుమ్ అయ్లి రితి గమ్మత్ తెన్ కతిస్క, జేవ్ మరియాద నెంజిలిస్క ముర్కి మర్కల్ రిత జా, జా ప్రేమ దెకయ్తి గుర్తుచి అన్నిమ్చి విలువ కడ్డతి. అన్నె జేవ్, ‡వాదు కెర్లె మబ్బు తిలె కి పాని నే జెతె కిసి ఉడ్డ గెతయ్, గే, జేవ్ కి దస్సి. జేవ్ కి జా మబ్బుచి రితి కామ్క నెంజితి. అన్నె, అంజూరుమ్ రూకు చెంగిల్ తిలె, చల్లి పొది పాసి అయ్లె పొది రూకెతె పండ్లు దెరుల, గని పంటొ లాయితి పొది పాసి అయ్లె కి, జేవ్ మాన్సుల్ కామ్క నెంజితొ రూకు రిత జా, చి కోదొవ్వొర్ మొర్ల రిత జతతి.

13 అన్నె జేవ్, సముద్రుమ్తెచ వెర్లి కెర్లల్చ రిత జా, జోవయించి సొంత పాపుమ్చి పొగ్గుర్ ఉడ్డిత్ రితి కెర్తతి. అన్నె కిస జతతి మెలె, ఎక్కితె సొంత టాన్తె వాట్ పిట బుల్లె తిల సుక్కల్చ రిత తవుల, చి దేముడు దిలి జోవయించి సిచ్చ కిచ్చొ మెలె, *ఎత్కిచి కంట అందర్ తిలిన్తె గెచ్చుల.

14 తొలితొచొ మాన్సు ఆదాము ఎక్కిలో తెంతొ హనోకు ఎద వర్స తెన్ సత్తు కుటుంబల్ జలి. హనోకు దేముడుచి సుద్ది తిలి ఆత్మ తెన్ ఇనాయంచి రిసొ ఇనెయి మెన సంగిలన్.

“అదె, జోవయించ పరలోకుమ్చ ఎతివాట్జిన్ దూతల్ ఎత్కి తెన్

15 ‘ఎత్కిక తిర్పు కెరుక, చి దేముడుక నేన్సన నెసిలస ఎత్కిక, జోచి మరియాద కడ్డ జేవ్ కెర్ల పాపుమ్ కమొచి రిసొ జోవయించి నేరిమ్ వయడుక,

చి జోవయించి రిసొ జేవ్ పాపుమ్లు సంగిల ఎత్కి కోపుమ్ కోడుచి నేరిమ్ వయడుక’ మెన ప్రబు ఉత్త అయ్లన్.”

16 ఉప్రమెన్సుచి అమ్ సంగిల మాన్సుల్ నిజుమి తిరిమ్ తిరిమ్ గోసల్ లట్టబ్బన, దేముడుచి ఉప్పిరి సేంతుమ్ నెంజ వేర వేరచి ఒగ్గర్క ఆస జతన, జోవయించ ఆసల్ రితి ఇస్టుమ్ అయ్లి రితి ఇండితన, బడాయ్ లట్టబ్బన, లాబుమ్క అన్నె మాన్సుల్క పులయ్తన జవుల.

సత్తిమ్చ నంపజలసక అన్నె జాగర్ల సంగిలిసి

17 తూమ్, ప్రేమ తిల బావుడ్లు, తుమ్ కిచ్చొ ఉచార కెర మెలె, †అమ్చొ ప్రబు జలో యేసుక్రీస్తుచ బారికుల్ జోచి సెక్కిక సంగిలిసి.

18 జేవ్ జోవయించ బారికుల్ తుమ్క, ‡“ఆకర్ దినాల్క సత్తిమ్చి ఉప్పిరి ఆన్తన బార్ జవుల. దేముడుక విరోదుమ్ జల జోవయించి పాపుమ్చ ఆసల్ రితి ఇండుల” మెన తుమ్క సంగిల.

19 జేవ్ సంగిల్ రితి ఈంజేవ్వొ మాన్సుల్ నంపజలసతె జట్లు కెరయ్తతి, దేముడుచి సుద్ది జోవయించి పెట్టి తయె నాయ్, చి జోవయించి సొంత ఆగుచ ఆసల్ రితి ఇండితతి.

20 గని తూమ్, ప్రేమ తిల బావుడ్లు, ప్రబుచి సత్తిమ్చి చి తుమ్చి నముకుమ్తె డిట్టుమ్ కెరన. దేముడుచి సుద్ది తిలి ఆత్మసెక్కిక ప్రార్దన కెర.

21 దేముడుచి ప్రేమ ఇండుక దెకన. పరలోకుమ్తె బెద కెయ్క తెయ్క జితి వరుమ్ అమ్చొ ప్రబు జలో యేసుక్రీస్తు జర్గు కెర్లె ఎదక, జాక నిదానుమ్ రక.

22 పడ్డొ, సగుమ్జిన్ అన్మానుమ్ జా అస్తి. జోవయించి ఉప్పిరి కన్యారుమ్ జా, సత్తిమ్ దెకవ.

23 సగుమ్జిన్క ఆగి తెంతొ ఉర్లిల్ రితి సయ్తాన్చి తెంతొ రచ్చించువ కెర, పడ్డొ, సగుమ్జిన్క, జోవయించి పాపుమ్తె నే బెదితి రితి జాగర్ల తా, బియ్ జోవయింక కన్యారుమ్ దెక.

ఆకర్ కోడు

24 జలె, తుమ్ పాపుమ్తె అన్నె నే సేడ్డి రితి తుమ్క రకుక తెర్లొ, జోవయించి పరలోకుమ్చి ఉజిడ్తె తుమ్ పొరపాట్ నెంతె సర్ల తెన్ జోచి మొక్కె టీవ్తి రితి దొర్కు జలిసి జెయిమ్ కెరుక తెర్లొ

‡ 1:11 1:11 పేతురు రెగిడ్లి 2 నంబర్ ఉత్తమ్ 2:15 దెక. బిలామ్ ఎత్కి అదికారుమ్ తిలో దేముడుచ కబుర్లు సంగితొసొ జలెకి, చెత్తర్ తప్పుల్ కెర్లొ. ఎత్కి అదికారుమ్ తిలో దేముడుచి కోడు మార్కువ కెరుక ఉచర్లొ, ఎత్కి అదికారుమ్ తిలో దేముడుక విరోదుమ్ తిల మాన్సుల్ “డబ్బుల్ దెవ్దె” మెంతియ్, జా డబ్బుల్ ఆసకయ్ ఎత్కి అదికారుమ్ తిలో దేముడుచి కోడు పిట్టవుక ఉచర్లొ, సంక్యాకాండుము 22:2-35, 31:16. పడ్డొ, బొమ్మల్క బలి దిలిసి ప్రెజల్ కంక సికడ్లొ, చి ప్రెజల్ లంజె జతి రితి సికడ్లొ, డీనయ్లిసి 2:14. § 1:11 1:11 సంక్యాకాండుము 16:1-35. * 1:11 1:11 కోరహుక చి జోవయించ సగుమ్జిన్ మాన్సుల్క బుయి గిడ గెలన్, చి జోవయించ అన్నె సగుమ్జిన్ మాన్సుల్ ఆగిక డడ్డయ్ గెల. † 1:12 1:12 పేతురు రెగిడ్లి 2 నంబర్ ఉత్తమ్ 2:13. ‡ 1:12 1:12 పేతురు రెగిడ్లి 2 నంబర్ ఉత్తమ్ 2:17 దెక. § 1:12 1:12 మాములుమ్ మొర్కు కి తయెదె, ఆకర్చి మొర్కు కి తయెదె. ఆకర్చి మొర్కు మెలె, ప్రబుక విరోదుమ్ జలన వెల్లి ఆగి గొయ్తె సిచ్చ జతిసి, ఈంజ. డీనయ్లిసి 2:11, 20:6, 14 చి 21:8 దెక. మెలె, మొర్లొ రూకు రిత జా, పలితుమ్ దెర్లి నాయ్, చి జేవ్ పలితుమ్ దెర్లిచి రుజ్జు డీనిలి పడ్డొక ఉట్కి జా పూర్లి మొరుల. * 1:13 1:13 పేతురు రెగిడ్లి 2 నంబర్ ఉత్తమ్ 2:17. † 1:17 1:17 పేతురు రెగిడ్లి 2 నంబర్ ఉత్తమ్ 3:2 దెక. ‡ 1:18 1:18 పేతురు రెగిడ్లి 2 నంబర్ ఉత్తమ్ 3:3 దెక.

25 ఎక్కిలో దేముడు జలో, అమ్చో ప్రబు జలో
యేసుక్రీస్తుచి అత్తి అమ్క రచ్చించుప కెర్తొసా జలో
దేముడుక పరలోకుమ్చి ఉజిడి, గవురుమ్, అదికారుమ్,
సెక్తి, కిచ్చొ నెంజిలి అగ్గె తెంతో తా, అప్పె కి, కెయెక
తెయెక కి నే పిట్టె తవున్! ఆమేన్!

ప్రకటన పుస్తకము జర్గు జంక తిలిసి దేముడు బారిక్ జలో యోహానుక డీసయ్లిసి

మొదొల్ కోడు

1 యేసుక్రీస్తు, జోచ సేవ కెర్తసక దెకవుక మెన బే బేగి జర్గు జంక తిలిసి దేముడు అబ్బొసి జోక దిలన్. బే బేగి జర్గు జంక తిలిసి జా ఎత్తి, జోచో సేవ కెర్తొసా యోహానుక జోచో దూతచి అత్తి డీసవ దిలయ్.

2 జలె, దేముడుచి ఈంజ కబుర్చి రిసా, యేసుక్రీస్తు దెకయ్లి ఈంజ సాచిచి రిసా, జా ఎత్తి దెకిలిన్చి రిసా యోహాను ఇన్నె సాచి రెగిడ్డసి.

3 జర్గు జంక తిలిన్చి ఈంజ కబుర్ అన్నె కో సదు కెరుల గే, ఇన్నెక కో నూన ఇన్నె సంగిల్ రితి కెరుల గే, జోక చెంగిలి. కిచ్చొక మెలె, ఈంజ జర్గు జంక దెర్తి సమయ్యుమ్ పాసి జా జెతయ్.

4 ఆసియా ప్రదేసిమ్చ *సత్తు †సంగుమ్చక ఆవ్ యోహాను కిచ్చొ కబుర్ రెగిడ్డసి మెలె, కెయ్చ తెయ్చ తెయ్చ తెయ్చ, తతోసా, జెంక తిలొసా తెంతొ, పడ్డొ జోచి సింగాసనుమ్చి పురెతో తతా ‡సత్తు ఆత్మల్ తెంతొ,

5 పడ్డొ నంపజతి సాచి నిదానుమ్తె ఇండ, మొర అన్నె జీవ్ జతసక తొల్పుర్ జతో, ఒండి లోకుమ్చ రానల్క ఏలుప కెర్తొ యేసుక్రీస్తు తెంతొ దయ, సేంతుమ్, తుమ్చి ఉప్పిరి తవున్. యేసుక్రీస్తు అమ్క ప్రేమ కెర, జోచి మొర్నిచి అర్పితుమ్ జలి సొంత లొయి సువడ కెర, అమ్చ పాపల్చి సిచ్చ తెంతొ అమ్క విడ్డల్ కెర్తన్.

6 జో అమ్క జోచో దేముడు జలొ జోచో అబ్బొన్చి రాజిమ్, పూజర్లు జతి రితి, సేవ కెరుక మెన జో జర్గు కెర అస్సె. జా ఎత్తిచి రిసా జో యేసుక్రీస్తుక కెయ్చ తెయ్చ గవురుమ్ అదికారుమ్ తవున్! †ఆమేన్!

7 ఈందె, మబ్బుల్ తెన్ జో పరలోకుమ్ తెంతొ అన్నె ఉత్త జెయెదె, చి ఎత్తి అంకివొ జోక దెకుల. జోక మార్లస ఎత్తిజిన్ కి. అన్నె జోక అగ్గె మార తిలన్ జలె 'బలే

* 1:4 1:4 యూదుల్ తెన్, 'సత్తు' మెలి నంబర్క కిచ్చొ అర్దుమ్ మెలె, పూర్తి తిలిసి ఇన్నె దొన్నిచి తిన్ని నంబర్లు అద్యయల్తె ఏక్ సత్తు సంగుమ్లుచ నవ్వొ దెర జోపయింక ఎక్కెక్ కబుర్లు సంగెదె, గని ఏక్ వేల ఈంజ 'సత్తు' నంబర్ ఒండి లోకుమ్చ నంపజలసచ సంగుమ్లు మొత్తుమ్క కి ఏక్ టాలి జయెదె. † 1:4 1:4 'సంగుమ్' మెలె, ఏక్తెచ నంపజలస మొత్తుమ్క 'సంగుమ్' మెనుక జతయ్. ‡ 1:4 1:4 సత్తు ఆత్మల్ మెలె, ఎత్తి అదికారుమ్ తిలొ దేముడుచి సుద్ది తిలి ఆత్మక సంగితయ్. ఇన్నె సత్తు మెలె, పూర్తి తిలిన్చి అర్దుమ్ కి, పూర్తి సత్తిమ్ తిలిన్చి అర్దుమ్ కి తయెదె. పూర్తి సెక్తి తిలిన్చి అర్దుమ్ కి ఉచరుక జయెదె. వడ్డొ ఒండి లోకుమ్తె తిలిసి ప్రబుచి ఆత్మ దెకితినచి అర్దుమ్ కి ఉచరుక జయెదె; జెకర్యా 4:10. § 1:6 1:6 ఎట్టి బాస తెన్ ఇన్నె 'ఆమేన్' మెనుల. జా కోడుచి అర్దుమ్ కిచ్చొ మెలె, 'తెద్దిలి!'. 'జర్గు జవున్!' * 1:7 1:7 ఎట్టి బాస తెన్ 'ఆమేన్!' మెనుల. కుపియ బాస తెన్ తెదిలి మెన సవుల † 1:11 1:11 నెంజలి 'వెల్లి పుస్తకము'. జేవ్ పొదులె ఏక్ వెల్లి పుస్తకముతె రెగ్గ, నదు కెర తియ తతి పొది, నుట్టువ కెర తియ తవుల. ‡ 1:13 1:13 దానియేలు 7:13, 14. § 1:13 1:13 యూదుల్చి అలవాట్ తెన్ దసా దిగిల్ పాలుమ్ చి బజార్ రగుమ్ పట్టె ఎత్తి అదికారుమ్ తిలొ దేముడుక ఎత్తిక వెల్లి పూజరి జలొ కేన్ జవున్ మాన్సు గలన బందన తయెదె. ఇన్నె, యేసుక 'జో ముక్కిమ్ జలొ పూజరి' మెన ఈంజ టాలి రుజ్జు దెకయ్తయ్. * 1:14 1:14 దానియేలు 7:9.

తప్పు కెర్లమ్' మెన ఒండి లోకుమ్చ సెకుమ్లుచ మాన్సుల్ ఏడుకుడు జవుల. దస్సి జర్గు జవున్! * ఆమేన్!

8 కెయ్చ తెయ్చ తెయ్చ తెయ్చ, తతోసా, జెంక తిలొసా, ఎత్తి అదికారుమ్ తిలొ ప్రబు జలొ దేముడు, జొయ్యి మొదొల్ జొయ్యి ఆకర్ మెన అర్దుమ్ జలి, "ఆవ్ అల్పా, ఆవ్ ఓమెగ" మెన సంగితయ్.

వత్తాన్ డిబ్బుతె యోహాను తిలి పొది యేసుప్రబు డీసిలిసి

9 ఆవ్ తుమ్చో బావొ జలొ యోహాను, జలె, యేసుచి తెడి తుమ్చి తెన్ ఈంజ కాలుమ్చ బాదల్ సేడ తుమ్చి తెన్ ఓర్పువ జతసుమ్. తుమ్చి తెన్ యేసుచి తెడి జోచి రాజిమ్తె, బెద ఏలుప కెర్తసుమ్. జలె, ఆవ్ యోహాను, దేముడు దిలి సుబుమ్ కబుర్, యేసుచి రిసాచి సాచి, నూనయ్తె తిలి రిసా జేలి జా వత్తాన్ డిబ్బుతె తిలయ్.

10 ఒత్త తిలె, ప్రబుచి బక్తి కెర్తి సెలవ్ కడన్లి దీసి, దేముడుచి జో యేసుప్రబుచి ఆత్మతె అంచి ఆత్మ తెన్ ఆవ్ బెరవ తిలి పొది, అంచి వడ్డొ, నప్పిర్మూరిచి అవాడ్ కిసి గట్టిజ జయెదె గే, దస్సి ఏక్ ఒగ్గర్ అవాడ్ నూన్లయ్.

11 "తుయి అప్పె కిచ్చొ దెకితె గే, ఏక్ †పుస్తకముతె రెగ్గ, నంపజలసచ ఆవ్ సంగిత సత్తు సంగుమ్లుతె తెద్రవు. ఎపెసు, స్మూర్లు, పెర్లము, తుయత్తెర, సార్దీన్, పిలదెల్లియ, అన్నె లవొదికయ పట్టుమ్తెచి సత్తు సంగుమ్లుతె తెద్రవు" మెన జా అవాడ్ అంక సంగిలన్.

డీసన్ సేడ్డిసి

12 తెదెడి అంక జా కోడు సంగిలి అవాడ్ తిలొసాక దెక్కుక మెన, ఆవ్ పసిల్లె, సత్తు దివ్వొ తిత బజర్క తెయార్ కెర్ల తంబల్ దెకిలయ్.

13 జేవ్ తంబల్చి నెడెమె ఎక్కిలొ టీవొజ తిలొ. జోకిసా తిలొ మెలె, ‡మాన్సు జా జెర్మిలొ రితొ డీస, చట్టె పావెతి దిగిల్ లాల్చి గలన తా, గుండె బజర్చి పట్టె §బందన తిలొ.

14 జోచి *బోడిచి సెండి, పూర్తి చొక్కిలి ఊలుచి ఎదిలి, మంచుచి ఎదిలి చొకు తయెదె. జోచ అంకివొ, ఆగివొ లగిలి రితి తిల.

15 జోచ చట్టొ, ఆగితె డడ్డ దగదగాల్న మెర్పువ జతి కంచుచి రితి తిల. జోచి అవాడ్, వెల్లి బూరుమ్చి పాని నూయి జతి అవాడ్చి రితి బడబడాల్న జయెదె.

16 జోచో ఉజిల్ అత్తి సత్తు సుక్కల దెర తిలన్, చి జోచి చోడి తెంతో దొన్ని పక్కలె వాండి తిలి కండా బార్ జతె తిలి, చి జోచి మొకొమ్, పొద్దు పూర్తి సత్తు తెన్ ఉజిడి లగితె పొది కిసి తయెదె గే, దస్సి జలె.

17 జోక దెకిల్ బేగి, మొర్లో రితో జా జోచి చట్టే సేడ గెలయ్. గని జోచో ఉజిల్ ఆతు తెన్ అంక చడ, అంక కిచ్చొ మెలన్ మెలె, “తుయ్ బి నాయ్. ఆవ్ తొలితొచొ కి ఆకర్చొ కి.

18 ఆవ్ జీవ్ తిలోసా జీవ్ దెతోసా. ఆవ్ మొర్లయ్, గని అన్నె జీవ్ జా కెయక తెయక జివ్వి తయిందె, అన్నె మొర్లుక చి మొర్లన్క రకితి టాన్కచి †తాలుమ్ అంచి అత్తి అస్సి.

19 జాకయ్ తుయి కిచ్చొ అప్పె దెకితసి గే, రెగుడు. అప్పెచి కి పడ్డొక జర్గు జంక తిలిసి కి.

20 పడ్డొ అంచొ ఉజిల్ అత్తి తిల సత్తు సుక్కల్, చి బజర్క తెయార్ కెర్ల సత్తు దీవుకంబల్చి అర్దుమ్, సత్తు సుక్కల్ సత్తు సంగుమ్లుచ దూతల్ జవుల, చి సత్తు దీవుకంబల్, జేవ్ సత్తు సంగుమ్లుయి జవుల” మెలన్.

2

ఎపెను పట్టుమ్తెచ సంగుమ్చక చి ఉత్తుమ్

1 “ఎపెను పట్టుమ్చ సంగుమ్చొ దూతక ఇసి మెన రెగుడు. *సత్తు సుక్కల్ జోచి ఉజిల్ అత్తి దెరితొ, దివ్వొ తిత సత్తు బజర్చ తంబల్చి నెడిమి బులితోసా తుమ్క సంగిలిన్ కిచ్చొ మెలె,

2 †తుచి కమొ కీసచ గే, తుయి అంచి కామ్ కెర కెర ఓర్పుప జా నిదానుమ్ తతిసి ఆవ్ జాని. మెలె, పాపుమ్తె ఇండిత మాన్సుల్క తుయి సంగుమ్తె నే బెదవంతె, ‘క్రిస్తుచ బారికుల్ ఆమ్’ మెన అబద్దుమ్క సంగిత గార్ మాన్సుల్క పరిచ్చ కెర, ‘క్రిస్తుచ నెంజితి’ మెన తుమ్ రుజ్జు కెర్లిసి కి ఆవ్ జాని.

3 అంచి నావ్చి రిసా తుమ్ ఒగ్గర్ నిదానుమ్ తెన్ ఓర్పుప జా అన్మానుమ్ నే జలిసి ఆవ్ జాని.

4 “గని తుచి ఏక్ తప్పుచి రిసా అంక కిచ్చొ బాద అస్సి మెలె, కిచ్చొ తీర్పు సంగుక అస్సి మెలె, అంచి రిసాచి తుచితె తిలి తొలితొచి ప్రేమ పచ్చ ముల దిలదు.

5 జాకయ్, అగె కిసి అంక ఒగ్గర్ ప్రేమ కెరై తిలదు, అప్పె కిసి అస్సున్ గే ఉచర. అప్పెచి తప్పు ఒప్పున పెట్టి దుకుమ్ జా, తుమ్ తొలితొ నంపజలి పొది ఇండిలి ప్రేమ కమొ అప్పె

తెంతొ అన్నె ఇండ. నెంజిలె, జా తప్పు ఒప్పున చెంగిల్ జతి రితి తుమ్ మార్పుప నే జలె, తుమ్తె ఆవ్ జా కెర, తుమ్చి దీవుకంబుమ్ ఉర్ల వెంట గెలిందె.

6 జలె తుమ్తె చెంగిల్ కామ్ ఏక్ అప్పెక అస్సి. కిచ్చొ మెలె, జేవ్ †‘నీకొలాయితులు’ మెలనచ కమొ దూర్ కెర్లసు. ఆవ్ కి ఎద్గరె నెసిత కమొ తూమ్ కి నెసితను.

7 “జలె, సంగుమ్ల్క ఏదేముడుచి సుద్ది తిలి ఆత్తు ఇన్నెతెన్ కిచ్చొ సంగితయ్ గే, కంగ్గొ తిలోసా నూన్తు. కో అంచి పరిచ్చతె జినుల గే, దేముడుచి పరలోకుమ్చి తోటతె తిలి జీవ్ దెతి రూక్చ పండ్లు కంక దెయిందె.

స్మార్లు పట్టుమ్చ సంగుమ్చక చి ఉత్తుమ్

8 “పడ్డొ స్మార్లు పట్టుమ్చ సంగుమ్చొ దూతక ఇసి మెన రెగుడు.

“తొలితొ తిలో, ఆకర్క తిలో మొర అన్నె జీవ్ జలోసా తుమ్క సంగిలిన్ కిచ్చొ మెలె,

9 తుమ్ సేడ్డ అల్లర్, తుమ్ బీద తిలిసి ఆవ్ జాని. బీద జలె కి, ఆత్మక సామ్సారుమ్ జా అస్సున్. పడ్డొ ‘యూదుల్ ఆమ్’ మెనన సత్తిమ్చ యూదుల్ నెంజిలన; నయ్తాన్చి సంగుమ్తె బెదితన జేవ్; జలె, తుమ్క దూసుప కెర్లిసి ఆవ్ జాని.

10 తుమ్ అప్పె సేడుక తిల అల్లర్చి రిసా తుమ్ బియఁ నాయ్. ఈందె, తుమ్తె సంగుమ్జిన్ పరిచ్చ జతి రితి, నయ్తాన్ జోక జేల్తె గలెదె, చి దెస్సు పొదుల్క అల్లర్ తెన్ తస్సె. మొరుక జలెకి తుమ్ నిదానుమ్ తా, చి తుమ్ జిన పరలోకుమ్తె తుమ్ కెయక తెయక జింక మెన బవుమానుమ్ దెయిందె.

11 “సంగుమ్ల్క అమ్చి దేముడుచి సుద్ది తిలి ఆత్తు ఇన్నెతెన్ కిచ్చొ సంగితయ్ గే, కంగ్గొ తిలోసా నూన్తు. ఈంజ లోకుమ్తెచ అల్లర్తె కో అంచి ఆత్తుసెక్కిక జినుల గే, జా అన్నెక మొర్లు, నయ్తాన్తె సిచ్చ జతి మొర్లు, జోవయింక తయె నాయ్.

పెర్లము పట్టుమ్చ సంగుమ్చక చి ఉత్తుమ్

12 “పడ్డొ పెర్లము పట్టుమ్తెచ సంగుమ్చొ దూతక ఇసి మెన రెగుడు.

“దొన్ని పక్కలె వాండి కెర్లి కండా దెర్లొసా తుమ్క సంగిలిన్ కిచ్చొ మెలె,

13 తుమ్ జితిసి కేనె గే జాని. కేనె మెలె, నయ్తాన్చి సింగాననుమ్ తిలిన్తెయి. అంచి నావ్ డిట్టుమ్

† 1:18 1:18 మెలె, మాన్సు ఒత్త తంక, నెంజిలి విడ్డల్ జా పరలోకుమ్తె నెంజిలి ఆగి గొయతె గెచ్చుక నెలవ్ దెతి సెక్కి కచి మెలె, యేసుచి. * 2:1 2:1 1:20 దెక. † 2:2 2:2 దొన్నిచి తిన్ని నంబర్లు అద్యయల్తె ‘సత్తు సంగుమ్లుచ దూతల్క’ మెన ఎక్కిక కబుర్లు జోవయింక రెర్ల అస్సి. ఎత్తి సంగుమ్చొ దూతక ఏక్ కబుర్. గ్రికు బాస తెన్ ఈంజ ‘డిసయ్లిసి’ మెలి పుస్తకుమ్తె ఈంజివ్ సత్తు కబుర్లు రెగిడ్డిన్తె ఎత్తి కబుర్తె ‘తుయి’, ‘తుచి’, ‘తుక’ మెల కొణొ రెర్ల అస్సి. గని ఎత్తి సంగుమ్చొ దూత జోవయించి సంగుమ్చ మాన్సుల్ మొత్తుమ్క టాలి రితి జయెదె మెన, తుక తుమ్, తుచి తుమ్చి, తుకక ‘తుమ్క’ మెన రెర్ల అస్సుమ్. దస్సి 2:2 కొడుతె తుచ కమొక ‘తుమ్చ కమొ’ మెన, 2:3 నంబర్ కొడుతె తుయి ఒగ్గర్ తెన్ నిదానుమ్ ఓర్పుప జా అన్మానుమ్ నే జలిన్క తుమ్ ఒగ్గర్ తెన్ నిదానుమ్ ఓర్పుప జా అన్మానుమ్ నే జలిసి మెన రెర్ల అస్సుమ్. దొన్నిచి తిన్ని నంబర్లు అద్యయల్ మొత్తుమ్తె ఈంజ సొమ్మమ్ కెర అస్సుమ్. ‡ 2:6 2:6 ఏక్ వేల బిలామ్ సిక్కిసి; మెలె, బొమ్మల్క దిలిసి కతిసిచి లంజె కమొతె బెదితిసి; జేవ్ నీకొలాయితులు సిక్కి. 2:14, 15 దెక. § 2:7 2:7 మెలె, దేముడు అబ్బొన్చి యేసుచి ఆత్తు.

దెరన్తను, పడ్డో అంక నిదానుమ్ నముకుమ్ తిలో అంచి సాచి సంగితె తిలో అంతిపయను బుల్తె తిలి పొది కి, తుమ్చి నెడిమి సయ్తాన్ జితినతె జో అంతిపయను జేవ్ మార్లె కి, అంచి రిసాచి తుమ్చి నముకుమ్ ఒప్పునుక ములున్ నాయ్.

14 గని, తుమ్ కెర్త సగుమ్ తప్పుల్చి రిసా అంక బాద, తీర్పు సంగుక అస్సె. కిచ్చో మెలె, తుమ్చి తెన్ బెదిలస సగుమ్జిన్ బిలామ్ సికడ్డిసి సిక 'చెంగిలి' మెంతతి. అమ్చ ఇస్రాయేలులు దేముడుక సత్తిమ్ ఇండితిసి పిట్టయ్తి రితి, బొమ్మల్క దిలిసి కంక చి లంజె కమెతె బెదుక బాలాకుక *బిలామ్ సికడ్లన్.

15 దస్సి, 'నీకొలాయితులు' మెలస సికడ్డిసి నంప కెర్తస సగుమ్జిన్ తుమ్తె అస్తి.

16 జాకయ్, తుమ్ తప్పు జలిసి ఒప్పున, పెట్టి దుకుమ్ జా, జా తప్పుల్ ముల. నెంజెలి, బే బేగి తుమ్తె జా కెర, అంచి చోడి తెంతో బార్ జలి †కండా తెన్ జేవ్ మాన్సుల్చి ఉప్పిరి యుద్దుమ్ కెరిందె.

17 "సంగుమ్లక దేముడుచి సుద్ది తిలి ఆత్మ ఇన్నెతెన్ కిచ్చో సంగితయ్ గే, కంగ్గో తిలోసా సూన్తు. ఈంజ లోకుమ్ సికడ్డిన్చి ఉప్పిరి కో జినుల గే, లుంకిల్ రితి తిలి పరలోకుమ్ తెంతో ఆవ్ సువితి 'మన్నా' మెలి అన్నిమ్ జోక దెయిందె, చి అన్నె కిచ్చో దెయిందె మెలె, జోక ఎక్కెక్ల చొక్కిల పత్రల్ దెయిందె. జోతె ఎత్తి మాన్సుక జోచి పత్రె, జోక నొవి నావ్ రెగ్గ దెయిందె. కేన్ నావ్ కక్క దెయిందె గే, ఎక్కి జోకయ్ సొంత ఎర్కె జయెదె, గని అన్నె కక్కయ్ నాయ్.

తుయత్తెర పట్టుమ్తెచ సంగుమ్చక చి ఉత్తుమ్

18 "పడ్డో తుయత్తెర పట్టుమ్చ సంగుమ్చొ దూతక ఇసి మెన రెగుడు.

"ఆగి లగిత రిత అంకివో తిలో, దగదగాల్ప మెర్పుప జతి కంచు డీస్త రిత చట్టో తిలో, దేముడుచొ పుత్తుసి తుమ్క సంగ తెద్దయ్త కొడో ఈంజేవ్.

19 "తుమ్ కెర్త కమె, తుమ్చి ప్రేమ, తుమ్చి నిదానుమ్చి నముకుమ్, తుమ్చి సేవ, బాదల్ ఓర్పుప జతి తుమ్చి నిదానుమ్, పడ్డో తుమ్ తొలితో నంపజలి కంట, తుమ్ అప్పె అన్నె ఒగ్గర్ చెంగిల కమెతె ఇండితిసి ఆవ్ జాని.

20 గని తుమ్చి రిసా అంక కిచ్చో బాద, కిచ్చో తీర్పు సంగుక అస్సె మెలె, 'దేముడుచ కబుర్లు సంగితిసి ఆవ్' మెన ఆరి సంగుమ్తె తేర్బోద యెజెబెలు అంచ సేవ కెర్తసక పాపుమ్ సికడ్లెకి, తుమ్ తీర్పు నే సంగితె తుక్తె తత్తను.

* 2:14 2:14 నంకాకాండుము 22:1-35, 25:1-2, 31:16. † 2:16 2:16 'యేసుచి చోడి దెర్లి కడ్లమ్' మెలె, జో తీర్పు కెర్త కోడు. ఎబ్రియూల్ 4:12.

‡ 2:28 2:28 డీసుయ్లిసి 22:16 దెక. * 3:1 3:1 1:4 వి ఎట్టెచి కోడు దెక. † 3:1 3:1 1:20వి ఎట్టెచి కోడు దెక.

అమ్చ సేవ కెర్తస లంజెతె గెతి రితి, బొమ్మల్క దిలిసి కతి రితి, జా సికడ్లయ్.

21 జాక 'తప్పు ఒప్పున పెట్టి దుకుమ్ జా, జా పాపుమ్ ముల్పు' మెన అగ్గెయ్ తెంతో జాక అవ్కానుమ్ దా అస్సి, గని జాచి లంజెచి రిసా విసారుమ్ కి జయె నాయ్.

22 ఈందె, జాక జబ్బు తెద్దయిందె, చి జాచి తెన్ లంజె జతస ఎత్తిజిన్క గొప్పు అల్లర్ సేడయిందె. జాచ కమె, జా కెర్లెన్చి రిసా, జాచి దుకుమ్ జా నే ములిలెగిన,

23 పడ్డో, జాచ బోదల్ జల జాచ కోడు సూన్లసక మొర్పు లయడిందె. దస్సి సిచ్చ కెర్లె, ఎత్తి సంగుమ్చ కిచ్చో చినుల మెలె, ఎత్తి మాన్సుచి బుద్ది, ఎత్తి మాన్సుచి పెట్టి తిలిసి ఆవ్ దెకితిసి సికుల, చి తుమ్తె ఎత్తి మాన్సుచ కమె ఎద తుమ్క తీర్పు జర్గు కెరిందె మెన చినుల.

24 "గని, తుమ్ తుయత్తెరచి నంపజలసతె కో జా వెర్లి సికితిన్తె బెదున్ నాయ్, అన్నె 'సయ్తాన్చి గుట్టు' మెన జేవ్ సగుమ్జిన్ సికయ్తిసి కో సికున్ నాయ్. తుమ్కయ్ కిచ్చో మెంతసి మెలె, తుమ్క కిచ్చో వేర జాడు వయడుక నెసి.

25 గని ఆవ్ అన్నె జెతె ఎదక తుమ్క తిలి ప్రేమ నిదానుమ్, ఆవ్ తుమ్క దిలి కిచ్చో అస్తి జలెకి డిట్టుమ్ దెరన.

26 కో జిన్ ఆకర్ ఎద్ద అంచ కమె నిదానుమ్ ఇండుల గే, అంక నేస్త మాన్సుల్చి ఉప్పిరి జోవయింక అదికారుమ్ దెయిందె.

27 జో నిదానుమ్ తిలస గొవుడుచి ఇనుముడండో దెరన్లి రితి గేడివో పుట్టయ్లి రితి కెర, అంక నేస్తసచి సెక్తి పాడె కెర్లి రితి కెర, జోవయింక ఏలుప కెరుల. దేముడు అబ్బొ కిసి అంకయ్ అదికారుమ్ దా అస్సె గే, దస్సి జో నిదానుమ్ తిలసకయ్ ఆవ్ అదికారుమ్ దెయిందె,

28 చి ముక్కిమ్ జలి పెందలెచి ఒగ్గర్ ఉజిడి దిలి †సుక్కో జోక దెయిందె.

29 "సంగుమ్లక అమ్చి దేముడుచి సుద్ది తిలి ఆత్మ కిచ్చో సంగితయ్ గే, కంగ్గో తిలోసా సూన్తు.

3

సార్దీన్ పట్టుమ్చ సంగుమ్చక చి ఉత్తుమ్

1 "సార్దీన్ పట్టుమ్చ సంగుమ్చొ దూతక ఇసి మెన రెగుడు.

"దేముడుచ *సత్తు ఆత్మల్ తిలో †సత్తు సుక్కల్ దెర్లొసా తుమ్క సంగిలిన్ కిచ్చో మెలె, తుమ్చ కమె ఆవ్ జాని. తుమ్క 'జివ్వి అస్తి' మెన మాన్సుల్ ఉచర్తతి, గని తుమ్ మొరయ్ అస్సున్.

2 తుమ్ చెడ్డోయ్ జా, చి మొర్లి రితి నే మొర ఇదిదిదిల్ సేసిలితె డిట్టుమ్ కెరన. కిచ్చొక మెలె, తుమ్చ కమొ 'అంక దేముడుచి మొక్కె పూర్తి చెంగిల్చ నెంజిలి' మెన దెక అస్సి.

3 "జాకయ్, తుమ్క అగ్గె దిలిసి, తుమ్ సూన నంపజలిసి, గుర్తు కెరన, పోసన, తుమ్చి తప్పు ఒప్పున పెట్టి దుకుమ్ జా తప్పు ముల. తుమ్ ఇసి చెడ్డోయ్ నే తిలె, జలె, అవ్ చోర్ రితి జా జెయిందె, చి కేన్ గడియక తుమ్తె జెయిందె గే, తుమ్ నేన్సు.

4 "జలె, ఒత్త సార్దీన్తె తుమ్తె, జోపయించ పాలల్ ముర్కి నే కెరన్తన సగుమ్జిన్ అప్పెక కి అస్తి. జేవ్, జలె, అంచె పరలోకుమ్చి ఉజ్జిడె బెదుక జేవ్ విలువ మెలి రితి ఆవ్ దెకితసి, చి చొక్కెల పాలల్ గలన అంచె తెన్ ఇండుల.

5 కో దస్సి జినుల గే, దస్సి జోక చొక్కెల పాలల్ దెయిందె, చి గలనుల, చి పరలోకుమ్తె బెదితనచ నవ్వొ ఆవ్ రెగిడ్డి పుస్తకుమ్తె జోచి నావ్ ఆవ్ పుంచి నాయ్. అంచొ అబ్బొ జలొ దేముడుచి మొక్కె కి జోచ దూతల్చి మొక్కె కి 'జోచి నావ్ అస్సి' మెన ఒప్పున్దె.

6 "సంగుమ్లక దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలొసా సూన్తు.

పిలదెల్పియ పట్టుమ్చ సంగుమ్చక చి ఉత్తమ్

7 "పిలదెల్పియ పట్టుమ్చ సంగుమ్చొ దూతక ఇసి మెన రెగుడు. పరలోకుమ్చి సుద్ది తిలొ, సత్తిమ్ తిలొ, దావీదు రానొచి తాలల్ దెరితొ, జో ఉగిడ్డె కో డంకుక నెత్తిర్తి, జో డంకిలె కో ఉగుడుక నెత్తిర్తి, జో తుమ్క సంగిలిన్ కిచ్చొ మెలె,

8 తుమ్చ కమొ ఆవ్ జాని. ఈందె, తుమ్క 'పెసుత్' మెన ఉగ్గి జలి కెప్పి తుమ్చి మొక్కె ఉగ్గ దా అస్సి. కో జాక డంకుక నెత్తిర్తి. తుమ్క సెక్తి ఒగ్గర్ నాయ్ మెన ఆవ్ జాని. జలెకి, అంచె కోడు నిదానుమ్తె ఇండ అస్సున్, చి అంచె నావ్చి మరియాద్ కడ్డి రితి కెర్పు నాయ్.

9 ఈందె, 'యూదుల్ అమ్' మెన అబద్దుమ్క సంగిత, నిజుమ్చ యూదుల్ నెంజిల, సయ్తాన్చి సంగుమ్తె బెదితనక కిచ్చొ కెరిందె మెలె, తుమ్చి చట్టె జేవ్ సెర్పు సెడ్డి రితి జర్తు కెరిందె, చి తుమ్క ఆవ్ ప్రేమ అస్సి మెన జేవ్ జాన్లి రితి కెరిందె.

10 "ఆవ్ సంగిలి రితి తుమ్ నిదానుమ్క ఎత్తి ఒర్పు జా అస్సున్చి రిసా, బూలోకుమ్తె జిత మాన్సుల్ ఎత్తిజిన్క పరిచ్చ కెర్తి కాలుమ్చి బాద తుమ్క పిట్టయిందె.

11 ఆవ్ బే బేగి అన్నె జెయిందె. తుమ్క తిలిన్ నిదానుమ్ తెన్, డిట్టుమ్ దెరన; తుమ్చి బవుమానుమ్ కో కి నే ఉర్తి రితి తా.

12 కో జినుల గే, అంచొ దేముడుచి పరలోకుమ్చి గుడితెచ టీవొ కెల స్తంబుమ్ జేవ్ జతి రితి కెరిందె. జోచి

జా దేముడుచి గుడిక జేవ్ కెయ్, ములితి నాయ్. అంచొ దేముడుచి నావ్, పడ్డొ జో అంచొ దేముడుచి పట్టుమ్చి నావ్; మెలె, అంచొ దేముడు తెంతొ పరలోకుమ్ తెంతొ ఉత్త జెతికయ్ నొవి యెరూసలేమ్ పట్టుమ్చి నావ్; పడ్డొ అంచె సొంత నొవి నావ్, జేవ్ జిన్తనచి ఉప్పిర్ రెగిడిందె.

13 "సంగుమ్లక అమ్చి దేముడుచి సుద్ది తిలి ఆత్మ కిచ్చొ సంగితయ్ గే, కంగ్గొ తిలొసా సూన్తు.

లవొదికయ పట్టుమ్చ సంగుమ్చక చి ఉత్తమ్

14 "లవొదికయ పట్టుమ్చొ సంగుమ్చొ దూతక ఇసి మెన రెగుడు.

† " 'అమేన్' మెలొ, నిదానుమ్ తిలొ, సత్తిమ్ సాచి జలొసా, దేముడు జెర్మయ్లిసి ఎత్తిక ఆదారుమ్ తిలొసా తుమ్క సంగిలిన్ కిచ్చొ మెలె,

15 "తుమ్చ కమొ ఆవ్ జాని. తుమ్ ఉసుమ్ రితి నాయ్, సీడొ రితి నాయ్! తుమ్ ఉసుమ్ తంక అంచె ఆస. నాయ్ మెలె, సీడొ జలె, సీడొ మెనుక జతి.

16 జలె, తుమ్క ఉసుమ్ మెనుక నెంజె, సీడొ మెనుక నెంజె, గని దొన్నిచి నెడిమి తా, 'చెంగిల్ అస్సుమ్' మెన దస్సి తత్తసుచి రిసా తుమ్క అంచె చోడి తెంతొ తుంక గెలిందె.

17 కిచ్చొక మెలె, 'సామ్సారుమ్ జా అస్సుమ్, చెంగిల్ జా అస్సుమ్, చి అమ్క కిచ్చొ కొత్తు నాయ్' మెన తుమ్ ఉచరన్లెకి, ఆత్మక దెకిలె, తుమ్ బాద తెన్, నిస్కారుమ్ జా, బీద జా, గుడ్డి జా, డుమ్డయ్ జా అస్సున్ మెన నేన్సు.

18 "జాకయ్, తుమ్క ఆవ్ కిచ్చొ బుద్ది సంగితసి మెలె, తుమ్ సామ్సారుమ్ జతి రితి, అంచె ఆగితె డయ్ పూర్తి చెంగిల్ కెర్తి బజరి గెనన. తుమ్ డుమ్డయ్ తతిసి నే డీస్తి రితి గలనుక మెన ఆవ్ దెత చొక్కెల పాలల్ గెనన, చి తుమ్చ అంకివొ చెంగిల్ జా డీస్తి రితి, కాటిక అంచెతె గెనన.

19 ఆవ్ కక్క ప్రేమ అస్సి గే, జోచి తప్పుల్చి రుజ్జు దెకవ, 'నమయుమ్ తెన్నిబుద్ది జతు' మెనయ్ సిచ్చ దెతసి. జాకయ్, చెంగిల్ జంక ఆస జా, తుమ్చ తప్పుల్ ఒప్పున, పెట్టి దుకుమ్ జా, తప్పుల్ ముల.

20 ఈందె, తుమ్చి కెప్పి ఇత్తల్తొ ఆవ్ టీవొజ పెట్టసి. తుమ్తె కో అంచె అవాడ్ నూన కెప్పి ఉగుడుల గే, జోచి తెడి జా పెన జెయిందె, చి జో తెన్ అన్నిమ్ కయిందె, చి జో అంచె తెన్ అన్నిమ్ కయెదె.

21 కో జినుల గే, ఆవ్ కిసి జిన కెర అంచొ అబ్బొ జలొ దేముడుచి సింగాసనుమ్తె జో తెన్ బెద వెన అస్సి గే, దస్సి, జేవ్ అంచె తెన్ అంచె సింగాసనుమ్తె వెనుక మెన, వరుమ్ దెయిందె.

22 "సంగుమ్లక అమ్చి దేముడుచి సుద్ది తిలి ఆత్మ కిచ్చొ సంగితయ్ గే, కంగ్గొ తిలొసా సూన్తు."

† 3:14 3:14 మెలె, సత్తిమ్ కెర్తి, నిజుమ్ తిలొ, ఎత్తి జర్తు కెర్తిసా.

4

పరలోకుమతే సిజాసనుమ్

1 ఇన్నెచి పడ్డో ఆవ్ దెకిలయ్, పరలోకుమతే పెసితి కెప్పి ఉగ్గి జా అస్సె! అన్నె, అగ్గె తొలితో ఆవ్ సూన్లి * అవాడ్ నప్పిర్మూరిచి అవాడ్చి రితి ఎక్కిలోచి అవాడ్, అంక, “ఇత్తల్ వెగ జే, చి ఇన్నెచి పడ్డోక కిచ్చొ జర్గు జంక అస్సె గే, తుక దెకయిందె” మెన సంగిలన్.

2 సంగిల్ బేగి, దేముడుచి యేసుచి ఆత్మనెక్కిక ఒత్త పరలోకుమతే తిలయ్, ఒత్త ఏక్ సిజాసనుమ్ అస్సె, చి సింగాసనుమతే ఎక్కిలో వెస అస్సె!

3 జో ఒత్త వెసిలోసా కిసి డీసిలన్ మెలె, వజ్రుమచి రితి చొకు, చి రితి ఎరస ఉజిడి లగిలన్, చి సిజాసనుమచి సుట్టునంత పచ్చన రంగుచి దూన్చి ఉజిడి లగితె తిలి.

4 జా సింగాసనుమచి సుట్టునంత అన్నె విస్సెక్ చెత్తర్ సిజాసనల్ తిల, చి జేవ్ సిజాసనల్ ఎక్కికెత్ విస్సెక్ చెత్తర్జిన్ చొక్కిల పాలల్ గలన్ల, బోడి బజర్చ కిరీటల్ గలన్ల, విస్సెక్ చెత్తర్జిన్ వెల్లెల మాన్సుల్ వెస అస్తి.

5 జా సిజాసనుమ్ తెంతో బిజిలి మొల్కితయ్, చి అవాడ్లుచి ఉర్ముల్చి అవాడ్ జెతయ్. సింగాసనుమచి పురైతో వత్తివొచ సత్తు దివ్వొ లగితతి. జేవ్ దివ్వొ దేముడుచి † సత్తు ఆత్మల్.

6 పడ్డో సిజాసనుమచి పురైతో గాజుచి రితి టేంటుచి సముద్దుమ్ తిలి. పడ్డో సింగాసనుమచి సుట్టునంత, జేవ్చ చెత్తర్ పక్కలె, చెత్తర్ జీవుల్ తిల. ఏక్ పక్క ఏక్ జీవు. జోవయింతె బెర్తు అంకివొ, ముకొమ్ పక్క పడ్డో పక్క కి తిల.

7 తొలితోచొ జీవు కిసాచొ మెలె, సింపుమ్చొ రితో. అన్నెక్ జీవు వసాని పిల్లచొ రితో, అన్నెక్ జీవుక మాన్సుచి మొకొమ్ చి, అన్నెక్ జీవు ఉడ్డితో గిద్దుచొ రితో డీసిలన్.

8 జేవ్ చెత్తర్ జీవుల్ ఎక్కిక, ఏక్ ఏక్ జీవుక సాపు రెప్పల్ తిల, అన్నె, ఉప్పిరి కి, జోవయించి రెప్పల్ తెడి కి బెర్తు అంకివొ తిల, చి రాతి మెద్దెనె కిచ్చొ గనుమ్ గాయుక ముల్లి నాయ్ మెలె,

“ఎక్కిచి ఉప్పిరి అదికారుమ్ తిలో దేముడు, అగ్గె తిలోసా, అప్పె తతోసా, కెయ్క తెయ్క తంక తిలోసా, ఎక్కి సుద్ది తిలోసా, ఎక్కి సుద్ది తిలోసా, ఎక్కి సుద్ది తిలోసా!” మెన గాయితె తత్తతి.

9 పడ్డో, సింగాసనుమతే వెసిలో కెయ్క తెయ్క జితోసాక జేవ్ చెత్తర్ జీవుల్ కెయ్క గవురుమ్, మరియాద దెతతి, కెయ్క జో కెర్లి దయక జోచి సర్ద సంగితె తతి పొది,

10 విస్సెక్ చెత్తర్జిన్ జేవ్ వెల్లెల మాన్సుల్ సింగాసనుమతే వెసిలోసాచి చట్టె నెర్ను సేడ, జేవ్ కెయ్క తెయ్క జితోసాక జోకర్తతి. సిజాసనుమచి పురైతో జోవయించ కిరీటల్ తియ దా గనుమ్ గాయితతి.

11 “తుయి అమ్చొ ప్రబు, అమ్చొ దేముడు విలువతిలోసా గవురుమ్, మరియాద, అదికారుమ్ తుక కలుగు జంక. కిచ్చొక మెలె, ఎత్కిక కి తూయి జెర్ముయ్లది, చి ఇసి జర్గు జంక తుచి ఇస్టుమ్ జా, జేవ్క జెర్ముయ్లది.” మెన గాయితె తత్తతి.

5

సుట్టుప కెర్లి పుస్తకుమ్ మెండపిల్ల నదు కెర్లిసి

1 పడ్డో కిచ్చొ దెకిలయ్ మెలె, సిజాసనుమతే వెస తిలోసాచొ ఉజిల్ అత్తి సుట్టుప కెర్లి పుస్తకుమ్ దెకిలయ్. జా పుస్తకుమచి తెడి, ఉప్పిరి కి రెగిడ్డిన్ తిలి. చి కో ఇస్టుమ్ అయ్లి రితి జా సుట్టుప కెర్లి పుస్తకుమ్ నే ఉగుడుక మెన, సత్తు ముద్దల్ తెన్ ముద్ద గెల తిల.

2 తెదొడి కిచ్చొ దెకిలయ్ మెలె, డిట్టుమ్చొ దూత ఎక్కిలో గట్టిజ అవాడ్ కెరన కిచ్చొ మెన సాడుప కెర్లన్ మెలె, “ఈంజ సుట్టుప కెర్లి పుస్తకుమచ ముద్ద కడ ఉగుడుక తగువ జలోసా కో?” మెన కేక్ గల్లో.

3 గని సుట్టుప కెర్లి జా పుస్తకుమ్ ఉగుడుక జలెకు, ఒత్త తిలిసి దెకుక జలెకు, బూలోకుమతే కి పరలోకుమతే కి, బూలోకుమక ఎట్టో లోకుమతే కి తగువ జలోసా కో కి డీసె నాయ్ చి రిసా,

4 ఆవ్ ఏడ గెలయ్; జా సుట్టుప కెర్లి పుస్తకుమ్ ఉగుడుక కి ఒత్త తిలిసి దెకుక కికో తగువ జలోసా డీసె నాయ్ చి రిసా.

5 తెదొడి, ఒత్తచ వెల్లెల మాన్సుల్తే ఎక్కిలో అంక, “ఏడు నాయ్. ఈందె, యూదా పూర్గుమ్చొచి సెకుమతే జెర్మిలో వెల్లొ సింపుమ్ జలో రితోసా, దావీదుచి సెకుమతేచి చేరుతె బార్ జలోసా, జీన అస్సె, చి సుట్టుప కెర్లి జా పుస్తకుమ్ ఉగుడుక, చి జేవ్ సత్తు ముద్దల్ కడుక జో తగువ జా తిలోసా” మెన సంగిలన్.

6 తెదొడి, జా సింగాసనుమక చి జేవ్ * చెత్తర్ జీవుల్క చి జేవ్ విస్సెక్ చెత్తర్జిన్ వెల్లెల మాన్సుల్చి నెడమె ఏక్ † మెండపిల్ల టీవోజ తిలిన్ దెకిలయ్. కిసా తిలో మెలె, అర్చితుమ్క కండయ్ జలి రితి జా తిలన్, చి జోక సత్తు కొమ్ముల్ చి సత్తు అంకివొ తిల. ఈంజేవ్ కిచ్చొ జవుల మెలె, దేముడు ఒండి బూలోకుమతే తెద్రయ్ల జోచ ‡ సత్తు ఆత్మల్.

* 4:1 4:1 1:10 దెక † 4:5 4:5 ఎక్కి అదికారుమ్ తిలో దేముడుచి సుద్ది తిలి అత్తక ఈంజ టాలి జతయ్. 1:4చి ఎట్టొచి చి కొడొ దెక. 4:6-8 దెక. ‡ 5:6 5:6 యోహాను 1:29, 36. † 5:6 5:6 1:4చి ఎట్టొచి కొడొ దెక.

* 5:6 5:6

7 జా మెండపిల్ల, జలె, పురె జా, జా సింగాసనుమ్తె వెన తిలోసాచి ఉజల్ అత్తి తెంతో సుట్టుప జలి జా పుస్తకుమ్ నజీలన్.

8 సుట్టుప జలి జా పుస్తకుమ్ నజీతికయ్, జేవ్ చెత్తర్ జివుల్, జేవ్ విస్సెక్ చెత్తర్జిన్ వెల్లెల మాన్సుల్, జా మెండపిల్లచి మొక్కె సెర్ను సేడ్ల. జేవ్ ఎత్తిజిన్తె ఎత్తి సుదల్ కిచ్చొ దెర తిలో మెలె, ఎక్కెక్ వీనెల్, చి బజర్చ గిన్నలు. జేవ్ గిన్నల్తె కిచ్చొ తిలి మెలె, బెర్తు దూపుమ్ తిలి. జా దూపుమ్చి అర్దుమ్ కిచ్చొ మెలె, ప్రబుచ సొంత జల మాన్సుల్చ ప్రార్దనల్.

9 తెదొడి జేవ్ ఏక్ నొవి గనుమ్ గాయిల. “ఈంజ సుట్టుప జలి జా పుస్తకుమ్ నజ, జేవ్చి ముద్ద కడుక తూయి తగుప జలొసా! కిచ్చొక మెలె, తూయి అర్పితుమ్ జా మొర, దేముడుచ జా గెతు మెన తుచి సూయి జలి లొయి తెన్ మాన్సుల్క అన్నె గెనన్లది. జేవ్ మాన్సుల్క ఎత్తి సెకుమ్ తెంతో, ఎత్తి బాసల్ తెంతో, ఎత్తి ప్రెజల్ తెంతో, ఎత్తి రాజిమ్ తెంతో గెనన, జోవయింక 10 ‘అమ్చొ దేముడుచి రాజిమ్తెచ రానల్ జేవ్ జా జోవయింక పూజర్లు జతు’ మెన, జర్గు కెర అస్సిసి, చి బూలోకుమ్చి ఉప్పిరి జేవ్ ఏలుప కెరుల.” మెన గనుమ్ గాయిల.

11 పడ్డొ అన్నె దెకిలయ్, చి సింగాసనుమ్చి, జేవ్ జివుల్చి, వెల్లో మాన్సుల్చి సుట్టునంత కిచ్చొ సూన్లయ్ మెలె, ఒగ్గర్ ఒగ్గర్ దూతల్చ, వెయిలుచి ఉప్పిరి వెయిలు, కోట్టుచి ఉప్పిరి కోట్టుచ దూతల్చ అవాడ్లు సూన్లయ్.

12 గట్టిజ అవాడ్ కెరన కిచ్చొ మెన కేక్ గెల్తె తిల మెలె, “అర్పితుమ్ జలొ ఈంజొ మెండపిల్ల జతొసా జలె, అదికారుమ్, సామ్సారుమ్, గ్యానుమ్, సెక్తి, మరియాద, గవురుమ్, చి మాన్సుల్ జోచి గవురుమ్ గాయితిసి జోకయ్ కలుగు జంక జొయ్యి తగుప జలొసా!” మెన కేకుల్ గెల్తె తిల.

13 పడ్డొ పరలోకుమ్తెచ, బూలోకుమ్తెచ, చి బూలోకుమ్క ఎట్టొ లోకుమ్తెచ, చి సముద్రుమ్తెచ, జేవ్ చెత్తర్తెచ ఎత్తి జివు ఎత్తి వస్తువ కేక్ గలిసి కిచ్చొ మెన సూన్లయ్ మెలె, “సింగాసనుమ్తె వెసిలోసాచి, చి మెండపిల్లచి గవురుమ్ ఎత్తి కెయ్తె తెయ్తె గాయుతు!

కెయ్తె తెయ్తె గాయుతు!

§ 5:14 5:14 ఎత్తి బాస తెన్ ‘అమేన్’ మెనుల. * 6:1 6:1 4:6-8 దెక. † 6:2 6:2 జా కిరీటుమ్ ఎత్తి అదికారుమ్ తిలో దేముడు సొంత జో గోడతె వెగిలోసాక దిలన్ గే మెండపిల్ల జలొ యేసు దిలన్ గే, కచిగె అత్తి జోవయింక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజెలె జర్గు జతి నాయ్. ఈంజేవ్ కమొ ఎత్తి జొయ్యి జర్గు కెర్తయ్, గెద. ‡ 6:4 6:4 కో దిల గే నేనుమ్. § 6:6 6:6 ఈంజ దేసిమి కిసి ముక్కిమ్క చింబొ కవుల గే, జా దేసిమిచ ముక్కిమ్క గోదుమ్క కెర్లి పొడియొ గే పొడియొ గే రంద దనచక అన్నిమ్ కెరుల. గని కారు తిలె, ఎత్తి కరీది జా గెలె, ఈంజ దేసిమి కిసి తందుడచి కంట డేవొ తొక్క కరీది జయెదె, చి చింబొ నెంజెలె కులర్ కవుల గే, దస్సి జా దేసిమి గారు తిలె, బార్లి దాన్క అన్నిమ్ రందుల; గెనుక నవుక ఒత్తచి రిసా.

మరియాద గవురుమ్, అదికారుమ్ ఎత్తి జోక కలుగు జవున్, జోక కెయ్తె తెయ్తె తవున్!” మెన కేక్ గెల్తె తిలిసి సూన్లయ్.

14 తెదొడి, “సిఅమేన్!” మెన జేవ్ చెత్తర్ జివుల్ సంగిల, చి వెల్లెల మాన్సుల్ సెర్ను సేడ్ సింగాసనుమ్తె వెసిలోసాక చి మెండపిల్లక జొకర్ల.

6

సుట్టుప కెర్లి పుస్తకుమ్చ సత్తు ముద్దల్

1 తెదొడి కిచ్చొ దెకిలయ్ మెలె, మెండపిల్ల జేవ్ సత్తు ముద్దల్తె తొలితో చి కడ్డన్, చి జేవ్ *చెత్తర్ జివుల్తె ఎక్కిలో, ఉర్ముల్చి రితి అవాడ్ కెరన “ఇన్నె జే!” మెలన్.

2 ఆవ్ దెకిలె, ఆదె! చొక్కెలో గోడొ డిసిలి, చి జా గోడొతె వెగిలోసాక దూన్ తిలి, చి జోక ఏక్ కిరీటుమ్ †దిల, చి బార్ జా, యుద్దుమ్ కెర జిన, ఒండి జినుక మెన గెలో.

3 జలె, మెండపిల్ల దొన్నిచి ముద్ద కడ్డికయ్, కిచ్చొ సూన్లయ్ మెలె, జేవ్ చెత్తర్ జివుల్తె అన్నెక జివు “ఇన్నె జే!” మెన కేక్ గలన్, చి

4 అన్నెక గోడొ; ఒగ్గర్ ఎరనచొ; బార్ జలన్. జా గోడొతె వెగిలోసాక కిచ్చొ సెలవ్ తిలి మెలె, ఒండి బూలోకుమ్తెచి సేంతుమ్ పిట్టవుక; మాన్సుల్ ఎక్కిలోక ఎక్కిలో మార్తి రితి; చి వెల్లి కండా జోక ‡దిల.

5 జలె మెండపిల్ల తిన్నిచి ముద్ద కడ్డికయ్, తిన్నిచొ జివు “ఇన్నె జే!” మెన కేక్ గలిసి సూన్లయ్. ఆవ్ దెకిలె, ఆదె! నీడొ గోడొ, చి జాతె వెగిలోసాచి అత్తి తక్కిడి అస్సి.

6 అన్నె, జేవ్ చెత్తర్ జివుల్చి నెడేమె తెంతో ఏక్ అవాడ్ కిచ్చొ సంగిలిసి సూన్లయ్ మెలె, “ఏక్ దీసిచి కూలిచి ఎదిలి డబ్బుల్క ఎక్కి పాత్తెక్ గోదుమ్, చి ఏక్ దీసిచి కూలిచి ఎదిలి డబ్బుల్క తిని పొర్లి కిబార్లి దాన్ దొర్కు జయెదె. గని తేలుక చి ద్రాచ రస్సుమ్క గార్ కెరుక నాయ్!” మెన జా అవాడ్ కేక్ గలన్.

7 మెండపిల్ల చెత్తర్చి ముద్ద కడ్డికయ్, “ఇన్నె జే!” మెన చెత్తర్చొ జివు కేక్ గలిసి సూన్లయ్.

8 అన్నె దెకిలయ్, చి ఆదె! కిచ్చొ రంగుగె సంగుక నే బెదిలిసి రితి ఏక్ గోడొ. జాతె వెసిలోసాచి నావ్, ‘మొర్ను’, చి మొర్లన్క రకితి లోకుమ్ జోచి పట్టి గెతయ్. అన్నె, ‘మొర్ను’ మెలోసాక చి మొర్లన రకితి లోకుమ్క కిచ్చొ సెలవ్ తిలి మెలె, యుద్దుమ్ వాట్, కకుర్తి వాట్, జబ్బుల్ వాట్ చి

డొంగ్రెచ జంతువుల్ గెతి వాట్ మాన్సుల్క మార్తి సెలవ్ తిలి. ఒండి లోకుమ్క చెత్తర్ వాటల్ తిలె, జేవ్ చెత్తర్ వాటల్తె ఏక్ వాటతె మాన్సుల్క దస్సి మారుక సెలవ్ జా తిలి.

9 మెండపిల్ల పాంచ్చి ముద్ద కడ్డికయ్, పరలోకుమ్తెచి బలి దెతి టాన్చి తెడి కిచ్చొ దెకిలయ్ మెలె, విరోదుమ్ మాన్సుల్ మార్తనచ జీవుల్క దెకిలయ్. దేముడుచి సుబుమ్ కబుర్ జేవ్ సూనయ్లి రిసా, చి యేసుచి రిసా జేవ్ సాచి సంగిలి రిసా, జేవ్ విరోదుమ్ మాన్సుల్ జోవయింక మార తిలె.

10 జేవ్ దస్సి మొర్తనచ జీవుల్ గట్టిజ అవాడ్ కెరన కిచ్చొ మెన కేక్ గల మెలె, “ఎత్తిచి ఉప్పిరి అదికారుమ్ తిలో ప్రబువ, తుయి ఎత్తి. సుద్ది తిలోసా, నిజుమ్ తిలోసా, బూలోకుమ్తె జితన అమ్క మార అమ్చి లోయి సుచిలి రిసా కెయెళ జోవయింక సిచ్చ కెర్తె గే?” మెన కేక్ గలిల.

11 తెదొడి జోవయింతె ఎత్తి. మాన్సుల్క చొక్కిలో పాలల్ *దా, కిచ్చొ మెల మెలె, “అన్నె ఇదిల్ రక. మాన్సుల్ తుమ్కయ్ కిసి మార్త గే, దస్సి, తుమ్చ బావుడ్లు జత ప్రబుచ అన్నె సేవ కెర్తనక మారుల. జేవ్ దస్సి మొర్తన ఎత్తిజిన్చి లెక్క బెర్తె ఎదక రక, చి తుమ్క, జోవయింక మార్తనక సిచ్చ దెయెదె” మెన జబాబ్ దిలన్.

12 మెండపిల్ల సొవ్వుచి ముద్ద కడ్డికయ్, ఆదె! వెల్లి బూకంపుమ్ జలి. పడ్డొ పొద్దు నీడిచి కంట నీడి జా గెలి, చి ఒండి జోను లోయి రంగు జా గెలి.

13 ఆగాసుమ్చ సుక్కలు బూలోకుమ్తె సేడ్ల. వెల్లి వాదు కెర్తె †అంజూరుమ్ రూక్చ చల్లి పొదిచ కాయల్ కిసి జేడ గెచ్చుల గే, దస్సి జేవ్ సుక్కల్ జేడ గెల.

14 పడ్డొ, కేన్ జవున్ పుస్తకుమ్ ముద్దొ కెర్తె కిసి జయెదె గే, దస్సి, ఆగాసుమ్ ముద్దొ జా డీసె నాయ్, చి జోవయింక జోవయింక టాన్లు తెంతో ఎత్తి డొంగ్రల్, ఎత్తి డిబ్బ ఒత్త తెంతో గెలి.

15 తెదొడి బూలోకుమ్చ రానలు, ముక్కిమ్చ వెల్లెల మాన్సుల్, జమాన్లుచ అదికారుల్, సొమ్మార్లు, బలుమ్ సెక్తిచ మాన్సుల్, ఎత్తి మాన్సు, గొతిమాన్సు జలెకి, గొతి నెంజిలన జలెకి, డొంగ్రెచ పరోతె, రంగ్ని బోరల్తె లుంక తవుల.

16 జేవ్ డొంగ్రల్, జేవ్ రంగ్ని పత్రల్క కిచ్చొ మెన కేకుల్ గలిల మెలె, “సింగాసనుమ్తె వెసిలోసా అమ్క నే దెకిత్ రితి, అమ్చి ఉప్పిరి సేడ. మెండపిల్లచి కోపుమ్చి సిచ్చ అమ్క నే లయితి రితి అమ్క లుంకడ.

17 జోచి కోపుమ్చి సిచ్చచి వెల్లి దీసి జా అస్సె, చి జా సిచ్చచి సెక్తిక అమ్ టీవ్క నెత్తుమ్” మెన కేక్ గల సంగిల.

* 6:11 6:11 పాలల్ కో దిల గే, కో ‘రక’ మెల గే నేనుమ్, గని ఎత్తి, అదికారుమ్ తిలో దేముడు జర్లు కెరవ తయెదె మెన జానుమ్. † 6:13 6:13

అంజూరుమ్ వండ్లు బొడ్ల వండ్లుచ రిత కాయల్ జవుల. * 7:4 7:4 బయ్బిల్తె ‘ఇస్రాయేలులు’ మెలె, మాములుమ్ యూదుల్చి రిసా ‘ఇస్రాయేలులు’ మెనుల, పడ్డొ యూదుల్ నెంజిలనతె కో యేసుక నంపజతతి గే, జోవయింక కి ‘అమ్చ ఇస్రాయేలులు’ మెన ఎత్తి, అదికారుమ్ తిలో దేముడు దెకితయ్. జేక ఇన్నె ‘ఇస్రాయేలులు’ మెలె, ప్రబుక నంపజలన మొత్తుమ్క టాలి జతయ్. ‘పుంజెక్ దొన్ని విసా చెత్తర్ వెయిల్జిన్’ మెలి నంబర్చి అర్దుమ్ కిచ్చొ మెలె, ‘పూర్తి జలిసి’, ‘మొత్తుమ్ నంపజలనచి లెక్క పూర్తి జలిసి’; టాలి జతయ్.

7

దేముడుచ సేవ కెర్తనక తోడు తతి ముద్ద

1 ఇన్నెచి పడ్డొ కిచ్చొ దెకిలయ్ మెలె, బూలోకుమ్చ చెత్తర్ పక్కల చెత్తర్ దూతల్ టీవోజ తా, చెత్తర్ దిక్కుల్చి వాదు దెర, కేన్ వాదు బుయ్యె కి సముద్దుమ్తె కి, కేన్ రూక్తె కి నే వీర్తి రితి అడ్డు కెర్తతి.

2 తెదొడి, పొద్దు బార్ జతి పక్క తెంతో అన్నెక్ దూత, ఉప్పిర్ జెంక, జీవ్ తతో జీవ్ దెతో దేముడుచి ముద్ద గల్లి బిల దెర తా వెగ గెతిసి దెకిలయ్. గట్టిజ అవాడ్ కెరన, బూలోకుమ్క సముద్దుమ్క అల్లర్ కెరుక మెన సెలవ్ తిల జేవ్ చెత్తర్ దిక్కుల్చి వాదు దెర్త చెత్తర్ దూతల్క,

3 “అమ్చో దేముడుచ సేవ కెర్తన ఎత్తిజిన్చ నిర్దెలె జోచి ముద్ద గల్లె ఎదక, బుయ్యెక, సముద్దుమ్క, రుకాలె కిచ్చొ అల్లర్ కెర నాయ్!” మెన కేక్ గల్లో.

4 పడ్డొ, జీవ్ తిలో జీవ్ దెతో దేముడుచి ముద్ద జోవయింక నిర్దెలె గలంతన కెత్తిజిన్ జవుల గే, సూన్లయ్. కెత్తిజిన్ మెలె, పుంజెక్ దొన్ని విసా చెత్తర్ వెయిల్జిన్ జోచి ముద్ద గలంతన జవుల. కేనె కేనెచ మెలె, అమ్చ *ఇస్రాయేలులుచ ఎత్తి సెకుమ్లుతె బెదిలన.

5 యూదాచి సెకుమ్తె బార వెయిల్ జిన్క, రూబేనుచి సెకుమ్తె బార వెయిల్ జిన్క, గాదుచి సెకుమ్తె బార వెయిల్ జిన్క,

6 ఆసేరు సెకుమ్తె బార వెయిల్ జిన్క, నఫ్తాలిచి సెకుమ్తె బార వెయిల్ జిన్క, మనస్సేచి సెకుమ్తె బార వెయిల్ జిన్క,

7 సిమ్యానుచి సెకుమ్తె బార వెయిల్ జిన్క, లేవీచి సెకుమ్తె బార వెయిల్ జిన్క, ఇస్సాకారు సెకుమ్తె బార వెయిల్ జిన్క,

8 జెబులునుచి సెకుమ్తె బార వెయిల్ జిన్క, యోసేపుచి సెకుమ్తె బార వెయిల్ జిన్క, చి బెన్యామీను చి సెకుమ్తె బార వెయిల్ జిన్క జో జోచి ముద్ద గల తయెదె.

ప్రబుచయ్ జల మాన్సుల్ జోచి గవురుమ్ సంగిలిసి

9 ఇన్నెచి పడ్డొ అన్నె దెకితె తిలె, ఆదె! కేన్ మాన్సు లెక్క కెరుక నెతిరి జనాబ్ ఒత్త తిల. ఎత్తి రాజిమ్ తెంతో, ఎత్తి సెకుమ్ తెంతో, ఎత్తి ప్రెజల్ తెంతో, ఎత్తి బాసల్ తెంతోచ జా తా, సింగాసనుమ్చి పుర్రెతో, చి మెండపిల్లచి పుర్రెతో టీవోజ తా, చొక్కిల పాలల్ గలన అస్తి, చి జోవయింక అత్తిలె కజురుమ్ రూక్చ మట్టల్ దెరన తా,

10 గట్టిజ అవాడ్ కెరన, “మాన్సుచి రచ్చున దేముడుతెయి చి మెండ పిల్లతెయి అస్సె!” మెన కేక్ గల్లె.

11 అన్నె, సింగాసనుమచి సుట్టునంత, విస్సెక్ చెత్తర్ జిన్ వెల్లెల మాన్సుల్చి సుట్టునంత, †చెత్తర్ జివుల్చి సుట్టునంత దూతల్ ఎత్తి టీవోజ తా, జోచి మొక్కె సెర్ను సేడ కిచ్చొ మెన సంగ దేముడుక జొకర్ల మెలె,

12 “అమేన్!‡ మాన్సుల్ జోచి గవురుమ్ గాయితిసి, గవురుమ్, గ్యానుమ్, జోచి దయచి రిసా, మాన్సుల్ జోచి నర్ల సంగితిసి, మరియాద దెకితిసి, సెక్తి అన్నె అదికారుమ్ ఎత్తి అమ్చొ దేముడుక కలుగు జవున్ కెయఁక తెయఁక నే పిట్టె జోక తవున్! ఆమేన్!” మెన కేక్ గల్ల.

ఒగ్గర్ బాదల్తె ప్రబుచయ్ జల మాన్సుల్ జిన్సి

13 తెదొడి వెల్లెల మాన్సుల్తె ఎక్కిలో అంక పుసిలన్. “ఈంజేవ్ చొక్కిల పాలల్ గలన తిలన కొన్న? కేనె తెంతో జా అస్తి?”

14 జాకయ్ కిచ్చొ మెలయ్ మెలె, “బాబు, తుయి జాన్సి” మెలయ్, చి జేవ్, “ఒగ్గర్ అల్లర్ జంక తిలి జా వెల్లి బాదతె తెంతో జిన అయ్లన. ఈంజేవ్, మెండపిల్లచి లోయితె జోవయింక పాలల్ కేడన చొకు కెరన అస్తి.

15 జాకయ్, జేవ్ దేముడుచి సింగాసనుమచి మొక్కె అస్తి, చి రాతి మెద్దెనె జోచి దేవులుమతె జోచి సేవ కెర్తె తత్తతి. అన్నె, సింగాసనుమతె వెసిలోసా జోవయింక జోతె రక రక, జేవ్ కిచ్చొ అల్లర్ నే జతి రితి జోచి నీడతె డంకెదె,

16 జోవయింక అప్పె తెంతో కెయఁక కి చూ కెరె నాయ్. తాన్ కెరె నాయ్. ఒప్పడక సుకా గెతి నాయ్, కేనెచి ఒగ్గర్ తాత్ లయె నాయ్.

17 కిచ్చొక మెలె, సింగాసనుమచి నెడిమి తెంతో మెండపిల్ల జోవయింక గొవుడు జా రకెదె, చి జీవ్ దెత పానివొ దెకవ పియడెదె. అన్నె, జోవయింక అంకివొతె ఆనునొ పూర్తి పుంచ గెలెదె.” మెన జో వెల్లొ మాన్సు సంగిలన్.

8

సుట్టుప కెర్లి పుస్తకుమచి ఆకర్చి ముద్ద మెండపిల్ల కడ్డిసి

1 మెండపిల్ల సత్తుచి ముద్ద కడ్డికయ్, రమారమి అర గంట ఎద పరలోకుమతె కిచ్చొ అవాడ్ నాయ్.

2 పడ్డొ, దేముడుచి మొక్కె టీవోజ తిల సత్తు దూతల్క దెకిలయ్. జోవయింక ఎక్కెక్ నప్పిర్మూరివొ *దిల.

3 తెదొడి అన్నెక్లొ దూత జా కెర, బజర్చి గిన్న దెరన బలి దెతి టాన్చి పురె టీవో జలన్. చి ‘ప్రబుచయ్ జల మాన్సుల్చ ప్రార్దనల్ తెన్ బెదున్’ మెన, సింగాసనుమచి పురెతోచి బలి దెతి టాన్చి జేవ్చి దుమ్మొ ఉడ్డితి రిసా జో దూత డయిక మెన, జోక ఒగ్గర్ దూపుమ్ †దిల.

4 చి దేముడుచి మొక్కె పావెతి రితి, జోవయింకయ్ జల మాన్సుల్చ ప్రార్దనల్ తెన్ జా దూపుమ్చి దుమ్మొ బెద, జో దూతచి అత్తి తెంతో ఉడ్డ దేముడుచి మొక్కె గెలి.

5 తెదొడి జో దూత జా దూపుమ్ డయితి గిన్న దెరన, బలి దెతి టాన్చి ఉప్పిర్చి ఆగి ఇంగుడ్లు సగుమ్ ఒత్త బెరవ కెర, బూలోకుమచి ఉప్పిరి గల దిలన్, చి ఉర్చుల్ కెర్లి, అవాడ్లుచి అవాడ్ అయ్లి, బిజిలి మొల్కిలి, చి బూకంపుమ్ జలి.

సత్తు నప్పిర్మూరివొతె ఏక్ చెత్తర్ వర్న తెన్ పుజిలిసి

6 తెదొడి సత్తు నప్పిర్మూరివొ దెర్ల సత్తుజిన్ దూతల్ జేవ్ నప్పిర్మూరివొ పుజుక తెయార్ జల.

7 తొలితొచొ దూత జోచి నప్పిర్మూరి పుజిలన్, చి కిచ్చొ తెదొడి బార్ జలి మెలె, లోయి తెన్ కలొయ్ జలి కరపత్తల్ చి ఆగి సేడ, బుయ్యె సూయి జలి, చి ఒండి బూలోకుమతెచి తిన్ని వాటల్తె ఏక్ వాట పూర్తి డడ్డ గెలి, చి రూకవ తిన్ని వాటల్తె ఏక్ వాట పూర్తి డడ్డ గెల, చి చివ్వర్ ఎత్తి డడ్డ గెలి.

8 తెదొడి దొన్నిచొ దూత జోచి నప్పిర్మూరి పుజిలన్, చి వెల్లి డొంగు జతి రితిసి, ఆగిక డడ్డ కెర, సముద్దుమతె గలి జలి.

9 అన్నె, ఒండి సముద్దుమచి తిన్ని వాటల్తె ఏక్ వాట లోయి జా గెలి. సముద్దుమతెచి జివుల్చ తిన్ని వాటల్క ఏక్ వాట మొర గెల, చి ఒడల్ మొత్తుమచ తిన్ని వాటల్తె ఏక్ వాట నాసెనుమ్ జా గెల.

10 తెదొడి తిన్నిచొ దూత జోచి నప్పిర్మూరి పుజిలన్, చి పరలోకుమ తెంతో వెల్లొ సుక్కొ సేడ, వత్తిచి దీవు లగిలి రితి జా, ఒండి బూలోకుమచ గడ్డెవ తిన్ని వాటల్తె ఏక్ వాట గడ్డెతె చి ఊటల్తె సేడ్లన్.

11 జో సుక్కొచి నావ్ ‘‡కోడు వాసెన’, చి ఒండి బూలోకుమచ పానివొక తిన్ని వాటల్తె ఏక్ వాట కోడ్ జా గెల. జా కోడు తిలొ పాని పిలి రిసా, ఒగ్గర్జిన్ మాన్సుల్ మొర గెల.

12 తెదొడి చెత్తర్చొ దూత జోచి నప్పిర్మూరి పుజిలన్, చి పొద్దుక తిన్ని వాటల్తె ఏక్ వాటక, జోనుచ తిన్ని వాటల్తె ఏక్ వాటక, చి సుక్కల్చ తిన్ని వాటల్తె ఏక్ వాటక దెబ్బ లయిలి. జోవయించి ఉజిడి అందర్ జా గెలి. ఒండి మెద్దెనచ తిన్ని వాటల్తె ఏక్ వాటక పొద్దుచి ఉజిడి లగ

† 7:11 7:11 4:6-8. ‡ 7:12 7:12 ఎబ్రి జాస తెన్ ‘అమేన్’ మెనుల. * 8:2 8:2 ఎత్తి అదికారుమ్ తిలొ దేముడు దిలన్ గే, మెండపిల్ల జలొ యేసు దిలన్ గే, కచిగ అత్తి జోవయింక దొవడ్ల గే, గని జేవ్ నప్పిర్లు జోవయింక తంక కచితుమ్ ఎత్తి అదికారుమ్ తిలొ దేముడుచి సెలవ్ జా తయెదె. † 8:3 8:3 కో దిల గే నేనుమ్. ‡ 8:11 8:11 జా సుక్కొక మాచివత్తి మెన నావ్. జాచి అర్దుమ్ విస్సుమ్ అన్నె కోడు కి అన్నె. మాన్సుల్ కో కయెల మొర గెచ్చుల.

నాయ్, చి ఒండి రాతిచ తిన్ని వాటల్తె ఏక్ వాటక జోనుచి సుక్కల్చి ఉజడి లగె నాయ్.

13 తెదోడి ఆవ్ అన్నె దెకిలయ్, చి కిచ్చో సూన్లయ్ మెలె, పొద్దు ఆగానుమ్చి మదెనె ఏక్ ఏక్ గిద్దు ఉడ్డితె తా గట్టిజ బర్న దా కిచ్చో మెన ఒర్నితె తిలి మెలె, “అయ్యో! అయ్యో! అయ్యో! అన్నెక్ తిన్ని దూతల్ వర్న తెన్ జోవయించ నప్పిరమూరివో అప్పె పుజుక తిలిన్క బూలోకుమ్తె జితన ఎత్తిజినక కెద్ది కస్తుమ్ కెద్ది నస్తుమ్!” మెన సంగ గిద్దు ఉడ్డితె తిలన్.

9

పాచ్చో దూత జోచి నప్పిరమూరి పుజిలిసి

1 తెదోడి పాచ్చో దూత జోచి నప్పిరమూరి పుజిలన్, చి కిచ్చో దెకిలయ్ మెలె, పరలోకుమ్ తెంతో బూలోకుమ్ ఎద ఏక్ సుక్కో సేడ్లన్, చి జో సుక్కో జతోసాక ఏక్ తాలుమ్ *దిల. మట్టు నెంజిలి దిగిలి గొయితె సేడ్డి వాట్ ఉగిడ్డి తాలుమ్.

2 మట్టు నెంజిలి జా గొయితె సేడ్డి వాట్ ఉగిడ్లన్, తెదోడి వెల్లిజా గొయి తెంతో వెల్లి ఆగి గొయ్చి రితిచి ఆగిచి దుమ్మో బార్ జలన్, చి జా గొయి తెంతో బార్ జతి దుమ్మోక పొద్దు కి ఆగానుమ్ కి గాందు డంకిలి రితి జా అందర్ జల.

3 పడ్డో, జా దుమ్మో తెంతో చిట్కల్ బూలోకుమ్తె బార్ జా బెర్ల, చి విన్నుమ్ కుర్దుచి ఎదిలి సెక్తి జోవయింక †దిల.

4 జోవయింక కిచ్చో ఆడ్ర దిలి మెలె, బుయ్యోచి చివ్వర్ గే కిచ్చో మొక్కల్ గే, కేన్ రూకుక గే పాడ్ కెరుక జయె నాయ్. గని, కేన్ మాన్సుల్క దేముడుచి ముద్ర జోచి నిర్దె తయె నాయ్ గే, జోకయ్ సిచ్చ కెరుక.

5 పాచ్ జోన్నో ఎద జోవయింక సిచ్చచ నొప్పుల్ కెరుక మెన జేవ్ చిట్కల్క సెలవ్ తిలి. గని కక్క మారుక సెలవ్ నాయ్. జేవ్ నొప్పి దెతిసి కిసిచి మెలె, మాన్సుక విన్నుమ్ కుర్దు చప్పిల్తె కిసి నొప్పి కెరెదె గే, తెద్ది నొప్పి జల.

6 జా పొదులె కిసి తయెదె మెలె, ‘మొర్ను జెవున్’ మెన మాన్సుల్ కోరప జవుల, గని మొరుక నెతిరి. మొరుక ఆనయ జవుల, గని మొర్ను జోవయింక కొంకడ ఉట్ట నిగెదె.

7 డీసుక జలె, జేవ్ చిట్కల్ కీస తిల మెలె, యుద్దుమ్క తెయార్ జల గోడల్చ రిత తిల. జోవయించ బోడిలె బజర్చ కిరిటల్ రిత తిల. జోవయించ మొకొమ్లు మాన్సుల్చ మొకొమ్లు రిత తిల.

8 జోవయించ రోమల్ తెర్బోదల్చి సెండిచి రితి, జోవయించ దంతో సింపుమ్లుచి దంతో రిత తిల.

* 9:1 9:1 జా తాలల్ దేముడు సొంత జో సుక్కో జతోసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజిలె జర్గు జతి నాయ్. † 9:3 9:3 జా తాలల్ దేముడు సొంత జో సుక్కో జతోసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజిలె జర్గు జతి నాయ్.

9 ఇనుము డొల్లు రిత డీస్త పొరల్ జోవయించి చామ్తె తవుల, చి ఉడ్డిలె జోవయించ రెప్పల్ కదుల్ జతి అవాడ్ కిసి మెలె, గోడలు జమాన్లుచి రదుమ్ కడన యుద్దుమ్తె నిగ గెతి రితి అవాడ్ జతె తవుల.

10 జోవయించ తోకల్ కీస మెలె, విన్నుమ్ కుర్దుచి తోకల్చి రితి బూసుల. జోవయించ తోకల్తె పాచ్ జోన్నో ఎద మాన్సుల్క నొప్పి దెతి సెక్తి తయెదె.

11 జోవయించి ఉప్పిర్చో రానొ కొన్నో జయెదె మెలె, మట్టు నెంజిలి గొయి రకితో దూత. ఎబ్బీ బాస తెన్ జో దూతచి నావ్ ‘అబద్దోను’, చి జా నావ్క అర్దుమ్ ‘నాసెనుమ్ కెర్దోసా’. గ్రీకు బాస తెన్ జా నావ్ ‘అపొల్లయోను’ మెనుల.

12 జా సిచ్చచి గండిమ్ తొలితో చి. ఒత్త తెంతో దన సిచ్చల్ అన్నె దొన్ని జర్గు జంక జయెదె.

సొవ్వో దూత జోవయించి నప్పిరమూరి పుజిలిసి

13 తెదోడి సొవ్వో దూత జోచి నప్పిరమూరి పుజిలన్, చి దేముడుచి మొక్కెచి బలి దెతి బజార్ టాన్చ చెత్తర్ కొమ్ముల్ తెంతో ఏక్ అవాడ్ అయ్లిసి సూన్లయ్.

14 జా అవాడ్ సొవ్వోచి నప్పిరమూరి దెరితో ఈంజో దూతక, “యూప్రటీసు మెలి వెల్లి గడ్డె బంద తిల చెత్తర్ దూతల్క విడ్డల్ కెరు” మెన జా అవాడ్ సంగిలన్.

15 జాకయ్ జేవ్ చెత్తర్ దూతల్క బందిలిసి ఈంజో దూత డీసిలన్. జేవ్ జయ్యి గడియ, జయ్యి దీసి, జయ్యి జోన్నో, జయ్యి వెర్ని విడ్డల్ జా ఒండి లోకుమ్చ ప్రజల్క తిన్ని వాటల్తె ఏక్ వాట జిన్క మార్తి రిసా రకితి రితి తెయార్ జా తిల.

16 జేవ్ దూతల్చి తెడి జా సిచ్చ జర్గు కెర్ల గోడల్తె వెగిల నయ్న్యుములు కెత్తిజిన్ జవుల మెలె, విస్సెక్ కోట్లు జిన్, జా లెక్క ఆవ్ సూన్లయ్.

17 జలె, జా డీసిల్ సివ్నతె జేవ్ నయ్న్యుమ్ వెగిల గోడలు అంక కీస డీసిల మెలె, జోవయింతె వెగిలసక గుండె ఆగి రంగు, నీలిమ్ రంగు చి ఎడ్డి రంగు బెదిల. ఎక్కెడ్ డాలు జత రిత ఇనుము సొక్కల్ గలన తిల, చి జేవ్ గోడల్చ బోడివో కీస తిల మెలె, సింపుమ్లుచ బోడివో రిత డీసిల, చి జోవయించి చోడి తెంతో ఆగి, దుమ్మో, చి ఎడ్డి రితి దుమ్మో బార్ జతె తిల.

18 జోవయించి చోడి తెంతో బార్ జతి ఆగి, దుమ్మో, ఎడ్డి దుమ్మో బార్ జతె తిలిన్క ఒండి బూలోకుమ్చ మాన్సుల్చ తిన్ని వాటల్తె ఏక్ వాటజిన్ మొర్ల.

19 కిచ్చోక మెలె, జేవ్ గోడలు అల్లర్ కెర్తి సెక్తి కిచ్చోతె మెలె, జోవయించి చోడితె చి జోవయించ తోకల్తె తిల. జోవయించ తోకల్ కీస మెలె, అయివోచ రిత జా బోడివో తెన్

తవుల, చి జోవయించ తోకల్కయ్ మాన్సుల్క గాయిమ్ కెరుల.

20 జలె, జా డీసిలిన్తె అన్నె కిచ్చొ జలి మెలె, ఈంజేవ్ సిచ్చల్ నే మార్ల సేనిల మాన్సుల్ కిసి జల మెలె, జేవ్ కెర్ల కమొక విసారుమ్ జతి నాయ్, ములితి నాయ్, చి బూతల్క, చి బజర్క, వెండిక, కంచుక, పత్తుర్క, దారుక తెయార్ కెర్ల బొమ్మల్క జొకరుక ములితి నాయ్. దస్స బొమ్మల్ దెకుక గే సూసుక గే ఇండుక గే నెతిర్లె కి.

21 అన్నె, జేవ్ మాన్సుల్ కెర్ల హత్యలు, మెంగుర్ కమ్మొ, లంజెకమ్మొ, చోర్ కమ్మొక, విసారుమ్ జతి నాయ్, ములితి నాయ్.

10

ఒగ్గర్ సత్తుచొ అన్నెక్ దూత

1 పడ్డొ, ఒగ్గర్ సత్తుచొ అన్నెక్ దూత పరలోకుమ్ తెంతొ ఉత్త జెంక దెకిలయ్. జో మబ్బు గలన్లి రితి జా, మబ్బుచి తెడి తా, జోచి బోడిచి ఉప్పిరి పచ్చన వయ్డూరుమ్ రంగుచి దూని లగిల్ రితి జా, జోచి మొకొమ్ పొద్దుచి రితి ఉజిడి తా, జోచ చట్టొ ఆగి రిత తంబల్ రిత తా.

2 ఏక్ ఇదిలిన్ పుస్తకుమ్ జోచి అత్తి తిలి. అగ్గె సుట్టుప జా తిలి, గని అప్పె ఉగ్గి జా అస్సె. జలె, జోచొ ఉజిల్ చాటు సముద్దుమ్తె తియ, డెబ్బి చాటు బుయ్యె తియ సుద,

3 సింవుమ్చి అవాడ్ రితి గట్టిజ అవాడ్ కెరన, ఒర్నిలన్. ఒర్నితికయ్, సత్తు ఉర్మల్ కెర జబాబ్ దిల.

4 సత్తు ఉర్మల్ కెర్తికయ్, ఆవ్ జేవ్ సంగిలిసి రెగిడ్తయ్, గని పరలోకుమ్ తెంతొ అయ్లి ఏక్ అవాడ్ సూన్లయ్. అంక కిచ్చొ సంగిలన్ మెలె, “జేవ్ సత్తు ఉర్మల్ సంగితిసి గుట్టు తతి రితి కెరు, రెగుడ్ నాయ్” మెన ఆడ్ర దిలన్.

5 తెదొడి సముద్దుమ్తె బుయ్యె టీవొజ, ఆవ్ దెకిలో దూత జోచొ ఉజిల్ ఆతు పరలోకుమ్ పక్క ఉక్కుల.

6 “కెయక తెయక నే పిట్టె జితొ, పరలోకుమ్ చి ఒత్త తిలిసి ఎత్తి, బూలోకుమ్చి ఒత్త తిలిసి ఎత్తి, అన్నె సముద్దుమ్చి ఒత్త తిలిసి ఎత్తి, జెర్మన్ కెర్లొసా సాచి” మెన ఒట్టు గలన, కిచ్చొ సాడుప కెర్లన్ మెలె, “సమయమ్ జా అయ్లి. అన్నె వాయిద కెరుక నెంజె.

7 గని, సత్తు దూతల్తె ఆకర్చొ దూత జోచి నప్పిరమూరి పుజుక తిల దినాల్క, దేముడు జోచ నేవ కెర్లన జల, జోచ కబుర్లు సంగిల పూర్తుల్క సంగిలి రితి, జోచి గుట్టు తిలిసి

నెరవెర్నుప జంక అస్సె” మెన జో దూత ఒట్టు గలన సాడుప కెర్లన్.

8 ఆవ్ అగ్గె సూన్లి పరలోకుమ్ తెంతొ చి అవాడ్ అంక అన్నె సంగిలిసి కిచ్చొ సూన్లయ్ మెలె, “అల్లె, తుయి గో! చి సముద్దుమ్తె బుయ్యె టీవొజ దూతచి అత్తి తిలి పుస్తకుమ్ నజు” మెలన్.

9 జో దూతతె ఆవ్ గెచ్చు, “అంక జా ఇదిలిన్ పుస్తకుమ్ దె” మెన సంగిలయ్, చి జో అంక, “నజన *కా, ఈంజ తుచి పెట్టి తుక కోడు జయెదె, గని తుచి చొడితె ఒండల్ తేల్చి రితి తియనయ్ తయెదె.” మెలన్.

10 జాకయ్ జా ఇదిలిన్ పుస్తకుమ్ జో దూతచి అత్తి తెంతొ నజన కయ్లయ్. అంచి చొడితె ఒండల్ తేల్చి రితి తియన తిలి, గని, జా కతికయ్, అంచి పెట్టి కోడు జలి.

11 తెదొడి అంక ఆడ్ర దిలిసి కిచ్చొ మెలె, “ఒగ్గర్ ప్రెజల్చి రిసా, ఒగ్గర్ రాజిమ్లుచి రిసా, ఒగ్గర్ బాసల్చి రిసా, ఒగ్గర్ రానల్చి రిసా ఆవ్ తుక అన్నె దెకయ్తిసి రెగ్గ మాన్సుల్క జానవుక” మెన అంక ఆడ్ర అయ్లి.

11

దొగుల సాచుల్

1 తెదొడి కట్టడి ఏక్ డండొ అంక *దిల, చి అంక కిచ్చొ ఆడ్ర అయ్లి మెలె, “ఉట్ట, దేముడుచి గుడిచి బలి దెతి టాన్చి ఒత్త ఒక్కి కెర్లసక కట్టడ దెకు.

2 గని దేముడుచి గుడి ఒత్తల్తొచి బయ్లెచి డర్దుక నే కట్టడతె ములు. కిచ్చొక మెలె, దేముడుక నేన్ల మాన్సుల్చి అత్తి జా టాన్ అప్పెచి మట్టుక తంక సెలవ్ అస్సె. †దొన్ని విసాని దొన్ని జొన్నొ పూర్తి ఈంజ సుద్ది జలి పట్టుమ్ జేవ్ సుద గెల అల్లర్ కెరుల.

3 అన్నె, ‡బార పుంజొ తిన్ని విసాని పొదులు అంచ దొగుల సాచులు †బస్తబట్టల్ గలన అంచ కబుర్లు సాడుప కెరుక మెన సెక్కి దెయిందె” మెన అంక ఆడ్ర అయ్లి.

4 ఈంజేవ్ దొగుల సాచుల్ కొన్న జవుల మెలె, బూలోకుమ్ ఏలుప కెర్లొ ప్రబుచి మొక్కె టీవొజ తిల, దొన్ని ఒలివ రూక్లు చి దొన్ని దీవుకంబల్, మెన *టాలి జయెదె.

5 అన్నె, కో ఇన్నెయింక కిచ్చొ అల్లర్ కెరుల గే, ఇన్నెయించి చొడి తెంతొ ఆగి బార్ జా, ఇన్నెయింక విరోదుమ్ జలసక లయ గెలెదె. కో ఈంజేవ్ దొగులక అల్లర్ కెరుల గే, జేవ్ ఇసి మొరుకయ్.

* 10:9 10:9 యెహెజ్కేలు 3:1-3. * 11:1 11:1 ఎత్తి అదికారుమ్ తిలో దేముడు దిలన్ గే మెండపిల్ల జలో యెసు దిలన్ గే అన్నె కచిగి అత్తి జోవయింక దావడ్ల గే, గని ఎత్తి అదికారుమ్ తిలో దేముడుచి సెలవ్ నెంజెలి, జోవయింక దొర్లు జతి నాయ్. 3 నంబర్ కోడుక దెకిలె, ఎత్తి అదికారుమ్ తిలో దేముడు, నెంజెలి మెండపిల్ల జలో యెసు లట్టబ్తయ్ మెన ఉచరుక జయెదె. గని గ్రీకు బాస తెన్ ఈంజ ‘డీనయ్లిసి’ తొత్తొ రెగిడ్ల సగుమ్ పుస్తకల్తె ఆడ్ర దిలోసాక ‘దూత’ మెన. నంబర్ కోడుతె అస్సె. సగుమ్తె దస్సి సంగె నాయ్. † 11:2 11:2 దొన్ని కి రమారమి తిన్ని నర వెర్నుల్ జయెదె. ‡ 11:3 11:3 దొన్ని కి రమారమి తిన్ని నర వెర్నుల్ జయెదె. § 11:3 11:3 కిచ్చొ గుర్తు దెకవుక మెన యూదుల్ తెన్ బస్తబట్టల్ గలవ బులుల మెలె, జోవయించి పెట్టిచి దుకుమ్ దెకవుక. * 11:4 11:4 జెకర్యూ 4 అద్యయ్మతె ఇసి టాలి అస్సె. † 11:6 11:6 ఏలియా పూర్తుమ్చొ దస్సి కెర తిలన్. రానల్ మొదొల్ పుస్తకుమ్ 17:1.

6 ఈంజేవ్ దొగుల సాచుల్క అన్నె కిచ్చొ సెక్తి మెలె, దేముడుచ కబుర్లు ఈంజేవ్ సంగితె ఎద పాని †నే పెట్టె రితి అడ్డు కెరుక. పడ్డొ అన్నె, †లోయి జతి రితి పానివొక మార్పుప కెరుక, చి కెత్తి సుట్లు ఇన్నెయింక ఇస్టుమ్ అయ్లె, ఎత్తి రగుమ్, అల్లర్క బూలోకుమ్చక సిచ్చల్ కెరుక సెక్తి అన్నె.

7 పడ్డొ, ఇన్నెయించి సాచి సంగ కేడయ్లి పడ్డొ, మట్టు నెంజిలి జా వెల్లి గొయి తెంతో వెగ జెతో జంతు ఇన్నెయించి ఉప్పిరి యుద్దుమ్ కెర జిన కెర, ఇన్నెయింక మారెదె.

8 ప్రబుక సిలువతె టీవొ కెర మార్లి వెల్లి పట్టుమ్తె ఇన్నెయించ పీనుమ్లు సేడ తవుల. జా పట్టుమ్క టాలిక కి 'సాదొమ్' చి 'ఐగుప్తు' మెన సంగుక జయెదె.

9 తిన్ని నర పొదుల్ పూర్తి ఎత్తి పైజల్ తెంతో, ఎత్తి సెకుమ్ తెంతో, ఎత్తి బాస తెంతో, ఎత్తి రాజిమ్ తెంతోచ మాన్సుల్ ఇన్నెయించ పీనుమ్లుక దెక దెక, ఇన్నెయింక మెన్నె రోవుక సెలవ్ నే దెతి.

10 ఈంజేవ్ దొగుల సాచుల్ సంగ తిల కబుర్లు, ఈంజేవ్ కెర్ల కమె బూలోకుమ్తె జేవ్ జితసక అల్లర్ కెర్లి రిసా; లాజ్ కెరయ్లి రిసా, బూలోకుమ్తె జితస ఈంజేవ్ మొర్లిన్చి రిసా వెర్లి సర్ల జా, సర్ల కెరన, జోవయించి వెర్లి సర్లచి గుర్తుక ఎక్కిలోక ఎక్కిలో బవుమానల్ దెతె తవుల.

11 జలె, జేవ్ తిన్ని నర పొదుల్ గెలె, దేముడు పుజీలి ఆత్మ ఈంజేవ్ సాచుల్చి పెట్టి పెస జియడ్లన్, చి ఉట్ట సోగ టీవొ జల, చి ఇన్నెయింక దెకిలన పూర్తి బియఁ గెల.

12 తెదొడి, ఈంజేవ్ జీవ్ జల సాచుల్ పరలోకుమ్ తెంతో చి ఏక్ అవాడ్ నూన్ల. కిచ్చొ మెన జా అవాడ్ సంగిలన్ మెలె, "ఇత్తల్ వెగ జా!" మెలన్, చి ఇన్నెయింక విరోదుమ్ జలనచి మొక్కె మబ్బు తెన్ పరలోకుమ్తె వెగ గెల.

13 జయ్యి గడియయ్ వెల్లి బూకంపుమ్ జలి. జా పట్టుమ్చ దెస్సు వాటల్తె ఏక్ వాట నాసెనుమ్ జా గెలి. జా బూకంపుమ్తె సత్తు వెయిల్జిన్ మాన్సుల్ మొర గెల. సేసిల మాన్సుల్ బియఁ కెర, పరలోకుమ్తె తిలో దేముడుక గవురుమ్ దిల.

14 సిచ్చల్చ గండిమ్లు, కస్టుమ్లు ఇన్నెతెన్ దొన్ని జా గెలి. మొత్తుమ్ తిన్ని సిచ్చల్ జతి రితి అన్నెక్ దస్సి సిచ్చ

కచితుమ్ జర్లు జంక అన్నె.

సత్తుజిన్ దూతల్తె ఆకర్చొ జోచి నప్పిర్మూరి పుజీలిసే

15 సత్తుచొ దూత జోచి నప్పిర్మూరి పుజీలన్, చి కిచ్చొ జలి మెలె, పరలోకుమ్తె గట్టిజ అవాడ్చ అవాడ్లు కిచ్చొ మెల మెలె, "బూలోకుమ్చి రాజిమ్ అమ్చొ ప్రబుచి చి జోచొ క్రీస్తు పుత్తున్చి రాజిమ్ జా మార్పుప జా అన్నె. కెయఁక తెయఁక జో ఏలుప కెరెదె" మెన సంగిల.

16 తెదొడి దేముడుచి పుర్రెతో జోచ సిజాసనల్తె వెసిత విస్సెక్ చెత్తర్జిన్ వెల్లెల మాన్సుల్ దేముడుచి మొక్కె సెర్లు సేడ, జోక కిచ్చొ మెన బక్తి కెర్ల మెలె,

17 "ఎత్తి సెక్తి అదికారుమ్ తిలో ఎత్తిక ఏలుప కెర్ల దేముడు ప్రబువ, తుయి అప్పె తతోసా, అగ్గె తెంతో తిలోసా, తుయి తుచి సెక్తి అదికారుమ్ దెరన, ఏలుప కెరుక దెర అస్సిసి మెన, తుక అమ్చి సర్ల సంగితసుమ్.

18 తుక నేన్ల మాన్సుల్ మొత్తుమ్ తుచి ఉప్పిరి కోపుమ్ దెకయ్ల,

గని తుచి కోపుమ్ తుయి దెకవ జోవయింక సిచ్చ కెర్లది. మొర్లనక పరిచ్చ కెర తుచ సేవ కెర్లన జల తుచ కబుర్లు సంగితసక

చి తుచ సొంత జల అన్నె మాన్సుల్క, తుక బిత ఎత్తిజిన్క, జేవ్ బాల వెల్లొ జలె కి, జోవయింక బవుమానుమ్ దెంక, పడ్డొ బూలోకుమ్చక నాసెనుమ్ కెర్లనక నాసెనుమ్ కెరుక మెన,

సమయుమ్ జా అయ్లి." మెన జో దేముడుచి మొక్కె బప్పన్ల.

19 తెదొడి పరలోకుమ్చి దేముడుచి గుడిచి కెప్పి ఉర్లి జలి, చి జోచి జా దేముడుచి గుడిచి తెడిక తెడిచి గదితె జోచి నే పిట్టి ప్రమానుమ్చి గుర్తుచి *పెటె డిసిలి. అన్నె, బిజిలి మొల్కొలి, అవాడ్లు అయ్లి, ఉర్మూల్ కెర్లి, చి బూకంపుమ్ కెర్లి, చి వెల్లెల కరపత్తల్ పెట్టె.

12

తేర్బోదచి వెల్లి అయిచి టాలి

† 11:6 11:6 మోసి పూర్ణుమ్చొ దస్సి కెర తిలన్. నిర్ణమకాండుమ్ 7:14-18. ఎత్తి అదికారుమ్ తిలో దేముడుక చి జోవయించ మాన్సుల్క పూర్ణుమ్ విరోదుమ్ కెర తిల. దస్సి, యెరూసలేమ్ పట్టుమ్చ మాన్సుల్ యెసుక విరోదుమ్ కెర మార్ల. చి ఈంజేవ్ సాచుల్చ పీనుమ్లు ఒత్తయ్ సేడ్ల. * 11:19 11:19 తెదొడక ఎద, ఎత్తి అదికారుమ్ తిలో దేముడుచి గుడితె జా పెటె తిలి తెడిక తెడిచి గదితె ఎక్కి ఎత్తిక వెల్లొ పూజరి, గని అన్నె కోయి నాయ్ గెచ్చుక జయెదె, అన్నె వెర్లికక ఎక్కి సుట్టు జో ఒత్త పెసుక జయెదె. ఇన్నె సంగిల్ రితి జా పెటె డిసిలె,

§ 11:8 11:8 సాదొమి పట్టుమ్చ మాన్సుల్చి ఐగుప్తు దేసిమ్చ మాన్సుల్ కిచ్చొ అర్దుమ్ తయెదె మెలె, జా డిసిలి తెంతో ఎత్తిజిన్ ఎత్తి అదికారుమ్ తిలో దేముడుచి గవురుమ్, జో కిసా అన్నె గే, పూర్తి దెకుక జయెదె. * 12:1

12:1 యూదుల్తె బార సెకుమ్లు తిల, గెద. యూదుల్క 'ఇస్రాయేలులు' మెనుల కి, పడ్డొ యెసుక నంపజలనక 'అమ్చ సత్తిమ్చ ఇస్రాయేలులు' మెన ఎత్తి అదికారుమ్ తిలో దేముడు దెకితయ్, జేవ్ యూదుల్ జలికి నే జలెకి. జేక జేవ్ బార సుక్కల్ తిలి కిరీటుమ్క 'ప్రబుచయ్ జలన మొత్తుమ్' మెన అర్దుమ్ కెరనుక జయెదె. యూదుల్ తెంతో క్రీస్తు రచ్చించుప కెర్లొసా జెర్మిలో. నయతాన్ జోవయింక అల్లర్ కెర్లొ, గని జినె నాయ్. జా తేర్బోదక ఏక్ రగుమ్ ఉచ్చర్లె, 'యెసుచి అయ్యసి మరియ' మెన ఉచరుక జయెదె. గని అన్నెక్ రగుమ్ ఉచ్చర్లె, నంపజలన మొత్తుమ్చి అత్తు సంగుమ్ మెనుక జయెదె. జా అత్తు సంగుమ్చ బోదల్ జల క్రీస్తుచ బావుడ్లు జల నంపజలనక కి నయతాన్ అల్లర్ కెర్లయ్, 12:17, గని ఆకర్క జినె నాయ్. 12:12 దెక.

1 తెదొడి ఆచారిమచి వెల్లి ఏక్ గుర్తు ఆగాసుమతె డీసిలన్. కిచ్చొ మెలె, పాలుమ్ మెలి రితి పొద్దు గలన్లి రితి జలి తేర్బోద. జాచి చట్టె జోను, జాచి బోడి *బార సుక్కల్ తిలి కిరీటుమ్.

2 జా అంగి జా తిలి, చి జాచి కంట్లు పావ అయ్లి నొప్పుల్క, లడెన్ జంక మెన, ఒర్నితె తిలి.

3 తెదొడి, ఆగాసుమతె అన్నెక్ వెల్లి గుర్తు డీసిలి. ఆదె! వెల్లో అయి రితో ఆగి రితో ఎరన జంతు. జోక సత్తు బోడియొ చి దెన్ను కొమ్మూల్, చి జోచ సత్తు బోడివోతె †సత్తు కిరీటల్ తిల.

4 జోచి తోక తెన్ ఆగాసుమచ సుక్కల్ మొత్తుమ్చ తిన్ని వాటల్తె ఏక్ వాటక కడ, బూలోకుమ్చి ఉప్పిరి సేడవ దిలన్. తెదొడి, జా తేర్బోద లడెన్ జతికయ్, జా లడెన్ జతో బోదక గీడ గెలుక మెన ఉచర, జాచి వురై జో వెల్లో అయి టీవోజ తిలన్.

5 జలె, జా పూత్తుక లడెన్ జలి. కీసా పూత్తు మెలె, గవురుమ్చి ఇనుముడండొ రితిసి దెరన దేముడుక నేన్ల మాన్సుల్ ఎత్తిజిన్క ఏలుప కెరుక దిలొసా. గనిజో అయితె దెర్ను నే సేడ్తె జో బోద దేముడుతె జోచి సింగాసనుమతె ఉక్కీల్ జలొ.

6 బయిలు దేసిమి జా తేర్బోద ఉట్ట నిగిలి. ఒత్త 'జాక' మెన దేముడు ఏక్ టూన్ తెయార్ కెర తిలన్. ఏక్ †వెయి దొన్ని పుంజొ అరవయ్ పొదుల్ ఒత్త జా కంక జింక అస్సె.

సయ్తాన్చి ఉప్పిరి యుద్దుమ్ కెర జిన్సిసి

7 తెదొడి పరలోకుమతె యుద్దుమ్ జలి. ఒత్త మికాయేలు మెలొ వెల్లో దూత ఎక్కిలొ, జోచి తెడిచ దూతల్ తెన్, జో వెల్లో అయి రితొసాచి ఉప్పిరి యుద్దుమ్ కెర్ల. జో అయిచి జాచి తెడిచ దూతల్ కి యుద్దుమ్ కెర్ల.

8 గని ఓడుప జల, చి ఒత్త తెంతొ పరలోకుమతె జోక అన్నె టూన్ నాయ్.

9 జో వెల్లో అయి, జో పూర్ణుమ్చొ అయి; జోక 'సయ్తాన్' మెనుల, ఒండి లోకుమ్చక మోసిమ్ కెర్లొసా, బూలోకుమతె జేడ సేడ గెలొ, చి జో తెన్, జోచ దూతల్ ఎట్టొ జేడ సేడ గెల.

సయ్తాన్ ఓడుప జలిసి

10 తెదొడి పరలోకుమతెచి గట్టిజ ఏక్ వెల్లి అవాడ్ సూన్లయ్. కిచ్చొ మెలి మెలె, "అమ్చొ దేముడు దెతి రచ్చన, జోచి సెక్తి, జోచి రాజిమ్, పడ్తొ జోచొ క్రీస్తుచి అదికారుమ్, అప్పె నెరవెర్చుప జా పావ జా అస్సె. కిచ్చొక మెలె, అమ్చ బావుడ్లుక నిందల్ సంగితె తిలొసా ఎట్టొ జేడ

సేడ అస్సె. అగ్గె అమ్చ బావుడ్లుక రోజుక రాతి మెద్దెనె దేముడుచి మొక్కె జో నిందల్ సంగితె తిలొ.

11 గని జేవ్ అప్పె మెండపిల్లచి సూయి జలి కీలొయిచి సెక్తిక, పడ్తొ జేవ్ సాచి సంగిలిన్చి నిదానుమ్క, జేవ్ దొన్నిచి రిసా, జో సయ్తాన్చి ఉప్పిరి జేవ్ జిన అస్సి. 'జేవ్ సాచి సంగిలిన్చి నిదానుమ్' మెలె, జోవయిచి సొంత జివుక విలువ నే దెకన్తె, జా మెండపిల్లచి నావ్క విలువ దెక, జోచి రిసాచి సాచి జేవ్ సంగిలి రిసా మాన్సుల్ మొర్ల.

12 జలె, సయ్తానుక జిన అస్సి. జాకయ్, ఓ పరలోకుమ్, ఒత్త జితన ఎత్తిజిని, సర్దసంతొసుమ్ జా! గని, ఓ బూలోకుమ్, ఓ సముద్దుమ్, అయ్యె! తుమ్క ఒగ్గర్ కస్తుమ్ సస్తుమ్! కిచ్చొక మెలె, సయ్తాన్ ఒగ్గర్ కోపుమ్ తెన్ తుమ్తె ఉత్త జా అస్సె. జోచి ఒగ్గర్ కోపుమ్ కిచ్చొక మెలె, జోక అప్పె ఒగ్గర్ సమయుమ్ సేసి నాయ్ మెన జో జాన అస్సి!" మెన పరలోకుమ్చి జా అవాడ్ సంగిలి.

13 'అంక ఒగ్గర్ సమయుమ్ నాయ్' మెన జో వెల్లో అయి దెక కెర, జో మున్సుబోదక లడెన్ జలి జా తేర్బోదక చజ అల్లర్ కెరుక మెన గెలన్.

14 గని జా తేర్బోదక దేముడు వెల్లి గిద్దురానొచ దొన్ని రెప్పల్ దిలన్. జా అయితె జా దెర్ను నే సేడ్తె బయిలు దేసిమి జా ఉడ్డ గెచ్చుక మెన, జా దొన్ని రెప్పల్ దిలన్. జా కేనే ఉడ్డ గెచ్చుక మెలె, *తిన్ని వెర్చుల్ నర కతె జితె చెంగిల్ తంక తిలి టూన్తె జా ఉడ్డ గెచ్చుక.

15 జలె, 'బూరుమ్ జాక గుడ్డ దెర గెస్సు' మెన, జా తేర్బోదచి పట్టి జో అయి జోచి చొండి తెంతొ గాడు రితి పాని సువ దిలన్.

16 గని జా తేర్బోదక బుయి తోడు తా జాచి చొండి పాడ, జోచి చొండి తెంతొ వెల్లో జో అయి సువ దిలి గాడుక బుయి గీడ గెలి.

17 తెదొడి జో వెల్లో అయి జా తేర్బోదచి ఉప్పిరి ఒగ్గర్ కోపుమ్ జా, జాచ అన్నె బోదల్చి ఉప్పిరి యుద్దుమ్ కెరుక మెన ఉట్ట గెలన్. దేముడుచ కొడొ నిదానుమ్ ఇండ యేసుచి రిసా సాచి జతసయ్చి ఉప్పిరి యుద్దుమ్ కెరుక మెన గెలన్.

సముద్దుమ్ తెంతొ సయ్తాన్చి సేవ కెర్తొ వెర్రి జంతు బార్ జలిసి

18 తెదొడి సముద్దుమ్చి ఒడ్డుచి ఇస్కతె జో వెల్లో అయి టీవో జలన్.

† 12:3 12:3 సత్తు బోడివో, దెన్ను కొమ్మూల్, చి సత్తు కిరీటల్చి అర్దుమ్ కిచ్చొ మెలె, అప్పెచి మట్టుక జో బూలోకుమతె ఏలుప కెరుక పూర్తి అదికారుమ్ తిలిసి. పడ్తొక ఓడుప జయెదె, గెద. సత్తు నంబర్క 'పూర్తి' మెలిన్చి అర్దుమ్, గెద. ‡ 12:6 12:6 మెలె, తిన్ని నర వెర్చుల్. § 12:11 12:11 మెలె, జో అర్చితుమ్ జలిన్చి సెక్తిక. * 12:14 12:14 "ఏక్ కాలుమ్, దొన్ని కాలుమ్లు చి ఏక్ అర కాలుమ్" మెన రెర్ల అస్సె. తిన్ని నర వెర్చుల్చి అర్దుమ్ జా కోడుక తయెదె. 11:2 దెక.

13

1 తెదొడి కిచ్చొ దెకిలయ్ మెలె, సముద్దుమ్ తెంతో ఏక్ వెర్రి జంతు బార్ జతె తిలసిసి దెకిలయ్. జోక దెన్ను కొమ్ముల్ చి సత్తు బోడివో. జోచ ఎక్కెక్ కొమ్ముల్తె ఎక్కెక్ కిరీటల్, చి జోచి ఎత్తి బోడివోతె దేముడుక దూసుప కెర్తె ఏక్ నావోల్ తిల.

2 ఆవ్ దెకిలె జో జంతు కీసా డీసిలో మెలె, డుర్కో వాగు రగుకమ్, చి జోచ చట్టో వెలుగుచ చట్టో రిత, జోచి మూతి సింపుమ్చి మూతిచి రితి తిల. జో జంతుకయ్ జో వెల్లొ అయి జోచి సెక్తి, జోచి సిజాసనుమ్, ఒగ్గర్ అదికారుమ్ దిలన్.

3 జో జంతుచి సత్తు బోడివోతె ఏక్ బోడి మొర్తి రితి గాయిమ్ జా తిలి రితి తిలి. గని మొర్తి జా గాయిమ్ అన్నె చెంగిల్ జా తిలి, చి ఆచారిమ్ జా ఒండి బూలోకుమ్చ మాన్సుల్ జో జంతుచి పట్టి గెతె తిల.

4 జో వెల్లొ అయి జోచి అదికారుమ్ జో జంతుక దిలి రిసా, మాన్సుల్ జో అయిక గవురుమ్ కెర జొకర్తె తిల. “జో జంతుచొ రితో కోయి నాయ్. జో జంతుతె యుద్దుమ్ కెర జోచి ఉప్పిరి కో జీనుక నెతిర్తి” మెన జంతుక గవురుమ్ కెర జొకర్తె తిల.

5 జో జంతుక కీసి చోండి తిలి మెలె, గవురుమ్ సంగన్త కొడొ, దేముడుక దూసుప కెర్తె కొడొ సంగితి చోండి తిలి. *దొన్ని విసా దొన్ని జొన్నొ జో ఏలుప కెర్తె రితి జోక సెలవ్ తిలన్.

6 దేముడుక, చి జోచి నావ్క, చి జోచి టాన్క దూసుప కెర కెర చోండి పుట్టయ్తె తిలన్. దేముడుచి టాన్ మెలె, జోచి పరలోకుమ్తె జితన.

7 పడ్డొ అన్నె, జోక కిచ్చొ సెలవ్ తిలి మెలె, యేసు ప్రబుచయ్ జల మాన్సుల్చి ఉప్పిరి యుద్దుమ్ కెర జీనుక మెన సెలవ్ తిలి. జా పొది ఎత్తి సెకుమ్చి ఉప్పిరి, ఎత్తి ప్రెజల్చి ఉప్పిరి, ఎత్తి బాసల్చి ఉప్పిరి, ఎత్తి రాజిమ్చి ఉప్పిరి, జా జంతుక అదికారుమ్ తంక సెలవ్ తిలి.

8 జా పొది ఒండి బూలోకుమ్తె జితన ఎత్తిజిన్ జోక బక్తి కెరుల. లోకుమ్ నే జెర్మయ్తె అగ్గె తెంతో తిలొ విరోదుమ్ సుదల్ మార్ల మెండపిల్లచి పుస్తకుమ్తె, కచ నవ్వొ తతి నాయ్ గే, జెవ్వొ జో జంతుక బక్తి కెరుల.

9 కంగ్గొ తిలొసా సూన్తు. కిచ్చొ మెలె,

10 “కక్క దెర గెచ్చుక మెన తిలె, జేవ్క దెర గెచ్చుక జయెదె. కో జలె కండాతె మొరవుక మెన తిలె, జేవ్ కండా తెన్ మొరవుక జయెదె.”

* 13:5 13:5 మెలె, తిన్ని నర వెర్లుల్. 11:2, 3. 12:6, 14 దెక. † 13:12 13:12 సముద్దుమ్ తెంతో బార్ జలొసా. ‡ 13:18 13:18 గ్రికు బాస చి ఎట్టి బాస రెగిడ్ రితితె ఎత్తి అచ్రుమ్క ఏక్ విలువ తయెదె. జేక, ఏక్ మాన్సుచి నావ్చ అలవాట్లు చి లెక్క బెదవుక జయెదె. ‘నీరో కైసర్’ మెలొ రోమ్ దేసిమ్చొ అగ్గె వెల్లి రానొ జలొసా ఎక్కెలోచి నావ్క సావ్య పుంజొ అరవయ్ సావ్య నంబరచి లెక్క బెదవుక జయెదె, చి యోహూస ఈంజ పుస్తకుమ్ రెగిడ్ దినాల్క ఇదిల్ అగ్గె, జో నీరో కైసర్ నంపజలనక అల్లర్ కెర్తె తిలొ. గని పడ్డొ అయల నంపజలనక అల్లర్ కెర్తె, మాన్సుల్చ నవ్వొక కి జయి లెక్క తయెదె. జేక, కచి రిసా సంగితయ్ గే నేనుమ్. * 14:1 14:1 ‘సీయోసు డొంగ్రు’ చి ‘యెరూసలేమ్ పట్టుమ్’ మెలె, ఎత్తి అదికారుమ్ తిలొ దేముడు జతి టాన్క, మెలె పరలోకుమ్క, టాలిచ నవ్వొ జవుల. † 14:1 14:1 మెలె యేసుప్రబు.

మెన రెగిడ్డి కోడు. ఈంజ కోడుతె కిచ్చొ జాగర్త బెదితయ్ మెలె, ప్రబుచయ్ జల మాన్సుల్ నిదానుమ్ తా బాదల్ ఓర్పుప జా నముకుమ్ తెన్ తంకయ్.

బుయి తెంతో వెర్రి జంతు బార్ జలిసి

11 తెదొడి అన్నెక్ వెర్రి జంతు బుయి తెంతో బార్ జలిసి దెకిలయ్. మెండపిల్లచి రితి జోక దొన్ని కొమ్ముల్ తిల, గని వెల్లి అయిచి రితి జో లట్టబ్బొ.

12 జో †తోలితోచొ జంతుచి నావ్ తెన్ జోచి క్రామ్ ఈంజొయ్ జర్గు కెర్తయ్, చి మొర్తి గాయిమ్ చెంగిల్ జా తిలొ జో తోలితోచొ జంతుక ఒండి లోకుమ్, ఒండి లోకుమ్చ మాన్సుల్ జొకర్తె రితి, ఈంజొయి జంతు జేవ్క సికడ్తయ్.

13 ఆచారిమ్చ వెల్లెల వెల్లెల కమొ ఈంజొ జర్గు కెర్తయ్. కిచ్చొ మెలె, ‘మాన్సుల్ దెకుత్’ మెన జోచి మొక్కె ఆగాసుమ్ పక్క తెంతో బుయిచి ఉప్పిరి అగి సూయి జతి రితి కెర్తయ్.

14 అన్నె, జో తోలితోచొ జంతుచి మొక్కె ఈంజొ జర్గు కెరుక సెలవ్ తిల ఆచారిమ్చ వెల్లెల కమొచి సెక్తిక బూలోకుమ్తె జితనక ఈంజొ మోసిమ్ కెర్తయ్. దస్సి, కిచ్చొ ఏక్ మోసిమ్ కెర్తయ్ మెలె, కడ్డుమ్క మొర్తి సెక్తిచి గాయిమ్ జలెకి జీవ్ తిలొ జో అన్నెక్ జంతుచి రిసా ఏక్ బొమ్మ జేవ్ తెయార కెర జొకరుక మెన, ఈంజొ జంతు బూలోకుమ్తె జితనక సికడ్తయ్.

15 జో తోలితోచొ జంతుచి బొమ్మ లట్టబ్బి రితి జీవ్ దెంక కి ఈంజొ జంతుక సెలవ్ తిలి, చి జో జంతుచి బొమ్మక నే జొకర్తనక మొరవుక కి ఈంజొ, జంతుక సెలవ్ తిలి.

16 పడ్డొ అన్నె కిచ్చొ ఏక్ అల్లర్ ఈంజొ అన్నెక్ జంతు, బుయి తెంతో బార్ జలొ జంతు, కెర్తయ్ మెలె, ఎత్తిజిని, బాల, వెల్లొ, సామాని, బీద సుదొ, గొతి నెంజిలొ మాన్సు. గొతి జలొ మాన్సు, ఉజిల్ అత్తి నెంజిలె నిర్దె ఏక్ గుర్తు కెరవంతి రితి ఈంజొ పెలయ్తయ్.

17 అన్నె, జా గుర్తు నే కెరవంతె కో కిచ్చొ గెనుక గే వికుక గే సెలవ్ తయె నాయ్. జా గుర్తుతె కిచ్చొ తయెదె మెలె, జంతుచి నావ్, నెంజిలె జోచి నావ్చి గుర్తుచి అంకె.

18 ఇన్నెచి అర్దుమ్ కెరనుక జలె, ముక్కిమ్చి గ్యానుమ్ అవ్సురుమ్. కక్క దస్సి గ్యానుమ్ అస్సె మెలె, జో జంతుచి అంకె లెక్క కెర్తె. ‡జేవ్చి అంకె ఏక్ మాన్సుచి నావ్ తెన్ బెదితి అంకె. జా అంకె కిచ్చొ మెలె, సావ్య పుంజొ తిన్ని విసా సావ్య (666).

14

మెండపిల్ల తెన్ జోచయ్ జల మాన్సుల్ టీవెలిసి

1 తెదొడి అన్నె దెకిలయ్, ఈందె! *సియోను డొగ్రె జో †మెండపిల్ల టీవె తా, జో తెన్ అన్నె కొన్న టీవోజ తిల మెలె, ‡పుంజెక్ దొన్ని విసా చెత్తర్ వెయిల్జిన్ జోవయించి నావ్, దేముడుచి నావ్ జోవయించ నిర్దెలె రెగ్గవన్ల మాన్సుల్ తిల.

2 అన్నె, ఒగ్గర్ పానివో సూయి జతి అవాడ్ రితిచి, ఉర్ముల్ కెర్లి వెల్లి అవాడ్ రితిచి, పరలోకుమ్ తెంతో చి, ఏక్ అవాడ్ సూన్లయ్. ఆవ్ సూన్లి అవాడ్ అన్నె కిసి తిలి మెలె, వీనెల్తె బజయ్తి అవాడ్చి రితి తిలి.

3 జలె, జేవ్ ఎతివాట్జిన్ మాన్సుల్ సింగాసనుమ్చి మొక్కె, సిజాసనుమ్చి సుట్టునంత టీవోజ తా కీచెత్తర్ జివుల్చి మొక్కె, చి *విస్సెక్ చెత్తర్జిన్ వెల్లెల మాన్సుల్చి మొక్కె, నొవి గనుమ్ గాయితె తిల. ఈంజ బూలోకుమ్చి రాజిమ్ తెంతో గెనన్ల, ఈంజేవ్ పుంజెక్ దొన్ని విసా చెత్తర్ వెయిల్జిన్ మాన్సుల్క పిట్టవ, జా గనుమ్ అన్నె కో సికుక నెత్తిర్.

4 ఈంజేవ్ మాన్సుల్ కిస మాన్సుల్ మెలె, సుద్ది తా, తేర్బోదల్ తెన్ నే బెదిల సుదల్, లంజె నే జలన. ఈంజేవ్ దేముడుక, మెండపిల్లక ముల్లి నాయ్, వేర 'దేముడ్లు' మెలనచి పట్టి గెతి నాయ్. ఈంజేవ్, జలె, మెండపిల్ల కేనె గెలె కి, జోచి పట్టి గెతతి. ఒండి లోకుమ్చ మాన్సుల్ తెంతో దేముడుచి మెండపిల్లక దిలి తొలి పండ్లు జతి రితి ఇన్నెయింక మెండపిల్ల అన్నె †గెననయ్ అన్నె.

5 జోచి పున్నిమ్ ఇన్నెయింకయ్ జొయ్యి దా అన్నెచి రిసా, ఇన్నెచి చొండితె కిచ్చొ అబద్దుమ్ తయె నాయ్.

సుబుమ్ కబుర్ సూనయ్తో దూత ఉడ్డితె తిలిసి

6 తెదొడి, అన్నెక్ దూతక దెకిలయ్. పొద్దు ఆగానుమ్చి మదెనె జో ఉడ్డితె తిలొ. కిచ్చొక మెలె, బూలోకుమ్తె జితన్క, ఎత్తి రాజిమ్చక, ఎత్తి సెకుమ్చక, ఎత్తి బాసచక, కెయ్క తెయ్క తతి పాడ్ నే జతి సుబుమ్ కబుర్ ఎత్తి ప్రైజల్క సూనవుక మెన, జా సుబుమ్ కబుర్ దెరన గెతె తిలొ.

7 అన్నె, జో గట్టిజ అవాడ్ కెరన కిచ్చొ మెన కేకే గలన్ల మెలె, "దేముడుక బియ్ కెర జోక గవురుమ్ కెర! కిచ్చొక మెలె, జో ఎత్తి మాన్సుల్క పరిచ్చొ కెర సిచ్చొ కెరుక, బవుమానుమ్ దెతి గడియ పాచ జా అన్నె. అన్నె

పరలోకుమ్, బూలోకుమ్, సముద్దుమ్, పానిచ ఉంటలు జెర్మయ్లో జోకయ్ నంపజా బక్తి కెర!" మెన సాడుప కెర్లన్.

8 అన్నెక్ దూత, జలె, ఇన్నెతెన్ దొన్నిచొ, జో అగ్గెచొ చి పట్టి ఉడ్డ గెచ్చొ, కిచ్చొ మెలన్ మెలె, †"వెల్లి బబులోను పట్టుమ్ నేడ అన్నె. ఎత్తి ప్రైజల్క జాచి లంజె ఆన, రగుమ్చి ద్రాచ రన్నుమ్ పియ్డిసి జా." మెన సాడుప కెర్లన్.

9 పడ్డె అన్నెక్ దూత, ఇన్నెతెన్ తిన్నిచొ; జేవ్ దొన్ని దూతల్చి పట్టి ఉడ్డితె తా కిచ్చొ మెన సంగిలన్ మెలె, "కో జో జంతుక చి జోచి బొమ్మక బక్తి కెరుల గే, జోచి గుర్తు కచి నిర్దె గే అత్తి గే, గలవనుల గే,

10 జోవయించి తప్పుక దేముడుచి కోపుమ్చి సిచ్చొచి ద్రాచ రన్నుమ్ కచితుమ్ కిచ్చొ పాని గట్ట నే బెదయ్తె, జోచి ఒగ్గర్ కోపుమ్చి గిన్నతె పివులచి పరలోకుమ్చి సుద్దిచ జోచ దూతల్చి మొక్కె, చి మెండపిల్లచి మొక్కె, ఎరన జతి ఎడ్డి జతి ఆగి లగితి వెల్లి ఆగి గొయ్తెచ బాదల్ సేడల.

11 జేవ్చి జా సిచ్చొచి దుమ్మొ కెయ్క తెయ్క బార్ జతె తా వెగ గెతయ్. జో జంతుక చి జోచి బొమ్మక జొకర్తనక చి జోచి గుర్తు గలవన్లనక, రాతి మెద్దెనె కిచ్చొ నే పుండితె తవుల." మెన దూత సాడుప కెర్లన్.

12 ఈంజ కోడుతె కిచ్చొ జాగర్ల బెదితయ్ మెలె, యేసు ప్రబుచయ్ జల మాన్సుల్, మెలె దేముడుచి కోడు రితి ఇండితన, యేసుచి ఉప్పిర్చి నముకుమ్తె ఇండితన, జేవ్ బాదల్ ఒర్పువ జా నిదానుమ్తె తంకయ్.

ప్రబుచి తెడిచి విస్తాంతిచి రిసా పరలోకుమ్ తెంతో అవాడ్

13 తెదొడి పరలోకుమ్ తెంతో చి ఏక్ అవాడ్ సంగిలిసి కిచ్చొ సూన్లయ్ మెలె, "ఏక్ కోడు రెగుడు. అప్పె తెంతో యేసుప్రబుచి తెడి తా కో మొరుల గే, జోవయింకయ్ చెంగిలి. మెలె, దేముడుచి సుద్ది తిలి ఆత్మ కిచ్చొ మెన్తయ్ మెలె, కిచ్చొక జోవయింక చెంగిలి మెలె, జేవ్ ఇండిలి బుద్ది జోవయింతెన్ బెదయ్ జెతయ్, చి జోవయించ కమొ కెర కేడయ్లిన్క అప్పె సెలవ్ తెన్ తవుల." మెన సంగితయ్ మెన పరలోకుమ్ తెంతో చి జా అవాడ్ సంగిలన్.

బూలోకుమ్చి పంట్

14 అన్నె ఆవ్ దెకితికయ్, ఆదె! కిచ్చొ మెలె, చొక్కిలి మబ్బు, చి జా మబ్బుతె కో వెన అన్నె మెలె, మాన్సు జా జెర్మున్ అయ్లి రగుమ్చొ ఎక్కిలో వెన అన్నె. జోచి బోడితె బజర్చి కిరిటుమ్, జోచి అత్తి వాండి కెర్లి కొడ్వెలి అన్నె.

‡ 14:1 14:1 ఈంజ నంబర్చి అర్దుమ్ కిచ్చొ మెలె, 'పూర్తి జలిసి', 'ఒగ్గర్ జలిసి', చి ఇన్నె, 'యేసుక నంపజలన మొత్తుమ్చి లెక్క పూర్తి జలిసి'. ఈంజ నంబర్ జయి టాలికచి నంబర్. ఎక్కి జయి నంబర్చి ఎత్లయి జవుల మేనుమ్ నాయ్, గని 'జోవయింక నంపజలన ఒగ్గర్ ఒగ్గర్జిన్ జవుల' మెలి అర్దుమ్ ఇన్నెతెన్ కెరనుమ్దె. పూర్తుమ్ తెంతో యూదుల్తె బార సెకుమ్లు తిల, చి యేసుక బారజిన్ సిస్సుల్ తిల. పడ్డె జోవయించ బారజిన్ సిస్సుల్ జోవయించ బారజిన్ బారికుల్ జల. 144,000 మెలె, బార బార వెయిలు. మెలె 12వెయిలు x 12వెయిలు x 1000 = 144,000. § 14:3 14:3 4:6-8. * 14:3 14:3 4:4. † 14:4 14:4 నెంజెలె 'నెత్తొవ అన్నె'. 3 నంబర్తె కి అన్నె గెనన్లనక గెనన్లనక నెత్తివెలన మెనుక జయెదె. ‡ 14:8 14:8 టాలిక రొమ్ పట్టుమ్క 'బబులోను' మెంతతి, ఈంజ 'డినయ్లిన్' చి పుస్తకుమ్తె.

15 తెదొడి అన్నెక్ దూత దేముడుచి గుడి తెంతో బార్ జా, గట్టిజ అవాడ్ కెరన, జా మబ్బుతె వెసిలోసొక కిచ్చొ మెన కేక్ గలన్లొ మెలె, “బూలోకుమ్చి పంటొ పూర్తి పిక అస్సెచి రిసొ, లాయితి సమయుమ్ జా అయ్లి. జాకయ్, తుచి కొడ్వెలి దెరన లాయి!” మెన కేక్ గలొ.

16 తెదొడి మబ్బుతె వెసిలోసొ బూలోకుమ్చి పంటొ పూర్తి జోచి కొడ్వెలి తెన్ కీసప్ప కెర కేడయ్లన్.

బూలోకుమ్చి పంటొ దూత లాయిలిసి

17 తెదొడి అన్నెక్ దూత పరలోకుమ్చి దేముడుచి గుడి తెంతో బార్ జలన్. జో వాండి కెర్లి కొడ్వెలి దెరన అస్సె.

18 తెదొడి, అన్నె, ఒత్తచి బలి దెతి టాన్ తెంతో అన్నెక్ దూత బార్ జలన్. ఈంజొ దూతక ఆగిచి ఉప్పిరి అదికారుమ్ తిలి. వాండిచి కొడ్వెలి దెర్లొ దూతక కేక్ గల కిచ్చొ మెన గట్టిజ అవాడ్ కెరన ఆగిచి ఉప్పిరి అదికారుమ్ తిలొ దూత సంగిలన్ మెలె, “తుచి కొడ్వెలి దెరన, ద్రాచ గెల్లచ, గొచ్చుల్చ పండ్లుచి పంటొ లాయి! జా పండ్లు పిక అస్సి!” మెన సంగిలన్.

19 జాకయ్, జో దూత బూలోకుమ్తె జోచి కొడ్వెలి తెన్ బూలోకుమ్ ఎత్కిచి ద్రాచ పంటొ లాయిలన్, చి దేముడుచి కోపుమ్చి సిచ్చ జతి జోచి గన్నతె గల దిలన్.

20 పట్టుమ్చి కోట ఒత్తల్తోచి జా రస్సుమ్ గెచ్చయ్తి గన్నతె పండ్లు సుదిల, చి జా సుదిలిన్చి గన్న తెంతో లొయి సూయి జా గెలి. కెద్దిచి మెలె, ఏక్ గోడొక చప్లయితి కలెమ్చి ఎదిలి డొకుతె జా లొయి బెర కెద్ది దూరిక పాచిలి మెలె, దొన్ పుంజొ మయిలుచి ఎదిలి దూరి పాచిలి.

15

ఆకర్క దెత సత్తు సిచ్చల్

1 వడ్డొ, పరలోకుమ్తె అన్నెక్ వెల్లి గుర్తు దెకిలయ్. జా వెల్లిచి, ఆచారిమ్చి గుర్తు కిచ్చొ మెలె, దేముడుచ సత్తు సిచ్చల్ అత్తి దెర తిల సత్తు దూతల్క దెకిలయ్. ఈంజ ఆకర్కచ సిచ్చల్ జవుల. కిచ్చొక మెలె, ఇన్నెయింతెన్ దేముడుచి కోపుమ్చి సిచ్చల్ కుటుల.

2 తెదొడి కిచ్చొ దెకిలయ్ మెలె, సీస రితి టేంటుచి గాడు తెన్ ఆగి బెదిల్ రితి తిలిసి. అన్నె, జా సీస రితి టేంటు తిలి గాడు సొడి, దేముడు దిల వీనెలు దెరన, జో జంతుక జీన, జోచి బొమ్మచి ఉప్పిరి చి జోచి నావ్చి ఉప్పిరి జీన్ల మాన్సుల్ టీవొజ తిలిన్ దెకిలయ్.

3 జేవ్ దేముడుచొ సేవ కెర్లొసొ జలొ మోసేచి గనుమ్ చి మెండపిల్లచి గనుమ్ గాయితె తిల,

§ 14:16 14:16 మత్తయి 13:24-30 దెక. చెంగిల్చి తియ తయెదె, వెర్లి డయ గెలెదె. మత్తయి 13:36-43 దెక. జోవయిచి పున్నిమ్ జలనక

పరలోకుమ్తె తియ తయెదె, పాపుమ్ తెన్ తా గెలనక వెల్లి ఆగి గొయ్తె గలెదె. * 15:5 15:5 పూర్ణమ్, యూదుల్ బయిలు దేసిమి దొన్ని విసా వెర్చుల్ బుల్లె తిలి పొది, ‘ఎత్కి అదికారుమ్ తిలొ దేముడుచి గుడి’ మెన జోవయింక జో తెయార్ కెరయ్లి టంబుగుడ్డ తిలి. జేవ్చి తెడిక తెడిచి గదితె జో అగ్గుల్ రెగిడ్ల పత్తల్ తిలి వెతి తిలి. వడ్డొ చెంగిల్ గేర బంద ‘దేముడుచి గుడి’ మెన ఒత్తచి తెడిక తెడిచి గదితె జా అగ్గుల్ తిలి వెతి తిల. † 15:6 15:6 15:1. ‡ 15:6

15:6 ఎత్కి అదికారుమ్ తిలొ దేముడుచి గుడితె పూజర్లు దన పాలల్ గలన దన పట్కల్ బందన తవుల. § 15:7 15:7 4:6-8.

“ఎత్కి సెక్తి అదికారుమ్ తిలొ దేముడు ప్రబు, తుచ కమొ వెల్లెల, అన్నె ఆచారిమ్చ!

ఎత్కి ఉగఉగల్క ఏలుప కెర్లొ వెల్లొ రానొ, తుచ కమొ సరి జతిక, సత్తిమ్చ!

4 ఓ ప్రబువ, తుచి నావ్ కో కి బియఁ కెర, గవురుమ్ కెరుక!

తుయి ఎక్కిలొయి పరలోకుమ్చి సుద్ది తిలొసొ,

ఎత్కి రాజిమ్లుచ జా కెర, తుక బక్తి కెరుక జా అస్సి;

తుచ తీర్పుల్క, తుచ సిచ్చల్క ‘సత్తిమ్చ’ నాయిమ్చ మెన రుజ్జు అయ్లి రిసొ”

మెన, గనుమ్ గాయిల.

5 ఇన్నెచి వడ్డొ అన్నె ఆవ్ దెకితికయ్, పరలోకుమ్తె దేముడుచి గుడి జలి * టంబుగుడ్డతెచి అగ్గుల్ తిలి తెడిక తెడిచి గది ఉర్ది జలి.

6 జా దేవులుమ్చి తెడిక తెడిచి గది తెంతో † సత్తు సిచ్చల్ దెర్ల సత్తు దూతల్ బార్ జల. కిచ్చొ గలన బార్ జల మెలె, ‡ ఉజిడ్చ పూర్తి సుబ్బుమ్చ బట్టల్చ పాలల్, చి జోవయింక గుండెల్తె ఎక్కెక్ బజార్ రగుమ్ పట్కల్ బందన తిల.

7 తెదొడి, కీచెత్తర్ జీవుల్తె ఏక్ జీవ్, జేవ్ సత్తు దూతల్క ఎక్కెక్ సత్తు బజర్చ గిన్నల్ దిలన్. జేవ్ గిన్నల్తె కిచ్చొ బెర తిలి మెలె, కెయఁక తెయఁక జితొ దేముడుచి కోపుమ్చి సిచ్చ.

8 జా దేముడుచి గుడిచి తెడిక తెడిచి గదితె దేముడుచి ఉజిడి తెంతో చి జోచి సెక్తి తెంతో చి దుమ్మొ బెర తిలి, చి జేవ్ సత్తు దూతల్ దెర్ల సత్తు సిచ్చల్ కుట్టితె ఎదక, కోయి జా దేముడుచి గుడిచి తెడిక తెడిచి గదితె పెసుక నెత్తిర్తి.

16

సత్తు సిచ్చల్ సత్తు దూతల్ బూలోకుమ్తె సువ దిలిసి

1 అన్నె కిచ్చొ సూన్లయ్ మెలె, ఏక్ వెల్లి అవాడ్ పరలోకుమ్తెచి జా దేముడుచి గుడి తెంతో సత్తు దూతల్క, “తుమ్ గెచ్చ, దేముడుచ సత్తు గిన్నల్చి కోపుమ్చి సిచ్చ బూలోకుమ్తె సువ గెల.” మెన సంగిలన్.

2 జాకయ్, తొలితొచొ దూత గెచ్చ, బుయిచి ఉప్పిరి జోచి గిన్నచి సిచ్చ సువ దిలన్. జో జంతుచి గుర్తు కెరవన జోచి బొమ్మక జొకర్ల ఎత్కి మాన్సుచి అగి ఒగ్గర్ అల్లర్చ గవ్వొ జల.

3 దొన్నిచొ దూత జోచి గిన్నచి సిచ్చ సముద్దుమ్తె సువ దిలన్, చి మొర్లొ మాన్సుచి లొయిచి రితి జలి, చి సముద్దుమ్తెచి ఎత్కి జీవుల్ మొర్ల.

4 తిన్నిచొ దూత జోచి గిన్నచి సిచ్చ గడ్డొచి ఉప్పిరి, ఊటల్చి ఉప్పిరి సువ దిలన్, చి లోయి జా గెల.

5 పితి పాని లోయి జతి సిచ్చచొ జో దూత కిచ్చొ సంగిలిసి సూన్లయ్ మెలె,

“తుయి అగ్గె తిలోసా, అప్పె తతోసా, పరలోకుమ్చి సుద్ది తిలోసా,

తుచ తీర్పులు సిచ్చలు ఎత్తి సరిగా అస్తి.

6 కిచ్చొక మెలె, తుచయ్ జల మాన్సుల్చి లోయి, చి తుచ కబుర్లు సంగిల మాన్సుల్చి లోయి

విరోదుమ్ జల మాన్సుల్ సువితికయ్,

జేవ్ తుచ మాన్సుల్చి లోయి సువిలసయ్ పింక మెన

జోవయింకయ్ లోయి దా అస్సిసి.

జోవయింక జెతి బబ్వాడ్, జా!

జోవయించి పాపుమ్ జెవిచ్చి కతతి!”

మెన జో దూత సంగిలన్.

7 తెదొడి బలి దెతి టాన్ కిచ్చొ మెన కేక గల్లీన్ సూన్లయ్ మెలె, “నిజుమి, ఎత్తి సెక్తి అదికారుమ్ తిలో దేముడు ప్రబు,

తుచ తీర్పులు సిచ్చలు సరిగచ, సత్తిమ్చ!”

మెన సంగితి సూన్లయ్.

8 తెదొడి, చెత్తర్చొ దూత పొద్దుచి ఉప్పిరి జోచి గిన్నచి సిచ్చ సువ దిలన్, చి జాచి ఆగిక మాన్సుల్క డయిక మెన, పొద్దుక సెలవ్ అయ్లి.

9 జేవ్చి ఒగ్గర్ వేడిక మాన్సుల్ డడ్డిల, చి దేముడుచి నావ్ దూసుప కెర్ల. కిచ్చొక మెలె, ఈంజేవ్ సిచ్చల్చి ఉప్పిరి జోక అదికారుమ్ అస్సె, చి ఈంజేవ్ సిచ్చల్ జో దిలన్చి రిసా. అస్సె, జేవ్ కెర్ల పాపల్క విసారుమ్ జతి నాయ్, ముల్లి నాయ్, చి జోక గవురుమ్ దెతి నాయ్.

10 పావ్చొ దూత జోచి గిన్నచి సిచ్చ, జో వెర్రి జంతుచి సిజాసనుమ్చి ఉప్పిరి సువిలన్, చి జంతుచి రాజిమ్ అందర్ జా గెలి. మాన్సుల్, జలె, జేవ్క అయ్లి సైమల్చి రిసా, జోవయించ జిబుల్ చప్పన్తె తిల.

11 జోవయించి నొప్పి జోవయించ గావ్వొచి రిసా పరలోకుమ్ తిలో దేముడుక సాపెనల్ సంగిల, గని జేవ్ కెర్ల కమొక విసారుమ్ జతి నాయ్, ములిత్ నాయ్.

సొవ్వుచొ దూత సువ దిలి సిచ్చ

12 సొవ్వుచొ దూత జోచి గిన్నచి సిచ్చ *యూప్రటీసు మెలి వెల్లి గాడుచి ఉప్పిరి సువ దిలన్, చి తూర్పు పక్క తెంతో జెత రానల్ జెతికయ్ వాటు తెయార్ జతి రిసా జాచి పాని అట్ట గెలి.

* 16:12 16:12 యూదుల్చి దేసిమ్క జా గాడు తూర్పు పక్కయ్ తయెదె. ఇదిల్ దూరి తయెదె. † 16:13 16:13 సయ్తాన్ జయెదె. 12:3, 9. ‡ 16:13 16:13 13:1 దెక. § 16:13 16:13 బుయి తెంతొచొ జంతు; 13:14, 19:20. * 16:15 16:15 ‘హర్మెగిడ్డోసు’ ఏక్ వేల యూదుల్చి దేసిమ్క ఉత్తర పక్కచి ‘హర్మెగిడ్డోసు’ మెలి టాన్ జయెదె. జేవ్ రాసలు సుకా గెలి యూప్రటీసు గాడ్ వాట్ జెవుల, గెద. జా యూప్రటీసు వెల్లి గాడు యూదుల్చి దేసిమ్క తూర్పు పక్క జయెదె. † 16:19 16:19 ఈంజ ‘డిసయ్లిన్’ చి పుస్తకుమ్తె కేన్ సుట్టు ‘బబులోసు పట్టుమ్’ మెలె, రోమ్ పట్టుమ్క టాలి జతయ్, బెర్తె. గని పడ్డె తిల అస్సె దన అల్లర్చ పట్టల్ రాజిమ్లుచి రిసా కి ఉచరుక జయెదె.

13 పడ్డె †వెల్లి జో అయిచి చోడి తెంతో, ‡వెర్రి జో జంతుచి చోడి తెంతో అస్సె దేముడుచ కబుర్లు సంగిలోసా ఆవ్ మెన అబద్దుమ్క సంగిలోసాచి చోడి తెంతో మండుకుల్చ రిత తిన్ని బూతల్ బార్ జలిసి దెకిలయ్.

14 జేవ్, సయ్తాన్చి నేవ కెర్ల బూతల్ జవుల, చి వెల్లెల వెల్లెల కమొ కెర కెర, ఒండి లోకుమ్చ రానల్తె గతతి. కిచ్చొక మెలె, ఎత్తి సెక్తి అదికారుమ్ తిలో దేముడు జోచి సెక్తి అదికారుమ్ దెకయ్తి వెల్లి సిచ్చ కెర్తి దీసిచి యుద్దుమ్క తెయార్ జతి రిసా, జేవ్ రానల్క ఎక్కితె కుడవుక.

15 జలె, ఎబ్రి బాస తెన్ *‘హర్మెగిడ్డోసు’ మెలి టాన్తె జేవ్ రానల్క జేవ్ బూతల్ కుడయ్ల.

16 యెసుప్రబు సంగిలిసి ఏక్ కిచ్చొ మెలె, “ఈందె, మాన్సుల్ నే ఉచర్లె పొది కిసి చోరు జెయెదె గే, దస్సి ఆవ్ జెయిందె. అయ్లె, కో తెలివి తా, డుమ్డొయ్ నే జతె లాజ్ నే బెట్టిత్ రితి జోవయించ పాలల్ సుద్ది తతి రితి దెకనుల గే, జోవయింకయ్ చెంగిలి” మెన ప్రబు సంగితయ్.

17 సత్తుచొ దూత జోచి గిన్నచి సిచ్చ ఆగాసుమ్చి వాదుచి ఉప్పిరి సువ దిలన్, చి పరలోకుమ్చి దేముడుచి గుడి తెంతో, సిజాసనుమ్ తెంతో, గట్టిజ అవాడ్ తెన్ కిచ్చొ సంగిలన్ మెలె, “జర్లు జలి!” మెలన్,

18 చి బిజలి మొల్కిలి, అవాడ్ అయ్లి, ఉర్ముల్ కెర్లి, చి ఒగ్గర్ వెల్లి బూకంపుమ్ అయ్లి. కెర్లి వెల్లిచి మెలె, మాన్సుల్ బూలోకుమ్తె తొలితో తిలిసి తెంతో కెయ్య నే జర్లు జలి ఎదిలి బూకంపుమ్ అయ్లి.

19 జా బూకంపుమ్ జతికయ్, వెల్లి పట్టుమ్ తిన్ని వాటల్ జా గెలి, చి దేముడుక నేన్ల మాన్సుల్చ రాజిమ్లచ పట్టల్ పాడ్ జల. చి జోచి ఎదివాట్ కోపుమ్చి సిచ్చచి గిన్నయ్ తిలిసి జా †వెల్లి బబులోసు పట్టుమ్చ మాన్సుల్ పూర్తి పియ గెల్లి రితి, దేముడు నే పచ్చితె జర్లు కెర్లన్.

20 పడ్డె ఎత్తి డిబ్బ ఉట్ట నిగిల్ రితి జా డిస్తి నాయ్, చి కేన్ డొంగుర్లు డిస్తి నాయ్.

21 అస్సె, వెల్లి వెల్లెల కరపత్తల్ ఆగాసుమ్ తెంతో మాన్సుల్చి ఉప్పిరి సేడ్ల. ఏక్ ఏక్ కరపత్తుర్ దొన్ని విసా దెసు కేజిల్ చి ఎదిలి జాడు తవుల, చి జా సిచ్చ కెర్లి అల్లర్ కెర్లి మెలె, ఒగ్గర్ ఒగ్గర్ అల్లర్చి రిసా, జా సిచ్చచ దెబ్బల్క మాన్సుల్ దేముడుక సాపెనల్ కెర్ల.

17

వెల్లి లంజెచి తేర్బోద మెన వెల్లి బబులోసు

1 తెదొడి, సత్తు గిన్నల్ దెర తిల సత్తు దూతల్తె ఏక్ దూత అంచితె జా కెర కిచ్చొ సంగిలన్ మెలె, “తుయి ఇన్నె వెగ జే! ఒగ్గర్ పానివొచి ఉప్పిరి వెన తిలి వెల్లి లంజె జలి తేర్బోద సిచ్చ జతిసి దెకయిందె.

2 జాచి తెన్ బూలోకుమ్చ రానల్ లంజె జా అస్తి, చి జాచి లంజెచి ద్రాచ రస్సుమ్ పియ పియ, బూలోకుమ్తె జితన మచ్చయి అస్తి” మెన సంగిలన్.

3 తెదొడి జో దూత అంక ఏక్ బయిలె కడ నిలన్, చి దేముడుచి సుద్ది తిలి ఆత్మసెక్కిక కిచ్చొ దెకిలయ్ మెలె, ఒగ్గర్ ఎరన తిలి జంతుతె ఏక్ తేర్బోద వెన తిలి. జా జంతు కీసా తిలి మెలె, జాచి ఆగ్ ఎత్తిచి ఉప్పిరి దేముడుక దూసుప కెర్త నవ్వొ, కొదొయ్ని గలన తిలన్. జాక సత్తు బోడివొ, దెస్సు కొమ్మల్ తిల.

4 జా తేర్బోద *ఊద రంగు చి ఎరన రంగుచ పాలల్ గలన తా, బజరి, రత్నాలు, ముత్యల్, తియన తిలి. జాచి అత్తి కిచ్చొ తిలి మెలె, జాచి లంజెచ వెట్కారలు కీడ్లు బెర తిలి బజరిచి గిన్న దెర తిలి.

5 పడ్డొ జాచి నిర్దె గుట్టుచి ఏక్ నావ్ రెగ్గ తిలి. ‘†వెల్లి బబులోను పట్టుమ్, లంజె జల తేర్బోదల్క అయ్యసి, బూలోకుమ్చ వెట్కారల్క అయ్యసి’ మెలి నావ్ రెగ్గ తిలి.

6 అన్నె, జా తేర్బోద కీసి తిలిసి దెకిలయ్ మెలె, దేముడుచ జల మాన్సుల్చి లోయిక, చి యేసుచి నావ్చి రిసా విరోదుమ్ సుదల్ మార్ల మాన్సుల్చి లోయిక, జా తేర్బోద మచ్చ తిలి. జా తేర్బోదక దెక, బలే ఆచారిమ్ జలయ్.

7 గని దూత అంక, “కిచ్చొక ఆచారిమ్ జతసి? జా తేర్బోదచి రిసా, చి సత్తు బోడివొ దెస్సు కొమ్మల్ తిలి, జా వెసిలో జంతుచి రిసాచి గుట్టుచి అర్దుమ్ తుక సంగిందె.

8 జలె, తుయి దెకిలో †జంతు అగ్గె తిలన్, గని అప్పె నాయ్, చి కీమట్టు నెంజిలి జా వెల్లి గొయి తెంతో జో వెగ జా, నాసెనుమ్ జా గెచ్చుక అస్సె. జలె, ‘పరలోకుమ్తె జా జితు’ మెన లోకుమ్ నే జెర్మయ్లి అగ్గె తెంతో మెండపిల్ల జలో యేసు ఏక్ *పుస్తకుమ్తె జోక నంపజతసచ నావ్వొ రెగ్గ అస్సె. జలె, బూలోకుమ్తె జితనతె కచ నవ్వొ జా పుస్తకుమ్తె తయె నాయ్ గే, జో జంతుక దెకుకయ్ ఆచారిమ్ జవుల. జో తిలో, అప్పె నాయ్, గని పడ్డొక అన్నె బార్ జయెదె.

9 “ఈంజ ఎత్తి అర్దుమ్ కెరనుక జలె, బుద్ది గ్యానుమ్

అవ్సురుమ్. జంతుచ సత్తు బోడివొ కిచ్చొ జవుల మెలె, జా తేర్బోద వెన తిల †సత్తు మెట్టల్.

10 అన్నె, సత్తు రానల్ జేవ్ జవుల. జేవ్ రానల్తె పాచ్జిన్ కేడ అస్తి, ఎక్కిలో అప్పె అస్సె, చి అన్నెక్లొ జెంక నేతయ్, అన్నె, జో అయ్లె, ఎక్కి గడియకయ్ తయెదె.

11 అగ్గె తిలో అప్పె నెంజిలో జో జంతు, జలె, జో అట్టుచొ రానో జయెదె, గని జేవ్ అన్నె సత్తుజిన్తె బెదితోసా జయెదె, చి జో నాసెనుమ్ జా గెచ్చుక అస్సె.

12 “పడ్డొ తుయి దెకిల దెస్సు కొమ్మల్ కిచ్చొ జవుల మెలె, ఏలుప కెర్తి అదికారుమ్ నేతయ్ గని అదికారుమ్ దొర్కు జా దెస్సుజిన్ రానల్ జవుల. జేవ్చి సమయుమ్ జా అయ్లె, జో జంతు తెన్ ఎక్కి గడియకయ్ రానల్ జా ఏలుప కెర్తి సెక్కి జేవ్క దొర్కు జయెదె.

13 ఈంజేవ్ ఎక్కి ఉద్దెనుమ్ తా, జో జంతుచి అత్తి జోవయించి సెక్కి జోవయించి అదికారుమ్ సొర్పు కెర దా, జోవయించి కామ్ జర్గు కెర దెవుల.

14 ఈంజేవ్ జో మెండపిల్లచి ఉప్పిరి యుద్దుమ్ కెరుల, చి †మెండపిల్ల జోవయించి ఉప్పిరి జీనెదె. కిచ్చొక మెలె, ప్రబుల్క ప్రబు, రానల్క రానో జో, చి జో తెన్ తిలసక కిచ్చొ మెనుక జయెదె మెలె, జో నిసాన బుకార్లన, జోక నిదానుమ్ తిలస మెన జో దూత అంక అర్దుమ్ సంగిలన్.

15 “తెదొడి అన్నె, జా తేర్బోద వెన తిలి టాన్ తుయి దెకిల పానివొ కిచ్చొ జవుల మెలె, పైజల్, జనాబ్, రాజిమ్లు అన్నె బాసల్ కొడొ జతసక.

16 పడ్డొ, తుయి దెకిల దెస్సు కొమ్మల్ జల రానల్, జలె, జంతు తెన్ బెద, లంజె జా తిలి తేర్బోదక జేవ్ ఒగ్గర్ విరోదుమ్ జవుల. జేవ్ జాక కీపాడ్ కెర, డుమ్డి కెర, జాచి ఆగ్చి సిద్ద కా కెర, జాక ఆగితె డయ గెలుల.

17 కిచ్చొక మెలె, దేముడు సంగిల కొడొచి కామ్ పూర్తి నెరవెర్సుప జతె ఎదక, జేవ్ ఎక్కి మెన్ను తా జోవయించి ఇస్టుమ్ జర్గు కెరుక మెన, జో జంతుచి అత్తి జోవయించి రానల్చి సెక్కి అదికారుమ్ జేవ్ సొర్పు కెర దా, జోచి కామ్ జర్గు కెరుక మెన, దేముడుయి జర్గు కెర అస్సె.

18 అన్నె, తుయి దెకిలి తేర్బోద కొన్ని మెలె, బూలోకుమ్చ రానల్చి ఉప్పిరి అదికారుమ్ తిలి *వెల్లి పట్టుమ్ జయెదె,” మెన దూత అంక సంగిలన్.

* 17:4 17:4 ఊద రంగు మెలె, ఎరన చి నీలిమ్ రంగు బెదయ్లె ఊద రంగు జయెదె. † 17:5 17:5 ‘వెల్లి బబులోను’ మెలె, రోమ్ పట్టుమ్క టాలి జతయ్. జా పట్టుమ్ జా రాజిమ్చ రానల్ నంపజలసక జేవ్ పొదులె ఒగ్గర్ అల్లర్ కెర్తి తిల. ఒత్త తెంతో ఒగ్గర్ రాజిమ్లుచ కి దన అల్లర్ కెర అస్సి. † 17:8 17:8 ఏక్ వేల రోమ్ దేసిమ్చ నీరో కైసర్ రానొక; మెలె వెల్లి రానొక; ‘జంతు’ మెన సంగితయ్ మెన సగుమ్జిన్ ఉచర్తతి. జో నీరో నంపజలసక ఒగ్గర్ అల్లర్ కెర తా అత్య కెరన్, గని జోవయించి బుద్ది తిలో దొమితియన్ మెలొసా సగుమ్ వెర్సుల్ గెలి పడ్డొ కైసర్ రానొ జలన్, చి జో కి నీరోచి రితి నంపజలసక ఒగ్గర్ అల్లర్ కెర్తన్. జో కి ‘అవ్ ఎత్తి అదికారుమ్ తిలో దేముడు’ మెన సంగితె తిలన్. అన్నె దన అల్లర్ కెర్తన పడ్డొ తిల. § 17:8 17:8 11:7 దెక. * 17:8 17:8 3:5, 13:8 దెక. † 17:9 17:9 రోమ్ పట్టుమ్ సత్తు మెట్టల్చి ఉప్పిరి తిలి. † 17:14 17:14 యేసుప్రబు, గెద. § 17:16 17:16 పడ్డొ రోమ్ పట్టుమ్చి రాజిమ్ దన అల్లర్ జలి. * 17:18 17:18 జేవ్ పొదులె రోమ్ పట్టుమ్క దస్సి సెక్కి తిలి. పడ్డొ అన్నె సగుమ్ దేసిమ్లు దన అల్లర్ కెర అస్సి.

18

బబులోను చి తీర్పు

1 ఇన్నెచి పడ్డో కిచ్చో దెకిలయ్ మెలె, అన్నెక్ దూత పరలోకుమ్ తెంతో ఉత్త్ర అయ్లిసి దెకిలయ్. జోక ఒగ్గర్ అదికారుమ్ తిలి. జోచి ఒగ్గర్ ఉజిడిక ఒండి బూలోకుమ్ ఉజిడ్ జా గెలి.

2 పడ్డో గట్టిజ అవాడ్ కెరన కిచ్చో మెన ఒర్న దిలో మెలె, “వెల్లి బబులోను సేడ గెచ్చు అస్సె, సేడ గెచ్చు అస్సె.

జా బూతల్ జితి టాన్ జా అస్సె; ఎత్తి వెట్కారుమ్చి బూతుమ్ రకితి టాన్, ఎత్తి గర్చి పిట్ట రకితి టాన్ జా అస్సె.

3 కిచ్చోక మెలె, జేవ్చి లంజె ఆసచి రస్సుమ్ పియ రాజిమ్లు ఎత్తిచ మాన్సుల్ మచ్చు గెచ్చు అస్సి, చి జేవ్ తెన్ ఈంజ లోకుమ్చ రానలు లంజె జా అస్సి, చి జేవ్చి పాపుమ్చ ఆసల్చి సొమ్నారుమ్క ఈంజ లోకుమ్చ సావుకర్లు సొమ్నారుమ్ జా అస్సె.”

మెన జో దూత సంగిలన్.

4 తెదొడి, పరలోకుమ్ తెంతో చి అన్నెక్ అవాడ్ కిచ్చో సంగిలిసి సూన్లయ్ మెలె, “జాచ పాపల్తె తూమ్ నే బెదితి రిసా, జాచ సిచ్చల్చ దెబ్బల్ తుమ్క నే జెతి రిసా అంచ పైజల్, జాచి తెంతో తుమ్ బార్ జా.

5 జా కెర్ల పాపల్ కెత్తి మెలె, ఆగాసుమ్ ఎద పావిత్ రితి కొట్టు జతతి, చి జా కెర్ల జాచ పాపల్ దేముడు నే పచ్చితె ఏదస్ట కెర్తయ్.

6 జా దిలి ఎదిలి జాక దా, జా కెర్ల కమెచి కంట అన్నె జాక దొన్ని వాటల్ కెర, జా కయ్లి గిన్నచి విస్సుమ్చి జా పితి రితి అన్నె దొన్ని వాటల్ కలోవ దాస.

7 జాక జయ్యి కిసి గవురుమ్ ఉచరన పొకిరి కెరన్ల కొల్లి జయ్యి నొప్పి జా ఏడ్డి రితి, సిచ్చ దాస.

‘ఆవ్ రాని జా వెస అస్సి, రండెల్ మాన్సు నెంజి, ఆవ్ కెయ్క ఏడుకుడు జంక నాయ్’ మెన జాచి పెట్టి ఉచరంతయ్.

8 జాక, ఎక్కి దీసి, జాక సిచ్చల్చ దెబ్బల్ లయుల. కిచ్చో సిచ్చల్ మెలె, మొర్చు, దుకుమ్, చి కరు జతిసి, చి ఆగితె డడ్డ గెచ్చెదె.

కిచ్చోక మెలె, జాక తీర్పు కెర సిచ్చ దెతో ప్రబు జలో దేముడు సత్తుచొ”

మెన జా అవాడ్ సంగిలన్.

వెల్లి బబులోనుక నంపజల మాన్సుల్

* 18:13 18:13 తియన వస్తువల్తె రోసుల్తె గలుక జయెదె. † 18:13 18:13 ఏక రగుమ్ చెంగిల్ వాసన తెలు. ‡ 18:13 18:13 జా దస్సి ఒలివ పండ్లుచి తేలు వాడిక కెరుల.

9 దస్సి, వెల్లి బబులోను తెన్ లంజె జా పొకిరి జల బూలోకుమ్చ రానల్ జా డడ్డితి సిచ్చచి దుమ్మొ దెక, జాచి రిసా ఏడుకుడు జవుల.

10 జా సిచ్చ జత బాదల్క బియ్ కెర, దూరి టీవోజ తా కిచ్చో మెన ఏడుల మెలె,

“అయ్యె! అయ్యె! తుయి వెల్లి పట్టుమ్, తుయి వెల్లి బబులోను పట్టుమ్!

ఎక్కి గడియయ్ తుచి సిచ్చ జర్లు జలి!”

మెన ఏడుల.

11 అన్నె, బూలోకుమ్చ సావుకర్లు జాచి రిసా ఏడుకుడు జవుల. జా గెలె, జాచి సామన్ అన్నె కోయి గెంతి నాయ్ చి రిసా ఏడుకుడు జవుల.

12 కిస సామన్లు మెలె, బజార్ సామన్, వెండి సామన్, రత్నాలు, ముత్యల్, చెంగిలి బట్ట, బట్టతె దెరయ్తి ఊద రంగు, సిల్కు బట్ట, ఎరన బట్ట, ఎత్తి రగల్ వాసనచి దారు, ఏనుగు కోరల్క తెయార్ కెర్ల వస్తుల్, ఒగ్గర్ విలువచి దారుక తెయార్ కెర్ల వస్తుల్, కంచు సామన్, ఇనుము సామన్, సూటి రగల్ పత్రల్క కెర్ల సామన్,

13 *దాల్చిమ్ చెక్కల్, బోడి గాఃసంతి చెంగిల్ వాసన తేలు, దూపుమ్, †అత్తర్ తేలు, గందుమ్, ద్రాచ రస్సుమ్, ‡మాములుమ్ తేలు, మెత్తన పిట్టు, గోదుము, సొమ్మూల్, మెండల్, గోడలు, రదుమ్లు, గొతిమాన్సుల్; మెలె మాన్సుల్చ జివుల్.

14 ఇన్నెతెన్ కిచ్చో ఏక కోడు బెదితయ్ మెలె, “తుయి పెట్టి ఆస జలి పంటో తుక ముల దా అస్సె, అన్నె తుక కెయ్క అన్నె నే దొర్కు జతి రితి, తుచి సుక్కుమ్ తుచి బడాయ్ జలిన్ పూర్తి గెలి.”

15 జా లంజెచి పట్టుమ్తె జోవయించి సామన్ దొర్కు కెరన ఇన పున్తకల్ ఏకిల సావుకర్లు కి దూరి టీవోజ, జాచి సిచ్చచ బాదల్క బియ్ కెర, ఇసి మెన ఎదార్డుమ్ ఏడుకుడు జవుల.

16 “అయ్యె! అయ్యె! చెంగిల చెంగిల బట్టల్, ఊద రంగుచ, ఎరన రంగుచ పాలల్ గలన, బజరి, రత్నాలు, ముత్యల్ తియన్ల వెల్లి పట్టుమ్ కెర్లె నస్టుమ్ జా అస్సె!

17 ఎక్కి గడియయ్ జాచి సొమ్నారుమ్ పూర్తి పాడ్ జా అస్సె!”

మెన ఏడుకుడు జవుల.

పడ్డో, ఓడల్ ఇండయ్త ఎజోమాన్లు, నముద్దుమ్తె గెతన, ఓడల్తె కూలి కామ్ కెర్లన, చి నముద్దుమ్ జిన బియ్యారి కెర్ల ఎత్తిజిన్ దూరి టీవోజ,

18 జా లంజెచి పట్టుమ్ డడ్డితినచి దుమ్మొ దెక, కిచ్చో మెన ఒర్చిల మెలె,

“ఈంజ పట్టుమచి ఎదిలి కేన్ పట్టుమ్ అస్సె?”

మెన దుకుమ్ కేక్ గల.

19 జోవయించ బోడిలె దూడి వించన ఏడుకుడు జా కిచ్చొ

మెన అన్నె కేక్ గల మెలె,

“అయ్యె! అయ్యె! సముద్రుమ్తె గెత ఓడల్ తిలస
ఎత్తిజిన్ జేవచి

సొమ్మారుమ్క సొమ్మారుమ్ జలి వెల్లి పట్టుమ్

కెద్ది నస్తుమ్ జా అస్సె!

ఎక్కి గడియయ్ పూర్తి నాసెనుమ్ జా గెచ్చు అస్సె!

20 ఓ పరలోకుమ్, దేముడుచ ఓ మాన్సుల్,

జోచ బారికుల్ జలస, జోచ కబుర్లు సంగిలస,

జాచి రిసా సర్ల జా!

కిచ్చొక మెలె,

జా తుమ్క అల్లర్ కెర్రి రిసా,

దేముడు జాక తీర్పు కెర,

సిచ్చు కెర అస్సె.”

మెన కేక్ గల్ల.

21 తెదొడి, సత్తుచొ ఏక్ దూత ఎక్కిలో తిర్వెలిచి ఎదిలి
జాడుచి ఏక్ పత్తురు ఉక్కుల, సముద్రుమ్తె గల కిచ్చొ మెన
సంగిలన్ మెలె,

“ఓ బబులోసు వెల్లి పట్టుమ్,

తుయి ఇసి డీస గలి జా అన్నె కెయ్యక కి డీసె నాయ్.

22 అన్నె వీన బజాయ్తి అవాడ్, ఎత్తి బజెన బజాయ్తిసి,

మూరి పుజితిసి, సప్పిర్మూరి పుజితిసి,

అప్పె తెంతో కెయ్యక కి తుచితె కో సూన్తి నాయ్.

అన్నె, కిచ్చొ రగుమ్ కామ్ కెర్తస కి

తుచితె కెయ్యక అన్నె తతి నాయ్.

అన్నె, తిర్వెలి బులితి అవాడ్

తుచితె కెయ్యక అన్నె కోయి సూన్తి నాయ్.

23 అన్నె, తుచితె కేన్ దీవుచి ఉజిడి

అన్నె కెయ్యక లగె నాయ్.

అన్నె, పెండ్లి ఉబెడొ పెండ్లి ఉబేడిచి అవాడ్లు

తుచితె అన్నె కెయ్యక కో సూన్తి నాయ్.

కిచ్చొక మెలె, తుచ సావుకర్లు ఒండి లోకుమ్క వెల్లి జా తిల,

చి తుచి మెంగుర్ కామ్క ఎత్తి రాజిమ్లుచ మాన్సుల్

మోసిమ్ జా గెల.

24 అన్నె, జేవ్తెయి దేముడుచ కబుర్లు సంగితసచి,

జోవయించయ్ జల మాన్సుల్ ఎత్తిజిన్చి,

అన్నె బూలోకుమ్తె మాన్సు మాల్లస ఎత్తిజిన్చి

లోయి జా పట్టుమ్తె డీసిలిచి సిచ్చు జలి”

మెన సత్తుచొ జో దూత సంగ సముద్రుమ్తె వెల్లి పత్తురు
గలిలన్.

19

జా లంజెచి పట్టుమ్క ప్రబు సిచ్చు కెర్రిసి

1 ఇన్నెచి పడ్డె, పరలోకుమ్తెచ ఒగ్గర్జిన్ జనాబ్ జట్టు
తెన్ కేక్ గలిన్చ అవాడ్లు సూన్లయ్. కిచ్చొ మెన కేక్ గల
మెలె,

“*దేముడుక జెయ్యి!

రచ్చున, గవురుమ్, సెక్తి, అమ్చొ దేముడుతెయి అస్సె!

2 “జోచ తీర్పులు సిచ్చులు సత్తిమ్చ, సరిగచ.

జేవ్చ లంజె కమొక ఒండి లోకుమ్క నాసెనుమ్ కెర్రి జా వెల్లి

లంజెక

జో తీర్పు కెర సిచ్చుతె గల అస్సె,

చి జోచ సేవ కెర్తసచి లోయి జా సువ దిలి రిసాచి సిచ్చు

జో నెరవెర్నుప కెర అస్సె.”

మెన కేక్ గల,

3 అన్నెక్ సుట్టు ఇసి మెన కేక్ గల,

“దేముడుక జెయ్యి!

జా లంజె జలి వెల్లి పట్టుమ్ డడ్డ గెలి దుమ్మొ

నే కుట్టితె కెయ్యక తెయ్యక వెగ గెతయ్!”

మెన కేక్ గలిల.

4 తెదొడి †విస్సెక్ చెత్తర్జిన్ వెల్లెల మాన్సుల్, చి

‡సింగాసనుమ్చి సుట్టునంత టీవొజ తా చెత్తర్ జివుల్

సెర్పు సేడ, సింగాసనుమ్తె వెన తిలో దేముడుక,

“అమేన్! దేముడుక జోబర!”

మెన సంగ బక్తి కెర్ల.

5 అన్నె, కిచ్చొ మెన సంగ సిజాసనుమ్ తెంతో ఏక్ అవాడ్

అయ్లి మెలె,

“తుమ్ జోచ సేవ కెర్తస, తుమ్ జోక బితస, బాల వెల్లి

ఎత్తిజిని,

అమ్చొ దేముడుచి గవురుమ్ గాయ్!”

మెన అవాడ్ అయ్లి.

మెండపిల్లచి పెండ్లి

6 తెదొడి ఒగ్గర్ పానివొ సూయి జతి అవాడ్ అయ్లి

రితి, ఒగ్గర్ ఉర్ముల్ కెర్రిన్చి అవాడ్ అయ్లి రితి, ఒగ్గర్జిన్

జనాబ్చ అవాడ్లు రితి సూన్లయ్. కిచ్చొ మెన కేక్ గల్ల మెలె,

“ఎత్తి సెక్తి అదికారుమ్ తిలో దేముడుక జోబర!

ప్రబు జలో అమ్చొ దేముడు ఏలుప కెర్తయ్!

7 మెండపిల్లచి పెండ్లి జతి సమయుమ్ జా అయ్లి, చి

‡పెండ్లి ఉబేడ్ తెయార్ కెరన అస్సెచి రిసా

ఆవ్ సర్లసంతోసుమ్ జా, జోక గవురుమ్ కెరుమ!

* 19:1 19:1 జోవయించ బాస తెన్ ‘హల్లెలూయా!’ మెన కేక్ గలుల, ‘ఎత్తి అదికారుమ్ తిలో దేముడుక జెయ్యి!’ మెలి అర్దుమ్ తెన్ † 19:4 19:4 4:4 దెక. ‡ 19:4 19:4 4:6-8 దెక. § 19:7 19:7 ‘మెండపిల్లక గెతి బూలి’ మెలె కిచ్చొ అర్దుమ్ తయెదె మెలె, యెసుక్రీస్తుక సంపజలస మొత్తుమ్, సంపజలస మొత్తుమ్చి సంగుమ్, ఎవెసు కచి ఉత్తుమ్ 5:31-32, యిర్మీయా 2:1-3, యెసయా 49:18, 69:10. పడ్డె జేవ్ సంపజలస గెచ్చు జింక తిలి నొవి యెరూసలేమ్, మెలె పరలోకుమ్చి పట్టుమ్క కి ‘మెండపిల్లచి బూలి’ మెనుల. 21:9, 10.

8 పెండ్లి ఉబేడ్ చొక్కీల్చి పూర్తి సుద్దిచి చెంగిలి బట్ట గలనుక మెన

జాక దిల!"

మెన కేక్ గల్ల. జా చెంగిల్ బట్టక కిచ్చొ అర్లుమ్ మెలె, * ఎత్తి అదికారుమ్ తిలొ దేముడుచ జల మాన్సుల్చ పున్నిమ్చ కమొ జవుల.

9 అన్నె జో దూత అంక కిచ్చొ సంగిలన్ మెలె, "ఇసి రెగుడు, 'మెండపిల్లచి పెండ్లి విందుతె బుకార్లసక చెంగిలి' మెన రెగుడు" మెలన్, చి అంక అన్నె, "ఈంజ కొడొ దేముడుచి సత్తిమ్చ కొడొయ్" మెలన్.

10 తెదొడి, బక్తి కెరుక మెన, జో దూతచి చట్టె సెర్ను సేడ్లయ్, గని అంక జో, "దస్సి కెరుక నాయ్. తుచి రితి, యేసుక నంప కెర్ల తుచ బావుడ్లుచి రితి జయిందె. మెలె, దేముడుక సేవ కెర్తొసా జయిందె. అంక పొని, గని దేముడుకయ్ జొకరు." మెలన్. కిచ్చొక మెలె, యేసు సంగిలి జో దెకయ్లి సాచి, దేముడు సంగిలొ కబుర్లు ఎక్కి ఆత్మ తెంతొచ.

చొక్కీలొ గోడతె వెగ జెతొసా

11 తెదొడి కిచ్చొ దెకిలయ్ మెలె, పరలోకుమ్ ఉర్ది జా తిలిన్ దెకిలయ్, చి ఆదె! చొక్కీలొ గోడొ! జోతె వెసిలొసాచి నావ్ కిచ్చొ మెలె, 'నిదానుమ్చొ, సత్తిమ్చొ'. చి సత్తిమ్చ తీర్పుల్ కెర, 'దేముడుచి సత్తిమ్ జీనున్' మెన, యుద్దుమ్ కెర్లయ్.

12 జోచ అంకివొ కీన మెలె, ఆగి లగిల్ రితి, చి జోచి బోడితె ఒగ్గర్ కిరీటల్ అస్తి. జోచి అగి రెగిడ్లి నావ్ ఏక్ అస్సె. గని కిచ్చొ నావ్ గే ఎక్కి జోకయ్ ఎర్కె, గని అన్నె కక్కయ్ నాయ్.

13 లొయితె బుడ్డ తిలొ పాలుమ్ జో గలన అస్సె, చి జోక తిలి నావ్ కిచ్చొ మెలె, 'దేముడుచి †కొడు' మెలి నావ్ తిలన్.

14 అన్నె, పరలోకుమ్చ సయ్యములు కి, సుద్ది తిలి చొక్కీలి చెంగిలి బట్టచ పాలల్ గలన, చొక్కీల గోడల్తె జేవ్ కి వెగ, జోచి పట్టి గతతి.

15 ఎత్తి అదికారుమ్ తిలొ దేముడుక ‡నేన్ల మాన్సుల్క మార్తి వాండి తిలి కండా జోచి చొండి తెంతొ బార్ జతయ్. గొవుడుచి ఇనుముడండొ తెన్ జోవయింక ఏలుప కెరెదె. ఎత్తి సెక్తి అదికారుమ్ తిలొ దేముడుచి సిచ్చుచి కొపుమ్చి గిన్నతె జో సుద, జేవ్ మాన్సుల్క కెర్తి సిచ్చు జో జర్లు కెరెదె.

16 జోచి పాలుమ్తె చి జోచి జంగయ్ చి ఉప్పిరి ఏక్ నావ్ అస్సె. 'రానల్క రానొ, ప్రబుల్క ప్రబు' మెలి నావ్.

ఆకర్చి యుద్దుమ్

17 తెదొడి కిచ్చొ దెకిలయ్ మెలె, పొద్దుచి ఉజిడ్తె టీవొజ తా ఏక్ దూత గట్టిజ అవాడ్ కెరన, పొద్దు ఆగాసుమ్చి

* 19:8 19:8 నెంజిల 'ప్రబుచయ్ జల మాన్సుల్' మెనుక జయెదె. † 19:13 19:13 యోహాను 1:1. ‡ 19:15 19:15 నెంజిల 'నెసిల మాన్సుల్' మెనుక జయెదె. § 19:20 19:20 సముద్దుమ్ తెంతొ బార్ జలొసా 13:1. * 19:20 19:20 బుయి తెంతొ బార్ జలొసా 13:11. * 20:1 20:1 9:1 దెక.

మదెనె టీవొజ, పక్కయ్ ఉడ్డిత ఎత్తి పిట్టల్క కిచ్చొ మెన కేక్ గలొ మెలె, "తుమ్ జా! చి దేముడు దొర్కు కెర్తి వెల్లి విందుక తెయార్ జా తా.

18 రానల్చి సిద్ద, వెయి జమాన్సుక వెల్లిచి సిద్ద, ఒగ్గర్ సెక్తిబలుమ్ మాన్సుల్చి సిద్ద, గోడల్చి సిద్ద, జోవయింతె వెగితనచి సిద్ద, ఎత్తి రగల్ మాన్సుల్చి సిద్ద; జేవ్ గొతి నెంజిలన జలెకి, గొతిమాన్సుల్ జలెకి; బాల వెల్లిచి సిద్ద కస్త" మెన, దూత పిట్టల్క సంగిలన్.

19 తెదొడి కిచ్చొ దెకిలయ్ మెలె, జో పాపుమ్చొ జంతు, చి ఒండి లోకుమ్చ రానలు, జోచ సయ్యముల్ తెన్ ఎక్కితె బెర్ల. కిచ్చొక మెలె, జో గోడతె వెసిలొసాచి ఉప్పిరిచి జోచ సయ్యముల్చి ఉప్పిరి యుద్దుమ్ కెరుక మెన బెర్ల.

20 తెదొడి †జంతు దెర్ను సేడ్లొ, చి జో తెన్, జోచి నావ్ తెన్ వెల్లి మాయకమొ కెర్లొ అన్నెక్ * జంతు కి దెర్ను సేడ్లొ. జో అబద్దుమ్క దేముడుచ కబుర్లు సంగితొసా ఆవ్ మెన అగ్గె సంగ తిలన్. అన్నె, జో జంతుచి గుర్తు కెరవన, జోచి బొమ్మక బక్తి కెర తిలనక మోసిమ్ కెర తిలొ. జో కి దెర్ను సేడ్లొ. జలె, జేవ్ దొగులక జీవ్ తత్తె, ఎడ్డి రంగు లగితి వెల్లి ఆగి గొయ్చి గడ్డె గల దిల.

21 తెదొడి, గోడతె వెసిలొసా జోచి కండా తెన్ రానల్కచి జేవ్ సయ్యములు ఎత్తిక మారయ్ గెలన్. జోచి చొండి తెంతొ బార్ జతి కండా తెన్ అన్నె, ఎత్తి పిట్టల్ జేవ్ మొర్లన ఎత్తిజనచి సిద్ద కా గెల కెర, పేట్ బెర్లె కయ్ల.

20

సయ్యతాన్ మట్టు నెంజిలి గొయితె వెయి వెర్పుల్ తతి సిచ్చు జతిసి

1 అన్నె కిచ్చొ దెకిలయ్ మెలె, పరలోకుమ్ తెంతొ దూత ఎక్కిలొ ఉత్తె జెతె తిలిసి దెకిలయ్. జోచి అత్తి మట్టు నెంజిలి జా * వెల్లి గొయిచి తాలుమ్ కడి, చి జాడు తిలి ఏక్ ఇనుము గొల్పు తిల.

2 తెదొడి వెల్లిచొ జో అయిక, జలె పూర్లుమ్ తెంతొచొ అయిక, మెలె, సయ్యతాన్ జలొ సయ్యతానుక దూత దెర కెర, వెయి వెర్పుల్ జో దస్సి తతి రితి జోక బంద గెల కెర,

3 మట్టు నెంజిలి జా గొయితె గల దా, వెయి వెర్పుల్ గెతె ఎదక దేముడుక నేన్ల మాన్సుల్క జో అయి అన్నె నే మోసిమ్ కెర్తి రిసా, జోచి ఉప్పిరి డంక దిలన్. జా వెయి వెర్పుల్ గెలె, జోక గడియ విడ్డల్ కెరుక.

క్రీస్తు తెన్ వెయి వెర్పులు ఏలుప కెరుక

4 తెదొడి కిచ్చొ దెకిలయ్ మెలె, సిజాసనల్, చి జోవయించి ఉప్పిరి కో వెన తిల మెలె, బూలోకుమ్చ దేసిమ్లు ఎత్తిక

ఏలువ కెర్తి రిసా దేముడు సెలవ్ దిలన. కొన్న మెలె, యేసుచి రిసా జేవ్ సాచి సంగ తిలి రిసా, చి దేముడుచి కోడు జేవ్ దెరన్లి రిసా, బోడి గండల్ జలన, చి అన్నె కొన్న మెలె, జో పాపుమ్చో జంతుక చి జోచి బొమ్మక బక్తి నే కెర్లన, జోచ నిర్దెలె అత్తిలె జోచి గుర్తు నే కెరవన్లన. జేవ్ జలె, జీవ్ జా ఉట్టిల, చి వెయి వెర్చులు క్రీస్తు తెన్ ఏలువ కెర్ల.

5 ఈంజయ్ జీవ్ జా ఉట్టిన్క 'తొలితొ చి' మెనుక జయెదె. తొలితొచి ఈంజ జీవ్ జా ఉట్టిన్కె బెదితనక చెంగిలి. ఎత్తి అదికారుమ్ దేముడుచ జేవ్ జవుల! కిచ్చొక మెలె, జోవయించి ఉప్పిరి †పడ్డొకచి మొర్నుక కిచ్చొ అదికారుమ్ తయె నాయ్.

6 తొలితొ చి జీవ్ జా ఉట్టిసి జతన దేముడుక చి క్రీస్తుక పూజర్లు రిత జవుల, చి వెయి వెర్చుల్ పూర్తి జో తెన్ ఏలువ కెరుల.

సయ్తాన్ అన్నె విడ్డల్ జా యుద్దుమ్ కెర్తిసి

7 జేవ్ వెయి వెర్చుల్ కేడ్లె, జో జేలి జలిసి తెంతో సయ్తాన్ విడ్డల్ జా,

8 'గోగు' 'మాగోగు' మెన బూలోకుమ్చ చెత్తర్ పక్కలెచ దేముడుక నేన్ల మాన్పుల్ యుద్దుమ్క తెయార్ జతి రితి, జో సయ్తాన్ జోవయింక మోసిమ్ కెరెదె. జేవ్ మాన్పుల్చి లెక్క కెర్ది మెలె, సముద్దుమ్తెచి ఇన్కగిడ్డల్ కెత్తి జా లెక్క కెరుక నెంజె గే, తెదివాట్ జిన్ జవుల.

9 తెదొడి జేవ్ బూలోకుమ్చి రుందిలి టాన్తె వెగ జా, దేముడుచ జల మాన్పుల్చి సుట్టునంత, చి జో †ప్రేమ తిలి పట్టుమ్చి సుట్టునంత బెర అయ్ల. గని పరలోకుమ్ తెంతో దేముడు తెంతో ఆగి సూయి జా జోవయింక డయ గెలి.

10 జోవయింక మోసిమ్ కెర్లొ సయ్తాన్ సిచ్చు జతె తంక ఎడ్డి ఆగి లగితి వెల్లి ఆగి గొయ్తె గీగలి జలొ. జో పాపుమ్చో జంతు, అన్నె అబద్దుమ్క 'దేముడుచ కబుర్లు సంగిత్సా ఆవ్' మెనన్లొసా కి ఒత్తయ్ గలి జా అన్తి. జేవ్ రాతి మెద్దెనె కెయ్క తెయ్క నే పిట్టె, ఒత్త సిచ్చల్ బాదల్ జతె తవుల.

మొర్లనక ఆకర్చి తీర్పు జతిసి

11 అన్నె కిచ్చొ దెకిలయ్ మెలె, వెల్లి చొక్కలి సిజాసనుమ్, చి జాచి ఉప్పిర్ వెసిలోసాక దెకిలయ్. జోతె తెంతో బూలోకుమ్ ఆగానుమ్ నిగ గెల, చి జేవ్క అన్నె కేన్ టాన్ నాయ్.

12 తెదొడి కిచ్చొ దెకిలయ్ మెలె, బాల వెల్లొ మొర్లన ఎత్తిజిన్ సింగాసనుమ్చి పురె టీచ తతికయ్, పుస్తకల్ *ఉగిడ్ల. పడ్డొ అన్నెక్ పుస్తకుమ్ ఉగిడ్ల; పరలోకుమ్తె జింక

సెలవ్ తిలనచ నవ్వొ రెగిడ్లి పుస్తకుమ్. జలె, మొర్లన జేవ్ కెర్ల కమొచి రిసా జేవ్ పుస్తకల్తె రెద్ద తిలి రితి తీర్పు జల.

13 తెదొడి, జేవ్తె మొర్లనక సముద్దుమ్ సార్చు కెర దిలి, అన్నె మొర్ను చి మొర్లన రకితి టాన్ ఒత్త తెంతో తిలనక సార్చు కెర దిల, చి సముద్దుమ్తె మొర్లన, చి మొర మొర్లన, రకితి టాన్తె తిలన ఎత్తిజిన్ జీవ్ జా, సింగాసనుమ్చి పురె టీచ, జేవ్కె, జేవ్క కమొచి రిసా తీర్పు జవుల.

14 తెదొడి మొర్ను చి మొర్లన రకితి టాన్ వెల్లొ ఆగి గొయ్చి గడ్డె †గలి జల. వెల్లి ఆగి గొయ్తె గల్లిసి దొన్నిచి మొర్ను జయెదె.

15 అన్నె, పరలోకుమ్తె జింక సెలవ్ తిలనచ నవ్వొ రెగిడ్లి పుస్తకుమ్తె కచి నావ్ తయె నాయ్ గే, జెవ్వి వెల్లి ఆగి గొయ్తె †గలి జల.

21

నొవి ఆగానుమ్, నొవి బుయి

1 తెదొడి ఆవ్ కిచ్చొ దెకిలయ్ మెలె, నొవి ఆగానుమ్, నొవి బుయి. అగ్గెచి ఆగానుమ్ అగ్గెచి బుయి కేడ తిలి, చి సముద్దుమ్ కి నాయ్.

2 పడ్డొ, పరలోకుమ్చి సుద్దిచి పట్టుమ్, నొవి యెరూసలేమ్ పరలోకుమ్ తెంతో దేముడు తెంతో, మున్నుక జెతికయ్ పెండ్లి ఉబేడ్ రితి తెయార్ జా తా, ఉత్త జెతిసి దెకిలయ్.

3 అన్నె, సింగాసనుమ్ తెంతో చి గట్టిజ అవాడ్చి అవాడ్ కిచ్చొ సంగిలిసి సూన్లయ్ మెలె, "ఈందె, దేముడు జతి టాన్ మాన్పుల్తెయి అన్నె. జోవయింతెన్ జో జయెదె. జేవ్ జోచయ్ పైజల్ జా తవుల, చి జో సొంతయ్ జేవ్ తెన్ తయెదె, జేవ్క దేముడు జా తయెదె.

4 జోవయించ అంకివొతె ఆసునొ కెయ్క అన్నె నే జెతి రితి, జోవయించ ఆసునొ జొయ్యి పుంచ గెలెదె, చి అప్పె తెంతో కిచ్చొ మొర్ను తయె నాయ్. ఏడుకుడు జతిసి, ఏడ్డిసి, నొప్పి కి తయె నాయ్. కిచ్చొక మెలె, పొర్నిచి ఎత్తి ఉట్ట గెల." మెన జా అవాడ్ సంగిలన్.

5 తెదొడి, సింగాసనుమ్తె వెసిలోసా, "ఈందె, ఎత్తి నొవి తెయార్ కెర్తసి" మెన, అన్నె, "ఈంజ ఎత్తి రెగుడు. ఈంజేవ్ కొడొ సత్తిమ్చ, నంపజతన" మెన జో సంగిలన్.

6 తెదొడి అంక, "పూర్తి జర్లు జలి, 'అల్పా, ఓమెగ' మెన ఆవ్ మొదొల్చొ, ఆకర్చొ. కక్క తాన్ కెర్లె, డబ్బుల్ నే దెతె, జీవ్ దెతో పాని అంచి ఊంట తెంతో ఆరి దెయిందె.

7 కో జీనుల గే, అంచి రాజిమ్చి ఈంజ వాట జోక దెయిందె, చి ఆవ్ జోచొ దేముడు జయిందె, జో అంక పూత్తు జా తయెదె.

† 20:5 20:5 మెలె, వెల్లొ ఆగి గొయ్చి సిచ్చతె గెతిసి. 20:14. ‡ 20:9 20:9 దొన్ని అర్థల్ ఉచరుక జయెదె. ఏక్ మెలె, మాములుమ్ యెరూసలేమ్ పట్టుమ్. అన్నెక్ మెలె, కెనె ప్రబుచయ్ మాన్పుల్ తవుల గే, ఒత్తయ్ మెన ఉచరుక జయెదె. § 20:10 20:10 ఎత్తి అదికారుమ్ తిలొ దేముడు ఒత్త గలయ్లొ, గెద. * 20:12 20:12 కో ఉగిడ్ల గే సంగె నాయ్. † 20:14 20:14 ఎత్తి అదికారుమ్ తిలొ దేముడు ఒత్త గలయ్లొ, గెద. ‡ 20:15 20:15 ఎత్తి అదికారుమ్ తిలొ దేముడు ఒత్త గలయ్లొ, గెద.

8 గని అంచి సాచి జంక బితన, నముకుమ్ నెంజిలన, నిదానుమ్ నెంజిలన, హత్య కెర్తన, లంజె జతన, మెంగ్ర మాన్సుల్, బొమ్మల్ జొకర్తన, అబద్దుమ్ జతన, అబద్దుమ్ కెర్తన, సయ్తాన్చి వెట్కారుమ్ జలన, జేవ్చి సచ్చ, గందకము తెన్ ఆగి లగితి వెల్లి ఆగి గొయ్తె గలుల. ఈంజ దొన్నిచి మొర్ను.”

మెండపిల్లక తేర్చి జతిసి నొవి యెరూసలేమ్

9 తెదొడి సత్తు ఆకర్చ సిచ్చల్ బెర్ల సత్తు గిన్నల్ అగ్గె దెర సువ తిల సత్తు *దూతల్తె ఎక్కిలో అంచితె జా కెర కిచ్చొ మెన అంక సంగిలన్ మెలె, “జో మెండపిల్లక తేర్చి జతి పెండ్లి ఉబేడక తుక దెకయిందె” మెలన్.

10 తెదొడి దేముడుచి యేసుచి ఆత్మసెక్కిక జో దూత అంక ఒగ్గర్ డోంక తిలి డొంగుతె కడ నిలన్, చి జో అంక దెకయ్తెకయ్, ప్రబుచి జా ఆత్మసెక్కిక కిచ్చొ దెకిలయ్ మెలె, జోచి †సుద్ది తిలి యెరూసలేమ్ పట్టుమ్ దెకిలయ్.

11 జా పట్టుమ్చి ఉజిడి కిసి తిలి మెలె, దేముడుచి ఉజిడ్ తెన్ తా, ఒగ్గర్ విలువచి రత్తుమ్చి రితి ఉజిడి లగిలి, వజ్రుమ్చి రితి సీనచి రితి టేంటచి ఉజిడి లగిలి.

12 జా పట్టుమ్క వెల్లి కోట ఒగ్గర్ డోంక తిలి. జా కోటతె బార గుమ్మల్ తిల. జేవ్ బార గుమ్మల్తె ఎక్ ఏక్ దేముడుచొ దూత తిలి. జేవ్ బార గుమ్మల్తె ‡ఇస్రాయేలుచ బారజిన్ పుత్తర్పుల్చ సెకుమ్లుచ ఎక్కిక్ నవ్వొ, ఎక్కిక్ గుమ్మలె రెగ్గ తిల.

13 తూర్పు పక్క తిన్ని గుమ్ముమ్లు, ఉత్తర పక్క తిన్ని గుమ్ముమ్లు, దచ్చెన పక్క తిన్ని గుమ్ముమ్లు, చి పడమర పక్క తిన్ని గుమ్ముమ్లు తిల.

14 వణ్ణొ పట్టుమ్చి కోటక బార పునాద్దు, చి జేవ్ పునాద్దుతె మెండపిల్లచి చి రిసాచ బారజిన్ బారికుల్చ నవ్వొ ఎక్కిక్ రెగ్గ తిల.

15 అంచి తెన్ లట్టబ్బొ జో దూతక, జా పట్టుమ్కచి జేవ్చ గుమ్ముమ్లకచి కోటక ఏకటార్తి రిసా, బజర్క తెయార్ కెర్లి కటార్తి డండొ తిలి.

16 పట్టుమ్క చెత్తర్ కోనల్, చి జేవ్చ పక్కల్చ కొల్తల్ సమానుమ్ అస్తి, జేవ్చ కోనల్చ కొల్తల్ సమానుమ్ అస్తి. తెదొడి జోచి డండొ తెన్ పట్టుమ్క కటార్లన్. *దొన్ని వెయిల్ దొన్ని పుంజొ కిలోమీటర్లు దూరి జేవ్చి కొల్త. చెత్తర్ పక్కల్ కి సమానుమ్; కెర్లి దీగు జయెదె గే, తెర్లి రూండు, తెర్లి డోంకు కి జయెదె.

* 21:9 21:9 15, 16 అద్యయల్. † 21:10 21:10 19:8 దెక. ‡ 21:12 21:12 జోవయింక అన్నెక్ నావ్ యాకోబు. ‘ఇస్రాయేలు’ మెలె, జో యాకోబుక అన్నెక్ నావ్ జయెదె, చి టాలిక ‘యూదుల్’, నెంజిలె ‘నంపజలన మొత్తుమ్’ చి అర్దుమ్ కెరనుక జయెదె. § 21:15 21:15 మీంతి * 21:16 21:16 రమారమి 1,400 మైలు † 21:17 21:17 అరవయ్ చెత్తర్ మీటర్లు మెలె, డబ్బయ్ దొన్ని గజాలు జయెదె, మెలె పుంజెక్ దొన్ని విసా చెత్తర్. పుంజెక్ దొన్ని విసా చెత్తర్ మెలె, బార బారలు, మెలె 144 = 12 x 12. బార సెకుమ్లుచ యూదుల్ తిల, యేసుక బార బారికుల్ కి తిల. జేక ఈంజ నంబర్ ఏక్ టాలి జయెదె.

17 జేవ్చి కోట కి కటార్లన్. †అరవయ్ చెత్తర్ మీటర్లు డోంకు, మాన్సు కటార్తి రితి, మెలె జో దూత కటార్లన్.

18 జా కోట వజ్రుమ్చి వస్తుతె తెయార్ కెర్లిసి, చి పట్టుమ్ రితి బజరి తిలి, చి జేవ్చి ఉజిడి కిసి మెలె, అద్దుమ్ రితి టేంట లగిలి.

19 జా పట్టుమ్చి కోటచ పునాద్దుతె ఎత్తి రగల్ రత్నాలు లగిల. తొలితో చి వజ్రుమ్, చొక్కిల్ లగిలి. అన్నెక్ రత్తుమ్ నీలిమ్ రగుమ్ లగిలి, అన్నెక్ రత్తుమ్ ‘యమునా’ మెంతిసి ఎరన లగిలి, అన్నెక్ రత్తుమ్ పచ్చన లగిలి.

20 అన్నెక్ రత్తుమ్ నారింజ రంగు లగిలి, అన్నెక్ రత్తుమ్ అన్నెక్ ఎరన రంగు లగిలి, అన్నెక్ రత్తుమ్ తామర్ పూల్చి ఎడ్డి రంగు లగిలి, అన్నెక్ రత్తుమ్ సముద్దుమ్చి పచ్చన రంగు లగిలి, అన్నెక్ రత్తుమ్ అన్నెక్ రంగు ఎడ్డి రంగు లగిలి, అన్నెక్ రత్తుమ్ చీంట్ అక్టల్ నొవర్ పలోయ్లి రంగు లగిలి, అన్నెక్ రత్తుమ్ గులాప్ రంగు లగిలి, అన్నెక్ రత్తుమ్ ఊద రంగు లగిలి.

21 వణ్ణొ బార గుమ్మల్చ టట్టల్ కిచ్చొ వస్తుతె తెయార్ జా తిల మెలె, బార ముత్త్యల్క. ఎత్తి టట్ట ఏక్ ముత్త్యల్క తెయార్ జలిసి, అన్నె, పట్టుమ్చి వీది రితి బజరి తా, అద్దుమ్చి ఎదిలి టేంట లగిలి.

22 అన్నె, జా పట్టుమ్తె కిచ్చొ దేముడుచి గుడి డిసి నాయ్. కిచ్చొక మెలె, ప్రబు జలో ఎత్తి సెక్కి అదికారుమ్ తిలో దేముడు అన్నె మెండపిల్ల సొంత జా పట్టుమ్క దేముడుచి గుడి జవుల.

23 అన్నె, జా పట్టుమ్క ఉజిడి దెంక పొద్దు గే జోసు గే నాయ్. కిచ్చొక మెలె, దేముడుచి ఉజిడి జాక దొర్కు జలి ఉజిడి, చి మెండపిల్ల జాక దీవు.

24 జాచి ఉజిడ్క ప్రెజల్ ఇండుల, చి ఒత్త కిచ్చొయ్ అందర్ తయె నాయ్.

25 అన్నె, రాతి మెద్దెన కెయ్చకి జా పట్టుమ్చ గుమ్మల్ డంకితి నాయ్, అన్నె, ఈంజ నొవి బూలోకుమ్చ రానలు ఒత్త జోవయించి గవురుమ్, జోవయింక గవురుమ్ దెతిసి ఎత్తి ఒత్త ఆనుల.

26 ఎత్తి ప్రెజల్క దొర్కు జలి గవురుమ్, ఎత్తి ప్రెజల్క దొర్కు జలి సొమ్నారుమ్ ఒత్త ఆనుల.

27 గని కిచ్చొ పాపుమ్చి ఒత్త పెసె నాయ్, చి మర్కటుమ్ గే, అబద్దుమ్ గే ఇండితన ఒత్త పెసితి నాయ్. కో ఒత్త పెసుల మెలె, ‘పరలోకుమ్తె బెదుతు’ మెన మెండపిల్లచి పుస్తకుమ్తె కచ నవ్వొ తవుల గే జెవ్వొ పెసుల.

22

జీవ్ దెతో పానిచి గాడు జీవ్ దెతి పలుమ్చొ రూకు

1 అన్నె జో దూత అంక కిచ్చొ దెకయ్లన్ మెలె, పరలోకుమ్చి జీవ్ దెతో పానిచి గాడు. కిసి తిలి మెలె, అడ్లుమ్చి ఎదిలి టేంట తా, దేముడుచి అన్నె మెండపిల్లచి సింగాసనుమ్ తెంతో బార్ జా,

2 పట్టుమ్చి వీదిచి నెడిమి ఉట్ట గెతయ్. పడ్డొ అన్నె కిచ్చొ మెలె, పరలోకుమ్చి జీవ్ దెతో రగుమ్ *రూకుల్ జా గాడుచ దొన్ని పక్కలె అస్తి. జేవ్ రుకాలె బార రగల్ పండ్లు, చి ఎత్తి జొన్ని పండ్లు పిక తత్తతి. జో రూక్చ అక్షల్ కిచ్చొక కామ్క జెతతి మెలె, ఒండి ప్రైజల్చక చెంగిల్ కెర్లయ్.

3 ఒత్త తెంతో, కిచ్చొచి రిసా గార్చి సాపెనల్ తిలిసి తయె నాయ్. దస్సిచి కిచ్చొ కి తయె నాయ్, గని జా పట్టుమ్తె దేముడుచి జో మెండపిల్లచి సింగాసనుమ్ తయెదె, చి జోచ సేవ కెర్లన జోక బక్తి కెరై తవుల.

4 జోచి మొకొమ్ జేవ్ దెకుల, చి జోవయించి నిర్దె జోచి నావ్ తయెదె.

5 పడ్డొ, ఒత్త తెంతో అందర్ తయె నాయ్, చి ఒత్త తిలసక దీవుచి జవున్ పొద్దుచి జవున్ ఉజిడి నాయ్. కిచ్చొక మెలె, ప్రబు జలో దేముడుచి ఉజిడి తయెదె, చి జేవ్ కెయెక తెయెక ఏలువ కెరుల.

6 అన్నె, “ఈంజేవ్ కొడొ సత్తిమ్చ, నంపజతన. అన్నె, ప్రబు జలో, జోచ కబుర్లు సంగితనచి ఆత్మతె సికడ్డొ దేముడు జోచొ దూతక తెద్రవ అస్సె; జర్గు జంక తిలిసి జోచ సేవ కెర్లనక దెకవుక మెన,” అంక జో దూత సంగిలన్.

యేసుప్రబు బే బేగి అన్నె జెయిందె

7 “ఈందె, ఆవ్ బే బేగి అన్నె జెయిందె” మెన యేసు సంగితయ్. ఈంజ పుస్తకుమ్తె తిలి కబుర్చ కొడొ కో దెరనుల గే, జోవయింక చెంగిలి.

8 ఆవ్ యోహాను ఈంజ ఎత్తి సూల్లొసా దెకిలోసా. అన్నె, ఈంజ ఎత్తి సూన దెకిల్ బేగి, అంక ఈంజ ఎత్తి దెకయ్లో దూతచి చట్టె సెర్లు సేడ జోక బక్తి కెర్లయ్,

9 గని జో అంక, “తుయి దస్సి కెరుక నాయ్! ఆవ్ తుచొ రితొ, దేముడుచ కబుర్లు సంగిత తుచ బావొదివొ తెన్ కి, తుచి రితొ సేవ కెర్లొసా జయిందె. దేముడుకయ్ జొకరు!” మెలన్.

10 తెదొడి జో అంక, “ఈంజ పుస్తకుమ్చి కబుర్చ కొడొ ముద్ద కెరు నాయ్, లుంకడు నాయ్; కిచ్చొక మెలె సమయుమ్ పాసి జా అస్సె.

11 పాపుమ్తె ఇండితన అప్పె కి పాపుమ్తె ఇండితె తత్తు, మర్కటుమ్చ అన్నె మర్కటుమ్ ఇండుతు, పున్నిమ్

జలస అన్నె పున్నిమ్తె ఇండితె తత్తు, సుద్దిచ అన్నె సుద్ది ఇండితె తత్తు.” మెన దూత సంగిలన్.

12 యేసుప్రబు సంగిలిసి అన్నె కిచ్చొ మెలె, “ఈందె, ఆవ్ బే బేగి జెయిందె. అయ్లె, ఎత్తి మాన్సు కెర్ల కమొ కొల్లి జోవయించి కూలి దెయిందె.

13 ‘అల్పా’ ‘ఓమెగ’ మెన, †తోలితోచొ, కర్వడ్చొ, మొదొల్చొ ఆకర్చొ ఆవ్వి” మెన యేసు సంగిలన్.

14 పరలోకుమ్చి జీవ్ దెతో చెట్టెచ పండ్లు కంక సెలవ్ దొర్కు కెరంతి రిసా, చి పరలోకుమ్చి గుమ్ముమ్ వాట్ పెసుక సెలవ్ దొర్కు కెరంతి రిసా, కో ‡జోవయించ పాలల్ కేడన తవుల గే, జోవయింకయ్ చెంగిలి.

15 గని గుమ్ముమ్ ఒత్తల్తోచి బయిలె కో అస్తి మెలె, సూనర్లు రిత మాన్సుల్, మెంగ్ర మాన్సుల్, లంజె జతన, అత్య కెర్లన, బొమ్మల్క జొకర్లన, చి అబద్దుమ్క ప్రేమ తా, అబద్దుమ్ కెర్లన ఒండి అస్తి.

16 యేసు, “ ‘అంక నంపజలసచ సంగుమ్లు సూన్తు’ మెన, ఈంజ సాచి తుక దెకయ్తి రిసా యేసు మెలొ ఆవ్ అంచొ దూతక తెద్రవ అస్సి. దావీదు పూర్లుమ్చొ జలో రానొచి సెకుమ్క ఆవ్ చేరు జలోసా, జోచి సెకుమ్తె జెర్మిలోసా, దేముడుచి రాజుమ్చి నొవి దీసిక దొర్కు జలి ఉజిడి దెతో సుక్కొ ఆవ్” మెన సంగిలన్.

నంపజా మెన మాన్సుల్క బుకార్లిసి

17 “తుమ్ జా” మెన దేముడుచి సుద్ది తిలి ఆత్మ అన్నె యేసుచి కీతెర్ని జతిసి సంగితతి. అన్నె, ఈంజ కొడు కొ సూనుల గే, జేవ్ కి జా మెన అన్నె మాన్సుల్క బుకార్లు. అన్నె, కక్క తాన్ తిలె, జో జెవున్, చి కో ఇస్టుమ్ జవుల గే, డబ్బుల్ నే దెతె ఆరి పరలోకుమ్చి జీవ్ దెతో పాని నజ పిత్తు.

18 ఈంజ పుస్తకుమ్చి కబుర్చ కొడొ సూన్త ఎత్తిజిన్క ఆవ్ కిచ్చొ జాగర్ల సంగితసి మెలె, ఈంజేవ్ కొడొతె అన్నె కిచ్చొ వేరచి బెదయ్లె, ఈంజ పుస్తకుమ్తె సంగ దెకయ్ల సిచ్చల్ జో మాన్సు సేడ్డి రితి దేముడు సిచ్చ కెరెదె.

19 అన్నె, ఈంజ జోచి కబుర్చి పుస్తకుమ్చ కొడొతె కో కిచ్చొ కడ గెలె, ఈంజ పుస్తకుమ్తె రెగ్ల దెకయ్లి జో జీవ్ దెతి రూక్చి, చి జోచి పరలోకుమ్చి సుద్దిచి పట్టుమ్తెచి జోచి వాట, ఎత్తి అదికారుమ్ తిలొ దేముడు కడ గెలెదె.

20 “కచితుమ్, ఆవ్ బే బేగి జెయిందె” మెన ఈంజ ఎత్తిక సాచి జతోసా సంగితయ్. *ఆమేన్, జే, ప్రబు యేసు!

21 జోచయ్ జల మాన్సుల్ ఎత్తిజిన్చి ఉప్పిరి ప్రబు జలో యేసుచి దయ తవున్. ఆమేన్.

* 22:2 22:2 యెహెజ్కేలు 47:12. † 22:13 22:13 నెంజిలె “తోలితో మొదొల్ తెంతో ఆకర్ ఎదచొ ఆవ్వి” మెన యేసు సంగిలన్. ‡ 22:14 22:14 నెంజిలె ‘ప్రబుచ కొడొ రితి ఇండితతి గే’. § 22:17 22:17 19:7-8, 21:2. యేసుచి తేర్ని మెలె, నంపజలస మొత్తుమ్ గెతి జోవయించి సుద్ది పట్టుమ్, చి జా పట్టుమ్తె బెదితన, నంపజలసయ్ మొత్తుమ్. యెసయా 49:18, 61:10, యిర్మీయా 2:1-3, ఎవెసు కచి ఉత్తుమ్ 5:31-32. * 22:20 22:20 తెద్దిలి